

MIZO KING JAMES BIBLE

Mizo King James Bible App Dataset

Edited and Published by The Christian Research Centre Publication Inc.
Kanan Veng, Aizawl, Mizoram, India

Generated PDF Edition • July 2026

BIBLE CHHUNG THUTE (TABLE OF CONTENTS)

ZAKARIA
MALAKIA

Page 672
Page 680

UPRANG (OLD TESTAMENT)

GENESIS	Page 4
EXODUS	Page 47
LEVITICUS	Page 82
NUMBERS	Page 106
DEUTERONOMY	Page 140
JOSUA	Page 169
RORELTUTE	Page 189
RUTHI	Page 209
1 SAMUELA	Page 212
2 SAMUELA	Page 238
1 LALTE	Page 260
2 LALTE	Page 286
1 CHRONICLES	Page 310
2 CHRONICLES	Page 334
EZRA	Page 361
NEHEMIA	Page 369
ESTHERI	Page 381
JOBA	Page 387
SAM	Page 411
THUFINGTE	Page 471
THUHRILTU	Page 491
SOLOMONA HLATE	Page 498
ISAIA	Page 502
JEREMIA	Page 543
TAH HLA	Page 586
EZEKIELA	Page 590
DANIELA	Page 629
HOSEA	Page 642
JOELA	Page 648
AMOS	Page 651
OBADIA	Page 656
JONA	Page 657
MIKA	Page 659
NAHUMA	Page 663
HABAKUKA	Page 665
ZEPHANIA	Page 667
HAGGAIA	Page 670

THUTHlung thar (NEW TESTAMENT)

MATTHAIA	Page 683
MARKA	Page 713
LUKA	Page 732
JOHANA	Page 764
TIRHKOHTE	Page 788
ROM	Page 818
1 KORINTH	Page 831
2 KORINTH	Page 844
GALATIA	Page 853
EPHESI	Page 858
PHILIPPI	Page 863
KOLOSA	Page 867
1 THESSALONIKA	Page 870
2 THESSALONIKA	Page 873
1 TIMOTHEA	Page 875
2 TIMOTHEA	Page 879
TITA	Page 882
PHILEMONA	Page 884
HEBRAI	Page 885
JAKOBA	Page 895
1 PETERA	Page 899
2 PETERA	Page 903
1 JOHANA	Page 906
2 JOHANA	Page 910
3 JOHANA	Page 911
JUDA	Page 912
THUPUAN	Page 914

GENESIS

Ziah tu: Mosia • Ziah kum: B.C. 1450-1410

Bible bu hmasa ber Genesis bu hian lei leh vân siam thu te, mihring hmasa ber Adama thuâwih lohna avânga hê khawvêla sual a luh thú te, khawvêl sual tlan tûra Mî Pakhat, Krista, vân aṭanga leia a lo kal tûr thúte a târlang a. Bible hmanga Pathian inpuan chhuahna a ni a, a thurin laimû phawk chhuakin Genesis bû hian zung a thlâk ṭan a, Bible pum a luan chhuak vek a ni. Genesis hian lei leh vân leh engkim inṭan dân a bul aṭangin min kawhmmuh a, Pathian kutchhuak leh thuneihna, A rorêlâ leh enkawlâ hnuai a awm vek a ni tih min hrilh. A hnial kalh lam leh ringhlel zâwnga zirtu (Bible critics) ṭhenkhat chuan Mosia Lehkhabu Panga (Gen-Deut) te hi ziaktu bîk awm lo, thutak leh phuachawp in pawlh, hmasâng Hebrai leh Bible ram vêla thawnthu (myths) hrang hrang lo awm sâ, tlai khawhnûa Juda mithiamten a bu-a an fâwkkhâwm (compiled) nia puhin, documentary hypothesis or JEDP an tih theory an vawrh chhuah chawp chu an ring zâwk a. Mahse chutiang liberal-ho rinthû chu Bible hian hneh taka paih thlâin, a tak ngeia thil thleng leh Mosia zia k ngei a ni tih hêng chângte hian a târlang: Ex. 17:14; 24:4; Num. 33:2; Deut.11:26-32; 31:9, 22; Jos.1:1-8; 8:30-35 etc. Genesis hi hmun ngâa ṭhen theih a ni: (1) Lei leh vân siam thú (1-2); (2) Mihring suala a tlûk thú leh chhandam lehna chungchâng (3-4:7); (3) Mihring lo pun zêl thú leh Tuilêt (4:8-7:24); (4) Babel Insâng (8-11:9); (5) Abrahama aṭanga Josefa thleng (11:10-50:26). Genesis bu hi Bible-a lehkhabu pakhatna a ni a, a chhûngah hian bung 50 a awm a, châng 1,533 a awm.

BUNG 1

THILSIAM CHANCHIN

¹A tîrah Pathianin vân leh lei a siam a.

²Lei chu rîruang nei lovin a ruak vek a; tui thûk tak chung chu a thim mup a. Pathian Thlarau chuan tui chungte chu a uap reng a.

³Pathian chuan, “Êng lo awm rawh se,” a ti a; tichuan êng a lo awm ta a.

⁴Pathianin êng chu a hmû a, ṭha a ti hlê a; Pathian chuan thim leh êng chu a ṭhen hrang ta a.

⁵Pathianin êng chu Chhûn a vuah a, thim chu Zân a vuah a. Tichuan, a ni khat nî-ah chuan tlai lam leh zîng lam a awm a.

⁶Pathian chuan, “Tui leh tui inkârah vân boruak lo awm sela, chû chuan tui leh tuite chu ṭhen hrang rawh se,” a ti a.

⁷Tichuan, Pathianin vân boruak a siam a, vân boruak hnuai tuite leh vân boruak chung a tuite chu a ṭhen hrang a; chutiang chuan a lo awm ta a.

⁸Vân boruak chu Pathianin Vân a vuah a. Tichuan, a ni hnih nî-ah chuan tlai lam leh zîng lam a awm a.

⁹Pathianin, “Vân hnuai tuite chu hmun khatah tling khâwm sela, khawmual chu lo lang rawh se,” a ti a; chutiang chuan a lo

awm ta a.

¹⁰Pathianin khawmual chu Lei a vuah a, tui tling khâwmte chu Tuifinriat tiin a vuah a. Pathianin a en a, ṭha a ti hlê a.

¹¹Tichuan Pathianin, “Leilung hian hnim te, thlai chi nei te, lei aṭanga rah chhuak tûrin anmahnia chi chhuah thei, thei kung tinrêngte tichhuak rawh se,” a ti a; chutiang chuan a lo awm ta a.

¹²Lei chuan hnim te, thlai, anmahnia chi pai ang zêla rah chhuak theiin, thing kûngte pawhin anmahnia chi pai ang zêla rah chhuak theiin a chhuah ta a. Pathianin chû chu a hmuhin ṭha a ti hlê a.

¹³Tichuan, a ni thum nî-ah chuan tlai lam leh zîng lam a awm a.

¹⁴Pathian chuan, “Chhûn leh zân ṭhen hrang tûrin vân boruakah hian êng lo awm rawh se; chûngte chu nî te, kum te, sik leh sâ te leh hunbi chhinchhiaha tûr te ni sela:

¹⁵Chûng êngte chu vân boruak zau aṭanga leilung chhun êngtu atân awm rawh se,” a ti a; chutiang chuan a lo awm ta a.

¹⁶Pathian chuan êng ropui tak pahni a siam a; a êng zâwk chu chhûna rorêltu tûr a ni a, a êng lo zâwk chu zâna rorêltu tûr a ni. Arsîte pawh a siam baw k a.

¹⁷Chûngte chu Pathianin lei chung ên tûrin vân boruak zau takah khian a dah a;

¹⁸Tichuan, êng leh thim chu chhûna rorêltu ni tûr leh zâna rorêltu ni tûrin a ṭhen hrang a. Pathianin a en a, ṭha a ti hlê a.

¹⁹Tichuan, a ni lî nî-ah chuan tlai lam leh zîng lam a awm a.

²⁰Pathianin, “Tuihte chuan nungcha tam tak lo awm sela, lei chung vân boruakahte chuan savâte thlâwk vêl rawh se,” a ti a.

²¹Tichuan, Pathianin tui puia te chuan nghapui lian pui pui te, nungcha che sawn thei tinrêngte chu anmahnia chi awm dân tûr ang zêlin a siam a, sava thla nei tinrêngte pawh anmahnia chi awm dân tûr ang zêlin a siam a. Pathianin a enin ṭha a ti hlê a.

²²Pathianin mal a sâwm a, “Chi tam tak neiin inthlah pung ula, tui puia tuite chu luah khat ula, savâte chu lei chungah hian inthlah pung rawh se,” a ti a.

²³Tichuan, a ni ngâ nî-ah chuan tlai lam leh zîng lam a awm a.

²⁴Pathianin, “Lei hian nungcha tinrêng anmahnia chi awm dân tûr ang zêlin chhuah sela: ran te, bawkvâka kal chí te leh ramsâte chu anmahnia chi awm dân tûr ang zêlin chhuah rawh se,” a ti a; chutiang chuan a lo awm ta a.

²⁵Tichuan, Pathianin leia ramsâte chu anmahnia chi awm dân tûr ang zêlin, rante pawh anmahnia chi awm dân tûr ang zêlin, lei chung a bawkvâka kal chí rêng rêng, anmahnia chi awm dân tûr ang zêlin a siam a. Pathianin a enin ṭha a ti hlê a.

²⁶Pathianin, “Keimahni anpuin mihring i siam ang u, keimahni ang takin; anni chuan tui a sangha chungah te, boruaka sava chungah te, ran rual chungah te, lei chung zawng zawngah leh lei chung a bawkvâka kal chí zawng zawng chungah te thú nei rawh se,” a ti a.

²⁷Tichuan Pathianin ama anpuin mihring a siam a; Pathian anpui ngein a siam a; mipaah leh hmeichhiaah a siam a.

⁸Tlai ni nêmah chuan huan chhûnga LALPA Pathian kal thâwm an hre ta a, Adama leh a nupui chuan LALPA Pathian chu huana thingbuk zîngah chuan an bihrûksan a.

⁹LALPA Pathian chuan Adama chu a ko va, a hnênah, “Khawiah nge i awm?” a ti a.

¹⁰Ani chuan, “Huana i âw ka lo hria a, saruak ka nih avângin ka hlau che a, ka biru ta a ni,” a ti a.

¹¹Ani chuan, “Saruak i ni tih tu nge hrilh che? Thing rah ei loh tûr tia ka khap tlat che kha i ei ta a ni mâw?” a ti a.

¹²Mipa chuan, “Mi awmpui tûra hmeichhia mi pêk khân thing rah chu mi pê a, ka ei ta a ni,” a ti a.

¹³LALPA Pathian chuan hmeichhe hnênah, “Eng thil nge i tih tâk?” a ti a. Hmeichhia chuan, “Rûlin mi bum a, ka ei ta mai a ni,” a ti a.

¹⁴LALPA Pathian chuan rûl hnênah: “Hetiang thil i tih tâk avâng hian, Ran leh ramsâ zawng zawng aiin Ânhhia i dawng nasa bîk ang; Bawkkhupin i kal reng tawh ang a, I dam chhûngin vaivut i ei tawh tûr a ni.

¹⁵Nang leh hmeichhe inkârah leh, I chithlah leh a chithlah inkârah Indona ka thlentîr ang; Ani chuan i lu a vaw keh ang a, Nangin a ke artui i hliamsak ang,” a ti a.

¹⁶Hmeichhe hnênah chuan: “I nau pâina leh i lungngaihna nasa takin ka tipung ang a; Na tuar chungin fa i hring thîn ang; I duh zâwng chu i pasal lam a ni ang a, I chungah thû a nei baw ang,” a ti a.

¹⁷Adama hnênah chuan, “Thing rah, ‘I ei tûr a ni lo’ tia thû ka pêk che pawisa lova i nupui thû i zawm zâwk avângin: “Nangmah avângin lei hi ânhhe dawng a lo ni ta; A rah ei tûrin i dam chhûngin Rim takin i thawk tawh ang.

¹⁸Hlîng leh buarte a rawn chhuahsak ang che a, Lova thlaite chu i ei tawh zâwk ang.

¹⁹I lo chawr chhuahna leia i kîr leh hmâ chu, Hmaia thlan chhuak khawpin ei i zawng tawh ang, Vaivut mai i ni a, Vaivutah baw i kîr leh tûr a ni,” a ti a.

²⁰Adama chuan a nupui chu, mi zawng zawng nu a nih avângin a hmingah Evi a sâ a.

²¹LALPA Pathian chuan Adama leh a nupui tân savun kawr a siamsak a, a hâktîr a.

²²LALPA Pathian chuan, “Ngai teh u, mihring chu a chhia a tha hriain, Keimahni zînga pakhat ang a lo ni ta a. Tûnah zawng a kuta banin, hê nunna thing rah hi a lawha a ei chuan, a nung kumkhua dah ang e,” a ti a.

²³LALPA Pathian chuan amah a lâk chhuahna lei chu let tûrin, Eden huan aţang chuan a tîr chhuak ta a.

²⁴Tichuan, mihring chu a hnawt chhuak a; Eden huan chhak lama nunna thing awmna kawng vêng tûrin cherubte leh mei khandaiah vir tawn reng chu a dah ta a.

BUNG 4

KAINAN ABELA A THAT

¹Adama chuan a nupui Evi chu a pâwl a, tichuan nau a pâi a, Kaina a hring a, “LALPA hnên aţangin mipa ka nei ta,” a ti a.

²A nau Abela a hring leh a. Abela chu beram vêngtu a ni a, Kaina erawh chu leilettu a ni thung a.

³Chutianga hun te a kal zêl lai chuan Kaina chuan a thlai tharte chu LALPA hnêna hlân tûrin a rawn lâ a.

⁴Abela pawhin a berâm rual zînga piang hmasa leh a thau te chu a rawn la vê a. LALPA chuan Abela leh a thilhlân chu a lo pawmsak a;

⁵mahse Kaina leh a thilhlân chu a pawmsak lo va. Kaina chu a thinur ta êm êm a, a hmêl a lo dur ta khup mai a.

⁶Tichuan, LALPA chuan Kaina hnênah, “Engati nge i thinur? Engati nge i hmêl a dur khup mai le?

⁷Tiţha ni la, pawmsak i ni vê dâwn lo vem ni? I tihţhat loh erawh chuan, sual* chu kawngkâ bulah a bawk reng asin. Nangmah thunun che a tum reng a, mahse nangma’n i thunun zâwk tûr a ni,” a ti a.

⁸Kaina chuan a unaupa Abela chu a bia a; chutia lova an awm lai chuan, Kaina chuan a nau Abela chu a bei vak a, a that ta a.

⁹LALPA chuan Kaina hnênah, “Khawiah nge i nau Abela?” a ti a. Ani chuan, “Ka hre hauh lo mai. Ka nau vêngtu ka ni em ni?” a ti a.

¹⁰Ani chuan, “Eng thil nge i tih tâk? I unaupa thisen âw chuan lei aţangin mi rawn au asin.

¹¹Tûn aţang chuan i kut aţanga i unaupa thisen dawng tûra a kâ lo ângtu leilung lakah hian ânhhe dawng i ni ta.

¹²Lei pawh let la, a hlâwkna chu a pe phal tawh lo vang che. Leiah hian tlân bo leh vâkvai mai i ni tawh ang,” a ti a.

¹³Kaina chuan LALPA hnênah, “Mi hremna hi a na êm a, tuar zawh rual a ni lo ve!

¹⁴Vawiinah hian hê lei chung aţangin mi hnawt chhuak ta si a; i mithmuh loh tûra thuhrûk ka niha, hê leiah hian tlân bo leh vâkvai mai ka nih si chuan mi hmû apiangin mi that mai dâwn asin,” a ti a.

¹⁵LALPA chuan a hnênah, “Chuti a nih chuan, Kaina that apiang chungah a lêt sarihin phubâ lâk a ni ang,” a ti ta a. Tichuan, miten an hmuha an thah mai loh nân LALPA chuan Kaina chu a chhinchhiah ta a.

KAINA CHHÛNGKUA

¹⁶Tichuan, Kaina chu LALPA awmna aţang chuan a kal chhuak a, Eden chhak lama Nod ramah chuan a han awm ta a.

¹⁷Kaina chuan a nupui a pâwl a, tichuan, nau a pâi a, Enoka a hring a. Khua a đin a, chû khua chu a fapa hming châwiin Enok a ti a.

¹⁸Enoka chuan Irada a hring a; Iradan Mehujaela a hring a, Mehujaelan Methusela a hring a, Methuselan Lameka a hring a.

¹⁹Lameka chuan nupui pahni a nei a: pakhat zâwk hming chu Adaii a ni a, a pahniha hming chu Zillaii a ni.

²⁰Adaii chuan Jabala a hring a. Ani chu puan ina chêng, ranrua enkawltuho thlahtu a ni.

²¹A nau hming chu Jubala a ni a. Ani chu tîngtang leh phênglâwng tumtuho thlahtu a ni a.

²²Zillaii pawhin dâr leh thîra hmanraw tinrêng chhertu Tubal-Kaina a hring vê a. Tubal-Kaina farnu chu Naamai a ni.

²³Lameka chuan a nupuite hnênah: “Adaii leh Zillaii te û, ka âw hi ngaithla ula; Lameka nupuite u, ka thû hi lo ngaithla teh u! Mi hliamtu chu ka that a, Mi tinatu tlangvâl pawh ka that bawh a.

²⁴Kaina phubâ mah a leh sariha lâk tûr a nih chuan Lameka phubâ chu a leh sawmsarih pasariha lâk a ni ang,” a ti a.

FAPA THAR

²⁵Adama chuan a nupui a pâwl leh a, fapa a hring a, a hmingah Setha a sâ a. “Kainan a tihlum tâk Abela aiah Pathianin chi thlah dang mi ruatsak ta si a,” a ti a ni.

²⁶Setha pawhin fapa a nei vê a; a hmingah Enosa a sâ a. Chúng lai chuan miten LALPA chu a hmingin an ko tan ta a.

BUNG 5

ADAMA CHHÛNGKUA

¹Hei hi Adama thlahte chanchin chu a ni. Pathianin mihring a siam ni khân, Pathianin ama anpuin a siam a.

²Mipaah leh hmeichhiaah a siam a, mal a sâwm a, a siam nî khân ‘Mihring’ tiin a vuah a.

³Adama chuan kum zâ leh sawmthuma upa a nihin, ama anpu fapa a hring a, amah ang tak a ni a, a hmingah Setha a sâ a.

⁴Setha a hrin hnûin Adama chu kum zariat a la dam a; fanu leh fapate a nei leh hlawn a.

⁵Tichuan, Adama dam chhûng zawng chu kum zakua leh sawmthum a ni a; a thi ta a.

⁶Setha chuan kum zâ leh pangâ upa a nihin Enosa a hring a.

⁷Enosa a hrin hnûin, Setha chu kum zariat leh pasarih a la dam a, fanu leh fapate a nei leh hlawn a.

⁸Tichuan, Setha dam chhûng chu kum zakua leh sâwm pahni a ni a; a thi ta a.

⁹Enosa chuan kum sawmkuaa upa a nihin Kainana a hring a.

¹⁰Kainana a hrin hnûin Enosa chu kum zariat leh sâwm pangâ a la dam a, fanu leh fapate a nei leh hlawn a.

¹¹Tichuan, Enosa dam chhûng zawng chu kum zakua leh pangâ a ni a; a thi ta a.

¹²Kainana chuan kum sawmsariha upa a nihin Mahalalela a hring a.

¹³Mahalalela a hrin hnûin, Kainana chu kum zariat leh sawmli a la dam a, fanu leh fapate a nei leh hlawn a.

¹⁴Tichuan, Kainana dam chhûng zawng chu kum zakua leh sâwm a ni a; a thi ta a.

¹⁵Mahalalela chuan kum sawmruk pangâ upa a nihin Jareda a hring a.

¹⁶Jareda a hrin hnûin Mahalalela chu kum zariat leh sawmthum a la dam a, fanu leh fapate a nei leh hlawn a.

¹⁷Tichuan, Mahalalela dam chhûng zawng chu kum zariat leh sawmkua pangâ a ni a; a thi ta a.

¹⁸Jareda chuan kum zâ leh sawmruk pahniha upa a nihin Enoa a hring a.

¹⁹Enoa a hrin hnûin Jareda chu kum zariat a la dam a, fanu leh fapate a nei leh hlawn a.

²⁰Tichuan, Jareda dam chhûng zawng chu kum zakua leh sawmruk pahni a ni a; a thi ta a.

²¹Enoa chuan kum sawmruk pangâ upa a nihin Methusela a hring a.

²²Methusela a hrin hnûin Enoa chu kum zathum chhûng zawng Pathian nên an lêng dîn thîn a, fanu leh fapate a nei leh hlawn a.

²³Enoa dam chhûng zawng chu kum zathum leh sawmruk pangâ a ni.

²⁴Enoa chu Pathian nên an lêng dîn thîn a; tin, Pathianin a la bo ta a, a awm ta lo va.

²⁵Methusela chuan kum za leh sawmriat pasariha upa a nihin Lameka a hring a.

²⁶Lameka a hrin hnûin, Methusela chu kum zasarih leh sawmriat pahni a la dam a, fanu leh fapate a nei leh hlawn a.

²⁷Tichuan, Methusela dam chhûng zawng chu kum zakua leh sawmruk pakua a ni a; a thi ta a.

²⁸Lameka chuan kum za leh sawmriat pahniha upa a nihin fapa a nei a.

²⁹A fapa hmingah Nova a sa a, “Hê mi hi chuan LALPA ânhhe lawhna leia kan hna thawh leh kuta kan thawhrimna lakah min chhâwk tawh ang,” a ti a ni.

³⁰Nova a hrin hnûin, Lameka chu kum zangâ leh sawmkua pangâ a la dam a, fanu leh fapate a nei leh hlawn a.

³¹Tichuan, Lameka dam chhûng zawng chu kum zasarih leh sawmsarih pasarih a ni a; a thi ta a.

³²Nova chu kum zanga mi a ni a; Nova chuan Sema te, Hama te, Japheta te a hring a.

BUNG 6

MIHRING SUALNA LEH RORÊLNA

¹Chûng hun laia, lei chung a mi hring an lo inthlah pun tan lai khân, hmeichhiate pawh an piang vê hlawn a;

²tichuan, Pathian fapate chuan mihring fanute chu an hmuhin hmêltha an ti a; an duh zâwng apiang chu nupui atân an nei ta mai a.

³LALPA chuan, “Ka Thlarau hian mihring hi a chai kumkhua lo vang, anni chu tisâ mai an ni si a; nimahsela, an dam chhûng chu kum zâ leh sawmnhni a ni ang,” a ti a.

⁴Chûng hun lai leh, a hnû thleng pawhin, Pathian fapaten mihring fanute an rawn neiha, an laka fa an hrin lai khân leiah hian milian* pui pui an lo awm thîn a. Chûng mite chu hmâsânga mi chakho, mi hmingthangte kha an ni.

⁵LALPA chuan lei chung a mihringte suahsualzia chu a hmû reng a, thinlunga an ngaihtuah leh an tum dân chuan sual lam hlîr a âwn reng mai tih a hria a.

⁶LALPA chuan leilunga mihring a lo siam ta chu pawî a ti a, a thinlung chu a na ngawih ngawih a.

⁷Tichuan, LALPA chuan, “Ka mihring siamte hi lei chung ata ka tiboral vek mai teh ang; mihring te, ramsâ te, bawkvâka kal chî te, chunglêng savâte chen hian, ka lo siam ta hi pawî ka ti a ni,” a ti a.

⁸Nova erawh chuan LALPA khawngaih mi nih a hlawh a.

NOVAN PATHIAN A TILÂWM

⁹Hei hi Nova thlahte chanchin chu a ni. Nova chu mi dik a ni a, a hun laia mite zîngah dem a kai vê lo. Nova chu Pathian nêan an lêng dân thîn a.

¹⁰Nova chuan fapa pathum: Sema te, Hama te, Japheta te a nei a.

¹¹Lei chu Pathian mithmuhah a khawlo zo va, lei chu inpâwngnêknain a lo khat ta a.

¹²Tichuan, Pathianin lei chu a en a, a chhe let dêr a; leiah hian tîsâ zawng zawng an inti khawlo zo ta vek si a.

LAWNG TUK A NI

¹³Pathianin Nova hnênah, “Tîsâ zawng zawng tâwpna chu ka hmâah hian a lo thleng ta a, anmahni vângin lei hi inpâwngnêknain a khat zo ta; ngai teh, a lei chawp hian ka tiboral dân a ni.

¹⁴“Gofar* thingin lawng tuk ang che; lawngah chuan pindante siam la, a bang chhûng lam leh pâwn lam chu chârnaîn zût phui tlat ang che.

¹⁵Hetiàng hian i siam tûr a ni: lawng dung lam chu tawng zathuma sei, a vâng lam chu tawng sawmngâa zau, a sân lam chu tawng sawmthum a ni tûr a ni.

¹⁶Lawngah chuan tukverh siam la, a chung lam aţangin tawng khata zauvin i zo tûr a ni; a pangah lawng kawngka siam la. Lawng chu a chhâwng hnuaihnhung leh, a chhâwng hnihna leh chhâwng thumna neiin siam la.

¹⁷Ngai teh, vân hnuai a awm tîsâ zawng zawng, nunna thâw pai rêng rêng tiboral tûrin keimah ngeiin lei chungah tui ka tipûn ang a; tichuan, lei chungah thil zawng zawng an thi vek ang.

¹⁸Amaherawhchu, i hnênah thû ka thlung ang; nang chu lawng chhûngah i lût ang a; nang leh i fapate leh i nupui leh i mote chu i hnênah an lût tûr a ni.

¹⁹Taksa nei nungcha tinrêng aţangin, pahnih zêlin i hnênah him taka an awm vê theih nân lawngah i rawn hruai tûr a ni a; a nu leh a pa an ni zêl baw tûr a ni.

²⁰Savâte pawh anmahni chi awm dân zêlin, rante pawh anmahni chi awm dân zêlin, leia bawkvâk chi tinrêngte pawh anmahni chi awm dân zêlin, chi tin aţanga tuak khat zêl i humhim

atân an lo kal tûr a ni.

²¹Nangma tân ei tûr chaw tinrêng la khâwmin, i tân chhêk khâw ang che; tichuan, in tân leh anniho tâna ei tûr a ni ang,” a ti a.

²²Chutiàng tak chuan Nova chuan a ti a; Pathianin thû a pêk ang zêlin a ti a.

BUNG 7

TUILÊT NASA CHU

¹LALPA chuan Nova hnênah, “Nang leh i chhûngte chu lawngah chuan lo lût rawh u le, tûnlai mite zîngah nang hi ka mithmuhah mi dik tak i ni si a.

²Sa thiàng zîng aţangin a nu leh a pa tuak sarîh zêl i hnênah i hruai baw tûr a ni a; sa thiàng lo erawh chu, a nu leh a pa tuak hnih zêl ni rawh se;

³chunglêng savâte pawh a nu leh a pa tuak sarîh zêl hê lei chungah an chî a mang loh nân i hruai vek tûr a ni.

⁴Tûn aţanga ni sarîh hnûah lei chungah hian ni sawmlî leh zan sawmlî ruah ka sûtîr ang a, nungcha ka siamho zawng zawng hi lei chung aţangin ka tiboral vek teh ang,” a ti a.

⁵Nova chuan LALPA thupêk ang zêlin a ti a.

⁶Lei chungah tui a lêt lai khân Nova chu kum zaruka upa a ni a.

⁷Tui chu a lo lêt ta a, Nova chu a fapate nêan, a nupui leh a fapa nupuite nêan lawngah chuan an lût ta a.

⁸Sa thiàng te, sa thiàng lo te, savâte, lei chungah rannung bawkvâk chi tinrêngte nêan,

⁹Pathianin Nova hnêna thû a pêk angin, a nu leh a pa, a tuak zêlin, Nova hnênah lawngah chuan an lût vek a.

¹⁰Ni sarîh a lo ral hnû chuan lei chungah tui a lo lian ta pûng a.

¹¹Nova chu kum zaruk a nih kum, thla hnihna, ni sâwm leh pasarihna nî chuan tuithûkpui hnâr zawng zawngte chu a sah ta hum hum a, vân tukverhte pawh a rawn insah hawng baw a.

¹²Leiah chuan ni sawmlî leh zan sawmlî ruahpuivânâwn a sîr tluk tluk a.

¹³Chumi nî tak chu Nova leh Nova fapa Sema te, Hama te, Japheta te, Nova nupui leh an mo pathumte nêan lawnga an luh ni a ni a—

¹⁴anmahni bâkah, ramsa tinrêng anmahni chi awm dân zêlin, sâ zawng zawng pawh anmahni chi awm dân zêlin, lei chungah bawkvâk chi rêng rêng anmahni chi awm dân zêlin, sava tinrêng anmahni chi awm dân zêlin, sava chi tinrênga mite nêan an lût a.

¹⁵Tichuan, tîsâ zawng zawng, nunna thâw pai rêng rêng chu a tuak zêlin Nova hnênah lawngah chuan an lût vek a.

¹⁶Pathianin thû a pêk ang zêlin, tîsâ zawng zawnga a nu leh a pa chu an lût zo ta a; LALPA chuan kawng chu a khâr ta a.

¹⁷Ni sawmlî chhûngin lei chungah chuan tui chu a lêt ta a. Tuiin a chîmsân ang zêlin lawng chu a invawrh sâng a, lei chung daiha sângah a lo awm ta a.

¹⁸Lei chungah chuan tuite chu nasa takin a lo pûn vak a, tui chuan a chîm sâng tual tual a, tui chungah chuan lawng chu a lêng zêl a.

¹⁹Tuite chuan lei chu a chîm pîl zo vek a, vân hnuaia tâng sâng zawng zawngte pawh a chîm pîl vek a.

²⁰Tuite chuan tâng sâng berte chu tawng sâwm leh panga zeta sângin a chim pîl daih a.

²¹Lei chungah tîsa vâk vêl chî zawng zawng chu an thi vek a: savâte, rante, ramsâte leh lei chungah bawkvâk chi tinrêngte bâkah mihring zawng zawng pawh an thi vek a.

²²Khawmuala chêng chî, an hnâra nunna thlarau thâw hmanga thaw thei zawng zawng pawh an thi fai vek a.

²³Tichuan, lei chungah nungchâ zawng zawng-mihringte, rante, bawkvâk chîte, chunglêng savâte chu a tihlum vek a. Lei aţang chuan tihboral an ni zo ta a. Nova leh a hnêna awm lawng chhûnga mite chauh chu nungdamîn an awm ta a.

²⁴Ni zâ leh sawmnga chhûng zawng chu tuite chuan lei chung chu a chîm pûng mai a.

BUNG 8

NOVA CHHANCHHUAH A NIH DÂN

¹Pathianin Nova leh lawng chhûnga nungcha tinrêng te, rannung zawng zawngte chu a hre reng a. Pathianin lei chungah thî a tlehtîr a, tui chu a lo kâm ta a.

²Tuithûkpui hnâte leh vân tukverhte chu a lo inkhâr a, vân aţanga ruah sîr bur bur pawh a lo hân ta a.

³Tuite chu lei chung aţang chuan a lo kâm zêl a. Ni zâ leh sawmngâ a lo ral hnû chuan tuite chu a lo kâm ta hlê a.

⁴Thla sarihna, ni sâwm pasarih niîn Ararat tâng chungah lawng chu a inngat ta a.

⁵Tui chu thla sâwmna thlengin a kâm zêl a. A thla sâwmna, a ni khatna nî-ah chuan tâng chhîpte chu a lo lang ta a.

⁶Chutiang zêla ni sawmli a lo ral leh hnû chuan Nova chuan ama siam lawng tukverh chu a hawng ta a.

⁷Choâk pakhat a thlawh chhuahtîr a, lei chungah tui a kâm fel hmâ chuan a thlâwk kual a thlâwk kual a.

⁸Lei chung ata chu tui a kang zo tawh emaw tia en tûrin thûro a thlawh chhuahtîr leh a.

⁹Nimahsela, lei pum chu tuîn a la chîm vek avângin thûro chuan fûkna tûr a hmu zo lo va, a hnênah, lawngah chuan a lo kîr leh a. A kut chu a va ban chhuak a, a man a, lawng chhûngah chuan a hnênah a la lût leh ta a.

¹⁰Ni sarîh dang a ngâk leh a, lawng aţang chuan thûro chu a thlawh chhuahtîr leh a.

¹¹Tlai lamah chuan thûro chu a lo kîr leh a, ngai teh, a hmûiah chuan olive thing hnah thliah thar arawn pû a; tichuan Nova chuan leiah tui a kâm ta tih a hre ta a.

¹²Tichuan, ni sarîh dang a ngâk leh a, thûro bawk chu a tîr chhuak leh a, a hnênah chuan a lo kîr ta lo va.

¹³A kum zaruk leh pakhatna, thla khatna, a ni khatna nî chuan lei aţangin tuite chu a kâm zo ta a; Nova chuan lawng khuhna chu a han hlîp a, ngai teh, leilung chu a lo hîl ta duak a.

¹⁴A thla hnihna, ni sawmnhîh pasarih ni chuan leilung chu a ro zo ta a.

¹⁵Pathian chuan Nova hnênah,

¹⁶“Nang leh i nupui te, i fapate leh an nupuite nêl lawng kha chhuahsan tawh rawh u.

¹⁷Tisa pû nungchâ zawng zawng: sava te, ran te, lei chungah bawkvâk chi tinrêngte chu chhuahpui vek ula, lei chungah hian tam tak an lo awm theih nân, chi tam tak neiin lo inthlah pung thûr thûr rawh se,” a ti a.

¹⁸Tichuan Nova chu a fapate, a nupui leh a hnêna chêng a mote nêl an kal chhuak ta a.

¹⁹Rannung tinrêng te, bawkvâk chi tinrêng te, sava chi tinrêng te, lei chungah tîng chî chi tinrêng te chu a chî chîin an kal chhuak ta a.

THIL SIAM CHUNGA PATHIAN THUTHLUNG

²⁰Chumi hnûah Nova chuan LALPA tân maichâm a siam a, sa thiang leh sava thiang chî tina mi lân, maichâmah chuan hâlral thihlan a hlân a.

²¹LALPA chuan thil rimtui chu a lo hria a. LALPA chuan a rilrûin, “Mihring thîlungin a suangtuahte hi a tleirâwl lai aţang rênga sual ni mah se, mihring avângin lei hi ânchhia ka lawh tawh ngai lo vang a; ka thil siam nungcha tinrêng te pawh ka tiboral tawh hek lo vang.

²²“Lei hi a awm chhûng chuan Buh tuh hun leh buh seng hun te, Khaw vâwt leh khaw lum te, Thlasik leh nipui te, Chhûn leh zân te A tâwp lo vang,” a ti a.

BUNG 9

¹Pathianin Nova leh a fapate chu mal a sâwm a, an hnênah: “Chî tam tak neiin lo inthlah pung ula, leilung hi luah khat rawh u.

²Leia ramsa tinrêng te, chunglêng sava tinrêng te, lei chungah vâk sawn thei zawng zawngte leh, tui puia sanghâ zawng zawngten nangmahni hlauhna leh tîhna an nei vek tawh ang. In kutah pêk an ni tawh e.

³Thil nung che sawn thei tinrêngte chu in tân chaw a ni ang. Thlai hring thlengin, engkim ka pe a che u.

⁴Amaherawhchu, sa rêng rêng chu a nunna thisen chawpa ei loh tûr a ni.

⁵In nunna thisen chhuahtu phubâ chu ka la ngei ang; sa tinrêng lakah phût ka nei ang a, mihring lakah pawh ka phût ang. Mi tin hnên ata an unau thisen mawh chu ka phût ang.

⁶“Mihring thisen chhuahtu chu Mihring vêkin chû mi thisen chu a chhuah vê ang; Pathianin ama anpuin mihring a siam si a.

⁷Nangni erawh chu, nasa taka chî thlah pungin Leiah hian fa tam tak hring ula Lo inthlah pung zêl rawh u,” a ti a.

⁸Pathianin Nova leh a fate hnênah chuan thû a sawi a:

⁹“Ngai teh u, Keimah ngeiin nangni leh in hnûa in thlah lo la awm tûrte hnênah pawh thuthlung ka siam ta,

¹⁰in hnêna awm thil nung tinrêng te, savâ te, ranruah te, ramsa tinrêng in hnêna awm te, lawng ațanga chhuak-ho lei chung a ramsa awm zawng zawngte nê.

¹¹Tichuan, nangni nê thuthlung ka siam tâk hi: Tûn chinah tîsâ zawng zawng nunna chu tuilêtin ka tihlum tawh ngai lo vang; leilung tichhe tûrin tui a lo lêt leh tawh hek lo vang,” a ti a.

¹²Pathian chuan, “Hei hi kei leh nangmahni leh, in hnêna awm nungcha tinrêngte nêna kan inkâra kumkhaw thuthlung chhinchhiahna tûra ka siam chu a nih hi:

¹³Chhûmah chuan ka chhimbâl ka zâmîr a, keimah leh leilung inkâra thuthlung chhinchhiahna a ni ang.

¹⁴Lei chung a chhûm ka zâmîr hunah chhûmah chuan chhimbâl chu a lo lang thîn ang;

¹⁵Kei leh nangmahni leh tîsâ nei nungcha tinrêngte nê kan inkâra ka thuthlung chu ka hre reng thîn ang a; tîsâ zawng zawng tiboral tûrin tui a lêt leh tawh ngai lo vang.

¹⁶Chhimbâl chu chhûmah a awm ang a, Pathian leh lei chung a tîsâ nei nungcha tinrêngte inkâra kumkhaw thuthlung a ni tih hre rengin ka en thîn ang,” a ti a.

¹⁷Pathianin Nova hnênah, “Hei hi kei leh lei chung a tîsâ zawng zawngte nêna kan inkâra thuthlung ka tihngheh tâk chhinchhiahna a nih hi,” a ti a.

NOVA LEH A FATE

¹⁸Lawng ațanga chhuak Nova fapate chu Sema te, Hama te, Japheta te an ni. Hama chu Kanaana pa a ni a.

¹⁹Chûngte chu Nova fapa pathumte an ni a, chûngho thlahte chuan lei pum pui hi an luah ta a ni.

²⁰Nova chuan thlawhhma lâ-in bul a țan a, grêp huan a siam a.

²¹Uain chu a in a, a rûi a, a puan inah chuan a mu suah ta a.

²²Kanaana pa Hama chuan a pa mu suah chu a va hmû a, pâwna awm a unaute pahni chu a va hrilh a.

²³Sema leh Japheta te erawh chuan puan an lâ a, an kokiâh an zâwn a, hnungtawh zâwng kalin an pa saruakna chu an va khuhsak a. Lehlam an hawi daih avângin an pa saruakna chu an hmu lo.

²⁴Tichuan, Nova uain rûi chu a lo harh a, a fapa naupang zâwkin a chung a tih dân chu a lo hre ta a.

²⁵Tihian a ti a: “Kanaana chuan ânchhia dawng sela, A unaute chhiahhlawhte Chhiahhlawhah țang rawh se,” tiin.

²⁶“Sema Pathian LALPA chu malsâwmin awm sela, Kanaana chu a chhiahhlawh lo ni rawh se.

²⁷Pathianin Japheta chu tilian sela, Sema puan inah te chêng sela; Kanaana chu a chhiahhlawh lo ni rawh se,” a ti a.

²⁸Nova chu tuilêt hnûah kum zathum leh sawmngâ a la dam a.

²⁹Tichuan, Nova dam chhûng nîte chu kum zakua leh sawmngâ a ni a; a thi ta a.

BUNG 10

NOVA THLAH HNAME

¹Hei hi Nova thlahte, Sema te, Hama te, Japheta te chanchin a ni. Tuilêt hnûah anni ațang hian fapate pawh an lo piang leh hlawn a.

²Japheta fapate chu Gomera te, Magoga te, Madaia te, Javana te, Tubala te, Meseka te leh Tirasa te an ni.

³Gomera fapate chu Askenaza te, Riphata te leh Togarmaha te an ni a.

⁴Javana fapate chu Elisaha te, Tarsisa te, Kittima te leh Dodanima te an ni.

⁵Hêng ațang hian tuipui kama chêng Jentail hnamte chu anmahni ram theuhah, anmahni țawng hman leh, an chi leh an hnam zia ang zêlin an pêm darh ta a.

⁶Hama fapate chu Kusa te, Mizraima te, Puta te leh Kanaana te an ni.

⁷Kusa fapate chu Seba te, Havila te, Sabta te, Raama te, Sabteka te an ni a; Raama fapate chu Seba leh Dedana te an ni.

⁸Kusa chuan Nimroda a hring a; ani chu lei chung a mi chak a lo ni țan ta a.

⁹LALPA hmâah sa pêl mî michak tak a ni a; chuvângin, “LALPA hmâa sa pêl mi chak Nimroda ang mai,” an ti thîn a ni.

¹⁰Lalram a neih țanna chu Sinar rama Babel te, Erek te, Akkad te leh Kalne te a ni.

¹¹Chû ram ațang chuan Assuria ramah a kal zêl a, Ninevi te, Rehobot Ir te, Kalah te,

¹²Ninevi leh Kalah inkâra awm (an khawpui ber) Resen khua te a din a.

¹³Mizraima thlah ațangin Lud-hote, Anam-hote, Lehab-hote, Naptu hote,

¹⁴Pathrus-ho leh Kasluh-ho (Philistia leh Kaptor-ho thlahtu) te an lo chhuak a.

¹⁵Kanaana chuan a fa hmâsa Sidona leh Hetha a hring a;

¹⁶Jebus-hote, Amor-hote leh Girgas-hote;

¹⁷Hiv-hote, Arka-hote leh Sin-hote;

¹⁸Arvad-hote, Zemar-hote leh Hamat-hote thlahtu a ni baw. Chu mi hnu chuan Kanaan hnamte chu an pêm darh ta a.

¹⁹Kanaan-ho ramri chu, Sidon ațangin Gerar lamah, Gaza thleng a ni a; Sodom lama kal chhohin Gomorra te, Adma leh Zeboiim lam pan zêlin, Lasa khaw thleng a ni.

²⁰Hêngte hi Hama fapate chu an ni a, anmahni chi chiin, anmahni țawng hmangin, anmahni ram leh anmahni hnam zîngah an awm a.

²¹Sema, Japheta û pawhin thlah a nei a, Ebera thlahte zawng zawng pa a ni.

²²Sema fapate chu Elama te, Assura te, Arpaksada te, Luda te Arama te an ni.

²³Arama fapate chu Uz-a te, Hula te, Gethera te, Masa te an ni.

²⁴Arpaksada chuan Sala a hring a, Salan Ebera a hring a.

²⁵Ebera chuan fapa pahni a nei a: pakhat zâwka hming chu Pelega a ni, ani hun lai khân lei hi then darh a ni a; a unaupa hming chu Joktana a ni.

²⁶Joktana chuan Almodada te, Selepa te, Hazarmavetha te, Jera te,

²⁷Hadorama te, Uzala te, Dikla te,

²⁸Obala te, Abimaela te, Seba te,

²⁹Ophira te, Havila te, Jobaba te a hring a.

³⁰An chênna hmun chu Mesa ațanga Sephar lama kalin, chhak lama tlâng thlengin a ni.

³¹Hêngte hi Sema thlahte chu an ni a, anmahni chi chîin, anmahni ƣawng hmangin, anmahni ram leh anmahni hnam zîngah an awm a.

³²Chûnghote chu Nova thlah hnamte an ni a, an inthlah chhâwn dân zêlin, hnam anga an inhlâwm hnan dânin; tuilêt hnûah chuan chûngho ațang chuan lei chungah hian an lo darh ta vek a ni.

BUNG 11

BABEL INSÂNG

¹Lei pum puia mite chuan ƣawng chi khat leh sawi dân thuhmun vek an la hmang a.

²Chutianga khawchhak lam an pan zêl lai chuan Sinar phaizâwl an thleng a, chutah chuan an chêng ta a.

³Anmahniho zîngah chuan, “Hawh u, leirawhchan siam ila, uluk takin i rawh ang u,” an ti hlawm a. Tichuan, lung aiah leirawhchan, a châr nân alkatra an hmang a,

⁴Tihian an ti a, “Hawh u, khawpui leh in sâng tak dân ila, a chhîpin vânte han tawng hial sela; hmingthang thamin kan inchher dân nia; chuti lo zawng, lei pum puiah hian tihdarhin kan awm vek mai tûr asin,” an ti a.

⁵Nimahsela, mihring faten khawpui an dân leh insâng an sak chu en tûrin LALPA chu a lo chhuk a.

⁶LALPA chuan, “Mihringte hi pum khat an ni a, ƣawng pakhat an hmang baw a, hetiang hi an thiltih ƣan dân a ni ta si a; tûnah zawng an thiltih tum dân hi tû mâ dân rual a nih tâk loh hi.

⁷Hawh u, i zuk kal ang u khai, ƣawng an inhriat tawn theih loh nân, an ƣawng khu i zuk tihhransak ang u,” a ti a.

⁸Tichuan, LALPA chuan anni chu khawvêl hmun tinah a tidarh ta vek a, khawpui an dân lai chu an bânsan ta a.

⁹Chuvângin, chu lai hmun chu Babel an ti ta a, LALPAN lei chung zawng zawngah an ƣawngte a tihhransak tâk vâng a ni a; chû hmun ațang chuan lei chung zawng zawngah a hnawt darh ta vek a ni.

SEMA THLAHTE

¹⁰Hei hi Sema thlahte chanchin a ni: tuilêt hnû kum hnihnaah chuan Sema chu kum zâa upa a ni a, Arpaksada a hring a.

¹¹Arpaksada a neih hnuah Sema chu kum zangâ a la dam a, fanu leh fapate a nei leh hlawm a.

¹²Arpaksada chuan kum sawmthum leh pangâa upa a nihin Sela a hring a.

¹³Sela a hrin hnûin Arpaksada chu kum zali leh pathum a la dam a, fanu leh fapate a nei leh hlawm a.

¹⁴Sela chuan kum sawmthuma upa a nihin Ebera a hring a.

¹⁵Ebera a hrin hnûin Sela chu kum zali leh kum thum a la dam a, fanu leh fapate a nei leh hlawm a.

¹⁶Ebera chuan kum sawmthum leh palia upa a nihin Pelega a hring a.

¹⁷Pelega a hrin hnûin Ebera chu kum zalî leh sawmthum a la dam a, fanu leh fapate a nei leh hlawm a.

¹⁸Pelega chuan kum sawmthuma upa a nihin Reuva a hring a.

¹⁹Reuva a hrin hnûin Pelega chu kum zahni leh pakua a la dam a, fanu leh fapate a nei leh hlawm a.

²⁰Reuva chuan kum sawmthum leh pahni a upa a nihin Seruga a hring a.

²¹Seruga a hrin hnûin Reuva chu kum zahni leh pasarih a la dam a, fanu leh fapate a nei leh hlawm a.

²²Seruga chuan kum sawmthuma upa a nihin Nahora a hring a.

²³Nahora a hrin hnuin Seruga chu kum zahni a la dam a, fanu leh fapate a nei leh hlawm a.

²⁴Nahora chuan kum sawmhni leh pakuaa upa a nihin Tera a hring a.

²⁵Tera a hrin hnûin Nahora chu kum zâ leh sâwm pakua a la dam a, fanu leh fapate a nei leh hlawm a.

²⁶Tera chu kum sawmsariha upa a ni a, Abrama te, Nahora te, Harana te a hring a.

TERA THLAHTE

²⁷Hei hi Tera thlahte chanchin a ni: Tera chuan Abrama te, Nahora te, Harana te a hring a. Haranan Lota a hring a.

²⁸Harana chu a pa Tera thih hmân a pianna ram, Kaldai rama Ur khuaah a thi a.

²⁹Abrama leh Nahora te chuan nupui an nei a: Abrama nupui hming chu Sarai a ni a, Nahora nupui hming chu Milkai a ni. Harana chu Milkai leh Iskai te pa a ni.

³⁰Sarai chu a ching a; fa a nei lo va.

³¹Tera chuan a fapa Abrama leh a tupa Lota, Harana fapa te, a monu Sarai, a fapa Abrama nupui te a hruai a, Kaldai rama Ur khua chhuahsanin, Kanaan ram an pan a; Haran khua an lo thlen chuan awmhmun an bêngbel ta a.

³²Tichuan, Tera dam chhûng chu kum zahni leh pangâ a ni a, Tera chu Haran khuaah chuan a thi ta a.

BUNG 12

ABRAMA HNÊNA THUTIAM

¹LALPA chuan Abrama hnênah: “I chênna ram leh i chhûngkua leh, I pa in ațang hian chhuak la, Ram ka la entîr tûr che lamah chuan kal rawh.

²Hnam ropui takah ka siam ang che a, Mal ka sâwm bawh ang che, Hming ropui tak ka siamsak ang che a; Nang chu malsâwmna i lo ni ang.

³Malsâwmtu che chu mal ka sâwm ang a, Ânhhe lawhtu che chu ânhhia ka lawh vê ang; Nangmahah hian leia hnam tinte hi malsâwm an ni ang,” a ti a.

⁴Tichuan, Abrama chu LALPA thù ang chuan a kal chhuak ta a, Lota pawh a hnênah a kal vê a. Haran khua a chhuahsan lai chuan Abrama chu kum sawmsarih leh pangâa upa a ni.

⁵Abrama chuan a nupui Saraii leh a nau fapa Lota te a hruai a, an sum leh pai deh chhuah zawng zawngte leh, Haran khuaa thuihruai an neih hote nên Kanaan ram chu an pan a. Tichuan, Kanaan ram chu an thleng ta a.

⁶Abrama chu a kal zêl a, Sekem awmna hmuna More sasaw thing awmna a va thleng a. Chû rama chêngte chu Kanaan mi an ni a.

⁷LALPA chu Abrama hnênah a inlâr a, “Hê ram hi i thlahte hnêna ka pêk tûr ram chu a ni e,” a ti a. Chutah chuan a hnêna inlâr LALPA tân maichâm a siam a.

⁸Chuta tâng chuan Bethel chhak lam tlângah a insawn chho va, puan in a kaih a, Bethel chu a thlang lamah a awm a, Ai khua chu a chhak lamah a awm a; chutah chuan LALPA tân maichâm a siam a, LALPA chu a hmingin a au va.

⁹Tin, Abrama chu chhim lam panin a kal ta zêl a.

ABRAMA, AIGUPTA RAMAH

¹⁰Chû ramah chuan tâm a lo tlâ a, chû tâm tlâ chu a nasat êm avângin Abrama chu Aigupta rama awm tûrin a pêm thla ta a.

¹¹Aigupta ram an thlen dawn chuan, a nupui Saraii hnênah, “Hmeichhe hmêl tha tak i ni tih ka hria a.

¹²Tichuan, Aigupta miten i hmêl an lo hmuh hunah, ‘Hei hi a nupui a ni tlat mai,’ an ti ang a, kei hi min that ang a, nang erawh chu an zuah si ang che.

¹³Chuvângin, ka farnu i ni tih khawngaih takin hrilh la, a tha mai ang; tichuan nangma zârah ka nunna hi zuahin a awm thei dawn nia,” a ti a.

¹⁴Chutia Abraman Aigupta ram a zu thlen chuan Aigupta mite chuan chû hmeichhia chu an lo hmu a, hmêltha an ti êm êm a.

¹⁵Pharoa milianhote pawhin an lo hmu a, Pharoa hnênah an hrilh a. Hmeichhia chu Pharoa inah chuan an hruai ta mai a.

¹⁶Amah avâng chuan Abrama chu a lo tiþha hle a. Berâmte, bâwngpate, sabengtung-pate, chhiahhlawh hmeichhia leh mipate, sabengtung-nute, sanghâwngseite a nei ta a.

¹⁷Nimahsela, Abrama nupui Saraii avângin LALPA chuan Pharoa leh a chhûngkua chu hrichhe râpthlâk tak hmangin a sawisâ a.

¹⁸Pharoa chuan Abrama chu a ko va, “Ka chungah hian eng thil nge i tih tâk? Engah nge ka nupui a ni, i tih that mai loh le?”

¹⁹Engvângin nge ‘Ka farnu a ni,’ te i tih ni? Chuvânga nupuia neih tum mai ka ni a. Kha le, i nupui chu hruai la, kal daih rawh,” a ti a.

²⁰Tichuan, Pharoa chuan a mite chu a tîr a, a nupui nên, a thil neih zawng zawng nên an kal botîr ta a.

BUNG 13

ABRAMAN KANAAN A LUAH

¹Abrama chu a nupui nên, a thil neih zawng zawng nên, a hnêna awm Lota nên Aigupta ram chu chhuahsanin Chhim* lamah a kal ta a.

²Abrama chu ran rualah te, tangkarua leh rangkachakah te a Hausa êm êm a.

³Chhim aţang chuan a tîra puan in a kaihna Bethel hmun thlengin a insuan a, chû hmun chu Bethel leh Ai inkâra awm a ni a,

⁴a tîra maichâm a siamna hmun kha a ni. Chutah chuan Abrama chuan LALPA chu a hmingin a au va.

⁵Lota pawh Abrama hnênah a kal ve zêl a, beram rualte, bawng rualte, puan inte a nei vê bawh a.

⁶An thil neihte chu a lo tam tâk êm avângin an chênghe thei ta lo va; khawsaho zêl tûrin a ram pawhin a lo daih ta hek lo.

⁷Abrama ranpûte leh Lota ranpûte chu an intibuai a. Chu ramah chuan Kanaan-mite leh Periz-mite an chêng a.

⁸Tichuan, Abrama chuan Lota hnênah, “Nang leh keia inkârah leh, ka ranpûte leh i ranpûte inkârah hian intihbuaina awm tawh lo hrâm rawh se; unau kan ni si a.

⁹Ram pum pui hi a awm duai a ni lo vem ni? Khawngaihni ka hnên aţangin inla hrang mai teh. Vei lama i kal chuan kei ding lamah ka kal ang a; a nih loh leh, nang ding lama i kal chuan kei chu vei lamah ka kal ang e,” a ti a.

¹⁰Lota chuan a han thlîr vêl a, Jordan phairuam zawng zawng chu Zoar thlengin, LALPA huan ang mai, Aigupta anga ram tha, tuia châwm thatna ram a ni tih a hmû a (LALPAN Sodom leh Gomorra a tihchhiat hma kha a la ni si a).

¹¹Lota chuan Jordan phaizâwl zawng zawng chu a thlang ta a, chhak lam panin Lota chu a insawn chho va. Tichuan an inþhen ta a.

¹²Abrama chu Kanaan ramah chuan a chêng ta a, Lota chu phaizâwl khawpuiah te chuan a awm ta a, Sodom thlengin a puan in chu a kaih zêl a.

¹³Nimahsela, Sodom mite chu LALPA lakah an suaksual êm êm a.

¹⁴Lota nêna an awm hran hnû chuan, LALPA chuan Abrama hnênah, “Dâk chhuak la, i awmna hmun aţang khân hmar lam te, chhim lam te, chhak lam te, thlang lam te han thlîr vêl teh;

¹⁵i hmuh phâk ram zawng zawng hi, nang leh i thlahte tân ka pè ang che.

¹⁶I thlahte chu leia vaivut ang maiin ka la siam ang; mîin leia vaivut an chhiar sêng a nih ngai chuan i thlahte chu chhiar sên an ni chauh vang.

¹⁷Tho la, hê ram dung leh vâng hi va fang chhuak rawh, ka pêk tawh che hi,” a ti a.

¹⁸Tichuan, Abrama chuan a puan in a sawn a, Hebron kianga Mamre sasaw thing bulah chuan awmhmun a khwar ta a; chutah chuan LALPA tân maichâm a siam a.

BUNG 14

SALTÂNG LOTA CHHANCHHUAH THÛ

¹Chûng lai chuan Sinar lal Amrafela te, Ellasar lal Arioka te, Elam lal Kedorlaomera te leh hnam hrang hrang lal Tidala-teho chuan

²Sodom lal Bera te, Gomorra lal Birsaa te, Adma lal Sinaba te, Zeboiim lal Semebera te leh Bela lal (Zoar lal a ni a) te chu an rûn a.

³Hêng lalho zawng zawng hi Siddim Phaizâwl (Tuipui Al ruam an tih baw) ah chuan an lo tâng tlâng a.

⁴Kum sâwm pahni chhûng Kedorlaomera hnuaiah an awm a, a kum sâwm pathumnaah chuan an hel ta a ni.

⁵Kum sâwm palînaah chuan Kedorlaomera leh a thurualpui lalhote an lo thawk a, Asteroth-Karnaim rama Refaim-hote, Ham rama Zuzim-hote, Saveh-Kiriathaim hote leh,

⁶thlalêr bula awm El Paran thlengin, Seir tlâng a chêng Hor-hote chu an bei chiam a.

⁷An kîr leh lam chu En Mishpat (Kadesh a ni a)-ah an lo kal a, Amalekho ram pum bâkah, Hazezon Tamar-a chêng Amor-hote pawh an hneh vek a.

⁸Sodom lal te, Gomorra lal te, Admah lal te, Zeboiim lal te leh, Bela (chû chu Zoar tihna a ni) lal hote chu Siddim Phaizâwl ah indo tûrin an lo intêl khâwm a,

⁹lehlam-ho chu Elam lal Kedorlaomera te, hnamte lal Tidala te, Sinar lal Amrafela te, Ellasar lal Arioka te an ni a—lal pangân hêng lal palite hi an lo ep a ni.

¹⁰Siddim Phaizâwl chu alkatra khurin a khat a; Sodom leh Gomorra lalte chu an tlânchhia a; chûng khurahte chuan thenkhat an tlâ a, a bâk zawng chu tlângah te an tlânchhia a.

¹¹Tichuan, Sodom leh Gomorra khuua mite thil hlû zawng zawng leh ei tûr zawng zawng chu an lâksak vek a, an kal bo ta a.

¹²Sodom khuua chêng Lota, Abrama nau fapa pawh a neih sum zawngte nêan an man tel a, an kalpui ta a.

¹³Mi pakhat tlân chhuak chu Hebrai mi Abrama hnênah chuan a lo kal a, chûng thû chu a rawn hrilh a; chutih lai chuan Abrama chu a thian Eskola leh Anera unaupa, Amor-mi, Mamre-a sasaw thing bulah a chêng a.

¹⁴Abraman a unaupa salah an man tih a hriat vêleh, ama ina piang, indo zir chhuak tawh thiau, a chhiahhlawh mi zathum leh sâwm pariatte chu râlthumin a inthumtîr a, Dan thlengin an ûm ta a.

¹⁵Zânah chuan a hote chu râl bei tûrin a sem darh a, amah leh a chhiahhlawh hote chuan an bei vak a, Damaska hmara Hobah khaw thlengin an ûm zui a.

¹⁶Tichuan, an thil hlu lâksak zawng zawng chu an chhuhkîr leh vek a, Lota leh a neih sumte, hmeichhiate leh mi dangte pawh an hruai kîr leh vek a.

¹⁷Kedorlaomera leh a thurualpui lalhote hneha a lo hâu lam chu, Sodom lal chuan Saveh Phaizâwl (Lal Phaizâwl an tih)-ah chuan a lo hmuak a.

ABRAMA LEH MELKIZEDEKA

¹⁸Salem lal Melkizedeka chuan chhang leh uain a rawn ken a; ani chu Pathian Chungnungbera puithiam a ni a.

¹⁹Mal a lo sâwm a: “Pathian Chungnungber, Lei leh vân neitu chuan Abrama hi malsâwm rawh se;

²⁰Pathian Chungnungber, I hmêlmâte i kuta petu chu fakîn awm rawh se,” tiin. Tichuan, a neih zawng zawng a tângin sâwma pakhat a pê a.

²¹Sodom lal chuan Abrama hnênah, “Ka mite hi chu min pê la, râlâk thil zawng zawng erawh chu nangma’n nei vek ang che,” a ti a.

²²Abrama erawh chuan Sodom lal hnênah, “LALPA Pathian Chungnungber, lei leh vân Neitu hnênah ka kut ka lo phar tawh a;

²³chuvângin, i tâ ami eng thil mah ka la lo vang, la zai khat tê pawh, pheikhawh hrui khat tê pawh engmah ka la lo vang, chuti lo zawng, ‘Abrama chu keima tihhausak alâwm,’ i ti dah ang e—

²⁴tlângvâhloten an lo ei ral tawh tih chauh lo chu ka la lo vang; mahse ka thian: Anera te, Eskola te leh Mamre-a te erawh chuan an chanvo chu la ve rawh se,” a ti a.

BUNG 15

ABRAMA HNÊNA PATHIAN THUTHLUNG

¹Chûng thil hnûah chuan LALPA thû chu Abrama hnênah inlânain a lo thleng a, “Abram, hlau suh. Kei hi i phâw leh i lâwmman ropui tak chu ka ni asin,” a lo ti a.

²Mahse Abrama chuan, “Lalpa PATHIAN, fa nei lo ka ni tih i hria a, eng nge mi pêk dâwn, ka ro khâwmtu tûr lah chu Damaska khuua mi Eliazara hi a ni mai si a?” a ti a.

³Abrama vêk chuan, “Ngai teh, fa pawh min pe si lo va; ka in chhûnga piang chu ka ro luahtu tûr a ni mai dâwn a nih hi!” a ti a.

⁴Ngai teh, LALPA thû chu a hnênah chuan a lo thleng a, “Chû mi chu i ro luahtu tûr a ni hlei nê, nangma’n fa i la hrin ngei chu i ro luahtu tûr a la ni dâwn asin,” a ti a.

⁵Tichuan, pâwnah a hruai chhuak a, “Vân lam khi en la, i chhiar sêng a nih chuan arsate khi han chhiar teh. I thlahte pawh khiti zât khi an la ni dâwn asin,” a ti a.

⁶LALPA chu a ring a, chû a rinna chu a diknaah a pawmsak ta a.

⁷Tihian a hrilh a, “Kei hi LALPA ka ni a, hê ram hi i rochun theih nâna Kaldai rama Ur khua a tâng a hruai chhuaktu che ka ni,” a ti a.

⁸Ani chuan, “Lalpa PATHIAN, engtin nge ka rochung ngei dâwn tih ka hriat theih ang?” a ti a.

⁹Ani chuan, “Bâwnglâ kum thum mi te, kêlpui kum thum mi te, berâmpa kum thum mi te, thûro leh pârva tuai mi rawn lâk rawh,” a ti a.

¹⁰Chûng zawng zawng chu a rawn la a, a lai takah a zai phel theuh va, a inzâwn zêlin a dah a; savâte erawh chu pahniha a zai phel vê lo va.

¹¹Saruang chung a mulukawlh rawn fû te chu Abrama chuan a lo hnawt kiang thîn a.

¹²Nî chu a tla têt tawh a, Abrama chu a muhil ta bawrh bawrh a; ngai teh, thil râpthlâk tak leh thim chhah tak hian a rawn khuh mup a.

¹³Abrama hnênah chuan: “I thlahte chu mi ramah an la mikhual ang a, an rawng an bâwlsak ang a, kum zali chhûng an tirethei ang tih Chiang takin hria ang che.

¹⁴An rawng bâwlsak tûr hnam chu keiman ka la ruat ang; chumi hnuah chuan hausa takin an lo chhuak leh ang.

¹⁵Nang erawh chu, i thlahtute hnênah thlamuang takin mual i liam ang a; kum upa tak niin an phûm ang che.

¹⁶Chhuan lîna a ral hunah erawh chuan hetah hian an lo kîr leh dâwn a ni, Amor-hote sualna hian a vâwrtawp a la thleng rih si lo va,” a ti a.

¹⁷Chutia nî a lo tlâk a, khua a lo thim hnu chuan, thuk aţanga meikhû chhuak vut vut leh meichher alh hluah hluah hian chûng saruange chu a lo kâr tawn a.

¹⁸Chumi nî chuan LALPA chuan Abrama chu thû a thlunpui a: “I thlahte hnênah hê ram hi, Aigupta lui aţangin lui lian—Euphrates Luipui thlengin ka pe tawh e—

¹⁹Ken-mite, Keniz-mite, Kadmon-mite,

²⁰Hit-mite, Periz-mite, Rephaim-mite,

²¹Amor-mite, Kanaan-mite, Girgasmite leh Jebus-mite ram hi,” a ti a.

BUNG 16

HAGARI LEH ISMAELA

¹Abrama nupui Saraii chuan fa a la hrinsak lo cheu va. Chhiahhlawh nula Aigupta mi a nei a, a hming chu Hagari a ni.

²Saraii chuan Abrama hnênah, “Ngai teh, LALPAN fa nei min phalsak si lo va. Khawngaih takin ka chhiahhlawhnu hi mutpui mai teh; ani hian fa mi hrinsak mial mahnâ,” a ti a. Abrama chuan Saraii thû chu a zâwm a.

³Tichuan, Abrama chu Kanaan rama kum sâwm zet a awm hnu chuan, Abrama nupui Saraii chuan a chhiahhlawh nula Hagari, Aigupta mi chu a hruai a, a pasal Abrama hnênah a nupui âtn a pe ta a.

⁴Ani chuan Hagari chu a mutpui a, nau a lo pâi ta a. Nau a pâi ta tih a inhriat vêleh a pi chu a hmusit ngâl ta mai a.

⁵Saraii chuan Abrama hnênah, “Hmuhsit ka tawh hi i mawh a ni! I lo pawm tûrin ka chhiahhlawh nu chu ka pê che a; mahse, nau a pâi tih a inhriat vêleh min hmusit ngâl ta si a. LALPA chuan nang leh keia inkâr thû hi rêl fel mai rawh se,” a ti a.

⁶Abrama chuan Saraii hnênah, “I chhiahhlawh nu chu i kuta awm a ni alâwm; i duh ang ang chuan ti ta che,” a ti a. Saraii chuan a tiduhdah ta hlê mai a, a tlân bo ta hial a.

⁷LALPA Vântirhkoh chuan thlalêra tuikhur bul, Sur panna kawng kama tuikhur bula a awm lai chu a lo hmû a.

⁸“Hagar, Saraii chhiahhlawh nu, khawi aţangin nge i lo kala, khawiah nge i kal dâwn?” a ti a. Ani chuan, “Ka pi Saraii ka tlân bosan a nih hi,” a ti a.

⁹LALPA Vântirhkoh chuan, “I pi hnênah chuan kîr leh la, a thû thûa awm tûrin va intulût rawh,” a ti a.

¹⁰LALPA Vântirhkoh chuan a sawi zêl a, “I thlahte chu nasa takin ka la tipung ang a, chhiar sên rual loha tam an la ni ang,” a ti a.

¹¹LALPA Vântirhkoh chuan a hnênah: “Ngai teh, nau i pâi tâk hi, Fapa i hring ang a, A hmingah Ismaela i sa tûr a ni, LALPA chuan i hrehawmna a hriatsak si che a.

¹²Ani chu ramvachal a la ni ang a; Mi tûpawh a do zêl ang, Mite pawhin an do vê bawk ang a, A unau zawng zawngte bulah a awm bawk ang,” a ti a.

¹³Ani chuan amah betu LALPA chu a hmingin a au va, Nang chu Hmutheitu Pathian i ni; “Kei mi hmutu chu ka hmu ve ta a ni lo vem ni?” a ti a.

¹⁴Chutichuan, chû tuichhunchhuah chu Beer Lahai Roi tih a ni ta a; Kadesh leh Bered inkâra mi a ni tih chhinchhia la.

¹⁵Hagari chuan Abrama chu fa a hrinsak ta a; Abrama chuan Hagarin a hrinsak, a fapa hmingah chuan Ismaela a sâ a.

¹⁶Hagarin Abrama tâna Ismaela a hrinsak lai chuan, Abrama chu kum sawmriat leh paruka upa a ni.

BUNG 17

THUTHLUNG CHHINCHHIAHNA

¹Abrama chu kum sawmkua leh pakuaa upa a nihin a hnênah LALPA a rawn inlâr a, “Kei hi Engkimtithei Pathian chu ka ni; ka hmaah hian kal zêl la, dem kâi lovin awm ang che.

²Kei leh nang nêna kan inkârah thu ka thlung ang a, nasa takin ka tipung ang che,” a ti a.

³Abrama chu a bawkkhup a, Pathianin ani chu a be zui zêl a:

⁴“Ngai teh, nangma hnên ngeia ka thu thlun chu, hnam tam takte pa i la ni ang, tih hi a ni.

⁵I hmingah pawh Abrama an ti tawh lo vang a, i hming chu Abraham a ni tawh zâwk ang.

⁶Nasa takin chî ka thlah puntîr ang che; nangmah aţang hian hnamte ka din ang a, nangmah aţang vêkin lalte pawh an lo chhuak ang.

⁷Nangmah leh i hnûa i thlah kal zêlte tân, chatuan thuthlung ka thlung ang a, ka tinghet bawk ang; tichuan, nang leh i hnûa i thlahte thlengin in Pathian ka ni zêl ang.

⁸Nang leh i hnûa i thlahte hnênah hê i mikhualna ram, Kanaan ram zawng zawng hi kumkhaw ro âtn ka pe bawk ang che a; tichuan, kei hi an Pathian ka ni ang,” a ti a.

⁹Pathian chuan Abraham a hnênah: “Nang chuan ka thuthlung hi i zâwm tlat tûr a ni; nangmah bâkah, i hnûa i thlah lo la awm tûrte pawhin an zâwm vek tûr a ni.

¹⁰Hei hi nang nêna kan inkâra ka thuthlung chu a ni a, nang leh i hnua i thlahten an zâwm tûr a ni: In zînga mipa apiangin serh an tan tûr a ni a;

¹¹In serh hmâwr vun in tan tûr a ni a, chû chu kei leh nangni inkâra thuthlung chhinchhiahna a ni ang.

¹²In zînga nausen mipa lo piang tawh phawt chu, nangma ina piang emaw, i thlahte zînga mi ni lo, ram dang mi, tangkâa i lei pawh ni se, a ni riat nîah serh i tansak tûr a ni.

¹³Nangma ina lo piang te leh, tangkaa i lei te chu serh in tansak tûr a ni a, ka thuthlung chu kumkhaw thuthlung atân in tîsâah a awm hlen tûr a ni.

¹⁴Mipa naupang serhtan loh, a serhvun hmâwr tan loh chu, chu mi chu ama mite laka tuithlâr hmiah tûr a ni; ka thuthlung bawhchhia a ni si a,” a ti a.

¹⁵Pathianin Abrahama chu a be zui zêl a, “I nupui Saraii pawh Saraii tiin ko tawh lo la, a hmingah Sari ti tawh zâwk ang che.

¹⁶Ani chu mal ka sâwm ang a, ama hrin ngei fapa ka pê ang che; tichuan, ani chu mal ka sâwm ang a, hnam tam tak nu a ni ang; amah aţangin mipui tân lalte pawh an lo la chhuak ang,” a ti a.

¹⁷Abrahama chu a bawkkhup a, a nui a, a rilrûin, “Kum zâa upa mi hian mâw fa nei ang? Sari, kum sawmkuaa upa hian fa a pâi meuh ang mâw?” a ti a.

¹⁸Abrahama chuan Pathian hnênah, “Ismaela hi i hmâah awm vê mai sela âw!” a ti a.

¹⁹Pathian chuan: “Ni lo ve, i nupui Sari ngei hian fa a hrinsak ang che a, a hmingah Isaaka i sa tûr a ni; amah leh ani hnua a thlahte thlengin kumkhaw thuthlung ka thlunpui ang a, ka tinghet bawk ang.

²⁰Ismaela chungchâng pawh ka hriatpui a che. Ngai teh, mal ka sâwm tawh a, chi tam tak thlahtu atân ka siam ang a, nasa takin ka la tipung ang. Lal sâwm leh pahniha a la hring ang a, hnam ropui takah ka la siam dâwn a ni.

²¹Ka thuthlung erawh chu Isaaka, nakum hetih huna Sarin a la hrinsak tûr che hnênah ka tinghet ang,” a ti a.

²²An inbiak zawh chuan, Pathian chu Abrahama hnên ata a chho ta a.

²³Tichuan, Abrahama chuan a fapa Ismaela te, a ina piang zawng zawng te, tangkâa a lei zawng zawng te, Abrahama ina chêng mipa tawh phawt chuan Pathianin a hnêna a hrilh tawh angin, an serh vun hmâwr chu an tan vek a.

²⁴Abrahama’n serh a tan lai khân kum sawmkua leh pakuaa upa a ni a.

²⁵Ismaela chu a serhvun hmâwr tan a nih lai khân kum sâwm pathuma upa a ni a.

²⁶Khami ni ngei khân Abrahama leh a fapa Ismaela-ten serh an tan a;

²⁷a ina chêng mipa zawng zawng, a ina piang te, ram dang aţanga tangkaa a leite pawhin ama rualin serh an tan vek a ni.

BUNG 18

THUTIAM FA

¹Mamre sasaw thing bulah chuan chhûn khaw lumah, ama puan in kawngkâa a thut laiin, a hnênah chuan LALPA a rawn inlâr a.

²Ani chuan a han en a, a hmâah chuan mipa pathum an lo ding a; a hmuh vêleh, puan in kawngka aţang chuan anmahni lo lâwm tûrin a tlân nghâl a, kûnin chibai a va bûk a,

³“Ka LALPA, i mithmuhah duhsakna ka chang vê a nih chuan i chhiahhlawh hi min kal pêl lo hrâm rawh.

⁴In ke sil nân tui tlem ka rawn lâktîr ang a, hê thing hnuaiah hian in châwl hahdam dâwn nia.

⁵Chhang tlêm ka rawn lâ ang a, chu chuan intiharh ang che u. In chhiahhlawh hnênah in lo kal ta sâ sâ a, chumi zawhah chuan in kal zêl dâwn nia,” a ti a. Anni chuan, “I sawi ang chuan va ti ta che,” an ti a.

⁶Tichuan, Abrahama chu puan in chhûnga Sari hnênah chuan a va tlân a, a hnênah, “Chhangphut tha ber chí kha tekhâwng thum la chhuak la, hmet la, chhangpêr siam nghâl vat ang che,” a ti a.

⁷Abrahama chu a ranrual awmnaah a va tlân a, bawng tuai mâm tha tak a va man a, tlangval hnênah a pê a, ani chuan ei tûrin a lo buatsaih nghal a.

⁸Tichuan, bawng sa kan hmin chu bawngnhute leh bawngnhute khang nêna a rawn lâ a, an hmâah a hlui a; thing buk hlima an ei chhûng chuan an bulah a ding reng a.

⁹Anni chuan, “Khawiah nge i nupui Sari a awm?” an ti a. Ani chuan, “Hei, puan in chhûnga hi a awm e,” a ti a.

¹⁰Ani chuan, “Hunbi a kim hunah i hnênah ka lo kîr leh ang; i nupui Sari hian fapa a nei dâwn tih hria ang che,” a ti a. (An dinna hnung maia awm, puan in kawngka bul aţang chuan Sari chuan a lo ngaitla ve reng a.)

¹¹Abrahama leh Sari chu upa tak, tar tak an ni a; Sari nau pai theih hun chu a pêl daih tawh a.

¹²Chuvângin Sari chu a nuih a za hlê a, “Kei tar zûr tawh hian hlimna ka nei leh thei ang maw, ka lalpa lah putar a ni tawh bawk si a?” a ti rilrû a.

¹³LALPA chuan Abrahama hnênah, “Engati nge Sari chu a lo nuiha, ‘Ka tar tawh si a, fa ka hring tak tak ang maw?’ te a tih le?”

¹⁴“LALPA tân harsa lutuk a awm thei em ni? Hun tiam a lo thlena, nau hrin a lo hunah ka lo kîr leh ang a, Sari ngei hian fapa a nei ang,” a ti a.

¹⁵Sari erawh chuan hlauthâwng takin, “Ka nui rêng rêng lo,” tiin a phâ a. Ani chuan, “I nuih ngei kha le!” a ti a.

ABRAHAMAN SODOM TÂN A DÎLSAK

¹⁶Chuta aţang chuan chûng mite chu an tho va, Sodom lam an hawi a, Abrahama chu anmahni thlah tûrin a rualin a kal vê a.

¹⁷LALPA chuan, “Ka thiltih tum hi Abrahama lakah hian ka thup dâwn em ni?”

¹⁸Abrahama hi hnam ropui leh thiltithe i tak a la ni ngei dawn a, amahah hian leia hnam zawng zawngin malsawmna an la dawng dawn si a?

¹⁹A fate leh an chhûngkaw lo la awm zêl tûrten LALPA kawng an zawh a, thil tha leh thil dik ti tûra thû a pêk theih nâna ka mi hriat a ni tawh a; chû bâkah Abrahama hnêna a lo sawi tawh anga LALPAN a thlentîr theihna tûr a ni si a,” a ti a.

²⁰LALPA chuan, “Sodom leh Gomorra sualna râpthlâk tak avânga an thâwm rîvâ hi a nasa tawh a,

²¹hêng an suahsualna âu thâwm ka beng a lo thlengte hi eng ang tak nge a nih en tûrin ka chhuk thla dawn a; chutiang chu a lo ni nge ni lo kan la hria ang chu,” a ti a.

²²Chûng mite chu chuta tâng chuan an kal chhuak a, Sodom lam an pan ta a; Abrahama erawh chu LALPA hmâah chuan a la ding reng a.

²³Abrahama chuan a va hnaih a, “Mi thâte pawh mi suaksualte rualin i tiboral dawn em ni?

²⁴Khaw chhûngah chuan mi thâ sawmngâ lo awm ta hlahu sela, chûng mi tha sawmngâ te avânga zuah lovin, chû hmun chu i tiboral tho dawn em ni?

²⁵Mi suaksualte ang maia mi thâte pawh tihluma, mi thâte pawh mi suaksualte ang maia hmer tel chu i ti âwm si lo va; Nang chuan chutiang chu i ti êm lo vang chu! Lei chung zawng zawnga Rorêltu chuan dik takin i ti dawn lo vem ni?” a ti a.

²⁶Tichuan, LALPA chuan, “Aw le, Sodom khaw chhûngah mi thâ sawmngâ ka hmuh chuan, anmahni avângin khua chu a pumin ka zuah ang e,” a ti ta a.

²⁷Abrahama chuan, “Ngai teh, kei, vaivut leh meivâp mai hian Lalpa chu ka be pawp ta sâ sâ che a:

²⁸Mi pangâ lekin mi thâten sawmngâ tling lo sela, pangâ an tlin loh avângin khua chu a pumin i tiboral tho dawn em ni?” a ti a. Ani chuan, “Mi sawmli pangâ an awm pawhin, ka tiboral lo vang,” a ti a.

²⁹Ani chuan amah chu a be zui zêl a, “Anih leh mi sawmli chauh lo hmu ta si la?” a ti a. Ani chuan, “Mi sawmli avâng pawhin ka tiboral lo vang,” a ti a.

³⁰Ani chuan, “LALPA chuan zah lo ngai sela, ka han sawi leh teh ang: Mi sawmthum chauh lo awm ta sela?” a ti a. Ani chuan, “Mi sawmthum ka hmuh pawhin ka tiboral lo vang,” a ti a.

³¹Ani chuan, “Ngai teh, Lalpa chu ka be pawp ta sâ sâ: Mi sawmhni chauh lo awm ta sela?” a ti leh a. Ani chuan, “Mi sawmhni avâng pawh chuan ka tiboral lo vang,” a ti a.

³²Ani chuan a hnênah, “Lalpa chuan zah lo ngai sela, wavi khat chauh ka han sawi leh teh ang: Mi sâwm chauh lo awm ta sela?” a ti a. Ani chuan, “Mi sâwm avâng pawh chuan ka tiboral lo vang,” a ti a.

³³Tichuan, LALPA chu Abrahama nên an inbiak zawh veleh chuan a kal ta a; Abrahama pawh ama awmna lamah a kîr leh ta a.

BUNG 19

SODOM KHAW SUALZIA

¹Tlaiah chuan Vântirhkohe pahni te chuan Sodom khua chu an zu thleng a, Lota chu Sodom kulh kawngkhâr bulah a lo thû a. Anni chu a lo hmuh vêleh lâwm tûrin Lota chu a tho va, kûnin chibai a lo bûk a.

²Ani chuan, “Hawh u, ka pute u, in chhiahhlawh inah hian zân riak tûrin lo thleng ula, in kê in sil dawn nia; zîng takah in tho vang a, in kal leh mai dawn nia,” a ti a. Anni chuan, “Ni lo ve, khawlaiah kan riak zâwk ang e,” an ti a.

³Mahse ani chuan a sâwm thut thut a; tichuan, an zui a, a inah chuan an lût ta a. Ei tûr a buatsaih a, dâwidim tel lo chhang a ur a, an ei ta a.

⁴An mut hmâ chuan khawchhûnga mi, Sodom khuua tleirâwlte leh upate chenin, vêng tina mipa zawng zawng chuan in chu anrawn hual a.

⁵Lota chu an ko va, “Zân ina i hnêna lo kal mipate kha khawiah nge an awm? Anni chu kan lo pâwl atânrawn hruai chhuak rawh,” an ti a.

⁶Tichuan, Lota chu kawngkaah chuan a va chhuak a, kawng chu a khâr leh a,

⁷“Ka unaute u, heti êma sual hi chu ti lo hrâm teh u!

⁸Hei, mipa la pâwl loh fanu pahni ka nei a; karawn hruai chhuak mai ang e, in duh duhin ti mai ang che u; hêng mipate chungah hi chuan engmah ti lo hrâm rawh u, chû chu ka in chhûnga an lo luh chhan pawh a ni si a,” a ti a.

⁹Mahse anni chuan, “Kiang mai teh!” an ti a. “Hê pa hi hetah a lo pêm lût vê dêk dêk a, ro ka rêl ê, te a ti vei mâw; anni ai khân kan sawisa nasa mai tûr che asin,” an ti a. Tichuan, Lota chu anrawn beihrawn a, kawngkhâr tihchhiat tumin anrawn hnaih tuau tuau va.

¹⁰Mahse, mite chuan an kut an ban chhuak a, Lota chu in chhûngah chuan an pawt lût a, kawng chu an inkhâr khum ta a.

¹¹Mite chuan kawngkhâr bula mipui lo kal te chu, a lian a têin an mit an tihdelsak a, tichuan kawngkhâr awmna lam pawh an dap fuh thei ta lo va.

SODOM LEH GOMORRA TIHBORAL THÛ

¹²Mite chuan Lota hnênah “Hetah hian mi dang i la nei em? I mâkpâte, i fapate, i fanute leh khuua mi leh sâ i nei apiangte chu hê hmun a tâng hian hruai chhuak rawh!

¹³Hê hmun hi kan tiboral dawn, an sualna chanchin LALPA beng a lo thleng hi a nasat tawh êm avângin, tiboral tûrin LALPAN minrawn tîr a ni,” an ti a.

¹⁴Tichuan, Lota chu a kal chhuak a, a fanu neitu a mâkpâte hnênah a va kal a, “Tho ula, hê hmun hi chhuahsan rawh u; LALPAN hê khua hi a tiboral dawn a ni,” a va ti a. Mahse, a mâkpâte chuan fiamthu thawh ang lekah an lo ngai si a.

¹⁵A tûk khua a lo vâr chuan, Vântirhkohte chuan Lota chu an tur hmanhmawh ta chûk chûk a, “Tho la, i nupui leh i fanu heta awmte hi hruai chhuak rawh, hê khaw hremnaah hian in boral vê palh ang e,” an ti a.

¹⁶Ani lah chu a vuaichâ hlê mai a, LALPAN a khawngaih bawk si a; tichuan, mite chuan amah leh a nupui leh a fanute bânah an chelh a, an hruai chhuak a, khaw pawnsan an va dah ta a.

¹⁷Chutia dai pâwna an va hruai chhuah lai chuan, “I sahimna tûrin tlan chhuak rawh! Hnung lam hawi suh la, phaizâwl khawi laiah mah hian châwl hek suh. Tlângah sâwn tlan ang che u, chuti lo zawn, in boral vê hlauh ang e,” an ti a.

¹⁸Lota chuan an hnênah, “Ni lo ve, pute u!

¹⁹I chhiahhlawh hi min duhsak a, ka nunna chhanhim tûrin heti tak hian zahngaihna in lantîr ta sâ sâ; tlâng lam pan saw chuan ka tlan thei lo vang; thil tha lovin min tlâkbuak ang a, ka thi palh mai ang asin.

²⁰En teh u, sâw khua saw tlan nân a hnai alâwm, khaw te reuh tê a ni a; sawtah sâwn min tlântîr mai rawh u (a tê hlê a ni lo'm ni?), chutah chuan kan khawsa mai dawn nia,” a ti a.

²¹Ani chuan, “Aw le, chû pawh chu ka phalsak ang che, chutianga i sawi avâng chuan chû khua pawh chu ka tiboral vê lo mai ang.

²²Hmanhmawh ula, chutah chuan tlan thuai rawh u. In thlen hmâ chuan engmah ka ti thei si lo va,” a ti a. Chuvângin, chû khua chuan Zoar tih hming a lo pu ta a ni.

²³Lotan Zoar khua a va luh lai chuan kâwlah nî a lo chhuak tawh a.

²⁴LALPA chuan Sodom leh Gomorra khuaah chuan, vâna LALPA hnên aţangin mei leh kât a sûtîr ta a.

²⁵Tichuan, phaizâwl zawnzawng te, khawpuite leh khuaa mi chêng zawnzawngte leh, leia thil ʔo zawnzawngte nêl lam a tiboral ta vek a.

²⁶Nimahsela, a nupui chuan hnung lam chu a thlîr kîr vawng vawng a, chi khâwn dingah a chang ta a.

²⁷Abrahama chu zîng takah, LALPA hmaa a dinna hmunah khân a va kal a.

²⁸Sodom leh Gomorra leh, phaizâwl pumpui chu a thlîr a; ngai teh, chu ramah chuan rawhtuina meikhû ang maiin meikhû a chho mup mup a.

²⁹Chutianga taka Pathianin phairam kuate a tihboral lai khân, Pathian chuan Abrahama chu a hre reng a; Lota chênna kuate a tihchhiat laiin Lota chu boralna hmun aţangin a chhuahthîr ta a ni.

LOTA THLAHTE

³⁰Lota chu Zoar khua aţangin a chho va, tlângah a khawsa ta a, a fanu pahnihte pawh a hnênah an awm a; Zoar khuaah chuan a awm ngam leh si lo va. A fanu pahnihte nêl pûkah an chêng ta a.

³¹A fanu û zâwk chuan a nau hnênah, “Kan pa hi a upa tawh a, leilung zawnzawng dânin tûmah min kawppui tûr mipa leiah an awm si lo;

³²hawh teh, kan pa hi uain i intîr ang khai, kan mutpui ang a, tichuan kan pa hi chi mang lovin kan siam dawn nia,” a ti a.

³³Tichuan, chumi zânah chuan an pa chu uain an intîr ta a. A û zâwk chu a pa bula mu tûr chuan a lût a, ani erawh chuan a lo mut lai emaw, a thawh leh lai emaw pawh a hre lo.

³⁴A tûkah chuan a û zâwk chuan a nau hnênah, “Nizân chu ka pa ka va mutpui ta e; zân inah pawh uain i tulh rûi leh ang khai, nang i lût vê thung ang a, i va mutpui vê dawn nia, tichuan kan pa chu chi mang lovin kan siam dawn zu nia,” a ti a.

³⁵Chumi zân pawh chuan an pa chu uain an tulh rûi leh a. A nau zâwk chu a tho va, a bulah a va mu vê a, ani chuan a lo mut lai emaw, a thawh leh lai emaw pawh a hre lo.

³⁶Tichuan, Lota fanute chuan an pa lakah fa an pâi vê vê a.

³⁷A û zâwk chuan fapa a hring a, a hmingah Moaba a sâ a; ani chu tûn thlenga Moab-ho thlahtu a lo ni ta a.

³⁸A nau zâwk pawhin fapa bawk a hring a, a hmingah Ben-ammia a sâ a; ani chu tûn thlenga Ammon-ho thlahtu a lo ni ta.

BUNG 20

ABRAHAMA LEH ABIMELEKA

¹Abrahama chu chuta ʔang chuan Chhim lamah a insawn a, Kades leh Sur inkârah a chêng a, Gerar-ah awmhmun a khuar ta a.

²Abrahama chuan a nupui Sari chu “Ka farnu a ni,” a ti a. Tichuan, Gerar lal Abimeleka chuan mi a tîr a, Sari chu a va hruai ta mai a.

³Nimahsela, Pathian chu zânah Abimeleka hnênah a lo kal a, “Kha hmeichhia i lâksak kha, mi nupui a nih avângin nang chu mitthi mai i ni ta,” tiin a hrilh a.

⁴Abimeleka chuan ani chu hnaih pawh a la hnaih hman lo va; ani chuan, “Lalpa, mi dik tak pawh i tihlum tho dawn em ni?

⁵Ka hnênah khân, ‘Ka farnu a ni’ a ti lo vem ni? Amah ngei pawhin, ‘Ka nuʔa a ni,’ a ti bawk si a. Thinlung dik tak leh kut thianghlama hê thil hi ti ka ni asin,” a ti a.

⁶Pathianin a mumangah chuan, “Ni e, thinlung dik tak pûa hê thil hi ti i ni tih ka hria e. Chuvâng chuan keima chungah thil sual ti lo tûrin ka khap che a ni rêng a; tichuan khawih pawh ka khawihthîr lo che a nih kha.

⁷Chuvângin, mi nupui kha pe kîr leh rawh; zâwlnei a ni a, a ʔawngʔaisak ang che a, tichuan i nung ang. I pêk kîr loh erawh chuan nang leh i thil neih zawnzawng chawpin in boral vek ang tih hria ang che,” a ti a.

⁸Abimeleka chu zîng takah a tho va, a chhiahhlawhte chu a ko khâwm vek a, chûng thûte chu a hrilh vek a; a mite chuan an hlau ta êm êm a.

⁹Abimeleka chuan Abrahama chu a ko va, “Kan chungah hian eng thil nge i tih tâk? I eng pawî nge kan sawi a, heti taka keimah leh ka lalram chungah sual lian tak i rawn thlen tâk le? Ka chungah hian i tih loh tawp tûr i ti a nih hi,” a ti a.

¹⁰Abimeleka vêk chuan Abrahama hnênah, “Eng rilru pûin nge hêng thil hi i tih le?” a ti leh a.

¹¹Abrahama chuan, “Hê hmunah hian Pathian ʔihna a awm ka ring lo va, ka nupui avâng hian min that mai ang tih ka hlauh vânga ti ka ni e.

¹²Ani hi ka farnu dik tak pawh a ni rêng a. Ka pa fanu a ni a; ka nu fanu erawh chu a ni lo va; tihian, ka nupuiah a lo awm ta a ni.

¹³Pathianin ka pa in ata min vahvaihtîr lai khân, ani hnênah hian, ‘Khawngaih takin heti hian min tihsak ta che: khawi hmunah pawh kal ila, kei hi “Ka nuṭa a ni,” ti zêl ang che,’ tiin ka hrilh sâ rêng a ni,” a ti a.

¹⁴Tichuan, Abimeleka chuan berâm te, bawngpa te, chhiahhlawh mipa leh hmeichhia te a rawn hruai a, Abrahama chu a pê a; a nupui Sari pawh a pe kîr leh ta a.

¹⁵Abimeleka chuan, “En teh le, ka ram chu i hmâa hi a awm duai alâwm; i duhna apiangah awm vê ang che,” a ti a.

¹⁶Sari hnênah chuan, “Hei le, i unaupa hnênah tangkaraw tlang sâng khat ka pêk hi; hei hian i hnêna mite leh mi zawng zawng mithmuhah a tifihlîm ta a che,” a ti a. Chutiang tak chuan a khak vê ta a ni.

¹⁷Abrahama chu Pathian hnênah a ṭawngṭai a; tichuan Pathianin Abimeleka leh, a nupui leh a chhiahhlawh hmeichhiate chu a tidam ta a. Tichuan, fate an hring ve leh ta a ni.

¹⁸LALPA chuan Abrahama nupui Sari avângin Abimeleka chhûngkuua mite zawng zawng chu a lo tiching vek hman tawh a lo ni a.

BUNG 21

ISAACA A PIANG

¹LALPA chuan a sawi tawh ang ngeiin Sari chu a zuk kan a, a hnêna a lo tiam tawh ang takin Sari chungah chuan a tihsak ta a.

²Pathian hun ruat a lo thlen chuan, Sari chuan nau a lo pâi a, tara lamah Abrahama chu fa a hrinsak ta a.

³Abrahama chuan a fapa lo piang, Sarin a hrinsak hmingah chuan Isaaka a sa a.

⁴Pathianin thû a lo pêk tawh angin, ni riat a lo tlin chuan Abrahama chuan a fapa Isaaka serh chu a tansak a.

⁵Abrahama chu a fapa Isaaka a lo pian lai khân kum zâa upa a ni a.

⁶Sari chuan, “Pathianin mi tinui vê ta e, a hria apiangin mi nuihpui vê dâwn a nih hi,” a ti a.

⁷Tihian a sawi bawk a, “Sarin fa a la pawm dâwn tih Abrahama hnêna sawi thei tu nge awm? A tar hnûah fapa ka hrinsak ta si a,” a ti a.

HAGARI LEH ISMAELA TE AN KAL BO

⁸Naute chu a lo ṭhang lian a, hnute hnêk pawh a bâng ta a. Hnute hnêk an bantîr ni chuan Abrahama chuan ruai ropui tak a ṭheh a.

⁹Aigupta mi Hagarin Abrahama tâna fapa a hrinsaka khân a lo nuihsawh lai chu Sarin a lo hmû a.

¹⁰Abrahama hnênah, “Hê bâwihnu leh a fapa hi hnawt chhuak rawh; hê bâwihnu fapa hi ka fapa Isaaka roluahpuitu a ni ve tûr a ni lo,” a ti a.

¹¹Chû thû chuan Abrahama rilru a tihrehawm ta hlê a, a fapa a ni vê bawk si a.

¹²Pathian chuan Abrahama hnênah, “I fapa emaw, i bâwihnu emaw chuan i rilru tibuai suh se. Sarin i hnêna a sawi apiang chu ngaithlâksak rawh; Isaakaah hian i chithlah chu chhiar a ni dâwn si a.

¹³Hê bâwihnu fapa pawh hi i chithlah a nih vê tho avângin hnam ka la dinsak dâwn a ni,” a ti a.

¹⁴Abrahama chu zîng takah a tho va, chhang a lâ a, savun tuithâwl a thun khat a, Hagari kokiah a bahtîr a, a fapa nê, tichuan a kal botîr ta a. Anni chu an kal chhuak a, Beersheba Thlalêrah chuan an vâk an vâk a.

¹⁵Tuithâwla tui chu an in zo ta a, a fapa chu hnimbuk pakhat hnuaiah chuan a nghat tawp a.

¹⁶Ani chu a kal sawn a, piah deuh, thal kah phâkna tâwk vêla hlâah hian a va ṭhu chawt a; “Naupang thi hmêl ka hmu ngam lo ve,” a ti a ni. A awmna ep chiahah chuan a va ṭhû a, aw râwl chhuahin a ṭap ta râwih râwih a.

¹⁷Pathian chuan naupang âu râwl chu a lo hria a. Pathian Vântirhkoah chuan vân aṭangin Hagari chu a zuk au va, a hnênah, “Engtizia nge ni Hagar? Hlau suh, a awmna hmuna naupang au âw kha Pathianin a lo hria asin.

¹⁸Tho la, naupang chu va kai tho la, i kutin pawm rawh, hnam ropui takah ka la siam dâwn a ni,” a ti a.

¹⁹Pathian chuan a mit a tihvârsak a, tuichhunchhuah a hmu ta a. Chutah chuan a va kal a, tuithâwl chu tuiin a thun khat a, naupang chu a intîr ta a.

²⁰Pathianin naupang chu a awmpui a; a lo ṭhang lian a, thlalêrah a chêng a, thal kâp thiam a lo ni ta a.

²¹Paran Thlalêrah chuan a chêng a; a nu chuan Aigupta rama mi nupui a neihsak a.

ABIMELEKA NÊNA THUTHLUNG

²²Chûng lai chuan Abimeleka leh a sipai hotu Phikola te chuan Abrahama chu an bia a, “Pathian chuan i thiltih apiangah a awmpui zêl ṭhîn che a.

²³Chuvângin, kei leh ka thlahte leh, chhuan lo la awm zêl tûrte thlengin ka chhiatna tûr thil engmah ti lo tûrin Pathian hminga chhechhamin mi tiam teh; i chung a ngilneihna ka lantîr ang bawkin, nang pawhin kei leh hê i chênna ram chungah hian ngilneihna lantîr tûrin min tiam rawh khai,” a ti a.

²⁴Abrahama chuan, “Ka tiam ang e,” a ti a.

²⁵Mahse, Abimeleka chhiahhlawhten tuichhunchhuah an chhuhsak avangin Abrahama chuan Abimeleka chu a khak ve ta a.

²⁶Abimeleka chuan, “Chutiang thil titu chu ka hre hauh lo mai; nangin min hrilh bawk si lo va, tûn thleng hian ka lo la hre hauh lo a nih chu,” a ti a.

²⁷Abrahama chuan berâm te, bawngpa te chu a kai a, Abimeleka chu a pê a, an pahnih chuan inremna thuthlung an siam ta a.

²⁸Abrahama chuan berâm rual zînga mi beramlâ pasarih a dah hrang bawk a.

²⁹Abimeleka chuan Abrahama hnênah, “Hêng beramlâ pasarih i dah hran te hi eng nge a awmzia?” tiin a zâwt a.

³⁰Ani chuan, “Hê tuichhunchhuah hi keima lai h ngei a ni tih mi hriatpui nân, hêng beramla pasarihte hi ka kut ațang ngein la ang che,” a ti a.

³¹Chuvângin, chu lai hmun chu Beerseba an lo ti ta a, an pahniha chhechhamna thu an tiam tâk avângin.

³²Beersebaah chuan inremna thuthlung chu an siam ta a. Abimeleka chu a sipai hotu Phikola nê chuan an tho va, Philistia ramah an kîr leh ta a.

³³Abrahama chuan Beerseba-ah chuan tamarisk* thing a phun a, chû hmunah chuan LALPA, Chatuan Pathian chu a au va.

³⁴Tichuan, Abrahama chu Philistia ramah chuan ni rei tak a châm a.

BUNG 22

ABRAHAMA RINNA FIAH A NI

¹Chûng thil hnûah chuan Pathianin Abrahama chu a fiah a, “Abraham!” tiin a ko va. Ani chuan, “Heta hi ka awm e,” a ti a.

²Ani chuan, “I fapa, i fapa neihchhun Isaaka, i hmangaih tak hi hruai la, Moria ramah kalpui rawh; chû hmuna tlâng pakhat ka la hrilh tûrah che chuan hâlral thilhlân atân va hlân rawh,” a ti a.

³Tichuan, Abrahama chu zîng takah a tho va, a sabengtung a buatsaih a, a tlangvâlte zînga pahni a hruai baw k a, a fapa Isaaka nê; hâlral thilhlân atân thing a ek a, a tho va, Pathianin a hrilhna hmun panin a kal chhuak ta a.

⁴Ni thum nîah chuan Abrahama chu a han hawi vêl a, râlkhat hla tak ațangin chû hmun chu a va hmu ta a.

⁵Abrahama chuan a tlangvâlte hnênah, “Sabengtung nê hian lo awm ula, naupang leh kei chu sâwtah sâwn Pathian chibai bûk tûrin kan va kal ang a, in hnênah kan lokîr leh ang,” a ti a.

⁶Tichuan, Abrahama chuan hâlral thilhlanna thing chu a lâ a, a fapa Isaaka a phurhtîr a; ani chuan mei leh chemtê a keng a, an pahni chuan an kal dîn ta a.

⁷Isaaka chuan a pa Abrahama hnênah, “Ka pa!” a ti a. Ani chuan, “Ka fapa, heta hi ka awm e,” a ti a. Ani chuan, “En teh, mei leh thing chu a awm a, mahse hâlral thilhlân tûr berâm no chu khawiah nge?” a ti a.

⁸Abrahama chuan, “Ka fapa, Pathian chuan hâlral atâna hlan tûr berâm no chu arawn pe mai dâwn alâwm,” a ti a. An pahni chuan an kal dîn zêl a.

⁹Tichuan, Pathianin a lo hrilhna hmun chu an va thleng a. Chutah chuan Abrahama chuan maichâm a siam a, thing chu a chhep khâwm a; a fapa Isaaka chu a phuar a, maichâma thing chungah chuan a muttîr ta a.

¹⁰Abrahama chuan a kutin a han ban a, a fapa that tûrin chemtê chu a lâ a.

¹¹Nimahsela, vân ațangin LALPA Vântirhkohvin, “Abraham, Abraham!” tiin arawn âu va. Ani chuan, “Heta hi ka awm e,” a ti a.

¹²Ani chuan, “Naupang chungah khân i kut thlâk suh la, engtin mah ti suh; i fapa, i fapa neihchhun ngei pawh keima tân i pêk phal avângin, Pathian i țih takzet tih ka hre ta e,” a ti a.

¹³Abrahama chu a lo dâk chhuak a, a han hawi vêl a, a hnung lamah chuan berâmpa, hling buk zînga a ki tâng reng hi a va hmu a. Tichuan, Abrahama chu a va kal a, berâmpa chu a va kai a, a fapa aiah hâlral thilhlânah a hlân ta a.

¹⁴Abrahama chuan chû hmun hming chu Jehova-Jireh tiin a vuah a; chû chu tûn thlengin, “LALPA Tlângah pêk a ni ang chu,” an ti ta zêl a ni.

¹⁵LALPA Vântirhkoh chuan Abrahama chu vân ațangin arawn ko nawn leh a.

¹⁶“I fapa, i fapa neihchhun pawh ui lova hê thil i tih tâk avâng hian keima’n chhia ka chham ta e—

¹⁷Malsâwmnain ka vûr ngei ngei ang che a, i thlahte pawh vâna arsi ang mai leh tuipui kama vaivut ang maia tamin ka tipung ang a; i thlahte chuan an hmêlmâte kulh kawngkâ an la neihsak ang.

¹⁸Ka thû i âwih tâk avângin, i chithlah ațangin leia hnam tinin malsâwmna an la dawng ang,” a ti a.

¹⁹Abrahama chu a tlangvâlte awmna lamah chuan a kîr leh a, an tho va, Beerseba-ah an hâu tlâng leh ta a; Abrahama chu Beerseba-ah chuan a chêng ta reng a.

NAHORA CHHÛNGKUA

²⁰Chûng thil hnûah chuan Abrahama hnênah chuan miten, “Milkai pawhin i unaupa Nahora tân fate a hrinsak ta tih thu an hrilh a:

²¹A fatirah Huza, a nau Buza, Arama pa Kemuela te,

²²Chezeda te, Hazoa te, Pildasa te, Jidlapa leh Bethuela te an ni a,” tiin.

²³Bethuela chuan Rebeki a hring a. Hêng mi pariatte hi Abrahama nau Nahora tâna Milkain a hrinsak te an ni.

²⁴A hmeinu Reumai pawhin Teba te, Gahama te, Thahasa te leh Maaka te a hring baw k a.

BUNG 23

SARI A THI A, AN PHÛM

¹Sari chu kum zâ leh sawmnhnîh pasarih a dam a; chuti chen chu Sari dam hun chhûng chu a ni a.

²Tichuan, Sari chu Kanaan rama Kirjath-Arba (Hebron an tih)-ah chuan a thi a, Abrahama chu amah sîn tûr leh țah tûrin a lo kal a.

³Abrahama chu ruang bulah chuan a lo ding chhuak a, Hetha fapate hnênah,

⁴“Kei hi ram dang mi, in zînga rawn mikhual mai kan ni a. Hê kan mitthi ruang phûmna tûrin hmun min pe rawh u,” a ti a.

⁵Hetha fapate chuan Abrahama chu an chhâng a,

⁶“Ka pu, min lo ngaithla teh: Nang chu kan zînga lal chak tak i ni a; i mitthi ruang chu kan thlanmuala i duhna lai berah hian phûm ang che. I mitthi ruang phûm nân, tûma’n an thlanmual an ui lo vang,” an ti a.

⁷Abrahama chu a lo ding a, Hetha fapate leh chû rama mite chu kûnin chibai a bûk a.

⁸An hnênah chuan, “Min lo ngaithla teh u, ka mitthi ruang phûm bo rem min tihsak chuan, Zohara fapa Ephrona hi min biaksak rawh u,

⁹a thlawhmma kianga awm Makpela pûk a neih lai chu min pêk phal theih nân. Tichuan, in zîngah thlanmual ram ni vê tûrin, a man pawh a chhiar ang chu a kimin ka lo pe ang e,” a ti a.

¹⁰Ephrona chu Hetha thlahte zînga khawsa vê a ni a; Hit mi Ephrona chuan Hetha fapate leh, an khaw kulh kawngkaa lût zawng zawngte hmâah chuan Abrahamama chu a chhâng a,

¹¹“Ka pu, lei lo ve, min lo ngaithla la: ram leh a chhûnga pûk pawh chu ka pe zâwk ang che; ka mite mithmuh lai ngei hian ka pe ngêl a che. I miruang phûm nân chuan hmang mawlh ang che!” a ti a.

¹²Abrahama chuan chû rama mite chu kûnin chibai a bûk a;

¹³chû rama mite hriatah chuan Ephrona chu a bia a, “Min pe phal dâwn a nih chuan, hei hi lo hria ang che. Ram leina man chu ka pê ang che a, min dawnsak la, tichuan ka miruang chu ka phûm ang e,” a ti a.

¹⁴Ephrona chuan Abrahamama chu a chhâng a,

¹⁵“Ka pu, min lo ngaithla teh: a ram hlut zawng chu tangkaraw tlang zali a ni. Nang leh keia inkârah hian a man sawi tûr em ni le? I mi ruang chu phûm mai rawh,” a ti a.

¹⁶Abrahama chuan Ephrona thu sawi chu a hria a; Abrahamama chuan Ephrona tân tangkarua chu a bûk chhuahsak a, Hetha fapate mithmuhah chuan sumdâwngho tangka bûk dânin tangkaraw tlang zali chu a pe ta a.

¹⁷Tichuan, Ephrona ram Makpela hmuna mi, Mamre thlen hmâ lawka awm chu, a ram nê, pûk nê, a ram chhûnga thing zawng zawng, a ramriin a huam phâk chin zawnga mite nêna insiam remin

¹⁸Hetha fapate leh khawpui kawngkaa lût zawng zawngte hriatpuiin Abrahamama ta a lo ni ta a.

¹⁹Chumi hnû chuan Abrahaman a nupui Sari chu Kanaan rama Mamre (Hebron an tih) thlen hmâ, Makpela lova pûkah chuan a phûm ta a.

²⁰Tichuan, ram leh a chhûnga pûk chu thlân hmun atân Abrahamama chuan Hetha fapate hnên aţangin a nei hlen ta a ni.

BUNG 24

ISAACA TÂN NUPUI

¹Abrahama chu a lo upain, a lo tar ta hlê a; LALPA chuan Abrahamama chu kawng engkimah mal a sâwm a.

²Chutichuan, a in chhûnga chhiahhlawh zînga upa ber, a neih zawng zawng chung a thuneitu ber hnênah chuan, “Khawngaihni i kut kha ka malpui hnuaiah hian rawlh teh le;

³tichuan, LALPA, vân Pathian leh lei Pathian hming chhâlin, hê ka chênna Kanaan nulate hi ka fapa nupui atan neihsak hauh lo tûrin chhia ka chhamtîr ang che;

⁴ka pianna ram leh ka laichînte hnênah kal la, ka fapa Isaaka tân nupui neihsak zâwk ang che,” a ti a.

⁵Chhiahhlawh chuan, “Chû hmeichhia chuan hê ramah hian mi zui hâu duh lo ta sela, i lo chhuahna ramah chuan i fapa hi ka hruai kîr leh mai dâwn em ni ang?” a ti a.

⁶Abrahama chuan, “Ka fapa hi chû hmuna hruai kîr leh hauh lo tûrin fimkhur hle ang che.

⁷LALPA vân Pathian, ka pa in leh ka laichînte ram aţanga mi hruai chhuaktu, keimah ngei mi biaa, ka hnêna chhechham meuhva, ‘I thlahte tân hê ram hi ka pê a che,’ titu chuan, a Vântirhkoh chu i hmâah a tîr ang a, chû hmun aţang chuan ka fapa tân nupui i neihsak ngei tûr a ni.

⁸Chû hmeichhia chuan a zui duh lo che a nih chuan, hê chhechhamna aţang hian i fihlîm a ni ang; ka fapa hi chû hmunah chuan hruai kîr hauh suh ang che,” a ti a.

⁹Tichuan, chhiahhlawh chuan a pu Abrahamama malpui hnuaiah chuan a kut a rawlh a, chû thilah chuan chhia a chham ta a.

¹⁰Chhiahhlawh chuan a pu sanghâwngsei zînga sâwm chu a hruai a, a kal ta a, a pu thil neih rêng rêng chu a kuta awm vek a ni a. Tichuan a tho va, Nahora awmna khua, Mesopotamia ramah chuan a kal ta a.

¹¹Tlai lam a ni a, tui chawi tûra hmeichhiate lo chhuah hun laiin, khaw daia tuichhunchhuah bulah chuan a sanghâwngseite chu a bawhtîr a.

¹²Ani chuan, “Aw LALPA, ka pu Abrahamama Pathian, khawngaih takin waviinah hian mi hlawhtlîntîr la, ka pu Abrahamama chungah ngilneihna lantîr ang che.

¹³Hei le, tuikhur bulah ka dîng a, khuaa nulahote chu tui chawi tûrin an lo kal chhuak ta e.

¹⁴Tûnah hian nula hnêna ka sawia, ‘Khawngaih takin i tuibêla tui ka in theih nân han chawi hniam teh,’ ka tiha, ‘In ta che, i sanghâwngseite pawh hi tui ka pê ang e,’ titu chu, i chhiahhlawh Isaaka tâna i ruat ni rawh se. Tichuan, ka pu chungah ngilneihna i lantîr ngei tih ka hre thei dâwn nia,” a ti a.

¹⁵Chû thû a sawi zawh hmâ chuan, Abrahamama nau Nahora nupui Milkai fapa Bethuela fanu Rebeki chu a kokia tuibêl pûin a lo kal a.

¹⁶Chû nula chu a hmelţha hlê mai a; mipa tûmahin an la pâwl loh, nula thianghlim a ni. Tuikhurah chuan a zu chhuk a, a tuibêl a tikhat a, a lo chho leh a.

¹⁷Amah tâwk tûrin chhiahhlawh chu a tlân a, a hnênah, “Khawngaih takin i tuibêla tui kha mi intîr ta che,” a ti a.

¹⁸Ani chuan, “In ta che, ka pu,” a ti a. A tuibêl chu a kutin a la thla ngêl a, tui chu a intîr ta a.

¹⁹Chutia tui a intîr zawh chuan, “I sanghâwngseite tân pawh hian duh tâwka an in tûrin tui ka thâlsak ang e,” a ti a.

²⁰Tuibêla tui chu tuikuangah chuan a bun ruak thuai a, tuikhurah chuan tui chawi tûrin a tlân kîr leh a, a sanghâwngsei zawng zawng in tûr pawh a châwisak ta a.

²¹Chû pa chuan mak ti takin, LALPAN a va zin chhan a tihhlawhtlînsak ta a ni nge ni lo tih ngaihtuahin, ngâwi rengin a lo thlîr a.

²²Tichuan, sanghâwngseiten tui an in zawh chuan, chû pa chuan rangkachak hnâr vuah, sekel chanvea rit leh, rangkachak ngûn pahnih sekel sâwma rit a phawrh chhuak a,

²³“Tû fanu nge i nih? Khawngaih takin min hrilh rawh, i pa inah chuan kan tân thlenna tûr hmun a awm ang em?” a ti a.

²⁴Ani chuan, “Milkain Nahora fapa a hrinsak Bethuela fanu ka ni e,” a ti a.

²⁵“Buhpâwl leh ran chaw pawh duh tâwka ei tûr kan nei a, riahna tûr hmun pawh kan nei asin,” tiin a hrilh a.

²⁶Tichuan, chu mi chuan a lu kûnin LALPA chu chibai a bûk ta a.

²⁷“LALPA ka pu Abrahama Pathian chu fakin awm rawh se, ka pu laka a zahngaihna leh a thutak chu a danglam ngai si lo va. Kei pawh ka kalna tûrah hian ka pu chhûngte inah min hruai a lo nih reng hi,” a ti a.

²⁸Tichuan, nula chû a tlân a, chûng thûte chu a nu chhûngte a va hrilh a.

²⁹Rebeki chuan nuṭa a nei a, a hming chu Labana a ni a, Labana chu chû mî awmna tuikhur lam pan chuan a tlân chhuak a.

³⁰A farnu hnâr vuah te, a bâna ngûn a bun te a hmuha, a farnu Rebekin, “Chû pa chuan chutiang chuan min bia a,” tia a sawi a lo hriat chuan, chû pa hnênah chuan a kal ta a ni. Ani chu tuikhur bula sanghâwngsei rual awmnaah chuan a lo la ding reng a.

³¹Ani chuan, “Nang, LALPA duh lai, lo kal rawh le! Engah nge pâwnah i din reng? I riahna tûr in leh sanghâwngsei awmna tûr hmun ka buatsaih dîam tawh asin,” a va ti a.

³²Tichuan, ani chuan in chu a lo thleng ta a. Labana chuan sanghawngsei phurte chu a hlâng thla a, buhpâwlte chu sanghâwngseiho ei tûrin a pê a, amah leh a kalpuite ke sil nân tui a pe baw a.

³³A ei tûr chaw an rawn hlui a; mahse ani chuan, “Ka rawn kal chhan ka sawi hmâ chuan ka ei lo vang,” a ti a. Ani chuan, “Sawi ta che,” a ti a.

³⁴Ani chuan, “Kei hi Abrahama chhiahhlawh ka ni a.

³⁵LALPA chuan ka pu chu nasa takin malsâwmnain a vûr a, a lo ropui ta hle a; berâm leh bawng rual te, tangka leh rangkachak te, chhiahhlawh mipa leh hmeichhia te, sanghâwngsei leh sabengtung te a pe ṭeuh va.

³⁶Ka pu nupui Sari chuan a tar hnûin ka pu tân fapa a hrinsak a; a kutah chuan a thil neih zawng zawng chu a hlân vek a.

³⁷Ka pu chuan, “Hê ka chênna rama Kanaan nulate hi ka fapa nupui atân i neihsak tûr a ni lo;

³⁸ka pa chhûngte leh ka laichînte hnênah i kal ang a, ka fapa tân nupui i neihsak tûr a ni,’ tiin chhia mi chhamtîr a.

³⁹Kei chuan ka pu hnênah chuan, ‘Chû nula chuan min zui duh ta lo sela,’ ka ti a.

⁴⁰Ani chuan, ‘A hnung ka zui LALPAN nangmah kalpui tûrin a Vântirrhkoh a tîr ang a, tluang takin a hruai ang che; chuvângin ka laichînte leh ka pa chhûngte zînga mi ka fapa tân nupui i hmuhsak ngei ang.

⁴¹Ka laichînte hnên i thlen phawt chuan hê chhechhamna aṭang hian i thiang tawh ang; nupui tûr an pe lo che a nih chuan, ka hnêna i chhechhamna aṭang hian i fihlîm baw ang,’ a ti a.

⁴²“Vawîina tuikhur bul ka lo thlen khân, ‘Aw LALPA, ka pu Abrahama Pathian, ka kal chhan mi tihhlawhtlinsak ang che,

⁴³ngai teh, tuikhur bulah hian ka lo ding ang a; tui chawî tûra nula thianghlim a lo kal hunah, “Khawngaih takin i tuibêla mi kha tui tlêm mi lo intîr ta che,” ka tiha,

⁴⁴ani chuan, “In ta che, i sanghâwngseite tân pawh tui ka chawisak ang e,” titu chu - chû hmeichhia chu ka pu fapa tâna LALPA ruat ngei lo ni rawh se,’ ka ti a.

⁴⁵“Chû thû chu ka rilrûa ka sawi zawh hmâin Rebeki hi tuibêl pûin a lo kal a; tuikhura tui chu a chawî a. A hnênah, ‘Khawngaih takin tui mi intîr rawh,’ ka ti a.

⁴⁶“A tuibêl put chu a ngat thuai a, ‘In ta che, i sanghâwngseite in tûr pawh ka pê ang e,’ a ti a. Tichuan ka in a, sanghâwngseite pawh a intîr baw a.

⁴⁷A hnênah, “Tû fanu nge i nih?’ tiin ka zâwt a. Ani chuan, ‘Nahora tâna Milkain a hrinsak Bethuela fanu ka ni e,’ a ti a. Tichuan, bengbeh te behtîrin, a bânah ngûn te ka buntîr ta a ni.

⁴⁸Ka lu kûnin LALPA chu chibai ka bûk a; ka pu nau fanu ngei chu ka pu fapa atâna nei tûra, kawng dik taka mi hruaitu LALPA, ka pu Abrahama Pathian chu ka fak baw a.

⁴⁹Tichuan, ka pu chungah zah in ngaiha, tihtak zeta rem in ti a nih chuan, min hrilh ula. In remti lo a nih pawhin, ding lam emaw, vei lam emaw ka hawi theih nân min hrilh rawh u,” a ti a.

⁵⁰Labana leh Bethuela te chuan an chhâng a, “Hei hi LALPA tih a nih ngei hi; keini zawng duh leh duh loh sawi thei pawh kan nih loh chu.

⁵¹Hei, Rebeki chu a awm alâwm; hruai la, kalpui mai rawh, LALPAN a lo sawi tawh ang chuan, i pu fapaa nupuiah chuan nei ang che,” an ti a.

⁵²Abrahama chhiahhlawhin chûng thû chu a lo hriat chuan, lei sîa kûnin LALPA chu chibai a bûk a.

⁵³Chhiahhlawh chuan tangkâ te, rangkachak incheina te, silhfên te a phawrh chhuak a, Rebeki chu a pe ta a. A nuṭa leh a nu pawh thil hlu tak tak a pe baw a.

⁵⁴Tichuan, amah leh a ṭhuihruaite chuan an eiin an in a, zânah chuan an riak ta a. A tûk zîngah chuan an tho va, “Ka pu hnênah min kaltîr tawh rawh u le,” a ti a.

⁵⁵Mahse, a nuṭa leh a nu chuan, “Mâmbawihî hi ni rei lo tê, ni sâwm tal kan hnênah la awm rih se; chumi hnu chuan a kal tawh dâwn nia,” an ti a.

⁵⁶Ani chuan, “LALPAN tluang taka mi hruai lai hian, min lo tikhawtlai lo hrâm ula; ka pu hnênah chuan min kaltîr tawh mai rawh u,” a ti a.

⁵⁷Anni chuan, “Chuti chu Mâmbawihî hi kan ko ang a, amah kan zâwt ve phawt ang e,” an ti a.

⁵⁸Rebeki chu an ko va, a hnênah, “Hê mi hnênah hian i kal duh em?” an ti a. Ani chuan, “Duh mai ang chu,” a lo ti a.

⁵⁹Tichuan, an farnu Rebeki chu amah enkawltunu nêh, Abrahamah chhiahhlawh leh a thuihruaite nêh chuan an kaltîr ta a.

⁶⁰Rebeki chu tihian mal an sâwm a: “Kan farnu, nang chu A sînga sîng têl nu lo ni la; I thlahte chuan anmahni hawtute kulh kawngka chu neihsak rawh se,” an ti a.

⁶¹Tichuan Rebeki leh a enkawltunu chu an tho va, sanghâwngsei chungah chuan an chuang a, chu mi chu an zui chhuak a. Chhiahhlawh chuan Rebeki chu a hruai a, an kal ta a.

⁶²Chhim lama chêng an nih avângin chutih lai chuan Isaaka chu Beer Lahai Roi kawng lamah chuan a lo kal a.

⁶³Tlaiah chuan Isaaka chu fianrial hun hmangin dai pâwnah a kal chhuak a; a han hawi vêl a, râlkhata sanghâwngsei lo kalte chu a hmu a.

⁶⁴Rebeki chu a han dâk chhuak a, Isaaka a han hmuh chuan sanghâwngsei aţang chuan a chhuk a;

⁶⁵chhiahhlawh hnênah, “Min tâwk târa lo kal saw tu nge ni?” tiin a lo zâwt a. Chhiahhlawh chuan, “Ka pu a nih saw,” tiin a hrilh a. Tichuan, a hmai khuhna chuan a inkhuh ta a.

⁶⁶Chhiahhlawh chuan thil a va tihdân zawnzawng chu Isaaka hnênah chuan a hrilh vek a.

⁶⁷Isaaka chuan Rebeki chu a nu Sari puan inah chuan a hruai lût a; tichuan, a nupui a lo ni ta a, a hmangaih êm êm a: a nu thih khawhar laia Isaaka hnêmtu a lo ni ta a.

BUNG 25

ABRAHAMA LEH KETURI

¹Abrahamah chuan nupui a nei leh a, a hming chu Keturi a ni.

²Ani chuan Zimrana te, Joksana te, Medana te, Midiana te, Isbaka leh Suaa te a hring a.

³Joksana chuan Seba leh Dedana te a hring a. Dedana fate chu Asurima te, Letusima leh Leumima te an ni.

⁴Midiana fate chu Ephaha te, Ephera te, Hanoka te, Abidaa leh Eldaa te an ni. Chûngte chu Keturi fate an ni a.

⁵Abrahamah chuan a neih zawnzawng chu Isaaka hnênah a pe vek a.

⁶Abrahamah chuan a hmei fateho pawh thilpêk a pe theuh va; a dam lai ngeiin khawchhak lamah, a fapa Isaaka awmna atanga chhak lam ram hla takah a kaltîr hlawn a.

ABRAHAMA THIH LEH PHÛM THÛ

⁷Abrahamah dam chhûng zawnzawng chu kum zâ leh sawmsarih panga a ni a.

⁸Tichuan, Abrahamah chu tar tak, kum upa tak niin a thi a, a mite hnênah hruai a ni ta a.

⁹A fapa Isaaka leh Ismaela te chuan Mamre bula Makpela pûk, Hit mi Zohara fapa Ephrona ramah chuan an phûm ta a,

¹⁰chû hmun chu Abrahaman Hetha fapate hnêna mi a lei kha a ni a. Chutah chuan Abrahamah chu a nupui Sari nêh chuan an phûm ta a ni.

¹¹Abrahamah thih hnû chuan Pathianin Isaaka chu malsâwmnain a vûr a. Isaaka chu Beer Lahai Roi-ah chuan a awm

reng a.

ISMAELA LEH ISAACA TE CHHÛNGKUA

¹²Hêngte hi Abrahamah fapa Ismaela, Sari chhiahhlawnu Hagarin Abrahamah a hrinsaka thlahte chu an ni.

¹³Hêng hi Ismaela fapate hming a ni a, an inthlahchhâwnna hming an put chu a ni: Ismaela fa u ber chu Nebaiota a ni a; a dawtah Kedara, Adbeela, Mibsama,

¹⁴Misma, Duma, Massa,

¹⁵Hadara, Tema, Jetura, Naphisa leh Kedema te an ni.

¹⁶Hêngte hi Ismaela fapate hming chu a ni a, an chênna khua leh an awmna hmun ang zêlin, anmahni chí ang zêlin lal sâwm leh pahni an awm a.

¹⁷Ismaela dam chhûng kum chu heti zat hi a ni: kum zâ leh sawmthum pasarih a ni a; a hnuk a chat a, a thi a, ama mite hnênah hruai a ni ta a.

¹⁸(An chênna chu Havila aţanga Sur thlengin a ni a, chu chu Assuria lam pana kal chuan Aigupta chhak lam a ni). A thih laiin a unaute zawnzawng pawh an awm vek a ni.

¹⁹Abrahamah fapa Isaaka thlahte chanchin chu hei hi a ni. Abrahaman Isaaka a hring a.

²⁰Isaaka chuan kum sawmli mi a nihin, Padan Arama Suria mi Bethuela fanu, Suria mi Labana farnu Rebeki chu nupuih a nei a.

²¹A nupui a chin avângin Isaaka chuan LALPA hnênah a dîlsak a; LALPA chuan a dîlna chu a lo pawmsak a, a nupui Rebeki chuan nau a pâi ta a.

²²Nimahsela, a pum chhûnga naute te chu an insual a; “Engkim a tha vek a nih si chuan, engvângin nge hetiana ka awm le?” a ti a. LALPA zâwt tûrin a kal ta a.

²³LALPA chuan a hnênah: “I chhûlah hnam chi hnih an awm a, I pum chhûng aţangin mi chi hnih an inţhen ang; Chi khat chu a dang aiin a la chak zâwk ang a, A û zawnzawng a bawl ang,” a ti a.

²⁴Tichuan, nau hrin a lo hun chuan, a chhûlah chuan phîr an lo awm tak tak hi a lo ni a.

²⁵A piang hmasa zâwk chu a sen thur mai a. Sahmul puan anga hmul dur mai hi a ni a; a hmingah Esauva an sa a.

²⁶Chumi hnû chuan a nau a lo chhuak vê a, a kut chuan Esauva ke artui a vuan a; a hmingah Jakoba an sa a. Nau an lo pian lai chuan Isaaka chu kum sawmruka upa a ni a.

²⁷Naupangte chu an lo ţhang lian a. Esauva chu sapêl thiam, ramvachal a ni a; Jakoba erawh chu mi zaidam, in lama che tla mi a ni.

²⁸Isaaka chuan a sa kah sâ a ei thîn avângin Esauva chu a ngaina hle a, Rebeki erawh chuan Jakoba chu a vohbîk hlê thung a.

ESAUVA A FATÎR NIHNA A HRALH

²⁹Jakoba chuan ei tûr a chhûm a; Esauva chu ram aţangin a lo hâu a, a chau hle a.

³⁰Esauva chuan Jakoba hnênah, “Ka rilţâm êm mai, i thil sen chhum kha khawngaih takin mi lo eitîr teh,” a ti a. Chuvâng chuan

a hmingah Edoma an ti ta a ni.

³¹Jakoba chuan, “Vawina fatir i nihna hian lei ta che,” a ti a.

³²Esauva chuan, “En teh, ka thi têt a ni mai si a; fatir nihna chu eng atân nge ka tih ang?” a ti a.

³³Jakoba chuan, “Tûnah chhia chu chham rawh le,” a ti a. Tichuan, chhia a chham ta a, a fatir nihna chu Jakoba hnênah chuan a hralh ta a.

³⁴Jakoba chuan châw leh a chawhmeh chhum chu a pê a; ani chuan a eiin a in a; tichuan a tho va, a kal ta a. Chutiang chuan Esauva chuan a fatir nihna chu a ngainêp a ni.

BUNG 26

ISAAKA LEH ABIMELEKA

¹Abrahama dam laia tàm tla hmasa bâkah, chû ramah chuan tàm a lo tla leh a. Isaaka chu Gerar khuaa Philistia lal Abimeleka hnênah a zuk kal a.

²LALPA chu a hnênah arawn inlâr a: “Aigupta ramah chuan chhuk thla suh; ka la hrilh tûr che ramah awm zâwk rawh.

³Hê ramah hian awm la, i hnênah ka awm ang a, mal ka sâwm zêl ang che; nang leh i thlahte tân hê ram pum hi ka pê a, i pa Abrahama hnêna chhechhama ka lo tiam tawh chu ka hlen ngei ang.

⁴I thlahte chu vâna arsi ang maia tamin ka tipung dâwn a; hêng ram zawnzawng hi i thlahte tân ka pe baw ang; i thlahah chuan leia hnam zawnzawngten malsâwmna an la dawng ang;

⁵Abrahaman ka âw a ngaithla a, ka thute a zâwm a, ka thupêk te, ka thuruat te, ka dân te a zawnzawng khân,” a ti a.

⁶Isaaka chu Gerar-ah chuan a awm ta a.

⁷Chû hmuna mite chuan a nupui chungchâng chu an zâwt a. Ani chuan, “Ka farnu a ni,” a ti a; a nupui chu a hmêltha si a, chû hmuna mite chuan Rebeki avâng a an thah mai a hlauh avângin “Ka nupui a ni,” a ti ngam lo va.

⁸Chû hmuna rei tak a awm hnûah chuan, Philistia lal Abimeleka chuan tukverh aţangin a han thlir a, duat taka Isaakan a nupui Rebeki a chûl lai chu a va hmu a.

⁹Abimeleka chuan Isaaka chu a ko va, “I nupui a ni tih a Chiang reng si a; engah nge ‘Ka farnu a ni,’ te i tih mai? a ti a. Isaaka chuan, “Chutia ka tihchhan chu, ‘Amah vâng hian ka thi palh dah ang e,’ ka tih vâng a ni,” a ti a.

¹⁰Abimeleka chuan, “Kan chungah hian eng thil nge i tih tâk? Kan zînga mi tuemaw hian i nupui hi lo mutpui palh ta sela, thiamloh changin min siam dêr dâwn asin,” a ti a.

¹¹Abimeleka chuan, “Hê mi leh a nupui khawihu apiang chu tihhlum an ni ang,” tiin a mite zawnzawng chu thû a pe ta a.

¹²Isaaka chuan chû ramah chuan buhchî a tuh a, chumi kum vêk chuan a leh zâ buh a thar a; LALPAN mal a sâwm a.

¹³Ani chu a hmuangil chho zêl a, mi hausa nih tling khawpin a hausakna chu a lo pung nasa ta a;

¹⁴berâm rual te, bâwnz rual te leh chhiahhlawh tam tak nêna a kâwi duah duah a. Philistia mite chuan an itsik ta hlê a.

¹⁵Philistia mite chuan a pa Abrahama dam laia a chhiahhlawhten tuichhunchhuah an laih zawnzawngte chu an chhilh a, leiin an hnawhsak ta vek a.

¹⁶Abimeleka chuan Isaaka hnênah, “Keini aiin in chak tawh êm mai, kan hnên ata kal bo mai teh u,” a ti a.

¹⁷Isaaka chu chuta tâng chuan a insawn a, Gerar Ruamah puan in a kaih a, chutah chuan awmhmun a khuar ta a.

¹⁸Isaaka chuan a pa Abrahama dam laia tuichhunchhuah an laih, Abrahama thih hnua Philistia miten an chhilh phui sak tuichhunchhuahte chu a hai chhuak leh a. Chûngte chu a pain a lo vuah tawh hming vêk kha a puttir zêl a.

¹⁹Isaaka chhiahhlawhte chuan ruamah chuan lei an lai a, tui hna luang lai an hai chhuak nghe nghe a.

²⁰Nimahsela, Gerar khaw ranpûte chuan Isaaka ranpûte chu an tibuai a, “Tui hi kan ta a ni,” tiin an chuh a. Chutianga an chuh buai avâng chuan, tuichhunchhuah hming chu Esek tih hming a puttir a.

²¹Tuichhunchhuah dang an lai leh a, chu pawh chu an chuh buai leh zêl a. Chuvângin, a hmingah Sitna a puttir a.

²²Chû hmun aţang chuan a insawn a, tuichhunchhuah dang a lai leh a, an chuh buai ta lo va. Tichuan, a hmingah Rehoboth a puttir a, “Tûnah chuan LALPAN hmun min pe ta a, hê ramah hian chî kan thlah pung thei tawh ang,” a ti a ni.

²³Chuta tâng chuan Beerseba-ah a insawn chho leh a.

²⁴Chumi zân chuan a hnênah LALPA arawn inlâr a, “I pa Abrahama Pathian ka nih hi; ka awmpui zêl che a, chuvângin hlauh suh ang che. Ka chhiahhlawh Abrahama avângin mal ka sâwm zêl ang che a, i thlahte pawh ka tipung nasa dâwn a ni,” a ti a.

²⁵Chû hmunah chuan maichâm a siam a, LALPA chu a hmingin a au va, puan in pawh chutah chuan a kaih a; chû hmunah chuan Isaaka chhiahhlawhte chuan tuichhunchhuah an lai a.

²⁶Chumi hnûah chuan Abimeleka chu a thianta zînga mi pakhat Ahuzata leh a sipai hotu Phikola te nêna Gerar aţangin Isaaka hnênah an lo kal a.

²⁷Isaaka chuan an hnênah, “Eng vâng ka hnêna lo kal nge in nih, min hua a, in hnên aţangin min hnawt chhuak a ni lo vem ni?” a lo ti a.

²⁸Anni chuan, “LALPAN a awmpui che tih Chiang takin kan hmu tawh a. ‘Chuvângin nang leh keini inkârah hian intiamkamna awm sela; nangmah nêna hian inremna thu i thlung ang u,’ kan ti a ni;

²⁹tichuan, i pawh rêng rêng kan khawih lo ang hian, kan pawh i sawi bik lo vang a; chuvâng chuan i thâtna tûr thil chauh ngaihtuahin, engmah buaina pawh siam lovin kan kaltir che a nih kha. Tûnah hian LALPA malsâwm dawng lai i ni si a,” an ti a.

³⁰Tichuan, ruai a buatsaihsak a, an eiin an in ho ta a.

³¹Atûk zîngah chuan an tho va, chhechhamin thu an intiam tawn a; tichuan, Isaaka chuan a kaltir a, ngaihngam takin an inthathên ta a.

³²Chumi nî tak chuan Isaaka chhiahhlawhte chu a hnênah an lo kal a, tuichhunchhuah an laih chungchâng sawiîn, “Tui hnâ kan hmu ta,” an ti a.

³³Chû tui chu Seba a ti a. Chuvângin chû khaw hming chu tûn thlengin Beerseba an ti ta a ni.

³⁴Esauva chu kum sawmlia upa a nihin, Hit Beeria fanu Judithi leh, Hit mi Elona fanu Basemathi te chu nupuiah a nei a.

³⁵Chûng mite chu Isaaka leh Rebeki te rilru tihah tu an ni ta a.

BUNG 27

ISAAKAN JAKOBA MAL A SÂWM

¹Isaaka chu a lo upain, a mitin khua a hmu fiah thei ta lo va, a fapa û zâwk Esauva chu a ko va, “Ka fapa,” a ti a. Ani chuan, “Êih-ah, heta hi ka awm e,” tiin a lo chhâng a.

²Ani chuan, “Hei le, ka tar tawh si a; ka thih hun tûr pawh ka hre lo va.

³Chuvângin, i hriamhreite la chhuak la, i thal bâwm leh i thal ngul kengin va ramchhuak la, sâ mi va kaksak ta che.

⁴Ka tui tihzâwng takin i siam ang a, ka ei tûrîn mi rawn chhawpsak dâwn nia, tichuan ka thih hmain malsâwmna ka lo hlân ang che,” a ti a.

⁵Isaaka’n a fapa Esauva a hrilh lai chu Rebeki chuan a lo ngaithla reng a. Esauva chu sa pêl tûr chuan ram lamah a kal chhuak ta a.

⁶Tichuan, Rebeki chuan a fapa Jakoba hnênah, “I pain i û Esauva hnênah heti hian a ti a,

⁷Sâ va kâp la, ka tui tihzâwng takin han siam la, ka thih hma ngei hian LALPA hmâah mal ka sâwm ang che,” a ti a ni.

⁸“Chuvângin ka fapa, ka thu âwih la, ka sawi ang hian ti ang che.

⁹Ran rual zîngah va kal la, kêl tuai thau tha tha pahni mi va laksak la; i pa tui tihzâwng takin ka lo siam ang e.

¹⁰Tichuan, i pa ei tûrîn i va hlui ang a, anin a lo eia, a thih hma ngeia mal a lo sâwm theihna tûr chein,” a ti a.

¹¹Jakoba chuan a nu Rebeki hnênah, “Ngâwi teh, ka û Esauva chu hmul ngah tak a ni a, kei lah vun mâm chi ka ni baw si a.

¹²Ka pa chuan min lo dap vêl ta hlauh se, amah bumtu mai ka ni dâwn a; malsâwmna ni lovin, ânhhia ka khum hlauh mai thei asin,” a ti a.

¹³Mahse a nu chuan, “Ka fapa, i ânhhia chu ka chungah tla zawk rawh se; ka thû chu âwih mai rawh; kal la, mi va lâksak mai teh,” a ti a.

¹⁴Tichuan, a va kal a, a va man a, a nu hnênah chuan a rawn thlen a; a nu chuan a pa tui tihzâwng takin a siam ta a.

¹⁵Rebeki chuan a fa û zâwk Esauva kawr tha ber, inchhûnga a kaw lai chu a lâ a, a fapa naupang zâwk Jakoba chu a haktîr a.

¹⁶A kut bâwr vêl leh a nghawng mâm lai te chu kêl vunin a tuam sak a.

¹⁷Chû sa tui hmêl deuh leh a chaw siam sâ chu a fapa Jakoba kutah chuan a hlân a.

¹⁸Tichuan, a pa hnênah a kalpui a, “Ka pa,” a ti a. Ani chuan, “Heta hi ka awm. Ka fapa tû zâwk nge i nih?” a lo ti a.

¹⁹Jakoba chuan a pa hnênah, “I fatîr Esauva ka ni e; mi hrilh ang khân ka ti e; khawngaihin tho la, thû la, ka sa kah sâ hi ei rawh; tichuan, mal mi sâwm ang che,” a ti a.

²⁰Nimahsela, Isaaka chuan a fapa hnênah, “Engtin nge heti taka i rawn peih hmâ theih le, ka fapa?” a ti a. Ani chuan, “LALPA i Pathianin min tihsak vâng a ni,” a ti a.

²¹Isaaka chuan Jakoba hnênah, “Ka fapa, khawngaihin lo hnai teh, ka fapa Esauva i ni chiah em ka lo dap vêl ang che,” a ti a.

²²Tichuan, Jakoba chu a pa Isaaka bulah chuan a va kal hnai a, ani chuan a lo dap vêl a, “A âw chu Jakoba âw a ni a, a kutte erawh chu Esauva kut a ni baw si,” a ti a.

²³A kutte chu Esauva kut ang maiin a hmul vek si a, a hre hrang thei ta lo va; tichuan mal a sâwm ta a.

²⁴“Ka fapa Esauva i ni meuh maw?” a ti leh a. Ani chuan, “Ni e,” a ti a.

²⁵Ani chuan, “Rawn la rawh le, ka fapa sa kah sâ chu ka lo ei ang e, tichuan mal ka sâwm dâwn che nia,” a ti a. Tichuan, a bulah chuan a va hlui a, ani chuan a lo ei a; uain a rawn lâk chu a in baw a.

²⁶Chumi zawhah chuan a pa Isaaka chuan, “Ka fapa, mi rawn hnaih la, mi fâwp rawh le,” a ti a.

²⁷Ani chuan a va hnaih a, a fâwp a; a thawmhnaw hâk rim chu a lo hnîm vang vang a, tihian mal a sâwm ta a: “Ni chiah mai, ka fapa rim chuan LALPA malsâwm ram rim a nam e.

²⁸Chuvângin, Pathianin Vên daifim te, Lei hausaknate, Buh leh uain nêl vûr che rawh se.

²⁹Mi tinin i rawng bâwl sela, Hnam tinte chu i hmâah kûn rawh se. I unaute chungah hotu lo ni la, I nu fapaten chibai bûk che rawh se. Ânhhe lawhtu che chu ânhhe dawng lo ni sela, Malsâwmtu che u chu malsâwmin awm rawh se,” a ti a.

ESAUVA A BEIDAWNG

³⁰Chutia Isaakan Jakoba mal a sâwm zawh vêleha, Jakoba a pa Isaaka a kalsan hman chiah tihah chuan, a û Esauva ram chhuak chu a lo thleng ve chiah a.

³¹Ani pawhin sâ chu tui takin a siam a, a pa hnênah chuan a rawn la a, a pa hnênah, “Ka pa chu lo tho sela, a fapa sa kah sâ hi rawn ei rawh se, tichuan mal min sâwm dâwn nia,” a rawn ti a.

³²A pa chuan a hnênah, “Tu nge i nih?” a ti a. Ani chuan, “I fapa mawle, i fa û zâwk Esauva ka ni e,” a ti a.

³³Isaaka chu a khûr ta chiam mai a, “Tû â ni?” Tu nge sâ kâpa mi rawn petu kha? I lo kal hmâ khân ka ei vek tawh a, mal ka sâwm baw a—malsâwmin a awm tho tho tawh ang,” a ti ta a.

³⁴Esauvan a pa thu sawi a han hriat chuan lungchhe êm êmin a tap ta vak vak a, a pa hnênah chuan, “Aw ka pa, kei pawh mal min sâwm ve lul rawh!” a ti a.

³⁵Mahse, ani chuan, “I nauvin mi rawn bum a, i malsâwmna chan tûr a kalpui ta daih mai!” a ti a.

³⁶Esauva chuan, “A hmingah Jakoba an ti rêng a ni lo vem ni? Vawî hnih ngawt mi luahlan zawn ta. Ka fatîr nihna min chhuhsak tawh a; hei, tûnah ka malsâwmna dawn tûr min chhuhsak leh tâk hi!” a ti a. Amah bawh chuan, “Ka tân malsâwmna i la zuah hrâm lo vem ni?” a ti ngawih ngawih a.

³⁷Isaaka chuan Esauva chu a chhâng a, “A ni ngawt mai, i lal atân ka siam a, a chhiahhlawh atân a unau zawnzawng ka pe bawh a; buh leh uain-in ka châwm bawh si a. Ka fapa, eng nge tihsak theih che ka neih tawh ang le?” a ti a.

³⁸Esauva chuan a pa hnênah, “Ka pa, malsâwmna pakhat chauh em ni i neih? Aw ka pa, kei pawh mal min sâwm ve lul rawh!” a ti a. Esauva chu awrâwl chhuah meuhvin a ãp ta a.

³⁹A pa Isaaka chuan a chhâng a, a hnênah: “Ngai rawh, i chênna chu leilung thatna hmun ațanga hla takah, Chung lam vân daifim thlen phâk lohnaah ni ang.

⁴⁰I khandaihin i nung ang a, I nau rawng i bâwl ang; Tâl chhuah i tum hunah A nghâwnkawl chu i nghâwnz ațangin i thing thla tawh ang,” a ti a.

JAKOBAN ESAUVA A TLAN BOSAN

⁴¹Tichuan, a pain malsâwmna a hlan tâk avângin Esauva chuan Jakoba chu a haw ta êm êm a, Esauva chuan a rilrûin, “Ka pa kan sîn ni a hnâi ta bawh a; ka nau Jakoba hi ka that mai ang,” a ti a.

⁴²A fapa û zâwk Esauva thu sawi chu Rebeki an va hrilh a. Tichuan, a fapa naupang zâwk Jakoba chu a kohtîr a, a hnênah, “I u Esauva hi nangmah thah tumin a inhnêm a nia.

⁴³Chuvângin ka fapa, ka thû hi ngaithla teh: tho la, Haran khuaa ka nuța Labana hnênah va tlânchhe rawh.

⁴⁴I û thinrimna hi a kian hmâ chu chutah chuan ni engemaw zât va awm rih ang che.

⁴⁵I û thinrimna hi nangmah ațanga a kiana, a chung a i thiltih hi a theihngihl thlengin awm reng la, chumi hnûah chuan mi ka rawn hruai kîrtîr leh dawn che nia. Engah nge ni khat thil thûah unau nauva ka sîn ang che u le?” a ti a.

⁴⁶Rebeki vêk chuan Isaaka hnênah, “Hetha fanute avâng hian nun hi ka ning hluah hluah a; Hetha fanute ang, hê ram nulâte ang hi Jakobana a neih vaih chuan, eng nge ka damchhan ni ta ang?” a ti a.

BUNG 28

¹Isaaka chuan Jakoba chu a ko va, mal a lo sâwm a, heti hian thû a hrilh a: “Kanaan nulate hi nupui atân i nei tûr a ni lo.

²Tho la, Padan Aram-ah, i nu pa Bethuela inah chuan va kal la; chutah chuan i nu nuța Labana fanute zînga mi nupuiah va nei ang che.

³Pathian Engkimtithia chuan malsâwm che sela, Mi tam tak in lo nih theih nân chi ãta takin inthlahpung rawh u;

⁴Abrahama malsâwmna ngei chu Nang leh i thlahte hnênah pê che sela; Tichuan, i mikhualna ram, Pathianin Abrahama hnêna a pêk chu I luah theihna tûrin,” a ti a.

⁵Tichuan, Isaaka chuan Jakoba chu a kaltîr ta a, Padan Aram-ah, Suria mi Bethuela fapa Labana, Jakoba leh Esauva te nu

Rebeki nuța hnênah chuan a kal ta a.

ESAUVAN MAHALATHI A NEI

⁶Esauva chuan Isaakan Jakoba mal a sâwm a, Padan Aramah nupui nei tûrin a tîr chhuak ta tih leh, “Kanaan rama nulate hi nupuiah i nei tûr a ni lo,” tih thupêk nêna delhkhilhin malsâwmna a hlan a;

⁷Tichuan, Jakoba chu a nu leh a pate thu zâwmin Padan Aram-ah a kal ta tih a lo hria a.

⁸Esauva chuan Kanaan nupaten a pa Isaaka lung an tiâwi lo tih a hre bawh a.

⁹Tichuan, Esauva chu Ismaela hnênah a kal a, Abrahama fapa Ismaela fanu Mahalathi, Nebajotha farnu chu a nupui neih sâte belhchhah nân a nei leh a.

BETHEL HMUNA JAKOBA THUTIAM

¹⁰Jakoba chu Beerseba ațangin a kal chhuak a, Haran khaw lamah a kal ta a.

¹¹Hmun pakhat a va thleng a, nî a tlâk tawh avângin chutah chuan a riak a. Chu lai hmuna lung pakhat chu a lâ a, a lukham a, chutah chuan a mu ta a.

¹²A mumangah chuan lei chungah hian leilâwn a lo indawh chho zur mai a, a chhîp chuan vân a han tawng a; chutah chuan Pathian Vântirhkohte chu an chhukin an chho zut zut mai a.

¹³A chungah chuan LALPA a ãng a, ani chuan: “Kei hi LALPA, i pu Abrahama Pathian leh Isaaka Pathian chu ka ni; i mutna hmun leh ram hi nang leh i thlahte tân ka la pe dawn asin.

¹⁴I thlahte chu leia vaivut ang mai an la ni ang; chhak leh thlangah te, chhim leh hmârah te in la inzâr darh zêl ang a; nangmahah leh i chithlah ațangin leia hnam zawnzawngin malsâwmna an la dawng ang.

¹⁵Ngai rawh, ka awmpui tlat che hi; i kalna apiangah ka vêng zêl ang che a, hê ramah ngei hian ka hruai kîr leh ang che; i hnêna ka thutiam hi ka hlen hmâ loh chuan ka kalsan lo vang che,” a ti a.

¹⁶Jakoba muhîl chu a lo harh a, “LALPA chu hê hmunah hian a lo awm reng mai â, ka lo hre si lo va,” a ti a.

¹⁷A hlâu ta hial a, “Hê hmun hi a va ãhbaiaawm êm! Eng dang a ni lo, Pathian in a ni a, vânram kawngkâ a nih hi!” a ti a.

¹⁸Jakoba chu zîng takah a tho va, a lung lukham chu a lâ a, lungphun atân a phun a, a chhîpah chuan hriak a leih a.

¹⁹Chû hmun hmingah chuan Bethel a vuah a; chû khaw hming hmasâ chu Luz a ni.

²⁰Jakoba chuan thû a tiam a, “Pathianin min awmpui zêl a, tûna ka zin kawnga min vên him tlata, chaw ei tûr leh silhfên min pêk zêla,

²¹thlamuang taka ka pa ina mi hruai kîr leh bawh chuan, LALPA chu ka Pathian a ni ang.

²²Hê lung ka phun pawh hi Pathian in a ni ang a, i thil mi pêk zawnzawng ațangin sâwmah pakhat ka pe mawlh ang che,” a ti a.

BUNG 29

JAKOBA LEH RAKILI AN INTAWNG

¹Jakoba chu a zin kawngah chuan a kal zêl a, Khawchhak mite ram chu a han thleng ta a.

²A han hawi vêl a, mual zâwla tuichhunchhuah hi a va hmû a; a bul vêlah chuan berâm rual hi hlâwm thumin an lo bawk thup a; chû tuichhunchhuah tui chu berâm rualte an intîr thîn a ni. Tuichhunchhuah chhinna lung chu lian tak a ni a.

³Berâm rualte chu an khalh khâwm thîn a; tuichhunchhuah kawngkâ lung chu an lum sawn a, berâmte tui an intîr zawhah tuichhunchhuah kawngkâ chu lung chuan an chhîn leh thîn a ni.

⁴Jakoba chuan an hnênah, “Ka unaute u, khawi lama mite nge in nih?” a ti a. Anni chuan, “Haran khuua mi kan ni e,” an ti a.

⁵An hnênah, “Nahora fapa Labana in hria em?” a ti a. Anni chuan, “Kan hria e,” an ti a.

⁶Ani chuan, “A dam lai a ni em?” a ti a. Anni chuan, “A dam lai a ni e. Sâw, a fanu Rakili pawh a berâm rual hruaia a lo kal saw,” an ti a.

⁷Ani chuan, “Hei, ni a la sâng hlê si a; ran rual khalh khâwm hun pawh a la ni si lo va. Berâmte kha tui pê ula, va tlattîr leh ta che u,” a ti a.

⁸Anni erawh chuan, “Ran rual zawng zawng an lo thlen kim veka, tuichhunchhuah kawngkâ lung an lum sawna, berâmte tui kan intîr phawt loh chuan kan tlattîr thei lo vang,” an ti a.

⁹Chutia an inbiak chhûng chuan Rakili chuan a pa berâmte chu a rawn khalh thleng ta a, berâm vengtu a ni ve rêng a.

¹⁰Jakoba chuan a nu nuâ Labana fanu Rakili leh, a nu nuâ Labana berâm rual a lo hmuh chuan Jakoba chuan a va pan hnâi a, tuichhunchhuah kawngkâ lung chu a lum sawn a, a nu nuâ Labana berâm rualte chu tui a intîr ta a.

¹¹Jakoba chuan Rakili chu a fâwp a, awrâwl chhuahin a tap râwih râwih a.

¹²Jakoba chuan Rakili hnenah a pa farnu Rebeki fapa a ni tih a hrilh a. Tichuan, ani chu a tlân a, a pa a va hrilh a.

¹³Labana chu a tupa Jakoba chanchin a lo hriat chuan amah hmuak tûrin a lo tlân a, a pawm a, a fâwp a, a in chhûngah a hruai lût a. Tichuan, Labana hnênah chuan a chanchin zawng zawng chu a hrilh ta a.

¹⁴Labana chuan, “Ka ruh leh tîsâ ngei i nih tak hi,” a ti a. A hnênah chuan thla khat a châm a.

JAKOBAN LEAII LEH RAKILI NUPUIAH A NEI

¹⁵Labana chuan Jakoba hnênah, “Ka tupa i nih vâng ngawtin a thlâwnin i thawk reng dawn em ni? I hlawh tûr zât mi hrilh ta che?” a ti a.

¹⁶Labana chuan fanu pahni a nei a: a upa zâwk hming chu Leaia ni a, a naupang zâwk hming chu Rakili a ni.

¹⁷Leaia mit chu a pâwl deuh a, Rakili chu tlâwntlai thâ leh hmêl tha tak a ni a.

¹⁸Jakoba chuan Rakili chu a ngaizâwnng hlê a; tichuan, “I fanu naupang zâwk Rakili hi kum sarih thawhah ka hlawh ang e,” a ti a

a.

¹⁹Labana chuan, “Mi dang neihthîr ai chuan nangmah neihthîr chu a tha zâwk tak ang chu. Ka hnênah hian awm phawt mai rawh,” a ti a.

²⁰Tichuan, Jakoba chuan Rakili hlawh chhuak tûrin kum sarih a thawk ta a; a duh êm avângin a tân chuan ni rei lo te chhûng ni maiin a hria a.

²¹Jakoba chuan Labana hnênah, “Kan hun tiam a thleng ta e, ka pâwl theih nân ka nupui chu min pe tawh rawh le,” a ti a.

²²Labana chuan chu mi khuua mi zawng zawng chu a sâwm khâwm a, ruai ropui tak a theh a.

²³Zân a lo ni a, a fanu Leaia chu Jakoba hnênah chuan a hruai lût a; ani chuan a lo pâwl a.

²⁴Labana chuan a fanu Leaia enkawltu atân a chhiahhlawh nu Zilpaa a pê a.

²⁵A tûk khuua a lo vâ a; ngai teh, Leaia a lo ni reng a. Labana hnênah chuan, “Engati nge hetia ka chung a i tih le? Rakili hlawh chhuak tûra thawk ka ni lo vem ni? Engvângin nge hetiang a mi bum tâk mai?” a ti a.

²⁶Labana chuan, “Kan ramah hian a nau zâwkin a û zâwk an neih khalh ngai lo va.

²⁷Hêmi ni sarih hunbî hi kim phawt sela, ani hlawh chhuak tûra kum sarih dang ka bula i thawh leh tûr aiah ani pawh chu kan pe dawn che nia,” a ti a.

²⁸Jakoba chuan chu ni sarih hun chu a tlingtlâ a. Tichuan, Rakili chu a nupui atân a pe ta a.

²⁹Labana chuan a fanu Rakili enkawltu atân a chhiahhlawhnu Bilhaia a pê a.

³⁰Rakili chu a pâwl a, Leaia ai chuan Rakili chu a duh zâwk a. Labana hna chu kum sarih dang a thawk leh ta a.

JAKOBA FATE

³¹LALPA chuan Leaia in lainat a hlawh lo tih a hmuhin a chhûl a hawnsak a; Rakili erawh chu a ching thung a.

³²Leaia chu a râi a, nau a nei a, a hmingah Reubena a sa a; “LALPA chuan ka hrehawmna mi hriatpui ta si a. Heti hi chuan ka pasal pawhin min hmangaih vê tawh ang,” a ti a ni.

³³Tichuan a râi leh a, fapa a hring a, “LALPAN lainat ka hlawh lo tih a hria a, he ka fapa hi min pe ta a nih hi,” a ti a. A hmingah Simeona a sâ a.

³⁴A râi leh a, fapa baw a hring leh a, “Tûnah zawng ka pasal hian ka lam a hawi vê tawh ang, fapa pathum lai ka hrinsak tawh si a,” a ti a. A hmingah Levi a sa a.

³⁵A râi leh a, fapa a hring leh a, “Tûnah zawng LALPA ka fak tawh ang,” a ti a. Chuvângin, a hmingah Juda a sa a. Tichuan nau a pâi zawm ta lo va.

BUNG 30

¹Rakili chuan Jakoba tân fa a hrinsak vê lo tih a inhria a, a laizâwnnu chu Rakili chuan a îtsik ta a, Jakoba hnênah, “Fa min pe vê rawh, chuti lo zawng, ka thi thei mai dawn!” a ti a.

²Jakoba chu Rakili chungah chuan a thinur thut a, “Fa nei thei lo tûa i chhûl tipingtu Pathian aiawhtu ka ni em ni?” a ti a.

³Ani chuan, “Heta hi ka chhiahhlawhnu a awm a; ani hi pâwl la, ka mal chungah ngei fa a hring dâwn nia, ama laka fate ka neih ve theih nân,” a ti a.

⁴A chhiahhlawhnu Bilhahi chu a nupui âtn a pê a, Jakoba chuan a lo pâwl a.

⁵Bilhahi chu a rai a, Jakoba chu fa a hrinsak ta a.

⁶Rakili chuan, “Pathianin ro min rêlsak a; ka au âw mi lo hriatsak a, fapa min pe ta,” a ti a. Chuvângin a hmingah Dana a sâ a.

⁷Rakili chhiahhlawhnu chu a rai leh a, Jakoba chu fapa pahnihna a hrinsak leh a.

⁸Rakili chuan, “Ka laizâwnnu chu nasa taka ka buan hnûah hnehna ka chang ta,” a ti a. Chuvângin a hmingah Naphtali a sâ a.

⁹Leaii chuan nau a pâi leh ta rêng rêng lo tih a inhriatin a chhiahhlawhnu Zilpaii chu a hruai a, Jakoba nupui âtn a pê a.

¹⁰Leaii chhiahhlawhnu Zilpaii chuan Jakoba chu fapa a hrinsak a.

¹¹Leaii chuan, “Vânneihna a lo kal e!” a ti a. Chuvângin, a hmingah Gada a sâ a.

¹²Leaii chhiahhlawhnu Zilpaii chuan Jakoba chu fapa pahnihna a hrinsak a.

¹³Leaii chuan, “Ka va lâwm tak êm, hmeichheho chuan nihlawh min ti dâwn mang e,” a ti a. Chuvângin, a hmingah pawh Asera a sa a.

¹⁴Reubena chu buh seng hun lai hian lovah a va feh a, zâwlaidi* a hmû a, a nu Leaii chu a rawn hawnsak a. Rakili chuan Leaii hnênah, “Khawngaih takin i fapa zâwlaidi chu min sem ve rawh,” a ti a.

¹⁵Nimahsela ani chuan, “Ka pasal min chhuhsak hi thil ho têah i ngai em ni? Ka fapa zâwlaidi mi lâksak i tum lehzêl ang mâw?” a ti a. Rakili chuan, “I fapa zâwlaidi aiah zân inah hian i mutpui dâwn nia,” a ti a.

¹⁶Tlâiah chuan Jakoba feh haw chu, Leaii chuan a lo hmuak a, “Ka hnênah i rawn lût tûr a ni, ka fapa zâwlaidi in a man ka lo tlâk vek tawh a nia,” a lo ti a. Tichuan, chumi zân chuan a bulah a mu ta a.

¹⁷Pathianin Leaii dilna a lo hria a, a rai a, Jakoba chu fapa pangâna tûr a hrinsak a.

¹⁸Leaii chuan, “Ka pasal tân ka chhiahhlawhnu ka pêk avângin Pathianin hlawh min pe ta,” a ti a. A hmingah Isakara a sâ a.

¹⁹Leaii chu a rai leh a, Jakoba chu fapa parukna tûr a hrinsak a.

²⁰Leaii chuan, “Pathianin ro hlu tak takin min thuam ta; tânah chuan ka pasal pawh ka bulah a chêng vê tawh ang, fapa paruk ka hrinsak ta si a,” a ti a, a hmingah Zebuluna a sâ a.

²¹Chumi hnûah chuan fanu a hring a, a hmingah Dinai a sâ a.

²²Pathianin Rakili pawh a hre reng a, Pathianin a dilna a ngaihthlâksak a, a chhûl a hawnsak a.

²³Nau a pâi a, fapa a hring ta a, “Pathianin ka hmingchhia mi chhilh bosak ta,” a ti a.

²⁴“LALPAN fapa dang min la pe belh leh ngei ang,” tiin a hmingah Josefa a sâ a.

JAKOBA LEH LABANA INREMNA

²⁵Rakilin Josefa a hrin hnuin, Jakoba chuan Labana hnênah, “Keima awmna lam panin, kan rama ka haw theihna tûrin min kaltîr tawh ta che.

²⁶Ka hlawh chhuah ka nupuite, ka fate hi min pê la, mi kaltîr tawh rawh; i tâna hnâ ka thawh dân chu i hria alâwm,” a ti a.

²⁷Labana chuan a hnênah, “Min khawngaih thei a nih chuan la awm leh rih teh, nangmah avânga LALPAN mal min sâwmzia finfiahna ka nei asin,” a ti a.

²⁸Amah vênin, “I hlawh duh zât sawi la, ka pe mai ang che,” a ti bawk a.

²⁹Jakoba chuan a hnênah, “I tâna ka thawhrimzia leh i ran rual ka enkawl dân chu i hria alâwm.

³⁰Ka lo kal hmâ kha chuan tlêm te chauh i nei a, tânah erawh chuan an lo pung nasa hle a; ka lo kal hnû hian LALPAN mal a sâwm che a. Tânah chuan keima puala in leh lo din a hun ve ta a ni lo’m ni?” a ti a.

³¹Tichuan ani chuan, “Eng thil nge ka pêk ang che?” a ti a. Jakoba chuan, “Engmah mi pêk ka ngai lo. Hetianga min tihsak dâwn phawt chuan, i ranrualte chawmin ka enkawl zêl ang e:

³²Vawiinah i ranrualte chu ka va en chhuak vek ang a, berâm zînga a râng leh a hâng zeuh zeuhte leh, berâmno zînga rawng uk zawng zawngte bâkah, kêt zînga a ze tial leh hângin a kah de thik thek apiang ka thlang chhuak ang a, chûngte chu ka hlawh âtn ni rawh se.

³³Tichuan, ka hlawhte chu i hmaa a rawn lan hunah ka dikna chu hunin a rawn her chhuahpui mai ang: kêt zînga a râng leh an panga hâng de zeuh pawh awm lo, berâm no zînga uk vê lo apiang chu, ka ran zînga an lo awm chuan keima rûkah ngai ang che,” a ti a.

³⁴Labana chuan, “Aw le, i thû ang chu ni rawh se!” a ti a.

³⁵Tichuan, chumi ni chuan kêt pa râng leh hâng apiangte, kêt pui tial leh hâng apiangte, a vâra tial thik thek te, berâm no zînga a rawng uk zawng zawng chu a fapate kutah a pê a.

³⁶Tichuan, amah leh Jakoba inkâr chu ni thum kala inhlatâh a dah a, Jakoba chuan Labana ran rual la bâng zawng chu a chawm zui a.

³⁷Jakoba chuan poplar leh theitê leh thingse tuai a lâ a, a pil a tikhawk thliah thliah a, tiangah chuan a vâ chu a lang de thet a.

³⁸Chûng tiang pil khaw de tial thet chu ran rualten tui in tûra an lo kal lai ngeia an rai theih nân, an tui in tûr awmna dawn-thlêng hmâah chuan a dah zêl a.

³⁹Tichuan, ran rualte chu tiang zâwnah chuan an lo rai ta a, a râng te, a tial te leh a hâng kâi te an hring ta zêl a.

⁴⁰Jakoba chuan berâm note chu a thliar hrang a, ran rualte chu Labana ran rual râng te leh a hâng kâi te lam chu a hawitîr vek a; Labana ran rualte nêna dah fin lovin ama ran rualte chu a dah

hrang daih a.

⁴¹Ran pian tha deuh an rai dawn apiangin, tiang awmna zinga an rai theih nân Jakoba chuan an hmuh ngei tûrin tui dahna thlêngah chuan tiang chu a lo dah thîn a.

⁴²Ran awngrawp deuhte erawh chu a dah lût vê duh lo va; a sawngnawi deuh deuh chu Labana ta an lo ni a, a pian tha deuh apiang chu Jakoba ta an lo ni ta zêl a.

⁴³Tichuan, ani chu a lo pung chak hle a, ran rual pui tham tak neiin, chhiahhlawh mipa leh hmeichhia te, sanghâwngsei leh sabengtunge chu a ngah ta êm êm a.

BUNG 31

LABANA LAK ATA JAKOBA A TLÂN CHHUAK

¹Labana fapaten, “Jakoban kan pa ta zawng zawng a lâksak vek a, kan pa thil neih ațangin heti khawp hian a intihausa ta a nih hi,” tia an sawi thâwm chu Jakoba chuan a lo hria a.

²Labana hmêl ațang rêngin tûn hmâ ang khân a lakah a hlim tawh lo tih Jakoba pawhin a hmu reng a.

³LALPA chuan Jakoba hnênah, “I pate leh i chhûngte awmna ramah kîr leh tawh rawh, ka awmpui zêl ang che,” a ti a.

⁴Tichuan, Jakoba chuan a ran rual tlatna phûla Rakili leh Leaii te ko tûrin mi a tîr a.

⁵In pa hmêl ațang hian, tûn hmâ angin ka chungah a lungâwi ta lo tih ka hria a; nimahsela, ka pa Pathian chuan mi awmpui tlat a.

⁶Ka theihna zawng zawngin in pa tân ka lo thawk thîn tih in hria a.

⁷Chuti chung chuan in pa chuan mi bum a, ka hlawh hi wawi sâwm lai mi tihdanglam sak tawh a, mi a tihchhiat erawh chu Pathianin a phal lo chauh zâwk a ni.

⁸A ze țial thik thekho zawng hi i hlawh ni rawh se,’ a tihin, ran rual zawng zawngin a ze țial chî hlîr no an nei a. ‘A ze tan chî zawng i hlawh dawn nia,’ a tih lahin ran zawng zawngin a ze tan zâwnga țial chî hlîr no an nei si a.

⁹Tichuan, Pathianin i pa ran rualte chu lâksakin ka hnênah min pe ta a ni.

¹⁰Ran an lo rai tirhin ka mangah hian ka lo dâk chhuak a, ran rual bawhtu berâm pête chu a ze tan te, a ze țial chî te leh a hâng te an lo ni hlawn zu nia.

¹¹Pathian Vântirhkhovin ka mumangah chuan, ‘Jakob,’ tîin min lo ko va. Kei chuan, ‘Heta hi ka awm e,’ ka ti a.

¹²“Ani chuan, ‘Dâk chhuak la, hawi vêl teh, ran rual bawhtu berâm pête kha a ze tan te, a ze țial te, a hâng kai te vek an nih kha; Labanan i chungah a tih dân zawng zawng kha ka hmu vek si a.

¹³Kei hi lungphun hriak i hnawiha, chhechhama thû i tiamna Bethel Pathian kha ka ni. Tûnah hian tho la, hê ram hi chhuahsan la, i pianna ramah kîr leh rawh,’ mi ti a ni,” a ti a.

¹⁴Rakili leh Leaii te chuan an chhâng a, “Kan pa inah hian keini tân ro khâwm tûr pawh a la awm rêng rêng em ni?

¹⁵Ram dang mi ang lekin min ngai tawh a ni lo vem ni? Min hralh a, kan chan ve tûr sum pawh a ei zo vek tawh a.

¹⁶Pathianin kan pa sum a lâksakte hi keimahni leh kan fate chan tûr rêng a ni; chuvângin, i hnêna Pathianin a sawi ang chuan ti mai rawh,” an ti a.

¹⁷Jakoba chu a tho va, a fapate leh a nupuite chu sanghâwngsei chungah a chuantîr a.

¹⁸Kanaan rama a pa Isaaka hnêna kal tûrin, a ran zawng zawng te leh a sum deh chhuah zawng zawng leh Padan-Arama ran rual a neih te chu a kalpui vek a.

¹⁹Labana chu a berâm hmul mêt tûra a kal bo lai a ni a, Rakili chuan a pa ina milimtê chu a rûksak a.

²⁰Jakoba chuan tlân bo a tum thû chu Suria mi Labana chu a hrilh lo va; a rûkin a tlân chhuak ta a.

²¹A neih zawng zawng nên a tlân bo ta a ni. A tho va, luipui chu a kân a, Gilead tlâng ram lam chu a pan ta a.

LABANAN JAKOBA A ÛM

²²A ni thum nî chuan Jakoba a tlân bo tih Labana chu an hrilh a.

²³Tichuan, a unaute a hrui a, ni sarîh kal an ùm a, Gilead tlâng ramah chuan an va ùmphâ ta a.

²⁴Nimahsela, Pathian chu Suria mi Labana mumangah a inlâr a, a hnênah, “Jakoba hnênah hian thu chhia emaw, thu tha emaw pawh sawi lo tûrin fimkhur ang che,” a ti a.

²⁵Tichuan, Labana chuan Jakoba chu a ùmphâ a. Jakoba chuan tlângah chuan puan in a lo kaih hman tawh a, Labana pawhin a unaute nên Gilead tlângah chuan puan in a kaih vê bawk a.

²⁶Labana chuan Jakoba hnênah, “Eng thil nge i tiha, hetia ka hriat lohva i lo tlân bo daiha, ka fanute pawh khandaiha sal man ang maia i hrui a bo tâk mai?

²⁷Engtizîa nge a rûk a râla, mi pawh hrilh lova i lo tlân bo mai? Perhkhuang leh dârbenthek te nên hlim taka zaia inthlah tûr a ni lo’m ni?

²⁸Ka tûte leh ka fanute ka fawh pawh i phal lo va. Tûna i thiltih dân hi a âthlâk hlê mai.

²⁹Duh chuan tichhe thei che ka ni a, mahse i pa Pathian chuan nizânah, ‘Jakoba hnênah hian thu chhia a tha sawi lo tûrin fimkhur rawh,’ min ti tlat a.

³⁰“Aw le, i pa in lam i ngaih tawh êm avângin tihian i kal ta a, engah nge ka pathian lim* chu mi rûksak kher le?” a ti a.

³¹Jakoba chuan Labana chu a chhâng a, “I fanute hi tharumin mi chhuhsak leh mai ang tih ka hlauh vâng a ni.

³²“I pathian lim erawh chu, i hmuhna apiang chu nungdamin chhuah suh ang che. Kan mite hmuhah hian, i thil chu kan hnêna a awm phawt chuan la lêt leh ang che,” a ti a. Rakilin a lo rûksak tih Jakobana hre si lo va.

³³Labana chu Jakoba puan inah te, Leaii puan inah te, an bâwih nute puan inah te a lût a, mahse a hmu lo va. Leaii puan in ațangin a lo chhuak a, Rakili puan inah chuan a lût a.

³⁴Rakili chuan an chhungkaw milim tê chu a lo la si a, sanghâwngsei zângdam hnuaiah a dah a, a ðhuthnan a. Labana chuan puan in kil tin chu a dap a, a hmu si lo va.

³⁵Rakili chuan a pa hnênah, “Ka lalpa, i hmâa ka tho kâng thei lo hi min lo hre thiam hrâm rawh, hmeichhe dân anga ka fel loh lai a ni si a,” a ti a. Milim chu a zawng a zawng a, a hmu si lo va.

³⁶Chutah Jakoba thin a thawk ve ta a, Labana chu a hau va. Jakoba chuan Labana hnênah: “Eng nge ka bawhchhiat? Eng thil sual nge ka tiha heti taka mi rawn ûmzui le?”

³⁷Ka bungrua zawng zawng i hai let vek a, i inchhûng thil eng nge i hmuh? Ka unaute leh i unaute hi kan inkâra rorêltuah lo tang vê vê rawh se!

³⁸Hei, kum sawmnhnîh chhûng zet i hnênah ka awm ta a; i berâmpuite leh i kêlpuite chuan no an chhiat ngai lo va, i berâmpate pawh ka talh ngai hek lo.

³⁹Ramsâin an seh pawhin i hnênah thlen lovin, a bo ai ka rûl zêl a. Chhûna rûk bo emaw, zâna rûk bo emaw pawh ni se, ka rulh tûrin mi phût ðhîn a nih kha.

⁴⁰Chû chu ka dinhmun a ni asin! Chhûnah ni sen sâin mi em chhau va, zânah khawvâwtin mi seh tlawk tlawk a, mutmû pawh ka tuah ðha thei lo va.

⁴¹Chutiang chuan i inah hian kum sawmnhnîh zet ka awm ta. I fanu pahnihte hlawn chhuakin kum sâwm leh kum li ngawt mi chhawr a; i rante hlawn chhuak tûrin kum ruk mi chhawr leh a, chumi chhûngin ka hlawn wawi sâwm lai i tidanglam hman a.

⁴²Ka pa Pathian, Abrahama Pathian, Isaakan a ðihdêka chuan mi awmpui lo phei sela chu kutbêngin mi chhuahtîr ngei ang le. Mahse Pathianin ka hrehawmzia leh ka thawhrimzia a hria a, nizânah a rawn zilh che a lo nih chu,” a ti a.

LABANA LEH JAKOBA TE INREMNA THUTHLUNG

⁴³Labana chuan Jakoba chu a chhâng a, “Hêng hmeichhiate hi ka fanute an ni a, hêng naupangte hi ka tû-te an ni a, ran rualte chen hian ka ta an ni a; hêng i hmuh zawng zawng hi keima ta vek a ni. Nimahsela, hêng ka fanute leh an fa hrin naupangte chungah hian tih theih eng nge ka neih tawh?”

⁴⁴Ti rawh le, nang leh keia inkârah hian inremna thû i thlung teh ang, kan pahniha inkâra thuhriatpuitu ni rawh se,” a ti a.

⁴⁵Jakoba chuan lung a lâ a, a phun ta a.

⁴⁶Jakoba chuan a unaute hnênah, “Lung han la khâwm rawh u le,” a ti a. Lung chu an la khâwm a, an tiang khâwm a, lungrem chungah chuan chaw an ei ta a.

⁴⁷Labana chuan Jegar Jahadutha tiin a vuah a, Jakoba chuan Galeed tih hming a putîr thung a.

⁴⁸Labana chuan, “Vawîinah hian hê lungrem hi nang leh keia inkâra thuhriatpuitu a nih hi,” a ti a. Chuvângin a hmingah Galeed an ti ta a,

⁴⁹“Mizpah an ti bawk a, “LALPA chuan kan inñhen hnûah pawh min vêng tawn zêl rawh se.

⁵⁰Ka fanute hi i tihretheih emaw, ka fanute bâkah nupui dang i neihsan emaw a nih chuan, tû dangin min hriatpui lo mahse, en teh, Pathian chu kan inkâra hriatpuitu ni rawh se!” a ti a.

⁵¹Labana bawk chuan Jakoba hnênah, “Hê lungrem vûm leh hê lungphun hi, nang leh keia inkârah ka dah nghet e.

⁵²I pawî khawih tûrin hê lungrem hi ka rawn pêl lo vang a, nang pawhin i rawn pêl bîk hek lo vang tih hê lungrem hian mi hriatpui sela, hê lungphun hian min hriatpui bawk rawh se.

⁵³Abrahama Pathian, Nahora Pathian, an pate Pathian chuan kan inkâr thû min rêlsak rawh se,” a ti a. Jakoba chuan a pa Isaakan a ðihdêka hmingin chhia a chham a.

⁵⁴Jakoba chuan tlângah inthâwina a hlân a, a unaute chu chaw ei tûrin a sâwm a. Tichuan chhau an ei a, tlângah chuan an riak ta a.

⁵⁵A tûk zîng takah Labana chu a tho va, a tû leh fate chu a fâwp a, mal a sâwm a. Tichuan, Labana chu a kal chhuak a, a awmna lamah a kîr leh ta a.

BUNG 32

ESAUVA JAKOBA A LO HMUAK

¹Jakoba chu a kal zêl a, Pathian Vântirhkohten an lo tâwk a.

²Jakoban anni a lo hmuh chuan, “Hei hi Pathian sipaite vênbûk a nih hi,” a ti a. Chu hmun hming chu Mahanaim a vuah a.

³Chumi hnûah Jakoba chuan Seir rama awm a û Esauva hnênah zualkote a tîr a.

⁴An hnênah, “Ka lalpa Esauva hnênah chuan heti hian ti ang che u, ‘I chhiahhlawn Jakobah heti hian a ti e: “Labana hnênah tûn hnâi thleng khân ka va chêng reng a.

⁵Bâwngpate, sabengtungte, ran rualte, chhiahhlawn mipa leh hmeichhiate ka nei vê a; i chhiahhlawn hi i mithmuhah i lo khawngaihna beisein mi ka rawn tîr a ni e,” tiin,” a ti a.

⁶Zualkote chu Jakoba hnênah an lo kîr leh a, “I û Esauva hnênah kan va kal a, ani pawh nangmah hmuak tûrin mipa zalî rual hruaiin lo kal a tum vê a ni,” tiin an rawn sawi a.

⁷Jakoba chu hlauvin a mangang ta êm êm a; a mite chu a pâwl pâwlin a ðhen hrang a; berâm rual te, bâwng rual te leh sanghâwngseite chu pâwl hnihah a ðhen a.

⁸“Esauva chuan pâwl khat a rawn beih buai laiin, pâwl khat zâwk tal chu lo insaseng hman tûrin rem a ruat a ni.

⁹Jakoba chuan, “Aw LALPA, ka pu Abrahama Pathian leh ka pa Isaaka Pathian, ‘I ram leh i chhûngte hnênah kîr leh tawh rawh, ka awmpui zêl ang che,’ tia min hrilh kha.

¹⁰I chhiahhlawn hnêna zahngaihna leh thutak i lantîr zawng zawng zînga a nêp ber pawh hi ka phû lo a ni; hê Jordan lui hi tiang nêp chauh ka kân khâ a ni a, tûnah erawh chuan pâwl hnih kan lo ni ta.

¹¹Ka û Esauva kut aţang hian min chhanchhuak lul rawh, ka ngên che a ni; kei leh hêng nûnâu hote hi min rawn bei chiam mai ang tih ka hlau si a.

¹²“Ðha takin ka enkawl ang che a, i thlahte chu tuiptui kama ðiauvut ang maia chhiar sen loha tamin ka tipung ang,’ i tih kha,” a ti a.

¹³Tichuan, chumi hmunah chuan a riak a, a thil neih zînga mi a û Esauva a pêk tûrte chu a thlang chhuak a:

¹⁴kêlpui zahnih leh kêlpa sawmnhni, berâmpui zahnih leh berâmpa sawmnhni,

¹⁵sanghâwngsei hnute sâwr lai sawmthum leh an notê te, bânwngpui sawmli leh bânwngpâ sâwm, sabengtungpui sawmnhni leh a no sâwm a dah hrang a.

¹⁶Chûngte chu a chhiahhlawhte hnênah a pâwl pâwlin a khalh hrantîr a, an hnênah, “Ka hmâah hian inkâr hlat tâwk zêlin lo va kal rawh u,” a ti a.

¹⁷A pâwl khatna hnênah chuan, “Ka û Esauvan a lo hmuh che u a, ‘Tû mi leh sâ nge in nih, khawiah nge in kal dâwn? In hmâa rante hi tû ta nge?’ a tih chuan,

¹⁸‘I chhiahhlawh Jakoba ta a ni a. Ka lalpa Esauva hnêna pêk tûr a ni e; en teh, amah pawh kan hnungah sâwn a awm e,’ tiin chhâng ang che u,” a ti a.

¹⁹Tichuan, a pâwl hnihna te, a pâwl thumna leh a dang zawngte hnênah pawh thû a pê a, “Hetiang hian Esauva in hmuh hunah in sawi zêl tûr a ni;

²⁰Ngai teh, i chhiahhlawh Jakoba chu kan hnungah sâwn a awm e,’ ti zêl ang che u,” a ti a. “Hêng thilpêkte hian min lo va hmakhah se, ka tilungâwi thei mahna, chumi hnûah a hmêl chu ka hmû ang a, min lo lâwm thei mial mahna,” a ti a ni.

²¹Tichuan, chûng thilpêkte chu hmâ a hruaitîr a, chumi zân chuan amah chauhvin bûkah chuan a riak a.

PATHIAN NÊNA INBUAN

²²Chumi zân chuan a tho va, a nupui pahnihte, a chhiahhlawhnu pahnihte leh a fapa sâwm leh pakhatte chu a hruai a, Jabbok lui kâiah chuan a kâipui a.

²³Lui chu a kâipui vek a, a thil neih zawng zawng pawh a thiar kai vek a.

²⁴Jakoba chu amah chauhvin a awm ta a; chutah chuan Mi tuemaw hian khawvâr hmâ zawng chu a buan a buan mai a.

²⁵Chû Mî chuan a hneh dâwn lo tih a inhriatin a khêlruh chuktuah chu a khawihsak a; an inbuan lai chuan Jakoba khêlruh chu a pelh ta a.

²⁶Chû Mî chuan, “Mî thlah rawh, khua pawh a vâw dâwn hi,” a ti a. Nimahsela ani chuan, “Mal mi sâwm hmâ chu ka thlah lo vang che!” a ti a.

²⁷Tichuan ani chuan, “Tu nge i hming?” a ti a. Ani chuan “Jakoba,” a ti a.

²⁸Ani chuan, “I hmingah Jakoba an ti tawh lo vang che, Israela an ti tawh zâwk ang che; Pathian leh mihring i buan a, i hneh ta si a,” a ti a.

²⁹Jakoba chuan, “Khawngaih takin ka zâwt a che, i hming min hrilh rawh,” a ti a. Ani chuan, “Engati nge ka hming mi zawh?” a ti a. Chutah chuan mal a sâwm ta a.

³⁰Jakoba chuan chû hmun hming chu Peniel a vuah a: “Pathian chu hmaichhanah ka hmû a, ka nunna min zuah sak ta si a,” a ti a ni.

³¹Peniel a kâi lai chuan nî chu a lo chhuak a, a khêl avâng chuan a bai ta a.

³²Chuvângin, tûn thleng hian Israel fate chuan khêl ruh inzawmna lai thâ hi an ei duh lo, Jakoba khêl thâ a khawih sakna lai tak a nih avângin.

BUNG 33

JAKOBA LEH ESAUVA AN INTÂWK

¹Jakoba chu a han hawi vêl ruai ruai a, râlkhata Esauva leh mi zali rual lo kal chu a va hmû a. Tichuan, naupangte chu Leaii leh Rakili leh chhiahhlawhnu pahnihte hnênah chuan a sem darh a.

²Chhiahhlawhnu leh an fate chu a kal hmasaktîr a, a dawtah Leaii leh a faten an zui a, Rakili leh Josefa-ten hnung an dâl a.

³Jakoba chuan anniho chu a kal pêl a, a û kiang a thlen hmâin lei siin vawi sarhi chibai a bûk a.

⁴Esauva chu amah tâwk tûrin a lo tlan a, a rawn kuah a, a ir a chuktuah a, a fâwp a, an tap dôn ta a.

⁵A lo dâk chhuak a, hmeichhia leh naupangte chu a hmû a, “Hêng i hnêna mite hi tute nge ni le?” a ti a. Ani chuan, “Naupangte hi Pathianin a khawngaih avânga i chhiahhlawh a pête an nih hi,” a ti a.

⁶Chhiahhlawhnu chu anmahni leh an fate nêan an lo kal hnai a, kûnin chibai an rawn bûk a.

⁷Leaii pawh a fate nêan an lo kal hnai a, kûnin chibai an bûk a. Chumi zawhah Rakili leh Josefa te chu an lo kal hnai leh a, kûnin chibai an bûk vê a.

⁸Esauva chuan, “Ran rual ka tawh zozâite kha eng tihna tûr nge ni?” a ti a. Ani chuan, “Ka lalpa, i mithmuha duhsakna ka dâwn theih nâna ka tih a ni e,” a ti a.

⁹Nimahsela Esauva chuan, “Ka nau, kei pawh ka intodelh vê asin; i tâte chu nangin nei zâwk ang che,” a ti a.

¹⁰Jakoba chuan, “E, ni lo vê, tûnah hian i duhsakna hmêl ka hmu ta a; chuvângin, ka thilpêk che hi khawngaih takin mi pawm sak lul rawh; i hmêl ka han hmû a, ka chung a i lungâwi hmêl hi Pathian hmêl hmû ang maiah ka inngai asin.

¹¹Khawngaih takin, malsâwmna ka rawn ken vê che hi pawm hrâm rawh, Pathianin min duhsak êm avângin ka nei tam tâwk alâwm,” a ti a. Chutia a ngen tlat avâng chuan a pawmsak ta a.

¹²Esauva chuan, “A nih leh, kal zâi i rêl tawh ang u le, hmâ ka han hruaisak ang che u,” a ti a.

¹³Jakoba erawh chuan, “Ka lalpa, naupangte hi an chaw tawh a, berâm rual te, bânwng rualte hi i hriat angin no hruai lai an ni a. Ni khat chauh pawh an khalh chak lutuk chuan ran rualte hi an thi vek mai ang.

¹⁴Khawngaih takin ka lalpa chuan a chhiahhlawhte hi min lo kalsan la. Kei chu zâwi muangin, ran rualte leh naupangte tlin tâwkin, Seir tlânga ka lalpa hnên chu ka rawn thleng vê mai ang,” a ti a.

¹⁵Esauva chuan, “A nih leh, ka mite zînga mi thenkhat hi ka hnutchhiah tal ang che chu,” a ti a. Ani erawh chuan, “Chutiang pawh a ngai dâwn em ni? Ka lalpa chuan min lo hre thiam hrâm mai rawh se,” a ti a.

¹⁶Tichuan, Esauva chu Seir lam panin chumi nî chuan a kîr leh ta a.

¹⁷Jakoba erawh chu Sukoth lamah a kal a, tah chuan ama in tûr a sâ a, ran rualte tân hulhliap a zârsak a. Chuvângin, chû hmun hming chu Sukoth an ti ta a ni.

KANAAN RAMAH JAKOBA A LO THLENG

¹⁸Jakoba chu Padan Aram aţanga a lo kalin, Kanaan rama Sekem khua chu dam takin a lo thleng ta a; khaw thlen hmâa dai kiangah chuan puan in a kaih a.

¹⁹Puan in a kaihna hmun chu Sekema pa Hamora fate hnên aţangin tangkâ zâin a lei a.

²⁰Chutah chuan maichâm a siam a, a hmingah El Elohe Israel a ti a.

BUNG 34

DINAII CHUNGA THIL THLENG

¹Dinaii, Leaii fanu, Jakoba a hrinsak chu chû rama nulate hmuh tum chuan a va lêng chhuak a.

²Hiv mi Hamora fapa Sekema, chu lai ram lal fapain a lo hmuh chuan a man a, a mutpui a, a lo tlâwm ta a.

³Chû mi chuan Jakoba fanu Dinaii chu a ngaizâwng hlê a, nula chu a hmangaih si a, nula rilru hmin tumin a thlêm a thlêm a.

⁴Tichuan, Sekema chuan a pa Hamora hnênah, “Hê nula hi nupuiah min neihsak mai teh,” a ti a.

⁵Jakoba chuan a fanu Dinaii chu Sekema a lo khawih chhia tih a hria a. Mahse, a fapate chu ram lamah ran rualte nêan an awm a; an lo haw hma chu a ngâwi rih a.

⁶Sekema pa Hamora chu Jakoba be tûrin a lo kal ta a.

⁷Chûng thû an lo hriat chuan Jakoba fapate chu ram lam aţangin an lo hawng a; an lungâwi lovin an thinrim êm êm a; Jakoba fanu a lo pâwngsual chu Israel-te zînga thil mualphothlâk leh thiag lo a ni si a.

⁸Hamora chuan an hnênah, “Ka fapa Sekema hian i fanu hi a duh tlat mai si a, khawngaih takin a nupui âtan min neihtîr mai rawh.

⁹I innei tawn ang u; in fanute min neihtîr ang a, kan fanute pawh in nei vê dâwn nia.

¹⁰Tichuan, keiniho zîngah in chêng ve ang a, ram pawh hei a awm duai alâwm. In khawsa ve ang a, duh leh in sumdâwng ang a, nangmahni pualin rote in khâwl dâwn nia,” a ti a.

¹¹Sekema chuan nula pa leh a nuţate hnênah chuan, “In khawngaihna ka ngên e, in phût ang chu ka ti zêl ang.

¹²A man tûr leh thilpêk chu in sawi zât zât kan pê ang che u; engpawh nise, nula hi nupui âtan min pe hrâm rawh u,” a ti a.

¹³Nimahsela, Jakoba fapate chuan Sekema leh a pa Hamora te chu an chhâng a, an farnu Dinaii a lo tihchhiatsak avângin, finrâwl chhuahin an chhâng a.

¹⁴“Kan farnu tân serhtan loh mi pasala neihtîr hi kan tih theih loh thil a ni a, chutiag tih chu kan tân hmingchhiatna a ni dâwn si a.

¹⁵Mahse, hetiang in tih chauhvîn kan remti thei ang; keimahni ang bawka mipa apiangin serh in tan vê dâwn chuan,

¹⁶kan fanute kan neihtîr ang che u a, keini pawhin in fanute kan nei vê bawk ang; tichuan in zîngah kan chêng vê ang a, hnam khat kan lo ni mai dâwn nia.

¹⁷Kan thû in pawisak lohva, serh in tan duh loh erawh chuan kan farnu chu kan hruai kîr ang a, kan kal daih mai ang,” an ti a.

¹⁸An thu sawi chuan Hamora leh Hamora fapa Sekema te chu a tilâwm hle a.

¹⁹Tlangvâl chuan Jakoba fanu chu a duh êm avângin tih tûr a tuk chu khawtlaipui lovin a ti nghâl mai a. Ani chu a pa chhûngte zînga mi ngaihsânawm ber a ni si a.

²⁰Tichuan, Hamora leh a fapa Sekema te chu an khaw kulh kawngkâah chuan an lo kal a, khaw chhûnga pa-ho hnênah chuan:

²¹“Sâwng mite saw keinite nêna inrem tlân duh mi an ni a. Chuvângin, hê ramah hian chêng ve sela, sumdâwng vê rawh se. Ram pawh hi a zau tâwk bawk alâwm. An fanute chu nupuiah te nei ila, kan fanute pawh kan neihtîr vê dâwn nia.

²²Mahse, anniho sâwn kan hnêna awma, hnam khata insiam tûr chuan thil phût an nei a: chû chu, kan zînga mipa tawh phawtin anmahni ang bawka serhtan vê hi a ni.

²³An ran rual te, an sum te, an ran zawng zawngte saw kan ta tûr a ni mai dâwn lo'm ni? An phût ang chu remtihsak ila, kan zîngah an lo khawsa vê mai ang,” a ti a.

²⁴Tichuan, an khaw kulh kawngkâa kal chhuakho zawng zawng chuan Hamora leh Sekema te thû chu an zâwm a; an khaw kulh kawngkâa chhuak mipa zawng zawng chuan serh an tan ta vek a.

²⁵A ni thum nî chuan nâ an tuar lai takin Jakoba fapate zînga pahni, Dinaii nuţa Simeona leh Levia te chu khandaih nêan huaisen chhuahin khaw chhûngah an lût a, mipa zawng zawng chu an va that fâi vek a.

²⁶Hamora leh a fapa Sekema chu khandaihin an that a, Sekema in aţang chuan Dinaii chu an hruai a, an chhuahsan ta a.

²⁷Jakoba faten chûng mi an tihhlumte chu an hmuhin an farnu an lo khawih chhiatsak avângin khua chu an rawk ta chiam a.

²⁸An berâm te, an bâwngpa te, an sanghâwngse te leh khawchhûng leh an lova thil awm zawng zawng te,

²⁹an sum leh pâi zawng zawng chu an lâksak a. An fanaute leh an nupuite chu salah an man a; in chhûnga an thil neih zawng zawng an rawk bawk a.

³⁰Jakoba chuan Simeona leh Levia te hnênah, “Min va tiluhai tak êm; hê rama chêng Kanaan-hote, Periz-hote tân mi huatthlalâah min siam ta; mahnilo-maha tlêm tawh nâk alaiin min that tûrin an rawn inpun khâwm ngei ang le. Keini leh kan chhûngkua min nuai chimit vek dâwn a nih hi,” a ti a.

³¹Mahse anni chuan, “Kan farnu hi he pa hian nawhchizuar ang leka a lo tih tûr em ni?” an ti thung a.

BUNG 35

BETHELAH JAKOBA A KÎR

¹Pathianin Jakoba hnênah, “Tho la, Bethel-ah chho rawh; chutah chuan han awm la, i û Esauva i tlân bosan laia i hnêna rawn inlâr Pathian tân maichâm siam ang che,” a ti a.

²Jakoba chuan a chhângte leh a hnêna awm zawng zawngte hnênah, “In zînga ram dang pathian in kawl zawng zawngte kha paih bo vek ula, nangmahni kha intithianghlîm ula, in silhfênte pawh thlâk vek rawh u.

³I tho ang u khai, Bethel-ah kan chho dâwn nia; chumi hmunah chuan ka mangan laia ka dîlna min chhângtu leh, ka kalna apianga min awmpui zêltu Pathian tân maichâm ka siam dâwn a ni,” a ti a.

⁴Tichuan, ram dang pathian an kawl laite leh an benga an behte chenin Jakoba hnênah chuan an pe vek a; Jakoba chuan chhângte chu Sekem bula sasaw thing hnuaiah a phûm bo vek a.

⁵Anni chu an kal ta zêl a; chûng lai khuua awmte leh a chhehvêla mite chu namên lova Pathian hlauhna in a man avângin Jakoba fate chu tûma’n an ûmzui lo.

⁶Jakoba leh a hnêna awm zawng zawngte chuan Kanaan rama Luz khua (Bethel) chu an lo thleng a.

⁷Chutah chuan maichâm a siam a, a û a tlân bosan laia a hnêna Pathian a rawn inlâr avângin a hmingah El Bethel a vuah a.

⁸Chutah chuan Rebeki enkawltu Debori chu a thî a, Bethel hnuaia sasaw thing hnuaiah an phûm a. Chû hmun chu Alon-bakut an ti ta a ni.

⁹Jakoba chu Padan Aram aţanga a lo hâwnin a hnênah Pathian a inlâr leh a, mal a sâwm a.

¹⁰Pathianin a hnênah, “I hming chu Jakoba a ni a; mahse Jakoba an ti tawh lo vang che, i hming chu Israela an ti tawh zâwk ang,” a ti a. Tichuan, Israel tih hming a puttîr ta a.

¹¹Pathianin a hnênah: “Kei hi Pathian Engkimtithia ka ni. Chi tam tak neiin lo inthlah pung la; nangmah aţangin chí leh hnam hrang hrang an lo chhuak ang a, i thâlbe aţangin lalte pawh an lo la chhuak bawk ang.

¹²Abrahama leh Isaaka hnêna ka pêk ram chu ka pê che a; i hnûa i thlah lo la awm tûrte tân hê ram hi ka pê a che,” a ti a.

¹³An inbiakna hmun aţang chuan Pathian chuan a chhohsan ta a.

¹⁴An inbiakna hmunah chuan Jakoba chuan lung a phun a; in tûr thilhan a hlân a, a chungah chuan hriak a leih a.

¹⁵Pathianin a rawn biakna hmun hmingah Jakoba chuan Bethel a vuah a.

RAKILI THIH THU

¹⁶Bethel aţang chuan an kal chhuak a. Ephratha khua an thlen hmâ lawkin, Rakili chuan nau a vei a, a vei na hlê a.

¹⁷Chutia na taka nau a vei lai chuan, nau chhar mi chuan, “Hlâu suh; fapa i nei leh dâwn e,” a ti a.

¹⁸Chutia a thlarauvin a chhuahsan dâwn têt chuan (a thi zui ta mai si a) a hmingah Ben Onia a sa a; mahse a pa chuan Benjamina

a ti thung a.

¹⁹Tichuan, Rakili chu a thi ta a, Ephratha kawngah chuan an phûm a (chu chu Bethlehem a ni a).

²⁰A thlânah chuan Jakobon lung a phun a, chû chu tûn thlenga Rakili thlân lung la awm chu a ni.

²¹Israela chu a kal zêl a, Eder insâng piahah chuan puan in a kaih a.

²²Chû rama Israelan awmhmun a khuar lai chuan Reubena chu a kal a, a pa hmei Bilhahi chu a va mutpui a; Israela chuan a lo hria a. Jakoba fapate chu sâwm leh pahni an ni a:

JAKOBA FAPA SÂWM PAHNIHTE

²³Leaii fapate chu, Jakoba fa û ber Reubena, te, Simeona te, Levia te, Juda te, Isakara leh Zebuluna te an ni;

²⁴Rakili fapate chu Josefa leh Benjamina te an ni a;

²⁵Rakili chhiahhlawhnu Bilhahi fapate chu Dana leh Naphtalia te an ni a;

²⁶Leaii chhiahhlawhnu Zilpahi fapate chu Gada leh Asera te an ni. Chhângte chu Padan Arama an awm laia Jakoba fa hrinte an ni.

ISAACA THIH THU

²⁷Jakoba chuan Mamre-a awm a pa Isaaka hnên a thleng ta a, chû chu Kiriath Arba (Hebron khua) a ni a; chû hmun chu Abrahama leh Isaak te chênna hmun a ni.

²⁸Isaaka chu kum zâ leh sawmriata upa a ni a.

²⁹Isaaka chu tar tak, kum upa takin a thî a, ama mite hnênah hruaiin a awm vê ta a. A fapa Esauva leh Jakoba-ten an phûm a.

BUNG 36

ESAUVA THLAHTE

¹Esauva thlahte chu hêngte hi an ni (Esauva chu Edoma a ni a).

²Esauvan Kanaan nula a neihte chu: Adaii, Hit mi Elona fanu te; Aholibami, Hiv mi Zibeona tunu Ana fanu te,

³Ismaela fanu Basemathi, Nebaiota farnu te an ni.

⁴Adaii chuan Esauva tân Eliphasa a hring a, Basemathiin Reuela a hring a.

⁵Aholibami chuan Jeusa te, Jalama te, Kora te a hring a. Chhângte chu Esauva fapa, Kanaan rama piang te an ni.

⁶Esauva chuan a nupui te, a fapa te, a fanu te, a ina chêng vê zawng zawng te, a ran rual leh ran vulh zawng zawng te, Kanaan rama a thawh chhuah sum leh pai zawng zawngte chu a kalpui a, a nau Jakoba hnên aţang chuan ram dangah a pêm ta daih a.

⁷Khawsa ho zêl thei lo khawpin ro sum an ngah dîn a, an ran rual tlatna tûrin an mikhualna ram chuan a daih ta si lo va.

⁸Tichuan, Esauva chu Seir Tlângah chuan a awm ta a. Esauva chu Edoma a ni a.

⁹Hei hi Seir Tlânga Edom-ho thlahthu Esauva thlahte chanchin chu a ni.

¹⁰Hêng hi Esauva fapate hming chu an ni: Eliphaza chu Esauva nupui Adaii fapa a ni a; Reuela chu Esauva nupui Basemathi fapa

a ni.

¹¹Eliphaza fapate chu Temana te, Omara te, Zephhoa te, Gatama te, Kenaza te an ni a.

¹²Timnai chu Esauva fapa Eliphaza hmei a ni a, Eliphaza tân Amaleka a hrinsak a. Hêng hi Esauva nupui Adaii fapate chu an ni a.

¹³Reuela fapate chu hêngte hi an ni: Nahatha te, Zera te, Samma te, Mizza te an ni. Hêng hi Esauva nupui Basemathi fapate an ni.

¹⁴Hêng hi Zibeona tunu, Ana fanu, Esauva nupui Aholibami fapate chu an ni. Esauva a hrinsakte chu, Jeusa te, Jalama leh Kora te an ni a.

EDOM HOTUTE

¹⁵Esauva fapate zînga a hotu deuh te chu hêngte hi an ni. Eliphaza, Esauva fa û ber fapate chu, Hotu Temana te, Hotu Omara te, Hotu Zephhoa te, Hotu Kenaza te,

¹⁶Hotu Kora te, Hotu Gatama te, Hotu Amaleka te an ni. Chûng chu Edom rama Eliphaza thlahte zînga hotute an ni. Adaii thlahte an ni a.

¹⁷Esauva fapa Reuela thlahte chu hêngte hi an ni: Hotu Nahatha te, Hotu Zera te, Hotu Samma te, Hotu Mizza te an ni a. Chûng chu Edom rama Reuela thlah zînga hotu deuh deuh te an ni. Anniho hi Esauva nupui Basemathi thlahte an ni a.

¹⁸Esauva nupui Aholibami thlahte chu hêngte hi an ni: Hotu Jeusa te, Hotu Jalama te, Hotu Kora te an ni. Chûngte chu Ana fanu, Esauva nupui Aholibami thlah zînga a hotu deuh te chu an ni.

¹⁹Chûngte chu Esauva, Edoma ni bawk thlahte zînga a hotu deuh deuh te chu an ni.

SEIRA THLAHTE

²⁰Hêngte hi a ram lo luahtu Hor mi Seira fapate an ni: Lotana te, Sobala te, Zibeona te, Anaa te,

²¹Disona te, Ezera te, Disna te an ni. Chûngte chu Edom rama awm Seira fapate, Hor mite zînga an hotute an ni.

²²Lotana fapate chu Horia leh Hemama te an ni. Lotana farnu chu Timnai a ni a.

²³Sobala fapate chu hêngte hi an ni: Alvana te, Manahatha te, Ebalate, Sephoa te, Onama te.

²⁴Zibeona fapate chu hêngte hi an ni: Aia leh Anaa te an ni a. Chû mi chu a pa sanghâwngseite a tlattîr laia thlalêra tuihna hmu chhuaktu Anaa kha a ni a.

²⁵Anaa fate chu Disona leh Aholibami, Anaa fanute an ni a.

²⁶Disona fapate chu hêngte hi an ni: Hemdana te, Eshbana te, Ithrana te, Cherana te.

²⁷Ezera fapate chu hêngte hi an ni: Bilhana te, Zaavana te, Akana te.

²⁸Disana fapate chu hêngte hi an ni: Uza leh Arana te.

²⁹Hor mite zînga hotute chu hêngte hi an ni: Hotu Lotana te, Hotu Sobala te, Hotu Zibeona te, Hotu Anaa te an ni.

³⁰Hotu Disona te, Hotu Ezera te, Hotu Disana te an ni. Chûng mite chu Seir rama hotu an insiam dân a ni a, Hor mite zînga hotute chu.

EDOM LALTE

³¹Israel faten rorêltu lal an la neih hma khân hêngte hi Edom rama rorêltu lal lo awm tawhte chu an ni a.

³²Beora fapa Bela chu Edom lalah a ẵng a, a khawpui hming chu Dinhabah a ni.

³³Bela a lo thih chuan Bozra khua ami Zera fapa Jobaban a ai a awm a.

³⁴Jobaba a lo thih chuan, Temani ram lal Husaman a ai a awm leh a.

³⁵Husama a lo thihin Bedada fapa Hadada, Moab rama Midian-ho hnehtu chu a aiah a lo lal a. A khawpui hming chu Avith a ni.

³⁶Hadada a lo thih chuan Masreka mi Samlan a aiawhin ro a rêl a.

³⁷Samla chu a thî a, Rehobot Lui kama mi Saulan a aiawhin ro a rêl a.

³⁸Saula chu a thi a, Akbora fapa BaalHanana chuan a aiawhin ro a rêl a.

³⁹Akbora fapa Baal-Hanana chu a thi a, a aiah Hadaran ro a rêl a; a khawpui hming chu Pau a ni a. A nupui hming chu Mehetabeli a ni a, Mezahaba fa Matredi fanu a ni.

ESAUVA THLAH HOTUTE

⁴⁰Hêngte hi an chhûngkua ang zêl leh an awmna hmun leh an hming ang zêla Esauva thlah hotute chu an ni: Hotu Timna te, Hotu Alva te, Hotu Jethetha te,

⁴¹Hotu Aholibama te, Hotu Ela te, Hotu Pinona te,

⁴²Hotu Kenaza te, Hotu Temana te, Hotu Mibzara te,

⁴³Hotu Magdiela te, Hotu Irama te an ni. Hêngte hi an chênna leh an ram neih ang zêla Edom rama hotute chu an ni. Esauva chu Edom-ho thlahtu a ni.

BUNG 37

JOSEFAN ROPUINA TÛR A MANG

¹Jakoba chu Kanaan rama a pa mikhualna ramah chuan a awm ta a.

²Hei hi Jakoba chanchin chu a ni. Josefa chu kum sâwm leh pasarih mi a nihin a ûte nên ran rual an thlah a. Ani mipa naupang chu a pa hmei Bilhai leh Zilpaii te nên an awm a; Josefa chuan an chanchin ẵa lo chu a pa hnênah a va thlen a.

³Israela chuan Josefa chu a tar lam fa a nih avângin a fa dang zawng aiin a duat bîk a. Kawrfual ẵal mâwi tak a ẵuisak bawk a.

⁴Nimahsela, an pa berin a unau dang zawng aiin a duat bîk tih an lo hriat chuan an haw ta êm êm a, biak pawh an be ẵa duh ta lo va.

⁵Josefa chuan mumang a nei a, a ûte a hrilh a; chû chuan an huat a tizual sauh va.

⁶An hnênah chuan, “Khawngaih takin ka mumang hi min lo ngaihthlâksak rawh u:

⁷Lovah hian buhphal kan lo têt a. Tichuan mâw, ka buhphal chu a lo tho va, ngîl deuh hian a ding a; in buhphalte chuan an lo din hual a, ka buhphal hmâah chuan an kûn a, chibai an lo bûk zu nial!” a ti a.

⁸A ûte chuan a hnênah, “Nang tehchai hian kan chungah ro i la rêl ang maw? Nang tehlul thuhnuaiiah hian maw kan la awm ang?” an ti a. A mumang leh a thu sawi avâng chuan an haw zual sauh va.

⁹Mumang dang a nei leh a, a ûte chu a hrihl leh a. “Ih mâw, mumang dang ka nei leh a. Tûn tuma mi chu, nî leh thla leh arsi sâwm leh pakhatte khian kûnin chibai min lo bûk nia mawle,” a ti a.

¹⁰Tichuan, a pa leh a ûte chu a hrihl a; a pa chuan, “I mumang hi eng ang mumang nge ni ngai le? Kei leh i nu te, i unaute hian lei sia kûnin chibai kan la bûk tehlul ang che mâw?” tiin a zilh ta a.

¹¹A ûte chuan an îtsik laiin a pa erawh chuan a rilrûah a pài reng a.

A UNAUTEN JOSEPHA AN HRALH

¹²Chumi hnû chuan a ûte chu an pa ran rualte thlahin Sekem-ah an kal a.

¹³Israela chuan Josefa hnênah, “I ûte ran rual vêng chu Sekemah an awm a ni lo’m ni? Tî rawh, an hnênah ka tîr ang che,” a ti a. Ani chuan a hnênah, “Heta hi ka awm e,” a ti a.

¹⁴Ani chuan, “Va kal ta la, i ûte chu an tha em tih leh ran rualte pawh an tha em tih va hre Chiang la, chanchin mi rawn hrihl leh dâwn nia,” a ti a. Tichuan Hebron Ruam aţang chuan a tîr chhuak a, Sekemah a kal ta a.

¹⁵Chutia ramhnuaia a vâk a vâk chu mi tuemaw hian a lo hmû a. Chû mi chuan, “Eng nge i zawn?” tiin a zâwt a.

¹⁶Ani chuan, “Ka ûte ka zawn a ni. Khawngaih takin ran rual an tlattîrna hmun min hrihl rawh,” a ti a.

¹⁷Chû mi chuan, “Helai aţanga an kal sawn dâwn khân, ‘Dothan lamah i kal ang u,’ tia an sawi ka hria asin,” a ti a. Tichuan, Josefa chuan a ûte awmna lam chu a va pan a, Dothan-ah chuan a va hmu ta a.

¹⁸Ani chu hla taka a la awm laiin an lo hmû a, an kiang a lo thlen hmân, amah thah tumin an lo phiar a.

¹⁹Anniho chuan, “Sâw le, mumang neia chu a lo kal saw!”

²⁰Hawh u, that ila, khuarkhurumah kan paih daih dâwn nia; ‘Ramsân a seh ta a nih hi,’ kan ti mai ang a. Tichuan, a mumangte chu eng teh fakau nge a nih kan hre mai dâwn alâwm!” an ti a.

²¹Chû chu Reuben a lo hriat chuan, an kut ata a chhan chhuah theih nân, “A thah zawn that lo ve,” a ti a.

²²Reubena chuan an kut aţanga chhan chhuaha, a pa hnêna a hruai kîr leh theih nân, “Thisen chu chhuah suh u, thlalêra khuarkhurumah sâwn thlâk ula, a chungah zawn kut thlâk hauh suh u,” a ti a.

²³Josefa chuan a ûte hnên a lo thleng a, anni chuan Josefa hâk lai, a kawrfual, rawng chi hrang hranga tîal mâwi chu an hlihsak

ngâl a.

²⁴An hruai a, khuarkhurumah chuan an thlak a. Chû khuarkhurum chu tui pawh awm lo, a ruak mai a ni a.

²⁵Chaw ei tûrin an thu ta a. An han hawi vêt a, Ismael-ho chu an sanghâwngseite nê, Gilead ram aţanga hmuimer bawlhlo te, thinghnai damdawi leh beraw te Aigupta rama phur thla tûra an kal duah duah chu an hmu ta a.

²⁶Juda chuan a unaute hnênah, “Kan nau hi kan thaha, a thisen kan thup ringawt hian hlâwkna eng nge awm?”

²⁷Tî r’u, Ismael mite hnênah hian hralh mai ila, a chungah chuan kut i thlâk lo vang u, kan nau, kan thisen zawmpui a ni si a,” a ti a. A unaute chuan rem an ti a.

²⁸Midian sumdâwng miten an kal pelh laiin an unau chuan Josefa chu khuarkhurum aţangin an khâi chhuak a, Ismael-ho hnênah chuan tangkaraw tlang sawmbnihin an hralh a. Tichuan, Josefa chu Aigupta ramah an hruai thla ta a.

²⁹Chumi hnu chuan Reubena chu khuarkhurumah chuan a va kal a, Josefa chu khur chhûngah chuan a lo awm tawh si lo va; a silhfênte chu a pawt thlêr a.

³⁰A unaute hnênah chuan a va kal a, “Kan nau kha a awm tawh lo; kei hi khaw’nge ka kal tâk ang?” a ti a.

³¹Josefa kawrfual chu an lâ a, kêtê an talh a, a thisenah kawrfual chu an hnim a.

³²Chû kawrfual rawng hrang hranga tîal chu an pa hnênah an va hâwn a, “Hei hi kan chhar a. Hei hi i fapa kawrfual a nih leh nih loh i hria em?” an ti a.

³³Ani chuan a lo hre mai a, “Ka fapa kawr ngei a nih hi. Ram sakawlin a seh a ni ngei ang. Josefa hi ramsân a pawt sawm ta a nih hi le,” a ti a.

³⁴Jakoba chuan a silhfên a pawt thlêr a, a kâwngah sâiip a veng a, a fapa chu ni rei tak a sîn a.

³⁵A fapa zawn zawn leh a fanu zawn zawnge chuan amah chu thlamuan an tum a; mahse hnem pawh a duh lo va, “Lusûn chungin ka fapa hnênah thlân*-ah ka liam thla ve mai teh ang,” a ti a. Tichuan amah ngaiin a pa chu a tîp thîn a.

³⁶Tin, Midian-ho khân Josefa chu Aigupta ramah an luhpui a, Pharoa vêngtu sipai lal Potiphara hnênah an hralh a.

BUNG 38

JUDA LEH TAMARI

¹Chûng lai chuan Juda chu a unaute lakah a tla hrang a, Adullam mi pakhat Hira chu a zuk tlawh a.

²Chutah chuan Juda chuan Kanaan mi pakhat Shuaa fanu chu a zu tawn fuh a, nupuiah a nei a, a pâwl ta a.

³Tichuan a rai a, fapa a hring a, a hmingah Era a sâ a.

⁴A rai leh a, fapa a hring leh a, a hmingah Onana a sâ a.

⁵Nau a pài leh a, fapa bawh a hring a, a hmingah Sela a sâ a. Chu mi a hrin lai chuan Juda chu Chezib khuah a awm a.

⁶Juda chuan a fapa û ber Era tân nupui a neihsak a, a hming chu Tamari a ni.

⁷Nimahsela Era, Juda fatîr chu LALPA mithmuhah a suaksual hlê a, LALPA chuan a tihlum ta a.

⁸Juda chuan Onana hnênah, “I û nupui hi nei la, pâwl rawh; tichuan i û tân chi i thlahsak dâwn nia,” a ti a.

⁹Onana erawh chuan a chi thlah tûr chu ama fa a ni dâwn lo tih a hre rân a; tichuan a û nupui a pâwl apiangin, a û tân chi a thlahsak lohna tûrin ama chi chu leiah a titla thîn a.

¹⁰A thil tih dân chuan LALPA a tilungâwi ta lo va; ani pawh chu a tihlum vê ta a.

¹¹Juda chuan a monu Tamari hnênah, “Ka fapa Sela hi a tlangval hmâ chu i pate in lamah lo va hmeithai rih mai ta che. Chuti lo zawng, ani pawh hi a ûte angin a thi vê dah ang e,” a ti a. Tamari chu a pa in lama awm tûrin a hâu ta a.

¹²Nikhua a lo rei a, Juda nupui, Shuaa fanu chu a thî a. A lusûn hun a lo zawh chuan Juda chu Timna khuua a berâm hmul mêtû hnênah a thian Hira, Adullam mi nê chuan an kal ta a.

¹³Tamari hnênah chuan miten, “En teh, i pasala pa chu a berâm hmul mêt tûrin Timna khuua a lo kal dâwn,” tiin an hrilh a.

¹⁴Tichuan, a hmeithaina puan a hlîp a, hmâi khuhnain a inkhuh a, a intuam tlat a, Timna kawnga hmun ualau takah chuan a lo thû a; Sela pawh a puitling ve tawh a, mahse a nupui ni turin amah chu neihtîr an tum lo tih a hre si a.

¹⁵Ani chu Judan a rawn hmuh chuan, nawhchizuar emaw a ti a, a inkhuh tlat si a.

¹⁶Tichuan, a awmna kawng sîr lam chu a va pan a, “Khawngaihin ka lo mutpui ang che âw,” a ti a; a monu a ni tih rêng a hre lo va. Ani chuan, “Mi mutpui manah eng nge mi pêk ang?” a ti a.

¹⁷Ani chuan, “Ran rual zînga mi kêl notê ka rawn thawn ang che,” a ti a. Tichuan, ani chuan, “I rawn thawn hmâin eng thil nge i dahkham ang?” a ti a.

¹⁸Ani chuan, “Dahkham tûr eng nge ka pêk ang che?” a ti a. Ani chuan, “I hming nemna te, i hrui te, i kuta i tiang ken lai te kha ni mai rawh se,” a ti a. Chûngte chu a pê a, tichuan a pâwl a, ani lakah chuan nau a pâi ta a.

¹⁹Ani chu a tho va, a kal sawn a, a hmai khuhna chu a hlîp a, a hmeithai thuam chu a inbel leh ta a.

²⁰Juda chuan chû hmeichhe hnêna a thil dahkham chu lakîr leh tûrin a thianpa Adullam mi chu kêltê a kentîr a; mahse a va hmu zo ta lo va.

²¹Chû hmuna mite chu a zâwt a, “He lai kawngsîra nawhchizuar inpho chhuak nu kha khawiah nge a awm tâk?” a ti a. Anni chuan, “He laiah nawhchizuar an awm lo,” an ti a.

²²Tichuan ani chu Juda hnênah a kîr leh a, “Ka va hmu hauh lo mai. Chu lai hmuna mite pawhin chutiang nawhchizuar an awm loh thû chu min lo hrilh a ni,” a ti a.

²³Juda chuan, “Hê kêl notê hi ka thawn ngei a, i va hmuh tâk si lovah chuan dahkham thilte chu ani khân nei mai rawh se, kan intimualpho palh ang e,” a ti a.

²⁴Thla thum vêl hnûah chuan Juda hnênah chuan miten, “I monu kha a inzuar thîn a; a nawhchizawrhna aţangin sâwn a pâi ta,” tiin an hrilh a. Juda chuan, “Rawn hrui chhuak ula, hâl hlum rawh u!” a ti a.

²⁵An hrui chhuah dâwn laiin Tamari chuan a pasala pa hnênah, “Ka fa paina chu hêng thil neitu hi a ni e,” a ti a. Amah vêkin, “Hêng hming nemna te, hruihrual te, tiang te hi tû ta nge a nih en Chiang teh u,” a ti a.

²⁶Juda chuan ama tâ a ni tih a lo hria a, “Kei aiin a tidik zâwk reng mai, ka fapa Sela tân ka neihtîr loh vâng vek a nih hi,” a ti a. Ani chu a pâwl leh tawh ngai lo.

²⁷A nau neih a lo hun chuan ngai teh, a chhûlah chuan phîr an awm a.

²⁸Nau a han hrin lai chuan pakhat zâwk kut a lo lang a; nau chhartu chuan, “Hei hi a piang hmasa a nih hi” tiin a kutah chuan lasen a suih a.

²⁹A kut chu a la lût leh a, beisei loh takin a unau zâwk chu a lo chhuak ta a. Nau chhartu chuan, “Engtin nge i rawn chhuah khalh theih? Dân bawhchhia i nih hi!” a ti a. Chuvâng chuan a ni, a hmingah Pereza an sak ni.

³⁰A hnungah chuan a unaupa, a kuta lasen bun kha a lo chhuak leh a. A hmingah Zera an sâ a.

BUNG 39

JOSEFA, AIGUPTA SAL

¹Josefa chu Aigupta ramah hrui thlâk a ni a. Pharoa vêngtu sipai hotu, Aigupta mi Potifara chuan amah hrui thlatu Ismael mite hnên aţangin a lo lei a.

²LALPA chu Josefa hnênah a awm a, a hmuîngîl hlê a; a pu Aigupta mi inah chuan a awm ta a.

³LALPAN a awmpui tih leh, a thiltih apiang LALPAN a hlawhtlîntîr zêl tih chu a pû chuan a hre ta a.

⁴Tichuan, a pu mit tung takin Josefa chuan rawng a bâwl thîn a. A inchhûng enkawltu lû-ah a siam a, a pu chuan a thil neih zawng zawng chungah thû a neihtîr ta hial a.

⁵Chutianga a inchhûng thil leh a neih zawng zawng chungah hotu bera a siam aţang chuan Josefa avângin LALPA chuan chû Aigupta mi chhûngkua chu mal a sâwm a; a inchhûngah leh ram lama a neih zawng zawng chungah LALPAN mal a sâwm a.

⁶Josefa kutah chuan engkim a dah vek a, a chaw ei tûr tih mai lohah chuan a thil neih chin pawh a hre tawh lo hial a ni. Josefa chu pian nalh tak leh hmêl tha veng vawng a ni a.

⁷Nakin deuhvah chuan Josefa chu a pu nupui chuan a ngaizâwn ta a, “Mi mutpui rawh,” a ti a.

⁸Nimahsela, ani chuan a duh lo va, a pu nupui hnênah chuan, “En teh, ka pu hian inchhûnga thil engmah hi a hre tawh lo va, ka kutah thil zawng zawng a dah vek a.

⁹Hê inah hian kei aia lian zâwk tumah an awm lo va, nang chauh lo chu ka tân engmah ui pawh a nei hek lo, a nupui i ni miau si a. Chuvângin, hê suahsualna nasa tak hi tiin engtin nge Pathian lakah thil sual ka tih theih ang?” a ti a.

¹⁰Chutiang chuan ni tina amah mutpui tûra a thlêmna chu Josefa chuan a ngaihsak duh lo va, a bula awm ringawt pawh a duh lo va.

¹¹Vawi khat chu, Josefa hna thawk tûr chu in chhângah a lût a, in chhângah chuan mi tûmah an awm loh lai a ni a.

¹²Ani chuan a kawrah a lo man bet a, “Mi mutpui rawh,” a ti a. Ani erawh chuan a silhfên chu a kutah hnutchhiahin a tlan chhuahsan ta daih a.

¹³A silhfên a kuta mi hnutchhiahin a tlan chhuak tih a hmuh chuan,

¹⁴a chhiahhlawhte chu a ko va, an hnênah, “En teh u, min timualpho tûr ringawtin kan hnênah Hebrai mi a rawn la lût a nih hi. Mi mutpui tumin a lo lût a, ring takin ka âu ta vak a ni.

¹⁵Aw ring taka ka au a hriat vêleh a silhfênte chu ka bula hnutchhiahin pânah a tlan chhuak ta a nih kha,” a ti a.

¹⁶Tichuan a pu lo hâw hmâ chu a silhfênte chu a lo kawh reng a.

¹⁷Hetieng hian a pasal hnênah chuan a lo sawi a, “Hebrai chhiahhlawh i rawn lâkluh khâ mi tihmualpho tumin ka hnênah a lo lût a;

¹⁸mahse, theihtâwpin ka au vak a, a silhfên pawh hnutchhiahin a tlan chhuak ta a ni,” tiin a lo hrilh a.

¹⁹“Hei hi i chhiahhlawhin ka chungah a tih dân a nih hi,” tia a nupui thu sawi a han hriat chuan Josefa pu chu a thinrim ta êm a.

²⁰Tichuan, a pu chuan Josefa chu a hruai lawk a, lal mi tângte an dahna thin lung inah chuan a khung ta a. Lung in tâng a ni ta dêr mai a.

²¹Mahse, LALPAN Josepha chu a awmpui a, zahngaihna a lantîr a, lung in tâng vêngtu chuan a lo duhsak êm êm a.

²²Tân in vêngtu chuan lung in tâng zawng zawng chu Josefa kutah a kawltîr vek a; an thiltih apiang chu ama tih a lo ni ta a.

²³LALPAN a awmpui tlat avângin tân in vêngtu chuan Josefa kuta thil awm rêng rêng chu enpui ngaiha a ruat lo va; a thiltih apiang chu LALPAN a hlawhtlîntîr zêl si a.

BUNG 40

LUNG IN TÂNGTE MUMANG

¹Chûng thil thlen hnû chuan Aigupta lal uain petu leh chhang siamtute chuan an lal, Aigupta lal lung an tiâwi lo va.

²Pharoa chu a milian pahni, uain petu hotu leh chhang siamtu hotu chungah chuan a thinur a.

³Josefa tâna hmun, vêngtu sipai lal ina tân inah chuan an tântîr ve a.

⁴Vêngtu sipai lal chuan anni chu Josefa lo enkawl tûrin a dah a, an rawng a lo bâwsak a; hun eng emaw chhûng an tâng vê ta a.

⁵Aigupta lal uain petu leh chhang siamtute chuan lung ina hun engemaw chen an tân hnûin mumang an nei a, zan khatah mumang awmze hrang nei an mang vê vê a.

⁶A tûk zînga an hnena Josefa a va kal chuan, lungngai hmêl an pu tih a rawn hmu a.

⁷Tichuan, a pu ina tâng ve Pharoa miliante hnênah chuan, “Engtizia nge tûkin chu in va ngui vê?” a ti a.

⁸Anni chuan, “Kan pahni hian mumang kan nei vê vê a, min hrilh fiahsak thei tûr an awm si lo va,” an ti a. Josepha chuan an hnênah, “Hrilhfiakhna chu Pathian ta a ni lo vem ni? Khawngaihni min hrilh teh u,” a ti a.

⁹Uain petu hotu chuan a mumang chu Josefa a hrilh a, “En teh, ka mangah chuan grêp hrui hi ka hmâah a lo zâm diah diah a,

¹⁰grêp hrui chuan pêng pathum a lo awm a; a kuhmûm ang hi a ni a, a lo pâ chhuak a, a pâ bâwrte chuan grape hmin a rawn chhuah a.

¹¹Pharoa no chu ka kutah hian a lo awm a; grêp te chu ka lo va, Pharoa novah chuan ka lo sâwr lût a, Pharoa kutah chuan ka lo pe a,” a ti a.

¹²Josefa chuan a hnênah, “Hei hi a hrilhfiakhna chu a ni: Pêng pathumte chu ni thum tihna a ni a.

¹³Ni thum chhûngin Pharoan a châwi sâng leh dâwn che a, i dinhmun ngaiha i ding leh ang a, a uain petu i nih laia i tih dân ang khân Pharoa kutah no i hlân leh dâwn a nih chu.

¹⁴Hamthamna i dawn leh hunah min rawn hre reng ang che. Khawngaih takin ka chungah lainatna rawn lantîr la, hê hmun aţanga mi chhuah tûrin Pharoa hnênah mi rawn sawisak ang che.

¹⁵Hebraiho ram aţanga rûk bo ka ni si a; hê tân in chhûnga min khungna tûr thil engmah ka ti lo ve,” a ti a.

¹⁶Chû hrilhfiakhna chu a tha tih hriain chhang siamtu hotu chuan Josefa hnênah, “Kei pawh ka mumangah chuan, ka lu chungah hian bâwm vâ pathum ka lo chhîpchhuan a.

¹⁷Bâwm chungnung berah chuan Pharoa tâna siam chhang chi hrang hrang a lo awm a, ka lu chungah bâwm chhûnga mi chu savâten an rawn chuk sup sup mai a ni,” a ti a.

¹⁸Josefa chuan a chhâng a, “Hei hi a hrilhfiakhna chu a ni e: Bâwm thumte chu ni thum tihna a ni.

¹⁹Ni thum chhûngin Pharoan i taksa aţangin i lu a khai kâng ang a, thingah a khai ang che a, savâten i taksa an la ei dâwn a nih chu,” a ti a.

²⁰Ni thum ni chu a lo thleng a, chumi ni chu Pharoa pian champhaphâk ni a ni a, a chhiahhlawh zawng zawngte tân ruai a theh a; uain petu hotu leh chhang siamtu hotu ber chu a chhiahhlawhte zîngah chuan a chawi sâng leh ta a.

²¹Uaiin petu hotu chu a hna ngai a chelhtîr leh a, Pharoa kutah no a hlân leh ta a.

²²Chhang siamtu hotu erawh chu, Josefan a lo hrilhfiakh tawh angin a khaihlum ta a.

²³Nimahsela, uaiin petu hotu chuan Josefa chu hre reng lovin a theihngihl ta daih a.

BUNG 41

PHAROA MUMANG

¹Kum hnih a liam hnûah chuan, Pharoa chuan mumang a nei a; ngai teh, lui kamah hian a lo ding a.

²Lui chhông aṭang chuan bāwngpui pasarih, thâu tak leh nalh tak tak hi an lo chhuak a; hnim hring hmunah chuan chāw an lo pet a.

³Ngai teh, an hnung lawkah chuan lui aṭang bawkin bāwngpui pasarih, chêr chhe deuh deuh an lo chhuak vê leh a, lui kamah chuan bāwngpui dangte kiangah chuan an ding a.

⁴Chhông bāwngpui chêr chhe deuh deuh te chuan bāwngpui thau leh nalh tak takte chu an ei zo ta mai a. Tichuan, Pharoa chu a ṭhangharh ta a.

⁵A han muhîl leh a, mumang a nei leh a; buh kung khatah hian buhvûi sarih, hrâw ṭha tak tak hi a lo chhuak a.

⁶Ngai teh, chumi hnûah chuan buhvûi sîn tê tê pasarih, khawchhak thlîin a chhêm ro rim rem hi a lo chhuak leh a.

⁷Chhông buhvui sîn tê tê pasarih te chuan buhvûi hrâw ṭha tak takte chu an hmawm zo ta mai a. Pharoa chu a lo ṭhangharh a, a mumang a lo ni a.

⁸A tûk zîngah chuan a rilru a buai ta hlê mai a, Aigupta rama dâwithiam zawng zawng leh mifing zawng zawngte chu a ko khâwm vek a. Pharoa chuan a mumang chu a lo hrilh hlawm a; mahse, Pharoa hrilh fiahsak thei tumah an awm lo va.

⁹Tichuan, uain petu hotu chuan Pharoa hnênah, “Vawiinah hian ka tih dik lohzia ka hre chhuak ta.

¹⁰Pharoa chu a chhihhlawh chung a thinur lai khân vêngtu sipai hotu inah kei leh chhang siam hotu nên khân min tântîr a,

¹¹zan khat chu, kan pahnihin mumang kan nei vê vê a. Kan mumang neih awmzia erawh chu a inang lo vê vê a.

¹²Chutah chuan kan hnênah Hebrai tlangvâl a awm vê a, vêngtu sipai hotu chhihhlawh a ni a. Ani chu kan han hrilh chuan kan mumangte chu min hrilh fiahsak a, kan mumang neih dân ang zêlin min hrilh fiahsak a ni.

¹³Min hrilh fiahsak ang chiahin thil a lo awm a. Kei chu ka hna ngaiah min dah leh a, ani erawh chu khâihlum a nih tâk kha,” a ti a.

¹⁴Pharoa chuan Josefa chu a kohtîr nghâl a, hmanhmawh takin tân i aṭang chuan an va hrui chhuak a; a inmêt fâi a, a thuamhnâw te a inthlâk a, Pharoa hnênah chuan a lo kal ta a.

¹⁵Pharoa chuan Josefa hnênah, “Mumang ka nei a, tûmah hrilhfiah thei an awm lo. Nimahsela, nang hian mumangte i hre thiam a, i hrilhfiah thei tih an sawi ka lo hria a ni,” a ti a.

¹⁶Josefa chuan Pharoa hnênah, “Keimah ni lovin, Pathianin Pharoa hi muanawm takin chhâng rawh se,” a ti a.

¹⁷Pharoa chuan Josepha hnênah: “Ngai teh, ka mumangah chuan lui kamah hian ka lo ding a.

¹⁸Lui aṭang chuan bāwngpui pasarih, nalh tak tak leh thâu mûm ṭha tak tak hi an lo chhuak nghâl a; hnim hring hmunah hian chāw an lo pet a.

¹⁹Ngai teh, an hnungah chuan bāwngpui dang pasarih, berh chip chep, chêr chhe êm êm, Aigupta ram pumah pawh chutiang khawpa bāwng chêr chhia ka la hmuh ngai loh chu an lo chhuak leh a.

²⁰Chhông bāwngpui chêr leh chhe tak takte chuan a hmasa zâwk, bāwngpui thâu te chu an ei zo ta vek a.

²¹An ei zawh hnû pawh chuan, an ei ta tih pawh hriat loh khawpin a hmâ mi ang khân an la chêr chhe reng mai a. Tichuan, ka ṭhangharh ta a.

²²Ka mumangah vêk chuan buh kung khat aṭang hian buhvûi pasarih, hrâw ṭha tak tak hi a lo chhuak bawk a.

²³Chumi hnûah buhvûi pasarih, vuai thin then, sîn tê tê, khawchhak thlîin a chhêm ro rim rem hi an lo chhuak leh a.

²⁴Buhvûi sîn tê tê te chuan a vui ṭha hote chu an lo lem zo vek a. Hei hi dâwithiamhote ka hrilh a, mahse min hrilhfiah thei tumah an awm lo,” a ti a.

²⁵Josefa chuan Pharoa hnênah, “Pharoa mumangte chu thil pakhat a ni; Pathianin a thiltih tûr Pharoa hnênah a lo entîr a nih chu:

²⁶Bāwngpui ṭha pasarih te chu kum sarih tihna a ni a, buhvûi ṭha pasarih te pawh kum sarih tihna bawk a ni; hê mumang hi thil pakhat a ni e.

²⁷An hnunga bāwngpui pasarih chêr chhe deuh deuh lo chhuakte pawh kum sarih tihna a ni a, buhsî hlîr vui sarih, khawchhak thlîin a chhêm ro rim rem nê, ṭam kum kum sarih entîrna vê vê a ni.

²⁸Hei hi Pharoa hnêna ka sawi tawh chu a ni. Pathianin a thiltih tum chu Pharoa hnênah a lo entîr lâwk a nih hi.

²⁹Aigupta ram pumah a tawntâwa hausakna kum sarih a lo awm ang a;

³⁰chumi zawhah kum sarih chhông ṭam kum a lo awm leh ang a, Aigupta rama hausakna zawng zawng theihngihl ṭhak khawpin ṭam chuan ram chu a ei kawnkâw leh vek ang.

³¹Ram chhôngah hausakna a lo awm tawh tih pawh hriat loh khawpin a zuitu ṭam tla tûr chu a nasa êm êm dâwn a ni.

³²Pathian tih a nih avângin chû mumang chu Pharoa hnênah wawi hnih hmuhtîr a ni a, chhông thil chu Pathianin thlentîr thuai a tum bawk a.

³³Chuvângin, Pharoa chuan mi chinchâng hria leh mifing thlang chhuak sela, Aigupta ram chhônga mawhphurtuâh dah rawh se.

³⁴Pharoa chuan hei hi ti nghâl sela, ram bial chungah hotute ruat sela, anni chuan hê hausak kum kum sarih chhônga Aigupta rama buh thar zawng zawng hmun ngâa ṭhena hmun khat zêl la khâwm rawh se.

³⁵Kum ṭhat kum lo awm hun chhônga buh zawng zawngte chu Pharoa thupêkin buhzêmah te chhêk khâwm ni sela, buhte chu khawpuiah te dah khâwl ni rawh se.

³⁶Chhông buh dah khâwl te chu Aigupta rama ṭam kum kum sarih lo awm hun atâna khêk khâwl tûr a ni; tichuan, ṭam a lo tlâk hun pawha ram a boral loh nân,” a ti a.

JOSEFA A KAISÂNG

³⁷Chû thurâwn chu Pharoa leh a khâwnbâwlho zawng zawng chuan ṭhâ an ti hlê a.

³⁸Pharoa chuan a khâwnbâwlte hnênah, “Mi heti ang, Pathian Thlaraubin a awmpui tlat mi hi kan hmu zo dawn em ni?” a ti a.

³⁹Pharoa chuan Josefa hnênah, “Hêng thil lo thleng tûr hi Pathianin a hriattîr che avângin, nang aia mi chinchâng hria leh fîng an awm chuang lo ve.

⁴⁰Ka lalram chungah hotûah awm la, i thû ang zêlin ka khua leh tuite chu an awm tawh ang; lalthutthlêng luahtu nihnaah chauh nang aiin ka lal ang,” a ti a.

⁴¹Pharoa chuan Josefa hnênah, “Aigupta ram zawng zawng chungah hotûah ka siam tâ che tih hre rawh,” a ti a.

⁴²Pharoa chuan a hming nemna zungbun a kuta mi chu a phâwi a, Josefa kutah a buntîr a; puan zaisîn a sintîr a, a nghâwnghang rangkachak thî a awrtîr bawk a.

⁴³A chuan nân a sakawr tawlaillîr tha ber dawttu a pê a; a hmâah chuan “Thingthi r’u!” tiin an âu zêl a. Tichuan, Aigupta ram zawng zawngah hotûah a dah nghet ta a.

⁴⁴Pharoa chuan Josefa hnênah, “Kei Pharoa ka ni a, i phalna lovin Aigupta ram chhûng zawng zawngah tûma’n an kut leh kê an lek thei lo vang,” a ti bawk a.

⁴⁵Pharoa chuan Josefa hmingah Zaphanath-Panea a vuah a. On khaw puithiam Potifara fanu Asenathi chu nupuiah a neihsak a. Tichuan, Josefa chuan Aigupta ram zawng zawng chu a fang chhuak ta a.

⁴⁶Josefa chu Aigupta lal Pharoa hmâa a va inlan lai khân kum sawmthuma upa a ni a. Josefa chu Pharoa hnên aţangin a kal chhuak a, Aigupta ram zawng zawng chu a fang chhuak ta a.

⁴⁷Kum that kum kum sarih chhûng chuan a ram chuan a tawntâwin buh a thar chhuak thûr thûr a.

⁴⁸Chû kum sarih chhûnga Aigupta rama buh thar zawng zawng chu a chhêk khâwm vek a, khawpuiah te chuan buh chu an chhûng khâwm a; khaw tinin an vêla buh tharte chu an chhûng khâwm zêl bawk a.

⁴⁹Josefa chuan tuipei kama tiauvut ang maia tamin buh chu a chhûng khâwm ta rei rui mai a, a zât pawh an teh tawh lo, a teha teh sên rual a ni ta si lo va.

⁵⁰Tâm kum a lo thlen hmâin On khaw puithiam Potifara fanu Asenathi chuan Josefa chu fapa pahni a hrinsak a.

⁵¹Josefa chuan a fa û zawk hmingah chuan Manasea a sâ a: “Pathianin ka thawhrimna leh ka pa chhungkua zawng zawng theihnghilh theiin mi siam ta si a,” a ti a ni.

⁵²A dawttu hmingah Ephraïma a sâ a: “Pathianin hrehawm ka tuarna ramah chî mi thlah puntîr ta si a,” a ti a ni.

⁵³Tichuan, kum that kum kum sarih chu Aigupta ramah chuan a lo tâwp ta a.

⁵⁴Josefa sawi lâwk angin tâm kum sarih chu a lo thleng tan ta a. Ram tinah tâm a lo tlâ a; nimahsela, Aigupta ram pumah erawh chuan ei tûr chaw a awm a.

⁵⁵Aigupta ram pumah pawh tâm a tla a, mipuite chuan Pharoa hnênah chaw an ngên a. Pharoa chuan Aigupta mipui zawng zawng hnênah chuan, “Josefa hnênah kal rawh u; a hrilh angin ti zêl rawh u,” a ti a.

⁵⁶Tâm chu lei chung zawng zawngah a lo tlâ a, Josefa chuan a buh dah khâwmna inte chu a hawng a, Aigupta mite hnênah chuan a hralh a. Aigupta ramah ngei pawh tâm chu a nasa êm êm mai si a.

⁵⁷Ram tinah tâm tlâ chu a nat êm avângin ram dang zawng zawng mite chu buh lei tûrin Aigupta rama Josefa hnênah an lo kal thîn a.

BUNG 42

JOSEFA UNAUTE AIGUPTA RAMAH

¹Jakoba chuan Aigupta ramah buh a awm tih a lo hria a; Jakoba chuan a fapate hnênah, “Engati nge in inen mai mai?”

²“En teh u, “Aigupta ramah buh a awm tih ka lo hria a ni; chûtah chuan zu kal ula, kan ei tûr zu lei rawh u; tichuan thi lovin kan dam khawchhuak thei dawn nia,” a ti a.

³Tichuan, Josefa unau sâwm te chu buh lei tûrin Aigupta ramah chuan an kal thla ta a.

⁴Jakoba chuan Josefa nau Benjamina chu a ûte hnênah a kaltîr ve lo, “Tawhsual a zu tâwk palh hlauh ang e,” a ti a ni.

⁵Israela fapate chu buh lei tûrin khualzin dangte rualin an kal ta a, Kanaan ramah pawh tâm a tla ve si a.

⁶Josefa chu Aigupta ram awptu a ni a; ram tina mite hnêna buh hralhtu ber a ni a. Josefa unaute chu an lo thleng ta a, a hmâah chuan an kûn a, chibai an bûk a.

⁷Josefa chuan a unaute chu a lo hmu a, a lo la hre hlawn a, mahse hre lo angin a awm a, vîn takin a lo bia a. An hnênah, “Khawi lam aţanga lo kal nge in nih?” a ti a. Anni chuan, “Kanaan ram aţangin buh lei tûrin kan lo kal a ni,” an ti a.

⁸Josefa chuan a unaute an ni tih a hre mai a, anni erawh chuan an hre tawh lo.

⁹Josefa chuan anmahni chungchâng mumanga a man kha a hre chhuak a, an hnênah chuan, “Enthlatu in nih hi! Hê ram ruahzia en thlithlâi tûra lo kal in ni,” a ti a.

¹⁰Anni chuan a hnênah, “Ni lo ve, ka lalpa, i chhiahhlawhte hi buh lei tûr maia lo kal kan ni e.

¹¹Mi pakhat fahrin vek kan ni a; mi rinawm kan ni a; i chhiahhlawhte hi enthlatu kan ni lo,” an ti a.

¹²Nimahsela ani chuan, “Ni lo, hê ram ruahzia enthla tûra lo kal in nih ngei hi,” a ti a.

¹³Anni chuan, “I chhiahhlawhte hi unau sâwm leh pahni, mi pakhat hrin vek, Kanaan rama mi kan ni e; a naupang ber chu kan pa hnênah a awm a, a dang pakhat erawh chu a awm tawh lo va,” an ti a.

¹⁴Nimahsela Josefa chuan, ““Enthlatute in ni!”” ka tih che u kha a dik a ni.

¹⁵“Hetiang hian in nihna dik tak fiah a ni ang; Pharoa nunna chhâlin, in naupang ber heta a rawn kal vê loh chuan hê hmun hi in chhuahsan tawp lo vang.

¹⁶In zînga mi pakhat hi tîr ula, in nau chu han hrui rawh se; in thu sawi chu a dik nge dik lo tih finfiah a nih chhûngin nangni chu rip chhûngah tântîr in ni ang; chuti a nih loh chuan, Pharoa

nunna chhâlin, enthlatu in ni ngei tihna a ni mai!” a ti a.

¹⁷Tichuan, ni thum chhông chu an vâiin tân inah a khung ta a.

¹⁸A ni thum ni chuan Josefa chuan, “Pathian ka tih si a, heti hian ti ula, in him phah dâwn nia:

¹⁹Mi rinawm in nih takzet chuan, hê tân in chhôngah hian in unau tuemaw ber hi tâng sela; nangni erawh chu kal ula, in chhôngkaw tâng tân buh chu phur rawh u.

²⁰In naupang ber churawn hruai ngei rawh u; tichuan, in thu sawi hi a dik tih finfiah a ni ang a, in him phah dâwn nia,” a ti a. Chutiang chuan an ti ta a.

²¹Anmahniho zingah chuan, “Kan nau chungah kan thiltih kha kan thiam lo dêr a ni, a thlaphânzia kan hmu reng a, zahngai tûra min ngen tawk tawk lai khân kan ngaihsak duh lo va; kha vâng khân hê manganna hian minrawn tlâkbuak ta a nih hi,” an ti a.

²²Reubena chuan a chhâng a, “In nau chungah paw khawih suh u,’ ka ti lo che u em ni? In ngaihsak duh lo a nih kha. Ngâwi tak rawh u, a thisen mawh chuan min thîng lêt ta a nih hi,” a ti a.

²³Josefa chuan an thu sawi a lo hre vê reng tih an hre hauh lo va, tawng lettumhingan an hnênah thu a sawi si a.

²⁴Ani chuan lehlam hawiin a kiansan a, a va tawp a. An hnênah chuan a lo kîr leh a, anmahni arawn bia a. An zing atângin Simeona chu a kai chhuak a, an hmuh laiin a phuar a.

KANAAN-AH AN UNAUVIN AN KÎR

²⁵Tichuan Josefa chuan an ip chu buha thun khat tûr leh, an ipah chuan an tangkâ chu dah lêt leh vek tûrin thû a pe a, kalkawnga an ei tûr a paitîr baw a. Chutiang chuan a tihsak a.

²⁶Tichuan, buh chu an sabengtungte an phurhtîr a, chuta tâng chuan an haw ta a.

²⁷Nimahsela, an zinga pakhat chuan an riahna hmunah sabengtung chaw pe tûra a ip a han hawn chuan a tangkâ chu a hmu ta a; a ip rawng bulah chuan a lo awm reng a.

²⁸A unaute hnênah chuan, “Ka tangkâ hi a ngaiin, ip chhôngah a lo awm reng mai!” a ti a. An thin a thâwngin an hlauthâwng ta êm êm a, “Engati nge Pathianin hetia min tih le?” an ti a.

²⁹Kanaan rama an pa Jakoba hnên chu an va thleng a, an chungah thil thleng zawng zawng chu an hrilh a:

³⁰“Chû rama an lal chuan vîn tak takin min bia a, ram enthlatûah min puh lehngâl a.

³¹Keini chuan a hnênah, ‘Mi rinawm tak kan ni a; enthlatu kan ni lo ve.

³²Kan pa fa, unau sâwm leh pahni kan ni; pakhat erawh chu a awm tawh lo va, a naupang ber chu Kanaan rama kan pa hnênah a awm,’ tîin kan hrilh a.

³³“Chû ram lal chuan kan hnênah, ‘Mi dik tak in nih leh nih loh chu heti hian ka hre mai ang; in unau pakhat hi ka hnênah in hnutchhiah ang a, in chhôngte tâng ei tûr chaw phur ula, kal rawh u.

³⁴In naupang ber churawn hruai ula; tichuan, enthlatu ni lovin, mi dik in ni tih ka hria ang. In unaupa ka hrên pawh ka pe kîr leh ang che u a, hê ramah hian in sumdâwng thei baw ang a

ti,” an ti a.

³⁵An ip te an han bun ruah chuan, ip tin maiah chuan an tangka fûn chu a lo awm theuh mai si a; chûng pawisa fûnte an han hmuh chuan an pa ho chuan an hlauthâwng hlê a.

³⁶An pa Jakoba chuan, “Nangni hian ka fate min chântîr zêl mai; Josefa a awm tawh lo va, Simeona lah heti hi a ni leh ta si a; Benjamina leh zêl mi lâksak in tum a. Ka chhiatna tur hlîr a nih hi,” a ti a.

³⁷Reubena chuan a pa hnênah, “Ka kutah dah mai rawh, karawn hruai kîr leh mawh ang; karawn hruai kîr leh loh chuan ka fapa pahni hi tihlum mai ang che,” a ti a.

³⁸Mahse ani chuan, “Ka fapa hi zawng in hnênah a chhuk thla vê lo vang, a û a thi tawh a, ani chauh a dam tawh a. Kawng lakah vanduaia lo tawk ta se, lungngai chungin ka lu tawh hi thlân* ah min liam thlâktîr dâwn asin,” a ti a.

BUNG 43

JOSEFA Û-TE BENJAMINA HRUAIIN AN KÎR LEH

¹Ram chhôngah chuan tâng chu a na ta hlê a.

²Aigupta ram atanga buh an phurh chhoh an ei zawh chuan, an pa chuan an hnênah, “Kal leh ta ula, buh tîem tal zu lei leh ta che u,” a ti a.

³Juda chuan a hnênah, “Chû mi chuan tihtak zetin, ‘In nau chu inrawn hruai loh chuan ka hmêl in hmu tawh lo vang,’ tîin min phût tlat a ni.

⁴“Kan nau hi kan hruai tel i phal chuan chaw lei tûrin kan kal ang.

⁵Kan hruai i phal loh erawh chuan kan kal tawh lo vang; chû mi chuan, ‘In nau chu inrawn hruai loh chuan ka hmêl in hmu tawh lo vang,’ a ti tlat a ni,” a ti a.

⁶Israela chuan, “Engah chuan nge min timangang tûr zâwnga nau dang in la neih thûte in hrilh kher le,” a ti a.

⁷Anni chuan, “Chû mi chuan keimahni leh kan chhôngkaw chanchin hi dîlchhût takin min zâwt a, ‘In pa chu a la dam em? Unau dang in la nei em?’ tîin min zâwt a. Min zawh ang chuan kan chhâng mai a ni. ‘In nau churawn hruai thla rawh u?’ a ti dâwn tih engtin nge kan hriat theih ang?” an ti a.

⁸Juda chuan a pa Israela hnênah, “Kan nau chu min hruaitîr mai rawh, tichuan, kan tho ang a, kan kal dâwn nia; chû chu keini leh nang leh kan fanau têt têt tâna thi lova kan dam khawchhuahna tûr zâwk a ni.

⁹A himna tûr chu keima’n a mawh ka phur ang, keima hnênah phût ang che. I hnênah karawn hruai kîr leh lo a nih chuan kumkhuain a mawh ka phur hlen ang.

¹⁰Inti khawtlâi lo ila zawng, tûnah hian a wawi hnihna kan lo lêt leh hial tawh ang chu,” a ti a.

¹¹An pa Israela chuan, “Chutiang a nih si chuan, tihian ti ang che u: in bâwmah khân hê rama chhuak thil tha thâ hi chû mi hnêna pêk atân chuan keng thla ang che u—thingnai damdâwi te, khawizû te, mawsawla te, beraw te, khawkherh leh theitê te kensak rawh u.

¹²Tangka pawh a lêthnih keng ula, in ip rawnga tangkâ lo awm kha pêk lêt leh atân keng thlâ ang che u; an hmuh hmaih pawh a ni thei asin.

¹³In nau pawh hi hruai ve mai rawh u; tho ula, chû mî hnênah chuan zu kal rawh u le.

¹⁴In unaupa pakhat zâwk leh Benjamina chu a rawn chhuahtîr theih nân Pathian Engkimtithia chuan chû mî chu khawngaihtîr che u rawh se. Ka chûn tāk leh ka chûn nî mai rawh se!” a ti a.

¹⁵Tichuan, anniho chu Benjamina hruaiin thilpêk tûrte bâkah tangkâ a lêt hniha tam kengin an tho va, Aigupta ramah an zuk kal leh a; Josefa hmâah chuan an zu inlan ta a.

¹⁶Josefa chuan an zinga mi Benjamina a lo hmuh chuan a inchhûng enkawltu hnênah, “Hêng mite hi ka inah va hruai rawh, ran talh la, lo siam peih diam ang che; hêng mite hian ka bulah chhun chaw an fâk ve dâwn a ni,” tiin a hrih a.

¹⁷Chû mi chuan Josefa thupêk angin a ti a, Josefa inah chuan anniho chu a hruai ta a.

¹⁸Josefa ina hruai luha an awm ta mai chu anni chuan an hlau ta hle mai a; “Kan kal hmasak tuma kan ipa tangkâ dah lêt leh a nih avâng khân hê hmunah hian min hruai lût a ni ngei ang; kan chungah remchâng zawngin keimahni leh kan sabengtungte nê sala mi man a tum a nih hi,” an ti a.

¹⁹Josefa in enkawltu bul an lo thlen chuan, kawngkhâr bulah chuan an bia a.

²⁰“Aw ka pu, buh lei tûrin wawi khat kan lo kal tawh a;

²¹riahbûk kan thlen chuan kan iptê kan han hawng a, kan ip rawng bulah chuan kan buh leina tangkâ kha a bûk ngai chiahin a lo awm theuh va; chû chu kan rawn keng lêt leh a ni.

²²Buh leina tûr tangkâ pawh a hranin kan rawn keng bawh a. Kan ipa tangka dahtu rêng rêng kan hre lo a ni,” an ti a.

²³Nimahsela ani chuan, “Thlamuang takin awm ula, hlâuthâwng suh u. In Pathian leh in pa Pathian chuan in ipah chuan sum a pê che u a nih chu; in tangkâte chu ka dawng alâwm,” a ti a. Tichuan, an hnênah Simeona chu a rawn hruai chhuak a.

²⁴Chû mî chuan anniho chu Josefa inah chuan a hruai lût a, tui a pê a, an kê te an sil a; an sabengtung ei tûr chaw a pe bawh a.

²⁵Chhûna Josefa lo haw huna an thil ken pêk tûr nê an lo inrâlring a, chutah chuan chaw an ei dâwn tih an hre tawh si a.

²⁶Josefa a lo haw chuan thilpêk tûr an ken chu in chhûngah chuan an rawn la lût a, a hmâah chuan an kun a, chibai an bûk a.

²⁷Ani chuan an dam lai a nih leh nih loh a zâwt a, “In pa putar in sawia chu a dam tha maw? Nungdamin a la awm em?” a ti a.

²⁸Anni chuan an chhâng a, “I chhiahhlawh, kan pa chu a hrisêl thâ a; a la dam e,” an ti a. An kûn a, bawkkhupin chibai an bûk a.

²⁹A han dâk chhuak a, a nau Benjamina, a nu fapa chu a hmû a, “Hei hi in nau in sawi chu em ni?” a ti a. Amah vêkin, “Ka fapa, Pathianin khawngaih che rawh se,” a ti a.

³⁰A nau hmêl a han hmuh chuan a hnuk a ulh a; Josefa chuan tahna tûr hmun fianrial a chuh vat a. Ama pindanah a va lût a, a va tap ta a.

³¹A hmâi a phih a, a lo chhuak leh a; a insûm hrâm hrâm a. “Chaw ei siam rawh u,” a ti a.

³²Ani chu a hrangin, anniho pawh a hrangin, a eipui Aigupta mite pawh a hrangin an eiho ta a; Aigupta mite chuan Hebrai mite nê chaw an kîlho thei lo, Aigupta mite tân thil thiàng lo a ni si a.

³³A hmaa an thut tlar dân chu, an upat dân indawtin, a upa ber aţanga a naupang ber thlengin indawt thapin an thû a; anni chu mak tiin an inen hêl hawl a.

³⁴Josefa hnên aţang chuan ei tûr an han sem kual a, Benjamina chanvo pheî chu mi dangte chan lêt nga laia tam a ni. Tichuan hlim takin an eiin an in ta a.

BUNG 44

JOSEFA NO

¹Josefa chuan a inchhung enkawltu hnênah, “Khâng mite buh ip kha an phurh zawh tâwkin thun khahsak la, an tangkâ chu an ip rawng bulah dah theuh bawh ang che.

²Keima no, tangkaraw no hi an naupang ber ip rawng bulah an buh leina tangkâ nê dah bawh ang che,” a ti a. Tichuan, Josefan a sawi ang chuan a ti a.

³Khua a vâ vêleh anniho chu an sabengtungte nê chuan an kaltîr ta a.

⁴Khua an chhuahsana, an kal hlat hmain Josefa chuan in enkawltu hnênah, “Tho la, khâng mite kha va ûm rawh; i va ûmphâk hunah, ‘Eng aiah nge thâtna chu suala in thungrulh ni?

⁵He no hi ka lalpa uain inna, ai a enna no a ni lo vem ni? Thil sual tak in ti a nih hi,’ ti ang che,” a ti a.

⁶Tichuan a va ûmphâ a, a sawi ang tak chuan a va ti a.

⁷Anni chuan a hnênah, “Engtizia nge kan pu chuan chutia a tih tâk? I chhiahhlawhte hian chutiàng thil chu kan ti duh teuh lo mai.

⁸En teh, kan ip rawng chhûnga tangkâ kan hmuh chhuah pawh Kanaan ram aţangin kan rawn la kîr leh vang vang a ni a. I lalpa in aţangin engtin nge tangkarua emaw, rangkachak emaw kan rûk theih tehlu ang?

⁹I chhiahhlawhte zîngah hian chutiàng thil i hmuh chuan, chu mi chu thi rawh se, keini pawh kan lalpa bâwihah kan ţang mai ang,” an ti a.

¹⁰Ani chuan, “Aw le, in thu ang chu ni rawh se; ka hmuhna ip neitu apiang chu ka bâwihah ţang rawh se, mi dangte chu in fihlîm vek ang,” a ti a.

¹¹Tichuan, hmanhmawh takin an ip theuh chu an la thlâ a, an ip chu an hawng theuh va.

¹²Tichuan, a zawng ta a. A upa ber aţangin a naupang ber thlengin a dap a, Benjamina ipah chuan no chu a hmu ta a.

¹³Chû vêleh an silhfênte an pawthlêr a, an sabengtung phur theuh chu an phurhtîr a, khuaah chuan an kîr leh ta a.

¹⁴Juda leh a unaute chuan Josefa in chu an va thleng a, ani chuan a lo la nghâk reng a; a hmâah chuan an bawkkhup a.

¹⁵Josefa chuan an hnênah, “Eng thil nge in tih tâk? Keini ang te hi chuan aien pawh kan thiam tâwk ang tih in hre lo vem ni?” a ti a.

¹⁶Juda chuan, “Ka lalpa hmâah hian eng nge kan sawi tâk ang? Sawi tûr eng nge kan neih? Engtin nge kan insawi fihlîm tâk ang le? Pathianin i chhiahhlawhte sualna hi a hmu chhuak ta a nih hi: hei le, i no latu bâkah kan vâi hian i bâwih kan ni ta e,” a ti a.

¹⁷Ani erawh chuan, “Chutiang thil chu ka ti hauh lo vang; hê no latu chauh hi ka chhiahhlawhah țang rawh se. Nangni erawh chu, in pa hnênah thlamuang takin hâu chho rawh u,” a ti a.

JUDAN BENJAMINA A DÎLSAK

¹⁸Chû vêleh Juda chuan a va hnaih a: “Aw ka lalpa, i chhiahhlawh hi i beng hriatah thû sawitîr la, i chhiahhlawh chungah hian i thinurna hi puak keh lul suh se; Pharoa ang mai i ni si a.

¹⁹Ka pu, i chhiahhlawhte hnênah, ‘Pa emaw, unau dang emaw in nei em?’ tîin min zâwt a.

²⁰“Ka pu, keini chuan i hnênah, ‘Pa kan la nei a, putar tak a ni a; a tar lam fa, la naupang tak a awm bawk a, a û chu a thi tawh a, ani chauh hi a nu hrin la dam chhun a ni a, a pain a ngai êm êm a ni,’ kan ti a.

²¹“Nangin i chhiahhlawhte hnênah, ‘Ani chu ka hnênah rawn hruai thla rawh u, ka lo hmu vê duh e,’ i ti a.

²²“Ka pu, keini chuan i hnênah, ‘Kan nau Taitea chuan a pa a kalsan thei lo vang, a pa a kal bosan chuan a pa chu a thi mai ang,’ kan ti a.

²³“Nangin i chhiahhlawhte hnênah, ‘In naupang ber in rawn hruai loh chuan, ka hmêl in hmu tawh lo vang,’ i ti tlat si a.

²⁴“Tichuan, i chhiahhlawh kan pa hnênah chuan kan chho va, ka pu, i thu sawite chu kan hrilh ta a.

²⁵Kan pa chuan, ‘Buh tlêm lei tûrin kal leh ta che u,’ a ti a.

²⁶“Nimahsela keini chuan, ‘Kan naupang ber a tel vê loh chuan kan zuk kal tawh lo vang; kan thum ber a tel loh chuan kan pu hmêl kan hmu thei chuang lo vang,’ kan ti a.

²⁷“Tichuan, i chhiahhlawh kan pa chuan, ‘Ka nupuiin fapa pahnihi mi hrinsak tih in hria a;

²⁸“pakhat zâwk chu ka hnên ata a kal chhuak a, “Pawh sawm vekin a awm a nih hi,” ka ti a; chumi hnûah chuan ka hmu leh tawh ngai lo va.

²⁹Tûnah hian ani hi min lâksak leh si chuan, a chungah vanduin lo thleng ta se, lungngai takin ka lu țuak hi thlânah min liam thlaktîr dâwn asin,’ a ti a.

³⁰“Chuvângin i chhiahhlawh, ka pa hnên kan han thlena, Taitea hi a tel vê loh chuan, a nunna leh Taitea nunna hi a inzawm tlat mai si a,

³¹Taitea hi a tel vê loh chuan, a thih phah mai ang. Chuvângin, i chhiahhlawhte hian kan pa, i chhiahhlawh luțuak chu lungngai takin thlânah kan liamtîr dâwn a ni mai.

³²Chuvângin, hê i chhiahhlawh hian kan nau vângin ka pa hnênah ka nun ka lo thâp tawh a, ‘I hnêna ka rawn hruai kîr loh chuan ka pa hmâah hian kumkhuan a mawh ka phur reng tawh

mai dâwn a ni,’ tîin ka lo ințawng tiam tawh a ni.

³³“Chutichuan, mi khawngaih la, i chhiahhlawh hi Taitea aiah ka lalpa bâwihah ka țang zâwk mai ang. Taitea chu a ûte rualin chhohtîr hrâm ang che.

³⁴Taitea tel lovin engtin nge ka pa hnênah ka hâu chhoh theih tehlul ang? Ka pa chungah chhiatna lo thleng tur chu ka ngai ngam dâwn em ni?” a ti a.

BUNG 45

A UNAUTE HNÊNAH JOSEFA A INPUANG

¹Josefa chu amah țawiâwma dinpuitu zawng zawngte hmâah chuan insûm zo lovin a țap chhuak ta phawng mai a, “Mi zawng zawngin mi chhuahsan vek rawh se!” a ti a. A unaute hmâah chuan tu nge a nih a inhriattîr chhûngin a bulah tû dang mah an awm lo.

²Ring takin a țap rawih rawih a, Aigupta mite leh Pharoa in chhûnga awmte pawhin an lo hre pha hial a.

³Josefa chuan a unaute hnênah, “Josefa kha ka ni e; ka pa chu a la dam mâw?” a han ti a. A unaute chuan mak an ti lutuk a, chhân ngaihna pawh an hre lova, an ka ho mai a.

⁴Josefa chuan a unaute hnênah, “Khawngaihin mi rawn hnaih teh u,” a ti a. Anni chuan an va hnaih a. Ani chuan: “In unaupa Josefa, Aigupta rama in hralh kha ka ni alâwm.

⁵Tûnah hi zawng, hê hmuna min hralh avânga lungngaiin mahni pawh inhuat phah duh suh u; nunna chhanhim tûrin Pathianin in hmâah min tîr hmasa zâwk a lo nih hi.

⁶Ram pumah kum hnih chhûng kan țâm tawh a, a bâk kum ngâ lo la awm tûr chhûng hian tûma’n lei an let lo vang a, buh seng tûr a awm hek lo vang.

⁷Leiah hian in tân chi thlah a zuahsak theih nân leh, chhanchhuahna ropui taka in nun a humhim theih nân, in hmâah Pathianin mi lo tîr hmasa a ni.

⁸Chuvângin, hê hmuna mi tîrtu chu nangni ni lovin Pathian zâwk a ni; Pharoa tân paah mi siam a, an chhûngkaw chungah hotu ber leh, Aigupta ram pumpuia rorêltu atân min siam ta a ni.

⁹Ka pa hnênah chuan kal chho leh thuai ula, a hnênah, ‘I fapa Josefa chuan, “Pathianin Aigupta ram zawng zawnga hotu atân mi siam ta a; muang lovin ka hnênah hian lo chhuk thla ang che.

¹⁰Nang leh i fate, i tute leh, i berâm rual leh bâwng rualte, i neih zawng zawng nê, ka awmna bul hnâiah, Gosen ramah hian in awm dâwn nia.

¹¹Tah chuan ka chawm ang che u; chuti lo zawng, nang leh i chhûngte leh, i neih zawng zawngte hi in rethei dâwn êm mai; țâm tlâ hian kum nga dang a la awh dâwn si a,’ a ti,” in ti dâwn nia.

¹²Hre rawh u, keima kâ ngeia in hnêna ka sawi lai hi, in mit leh ka nau Benjamina mit ngeiin a hmuh tâk hi.

¹³Chutichuan, Aigupta rama ka ropuina zawng zawng leh, in mita in hmuh zawng zawng hi ka pa chu han hrilh ula; hmanhmawh takin ka pa chu rawn hruai thla rawh u,” a ti a.

¹⁴Tichuan, Benjamina nghâwngah chuan a kuah ngawih ngawih a, a țap a, Benjamina pawh a û ir chuktuahin a țap bawk a.

¹⁵A ùte zawnz zawnz chu a fâwp ngawih ngawih a, a ùahkhum râwih râwih hlawn a; chumi zawn chuan a unaute nèn tîti khawhchâng an sawiho ta a.

¹⁶Chutih lai chuan “Josefa unaute an lo kal,” tih thù chu Pharoa in chhûnga mite pawhin an lo hria a. Chû chuan Pharoa leh a khâwnbâwlte chu a tilâwm hlê a.

¹⁷Pharoa chuan Josefa hnênah, “I unaute chu hrilh la, ‘Hetihian ti rawh se: In rante chu buh phurhtîrin, kal chhuak ula; Kanaan ramah chuan han kal rawh u.

¹⁸In pa leh in chhungkuate chu han hruai ula, ka hnênah lo kal rawh u; Aigupta ram ùa lai ber hi ka pê ang che u a, hê ram hausakna hi tlân ang che u.

¹⁹Nang pawh, hetiang ti tûr hian thù ka pê ang che: An nupuite leh an fanau têtê chuan nân Aigupta rama tawlailîrte hi khalh chhuak sela; in pa chu hetah hian rawn hruai rawh u.

²⁰Bungraw ken tûr lam pawh ngaihtuah buai duh suh se, Aigupta rama thil ùa tinrêng hi an tâ a ni mai dâwn alâwm,” a ti a.

²¹Chutiang chuan Israela fate chuan an ti a; Pharoa thupêk angin Josefa chuan tawlailîrte a pê a, an zin kawng atâna ei tûr mamawhte a paitir bawh a.

²²An zavaia tân silhfên inthlâkna a pe ùeuh va; Benjamina phei chu silhfên inthlâkna pangâ leh tangkaraw tlang zathum a pê a.

²³A pa hnênah chuan hêngte hi a thawn a: Aigupta rama thil ùa ùa, sabengtung sâwm phurh zawn tâwk leh, a pa tân kalkawnga ei tûr chaw te, buh leh chhang, sabengtungpui sâwm in an phurh tâwk a thawn a.

²⁴Tichuan, a unaute chu a tûr hâw a, an kal chhuak ta a; an hnênah chuan, “Kawng lakah va intibuai rêng rêng suh u,” a ti a.

²⁵Tichuan, Aigupta ram atâng chuan an chho va, Kanaan rama an pa Jakoba hnên chu an han thleng ta a.

²⁶A hnênah chuan, “Josefa kha a lo la dam reng mai, Aigupta ram puma hotu a ni lehngâl a,” an ti a. Jakoba chu a mit sulh a, âwih ngaihna pawh a hre lo.

²⁷Nimahsela, an hnêna Josefa thusawi zawnz zawnz chu an han hrilh a, a chuanna tûr tawlailîr Josefa rawn thawn te a han hmuh chuan an pa Jakoba rilru chu a lo harh leh ta huai a.

²⁸Israela chuan, “A tâwk e. Ka fapa Josefa chu nungdam in a lo la awm reng zu nia. Ka thih hmâ ngei in amah hmu tûr chuan ka kal mawlh ang,” a ti ta a.

BUNG 46

AIGUPTA RAMAH JAKOBA A KAL

¹Chutichuan, Israela chu a neih zawnz zawnz nèn a chhuak a, Beerseba a thleng a, a pa Isaaka Pathian hnênah inthâwina a hlân a.

²Zânah chuan inlârnain Pathian in Israela chu a ko va, “Jakob, Jakob,” a ti a. Ani chuan, “Heta hi ka awm e,” a ti a.

³Ani chuan, “Kei hi Pathian, i pa Pathian chu ka ni; Aigupta rama zuk kal chu hlâw suh, chutah chuan hnam ropui takah ka

siam dâwn che asin.

⁴Aigupta ramah chuan i hnênah ka kal vê ang a, chuta ùang chuan ka hruai chho leh ngei ngei ang che; Josefa kut ngei in i mit a la siamsak ang che,” a ti a.

⁵Jakoba chu Beerseba atâng chuan a tho va; Israela fate chuan an pa Jakoba leh an fanau leh an nupuite chu an chuanna tûr Pharoan a thawnsak tawlailîrah an chuantîr a.

⁶Tichuan, Jakoba chu a tu leh fate zawnz zawnz nèn, an ran rualte leh an bungrua, Kanaan rama an deh chhuah zawnz zawnz nèn Aigupta ramah chuan an kal ta a.

⁷A fapate leh a tupate, a fanute leh a tunute leh, a thlah zawnz zawnz chu Aigupta ramah chuan a luhpui ta a.

⁸Hêngte hi Israela thlah, Jakoba leh a fapate, Aigupta rama chhuk thlâte hming chu a ni: Reubena chu Jakoba fa ù ber a ni a.

⁹Reubena fapate chu Hanoka, Pallua, Hezrona leh Karmia te an ni.

¹⁰Simeona fapate chu Jemuela, Jamina, Ohada, Jakina, Zohara leh Saula, Kanaan hmeichhe laka a fapa te an ni.

¹¹Levia fapate chu Gersona, Kohatha leh Merari te an ni.

¹²Juda fapate chu Era, Onana, Sela, Perezah leh Zera te an ni (Era leh Onana te chu Kanaan ramah an ùa a). Perezah fapate chu Hezrona leh Hamula te an ni.

¹³Isakara fapate chu Tola, Puva, Joba leh Simrona te an ni.

¹⁴Zebuluna fapate chu Sereda, Elona leh Jahleela te an ni.

¹⁵Chûngte chu Leaii fapate, Padan Aram rama Jakoba a hrinsak te chu an ni a, fanu Dinaii a nei bawh. A fapate leh a fanute nèn, an vâi in sawmthum leh pathum an ni a.

¹⁶Gada fapate chu Ziphiona, Haggia, Suni, Ezbona, Eria, Arodia leh Arelia te an ni.

¹⁷Asera fapate chu Jimna, Isua, Isuia, Beria, Sera leh an farnu te an ni a. Beria fapate chu Hebera leh Malkiera te an ni.

¹⁸Chûngte chu Labanan a fanu Leaii awmtunu atâna a pek Zilpai in Jakoba a hrinsak te an ni: mi sâwm paruk an ni.

¹⁹Rakili, Jakoba nupuia fapate chu Josefa leh Benjamina te an ni.

²⁰Josefa chuan Aigupta ramah fa pahnih Manasea leh Ephraima te a nei a, anni chu On puithiam Potifara fanu Asenathi hrinsak an ni.

²¹Benjamina fapate chu Bela, Bekera, Asbela, Gera, Maamana, Ehia, Roshah, Muppima, Huppima leh Arda te an ni.

²²Chûngte chu Rakili fapate, Jakoba laka a hrin te an ni: an vâi in sâwm leh pali an ni.

²³Dana fapa chu Husima a ni.

²⁴Naphthalia fapate chu Jahzeela, Gunia, Jezera leh Sillemah te an ni.

²⁵Chûngte chu Labanan a fanu Rakili enkawltunu atâna a pêk Bilhai in Jakoba a hrinsak te an ni a: an vâi in pasarih an ni.

²⁶Jakoba ruala Aigupta a chhuk thlâte chu ama fa ngei bâkah, Jakoba mote chhiar telin, an vâi in mi sawmruk leh paruk an ni.

²⁷Josefa fapa Aigupta rama piangte chu mi pahni an ni a. Aigupta rama pêm thlâ Jakoba chhûngte zawng zawng chu sawmsari an ni.

GOSEN-AH JAKOBA A INBÊGBEL

²⁸Juda chu Gosen ram lam kawng lo zu kawhmuh tûrin Josefa hnênah a kal hmasaktîr a. Gosen ram chu an lo thleng ta a.

²⁹Josefa pawhin a tawlailîr a buatsaih a, Gosen ramah a pa Israela hmuak tûrin a kal ta a. A pa a va hmuh chuan a kuah ngawih ngawih a, a ir chuktuahin rei fê a òp a.

³⁰Israela chuan Josefa hnênah, “Nungdam i lo la awm reng a, i hmêl ngei ka hmuh leh tâk avâng hian tûnah chuan duh leh thi tawh mai rawh i,” a ti a.

³¹Josefa chuan a unaute leh a pa chhûngte hnênah, “Pharoa hnênah ka va kal ang a, Kanaan rama ka unaute leh ka pa chhûngkua an lo thleng ta tih ka va hrilh ang e.

³²Anni chu berâm vêngtute an ni a, ran vulh mi an nih avângin an berâm rualte, an bâwng rualte leh an neih zawng zawng nêan an rawn chhawm vek a ni,’ tiin ka han hrilh ang e.

³³“Het i hian ti ula, Pharoa a koh che u a, ‘Eng hna thawk mi nge in nih?’ a tih chuan,

³⁴I chhiahhlawhte hi min thlahtute ațang rêngin, keini pawh hi kan naupan têt ata tûn thleng hian ran vulhtute kan ni,’ in ti ang a; tichuan Gosen ramah hian in awm thei dâwn nia; Aigupta mite tân berâm vêngtute chu tenawma ngaih an ni si a,” a ti a.

BUNG 47

¹Josefa chu a kal ta a, Pharoa hnênah, “Ka pa leh ka unaute, an berâm leh bâwng rualte leh an neih zawng zawng nêan Kanaan ram ațangin an lo thleng ta a; Gosen ramah an awm e,” a ti a.

²A unaute zînga mi pangâ a hruai a, Pharoa hmâah a va inlantîr a.

³Pharoa chuan a unaute hnênah, “Eng nge in thawh thin?” a lo ti a. Anni chuan Pharoa hnênah, “I chhiahhlawhte hi kan thlahtute ațangin berâm vêngtute kan ni e,” an ti a.

⁴Anni vêk chuan Pharoa hnênah, “Kanaan ramah tât a tlâk nat êm avângin i chhiahhlawhte hian ran chaw pêk tûr hnim hring pawh kan nei tawh lo va, hê rama awm tûr hian kan lo kal a ni. Tûnah hian i chhiahhlawhte hi Gosen ramah min awmtîr ang che,” an ti a.

⁵Pharoa chuan Josefa chu a bia a, “I pa leh i unaute chuan i hnên an rawn thleng ta a.

⁶Aigupta ram chu i hmaa hi a awm duai alâwm. I pa leh i unaute chu ram t̃ha lai berah hian awm rawh se; Gosen ramah ngei chuan awm rawh se. An zîngah mi fel bîkte an awm a nih phei chuan, ka ran rual enkawltu lû-ahte siam ang che,” a ti a.

⁷Josefa chuan a pa Jakoba chu Pharoa hmâah a hruai a; Jakoba chuan Pharoa chu mal a sâwm a.

⁸Pharoa chuan Jakoba hnênah, “Kum engzât nge i nih tawh le?” tiin a zâwt a.

⁹Jakoba chuan Pharoa hnênah, “Ka khualzin kum leh nîte chu kum za leh sawmthum a ni a; ka dam chhûng kumte hi a

beithamin a retheihthlâk hle a; min thlahtute dam chhûng leh an khualzin kum pawh a zât ve lo,” a ti a.

¹⁰Tichuan, Jakoba chuan Pharoa chu mal a sâwm leh a, Pharoa hnên ațang chuan a kal chhuak ta a.

¹¹Pharoa thupêk angin Aigupta rama ram t̃ha ber, Rameses ramah chuan Josefa chuan a pa leh a unaute tân ram chu a pê a, awmhmun a khuartîr ta a.

¹²Josefa chuan a pa te, a unaute leh an pa chhûngte zawng zawng tân, an chhûngkaw mamawh zat ang zêlin ei tûr a pê a, a châwm ta a.

JOSEFAN TÂM A CHHAWMDÂWL

¹³Ram zawng zawngah chuan ei tûr a awm ta lo va; tât chu a nasat tâk êm avângin Aigupta ram leh Kanaan ram pum pui chu tât tlâ chuan a hrêk chau ta a.

¹⁴Josefa chuan buh lei nâna an hman Aigupta ram leh Kanaan rama tangka awm zawng zawng chu a lâk khâwmsak vek a; Josefa chuan chûng tangkate chu Pharoa inah a dah lût zêl a.

¹⁵Chutia Aigupta ramah leh Kanaan rama sum zawng zawng an hman fai vek hnu chuan, Aigupta mi zawng zawng chu Josefa hnênah an lo kal a, “Châw min pe rawh; engah nge i mithmuh lai renga kan thih mai ang le? Tangka kan nei tawh si lo,” an ti a.

¹⁶Josefa chuan, “In rante rawn pe mai rawh u, tangkâ a awm tawh si loh chuan in rante han pe ula, buh ka lo pe ang che u,” a ti a.

¹⁷Tichuan, an rante chu Josefa hnênah an rawn kai a, Josefa chuan an sakawr te, an ran rualte, an bâwng rualte leh an sabengtungte chu buhin a lo thleng zêl a. Chumi kum chuan kumtluanin an ran rual zawng zawng chu buhin a thlengsak a, an ei tûr pên a châwm ta a.

¹⁸Chumi kum chu a lo ral a, a kum lehah chuan a hnênah an lo kal leh a, “Ka pu, kan tangka kan hman fai vek tawh thu hi zêp rual a ni lo va; kan ran zawng zawng pawh i kutah a awm vek tawh si a. Ka pu, i mithmuhah hian keimahni leh kan ram bâk engmah kaw kan nei ta lo.

¹⁹I hmâah hian kan ram te nêan kan boral ngawt mai dâwn em ni? Keini leh kan ram hi ei tûr man atân min lei mai rawh; tichuan kan ram chawp hian Pharoa bâwihah kan t̃ang mai ang; buh chí min pê la, tichuan thi lova kan dam khawchhuah ve a, kan thlawhmâte a ram chhiat vek loh nân,” an ti a.

²⁰Tichuan, Josefa chuan Aigupta ram zawng zawng chu Pharoa tân a lei vek a; tât chu a nasat êm avângin Aigupta mi tinin an ram an hralh a. Tichuan, ram chu Pharoa ram a lo ni ta a.

²¹Mipuite chu Aigupta ramri tâwp ațanga a tâwp lehlam thlenga khaw hrang hrangah te chuan a sawn darh vek a.

²²Puithiamho ram chauh chu a leisak ve lo va; anni puithiamhote chuan Pharoa hnên ațangin an ei tâwk tûr buh an dawng thin a, Pharoa a pêk ang zât chu an lo ei ve mai a; chuvângin, an ram te chu hralh lovin an awm thei a ni.

²³Josefa chuan mipuite hnênah, “Vawinah hian nangmahni leh in ram chu Pharoa tân ka lei ta a. Hei hi in buhchi tûr a ni a, lovah chuan chîng ang che u.

²⁴Buh in seng hunah Pharoa tân hmun ngaa ðena hmun khat in pe tûr a ni. Hmun ngaa ðena hmun li chu nangmahni chan tûr a ni a, buhchî atân te, chaw atân te, in chhûngte leh in fanau zawng zawngte ei tûr a ni e,” a ti a.

²⁵Anni chuan, “Kan nunna ber min chhan chhuak tawh a, i duh zâwnga awm zêl kan tum ang a, Pharoa chhiahhlawhah chuan kan awm mawlh ang,” an ti a.

²⁶Josefa chuan buh thar hmun ngaa ðena hmun khat Pharoa chan tûr a ni tiin tûn thlenga an la hman, Aigupta ram dânah a siam a; puithiamho ram chauh chu Pharoa ram chanah a telh ve lo.

JAKOBA HNÊNA JOSEPHA THUTIAM

²⁷Tichuan, Israela te chuan Aigupta ram chhûnga Gosen ramah chuan awmhmun an khuar a, in lo ramte neiin an lo ðang zêl a, nasa takin an inthlah pung ta a.

²⁸Jakoba chu Aigupta ramah chuan kum sâwm leh pasarih a dam a. Tichuan, Jakoba dam chhûng chu kum za leh sawmli pasarih a ni.

²⁹Israela thih hun chu a lo hnai ta a, a fapa Josefa chu a ko va, “Ka chungah i lungâwi a nih chuan, ka mal hnuaiah hian i kut han rawlh la, khawngaih takin ka thu hi tihtak zetin mi hlensak ang che. Khawngaih takin Aigupta ramah hian mi phûm suh ang che,

³⁰Aigupta ram aţang hian mi la chhuak la, mi thlahtute hnênah mi phûm la, anniho phûmna hmunah min phûm ve ang che,” tiin a chah a. Ani chuan, “I sawi ang takin ka ti ang e,” a ti a.

³¹Tin, ani chuan, “Ka hnênah chhia chham rawh le,” a ti a. Ani chuan a hnênah chhia a chham ta a. Tichuan, Israela chu a khum lu siin a kûn a.

BUNG 48

JAKOBAN JOSEFA FAPATE MAL A SÂWM

¹Chûng thil thlen hnûah chuan Josefa hnênah, “I pa a dam lo a nia,” an rawn ti a. Ani chuan a fapate pahni, Manasea leh Ephraima chu a hnênah a hruai ve a.

²Jakoba hnênah chuan, “En teh, i fapa Josefan a rawn tlawh dâwn che,” tiin an hrilh a; Israela chu a intiharh a, khumah chuan a ðhu chhuak a.

³Jakoba chuan Josefa hnênah: “Pathian Engkimtitheia chu Kanaan rama Luz khuah ka hnênah a inlâr a, mal min sâwm a,

⁴Ngai teh, chi thlah pung zêl tûrin ka siam ang che a, mipui tam tham taka ka tihpun hunah che, hê ram hi i thlahte hnênah kumkhaw ro atân ka pe ang che,” tiin min hrilh a ni.

⁵Chuvângin, Aigupta rama ka lo kal hmâa Aigupta rama i hrin fapa pahni, Manasea leh Ephraima te hi ka tâ an ni; Reubena leh Simeona te ka tâ an ni ang hian ka tâ an la ni vê zêl ang.

⁶Anni i hrin hnûa piangte chu i tâ an ni ang a, ro luah thúah chuan an unaute hming an ðawm mai ang.

⁷Keima chungchâng hi, Padan ram aţanga ka lo kal lai khân, Kanaan rama kawng lakah Rakili chuan min thihsan a, chû chu Ephrath khuah aţanga hnai tê a ni; Ephrath kawngah kan phûm ta a (chû chu Bethlehem tihna a ni a),” a ti a.

⁸Israela chuan Josefa fapate chu a hmu a, “Hei, tute nge an nih?” a ti a.

⁹Josefa chuan a pa hnênah, “Hê rama Pathianin min pêk, ka fapate an nih hi,” a ti a. Ani chuan, “Khawngaihni ka hnênah han hruai la, mal ka lo sâwm ang e,” a ti a.

¹⁰Israela chu a upat tawh êm avângin a mitin khuah a hmu fiah tawh lo va. Josefa chuan a bul hnai chuan a rawn kai a, anni chu a lo kuah a, a fâwp a.

¹¹Israela chuan Josefa hnênah, “I hmêl hmuh leh hi ka beisei pha tawh lo va; nimahsela, Pathian chuan i fate nên lam mi muhtîr tak hi!” a ti a.

¹²Josefa chuan a fate chu a pa malchung aţang chuan a la sawn a, lei sia kûnin chibai a bûk a.

¹³Josefa chuan an pahnihiin a kai a, Ephraima chu a kut ding lama chelhin Israela kut vei lamah a kalpui a, a kut vei lama Manasea kaiin Israela kut ding lamah a kal hnaihpui bawh a.

¹⁴Israela chuan Ephraima chu a nau zâwk tih hre reng mahse a ban kawkalh a, a kut ding lam chu phar chhuakin, a nau zâwk Ephraima lu chungah a ngat a, a kut vei lam chu Manasea lu chungah a ngat thung a,

¹⁵Josefa chu tihian mal a sâwm a: “Ka pa Abrahamah leh Isaaka te zui ðhin Pathian, Tûn thlenga ka dam chhûng zawnga mi chawmtu

¹⁶Sual zawng zawng laka min tlantû Vântirhkoh chuan, Naupangte hi malsâwm rawh se. Anni hian ka hming leh, Ka pa Abrahamah leh Isaaka hming pu zêl sela, Leiah hian mipui tam tak ni tûrin lo pung thûr thûr rawh se,” a ti a.

¹⁷A pâin Ephraima lu chungah a kut ding lam a ngat tih Josefan a hmuh chuan a ngaihdan a ni ta lo va; Ephraima lu chungah a pa kut ding lam innghat chu lâk sawn a tum a.

¹⁸Josefa chuan a pa hnênah, “Ka pa, khati khân ni lo ve, ani hi fa û zâwk a ni a, a lu chungah i kut ding lam ngat ta che,” a ti a.

¹⁹Mahse a pa chuan a hnai a, “Ka hria e, ka fapa, ka hria e. Ani pawh hnam lian tak a la ni ang a, chi ropui tak a la ni ve tho vang; amaherawhchu, a nau zâwk hi ani aia la ropui tûr a ni a, a thlahte pawh hnam tam tham tak an la ni ang,” a ti a.

²⁰Chuvângin, “Nangmah avângin Israel-fate chuan, ‘Ephraima leh Manasea angin Pathianin siam che rawh se!’ tiin duhsakna an la inhlân ðhin ang,” tiin mal a sâwm a. Chutiang chuan Ephraima chu Manasea aiin a dah hmasa ta a.

²¹Israela chuan Josefa hnênah, “Hei le, ka thi dâwn ta e; nimahsela, Pathianin a awmpui zêl ang che u a, in thlahtute ramah chuan a hruai kîr leh ang che u.

²²Chû chauh ni lovin, Amor-mite ram, an kut aţanga ka khandaih leh ka thal ngeia ka lâksak chu, i unaute chanvo aia chan khata tam ka pe belhchhah ang che,” a ti a.

BUNG 49

A FATE HNÊNA JAKOBA THU HNUHNUNG

¹Jakoba chuan a fapate chu a ko a, “Lo kal khâwm teh u, ni hnuhnunga thil lo thleng tûr ka lo hrilh dâwn che u nia:

²Nangni Jakoba fate u, lo kal khâwm ula, ngaithla teh u, In pa Israela thu hi ngaithla rawh u.

³“Nang Reuben, ka fa û ber i ni a, Ka thiltihtheihna leh chakna hnâr, Mi dangte aia chungnung leh zahawm i ni.

⁴Tui anga nghet lo, tûmah i khûm lo vang, I pa khumpui chu i kai avâng leh, Ka khuma lâwn kaia i tihbawlhhlawh avângin.

⁵“Simeona leh Levia te hi unau an ni a; An chênna hmuna nunrâwnna hriamhreï an ni.

⁶Ka thlarau chu an remruatnaah a tel ve lo vang a; An inrâwn khâwmnaah ka zahawmna a tel vê hek lo vang; An thinur laiin tual an that a, Pawisak nei lovin bâwngchal an hliam a.

⁷An thinura an kawlh êm avângin ânhhia dawng rawh se; An thinrimna pawhin ânhhia dawng rawh se, an râwng si a! Jakoba-ho zîngah ka sem darh ang a, Israel-ho zîngah ka tidarh ang.

⁸“Juda, nang hi i unaute’na an la fak tûra chu i ni e; I kutin i hmêlmâte ringah i la rêk dâwn si a; I pa thlahte chu i hmâah an la kûn ang.

⁹Juda hi sakeibaknei tuai a ni; Ka fapa, i saseh chu i chhohsan a. A kûn a, sakeibaknei angin a bawk a, Tu nge titho ngam ang le?

¹⁰Lalna tiangin Juda a kalsan lo vang a, A ke kêr aţangin dân petu a insawn hek lo vang, Silo-a a lo kal hmâ loh chuan; Amahah chuan miten thu an âwih ang.

¹¹A sabengtung chu grêp hruiah a thlung a, A sabengtung tuai pawh grêp hruï tha chí-ah, A silhfên chu uaina sûin A puante chu grêp tuisenah a sû a.

¹²A mitte chu uain aiin a duk a A hâ-te chu hnute tui aia vâ a ni.

¹³“Zebuluna chu tuifinriat kamah a awm ang a; Lawngte tân chawlhna hmun a ni ang, A ram chu Sidon nê an inrî ang.

¹⁴“Isakara hi sabengtung chak tak, Phurrit pahnih inkâra bawk ang a ni.

¹⁵Chawlh hahdam tha a ti a, A ram chu nuam a ti bawk a; Puak phur tûrin a koki a tihniâm a, Bâwih chhawr lai ang a lo ni ta.

¹⁶“Dana hi a mi Israel hnam chung, Rorêltu tûr a la ni ang.

¹⁷Dana chu kawng sîra rûl a ni, Kawng laia rûl ngân a ni a, Sakawr kêah a lo chuk ang a, A chung a chuang chu a bin thla ang.

¹⁸Aw LALPA, i chhandamna chu ka nghâk reng e!

¹⁹“Gada hi sipai rualin an chîl nek ang a, A tâwpah erawh chuan hnehna a chang ang.

²⁰Asera hi buh leh bâlah a la hausa ang a, Lal ei tûr tuihnai a la thawk chhuak ang.

²¹“Naphtalia hi zukpui chhuah zalen a ni; A ţawngkam a tha si a.

²²“Josefa hi thei buk rah duh tak, Tuikhur kianga thei buk chu a ni a; A pêngin a bangte a zâm khuh vek ang chu a ni.

²³Thal kâptuten nasa takin an timangang a, An kâp bawk a, an haw bawk a.

²⁴Nimahsela a thal ngul chu a khauh reng a, A kut thâte pawh tihchakin a awm a, Jakoba Pathian Chaka kut ngei chuan (Chuta

ţangin Beram Vêngtu, Israela Lungpui chu a awm si a).

²⁵In pa Pathian ngei chuan a ţanpui ang che u a, Engkimtitheia chuan, Chung lam vân malsâwmnate, Hnuai lama tui thûk malsâwmnate, Hnutê leh chhûl malsâwmnatein Mal a sâwm ang che u.

²⁶In pa malsâwmnate hian Min thlahtute malsâwmnate a khûm vek a, Chatuan tlâng tâwp thlengin a khûm a. Chûng chu Josefa lu chungah a chuang ang, A unaute laka tihhrana awm lu chungah ngei chuan.

²⁷“Benamina hi chinghne koham a ni; Zîng lamah a sa seh chu ei a, Tlai lama râlîk sem thîn ang chu a ni.”

²⁸Hêngte hi Israel hnam sâwm leh pahnihte chu an ni a, chûng thûte chu an hnêna an pa sawi a ni. Malsâwmna hlânin, malsâwmna an chan tûr tâwk ang zêlin mal a sâwm a.

JAKOBA A THI A, AN PHÛM

²⁹An hnênah hêng thu hi a chah bawk a: “Ka mite hnênah ka kal tawh dâwn a; Hit mi Ephrona ram chhûnga pûkah khân, min thlahtute kiangah min phûm ve dâwn nia.

³⁰Chû pûk chu Kanaan rama Mamre zâwn taka Makpela ram chhûnga awm, Abrahaman Hit mi Ephrona ram, thlân atâna a leisak kha a ni.

³¹Chû hmunah chuan Abrahamah leh a nupui Sari te, Isaaka leh a nupui Rebeki te an phûm a, kei pawhin Leaii ka phûm bawk a.

³²Chû ram leh a chhûnga pûk chu Hetha fapate hnên aţanga lei a nih kha,” a ti a.

³³Jakoba chuan a fapate hnêna chûng thûte chu a chah zawhin khumah chuan a kê a hlâng kai a, a thaw a tâwp a, ama mite hnênah hruai a ni vê ta a.

BUNG 50

¹Josefa chuan a pa hmai a si a, ţah chungin a pa chu a fâwp vawng vawng a.

²Josefa chuan a pa ruang chu ţawih thei lova siam tûrin a chhiahhlawh damdâwi thiamte chu thû a pê a. Tichuan, damdâwi thiamte chuan Israela ruang chu ţawih thei lovin an siam ta a.

³Chutianga ţawih thei lo va siam tûr chuan ni sawmlî lai a duh a; Aigupta mite chuan ni sawmsarih chhûng an sîn a.

⁴An sîn hun chhûng a lo zawh chuan, Josefa chuan Pharoa chhûngte chu a bia a, “In mit ka tlun chuan, khawngaih takin Pharoa hnênah heti hian minrawn sawisak rawh u,

⁵“Ka pa khân heti hian thu min tiamtîr a, “Ngai teh, ka thi dâwn tawh a; Kanaan rama keima thlan laihsa ngeiah khân min phûm tûr a ni,” tiin. Chuvângin ka pa han phûm tûrin khawngaih takin tûnah hian min kaltîr la, tichuan ka lo kîr leh mai ang,’ a ti a.

⁶Pharoa chuan, “Chhia a lo chhamtîr ang che chuan han kal la, i pa chu han phûm ta che,” a ti a.

⁷Josefa chu a pa phûm tûrin a chho va, ama rualin Pharoa hnuai a thawk milian zawng zawng te, ama in chhûnga upate leh Aigupta rama upa zawng zawng pawh an kal vek a,

⁸Josefa ina awm zawng zawngte, a unaute leh a pa chhûngte zawng zawng pawh an kal chho vek a. Gosen ramah chuan an

fanau tê têtê, an berâm leh bâwng rualte chauh an hnutchhiah a ni.

⁹Ama rual chuan sakawr tawllailîr leh a chung chuang mite an tel vek a, pâwl lian tham tak an ni a.

¹⁰Tichuan, Jordan lui râla Atada hruihzâwl chu an lo thleng a, chutah chuan ropui tak leh urhsûn takin an sùn a. Nî sarih chhûng zet a pa chu an ãah a.

¹¹Chû rama chêng Kanaan miten Atada hruihzâwla an lusûn an hmuh chuan, “Hei hi Aigupta mite lusûn dân runthlâk tak chu a nih hi,” an ti a. Chuvângin chu hmun hmingah Abel Mizraim an ti a, Jordan râla awm a ni.

¹²Tichuan, a fapate chuan a thuchah ang takin an tihsak ta a.

¹³A fapate chuan Kanaan ramah chuan an zâwn lût a, Makpela hmuna pûk, Mamre zâwna mi, Hit mi Ephrona hnên ațanga Abrahaman thlân atâna a leiah khân an phûm ta a.

¹⁴A pa an phûm zawh chuan, Josefa chu a unaute leh a pa phûm tûra ama ruala kal chho hote nên Aigupta ramah an kîr leh ta a.

JOSEFAN A UNAUTE A ẐAWNG THLAMUAN

¹⁵Josefa unaute chuan an pa ber a thih tawh si chuan, “Josefa hian min hua ang a, a chungah thil sual kan tih kha min thungrûl lêt tak tak mai ang â,” an ti a.

¹⁶Tichuan Josefa hnênah zualko an tîr a, “I pa khân a thih hmâ khân thû min chah a,

¹⁷Josefa chu han hrilh ula: “Khawngaih takin i unaute bawhchhiatna leh an sualnaah chuan ngaidam tûrin ka ngên a che; i chungah thil ãa lo tak an ti si a,” ti ang che u, min ti a. Tûnah hian i pa Pathian chhiahhlawhte thil lo tihsual tawh chu khawngaih takin ngaidam ang che,” an ti a. Chû thû an han sawi chuan Josefa chu a ățap ta a.

¹⁸A îte pawh chu a hmâah chuan an bawkkhup a, “Hei le, i chhiahhlawhte kan ni e,” an ti a.

¹⁹Josefa chuan an hnênah, “Hlau suh u, Pathian aiawh ka ni em ni?

²⁰Nangni chuan ka chungah thil sual tih in tum ngei a; mahse Pathianin thil ãaah a chantîr ta hlah zâwk a ni, wawiin anga mi tam tak nunna chhanhim an nih theihna tûr hian.

²¹Chuvângin, hlau rêng rêng suh u; nangni leh in fanaute ei tûr chu ka tum zêl dâwn alâwm,” a ti a. An hnêna zaidam taka a thu sawi chuan a thlamuan ta a.

JOSEFA THIH THÛ

²²Chutichuan, Josefa chu a phhûngte nên Aigupta ramah chuan an awm ta reng a. Josefa chu kum zâ leh sâwm a dam a.

²³Josefa chuan Ephraïma tû leh fate chu khûp thum thlengin a hmu hman a. Manasea fapa, Makira fate pawh Josefa mal chungah châwi len an ni.

²⁴Josefa chuan a unaute hnênah, “Ka thih a hnai ta; Pathianin a rawn kan ngei ngei ang che u a, hê ram ațang hian a hruai chhuak ang che u a, Abrahama te, Isaaka te, Jakoba te hnêna chhechhama pêk a tiam ramah chuan a hruai chho ang che u,” a ti a.

²⁵Josefa chuan Israela thlahte chu chhia a chhamtîr a, “Pathianin a rawn kan hunah che u chuan ka ruhte chu heta ățang hian la chho ang che u,” a ti a.

²⁶Tichuan, Josefa chu a thi ta a, kum za leh sâwma upa a ni. A ruang chu ățawih thei lovin an siam a, Aigupta ramah kuangah chuan an zalh ta a.

EXODUS

Ziah tu: Mosia • Ziah kum: B.C. 1450

Exodus Bu hming hi Genesis ang bawkin, Hebrai ațanga Grik țăwnga Bible lehlin hmasak Septuagint bûin a vuah dân a ni a, a awmzia chu 'kal chhuak' tihna a ni. Sinai Tlâng leh a chhehvêla an awm laia Mosia ziah a ni. Pathianin Israel mite Aigupta rama sala an tâna ata a chhan chhuah dân mak tak chanchin a ni a. A thupui pawh Pathianin a mite a chhan chhuah an nih leh tûr thû te, ram tiam Kanaan rama a hruai kîr leh tûr thû te chu Pathianin Abrahamana hnênah a lo tiam tawh a. Pathian mi thlan Mosia hmangin Aigupta ram ațangin Israel mipuite chu Sinai thlalêrah thil mak ropui tak tak hmangin a hruai chhuak a. Thlalêra an awm laiin Pathianin a hnam thlante hnênah a duh zâwnga an nun dân tûr te, Pathian lawm tlâk leh a pâwl theih tûra an nun dân kawng hrang hranga a kaihhruaina thû a ni. Aigupta rama Pathian thil mak tih ropui te, saltâng chhan chhuahna te, Tuipui Sen kân te, kalhlên Kût te, Manna te, Sinai Tlâng te, Thupêk Sâwm te, Lungpui te, Biakbûk te leh puithiamna chungchâng te a nih avângin Exodus bû hi Bible a thil thleng pawimawh fûn khâwmtu pawimawh a ni. Exodus bu pumpui hi hmun thumah a then theih : (1) Israel mite Aigupta rama an awm lai (Bung 1-15); (2) Tuipui Sên an kân ațanga Sinai Tlâng (Bung 16-18); (3) Sinai Tlâng Israel mipuite khawsa dân (Bung 19-40). Exodus hi Bible-a bu hnihna a ni a, a chhûngah hian bung 40 leh châng 1213 a awm.

BUNG 1

AIGUPTA RAMA ISRAEL FATE TUARNA

¹Hêng hi Israela fate Aigupta rama Jakoba ruala mimal leh chhûngkuua kalte hming chu an ni.

²Reubena te, Simeona te, Levia te, Juda te;

³Isakara te, Zebuluna te, Benjamina te;

⁴Dana te, Naphthalia te, Gada te, Asera te an ni.

⁵Jakoba thlah zawng zawng chu mi sawmsarih an ni (Josefa chu Aigupta rama awm sa a ni a)

⁶Josefa leh a unau te leh a hun laia mi zawng zawng te chuan mual an liam zo ta a. ⁷Israela thlahte chu an chî a ța a, chî tam tak thlahin nasa takin an pûng zel a, an lo chak ta hlê mai a; ram pumah chuan an lo khat ta a.

⁸Aigupta ramah chuan Josefa pawh hre lo lal thar a lo awm ta a.

⁹Chumi chuan a mite hnênah, “En teh u, Israela thlah hote hi keimahni aiin an tamin an chak zâwk dâwn reng mai;

¹⁰ti rawh u, an pun zêl loh nân an lakah finrâwl i thawh teh mai ang u; chuti lo zawng, indonate hi lo awm hlauh se, hmêlma lamah pakaiin keini min do ang a, hê ram hi an chhuahsan mai tûr asin,” a ti a.

AIGUPTA RAMA ISRAEL FATE TUARNA

¹¹Tichuan, rim taka thawka phurrit nasa taka tirethei turin, an chungah hna thawk vêngtute an ruat a. Pharoa bungraw dah khâwmna tûr Pithom leh Ramases khua te an din a.

¹²Nimahsela, an tihretheih nasat poh leh an pung chak sauh va, an darh chak deuh deuh mai si a. Israela thlahte chu hlauhawm an ti ta hial a.

¹³Tichuan, Aigupta mite chuan Israela thlahte chu rim lehzualin hna an thawhtîr a.

¹⁴Sal chhawrin an chhawr ta âwrh âwrh a, hlum ațangin leirawhchan an siamtîr a; lovah hna tinrêng an thawhtîr a. An hnathawhna apiangah a rim thei ang berin an thawhtîr a.

¹⁵Aigupta lal chuan Hebrai nau chhartute chu a ko va, pakhat hming chu Siphraii a ni a, pakhat zâwk chu Puaii a ni;

¹⁶“Hebrai hmeichhiaten nau an neiha, nau in chhar rêng rêngin, mipa a nih chuan in tihlum zêl tûr a ni a; hmeichhia a nih chuan in zuah zêl tûr a ni,” a ti a.

¹⁷Nimahsela, nau chhartute chuan Pathian an ți a, Aigupta lal thupêk ang chuan an ti duh lo va, mipa pawh an zuah ta zâwk zêl a.

¹⁸Tichuan, Aigupta lal chuan nau chhartute chu a ko va, “Engati nge hetiangah in tiha, mipate pawh in zuah zêl mai le?” a ti a.

¹⁹Nau chhartute chuan Pharoa hnenah, “Hebrai hmeichhiate hi Aigupta hmeichhiate nêan an inan loh vâng a ni; nau an awl si a, nau chhartute thlen hmân an lo nei fel hman thîn alâwm,” an ti a.

²⁰Chuvâng chuan Pathianin nau chhartute chu ța takin a ti ta a, mite chu an lo pung zêl a, an chak telh telh baw k a.

²¹Pathian an ți a êm avângin nau chhartute chu chhûngkua te a dinsak ta a.

²²Pharoa chuan a mite zawng zawng hnênah, “Mipa nausên lo piang tawh phawt chu tuiah thlâk zêl ula, hmeichhia a nih chuan zuah zêl ang che u,” tiin thû a pê a.

BUNG 2

MOSIA A LO PIANG

¹Levia chhûngkaw zinga mi pakhat chuan Levia mi baw k nupuiah a nei a.

²Chû hmeichhia chu a rai a, fapa a hring a. Nausên hmêl ța tak a ni tih hriain, chû nu chuan thla thum chhûng a thukrû a.

³A thuhrûk reng theih si loh avângin, rairuanga siam bâwm a la a, hlumin a zût phuî a, alkatra in a châr nghet a, a chhûngah naute chu a mut a, luipui kama rairuang buk zîngah a dah ta a.

⁴Engtin nge a awm zêl tih hriat tumin, a farnu chu râlkhatath chuan a ding reng a.

⁵Chutih lai chuan Pharoa fanu chu luiah inbual tûrin a lo kal a. A chhiahhlawh nulate chu lui kamah chuan an lo vâk vêl a; rairuang zînga bâwm a hmuh chuan a chhiahhlawh nu chu va la tûrin a tîr a.

⁶A han hawn chuan, nausên chu a hmu a, nausên chu a ța ta a. A khawngaih ta êm êm a, “Hei, Hebrai fa a ni reng mai,” a ti a.

⁷A farnu chuan Pharoa fanu hnênah, “Nau awmtu tûr Hebrai hmeichhia ka va koksak ang che âw, a awmsak dâwn che nia?” a ti a.

⁸Pharoa fanu chuan a hnenah, “Va kal ta che,” a ti a. Chû nula chu a kal a, naute nu chu a va ko va.

⁹Pharoa fanu chuan a hnênah, “Hê nautê hi hâwn la, mi awmsak rawh; hlauh ka pê ang che,” a ti a. Tichuan, hmeichhia chuan nausên chu a la a, a enkawl ta a.

¹⁰Nautê chu a lo ðang lian a, Pharoa fanu hnênah chuan a hruai a; ani chuan ama fapaah a lo neih ta a. A hmingah Mosia a sa a, “Tui ata ka lâk chhuah a nih avângin,” a ti a ni.

MIDIAN RAMAH MOSIA A TLÂNCHHIA

¹¹Mosia chu a lo puitling ta a. A unaute kan tûrin a va leng chhuak a, an phur rihziata chu a va hmu a. Aigupta mi hian a unau Hebrai zînga mi pakhat a vaw lai chu a va hmu a.

¹²Tichuan, ani chu a hawi kual a, tumah hmuh tûr an awm lo tih a hriatin, Aigupta mi chu a that a, ðiauvutah a thukru ta a.

¹³A tûkah chuan a va kal leh a, Hebrai mi pahnih hi an lo insual a, a thiam lo zâwka hnênah chuan, “Engati nge ðian te kut i thlâk tâk mai?” a ti a.

¹⁴Ani chuan, “Tu nge kan chungah lalah leh rorêltûah siam che? Aigupta mi i thah ang bawka mi thah ve i tum a ni mâw?” a lo ti a. Mosia chuan, “E heu, an lo hre tlat mai â!” a ti a, a hlauthâwn ta a.

¹⁵Pharoan chû chu a lo hriat chuan, Mosia chu thah a tum ta a. Nimahsela, Mosia chu Pharoa hmuh phâk loh tûrin a tlan bo va, Midian ram a va thleng a, tuikhur bulah a ðhû a.

¹⁶Midian rama puithiam chuan fanu pasarih a nei a. Tui châwi tûrin an lo kal a, an berâm rualte in tûrin tuikuangah chuan tui an chhûng khat ðhin a.

¹⁷Chutih lai chuan berâmpuho an lo kal a, an rawn hnawt darh a; Mosia chu a lo ðing chhuak a, a rawn ðanpui a, an berâm rualte chu tui a pêksak ta a.

¹⁸An pa Reuela hnêna an va haw chuan, “Vawiin chu in lo va hâu hmâ ve, engtizia nge?” a lo ti a.

¹⁹Anni chuan, “Aigupta mi pakhatin berâmpuho kut aţangin min chhan chhuak a, tui tam tâwk min thâlsak a, kan berâm rualte tui min pêksak bawk a,” an ti a.

²⁰Ani chuan a fanute hnênah, “Chû mi chu khawiah nge a awm? Engati nge in rawn kalsan? Chaw ei tûrin va ko teh u,” a ti a.

²¹Mosia chuan chu mi hnêna awm chu a remti ta a; ani chuan a fanu Zippori chu Mosia a neih tûr a.

²²Ani chuan fapa a hrinsak a, a hmingah Gersoma a sâ a; “Ram dangah mikhualin ka awm ta si a,” a ti a ni.

²³Hun a kal zêl a, Aigupta lal chu a thi ta a. Israel fate chu an saltâna avangin an rûm a, an âu va; an saltâna avânga an au âw chu Pathian hnên a lo thleng a.

²⁴Pathian chuan an rûm thâwm a lo hria a; Pathian chuan Abrahama te, Isaaka te, Jakoba te hnêna a thutiam kha a hre reng a.

²⁵Pathian chuan Israel fate chu a thlîr reng a, a ngaihsak ta a.

BUNG 3

THING BUK KANG BULAH MOSIA

¹Mosia chuan a puzawn, Midian puithiam Jethroa berâm rualte chu a veng ðhin a. Berâm rual chu thlalêr thlang lamah a hruai a, Pathian tlang, Horeb hmun chu a va thleng ta a.

²LALPA Vântirhkoh chu hnim buk zîngah chuan meialhin a hnênah arawn inlâr a. A han en chuan, ngai teh, hnim buk chu a alh hlauh hlauh a, mahse hnim buk taka chu a kâng ral si lo va.

³Mosia chuan, “He thil ropui tak hi ka han en Chiang ang a, engati nge hnim buk hi a kan ral loh tih ka han fiah teh ang,” a ti a.

⁴Chumi en tûra a han kal peng chu LALPA chuan a hmu a, hnim buk aţang chuan Pathianin, “Mosi, Mosi!” tiin a ko va. Ani chuan, “Heta hi ka awm e,” a ti a.

⁵Ani chuan, “Hê hmun hi rawn hnaih suh. I pheikhawk kha phelh rawh, i dinna kha hmun thianghlim a ni e,” a ti a.

⁶Amah vêkin, “Kei hi i pa Pathian, Abrahama Pathian, Isaaka Pathian, Jakoba Pathian ka nih hi,” a ti a. Mosia chuan a hmai a hup a, Pathian chu a en ngam lo va.

⁷LALPA chuan, “Aigupta rama ka miten hrehawm an tawrh nasatzia ka hmu reng a, rim taka anmahni chhawrtute avânga an rûm thâwm leh an lungngaihzia pawh ka hria a ni.

⁸Chuvângin Aigupta hote kut aţanga chhan chhuak tûr leh, chû ram aţanga ram ðha leh ram zau, khawizû leh hnute tui luanna ram, Kanaan mite, Hit mite, Amor mite, Periz mite, Hiv mite leh Jebus mite rama hruai chho tûrin ka lo chhuk a ni.

⁹Ngai teh, Israel fate ðap thâwmin ka hnên a lo thleng a, Aigupta miten an hnehchhiah dân leh an tihnaawmnahzia chu ka hmu reng si a.

¹⁰Hawh teh, Aigupta ram aţanga ka mi Israel fate hruai chhuak tûrin Pharoa hnênah ka tîr ang che,” a ti a.

¹¹Mahse, Mosia chuan Pathian hnênah, “Pharoa hnêna zu kala, Aigupta ram aţanga Israel fate hruai chhuak tûr meuh chuan kei tehlul hi tu nge maw ka nih le?” a ti a.

¹²Ani chuan, “Ka awmpui tlat dâwn che alâwm. Keima tîr ngei i ni tih hei hi chhinchhiahna tûr a ni: Aigupta aţanga ka mite i rawn hruai chhuah hunah hê tlângah ngei hian Pathian rawng i la bawl dawn nia,” a ti a.

¹³Mosia chuan Pathian hnênah, “Israel fate hnênah chuan zu kal ta îla, ‘In thlahtute Pathianin in hnênah mi tîr a ni,’ ka tiha, annin, ‘Tu nge a hming chu?’ tiin mi lo zâwt sela, engtin nge ka chhân ang?” a ti a.

¹⁴Pathian chuan Mosia hnênah, “AWMA* KA NI,” a ti a. “Tichuan, Israel fate hnênah, ‘AWMA** chuan in hnênah mi tîr a ni,’ i ti dâwn nia,” tiin a hrilh a.

¹⁵Pathian chuan Mosia hnênah, “Israel fate hnênah chuan heti hian i sawi tûr a ni: ‘LALPA in thlahtute Pathian, Abrahama Pathian, Isaaka Pathian, Jakoba Pathian chuan in hnênah mi tîr a. Hei hi kumkhuaa ka hming chu a ni a, ðangthar lo la awm tûr zawng zawngte pawhin min hriatrengna tûr chu hei bawk hi a ni.’

¹⁶Kal ta la, Israel upate chu ko khâwm la, an hnênah, ‘LALPA in thlahtute Pathian, Abrahamama Pathian, Isaaka Pathian, Jakoba Pathian chu ka hnênah arawn inlâr a, “Ka rawn kan tawh reng che u a, Aigupta rama an tihduhdah dân che u pawh ka hmu reng a ni;

¹⁷tihnawmnah in tuarna Aigupta ram ațang hian ka hruai chhuak ang che u a, Kanaan mite, Hit mite, Amor mite, Periz mite, Hiv mite, Jebus mite ram, khawizû leh hnute tuia luang ramah chuan ka hruai ang che u,” a ti,’ ti ang che.

¹⁸“Tichuan, i thû an âwih mai ang; chutichuan, nang leh Israel upate chu Aigupta lal hnênah chuan in kal ang a, a hnênah, ‘LALPA, Hebrai mite Pathianin min rawn tlawh a; chuvângin, LALPA kan Pathian hnêna inthâwina kan hlan theih nân thlaler ni thum kala hlaa va kal min phalsak tûrin i khawngaihna kan dîl a che,’ ti ang che u.

¹⁹Aigupta lal chuan a kaltîr phal dâwn lo che u tih ka hre sâ reng a, kut chak takin nawr mahse a phal chuang lo vang.

²⁰Tichuan, keiin ka kut ka phar ang a, chû hmunah ngei chuan ka thiltih mak zawng zawng hmangin Aigupta chu ka la hrem dâwn a ni; chumi hnûah erawh chuan a chhuahtîr ang che u.

²¹Tichuan, hêng mite hi Aigupta mite duhsakna ka dawntîr ang a; in kal chhuah hunah chuan kutruakin in kal hauh lo vang.

²²In hmeichhia zawng zawngten an thenawma chêngte hnên ațangin tangkarua leh rangkachaka siam thil te, silhfênte in dîl ang a; chûng chuan in fapate leh in fanute chu in chei tîr a ni. Chutiang chuan Aigupta mite chu in rawk tîr a ni,” a ti a.

BUNG 4

PHAROA TANA CHHINCHHIAHNA MAK

¹Mosia chuan a chhâng a, “Min lo ring duh ngut lo vang; ka thu sawite pawh an lo âwih duh tak tak lo vang; ‘LALPA chu i hnênah a inlâr nek lo vang e,’ te an lo ti mai thei asin,” a ti a.

²LALPA chuan a hnênah, “I kuta mi kha eng nge?” a ti a. Ani chuan, “Tiang,” tiin a chhâng a.

³Ani chuan, “Leiah han paih teh,” a ti a. Leiah chuan a han paih a, rûlah a chang a; Mosia chu a tlânchhe ta a.

⁴LALPA chuan Mosia hnênah, “I kutin ban la, a meiah man rawh,” a ti a (a kutin a han ban a, a meiah a man a, a kutah chuan tiang a lo ni leh ta mai a).

⁵Hetianga i tih chûan LALPA an thlahtute Pathian, Abrahamama Pathian, Isaaka Pathian, Jakoba Pathian chu i hnênah arawn inlâr ngei tih an hria ang,” a ti a.

⁶LALPA chuan a hnênah, “I kutin i âwm kha han zen teh,” a ti a. A kutin a âwm a han zen a, a han phâwi chhuah leh chuan ngai teh, a kut chu vûr anga vârin a lo phâr ta vek mai a.

⁷Ani chuan, “I kut khân i âwm han zen leh teh,” a ti a. Tichuan a kut chu a âwmah a han zen leh a, a han phâwi chhuah chuan a pangti dang ang chiahin a lo awm leh ta mai a.

⁸“Chuvângin, i thu sawi an ngaihlâk duh loh emaw, chhinchhiahna hmasa zâwk an âwih loh emaw chuan, hê chhinchhiahna thuchah hi chu an âwih tawh ang.

⁹Hêng chhinchhiahna pahnihte hi an la âwih duh loh cheu va, i thû an ngaihlâk duh loh zêl chuan, luia mi tui suak la, lei chârah bun chhuak ang che. Lui ațanga tui i suah chu lei chârah chuan thisenah a chang dâwn a ni,” a ti a.

¹⁰Mosia chuan LALPA hnênah, “Aw ka Lalpa, i chhiahhlawh hi kei mi biak hmâ leh hnûah pawh ățawngkam ka thiam si lo; ka ățawng a muang si, ka dang a âwk baw si,” a ti a.

¹¹LALPA chuan a hnênah, “Mihring kê hi tu siam nge? ățawng thei lo te, bengngawng te, mitvâr te, mitdel te hi tû siam nge? Kei, LALPA hi ka ni lo vem ni?

¹²Chuvângin kal mai rawh, i kê chu ka awmpui ang a, i sawi tîr chu ka hrilh zêl ang che,” a ti a.

¹³Mahse ani chuan, “Aw ka Lalpa, khawngaih takin mi dang tîr zâwk mai rawh,” a ti a.

¹⁴Tichuan, LALPA thinurna chu Mosia chungah chuan a ling ta a: “I u Aarona, Levia chî a awm a ni lo vem ni? ățawngkam thiam tak a ni tih ka hria. En rawh, nangmah hmuak tûrin a lo kal chhuak e. A hmuh che chuan a thinlung a lâwm hlê ang.

¹⁵Ani hnênah chuan thû sawi la, a kâah thu dah rawh. I kê leh ama kê chu ka awmpui ang a, in tih tîr chu ka hrilh zêl ang che u.

¹⁶Ani chu mipuite hnêna i thu sawi chhâwngtu a ni ang. Amah chu i tân kê a ni ang a, ama tân nang chu Pathian ang i ni ang.

¹⁷Hê tiang hi keng zêl la, hemi hian thil mak i ti thîn dâwn nia,” a ti a.

AIGUPTA RAMAH MOSIA A KAL

¹⁸Tichuan, Mosia chu a puzawn Jethroa hnênah chuan a kîr leh a, a hnênah, “Aigupta rama ka unaute an la dam em tih zu tlawh tûrin khawngaihin mi kaltîr ta che,” a ti a. Jethroa chuan Mosia hnênah, “Thlamuang takin kal ang che,” a ti a.

¹⁹LALPA chuan Midian rama Mosia hnênah, “Kal la, Aigupta ramah chuan kîr leh rawh; nangmah thah tumtu zawng zawng kha an thi vek tawh e,” a ti a.

²⁰Tichuan Mosia chuan a nupui te, a fapate a hruai a, sabengtung chungah a chuantîr a, Aigupta ramah chuan a kîr leh ta a. Mosia chuan Pathian tiang chu a keng zêl a.

²¹LALPA chuan Mosia hnênah, “Aigupta ram i thlen hunah i kuta thil mak ka dah zawng zawngte kha Pharoa hmâah entîr ang che. Amaherawhchu, mipuite a chhuahtîr phal loh nân a thinlung chu ka tiluhlul dâwn a ni.

²²Pharoa hnênah chuan heti hian ti ang che, ‘LALPAN heti hian a ti: “Israela chu ka fapa, ka fa û ber a ni.

²³Chuvângin, ka hrilh a che, ka rawng a bâwl theih nân ka fapa hi chhuahtîr rawh. I chhuahtîr duh loh chuan, i fapa, i fa û ber chu ka tihlum ve ang,” a ti e, ti ang che,’ a ti a.

²⁴Kalkawnga riahhmun awmna an thlen lai chuan LALPAN a lo tawh a, tihlum a lo tum a.

²⁵Zîpori chuan lung hriam tak a la a, a fapa serhvnun hmâwr chu a tansak a, Mosia kêah a paih a, “Ka tân chuan thisen kai pasal i nih tâk hi!” a ti a.

²⁶Lalpa chuan a kaltîr zêl a. Ani chuan, “Thisen kai pasal i ni ei!” a ti a— chû chu serhtan a tihna a ni.

²⁷LALPA chuan Aarona hnênah, “Mosia hmuak tûrin thlalêrah kal rawh,” a ti a. Tichuan a kal a, Pathian tlângah chuan a va hmû a, a fâwp a.

²⁸Mosia chuan Aarona hnênah chuan amah tîrtu LALPAN a hnêna thu a hrilh zawng zawng te, thil mak ti tûra thû a pêk zawng zawngte chu a hrilh vek a.

²⁹Tichuan, Mosia leh Aarona te chu an kal zêl a, Israel fate zînga upaho chu an ko khâwm vek a.

³⁰Aarona chuan LALPAN Mosia hnêna thû a pêk zawng zawng chu a hrilh vek a. Mipui hmâah chuan thil makte chu a entîr bawk a.

³¹Anni chuan an ring ta a; LALPAN Israel fate a rawn tlawhin an hrehawm tuar nasatzia a rawn hmuhpui tih an han hriat chuan, an lu kûnin chibai an bûk a.

BUNG 5

PHAROA NENA INTAWH VAWI KHATNA

¹Chumi hnû chuan Mosia leh Aarona chu Pharoa hnênah an kal ta a, a hnênah, “LALPA Israelte Pathian chuan heti hian a sawi e: ‘Ka miten ka tân kût an hman theih nân thlalêrah kaltîr rawh,’ a ti,” an ti a.

²Pharoa chuan, “Israelte chhuahtîr tûra a thû ka âwih tûr LALPA chu tu nge? LALPA in tiha chu tu nge a nih ka hre lo ve, Israelte pawh ka chhuahtîr hek lo vang,” a lo ti a.

³Anni chuan, “Hebraite Pathianin min rawn tlawh a. Chuvângin, ni thum kala hlâ thlalêrah va kal a, LALPA kan Pathian hnêna inthâwina va hlân tûrin khawngaih takin min kaltîr rawh, chuti lo zawng, hriin emaw, khandaihin emaw min hrem mai ang asin,” an ti a.

⁴Aigupta lal chuan an hnênah, “Nangni Mosia leh Aarona te u, engah nge mite hna thawk lai in tih khaihlak mai mai le? An hnathawhnaah kîr leh vat rawh se,” a ti a.

⁵Pharoa vêkin, “En ta che u, hê ram chhûnga mi an tam tawhzia hi, an hnathawh lai in chawltîr ringawt lehngghâl a!” a ti bawk a.

⁶Tichuan, chumi ní lâ lâ chuan Pharoa chuan hna thawk vêngtute leh an hotute chu thû a pê a,

⁷“Tûn hmâ ang khân hêng mite hi leirawhchan siamna tûr buhpâwl pe tawh suh u. Anmahni ngeiin inzawng chawp tawh zâwk rawh se.

⁸Leirawhchan an siam tûr zât chu a hmâa mi ang tho ni rawh se. Tih tlêmsak hlek suh u. An dâwngdah mai mai a nih hi; chuvâng chuan alâwm, ‘Kan Pathian hnênah inthâwi tûrin min kaltîr rawh,’ te an tih ni.

⁹“An thawh tam lehzuâl nân, hnathawh tûr pêk belh rawh u, dâwt thû mai mai hi ngaihven suh se,” a ti a.

¹⁰Tichuan, hna thawk vêngtute leh hotute chu an kal chhuak a, mipuite hnênah, “Pharoan heti hian a ti: ‘Buhpâwl ka pe tawh lo vang che u.

¹¹Kal ula, nangmahnin va inzawn chawp tawh rawh u; in thawh tûr bituk zât chu tihtlêm a ni hek lo vang,’” an ti a.

¹²Tichuan, mite chu Aigupta ram dung tuanin, buhpâwl aiah buh bul zawng khâwmîn an vâk darh chum chum a.

¹³Hna thawk vêngtute chuan, “Buhpâwl awm laia in ni tin thawh tûr zât kha thawk zo vek rawh u,” tiin an lo tur hmanhmawh reng bawk a.

¹⁴Israel fate zînga Pharoa hna thawk vêngtu hotu atâna an ruatte pawh an vua a, “Engah nge niminah leh waviinah leirawhchan siam tûr tuk zât in siam loh?” an ti a.

¹⁵Israel fate zînga hotute chu Pharoa hnênah an va kal a, “I chhiahhlawhte hi engti zia nge heti taka min tih tāk mai le?”

¹⁶I chhiahhlawhte hi buhpâwl min pe si lo va, ‘Leirawhchan siam rawh u!’ min ti bawk si a. I chhiahhlawhten vuak kan tuar a, i mite thiam loh a ni asin,” tiin an va zualko a.

¹⁷Mahse, ani chuan, “In thatchhiat vâng lek a nih chu! Thatchheho! Hei vâng lek hi a nih hi, ‘LALPA hnênah inthâwi tûrin i kal ang u,’ te in tih ni.

¹⁸“Ti khân hnâ thawkin va kal teh u; buhpâwl pawh pêk in ni tawh lo vang a, leirawhchan in siam tûr tuk zât in siam tho tûr a ni,” a lo ti khur khur a.

¹⁹“Ni tina an leirawhchan siam tûr tuk zât tihtlêm a ni lo vang,” tih thû an han hriat chuan, Israel fate zînga hotute chuan an chan chauhzia an lo inhre ta a.

²⁰Pharoa hnên aţanga an lo chhuah lai chuan anmahni hmuh tuma lo ding reng Mosia leh Aarona te chu an va tâwk a.

²¹An hnênah, “LALPAN in chungah ro rêl rawh se, Pharoa leh a chhiahhlawhte laka mi huatlhala leh an kuta tihhlum tlâk leka min siamtu in lo nih hi,” an ti a.

ISRAELTE CHHAN CHHUAHNA TIAMSAK A NI

²²Mosia chuan LALPA lam a hawi a, “LALPA, engati nge hêng mite chungah hian manganna i rawn thlen tāk le? Engah nge a tîrh pawh mi tîrh ni?”

²³I hminga Pharoa hnêna thu sawi tûra ka kal aţang tawhin, hêng mite lakah hian a sual zual sauh mai si a; i mite lah i chhan chhuak leh tawp si lo va,” a ti a.

BUNG 6

¹LALPA chuan Mosia hnênah, “Tûnah hian Pharoa chung a tih tûr i hmu tawh ang. Kut chak takin a chhuahtîr dâwn a, kut chak tak bawkin a ram aţang hian a la hnawt chhuak dâwn a ni,” a ti a.

²Pathianin Mosia hnênah: “Kei hi LALPA ka nih hi.

³Abrahama te, Isaaka te, Jakoba te hnênah khân Pathian Engkimtithia* angin ka inlâr thîn a; nimahsela ka hming JEHOVA** ang hi chuan ka la inhriatîr lo.

⁴An hnênah khan mikhual anga an awmna, an khualzinna Kanaan ram kha ka pe dâwn tih ka tiam bawk a.

⁵Aigupta mite bawiha tâng Israel fate rûm thâwm ka hria a, ka thutiam pawh ka hre reng asin.

⁶Chuvângin, Israel fate hnênah sawi rawh: ‘Kei hi LALPA ka ni; Aigupta phurrit ata ka hruai chhuak ang che u a, anmahni bâwih in nihna aţangin ka hlihsak bawh ang che u; bân phar meuhin ka

tlán chhuak dâwn che u a, anni erawh chu nasa takin ka hrem thung dâwn a ni.

⁷Ka mite in ni ang a, in Pathian ka ni bawh ang. Kei hi LALPA in Pathian, Aigupta phurrit ata chhan chhuaktu che u ka ni tih in la hria ang.

⁸Abrahama te, Isaaka te, Jakoba te hnêna pêk ka tiam ramah chuan ka hruai ang che u; in rochan atân ka pe ang che u: Kei hi LALPA ka ni si a,” a ti a.

⁹Chû thû chu Mosian Israel fate hnênah a va sawi a; nimahsela an saltân hrehawmna leh an lungngaihna avângin Mosia thu sawi pawh an ngaihsak duh lo.

¹⁰LALPA chuan Mosia chu a bia a,

¹¹“Va kal ta la, Aigupta lal Pharoa hnênah chuan a ram ata Israel fate chhuahtîr tûrin va hrilh rawh,” a ti a.

¹²Mosia chuan LALPA hmâah, “Israel fate chuan min ngaihsak duh si lo va. Keia hmuí chher loh lehngghâl phei chu Pharoan engtin nge mi lo ngaihthlâksak duh ang le?” tiin a hnial a.

¹³LALPA chuan Mosia leh Aaron a chu a bia a, Israel fate leh Aigupta lal Pharoa hnênah Aigupta ram atanga Israel fate hruai chhuak tûra mawhphurhna a pe ta a.

MOSIA LEH AARONA TE CHHÛNGKUA

¹⁴Hêngte hi thlahtu chhûngkaw puipate an ni: Israela fa û ber Reubena fapate chu: Hanoka te, Pallua te, Hezrona leh Karmia te an ni. Hêngte hi Reubena thlahte an ni a.

¹⁵Simeona fapate chu Jemuela te, Jamina te, Ohada te, Jakina te, Zohara leh Kanaan nu laka a fa Saula te an ni. Hêngte hi Simeona thlahte an ni a.

¹⁶Hêngte hi Levía fapate leh an thlah chhâwng zêlte chu an ni: Gersona te, Kohatha te, Meraria te chu. Levía dam chhûng chu kum za leh sawmthum pasarih a ni a.

¹⁷Gersona fapate chu, an chhûngkua ang zêlin Libnia leh Simia te an ni.

¹⁸Kohatha fapate chu Amrama te, Izara te, Hebrona te, Uzziela te an ni. Kohatha dam chhûng chu kum zâ leh sawmthum pathum a ni a.

¹⁹Meraria fapate chu Mahalia leh Musia te an ni. Hêngte hi Levía chhûngkua leh an thlah chhâwngte an ni.

²⁰Amrama chuan a pa farnu Jokebedi chu nupuia a nei a; Aaron a leh Mosia te a hring a. Amrama dam chhûng chu kum za leh sawmthum pasarih a ni.

²¹Izara fapate chu Kora te, Nephega te, Zikria te an ni.

²²Uzziela fapate chu Misaela te, Elzaphana te, Zithria te an ni.

²³Aaron a chuan Aminadaba fanu, Nasona farnu Elisebi chu nupuia a nei a; ani chuan Nadaba te, Abihua te, Eleazara te, Ithamara te a hring a.

²⁴Kora fapate chu Asira te, Elkana te, Abiasapha te an ni. Chûngte chu Koraho chhûngkua an ni.

²⁵Aaron a fapa Eleazara chuan Putiela fanute zînga mi pakhat nupuia a nei a; ani chuan Phinehasa a hring a. Hêngte hi Levía chhûngkua an puipa, a chí chá an inthlah chhâwng chu a ni.

²⁶Hêng mite hi, “Aigupta ram atangin Israel fate chu a huhovin hruai chhuak rawh u,” tia LALPAN a hrilh Aaron a leh Mosia te kha an ni a.

²⁷Hêng mite hi Aigupta lal Pharoa hnêna va kal a, Aigupta ram atanga Israel fate chhuahtîr tûra va hrilhtute an ni a. Hêng mite hi Mosia leh Aaron a te chu an ni a.

MOSIA THUSAWI CHHÂWNGTU AARONA

²⁸LALPAN Aigupta rama Mosia hnêna thu a sawi ni khân

²⁹LALPA chuan Mosia a bia a, “Kei hi LALPA ka ni. Aigupta lal Pharoa hnênah ka hrilh ang che hian sawi ang che,” a ti a.

³⁰Mahse, Mosia chuan LALPA hmâah, “Ngai teh, kei chu hmuí chher loh pû ka ni si a, Pharoan engtin nge mi lo ngaihthlâksak duh ang?” tiin a hnial a.

BUNG 7

¹LALPA chuan Mosia hnênah: “En teh, Pharoa tân Pathian anga ka siam che hi; i û Aaron a hi i tân zâwnei a ni ang.

²Thû ka pêk apiang che i hrilh tûr a ni. I û Aaron a chuan hê ram atanga Israel fate tîr chhuak tûrin Pharoa hnênah a hrilh bawh tûr a ni.

³Pharoa thínlung chu ka tiluhlul ang a, tichuan, Aigupta ramah hian ka chhinchhiahnate leh ka thil makte ka tipung chiam ang a.

⁴Aigupta ram chung a kut ka thlâk theih nân leh, nasa taka ka hrem phawt hnûah chauh ka mi Israel fa, ka mipui rualhote hi Aigupta ram atanga ka hruai chhuah theih nân Pharoa chuan in thu sawi chu a lo ngaihthlâksak lo vang che u.

⁵Tichuan, Aigupta chung a kut ka phara, an zîng ata Israel fate ka hruai chhuah hunah, Aigupta mite chuan kei hi LALPA ka ni tih an hria ang,” a ti a.

⁶Mosia leh Aaron a chuan chutiang chuan an ti a; LALPA thupêk ang takin an ti a ni.

⁷Pharoa hnêna thû an va sawi lai khân Mosia chu kum sawmriata upa a ni a, Aaron a chu kum sawmriat leh pathuma upa a ni.

AARONA TIANG MAK

⁸LALPA chuan Mosia leh Aaron a chu a bia a,

⁹“Pharoan in hnênah, ‘Thil mak min entîr ta che u,’ a lo tih chuan Aaron a hnênah tihian hrilh ang che, ‘I tiang kha lek chhuak la, Pharoa hmâah theh thla la, rûlah chantîr ang che,’ i ti dâwn nia,” a ti a.

¹⁰Tichuan, Mosia leh Aaron a chu Pharoa hnênah an lût a, LALPAN thu a pêk ang chuan an han ti ta a. Aaron a chuan Pharoa leh a thuihruaite hmâah chuan a tiang chu a han theh a, rûlah a chang ta a.

¹¹Pharoa pawh chuan a mifingte leh dâwithiamte a ko va; Aigupta dâwithiamho chuan chutiang bawh chuan dâwi hmangin an ti ve a.

¹²An tiang chu an theh thla theuh va, rûlah an lo chang hlawn a. Nimahsela, Aaron a tiang chuan anniho tiang chu a dawh zo ta vek a.

¹³Nimahsela, Pharoa thinlung chu a khauh sauh va, LALPAN a sawi tawh angin anni thû chu a lo ngaihsak duh ta lo va.

HRI PAKHATNA: TUI THISENAH A CHANG

¹⁴LALPA chuan Mosia hnênah: “Pharoa thinlung hi a khauh tlat a; mipuite chu a kaltîr phal lo vang.

¹⁵Pharoa hnênah chuan zîngah, luia a kal thîn hunah va kal la, amah tâwk tûrin lui kamah chuan lo dîng ang che; tiang rûla chang kha i keng bawk tûr a ni.

¹⁶A hnênah, ‘LALPA Hebraite Pathian chuan, “Ka miten thlalêra ka rawng an bâwl theih nân chhuahtîr rawh a ti a che,” tih hrilh tûr chein i hnênah mi tîr a ni; nimahsela, tûn thlengin i la ngaithla duh lo va!

¹⁷Chuvângin, LALPAN heti hian a ti: “Kei hi LALPA ka ni tih hei hian lo hria ang che. En ta che, ka kuta tiang hmang hian luipui tui hi ka vua ang a, thisenah a lo chang mai ang.

¹⁸Luia sanghate chu an thi ang a, lui chu a uih vung vung ang a, Aigupta mite chuan lui tui chu an in ten êm êm dawn a ni,’ a ti e,” a ti a.

¹⁹LALPA chuan Mosia a bia a, “Aarona hrilh la, ‘I tiang keng la, Aigupta luipui chungah te, lui te chungah te, an dîl chungah te, an tui tlin khâwmna zawng zawng chungah te chuan, thisena a lo chan vek theih nân lek chhuak rawh. Tichuan, Aigupta ram puma an thingkuang leh lungkuang tuizêmah te pawh thisen a lo awm vek mai ang,’ ti rawh,” a ti a.

²⁰Mosia leh Aarona chuan LALPAN thû a pêk ang chuan an ti a. A tiang chu a han lek chhuak a, Pharoa leh a thuihruaite mithmuhah chuan luia tuite chu a vaw ta a. Luia tui zawng zawng chu thisenah a lo chang ta vek a.

²¹Luia sanghâte chu an thi a, lui chu a uih ta hum hum a, Aigupta mite chuan lui tui chu an in thei ta lo va. Tichuan, Aigupta ram pum chu thisenin a lo khat ta a.

²²Aigupta dâwithiamho pawhin mitdâwivaih hmangin chutiang bawk chuan an ti ve a; mahse Pharoa thinlung chu a luhlul sauh va, LALPAN a sawi ang khân an thu a ngaihtla duh chuang lo.

²³Pharoa chu a hawi lêt vut a, ama in lamah a haw ta a. Chû thil thleng pawh chuan a rilru a tidanglam chuang lo.

²⁴Lui tui an in theih loh avângin Aigupta mi zawng zawng chuan tui in tûr zawngin lui kam chu an lai chiam a.

²⁵LALPAN luipui a vuak aţang chuan ni sarih a liam ta a.

BUNG 8

HRI PAHNIHNA: CHUNGÛ

¹LALPA chuan Mosia a bia a, “Pharoa hnênah kal la, heti hian sawi ang che, ‘LALPAN heti hian a ti e: “Ka miten ka rawng an bâwl theih nân kaltîr rawh.

²An kal i phal loh chuan ngai rawh, i ram zawng zawng hi chungû-in ka tikhat vek ang.

³Luite chu chungû hlîrin an khat mur mur ang a, an lo chhuak ang a, i inchhûngah te, i mutna pindanah te, I khumah te, i chhiahhlawhte inchhûngah te, i mite chungah te, i thukah te, i

chhang hmehna thlêngah te an kat sup sup mai ang.

⁴Chungû-te chuan nang leh i mite leh i chhiahhlawh zawng zawng anrawn bâwm nuai nuai ang che u,” a ti,’ ti ang che,” a ti a.

⁵LALPA chuan Mosia a bia a, “Aarona hrilh la, ‘I tiang kha lui tê leh luipui chungah te, dîl chungah te lek chhuak la; tichuan, Aigupta ram chhûngah hian chungû a lo puang vak mai ang,’ ti rawh,” a ti a.

⁶Tichuan, Aarona chuan Aigupta tui chungah te chuan a kut a phar a, chungû-te chu an lo chhuak a, Aigupta ram chu an tikhat ta vek a.

⁷Dâwithiamte pawhin mitdâwivaih hmangin chutiang chuan an lo ti ve a, Aigupta ram chhûngah chuan chungûte chu an chhuahtîr ve a.

⁸Pharoa chuan Mosia leh Aarona te chu a ko va, “Chungû-te hi kei leh ka mite hnên aţanga la bo tûrin LALPA min dîlsak rawh u; tichuan, LALPA hnêna an inthâwi theih nân mipuite chu ka kaltîr ang e,” a ti a.

⁹Mosia chuan Pharoa hnênah, “Nang leh, i chhiahhlawhte leh, i mite hnên aţanga chungû-te tikiang a, luih chauh awmtîr tûrin engtikah nge ka ngensak dâwn che, nangmah ngeiin ruat ta che,” a ti a.

¹⁰Ani chuan, “Naktûkah le,” a ti a. Ani chuan, “I thû ang tak chuan ni rawh se, tichuan LALPA kan Pathian ang hi tumah an awm lo tih i hria ang.

¹¹Chungû-te chu i in aţang te, i chhiahhlawhte in aţang te, i mite in aţangtein an kiang vek ang a, luih chauh an awm tawh ang,” a ti a.

¹²Mosia leh Aarona chu Pharoa hnên aţang chuan an kal chhuak a. Mosia chuan Pharoa tibuaite chungu puang chu tikiang tûrin LALPA chu a au va.

¹³LALPA chuan Mosia ngensak ang chuan a ti ta a. Tichuan chungû, in chhûnga mite, kawt laia mite leh lova mite chu an thi fai ta vek a.

¹⁴Chûngte chu an chhêk vûm thêr thûr a, a ram chu a uih vung vung mai a.

¹⁵Pharoa erawh chuan harsatna a kiang ta tih a hriatin a thinlung a tiluhlul leh a, LALPAN a sawi ang ngeiin an thu a zâwm leh duh ta lo va.

HRI PATHUMNA: HRIK

¹⁶LALPA chuan Mosia hnênah, “Aarona hrilh la, ‘I tiang kha lek rawh, leia vaivut chu vua la, tichuan Aigupta ram pumah hrikah a lo chang dâwn nia,’ a ti e,” a ti a.

¹⁷Chutiang chuan an ti a. Aarona chuan a tiang chu a han lek chhuak a, leia vaivut chu a vua a, tichuan mihring leh ran hrikah a lo chang ta a. Aigupta ram puma vaivut chu hrikah a lo chang ta vek a.

¹⁸Dâwithiamhote pawhin hrik chu dâwi chhuah ve an han tum a, mahse an ti thei ta lo va. Tichuan, mihring leh ran te chu hrik chuan a bâwm ta nuai nuai a.

¹⁹Dâwithiamho chuan Pharoa hnênah, “Hei hi chu Pathian kut a ni tlat mai,” an ti a. Nimahsela, Pharoa thinlung chu a luhlul

zual sauh va, LALPAN a lo sawi ang khân an thu a ngaihsak duh chuang lo.

HRI PALINA: THO

²⁰LALPA chuan Mosia hnênah, “Zîng takah tho la, Pharoa chu tui lam pana a kal laiin a hmâah lo ding ang che. Heti hian hrilh la, ‘LALPAN: “Ka miten ka rawng an bâwl theih nân chhuahtîr rawh.

²¹Ka mite hi i chhuahtîr duh loh chuan, ngai rawh, nang leh i chhiahhlawhte, i mite leh in inahte nasa takin tho ka tipuang vak dâwn a ni. Aigupta mite in chu tho hlîrin a khat mur mur ang a, an dinna lei chenin tho an fu khat vek ang.

²²Chumi nîah chuan ka mite chênna Gosen ram chu ka hum bîk ang a, tho rêng rêng a puang ve lo vang; tichuan, hê ramah hian kei hi LALPA ka ni tih i hria ang.

²³Ka mite chu i mite lakah ka thliar hrang dâwn a ni. Naktûkah hê chhinchhiahna hi a lo awm nghal ang,” a ti,’ ti ang che,” a ti a.

²⁴Chutiang tak chuan LALPA chuan a ti ta a. Pharoa inchhûngah te, a chhiahhlawhte inchhûngah te, Aigupta ram puma inchhûng zawng zawngah tho rual chu an tleh lût ta mur mur mai a. Tho rual tam avâng chuan a ram chuan a chhiat phah nasa hle a.

²⁵Pharoa chuan Mosia leh Aaron a te chu a ko va, “Kal ula, ram chhûngah hian in Pathian hnênah chuan va inthâwi ta che u,” a ti a.

²⁶Mosia chuan, “Chutianga tih chu a dik lo vang, LALPA kan Pathian hnêna kan inthâwina chu Aigupta mite tâna thil thianga lo a ni dâwn asin. Aigupta mite ten zâwnga kan inthâwi chuan lungin min deng mai lo vang maw?

²⁷Chuvângin, LALPA kan Pathianin thû min pêk angin thlalêr ni thum kalah inthâwi tûrin kan va kal zâwk ang,” a ti a.

²⁸Pharoa chuan, “Aw le, LALPA in Pathian hnêna inthâwi tûr chuan ka kaltîr ang che u; chû bâka hla chu kal suh u. Min han dîlsak pawt mai teh u,” a ti a.

²⁹Mosia chuan, “I hnên aţanga ka chhuah hunah Pharoa leh a chhiahhlawhte leh a mite hnên aţanga tho puang mur mur hi naktûk aţanga a lo kian theih nân LALPA hnênah ka dîlsak ang che. Amaherawhchu, Pharoa hian LALPA hnêna inthâwi tûra an kal phal leh lo tûrin min tihder tawh suh se,” a ti a.

³⁰Tichuan, Mosia chu Pharoa hnên aţangin a kal chhuak a, LALPA hnênah a dîlsak ta a.

³¹LALPA chuan Mosia thu ang chuan a ti a; Pharoa leh a chhiahhlawhte leh a mipuite chungah tho puang nasa chu a la kiang ta a. Pakhat mah an awm ta lo va.

³²Nimahsela, chumi ţum pawh chuan Pharoa chuan a thinlung a tikauh leh tho va; tûmah a chhuahtîr phal leh ta lo va.

BUNG 9

HRI PANGÂNA: RAN PÛL

¹LALPA chuan Mosia hnênah, “Pharoa hnênah lût la, hei hi hrilh rawh, ‘LALPA Hebraite Pathian chuan: “Ka mite hian ka rawng an bâwl theih nân chhuahtîr rawh.

²I chhuahtîr duh lohva, i hrên reng chuan,

³ngai rawh, lova i ran rual chungah te, sakawr chungah te, sabengtung chungah te, sanghâwngsei chungah te, berâm chungah te LALPAN kut a thlâk ang a; nasa takin pulh hri a lêng dâwn a ni.

⁴LALPA chuan Aigupta rante leh Israel rante chu a thliar hrang ang. Israel fate ran pakhat mah a thi ve lo vang,” a ti,’ ti ang che,” a ti a.

⁵Tichuan LALPA chuan hun a ruat a, “Naktûkah LALPAN hê thil hi ram chhûngah a thlentîr dâwn a ni,” a ti a.

⁶A tûkah chuan LALPAN chû thil chu a thlentîr ta ngei a, Aigupta ran zawng zawng chu an thi vek a; Israel fate ran erawh chu pakhat mah thi a awm ve lo.

⁷Pharoa chuan mi a va tîr a, ngai teh, Israel mite ran chu pakhat mah a thi ve lo tak tak a. Mahse, Pharoa thinlung chu a khauh tlat a, mipuite chu a chhuahtîr duh chuang lo.

HRI PARUKNA: KHAWIHLÎ

⁸LALPA chuan Mosia leh Aaron a chu a bia a, “Meipui bula mi vut va ţûm ula, Pharoa hmuh lai ngeiin Mosian vânvawrh rawh se.

⁹Tichuan, vaivut khû angin Aigupta ram pumah a darh ang a, tichuan Aigupta ram chhûnga mihring leh sate chungah khawihli puiah a chang dâwn a ni,” a ti a.

¹⁰Meipui bula vut chu an va ţûm a, Pharoa hmâah an va ding a, Mosia chuan vânvamah a vawrh darh ta a. Mihringte leh rante chuan khawihli pui chu an lo vei ta a.

¹¹Dâwithiamho chu Mosia hmâah chuan an ding reng thei ta lo va, dâwithiamhote leh Aigupta mi zawng zawng chuan khawihli pui chu an vei ve vek si a.

¹²Nimahsela, LALPAN Pharoa thinlung chu a tikauh va; Mosia hnêna LALPAN a sawi ang khân an thû chu a ngaihsak duh leh chuang lo.

HRI PASARIHNA: RIAL

¹³LALPA chuan Mosia hnênah, “Zîng takah tho la, Pharoa hmâah va ding la, heti hian va sawi rawh, ‘LALPA, Hebraite Pathian chuan: “Ka rawng an bâwl theih nân, ka mite hi chhuahtîr rawh,

¹⁴Tûn ţum chu i chhiahhlawhte leh i mite chungah mai ni lovin, nangma chungah ngei ka hrî zawng zawng ka rawn lêtîr ang a, keimah ang hi lei chungah hian tûmah an awm lo tih i hria ang.

¹⁵Pulh hrî hmangin nang leh i mite chungah kut hi thlâk teh ila zawng, lei ata hi i boral daih tawh tûr a nia.

¹⁶Amaherawhchu, nangmaha ka thiltihtheihna lantîr tûr leh, lei chung zawng zawng ka hming puan darh a nih theih nân ka tungding mai che a ni.

¹⁷Nang erawh chuan ka mite hi inchhuan khumin i chhuahtîr duh lo zêl vei a.

¹⁸Ngai rawh, naktûk tûn ang hunah hian rial nasa tak, a ang tluka nasa Aigupta ram awmtirh aţanga la awm ngai rêng rêng lo chu ka tlaktîr dâwn a ni.

¹⁹Chuvângin, i ran rualte leh lova i thil neih zawng zawng chu inah khungtîr vek rawh; in khung duh loh chuan mihring pawh, ran pawh ram hnuaia awm zawng zawng chu rialin a dêng ang a, an thi vek ang,” a ti, ti ang che,” a ti a.

²⁰Tichuan, Pharoa thuihruaite zînga LALPA thù pawisa apiang chuan an chhiahhlawhte leh an rante chu in chhôngah an khung ta a.

²¹Nimahsela, LALPA thu pawisa lote chuan an chhiahhlawhte leh an rante chu ram hnuaia an awmtîr mai a.

²²LALPA chuan Mosia hnênah, “Vân lamah i kut phar rawh, tichuan Aigupta ram puma mihring te, ran te, lova thlai tinrêng te rialin a den theih nân,” a ti a.

²³Mosia chuan vân lamah a tiang chu a lek chhuak a; LALPA chuan khawpui rî leh rial a tîr a, leiah chuan têt a tla bawh a. Aigupta ramah chuan LALPAN rial a tlaktîr ta chiam mai a.

²⁴Tichuan, rial a tlâ a, têt tlâ leh rial tlâ inpawh chu a nasa khawp a, Aigupta hnam lo pian achinah, chutiang taka nasa chu a la awm ngai lo.

²⁵Aigupta ram dungtluanin rial a tlâ a, mihring leh sate, lova thlai tinrêng leh thingkungte chu rial chuan nasa takin a dêng a.

²⁶Israel fate awmna Gosen ramah erawh chuan rial a tla ve lo.

²⁷Pharoa chuan Mosia leh Aaron a te a kohtîr a, an hnênah, “Tûn tûm zawng thil ka lo tisual a ni e. LALPA chu a dik a, kei leh ka mite hi kan sual a ni.

²⁸Khawpui ri dur dur leh rial tlâte hi a tâwk ta e, titâwp tawh tûrin LALPA chu mi ngensak rawh u. Ka kaltîr tawh ang che u a, ka chelh tawh lo vang che u,” a ti a.

²⁹Mosia chuan a hnênah, “Khawpui hi ka chhuahsan vêleh, LALPA hnênah kut ka phar ang a; lei hi LALPA tâ a ni tih i hriat nân khawpui ri a reh ang a, rial pawh a tla tawh hek lo vang.

³⁰Nang leh i chhiahhlawhte hi chuan LALPA Pathian in tîh dâwn chuang lo tih ka hria a ni,” a ti a.

³¹Barli vui tawh leh la kuhmûm tawh chu rial chuan a chhu chhê vek a,

³²Wheat leh buhtun erawh chu an chin tlai avângin a chhe ve lo.

³³Pharoa hnên ata Mosia chuan khawpui chu a chhuahsan a, LALPA lamah kut ka phar a; khawpui rî leh rial tla chu a lo bâng ta a, lei chung a ruahsûr pawh a hân ta a.

³⁴Ruah te, rial te, khawpui rîte a reh ta tih a hriatin Pharoa chu a sual ngai bawkin a sual leh a; amah leh a hote nân luhlul an chhuah leh ta a.

³⁵Chuti tak chuan Pharoa thinlung chu a sak a; LALPAN Mosia hnêna a sawi angin Israel fate chu a chhuahthîr phal chuang lo.

BUNG 10

HRI PARIATNA: KHAUKHUAP

¹LALPA chuan Mosia hnênah, “Pharoa hnênah lût rawh; ka thil mak tihte ka entîr zêl theih nân a thinlung leh a thuihruaite thinlung ka tisak leh tawh e;

²nangni pawhin Aigupta rama thil ropui tak tak ka tih te, an zînga thil mak ka tihte chenin, kei LALPA ka ni tih in hriat nân in fapate, in tupate hnênah in hrilh chhâwng zêl tûr a ni,” a ti a.

³Tichuan, Mosia leh Aaron a chu Pharoa hnênah an lo kal a, “LALPA, Hebraite Pathian chuan: ‘Ka hmâah hian eng chen nge inphahhniam duh lova i awm luih dâwn? Ka rawng an bâwl theih nân ka mite hi chhuah rawh.

⁴Ka mite hi i chhuahthîr duh loh chuan hre rawh, naktûkah i ram chhôngah hian khaukhuap ka tipuang ang.

⁵Chungte chuan lei chung hi hmuh theih loh khawpin an dâp khat dul mai ang; rial chhut chhiat bâng ei tûr la awm apiang an ei vek ang a, lova thingnah chawr zawng zawng pawh an ei filh vek ang.

⁶I inah te, i chhiahhlawh zawng zawng inah leh Aigupta mite in zawng zawngah an khat mur mur ang a, chutiang rêng rênga tam chu hê leia an awm ve achinah in pate emaw, in pute emaw pawhin an la hmuh ngai loh a ni ang,’ a ti e,” a ti a. Lehlam a hawi a, Pharoa chu a chhuahsan ta a.

⁷Pharoa hote chuan a hnênah, “Hê mihring hi eng chen nge maw kan tân thangah a tûn reng mai dâwn le? Anniho hi chhuahthîr mai la, LALPA an Pathian rawng chu va bâwl mai rawh se. Aigupta ram chhiat tawhzia hi i hre lo vem ni le?” an ti a.

⁸Tichuan, Mosia leh Aaron a te chu Pharoa hmâah chuan an hruai leh a, an hnênah, “Kal ula, LALPA in Pathian rawng chu va bâwl ta che u. Tûte nge kal tûr chu?” an ti a.

⁹Mosia chuan, “Kan fapate, kan fanute, kan fanautê têtê leh upa lam te, kan berâm leh bâwng rualte nân apui anâwiin kan kal ang, LALPA hmâa ruai theh tûr kan ni si a,” an ti a.

¹⁰Ani chuan an hnênah, “In fanautê têtê nân ka kaltîr dâwn che u avângin LALPA chu in hnênah awm rawh se! Nimahsela, fimkhur rawh u, thil tla lo tih in tum tlat a ni.

¹¹Chutiang tûr a ni lo vang! Nangni mipaho chu kal ula, LALPA rawng chu va bâwl rawh u, chû chu a ni l’om ni in duh?” a ti a. Pharoa hnên a tâng chuan an hnawt chhuak ta a.

¹²LALPA chuan Mosia hnênah, “Aigupta ram chung a khâu a puan theih nân hian i kut phar la; tichuan, Aigupta ram hi a rawn tuam ang a, rialin a den chhiat bâng a ram chhônga thlai rêng rêng an rawn ei filh vek dâwn nia,” a ti a.

¹³Tichuan, Mosia chuan Aigupta ram chungah chuan a tiang chu a han lek chhuak a, LALPA chuan nilêng leh zankhuain khawchhak thli a rawn tlehtîr a. A tûk zîngah chuan khawchhak thli chuan khaukhuap a rawn lôn lût ta a.

¹⁴Khaukhuap chuan Aigupta ram pum chu an dâp khat ta dul mai a, Aigupta ram zawng zawngah an fu khat thep thup a. An tawrhhlêlhawm êm êm a; chutiang khawpa khaukhuap tam chu tûn hmain a la awm ngai lo va, tûn hnûah pawh a awm leh tawh hek lo vang.

¹⁵Leilung chu an dâp khat mup mup a, a ram pum chu a dur khup mai a; rialin a nuai chhiat bâng thlai leh thei chi tinrêng an ei kawh vek a. Tichuan, Aigupta ram dung tluanin thing hring emaw, thlai hring emaw pawh pakhat mah an zuah lo va.

¹⁶Pharoa chuan Mosia leh Aaron a chu hmanhmawh takin a kohtîr a, “LALPA Pathian chungah leh nangni chungah hian ka lo sual a ni.

¹⁷Tûn tûm chauh chu ka sual hi min ngaidam ula, hê thihna chauh hi chu min lâkkiansak hrâm tûrin LALPA in Pathian chu min dîlsak rawh u,” a ti a.

¹⁸Tichuan, Pharoa hnên ata chu a kal chhuak a, LALPA hnênah a tawnğtai a.

¹⁹LALPA chuan khawthlang thli na tak arawn tlehtîr a, chû chuan khaukhuate chu Tuipui Senah a lèn lût ta vek a. Tichuan, Aigupta ram pumah khaukhupakhat mah a awm ta lo va.

²⁰Nimahsela, LALPA chuan Pharoa thinlung chu a tiluhlul leh ta a, Israel fate chu a chhuahthîr phal leh ta lo va.

HREMNA PAKUANA: KHAW THIM

²¹LALPA chuan Mosia hnênah, “Vân lamah i kut kha phar la, Aigupta ramah hian khaw thim, pangtiin a hriat theih khawpa thim lo awm teh se,” a ti a.

²²Mosia chuan vân lamah bân a phar a, tichuan, ni thum chhûng Aigupta ram pumah chuan thim chhah mup mai hi a lo awm ta a.

²³Tûmah an inhmu thei lo va; ni thum chhûng chu an awmhmun ațanga che sawn thei pawh an awm hek lo. Israel fa zawng zawngte awmna hmunah erawh chuan êng an nei thung a.

²⁴Pharoa chuan Mosia a ko va, “Kal ula, LALPA rawng chu va bâwl rawh u; in berâm rualte leh in bâwng rualte chauh in hnutchhiah dawn nia. In fanautê tete pawh hruai rawh u,” a ti a.

²⁵Mahse Mosia chuan, “LALPA kan Pathian hnêna hlan tûr, hâlral inthâwina atâna hlan tûr min phalsak baw tûr a ni.

²⁶Chuvângin, kan ran rualte pawh kan hruai tel ve ang a, pakhat mah kan hnutchhiah lo vang. Engemawzât chu LALPA kan Pathian rawngbâwl nâna hman tûr a ni a, a hmun kan va thlen phawt loh chuan engin nge LALPA rawng kan bâwl dawn tih kan hre hlei nê,” a ti a.

²⁷Nimahsela, LALPA chuan Pharoa thinlung chu a tiluhlul leh a, a kaltîr phal leh ta lo va.

²⁸Pharoa chuan tihian a ti ta a, “Ka hnên ata kal bo rawh! Ka hmêl hmu tawh lo tûrin fimkhur hle ang che! Ka hmêl i hmu leh nî chu i thih nî a ni tawh ang!” a ti a.

²⁹Mosia chuan, “I sawi dik hle mai. I hmêl hi ka hmu leh tawh ngai lo vang,” a ti ve ta a.

BUNG 11

FATÎR THIH TÛR THU PUAN

¹LALPA chuan Mosia hnênah, “Pharoa leh Aigupta ram hi wawi khat chu hrî ka han lêtîr leh teh ang. Chumi hnûah chuan heta țang hian a kaltîr tawh ang che u. A kaltîr che u a nih vêk vêk chuan a hnawhin a hnawt chhuak ang che u.

²Mipuite chu hrilh la, mipa leh hmeichhiaten an țhenawmte hnênah incheina thil rangkachak leh tangkaruaa siam te dîl țheuh rawh se,” a ti a.

³Tichuan, LALPA chuan mipuite chu Aigupta mite a duhsaktîr a. Chubâkah Mosia chu Aigupta ramah chuan mi ropui tak, Pharoa hote leh mipuiten an ngaihsân êm êm a ni baw a.

⁴Mosia chuan, “LALPAN heti hian a ti: ‘Zan laiah Aigupta ram hi ka fang dawn a;

⁵Aigupta rama fatîr zawng zawng, lalthutthlênga țhu Pharoa fatîr ațangin, buhrâwtsawmnaa chhiahhlawhnu fatîr chenin, ran piang hmasa ber te nê an thi vek ang.

⁶Tichuan, Aigupta ram pumah nasa taka țahna rûnpui a lo awm ang, chutiang chu tûn hmaa la awm ngai lo, tûn hnû pawha awm leh tawh ngai lo tûr a ni.

⁷LALPAN Israel mite chu Aigupta mite laka a thliar hranzia in hriat nân, Israel fate dodâl zâwngin mi leh sa rêng rêngin, ui takngial pawhin an lei an phût ngam lo vang.’

⁸Hêng i chhiahhlawh zawng zawngte hi ka hnênah lo kalin, ka hmâah an bawkkhup ang a, ‘I mite nê hian min chhuahsan hrâm teh u!’ in la ti zâwk dawn a ni. Chumi hnûah chuan ka kal chhuak chauh vang,” a ti a. Thinur takin Pharoa chu a chhuahsan ta a.

⁹LALPA chuan Mosia hnênah, “Aigupta rama ka thil mak tihte a pun zêl theih nân Pharoa hian in thû a ngaihlâksak duh lo che u a nih hi,” a ti a.

¹⁰Tichuan, Mosia leh Aaron a chuan Pharoa hmâah chûng thil mak tak takte chu an ti a; LALPA chuan Pharoa thinlung chu a lo tiluhlul thîn a, Israel fate chu a ram ațanga an kal chhuah a phalsak lo thîn a ni.

BUNG 12

KALHLEN KUT INTANNA

¹Aigupta ramah chuan LALPA chuan Mosia leh Aaron a te chu a bia a,

²“Tûn thla hi in tân thla chhiar țanna a ni ang a; in tân kum chhiar țanna thla a ni ang.

³Israel pung khâwmho zawng zawng hnênah chuan sawi rawh: ‘Tûn thlâ ni sâwm ni hian chhûngkaw tinin an ei tâwk berâmno la rawh se.

⁴Berâm pum ei sêng lo chhûngkaw tlêm an nih chuan, an țhenawm chhûngkaw dangte nê an mamawh tâwk ang zêlin bêram no pakhat ințawmin insem rawh se.

⁵In berâm chu hmêlhem lo, a pa kum khat mi a ni tûr a ni. Berâm emaw, kêl rual zînga mi emaw zâwk zâwk in hmang thei ang.

⁶Chumi thlâ ni sâwm leh ni li thlengin in dah țha ang a. Tichuan, Israel mipui pung khâwmho zawng zawngin tlai lamah an talh tûr a ni.

⁷A thisen chu an lâ ang a, an eina in kawngka biang pahnihah leh kawngka lu chungah an tât tûr a ni.

⁸Chumi zânah chuan a sâ chu an ei tûr a ni; meia hem hmin tûr a ni a, dâwidim tel lo chhang leh hnim khâ nê an ei pawlh tûr a ni.

⁹A hela ei tûr a ni lo va, tuia chhum hmin tûr pawh a ni hek lo; mei sâa hem hmin tûr a ni—a lu te, a kê te, a kawchûng te nê.

¹⁰A tûk zîng thlengin an ei bâng an dah tûr a ni lo va, a tûk thlenga ei bâng la awm chu in hâl ral vek tûr a ni.

¹¹Hetiàng hi in ei dân tûr a ni: kawnghrên in hrêng sâ vek ang a, pheikhawk bun sâ diamin, tiàng keng chungin in ei tûr a ni. Hmanhmawh taka ei tûr a ni a. LALPA Kalhlên châw a ni si a.

¹²Chumi zânah chuan Aigupta ram chhûng ka pal tlang dâwn a, Aigupta rama fatîr zawng zawng, mihring leh ran pawh ka tihlum vek ang; Aiguptaho pathian zawng zawng do zâwngin ro ka rêl ang; LALPA ka nih hi.

¹³Thisen chu nangmahni chênna in chhinchhiahna a ni ang. Thisen ka hmuh chuan ka kal kân zêl ang che u; tichuan, Aigupta rama thihna ka thlen laiin nangni chuan in tuar ve lo vang.

¹⁴Tichuan, chu nî chu in tân hriatrengna nî a ni ang a; in thlah lo la awm tûr zawng zawngte nêl LALPA tân kût nî angin in serh tûr a ni. Kumkhua atâna thu thlungin kût nî atân in serh tûr a ni.

¹⁵Nî sarih chhûng dâwidim telh loh chhang in ei tûr a ni. A nî khatnaah in in aţangin dâwidim rêng rêng in paih fai vek tûr a ni. Tûpawh nî khat nî aţanga nî sarih nî thlenga dâwidim telh chhang ei chu, chû mi chu Israel mite zîng ata tihboral tûr a ni.

¹⁶A nî khat nî leh a nî sarih nî chuan in tân inkhâwmpui thiànglim in nei tûr a ni. Chûng nîahte chuan eng hnâ mah thawh tûr a ni lo va; in mamawh chaw ei tûr chauh in siam thei ang.

¹⁷Tichuan, Aigupta ram aţanga mipuite ka hruai chhuah nî aţang ngei hian Dâwidim telh loh Kût in serh nghâl tûr a ni. Chuvângin, chhuan lo la awm zêl tûr thlengin, kumkhaw thuthlung angin hê nî hi in serh zêl tûr a ni.

¹⁸Thla hmasa ber nî sâwm leh pali tlai aţanga nî sawmnhîh leh pakhat tlai thlengin dâwidim telh loh chhang in ei tûr a ni.

¹⁹Nî sarih chhûng in inah dâwidim rêng rêng a awm tûr a ni lo, dâwidim telh chhang eitu chu khawtual mi a nî emaw, mikhual a nî emaw pawh ni se, Israel mipui zîng ata tuithlâr tûr a ni.

²⁰Dâwidim telh rêng rêng in ei tûr a ni lo va; in awmna apiangah dâwidim telh loh chhang in ei zêl tûr a ni, a ti e,” a ti a.

²¹Mosia chuan Israel upaho zawng zawng chu a ko khâwm vek a, an hnênah, “Berâm no chu in chhûngkaw mamawh angin thlang chhuak ula, Kalhlên kûtna berâm no chu talh rawh u.

²²Hussop ţang thliak ula, thlêng chhûnga thisenah chuan chiah ula, thlênga thisen chuan kawngka biang pahni leh kawngka lu chungah tât ang che u. Khua a vâr hmâ chu tûmah mahni kawngka pâwnah an chhuak tûr a ni lo.

²³Aigupta mite tihlum tûrin LALPA chuan a rawn fang dâwn a; kawngka biang tawn tawnah leh kawngka lu chungah thisen a rawn hmuh chuan, chû kawngka chu LALPA chuan a kal kân ang a, tihlumtu chu nangmahni that tûra a lo luh a phal lo vang.

²⁴Hê thil hi nangmahni leh in thlahten kumkhuaa dân thupêk anga an vawn reng tûr a ni e.

²⁵A tiam anga LALPAN a pêk tûr ram in thlen hunah chuan hê rawngbâwna hi in chhunzawm zêl tûr a ni.

²⁶Hei hi eng rawngbâwna nge ni?’ tia in faten an zawh che u chuan,

²⁷heti hian sawi ang che u, ‘Hei hi LALPA kalhlên kût a nih hi; Aigupta mite a tihlum lai kân, Israel fate in chu a kalkân zêl a, a chhûngkua kuain min zuah ta a ni,’ in ti dâwn nia,” a ti a. Tichuan, mipuite chuan an lu kûnin chibai an bûk a.

²⁸Israel fate chu an tîn darh ta a; LALPAN Mosia leh Aaron a te thû a pêk ang chuan an ti ta a.

HRI SÂWMNA: FATÎR TIHHLUM

²⁹Zan laiah chuan Aigupta rama fatîr zawng zawng, lalthutthlênga thû Pharoa fa û ber aţanga lung ina tâng sal fa û ber thlengin, ran piang hmasa ber chenin LALPA chuan a tihlum ta vek a.

³⁰Zan laiah chuan Pharoa chu a tho va, amah leh a hote zawng zawng leh, Aigupta mi zawng zawng pawh an tho vek a; mitthi awm lohna chhûngkua rêng rêng a awm ta lo va, Aigupta ramah chuan nasa takin mi an ţap ta chuah chuah mai a.

KAL CHHUAHNA

³¹Mosia leh Aaron a te chu azân azânin a ko va, “Tho ula, nangni leh Israel fa zawng zawngte hian ka mite hi chhuahsan rawh u. Kal ula, in sawi ang chuan LALPA rawng chu va bâwl rawh u.

³²In sawi ang chuan, in berâm leh bâwn rualte pawh kalpui vek rawh u; kei pawh mal mi sâwm ve baw ang che u,” a ti a.

³³Aigupta mite pawhin anniho chu hmanhmawh taka chhuak tûrin an lo nawr ve chhên baw a. “Kan thi zo takngial dâwn,” an ti a ni.

³⁴Tichuan, mite chuan an chhang ur tûr hmeh sâ dâwidim telh loh chu an fûn a, an chhang hmehna thlêngte chu puana tuamin an kokiah an bât a.

³⁵Israel fate chuan Mosia thû zâwmîn, Aigupta mite hnênah chuan tangkarua leh rangkachak incheinate leh thuamnâwte an lo dîl tawh hlawm a.

³⁶LALPA chuan mite chu Aigupta mite a khawngaihtîr a, an dîl apiang an pe tawp tawp a. Chutiàng chuan Aigupta mite chu an rawk a ni ta ringawt a.

³⁷Tichuan, Israel fate chuan Ramases aţanga kal chhuakin Sukkoth an thleng a, naupangte tiam lovin, kea kal chu mipa hlîr nuai ruk vêl an ni.

³⁸Anmahni rualin mipui inpawlsawpho an tel ve ţeuh a, ran rual te pawh tam tham tak—berâm rual te leh bâwn rualte nêl an kâwi duah mai a.

³⁹Aigupta ram aţanga an ken chhuah dâwidim telh loh chhang hmeh sâ chu an ur a; ei tûra buatsaih hman lo khawpa Aigupta ram aţanga nawr chhuah chûk chûk an nih avângin an chhang hmehah pawh dâwidim a tel lo a ni.

⁴⁰Israel fate Aigupta rama an awm chhûng chu kum zalî leh sawmthum a ni.

⁴¹Kum zalî sawmthum a zawh nî takin LALPA mite chu Aigupta ram aţangin an kal chhuak ta a ni.

⁴²Aigupta ram aţanga hruai chhuaha an awm zân chu urhsûn taka LALPA hminga serh tûr a ni a. Chû LALPA zân chu Israela thlah kal zêlten urhsûn takin an serh zêl tûr a ni.

KALHLÊN KÛT HMAN DÂN

⁴³LALPA chuan Mosia leh Aarona hnênah, “Hetiang hian Kalhlên Kût hman tûr a ni: Ram dang mi tûma’n an ei ve tûr a ni lo.

⁴⁴Amaherawhchu, in chhiahhlawh mipa, tangkâa in lei, serh in tansak tawh chuan a ei ve thei ang.

⁴⁵Ram dang mi leh inhlawhfate chuan an ei ve tûr a ni lo.

⁴⁶In khata ei tûr a ni; sâ chu pâwna ken chhuah rêng rêng tûr a ni lo, a ruh pawh in titliak tûr a ni hek lo.

⁴⁷Israel pung khâwmho zawng zawngten an zâwm vek tûr a ni.

⁴⁸Nangmahni zînga chêng ram dang miin LALPA Kalhlên hi an hman ve duh a nih chuan, an mipa zawng zawngten serh an tan vek hnûah an zawm ve thei ang a; tichuan a ram mî anga ngaih an lo ni tawh ang. Serhtan loh mî erawh chuan an ei ve tûr a ni lo.

⁴⁹Ram chhûnga piangte leh in zînga chêng ram dang mite tân dân pakhat a awm tûr a ni,” a ti a.

⁵⁰Chutiang chuan Israel fa zawng zawngte chuan an ti a; LALPAN Mosia leh Aarona hnêna thu a pêk ang takin an ti ta a.

⁵¹Tichuan, chumi nî tak chuan LALPAN Israel fate chu Aigupta ram aţangin a hruai chhuak ta a.

BUNG 13

FATÎR HLAN THÛ

¹LALPA chuan Mosia a bia a,

²“Israel fate zînga fatîr, chhûl keu hmasa ber apiang chu mihring pawh, ran pawh ka tân in serh hrang tûr a ni; keima ta a ni si a,” a ti a.

DÂWIDIM TELH LOH KÛT

³Mosia chuan mipuite hnênah: “Hê bâwih chhuahna nî, Aigupta ram aţanga in chhuahna nî hi hre reng rawh u; LALPA kut chak chuan hê hmun aţang hian a hruai chhuak si che u a. Chhang dâwidim telh in ei tûr a ni lo.

⁴In kal chhuah ni hi Abib thlâ a ni.

⁵LALPAN in thlahtute hnêna a tiam ram, Kanaan hote, Hit hote, Amor hote, Hiv hote leh Jebus hote chênna, khawizû leh hnudetui luanna ram chu in thlen hunah, hemi thlâah hian hê rawngbâwna hi hman zêl rawh u.

⁶Ni sarih chhûng dâwidim telh loh chhang in ei tûr a ni a, a ni sarih niin LALPA tân kût chaw in ei tûr a ni.

⁷Dâwidim telh loh chhang hlîr ni sarih chhûng in ei tûr a ni. In zîngah dâwidim telh chhang rêng rêng a awm tûr a ni lo va, in awmna inah dâwidim rêng rêng a awm tûr a ni hek lo.

⁸Chumi nî chuan in fate hnênah, ‘Aigupta ram aţanga kan lo chhuah laia LALPAN kan chung a thil min tihsak avângin hê thil hi kan ti a ni,’ in ti tûr a ni.

⁹In kut atân chhinchhiahna, in mit leh mit inkâr atân hriatrengna, in kâ atân LALPA dân lo ni rawh se; kut chak takin LALPA chuan Aigupta ram aţangin a hruai chhuak si che u a.

¹⁰Chutichuan, hê dân hi kum tinin a hun téah in hmang thîn tûr a ni.

FATÎR CHUNGCHÂNGA DÂN

¹¹“LALPAN nangni leh in thlahtute hnêna a lo tiam Kanaan mite ram a hruai thlen che u a, a pêk hunah che u chuan,

¹²in fatîr chhûl keu hmasa ber leh, in ran vulh zînga piang hmasa ber chu LALPA tân in dah hrang tûr a ni a; a pa chu LALPA tâ a ni ang.

¹³Sabengtungin no a hrin hmasak ber chu berâm novin in tlan tûr a ni; in tlan duh loh chuan a ring in titliak tûr a ni. Nangni zînga in fapa piang hmasa ber chu in tlan bawh tûr a ni.

¹⁴Nakin hnuah in faten, ‘Hei hi eng tihna nge ni?’ tia an zawh che u chuan, ‘LALPAN a kut chakin Aigupta mite bâwih ata min hruai chhuak a.

¹⁵Pharoan luhlul taka kan chhuah a phal loh lai khân, LALPA chuan Aigupta rama fatîr zawng zawng, mihring pawh, ran pawh a tihlum vek a. Chuvângin, nausên mipa, chhûl keu tawh phawt chu LALPA hnênah kan hlân zêl a, kan fapa piang hmasa ber erawh chu kan tlan zêl a ni.

¹⁶I kutah chhinchhiahna, i mit leh mit inkârâh hrênna ang a ni ang; LALPAN a kut chakin Aigupta ram aţangin min hruai chhuak si a,” in ti tûr a ni,’ a ti a.

THLALÊR KAWNG

¹⁷Pharoan mite a chhuahtîr lai khân, hnai zâwk mahse Pathianin Philistia mite ram lamah a hruai lo va; Pathianin, “Mipuiten indona hmêl an hmuhin an rilru an lamlêt ang a, Aigupta ramah an kîr leh duh mai ang,” a tih vâng a ni.

¹⁸Chuvâng chuan Pathianin thlalêr lam, Tuipui Sen lamah a hruai kual ta zâwk a ni. Israel fate chu Aigupta ram aţang chuan inrem fel sâ vekin an chhuak a.

¹⁹Mosia chuan Josefa ruhte chu a keng zêl a, ani Josefa khân, “Pathianin arawn kan ngei ngei dawn che u a, ka ruhte hi in keng cho dawn nia,” tiin chhechham meuhin Israel fate chu a lo tiamtîr tawh si a.

²⁰Sukkoth aţang chuan an kal zêl a, thlalêr bul lawk Ethamah riahbûk an khuar a.

²¹LALPA chuan an hmâ a hruai a, chhûn leh zâna an kal theih nân, chhûnah chuan chhûm dîngin a hruai a, zânah chuan anmahni ên tûrin meialh dîngin a hruai a.

²²Chhûna chhûm dîng leh zâna meialh dîng chuan mipuite chu a kiansan ngai lo.

BUNG 14

TUIPUI SEN KÂN

¹LALPA chuan Mosia a bia a

²“Israel fate chu hrilh rawh, kîr leh sela, Pi Hariroth thlen hmâ, Migdol leh tuipui inkâr, Baal Zephon zâwn takah riahbûk khuar rawh se; chumi dep tuipui kamah chuan riak rawh se.

³Pharoa chuan Israel fate chu, ‘Ram palai-lêngah an tâl buai a; thlalêrah an tâng ta zu nia,’ ti rawh se.

⁴Tichuan, Pharoa chuan a ûmzui ngei theih nân a rilru chu ka tiluhlul leh ang a; Aigupta miten kei hi LALPA chu ka ni tih an hriat nân Pharoa leh a sipai rual chungah chuan hnehna ka chang

dawn a ni,” a ti a. Chutiang chuan an ti ta a.

⁵Mipuite chu an tlan chhuak ta tih thu Aigupta lal hnênah chuan an hrilh a, Pharoa leh a hote thinlung chu mipuite do zâwngin a inlet leh ta a; “Engvângin nge maw kan mi chhawr lai Israelte chu kan chhuahtîr tâk mai le?” an ti a.

⁶Tichuan, a sakawr tawlaîlîr a buatsaih a, a sipaite chu a hruai ta a.

⁷Sakawr tawlaîlîr tha tha zaruk bâkah, Aigupta rama sakawr tawlaîlîr zawng zawng leh an hotu theuh nêh a hruai a.

⁸LALPA chuan Pharoa thinlung chu a tikhauh sauh sauh va, ani chuan Israel fate chu a ûmzui ta chiam a; Israel fate lah inring tâwk taka kal chhuak an ni si a.

⁹Aigupta mite chuan an sakawr zawng zawng nêh, Pharoa tawlaîlîrte leh a sakawr chungchuan mite leh a sipai rualte nêh an ûmzui ta a, Baal Zephon thlen hmâ, tuipui kama Pi Hariroth hmuna an awm lai chu an va ûmpaha ta a.

¹⁰Pharoa hoten an va hnaih mêk lai chuan Israel fate chu an han hawi vêl a, ngai teh, anmahni ûma Aigupta-ho lo tlan chu an va hmu ta mai a. An hlau ta êm êm a, Israel fate chuan LALPA chu an au vak vak a.

¹¹Mosia hnênah chuan, “Aigupta ramah thlan a awm loh vângin em ni thlalêrah thi tûra min hruai chhuah? Engvângin nge Aigupta ram aţanga min hruai chhuah rêng rêng?”

¹²Aigupta rama kan awm lai khân, ‘Aigupta mite rawng hi tha takin kan bâwl zêl zâwk ang e,’ tiin i hnênah khân kan sawi lo vem ni? Thlalêra va thih tlâw ngawt ai chuan Aigupta mite rawng kha bâwl tha hlê hlê ila a that zâwk vei nêh,” an ti a.

¹³Mosia chuan mipuite hnênah, “Hlau suh ula. Awm hlê hlê rawh u; wawiina LALPAN chhandamna a thawhsak tûr che u hi lo thlîr ringawt mai rawh u. Wawiina Aigupta mi in hmuhte hi, kumkhuain in hmu leh tawh ngai lo vang.

¹⁴LALPAN a dosak dawn che u a, nangni chu tikhân lo awm ringawt mai rawh u,” a ti a.

¹⁵LALPA chuan Mosia hnênah, “Engah nge min auh vak vak? Israel fate chu hma lam pan tûrin hrilh rawh.

¹⁶I tiang kha lek chhuak rawh; tuipui chungah i kut phar la, tui chu tiñhen rawh. Tichuan, Israel fate chu tuipui lai lei chârah chuan an kal kâi dawn nia.

¹⁷Keima’n Aigupta-ho thinlung chu ka tikhauh ang a, an ûmzui zêl ang che u a. Tichuan, Pharoa leh a sipai zawng zawng te, a tawlaîlîrte leh a sakawr chungchuan mite chungah chawimâwina ka chang dawn a ni,” a ti a.

¹⁸Pharoa leh a tawlaîlîrte leh a sakawr chungchuan mite chungah chawimâwina ka chan hunah zawng, Aigupta-hote hian kei hi LALPA ka ni tih an hria ang,” a ti a.

¹⁹Tichuan, Israelte riahbûk hmâa Pathian Vântirhkoah kha, an hnung lamah a insawn a, an hmâa awm thîh chhûm dîng pawh kha a insawn a, an hnungah a dîng a.

²⁰Aigupta-ho awmna leh Israelte awmna inkârah chuan a awm ta a. Lehlam tân chuan chhûm zîng thim mup a ni a, lehlama awmte tân zân thim êntu a ni thung a; chuvângin chumi zân zankhua chuan atu amah an inkalpawh thei lo.

²¹Mosia chuan tuipui chungah chuan a kut a han phar chhuak a; LALPA chuan tui chu nem kiang tûrin chumi zân zankhua chuan khawchhak thli na tak a tlehtîr a, tui chhûng chu lei chârah a chantîr a; tichuan tuipui chu a lo inñhen ta a.

²²Israel fate chu tui chhûng lei chârah chuan an kal ta a, tuite chu an dîng lamah leh an vei lamah bang ang maiin a lo awm ta a.

²³Aigupta-ho chuan an ûmzui a; Pharoa sakawr zawng zawng te, a tawlaîlîrte leh a sakawr chungchuan mite chuan tuipui chhûngah chuan an ûm lût a.

²⁴A tûk vârtianah chuan LALPA chuan chhûm dîng leh mei dîng kâr aţang chuan Aigupta sipai rualte chu a zuk en a, Aigupta sipaihote chu a tibuai ta nuai nuai a.

²⁵An khalh chak theih lohna tûrin, an tawlaîlîr kête chu a thlawnsak a. Aigupta-ho chuan, “Hawh u, Israelhote hi i tlânsan mai ang u, Aigupta mite do tûrin LALPAN a pui a nih hi,” an ti a.

²⁶LALPA chuan Mosia hnênah, “Tuipui chungah i kut phar leh rawh, Aigupta-ho hi an tawlaîlîr leh an sakawr chungchuan mite nêh tuiin rawn chîm rawh se,” a ti a.

²⁷Mosia chuan tuipui chungah chuan a kut a phar a; zîng khua a lo vâh a, Aigupta-ho tlânchhiat mêk lai chuan, tuipui chuan a rawn chîm khat leh ta vek mai a. Chutiang chuan LALPAN Aigupta-ho chu tuipuiah a paih thla ta a ni.

²⁸Tuite chu a infin leh a, tawlaîlîrte, sakawr chungchuan mite leh tuipui chhûnga ûm lûttu Pharoa sipai rual zawng zawng chu a chîm pil vek a. Tûmah dam chhuak rêng an awm lo.

²⁹Israel fate erawh chu tuipui chhûng lei chârah chuan an kal a, tuite chu an dîng lam leh vei lamah bang ang mai a ni a.

³⁰Chumi nî chuan LALPAN Israelte chu Aigupta-ho kut aţangin a chhan chhuak a, vaukamah chuan Aigupta-ho ruangte chu Israelte chuan an hmû a.

³¹Chutiang chuan Israelte chuan Aigupta rama LALPA thiltih ropui tak takte an hmû a; mipuiten LALPA chu an tiñ a, LALPA leh a chhihhlawh Mosia chu an ring ta a.

BUNG 15

MOSIA HLA

¹Mosia leh Israel fate chuan LALPA fakin hê hla hi an sa dual dual a: “LALPA fakin hla ka sâ ang, Ropui taka a hneh tâk hi! Sakawr leh a chungchuangete chu Tuipuiah a paih thla ta!”

²LALPA chu ka chakna leh ka hlâ a ni, Min chhandamtu a lo ni si a; Ka Pathian a ni a, ka fak zêl ang; Ka pa Pathian a ni a, ka chawimâwi ang.

³LALPA chu râldo mi a ni; A hming pawh LALPA a ni.

⁴Pharoa tawlaîlîr leh a sipaihote chu Tuipuiah a paih thla a; A sipai hotu huaisente pawh Tuipui Senah an tla ta.

⁵Tui thûk chuan a chîm pil a; Lungtum angin li mawngah an pil ta.

⁶Aw LALPA, i kut dîng lam chakzia chu a ropui e; Aw LALPA, i kut dîng lamin hmêlmâte i râwt sawm a.

⁷I thatna a nasat êm avângin Nangmah dotute i paih thla ta a; I thinur rawn thawk chuan Buhpâwl angin an kâng ral ta.

⁸I hnâra i thâw chuan Tuite chu a tiang khâwm ûr a; Tui intiang chu a ding luah a; A thûk laite pawh a khang zo va.

⁹Hmêlmâ chuan, ‘Ka ûm ang a, Ka ûmphâ ang a, râlâk sum kan insem ang; An lakah duh tâwk ka ngah ang. Khandaih ka phâwi ang a, Ka kutin ka that hlawnm teh ang,’ a ti vei a.

¹⁰I thli chu i han thlehtir a, Tuipui chuan a chîmpil ta vek a; Suan tlang angin tuipuih an pil daih a.

¹¹“Aw LALPA, Pathian dangte zîngah nang ang hi tu nge awm? Tu nge nang anga mâwina thianghlîm neia, Fak tlâk khawpa thil mak ti thei le?

¹²I kut ding lam i phar chuan, Leiin a lem zo ta a.

¹³Nang chuan i tlan chhuahhote chu Zahngaihna in i hruai thîn a; I chaknain i hruai zêl ang, I awmna hmun thianghlîm thlengin.

¹⁴“Miten an lo hriatin an hlau ang; Philistia rama chêngte chu lungngaihna in a tuam ang.

¹⁵Edom lalin mak a ti ang a, Moab mi chakhote chu Hlauhna in a man ang a; Kanaan rama mite an tui ral zo vang.

¹⁶Hlauhna leh râpnain a man ang; I bân tha chakzia chuan Lungtum ang maiin a ngawihthir ang, Aw LALPA, i miten an kal pelh hma loh chuan, I tlan saten an kal pelh hma loh chuan.

¹⁷I chenna tlângah ngei chuan Anni chu i hruai ang a, i phun nghet ang, Aw LALPA, i chenna hmun âtana I siam hmun ngeiah chuan, Aw LALPA, i hmun thianghlîm, I kuta i din nghehna hmunah ngei chuan.

¹⁸“LALPA chuan chatuanin ro a rêl ang.”

¹⁹Pharoa sakawrte chu a tawlailirte leh sakawr chungchuangete nên tuipuih an tlâ a, LALPA chuan tuiin a chîm piltir ta. Israel fate erawh chu tui chhûngah pawh lei chârah an kal kai si a.

MIRIAM HLA

²⁰Miriami, zâwlneinu, Aarona farnu chuan dârbenthek a keng a; a hnungah chuan hmeichhia zawng zawngin dârbenthek kengin, lâm chungin an zui chhuak a.

²¹Miriami chuan a lo chhâwn a: “LALPA chu fak rawh u, Ropui takin a hneh ta si a! Sakawr leh a chung chuangete chu Tuipuih a paih thla ta!” tiin.

TUI KHÂ TIHTUI

²²Mosia chuan Israelte chu Tuipui Sen aţang chuan a hruai zêl a; Sur Thlalêrah an lût a. Thlalêrah chuan ni thum an kal hnûah pawh tui an hmu lo va.

²³Mara hmun an lo thleng a, Mara tui chu a khâk avângin an in thei lo va. Chuvângin a hmingah pawh Mara tih a ni rêng a.

²⁴Mipuite chu Mosia chungah an phunnâwi a, “Eng nge kan in tâk ang?” an ti a.

²⁵Ani chuan LALPA chu a âu va, LALPA chuan thing pakhat a kawhbmuh a. Chû chu tuih a paih lût a, tui chu a lo tui ta a. Chumi hmunah chuan dân leh thupêk a siamsak a. Chutah chuan anmahni fiahna a siam a,

²⁶“LALPA in Pathian âw hi ngun taka in ngaihthlâka, a mithmuha thil dik in tiha, a thupêkte in ngaihsaka, a dân thûte in zawm chuan, Aigupta mite chungah ka thlentir ang natna pakhat

mah in chungah ka thlentir ve lo vang. Kei hi nangmahni tidamtu LALPA ka ni si a,” a ti a

²⁷Chumi hnû chuan Elim hmun an va thleng a, chutah chuan tuichhunchhuah sâwm leh pahni leh tûm kung sawmsarih a awm a; tui awmna bulah chuan an riak ta a.

BUNG 16

VÂN LAM CHÂW

¹Elim aţang chuan an kal zêl a, Israel pung khâwmhoten Aigupta ram an chhuahsan aţanga a thla hnihna, ni sâwm leh pangâ an kal ni chuan Sin Thlalêr an lo thleng ta a; chû chu Elim leh Sinai inkâra awm a ni.

²Thlalêra Israel pung khâwmho chu an vai chuan Mosia leh Aarona chungah an phunnâwi a.

³Israel fate chuan an hnênah, “E khai, Aigupta rama sa bêl bula kan thut laia duh tâwka chaw kan ei lai te khân LALPA kutah khân lo thi ta ila, a ţha zâwk tûr! Mipui hei zozâi hi thlalêrah rilţama thi tûrin min lo hruai chhuak lek a nih hi,” an ti a.

⁴LALPA chuan Mosia hnênah, “Ngai teh, vân aţangin in tân chaw ka rawn sîrtir ang e. Mipuite chuan an ni khat tlâ zêl chhar khâwm tûrin kal chhuak thîn sela, ka dân siam hi an zâwm nge zâwm lo tih ka fiah dâwn a ni.

⁵A ni ruk nia an chhar chu ei tûrin an buatsaih ang a, ni tina an chhar lêta tam an chhar tûr a ni,” a ti a.

⁶Mosia leh Aarona chuan Israel fate zawng zawng hmâah chuan, “Tlai lamah chuan Aigupta ram ata hruai chhuaktu che u chu LALPA a ni tih in hre mawlh ang.

⁷Zîng lamah chuan LALPA ropuina in hmû ang; LALPAN a chungah in phunnâwinate kha a lo hre ta si a. Keini hi eng nge kan niha, kan chungah in phunnâwi tâk mai?” an ti a.

⁸Mosia bawkin, “LALPAN tlai lamah sa ei tûr a pêk che u a, zîng lamah puar tâwka chaw ei tûr a pêk hunah che u chuan hei hi in la hria ang; LALPAN ama chungah in phunnâwina kha a hai si lo va. Keini hi eng nge kan nih? Kan chungah in phunnâwi hi LALPA chungah phunnâwi in ni zâwk asin,” a ti a.

⁹Mosia chuan Aarona hnênah, “Israel fa pung khâwmho zawng zawng hrilh la, ‘LALPA hnênah lo hnai rawh u, in phunnâwinate kha a lo hria e,’ ti ang che,” a ti a.

¹⁰Aaronan Israel fa pung khâwmho zawng zawng hmâa thû a sawi lai chuan, thlalêr lam an han hawi chhuak a; ngai teh, chhûm zîngah chuan LALPA ropuina chu a lo lang ta a.

¹¹LALPA chuan Mosia a bia a,

¹²“Israel fate vuivaina chu ka hria e. An hnênah, “Tlaih chuan sâ in ei ngei ang, zîng lamah puar takin chaw in ei bawk ang a. Kei hi LALPA in Pathian chu ka ni tih in hria ang,’ a ti, ti ang che,” a ti a.

¹³Tlaih chuan vahmîm an lo thlâwk mur mur a, an riahbûk vêl chu an dâp ta dul mai a, zîngah chuan riahhmun vêl zawng zawng chu dâiin a lo khuh vek a.

¹⁴Dai tlâ a hul veleth thlalêr lei chungah chuan thil vâv mûm sîn tê tê, vûr ang maia thianghlîm hi a lo awm ţeuh mai a.

¹⁵Israel faten an han hmuh chuan, “Eng thil nge ni?” an ti hlawm a. Eng nge a nih an hre si lo va. Mosia chuan an hnênah, “Hei hi LALPA ei tûr chaw a pêk che u chu a nih hi.

¹⁶Hei hi in zawm tûra LALPA thupêk a ni: ‘Mi tinin mahni mamawh tawk zêlin chhar khâwm sela, mi pakhat tân omer* khat zêlin, in chhûngkaw mihring awm zât ang zêlin in chhar tûr a ni; mi tinin mahni puan ina awmte mamawh zât chhar rawh se,’” a ti a.

¹⁷Israel fate chuan chutiang chuan an chhar khâwm a, thenkhatin an chhar tam deuh va, thenkhatin an chhar tlêm deuh a.

¹⁸An thil chhar chu omer-a an han bûk chuan, a chhar tamin an ngah chuang lo va, a chhar tlêmin an tlachham bawh hek lo. Mi tinin an mamawh tawk zêlin an chhar si a.

¹⁹Mosia chuan, “Tûma’n a tûk thlenga rin tûrin dah khâwl suh se,” a ti a.

²⁰Nimahsela, Mosia thû chu an pawisa lo va. Thenkhat chuan a tûk thlengin an dah tha a, chûngte chu a lo lung a, a rim chhia a. Mosia chu an lakah a thinur hlê a.

²¹Tichuan, tûk tinin, mi tinin an mamawh tâwk ang zêlin an chhar khâwm thîn a. Nî a lo tlângsân chuan a tuiŕil vek thîn a ni.

²²A ni ruk nîah erawh chuan a lehnhniha tamin, mi pakhat tân omer hnih zêl an chhar khâwm thîn. Pungkhâwmho zînga an hotute chu Mosia hrilh tûrin an vaiin an lo kal a.

²³Ani chuan an hnênah, “LALPA thû chu hei hi a ni: ‘Naktûk hi Sabbath chawlni, LALPA Sabbath thianghlim a ni. Chhang ur tûr chu wawiinah ur ula, chhum tûr in neih chu chhûm rawh u; chumi bâng zawng chu a tûk atân dah tha ang che u,’ tih hi,” a ti a.

²⁴Mosia thupêk ang chuan a tûk atân chuan an dah thâ a; chû chu a rimchhe ve lo va, a lung bawh hek lo.

²⁵Mosia chuan, “Vawiinah hian ei rawh u, wawiin hi LALPA Sabbath ni a ni si a; wawiinah chuan leia tlâ hmuh tûr a awm lo vang.

²⁶Nî ruk chhûngin in chhar khâwm thîn ang a, a ni sarîh nî, Sabbath nî-ah chuan pakhat mah hmuh tûr a awm lo vang,” a ti a.

²⁷Nimahsela, mi thenkhat chu ni sarîh niin chhar khâwm tûrin an kal chhuak a, mahse hmuh tûr rêng an hre lo va.

²⁸LALPA chuan Mosia hnênah, “Ka thupêk leh ka dânte hi eng chen nge in palzût dâwn le?

²⁹Khai u le! LALPA chuan Sabbath nî a pêk che u hi; chûvângin a ni ruk nî chuan ni hnih daih chhang a pe che u a. A ni sarîh nî chuan mi tin mahni awmna hmuna awm vek tûr a ni a; a ni sarîh nî chuan tûmah pâwnah chhuak suh se,” a ti a.

³⁰Tichuan, mipuite chu a ni sarîh nî chuan an chawl ta a.

³¹Israela chhûngkua chuan a hmingah Manna an vuah a. Koriandar chỉ anga vâ sar, khawizû leh chhang chawhpawlh anga tui a ni.

³²Mosia chuan, “Hei hi LALPA thupêk chu a ni: ‘Aigupta ram aţanga ka hruai chhuah lai che u a, thlalêra in awm laia ka chawm thinna che u chhang hi in thlah kal zêlten an rawn hmuh vê atân omer khat dah tha rawh u,’” a ti a.

³³Mosia chuan Aaronah hnênah, “Bêl han lâ la, a chhûngah manna omer khat thun la, in thlah kal zêlte tân LALPA hmâah dah tha rawh,” a ti a.

³⁴LALPA Mosia thû a pêk angin Aaronah chuan Thuhriattirna hmâah chuan a dah tha ta a.

³⁵Israel fate chuan mihring chênna ram an thlen hmâ, kum sawmli chhûng zawng chuan manna chu an ei a; Kanaan ramri bul an thlen hmâ loh chuan manna chu an ring reng a.

³⁶Omer khat chu ephah* hmun sâwma thena hmun khat a ni.

BUNG 17

LUNGPIUI AţANGIN TUI

¹Israel fa pung khâwmho zawng zawng chu LALPA thupêk angin, Sin Thlalêr aţang chuan an insawn chhuak a, Rephidimah riahbûk an khuar a; nimahsela mipuite tân tui in tûr a awm si lo va.

²Tichuan mipuite chuan Mosia chu an nawr a, “Tui in tûr min pe rawh,” an ti a. Mosia chuan an hnênah, “Engvângin nge hetia min nawr mai? Engvângin nge LALPA chu in fiah le?” a ti a.

³Mipuite chu an tuihâl si a, Mosia chu an mawhchhiat a, “Engvângin nge kan fanaute leh kan ran rualte tuihâla thi tûr ringawta Aigupta ram aţanga min hruai chhuah ni?” an ti a.

⁴Mosia chuan LALPA chu a âu va, “Hênggho hian lungin min deng hlum takngial dâwn! Engtin nge ka tih tâk ang?” a ti a.

⁵LALPA chuan Mosia hnênah, “Israel upaho hruaiin mipui hmâah sâwn va kal rawh. Luipui i vuakna tiang kha keng bawh la, va kal rawh.

⁶Ngai teh, Horeb lungpui chungah sâwn i hmâah ka lo ding ang e; lungpui chu vua la, mipuite in tûrin tui a lo chhuak ang,” a ti a. Mosia chuan Israel upate mithmuhah chutiang tak chuan a ti a.

⁷Chû hmun hmingah chuan Massa leh Meriba tih a vuah a; Israel faten an nawr chiam avâng leh, “LALPA hi kan zîngah a awm ngût emaw chu le?” tia LALPA an fiah avângin.

AMALEK MITE CHUNGA HNEHNA

⁸Rephidim-ah chuan Amalek-ho an rawn thawk a, Israelte chu an rawn bei a.

⁹Mosia chuan Josua hnênah, “Amalek-ho do tûrin mi thenkhat thlang chhuak la, kal chhuak rawh. Naktûkah tlang chhîpah khian Pathian tiang kengin ka lo ding ve ang e,” a ti a.

¹⁰Josua chuan Mosia sawi ang chuan a ti a, Amalek-ho chu a va bei ta a. Mosia chu Aaronah leh Hura te nên tlâng chhîpah chuan an lâwn chho bawh a.

¹¹Mosian a kut a phar chhûng chuan Israelte chu an chak a; a kut a lâl thlâk chuan Amalek-ho an chak thung a.

¹²Tichuan, Mosia bân chu a kham ta êm êm a; lung an rawn lâksak a, a chungah chuan an thuttîr a. Aaronah leh Hura chuan a bânthe chu lehlam lehlamah an dâwm kânsak a; tichuan ni tlâk thlengin a phar thei ta a.

¹³Tichuan, Josua chuan khandaih hriamin Amaleka leh a mite chu a hneh ta a.

¹⁴LALPA chuan Mosia hnênah, “Hê thil hi hriat reng atân lehkhâbûah ziaak la, Josua hrilh bawng ang che; vâh hnuaiâh hian tûma hriat tawh loh tûrin Amalek-ho hi ka nuai bo vek dâwn a ni,” a ti a.

¹⁵Mosia chuan maichâm a siam a, a hmingah ‘LALPA chu ka Puanzâr a ni’ a ti a;

¹⁶“Amalek-ho chu chhuan zawnz zawnz thlengin ka do zui zêl ang,” tia LALPAN chhia a lo chham tawh vâng a ni,’ a ti a ni.

BUNG 18

JETHROA THURÂWN

¹Jethroa, Midian rama puithiam, Mosia puzawn chuan Pathianin a mi Israelte leh Mosia tâna thil a tihsak dân te—LALPAN Israelte Aigupta ram ațanga a hruai chhuah dân zawnz zawnzge chu a lo hria a.

²Jethroa, Mosia puzawn chuan Mosia nupui, in lama a tîrh hâw Zippori kha arawn hruai a,

³a fapate pahnih nêh. A pakhat zâwka hming chu Gersoma a ni a, (“Ram dangah ka va mikhuah ta si a,” a tih kha a ni a);

⁴a fapa dang chu Eliezara a ni a (“Ka pa Pathian chu mi tanpuitu a ni, Pharoa khandaih lakah mi chhandam ta si a,” a ti a);

⁵Jethroa, Mosia puzawn chu Mosia nupui leh a fapate hruaiin thlalêra Pathian tlâng a niahmunah chuan an lo kal a.

⁶Mosia hnênah, “Kei, i puzawn Jethroa hi i nupui leh i fapa pahnih te nêh kan lo kal e,” a ti a.

⁷Mosia chu a puzawn hmuak tûrin a va chhuak a, a kûn a, a fâwp a. An dam leh dam loh te an inzâwt a, puan in chhûngah chuan an lût a.

⁸Mosia chuan a puzawn hnênah chuan, Israelte thlavâng hauva LALPAN Pharoa leh Aigupta mite chung a thiltih zawnz zawnzge, kawng laka harsatna lo thleng zawnz zawnzge leh, LALPAN a chhan chhuah dân te chu a sawi vek a.

⁹LALPAN Aigupta ram ațanga a chhan chhuah Israelte tâna a thil tha tihsak zawnz zawnz avâng chuan Jethroa chu a lâwm êm êm a.

¹⁰Jethroa chuan, “Aigupta mite kut ațang leh Pharoa kut ațanga nangni hruai chhuaktu LALPA chu fakin awm rawh se, Aigupta mite kut ațanga mipuite chhan chhuaktu ngei chu a ni si a.

¹¹Tûnah chuan LALPA chu pathian dang zawnz zawnz aia ropui a ni tih ka hre ta; an thil chhuan ber berte ai pawha chungnung daih a ni si a,” a ti a.

¹²Mosia puzawn Jethroa chuan Pathian hnênah hâlral thilhlân leh inthâwina thil dang a hân a. Mosia puzawn chu Pathian hmâa inthâwina chawhlui kîlpui tûrin Aaron a chuan Israel upate arawn kalpui vek a.

¹³A tûkah chuan mipuite rorêlsak tûrin Mosia chu a thû a; Mosia hmâah chuan mipuite chu zîng ațangin tlai thlengin an ding reng a.

¹⁴A thiltih vêl dân zawnz zawnz Mosia puzawnin a lo hmuah chuan, “Mipuite tâna i thiltih hi eng nge ni le? Engvângin nge

nangmah chauhva i thûta, zîng ațanga tlai thlenga i hmaa mi an din reng mai le?” a ti a.

¹⁵Mosia chuan a puzawn hnênah, “Pathian râwn tûrin mite hi ka hnênah an lo kal thîn a.

¹⁶Harsatna an neihin ka hnênah an lo kal a, an kâr thû ka lo rêlsak a; Pathian dân leh thupêkte ka lo hriattîr thîn a ni,” a ti a.

¹⁷Mosia puzawn chuan a hnênah, “I thiltih dân hi a tha tâwk lo tlat mai.

¹⁸Nang leh hêng i hnêna awmte hi in la intichau zo mai ang. Hê hnê hi i tân a hautak lutuk a; nangmah maia tlin chi ziazâng a ni lo.

¹⁹Ka thû hi lo ngaithlâ la, thurâwn ka pê ang che a, Pathianin a awmpui ngei ang che. Mipuite aiawhin Pathian hmâah ding la, an harsatna tinrêngte chu Pathian hnênah thlensak zâwk rawh.

²⁰Dân leh thupêkte i zirtîr thîn ang a, an awm dân tûr te, tih tûr leh tih loh tûrte i lo kawhmmuh thîn dâwn alâwm.

²¹Chu mai a la ni lo, mipui zîng ațangin mi fel deuh deuh, Pathian tih mi te, mi dik te, hlêprûk duh lo mi te thlang chhuak la; thenkhat chu sâng rual chung a hotû-ah te, za rual chung a hotu-ah te, sawmnga rual chung a hotûah te, sâwm rual chung a hotû-ah te dah ang che.

²²Anni chuan eng hunah pawh mite ro rêlsak rawh se. Nang chuan thu lian tham chauh rêl la, thu tênau chin chu annin rêl fel vek sela. Tichuan, i tân a awlsam phah ang a, i phur an chhâwk zâng khaisak ang che.

²³Chutiang taka Pathian thupêk ang a i tih chuan nang pawhin i tlin rei zâwk ang a, mipui lam pawh lungâwi takin an hâw hmâ thei zâwk dâwn a ni,” a ti a.

²⁴Tichuan, Mosia chuan a puzawn thû chu a zâwm a, a sawi ang chuan a ti ta a.

²⁵Mosia chuan Israel mipui zîng ațang chuan mi fel deuh deuh a thlang chhuak a, mipui chung a hotû-ah te a ruat a; sang pâwl hotûah te, za pâwl hotû-ah te, sawmnga pâwl hotû-ah te, sâwm pâwl hotû-ah te a ruat ta a.

²⁶Chûngte chuan eng hunah pawh ro an rêl a; thu harsa zual chu Mosia hnênah anrawn thlen a, thu tênau zawnz zawnz chu anmahni’n an rêl fel ta zêl a.

²⁷Tichuan, Mosia chuan a puzawn chu a thlah a, a awmna ramah a hâw leh ta a.

BUNG 19

ISRAELTE SINAI TLÂNGAH

¹Israel faten Aigupta ram an chhuahsan ațanga thla thumna, ni khat ni chuan Sinai Thlalêr an lo thleng a.

²Rephidim chhuahsana Sinai Thlalêr an lo thlenin thlalêrah chuan an riak a. Tlâng bulthut hmunah chuan Israelte chuan riahmun an khua a.

³Mosia chu Pathian hnênah a han chho va, tlâng ațang chuan LALPAN arawn ko va, “Jakoba chhûngkaw hnênah sawi la, Israel fate chu hrilh rawh:

⁴Aigupta mite chung a ka thiltih dân in hmu a, mupui thlân ka châwî che u a, ka hnênah ka hruai thlen tâk che u hi.

⁵Chuvângin, ka thû in zawma, ka thuthlung in wawn tlat chuan mi dang zawng zawng aiin ka ro hlu bîk in ni ang; khawvêl pum pui hi ka ta a ni si a.

⁶Tichuan, ka tân puithiam chỉ leh hnam thianghlim in ni ang, tiin. Hêng thute hi Israel fate i hriattîr tûr chu a ni e,” a ti a.

⁷Mosia chuan mipuite zînga upate chu a ko khâwm a, LALPAN thu a pêk zawng zawng chu a hrilh vek a.

⁸Mi zawng zawng chuan inthurualin, “LALPA sawi apiang chu kan ti zêl ang,” an ti a. Mosia chuan mipuite thu sawi chu LALPA hnênah a hlân chhâwng leh a.

⁹LALPA chuan Mosia hnênah, “Ngai teh, chhûm chhah takah i hnênah ka lo kal ang a, i hnêna ka thu sawi lai chu miten hria sela, tichuan kumkhuain an rin phah dâwn che nia,” a ti a. Tichuan, mipuite thu sawi chu Mosian LALPA hnênah a hlân chhâwng zêl a.

¹⁰LALPA chuan Mosia hnênah, “Mipuiho hnênah chuan va kal la, wawiinah leh naktûkah anniho chu thian thianghlim rawh, an puante pawh su fai rawh se.

¹¹A ni thum nî âtân inpeih vek rawh se. A ni thum niin LALPA chu mipuite hmuh tûrin Sinai Tlângah a lo chhuk thla dâwn si a.

¹²Mipuite tân a vêlin ramrî i kamsak tûr a ni a, “Tlângah hian tûmah an kal chho tûr a ni lo va, a bul vêl pawh va tawh hauh lo tûrin fimkhur rawh u. Mi tûpawhin tlâng a han tawh vaih chuan, tihhlum ngei tûr a ni.

¹³Kut pawhin deh hlek loh tûr a ni a, lunga den hlum a nih loh vêk pawhin, thala kah hlum tûr a ni; mihring pawh, ran pawh ni se, a thi ngei tûr a ni,” tiin hrilh rawh. Tâwtawrâwt a lo rîk vang vang hunah, tlâng chu an rawn hnaih tûr a ni,” a ti a.

¹⁴Tichuan Mosia chu tlâng aţang chuan mipuite hnênah a lo chhuk a, mipuite chu a thian thianghlim a, an puante an su fai a.

¹⁵Mipuite hnênah chuan, “A ni thum nî âtân inpeih vek rawh u; in nupuite pawh hnaih suh u,” a ti a.

¹⁶A ni thum nî chuan khawpui a lo ri a, kâwl a phe zuai zuai a, tlângah chuan chhûm chhah tak a lo awm a; ring takin tâwtawrâwt a lo ri a, a rin êm avângin riahhmuna mipuite chu an khûr hial a.

¹⁷Mosia chuan riahhmuna mipuite chu Pathian tâwk tûrin a hruai a, tlâng bulah chuan an dîng a.

¹⁸LALPA chu meialha a lo chhuk avângin Sinai Tlâng chu meikhûin a khat vek a. Rawhtuina meipui angin a khu mup mup a, tlâng chu a pumin a nhîng dur dur a.

¹⁹Tâwtawrâwt chu a ri sei chiin a ri ring tial tial a, Mosia chu a lo ţawng chhuak a, Pathianin âwin a lo chhâng a.

²⁰LALPA chu Sinai Tlâng chung, a tlâng chhîp takah chuan a lo chhuk a. LALPA chuan Mosia chu tlâng chhîpa chho tûrin a ko va, Mosia chu a han chho va.

²¹LALPA chuan Mosia hnênah, “Chhuk thlâ la, mipuite khu fimkhur tûrin hrilh rawh, LALPA hmêl hmuh tumin ramri kham an rawn kân palh ang a, mi tam takin an thih phah mai ang.

²²Puithiamho, LALPA hnaiha lo kal vête pawh inthian thianghlim rawh se; chuti lo zawng, LALPA kut an tuar palh hlauh ang e,” a ti a.

²³Mosia chuan LALPA hnênah, “Mipuite chu Sinai Tlângah an lo chho ve thei hlei nê; “Tlâng hual vêl hian rî khamin serh thianghlim rawh u,” tiin fimkhur tûrin min hrilh tawh avâng khân,” a ti a.

²⁴LALPA chuan a hnênah, “Kal mai rawh! Chhuk thla la, Aarona hruaiin lo chho leh ang che. Puithiamte leh mipuite chuan LALPA hnêna kal tumin lo lût tlang hlek suh se, chuti lo zawng, a kut an tuar mai ang,” a ti a.

²⁵Tichuan Mosia chu mipuite hnênah a chhuk a, chûng thûte chu a zu hrilh a.

BUNG 20

THUPÊK SÂWM

¹Pathianin hêng thûte hi a sawi a:

²“Kei hi LALPA i Pathian, Aigupta ram ata hruai chhuaka, i saltânna aţanga chhanchhuaktu che chu ka ni.

³Keimah lo chu pathian dang rêng rêng i nei tûr a ni lo.

⁴“Milem siamchawp, chung lam vâna mi anpui emaw, hnuai lam leia mi anpui emaw, lei hnuai tui chhûnga mi anpui emaw i siam tûr a ni lo;

⁵Chûngte chu chibai i bûk tûr a ni lo va, an rawng i bâwl tûr a ni hek lo. Kei, LALPA i Pathian hi Pathian thîkthuchhia ka ni a; kei mi hawtute chu an pate suahsualna avângin an thlah kal zêl chhuan thumna leh chhuan lî-na thlenga thungrûl thîn ka ni a,

⁶mi hmangaihtute leh ka thupêk zâwmtu mi sâng tam tak chung a khawngaihna lantîr thîntu ka ni.

⁷“LALPA i Pathian hming chu a narânin i lam mai mai tûr a ni lo; LALPA chuan duhdah taka a hming lamtute chu thiam changin a chhuah dâwn si lo va.

⁸“Sabbath nî hi thianghlim taka serh tûr a ni tih hre reng rawh.

⁹Ni ruk chhûngin hnâ i thawk tûr a ni a, i hna tinrêng i thawk thei a,

¹⁰Ni sarih nî hi LALPA i Pathian tân Sabbath nî a ni. Eng hnâ mah i thawk tûr a ni lo va; nang leh i fapate, i fanute, i chhiahhlawh mipa leh hmeichhia te, i rante, i huang chhûnga mikhual awm vête chenin, engmah in thawk tûr a ni lo.

¹¹Ni ruk chhûngin LALPAN vân leh lei te, tuifinriat leh a chhûnga thil awm zawng zawngte a siam a, a ni sarih niin a châwl a. Chuvângin, LALPAN Sabbath nî chu mal a sâwm a, a serh ta a ni.

¹²“I nu leh i pa châwimâwî rawh: tichuan LALPA i Pathianin ram a pêkah che chuan i dam rei dâwn nia.

¹³“Tual i that tûr a ni lo.

¹⁴“I uirê tûr a ni lo.

¹⁵“Rûk i ru tûr a ni lo.

¹⁶“I ţhenawmte do zâwngin thuhretu derah i ţang tûr a ni lo.

¹⁷“I ðhenawmte in leh lo i awt tûr a ni lo va; i ðhenawm pa nupui pawh i it tûr a ni hek lova, a chhiahhlawh mipa leh hmeichhia te, a sabengtung te, i ðhenawmte thil neih rêng rêng pawh i awt tûr a ni lo,” a ti a.

MIPUITEN PATHIAN AN HLAU

¹⁸Mipui zawng zawng chuan khawpui rî te, tâwtawrâwt rî te hriain kâwl phê te, tlânga meikhu mup mup te chu an hmû a; chûng thil an hmuh avâng chuan hlauvin an khûr a, an ding hla sauh sauh va.

¹⁹Mosia hnênah, “Kan hnênah thû sawi mai la, kan lo ngaithlâ ang e; Pathian chuan kan hnênah thû sawi tawh lo mai rawh se, kan thi thei mai dâwn alâwm,” an ti a.

²⁰Mosia chuan mipuite hnênah, “Hlau suh u; Pathianin a fiah che u a nih hi, in hmâa a ðihbâiawmna chhan hi thil sual in tih lohna tûr a ni e,” a ti a.

²¹Mipuite chu an ding hla daih a, Mosia erawh chuan Pathian awmna thim chhah mup lam chu a pan hnai thung a.

MAICHÂM HMAN DÂN TÛR

²²LALPA chuan Mosia hnênah, “Hetì hian Israel fate i hrilh tûr a ni: ‘Vân aţangin ka rawn bia che u tih in hmu ta a.

²³Keima aiawh tûr thil engmah in siam chawp tûr a ni lo va; tangkarua leh rangkachaka siam pathian lim rêng rêng in nei tûr a ni hek lo.

²⁴Ka tân leiin maichâm i siam tûr a ni a, a chungah chuan i berâm leh i bâwngpate chu hâlral thilhlân atân leh remna thilhlân atân i hlân tûr a ni. Ka hming ka chhinchhiahna hmun apiangah i hnênah ka lo kal ðhîn ang a, mal ka sâwm ðhîn ang che.

²⁵Lunga maichâm min siamsak chuan lung chher loh hmangin i din tûr a ni; lungchherna hmanrua i hman chuan i tikhawlo tawh tihna a ni.

²⁶Ka maichâm pan tûrin kailâwnah i lâwn chho tûr a ni lo, i saruakna a lang palh ang e,’ tiin.

BUNG 21

CHHIAHHLAWH NEIH DÂN TÛR

¹“Hêng dânte hi an zawm tûrin pe ang che:

²Chhiahhlawh atân Hebrai mi an lei chuan, kum ruk chhûng a thawk ang a; a kum sarìh kumah man lo va chhuah zalên tûr a ni.

³Ama thûa rawn inpê lût a nih chuan, ama thu bawkin a chhuak leh thei ang; a nupui nêna lo lût a nih chuan, ama rualin a nupui pawh a chhuahpui thei ang.

⁴A puin nupui a neihsaka, fanu fapate an hrin chuan, a nupui leh a fate chu a pu tâ a ni ang a, amah maiin a chhuak tûr a ni ang.

⁵Chhiahhlawh chuan, ‘Ka pu te, ka nupui leh ka fate hi ka la thlahlel a, ka chhuahsan duh lo ve,’ a tih erawh chuan,

⁶a pu chuan rorêltute hmâah a hruai ang a. Kawngka bulah emaw, kawngka biang bulah emaw a hruai ang a, a pu chuan thîr zumin a beng a verhsak ang a; kumkhuain a pu rawng a bâwl hlen tawh ang.

⁷“Miin a fanu chu bawihnu atân hralh se, bawihpate anga chhuahthîr ve tûr a ni lo.

⁸A puin nupui atân lo hual ta se, a pu duh zâwng tlin leh ta si lo sela, in tlanchhuah a phal tûr a ni. Verther taka a lo bum avângin a tân hnam dang mite hnêna hralh a thiàng lo.

⁹A fapa nupui atâna a hual a nih chuan fanu te chung a tih dan tûr pangngaiin a ti tûr a ni.

¹⁰Nupui dang a neih chuan, a nupui hmasa a nihnaa a chanvo, ei tûr leh silhfên te a tihlêmsak tûr a ni lo.

¹¹Hêng thil pathumte hi a tihsak duh loh chuan, man leh mual sawi lovin a chhuah zalên leh tûr a ni.

THARUM THAWH CHUNGCHÂNGA DÂN

¹²“Miin mi dang vua sela, a vuaka chu a thih chuan ani pawh tihhlum ve ngei tûr a ni.

¹³Mahse a tum rêng vâng ni lo, Pathian remtihna thil a nih chuan, a tlân chhiatna tûr hmun him ka ruatsak ang che.

¹⁴“Miin tum sâ rênga a ðhenawm chu bumna hmanga a tihhlum chuan, ka maichâm aţangin tihhlum atân hnuh chhuah tûr a ni.

¹⁵“Tûpawh a pa emaw, a nu emaw chung a kut thlâktu chu tihhlum ngei ngei tûr a ni.

¹⁶“Mihring ru bova, zuartu chu a kuta a la kawl lai hmuh a nih chuan, chû mi chu tihhlum ngei tûr a ni.

¹⁷“A nu emaw, a pa emaw ânhche lawhtu chu tihhlum ngei ngei tûr a ni.

¹⁸“Mi insual sela, pakhat zâwkin lung tumin chhu sela, emaw, kuttumin hnek sela, thi lovin, khum betin sil sela,

¹⁹lo tho chhuak lehin, tiang hawla khawlai a lên theih chuan, kut thlâktu chu chhuah tûr a ni. A dam loh chhûnga a thâ chu a tisiltu chuan a rûl ang a, a dam var thlengin a inenkawlina man a tumsak tûr a ni.

²⁰“Miin a chhiahhlawh mipa emaw, hmeichhia emaw tiangin vua sela, a kutah thi ta sela, amah chu hrem ngei ngei tûr a ni.

²¹Amaherawhchu, ni hnih khat tal a dam chuan a pu chu hrem tûr a ni lo vang; ama ro sum a ni miao si a.

²²“Mi lo insualin, hmeichhe naupâi lai lo khawih pawh sela, hliam dang thlen lo mahse, a naupâi chu a chhiat chuan hrem ngei ngei tûr a ni; hmeichhe pasal phût zât aţangin a châwi tûr chu rorêltu tuk zât zât a ni ang.

²³Hmeichhia in hliam a tuar phah chuan a thungrulh dân tûr chu nunna aiah nunna,

²⁴mit aiah mit, hâ aiah hâ, kut aiah kut, kê aiah kê,

²⁵tihkan aiah tihkan, hliam aiah hliam, vuak aiah vuak tuartûr tûr a ni.

²⁶Mi in a chhiahhlawh nu mit emaw, a chhiahhlawh pa mit emaw vuaksakin, lo del phah ta se, a mit avâng chuan a chhuah zalên tûr a ni.

²⁷A chhiahhlawh nu hâ emaw, a chhiahhlawhpa hâ emaw vuak balsak sela, a hâ avâng chuan a chhuah zalên tûr a ni.

RAN KHUAHKHIRH DÂN

²⁸“Bâwngpain mipa emaw, hmeichhia emaw si hlum sela, chu bâwngpa chu lung a den hlum tûr a ni a, a sâ chu ei tûr a ni lo va; bâwngpa neitu erawh chu hrem tûr a ni lo.

²⁹Amaherawhchu, tûn hma lamin chu bâwngpa chuan mi sîk lo chîng thîn sela, a neitu pawhin hre reng si sela, a khuahkhîrh loh avânga mipa emaw, hmeichhia emaw a sîkhlum chuan, chû bâwngpa chu lung a denhlum tûr a ni a, a neitu pawh tihhlum bawh tûr a ni.

³⁰A nunna aiah sum lo phût ta sela, châwi tûra an tuk zât zât chu a nunna tlan nân a pe tûr a ni.

³¹Bâwngpa chuan mi fapa emaw, mi fanu emaw si hlum ta sela, hê dân ang bawh hian rêl tûr a ni.

³²Bâwngpa chuan chhiahhlawh mipa emaw, hmeichhia emaw si hlum ta sela, a neitupa hnênah tangkarua sekel sawmthum a châwi ang a, bâwngpa chu lung a den hlum bawh tûr a ni.

³³“Miin khur chhîn a hawn emaw, lei lai khuarin chhîn leh lo se, khurah chuan bâwngpa emaw, sabengtung emaw tla hlum ta sela,

³⁴khur neitu chuan a man a châwi tûr a ni; ran neitu chu tangkâ a pe ang a, sa ruang erawh chu a hlâwm thung ang.

³⁵“Mi pakhat bâwngpain mi dang bâwng hliamin, thih phah ta se, bâwngpa dam zâwk chu an hralh ang a, a man chu an insem tûr a ni; bâwngpa thi zâwk sâ pawh an insem bawh tûr a ni.

³⁶Chû bâwngpa chuan tûn hma pawhin mi sîk a lo chîn thîna, a neitupain hre reng chung a khuahkhîrh loh chuan, bâwngpa aiah bâwngpa a châwi ang a, a sâ erawh chu a nei thei ang.

BUNG 22

NEIHSUM CHUNGA MAWHPHURHNA

¹“Miin bâwngpa emaw, berâm emaw a rûka, a talh emaw, a hralh emaw chuan, bâwngpa pakhat aiah bâwngpa pangâ a châwi ang a, berâm pakhat aiah berâm palî a châwi tûr a ni.

²Rûkrû mi ina lût chu lo manin lo vawhlum ta sela, tualthah mawhphurhna a awm lo vang.

³Ni chhuah hnûa tihhlum a nih chuan tualthahna mawh a phur ang. Rûkrû chuan a thiltih man a rûl leh ngei tûr a ni a, rulh tûr engmah a neih loh chuan, a rûkrûk manah amah chu hralh tûr a ni ang.

⁴Rûkrûin a thilrûk–bâwngpa emaw, sabengtung emaw, berâm emaw chu a la dam chuan, a leh hnihin a rûl tûr a ni.

⁵“Mi lovah emaw, mi grêp huanah emaw ran a tlattîr a, a rante a thlahthlam avângin mi dang lova thlaite va ei chhiatsak sela, ama lo tha ber leh a grêp huan tha berin a rûl tûr a ni.

⁶“Miin ramah meî chhêmin, hnim hnawkte kâng kâiin, buhpah dahkhâwm te, buh ding lai te emaw, a lo pumpui emaw kâng ta se, meî chhuahtu chuan a rûl vek tûr a ni.

⁷“Miin tangkâ emaw, thawmhnâw emaw a thenawm kawltîr se, a kawh chhûng chuan a in aţangin rûk bo ni ta se, rukrû chu man a nih chuan a leh hnih a châwi tûr a ni.

⁸Rukrû chu man a nih loh chuan, a thenawmpa bungrua chu ama lâk a nih leh nih loh finfiah tûrin in neitupa chu rorêltu hnênah hrui tûr a ni.

⁹Bawhchhiatna hrang hrang, bâwngpa te, sabengtung te, berâm te, thuamhnâw leh thil dang tihbo leh inchuh thubuai awm ta se, rorêltute hmâa thlen tûr a ni a, rorêltuten thiam loh an chantîr zâwka chuan a thenawm pa chu a lêtin a rûl tûr a ni.

¹⁰Miin sabengtung emaw, bâwngpa emaw, berâm emaw, ran dang engpawh a thenawmpa enkawltîr se, lo thi palhin emaw, hliamin emaw, rûk bovin emaw lo awm ta se, tûma’n hmu si lo se,

¹¹an pahnihin LALPA hmingin chhia an chham vê vê ang a; a thenawmpa bungrua engmah a khawih lo tih a sawi ang a; a neitupain chu chu a lo pawm ang a, a rulh pawh a ngai lo vang.

¹²A lo rû ngei a nih erawh chuan, a neitupa hnênah a rûl leh tûr a ni.

¹³Ramsâin lo pawt sawm vek ta se, a seh ngei tih finfiahna arawn keng tûr a ni a, sa seh a nih avângin rulh lêt a ngai lo vang.

¹⁴“Miin a thenawmpa ran emaw lo chhawr hawh ta se, a neitu hriat lohvin hliam tâwkin lo thi ta se, a hawhtu chuan a rûl tûr a ni.

¹⁵A neitupain a hmuhpui ve tho a nih chuan, a rulh kher a ngai lo vang; man neia hawh a nih chuan, a hawh manin a tum ang.

NUNPHUNG LEH SAKHAW SERH DÂN

¹⁶“Nula thianghlim, nupui atâna tûma la hual loh chu mipain thlêmin lo mutpui ta se, nupui man pangngai pên, nupuiah a nei tûr a ni.

¹⁷Nula pain neihtîr a remti lo hulhual a nih pawhin nula thianghlim man pangngai chu a pe tho tûr a ni.

¹⁸“Dâwithiamnu chu i zuah tûr a ni lo.

¹⁹“Ran pâwltu chu tihhlum ngei ngei tûr a ni.

²⁰Tûpawh LALPA hnênah chauh ni lo, pathian dang hnêna inhâwi chu tihbora tûr a ni.

²¹“Hnam dang i tiduhdah tûr a ni lo va, i hnuaichhia tûr a ni hek lo; nangni pawh Aigupta ramah khân hnam dang mi in nih kha.

²²“Hmeithai te, fahrah te i tinawmnah tûr a ni lo.

²³In tihduhdaha, anni’n kei mi rawn auh chuan, an âu âw chu ka lo ngaithla ngei dawn si a;

²⁴ka thinurna a ling ang a, khandaihin ka that ang che u a; in nupuite chu hmeithai an ni ang a, in fate pawh fahrah an ni ve mai ang.

²⁵“Ka mite zînga mi rethei pawisa in puktîr pawhin, pawisa pûktîra eizawngtute angin in ti ve tûr a ni lo; a pung pawh in phût ve tûr a ni hek lo.

²⁶Dahkham atâna i thenawmpa thawmhnâw i lâk chuan ni tlâk hmâin i pe kîr leh tûr a ni.

²⁷A thawmhnaw neihchhun, a intuam lumna ve ber a ni si a. Eng sinin nge a mut tâk ang? Kei mi rawn au ang a, ka khawngaih ang a, ka lo chhâng ngei dawn asin.

²⁸“Pathian i ânkhum tûr a ni lo; i mite zînga rorêltu pawh ânchhia lawh hek suh.

²⁹“I thlai thar leh i hriak sâwr thar hmasâ chu tikhawtlai lovin i hlân vat tûr a ni. I fapa hrin hmasak ber chu min pe tûr a ni.

³⁰Chutiang bawkin, i bâwngpa leh i berâm no neih hmasak ber chu min pe tûr a ni. A pui hnênah ni sarih a awm ang a; a ni riat niah mi pe tûr a ni.

³¹“Ka tân mi thianghlim in ni tûr a ni: ramsa sehhlum sâ chu in ei tûr a ni lo va, ui in pe mai tûr a ni.

BUNG 23

MI TIN TÂN RORÊLNA DIK

¹Thu thang dik lo theh darh suh. Thuhretu dik lo i nih ve loh nân misualho zîngah i kut rawlh ve suh.

²Thil sual ti tûrin mipui tihdân zui ngawt suh; thubuai remnaah a tam lam lam tih vângin a dik lo lamah țang suh.

³Thubuai rêlnaah mi rethei pawh țan bîk suh.

⁴“I hmêlmapa bâwng bo emaw, a sabengtung bo emaw i hmuh chuan a hnênah i khalh hâwsak ngei tûr a ni.

⁵Nangmah hawtu tâ sabengtung chu a phurin a delh beh reng hmû la, hreh tak chung pawhin i țanpui ngei tûr a ni.

⁶In zînga miretheite thubuai chu vervêk takin i rêlsak tûr a ni lo.

⁷Thil dik lo lakah inthiarfihlîm daih rawh; pawî sawi lo leh mi dikte tihlum suh. Mi suaksualte chu thiam ka chantîr dâwn si lo.

⁸Thamna rêng rêng chu lâk loh tûr a ni, thamna hian rilru a tidel a, mi dikte thû a kailek thîn.

⁹Ram dang mi i hnuaichhiah tûr a ni lo, nangni pawh Aigupta rama ram dang mi in nih khân an rilru put dân in hriat kha.

SABBATH NI SERH DÂN

¹⁰“In thlawh hmâah kum ruk chhûng buh in chîng ang a, a thar pawh in seng zêl ang a,

¹¹a kum sarihnaah chuan buh chîng lovin, in zînga mi retheiten ei tûr an lo zawn ve nân in dah âwl mai tûr a ni; annin an lâk bâng chu ramhnuaia ramsâten an lo tlân ve dâwn nia. Chutiang bawh chuan in grêp leh olive huante chu in ti tûr a ni.

¹²Ni ruk chhûngin hnâ in thawk tûr a ni a, a ni sarih ni chuan in châwl tûr a ni; in bâwngpa leh in sabengtung te pawh an châwl ang a, in chhiahhlawhnu fate leh mikhualte pawh an châwl hahdam tûr a ni.

¹³Ka hrilh apiang che u chu ngaihven zêl ula, pathian dang hmîng rêng rêng chu lam pawh in lam tûr a ni lo, in kâ hian a sawi pawh sawi ri suh se.

KUM TINA KÛTPUI PATHUM

¹⁴“Kum khatah ka tân vawî thum kûi i hmang tûr a ni:

¹⁵Dâwidim telh loh Chhang Kût i hmang tûr a ni (Abib thlâ, Aigupta ram ațanga in lo chhuah thlâ, ka hun ruat ngeiah chuan thû ka pêk che angin ni sarih chhûng dâwidim telh loh chhang in ei tûr a ni; ka hmâah hian tûmah kutruakin an lo lang tûr a ni lo);

¹⁶Iova i chîn ațanga i thawhrim rah hmasa tân Buhseng Kût siam ula; kum tâwpah, in thil chîn zawn zawn in seng zawh hunah Pâwl Kût hmang ang che u.

¹⁷Kum khat chhûngin mipa zawn zawn chu LALPA hmâah vawî thum an inlan vek tûr a ni.

¹⁸Ka hnêna inthâwina thisen chu dâwidim telh chhang nên i hlân tûr a ni lo; ka hnêna inthâwina thau chu a tûk thlenga dah reng tûr a ni hek lo.

¹⁹In rama thlai thar hmasate chu LALPA in Pathian inah in rawn dah tûr a ni. Kêl notê chu a pui hnutêin i chhûm tûr a ni lo.

VÂNTIRHKOH LEH THUTIAM

²⁰“Ngai teh, in kalna kawnga vêng zêl tûr che u leh, in tâna ka buatsailh hmuna hruai thleng tûr che u-in in hmahruaitu atân Vântirhkoh ka tîr e.

²¹Ama zai ngai chungin a thû âwih rawh u; tithinur hauh suh u, in bawhchhiatnate a ngaidam duh lo mai ang; amahah chuan ka hming a awm si a.

²²A thû in zawma, ka hrilh ang che u a in tih erawh chuan, in hmêlmâte chu ka hmêlmâ an ni ang a, in khingpuite chu ka khingpui an ni ve ang

²³Ka Vântirhkoh chuan in hmâ a hruai zêl ang a, Amor-mite, Hit-mite, Periz-mite, Kanaan-mite, Jebus-mite ramah chuan a hruai thleng ang che u a; anni chu ka tiboral daih dâwn a ni.

²⁴Chûng mite pathian chu chibai in bûk ve tûr a ni lo va, an rawng pawh in bâwl tûr a ni lo va, an tihdân angin in ti ve tûr a ni hek lo; in tihchhiatsak vek ang a, an sakhaw lungphunte chu in chhu sawm vek tûr a ni.

²⁵LALPA in Pathian rawng in bâwl zâwk tûr a ni; ani chuan in chaw leh tui chu mal a sâwm ang. Tichuan, in zîng ata natna ka lâk bosak bawh ang che u.

²⁶In ramah nau chhiat emaw, ching emaw an awm lo vang; in dam chhûng nite ka tihkimsak ang che u.

²⁷“In hmâah ka țihbâiawmna ka tîr ang a, in thlen china mipuite zîngah chî-âina ka thlen zêl ang a, in hmêlma zawn zawn in hmâah ka tlânchhiattîr ang.

²⁸In hmâah khawinghal ka tîr ang a, chûngte chuan Hiv-mite, Kanaan-mite, Hit-mite chu in hmâah an ûm zêl ang.

²⁹Kum khat chhûng mai chuan ka hnawt chhuak vek lo vang, chuti lo zawn engkim a ram chhe vek ang a, in tân ramsa an lo tam lutuk mai dâwn si a.

³⁰Nangniho hi ram pum luah thama in lo pun hmâ chuan, anniho chu tlêmtê têin ka hnawt chhuak hret hret zâwk ang.

³¹In ram chin chu Tuipui Sen ațanga Philistia rama tuifinriat thlengin, thlalêr ațanga Luipui thlengin ka khamsak ang che u. A ram chhûnga lo chêngte chu in kutah ka pê ang che u-a, nangnin in hnawt chhuak vek tûr a ni.

³²Annite nêen emaw, an pathiante nêen emaw inremna thu in thlung tûr a ni lo.

³³In ramah pawh in awmtîr ve tûr a ni hek lo; chuti lo zawn, ka lakah thil sual an tihtîr mai ang che u. An pathiante rawng in bâwl mai chuan in tân thang an la ni ang,” a ti a.

BUNG 24

ISRAELIN THUTHLUNG A NEMNGHET

¹Ani chuan Mosia hnênah, “Nang leh Aarona te, Nadaba leh Abihua te, Israel upa sawmsarih te nên LALPA hnênah lo chho ula, râlkhath aţangin chibai rawn bûk ang che u.

²Mosia chauh LALPA kiangah lo kal sela, anni chu lo kal hnai suh se; mipuite pawh ama rualin lo kal vê hauh suh se,” a ti a.

³Mosia chu a han chho va, LALPA thu sawi leh a rorêlna thu zawng zawng chu mipuite hnênah a hrilh vek a. Mipuite chuan an vaiin aw khat pûin, “LALPA sawi zawng zawng chu kan ti vek ang,” tiin an sawi rual a.

⁴Mosia chuan LALPA thù zawng zawng chu a ziaik chhuak a. Zing takah a tho va, tlâng bulthutah chuan maichâm a siam a, Israel hnam sâwm leh pahnih zâtin lung sâwm leh pahnih a phun bawk a.

⁵Israel fate zînga mi tlangvâlthe a tîr a; chû mite chuan LALPA hnênah hâlral thilhlân leh remna thilhlân bâwngpa an hlân a.

⁶Mosia chuan a thisen zâtve chu a lâ a, chawhtawlhah a dah a, a zâtve chuan maichâm chu a theh a.

⁷Thuthlunna Bu chu a la a, mipuite hriatah a chhiar a. Anni chuan, “LALPA sawi zawng zawng chu kan ti vek ang a, a thù kan âwih ang,” an ti a.

⁸Mosia chuan thisen chu a lâ a, mipuite chu a theh a, “Hei hi LALPA thuthlunna thisen, a sawi ang taka nangmahni nêna a thlun tâk chu a ni,” a ti a.

PATHIAN NÊN TLÂNG CHUNGAH

⁹Tichuan, Mosia chu Aarona te, Nadaba te, Abihua te leh Israel upate zînga sawmsarih te nên chuan an kal chho ta a,

¹⁰Israelte Pathian chu an han hmû a. A kephah hnuai chu sapphir lungmantam rem khâwm ang a ni a, vân tak tak ang maiin a thianga.

¹¹Israel fate zînga milianhote chungah chuan kut a thlâk lo. Pathian chu an hmu a, an eiin an in ho va.

¹²LALPA chuan Mosia hnênah, “Tlângah hian ka hnênah lo chho la, awm rih ang che; mipuite i zirtîr tûr, dân leh thupêk ka ziah sâ, lungphêka ziah chu ka pe dâwn che nia,” a ti a.

¹³Mosia chu a kaiha vêngtu Josua nên an tho va, Mosia chu Pathian tlângah chuan a han chho va.

¹⁴Upaho hnênah chuan, “Kan lo kîr leh hmâ chu hetah hian min lo ngâk ang che u. Aarona leh Hura te in hnênah an awm thova. Harsatna nei apiangten lo pan mai rawh se,” a ti a.

¹⁵Mosia chu tlângah chuan a han kal chho va, chhûmin tlâng chu a khuh mup a.

¹⁶Sinai Tlângah chuan LALPA ropuina chu a awm a, chhûm chuan ni ruk chhûng a khuh a. A ni sarih ni chuan chhûm zing aţang chuan Mosia chu a rawn ko va.

¹⁷Tlâng chungah LALPA ropuina hmêl, Israel fate mithmuha a lan dân chu mi kâng ral vek thei meipui ang mai a ni.

¹⁸Tichuan, Mosia chu chhûm zîngah chuan a lût a, tlângah chuan a han chho va. Mosia chu tlângah chuan ni sawmli leh zan

sawmli a awm a.

BUNG 25

BIAKBÛK TANA THILPEK

¹LALPA chuan Mosia a bia a,

²“Israel fate hnênah chuan, ka tân thilpêk rawn hlân tûrin hrilh rawh. Phal taka pêk duhna thilung neitute thilhlân chu ka tân i la tûr a ni.

³Thilpêk i lak tûr chu hêngte hi a ni: rangkachak te, silvar te, dâr te;

⁴la dumpâwl te, a senduk te, a sen lâr te, puan zaisîn te, kêl hmul te;

⁵berâm vun tihsen te, zawngdulinu vun te, acacia thing te;

⁶khawnvârtui, hriak rîmtui, thih chî leh hâl rîmtuia hman chî te;

⁷onyk lung te, puithiam kawr hmâa zehmâwi chî lung têtê a ni.

⁸An zînga ka chên ve theih nân, biakbûk thianghlîm min siamsak rawh u.

⁹Biakbûk awm dân tûr leh a chhûng chei mawi dân tûr chu, a lem ka entîr che ang chiah khân in sa tûr a ni.

THUTHLUNG BÂWM

¹⁰“Acacia thingin bâwm in siam tûr a ni; a dung lam tawng hnih leh a chanvêa sei, a vâng lam tawng khat leh a chanvê, a sân lam tawng khat leh a chanvê ni rawh se.

¹¹Rangkachak hlangin a pâwn lam leh a chhûng lam chu in luan chhuak vek tûr a ni a, rangkachak bawkin a tlâng in kâwm chhuak vek bawk tûr a ni.

¹²Rangkachak khâng pali chhûng bawk ula, a sîr killîah chuan vuah ang che u; lehlamah khâng pahnih, lehlamah khâng pahnih vê vê vuah ang che u.

¹³A zâwnfung atân acacia thing tlâwn pahnih in siam ang a, rangkachakin in luan vek tûr a ni.

¹⁴Bâwm chu zâwn theih tûrin a sîra khângah te chuan zâwnfungte chu in rawl tûr a ni.

¹⁵Zâwnfungte chu bâwm panga khângah te chuan vuah sâin a awm reng tûr a ni a; phâwi chhuah tûr a ni lo.

¹⁶Bâwm chhûngah chuan Thuhriattîrna ka la pêk tûr che chu i dah tûr a ni.

¹⁷Zahngaihna thutthlêng rangkachak hlangin siam la; a sei zâwn chu tawng hnih leh a chanvê ni sela, a vâng lam chu tawng khat leh a chanvê ni rawh se.

¹⁸Rangkachakin cherub lim pahnih in siam ang a, a chhera chher ngei ni se, zahngaihna thutthlêng hmâwra dah vê vê tûr a ni.

¹⁹Cherub pakhat chu a hmâwr lehlamah a awm ang a, cherub dang chu a hmâwr lehlamah a awm tûr a ni; tichuan, a hmâwr tawn tawna cherubte leh zahngaihna thutthlêng chu inzawm vek a ni tûr a ni.

²⁰Cherubte chu zahngaihna thutthlêng bihin an inhawitawn vê vê ang a, an thlâ chu zâr pharhin, zahngaihna thutthlêng chu an khuh tûr a ni.

²¹Zahngaihna thutthlêng chu bâwm chungah i hung tûr a ni a, bâwm chhôngah chuan ka la pêk tûr che Thuhriattîrna chu i dah tûr a ni.

²²Chutah chuan kan inhmu thîn dâwn nia. Thuhriattîrna dahna Bâwm chungah cherub pahnihte inkâr, zahngaihna thutthlêng chungah chuan kan inbia ang a, Israel fate hnêna thu ka pêk apiang ka hrilh thîn ang che.

CHHANGSERH DAHNA DAWHKAN

²³“Acacia thingin dawhkân in siam bawk tûr a ni; a sei zâwnng tawng hnih, a vâng lam tawng khat, a sân lam tawng khat leh a chanvê ni rawh se.

²⁴Rangkachak hlangin in luan chhuak vek ang a, a tlâng pawh rangkachakin i kâwm chhuak vek tûr a ni.

²⁵Kutphah bawka hlaiin a vêlin a sîr kâwmna siam ula, a tlâng chu rangkachakin kâwm leh ang che u.

²⁶Rangkachak khâng palî siam bawk ula, dawhkân ke pali kil theuhvah in vuah tûr a ni.

²⁷A zâwnngul rawlhna tûr khâng chu a tlâng kâwmna sîrah zêl vuah tûr a ni.

²⁸Dawhkân chu zâwn theih tûrin acacia thingin zâwnngul i siam tûr a ni a, rangkachakin i luan bawk tûr a ni.

²⁹Thlêng te, no te, fianpui te, chawhtawlh te siam ula. Rangkachak hlanga siam vek tûr a ni.

³⁰Ka hmâa dawhkân chungah chuan chhangserh i dah reng tûr a ni.

RANGKACHAK KHÂWNVÂR HÛNCHHAN

³¹“Rangkachak hlangin khâwnvâr dahna i siam tûr a ni; khâwnvâr dahna chu a chhera chher tûr a ni a. A hûnna bulthut leh a ngul te, a lu bawk te, a chei mâwina pangpâr kuhmûm leh a pâr parh lem nên chuan inzawm vekin in siam tûr a ni.

³²A kûngpui aţangin zâr paruk a pêng ang a: lehlam lehlamah pathum vê vên a pêng darh ang.

³³A zâr hmâwrah theite pâr kuhmûm leh a cheina bawk leh a pâr parh lem pathum zêl a awm tûr a ni a; a zâr hmâwr lehlamah pawh theite pâr kuhmûm leh a cheina bawk leh a pâr parh lem pathum bawk a awm ang a; tichuan, khâwnvâr dahna chuan pêng paruk a nei ang.

³⁴Khâwnvâr ngul zidingah chuan a cheimâwina theite pâr kuhmûm leh pâr parh lem pali a awm tûr a ni.

³⁵A zâr chung zâwk pahni inkârah pangpâr kuhmûm pakhat awm sela, a zâr hnuai zâwk pahni inkârah chuan pangpâr kuhmûm pakhat awm zêl bawk sela; tichuan khâwnvâr dahna ngul aţanga zâr parukah chuan a awm vek tûr a ni.

³⁶A zârte leh a kuhmûmte chu rangkachak hlang tlang khata chher tûr a ni.

³⁷Hemi atân hian khâwnvâr pasarih i siam tûr a ni a, han chhita hmalam ên tûr zâwnnga hûn tûr a ni.

³⁸A vâp cheh bunna tûr bakcheh leh meivâp dahna thlêng rangkachak hlang hlakin i siam bawk tûr a ni.

³⁹Khâwnvâr dahna leh bungbêl vêl siam nân rangkachak talent* khat i hman tûr a ni.

⁴⁰Hêngte hi tlâng chungah a lem ka entîr che ang khân siam ang che.

BUNG 26

BIAKBÛK

¹“Biakbûk i siam tûr a ni; chutah chuan la zaisîn tak, a dumpâwl leh a senduk leh a senlâr zeh pawlh, cherub lem mâwi taka zeh tjal, puanzâr sâwm siam la.

²Puanzâr sei zâwnng chu tawng sawmhni h leh pariat a ni ang a, a vâng lam chu tawng lî zêl a ni ang. Puanzâr hlai zâwnng te chu a intiat vek tûr a ni.

³Puanzâr pangâ chu thuihawm vek tûr a ni a, puanzâr panga dangte pawh thuihawm bawk tûr a ni.

⁴Puanzâr thuihawm sîr khat tlângah chuan lahrual dumpâwlin a beng vuah thliah thliah ula; chutiang bawkin puanzâr thuihawm dang tlâng hmâwrah pawh i ti ve tûr a ni.

⁵Puanzâr pakhat a beng sawmngâ i vuah ang a, puanzâr dangah pawh a beng sawmngâ i vuah bawk ang a, chúng beng vuahte chu a inzâwn vek tûr a ni.

⁶A beng bah zawmna tûr thil kawm sawmngâ rangkachakin siam ula, chúngte chuan puan thui khâwm pahnihte chu in bêt zawm ang a, tichuan, Biakbûk zâr chu puan thân khat a lo ni ang.

⁷“Biakbûk chung khuhna tûr kêl hmul puan in siam tûr a ni. Puanzâr sâwm leh pakhat in siam tûr a ni.

⁸Puanzâr sei zâwnng chu tawng sawmthum theuh ni sela, a vâng lam tawng lî theuh ni bawk sela; puanzâr sâwm leh pakhatte chu a intiat vek tûr a ni.

⁹Chúng puanzâr pangâte chu i thuihawm tûr a ni a; a dang parukte pawh i thuihawm bawk tûr a ni; puanzâr thuihawm parukna chu puan in hma lamah a inthlepa zâr tûr a ni.

¹⁰Puanzâr thuihawm pakhat zâwk tlângah chuan a beng sawmngâ in siam tûr a ni a, puanzâr dang zâwk tlângah pawh a beng sawmngâ bawk in siam tûr a ni.

¹¹Dârin a inbahna kawm sawmnga siam ula, a kawmte chuan a bengah va inbêt theuh sela, puan inzawm vek pakhat a lo ni ang.

¹²Biakbûk hnung lamah chuan a khuhna sahmul puan chuang chu uai thla rawh se.

¹³Biakbûk sîr tuaka sahmul puan chuang tawng khat zei zei chu, biakbûk sîr lehlam lehlamah uai thla rawh se.

¹⁴Puan in chung khuhna chu berâm vun chhum sen tawh leh zawngdulinu vunin in thuah bawk tûr a ni.

¹⁵“Biakbûk bang atân, ngîl taka ding thei tûrin acacia thingphêkin frêm siam la.

¹⁶A frêm chu tawng sâwma sei, tawng khat leh a chanvêa hlai ni rawh se.

¹⁷Frêm pahnih chu rem taka invuahzawm thei tûr in ke pahnih a nei tûr a ni. Chutiang chuan biakbûk frêm zawng zawng chu in siam tûr a ni.

¹⁸Biakbûk chhim lam bang atân chutiang rem khâwm chu sawmhnih siam rawh u.

¹⁹Chûng bang frêm ke pahnihte chu silvar ker kuakah innghat sela, frêm sawmhnih tân silvar kerkuak sawmlî i siam tûr a ni.

²⁰Biakbûk hmar lam bang atân thingphêk rem khâwm sawmhnih a awm bawh ang a,

²¹a ke nghahna tûr silvar kerkuak sawmlî nê: frêm pakhatata a ke innghahna pahnih zêl a awm ang.

²²Biakbûk kawmchâr lam, khawthlang lam bang atân thingphel frêm paruk i siam tûr a ni.

²³Biakbûk hnung bang kil vê vê atân frêm pahnih i siam bawh tûr a ni.

²⁴A kil hnih chu a bul aţanga a lêr thlengin khâng pakhatin kilh zawm tûr a ni. A pahnih chuan a inthlawp tawn vê vê ang a; chûng chu a sîr kil hnih tân a ni.

²⁵Tichuan, frêm remkhâwm pariat leh a nghahchhan silvar kerkuak nê-frêm tina nghahchhan pahnih zêl, a vaiin nghahchhan sâwmparuk a awm tûr a ni.

²⁶“Acacia thingin bangrel in siam tûr a ni: Biakbûk sîr khatah a rel pangâ zêl awm sela,

²⁷Biakbûk sîr lehlamah rel pangâ awm bawh sela, Biakbûk kawmchâr, khawthlang lamah pawh rel pangâ bawh awm sela.

²⁸A bangrel laitâ chuan a tâwp aţanga a tâwp lehlam thlengin a hawh tlang tûr a ni.

²⁹Chûng bang frêm te chu rangkachaka tuam vek tûr a ni a, a bangrel rawh luhna tûr khâng pawh chu rangkachak bawkin in siam tûr a ni a, a bangrelte pawh rangkachaka tuam bawh tûr a ni.

³⁰Biakbûk chu tlang chung a lem ka entîr che ang tak khân din ang che.

³¹Puanzâr tûr chu la dumpâwl te, a senduk te, a sen lâr tea inpawh, la zaisîn taka tah tûr a ni a; chutah chuan thiam taka zeh cherub lemte a chuang bawh tûr a ni.

³²Chû chu acacia thing, rangkachaka tuam ban palî-ah khai ang che. A khaina kawm chu rangkachaka siam ni se, silvar tlang ker kuak palî chungah innghat bawh rawh se.

³³Nghet taka chilh betin puanzâr chu i zâr tûr a ni. Chû puanzâr pindan chhûngah chuan Thuthlunna Bâwm chu dah lût ang che. Chû puanzâr chu in tân hmun thianghlim leh Hmun Thianghlim Ber daidanna bang a ni ang.

³⁴Hmun Thianghlim Ber chhûnga awm Thuthlunna Bâwm chu zahngaihna thutthlengin i chhîn tûr a ni.

³⁵Dawhkân chu puanzâr pâwnah hûng la, khâwnvâr dahna chu Biakbûk chhim lama dawhkân sîrah hûng la, dawhkân chu a hmar lamah hûng ang che.

³⁶“Puantatuin la zai sîn dumpâwl te, a senduk te, a senlâr te zeh pawhlin thiam takin tah sela, Biakbûk kawngkâah zâr ang che.

³⁷Puanzâr zârna tûr in acacia thingin ban pangâ, rangkachaka luan i siam tûr a ni; a inbahna kawm pawh rangkachak ni se, a ke nghahna tûr in dâr tlang kerkuak i chher bawh tûr a ni.

BUNG 27

HÂLRAL THIL HLANNA MAICHÂM

¹“Acacia thingin maichâm, killi nei, tawng ngâa sei, tawng ngâa hlai, tawng thuma sâng i siam tûr a ni.

²A killi tin aţang chuan a kî lo chawr chhuak sela; chûng a kite chu maichâm nê in zawm vek tûr a ni a, dârin i luan bawh tûr a ni.

³Meivâp dawnthlêng te, vutlawh te, chawhtawh te, thîrkut te, meilâk bêl te i siam tûr a ni a; chûng bungbêlte chu dârin siam vek ang che.

⁴Maichâm atân dârin lên i siam ang a; chû lên sîr killiahte chuan dârin khâng pali i siam bawh tûr a ni.

⁵Dâr lên chuan maichâm hnua, a bang chanvê vêl awh rawh se.

⁶Maichâm zâwnngul atân acacia thing tlawn dâra luan i siam tûr a ni.

⁷Zâwnngulte chu khângah chuan rawh luh tûr a ni a, maichâm pang lehlam lehlamah a zâwn nân a invuah tûr a ni.

⁸Maichâm chhûng lam tikawrawng tûr in thingphêk hmang la, tlang chung a ka entîr che ang khân siam ang che.

BIAKBÛK HUNGNA

⁹“Biakbûk tualzâwl i siam bawh tûr a ni. A chhim lam hung nân la zai sîn tah, tawng zâa sei zâr tûr a ni.

¹⁰Dâr ban sawmhnih leh a innghahna dâr kerkuak sawmhnih a awm tûr a ni. Banah te chuan puanzâr kaihna kawm leh a zâr ngulte chu silvar a ni tûr a ni.

¹¹Chutiang bawkin a hmar lam tawng zâa sei chu a dung tuana puanzâr tûr te, ban sawmhnih leh a innghahna dâr kerkuak sawmhnih nê, bana puanzâr kaihna kawmte leh a zârngul silvar tlawn te pawh a awm bawh tûr a ni.

¹²“Khawthlang lam chu a dung tuanin tawng sawmngâa sei puan zâr tûr a ni a, ban sâwm leh a nghahchhan sâwm nê.

¹³Khawchhak lam hung zâwl vâng lam chu tawng sawmngâ a ni tûr a ni.

¹⁴A luhna kawngka lehlamah chuan tawng sâwm pangâa sei puan zâr tûr a ni a, ban pathum leh nghahchhan pathum a nei bawh tûr a ni.

¹⁵A lehlamah pawh puanzâr tawng sâwm pangâa sei, nghahchhan pathum nei ban pathum a awm bawh tûr a ni.

¹⁶“A hung chhûnga luhna kawngkapui tân puanzâr tawng sawmnhia sei, la zai sîn dumpâwl te, a sen duk te, la zai sen lâr tea tah, puantahtuin uluk taka a zeh mâwi a awm tûr a ni. Ban palî leh a nghahchhan palî a nei bawh tûr a ni.

¹⁷A hungna ban zawng zawng chu silvara zem chhuah vek tûr a ni a; puan bahna kawm pawh silvar bawh a ni ang a, a nghahchhan chu dâr a ni tûr a ni.

¹⁸A hung chhûng sei zawng chu tawng zâ ni sela, a vâng lam tawng sawmngâ ni sela, a sân lam tawng ngâ ni rawh se; a hungna chu puan zai sîn tah ni sela, a nghahchhan chu dâr a ni tûr a ni.

¹⁹Biakbûka bungbêl leh a sakna hmanrua zawng zawngte, a kilh behna zawng zawngte, a hungna pal khen nghehnate chu dâr vek a ni tûr a ni.

KHÂWNVÂR ENKAWL DÂN

²⁰“Khâwnvâra chhit ên reng atân olive hriak thlitfîm chu i hnêna rawn keng thîn turin Israel fate chu thû i pe tûr a ni.

²¹Inkhâwmna biakbûk chhûng, Thuthlunna pindan puanzâr hmâah chuan, Aarona leh a fate chuan LALPA hmâah tlai aţanga zîng thlengin an vil reng tûr a ni. Hei hi Israela thlah kal zêl tûrte tân dân nghet a ni kumkhua tawh ang.

BUNG 28

PUITHIAM THAWMHNÂW

¹“Tin, i unaupa Aarona leh a fapa te chu ka tâna puithiam rawngbâwl hnâ thawk tûrin Israel mite zînga ta serh hrang ang che. Aarona leh Aarona fapate chu Nadaba te, Abihua te, Eleazara leh Ithamara te an ni a.

²I unaupa Aarona tân kawr thianghlîm, a tihropuina tûr leh chei mâwina tûr siamsak ang che.

³Tichuan, mi themthiam, finna thlarauva ka tikhkha zawng zawngte chu hrilh la, Aarona thuamnâwte chu siamsak rawh se, ka tâna puithiam rawngbâwl hna thawk tûra serh hran tûr a ni si a.

⁴Hêngte hi an thawmhnaw siam tûrte chu a ni: âwmbel te, âwm cheina te, kawrfual te, kawr zeh tjal te, diar khim te leh kâwnghrên te a ni. I unaupa Aarona leh a fapate tân thawmhnaw thianghlîm an siamsak ang a, tichuan ka tân puithiam rawngbâwl hnâ an thawk thei ang.

PUITHIAM KAWR

⁵“Rangkachak te, la dumpâwl te, a senduk te leh senlâr te leh la zai sîn te la khâwm sela,

⁶tichuan puithiam kawr chu rangkachak te, la dumpâwl te, a senduk te leh senlâr te leh la zai sîn tein uluk takin kut themthiamten an siam tûr a ni.

⁷Kokîah dârbak lehlam lehlama kaiha, a tlâng lama thui zawm tûr a ni.

⁸Puithiam kawr âwmbel te, rangkachak te, la dumpâwl te, a senduk te, a senlâr te leh la zai sîn te chu inang tlâng uluk taka tah vek tûr a ni.

⁹Onuk lung pahnih i lâ ang a, chutah chuan Israela fapate hming i ker tûr a ni:

¹⁰lung pakhtah chuan paruk hming i tlar ang a, lung dangah pawh paruk dang hming i tlar leh ang a, an upat dân indawt zêla intlar tûr a ni.

¹¹Hming nemnâa thil an chuantîr ang hian, lung pahnihah te chuan thil ker thiamin Israela fapate hming chu a ker ang a. Chûng thil kerte chu rangkachakah phûm ang che.

¹²Chûng lung pahnihte chu Israela fapate hriatrengna lung atân puithiam kawr dârbakah i bel vê vê tûr a ni. Aarona pawhin a koki khinghnihah chûng hming hriatreng nân chuan LALPA hmâah a bât thîn tûr a ni.

¹³Rangkachak târna tûr i siam bawk tûr a ni a,

¹⁴rangkachak hlanga siam khaidiat i siam bawk ang a, a târna tûra siamah chuan i suih nghet tlat tûr a ni.

PUITHIAM ÂWMBEL

¹⁵“Rorêlna hman tûr âwmbel i siam tûr a ni. Puithiam kawr ang bawk khân uluk takin puantah thiam tahtîr la: rangkachak te, la dumpâwl te, a senduk te, lazai sen lâr te, la zaisîn te nên inchawih tâwk takin tahtîr ang che.

¹⁶Kil li neiin a invuak thuahin thlep la: a dung lam khâp khat, a vâng lam pawh khâp khat ni rawh se.

¹⁷Chutah chuan lunghlu phûmna tûr tlar lî siam ang che: Tlar khatnaah sardion, topaz leh emeral a awm ang a; chû chu tlar khatna tûr a ni;

¹⁸tlar hnihnaah tarki te, sapphir te, lunghlû te;

¹⁹tlar thumnaah jacin te, egat te leh amethu te;

²⁰tlar lînaah chuan berul te, onuk leh jasper te a awm tûr a ni. Rangkachak phêkah phûm tlar tiar tûr a ni.

²¹Chûng lungah te chuan Israela thlah hming sâwm leh pahnih a chuang theuh tûr a ni a, hming nemnaa nem kai ang hian hming put bîk an nei theuh ang a; hnam sâwm leh pahnihte ang zêlin a ni tûr a ni.

²²“Âwmbel khâi nân rangkachak hlangin khaidiat anga herh hrui i siam tûr a ni.

²³Âwmbela vuah tûr rangkachak khâng pahnih siam la, âwmbel hmâwr vê vêah vuah ang che.

²⁴Rangkachak khaidiat pahnihte chu âwmbel hmâwra khâng i vuah vê vêah chuan thlung ang che;

²⁵khaidiat pahnih hmâwr vê vê chu lunghlu rem tlêpah chuan chilh bet la, puithiam kawr dârbakah chuan thlun zawm ang che.

²⁶“Rangkachak khâng pahnih siam leh la, âwmbel hmâwr vê vê, puithiam kawr nêna indep chhûng lamah a awm tûr a ni.

²⁷Rangkachak khâng pahnih siam la, puithiam kawr dârbak vuahna zâwn hnuai deuh, puithiam kawr hrên behna tah mâwi tak chung hretah vuah ang che.

²⁸Âwmbel chu puithiam kawra khâng invuahah te chuan hruihrual dumpâwlin suih ngheh tûr a ni a, tichuan, âwmbel chu puithiam kawr chei mâwi chung a bei ngheh a, puithiam kawr aţanga a tawl sawn loh nân.

²⁹Tichuan, Aarona chu hmun thianghlîma a kal apianga LALPA a hriatreng nân, a thinlung zâwn taka rorêlna âwmbel bel chungin Israelho hnam hming chu a pu zêl tûr a ni.

³⁰Rorêlna âwmbelah Urim leh Thummim i dah tûr a ni a, chûng chu LALPA hmâa a va luh hunah Aarona thinlung zâwnah a awm tûr a ni. Aarona chuan a thinlung zâwnah Israel fate chung a rorêlna chu LALPA hmâah a pu reng tûr a ni.

PUITHIAM THAWMHNAW DANGTE

- ³¹“A dumpâwl hlangin puithiam kawrfual i siam tûr a ni.
- ³²A lai takah a lu rawlhna tûr rek kua la; a reh kuakna tlâng chu a thlêr loh nân, kawr nghâwng angin thleh kual vek tûr a ni.
- ³³“A kawrfual tlâng chu theibuhfai lem, a dumpâwl te, a senduk te leh a sen lâr tea chei kual chhuah vek ni sela, a inkârthlâkin rangkachak tengeng vuah chhuah vek tûr a ni:
- ³⁴kawrfual fêmah chuan rangkachak tengeng leh theibuhfai chu, rangkachak tengeng leh theibuhfai lemin a kual chhuah vek bawk tûr a ni.
- ³⁵Tichuan, hmun thianghlîma rawngbâwl tûra LALPA hmâa Aaron a va luh leh a lo chhuah leh laiin, a tengeng rî aţangin a la thi lo tih a hriat theih dâwn a ni.
- ³⁶“Rangkachak hlang hlaka siam thil phêk siam la, tah chuan hming nemnaa nem kai angin: LALPA HNENAH THIANGHLIMNA tih thû i ker tûr a ni.
- ³⁷Chû chu hrui dumpâwlin puithiam diar khimah chilh beh tûr a ni a; puithiam diarkhim hma lamah a awm tûr a ni.
- ³⁸Chû chu Aaron a chalah a awm ang a, Israel faten thilpêk thianghlîm an hlan rêng rêngah, thil thianghlîma sualna awm apiang chu Aaron a phurh zêl theih nân leh LALPA hmâah pawm tlâk a nih theih nân, a chalah a awm reng tûr a ni.
- ³⁹“Kawrfual chu puan zaisîn zeh mâwi takin i tah tûr a ni, diar khim tûr pawh puan zaisîna tah tûr a ni a, a hrên tûr pawh mâwi taka tah tûr a ni.
- ⁴⁰“Aaron a fate tân kawrfual i siamsak tûr a ni a, kâwng hrên pawh i siamsak bawk tûr a ni. A tiropuitu leh chei mâwitu atân lukhum i siamsak bawk tûr a ni.
- ⁴¹Chûngte chuan i unaupa Aaron a leh a fapate i thuan tûr a ni. Anni chu puithiam anga ka rawng an bawl theih nân hriak thih la, serh hrang bawk la, tithianghlîm ang che.
- ⁴²An saruakna khuh tûrin puan zaisîna siam kekawr siamsak la; chû chu an kâwng aţanga an mal thlenga fual ni rawh se.
- ⁴³Aaron a leh a fapate chuan thil sual an tiha an thih loh nân Biakbûkah emaw, hmun thianghlîma maichâm bulah emaw rawngbâwl tûra an lo kalin, hêng hi an inbel zêl tûr a ni. Amah leh a thlah kal zêl tûrte tân kumkhaw dân nghet a ni tawh ang.

BUNG 29

AARONA LEH A FATE HLAN THIANGHLIMNA

- ¹“Puithiam anga ka rawngbâwltu tûrte i hlan thianghlîm dân tûr chu hetiang hi a ni: Bâwngpa pakhat leh berâmpa pahnih hmêlhemna nei lo kai la,
- ²dâwidim telh loh chhang te, dâwidim telh loh hriaka hmeh chhang te, hriaka chulh dâwidim telh loh chhangpêr te chu wheat chhangphut dipin siam ang che.
- ³Bâwm khatah i khung khâwm ang a, a bâwm chawpin, bâwngpa leh berâm pa pahnihte nê i rawn kai tûr a ni.
- ⁴Aaron a leh a fapate chu Biakbûk kawngkâah i rawn hrui ang a, tuiin i bual fai tûr a ni.

⁵Chumi zawhah an thuanhnâwte i lâ ang a, Aaron a i hâktîr ang a, puithiam kawrfual te, puithiam kawr te, âwmbel te nê; tichuan puithiam kawr hrênna mâwi tak chu i hrêntîr bawk tûr a ni.

⁶A lû-ah diar i khimtîr ang a, a diar khim chungah lukhum thianghlîm i khumtîr bawk tûr a ni.

⁷Hriak thih chî lâ la, a lu chungah leih la, hriak chu thih ang che.

⁸Chumi zawhah a fapate chu hrui la, kawrfual haktîr ang che.

⁹Aaron a fapate chu puithiam kawr hrênna hrêng la, lukhum khumtîr ang che. Tichuan, puithiam nihna chu kumkhuaan an tân tihngheh a ni tawh ang. Aaron a leh a fapate chu i tithianghlîm tûr a ni.

¹⁰“Bâwngpa pawh chu Biakbûk hmâah i rawn kai ang a, Aaron a leh a fapaten bâwngpa lu chungah chuan an kut an nghat tûr a ni.

¹¹Chumi zawhah chuan LALPA hmâah, Biakbûk kawngka bulah bâwngpa chu i talh tûr a ni.

¹²Bâwngpa thisen chu keng la, chu chuan maichâm kî-te chu i kutzunchalin tât la, maichâm sîr vêlah chuan thisen chu i leih baw vek tûr a ni.

¹³A kawchhûng tuamtu thau zawng zawng, a thin tuamtu râng te, a kal pahnih leh a tuamtu thau te nê lâ la, maichâm chuan hâl vek ang che.

¹⁴Bâwngpa sa te, a vun te leh a kawchhûng te erawh chu daipâwnah hâl tûr a ni. Sual tâna thilhlân a ni si a.

¹⁵“Berâmpa pakhat chu kai la, Aaron a leh a fapaten chû berâmpa lu chungah chuan an kutte nghat rawh se;

¹⁶berâmpa chu i talh ang a, a thisen chu lâin maichâm chungah a vêlin i theh tûr a ni.

¹⁷Berâmpa chu chan sawm vek la, a kawchhûngte leh a kête chu sil la, a sa chan sâ leh a lu nê i dah khâwm tûr a ni.

¹⁸Berâmpa chu a pumin maichâm chuan i hâl tûr a ni. LALPA hnêna hâlral thilhlân a ni a; LALPA tân meia thilhlân, rimtui a ni.

¹⁹“Berâmpa pakhat zâwk pawh chu kai la, Aaron a leh a fapaten berâmpa lu chungah an kut an lo nghat tûr a ni.

²⁰Berâmpa chu talh la, a thisen chu lâin, Aaron a beng dîng lam tlângah te, a fapate beng dîng lam tlângah te, an kut dîng lam zungpuiah te, an ke dîng lam zungpuiah te i tât theuh tûr a ni a, maichâm vêlin thisen chu i theh bawk tûr a ni.

²¹Maichâm chunga thisen leh hriak thih chî chu lâ la, Aaron a leh a silhfênah te, a fapate leh an silhfênah te chuan theh ang che; tichuan, ama silhfên leh a fapate silhfên chu tithianghlîm a lo ni tawh ang.

²²Berâmpa thau pawh i la bawk tûr a ni a, a ngûm thau te, a rilbawh thau te, a thin tuamtu râng te, a kal pahnih leh a tuamtu thau te, a bawp dîng lam nê (serh hran tawh berâmpa a ni si a),

²³chhang tlang khat nê, chhangpêr hriak hnawih nê, dâwidim telh loh chhang pan chî, LALPA hnêna hlan tawh chhang bâwma mi nê lâ la;

²⁴chûng zawng zawng chu Aaron a leh a fapate kutah hlân rawh, thên thilhlân atân LALPA hmâah thên ang che.

²⁵An kut aṭangin la kîr leh la, LALPA hmâa rimtui ni tûrin maichâmah hâlral thilhlân angin i hâl tûr a ni. LALPA tâna meia thilhlân a ni si a.

²⁶Chumi zawhah Aarona serh hranna berâmpa irno chu lâ la, LALPA hmâa thên thilhlânah thên rawh; chû chu i chanpual tûr a ni.

²⁷Serh hranna berâmpa aṭangin thên thilhlân anga i thên tawh a irno leh a bawp chu, i serh hrang ang a, Aarona leh a fapate chanpual a ni ang.

²⁸Chû chu Israel fate laka Aarona leh a fapate chanpual atâna kumkhuaa ruat ngheh a ni. Thên thilhlân a ni si a; chûvângin, Israel faten inrem nâna thil an hlanin, an thên ṭhîn tûr a ni, LALPA hmâah châwi kâna thên tûr tihna a ni.

²⁹“Aarona silhfên thianghlimte chu a hnûah a fapaten an rochung zêl tûr a ni a, chûngte hmang chuan hriak thiha serh thianghlim an ni ang.

³⁰Fapa, amah aiawha puithiama lo ṭang tûr chuan, hmun thianghlima rawng bâwl tûra Biakbûka a luhin ni sarih chhûng a ha tûr a ni.

³¹“Serh hranna berâmpa sâ chu lâ la, hmun thianghlimah chhûm ang che.

³²Aarona leh a fapate chuan berâmpa sâ chu, bâwm chhûnga chhang dah te nên Biakbûk kawngka bulah an ei tûr a ni.

³³Anmahni serh hran leh tithianghlim nâna sual thâwina sâ chu an ei tûr a ni; thil thianghlim a nih avângin, pâwn lam mite chuan an ei ve tûr a ni lo.

³⁴Thil hlanna sâ emaw, chhang emaw chu a tûk thlenga bâng a la awm chuan, a bâng zawng chu meîn i hâl vek tûr a ni. Ei tûr a ni lo, thil serh a ni si a.

³⁵“Thû ka pêk zawng zawng che ang hian Aarona leh a fapate hnênah i ti tûr a ni. Anni chu ni sarih chhûng i serh hrang tûr a ni.

³⁶Sual thâwia tlanna atân ni tin bâwngpa i hlân tûr a ni. Tlanna thil i hlan dâwnin maichâm chu i tîfai ziah tûr a ni a, hriak hnawihin i tithianghlim bawk tûr a ni.

³⁷Ni sarih chhûng maichâm tân inremna siamin i tithianghlim tûr a ni. Maichâm chu serh ṭat tûr a ni a. Eng thil pawh maichâm tawktu apiang chu thil serhah an chang zêl ang.

NI TIN THIL HLAN

³⁸“Hei hi maichâm chung a i hlan tûr chu a ni: berâm no pahnih kum khat mi, ni tinin.

³⁹Zîng lamah berâm no pakhat i hlân ang a, tlai lamah berâm no pakhat dang i hlân leh tûr a ni.

⁴⁰Berâm no pakhat hlan rualin chhangphut dip ephah hmun sâwma ṭhena hmun khat, hriak sâwr hin* khat hmun lîa ṭhena hmun khat nêna pawlh, in tûr thilhlân atân uain hin khat hmun lîa ṭhena hmun khat nên hlan tûr a ni.

⁴¹Tlai lamah berâm no pakhat dang i hlân tûr a ni; chumi rual chuan zîng lama ei tûr leh in tûr i hlan dân ang bawkin hlân ang che, chû chu LALPA hnêna meia thilhlân, thil rimtui a ni si a.

⁴²Hei hi in thlah kal zêlten biakbûk kawngkâah LALPA hmâa hâlral thilhlân an hlan dân tûr chu a ni, chutah chuan in hnêna

thû sawi tûrin ka rawn kan ṭhîn ang che u.

⁴³Chumi hmunah chuan Israel fate ka rawn kan ang a, biakbûk chu ka ropuinain tithianghlim a ni ang.

⁴⁴Chutiang chuan biakbûk leh maichâm chu ka tithianghlim dâwn a ni. Aarona leh a fapate pawh puithiam nihnaa ka rawngbâwl tûrin ka tithianghlim bawk ang.

⁴⁵Israel fate zîngah ka chêng ang a, an Pathian ka ni bawk ang.

⁴⁶Kei hi LALPA an Pathian, an zînga ka chên theih nâna Aigupta ram aṭanga hrui chhuaktu ka ni tih an hria ang. LALPA an Pathian chu ka ni si a.

BUNG 30

MAICHÂM RIMTUI

¹“Rimtui hâlna tûr maichâm i siam tûr a ni; acacia thingin i siam tûr a ni.

²A dung lam tawng khat, a vâng lam pawh tawng khat ni se–kil li nei a ni ang a, a sân lam tawng hnih a ni tûr a ni. A kî-te chu a tak nên a inzawm vek tûr a ni.

³A chung lam zawng chu, a sîr hual vêlin a kîte nên rangkachak hlangin i tuam vek tûr a ni a; a vêlin rangkachaka chhûn ni rawh se.

⁴Rangkachak khâng pahnih siam la, a tlâng hnui lam sîr tawn tawnah chuan vuah ang che. A sir tawn tawnah i vuah ang a, chûng chu a zâwnngul rawlhna tûr a ni.

⁵Acacia thingin zâwnngul siam la, rangkachakin luan ang che.

⁶Thuthlung Bâwm awmna pindan puanzâr pâwn lamah i hûng tûr a ni, Thuthlung Bâwm chung a zahngaihna ṭhutthleng aṭangin ka rawn be ṭhîn ang che.

⁷Aaronan tûk tin thil rimtui a hâl ṭhîn tûr a ni; khâwnvâr a chhit apiangin, rimtui pawh a hâl bawk tûr a ni.

⁸Tlai lamah Aaronan khâwnvâr a chhit dâwnin, a chung a rimtui pawh a hâl ziah tûr a ni; LALPA hmaa rimtui hi chhuan zawng zawng thlenga hâl reng tûr a ni.

⁹Chutah chuan rimtui danglam chí te, hâlral thilhlân te, chhang te i hlân tûr a ni lo va; in tûr thilhlân pawh i leih tûr a ni hek lo.

¹⁰Aaronan kum tin wavi khat a ki chungah te chuan inremna siamin, sual tlanna tûr thisen a hlan ṭhîn tûr a ni; tlanna thilhlân hi kumkhua atân kum tin wavi khat zêl a siam ziah tûr a ni. LALPA tâna thil thianghlim ber a ni si a,” a ti a.

TLANNA SUM

¹¹LALPAN Mosia chu heti hian a hrilh a:

¹²“Israel fate zât i chhiar hunin, mi tinin LALPA hnênah mahni intlanna sum an pe ṭheuh tûr a ni, an tam lam i chhiarin, an zîngah chhiarpui laia hrîa ṭhî an awm dâwn lo nia.

¹³Chhiarpuia tel apiangte pêk tûr chu sekel chanvê a ni, chû chu hmun thianghlima sekel bûkna anga tehin a ni a (sekel khat hi gera 20 a ni). Chû sekel chanvê chu LALPA tâna thilhlân a ni ang.

¹⁴Kum sawmhnih chin leh a chung lam, chhiarpuia tel apiangte chuan LALPA hnênah thil an hlân vek tûr a ni.

¹⁵Mi hausate pawhin an pe tam tûr a ni chuang lo va, mi retheite pawhin sekel chanvê aia tlêm an pe tûr a ni hek lo, LALPA hnêna thil in hlan hi nangmahni intlanna tûr a ni.

¹⁶Israel fate tlanna sum chu i la khâwm tûr a ni a, Biakbûka rawngbâwl nâna hman atân i ruat tûr a ni, hetiang nangmahni in intlanna hi LALPA hmâa Israelten an hriat reng theihna tûr a ni,” a ti a.

DÂR CHAWHTAWLH

¹⁷LALPAN Mosia chu thû a hrilh a:

¹⁸“Insil nân dârin bêldar i siam bawk tûr a ni, a hûn chhan pawh dâr ni sela. Biakbûk leh maichâm inkârah i hûng tûr a ni. A chhûngah chuan tui i dah ang a,

¹⁹chû tui chu Aarona leh a fapaten an kut leh ke sil nân an hmang tûr a ni.

²⁰Biakbûk chhûnga an luhin emaw, rawngbâwl tûra maichâm bula an lo kala, LALPA hnêna meia hâlrâl thil an hlanin emaw, tui chuan an insil fai thîn tûr a ni a, chutia an tih loh chuan an thi mai ang.

²¹Chuvângin, an kut leh kête an sil tûr a ni, chuti lo chu an thi mai ang. An tân kumkhaw dân nghet a ni ang a— amah leh a thlah zawng zawngte tân pawh a ni ang,” a ti a.

HRIAK THIANGHLIM

²²LALPAN Mosia chu a bia a:

²³“Thil rimtui tak tak—murra tui sekel zangâ, chumi zâtê thakthing rimtui (sekel zahnih sawmngâ), fu rimtui chi sekel zahnih sawmngâ,

²⁴hmun thianghlina sekel bûkna angin, kasia sekel zangâ leh olive hriak hin khat nêr rawn keng la.

²⁵Hêng aţang hian rimtui siamtuten an chawhpawlh angin, a thiha thih chi hriak thianghlim i buatsaih tûr a ni. Chutiang chu hriak thianghlim a ni ang.

²⁶Chû chuan biakbûk leh Thuthlung Bâwm chu i thih tûr a ni;

²⁷dawhkân leh bungbêl zawng zawng te, khâwnvâr dahna leh a hmanrua te leh rimtui hâlra maichâm te;

²⁸hâlrâl thil hlanna maichâm leh a bungrua te, bêl leh a hûn chhante nêr.

²⁹Thil thianghlim ber ni tûrin i tithianghlim vek ang a; a khawihthu apiang serh hran an ni zêl ang.

³⁰Aarona leh a fapaten puithiam anga ka rawng an bawl theih nân, serh hrang baw k ang che.

³¹Israel fate chu hrilh la: “Hei hi in thlah zawng zawngte thleng pawhin ka tân hriak thih tûra serh hran chu a ni.

³²Mihring taksâa leih chi a ni lo va; hetiang siam dân hian a anpui dang in siam tûr a ni hek lo. Thil serh a ni a, in tâna serh hran a ni ang.

³³Mi tûpawhin a anpui a lo siam ve emaw, pân lam mi tân a lo hmang emaw a nih chuan, chû mi chu ama mite lak ata tuithlâr daih tûr a ni,” a ti a.

RIMTUI

³⁴LALPAN Mosia hnênah: “Thil rimtui tak tak, stakte te, onuka leh galbanam te, beraw fim tak te nêr a inzât zêlin la khâwm ang che.

³⁵Chûngte chu a siam thiamin an chawhpawlh angin, chi alin thlîfim la, thil rimtui leh serh hran siam ang che.

³⁶A thên chu râwt dîp vek la, nangmah ka rawn biak thînna tûr che Biakbûk chhûnga Thuthlung Bâwm hmâah i dah tûr a ni. Chû chu in tân thil serh ber a ni ang.

³⁷Chutiang rimtui i siam tûr chu a chawhpawlh dân a inan baw k chuan, nangmahni tân i siam vê hauh tûr a ni lo. In tân LALPA lama serh a ni ang.

³⁸Mi tûpawhin a anpui a siama a hnim chuan, ama mite lak ata tuithlâr tûr a ni.

BUNG 31

BIAKBÛK SA TÛR MI THEMTHIAMTE

¹LALPA chuan Mosia hnênah:

²“Hei le, Juda hnama mi Hura fapa, Uria fapa Bezalela chu ka thlang chhuak ta a.

³Amah chu Pathian Thlarauvin finna te, hriat thiamna te, hmangchâng hriatna te leh themthiamna tinreng nêr,

⁴rangkachak te, silvar te, dâr te hmanga thil siam thiam leh mâwi taka rem thiam te,

⁵lunglu phûm tûr zai thiamna te, thing kermâwi thiamna te, kawng tinrênga mi themthiam ni tûrin ka tikhat tawh e.

⁶Amah pui tûrin Dan hnama mi Ahisamaka fapa Aholiaba chu keima’n ka ruat tawh a; thû ka pêk che ang taka an siam chhuah theih nân kut themthiam rualho thinslungah pawh finna ka pe tawh e:

⁷chûngte chu biakbûk te, Thuthlung Bâwm te leh chumi chungah zahngaihna thutthlêng te, Biakbûk chhûnga bungrua zawng zawngte—

⁸dawhkân leh a hmanruate, rangkachak hlanga siam khâwnvâr dahna leh a hmanrua zawng zawng te, rimtui hâlra maichâm te,

⁹hâlrâl thil hlanna maichâm leh a bungrua zawng zawng, tuichhûn bêl leh a hûn chhan te—

¹⁰rawngbâwlina silhfên te, Aarona leh a fapaten puithiam anga rawng an bâwlina kawr thianghlim te,

¹¹hriak thih chi leh hmun thianghlim atâna rimtui hâlra te a ni. Thu ka pêk che ang takin an ti vek tûr a ni.

SABBATH DÂN

¹²LALPA chuan Mosia hnênah:

¹³“Israel fate chu hrilh rawh: ‘Ka Sabbathte hi in serh tûr a ni, kei hi nangmahni tithianghlimtu LALPA ka ni tih in hriat nân, in thlah kal zêlte thlenga kei leh nangni inkâra chhinchhiahna a ni si a.

¹⁴Chuvângin, Sabbath chu in serh tûr a ni, in tân thil serh a ni si a. Mi tûpawh a bawhchhetu chu tihlum ngei ngei tûr a ni; tûpawhin chumi nîa hna a thawh chuan, chû mi chu ama mite

laka ta tuithlâr tûr a ni.

¹⁵Ni ruk chhûngin hna thawh tûr a ni a, ni sarih ni erawh chu Sabbath chawlhni, LALPA tâna serh thianghlim a ni. Sabbath nîa tûpawhin hnâ a thawh chuan tihhlum ngei ngei tûr a ni.

¹⁶Chuvângin, Israel faten Sabbath an serh tûr a ni a, kumkhaw thuthlung angin an thlah zawnz zawnz Sabbath an serh tûr a ni.

¹⁷Keimah leh Israel fate tân kumkhuaa thuthlung chhinchhiahna a ni ang; ni ruk chhûngin LALPA lei leh vân a siam a, a ni sarih nîn a châwl a, a intiharh si a, a ti e,” a ti a.

¹⁸Sinai Tlâng chung Mosia hnêna thû a sawi zawhin, Pathian kutzungtanga ziaik Thuthlung, lung phêka ziah phêk hnih chu Mosia a pe ta a.

BUNG 32

RANGKACHAK BAWNGNO

¹Mipuiten Mosia chu tlâng ațanga lo chhuk thla har an tih tâk êm avângin, Aarona hnênah chuan mipui an rawn pung khâwm a, a hnênah, “Ti teh khai, kan hmaa kal tûr pathian min siamsak mai rawh; hê Mosia lah hi, Aigupta ram ațangin min hruai chhuak zeta, a chungah eng thil nge lo thleng ta tih pawh kan hre si lo va,” an ti a.

²Aarona chuan an hnênah, “In nupuite, in fapate leh in fanuten an benga rangkachak bengbeh an beh te chu rawn thlawnsak ula, ka hnênah rawn la khâwm ta che u,” a ti a.

³Tichuan, mi zawnz zawnz chuan an benga rangkachak bengbeh an behte chu la thlân Aarona hnênah chuan an rawn la khâwm a.

⁴Ani chuan an hnên ațangin rangkachakte chu a lo dawng a; tichuan bâwngno lemah a chhûng a, a kerna hmanruain a lim a din ta a. Anni chuan, “Aw Israelte u, hei hi in pathian, Aigupta ram ațanga hruai chhuaktu che u chu a nih hi!” an ti a.

⁵Aaronan chu chu a lo hmuhin a hmâah chuan maichâm a siam a. “Naktûk hi LALPA chawimâwina ruai thehna ni a ni e,” tiin a tlângautîr a.

⁶A tûkah chuan hmâ takah an tho va, hâlral thilhan te hlânin inremna thil an rawn hlân a; mipuite chu eia in tûrin an thû a, infiam tûrin an tho leh a.

⁷LALPA chuan Mosia hnênah, “Chhuk thla tawh rawh le! Aigupta ram ațanga i hruai chhuah i mite khu an intikhawlo zo ta.

⁸An kawng zawh tûra thû ka pêk an pên bosan ranzia khu. Bâwngno lim an din a, chû chu biain a hnênah an inthâwi a, ‘Aw Israel, hei hi i pathian, Aigupta ram ațanga hruai chhuaktu che a nih hi,’ an ti zu nia!” a ti a.

⁹LALPA chuan Mosia hnênah, “Hêng miteho hi ka thlîr reng a, an va luhlul tak êm!

¹⁰Lo ngâwi tak rawh khai, ka thinurna hi anmahni chungah ling sela, ka zuk nuai chimit lâw lâw teh ang. Nangmah ațang hian hnam ropui ka siam mai zâwk ang e,” a ti a.

¹¹Mosia chuan LALPA a Pathian hnênah: “LALPA, engtizia nge thiltihtheihna ropui leh kut chak taka Aigupta ram ațanga i hruai

chhuah i mite chungah chuti taka i thinur a sosân tâk mai le?

¹²Eng aiah nge Aigupta miten, ‘Anmahni sawisak hrepa, tlâng rama tihhlum mai atân leh, lei chung ata tihboral vek atân lek a lo hruai chhuak a nih hi,’ an la rawn tih ang le? I thinurna nasa tak lakah inbengdai la, i mite tihchhiat i tum hi sût leh hrâm teh.

¹³I chhiahhlawh Abrahamate, Isaakate, Israela te hnênah, ‘In chithlah chu vâna arsi ang maia tamin ka tipung ang; hê ram ka sawi tâk zawnz zawnz hi in thlahte hnênah ka pê ang a, tichuan, kumkhuaan an nei hlen tawh ang,’ tia mahni leh mahni inchhâla i tiam kha hre reng ang che,” a ti a.

¹⁴Tichuan, LALPA chu ama mite tihnat a tumna lakah chuan a inbengdai leh ta a.

¹⁵Mosia chu Thuthlung ziahna lung phêk pahni a kuta kengin tlâng ațang chuan a chhuk ta a. Lung phêkte chu a lehlam lehlama inziak a ni a; phêk lehlamah ziah a ni a, a lehlam phêkah pawh ziah a ni baw k a.

¹⁶Lung phêkte chu Pathian kutchhuak a ni a, lung phêka thu ker pawh Pathian ker baw k a ni a.

¹⁷Josuan mipui âu thâwm ri dur dur a han hriat chuan, Mosia hnênah, “Riahmun lamah indo âu thâwm a awm tlat mai,” a ti a.

¹⁸Ani erawh chuan: “Ni suh e, hnehna âu thâwm a ni lo, Tlâwmte ăp thâwm pawh a ni hek lo, Zai thâwm rî a ni ka hriat ni,” a ti a.

¹⁹Tichuan, riahmun kiang an va thlen vêleh bâwngno lim leh mipui lâw lai chu a zu hmu ta a. Mosia thinur chu a ling phut a, lung phêk a ken chu a paih thui a, tlâng bulthutah chuan a vawm keh ta a.

²⁰Bâwngno lim an lo siam chu a la lawk a, meiah a rawh a, a chhu dip vek a; tuih a phul a, Israel fate chu a intîr ta hlawn a.

²¹Mosia chuan Aarona hnênah, “Hêng mite hian i chungah engti teh fakauvin nge an tiha, anmahni chungah hetiang sualna nasa i thlentîr tâk mai le?” a ti a.

²²Aarona chuan, “Ka lalpa thinurna chu ling lo hrâm teh se. Hêng mite hi sual lam âwn tlat mi an ni tih i hria alâwm.

²³Kan hmahruaitu tûr pathiante min siamsak rawh; hê Mosia, Aigupta ram ațanga min hruai chhuaktu lah hi, engtin nge a awm tâk tih pawh kan hriat loh hi,’ an rawn ti si a.

²⁴An hnênah, “Tûpawh rangkachak nei chuan rawn la rawh se,’ ka ti a. Min rawn pe khâwm a, meiah ka lo paih lût a, hê bâwngno hi a lo chhuak ta mai a ni,” a ti a.

²⁵Mosian mipuite chu duh duha tâl vêl mai mai an ni tih a han hmû a (Aarona chuan an hmêlmâte hmuhsit tlâk lekin a lo tâltîr mai mai si a),

²⁶Mosia chu riahmun luhna kawngkâah chuan a ding a, “Tûpawh LALPA lama ăang apiang ka hnênah lo kal rawh u,” a ti a. Leviah fapate zawnz zawnz chu a hnênah chuan an kal khâwm a.

²⁷An hnênah, “LALPA Israelte Pathian chuan heti hian a ti: ‘Mipa tawh phawt chuan a khandaiah pâi sela, riahmun chhûngah hian kawngka ațanga kawngka lehlam thlengin lût vek sela, mi tinin a unaupa pawh, a thian pawh, a thenawmte pawh that zêl rawh se,’ a ti e,” a ti a.

²⁸Tichuan, Levia fapate chuan Mosia thû ang tak chuan an ti ta a. Chumi ni chuan mipui zînga mipa sângthum vêl lai an thi a.

²⁹Mosia chuan, “Vawiinah LALPA tân in serh hrang rawh u, mi tinin mahni fapa te, mahni unaute ngei an do tâk avângin vawiinah hian malsâwmnain a vûr thei dawn che u nia,” a ti a.

³⁰A tûkah chuan Mosian mipuite hnênah, “Sual rapthlâk tak in lo ti ta si a. Chuvângin LALPA hnênah ka han kal chho leh ang a; in sual thâwina ka han hlan theih tâk hlauhvin,” a ti a ni.

³¹Tichuan Mosia chu LALPA hnênah a kîr leh a, “E khai, hêng mite hian sual râpthlâk tak an lo ti a, rangkachak pathian an lo insiam ta hial mai!

³²Chutichung pawhin, an sual hi ngaidam rawh aw—chuti a nih loh chuan, i lehkhâbûa i lo ziah tawh aţang khân mi thâi bo mai tûrin ka ngên a che,” a ti a.

³³LALPA chuan Mosia hnênah, “Ka chungah thil sual ti apiang, ka lehkhâbu aţangin ka thai bo vang.

³⁴Chuvângin kal la, ka hrilh tawh che lamah chuan mipuite chu hruai rawh. Ngai teh, ka Vântirhkhovin i hmâ a hruai zêl dawn alâwm. Hrem tûra ka lo kal hunah erawh chuan, an sualna chiah zêl chu ka rawn hremna tûr a ni,” a ti a.

³⁵Tichuan, LALPA chuan Aarona siam bâwng no chungah an thiltih avângin mipuite chungah hrî a lêngtîr ta a.

BUNG 33

SINAI CHHUAHSAN TÛRA THUPÊK

¹LALPA chuan Mosia hnênah, Kal chhuak tawh rawh u, nang leh Aigupta ram aţanga i mi hruai chhuahteho nêh hian, Abrahama te, Isaaka te leh Jakoba te hnêna, ‘In thlahte hnênah ka pê ang,’ tia chhechhama ka lo tiam tawh lam chu pan chho rawh u.

²In hmâah ka Vântirhkhoh ka tîr ang a, Kanaan mite, Amor mite, Hit mite, Periz mite, Hiv mite leh Jebus mite chu keima’n ka hnawt chhuak ang.

³Khawizû leh hnutetua luang ramah chuan kal chho rawh u; kei erawh chu in zîngah ka chho vê lo vang, chuti lo zawng, mi luhlul tak in ni si a, kawng lakah hian ka tiboral hlauh dah ang che u,” a ti a.

⁴Chû thu lâwmawm lo tak mipuiten an lo hriat chuan an ngui rawih mai a, tûmah inchei duh pawh an awm ta lo va.

⁵LALPA chuan Mosia hnênah, “Israel fate chu hrilh rawh, ‘Mi luhlul tak in nih hi. In zîngah ka lo kal ang a, mitkhap kâr lovah ka tichimit vek mai tur che u asin. Chuvângin, nangmahni chungah tih dân tûr ka hriat theih nân in incheinate chu hlip vek rawh u,’” tiin a lo hrilh tawh si a.

⁶Chuvângin a ni Israel faten Horeb Tlângah an incheinate an hlih thlâk ni.

MOSIA LEH PATHIAN AN INTÂWK

⁷Mosia chuan a puan in chu a lâ a, riahhmun dai pâwnah, riahbûk aţanga hla takah chuan a kaih a, a hmingah biakbûk a vuah a. Tichuan mi tûpawhin LALPA a zawn duh chuan, riahhmun dai pâwna biakbûk panin an kal chhuak thîn.

⁸Biakbûk pana Mosia a kal chhuah dawn rêng rêngin mi zawng zawng an lo ding thup a, anmahni puan in kawngkâah chuan an lo ding theuh va, biakbûka a luh thlengin Mosia chu an lo thlîr zui thîn.

⁹Biakbûka Mosia a luh chuan chhûm ding chu a lo chhuk thlâ a, biakbûk kawngkâah chuan a rawn ding a, LALPA chuan Mosia chu a rawn be thîn a ni.

¹⁰Mi zawng zawng chuan biakbûk kawngkâa chhûm ding chu an hmu vek a, an lo ding chhuak vek a, mi tinin anmahni puan in aţangin chibai an lo bûk vê thîn.

¹¹Thian dôn an inbia ang mai hian LALPA chuan Mosia chu hmai chhanah a be thîn a ni. Chumi hnûah riahhmun lamah a lo kîr leh thîn a. A chhiahhlawh Josua, Nuna fapa, tlangvâl erawh chuan biakbûk chu a chhuahsan ve lo.

PATHIANIN AWMPUI A TIAM

¹²Mosia chuan LALPA hnênah, “Ngai teh, ‘Hêng mite hi hruai chho rawh,’ tiin min hrilh a. Nimahsela, ka hnênah tu nge i rawn tîrh ve dawn tih min la hrilh si lo. Mahse nang chuan, ‘I hming chenin ka hre chiang che a, ka duhsak zâwng tak i ni,’ tih min hrilh a nih kha.

¹³Tûnah hian ka ngên a che, i duhsak zâwng ka nih tak zet chuan, nangmah ka hriat chian chea, i duhsak zâwnga ka awm zêl theih nân, i kawng chu min kawhhmuh ang che. Hê hnam hi i miteah min chhiar bawh ang che,” a ti a.

¹⁴Ani chuan, “In hnênah ka awm zêl ang a, chawlh hahdamna ka pê ang che u,” a ti a.

¹⁵Ani chuan a hnênah, “Kan hnêna i awm ve reng dawn loh chuan, hê hmun ata hi min hruai chho lul suh ang che.

¹⁶Kan hnênah i awm zêl a nih chauh loh chuan kei leh i mite hi i duhsak zâwng kan ni tih engtin nge kan hriat theih ang? Chû ngei chu a ni, kei leh i mite hi lei chung zawng zawnga mi dangte laka min thliar hrangtu tûr a ni si a,” a ti a.

¹⁷Tichuan, LALPAN Mosia hnênah, “I sawi ang tak chuan ka ti ang e; ka mi duhsak zâwng tak i ni a, i hming pawh ka hria e,” a ti a.

¹⁸Ani chuan, “Khawngaih takin i ropuina mi hmuhtîr ta che,” a ti a.

¹⁹Ani chuan, “Aw le, ka thatna zawng zawng i hmâah ka rawn lantîr ang a, i hnênah LALPA hming chu ka puang ang e. Ka khawngaih tûra chu ka khawngaih ang a, zah ka ngaihna tûra hnênah chuan zah ka ngai ang.”

²⁰“Ka hmêl erawh chu i hmu thei lo vang; kei mi hmûa dam khawchhuak tûmah an awm dawn si lo va,” a ti a.

²¹LALPA chuan, “Hei hi ka awmna chu a ni a, nang chu khâ lungpui chungah khân lo ding la.

²²Ka ropuinain a rawn kal pelh lai chein lungpui keh kârah ka dah ang chea, ka kal pelh chhûng chein ka kutphahin ka hlih dawn che nia.

²³Ka kut chu ka la kiang ang a, ka hnung lam i hmu dawn nia; ka hmêl erawh chu hmuh chî a ni lo ve,” a ti a.

BUNG 34

MOSIAN LUNG PHÊK THAR A SIAM

¹LALPA chuan Mosia hnênah, “Lung phêk hmasa ang lung phêk pahnih chher la, lung phêk hmasa i tihkeh tâka thuziak ang kha ka ziaak leh ang e.

²Naktûk zîngah rawn peih vek la, zîngah chuan Sinai Tlângah lo chho la, tlâng chhîpah ka hnênah rawn inlan ang che.

³I rualin tûmah an rawn kal ve tûr a ni lo va, tlâng pang zawng zawngah tûmah hmuh tûrin awm suh se; rante leh a ruala tla chi rêng rêng pawh tlângah chuan tla suh se,” a ti a.

⁴Tichuan, lung phêk chu a hmaa mi angin phêk hnih a chher a. A tûkah chuan Mosia chu hmâ takah a tho va, LALPAN thù a pêk ang chuan Sinai Tlângah chuan a lâwn chho ta a; lung phêk pahnih chu a keng bawk a.

⁵LALPA chu chhûmah chuan a lo chhuk a, a bulah chuan a rawn dîng a, LALPA hming chu a rawn puang a.

⁶A hmâah chuan LALPA chu rawn inlanin, “LALPA chu, LALPA Pathian chu, zahngai thei, khawngaihna ngah, dawhthei, thâtna leh thutaka khat,

⁷mi sâng tam takte chungah zahngaihna lantîrtu, khawlohna te, bawhchhiatna te leh sualnate ngaidam thîn, an suahsualna erawh ngaizam ngai lo, an pate suahsualna avânga an fate leh an tûte, chhuan thumna leh chhuan lîna thleng pawha hrem thîntu a ni,” tiin a puang a.

⁸Tichuan, Mosia chu rang takin, chala lei sîin a kûn nghâl a, chibai a bûk a.

⁹“Aw LALPA, min khawngaih ta sâ sâ a nih chuan, mi luhlul tak nimah ila, kan zîngah hian Lalpa chu lo kal vê sela, kan khawlohnte leh kan sualnate min ngaidam tûr leh, i tâa min neih tûrin ka ngên che a ni,” a ti a.

THUTHLUNG NEMNGHEH THAR

¹⁰Ani chuan: “Ngai rawh, thuthlung ka siam ta. Lei chung zawng zawngah hian tû hnam zîngah mah ka la tih ngai loh, i mite hmuh vek tûrin an hmâah thil mak ka ti dâwn e; in awmna vêla mi zawng zawngte chuan LALPA hnathawh hi an hmu vek ang. In hnêna ka tih tûr hi thil rûr tak a ni si a.

¹¹Vawiina ka thupêk che u hi lo chhinchhiah tlat rawh u. Ngai teh u, Amor mite, Kanaan mite, Hit mite, Periz mite, Hiv mite leh Jebus mite hi in hmâ ata ka hnawh chhuahsak dâwn che u a.

¹²Fîmkhur hlê ang che u, chuti lo zawng, in kalna tûra mi chêngte nêin inremna thuthlung te hi in siam hlaui dah ang e, in tân thang an lo ni mai dâwn si a.

¹³An maichâmte in tihchhiatsak zâwk tûr a ni a, an lungphun serh te chu chhu sawm vek ula, an milim thingphunte chu kit vek ang che u,

¹⁴(pathian dangte chu chibai in bûk tûr a ni lo, LALPA chu Pathian thîkthuchhia a ni a, a hming pawh Thîkthuchhiaa a ni si a),

¹⁵chu rama mi chêngte chu thu in thlunpui mai zawngin, nawhchizawrhna hmanga an pathian hnêna inthâwi chîng mi an ni si a, an inthâwina sâ ei ve tûrin an rawn sâwm ang che u a,

¹⁶in fapate tân an fanute in neiha, an fanute nawhchizawrhna ang maia an pathiante hnêna in inphalrai chuan, in fapate pawhin chutiang chuan an pathiante an be vê mai ang.

¹⁷Chhûn chawp pathian rêng rêng in siam ve tûr a ni lo.

¹⁸“Dâwidim telh loh Chhang Kût in hmang thîn tûr a ni. Abib thlâa ka hun ruatah thù ka pêk tawh che u angin ni sarih chhûng dâwidim telh loh chhang in ei tûr a ni; Aigupta ram aţanga in lo kal chhuah pawh kha Abib thla a nih kha.

¹⁹In ran rual zînga a pa piang hmasa ber chu bâwngpa emaw, berâm emaw pawh ni se, ka tâ a ni.

²⁰Sabengtungno hrin hmasak ber erawh chu berâm novin in tlan tûr a ni. In tlan duh lo a nih chuan a ring elh tliah tûr a ni. In fapa piang hmasa ber chu in tlan zêl tûr a ni. Ka hmâah tûmah kut ruakin an rawn inlan tûr a ni lo.

²¹“Ni ruk chhûngin hnâ in thawt tûr a ni a, ni sarih ni erawh chu in châwl tûr a ni; leileh lai pawhin, buhseng lai pawhin in châwl tûr a ni.

²²Wheat buh thar tîr in seng hunah Chawlhkâr Kût in hmang tûr a ni a, kum tâwpah Pâwl Kût in hmang bawk tûr a ni.

²³Kum khat chhûngin in zînga mipa zawng zawng chu LALPA Pathian, Israelte Pathian hmâah vawi thum an rawn inlan thîn tûr a ni.

²⁴In hmâah hnam dangte ka hnawh chhuahsak che u-in, in huang ka zauhsak dâwn si che u-a; chuvângin, kum khat chhûnga LALPA in Pathian hmâa vawi thum inlan tûra in kal chhoh hlânin tûma'n in ram chu an tibuai lo vang.

²⁵“Thisena inthâwina chu dâwidim telh chhang nêin ka hnênah in rawn hlân tûr a ni lo va, Kalhlên Kût inthâwina sâ pawh a tûk thlenga dah tûr a ni hek lo.

²⁶In thlawhhamâ aţanga thlai thar hmasa ber chu LALPA in Pathian inah in rawn la khâwm tûr a ni. Kêlno sa chhum nân a pui hnutê in hmang tûr a ni lo.

²⁷LALPA chuan Mosia hnênah, “Hêng thûte hi ziaak rawh, hêng thu hmang hian nang leh Israelte hnênah thù ka thlung si a,” a ti a.

²⁸Tichuan, LALPA hnênah ni sawmli leh zan sawmli a awm a; engmah a eiin a in lo va. Lungphêkah chuan thuthlunna thù, Thupêk Sâwm chu a ziaak a a.

MOSIA HMÊL ÊNG

²⁹Mosia chu Sinai Tlâng aţang chuan a lo chhuk thlâ a (Thuthlunna lung phêk pahnihte kengin Mosia chu tlâng aţangin a lo chhuk a), Pathian nêin an inbiak lai khân a hmêl a lo êng ta tih Mosia chuan a hre hauh lo va.

³⁰Aarona leh Israel fate zawng zawngin Mosia an lo hmuh chuan, ngai teh, a hmai vun chu a êng sût mai a, a bul hnaiah pawh an lo kal ngam ta lo va.

³¹Mosia chuan a han âu hlawm a, Aarona leh pung khâwmhotute chu a hnênah an lo kîr leh a; Mosia chuan a lo bia a.

³²Chumi hnû chuan Israel fate zawng zawng chuan an rawn hnaih a, ani chuan Sinai Tlângah LALPA nêna an inbiakna thûte chu thupêk angin a lo pê a.

³³Mosia chuan an hnêna thû a sawi zawhin, a hmâi chu puanin a khuh ta a.

³⁴LALPA be tûra a hnêna a luh dâwn erawh chuan, a lo chhuah leh hmâ chu Mosia chuan a hmai khuhna chu a hlíp thla thîn a; chuta tanga a lo chhuak leh chuan thupêk a dawn apiang chu Israel fate hnênah a hrilh chhâwng leh thîn.

³⁵Israel faten Mosia hmêl an en apiangin Mosia hmâi vun chu a lo êng ta thîn a, chuvângin, Pathian be tûra a luh dâwnah chauh lo chuan hmâi khuhna chuan a inkhuh reng thîn.

BUNG 35

SABBATH DÂN

¹Mosia chuan Israel mipui zawng zawng chu a ko khâwm a, an hnênah, “Hêng thûte hi LALPAN in zawm atâna a pêk che u a nih hi:

²Ni ruk chhûngin hnâ thawh tûr a ni a, a ni sarih nî erawh chu in tân ni serh, LALPA tâna Sabbath chawlhna ni a ni. Hemi nîa hna thawk apiang chu tihlum tûr a ni.

³Sabbath nî-ah chuan in chênna ram pumah mei pawh in chhêm tûr a ni lo,” a ti a.

BIAKBÛK TÂNA THILPÊK

⁴Mosia chuan Israel fa pung khâwmho zawng zawng hnênah, “Hei hi LALPA thupêk chu a ni:

⁵In zîng aţangin LALPA tân thilpêk han pe rawh u. Pêk duhna thinlung nei apiangin LALPA tâna thilhlân angin rawn la rawh se: rangkachak te, silvar te leh dâr te;

⁶la dumpâwl te, la senduk te, la senlâr te, la zai sîn te leh kêl hmul te;

⁷berâmpa vun rawng thlâk sen te, ramsa vun te, acacia thing te;

⁸hriak chhit chí te, hriak thih chí leh hâl chí thil rimtui te;

⁹puithiam kawr leh a âwmbela dah tûr onuk lung leh lunglu dangte nên rawn dah khâwm rawh u.

BIAKBÛK TÂNA THIL TÛLTE

¹⁰In zînga kut themthiam zawng zawngte kha lo kal ula, LALPA thupêk ang takin rawn siam rawh u:

¹¹biakbûk te, a puan in te, a chung khuhna te, a kilhbehna te, a bangrel te, a bang tun te, a ban te, ban inngahchhan te;

¹²thuthlung bâwm leh a zâwnngul te, zahngaihna thutthlêng te, pindan puanzâr te;

¹³dawhkân leh a zâwnngul te, bungbêl zawng zawng leh chhangserh dahna te;

¹⁴khâwnvâr hûnna te, a hmanrua te, a khâwnvâr te, chhit tûr hriak te;

¹⁵rimtui hâlna maichâm te, a ngul te, hriak thih chí te, thil rimtui hâl chí te, biakbûk luhna kawngka puanzâr te,

¹⁶hâlral thil hlanna maichâm leh a bang tuamna dâr leh a zâwnngul leh hmanrua te, bêl leh a hûn chhan te;

¹⁷a kawtzâwl hungna zâr tûr te, a ban te, a hûn chhan te, a tualzâwla luhna puanzâr te;

¹⁸biakbûk khen nghehna te, a hungna kilh behna te leh a hruì te;

¹⁹hmun thianghlîma rawngbâwtute thuamhnâw–puithiam Aarona silhfên thianghlîm te, puithiam rawngbâwl tûr a fapate silhfên te nên siam rawh u,” a ti a.

BIAKBÛK THAWHLÂWM AN PÊ

²⁰Israel fa pung khâwmho zawng zawng chu Mosia hnên ata an tîn darh ta a.

²¹Tichuan, an thinlunga tihharhna chang apiangte leh pêk duhna thinlung nei apiangte chu an lo kal khâwm a, biakbûk sak nâna thil tûl zawng zawng te, silhfên thianghlîm atâna thil tûl chenin LALPA tâna thilpêk chu an rawn hlân ta a.

²²A hmei a pân thilpêk pêk duhna thinlung nei apiangte chu an lo kal a, bengbeh te, hnâr vuah te, thi te, rangkachak incheina tinrêng te nên mipate pawhin an rangkachak tlang te LALPA tân an rawn hlân a.

²³La dumpâwl te, la senduk te, la senlâr te, la zai sîn te, kêl hmul te, berâmpa vun tihsen te leh ram savun nei apiangte chuan an rawn la khâwm a.

²⁴Silvar emaw, dâr emaw pe duhin LALPA tâna thilhlân an rawn pe khâwm baw a. Acacia thing neite pawhin a tûl apianga hman atân an rawn lakhâwm baw a.

²⁵Hmeichhe kut themthiam zawng zawngte chuan lâ an kai a, la dumpâwl te, la senduk te, la senlâr te leh la zai sîn an kaih sâte chu an rawn theh khâwm a.

²⁶Nu themthiam zînga finnain an thinlung a kaih harh zawng zawngte chuan kêl hmul an lo tah baw a.

²⁷Hotute chuan puithiam kawr leh âwmbela vuah tûr onuk lunghlûte,

²⁸rimtui leh chhit ên chí hriak te, hriak thih chí te leh rimtui hâl chîte an rawn lâ a.

²⁹Israel fate chuan LALPA tân mahnî duh zâwng zâwng thil an hlân baw a, a hmei a pain pêk duhna thinlung nei apiang chuan LALPAN Mosia kuta ti tûra thû a pêk ang zêla hman atân châkkhai tinrêng an rawn thawh khâwm baw a.

PATHIANIN MI THEMTHIAM RUAL A KOHTE

³⁰Mosia chuan Israel fate hnênah, “Hei le, LALPA chuan Juda hnama mi, Hura fapa, Uri-a fapa Bezalela chu a thlang chhuak ta;

³¹amah chu finna te, hriat thiamna te, hmangchâng hriatna te leh themthiamna tinrêng te,

³²rangkachak te, silvar te, dâr te hmanga thil siam thiamna leh a rem mâwi dân te,

³³lunglu phûm tûr zai thiamna te, thing ker mâwi thiamna te, kawng tinrênga themthiam mi ni tûrin Pathian Thlarauvin a tikhat tawh e.

³⁴Amah pui tûrin Dan hnama mi Ahisamaka fapa Aholiaba thinlungah mite zirtîr theihna a pê a.

³⁵Anni hi kut themthiamna chi hrang hrang, ker mâwi lam te, riruat thiamna te, thui mâwiah te, la dumpâwl leh senduk te, a senlâr leh a zai sîn tea mâwi taka puan tah leh duan dân thiam

tûra finnaa tihkhah an ni tawh e,” a ti a.

BUNG 36

¹“Bezalela leh Aholiaba leh kut themthiamho, biakbûk sak dân tûr tinrêng hriat thiamna nei tûra LALPAN finna te, hmangchâng hriat thiamna a pêkhote hian LALPAN tih tûr a pêk ang zêlin an thawk tûr a ni.

A DAIH BÂK THLENGIN MITEN AN PÊ

²Mosia chuan Bezalela leh Aholiaba te, mi themthiamho, LALPAN an thinlunga finna a pêk, an rilrûa phûrna neite chu hna thawk tûr chuan a ko ta a.

³Israel faten biakbûk sakna tûra thilpêk an rawn hlan zawng zawngte chu Mosia hnên aţangin an dawng zêl a. Tûk tinin mahni duh thûa petute chuan thilpêk an rawn chhûng lût zêl a.

⁴Hmun thianghlim satu kut themthiamhote pawh anmahni tum bîk theuh thawkin an bûr char char bawk a,

⁵Mosia hnênah chuan, “LALPAN tih tûr min pêk siam nâna châkkhâi mamawh aia tam daih mipuiten an rawn lakhâwm ta,” tiin an hrilh a.

⁶Tichuan, Mosia chuan thû a pe a, “A hmei a pân hmun thianghlim atâna thilpêk chu tûma’n rawn pe tawh suh se,” tiin riahhmun zawng zawngah chuan a tlângautîr ta a. Thilpêk rawn la tawh lo tûrin mipuite chu an khap ta hial a,

⁷châkkhâi an rawn lâk khâwm sâ pawhin an hman tûr a daih zân tawh a, a tam lutuk tawh zâwk a ni.

BIAKBÛK SAK THÛ

⁸Biakbûk satu mithiamhote chuan puan zai sîn te, la dumpâwl te leh la senlâr te a thlûra tahin, puanzâr tûr sâwm an siam a; puanzârah chuan mâwi taka duan Cherub lem an zep tel a.

⁹Puanzâr dung chu tawng sawmhni pariat sei, a vâng lam tawng lî a hlai a ni a; puanzârte chu a intiat vek a ni.

¹⁰Puanzâr thân ngâ chu a thui zawm a, thân nga dang pawh a thui zawm bawk a.

¹¹Puanzâr thui zawm pakhat tlângah chuan la dumpâwl hrualin a beng a vuah thliah a; chutiang bawkin puanzâr thui kawp dang tlângah pawh a vuah bawk a.

¹²Puanzâr thui zawm hlâwm khatah a beng sawmngâ a vuah a, puanzâr thui zawm hlâwm dangah pawh beng sawmngâ a vuah bawk a; a bengte chu a inzâwn thliah a.

¹³A bengâ bâttu atân a tawn tawnah rangkachakin a bahna sawmngâ a siam a, chutichuan Biakbûk chu puanthân khata khuh zo vek ang a lo ni ta a.

¹⁴Biakbûk chung khuh nân kêl hmula tah puanzâr a siam a; puanzâr sâwm pakhat a siam a;

¹⁵Puanzâr sei zâwn chu tawng sawmthum theuh a ni a, a hlai lam chu tawng lî theuh a ni bawk; puanzâr sâwm pakhatte chu a intiat vek a.

¹⁶Puanzâr thân ngâ chu a thui zawm a, thân ruk dang pawh a thui zawm bawk a.

¹⁷Puanzâr thui kawp sîr ber tlângah chuan a beng sawmngâ a vuah a, puanzâr thui kawp dang tlângah pawh a inzâwn chiahin a beng sawmngâ a vuah leh a.

¹⁸Dâra siam thil bahna kawm sawmngâ, han vuah zawma puan in pakhat ni tûrin a siam a.

¹⁹Berâmpa vun chhum senin puan in chung chu a khuh a, ram savun tha chiin a thuah leh bawk a.

²⁰Biakbûk banga tun chhoh tûr chu acacia thingin a siam a.

²¹Bang rem khâwm sei zawng chu tawng sâwm a ni a, a vâng lam chu tawng khat leh a chanvê a ni.

²²Bang frêm tin chuan frêm dangte nêna inbahzawmna pahni a nei zêl a. Biakbûka frêm zawng zawngah chutiang chu a siam vek a.

²³Tichuan biakbûk tân frêm a siam a, a chhim lam bangah frêm sawmhni a awm a.

²⁴Chûng bang frêm sawmhnihte nghah chhanah silvâr kerkuak sawmli a siam a: inbahzawmna nei frêm pakhatin nghahchhan pahni a nei zêl a.

²⁵Biakbûk bang lehlam, a hmar lam sîr tân frêm sawmhni a siam bawk a,

²⁶a ke nghahna tûr silvâr kerkuak sawmli nê: frêm pakhatin a ke nghah chhan pahni a nei zêl a ni.

²⁷Biakbûk khaw thlang lam bang tân frêm paruk a siam a.

²⁸Biakbûk hnung bang kil vê vê atân frêm pahni a siam bawk a.

²⁹A hnuai lam leh a chung lam inthlâwp nghet tûrin khângah a inkaih bet vê vê a. A kil lehlam pawh chutiang chuan a siam a.

³⁰Tichuan, frêm pariat leh a ke nghahchhan sâwmparuk–silvara siam– frêm pakhat hnuai a nghahchhan pahni a nei a awm zêl a.

³¹Acacia thingin bangrel a siam a: biakbûk bang sîr khatah a rel panga zêl a awm a,

³²biakbûk bang sîr lehlamah a rel pangâ a awm bawk a, biakbûk kawmchâr lam, a khawthlang lamah pawh a rel pangâ bawk a awm a ni.

³³A bangrel laitâ chuan a tâwp aţanga a tâwp lehlam thlengin a hawl thlang a.

³⁴Bang frêm chu rangkachakin a tuam a, bangrela rawl hluha tûr khâng chu rangkachakin a siam a, a relte pawh rangkachakin a luan vek a.

³⁵A chhûng puanzâr chu la dumpâwl te, la senduk te, la senlâr leh la zai sîna tah a ni a; Cherub lem mâwi tak zeha tah a ni.

³⁶A zâr nân acacia thing ban palî a siam a, rangkachakin a luan a, puanzâr bahna kawm te pawh rangkachakin a luan a; ban nghahchhan silvâr kerkuak palî a chhûng bawk.

³⁷Biakbûk kawngkâa zâr tûr la dumpâwl te, la senduk te, la senlâr leh la zai sîn, puantah thiamin a tah chu a siam a,

³⁸ban pangâ leh a bahna kawm te nê. Ban lu bâwkte leh a khângte chu rangkachakin a luan a, ban nghahchhan pangâte erawh chu dâra siam a ni.

BUNG 37**THUTHLUNG BÂWM SIAM THÛ**

¹Bezalela chuan thuthlung bâwm chu acacia thingin a siam a; a dung lam tawng hnih leh a chanvê, a vâng lam tawng khat leh a chanvê, a sân lam pawh tawng khat leh a chanvê a ni.

²A pawns lam leh a chhûng lam chu rangkachak hlangin a luan chhuak vek a, a kotlângte pawh rangkachakin a kâwm baw a.

³A killi sîr tina vuah tûrin rangkachak khâng palî a chhûng a: bâwm pang lehlam lehlamah khâng pahniê vê vê a vuah a.

⁴Acacia thing tlâwnin zâwnngul a siam a, rangkachakin a luan chhuak vek a.

⁵Thuthlung bâwm pang lehlam lehlamah a zâwnngul rawlhna tûr khâng a vuah a.

⁶Zahngaihna thutthleng pawh rangkachak hlangin a siam baw a; a dung lam chu tawng khat leh a chanvêa sei, a vâng lam pawh tawng khat leh a chanvêa hlai a ni.

⁷Rangkachaka chher cherub lem pahniê a siam a; zahngaihna thutthleng hmâwr vê vê nêna inzawm a:

⁸A hmâwr lehlamah cherub pakhat, a hmâwr lehlamah cherub dang pakhat. Zahngaihna thutthleng nêna inzawm vekin a hmâwr vê vêah cherubte chu a siam a ni.

⁹Cherubte chuan chung lamah an thlâ an zâr a, an thlâ chuan zahngaihna thutthleng chu an zârhliap a. Cherubte chuan inhmachhawin zahngaihna thutthleng lam chu an hawi vê vê a.

CHHANGSERH DAHNA DAWHKÂN SIAM DÂN

¹⁰Dawhkân chu acacia thingin a siam a; a dung lam tawng hnih, a vâng lam tawng khat, a sân lam tawng khat leh a chanvê a ni.

¹¹Rangkachak hlangin a tuam a, rangkachakin a tlâng a kâwm chhuak vek baw a.

¹²Rangkachaka tuam phêk, kutpah bawkin a tlâng a khuap kual vek a.

¹³Rangkachakin khâng palî a chhûng a, chûng khângte chu dawhkân ke palî kil theuhvah a vuah a.

¹⁴A zâwnna thing tlâwn rawlh theih tûrin khângte chu dawhkân tlang tuamna hrûlah chuan a vuah a.

¹⁵Zâwnngul tlâwnte chu acacia thingin a siam a, rangkachakin a luan vek a.

¹⁶Dawhkâna dah tûr bungbêl hrang hrang: thlêng te, no te, chawhtawlh te, tui thlitna bêltung te chu rangkachak hlangin a siam a.

RANGKACHAK KHÂWNVÂR DAHNA SIAM THÛ

¹⁷Rangkachak hlang hlaikin khâwnvâr dahna a siam baw a; khâwnvâr dahna chu a chhera chher a ni. A hûnna bulthut leh a ngul te, a lu baw te, a chei mâwina pangpâr kuhmûm leh a pâr parh lem nêna chuan a inzawm vek a.

¹⁸A kûngpui aţangin zâr paruk a pêng darh a: lehlam sîr aţangin a zâr thum a lo chhuak a, lehlam sîr aţanga chawr chhuak chu zâr thum baw a ni a.

¹⁹A zâr hmâwrah theite pâr kuhmûm leh a cheina baw leh a pâr parh lem pathum zêl a awm a; a zâr hmâwr lehlamah pawh theite pâr kuhmûm leh a cheina baw leh a pâr parh lem pathum baw a awm-tichuan khâwnvâr dahna chuan pêng paruk a nei a.

²⁰Khâwnvâr ngul zidingah chuan a chei mâwina theite pâr kuhmûm leh pâr parh lem palî a awm a.

²¹A zâr chung zâwk pahniê inkârah chuan pangpâr kuhmûm pakhat a awm a, a zâr hnuai zâwk pahniê inkârah chuan pangpâr kuhmûm pakhat a awm baw a; tichuan khâwnvâr dahna ngul aţanga zâr parukah chuan a awm vek a ni.

²²A zârte leh a kuhmûmte chu inzawm vek, rangkachak hlang tlang khat aţanga chher a ni.

²³Khâwnvâr pasarih, a vâp cheh bunna bakcheh leh meivâp dahna thlêng nêna rangkachak hlangin a siam a.

²⁴Khâwnvâr dahna leh bungbêl vêl siam nân rangkachak talent khat a hmang a ni.

RIMTUI HÂLNA MAICHÂM

²⁵Acacia thingin rimtui hâlna maichâm a siam a. A dung lam tawng khat, a vâng lam pawh tawng khat-kil li nei-a sân lam tawng hnih a ni. A kîte nêna inzawm a ni.

²⁶A chung lam te, a pang zawng leh a kîte chu rangkachak hlangin a tuam vek a. A tlâng chu rangkachakin a kâwm chhuak vek baw a.

²⁷A zâwnna thing tlâwn rawlhna tûr rangkachak khâng a chher a, a tlâng kawmna bul, a sîr tuakah pahniê vê vê a vuah a.

²⁸Acacia thing tlâwnin a zâwnngul a siam a, rangkachakin a tuam a.

HRIAK THIH CHÎ LEH RIMTUI SIAM THÛ

²⁹Hriak thianghlim thih chî leh rimtui hâl tûr chî, rimtui siam thiam tih dânin a siam chhuak baw a.

BUNG 38**HÂLRAL THIL HLANNA MAICHÂM**

¹Acacia thingin hâlrâl thil hlanna maichâm a siam a; a dung lam tawng ngâ, a vâng lam tawng ngâ-kil li a nei a-a sân zâwnngul chu tawng thum a ni.

²A killi aţangin a kî a siam theuh va; chûng kîte chu maichâm nêna inzawm vek a ni. Dânin a luan a.

³Maichâma hman tûr meivâp dawnthlêng te, vutlawh te, chawhtawh te, thîrkut te, meilâk-bêl te a siam a; chûng bungbêl te chu dân vekin a siam a.

⁴Maichâm âtn dânin lên a siam a, chû chuan a hnuai lam bang chanve vêl a awh a.

⁵Lên sîr kil li-ah chuan a zâwnna tlâwn rawlhna tûr dânin khâng palî a siam a.

⁶Maichâm zâwnngul âtn acacia thing tlâwn a siam a, dânin a luan a.

⁷Maichâm pang lehlam lehlama zâwn nân zâwnngulte chu khângah chuan a rawlh a. Maichâm chhûng lam tikawrawng tûrin a bangah thingphel a hmang a.

DÂR CHAWHTAWLH SIAM THÛ

⁸Biakbûk kawngka bula rawngbâwl tûra hmeichhe lo kal khâwmten dârthlalanga an hman thîn dârin tui chhûn bêl leh a hûnchhan pawh dâr bawkin a siam a.

BIAKBÛK HUNGNA SIAM THÛ

⁹Biakbûk tualzâwl chhim lam chu a hung a; a hung nân la zai sîn tah, tawng zâa sei a zâr a.

¹⁰Ban sawmhnih leh a innghahna dâr mûm sawmhnih a awm bawk a. Bana puanzâr kaihna kawm leh a zâr ngulte chu silvar a ni.

¹¹A hmar lam hungna pawh tawng zâa sei, ban sawmhnih leh a inzawmna dâr mûm sawmhnih a ni a. Chûng bana puanzâr kaihna kawm leh a zâr ngulte chu silvar a ni.

¹²Khawthlang lam hungna chu tawng sawmngâa sei a ni a, ban sâwm leh a nghahchhan sâwm a awm. Chûng bana puanzâr kaihna kawm leh a zâr ngulte chu silvar a ni.

¹³Khawchhak lam hungna chu tawng sawmngâ a ni.

¹⁴A luhna kawngka sîr lehlam hungna chu tawng sâwm pangâa sei a ni a, ban pathum leh a bulthut pathum a nei a,

¹⁵a luhna kawngka sîr lehlam hungna pawh chumi chen bawk chu a ni a; a lehlam lehlamin puanzâr tawng sâwm pangâa sei, ban pathum leh a bulthut pathum nei vê vê a awm bawk.

¹⁶A hungna kual chhuaka puanzâr chu la zai sîna tah vek a ni.

¹⁷Ban bulthutte chu dâra siam a ni a, bana a bahna kawmte leh ban zawmtu chu silvara siam a ni a, ban chhîpa bâwk pawh silvara luan vek a ni; tual hungna ban zawng zawng chu silvar tlâwna zawm vek a ni.

¹⁸A luhna kawngka puia puanzâr chu la dumpâwl leh a senduk te, la senlâr leh la zai sîna tah te a ni. Tawng sawmhnih a sei, tawng ngâa sâng, biakbûk hungna nêna inchen a ni.

¹⁹Ban palî leh a bulthut dâr kerkuak palî a awm bawk a; a bahna kawmte chu silvar a ni a, a ban lu bâwk leh a kham pheite chu silvar vek a ni.

²⁰Biakbûk leh a hungna kilh behna zawng zawng chu silvara siam vek a ni.

BIAKBÛKA THILTE

²¹Hetiang hi biakbûk, Mosia thupêk anga Thuthlung Bâwm dahna biakbûk sak dân, Levia mite rawngbâwl nâna Aarona fapa Ithamara chhinchhiah chu a ni.

²²Bezalela, Uria fapa, Hura fapa, Juda hnama mi chuan LALPAN Mosia hnêna thû a pêk zawng zawng chu a siam a.

²³Oholiaba, Ahisamaka fapa, Dan hnama mi, thil ker mâwi leh duang chhuak thiam, la dumpâwl leh a senduk te, a senlâr leh la zai sîn thui mâwi thiam takin a puibâwm zêl a.

²⁴Hmun thianghlim sak nâna rangkachak an hman zawng zawng, rangkachak an thawh khâwm zât chu, hmun thianghlima sekel bûkna anga tehin talent 29 leh sekel 730 a ni.

²⁵Chhiarpui laia mi tin thawh tûra tuk zât anga silvar an rawn thawh chu, hmun thianghlima sekel bûkna anga tehin, talent za leh sekel sângkhat zasarih sawmsarih panga a ni:

²⁶chû chu chhiarpui tel kum sawmhnih chin, mi 6,03,550 aţanga mi tinin beka khat pe zêl ang an ni (beka khat chu, hmun thianghlima sekel bûkna anga tehin, sekel chanve tluk a ni a).

²⁷Silvar talent zâ chu hmun thianghlim sakna ban bulthutte leh puanzârna ban nghahchhante siam nân hman a ni a: ban nghahchhan pakhat chhûn nân talent khat zêl hman a ni.

²⁸Sekel 1775 aţangin bana vuah tûr thîr kawm te, a lu bâwk atân leh a zârna thîr tlâwn siam nân a hmang bawk.

²⁹Dâr an rawn thawh khâwm zât chu talent 70 leh sekel 2400 a ni a.

³⁰Chûng chu biakbûk kawngka ban nghahchhan siam nân te, dâr maichâm te, dâr lên te leh maichâma hmanraw thil zawng zawng siam nân te,

³¹biakbûk hungna ban nghahchhan zawng zawng te, a luhna ban bul te, biakbûk khen nghehna te, a vêla hungna khen nghehna zawng zawng siam nân te a hmang a ni.

BUNG 39

PUITHIAM THAWMHNAW SIAM DÂN

¹LALPAN Mosia hnêna thû a pêk angin la dumpâwl te, la senduk leh la senlâr in hmun thianghlima puithiam rawngbâwna tûr kawr leh Aarona hâk tûr silhfên thianghlim siam a ni.

PUITHIAM THAWMHNAW SIAM DÂN

²Puithiam kawr chu rangkachak zai te, la dumpâwl leh a senduk te, a senlâr leh la zai sîn tein a siam a.

³Rangkachak chu pan takin an dêng phêk a, an phel sîn leh vek a, tichuan la dumpâwl te, la senduk te, la senlâr te leh la zai sînte nê, mâwi takin an zeh pawlh a.

⁴Dârbak pahnih neiin, a tlânga suih zawm theihin an siam a.

⁵LALPAN Mosia hnêna thû a pêk angin, puithiam kawr chungah hrên behna chu rangkachak te, la dumpâwl te, la senduk te, la senlâr te leh la zai sîn te nêna thiam taka zeh mâwi a ni.

⁶Rangkachak phêk chungah chuan onuk lunghlûte an phûm a; hming nemnaa an nem kai ang hian, Israela fapate hming ker a intlâr tiar a.

⁷LALPAN Mosia hnêna thû a pêk angin chûng lungte chu Israela fapate hriat reng nân puithiam kawr dârbakah a bel a.

ÂWMBEL SIAM DÂN

⁸Puithiam kawr siam tûra an uluk ang zet in âwmbel chu rangkachak te, la dumpâwl te, la senduk te, la senlâr leh la zai sîn te nê in chawih takin a siam a.

⁹Âwmbel chu kil li neia inthuahin an thlep a: a inthuah chu a dung lam khâp khat a ni a, a vâng lam pawh khâp khat bawk a ni a.

¹⁰Chutah chuan tlar lî-in lunghlû an phûm a: tlar khatnaah sardion, topaz leh emeral a awm a;

¹¹tlar hnihna chu tarki te, sapphir te, lunghlû te a ni a;

¹²tlar thumna chu jacin te, egat leh amethu te a ni a;

¹³Tlär lîna chu berul te, onuk leh jaspar te a ni a. Rangkachak phêk chungah an phûm tlar tiar a.

¹⁴Chûng lungah te chuan Israela thlah hming sâwm leh pahnih a chuang a: hming nemnaa nem kai ang hian lung pakhatin hnam sâwm leh pahnihte zînga pakhat hming a pu ðheuh va.

¹⁵“Âwmbel khâi nân rangkachak hlangin khaidiat anga herh hruì an siam a.

¹⁶Rangkachak khaidiat pahnih leh rangkachak khâng pahnih an siam bawk a, tichuan âwmbel tlâng hmâwr vê vêah khângte chu an vuah a.

¹⁷Rangkachak khaidiat pahnihte chu âwmbel sîr hniha khângah chuan an thlung a.

¹⁸Khaidiat pahnih hmâwr chu lunglu rem tlêp pahnihah chuan an thlung a, puithiam kawr dârbak hma lam nêan an thlun zawm a.

¹⁹Rangkachak khâng pahnih an siam a, âwmbel hmâwr vê vê, puithiam kawr nêna indep chhûng lamah an vuah a.

²⁰Rangkachak khâng dang pahnih an siam a, puithiam kawr dârbak vuahna zâwn hnuai deuh, puithiam kawr hrên behna tahmâwi tak chung hretah an vuah a.

²¹LALPAN Mosia hnêna thû a pêk angin âwmbel chu puithiam kawr chei mâwi chung a bei ngheha, puithiam kawr aţanga a tawlh sawn loh nân, âwmbel chu puithiam kawra khâng invuahah te chuan hruihruah dumpâwlin an suih nghet a.

PUITHIAM THAWMHNAW DANGTE

²²Puithiam kawrfual chu a dumpâwl hlangin a siam a.

²³A lai takah a nghâwng rawlhna tûra reh kuak a ni a, a rehna tlâng chu a thlêr loh nân kawr nghâwng anga thleh kual vek a ni.

²⁴Kawrfual tlâng chu la dumpâwl te, la senduk te, la sen lâi leh la zai sîn tea zeh mâwi theibuhfai lem an siam a.

²⁵Rangkachak hlangin tengeng an siam a, kawrfual fêmah chuan tengeng chu theibuhfai leh theibuhfai inkârah chuan a inkârthlâkin an khai tlar tiar a.

²⁶LALPAN Mosia hnêna thû a pêk angin, rawngbâwl huna hâk tûrin kawrfual fêmah chuan tengeng leh theibuhfai, tengeng leh theibuhfai nêan a inkârthlâk kual vek a ni.

²⁷Aarona leh a fapate tân uluk taka la zai sîna tah kawr te an siamsak a,

²⁸la zai sîna siam diâr khim te, la zai sîna siam lukhum mâwi tak te, la zai sîna tah kekawr te,

²⁹puantah thiamin mâwi taka la zai sîna an tah, puithiam taihrên, a dumpâwl te, a senduk leh a senlâr tea inpawlh chu LALPAN Mosia hnêna thu a pêk angin an siam a.

³⁰Rangkachak hlang hlak phêka siam chalhrên thianghlim an siam a, chutah chuan hming nemna ker angin: LALPA HNENAH THIANGHLIMNA tih thû an ziaak a.

³¹LALPAN Mosia hnêna thû a pêk angin chalhrên chungah chuan hruì dumpâwlin an tawn bet a.

HNÂ AN ZO TA

³²Tichuan, biakbûk sak hnâ zawng zawng chu an zo ta a. LALPAN Mosia hnêna thû a pêk ang zêlin Israel fate chuan an ti a; tichuan an zo ta a ni.

³³Biakbûk hmanruate chu Mosia hnênah an rawn la khâwm a, a chung zâr te, a chhûnga bungrua zawng zawng: a chilh behna te, a bangrel te, a ban leh a bulthut te;

³⁴a chung khuhna berâmpa vun chhum sen te, ram savun ţha chîte, a pindan puanzâr te;

³⁵Thuthlung Bâwm leh a zâwnna tlâwn leh zahngaihna thutthlêng te;

³⁶dawhkân te, a bungbêl leh chhangserh te;

³⁷rangkachak hlang khâwnvâr dahna leh a khâwnvâr (rem fel sâ) te, hriak leh a bûr nêan;

³⁸rangkachak maichâm, hriak hnâwih chi, hâl rimtui leh biakbûk kawngkhâr puanzâr te nêan;

³⁹dâr maichâm, dâr lên, a zâwnfung, a bungrua zawng zawng; tuichhûn bêl leh a hûnna nêan;

⁴⁰tual hungna puanzâr, a ban leh a bulthut, a luhna kawngka puanzâr, a kaihna hruihruah, a khen nghehna te; biakbûk rawngbâwl na bungbêl zawng zawng nêan;

⁴¹hmun thianghlima rawngbâwl na tûr puithiam thuam: puithiam Aarona kawr thianghlim, rawngbâwl nâna an hman Aarona fapa puithiam kawr te chu an rawn la khâwm a.

⁴²LALPAN Mosia hnêna thû a pêk ang chiahin, Israel fate chuan an thawk zo ta vek a.

⁴³Mosian chûng hna thawh zawng zawng chu a en a, fel takin an zo ta vek a; LALPAN thû a pêk ang ngeiin an thawk zo va. Mosia chuan mal a sâwm ta a.

BUNG 40

BIAKBÛK TUN DIN LEH REM FEL

¹LALPA chuan Mosia hnênah:

²“Thla hmasa ber ni khat niin biakbûk i tung ding tûr a ni.

³A chhûngah Thuthlung Bâwm i dah ang a, bâwm chu puan i zâr hnan tûr a ni.

⁴Dawhkân chu la lût la, a chungah chuan bungruate fel taka rem tûr a ni; khâwnvâr hûnna la lût la, khâwnvâr chu chhi ang che.

⁵Rimtui hâl na tûr rangkachak maichâm chu Thuthlung Bâwm hmâah dah la, biakbûk kawngkâah puanzâr i zâr tûr a ni.

⁶Biakbûk kawngka pâwnah hâlrâl thilhlanna maichâm chu i hûng tûr a ni.

⁷Biakbûk leh maichâm inkârah tui chhûn bêl i hûng ang a, tui dah baw ang che.

⁸A tualzâwl chu hung chhuak vek la, a kawngkâah puanzâr pawh i zâr tûr a ni.

⁹Hriak thih chi lâ la, biakbûk leh a chhûnga thil zawng zawng chu hriak i chulh vek ang a; a bungrua zawng zawng chawpin i hlân thianghlim ang a, serh hran a lo ni tawh ang.

¹⁰Hâlrâl thil hlanna maichâm leh a bungbêl zawng zawng hriak chulh la, maichâm pawh chu serh hrang bawh ang che. Tichuan, maichâm chu hmun thianghlîm ber a lo ni tawh ang.

¹¹Tui chhûn bêl leh a hûnchhan chu hriak chulh la, serh hrang ang che.

¹²Aarona leh a fapate chu biakbûk kawngkâah rawn hruai la, tuiin lo sil ang che.

¹³Aarona hian ka rawng a bâwl theih nan silhfên thianghlîm bel la, hriak thih la, serh hrang rawh.

¹⁴A fapate pawh rawn hruai la, kawrfual hâktîr ang che.

¹⁵An pa hriak i thih angin anni pawh hriak thih vê la, tichuan, puithiam angin ka rawng an bâwl thei dawn nia; hê hriak thihna hi an thlah kal zêl thleng pawha kumkhaw puithiam an nih hlenna tûr a ni si a,” a ti a.

¹⁶Chutiang chuan Mosia chuan a ti a; LALPAN ti tûra thû a pêk ang zêlin a ti a.

¹⁷A kum hnihna, thla khatna, chumi thlaa ni hmasa berah chuan biakbûk chu tun dîn a ni ta a.

¹⁸Tichuan, Mosia chuan biakbûk chu a tung dîng ta a, a ban ke nghahchhante a sawh nghet a, a bangrelte a hawlh zawm a, a bante chu a tung dîng a.

¹⁹LALPAN thû a pêk ang zêlin Mosia chuan Biakbûk chung a zâr a, a chung khuhnain a khuh a.

²⁰Thuhriattîrna chu lâin Thuthlung bâwm chhûngah chuan a dah lut a, bâwm pang sira khângah te chuan a zâwnngul tlawn a rawlh a, thuthlung bâwm chung chu zahngaihna thutthlêngin a chhîn ta a.

²¹LALPAN Mosia hnêna thû a pêk ang zêlin Thuthlung Bâwm chu biakbûk chhûngah chuan a la lût a, puanzâr zârin Thuthlung Bâwm chu a daidang ta a.

²²Dawhkân chu biakbûk chhûng, biakbûk hmar lam, puanzâr pâwnah a hûng a;

²³a chungah chuan chhang chu LALPA hmâah a dah a, LALPAN Mosia hnêna thu a pêk ang zêlin.

²⁴Biakbûk chhûngah chuan khâwnvâr dahna pawh biakbûk chhim lam, dawhkân dahna epah a hûng a;

²⁵LALPAN Mosia hnêna thû a pêk ang zêlin, khâwnvâr chu LALPA hmâah chuan a chhi a.

²⁶Rangkachak maichâm chu biakbûk chhûnga puanzâr hmâah a hûng a;

²⁷LALPAN Mosia hnêna thu a pêk ang zêlin maichâmah chuan rimtui a hâl a.

²⁸Biakbûk kawngkâah chuan puanzâr a zâr bawh a.

²⁹LALPAN Mosia hnêna thu a pêk ang zêlin, biakbûk kawngka pâwnah chuan hâlrâl thil hlanna maichâm a hûng a, chutah chuan hâlrâl thilhlân leh buhbâl thilhlân a hlân a.

³⁰Biakbûk leh maichâm inkârah tui chhûn bêl a hûng a, tah chuan insil nân tui a dah a;

³¹chû tui chu Mosia leh Aarona leh a fapaten an kut leh ke an silna tûr a ni.

³²LALPAN Mosia hnêna thû a pêk ang zêlin Biakbûka an luh apiangin maichâm an rawn hnaih hunah an insil thîn.

³³Biakbûk leh maichâm vêl zawng zawng chu a hung chhuak vek a, a luhna puanzâr pawh a zâr a. Tichuan, Mosian hnê chu a thawk zo ta a.

CHHÛM LEH ROPUINA

³⁴Tichuan, biakbûk chu chhûmin a khuh a, LALPA ropuinain biakbûk chu a luah khat a.

PATHIAN ROPUINA CHHÛM

³⁵Chutia biakbûk chung chhûmin a khuh a, LALPA ropuinain biakbûk a luah khah tlat avâng chuan Mosia chu biakbûk chhûngah chuan a lût thei ta lo va.

³⁶Chhûm chuan biakbûk chu chung lama a kian chhohsan vêleh, Israel fate chu an kal zêlna tûr lam panin an insuan chhuak leh thîn a ni.

³⁷Chhûm chuan a kiansan loh erawh chuan, a kiansan hmâ chu insawn lovin an awm reng thîn a.

³⁸An khualzin chhûng zawng khân Israel fate zawng zawng hmuh theihin chhûnah LALPA chhûm chu biakbûk chungah a awm a, zânah chuan meialh a awm thîn a ni.

LEVITICUS

Ziah tu: Mosia • Ziah kum: B.C. 1450-1410

Leviticus bu hi Latin Vulgate bu-ah Grik ɬawnga Levitikon tia dah a nih avangin, a bu hming sawi nân hman zui a ni a, 'Levia chite chungchâng' tihna a ni (25:32,33). A Hebrai Bible-ah chuan a bu hming hi wayyigra tih a ni a, 'A ko va' tihna mai a ni. Pathianin a chhan chhuah mipuite awm dân tûr te, Pathian biak dân leh a rawng an bawl dân tûr kimchanga târlan a ni. Leviticus bu hi inthâwina leh thilhlân chungchâng te, puithiamte leh mipuiten thianghlîm taka Pathian biaa chibai an buk dân tûr chungchâng inzirtîrna a ni deuh ber. Nun dân leh taksa invawn fai dânah thianghlîmna pawimawh zia a uar hlê. Thianghlîmna lovin tûma'n Pathian an hmu thei lovang" tih chu a bu pum khai khâwmtu a ni. A bu tâwpa, "Hêngte hi Israel fate tân LALPAN Sinai Tlânga Mosia hnêna a thupêk te a ni", (27:34 cf. 7:38; 25:1; 26:46) tih thû aţang hian Leviticus bu hi Pathianin Mosia a ziahtûr a ni tih a lang. A bu chhûngah hian dân thu Pathianin Mosia hnênah a pê tih wavi 56 a lang nawn a, thianghlîmna tih hi wavi 150 chuang a lang bawk. A bu chhûngah hian bung 27 leh châng 859 a awm. Bible bu thumna a ni.

BUNG 1

HÂLRAL THILHLAN

¹LALPA chuan Mosia a ko va, biakbûk aţangin a rawn bia a,

²Israel fate hnênah heti hian sawi rawh: In zinga mi tûpawhin Lalpa hnêna hlan tûr thil an rawn kenin, in ran vulh-bâwng rual leh bêram rual zinga mi in rawn hlân ɬîn tûr a ni.

³Hâlrâl atâna thilhlân chu ran a nih chuan, ran rual zinga a pa hmêlhem lo a hlân tûr a ni; ama duhthu ngeiin LALPA biakbûk kawngka hmâah a hlân tûr a ni.

⁴Hâlrâl atâna a hlan tûr lu chungah chuan a kut a nghat ang a, ama sual ɬâwina atân pawmsak a ni ang.

⁵LALPA hmâah bâwngpa chu a talh tûr a ni; puithiamho, Aarona fapaten a thisen chu an rawn la ang a, biakbûk kawngka bula maichâm leh a vêlah chuan thisen chu an theh tûr a ni.

⁶Hâlrâla hlan savun chu a lip ang a, a chan darh vek tûr a ni.

⁷Puithiam Aarona fapate chuan maichâmah mei an chhêm ang a, mei chungah chuan thing an chhep khâwm tûr a ni.

⁸Tichuan, puithiamho, Aarona fapate chuan chan darh sa, a lû te, a ɬau te chu maichâm mei chungah thing chheh chungah chuan rem takin an dah tûr a ni;

⁹a kawchhûngte leh a kête chu tuiin a sil tûr a ni. Puithiam chuan maichâmah chuan hâlrâl thilhlân angin a hâlrâl vek tûr a ni a, chû chu meia thilhlân, LALPA tâna rimtui a ni.

¹⁰A thilhlân chu ran rual zinga mi berâm emaw, kêl emaw a nih chuan, hâl rala hlan tûr chu a pa hmêlhem lo a ni tûr a ni.

¹¹Maichâm hmar lamah LALPA hmâah a talh tûr a ni a; tichuan, puithiamho, Aarona fapaten mai châmah chuan a vêlin

thisen chu an theh tûr a ni.

¹²A sâ chu a chan darh ang a, a lu nê, a ɬau nê; maichâm mei chungah thing chheh chungah chuan puithiamin rem takin a dah tûr a ni;

¹³a kawchhûngte leh a kête erawh chu tuiin a sil tûr a ni. Puithiam chuan maichâmah a rawn la vek ang a, a hâl ral vek tûr a ni; hâlrâl thilhlân a ni a, chû chu meia thilhlân, LALPA tâna rimtui a ni si a.

¹⁴LALPA tâna hâlrâl thilhlâna hlan tûr chu sava a nih chuan, ɬuro emaw, pârva emaw a rawn keng tûr a ni.

¹⁵Puithiam chuan maichâmah a rawn la ang a, a lû a ɬuai bung ang a, maichâmah a hâl tûr a ni; a thisen chu maichâm sîrah a far kangtîr tûr a ni.

¹⁶A chawchaweng chu a hmulte nê paih tûr a ni a, maichâm sîr chhak lama vut dahna hmunah a paih tûr a ni.

¹⁷Zai phel vek lovin a ɬlâ-ah pawt ɬet sela; puithiamin maichâma thingtuah alh chungah hâl rawh se. Hâlrâl thilhlân a ni a, chû chu meia thilhlân, LALPA tâna rimtui a ni si a.

BUNG 2

BUHBÂL THILHLAN

¹Mi tûpawhin LALPA tân buhbâl thilhlân a hlan duh chuan, a thilhlân chu chhangphut ɬa chi a ni tûr a ni a. Hriaka leihin a chungah beraw a dah bawk tûr a ni.

²Aarona fapa puithiamte hnênah a rawn la ang a, an zinga pakhatin chhangphut vei khat leh hriak nê, berâw zawng zawng nê a la chhuak ang. Puithiam chuan hriatrengna thiltih atân maichâmah a hâl tûr a ni, chû chu meia thilhlân, LALPA tâna rimtui a ni si a.

³Buhbâl thilhlâna an hlan bâng zawng chu Aarona leh a fapate chan tûr a ni. Meia thil hlan chu LALPA tân thil thianghlîm ber a ni si a.

⁴Buhbâl thilhlânah ɬuka ur hmin chhang i rawn ken chuan, dâwidim pawlh loh chhangphut ɬa chi, hriak nêna hmeah ni se, a nih loh pawhin dâwidim pawlh loh, hriaka chulh chhang pêr pan chi a ni tûr a ni.

⁵I buhbâl thilhlân chu ɬlênga ur hmin chhang a nih chuan, chhangphut ɬa chi, dâwidim pawlh loh, hriaka chulh a ni tûr a ni.

⁶I tisawm vek ang a, hriakin i leih tûr a ni; buhbâl thilhlân a ni si a.

⁷I buhbâl thilhlân chu bêl chhûnga ur hmin a nih chuan, hriaka hmeah chhangphut ɬa chia siam a ni tûr a ni.

⁸Chûng ɬilte nêna buatsaih buhbâl thilhlân chu LALPA hnênah i rawn keng tûr a ni. Puithiam hnêna pêk a nih hunah maichâmah a rawn la tûr a ni.

⁹Puithiam chuan buhbâl thilhlân aţangin hriatrengna tûr a la ɬen ang a, maichâmah a hâl tûr a ni. Chû chu meia thilhlân, LALPA tâna rimtui a ni si a.

¹⁰A bâng zawng chu Aarona leh a fapate chan a ni ang. LALPA tâna meia thilhlân thianghlîm ber a ni si a.

¹¹LALPA hnêna buhbâl thilhlân inrawn ken rêng rêngah dâwidim a tel tûr a ni lo. LALPA tana meia thil hlânah dâwidim emaw, khawizu emaw in hâl tûr a ni hek lo.

¹²In buhbâl thar hmasa ber chu LALPA hnênah in hlân thîn tûr a ni a, nimahsela rimtui âtna maichâmah chuan in hlân ve tûr a ni lo.

¹³In buhbâl thilhlân apiangah chî in al tûr a ni; in Pathian nêna chîa in thuthlunnaah chî hi in buhbâl thil hlana tel zêl tûr a ni a. In thil hlân rêng rêngah chî in hlân tel zêl baw tûr a ni.

¹⁴Buhbâl thar hmasa ber LALPA hnêna in hlân chuan, buh thar hmasa, den phut, meia ur ro in hlân tûr a ni.

¹⁵Hriak i chulh ang a, a chungah berâw i phul baw tûr a ni. Buhbâl thilhlân a ni si a.

¹⁶Puithiam chuan hriatrengna âtna tih chin: chhangphut tîem leh hriak tîem bâkah, berâw zawng zawng chu LALPA hnêna meia thilhlân âtna a hâl tûr a ni.

BUNG 3

REMNA THILHLÂN

¹A thilhlân chu remna thilhlân a niha, ran a hlân dâwn a nih chuan, a nu emaw, a pa emaw pawh ni se, LALPA hmâah a hmêlhem lo a hlân tûr a ni.

²A thilhlân tûr ran lu chungah a kut a ngat ang a, biakbûk kawngka bulah a talh tûr a ni a; Aarona fapa puithiamten a thisen chu maichâmah chuan a vêlin an theh tûr a ni.

³Remna inthâwina thilhlân ângin LALPA hnêna a hlân tûr chu meiin a hlân tûr a ni. A kawchhûng tuamtu thau leh a rîlbawh thau zawng zawng te,

⁴a kal pahnih leh a tuamtu thau te, a kal chungah a thîn tuamtu rângte chu a phawrh vek ang a;

⁵Aarona leh a fapaten maichâm chungah thingfâk an chheh chungah an hâl ral tûr a ni, chû chu meia thilhlân, LALPA tâna rimtui a ni si a.

⁶Inremna tûra LALPA hnêna inthâwina thilhlân chu ran rual zînga mi a nih chuan, a nu pawh a pa pawh a hmêlhem lo a ni tûr a ni.

⁷A thilhlân tûr chu berâm no a nih chuan LALPA hmâah a hlân tûr a ni.

⁸A thilhlân lu chungah chuan a kut a ngat ang a, biakbûk kawtah a talh ang; Aarona fapate chuan a thisen chu maichâmah chuan a vêlin an theh tûr a ni.

⁹Remna inthâwina thilhlân âng chuan, a thau leh a mei thau zawng chu a hnungzâng ruh bul thlengin a hlep thla vek ang a, chûng chu LALPA hnênah meia thilhlânin a hlân tûr a ni. A kawchhûng thau te, a rîlbawh thau zawng zawng te,

¹⁰a kal pahnih leh a tuamtu thau te, a kal chungah a thîn tuamtu rângte chu a phawrh vek ang a;

¹¹puithiamin maichâmah LALPA hnêna ei tûr thilhlânah a hâl tûr a ni.

¹²A thilhlân chu kêl a nih chuan, LALPA hmâah a hlân tûr a ni.

¹³A lu chungah a kut a ngat ang a, biakbûk kawtah a talh tûr a ni; Aarona fapate chuan a thisen chu maichâmah chuan a vêlin an theh tûr a ni.

¹⁴Tichuan, LALPA hnênah meia thilhlânin a hlân tûr a ni. A kawchhûng thau te, a rîlbawh thau zawng zawng te,

¹⁵a kal pahnih leh a tuamtu thau te, a kal chungah a thîn tuamtu rângte chu a phawrh vek ang a; a kal chungah a thîn tuamtu rângte chu a phawrh vek ang a;

¹⁶puithiamin maichâmah LALPA hnêna ei tur thilhlânah a hâl tûr a ni, chû chu rimtui âtna meia thilhlân a ni e; thau zawng zawng chu LALPA pual a ni si a.

¹⁷Sa thau rêng rêng leh sa thisen rêng rêng in ei tûr a ni lo, 'tihi, kumkhuaa in thlah kal zêlte tâna dân ngat a ni tawh ang,' a ti a.

BUNG 4

SUAL THÂWINA

¹LALPA chuan Mosia a bia a,

²"Israel fate chu heti hian hrilh rawh: 'Mi tûpawhin tihpalh thila LALPA thupêk a bawchhiat a, tih loh tûr thil engpawh lo ti se,

³hriakthih puithiamin thil sual tiin, chû sual mawh chu mipui chungah a lo tla dâwn a nih chuan, LALPA hnênah a thil sual lo tih tawh thâwi nân bawngpa tuai, hmêlhem lo chu sual thâwina thilhlânah a hlân tûr a ni.

⁴Bâwngpa chu biakbûk kawngka bulah LALPA hmâah a rawn kai tûr a ni a, bâwngpa lu chungah a kut a ngat ang a, LALPA hmâah bâwngpa chu a talh tûr a ni.

⁵Hriakthih puithiam chuan bâwngpa thisen engemaw zât chu biakbûkah a lâlût tûr a ni.

⁶Puithiam chuan a kutzungtang chu thisenah chuan hnim sela, hmun thianghlim puanzâr hmâah chuan, thisen chu LALPA hmâah wawi sarih a theh tûr a ni.

⁷Puithiamin LALPA hmâah biakbûk chhûnga rimtui hâl na maichâm kî-ah te chuan thisen tât sela; bâwngpa thisen la bâng zawng chu biakbûk kawngka bula hâlral thilhlanna maichâm bulah bun chhuak vek rawh se.

⁸Sual thâwina bâwngpa thau zawng zawng chu la vek sela. A kawchhûng thau te, a rîlbawh thau zawng zawng te,

⁹a kal pahnih leh a tuamtu thau te, a kal chungah a thîn tuamtu rângte chu phawrh vek sela;

¹⁰remna inthâwina bâwngpa a tih dân angin ti sela; chûngte chu puithiam chuan hâlral thilhlanna maichâmah a hâl tûr a ni.

¹¹Bâwngpa vun leh a sa zawng zawng te, a lû leh a kête, a kawchhûng leh a rîl te nen,

¹²bâwng sa chu a pumin riahhmun daipâwn hmun fai, vut an paihna hmunah a kalpui vek ang a, thingfâk chhepin a hâlral vek tûr a ni; vut paihna hmunah a hâlral vek tûr a ni.

¹³Israel hnam pumin tihpalha thil sual an tiha, an thil sual tih chu pungkhâwmho hmâah thup pawh ni se, LALPAN tih loh tûr thu a pêk bawchhe zâwnga ti an nih avângin thiam loh an chang

tho vang;

¹⁴Thil sual an ti tih an hriat chhuah hun hunah, a hnam pumin sual thâwi nân bâwngpa an hlân ang a, biakbûk hmâah an rawn kai tûr a ni.

¹⁵Mipuite zînga upate chuan LALPA hmâah bâwngpa lu chungah chuan an kut an nghat tûr a ni. Bâwngpa chu LALPA hmâah chuan an talh tûr a ni.

¹⁶Hriakthih puithiamin bâwngpa thisen thenkhat chu biakbûkah rawn la rawh se.

¹⁷Tichuan, puithiam chuan a kutzungtang chu thisenah chuan hnim sela, puanzâr hmâah thisen chu vawî sarih LALPA hmâah theh rawh se.

¹⁸A thisen thenkhat chu biakbûk chhûnga LALPA hmâa maichâm kiah te chuan tât sela; a bâk zawng chu biakbûk kawngka bula hâlrâl thilhlanna maichâm kawngka bulah chuan bun chhuak rawh se.

¹⁹Sa thau zawng zawng chu a la khâwm vek ang a, maichâmah chuan a hâl tûr a ni.

²⁰Sual thâwina bâwngpa a tih ang bawkin chu bâwngpa chungah chuan a ti ve tûr a ni; chutiang chu a tih dân tûr a ni. Tichuan, puithiam chuan inremna a siamsak ang a, ngaihdam an ni ang.

²¹Bâwngpa sa chu riahmmun daipâwnah a kalpui ang a, bâwngpa hmasa zâwk a tih ang bawkin a hâlrâl tûr a ni. Chû chu mipuite sual thâwina a ni.

²²Rorêltu a lo sual a, LALPA a Pathianin tih loh tûra thu a pêk zînga a eng pawh a tih palha thiam loh a chanin, emaw,

²³a tisual tih a inhriat chhuahin, inthâwi nân kel no hmêlhem lo a rawn hlân tûr a ni.

²⁴Kêl lô-ah chuan a kut nghat sela, LALPA hmâah hâlrâl thilhlân an hlanna hmunah chuan talh rawh se. Sual thâwina thilhlân a ni si a.

²⁵Puithiam chuan sual thâwina thisen engemaw zât chu a kutzungtangin hâlrâl thilhlanna maichâm kî-ah te chuan tât sela; a thisen chu thilhlân hâlrâlma maichâm bulah bun chhuak vek rawh se.

²⁶Sa thau zawng zawng chu remna thilhlân thau a tih dânin maichâmah chuan a hâl tûr a ni. Tichuan, puithiam chuan a sualna laka tlanna a siamsak ang a, amah chu ngaihdam a ni ang.

²⁷Mi narânin thil a lo tihsual palha, LALPA thupêk bawhchhiaa tih loh tûr a tiha thiam loh a chan chuan.

²⁸emaw, a tisual tih a inhriat chhuah chuan, a thil tihsual thâwi nân kêlnu hmêlhem lo a rawn hlân tûr a ni.

²⁹Sual thâwina lu chungah a kut a nghat ang a, hâlrâl thil hlanna hmunah sual thâwina ran chu a talh tûr a ni.

³⁰Puithiam chuan sual thâwina thisen chu a kutzungtangin a pir ang a, hâlrâl thil hlanna maichâm kî-ah te chuan a tât ang a, thisen la bâng zawng chu maichâm bulah a bun chhuak vek tûr a ni.

³¹Remna inthâwina thilhlanna thau an paih angin a thau zawng zawng chu phawrh chhuak vek sela; puithiam chuan maichâmah

LALPA tâna rimtui atân hâl rawh se. Tichuan, puithiam chuan tlanna a siamsak ang a, amah chu ngaihdam a ni ang.

³²Sual thâwi nâna berâm no a hlan chuan a nu hmêlhem lo a rawn kai tûr a ni.

³³Sual thâwina ran lu chungah a kut a nghat ang a, hâlrâl thil hlanna hmunah sual thâwi nân a talh tûr a ni.

³⁴Puithiam chuan sual thâwina thisen chu a kutzungtangin a pir ang a, hâlrâl thil hlanna maichâm kî-ah te chuan a tât ang a, thisen la bâng zawng chu maichâm bulhutah a bun chhuak vek tûr a ni.

³⁵Remna inthâwina thilhlanna berâm no thau an paih angin a thau zawng zawng chu phawrh chhuak vek rawh se. LALPA tâna meia thilhlân an hlân angin puithiamin maichâmah a hâl tûr a ni. Tichuan, thil a lo tihsual tawhah puithiamin tlanna a siamsak ang a, amah chu ngaihdam a ni ang.

BUNG 5

BAWHCHHIAT SUAL THÂWINA

¹Mi tûpawhin rorêlna hmâah a thu hriat reng emaw, a thil hmuh dân emaw puang tura tih a niha, a puan duh loh chuan, thil sual ti a ni, a mawh a phur tûr a ni.

²Mi tupawhin thil thiàng lo a khawihin, ramsa thiàng lo ruang te, ran thiàng lo ruang te, bawkvâk chi rannung thiàng lo ruang te, a thiàng lo tih hre lova khawih pawh ni se, a bawhlhlawh tho va, a mawh a phur tho tûr a ni.

³Mihringa bawhlhlawhna thil a khawih rêng rêngin—mihring tibawhlhlawh thei thil eng pawh, hre lova khawih pawh ni se—a hriat chhuah hunah a mawh a phur tûr a ni.

⁴Miin thil tha nge sual a nih pawh ngaihtuah Chiang lova ti tûra chhia a lo chham chuan, hre lo chung a chhechhamna chu a hriat chhuah hunah, a thil tihsual mawh chu a phur tûr a ni.

⁵Hêng thil engah pawh hian thiam loh a chan chuan, chû thilah chuan a lo tisual a ni tih a inpuang tûr a ni;

⁶a thil sual tih thâwina tûrin ranrual zînga a nu emaw, berâm no emaw, kêl no emaw, LALPA hnênah sual thâwi nân a rawn hlân tûr a ni. Tichuan, puithiamin a sualnaah chuan inremna a siamsak ang.

⁷Berâm no hlan tûr nei zo lo a nih chuan, a thil sual tih tawh thâwi nân, thûro pahnih emaw, parva no pahnih emaw LALPA hnênah a rawn la tûr a ni: pakhat chu sual thâwi nân, pakhat dang chu hâlrâl thilhlân atân a ni ang.

⁸Puithiam hnênah a rawn keng ang a, ani chuan sual thâwi nân a hlân hmasa ang, a ngâwng chu thuai chhum lo deuhin, a ring a elh tiak tûr a ni.

⁹Sual thâwina thisen chu a then maichâm sîr vêlah a theh ang a, a la bâng zawng chu maichâm bulah a far kangtîr tûr a ni. Sual thâwina a ni si a.

¹⁰A pahnihna pawh dân ang takin hâlrâl thilhlânah a hlân tûr a ni. Tichuan a thil sual tih tawh lakah puithiam chuan inremna a siamsak ang a, ngaihdamna a chang ang.

¹¹Thuro pahni emaw, parva no pahni emaw takngial pawh a tlin lo a nih chuan, thil sual titu chuan chhangphut dip tak, ephah hmun sâwma thena hmun khat sual thâwi nân a rawn keng tûr a ni. Hriak a telh tûr a ni lo va, beraw pawh a telh tûr a ni hek lo, sual thâwina a ni si a.

¹²Puithiam hnênah a rawn keng ang a, puithiam chuan hriatrengna atân a vei khatin a thâm ang a, LALPA hnêna meia thilhlân dân angin maichâmah a hâl tûr a ni. Sual thâwina a ni si a.

¹³Thil sual a lo tih tawhnate lakah puithiam chuan inremna a siamsak ang a; ngaihdam a ni ang. Buhbâl thilhlana tihdân angin a la bâng zawng chu puithiam chanpual tûr a ni ang.”

BAWHCHHIAT THÂWINA

¹⁴LALPA chuan Mosia hnênah:

¹⁵“Miin thil sual a tiha, LALPA thil thianghlim a bawhchhiat palh chuan, LALPA hnênah a sual thâwina tûrin ran rual zînga berâm pa hmêlhem lo a rawn la tûr a ni, sual thâwina atâna ran hlut zâwnng chu hmun thianghlîma tangkaraw sekel hlutna anga chhût tûr a ni.

¹⁶Ani chuan thil thianghlim chung a pawh a lo khawih tawh thâwi dam leh nân hmun ngâa thena hmun khat pêk belhin, puithiam hnênah a pe tûr a ni. Puithiam chuan sual thâwina berâm pain inremna a siamsak ang a, ngaihdam a ni ang.

¹⁷“Mi a lo sual a, LALPA thupêkin a khap thil eng pawh lo bawhchhiain, tisual tih inhre lo mah se, thiam loh a chang tho ang a, a sual mawh a phur tho ang.

¹⁸Ran rual zînga mi berâmpa hmêlhem lo, a hlut zâwnng i chhût angin, sual thâwina thilhlân atân, puithiam hnênah rawn kai rawh se. Tichuan, hre lova thil sual tih chungchângah a hriat loh avângin puithiamin inremna a siamsak ang a, ngaihdam a ni ang.

¹⁹Bawhchhiat sual thâwina a ni e; LALPA dân a bawhchhe ngai si a.”

BUNG 6

¹LALPA chuan Mosia hnênah:

²“Mi tûpawh, a thenawm pain a him zâwk duha a kuta thil a kawltîr chungchângah dâwt sawi te, dahkham pêkkîr duh loh te, rûkrûk te, inbumna hmanga mi thil lâk luihsak te hi LALPA dân bawhchhiatna a ni a;

³thil bo chharin chhar lo anga dâwt a sawi te, dik lo taka chhechham te— hêng thil zînga a engpawh hi miin a tih chuan:

⁴a thil sual tihah mawh a phur a, chuvângin a rûkrûk te, mi thil a lo lak luihsak te, a hnêna miten thil an dahkham a kîr duh loh te, thil bo a chhar te chu a rûl leh vek tûr a ni,

⁵dâwta chhia a lo chham hnan tawh pawh a rûl leh vek tûr a ni. A bi kima a rulh leh bâkah hmun ngâa thena hmun khat a rulh belhchhah ang a, a bawhchhiat sual thâwi niin a neitu hnênah a pe lêt leh tûr a ni.

⁶A bawhchhiat sual thâwina chu LALPA hnênah a hlân tûr a ni; bawhchhiatna sual thâwi nâna puithiam hnêna a hlan tûr chu, ran rual zînga berâmpa hmêlhem lo, a hlut zâwnng i tuk ang a ni tûr a ni.

⁷Tichuan, puithiam chuan LALPA hmâah inremna a siamsak ang a, hêng zînga eng thil pawh a lo bawhchhiatna lakah ngaihdam a ni ang,” a ti a.

HÂLRAL THILHLÂN DÂN

⁸LALPA chuan Mosia a bia a,

⁹“Aarona leh a fapate hnênah thu pê rawh, ‘Hei hi hâlrâl thilhlân hlan dân chu a ni: Hâlrâl thilhlân chu zankhuain, atûk zîng thlengin maichâm chung a thukah chuan a awm tûr a ni a, maichâma mei chu chhawm alh reng tûr a ni.

¹⁰Puithiam chuan puan zaisîn silhfên a inbel ang a, puan zaisîn kekawr a hâ ang, maichâma hâlrâl thilhlân kâng vâp te chu a rût ang a, maichâm sîrah chuan a dah khâwm tûr a ni.

¹¹A silhfênte a hlip ang a, silhfên dang a inbel ang; tichuan, a vâp chu riahhmun daipâwn hmun thiangah a paih tûr a ni.

¹²Maichâma mei chu chhawm alh reng tûr a ni a; a mit tûr a ni lo. Puithiam chuan tûk tinin thingfâk a tuah tûr a ni a, hâlrâl thilhlân pawh a rem tha zel tûr a ni; remna thilhlân sathau chu a hâl thîn tûr a ni.

¹³Maichâmah chuan mei a alh reng ang a; englai mahin a mit tûr a ni lo.

BUHBÂL THILHLÂN HLAN DÂN

¹⁴“Hei hi buhbâl thilhlân hlan dân tûr chu a ni: maichâm chungah Aarona fapaten LALPA hmâah an hlân tûr a ni.

¹⁵Buhbâl thilhlân aţangin chhangphut dip vei khatin a thûm ang a, hriak nê, buhbâl thilhlana berâw awm zawng zawng nê a la ang a, LALPA hriatreng nân rîmtui atân maichâmah a hâl tûr a ni.

¹⁶A la bâng chu Aarona leh a fapaten an ei ve ang; dawidim telh loh chhang nê hmun thianghlîma ei tûr a ni a; biakbûk tual zâwlah an ei tûr a ni.

¹⁷Dâwidim pawlh chhang nêna ur tûr a ni lo. Meia thilhlân aţangin chanvo ka siamsak a; sual thâwina thilhlân leh bawhchhiat thâwina thilhlân te anga thil serh ber a ni.

¹⁸Aarona thlahte zînga mipa zawng zawngin an ei thei ang. LALPA hnêna meia thilhlân chungchângah in thlah kal zêlte tân dân nghet a ni tawh ang. A khawihtu apiang chu serh hlan an ni ve nghâl tûr a ni,” a ti a.

¹⁹LALPA chuan Mosia hnênah,

²⁰“Aarona leh a fapaten heti hian an hlân thîn tûr a ni: hriakthih an dawn ni aţangin ni tin buhbâl thilhlân LALPA hnêna an hlan thîn tûr chu, chhangphut dip ephah hmun sâwma thena hmun khat a ni a, zîng lamah a zâtvê, tlai lamah a zâtvê a ni.

²¹A urna thlêngah hriak nêna siam tûr a ni. A inpawlh tâwk hunah i rawn la lût tûr a ni. Chhang phel sîn tê têa buhbâl thilhlân chu rîmtui atân LALPA hnênah i hlân tûr a ni.

²²A fapate zînga puithiam, a aiawh tûra hriakthihin a hlân tûr a ni. Chû chu kumkhuaa LALPA dân a ni. A vaia hâl ral vek tûr a ni.

²³Puithiam tâna buhbâl thilhlân apiang chu a vaia hâl ral zêl tûr a ni. Ei tûr a ni lo,” a ti a.

SUAL THÂWINA DÂN

²⁴LALPA chuan Mosia a bia a,

²⁵“Aaronah leh a fapate hrilh la, ‘Hetiang hi sual thâwina dân chu a ni: Hâlrâl thilhlân hlanna tûr ran talhna hmunah, sual thâwina ran pawh LALPA hmâah talh tûr a ni. Thil thianghlîm ber a ni si a.

²⁶Sual thâwina hlântu puithiam chuan a ei tûr a ni a. Biakbûk kawtzâwl, hmun thianghlîmah ei tûr a ni.

²⁷A sa khawihthu apiang pawh serh hran a ni ve tûr a ni. Silhfênah thisen a per chuan a kaina lai chu hmun thianghlîma sûk fai tûr a ni.

²⁸A chhumna hlumbêl chu tihkeh tûr a ni. Dârbêla chhum a nih chuan, nawh faia tuia tleuh fai tûr a ni.

²⁹Puithiam mipate chauhin a sa chu an ei thei ang. Thil thianghlîm ber a ni si a.

³⁰Amaherawhchu, sual thâwina thisen, sual tlan nâna biakbûk hmun thianghlîma lâk luh sa rêng rêng chu ei tûr a ni lo va. Meia hâlrâl zâwk tûr a ni.

BUNG 7**BAWHCHHIATNA SUAL THÂWI DÂN**

¹Chutiang bawkin bawhchhiatna sual thâwi dân tûr chu hetiang hi a ni (thil thianghlîm ber a ni si a):

²Hâlrâl thilhlân tûr talhna hmunah bawhchhiat sual thâwina pawh an talh tûr a ni. A thisen chu maichâm vêlah an theh kual vek tûr a ni.

³Sa thau zawng zawng a hlân vek tûr a ni. A mei thau leh a kawchhûng tuamtu thau te,

⁴a kal pahnih leh a tuamtu thau te, a kal chung a thin bawhtu thau nêw zawng chu a phawrh chhuak vek ang a;

⁵puithiamin maichâmah LALPA tâna meia thilhlân angin a hâl tûr a ni. Bawhchhiat thâwina a ni si a.

⁶Puithiam zînga mipa zawngin an ei thei ang. Hmun thianghlîmah ei tûr a ni. Thil thianghlîm ber a ni si a.

⁷Bawhchhiat thâwina hi sual thâwina ang bawh a ni a; a dân pawh thuhmun reng a ni: remna siamsaktu puithiamin a sa chu a nei tûr a ni.

⁸Puithiamin hâlrâl thil a hlan rêng rêngin, chu hâlrâl thil hlântu puithiam ngei chuan a vun chu a nei tûr a ni.

⁹Buhbâl thilhlân rêng rêng, thuka hem leh chhang ur thlênga ur te, a nih loh leh, thîrbêla kan te chu a hlântu puithiam chan tûr a ni.

¹⁰Buhbâl thilhlân rêng rêng, hriaka hmeh pawh, a ro pawh ni se, Aaronah fapa zawng zawngte chan tûr a ni a, an insem vek tûr a ni.

REMNA THILHLÂN DAN

¹¹Hei hi remna thilhlân inthâwi dân, LALPA hnêna an hlan dân tûr chu a ni:

¹²Lâwmthu sawi nâna hlan a nih chuan, hriak nêna in pawh dâwidim telh loh chhang te, dâwidim telh loh chhangpêr hriak

hnawih te, chhangphut tha chi hriak nêna hmeha siam te nêw, lâwmthu sawi inthâwi nân a hlân tûr a ni.

¹³Chhâng chhang bâkah chuan, inremna thilhlân a lâwmthu sawina hlanah dâwidim telh chhang pawh hlân tel rawh se.

¹⁴Chhang a hlan apiangin tlang khat zêlin LALPA tân thên thilhlânah a hlân tûr a ni. Chû chu remna thilhlân thisenah thehtu puithiam chanpual tûr a ni.

¹⁵Lâwmthu sawina tûra remna thilhlân inthâwina sa chu hlan ni lâ lâ ei tûr a ni. Ei bâng chu a tûk thlenga dahthat tûr a ni lo.

¹⁶Inthâwina thilhlân chu intiamkamna thil emaw, mahni inpêkna thil emaw a nih chuan, inthâwina thil a hlan nîa ei tûr a ni a; ei bâng pawh a tûka ei leh theih a ni;

¹⁷a tûk thumna thlenga inthâwina sa ei bâng la awm chu hâl ral vek tûr a ni.

¹⁸A ni thum ni thlenga remna inthâwina sâ a enga pawh an ei chuan, a thilhlân chu pawm a ni lo vang a, thilhlânah pawh chhiar a ni hek lo vang; a hlântu tân intihbawhlhlawhna a ni zâwk ang a, a eitu chuan a mawh a phur tûr a ni.

¹⁹A sa chu thil bawhlhlawh nêw intawh ta se, ei tûr a ni lo. Hâl ral vek tûr a ni. A sa thianghlîm lai te erawh chu mi thiange chuan an ei thei ang.

²⁰Amaherawhchu, LALPA hnêna remna inthâwina thilhlân sa, thian lohna nei chu miin a ei chuan, chû mi chu a mite laka tuithlâr tûr a ni.

²¹Tûpawhin thil thianghlîm lo rêng rêng, mihring bawhlhlawhna te, ran thianghlîm lo te, thil thianghlîm lo rêng rêng a khawih a, remna thilhlân inthâwina sa, LALPA chanpual a ei chuan, chû mi chu a mite zîng a tanga tuithlâr tûr a ni,” a ti a.

THAU LEH THISEN EI LOH TÛR

²²LALPA chuan Mosia hnênah,

²³“Israel fate hnênah hrilh rawh: ‘Sathau rêng rêng, bâwng thau te, berâm leh kêl thau te in ei tûr a ni lo.

²⁴Ran, amaha thi thau te, ramsain a seh hlum thau te chu thil dangah chuan hman theih a ni a; ei erawh chu in ei tûr a ni lo.

²⁵Tupawh, LALPA tâna miin meia thilhlân an hlan sathau ei chu a mite zînga ta tuithlârin a awm tûr a ni.

²⁶Sava thisen emaw, ramsa thisen emaw pawh ni se, in awmna hmun apiangah thisen rêng rêng in ei tûr a ni lo.

²⁷Thisen ei chu tupawh ni se ama mite zînga ta tuithlâr tûr a ni.

AARONAH LEH A FAPATE CHANPUAL

²⁸LALPA chuan Mosia a hrilh a,

²⁹“Israel fate hrilh rawh: ‘LALPA hnêna remna atâna inthâwina hlântu chuan, a inremna atâna inthâwina hlana mi chu LALPA hnênah rawn la rawh se.

³⁰Ama kut ngeiin LALPA tâna meia a thilhlân chu a rawn keng tûr a ni. Sathau leh a irno chu LALPA hmâah thên thilhlân anga a thên theih nân rawn la rawh se.

³¹Puithiamin maichâmah sathau chu hâl rawh se; a irno erawh chu Aaronah leh a fapate chan tûr a ni a.

³²Inremna inthâwina atâna i hlan sa dâr dîng lam chu thên thilhlân anga chawikân tûrin puithiam i pe tûr a ni.

³³Aarona fapate zînga mi, remna inthâwina thisen leh sathau hlântuin sa dâr chu a chang tur a ni.

³⁴Remna thilhlân sa, Israel fate hnêna ta ka lak hran, a âwm bâwr thêna hlan leh a dâr, chawi kâna hlan hi, Israel fate hnêna ta puithiam Aarona leh a thlahte chanpual tûra kumkhaw dân atân ka ruat a ni,” a ti a.

³⁵Hêng hi LALPA hnêna meia thilhlân ami, Aarona leh a fapate chanpual atâna serh hran, LALPA puithiam ni tûra Mosian a hlan nia a ruat kha a ni.

³⁶Hriakthih a chantîr nî aţanga an thlah kal zêl thlenga Israel faten an pêk atân, hei hi thuruat hmanga LALPA pêk a ni.

³⁷Hêng hi hâlral thilhlân te, bubbâl thilhlân te, sual thâwina te, bawhchhiat thâwina te, hriakthihna te leh remna thilhlanna dân thu,

³⁸Sinai Thlâlêra LALPAN Israel fate hnênah inthâwina hlân tûra thû a pêk nîa, Sinai Tlânga Mosia hnêna LALPA pêk te chu a ni.

BUNG 8

AARONA LEH A FATE SERH HRANNA

¹LALPA chuan Mosia a hrilh a:

²“Aarona leh a fapate hruai la, thuamnâw te, thih tûr hriak te, sual thâwina tûr bâwngpa pakhat, berâmpa pahni leh, dâwidim telh loh chhang bâwm khat nên keng rawh se;

³mipuite chu biakbûk kawngka bulah lo kal khâwm vek rawh se,” a ti a.

⁴Tichuan, Mosia chuan LALPA thupêk ang chuan a ti a. Biakbûk kawt zâwlah chuan mipuite chu an lo pung khâwm hmur mai a.

⁵“Hetiang hi LALPAN ti tûra thu a pêk chu a ni e,” tiin Mosian punghâwmho chu a hrilh a.

⁶Mosia chuan Aarona leh a fapate chu a rawn hruai a, tuiin a bual ta a.

⁷Kawr a hâktîr a, kawnghrên a hrêntîr a, kawrfual a hâktîr leh a, a chungah puithiam kawr a hâktîr bawk a; a hrêna, mâwi taka tah chu a kâwngah a hrên behsak a.

⁸Puithiam âwmbel pawh a bel bawk a; chutah chuan Urim leh Thummim pawh a dah a.

⁹A lû-ah diar a khimtîr a. LALPAN Mosia hnêna thu a pêk angin, a diar khim hma lamah chuan rangkachak phêk, lallukhum thianghlim chu a vuah a.

¹⁰Mosia chuan hriak thih chi chu a la a, biakbûk leh a chhûnga thil awm zawng zawng chu hriak a thih a, a hlân thianghlim ta a.

¹¹A then chu maichâmah wawi sarih a theh a, maichâm leh a bungbêl zawng zawng te, tuichhûn bêl leh a hûnchhan te hriak a thih a, a hlân thianghlim vek a.

¹²Aarona lû-ah hriak a leih a, hriak thihin a thian thianghlim ta a.

¹³Mosia chuan Aarona fapate chu hruaiin kawrte chu a hâktîr a, a hrênnain a hrêng a, lukhum a khumtîr a, LALPAN a hnêna thu a pêk ang zêlin Mosia chuan a ti a.

¹⁴Sual thâwina bâwngpa a rawn kai a. Aarona leh a fapate chuan sual thâwina bâwngpa lu chungah an kut an ngat a.

¹⁵Mosia chuan a talh a. A thisen a la a, maichâm kî-te chu a kutzungţangin a tât hlawm a, maichâm chu a tithianghlim a. Maichâm bulah chuan thisen chu a leih bua a, remna siamna tûrin a hlân thianghlim a.

¹⁶Chumi zawhah chuan a rîlbawh thau zawng zawng te, a thîn tuamtu râng te, a kal pahni leh a thau te chu a la a, maichâmah chuan Mosian a hâl a.

¹⁷Bâwngpa vun te, a sa te, a kawchhûng te erawh chu LALPAN a hnêna thu a pêk angin Mosian daipâwnah a hâl a.

¹⁸Hâlral thilhlân atân berâmpa a rawn kai leh a. Aarona leh a fapate chuan berâmpa lû-ah chuan an kut an ngat a,

¹⁹Mosia chuan a lo talh a. Maichâm chung chu a thisenin a theh kual vek a.

²⁰Berâmpa chu a chan darh a; Mosia chuan a lû te, a sa hrang te leh a thau te chu a hâl ral a.

²¹A kawchhûng leh a kête chu tuiin a sil a. Mosia chuan berâmpa chu maichâmah chuan a pumin a hâl a. LALPAN Mosia thu a pêk angin, chu chu LALPA hnêna meia thilhlân, rimtui atâna hâlral thilhlân a ni si a.

²²Berâmpa pahniha, berâmpa serh hran chu a rawn kai leh a. Aarona leh a fapate chuan berâmpa lu chungah chuan an kut an ngat a,

²³Mosia chuan a talh a. A thisen a la a, Aarona beng dîng lam tlângah te, a kut dîng lam zungpuiah te, a ke dîng lam zungpuiah te a tât a.

²⁴Aarona fapate chu a hruai a. Mosia chuan an beng dîng lam hmâwrah te, an kut dîng lam zungpuiah te, an ke dîng lam zungpuiah te thisen chu a tât a. Mosia chuan maichâm chung chu a kual chhuakin thisenin a theh a.

²⁵Chumi zawhah sathau leh a mei thau te, a rîlbawh thau zawng zawng te, a thîn tuamtu râng te, a kal pahni leh a thau te, a bawp dîng lam te a la a;

²⁶LALPA hmaa dâwidim telh loh chhang an dahna bâwma mi dâwidim telh loh chhang pakhat, hriak nêna ur chhang pakhat leh chhangpêr pakhat chu lâ-in, sathau leh a bawp dîng lam chungah a dah a;

²⁷chûng zawng zawng chu Aarona leh a fapate kutah a dah a, LALPA hmâah thên thilhlân atân an thên ta a.

²⁸Mosian an kut aţangin a la a, hâlral thilhlanna maichâmah chuan a hâl a. Rimtui atâna serh hranna thilhlân a ni. Chû chu LALPA tâna meia thilhlân a ni.

²⁹Mosia chuan a âwm bâwr chu a la a, LALPA hmâah thên thilhlân angin a thên a. LALPAN Mosia hnêna thu a pêk angin, chu chu serh hranna berâmpa, Mosia chanvo chu a ni.

³⁰Mosia chuan hriak thih chi leh maichâma thisen thenkhat chu a la a, Aarona leh a silhfên chungah te, a fapate leh a fapate

silhfên chungah te a theh a; tichuan Aarona leh a silhfên te, a fapate, a fapate silhfênte chu a hlân thianghlim ta a.

³¹Mosian Arona leh a fapate hnênah, “Sa kha biakbûk kawngka bulah chhûm ula, bâwm chhûnga chhang hlan thianghlim te nê ‘Arona leh a fapaten an ei ang’ ka lo tih tawh ang khân ei rawh u.’

³²“A sa leh chhang ei bâng chu meiah hâl vek tûr a ni.

³³Inserh thianghlimna ni a kim hma chuan ni sarh chhûngin biakbûk kawngka aţangin in chhuak tûr a ni lo.

³⁴Vawiina a tih ang hian LALPA chuan inremna siamsak tûr che u-in, thu a pê ta e.

³⁵Chuvângin, LALPA rawngbâwl hna thawk tûrin, ni sarh chhûng chu biakbûk kawngka bulah hian achhûn azânin in awm tlat tûr a ni; chû chu thi lova in awmna tûr a ni a; chutiang ti tûra thu pêk chu ka ni e,” a ti a.

³⁶Tichuan, Aarona leh a fapate chuan Mosia hmanga LALPA thupêk ang zêlin thil engkim an ti a.

BUNG 9

PUITHIAM RAWNGBÂWLNA A INĀN

¹A ni riatnaah chuan Mosian Aarona te, a fapate leh Israel upate chu a ko va.

²Aarona hnênah, “Nangmah ngeiin sual thâwi nân bâwngpa tuai leh hâlral thilhlân atân berâmpa hmêlhem lo vê vê kai la, LALPA hmâah hlân rawh.

³Israel fate hnênah heti hian ti la, ‘Sual thâwi nân kêl no leh, hâlral thilhlân atân bâwng no leh berâm no, kum khat mi vê vê, hmêlhem lo rawn kai ula,

⁴LALPA hmâah remna inthâwi nân bâwngpa tuai leh berâmpa leh buhbâl thilhlân tûr hriak nêna pawl sa rawn buatsaih rawh u; vawiinah hian in hmâah LALPA a lo lang dâwn e,’ tiin,” a ti a.

⁵Tichuan, Mosia thupêk angin biakbûk hmâah an rawn kai a. Pung khâwmho zawng zawng chuan an rawn hnaih a, LALPA hmâah chuan an ding a.

⁶Mosia chuan, “In hnênah LALPA ropuina a lo lan dâwn avângin LALPAN hetiang a ti tûr hian thu a pê che u a ni,” a ti a.

⁷Mosia chuan Aarona hnênah, “Maichâmah va kal la, nangma sual thâwi nân leh i pualin hâlral thilhlân va hlân la, nangma tân leh mipuite tân inremna siam rawh. Mipuite thilpêk chu hlansak la, LALPA thupêk angin inremna siamsak rawh le,” a ti a.

⁸Tichuan, Aarona chu maichâmah chuan a va kal a, ama pualin sual thâwi nân bâwng no chu a va talh a.

⁹Aarona fapate chuan thisen chu an rawn lâksak a. Thisenah chuan a kutzungtang a hnim a, maichâm kî-te chu a hnawih a, maichâm bulah chuan thisen chu a leih baw ta a.

¹⁰A thau te, a kal te, a thin tuamtu rângte chu LALPAN Mosia hnêna thu a pêk angin maichâmah chuan sual thâwi nân a hâl a.

¹¹A sa leh a vun te chu daipâwnah a hâl ral a.

¹²Hâlral thilhlân pawh chu a talh a; Aarona fapate chuan thisen chu an lo pe a, chû chuan maichâm chu a vêlin a theh a.

¹³Hâlral thilhlân tûr sa chan darh sa leh a lû chu an pe a, maichâmah chuan a hâl a.

¹⁴A kawchhûng leh a kête chu a silfai a, hâlral thilhlân atân maichâmah chuan a hâl ta a.

¹⁵Mipuiho thilhlân chu a rawn la a, mipuite tâna sual thâwina kêl chu rawn kaiin a talh a, a hmasa zâwk a tih dân angin sual thâwi nân a hlân a.

¹⁶Hâlral thil hlân pawh a rawn la a, a dân ang zêlin a hlân a.

¹⁷Chumi hnûah buhbâl thilhlân a rawn la a, vei khatin a thâm a, zîng lama hâlral thilhlân a hâl bâkah, maichâmah chuan a hâl bawk a.

¹⁸Mipuite tâna inremna thilhlana inthâwi nân bâwngpa leh berâmpa a talh bawk a. Aarona fapate chuan a thisen chu an rawn pe a, ani chuan maichâm chu a theh kual a,

¹⁹bâwngpa leh berâmpa ami sathau te—a mei thau te, a rilbawh thau te leh a kal te, a thin tuamtu râng te a ni a;

²⁰chûng thau chu a âwm bâwr chungah an dah a. A thau chu maichâmah chuan a hâl a;

²¹a âwm bâwr leh a bawp ding lam chu Mosian thu a pêk angin Aarona chuan thên thilhlân angin LALPA hmâah a thên a.

²²Aarona chuan mipui lamah kut a phar chhuak a, mal a sâwm a, sual thâwina te, hâlral thilhlân te leh, remna thilhlân te a hlan zawh chuan a lo chhuk ta a.

²³Mosia leh Aarona chu biakbûk chhûngah chuan an lût a, an lo chhuak leh a, mipuite chu mal an sâwm a. LALPA ropuina chu mipui zawng zawng chungah chuan a lo lang a,

²⁴LALPA hma aţang chuan mei a lo chhuak a, maichâma hâlral thilhlân leh sathau te chu a kâng ral vek a. Mi zawng zawngin chû chu an hmû a, an au dur dur a, an bawkkhup a.

BUNG 10

NADABA LEH ABIHUA-TEN MEI BAWLHLAWH AN HMANG

¹Aarona fapa Nadaba leh Abihua te chuan rimtui hâlbûrin mei an la a, rimtui an phul a, tihdân tûra thu a pêk ang lovin mei chi dang LALPA hmâah an hlân a.

²Tichuan, LALPA hnên aţangin mei a lo chhuak a, anni chu a kâng hlum a, LALPA hmâah chuan an thi ta a.

³Mosia chuan Aarona hnênah, “LALPAN heti hian a ti e: ‘Mi rawn hnaihtute chuan Ka thianghlimzia an hre tûr a ni; Mipui zawng zawng hmâah Châwimâwiin ka awm tûr a ni,’” a ti a. Aarona erawh chu a ngâwi reng a.

⁴Mosia chuan Misaela leh Elzaphana, Aarona pami Uzziela fapate chu a ko va, an hnênah, “Lo hnai ula, in unaute hi hmun thianghlim aţang hian riahhmun daipâwnah va zâwn chhuak teh u,” a ti a.

⁵Tichuan, an va hnaih a, Mosian a hrilh angin an kawrah an chelha, riahhmun pâwn lamah an zâwn chhuak ta a.

⁶Mosia chuan Aarona leh a fapa Eleazara leh Ithamara te hnênah, “In sam kha thlah suh ula, in puan pawh pawt thlêr suh u, in thih hlauh chuan mipui zawng zawng chungah thinurna a lo

thleng mai ang. LALPAN meia a tihkan in unaute chu Israel chhângkaw pumpuiin sîn zâwk rawh se.

⁷Biakbûk kawngka pâwn lamah in chhuak tûr a ni lo, chuti lo chuan in thi ang, LALPA hriak thihna hriak chu in chungah a awm si a,” a ti a. Tichuan, Mosia thu chu an zâwm ta a.

PUITHIAMTE AWM DÂN TÛR

⁸LALPA chuan Aaron a chu a bia a:

⁹“Nangmah emaw, i bula awm i fapaten emaw, biakbûka in luh dâwnin zû emaw, ruihtheih thil rêng rêng emaw in suh u, chuti lo chuan in thi ang. In thlah kal zêlte tân kumkhuaa dân nghet a ni ang;

¹⁰tichuan, thil thianghlim leh thianghlim lo te, a thi ang leh thi ang lo te in thliar thiam ang a,

¹¹Mosia hmanga LALPAN a sawi dân thupêk zawng zawng Israel fate hnênah in zirtîr thei dâwn nia,” a ti a.

¹²Mosia chuan Aaron leh a fapa la dam Eleazara leh Ithamara te a bia a: “Buhbâl thilhlân leh LALPA hnêna meia thilhlân âtâna hman bângte chu la ula, dâwidim tel lovin maichâm sîrah hian ei rawh u; thil thianghlim ber a ni si a.

¹³Hmun thianghlimah chuan ei ula, LALPA hnêna meia thilhlân a nih avângin nangmah leh i fapate chanpual liau liau a ni e; chutiang ti tûra thupêk ka ni alâwm.

¹⁴Thên thilhlana hlan a irno leh chawi kâna hlan a bawp chu, nang leh i fapate leh, in hnêna awm in fanute nê, hmun faiah in ei tûr a ni; Israel faten remna thilhlân inthâwi nâna an rawn hlan hi, nang leh i fapate chanpual a ni si a.

¹⁵Chawi kâna hlan a bawp leh thêna hlan a irno te chu LALPA hmâa thên âtân a thau, meia hlan rualin rawn la sela. Chu chu nang leh i hnêna awm i fapaten kumkhuaa an chanvo ni hlen tûrin LALPAN thû a pê a ni,” a ti a.

¹⁶Chumi zawhah chuan Mosian sual thâwina kêl chu fimkhur takin a zawng a, an lo hâl dêr tawh a lo ni a. Aaron a fapa la dam Eleazara leh Ithamara te chungah chuan a thinur ta a.

¹⁷“Engtizia nge sual thâwina chu hmun thianghlimah in ei loh, thil thianghlim ber a ni asin; LALPA hmâah an tân remna siamsaka, mipuite sualna phurhsak tûra Pathian pêk che u a ni lo’ m ni?

¹⁸En teh u! A thisen pawh hmun thianghlima lak luh a nih loh hi; thu ka pêk che u ang khân hmun thianghlima ei tûr in ni asin,” a ti a.

¹⁹Aaron a chuan Mosia hnênah, “Ngai teh, wawiinah hian LALPA hmâah an sual thâwina leh hâlral inthâwina an hlân tawh a, hetiang chhiatna hian min tlâkbuak ta baw si a! Wawiin ni angah hian sual thâwina ei ta îla, LALPA hmuha pawm tlâk pawh a ni dâwn em ni?” a ti a.

²⁰Mosia chuan chû thû a han hriat chuan a lungâwi ta a.

BUNG 11

EI THIANG LEH THIANG LO

¹LALPA chuan Mosia leh Aaron a chu thu a hrilh a,

²“Israel fate hnênah heti hian hrilh rawh u, ‘Lei chungah sa zawng zawng zîngah hêngte hi in ei thei ang;

³Nungcha zîngah, ke tin kâk chhuaka, chawpai thial nawn chi tawh phawt chu—in ei thei ang.

⁴Amaherawhchu, chawpai thial nawn leh, tin kâk zînga mi hêngte hi in ei tûr a ni lo: sanghâwngsei hian a chawpai a thial nawn na a, a ke tin a kâk loh avângin ei thi ang lo a ni a;

⁵khâma chêng sangâwi hian a irh chhuah thial nawn mah se, a tin a kâk loh avângin a thi ang lo va;

⁶sazupui pawh a irh chhuah thial nawn mah se, a tin a kâk loh avângin a thi ang lo baw;

⁷vawh hi tin kâk chhuak chi nei nimah se, a irh chhuah a thial nawn ve lo va, in tân ei thi ang lo a ni.

⁸An sa chu in ei tûr a ni lo va, an ruang pawh in khawih tûr a ni hek lo. In tân bawlhhlawh an ni.

⁹Tuia chêng zîngah hêngte hi in ei thei e: tuia chêng chi pângparh leh puhlip nei chi chu, tuipua chêng te, luia chêng te pawh in ei thei ang.

¹⁰Mahse, tuipui leh luia chêng si, pângparh leh puhlip nei lo, tuipui chhûnga che vêl zawng zawng te, tuia chêng nungcha tinrêngte chu, in tân thil tenawm a ni.

¹¹In tân thil tenawm a ni a; a sa rêng rêng in ei tûr a ni lo, a thi ruang te pawh thil tenawm a ni.

¹²Tuia chêng pângparh leh puhlip nei lo tawh phawt chu—in tân tenawm vek a ni.

¹³Sava zîngah hêngte hi tenawma ngaih tûr an ni; tenawm an nih avângin ei loh tûr a ni: mupui, mulukawlh, muârla,

¹⁴mutê leh mu chi rêng rêng te;

¹⁵cho-âk chi rêng rêng;

¹⁶ostrik, vabak, tuipui sava, mupui chi rêng rêng,

¹⁷hrângkir, lui dung mutê, ngâwihûp;

¹⁸chingpirinû, va-inronghâk, mulukawlh;

¹⁹kânghlâi, dîl sava chi rêng rêng, chhuangtuar leh bâk te.

²⁰Rannung thla nei, ke palîa kal chi rêng rêng chu in tân tenawm vek a ni.

²¹Rannung thla nei zîngah ke pali hmanga bawkvâka kal chite chu in ei thei ang: chûngte chu lei chungah inperh zuang theia bawppui nei chite an ni.

²²Hêng hi ei theih chi chu an ni: khaukhuap chi rêng rêng te, khaukhuap thil ei chhe chi te, perhpâwng chi te leh khauchher chi te hi.

²³Rannung thla nei chi dang, ke pali neite chu in tân tenawm an ni.

RAN BAWLHHLAWHTE

²⁴Hêngte hian mi an tibawlhhlawh thei; a thi ruang khawihthu apiang tlai thlengin an bawlhhlawh ang;

²⁵a sa hrang khawihthu pawhin a silhfênte a su fai tûr a ni a, tlai thlengin a bawlhhlawh ang;

²⁶Tin kâk chhuak lo, a chawpai pawh thial nawn lo chu, eng sa ruang pawh ni se, in tân bawlhhlawh a ni. A khawihthu pawh a bawlhhlawh ang.

²⁷Tin kâk chhuak lo, a chawpai pawh thial nawn lo chu, eng sa ruang pawh ni se, in tân bawlhhlawh a ni. A khawihthu pawh a bawlhhlawh ang.

²⁸Chutiang sa ruang latu apiang chuan a silhfênte a su fai tûr a ni a, tlai thlengin a bawlhhlawh ang. In tân thil bawlhhlawh a ni e.

²⁹Hêng lei chung a bawkvâka kal zînga mite pawh in tân bawlhhlawh a ni ang; bui te, chaichîm te, tangkeu chi rêng rêng te;

³⁰chawkê te, tangkâwng te, laitel te, kâwlchawr te leh laikng te.

³¹Hêng bawkvâka kal chite hi in tân bawlhhlawh vek a ni. A thi tawh taksa khawih chu tlai thlenga bawlhhlawhna a ni.

³²A thi tawh taksain a delh apiang chu a bawlhhlawh zêl ang, thing chungah emaw, puan chungah emaw, savun emaw, ip chungah emaw, hmanraw hman lai chungah pawh ni se, tuia chiah tûr a ni. Tlai thlengin a bawlhhlawh ang a; chumi hnûah chuan a lo thianga tawh ang.

³³Hluma siam bêl engpawh a delh chuan in tikeh zêl tûr a ni; a chhûngah eng thil pawh awm se a bawlhhlawh a ni:

³⁴ei tûr dahna bêl chungah tui bua se, a bawlhhlawh nghâl a, chutiang bêl chhûnga tui in tûr chawp chuan a bawlhhlawh a ni.

³⁵Chutiang sa thi ruang pangti eng lai pawhin a delh apiang chu a bawlhhlawh zêl ang; thuk a ni emaw, chhang ur bêl a ni emaw, tihkeh tûr a ni; tihbawlhhlawh a ni a, in tân bawlhhlawh a ni ang.

³⁶Tuikhur emaw, tui tam tak dahna tuizêm emaw a nih erawh chuan a thianghlim tho vang, sa ruang khawih apiang an lo bawlhhlawh ang.

³⁷Chutiang sa ruang them chuan thlai chi tuh tûr delh sela, a thianghlim reng tho vang.

³⁸Thlai chi chu tuia an chiah laia sa thi ruang a eng lai pawh lo tla se, in tân thil bawlhhlawh a ni.

³⁹Sa ei thianga eng pawh a thih chuan, a ruang khawihthu chu tlai thlengin a bawlhhlawh ang.

⁴⁰A sa eitu chuan a kawr te a su fai ang a, tlai thlengin a bawlhhlawh ang. Sa ruang phurtu pawhin a thuamnawte a su fai tûr a ni a, tlai thlengin a bawlhhlawh ang.

⁴¹Lei chung a bawkvâka kal chi rêng rêng chu bawlhhlawh a ni ang. A sa ei loh tûr a ni.

⁴²A tlenga tleng chi engpawh, ke palia kal chi engpawh, ke tam tak nei, lei chung a bawkvâka kal chi rannung rêng rêng chu in ei tûr a ni lo—thil tenawm an ni si a.

⁴³Bawkvâka kal chi rêng rêng in intibawlhhlawh tûr a ni lo; chutiang thil chuan tibawlhhlawh che u suh se, hêng thilte hian in lo intibawlhhlawh hlah dah ang e.

⁴⁴Kei hi LALPA in Pathian ka ni si a. Chuvangin, nangmahni kha intithianghlim rawh u; in thianghlim tûr a ni, kei ka thianghlim si a. Lei chung a bawkvâka kalte avâng hian intibawlhhlawh suh u.

⁴⁵Kei hi in Pathian ni tûra Aigupta ram atanga nangmahni hruai chhuaktu che u LALPA chu ka ni. Chuvângin, in thianghlim tûr a ni, kei ka thianghlim si a.

⁴⁶Hei hi ramsa te, sava te, tui chhûnga chêng nungcha tinrêng te, khawmuala vâk vêl rannung tinrêngte chungchanga dân chu a ni,

⁴⁷thil thianghlim leh thianghlim lo thliar hranga, sa ei thianga leh thianga lo te thliar hran a nih theih nân, tiin, a ti a.”

BUNG 12

NAU NEIH ZAWHA INTHEH DÂN

¹LALPA chuan Mosia hnênah,

²“Israel fate hnênah hrilh rawh: ‘Hmeichhiain nau a paia, mipa a hrin chuan, ni sarikh chhûng a bawlhhlawh ang; a bawlhhlawh hun pangngai angin a bawlhhlawh ang.

³A ni riat nîah naute serh hmâwr vun chu tan tûr a ni.

⁴A thisen chhuak avânga inthen thianghlim nân nu chu ni sawmthum pathum dang bawlhhlawh a la ni ang. Inthen thianghlim hun a tâwp hma chuan thil serh a khawih tûr a ni lo va, hmun thianghlimah a kal tûr a ni hek lo.

⁵Fanu a hrin erawh chuan, kâr hnih chhûng a bawlhhlawh ang, a thisen chhuak avânga inthen thianghlim nân nu chu ni sawmruk paruk chhûng bawlhhlawh a la ni ang.

⁶A inthen thianghlimna ni a zawh hunah fapa pawh, fanu pawh ni se, puithiam hnênah hâlrâl thilhlân atân berâm no kum khata upa leh, sual thâwi nân pârva tuai leh thûro nê biakbûk kawngka bulah a rawn keng tûr a ni.

⁷Ani chuan LALPA hmaah hlânin inremna a siamsak ang. A thisen chhuak ata chu then thianghlim a ni tawh ang. Hei hi nausên mipa emaw, hmeichhia emaw hringtu tâna dân a ni e.

⁸Berâm no a tlin zo lo a nih chuan, thûro pahnih emaw, pârva tuai pahnih emaw a rawn keng thei ang—pakhat hâlrâl thilhlân atân, a pakhat zâwk chu sual thâwi nân. Tichuan, puithiamin inremna a siamsak ang a, a lo thianghlim tawh ang.

BUNG 13

PHÂR ENKAWL DÂN

¹LALPA chuan Mosia leh Aaron a te hnênah:

²“Tû emaw vuna phâr natna ni âwm taka a vûn a, a vâra bawl emaw, pân khir emaw a awm chuan puithiam Aaron a hnênah emaw, a fapa puithiam zînga mi tuemaw hnênah emaw kalpui tûr a ni.

³Puithiam chuan a pangtia pân chu a lo endik ang a; a pân vêla hmul chu a lo vâ a, a pân chu a vun aia thûka a lan chuan phâr natna a ni a. Puithiam chuan ngun taka enin mi bawlhhlawh a ni tih a puang tûr a ni.

⁴A vuna durh chu a vâra, a vun aia thûk a nih lêm lohva, a hmul pawh a vâ loh chuan, puithiam chuan ni sarikh chhûng a awm hrantîr tûr a ni.

⁵A ni sarikh nîin puithiam chuan a en leh ang a; a pân chu a la ngai reng a, a pân chu a vunah a tai darh loh chuan, puithiam

chuan ni sarih dang a awm hrantîr leh tûr a ni.

⁶A ni sarih nîin puithiamin a en leh ang a; a pân chu a lo hil a, a vun vêlah a ƣaidarh loh chuan, puithiam chuan thianghlimah a puang tûr a ni; pân khîr mai a ni a, a silhfên te a sũ ang a, a lo thianghlim tawh ang.

⁷Amaherawhchu, puithiamin thianghlim tawh anga a puan hnua a pân khîrte a vunah a darh leh chuan, puithiamin a en leh tûr a ni.

⁸Puithiam chuan a ena, a vuna pânthe chu a ƣai darh zêl tih a lo hmuh chuan, a bawlhhlawh tih a puang tûr a ni. Phâr natna a ni.

⁹“Miin phâr natna a vei chuan, puithiam hnênah kalpui tûr a ni.

¹⁰Puithiam chuan a lo en ang a; a vuna vûng chu a vâ a niha, a hmulte pawh a lo vâ a, a vûng chuan hnâi a lâk chuan,

¹¹taksâa phâr benvawn chi a ni. Thianghlim lo a nih avângin, awm hrantîr kher lovin puithiamin thiang loah a puang tûr a ni.

¹²“Phâr chu a vun zawng zawngah a ƣai darh a, a chhîp atanga a ke lêr thlenga puithiamin a hmuh theih chin chin phârin a bâwm khat vek tih a hmuh chuan,

¹³puithiam chuan ngun takin a en ang a; phârin a taksa pum a tuam chhuak vek tawh a nih chuan, chû mi chu a thiang tawh tih a puang tûr a ni. A pumin a vâ chhuak tawh a. A thiang tawh a ni.

¹⁴Amaherawhchu, pân hnâi te a lo awm leh a nih chuan a bawlhhlawh a ni.

¹⁵Puithiam chuan pân hnâite chu a en ang a, thiang lo a ni tih a puang ang; tîsâa pân hnâi chu bawlhhlawh a ni si a. Phâr a ni.

¹⁶Pân hnâi chu a lo ziaawm deuh va, durh vâra a lo chan chuan, puithiam hnênah a kalpui leh tûr a ni.

¹⁷Puithiam chuan a lo en ang a; a durh te chu a lo vâ takzet a nih chuan, hri veitu chu puithiam chuan thiangah a lo puang tûr a ni. A thianghlim tawh si a.

¹⁸“Pangti vunah khawihlî a lo awm a, a dam leh chuan,

¹⁹a khawihlîna hmunah a durh vâ pep emaw, a keu deuh emaw, a vâ sen deuh emaw a nih chuan, puithiam hnênah entîr tûr a ni;

²⁰puithiamin a lo ena, vun aia thûka a lana, a hmul a vâ bawh chuan, puithiam chuan a bawlhhlawh tih a puang tûr a ni. Khawihlîa phâr natna lo piang chhuak a ni.

²¹Puithiamin a lo endik a, hmul vâ pawh a awm lohva, a pangti vun aia thuk lo a niha, a hil tawh bawh chuan, puithiam chuan ni sarih a dah hrang tûr a ni;

²²a pangti vun dangah te a ƣai darh chuan, puithiam chuan bawlhhlawh a ni tih a puang tûr a ni. Phâr natna a ni.

²³Pangtîa bawl vâ chu hmun khat mai a niha, a ƣai darh loh chuan, khawihli ser mai a ni a; puithiam chuan a thianghlim tih a puang tûr a ni.

²⁴“Pangtîa vun meiin a kan a, a durh chhuak chu a vâ pep emaw, vâ sen deuh emaw, a vâ emaw chuan

²⁵puithiamin a en tûr a ni; a durh leu laia hmul chu a lo vâra, a vun aia thuka a lan chuan, kâng aƣanga phâr lo piang chhuak a ni

a. Chuvângin, puithiamin a bawlhhlawh tih a puang tûr a ni. Phâr natna a ni e.

²⁶Amaherawhchu, puithiamin a en dika, a durh vâ laia hmul vâ a awm lohva, a vun aia a thuk lohva, a hil tawh bawh chuan, puithiam chuan ni sarih a dah hrang tûr a ni.

²⁷A ni sarih nî chuan puithiamin a endik tûr a ni. A pangti vunah te a lo ƣai darh a nih chuan, puithiam chuan bawlhhlawhah a puang tûr a ni. Phâr natna a ni si a.

²⁸Mahse a durh vâ chu hmun khat maia a awm a, pangti dangah a darh lohva, a hmuamhmâ chu a hil tawh chuan, a kan vânga durh mai a ni a. Puithiamin thianghlimah a puang tûr a ni, kâng ser mai a ni e.

²⁹“Mîpa emaw, hmeichhia emawin a lû-ah emaw, a khabêah emaw pân a neih chuan

³⁰puithiamin pân chu a endik tûr a ni; vun aia thûka a lana, hmul eng sîn tê tê a awm chuan, puithiamin bawlhhlawh a ni tih a puang tûr a ni. Lu leh khabe hmul kâra phâr puhlip chi a ni.

³¹Amaherawhchu, puithiamin chû pân chu a endik a, vun aia a thûk lohva, hmul dum pawh a awm loh chuan, puithiamin pân hri neia chu ni sarih a dah hrang tûr a ni.

³²A ni sarih nîah puithiam chuan pân chu a endik leh tûr a ni; pân chu a ƣai darh lohva, hmul eng pawh a awm lohva, a pân chu a vun aia a thûk bawh loh chuan,

³³a mehsak tûr a ni, a pân lai erawh chu mêt tel suh se. Puithiam chuan pân hri vei chu ni sarih dang a dah hrang leh tûr a ni.

³⁴A ni sarih nî chuan puithiam chuan pân chu a endik ang a; pân chu a vuna a darh loh va, a vun aia thûka a lan loh bawh chuan, puithiam chuan a thianghlim tih a puang tûr a ni. A puan te a sũ ang a, thianghlim a lo ni tawh ang.

³⁵Then thianghlim a nih hnûah a pânthe chu a vuna a lo darh leh chuan,

³⁶puithiamin a endik leh tûr a ni; a pânthe a vuna a lo ƣai darh leh ngei a nih chuan, puithiam chuan a hmul a eng em tia a endik a ngai lo vang. A bawlhhlawh a ni.

³⁷A pân chu a ngai reng a niha, hmul dum a rawn ƣo chuan, a pân chu a dam ta tihna a ni. A thianghlim tawh a, puithiamin a thianghlim ta tih a puang tûr a ni.

³⁸“Mîpa emaw, hmeichhia emaw pangtîah thil vâ deuh lo awm ta se,

³⁹puithiamin a ensak tûr a ni; a pangti vuna vâ chu a thîm deuh a nih chuan, vun vâ satliah mai a ni a. A thianghlim tihna a ni.

⁴⁰Mîpa chhîp sam a tlâk kawh chuan lukawh a ni mai a, mahse a thianghlim a ni.

⁴¹A chal sam a tlak kawh chuan, chalkawh a ni mai a, mahse a thianghlim tho a ni.

⁴²A lukawlah emaw, a chalkawlah emaw, bawl sendâng deuh a awm zui chuan, a lukawh emaw, chalkawh emawa phâr insiam a ni.

⁴³Puithiamin a endik tûr a ni; a lukawlh emaw, a chalkawlh emawa pân durrh chu, pangti vuna phâr lan dân anga a sendâng deuh a nih chuan

⁴⁴phâr natna vei a ni. A bawlhhlawh a. Puithiam pawhin a bawlhhlawh tih a puang tûr a ni; a phârna chu a lû-ah a ni.

⁴⁵Phâr vei chu a silhfênte pawthlêr a ni ang a, a lu khuh lovin, a hmuí chung lam a tuam ang a, ‘Ka bawlhhlawh e! Ka bawlhhlawh e!’ tiin a au thîn tûr a ni.

⁴⁶“Mí bawlhhlawh a ni ang. Phâr natna a vei chhûng chu bawlhhlawh a ni zêl ang. Mí bawlhhlawh a ni a, a awm hrang bawk tûr a ni; a awmna tûr chu daipawn a ni.

PHÂR VEITE SILHFÊN ENKAWL DÂN

⁴⁷“Thuamhnâwah phâr hrî kai ta se, sahmul puanah te, puan zai sînah te,

⁴⁸laphiarah te, sahmul laphiarah te, savunah te, savuna siam thil dang dangah te pawh,

⁴⁹chu hrî chu a hring deuh emaw, a sen deuh emaw a niha, silhfênah te, savunah te, laphiarah te, sahmul phiarah te, savuna siam eng thilah pawh a lo awm chuan, phâr hrî a ni a, puithiam entîr tûr a ni.

⁵⁰Puithiam chuan hrî chu a endik ang a, hrî veitu chu ni sarîh a dah hrang tûr a ni.

⁵¹Ni sarîhnaah hrî chu a endik leh tûr a ni. Hrî chu thuamhnâwa a lo ãai darh chuan savunah te, laphiarah te, sahmul phiarah te, savuna siam eng thilah pawh chû hrî chu thil ei chhetu phâr hrî tihna a ni a; thawmhnâw te chu hâl tûr a ni a. A bawlhhlawh tihna a ni.

⁵²Chû hrî kaina thuamhnâw chu savun a ni emaw, laphiar a ni emaw, sahmul phiar a ni emaw, savuna siam eng thil pawh ni se, hâl tûr a ni, thil eichhetu phâr hrî a ni si a; a thawmhnâw chawpa meia hâl tûr a ni.

⁵³“Amaherawhchu, puithiamin a endik a, hrî kaina thuamhnâw—savun emaw, laphiar emaw, sahmul phiar emaw, savuna siam eng thilah pawh ni se a ãaidarh loh chuan,

⁵⁴puithiam chuan hrî kaina thuamhnâw chu sù fai tûrin thû a pe tûr a ni a; ni sarîh chhûng a dah hrang leh tûr a ni.

⁵⁵Sûk fai hnûah puithiam chuan hrî kai chu a endik leh ang a; hrî rawng chu a danglam loh chuan, ãaidarh kher lo mah se, a bawlhhlawh a ni, i hâl tûr a ni; pawns lam leh chhûng lamah pawh thil a eichhe zêl si a.

⁵⁶Sûkfai hnûah puithiamin a endik a, a lo hîl ta a nih chuan, a hrî kaina lai silhfên emaw, laphiar emaw, sahmul phiar emaw, savun emaw chu a hlep thla tûr a ni.

⁵⁷Silhfênah emaw, laphiarah emaw, sahmul phiarah emaw, savunah emaw hrî chu a lo lan leh chuan, hrî darh chak chî tihna a ni; hrî kaina thuamhnâw chu hâl mai tûr a ni.

⁵⁸Silhfên emaw, laphiar emaw, sahmul phiar emaw, savuna siam thuamhnâw engpawh i sùk a, hrî kai a reh daih chuan, sùk nawn leh tûr a ni a, tichuan a lo thianghlim tawh ang.

⁵⁹“Hei hi sahmul te, puan zaisîn te, laphiar te, sahmul phiar te, savuna siam eng thil pawha hrî kai chungchânga, bawlhhlawh a

nih leh nih loh thliar hran dân tûr chu a ni,” a ti a.

BUNG 14

PHÂR DAM TAWH THEN DÂN

¹LALPA chuan Mosia hnênah,

²“Phâr dam tawh then fai nîa tihdân tûr chu hetiang hi a ni ang: Puithiam hnênah hrui tûr a ni.

³Puithiam chu daipawnah a kal ang a, puithiam chuan a va endik tûr a ni; phâr phârna lai chu a dam ngei a nih chuan,

⁴chu mi then fai nân sava thiag pahnih, sidar thing, lazai sen leh hussop rawn lâksak tûrin thû a pe ang.

⁵Sava pakhat zâwk chu tui luang lai chungah hlum bêl chhûnga talh tûr thû a pe bawk tûr a ni.

⁶Sava la nung zâwk chu sidar thing leh la zai sen leh hussop nân a la ang a, tui luang lai chungah talh sava thisenah chuan sava nung nân a hnim tûr a ni.

⁷Phâr hri laka then tûra chu vawî sarîh a theh ang a, a thiag ta tih puangin, sava nung zâwk chu ram lamah a chhuahtîr ang.

⁸Then thianghlim tûra chuan a silhfênte a sù ang a, a inmêt fai ang a, intih fai nân tuiin a inbual tûr a ni. Chumi zawhah chuan riahhmunah a lo lût ang a, ni sarîh chhûng a puan in pawns a awm tûr a ni.

⁹A ni sarîh ni erawh chuan a lû te, a khabê hmul leh a mitko hmul te—a hmul zawng zawng a inmêt fai vek tûr a ni. A puan te sufaiin tuiah a inbual ang a, tichuan a lo thianghlim tawh ang.

¹⁰“A ni riat nîah berâm no pahnih, a pa hmêlhem lo nân, berâm no pakhat, a nu kum khat mi, hmêlhem lo nân, buhbâl thilhlân atân chhangphut dip ephah hmun sâwma ãhena hmun thum, hriaka hmeh nân, hriak log* khat nân a rawn keng tûr a ni.

¹¹A thiantu tûr puithiam chuan a then thianghlim tûra chu biakbûk kawngka bulah, LALPA hmaah a hrui ang a.

¹²Puithiam chuan berâm no a pa pakhat leh hriak log khat chu bawhchhiat thâwî nân a hlân ang a, LALPA hmaah thênin, thên thilhlân angin a hlân tûr a ni.

¹³Hmun thianghlima sual thâwîna leh hâlral thilhlân talhna hmunah puithiam chuan berâm no a pa chu a talh tûr a ni; sual thâwîna chu puithiam chanpual a ni ang bawkin, bawhchhiat thâwîna pawh a ni ve bawk a. Thil thianghlim ber a ni si a.

¹⁴Puithiam chuan bawhchhiat thâwîna thisen chu a la ang a, a then tûra beng tlângah te, a kut ding lam zungpuiah te, a ke ding lam zungpuiah te a hnawih tûr a ni.

¹⁵Puithiam chuan hriak log khata mi chu lâ-in, a kutpah vei lamah a bun tûr a ni.

¹⁶A kutpah vei lama hriak chu puithiam chuan a kut ding lam zungchalin a hnim ang a, a kutzungtang chuan vawî sarîh LALPA hmâah a theh tur a ni.

¹⁷A kuta hriak la awm chuan puithiam chuan then tûra beng ding lam hmâwah te, a kut ding lam zungpuiah te, a ke ding lam zungpuiah te, bawhchhiat thâwîna thisen chungah te chuan a hnawih tûr a ni.

¹⁸Puithiam kuta hriak la bâng zawng chu a then tûra lû-ah a thih tûr a ni. Chutiang chuan puithiam chuan LALPA hmâah inremna a siamsak tûr a ni.

¹⁹Puithiam chuan sual thâwina a hlân ang a, bawlhhlawhna ata a then thianghlim tûra tân inremna a siamsak ang. Chumi zawhah hâlral thihlan chu a talh tûr a ni.

²⁰Puithiam chuan maichâmah chuan hâlral thihlan leh buhbâl thihlan a hlân tûr a ni. Tichuan, puithiamin inremna a siamsak ang a, a lo thianghlim tawh ang.

²¹“Mî rethei chutiang tlin zo ve lo chuan, a bawhchhiat thâwi nân berâm no, a pa pakhat, inremna siamsak nâna thên tûr leh, buhbâl thihlana mi tûr chhangphut dip ephah hmun sâwma thena hmun khat hriak pawlh sa leh, hriak log khat arawn keng ang a,

²²thûro pahni emaw, pârvâ no, a pa pahni emaw, a tlin ang churawn keng sela: pakhat chu sual thâwina a ni ang a, pakhat zâwk chu hâlral thihlan atân a ni ang.

²³Then thianghlim a nih aţanga a ni riat niin biakbûk kawngka bulah, LALPA hmâah arawn la tûr a ni.

²⁴Puithiam chuan bawhchhiat thâwina berâm no leh hriak log khat chu a lo la ang a, puithiam chuan thên thihlan angin LALPA hmâah a thên tûr a ni.

²⁵Bawhchhiat thâwina berâm chu a talh ang a, chû bawhchhiat thâwina thisen chu puithiam chuan a la ang a, then tûra beng dîng lam hmâwrah te, a kut dîng lam zungpuiah te leh, a ke dîng lam zungpuiah te a hnawih tûr a ni.

²⁶Puithiam chuan hriak chu ama kutphah vei lamah a bun tûr a ni.

²⁷A kutphah vei lama mi hriak chu a kut dîng lam zungţangin LALPA hmâah wawî sarih a theh tûr a ni.

²⁸Puithiam chuan a kut dîng lama hriak la awm chu then thianghlim tûra beng dîng lam hmâwrah te, a kut dîng lam zungpuiah te, a ke dîng lam zung puiah te chuan bawhchhiat thâwina thisen a hnawihnaah a hnawih ve tûr a ni.

²⁹Puithiam kuta hriak la bâng chu, LALPA hmâah inremna siamsakna tûrin, then thianghlim tûra lû-ah chuan a thih tûr a ni.

³⁰Thûro emaw, pârvâ no emaw, a neih remchan zâwk zâwk arawn hlân tûr a ni—

³¹a neih theih zâwk zâwk chu hlânin, pakhat chu sual thâwi nân, a pakhat zâwk chu hâlral inthâwi nân, buhbâl thihlan atân a pe ang. Tichuan puithiam chuan then thianghlim tûra chu LALPA hmâah inremna a siamsak tûr a ni.

³²Hei hi phâr hri vei, a inthenthiainghlim nâna tûl pangngai tlin zo ve lo tâna dân a ni e,” a ti a.

PHÂR INCHHÛNG ENKAWL DÂN

³³LALPA chuan Mosia leh Aarona te hnênah:

³⁴“In luah tûra ka pêk che u Kanaan ram in va thlen hunah, in luah rama khawî lai inah pawh phâr hrî ka dah chuan,

³⁵chu in neituin puithiam hrilh tûra a kalin, ‘He inah hian phâr hrî ni âwm tak a awm e,’ a ti ang a,

³⁶“tichuan chu hrî endik tûra inchhûnga puithiam a luh hmain, inchhûng bungrua zawng zawng bawlhhlawha puan hnan vek a nih loh nân, in chu tiruak phawt tûrin thû a pe tûr a ni; chumi zawhah endik tûrin puithiam chu inah chuan a lût tûr a ni.

³⁷Hrî kaina chu a en vêl ang a; hrî chu inchhûng lam bangah a hring emaw, a sen deuh emaw a niha, bang a ei khuar tawh chuan,

³⁸puithiam chu in aţang chuan kawngkapuiah a chhuak ang a, ni sarih chhûng in chu a khâr tûr a ni.

³⁹Ni sarih hnûah puithiam chu lo kalin arawn en leh ang a; hrî chu inchhûng banga a ţai darh chuan

⁴⁰hri awmna lung chu puithiam chuan la chhuak tûrin thû a pê ang a, khaw pâwna bawlhhlawh hmunah an paih daih tûr a ni.

⁴¹Bang chhûng lam chu a vêlin a ziah khawhtîr vek ang a, a khawk nâwi te chu khaw pâwna bawlhhlawh hmunah a paihtîr tûr a ni.

⁴²Lung dang lâin, chûng lung hnawh khah nân chuan an hmang ang a, a chârna in chu an zût mâm leh tûr a ni.

⁴³“Lung a lâk sawn tawh hnûah bang pawh a ziah khawh veka, zût mâm tawh hnua hrî chu lo kîr leha inchhûnga arawn awm leh chuan,

⁴⁴puithiam chu lo kalin arawn en leh ang a; inchhûngah hrî a darh chuan, ei chhetu phâr hrî a ni a, bawlhhlawh a ni.

⁴⁵In chu a ţiat mai tûr a ni, a lungrem te, thingzai te, a chârna nêndâipâwnah kalpuin, bawlhhlawh hmunah a paih tûr a ni.

⁴⁶Chu bâkah, khâr a nih laia ina lût tawh phawt chu tlai thlengin an bawlhhlawh ang.

⁴⁷Chû ina mû chuan a silhfênte a sû ang a, inchhûnga chaw ei chuan a thawmhnawte a su fai tûr a ni.

⁴⁸“Puithiam a lo luh a, a en vêl a, in chu zût that hnua hrî a ţai darh loh chuan, hrî chu a kian tâk avângin puithiam chuan in chu thianghlimah a puang tûr a ni.

⁴⁹Chû in thian tûr chuan sava pahni, sidar thingţang, la senlâr leh hussop kâu te a la tûr a ni.

⁵⁰Sava pakhat chu tui luang lai chungah hlum thlêngah a talh ang a;

⁵¹sidar thingţang te, hussop te, la senlâr te leh sava nung zâwk chu a la ang a, sava talh tâk thisenah leh tui luang laiah a hnim ang a, in chu wawî sarih a theh tûr a ni.

⁵²Sava thisen leh tui luang lai leh sava nung te leh, sidar thingţang te, hussop te leh la senlâr te chuan in chu a thian tûr a ni.

⁵³Sava nung chu khaw pâwn ram hnuaiah thlawh chhuatîr sela, chu in tân chuan remna siamsak sela, tichuan a lo thianghlim tawh ang.

⁵⁴“Hei hi phâr leh pân chi rêng rêngte tâna dân a ni a,

⁵⁵thawmhnaw leh ina phâr tân te,

⁵⁶pangtîa durh te, a khir te leh vun vîr te,

⁵⁷a thiang nge thiang lo hriat hranna tûra dân chu a ni. Hei hi phâr enkawl dân a ni e,” a ti a.

BUNG 15

TAKSÂA BAWLHHLAWH CHHUAK ENKAWL DÂN

¹LALPA chuan Mosia hnênah,

²“Israel fate hnênah hêng thu hi hrilh rawh u: ‘Mipa tûpawh a taksa ațanga thil chhuak a awm rêng rêngin, chû thil chhuak chu bawlhhlawh a ni.

³A thil pût chhuak avânga a bawlhhlawh dân chu hetiang hi a ni ang—a taksa thil pût chhuak a awm chuan, a reh leh mai a nih pawhin a bawlhhlawh tho a ni.

⁴Chutiang thil pût nei mutna khum apiang chu a bawlhhlawh zêl ang a, a ținutna pawh a bawlhhlawh zêl bawk ang.

⁵Tûpawhin a khum chu khawih se, a silhfen a sũ ang a, a inbual bawk tũr a ni, tlai thlengin a bawlhhlawh ang.

⁶Chutiang thil pût nei ținutna hnũah chuan mi tupawh thu se, a silhfente sũn a inbual tũr a ni a, tlai thlengin a bawlhhlawh ang.

⁷Thil pût neia taksa chu tupawhin khawih se, a silhfente sũn, a inbual tũr a ni a, tlai thlengin a bawlhhlawh ang.

⁸Thil pût neiin bawlhhlawh ve lo chil a chhâk khum chuan, a silhfente sũn a inbual tũr a ni a, tlai thlengin a bawlhhlawh ang.

⁹Thil pût nei lai chuanna leh a ținutchhan apiang chu bawlhhlawh a ni zêl ang.

¹⁰ținutchhana a hman tawh khawihthu apiang chu tlai thlengin an bawlhhlawh ang. Chũng thil la sawntu apiang chu an puante sũn, an inbual ang a, tlai thlengin an bawlhhlawh ang.

¹¹Thil pût nei laiin kut sil fai lova mi a khawih apiang chuan an puante an sũ ang a, an inbual tũr a ni, tlai thlengin an bawlhhlawh ang.

¹²Thil pût nei laiin hlum bêl a khawih chuan tihkeh tũr a ni a, thinga siam hmanrua a khawih apiang chu sil fai zêl tũr a ni.

¹³Thil pût neia chu, a thil pût ațanga tihthianghlim a nih hunah amahin inthen hun chhũng atân ni sarih chhiar se la, a puante a sũ ang a, tui luang laiaa a inbual ang a; tichuan a lo thianghlim tawh ang.

¹⁴A ni riat niin ținũro pahnih emaw, pârva no pahnih emaw kengin, biakbũk kawngka bulah, LALPA hmâah a lo kal ang a, puithiam hnênah a rawn pe tũr a ni.

¹⁵Puithiam chuan pakhat chu sual thâwi nân, pakhat chu hâlrâl thilhlân atân a lo hlân tũr a ni. Chutiang chuan a thil pût avângin LALPA hmâah inremna a siamsak ang.

¹⁶Mipa tupawh, a chĩ a tlâk chuan a taksa pumin a inbualfai tũr a ni a, tlai thlengin a bawlhhlawh ang.

¹⁷A chĩ tlâ-in a kaina rêng rêng, thuamhnaw te, savun te chu sũk fai vek tũr a ni a, tlai thlengin a bawlhhlawh ang.

¹⁸Hmeichhiain mipa a mutpuia, chĩ a tlâk chuan, an inbual ve tũr a ni a, tlai thlengin an bawlhhlawh ang.

¹⁹Hmeichhiain thil pût a neiha, taksa ațanga thi pût a nih chuan, ni sarih chhũng dah hran tũr a ni; amah khawihthu apiang chu tlai thlengin an bawlhhlawh ang.

²⁰A thianghlim loh chhũnga a mutna chu bawlhhlawh a ni ang; a ținutna apiang a bawlhhlawh zêl ang.

²¹A khum khawihthu chuan a puante sũn a inbual tũr a ni, tlai thlengin a bawlhhlawh ang.

²²A ținutna hnũ khawihthu apiang chu a puante sũn a inbual tũr a ni a, tlai thlengin a bawlhhlawh ang.

²³A khuma thil awm emaw, a ținutnaa thil awm emaw, mi tupawhin khawih se, tlai thlengin a bawlhhlawh ang.

²⁴Mi tupawhin a mutpui chuan a bawlhhlawhna chu a kai ve ang a, ni sarih chhũng a bawlhhlawh ang; a mutna khum apiang chu a bawlhhlawh zêl bawk ang.

²⁵Hmeichhiain a dân pangngai aia rei thi a neiha, a bawlhhlawh hun pangngai pêla thi a nei chuan, thi a nei hun chhũng zawng chu a bawlhhlawh hun pangngai anga ngaih tũr a ni. A bawlhhlawh a ni.

²⁶A thi nei chhũnga a mutna chu a tân bawlhhlawhna khum a ni; amah a bawlhhlawh ang bawkin a ținutna apiang chu a bawlhhlawh zêl a ni.

²⁷Chũng thil khawihthu apiang chu a bawlhhlawh ve ang; a puante sũn a inbual tũr a ni a; tlai thlengin a bawlhhlawh ang.

²⁸A bawlhhlawhna ațanga then fai a nih chuan, ni sarih chhũng a inenthla ang a, chumi hnũah a lo thianghlim tawh ang.

²⁹A ni riat niin ținũro pahnih emaw, pârva no pahnih emaw kengin biakbũk kawngka bulah, puithiam hnênah a rawn pe tũr a ni.

³⁰Puithiam chuan pakhat chu sual thâwi nân, pakhat zawk chu hâlrâl thilhlân atân a lo hlân ang a, tichuan a thi nei bawlhhlawhna lak ata puithiamin LALPA hmâah inremna a siamsak tũr a ni.

³¹Chutiang chuan Israel fate chu an bawlhhlawhna ata i tihrang țin tũr a ni; chuti lo chuan an zĩnga awm ka biakbũk hi thianghlim lohna nêna tibawrhângin an thih phah mai dâwn si a.

³²Hei hi mipa chi chhuak, a chi tlâk avânga a bawlhhlawhna laka inthen dân leh,

³³hmeichhia, a bawlhhlawhna pangngai avânga a theih lohna te, a hmei a pain thil pût chhuak an nei avâng te, an bawlhhlawh laia mutpuitute tâna an zawm tũr dân chu a ni,” a ti a.

BUNG 16

INREMNA NÎ

¹Aarona fapate pahnihin LALPA hmâa mei thianghlim lo an hlân avânga an thih hnu khân LALPAN Mosia a bia a;

²LALPAN Mosia hnênah: “I unaupa Aarona hrilh la, puanzâr chhũng Hmun Thianghlima, thuthlunna bâwm chungah zahngaihna ținutthlêng hmâah hian eng hunah mah lût suh se, a thih phah hlauh ang e; zahngaihna ținutthlêng chungah chuan chhũm zĩngah ka lo lang dâwn si a.

³Chuvângin, Aarona chu Hmun Thianghlimah chuan sual thâwina bâwngpa tuai thisen nê, hâlrâl thilhlân atân berâmpa thisen nê a lo lût tũr a ni.

⁴Puan zaisĩn kawr thianghlim leh puan zaisĩn kekawr hâ sela; puan zaisĩna siam tâihrên a hrêng ang a, puan zaisĩn diar a khim bawk tũr a ni. Hêng hi silhfên thianghlim a ni a. Chuvângin, a

inbual fai zawhah a inbel chauh tûr a ni.

⁵Israel mipui pungkhâwmho hnên aţangin sual thâwi nân kêl no pahni leh, hâlrâl thilhlân atân berâmparawn kai rawh se.

⁶“Aarona chuan bâwngpa chu sual thâwi nân, ama tân a hlân ang a, amah leh an chhûngkaw tân inremna a siam tûr a ni.

⁷Kêl pahni chu a la ang a, biakbûk kawngka bulah LALPA hmâah chuan a hlân tûr a ni.

⁸Chumi zawhah Aarona chuan kêl pahnihah chuan thum a vâwr ang: pakhat chu LALPA chanpual a ni ang a, pakhat zâwk chu sual thâwina atâna hlan tûr a ni.

⁹LALPA chanpual zawk chu Aaronan arawn kai ang a, sual thâwi nân a hlân tûr a ni.

¹⁰Sual mawh phurtu tûr kêl chu inremna siam nân leh, sual kal bopui tûra thlalêra chhuah botîr tûrin, LALPA hmâah a nung chung hlan tûr a ni.

¹¹“Aarona chuan ama puala hlan tûr, sual thâwina bâwngpa chu arawn kai ang a, amah leh an chhûngkaw tân inremna siam tûrin, ama pualin sual thâwina bâwngpa a talh tûr a ni.

¹²LALPA hmaa maichâm aţangin rimtui hâl bûr meilinga khatin a la ang a, rimtui râwt dip vei khata kengin, puanzâr chhûngah a lût tûr a ni.

¹³Rimtui hâl khû chuan Thuthlung Bâwm chungah zahngaihna thutthlêng chu a zâm hliah vek theih nân, rimtui chu LALPA hmâa mei chungah chuan a phul tûr a ni; chuti lo chuan a thih phah mai dâwn si a.

¹⁴Bâwngpa thisen pawh a la ang a, chû chuan zahngaihna thutthlêng chhak lam sîr chu a kutzungţangin a theh tûr a ni; zahngaihna thutthlêng hmâah chuan thisen chu a kut zungţangin vawi sarih a theh bawt tûr a ni.

¹⁵“Chumi zawhah mipuite chanpual sual thâwina kêl chu a talh ang a, bâwngpa thisen a tih ang bawkin a thisen chu puanzâr chhûngah a lût ang a, zahngaihna thutthlêngah leh zahngaihna thutthlêng hmâah a theh tûr a ni.

¹⁶Tichuan, Israel fate bawhlhlawhna avâng te, an bawhchhiatna avâng te leh, an sualna zawng zawngte avângin, Hmun Thianghlim tân inremna a siamsak tûr a ni; an bawhlhlawhnain a chîm reng an biakbûk tân pawh a siamsak bawt tûr a ni.

¹⁷Inremna siam tûra Hmun Thianghlima a luh laiin amah leh an chhûngkaw tân te, Israel mipui zawng zawng tân te inremna a siam theih nân, a lo chhuah leh hmâ chu biakbûk chhûngah tûmah an awm ve tûr a ni lo.

¹⁸LALPA hmâa maichâmah chuan a kal chhuak ang a, inremna a siam ang a, bâwngpa thisen leh kêl thisen chu a keng vê vê ang a, maichâm kî-te chu a vêlin a hnawih tûr a ni.

¹⁹Thisen chu a kut zungţangin vawi sarih thehin a thian ang a, Israel fate bawhlhlawhna ata chu a hlân thianghlim tûr a ni.

²⁰“Hmun Thianghlim leh, biakbûk leh maichâm tâna inremna a siam zawhah kêl nung chu arawn kai tûr a ni.

²¹Aarona chuan kêl lu chungah a kut khing hnih a nhat ang a, Israel fate dik lohna zawng zawngte, an bawhchhiatna zawng

zawngte leh an sualna zawng zawng chu a puan khum ang a, kêl lu chungah chuan a nhat vek ang a, ruat bîk mi tuemawin thlalêrah a va chhuah bo daih tûr a ni.

²²Kêl chuan tuma luah loh ram rehah mipuite khawlohna zawng zawng chu a phur ang a; thlalêrah chuan kêl chu a va chhuah bo daih tûr a ni.

²³“Chumi zawhah Aarona chu biakbûkah a lo kal ang a, Hmun Thianghlima a luh laia puan zaisîn thuamnâw a inbelte chu a hlip ang a, chutah chuan a hnutchhiah tûr a ni.

²⁴Hmun thianghlimah chuan a inbual ang a, a silhfênte inbelin, ama puala hâlrâl thilhlân leh mipuite puala hâlrâl thilhlân hlân tûrin a lo chhuak ang a, ama pual leh mipuite pualin inremna a siam tûr a ni.

²⁵Sual thâwina thau chu maichâmah a hâl tûr a ni.

²⁶Sual phurtu kêl va chhuahtu chuan a thuamnâwte sîin a inbual ang a, chumi hnûah riahhmunah a lo lût leh tûr a ni.

²⁷Hmun Thianghlima inremna siam nâna thisen hman, sual thâwina bâwngpa leh sual thâwina kêl te chu riahhmun daipâwnah lâk chhuah tûr a ni. A vun te, a sâ te leh a kawchhûng te chu meihin an hâl tûr a ni.

²⁸A hâltu chuan a silhfênte sîin a inbual ang a, chumi zawhah riahhmunah a lo lût tûr a ni.

²⁹“Hetiang hi kumkhuaa in zawm tûr dân thuruat a ni: thla sarihna, ni sâwm nîah chuan khawtual mi pawhin, in zînga awm ve mikhualte pawhin, in rilru te intihrehawmin, hna pawh in thawk tûr a ni lo.

³⁰Chumi nî chuan puithiamin inremna a siamsak che u-in, LALPA hmâa in sualna zawng zawng laka in thianghlim theih nân a thian dâwn si che u-a.

³¹In tân urhsîn taka chawlhna nî a ni a, in rilrute in tihrehawm tûr a ni. Hei hi in kumkhaw dân zawm tûr a ni e.

³²Puithiam, a pa aiawha puithiam anga rawngbâwl tûra hriakthih leh serh hnan chuan inremna a siam tûr a ni a, puan zaisîna siam thawmhnaw thianghlimte a inbel ang a;

³³Hmun Thianghlim pualin inremna a siam ang a, biakbûk pual leh maichâm pualin inremna a siam leh tûr a ni a, puithiamte tân leh mipui zawng zawng tân inremna a siam bawt tûr a ni.

³⁴Kum khatah vawi khat zêl Israel fate sualna zawng zawng thâwina tûra inremna siamsak hi in tân kumkhuaa zawm tûr dân a ni e,” a ti a. Tichuan, LALPAN Mosia thû a pêk angin a ti ta a.

BUNG 17

THISEN THIANGHLIMNA

¹LALPA chuan Mosia a hrilh a,

²“Aarona leh a fapate leh, Israel fa zawng zawngte hnênah sawi rawh, ‘Hei hi LALPA thupêk a ni:

³“Israel chhûngkuaa miin riahhmun chhûngah emaw, riahhmun pâwnah emaw bâwngpa emaw, berâm emaw, kêl emaw a talha,

⁴LALPA biakbûk hmâah LALPA hnêna hlân tûra biakbûk kawngka bula arawn ken loh chuan, chû mi chuan thisen a

chhuah avânga a mawh chu a phur tûr a ni. Thisen chhuah a ni si a; chû mi chu a chipuiten an tuithlâr tûr a ni;

⁵chû chu Israel faten rampalailênga inthâwina an hlan mai mai tawh lohva, biakbûk kawngka bulah, puithiam hnênah, LALPA hnênah ngei an rawn thlena, LALPA hnêna remna thilhlân anga an hlan theih nân a ni.

⁶Puithiam chuan thisen chu biakbûk kawngka bula maichâmah a theh ang a, a thaute chu LALPA hnênah rimtui atân a hâl tûr a ni.

⁷An inphalrai thinna ramhuaite hnênah inthâwina an hlan tawh tûr a ni lo. Hei hi an thlah kal zêlte thlenga dân ngheta an hman tûr a ni,” a ti a.

⁸“Anni chu tihian hrilh bawh rawh: ‘Israel chhûngkaw zînga mi tuemaw, in zînga mikhual tuemaw pawhin hâlral thilhlân emaw, inthâwina emaw a hlana,

⁹LALPA hnêna hlan tûra biakbûk kawngka bula a rawn lâk loh chuan, chû mi chu a mite zînga ta tuithlâr tûr a ni.

¹⁰Israel chhûngkaw zînga mi tuemaw, in zînga mikhual tu emawin, eng thisen pawh a ei chuan, thisen eitu chu ka enhrang ang a, a chipuite lakah ka thlahthla daih ang.

¹¹Taksa nunna chu thisenah chuan a awm si a, in nunna atân maichâm chung a inremna siam nâna ka pêk che u a ni; thisen hi nunna atâna inremna siamtu a ni si a.’

¹²“Chuvângin, Israelte hnênah ka sawi a ni, ‘In zînga tumahin thisen ei suh se, in zînga chêng mikhualte pawhin thisen chu an ei tûr a ni lo.’

¹³“Israel mi tupawhin emaw, in zînga chêng mikhual tûpawhin emaw sa pêla, ei theih chi ramsa emaw, sava emaw man apiangin, a thisen chu a tichhuak vek ang a, vaivutin a vûr zêl tûr a ni;

¹⁴tisa zawng zawng nunna a ni si a. A thisen chu a nunna vawngtu a ni. Chuvângin, Israel fate hnênah ka sawi e, ‘Thisen hi tîsâ zawng zawng nunna a nih avângin eng sa thisen mah in ei tûr a ni lo. A ei apiang chu tuithlâr tûr a ni.

¹⁵“Mi tupawhin ran thisâwn sâ emaw, sa sehhlum sâ emaw a ei chuan, in rama mi emaw, ram dang mi emaw pawh ni se, a silhfênte sûin a inbualfai tûr a ni a, tlai thlengin a bawhlhlawh ang. Chumi hnûah chuan a lo thianghlim tawh ang.

¹⁶A insûk fai lohva, a inbual bawh loh chuan a sual mawh chu a phur ang,” a ti a.

BUNG 18

MUTPUI THIANG LOTE

¹LALPA chuan Mosia hnênah, ²“Israel fate hnênah hê thû hi hrilh ang che: ‘Kei hi LALPA in Pathian ka ni a. ³In chên tawhna Aigupta ram mite tihdân angin ti ve suh u; ka hruai luhna tûr che u Kanaan rama mite tihdânin in ti ve tûr a ni hek lo; an dân thu pawh in zâwm bawh tûr a ni lo. ⁴Ka rorêlna leh ka dân thute chu in zâwm zâwk tûr a ni: Kei hi LALPA in Pathian ka nih hi. ⁵Ka dân thuruatte leh ka rorêlnate chu in zâwm ang a, miin a zawm chuan, chûngte chuan a nung zâwk ang: LALPA ka nih hi. ⁶Mi tumahin in chhûngkhat hnai saruakna hlîmsak tûrin in pan tûr a ni lo: LALPA ka nih hi. ⁷I pa saruakna emaw, i nu saruakna emaw i hlîmsak tûr a ni lo. I nu a ni a; a saruakna i hlîm tûr a ni lo. ⁸I pa nupui saruakna pawh i hlîmsak tûr a ni hek lo; i pa saruakna a ni si a. ⁹I farnu, i pa fanu emaw, i nu fanu emaw, i pianpui a ni emaw, ni lo emaw, an saruakna i hlîmsak tûr a ni lo. ¹⁰I fapaa fanu emaw, i fanua fanu emaw, an saruakna chu i hlîmsak tûr a ni lo. An saruakna chu nangma saruakna a ni si a. ¹¹I pa nupuia fanu, i pa hrin chu i farnu a ni—a saruakna i hlîmsak tûr a ni lo. ¹²I pa farnu saruakna chu i hlîmsak tûr a ni lo; i pa chhûng bul a ni e. ¹³I nu laizâwn saruakna i hlîmsak tûr a ni lo, i nu laina bul a ni si a. ¹⁴I pa unaupa saruakna chu i hlîmsak tûr a ni lo. A nupui pawh i pan tûr a ni lo; i nu a ni si a. ¹⁵I monu saruakna chu i hlîmsak tûr a ni lo —i fapa nupui a ni a—a saruakna i hlîmsak tûr a ni lo. ¹⁶I unaupa nupui saruakna i hlîmsak tûr a ni lo; i unaupa saruakna a ni si a. ¹⁷Nufa faa saruakna chu i hlîmsak tûr a ni lo; i nu fapaa fanu emaw, a fanua fanu emaw saruakna pawh i hlîmsak tûr a ni hek lo. In bulhna tak an ni si a. Suahsualna thil a ni. ¹⁸I nupui la dam laiin amah chotuah nân a laizâwnnu saruakna hlîmsakin, nupuia i nei tûr a ni lo. ¹⁹Hmeichhiain thî a neih vânga a bawhlhlawh laiin a saruakna hlîm tûrin i pan tûr a ni lo. ²⁰Mahni intibawrhâng tûrin i thenawm pa nupui i mutpui tûr a ni lo. ²¹I thlahte zînga mi tûmah Moleka mei i kal tlangtîr tûr a ni lo va, i Pathian hming i tichhe tûr a ni hek lo: LALPA ka nih hi. ²²Hmeichhia i pâwl angin mipa i pâwl tûr a ni lo. Thil tenawm a ni. ²³Mahni intibawhlhlawh nân ran i pâwl tûr a ni lo. Hmeichhia tûmah inpâwltîr tûrin ran hmâah a ding tûr a ni lo. Mi piangsual nihna a ni. ²⁴Hêng thilte hian in intibawhlhlawh ve tûr a ni lo; in hmâa ka ûm chhuah tûr hnam zawng zawngte chu hêng thil hian a lo tibawhlhlawh vek tawh a ni. ²⁵Ram chu tihbawhlhlawh a ni ta; chuvângin an khawlohna avânga hremnain ka tlawh a, a ram chuan a luahtute chu a luak chhuak mai zâwk a ni. ²⁶Nangni chuan ka dânte leh ka rorêlnate chu zâwm ula, in rama michêngte leh in zînga chêng ram dang mite pawhin hêng thil tenawmte hi ti ve hauh suh u, ²⁷(hêng thil bawhlhlawh zawng zawngte hi hê rama lo awm hmasaten an lo ti thîn a, chuvângin ramin a bawhlhlawh phah zo ta), ²⁸in hmâa nhamte a luak chhuak angin, nangni pawh in intibawhlhlawh chuan a luak chhuak ve mai ang che u. ²⁹Mi tupawhin hetiang a thil tenawm a tih chuan, chutiang titu chu a chipuiten an tuithlâr tûr a ni. ³⁰Chuvângin, in hmâa mite thil chin tenawm tak tak zînga a engamah chîng ve lova, chûng thiltea in intibawhlhlawh ve loh nân ka dânte hi zâwm tha hle ang che u: LALPA in Pathian ka ni si a,’ tiin,” a ti a.

BUNG 19

THATNA DÂN LEH SERHSÂNG DÂN

¹LALPA chuan Mosia hnênah,

²“Israel mipui zawng zawng hnênah hê thû hi hrilh rawh: ‘In thianghlim tûr a ni, Kei LALPA in Pathian hi ka thianghlim si a.

³In zînga mi tinin mahni nu leh pa an zah tûr a ni a, ka Sabbath-te hi in serh tûr a ni: LALPA in Pathian ka nih hi.

⁴Milem lam chu âwn suh u, chherchawp pathian pawh siam hek suh u: LALPA in Pathian ka nih hi.

⁵LALPA hnênah inremna thilhlân inthâwina in hlan chuan nangmahni duh thûin in hlân tûr a ni.

⁶In hlan ni leh a tûkah in ei tûr a ni. A ni thum ni thlenga la bâng chu meia hâl tawh tûr a ni.

⁷A ni thum nîa ei a nih chuan thil tenawm a ni a. Pawm a ni lo vang.

⁸A eitu apiangin a khawlohna mawh a phur ang, LALPA hnêna thilhlân thianghlim a tihbawrhbân avângin; chû mi chu a chipuite laka tuithlâr a ni ang.

⁹In rama buh thar in seng hunah vau fêh thlengin in seng fai kêl tûr a ni lo, in lâk hmaih pawh in zawng tûr a ni lo.

¹⁰In grêp pawh lo fai kêl lo ula, in grêp huana lawh hmaih pawh lâwr khâwm suh u; mi retheite leh mikhualte tân zuah ve rawh u: LALPA in Pathian ka nih hi.

¹¹Rûk i ru tûr a ni lo va, a derin i ti tûr a ni lo va, dâwt in inhrilh tûr pawh a ni hek lo.

¹²A derin Ka hmingin chhia i chham tûr a ni lo va, i Pathian hming i tihlîau tûr a ni hek lo: Kei hi LALPA chu ka ni.

¹³I thenawm chu bum suh la, thil rûksak hek suh. I hnêna inhlawhfa hlawh chu zankhuain, a tûk thlengin hrênsak suh.

¹⁴Bengngawng chu ânchhia lawh suh la, mitdel hmâah dâltu dah hek suh, i Pathian chu tîh rawh: LALPA ka nih hi.

¹⁵Rorêlnaah dik lo takin in ti tûr a ni lo. Mi retheite lakah hleih nei lo la, mi thiltitheite zah bîk suh. Diknain i thenawm chu i rêlsak tûr a ni.

¹⁶I mite zîngah thu tha lo pu darhin tei vêl ruai suh; i thenawm khawvêngte do zâwngin tanhmun siam hek suh: LALPA ka nih hi.

¹⁷I unau huatna thîlung i pu tûr a ni lo. I thenawm chu zilhau mai la, a sual mawh chu phur ve suh.

¹⁸Phubâ i la tûr a ni lo va, i chipuite huatna i pai reng tûr a ni hek lo; nangmah i inhmangaih angin i thenawm khawvêngte hmangaih rawh: LALPA ka nih hi.

¹⁹Ka dânte i vawng tha tûr a ni. I rante chu ran chi dangte nêh i thlahpawhlîr tûr a ni lo. I lovah thlai chi hrang hrang chîn pawlh suh. Puan zaisîn leh sahmul puan tahpawlh kawr inbel suh u.

²⁰Bawihnu, mi nupui hual, la tlan chhuah loh leh zalenna pawh la pêk loh chu mi tupawhin lo mutpui se, vuak a tuar tûr a ni; mahse zalên a la nih loh avângin tihhlum tûr a ni lo.

²¹A bawhchhiat thâwi nân LALPA hnênah bawhchhiat thâwina berâmpa, biakbûk kawngka bulah a rawn kai tûr a ni.

²²Puithiam chuan a thil lo tihsual tawh laka tlan nân bawhchhiat thâwina berâmpa LALPA hnênah a hlansak tûr a ni. Thil sual a lo tih tâk chu ngaihdam a ni ang.

²³Chû ram chu in thlen huna, ei tûr thei chi hrang hrang in phunin, a rah chu serhtan loh angah in ngai tûr a ni. Kum thum chhûng in tân serhtan loh ang a ni ang. Ei loh tûr a ni.

²⁴A kum lînaah erawh chuan LALPA fakna atân a rah zawng zawng chu serhhran vek tûr a ni.

²⁵Kum ngâna aţangin a rahte chu in ei thei tawh ang, a lo rah tam lehzuat theih nân: Kei hi LALPA in Pathian ka nih hi.

²⁶A thisen chawpin eng thil mah in ei tûr a ni lo, dâwi hmanga âi-en emaw, thil hrilh lâwk emaw in chîng ve tûr a ni lo.

²⁷I beksam zâwn aţangin i lû i mêt kual ruih tûr a ni lo va, i khabe hmul i chei danglam tûr a ni hek lo.

²⁸Mitthi avânga taksa inzai chik nuk te, pangtia reh thei lova ziah rân* te i siam tûr a ni hek lo: LALPA ka nih hi.

²⁹I fanu chu nawhchizuarah i siam tûr a ni lo; chuti lo zawng, nawhchizawrhna ramah a lo chang ang a, suahsualnain ram chu a tikhat dah ang e.

³⁰Ka Sabbath-te hi in serh tûr a ni a, Ka hmun thianghlim hi in zah tûr a ni: LALPA ka nih hi.

³¹Râu zâwlte leh ‘thlâ kochhuaktu dâwithiamte chu eng atân mah ti suh u; anni tihbawhlhlawha awm tûrin pan rêng rêng suh u: Kei hi LALPA in Pathian ka ni si a.

³²Lu ţuak tawhte hmâah chuan lo ding thîn ula, kum upate zah ula, in Pathian chu tîh rawh u: LALPA ka nih hi.

³³In rama hnam dang awm vête chu tinawmnaah suh u.

³⁴In zînga mikhual awm vête chu nangmahni pianpui ang ni sela, nangmah i inhmangaih angin i hmangaih ve tûr a ni; Aigupta ramah pawh mikhual in nih kha: Kei hi LALPA in Pathian ka nih hi.

³⁵Rorêlnaah te, a sei zâwng te, bûk rih zâwng leh a tam lam tehnaah te dik lo takin in ti tûr a ni lo.

³⁶Bûkna dik te, bûklung dik te, ephah dik leh hin dik tak in hman tûr a ni: Kei hi LALPA in Pathian, Aigupta ram aţanga hruai chhuaktu che u ka nih hi.

³⁷Chuvângin, Ka dân zawng zawng te, ka rorêlna zawng zawngte hi pawmin, in zâwm tûr a ni: LALPA chu ka nih hi, ‘tiin,’ a ti a.

BUNG 20

DÂN BAWHCHHIATE HREMNA

¹LALPA chuan Mosia a bia a,

²“Israel fate hnênah i hrilh tûr a ni: ‘Israel mi emaw, mikhual Israela chêng tûpawh an tu leh fa Moleka hnêna pê apiang chu tihhlum ngei tûr a ni. Ram neituten lungin an deng tûr a ni.

³Ka hmun thianghlim tibawrhbâng a, Ka hming thianghlim tihlîau tûra a tu leh fate Moleka hnêna a pêk avângin chû mi chu hmaisen ka hmuh ang a, a chipuite zînga ta ka tiboral ang.

⁴Hê rama miten Moleka hnêna an tu leh fate petu chu tihhlum ahnêka an haider chuan,

⁵chû pa lakah leh an chhûngkaw lakah chuan hmaisen ka hmuh ang a; Moleka laka inzuar tûra min uirêsantu zawng zawngte chu an chipuite lakah ka tuithlâr ang.

⁶Râu zâwlte leh ‘thlâ kochhuaktu dâwithiamte biakrâwn chînga, chûng mite hnêna uirête lakah chuan hmaisen ka hmuh ang a, an chipuite zînga ta ka ensan ang.

⁷Chuvângin, in serh hrang ula, lo thianghlim rawh u, Kei hi LALPA in Pathian ka ni si a.

⁸Ka dânte hi vawng tlat ula, zâwm rawh u: Kei LALPA hi nangmahni tithianghlimtu ka ni si a.

⁹Tûpawh, a pa emaw, a nu emaw ânhche lawhtu chu tihhlum ngei tûr a ni. A nu leh a pa ânhhia lawh a ni a. A thisen mawh chu ama chungah a tla ang.

¹⁰Mi nupui uirêtu, a thenawm pa nupui uirê saktu, uirepa leh uirenu chu tihhlum ngei ngei tûr an ni.

¹¹Mahni pa te nupui lo mutpuitu chuan a pa saruakna a hlîmsak a ni; an pahniha tihhlum vê vê tûr an ni. An thisen mawh chu anmahni chungah a tla tûr a ni.

¹²Miin a monu a mutpui chuan, an pahnihin tihhlum vê vê tûr an ni. A hleihluaka khawsa an ni a. An thisen mawh chu an chungah a tla tûr a ni.

¹³Mipain hmeichhia ang maia mipa bawh a mutpui chuan, tenawmna thil tidûn an ni a, tihhlum ngei ngei tûr an ni. An thisen mawh chu phur rawh se.

¹⁴Mi tupawhin nu leh a fanu nupuia a neih kawp chuan suahsualna thil a ni. In zîngah chutiang sualna chu a awm tawh loh nân amah leh an nufa chu hâhlum tûr an ni.

¹⁵Mipain ran a pâwl chuan tihhlum ngei tûr a ni, ran pawh chu tihhlum ve nghâl bawh tûr a ni.

¹⁶Hmeichhiain ran a va pan a, a inpâwtîr chuan, chû hmeichhia leh ran chu in tihlum tûr a ni. Tihhlum ngei tûr an ni. An thisen mawh chu phur rawh se.

¹⁷Miin a farnu, a pa fanu emaw, a nu fanu emaw a neih a, a saruakna a hmuh a, ani pawhin a saruakna a hmuh chuan thil tha lo tak a ni. An mite hmuh laiin ensan tûr an ni. A farnu saruakna hlîmsak a ni a. A sual mawh a phur tûr a ni.

¹⁸Miin hmeichhe thi nei lai a mutpuia, a saruakna a hlîm chuan, a thi chhuahna hai lansak a ni a, ani pawhin mahni thi chhuak lai inhlîm a ni bawh a. Chuvângin, an pahnihin an mite laka tuithlâr tûr an ni.

¹⁹I nu laizâwn emaw, i pa farnu emaw saruakna i hlîm tûr a ni lo, mahni laina hnai tihmualphona a ni. An khawlohna mawh an phur ang.

²⁰Miin a pami nupui a mutpui chuan, a pami saruakna hlîmsak a ni. An sual mawh an phur tûr a ni a; fa nei lovin an thi ang.

²¹Miin a unaupa nupui a neihsak chuan, thil bawhlhlawh a ni. A unaupa saruakna a hlîmsak a ni. Fa nei lovin an awm ang.

²²Ka dân zawng zawng leh Ka rorêlnate hi vawng tha la, zâwm la, tichuan in chên nâna ka hruai luhna tûr ram chuan a luak

chhuak tel lo vang che u.

²³In hmâa ka hnawh chhuahsak tûr hnamte chin dân in zâwm ve tûr a ni lo; anni chuan hêng thilte hi an chîng a, chuvângin a tenin ka ten a ni.

²⁴Nangni erawh chu ka hrilh a che u, “An ram, khawizu leh hnutetuia luang ram chu in luah atân ka pe ang che u,” ka lo tih tawh kha. Kei hi, hnam dangte laka nangmahni tihrangtu, LALPA in Pathian ka nih hi.

²⁵Chuvângin, sa thiang leh thiang lo te leh, sava thiang leh thiang lo te in thliar hrang tûr a ni; sa thiang lo laka ka tihhran tawh che u avângin ramsa emaw, sava emaw, leia bawkvâk chi rêng rêng laka tenawmah insiam suh u.

²⁶Ka tân in thianghlim tûr a ni, Kei LALPA hi ka thianghlim si a, Ka tâ ni tûrin hnam dangte lakah ka tihrang tawh si che u a.

²⁷Mipa emaw, hmeichhia emaw, râu zâwlte leh ‘thlâ kochhuaktu dâwithiamte chu tihhlum ngei tûr an ni; lungin an dêng tûr a ni. An thisen mawh chu an chungah tla rawh se,’ tih hi,” a ti a.

BUNG 21

PUITHIAMHO INVAWN DÂN

¹LALPA chuan Mosia hnênah, “Puithiam Aarona fapate hnênah heti hian hrilh rawh: ‘Mahni mite zîngah mitthi avângin tumah intibawhlhlawh ve suh se,

²a chhûng bul hnai zual bîk: a nu te, a pa te, a fapa te, a fanu te, a unaupa te an nih chauh loh chuan;

³a farnu bul hnai, nula thianghlim, pasal pawh la nei lo ruang erawh chu a khawihin, a intibawhlhlawh thei bawh ang.

⁴Chuti tih lohvah chuan an mite zînga hotu lian an nih avângin an intibawhlhlawh ve mai mai tûr a ni lo.

⁵An lû te an ziat kawlh tûr a ni lo va, an khabe hmul sîr tuakah an tan tûr a ni hek lo va, an taksa pawh an zai kak tûr a ni bawh hek lo.

⁶LALPA hnênah meia thilhlân te, an Pathian tâna chhang te an hlan thîn avângin, an Pathian tân an thianghlim tûr a ni a, an Pathian hming an tihliao tûr a ni lo; chuvângin an thianghlim tûr a ni.

⁷Nupui atân nawhchizuar te, hmeichhe hminghliauna nei te, an pasal te mâk hnû emaw chu a nei tûr a ni lo; puithiam chu a Pathian tâna serh hran a ni si a.

⁸Chuvângin, i Pathian hnêna chhang hlântu a nih avângin i serh hrang bîk tûr a ni. I tâna thianghlim a ni tûr a ni, Kei, LALPA, nangmah tithianghlimtu hi ka thianghlim si a.

⁹Puithiam tupawh ni se, a fanuin nawhchi zuarin a intihbawhrbân chuan, a pa tibawhrbâng a ni a. Meia hâl hlum tûr a ni.

¹⁰Unau zînga puithiam lala tang, a lûa hriak thih chi pawh thih tawh, puithiam kawr ha tûra serh hran tawh chu lu khuh lovin a awm tûr a ni lo va, a puan a pawthlêr tûr a ni hek lo;

¹¹mitthi ruang bulah a kal tûr a ni lo va, a pa emaw, a nu emaw avângin a intibawhrbâng tûr a ni hek lo;

¹²hmun thianghlim ațangin a kal chhuak tûr a ni lo va, a Pathian hmun thianghlim a tibawrhâng tûr a ni hek lo; a Pathian tâna hriakthiha serh hranna chu ama chungah a awm si a: LALPA ka nih hi.

¹³Nupui atân nula thianghlim ngei a nei tûr a ni.

¹⁴Hmeithai emaw, mâk hnu hmeichhia emaw, hmeichhe hminghliau emaw, nawhchizuar emaw—chutiang mite chu a nei tûr a ni lo; ama mite zînga nula thianghlim chauh nupuiah a nei tûr a ni.

¹⁵Kei LALPA hi a tithianghlimtu ka ni si a; chuvângin, a mite zîngah a thlahte a tithangtlâwm tûr a ni lo,” a ti a.

¹⁶LALPA chuan Mosia a bia a,

¹⁷“Aarona hrilh la: ‘In chithlah țhangthar zêlte zînga mi, Pathian hnêna chhang hlântu tûr, piansualna nei rêng rêng chuan a hnaih ve tûr a ni lo.

¹⁸Piansualna nei chuan an rawn hnaih ve tûr a ni lo: mitdel te, kebai te, hmêl hem lo te, fuke piangsual te,

¹⁹ke tliak te, kut tliak te,

²⁰êl-kûn te, mi tawngchham te, mit țha lo nei te, vun phâr te, puhlip nei te leh mi tilrehte chenin.

²¹Puithiam Aarona thlahte zînga piansualna nei tumahin meia thilhlân LALPA hnêna hlân tûrin an rawn hnaih tûr a ni lo. Piansualna nei a ni si a; chuvângin, a Pathian hnênah chhang hlân tûrin a rawn hnaih ve tûr a ni lo.

²²A Pathian chhang thianghlim leh a thianghlim ber erawh chu a ei thei vê vê;

²³piangsual a nih avângin, Ka hmun thianghlim a tihbawrhân loh nân puanzâr bulah emaw, maichâm emaw hnaih ve suh se, tihna a ni; Kei hi LALPA anmahni tithianghlimtu ka ni si a,” a ti a.

²⁴Mosia chuan Aarona leh a fapate leh, Israel fate zawng zawng chu a hrilh ta a.

BUNG 22

¹LALPA chuan Mosia hnênah,

²“Aarona leh a fapate hrilh rawh, Israel faten Ka hming thianghlim an tihhliau loh nân, Ka hnêna thil thianghlim an serh hran takte lakah chuan inthiarfihlîm rawh se: LALPA ka nih hi.

³Tihian hrilh rawh: ‘In thlahte ațanga țhangthar lo la chhuak tûr zawng zawngte zînga mi tupawh, bawhlhlawhna a neih laia Israelten LALPA tâna thil thianghlim an hlan tawh rawn hnaihtu chu, Ka hma ata paih chhuah tûr a ni: LALPA ka nih hi.

⁴Aarona thlahte zînga mi phâr emaw, taksâa thil pût emaw nei tupawhin a thianghlim leh hma chuan thilhlân thianghlim a ei ve tûr a ni lo. Mitthi ruang khawih avâng emaw, mipa chi chhuakin a deh vâng emaw,

⁵bawkvâka kal nungcha khawih vânga bawhlhlawhna emaw, mi tibawhlhlawh thei engpawh a khawihin, a bawhlhlawh dân chu eng ang pawh ni se—

⁶chutiang thil khawihthu chu tlai thlengin a bawhlhlawh ang a, a inbual zet loh chuan thil serh thianghlimte chu a ei ve tûr a ni lo.

⁷Ni tlâk hunah a thiang tawh ang; chumi hnêah chuan thil serh thianghlimte pawh a ei thei tawh bawk ang, ei tûr chaw a ni si a.

⁸Mi tibawhlhlawh thei, thil thi sa te, sa seh sâ te chu a ei tûr a ni lo: LALPA ka nih hi.

⁹Chuvângin, Ka dânte hi an vawng tlat tûr a ni, chuti lo chuan an tibawrhâng ang a, an tihsual mawh phurin an thih phah hlauh ang e: Kei LALPA hi anmahni tithianghlimtu ka ni si a.

¹⁰Ram dang mi tûmahin thil serh thianghlim an ei ve tûr a ni lo; puithiam awmpui emaw, a mi rawih emaw pawhin thil serh thianghlim an ei ve tûr a ni lo.

¹¹Amaherawhchu, puithiamin ama sum ngeia a lei mihring chuan a ei ve thei a; a inhhûnga piangte pawhin an ei ve thei bawk.

¹²Puithiam fanuin ram dang mi pasala a neih chuan, thil serh thianghlimte chu a ei thei tawh lo vang.

¹³Mahse, puithiam fanu chu lo hmeithaiin emaw, mâk emaw a niha, fa nei lova a pa hnêna lo kîr leh a nih chuan, a nulât lai ang bawk khân a pa chaw ei ang a ei ve thei ang; ram dang mi erawh chuan an ei ve thei lo vang.

¹⁴Tihpalhin miin thil serh thianghlimte chu ei ta se, puithiam hnênah thilhlân thianghlim chu a rûl leh ang a, hmun ngâa țhena hmun khat a pêk belhchhah tûr a ni.

¹⁵Israel faten LALPA hnêna an hlan thil serh thianghlim hi tumahin an palzam mai mai tûr a ni lo va,

¹⁶an thil serh thianghlim chu mi dangte eitirin, chû bawhchhiatna mawh chu an phurhtîr tûr a ni hek lo; Kei LALPA hian anni chu ka serh hrang tawh si a,” a ti a.

THILHLÂN PAWM TLÂK LEH PAWM TLÂK

¹⁷LALPA chuan Mosia a bia a,

¹⁸“Aarona leh a fapate leh Israel fa zawng zawngte hrilh rawh: ‘Israel chhûngkuua mi emaw, Israel mite zînga chêng mikhualte emawin hâlral thilhlân anga an thutiam avânga inthâwina emaw, mahni duhthûa thilhlân, LALPA hnêna an hlan rêng rêngin—

¹⁹mahni duhthûa hlan atân bâwng emaw, berâm emaw, kêl emaw ațangin, a pa hmêlhem lo ngei in hlân tûr a ni.

²⁰Hmêlhemna nei thil chu in hlân tûr a ni lo, in aiah pawm a ni lo vang.

²¹Mi tûpawhin a thutiam hlen nân emaw, mahni duhthûa thilhlân nân emawa remna thilhlân inthâwina a hlan chuan, a ran rual zîng ami emaw, berâm rual zînga mi emaw LALPA hnêna a hlan apiang chu duhthusâma pawm tlâk a ni tûr a ni; hmêlhemna rêng rêng a nei tûr a ni lo.

²²A mitdel te, a ruh tliak te, a sil-awng te, pânhnâi la te, tangseh te leh a phâr te chu LALPA tân i hlân tûr a ni lo va, meia thilhlân angin LALPA maichâmah in hlân tûr a ni hek lo.

²³Mahni duhthûa thilhlân atân chuan bâwngpa emaw, berâmpa emaw fûke sei lutuk emaw, tâwi lutuk emaw pawh hlan theih ni mahse, thutiam nân chuan pawm a ni lo vang.

²⁴Vuak duk chur emaw, chhut keh emaw, tithlêr emaw, zai kak sa emaw chu LALPA hnênah in hlân tûr a ni lo; in ramah chutiang chu thilhlân atân in buatsaih tûr a ni lo.

²⁵Hnam dang mite rêng rêngin hêng thil hi in Pathian chhang angin in hlan tûr a ni lo, anmahniah hlemhlêtna leh piansualna a awm si a. Nangmahni aiah pawm theih a ni lo vang, 'ti hi,' a ti a.

²⁶LALPA chuan Mosia a bia a:

²⁷“Bâwng emaw, berâm emaw, kêl emaw a lo pianin, a pui bulah ni sarih a awm tûr a ni; ni riat ni leh a hnû aţang chuan, LALPA hnêna meia thilhlân atân pawm theih a ni tawh ang.

²⁸Bâwngpui emaw, berâmnu emaw pawh, a pui leh a no chu ni khatah in talh tûr a ni lo.

²⁹LALPA hnênah lâwmthu sawia inthâwina in hlanin, nangmahni duhthû ngeini ti thîn rawh u.

³⁰A ni lâ lîn in ei tûr a ni; atûk thlengin engmah in khêk tûr a ni lo: LALPA ka nih hi.

³¹“Chutichuan, Ka thupêkte in vawngin in zâwm tlat tûr a ni: LALPA ka nih hi.

³²Ka hming thianghlim chu in tibawrhbâng tûr a ni lo, Israel fate zîngah zahawmin ka awm tûr a ni. Nangmahni tithianghlimtu LALPA,

³³in Pathian ni tûra, Aigupta ram aţanga nangmahni hruai chhuaktu che u chu ka ni: LALPA ka nih hi,” a ti a.

BUNG 23

LALPA KÛTTE

¹LALPA chuan Mosia a bia a,

²“Israel fate hnênah heti hian sawi rawh: ‘LALPA kût inkhâwpui thianghlim atâna in puan tûr Ka kûtte chu hêngte hi a ni.

SABBATH

³Ni ruk chhûngin hnâ in thawk tûr a ni a, a ni sarih nî erawh chu urhsûn taka chawlhna Sabbath nî, inkhâwpui thianghlim a ni. Eng hnâ mah in thawk tûr a ni lo; in awmna zawng zawngah LALPA tâna Sabbath a ni ang.

KALHLÊN KÛT LEH CHHANG DÂWIDIM TELH LOH KÛT

⁴Hêngte hi LALPA tâna kût, inkhâwpui thianghlim, a hun taka in hman thîn tûrte a ni e.

⁵Thla hmasa ber, ni 14-na tlai lam hi LALPA Kalhlên kût a ni.

⁶Chumi thla ni 15 nî chu LALPA tâna chhang dâwidim telh loh kût a ni a; ni sarih chhûng dâwidim telh loh chhang in ei tûr a ni.

⁷A ni hmasa berah inkhâwpui thianghlim in hmang ang a; eng hnâ mah in thawk tûr a ni lo.

⁸Ni sarih chhûngin LALPA hnênah meia thilhlân in hlân tûr a ni. A ni sarih nî chu inkhâwpui thianghlim a ni a; eng hna mah in thawk tûr a ni lo,” a ti a.

RAH HMASA KÛT

⁹LALPA chuan Mosia hnênah,

¹⁰“Israel fate hnênah hêng hi sawi rawh: ‘Ram ka pêk che u in thlen huna buh in seng hunah, in buh thar hmasa phal khat chu puithiam hnênah inrawn la tûr a ni.

¹¹In aiawha pawmsak a nih theih nân LALPA hmâah buhphal chu a thên tûr a ni; Sabbath zawh tûk lehah puithiam chuan a thên thîn tûr a ni.

¹²Buhphal in thên ni chuan berâm no, a pa kum khat mi hmêlhem lo chu LALPA hnêna hâlral thilhlân atân in hlân tûr a ni.

¹³Buhbâl thilhlân atân chhangphut dip ephah hmun sâwma thena hmun hnih, hriak nêna hmeh pawlh chu, rimtui atân LALPA hnênah meia hlan tûr a ni; in tûr hlan atân uain, hin hmun lia thena hmun khat in hlân tel bawk tûr a ni.

¹⁴In Pathian hnêna thilhlân inrawn hlan nî a lo thlen hma chuan chhang emaw, mîm kan ro emaw, thlai hring emaw in ei hauh tûr a ni lo; hei hi in chênna apiangah, in thlah kal zêlthlenga kumkhaw dân tûr a ni.

CHAWLHKÂR KÛT

¹⁵Sabbath zawh tûk, thên thilhlân atâna buhphal in hlan nî aţanga ţanin: Sabbath wawi sarih chhiar ula.

¹⁶Sabbath wawi sarihna zawh tûk, a ni sawmnga nî-ah chuan LALPA hnênah buh thar thilhlân in hlân tûr a ni.

¹⁷In awmna aţangin thên thilhlân tûr chhang hlâwm hnih, ephah hmun sâwma thena hmun hniha siam inrawn la tûr a ni. Chhangphut tha chi a ni tûr a ni a; dâwidim nêna ur hmin tûr a ni. LALPA tâna buh thar hmasa ber a ni si a.

¹⁸Chûngte chu chhang nê, berâm no pasarih, kum khata upa, hmêlhem lo nê, bâwngpa tuai pakhat leh berâmpa pahni nê in hlân tûr a ni. Chûng buhbâl thilhlân leh in tûr thilhlân te chu, LALPA tâna hâlral thilhlân a ni a, LALPA tâna rimtui ni tûra meia hlan a ni.

¹⁹Sual thâwi nân kêl no pakhat leh, remna inthâwi nân berâmpa pahni, kum khata upa in hlân tûr a ni.

²⁰Puithiam chuan thên thilhlân atân buh thar hmasa berte chu, berâm no pahni nê LALPA hmâah a thên tûr a ni. Puithiam chanpual, LALPA tâna serh thianghim a ni ang.

²¹Chumi nî chuan inkhâwpui thianghlim a ni tih in puang tûr a ni. Hna pangngai rêng rêng in thawk tûr a ni lo. Chû chu in thlah kal zêl thlengin in awmna apiangah in tân kumkhaw dân a ni ang.

²²In lova buh in seng hunin, in vaufêm thlengin in seng fai kêl tûr a ni lo, seng hmaihte pawh in vâi nawn tûr a ni hek lo. Mi retheite leh mikhualte tân zuahsak ve rawh u: LALPA in Pathian ka nih hi,” a ti a.

TÂWTAWRÂWT KÛT

²³LALPA chuan Mosia a bia a,

²⁴“Israel fate hnênah hrihl rawh: ‘Thla sarihna, chumi thla ni hmasa berah sabbath chawlh in nei ang a, tâwtawrâwt ham hriatrengna, inkhâwpui thianghlim a ni.

²⁵Hna rêng rêng in thawk tûr a ni lo va; LALPA hnênah meia thilhlân in hlân tûr a ni,” a ti a.

INREMNA NÎ

²⁶LALPA chuan Mosia a bia a:

²⁷“He thla sarihna, ni sâwm nî hi Inremna Nî a ni bawk a. In tân inkhawmpui thianghlim ni sela; in intihrehawm ang a, meia

thilhlán chu LALPA hnénah in hlán tûr a ni.

²⁸Inremna Nî a nih avângin, chumi nî chuan eng hna mah in thawk tûr a ni lo, in tân LALPA in Pathian hmâa inremna siam ni a ni si a.

²⁹Tupawh chumi nia intihrehawm ve duh lo chu a chipuite laka tuithlâr tûr a ni.

³⁰Tupawh chumi nia hna thawk apiang, chû mi chu a chipuite lakah ka tiboral ang.

³¹Eng hna mah in thawk tûr a ni lo; hei hi in chênna hmun apianga in thlah kal zêlte tân kumkhaw dân a ni ang.

³²In tân tihtak zeta chawlhna sabbath a ni a, in rilru in tihrehawm tûr a ni; chumi thla ni kua ni tlai chu, tlai lam ațanga a tûk tlai thlengin, sabbath in hmang tûr a ni,” a ti a.

BIAKBÛK KÛT

³³LALPA chuan Mosia hnénah,

³⁴“Israel fate hnénah hrilh rawh: ‘Hê thla sarihna, ni 15 nî hi LALPA tâna ni sarih awh Biakbûk Kût a ni e.

³⁵A ni hmasa ber chu inkhâwmpui thianghlim a ni ang. Eng hna mah in thawk tûr a ni lo.

³⁶Ni sarih chhûng chu LALPA hnénah meia thilhlán in hlán thîn tûr a ni. A ni riat nûn inkhâwmpui thianghlim in nei ang a, LALPA hnénah meia thilhlán in hlán tûr a ni. Inkhâwmpui thianghlim a ni a, hemi ni hian eng hnâ mah in thawk tûr a ni lo.

³⁷Hêng hi LALPA kût a ni tih inkhâwmpui thianghlima in puan tûrte a ni, LALPA hnêna meia thilhlán hlan te, hâlrál thilhlán leh buhbâl thilhlán te, inthâwina leh in tûr hlanna te, engkim chuan nî bîk a nei zêl a ni—

³⁸LALPA Sabbath-te hi, in thilpêk te, in thutiam te leh mahni duhthûa in thilhlán zawng zawng bâka LALPA hnêna in hlan thîn tûr a ni e.

³⁹Thla sarihna ni 15 nîah chuan, lova thlai thar in seng khâwmin, ni sarih chhûng LALPA tân kût in hmang bawk tûr a ni; a ni hmasa ber chu sabbath-chawlhniâh in hmang ang a, a ni riat nîah pawh sabbath-chawlh a awm leh bawk tûr a ni.

⁴⁰A ni khat nî chuan thingkûng mâwi tak tak rah te, tûmkau te, thingzâra mi chhâwl te, luikama tui-pui-sut-hlah te la khâwm ula; LALPA in Pathian hmâah ni sarih chhûng hlim takin awm rawh u.

⁴¹Kum khatah ni sarih chhûng LALPA tân kût in hmang thîn tûr a ni. In thlahte thleng pawhin kumkhaw dân a ni tawh ang. Thla sarihnaah in hmang thîn tûr a ni.

⁴²Ni sarih chhûng chhâwlbûkah in awm tûr a ni. Israel mi anga piang zawng zawng chu chhâwlbûkah an awm vek tûr a ni.

⁴³Tichuan, Aigupta ram ațanga ka hruai chhuah lai khân Israel fate chu chhâwlbûkah an chêng thîn tih in thlah kal zêlten an rawn hre dâwn a ni: LALPA in Pathian ka nih hi,” a ti a.

⁴⁴Chutiang chuan Mosian Israel fate hnénah LALPA kûtte chu a hriattîr ta a.

BUNG 24

BIAKBÛK KHÂWNVÂR ENKAWL DÂN

¹LALPA chuan Mosia a bia a,

²“Israel fate hnénah olive hriak fim, chhit tûra sâwr, khâwnvâra chhit ên reng atân i hnêna rawn la tûrin thû pe rawh.

³Biakbûk chhûng, Thuhriattîrna puanzâr pâwn ațangin, Aarona chuan tlai ațanga zîng thlengin LALPA hmâah a vil reng tûr a ni; in thlah kal zêlte tân kumkhaw dân tûr a ni.

⁴Rangkachak hlanga siam khâwnvâr, a dahchhan nei chu LALPA hmâah chuan a vil reng tûr a ni.

BIAKBÛK CHHANG

⁵“Chhangphut ța chi lâ la, chhang tlang sâwm pahni ur hmin rawh. Chhang tlang khatah ephah hmun sâwma ținena hmun hnih zêl hman tûr a ni.

⁶Chûngte chu LALPA hmâa rangkachak hlanga siam dawhkân chungah tlar hnihin, paruk vê vên tlar rawh.

⁷LALPA hmâa meia thilhlán hriatrengna a nih theih nân, tlar tina chhang chungah chuan beraw fim chí phul ang che.

⁸Sabbath nî apiangin Israel fate thawkhâwm ațangin chhangte chu LALPA hmâah fel takin a rem thîn tûr a ni; chû chu kumkhaw dân thuruat a ni.

⁹Chûng chu Aarona leh a fapate chanpual a ni a, hmun thianghlimah an ei tûr a ni; an kumkhaw dân thuruat angin meia LALPA hnêna thilhlán, an tâna thil thianghlim ber a ni si a,” a ti a.

PATHIAN SAWI CHHIAT HREMNA

¹⁰Israel nu pakhat fapa, a pa Aigupta mi chu Israel fate zîngah a va kal chhuak a; riahmunah chuan Israel nu fapa leh Israel mipa pakhat nêan an insual a.

¹¹Israel nu fapa chuan Lalpa hming sawi chhiaian ânchhia a lawh a; tichuan Mosia hnénah an rawn hruai a. (A nu chu Selomith-i, Dibri-a fanu, Dan hnam a ni a).

¹²LALPAN engtin nge a tih dâwn tih ngaichângin, ani chu an khung hrang rih a.

¹³LALPA chuan Mosia a rawn bia a,

¹⁴“Ânchhe lawhtu chu riahmun pâwnah hruai rawh u; a thu sawi hretu zawng zawngin a lû-ah an kut ngat sela, tichuan, mipui zawng zawngin lungin deng rawh se.

¹⁵Chumi zawhah Israel fate hnénah thu sawi la: “Tupawh a Pathian ânchhe lawhtu apiangin ama sual mawh a phur ang.

¹⁶Tupawh LALPA hming sawi chhetu chu tihhlum ngei ngei tûr a ni. Mipui zawng zawng, ram chhûnga piang leh mikhualte pawhin lungin an deng tûr a ni. Lalpa hming sawichhia chu tihhlum ngei ngei tûr a ni.

¹⁷Tupawh tualthat chu tihhlum ngei ngei tûr a ni.

¹⁸Mi ran tihlumtu chuan a rûl tûr a ni, ran aiah ran.

¹⁹Miin a ținawm a tihhmêlhem chuan, a tih ang takin a chungah pawh tih ve tûr a ni—

²⁰ruh tliak chu ruh tliak vêkin, mit aiah mit, hâ aiah hâ; mi a tihhmêlhem ang bawkin a chungah pawh tih lêt ve tûr a ni.

²¹Mi ran tihlumtu chuan a rûl leh tûr a ni; mihring thattu erawh chu tihhlum ngei tûr a ni.

²²Nangmahni ram neitute tân leh ram dang mite tân dân inang reng in nei tûr a ni; Kei Lalpa hi in Pathian ka ni si a, 'ti rawh,' a ti a.

²³Mosia chuan Israel fate chu a bia a; daipâwnah chuan ânhche lawhtu chu an hruai a, lungin an dêng ta a. LALPAN Mosia hnena thû a pêk angin Israel fate chuan an ti a.

BUNG 25

KUM SARIHNA SABBATH

¹LALPA chuan Sinai Tlângah Mosia chu a bia a,

²Israel fate hnênah hê thu hi sawi rawh: 'Ka pêk ram in va thlen hunah chû ram chuan LALPA tân Sabbath chawlh a hmang ve tûr a ni.

³Kum ruk chhûngin in lote in let ang a, kum ruk chhûng in grêp huan te in hlâwi fai thîn ang a, a rah te in lo thîn ang;

⁴a kum sarihnaah erawh chuan, a ram tân tihtak zeta chawlh dêrna sabbath a awm tûr a ni. In lote chu in let tûr a ni lo va, in grêp huante pawh in thawlh fai tûr a ni hek lo.

⁵Amaha thlai lo ʔo te chu in seng tûr a ni lo va, in thawlh fai loh grêp rahte pawh in lo tûr a ni hek lo, ram tân chawlh kum a ni si a.

⁶Sabbath kuma ramin a thar chhuah chu in chaw tûr a ni: nangni tân te, in chhiahhlawh hmeichhia leh mipa tân te, in hlawhfa rawih tân te, in hnêna chêng ram dang mi tân te,

⁷in ranrualte leh in rama tlâ sa dang te nên –chûng aʔanga thar chhuak chu in ei tûr a ni.

JUBILI KUM

⁸Sabbath kum vawi sarih chhiar la, kum sarih hmun sarih a lo ni ang a; sabbath sarih hmun sarih chu kum 49 a lo ni ang.

⁹Thla sarihna, ni sâwm nî chuan Jubili tâwtawrâwt chu i hamtîr tûr a ni; Inremna Nî-ah chuan ram pumah tâwtawrâwt i hamtîr ruai ruai tûr a ni.

¹⁰A kum 50-na chu in hlân thianghlim ang a, in ram pumah a michêng zawng zawng tân zalên an ni tih in puang tûr a ni. In tân Jubili a ni a; mi tin hnênah an thil neih ngai pêkkîr leh ʔeuh tûr a ni a, mi tin mahni inpui lama lêt leh ʔeuh tûr a ni.

¹¹Kum 50-na Jubili chu in tân a ni e; chuvângin, engmah in chîng lo vang a, amaha lo ʔo rah chu in seng tûr a ni lo va; in enkawl loh grêp rahte pawh in lo tûr a ni hek lo.

¹²Jubili a ni miao va; in tân serhhran a ni si a; chuvângin lova thil tharte chu in ei ve mai tûr a ni.

¹³He Jubili kumah hian, mi tinin mahni ta ngai in inpe kîr leh ʔeuh tûr a ni.

¹⁴In ʔenawmte hnênah thil in hralh emaw, in ʔenawmte hnên atanga ʔhil in lei emawin, in innêp vak tûr a ni lo.

¹⁵Jubili hnûa a kum zât azirin i ʔenawm hnêna mi i lei ang a, ani'n a rah thar thei tûr zât azirin a leitîr ve thung ang che.

¹⁶A kum tam dân azir zêlin a man i tisâng thei ang a, a kum tlêm dân azir zêlin a man i tihniâm tûr a ni; buhbâl thar chhuah kum a tam tawh dân azirin i hnênah a hralh ve si a.

¹⁷Chuvângin, tumah innêptawn vak vak lo ula, in Pathian hi ʔih hle rawh u: LALPA in Pathian chu ka ni si a.

KUM SARIH KUMA EI TÛR

¹⁸Tichuan, Ka dân hi vawng ʔhain, Ka rorêlnate hi pawm ula, vawng ʔlat rawh u; chu ramah chuan ralmuang takin in awm thei dâwn nia.

¹⁹Tichuan, ram chuan rah a chhuahsak ang che u a, hnianghnâra eia bârin, ralmuang takin in awm thei ang.

²⁰Nangni'n, "Engmah chîng lova, buh seng tûr awm bawk si lovin, a kum sarihnaah eng nge kan ei tâk ang?" in ti a nih chuan,

²¹A kum ruknaah Ka malsâwmna thû ka pê ang a, kum thum daih zân tûr in thar mai ang.

²²Kum riatnaah in chîng leh chauh ang a, a kum kuana thlengin buh hlui in ring thei dâwn a ni; buh in thar leh hmâ zawngin buh hlui chu in ring dâwn nia.

BUNGRAW TLAN LÊT LEH DÂN

²³Ram hi ka tâ a nih avângin in hralh hlen tûr a ni lo; Ka hnêna mikhual leh khualzin mai in ni si a.

²⁴In ram neih zawng zawng chu tlan lêt theih vek a ni tûr a ni.

²⁵In unau zînga pakhat lo retheiin a ram ʔhenkhat lo hralh ta se, a tlan chhuahsak theitu tûr a unau a lo kal chuan, a unaupain a lo hralh tawh chu a lei lêtsak leh thei ang.

²⁶Chû mi chuan tlansaktu tûr nei lovin, amahin a tlan lêt thei a nih chuan,

²⁷a hralh kum aʔanga chhûtin, a man la bâng tûr zât chu, a hralhna hnênah a pe ang a, tichuan a ram chu a pekîr leh thei ang.

²⁸Amahin a tlan chhuak thei lo a nih chuan, a leitu kutah Jubili Kum thlengin a awm mai tûr a ni; Jubili kum a lo thlen chuan a zalên tawh a, a neitu hnênah chuan a pekîr leh tûr a ni.

²⁹Kulh nei khuaa miin a in hralh ta se, a hralh aʔanga kum khat chhûngin a tlan leh thei ang; kum khat pumhlûm chhûngin a tlan leh thei a ni.

³⁰Kum khat chhunga a tlan theih loh chuan, kulh nei chhûnga in chu a leitu ta a ni hlen mai ang, a thlah zêlte thleng pawhin. Jubili kumah pawh chhuah zalen theih a ni tawh lo vang.

³¹Amaherawhchu, kulh nei lo khuaa inte chu thingtlâng ram anga ngaih a ni ang. Tlan chhuah theih a ni a, Jubili kumah chhuah zalên a ni ang.

³²Levia thlahte khuaa an in leh an chanpual chhûnga an ram te erawh chu, Levia thlahte chuan engtik hunah pawh an tlan chhuak thei a ni.

³³Miin Levia mite in chu lei ta se, a chênna khuaa a hralh tâk in chu, Jubili kumah pêkkîr leh tûr a ni; Levia mite khuaa an inte chu Israel fate zînga an chanpual ve liau liau a ni si a.

³⁴An khaw dai vêl ram te erawh chu, an chanpual nghet a nih avângin hralh ve chi a ni lo vang.

RETHEITE HNÊNA THIL HAWHTÎR

³⁵In unau tuemaw lo retheiin, in zîngah pachhe takin lo awm sela, mikhual emaw, khualzin emaw in ãanpui thîn angin, in zînga a khawsak ve theih nân in ãanpui tûr a ni.

³⁶A lakah a pung ûm emaw, hlâwkpui nâna hman emaw tum suh; i kiana a khawsak ve theih nân Pathian tîh zâwk rawh.

³⁷I tangka chu a pung ûmin pûktîr suh, hlâwkna ûmin ei tûr pawh pûktîr hek suh.

³⁸Kei hi LALPA in Pathian ka ni, Kanaan ram pe tûr che u leh, in Pathian ni tûra, Aigupta ram atanga nangni hruai chhuaktu che u ka nih hi.

BAWIH ENKAWL DÂN

³⁹I bula khawsa i unau pakhat chu lo pachhiain, i hnênah rawn inhralh hial pawh ni se, bâwih angin i chhawr lui tûr a ni lo.

⁴⁰Inhlawhfa ang leh mikhual angin i hnênah awm ve mai sela, Jubili Kum a lo thlen thlengin i rawng bâwl rawh se.

⁴¹Chumi hnûah amah leh a bula chêng a fate nêan an chhuahsan ang che a, anmahni chhûngkaw ngaiah lêt leh rawh se. A pi leh pute in lo ramah a kîr leh tûr a ni.

⁴²Aigupta aţanga ka hruai chhuah, Ka chhiahhlawhte an ni si a; bâwih anga hralh tûr an ni lo.

⁴³Kherkhiap takin a chungah i inlek tûr a ni lo, i Pathian i tîh zâwk tûr a ni.

⁴⁴Bâwihnu leh bâwihpa atâna in neih theih tûrte chu—in chheh vêl hnam aţangin, bâwihnu leh bâwihpa in lei thei ang.

⁴⁵Chû bâkah in zînga chêng ve hnam dang fa, in rama an hrin, chhûngkuua khawsa vête pawh in lei thei bawk a; in ta an lo ni mai ang.

⁴⁶In faten an la rawn rochungin, an ta angin an nei chhawm zêl thei a; in bâwih atân an awm hlen tawh ang. Amaherawhchu, in unaupui, Israel mite erawh chu hnuaichhiah takin in tinawmnah tûr a ni lo.

⁴⁷Mikhual emaw, ram dang mi emaw a lo hausaka, a kiana chêng i unaupa a lo retheih hle a, chu mikhual emaw, ram dang mi emaw, ram dang mi chhûngte emaw hnêna a inhralh chuan,

⁴⁸a inhralh hnûah pawh tlan chhuah leh theih a ni. A unaupate zînga mi tu berin emaw a tlan thei ang;

⁴⁹a nih loh leh, a pami emaw, a pami fapa emawin a tlan thei ang; a nih loh leh, a chhûngte zînga hnâivâi takin a tlan thei ang; a tih theih chuan, amah pawh a intlan chhuak thei bawk ang.

⁵⁰Amah leitupa nêan an chhût ang a: a tlan chhuahna man tûr chu, hralh a nih aţanga Jubili Kum lo thlen hun thlengin, inhlawhfa pangngaiin engzât nge a hlawh chhuah hman ang tih hisâpa chhût chhuah tûr a ni.

⁵¹Kum tam tak a la bâk a nih chuan, amah an leina man zât tangkâin a intlan chhuak tûr a ni.

⁵²Jubili Kum thlenna tûr kum tlêm te chauh a awm tawh chuan, amah nêan an chhût dîn ang a, chumi kum tlêm tawh dân hisâp chuan intlanna man a pe ang.

⁵³Kum khat atâna hlawhfa rawih angin an inchoawr tûr a ni a, in mithmuhah a tinawmnah tûr a ni lo.

⁵⁴Chûng kum chhûng chuan intlan thei ta lo se, amah leh a fate chu Jubili Kumah chhuah zalen vek tûr an ni.

⁵⁵Israel fate chu Ka chhiahhlawhte an ni miao va; Ka chhiahhlawh, Aigupta ram atanga ka hruai chhuah te an ni: LALPA in Pathian ka nih hi.

BUNG 26**MALSÂWMNA LEH HREMNA THUTIAM**

¹Milem biak tûr in siam chawp tûr a ni lo; ker chawp milem emaw, lunga siam milim emaw in dîn chawp tûr a ni lo va; kûna chibai bûk tûr lung milim in ramah in phun tûr a ni hek lo; Kei LALPA hi in Pathian ka nih hi.

²Ka Sabbath-te serh ula, Ka hmun thianghlim pawh zah rawh u: LALPA ka nih hi.

³Ka dân thuruatte anga in nuna, Ka thupêkte pawma in zawm chuan,

⁴a hun takah ruahtui ka pe ang che u a, ramin hlâwk takin rah a chhuah ang a, in theikûngte chu a rah duh êm êm dâwn a ni.

⁵Buh in seng zawh hmâin grêp lawh a lo hun ang a, grêp in lawh zawh hmâin buh chin a lo hun leh ang a; ei tûr bâr tûr in hnianghnâr hlê ang a, in ramah ngei thlamuang takin in awm ang.

⁶Ram chhûngah muanna ka thlen ang a, in mu siai siai ang a, tuma'n an tihlau lo vang che u; ramsa kawhhte in ram aţangin ka hnawh bosak ang che u a, in ram chu khandaihin a pal tlang ngai lo vang.

⁷In hmêlmate chu in ûm ang a, in hmâah khandaiha tihhlumin an awm ang.

⁸Mi pangâ lekin mi za rual in ûm ang a, mi za rual chuan mi sîng khat in ûm tlan dur dur ang; in hmêlmate chu in khandaih lakah an tlu zawih zawih ang.

⁹Duhsakna mitin ka thlîr ang che u a, chi tam tak thlah nei theiin, ka tipung thûr thûr ang che u-a, in tâna Ka thuthlung chu ka hlen ang.

¹⁰In buh neih sâ in ei lai mêkin, buh thar dah nân a hluiin hmun a ken a tûl ang.

¹¹Ka biakbûk pawh in zîngah ka hûng ang a, Ka nun hian a haw ngai lo vang che u.

¹²In zîngah ka chêng ang a, in Pathian ka ni ang a, Ka mite in ni ang.

¹³Kei hi LALPA in Pathian, an bâwih ni ngai tawh lo tûra, Aigupta ram aţanga nangmahni hruai chhuaktu che u ka nih hi; in nghawngkawh ka tih tliahsak tawh che u-a, in dingchar thei tawh e.

¹⁴Amaherawhchu, Ka thû in âwih lohva, hêng thupêk zawng zawngte hi in zawm duh lohva,

¹⁵Ka dân thûte hi in hmuhsita, Ka rorêlnate hi in huat a, Ka thupêk zawng zawngte in zawm duh loh chuan, kei pawhin Ka thuthlung chu ka chhu chat ve ang a,

¹⁶In chungah heti hian ka ti ve ang; in chungah thil hlauhawm karawn thlen ang a, ngawr leh sikserhin a man ang che u-a, mit tha lo leh lungngaihna in a tuam ang che u. In thlai chĩnte chu a lothlawn mai a ni ang a, in hmêlmâte ei ral tũr lek a ni ang.

¹⁷Ka hmêlin a ep tlat ang che u-a, in hmêlmâte lakah in tlawn ang. Nangmahni hawtuten in chungah ro an rêl ang a, tũma ũm lohvin in tlanchhia ang.

¹⁸Chutichung pawha Ka thu in la awih loh cheu chuan, in sualnate avangin a lêt sarihin ka hrem ang che u.

¹⁹In chapopui in chakna chu ka tihchhiatsak ang che u-a; in tân vân chu thĩr ang, lei chu dār ang maiah ka chantĩr ang.

²⁰In chakna chu a hah thlawn ringawt ang a; in leilungin rah chhuah tũr a nei lo vang a, in theikungten rah an chhuah hek lo vang.

²¹Mi kalh zawn̄ga in nuna, Ka thu in awih duh loh chuan, in sualna ang zêlin a lêt sariha nasāin hrĩ ka lêtĩr ang.

²²In zingah ram sakawlte pawh karawn tĩr ang a, in fanaute an rũksak ang che u-a, in ranrualte an suasam ang a, in rĩral tial ang a; in kawngpuite chu a thĩng thup mai ang.

²³Hêng thilte hmanga Ka siamthat theih loh che u-a, Ka duh loh zawn̄g bawka in la nun cheu chuan,

²⁴kei pawh nangmahni kalh zawn̄gin ka awm ve ang a, in sualnate avangin a lêt sariha nāin ka hrem ang che u.

²⁵Thuthlung bawhchhiatna phuba lāin, nangmahni dotu tũr khandaih karawn tĩr ang; in awmna khuaa in tlān khāwm laiin, in zingah hrĩ ka lêtĩr ang a; hmêlma kutah mantĩrin in awm bawka ang.

²⁶Ei tũr chāw in lāk chhuahna kawng ka khārpĩn hunah chuan, nũ sāwmin thuk pakhatāh chhang an ur ang a, teh ker kerin an sem ang a, in chanpual in ei ang a, in kham lo hle ang.

²⁷Chutichung pawha ka thũ in la awih duh loh cheu a, ka duh loh zawn̄ga ring tikhawnga in la nun zui zêl chuan,

²⁸thinur takin nangmahni kalh zawn̄gin ka che ve ang; kei, keimah ngei hian in sualnate avangin a lêt sarih bawka nāin ka thunun ang che u.

²⁹In fapa sate pawh in la ei hial dāwn a ni, in fanu sate pawh in la ei ngei ang.

³⁰In hmun sāngte ka tichim ang a, in rimtui maichāmtē ka kit thlu ang a, in ruangte chu in milim nung hlei lo den nān ka hman ang a; ka nun hian a haw hluah hluah ang che u.

³¹In khawpuite chu ka tichereu vek ang a, in hmun thianghlime pawh ka tiram vek ang a, in rimtuite pawh ka hnĩm tawh lo vang.

³²Ram chhũng chu ka tichereu vek ang a, a chhũnga chēng vē in hmêlmâte chuan mak an ti hial ang.

³³Hnam dang zingah khandaihin ka ũm darh ang che u-a; in ram chu tihcherēu a ni ang a, in khawpuite chu a ram zo vek ang.

³⁴Tichuan, hmêlmate rama in awm chhũng leh ram a chereu chhũng zawn̄gin, a ram chuan sabbath a lo chēn ve thung ang a; ram chuan sabbath chawlh chhũng a chēn ang a, a lo chāwl veng veng mai ang.

³⁵Tihcherēuva a awm chhũng chuan a chāwl ve tũr rēng a ni—in luah chhũngin in sabbath-ah te a chāwl ve si lo va.

³⁶Nangniho zinga in hmêlmate rama hnutchhiaha khawsa hote zingah zāmnā thĩlung ka neih tĩr ang a; hnahtel ri rekah pawh an tlanchhia ang; khandaih laka tlanchhia ang maiin an tlanchhia ang a, tuma ũm lohvin an inpalthlu nawk nawk mai ang.

³⁷Ũmtu awm si lovin, khandaiha sahthlūk ang maiin, an indelh nêlh nũlh ang a; hmêlmate lo hmachhawn tũrin thā rēng an nei lo vang.

³⁸Hnam dangte zingah in boral ang a, in hmêlmate ramin a ei zo mai ang che u.

³⁹In zinga hnutchhiaha awmte chu in hmêlmate ramah chuan an khawlohnā avangin an zuih ral tial ang a; an pute khawlohnā, anmahni awm reng avāng pawhin an rĩral bawka ang.

⁴⁰Amaherawhchu, an khawlohnate leh an pute khawlohnate, an rinawmlohnate, keima laka an rinawm lohna te, ka duh loh zawn̄ga an khawsak dân te an inpuan a,

⁴¹chuvānga anmahni do zawn̄ga che lêt ve chauh ka nihzia te, an hmêlmate ramah ka thawn bo ta a ni tih te inhria a, an thĩlung serhtan loh te intitlāwm a, an sual mawh an phur a ni tih an pawm chuan—

⁴²Jakoba hnēna ka thuthlung kha ka hre reng ang a, Isaaka leh Abrahama hnēna ka thuthlung te ka hre reng ang a; ram pawh chu ka hre reng dāwn a ni.

⁴³Ram pawh chu an rauhsan tũr a ni rēng a, anni'n an rauhsan chhũngin ramin sabbath a lo chēn ve tũr a ni si a; ka rorēlnate an hmuhsita, an rilrũa ka dân thuruatte an huat avānga an sual mawh a ni tih an pawm bawka tũr a ni.

⁴⁴Heti chung hian, hmêlma rama an awm lai pawhin ka paih bo êm lo vang a, ka haw bawka lo vang a, an hnēna ka thuthlung bawhchhe khawpin ka tiboral vek hek lo vang; Kei hi LALPA an Pathian ka ni si a.

⁴⁵Hnam dangte mithmuha Aigupta ram atanga ka hruai chhuahtēho hi, anmahni avangin an pipute hnēna ka thuthlung kha ka hre reng ang, an Pathian ka nih zêl theih nān: LALPA ka ni si a,' tiin, a ti a.

⁴⁶Hêng hi dân thuruatte, rorēlnate leh dân te, LALPAN amah leh Israel fate inkāra Mosia hmanga Sinai Tlānga a siam te chu a ni.

BUNG 27

MIHRING LEH PATHIAN HNĒNA HLAN TAWH TLAN DÂN

¹LALPA chuan Mosia hnēnah,

²“Israel fate hnēnah hē thũ hi hrilh rawh: ‘Miin LALPA hnēnah mi tute emaw a hlanin a hlut zawn̄g chu i chhũt dân ni sela,

³Mipa kum 20 atanga kum 60 a nih chuan, hmun thianghlime sekel-in tangkaraw sekel 50 a bũk ang.

⁴Hmeichhia a nih chuan, a hlut zawn̄g sekel 30 a ni ang;

⁵kum ngā atanga kum 20 inkār chu, mipa a nih chuan sekel 20 ni se, hmeichhia chu sekel 10 a ni ang;

⁶thla khat mi ațanga kum nga inkâr chu, mipa a nih chuan tangkaraw sekel ngâ a ni ang a, hmeichhia a nih chuan sekel thum a ni ang;

⁷kum 60 chin chung lam chu, mipa a nih chuan sekel 15 lo ni se, hmeichhia a nih chuan sekel 10 a ni ang.

⁸I tuk zât pe thei lo khawpa rethei a nih chuan, puithiam hnênah va inlan se, puithiam chuan a hlut zât âwm tâwk a tih a lo tuk ang; thutiamtu dinhmunin a tlin tâwk angin puithiamin a lo tuksak mai ang.

⁹Miin LALPA hnêna an thilpêk an rawn ken chu ran a nih chuan, LALPA hnêna pêk tawh pawt chu thil serh a ni zêl ang.

¹⁰Lo tidanglamin, a chhiain a ța, a țhain a chhia a thlâkthleng tûr a ni lo; ran chu ran vêka thleng a nih chuan, a pahnihin thil serh a ni ang.

¹¹Sa thiang lo, inthâwi nâna LALPA hnêna hlan chi loh a nih chuan, puithiam hnênah ran chu a entîr tûr a ni;

¹²a chhiat a țhat azirin puithiamin a man âwm tâwk a lo tuk ang; puithiamin a lo tuk ang ang chu a man tûr a ni mai.

¹³Amaherawhchu, a tlan leh duh chuan, a man tuk bâka hmun ngâa țhena hmun khat a pêk belh tûr a ni.

¹⁴Miin a in chu LALPA tâna thianghlim ni tûrin hlân ta se, a țhat leh țhat loh dân azirin, puithiamin a hlut dân a lo tuk ang; puithiamin a hlut dân a chhût ang chu a man tûr a ni ang.

¹⁵A in hlântuin a tlan duh a nih chuan, i tuk zât hmun ngâa țhena hmun khat a pêk belh ang a, ama ta a lo ni leh ang.

¹⁶Miin ama ram țhenkhat LALPA hnêna a hlan chuan, chuta buh chi ngai zât azirin a hlut zâwng chu tuk tûr a ni. Barli chi homer* khat hlut zâwng chu tangkarua sekel 50 a ni ang.

¹⁷Jubili Kum ațanga a lo chu a hlan chuan, i tuk zât chu a man a ni ang.

¹⁸Jubili hnu lamah a lo chu hlan ta se, Jubili Kum lo awm leh thlenga kum la awm zat azirin a man tuk tûr a ni a, a man puitling i tuk ațanga tihhniam tûr a ni.

¹⁹Mahni thlawhhma hlântuin a tlan leh duh chuan, a man i tuk zât hmun ngâa țhena hmun khat pe belh sela, tichuan a ta a lo ni leh ang.

²⁰A thlawhhmâ chu tlan duh lovin, mi dang hnênah hralh ta se, tlan chhuah theih a ni tawh lo vang;

²¹Thlawhhmâ chu, Jubili huna a lo zalen pawhin, ram hlan tawh, LALPA tâna serh hran a ni zêl ang a; puithiam ram a ni tawh ang.

²²Miin ama ram ni lo, a lei chhâwn tawh chu LALPA hnênah hlân ta se,

²³puithiam chuan a man i tuk zât chu Jubili Kum thlengin a chhût ang a, chutia i tuk zât sum chu chumi ni chuan LALPA tâna hlan thianghlim a lo ni tawh ang.

²⁴Jubili Kumah thlawhhmâ chu a leina pa, a ram neitu pangngai hnênah pêkkîr leh tûr a ni ang.

²⁵A man i tuk rêng rêng chu Hmun thianghlim sekel hisâp zêl a ni tûr a ni: sekel khat chu gera 20 a ni a.

²⁶Ran piang hmasa ber chu LALPA chanpual a nih avângin tûma'n an hlân tûr a ni lo; bâwngpa a ni emaw, berâm a ni emaw, LALPA ta a ni.

²⁷Sa thiang lo a nih chuan, a man i tuk zâtin a tlan tûr a ni a, hmun ngâa țhena hmun khat a pe belh ang; a tlan loh erawh chuan, a man chu i tuk zata hralh tûr a ni.

²⁸Miin a thil neih rêng rêng, LALPA hnêna a serh hran tawh chu mihring emaw, sa emaw, a rochun ram emaw pawh ni se, hralh emaw, tlan emaw theih a ni tawh lo; thil serh hran tawh chu LALPA tâna serh tlat a ni tawh si a.

²⁹Mi tupawh, thi tûra a chungthu rêl tawh chu, tlan chhuah theih a ni lo, tihhlum* ngei tûr a ni.

³⁰Ram chhûnga sâwma pakhat zawng zawng, rama thlai chi te, theirahte hi LALPA ta a ni. LALPA tâna serh hran a ni.

³¹Miin a sâwma pakhat chu a tlan duh chuan, hmun ngâa țhena hmun khat pêk belhin a tlan thei.

³²Ran rual zînga sâwma pakhat, tiang hnuaia lûta a sâwmna zêl chu, LALPA tâna serh hran a ni ang.

³³A ța deuh leh ța lo deuh te a thliar hrang tûr a ni lo va, a thlâkthleng tûr a ni hek lo; a thlâkthleng a nih vêk pawhin, a pahnih chuan serhhran vê vê tûr a ni a; tlan chhuah tûr a ni lo,' tih hi," a ti a.

³⁴Hêngte hi Israel fate tân LALPAN Sinai Tlânga Mosia hnêna thû a pête chu a ni.

NUMBERS

Ziah tu: Mosia • Ziah kum: B.C. 1405

Numbers tih hming hi Grik Septuagint (LXX) leh Latin Bible-a a chuan dân a ni a; hê lehkhabu bung 1-4 leh 26-ah te hian mihring zât inchhiarna a awm avâng a hê hming hi pu ta ni tûr a ni. A Hebrai lamah chuan ‘thlalêr hmuna’ (Bemidbar) tih a ni thung a. Sinai thlalêra an vahvaih lai, kum 39 vêl chhûnga thil thleng ziahna a nih avângin a bu hming atân pawh a inhme hle. A chi chi leh a chhûngkua kuaa inchhiarnain a bu chhûng a luah thui hle. Numbers Bû hi Mosia Lehkhabu ziaik pali dangte ang bawkin, Mosia ziaik a nih thu hian Numbers bû bakah Bible pumpui a luan chhuak a ni ber e (Num.33:2; 36:13; Jos. 8:31; 2 Lal. 14:6; Neh. 8:1; Mk. 12:26; Joh. 7:19). Thlalêra an vahvaih kum 40 hun tâwp lam, Mosia hun tâwp lam ni bawk, ramtiam lût tûra Kanaan ram dep, Jordan luikam chhak lam phaizâwla an awm laia ziah a ni. Thlalêra Israel fate thuawih lohzia, Mosia leh Aarona te meuh pawhin Pathian lung an tihawi lohna leh a nghawng te, Balaama’n Israelte ânchhia aia mal a sâwm thu te, Peor hmuna Israelte bawhchhiatna leh hremna te leh, Kanaan ram luah tûra inbuatsaihna te chu a bu chhûng thupui deuh te a ni. Aigupta saltânna atanga chhan chhuah, ni tin ei tûr manna leh Pathian thupêk dawngtu, hruaitu ropui Mosia hruai dân, Biakbûk, chhûna chhûm ding, zâna mei ding leh thilmak tak takten mipui an kaihruai reng a ni. Pathian duh dân ang taka nung âwm tak, mahse an luhlul êm avângin thlalera kum 40 an thang chhung khân Pathian lung an tiawi lo tum tla zak mai a ni. Numbers Bû hi Bible bu 4-na a ni a, a chhûngah hian bung 36 a awm a, châng 1288 a awm bawk.

BUNG 1

ISRAELTE CHHIARPUI HMASA BER

¹Aigupta ram an chhuahsan atanga kum hnihna, thla hnihna ni chuan Sinai Thlalêra biakbûk chhûngah LALPAN Mosia a bia a:

²Israel mipui zawng zawng, a hnam leh chhûngkua ang zêlin, an hming in dawt dânin, a mal malin mipa,

³kum 20 chin chung lam, Israel mi indonaa kal thei chin chu chhiar vek rawh u. Nang leh Aarona’n a pâwl pâwlin in chhiar tûr a ni.

⁴Nangmahni pui tûr che u-in hnam tin atângin mi pakhat, an chhûngkaw puipa theuh an awm ve tûr a ni.

⁵Hêng hi nangmahni puitu tûr hmingte chu an ni: Reuben hnama mi Sedeura fapa Alizura te;

⁶Simeon hnama mi Zurisadaia fapa Selumiela te;

⁷Juda hnama mi Amminadaba fapa Nasona te;

⁸Isakar hnama mi Zuara fapa Nethanela te;

⁹Zebulun hnama mi Helona fapa Eliaba te;

¹⁰Josefa fapa: Ephraim hnama mi Ammihuda fapa Elisama te; Manase hnam ami Pedazura fapa Gamaliela te;

¹¹Benjamin hnama mi Gideon fapa Abidana te;

¹²Dan hnama mi Amisadaia fapa Ahiezera te;

¹³Aser hnama mi Okrana fapa Pagiela te;

¹⁴Gad hnama mi Deuela fapa Elisapha te;

¹⁵Naphtali hnama mi Enana fapa Ahira te an ni.”

¹⁶Hêngte hi mipui zîng atanga thlan chhuah, an hnam hruaitute, Israel hnam then chung hotute chu an ni.

¹⁷Hêng mi, an hming târlan hote hi Mosia leh Aarona’n an hruai a,

¹⁸thla hnihna ni khat niin mipui an ko khâwm vek a; a hnam leh chhûngkua ang zêlin, an hming indawt dânin, a mal malin mipa kum 20 chin chung lam zawng chuan an thlahtute hming an sawi chhuak zêl a.

¹⁹LALPAN Mosia hnêna thu a pêk ang zêlin Sinai Thlalêrah chuan a chhiar ta a.

²⁰Israela fapa upa ber Reubena thlahte chu a hnam leh an chhûngkaw inthlahchhâwn dân a an hming indawt dânin, mipa kum 20 chin chung lam, a mal malin, indonaa kal thei chin an chhiar a:

²¹Reuben hnam an chhiarte chu an vaiin mi 46,500 an ni.

²²Simeona thlahte chu a hnam leh an chhûngkaw inthlahchhâwn dân a an hming indawt dânin, mipa kum 20 chin chung lam, a mal malin indonaa kal thei chin an chhiar a:

²³Simeon hnam an chhiarte chu an vaiin mi 59,300 an ni.

²⁴Gada thlahte chu a hnam leh an chhûngkaw inthlahchhâwn dân a an hming indawt dânin, mipa kum 20 chin chung lam, a mal malin indonaa kal thei chin an chhiar a:

²⁵Gad hnam an chhiarte chu an vaiin mi 45,650 an ni.

²⁶Juda thlahte chu a hnam leh an chhûngkaw inthlahchhâwn dân a an hming indawt dânin, mipa kum 20 chin chung lam, a mal malin indonaa kal thei chin an chhiar a:

²⁷Juda hnam an chhiarte chu an vaiin mi 74,600 an ni.

²⁸Isakara thlahte chu a hnam leh an chhûngkaw inthlahchhâwn dân a an hming indawt dânin, mipa kum 20 chin chung lam, a mal malin indonaa kal thei chin an chhiar a:

²⁹Isakara hnam an chhiarte chu an vaiin mi 54,400 an ni.

³⁰Zebuluna thlahte chu a hnam leh an chhûngkaw inthlahchhâwn dân a an hming indawt dânin, mipa kum 20 chin chung lam, a mal malin indonaa kal thei chin an chhiar a:

³¹Zebulun hnam an chhiarte chu an vaiin mi 57,400 an ni.

³²Josefa fapa, Ephraim thlahte chu a hnam leh an chhûngkaw inthlahchhâwn dân a an hming indawt dânin, mipa kum 20 chin chung lam, a mal malin, indonaa kal thei chin an chhiar a:

³³Ephraim hnam an chhiarte chu an vaiin mi 40,500 an ni.

³⁴Manase thlahte chu a hnam leh an chhûngkaw inthlahchhâwn dân a an hming indawt dânin, mipa kum 20 chin chung lam, a mal malin indonaa kal thei chin an chhiar a:

³⁵Manase hnam an chhiarte chu an vaiin mi 32,200 an ni.

³⁶Benjamina thlahte chu a hnam leh an chhûngkaw inthlahchhâwn dâna an hming indawt dânin, mipa kum 20 chin chung lam, a mal malin indonaa kal thei chin an chhiar a:

³⁷Benjamin hnam an chhiarte chu an vaiin mi 35,400 an ni.

³⁸Dana thlahte chu a hnam leh an chhûngkaw inthlahchhâwn dâna an hming indawt dânin, mipa kum 20 chin chung lam, a mal malin indonaa kal thei chin an chhiar a:

³⁹Dan hnam an chhiarte chu an vaiin mi 62,700 an ni.

⁴⁰Asera thlahte chu a hnam leh an chhûngkaw inthlahchhâwn dâna an hming indawt dânin, mipa kum 20 chin chung lam, a mal malin indonaa kal thei chin an chhiar a:

⁴¹Asera hnam an chhiarte chu an vaiin mi 41,500 an ni.

⁴²Naphtalia thlahte chu a hnam leh an chhûngkaw inthlahchhâwna an hming indawt dân ang zêlin, mipa kum 20 chin chung lam, a mal malin indonaa kal thei chin an chhiar a:

⁴³Naphtalia hnam an chhiarte chu an vaiin mi 53,400 an ni.

⁴⁴Hêngte hi Mosia leh Aarona'n an chhiar tâk, Israel hnam 12 te chung hotute chu an ni a, mi tinin an thlahtu ai an awh theuh a ni.

⁴⁵Tichuan, Israel mi an chhiar zawng zawng, an thlahtu chhûngkua ang zêla, kum 20 chin chung lam, Israel rama indonaa kal thei tûrte chu—

⁴⁶an vaiin mi 603,550 an inchhiar a.

⁴⁷Levi hote erawh chu an thlahtu hminga chhiar an ni ve lo;

⁴⁸LALPAN Mosia hnênah a lo sawi tawh si a:

⁴⁹“Levi hnam chu in chhiar tel ve tûr a ni lo va, Israel fate zînga inchhiarnaah in telh ve tûr a ni hek lo;

⁵⁰mahse, Leviamite hi Thuhriattirna biakbûk enkawl tûr te, a inchhûng bungrua zawng zawngte leh chuta thil awm zawng zawng chung mawhphurtûah i ruat zâwk tûr a ni; biakbûk leh a bungrua zawng zawng an zâwn thîn ang a; an enkawl ang a, biakbûk chu a vêlah an awmchilh tûr a ni.

⁵¹Biakbûk a insawn dâwn apiangin, Leviamite chuan an thiatt tûr a ni; biakbûk tundin leh hunah, Leviamite bawkin an tung ding leh ang. Pâwn lam mi rawn inrawlh ve chu tihhlum tûr a ni.

⁵²Israel fate chuan anmahni hmun theuhvah, anmahni hnam puanzârna bulah, a pâwl pâwlin an puan inte an zâr tûr a ni a;

⁵³Leviamite erawh chuan, Israel fate chung thinurna a thlen loh nân, Thuhriattirna biakbûk hual vêlin an inzâr darh tûr a ni; tichuan Leviamite chuan Thuhriattirna biakbûk chu an enkawl tûr a ni,” a ti a.

⁵⁴Chutiang chuan Israel fate chuan an ti a; Mosia hnêna LALPAN thu a pêk ang zêlin an ti thîn a ni.

BUNG 2

HNAM LEH PÂWL HOTUTE

¹LALPA chuan Mosia leh Aarona te chu a bia a:

²“Israel mite chu anmahni chhûngkaw chhinchhiahna puanzâr theuh târ sela, an pâwl tihdân ang zêlin riabhûk sa rawh se; biakbûk aţanga kâr awm deuhin riabhûk an sa tûr a ni.

³Ni chhuahna, khawchhak lamah chuan, an pâwl tihdân anga bûk khuar tûrte chu Juda pâwlho an ni ang; Juda hnam hruaitu chu Amminadaba fapa Nasona ni rawh se,” a ti a.

⁴A sipaite chu an vaiin 74,600 an ni.

⁵Anni dawta riabhûk rem leh tûr chu Isakar hnam an ni a, Isakara thlahte hruaitu chu Zuara fapa Nethanela a ni ang.

⁶A sipaite tam lam chu 54,400 an ni.

⁷A dawt leha mite chu Zebulun hnam an ni a, Helona fapa Eliaba chu Zebuluna thlahte hruaitu a ni ang,” a ti a.

⁸A sipaite tam lam chu 57,400 an ni.

⁹“Tichuan, Juda thlahho a pâwl pâwla chhiar tâkte hi, an vaiin mi 1,86,400 an ni a—anniho hian riabhûk sakah hma an hruai thîn tûr a ni.

¹⁰“Chhim lamah Reubena pâwlte chuan anmahni chhinchhiahna puanzâr târin riakhmun an rem ve ang a, Reubena thlahte hruaitu chu Sedeura fapa Elizura a ni ang.”

¹¹A sipaite tam lam chu 46,500 an ni.

¹²Anniho dawta riabhûk rem leh tûrte chu Simeon hnam an ni a, Simeona thlahte hruaitu chu Zurisadaia fapa Selumiela a ni ang.”

¹³A sipaite tam lam chu 59,300 an ni.

¹⁴A dawt leh chu Gad hnam an ni a, Gada thlahte hruaitu chu Reuela fapa Elisapha a ni ang.”

¹⁵A sipaite tam lam chu 45,600 an ni.

¹⁶Tichuan, Reubena thlahte hova a pâwl pâwla chhiar tâkte hi, an vaiin mi 1,51,450 an ni a—anniho hi riabhûk sakah a hmahruai dawttu tûr an ni.

¹⁷Biakbûk an sawn chhuah dâwnin, Leviamite chu a laiah an kal ang a; riabhûka an inrem dân ang zêlin, an kal chhuah pawhin pâwl tin chu anmahni awmna hmun theuhah, a pâwl pâwlin an kal thîn tûr a ni.

¹⁸“Khawthlang lamah Ephraima pâwlte chuan anmahni chhinchhiahna puanzâr târin riakhmun an rem ve ang a, Ephraima thlahte hruaitu chu Ammihuda fapa Elisama a ni ang.”

¹⁹A sipaite tam lam chu 40,500 an ni.

²⁰A dawtah chuan Manasia hnam an awm ang a, Manasia thlahte hruaitu chu Pedazura fapa Gamaliela a ni ang.

²¹An sipaite tam lam chu 32,200 an ni.

²²A dawtah Benjamin hnam an awm ang a, Benjamina thlahte hruaitu chu Dideonía fapa Abidana a ni ang.

²³An sipaite tam lam chu 35,400 an ni.

²⁴Tichuan, Ephraim pâwla sipaiho chu an vaia chhiarin 1,08,100 an ni a—anniho hi a hlâwm thumnaa kal tûr an ni.

²⁵“Hmar lamah Dana pâwlten anmahni chhinchhiahna puanzâr târin riakhmun an sa ve ang a, Dana thlahte hruaitu chu Ammishaddaia fapa Ahiezera a ni ang.”

²⁶An sipaite tam lam chu 62,700 an ni.

²⁷A dawtah Aser hnam an awm ang a, Asera thlahte hruaitu chu Okrana fapa Pagiela a ni ang.

²⁸A sipaite tam lam chu 41,500 an ni.

²⁹A dawt lehah Napthali hnam an awm ang a, Napthalia thlahte hruaitu chu Enana fapa Ahira a ni ang.

³⁰A sipaite tam lam chu 53,400 an ni.

³¹Tichuan, Dana pâwla sipaiho chu an vaia chhiarin 1,57,600 an ni a—anniho hi hnung dâwltu tûr an ni.

³²Hêngte hi an thlahtute hming ang zêla Israel fate inchhiarna a ni. A pâwl ang zêla inchhiarin, an zavaiin mi 603,550 an ni.

³³Levia hnamte erawh chu Mosia hnêna LALPA thûpêk angin, Israel fate inchhiarnaah telh an ni ve lo.

³⁴Tichuan, LALPAN Mosia hnêna thû a pêk ang zêlin, Israel fate chuan an ti a; riahmun an khuar leh an insuan chhuah apiangin, anmahni hnam hlâwm tihdân ang zêlin an che chhuak thîn a ni.

BUNG 3

AARONA FAPATE

¹Sinai Tlânga LALPAN Mosia leh Aarona a biak lai khân, an thlahte chu hêngte hi an ni.

²Aarona fapate hming chu hêngte hi an ni: a fatîr Nadaba te, Abihua te, Eleazara te leh Ithamara te an ni.

³Hêngte hi Aarona fapa, puithiam atâna hriakthih, puithiam hnathawk tûra serh hrante hming chu a ni.

⁴Nadaba leh Abihua te erawh chu Sinai Thlalêrah khân LALPA hmâah mei thiàng lo an hlan lai khân LALPA hmâah an thi a; fa pawh an nei lo. Eleazara leh Ithamara te chuan an pa Aarona kaihhruiin puithiam hna an thawk a.

LEVIA CHITEN BIAKBÛKAH RAWNG AN BÂWL

⁵LALPA chuan Mosia a bia a:

⁶“Levia hnamte churawn hruai hnai la, puithiam Aarona hnênah a rawng an bâwlsak theih nân va hlân ang che.

⁷Amah pui tûr leh biakbûk hmaa mipuite mamawh apiang thawk tûrin biakbûkah rawng an bawl tûr a ni.

⁸Chû bâkah biakbûk chhunga bungrua zawng zawngte vawngin, Israel fate mamawh apiang enkawlin, biakbûk hna an thawk tûr a ni.

⁹Levia hote chu Aarona leh a fapate hnênah i pê tûr a ni a; anni chu Israel fate zîng aţanga ka pêk an ni si a.

¹⁰Aarona leh a fapate chu chanvo i pê ang a, anni chuan puithiam hna chu an thawk reng tawh tûr a ni; pawns lam mirawn inrawlh ve an awm chuan tihlum tûr an ni,” a ti a.

¹¹LALPA chuan Mosia chu a bia a:

¹²“Ngai teh, Israelte fatîr zawng zawng, ka tâ tûra ka hauh aiah, Levia hote hi Israel fate zîng aţangin ka la hrang ta. Chuvângin Levia mite chu ka tâ an ni,

¹³fatîr zawng zawng ka tâ an ni si a. Aigupta rama fatîr zawng zawng ka tihlum ni aţang khân, Israel rama mihring leh an ran piang hmasate chu ka tân ka serh hrang vek a. Ka tâ tûr an ni: LALPA ka nih hi,” a ti a.

LEVIA MITE CHHIAR TÛR THUPÊK

¹⁴Sinai Thlalêrah chuan LALPAN Mosia a bia a:

¹⁵“Levia-hote hi an chhângkua leh an inthlahchhâwn dân zêlin chhiar la; mipa thla khat chin chung lam zawng zawng chhiar vek rawh,” a ti a.

¹⁶Tichuan, LALPAN thû a pêk ang zêlin Mosia chuan a chhiar ta a.

¹⁷Levia fapa hmingte chu: Gersona te, Kohatha te leh Meraria te an ni.

¹⁸Gersona fapaten hnam hming an put chu: Libnia leh Simeia te an ni.

¹⁹Kohatha thlahte hnam hming put chu: Amrama te, Izehara te, Hebrona leh Uziela te an ni.

²⁰Meraria thlahte hnam hming put chu: Mahlia leh Mushia te an ni. Hêngte hi Levia thlahte hnam hming put chu an ni.

²¹Gersona aţangin Libni hnam leh Simeia hnam an lo chhuak a; chûngte chu Gerson hnam an ni.

²²Mipa thla khat achin chung lam an chhiar chu, an za vaiin 7500 an ni.

²³Gerson hnamte chu biakbûk khaw thlang lamah riahmun an rem tûr a ni.

²⁴Gersona thlahte zînga an hruaitu chu Laela fapa Eliasapha a ni.

²⁵Gersona thlahte hovin biakbûk enkawl hna an thawh tûrte chu, biakbûk te, puan in leh a chung kuhna te, biakbûk kawngka puanzâr te,

²⁶a tual hungna kawngka puanzâr te, biakbûk bang puanzâr leh maichâm te, a kaihna hrui zawng zawng te a ni.

²⁷Kohath-ho aţangin Amram hnam te, Izehar hnam te, Hebron hnam te, Uziel hnam te an lo chhuak a; chûngte chu Kohatha thlahte an ni.

²⁸Mipa thla khat chung lam an chhiar zawng zawng, hmun thianglim enkawltute chu an vaiin 8,600 an ni.

²⁹Kohatha thlahte chuan biakbûk chhim lamah riahmun an rem thîn tûr a ni.

³⁰Kohatha thlahte hruaitu chu Uziela fapa Elizaphana a ni.

³¹An hnâ chu Thuthlung Bâwm te, dawhkân te, khâwnvâr dahna te, maichâm te, hmun thianghlina an hman bungbêl te, puanzâr leh hmanraw dangte nêna enkawl a ni.

³²Puithiam Aarona fapa Eleazara, Levia chite chung hotu chu hmun thianglim enkawltu hotu a ni.

³³Meraria thlahte aţangin Mahli hnam te leh Mushi hnam te an lo chhuak a; chûngte chu Meraria thlahte an ni.

³⁴Mipa thla khat chung lam an chhiar zawng zawng chu an vaiin 6200 an ni.

³⁵Meraria thlahte hruaitu chu Abihaila fapa Zuriela a ni. Hêngho hi biakbûk hmar lama riahmun rem thîn tûr an ni a.

³⁶Meraria thlahte tih tûra ruat chu biakbûk bang te, a bangrel te, ban te, a bulthut te, a bungbêl te,

³⁷a hungna ban te, ban bul̄thut te, a khenna te leh a kaihna hruì enkawl hnâ a ni.

³⁸Biakbûk khawchhak lam, inbiakna puan in kawt âna bûk khuar tûrte chu Mosia te, Aarona leh a fapate an ni a, anni chu hmun thianghlim enkawltu tûr leh, Israel fate mamawh ang zêla thawktu tûr an ni; pawns lam mirawn hnaihtu apiang chu tihhlum zêl tûr an ni.

³⁹LALPAN chhinchhiah tûra Mosia leh Aarona te thû a pêk anga an chhûngkua ang zêla Levìa thlahte, mipa thla khat chung lam an chhiar zawng zawng chu 22,000 an ni.

FATÎR AIAH LEVIA THLAHTE SERH HRAN

⁴⁰LALPA chuan Mosia hnênah: “Israel fate zînga fatîr thla khat chin chung lam zawng zawng chhiar vek la, an hming ziaik chhuak vek rawh.

⁴¹Levia thlahte chu Ka tân dah hrang rawh –LALPA ka nih hi–Israela thlahte fatîr zawng zawng aiah ka hauh a ni; Levìa mite ran rual rêng rêng chu Israel fate ran piang hmasa ber aiah ka hauh bawka a ni,” a ti a.

⁴²Tichuan, Mosia chuan LALPA thupêk angin Israel fate zînga fatîr zawng zawng chu a chhiar vek a.

⁴³Fatîr zînga mipa zawng zawng, thla khat chin chung lam chu an hming an ziaik chhuak vek a, an vaiin mi 22,273 an ni.

⁴⁴LALPA chuan Mosia a bia a:

⁴⁵“Israel fate zînga fatîr zawng zawng aiah Levìa mite chu dah hrang la, an ran aiah Levìa mite ran dah hrang bawka rawh. Levìa mite chu Ka tâ an ni ang: LALPA ka nih hi.

⁴⁶Levia mite aia Israelte fatîr an tam zâwkna mi 273 te tlan nân,

⁴⁷mi pakhat zêlah sekel nga theuh i la tûr a ni; sekel chu hmun thianghlîma hman lai ang chiaha bûk tûr a ni a, sekel khatah gerah 20 zêlin.

⁴⁸Chûng mi chuangte tlanna sum chu Aarona leh a fapate pe ang che,” a ti a.

⁴⁹Tichuan, Levìa mite aia mi chuangte tlanna sum chu Mosian a la khâwm ta a.

⁵⁰Israelte fatîr aţangin sum chu a lakhâwm a, hmun thianghlîma sekel bûkna angin sekel 1,365 a ni.

⁵¹LALPAN Mosia hnêna thu a pêk angin, tlanna sum chu Mosia chuan, LALPA thu angin, Aarona leh a fapate a pe ta a.

BUNG 4

KOHATHA THLAHTE HNA CHANPUAL

¹LALPA chuan Mosia leh Aarona te chu a bia a:

²“Kohatha thlahte chu an chi leh chhûngkua ang zêlin chhiar la,

³biakbûka hna thawktu tûr zawng zawng, kum 30 aţanga kum 50 inkâr hming ziaik chhuak rawh.

⁴“Biakbûk hmun thianghlim bera Kohatha fapate rawngbâwl dân tûr chu hetiang hi a ni ang:

⁵Riahhmun insawn dâwn apiangin, Aarona leh a fapate an lo kal ang a, puanzâr chu an la thla ang a, Thuthlung Bâwm tuam nân an hman tûr a ni.

⁶Chû chu savun ţa chiin an tuamhnan tûr a ni, puan dumpâwlin an khuh leh ang a; a zâwnfung pawh an vuah bawka tûr a ni.

⁷Chhangserh dahna dawhkân chungah puan dumpâwl an phah ang a, chutah chuan thlêng te, bêl te, chawhtawlh te, a bun chhuahna no te chu an fûn khâwm ang a; chutah chuan chhangserh pawh a tel zêl tûr a ni.

⁸Puan sendukin an khuh leh ang a, savun ţa chiin an tuamhnan bawka ang a; a zâwnfung pawh an vuah leh tûr a ni.

⁹Khâwnvâr dahna te, khâwnvâr te, chaicheh leh a vâp dahna te, hriak dahna bûr leh hmanruate chu puan dumpâwla tuam tûr a ni.

¹⁰Chûngte chu hmanraw dang zawng zawng nê savun ţa chia tuama, a zâwnfungah vuah leh tûr a ni.

¹¹Rangkachak maichâm chu puan dumpâwlin an khuh tûr a ni a, savun ţa chiin an tuamhnan leh ang a; a zâwnfung an vuah leh tûr a ni.

¹²Hmun thianghlîma an hman rawngbâwlna bungbêl zawng zawng chu puan dumpâwlin an fûn ang a, savun ţa chiin an tuamhnan leh ang a, a zâwnfungah an vuah tûr a ni.

¹³Maichâma meivâp chu an rût fai ang a, a chungah puan senduk an phah tûr a ni.

¹⁴A chungah chuan an hmanraw hman bungbêl zawng zawng–rimtui hâl bûr te, thîrkut te, vut-lawh te, bêl te, maichâm bungbêl zawng zawng te chu fûn khâwm sela, savun ţa chiin an tuamhnan leh ang a, a zâwnfung an vuah tûr a ni.

¹⁵Aarona leh a fapaten hmun thianghlim leh, hmun thianghlim bungrua zawng zawng an têt fela, riahhmun sawn tûra an inpeih hunah, Kohatha thlahte chu a zâwn tûrin an lo kal thîn tûr a ni; thil thianghlimte erawh chu an khawih hauh tûr a ni lo; an thih phah mai ang. Chûngte chu biakbûk bungrua, Kohatha thlahten an ken tûrte a ni.

¹⁶Puithiam Aarona fapa Eleazara thawh tûr chu, hriak chhit tûr te, rimpui te, ni tina buhbâl thilhlân te, hriak thih chi te, biakbûk chhûnga thil awm zawng zawng, hmun thianghlim leh a bungrua zawng zawng enkawl te a ni,” a ti a.

¹⁷LALPA chuan Mosia leh Aarona te chu a bia a:

¹⁸“Levia hnamte zîng aţangin Kohatha thlahte hi paihbo suh u;

¹⁹amaherawhchu, thil serh thianghlim ber bul hnaia an kal pawha an boral loh nân, heti hian ti zâwk ang che u: Aarona leh a fapate chu an hnênah va lût sela, an thawh tûr chanpual ruatsak rawh se.

²⁰Mahse, thil serh hrante an tuam ţat lai en tûr pawhin va lût ve suh se, chuti lo zawng an thih phah mai ang,” a ti a.

GERSONA FAPATE HNA CHANPUAL

²¹LALPA chuan Mosia a bia a:

²²“Gersona fapate hi an thlahtute leh an chhûngkua ang zêlin chhiar vek rawh.

²³Kum sawmthum aṭanga kum sawmnga inkâr mi, biakbûka hna thawk thei zawng zawng chu chhiar vek ang che.

²⁴Hêngte hi Gersona fapate chuan an enkawla an zâwn ṭhin tûrte a ni:

²⁵Biakbûk puanzârte leh inbiakna puan inchung khuhna te, a thuahna savun te, biakbûk kawngka puanzâr te,

²⁶kawt hungna kawngka puanzâr te, biakbûk leh maichâm hungna puanzâr te, a kaihna hrui te, a hmanrua zawng zawng nêan an zâwn ṭhin tûr a ni.

²⁷Aarona leh a fapate chuan Gersona fapate chu an hnathawh tûr chanpual an ruatsak vek tûr a ni. An thawh tûr leh mawhphurhna te chu in kawhhmuh zêl bawk tûr a ni.

²⁸Chûngte chu biakbûk chungchânga Gersona thlahteho tihtûr a ni. An tihtûrte chu puithiam Aarona fapa Ithamara'n a lo kawhhmuh ṭhin tûr a ni.

MERARI FAPATE HNA CHANPUAL

²⁹“Meraria thlahte chu an chhûngkua leh an thlahte ang zêlin i chhiar tûr a ni.

³⁰Kum sawmthum achin chung lam zawng, kum sawmnga thlengin, biakbûka rawngbâwl thei chin chu i chhiar vek tûr a ni.

³¹Biakbûk hnaa an chanpual, an phurh ve tûrte chu hêngte hi a ni: biakbûk bang te, a rel te, a ban leh a nghahchhan te,

³²tual hungna ban leh a nghahchhan te, a kilhbehna te, a kaihna hrui te leh a hmanrua zawng zawngte nêan a ni a; mi tin hnênah an phurh tûr chu hming hmerhin in ruatsak tûr a ni.

³³Chûng zawng chu biakbûk rawngbâwlnaa Meraria thlahteho chanpual, puithiam Aarona fapa Ithamara hova an thawh tûr chu a ni.”

LEVIA MITE CHHIARPUI

³⁴Mosia te, Aarona te leh mipui hotute chuan Kohatha thlahteho chu an chhûngkua leh an thlah zât azirin an chhiar a,

³⁵kum sawmthum achin chung lam zawng, kum sawmnga thlengin, biakbûka rawngbâwl thei chin chu an chhiar vek a;

³⁶an chhûngkua ang zêla an chhiarte chu 2,750 an ni.

³⁷Chûng mi an chhiarte chu Kohatha thlahte, biakbûka rawngbâwl thei chin, Mosia hnêna LALPAN thu a pêk anga Mosia leh Aaronan an chhiar tâkte chu an ni.

³⁸Gersona thlah an chhiar te chu an chhûngkua leh an thlahte ang zêlin,

³⁹kum sawmthum achin chung lam zawng, kum sawmnga thlengin, biakbûka rawngbâwl thei chin an chhiar vek a—

⁴⁰a chhûngkua ang leh a chî chia an chhiarte chu 2,630 an ni.

⁴¹Chûng mi an chhiarte chu Gersona thlahte, biakbûka rawngbâwl thei chin, Mosia hnêna LALPAN thu a pêk anga Mosia leh Aarona ten an chhiar tâkte chu an ni.

⁴²Meraria thlah an chhiar te chu an chhûngkua leh an thlahte ang zêlin,

⁴³kum sawmthum achin chung lam zawng, kum sawmnga thlengin, biakbûka rawngbâwl thei chin chu an chhiar vek a—

⁴⁴a chhûngkua ang leh a chî chia an chhiarte chu 3,200 an ni.

⁴⁵Chûng mi an chhiarte chu Meraria thlahte, biakbûka rawngbâwl thei chin, Mosia hnêna LALPAN thu a pêk anga Mosia leh Aarona ten an chhiar tâkte chu an ni.

⁴⁶Mosia leh Aarona leh Israel mipui hotuten an chhûngkua leh an thlahte ang zêla an chhiar Levia thlahte chu,

⁴⁷kum sawmthum achin chung lam zawng, kum sawmnga thlengin, biakbûk hmanraw phur thei chin an chhiar vek a—

⁴⁸chûng an chhiarte chu 8,580 an ni.

⁴⁹LALPA thupêk angin, mi tin an rawngbâwl na leh an hna chanpual ang theuhvin, Mosian a chhiar a; tichuan, LALPA thupêk ang zêlin Mosian a chhiar ta a ni.

BUNG 5

MI BAWLHHLAWHTE AN DAH HRANG

¹LALPA chuan Mosia a bia a:

²“Israel fate hnênah phâr te, thipût nei lai te leh, mitthi ruang khawih vânga bawlhhlawh apiang chu riahmmun pâwnah chhuak vek tûrin thû pe rawh.

³Ahmei apain daipâwnah i chhuahtîr tûr a ni; chuti lo zawng, in zîngah ka chêng ve si a, riahmmun hi an tibawrhbâng palh ang e,” a ti a.

⁴Tichuan, Israel fate chuan chutiang chuan an ti a, riahmmun pâwnah chuan an dah chhuak vek a; LALPAN Mosia a hrilh ang zêlin Israel fate chuan an ti ta a.

SUAL PUAN LEH RULH LÊT

⁵LALPA chuan Mosia hnênah,

⁶“Israel fate hnênah heti hian ti rawh: ‘Mipa emaw, hmeichhia emaw LALPA chung rinawm lovin, thil sual tiin, thiam loh chang ta sela,

⁷a thil sual tih chu a inpuang tûr a ni. A bawhchhiat man chu kim takin a rûl leh tûr a ni a, chu bâkah hmun ngâa thena hmun khat chu a paw sawina pa hnênah a pêk belh tûr a ni.

⁸Amaherawhchu, a bawhchhiat man lo dawngtu tûra chuan laina a neih loh chuan, a bawhchhiat man rulhna chu puithiam chanpualah LALPA hnênah a pe tûr a ni; chû chu inrem nâna berâmpa a hlan tûr tiam lovin a ni.

⁹Israel faten inthâwi nâna thil thianghlim an hlan, puithiam hnêna an pêk apiang chu, puithiam chanpual a ni ang.

¹⁰Mahni thil serh thianghlim chu a neitu tâ a ni ang a; puithiam hnêna an hlan apiang puithiam tâ a ni ang,” a ti a.

NUPUI RINAWM LO CHUNGCHÂNG

¹¹LALPA chuan Mosia a bia a,

¹²“Israel fate hnênah heti hian hrilh rawh: ‘Tû nupui pawh leplêrin a pasal lakah rinawm lo takin lo khawsa ta se,

¹³mipain lo mutpui sela, a pasalin hre si lo se, chesual ngei sîin inthup tlat sela, thuhretu pawh awm lovin, kutman ni baw si lo sela—

¹⁴a pasala rilrûah thîkna chawh thovin, a nupui chesual chu ringhlelin thîk ta sela; emaw, a nupui chesual si lo chu ringhlelin thîk ta sela—

¹⁵chu pa chuan a nupui chu puithiam hnênah arawn hruai tûr a ni. Thilhlân atâna tûl—barli chhangphut epha hmun sâwma thena hmun khat a keng tûr a ni; a chungah hriak a leih tûr a ni lova, rimtui a pawlh tûr a ni hek lo, thîk thâwina chhangphut thilhlân, hriatrengna atâna hlan, khawlohna hriatrengna tûr a ni si a.

¹⁶Puithiam chuan a hruai ang a, LALPA hmâah a dintîr ang.

¹⁷Puithiam chuan hlum bêlin tui thianghlim a suak ang a, biakbûk chhuata vaivut thâmin, tuih chuan a phul ang.

¹⁸Puithiam chuan hmeichhia chu LALPA hmâah a dintîr ang a, hmeichhe lukhuhna chu hlîpin, a kutphahah chuan hriatreng nân thilhlân chu a hûmtîr ang, chû chu thîk thâwina chhangphut chu a ni. Puithiam chuan ânhhia rawn thlentû tui khâ chu a kutin a keng tûr a ni.

¹⁹Puithiam chuan hmeichhia chu chhia a chhamtîr ang a, hmeichhe hnênah chuan, “Tûma’n an mutpui loh che a, i pasal laka bawhlhlawhna kawng i zawhsan lo a nih chuan, he ânhhe thlentû tui kha lakah hian lo fihlîm ang che.

²⁰Amaherawhchu, pasal nei chung renga khawdang i hawi a, i pasal ni lo mipain a mutpui che a, i intihbawrhbân erawh chuan”—

²¹puithiam chuan hmeichhia chu a vau ang a, chhia chhamtîrin, hmeichhe hnênah chuan heti hian a ti ang— “LALPA chuan i mite chhechhamna ânhhe bûrah siam che rawh se, LALPAN i malpui tiṭawihin, i dul tivûng sela;

²²hê ânhhe thlentû tui hi i pumpuiah lût sela, i pum chu tipuarin i malpui tiṭawih rawh se,” a ti ang a. Hmeichhia chuan, “Amen, chutiang chu ni rawh se,” a ti tûr a ni.

²³Puithiam chuan chûng ânhhe thûte chu lehkhâbûah a ziaik ang a, tui khâ chu a tlêng fai leh tûr a ni.

²⁴Tichuan, ânhhe thlentû tui khâ chu hmeichhia chu a intîr tûr a ni a, chû ânhhe thlentû tui chu a kawchhûngah a lût ang a, a lo khâ ang.

²⁵Puithiam chuan thîk thilhlân chhangphut hmeichhe kuta mi chu a la ang a, LALPA hmâah a thên ang a, maichâmah a kalpui ang;

²⁶puithiam chuan chu thilhlân chu hriatreng nân vei khatin a thâm ang a, maichâmah chuan a hâl ang a, chumi zawhah chuan tui chu hmeichhia a intîr tûr a ni.

²⁷Hmeichhia chu tui a han intîr chuan, heti hi a lo ni ang, a lo che bawhlhlawh ngei a, a pasal a lo uirêsan ngei a nih chuan, ânhhe thlentû tui kha a kawchhûngah lûtin a lo khâ ang a, a pum a lo puar ang a, a malpui a ṭawih ang a, chû nu chu a mite zînga ânhhia maiah a chang tawh ang.

²⁸Mahse hmeichhia chu a intihbawrhbân lohva, a fihlîm a nih chuan, eng mah a ti lo vang a, nau pawh a pai leh thei ang.

²⁹Hei hi nupui leplêrh, fawr bo chîng, pasal pawm lai nei reng chung a mi dang chêsualpuitu tâna thîk thâwi dân chu a ni a,

³⁰mipain thîkna rilru a lo put a, a nupui a thîk thâwi dân chu a ni; puithiamin hmeichhia chu LALPA hmâah a dintîr ang a, he

dân ang hian a lo ti tûr a ni.

³¹Tichuan, mipa chu khawlohna sual lakah chuan a lo fihlîm ang a, hmeichhia erawh chuan a sual mawh chu a phur ang,” a ti a.

BUNG 6

NAZARIT MI NIH DÂN

¹LALPA chuan Mosia a bia a,

²“Israel fate hnênah heti hian sawi rawh: ‘Mipain emaw, hmeichhiain emaw Nazarit mi ni tûra thu a tiam a, LALPA tâna a inserh hran chhûngin,

³uain leh zu dang lakah a inthiarfihlîm tûr a ni; uain thûr te, zu thûr te chenin a nghei vek tûr a ni a; grêp sâwr tui pawh a in tûr a ni lo va, grêp tharlâm emaw, pho ro emaw pawh a ei tûr a ni lo.

⁴A inserh hran hun chhûng zawng chu grêp aṭanga siam thil rêng rêng, a mu pawh, a pil pawh a ei tûr a ni lo.

⁵A inserh hran chhûngin a lu chu bakmehnain a deh pawh a dek tûr a ni lo; LALPA tâna a inserh hran ni a kim hma chu serh a ni reng ang a, a sam pawh a zuah reng tûr a ni.

⁶LALPA tâna a inserh hran hun chhûng zawngin mitthi ruang a hnaih tûr a ni lo.

⁷A nu emaw, a pa emaw, a unaupa emaw, a farnu emaw pawh thi se, a intibawhlhlawh tûr a ni lo, Pathian tâna inserh hrang a ni si a.

⁸A inserh hran chhûng zawng chu LALPA tâna serh hran a ni.

⁹A bulah mi lo thi thutin, a inserh hranna lu chu lo tibawhlhlawh sela, a inthenna ni, a ni sarih niah a lu chu a ziat kawh tûr a ni.

¹⁰A ni riat niah ṭhûro pahni emaw, pârvâ tuai pahni emaw kengin biakbûk kawngkaah puithiam hnênah a rawn la tûr a ni;

¹¹mitthi ruang vânga a bawhchhiatnaah, puithiam chuan pakhat chu sual thâwi nân a hlân ang a, pakhat dang chu hâlral thilhlân atân a hlân ang a, inremna a siamsak ang; chumi ni chuan a lu chu a thian thianghlim tûr a ni.

¹²Bawhchhiat thâwi nân berâm pa kum khat mi kengin, a inserh hranna chu LALPA hnênah a hlân thar leh tûr a ni; a lo inserh hran tawh nîte erawh chu bawhchhiat a nih tâk avângin a thlâwn mai a ni ang.

¹³Nazarit mi nih dân chu hetiang hi a ni: A intihhranna nî a lo kim chuan, biakbûk kawngkaah a rawn hruai tûr a ni.

¹⁴LALPA tâna a thilhlân tûr: hâlral thilhlân atân berâm pa kum khat mi, hmêlhem lo nê, sual thâwi nân berâm nu, kum khat mi hmêlhem lo nê, inremna thilhlân atân berâm pa pakhat, hmêlhem lo nê,

¹⁵dâwidim telh loh chhang te, hriaka hmech chhangphut ṭha chia siam kêk te, hriaka kan chhangpêr te bâwm khatin, buhbâl thilhlân leh in tûr thilhlân te nê a hlân tûr a ni.

¹⁶Puithiamin chûngte chu LALPA hmâah a keng ang a, a sual thâwi nân leh a hâlral thilhlân atân a hlansak ang.

¹⁷Berâm pa chu, bâwma dawidim telh loh chhangte nên chuan remna inthâwi nân LALPA hnênah a hlân tûr a ni a; puithiam chuan buhbâl thilhlân leh in tûr thilhlân a hlân tel bawk tûr a ni.

¹⁸Nazarit mi chuan a inserhhranna lû chu biakbûk kawngkaah chuan a mêt fai ang a, remna inthâwina thilhlân hnuai meiah chuan a rawh tûr a ni.

¹⁹Puithiam chuan berâm pa chhum hmin dâr te, bâwma dâwidim telh loh kêk tlang khat nên, chhang pêr khat nên a la ang a, chu Nazarit mi, a lu met fai tawha kutah chuan a hlân tûr a ni;

²⁰tichuan, puithiam chuan thên thil hlânin LALPA hmâah a thên ang; thên thilhlân ir-âwm leh thên thilhlân bawp te chu puithiam chan tûra serh hran a ni. Chumi zawh aţang chuan Nazarit mi chuan uain pawh a in thei tawh ang.’

²¹“Hei hi Nazarit miten LALPA hmâah thu an tiam a, inserh hran nâna thil an hlan dân chu a ni, hei bâka pêk belh a duh chuan a pe belh thei ang; a inserhhranna dân a intiam ang zêlin a hlen chhuak tûr a ni.

PUITHIAM MALSAWMSAKNA

²²LALPA chuan Mosia a bia a:

²³“Aarona leh a fapate hnênah heti hian hrilh rawh, ‘Heti hian Israel fate mal in sâwm tûr a ni. Tihian ti ang che u:

²⁴“LALPAN malsâwmin veng che u rawh se;

²⁵LALPA chuan a hmêl chu in chungah êntîr sela, Khawngaih che u rawh se;

²⁶LALPA chuan in lam rawn hawi sela, Thlamuanna pe che u rawh se,” ti zêl ang che u.’

²⁷“Tichuan Israel fate chungah Ka hming an chuantîr ang a, keiin mal ka lo sâwm thîn dawn nia,” a ti a.

BUNG 7

HRUAITUTE THILHLÂN

¹Mosia’n biakbûk a din fel zawh chuan, a bungrua zawng zawng te, a maichâm leh bungbêl zawng zawng te chu hriak a thih a, a hlân thianghlâm ta a; chutiang tak chuan hriak thihin a hlân thianghlâm a ni.

²Israel hnam puipate, an thlahtu chhûngkaw hotu leh chhiarpui buaipuitu, hnam tina an hotute chuan thilpêk an rawn hlân a.

³LALPA hmaa thilpêk an rawn kente chu, tawlailîr chung nei paruk leh bawngpa sâwm pahni a ni a, puipa pahnihin tawlailîr pakhat zêl tumîn, puipa pakhatin bawngpa pakhat zêl an tum a; biakbûk kawtah chuan an rawn kai a.

⁴LALPA chuan Mosia hnênah,

⁵“Hêngte hi a tûl ang zêla biakbûk rawngbâwl nâna hman a nih theih nân lo dawn sak la; Levi hote hnênah an hna thawh tûr ang zêlin sem ang che,” a ti a.

⁶Tichuan, Mosia chuan tawlailîrte leh bawngpate chu a la a, Levi hote chu a pe ta a.

⁷Tawlailîr pahni leh bawngpa pali chu Gersona fapate hnênah an thawh tûr ang zêlin a pê a;

⁸Tawlailîr pali leh bawngpa pariat chu puithiam Aarona fapa Ithamara kutah, Meraria fapate hnênah an thawh tûr ang zêlin a pe bawk a.

⁹Kohatha fapate erawh chu a pe ve lo, anniho chu thil thianghlâm enkawltu, an kokîa zâwn thîn tûra tih an ni si a.

¹⁰Puipahote chuan hriakthih ni chuan maichâm tâna hlan tûr thil an rawn keng a; tichuan, puipahote chuan maichâm hmâah thilpêk an hlân a.

¹¹LALPAN Mosia hnênah, “Maichâm hlan nâna an thilpêkte chu, a inchohâwkin ni tin puipa pakhat zêlin hlân rawh se,” a ti a.

¹²A ni khat nia thilpêk hlân hmasatu chu Juda hnama mi, Amminadaba fapa Nasona a ni a.

¹³A thilhlân chu hmun thianghlâm sekel bûka teha sekel 130-a rit silvâr thlêng leh, silvâr chawhtawlh, sekel 70 a rit, buhbâl thilhlân atân chhangphut tha chi hriaka chawhpawlh, a khat vê vê a ni a;

¹⁴rangkachak no, sekel 10-a rit, rimtuia khat nên;

¹⁵bawngpa tuai pakhat, berâmpa pakhat, berâmno, a pa kum khat mi, hâl ral atâna hlan tûr nên;

¹⁶kêl no pakhat, sual thâwi nâna hman tûr nên;

¹⁷remna inthâwi thilhlân atân: bawngpa pahni, berâmpa pangâ, kêlpa pangâ, berâm no, a pa kum khat mi pangâ nên. Hêng hi Amminadaba fapa Nasona thilpêk rawn hlante chu a ni.

¹⁸A ni nhii ni chuan Isakar-ho puipa, Zuara fapa Nethanela chuan thilpêk a hlân ve a.

¹⁹A thilhlân chu hmun thianghlâm sekel bûka teha sekel 130-a rit silvâr thlêng leh, silvâr chawhtawlh, sekel 70 a rit, buhbâl thilhlân atân chhangphut tha chi hriaka chawhpawlh, a khat vê vê a ni;

²⁰rangkachak no, sekel 10-a rit, rimtuia khat nên;

²¹bawngpa tuai pakhat, berâm pa pakhat, berâm no, a pa kum khat mi, hâl ral atâna hlan tûr nên;

²²kêl no pakhat, sual thâwi nâna hman tûr nên;

²³remna inthâwi thilhlân atân: bawngpa pahni, berâmpa pangâ, kêlpa pangâ, kêl no, a pa kum khat mi pangâ nên. Hêng hi Zuara fapa Nethanela thilpêk rawn hlante chu a ni.

²⁴A ni thum ni chuan Zebulun-ho puipa, Helona fapa Eliaba chuan thilpêk a hlân ve a.

²⁵A thilhlân chu hmun thianghlâm sekel bûka teha sekel 130-a rit silvâr thlêng leh, silvâr chawhtawlh, sekel 70 a rit, buhbâl thilhlân atân chhangphut tha chi hriaka chawhpawlh, a khat vê vê a ni;

²⁶rangkachak no, sekel 10-a rit, rimtuia khat nên;

²⁷bawngpa tuai pakhat, berâmpa pakhat, berâm no, a pa kum khat mi, hâl ral atâna hlan tûr nên;

²⁸kêl no pakhat, sual thâwi nâna hman tûr nên;

²⁹remna inthâwi thilhlân atân: bawngpa pahni, berâmpa pangâ, kêlpa pangâ, berâm no, a pa kum khat mi pangâ nên. Hêng hi Helona fapa Eliaba thilpêk hlante chu a ni.

³⁰A ni lî nî chuan Reuben-ho puipa, Sedeura fapa Elizura chuan thilpêk a hlân ve a.

³¹A thilhlân chu hmun thianghlim sekel bûka teha sekel 130-a rit silvâr thlêng leh, silvâr chawhtawlh, sekel 70 a rit, buhbâl thilhlân atân chhangphut tha chi hriaka chawhpawlh, a khat vê vê a ni;

³²rangkachak no, sekel 10-a rit, rimtuia khat nê;

³³bâwngpa tuai pakhat, berâmpa pakhat, berâm no, a pa kum khat mi, hâl ral atâna hlan tûr nê;

³⁴kêl no pakhat, sual thâwi nâna hman tûr nê;

³⁵remna inthâwi thilhlân atân: bâwngpa pahni, berâmpa pangâ, kêlpa pangâ, kêl no, a pa kum khat mi pangâ nê. Hêng hi Sedeura fapa Elizura thilpêk hlante chu a ni.

³⁶A ni ngâ nî chuan Simeon-ho puipa, Zurisadaia fapa Selumiela chuan thilpêk a hlân ve a.

³⁷A thilhlân chu hmun thianghlim sekel bûka teha sekel 130-a rit silvâr thlêng leh, silvâr chawhtawlh, sekel 70 a rit, buhbâl thilhlân atân chhangphut tha chi hriaka chawhpawlh, a khat vê vê a ni;

³⁸rangkachak no, sekel 10-a rit, rimtuia khat nê;

³⁹bâwngpa tuai pakhat, berâmpa pakhat, berâm no, a pa kum khat mi, hâlral atâna hlan tûr nê;

⁴⁰kêl no pakhat, sual thâwi nâna hman tûr nê;

⁴¹remna inthâwi thilhlân atân: bâwngpa pahni, berâmpa pangâ, kêlpa pangâ, berâm no, a pa kum khat mi pangâ nê. Hêng hi Zurisadaia fapa Selumiela thil hlante chu a ni.

⁴²A ni ruk nî chuan Gad-ho puipa, Deuela fapa Eliasapha chuan thilpêk a hlân ve a.

⁴³A thilhlân chu hmun thianghlim sekel bûka teha sekel 130-a rit silvâr thlêng leh, silvâr chawhtawlh, sekel 70 a rit, buhbâl thilhlân atân chhangphut tha chi hriaka chawhpawlh, a khat vê vê a ni;

⁴⁴rangkachak no, sekel 10-a rit, rimtuia khat;

⁴⁵bâwngpa tuai pakhat, berâmpa pakhat, berâm no, a pa kum khat mi, hâl ral atâna hlan tûr nê;

⁴⁶kêlno pakhat, sual thâwi nâna hman tûr;

⁴⁷remna inthâwi thilhlân atân: bâwngpa pahni, berâmpa pangâ, kêlpa pangâ, berâm no, a pa kum khat mi pangâ nê. Hei hi Deuela fapa Eliasapha thil hlante chu a ni.

⁴⁸A ni sarîh nî chuan Ephraim-ho puipa, Ammihuda fapa Elisama chuan thilpêk a hlân ve a.

⁴⁹A thilhlân chu hmun thianghlim sekel bûka teha sekel 130-a rit silvâr thlêng leh, silvâr chawhtawlh, sekel 70 a rit, buhbâl thilhlân atân chhangphut tha chi hriaka chawhpawlh, a khat vê vê a ni;

⁵⁰rangkachak no, sekel 10-a rit, rimtuia khat nê;

⁵¹bâwngpa tuai pakhat, berâmpa pakhat, berâm no, a pa kum khat mi, hâl ral atâna hlan tûr nê;

⁵²kêl no pakhat, sual thâwi nâna hman tûr nê;

⁵³remna inthâwi thilhlân atân: bâwngpa pahni, berâmpa pangâ, kêlpa pangâ, kêl no, a pa kum khat mi pangâ nê. Hêng hi Ammihuda fapa Elisama thil hlante chu a ni.

⁵⁴A ni riat nî chuan Manase-ho puipa, Pedazura fapa Gamaliela chuan thilpêk a hlân ve a.

⁵⁵A thilhlân chu hmun thianghlim sekel bûka teha sekel 130-a rit silvâr thlêng leh, silvâr chawhtawlh, sekel 70 a rit, buhbâl thilhlân atân chhangphut tha chi hriaka chawhpawlh, a khat vê vê a ni;

⁵⁶rangkachak no, sekel 10-a rit, rimtuia khat nê;

⁵⁷bâwngpa tuai pakhat, berâmpa pakhat, berâm no, a pa kum khat mi, hâl ral atâna hlan tûr;

⁵⁸kêl no pakhat, sual thâwi nâna hman tûr nê;

⁵⁹remna inthâwi thilhlân atân: bâwngpa pahni, berâmpa pangâ, kêlpa pangâ, berâm no, a pa kum khat mi pangâ nê. Hêng hi Pedazura fapa Gamaliela thilrawn hlante chu a ni.

⁶⁰A ni kua nî chuan Benjamin-ho puipa, Gideon fapa Abidana chuan thilpêk a hlân ve a.

⁶¹A thilhlân chu hmun thianghlim sekel bûka teha sekel 130-a rit silvâr thlêng leh, silvâr chawhtawlh, sekel 70 a rit, buhbâl thilhlân atân chhangphut tha chi hriaka chawhpawlh, a khat vê vê a ni;

⁶²rangkachak no, sekel 10-a rit, rimtuia khat;

⁶³bâwngpa tuai pakhat, berâmpa pakhat, berâm no, a pa kum khat mi, hâl rala hlan tûr;

⁶⁴kêl no pakhat, sual thâwi nâna hman tûr nê;

⁶⁵remna inthâwi thilhlân atân: bâwngpa pahni, berâmpa pangâ, kêlpa pangâ, berâm no, a pa kum khat mi pangâ nê. Hêng hi Gideon fapa Abidana thilpêkrawn hlante chu a ni.

⁶⁶A ni sâwm nî chuan Dan-ho puipa, Ammisadaia fapa Ahiezera chuan thilpêk a hlân ve a.

⁶⁷A thilhlân chu hmun thianghlim sekel bûka teha sekel 130-a rit silvâr thlêng leh, silvâr chawhtawlh, sekel 70 a rit, buhbâl thilhlân atân chhangphut tha chi hriaka chawhpawlh, a khat vê vê a ni;

⁶⁸rangkachak no, sekel 10-a rit, rimtuia khat nê;

⁶⁹bâwngpa tuai pakhat, berâmpa pakhat, berâm no, a pa kum khat mi, hâl ral atâna hlan tûr nê;

⁷⁰kêl no pakhat, sual thâwi nâna hman tûr nê;

⁷¹remna inthâwi thilhlân atân: bâwngpa pahni, berâmpa pangâ, kêlpa pangâ, berâm no, a pa kum khat mi pangâ nê. Hêng hi Ammisadaia fapa Ahiezera thilpêkrawn hlante chu a ni.

⁷²A ni sâwm pakhat nî chuan Aserho puipa, Okrana fapa Pagiela chuan thilpêk a hlân ve a.

⁷³A thilhlân chu hmun thianghlim sekel bûka teha sekel 130-a rit silvâr thlêng leh, silvâr chawhtawlh, sekel 70 a rit, buhbâl thilhlân atân chhangphut tha chi hriaka chawhpawlh, a khat vê vê a ni;

⁷⁴rangkachak no, sekel 10-a rit, rimtuia khat nê;

⁷⁵bâwngpa tuai pakhat, berâmpa pakhat, berâm no, a pa kum khat mi, hâl ral atâna hlan tûr nê; n;

⁷⁶kêl no pakhat, sual thâwi nâna hman tûr nê; n;

⁷⁷remna inthâwi thilhlân atân: bâwngpa pahni, berâmpa pangâ, kêlpa pangâ, berâm no, a pa kum khat mi pangâ nê. Hêng hi Okrana fapa Pagiela thilrawn hlante chu a ni.

⁷⁸A ni sâwm pahni ni chuan Naphtali-ho puipa, Enana fapa Ahira chuan thilpêk a hlân ve a.

⁷⁹A thilhlân chu hmun thianghlîm sekel bûka teha sekel 130-a rit silvâr thlêng leh, silvâr chawhtawlh, sekel 70 a rit, buhbâl thilhlân atân chhangphut tha chi hriaka chawhpawlh khat vê vê a ni;

⁸⁰rangkachak no, sekel 10-a rit, rimtua khat nê; n;

⁸¹bâwngpa tuai pakhat, berâmpa pakhat, berâm no, a pa kum khat mi, hâl ral atâna hlan tûr; n;

⁸²sual thâwina tûr kêl no pakhat nê; n;

⁸³remna inthâwi thilhlân atân: bâwngpa pahni, berâmpa pangâ, kêlpa pangâ, berâm no, a pa kum khat mi pangâ nê. Hêng hi Enana fapa Ahira thilrawn hlante chu a ni.

⁸⁴Israel puipaten maichâm hriak thih laia an thilhlante chu: silvâr thlêng sâwm pahni, silvâr chawhtawlh sâwm pahni, rangkachak no 12 a ni.

⁸⁵Silvâr thlêng te chu sekel 130-a rit theuh a ni a, chawhtawlh chu sekel 70a rit theuh a ni baw. Tichuan, silvâr bungbêl zawng zawng chu hmun thianghlîm sekel bûka tehin sekel 2,400 a ni.

⁸⁶Rangkachak no sâwm pahni rimtua khat te chu hmun thianghlîma sekel bûka tehin sekel 10 theuh a ni a; rangkachak no zawng zawng rih zawng chu sekel 120 a ni.

⁸⁷Hâl rala hlan tûr bâwngpate chu avaiin bâwngpa tuai sâwm pahni, berâmpa sâwm pahni, berâmpa kum khat mi sâwm pahni, buhbâl thilhlante nê, sual thâwina kêl no sâwm pahni nê.

⁸⁸Remna inthâwina thilhlân zawng zawng chu bâwngpa 24, berâmpa 60, kêl pa 60, berâm no kum khat mi 60 a ni. Hêng hi hriak thih hnua maichâm hlan nâna thilpêkte chu a ni.

⁸⁹Amah be tûra biakbûka Mosia a va luh laiin, Thuthlung bâwm chung cherub pahni inkâra zahngaihna thutthlêng ttag chuan, a hnêna thu sawitu âw chu a hria a, Ani chuan a lo bia a.

BUNG 8

KHÂWNVÂR DAH DÂN TÛR

¹LALPA chuan Mosia a bia a:

²“Aarona chu heti hian hrilh rawh, ‘Khâwnvâr i chhit dân tûr chu, khâwnvâr pasarih chuan a hûnna hmalam a ên tûr a ni,’” a ti a.

³Aarona chuan chutiang chuan a ti a; LALPAN Mosia hnêna thu a pêk angin, khâwnvârte chu a hûnna hmalam zawn ên thei tûr zâwngin a chhi ta a.

⁴Chû khâwnvâr dahna siam dân chu rangkachaka chher a ni a; a ngul leh a tlâng pangpâr chenin a chhera chher vek a ni.

LALPAN Mosia hnêna a siam dân tûr a entîr angin, khâwnvâr dahna chu siam a ni.

LEVIA CHÎTE THENFAI LEH SERH HRAN

⁵LALPA chuan Mosia a bia a:

⁶“Levia mite hi Israel fate zîng aţangin lahrang la, thian thianghlîm rawh.

⁷Heti hian thian ang che: Tlenfaina tuiin theh la, an taksa chu a pumin inmêt fai vek sela, an puante sufai sela, insilfai rawh se.

⁸Tichuan, bâwngpa tuai pakhat leh chumi ruala hlan tûr chhangphut dip, hriaka hmeş sâ nêrawn la sela, sual thâwina tûr bâwng pa tuai pakhat dang i kai baw tûr a ni.

⁹Levia mite chu biakbûk kawtah i rawn hruai ang a, Israel fate pawh an zavaiin i rawn hruai khâwm vek baw tûr a ni.

¹⁰Tichuan, LALPA hmâah Leviamite chu i rawn hruai ang a, Israel fate chuan Leviamite chungah an kut an ngat ang;

¹¹Aarona chuan Leviamite chu, Israel faten thên thil an hlân angin, LALPA rawngbâwl hna an thawh theihna tûrin LALPA hmâah a hlân tûr a ni.

¹²Levia miten bâwng patuaite lu chungah kut an ngat ang a, pakhat chu sual thâwi nân i hlân ang a, a pakhat zâwk chu Leviamite tâna inremna siam nân LALPA hnênah hâlral thilhlân atân i hlân tûr a ni.

¹³Levia mite chu Aarona leh a fapate hmâah i dintîr ang a, LALPA hmaa thên thilhlân angin i hlân tûr a ni.

¹⁴Tichuan, Leviamite chu Israel fate zîng aţangin a tihrang ang a, Leviamite chu ka tâ an ni ang.

¹⁵Chumi hnua chuan Leviamite chu biakbûka rawngbâwl tûrin an kal tawh tûr a ni. Tichuan, anni chu i thianfai ang a, thên thilhlân angin i hlân tûr a ni.

¹⁶Israel fate zîng aţangin an zavaiin keima chanpuala pêk an ni tawh si a; Israel fa zawng zawng zînga chhîl keu hmasa, piang hmasa berte aiah keima chanpuala ka ruat an ni e.

¹⁷Israel fate zînga fatîr zawng zawng chu, mihring pawh, ran pawh ka tâ an ni a; Aigupta rama fatîr zawng zawng ka tihhlum lai khân ka chanpual atân ka lo serh hrang tawh si a.

¹⁸Chuvângin, Israel fate zînga fatîr zawng zawng aiah Leviamite hi ka chanpualah ka neih ta a ni.

¹⁹Israel faten hmun thianghlîm an hnaih pawha hrîn a man loh nân te, Israel mipuite tân inremna siamsak tûr te, biakbûka Israel fate tâna rawng an bâwl theih nân, Leviamite hi Aarona leh a fapate tân Israel mipui zîng ata thilpêk anga ka pêk an ni,” a ti a.

²⁰Chutiang chuan, Mosia leh Aarona leh Israel mipui zawng zawng chuan Leviamite chungah chuan an ti a; Leviamite chung a ti tûra LALPA’N Mosia hnêna thu a pêk angin Israel fate chuan an ti ta a.

²¹Tichuan, Leviamite chu an inthian a, an puante an sufai a; LALPA hmaa thên thilhlân angin Aarona chuan a hlân a, Aarona chuan anmahni tithianghlîm nân inremna a siamsak baw a.

²²Chumi hnua chuan Leviamite chu Aarona leh a fapate hnuaia rawngbâwl hna thawk tûrin biakbûkah chuan an lût a;

Levia mite chungchânga LALPAN Mosia hnêna tih tûr a pêk ang zêlin an ti a.

²³LALPA chuan Mosia a bia a,

²⁴“Hei hi Levia mite chungchâng a ni: Kum sawmnhni panga achin chung lam mi chu biakbûkah hna thawk tûrin an lût thei ang a;

²⁵kum sawmnga an lo tlinin an hnathawh chu an chawlhsan ang a, rawng an bawl tawh lo vang.

²⁶Biakbûka thawk an unaute chu a tûl ang zêlin an puibâwm thei ang a, anmahni pual erawh chuan engmah an thawk tûr a ni lo. Chutiang chuan Levia mite hnathawh dân i rêlsak tûr a ni,” a ti a.

BUNG 9

KALHLÊN KÛT TUM HNIHNA

¹Aigupta ram an chhuahsan aţanga a kumhnhina, thla khatnaah chuan Sinai Thlalêrah LALPAN Mosia a bia a:

²“Israel faten a hunbî takah Kalhlên Kût hi hmang rawh se.

³Tûn thla ni sâwm leh palina, tlai lamah a hun takah in hmang tûr a ni. Chumi atâna serh leh sâng dân pawh in zâwm vek tûr a ni,” a ti a.

⁴Chutiang chuan Mosia chuan Israel fate chu Kalhlên Kût hmang tûrin a hrilh a.

⁵Tichuan, Sinai Thlalêrah chuan, a thla khatna ni sâwm palina, tlai lamah chuan Kalhlên Kût chu an hmang ta a; LALPAN Mosia hnêna thu a pêk ang zêlin, Israel fate chuan an zâwm a.

⁶Mi tuteemaw, mitthi ruang an khawih avanga bawhlhlawh, chumi nia Kalhlên kût hmang ve thei lo an awm a; chumi ni chuan Mosia leh Aarona hnênah an lo kal a.

⁷Chûng mite chuan, “Mitthi ruang khawih avânga thianghlim lo kan ni a. Eng aiah nge Israel faten LALPA hnêna thil an hlan hun serhah hian min khap bîk ang le?” an va ti a.

⁸Mosia chuan an hnênah, “Lo ngawi teh u, LALPA hnên aţangin in chungchâng thu hi ka’n ngaichâng phawt ang e,” a ti a.

⁹LALPA chuan Mosia a hrilh a,

¹⁰“Israel fate hnênah sawi la: ‘In zînga mi emaw, in thlahte zînga mi emaw, mitthi ruang khawih avânga bawhlhlawh te, ram hla taka zin bote pawhin, LALPA Kalhlên Kût hi an hmang thei tho vang.

¹¹Thla hnihna ni sâwm palina tlaiah an hmang ve thei ang. Dâwidim telh loh chhang leh hnim hnah khâ nên an ei tûr a ni.

¹²A tûk thlengin eibâng an zuah tûr a ni lo va, a ruh engmah tihthlah loh tûr a ni. Kalhlên kût hman dân zawnzawng pawh an zâwm vek bawh tûr a ni.

¹³Amaherawhchu, bawhlhlawhna nei lo, zin bo pawh ni si lo, Kalhlên kûta tel ve duh lo chu, chû mi chu a mite zînga ta tuithlâr tûr a ni, hun ruat chhûnga LALPA hnênah eng thilpêk mah a rawn hlan ve loh avângin; chu mi chuan a sual man a phur ang.

¹⁴In zînga mikhual chêng vê ten LALPA Kalhlên kût hi an hmang ve duh a nih chuan, Kalhlên kût serh leh sâng dân zawmin

an hmang ve tûr a ni; a ram mite leh mikhualte tân dân thuhmun pakhat in hmang tûr a ni,” a ti a.

MEI LEH CHHÛM

¹⁵Biakbûk tundin ni chuan Thuthlunna Bâwm awmna biakbûk chu chhûmin a rawn tuam mup a; tlai aţanga zîng thlengin mei ang maiin biakbûk chungah chuan a êng pup a.

¹⁶Chutiang chuan a awm ta reng a: chhûnah chhûmin a khuh a, zânah mei angin a êng a.

¹⁷Chhûm chu biakbûk aţanga chung lama a invawrh chhoh apiangin, Israel fate chu an insuan chhuak thîn a; chhûm a dinna apiangah Israel fate chuan riahbûk an khuar thîn.

¹⁸LALPA thupêkin Israel fate chuan zin kawng an zawh a, LALPA thupêkin riahhmun an khuar thîn; chhûmin biakbûk chung a khuh chhûng zawnzawng chuan riahhmunah an awm reng thîn a ni.

¹⁹Chhûm chuan biakbûk chu hun rei tak chhûng a khuh châng pawhin, Israel fate chuan LALPA thu an zâwm a, an insawn lo.

²⁰A châng chuan biakbûk chungah chhûm chu ni rei lo tê chauh te a awm a; LALPA thupêk ang zêlin riahbûk an khuar a, LALPA thupêk ang zêlin an insuan chhuak thîn.

²¹A châng chuan chhûm chu tlai aţanga a tûk zîng thleng chauhin a awm a: zîng lamah chhûm chu a invawrh sân chuan, an kal chhuak thîn; chhûnah pawh, zânah pawh, chhûm chu lâk chhoh a nih chuan, an kal chhuak mai thîn a ni.

²²Ni hnih emaw, thla khat emaw, kum khat emaw pawh ni se, biakbûk chungah chhûm a awm chhûng chuan insawn lovin riah hmunah chuan an awm reng a; a invawrh sân erawh chuan, an insuan chhuak thîn a ni.

²³LALPA thupêkin riahhmunah chuan an châm reng thîn a, LALPA thupêk vêkin an zin chhuak leh thîn; Mosia hmanga LALPA thupêk ang zêlin, LALPA thu chu an zâwm thîn a.

BUNG 10

TÂWTAWRÂWT HAM DÂN

¹LALPA chuan Mosia hnênah:

²I tân silvarin tâwtawrâwt pahnihi siam la; a chherin chher ang che; mipui koh khâwm nân te, an kal chhuah dâwnah te i hân thîn tûr a ni.

³A pahniha a ruala an ham chuan, mipui zawnzawng chu i hmâah, biakbûk kawngka bulah an lo pungkhâwm tûr a ni.

⁴Pakhat chauh ham a nih chuan, Israel hnam then hrang zînga hotute chauh i hnênah an lo kal khâwm tûr a ni.

⁵Inrâlrin nâna in ham chuan, chhak lama awmhoten kal chhuah an ţan tûr a ni.

⁶Inrâlrinna in ham nawn chuan, riahhmun chhim lama miten kal chhuah an ţan ve ngâl tûr a ni; kal chhuah hun hriattîr nân an hân tûr a ni.

⁷Mipui koh khâwm nân ringawt chuan, inrâlrinna ang ni lovin, ham pangngaia ham mai tûr a ni.

⁸Aarona fapa puithiamten tâwtawrâwt an hăm thîn tûr a ni a; chutiang chu in thlahte thlenga kumkhuaa in tih dân tûr a ni ang.

⁹In rama in hmêlma rawn nêk chêptute in do lêt dâwnin, inrâlirna tâwtawrâwt in hăm tûr a ni, tichuan, LALPA in Pathian hmâah hriatreng in ni ang a, in hmêlmate lakah chhanhim in ni ang.

¹⁰In hlimna nîah te, in kût hun ruatah te, in thla thar hunah te, hâlral thilhlân leh remna inthâwina thil in hlan nî pawhin tâwtawrâwt in hăm tûr a ni; tichuan, in Pathian hmâah hriatreng in ni ang: kei LALPA hi in Pathian ka ni si a,” a ti a.

SINAI CHHUAHSANNA

¹¹Kum hnihna, thla hnihna ni sawmnhnî ni chuan, Thuhriattirna biakbûk chungah chhûm chu a invawrh sâng ta a.

¹²Israel fate chu Sinai Thlalêr ațang chuan an kal chhuak ta a; Paran Thlalêrah chuan chhûm chu a dîng ta a.

¹³Chumi ținm chu LALPAN Mosia hnêna thu a pêk anga an chhuah wavi khatna a ni a.

¹⁴Juda thlahte chu an puanzâr nêan an chhuak hmasa ber a; Amminadaba fapa Nasona chu an sipai hotu a ni a.

¹⁵Isakara thlahte hotu chu Zuara fapa Nethanela a ni.

¹⁶Zebuluna thlahteho hotu chu Helona fapa Eliaba a ni.

¹⁷Biakbûk chu an ținat a; Gersona fapate leh Meraria fapate chuan biakbûk hmanruate chu zâwnin, an kalpui ta a.

¹⁸Reubena hote pawh an puanzâr nêan an kal chhuak a; an pâwl hotu chu Sedeura fapa Elizura a ni.

¹⁹Simeona thlahte hotu chu Zurisadaia fapa Selumiela a ni.

²⁰Gada thlahte hotu chu Deuela fapa Eliasapha a ni a.

²¹Kohatha thlahte chuan thil thianghlimte chu an zâwn chhuak a; a hmun an va thlen chuan mi dangten biakbûk an lo kaih zo hman tawh țin a.

²²Ephraïma thlahte chu an puanzâr nêan an kal chhuak a; an pâwl hotu chu Ammihuda fapa Elisama a ni.

²³Manasea thlahte hotu chu Pedazura fapa Gamaliela a ni a.

²⁴Benamina thlahte hotu chu Gideoni fapa Abidana a ni.

²⁵(Riahmun ațanga kal chhuak hnunung ber) Dana thlahte chu an puanzâr nêan an kal chhuak a; an pâwl hotu chu Ammisadaia fapa Ahiezera a ni.

²⁶Asera thlahte hotu chu Okrana fapa Pagiela a ni a.

²⁷Naphtalia thlahte hotu chu Enana fapa Ahira a ni.

²⁸Chutiang chu Israel faten an kal chhuah dawna, a pâwl indawta an inzui dân chu a ni.

²⁹Mosia puzawn, Midian mi Reuela fapa Hobaba hnênah chuan Mosian, “LALPAN ‘Ka pê ang che u’ a tih hmun chu kan pan mêk a. Kan hnênah lo kal ve la, țin takin kan ti ang che; LALPAN Israelte tân thil țin tak a tiam si a,” a ti a.

³⁰Ani chuan, “Ka lo kal ve lo mai ang, ka laichînte leh ka awmna ram lamah ka hâw leh zâwk ang e,” a ti a.

³¹Mosia chuan, “Min kalsan lo hrâm rawh, thlalêra riahmun khuar dân tûr chinchâng i hre si a, kan mit i ni mai dâwn asin.

³²Kan hnêna i lo kal ve duh chuan, LALPAN kan chungah thil țin a tih ang zêlin i chungah pawh kan ti ve ang,” a ti a.

³³Tichuan, LALPA tâng chu chhuah sanin ni thum an kal a; ni thum an kal chhûng chuan LALPA thuthlunna bâwm chu an hmâah chuan a kal hmasa a, chawlhna tûr hmun remchâng an zawng zêl a.

³⁴Riahmun ațanga an kal chhuahin chhûnah chuan LALPA chhûm chu an chungah a awm zêl a.

³⁵Thuthlung bâwm chu a chhuahpui dâwn apiangin Mosia chuan: “AW LALPA, lo tho la! I hmêlmâte chu țin darh la, Nangmah hawtute chu i hmâah tlanche rawh se,” a ti țin a.

³⁶A inngah dâwn apiangin: “AW LALPA, Israel mi sâng tam takte hnênah hian, Lo kîr leh rawh,” a ti țin a ni.

BUNG 11

MIPUI AN PHUNNÂWI

¹Mipui phunchiar chuan LALPA a tilâwm ta lo va; LALPAN a lo hriatin a thinur chu a lo ling ta a. Tichuan LALPA mei chu an zîngah chuan a lo alh chhuak a, riahmun hmâwrtawng lam chu a kâng ta hlauh mai a.

²Mipuite chuan Mosia an au va, Mosia chu LALPA hnênah a ținwtai a, kângmei chu a mit ta a.

³LALPA mei an zînga a chhuah avângin chu hmun hmingah chuan Tabera a vuah a.

⁴An zînga mi inpawlsawpho awm vête chu sa râwpin an râwp a; Israel mite pawhin țin chungin: “Tu’n nge sâ ei tûr min pe ta ang le?”

⁵Aigupta rama duh duha kan ei țin sangha te, fanghma te, dawnfawh te, purûntung te, purûnsen te leh purûnvâr te tak kha âw;

⁶tûnah zawng kan râwpral takngial dâwn a nih hi; hê manna mai lo hi chu engmah hmuh phâk a awm si lo!” an ti a.

⁷Manna chu coriander* ang deuh, tuikeplung anga vâ uk deuh a ni.

⁸Miten an chhar khâwm a, a râwtnaah an râwt sawm a, sumah te an dêng a, bêlah an chhûm hmin a, kêk te an siam țin; hriak nêna siam chhang ang maia tui a ni.

⁹Zân lamah riahmunah dai a tlâk laiin manna chu a tla vê țin.

¹⁰Mipuite chu a chhûng chhûngin an puan in kawngkaah an țin chauh chauh tih Mosian a lo hria a; chû chuan LALPA thinurna chu nasa takin a tiling ta a; Mosia chu a mangang ta hle a.

¹¹Mosia chuan LALPA hnênah, “Engtizia nge i chhiahhlawh i tihmangan vak mai le? Engtizia nge ka lakah i lâwm lohva, hêng mipuite mawh zawng zawng hi ka chungah i bûrbun vek mai le?”

¹²Hêng mite hi keima pai leh hrin an ni em ni? ‘An pipute hnêna i lo tiam ramah, hnute hne lai nau pawmtu ang maia kuah thlang zak tûra min tih tâk mai?’

¹³Hêng mipui zawng zawng tân hian khawia mi nge sâ ka pêk tehlu ang? ‘Sâ min pe rawh, kan ei châk êm mai,’ tiin min

ṭahkhum luai luai si a.

¹⁴Ka tân hêng mite hi tuar zawh rual an ni lo, a hahthlak êm mai.

¹⁵Hetia min tih reng ai chuan, tihian mi tihlum mai rawh—khawngaihin min hrethiam la—min tirethei tawh lo mai rawh!” a ti a.

UPA SAWMSARIHTE

¹⁶LALPA chuan Mosia hnênah: “Israelte zîngah mipuite kaihruaia, hotua ṭang thei âwm upa sawmsarih ka hnênahrawn hruai la; i kianga ding ve tûrin biakbûkahrawn hruai ang che.

¹⁷Chutah chuan ka lo chhuk ang a, karawn bia ang che. I Thlarau chana mi ka la ang a, anni pawh ka sem ve ang; tichuan chúng mite chuan i ko an chhâwk ang che a, nangmah maiin i phur tawh dâwn lo nia.

¹⁸Mipuite hnênah heti hian ti ang che, ‘Naktûk atân inserh hrang rawh u, sâ in ei dâwn nia; “Aiguptaah sâ a tam vei nê, tu nge ei tûr sâ min pe dâwn?” tia in ṭah avângin LALPA beng a lo thleng a. Chuvângin LALPA chuan sâ a pe ang che u a, in ei mawlh ang.

¹⁹Ni hnih khat mai in ei lo vang, ni nga, ni sâwm, ni sawmhnih chhûng mai pawh ni lo,

²⁰thla khat pumhlûm in ei ang a, in hnâr aṭanga lo chhuak khawpin, hnê hlûi khawpin in ei ang, “Engah nge Aigupta aṭang khân min hruai chhuah?” tiin a hmâah in ṭahkhum vêl a, in zînga chêng reng LALPA in hmuhsitna a nih kha,’ ti ang che,” a ti a.

²¹Mosia chuan, “Ka hnêna awm mipuite hi, mipa kêa kal thei chin pawh mi 600,000 lai an ni a; ‘Thla khat pumhlûm ei khawp sâ ka pe dâwn,’ i ti si a.

²²“Berâm rual leh ran rualte pawh talhsak ila, an ei khawp a tling dâwn em ni? Tuifinriata sangha zawng zawng pawh man khâwmsak ila, an kham khawp a tling dâwn em ni?” a ti a.

²³LALPA chuan Mosia hnênah, “LALPA bân chu tihtawi a ni ta em ni? Ka sawi anga thil a thlen leh thlen loh chu i hre dawn alâwm,” a ti a.

²⁴Tichuan, Mosia chu a chhuak a, LALPA thusawi chu mite hnênah chuan a hrilh a, upa sawmsarihthe chu a ko khâwm a, biakbûk chu a din hualtîr a.

²⁵LALPA chu chhûmah chuan a lo chhuk a, arawn bia a, ani* chana mi Thlarau chu a la a, upa sawmsarihthe chungah chuan a dah ta a; chutia an chungah Thlarau a dah veleth thu an puang mawlh mawlh hlawn a, chumi hnua erawh chuan an ti nawn leh ngai tawh lo.

²⁶Mi pahnih erawh chu riahmunah an lo awm a: pakhat hming chu Eldada a ni a, a pakhat zâwk hming chu Medada a ni. Anni hnênah pawh Thlarau chu a thleng ve a. Anni pahnih chu biakbûka kal te zînga chhiar tel an ni a; an awmna riahmunah chuan thlarau thuchah an lo puang ve char char a.

²⁷Tlangvâl pakhat chu a tlan a, Mosia a va hrilh a, “Eldada leh Medada—ten riahmunah thu an puang vak vak mai,” a va ti a.

²⁸Tichuan, Nuna fapa Josua, Mosia kaiha vêngtu, a mi thlante zînga pakhat chuan, “Ka pu Mosi, khap mai ta che!” a lo ti a.

²⁹Mosia erawh chuan, “Mi lo ngaimawhsak a ni mâw? LALPA chuan a Thlarau chu ama mi zawng zawngte hnênah dah vek sela, zâwlnei ni vek se tih nâk alai â!” a ti a.

³⁰Mosia chu Israel upate nê chuan riahmun lamah an kîr leh ta a.

LALPAN VAHMÎM A TÎR

³¹LALPA hnên aṭang chuan thli a lo tleh ta a, tuifinriat aṭang chuan vahmîm arawn lên lût a, riahmun bul chu lei aṭanga tawng hnih vêla sângah, a chhehvêl zawng zawnga ni khat kal ṭeuh hual chhûngah chuan an ṭum ta mur mur a.

³²Mipuite chuan chumi ni nilêng leh zankhua leh a tûk nilêngin vahmîmte chu an man khawm a (a man tlêm ber pawhin homer* sawm an man a), an bûk velah chuan an rêp tuar mai a.

³³Nimahsela, sâte an ei laia, sâte chu an ṭial mêk lai chuan, mipuite chungah chuan LALPA thinur chu a ling ta a, LALPA chuan pulh hri nasa takin a hrem ta a ni.

³⁴Chúng mi vir tak takte chu chumi hmuna an phûm avângin, chu hmuna chu Kibroth-havata tiin an vuah ta a.

³⁵Kibroth-havata aṭangin Hazeroth-ah an insuan a, Hazeroth-ah riahmun an khuar a.

BUNG 12

AARONA LEH MIRIAM TE PHUNNÂWINA

¹Mosia chuan Ethiopia hmeichhia nupua a neih avângin Miriami leh Aarona te chuan an sawisêl a; Ethiopia hmeichhia chu nupua a nei ngei si a.

²“LALPA hian Mosia hnênah chauh em ni thu a sawi le? Kan hnênah pawh a sawi ve baw lo vem ni?” an ti a. Chû chu LALPAN a lo hria a.

³(Mosia chu lei chungah mihring zawng zawng zînga mi inngaitlâwm ber a ni a).

⁴Tichuan, LALPA chuan Mosia te, Aarona te, Miriami te hnênah, “In pathum khân biakbûkah lo kal rawh u!” tiin a ko thut a. An pathum chuan an kal ta a.

⁵LALPA chu chhûm dingah chuan a lo chhuk a, biakbûk kawngkaah chuan a ding a, Aarona leh Miriami te chu a ko va. Anni chuan an va pan a.

⁶Ani chuan, “Ka thu hi ngaithla rawh u: In zîngah hian zâwlnei an awm chuan, Kei, LALPA hian inlârnain ka inhriattîr ang; Mumangah pawh ka be mai ang.

⁷Ka chhiahhlawh Mosia hi zawng chutiang maiin ka ti ve lo: Ka mite tân hian a rinawm vêl vek a ni.

⁸Hmaichhanah ngei kan inbe ṭhîn, Thup lovin, aruh langin kan inbia a, LALPA ruangâm pawh a hmu tawh asin. Eng in ti tâ nge ni Ka chhiahhlawh Mosia in sawi chhiat ngam chu le?” a ti a.

⁹Anni chungah chuan LALPA chu a thinur hle mai a, a kalsan ta a.

¹⁰Biakbûk chungah chhûm chu a kian vêleh, Miriami chu a lo phâr ta nghal a, vûr ang maiin a vûr ta uar mai a. Aarona’n Miriami lam a han hawi chuan, phâr a lo ni reng mai a.

¹¹Aarona chuan Mosia hnênah, “Aw, ka lalpa! Khawngaih takin hê sualna hi kan chungah ngahat lul suh, kan ât êm avângin kan lo tisual ta a ni.

¹²Nu pum chhung ațanga lo chhuak ve a, pangti zatve riral sâa mitthi ang lek chuan khawngaih takin awmtîr lul suh!” a ti ngawih ngawih a.

¹³Tichuan, Mosia chuan LALPA a au va, “Aw Pathian, khawngaih takin tidam leh rawh, ka ngên a che!” a ti a.

¹⁴LALPA chuan Mosia hnênah, “A pain a hmaia chil a chhâk mai pawhin, ni sarih chhûng chu a zak dawn lo vem ni? Daipawn-ah ni sarih chhûng va bibo sela, chumi hnûah chuan in hruai lût leh thei ang,” a ti a.

¹⁵Tichuan, Miriami chu ni sarih chhûng daipawnah chuan an va dah hrang ta a. Miriami an hruai luh leh hmâ chuan mipuite chu an insawn lo.

¹⁶Chumi hnu chuan mipui chu Hazeroth chhuahsanin Paran Thlalêrah awmhmun an khuar ta a.

BUNG 13

ENTHLATUTE KANAAN RAMAH AN TÎR

¹LALPA chuan Mosia a bia a,

²“Israel fate tâna ka pêk Kanaan ram enthla tûrin mite tîr rawh; hnam tin ațanga an puipa, an hnam hruaitu theuh i tîr tîr a ni,” a ti a.

³Tichuan, LALPA thupêk angin Paran Thlalêr ațang chuan Mosian a tîr chhuak a, an vaiin Israel fate zînga an hnam puipate thiau an ni a.

⁴Hêngte hi an hmingte chu a ni: Reubena thlah ațangin, Zakura fapa Samua te;

⁵Simeona thlah ațangin Horia fapa Saphata te;

⁶Juda thlah ațangin Jephunia fapa Kaleba te;

⁷Isakara thlah ațangin Josefa fapa Igala te;

⁸Ephraïma thlah ațangin Nuna fapa Hosea te;

⁹Benamina thlah ațangin Rafua fapa Paltia te;

¹⁰Zebuluna thlah ațangin Sodïa fapa Gadiela te;

¹¹Josepha thlah, chu chu, Manasea thlah ațangin Susia fapa Gadia te;

¹²Josepha thlah, chu chu, Manasea thlah ațangin Susia fapa Gadia te;

¹³Asera thlah ațangin Mikaela fapa Sethura te;

¹⁴Naphtalia thlah ațangin Vopsia fapa Nabia te;

¹⁵Gada thlah ațangin Makia fapa Geuela te an ni.

¹⁶Hêng mite hi ram enthla tûra Mosian a tîrte hming chu an ni. Nuna fapa Hosea chu Mosia chuan Josua tiin a ko va.

¹⁷Tichuan, Kanaan ram enthla tûr chuan Mosian a tîr chhuak ta a, an hnênah, “Chhim lam ațang hian lût chho ula, tlâng ramah te chuan kal chho zêl ula,

¹⁸a ram chu eng ang nge ni: a michêngte chu an chak nge chak lêm lo, mi an tam nge an tlêm;

¹⁹an chênna ram leilung chu a ța nge tha lo; an khawpuite chu kulh nei nge puan in kaih vê mai;

²⁰a ram chu a hausa nge a rethei; ramngâwte a awm nge awm lo tih te chu va thlithlai rawh u. Huai takin awm rawh u. Chumi rama theirah thenkhatrawn hâwn ang che u,” a ti a. Chutih lai chu grêp rah hmasa hmin hun a ni a.

²¹Tichuan an kal chho va, Zin Thlalêr ațang chuan Hamath luhna bula awm Rehob thlengin a ram chu an fang chhuak vek a.

²²Chhim lam ațangin an chho va, Hebron an lo thleng a; chutah chuan Anaka thlah Ahiman-hote, Sesai-hote leh Talmai-hote an awm a. (Hebron kua chu Aigupta rama Zoan kua aiin kum sariha din hmasak a ni.)

²³Eskol Ruam an va thleng a, chutah chuan grêp rah bâwr khat chu a ățang chawpin an hlep a, mi pahnihin tiangin an zâwn a. Theibuhfaite leh theipui rahte pawh an rawn hâwn baw k a.

²⁴Israel mipaten a bâwr chawpa grêp rah an hleh thlakna hmun a nih avângin chu hmun chu Eskol Ruam an ti a.

²⁵Ram enthlaa ni sawmli an thang hnu chuan an kîr leh ta a.

²⁶Tichuan an kal chhuak a, Paran Thlalêrah Kadesh hmuna Mosia leh Aarona te leh Israel mipui pungkâwmho zawng zawng awmna chu an lo thleng a; anni leh mipuiho zawng zawng tân thuchah rawn hâwnin, chu rama theirahte chu an entîr a.

²⁷A hnênah chuan: “Min tîrhna ramah chuan kan va kal a. Khawzû leh hnutetui chu a lo luang teh meuh mai, hei hi a ram theirah chu a nih hi.

²⁸Mahse, chû rama chêngte chu mi chak pui pui an lo ni a; an khawpuite chu a lianin kulha hung khup a ni a; chû mai a ni lo, chumi hmuna awm Anaka thlah hote pawh kan hmu a.

²⁹Amalek-ho chu Chhim lamah an chêng a; Hit-hote, Jebus-hote leh Amor-hote chu tlâng ramah an chêng a; Kanaan-hote chênna chu tuifinriat kam leh Jordan lui dungah te a ni,” an ti a.

³⁰Kaleba chuan Mosia hmâah chuan mipuite chu a tingâwi thuap a, “Hawh u, han chho nghâl îla, i han la thuai ang u, kan hneh ngei dawn si a,” a ti a.

³¹Nimahsela, ama ruala kal ve dangte chuan, “Chûng mite chu keini tân a do va do rual an ni hlei nê, keini aiin an chak zâwk si a,” an ti a.

³²Israel mipuite hnênah chuan ram an han enthlâk chanchin chu a ța lo zâwn hîrin an sawi a, “Kan ram han enthlâk chu a chhûnga mi chêngte ei zawh hmang mi zu nia, chuta mi chêng kan hmuhte rêng rêng chu mi lian tak tak hîr an ni a.

³³Chutah chuan milian pui pui kan hmu a: (Anaka thlahte chu milian thlah an ni a); anni lakah chuan khau ang lekin kan inhmua a, anni pawhin khau ang lekin min hmu a ni,” an ti a.

BUNG 14

ISRAELTEN KANAAN AN LÛT DUH LO

¹Tichuan, pungkâwmho zawng zawng zawng chu awrâwl chhuahin an ățap ta chiam mai a, chumi zânah pawh chuan mipuite chu an ățap an ățap a.

²Israel mipui zawng zawng chuan Mosia leh Aarona te chu an sawisêl a, pungkâwmho zawng zawng chuan an hnênah, “Aigupta ramah khân lo thi ta zâwk ila âw! A nih loh leh hê thlalêrah hian thi ila a ni mai!

³Engah nge LALPA hian khandaiha thi tûr ringawta hê rama min hruaia, kan nupui fanauten an tuar vê ngawt ang le? Aigupta rama kîr leh hi kan tân a tha fê zâwk lo mâw?” an ti a.

⁴Tichuan, an inrâwn khâwm a, “Hruaitu inthlang chhuak ila, Aigupta ramah i kîr leh mai ang u,” an ti a.

⁵Mosia leh Aarona chu Israel mipui pungkâwmho zawng zawng hmâah chuan an bawkkhup a.

⁶Nuna fapa Josua leh Jephunea fapa Kaleba, ram va enthlatute zînga mite chuan an puan te an pawthlêr a;

⁷Israel mipui pungkâwmho zawng zawng hmâah chuan thu sawiin: “Ram kan va enhlâk chu ram tha tak a ni asin le.

⁸Kan chungah LALPA a lâwm phawt chuan, chû ramah chuan min hruai lût ang a, min pe ngei ngei ang, ‘khawizû leh hnute tuia luang ram a ni si a,’

⁹LALPA chungah hian i hel lo phawt mai ang u, chû rama mite pawh chu hlau duh suh u, kan chaw tûr an ni mai; kan lamah LALPA a tang a, invênna nei lo bêlchhûnga sâ mai an ni. Hlahu tûr an ni lo ve,” an ti lawm lawm a.

¹⁰Mahse pungkâwmhote erawh chuan lunga den an tum a. Chutih lai tak chuan Israel mipui zawng zawng hmuh tûrin LALPA ropuina chu biakbûkah chuan a lo lang ta ut mai a.

MOSIAN MIPUITE A DÎLSAK

¹¹LALPA chuan Mosia hnênah: “Hêng mipuiho hian engchen nge min hnâwl zêl dâwn le? An zîngah chhinchhiahna thilmak tinrêng ka entîr chung pawhin engchen nge min la rin duh loh fo dâwn?

¹²Pulh hrî lêtîr ila, suatmang vek ila a ni mai; nang erawh chu anni aia hnam ropui leh thiltitheî zâwkah ka din ang che,” a ti a.

¹³Mahse, Mosia chuan LALPA hnênah: “Aigupta hovin an lo hre rêu rêu ang e, hêng mite hi anmahni zîng ațanga i chakna ngeia i hruai chhuah an ni si a,

¹⁴hê rama chêngte hnênah hian an sawi darh dâwn asin. Hêng mipuite zîngah hian Nang LALPA i awm tih an hai si lo; Nang, LALPA hi hmaichhan ngeia hmuhin i awm a, i chhûm chu anmahni chungah a ding reng bawk si a; chhûnah chhûm dingin, zânah mei dingin an hma i hruai zêl alâwm.

¹⁵Hêng mipuite hi mi pakhat ang maia i tihlum vek mai zawngin, i hmingthanzia hretu hnamten,

¹⁶LALPA chuan hêng mite hi pêk a tiam ramah a hruai thlen zawh loh avângin thlalêrah zu tihlum ringawt a le,’ an rawn ti dâwn asin.

¹⁷Chuvângin ka ngên a che, i sawi tawh ang ngei khân ka LALPA thiltitheihna chu lo ropui zual sauh zâwk rawh se, tichuan,

¹⁸LALPA chu thinnel, ngilneihna ngah, suahsualna leh bawhchhiatna ngaidamtu a ni; mahse, mi dik lote thiam chantîr mai mai lo, pate suahsualna avânga an fate, an tûte, chhuan

thumna leh chhuan lîna thlenga hrem thîntu a ni si a.’

¹⁹“Chuvângin, hêng mipuite hi Aigupta ațang tawha tûn thlenga i ngaihdam ang khân, i zahngaihna nasatzia ang zêlin, hêng mite sualna hi ngaidam tûrin ka ngên a che,” a ti a.

²⁰LALPA chuan: “Aw le, i thu ang takin ka ngaidam ta e;

²¹amaherawhchu, kei hi Minunga chu ka ni a, khawvel pumpui hi LALPA ropuinain a luah khat vek tûr a ni—

²²hêng mi zawng zawng, Aigupta leh thlalêra chhinchhiahna thilmak ka tihte leh ka ropuina hmutute ngei hian, vawi sâwm zet min fiah ta, Ka thu lah an pawisa duh dêr si lo va,

²³an thlahtute hnêna chhechhama pêk ka tiam ram chu an hmu tawp lo vang, Kei mi hnâwtute pawhin an hmu bawk hek lo vang.

²⁴Ka chhiahhlawh Kaleba erawh hi chuan thlarau danglam bik neia, tihtak zeta mi zuitu a nih avângin, a va kalna ramah chuan ka hruai ang a, a thlahten an rochung bawk ang.

²⁵Amalek hote leh Kanaan hote chu phai ruamah chuan an awm a; naktukah lêt leh ula, Tuipui Sen kalna Kawng lamah thlalêrah kal chhuak rawh u,” a ti a.

HELHO THI TURA RÊL

²⁶LALPA chuan Mosia leh Aarona te chu a bia a,

²⁷“Hêng mi sual phunchiarho hi engchen nge ka dawh zêl dâwn? Israel mipuiten ka chungah an phunchiarna zozai hi ka hre vek si a.

²⁸An hnênah heti hian ti rawh u, ‘Ka beng hriata in sawi ang ngeiin in chungah ka thlen dâwn a ni,’ LALPA Minunga chuan a ti:

²⁹In zînga kum sawmnhin chin chung lam, chhiarpua hming ziaak tawh ka laka vuivai chînggho zawng zawng kha abo abâng awm lovin, hê thlalêrah hian in tlu hlum vek ang a, in ruangte chu let rem rum rawh se.

³⁰Jephunea fapa Kaleba leh Nuna fapa Josua te chauh lo chuan, chhechham meuhva awmtîr che u ka tum ram chu in lût rêng rêng lo vang.

³¹In fanau tê tê, tihnawmnah tuar tûr ang leka in sawite zâwk hi ka hruai lût ang a, in hmuhsit ram chu eng ang nge a nih an la hria ang.

³²Nangniho erawh chu, hê thlalêrah hian in ruang a la tlu rem rum mai ang.

³³Thlalêr hian in ruangte a ei zawh vek hmâ chuan, in fate ngei pawhin in suahsualna phurin, kum sawmli chhûng hê thlalêrah hian an vâkvai ve dâwn a ni.

³⁴Ram enthla tûra in thang bo ni zat, ni sawmlia ni khat kha sual mawh phurhna kum khat zêlah chhiarin, chu kum sawmli chhûng chuan ka lâwm lohzia hi in la hre dâwn khawp mai.

³⁵Kei LALPA hian ka sawi chu ka sawi tawh e; hêng misual pungkâwmho, min dodâl tûra inpungkâwmho chungah hian ka sawi ang chu ka hlen mawlh ang. Hê thlalêrah hian an la tluhlum vek ang a, an thi tlâw ringawt ang,” a ti a.

³⁶Tichuan, ram enthla tûra Mosian a tirh, a tha lo zâwng hlîra chanchin rawn sawia, mipui zawng zawng tilunghnûrtute,

³⁷ram chanchin a chhe zâwnga rawn sawitute ngei chu LALPA hmâah chuan pulh hrîin an thi ta a.

³⁸Amaherawhchu, ram enthla tûra kal chhuak ve, Nuna fapa Josua leh Jephunea fapa Kaleba te erawh chu an thi ve lo.

RAM RÛN HLAWHCHHAM

³⁹Mosia chuan chûng thû chu Israel mipui zawng zawng a han hrilh chuan, an lungngai ta êm êm a.

⁴⁰A tûkah chuan zîng takah an tho va, tlâng chhîpah an han chho va, “Heta hi kan awm e, kan lo sual ta si a, LALPAN mi pêk a tiam hmunah chuan kan kal chho ngei tûr alâwm!” an ti leh si a.

⁴¹Mosia chuan an hnênah, “Engati nge LALPA thupêk chu in bawhchhiat luih leh sauh mai le? In hlawhtling chuang lo vang.

⁴²Han chho duh ting suh u, in zîngah LALPA a awm dâwn si lo va, in hmêlmaten an lo sawisa hrep ang che u.

⁴³Amalekho leh Kanaanho in hmâah khian an awm a, an khandaiha tihhlum tûr lek in ni; LALPA in hawisan tâk avâng hian, LALPAN a awmpui dâwn hauh lova che u,” a ti a.

⁴⁴Nimahsela, tlâng chhîp lamah chuan an kal lui tâl a; mahse riahhmun aţang chuan LALPA thuthlunna bâwm leh Mosia chu an chhuak tel ve lo.

⁴⁵Tichuan, tlâng rama chêng Amalekhote leh Kanaanhote chu an lo thawk thla a, an rawn sawisa hrep a, Horma thlengin baklêngin an rawn ûm kîr ta a ni.

BUNG 15

BUHBÂL LEH IN TÛR HLAN DÂN

¹LALPA chuan heti hian Mosia a bia a,

²Israel fate hnênah thu sawi la, tihian hrilh rawh: “In luah tûr ram ka pêk tûr che u in thlen hunah chuan,

³LALPA hnênah meia thilhlan te, hâlrâl thilhlan te, inthâwina te, thutiam hlen tûr te, mahni duhthua thilhlan te chu in kût hunah LALPA tâna rîmtui siam tûra in berâm rual zînga mi in hlan hunin,

⁴LALPA tâna thilhlantu chuan buhbâl thilhlan, chhangphut dip ephah hmun sâwma ðhena hmun khat, hriak hin khat hmun lia ðhena hmun khata hmeh a rawn keng tûr a ni;

⁵hâlrâl thilhlan te, inthâwi nân berâm no pakhat zêl bâkah in tûr thilhlan atân uain hin khat hmun lia ðhena hmun khat in buatsaih tûr a ni.

⁶Berâm pachal hlân tûrin, buhbâl thilhlan tûr chhangphut ðha chi ephah khat hmun sâwma ðhena hmun khat leh hriak, hin khat hmun thuma ðhena hmun khat nân in buatsaih tûr a ni;

⁷in tûr thilhlanah uain hin khat hmun thuma ðhena hmun khat LALPA hnêna rîmtui atân in hlân tel bawk tûr a ni.

⁸Hâlrâl thilhlan atân bâwngpa tuai in buatsaihin emaw, thutiam hlenna thilhlan atân emaw, LALPA hnêna remna thilhlan tûr in buatsaihin,

⁹bâwngpa tuai hlan rualin buhbâl thilhlan atân chhangphut ðha chi ephah hmun sâwma ðhena hmun thum, hriak hin chanve nêna pawh in rawn keng tel tûr a ni;

¹⁰in tûr thilhlan atân uain hin chanve, meia thilhlan tûr in rawn keng tûr a ni, hei hi LALPA tâna rîmtui a ni si a.

¹¹Chutiang chuan bâwngpa tuai emaw, berâmpa emaw, berâm no emaw, kêlno emaw hlan rualin hêng hi a bikima telh zêl tûr a ni.

¹²Ran in hlan tam dân ang zêlin, hêng hlan tel tûr hi in chhût tel zêl tûr a ni.

¹³A ram mite chuan LALPA tâna rîmtui, meia thilhlan an hlan apiangin hetiang hi an ti zêl tûr a ni.

¹⁴Ram dang mi in zînga khawsa emaw, in hnêna awm nghet tûrte emawin, LALPA tâna rîmtui, meia thilhlan an hlan duh chuan, in tih dân ang bawkin an ti ve tûr a ni.

¹⁵Khawtual tân leh in zînga chêng ve mikhualte tân dân thuhmun in hman tûr a ni a, chû chu kumkhuaa in hman reng tûr a ni; LALPA hmâah chuan nangni leh mikhualte chu thuhmun reng an ni si a.

¹⁶Nangni leh in zînga chêng mikhualte tân dân pakhat, remruat dân pawh pakhat a ni tûr a ni,” a ti a.

¹⁷LALPA chuan Mosia a bia a,

¹⁸“Israel fate hnênah sawi la: ‘Ka hruai luhna tûr ram in thlen hunin,

¹⁹chu ram chhang in ei hunah, LALPA hnênah thên thilhlan in hlân tûr a ni.

²⁰Ei tûr chhang in siam hmasak ber aţangin tlang khat chu ðhên thilhlanah in hlân tûr a ni; hruihzâwla buh châwikân, ðhêna in hlan angin in hlân ve tûr a ni.

²¹In buh thar hmasa thên thilhlana LALPA hnêna in hlan hi in thlahte thlenga kumkhuaa zawm tûr dân a ni.

TIHPALH SUAL RÊL DÂN

²²“Thil sual in lo tihpalha, LALPAN Mosia hnêna dân zawm tûr a pêk zawng zawng hi zâwm lo palh ta ula–

²³Mosia hmanga LALPA thupêk zawng zawng, LALPAN a pêk ni aţanga chhuan zawng zawng thlenga awm tûrte chu miin a tih loh palhin–

²⁴vântlâng hriatpuina lo va, chin châng hriat loh vânga zâwm lo palh a nih chuan, vântlâng mipuiin bâwngpa tuai hâlrâl thilhlanah LALPA tâna rîmtui an hlân tûr a ni a, chumi ruala hlan tel vê tûr buhbâl thilhlan leh in tûr thilhlan te pawh a hlan dân pangngai angin, sual thâwi nân kêl no pakhat nân hlan tel bawk tûr a ni.

²⁵Tichuan, puithiamin Israel mipui pungkhâwmho zawng zawng tân inremna a siamsak ang a, tihpalh vânga tisual a nih chuan ngaihdam a ni ang; LALPA hnêna meia thilhlan tûr te, LALPA hmaa an sual thâwina tûr, tihpalh sual thâwina tûr thilpêkte an rawn keng tûr a ni.

²⁶Israel hnam pumpui leh an zînga ram dang mite nân ngaihdam vek an ni ang, an zaa tisual palh an nih avângin.

²⁷Mimal tupawhin hre lova thil a tihsual chuan, sual thâwi nân kêlno kum khat mi a rawn keng tûr a ni.

²⁸Tichuan, hre lova thil lo tisualtu tân puithiamin inremna a siamsak ang a, LALPA hmâah hre lova tisual palh a nih avângin ngaihdam a ni ang.

²⁹Israel rama piangte leh an zînga ram dang mi chêng vete tân, tihpalh sual thâwina dân chu a thuhmun tûr a ni.

TIHLUIH SUAL RÊL DÂN

³⁰Hre reng chung a tisual luitu erawh chu, khawtual pawh, mikhual pawh ni se, chu mi chuan LALPA a sawichhia a ni a, a mite zîng ata tuithlâr tûr a ni.

³¹LALPA thû hmusit a, a thupêk a bawhchhiat avângin, chû mihring chu tuithlâr tûr a ni a, a sual mawh chu amah vêkin a phur ang, a ti a.

SABBATH BAWHCHHIAT HREMNA

³²Thlalêra Israel fate an awm lai chuan, Sabbath niin mi pakhat thing fawm lai an hmu a.

³³A thing fawm lai hmutute chuan Mosia leh Aaron a leh punghâwmho hnênah an rawn hruai a.

³⁴A chungah engtia tih tûr nge tih hriat hmâin chu pa chu tân inah an khung a.

³⁵LALPA chuan Mosia hnênah, “Chû pa chu tihhlum ngei tûr a ni; pung khâwmho zawng zawng chuan daipâwnah lungin an dêng tûr a ni,” a ti a.

³⁶Tichuan, LALPAN Mosia hnêna thu a pêk angin chû mi chu punghâwmho chuan riahhmun pâwnah an hruai a, lungin an dêng hlum ta a.

PUAN FÊMA PEHBUK

³⁷LALPA chuan Mosia a be leh a,

³⁸“Israel fate hnênah thu sawi rawh: An puan tlâng kilah chuan pehbuk siam sela, chûng puan tlâng kila pehbukah chuan la dumpâwl chillh rawh se, chutiang chu kumkhuaa an chin zui zêl tûr a ni.

³⁹Pehbuk chu in nei ang a, in en thîn ang a, LALPA thupêkte chu zâwm tûrin in hre reng ang a, tichuan in thinlung duhzâwn leh in mitin a châk zâwn it vângin nawhchizuar kawngah in kal dâwn lo nia;

⁴⁰tichuan, ka thupêk zawng zawngte hre rengin in zâwm ang a, in Pathian tân thianghlum takin in awm thei ang.

⁴¹Kei hi LALPA in Pathian ka ni a, in Pathian ni tûra Aigupta ram aţanga hruai chhuaktu che u ka ni: Kei hi LALPA in Pathian ka nih hi,” a ti a.

BUNG 16

MOSIA LEH AARONA LAKA HELNA

¹Levia chîa mi, Kohatha fapa, Izhar a fapa Kora chuan Eliaba fapa Dathana leh Abirama te, Reubena thlaha mi Peletha fapa Ona te chuan mite an sâwm khâwm a;

²Israel fate zînga hruaitu tling, punghâwmho aiawh tham mi langsâr zahnih leh sawmnga rual nên chuan Mosia chu an va ep a.

³Chûng kalkhâwmho chuan Mosia leh Aaron a te chu an va bei a, “In va intilal êm êm ve, mipuite pawh, a mal mala serh hran an ni a, LALPA pawh an zîngah a awm ve tho va. Engvangan nge LALPA mite chungah heti taka in indahlal bîk?” an va ti a.

⁴Mosia’n chû chu a lo hriat chuan a bawkkhup thlawp a;

⁵Kora leh a pâwl zawng zawng hnênah chuan, “Naktûk zîngah LALPAN ama mi a tih te, serh hran a tihte chu rawn tilang mai rawh se, ama hnêna kal tûrin a ti mai ang. A mi thlan apiangte chu amah hnaih tûrin a ti dâwn a ni.

⁶Kora, nang leh i hote zawng zawngin heti hian ti ang che u:

⁷hâlbûr keng ula, meiling dah ula, naktûk zîngah LALPA hmâah rimtui hâl ang che u, tichuan, LALPAN a thlan zâwk zâwk chu mi thianghlum ni rawh se. Nangni Levia thlahteho hi alâwm inlek zâwk chu!” a ti a.

⁸Mosia bawh chuan Kora hnênah, “Nangni Levia thlahte u, ngaitla rawh u:

⁹Israelte Pathianin ama kianga awm tûr leh, LALPA biakbûkah leh mipuite hmâah rawngbâwltu atân Israel mipuite laka a koh hran bîk che u hi in ngainêp em ni?

¹⁰Nangni, Levia thlah zawng zawngte u, nangni leh in unau zawng zawngte nên amah hnaiha a dah che u hi in duh tâwk na nge? Puithiam nih te chu in tum lehze em ni?

¹¹Hei vâng hian nang leh i hote zawng zawng hi LALPA dodâl tûra inhâwrkhâwm in nih hi. Aaron a hi eng nge a niha in rêl sup sup mai le?” a ti a.

¹²Mosia chuan Eliaba fapa Dathana leh Abirama te chu a kohtîr a, mahse anni chuan, “Kan lo chho lo vang!

¹³Thlalêrah min tihlum tûra khawizû leh hnute tuia luang ram aţanga min hruai chhuak ringawt mai hi thil tê tham a ni em ni, kan chungah lal ang maiin i la inchhek zêl ang maw?

¹⁴Khawizû leh hnute tuia luang rama mi hruai luha, huan leh ram inpêk te lah a hnai lo mai si a. Meng reng chung a mi bum i la tum em ni? Kan lo kal tawp lo vang!” an lo ti a.

¹⁵Mosia chu a thinrim hle a, LALPA hnênah, “Hêngho thilhlante hi lo pawmsak suh ang che. An hnên aţangin sabengtung pakhat pawh ka laksak lo, an pawh pawh ka sawi hek lo,” a ti a.

¹⁶Mosia chuan Kora hnênah, “Naktûkah nang leh i hote zawng zawng nên LALPA hmâah in inlan tûr a ni—anniho leh nangmah bîkah Aaron a pawh a tel ve bawh tûr a ni.

¹⁷Hâlbûr rawn keng theuh sela, chutah chuan rimtui phul sela, mi tinin mahni hâlbûr theuh LALPA hmâah keng rawh se, hâlbûr 250 a ni ang a, nang leh Aaron a pawhin hâlbûr in keng vê vê tûr a ni,” a ti a.

¹⁸Tichuan, mi tinin hâlbûr chu an keng theuh va, mei an dah a, rimtui an phul theuh va, Mosia leh Aaron a te nên biakbûk kawngka bulah chuan an ding ta a.

¹⁹Anni ep tûrin Kora chuan biakbûk kawngka bulah chuan punghâwmho zawng zawng chu a dintîr a. Tichuan, mipuiho

hmâah chuan LALPA ropuina chu a lo lang ta a.

²⁰LALPA chuan Mosia leh Aaron a te chu a bia a,

²¹“Hêng pungkâwmhote hi ka tihboral ngâl vek theih nân nangni kha awm hrang daih rawh u,” a ti a.

²²Anni erawh chu an bawpkhup a, “Aw Pathian, tîsa zawng zawng thlaraute Pathian i ni a, mi pakhat sual avângin mipui zawng zawng chungah i thinrim dâwn em ni?” an ti a.

²³Tichuan, LALPA chuan Mosia hnênah,

²⁴“Pungkâwmhote hnênah hian, ‘Kora te, Dathana te leh Abirama te puan in ațangin insaseng vek rawh u,’ tiin hrilh rawh,” a ti a.

²⁵Mosia chu a tho va, Dathana leh Abirama te hnênah chuan a kal a, Israel upate chuan an zui a.

²⁶Pungkâwmho hnênah chuan, “Hêng mi suaksualte puan in hi chhuahsan vek rawh u! An thil engmah khawih suh u, chuti lo zawng, an sualna zawng zawng hian a eiral ve mai ang che u,” a ti a.

²⁷Chutichuan, Kora te, Dathana te leh Abirama te puan in chu mipuite chuan an chhuahsan vek a; Dathana leh Abirama te chu an lo chhuak a, an puan in kawngka bulah chuan an nupuite, an fapate, an fanaute nân chuan an dîng a.

²⁸Mosia chuan, “Keima duhthûa ti ka nih lohzia leh, mi tîrtu LALPA thûa ti ka nihzia hê thil ațang hian in hria ang.

²⁹Hêng mite hi mi dangte ang bawka thih dân pangngaia an thiha, mihrinte tawh tûr pangngai tâwk ve satliah mai an nih chuan, LALPAN mi tîr lo tihna a ni ang.

³⁰Mahse, LALPAN thil thar a siama, leiin a kâ a âna, an neih zawng zawng nân a lem zawh veka, a nung chungah khuarkhuruma* an tla thlâ a nih chuan, hêng mite hian LALPA an lo hnâwl ngei tih in hre thiam tawh ang,” a ti a. (*Heb. seol, mitthi khua);

³¹Chûng thû zawng zawng a sawi zawh vêleh chuan, an awmna hnuai lei chu a lo khi phuk a,

³²lei chuan a kâ a âng a, anniho chu an thil neih zawng zawng nân, Kora leh a hote zawng zawng chu an bungruate nân chuan a lem pil ta vek a.

³³Tichuan, anmahni leh an hnêna awm zawng zawng chu a nung chungin khuarkhurumah chuan an tla thla a; lei chuan a chip hnan a, pungkâwmho zîng ațang chuan an boral ta a.

³⁴Chûng mangang au thâwmah chuan, a bul vêla awm Israel mipuite chuan “Leiin min lem pil ve dah ang e!” tiin, baklêngin an tlânchhia a.

³⁵LALPA hnên ata mei a lo chhuak a, rimmtui hlântu mi zahnih leh sawmngate chu arawn kâng hlum ta vek a.

³⁶LALPA chuan Mosia a bia a:

³⁷“Puithiam Aaron a fapa Eleazara hrilh la, mei alh lai ațangin rimmtui hâlbûrte chu la chhuak rawh se, thil serh a ni si a, mei pawh chu hla lehzualah tidarh rawh se.

³⁸Hêng mi, mahni nunna chungah thilsual tituho hâlbûrte hi chher phêk sela, maichâm khuh nân hman ni rawh se. LALPA hnêna hlan tawh a nih avângin thil serh a ni; Israel fate tân pawh

chhinchhiahna ni ngâl rawh se,” a ti a.

³⁹Tichuan, puithiam Eleazara chuan kâng hlum tate hlan tawh dâr hâlbûrte chu a lakhâwm a, maichâm chhîn atân a chher a,

⁴⁰LALPAN Mosia kâa a lo sawi tawh angin, Aaron a thlah ni lo, Kora leh a pâwlte ang maia, pâwnlam mi tumahin LALPA hmaa rimmtui hlân tûra an ngampat mai mai tawh loh nân, he thil thleng hi Israel faten an hrereng tûr a ni.

MIPUITE PHUNNÂWINA

⁴¹A tûkah chuan Israel mipui pungkâwmho zawng zawng chuan Mosia leh Arona te chu demin, “LALPA mite in tihhlum rikngawt mai le,” tiin an phun mur mur a.

⁴²Chutia Mosia leh Aaron a dodâl tûra mipui an inpungkâwm lai chuan, biakbûk lam an han hawi a; chhûmin arawn tuam thut a, LALPA ropuina a lo lang ta ut mai a.

⁴³Tichuan, Mosia leh Aaron a chu biakbûk hmâah chuan an va kal a.

⁴⁴LALPA chuan Mosia chu a bia a,

⁴⁵“Hêng pungkâwmho hi kiansan rawh u, mitkhap kâr lovah ka’n tiboral vek mai teh ang,” a ti a. Anni chu hmaia lei siin an bawkkhup a.

⁴⁶Mosia chuan Aaron a hnênah, “Hâlbûr lâ la, a chhûngah maichâma mei saw dah la, rimmtui phul baw la, pungkâwmho tân inremna siamsak tûrin tlânpuin ngâl rawh; LALPA hnên ațangin thinurna a chhuak ta dêr mai. Pulh hrî a lêng ățan tawh a nia,” a ti a.

⁴⁷Aaron a chuan Mosia thu âwihin a va la sawk sawk a, pungkâwmho zîngah chuan a tlân luhpuin a; mipui zîngah chuan hrî a lo lêng ățan tawh reng mai a. Tichuan, rimmtui chu a hâl a, mipuite tân inremna a siamsak ta a.

⁴⁸Mitthite leh minungte inkârah chuan a dîng a; tichuan hrî chu a kiang ta a.

⁴⁹Kora helna avânga thite tiam lovin, chu pulh hrî avânga thite chu mi 14,700 an ni.

⁵⁰Hrî chu a lo kiang ta a, Aaron a chu biakbûk kawngkaa lo awm Mosia hnênah chuan a kîr leh ta a.

BUNG 17

AARONA TIANG CHAWR

¹LALPA chuan Mosia a bia a:

²Israel fate hnênah sawi la, an chhûngkaw tin ațangin tiang pakhat țeuh, hnam tin hruaitu pualin an hnam zât–tiang sâwm leh pahnih lakhâwm rawh. Tiangah chuan an hruaitu hming ziaik zêl ang che.

³Levia tiangah chuan Aaron a hming i ziaik tûr a ni. An tiangah chuan hnam khat hruaitu hming a chuang zêl tûr a ni.

⁴Chûng chu biakbûk chhûnga Thuhriattîrna bâwm awmna hmâ, kan inbiak ținna hmunah dah ang che.

⁵Heti hi a ni ang a, ka mi thlan chhuah tûra tiang chu a lo pār ang a; chumi hmang chuan Israel faten nangma chungah an phunnâwina ka tireh dâwn a ni,” a ti a.

⁶Chutiang chuan Mosian Israel fate chu a hrilh a, a hruaitu tinte chuan an hnam hruaitute hming chuanna tiang pakhat zêl, tiang sâwm leh pahnih anrawn pê a; chúng zingah chuan Aaron a tiang pawh a tel ve a.

⁷Mosia chuan tiangte chu hriatpuina biakbûka LALPA hmâah chuan a dah a.

⁸A tûkah chuan Mosia chu hriatpuina biakbûkah chuan a va lût a, ngai teh, Leviah chiah mi, Aaron a tiang chu a lo chawr a, a kuhmûm a, pâr a chhuah a, theitê a lo rah a.

⁹LALPA hma aţang chuan Mosia chuan tiang zawng zawng chu Israel fate hnênah chuan a la chhuak vek a; an lo en a, mi tinin anmahni tiang theuh chu an la a.

¹⁰LALPA chuan Mosia hnênah, “Aaron a tiang kha Thuhriattîrna hmâah dah leh rawh, ka laka an phunchiarna i lâk kian theih nân leh, an hel leh a nih chuan an thih phah ngei dâwn tih chhinchhiahna a ni si a,” a ti a.

¹¹Chutiang chuan LALPAN a hnêna thu a pêk ang takin Mosia chuan a ti a.

¹²Tichuan, Israel fate chuan Mosia hnênah chuan, “Kan thi a, kan boral a, kan boral vek a nih hi!

¹³LALPA biakbûk hnaih hlek apiang an thi zêl si a. Kan zavaiin kan mang thak mai dâwn em ni le?” an ti a.

BUNG 18

PUITHIAM LEH LEVIA CHITE HNA

¹LALPA chuan Aaron a hnênah: “Hmun thianghlina bawhchhiatna a awmin nang leh i fapate leh in chhôngkuain mawh in phur ang a, in puithiamna chungchânga bawhchhiatna mawh erawh chu nangmah leh i fapaten an phur ang.

²I pa thlah, Leviah chi, i unaute chu nangmah pui tûr leh rawngbâwlpui tûrin sâwm la, nangmah leh i fapate erawh chu hriatpuina biakbûk hmâah in awm zêl tûr a ni.

³In hna tûl leh biakbûka in mamawh apiangah an pui ang che u-a; hmun thianghlina leh maichâm thil erawh chu anrawn hnaih ve tûr a ni lo, chuti lo zawng, nangni leh anni pawhin an thih phah mai ang.

⁴Biakbûka hna leh mamawh tinrêngah an pui ang che u-a, thawh tûr zawng zawng an thawk ang; mahse pâwnlam mi erawh chuan anrawn hnaih ve tûr a ni lo.

⁵Israel fate chung a thinurna a lo thlen leh tawh loh nân, hmun thianghlina leh maichâma rawngbâwl hna zawng zawng chu in vil tlat tûr a ni.

⁶Ngai teh u, keimah ngeiin Israel fate zing aţangin in unaw Leviah mite ka la chhuak a; anni chu biakbûk hna thawk tûra LALPAN a thlâwna a pêk che u an ni.

⁷Chuvângin, nangni leh in fapate chuan maichâmah leh puanzâr chhông lama puithiam rawngbâwlina tinrêng in thawk ang a; rawng in bâwl ang. Puithiam nihna ka pêk che u hi a thlâwna pêk rawngbâwlina a ni a, pâwnlam mi anrawn inrawlh ve chuan tihhlum an ni ang,” a ti a.

THILHLANA PUTHIAMTE HNA CHANPUAL

⁸LALPA chuan Aaron a bia a: “Israel faten thilpêk thianghlina anrawn hlan, ka tâna thêna an hlan zawng zawng chungah keimah ngeiin thuneihna ka pê a che; nang leh i fapaten kumkhuaa an sa chanpual atân ka pê a che u.

⁹Meia hâl loh chin zawng chu thil thianghlina ber, i chan tûr a ni ang; an thilhlana tinrêng, buhbâl thilhlana leh sual thâwina leh bawhchhiat thâwina ka hnêna an hlante chu thil thianghlina ber a ni ang a, nang leh i fapate chanpual tûr a ni.

¹⁰Hmun thianghlina berah in ei tûr a ni; mipa zawngin an ei tûr a ni. In tân thil serh a ni ang.

¹¹Israel faten thên atâna an thilpêk leh thên thilhlana zawng zawngte pawh i chanpual tûr a ni ang; kumkhuaa in chanpual atân nang leh i fapate leh i hnêna khawsa i fanute tân ka pê a. In ina a thiang apiangin an ei thei ang.

¹²Hriak tha ber ber te, uain thar leh buhbâl thar tha thâ te, rah hmasa LALPA hnêna an hlante chu, in tân ka pe a che u.

¹³An huana theirah hmin hmasa, LALPA tâna anrawn lâk khâwm chu in ta tûr a ni. In chhôngkuua mi thiang apiangin an ei thei ang.

¹⁴Israel rama thil serh bîk apiang chu in tâ a ni.

¹⁵Mihring leh ran zinga piang hmasa ber, chhûl keu hmasa, LALPA hnêna anrawn hlan apiang in tâ a ni ang; mipa piang hmasa ber a nih chuan in tlan ngei tûr a ni a, sa thiang lo zinga piang hmasa pawh tlan bawt tûr a ni.

¹⁶Tlan tûrte chu thla khata upa an nih laiin, i ruat dân angin, hmun thianghlina sekel tehna angin, silvâr sekel nga (gera sawmhnih) zêl a ni ang.

¹⁷Bâwng no piang hmasa te, berâm no piang hmasa te, kêl no piang hmasate erawh chu i tlan tûr a ni lo; serh hran an ni si a. An thisen chu maichâmah i theh ang a, an thau te chu LALPA hnênah rimtui atân meiah i hlân tûr a ni.

¹⁸Thên thilhlana a irno leh a bawp ding lam i chang ang bawkin, a sate chu i chanpual tûr a ni.

¹⁹Israel faten LALPA hnêna thên tûra thil thianghlina an hlan zawng zawng pawh, kumkhuaa nang leh i fapate leh i fanute chanvo atân ka pê che a; nang leh i thlahten LALPA hmaa chi thuthlung kumkhuaa an vawn tûr chu a ni,” a ti a.

²⁰LALPA chuan Aaron a hnênah: “Anniho ramah rochan engmah i nei ve tûr a ni lo va, an zingah chanvo engmah i nei tûr a ni hek lo; Kei hi Israel fate zinga i chanvo leh i rochan chu ka ni e.

LEVIA CHITE CHÂWM NÂN SÂWMA PAKHAT

²¹“Ngai teh, Israel rama sâwma pakhat zawng zawng chu, biakbûk hnâ thawka, rawngbâwl nâna an inhman manah rochan atân Leviah chite hnênah ka pê a ni.

²²Tûn achinah chuan Israel faten biakbûk anrawn hnaih tûr a ni lo, chuti lo zawng, an sual mawh phurin an thi mai ang.

²³Leviah chite erawh chuan biakbûk rawngbâwl hnâ an thawk tûr a ni a, an tihdik lohnaah mawh an phur ang; Israel fate zingah rochan engmah an nei ve tûr a ni lo tih hi, in thlah kal zêlah kumkhaw dân a ni ang.

²⁴Israel faten sâwma pakhat, LALPA hnêna thên thilhlana an hlan chu, Levia chite hnênah rochan atân ka pê a; chuvâng chuan a ni, 'Israel fate zîngah rochan an nei lo vang,' ka tih ni," a ti a.

LEVIA CHITE SÂWMA PAKHAT

²⁵LALPA chuan Mosia a bia a,

²⁶"Levia mite hnênah thu sawi rawh: 'In rochan atâna ka pêk Israel fate hnên ațanga sâwma pakhat in lâk hunah, sâwma pakhat hmun sâwma thena hmun khat chu LALPA tân thên thilhlana in hlan tûr a ni.

²⁷Chutia in thên thilhlana chu buhchîlna leh uain sâwrkhur ațanga in thar chhuah hmasak ve anga ngai a ni ang.

²⁸Tichuan, Israel fate laka sâwma pakhat in dawn chu LALPA hnênah thên thilhlana atân in hlan ve tûr a ni a, LALPA hnêna in thên thilhlana chu puithiam Aarona in pe tûr a ni.

²⁹Thilpêk in dawn tinrêng ațanga LALPA chanvo, thên thilhlana in hlan tûr chu a ța lai ber, a serh hran lai ngei a ni tûr a ni.'

³⁰"Chuvângin, heti hian sawi rawh u: 'A ța ța in pêk chuan, a bâk zawng chu Levia mite pawhin buh thar ve a, uain pawh thar ve anga pawmsak an ni ang.

³¹Biakbûk hna thawka i hlauh chhuah a nih avângin nang leh i chhûngten khawiah pawh an ei thei ang.

³²A ța ța in hlan chuan, chumi avâng chuan sual mawh in phur lo vang. Amaherawhchu, Israel fate thilpêk thianghlim in tibawrhâng tûr a ni lo, chuti lo chuan, in thih phah hlauh dah ang e,'" a ti a.

BUNG 19

INTHEN THIANGHLIM DÂN

¹LALPA chuan Mosia leh Aarona a bia a,

²"Hei hi LALPAN dân thu a pêk chu a ni: 'Israel fate hnênah bâwngla sen, hmêlhem lo, sawisêl kai lo, nghâwngkawh pawh la bat lo in hnênahrawn lâktîr rawh.

³Puithiam Eleazara in pê ang a, anin daipâwnah a kai ang a, a hmuh lai ngeiin a talhtîr tûr a ni;

⁴Puithiam Eleazara chuan a thisen chu lâin, a kutzungtângin biakbûk kawt vêl chu thisen chuan wâi sarih a theh tûr a ni.

⁵Bâwnglâ chu a mithmuh lai ngeiin hâl tûr a ni: a vun te, a sâte, a thisen te, a kawchhûng te chu hâl ral vek tûr a ni.

⁶Puithiam chuan sidar thing leh hussop leh la sen te lakhâwmin, bâwngla hâlna meiah chuan a thehlu tûr a ni.

⁷Puithiam chuan a thuamnâwte a sù ang a, a inbual ang a, chumi hnuaiah riahhmunah a lo lût leh tûr a ni; puithiam chu tlai thlengin a bawhlhlawh ang.

⁸A hâlthu pawhin a thuamnâwte sùin, a inbual ang a, tlai thlengin a bawhlhlawh ang.

⁹Bawhlhlawh khawih ve lo mi thiengin bâwng vâp chu a khâwm ang a, daipâwn hmun faiah a dah ța ang; chû chu Israel mipuite tân inthenfaina tui atâna hman tûr a ni; sual tlenfaina tûr a ni.

¹⁰Bâwng vâp khâwmtu chuan a thuamnâwte a sù ang a, tlai thlengin a bawhlhlawh ve ang. Israel fate leh an zînga hnam dang awm vê-ten kumkhuaa an tih zêl tûr dân a ni.

¹¹Mitthi ruang chu tupawhin khawih se, ni sarih chhûng a bawhlhlawh ang.

¹²A nithum ni leh a ni sarih niin tuiin a inthian thianghlim ang a, a lo thieng tawh ang. Mahse, a ni thum ni leh a ni sarih nia a inthen loh chuan, thianghlim lovin a awm reng ang.

¹³Tupawhin mitthi ruang khawih se, a inthen loh chuan, LALPA biakbûk tibawhlhlawh a ni. Chû mi chu Israel hnam ațanga tuithlâr daih tûr a ni. Tlenfaina tui theh a nih loh avângin a thianghlim lo reng ang a; a bawhlhlawh reng ang.

¹⁴Bûk chhûngah mi lo thi se, heti hian tih tûr a ni: Bûk chhûnga lo lût leh bûk chhûnga lo awm sate chu an vaiin ni sarih an bawhlhlawh ang;

¹⁵bungbêl inhawng te leh chhîn nei lote chu bawhlhlawh vek a ni.

¹⁶Ram hnuaia khandaiha thah emaw, mitthi ruang emaw, mihring ruh emaw, thlân emaw miin khawih ta se, ni sarih chhûng a bawhlhlawh ang.

¹⁷Chutianga mi a lo bawhlhlawh chuan, bêlin tui luang lai thâl sela, chutah chuan sual tlenfaina bâwngla vâp phul tûr a ni.

¹⁸Mi thiengin husopin chu tuih chuan a chiah ang a, chumi chuan puan in te, bungbêl zawng zawng te, chuta mi awm ve te, ruh emaw, mi thah ruang emaw, mitthi ruang emaw, thlân emaw khawihthu chungah chuan a theh tûr a ni.

¹⁹A ni thum ni leh ni sarih ni-ah mi thiengin mi thieng lo chu a theh tûr a ni; a ni sarih ni chuan amah pawh chu inthianin, a thuamnâwte a sù ang a, a inbual tûr a ni; tichuan tlaiah chuan a lo thianghlim tawh ang.

²⁰"Mi thieng lo inthian thianghlim duh bawh si lo chu, LALPA hmun thianghlim tibawrhâng a ni a, chû mi chu pungkhâwm zîng ata tuithlâr tûr a ni. Silfaina tui theh a ni lo va; a thianghlim lo a ni.

²¹Hei hi kumkhuaa an tih zêl dân tûr a ni. Thenfaina tui thehtu pawhin a thuamnâwte a su fai tûr a ni; thenfaina tui khawihthu chu tlai thlengin a thianghlim lo vang.

²²Mi thieng lo khawih apiang chu a bawhlhlawh zêl ang; chu mi khawihthu pawh chu tlai thlengin a thianghlim lo ve ang,'" a ti a.

BUNG 20

KADES HMUNA MOSIA CHETSUALNA

¹Thla khatnaah chuan Israel mipui, pungkhâwmho zawng zawng chuan Zin Thlalêr an lo thleng a, Kades hmunah chuan awmhmun an khuar a; chumi hmunah chuan Miriami a thi a, an phûm ta a.

²Chutah chuan mipuite chuan tui an nei lo va; Mosia leh Aarona te mawhchhiat tûrin mipui an inpunkhâwm a.

³Mipuite chuan Mosia hnênah: "Kan unaute LALPA hmaa an thih lai khân kan lo thi ve ta lo kha âw!

⁴Engah nge hê thlalêra thi tûr ringawta kan rante nê LALPA mite min hruai le?

⁵Engah nge hê hmun hrehawma kal tûra Aigupta ram ata min hruai chhuah le? Buh te, theipui te, grêp te, theibuhfai te rêng rêng pawh a awm ve lo va; tui in tûr lah a awm baw si lo,” an ti a.

⁶Tichuan, Mosia leh Aaron a te chu mipui zîng aţangin biakbûk kawtah an va kal a, an bawkkhup a. An hnênah chuan LALPA ropuina a lo lang a.

⁷LALPA chuan Mosia hnênah,

⁸“Tiang kha lâ la; nang leh i unau Aaron a nê mipui ko khâwm rawh u. An mithmuhah lungpui saw tui tichhuak tûrin hrilh la, tui a lo chhuak mai ang; tichuan, lungpui aţang chuan mipuite leh an rante tân tui i tihchhuahsak dâwn nia,” a ti a.

⁹Chutichuan, a thupêk ang chuan Mosia chuan LALPA hma aţang chuan tiang chu a lâ a.

¹⁰Mosia leh Aaron a te chuan lungpui bulah chuan mipuite chu an kokhâwm a; an hnênah chuan, “Nangni helhmangte u, ngaithla rawh u! Hê lungpui aţang hian tui kan tihchhuahsak tûr che u em ni?” an ti a.

¹¹Mosia chuan a kut a lek chhuak a, a tiang chuan lungpui chu vawi hnih a vua a; tui chu a lo luang chhuak ta huau huau va, mipuite leh an rante chuan an in ta a.

¹²LALPA chuan Mosia leh Aaron a te hnênah, “Kei mi ring lova, Israel mipuite hmaah min châwimâwi hek lo, chuvângin, ka pêk tûr che u ramah chuan hêng pungkâwmhote hi in hruai lût hlek lo vang,” a ti a.

¹³Hei hi Meriba tui chu a ni, Israel fate chu LALPA lakah an hel a, ani pawhin a thianghlimzia an hnênah a lantîr baw si a.

EDOM KAL TLANG PHAL LO

¹⁴Kades aţang chuan Mosia chuan Edom lal hnênah palai a tîr a. “I unau Israela chuan heti hian a ti: ‘Harsatna namên lovin min tlakbuak thûte chu i lo hre tawh ngei ang a,

¹⁵kan thlahtute Aigupta rama an pêm thlâk thû te, hun rei tak Aigupta rama an awm thû te, Aigupta miten kan thlahtute an tihduhdahzia te kha.

¹⁶LALPA hnênah mangangin kan âu va, anin kan âu âw te a lo hria a, Vântirhkoh rawn tûrin Aigupta ram aţangin min hruai chhuah a; tûnah hian i ramri bul lawk Kades hmunah kan awm mêk a ni.

¹⁷Khawngaih takin i ram chhûnghah min kal tlangtîr ta che. Thlawhmmâ te leh grêp huan chhûngte kan pal tlang lo vang a, tuihhunchhuaha tui te pawh kan in hauh lo vang; Lal Lamlianah zêl kan kal ang; i ram chhûnghah kan kal pelh hma chu dîng lamah emaw, vei lamah emaw kan pêng hauh lo vang,” tiin.

¹⁸Mahse Edom lal chuan, “Ka ram chhûnghah in pal tlang tûr a ni lo, in pal tlang vaih chuan khandaihin ka lo bei mai ang che u,” a lo ti a.

¹⁹Israel fate chuan a hnênah, “Lal Lamlianah chauh kan kal ang a, keini emaw, kan ranten emaw i tui an in chuan, a man kan châwi zêl ang e; engmah kan ti lo vang, kên min kal tlangtîr hrâm rawh,” an ti a.

²⁰Ani erawh chuan, “In kal tlang thei lo vang,” a ti a. Tichuan, Edom lal chu sipai rual chak leh tam tâwk hruaiin anmahni do tûrin a rawn thawk chhuak ta a.

²¹Chutiang khawp chuan Edoma chuan Israelten a ram an pal tlang a phal lo va; Israelte chuan an kîrsan ta a.

AARONA A THI

²²Israel fa, pungkâwmho zawng zawng chu Kades aţangin an chhuah a, Hor Tlâng an va thleng a.

²³Edom ramri depa awm Hor Tlângah chuan LALPA chuan Mosia leh Aaron a te chu a bia a:

²⁴“Aaron a hi a mite hnênah a kal dâwn ta a, Meriba tuiyah khân ka thu âwih lova in hel avângin, Israel fate hnêna ka pêk ramah chuan a lût ve lo vang.

²⁵Aaron a leh a fapa Eleazara te hi hruai la, Hor Tlângah chhohpui rawh;

²⁶Aaron a silhfente chu hlîp la, a fapa Eleazara hâktîr ang che; Aaron a chu a mite hnênah kaltîr a ni ang, a thi dâwn si a,” a ti a.

²⁷Mosia chuan LALPA thupêk ang zêlin a ti a, mipui zawng zawng hmuh laiin Hor Tlângah chuan an kal chho ta a.

²⁸Mosia chuan Aaron a silhfente chu a hlihsak a, a fapa Eleazara chu a hâktîr a; tichuan, Aaron a chu tlang chhîpah chuan a thi ta a. Mosia leh Eleazara te chu tlang aţang chuan an chhuk thla a.

²⁹Mipui zawng zawngin Aaron a thih thu an lo hriatin, Israel hnam pumpui chuan ni sawmthum chhûng zet an sîn a.

BUNG 21

HORMA-AH KANAANHO HNEH AN NI

¹Kanaan mi, Arad lal, Chhim lama chêng chuan Israel-te chu Atharim kawngah an lo kal dâwn tih a lo hriatin, Israelte chu a do va, mi engemaw zât a man a.

²Tichuan, Israelte chuan, “He mite hi kan kuta min pêk chuan, an khuate chu kan tiboral vek dâwn nia,” tiin LALPA hnênah thu an tiam a.

³LALPA chuan Israelte âu âw chu a lo ngaithla a, Kanaanhote chu an kutah a pê a, anmahni leh an khuate lamin an tiboral ta vek a. Chû hmun hming chu Horma tiin an vuah ta a.

DÂR RÛL

⁴Hor Tlâng aţang chuan Edom ram hêl kual tûrin Tuipui Sen kawng lamah baw an chhuk thla leh ta a; kawng lakah chuan mipui rilru chu a hnual hlê mai a.

⁵Mipuite chuan Pathian leh Mosia an mawhchhiat a: “Engah nge thlalêra thi tûr ringawta Aigupta aţanga min hruai chhuah le? Chaw leh tui pawh awm si lo, hetiang chhang hrep pawh hi kan ning hlauh hlauh e,” an ti a.

⁶LALPA chuan mipui zîngah chuan rûl chuk na chi a tîr a, mite chu a chuk a; Israel mipui tam takin an thih phah a.

⁷Mipuite chu Mosia hnênah an lo kal a, “LALPA leh nangmah kalhin kan lo ţawng sual a, thil kan tisual ta a ni; kan hnên aţanga rûl tikiang tûrin LALPA min dîlsak rawh,” an ti a. Tichuan, Mosia

chuan mipuite tân a ngensak a.

⁸LALPA chuan Mosia hnênah, “Rûl chuk na chi lem siam la, thing lêrah khai ang che; rûl chuk tupawhin an en chuan, an dam ang,” a ti a.

⁹Tichuan, Mosia chuan dârin rûl a siam a, thing lêrah a khai a, rûlin mi tupawh chuk se, dâr rûl an en chuan an dam ta zêl a.

HOR TLÂNG AṬANGA MOAB

¹⁰Israel fate chu an kal zêl a, Obot hmunah riahhmun an khuar a.

¹¹Obot aṭang chuan an chhuak a, Moab chhak ni chhuahna lam thlalêra Ije Abarim hmunah riahhmun an khuar a.

¹²Chuta ṭang chuan an kal zêl a, Zered Ruamah riahhmun an khuar a.

¹³Chuta ṭang chuan an kal zêl a, Arnon râl lehlamah, Amor-ho ramri thlenga inzâr phei thlalêr hmunah bûk an khuar a; Arnon chu Moab ramri, Moab leh Amor ram inkâra awm a ni.

¹⁴Chuvângin, LALPA Indona Lehkha bûah hetiang hian târlan a ni: Sufa hmuna Vahep, Arnon luikawrte,

¹⁵A tlâng pangpêr awihtlân Ar khaw thlenga pharh chho chu, Moab ramri bula awm a ni,” tiin.

¹⁶Chuta ṭang chuan Beer-ah an kal leh a, chû hmun chu LALPAN Mosia hnêna, “Mipuite ko khâwm la, tui ka lo pê ang e,” tia a sawi tuichhunchhuah kha a ni.

¹⁷Israelte chuan he hla hi an sa a: “Aw tuikhur, lo luang chhuak la! Zaiin kan âwi n’ang che—

¹⁸Hruaitute tuikhur siam, Milianhote lai khuar, Talhfiak lek chung a lai chu,” tiin. Thlalêr aṭang chuan Mattana-ah an insawn leh a,

¹⁹Matana aṭangin Nahaliel-ah, Nahaliel aṭangin Bamot-ah,

²⁰Bamot aṭangin Moab phaizâwlah, a vêla ramruak thlîr theihna Pisga tlâng thlengin.

LAL SIHONA AN HNEH

²¹Israelte chuan Amor lal Sihona hnênah palai an tîr a,

²²“I ram hi min kal tlangtîr ta che. Thlawhmmâah emaw, grêp huanate emaw kan kalpêng hauh lo vang; tuichhunchhuaha mi tuite pawh kan in lo vang; i ram chhûng kan kal pelh thlengin Lal Lamlianah zêl kan kal ang e,” an ti a.

²³Nimahsela, Sihona chuan Israelte chu a ram kal tlangtîr a phal lo va. Sihona chuan a mi zawng zawngte chu thlalêrah Israelte lo do tûrin a khâwm chiam a, Jahaz hmunah Israelte chu a va bei ta a.

²⁴Israelte chuan khandaih hmanin an lo hneh a, a ram chu Arnon aṭanga Jabbok, Ammon-ho chênna hmun thlengin an neihsak a; Ammon-ho chuan an ramri chu kulhin an hung mup a.

²⁵Tichuan, Israelte chuan chûng khuate chu an la vek a, Amor-ho khawpui Hesbon leh a chhehvêl khuawng zawngte chu Israelte chuan an luahsak a.

²⁶Hesbon chu Amor-ho lal Sihona khawpui a ni a, chû mi chuan Moab lal hmasa kha a lo bei a, a ram pawh Arnon thlengin a lo chhuhsak vek a ni.

²⁷Chuvâng chuan heti hian thufing an sawi thîn: “Hesbon-ah lo kal ula, Sihona khawpui chu i dîn thar leh ang u.

²⁸“Hesbon aṭangin senmei a chhuak a, Sihona khawpui aṭanga meialh chuan Moab ram Ar a kâng zo ta, Arnon hmun sânga lalte nê.

²⁹I vân a duai e Moab! Kemos mite u, in boral ta mâw! In fapate râltilân an ni ta, In fanute salah an tâng, Amor lal Sihona kutah chuan.

³⁰“Mahse kan han chêt vê meuh chuan; Hesbon chu Dibon thlengin a tûral ta. Nopha thlengin kan nuai chimit vek a, Medeba thlengin a ram zo ta,” an ti a.

³¹Tichuan, Israelte chu Amor-ho ramah chuan an awm ta a.

³²Mosia chuan Jazer enthla tûrin mi a tîr a; chûng khuate chu an la a, chuta Amor-ho lo awmte chu an hnawt chhuak a.

OG LAL AN HNEH

³³An lêt leh a, Basan lam panin an chho ta a. Basan lal Og-a chuan amah leh a sipai zawng zawngte nê Edrei hmuna lo bei tûrin a lo thawh chhuak a.

³⁴LALPA chuan Mosia hnênah, “Amah chu hlau suh, a sipai zawng zawng leh a ram chu amah chawpin i kutah ka pe tawh e; Hesbona chêng, Amor-ho lal Sihona i tih ang khân i ti ve tûr a ni,” a ti a.

³⁵Tichuan, an hneh ta a, a fapate, a mi zawng zawngte nê tumah an zuah lo; a ram chu an neihsak bawh a.

BUNG 22

BALAKA’N BALAAMA A SÂWM

¹Israel fate chu an kal zêl a, Moab phaizâwl, Jordan râl, Jeriko zâwnah riahhmun an khuar ta a.

²Zipora fapa Balaka chuan Israelten Amor-hote chung a thlith dân chu a lo hria a.

³Moab mite chuan chutiang khawpa tam mipui chu an lo hlau êm êm a, Israel fate chu a râpin an râp hial a.

⁴Moab-hote chuan Midian upate hnênah, “Bâwngpain hlobet a pet duak duak ang maiin hêng mite hian kan vêla thil zawng zawng an ei zo mai dâwn,” an ti a. Chutih laia Moab lal chu Zipora fapa Balaka a ni a.

⁵A laichînte awmna luipui kama chêng, Beora fapa Balaama, Pethor khuaa mi chu ko tûrin palai a tîr a: “Lo ngaithla teh, Aigupta aṭangin mipui an lo chhuak a. Leilung hi an dâp khat dul mai a, kan bul lawkah an rawn tlim khat hmur mai!

⁶Chuvângin, lo kal thuai la, hêng mite hi ânchhia mi rawn lawhsak teh, ka tân an chak lutuk si a. Nangin mal i sâwmte chu malsâwmin an awm a, ânchhia i lawhte chuan chhiat an tawh thîn tih ka hre si a; hêng mite hi hnehin hê ram ata hi ka hnawt chhuak thei mial mahna,” tiin a chah a.

⁷Tichuan, Moab upate leh Midian upate chu aien man tûr kengin an kal ta a, Balaama hnên an va thlen chuan Balaka thuchah chu an va hrilh a.

⁸Ani chuan an hnênah, “Zânin chu hetah riak ula, LALPAN thú min hrilh apiang ka hrilh dâwn che u nia,” a ti a. Tichuan, Moab

miliante chu Balaama hnênah chuan an riak ta a.

⁹Pathian chu Balaama hnênah a lo kal a, “Hêng i hnêna mite hi tute nge ni?” a ti a.

¹⁰Balaama chuan Pathian hnênah, Zipora fapa Balaka, Moab lalin ka hnênah thu a rawn chah a,

¹¹“Lo ngaithla teh, Aigupta ațanga lo chhuak mipuiten leilung an dâp khat dul mai a. Tunah lo kal la, hêng mite hi ânhhia mi rawn lawhsak teh; tichuan hêng mite hi hnehin ka hnawt chhuak thei mial mahna, a ti a ni,” a ti a.

¹²Pathianin Balaama hnênah, “An hnênah i kal tûr a ni lo; chûng mite chu ânhhia i lawh tûr a ni hek lo, ka mi duhsakte an ni asin,” a ti a.

¹³Tichuan, Balaama chu zîng takah a tho va, Balaka miliante hnênah chuan, “In ramah chuan kîr leh rawh u, LALPAN in hnêna kal a phal lo ve,” a ti a.

¹⁴Moab milianho chu an tho va, Balaka hnênah chuan an kîr leh ta a, “Balaama chu kan hnênah a lo kal ve duh lo,” tiin an hrilh a.

¹⁵Balaka chuan a hmaa mi aia tam leh zahawm zâwk milianho a tîr leh a.

¹⁶Balaama hnên an va thleng a, “Zipora fapa Balaka chuan: ‘Khawngaih takin i lo kalna hi engmahin dâl suh se;

¹⁷ropui takin ka châwimâwi ang chia, i duh apiang ka tihsak ang che. Khawngaih takin lo kal la, hêng mite hi ânhhia mi rawn lawhsak lul rawh khai,” a ti a.

¹⁸Balaama chuan Balaka chhiahhlawhte hnênah, “Balaka chuan a in khatin tangkarua leh rangkachak mi pe dâwn mah se, LALPA Pathianin ti tûra thû mi pêk bâk chu ka belhchhah thei lo va, ka paih then thei hek lo.

¹⁹Nangni pawh, khawngaih takin zânin chu hetah riak ve ula, LALPA chuan eng nge a sawi dâwn ka’n ngaichâng leh ang e,” a ti a.

²⁰Zânah chuan Pathian chu Balaama hnênah a lo kal a, “Nangmah ko tûr mi an lo kal a nih chuan, tho la, an rualin kal ve ang che; amaherawhchu, ka hrilh che ang chauhvîn i ti tûr a ni,” a ti a.

²¹Tichuan, Balaama chu zîngah chuan a tho va, a sabengtung a buatsaih a, Moab milianho hnênah chuan a kal ve ta a.

BALAAMA, SABENG TUNG LEH VÂNTIRHKOH

²²Nimahsela a kal chhuah ve tâk âvâng chuan Pathian thin a thawk ta a, LALPA Vântirhkoh chu hmêlmâ ang maiin kalkawng dâlin a lo ding a. Ani chu ama sabengtung chungah a chuang a, a chhiahhlawh pahnihte pawh a kiangah an awm ve a.

²³LALPA Vântirhkoh, a kuta khandaih vilik chungah kawng laia lo ding chu sabengtung chuan a hmu a, sabengtung chu kawng sîrah a pêng a, phûlah a tlân lût a. Balaama chuan kawnga kaltîr leh tumin sabengtung chu a vua a.

²⁴LALPA Vântirhkoh chu grêp hungna pal leh pal inkâr zîm laia a lo ding leh a.

²⁵Sabengtungin LALPA Vântirhkoh a han hmuh chuan, bang sîr lam a nêk a, Balaama kê chu bangah chuan a nghêng bet a; ani

chuan a vaw leh a.

²⁶LALPA Vântirhkoh chu a kal hla deuh va, ding lam leh vei lama kal pelh theih lohna tûr hmun zîm laia a chuan a lo ding leh a.

²⁷Sabengtungin LALPA Vântirhkoh a han hmuh chuan, Balaama hnuaia a chuan a bawk ta a; Balaama chu a thinur a, a tiangin sabengtung chu a vaw thuai thuai a.

²⁸LALPA chuan sabengtung kê chu a hawnsak a, Balaama hnênah, “I pawî eng nge ka sawi a, wawî thum ngawt mi vuak tâk chu le?” a ti a.

²⁹Balaama chuan sabengtung hnênah, “Mi pawisak loh vângin mawle. Khandaih pheî chu lo keng ila, ka tihlum tawh hial ang che chu!” a ti a.

³⁰Sabengtung chuan Balaama hnênah, “I tâ ka nih achin vawiin thlengin chuan nân mi hmang reng lo vem ni? Hetiang hian ka ti tawh ngai che em?” a ti a. Ani chuan, “Tî ngai lo ve,” a ti a.

³¹LALPA chuan Balaama mit chu a mentîr a, LALPA Vântirhkoh, kawng dâl taka a khandaih phâwi sâ hûm chungah lo ding chu a hmu ve ta a; a lu a kûn a, hmaia lei siin a bawkkhup a.

³²LALPA Vântirhkoh chuan a hnênah, “Engah nge i sabengtung hi wawî thum ngawt i vuak? Ngai rawh, ka duh lohna kawnga i kal âvângin, nangmah dodâl tûrin ka lo kal a nih hi.

³³Sabengtung hian mi hmu a, wawî thum lai a pêng thîn a nih kha. Min pelh tumin pêng sawn thîn lo se nangmah zawk hi ka tihlum tawh ngei ang che a, ani erawh chu ka zuah thung ang,” a ti a.

³⁴Balaama chuan LALPA Vântirhkoh hnênah, “Ka lo tisual a nih chu, kawngah min dâl tûrin i lo ding tih ka lo hre lo atin ni. I lungawi lo a nih chuan, tunah hian ka kîr leh mai ang e,” a ti a.

³⁵LALPA Vântirhkoh chuan Balaama hnênah, “Hêng mite hnênah hian kal ta la, i hnêna ka sawi ang chia hi va sawi ang che,” a ti a. Tichuan, Balaama chu Balaka miliante nên chuan an kal ta zêl a.

³⁶Balaka’n Balaama a lo kal tih a hriat vêleh, Arnon lama an ramri tâwp, Moab khawpuia a amah hmuak tûrin a va kal a.

³⁷Balaka chuan Balaama hnênah, “Thahnemngai takin ka rawn kohtîr thîn che a ni lo vem ni? Engtizaa lo kal mai lo nge i nih? Dinhmun sâng takah ka hlângkai thei lo che em ni?” a ti a.

³⁸Balaama chuan Balaka hnênah, “Hei le, i hnênah ka lo kal tâk hi! Thu sawi theihna rêng ka nei em ni? Pathianin ka kâa thu a dah te chauh ka sawi dâwn a ni,” a ti a.

³⁹Tichuan, Balaama chuan Balaka chu a zui a, Kirjat Huzot-ah an kal ta a.

⁴⁰Balaka chu bâwngpâ leh berâmin a inthâwî a, Balaama leh an hnêna awm ve milianhote chu a hleh then ve a.

BALAAMA THUPUAN PAKHATNA

⁴¹A tûkah chuan Balaka chuan Balaama chu a hruai a, Baala hmun sângah a chhohpui a, chuta țang chuan mipuite awmna chin chu a thlîr kual theih vek a.

BUNG 23

¹Balaama chuan Balaka hnênah, “Hetah hian maichâm pasarih mi siamsak la, bâwngpâ pasarih leh berâmpa pasarih mi buatsaihsak rawh le,” a ti a.

²Balaka chuan Balaama sawi angin a ti a, Balaka leh Balaama te chuan maichâm tinah chuan bâwngpâ pakhat leh berâmpa pakhat zêl an hlân a.

³Balaama chuan Balaka hnênah, “I hâlrâl thilhlân bulah lo ding la, kei chu ka va kal hrang rih ang e; LALPA chu ka hnênah a lo kal mahna, min entîr apiang ka hrilh ang che,” a ti a. Tichuan, tlâng sâng hmun fianrialah a kal ta daih a.

⁴Pathianin Balaama chu a lo tâwk a, ani chuan, “Maichâm pasarih ka buatsaih a, maichâm tinah bâwngchal leh berâmchal ka hlân tawh e,” a ti a.

⁵LALPA chuan Balaama kâah thu a dah a, “Balaka hnênah kîr la, va hrilh rawh le,” a ti a.

⁶A hnênah chuan a va kîr leh a, ani chu Moab milianho zawng zawngte nêan an hâlrâl thilhlân bulah chuan an lo la ding reng a.

⁷Ani chuan thû chu a puang ta a: “Moab lal Balakan Aram aţangin mi rawn ko va, Khawchhak lam tlâng aţang chuan. ‘Lo kal la, Jakob-ho ânchhia mi lawhsak rawh, Lo kal la, Israelho sawichhe rawh!’ tiin.

⁸“Pathianin ânchhia a lawh loh keiin engtin nge ânchhia ka lawh ang? Pathianin a sawi chhiat loh engtin nge keiin ka sawi chhiat ang?

⁹Lungpui chung aţangin ka hmu si a, Tlâng chung aţangin ka thlîr reng a; Khû! A hnam pumin an tla hrang a, Hnam dangte zîngah an inchhiar ve si lo.

¹⁰“Jakoba vaivut hi tu nge chhiar theia, Israelho zâtve zâtve pawh tu nge chhiar thei? Mi dik thihin ka thi mai na’ng e, Chutiang chu ka tâwpna ni rawh se!” a ti ta a.

¹¹Balaka chuan Balaama hnênah, “Eng thil nge mi tihsak tâk? Ka hmêlmâte ânchhe lawh tûrin ka hruai che a, en teh, mal i sâwm ta hlauh zâwk a nih hi!” a ti a.

¹²Ani chuan, “LALPAN ka kâa sawi tûr thû a dah chu ka ngai pawimawh lo thei dâwn em ni?” tiin a chhâng a.

BALAAMA THUPUAN PAHNIHNA

¹³Balaka chuan a hnênah, “Anmahni lan theihna hmun dangah hian khawngaih takin lo kal ta che; an vai ni lo, a awm hla deuhte chauh hmuh theihna hmunah kal ila; chuta ţang chuan ânchhia mi lawhsak dâwn nia,” a ti a.

¹⁴Tichuan, Zophim hmun, Pisga tlâng chungah a hruai a, maichâm pasarih a siam a, bâwngchal leh berâmchal pakhat theuh maichâm tinah a hlân a.

¹⁵Balaka hnênah chuan, “Sâwtah sâwn LALPA ka va biak chhûngin i hâlrâl thilhlân bulah hian lo ding ang che,” a ti a.

¹⁶LALPA chuan Balaama chu a lo tâwk a, kâah chuan thu a lo dah a, “Balaka hnênah kîr leh la, thû chu va sawi rawh,” a ti a.

¹⁷A va kîr leh chuan, ani chu hâlrâl thilhlân bulah chuan Moab milianhote nêan an lo la ding reng a. Balaka chuan a hnênah,

“LALPAN eng thil nge a lo sawi le?” a ti a.

¹⁸Ani chuan thuchah chu a puang ta a: Balak, tho la, ngaithla rawh! Zipora fapa, mi lo ngaithla teh!

¹⁹“Pathian chu dawthei mihring a ni ve lo va, Mihring fa anga inlamlêt chi a ni hek lo. A sawi tawh chu a hlen dâwn lo vem ni? A sawi tawh chuan a tipuitling dâwn lo vem ni?

²⁰Ngai teh, malsâwm tûrin thû mi pê a; Mal a sâwm tawh chu ka sût thei lo.

²¹“Jakob-ho khawlohna a hmu si lo, Israelte zîngah suahsualna a hmu hek lo. LALPA an Pathian chuan a awmpui a, Lal âw-kân anmahni a rial lo.

²²Pathianin Aigupta ata a hruai chhuak a; Ramsial ang maia chak an ni.

²³“Jakob-ho chu dâwi hneh rual an ni lo, Israel-ho do zâwngin ânchhia a awm hek lo. Jakob-ho leh Israel-ho tân, Pathianin thil a tihsak zo tawh si!’

²⁴Mipui khu en teh, sakeibakneipui anga thovin, Sakeibaknei angin a zuang tho va; A saseh tûr a ei zawha, a thisen a dâwt zawh hma chuan a chawlhsan dâwn si lo,” tiin a puang leh a.

²⁵Balaka chuan Balaama hnênah, “Ânchhia i lawh lo a nih rau rau chuan, mal pawh sâwm kher lo lâ!” a lo ti a.

²⁶Balaama chuan Balaka chu a chhâng a, ‘LALPAN mi hrilh chiah ka sawi ang,’ ka ti lo vem ni?” a ti a.

BALAAMA THUPUAN PATHUMNA

²⁷Balaka chuan Balaama chu, “Ti teh khai, hmun dangah kal leh ila; chuta ţang chuan Pathianin ânchhe lawh a remti tawh mial mahna,” a ti a.

²⁸Balaka chuan Balaama chu Peor tlâng chungah, a hnuai ram kawlh vêk vûk thlîrna remchângah chuan a hruai leh a.

²⁹Balaama chuan Balaka hnênah, “Hetah hian maichâm pasarih mi siamsak la, bâwngchal pasarih leh berâmchal pasarih mi buatsaihsak rawh,” a ti a.

³⁰Balaka chuan Balaama sawi angin a ti a, maichâm tinah bâwngchal pakhat leh berâmchal pakhat zêl a hlân a.

BUNG 24

¹Israelte mal sâwmsak chu LALPA duh zâwng a ni tih Balaama chuan a hre Chiang ta a, tichuan a hmaa a tihdâna aien tûra kal hran ngai a ti tawh lo va, thlalêr ram pharh duai lam chu a thlîr a.

²Balaama chu a han hawi vêl a, a chi hlâwm hran hrana Israel-ho inzârapharh dân chu a zu hmu a; a chungah chuan Pathian Thlarau a lo thleng a.

³Tichuan, thuchah a puang ta a: “Beora fapa Balaama thupuan, Mît lo vâv taa thû chu,

⁴Pathian thu hretu thuchah Engkimtitheia inlârna hmutu, Tlûa mît lo vâv taa thupuan chu:

⁵“Aw Jakob, i puan inte chu a va mâwi êm! Aw Israel, i chênna te chu le!

⁶Ruamrai anga pharh duaîin, Lui kama huan iangin, LALPA phun rimtui kûngte angin, Lui kama sidar thing a iang e.

⁷A tuižêma miin a châwm a, Tui tam takah chi a thlah ang. “A lal chu Agag-a aia chungnung a ni a, A lalram chu châwimâwiin a awm ang.

⁸“Pathianin Aigupta ata a hruai chhuah, Ramsial ang maia chak a ni; A hmêlma hnamte a ei zo vang a; An ruhte tih tliahsakin A thalin a kâp tlang ang.

⁹A bawk a, sakeibaknei angin a muzâl a; Tu nge keipui chu chawktho ngam ang le?” “Nang malsâwmtu chu malsâwmin awm sela, Ânhhe lawhtu che chu ânhhe dawngin awm rawh se,” a ti a.

¹⁰Balaka chu Balaama chungah chuan a thin ur ta êm êm a, a kut a bêng thuai thuai a; Balaka chuan Balaama hnênah, “Ka hmêlmâte ânhhe lawh tûrin ka ko ve lêm che a, en rawh, hei, wavi thum teh meuh mal i sâwm tâk hi!

¹¹Mi hâwsan vat rawh. Ropui taka châwimâwi che ka lo tum vei nê, chû châwimâwina chu LALPAN a lo dâl che a nih hi,” a ti a.

¹²Balaama chuan Balaka hnênah, “Palai i rawn tirhte hnênah khân he thu hi ka hrilh lo che em ni?

¹³Balaka chuan a in khatin tangkarua leh rangkachak mi pe dâwn mah se, LALPA thû chu a chhe zâwngin emaw, a tha zâwngin emaw, keima duh dânin ka sawi thei lo. LALPA sawi chiah ka sawi ang,’ ka ti sâ rêng lo vem ni?

¹⁴Aw le, ka mite hnênah ka hâu dâwn ta a. Lo kal lawk la. Hêng miten nakina i mite chung a an la tih dân tûr chungchângah thurâwn ka lo pe ang che,” a ti a.

BALAAMA THUPUAN PALINA

¹⁵Tichuan, thuchah a puang leh a: “Beora fapa Balaama thupuan, Mit lo vâ taa thû chu,

¹⁶Pathian thu hretu thuchah Chungnungbera hriatna neia, Engkimtithêia inlârna hmutu, Tlûa mit lo vâ taa thupuan chu:

¹⁷“Amah chu ka hmu, tûnah chuan a ni lo; Ka thlîr reng a, a la hnai si lo; Jakoba aţangin Arsi a lo chhuak ang a, Israela aţangin Laltiang a lo chhuak ang; Moab chu a rawn tichhia ang a, Buaina fate* chu a tiboral ang.

¹⁸“Edom ram a nei ang a; A hmêlma Seir pawh a nei bawk ang a, Israel chu tuma’n an ngam lo vang.

¹⁹Jakoba aţangin Rorêltu a lo chhuak ang a, Khawpuia thi bângte a nuai bo ang.”

²⁰Amalekho lam hawiin, thuchah a puang zêl a: “Amalek chu hnamte zînga hmasa ber ni mah se, A boral thlengin a hnunung ber a ni ang.”

²¹Ken-ho lam hawiin, thuchah a puang zêl a: “I chênna chu hmun nghet a ni a, I bû pawh lungpuia chheh a ni.

²²Nimahse Kain chu a kâng ral ang. Assur-ho sala i awm hun engtia rei nge la ni?” a ti a.

²³Tichuan, thuchah a puang zêl a: “E khai! Hetianga Pathian a chêtin tu nge dam thei ang?

²⁴Kupra vaukam aţangin lawng a lo thleng ang a, Assur te, Eber te an rawn tirethei ang, Amalekho pawh an boral ang,” a ti a.

²⁵Balaama chu a tho va, a khaw lamah a hâu ta a; Balaka pawh a hâu ve ta a.

BUNG 25

MOAB RAMA ISRAELTE UIRÊNA

¹Israel hote chu Sittim hmunah chuan an awm a, Moab nulate nê chuan inngaih an chîng ţan ta a.

²Anni chuan an pathian hnêna inthâwinaah te an sâwm a, an va ei ve a, an pathian hmâah te chuan chibai bûkin an kûn ve ta mai a.

³Israelte chuan Peor hmuna Baala chu an biak tâk avângin Israelte chungah chuan LALPA thin a thawk ta a.

⁴LALPA chuan Mosia hnênah, “Hnam hruaitu zawng zawngte hruai la, ni sen sa hnuaiah LALPA hmâah khaihlum vek rawh u, LALPA thinrim sosâng hi Israelte lakah a kiang thei mahna,” a ti a.

⁵Israel rorêltute hnênah chuan Mosian, “In mite zîngah Peor hmuna Baal pathian betu apiang that vek rawh u,” a ti a.

⁶Chutia biakbûk kawngka bula Israel mipui an lo ţah luai luai lai chuan, Mosia leh pungkâwmho zawng zawng hmuh lai ngeiin Israel fate zînga mi pakhat chuan Midian nula pakhat a rawn hruai lût leh ta nghâl a.

⁷Puithiam Arona fapa, Eleazara fapa Phinehasa’n a lo hmuh chuan, mipui zîng aţang chuan a tho va, fei a chuh lawk a;

⁸chû Israel mi awmna bûk chhûngah chuan a ûmzui a, chu Israel mi leh hmeichhia chu an dulah a chhun tlang vê vê a. Tichuan, Israelte zînga hri lêng chu a kiang ta a.

⁹Chû pulh hrî avânga thite chu 24,000 lai an tling.

¹⁰LALPA chuan Mosia a bia a:

¹¹“Puithiam Aarona fapa, Eleazara fapa Phinehasa hian an zînga ka thahnemngaihna min tawmpui tâk avângin Israel fate chung a ka thinurna a dai ta; chuvângin ka thahnemngaihna chuan Israel fate chu a ei zo ta lo chauh a ni.

¹²Chuvângin, “Ngai teh, amah nê kan inkârah inremna thuthlung ka pe ta;

¹³a Pathian tân thahnem a ngaih êm avangin Israel fate tân inremna a siamsak ta a nih hi; chuvângin, hei hi amah leh a thlah kal zêlte tân kumkhaw puithiamna thuthlung a ni,’ tih sawi rawh,” a ti a.

¹⁴Israel mi an tihhlum tâk, Midian hmeichhia nêna an tihhlum tâk hming chu Simeona thlah zînga hotu, Salua fapa Zimria a ni.

¹⁵Midian hmeichhia an thah tâka hming chu Zura fanu Kozbii a ni a; ani chu Milian hnam chhûngkaw pakhat hotu a ni.

¹⁶LALPA chuan Mosia a bia a:

¹⁷“Midian-hote hi chaw buai ula, bei rawh u;

¹⁸vervêk taka Peor hmuna bumna hmanga an chhaihbuai che u avâng leh, Peora thil thleng avânga hri lên laia an thah tâk, an farnu Kozbii, Midian hotu fanu hmanga an tikhawloh che u avângin,” a ti a.

BUNG 26

ISRAELTE CHHIARPUI VAWI HNIHNA

¹Hrî lêng a kian hnu chuan LAL PAN Mosia leh puithiam Aaronapa fapa Eleazara te chu a bia a:

²“Israel mipui zînga râl do thei chin, kum sawmhni ching chung lam zawng chu, an chhûngkua ang zêlin chhiar vek rawh u,” a ti a.

³Tichuan, Mosia leh puithiam Eleazara te chuan Jordan kama Moab phaizâwl, Jeriko râlach chuan anniho chu an bia a:

⁴“Mosia hnêna LALPAN thû a pêk angin, Aigupta ram ațanga lo chhuak Israel fate chu kum sawmhni ching chung lam zawng chhiar tûr a ni e,” an ti a.

⁵Reubena chu Israela fatîr a ni a. Reubena thlahte chu: Hanoka, Hanok hnam thlahtu; Palua, Palu hnam thlahtu;

⁶Hezrona, Hezron hnam thlahtu; Karmia, Karmi hnam thlahtu.

⁷An chhûngkua ang zêla chhiara Reubena thlahte zât chu: mi 43,730 an ni.

⁸Palua fapa chu Eliaba a ni.

⁹Eliaba fapate chu Nemuela, Dathana leh Abirama te an ni. Hêng Dathana leh Abirama te hi Kora pâwla mi, mipui aiawha Mosia leh Aaronapa beitu, LALPA laka helte kha an ni a;

¹⁰Ieini a kê a âng a, Kora leh a pâwlte kha a dawlh ta vek a, meipuiin patling zahni leh sawmnga a lo kâng hlum bawh a; khangte kha chhinchhiahna a lo ni ta.

¹¹Kora fate erawh chu an thi ve lo.

¹²Simeona thlahte chu, an chhûngkua ang zêlin: Nemuel hnam thlahtu Nemuela; Jamin hnam thlahtu Jamina; Jakin hnam thlahtu Jakina;

¹³Zer hnam thlahtu Zera; Saul hnam thlahtu Saula.

¹⁴Hêng hi Simeona thlahte chu an ni a: mi 22,200 an ni.

¹⁵Gada thlahte chu, an chhûngkua ang zêlin: Zephona, Zephon hnam thlahtu; Hagia, Hagi hnam thlahtu; Sunia, Suni hnam thlahtu;

¹⁶Oznia, Ozni hnam thlahtu; Eria, Eri hnam thlahtu;

¹⁷Aroda, Arod hnam thlahtu; Arelia, Areli hnam thlahtu.

¹⁸An chhûngkua ang zêla chhiara Gada thlahte zât chu: mi 40,500 an ni.

¹⁹Juda fapate chu Era leh Onana te an ni a; Era leh Onana te chu Kanaan ramah khân an thi a.

²⁰Juda thlahte chu, an chhûngkua ang zêlin: Sela, Sel hnam thlahtu; Pereza, Perez hnam thlahtu; Zera, Zer hnam thlahtu.

²¹Pereza thlahte chu: Hezrona, Hezron hnam thlahtu; Hamula, Hamul hnam thlahtu.

²²An chhûngkua ang zêla chhiara Juda thlahte zât chu: mi 76,500 an ni.

²³Isakara thlahte chu, an chhûngkua ang zêlin: Tola, Tol hnam thlahtu; Pua, Pua hnam thlahtu;

²⁴Jasuba, Jasub hnam thlahtu; Simrona, Simron hnam thlahtu.

²⁵Hêngte hi Isakara thlahte, an chhûngkua ang zêla chhiarte chu an ni a: mi 64,300 an ni.

²⁶Zebuluna thlahte, an chhûngkua ang zêlin: Sereda, Sered hnam thlahtu; Elona, Elon hnam thlahtu; Jaleela, Jaleel hnam thlahtu.

²⁷An chhûngkua ang zêla chhiara Zebuluna thlahte zât chu: mi 60,500 an ni.

²⁸Josepha thlahte chu, an chhûngkua ang zêlin, Manasea leh Ephraima te an ni:

²⁹Manasea thlahte: Makira, Makir hnam thlahtu; Makiran Gileada a hring a; Gileada chu Gilead hnam thlahtu a ni.

³⁰Hêngte hi Gileada thlahte an ni: Jezira, Jezir hnam thlahtu; Heleka, Helek hnam thlahtu;

³¹Asriela, Asriel hnam thlahtu; Sekema, Sekem hnam thlahtu;

³²Semida, Semid hnam thlahtu; Hephera, Hepher hnam thlahtu.

³³Hephera fapa Zelophehada chuan fapa a nei lo va, fanu hlîr a nei a; Zelophehada fanute hming chu Malaii te, Novai te, Hoglai te, Milkai te leh Tirzai te an ni.

³⁴An chhûngkua ang zêla chhiara Manasea thlahte zât chu: mi 52,700 an ni.

³⁵Hêng hi Ephraima thlahte an ni, an chhûngkua ang zêlin: Suthela, Suthel hnam thlahtu; Bekera, Beker hnam thlahtu; Tahana, Tahan hnam thlahtu.

³⁶Hêng hi Suthela thlahte an ni: Erana, Eran hnam thlahtu.

³⁷An chhûngkua ang zêla chhiara Ephraima thlahte zât chu: mi 32,500 an ni. Hêng hi an chhûngkua ang zêla Josepha thlahte an ni.

³⁸An chhûngkua ang zêla Benjamina thlahte chu: Bela, Bel hnam thlahtu; Asbela, Asbel hnam thlahtu; Ahirama, Ahiram hnam thlahtu;

³⁹Suphama, Supham hnam thlahtu; Huphama, Hupham hnam thlahtu.

⁴⁰Bela thlahte chu Arda leh Naamana te an ni: Arda, Ard hnam thlahtu; Naamana, Naaman hnam thlahtu.

⁴¹An chhûngkua ang zêla chhiara Benjamina thlahte zât chu: mi 45,600 an ni.

⁴²An chhûngkua ang zêla Dana thlahte chu hêng hi an ni: Suhama, Suham hnam thlahtu. Hêng hi an chhûngkua ang zêla Dana thlahte chu an ni.

⁴³An chhûngkua ang zêla chhiara Suham thlahte zât chu, mi 64,400 an ni.

⁴⁴Asera thlahte chu, an chhûngkua ang zêlin: Jimnaa, Jimna hnam thlahtu; Jesuia, Jesui hnam thlahtu; Beria, Beri hnam thlahtu.

⁴⁵Beria thlahte: Hebera, Heber hnam thlahtu; Malkiela, Malkiel hnam thlahtu.

⁴⁶Asera fanu hming chu Seri a ni a.

⁴⁷An chhûngkua ang zêla chhiara Asera thlahte zât chu: mi 53,400 an ni.

⁴⁸Naphtalia thlahte, an chhûngkua ang zêlin: Jazeela, Jazeel hnam thlahtu; Gunia, Guni hnam thlahtu;

⁴⁹Jezera, Jezer hnam thlahtu; Silema, Silem hnam thlahtu.

⁵⁰An chhûngkua ang zêla chhiara Naphthalia thlahte zât chu, mi 45,400 an ni.

⁵¹Hêngte hi Israela thlah an chhiar chhuah zât chu a ni a: 601,730 an ni.

⁵²LALPA chuan Mosia hnênah:

⁵³“Hêng mite hnênah hian ram chu an ro atân, an tam dân ang zêla sem tûr a ni.

⁵⁴Hnam lian deuh te chu ram pe zau deuh la, hnam tlêm deuh te chu ram tê zâwk pe ang che. An tam dân chhinchhiah ang zêlin roluah ram chu sem tûr a ni.

⁵⁵Ram chu thumvâwra sem tûr a ni a; an thlahtu hnam hming zêlin roluah tûr ram chu luah rawh se.

⁵⁶A hnam len leh têt azirin, an roluah tûr ram chu thumvâwra sem tûr a ni,” a ti a.

⁵⁷Hêngte hi an chhûngkua ang zêla chhiara Levia thlahte chu an ni: Gersona, Gerson hnam thlahtu; Kohatha, Kohath hnam thlahtu; Meraria, Merari hnam thlahtu.

⁵⁸Hêng hi Levia thlahte chu an ni: Libnia thlahte, Hebrona thlahte, Mahlia thlahte, Musia thlahte leh Kora thlahte. Kohatha chuan Amrama a hring a.

⁵⁹Amrama nupui Jokebedi chu Levia thlaha mi, Levia laka Aiguptaa piang a ni a; Amrama tân fa, Aarona te, Mosia leh an farnu Miriami te a hrinsak a.

⁶⁰Aarona chuan fa Nadaba leh Abihua te, Eleazara leh Ithamara te a hring a.

⁶¹Nadaba leh Abihua te chu hman thiang lo mei an hlan avângin LALPA hmâah khân an thi a.

⁶²Mipa thla khat chung lam, inchhiarnaa tel zawng chu 23,000 an ni; Israel mipui dangte zînga chhiar tel an ni ve lo, a chhan chu Israel fate zîngah rochan an neih ve loh avângin.

⁶³Hêngte hi Jordan kam, Moab phaizâwl, Jeriko râl lehlama an awm laia Mosia leh puithiam Eleazara’n an chhiar tâk te chu an ni.

⁶⁴Hêngho zîngah hian Sinai Thlalêra an awm laia Mosia leh puithiam Aarona ten Israel mipui an chhiar te zînga mi kha pakhat mah an awm ve tawh lo.

⁶⁵An chungchâng sawiin LALPA’N, “Thlalêrah an thi ngei tûr a ni,” a lo ti tawh si a. Tichuan an zînga mi pakhat mah an awm ta lo, Jephunea fapa Kaleba leh Nuna fapa Josua te chauh lo chu.

BUNG 27

ROKHÂWM DÂN

¹Josefa fapa, Manasea thlah, Makira fa, Gileada fa, Hephera fa Zelophehada chuan fanu hlîr a nei a; an hmingte chu Malaii te, Novaii te, Hoglaii te, Milkai leh Tirzai te an ni.

²Biakbûk kawngka bulah chuan Mosia te, puithiam Eleazara te leh pungkâwmho zawng zawng hmâah chuan an ding a:

³“Kan pa chu thlalêrah khân a thi tawh a; amaherawhchu, LALPA laka hel tûra inhâwrkhâwm Kora hote zîngah kha chuan a tel ve lo, ama sualna avângah thi a ni a; fapa a nei lo va.

⁴Fapa a neih loh avâng maiin kan pa hming chu thlahtute zîng aţangin in paih dâwn em ni? Chuvângin, kan pa unaute zîngah hian rochan min pe ve rawh u,” an ti a.

⁵An chungchâng thû chu Mosian LALPA hnênah a thlen a.

⁶LALPA chuan Mosia hnênah:

⁷“Zelophehada fanute thû hi a dik alâwm; an pa unaute zîngah rochan ram in pe ve ngei tûr a ni a, an pa rochan ai chu anni hian khâwm ve rawh se.

⁸Israel fate hnênah sawi la: ‘Fapa nei lova mi a lo thihin, a rochan ai chu a fanuin a khâwm tûr a ni.

⁹Fanu a neih loh chuan, a rochan chu a unaute in pe tûr a ni.

¹⁰Unau a neih loh chuan, a rochan chu a pamite in pe tûr a ni.

¹¹A pamiin unau a neih loh chuan, a rochan chu an chhûngkhat hnai ber hnênah pe ula, ani chuan chang mai rawh se.’ LALPAN Mosia hnêna thu a pêk hi Israel fate tân rorêlna dân nghet a ni ang,” a ti a.

ISRAELTE HRUAITU THAR ATÂN JOSUA

¹²LALPA chuan Mosia hnênah: “He Abarim Tlângah hian chho la, Israel fate hnêna ka pêk ram chu han thlîr rawh le.

¹³I thlîr zawhah chuan, i u Aarona hruai a nih ang bawkin, nang pawh i mite hnênah hruai i ni ve ang.

¹⁴Zin Thlalêra mipui thinrim sosân lai khân, tui awmna bula mipuite hmâah khân, mi chawimâwi tûra thu ka pêk che kalha i hel tlat vâng a ni e,” a ti a. (Chûng chu Zin Thlalêr, Kades hmuna Meriba tuite kha a ni.)

¹⁵Mosia chuan LALPA hnênah:

¹⁶LALPA, tîsâ zawng zawngte thlarau Pathian chuan mipuite hruaitu tûr mi tuemaw ruat sela,

¹⁷mipuite hmâah kala, anmahni hruai chhuak a, an hnû dâwla hruai lût thîntu tûr mi ruat rawh se, tichuan, LALPA mite hi vêngtu nei lo berâmte ang an ni dâwn lo nia,” a ti a.

¹⁸LALPA chuan Mosia hnênah: “Nuna fapa Josua, Thlarauvin a chênchilh mi hi hruai la, a lu chungah i kut ngat rawh;

¹⁹puithiam Eleazara hmâah leh pungkâwm zawng zawng hmâah dintîr la, an mithmuh ngeiah thuneihna hlân ang che.

²⁰Israel mipui pungkâwm zawng zawngten a thû an âwih theih nân, i thuneihna thenkhat pe bawh ang che.

²¹Puithiam Eleazara hmâah a ding ang a, anin Urim hmangin LALPA a râwnsak thîn tûr a ni; ani leh Israel fate zawng zawng, pungkâwmho zawng zawng chu, a thupêk ang zêlin an kal chhuakin, a thû vêkin an lût leh thîn tûr a ni,” a ti a.

²²Tichuan, Mosia chuan LALPA thupêk ang zêlin a ti a. Josua chu a hruai a, puithiam Eleazara hmâah leh pungkâwm zawng zawng hmâah chuan a dintîr a.

²³LALPAN thu a pêk ang zêlin Mosia chuan a chungah kut a ngihat a, thuneihna a hlân ta a.

BUNG 28

NI TINA THILHLANTE

¹LALPA chuan Mosia a bia a,

²“Israel fate hnênah heti hian thû pe rawh, “Ka tâna thilhlân, ka châw atâna rimtuaia meia thilhlante chu, a hunbí takah an hlân thîn tûr a ni.’

³“Heti hian hrilh la, ‘Hei hi meia thilhlân LALPA hnêna in hlan tûr chu a ni: berâmpa pahni kum khat mi, hmêlhem lo chu, hâlrâl thilhlân atân ni tin in hlân thîn tûr a ni.

⁴Berâm pakhat chu zîng lamah in hlân ang a, berâm dang chu tlai lamah in hlân tûr a ni;

⁵buhbâl thilhlân atân chhangphut epha khat hmun sâwma ðhena hmun khat, hriak thlîtfîm hin khat hmun lia ðhena hmun khat nêna pawl in hlân tel tûr a ni.

⁶Rimtui atâna hâlrâl thilhlân hi LALPA hnêna hlan reng tûra Sinai Tlâng aţanga ruat tawh kha a ni e.

⁷Berâm no pakhatah in tûr thil hin hmun lia ðhena hmun khat hlan tel zêl tûr a ni; hmun thianghlîmah in tûr thil chu LALPA hmâah i bun chhuak tûr a ni.

⁸Berâm pakhat zâwk chu tlaiah i hlân tûr a ni; zîng lama buhbâl thilhlân leh in tûr thilhlân ang bawkin, LALPA hnênah rimtui atân meia thilhlân angin i hlân tûr a ni.

SABBATH NIA THILHLAN

⁹Sabbath ni-ah berâm no pahni, kum khat mi, hmêlhem lo leh, buhbâl thilhlân atân chhangphut dip tak, ephah khat hmun sâwma ðhena hmun hni, hriak nêna hmeh pawl leh in tûr thilhlân te nêna hlan tûr a ni—

¹⁰Sabbath ni apiangin hâlrâl thilhlân pangngai bâkah, hê hâlrâl thilhlân hi in tûr thilhlân nêna hlan thîn tûr a ni.

THLA TIN THILHLAN

¹¹In thla thar ni apiangin LALPA hnênah hâlrâl thilhlân atân: bâwngpa tuai pahni, berâmpa pakhat, berâmno hmêlhem lo, a pa kum khat mi pasarih;

¹²bâwngpa pakhat zêlah buhbâl thilhlân atân chhangphut ðha chi epha hmun sâwma ðhena hmun thum, hriak nêna pawl a tel zêl ang a; berâmpa pakhat zêlah buhbâl thilhlân chhangphut ðha chi epha hmun sâwma ðhena hmun hni, hriak nêna pawl a tel baw tûr a ni;

¹³berâm no pakhat zêlah hâlrâl rimtui, LALPA hnênah meia hlan tûrin, buhbâl thilhlân atân chhangphut ðha chi epha hmun sâwma ðhena hmun khat, hriak nêna pawl a tel zêl tûr a ni.

¹⁴In tûr thilhlân chu bâwngchal pakhatah uain hin chanve, berâmpa pakhat zêlah hin khat hmun thuma ðhena hmun khat, berâm no pakhat zêlah hin khat hmun lia ðhena hmun khat a tel tûr a ni; hetiang hi kum tluana hâlrâl thilhlân thla tina in hlan tûr a ni.

¹⁵Hêng hâlrâl thilhlân leh in tûr thilhlân awm sâte bâkah hian, sual thâwi nân kêl no pakhat LALPA hnênah hlan baw tûr a ni.

KALHLEN KÛT NÎ A THILHLAN

¹⁶Thla khatna, ni sâwm palina hi LALPA Kalhlên Kût a ni.

¹⁷Hê thla ni sâwm panga ni hi kût ruai a ni a; ni sarih chhûng chhang dawidim telh loh chauh ei tûr a ni.

¹⁸Ni hmasa berah chuan inkhâwmpui thianghlîm in nei tûr a ni. Eng hna mah in thawk tûr a ni lo.

¹⁹LALPA hnênah meia hlan tûr hâlrâl thilhlân atân: bâwngpa tuai pahni, berâm pa pakhat, berâm no kum khat mi pasarih in hlân tûr a ni. Chhûngte chu hmêlhemna nei lo a ni tûr a ni.

²⁰Buhbâl thilhlân atân chhangphut ðha chi hriak pawl chu: bâwngpa pakhat zêlah epha hmun sawma ðhena hmun thum, berâmpa a nihin hmun sâwma ðhena hmun hni a ni ang;

²¹berâm no pasarih zînga pakhat zêlah epha hmun sawma ðhena hmun khat;

²²in tân inremna siam nân sual thâwina tûr kêl pakhat a ngai tel baw.

²³Hêngte hi hâlrâl thilhlân, tûk tina in hlan thîn bâkah in hlan thîn tûr a ni.

²⁴Heti ang hian ni sarih chhûng LALPA tâna rimtui, ei tûr thil chu meiin in hlân tûr a ni; hâlrâl thilhlân leh in tûr thilhlân awm sa reng bâkah in hlan thîn tûr a ni.

²⁵Ni sarih ni chuan inkhâwmpui thianghlîm in nei leh tûr a ni. Eng hna mah in thawk tûr a ni lo.

CHAWLHKÂR KÛTA THILHLAN

²⁶Buh thar tîr ni, Chawlhkâr Kût nia LALPA hnêna buh thar inrawn hlan ni chuan, inkhâwmpui thianghlîm in nei tûr a ni. Eng hna mah in thawk tûr a ni lo.

²⁷LALPA tâna rimtui, hâlrâl thilhlân pêk tûr chu: bâwngpa tuai pahni, berâmpa pakhat, berâm no kum khat mi,

²⁸buhbâl thilhlân atân chhangphut ðha chi hriak nêna pawl: bâwngpa pakhat zêlah epha khat hmun sâwma ðhena hmun thum, berâmpa pakhat zêlah epha khat hmun sâwma ðhena hmun hni;

²⁹berâm pasarih zînga pakhat zêlah epha khat hmun sâwma ðhena hmun khat ni se;

³⁰in tân inremna siamna tûr kêl pakhat a ngai tel baw.

³¹Hmêlhemna nei lo a ni ngei tûr a ni. Hâlrâl thilhlân leh buhbâl thilhlân pangngai bâkah, hêng hi in tûr thilhlân rualin in hlân tûr a ni.

BUNG 29

TÂWTAWRÂWT KÛTA THILHLAN

¹Thla sarihna, ni khat nî-ah inkhâwmpui thianghlîm in nei tûr a ni. Eng hna mah in thawk tûr a ni lo. In tân tâwtawrâwt ham nî a ni si a.

²LALPA hnênah rimtui atân hâlrâl thilhlân: bâwngpa tuai pakhat, berâmpa pakhat leh, berâm no kum khat mi, hmêlhem lo pasarih in hlân tûr a ni.

³An buhbâl thilhlhan chu bâwngpa pakhat zêlah hriak nêna pawlh chhangphut tha chi, epha khat hmun sâwma thena hmun thum, berâm pakhat zêlah hriak nêna pawlh chhangphut epha khat hmun sâwma thena hmun hnih,

⁴berâmno pasarih zînga pakhat zêlah chhangphut epha hmun sâwma thena hmun khat a ni ang a;

⁵in tân inremna siamna tûrin, sual thâwina tûr kêl pakhat a ngai tel baw;

⁶hêng hi thla thar apianga hâlrâl thilhlhan leh a kawppui buhbâl thilhlhan te, ni tina hâlrâl thilhlhan leh a kawppui chhangphut leh in tûr thilhlhan te, dân ang taka LALPA tâna rimtui, meia thilhlhan thin te bâka hlan tel tûr a ni.

INREMNA NÎA THILHLAN

⁷Thla sarihna ni sâwm niah inkhâwmpui thianghlîm in nei tûr a ni. In intihrehawm tûr a ni a; eng hna mah in thawk tûr a ni lo.

⁸LALPA hnênah rimtui atân hâlrâl thilhlhanah: bâwngpa tuai pakhat, berâmpa pakhat, berâm no kum khat mi pasarih in hlân tûr a ni. Hmêlhem lo a ni tûr a ni.

⁹An buhbâl thilhlhan chu bâwngpa pakhat zêlah hriak nêna pawlh chhangphut tha chi, epha khat hmun sâwma thena hmun thum, berâm pakhat zêlah hriak nêna pawlh chhangphut epha khat hmun sâwma thena hmun hnih,

¹⁰berâm no pasarih zînga pakhat zêlah chhangphut epha hmun sâwma thena hmun khat a ni ang a;

¹¹hêng hi ni tina hlan thin sual thâwina kêl pakhat te, inremna siamna tûr sual thâwina te, ni tina hâlrâl thilhlhan leh a kawppui chhangphut leh in tûr thilhlhan te bâka hlan tûr a ni.

BIAKBÛK KÛTA THILHLAN

¹²Thla sarihna ni sâwm leh panga niah inkhâwmpui thianghlîm in nei tûr a ni. Nî sarih chhûng LALPA tân kût in hmang ang a, eng hna mah in thawk tûr a ni lo.

¹³LALPA hnênah rimtui atân hâlrâl thilhlhanah: bâwngpa tuai sâwm leh pathum, berâmpa pahni, berâm no kum khat mi sâwm leh pali in hlân tûr a ni. Hmêlhemna nei lo a ni tûr a ni.

¹⁴An buhbâl thilhlhan chu bâwngpa sâwm leh pathum zînga pakhat zêlah hriak nêna pawlh chhangphut tha chi, epha khat hmun sâwma thena hmun thum, berâm pahniha pakhat zêlah hriak nêna pawlh chhangphut epha khat hmun sâwma thena hmun hnih,

¹⁵berâm no sâwm leh pali zînga pakhat zêlah chhangphut epha hmun sâwma thena hmun khat a ni ang a;

¹⁶hêng hi sual thâwina kêl pakhat nê, ni tina hâlrâl thilhlhan leh a kawppui chhangphut leh in tûr thilhlhan te bâka hlan tûr a ni.

¹⁷A ni hnih niah bâwngpa tuai sâwm leh pahni, berâmpa pahni, berâm no kum khat mi, hmêlhem lo i hlân ang a,

¹⁸bâwngpa te, berâmpa te leh berâm note hlan ruala chhangphut thilhlhan leh in tûr thilhlhan tûr zât chu, dânin a tuk zat zêl a ni tûr a ni;

¹⁹hêng hi sual thâwina kêl pakhat nê, ni tina hâlrâl thilhlhan leh a kawppui chhangphut leh in tûr thilhlhan te bâka hlan tûr a ni.

²⁰A ni thum nî chuan bâwngpa sâwm leh pakhat, berâmpa pahni leh berâm no sâwm leh pali, hmêlhem lo i hlân tûr a ni a,

²¹an chhangphut thilhlhan leh in tûr thilhlhan tûr zât chu, bâwngpa te, berâmpa leh berâm note hlan tam leh tlêm azira a bi tuk ang zêl a ni ang;

²²hêng hi sual thâwina kêl pakhat nê, ni tina hâlrâl thilhlhan leh a kawppui chhangphut leh in tûr thilhlhan te bâka hlan tûr a ni.

²³A ni lî nî-ah bâwng pa sâwm, berâmpa pahni, berâm no kum khat mi, hmêlhem lo i hlân ang a,

²⁴an chhangphut thilhlhan leh in tûr thilhlhan tûr zât chu, bâwngpa te, berâmpa leh berâm no hlan zât azira a bi tuk ang zêl a ni ang;

²⁵hêng hi sual thâwina kêl pakhat nê, ni tina hâlrâl thilhlhan leh a kawppui chhangphut leh in tûr thilhlhan te bâka hlan tûr a ni.

²⁶A ni nga niah bâwngpa pakua, berâm pa pahni, berâm no kum khat mi, hmêlhem lo i hlân ang a,

²⁷an chhangphut thilhlhan leh in tûr thilhlhan tûr zât chu, bâwngpa te, berâmpa te leh berâm no hlan zât azira a bi tuk zât ang zêl a ni ang;

²⁸hêng hi sual thâwina kêl pakhat nê, ni tina hâlrâl thilhlhan leh a kawppui chhangphut leh in tûr thilhlhan te bâka hlan tûr a ni.

²⁹A ni ruk niah bâwngpa pariat, berâm pa pahni, berâm no kum khat mi, hmêlhem lo i hlân ang a,

³⁰an chhangphut thilhlhan leh in tûr thilhlhan tûr zât chu, bâwngpa te, berâmpa leh berâm no hlan zât azira a bi tuk zât ang zêl a ni ang;

³¹hêng hi sual thâwina kêl pakhat nê ni tina hâlrâl thilhlhan leh a kawppui chhangphut leh in tûr thilhlhan te bâka hlan tûr a ni.

³²A ni sarih niah bâwngpa pasarih, berâm pa pahni, berâm no kum khat mi, hmêlhem lo i hlân ang a,

³³an chhangphut thilhlhan leh in tûr thilhlhan tûr zât chu, bâwngpa te, berâmpate leh berâm no hlan zât azira a bi tuk zât ang zêl a ni ang;

³⁴hêng hi sual thâwina kêl pakhat nê, ni tina hâlrâl thilhlhan leh a kawppui chhangphut leh in tûr thilhlhan te bâka hlan tûr a ni.

³⁵A ni riat niah inkhâwmpui thianghlîm in nei tûr a ni. Eng hna mah in thawk tûr a ni lo.

³⁶LALPA hnênah rimtui atâna hâlrâl thilhlhanah: bâwngpa pakhat, berâmpa pakhat, berâm no kum khat mi pasarih, hmêlhem lo i hlân tûr a ni.

³⁷bâwngpa te, berâmpa te leh berâm no hlan ruala an chhangphut thilhlhan leh in tûr thilhlhan tûr chu, a bi tuk zât ang zêl a ni ang;

³⁸hêng hi sual thâwina kêl pakhat nê, ni tina hâlrâl thilhlhan leh a kawppui chhangphut leh in tûr thilhlhan te bâka hlan tûr a ni.

³⁹Hêng thil hi a hun taka ruat kût in hman hunah hâlrâl thilhlhan leh buhbâl thilhlhanah te, in tûr leh remna thilhlhanah te LALPA hnênah in hlân tûr a ni (hêng bâka mahniam thutiam leh duhthûa thilhlhan te nê),” a ti a.

⁴⁰Tichuan, LALPAN Mosia hnêna thu a pêkte chu Mosia chuan Israel fate hnênah a hrilh vek a.

BUNG 30

INTIAMKAM CHUNGCHÂNGA DÂN

¹Mosia chuan Israel hnam hruai tute chu a bia a, “LALPA thupêk chu hei hi a ni:

²Miin LALPA hnênah thu a tiam emaw, chhechhama intiamkamna emaw a neih chuan, a thutiam chu a bawhchhe tûr a ni lo; ama kam chhuak ang chu a hlen tûr a ni.

³Nulain a pa ina a la awm laiin LALPA hnênah thu tiamin, chu thutiam chuan amah in phuartîr sela,

⁴a intiamkamna leh, chumîa a in phuartîrna chu a pa pawhin a lo hriatpuia, sawisêlna a neih loh bawk chuan, chu a intiamkamna thû chu a dîng tlang ang a, a lo in phuartîrna thutiam pawh a dîng tlang bawk ang.

⁵A intiamna chu a pain a hriat ni lâ lâa a remtih loh chuan, a pain a phal loh avângin, a intiamkamna ata chu a fihlîm ang a, LALPAN a ngaidam ang.

⁶“Ngaihtuah Chiang mang lova thû a lo intiamna, chû a thutiamna in phuartîr chung chuan pasal nei ta se,

⁷a pasalin a lo hriat a, a hriat nîah pawh sawisêlna a neih loh chuan, a thuthiam leh amah a lo in phuartîrna pawh chu a dîng tlang bawk ang.

⁸Amaherawhchu, a pasalin a hriat nîa a remtih loh chuan, a lo intiamna leh amah a lo in phuartîrna chu engmah lo mai a ni ang a, LALPAN a ngaidam ang.

⁹“Hmeithai emaw, mâk hnû emaw a nih chuan, a intiamkamna ang chu a hlen tûr a ni.

¹⁰“A pasal ina awm chungah thu a tiam emaw, intiamkamna a neih emawa,

¹¹a pasalin a hriat pawha pawî ti lova, a sawisêl loh chuan, a thutiamin a phuarna ang chu a hlen tûr a ni.

¹²Nimahsela, a pasalin a hriat nîa a sûtsak erawh chuan, ama kam chhuak ngeia a thu lo intiamkam tawh pawh chu sût leh a ni ang; a pasalin a thiahsak leh avângin LALPAN a ngaidam ang.

¹³Ama hlen chhuah tûra chhechhama a intiamkamna te chu a pasalin a nem nghehsak thei a, a thiahsak thei bawk.

¹⁴A pasalin hre reng chungah a ngawihsan a nih chuan, a thutiam leh ama lo intiamkamna chu a hlen chhuak tûr a ni; a hriat ni aţang rênga a ngawihsan avângin a nemnghet tihna a ni.

¹⁵A hriat hnua a thiahsak erawh chuan, a mawh a phurhsak a ngai thung ang,” a ti a.

¹⁶Hêng te hi pa leh a fanu nula a hnêna la awm inkârah te, pasal leh nupui inkâra tihdân tûr LALPAN Mosia hnêna a pêk chu a ni.

BUNG 31

MIDIAN-HO CHUNGA PHUBA

¹LALPA chuan Mosia a bia a:

²“Midian-ho chungah hian Israel fate phubâ lâksak rawh. Chumi zawhah chuan i mite hnênah hruai i ni tawh dawn nia,” a ti a.

³Mipuite hnênah chuan Mosian, “Indo tûrin mi engemaw zât inbuatsaih rawh se, Midian-ho hnênah va kal sela, Midian-ho chungah LALPA phubâ va la rawh se.

⁴Israel hnam tin aţangin mi sâng khat zêl indo tûrin tîr chhuak rawh u,” a ti a.

⁵Tichuan, Israel hnam tin aţangin mi sâng khat, an vaiin sîngkhat leh sâng hnih chu indo tûrin an inpuahchah ta a.

⁶Mosia chuan hnam tina mi sâng khat theuh chu indo tûrin, hmanraw thianghlime nên chuan a tîr liam ta a; puithiam Eleazara fapa Phinehasa chuan tâwtawrâwt ham tûrte kengin a ho va.

⁷LALPAN Mosia thu a pêk angin, Midian-hote chu an va bei a, mipa zawng zawng chu an va that vek a.

⁸Mi dangte an thah rualin Midian lalte pawh an that a, chûng Midian lalte chu Evia te, Rekema te, Zura te, Hura leh Reba te an ni. Beora fapa Balaama pawh khandaihin an that tel bawk.

⁹Israel fate chuan Midian hmeichhiate chu an fanaute nên salah an man a, an bâwng rual te, an berâm leh kêl rualte, an bungrua zawng zawng chu râlâlâk sum atân an lâksak vek a.

¹⁰An awmna khuate chu an kulh chawpin an hâl vek a.

¹¹An râlâlâk sum zawng zawng— mihringte leh ran te nên an hui fai vek a.

INDONA AţANGA LO HÂW

¹²An râlâlâk sum zawng zawng chu Mosia te, puithiam Eleazara leh Israel mipui pungkhâwmho awmna, Jordan luikam, Moab phaizâwl, Jeriko râlah chuan an rawn hâwn a

¹³Mosia te, puithiam Eleazara te leh pungkhâwmho puipa zawng zawngte chuan riahhmun kawtchhuahah an lo hmuak a.

¹⁴Nimahsela, indona aţanga lo hâw sipai rual, sâng hotute leh sipai za hotute chungah chuan Mosia thin a thawk ta a.

¹⁵Mosia chuan an hnênah: “Hmeichhe-ho hi in zuah vek elo maw?

¹⁶En ta che u, hêng hmeichhiate hi Balaama thurâwn anga, Peor hmuna Israel fate LALPA dân bawhchhiattîrtute kha an ni asin; hei vâng tak hian LALPA mite zîngah pulh hrî a lo lên phah tâ a nih kha.

¹⁷Chuvângin, naupang zînga mipa zawng zawng leh, hmeichhia mipa pâwl tawh zawng zawng chu that vek rawh u.

¹⁸Mipa la pâwl loh hmeichhia zawng zawng chu in tân zuah ula.

¹⁹Nangniho pawh riahhmun pâwnah hian ni sarih chhûng awm ula; mi thattu emaw, mi thah ruang khawihthu emaw apiang chu in sal mante nên a ni thum nîah leh a ni sarih nîah inthian thianghlîm rawh u.

²⁰In thuamhnâw zawng zawng, savun leh kêl hmul leh thinga siam rêng rêng chu thianfai vek rawh u,” a ti a.

²¹Puithiam Eleazara chuan indonaa kal indo mite hnênah chuan, “Hei hi LALPAN Mosia hnêna a pêk dân thuruat chu a ni:

²²Rangkachak te, tangkarua te, dâr te, thîr te, rângvâ te, suan te,

²³meia hâla chhe thei lo chi rêng rêng chu meiah in rawh ang a, a lo thianghlim tawh ang; tlenfaina tuiin tihthianghlim leh tûr a ni. Meia rawh tuar thei lo chi zawng zawng chu tuia sil tûr a ni.

²⁴A ni sarih ni chuan in silhfênte in sù ang a, a lo thianghlim tawh ang a, chumi zawhah riahhmunah in lo lût thei tawh ang,” a ti a.

RÂLLÂK SUM SEM DÂN

²⁵LALPA chuan Mosia a bia a:

²⁶“Nang leh puithiam Eleazara leh pungkâwmho puipaten hêng an râlâlâk mihringte leh rante hi chhiar rawh u;

²⁷râlâlâk sumte hi hmun hnihah then ula, indonaa kala indonaa telte leh, pungkâwmho zawng zawngte hnênah zât leh zâtin sem rawh u.

²⁸Indonaa kalhote chan ațangin: mihring te, bâwng te, sabengtung te, berâm te chu zanga zêla pakhat chu LALPA tâna chhiah angin lâksak ula;

²⁹anniho chan ațanga in lâkhran te chu, LALPA tâna then thilhlân angin puithiam Eleazara hnênah pe rawh u.

³⁰Israel mipuite chan ațangin mihring te, bâwng te, sabengtung te, berâm leh ranrual zawng zawng, sawmnga zêla pakhat chu LALPA biakbûk enkawltu Levia mite hnênah pe rawh u,” a ti a.

³¹Mosia leh puithiam Eleazara te chuan Mosia hnêna LALPA thupêk ang chuan an ti a.

³²Indonaa kalhoten râlâlâk sum an chan pual theuh an lâk tiam lovin, an rawn hawn zawng zawng chu: berâm chu 675,000 a ni a;

³³bâwng 72,000,

³⁴sabengtung 61,000,

³⁵hmeichhia mipa la pâwl loh zawng zawng chu 32,000 an ni.

³⁶A zahve dang, indonaa kalte chanpual chu, berâm 337,000 a ni a;

³⁷chuta țanga LALPA chanvo chu berâm 675 a ni.

³⁸Bâwng chu 36,000 a ni a, chumia LALPA chanvo chu 72 a ni.

³⁹Sabengtung chu 30,500 a ni a, chumia LALPA chanvo chu 61 a ni.

⁴⁰Mihring zât chu 16,000 an ni a, chumia LALPA chanvo chu mi 32 an ni.

⁴¹Tichuan, LALPAN Mosia hnêna thû a pêk angin LALPA tâna then thilhlân atân puithiam Eleazara a pe ta a.

⁴²Mosian indonaa kalte chanpual a pêk hnua, Israel mipui chanvo tûr chu—

⁴³a zahvea mipuiten an chan ve chu berâm 337,000,

⁴⁴bâwng 36,000,

⁴⁵sabengtung 30,500,

⁴⁶mihring 16,000 an ni a—

⁴⁷LALPAN Mosia hnêna thû a pêk ang zêlin, Israel mipuite chanvo ațangin, mihring leh ran sawmnga zêla pakhat chu LALPA biakbûk enkawltu Levia mite hnênah Mosian a pê a.

⁴⁸Chumi hnua chuan sipai sâng tam tak hotute, sâng chung a hotute, za chung a hotute chu Mosia hnênah an lo kal a;

⁴⁹Mosia hnênah, “I chhiahhlawhte hian indonaa kan hote theuh kan chhiar a, kan zingah tumah kim lo an awm lo ve.

⁵⁰Chutichuan, LALPA tâna hlan tûr thil kan rawn keng a, mi tinin rangkachaka siam incheina: bânbun te, ngûn te, zungbun te, bengbeh leh thî kan lakkhâwmte chu, inremna min siamsak tûrin LALPA hnênah kan rawn hlân e,” an ti a.

⁵¹Tichuan, Mosia leh Eleazara te chuan an hnên ațang chuan rangkachaka siam incheina thilte chu an lo dawng a.

⁵²Sipai sâng hotute leh za hotuten LALPA hnêna rangkachak an hlan zawng zawng chu sekel 16,750 a ni.

⁵³(Indo mi sipai pangngaite chuan an thil lâkte chu an nei mai a.)

⁵⁴Sâng hotute leh za hotute hnên ațangin rangkachak te chu Mosia leh puithiam Eleazara te chuan an lo dawng a, Israel miten an hriatreng nân biakbûkah LALPA hmâah an dah ta a.

BUNG 32

JORDAN KHAWCHHAKA CHÊNG HNAME

¹Reubena thlahte leh Gada thlahte chuan ranrual an ngah hle a; Jazer ram leh Gilead ram te chu ran vulh nâna hmun remchâng tak a ni tih an hmû a,

²tichuan, Gada thlahte leh Reubena thlahte chuan Mosia te, puithiam Eleazara leh pungkâwm hotute chu an bia a,

³Atarot te, Dibon te, Jazer te, Nimra te, Hesbon te, Eleale te, Sebam te, Nebo te leh Beon te,

⁴LALPAN Israel mipuite tâna min hnehsak tâk hi ran tlatna hmun a ni a, in chhiahhlawhte hian ranrual kan ngah hle si a.

⁵“In mithmuhah duhsak tlâka min ngai a nih chuan, hê ram hi in chhiahhlawhte tân min pe ula. Jordan lui chu min hruai kai ve lo mai rawh u,” an ti a.

⁶Mosia chuan Gada thlahte leh Reubena thlahte hnênah chuan: “In unaute indo tûrin an kal ang a, nangni hetah hian in thû mai mai ang mâw?

⁷LALPAN ram a pêka lût mai tûr Israel fate thinlung hi engah nge in tihhnual ang le?

⁸Kades Barnea ațanga ram enthla tûra ka tîrh in pateho pawh khân mi dangte rilru an tihhnual zo vek a nih kha.

⁹Eskol Ruam an han thleng a, ram an han hmuh khân, Israel mipuite rilru an tilunghnûr zo va, khâ vâng khân LALPAN a pêk ramah an lût ta lo a nih kha.

¹⁰Khâ vâng vêk khân LALPA thin a thawk a, chhechham meuhin heti hian a tih hial kha:

¹¹“Kei mi zui duh tak tak lo, Aigupta ațanga lo chhuak mipa zawng zawng, kum sawmhnih chín chung lam zawng chuan

Abrahama te, Isaka te, Jakoba te hnêna chhechhama ka lo tiam ram chu an hmu tawp lo vang,

¹²Ken mi Jephunea fapa Kaleba leh Nuna fapa Josua, LALPA zuitu tak takte chauhin an hmu ang,’ a tih kha.

¹³“Chuvângin, LALPA chu Israelte chung a thinrim êm avângin, LALPA hmaa thilsual titute zawng zawng an thih mang zawh vek hma chu, thlalêrah kum sawmli chhûng a vahvaihtîr a.

¹⁴En ta che u! In pate dinhmun chiah asin in luah leh tâk ni, misual thlahho, Israelte chung a LALPA thinurna nasa zâwk tawngbawtu tûr mai in ni e.

¹⁵Amah zui lova in pên bosan leh a nih vaih chuan, thlalêrah baw k a hnutchiah leh ang che u-a, hêng mipuite hi in tiboral vek dâwn tihna a ni mai,” a ti a.

¹⁶Anni chuan anrawn hnaih a: “Kan berâm rualte tân inte kan sa ang a, kan nupui fanaute tân khua kan din ang a,

¹⁷keiniho erawh chu inrâlthuamin, Israel fate awmna tûr hmun kan hruai thlen thlengin an hma hruai zêl tûrin kan inpeih e; a rama mi chêngte avângin kan fanaute erawh chu kulh nei khuahte an lo awm mai ang.

¹⁸Israel faten an luah tûr ram an chan theuh hma chuan in lamah kan hâwsan hauh lo vang.

¹⁹Jordan râl chhak lam hi kan chanvo a lo nih theih hlauh chuan, Jordan râl lehlam leh a piah lam ram chu kan luahpui ve lo mai ang e,” an ti a.

²⁰Mosia chuan an hnênah: “Chutianga in tih dâwna, indo tûra LALPA hmâah in inrâlthuama,

²¹in râldo miten LALPA hmâah Jordan lui an kân a, a hmâah hmêlmaho zawng zawng a hnawhchhuah veka,

²²LALPA hmâah ram chu tihtlâwm a nih hnûah chauh in kîrsan dawn a nih chuan, LALPA lakah leh Israelte lakah sawisêl tûr in awm lo vang; hê ram pawh hi LALPA laka in rochan a ni ang.

²³Chutianga in tih loh erawh chuan, LALPA laka thil sual ti in ni dâwn tih chhinchhiah rawh u; in sualna chuan a zawng chhuak leh ngei ang che u.

²⁴In fanaute tân khua te din ula, in berâm rualte awmna tûr in pawh sa rawh u, in sawi ang tak chuan ti ta che u,” a ti a.

²⁵Gada thlahte leh Reubena thlahte chuan Mosia hnênah chuan: “Kan pu thupêk angin i chhiahhlawhte hian kan ti ang.

²⁶Kan nupui fanaute, kan berâm rualte leh kan ran rual zawng zawngte chu Gilead khuaah te an awm ang a;

²⁷i chhiahhlawhte erawh chuan, râlthuam nêl lui kânin, kan puin a sawi ang ngeiin LALPA hmâah indo tûrin kan kal zêl ang,” an ti a.

²⁸Chutianga taka tihsak tûrin Mosia chuan puithiam Eleazara te, Nuna fapa Josua leh Israel hnam puipate chu thû a pe ta a.

²⁹Mosia chuan: “Gada thlahte leh Reubena thlahten Jordan lui an kânpui che u a, LALPA hmaa indo tûra mi tin inrâlthuama, in hma zâwna ram in tuk tlâwm hunah, Gilead ram hi an tân pe ang che u.

³⁰Râlthuam nêl an kaipui loh che u chuan, nangmahni zîngah Kanaan ram chhûnga mi chanpual an nei ve mai tûr a ni,” a ti a.

³¹Gada thlahte leh Reubena thlahte chuan an chhâng a: “In chhiahhlawhte hnêna LALPA sawi ang chu kan ti mawlh ang.

³²Kanaan ramah chuan LALPA hmâah inrâlthuamin kan kai ve ang a, kan chanpual ram erawh chu Jordan lui helam ram hi ni zêl rawh se,” an ti a.

³³Tichuan, Mosian Gada thlahte, Reubena thlahte leh Josepha fapa Manasea hnam zahve te hnênah chuan Amor-ho lal Sihona lalram te, Basan lal Oga lalram te chu a ram leh a ramri chhûnga khua te, a ram thenawma khuate nêl lam chuan a pe ta a.

³⁴Gada thlahte chuan Dibon leh Atarot leh Aroer te,

³⁵Atroth leh Sophah leh Jazer leh Jogbeha te,

³⁶Bet Nimra leh Bet Haran khua te chu kulh neia dinin, berâm huang te an siam a.

³⁷Reubena thlahte chuan Hesbon leh Eleale leh Kirjathaim te,

³⁸Nebo leh Baal Meon (an hming thlak a ni a) leh Sibma khua te an din a; an khawpui din te chu hming dang an vuah a.

³⁹Manasea fa Makira thlahte chu Gilead-ah an kal a, an la a, chuta lo awm Amor-hote chu an hnawt chhuak a.

⁴⁰Tichuan, Mosia chuan Gilead chu Manasea fa Makira a pê a, chutah chuan an awm ta a.

⁴¹Manasea fa vêk Jaira pawh a thawk chhuak a, chûng laia khaw awm te chu a la a, Havot Jair tiin a vuah a.

⁴²Noba pawh a thawk chhuak a, Kenath leh a chhehvêl khuate a la a, ama hming châwiin Noba a vuah a.

BUNG 33

AIGUPTA AṬANGA ISRAEL FATE ZIN KAWNG THLÎRLÊTNA

¹Mosia leh Aaron a te kaihhruaia Aigupta aṭanga chhuak Israel faten Aigupta aṭanga an zin kawng chu hêtang hi a ni.

²Mosia chuan an chhuahna leh an zin kawngte chu LALPA thupêk ang zêlin a zia k a. An kal chhuahna leh zin kawngte chu hêngte hi a ni:

³A thla khatna, ni sâwm leh panga niin Rameses aṭangin an chhuak a; Kalhlên Kût zawh tûkah khân Israel fate chu Aigupta mite mithmuh lai ngeiin huaisen takin an kal chhuak a.

⁴Aigupta mite chuan an fatîr zawng zawng LALPAN a tihhlumte kha an phûm mêk lai a ni a. An pathiante leh zêl pawhin LALPA rorêlna kut an tuar si a.

⁵Israel fate chu Ramases aṭangin an chhuak a, Sukkoth-ah an riak a.

⁶Sukoth aṭangin an chhuak a, Ethamah an riak leh a, chû chu thlalêr depa awm a ni.

⁷Etham aṭanga an chhuak leh chu Pi Hariroth lamah an inher lêt a, chû chu Baal Zephon chhak a ni a; Migdol bulah riahhmun an khuar a.

⁸Hariroth aṭangin an chhuak a, tuipui kânin thlalêrah an lût a, Etham Thlalêrah ni thum an kal a, Mara-ah riahhmun an khuar a.

⁹Mara ațanga chhuakin Elim an thleng a. Elim-ah chuan tuihnâ sâwm leh pahnih leh tûm thing kung sawmsarih a awm a; chutah chuan riahmun an khuar a.

¹⁰Elim ațangin an chhuak a, Tuipui Sen kamah an riak a.

¹¹Tuipui Sen kam ațangin an chhuak a, Sin Thlalêrah riahmun an khuar a.

¹²Sin Thlalêr ațangin an chhuak a, Dophka-ah riahmun an khuar a.

¹³Dophka ațangin an chhuak a, Alus-ah riahmun an khuar a.

¹⁴Alus ațangin an chhuak a, Rephidim-ah riahmun an khuar a, chutah chuan mipuite tân in tûr tui a awm ta lo va.

¹⁵Rephidim ațangin an chhuak a, Sinai Thlalêrah riahmun an khuar a.

¹⁶Sinai Thlalêr ațangin an chhuak a, Kibrot Hattava-ah riahmun an khuar a.

¹⁷Kibrot Hattava ațangin an chhuak a, Hazerot-ah riahmun an khuar a.

¹⁸Hazerot ațangin an chhuak a, Ritma-ah riahmun an khuar a.

¹⁹Ritma ațangin an chhuak a, Rimon Perez-ah riahmun an khuar a.

²⁰Rimon Perez ațangin an chhuak a, Libna-ah riahmun an khuar a.

²¹Libna ațangin an chhuak a, Risa-ah riahmun an khuar a.

²²Risa ațangin an chhuak a, Kehelathaah riahmun an khuar a.

²³Kehelatha ațangin an chhuak a, Sepher Tlângah riahmun an khuar a.

²⁴Sepher Tlâng ațangin an chhuak a, Harada Harada-ah riahmun an khuar a.

²⁵Harada ațangin an chhuak a, Makhelot-ah riahmun an khuar a.

²⁶Makhelot ațangin an chhuak a, Tahat-ah riahmun an khuar a.

²⁷Tahat ațangin an chhuak a, Tera-ah riahmun an khuar a.

²⁸Tera ațangin an chhuak a, Mitkaah riahmun an khuar a.

²⁹Mitka ațangin an chhuak a, Hasmona-ah riahmun an khuar a.

³⁰Hasmona ațangin an chhuak a, Moserot-ah riahmun an khuar a.

³¹Moserot ațangin an chhuak a, Bene Jaakan-ah riahmun an khuar a.

³²Bene Jaakan ațangin an chhuak a, Hor Hagidgad-ah riahmun an khuar a.

³³Hor Hagidgad ațangin an chhuak a, Jotbatha-ah riahmun an khuar a.

³⁴Jotbatha ațangin an chhuak a, Abrona-ah riahmun an khuar a.

³⁵Abrona ațangin an chhuak a, Ezion Geber-ah riahmun an khuar a.

³⁶Ezion Geber ațangin an chhuak a, Zin Thlalêr-ah riahmun an khuar a, chû chu Kades a ni a.

³⁷Kades ațangin an chhuak a, Edom ramri bul, Hor Tlângah riahmun an khuar a.

³⁸Puithiam Aarona chu LALPA thupêkin Hor Tlângah chuan a lâwn chho va, Aigupta ram ațanga Israel fate an lo chhuah ațanga a kum sawmli kum, thla ngâna, ni khat niin chutah chuan a thi a.

³⁹Aarona chu Hor Tlângah a thihin kum 120 a upa a ni.

⁴⁰Kanaan mi, Arad lal, Kanaan ram chhima awm chuan Israel fate lo kal thu a lo hria a.

⁴¹Hor Tlâng ațang chuan an chhuak a, Zalmon-ah riahmun an khuar a.

⁴²Zalmon ațang chuan an chhuak a, Punon-ah riahmun an khuar a.

⁴³Punon ațang chuan an chhuak a, Obot-ah riahmun an khuar a.

⁴⁴Obot ațang chuan an chhuak a, Moab ramri bul, Ije Abarim-ah an riak a.

⁴⁵Ijim ațang chuan an chhuak a, Dibon Gad-ah riahmun an khuar a.

⁴⁶Dibon Gad ațang chuan an chhuak a, Almon Diblathaim-ah riahmun an khuar a.

⁴⁷Almon Diblathaim ațang chuan an chhuak a, Nebo thlen hma, Abarim tlângah riahmun an khuar a.

⁴⁸Abarim tlâng ațang chuan an chhuak a, Jordan luikam, Moab phaizâwl, Jeriko râlah riahmun an khuar a.

⁴⁹Beth Jesimot ațanga Abel Acacia thing hmun thlengin Jordan luikama Moab phaizâwlah riahmun an khuar a.

KANAAN HNEH DÂN TÛR THUPÊK

⁵⁰Jordan luikama Moab phaizâwl, Jeriko râlah chuan LALPAN Mosia a bia a,

⁵¹“Israel fate chu heti hian hrilh la: ‘Jordan lui kâna Kanaan ram in luh hun chuan,

⁵²chû rama mi, in hmâa awm zawng zawng chu hnawt chhuak vek ula, an lung milim te, an milim chhûn te vaw chhe vek ula, an hmun sâng te chu tihchhiatsak vek rawh u;

⁵³chû rama chêngte chu luahlân vek ula, in tâna ka pêk tawh che u a nih avângin ram chu luah rawh u.

⁵⁴Chhûngkaw tinte chanvo chu thum vâwrin insem tûr a ni; chhûngkaw hung deuh tân ram zau deuh in pê ang a, chhûngkaw tlêm deuh chu ram zîm deuh pê ula; thumvâwra a tlûkna ang zêlin mi tinin chanpual an nei theuh ang. Ram luah dân tûr chu a chí chia inhlâwm hran zêl tûr a ni.

⁵⁵Chu ram lo luah hmasatute chu in hnawh bo vek loh chuan, in zuahhote chuan in mit an la timîm ang a, in taksa tân chhuntu hlîngah an chang reng bawk ang a, in chênna ramah chuan an tibuai reng dâwn che u a ni.

⁵⁶Chubâkah, an chungah tih ka tum rilrûk chu in chungah ka ti hlah mai ang,” a ti a.

BUNG 34

KANAAN RAMRI KHAM

¹LALPA chuan Mosia a bia a,

²“Israel fate hnênah heti hian thû pe rawh: ‘Kanaan ram in luh hunah, in luah tûr Kanaan ramri chin chu hetiang hi a ni ang.

³Chhim lam ramri chu Zin Thlalêr ațangin Edom ramri hrûl zêl a ni ang a; chhim lam ramri chuan chhak lamah Tuipui Thi tâwpna chin a han thleng ang;

⁴chhim lama in ramri chuan Akribim pan chhovin, Zin lam hrût zêlin, Kades Barnea chhim lam a han pawh ang a; chuta țangin Hazar Adarah, chuta țangin Azmon a han chhun ang.

⁵ramri chu Azmon ațanga kualin Aigupta Lui kal tlangin, Tuifinriatah a tâwp ang.

⁶Khawthlang lam ramri chu Tuifinriat Zau a ni ang a; chû chu khawthlang lama in ramri tûr a ni.

⁷Hmar lama in ramri tûr chu hei hi a ni: Tuifinriat Zau ațangin Hor Tlâng thlengin ramri in kham tûr a ni;

⁸Hor Tlâng ațangin Hamath luhna thlengin ramri in siam tûr a ni; chuta țangin ramri chuan Zedad a chhun ang;

⁹ramri chuan Ziphron a pan zêl ang a, Hazar Ena-ah a tâwp ang. Hei hi hmar lama in ramri chin tûr chu a ni.

¹⁰Khawchhak lamah Hazar Enan ațangin Sepham thlengin in ramri in kham ang a;

¹¹Sepham ațangin Ain chhak lam zêlah Ribla a chhun ang a; ramri chu kal thla zêlin, Kinneret Tuipui kam chhak lam a zu pawh ang;

¹²ramri chuan Jordan luidung zawh thlain, Tuipui Thi-ah a tâwp ang. Hêng ramri hual chhûng hi in ram tûr chu a ni ang,” a ti a.

¹³Mosia chuan Israel fate chu thû a pê a: “Hei hi hnam kua leh hnam chanve te tâna LALPA thupêk, thumvâwra in luah tûr chu a ni.

¹⁴Reubena hnamte chuan an chhûngkua ang zêlin, Gada hnamte pawhin an chhûngkua ang zêla ram luah tûr an nei tawh a; Manase hnam zâtve te pawhin an chanpual tûr an chang tawh baw a.

¹⁵Tichuan, chûng hnam hnih leh a zahve-te chuan Jordan lui he lam, Jeriko khawchhak lam, ni chhuahna lam hi an chang tawh baw a ni,” a ti a.

RAM SEMTU TÛR RUATNA

¹⁶LALPA chuan Mosia a bia a,

¹⁷“In zînga ram semtu tûr hmingte chu: puithiam Eleazara leh Nuna fapa Josua te hi an ni e.

¹⁸Hnam tin ațanga hotu pakhat in thlan chhuahte chuan ram luah tûr an sem tûr a ni.

¹⁹Chûng mite hming chu hêngte hi a ni: Juda hnam ațangin Jephunia fapa Kaleba;

²⁰Simeon hnam ațangin Amihuda fapa Semuela;

²¹Benjamin hnam ațangin Chislona fapa Elidada;

²²Dan hnam ațanga an puipa Joglia fapa Bukia;

²³Josepha thlahte: Manase hnam ațanga an puipa Ephoda fapa Hanniela;

²⁴Ephraim hnam ațanga an puipa Shiptana fapa Kemuela;

²⁵Zebulun hnam ațanga an puipa Parnaka fapa Elizaphana;

²⁶Isakar hnam ațanga an puipa Azzana fapa Paltiel;

²⁷Aser hnam ațanga an puipa Selomia fapa Ahihuda;

²⁸Naphtali hnam ațanga an puipa Ammihuda fapa Pedahela te an ni,” a ti a.

²⁹Hêng mite hi Kanaan rama Israel fate luah tûr ram semtu atâna LALPA mi ruat te chu an ni.

BUNG 35

LEVIA CHITE KHUA

¹Jordan lui kama Moab phaizâwl, Jeriko râla an awm laiin LALPA chuan Mosia a bia a:

²“Israel fate hnênah thû pê la, an ram chanpual chhûngah Levia chite tân chênna tûr khaw engemaw zât, dai kiang vêla ran tlatna tûr nêl pe rawh se.

³Chênna tûr khua an nei ve tûr a ni a; a chheh vêla ram chu an bawng te, an berâm te, kêl te leh an ran tlatna tûr a ni ang.

⁴Levia mite tâna ram in pêk tûr chu, khawpui kulh ațanga teha tawng sâng khat bial a ni ang.

⁵Khawpui pawns lam chu teh la, chhak lam tawng sâng hnih, chhim lam tawng sâng hnih, thlang lam tawng sâng hnih, hmar lam tawng sâng hnih theuh ni sela. Khua chu a laiaa a awm tûr a ni. Chûng ram awl chu khuaa mite chanpual a ni ang.

⁶Levia chite tâna khua i pêkho zîngah chuan, khaw paruk chu mi tihlumtute tualtân nân, inhumhimna khua ni rawh se. Hêng bâkah hian khaw dang sawmli leh pahni i pe baw tûr a ni.

⁷Tichuan, Levia chite tâna khua i pêk chu sawmli leh pariat a ni ang; a chhehvêla vantlâng ram te nêl.

⁸Chûng khua i pêk tûrte chu Israel fate chanpuala mi a ni tûr a ni; hnam lian deuh chanpuala mi i pe tam deuh ang a, hnam tê deuh chanpuala mi i pe tlêm deuh mai tûr a ni. Hnam tinin an ram neih azirin, an khuate chu Levia mite sem ve theuh rawh se,” a ti a.

INHUMHIMNA KHUATE

⁹LALPA chuan Mosia a bia a,

¹⁰“Israel fate hnênah heti hian hrilh rawh: ‘Kanaan ram lût tûra Jordan lui in kai hunin,

¹¹ti palha mi tihlumtute tlân luh theih nân, khaw paruk chu inhumhimna khua atân in ruat tûr a ni.

¹²Tualthattu chu pungkhâwmho hmaa a chungthu rêl a nih hmaa phubalatu kuta a thih mai loh nân, in tân inhumhimna khawpui ni rawh se.

¹³Khua in pèkte ațangin inhumhimna khawpui atân khaw paruk in ruat tûr a ni.

¹⁴Inhumhimna khawpui atân Jordan râl chhak lamah khaw pathum, Kanaan ram lamah pawh khaw pathum in ruat tûr a ni.

¹⁵Chûng khaw parukte chu Israel fate, ramdang mite leh, in zînga mikhualten mi an thah palha, an tualtlânna tûr a ni.

¹⁶Amaherawhchu, miin thîr hmanga mi a vuak a, a thih chuan tualthat a ni; tualthattu chu tihhlum ngei tûr a ni.

¹⁷Thih theihna khawpa lunga mi a chhut a, a thih chuan tualthat a ni; tualthattu chu tihhlum ngei tûr a ni.

¹⁸Thing tuma thi khawpa mi a vuak a, a thih chuan tualthat a ni; tualthattu chu tihhlum ngei tûr a ni.

¹⁹Thisen phuba latu chuan tualthattu chu a tihlum tûr a ni; a hmuhna apiangah a tihlum mai tûr a ni.

²⁰A huat rêng vânga mi a namthlu emaw, lo chânggrûin thi khawpin lo vawm ta se, emaw,

²¹huat sâ rêng vânga kut lâwnga a beiha a thih chuan, a kutthlâktu chu tihhlum ngei tûr a ni. Tualthattu a ni. Thisen phuba latu chuan tualthattu chu a hmuhna apiangah a tihlum tûr a ni.

²²Amaherawhchu, huat vâng pawh ni lova mi a nam thut emaw, chângru lêm lova mi a vawm palh emaw,

²³hmu lâwk lova a lung vawmin, a hmêlma pawh ni lo, mi tihnat a tum vâng pawh ni lovin, tûemaw va dêng fuhin, a thi palh hlauh thei a,

²⁴chutiangah chuan tihlumtu leh thisen phuba latu inkâr thu chu pungkhâwmhoten an rêl tûr a ni.

²⁵Tichuan, pungkhâwmho chuan thisen phuba latu lakah chuan tihlumtu chu an chhan ang a, pungkhâwmho chuan a tân chhiatna, inhumhimna khawpuiah chuan an hruai kîr ang a, chutah chuan hriak thianghlîma thih puithiam lalber thih hun thlengin a awm reng tûr a ni.

²⁶Mi tihlumtu chuan a tânchhiatna hmun, inhumhimna khawpui chu engtik hunah pawh chhuahsan ta se,

²⁷thisen phuba latuin tihlumtu chu a lo hmuh a, a that a nih pawhin, a thattu in a thisen mawh a phur lo vang,

²⁸a chhan chu, puithiam lalber thih thlengin chu inhumhimna khawpuia awm reng tûra tih a nih vâng a ni. Puithiam lalber thih hnuah erawh chuan, tihlumtu chu ama awmna hmunah a kîr thei tawh ang.

²⁹Hêng hi in awmna apiangah in thlah kal zêlte thlenga ro in rêl dân tûr chu a ni.

³⁰Tupawhin mi that se, thuhretute hriatpuina ngeia tihhlum tûr a ni; amaherawhchu, mi tihlum tûr meuh chuan thuhretu pakhat hriatpuina mai chu a tâwk lo.

³¹Chubâkah tualthat, thi tûra a chungthu rêl tawh nunna chu tlan chhuah tûr a ni lo, tihhlum ngei tûr a ni zâwk.

³²Inhumhimna khawpuia tân lût tawh chu, puithiam lalber thih hma chuan a awmna rama a kîr leh theih nân tlanna sum in la tûr a ni lo.

³³In awmna ram chu in tibawlhhlawh tûr a ni lo; thisen hian ram a tibawlhhlawh a, thisen chhuahna ram chu, thisen chhuahtu thisen chauh lo chuan engmahin a thianfai thei lo.

³⁴Chuvângin, in awmna ram chu tibawrhâng suh u, chutah chuan ka chêng ve si a; kei LALPA hian Israel fate chu ka chênpuî thîn si a,” a ti a.

BUNG 36

ROKHÂWMTU HMEICHHIATE PASAL NEIH DÂN

¹Josefa thlah, Manasea fapa, Makira fapa, Gileada thlah chhûngkaw hotu lû-te chu Mosia leh Israel fate zînga hotu lûte hnênah an kal a;

²“LALPA chuan kan pu hi Israel fate hnênah thumvâwra ram luaht tûr sem tûrin thu a pê che a, kan unaupa Zelophehada ram ro chu a fanute pe tûrin thu a pe bawk che a.

³Tichuan, Israel fate zînga nham dang tupawh pasalah nein kan thlahtu ram ro chu la chhuakin, an pasal neih apiangte nham ro-ah a pakai dâwn tihna a ni a; chutiang chuan kan rochan chu lâksak kan ni dâwn tihna a ni a.

⁴Israel fate tân Jubili a lo thlen hunah, an ram chan chu pasala an va neih nhamte chanpualah a bet ang a; tichuan kan nham thlahtute ram chan tûr chu kan chên ringawt mai dâwn a ni,” an ti a.

⁵Mosia chuan LALPA thu-in Israel fate chu thû a pê a: “Josefa thlahte sawi hi a dik tlat a ni.

⁶“Hei hi Zelophehada fanute chungchânga LALPA thupêk chu a ni e, ‘Pasal atân thâ an tih apiang chu nei rawh se, amaherawhchu, an pate hnampui zînga mi chauh an nei thei ang,’ a ti a.

⁷Tichuan, Israel fate ro chu nham leh nham kârah a insawn lo vang, Israel fate chuan an thlahtute nham ro chu an vawn ngheh tlat dâwn avângin.

⁸Israel nham zînga thlahtu rokhâwmtu tûr chuan, an nham ro an chhawm zêl theih nân, an thlahtu hnama mi ngei nupuiah an awm tûr a ni.

⁹Tichuan, ro chu nham khat ațangin nham dangah a insuan lo vang a, Israel nham tinin mahni roluah theuh an chang zui thei zêl dâwn a ni,” a ti a.

¹⁰Mosia hnêna LALPA thupêk angin Zelophehada fanute chuan an ti ta a;

¹¹tichuan, Zelophehada fanu Malaii te, Tirzai te, Hoglaii te, Milkai leh Novaii te chuan an chipuite chu pasalah an nei ta a.

¹²Josefa fa Manase chhûngkuaa mi pasalah an nei a, an ro pawh an thlahtu chhûngkua chuan an chhawm ta zêl a.

¹³Hêng hi Jeriko râl, Jordan kam, Moab phaizâwla Israel fate tâna inkaihhrûaina dân, LALPAN Mosia a pêk chu a ni.

DEUTERONOMY

Ziah tu: Mosia • Ziah kum: B.C. 1405

Deuteronomy hi ‘Dân Pahnihna’ tihna emaw, ‘dan bu ziah chhâwn’ tihna emaw a ni (17:18). Hê lehkhawh hian Exodus buin a ziah tawh Thu Pêk Sâwm ziah nawn a ni a (Bung 5). Israel faten an pan tûr ramtiam Kanaan ram chu râlkhata hmu pha reng chung a ziah a ni. Jeriko khaw zâwn, Jordan lui kam chhak lam Moab phaizâwlah awmhmun khuarin, an puan in kaihte chuan phaizâwl a dâp dul mai a (1:1). A hun tâwp a hnai a, Mosia chuan thlalêra kum 40 an awm chhunga thil thleng chanchin te, Pathianin a hruai dân te a thlîr lêt a; ramtiam an luh huna an awm dân tûr leh fuihna thuchah te a sawi a. Hruaitu thar atân Josua hnênah mawhpurhna a hlân a. Taksaa a luh ve dâwn loh avângin an awmna chhak, Pisga Tlâng aţangin Kanaan ram pum chu Pathianin a thlirtîr a. Israel mipuite mal a sâwm a, Moab tlângah chuan a thi ta a ni. A chhûng thu hi hmun sariyah tşen theih a ni. (1) Thlalêra Israelte awmdân chanchin (1:1-3:29); (2) Dân thupêk sawi nawnlehna leh Lalpa tîh tûra infuihna (4:1-11:32); (3) Ramtiam luh hnua nun dân tûr thuchah (12:1-27:26); (4) Nakina Israelte hnêna Krista lokallehna tûr hrilhlâwkna leh Pathian Thuthlung (28:1-3:20); (5) Mosian Levian chi puithiamte leh Josua hnêna a thuchah (31); (6) Mosia fakna hla leh a malsâwmna (32, 33) leh, (7) Mosia thih thu (34) te a ni. Deuteronomy hi Bible-a lehkhaw pangâna a ni a, bung 34 a awm a, châng 958 a awm baw.

BUNG 1

KANAAN LÛHNA THUPÊK HMASA

¹Hêng hi Jordan lui chhak lam thlalêr, Paran, Tophel, Laban, Hazeroth, Dizahab vêla an awm laia, Jordan kam Sup râla Israel ho hnêna Mosia thusawi a ni.

²Horeb aţangin Kades Barnea chu Seir Tlâng lam kawngah ni sâwm kal a ni.

³Kum sawmlîna, thla sâwm pakhat-na, ni khat ni chuan LALPAN an hnêna sawi tûr thu a pêk angin Mosia chuan Israel fate hnênah thû a sawi a,

⁴Sihona, Amor-ho lal, Hesbon khuua mi leh Oga, Basan lal, Edrei biala Astaroth-a awm te a thah hnu kha a ni a.

⁵Jordan lui chhak lam, Moab ramah hê dân hi a puang ţan a,

⁶“LALPA kan Pathianin Horeb tlângah khân heti hian min hrilh a: ‘Hê tlângah hian in awm rei tâwk ta e.

⁷Kal chhuak tawh ula, Amor tlângramah te, a chhehvêl tlângramah te leh phai ruam zawng zawng te hrût ula, chhim lamah te, tuifinriat kamah te, Kanaan-ho ramah leh Lebanon ramah te, Euphrates luipui thlengin kal chhuak rawh u.

⁸Khai le, in hmâah hian ram ka lo peih sa diam tawh e; in thlahtu Abrahama te, Isaaka te, Jakoba te leh an thlah kal zêlte tân chhechhama ka lo tiam ramah chuan lût ula, luah rawh u,’ a ti a.

HNAM TIN HOTU RUAT THU

⁹“Khatih lai khân ka hrilh che u kha: ‘Keimah mai chuan ka tlin ta ngang lo va.

¹⁰LALPA in Pathian zâwkin a tipung che u a, tunah chuan vâna arsi ang maia tam in lo nih tâk hi.

¹¹LALPA in thlahtute Pathian chuan tûn aia a lêt sângin tipung che u sela, a tiam ang takin malsawm che u rawh se!

¹²In harsatna te, in phurritte leh in phunchiarna zawng zawngte hi engtin nge kei tehulun ka dâwl zawh ang le?

¹³Chuvângin, nangmahni hnam tin zînga mi tşeu mi fîng, mi remhria leh chinchâng hria rawn inthlang chhuak ula, in chung a hotuah ka lo siam ang e,’ ka ti a.

¹⁴Nangniho khân, ‘Tihdan tûr min hrilh chu a tşah hle mai,’ in ti a nih kha.

¹⁵Tichuan, hnam tin aţangin mifing leh mi remhria te chu in hotu atân ka lo siam ta a, sâng chung a hotu te, za chung a hotu te, sawmnga chung a hotu te, sâwm chung a hotu te an lo ni ta a; tin, hnam tin tâna hotu tûr ruat an awm baw k a.

¹⁶“Chumi laia in rorêltute hnênah khân, ‘In unaute kêra thubuai chu ngaithla ula, in unau kêr thû a ni emaw, ram dang mi awm vê te nêna inkâr thû a ni emaw, dik takin rêl rawh u.

¹⁷Rorêlnaah duhsak bîk in nei tûr a ni lo; miliante leh mitête thû chu thuhmun rengin ngaihlhâksak rawh u; rorêlna hi Pathian tâ a nih avângin, mîhring hmaizah vângin in zâm chhe mai tûr a ni lo. In tâna rêl khîrh zual bîkte chu ka hnênah rawn thlen ula, keiman ka lo ngaithla ang,’ tia thû ka pêk kha.

¹⁸Khâng hun lai khân in tih tûr apiang ka hrilh tşin che u kha.

ISRAELTEN RAM AN LÛT DUH LO

¹⁹Tichuan, Horeb kan chhuahsan a, LALPA kan Pathianin thû min pêk ang zêlin Amor-ho tlâng ram kalna kawnga thlalêr hmun râpthlak leh zau pui pui in hmuh te kha kan paltlang a. Kades Barnea kan va thleng a.

²⁰In hnênah, ‘LALPA kan Pathian min pêk Amorho tlâng ram chu in lo thleng ta a.

²¹En teh u, LALPA in Pathian chuan in tân ram chu a peih ta e; LALPA Pathianin in thlahtute hnêna a lo sawi tawh angin han chho ula, nei tawh rawh u le; hlau suh ula, zâm hek suh u,’ ka ti a.

²²Ka hnênah khân in lo kal tşeu va, ‘Kal hmasa tûr mi tîr ila, annin ram chu lo va enthlîthlai hmasa sela, kan luh chhoh dân tûr te, khuua kan luh dân tûr chinchâng te rawn sawi rawh se,’ in ti a.

²³“Chû remruatna chu tşah ka ti hle a; tichuan, hnam tin aţanga mi pakhat zêl, mi sâwm leh pahnih ka thlang chhuak a.

²⁴Tichuan an kal a, tlâng ramah chuan an chho va, Eskol Ruam an va thleng a, an enthlîthlai vek a.

²⁵An theirahte pawh lovin an rawn hâwn thla a; ‘LALPA kan Pathianin ram min pêk chu ram tşah tak a ni reng mai,’ tiin an rawn sawi a.

²⁶“Nimahsela, LALPA in Pathian thupêk chu helsanin, in lût chho duh lo va;

²⁷LALPA hian min huat avângin, Amorho kuta min tiboral tûrin Aigupta ram aţangin min hruai chhuak lek a lo nih hi,' tiin in puan inah te khân in phun nuai nuai a.

²⁸Khawi lamah chuan nge kan chhoh tehlul ang? "A michêngte lah chu keini aia lian leh sâng pui pui an ni a; an khawpuite chu a ropuiin an kulhte chuan vân a tawng hial a; chu achhapah Anaka thlahte kan hmu leh ta nghâl a," tiin, kan unauten kan rilru an tihnual zo vek a nih kha.

²⁹Kei chuan in hnênah, 'Mangang suh ula, anmahni chu hlau suh u.

³⁰LALPA in Pathian chu in hmâah a kal a, in mithmuha Aiguptaho chung a tihsak che u ang khân a dosak dawn che u alâwm,

³¹thlalêrah ngei pawh hian, pain a fa a pua angin, LALPA in Pathian chuan hê hmun thlenga a puakzia che u hi in hmu reng si a.'

³²Chutichung chuan LALPA in Pathian chu in la ring duh si lo va,

³³ani chu in hmâah a kal a, in bûk khuarna tûr hmun a lo dap chhuak vek a, in kalna tûr kawng kawhmmuhin zânah meîn, chhûnah chhûmin a hruai zêl che u hi.

HELNA AVÂNGA ISRAELTE HREMNA

³⁴"LALPA'N in thusawi a lo hriatin, a thinrim a, chhechhamin heti hian a ti a,

³⁵Hêng misualho zînga mi pakhat mah hian in thlahtute hnêna chhechhama pêk ka tiam ram chu an hmu tawp lo vang,

³⁶Jephunea fapa Kaleba tih chauh lo chu; ani hi chuan a hmû ang a, tihtak zeta LALPA a zui tlat avângin a rah chin chin chu amah leh a thlahte tân ka pê ang,' a ti hial a nih kha.

³⁷Nangmahni avângin keima chungah pawh LALPA chu a thinrim a, 'Nang pawh chû ramah chuan i lût lo vang.

³⁸Nuna fapa Josua, i kaihza vêngtu erawh chu a lût ang. Ani hian Israelte a la luahtîr dawn avângin fuih sauh sauh ang che.

³⁹In fanau tê tê, hmêlmâte kut tuar tûr leka in sawi, waviina a chhia a tha pawh la thliar tham lote hi a ni lût tûr chu ni; anni hnênah ka pê ang a, an luah ang.

⁴⁰Nangni erawh chu kîr leh ula, Tuipui Sen panna Lamlianah chuan lêt leh rawh u,' a ti ta a nih kha.

⁴¹Nangni lahin ka hnênah, 'LALPA lakah kan lo sual ta a nih chu; LALPA kan Pathianin thû min pêk ang chuan kan chho vang a, ka'n han bei ang e,' in ti a. Tichuan, in vaiin râlthum nên tlâng rama chho turin ţan in la leh hnuhnawh a.

⁴²"LALPA chuan ka hnênah, 'In hnênah ka awm dawn lo, chuvângin, kal chho suh ula, han bei hek suh u; chuti lo zawng, hmêlmâten an lo sawp hrep ang che u,' tiin hrilh rawh," mi ti a.

⁴³Tichuan, ka hrilh che u a; nimahsela in ngaithla duh lo va, LALPA thupêk chu in helsan ta zâwk a, chak tûra inngaiin tlâng ramah chuan in chho lui ngat a.

⁴⁴Chulai tlâng rama chêng Amorho chu khuai ang maiin an rawn thawk chhuak huk a, Seir aţangin Horma thleng rawkin baklêngin an rawn ûm lêt che u kha.

⁴⁵In lo hâu kha LALPA hmâah in ţap tak nâ a, ani'n a lo ngaithla duh tawh lo che u a, in lamah beng pawh a chhi duh tawh hek lo.

⁴⁶Chuvângin, Kades-ah khân kha chen kha in awm ta reng a nih kha.

BUNG 2

THLALERA VAHVAIH CHHUNG

¹Tichuan, LALPA thuin kan lêt leh a, Tuipui Sen panna kawnga thlalêrah chuan kan lût a, Seir Tlângah chuan hun rei tak kan then kual phah ta a.

²LALPA chuan mi bia a:

³He tlâng hi in vêl rei tâwk ta e; hmar lam pan tawh rawh u.

⁴Mipui hnênah, "In unau, Esauva thlah, Seir tlâng chêngte ram in paltlang dawn a; an lo hlau hle ang che u. Chuvângin, nangmahni lam kha fimkhur rawh u.

⁵Annite nên chuan intibuai suh u, Seir Tlâng hi Esauva thlahte tâna ka pêk tawh a ni a, chuvângin, an ram chu pên khata zau pawh ka pe lo vang che u.

⁶In ei tûr chaw chu pawisain in lei zêl tûr a ni; in in tûr tui pawh pawisa bawkin in lei tûr a ni.

⁷"LALPA in Pathianin in kutkawih tinrêng mal a sâwm thîn hi. Hê thlalêr zau taka in kal hahzia pawh a hai lo ve. Hêng kum sawmli chhûng hian LALPA in Pathian chuan a awmpui reng thîn che u a; engmah in tlâkchham loh kha," tiin thû pe rawh,' a ti a.

⁸"Tichuan, kan unau Esauva thlah, Seir a chêngte chu phai kawngpui leh Elath leh Ezion Geber lama pehhêlin, Moab Thlalêr kawngah kan paltlang ta a.

⁹LALPA chuan ka hnênah, 'Moab mite hi tibuai suh ula, an ram luah tumin bei hek suh u, Ar hi Lota thlahte tâna ka pêk tawh a nih avângin an ram khawii lai mah ka pe lo vang che u,'" a ti a.

¹⁰(Tûn hma khân Anak-ho anga milian, tam bawk si, sâng pui pui Emim-ho an lo awm tawh thîn a.

¹¹Anak-ho anga milian an ni a, Moab-ho chuan Emim tiin an ko thîn.

¹²Seir tlâng lo chêng hmasate chu Hor mite an ni a, mahse Esauva thlahten an luahlân a, an hnawt darh vek a, Israelten an tâna LALPAN ram a pêk lo luahtute chung a an tih ang bawkin, chû ram chu Esauva thlahte chuan an luahlân ta a ni).

¹³"Tûnah tho ula, Zered ruam hi kân rawh u,' a ti a. Tichuan, Zered ruam chu kan kân ta a.

¹⁴Kades Barnea kan chhuahsan aţanga Zered ruam kan kal pelh hun chhûng chu kum sawmthum leh kum riat a ni a, khâmi hun chhûng khân LALPAN chhechhama a tiam angin, khatih laia mipa râl do thei chin zawng zawng chu an thi zo vek a ni.

¹⁵Riahmmuna an thih mang hmâ loh chu an chungah LALPAN kut a thlâk reng si a.

¹⁶"Chutiang taka mipui zînga râl do thei chin an thih zawh hnu chuan,

¹⁷LALPAN mi bia a:

¹⁸Vawiinah hian Moab ramria awm Ar chu i kal tlang tûr a ni.

¹⁹Ammon-ho bulhna in va thlenin, tibuai suh ula, va bei hek suh u, Lota thlahte tâna ka pêk ram a nih avângin, Ammon-ho ram hi chhetê pawh ka pe lo vang che u,” a ti a.

²⁰(Chû chu milianho ram tih a ni thîn; tûn hmian milianho an chêng thîn a. Ammon-ho chuan Zamzum-ho, an ti a,

²¹Anak-ho anga milian, tam baw si, mi sâng pui pui an ni. Nimahsela LALPAN a hnehsak a, an ram chu chhuhsakin an luahlân ta a,

²²Seir tlânga chêng Esauva thlahte tâna an hmaa lo awm tawh Hor mite a tihboralsak ang khân. An hnawt chhuak vek a, an hmun chu an luahlân ta a ni, tûn thleng hian.

²³Av-ho, Gaza thlenga khuua chêngo pawh Kaptor ațanga lo kal Kaptor-hovin anrawn hneh a, an luahlân a.)

²⁴Tho ula, Arnon lui kân tûrin kal chhuak tawh rawh u. Ngai teh u, Hesbon lal Sihona, Amor mi leh a ram chu in kutah ka pêk tawh che u hi. Bei ula, a ram chu neihsak rawh u.

²⁵Vawiin ațang hian in chanchin lo hre pha, vân hnuaia hnam zawng zawng hnênah nangmahni râpna leh hlauhna thinlung ka pê ang a, hlaupa khûrin, an mangang hle dâwn a ni,’ a ti a.

LAL SIHONA A TLÂWM

²⁶“Tichuan, Kedemoth Thlalêr ațangin Hesbon lal Sihona hnênah inremna thu thawnin palai ka tîr a,

²⁷I ram chhûngah kan lo kal tlang ang e; kawngpui chauh kan zawh ang a, ding lam leh vei lamah kan pêng hauh lo vang.

²⁸Kan ei tûr chaw leh kan in tûr tui pawh in hnên ațangin kan lei vek ang; kê in min kaltlangtîr mai rawh,

²⁹LALPA kan Pathianin min pêk rama lût tûra Jordan lui kan kân thlengin min kaltîr ta che, Seir tlânga Esauva thlahte leh Ar rama Moab hovin min kaltlangtîr ang baw khân,’ ka ti a.

³⁰Nimahsela, wawiina in hmuh ang hian, in kuta pêk a nih theih nân, LALPA in Pathian chuan Hesbon lal Sihona rilru chu tiluhlulîn, a thinlung a lo tihngawltâwsak a, min kaltlangtîr phal lo hi a lo ni a.

³¹LALPA chuan, “En ta che, Sihona leh a ram chu ka pêk tan tawh pang che u hí. A ram chu in luah tan theih nân neihsak rawh u,’ a ti a.

³²Tichuan, Sihona chu a hote nên an vaia min bei tûrin Jahaz hmunah arawn thawk chhuak ta ngei a.

³³LALPA kan Pathian chuan kan kutah min pê a; tichuan, amah leh a fapate leh a hote zawng zawng chu kan hneh ta a.

³⁴Chutih lai chuan a khuua zawng zawng kan la vek a, khaw tina mi zawng zawng, ahmei apain, naupangte nên kan that mang vek a; tumah kan zuah lo.

³⁵Kan chanpual atâna an ranrualte leh kan lâk tâk khuua ațangtea râllâk sum te chauh kan la a.

³⁶Arnon lui kama awm Aroer khuua leh lui ruama khawpui ațangin Gilead thlengin, min chelh thei tûr eng khuua mah a awm lo va; LALPAN kan kutah min pe ta vek a ni.

³⁷LALPAN khawih tel lo tûra min tih chin Ammon-ho ram te, Jabbok luikam vêt te leh tlâng rama khuate chauh chu in va thleng lo a nih kha.

BUNG 3

OG LAL A TLÂWM

¹Tichuan kan inher a, Basan kawngah kan chho ta a; Basan lal Oga chu amah leh a hote zawng zawng nên min bei tûrin Edrei hmunah a lo thawk chhuak a.

²LALPA chuan ka hnênah, ‘Ani chu hlau suh, amah leh a hote zawng zawng chu a ram chawpin i kutah ka pe tawh e; Hesbona chêng Amor lal Sihona chung a i tih ang khân hê pa chungah pawh hian ti ve ang che,’ a ti a.

³Tichuan, LALPA kan Pathian chuan Basan lal Oga chu a ho zawng zawngte nên kan kutah min pê a, tumah dam chhuak awm lovin kan râwt chimit vek a.

⁴Chumi tum chuan a khuua zawng zawng kan la vek a; Basan lal Oga ram huam chhûng, Argob biala khaw sawmruk zet chu hmaih awm lovin kan la fai vek a ni.

⁵Chûng khawpuite chu kulh sâng tak taka hung, kawngkhâr leh a kalhna nei vek a nih bâkah, thingtlâng khuua tam tak a awm bawk.

⁶Hesbon lal Sihona chung a kan tih ang khân kan tichhe vek a, khaw tina mi zawng zawng chu, ahmei apain, naupangte nên kan that mang vek a.

⁷Kan lâk khuate ațang chuan an ranrualte leh râllâk sum te chu kan laksak vek a.

⁸Khatih lai khân Jordan lui helam kama awm Amor lal pahnih ram kan lâksak a, Arnon lui ațanga Hermon Tlâng thlengin

⁹(Sidon-hovin Hermon chu Sirion an ti a, Amor-hovin Senir an ti thung),

¹⁰phaizâwla khuua zawng zawng, Gilead leh Basan ram pumpui, Basan lal Oga ram chhûnga khuua zawng zawng chu Salka leh Edrei thlengin kan la vek a ni.

¹¹Basan lal Oga chauh kha milian la dam chhun a ni a. A khum pawh thîr khum a ni. (Ammon-ho khuua Rabbaah a la awm reng lo vem ni?) Tehna pangngai tawnga tehin a sei zâwng tawng kua, a vâng lam tawng li a ni.

JORDAN CHHAK RAM THEN DARH

¹²“Chutih laia kan ram neih, Arnon Lui kama Aroer ațanga Gilead ram zatve leh a khawpuite nên Reubena leh Gada thlahte hnênah ka pê a.

¹³Gilead ram la bâng leh Basan ram pum, Oga lalram chu Manasea thlah zâtve te hnênah ka pê a. (Argob ram bial zawng zawng chu, Basan pumpui tiamin, milian ram tih a ni thîn a.

¹⁴Manasea thlah Jaira chuan Argob ram pum chu, Gesur-ho leh Maakathi-ho ramri thlengin a la vek a, Basan ram chu ama hming châwiin, tûn thlenga a la put tâk Havoth Jair a vuah a.)

¹⁵Gilead chu Makira ka pe baw k a.

¹⁶Reuben-ho leh Gad-ho chu Gilead ațanga Arnon lui thlengin a ni a, a lui lai tak chu ramri a ni a, Ammon mite nêna inrîna

Jabok lui thlengin ka pê a ni;

¹⁷a phai ruam lamah Jordan lui chu ramri ni zêlin, Kinnereth ațanga Araba Tuipui (Tuipui Al) thlengin, Pisga chuan hnuai thlengin a ni.

¹⁸“Khatih lai khân thû ka pêk che u kha: ‘LALPA in Pathian chuan hê ram hi in tân a pê che u a. Nangni râl do thei tûr chin zawng chu râlthuum nên in unau Israel mipui hmâah hian in kân hmasa tûr a ni.

¹⁹In nupui leh in fanautê têtê, in ranrual (ranrual in ngah hle tih ka hria a) te chu khawpui ka pêk che u ah hian an lo awm tûr a ni,

²⁰LALPA in Pathianin Jordan râlâh, in unaute tâna ram ka pêk chu an luah fela, thlamuang taka an awm theih hun thlengin. Chumi hnuah ram ka pêk che u ah hian in lo kîr leh vek dâwn nia,’ ka ti a.

²¹Josua pawh thû ka pê a, ‘LALPA i Pathianin hêng lal pahnihte chung a tih dân hi i mit ngeiin i hmu a; chutiang bawkin i la pal tlang tûr lalram zawng zawng chu LALPA’N a khawih zêl dâwn.

²²I hlau tûr a ni lo, LALPA i Pathian ngeiin a dosak dâwn si che a,’ tiin.

MOSIA TÂNA RAM LUH KHAPNA

²³“Chutih lai chuan LALPA chu ka ngên a:

²⁴Aw Lalpa PATHIAN, i chhiahhlawh hnênah hian i ropuina leh i kut tha chakzia i entîr ƣan chauh a ni a, leiah leh vânah hian i hnathawh anga thawka, i thiltih anga ropui ti thei pathian dang tu nge awm le?

²⁵Lui hi mi kaitîr ve la, Jordan râl ram ƣa tak mai te, tlang ram mâwi tak takte leh Lebanon ram te chu mi hmuhtîr tûrin ka ngên a che,’ ka ti a.

²⁶Mahse, LALPA chu nangmahni vângin ka chungah a thinur a, min ngaithla duh lo va. LALPA chuan: ‘A tâwk tawh. Hemi chungchâng hi sawi tawh suh.

²⁷Pisga tlangah han lâwn la, thlang lamah te, hmar lamah te, chhim lamah te leh chhak lamah te i mit han lên vêl la; Jordan lui hi i kai vê dâwn loh avângin i mitin han thlîr kual zâwk ang che.

²⁸Josua chu thû pê la, fuîh la, tichak mai rawh; ani chuan hêng mipuite hi a hrui kai ang a, i han hmuh tûr ram chu a luahtîr dâwn alâwm,’ a ti a.

²⁹Tichuan, Beth Peor ep phaizâwlah chuan kan awm ta reng a.

BUNG 4

MOSIAN THUAWIH TURIN A FUIH

¹“Khai le, Israelte u, LALPA Pathianin in thlahtute hnêna a pêk ram chu dam taka lûta, ram in luah theih nân, dân leh rorêlna thû ka zirtîr che u hi in vawn reng theih nân lo ngaithla rawh u.

²Thû ka pêk che u hi in belhchhah tûr a ni lo va, in paih ƣen tûr a ni hek lo; tichuan LALPA in Pathian thupêk ka pêk che u hi in zâwm thei ang.

³Baal Peor hmuna LALPA thiltih dân in mit ngeiin a hmuh kha; LALPA in Pathian chuan Peor hmuna Baala betu in zinga mi a tihlum vek a nih kha.

⁴Nangni LALPA in Pathian vuan tlattute erawh chu, wawiin thlengin in zavaia nungdama in la awm hi.

⁵LALPA ka Pathianin dân leh rorêlna thû min pêk ang zêla in luah tûr rama in awm huna in zawm theih nân, tihtak zetin ka zirtîr che u hi.

⁶Chuvângin, fimkhur takin zâwm ang che u; hêng dân thû zawng zawng hi miten an hriata an lo hmuh hunah, ‘Hê hnam ropui hi an fingin an va remhre êm,’ tiin, mi fîng leh remhria nih in hlauh dâwn asin.

⁷LALPA kan Pathian anga min hnaih renga, koh phâk renga awm Pathian neitu hnam ropui hi tu dang nge awm ang le?

⁸Wawiina in hmaa dân thu leh rorêlna dik ka puan chhuah tâk zawng zawng ang nei ve hnam ropui dang hi tu nge awm thei ang?

⁹“In mit ngeiin a hmuh tâkte kha ngun taka in vawn ƣat loh chuan, in theihngihl dah ang e; chuvângin, dam chhûnga in thîlung ațanga a bo hlen loh nân fimkhur takin invêng ula. In fate leh in tute pawh zirtîr ƣîn ula,

¹⁰Horeb tlanga LALPA in Pathian hmâa in din ƣhup laia LALPAN ka hnêna, ‘Mipuite hi ka hnênah rawn ko khâwm la, hê leia an dam chhûnga kei mi ƣih dân an zir theih nân leh, an fate pawh an zirtîr zêl theih nân, ka thû ka lo hrilh ang e,’ tia a sawi te kha hre reng rawh u.

¹¹Tichuan, in lo kal hnai a, tlang bulƣhutah in dîng khâwm a, tlang chu vanlaizâwl thlengin a kâng ta hlauh hlauh a, thim te, chhûm te leh thim chhah mup te a lo awm a.

¹²LALPA chuan meipui ațang chuan a rawn bia che u a. Thusawi ri chu in hria a, mahse a riruang pawh engmah in hmu lo va; âw chauh in hria a nih kha.

¹³Tichuan, in zawm tûrin a thuthlung Thupêk Sâwm chu in hnênah a puang a; lungphêk pahnihah a ziaak ta a ni.

¹⁴Chutih lai chuan, in va kaina tûr ram in luah huna in vawn reng theih nân, LALPA’N dân thu leh rorêlna dân zirtîr tûr che u-in thu mi pe ta a ni.

MILEM BIAK LAKA FÎMKHURNA

¹⁵“Horeb tlanga meialh zînga LALPA rawn ƣawng chhuah lai khân, a hmêl lan dân riruang engmah in hmuh loh kha, chuvângin fimkhur hle rawh u,

¹⁶chuti lo zawng, verther deuh hian milemte insiam chawpin: mipa emaw, hmeichhia emaw,

¹⁷leia rannung ang emaw, boruaka thlâwk ƣîn sava thla nei ang emaw,

¹⁸lei chung a bawkvâka kal chi ang emaw, lei hnuai tua chêng sangha ang emaw te hian in lo siam palh ang e.

¹⁹A nih loh leh, vâ lam in han hawî a, ni te, thla te, arsîte leh vâna thîl zawng zawng in han thlîrin, chibai bûka an rawngbâwl te in châk mai palh ang e; chûngte chu LALPA in Pathianin vâ hnuai mi zawng zawng chhawr ƣangkai tûra a pêk mai an ni si a.

²⁰LALPA erawh chuan ama mi, a rochan ni tûrin, tûna in awm anga awmtîr tûr che u in, thîr rawhtuina meipui, Aigupta ațang ngei chuan a la chhuak che u a ni.

²¹Kei erawh chu, nangmahni avângin ka chungah LALPA thin a rim a, Jordan lui pawh mi kaitîr ve dâwn lo va, LALPA in Pathianin rochan atâna a pêk che u ram ãa takah luh min phalsak ve ta lo a ni.

²²Hê ramah hian kei chu ka thi ang a, Jordan lui pawh ka kai ve dâwn ta lo va; nangni erawh chuan in kai dâwn a; tichuan chû ram ãa tak chu luah mawlh ang che u.

²³Fîmkhur hle rawh u; chuti lo zawng, LALPA in Pathian nêna in thuthlungte kha in theihngihl hlah ang a, LALPA in Pathianin a khap tlat milemte hi in siam chawp palh ang e.

²⁴LALPA in Pathian hi mi kângral ãhin mei, Pathian thîkthu chhe tak a ni asin.

²⁵“Chumi ramah chuan rei tak in awm hnua, tu leh fate hial in neih hnua, a khawlo zâwnga in awma, LALPA in Pathian mithmuha thil sual tia, milim eng engemaw in siama, a thin tirim zâwnga in awm teh mai chuan,

²⁶chû ram luah tûra Jordan lui kâna in va luah tûr ram aţang ngei chuan in boral thuai ang tih thu hi, vawiinah hian mi hriatpuitu atân lei leh vân ka ko va; dam pawh in dam rei hek lo vang a, in rîral vek mai ang.

²⁷LALPA chuan hnam tin zîngah a hnawt darh ang che u a, LALPAN a hnawh darhna ramah chuan a kuangbâng tlêmtê chauh in ni tawh mai ang.

²⁸Chûng ramah chuan, mihring kuta siamchawp, thing leh lunga siam, hmu thei lo, hre thei lo, ei thei hlei lo chu in pathian biak a ni mai ang.

²⁹Mahse, chûng hmun aţang pawh chuan LALPA in Pathian hi in zawn a, in rilru leh in thinlung zawng zawnga in zawn chuan in hmû ang.

³⁰Ni hnahnungah chuan, hêng thil zawng zawng hi in chung a lo thlena, in mangana, LALPA in Pathian lam in hawia, a âw in ngaihlhak chuan

³¹(LALPA in Pathian chu zahngai thei Pathian a ni si a), in thlahtute hnêna chhechhama a lo tiam tawh chu a theihngihl dâwn si lo; chuvângin, a thlahthlam lo vang che u a, a tiboral hek lo vang che u.

³²“Tûn hma hun kal tawh, in pian hma daiha Pathianin leilunga mihring a siam aţang khân han zâwt vêl teh u, vân tâwp aţanga a tâwp lehlam thleng pawhin zâwt vek teh u, hetiang rêng rênga thil ropui hi a thleng tawh ngai em, hriat tûr a awm chuan zâwt rawh u.

³³Nangmahni anga meialh aţanga Pathian thu puan chhuah hriaa, nung reng thei baw si tu nge awm le?

³⁴A nih loh leh fiahna te, chhinchhiahna te, thilmak te, indona te, kut chak tak te lek chhuaka, bân phara, rîkrâpna thilte nê, in mithmuha LALPA in Pathianin Aigupta ram ata a hruai chhuak che u ang khân, Pathian hian ama hnam tâna lâk chhuah tumin hnam dang tuemaw tal a kan tawh rêng em le?

³⁵LALPA ngei hi Pathian a ni tih in hriat theih nân, in hnênah a inhriatîr tawh; Amah lo chu tû dang mah an awm lo.

³⁶A zirtîr theih nân che u vân aţangin a âw a hriatîr tawh che u a; leiah hian ama meipui ngei a entîr che u a, meipui aţangin a âw

in hre baw a.

³⁷In thlahtute a hmangaih avângin, nangni an fate hi a thlang che u a; a thiltihtheihna chak tak chuan Aigupta aţangin a hruai chhuak che u a,

³⁸tûna in awm dân anga awm tûr hian, nangmahni aia hnam ropui leh chak zâwk te in hmâah a ûm chhuak a, in rochan atâna a pêk theih nân an ramah chuan a hruai lût che u a.

³⁹Chuvângin, vawiinah hian, LALPA ngei hi chung lam vânah leh hnua lam leiah hian Pathian a ni tih in thinlungin ngaihavenin hre reng rawh se; tû dang mah an awm si lo.

⁴⁰Vawiina thû ka pêk che u ang hian, a dân leh a thupêkte chu zâwm tlat ula, in tân a ãâ ang a, nangni hnua in thlah kal zêlte tân pawh a ãâ ang; tichuan, LALPA in Pathianin kumkhua atâna a pêk che u ramah hian in dam rei dâwn nia,” a ti a.

JORDAN CHHAK LAMA HIMNA KHUATE

⁴¹Mosia chuan Jordan lui râl, ni chhuahna lamah chuan khaw pathum a ruat a,

⁴²chûng chu tualthattute tualtlânna tûr a ni; miin a ãenawm, a huat vâng pawh ni lo, tihpalh thila a tihhlumin, hêng khua eng berah emaw hian a tlân luh chuan a him ang:

⁴³Reubena thlahte tân Bezer khua, thlalêr tlâng zâwla awm te, Gada thlahte tân Gilead rama Ramoth khua te leh, Manasea thlahte tân Basan rama Golan khua te a ni.

PATHIAN DÂN KAWHHMUHNA

⁴⁴Hei hi Mosian Israel fate tâna dân a pêk chu a ni.

⁴⁵Hêngte hi Aigupta aţanga an lo chhuah hnua Mosian Israelte a hrilh ãhin, chanchin sawina te, dân thu te, rorêl dân thûte a ni a,

⁴⁶Aigupta aţanga an lo chhuah hnua, Mosia leh Israel faten an hneh tâk, Hesbona chêng, Amor lal Sihona ram chhûng, Beth Peor râl, Jordan chhak lama an awm laia mi a ni.

⁴⁷Chu mi ram leh Basan lal Oga ram, Jordan râl, ni chhuahna lama awm, Amor-ho lal pahnihte ram chu an neihsak ta a,

⁴⁸Arnon Luikama awm Aroer aţanga Sion Tlâng (Hermon an tih) thlengin,

⁴⁹Jordan lui chhak lam phaizâwl zawng zawng, Araba Tuipui thlengin, Pisga chuan hnua mual tiamin an neihsak vek a ni.

BUNG 5

THUPEK SAWM THLIRLETNA

¹Mosia chuan Israelte chu a ko khâwm vek a, an hnênah: “Aw Israel mite u, vawiina dân thû leh rorêlna dân ka hrilh che u hi, in zir theih nân leh fîmkhur taka in zawm theih nân ngaihlh rawh u.

²LALPA kan Pathian chuan Horebah khan thû mi thlunpui a.

³Chû thuthlung chu LALPAN min thlahtute kha a thlunpui lo va, keini vawiina heta awm, nungdama awm, kan zavaia hnênah hian a thlung zâwk a ni.

⁴LALPAN tlâng chungah meialh kâr aţangin hmai chhanah a bia che u a nih kha.

⁵Khatah khân LALPA leh nangni inkârah LALPA thuchah puang tûrin ka ding a; nangni chuan mei kha in hlau va, tlângah khân in lâwn chho ve lo va. Heti hian a ti a:

⁶Kei hi LALPA in Pathian, bâwiha in tâna Aigupta ram ațanga nangni hruai chhuaktu che u chu ka ni.

⁷Ka hmâah hian eng pathian dang mah in nei tûr a ni lo.

⁸Milem siamchawp rêng rêng— chung lam vâna mi ang emaw, lei hnuaï lama mi ang emaw, lei hnuaï tui chhûnga mi ang emaw i siam tûr a ni lo;

⁹chibai bûkin an hmâah i kûn tûr a ni lo va, an rawng i bâwl tûr a ni hek lo. Kei, LALPA i Pathian hi Pathian thîkthuchhia ka ni a, mi hawtute chu an thlah chhuan thumna leh chhuan lîna thlenga an pate suahsualna mawh phurhtîrtu ka ni a,

¹⁰mahse, mi hmangaihtu leh ka thupêk zâwmtu mi sâng tam tak hnêna zahngaihna lantîrtu ka ni.

¹¹LALPA i Pathian hming hi duhdah takin i lam mai mai tûr a ni lo, LALPA chuan duhdah taka a hming lamtu chu thiam changin a chhuah lo vang.

¹²LALPA i Pathianin thu a pêk che ang ngeiîn Sabbath ni hi serh la, vawng thianghlim rawh.

¹³Ni ruk chhungin hna i thawk tûr a ni, i hna tûl tinrêng i thawk tûr a ni a,

¹⁴a ni sarîh ni erawh chu LALPA i Pathian tân Sabbath a ni. Eng hna mah i thawk tûr a ni lo: nang emaw, i fapa emaw, i fanu emaw, i bâwiha emaw, i bâwihnu emaw, i bâwngpa emaw, i sabengtung emaw, i ran rêng rêng emaw, i huang chhûnga awm mikhuah emaw pawh ni se, i bâwiha leh i bawihnu te pawh nang ang bawkin an châwl ve tûr a ni.

¹⁵Aigupta ramah khân sal in ni a, LALPA in Pathian chuan kut chak tak rawn phar chhuakin, chuta țanga a hruai chhuah in ni tih hre reng ula; chuvâng chuan a ni, LALPA in Pathianin Sabbath ni serh tûra thû a pêk che u ni.

¹⁶LALPA i Pathianin thû a pêk che angin i nu leh i pa châwimâwi rawh, tichuan i dam rei ang a, LALPA i Pathianin ram a pêk che-ah hian i lo hmuîngîl dâwn nia.

¹⁷Tual i that tûr a ni lo.

¹⁸I uirê tûr a ni lo.

¹⁹Rûk i ru tûr a ni lo.

²⁰I țhenawm khawvêngte hêk zâwngin hretu derah i țang tûr a ni lo.

²¹I țhenawmpa nupui i ît tûr a ni lo; i țhenawmte in te, a lo te, a bâwiha te, a bawihnu te, a bâwngpa te, a sabengtung te leh i țhenawm thil neih rêng rêng i awt tûr a ni lo.'

²²“Hêng thûte hi tlâng chungah mei ațang te, chhûm leh thim chhah mup ațangtein, LALPA aw ring takin nangni mipui pungkhâwmho zawn zawn hmâah a sawi a nih kha; a belhchhah leh tawh lo. Lungphêk pahniha a ziaak a, mi pe ta a ni.

MIPUITEN PATHIAN AN HLAU

²³“Khatia tlâng a kan dur dura, thim chhah mup kâra âw in hriat khân, in upate leh hnam tin hruaitute nên min rawn hnaih a nih kha.

²⁴Nangnin, ‘LALPA kan Pathian chuan a ropuizia leh a lenzia min entîr a nih hi, meipui ațangin a âw kan hre ta. Vawîinah hian Pathianin mihring a biak lai kan hmu a; mahse a nung reng baw si a.

²⁵Chuvângin, engah nge kan thih kher ang? LALPA kan Pathian âw kan hriat leh chuan, kan thi tawh ngei ang; hê meipui hian min kâng ral mai dâwn si a.

²⁶Tisa pu zawn zawn zîngah, mei ațanga Pathian nung âw kan hriat anga hria a, dam tho si hi tu nge awm ngai le?

²⁷LALPA kan Pathianin thu a sawi zawn zawn ngaithla tûrin hnaih la, tichuan LALPA kan Pathianin i hnêna a sawi apiang kan ngaithla ang a, kan zâwm ang,’ in ti a.

²⁸Min biak laia ka hnêna in thusawite chu LALPA’N a lo hria a, tichuan LALPA chuan: ‘Hêng mipuiten i hnêna an sawi te kha ka lo hria a. An thusawi zawn zawn kha a dik e.

²⁹Anmahniah hian kei mi tîhna thinlung neiin, ka thupêkte hi han zâwm tehrêng sela âw, anni leh an thlahte chu an hmuîngîl kumkhua mai tûr!

³⁰An hnênah zu kal tâ la, “In bûkah kîr rawh u,” tiin hrilh rawh.

³¹Nang erawh chu ka bulah hian rawn ding la, ka thupêk te, ka dân thu te leh ka rorêl dân zawn zawn ka lo hrilh ang che a, tichuan, awmna tûr ram ka pêk an luah huna an zawn theih nân zirtîr ang che,’ a ti a.

³²“Chuvângin, LALPA in Pathianin thû a pêk che u zâwm tûrin fimkhur hle rawh u; ding lamah emaw, vei lamah emaw in pên bosan tûr a ni lo.

³³In luah tûr ramah chuan in nun theih nân leh in lo hmuîngîl zêl a, in damrei theih nân, LALPA in Pathianin thû a pêk ang zêlin a kawng chu in zawn tûr a ni.

BUNG 6

THUPEK ROPUI BER

¹Hei hi thupêk te, dân thuruatte leh rorêlna thute a ni a, luah tûr in va kaina rama in zawn theih nân, LALPA in Pathianin nangmahni zirtîr tûra thu min pêk a ni a;

²tichuan, LALPA in Pathian tîh nachâng in lo hria ang a, a dân thu leh a thupêkte zawn tûra ka hrilh che u hi, nangni leh in tu leh fate chenin, in dam chhûngin in zâwm ang a, dam pawh in dam rei dâwn nia.

³Chuvângin âw, Israel mite u, ngaithla teh u, in lo hmuîngîla, in thlahtute LALPA Pathianin in tâna a tiam— ‘khawizu leh hnute tuia luang ram’-ah chuan nasa taka in lo pun zêl theih nân, a thu te zâwm tûrin fimkhur rawh u.

⁴“Aw, Israel mite u, ngaithla teh u: LALPA kan Pathian chu, LALPA pakhat a ni e!

⁵LALPA in Pathian chu in thinlung zawn zawnin, in thlarau zawn zawnin, in chakna zawn zawnin in hmangaih tûr a ni.

⁶Vawiina thú ka pêk che u hi, in thinsungah vawng tlat rawh u.

⁷Thahnemngai takin in fate zirtîr ula, in ina in thut lai te, kawnga in kal lai te, in mut lai leh in thawh hunah te pawh sawi zêl rawh u.

⁸Chhinchhiah nân in bânah hrêng ula, mit leh mit inkâra chahhrênah hmang ula.

⁹In kawngka biangah te leh in tual kawngkaah te in ziaik tûr a ni.

THUÂWIIHLOH PAWIZIA

¹⁰“LALPA in Pathianin in thlahtu Abrahamata te, Isaaka te, Jakoba te hnêna chhechhama pêk a lo tiam rama a hruai luh hunah che u chuan, in sak hauh loh khawpui ropui leh mâwi tak tak te,

¹¹in chhêkkhâwm loh thil tha tak taka khat in te, in laih hah loh tuichhunchhuah laihsâ te, in chîn hah loh grêp huan leh olive hmun te in neiha—in eia, in tlai hlê hunah,

¹²fimkhur lehzual rawh u, chuti lo zawng, in saltâna Aigupta ram ațanga nangmahni hruaichhuaktu LALPA hi in theihngihlhlauh ang e.

¹³LALPA in Pathian chu tîh tak chungin a rawng bâwl ula, ama hming chhâlin thu in tiam tîh tûr a ni.

¹⁴In chheh vêla mite pathian biak tîh, pathian dang rêng rêng chu in be vê hauh tûr a ni lo

¹⁵(In zînga chêng LALPA in Pathian hi Pathian thîkthuchhia a ni a), in chungah a thirrim a puahkeh vaih chuan, lei chung ațang hian a tiboral daih mai ang che u.

¹⁶“Massa hmuna Pathian in fiah ang khân LALPA in Pathian hi in fiah tûr a ni lo.

¹⁷LALPA in Pathian thupêk te, a hriattîrna thú te, a dân thú zawm tûra a pek che u chu thahnemngai takin in zâwm tlat tûr a ni.

¹⁸LALPA mithmuhah dik tak leh tha takin ti ula, tichuan in lo hmuîngîl ang a, in thlahtute hnêna LALPAN a lo tiam ram tha takah chuan lûtin, in luah thei dâwn nia,

¹⁹in hmâa hmêlmâ zawng zawng chu LALPAN a lo sawi tawh angin, a hnawh chhuahsak ang che u.

²⁰“Nakinah in faten, ‘Hêng hriattîrna thu te, dân thute leh rorêlna dân, LALPA kan Pathianin a pêk che u hi eng nge a awmzia?’ an la rawn ti ang a;

²¹in fate hnênah: ‘Aigupta ramah Pharoa sal kan ni a, LALPA chuan kut chak takin Aigupta ram ata min hruai chhuak a ni;

²²LALPA chuan Aigupta mite, Pharoa leh a chhiahhlawhho zawng zawng chungah te chuan chhinchhiahna leh thilmak leh tawrhlehlawm tak tak kan mithmuh lai ngein a entîr a.

²³Kan thlahtute hnêna mi pêk a tiam rama min hruai luh theih nân, chû hmun ațang chuan min hruai chhuak ta a ni.

²⁴Vawiina kan awm dân anga nung dama min zuah renga, kan thatna tûra LALPA chuan hêng dân thu zawng zawng hi zâwma, LALPA kan Pathian chu tîh tlat tûrin thú min pê a ni.

²⁵LALPA kan Pathian hmâah fimkhur taka hêng dân thú zawng zawng hi kan zawm phawt chuan, kan tân thuthlung hlen chhuahna dik a ni ang,’ ti ang che u.

BUNG 7

HNAM THLAN

¹LALPA in Pathianin in luah tûr rama a hruai luh che u a, in hmâa awm hnam tam tak, Hit-hote, Girgas-hote, Amor-hote, Kanaan-hote, Periz-hote, Hiv-hote leh Jebus-ho, nangni aia lian leh chak zawk hnam sarihte chu a hnawh chhuahsak che u a,

²LALPA in Pathianin in kuta a pêk hunah che u chuan, in hneh ang a, in that vek tûr a ni. Eng thú mah in thlunpui tûr a ni lo va, zahngaihna in lantîr tûr a ni hek lo.

³In inneih pawlh tûr a ni lo. In fanute chu an fapate in neihtîr tûr a ni lo va, in fapaten an fanute nupuiah an nei tûr a ni hek lo.

⁴In fapaten Kei mi zui lai chu hruai bovin, pathian dang rawng an bâwl phah ang a; in chungah LALPA thîn a thawk ang a, a tiboral nghâl mai tûr che u asin.

⁵Chuvângin, heti hian ti rawh u: an maichâmte leh an sakhaw thingphun te chu tihchhiatsak vek ula, an milim ban phunte chu kit ula, an milem kerte pawh hâl rawh u.

⁶“LALPA in Pathian tân hnam thianghlim in ni si a; LALPA in Pathian chuan leia hnam zawng zawng chungah a rohlu bîk ni tûrin, ama tâna a thlan in ni.

⁷LALPA chuan hnam dangte aia in tam zawk avânga hmangaiha thlang che u a ni lo; hnam azawnga hnam tlêm ber in ni asin;

⁸nimahsela, LALPA chuan a hmangaih êm che u avâng leh, in thlahtute hnêna chhechhama thu a lo tiam tawh a vawn tlat avâng zâwkin, a kut chak takin LALPA chuan a hruai chhuak che u a, Aigupta lal Pharoa kut ațang leh, sala in tâna ațangin a tlanchhuak che u a ni.

⁹Chuvângin, LALPA in Pathian hi, Pathian a ni a, amah hmangaiha a thupek zâwmtute tân chuan chhuan sâng thlenga a thuthlung leh zahngaihna vawnsaktu Pathian rinawm a ni tih hre rawh u;

¹⁰amah hawtute chu an hmaichhana thungrûlin a tiboral tîh. Amah hawtu lakah a tûan muang dâwn lo; hmaichhanah ngei a thungrûl dâwn si a.

¹¹Chuvângin, wawiina ti tûra ka hrilh che u thupêk te, dân thuruatte leh rorêlna dân te hi vawng tha ula, zâwm tlat ang che u.

THUÂWIIH A MANHLÂ

¹²“Hêng rorêlna thúte hi in ngaihthlâk a, in zawma in tih bawh chuan, LALPA in Pathianin in thlahtute hnêna thú a lo thlun tawh leh zahngaihna a lo tiam tawh chu, in chungah a hlen ngei ang.

¹³Tichuan, a hmangaih ang che u a, malsâwmin a tipung zêl ang che u; in thlahtute hnêna in tâna ram pêk a lo tiamah chuan chithlah malsâwmna leh leilung malsâwmnain a vûr ang che u a, in buh thar te, in uain thar te, in hriak sâwr te, in bâwng vulh te leh in berâm vulh te pawh nasa takin a tipung zêl dâwn nia.

¹⁴Hnam dang zawng aiin malsâwmna in dawng ang a; nangni zîngah a hmei a pain, in ran vulh zîngah pawh chîng rêng rêng an awm lo vang.

¹⁵LALPA chuan in natna zawng zawng a lâk bosak ang che u a, Aigupta rama natna râpthlak tak tak in hriat tâkte khân a tina ve lovang che u a, nangmahni hawtute chungah a thlentîr hlauh zâwk ang.

¹⁶LALPA in Pathianin a pêk che u hnam zawng zawng chu in tiboral vek tûr a ni; in khawngaih tûr a ni lo va; an pathiante in be tûr a ni hek lo, in tân thang an ni dâwn si a.

¹⁷“In rilruin, ‘Hêng hnamte hi keini aiin an lian zâwk si a, engtin nge kan luahlan theih ang?’ in tih chuan—

¹⁸anni chu hlau suh u, LALPA in Pathianin Pharoa leh Aigupta mi zawng zawng chungah a thiltih dân kha hre reng rawh u:

¹⁹in hmuh lai ngeia fiahna nasa tak tak te, chhinchhiahnate leh thilmakte, LALPA in Pathianin kut chak takin bân phar meuha a hruai chhuah che u kha. Chutiang chuan LALPA in Pathian chuan in mi hlauhthe chungah a ti zêl dâwn a ni.

²⁰Chubâkah, LALPA in Pathian chuan an zîngah khawinghal a tîr ang a, a la dam chhun leh in vêla birûte chenin an la boral vek dâwn a ni.

²¹Anni chu hlau rêng rêng suh u; Pathian ropui leh hlauhawm, LALPA in Pathian hi in zîngah awm a ni asin.

²²LALPA in Pathianin chûng hnamte chu a hmatiam tê têin a hnawt chhuak vek dâwn; wawi leh khatah in tichimit thei nghâl vek lo vang, chuti lo zawng, in tâna buaithlâk khawpin ramsate an pung vak mai ang.

²³Mahse LALPA in Pathianin a pe ang che u a, an boral zawh thlengin a hnehsak zêl ang che u.

²⁴An lalte chu in kutah a pê ang che u a, an hmingte chu vân hnuaî aţang hian a thai bo vek ang a; in tihboral vek hma chu tuma’n an chelh lo vang che u.

²⁵An milim pathian chher chawpte chu hâl ula; a cheina silvâr leh rangkachak te chu ít suh ula, la hek suh u, in awhna tûr thang lek a ni ang; LALPA in Pathian ngaiha thil tenawm a ni si a.

²⁶Chûng thil tenawmte chu in inchnûngah pawh la lût suh u, chhiatna thlentû tûr mai a ni. Ânchhedawng thil a ni a, a tenin ten hlauh hlauh rawh u.

BUNG 8

LALPA I PATHIAN HRERENG RAWH

¹“In thlahtute hnêna LALPA’N pêk a tiam che u rama in luha, in luaha, dam taka in awma in lo pun zêl theih nân, wawiina thupêk ka pêk che u hi, fimkhur takin zâwm rawh u.

²LALPA in Pathian chuan a thupêk in zawm dâwn nge dâwn lo tih in rilru put dân hriat tumin a fiah che u a, a hruai zawi duh che u avângin thlalêrah kum sawmli lai a kaihrui che u tih hi in hre reng tûr a ni.

³Mihring hian chaw ringawt a ring tûr a ni lo; LALPA kâa chhuak thu tinrêng a nunpui zâwk tûr a ni, tih in hriat theih nân, a hruai hrep che u a, rilţâma in awm pawh a phal a, in la hriat ngai

loh, in thlahtute pawhin an la hriat ngai loh mannain a chawm che u a.

⁴Hêng kum sawmli chhûng hian in kawr te pawh in ha chhe lo va, in kê te pawh a vûng hek lo.

⁵Pain a fapa a thunun ang hian, LALPA in Pathian pawhin a thunun vê che u tih in rilruin in hre tûr a ni.

⁶“Chuvângin, LALPA in Pathian thupêk hi zâwm tlat ula, amah tih dêkin a kawng chu zawh zêl rawh u.

⁷LALPA in Pathian chuan ram ţa tak, tlang leh luikawr ruam aţanga lo luang chhuak lui tui te, tuikhur leh tui hna nghet nei awmnaah te chuan a hruai lût ang che u a;

⁸wheat leh barli te, grêp leh theipui leh theibuhfai chinna hmun, olive hriak leh khawizu tamna ram a ni a;

⁹ei tûr tlâkchham rêng rêng awm lova, hnianghnâra in tlan tûr tamna ram a ni a; a ram lungte chu tîr a ni a, a tlang pangte chu in tân dâr lai chhuah theihna a ni.

¹⁰Tlai taka in ei puar hnua, chutiang ram ţa a lo pêk che u avâng chuan LALPA in Pathian chu chawimâwi ang che u.

¹¹“Vawiina thu ka pêk che u ang hian, LALPA in Pathian leh a thupêk te, a rorêlna leh a dân thu zawm te hi theihngihl lo tûrin fimkhur hle rawh u,

¹²chuti a nih loh chuan—puar leh fânna in chan hnua, in ţa tak tak in saka, a chhûnga in chêna;

¹³in bâwng leh berâm leh ran rualte an lo pun a, tangkarua leh rangkachak te in lo ngah a, engkim in lo inlâk muk hlê hnûah;

¹⁴in rilru a lo chapo ang a, sala in tâna Aigupta ram aţanga nangmahni hruai chhuaktu LALPA in Pathian hi in theihngihl mai ang;

¹⁵khâng thlalêr zau leh râpthlâk pui pui, rûl hlauhawm tak tak leh khawmualkaikuang tamna, tui awm lohna thlalêr ram rovah khân a hruai tlang che u a; lung chang pui pui aţangin tui a pêk che u kha;

¹⁶thlalêrah khân in thlahtute la hriat ngai loh manna in a chawm che u a, inngaitlâwm taka thil ţa tih nachâng in lo hriat theih nân, a tâwpah khân hrehawmna hmangin a han fiah che u a nih kha.

¹⁷nangni chuan, ‘Hê hausakna hi ka kut chakna leh thiltihtheihna ngeia ka thawh chhuah a ni,’ in ti rilru hlauh ang e.

¹⁸LALPA in Pathian hi hre reng phawt mai teh u, in thlahtute hnêna a thu thlun tihngheh nân, hausa tûra thiltihtheihna petu che u chu amah hi a ni asin, wawiina in awm ang tak hian.

¹⁹Eng vâng pawha LALPA in Pathian theihngihlha, pathian dang in zuisan a, an rawngte bâwla chibai in bûk vaih chuan, in boral phah ngei ang tih wawiinah hian ka hriatîr a che u.

²⁰In hmaa hnamte LALPA a lo tihboral ang mai khân, nangni pawhin LALPA in Pathian âw hi in pawisak loh zawngin, in la boral ngei ngei dâwn a ni.

BUNG 9

ISRAELTE HEL DAN THLIRLETNA

¹⁴Aw, Israel mite u, ngaithla teh u: wawiinah hian Jordan lui in kân dâwn ta a, nangni aia hnam ropui leh thiltitheî zâwk, an khaw ropui, a hungna te pawhin vân tawng hial tûra sâng te chu in lâksak dâwn a ni a,

²mi lian leh sâng pui pui, Anaka thlahho an ni a, ‘Anaka thlahte chu tu nge do theî ang?’ tia miten an sawi thîn kha an ni a.

³Chuvângin, LALPA in Pathian hian mi kângraltu mei angin in hma a hruai zêl tih hi wawiinah hian hre thiam teh u. In hma ngeiah chûngho chu a tichhiain a titlâwm dêr ang a; LALPAN a lo hrilh tawh che u ang khân, nangni chuan in hnawt chhuak ang a, in tichhe nghâl tûr a ni.

⁴LALPA in Pathianin in hmâa a hnawh chhuahsak che u hnûah in rilruin, ‘Kan that ve êm avângin LALPAN hê ram luah tûr hian min hruai lût a ni,’ in ti dah ang e; chûngho hnam suahsual avâng zâwk chuan a ni, LALPAN in hmâah a hnawh chhuahsak che u ni.

⁵In thatna avâng emaw, in rilru a ngîl êm vâng emawa hêng mite ram luahsak tûr in ni awzâwng lo va; mahse in thlahtu Abrahama te, Isaka te leh Jakoba te hnêna LALPAN thu a lo tiam tawh hlen chhuakin, hêng mite suahsualna avâng zâwk hian LALPA in Pathianin a hnawh chhuahsak che u a ni.

⁶Chuvângin, LALPA in Pathian chuan in that êm avânga hê ram tha hi pê che u a ni lo tih lo hre thiam mawlh teh u, nangni chu hnam luhlul in nih kha.

⁷Hre reng rawh u! Thlalêrah LALPA in Pathian in tihthinrim thinzia kha theihngihlîh suh u. Aigupta ram in chhuahsan ațanga hê hmun in lo thlen thleng hian, LALPA lakah in la hel reng a nih hi

⁸Horeb-ah pawh khân LALPA chu in tithinur a, tihboral vek che u duh khawpin in lakah a thinrim a nih kha.

⁹Tlângah khân lungphêk, LALPAN nangmahni nêna thu a thlunna lungphêk la tûra ka han kal lai khân, tlângah khân ni sawmli leh zan sawmli ka han awm a. Châw pawh ka ei lo va, tui pawh ka in hek lo.

¹⁰Tichuan, LALPA chuan lungphêk pahni, LALPA kutzungtanga a ziah chu min pê a, chutah chuan mipui punkhâwm nia tlâng chung a meialh ațanga LALPAN thû a hrilh zawng zawng che u kha a chuang a ni.

¹¹Ni sawmli leh zan sawmli a lo ral a, LALPAN thuthlung ziahna lungphêk phêk hnih chu min pe ta a.

¹²LALPA chuan ka hnênah, ‘Tho la, heta țang hian chhuk thla vat rawh, Aigupta ațanga i mi rawn hruai chhuahho khu an che khawlo zo ta; awm dân tûr ka hrilh loh ang zâwnga an pên bo ranzia khu; milem chher chawp an insiam ta reng mai,’ a ti a.

¹³“LALPA chuan heti hian mi hrilh baw k a, ‘Hêng mite hi han en rêng rêngin, hnam luhlul an nihzia ka hmu reng mai.

¹⁴Khawi nge, vân hnuai ata an hming nêna lama nuailbo tûrin ka’n tiboral teh ang; anmahni aia hnam chak zâwk leh ropui zâwkin ka siam ang che,’ mi ti a.

¹⁵Tichuan, tlâng ațang chuan ka lêt thla a, tlâng chu a lo kâng dur dur a; thuthlunna lungphêk pahni chu ka kut khinghnihin ka keng a.

¹⁶Nangmahni lam ka han en nâk chuan, LALPA in Pathian lakah thil sual tiin-bâwng no lim in lo chhûng reng mai a! LALPAN in zawm tûra thû a pêk che u chu in hawisan rang kher mai.

¹⁷Lungphêk pahnihte chu ka la lawk a, in mithmuah ka paih keh ta vek a nih kha.

¹⁸LALPA hmâah chuan ni sawmli leh zan sawmli, a hma ang bawkin ka bawkkhup leh ta a; in sual êm avâng leh, a thinrimna chawktô tûra LALPA mithmuah in thiltih sual zozâi avângin chaw ka ei lo va, tui ka in baw khek lo.

¹⁹LALPA thinurna nasatzia leh in chung a lungnih loh êm avângin, a tiboral vek mai ang che u tih ka hlau si a. Nimahsela, khami țum pawh khân LALPA chuan ka thû min lo ngaihlâksak a.

²⁰Aarona chungah phei chuan LALPA thin a ur êm êm a, a tihlum mai dâwn a; chumi țum pawh chuan Aarona tân ka dîlsak a ni.

²¹Tichuan, in thil siam bâwng no, in sualna chu ka la lawk a, meiah ka rawh a, ka chhu sawm a, vut angin ka râwt dîp vek a; tlâng ațanga lui lo luang thlâah chuan ka phul ta a.

²²“Tabera-ah te, Masa-ah te, Kibroth Hatava-ah te pawh khân LALPA chu in tithinur leh baw k a.

²³Chutiang bawkin, Kades Barnea ațanga LALPAN a tih chhuah che u a, ‘Ram ka pêk che u luah tûrin han chho rawh u le,’ a tih lai khân, LALPA in Pathian thupêk lakah chuan in hel a, amah in ring lova, a thû in âwih duh hek lo.

²⁴Ka hriat tih ni che u ațangin LALPA lakah hian in la hel lui zêl a.

²⁵“Chuvâng chuan LALPA hmâah ka bawkkhup a; tihboral che u a tum thû LALPAN a sawi avângin ni sawmli leh zan sawmli ka bawkkhup ngar ngar mai a ni.

²⁶LALPA hnênah chuan ka țawngțai a: ‘Aw LALPA Pathian, i mite hi i kut chak taka Aigupta ata i hruai chhuah an ni si a, i ropuina azâra i roluah tûra i tlansâte hi tiboral lul suh aw.

²⁷I chhiahhlawh Abrahama te, Isaaka te, Jakoba te kha hre reng la; hêng mipuite hi an luhlulna te, an khawlohna te leh an sualna lam te hi en suh ang che;

²⁸chuti lo zawng, i hruai chhuahna rama miten, “LALPA chuan hruai chhuah a tiamna ramah a hruai thlen leh theih loh avâng leh a huat êm avângin, tihlum tûrin thlalêrah a hruai chhuak mai a ni,” an rawn ti dah ang e.

²⁹I mite leh i rochan, i bân phar chhuak meuhva i kut chaka i hruai chhuah te an ni si a,’ tiin.

BUNG 10**LUNGPHÊK PAHNIHNA**

¹⁴Khatih lai khân LALPA chuan ‘Lungphêk pahni a hmaa mi ang kha chher leh la, tlângah ka hnênahrawn chhohpui rawh. Bâwm pawh thingin siam bawh ang che.

²I tihkeh tâk, a hmaa mi ang khân, chûng lungphêkah chuan ka lo zia ang a; bâwm chhûngah chuan i dah dâwn nia,’ a ti a.

³Tichuan, acacia thingin bâwm ka siam a, a hmaa mi ang lungphêk pahni a chher a, chûng lungphêk pahni a chu kengin tlângah chuan ka chho va.

⁴Lungphêkah te chuan a hmaa a ziah angin Thupêk Sâwm a lo zia a, chûngte chu mipui in punkhâwm nia tlâng chung a mei zînga LALPA thu rawn sawi kha a ni.

⁵Tlâng aţang chuan ka lêt thla leh a, lungphêkte chu bâwm ka siam chhûngah chuan ka dah a; LALPA thu min pêk angin, tûn thlengin a la awm ta a ni,’ a ti a.

⁶(Israel fate chu Bene Jakan tuichhunchhuah aţangin Mosera-ah an insuan a, chû chu Aaron a thihna hmun leh phûmna hmun kha a ni; a aiawhin a fapa Eleazara chuan puithiam rawn a bâwl ta a.

⁷Chuta ţang chuan Gudgoda-ah an insuan a, Gudgoda aţang chuan lui tui tam tak awmna Jotbatha-ah an insuan leh a.

⁸Khata ţang khân tûn thlengin LALPA chuan Levia chîte chu LALPA thuthlunna bâwm zâwn tûr te, LALPA hmaa rawngbâwla, ama hminga malsâwmna hlân tûr in a ruat a.

⁹Chuvângin, Levia chîte chuan an unaute zîngah rochan ram an nei ve ta lo a ni; LALPA in Pathianin a lo tiam tawh angin, LALPA chu an rochan a ni si a.)

¹⁰“A hma ang bawkin, tlângah chuan ni sawmli leh zan sawmli ka awm a; chumi ţum pawh chuan LALPA’N min ngaithla a, tichuan LALPA chuan a tiboral ta lo chauh che u a nih kha.

¹¹LALPA chuan ka hnênah, ‘Tho la, mipui hmâah hian kal rawh, tichuan anni pêk tûr a thlahtute ka lo tiam tawh ram chu an luah, an luah theih nân,’ a ti a.

DÂN THU LAIMU

¹²“Tunah hian Israelte u, LALPA in Pathianin engti tûr in nge a phût che u, LALPA in Pathian chu ţiha, a kawng zawng zawng zawh zêla, amah chu hmangaiha, in thinlung zawng zawng leh in thlarau zawng zawng LALPA in Pathian rawng chu bâwla,

¹³vawiina ka hrilh che u ang taka in ţatna tûr LALPA dân leh a thupêk zâwm tûr in ni lo vem ni?

¹⁴Vân te, vân sang ber te khi LALPA in Pathian tâ a ni, leilung leh a chhûnga awm tinrêng nêh hian.

¹⁵LALPA chuan in thlahtute hmangaih kha a lâwm vê-na chhun a ni a; hnam dang zawng aiin an thlahte hi a thlang ta che u a ni, tûna in awm ang hian.

¹⁶Chuvângin, in thinlung serh tan ula, luhlul tawh suh u.

¹⁷LALPA in Pathian hi pathiante Pathian leh lalte Lal, Pathian ropui, thiltitheh leh ţihbaiawm, hleih nei lo, thamna la ve ngai lo a ni si a.

¹⁸Ani chuan pa nei lote leh hmeithai te chu dik takin ro a rêlsak ţhin a, hnam dang mite a hmangaih in ei tûr leh silhfên te a pe ţhin.

¹⁹Chuvângin, hnam dang mite chu hmangaih ve rawh u, nangni pawh Aigupta ramah khân ram dang mi in nih ţhin kha.

²⁰LALPA in Pathian chu in ţih tûr a ni; a rawng in bâwl tûr a ni a, amah chu vuan tlat ula, a hming chhâlin chhia in chham ţhin tûr a ni.

²¹Hêng in mit hmuha thil ropui leh râpthlak pui pui titu hi in Pathian a ni a, in fak tûr a chu a ni.

²²In thlahtu Aigupta rama chhuk thlâte kha mi sawmsarih chauh an ni a, tûnah erawh chuan LALPA in Pathianin vâna arsi ang maia tamin a tihpun tâk che u hi.

BUNG 11**HMANGAIHNA LEH THUAWIH LAWMMAN**

¹Chuvângin LALPA in Pathian chu in hmangaih tûr a ni a, a hnê te, a dân te, a rorêna te leh a thupêkte chu in zâwm tlat tûr a ni.

²Vawiinah hian in fate, LALPA in Pathian thununna la hmu ve pha lote hnêna sawi ka ni lo tih hre rawh u—a ropuizia leh a kut chak tak leh a bân phar dân te,

³Aigupta rama Aigupta lal Pharoa leh a ram pumpui chung a chinchhiaha leh a thiltithe;

⁴Aigupta sipai rual leh an sakawr leh tawilailr chung a thiltih te; nangmahni an rawn ûm lai che u a, Tuipui Sen tuiin a vûrtir dân te, vawiin thlenga LALPAN a chhut chhiat hnehzia te;

⁵hê hmun in lo thlen hmâ zawng thlalêra in tâna a thiltih te;

⁶Reubena thlah, Eliaba fapa Dathana leh Abirama te chhûngkaw chung a tihdân: an bungrua te, an puan in te, an thil neih zawng zawng chawpa Israel mipui zînga mi ni si, leiin a kê a âng a, a dawlh zawh vek dân te kha—

⁷khâng LALPA thiltih ropui tak tak kha in mitin a hmuah ngei kha.

⁸Chuvângin, vawiina ka hrilh che u ang hian, thupêk tinrêng hi zâwm ula; tichuan in lo chak deuh deuh ang a, in luah tûr ramah chuan in lût ang a, in nei thei dâwn a ni,

⁹tichuan, chu ‘khawizû leh hnute tuia luang ram,’ in pi leh pute leh an thlahte tâna LALPAN chhechhama a tiam ramah chuan in dam rei dâwn nia.

¹⁰In luah tûr ram hi in lo chhuahna Aigupta ram ang huana thlai chî in tuha, tui chawia in chawm ţhin ang kha a ni lo;

¹¹in va luah tûr ram chu tlâng te leh ruam te a ni a, vân ruahtuiin a chawm ram a ni a,

¹²LALPA in Pathianin duh taka a enkawl ram a ni a; chutah chuan kum bul aţanga kum tâwp thlengin LALPA in Pathian mit a fu reng ţhin a ni.

¹³Vawiina thu ka pêk che u hi thahnemngai taka in zawma, LALPA in Pathian hi in hmangaih, in thinlung zawng zawng leh in rilru zawng zawng a rawng in bâwl chuan,

¹⁴In buh thar te, in uain thar te leh in hriak thar te in seng theih nân, in ramah chuan a hun taka ruah sữr tûrîn, ruah hmasa leh ruah hnuhnûng ka pê ang che u.

¹⁵In rante tân in ramah hlobette ka ʔotîr ang a, in ei ang a, in tlai baw ang, a ti a ni.

¹⁶Nangmahni lam hi fimkhur rawh u, chuti lo zawng, in thinlung chu bumin a awm ang a, pathian dang rawng bâwlin, chibai bûk tûrîn in pêng bo hlah ang a,

¹⁷LALPA thinurna in tawngbaw mai tûr a nia; chuti ni se, ruah sữr lo tûrîn vân a khâr ang a, ramîn rah chhuah tûr nei lovin, LALPAN a pêk che u ram ʔa tak aʔang chuan in boral thuai mai ang.

¹⁸“Chuvângin, hêng ka thûte hi in thinlungah leh in rilruah vawng ʔlat ula, chhinchhiahna atân in bân bunah te, in mit inkâra chalhênah te hman rawh u.

¹⁹Chûngte chu in fate in zirtîr tûr a ni a, in inchhûnga in ʔhutho lai te, kawnga in kal lai te, in mut hmunah te, in thawh hunah te sawiho ʔhîn rawh u.

²⁰In kawngka biangah leh in tual kawngkhârah te in târ baw tûr a ni a,

²¹tichuan, in thlahtute hnêna LALPAN chhechhama pêk a lo tiam ramah chuan lei chungah vâna nî ang mai khian nangni leh in fate dam-chhûng ni a tisei dâwn nia.

²²“LALPA in Pathian hmangaih tûr leh, a kawng tinrêng zawha, amah vuan nghet ʔlat tûra, vawiina hêng thû ka pêk zawng zawng hi fimkhur taka in zawm chuan—

²³LALPAN hêng hnam zawng zawng hi in hmaa ta a hnawh bosak ang che u a, nangni aia hnam lian leh chak zâwkte chu in luahlân zêl ang.

²⁴In kephahin a rah chin ram apiang chu in ta a ni zêl ang: thlalêr leh Lebanon aʔang te, lui aʔang te, Euphrates Luipui te, Khawthlang lama Tuifinriat thlengin in ram a ni zêl ang.

²⁵Tû mahin an chelh lovang che u; LALPA in Pathianin in hnêna a lo sawi tawh angin, in rah chin ram zawng zawngah nangmahni râpna leh hlahna chî a tuh dâwn si a.

²⁶“Khai le, in hmâah hian malsâwmna leh ânhhia ka dah e:

²⁷LALPA in Pathian thupêk, vawiina ka hrilh che u hi in zawm chuan malsâwmna in dawng ang;

²⁸LALPA in Pathian thupêk vawiina ka hrilh che u hi in âwih lohva, in hriat ngai loh pathian dang be tûra in pên bosan erawh chuan ânhhia in dawng ang.

²⁹LALPA in Pathianin in luah tûr rama a hruai thlen hunah che u chuan, Gerizim Tlângah malsâwmna in dah tûr a ni a, Ebal Tlângah ânhhia in dah tûr a ni.

³⁰Jordan râl lehlam, ni tlâkna lam, Gilgal ep ruama chêng Kanaan ram chhûng, More sasaw thing sîra awm a ni lo'm ni?

³¹LALPA in Pathianin a pêk che u rama lûta, luah tûrîn Jordan lui in kai ang a, ram chu in luah ang a, in chêng reng tawh ang.

³²Vawiina in hmaa dân leh rorêlna thu ka pêk zawng zawng che u hi, zâwm tûrîn in fimkhur hle tûr a ni.

BUNG 12

PATHIAN BIAKNA HMUN BÎK

¹“Hêng dân thuruat leh rorêl dânte hi LALPA in Pathianin in thlahtute hnêna a lo pêk ram in luah hunah, hê leia in dam chhûng zawnga in zawm tûrte chu a ni.

²In va hnawh chhuah tûr rama miten an pathian an biak ʔhinna hmun—tlâng sâng chung a mi te, mual pâwnga mi te leh thing hring hnuaia mi te chu in tichhe vek tûr a ni.

³An maichâm te tichhia ula, an sakhaw thingphunte kit ula, thinga siam milimte chu hâl rawh u; an pathian lim kerte tichhe vek ula, chûng hmuna an hmingte chu thai bo vek ang che u.

⁴Chutiang thilte nên chuan LALPA in Pathian hi chibai in bûk tûr a ni lo.

⁵In hnam pumpui aʔang hian LALPA in Pathianin ama hming awmna tûr leh a chênna tûr duh a thlanna hmun in zawng ang a; chutah chuan in kal tûr a ni.

⁶Chutah chuan in hâlral thilhlân te, in inthâwina te, in sâwma pakhat te, in kuta thên thilhlân, in thutiam thilpêk te, duhthûa thilhlân te, in ran piang hmasate inrawn hlân ʔhîn tûr a ni.

⁷Chutah chuan LALPA in Pathianin in kutkawih tinrêng mal a sâwm che u avângin, nangni leh in chhûngte nên hlim takin in ei ʔhîn dâwn nia.

⁸Mi tinin dik nia an hriat anga tûna kan tih zawng zawng hi in ti tawh tur a ni lo.

⁹tunah hian LALPA in Pathianin luah tûr ram leh hah chawlhna hmun tûr a pêk che u in la thleng rih si lo va.

¹⁰Jordan in kai hnua, luah tûra LALPA in Pathianin a pêk che u rama in chên hnua erawh chuan, in vêla awm in hmêlmâ zawng zawng lakah in châwl hahdamîn, râlmuang takin in awm tawh ang a,

¹¹LALPA in Pathianin a hming awmna tûr hmun a thlan chu a awm baw ang. Chutah chuan ka thupêk ang zêla inrawn ken tûrte chu: in hâlral thilhlân te, in inthâwina te, in sâwma pakhat te, kuta in thên thilhlân te, LALPA hnêna mahni duhthu ngeia in intiamna thilhlante a ni ang.

¹²LALPA in Pathian hmâah chuan nangni leh in fapate, in fanute, in bâwihpa leh bâwihnu te, nangmahni zînga rochan ram nei ve lo in khuua chêng, Levia mite nên hlim takin awm ang che u.

¹³Hmun remchâng nazawngah hâlral thil hlân mai mai lo tûrîn fimkhur rawh u.

¹⁴In zînga hnam khat chan ram chhûng LALPAN a thlan bîkah chauh hâlral thil in hlân tûr a ni a, chutah chuan thû ka pêk zawng zawng hi in ti vek tûr a ni.

¹⁵LALPA in Pathianin malsâwmna a pêk che u ang zêlin, sâ in ei châk apiang chu nangmahni inah in talh thei a, in ei thei baw; sakhi leh sazuk sâte chu mi thiaw leh mi bawhlhawhte pawhin ang khat rengin an ei thei ang.

¹⁶A thisen erawh chu in ei tûr a ni lo; tui angin leiah in leihbaw mai tûr a ni.

¹⁷Sâwma pakhat in pêk buh te, in uain thar te, in hriak te, in ran piang hmasa te, in intiamna thilpêk te, duhthûa in thilpêk te, kuta in thên thilhlante erawh chu mahni inah in ei tûr a ni lo.

¹⁸LALPA in Pathianin a eina tûr hmun a thlan sakah erawh chuan nangni leh in fapate, in fanute, in bâwihpa leh bâwihnu te, in khuua chêng ve Levía mite nê, LALPA in Pathian hmâah in ei thei ang; in kutkawih chung a malsâwmna a vûr che u avângin LALPA in Pathian hmâah hlim takin in awm tûr a ni.

¹⁹In rama in awm chhûng zawngin Levía chite hi ngaihthah lo tûrin fimkhur rawh u.

²⁰“LALPA in Pathianin a tiam tawh che u anga in ram a tihzauh huna, sâ in ei châk laia ‘Sa ka ei teh ang’ in tih chuan, sâ chu duh tâwkin in ei thei ang.

²¹In awmna ațanga LALPA in Pathianin a hming a dahna hmun a hlat lutuk chuan, ka hrih tâk ang che u khân, LALPA pêk zînga in ran vulh chu in talh thei ang a, mahni inah duh tâwkin sâ chu in ei thei ang.

²²Sakhi leh sazuk sâ in ei angin in ei thei ang; mi thiange leh bawhlhlawh lai te pawhin an ei thei vek ang.

²³Sa thisen erawh chu in ei tûr a ni lo, thisen chu nunna a ni si a; nunna chawpin sâ in ei tûr a ni lo.

²⁴In ei tûr a ni lo va; tui angin leiah in leih baw tûr a ni.

²⁵In ei tûr a ni lo, LALPA hmuha thil dik in tih hian, nangni leh in fate tnatna tûr a ni zâwk a ni.

²⁶In thil neih zînga thil thianghlim, in thutiam thilpêk te chauh chu kengin, LALPA hmun ruatah chuan in kalpui tûr a ni.

²⁷LALPA in Pathian maichâmah chuan, hâlral atâna in thilhlân, sâ leh thisen chu in hlân tûr a ni; in inthâwina sa thisen chu LALPA in Pathian maichâm chungah in leih bua ang a, a sâ te chu in ei tûr a ni.

²⁸Hêng thu ka pêk zawng zawng che u hi pawmin zâwm vek rawh u, LALPA in Pathian mithmuha thil dik leh thâ tih hi, in tân leh in thlahte zêl tân kumkhuaa in tnatna tûr a ni si a.

MILEM PATHIAN LAKA FIMKHUR

²⁹“LALPA in Pathianin in luah tûr hnamte a hnawhchhuaha, nangnin in va luahlana, an rama in va chên hunah,

³⁰in hmâa tihborala an awm ang mai khân nangni pawh thangah in âwk palh ang e, fimkhur rawh u, ‘Hêng mite hian engtîn nge an pathian rawng an bâwl tîn? an tih ang hian i ti ve ang u,’ tiin an pathiante chu ngaihven suh u.

³¹Chutiangan LALPA in Pathian hi chibai in bûk tûr a ni lo; an pathian an biak dân tinrêng chu LALPA ngaiha tenawm leh huatthlâl a ni a; an pathian hmâah an fanute leh an fapate meuh pawh meiah an hâl hlum tîn si a.

³²Thû ka pêk apiang zâwm tûrin fimkhur hle rawh u; in belh chhah tûr a ni lo va, in paih tthen tûr a ni hek lo.

BUNG 13

RING DUH LOTE HREMNA

¹“In zîngah zâwlnei emaw, mumang nei mi emaw te awmin, chhinchhiahna leh thilmakte entîr ta se,

²chhinchhiahna emaw, thilmak emaw an sawi lâwk ang chu lo thleng dikin, ‘Ti r’u, pathian dang i zui ang u,’ tiin, in hriat ngai loh chu—‘an rawng i bâwl ang u,’ te an tihin,

³chutiangan zâwlnei emaw, mang nei mi emaw thû chu bengkhawn suh u, LALPA in Pathian chuan in thilung zawng zawng leh in rilru zawng zawngin amah LALPA in Pathian chu in hmangaih tak tak em tih a fiah che u a ni zâwk e.

⁴LALPA in Pathian chu tih dêk chungin zui ula, a âw ngaichângin a thupêkte chu zâwm zêl rawh u; amah chu vuan tlat ula, a rawng bâwl ang che u.

⁵Chutiangan zâwlnei emaw, mang nei mi emaw chu tihhlum tûr a ni, Aigupta ram ata hruai chhuaktu leh saltâna ațanga chhanchhuaktu LALPA in Pathian pên bosan tûr zâwnga thu a sawi avâng leh, LALPA in Pathianin in kawng zawh tûra thu a pêk che u laka hruai sual che u a tum avângin. Chuvângin, in zîng ațangan thil t̃ha lo chu in thianfai zêl tûr a ni.

⁶“In unaupa emaw, in nu fapa emaw, in fapa emaw, in fanu emaw, in nupui te emaw, mahni ang maia in ngaih in thian bul emawin, nangni leh in thlahtute pawhin an la hriat ngai loh pathian dang zui tûrin, ‘Ti teh khai, pathian dang rawng i bâwl ang u hmiang,’ an tiha,

⁷in chheh vêl zawng zawnga pathian hnaivai deuh emaw, ram hla tak, kâwlkil leh a lehlama mi emaw be tûra an thlêm che u chuan,

⁸in remti tûr a ni lo va, in bengkhawn tûr a ni hek lo; in lainat emaw, in zuah emaw, in thupsak emaw tûr a ni lo;

⁹in tihlum ngei ngei tûr a ni; tihlum tûrin kut in thlâk hmasa tûr a ni, chumi hnuah mipui an che ve chauh tûr a ni.

¹⁰A thih thlengin lungin in deng tûr a ni, Aigupta rama bâwiha in tâna ata hruai chhuaktu LALPA in Pathian tlân bosan tûra hruai bo che u a tum avângin.

¹¹Chutichuan, Israel mi zawng zawngin an hria anga, an hlau baw ang; tichuan in zîngah hetiang suahsualna hi a awm leh tawh ngai lo vang.

¹²“LALPA in Pathianin in chênna tûra a pêk che u khawi khuaah emaw thâwm in hriata,

¹³In zîng ațangan misual, Beliala fate an lo chhuaha, khawpuia mite hnênah kalin, “Hawh u, pathian dangte rawng hi bâwl ve tawh ila,” tiin, an la hriat ngai loh hnênah hruai bo tum ta sela—

¹⁴thahnemngai takin in zâwt vêl ang a, chhui chhuak tûrin in dap tûr a ni. Chutiangan thil tenawm taka ti in zîngah an lo awm reng tih in hriat chuan,

¹⁵chû khuua michêngte chu khandaihin in tihlum vek ang a, khawchhûnga thil awm zawng zawng, an ranrualte nê lam khandaihin in suat vek tûr a ni.

¹⁶An thil neih zawng zawng chu tualzâwl zau laiah in chhep khâwm ang a, LALPA in Pathian tân chu khuah leh an thil neih zawng zawng chu in hâl ral vek tûr a ni. Thil chhe hlâwmah a chang kumkhua ang a, tuman an dân thar leh tûr a ni lo.

¹⁷In kutah ânchedawng thil rêng rêng a awm tûr a ni lo: LALPA chuan in thlahtute hnêna chhechhama a lo tiam ang khân, a thinurna namên lo chu zahngaihnaah a chantîr ang a, a

khawngaihna chu in chungah a lantîr bawk ang a, a tipung zêl ang che u;

¹⁸LALPA in Pathian âw hi in ngaihlhâk a, vawiina thu ka pêk che u anga a thupêk zawng zawng in vawn tlat a, LALPA in Pathian mithmuha dik taka in tih zêl chuan.

BUNG 14

LU SÛN DAN DIK LO

¹LALPA in Pathian fate in ni a; mitthi sùn avângin in chalsam in ziat fai tûr a ni lo va, in inzai thî tûr a ni hek lo.

²LALPA in Pathian tân hnam thianghlîm in ni si a, LALPA chuan ama mi ni tûrin a thlang che u a, lei mihring zawng zawng chungah hian a rohlu ni bîk tûra thlan in ni.

SA THIANG LEH THIANG LO

³Thil tenawm rêng rêng in ei tûr a ni lo.

⁴Hêng sâte hi in ei thei ang: bâwngpa, berâm, kêl,

⁵sazuk, sangai, sakhi, saza, ramkêl, sathâr te leh ram-berâm te hi.

⁶Sa tinrêng, a tin kâk chhuak, hmun hniha a tin kâk chhuak, chaw thial nawn chi tawh phawt chu in ei thei ang.

⁷Chaw thial nawn zînga tin kâk lo in ei loh tûrte chu: sanghâwngsei te, sazupui te leh sangâwi te hi an ni; chaw an thial nawn nâa, tin kâk an neih loh avângin in tân ei thiang lo a ni.

⁸Vawk hi in tân ei thiang lo a ni, a tin chu kâk ve mahse, chaw a thial nawn loh avângin a sa in ei tûr a ni lo va, a thisâwn ruang pheh chu in khawih hauh tûr a ni lo.

⁹Tuia chêng zîngah hêng hi in ei thei ang: pângparh leh phuhlip nei chi rêng rêng chu a ei theih vek a.

¹⁰Pângparh leh phuhlip nei lo chu in ei tûr a ni lo; in tân thil thianghlîm lo a ni.

¹¹Sava sa thiang chi chu in ei thei vek ang.

¹²Hêng sâte erawh chu in ei tûr a ni lo: muvanlai, mulukawlh, mupui,

¹³mutê, mute khâwi chi, mute chi rêng rêng;

¹⁴choâk chi rêng rêng;

¹⁵Ostrich, chingpirinu, tuipei sava, mu chi rêng rêng;

¹⁶hrankir, chhimbuk, chhimbuksialki,

¹⁷tual-choâk, mulukawlh, luidung chhimbuk,

¹⁸kânghlai, dîl sava chi rêng rêng, chhuangtuar leh bâk te.

¹⁹Bawkvâka kal chi thlâwk thei rêng rêng chu in tân bawhlhlawh a ni; ei tûr a ni lo.

²⁰Sava thiang chi chu in ei thei vek ang.

²¹Amaha thi chu eng sâ mah in ei tûr a ni lo; in khuua chêng ve hnam dang mite chu in pe thei a, anni chuan an ei thei a; a nih loh leh, hnam dangte hnenah in hralh thei a ni; nangni chu LALPA in Pathian tâna hnam thianghlîm in ni si a. Kêl notê chu a pui hnutein in chhûm tûr a ni lo.

SÂWMA PAKHAT CHUNGCHÂNG

²²In rama thlai pung sâwma pakhat dik tak chu kum tinin in pe tûr a ni.

²³LALPA in Pathian tîh dan in zir theih nân in buhbâl te, in uain thar te, in hriak te leh in ran piang hmasa ber te aţanga in sâwma pakhat theuh chu, LALPA in Pathian hmâah, a hminga a dahna tûr hmun a ruatah chuan in ei thîn tûr a ni.

²⁴A kal kawng in tân a hlat lutuk avânga sâwma pakhat in ken theih lohva, LALPA in Pathian malsâwmna in dawn phur tûra LALPA in Pathianin a hming awmna tûra a ruat chu in awmna aţanga a hlat lutuk chuan,

²⁵tangkaah in chantîr ang a, pawisa chu in keng ang a, LALPA in Pathian hmun ruatah chuan in kalpui tûr a ni.

²⁶Chû pawisa chu in duh ang angin in hman thei ang: bâwngpa emaw, berâm emaw, uain emaw, in tûr chi dang emaw, in rilru duh zâwng apiang lei nân hman tûr a ni; chutah chuan LALPA in Pathian hmâah, nangni leh in chhûngkuain hlim takin ei ho ang che u.

²⁷In khuua chêng ve Levia chite chu in thlahthlam tûr a ni lo, nangni zîngah rochan ram an nei ve si lo va.

²⁸Kum thumna kum tâwp apiangin, chumi kuma in thlai thar aţanga in sâwma pakhat chu khuah in dah khâwm tûr a ni.

²⁹Tichuan, Levia chi, nangni zînga rochan ram nei ve lote, hnam dangte, pa neilo leh hmeithai in vêng chhûnga awm te chu lo kalin, puar takinrawn ei rawh se; tichuan, LALPA in Pathianin in kutkawih zawng zawngah mal a sâwm zêl ang che u.

BUNG 15

KUM SARIH DANA LEIBA NGAIHDAM

¹Kum sarih a lo ral apiangin leiba ngaihdamna in siam tûr a ni.

²Hei hi ngaihdam dân chu a ni: Pûktîrtu apiangin a thenawm hnêna a pûktîr chu a ngaidam tûr a ni; a thenawm emaw, a unau emaw chu a thîng lêt tûr a ni lo, LALPA ngaihdamna, tih a ni miao si a.

³Hnam dang mi hnên aţang chuan in thîng lêt thei ang; in chipui unaute lakah erawh chuan engmah in phûl lêt tûr a ni lo,

⁴in zîngah rethei in awm hauh lo a nih nghal loh chuan; LALPA in Pathianin in roluah tûr a pêk ramah chuan LALPAN nasa takin mal a sâwm dân si che u a—

⁵amaherawhchu, LALPA in Pathian âw hi fimkhur taka âwihin, a thupêk vawiina ka hrilh zawng zawng che u hi in pawm ngei tûr a ni.

⁶LALPA in Pathian chuan a tiam che u ang ngeiin mal a sâwm ang che u a; hnam tam tak hnênah in pûktîr ang a, nangni erawh chuan in pûk ve lo vang; hnam tam tak ro in rêlsak ang a, anni erawh chuan an rêlsak ve lo vang che u.

RETHEITE TÂNA THILPHALNA

⁷LALPA in Pathianin a pêk che u ram chhûngah hian, in unaute zîngah rethei an awm chuan, in unau retheite lakah chuan thînlung tisak suh ula, uikawm hek suh u,

⁸an lakah inhawng takin, an mamawh zât chu phal takin pûktîr rawh u.

⁹In rilrûah ngaihtuahna verther tak lo lûtin, ‘Ngaihdamna hun, kum sarihna a hnai tawh si a,’ tiin i unau rethei chu engmah pêk loh te i lo tum dah ang e, fimkhur rawh; in chung a vui thû LALPA hnêna a thlen mai zawngin, thil sual ti in ni mai dâwn asin.

¹⁰In pe ngei zâwk tûr a ni a, ui tak chungin in pe tûr a ni hek lo; hêngte avâng hian alâwm in hnathawh zawng zawng leh in kutkawih tinrêngah LALPA in Pathianin malsâwmnaa a vûr phah dâwn che u ni.

¹¹Ram chhûngah rethei awm loh tak tak chu a awm lo vang; chuvângin thu ka pêk che u hi, ‘In rama in unau rethei leh tlachhamte tân thilphal hle rawh u,’ ka ti a ni.

BÂWIIH ENKAWL DÂN

¹²“In unau, Hebrai mipa emaw, Hebrai hmeichhia emaw, in hnênah hralh ta se, kum ruk in chhawr ang a, a kum sarihnaah chuan in chhuah zalên tûr a ni.

¹³Chutianga in chhuahtîr hunah chuan kutruak ngawtin in kaltîr tûr a ni lo;

¹⁴In ran te, in hruih zâwla mi te leh, in uain sâwr khura mi te chu phal takin pe ang che u. LALPAN mal a sâwm che u aţangin in pe chhuak ve tûr a ni.

¹⁵Aigupta ramah khân bâwih in ni a, LALPA in Pathianin a tlan chhuak che u tih hre reng rawh u; chuvâng chuan wawiinah hian thu ka pêk che u hi.

¹⁶Tin, amah zâwkin nangni leh in chhûngkua a ngainat avâng che u leh in hnêna awm a la thlâkhlelh avângin, ‘Ka chhuak lo mai ang e,’ a tih chuan,

¹⁷thîr zumin kawngkhâr chhanah a beng in verh ang a, tichuan, in bâwih a ni kumkhua tawh ang. In bâwihnu pawh chutianga bawh chuan in ti ve tûr a ni.

¹⁸Zalên taka chhuahtîr chu a uiawm zâwngin ngai suh; kum ruk chhûng lai inhlawhfa thawh lêt hniha hlû a lo thawh chhuak hman tawh si a. Tichuan, LALPA in Pathianin in tih apiangah mal a sâwm zêl ang che u.

RAN NO HRIN HMASAK ENKAWL DÂN

¹⁹“In bâwng leh berâm rual zînga a pa piang hmasa ber chu LALPA in Pathian tân in serh hrang zêl tûr a ni; in bâwngpa piang hmasa ber chu hnathawkah in chhawr tûr a ni lo va, in berâm pa piang hmasa ber hmul pawh in mêt tûr a ni lo.

²⁰LALPA in Pathian hmâah kum tinin LALPA hmun ruatah chuan, nangni leh in chhûngkuain in ei thîn tûr a ni.

²¹Hmêlhemna a lo neiha, a kê a bai emaw, a mit a del emaw, piansualna engemaw bîk a neih emaw chuan, LALPA in Pathian hnênah in hlân tûr a ni lo.

²²In vêng chhûngah in ei thei ang; sazuk leh sakhi sa ei angin, mi thianga leh bawhlhlawhna nei lai te pawhin an ei thei ang.

²³A thisen erawh chu in ei tûr a ni lo; tui angin leiah in leih baw tûr a ni.

BUNG 16

KALHLÊN KÛT THLIRLÊTNA

¹Abib thla hi serh ula, LALPA in Pathian tân Kalhlên Kût hmang thîn rawh u, LALPA in Pathianin Aigupta ram aţang khân azân azânin Abib thla hian a hruai chhuak si che u a.

²Chuvângin, LALPAN a hming awm na tûra a ruatah chuan, bâwng leh berâm, LALPA in Pathian tân Kalhlên Kût inthâwina in hlân tûr a ni.

³Dâwidim telh chhang nê in ei tûr a ni lo; ni sarih chhûng dâwidim telh loh chhang nê in ei tûr a ni, chû chu tuarna chhang a ni (Aigupta ram aţang khân hmanhmawh takin in lo chhuak si a), in dam chhûnga Aigupta ram in chhuahsan nî in hriat reng theihna tûr pawh a ni.

⁴Ni sarih chhûng chu in ram pumah dâwidim hmuh tûr pawh a awm tûr a ni lo, a ni hmasa ber tlaia in inthâwina sâ pawh zankhuain, a tûk thlengin a awm tûr a ni lo.

⁵LALPA in Pathianin a pêk che u in awmna khawi dangah mah Kalhlên Kût inthâwina hi in hmang thei lo vang a;

⁶mahse, LALPA in Pathianin ama hming awmna tûra a ruatna hmunah chauh Kalhlên Kût inthâwina hi tlai lam ni tlâk dâwnah, Aigupta aţanga in kal chhuah hun angah khân in hlân thîn tûr a ni.

⁷LALPA in Pathianin hmun a ruatah chuan in hem hmin ang a, in ei ang a, a tûkah in puan in lamah in hâw leh tûr a ni.

⁸Ni ruk chhûngin dâwidim telh loh chhang in ei ang a, a ni sarih niah chuan LALPA in Pathian tân inkhâwmpui thianghlim a awm ang. Chumi ni chuan eng hna mah in thawk tûr a ni lo.

CHAWLHKÂR KÛT THLIRLÊT

⁹Chawlhkâr sarih chhût chhuak ula; favaha buh in hleh ţan ni aţangin chawlhkâr sarih chu chhiar ţan tûr a ni.

¹⁰Chumi zawhah in deh chhuah zînga in thilthlâwn pêk khâwm aţangin LALPA in Pathian tân Chawlhkâr Kût in nei tûr a ni; in pêk dân tûr chu LALPA in Pathian malsâwmna in dawn ang zêl ni rawh se.

¹¹LALPA in Pathianin a hming awmna tûra a ruatah chuan nangni leh in fapate, in fanute, in bâwihpate, in bâwihnute, in khuaa awm Levia chîte, in zînga awm hnam dangte, pa nei lote leh hmeithaite nê LALPA in Pathian hmâah hlim takin awm rawh u.

¹²Aigupta ramah khân bâwih in ni tih hre reng ula, hêng dântê hi zâwm tûrin fimkhur hle rawh u.

BIAKBÛK KÛT THLIRLÊT

¹³“In hruih aţang leh in uain sâwrkhur aţanga in seng khâwm zawhah, ni sarih chhûng Biakbûk Kût in hmang tûr a ni.

¹⁴In kûtah chuan nangni leh in fapate, in fanute, in bâwihpate, in bâwihnute, in khuaa awm Levia chîte, in khuaa awm ve hnam dangte, pa neilote leh hmeithaite nê hlim takin in hmang tûr a ni.

¹⁵LALPA hmun ruatah chuan ni sarih chhûng LALPA in Pathian hmâah kût thianghlim hmang rawh u, LALPA in Pathianin in thawh chhuah zawng zawng leh in kutkawih apiangte

mal a sâwm ðhin avângin lâwm êm êm tûr in ni asin.

¹⁶In mipa zawng zawng chu kum tin vawi thum LALPA in Pathian hmâah, hmun a ruatah chuan an inlan ðhin tûr a ni: Dâwidim telh loh Chhang Kûtah te, Chawlhkâr Kûtah te leh, Biakbûk Kûtah te a ni ang; kutruak maiin LALPA hmâah an inlan tûr a ni lo.

¹⁷Mi tinin an theih ang tâwk zêlin, LALPA in Pathianin malsâwmna a pêk ang zêlin an pe tûr a ni.

DIKNAA RORÊLNA

¹⁸“LALPA in Pathianin in awmna tûra a ruatah chuan, a hnam ang zêlin, rorêltute leh hotute in ruat tûr a ni, rorêlna dîkin mite ro an rêlsak tûr a ni.

¹⁹Rorêlna chu in kailek tûr a ni lo; hleih in nei tûr a ni lo va, thamna in la tûr a ni hek lo, thamna hian mifingte mit a tidel ðhin a, mi dikte thû a herh kâwi ðhin.

²⁰LALPA in Pathianin a pêk che u ram chu dam taka in luah theih nân, dikna tluantling in zâwm tûr a ni.

²¹“LALPA in Pathian tâna maichâm in dinna bulah milim thing in phun tûr a ni lo.

²²LALPA in Pathian huat zâwng milim ban in phun tûr a ni lo.

BUNG 17

¹“LALPA in Pathian hnênah hmêlhemna nei bâwngpa emaw, berâm emaw in hlân tûr a ni lo, chutiang chu LALPA in Pathian tân thil tenawm a ni si a.

²“LALPA in Pathianin a pêk che u khawi hmuna mi pawh, nangni zîngah hian mipa emaw, hmeichhia emaw LALPA in Pathian mithmuha mi suaksual, a thuthlung bawhchhia an lo awmin,

³chumi chuan pathian dangte ûmin, an rawng te bâwlin, biak hauh loh tûra ka tih-nî emaw, thla emaw, vâna thil engpawh lo be ta se,

⁴an hrilh che a, i lo hria a nih chuan, ðahnemngai takin i zâwt chhuak tûr a ni. A lo dik tak taka, Israel mite zîngah chutiang thil tenawm ti an awm tih hriat chian a nih chuan,

⁵chutiang suahsualna tih chîng mipa emaw, hmeichhia emaw chu in kulh kawngkaah in hruai ang a, chû mipa emaw, chû hmeichhia emaw chu lungin in deng hlum tûr a ni.

⁶Thi tlâka ngaih chu hriatpuitu mi pahnih emaw, pathum emaw te thúin tihhlum tûr a ni; hriatpuitu pakhat thu mai chuan tihhlum tûr a ni lo.

⁷Hriatpuitute chuan tihhlum tûra chungah chuan kut an thlâk hmasa tûr a ni a, chumi zawhah mipui zawng zawngin kut an thlâk ve ang. In zîng aţangin thil ðha lo chu in dah bo tûr a ni.

⁸“In tâna rêl khirh lutuk a lo awm thei a, thisen chhuah chungchânga thiamloh chantîr dân tûrah te, rorêl dân inang lo kârah te, hrem dân tâwk bithliah dânah te, khaw chhûngah inhniâl buaina chungchâng te a lo awmin, tho ula, LALPA in Pathianin hmun a ruatah chuan kalpui ang che u.

⁹Puithiam te, Levia chite leh, chuta rorêltute hnênah chuan kalin, in va zâwt ang a; anni chuan thu tihtlûk dân an lo hrilh

dâwn che u nia.

¹⁰Tichuan, LALPAN a hmun ruata thu tlûkna an lo puansak che u ang chuan in ti tûr a ni. Tih dân tûra thu an pêk ang che u chu fimkhur takin zâwm rawh u.

¹¹Dân ang taka thu tlûkna an hrilh ang chuan in ti tûr a ni; thutlûkna an puan chhuah tawh aţang chuan ding lamah emaw, vei lamah emaw in pênsan tûr a ni lo.

¹²LALPA in Pathian hmâa rawngbâwla ding ðhin puithiam emaw, rorêltu emaw zâwm lova, mahni duh dânâ tiluitu chu a thi tûr a ni. Israelte zîng ata thil ðha lo chu in dah bo tûr a ni.

¹³Tichuan, mipuiin an lo hriatin an hlau ang a, mahni thúin an tilui ngam tawh lo vang.

LAL NEIH DÂN TÛR

¹⁴“LALPA in Pathianin a pêk che u ram in va thlena, in neiha, in luah hunah, ‘Kan chhehvêla hnam zawng zawngte angin lal i nei ve ang u,’ in tih chuan,

¹⁵LALPA in Pathianin a thlan ngei nangmahni chung a lal tûr chu in siam tûr a ni; in unau zînga mi pakhat in chung a lal atân in siam tûr a ni a; in unau ni lo, hnam dang mi chu in dah tûr a ni lo.

¹⁶Amaherawhchu, ama hman atân sakawr a neih belh ðeuh tûr a ni lo va, sakawr tipung tûrin mipuite Aigupta lamah a lêtpui tûr a ni hek lo, LALPA ngein, ‘Chû kawngah chuan in lét tûr a ni lo,’ a tih kha.

¹⁷Nupui tam tak a nei tûr a ni lo, a rilru a vah bo phah mai ang; ama pualin tangka leh rangkachak a khâwl ðeuh tûr a ni hek lo.

¹⁸“A lalramah chuan lalthutthlênga a ðhut hunah, Levia chi puithiamte kaw l ðhin dân bu hi lehkhâbûah amah ngeiin a ziaik chhâwng tûr a ni.

¹⁹Ama’n a kaw l ang a, a dam chhûngin a chhiar ðhin ang a, tichuan LALPA a Pathian ðih dân zirin, hê dân leh thuruatte hi zâwm tûrin a fimkhur phah ang a;

²⁰a chipui unau dang lakah indahsâng bîk lovin, thupêk pawh ding lam leh vei lamah pênsan lo sela; tichuan, Israelte zîngah amah leh a thlahte thlengin a lalram chuan a daih rei thei dâwn a ni.

BUNG 18

PUITHIAMTE LEH LEVIA CHITE

¹“Puithiamho, Levia chi-Levia hnam zawng zawng chuan Israel mite zîngah chanpual ram an nei ve tûr a ni lo; LALPA hnêna meia thilhlân leh a chanpuala mi chu an ei tûr a ni.

²Chuvângin, an unaute zîngah chanpual an nei ve tûr a ni lo; an hnêna a sawi tawh angin LALPA chu an chanpual a ni.

³Mipuiten inthâwina an hlan apianga puithiamte chanvo ve tûr chu hei hi a ni: bâwngpa pawh, berâm pawh ni se: puithiam hnênah a dâr te, a khabe khinghni h leh a pumpui te chu puithiam an pe tûr a ni.

⁴In buh thar hmasa te, uain thar hmasa te leh in berâm hmul meh hmasak berte chu in pe baw l tûr a ni.

⁵Anniho hi, an thlah kal zêlte nê, LALPA in Pathianin in hnam pum aţanga, kumkhuaa LALPA hminga rawngbâw l tûra a

ruat an ni miao si a.

⁶“Levia mi chu a awmna Israel ram khawii khua ațang pawhin lo kal sela, a rilrûa duhna tak tak nêna LALPA hmun ruata a lo kal chuan,

⁷a unau Leviamî, LALPA hmâa ding thîn mi dangte ang bawkin, LALPA a Pathian hmingin rawng a bâwl ve thei ang.

⁸Ama chanpual thil a hralhna bâkah, mi dangte chan ang ei tûr pawh a chang ve ang.

CHÎN TLÂK LOH HNAM DÂN

⁹“LALPA in Pathianin a pêk che u ram in va thlen hunah, chuta lo awm hnamte chîn dân tenawm chu in zui ve hlek tûr a ni lo.

¹⁰In zînga tumahin a fapa emaw, a fanu emaw meiah a kal tlangtîr* tûr a ni lo va, dâwithiamna te, aien leh aisân– bâwlhlo hmanga mang hrilhfiâh te, indâwivaih te,

¹¹âikaih chîn te, ramhuai zâwl rawih te, rêu biak te, mitthi thlarau kohchhuah te in chng ve tûr a ni lo.

¹²Hetiâng tih chîn hi LALPA laka thil tenawm a ni, hêng thil tenawm an chîn avâng hian a ni, LALPA in Pathianin in hma ata a hnawh chhuah ni.

¹³LALPA in Pathian hmâah chuan sawisêl in kai tûr a ni lo.

¹⁴Hêng in luahlan tûr hnamte hian zâwl thupuan te, rêu hrilhfiâhna te an lo buaipui êm êm a; nangni erawh chu, chutiâng ti ve tûrin LALPA in Pathianin a ruat lova che u.

MOSIA ANG ZÂWLNEI THAR

¹⁵“LALPA in Pathianin keimah ang hi in unaute zînga mi Zâwlnei a la siamsak dâwn che u a. A thû chu lo zâwm ang che u,

¹⁶Horeb tlânga in punkhâwm nî a LALPA in Pathian in duh dân ang taka, ‘LALPA kan Pathian âw chu min hriattîr tawh suh, hê meipui râpthlâk tak pawh hi min hmuhtîr tawh lo hrâm rawh, kan thi mai dâwn alâwm,’ tia in ngen kha.

¹⁷LALPA chuan ka hnênah: ‘An thusawi chu a ța e.

¹⁸An unaute zîng ațangin nangmah ang Zâwlnei ka la siamsak ang a, a kâah ka thûte ka dah ang a, thû ka pêk apiang a puang chhuak thîn ang.

¹⁹Keima hminga thû a sawi ngaithla duh lo apiang chu, keiman a chungthû ka la ngaihtuah ang.

²⁰Nimahsela, zâwlnei tuemaw, ka hminga thu sawi ve ringawt, sawi tûra ka tih pawh ni lo, emaw, pathian dang hminga thusawitu zâwlnei chu an thi tûr a ni,’ a ti a.

²¹In thinslungah inzâwtin, ‘LALPA thusawi a ni lo tih engtin nge kan lo hriat theih ang?’ in ti a nih chuan–

²²zâwlnei in LALPA hminga thu a sawiin, a sawi anga a lo thleng dik lo a nih chuan, chû chu LALPA’N a sawi loh chu a ni; zâwlnei chuan a rinthu in a sawi mai mai a ni; chutiâng mi chu in hlau tûr a ni lo.

BUNG 19

INHUMHIMNA KHAWPUI PATHUMTE

¹LALPA in Pathianin a pêk che u ram neitute chu, LALPA in Pathianin a tihborala, nangnin in luahlana, an khawpuite leh an inte pawh in luah hunah,

²LALPA in Pathianin luah tûra a pêk che u ram chhâng hmun laili deuh deuhah khaw pathum in ruat tûr a ni.

³LALPA in Pathianin luah tûra ram a pêk che u chu bial thumah in then baw ang a, chûng khuaah te chuan tualthat apiang an tlan luh theih nân, kawng te in siam tûr a ni.

⁴Chûng hmuna himna zawnga tual tlan thei tûr chu hetiang mi hi an ni: Mi tupawhin a huat sâ reng ni lo, tihpalhin a bula mi tihlum ta ang sela–

⁵emaw, mi pakhat chu a thenawm nên thing kit tûrin ramah an kal a, thing kit tûra a hrei a vaina lamah, a hrei fang thlawn chuan a thenawm chu va deng hlum ta se–hêng khua eng berah emaw hian a tlan anga, a him ang;

⁶a tlânna kawng a thui lutuk chuan, a thisen phuba latuin thinur chungâ u min, a umphâk ang a, huatna nei sâ lova tipalhtu chu thi tlâka ruat ni lo mahse, kawng lakah a that hman mai thei si a.

⁷Chuvângin, ‘Khaw pathum ruat tûrin ka ti che u a ni,’ a ti a.

⁸LALPA in Pathianin in thlahtute hnêna ram pêk a lo tiamah chuan, in thlahtute hnêna chhechhama a lo tiam anga in ram a tihzauhsak che u a,

⁹vawiina ka hrilh che u ang leh hêng thupêkte anga tia, in zawm veka, LALPA in Pathian chu in hmangaiha, a kawnga in kal zêl chuan, hêng bâkah hian in pualin khaw pathum dang in la tihbelh leh thei ang,

¹⁰chuti a nih loh chuan, LALPA in Pathianin luah tûra a pêk che u ramah hian pawh khawih lo thisen chhuah a ni ang a, thisen mawh chu in chungah a tla mai dâwn asin.

¹¹Amaherawhchu, miin a thenawm a huat avâng a lo châng rûin, thi khawpin kut lo thlak se, thi ta baw se, hêng khua eng berah emaw hian tlan ve ta se,

¹²ama khuaa upaten mi tûrin an va hruai ang a, tihhlum tûrin thisen phuba latu hnênah an pe tûr a ni.

¹³In lainat tûr a ni lo, Israelte zîngah hian pawh khawih lo thisen chhuahna mawh chu in dah bo tûr a ni; tichuan in tlan a ța ang.

CHANPUAL RAMRI

¹⁴“LALPA in Pathianin luah tûra a pêk che u ramah hian, hman laia miten ramri an lo kham tawh, in thenawmte ramri lung chu in tisawn tûr a ni lo.

THUHRIATPUTUTE CHUNGCHÂNG

¹⁵“Mi an sual e, an dik lo ve, tia puh thlu tûrin thuhretu pakhat mai a tâwk lo; mi pahnih pathum hriatpuinaa tihngheh tûr a ni.

¹⁶Thuhretu derin dâwtin mi dang puhchhiat tum ta se,

¹⁷a inkhingte chu an pahnihin LALPA hmâah, chutih laia rawngbâwltu puithiamte leh rorêltute hmâah an ding dân tûr a ni.

¹⁸Rorêltute chuan ngun takin an lo chhui ang a, a unau dik lo taka puhchhiat tuma thuhretua inchhâl chu, thuhretu der mai a lo nih chuan,

¹⁹a unau chungah tih a tum ang tak chuan chû mi chungah chuan in ti ve tûr a ni; chutiang chuan, thil tha lo chu in zing aţangin in dah bo tûr a ni.

²⁰Chûng thu lo hriate chuan an hlau ang a, chutiang thil tha lo chu an ti ngam tawh dân lo nia.

²¹In lainat tûr a ni lo; nunna aiah nunna, mit aiah mit, hâ aiah hâ, kut aiah kut, kê aiah kê a ni mai.

BUNG 20

INDO CHUNGCHANGA DAN

¹“In hmêlmate do tûra in thawh chhuaha, sakawr leh tawilair te, nangni aia tam zâwk sipaite in hmuhin, anmahni chu hlau suh u; LALPA in Pathian, Aigupta ram aţanga hruai chhuaktu che u chu in hnênah a awm si a.

²Indo in hnaih ta tihah puithiam chu lo kalin sipaite hnênah thu a sawi tûr a ni.

³Ani chuan an hnênah, ‘Aw Israelte u, ngaithla teh u: Tûnah hian in hmêlmate nê in indo têt tawh a. In rilru zâm hauh suh se, hlahu pawh hlau suh u; anmahni hlauvin khûr rêng rêng suh u;

⁴LALPA in Pathianin in hmêlmate a dopui ang che u a, in lamah a ţang ang a, a chhan chhuak ang che u,’ ti rawh se.

⁵Hotute pawhin sipaite hnênah: ‘In sa zo hlim, la hlân lo in awm em? A in lamah hâw leh rawh se, indonaah a thi hlahu ang a, mi dangin an lo hlân dah ang e.

⁶Grêp huan siama a rah thar la ei lo in awm em? A in lamah kîr leh rawh se, indonaah a thi hlahu ang a, mi dangin a lo ei dah ang e.

⁷Nupui huala la nei lo in awm em? A in lamah kîr leh rawh se, indonaah a thi hlahu ang a, mi dangin an lo nei dah ang e,’ an ti tûr a ni.

⁸Hotute chuan sipaite hnênah, ‘Tu nge hlau leh zâm in awm em? A in lamah haw leh rawh se, amah angin a sipaipuite rilru a tizâm ve dah ang e,’ an ti tur a ni.

⁹Hotuten sipaite hnêna thu an sawi zawhah, sipaite hmahruaitu tûr hotute an ruat tûr a ni.

¹⁰“In va beih tûr khua in hnaih hunah inremna thu puang hmasa zêl ula.

¹¹In inremna thu an lo pawm a, an lo inhawn chuan, chû khuaa mi zawng zawng chu in thuhnuaiah an awm ang a, duh ang anga in chhawr tûr an ni ang.

¹²Khuaa mite chuan inrem an duh lohva, indo an thlan zâwk chuan in hual tûr a ni.

¹³LALPA in Pathianin in kuta a pêk hunah che u chuan mipa zawng chu khandaihin in that vek tûr a ni.

¹⁴Hmeichhiate, an fanaute, rante leh khuaa an thil neih zawng zawng, râlâl thilte chu, duh tâwkin in la tûr a ni; LALPA in Pathianin hmêlmate thil neih a pêk che u chu duh tâwkin tlan rawh u.

¹⁵Hêng khaw hnaivaia mite ni lo, ram hla zâwka mite khua in beih pawhin hetiang hian in ti zêl tûr a ni.

¹⁶Mahse, LALPA in Pathianin in luah tûra a pêkho khuaah erawh chuan, engkim thaw thei tawh phawt chu nung damin in zuah tûr a ni lo,

¹⁷in that chimit zêl tûr a ni: Hit mite, Amor mite, Kanaan mite, Periz mite, Hiv mite leh Jebus mite chu LALPA in Pathian thupêk ang takin in tiboral vek tûr a ni,

¹⁸chutianga in tih loh chuan, an pathiante laka an tih thin thil tenawm tak tak an zirtîr ang che u a, LALPA in Pathian laka thil sual ti in ni mai ang.

¹⁹“Khua chu rei tak in hual a, lâk ngei tuma in beih laiin, hreipui chelekin an thei kûngte chu in kit mai mai tûr a ni lo; a rah te chu in ei thei ang, thei kûngte hi mihringte tân chaw a nih avângin, hual rei a tûl pawhin kih loh tûr a ni.

²⁰A rah ei loh chi tih in hriat chian thing kûngte erawh chu kit ula, khua chu in lâk theih hmâa kulha hung hnan nân in hman thei ang.

BUNG 21

TUALTHATTU HRIAT LOH RÊL DAN

¹“Mi tupawh lo tualthiin, a ruang chu LALPA in Pathianin luah tûra a pêk che u ram hnuaiah hmû ta ang ula, a thattu hriat ni lo sela,

²in upate leh in rorêltute chu va kalin, mi thah ruang awmna a ţangin a vêla khuate hlat zâwng an teh tûr a ni.

³Mi thah ruang awmna hnaih ber khuaa upate chuan bâwnglâ, la chhawr ngai loh, nghâwngkawh la bah loh anrawn kai tûr a ni.

⁴Chumi khuaa upate chuan bâwnglâ chu lui luang lai awmna ruam, lei la leh loh leh thlai la chîn lohna hmunah chuan, bâwngla ring chu an elhtliak tûr a ni.

⁵Levia chi puithiamte chu lo kal hnai sela, anni chu LALPA in Pathianin ama rawngbâwl tûr leh, LALPA hminga mal sâwm tûra a thlan chhuahte an ni si a; thubuai leh pawh khawih thil rêng rêng chu anni thû thûa rem tûr a ni.

⁶Chû lui ruama bâwngla ring an elhtliak chungah chuan mithah ruang awmna hnai ber khuaa upate zawng zawng chuan an kut an sil tûr a ni.

⁷Heti hian an lo chhâng tûr a ni, ‘Kan kutin hê thisen hi a chhuah lo va, kan mitin a hmu hek lo.

⁸Aw LALPA, i tlan sâ, i mi Israelte hi ngaidam la, i mi Israelte chungah hian, pawh khawih lo chungah thisen chhuahna mawh phurhtîr lo vang che,’ ti rawh se. Tichuan, thisen chhuah avânga mawhphurhna chu an hnên ata lâkkian a ni ang.

⁹Pathian mithmuha dik taka in tih chuan, pawh khawih lo chungah thisen chhuahna mawh chu in hnên ata lâkkian a ni ang.

HMEICHHE SALTÂNG

¹⁰“In hmêlmate do tûra in kal chhuaha, LALPA in Pathianin in kuta a pêk che u a, sala in hruaia,

¹¹chûng sal zîngah chuan hmeichhe hmêl tha tak, i duh zâwng tak i hmuha, nupui atân hiala i nei duh a nih chuan,

¹²i inah i hruai hâw ang a, a sam te a ziat kawlh ang a, a tinte a hlep fai tûr a ni.

¹³A sal kawr te chu a hlîp ang a, i inah chuan a awm reng tawh ang, thla khat chhûng chu an nu leh pate an sîn ang; chumi hnûah chuan i pâwl ang a, a pasal i lo ni ang a, i nupui a lo ni bawh ang.

¹⁴I lung dum leh si lo sela, i chhuah zalên tûr a ni, pawisain i hralh tûr a ni lo; i lo tihhminghliau tawh avângin, i tinawmnah tûr a ni lo.

FA U ROCHAN

¹⁵“Miin nupui pahnihi nei ta se, pakhat ngainain pakhat zâwk ngaina lo se, a ngainat zâwk leh ngainat loh zâwk chuan fa nei ve ve sela, a fapa u ber chu a ngainat loh zâwk laka piang ni ta se,

¹⁶a fapate hnêna ro a sem niah chuan, a fa u dik tak, a nupui ngainat loh zâwk fa aiah a nupui ngainat zâwk fa chu duhsakin, fapa u ber nihna a hlân tûr a ni lo.

¹⁷A nupui ngainat loh zâwk fa chu a thil neih zawnz zawnz aţangin chan hnih pêin fa u nihna chu a pawm tûr a ni, a chakna in ţanna a ni si a; fa u nihna chu a chanvo liau liau a ni.

FAPA SUAL ENKAWL DAN

¹⁸“Miin fa luhlul leh helhmang tak neiin, a nu leh a pate thu âwih duh lovin, an thununna pawh pawm duh lo sela,

¹⁹a nu leh a pate chuan an man bet ang a, an khuua upaho hnênah, khawpui kulh kawngka bulah an hruai tûr a ni.

²⁰An khuua upaho hnênah, ‘Hê kan fapa hi mi luhlul leh helhmang a ni; kan thu rêng a âwih duh lo va; zu leh sa heh mi, ngawlvei a ni,’ an ti tûr a ni.

²¹Tichuan, khuua mipa zawnz zawnzin lungin an dêng hlum tûr a ni; chutiang chuan in zînga thil tha lo chu in dah bo zêl tûr a ni a, Israel mi zawnz zawnz hria se, hlau rawh se.

DÂN CHI HRANG HRANG

²²“Miin thihna khawp sual tiin, tihhlum a niha, thingah khaihân ni ta se,

²³a ruang chu zan khuua thinga awm tûr a ni lo va, chumi ni lâ lâ chuan in phûm ngei tûr a ni; tichuan, luah tûra LALPA in Pathianin a pêk che u ram chu in tibawhlhlawh dâwn lo nia; tûpawh thinga khaihân chu Pathian ânchhedawng a ni si a.

BUNG 22**SEX LAMA THIANGHLIMNA**

¹“In unaute bâwngpa emaw, an berâm emaw vâk bo hmu reng siin, thlîr liam mai suh u; in unaute hnênah chuan in khalh hâwsak ngei ngei tûr a ni.

²In unaute chu in bul hnaiah an awm lo emaw, tû tâ nge a nih in hriat loh chuan, in inah in kai hâw mai ang a, in lo kawh rih ang a, in unauten an rawn hmuh chhuah hunah in pe kîr leh mai tûr a ni.

³Chutiang bawkin an sabengtung chungah te pawh ti ula, an thawmhnaw chungah pawh in ti bawh tûr a ni; in unaute thil tihbo chu nangnin in chhar chuan, chutiang bawh chuan ti zêl rawh u; in ngawih bopui tûr a ni lo.

⁴“In unaute sabengtung emaw, an bâwngpa emaw kawnga tlû in hmuhin, in hêl daih tûr a ni lo; theihtâwp chhuahin in kaihthawhpui zawk tûr a ni.

⁵“Hmeichhiain mipa thawmhnâw a inbel tûr a ni lo, mipain hmeichhe silhfên a inbel tûr a ni hek lo, chutiang thil titute chu LALPA in Pathian tân tenawm an ni.

⁶“In kalna kawng sîr thingah emaw, leiah emaw sava tui emaw, a notê emaw a puiin a awp lai hmu ta ula, a note lâk pahin a pui in la tel tûr a ni lo;

⁷a pui chu chhuah ngei ngei tûr a ni a, a notê te chu in la thei ang; tichuan in tân a tha ang a, in dam rei bawh ang.

⁸“In thar in sak chuan, mi an tlâk palha, an thisen mawh in phurh loh nân, a chung chu in hung tûr a ni.

⁹“In grêp huanah thei chi hrang hrang chin pawlh suh u, in thei chin rahte leh in grêp rahten an khawloh phah hlauh dah ang e.

¹⁰“Bâwngpa leh sabengtung lei in leh duntîr tûr a ni lo.

¹¹“Silhfên inang lo tak tak, sahmul puan leh puan zaisîn tahpawh ang chite chu hâk pawlh suh u.

¹²“In puan sin killî-ah chuan a fêm siam rawh u.

SEX LAMA THIANGHLIMNA

¹³“Miin nupui neiin, a pâwl hnûah lungten leh si se,

¹⁴hming chhe zâwnga puhin, ‘Hê nu hi nupuiahi ka nei a, nula thianghlim pawh a lo ni nek lo ve,’ tiin sawi tlângthang ta se,

¹⁵hmeichhe nu leh pate chuan chu hmeichhia chu a la thianghlim ngei a ni tih fiahna chu kulh kawngka bulah khaw upate hnênah an rawn la tûr a ni.

¹⁶Hmeichhe pa chuan upate hnênah, ‘Hê mi hi ka fanu ka neihtîr a, a duh leh si lo va.

¹⁷Tûnah hian a puh hmingchhia a, “I fanu hi nula thianghlim pawh a lo ni lo ve,” a ti leh si a, hêngte hi ka fanu thianghlimzia finfiahna a ni e,’ a ti ang a. Khaw upate hmâah puan chu an kai pharh tûr a ni.

¹⁸Tichuan, khaw upate chuan chû pa chu an hruai ang a, an hrem tûr a ni;

¹⁹Israel nula thianghlim hming a tihchhiat avângin tangkarua sekel zâ an châwitîr ang a, hmeichhe pa hnênah an pe tûr a ni. A nupui a ni reng ang a, a dam chhûngin a then tûr a ni lo.

²⁰Amaherawhchu, a puhna a lo dik tak taka, nula thianghlim a nihzia fiahna tûr engmah a awm loh chuan,

²¹chû hmeichhia chu a pa kawtah an va hruai ang a, a pa ina a awm laia nawhchizuar ang maia a khawsaka, Israelte zînga mualphona thlentu a nih avângin, khuua mipate chuan lungin an

dêng hlum tûr a ni. Chutiang chuan in zînga thil tha lo chu in thianfai tûr a ni.

²²“Mipain pasal nei lai mi nu a mutpui lai man ni ta se, an pahnih chuan an thi tûr a ni—hmeichhe lo mutpuitu leh a mutpui hmeichhia chu; chutiang chuan Israelte zînga ta thil tha lo chu in thianfai tûr a ni.

²³Nula thianghlim, mi nupui hual tawh chu, miin khaw chhûngah a hmuha, a mutpui chuan,

²⁴an pahnihin kulh kawngka pâwnah in hruai ang a, lungin in dêng hlum tûr a ni, hmeichhia chu: khaw chhûnga awm si, a au loh avângin; mipa chu: a thenawm nupui a lo tlâwm avângin; chutiang chuan in zînga ta thil tha lo chu in dah bo tûr a ni.

²⁵“Mipain mi nupui hual ramhnuaiah a hmuha, a pâwngsuala a mutpui chuan, a pâwngsualtu mipa chauh chu a thi tûr a ni.

²⁶Hmeichhia chu engtin mah tih ve tûr a ni lo; nula chungah chuan thihna khawp sual a awm ve lo, chutiang chu, miin a thenawm a beih vak a, a that ang mai hi a ni.

²⁷Mipa khân ramhnuaiah mi nupui hual a tawng fuh a, a âu va; mahse tumah chhantu an awm si lo a ni.

²⁸“Mipain nula thianghlim, mi nupuia la hual loh chu man betin a mutpuia, hriat chhuah ni ta se,

²⁹a mutpuitu mipa chuan nula pa hnênah tangkarua sekel sawmnga a châwi ang a, a khawih chingpen tawh avângin nupuia a nei tûr a ni; a dam chhûngin a then thei lo vang.

³⁰“Tûmâ’n mahni pa te nupui neih tûr a ni lo, a pa khumpui pawh a hlîm lang tûr a ni hek lo.

BUNG 23

PUNGKHAWMHO ZINGA TEL LO TURTE

¹“Tilmu tihkeh tawh emaw, zahmawh tan te emaw chu LALPA mite inkhâwmnaah an tel ve tûr a ni lo.

²“Sâwn te pawh LALPA mite inkhâwmna zîngah an tel ve tûr a ni lo; an thlahte chhuan sâwmna thleng pawhin LALPA mite inkhâwmnaah an tel ve tûr a ni lo.

³“Amor mite, Moab mite chu LALPA mite inkhâwmnaah an tel ve tûr a ni lo; an thlahte chhuan sâwmna thleng pawhin LALPA mite inkhâwmnaah an tel ve tûr a ni lo,

⁴Aigupta aţanga in lo kal chhuah laia, chaw leh tuisik takngial pawh an pêk duh loh che u bâkah, nangmahni ânhhia lawh tûra Mesopotamia rama Pethor khuua mi, Beora fapa Balaama an rawih avângin.

⁵Mahse, Pathianin Balaama thú chu a ngaihsak duh lo va, LALPA in Pathianin a hmangaih êm che u avângin, chu ânhhia chu LALPA in Pathian chuan malsâwmnaah a chantîr ta zâwk a.

⁶Anniho nêna inremna leh an hamthatna chu in dam chhûngin in zawng tûr a ni lo.

⁷“Edom mite chu hnualsuat suh u, in unaute an nih hi. Aigupta mite pawh hnualsuat suh u, an rama in zu mikhual kha.

⁸Chhuan thum hnua an fa lo piangte chu LALPA mite inkhâwmnaah an tel thei tawh ang.

RIAHHMUN CHHÛNG VAWNFAI

⁹“In hmêlmate do tûra sipaiho an kal chhuah hunah, thil tha lo tinrêng lakah inthiarfhlîm ang che u.

¹⁰In zînga mipa tupawh zân lama amah a ţanga thil chhuak avânga bawhlhlawh awm ta se, riahbûk pâwnah a chhuak tûr a ni; a lo lût leh mai tûr a ni lo.

¹¹Tlai lam a lo nihin a inbual tûr a ni a; ni tlâk hnua riahbûkah a lo kîr thei ang.

¹²“Riahbûk pâwnah chuan inthiarna hmun in siam tûr a ni.

¹³In hmanraw hman tûr zîngah suahdûr nei ula, inthiarna tûr lei in lai khuar ang a, zunram in thiarin, leiin in vûr leh thîn tûr a ni.

¹⁴LALPA in Pathian chu in hmêlmâte laka chhanchhuak tûr che u leh, in kuta hlân tûrin in zîngah riahbûkah hian a lo tel zêl si a; chuvângin, in riahbûk chu a thianghlim tûr a ni, in zîngah thil thianghlim lo a hmuhin, a kalsan hlauh dah ang che u.

DÂN HRANG HRANG

¹⁵“Bâwih, a pu laka tlân bovin in hnên rawn pan sela, a pu hnênah in pekîr leh tûr a ni lo.

¹⁶In zîngah a khawsa ve ang a, awm nâna hmun remchâng a tih berah chuan awm rawh se; tinawmnah suh u.

¹⁷Israel fanute zîngah sakhaw thila nawhchizuar an awm tûr a ni lo; Israel fapate zîngah mawngkawhur an awm tûr a ni hek lo.

¹⁸Nawhchizawrh hlauh emaw, uicho man emaw chu intiamkamna thilhlân atân LALPA in Pathian inah in rawn keng tûr a ni lo, LALPA in Pathian ngaiha thil tenawm vê vê a ni si a.

¹⁹“In unaute hnênah pawisa emaw, ei tûr thil emaw, a pung nei thei tûr chi rêng rêng chu, a pung neiin in pûktîr tûr a ni lo.

²⁰Ram dang mite chu a pung neiin in pûktîr thei e, in chipuite lakah chuan a pung nên in la tûr a ni lo; tichuan, in va luah tûr rama in va luh hunah in kutkawih thil zawng zawngah LALPA in Pathianin mal a sâwm ang che u.

²¹“LALPA in Pathian hnêna intiamna in neihin, a rulh tlâk hun in tikhawtlai tûr a ni lo; LALPA in Pathian chuan a phût dâwn si che u a, in tân sual a lo ni dah ang e.

²²I intiam ve kher loh pawhin, i tân sual a ni lo vang.

²³Kâa in insawi bat tawh chu in hlen ngei tûr a ni, LALPA in Pathian hnênah mahni duhthu ngeia in intiamna a ni si a.

²⁴“In thenawmte grêp huana in luhin, duh tâwkin in ei thei ang, mahse iptêah chuan in ak haw tûr a ni lo.

²⁵In thenawmte lova in kalin, in kutin an buhvui dîng chu in thliak thei ang, mahse favah ruaiin in ât tûr a ni lo.

BUNG 24

INMÂK CHUNGCHANGA DAN

¹“Miin nupui a neiha, a nupui awm dânah thil fel tâwk lo a hmuh avânga a mit lung zo ta lo a nih chuan, inmâkna lehkha a ziahsak ang a, a pê ang a, a in a ţangin a chhuahtîr ang,

²a in a chhuahtîr tawh hnua, midang nupuia a awm leh hnua,

³a pasal hnunhung zâwkin lo lungten leh ta se, inmâkna lehkha ziahsakin, a in a tanga chhuahtîr emaw, a nih loh leh, a pasal hnunhung zâwk chu lo thi ta se,

⁴tihbawhlhlawh a nih tawh hnûah chuan, amah thentu a pasal hmasa khân nupui atân a la lêt leh tûr a ni lo; LALPA ngaihin thil tenawm a ni, LALPA in Pathianin luah tûra a pêk che u ramah hian thil sual in lalût tûr a ni lo.

DÂN HRANG HRANG

⁵Nupui nei hlim chu indonaah a kal ve tûr a ni lo va, mawhpurhna chi dang la tûr pawha phût loh tûr a ni; kum khat chhûng chu awm âwl sela, a nupui neih tâk nên hlim takin awm rawh se.

⁶Tuma'n buhherna lung chungnung zâwk emaw, a hnuaihnung zawk emaw chu, thil pûk dahkhamah a hrênsak tûr a ni lo, mi eizawna hrênsak a ni si a.

⁷Mi tupawhin a chipui Israel mi vêk rûin, tiduhdah se emaw, hralh ta se, chû mihring rutu chu a thi tûr a ni; chuvângin in zîng aţangin thil thalo chu in dah bo zêl tûr a ni.

⁸Phâr hri lakah fimkhur hle ula, Levia chî puithiamten tih tûr an zirtîr ang che u chu ngun takin zâwm rawh u; an hnêna thu ka pêk ang khân, fimkhur takin ti ang che u.

⁹Aigupta in rawn chhuahsanna kawnga LALPA in Pathianin Miriami chung a tih kha hre reng ang che u!

¹⁰I unau thil i pûktîrin, a dahkham tûr lâk tumin a inah va lût suh.

¹¹Nang chu pâwnah lo ding la, i thil pûktu chuan a dahkham tûr rawn la chhuak zâwk rawh se.

¹²Mi rethei tak a nih chuan, a dahkham tûr chu riahpui ngâl tum kher suh.

¹³A dahkham chu ni tlâk rualin in pe kîr leh ngei tûr a ni, tichuan ama puan ngei in a intuam lum ang a, mal a sâwm thei dâwn che u a ni; LALPA in Pathian ngaiha mi dik tak nihna a ni bawk ang.

¹⁴In hlawhfa chhawr lai, mi rethei leh tlachham tak chu, in chipui unau an ni emaw, in awmna rama chêng ve hnam dang pawh ni se, in hnuaichhiah tûr a ni lo.

¹⁵A retheiha, a rilru innghahna ber a nih avângin, a thawh ni lâ lân hlawh i pe tûr a ni, niin a tlâk hnan tûr a ni lo; chuti lo zawng, i laka a vui thû LALPA hnêna a au chhuahpui hlauh chuan, i tân sual a ni mai dâwn asin.

¹⁶Pate chu fate avânga tihhlum tûr an ni lova, fate pawh pate avânga tihhlum tûr an ni hek lo; mi tinin mahni sual an thihpui zâwk tûr a ni.

¹⁷Mikhual a nih vâng mai emaw, pa nei lo a nih vâng mai emawin an dikna tikhawlohsak suh; dahkham atân hmeithai thum lâksak suh.

¹⁸Aigupta ramah khân sal ve mai in ni a, LALPA in Pathianin chuta ta chu a tlanchhuak che u tih hi hre reng rawh u; chuvângin hêng thil ti tûr hian thû ka pê che u a ni.

¹⁹In lova buh in sengin, buhpah in lâk hmaihte chu la leh tûrin kîr suh u; mikhualte, pa nei lote, hmeithaite chan ve tûr a ni;

tichuan, LALPA in Pathianin in kutkawih tinrêngah mal a sâwm dâwn che u nia.

²⁰In olive rahzâr in khawn hnu chu khâwng nawn leh tawh suh u; mikhualte, pa nei lote, hmeithaite chan ve tûr a ni.

²¹In grêp huana mi in seng hunah, in lawh hmaihte te chu vâi nawn leh suh u, mikhualte, pa nei lote, hmeithaite chan ve tûr a ni e.

²²Aigupta ramah khân sal ve mai in ni tih hre reng rawh u; chuvângin hêng thil ti tûr hian thu ka pêk che u hi.

BUNG 25

UNAU LA DAM TANA NUPUI

¹Mi an inkhin buaia, rorêlna hmâa an lo kalin, rorêltuten ro an lo rêlsak ang a, mi dik thiam an chantîr ang a, mi sual chu thiam loh an chantîr tûr a ni a,

²misual zâwk chu vuak ngei âwm a nih chuan, rorêltu chuan a muttîr ang a, a thiltih sual nasat dân azirin, a mithmuh laiin, vuak zât tûr bithliahin a vuaktîr ang.

³Wawi sawmli thleng vuak theih a ni ang a, chu aia tam chu vuak tûr a ni lo; hei aia tama vuak a nih chuan, in unaupa chu in hmuha tihmualpho a ni mai dâwn a ni.

⁴Bâwngpain buh a chîl laiin a hmui in phuwar tûr a ni lo.

UNAU LA DAM TÂNÂ NUPUI

⁵Unau mipa chênggho zînga pakhat chu fa nei lovin thi ta se, thi taa nupui chuan an chhûngkaw laka mihrang daih a nei tûr a ni lo; a pasala unaupain nupuih a nei ang a, chû mi lakah chuan a pasala unaupa a nihna anga a tih tûr chu a ti tûr a ni.

⁶Hetianga hi a ni ang: fapa a hrin hmasak ber chuan a unaupa thi taa hming a pu tûr a ni, tichuan Israelte zînga a hming bo mai tûr chu a tungnung thei dâwn a ni.

⁷Amaherawhchu, a unaupa nupui a neih duh loh chuan, a unaupa nupui chu kulh kawngka bula khaw upate hnênah a kal ang a, 'Ka pasala unaupain a û tân Israelte zîngah chí a thlah duh lo va, ka pasala unaupain a tihtûr a ti duh lo ve,' a va ti tûr a ni.

⁸Khaw upate chuan ani chu an ko vang a, an sawipui tûr a ni. Mahse şan a khawh tlata, 'Ka nei duh lo ve,' a tih chuan,

⁹a unaupa nupui chu upate hmuh laiin a lo kal ang a, a pheikhaw chu a rawn hlihsak ang a, a hmaiha chîl a chhâk ang a, 'Mahni unaupa chhûngkaw dinsak duhlotu chu hetianga tih ni rawh se,' a ti tûr a ni.

¹⁰Israelte zînga a hming put tûr chu, 'Pheikhaw hlihsak chhûngkua,' tih a ni ang.

DÂN HRANG HRANG

¹¹Mi pahnih insual sela, pakhat zâwk nupui chuan a pasal chhan tuma rawn hnaihin, a sualpuipa serhah pawhsak se,

¹²chû nu kut chu in tansak tûr a ni; in khawngaihin tûr a ni lo.

¹³In iptêah bûklung inang lo, a zâng deuh leh a rit deuh in nei kawp tûr a ni lo.

¹⁴In inah pawh tehna no intiat lo, no lian deuh leh no tê deuh in kawp kawp tûr a ni lo.

¹⁵Bûklung dik leh ða leh tehna no dik leh ða in nei tûr a ni; tichuan LALPA in Pathianin a pêk che u ramah chuan in ðam chhûng ni a sei dâwn nia.

¹⁶Chutiang thil tih chîng, dik lo taka titute zawng zawng chu LALPA in Pathian laka tenawm an ni.

AMALEK-HO TIHBORAL TÛR

¹⁷Aigupta aţanga in lo chhuah laia Amalek hovin in chung a ni tihdân che u kha hre reng rawh u,

¹⁸kawnga in kal laia, hnung lam aţanga an rawn beih vak che u a, in haha in chauh laia, in zînga a hnukhâwia kal leh chau zual an rawn khawih dân che u kha; Pathian ðihna rêng an nei lo a nih kha.

¹⁹Chuvângin, LALPA in Pathianin luah tûra ram a pêk che u in thlen huna, LALPA in Pathianin in vêl zawng zawng in hmêlmâte laka a chawlh hahdamtîr hunah che u chuan, hêng Amalek-ho hi anmahni hriatrengna chawpin vân hnuai ata in nuai reh vek tûr a ni. In theihngihl tûr a ni lo.

BUNG 26

BUHTHAR LEH SAWMA PAKHAT

¹LALPA in Pathianin roluah atâna a pêk che u ram in va thlena, in luaha, awmhmun in benbel hunah,

²LALPA in Pathianin a pêk che u ramin a thar hmasak ðhenkhat chu bâwmah in dah ang a, LALPA in Pathianin a hming awm nâna hmun a ruatah chuan in kalpui tûr a ni.

³Chûng nîah te chuan puithiam hnênah kalin, ‘LALPA’N kan thlahtute hnêna pêk a tiam ram chu kan lo thleng ta tih wawiinah hian LALPA i Pathian hmâah ka puang e,’ in ti tûr a ni.

⁴Puithiam chuan in kuta bâwm chu a lo la ang a, LALPA in Pathian maichâm hmâah chuan a hûng ang.

⁵LALPA in Pathian hmâah chuan heti hian in ti tûr a ni: ‘Kan pu chu Suria mi a ni a, vâkvaia a thi mai tûr chu, Aigupta ramah mi tlêmtê hruaiin a chhuk thla a; chutah chuan hnam ropui leh chak tak, tam tak an lo ni ta a.

⁶Mahse, Aigupta hovin min tiduhdah a, min tirethei êm êm a, rim takin min chhawr ðhin a.

⁷Tichuan, min thlahtute LALPA Pathian chu kan au va, LALPA chuan kan au âw a lo hria a, kan hrehawmna te, kan thawhrimzia te, min rahbeh nasatzia te min hmu a.

⁸Tichuan, LALPA chuan a bân pharin, thil hlauhawm râpthlak tak takte, chhinchhiahna leh thilmak tak takte hmangin, a kut chak takin Aigupta aţangin min hruai chhuak a.

⁹Hê ram min pêk “khawizû leh hnute tua luang ram” hi min hruai thleng ta a;

¹⁰Aw LALPA, en teh hei, i ram min pêkin rah a chhuah hmasak chu kan rawn keng e,’ in ti ang. ‘Tichuan LALPA in Pathian hmâah in dah ang a, LALPA in Pathian chu chibai in bûk tûr a ni.

¹¹Tichuan, LALPA in Pathianin thil ða tinrêng a pêk che u avângin, in chhûngkuain, Levia mite leh in zînga mikhual awm ve te nên hlim takin in awm tûr a ni.

¹²“A kum thumna, sâwma pakhat pêk kuma in thar chhuah aţanga sâwma pakhat in pêk zawha—Levia chîte, mikhualte, pa nei lote leh hmeithaiten in awmna hmuna an lo ei ve tûr in pêk hnûah,

¹³LALPA in Pathian hnênah heti hian in ti tûr a ni: ‘I thupêk zawng zawng chu min hrilh ang zêlin, ka in aţangin sâwma pakhat thianghlim chu ka dah chhuak a, Levia chite, mikhualte, pa nei lote leh hmeithaite pawh ka pe tawh bawh a; i thupêkte chu ka bawhchhe lova, ka theihngihl hek lo.

¹⁴Chuta mi chu lusûn laiin kan ei lova, bawhlhlawh thilah kan hmang hêk lo va, mitthi pualah kan pe hek lo. LALPA kan Pathian âw chu kan zawm zêl a, i thu min pêk ang zêlin kan ti e.

¹⁵I awmna hmun thianghlim, vân aţang khân rawn thlîr la, kan thlahtute hnêna pêk i tiam ram “khawizû leh hnute tua luang ram” leh, i mi Israelte hi malsâwm ang che,’ in ti tûr a ni.

LALPA MI BÏKTE

¹⁶“Vawiinah hian LALPA in Pathianin hêng dân leh rorêlnate hi zâwm tûrin thû a pê che u a; chuvângin in thinlung zawng zawng leh in nundân zawng zawng a zâwm tûrin fimkhur rawh u.

¹⁷Vawiinah hian LALPA chu in Pathianah in pawm nghet ta a; chuvângin a kawng te in zawh zêl ang a, a dân te, a thupêk te, a rorêlnate leh a âw te in zâwm tlat tûr a ni.

¹⁸Vawiinah hian LALPA pawhin a tiam tawh che u angin, ama mi bîk atân a pawm nghet ta che u a; chuvângin a thupêk zawng zawng in zâwm ang a,

¹⁹a lo tiam tawh che u angin, LALPA in Pathian tâna hnam thianghlim ni tûrin, hnam a siam ho zawng zawng chung daihah fakawm, hmingthâ leh chawimâwina dawng tlâk tûrin a chawisâng ang che u.”

BUNG 27

DAN, LUNGPHÊKA ZIAH

¹Mosia leh Israel upate chuan mipuite chu thû an pê a: “Vawiina thupêk kan hrilh zawng zawng che u hi zâwm rawh u.

²LALPA in Pathianin a pêk che u rama lût tûra Jordan in kai nîah chuan lung lian pui pui chher ula, chinaiin zût mâm rawh u.

³Chûngah te chuan hêng dân thûte hi in ziaik tûr a ni; tichuan, LALPA in Pathianin in thlahtute hnêna a lo tiam tawh angin, lui in kai zawhah chuan ‘khawizû leh hnute tua luang ram,’ LALPA in Pathianin a pêk che u chu in lût thei dâwn nia.

⁴Jordan râl in kai hnuah, chûng lung chu Ebal Tlâng chhîpah phun ula, wawiina thû kan pêk che u ang hian, chinaiin in zût tûr a ni.

⁵Chutah chuan LALPA in Pathian tân maichâm, lung maichâm in din tûr a ni; thîr hmanrua engmah in hmang tûr a ni lo.

⁶Lung chher lohîn LALPA in Pathian tân maichâm in din tûr a ni a, chutah chuan LALPA in Pathian hnênah hâlral thilhan in hlân tûr a ni.

⁷Remna inthâwina in hlân ang a, chutah chuan LALPA in Pathian hmâah chuan in ei ang a, hlim takin awm ang che u.

⁸Lungah te chuan hêng dân thûte hi fiah takin in ziaik tûr a ni.”

⁹Mosia leh puithiam Levia chite chuan Israel mi zawng zawng hnênah, “Aw Israel mite u, lo ngaithla ula, ngaihven teh u: Vawiinah hian LALPA in Pathian mite in lo nih tâk hi.

¹⁰Chuvângin, LALPA in Pathian thû chu âwih ula, a thupêk te, a dân thû vawiina kan hrilh ang che u hian zâwm rawh u,” an ti a.

EBAL TLÂNG AṬANGIN ÂNCHHIA

¹¹Chumi ni vêk chuan Mosian mipuite chu thû a pê a,

¹²“Jordan lui in kai hnûah mipuite malsâwm tûrin hêng nhamte hi Gerizim Tlângah an ding ang: Simeona te, Levia te, Juda te, Isakara te, Josepha leh Benjamina hnam te an ni a;

¹³ânhche lawh tûrin hêng nhamte hi Ebal Tlângah an ding ang: Reubena te, Gada te, Asera te, Zebuluna te, Dana leh Napthalia hnam te an ni.

¹⁴“Levi nhamte chu aw ring taka auvin Israel mi zawng zawng hnênah:

¹⁵“LALPA tâna thil tenawm milim ker leh chhûn, mi themthiam kutchhuakte a rûka lo kawltu chuan ânhchia dawng rawh se,’ an ti ang a. Mipui zawng zawngin, ‘Amen!’ an lo ti tûr a ni.

¹⁶“A nu leh a pa hmusittu chuan ânhchia dawng rawh se,’ an ti ang a. Mipui zawng zawngin, ‘Amen!’ an lo ti tûr a ni.

¹⁷“A thenawm ramri sawntu chuan ânhchia dawng rawh se,’ an ti ang a. Mipui zawng zawngin, ‘Amen!’ an lo ti tûr a ni.

¹⁸“Kawng dik lova mitdel kaltîrtu chuan ânhchia dawng rawh se,’ an ti ang a. Mipui zawng zawngin, ‘Amen!’ an lo ti tûr a ni.

¹⁹“Mikhual te, pa nei lote leh hmeithai te dikna tikhawlohsaktu chuan ânhchia dawng rawh se,’ an ti ang a. Mipui zawng zawngin, ‘Amen!’ an lo ti tûr a ni.

²⁰“Mahni pate nupui lo mutpuitu chuan ânhchia dawng rawh se, a pa khumpui a hlîmsak si a,’ an ti ang a. Mipui zawng zawngin, ‘Amen!’ an lo ti tûr a ni.

²¹“Ran pâwltu chuan ânhchia dawng rawh se,’ an ti ang a. Mipui zawng zawngin, ‘Amen!’ an lo ti tûr a ni.

²²“A farnu, mahni pa fanu emaw, mahni nu fanu emaw mutpuitu chuan ânhchia dawng rawh se,’ an ti ang a. Mipui zawng zawngin, ‘Amen!’ an lo ti tûr a ni.

²³“Mahni pizawn mutpuitu chuan ânhchia dawng rawh se,’ an ti ang a. Mipui zawng zawngin, ‘Amen!’ an lo ti tûr a ni.

²⁴“Arûka mahni thenawm bei vaktu chuan ânhchia dawng rawh se,’ an ti ang a. Mipui zawng zawngin, “Amen!’ an lo ti tûr a ni.

²⁵“Pawi sawi lo thah nâna thamna latu chuan ânhchia dawng rawh se,’ an ti ang a. Mipui zawng zawngin, ‘Amen!’ an lo ti tûr a ni.

²⁶“Hêng dân thu zâwm duh lo chuan ânhchia dawng rawh se,’ an ti ang a. Mipui zawng zawngin, ‘Amen!’ an lo ti tûr a ni.

BUNG 28

THUAWIH MANHLA ZIA

¹“LALPA in Pathian thu hi thahnemngai taka in âwiha, a dân thupêk vawiina ka pêk zawng zawng che u hi fimkhur taka in zawm chuan, LALPA in Pathianin leia hnam zawng zawng chungah a châwisâng ang che u.

²LALPA in Pathian thû in âwih phawt chuan, hêng malsâwmna zawng zawngte hian a ûmpa ang che u a, a vûrin a vûr ang che u:

³Malsâwmna chuan khaw chhûng leh pâwn thlengin a vûr zêl ang che u.

⁴Malsâwmna in dawn tûr chu fanau neihnaah te, in huanthlai thar hlâwk lamah te, in bâwng rual leh berâm rual lo pung chho zêlah te a ni ang.

⁵In buhzêm leh chaw bêl thlengin mal a sâwm ang.

⁶In kal chhuak te chu malsâwm in awm ang a, in lo haw lam pawh malsâwm bawkin in awm ang.

⁷LALPA chuan nangmahni dotu in hmêlmâte chu a hnehtîr ang che u a; nangmahni bei tûr che u-in kawng khatah an lo kal ang a, kawng sariyah an tlânchhia ang.

⁸“LALPA chuan in buh inah te, in kutkawih tinrêngah te malsâwm tûrin thû a pê ang a, LALPA in Pathianin a pêk che u ramah chuan mal a sâwm dawn che u nia

⁹LALPA in Pathian thupêkte in zawm a, a kawngte in zawh chuan, in hnêna a lo tiam tawh angin, LALPA chuan hnam thianghlamah a din nghet ang che u.

¹⁰Leia hnam zawng zawngten LALPA hminga koh ngei in ni tih an hmû ang a, an hlau ang che u.

¹¹LALPA chuan in thlahtute hnêna pêk che u a lo tiam ramah chuan fanaute, ran rual te, buh leh bâl te a neihhtîr t̄euh ang che u a, thil t̄ha tinrêngin a vûr ang che u.

¹²LALPA chuan in kutkawih tinrêng malsâwm tûrin, vâna a robâwm t̄ha t̄ha churawn hawngin, a hun takah ruah arawn s̄urt̄ir t̄hin dawn a ni. Hnam tam tak in p̄ukt̄ir ang a, nangni chuan in p̄uk ve lo vang.

¹³LALPA chuan a mei lam ni lovin, a lû-ah a siam ang che u; LALPA in Pathian thupêk, vawiina ka hrilh che u hi in ngaihsaka, fimkhur taka in zawm phawt chuan, a hnuaihnung lama awm lovin, a chungnungah zêl in awm ang.

¹⁴Chuvângin, vawiina thu ka pêk che u hi, pathian dangte rawngbâwl tûrin, ding lam leh vei lamah in pên bosan tûr a ni lo.

THUÂWIIH LOH RAH

¹⁵“Amaherawhchu, LALPA in Pathian thû in awih lohva, a thupêk leh a dân thû vawiina ka hrilh che u hi fimkhur taka in âwih duh loh chuan, hêng ânhchiate hi in chungah a lo thleng ang:

¹⁶“Khawchhûngah pawh, ram lamah pawh ânhchia in dawng ang.

¹⁷In buhzêm leh in chaw bêl thlengin ânhchia in dawng ang.

¹⁸In fanau te, in huanthlai te, in bâwng rual leh berâm rualten ânhchia an dawng ang.

¹⁹In kal chhuak te chuan ânhhia in dawng ang a, in lo hâu lam pawhin ânhhia bawk in dawng ang.

²⁰Kei mi kalsana, suaksual taka in tih avângin, chhiatna leh boral thutna in tawh thlengin LALPA chuan in kutkawih tinrêngah ânhhia te, buaina te, inhauhna te arawn thlen ang.

²¹In luah tûr ram ațanga in boral vek thlengin LALPA chuan hrichhia a veitîr reng ang che u.

²²Ngawr natna te, khawsik te, vûng te, khawsik sa huam huam te, khandaih te, khawkhêng te leh hmuar hrîtein LALPAN a hrem ang che u a; in ral vek thlengin a ûmzui zêl ang che u.

²³In lu chung vânte chu dâr a ni ang a, hnuai lam lei chu thîr a ni ang.

²⁴LALPA chuan ruah chu lei nâwi leh vaivutah a chantîr ang a; in boral vek thlengin vân ațangin arawn surtîr mai ang.

²⁵LALPA tirhin in hmêlmate chuan an sawp hrep tîin ang che u a; anmahni do tûrin kawng khatah in kal ang a, an hmâah chuan kawng sariyah in tlânchhia ang; leia lalram zawng zawng chawkbuaiteu lek in ni ang.

²⁶In ruangte chu chunglêng savate leh ramsate tân chaw mai a ni ang a, tuma hnawhkan rual an ni lo vang.

²⁷LALPA chuan Aigupta-ho vei tîin tihdam theih loh khawihlî te, ngâwt te, pânchhia te, uithak te a veitîr ang che u.

²⁸LALPA chuan âtna te, mitdelna te leh rilru buaina tein a hrem ang che u.

²⁹Mitdelin thimtham zînga a dap tîin angin, chhûnah pawh in dap in dap ang a; engahmah hmuîngîl lovin, mite rahbeh leh rawk in tâwk reng ang a, tuma'n an chhan chhuak lo vang che u.

³⁰Nupui in hual vê te pawh mi dangin an mutpui mai mai ang; in in sa ang a, in luah leh si lo vang; grêp huan in siam ang a, a rah in seng lo vang.

³¹In hmuh lai ngeiin in bâwngpate chu an talhsak ang che u-a, a sâ ei tûr pawh in chang lo vang; in sabengtungte chu in hmuh laiin an chhuhsak ang che u a, an pe kîr leh lo vang che u; in berâmte chu in hmêlmâte an pê ang a, tuma'n an hmuh lêtsak lo vang che u.

³²In fapate leh in fanute chu midang hnênah thawn bo an ni ang a, anmahni ngaiin nilêng lêngin, mitvai khawpa thlîrin in dâkfân reng ang a; in kut te pawh a zawi zo vek ang.

³³Hah taka in thawh chhuah sa in rama thil rahte chu in la hriat ngai loh hnamin an ei zawhsak ang che u-a, an tiduhdahin an rapbet tlawk tlawk ang che u.

³⁴Chûng thilte chu in hmuh ngawt pawhin in ât phah hial ang.

³⁵LALPA chuan in khûpah leh in kêah te, in kephah ațanga in chhîp chhuakin khawihli nasa leh dam thei lo a bawm khahtîr reng ang che u.

³⁶LALPA chuan nangmahni leh in lal chawpin, in thlahtute pawhin an la hriat ngai loh hnam hnênah a hruai bo ang che u-a, chuta in rawngbâwsak tûrte chu—thing leh lung pathian mai a ni ang.

³⁷LALPAN a hnawh bona che u rama mite mak tih huai huaiin, mi kamchhe tleuh nân, thil chhe lam entir nân an hmang dâwn

che u a ni.

³⁸In lovah buhchî tam tak in feh chhuahpui ang a, mahse buhseng tûr in nei tlêm hle ang; khaukuap chaw mai a nih dawn avângin.

³⁹Grêp huan siamin, uluk takin in enkawl ang a; a rah seng tûr leh uain in tûr in nei chuang lo vang; ngêtin a ei zo vek dâwn si a.

⁴⁰Olive kûng chu in ram pumah duah hluah hluah mahse, hriak hnawih tûr takngial pawh in nei lo vang; olive rahte chu a tîl zo mai dâwn si a.

⁴¹Fapate, fanute in hring ang a, mahse in tâ an ni lo vang; sala tâng tûr mai an la ni dâwn si a.

⁴²In thei kûngte leh in rama thlai dangte chu khaukuapin an ei kawlh vek ang.

⁴³In zînga hnam dang awmte chu an sâng tual tual ang a, nangni erawh chu in hniam tial tial ang.

⁴⁴An pûktîr ang che u-a, nangni erawh chuan in pûktîr ve thei lo vang; anni chu a lu lamah, nangni a mei lamah in țang zêl ang.

⁴⁵Hêng ânhhia zawng zawng hi in chungah a lo thleng ang; in chhiat zawh rak thlengin a ûmzuiin, a nangchîng ang che u; LALPA in Pathian thu in awih lohva, a thupêkte leh a dân thu zâwm tûra ka hrilh che u in pawm duh loh avângin.

⁴⁶Hêng hi nangni chungah leh in thlahte chungah pawh, kumkhua atân chhinchhiahna leh thilmak a ni ang.

⁴⁷Engkim in ngah chung pawha thîlung hlim leh lâwma LALPA in Pathian rawng in bâwl loh avângin,

⁴⁸rlîâm leh chhâwlhâl êm êmin, saruak leh engkim tlachham ngawih ngawih chungin LALPAN arawn tîrh tûr in hmêlmate rawng chu in la bâwlsak ang a; a tihboral tîak thleng che u in in nghâwngah thîr kawl a bahtîr ang che u.

⁴⁹LALPA chuan ram hla tak, kâwlkil tâwp ațangin nangmahni do tûrin hnam chak tak, an țawng pawh in hriat loh chu, mupui thlâwk anga chakin arawn tîr ang a,

⁵⁰chûngho chu tar te pawh zah nachâng hre lo, naupangte pawh dîm chuang lo, hnam kawlhseu pui pui an ni ang.

⁵¹In ran vulhte, in buhbâlte chu in boral vek thlengin an ei kawnkâwsak vek ang che u-a; an tihboral vek hma che u chu in buh te, in uain te, in hriak te, in bâwngte leh in berâm te an zuah lo vang.

⁵²In rinpui ber in kulh sâng te a chim vek thlengin in ram puma in kulh kawngka zawng zawngah an hual bet ang che u a; LALPA in Pathianin a pêk che u in ram puma in kawngka zawng zawngah an kalh khung vek ang che u.

⁵³In hmêlmaten an hual che u-a, mangang taka an dan chêp hunah che u chuan, in mangang chuan LALPA in Pathianin a pêk che u in fa hrin ngei, in fapa sate, in fanu sate in la ei hial dâwn a ni.

⁵⁴In zînga mi fîng leh ngilnei ber pawhin a unaupa te, a nupui pawm lai te, a fa la dam chhunte pawh a la huphurh hial ang a,

⁵⁵a fate sâ a ei tûr pawh tumah a pe vê phal lo vang; in hmêlmaten an hual che u-a, in kawngka zawng zawng an danbeh avânga nasa taka in mangan dâwn avângin.

⁵⁶In zînga nu zaidam leh mi lainat thei ber, lei pawh rap ngai lo khawpa awm no thîn pawhin, a pasal pawm lai leh a fanu leh fapate pawh a huphurh ang a,

⁵⁷a nau hrin leh ama chhûl inngâk lo chhuak sâ te chu a pe vê phal lo vang a, a rûkin a ei ang; chuti khawp chuan in hmêlmaten in kawngka zawng zawng an dan chah vek laia, ei tûr tlâkchham avânga in mangan dân tûr chu a ni.

⁵⁸“Hê lehkhahua dân ziaik zawng zawng fimkhur taka in zawm lohva, LALPA IN PATHIAN hming ropui leh tihbaiawm hi in zah loh chuan,

⁵⁹LALPAN nangni leh in thlahte chungah hri râpthlak pui pui–natna tawrhlelhawm leh daih rei chí arawn thlen ang.

⁶⁰Chûng bâkah in hlauh êm êm Aigupta-ho natnate kha arawn thlentîr baw ang a, a thlah leh tawh mai mai lo vang che u.

⁶¹He Dân Bua ziaik loh natna leh hri chhe tinrêng chu in boral thlengin LALPAN in chungah arawn thlentîr baw ang.

⁶²Vâna arsi ang maia tam thîn kha, LALPA in Pathian thu in âwih loh avângin, a dam chhunte chu mi tlêmtê chauh in ni ang.

⁶³LALPAN in tân thil tha tihsaka, tihpun zêl che u hi nuam a ti ang bawkin, LALPA chuan nangni tihchhiat veka, engmah lova siam che u hi nuam a ti ve mai dân a ni; in luah tûr ram aţanga hnawh bo daih in ni baw ang.

⁶⁴“LALPA chuan kâwlkil aţanga kâwlkil lehlam thlengin, hnam tin zîngah a tidarh ang che u-a; chûngah te chuan in pi leh pute pawhin an la hriat loh pathian dang, thingbul lungbul in la bia ang.

⁶⁵Chûng hnam zîngah chuan chawlh hahdamna in hmu lo vang a, ke nghahchhan takngial pawh in nei lo vang; chutah chuan LALPAN hlauthâwng rêng rêngin, mitvai ruaiin, rilru na ngawih ngawihin a siam ang che u.

⁶⁶Thih hlau rêng rêngin in awm ang a; chhûn in hlau ang a, zân in hlau baw ang a, in dam zêl dân nge dân lo tih pawh in hre lo vang.

⁶⁷In mitin thil a hmuhte avâng leh, hlauhna in thauvah a man tlat avângin, zîng a lo nihin, ‘Tlai ni tawh sela âw!’ in ti ang a; tlai a lo nihin, ‘Zîng ni tawh sela âw!’ in la ti ang.

⁶⁸LALPA chuan Aigupta ram, ‘In hmu leh tawh ngai lo vang,’ tia ka lo sawi tawh kawngah khân, lawngin a hruai kîr leh ang che u. Chutah chuan in hmêlmate bâwihnu leh bâwihpa atân zawrh in ni ang a, mahse tuma’n an lei duh lo vang che u,” a ti a.

BUNG 29

MOAB-AH THUTHLUNG TIHTHAR

¹Horeb tlânga an hnêna thu a thlun tawh bâkah, Moab rama Israel fate hnêna a thuthlung, LALPAN Mosia a pête chu hêngte hi a ni.

²Mosia chuan Israel mi zawng zawng a ko khâwm a: “LALPAN in mithmuha Aigupta rama Pharoa leh a chhiahhlawh zawng zawng leh a ram puma a thiltihte in hmuh kha–

³fiahna ropui te, chhinchhiahnate leh thilmak tak tak in mit ngeiin a hmu a.

⁴Amaherawhchu, LALPAN hriatthiamna thinlung te, hmuh theihna mit leh hriat theihna beng te chu waviin thlengin a la pe lo che u a.

⁵Thlâlêrah kum sawmli lai ka hruai che u a. In kawrte pawh in ha chul lo va, in kêa pheikhawkte pawh in bun chul hek lo.

⁶Kei hi LALPA in Pathian ka ni tih in hriat theih nân, chaw pawh in la ei lo va, uain leh zu chi dang te pawh in la in hek lo.

⁷Hê hmun in lo thlen khân, Hesbon lal Sihona leh Basan lal Oga ten min do tûrin anrawn thawk a, kan lo hneh ta a.

⁸An ram kan lâksak a, Reubena thlah te, Gada thlah te leh Manase hnam zahvê te luah tûrin kan pê a.

⁹Chuvângin in thiltih apianga in hmuingîl theih nân, hê thuthlung ang hian ti ula, vawng tlat rawh u.

¹⁰“Vaviinah hian in zavaiin LALPA in Pathian hmâah in ding a nih hi: hnam hruaitute leh upate, hotute leh Israel mipa zawng zawng te,

¹¹in fanaute leh in nupuite–in zînga awm ve hnam dang te, in thing kittu leh in tui chawitute nê–

¹²LALPA in Pathianin waviina a siam a thuthlungah leh a thutiama in luh theih nân,

¹³in thlahtu Abrahamate, Isaaka te, Jakoba te leh in hnêna a lo tiam tawh anga, ama mi in nihna chu a tinghet ang a; tichuan amah pawh in tân Pathian a ni ang.

¹⁴“Hê thuthlung leh hê chhechhamna hi nangni nê chauhva siam a ni lo,

¹⁵vaviina kan zînga LALPA kan Pathian hmâa ding ve te leh waviina kan zînga tel ve lote nê

¹⁶(Aigupta rama kan awm dân te leh kanrawn pal tlang hnamte kha in hre si a;

¹⁷an thiltih tenawm tak takte in hmuh kha, chûng zîngah chuan thing te, lung te, silvâr te leh rangkachaka siam pathian limte a ni a);

¹⁸chuvângin in zîngah hian mipa emaw, hmeichhia emaw, chhûngkua emaw, a hnam pum emawa LALPA kan Pathian hawisanna thinlung pu an awm loh nân te, hêng hnamte biak thîn pathiante lam hi tuma’n kan hawi lohva, in zîngah hian thil khâ emaw, khâkna zung emaw a lo chawr chhuah loh nân;

¹⁹hêng ânchhiate hi miin a hriat hnu pawha, ‘Ka duh dânin awm zêl mah ila, ka him tho vang,’ tia mahni inhnêm chawp te hi kan lo awm palh ang e– chuti tih chu mi harhfimte zînga zu ngawlvei tel ve tum ang chauh a ni ang.

²⁰LALPAN a zuah hauh lo vang; chutiang mi chungah chuan LALPA thikthu leh thinurna chu a puakkeh ang a, hê dân bua inziak ânchhia zawng zawng hian chû mi chu a tlâkbuak ang a, vân hnua aţangin a hming chu LALPAN a thai bo vang.

²¹He Dân Bua ziaik ânchhe thuthlung zawng zawng khum tûrin chu mi chu LALPAN Israel hnam zawng zawng atâ a tihrang daih ang;

²²tichuan, nangni hnua tţangthar lo la chhuak tûr te, ram hla tak aţanga ramdang mi lo la kal tûrten, LALPAN hrî leh natna a thlentîr tih anrawn hmuhin:

²³Ram pum chu kât te, chi te leh kângvâpin a khat a; LALPA thinurna leh thinrimnain Sodom leh Gomorra te, Adma leh Zeboiim te a tihchhiat ang maiin, thlai chinna tlâk loh, hnim pawh to theih lohnaah a chang ta,' an la ti ang.

²⁴Hnam tinte chuan, 'Engtizia nge LALPAN heti taka hê ram chungah kut a thlâk mai le? Hê thinurna kângmei nasa tak awmzia hi eng nge ni ngai le?' an ti ang.

²⁵Mite chuan heti hian an la ti ang: 'Aigupta ram atanga a hruai chhuah laia, an thlahtuten LALPA Pathian thuthlung an phatsan tak vâng a nih hi;

²⁶an hriat ngai loh pathian dang an biak vâng a ni a, Anin a pêk pawh ni lo pathian dangte rawng an bâwlsan vei a.

²⁷Tichuan, hê lehkhahua inziak ânhche tinrêngin a tlâkbuak theih nân, hê ram chungah hian LALPA thinurna chu a lo puakkeh ta a nih hi.

²⁸LALPA lungawi lo chuan thinrim êm êmin, thinur chungin an ram ata a phih chhuak a, tuna an awmdân ang hian, ram dangah a paih chhuak ta daih a ni,' an la ti dawn a ni.

²⁹Thurûkte chu LALPA kan Pathian tâ a ni a, puan chhuah tawhte erawh chu keimahni leh kan thlahte tân a ni ve thung, kumkhuaa hê dân thû zawng zawng kan zawm theihna tûrin," a ti a.

BUNG 30

PATHIAN LAM HAWI A MANHLA

¹Hêng thil zawng zawng, mal sâwmna leh ânhchia in hmâa ka dah hi, in chungah a lo thlena, LALPA in Pathianin a hnawh bona che u hnam tin zînga in awmnaah in inhriatchhuah leh a,

²LALPA in Pathian lam in lo hawi leha, vawiina ka hrilh che u ang taka nangni leh in fate nê, in thinlung leh in thlarau zawng zawnga a thû in âwih chuan,

³LALPA in Pathianin a khawngaih ang che u a, a tihdarhna hnam tin atângin a hruai khâwm leh ang che u a, in saltânna atângin LALPA in Pathian chuan a hruai kîr leh ang che u.

⁴Vân hnuai hmun hla bera hnawh bo tâwk in zîngah lo awm se, chuta ta chu LALPA in Pathianin a hruai khâwm leh ang che u-a, chuta ta chu a hruai kîr leh ang che u.

⁵In thlahtuten an luah ramah hian LALPA in Pathian chuan a hruai hâw leh ang che u-a, in nei leh ang a. In thlahtute ai maha tamin a tipungin a tihmuingîl ang che u.

⁶Dam taka in awm zêl theih nân, LALPA in Pathian chu in thinlung zawng zawng leh in thlarau zawng zawnga hmangaih thei tûrin LALPA in Pathian chuan in thinlung leh in thlahte thinlung serh a tansak ang che u.

⁷LALPA in Pathian chuan hêng ânhchia zawng zawng hi nangmahni hawtu leh tiduhdahtu in hmêlmâte chungah a dah zâwk dawn asin.

⁸Nangni chuan a thupêk zawng zawng zawm tûra vawiina ka hrilh ang che u hian LALPA thu in âwih tawh dawn a ni.

⁹LALPA in Pathian chuan in kut hnathawh tinrêng te, in chithlah te, in ranvulh te leh in thlai tharte chu nasa takin a tipung

hlen tawh ang. In thlahtute chungah a lâwm angin LALPA chu in chungah a lâwm hlen tawh bawh ang;

¹⁰LALPA in Pathian chu in thinlung zawng zawng leh in thlarau zawng zawnga a thû in âwih a, a lam in hawi chuan, hê Dân Bûa inziak ang a thupêkte, a dân thûte chu in zâwm tûr a ni thung.

THIH NGE DAM THLANG RAWH

¹¹Hê thupêk vawiina ka pêk che u hi in tân a har lutuk lo va, ban phâk loh pawh a ni hek lo.

¹²Vâna mi pawh a ni lo, ni se, 'Tu nge vânah lâwn chho vang a, kan lo hriata kan lo zawm theih nân tûn nge min rawn lâksak ang?' in ti ang.

¹³Tuipui râl daih mi pawh a ni lo, ni se, 'Tu nge tuipui râlah kal ang a, kan lo hriata kan lo zawm theih nân tûn nge min rawn lâksak ang?' in ti ang.

¹⁴Thû chuan a hnaih a che, i zawm mai tûrin i kâah leh i thinlungah a awm ta.

¹⁵Khai le, in hmaah nunna leh thatna, thihna leh chhiatna ka dah e,

¹⁶dam taka in awma, in lo pun zêl theih nân LALPA in Pathian chu hmangaih ula, a kawng te chu zawh ula, a thupêkte, a dân thute leh a rorêlna thute chu zâwm rawh u; tichuan in luah tûr ramah LALPA in Pathianin mal a sâwm ang che u.

¹⁷Mahse, in thinlungin khaw dang a hawia, in ngaihlâk duh lohva, in pên bova, pathian dangte chibai bûka an rawng in bâwl chuan,

¹⁸in boral phah ngei ang tih vawiinah in hnênah ka puang a ni; Jordan lui kâna luah in tum ramah hian in dam rei bawh hek lo vang.

¹⁹In hmâah nunna leh thihna, malsâwmna leh ânhchia ka dah tih hriatpuitu atân lei leh vân ka sâwm a ni; chuvângin nangni leh in thlahte in dam zêl theih nân, nunna chu thlang rawh u;

²⁰tichuan, LALPA in Pathian chu in hmangaih thei ang a, a thu âwihin, amah chu in vuan tlat thei dawn a ni, amah chu in nunna leh in damreina a ni si a; tichuan, in thlahtu Abrahama te, Isaaka te leh Jakoba te hnêna pêk a lo tiam ramah chuan in awm reng thei dawn nia," a ti a.

BUNG 31

JOSUA - ISRAELTE HRUAITU THAR

¹Mosia chuan Israel mi zawng zawng hnênah chûng thû chu a sawi a.

²An hnênah: "Vawiinah hian kum za leh sawmnhniha upa ka lo ni ta a. Duh ang pawhin ka lûtin ka chhuak vâk thei ta lo va. LALPAN ka hnênah, 'Hê Jordan lui hi i kai ve tûr a ni lo,' min ti si a.

³Amah LALPA in Pathian ngei chu in hmâah a kai tawh e; hêng hnamte hi in hmâah a tihboralsak ang che u-a, in luahlân dawn a ni. LALPA sawi angin in hmâah Josua hian a kai dawn e.

⁴LALPAN Amor-ho lal Sihona leh Oga te leh an ram a tihchhiat ang mai khân, anni chungah pawh a ti ve ang.

⁵Thupêk zawng zawng ka hrilh che u anga an chungah in tih theih nân, LALPAN anni chu a pê ang che u.

⁶Chak tak leh huai takin awm rawh u, anni chu hlau suh ula, zâm hek suh u. LALPA in Pathian chu in zîngah a tel ve si a. A kalsan lo vang che u-a, a thlahthlam hek lo vang che u,” a ti a.

⁷Mosia chuan Israel mi zawng zawng hmuhah Josua chu a ko chhuak a, a hnênah, “Chak tak leh huai takin awm rawh, hêng mipuite hi an thlahtute hnêna LALPAN pêk a tiam ramah chuan i hruai lût tûr a ni, anniho hi luahtîr ngei ang che.

⁸I hmaa kal chu LALPA a ni si a. A awmpui zêl ang che. A thlahthlam lovang che a, a kalsan tawp lo vang che; hlau suh la, zâm hek suh,” a ti a.

KUM SARIH DÂNA DÂN BU CHHIAR CHHUAH

⁹Mosia chuan hê dân hi lehkhabuah a ziaak a, puithiam Leviah, thuthlung bâwm zâwn tute hnênah leh Israel upa zawng zawngte hnênah a hlân ta a.

¹⁰Mosia chuan thû a pê a: “Kum sarih tâwpna zêlah, leiba ngaihdamna atâna hun ruatah, Biakbûk Kût laiin,

¹¹LALPA in Pathianin hmun a ruatah, a hmaa Israel mipui zawng zawng an rawn inlan laiin, hê dân bu hi Israel mi zawng zawng hriatah in chhiar thîn tûr a ni.

¹²Mipui ko khâwm ula, ahmei apain, nunaute leh, in zînga awm ve nham dang tel ve pawhin an lo hriata, LALPA in Pathian tîh dân an lo zir theih nân leh, hê dân thû hi fimkhur taka an zawng theih nân te,

¹³engmah la hre ve lo an tû leh fate pawhin an lo hriata, Jordan lui kâna in va luah tûr ramah chuan in dam chhûnga Pathian tîh dân in lo zir theih nân ngaithla vek rawh se,” a ti a.

ISRAELTE HEL TÛR HRILH LÂWKNA

¹⁴LALPA chuan Mosia a bia a, “Khai le, i thih hun a lo hnai ta a; Josua ko la, biakbûk chhûngah rawn inlan vê vê rawh u, mawhphurhna ka lo hlân tawh ang e,” a ti a. Tichuan, Mosia leh Josua chu biakbûkah chuan an va inlan ta a.

¹⁵Biakbûkah chuan LALPA chu chhûm dingah a rawn inlâr a, biakbûk kawngkaah chuan chhûm chu a ding ta luah a.

¹⁶LALPA chuan Mosia hnênah: “Khai le, nang chu i thlahtute hnênah i châwl dâwn ta si a; hêngho hian an va kalna tûr ramah chuan pathian dangte biain min uirêsan ang a, anmahni nêna ka thuthlung siam chu an bawhchhia ang.

¹⁷Chutih hunah chuan an lakah ka thinrim a puakkeh ang a, an lakah ka hmêl thupin ka hawisan ang a, an ral duak duak ang. Buaina leh thil tha lovin a tlâkbuak ang a, ‘Kan zîngah Pathian a awm tâk loh avângin hêng thil tha lote hi kan chungah a lo thleng a ni lo’ m ni?’ an la ti ang.

¹⁸Thil tha lo tak tak an ti a, pathian dangte lam an hawi tâk avângin an lakah ka hmêl ka thup dâwn a ni.

¹⁹“Tichuan, he hlâ hi ziaak chhuak la, Israel fate zirtîr ang che; Israel fate sualna mi hriatpuitu atân an kâah dah bawh ang che.

²⁰An thlahtute hnêna ka lo tiam khawizu leh hnute tuia luang ram ka hruai thlen hunah, tlai puara an awma, an thau mûm tul hunah chuan pathian dangte lam hawiin, an rawng an la bâwl ang

a; min tithinur tûrin ka thuthlung an bawhchhia ang.

²¹Buaina leh thil tha lo tam takin a tlâkbuak hunah, hê hla hi thuhretûah a tang dâwn a ni; an thlahte pawhin an theihngihl dâwn si lo va, pêk ka tiam ram ka hruai thlen hmâ pawh hian, tûna an rilru put dân a tang hian hai rual a ni si lo va.

²²Mosia chuan chumi ni chuan hlâ chu a ziaak chhuak a, Israel fate a zirtîr hlawm a.

²³Nuna fapa Josua chu mawhphurhna a hlân a, “Chak tak leh huai takin awm rawh; Israel fate hi chhechhama ka lo tiam ramah chuan hruai lût ang che, i hnênah ka awm zêl ang,” a ti a.

²⁴Mosia chuan dân thû chu lehkhabuah a ziaak a, a ziaak zo ta a,

²⁵Mosia chuan Leviah, LALPA thuthlungna bâwm zâwn tute chu thû a pê a:

²⁶“Hê Dân Bû hi la ula, LALPA in Pathian thuthlungna bâwm sîrah dah rawh u, nangmahni hêktûah tang rawh se;

²⁷helhmang leh mi luhlul in ni tih ka hre si a. Tûna ka dam lai mahin LALPA lakah heti tak hian in hel a, ka thih hnuah lek phei chuan engtiang taka nasa ni ang maw?

²⁸Hêng thûte hi an beng hriata ka sawi a, thuhretu atân lei leh vân ka koh theih nân, hnam tin zînga upate leh hotute ka hnênah rawn ko khâwm rawh u.

²⁹Ka thih hnûah in rawn che khawlo vek ang a, ka thupêk che u hi in la hawisan dâwn tih ka hre reng a ni. In tuhrah ngei hmangin, LALPA mithmuah a thîn tiur tûra thil sual in la tih dâwn avângin, ni hnunungah chuan thil tha lovin a rawn tlâkbuak dâwn che u a ni,” a ti a.

MOSIA HLA

³⁰Mosia chuan hlâ chu Israel mipui pungkhâwm hriatah chuan a tâwp thlengin a chham chhuak a:

BUNG 32

MOSIA HLA

¹“Aw vânte u, beng chhi r’u, thû ka sawi dâwn e; Aw leilung, ka kâa thu chhuak hi ngaithla rawh.

²Ka zirtîrna hi ruah angin sîr se, Daifim iangin ka thu hi far sela, Hnah nêam chungah ruah a tla seng seng ang leh, Hlobet chungah ruah hmî ang mai hian.

³LALPA hming chu ka puang nâ’ng e: Kan Pathian chu ropuina pe rawh u.

⁴Sawisêl bova thawktu, Lungpui chu a ni; A kawngte chu dikna hlîr a ni, Dikna Pathian, fellohna nei lo; Midik leh Mingîla chu a ni.

⁵“An intikhawlo zo ta; Sawisêl kai an nih avângin, A fate pawh an ni nek lo ve, Thangthar rilru herh leh khawlo-ho zet chu.

⁶Aw, mi â leh lungfinglote u, LALPA hi engti takin nge in dâwr dâwn? Nangmahni tlantû in Pa a ni lo vem ni? Siana dintu che u a ni lo vem ni?

⁷“Tûn hmâte kha hre reng teh u, Chhuan tam tak kal tâte kha. In pa chu zâwt ula, a entir ang che u; In upate pawhin an hrilh dâwn che u nia:

⁸Chungnungbera'n nham tin tân ram a sema, Adama thlahte a then hran lai khân, An ramrite a khamzak a Israel fate tam dân ang zêlin.

⁹LALPA rochan chu a mite an ni si a; Jakoba chu a rokhâwmtu a ni.

¹⁰“Thlalêr hmuna a chhar Thlalêr chhengchhia, thaw vûk vûk karah, A hliakhkhuh a, a zirtîr a, A mitnaute angin a enkawl a.

¹¹Mupuiin a bû a thai darh a, A notête vîlin a đir char char a, An chungah thlâ zârin, a la kâng a, A thlân a châwi thîn ang hian,

¹²LALPA chauh chuan a hruai a, Hnam dang pathian rêng a tel ve lo.

¹³“Lei hmun sângah a hlângkai a, Chû chu lei rah a eitîr theih nân a ni; Lung kêra mi khawizu a laktîr a, Hriak pawh lung chang aţangin.

¹⁴Bâwngpuiin hnutekhal, berâmin hnute tui, Berâm no thau nê, Basan ram berâm leh kêl te, Buh tui ber chi nê; Grêp tuisen, uain chu in in a.

¹⁵“Mahse Jesurun-ho chu an thau ngêng ngalh ta mai; In thau tual tual, in chum buang a, In mûm tul mai mâw! Amah Siamtu Pathian a hawisan ta, A chhandamna Lungpui chu hmusitin.

¹⁶Ram dang pathian biain a thîkthu an chawktho; Thil tenawmin a thîn an tiur a.

¹⁷Pathian ni lo, ramhuai an bia, An hriat loh pathian hnênah, An pute pawhin an hriat loh An hriat chawp pathian tharte chu.

¹⁸Nangmah hringtu Lungpui ngaihtahin, I Siamtu Pathian i theihnghil ta.

¹⁹“Chû chu LALPAN a hmuhin, a hnar ta, A fanu leh fapaten an tihthinur avângin.

²⁰“Ka hmêl ka thupsan teh ang, An tâwp dân ka lo thlir teh ang, Thangthar awmherho an ni si a, Rinna rêng nei loho chu.

²¹Pathian ni hlei lo vângin ka thîkthu an chawktho; An mîlem âthtlakin min tithinur a. Mahse nham pawh tling lote hmangin ka thîktîr ang; Hnam mâwl tak hmangin ka chhaih kawlh ang.

²²Ka thîurna mei a alh a, Hremhmun hnuaihnnung ber thlengin a kâng ang; Lei hi a rahte chenin a kâng vek ang a, Tlâng nghahchhante pawh a kâng ang.

²³Chhianain ka vûr ang a, Anni chu thalin ka kâp ang.

²⁴Rilâtâmnain ka tiboral ang a, Hri-a lem zawha, natna râpthlâka tiboralin, Ramsa kawlh te ka sehtîr bawg ang, Vaivut zinga rôlpui tûr nê.

²⁵Pâwnah khandaihin an thi ang; Chhûng lamah thlabârin Tlangval leh nula thianghlim leh, Nau pawm lai leh putarte an awm ang.

²⁶“Ka vawm keh darh vek mai teh ang, Mihringte zingah hriat zui tûr awm lo khawpin ka'n siam teh ang,” ka ti a,

²⁷Hmêlma chu a ni lo zâwnga ‘Kan kut chu chawisânin a awm ta; Hêng thil hi LALPA tih a ni tawp lo ve,’ Tia thîrim taka a uang tûr ka vêng si.”

²⁸“Finna tlachham nham an lo ni, Hriatthiamna rêng an nei lo ve.

²⁹Aw han fîngvâr deuh se, an hrethiam ni mai tûr, An tûnhnu hun pawh an dâwn thiam tûr!

³⁰Engtin nge pakhatin sâng a ûm theiha, Pahnihin sîng an tlânchhiattîr theih le, An Lungpuiin a hralha, An LALPAN a bânzan a nih ngawt loh chuan?

³¹An lungpui chu kan Lungpui ang a ni lo, Kan hmêlmâte ngeiin an hai lo ve.

³²An grêp hruî chu Sodom grêp hruî Gomorra huana mi lek a ni; An grêp pawh a kha chí, A bâwr bâwra kha chí a ni.

³³An uain te chu rûl tûr ang hlauh, Chawngkawr tûr anga nunrâwng a ni.

³⁴Chû chu keimaha khâwl khâwm, Ka robâwm zînga châr tlat a ni lo vem ni?

³⁵Phuba lâkna leh thungrulhna hi ka kut a ni; An kê rah chuan tleu hun a la nei dâwn; An tân chhiatna ni a hnai ta, An chungah a thleng thuai ang.’

³⁶“LALPAN a mite ro a rêlsak dawn, A chhihhlawhte chu a khawngaih si a, An thiltihtheihna a bo hunah, bâwih leh zalên zîngah, Tumah hmuh tûr a nei lo vang.

³⁷An pathiante chu khawiah nge, An inhumna lungpuite chu khawiah nge?’ arawn ti ang.

³⁸An inthâwina sathau chu tu nge eia, An uaiin in tûr thilhan chu tu nge in? Lo thova, rawn ţanpui che u in, In inhumhimna lo ni rawh se.

³⁹En teh u, Kei hi Amah chu ka ni, Keimah lo chu Pathian dang a awm lo; Ka tihlum thîn a, ka tinung bawg thîn; Ka hliam thîn a, ka tidam leh thîn a ni; Ka kut ata chhan chhuak thei tumah an awm lo.

⁴⁰Ka kut hi vân lamah ka phar a, “Kumkhuaa nung reng ka nih avângin,

⁴¹Ka khandaih ka tahhriama, Ka kutin rorêlna fawng a chelh chuan, Ka hmêlmâte chungah phubâ ka la ang a, Mî hawtute chu ka thungrûl ang.

⁴²Ka thalte chu thîsenin ka tirui ang a, Ka khandaihin tîsa a eiral ang, Thah tawhte leh saltângte thîsen leh, Hmêlma hotu lûte nê,” a ti a.

⁴³Aw, Jentailte u, a mite nê hlim rawh u; A chhihhlawhte thîsen phubâ chu a la dâwn si a, A hmêlmâte chungah phubâ a la ngei dâwn; A ram leh a mite tân inremna a siamsak ang.” a ti a.

⁴⁴Tichuan, Mosia chu Nuna fapa Josua nê an lo kal a, chûng thû zawng zawng chu mipui beng hriatah a sawi chhuak a.

⁴⁵Mosia chuan Israel-ho zawng zawng hnênah chûng thute chu a sawi zo ta a;

⁴⁶tihian a sawi zui a: “Vawiina in hnêna thû ka hriattîr zawng zawng che u hi in thîlungin vawng tlat ula, hê dân thû zawng zawng hi in fate zirtîr tûrin fîmkhur takin zawm ang che u.

⁴⁷In tân thil namai a ni hlei nê, in nunna a ni asin; hê thû in zawm avâng hian Jordan lui kêna ram in va luah tûrah chuan in dam rei phah bawg ang,” tiin.

NEBO TLÂNGAH MOSIA A THI DÂWN

⁴⁸Chumi ni chuan LALPAN Mosia a bia a:

⁴⁹“Hê Abarim tlâng dunga Nebo Tlâng chhîpah khian han chho rawh, chû chu Moab ram chhûng, Jeriko epa awm a ni; Israel te luah atâna ka pêk Kanaan ram chu han thlîr ang che;

⁵⁰chû i lâwn chhohna tlângah chuan i han thi ang a, i mite hnênah hruai i ni dâwn nia, i unaupa Aaron a pawh Hor tlâng a mite hnêna hruai a ni ta ang khân;

⁵¹Zin Thlalêra Kadesh hmuna Meriba tuiah khân Israel fate zîngah mi châwimâwi lohva, Israel fate zînga ka thupêk i bawhchhiat avâng khân.

⁵²Israel fate ka pêk ram chu lût ve dâwn lo mah la, a ram awm dân chu i han thlîr vêl dâwn nia,” a ti a.

BUNG 33**ISRAELTE TANA MOSIA MALSÂWMNA HNUHNUNG**

¹Hei hi Pathian mi Mosian a thih hmaa Israel fate mal a sâwmna hnuhnung chu a ni.

²Heti hian a ti a: “LALPA chu Sinai aţangin a lo kal a, Seir aţangin a tho chhuak a; Paran Tlâng aţangin a êng chhuak a, Mi thianghlim sîng khat nê a lo kal a; A kut dîng lam aţang chuan An tân dân meialh a lo chhuak.

³Ni e, a mite chu a hmangaih a, A mi thianghlim zawng zawngte chu i kutah an awm vek a; I ke bulah an thû a; Mi tinin i thûte an lo dawng a.

⁴Mosia chuan dân min pê a, Jakoba mipuite rochun tûr chu.

⁵Jesurun-ah Lal a ni a, Mipui hotute an pun khâwma, Israel hnam zawng zawng an awm khâwm lai khân.

⁶“Reuben-ho chu thi lovin dam reng sela, A mite chu tîem suh se,” a ti a.

⁷Juda-ho chungchâng a sawi chu hei hi a ni: “LALPA, Juda âw hi lo ngaihla la, A mite hnênah hruai ang che; A bân thâ tichak la, A hmêlmate dopuitu lo ni ang che,” tiin.

⁸Levi-ho chungthû pawh a sawi a: I Urim leh i Thummim chu i Mi Thianghlima hnênah awmtîr la, Masa-a i fiah tawh kha, Meriba tuiah pawh in inbeih chiam kha.

⁹Mahni nu leh pa te pawh, ‘Ka la hmu lo’ ti khawpa; A unaute pawh hre chang lovin, A fate ngei pawh a hre hek lo; I thû erawh chu an zawm tlat a, I thuthlung pawh an vuan tlat a ni.

¹⁰Jakob-ho chu i rorêl dân an zirtîr ang a, Israel-ho chu i dân an zirtîr ang. I hmâah rimtui an chhawp thîin ang a, I maichâmah pumhâl thil an hlân ang.

¹¹LALPA, a neih sumte malsâwm la, A kutkawihte lo pawm ang che; Amah dotute chu an kâwngah vua la, Amah hawtute chu dîng chhuak tawh suh se,” tiin.

¹²Benjamin-ho chungthu a sawi a: “LALPA mi duhtaka chu a hnênah him takin a awm ang, Nilêngin a hliakhkhuh tlat ang a, A koki khinghnihi inkârah a chhuang ang,” tiin.

¹³Josefa-ho chungthû pawh a sawi a: “A ram chu LALPAN malsâwm sela, Vân thil hlû, daifîm ngeiin, Hnuai lam tui thûka mi nê.

¹⁴Ni êng rahchhuah hlu tak takte, Thla bi-a rah chhuak thil hlûte nê,

¹⁵Tlâng hlun tak taka thil tha ber berte, Chatuan tlâng thil hlute nê,

¹⁶Leilung hausakna leh a thil hlu te, Thingbuka chêngte duhsakna nê. Josefa lû-ah malsâwmna thleng rawh se, Unaute laka serh hrana lu chungah ngei chuan.’

¹⁷A ropuina chu bâwngpa piang hmasa ang, A kite chuan sele kí a iang e; Chûng chuan hnam tin a phîin darh ang, Kâwlkil thleng rawkin; Ephraim-ho chu sîng rual an ni a, Manase-ho chu sâng rual an ni.”

¹⁸Zebulun-ho chungthû: “Hlim rawh, Zebulun, i kal chhuahnaah, Nang Isakar, i puan inah khân!

¹⁹Tlângah mipui an ko khâwm ang a; Chutah chuan diknain an inthâwi ang; Tuipui hausakna an tlân dâwn si a, Tîau hnuaia ro phûm rûkte nê.”

²⁰Gad-ho chungthû: “Gad ram zauhtu chu malsâwmn awm sela; Sakeibaknei angin a khawsâ a, A chhîp leh a bân a ham thlêr a.

²¹Chanpual Tha lai a inpê a, Rorêltu chanpual atâna an ruat chu. Mipui hotute a rawn kalpui a; Israelte tân LALPA rorêlna dân chu, Dik takin a rêl fel.”

²²Dan-ho chungchâng thû: “Dana chu sakeibaknei notê a ni; Basan aţanga lo zuang chhuak tûr chu.”

²³Naphtali-ho chungthû: “Aw Naphtali, duhsakna lungawipuitu, LALPA malsâwmnain i khat e, Thlang lam leh chhim lam chang ang che.”

²⁴Aser-ho chungthû: “Asera hi fapa dangte aia nihlawh bîk a ni; A unaute duhsakin awm sela, A kê chu hriakah chia rawh se.

²⁵I pheikhawkte pawh thîr leh dâr ni se; Dam chhûnga chak reng tûr i ni.

²⁶“Jesurun Pathian ang hi tu dang mah an awm lo, Tânpui tûr che u-in vân chungah a chuang a, A ropuina chu chhûm chungah a ni a awm ni.

²⁷Chatuan Pathian chu i himna a ni, A hnuaiah chatuan bân a awm a; I hmêlmâte chu a vai kiansak ang che a, ‘Tiboral rawh!’ a ti ang.

²⁸Israelte chu muang takin an awm tawh ang a, Jakoba tuichhunchhuah chu a pumbil ang. Buh leh uain tharlâm tamna ramah chuan; Vânin daifîm a sûrtîr baw ang.

²⁹I nihlawh e, âw Israel! Nangmah anga LALPA chhandam hnam tumah an awm lo, Nangmah puitu leh i phâw a ni a, I ropuina khandaih a ni! I hmêlmâte an rawn intulût ang a, An hmun sângte chu i chîl chhia ang.”

BUNG 34**NEBO TLÂNGAH MOSIA A THI**

¹Mosia chu Moab phaizâwl, Jeriko râl aţang chuan Nebo Tlâng, Pisga chhîpah chuan a han lâwn chho va. LALPA chuan Dan thlengin Gilead ram zawng zawng a entîr a,

²Naphtali pumpui leh Ephraim leh Manase ram te, Judai ram zawng zawng Khawthlang Tuipui thlengin,

³Chhim lam te, Tûm khawpui an tih Jeriko phai ruam, Zoar thlengin a thlîr a.

⁴LALPA chuan a hnênah, “Hêng ram hi Abrahama te, Isaaka te, Jakoba te hnêna chhechhama, ‘In thlahte hnênah ka pe ang,’ ka lo tih chu a ni. I mit ngeiin ka hmuhtîr che a, chû hmun erawh chu i kai ve lo vang,” a ti a.

⁵Tichuan, LALPA thû ang zêlin, LALPA chhiahhlawh Mosia chu Moab ramah chuan a thi ta a.

⁶Beth Peor epa Moab rama ruamah chuan a phûm a; nimahsela, tûn thleng hian a thlân awmna chu tuma’n an hre lo.

⁷Mosia chu a thihin kum zâ leh sawmhniha upa a ni. A khawhmuh a la fiah a, a tha chakna a la kiam hek lo.

⁸Israel fate chuan Moab phaizâwlah chuan Mosia chu ni sawmthum an ãah a. Tichuan, Mosia sûna an ãah nite chu an hmang zo ta a.

⁹Nuna fapa Josua chu a chungah Mosian kut a lo nghah tawh avângin, finna thlarauvin a khat a; LALPAN Mosia hnêna thû a pêk ang takin, Israel mite pawhin a thû chu an zâwm a.

¹⁰Nimahsela, chumi hnû ațang chuan Israelte zîngah Mosia anga LALPAN hmaichhana a biak ãhin zâwlnei dang tumah an awm tawh lo,

¹¹Aigupta ramah Pharoa hmâah te, a khâwnbâwl zawng zawng leh a ram pumah chhinchhiahna leh thilmak zawng zawng entîr tûrin a tîr a,

¹²thiltihtheihna mak khati zozai leh, thil râpthlâk pui puite kha Israel mi zawng zawng mithmuhah a entir ãhin a ni.

JOSUA

Ziah tu: Josua • Ziah kum: B.C. 1450-1385

Ziahna Hmun: Gilgala an awm lai, Josua hova Kanaan ram an hneh duai duai hun. Josua dam lai chanchin leh, a tâwp bung 24-na, a thih hnu chanchin hi puithiam Eleazara leh a fapa Phinehasa te ziah a ni tiin Judate thurochhiah buin a sawi. Josua lehkhahbûah hian Pathianin a chhiahhlawh Abrahama te, Isaaka te leh Jakoba te hnêna a thutiam chu hlenin, Aigupta rama saltâng Israel fate chu Mosia hmangin a hruai chhuak a, Mosia thlaktu, Pathian mi ropui Josua hova ramtiam Kanaan an luh tâk thû te, Kanaan rama lo chêng sâ hnam hrang hrangte an va do hneh dân leh, an ram an chhuhsak a, Israel hnam 12-ten a hnam ang zêla an inchansem dân, kum sawmthum vêl chhûnga thil thleng chanchin a chuang. Hê lehkhahu hian hmêlmapa Setana lalna Kanaan ram su thiata, Pathian chakna leh a thutiam anga ringtuten LALPA tân ram an lâl lêt leh dân fiah takin a entîr a, thlarauva indona thuchah pawimawh a puang a ni (Eph. 6:10-18). Josua bu hi thupui 4: (i) Kanaan lût tûra inpuahchahna (bung 1-5), (ii) Kanaan ram hneh a nih dân (6-12), (iii) Israel hnam tinin ram an insem dân (13-22) leh (iv) Josua thuchah hnunung leh a thih thû te a ni. Josua bûah hian bung 24 a awm a, châng 658 a awm baw. Bible-a a bu rukna a ni.

BUNG 1

PATHIANIN JOSUA HNENAH THUNEIHNA A HLAN

¹LALPA chhiahhlawh Mosia thih hnu chuan Nuna fapa Josua, Mosia kaiha vêngtu chu a bia a:

²Ka chhiahhlawh Mosia chu a thi ta a. Tho la, nang leh hêng mipui zawng zawng nêh hian Jordan lui hi kân ula, Israel fate tâna ka pêk ramah chuan lût rawh u.

³Mosia hnêna ka hrilh tawh angin, in kephaha in rah chin chin chu ka pêk tawh che u hi.

⁴Thlâlêr ram leh hê Lebanon ațang hian luipui, Euphrates Lui thlengin, Hit-ho ram zawng zawng leh, ni tlâkna lama Tuifinriat Zau thlengin in ram a ni ang.

⁵I dam chhûngin tuma'n an chel lo vang che; Mosia hnêna ka awm ang khân i hnênah pawh ka awm ang. Ka kalsan lo vang che a, ka thlahthlam hek lo vang che.

⁶Chak tak leh huai takin awm rawh, hêng mipuite hi an thlahtute hnêna pêk ka lo tiam ram chu i luahpui dâwn si a.

⁷Ka chhiahhlawh Mosian thû a pêk zawng zawng i zawm vek theih nân chak tak leh huai takin awm phawt mai rawh; i kalna apianga i hmuingîl zêl theih nân dîng lamah emaw, vêi lamah emaw pênсан lo vang che.

⁸Hê Dân Bu hian i kâ a chhuahsan tûr a ni lo va, a thu inziak zawng zawng i zawm theih nân achhûn azânin ngaihtuah berah neih ang che. Tichuan i kawng zawh chu a hmuingîlin i lo hlawhtling dâwn nia.

⁹Thu ka pê che a ni lo vem ni? Chak tak leh huai takin awm rawh; hlau suh la, zâm hek suh, LALPA chuan i kalna apiangah a awmpui zêl ang che," a ti a.

JORDAN LUI KÂN TURA THUPEK

¹⁰Josua chuan mipui hotute hnênah chuan thû a pê a,

¹¹"Riahmmun hi fang kual ula, mipuite hnênah, 'Ei tûrte buatsaih rawh u, LALPA in Pathianin luah tûra a pêk che u ram luah tûrin ni thum chhûngin hê Jordan lui hi in kân dawn ta e,' ti rawh u," tiin thû a pê a.

¹²Reuben-hote, Gad-hote leh Manase hnam zâtve te hnênah chuan Josuan,

¹³"LALPA chhiahhlawh Mosian thû a pêk che u kha hre reng ula, 'LALPA in Pathian chuan hê ram hi a pê che u a, a chawltîr baw ang che u.

¹⁴In nupui fanaute leh in ranrualte chu Jordan helama Mosian a pêk che u ramah hian an lo awm ang a. Nangni michak huaisenho chu in unaute ƣanpuiin a hmahruaiah in kal vek tûr a ni a.

¹⁵LALPAN in unaute chu nangni ang bawka hah chawlhna a pêka, LALPA in Pathianin a pêk ram an luah hmâ loh chuan in kalpui ve tûr a ni. Chumi hnûah chuan in lêt leh ang a, Jordan râl he lam ni chhuahna lam, LALPA chhiahhlawh Mosia pêk che u ramah chuan hlim takin in chêng tawh dâwn nia," a ti a.

¹⁶Josua hnênah chuan, "Ti tûra thû min pêk apiang kan ti ang a, min tîrhna apiangah kan kal ang.

¹⁷Engkimah Mosia thû kan âwih ang bawkin, i thû pawh kan âwih ang. LALPA i Pathian chu Mosia hnêna a awm ang khân i hnênah pawh awm phawt mai rawh se.

¹⁸Tûpawh i thupêk rêng rêng pawisa lova, i laka hel chu, tihhlum ni rawh se. Chak tak leh huai takin awm phawt mai rawh," an ti a.

BUNG 2

RAHABI'N ENTHLATUTE A THUKRÛ

¹Nuna fapa Josua chuan Sittim* hmun ațang chuan a rûkin enthlatu mi pahni a tîr a, "Kal ula, ram chu va thlîr vêl teh u, Jeriko khua saw en Chiang bîk ang che u," a ti a. Tichuan, an kal ta a, nawhchizuar pakhat, a hming Rahabi inah an va thleng a, tah chuan an riak ta a.

²Jeriko lal hnênah chuan miten, "E khai, zânin hian ram enthla tûr Israel mi pahni an lo kal e," tiin an va hrilh a.

³Lal chuan Rahabi hnênah, "I ina lo thlengte kha han hruai rawh, ram pum enthla tûra lo kal an nih kha,' ti tûrin mi a tîr a.

⁴Chû nu chuan mi pahnihte chu a hruai a, a thukrû a. An hnênah, "Ni e, khâ mite kha ka hnênah an lo kal ngei alâwm, mahse khawi ațanga lo kal nge tih ka hre lo.

⁵Khua a thim dâwna, kulh kawngka khâr hun lai vêl khân an kal chhuak leh ta a ni. Khawi lamah nge an kal tâk pawh ka hre lo; ûm vat ula, in la ûmpa mai ang," a ti a.

⁶(Anni erawh chu in chungah a hruai chho va, ziza kûng chheh khâwm zîngah a thukrû a).

⁷Tichuan, mite chuan Jordan luikai panna kawngah chuan an ùm ta a. A ùmtuho an kal chhuah vêleh kulh kawngka chu an khâr leh nghâl a.

⁸An mut hmân, ani chu in chungah a han chho va,

⁹mite hnênah chuan: LALPA chuan hê ram hi a pe tawh che u tih ka hria a, nangmahni râpnain min man a, nangmahni lakah ram puma mi zawng zawng chu an zâm vek tawh a ni.

¹⁰Aigupta in rawn chhuahsan laia in kalna tûra LALPAN Tuipui Sen a tihkangchah thû te kan lo hria a, Jordan râl leh lama Amor lal pahni, Sihona leh Oga te in nuai chimih vek dân te kan lo hria a.

¹¹Chûng thû te chuan kan thinlung a tituiral zo nghâl vek a; nangmahni vângin tûmah han inti huaisên thei pawh kan awm tawh lo, LALPA in Pathian chu lei hnuaiah leh vân chungah Pathian a ni si a.

¹²Chuvângin ka ngên a che u, ka pa chhûngkaw chungah zahngaihna lantîr tûrin LALPA hmingin thû tiam ula, chumi delhkihna tûr chuan engemaw min hnutchhiah bawh rawh u;

¹³ka nu leh pate, ka nuṭa leh ka laizâwnte leh an thil neihte hi min zuahsak ula, thihna ata min chhanhim lul rawh u,” a ti a.

¹⁴Anni chuan a hnênah, “Hê kan thiltih hi tûma’n in sawi chhuah hauh loh chuan, in thih ai kan thi zâwk nâng e. Hê ram hi LALPAN min pêk hunah in chungah zah kan ngai ngei ngei ang,” tiin an chhâng a.

¹⁵Tichuan, anni chu tukverh aṭangin hruin a uai thlâktîr a, a in chu khawpui kulh tlâng, kulh bang bula awm a ni a.

¹⁶Ani chuan, “Nangmahni ùmtuten an hmuh loh nân che u, tlângah sâwn va kal rawh u. Ùmzuitu che u an lo kîr leh hmâ chu, tah chuan ni thum birû ula. Chumi hnûah chuan in hâw tawh dân nia,” a ti a.

¹⁷Mite chuan a hnênah: “Chhia min chhamtîr mai hi chuan thiam loh min chantîr zo dân lo a nia;

¹⁸mahse ram chhûnga kan lo kal hunah min uai thlâktîrna tukverhah hian hruin sen i lo phuar bet ang a, i pa te, i nu te, i nuṭate, i pa chhûngte zawng zawng i inah i lo awmtîr vek tûr a ni.

¹⁹Tûpawh in aṭanga khawlaia tlân chhuak apiang chuan ama thisen mawh a phur ang a, keini thiam loh a ni lo vang. Mahse i ina awm tûpawh an khawih chuan an thisen mawh chu kan phur ang.

²⁰Kan thiltih hi i sawi chhuah vaih chuan chhia min chhamtîrna lakah kan fihlîm bawh ang,” an ti a.

²¹Ani chuan, “In sawi ang tak chu ni rawh se,” a ti a. Tichuan, anni chu a kaltîr a, an kal liam ta a. Hruin sen chu tukverhah chuan a phuar bet a.

²²Tlâng lamah chuan an va kal ta a, a ùmtute an lo kîr leh thlengin ni thum an birû a. A ùmtute chuan kawng tuânin an zawng a, an hmu lo va.

²³Mi pahnihte te erawh chu tlâng aṭangin an chhuk a, lui chu an kân a, Nuna fapa Josua hnênah chuan an chungah thil thleng chu an hrilh vek a. ²⁴“LALPA chuan ram pum chu kan kutah a lo pe tawh reng mai, ram chhûnga mi zawng zawng chu keimahni vângin an zâm chhe zo vek tawh zu nia,” tiin Josua chu an hrilh a.

BUNG 3

ISRAELTEN JORDAN LUI AN KÂN

¹Josua chu zîng takah a tho va; Acacia thing hmun aṭang chuan Israel mipui zawng zawng nêen Jordan lui chu an lo thleng a, lui an kân hmân chutah chuan an riak a.

²Ni thum hnûah chuan hotute chuan riahhmun chu an fang vêl a;

³mipuite hnênah chuan, “LALPA in Pathian thuthlung bâwm chu Levia chî puithiamten an zâwn in hmuh hunah in awmna hmun theuh atang kân in zui nghal tûr a ni.

⁴Amaherawhchu, nangmahni nêna in inkâr chu tawng sâng hnih vêl ni rawh se. Tûn hmân hê kawng hi in la zawh ngai si lo va, kalna tûr kawng in hriat theih zâwk nân, va hnaih lutuk suh u,” tiin a hrilh a.

⁵Josua chuan mipuite hnênah, “Inthian thianghlim rawh u, naktûkah LALPAN in zîngah thilmak tak a ti dân e,” a ti a.

⁶Josua chuan puithiamte chu a bia a, “Thuthlung Bâwm chu châwi kâng ula, mipuiho hmâah hian lui chu kân rawh u,” a ti a. Tichuan thuthlung bâwm chu an châwi kâng a, mipuiho hmâah chuan an kal ta a.

⁷LALPA chuan Josua hnênah, “Mosia hnêna ka awm ang kân i hnênah ka awm zêl dân tih an hriat nân wawinah hian Israel mi zawng zawng mit hmuhah ka chawimâwi ang che.

⁸Thuthlung bâwm zâwntu puithiamte hnênah heti hian thû pe rawh, ‘Jordan lui kam tui chu dân ula, Jordan lui chuan dîng reng rawh u,’ tiin,” a ti a.

⁹Josua chuan Israel mipuite hnênah, “Hetah hian lo kal ula, LALPA in Pathian thû chu rawn ngaitla rawh u,” a ti a.

¹⁰Josua chuan, “Pathian nung chu in zîngah a awm a, in hmâa mi Kanaanho te, Hit-ho te, Hiv-ho te, Periz-ho te, Girgas-ho te, Amor-ho te leh Jebus-ho te chu mathei lovin a hnawh chhuahsak dân che u tih hemîah hian in hria ang.

¹¹Ngai teh u, leilung zawng zawng LALPA thuthlung bâwm chuan in hmâah Jordan lui hi a kân dân ta e.

¹²Israel hnamte aṭangin mi sâwm leh pahni, hnam tin aiawh theuh thlang chhuak rawh u.

¹³Heti hi a lo ni ang a, leilung zawng zawng Lalpa, LALPA thuthlung bâwm zâwntu puithiamte kephahin Jordan lui tui a rah vêleh a hnâr lam aṭanga Jordan lui lo luang thla lai chu tihchah a ni ang a, inhlâwm dîng luah mai ang,” a ti a.

¹⁴Tichuan, mipuite chu Jordan lui dân kâi tûrin an puan in aṭangin an lo chhuak a, thuthlung bâwm zâwntu puithiamte chuan hmâ an hruai a.

¹⁵Bâwm zâwntuten Jordan lui an lo thlena, bâwm zâwntu puithiamte kên vaukam tui a han dai vêleh chuan (buh seng hun lai chuan Jordan lui hi a kuang zawng zawngah a luang liam thîn a)

¹⁶a hnâr lam aṭanga tui lo luang thla lai chu a dîng a, Adam khua aṭanga hla tak, Zaretan bulah a lo inhlâwm dîng ta luah mai a. Araba Tuipui, Tuipui Al lama luang thla chu a kang chat thla zêl a: Jeriko zâwnah chuan mipui chu an kal kâi ta vek a.

¹⁷Israel mipui zawng zawngin Jordan lui chu lei châra an kân zawh vek thlengin LALPA thuthlung bâwm zâwntu puithiamte chu Jordan lui lâia lei chârah chuan an ding reng a; tichuan mipui zawng zawng chuan Jordan lui chu an kân ta vek a.

BUNG 4

HRISTRENGNA LUNGPHUN

¹Mipui zawng zawngin Jordan lui an kân zawh chuan, LALPAN Josua a bia a:

²“Mipuite zing ațang hian hnam tin aiawh patling sâwm leh pahnih thlang chhuak la,

³heti hian hrilh ang che, ‘Jordan lui lai, puithiamte dinna hmun ațang sâwn lung sâwm leh pahnih la chhuak rawh u. Chûngte chu keng zêl ula, zân ina in riahna tûr hmunah chuan dah ang che u,’ ti rawh,” a ti a

⁴Josua chuan Israel mite zinga a thlan chhuah sâ, hnam tin aiawh mi sâwm leh pahnihte chu a ko va;

⁵Josua chuan an hnênah: “LALPA in Pathian bâwm awmna bul, Jordan lui laia sâwn va kal ula, Israel hnam zâtin, mi tinin lung pakhat theuh va pu chhuak rawh u,

⁶tichuan hêng hi in tân chhinchhiahna a la ni dâwn nia, nakinah in faten an pate hnênah, ‘Hêng lungte hi eng tihna nge ni?’ tiin an larawn zâwt ang che u a.

⁷Chuta in chhân dân tûr chu, ‘LALPA thuthlung bâwm hmâah Jordan lui luang lâi a châwl tih entîrna a ni; Jordan lui an kân laiin Jordan tui luang lai chu a kang chat a: hêng lungte hi Israelten kumkhuaa an hriatrengna tûr a nih hi,’ in la ti dâwn nia,” a ti a.

⁸Josua thupêk angin Israel fate chuan an ti a, Jordan lui laia mi lung chu, Israel hnam zâtin sâwm leh pahnih an la a; LALPAN Josua a hrilh angin, an riahna tûr hmunah chuan an pu thleng a, chutah chuan an dah ta a.

⁹Jordan lui laia, thuthlung bâwm zâwntu puithiamten kêa an dinna hmun takah chuan Josuan lung sâwm leh pahnih a phun a: chûngte chu tûn thlengin a la ding reng a ni.

¹⁰Mosian Josua hnêna thû a lo hrilh anga, LALPAN mipuite hnêna hrilh tûra thû a pêk ang zêla Josuan engkim a tih zawh thlengin bâwm zâwntu puithiamte chu Jordan lui laia chuan an ding reng a: mipuite pawh chu hmanhmawh takin an kal kêi sawk sawk a.

¹¹Tichuan, mipui zawng zawng chu an kêi zo ta vek a, mipui hmuh laiin LALPA thuthlung bâwm leh puithiam hote pawh chu an kêi ve ta a.

¹²Mosian a lo hrilh tawh angin Reubena thlahte, Gada thlahte leh Manase hnam zâtvê te chuan inrâlthuam chungin Israel mipuite hmâ an hruai a:

¹³Indo peih sa thiau sipai singli vêl chuan LALPA hmâah, indo tûrin Jeriko phai zâwl lam chu an pan mup mup a.

¹⁴Chumi ni chuan LALPAN Israel mi zawng zawng mithmuhah Josua chu a châwi sâng a; Mosia an zah ang bawkin ani pawh chu a dam chhûngin an zah ve ta a.

¹⁵LALPA chuan Josua a bia a,

¹⁶“Thuthlunna bâwm zâwntu puithiamte khu Jordan lui ațanga lo chhuak tûrin thû pe rawh,” a ti a.

¹⁷Josua chuan puithiamte chu, “Jordan lui ațang khân lo chho tawh rawh u le,” tiin thû a pe ta a.

¹⁸Chutia Jordan lui ațanga LALPA thuthlung bâwm zâwntu puithiamte an lo chhuah chhohva, puithiamte kê-in vaukam lei châr a rah vêh Jordan lui tui chu a luan dân pangngaiin a luang leh nghâl a, a hmâ ang bawkin a kuangah chuan a luang liam leh ta dûl dûl a.

¹⁹Mipuite chuan a thla khatna, a ni sâwm niin Jordan lui chu an kêi a, Jeriko chhak lam ramri bul, Gilgal hmunah riahmun an khuar ta a.

²⁰Jordan lui ațanga an lâk lung sâwm leh pahnihte chu Gilgal-ah chuan Josuan a phun bawk a.

²¹Israel fate hnênah, “Nakin hnûah in faten an pate hnênah, ‘Hêng lungte hi eng tihna nge?’ tiin an la zâwt ang che u a,

²²Israelten hê Jordan lui hi lei châra an kal kêi vâng a ni,’ tiin in fate in la hrilh tûr a ni;

²³LALPA in Pathianin kan vâia kan kal kêi thlenga kan hmâa Tuipui Sen a lo tikang chat vek ang khân, LALPA in Pathianin Jordan lui pawh in zâa in kân vek thlengin in hmâah a tikang chat a nih hi:

²⁴tichuan, lei mihring zawng zawngin LALPA kut chakzia an lo hriata, kumkhuaa LALPA tih dêka in awm theihna tûr a nih hi,” a ti a.

BUNG 5

CHHUAN HNIHNA-HO SERHTAN

¹Jordan lui thlang lama Amor lallo zawng zawng leh, tuihinriat kama chêng Kanaan lallo zawng zawngte chuan Israel faten Jordan lui an kân chhûng zawng LALPAN tui a tihkangsak tih thû an lo hriat chuan an thinnlung chu a tui ral zo va, Israel fate avâng chuan an zâm chhe zo ta a.

²Chutih lai chuan LALPAN Josua hnênah, “Lung hriamin chemtê siam la, a vawi hnihna atân Israel fate serh tansak rawh,” a ti a.

³Josua chuan lung hriamin chemtê a siam a, Israel fa mipate serhvun chu a tansak ta hlawn a.

⁴Hei hi Josuan an serh a tansak chhan a ni: Aigupta ațanga lo chhuak mipa, râl do thei chin zawng zawng chu Aigupta ațanga an lo kalna kawng thlalêr hmunah khân an thi zo tawh a.

⁵Aigupta ațanga chhuakte kha serhtan vek an ni a: mahse Aigupta ațanga an lo chhuah hnûa kawng laka piang zawng zawng chuan serh an la tan ve lo va.

⁶Israel faten LALPA thû an âwih loh avângin Aigupta ațanga lo chhuak mipa râl do thei chin zawng zawng an thih vek hmâ chuan thlalêrah khân kum sawmlî an vâkvai a: chûngcho chu an thlahtute hnêna LALPAN chhe chhama pêk a lo tiam khawizû leh hnute tua luang ram chu an hmu ve lo vang tia LALPA a lo intiam tawh vâng a ni.

⁷Anniho aia a châwm seilen tâk an fate serh chu Josua chuan a tansak ta a: kawng lakah khân an serh tansak an la nih loh avângin serhtan lohvin an la awm reng si a.

⁸Chutia mi zawng zawng serh an tan hnêa an dam fel hmâ chu riahhmuna anmahni bûkah chuan an awm rih a.

⁹LALPA chuan Josua hnênah, “Aigupta-hovin an hmuhsitna che u kha vawiinah hian ka lum bo ta e,” a ti a. Chuvângin, chumi hmun chu tân thlengin Gilgal tih a ni ta a ni.

¹⁰Israel fate chuan Gilgal-ah awmhmun an khuar a, chumi thlâ ni sâwm leh palina nî chuan Jeriko phâi zâwlah kalhlên kût an hmang a.

¹¹Kalhlên kût zawh tûk ațang chuan, chû rama buh thar, dâwidim telh loh chhang leh mîm kan ro te chu an ei ta a.

¹²Chû rama buh thar an ei tûk ațang chuan manna pawh a tla zui tawh lo; Israel fate pawhin an hmu pha tawh ngai lo va; mahse chumi kuma Kanaan buh thar chu an ring tan ta a ni.

LALPA SIPAI HOTU LAL

¹³Josua chu Jeriko khaw bula a awm lai chuan a han hawi chho va, ngai teh, mi pakhat khandaih kenga lo ding reng hi a hmu a. Josua chuan a va pan hnai a, a hnênah, “Kan lama țang nge i nih, kan hmêlma lama țang?” a ti a.

¹⁴Ani chuan, “Ni lo ve; LALPA Sipate Hotu nihna nêna lo kal ka ni,” a ti a. Josua chu hmâia lei sîn a bawkkhup a, chibai a bûk a, a hnênah, “Lalpa chuan a chhiahhlawh hnênah hian eng nge a sawi duh le?” a ti a.

¹⁵LALPA Sipate Hotu chuan Josua hnênah, “I pheikhawh kha phelh rawh; i dinna kha hmun thianghlîm a ni e,” a ti a. Josua chuan a phelh ta a.

BUNG 6

JERIKO TIHCHHIAT THU

¹Jeriko khawpui chu Israel fate avâng chuan a inkharkhip tlat a: tûmah lût leh chhuak an awm lo.

²LALPA chuan Josua hnênah, “En ta che! Jeriko khawpui hi an lal leh an mi chak huaisente chawpin i kutah ka pêk tawh che hi.

³In sipai rualten khua hi a vêlin wawi khat in kal hual tûr a ni. Chutiang chuan ni ruk chhûng in ti ziah tûr a ni.

⁴Berâmpa ki tâwtawrâwt kengin bâwm hmâah puithiam pasarih an kal tûr a ni: a ni sarih ni chuan wawi sarih in hêl kual tûr a ni a, puithiamte chuan tâwtawrâwt chu an hâm tûr a ni.

⁵Tâwtawrâwt chu a ri sei chîa an ham vang vang rî in hriat hunah, mi zawng zawng chu ring takin an au dur dur tûr a ni a; tichuan, kulh bang chu a chim vek mai ang. Mi tin mahni hma zâwn theuhvah an lût chho tûr a ni,” a ti a.

⁶Nuna fapa Josua chuan puithiamte chu a ko va, an hnênah, “Thuthlung bâwm hi zâwn ula, LALPA thuthlung bâwm hmâah chuan puithiam pasarihin berâmpa ki tâwtawrâwt pasarih keng rawh se,” a ti a.

⁷Mipui hnênah chuan, “Khawpui kal hual tûrin chhuak tawh rawh u le, râlthuum keng zawng chu LALPA thuthlung bâwm hmâah kal rawh se,” a ti a.

⁸Josuan chûng thu a sawi zawh chuan, berâmpa ki tâwtawrâwt pasarih keng puithiam pasarihte chu LALPA hmâah chuan an kal a, tâwtawrâwtte chu an hâm a: LALPA thuthlung bâwm chuan a zui a.

⁹Râlthuum keng-ho chu tâwtawrâwt hâm puithiamte hmâah chuan an kal a, bâwm chu a hnuđâl hovin an chhawm a, puithiamte chuan kal pahin tâwtawrâwt chu an hâm zêl bawh a.

¹⁰Josua chuan mipuite hnênah chuan, “Âu rawh u,” ka tih ni a lo thlen hmâ chuan, in âu tûr a ni lo va, in kâ ațangin engmah in tiri chhuak tûr a ni hek lo; ‘Au rawh u le!’ tia thû ka pêk hunah chauh in âu tûr a ni,” a ti a.

¹¹Tichuan, LALPA thuthlung bâwm chuan khawpui chu wawi khat a han hêl kual a. Chumi zawhah chuan riahhmuna an kîr leh a, riahhmuna chuan an riak a.

¹²Josua chu zîng takah a tho va, puithiamten LALPA bâwm chu an zâwn a.

¹³Puithiam pasarih, berâmpa ki tâwtawrâwt kengte chu LALPA bâwm hmâah chuan an kal zêl a, tâwtawrâwt chu an hâm zêl a. An hmâah chuan râlthuum kengte chu an kal a; hnuđâlho chuan LALPA bâwm chu an chhawm a, puithiamte chuan kal pahin tâwtawrâwt an hâm zêl a.

¹⁴A ni hnih niin khua chu wawi khat an hêl kual a, riahhmuna an kîr leh a: chutiang chuan ni ruk chhûng an ti a.

¹⁵A ni sarih nî chuan zîng takah, vârtianah an tho va, an tihdân pangngaiin khua chu wawi sarih an hêl ta a: chumi nî chiah chuan wawi sarih an hêl kual a ni.

¹⁶A wawi sarihnaah chuan, puithiamte chuan tâwtawrâwt an han hâm a, Josua chuan mipuite hnênah, “Âu rawh u le, LALPAN khawpui hi a pêk tawh che u hi!

¹⁷Khawpui leh a chhûnga thil awm zawng zawng hi LALPAN a tiboral vek dâwn a ni. Kan mi tirhte lo humhimtu nawhchizuar Rahabi leh a ina awmte chauh chu zuah tûr an ni.

¹⁸Nangni chu ânychhedawng thil rêng rêng lakah inthiarfihlîm rawh u, chuti lova hêng ânychhedawng thilte hi in lo lâk vaih chuan nangmahni ngei pawh ânychhedawngah in insiam ang a, Israelte riahhmun hi ânychhia-ah in chantîr ang a, a buai zo vek ang.

¹⁹Silvar te, rangkachak te, dâr leh thîr bungbêl zawng zawng chu LALPA tâna serh hran a ni a: LALPA sum ina dah vek tûr a ni,” a ti a.

²⁰Tichuan, puithiamten tâwtawrâwt an han hâm a, mipui chu an âu ta dur dur a. Chutia mipuiin tâwtawrâwt rî an hriata, ring taka an âu dur dur lai chuan, kulh chu a tlu sawp ta rup a. Mipuite chu an hma zâwn theuh ațangin khaw chhûngah chuan an lût chho vek a, khua chu an la ta a.

²¹Khawpui chu an tichhe vek a, a chhûnga mi zawng zawng, a hmei a pain, nunau leh tar te pawh, bâwngpa te, berâm te leh sabengtung te nên khandaihin an sât hlum vek a.

²²Josua chuan ram va enthlatu mi pahnihte hnênah, “Nawhchizuar nu inah chuan va lût ula, in intiam tawh angin chû hmeichhia leh a thil neih zawng zawng chu va thiar chhuak rawh u le,” a ti a.

²³Enthlatu tlangval pahnihte chu an va lût a, Rahabi leh a pa te, a nu te, a nuța te leh a neih zawng zawng chu an va thiar chhuak a; a laichîn unaute zawng zawng pawh an hruai chhuak baw a, Israelte riahmun pâwnah chuan an dah ta a.

²⁴Khawpui chu a chhûnga thil zawng zawng nê an hâl vek a. Silvar leh rangkachak te, dâr leh thîr bungbêlte chauh chu LALPA sum inah chuan an dah tha a.

²⁵Tichuan, Josua chuan nawhchizuar Rahabi leh a pa chhûngte, an neih zawng zawng nê nung damin a zuah a; Josuan Jeriko enthla tûra a mi tirhte a lo hum avâng khân tûn thlengin Israelte zîngah an la tel ve ta zêl a ni.

²⁶Khatih lai khân Josuan chhia a chham hnan a, “Hê Jeriko khua dîn lehtu chu LALPA hmâah ânchhedawngin awm rawh se; a fatîr chânin lung a phûm ang a, a fatlum hlohin a kawngkhârte a siam ang,” a ti a.

²⁷Tichuan, LALPA chu Josua hnênah a awm a, a hming chu ram pumah a lo thang ta a.

BUNG 7

AI KHAW-HO LAKAH AN TLÂWM

¹Israel fate chuan ânchhedawng thil avângin dân an lo bawhchhe ta a, Juda hnama mi Zera fapa, Zabdia fapa, Karmia fapa Akana chuan ânchhedawng thawmhnâw a lo la a; tichuan, Israel fate chungah LALPA thin a ur ta a.

²Josua chuan Jeriko ațangin Bethel chhaka awm Beth-aven kiana Ai khuaah chuan mi a tîr a, an hnênah, “Han chho ula, a ram chu han en thlithlai teh u,” a ti a. A mi tirhte chu an han kal a, Ai khua chu an han enthlâ a.

³An lo kîr leh chuan Josua hnênah, “Kan zavaia kal a ngai lo vang; mi sângnih sângthum vêl kal se, Ai khua chu han beî mai se; Ai khuaa mite chu tîem tê an ni a, a zavâi vâia kal buai a ngai lo vang,” an ti a.

⁴Tichuan, mi sângthum vêl an han kal ta a: mahse Ai mite hmâah chuan baklêngin an tlânchhe ta mai a.

⁵Ai-ho chuan mi sawmthum leh paruk an that a, kulh pâwn ațangin Sebarim thleng rawka an rawn ûmna lamah an that hlawm a; tichuan, mipui thinlung chu a tui ral zo ta a.

⁶Josua leh Israel upate chuan an puante an pawt thlêr a, LALPA thuthlung bâwm hmâah chuan an bawkkhup a, an lû-ah vaivut phulin tlai thlengin an bawkkhup a.

⁷Josua chuan, “A va pawî tak êm, âw Lalpa PATHIAN, engtizia nge Amor-ho kuta tihboraî tûr leka hêng mipui hi Jordan lui min hruai kai le? Jordan lui chhak lamah khân awm ta hlê hlê îla a lungâwithlâk zâwk tûr!”

⁸Aw LALPA, hmêlmaho laka Israelte an tlanchhiat lai hian eng nge maw ka sawi leh tâk ang le?

⁹Kanaan-ho leh hê rama chêng zawng zawngten an lo hriatin, min rawn hual ang a, leilung ațang hian kan hming hi an nuai bo vek dâwn asin. Engtin nge i hming ropui tak hi i tih dâwn?” a ti a.

AKANA SUALNA

¹⁰LALPA chuan Josua hnênah, “Tho ta che; engati nge khatia i bawhkhuh reng?”

¹¹Israel-hovin thil sual an ti ta a nih hi, zawm tûra thupêk ka thuthlung an bawhchhia a: ânchhedawng thil an lo la a, an rûk bâkah an zêp ru baw a, an thawmhnaw kârah an thukru lehngâl a.

¹²Chuvângin, Israelho hi hmêlma laka țang thei an ni hlei nê, hmêlma lakah an tlânchhe mai rêng dâwn asin: ânchhedawng tlâk lekah an insiam tâk hi. Chuvângin, in zîng ata ânchhedawng thilte chu in tihboraî hmâ chuan in hnênah ka awm tawh lo vang.

¹³Tho la, mipui hi thian thianghlim la, tihian hrilh rawh, ‘Naktûk atân inthian thianghlim rawh u, LALPA Israelte Pathian chuan heti hian a sawi e: “Aw Israelte u, in zîngah hian ânchhedawng thil a awm a; in zîng ata hê ânchhia hi in paih bo hmâ chuan in hmêlmâte in ngam hauh lo vang.”

¹⁴Chuvângin, zîngah a hnam hnam in rawn inlan tûr a ni. LALPAN a lo man hnam chu a chî chîin an rawn inlan leh tûr a ni; LALPAN a lo man hnam ațang chuan a chhûngkua kuain an rawn inlan leh tûr a ni; LALPAN a lo man chhûngkua ațang chuan mipa, a mal malin an rawn inlan tûr a ni.

¹⁵Tûpawh ânchhedawng thil latu chu amah leh a neih zawng zawng nê hâlhlum an ni ang, LALPA thuthlung a bawhchhiat avâng leh, Israel mite zîngah mualphothlâk tak thil a tih avângin,’ tiin,” a ti a.

¹⁶Tichuan Josua chu zîng takah a tho va, Israel mipuite chu a hnam hnam in rawn kaltîr a, Juda hnam chu man chhuah an ni ta a.

¹⁷Juda hnama chî pêng hrang hrangte chu a inlantîr a; Zer chí chu a malman a; Zer chhûngkua chu a mal mala a inlantîr hnûah Zabdia chu malman a ni ta a.

¹⁸Zabdia chhûngkua ațanga a mimal mala an inlan hnuah Juda hnama mi, Zera fapa, Zabdia fapa, Karmia fapa Akana chu man chhuah a ni ta a.

¹⁹Josua chuan Akana hnênah, “Ka fapa, LALPA Israelte Pathian chu châwimâwi la, a hnênah chuan inpuang tûrin ka ngên a che; eng thil nge i lo tih tâk min hrilh rawh; ka lakah engmah zêp suh,” a ti a.

²⁰Akana chuan Josua chu a chhâng a, “LALPA Israelte Pathian lakah thil sual ka lo ti ta a ni, hei hi ka thiltih chu a ni:

²¹Bungraw man ho zîngah khân Babulon puan mâwi tak leh tangkarua sekel zahnih bûk leh rangkachak tlang sekel sawmnga bûk ka hmû a, ka awt êma, ka la ta mai a ni. Ka puan in hnuai leiah ka phûm a, tangkarua pawh a mawngah ka dah,” a ti a.

²²Tichuan, Josua chuan mi a tîr a, anni chu puan inah chuan an va tlân a; ngai teh, puan inah chuan a lo thukru ngei a, tangkarua pawh a hnuaiah chuan a lo awm baw a.

²³Puan in ațang chuan an la chhuak a, Josua leh Israel mipui zawng zawng hmâah chuan an rawn lâ a, LALPA hmâah chuan an dah a.

²⁴Josua leh Israel mi zawng zawng chuan Zera fapa Akana chu an hruai a, tangkarua te, puan te, rangkachak tlang te, a fapa leh a

fanu te, a bâwngpa te, a sabengtung te, a berâm te, a puan in te leh, a neih zawng zawng nên Akor ruamah an hruai a.

²⁵Josua chuan, “Engah nge min tihmangan? LALPA vawiinah hian a timangang ve thung ang che,” a ti a. Israel mi zawng zawng chuan lungin an dêng a, lung a an den hnu chuan an hâl ta a.

²⁶A chungah chuan lung an tiang vûm thûr a. Tichuan, LALPA thinurna nasa tak chu a lo dâi ta a. Chû hmun hmîng chu tûn thlengin Akor Ruam tih a ni ta a.

BUNG 8

AI KHAW TLUK CHHIAT THU

¹LALPA chuan Josua hnênah, “Hlâu suh la, zâm hek suh; tho la, indo mi zawng zawng hruaiin, Ai khuah chuan chho rawh. En teh, Ai lal te, a mipui te, a khawpui leh a ram chu i kutah ka pe tawh e.

²Jeriko khuah leh an lal chungah i tih ang bawkin Ai khuah leh an lal chungah chuan i ti vê tûr a ni. An bungruah leh an ran rualte chauh râlâk sum atân nangmahni pualah in la tûr a ni. Khuah chu a hnung lam ațanga châng rutu insiamin bei rawh u,” a ti a.

³Tichuan, Josua leh indo mi zawng zawng chu Ai khuah bei tûrin an tho va; Josua chuan mi chak huaisen sîngthum a thlang chhuak a, zânah a tîr chhuak a.

⁴An hnênah thû a pê a: “Khai u le, a khawpui bei tûrin a khaw hnung lamah lo châng rû ang che u. Khuah ațangin awm hla lo ula, in vaiin inring reng ang che u.

⁵Kei leh ka hnêna miten khuah chu kan rawn pan ang a, min bei tûra an rawn tlan chhuah hunah keini chu an hmâah kan lo tlanche phawt dâwn a ni.

⁶Min ûm tûrin khuah ațangin an lo tlan chhuak ang a, khuah ațanga hla fê kan inûmtîr ang a, ‘A hmâ ang bawkin kan hmâah an tlanche leh ta,’ an ti ang a. Chutiang tûr chuan an hmâah kan tlanche dâwn a ni.

⁷Chutih lai chuan nangni kha in bihrûkna ațangin in lo chhuak ang a, khuah chu in rawn la dâwn nia, LALPA in Pathianin in kutah a pe dâwn si che u a.

⁸Khuah chu in lâk vêleh, a khaw pumin in hâl tûr a ni. LALPA thupêk ang takin in ti tûr a ni. Khai le, thu ka pêk tawh che u hi,” a ti a.

⁹Tichuan, Josua chuan anmahniho chu a tîr chhuak ta a; Ai khaw thlang lam, Bethel leh Ai khaw inkârah an châng ru ta a; Josua erawh chu chumi zân chuan mipui zîngah a riak a.

¹⁰Josua chu zîng takah a tho va, mipuite chu a ko khâwm a, amah leh Israel upate chuan mipuite hmâ hruaiin Ai khaw lam an pan chho ta a.

¹¹Ama ruala kal indo mite chuan an han hnaih ta hlê a; Ai khaw hmar lamah chuan awmhmun an khuar a. Ai khuah nêna an inkârah chuan ruam a awm a.

¹²Khawpui thlang lamah chuan lo châng ru tûrin mi sângngâ a dah bawk a.

¹³Mipuite chuan awmhmun an rem fel a, a sipai bupui chu khawpui hmar lamah an inkhuah a, khawpui thlang lama lo châng

tawh an awm bawh a, chumi zân chuan Josua chu ruamah chuan a kal a.

¹⁴Ai khaw lalin a lo hmuh chuan khawpui chhûnga mite chu hmanhmawh takin zîng takah an tho va, amah leh a mite zawng zawng chu Israelte bei tûrin, ruam thlen hmâ an hmun ruatah chuan an kal chhuak vek a. Mahse, khawpui hnung lamah châng rutu an awm tih rêng a hre lo.

¹⁵Josua leh Israelho zawng zawng chu chûngho hmâah chuan tlawm ta anga langin thlalêr kawngah an tlanchehia a.

¹⁶Anmahni ûm tûrin Ai khuah mi zawng zawng chu an inpun khâwm vek a. Josua ûm tûr chuan khuah ațanga hla taka thlêm chhuahin an awm a.

¹⁷Ai khuah leh Bethel khuah ațang chuan Israelte ûm tûrin tûmah abo abâng awm lovin an chhuak fai vek a. Israelte an ûm avângin khuah chu a inhawng tlang huai a.

¹⁸LALPA chuan Josua hnênah, “I fei ken kha Ai lam hawiin lek rawh, i kutah ka pe dâwn e,” a ti a. Josua chuan khawpui lam hawiin a kuta fei chu a lek ta a.

¹⁹Tichuan, a châng rutute chu an awmna hmun ațangin an tho thuai a; a bân a phar vêleh an tlan ngâl a, khuah chu an lût a, an la a, khuah chu rang takin an hâl ta a.

²⁰Ai khaw miten hnung lam an han lehawi a, vân lama an khawpui kâng khû chho ngut ngut chu an hmu ta mai a. Thlalêr lama tlanche hote lahin anmahni ûmtute an rawn bei lêt tawh bawh si a, khaw lamah mah tlan chhiat ngaihna an hre ta lo.

²¹A châng rututen khawpui chu an la a, khawpui chu a kâng khu vut vut tih Josua leh Israel mi zawng zawngin an hmuh chuan an lo tlan lêt a, Ai mite chu an that ta chiam a.

²²Mi dangte pawh khaw chhûng ațang chuan anmahni bei tûrin an lo chhuak a; Israelte chuan a lehlam lehlamah an kârcheh a. Tichuan, an sâm ta chiam a, tûmah nung damin an chhuah lo, tlan chhuak pawh an awm hek lo.

²³Ai khaw lal erawh chu a nung chungin an man a, Josua hnênah an rawn hruai a.

²⁴Israelten anmahni ûmtu Ai khaw mipuite chu phûlah te, thlalêr hmunah te an tihlum zawha, khandaih hriama an thah chimih vek hnûah chuan Israel mi zawng zawng chu Ai khuah chuan an lo kîr a, chuta la awmte chu khandaih hriamin an sâm zui zêl a.

²⁵Chumi nîa thî zawng zawng, Ai khuah mite chu a hmei a pain sîngkhat leh sângnhîh zet an ni.

²⁶Josua chuan Ai khuah awm zawng zawng an thah chimih vek hmâ chuan, bân phara fei a lek lai chu a thlah duh lo va.

²⁷LALPA Josua hnêna thû a pê ang takin chû khuah ran rualte leh râlâk bungruate chauh chu Israel mite chuan anmahni chanpual atân an la a ni.

²⁸Josua chuan Ai khuah chu a hâl a, bawhlhlawh chheh khâwmna hmun ni kumkhuah tawh tûrin a siam a, tûn thlengin a la ram chhe ta reng a ni.

²⁹Ai khaw lal chu tlai thlengin thingah an khai a. Josua thupêkin ni a tlan vêleh a ruang chu thing ațangin an la thlâ a, kulh kawngka bulah chuan an paih a, a chungah lung an tiang

vûm thûr a, chủ chu tûn thlengin a la awm reng a ni.

JOSUAN THUTHLUNG THAR THAWH

³⁰Josua chuan Ebal tlângah LALPA Israelte Pathian tân maichâm a siam a.

³¹Mosia Dân Lehkhabûin a ziah tawh angin, “lung chher loh, tûma’n thîr chhernaa an la chher loh lung maichâm” siam tûra LALPA chhiah hlauh Mosian Israel fate hnêna thû a lo pêk tawh angin an siam a. Chutah chuan remna inthâwina hlânin LALPA hnênah hâlrâ thilhan an hlân a.

³²Chutah chuan, Israel fate hmuh lai ngeia Mosian dân a ziah kha lungah chuan a ziaik chhuak a.

³³Israel-ho zawng zawng chu an upate, hotute, rorêltute nê, mikhualte leh a rama piangte nê, bâwm sîr tuakah chuan, a laia LALPA thuthlung bâwm zâwntu Levia chî puithiamte dinna bâwm sîr tuakah chuan an dîng a. LALPA chhiahhlauh Mosian Israel mipuite mal an insâwm tawn dân tûra thû a lo pêk tawh angin mipui zâtve-in Gerizim Tlâng an hmachhawn a, a zâtve dangin Ebal Tlâng an hmachhawn a.

³⁴Dân Bûa inziak malsâwmna thû leh ânhche dawnna thû zawng zawng chu dân bûa mi angin a chhiar chhuak a.

³⁵Israel mipui pung khâwmho zawng zawng, hmeichhia leh naupangte leh an zînga mikhualte hmâah Mosian Josua hnêna thû a lo pêkte chu pakhat mah chhiar hmaih a nei lo.

BUNG 9

GIBEON MITE NENA INREMNA

¹Jordan râla awm lallo zawng zawng–tlâng ram leh phâia mite, Lebanon thlenga Tuifinriat vaukam dung tluana awm–Hit-ho te, Amor-ho te, Kanaan-ho te, Periz-ho te, Hiv-ho te leh Jebus-hoten an lo hriat chuan,

²Josua leh Israel-ho chu beih rawn tumin an inthurual a, an intêl khâwm sauh sauh va.

³Gibeon khuaa mite erawh chuan Josuan Jeriko leh Ai khaw chung a thiltih dân an lo hriatin

⁴finrâwl an chhuah a, palai ni âwm taka insiam chawpin an va kal a. An sabengtungte chuan ip hlui tak tak te, uain ip hlui bel tẹp tawhte an phurhtîr a,

⁵an pheikhawkte chu a hluiin a tẹt pheng phung a, an kawr hâk rêng rêng chu hlui tak vek a ni a; an chhang kente chu a hmuar khawro vek a.

⁶Josua chu a riahhmun Gilgalah chuan an zuk pan a, amah leh Israel mipuite hnênah chuan, “Ram hla tak aţanga lo kal kan ni a; inremna thû i thlung ang u,” an ti a.

⁷Israel mite chuan Hiv-ho hnênah, “Kan zînga khawsa ve mai te hi in lo ni reng thei a; engtin nge inremna kan siampui theih ang che u?” an ti a.

⁸Mahse anni chuan Josua hnênah, “I chhiahhlawhte kan ni e,” an ti a. Josua chuan, “Tute nge in niha, khawi aţanga lo kal nge in nih?” a ti a.

⁹Anni chuan, “LALPA in Pathian hming avânga i chhiahhlawhte hi ram hla tak aţanga lo kal kan ni a; A hming

thanzia te, Aigupta rama a thiltih zawng zawngte kan lo hria a,

¹⁰Jordan râla Amor-ho lal pahni– Hesbon lal Sihona leh, Basan lal Oga, Astarot a awm te chung a thiltih zawng zawngte pawh kan lo hre ve a.

¹¹Chuvângin, kan upate leh kan ram mipui zawng zawngin kan hnênah, ‘Zin kawnga ei tûrte keng ula, anni chu va be rawh u, “In chhiahhlauh kan ni a; chuvângin, inremna thû i thlung ang u,” ti tûrin min rawn tîr a ni e,’ an ti a.

¹²Hêng chhangte hi keimahni in leh lo kan rawn chhuahsan lai chuan a la lum thar thar a. Tûnah zawng, en mah teh u, a hmuar khawro vek tawh a nih hi.

¹³Hêng uain iptête hi a thar laia kan thun khah a ni a, en teh u, a tẹt zo tawh a; kan silhfên leh kan pheikhawkte pawh kan zin kawng a thui êm avângin a chul zo tawh a nih hi,” an ti a.

¹⁴Israel mite chuan an thil kente chu an lo dawn sak a; mahse, LALPA râwn nachâng rêng an hre lo va.

¹⁵Tichuan, Josua chuan inremna siamin, anmahni zuah tûrin thû a thlunpui ta mai a; pung khâwmho zînga rorêltute chuan chhia an chham hnan ve ta baw k a.

¹⁶Chutia thû an thlunpui hnû ni thum a lo ral chuan, an bul lawka chêng, an thenawm hnaia mi an ni tih an hre chhuak ta a.

¹⁷Israel-ho chu a ni thum nîah chuan an khuaah an va kal a. Chûngho khuate chu Gibeon te, Kephira te, Beeroth te leh Kirjat Jearim te a ni a.

¹⁸Mahse, pung khâwmho hruaitute chuan LALPA Israelte Pathian hnênah chhia an lo chham tawh avângin, Israelho chuan an bei lo. Pung khâwmho zawng zawng chuan an hotute chu an dem hlê a.

¹⁹Tichuan, hruaitu zawng zawngte chuan mipuite hnênah, “LALPA Israelte Pathian chhâlin chhia kan lo chham tawh si a, chuvângin kan khawih thiang tawh lo a ni.

²⁰Heti hian kan ti mai dâwn nia: An hnêna chhia kan lo chham tawh avângin, thinurna laka kan him nân anni hi chu i zuah mai ang u,” an ti a.

²¹Hotute vêk chuan, “Tihian zuah mai ila, pung khâwmho zawng zawng tân thingkittu leh tuichâwiah awm rawh se, hotute an intiam laklawh tawh si a,” an ti a.

²²Josua chuan anniho chu a ko khâwm a, an hnênah, “Kan bul hnaia awm reng si, ‘Ram hla taka awm kan ni,’ tiin eng vânga min bum nge in nih?”

²³Chuvângin, ânhhedawng in ni ta, ka Pathian ina thingkittu leh tuichâwiah in awm ang a, sal nihna aţang hian in zalên tawh ngai lo vang” a ti ta a.

²⁴Anni chuan Josua chu an chhâng a, “LALPA in Pathian chuan a chhiahhlauh Mosia hnênah ram zawng zawng pe tûr che u leh, in hmâa awm hnam zawng zawng tiboral vek tûrin thû a pê tih i chhiahhlawhte hian kan lo hria a; min tihlum ve mai kan hlauh êm avângin heti hian kan ti ta mai a ni.

²⁵Tûnah zawng, hei, in kutah kan awm ta e; dik leh t̃ha in tih ang apiangin kan chungah ti rawh u,” an ti a.

²⁶Chutiang tak chuan a tihsak ta a, Israel-hoten an thah loh nân an kut aṭang chuan a chhan chhuak ta a ni.

²⁷Chumi ni aṭang chuan anni chu LALPAN maichâm a hûnna hmun ruatah leh pung khâwmhote tân Josuan thingkittu leh tuichâwi atân a siam ta a ni, tân thleng hian.

BUNG 10

NÎ A DING RENG

¹Jerusalem lal Adoni-Zedeka chuan Josuan Ai khu a lâka, Jeriko leh an lal a tihchimih ṭhak ang bawka Ai khu leh an lal chung a tih ve thûte leh, Gibeon mipuiten Israelte nân inremna an siama, an mi leh sâ an lo nih tâk thûte an lo hriat chuan,

²an hlau ta êm êm a, Gibeon chu khaw ropui tak, lal khawpui dangte tluka lian, Ai khu ai pawha ropui zâwk leh a mi chêngte pawh mi chak pui pui hlîr an ni si a.

³Tichuan, Jerusalem lal Adoni-Zedeka chuan Hebron lal Hohama hnênah te, Jarmuth lal Pirama hnênah te, Lakis lal Japhia hnênah leh Eglon lal Debira hnênah te mi a tîr a,

⁴Lo kal ula, min rawn ṭanpui teh u, Gibeon-ho hian Josua leh Israel fate nêna inremna an siampui avângin i va bei ang u,” a ti a.

⁵Tichuan Amor-ho lal panga, Jerusalem lal te, Hebron lal te, Jarmut lal te, Lakis lal te leh Eglon lal te chu an intêl khâwm a, an sipai rual zawn zawn nân an kal chho va, Gibeon-ho do tûr chuan a khaw bulah ṭanhmun an rawn khuar a.

⁶Gibeon mite chuan Josua hnênah an riahmmun Gilgal-ah zualko an tîr a, “I chhiahhlawhte hi min thlahthlam suh âw; min ṭanpuia min chhan tûrin kan hnênah lo kal thuai rawh, tlâng rama chêng Amor lal zawn zawnge chu min do rawn tûrin hei, an rawn pungkhâwm tuau tuau mai,” a ti a.

⁷Tichuan, Josua chu indo mi zawn zawn nân, mi chak huaisen zawn zawn nân Gilgal aṭang chuan an chho va.

⁸LALPAN Josua hnênah, “Anniho chu hlau suh, i kutah ka pe tawh e; i hmâah hian tûmah ding thei an awm lo vang,” a ti a.

⁹Gilgal aṭang chuan zankhuain an kal a, Josua chuan anniho chu a han ṭhâwn ṭhut a.

¹⁰LALPA chuan Israel-ho hmâah chuan a titlâwm dêr a, Gibeon-ah chuan an that ṭeuh va, Beth Horon kawngah chuan an ûm chiam a, Azeka leh Makeda thlengin an that zêl a.

¹¹Chutia Israel-ho hmâa an tlânchhiata, Beth Horon chhuk thlâkna hmun an thlen chuan LALPAN vân aṭangin rial lian pui puiin Azeka thleng rawkin a dentîr chiam a, mi tam tak an thî a. Israel-ten khandaiha an thah aiin rialin a den hlum chu an tam zâwk a ni.

¹²LALPAN Israelte hnêna Amor-ho a pêk nî chuan Israel-mite mithmuhah Josuan LALPA hnênah tihian a sawi a: “Nî-a, Gibeon chungah ding reng rawh; Thlâa, Aijalon Ruamah ding tlat rawh,” tiin.

¹³Tichuan, nî chu a ding ta reng a, Thlâ pawh a ding bawk a, An hmêlmâte chungah duh tâwka Phubâ an lâk thlengin. Hê thû hi Jasara Lehkhabuah ziah a ni lo vem ni? Tichuan, nî chu vân laizâwlah chuan a ding reng a, ni khat pumhlûm ang vêt tla lovin a awm reng a.

¹⁴Chutianga LALPAN mihring âw a ngaithlâk nî chu tân hmân emaw, tân hnûah emaw a awm ngai rêng rêng lo; LALPAN Israel-hote chu râl a dopui tlat si a.

¹⁵Tichuan, Josua chu Israel mi zawn zawnge nân Gilgala an riahmmunah chuan an kîr leh ta a.

AMOR LAL PANGA KHAIHLUM

¹⁶Chung lal pangâte chu an tlânchhia a, Makeda pûkah an birû a.

¹⁷Josua hnênah chuan, “Lal pangâte kha Makeda pûka an bihrûknaah hmuh chhuah an ni,” tiin an rawn hrilh a.

¹⁸Josua chuan, “Pûk kawngka chu lung lian pui puiin chhîn tlat ula, a vêngtu tûr mi dah rawh u.

¹⁹Nangni chu awm ve reng lovin, in hmêlmâte ûmzui ula, a hnuđâlho chu bei zui zêl rawh u. LALPA in Pathianin in kutah a pe tawh che u a, an khaw chhûngah luhtîr hauh suh u,” a ti a.

²⁰Josua leh Israel faten mi tam tak an thah chiam hnûah chuan an thah bâng mi tlênte chu kulh chhûngah te an tlân lût hlawn a.

²¹Mi zawn zawn chu Makeda hmuna Josua hnênah chuan ngaiṭha takin an hâw khâwm a. Israel fate sawi chhe zâwngin tûma’n lei pawh an phût ngam eih lo.

²²Josua chuan, “Pûk kawngka kha hawn tawh ula, lal pangâte kha pûk aṭang kân ka hnênah rawn hruai rawh u,” a ti a.

²³Chutiang chuan an ti a, pûk aṭang chuan chûng lal pangâte chu an rawn khalh chhuak a: Jerusalem lal te, Hebron lal te, Jarmut lal te, Lakis lal leh Eglon lal te an ni a.

²⁴Chûng lalte chu Josua hnêna an rawn hruai laiin Josuan Israel mi zawn zawn chu a ko khâwm a, a hnêna awm sipai hotute hnênah chuan, “Lo kal hnai ula, hêng lalho nghâwngh hi rawn rap teh u,” a ti a. An lo hnai a, an nghâwngh chuan an rap a.

²⁵Josua chuan an hnênah, “Hlau suh ula, zâm hek suh u; chak tak leh huai takin awm ula, in hmêlmâ in do zawn zawn chungah LALPAN a dosak zêl ang che u,” a ti a.

²⁶Chumi zawnah chuan Josuan kut a thlâk a, a that vek a, thing panga lêrah an kâi a; tlai thlengin thingah chuan an kâi a.

²⁷Ni a tlâk dâwn lai takin Josua thupêkin thing ata chu an la thlâ a, an bihrûkna pûkah chuan an paih lût a, pûk kawngka chu lung lian pui puiin an chhîn a, chû chu tân thlengin a la awm reng a ni.

CHHIM LAMA HNEHNA

²⁸Chumi ni chuan Josuan Makeda khu a lâ a, an lal chu khandaihin a that a. A chhûnga awm mi zawn zawn chu a râwt chimit vek a. Tûmah a zuah lo. Jeriko lal a tih dân ang bawkin Makeda lal chungah pawh a ti a.

²⁹Josua chu Israel-ho zawn zawn nân Makeda aṭangin Libna-ah an kal a; Libna khu a chu an bei a.

³⁰LALPAN chû khu leh an lal chu Israelte kutah a pê a; a chhûnga mi zawn zawn chu khandaihin an tihlum vek a. Tûmah an zuah lo va, Jeriko lal chungah an tih ang bawkin chû khaw lal chungah chuan an ti a.

³¹Josua chu Israel-ho zawng zawng nêen Libna aṭangin Lakis-ah an kal a; ṭanhmun an siam a, khua chu an bei a.

³²LALPA chuan Lakis chu Israel-te kutah a pe a, a ni hnih nîn an lâ a, a khaw chhûnga mi zawng zawng chu khandaihin an sât hlum vek a, Libna khua an tih dân bawkin an ti a.

³³Gezer lal Horama chu Lakis-ho pui tûrin a lo kal a; Josua chuan amah leh a hote chu pakhat mah zuah lovin a lo that chimit vek a.

³⁴Josua chu Israel mi zawng zawng nêen Lakis aṭangin Eglon-ah an kal a; chû khaw bei tûr chuan ṭanhmun an khuar a, an bei ta a.

³⁵Chumi ni chuan an la nghâl a, khandaihin an sâmb chiam a; Lakis khua a tih dân ang bawkin chumi ni vêk chuan chû khuua mi zawng zawng chu an that chimit vek a.

³⁶Josua chu Israel mi zawng zawng nêen Eglon aṭangin Hebron-ah an kal a; an va bei a.

³⁷Khua chu an lâ a, khandaihin an sâmb chiam a—an lal te, an chhehvêl khuua mi zawng zawng chu an that vek a; tûmah zuah lovin Eglon khua an tih ang bawkin an ti a, a khua lamin an chhu chhe vek a, a mi chêng zawng zawng pawh an râwt chimit vek a.

³⁸Chumi hnû chuan Josua chu Israel mi zawng zawng nêen Debir-ah an lêt leh a; an va bei leh a.

³⁹Chû khua chu an lâl nêen, a chhehvêl khua zawng zawng nêen an la vek a; khandaihin an sâmb a, a chhûnga awm zawng zawng an that chimit ṭhak a. Tûmah an zuah lo; Hebron chungah a tih ang khân Debir leh an lâl chungah pawh a ti bawk a, Libna khua leh an lâl chungah a tih ang bawk khân.

⁴⁰Tichuan, Josua-ho chuan a ram zawng zawng: tâng ram leh chhim lam ram te, phâi ram leh thlâlêr âwihtlân ram te chu an lâl zawng zawngte nêen an tichimit vek a; LALPA Israelte Pathianin thû a pêk angin, a thâwka thaw thei tawh phawt chu eng thil mah zuah lovin an that fai vek a ni.

⁴¹Josua-ho chuan Kades Barnea aṭangin Gaza thlengin, Gosen ram zawng zawng nêen, Gibeon thlengin an hneh zo ta a.

⁴²LALPA Israelte Pathianin Israel mite a dopui avângin chûng lalte leh an ram zawng zawng chu ṭum khatah an la thei vek a ni.

⁴³Chûng zawhah chuan Josua chu Israel mi zawng zawng nêen an riahhmun Gilgal-ah an hâwng leh ta a.

BUNG 11

HMAR LAMAH HNEHNA

¹Hazor lal Jabinan chûng thû chu a lo hriatin, Madon lal Jobaba te, Simron lal te, Aksaph lal te,

²hmar lam tâng ram lal te, Kinnerot chhim lam lal te, phâi ram lal leh thlang lam Dor tâng vêla lal te,

³chhak lam leh thlang lama Kanaan lal te, Amor-ho te, Hit-ho te, Periz-ho te, tâng rama chêng Jebus-ho te leh Mizpa rama Hermon tâng hnuaia awm Hiv-ho hnênah te zualko a tîr a.

⁴Tichuan, an sipai zawng zawng nêen anrawn thawk a, sakawr leh tawilâlir pawh tam tak a ni a, lui kama ṭiauvut ang maia tam an ni.

⁵Chûng lallo zawng zawng chu an intêl khâwm a, Israel-ho dorawn tûrin Merom tui awmna bulah ṭanhmun an khuar a.

⁶LALPA chuan Josua hnênah, “Hêng mite hi hlau suh, naktûk hetih hunah hian tihlum sâin Israelte hmâah karawn pe vek dâwn e. An sakawr kaihza thâ chhahsak ula, an tawilâlirte chu hâl vek ang che u,” a ti a.

⁷Tichuan, Josua chu indo mi zawng zawng nêen anmahni do tûrin a chhuak a, Merom tui kiangah chuan an va bei thut a.

⁸LALPA chuan Israelte kutah a pê a, an hneh duai duai a, Sidon Lian Zâwk leh Misrephot Lui thlengin an ûmzui a, chhak lamah Mizpah Ruam thlengin an ûm bawk a; an thah chimih vek thlengin an ûm zui a ni.

⁹Tichuan, LALPAN a hrilh ang takin Josua chuan a ti a: an sakawr kaihza thâ te a chhahsak a, an tawilâlirte a hâlsak bawk a.

¹⁰Chutih lai chuan Josua chu a lêt leh a, Hazor khua a lâ a, an lal chu khandaihin a tihlum a; tûn hmâin Hazor chu chûng lai vêl lalram khawpui ber a lo ni thîn a.

¹¹A chhûnga mi zawng zawng chu khandaihin an sâmb a, an vâiin an that vek a. Thaw thei rêng rêng nung damin an zuah lo. Hazor khua chu a hâl bawk a.

¹²Chutiang chuan chûng lai vêla lal khawpui leh an lâl zawng zawngte chu Josuan a la vek a, khandaihin a that zêl a. LALPA chhiahhlawh Mosian thû a lo pêk ang zêlin a râwt chimit vek a ni.

¹³Amaherawhchu, mual pâwng chungah khaw lo din tawh sâ chu Israelten pakhat mah an hâl lo, Hazor chauh chu Josuan a hâl a ni.

¹⁴Chûng khawpuia râlâlâk sumte leh ran rual te chu Israel fate chuan anmahni pualin an nei a; amaherawhchu mi zawng zawng an thah zawh vek hmâ chuan khandaihin an that zêl a, thaw thei rêng rêng zuah an nei lo.

¹⁵LALPAN a chhiahhlawh Mosia thû a pêk angin Mosia chuan Josua hnênah thû a pê a, chutiang tak chuan Josuan a ti a. LALPAN Mosia hnêna thû a pêk tawh zawm loh rêng a nei lo.

JOSUA RAM LAKTE

¹⁶Josua chuan hêng ram zawng zawng: tâng ram te, Chhim lam zawng zawng te, Gosen ram pum te, phâi ram te, Jordan phâi-Israel tâng ram leh phâi ram te a la vek a,

¹⁷Halak Tlâng leh Seir chhohna aṭangin Hermon Tlâng hnuaia Lebanon Ruama awm Baal Gad a va thleng a. An lalte a man vek a, a bei a, a that vek a.

¹⁸Josuan hêng lallo zawng zawng a do chhung hi rei tak a ni.

¹⁹Gibeon khuua Hiv-mite tih chauh lo chu Israel fate nêna inremna siam khawi khua mah an awm lo. Indonaa ram lâl vek a ni.

²⁰LALPAN Mosia hnêna thû a pêk angah hêngho hi a tihmang veka, zahngaihna tel lova tihboral vek an nih theih nân Israel-ho nêna indo chawkh chuak tûr zâwngin LALPAN an thilung a lo tiluhlul bawk si a.

²¹Chûng lai vêk chuan Josua chu a lo kal a, tâng ram aṭang te, Hebron aṭang te, Debir aṭang te, Anab aṭang te, Judai leh Israel tâng ram zawng zawngah Anak-ho chu a that vek a; Josua chuan

an kuate nên lam a tiboral vek a ni.

²²Israel fate awmna ramah Anaka thlahte chu pakhat mah an awm tawh lo; Gaza-ah te, Gad-ah te leh Asdodah te chauh an awm tawh a ni.

²³LALPAN Mosia hnêna a lo sawi tawh angin Josua chuan a ram pum chu a la ta a; Josua chuan Israel mite hnênah a hnam hnama an rochan atân a pe ta a. Ram chu indona lakah a lo ralmuang ta a.

BUNG 12

MOSIA LO HNEH TAWH LALTE

¹Israel faten an hneh tâk lalte leh an ram an neihsak tâkte chu hêngte hi a ni: ni chhuahna Jordan râl chhak lam, Arnon Lui ațanga Hermon Tlâng thlengin, Jordan phâi zâwl chhak lam zawng chu a ni a:

²Chûng zînga lal pakhat chu Amor mi, Sihon lal, Hesbona chêng a ni a, Aroer ațangin Gilead ram zâtve a awp a, chû chu Arnon lui kama awm a ni; chu lui lai tak ațanga Ammon hote nêna inrîna Jabbok Lui thlengin a ni a,

³Jordan chhak lam phâi, Kinnereth Dîl ațanga Araba Tuipui (Tuipui Al) thlengin a ni leh a; Beth Jesimoth panna kawng nê, chhim lama Pisga mual thluang thla zawng nê a huam vek a ni.

⁴Lal dang, Basan lal Oga, mi lian hnam zînga la dam chhun chu Astaroth ah leh Edrei-ah te a awm a,

⁵Hermon Tlâng te, Salka te, Basan ram zawng zawng te, Gesur leh Makatho ramri thleng bâkah, Gilead ram zâtve leh Hesbon lal Sihona ramrî thlengin a awp a.

⁶Chûngte chu LALPA chhiahhlawh Mosia leh Israel faten an hneh vek a; LALPA chhiahhlawh Mosia chuan Reuben-ho te, Gad-ho te, Manase hnam zâtve te hnênah an rochan atân a pê a.

JOSUAN A HNEH TÂK LALHOTE

⁷Josua leh Israel faten Jordan thlang lam ram an hneh tawhte chu hêng hi an ni: Lebanon Ruama Baal Gad ațangin chhim lamah Halak tlâng leh Seir tlâng lâwn chhohna thlengin a ni a, chûngte chu Josuan Israel hnamte chanpual atân a pê a,

⁸tlâng ram te, phâi ram te, Jordan phâi te, tlâng pangpêr ram te, thlalêr ram te a ni a; chhim lamah Hit-ho te, Amorho te, Kanaan-ho te, Periz-ho te, Hivho te leh Jebus-ho te chênna ram a ni a:

⁹Jeriko lal, pakhat; Bethel kianga Ai khaw lal, pakhat;

¹⁰Jerusalem lal, pakhat; Hebron lal, pakhat;

¹¹Jarmuth lal, pakhat; Lakis lal, pakhat;

¹²Eglon lal, pakhat; Gezer lal, pakhat;

¹³Debiri lal, pakhat; Geder lal, pakhat;

¹⁴Horma lal, pakhat; Arad lal, pakhat;

¹⁵Libna lal, pakhat; Adullam lal, pakhat;

¹⁶Makeda lal, pakhat; Bethel lal, pakhat;

¹⁷Tapua lal, pakhat; Hepher lal, pakhat;

¹⁸Aphek lal, pakhat; Lasaron lal, pakhat;

¹⁹Madon lal, pakhat; Hazor lal, pakhat;

²⁰Simron Meron lal, pakhat; Aksaph lal, pakhat;

²¹Taanak lal, pakhat; Megiddo lal, pakhat;

²²Kedes lal, pakhat; Karmel-a Jokneam lal, pakhat;

²³Dor tlâng sânga Dor lal, pakhat; Gilgal mite lal, pakhat;

²⁴Tirza lal, pakhat—an vâin lal sawmthum leh pakhat an ni.

BUNG 13

RAM LÂK TUR HMABÂKTE

¹Josua chu a upain a lo tar ta hlê a. LALPA chuan a hnênah, “I lo upain i tar ta hlê a, ram lâk tûr lah a la tam bawk si a.

²Ram lâk tûr la hmabâkte chu hei hi a ni: Philistia ram pumpui leh Gesur ram pumpui te,

³Aigupta chhak lama Sihor ațangin hmar lamah Ekron thlengin (chû chu Kanaan rama chhiar a ni a); Philistia lal panga—Gaza mi te, Asdod mi te, Askelon mi te, Git mi te, Ekron mi te leh Avit mi te an ni;

⁴chhim lamah chuan Kanaan ram zawng zawng te, Sidon mite rama Meara ațanga Amor-ho ramri Aphek thlengin a ni;

⁵Gebal-ho ram te, Lebanon rama ni chhuahna lam zawng zawng, Hermon Tlâng hnuaia Baal Gad ațanga Hamath luhna thlengin a ni a;

⁶Lebanon ațanga Misrephot inkâr tlâng rama chêng zawng zawng te, Sidon mi zawng zawng nê—chûng mite chu Israel mite hmâah hian ka hnawt chhuak vek ang; thû ka pêk che ang khân, Israelte rochan tûr ram hi thumvâwrin sem phawt mai rawh.

⁷Chutichuan, hê ram hi hnam kuate leh Manase hnam zâtve te rochan atân sem rawh,” a ti a.

JORDAN CHHAK RAM INSEM

⁸LALPA chhiahhlawh Mosian a lo pêk tawh angin Reuben hnam te, Gad hnam te leh a dang hnam zâtve te chuan, Jordan chhak lam ram, Mosian an rochan atâna a lo pêk chu an dawng ta a:

⁹Arnon lui kama awm Aroer khua ațangin ruam lai taka khawpui nê, Medeba phâi zâwl zawng zawng, Dibon thlengin;

¹⁰Amor lal, Hesbon ațanga awptu Sihona khawpui zawng zawng, Ammon mite ramri thlengin;

¹¹Gilead ram leh Gesur-ho leh Maakath-ho ramri huamin, Hermon Tlâng vêl zawng zawng te, Basan ram pumpui, Salka thlengin;

¹²Astarot leh Edrei khuua rorêl thîn Basan lal Oga ram zawng zawng, ani kha milian hnam la dam chhun a ni a; chûngte chu Mosian a hneh a, a lo hnawt chhuak tawh a.

¹³Israel-hote chuan Gesur mite leh Maakath mite chu an la hnawt chhuak lo, tûn thlengin Gesur mite leh Maakath mite chu Israelte zîngah an la chêng ta reng a ni.

¹⁴Rochan ram a sem vê loh chu Levi hnam te chauh an ni a; LALPA Israelte Pathianin a lo hrihl tawh angin a hnêna inthâwina, meia thihhlante chu an rochan a ni si a.

REUBEN-HO RAM

¹⁵Mosian Reubena thlahte chu an chhûngkua ang zêla insem tûr ram a lo pe tawh a.

¹⁶An ram chan chu Arnon Lui kama Aroer khua te, a ruam laia khawpui te leh Medeba phâi zâwl zawng zawng te;

¹⁷Hesbon khua leh a chhehvêl phaia khua zawng zawng: Dibon te, Bamoth Baal te, Beth Baal Meon te,

¹⁸Jahaza te, Kedemoth te, Mephaath te,

¹⁹Kirjathaim te, Sibmah te, ruam laia tlânga awm Zereth Shahar te;

²⁰Beth Peor te, Pisga chuan hnuai te, Beth Jesimoth te—

²¹phâi ram khawpui zawng zawng leh Amor lal, Hesbona rorêl thîn, Sihona lalram zawng zawng te a ni; ani kha Midian lalhote nêen Mosian a lo that tawh a: Evia te, Rekema te, Zura te, Hura te, Reba te kha Sihona lalram chhûnga awm thîn an ni a.

²²Israel faten khandaiha an thahte zîngah zâwlnei Balaama, Beora fapa kha a tel vê baw.

²³Reuben-ho ramrî chu Jordan lui kam a ni. Hêng ram leh khawpui te leh khawpui te hi Reubena thlahten a chhûngkua kuua rohana an neih tâk te chu a ni.

GAD-HO RAM

²⁴Mosia chuan Gad-ho hnam te tân rochan ram a pe vê a, Gada thlahten a chhûngkua ang zêla an chan tân.

²⁵An ram chuan Jazer te, Gilead khua zawng zawng te, Ammon-ho ram zâtvê te, Rabba bula awm Aroer te a huam a,

²⁶Hesbon aţangin Ramath Mizpa leh Betonim thlengin, Mahanaim aţangin Debir ramri a huam a,

²⁷ruamah chuan Beth Haram te, Beth Nimra te, Sukkoth te, Zaphon te, Hesbon lal Sihona ram la bâng zawng te a ni a, Jordan lui ramrîa neih zêlin, Jordan lui chhak lam zawng nêen, Kinnereth Dîl thlengin a ni.

²⁸Hêng ram leh khawpui te leh khawpui te hi Gada thlahten a chhûngkua kuua rohana an neih tâk chu a ni.

MANASE HNAM ZATVE (CHHAK LAM)

²⁹Mosian Manase hnam zâtvê te tân rochan a sem baw a; Manase hnam zâtvê-ten a chhûngkua ang zêla an chan ve tûr chu:

³⁰An ram chu Manahaim aţangin Basan ram zawng zawng, Basan lal Oga lalram pumpui leh, Basan ram chhûnga Jair khawpui leh a khawper, khaw sawmruk te;

³¹Gilead ram zâtvê leh, Basan rama Oga lalram khawpui Astaroth leh Edrei te chu Manase fapa Makira thlahte chan tûr a ni, Makira thlah zâtvê-ten an chhûngkua ang zêla an chan tûr chu.

³²Hêngte hi Jordan chhak lam, Jeriko râl, Moab rama Mosian ram luah tûr a sem te chu a ni.

³³Levi hnam te erawh chu ram luah tûr a sem vê lo; an hnêna a lo sawi tawh angin LALPA Israelte Pathian chu an rochan a ni si a.

BUNG 14**JORDAN THLANG LAM RAM SEM DAN**

¹Kanaan rama Israel fate rochan, puithiam Eleazara te, Nuna fapa Josua leh Israela thlah hnam tin aiawhtuten chanpual ram an sem te chu hêng hi a ni.

²LALPAN Mosia hnêna thû a lo pêk angin hnam kua leh hnam chanvê te chanpual insem dân chu thumvâwrin a ni.

³Mosian Jordan chhak lamah hnam hnih leh a chanvê te tân rochan a lo pe tawh a; Levi hnam te tân erawh chuan an zîngah rochan a pe ve lo.

⁴Josepha thlahte chu hnam hnih: Manase leh Ephraim an ni a. Levia thlahte tân erawh chuan chênna tûr khawpui an ruat te leh, an dai vêla ran tlatna tûr hmun leh bungraw dahna tûr ilo bák chu chanpual engmah an pe lo.

⁵LALPAN Mosia hnêna thû a pêk angin Israel fate chuan an ti a; ram chu an insem ta a.

KALEBAN HEBRON A ROCHUNG

⁶Juda thlahte chu Josua hnênah Gilgal-ah an lo kal a. Ken mi Jephunea fapa Kaleba chuan a hnênah: “Kades Barnea hmuna Pathian mi Mosia hnêna LALPAN nang leh keia chungchâng a sawi kha i la hria ang a.

⁷LALPA chhiahhlawh Mosian Kades Barnea aţanga ram enthla tûra min tîr lai kân kum sawmlîa upa ka ni a, a hnênah kân ka thînlunga awm ang chiaha ka hrilh kha.

⁸Nimahsela, ka ruala kal ve ka unaute kân mipui rilru an tîhnual zo va, kei chuan LALPA ka Pathian hi ka zui tawp mai a ni.

⁹Mosia chuan khami ni kân tihian chhia a chham a, ‘LALPA i Pathian chu tihtak zeta i zui avângin i kephahin a rah chin ram chu nang leh i thlahten kumkhuain an la rochung ngei ang,’ tiin.

¹⁰Ngai teh, hei, LALPAN hê thû Mosia hnêna a hrilh aţanga thlalêra Israelte vahvaih chhûng, hêng kum sawmli leh kum nga chhûng zawng hian LALPA chuan mi la damtîr ve reng a; hei, tûnah chuan kum sawmriat leh pangâa upa ka lo ni ta.

¹¹Chuti chung pawhin, Mosian min tîr lai ang baw kân tûnah pawh hian ka la chak reng a; indonaah pawh lûta chhuak theiin, khatih hun lai ang baw kân tûnah pawh hian ka la chak reng a ni.

¹²Chuvângin, LALPAN khami nia a sawi ang kân, hê tlâng hi min pe ta che; khatih lai kha chuan Anak-ho an awm a, kulh nei khaw ropui tak an nei tih i hriat kha. LALPAN min awmpui ang a, chûngho chu LALPA sawi tawh ang ngeiin ka hnawt chhuak thei mai ang,” a ti a.

¹³Josua chuan mal a lo sâwm a, Hebron khua chu Jephunea fapa Kaleba rochun tân a pe ta a.

¹⁴LALPA Israelte Pathian chu tihtak zeta a zui tlat avângin, Hebron khua chu Ken mi, Jephunea fapa Kaleba chanpual a ni ta zêl a ni, tûn thleng hian.

¹⁵Tûn hma lama Hebron hming chu Kirjath Arba a ni (Arba chu Anak-ho zînga mi ropui ber a ni a). Tichuan, ram chu indona ata a lo ralmuang ta a.

BUNG 15**JUDAI RAM**

¹Juda thlahte tân an chhûngkua ang zêla an chanpual ram chu hei hi a ni: A chhim tâwp ramrî chu Zin Thlalêr chhim lam, Edom nêna a inrîna a ni.

²A chhim lam ramrî chu Tuipui Al chhim kilah, a chhim chhawng litengsâwl aţangin a inţan a.

³Chuta ţangin Akrabim chhohna chhim chhawng lamah a kal zêl a, Zin lam a hrût phei a, Kades Barnea chhimah a chho va, Hezron a thleng a, Adar lamah a chho va, Karka a kualkhung a.

⁴Chuta ţang chuan Azmon-ah a kal phei a, Aigupta Lui a va pawh a; tuifinriatah ramrî a tâwp a. Hei hi chhim lama in ramrî chu a ni a.

⁵Chhak lam ramrî chu Tuipui Al a ni a, Jordan lui chhuah thlengin a ni. Hmar lam ramrî chu Jordan lui chhuaha litengsâwl aţangin a inţan a.

⁶Ramrî chu Beth Hoglaah a kal chho va, Beth Araba hmar lamah a kal zêl a; ramrî chu Reubena fapa Bohana lungah a chho va.

⁷Akor Ruam aţangin ramrî chu Debir lamah a kal chho va, Gilgal lam hawiin a kâwi leh a, chû chu Adumim chhohna bul a ni a, chû chu ruam chhim lampang a ni. Ramrî chu En Semesh lamah a kal zêl a, En Rogel-ah a tâwp a.

⁸Ramrî chu Hinnoma fate Ruam hrûl zêlah kalin Jebus-ho khawpui (Jerusalem) chhim lam ep thlengin a kal a. Ramrî chuan Hinnom Ruam thlen hmâa tlâng chhîp a lâwn chho va, chû chu Rephaim Ruam hmar lam tâwpa awm a ni.

⁹Tlâng chhîp aţang chuan Nephtoa lui tui lamah a chhuk a, Ephron Tlâng khawpui a huam a. Ramrî chuan Baala (Kirjath Jearim) a vêt kual a.

¹⁰Baala aţangin Seir Tlângah ramrî chu a kal zêl a, Jearim tlâng hmar lam (Kesalon) hrûlah a kal a, Beth Semesah a chhuk thlâ a, Timna lamah a kal zêl a.

¹¹Ramrî chu hmar lampang Ekron sîrah a kal a. Sikron lamah a her kual a, Baala Tlâng hrûlah kal zêlin Jabneel a thleng a, tuiptuah ramrî chu a tâwp ta a ni.

¹²Thlang lam ramrî chu a dung tuanin Tuifinriat vaukam a ni. Hei hi Juda thlahte, an chhûngkua ang zêla an chanpual ram chin chu a ni.

KALEBAN HEBRON LEH DEBIR A LUAH

¹³LALPAN Josua hnêna thû a pêk angin Juda thlahte zîngah Jephunea fapa Kaleba chanpual atân Kirjath Arba an tih (Arba chu Anaka pa a ni), Hebron an tih bawk chu an pê a.

¹⁴Chûta ţang chuan Kaleba chuan Anaka fapate pathum a hnawt chhuak a: Anaka fate chu, Sesaia te, Ahimana leh Talmaia te an ni.

¹⁵Chuta ţang chuan Debir khuua michênge chu a han rûn a (Debir chu tûn hmâ chuan Kirjath Sepher tih a ni a).

¹⁶Kaleba chuan, “Kirjath Sepher han beia la theitu hnênah ka fanu Aksaii hi nupui atân ka pê ang,” a ti a.

¹⁷Tichuan Othniela, Kenaza fapa, Kaleba unau chuan a han lâ a; a fanu Aksaii chu nupui atân a pe ta a.

¹⁸Ani chu a va lâwi chuan a pa hnêna ram dîl tûrin a pasal chu a fuih a. Tichuan, a sabengtung aţang chuan a chhuk a, Kaleba chuan, “Eng nge i duh le?” a lo ti a.

¹⁹Ani chuan, “Malsâwmna min pe rawh; Chhim lamah ram min pe tawh a, tuikhurte pawh min pe tel ta che,” a ti a. Tichuan tuikhur chhak zâwk leh tuikhur thlang zâwk chu a pe ta a.

JUDAI RAM KHUATE

²⁰Juda thlah hnamte tân an chhûngkua ang zêla an rochan chu hêng hi a ni:

²¹Chhim lama Edom ramrî bula Juda thlah hnam chan chhûnga khaw hmâwrtawng deuh deuh te, Kapzeel te, Eder te, Jagur te,

²²Kina te, Dimona te, Adada te,

²³Kedes te, Hazor te, Ithnan te,

²⁴Ziph te, Telem te, Bealoth te,

²⁵Hazor te, Hadata te, Kerioth te, Hezron (Hazor tihna a ni) te,

²⁶Amam te, Sema te, Molada te,

²⁷Hazar Gadda te, Hesmon te, Beth Pelet te,

²⁸Hazar Sual te, Beerseba te, Bizjothja te,

²⁹Baala te, Ijim te, Ezem te,

³⁰Eltolad te, Chesil te, Horma te,

³¹Ziklag te, Madmana te, Sansana te,

³²Lebaoth te, Silhim te, Ain te leh Rimmon te: khawpui 29 leh an khawperte nêna a ni.

³³Phai lamah: Estaol te, Zora te, Ashna te,

³⁴Zanoa te, En Gannim te, Tappua te, Enam te,

³⁵Jarmuth te, Adullam te, Soko te, Azeka te,

³⁶Saraim te, Adithaim te, Geder a te leh Gederothaim te: khawpui 14 leh an khawperte nên;

³⁷Zenan te, Hadasa te, Migdal Gad te,

³⁸Dilean te, Mizpa te, Joktheel te,

³⁹Lakis te, Bozkath te, Eglon te, Jos. 10:3;

⁴⁰Kabbon te, Lahmas te, Kitlis te,

⁴¹Gederot te, Beth Dagon te, Naama te leh Makeda te: khawpui 16 leh a khawperte nên;

⁴²Libna te, Ether te, Asan te,

⁴³Jipta te, Asna te, Nezib te,

⁴⁴Keila te, Akzib te leh Maresa te: khawpui pakua leh a khawperte nên;

⁴⁵Ekron leh a chhehvêl khaw lian leh têtê;

⁴⁶Ekron aţanga tuiptui thlengin, Asdod bul vêla khuate nên;

⁴⁷Asdod leh a chhehvêl khua leh khawper te, Gaza khua leh a khawper te—Aigupta Lui leh Tuifinriat vaukam thlengin.

⁴⁸Tlâng ram lamah: Samir te, Jattir te, Soko te,

⁴⁹Danna te, Kirjath Sanna (chu chu Debir a ni) te,

⁵⁰Anab te, Estemo te, Anim te,

⁵¹Gosen te, Holon te leh Gilo te: khawpui sâwmpakhat leh an khawperte nê;

⁵²Arab te, Duma te, Esean te,

⁵³Janum te, Beth Tappua te, Apheka te,

⁵⁴Humta te, Kirjath Arba (Hebron) te leh Zior te: khawpui pakua leh an khawperte nê;

⁵⁵Maon te, Karmel te, Ziph te, Jutta te,

⁵⁶Jezreel te, Jokdeam te, Zanoa te,

⁵⁷Kain te, Gibeah leh Timna te: khawpui sâwm leh an khawperte nê;

⁵⁸Halhul te, Beth Zur te, Gedor te,

⁵⁹Maarat te, Beth Anot te leh Elketon te: khawpui paruk leh an khawperte nê;

⁶⁰Kirjat Baal (Kirjath Jearim) leh Rabba te: khawpui pahni leh an khawperte nê;

⁶¹Thalêr lamah: Beth Araba te, Middin te, Sekaka te,

⁶²Nibsan te, Chi Khawpui te leh En Gedi te: khawpui paruk leh an khawperte nê.

⁶³Jebus-ho, Jerusalem luahtute chu Juda thlahte chuan an hnawt chhuak thei lo; mahse Jebus-ho chu Juda thlahte nê Jerusalemah tûn thleng hian an la chêngo reng a ni.

BUNG 16

EPHRAIM LEH KHAWTHLANG MANASE MITE

¹Josefa thlahte chanpual chu Jeriko bul Jordan ațangin chhak lamah, Jeriko tuiyah a kal zêl a, Jeriko ațangin Bethel lamah thlalêr tâng ramah a chho va,

²Bethel ațangin Luz-ah, Arki ram chhunga Ataroth ramri hrûlah;

³thlang lamah Japhlet-ho ramri a pan a, Beth Horon chuan-hnuai ramri lamah a chhuk thlâ a, Gezer a thleng a; tuiptuiyah a tâwp a.

⁴Josefa thlahte, Ephraïma leh Manasea thlahte chuan an chanpual atân an la ta a.

EPHRAIM RAM

⁵Ephraïma thlahte ramrî chu an chhûngkua ang zêlin hetiang hi a ni: Chhak lama an ram chanpual ramrî chu Atarot Adar ațanga Beth Horon chhakta zâwk thlengin a ni.

⁶Ramrî chu tuiptui lam panin Mikmethat hmar thlangah a chhuak a; chuta țang chuan ramrî chu chhak lamah Taanath Silo lamah a kual a, Janoha chhakah a kal zêl a.

⁷Janoha ațangin Ataroth leh Naara lamah a chhuk thlâ a, Jeriko a thleng a, Jordan luiyah a chhuak a.

⁸Ramrî chu Tappu ațangin thlang lamah Kana lui a thleng a, tuiptuiyah a tâwp a. Hei hi an chhûngkua ang zêla Ephraïm thlah hnamte chanpual ram chu a ni.

⁹Manasea thlahte chanpual zîngah Ephraïma thlahte tâna khawpui an ruatsak a awm baw, khawpui zawng zawng leh an khawperte nê.

¹⁰Gezer khuua Kanaan-ho an hnawt chhuak lo va; mahse Kanaan-ho chu Ephraïm mite zîngah tûn thleng hian chhiahhlawh anga chhawr luihin an la awm.

BUNG 17

KHAWTHLANG MANASE HNAM ZATVE

¹Josefa fatîr a nih avânga Manasea thlahte chanpual chu hei hi a ni: chû chu Manasea fatîr Makira, Gileada pa chu indo mi a nih avângin, Gilead leh Basan ram pawh pêk a ni rêng a.

²Manasea thlah dangte pawhin an chhûngkua ang zêlin chanpual ram an nei vê: chûngte chu Abiezera thlahte, Heleka thlahte, Asriela thlahte, Sekema thlahte, Hephhera thlahte leh Semida thlahte an ni; chûngte chu Manasea thlah mipate zîngah chuan an chhûngkaw hotu deuhte an ni.

³Nimahsela Zelophehada, Hephhera fa, Gileada fa, Makira fa, Manasea fa chuan fapa nei lovin fanute chauh a nei a. Chûng a fanu hmingte chu Malai te, Novai te, Hoglei te, Milkai leh Tirzai te an ni.

⁴Nuna fapa Josua leh puithiam Eleazara leh hotute hnênah an lo kal a, “Kan nuțate zînga rochan nei ve tûrin LALPA chuan Mosia hnênah thû a pêk kha,” an rawn ti a. Tichuan, LALPA thupêk angin an pamite zîngah rochan an siamsak ve ta a.

⁵Jordan râla Gilead leh Basan ram an chan tawh bâkah, Manasea thlahte chuan chan sâwm an chang a,

⁶an mipate ang bawka Manasea thlah hmeichhiaten chanpual an chan ve vâng a ni; Manasea thlah dangte chuan Gilead ram chu an chang hlawn a.

⁷Manase-ho chan ram chu Aser-ho ram ațanga Mikmethat thlengin a ni a, chû chu Sekem chhak lam a ni; ramrî chuan En Tappua mite awmna chhim lam a hrût zêl a.

⁸Tappua chu Manasea-ho chan a ni a, mahse Manasea ramri depa awm Tappua chu Ephraïma thlahte chan a ni thung.

⁹Ramrî chu Kana lui lamah a chhuk a, chhim lamah lui chu a zawh thla zêl a. Manasea khawpui thenkhat chu Ephraïm ram chhunga awm a ni. Manasea ramrî chu lui kawr hmar lam zêl chu a ni a; tuiptuiyah a tâwp a.

¹⁰Chhim lam chu Ephraïma chan a ni a, hmar lam chu Manasea chan a ni a, tuiptui chu ramrî a ni. Manasea hmar lam chu Aser ram a ni a, chhak lam chu Isakar ram a ni.

¹¹Isakar leh Aser ramah Manasea chuan Beth Sean leh a chhehvêl khua te, Ibleam leh a chhehvêl khua te, Dor khuua chêng te leh a chhehvêl khua te, En Dor khuua chêngte leh a chhehvêl khua te, Taanak a chêngte leh a chhehvêl khua te, Megiddo khuua chêngte leh a chhehvêl khua te nê— tâng ram bial thum a nei.

¹²Chuti chung chuan Manasea thlahte chuan chûng khuua lo awmte chu an hnawt chhuak thei lo, chû ramah chuan Kanaan-ho chu an țang nghet ve tlat si a.

¹³Israela thlahte chu an lo chak telh telh a, Kanaan-ho chu hnawt chhuak lovin chhiahhlawh hnâ an thawhtîr ta zâwk a.

EPHRAIM LEH MANASE-HOVIN RAM DUH BELH

¹⁴Josefa thlahte chuan Josua hnênah, “Engtizia nge keini hi ram luah tûr chan khat chauh min pêk le, LALPAN tûn thlengin mal min sâwm a, mi kan thahnem hlê si a?” an ti a.

¹⁵Josua chuan a chhâng a, “Chutia in tam hlê a, Ephraim tâng ramte hi in tân a zîm lutuk a nih chuan Periz-ho leh milian-ho awmna ram ngâwte khi chên nân han thiat darh ta che u,” a ti a.

¹⁶Nimahsela, Josefa thlahte chuan, “Tlâng ram mai chu kan khawpkham lo vang; Kanaan-ho phai zâwla chêng zawng zawng, Beth Sean leh a chhehvêl khuate leh, Jezreel Phai zâwla awm zawng zawngten thîr tawlaillîr an nei vek si a,” an ti a.

¹⁷Josua chuan Josefa thlah—Ephraimho leh Manase-ho hnênah chuan, “Hnam ropui leh thiltitheî tak in ni bawk a; chuvângin ram chan khat mai chang tûr pawh in ni lo tak e;

¹⁸mahse, tâng ram chu chang tel ngei rawh u. Ram ngaw pawh ni se in thiat darh ang a, a ram huam chin zawng chu in ta ni rawh se; Kanaan-hote chu thîr tawlaillîr te neiin chak hlê mah se, in hnawt chhuak ngei dâwn nia,” a ti a.

BUNG 18**RAM LA BÂNG SEM DAN**

¹Israel hnam pumpui chu Silo-ah an pungkâwm a, chutah chuan biakbûk an sâ a. Ram pawh an thu hnuaiah an dah tawh a.

²Nimahsela, Israel fate zîngah an chanpual tûr ram la nei ve lo hnam sarih an la awm cheu va.

³Josua chuan Israel fate hnênah chuan: “LALPA in thlahtute Pathianin ram a pêk tawh che u hi, engtika luah nge maw in tum vê le?

⁴In zîng aţang khân hnam tin aiawh mi pathum zêl inthlang chhuak ula, ka lo tîr chhuak hlawn teh ang; an luah tûr ram en fiah tûrin va fang chhuak sela, ka hnênah lo kîr leh rawh se.

⁵Ram chu hmun sarihah an then ang a. Juda-ho chu chhimah an hmun ngaiah an awm ang a, Josefa thlahte pawh hmar lama an awmna ngaiah an awm zêl ang.

⁶Ram chu hmun sarihah in then tûr a ni, a inthen dân ziah sâ chu in rawn lâ ang a, tichuan LALPA kan Pathian hmâah thum ka lo vâwrsak ang che u.

⁷Levia chîte erawh chuan in zîngah chanvo an nei ve lo vang, LALPA puithiam hnâ hi an rochan a ni si a. Gad-ho te, Reuben-ho te leh Manase hnam zâtvê te hnênah LALPA chhiahhlawh Mosian Jordan chhak lamah chanpual a lo pe tawh bawk a,” a ti a.

⁸Tichuan, chûng mite chu an kal chhuak ta a; ram teh tûr ho hnênah chuan Josua, “Tikhân kal ula, ram chu en dik chungin fang chhuak vek ula, ka hnênah lo kîr leh ang che u; tichuan, LALPA hmâah Silo-ah thum ka lo vâwrsak dâwn che u nia,” a ti a.

⁹Chûng mite chu an kal ta a, ram chu an fang chhuak vek a, hmun sarihah thenin khawpuite an chhinchhiah a; Silo riahhmunah Josua hnênah an lo kîr leh a.

¹⁰Josua chuan Silo-ah LALPA hmâah thum a vâwr a, an ramri then dân ang zêlin ram chu Israel fate hnênah chuan a sem ta a.

BENJAMIN RAM

¹¹Benamina thlahten an chhûngkua ang zêla an chan tûr chungah thumvâwr chu a tla hmasa ber a, an chan tûr ram chu Juda thlahte leh Josefa thlahte inkâra awm a ni a.

¹²Hmar lama an ramrî chu Jordan aţangin a inţan a, Jordan hrûlah ramri chuan hmar lam a pan a, chuta tângin thlang lam hawiin tâng ramah a her chho va; Beth Aven Thlalêrah a tâwp a.

¹³Ramrî chuan Luz khaw lam a pan a, Luz khaw bul (Bethel) chhim lam a thleng a; ramrî chu Ataroth Addar lamah a chhuk thla a, Beth Horon chuan-hnuai chhima tâng bul a zu thleng a.

¹⁴Beth Horon chhim lam tâng aţang chuan ramrî chu chhim thlang lamah a kual a; Kirjath Baal (Kirjath Jearim an tih baw), Juda thlahte khuaah a tâwp a. Hei hi a thlang lama rî chu a ni.

¹⁵A chhim lam rî chu Kirjath Jearim aţangin a inţan a, thlang lam pan zêlin, Nephtoa luite tuih a chhuak a.

¹⁶Ramrî chu Rephaim hmar lampang ruama Hinoma Fapa Ruam bula tâng hmâwrah a chhuk a, Jebus khawpui chhim lam Hinnom ruamah a chhuk a, En Rogelah a chhuk zêl a.

¹⁷Hmar hawi zâwngin a kual a, En Semes-ah a chhuak a, Adummim Chhohna bula Geliloth a thleng a, Reubena fapa Bohana lungphunah a chhuk leh a.

¹⁸Araba hmar lam a hrût pheî a, Arabaah a chhuk a.

¹⁹Ramrî chu Beth Hogla hmar lam hrûl zai zaiyah a kal a; tichuan, ramri chuan Jordan lui chhim tâwpa Tuipui Al hmar lam litengsâwlah a hmâwr a bawk a. Hei hi a chhim lam ramrî chu a ni.

²⁰Jordan lui chu chhak lama a ramrî a ni. Hei hi an chhûngkua ang zêla Benamina thlahte rochun ram huam chhûng chu a ni.

²¹Benamina thlahte tân an chhûngkua ang zêla an khawpuite chu Jeriko te, Beth Hogla te Emek Keziz te,

²²Beth Araba te, Zemaraim te, Bethel te,

²³Avim te, Para te, Ophrah te,

²⁴Kephar Haamoni te, Ophni leh Gaba te: khawpui 12 leh an khawperte;

²⁵Gibeon te, Rama te, Beeroth te,

²⁶Mizpa te, Kephira te, Moza te,

²⁷Rekem te, Irpeel te, Tarala te,

²⁸Zela te, Elep te, Jebus (chû chu Jerusalem tihna a ni) te, Gibeath te leh Kirjath te: khawpui sâwm leh pali leh a khawper te. Hei hi an chhûngkua ang zêla Benamina thlahte chanpual ram chu a ni.

BUNG 19**JUDAI RAMAH SIMEON-HO CHANVO**

¹Simeona thlahten an chhûngkua ang zêla an chan tûrin thumvâwr wavi hnihna chu Simeona chungah a lo tla a. An chan tûr ram chu Juda thlahte ram chan chhûnga mi a ni.

²An chan chhûngah chuan Beerseba (Seba) te, Molada te,

³Hazar Sual te, Bala te, Ezem te,

⁴Eltolad te, Bethul te, Horma te,

⁵Ziklag te, Beth Markaboth te, Hazar Susa te,

⁶Beth Lebaoth leh Saruhen te: khawpui sâwm leh pathum leh an khawper te nê;

⁷Ain te, Rimmon te, Ether leh Ashan te: khawpui pali leh an khawper te;

⁸Hêng khawpui chheh vêla khua zawng zawng, chhim lama Ramah an tih, Baalath Beer thlengin a ni. Hei hi Simeona thlahte tân an chhûngkua ang zêla an chanpual chu a ni.

⁹Simeona thlahte chanpual hi Juda thlahte ram chhûnga awm a ni, Juda thlahte tân an ram chu a zau lutuk rêng rêng a. Chuvângin, anni chanpual chhûngah chuan Simeona thlahten ram an nei ta mai a ni.

ZEBULUN RAM

¹⁰Thumvâwr wawi thumna chu an chhûngkua ang zêlin Zebuluna thlahte chungah a lo tla a, an luah tûr ramri chuan Sarid thleng a huam.

¹¹An ramri chuan thlang lam panin Marala te, Debbashet te a pal tlang a, Jokneam chhaka lui dung a zawh a.

¹²Sarid aţangin chhak lam ni chhuahna lamah Kislot Tabor ri hrûlah a chho zêl a, Dabêrat lam a pan zêl a, Japhia a pal tlang a.

¹³Chuta ţang chuan Eth Kazin lam hawiin Gath Hepher chhak lam a hrût chho va, Nea nêna inrî Rimmon a va thleng a.

¹⁴Ramri chu Hannathon hmar lamah a her kual a, Jipthah El Ruamah a tawp ta a ni.

¹⁵Kattat te, Nahallal te, Simron te, Idala te leh Bethlehem te a tel a: khawpui 12 leh a khawpêrte nê.

¹⁶Hei hi Zebuluna thlahte, an chhûngkua ang zêla an chan ram, an khawpui te leh an khawpêrte chu a ni.

ISAKAR RAM

¹⁷Thumvâwr wawi lîna chu an chhûngkua ang zêla an chan tûrin Isakara thlahte chungah a tla a.

¹⁸An ram chhûngah chuan Jezreel te, Kesulot te, Sunem te,

¹⁹Haphraim te, Sion te, Anaharat te,

²⁰Rabbit te, Kision te, Abez te,

²¹Remeth te, En Gannim te, En Hadda te leh Beth Pazzet te a huam.

²²Ramri chuan Tabor te, Sahazima te leh Beth Semes te a hrût a; Jordan-ah a tawp a: khawpui 16 leh an khawpêrte nê.

²³Hêng hi Isakara thlahte tân an chhûngkua ang zêla an chan ram leh an khawpui leh a chhehvêl khuate chu a ni.

ASER RAM

²⁴Thumvâwr wawi ngâna chu an chhûngkua ang zêla an chan tûrin Asera thlahte chungah a tla a.

²⁵An ram chuan Helkath te, Hali te, Beten te, Aksap te,

²⁶Alamelek te, Amad leh Misal te a huam a; thlang lamah Sihor Libnat lui zawh thlâin Karmel Tlâng a zu thleng a.

²⁷Ni chhuahna lam Beth Dagon lamah a her chho leh a; Zebulun ram leh Jipthah El Ruam a han thleng a, chuta ţangin hmar lamah Beth Emek leh Neiel lamah a pheî zêl a, vei lama awm Kabul a pal tlang a,

²⁸Ebron te, Rehob te, Hammon te leh Kana te, Sidon Lian thlengin ramri a kal zêl a.

²⁹Ramri chu Rama lamah a kual a, Tura kulh khawpui a chhun a; ramri chu Hosa lamah a kal zêl a, Akzib bial chhûngah tuipuah a tawp ta a ni.

³⁰Umma te, Aphek te leh Rehob te pawh an tel: khawpui 22 leh an chheh vêl khuate nê.

³¹Hêng hi Asera thlahte tân an chhûngkua ang zêla an chan ram leh an khawpui leh a chhehvêl khuate chu a ni.

NAPHTALI RAM

³²Thumvâwr wawi rukna chu an chhûngkua ang zêla an chan tûrin Naphtali thlahte chungah a tla a.

³³An ramri chu Heleph aţangin a inţan a, Zaananim hmuna terebinth kûng te, Adami Nekeb te leh Jabneel te leh Lakkum te a huam a; Jordan luih a tawp a.

³⁴Heleph aţangin ramri chuan thlang lamah Aznot Tabor a zu thleng a, chuta ţang chuan Hukok lamah a kal zêl a; chhim lamah Zebulun nê a inrî a, thlang lamah Aser nê a inrî bawk a, ni chhuahna lamah Jordan lui bul Juda kuaah a tawp a ni.

³⁵Kulh nei khuate chu Ziddim te, Zer te, Hammath te, Rakkat te, Kinneret te,

³⁶Adama te, Rama te, Hazor te,

³⁷Kedes te, Edrei te, En Hazor te,

³⁸Iron te, Migdal El te, Horem te, Beth Anath leh Beth Semes te: khawpui 19 leh an khawper te a ni.

³⁹Hêng hi Naphtalia thlahte tân an chhûngkua ang zêla an chan ram leh an khawpui leh a chhehvêl khuate chu a ni.

DAN-HO RAM

⁴⁰Thumvâwr wawi sarihna chu an chhûngkua ang zêla an chan tûrin Dana thlahte chungah a tla a.

⁴¹An chan ram chuan hêng hi a huam, Zora te, Eshtaol te, Ir Semes te,

⁴²Saalabin te, Aijalon te, Jethlah te,

⁴³Elon te, Timna te, Ekron te,

⁴⁴Elteke te, Gibbethon te, Baalat te,

⁴⁵Jehud te, Bene Berak te, Gath Rimmon te,

⁴⁶Me Jarkon te leh Rakkon te, Joppa khawpui bula ram thlengin.

⁴⁷Dana thlahte chanpual ramri chu hêng khaw piah lamah te hian a la ni, a chhan chu, Dana thlahten Lesem an han beiha an lâk theih tâk vângin a ni; khandaihin mi an that chiam a, an laksak a, an chêng ngâl ta a ni. Lesem khua chu an thlahtu Dana hming châwiin Dan an ti ta a.

⁴⁸Hêng hi Dana thlahte tân an chhûngkua ang zêla an chan ram leh an khawpui leh a chhehvêl khuate chu a ni.

JOSUA CHANPUAL

⁴⁹An ramri then dân ang zêla ram an insem zawh chuan, Israel fate chuan Nuna fapa Josua chu an zingah chanpual an pe vê a.

⁵⁰LALPA thú ang takin a dîl ang khawpui an pê a, chû chu Ephraim tlâng rama Timnat Sera a ni a; khawpui a din a, tah chuan a chêng ta a.

⁵¹Hêngte hi a ni puithiam Eleazara te, Nuna fapa Josua te leh Israel hnam tina hnam puipaten Silo khuaa LALPA hmâa biakbûk kawngkâa thumvâwra rochan atân ram an sem tâk chu ni. Tichuan a ram pum chu an insem zo ta a.

BUNG 20**INHUMHIMNA KHAWPUITE**

¹LALPA chuan Josua a bia a, heti hian a ti a,

²Israel fate hnênah sawi rawh: ‘Mosia hmanga in hnêna ka sawi tawh ang khân inhumhimna tûr khua siam tawh rawh u;

³miin tihpalh emaw, tum hauh lo emawa mi a lo thah palha a tlân luh theih nân; thisen chhuahna phuba latu lakah in tân inhumhimna a ni ang.

⁴Chûng khua eng berah emaw chuan a tlân ang a, khawpui kawngka bulah chuan a va ding ang a, chû khaw upate hriatah chuan a tlân chhan a hrilh ang a, anni’n khaw chhûngah an lo la lût ang a, an zînga a chên vê theih nân awmna hmun an lo pe tûr a ni.

⁵Thisen phuba latuin a rawn ûmzui pawhin tualthattu chu chû mi kutah chuan an pe tûr a ni lo, inhmêlhuat lâwk vâng ni lo, tihpalh thila a thenawm that a nih vângin.

⁶Chû khuaah chuan a chungthû mipuiin an rêl fel hmâ emaw, chutih laia puithiam lalber tâng lai a thih hmâ emaw chuan a awm reng tûr a ni. Chumi hnûah chuan tualthat palhtu chu a tlânchhiatna khua a tâng chuan ama khua leh ama inah a hâwng thei tawh ang, ‘tîn,” a ti a.

⁷Tichuan, Naphtali tlâng ram Galili bialah Kedesh khua te, Ephraim tlâng ramah Sekem khua te leh Juda tlâng ramah Kirjath Arba (Hebron) khua te an ruat a.

⁸Jordan râl chhakah chuan Reuben-ho ram, Jeriko chhak zâwn thlalêr phâi zâwla awm Bezer khua te, Gad-ho ram Gilead bialah Ramoth khua te, Manase-ho ram, Basan biala Golan khua te an ruat bawk.

⁹Hêng khuate hi Israela thlah zawng zawng leh an zînga hnam dang chêng vête tâna an ruat chu a ni a, tual that palhtu chu a tlân luha, pung khâwmhovin a chungchâng an rêl hmâa thisen phuba latu kuta a thih lohna tûr a ni.

BUNG 21**LEVIA CHITE KHUA**

¹Levia chite zînga an puipate chu puithiam Eleazara te, Nuna fapa Josua te leh Israel hnam hruaitute hnênah an lo kal a.

²Kanaan rama Silo khuaah chuan an rawn bia a, “LALPA chuan Mosia hmanga kan chênna tûr khua leh a dai vêla ran tlatna tûr vântlang ram min pe tûra thú min pêk tawh kha,” an ti a.

³Tichuan, LALPA thupêk ang takin Israel fate chuan an ram chan chhûnga mi, hêng khuate leh a dai vêl ram te hi Levia chite hnênah an pê a:

⁴Thumvâwr chu Kohatha thlahten an chang a. Puithiam Aarona thlah, Levia chite chuan Juda hnam chan a tâng te, Simeon hnam chan a tâng leh Benjamin hnam chan a tângin khawpui sâwm leh pathum thumvâwrin an chang a.

⁵Kohatha thlah dang zawngten Ephraim hnam chan te, Dan hnam chan te leh Manase hnam zâtve chan a tângin khawpui sawm thumvâwrin an chang a.

⁶Gersona thlahten Isakar hnam chan te, Aser hnam chan te, Naphtali hnam chan te, Basan rama Manase hnam zâtve chan te a tângin Gersona thlahten thumvâwrin khawpui sâwm leh pathum an chang a.

⁷Merari thlahten an chhûngkua ang zêlin Reuben hnam chan te, Gad hnam chan te leh Zebulun hnam chan te a tângin khawpui sawm leh pahni an chang a.

⁸LALPAN Mosia hmanga thú a lo pêk angin Israel faten hêng khuate hi thumvâwrin Levia chite hnênah an pê a ni.

⁹Tichuan, Juda thlahte leh Simeona thlahte chan ram a tângin sawi tâk khuate chu an pê a,

¹⁰chûng chu Levia thlahte zînga mi Aarona chhûngte leh Kohatha chhûngkaw tân a ni: thumvâwr chu an chungah a tla hmasa si a.

¹¹Juda tlâng rama Kirjath Arba khua leh a dai vêl ram an pê a (Arba chu Anaka pa a ni a), chû chu Hebron tihna a ni a.

¹²A khawpui chhehvêla ram leh khuate erawh chu Jephunea fapa Kaleba chanpual atân an pê a.

¹³Tichuan, puithiam Aarona thlahte hnênah chuan Hebron khua (tualthatte inhumhimna khua) leh a dai vêl ram te, Libna leh a dai vêl ram nê,

¹⁴Jattir leh a dai vêl ram nê, Estemoa leh a dai vêl ram nê,

¹⁵Holon leh a daivêl ram nê, Debir leh a chhehvêl ram nê,

¹⁶Ain leh a chhehvêl ram nê, Jutta leh a dai vêl ram nê, Beth Semes leh a dai vêl ram nê: chûng hnam pahni a tâng chuan khawpui pakua pêk a ni;

¹⁷Benjamin hnam a tângin, Gibeon leh a chhehvêl ram nê, Geba leh a chhehvêl ram nê,

¹⁸Anathoth leh a chhehvêl ram nê, Almon leh a chhehvêl ram nê: khawpui palî a ni.

¹⁹Puithiam Aarona thlahte chan khua zawng zawng chu a chhehvêl ram te nê sâwm leh pathum a ni.

²⁰Kohatha thlah chhûngkua, Levia chí, Kohatha thlah dang zawngte pawhin Ephraim hnam te chan ram a tâng bawkin an nei a.

²¹Ephraim tlâng rama awm Sekem khua (tualthatte inhumhimna khua) leh a chhehvêl ram te, Gezer leh a chhehvêl ram te,

²²Kibzaim leh a chhehvêl ram te, Beth Horon leh a chhehvêl ram te: khawpui palî a ni;

²³Dan hnam chan ațangin, Elteke leh a chhehvêl ram te, Gibethon leh a chhehvêl ram te,

²⁴Aijalon leh a chhehvêl ram te leh, Gath Rimmon leh a chhehvêl ram te: khawpui pali a ni.

²⁵Manase hnam zâtve hnam chan ațangin Tanak leh a chhehvêl ram te leh, Gath Rimmon leh a chhehvêl ram te: khawpui pahnihi a ni.

²⁶Chûng khawpui sâwm leh an chhehvêl ramte chu Kohatha thlah chhûngkaw dang zawnge tân a ni.

²⁷Gersona thlahte, Levia chhûngkua te hnênah pawh Manase hnam chanve dang chan ațangin Basan biala Golan khua leh a chhehvêl ram (tualthatte inhumhimna khua) leh Be Estera leh a chhehvêl ram: khawpui pahnihi a ni baw;

²⁸Isakar hnam chan ațangin Kision leh a chhehvêl ram te, Daberat leh a chhehvêl ram te,

²⁹Jarmuth leh a chhehvêl ram te leh En Gannim leh a chhehvêl ram te: khawpui palî a ni a;

³⁰Aser hnam chan ațangin Misal leh a chhehvêl ram te, Abdon leh a chhehvêl ram te,

³¹Helkath leh a chhehvêl ram te, Rehob leh a chhehvêl ram te: khawpui palî a ni a;

³²Naphtali hnam chan ațangin Kedesh leh a chhehvêl ram (tualthatte inhumhimna khua) te, Hammoth Dor leh a chhehvêl ram te leh, Kartan leh a chhehvêl ram te: khawpui pathum a ni a.

³³Chûng khawpui sâwm leh pathum te leh an chhehvêl ramte chu Gersona thlah chhûngkaw dang zawnge tân a ni.

³⁴Meraria thlah chhûngkua, Levia chi la bâng zawnge tân Zebulun hnam chan ațangin Jokneam leh a chhehvêl ram te, Karta leh a chhehvêl ram te,

³⁵Dimna leh a chhehvêl ram te leh, Nahalal leh a chhehvêl ram te: khawpui palî a ni;

³⁶Reubena hnam chan ațangin, Bezer leh a chhehvêl ram te: khawpui palî a ni a,

³⁷Kedemoth leh a chhehvêl ram te, Mephaath leh a chhehvêl ram te: khawpui palî a ni a;

³⁸Gad hnam chan ațangin, Gilead biala Ramoth leh a chhehvêl ram (tualthattu inhumna khua) te, Mahanaim leh a chhehvêl ram te,

³⁹Hesbon leh a chhehvêl ram te leh, Jazer leh a chhehvêl ram te: khawpui palî a ni.

⁴⁰Tichuan, Levia chi la bâng zawnge, Meraria thlahho chuan an chhûngkua ang zêlin khawpui sâwm leh pahnihi chu thumvâwrin an chang a.

⁴¹Israel fate luah chin ram chhûnga Levia chîte khawpui zawnge zawnge chu a chhehvêla ram te nên sawmlî leh pariat a ni.

⁴²Hêng khua zawnge zawnge hi a dai vêlah ram âwlin a hual chhuak vek baw a; chutiang chu khawpui zawnge zawnge awm dan a ni.

THUTIAM HLENCHHUAHNA

⁴³LALPA chuan an thlahtute hnêna chhechhama pêk a tiam ram zawnge zawnge chu Israelte hnênah a pe ta a, tichuan an nei a, awmhmun an bêngbel ta a.

⁴⁴LALPA chuan an pute hnêna a lo tiam tawh angin râlmuangaw chawlhna a pe ta a. An hmêlmâte tûmahin an do ngam rêng rêng lo va; LALPAN an hmêlmâte zawnge zawnge chu an kutah a pe vek si a.

⁴⁵LALPAN Israel hnam tâna thil tha a lo sawi chhuah zawnge zawnge pawh pakhat mah a thlawn hek lo. Engkim a thleng kim vek a ni.

BUNG 22

KHAW CHHAKA AWMTE AN HAW TA

¹Josua chuan Reuben-ho te, Gad-ho te leh Manase hnam zâtve te chu a ko va,

²an hnênah: “LALPA chhiahhlawh Mosian thu a pêk zawnge zawnge che u kha in zâwm a, keiin thu ka pêk che u pawh in âwih baw a.

³Tûn thleng hian hei leh chen hi in unaute in kalsan lo va, LALPA in Pathian thupêk in zâwm tlat a.

⁴Tûnah chuan LALPA in Pathianin a lo tiam tawh angin in unaute chu a chawlh hahdamtîr ta a; tichuan, nangni pawh Jordan râla LALPA chhiahhlawh Mosian a lo pêk che u, nangmahni ramah, mahni in lamah chuan hâw ve tawh rawh u.

⁵Amaherawhchu, LALPA chhiahhlawh Mosian dân leh thupêk a pêk zawnge zawnge—LALPA in Pathian hmangaih tûr te, a kawng zawnge zawnge zawnge tûr te, a thupêk zâwm tûr te, amah vuan nghet tlat tûr te, in thilung leh in thlarau zawnge zawnge a rawng bawl tûr tein fimkhur hlê ang che u,” a ti a.

⁶Tichuan, Josuan mal a sâwm a, a thlah liam a, an in lamah an hâw ta a.

⁷Manase hnam zatve te hnênah Mosian Basan ram a pê a, a zatve dangte chu an unaute zîngah Jordan thlang lamah Josuan ram a pe vê thung a. Anmahni in lama a tîr hâw lai pawhin Josua chuan mal a sâwm a,

⁸an hnênah, “In in lamah chuan ran rual te, rangkachak te, silvar te, dâr te, thîr te, thawmhna tam tak nên hausa hnawkin in hâw dâwn ta a. In hmêlmâte laka in râllakte hi in unaute nên insem ang che u,” a ti a.

⁹Tichuan, Reubena thlah te, Gada thlah te leh Manase hnam zâtve te chu Kanaan rama Silo ațang chuan an hâw ta a. LALPA thupêk anga Mosian a lo pêk, anmahni rochan Gilead rama hâw tûrin Israela thlah mi dangte chu an tînsan ta a.

JORDAN LUI KAMA MAICHÂM

¹⁰Reubena thlah te, Gada thlah te leh Manase hnam zatve te chuan Kanaan rama Jordan bial an va thlen chuan Jordan lui bulah maichâm lian leh ropui tham an din ta a.

¹¹Israela thlahte chuan, “Ngâwi teh u, Reubena thlah te, Gada thlah te leh Manase hnam zâtve te khân Kanaan ram dep, Jordan bial—Israel fate chan lamah maichâm an din luah mai,” tia mi sawi

an lo hria a.

¹²Israela thlahten chu thû an lo hriat chuan anmahni do tûrin Israel mipui zawng zawng chu Silo-ah an inpun khâwm chiam a.

¹³Israela thlahte chuan Gilead rama Reubena thlah te, Gada thlah te leh Manase hnam zâtvê te hnêna va kal tûrin puithiam Eleazara fapa Phinehasa an tîr a;

¹⁴ama rualin Israel hnam sâwm zînga an puipa pakhat zêl an tel baw a; chûngte chu Israel hnam hrang hranga chhûngkaw hotu lûte vek an ni a.

¹⁵Anni chu Gilead ramah Reubena thlah te, Gada thlah te leh Manase hnam zâtvê te hnênah chuan an va kal a, an hnênah,

¹⁶“LALPA mî mipui pung khâwmhovin heti hian an ti e: ‘Engtizia nge Israelte Pathian phatsana hetiang thil sual in tih tāk le? Maichâm in lo insiam ta mai hi, vawiina LALPA in hawisanna leh LALPA laka in helna a ni lo vem ni?’

¹⁷Peor hmuna kan bawchhiatnate kha tâwk in la ti na nge? Khatia pulh hrî a lêng chung pawh khân vawiin thleng hian tlen fai kan la nih chuan loh hi;

¹⁸vawiinah hian LALPA hnungzui in bânsan ang maw? Vawiina LALPA in helsan a nih chuan, naktûkah chuan Israel hnam pumpui chungah hian a thinur ngei dâwn asin.

¹⁹Amaherawhchu, in luah ram hi a bawlhhlawh a nih chuan, LALPA ramah lo kâi vê mai ula, LALPA biakbûk dinna ramah, kan zîngah hian chanvorawn nei ve mai ta che u; LALPA kan Pathian maichâm awm sa bâkah, maichâm dang dinin LALPA lakah leh keini lakah hian hel lo hrâm teh u.

²⁰Zera fapa Akanan ânchedawng chungah thil sual a lo tih avâng mai pawh khân, Israel hnam pum chungah thinurna a lo thleng a ni lo vem ni? Thil sual titu chauhin a thih phah loh khâ,” an ti a.

²¹Tichuan, Reubena thlah te, Gada thlah te leh Manase hnam zâtvê te chuan Israel hnam puipate chu an chhâng a:

²²“LALPA, pathiante Pathian, LALPA, pathiante Pathian chuan a hria e, Israel hnam pawhin hre ve rawh se— LALPA phatsanna a niha, helna a lo nih ngai chuan vawiinah hian zuah pawh min zuah suh u.

²³LALPA hawisan zâwnga maichâm hi siam kan niha, hâlral thilhlân te, buhbâl thilhlân te, remna thilhlân te kan hlân a nih ngai chuan amah LALPA ngeiin mawh min phurhtîr rawh se.

²⁴Amaherawhchu, nakinah in thlahten kan thlahte hnênah, “LALPA Israelte Pathian hi eng atân nge maw in tih ve ngawt le?” an la rawn tih kan vênthâwn vânga ti kan ni e.

²⁵“LALPA chuan keini leh nangni Reubena thlahte leh Gada thlahte inkâr daidangtu atân Jordan hi a siam ta si a. LALPA hnênah chanvo in nei ve lo ve,’ an tihkhuma, in thlahte avanga kan thlahten LALPA tîh nachâng an hriat loh phah mai ang tih kan hlahv vâng a ni.”

²⁶Chuvâng chuan alâwm, ‘Hawh u, maichâm i din ve ang u, inthâwi nân te, hâlral thilhlân nân te ni lovin,

²⁷nangni leh keini leh keini hnua kan thlahten hâlral thilhlân te, inthâwina te, remna thilhlân te hmangin LALPA hmâah rawng kan bawl thîin tih min hriatpuitu atân zâwk a ni; tichuan, in

thlahten kan thlahte hnênah, “LALPA hnênah tih tûr in nei ve lo,” an tih loh nân kan ti a ni.’

²⁸Chuvângin, nakinah keini emaw, kan thlahte hnênah emaw, chutianga an tih chuan, ‘En ta che u, kan piputen LALPA maichâm ang chiahin heta hi an lo din ve reng asin, hâlral leh inthâwi nâna hman tûr erawh ni lovin, keini leh nangni inkâra thuhretu atân a ni e,’ an la tih atân kan ti zâwk a ni.

²⁹LALPA lakah chuan kan hel loh tûrzia leh LALPA zui zêl hi kan bânsan loh tûrzia mai chu; a biakbûk kawta mi LALPA kan Pathian maichâm bâk chu hâlral thil hlân nân emaw, buhbâl hlân nân emaw, inthâwi nân emaw a hranpaa maichâm din kan ni awzâwng lo ve,” an ti a.

³⁰Puithiam Phinehasa leh a hnêna awm Israel hnam then hrang hrang puipate chuan, Reubena leh Gada leh Manasea thlahte thu sawi an lo hriat chuan an lâwm hlê a.

³¹Puithiam Eleazara fapa Phinehasa chuan Reubena thlahte, Gada thlahte leh Manasea thlahte hnênah, “LALPA phatsan zâwnga engmah in tih loh dân aţang hian, vawiinah hian kan hnênah LALPA a awm ngei tih kan hria e. Tûnah zawng, LALPA kut aţangin Israel fate in chhan chhuak ta a nih hi,” a ti a.

³²Puithiam Eleazara fapa Phinehasa leh an puipate chu Reubena thlahte leh Gada thlahte nên Gilead ram aţang chuan Israel fate hnênah, Kanaan ramah an hâw leh ta a, an hnênah chuan thu an va thlen a.

³³Chûng thû chuan Israel fate chu a tilâwm êm êm a, Israel fate chuan Pathian an fak a; Reubena leh Gada thlahte chu han rûna, an chênna ram tichhe tûra han kal thu rêng rêng an sawi leh tawh lo.

³⁴Reubena thlahte leh Gada thlahte chuan chû maichâm chu Thuhretu an ti a, “LALPA chu Pathian a lo ni tih kan inkâra thuhretu a ni si a,” an ti a ni.

BUNG 23

JOSUA THLAHNA THUCHAH

¹Israelte chu LALPAN an chhehvêla an hmêlmâ zawng zawng laka ralmuanna hun rei tak a pêk hnûah chuan, Josua pawh a lo upain a lo tar ta hle a.

²Josua chuan Israel mi zawng zawng te, an upa te, an puipa te, an rorêltu te leh an hotu te a ko khâwm a, an hnênah: “Ka lo upain ka lo tar ta a.

³LALPA in Pathianin nangmahni avânga hêng hnam zawng zawng chungah a thiltih dânte chu in hmu ta a; LALPA in Pathian chuan nangmahni a dopui che u a ni sî a.

⁴En teh u, hêng hnam la awmho hi, ka tihboral tawh hnam zawng zawngte nên, Jordan lui aţangin, thlang lamah Tuifinriat Zau thlengin, in rochan atân thumvâwrin ka sem tawh baw che u a.

⁵LALPA in Pathian chuan a lo tiamsak tawh che u ang takin, anniho chu a ûm bosak che u in, in hmuh phâk loh vah a hnawh chhuahsak dâwn che u a ni.

⁶Chuvângin, Mosia Dân Bua inziak zawng zawng ti tûr leh zâwm tûrin huaisan hlê ang che u, LALPA in Pathianin a tiam

tawh che u angin an ramte chu in nei tûr a ni, chuti ni lova vei lamah emaw, ding lamah emaw in pên-san chuan,

⁷Hêng hnam in zînga la awm te nên hian in inchiaphiah mai dâwn asin. An pathian hmingte chu a lam pawh lam suh u, an hming chhâlin tûmah chhia chhamtîr hek suh u; an rawng pawh in bâwl tûr a ni lo va, chibai bûkin an hmâah in kûn tûr a ni hek lo,

⁸vawiina in tih ang hian, LALPA in Pathian hi in vuan nghet tlat tûr a ni.

⁹LALPA chuan in hmâa hnam ropui leh chak tak takte a hnawh chhuahsak che u a; vawiin thleng hian nangmahni ngam tûr tûmah an awm tâk loh hi.

¹⁰LALPA in Pathian chuan a tiam tawh angin, nangmahni dopuitu che u a nih avângin in zînga mi pakhatin mi sâng khat a ûm ang.

¹¹Chuvângin, LALPA in Pathian hi hmangaih zêl tûrin nangmahni lam kha inenfiâh thîn rawh u.

¹²Chuti ni lova, in hnungtawlha, hêng hnam la bângho in zînga la awmte nêna in inzawm tlat a—in inneihpawlh a, in in pawhtawn zêl a nih vaih chuan,

¹³LALPA in Pathian chuan hêng hnamte hi in hmâah a hnawh chhuahsak tawh lo vang che u tih hre rawh u. LALPA in Pathianin hê ram tha tak a pêk che u aţanga in boral vek hma chuan in tân thang leh mangkhâwng an ni ang a, in nâk atân vuakna tiang leh in mit atân hling an ni ang.

¹⁴“Ngai teh u, vawiinah hian kei chu leilung zawng zawng dânin ka kal a hun ta. LALPA in Pathianin nangmahni tâna thil tha a lo sawi tawh zawng zawng pakhatmah a thlâwn lo tih hi in thinlung zawng zawng leh in thlarau zawng zawngin in hria alâwm. In tân a lo thleng kim vek a; pakhatmah thlâwn rêng rêng a awm lo.

¹⁵Chuvângin, LALPA in Pathianin a tiam ang tak che u a in chungah thil tha a thlentîr ang bawh hian, LALPA in Pathianin hê ram tha tak a pêk che u aţang hian a tihboral vek hmâ loh che u chuan, LALPA chuan thil tha lo tinrêng in chungah a thlentîr ve mai dâwn a ni.

¹⁶LALPA in Pathianin zawm tûra thû a pêk che u hi in bawhchhiata, pathian dangte hnên lama in pên-sana, an rawng te in bâwl a, kûna chibai in bûk vaih chuan, LALPA thinurna chu nangmahni chungah a puak keh ang a, hê ram tha tak a pêk che u aţang hian in la boral thuai mai ang,” a ti a.

BUNG 24

SEKEM THUTHLUNG

¹Josua chuan Israel hnam zawng zawng chu Sekemah a ko khâwm a, Israel upate, an puipate, an rorêltute leh an hotute chu a ko va; Pathian hmâah an rawn inlan a.

²Josua chuan mipui zawng zawng hnênah, “LALPA Israelte Pathian chuan heti hian a ti a ni: ‘Hmân laiin in thlahtute chu Abrahamah pa leh Nahora pa Tera tiamin Lui piah lamah sâwn an chêng a; pathian dangte rawng an bâwl thîn a.

³In thlahtu Abrahamah chu Lui râl leh lam aţangin ka hruai chhuak a, Kanaan ram dung tluanin ka hruai kual a, a thlahte ka

tipung a, Isaaka kha ka pê a.

⁴Isaaka tân Jakoba leh Esauva ka pê a. Esauva chanpual atân Seir tlang ka pê a, Jakoba leh a fate chu Aigupta ramah an chhuak thla ta a.

⁵Mosia leh Aaronah ka tîr a, Aigupta mite zînga ka tih ang zêlin hrî ka lêngtîr a. Chumi hnûah chuan ka hruai chhuak ta che u a.

⁶In thlahtute chu Aigupta aţangin ka hruai chhuak a, tuipui in va thleng a; Aigupta mite chuan in thlahtute chu tawilair leh sakawr chung chuang mite nên Tuipui Senah an ûm zui a.

⁷LALPA an han auh khan nangni leh Aigupta mite inkâr chu a rawn tithim ta mup a, tuipuiin a chîmpiltîr ta bawh a. Aigupta rama ka thiltihte chu in mit ngeiin in hmu a; thlalêrah khân hun rei tak in awm kha.

⁸Chuta ţang chuan Jordan chhak lama chêng Amor-ho ramah ka hruai lût che u a, an lo do che u a. Mahse an ram in neih theih nân in kutah ka pê che u a, in hmâah ka tihboralsak che u kha.

⁹Chumi hnûah Zippora fapa Balaka, Moab lal chu nangmahni do tûrin a lo thawk a, Beora fapa Balaama chu ânchhia lawh tîr che u in a tîr a.

¹⁰Nimahsela Balaama thû chu ka ngaihlhâksak duh lo va; tichuan, mal a sâwm ta mawlh mawlh zawk che u a. Chuvângin khâ pâ kut ata kha ka chhan chhuak che u a ni.

¹¹Chumi hnûah Jordan kaiin Jeriko-ah in lo thleng a. Jeriko mite chuan an lo do che u a; Amor-ho te, Periz-ho te, Kanaan-ho te, Hit-ho te, Girgas-ho te, Hiv-ho te leh Jebus-ho te pawhin an do che u a. Mahse chûngho chu in kutah ka pê che u a.

¹²In hmâah khawinghal ka tîr a, chûng chuan in hmâah an ûm darh a, Amor lal pahnihte pawh kha chuti bawh. Khângte kha in khandaih emaw, in thal ngul emaw vâng a ni lo.

¹³In thawh rim lohvin ram te, in din hauh loh khawpui te ka pê che u a; chûngha te chuan in chêng a; in phun hauh loh grêp huan leh olive huana mi te in ei a.

¹⁴Chuvângin, LALPA chu hlau ula, rinawm tak leh thutakin a rawng bâwl rawh u; Lui râlah leh Aigupta rama in thlahtute pathiante kha paih bo vek ula. LALPA rawng bâwl rawh u!

¹⁵LALPA rawngbâwl hi thil tha lo anga in ngaih chuan vawiinah hian tû rawng nge in bâwl dâwn thlang mai rawh u; in thlahtuten Lui râla pathian dangte rawng an bâwl thinte kha nge, hê in chênna rama Amor-ho pathiante hi? Kei leh ka chhûngte hi chuan LALPA rawng a ni kan bâwl dâwn ni,” a ti a.

¹⁶Tichuan, mipuite chuan an chhâng a: “LALPA kalsanin pathian dangte rawng chu kan bâwl tawp lo vang.

¹⁷Aigupta bâwih nihna ata keini leh min thlahtute hruai chhuaktu chu LALPA kan Pathian ngei hi a ni si a; kan mithmuah chhinchhiahna ropui tak takte a ti a, kan kal tlangna ram leh hnam tinte laka min vêngnim zêltu a ni.

¹⁸LALPAN chûng hnam zawng zawng leh hê rama chêng Amor-hote chu min hnawh chhuahsak vek a. Keini pawhin LALPA rawng a ni kan bâwl dâwn ni, amah chu kan Pathian a ni si a,” an ti a.

¹⁹Josua chuan mipuite hnênah, “LALPA rawng chu in bâwl thei lo vang, Pathian thianghlîm a ni si a. Pathian thîkthuchhia a ni a;

in sualnate leh in bawhchhiatnate a ngaidam lo vang.

²⁰LALPA chu in hawisana, pathian dangte rawng in bâwl chuan, in chungah tha taka a tih hnûah pawh a hrem ang che u a, a tiboral mai ang che u,” a ti a.

²¹Mipuite chuan Josua hnênah, “Chutiang chu ni lo ve, LALPA rawng chu kan bâwl tlat zâwk ang e,” an ti a.

²²Josua chuan mipui hnênah, “Aw le, LALPA rawngbâwl in thlang ta tih thuhretute chu nangmahni ngei hi in ni e,” a ti a. Anni chuan, “Ni e, thuhretute chu kan ni e!” an ti a.

²³Ani chuan, “Chuti chu, in zînga hnam dang pathiante kha paih bo vek ula, in thinlungin LALPA Israelte Pathian lam chu hawi tlat rawh u,” a ti a.

²⁴Mipuite chuan Josua hnênah, “LALPA kan Pathian rawng kan bâwl ang a, a thû pawh kan âwih zêl ang!” an ti a.

²⁵Chumi nî chuan Josua leh mipuite chuan thuthlung an siam a, Sekemah chuan an zawm tûrin dân leh thupêk a siamsak a.

²⁶Josua chuan chûng thute chu Pathian Dân Bû-ah a ziaak ta a. Lung lian tak a lâ a, LALPA hmun thianghlim bula sasaw thing hnuaiah chuan a phun ta a.

²⁷Josua chuan mipui zawng zawng hnênah, “En teh u, hê lung hi kan tân hriatpuitu ni rawh se, LALPAN kan hnêna thû a sawi zawng zawng a lo hre vek si a. In tân pawh thuhriatpuitu a ni ang, chuti lo zawng, Pathian in lo phatsan dah ang e,” a ti a.

²⁸Tichuan, Josua chuan mipuite chu anmahni luah ram theuhvah a tîn darhtîr ta a.

JOSUA LEH ELEAZARA THIH THÛ

²⁹Chumi hnûah chuan LALPA chhiahhlawh, Nuna fapa Josua chu kum za leh sâwma upa niin a thi ta a.

³⁰Ephraim tâng rama Gaash Tlâng hmar lam, ama ram chan chhûng, Timnath Sera-ah chuan an phûm ta a.

³¹Josua dam chhûng zawng chuan Israelten LALPA rawng an bâwl a, Josua thih hnûah pawh Israelte tana LALPA hnathawh zawng zawng hre phâk upate la dam chhûng chuan a rawng an bâwl chhunzawm zêl a.

³²Josefa ruh, Israel faten Aigupta ram aţanga an lâk chhoh kha, Sekem khuaah, Jakoban Sekema pa Hamora fapate hnên aţanga tangkaraw tlang zâa a lei hmun, Sekem khuaah an phûm a; chû chu Josefa thlahte chanpualah a lo awm ta a ni.

³³Aarona fapa Eleazara pawh a thi a. Ephraim tâng rama ama puala an pêk, a fapa Phinehasa tângah chuan an phûm ta a.

RORELTUTE

Ziah tu: Samuela • Ziah kum: B.C. 1050-1000

Judate Talmud bûin a sawi dânin Rorêltute bu hi Samuela ziaak a ni. Josua hruaina hnuaiah Israelten Pathian thû an âwih a, hnehna changin Kanaan ram an la duai duai a; mahse hruaitu ropui Josua thih hnû lawkah milem pathian Baala lamah a hnam pumin an thle ta dual mai a. Rorêltute bû hian Israelte hnungtawlh chin thîn zia te, Pathian an hawisan avânga hnam dangte hmanga hrem an tawh thîn thû te, manganga Pathian an auh vêleh Pathianin hnam dangte awpbehna laka a chhan chhuah leh thîn dân te leh, chhanchhuaktu -‘Rorêltu’ tia an sawi pasaltha Debori te, Gideona te, Samsona te leh hruaitu huaisen tak tak, an vaiin mi 13 lai a pêk thû kan hmu. Israelte chanchinah Rorêltute hun kha hun thim anga ngaih theihin, “Mi tinin mahni tha tih zâwng zâwnga an tih” mai mai hun lai kha a ni (17:6; 21:25). Rorêltute bu hi hmun hnihin a then theih: Bung 1-16 hi Rorêltuten hnam chhan chhuah hna an thawh dân chanchin a ni a; Bung 17-21 hian tualchhông rorêlna mûmal lohzia leh khawtlâng nun buaizia a târlang. Khatih laia Israelte chanchin an sawi thîn dân: ‘helna, hremna, simna leh dân thar lehna’ tih tawngkam hian Rorêltute bu thupui a khaikhâwm fiah hle a ni. Rorêltute hi Bible-a lehkhabu 7-na a ni a, a chhôngah bung 21 leh châng 618 a awm.

BUNG 1

KANAAN RAM AN ZAUH ZEL

¹Josua thih hnûah chuan Israel fate chuan LALPA an râwn a, “Kanaan-hote han bei tûrin kan aiah tu nge thawk chhuak hmasa ang le?” an ti a.

²LALPA chuan, “Juda ho han chho rawh se . An kutah ram chu ka pe tawh e”, a ti a.

³Juda thlahte chuan an unau Simeona thlahte hnênah, “Kanaan-ho kan do tlân theih nân kan ram chhôngah hian lo kal rawh u; tichuan keini pawh in ramah kan lo kal ve dawn nia,” an ti a. Tichuan, Simeona thlahte chu an kal ta a.

⁴Juda thlahte chu an thawk chho va, LALPA chuan Kanaan-mite leh Periz mite chu an kutah a pê a; Bezek khuaah mi sîng khat lai an that a.

⁵Bezek khuaah chuan Adoni-Bezeka an hmu a, an bei a, Kanaan-hote leh Periz hote chu an hneh ta a.

⁶Adoni-Bezeka chu a tlânchhia a, an ûmzui a, an man a, a kutzungpui leh a kezungpui an tansak a.

⁷Adoni-Bezeka chuan, “Kutzungpui leh kezungpui tan chhum tawh lal sawmsarihten ka dawhkân hnuaiah buhmal an chhar thîn kha a ni a; ka tih ang chiahin Pathianin min thungrûl ve ta a nih hi,” a ti a. Jerusalem khuaah an hruai a, chutah chuan a thi ta a.

⁸Juda thlahte chuan Jerusalem chu an bei a, an lâ a; khandaihin mi an that chiam a, a khua chu an hâl a.

⁹Chumi hnûah Juda thlahte chuan chhim lam tlângam leh phâi rama chêng Kanaan-hote chu an bei zêl a.

¹⁰Juda thlahte chu Hebron khuua Kanaan-ho bei tûrin an kal a. (Tûn hmân Hebron chu Kirjath Arba tih a ni thîn a.) Chutah chuan Sesaia te, Ahimana te leh Talmaia te chu an that a.

¹¹Chuta tâng chuan Debir khuua awmte bei tûrin an kal zêl a. (Tûn hmâ chuan Debir chu Kirjath Sepher tih a ni)

¹²Kaleba chuan, “Tupawh Kirjath Sepher beia la theitu hnênah ka fanu Aksa-i hi nupui âtn ka pê ang,” a ti a.

¹³Kaleba nau Kenaza fapa Othniela chuan a va lâ a; tichuan, a fanu Aksa-i chu nupuiah a pe ta a.

¹⁴A pasal hnêna a va lâwi chuan, a pa ram dîl tûrin a va fuih nghâl a. A sabengtung aţangin a chhuk a, Kaleba chuan ani chu, “Eng nge i duh tâk le?” a lo ti a.

¹⁵Ani chuan a hnênah, “Mal min sâwm rawh; Chhim lamah ram min pê a, tuikhur pawh min pe tel ta che,” a ti a. Kaleba chuan khur chhaktâ leh khur thlang zâwk chu a pe ta a.

¹⁶Mosia puzawn, Kena thlahte chu Tûm Khawpui aţang chuan Juda thlahte awmna Judai Thlalêr, chhim lama Arad bulah chuan an rawn pêm chho va; an zîngah chuan an rawn chêng ve ta a.

¹⁷Juda-ho chu an unau Simeon-ho te nêan an thawk chhuak a, Zephath khuua chêng Kanaan-ho an bei a, an tichimit thak a. Chû khaw hming chu Horma an ti a.

¹⁸Juda-ho chuan Gaza khua leh a ram te, Ashkelon khua leh a ram te leh, Ekron leh a ram te an lâ a.

¹⁹LALPA chuan Judate chu a awmpui a. Tlâng rama michêngte chu an hnawt chhuak a, mahse phâi rama chêngte erawh chu an hnawt chhuak thei lo, thîr tawlaîlîr an neih tlat avângin.

²⁰Mosian a lo sawi tawh angin, Hebron khua chu Kaleba an pê a. Ani chuan Anaka fapa pathumte chu a hnawt chhuak a.

²¹Nimahsela, Benamina thlahte chuan Jerusalem luahtu Jebus-ho chu an hnawt chhuak lo; chuvângin Jebus-ho chu Benamina thlahte nêan Jerusalemah tûn thleng hian an chêng ho ta zêl a ni.

²²Josefa thlahte pawhin Bethel chu an bei a, LALPAN a awmpui a.

²³Tichuan, Josefa thlahte chuan Bethel enthla tûrin mi an intîr a. (Chû khua chu tûn hmâ chuan Luz an ti a.)

²⁴Enthlatute chuan khua aţanga mi pakhat lo chhuak an hmu a, chumi hnênah chuan, “Khawngaih takin khawpui chhônga luhna kawng min kawhmmuh la, i chungah zahngaihna kan lantîr ve dawn nia,” an ti a.

²⁵Ani chuan khawpui luhna chu a kawhmmuh a, khawpui chu khandaihin an bei chiam a; tichuan, chû pa leh a chhôngte zawng zawng chu an zuah a.

²⁶Chû mi chu Hit-mite ramah a pêm a, khua a dân a, tûn thlengin Luz tih hming a pu ta reng a ni.

RAM LA HNEH KIM LOH

²⁷Manasea thlahte chuan hêng khuaa michêngte hi an hnawt chhuak lo—Beth Sean leh a chhehvêl khuate, Taanak leh a chhehvêl khuate, Dor khuaa chêngte leh a chhehvêl khuate, Megiddo khuaa chêngte leh a chhehvêl khuate te hi an hnawt chhuak lo; Kanaanho chu chûng ramah chuan an awm lui tlat si a.

²⁸Israela thlahte chu an lo chak deuh deuh hnû chuan Kanaan-hote chu chhiah an chawitîr ta a, an hnawt chhuak vek lo a ni.

²⁹Ephraim-ho pawhin Gezer khuaa awm Kanaan-hote pawh an hnawt chhuak bik lo; Kanaan-hote chu Gezer khuah chuan an zîngah an chêng ve ta zêl a ni.

³⁰Zebuluna thlahte pawhin Kitron khuaa chêng te emaw, Nahalol khuaa chêng te emaw chu an hnawt chhuak bik lo; chuvângin, an zîngah Kanaan-hote chu chhiah châw atân an siam ta mai a ni.

³¹Asera thlahte pawhin Akko khuaa chêng te, Sidon khuaa chêng te, Ahlab te, Akzib te, Helba te, Aphik te leh Rehob khuaa chêngte chu an hnawt chhuak chuang lo.

³²Chuvângin, Asera thlahte chu a ram mi Kanaan mite nên an in awmpawlh ta mai a; an hnawt chhuak si lo va.

³³Naphtali thlahte pawhin Beth Semes khuaa chêng te leh Beth Anath khuaa chêng te an hnawt chhuak lo bawk a; a ram mi Kanaan mite nên an in awmpawlh ta mai a. Mahse, Beth Semes leh Beth Anath khuaa chêngte chu chhiah an chawitîr ta a ni.

³⁴Dana thlahte chu Amor-hoten phâi zâwla an chhuk thlâk vè an phal lo va, tlâng ramah chuan an nawr tawm ta zâwk mah a;

³⁵Amor-hote chu Heres Tlângah te, Aijalon-ah te leh Saalbim-ah te chuan an awm lui tlat a; mahse Josefa thlahte chu an lo chak tial tial a, chhiah châwiah an siam ta a ni.

³⁶Tichuan, Amor-ho ramri chu Akrahim chhohna aţanga Sela chung lam zawng a lo ni ta a ni.

BUNG 2**ISRAELTE THUÂWIIH LOHNA**

¹LALPA Vântirhokoh chu Gilgal aţangin Bokim khuah a lo chho va: “Aigupta aţangin ka hruai chhuak che u a, in thlahtute hnêna chhechhama ka lo tiam ramah chuan ka hruai lût ta che u a; ‘In hnêna ka thuthlung kha ka bawhche ngai lo vang.

²Hê rama chêngte hi eng thuthlung mah in siampui tûr a ni lo va; an maichâmte chu in thiahsak tûr a ni,’ ka ti a. Nimahsela, ka thu rêng rêng in âwih duh lo va. Engvângin nge hetiangin in tih tāk le?

³Chuvângin, “Hêng mite hi ka hnawh chhuahsak tawh lo vang che u; in pangtiah chhuntu hling an ni ang a, an pathiante lah chu in tân thlêmna thang an lo ni ang,’ tia ka hrilh che u kha,” a ti a.

⁴Tichuan, LALPA Vântirhokohvin Israel mi zawng zawng hnêna chûng thu a sawi zawh chuan, mipuite chu an ƣap ta ruai ruai mai a.

⁵Chû hmun chu Bokim an lo ti ta a; LALPA hnênah chuan an inthâw a.

⁶Josua mipuite chu a tîntîr hnûin, Israela thlahte chu anmahni chan ram ƣeuh luah tûrin an hâu darh ta a.

JOSUA THIH THU

⁷Josua dam chhûng chuan mipuiten LALPA rawng an bawl a, Josua thih hnûah pawh LALPAN Israelte tâna a hnathawh tinrêng hre phâk upate la dam chhûng chuan a rawng an bawl zêl a.

⁸LALPA chhiahhlawh, Nuna fapa Josua chu, kum za leh sâwma upa niin a thi ta a.

⁹Ephraim tlâng rama ama ram chan chhûng, Gaash Tlâng hmar lam, Timnath Sera-ah chuan an phûm ta a.

¹⁰Chûng hun laia mi zawng zawngte chu an thlahtute hnên lamah mual an liam zo va; anni thlâk tûrin LALPA pawh hre lo, Israelte tâna a thiltih pawh hre pha ve lo ƣangthar an lo chhuak ta a.

ISRAELTE RINAWM LOHZIA

¹¹Israel fate chuan LALPA mithmuhah thil sual an ti a, Baala rawng an bawl ta mai a;

¹²an thlahtute LALPA Pathian, Aigupta ram aţanga hruai chhuaktu chu an hawisan a; pathian dang, an chheh vêla chêngten an biak ƣhin zînga mi chu pathianah an neih a, kûnin chibai an bûk ve ta mai a; chuvângin LALPA ƣhin an tiur ta a.

¹³LALPA hawisanin Baala leh Astoreth-i te rawng an bawl an ta a.

¹⁴LALPA thinurna chu Israelte chungah chuan a ling ta a. Anmahni rawk chereutu suamhmangte kutah a pê a; an chhehvêl zawng zawng an hmêlmâte hnênah a hralh a, tichuan, an hmêlmâ tûmah ngam alawi pawh an nei ta lo va.

¹⁵LALPAN a lo sawi tawh leh LALPA ngeiin a lo tiam tawh ang takin, an kal chhuahna apiangah LALPA kutthlâk chu an chhiatpui ta zat zat a, an mangang ta êm êm a.

¹⁶Amaherawhchu, anmahni rawktute kut aţanga chhanchhuaktu tûr LALPAN a siamsak leh ƣhin a.

¹⁷Nimahsela, rorêltute thû chu ngaihsak duh lovin, pathian dangte lakah an uirê a, chibai te an bûk ta zâwk a. An thlahtuten Lalpa thu zâwma an kawng zawh lai chu an pên bosan leh nghal mai a; an pute tihdan an zâwm duh lo va.

¹⁸LALPAN rorêltute a siamsak lai chuan, LALPA chu rorêltute lamah a ƣang a, rorêltute dam chhûng chuan an hmêlmâ zawng zawng lakah a chhan chhuak ƣhin a; anmahni awpbeta timangangtute avânga an rûm thâwmah LALPA chuan a lo lainat leh ƣhin a ni.

¹⁹Rorêltu a lo thih chuan a ngai bawkin an hnungtawh leh a, pathian dangte zuin an rawng te an bawl a, kûnin chibai an bûk a, an pate ai mahin an che khawlo zâwk mah ƣhin a. An thil chin ƣhin te leh an luhlulna kawng chu an thlah duh chuang lo va.

²⁰Israelte chungah LALPA thinurna chu a ling ta a; “Hê hnam hian an thlahtute hnêna ka thuthlung an bawhchhia a, ka thu lah an ngaihsak duh rêng rêng si lo,

²¹Josua thih hmâa ka hnawhchhuah bâng hote kha eng hnam mah ka hnawhchhuahsak tawh lo mai teh ang,

²²an pipute kawng zawh thin ang khân, LALPA kawng an zawh dân nge zawh dân lo tih fiah nân, anniho hi Israelte fiah nân ka hmang zawk teh ang,” a ti ta a.

²³Tichuan, LALPA chuan chûng hnamte chu hnawtchhuak nghâl lovin a zuah ta zâwk a; Josua kutah pawh khân a hlân lo zo tawh bawh a.

BUNG 3

RAM CHHUNGA HNAM LA AWM TE

¹Hêng hnamte hi Kanaan rama indo hre ngai lo Israel fa zawng zawngte fiah nâna LALPAN a zuahte chu an ni.

²(Israela thlah, thangtharte zînga indo dân pawh la hre ve loten râl do dân an zir thiam theih nân chauha zuah an ni a),

³chûngte chu, Philistia lal pangâ te, Kanaan-ho zawng zawng te, Sidon-hote leh, Lebanon Tlâng chêng, Baal Hermon Tlâng aţanga Hamath luhna thlenga awm Hiv-hote an ni.

⁴Mosia hmanga an thlahtute hnêna LALPAN thu a lo pêk chu, an zawm dân nge dân lo tiin, chûngho chu Israelte fiahna tûra zuah an ni.

⁵Chuvângin, Israel fate chu Kanaanho te, Hit-ho te, Amor-ho te, Periz-ho te, Hiv-ho te leh Jebus-ho te zîngah chuan an awm ta a.

⁶An fanute chu nupuaiah te an nei a, an fanute pawh an fapate an neihtîr bawh a; pathian dang rawng an bâwl ta a.

OTHNIELA

⁷Israel fate chuan LALPA mithmuhah thil sual an ti a. LALPA an Pathian chu theihngihlin, Baala leh Aseri te rawng an bâwl ta a.

⁸Chuvângin, Israelte chungah LALPA thinurna chu a ling ta a, Mesopotamia lal Kusan-Risathaima kutah a hralh a, Israel fate chu kum riat chhûng Kusan-Risathaima thuhnuaiah an kûn ta a.

⁹Israel fate chuan LALPA an au va, LALPA chuan Israel fate chhanchhuaktu tûr Othniela, Kaleba nau Kenaza fapa a pê a, ani chuan a rawn chhan chhuak ta a ni.

¹⁰LALPA Thlarau chu a chungah a lo thleng a, Israelte ro a rêlsak a. Indo tûrin a kal chhuak a, LALPA chuan a kutah Mesopotamia lal Kusan-Risathaima chu a pê a; Kusan-Risathaima chu a hneh ta a.

¹¹Tichuan, ram chu kum sawmli chhûng a lo ralmuang ta a. Kenaza fapa Othniela chu a thi ve ta a.

EHUDA

¹²Israel fate chuan LALPA mithmuhah thil sual an ti leh a. LALPA mithmuha thil sual an tih tâk avângin, Israelte bei tûrin LALPA chuan Moab lal Eglona chu a tichak a.

¹³Ani chuan Amalek leh Ammon mite a khâwm chiam a, Israel hote chu a va hneh a, Tûm Khawpui chu a lâksak a.

¹⁴Israel fate chu Moab lal Eglona thu hnuaiah kum sawm leh pariat an kûn a.

¹⁵Nimahsela, Israel faten LALPA an han auh chuan, LALPA chuan chhanchhuaktu a rawn siamsak ta a. Gera fapa Ehuda,

Benjamin mi chu veikhawr a ni a. Ani chu Israelte chuan Moab lal Eglona hnêna pêk tûr chhiah an kentîr a.

¹⁶Ehuda chuan khandaih (hriam tawn, tawng chena sei) a chher a, a malpui ding lam puan hnuaiah a thukrû a.

¹⁷Moab lal Eglona pêk tur chhiah chu a rawn keng a. (Eglona chû pa thau tak a ni a)

¹⁸Thilpêk a hlan zawh chuan, thilpêk phurtute chu a hawtîr a.

¹⁹Mahse, Gilgal kianga lung milim awmna aţang chuan a kîr leh a, a hnênah, “Aw lalber, thurûk hrilh tûr che ka nei asin,” a ti a. Ani chuan, “Lo ngâwi lawk r’u!” a ti a. A awmpuite chuan an chhuahsan ta vek a.

²⁰Ehuda chu a hnênah a va kal a (ani chu ama pindan chungnung hmun daiah chuan a lo thu a). Ehuda chuan, “I tâna Pathian thuchah ka nei e,” a ti a. Ani chu a thutna aţangin a lo tho va.

²¹Ehuda chuan a kut veilamin a khêl ding lama khandaih chu a phâwi a, a dulah chuan a vit hrawih a.

²²A fawng chawpin a tlum vek a, khandaih chu thauvin a hnawh avangin a dul ata a phawi lo; a rîlte chu a chhuak nuaih mai a.

²³Ehuda chu bathlârah a va chhuak a, pindan chungnung kawngkhârte chu a khâr khum a, a kalh hnan tlat a.

²⁴A kal liam hnu chuan, Eglona chhiahhlawhte chu an lo kal a, pindan chungnung kawngkhâr lo inkalh bur an hmuh chuan mak an ti hle a. “Pindan chungnung hmun daiah a inthiar a ni ang e,” an ti a.

²⁵Ngaihthat lohna tham khawpa rei an nghah hnûah pawh pindan chungnung kawngkhâr chu a la rawn hawng ta si lo va. Tichuan chabi an lâ a, an hawng ta a. An pu ber chu chhuatah thiin a lo lum reng mai a.

²⁶Ehuda erawh chu an buai khawtlai chhûng khân a tlân bo va, lung milim awmna a kal pêl a, Seira-ah a tlân ta a.

²⁷A va thlen chuan Ephraim tlâng ramah tâwtawrâwt a hâm a, tichuan Israel fate chuan tlâng ram aţang chuan an zui thla a, ani chuan hmâ a hrui a.

²⁸Ani chuan an hnênah, “Mi zui rawh u, LALPA chuan in hmêlma Moab-ho chu in kutah a pe tawh e,” a ti a. Tichuan, an zui zêl a, Jordan luia Moab kai chu an la a, tû dang mah an kaitîr phal lo.

²⁹Chumi tum chuan Moab mi âwmkhauh leh huaisen pui pui sîng khat zet an that a; tûmah tlân chhuak an awm lo.

³⁰Tichuan, chumi nî chuan Moab chu Israelte kutah tukdawlin a awm ta a. Ram chung chu kum 80 lai ralmuangin a awm ta a ni.

SAMGARA

³¹Ani dawtah chuan Anatha fapa Samgara a lo lang ve a, Philistia mi zaruk lai bâwngh chhunna tiangin a that a; ani pawhin Israelte a chhan chhuak a ni.

BUNG 4

DEBORI

¹Ehuda thih hnû chuan, Israel faten LALPA mithmuhah thil sual an ti leh a.

²LALPA chuan Kanaan lal Jabina, Hazor awptu hnênah a hralh ta a. An sipai hotu chu Sisera a ni a, Haroseth Hogayim khuua chêng a ni.

³Israel fate chuan LALPA an âu va; Jabina chuan thîr tawlaillîr zakua lai a nei a, kum sawmnhîh chhûng Israel fate nasa takin a hrêk bet tawh a.

⁴Chûng laia Israelte rorêltu chu Lapidoth-a nupui zâwlnei Debori a ni.

⁵Ephraim tlâng rama Rama leh Bethel inkara tûm thing hnuaiyah a thû thîn a. Israel fate chuan an chungchâng rêlsak tûrin an pan thîn a ni.

⁶Ani chuan Abinoama fapa, Naphtali rama Kedes khuua mi Baraka chu a kohtîr a, a hnênah, “LALPA Israelte Pathianin thû a pê che a ni lo vem ni? ‘Kal la, Naphtalia thlahte leh Zebuluna thlahte mi sîngkhat hruaiin Tabor tlângah kal rawh,

⁷ nangmah do tûrin Jabina sipai hotu Sisera chu a tawlaillîrte leh a sipai rualte nêh Kison Luiah ka rawn kaltîr ang a; i kutah ka pe ang che,’ ” a ti a.

⁸Baraka chuan a hnênah, “Mîn kalpui ve dâwn chuan, ka kal ang a; mahse mîn kalpui dâwn loh chuan ka kal lo vang!” a ti a.

⁹Ani chuan, “Ka kalpui mawlh ang che; mahse, hê i kal chhuahna tûrah hian hmingthât i hlauh dâwn ta lo a nih chu, LALPAN Sisera chu hmeichhe kutah a hralh dâwn si a,” a ti a. Tichuan, Debori chu a tho va, Baraka nêh Kedes ah an kal ta a.

¹⁰Baraka chuan Zebulun-ho leh Naphtali-ho chu Kedes-ah a ko khâwm a; mi sîngkhat rual a ko khâwm a, Debori pawh a hnênah a kal ve a.

¹¹Ken mi Hebera, Mosia puzawn, Hobaba thlah chuan Ken mi dangte lakah awm hrangin, Kedes kianga Zaanaim terebinth thing bulah puan in a kaih a.

¹²Abinoama fapa Baraka chu Tabor Tlâng-ah a kal tih thu Sisera hnênah an hrilh a.

¹³Tichuan, Sisera chuan a tawlaillîr zawng zawng, thîr tawlaillîr zakua leh a hnêna mi awm zawng zawng chu Haroseth Hagoyim aţang chuan Kison Luiah a ko khâwm vek a.

¹⁴Debori chuan Baraka hnênah, “In ring rawh le! Wawiin hi LALPA’N i kutah Sisera a pêk ni che chu a ni e. LALPA’N i hmâ a hruai a ni lo vem ni?” a ti a. Tichuan, Baraka chu Tabor Tlâng aţang chuan mi sîngkhatin an zui thlâ a.

¹⁵LALPA chuan Sisera leh a tawlaillîr zawng zawng leh a sipai rual zawng zawng chu Baraka khandaih hmâah chuan a titlâwm ta a; Sisera chu a tawlaillîr aţang chuan a chhuk a, kêin a tlân bo ta a.

¹⁶Baraka chuan tawlaillîr leh sipai rualte chu Haroseth Hagoyim thlengin a ûm a, Sisera sipai zawng zawng te chu khandaihin an that vek a; pakhat mah an zuah lo.

¹⁷Sisera erawh chu a tlân zêl a, Ken mi, Hebera nupui, Jaeli puan inah a lût a; Hazor lal Jabina leh Ken mi Hebera te chu

inţhian thâ an ni a.

¹⁸Jaeli chu Sisera hmuak tûrin a va chhuak a, a hnênah, “Lo kal teh, ka pu, ka hnênah lo kal rawh; hlau suh,” a ti a. Tichuan, puan inah chuan a luhpui a, ani chu sahmul puanin a khuh a.

¹⁹Ani chuan a hnênah, “Khawngaihin tui in tûr mîn pe ta che, ka tui a hâl êm mai,” a ti a. Bâwnghnute bêl chu a hawng a, a intîr a, ani chu a khuh leh a.

²⁰A hnênah, “Puan in kawngkâah khân lo dîng la, mi tûpawh lo kalin, ‘Hetah hian mi an awm em?’ tia an zawh che chuan, ‘Awm lo,’ ti zêl ang che,” a ti a.

²¹Mahse, Hebera nupui Jaeli chuan puan in khenkilhna leh tuboh a keng a, ani chau tawngkhawng, nghet taka a muhîl lai chu dîm tea va panin, a bekah chuan a khêng lût a, leiah chuan a kilh bet a. Tichuan, a thi ta a.

²²Baraka chuan Sisera chu a rawn ûmzui a, Jaeli chu amah hmuak tûrin a lo chhuak a, a hnênah, “Hawh teh, i zawn chu ka lo entîr ang che,” a ti a. A puan ina a va luh chuan, Sisera chu, a beka puan in khenkilhna bûr vû chungin a lo thi reng mai a.

²³Tichuan, chumi ni chuan Pathianin Israel mite hmâah Kanaan lal Jabina chu a titlâwm ta a.

²⁴Israel fate chu Kanaan lal Jabina lakah chuan an chak tial tial a, a tâwpah chuan Kanaan lal Jabina chu an tiboral ta a ni.

BUNG 5

DEBORI HLA

¹Chumi ni chuan Debori leh Abinoam-a fapa Baraka chuan heti hian hlâ an sa a:

²Israelte phuba lâksaktu LALPA chu fak rawh u, Mipuiten phûr takin an zui zêl a.

³Aw, lalte u! ngaithla ula, Aw, lal fapate u, in beng chhi r’u Kei, kei hi LALPA fakin ka zai ang.

⁴“LALPA, Seir i kalsan laia Edom ram i chhuahsan khân, Leilung a khûr, khuangruah a sûr, Chhûmte paw’n an sûtîr;

⁵Tlângte an khûr LALPA hmâah, Sinai pawh, LALPA Israel Pathian hmâah chuan.

⁶Anatha fapa Samgara hun lai leh, Jaeli te hun laite khân, Lamlian a ţhing ţhuap e, Khualzinten pumpelh kawng an zawh.

⁷Israel khuate an fam zo dâwn, Kei Israel nu Debori hian Chêt zai ka rêl hmâ zawng.

⁸An thlang ta, pathian tharte; Kulh kawngka bulah indona; Israel sîngli zîngah fei leh phâw rêng awm lo ve.

⁹Ka thinlung neitu Israel hruaitute, Châk taka inpe mipuite nêh, LALPA chu fak mawlh rawh u!

¹⁰Sawi r’u, sabengtung vâra chuangte u, Rorêlnaa ţhute nêh, Lamtuang zawha kalte pawh.

¹¹Thal kâptute thâwm hlatah, siktui thiang hmunah chuan, LALPA thiltih thatte an fak, Israel khaw tina a thil tha tihte chu; LALPA mite an chhuk, kulh kawngkâah chuan.

¹²Harh la, harh la, Debori! Harh la, harh la, zai rawh! Tho rawh Barak, i sal mante hruaiin, Aw, Abinoama fapa!

¹³A la damte lo chhuk e, mi lianho bei tûrin, LALPAN mi chakho mi ngamtîr ta.

¹⁴Ephraim aţangin Amaleka zungkaiho an lo chhuk. Benjamin, i miten an rawn zui a che, Makir ata rorêltute an chhuk thlâ a, Zebulun aţangin râl rêltu tiang a chhuk.

¹⁵Isakar mi lianten Debori an bêl; A râlrelna hnuaiah phaitual lam panin, Baraka pawh Isakar iangin Reubena sipaihote zîngah tîrh liam a ni, An tum a ruh tlang mang e.

¹⁶Berâm huang zînga i thut reng le, Berâm kohna phênglâwngh ngaithlân maw? Reubena-hovin lung lêm an nei lo ve.

¹⁷Jordan râlâh Gileada a awm daih si, Engah nge Dan-ho chu lawngah an awm veng veng? Asera lah tuipui kam litengsâwlah a awm hle hle a.

¹⁸Zebulun chu mahni nunna thâp mihring a ni, Naphtalia pawh râl hmâah a zâm lo.

¹⁹Lalten an rawn bei a, Kanaan lallo an ţang nasa Megiddo tuia Tanakah chuan; Râllâk tûr rêng an hre lo ve.

²⁰Vân aţangin an rawn do va; Arsiten an hmun aţangin Sisera an rawn bei.

²¹Kison luiin anni chu a hnâwl bo ta, Hmasâng lui, Kison lui ngei chuan. Aw ka thlarau, chak takin pên zêl rawh!

²²Sakawr a tlan ri tlut tlut a, Chak takin an lîm puat puat e.

²³Meroz chu ânchhia lawh r’u, LALPA Vântirhkohin a ti, ‘A mi chêngte chu na takin ânchhia lawh r’u, LALPA an ţanpui duh lohva, Mi chakte bei tûra LALPA an puhi loh avângin.’

²⁴“Nu hamţha ber chu Jaeli a ni, Ken mi Hebera nupui chu; A nihlawh e, puan ina chêng nuho zîngah.

²⁵Tui a dîl a, hnudetui a pê a; No mâwiin hnute khal a rawn la.

²⁶A kutin puan in khenkilhna a châwi, A kut ding lamin hnathawktu tuboh; A chhu chawrh chawrh, Sisera lu a khêng tlang, A bekbawr a khêng tlang hial a.

²⁷A ke bulah a awp rawp, a thal dêr mai; A ke bulah a chalchâng, a zal dêr a; A thal dêr a, fam dairial a chang ta.

²⁸“Tukverhah Sisera chûnnu a dâk ruai ruai a, Bang âwng bihin a ţap râwih râwih, Engtikah nge a tawlailîr a lo hâu dâwn? Engin nge a tawlailîr tikhawtlai le?

²⁹Hmeichhe fîngten an lo chhâwn, Amah pawhin a lo chhâwn vê.

³⁰“Râllâk sum an la hmu tâwk lo nge, Nula pahnih khat chan theuh tumin An insem khawtlai zâwk? Sisera hawn atân puan ze hrang hrang, Râllâk puan zehmâwi, ze ţialte nê, Rawktu nghâwngha bah tûr thui mâwi an dap khawtlai zâwk?”

³¹“Aw LALPA, hetiang hian i hmêlmâte chu boral vek rawh se! Nangmah hmangaihtu crawh chu Ni sat vânglai ang lo ni rawh se,” tiin hlâ an sâ a. Tichuan ram chu kum sawmli lai râl muangin a awm ta a.

BUNG 6

MIDIAN-HOVIN ISRAEL AN AWPBET

¹Israel fate chuan LALPA mithmuhah thilsual an ti leh ta a. Chuvângin, LALPA chuan Midian-ho thuhnuaiah kum sarih a awmtîr ta a,

²Midian-ho chuan Israelte chu an tham lo hlê mai a. Midian-ho avâng chuan tlang panga pûkah te, khurah te, kulhah te bihrukna tûr an siam a.

³Israelten thlai an chîn apiangin Midian-ho an lo kal a; Amalek mite leh Khawchhak lam mite pawh anmahni do tûrin an lo kal thîn a.

⁴Ramah chuan awmhmun an rawn khuar a, Gaza thlengin leia an thil thar rêng rêng an tihchhiatsak zêl a, Israel ramah ei tûr engmah a awm lova, berâm te, bâwngh te leh sabengtungte pawh an zuah lo.

⁵An ran rualte leh an puan inte nê an rawn thawk a, khau puang ang maia tam an ni; anmahni leh an sanghâwnghseite chu chhiar sên rual an ni lo; ram tichhe tûr ringawtin an lo lût thîn a.

⁶Midian-ho avâng chuan Israelte chu an lo rethei ta êm êm a, Israel fate chuan LALPA chu an âu ta a.

⁷Midian-ho avâng chuan Israel fate chuan LALPA chu an au ruai ruai a.

⁸LALPA chuan Israel fate hnênah zâwlnei a tîr a, chu mi chuan, “LALPA Israelte Pathian chuan heti hian a ti: ‘Aigupta aţang leh sala in tânna aţangin ka hruai chhuak che u a;

⁹Aigupta mite kut ata leh nangmahni awpbettute kut aţangin ka chhan chhuak che u a, hêng mite hi in hmâ ata hnawt chhuakin an ram chu ka pê che u a.

¹⁰“Kei hi LALPA in Pathian chu ka ni; in luah ram neitu Amor-hote pathian rêng rêng chu hlau suh u,” tiin ka hrilh bawk che u a. Nimahsela ka thû in âwih duh si lo va,’ a ti a ni,” tiin.

GIDEONA

¹¹LALPA Vântirhkoh chu a lo kal a, Ophra hmunah Abriezrit mi Joasa terebînth thing hnuaiah a thû a; chutih lai chuan a fapa Gideona chuan Midianho hmuh loh tûrin, uain sâwr khurah buh a lo vua a.

¹²LALPA Vântirhkoh chu a hnênah a rawn inlâr a, “Nang, michak huaisen, LALPA chu i hnênah a awm e!” a ti a.

¹³Gideona chuan, “Aw, ka pu, LALPA chu kan hnênah a awm a nih chuan, engati nge hêng thil zawng zawng hi kan chung a lo thlen si le? ‘LALPA chuan Aigupta aţangin min hruai chhuak a ni lo vem ni?’ tia kan paten a thilmak tih an sawi fo te hi khawiah nge a nih zawh tâk?’ Tûnah zawng LALPAN min thlauhthlâ a, Midian-ho kutah min pe ta a nih hi,” a ti a.

¹⁴LALPA chuan ani chu a en a, “Hê I chakna ngei hian kal la, Midian-ho kut ata Israel mite i chhandam dâwn nia. Ka tîr che a ni lo’m ni?” a ti a.

¹⁵A hnênah chuan, “Aw ka Lalpa, engtin nge Israelte chu ka chhandam theih tehlu ang? Kan chî lah chu Manasea thlah zînga a ţâwmkailo ber kan ni a, ka pa chhûngkuaah lah a nêp ber ka ni bawk si a,” a ti a.

¹⁶LALPA chuan, “I hnênah ka awm zêl dâwn alâwm, Midian-ho chu mi pakhat ang lekin i hneh mai dâwn a ni,” a ti a.

¹⁷Ani chuan a hnênah, “Hetia min duhsak ta rau rau a nih chuan, nangmah ngeiin min bia tih chhinchhiahna mi entîr ta che.

¹⁸Ka ngên a che, i tâna thil hlan tûr ka va lâka, i hmâa ka hlan thlengin, heta tâng hian lo la kal sawn suh ang che,” a ti a. Ani chuan, “I lo kîr leh hmâ chu ka lo nghâk reng ang che,” a ti a.

¹⁹Tichuan, Gideona chu inah a va lût a, kêltê a talh a, chhangphut ephah khatin dâwidim telh loh chhang a siam a. Sâ chu bâwmah a dah a, sa tui chu bêl chhûngah a dah a; sasaw thing hnuaiah chuan a keng pheî a, a va hlui ta a.

²⁰Pathian Vântirhkoh chuan a hnênah, “Sâ leh dâwidim telh loh chhang hi lâ la, hê lung chungah hian dah la, a tui kha leih rawh,” a ti a. Ani chuan chutiang chuan a ti a.

²¹LALPA Vântirhkoh chuan a kuta a ken lai tiang hmâwr hmangin sâ leh dâwidim telh loh chhang chu a khawih a; lung a tâng chuan mei a lo chhuak a, sâ leh dâwidim telh loh chhang chu a kâng ral ta a. LALPA Vântirhkoh chu hmuh theih lohvin a bo leh ta a.

²²Gideona chuan LALPA Vântirhkoh a ni tih a lo hre ta a. Gideona chuan, “E heu, hmaichhanah LALPA Vântirhkoh ka hmu a ni reng mai, Aw, Lalpa PATHIAN!” a ti a.

²³LALPA chuan a hnênah, “I hnênah thlamuanna awm rawh se; hlau suh, i thi lo vang,” a ti a.

²⁴Gideona chuan chutah chuan LALPA tân maichâm a siam a, ‘LALPA chu Thlamuantu a ni,’ a ti a. Tûn thleng hian Ophra khuua Abiezrit ram chhûngah a la awm.

²⁵Chumi zân chuan LALPAN a hnênah, “I pa bâwngpa tuai leh, a pahnihna atân bâwngpa dang kum sariha upa kai la, i pa maichâm thiât la, a bula milim awmna thing chu kit baw ang che;

²⁶hê lung chungah hian LALPA i Pathian tân maichâm tha takin dîn la, bâwngpa pahnihna chu lâ la, milim awmna thing i kih hmangin hâlral thilhan hlân ang che,” a ti a.

²⁷Tichuan, Gideona chuan a chhihhlawhte zînga mi sâwm a hruai a, LALPAN tih tûr a hrih ang chuan a ti a. Mahse a pa chhûngte leh an khuua mite a hlauh avângin chhûnah ti lovin, zânah a ti ta a.

GIDEONAN BAALA MAICHÂM A TICHHIA

²⁸A tûk zîng takah chuan khuua mite chu an lo tho va, Baala maichâm chu tihchim vekin a lo awm ta a; a bula thing milim pawh chu kih thlûk a ni a, bâwngpa pahnihna chu maichâm siam tharah chuan hlan mêk a lo ni baw a.

²⁹Anmahni zîngah chuan, “Hei hi tû tih nge ni?” tiin an inzâwt a. An han in zawh chian nâk chuan, “Hêng hi Joasa fapa Gideona tih a nih hi,” an ti ta a.

³⁰Chû khuua mite chuan Joasa hnênah, “I fapa chu rawn hruai chhuak rawh, Baala maichâm a tichhiat avâng leh a bula thing milim a kih thlûk avângin a thi ngei tûr a ni,” an ti a.

³¹Joasa chuan a kianga dîng zawng zawngte hnênah, “Baala lamah in tâng ang maw? Amah chu hum in tum em ni? Tûpawh

ama lamtâng apiang chu tukinah lâ lâ hian tihhlum in ni ang! Ani hi pathian a nih tak tak chuan amah chu lo inhum zâwk ang hmiang, a maichâm chu tihchhiatsak a ni si a!” a ti a.

³²Chumi ni chuan a hmingah ‘Jerubbaala’ tih a sâ a, “Baala chuan a maichâm tichhetu chu rawn bei mai ang hmiang,” a ti a ni.

³³Midian-ho leh Amalek-ho te leh Khawchhak lama chêngte chu an inpunkhâwm a; lui an rawn kân a, Jezreel Phâi zâwlah awmhmun an khuar a.

³⁴LALPA Thlarau chu Gideona chungah a lo thleng a; tâwtawrâwt a hâm a, Abiezrit mipuite chu ama lamah an tâng khâwm a.

³⁵Manase ram pumah chuan thu a thawn kual vek a, anniho pawh chu a lamah an tâng khâwm vek a. Aser-ho leh Zebulun-ho leh Naphtali-ho ramah pawh thu a thawn baw a; anmahni tâwk tûrin an lo thawk chhuak hlawn a.

SAHMUL CHHINCHHIAHNA

³⁶Gideona chuan Pathian hnênah, “I sawi tâk ang khân, keima kutin Israelte i chhan chhuak dâwn a nih tak meuh chuan—

³⁷en teh, hruih zâwlah hian berâm hmul ka dah ang a; a vêl lei chu a ro vek a, berâm hmul chungah chauh dâi a lo tlâk chuan, i sawi tawh angin, ka kutin Israelte i chhan chhuak dâwn tih ka hria ang,” a ti a.

³⁸Chutia a tûk zîng a han thawh chuan, berâm hmula dâi tlâ chu a han sâwr a, dâitling chu no khat lai a sâwr chhuak ta a.

³⁹Gideona chuan Pathian hnênah, “Ka lakah thinrim lo la, vawî khat chauh thû min sawitîr leh tûrin ka ngên a che: Berâm hmul vêk hmang hian vawî khat dang min chhintîr leh rawh; berâm hmul chauh ro sela, a vêla lei chungah dai lo tla huh vek rawh se,” a ti a.

⁴⁰Chutiang tak chuan chumi zân chuan Pathianin a awmtîr a. Berâm hmul chauh a ro va, a vêl zawng zawngah dai a tla huh vek a.

BUNG 7

GIDEONA MI HUAISEN ZATHUM

¹Tichuan Jerubbaala (Gideona tihna a ni) leh a hote zawng zawng chu zîng takah an tho va, Harod lui bulah awmhmun an khuar a; tichuan, Midianho riahmun chu an awmna hmar lamah, Moreh tlâng bul ruamah a ni a.

²chuan Gideona hnênah, “I hnêna mite kha, an kuta Midian-ho pêk atân chuan an tam lutuk a ni, chuti lo zawng, Israelte hian, ‘Kan kut ngeiin kan inchhan chhuak a ni,’ tiin min uan khum dah ang e.

³Chuvângin, mipui hriatah tihian puang rawh, “Tupawh hlau leh khûr apiang chu, Gilead Tlâng a tâng hian hâw rawh se,” a ti a. Mi sîngnhîh leh sângnhîh an hâw a, sîngkhat an la awm a.

⁴LALPA chuan Gideona hnênah, “Mi an la tam lutuk cheu mai; luih hruai thlâ la, chutah chuan ka lo thliarsak ang che. ‘Hê mi hi i hnênah kal ve rawh se’ tia ka hrih apiang che chu, i hnêna kal tûr a ni; ‘Hê mi hi i hnêna kal ve tûr a ni lo,’ ka tih chu a kal ve tûr a ni lo,” a ti a.

⁵Tichuan, mite chu luiah a hruai thla a. LALPA chuan Gideona hnênah, “Ui anga an leia tui liak apiang dah hrang zêl la; ðhingthia tui dâwtte chu a hrangin dah bawk ang che,” a ti a.

⁶Tichuan, an kutphaha tui suaka liakte chu mi zathum an ni a; a bâk zawng chuan ðhingthiin tui chu an dâwt vek a.

⁷LALPA chuan Gideona hnênah, “Tui liak mi zathum hmangin ka chhandam ang che u a, in kutah Midian-ho chu ka pe dâwn e. Mi dang zawng chu anmahni in lamah hâw vek rawh se,” a ti a.

⁸Tichuan, mipuite chuan ei leh in tûr te an la a, tâwtawrâwt an keng theuh va. Israel mi dang zawngte chu anmahni puan in lamah a hawtîr vek a, mi zathumte chauh chu a awmtîr a. Midian-ho chu an thlang phâi zâwla an riahmunah chuan an awm hmur mai a.

⁹Chumi zân chuan LALPAN a hnênah, “Tho la, an riahhmunah chuan zu chhuk rawh, i kutah ka pe tawh a che.

¹⁰Zu chhuk thlâk i hlau a nih chuan, i chhiahhlawh Pura nêr riahhmunah chuan in zu kal dâwn nia,

¹¹tichuan, an tîtite i zu ngaithla ang a; chumi hnûah zawng, an riahhmun zu bei tûrin i thâ a za zak tawh mai ang,” a ti a. Tichuan, a chhiahhlawh Pura nêr chuan riahhmuna sipaiho ralvênna hmâwrtawng berah an zu chhuk ta a.

¹²Midian-ho te, Amalek-ho te leh Khawchhak mi zawng zawng chu phâi zâwlah chuan khaukhuap rual ang maiin an tlim hmur mai a; an sanghâwngseite chu lui kama ðiau zât ang maia tam an ni.

¹³Gideona zu thlen thlâk lai chuan, mi pakhat chuan a ðhianpa hnênah a mumang a lo hrilh a. “Mumang ka nei a: A makzia chu, barli chhang tlang hi Midian-ho riahhmunah hian a lo lum lût a; puan in chu a rawn su thlu a, a bingbilet tawp a, puan in chu a pêr thlawp mai zu nia,” a ti a.

¹⁴A ðhianpa chuan a chhâng a, “Chu zawng, hê Israel mipâ tak mai, Joasa fapa Gideona ngûnhnâm bâk eng dang a ni lo vang! A kutah Midian-ho leh riahhmun pum pui hi Pathianin a pe tawh a nih chu,” a ti a.

¹⁵Gideonan chû mumang leh a awmze hrilhfiahna a han hriat chuan, Pathian chu chibai a bûk a. Israelte riahhmunah chuan a kîr chho va, an hnênah, “Tho rawh u le, LALPA chuan Midian-ho riahhmun khu in kutah a pe tawh e,” a ti a.

¹⁶Tichuan, chûng mi zathumte chu pâwl thumah a ðhen a, an vaiin tâwtawrâwt te, bûr ruak te leh a chhûnga meichher awm nêr a pe ðheuh va.

¹⁷An hnênah, “Mi en ula, heti hian ti rawh u; lo thlîr reng ula, an riahhmun tawntirh ka thlen veleh ka tih ang hian ti ve ang che u;

¹⁸Kei leh ka hnêna awm zawng zawngten tâwtawrâwt kan ham vêleh, riahhmun kil tin aţangin tâwtawrâwt lo hâm vê ula, ‘LALPA leh Gideona ngûnhnâm!’ tiin in âu dâwn nia,” a ti a.

¹⁹Tichuan, Gideona leh a hnêna mi za khat te chuan zanlai râlvêng inthlâk zawh hlimah riahhmun tawntirh an zu thleng a; tâwtawrâwt an hâm a, an bêl ken chu an tikeh nghâl a.

²⁰A pâwl thum chuan tâwtawrâwt hâmin, bêl chu an tikeh vek a—an kut vei lamin meichher an chhî a, an kut ðing lamin

tâwtawrâwt ham tûr an keng a— “LALPA leh Gideona ngûnhnâm!” tiin an âu dur dur a.

²¹Riahhmun hualin mi tin chu an dinna hmunah an ðing ðheuh va; sipai rual hote chu âu tuar tuar chungin an tlânchhia a.

²²Mi zathum rualin tâwtawrâwt an ham vêleh, riahhmun pumpuiah chuan LALPAN anmahni leh anmahni khandaihin a insualtîr ta chiam mai a; sipaite chu Zerera lamah Beth Acacia thlengin, Tabbath bula Abel Mehola thlengin an tlânchhia a.

²³Israel mite chu Naphtali ram te, Aser ram leh Manase ram pum aţangin an lo pung khâwm a, Midian-ho chu an ûm a.

²⁴Gideona chuan Ephraim tlang ram pumah zualko a tîr vêl a, “Midian-ho bei tûrin lo chhuk rawh u, Jordan lui an kaina tûr Beth Bara leh lui dang an kânna tûrah lo châng rawh u,” a ti a. Ephraim rama mi zawng zawng chu an lo tlan khâwm a, lui kaina kân zawng zawng, Beth Bara aţanga Jordan thlengin an lo chân khalh vek a.

²⁵Midian lal pahnih Oreba leh Zeeba an man a. Oreba chu Oreba lungpuiah an that a, Zeeba chu Zeeba uain sâwrkhurah an that a. Midian-ho chu an ûm zêl a, Oreba leh Zeeba lûte chu Gideona hnênah Jordan râl lehlahmah an rawn lâ a.

BUNG 8

GIDEONA'N MIDIAN-HO A TUDAI

¹Ephraim mite chuan a hnênah, Engah nge Midian-ho bei tûra mi pawh i sâwm ve loh?” an ti a. Na takin an khak a.

²Ani chuan an hnênah, “Nangni aiin thiltih sawi tham ka nei bîk em ni? Abiezrit uain thâ aiin Ephraim grêp kuangbâng pawh a ða fê zâwk lo vem ni?”

³Pathianin Midian lal Oreba leh Zeeba te in kutah a pê che u a. In thiltih tluk tûr tih vê eng nge ka neih?” a ti a. A thusawi chuan an thinrim chu a bengdai ta a.

⁴Gideona leh a hote mi zathum chuan Jordan an va thleng a, lui an kân a, chau tak chungin an ûmzui zêl a.

⁵Sukkoth khuaa mite hnênah chuan, “Khawngaih takin hêng ka hnungzuite hi an chauh tawh êm avângin chaw ei tûr min lo pe teh u, Midian lal Zeba leh Zalmunna te kan ûm a nih hi,” a ti a.

⁶Sukkoth khaw hotute chuan, “Chutia i sipaite chaw pe tûr êm chuan, Zeba leh Zalmunna te chu i kutah an awm tawh em ni?” an ti a.

⁷Gideona chuan, “In thiltih dân vei chu, LALPAN ka kutah Zeba leh Zalmunna min pêk hun chuan hlîngkhaw leh thlalêr hlîngin in vun chu ka va hîk dâwn rûa êm!” a ti a.

⁸Chuta ðang chuan Penuehah an kal zêl a, an hnênah chutiang thû bawk chu a va sawi leh a. Penuehah khuaa mite chuan Sukkoth mite chhân dân ang bawkin an lo chhâng leh a.

⁹Penuehah mite hnênah chuan, “Ralmuanga ka lo kîr hunah hê kulh hi ka sawp chhe vek ang maw lê!” a ti a.

¹⁰Zeba leh Zalmunna te chu Karkor khuaah an awm a, an hnênah chuan Khawchhak lamah sipai la bâng zawng, mi sîngkhat leh sangnga an la awm a; khandaih keng mi nuai khat leh sîngnhai lai kha an thi tawh si a.

¹¹Gideona chu Noba leh Jogbehah chhak lama puan ina chênghote kawngah chuan a kal chho zêl a; râlmuang taka sipaiho lo awm lai chu an han bei thut a.

¹²Zeba leh Zalmunna te chu an tlânchhia a, an ûmzui a; Midian lal pahnih Zeba leh Zalmunna te chu a man a, an sipai zawng zawng chu an tukzal dêr a.

¹³Tichuan, Joasa fapa Gideona chu, Heres Chhohna aţangin, indo zovin a haw leh ta a.

¹⁴Sukkoth khaw tlangvâl pakhat chu a man a, a zâwt a; Sukkoth khaw hruiute leh an upa sawmsarih leh pasarihthe hming a ziah chhuahtîr a.

¹⁵Sukkoth mite hnên a lo thlen chuan, “Hei le, Zeba leh Zalmunna te chu en ta che u, ‘I sipai châute châw kan pêkna tûrin Zeba leh Zalmunna te chu i kutah an awm tawh em ni?’ tia min tihel vêl kha le?” a ti a.

¹⁶Tichuan, khaw upate chu a man khâwm a, hlîngkhang leh thlalêr hlîng hmangin Sukkoth mite chu a zilh ta a ni.

¹⁷Penuel kulh pheî chu a chhut chhiatsak a, khuua mite chu a that chiam a.

¹⁸Zeba leh Zalmunna te chu, “Tabor tlânga in mi thahte kha eng ang mi nge an nih?” tiin a zâwt a. Anni chuan, “Nangmah ang tak hi maw lê; lal fapa ang tak vek an ni,” an ti a.

¹⁹Ani chuan, “Ka unau, ka nu hrin te ngei an nih kha. An nunna chu lo zuah ni ula, LALPA nung renga hmingin ka that hauh lo vang che u,” a ti a.

²⁰A fa upa ber Jethera hnênah chuan, “Tho la, that rawh le!” a ti a. Mahse, a la naupan êm avângin a zâm a; khandaih pawh a phâwi ngam lo va.

²¹Zeba leh Zalmunna te chuan, “Nangmah kha lo tho la, min that ta che; patlingin thâ a thawh ang chu,” an ti a. Gideona chu a tho lawk a, Zeba leh Zalmunna te chu a tihlum ta a, an sanghâwngsei nghâwng cheimawina kual chu a lâksak a.

GIDEONA EPHOD

²²Israel mite chuan Gideona hnênah, “Nang leh i fapate, i tupate hi kan chung a rorêltuah ţang rawh u; Midian-ho kut ata min chhan chhuak ta si a,” an ti a.

²³Mahse Gideona chuan, “In chung a rorêltuah zawng ka ţang lo vang, ka fate pawh an ţang hek lo vang; LALPAN in chungah ro a rêl zâwk ang,” a ti a.

²⁴Gideona chuan an hnênah, “Thil pakhat ka dîl zâwk ang che u, mi tinin râl lâka bengbeh in lâk kha min pe theuh rawh u,” a ti a. Ismaela thlahte an nih avângin, rangkachak bengbeh an nei hlawm si a.

²⁵Anni chuan, “Lâwm takin kan pe mawlh ang,” an ti a. Puan an phah a, mi tinin râl bengbeh an lak chu an theh khâwm theuh va.

²⁶A dîl anga rangkachak bengbeh an theh khâwm chu rangkachak sekel 1,700 bûk lai a ni a; hêng bakah hian lal incheina te, thi cheimâwi te, Midian lal puan senduk te, an sanghâwngsei khaidiat awrh te chu chhiar tel a ni lo.

²⁷Chumi hmang chuan Gideona chuan puithiam kawr (ephod) a siam a, ama khuua Ophrah-ah a dah a. Chû thil avâng chuan Israel mi zawng zawng an lo uirê phah a. Gideona leh a chhûngte tân thang hlauhawmah a lo chang ta a.

²⁸Chutiang chuan Midian-ho chu Israel fate lakah an tlâwm hlen ta a, an rawn inlek chhuak leh tawh ngai lo. Gideona hun chhûng kum sawmlî lai chu ram pawh a râlmuang ta a ni.

GIDEONA A THÎ

²⁹Joasa fapa Jerubbaala chu ama inah chuan a chêng a.

³⁰Gideona chuan ama fa hrin ngei fapa sawmsarih a nei a, nupui tam tak a nei si a.

³¹Sekem khuua a hmei pawhin fapa a hrinsak a, a hmingah Abimeleka a sâ a.

³²Joasa fapa Gideona chu tar tak a nihin a thi a, Ophrah khuua Abiezrit mi, Joasa thlânah chuan an phûm ta a.

³³Gideona thih hnû rei lo teah Israel fate chu Baala hnênah an uirê zui leh ta mai a, Baal-Berith chu an pathian atân an siam a.

³⁴Israel fate chuan kil tin aţanga an hmêlmâ zawng zawngte laka chhanchhuaktu LALPA an Pathian chu an hre reng peih ta lo va;

³⁵Israelte tâna thil tha tihsaktu Jerubbaala (Gideona) chhûngkaw chungah pawh duhsakna engmah an lantir duh hek lo.

BUNG 9

ABIMELEKA THIL PHIARRÛK

¹Jerubbaala fapa Abimeleka chu a nu nuţate-ho awmna khuua Sekemah a kal a, anniho bâkah a pute chhûngkua zawng zawng hnênah,

²“Sekem khuua mi zawng zawng hriatah: ‘Jerubbaala fapa sawmsarihten in chungah rorêl se nge in duh, mi pakhat chauhin?’ tih hi sawi teh u. Kei hi in ruh leh tisa ang pu vê ka ni tih hre reng ang che u,” a ti a.

³A nu nuţate chuan chûng thu zawng zawng chu Sekem khuua mi zawng zawngte hriatah an sawi ta vek a; “Kan unaupa a ni tak alâwm,” tiin Abimeleka lamah chuan an rilru a thle ta dual a.

⁴Baal-Berith tempul aţangin tangkarua sekel sawmsarih an pê a, chumi hmang chuan Abimeleka chuan mi tlâktlailo leh mi bumro pui pui a ruai a, anni chuan a hnung an zui ta a.

⁵Ophrah khuua a pa inah an va kal a, a unau, Jerubbaala fapa sawmsarihthe chu lung pakhat chungah a that vek a. Nimahsela, Jerubbaala fapa naupang ber Jothama chu a that tel lo; a lo bihrûk bo avângin.

⁶Tichuan, Sekem khuua leh Beth Millo khaw mipui zawng zawng chu an inpun khâwm a, Sekem khaw dai, terebinth thing hnuaia lungphun bulah chuan Abimeleka chu lalah an siam ta a.

THINGKUNG TEHKHINNA

⁷Chû thû chu Jothama an va hrilh a, ani chu Gerizim Tlâng chhîpah chuan a han dîng a, theitâwpa ringin heti hian a âu va. An hnênah: “Min lo ngaithla teh u, Sekem mite u, Pathianin in thu a ngaithla ve dâwn nia!

⁸Wawi khat chu thingkûngten an lal atâna hriak thih tûr an zawng a, Olive thing hnênah chuan, ‘Kan chungarorêltu ni ta chê!’ an ti a.

⁹Mahse, Olive thing chuan an hnênah, “Thing dang chungarorêltu ni ta chê!” a ti a.

¹⁰“Thingte chuan theipui kûng hnênah, ‘Lo kal la, kan lalah awm rawh!’ an ti a.

¹¹Mahse, theipui kûng chuan, Thing dang chungarorêltu ni ta chê!” a ti a.

¹²“Thingte chuan grêp hrui hnênah, ‘Lo kal la, kan lalah awm ta chê!’ an ti a.

¹³Mahse, grêp hrui chuan an hnênah, Thing dang chungarorêltu ni ta chê!” a ti a.

¹⁴“Thingkûng zawng zawng chuan hling kûng hnênah, ‘Lo kal la, kan lalah awm ta chê!’ an ti a.

¹⁵Hlingkung chuan thingte hnênah, ‘In lal atân hriak min thih tak tak a nih chuan, Lo kal ula, ka buk hlim hi rawn bêl ula; In duh loh chuan, hling ațanga mei lo chhuakin Lebanon sidar thing lamin kâng rawh se!’ a ti a.

¹⁶Chuvângin, tihtak zet leh rinawm taka Abimeleka hi lala in siam a, Jerubbaala leh a chhûngkua hi in tih țăata, a phu tâwk anga in tih chuan—

¹⁷ka pa khân in tân a nunna pawh thâp hialin a dosak che u a, Midian-ho kut ațangin a chhan chhuah che u kha;

¹⁸mahse, tûnah hian ka pa chhûngkaw lakah in hel a, a fapa sawmsarihte chu lung pakhat chungah in that a, a chhiahhlawhnu laka a fapa Abimeleka chu in unau a nih avângin Sekem lalah in siam ta a-

¹⁹wawinah hian Jerubbaala leh an chhûngte lakah dik tak leh rinawm taka in tih chuan, Abimeleka hi lo lâwm ula, ani pawh in chungah lâwm baw rawh se.

²⁰Chuti a nih loh chuan le, Abimeleka ațangin mei lo chhuak sela, Sekem leh Beth Millo mite chu kâng zo vek rawh se; Sekem mite ațang leh Beth Millo mite hnên ațangin mei lo chhuak se, Abimeleka chu kâng zo rawh se!” a ti a.

²¹Jothama chu a tlânchhia a, a tlân bo ta a; a unaupa Abimeleka a hlauh avângin Beer khuaah a kal a, chutah chuan a va awm ta reng a.

ABIMELEKA TLÂKCHHIATNA

²²Abimelekan Israelte chungah kum thum zet ro a rêl hnu chuan,

²³Pathianin Abimeleka leh Sekem mite inkârah inhuatna thlarau sual a tîr a; Sekem mite chuan Abimeleka chungah vervêk takin an ti ta a,

²⁴Jerubbaala fapa sawmsarihte thisen phubâ chu, anmahni tihlumtu an unaupa Abimeleka leh, chu tualthahnaa lo țănpuitu Sekem mite chungarorêltu ni ta chê!” a ti a.

²⁵Tichuan, Sekem mite chuan tlâng chhîpah te amah chângrutu mi an indah a, chûng kawnga lo kal mi rêng rêng chu an lo rawk zêl a; chû thû chu Abimeleka an hrilh ta a.

²⁶Ebeda fapa Gaala chu a unaute nêl Sekemah an lo kal a; ani chu Sekem mite rinzâwng tak a ni a.

²⁷Lovah te an kal a, an grêp huana mi grêp rahte an lo va, an chîl a, an intihlim a. An pathian inah te an kal a, an ei a, an in a, Abimeleka chu ânchhia an lawh a.

²⁸Ebeda fapa Gaala chuan, “Abimeleka hi tu nge maw a niha, Sekema pawh hi tu nge a niha, a rawng kan bâwlâna tûr le? Jerubbaala fapa a ni lo vem ni, Zebula pawh chu a hnuaia hotu a ni ve mai lo vem ni? Sekema pa Hamora rawng chu bâwl zâwk rawh u; engah nge ani te ang rawng kan bâwl ang?

²⁹Hêng mite chungarorêltu ni ta chê!” a ti a. Tichuan, Abimeleka hnênah, “I sipaite tipung la, lo kal ta chê!” a ti a.

³⁰Khaw hotu Zebulan Ebeda fapa Gaala thusawi a lo hriat chuan a thinrim hle a.

³¹Abimeleka hnênah chuan a rûkin zualko a tîr a, “Fimkhur rawh! Ebeda fapa Gaala leh a unaute Sekemah an lo kal a; hetah hian nangmah do tûrin kulh an thawm țăa tlut tlut mai.

³²Chuvângin, a zân a zânin i hote nêl lo thawk ula, dâiah lo châng rû ang che u.

³³Zînga ni a chhuah vêleh, tho vat ula, khaw chhung hi in rawn bei thut ang a; nangmahni do tûra amah leh a hote an lo chhuah hunah, remchâng in hmuh angin an chungah ti ang che u,” a ti a.

³⁴Tichuan, Abimeleka leh a hote zawng zawng chu zânah chuan an tho va, pâwl lîa insiamin Sekem khua chu an rawn hual a.

³⁵Ebeda fapa Gaala chu a lo chhuak a, khawpui kulh kawngka luhnaah chuan a dîng a, Abimeleka leh a hote chu an chân-rûkna hmun ațang chuan an lo tho va.

³⁶Gaalan chûng mite a hmuh chuan, Zebula hnênah, “En teh, mite khi tlâng chhîpah ațangin an lo chhuk thla hum hum mai!” a ti a. Mahse Zebula chuan, “Tlâng hlim saw mipui emaw i ti a nih lek chu,” a ti a.

³⁷Gaala baw rawh chuan, “En ta che, ram lai taka saw mipui an lo chhuk saw, pâwl khat phei chu Meonenim* sasaw ruam ațanga an lo kal saw,” a ti leh a.

³⁸Zebula chuan, ‘Abimeleka hi tu nge a niha, a rawng kan bâwlsak tûr chu?’ i tihna kâ kha khaw nge ni ta le? Hêng mite hi i hmuhsit te kha an ni lo vem ni? I duh chuan chhuak la, inbei ta che u,” a ti a.

³⁹Tichuan, Gaala chu Sekem mite hmâ hruiin a kal chhuak a, Abimeleka nêl chuan an inbei ta a.

⁴⁰Abimeleka chuan a lo ûm a, a tlânchhe ta a; kulh kawngka bul thlengin hliam tuar tam tak an thlu phung mai a.

⁴¹Abimeleka chu Aruma khuua awm a ni a, Gaala leh a unaute chu Sekema awm phal lovin Zebula chuan a hnawt chhuak a.

⁴²Atûk lehah chuan mite chu lovah an va kal chhuak a; chû chu Abimeleka hnênah an hrilh a.

⁴³Tichuan a hote chu a hruai a, pâwl thumah a then a, phûlah chuan an lo châng a. A han hawi vêl a, khuua aţang chuan mipui an lo chhuak a; anmahni bei tûrin an tho va, a bei ta a.

⁴⁴Abimeleka leh a pâwlte chuan hma lam an pan zêl a, khawpui luhna kawngka bulah an awm a; pâwl hnih dangte chuan daia chhuakho zawng zawng chu an bawh zui a, an that zêl a.

⁴⁵Chumi nî chuan Abimeleka chuan khawpui chu nilêngin a bei a; khawpui chu a la a, a chhûnga mite chu a that a; khawpui chu a chhu chhe vek a, chî a phul vak a.

⁴⁶Chûng thû chu Sekem kulha awm zawng zawngten an lo hriat chuan, an pathian Berith tempul kulhbîngah an lût vek a.

⁴⁷Sekem kulh chhûngah mi an awm khâwm vek tih Abimeleka an hrilh a.

⁴⁸Abimeleka chu Zalmon Tlângah a hote zawng zawng nêan chho va. Abimeleka chuan hreipui a la a, thingzâr a chêk thla a, a lâ a, a kokîah a pu a; a hnêna mite hnênah chuan, “Ka tih dân in hmuh ang hian ti ve vat rawh u,” a ti a.

⁴⁹An vai chuan thingzâr chu an chêk thla a, Abimeleka chu an zui a, kulhbîng bulah chuan an chhep a, an hâl khum ta a, Sekem kulha awm zawng zawng, a hmei a pain mi sâng khat vêl an thi a.

⁵⁰Abimeleka chu Thebez-ah a kal zêl a, an hual a, an la ta a.

⁵¹Chû khawpui laiah chuan in sâng nghet tak a awm a, tah chuan chû khawpui mipa leh hmeichhia zawng zawng chu an tlan khâwm a, an inkharkhip tlat a; in sâng chhîp zâwlah chuan an chho va.

⁵²Abimeleka chuan chu in sâng chu a va thleng a, a bei a; hâlkhum tumin in sâng kawngka bulah a va kal a.

⁵³Nimahsela, hmeichhia tuemaw hian buhrâwtsawmna bân chung lamin Abimeleka lû-ah a zu thlâk a, a luruh a keh a.

⁵⁴Tichuan, a râlthum kengtu tlangvâl chu a ko vat a, “I khandaîh phâwi la, mi that rawh, chuti lo zawng, ‘Hmeichhe thah a ni,’ min rawn ti dah ang e,” a ti a. A tlangvâl chuan ani chu a vit tlang a, a thi ta a.

⁵⁵Israel miten Abimeleka a thi ta tih an hriat chuan an kal kiang a, mahni in lamah an hâw darh ta vek a.

⁵⁶Tichuan, Abimelekan a pa chung a tih dân leh, a unau sawmsarih a thah avânga a suahsualna chu Pathianin a thungrûl ta a ni.

⁵⁷Sekem khuua misualho zawng zawng chung Jerubbaala fapa Jothama ânchhia chu Pathianin anmahni lu chung ngeiah a khumtîr vê ta a ni.

BUNG 10

TOLA

¹Abimeleka hnua Israelte chhan chhuak tûra lo chhuak chu, Isakar mi Dodoa fapa, Pua fapa Tola a ni. Ephraim tlang rama Samir khuua mi a ni a.

²Kum sawmhnih leh kum thum Israelte chungah ro a rêl a; a thi a, Samir khuua an phûm a.

JAIRA

³Ani awm hnûah Gilead mi Jaira chuan Israelte chungah kum 22 chhûng ro a rêl a.

⁴Fapa sawmthum a nei a, sabengtung sawmthum chungah an chuang thîn a; Gilead ramah chuan khaw sawmthum an nei a, chûng khaw hming chu tûn thleng hian “Havoth Jair” an ti a ni.

⁵Jaira chu a thi a, Kamon-ah an phûm a.

ISRAELTEN RAHBEH AN TÂWK LEH

⁶Israel fate chuan LALPA mithmuhin thilsual an ti leh a, Baala te, Astorethi te, Suria pathian te, Sidon pathian te, Moab pathian te, Ammon mite pathian te leh Philistia mite pathian te rawng an bâwl a; LALPA chu an hawisan a, a rawng pawh an bâwl duh ta lo va.

⁷LALPA thinurna chu Israelte chungah a sosâng nasa hlê a; Philistia-hote leh Ammon-hote hnênah anni chu a hralh ta a.

⁸Chumi kum aţang chuan Israel fate chu an zar buai a, an nêksâwr tan a— Ammon-ho chuan kum sâwm leh pariat chhûng chu Jordan chhak lama Amor-ho ram, Gilead rama Israel fate chu an tiduhdah ta a ni.

⁹Ammon-hote chuan Juda ram te, Benjamin ram te leh Ephraim ram te do tûrin Jordan lui an rawn kân a, Israel ram chu an rawn timangang ta êm êm a.

¹⁰Israel fate chuan LALPA an âu va, “Kan Pathian kan hawisan a, Baala rawng kan bâwl a, i chungah thilsual kan lo ti ta a ni!” an ti a.

¹¹LALPA chuan Israel fate hnênah, “Aigupta-ho lakah te, Amor-ho lakah te, Ammon-ho lakah te leh Philistia-ho lakah te ka chhan chhuak thîn che u a ni lo vem ni?”

¹²Sidon-hote, Amalek-hote leh Maon-hote pawhin an tiduhdah thîn che u a; kei mîn âu va, tichuan an kut aţangin ka chhan chhuak leh thîn che u a nih kha.

¹³Chutichung pawhin min hawisan a, pathian dangte rawng in la bâwl leh zêl si a. Chuvângin ka chhan chhuak tawh dâwn lova che u.

¹⁴In duhthlan pathiante chu âu vak vak ta che u; in manganna ata chu in chhan chhuahtîr ula a ni ang chu,” a ti a.

¹⁵Israel fate chuan LALPA hnênah, “Kan lo sual êm a ni! Thâ i tih ang angin mîn ti mai rawh; vawîinah hian mîn chhan chhuak lul rawh, kan ngên che a ni,” an ti a.

¹⁶Tichuan, ram dang pathiante chu an zîng aţangin an paih bo va, LALPA rawng an bâwl ta a. Israelte manganna chu Ani pawhin a en reng thei ta lo va.

¹⁷Ammon-hote chu an inpun khâwm a, Gilead-ah tanhmun an khuar a. Israel fate pawh an inhâwr khawm a, Mizpa-ah tanhmun an khuar ve bawk a.

¹⁸Tichuan, mipuiho, Gilead biala hotute chuan, “Ammon-ho hi tu nge han bei hmasa ang? A hmahruaitu chu Gilead ram puma hotu ber a ni ang,” an ti a.

BUNG 11**JEPHTHA**

¹Jeptha chu Gilead pa chak leh mi huaisen a ni a; mahse nawhchizuar fapa a ni a; Gileada fa a ni.

²Gileada nupui chuan fapate a hring a; a fapate an lo puitlin chuan, “Nang chu hmeichhe dang fa i ni a, kan pa ro i khâwm ve thei lo vang,” tiin Jeptha chu an hnawt chhuak a.

³Tichuan, Jeptha chu a unaute hnên ațang chuan a kal bo va, Tob ramah a han awm ta a; Jeptha chuan mi ho tak takte a kâwi khâwm a, rammûin an chhuak ho tîn a.

⁴Nakinah chuan Ammon-ho chuan Israelte chu an do ta a.

⁵Ammon-hovin Israelte an do tâk avângin, Gilead upate chu Jeptha hruai tûrin Tob ramah an kal ta a.

⁶Jeptha hnênah chuan, “Lo kal la, Ammon-hote nêna kan indonaah hian kan hotûah i țang dâwn nia,” an va ti a.

⁷Jeptha chuan Gilead upate hnênah, “Mîn hua a, ka pa in ațangin mîn hnawt chhuak a ni lo vem ni? Engah nge tûna in mangan vêleha inrawn kal leh si?” a lo ti a.

⁸Gilead upate chuan Jeptha hnênah, “Chuvâng tak chuan a ni, i lam kan lo hawi tâk ni; kan hnênah lo kal la, i hovin Ammon-mite chu kan do vang a, tichuan, Gilead mi zawng zawng chungah hotu berah i awm dâwn alâwm,” an ti a.

⁹Jeptha chuan Gilead upate hnênah, “Ammon-ho bei tûra mîn hruai hâwna, LALPAN ka kutah anni chu mîn pe bawk ta se, in hotûah ka țang takmeuh ang mâw?” a ti a.

¹⁰Gilead upate chuan Jeptha hnênah, “I sawi anga kan tih dâwn lohva ai chuan, LALPA ngei hi kan kâra thuhretu ni rawh se,” an ti a.

¹¹Tichuan, Jeptha chu Gilead upate hnênah chuan a kal ta a, anni chuan an chungah hotu leh hruaitûah an siam ta a; Jeptha pawhin Mîspa khuah chûng thute chu LALPA hmâah a thlen a.

¹²Jeptha chuan Ammon-ho lal hnênah chuan palai tîrin, “Eng aiah nge ka ram bei tûra irawn thawh chhuah ni?” a ti a.

¹³Ammon lal chuan Jeptha palaite chu a chhâng a, “Aigupta ram ațanga an lo chhuah lai khân Israelten ka ram mîn chhuhsak a, Arnon ațanga Jabbok lui leh Jordan lui thlengin. Chuvângin hêng ramte hi țha têtên mîn pekîr leh tûr a ni,” a lo ti a.

¹⁴Jeptha chuan Ammon lal hnênah chuan palai a tîr leh a,

¹⁵a hnênah, “Jeptha chuan heti hian a ti e: ‘Israelten Moab ram an chhuhsak lo va, Ammon ram pawh an chhuhsak hek lo;

¹⁶Aigupta ațanga Israelte lo chhuah lai khân, Tuipui Sen thlengin thlalêrah an kal a, Kades hmun an lo thleng a.

¹⁷Israelte chuan Edom lal hnênah, “I ram chhûngah mîn kal tlangtîr ta che,” tia dîl tûrin palai an tîr a. Mahse, Edom lal chuan a lo ngaithla duh lo va. Moab lal hnênah pawh an tîr bawk a, mahse ani pawhin a lo phal chuang lo va. Chuvângin, Israelte chu Kades hmunah chuan an awm ta reng a.

¹⁸Tichuan, Edom ram leh Moab ram hêlin thlalêr ram chu an pal tlang a, Moab ram chhak lamah an kal kual a, Arnon râl lehlamah awmhmun an khuar a; Arnon kha Moab ramri chin a

nih avângin Moab ram chhûngah khân luh pawh an lût hek lo.

¹⁹Chuta țang chuan Israelte chuan Amor lal Sihona, Hesbon lal hnênah, “Kan rama kal tûrin khawngaihin i ram chhûngah mîn kal tlangtîr ta che,” tiin palai an tîr leh a.

²⁰Nimahsela, Sihona chuan a ram pal tlang tûr ngawt pawhin a ring zo lo va. Sihona chuan a mite a ko khâwm vek a, Jahaz-ah bûk khuarin Israelte chu an bei ta vak a.

²¹LALPA Israelte Pathian chuan Sihona leh a mi zawng zawng chu Israelte kutah a pê a, an hneh ta a. Amor-ho ram pum leh chû rama chêng te chu Israelte chuan an nei ta vek a.

²²Arnon ațanga Jabbok thlengin, thlalêr ram ațanga Jordan lui thlengin, Amor-ho ram zawng zawng chu an nei ta vek a nih kha.

²³LALPA Israelte Pathianin a mi Israelte tâna Amor-ho ram chu a chhuhsak a, chû chu tûnah hian i nei anga maw?

²⁴I pathian Kemosan chanpual a pêk ang ang che chu i kawl țha hlê hlê dâwn lo vem ni? Keini pawhin LALPA kan Pathianin kan chanpual atâna mîn pêk chu kan nei zêl baw ang.

²⁵Zippora fapa Balaka, Moab lal ai khân i chak zâwk em ni? Ani khân Israelte kha a lo khing buai em? A lo bei tak meuh em le?

²⁶Hesbon leh a chhehvêl khua te, Aroer leh a chhehvêl khua te, Arnon phâi ruama khawpui zawng zawngte hi kum zathum zet Israelten an luah tawh a ni a, engah nge hei leh chen la lêt leh lova i lo awm?

²⁷I lakah hian tihsual ka nei lo va, mi irawn bei hi i tidik lo zâwk a ni. Vawîinah hian Israel fate leh Ammon mite inkâr thû hi LALPA, Rorêltu chuan rêl rawh se,’ a ti,” an ti a.

²⁸Nimahsela, Ammon lal chuan Jeptha thuchah chu a ngaithla duh chuang lo.

JEPHTHA THUTIAM LEH A HNEHNA

²⁹LALPA Thlarau chu Jeptha chungah a lo thleng a, tichuan, Gilead ram leh Manase ram te, Gilead biala Mizpa te a fang kual a; Gilead biala Mizpa ațang chuan Ammon-ho awmna lam chu a pan ta a.

³⁰Jeptha chuan LALPA hnênah thû a tiam a, “Ammon-ho hi ka kutah mîn pêk tak tak chuan,

³¹Ammon-ho laka hnehtu chan changa ka lo hâw hunah, ka in kawngka ațanga mi hmuak tûra lo chhuak hmasa ber chu, LALPA tâ a ni ang a, hâlral thilhlana ka hlân ang,” a ti a.

³²Tichuan, Jeptha chu Ammon-ho nêna indo tûr chuan a kal chhuak ta a, LALPAN a kutah anni chu a pê a.

³³Aroer ațangin Minith thlengin– khaw sawmhnihi zet a hneh duai duai a–Abel Keramim thlengin a that hmiah hmiah a. Tichuan, Ammon-ho chu Israel fate hmâah an tlâwm ta a.

JEPHTHA FANU

³⁴Jeptha chuan Mizpaa an in a lo thlen chuan, a fanu chuan thinrîk thing ri chhek chheka lâm chungin a lo hmuak a; a fanu neihchhun a ni a. Amah lo chu fapa leh fanu dang a nei lo.

³⁵Ani ber kher a han hmu ta mai chu, a puan a pawt thlêr a, “E-heu, ka fanu! Mîn va titlâwm êm ve le! Mi tilungngaitu i ni ta reng mai! LALPA hnênah thû ka lo tiam tawh si a, sût leh thei ka

ni tawh si lo,” a ti a.

³⁶Ani chuan, “Ka pa, LALPA hnênah thú i lo tiam tawh chuan, i sawi ang ngei chuan hlen ang che, LALPAN i hmêlmâ Ammon-ho chungah phubâ a lâksak tawh si che a,” a ti a.

³⁷A pa hnênah chuan, “Hei hi mi tihsak rawh: ka nulat thianghlimna te, keimah leh ka thianten sôn tûrin tlângah thla hnih chhung min vah chhuahtîr phawt ta che,” a ti a.

³⁸Ani chuan, “Kal ta che,” a ti a. Thla hnih thang bo tûrin a kaltîr ta a; a thianten an kalpui a, tlângah chuan a nulat thianghlimna chu a han sôn ta a.

³⁹Thla hnih a lo ral chuan a pa hnênah a lo haw leh a, ani chuan a fanu chungah a thutiam chu a hlen chhuak ta a. Ani chuan mipa rêng rêng a pâwl lo.

⁴⁰Israel nulate chu kum tinin Gilead mi Jephtha fanu sôn tûrin ni lî an thang bo thîn a, Israelte zîngah chuan tihdânah an neih hlen ta a ni.

BUNG 12

JEPHTHA LEH EPHRAIM-HO INDONA

¹Ephraim-ho chu an inpunkhâwm a, Zaphon-a kal tûrin lui an kân a, Jephtha hnênah, “Ramri pêl rawkin Amon mite i bei a, engtizia nge tel ve tûra min sâwm loh? I inah kan hâl khung dâwn che a ni,” an ti a.

²Jephtha chuan an hnênah, “Kei leh ka mite hian Ammon-ho hi theihtâwp chhuahin kan do tauh tauh va; nangni pawh ka rawn pun che u a; mahse min rawn chhan duh lo a nih zâwk kha.

³Min rawn pui dâwn chuang lo tih ka hriatin, thih pawh huamin, Ammon-ho bei tûrin lui ka kân a; LALPA chuan ka kutah min pe ta a nih hi. Eng aiah nge tûna taka mi bei tûra in lo kal leh si?” a ti a.

⁴Tichuan, Jephtha chuan Gilead mi zawng zawng chu a ko khâwm a, Ephraim-ho chu a bei ta a. “Nangni Gilead-ho hi Ephraim leh Manase ram ațanga tlânchhe awm khâwm lek in ni,” an lo tih khum thîn avângin Gilead mite chuan Ephraim mite chu an hneh ta a ni.

⁵Ephraim-ho thlen hmâin Gilead mite chuan Jordan lui kân theihna kân zawng zawng an lo chân khalh vek a. Ephraim mi tlân chhuak lo kal apiangten, “Min kaitîr rawh,” an tihin, Gilead mite chuan, “Ephraim mi i ni em?” tiin an lo zâwt thîn a. “Ni lo,” a tih chuan,

⁶“Shibboleth!” han ti teh,” an ti a. Chû mi chuan, “Sibboleth,” a ti a, a lam ri dik thei si lo va. Tichuan an la hrang a, Jordan kaiah chuan an that zêl a. Chutah chuan Ephraim mi sînglî sâng hnih zetin an thih phah ta a ni.

⁷Jephtha chuan Israelte chungah kum ruk ro a rêl a. Tichuan, Gilead mi Jephtha chu a thi a, Gilead khawpuia a awmnaah chuan an phûm ta a.

IBZANA, ELONA LEH ABDONA

⁸Ani awm hnûah chuan Bethlehem khuah mi Ibzan Israelte chungah ro a rêl a.

⁹Fapa sawmthum leh fanu sawmthum a nei a. Chûng a fanu sawmthumte chu hmun dangah pasal a neih darhtîr a, a fapate tân hmun dang danga mi nupui sawmthum a neih sak baw. Israelte chungah kum sarih ro a rêl.

¹⁰Ibzana chu a thi a, Bethlehem khuah an phûm a.

¹¹Ani awm hnûah Zebulun mi Elonan Israelte chungah ro a rêl leh a. Kum sâwm Israelte ro a rêl sak a.

¹²Zebulun mi Elona chu a thi a, Zebulun rama Aijalon khuah chuan an phûm a.

¹³Ani hnûah Piratho mi Hillela fapa Abdona chuan Israelte chungah ro a rêl a.

¹⁴Fapa sawmli leh tupa sawmthum, sabengtung sawmsarih chungah chuang thîn a nei. Israelte chungah kum riat chhûng ro a rêl.

¹⁵Pirathon mi Hillela fapa Abdona chu a thi a, Amalek-ho tlâng ram, Ephraim rama Pirathon khuah an phûm ta a.

BUNG 13

SAMSONA PIAN THU

¹Israel fate chuan LALPA mit hmuhah thilsual an lo ti leh ta a, LALPA chuan Philistia mite kutah kum sawmli chhûng a pê a.

²Zora khuah chuan mi pakhat, Dana thlaha mi a awm a, a hming chu Manoa a ni; a nupui chu a ching a, fa an nei lo va.

³Chû hmeichhe hnênah chuan LALPA Vântirhkoh a inlâr a, “Hei le, i ching a, fa nei thei lovin i awm a; mahse nau i pây ang a, fapa i hring dâwn a ni.

⁴Chuvângin fimkhur la, uain leh zu lam chi rêng rêng in suh la, ei thiang lo thil rêng rêng pawh ei hauh lo vang che.

⁵Ngai teh, i rây ang a, fapa i hring dâwn a ni. A lûah bakmeh chem rêng rêng chelek tûr a ni lo, naupang chu chhûla a awm lai ațangin Pathian tân Nazarit mi a ni ang; Philistia mite kut ata Israelte a chhan chhuak tan tawh dâwn a ni,” a ti a.

⁶Hmeichhia chuan a pasal hnênah, “Pathian Mi ka hnênah a lo kal a, a hmêl chu Pathian Vântirhkoh ang maia hlauhawm hi a ni; mahse khawî lama mi nge a nih ka lo zâwt ta hauh lo va, amah pawhin a hming min hrilh lo baw a.

⁷Chû mi chuan, “Ngai rawh, i rây ang a, fapa i hring ang a. Uain leh zu lam chi rêng rêng i in tûr a ni lo va, ei thiang lo rêng rêng i ei baw tûr a ni lo, chû nau chu chhûl ațangin a thih nî thlengin Pathian tân Nazarit mi a ni ang,’ a ti,” a ti a.

⁸Manoa chu LALPA hnênah a tawngtai a, “Aw ka Lalpa, i mi rawn tîr Pathian Mi kha khawngaih takin rawn tîr leh la, nau piang tûr chungchânga kan tih tûr min rawn zirtîr leh rawh se,” a ti a.

⁹Pathian chuan Manoa âw chu a lo ngaithlâ a, hmeichhia chu lova a thut laiin a hnênah Pathian Vântirhkoh chu a lo kal leh a; mahse a pasal Manoa chu a bulah a awm ve si lo va.

¹⁰Hmeichhia chu a pasal va hrilh tûrin hmanhmawh takin a tlân a, a hnênah chuan, “En teh, hmân nia Mi lo kal kha tûn maiah kân ka hnênah a lo lang leh ta!” a va ti a.

¹¹Manoa chu a tho va, a nupui chu a zui a. Chû Mi awmna an va thlen chuan, “Hê hmeichhe hnêna thu sawitu kha i ni em?” a ti a. Ani chuan, “Ka ni e,” a ti a.

¹²Manoa chuan, “I thusawite kha lo thleng ngei rawh se! Mipa naupang chu engtin nge a awm ang a, eng thilte nge a tih ang?” a ti a.

¹³LALPA Vântirhkoh chuan Manoa hnênah, “Hmeichhe hnêna ka sawi ang khân fîmkhur hle mai rawh se.

¹⁴Grêp hruia mi rêng rêng a ei tûr a ni lo va, uain leh zu lam chi rêng rêng a in bawk tûr a ni lo, ei thiàng lo thil pawh engmah a ei tûr a ni hek lo. Thû ka pêk apiàng kha zawm vek rawh se,” a ti a.

¹⁵Manoa chuan LALPA Vântirhkoh hnênah, “Khawngaih takin kan chelh lawk ang che, kêltê ka va buatsaihsak lawk ang che,” a ti a.

¹⁶LALPA Vântirhkoh chuan Manoa hnênah, “Min chelh mah la, i châw chu ka ei lo vang. Hâlrâl thilhlân in hlan duh erawh chuan, LALPA hnênah i hlân tûr a ni,” a ti a (Manoa chuan LALPA Vântirhkoh a ni tih a hre si lo va).

¹⁷Manoa chuan LALPA Vântirhkoh hnênah chuan, “I thusawi anga a lo thlen huna kan châwimâwi theih nân che, tu nge i hming le? a ti a.

¹⁸LALPA Vântirhkoh chuan a hnênah, “Maka a ni tih i hmu reng si a, engati nge ka hming mi zawh le?” a ti a.

¹⁹Tichuan, Manoa chuan kêltê leh buhbâl thilhlân tûr a lâ a, lung chungah chuan LALPA hnênah a hlân ta a. Manoa leh a nupuiin an lo thlîr reng lai chuan thil mak tak a ti ta a—

²⁰maichâm aţanga vân lama meialh a chhoh vêleh, LALPA Vântirhkoh chu maichâm meialh zîngah chuan a chho ta daih a! Manoa leh a nupuiin chû chu an hmuhin, hmaia lei sîin an bawkkhup a.

²¹Manoa chuan LALPA Vântirhkoh a ni tih a lo hre ta a, chumi hnûah chuan LALPA Vântirhkoh chu Manoa leh a nupui hnênah a inlâr zui tawh lo.

²²Manoa chuan a nupui hnênah, “Pathian kan hmu ta si a, kan thi ngei dâwn a nih hi!” a ti a.

²³A nupui erawh chuan, “LALPAN min tihlum duh ni se, kan hâlrâl thilhlân leh buhbâl thilhlân te kha a pawm duh nâng; hêng thil zawng zawngte hi min êtîr duh bawk lo vang a, tûn ang hunah hêng thilte pawh hi min hrilh duh hek lo vang,” a ti a.

²⁴Hmeichhia chuan fapa a hring ta a, a hmingah Samsona a sa a; naupang chu a lo ţangh lian a, LALPA chuan mal a sâwm a.

²⁵Zora leh Eshtaol inkâra awm Mahane Dan khuaa a awm laiin LALPA Thlarau chuan a rawn khawih harh ţan ta a.

BUNG 14

SAMSONA NUPUI PHILISTIA MI

¹Samsona chu Timna khuah a zu kal a, Philistia fanute zînga hmeichhe pakhat a zu hmu fuh a.

²A hâw chhoh leh chuan a nu leh a pa hnênah, “Timna khuah Philistia mite fanu ka hmû a; nupuih min neihsak teh u,” a ti a.

³A nu leh a pate chuan a hnênah, “I laichînte zîngah emaw, kan mite zîngah emaw hian hmeichhia an awm lo vem ni? Serhtan loh Philistia mi ber kher nupuia neih i sawi tâk mai?” an ti a. Samsona chuan a pa hnênah, “Min neihsak mai rawh, ka duh zâwng tak a ni si a,” a ti a.

⁴A nu leh a pate chuan chû chu LALPA tih a ni tih an hre si lo va— Philistia mite chungah kutthlâkna tûr remchâng a zawng a ni si a. Israelte chu chûng lai chuan Philistia-ho thuhnuaia an awm lai a ni a.

⁵Samsona chu a nu leh a pa hruaiin Timna khuah a chhuk a, Timna grêp huan an thleng a. Chutah chuan sakeibaknei pa tuai hian rûm chungin a lo bei thut mai a.

⁶LALPA Thlarau chuan amahah chak takin a rawn thawh a, a kutah engmah ken a nei lo chungin, kêlte pawh sawm ang lekin sakeibaknei chu a pawt sawm a. Nimahsela, a thiltih chu a nu leh a pate a hrilh lo.

⁷Tichuan an chhuk a, hmeichhia chu an zu bia a; nula chuan Samsona lung a tiâwi hlih hlih mai a.

⁸Nakin deuhah chuan neih tumin a zu kal leh a, sakeibaknei ruang en tûrin kawng sîrah a pêng a. Ngai teh, sakeibaknei ruangah chuan khuai an lo awm mur mur a, a zû pawh a tam hle a.

⁹A kutin a la a, kal pahin a ei a. A nu leh a pate hnên a zu thlen chuan a pê a, an ei vê a. Mahse chu khawizû chu sakeibaknei ruang aţanga a lâk chhuah tih a hrilh lo.

¹⁰A pa chu hmeichhe hnênah chuan a zu lêng a. Tlangvâltan an tih thîin dân angin Samsona chuan ruai a ţheh a.

¹¹Amah an lo hmuh chuan, a ţhiana ţang tûrin mi sawmthum an rawn hruaisak a.

¹²Samsona chuan an hnênah, “Zawhna khîrh ka zâwt ang che u a. Ruaiţheh ni sarîh chhûnga dik taka min hrilh theih chuan, puan zai sîn sawmthum leh, silhfên inthlâkna tûr sawmthum ka pê ang che u.

¹³Min hrilhfiah theih loh erawh chuan, puan zai sîn sawmthum leh silhfên inthlâkna sawmthum min pe tûr a ni,” a ti a. Anni chuan, “Zawhna chu zâwt ta che, kan lo ngaithlâ ang chu,” an ti a.

¹⁴Tihian a sawi ta a: “Eitu aţangin ei tûr a lo chhuak a, Chak tak aţangin thil thlum a lo chhuak, tih hi,” a ti a. Ni thum chhûngin chu thukhîrh chu an hrilhfiah thei lo va.

¹⁵A ni sarîh ni chuan Samsona nupui hnênah chuan, “I pasal chu hê thukhîrh min hrilhfiah tûrin thlêm mai teh, chuti lo zawng, nangmah leh i pa in hi kan hâl mai dâwn a nia. Mahni neihsa chântîr tûr lekin em ni ţhianah min sâwm? A ni lo vem ni?” an ti a.

¹⁶Samsona nupui chuan ţap chungin, “Min lo va haw âwm vê! Min hmangaih tak tak lo a nih hi! Kan mite hnênah thukhîrh i pê a, mi pawh i hrilhfiah leh duh tawp si lo va,” a ti a. Ani chuan a hnênah, “En teh, ka nu leh ka pa pawh ka hrilh lo va; nangmah ka hrilh ang che mâw?” a ti a.

¹⁷Tichuan, ruaiţheh ni sarîh chhûng chuan a hmâah chuan a ţap a ţap a. A nawr nasat êm avângin a ni sarîh ni chuan a hrilh ta a. Ani chuan chu thukhîrh chu a mite hnênah chuan a hrilh ta a.

¹⁸Tichuan, chû khuaa mite chuan a ni sarih nâ ni a tlâk hmâ chuan a hnênah: “Khawizû aia thlum zâwk chu eng nge? Sakeibaknei aia chak zâwk chu eng nge?” an ti ta dual dual a. Ani chuan an hnênah: “Ka bâwnglâ hian lei let lo ula chuan, Ka thukhirh hi in hre chhuak hauh lo tûr!” a ti a.

¹⁹LALPA Thlarau chu a chungah chak takin a rawn thawk a, Ashkelon khuaah a chhuk thla a, mipa sawmthum a zu that a, an thawmhnâwte a lâksak a, thukhirh hrilhfiatute hnênah chuan thawmhnaw inthlâkna chu a pe ta a. Thinur ðeuh chungin a pa inah a haw chho ta a.

²⁰Nimahsela, Samsona nupui chu a ðhian pa, ðhian thaa a zu siana nupui atân an lo pe daih a.

BUNG 15

SAMSONA'N PHILISTIA-HO A HNEH

¹Chumi hnû, buhseng hun lai hian, kêltê pakhat kengin Samsona chuan a nupui a zu tlawh dâwn a. “Ka nupui pindanah min luhtîr rawh u,” a ti a. Mahse a puzawn chuan a lo luhtîr phal ta lo va.

²A puzawn chuan, “Ani chu i haw ta viau a nih dâwn hi ka ti a; chuvângin i ðhianpa kha ka lo pe ta mai a ni. A nau hi a hmêltha zâwk a ni lo'm ni? Khawngaihin, a aiah nei zâwk mai rawh,” a ti a.

³Samsona chuan an hnênah, “Tûn ðum chu pawî ka khawih pawhin, Philistia mite ai chuan dem ka kai bîk lo vang!” a ti ta ngat a.

⁴Samsona chu a va kal a, sihal zathum a va man a; pahnih zêlin an mei a ðawn zawm a, a inzawmna laiah chuan meichher a ðawn bet zêl a.

⁵Meichherte chu a hâl a, Philistia mite buh hmunah a chhuah a, an buhphal leh buh dîng lai te, an grêp huan leh an olive hmunte nêl lam chuan a kâng ta dur dur mai a.

⁶Philistia mite chuan, “Hei hi tû tih nge ni?” an ti a. Anni chuan, “Timna khaw mâkpa Samsona tih mawlê; a nupui chhuhsakin, a ðhianpa an lo pe daih a nih kha,” an ti a. Philistia-ho chu an lo kal a, an pafa chuan an hâl hlum ta a.

⁷Samsona chuan an hnênah, “Hetiang hian ti mah ula, in chungah phubâ ka la tho tho dawn, chumi zawhah chuan ka duh tâwk tawh ang,” a ti a.

⁸Abiling abalangin a sâm ta chiam a, a that ðeuh va; tichuan, Etam lung pûk kârah a chhuk a, tah chuan a awm ta a.

⁹Philistia-hote chu an chho va, Judai ramah ðanhmun an han khuar a, Lehi khua an han ep tuar a.

¹⁰Juda-ho chuan, “Engtizia nge hetia min rawn ep tâk ut mai le?” an lo ti a. Anni chuan, “Samsona man tûrin kan lo chho a ni, kan chungah a tih ang bawkin a chungah kan ti ve ang,” an ti a.

¹¹Tichuan, Juda mi sângthum lai chu Etam lung pûkah chuan an chhuk thlâ a, Samsona hnênah, “Philistia-ho hi kan chungah thuneitu an ni tih i hre na nge? Engtizia nge hetia min tih tâk mai?” an ti a. Ani chuan an hnênah, “Ka chungah an tih ang bawkin an lakah ka ðuan ve a nih kha,” a ti a.

¹²Nimahsela anni chuan, “Philistia-ho kuta pêk atân rawn man tûr chea lo kal kan ni asin,” an ti a. Samsona chuan an hnênah,

“Nangni tal chuan min tihlum lo tûrin chhia chham rawh u,” a ti a.

¹³Anni chuan a hnênah, “Tihlum lo ve, ða takin kan phuar ringawt ang che a, an kutah kan pe mai dâwn che a ni; kan tihlum hauh lo vang che,” an ti a. Hruizên thar pahnihin an phuar a, lungpui aţang chuan an hruai chhuak ta a.

¹⁴Lehi an rawn thlen chuan, Philistia-ho chuan amah chu an lo âu nawmnah a. Chutah chuan, LALPA Thlarau chu chak takin a chungah a rawn thawk thut a; a bâna an phuarna hruite chu lazai kâng chat ang mai hian, a kut ata a chat thla tuarh a.

¹⁵Sabengtung khabe ruh tharlâm a hmû a, a la lawk a, chû chuan mi sângkhat zet a vaw hlum a.

¹⁶Samsona chuan: “Sabengtung khabe ruhin, Ka chhep vûm thûr mai le, Sabengtung khabe ruhin Mi sângkhat ka that e!” a ti a.

¹⁷Chû thû a sawi zawh chuan, a kuta khabe ruh a ken chu a paih a, chû hmun chu Ramath Lehi a ti a.

¹⁸A tui a lo hâl ta êm êm a; LALPA a âu va, “I chhiahhlawh kutin chhandamna ropui tak i thlen ta a; tûnah hian serhtan lohte kuta tlu lût tûrin, tuihâlin ka thi mai dâwn em ni?” a ti a.

¹⁹Tichuan, Pathianin Lehi hmuna khuarkhurum chu a tikhichat a, tui a lo chhuak huau huau va, a in ta a; a thlarau chuan ngai a rawn awh leh a, a lo harh chhuak leh ta a. Chû hmun hmingah chuan En Hakkore a sa a, tûn thleng hian Lehi ah a la awm.

²⁰Tichuan, Philistia-ho hun laiin Israelte chungah kum sawmnhnîh ro a rêl a ni.

BUNG 16

SAMSONA LEH DELILI

¹Samsona chu Gaza khuaah a zu kal a, nawhchizuar a hmu a, a mutpui a.

²“Samsona a lo kal!” tia Gaza mite an inhriattir vêleh, chû hmun chu an rawn hual a, khawpui kulh kawngka bulah chuan zankhuain an lo châng a. “Zîng khua han vâs sela, kan that dâwn nia,” tiin, zankhuain an ngawi ðhap a.

³Samsona chu zanlai thlengin a mu a; zan laiah chuan a tho va, khawpui kulh kawngkhâr leh a ban pahnih chu a chelh a, a kalhna te nêl lam chuan a phâwi vek a, a kovin a pû a, Hebron ep tlang chhîpah a chhohpui daih a.

⁴Chûng hnûah chuan Sorek Ruama nula pakhat, a hming Delili an tih chu a ngaizâwng leh ta a.

⁵Philistia hotute chu a hnênah an va kal a, tihian an hrilh a, “Amah hi lo thlêm teh, heti taka a chakna hi eng nge ni a, engtia hneh theih nge, engtin nge kan phuar anga kan sawisak theih ang, tih hriat chhuah lo tum teh; tichuan tangkaraw tlang 1100 kan pe ðeuh dâwn che nia,” an ti a.

⁶Tichuan, Delili chuan Samsona hnênah, “Engvânga chak viau nge maw i nih le, sawisak theih tûrin engtia phuarbeh theih nge i nih min hrilh teh,” a ti a.

⁷Samsona chuan, “Thal hrui tharlâm, la phoro loh pasarihin min phuar sela, midang ang bawka chak lo ka ni ve mai ang,” a ti

a.

⁸Tichuan, Philistia hotute chuan thal hrui thar diai, la phoro loh pasarih anrawn pê a, chûng chuan a phuar ta a.

⁹Pindan chhûngrilah chuan a chângrutute an awm a. Ani chuan, “Samson, Philistia miten anrawn bei dâwn che!” a ti a. Thal hruite chu meilinga lazai deh chhum ang maiin a chat nghal tuarh a. A chakna chhan chu hriat a ni ta lo va.

¹⁰Delili chuan Samsona hnênah, “En teh, mi ngaihnêpzia hi, dâwt ringawtin mi bum vêl a. Khawngaih takin, engtia phuar beh theih nge i nih min hrilh rawh,” a ti a.

¹¹Ani chuan, “Hruizên thar, la hman hauh lohvin nghet takin min phuar sela, mi dang ang bawka chak lo ka ni ve mai ang,” a ti a.

¹²Chutichuan, Delili chuan hruizên thar a la a, a phuar ta a, a hnênah, “Samson, Philistia miten an bei dâwn che!” a ti a. Pindan chhûngrilah chuan chângrutute kha an awm a. Mahse, a kuta phuarnate chu lazai ang lekin a tichat leh ta vek mai a.

¹³Delili chuan Samsona hnênah, “Dâwt baw min hrilh a, min la ngaihnêp cheu a ni mâw. Engtia phuar beh theih nge i nih min hrilh tak tak teh,” a ti a. Ani chuan, “Ka sam phiar hlâwm sarilh hi puanah tahhnan mai rawh,” a ti a.

¹⁴Tichuan, puanbu nêchuan nghet takin a tahhnan ta tlat a, “Samson, Philistia miten anrawn bei dâwn che!” a ti a. A muhîl a lo harh chuan a puanbu kilhbehna chu a puanbu chawpin a phih dâwk vek a.

¹⁵Ani chuan, “I thinlung min pe si lovin engtin nge ‘Ka hmangaih che’ i tih theih? Vawi thum ngawt nuihzabûr-ah mi i siam ta, i chakna chhan pawh min la hrilh duh chuang si lo,” a ti a.

¹⁶Chutiang chuan ni tin a zar chhên a, a nawr tlut tlut avâng chuan, a rilru chu thihna khawp hialin a lo mangang ta a,

¹⁷a rilru chu a hrilh ta vek a, “Ka lûah hian bakmehna chelek a la ni ngai lo va, ka nu chhûl aţang rêngin Pathian tâna Nazarit mia awm ka ni a. Inziat kawlh vek ila, ka chakna chuan min kalsan ang a, mi dang ang maia chak lovin ka awm mai ang,” a ti ta a.

¹⁸A thinlung zawng zawng a phawrh ta tih Delili chuan a hriatin, Philistia hotute chu a ko va, “Lo kal leh ta che u, a thinlung zawng zawng a phawrh ta e,” a ti a. Tichuan, Philistia hotute chu a hnênah an lo kal a, tangka pawh anrawn keng a.

¹⁹A mal chungah a chûl mû a, a sam phiar sarilh hlep thla tûrin mi a ko va. Tichuan, a sawisa ţan ta a, a chakna chuan a kalsan ta daih a.

²⁰“Samson, Philistia hovin anrawn bei dâwn che!” a han ti a. A muhîl chu a lo tho va, “A hmâ ang bawkin ka tâl chhuak leh mai dâwn alâwm!” a ti a. Mahse LALPAN a kalsan tawh tih rêng a inhre lo.

²¹Philistia mite chuan an man a, a mitmu an kher chhuahsak a, Gaza khuah an hruai thlâ a. Dâr kawlte an buntîr a, tân ina buh râwtsawmtûah an chhawr ta a.

²²Amaherawhchu, a lu an meh kawlh sak hnû kha a lo ţang sei ţan leh ta a.

SAMSONAN PHILISTIA-HO A THIHCHILH

²³Philistia hotute chu an pathian Dagona hnênah inthâwina ropui tak hlâna, intihlim tûrin an pung khâwm chiam a: “Kan hmêlmâ Samsona chu kan pathianin kan kutah min pe ta!” an ti a.

²⁴Mipuiten amah an han hmuh chuan, an pathian chu an fak a; “Kan pathianin kan hmêlmapa min pe ta, Kan ram tichhetu kha, Mi tam tak tihlumtu ngeia chu,” tiin.

²⁵Chutia thinlung hlim taka an awm lai chuan, “Samsona chu han ko teh u, a hmuhdawm dâwn êm mai,” an ti a. Samsona chu tân in aţang chuan an ko va, enawm atân arawn inlan ta a. Ban pahnih inkârah an dintîr a.

²⁶Samsona chuan amah kaitu naupang hnênah, “Tempul inngahna bante hi mi han dehtîr teh, ka lo ngêng ang e,” a ti a.

²⁷Tempul chu mipa leh hmeichhiain an khat tlat a. Philistia milianho zawng zawng chu an kim vek a, mipa leh hmeichhia sângthum vêl zet in chung aţangin Samsona nuihza siam chu an thlîr a ni.

²⁸Samsona chuan LALPA chu a âu va, “Aw Lalpa PATHIAN, minrawn hre reng tûrin ka ngên a che! Aw Pathian, Philistia mite chungah hian ka mit khinghnih phubâ ka lâk theih nân, tûn ţum atân chauh hian mi tichak leh tûrin ka dîl a che!” a ti a.

²⁹Samsona chuan tempul inngahna ban laita pahnih chu a vuan a, a kut ding lam leh vei lamin bante chu ţanchhanah a hmang a.

³⁰Samsona chuan, “Philistia-ho hi ka’n thihchilh ang e,” a ti a. Theihtâwpin a nam vak a, tempul chu a chim rup a, milianhote leh a chhûnga awm zawng zawng chu a delh a. Tichuan, a dam laia a thahte aiin a thihchilha thîte chu an tam zâwk daih a ni.

³¹A unaute leh a pa chhûngte chu a ruang hlâwm tûrin an lo chhuk a, an zâwn chho va, Zora leh Estaol inkâra a pa Manoa thlânah chuan an phûm ta a. Israelte chungah kum sawmhnih chhûng ro a rêl a ni.

BUNG 17

MIKA, MILEM BIA

¹Ephraim tlâng ramah chuan mi pakhat a awm a, a hming chu Mika a ni.

²Chû mi chuan a nu hnênah, “Tangka sekel 1100 mîin an rûksak che a, ânychia i lawh a, kei pawh min hrilh kha-khâ tangkâ kha ka kawl asin; keima rûk a ni e,” a ti a. A nu chuan, “Ka fapa, LALPAN malsâwm che rawh se!” a ti a.

³Chû tangka sekel 1100 chu a nu hnênah a pê kîr a, a nu chuan, “Hê tangkâ hi ka fapain milem a ker nân leh milem chhûn nân, ka kut ngeiin LALPA hnênah ka hlân tawh a; chuvângin, tûnah hian ka pe lêt leh ang che,” a ti a.

⁴Tichuan, silvar tangkâ chu a nu hnênah chuan a pekîr a. A nu chuan silvar tangka sekel zahnih chu a lâ a, tangkaraw chhertu hnênah a pê a, ani chuan a ker chí leh a chhûn chí milimah a lo siamsak a; Mika inah chuan an dah ta a.

⁵Mika chuan pathian dahna in a nei a, puithiam kawr leh milim a siam a; a fapa pakhat chu puithiam atân a serh hrang a.

⁶Chûng hun lai chuan Israel ramah lal an la awm lo va; mi tinin tha an tih dân dânin an ti mai a.

⁷Judai rama Bethlehem khuua Juda chhungkaw zingah chuan tlangval pakhat a chêng ve a; chu mi chu Levia chi a ni.

⁸Chû mi chuan awmna tûr zawnin Judai rama Bethlehem khuua chu a chhuahsan a. Ephraim tlang ramah arawn kal a, Mika inah chuan a lo thleng a.

⁹Mika chuan, “Khawî aţanga lo kal nge i nih?” a ti a. Ani chuan, “Judai rama Bethlehem khuua mi, Levia chi ka ni a, awmna tûr hmun ka zawn a ni,” a ti a.

¹⁰Mika chuan a hnênah, “Ka hnênah hian awm ta che, pa atân leh puithiamah i awm ang a, kum tin silvâr tangka sekel sâwm leh, silhfên inthlâkna bâkah, i ei tûr ka tumsak ang che,” a ti a. Levia mi chu a awm ta a.

¹¹Chû mi inah chuan Levia mi chu lungâwi takin a awm a; tlangvâl chu a fapa pakhat ang maiin a awm ta a.

¹²Mika chuan Levia mi chu a serh hrang a, tlangvâl chu ama puithiamah tângin, Mika inah chuan a awm reng a.

¹³Mika chuan, “Levia chi puithiam ka neih tâk avângin LALPA chuan ka chungah t̃hat a chhuah ang tih ka hre ta!” a ti a.

BUNG 18

DAN MITEN MIKA MILEM BIAK AN ENTAWN

¹Chûng hun lai chuan Israel ramah lal an nei lo va. Chutih lai chuan Dan hnam te chuan ram luah tûr an zawn a; chutih hun thleng chuan Israel hnam zingah chanpual an la nei ve si lo va.

²Tichuan, Dana thlahte chuan ram t̃ha zawn a en thlithlai tûrin, an chîte zing aţangin mi huaisen pangâ, Zora leh Estaol khuua aţangin an tîr a. “Kal ta ula, ram chu va en thlithlai rawh u,” an ti a. Ephraim tlang ram an han thlen chuan Mika inah an lût a, an riak ta a.

³Mika ina an awm lai chuan, Levia tlangvâl chu a aw-phâwi aţangin an man chhuak a, an va pan a, “Eng nge hetah i tih? Hetah hian eng thil nge i neih?” an ti a.

⁴Ani chuan an hnênah, “Mika hian hetiang hian mi tihsak a. Mi ruai a, ama puithiamah ka awm ta a ni,” a ti a.

⁵Anni chuan a hnênah, “Khawngaih takin, kan zin kawngah hian kan tluang dâwn em tih Pathian hnênah min zawhsak rawh,” an ti a.

⁶Puithiam chuan an hnênah, “Thlamuang takin kal rawh u. In kalna apiangah LALPAN awmpui zêl che u rawh se,” a ti a.

⁷Tichuan, chûng mi pangâte chu an chhuak a, Lais khuah an va kal a. Chuta mite chu Sidon mite ang maiin ralmuang tak leh him takin an lo awm hlê hlê tih an va hmu a. Chû ramah chuan midang tibuai thei tûr thuneitu bîk pawh an awm lo va. Sidon-ho nêan inhlât hle a, midang zawmpui tû dang mah an nei bawk si lo va.

⁸Chûng enthlatute chu an unaute awmna Zora leh Estaol khuah chuan an hâw leh ta a, an unaute chuan, ‘Eng chanchin nge in rawn hawn le?’ an lo ti a.

⁹Anni chuan, “Hawh u, tho ula, i han bei ang u. A ram kan va hmu a, a t̃ha hlê mai. In che chhuak ve dâwn lo’ m ni? Chû ram chu i han luah ang u, a huphurhawm lo ve.

¹⁰In va kalna tûr hmun chu, a ram pawh a zau va, a michêngte lah râlmuang taka khawsa an ni a. Lei chungah engmah tlâkchham lohna hmun a ni a, Pathianin in kutah a pe dêr tawh lehngghâl che u a,” an ti a.

¹¹Tichuan, Zora leh Estaol khuua aţang chuan, Dana thlah mi zaruk chu, râlthuum nêna inthuamin an kal ta a.

¹²Chutia an kal chho chu, Judai rama Kirjath Jearim-ah riahhmun an khuar a. (Chuvângin chû khuua chuan Mahane Dan tih hming a la pu ta reng a ni. Chû chu Kirjath Jearim thlang lama awm a ni.)

¹³Chuta t̃ang chuan an kal zêl a, Ephraim tlang rama Mika in chu an va thleng a.

¹⁴Mi panga, Lais ram enthla tûra han kalte khân an unaute hnênah chuan, “Helai inah hian puithiam kawr te, milemtê te, milim ker leh chhûn te a awm tih in hria em? Tih dân tur t̃ha han ngaihtuah teh u,” an ti a.

¹⁵Tichuan an va kal pêng a, Levia chi tlangvâl awmna in—Mika inah chuan an va kal a, chibai an va bûk a.

¹⁶Dana thlah mi zaruk, râlthuama inthuum te chu kawngkhâr bulah chuan an ding a.

¹⁷Ram enthlatu mi pangâte chu an kal chho va. Inah chuan an lût a, milim ker te, puithiam kawr te, milimtê te, milem chhûn te chu an la a. Puithiam chu mi zaruk, râlthuama inthuumho zingah kawngkhâr bulah chuan a ding a.

¹⁸Chûng miten Mika in chhûnga an luha, milim ker te, puithiam kawr te, milimtê te, milem chhûn te an lâk chuan, puithiam chuan, “Eng nge in tih dâwn a?” a ti a.

¹⁹Anni chuan, “Lo ngâwi mai teh, i kâ hup la, min rawn zui mai rawh; kan tân pâ-ah leh puithiamah i awm dâwn nia. Chhûngkaw mal puithiama awm reng nge t̃hâ i tih, Israel chhûngkua leh hnam tâna puithiam nih?” an ti a.

²⁰Puithiam chu a lâwm hle a, milim ker te, puithiam kawr te, milemtê te, milem chhûn te chu kengin, an zingah chuan a tel ve ta a.

²¹An lêt leh a, an kal ta a, an naupangte, an rante leh an thuamhnâwte chu an hmâah chuan an kaltîr a.

²²Mika in aţanga thui fê an kal ta tihah, Mika t̃henawm hnaite chu an inko khâwm a, Dan-ho chu an va ûmphâ a.

²³Dana thlahte chu an va âu va. Anni chu an lo leh hawî a, Mika hnênah chuan, “Engtizia nge ni ta, khati zât zât in rawn thawh tâk?” an lo ti a.

²⁴Ani chuan, “Keima siam ka pathiante leh ka puithiam min chhuhsak a, in kal bopui ringawt mai. Engmah ka nei tawh hlei nê? ‘Engtizia nge ni ta?’ te in la ti zâwk lehngghâl a,” a ti a.

²⁵Dana thlahte chuan a hnênah, “Kan beng hriatah engmah rawn sawi tawh suh, thinrim kut i tuar palh ang e, nang leh in chhûngkuain in thih phah mai tûr asin!” an ti a.

²⁶Dana thlahte chu an kal ta a. Anni tân cho rual loh khawpa chak an ni tih a hmuhin, Mika chuan ama in lamah a kîrsan ta a.

DANA THLAHTE LAIS-AH INBÊGBEL

²⁷Tichuan, Mika thilsiamte leh a puithiam chu an kalpui ta daih a, Lais khawpui, a michêngte râlmuang tak leh him taka lo awmte khua chu an va thleng a; khandaihin an bei chiam a, khua chu an hâl a.

²⁸Sidon aţanga hla tak a nih avângin tûmah chhantu pawh an awm lo, thurualpui dang pawh tûmah an nei hek lo. Beth Rehob ruama awm a ni a. Tichuan, khawpui an din thar leh a, tah chuan an awm ta a.

²⁹An khawpui hming chu Dan an ti a, an thlahtu Israela fa, Dana hming châwia sak a ni. Tûn hmain chû khua chu Lais tih a ni.

³⁰Dana thlahte chuan milim kerchawp chu an be zui ta a; Manasea fapa, Gersoma fapa Jonathana leh a fapate chu Dan hnam puithiamah an awm ta zêl a ni, sala hruai an nih thleng khân.

³¹Silo khuaa Pathian in a awm chhûng zawng khân, Mika siam milim ker chawp kha an lo tungding ve reng a ni.

BUNG 19

LEVIA MI LEH A HMEI

¹Israel rama lal an la awm hmâ khan, Ephraim tlâng ram kilkhâwr takah hian Leviam chî mi pakhat a awm a. Judai ram Bethlehem khuaa mi hmei a nei a.

²A hmei chuan a uirêsan a, Judai ram Bethlehem khuaa a pa in lamah a hâwsan daih a, thla li a va awm a.

³A pasal chu a tho va, tha taka va biaka, hruai hâw leh tumin a chhiahhlawh leh sabengtung pahni kengin an va kal a. Ani chuan a pa inah a lo hruai lût a; hmeichhe pâin a lo hmuh chuan, hlim takin a lo lâwm a.

⁴A puzawn, hmeichhe pa chuan a lo chelh a; ni thum a châm a. An eiin an in tlâng a, an riak baw a.

⁵A ni lîna tûk zîngah chuan an tho va, kal tumin a tho va; mahse a puzawn chuan a mâkpa hnênah, “Chhang tlêm tal eiin i thinlung han tiharh zet la, tichuan in kal tawh dâwn nia,” a ti a.

⁶Tichuan an thû a, an pahni chuan an eiin an in tlâng a. Hmeichhe pa chuan a hnênah, “Han intihlim leh ula, zânin chu riak leh hrâm teh u,” a ti a.

⁷Kal chhuah a tum pawhin a puzawn chuan a ngên tlat si a; tichuan, an riak leh ta a.

⁸A ni ngâ ni tûk zîngah chuan kal tûr bawkin a tho va, mahse a puzawn chuan, “I thinlung han tiharh rih la mawlê,” a ti a. Tichuan chawhnu her thlengin a khawmuang leh a; an pahni chuan chaw an ei dîn leh a.

⁹Tichuan, ani chu a hmei leh a chhiahhlawh nêl kal tumin an tho va, mahse a puzawn chuan, “Ngâwî teh, hei khua a tlai leh dêr tawh a, khawngaihin, zânin chu riak leh mai teh u. Ti rawh, hei khua a thim mai dâwn hi; hetah hian riak leh ula, i thinlung chu hlim rawh se. Naktûkah chuan hmâ takin, in khua thleng hman

ngei tûrin, in kal nal nal dâwn nia,” a ti a.

¹⁰Nimahsela, chû mi chuan zân riah a duh ta lo va; a tho va, a kal ta a, Jebus (chû chu Jerusalem tihna a ni a) khaw bul an lo thleng a. Sabengtung pahni, a chuanna phah sâ a hruai a, a hmei pawh a tel vê a.

¹¹Jebus khaw bul an thlen chuan, khua chu a tlai hlê tawh a; chhiahhlawh chuan a pu hnênah, “Ti rawh u, i pêng lawk ang u khai, Jebus-ho khuaah hian i riak mai ang u,” a ti a.

¹²Mahse a pu chuan a hnênah, “Israela thlahte khua ni lo, hnam dang khuaah zawng kan kalpêng tûr a ni lo; Gibe khua i pan zâwk ang u,” a ti a.

¹³A chhiahhlawh hnênah chuan, “Ti rawh, Gibe khuaah emaw, Rama khuaah emaw, khawiah emaw hian kan riak dâwn nia,” a ti a.

¹⁴Tichuan an kalpêl a, an kal zêl a; Benjamin ram chhûnga Gibe khaw bul an lo thlen chuan ni chu a tla ta a.

¹⁵Riak tûrin Gibe khua chu an pan ta a. Khuaa an luh chuan, tûman an ina thleng tûra an sâwm loh avângin khawlaiah chuan an thû ta ringawt a.

¹⁶Chutih lai chuan putar pakhat feh hâwng hi a lo kal a, amah chu Ephraim tlâng rama mi vê baw a ni a; hê Benjamin-ho khua Gibe-ah hian a va awm vê lai a ni a.

¹⁷A han hawi kual vêl a, khawpui lailia mikhualte chu a hmu a, chû putar chuan, “Khawi aţanga lo kal nge in niha, khawi lam nge in pan dâwn?” a ti a.

¹⁸Ani chuan, “Judai rama Bethlehem aţangin Ephraim tlâng ram kilkhâwr lama kal tum kan ni; chu hmuna mi chu ka ni a. Judai rama Bethlehemah ka va zin a; tûnah hian LALPA inah ka kal dâwn a ni. Mahse an ina mi thleng duh tûmah an awm si lo va,

¹⁹kan sabengtungte ei tûr chaw kan nei a, kei leh i chhiahhlawh hmeichhia leh i chhiahhlawh tlangvâl tân chhang leh uain kan nei baw a; tlâkchham kan nei lo ve,” a ti a.

²⁰Putar chuan, “In hnênah thlamuanna awm rawh se! In mamawh zawng zawng chu ka lo tum vek ang e; khawlaiah zawng riak lul suh u,” a ti a.

²¹Tichuan, a inah chuan a hruai lût a, sabengtungte chu chaw a pe a. An kête an sil a, an eiin an in tlâng a.

GIBEA-HO SUALNA

²²Chutia hlim taka an awm lai chuan, khawpui chhûnga misual, Beliala faten in chu an rawn hual a, kawngka an rawn chhir vak vak a. In neitu putar hnênah chuan, “I mikhualpa kha han hruai chhuak teh, kan lo pâwl teh ang!” an ti a.

²³In neitupa chu a va chhuak a, an hnênah, “Ni lo vê, ka naute u! Chutianga suahsualna chu ti lul suh u! Hê mi hi ka mikhual a ni tih in hria a, hetiang thil râpthlâk hi chu ti suh u khâi.

²⁴En teh u, ka fanu nula thianghlim leh hê pa hmei hi an awm a; ka rawn hruai chhuak ang e. Duh leh in tlâwm ang a, in duh dân dân chuan ti ula; nimahsela, hê mi chungah hi chuan thil bawhlhawh ti teh suh u!” a ti a.

²⁵Mahse, chûng mite chuan a thû chu engahmah an ngai duh lo va. Tichuan, chû pa chuan a hmei chu an hnênah a va chhuatîr a.

Anni chuan an lo pàwl a, khawvâr thlengin zankhuain an lo sawisa a; khawvâr dâwnah an chhuahtîr chauh va.

²⁶Khawvâr dâwnin hmeichhia chu a pasal thlenna kawngkhâr bulah a lo kal a, tah chuan a tlu tawp a, khaw ên thlengin a awm ta reng a.

²⁷A pasal chu zîngah a tho va, kal chhuah tuma kawngka a han hawn chuan, a hmei chu a lo let hlâwm reng mai a, a kut chuan kawngkhâr chu a lo ban a.

²⁸A hnênah chuan, “Tho rawh, i kal ang le,” a ti a. Mahse chhâng tûr rêng a lo awm tawh lo va. Chû pa chuan a sabengtung chungah a hlâng kâi a; a tho va, a awmna lamah a kalpui ta a.

²⁹In a va thlen chuan chemtê a la a, a hmei taksa chu hmun sâwm leh hmun hnihah a chan sawm a, Israel ram bung hrang hrangah a thawn darh ta vek a.

³⁰Chu thil lo hmû apiang chuan, “Aigupta ram ațanga Israel fate an lo chhuah achinah tûn thlengin hetiang thil hi tûman an la ti ngai lo va, hmuh tûr pawh a awm ngai hek lo. Ngaihtuah ula, inrâwn khâwmin, âu chhuahpui teh u!” an inti hlawm a.

BUNG 20

ISRAEL LEH BENJAMIN-HO INDONA

¹Chutichuan, Israel fate zawng zawng chu, Dan ațanga Beerseba thlengin, Gilead ram ațangte nê, Mispa khuaa LALPA hmâah thukhat vuain an kal khâwm vek a.

²Mi zawng zawng hotute, Israel hnam tin hotute chu Pathian mite inkhâwmnaah chuan an lo kal vek a, khandaih keng sipai nuai lî lai an ni a.

³(Benjamina thlahte chuan Mizpa khuaah Israel-ho an kalkhâwm tih an lo hria a.) Israel-hote chuan, “Min hrilh rawh u, hetiang suahsualna thil hi engtin nge a lo thlen?” tiin an zâwt a.

⁴Tichuan, Levia mi, hmeichhia an thahsaka pasal chuan a chhâng a, “Ka hmei nê Gibeah khua, Benjamin ram chhûngah zân riak tûrin kan kal a.

⁵Keimah avângin mite chuan zâna kan thlenna chu hualin min rawn bei a. Mi tihhlum an tum a, mahse ka hmei zâwk chu thi khawp hialin an pâwngsual ta vak mai a ni.

⁶Hetiag taka Israel ramah hurna tenawm leh nunrâwnna thil an tih avângin, ka hmei taksa chu ka la a, ka chan sawm a, Israelte luah ram bial zawng zawngah ka thawn darh ta a ni.

⁷En teh u! Nangni Israel mi zawng zawngte u, tûnah hian in ngaihdân leh in thurâwn han pe rawh u!” a ti a.

⁸Tichuan, mipui zawng zawng chu inthuralin an tho vek a, “Tûmah mahni puan inah emaw, mahni in lamah emaw kan hâu tûr a ni lo;

⁹hetiang hi Gibeah khaw chungah kan tih dân tûr a ni: ținum vâwrin a bei tûr kan inthlang chhuak ang.

¹⁰Israel ramah hurna bawhlhlawh tak an tih avânga thungrulh nân, Benjamin khua Gibeah beia mipui han kalte ei tûr lo hlân tûrin, Israel hnam tin ațangin zâah sâwm zêl, sângah za zêl, sângah sâng zêl kan thlang chhuak ang,” an ti a.

¹¹Tichuan, Israel mi zawng zawng chu khawpui bei tûrin, inthural takin an pung khâwm ta a.

¹²Israel hnamte chuan Benjamin hnam zawng zawngte hnênah zualko an tîr chhuak vek a, “Hetiang suahsualna hi engti zia nge in zînga a lo awm?

¹³Chuvângin Gibeah khuaa misualho, Beliala fate kha min pe ula, hetiang thil tha lo hi Israelte zîng ata tihbo a nih theih nân, kan lo tihlum ang e!” an ti a. Nimahsela, Benjamina thlahte chuan an unau Israel fate thû chu an lo ngaihthlâksak duh lo va.

¹⁴Benjamina thlahte chu an awmna khua ațangin Israel fate bei tûrin Gibeah khuaah an inpunkhâwm ta zâwk a.

¹⁵Chutih laia Benjamin-ho khaw hrang hrang ațanga khandaih kenga lo kalte chu mi 26,000 an ni a; hêng bâkah hian Gibeah khua ațangin mi thlan chhuah thalh 700 an awm bawk a.

¹⁶Hêng mi thlan chhuah zîngah hian mi zasarîh veikhawr an awm a; an vai chuan virvawm hmang thiam, samzai tiat lek pawh hlah lo an ni.

¹⁷Israel mi, Benjamin-ho do tûr lamah chuan khandaih keng mi ținiau nuai lî zet an awm ve thung a; an vâi chuan indo mi vek an ni.

¹⁸Tichuan, Israel fate chu an tho va, Pathian inah Pathian râwn tûrin an chho va. “Benjamin-ho bei tûrin kan zîngah tu nge kal hmasa ang?” an ti a. LALPA chuan, “Juda-ho han kal hmasa rawh se!” a ti a.

¹⁹Israel fate chu zîngah an thova, Gibeah epin ținhmun an khuar a.

²⁰Israel mite chu Benjamin-ho do tûrin an kal chhuak a, Gibeah khua chu beih tumin Israel mite chuan ținhmun an khuar a.

²¹Benjamina thlahhote chu Gibeah ațang chuan an lo chhuak huk a, chumi ni chuan Israel mi 22,000 lai an rawn sâwm thlu ta buaih buaih mai a.

²²Israel mite chu an infuih thar leh a, an beih țin nia an awmhmun ngai vêkah khân ținhmun an siam leh a.

²³Israel fate chu LALPA hmâah chuan an chho va, tlai thlengin an țin a, LALPA chu an râwn a, “Kan unau Benjamin-hote hi kan han bei leh dâwn em?” an ti a. LALPA chuan, “Han bei leh rawh u,” a ti a.

²⁴A ni hnih niin Israel fate chuan Benjamina thlahte chu an han pan hnai leh a.

²⁵Benjamin-ho chu a ni hnih ni pawh chuan anmahni bei tûrin Gibeah khua ațangin an lo chhuak leh a, Israel mi 18,000 lai an rawn sâwm thlu leh ta buaih mai a; an vâiin khandaih keng ținiau an ni si a.

²⁶Israela thlah mipuiho zawng zawng chu Pathian inah kalin an han țin vak vak a. LALPA hmâah an thû a, chumi ni chuan tlai thlengin chaw an nghei a; hâlral thilhan leh remna thilhan te LALPA hnênah an hlân a.

²⁷Israel fate chuan LALPA an râwn a (chûng lai chuan Pathian thuthlunna bâwm chu chumi hmuna chuan a awm a,

²⁸Aarona fapa, Eleazara fapa Phinehasa chu bâwm hmâah chuan a ding țin a), “Kan unau Benjamin-ho bei tûrin kan kal

chhuak leh dâwn nge, kan bânsan tawh mai dâwn?” an ti a. LALPA chuan, “Han chho rawh u, naktukah chuan in kutah ka pe tawh ang che u,” a ti a.

²⁹Israelte chuan Gibeah khaw hual vêlin chângrutu an indah vek a.

³⁰Israela thlahte chu a ni thum ni chuan Benjamina thlahte bei tûrin an thawk chho leh a, ni danga an tih dân ang bawkin, indo tûrin tanhmun an khwar leh a.

³¹Tichuan, Benjamina thlahte chu anmahni bei tûr chuan an lo chhuak leh a, khua ațanga thlêm chhuah an ni a. Ni dang ang bawk khân mi an that tan leh a, phûl vêlah leh kawngpui (Bethel leh Gibeah panna kawng)-ah te chuan Israel mi sawmthum zet an that leh ta mai a.

³²Benjamina thlahte chuan, “A hma ang bawkin kan hmâah an tlâwm leh ta,” an ti a. Nimahsela, Israela thlahte chuan, “Tihian tlânchhia ila, khawpui ațangin lamlian lamah an rawn tawlh chhuak dâwn nia,” an ti hi a lo ni a.

³³Tichuan, Israel-ho zawng zawng chuan an tanhmun chhuahsanin, Baal Tamar hmunah tanhmun an lo khawh ta a. Chutah le, Israel mi, lo chângrutu hote kha an bihrûkna hmun ațangin an lo zuang chhuak ta a.

³⁴Israel mi zawng zawng ațanga thlan chhuah thiau mi sîngkhatin Gibeah chu an rawn bawh ta huk a, an inbei nasa hle mai. Benjamin-ho chuan an chungah chhiatna a thleng dâwn tih rêng an hre si lo.

³⁵LALPA chuan Israelte hmâah Benjamin-ho chu a hneh ta. Chumi ni chuan Israelte chuan Benjamin mi 25,100 an that a; khandaih keng thiau an ni.

³⁶Benjamin-ho chuan an tlâwm ta tih an inhre ta a. Gibeah mite lo chângru tûra an dahhote kha rinchanin, Benjamin-ho hmâah khân Israel mite kha an tawlhkir mai a ni a.

³⁷Gibeah khuaah chuan a chângrutute chu an lût hum hum a; a chângrutute chu an inzâr darh a, khaw chhûnga mi zawng zawng chu khandaihin an sâm thlu vek a.

³⁸Khawpui chhûng ațangin nasa takin meikhu chhuah vak tûr a ni, tiin, Israel sipai nâwlpui leh a lo chângrututen chhinchhiahna an lo siam lâwk diam a,

³⁹chu vêleh Israel sipai nâwlpuite chuan beihpui an thlâk ngâl tûr a ni a. Tichuan, Benjamin-ho chuan an rawn bei buan buan a, mi sawmthum an that hman a. “Indo hmasak ang bawkin kan hmâah an tlâwm leh ngei dâwn e,” an ti hman tawh a.

⁴⁰Mahse, khawpui chhûng ațangin meikhu nasa tak a chho ta ngut ngut mai si a, Benjamin-ho an han lehawi nâk chuan, a khaw pumpui chu meikhûin vân lamah a chho mup mup a.

⁴¹Israel sipaiten an rawn bawh lêt ngâl baw si a, an chungah chhiatna a lo thleng tih an han hmuh meuh chuan, Benjamin-ho chu thlaphângin an chî-âi zo ta vek a.

⁴²Thlalêr lam hawiin Israel-ho hmâah chuan an tlânchhe dur dur a; mahse indona ațanga tlân chhuah ngaihna a awm lo, khawpui ațanga lo tlân chhuakte chu an lo that zêl baw si a.

⁴³Benjamin-ho chu an hual a, an ûm a, Gibeah khaw bul chhak lam thlengin an that zawih zawih a.

⁴⁴Benjamin mi 18,000 an thi a; chûngte chu mi huaisen tak vek an ni.

⁴⁵Thlalêr lama tlânchhiate chuan Rimon lungpui an pan a; kawngpui ah mi 5,000 an that a. Gidom thlengin an ûmzui chiam a, mi 2,000 an that leh a.

⁴⁶Chumi nia Benjamin-ho, khandaih keng thiau, thi zawng zawng chu 25,000 an ni; an vaiin mi huaisen vek an ni a.

⁴⁷Mi zaruk erawh chu thlalêra Rimmon lungpui lamah an tlânchhia a, Rimmon lungpui ah chuan thla li an awm a.

⁴⁸Israel hote chuan Benjamin-ho chu an bei zui zêl a, khaw tina kalin mihring leh ran an hmuh apiang khandaihin an that fai phiar a. An kalna khua zawng zawng chu an hâl vek baw si a.

BUNG 21

BENJAMIN-HO NUPUI TUR

¹Israel mite chuan Mizpah khuaah, “Tûman kan fanute hi Benjamin-ho nupui ah kan neitîr tûr a ni lo,” tiin chhia an lo chham tawh a.

²Mipuite chu Pathian inah an kal a, Pathian hmâah chuan tlai thlengin an awm a. Awrâwl chhuahin, lungchhe takin an tap vak vak a,

³“Aw LALPA, Israelte Pathian, engati nge Israel ramah hetiang thil hi a lo awm a, engtizia nge vawiinah hian Israel hnam pakhat kan kim tâk loh le?” an ti a.

⁴A tûkah chuan mipuite chu hmâ takah an tho va, chutah chuan maichâm an din a, hâlrâl thilhlân leh remna thilhlân an hlân a.

⁵Israel fate chuan, “Israel hnam zawng zawng zîngah LALPA hmâa kal khâwmnaa tel ve lo tu nge awm?” an ti a. Mizpah khuaa LALPA hnêna kal ve duh lo apiang chu “Tihhlum ngei tûr a ni,” tiin urhsûn takin chhia an lo chham tawh si a.

⁶Israel fate chuan, “Vawiinah hian Israel-te zîngah hnam khat an kim ta lo,” tiin an unau Benjamin-mite chu an sùn a.

⁷A la dam chhunte nupui tûr hi engtin nge kan tih tâk ang, kan fanute lah chu an nupui ah pe lo tûrin LALPA hmâah thu kan lo tiam tawh si a?” an ti a.

⁸Anih leh, “Israel hnam zîngah LALPA hmaa Mizpah lo kal ve lo hnam an awm em?” an ti a. Pung khâwmho zîngah chuan Jabes Gilead mite chu pakhat mah an lo tel vê lo va.

⁹Mi an han inchhiar a, Jabes Gilead mi tûmah an lo awm ve ta si lo va.

¹⁰Tichuan, pung khâwmho chuan mi huaisen sîngkhat leh sânghnihte chu, thû pên an tîr a, “Kal ula, Jabes Gilead khuaa chêng zawng zawng, hmeichhia leh naupangte pawh, khandaihin va that vek ang che u.

¹¹Heti ang hi in tih dân tûr a ni: Mipa zawng zawng leh hmeichhia mipa pâwl tawh zawng zawng chu in that vek tûr a ni,” tiin.

¹²Tichuan, Jabes Gilead mite zîngah chuan nula thianghlim, mipa la pâwl lo mi zali an hmu a; Kanan rama Silo-ah an rawn hruai a.

¹³Pung khâwmho zawng zawng chuan Benjamina thlah, Rimmon lungpuia awmte hnênah palai tîrin, inremna thu an va puang ta a.

¹⁴Benjamin-ho chu an lo kîr a, Jabes Gilead hmeichhia nungdama an zuah te chu an lo pe hlawm a; mahse an daih khawp an la hmu lo va.

¹⁵LALPAN Israel hnam zîngah Benjamin-ho laka indaidanna a siam tâk avângin mipuite chuan pawî an ti hlê a.

¹⁶Pung khâwmho zînga upate chuan, “Benjamin hmeichhiate an thi zo tawh si a, a la bânggho tân eng nge kan tih leh tâk ang le?” an ti a.

¹⁷“Israel hnam aţanga an boral vek loh nân, Benjamin mite zînga la dam chhunten roluah tûr an nei ve tûr a ni.

¹⁸Mahse kan fanute an hnêna pe lo tûr leh, ‘Benjamin hnêna a fanu pe apiang chu ânchhedawngin awm rawh se’ ti hialin Israel faten thu kan lo tiam tawh si a.

¹⁹Heti hian i ti ang u: “Bethel aţanga Sekem chhohna kawngpui chhak lam, Bethel hmar lam, Lebona chhima Silo hmunah hian kum tin LALPA tân kût a awm tşîn a,” an ti a.

²⁰Tichuan, Benjamina thlahte hnênah chuan, “Kal ula, grêp huanah chuan lo châng ula,

²¹in lo thlîr reng ang a; Silo nulate lâm tûra an lo kal chhuah hunah, grêp huan aţang chuan lo chhuak ula, Silo nulaho zîng aţang chuan mi tinin mahni nupui tûr in lo man dâwn nia; tichuan Benjamin ramah hâwnpui tawh mai ang che u.

²²An pate emaw, an nuţate emawin kan hnênah an rawn sawi buai dâwn a nih pawhin, heti hian kan lo ti dâwn nia, ‘Min lo hre thiam mai teh u, indonaah khân an nupui tûr kan lo zuahsak si lo va; thutiam bawhchhiaa nupui atâna pê pawh in ni hlei nê,’ kan lo ti mai dâwn nia” an ti a.

²³Chutiang chuan Benjamina thlahte chuan an ti a; nula lâm ho an lo man aţang chuan an mamawh tâwk an chang kim vek a. Anmahni awmna ramah chuan an hawnpui a, khawpui te an din thar leh a, an inbêngbel leh ta a.

²⁴Tichuan, Israel fate chu, chû hmun aţang chuan mahni hnam leh chhûngkaw awmna tşeuhvah an hâu ta a.

²⁵Chûng lai chuan, Israel ramah lal an la awm lo va; mi tinin tşâ an tih dân dânin an ti mai a ni.

RUTHI

Ziah tu: Samuela • Ziah kum: B.C. 1126-1105

Ruthi bu hian Rorêltute rorêl laia Israel fate khawtlâng nun dân leh khawsak dân a târlang. A hun thù-ah Rorêltu hmasa lam, Jair-a hun lai vêl (B.C. 1126-1105) a ni thei ang (Ror. 10:3-5). A bu ziaktu hi tu nge a nih a bû hian a tilang lo va, Judate thurochhiah hlui tak chuan Samuela ziaq niin a sawi. Hei hi a rin theihna chhan chu, Israel lal ropui ni tûr Davida hriak thihtu a ni a (1 Sam. 16:613); ani thuka Davida bulpui chhui chhuah hna pawimawh thawka ziaktu tûr mi dang an awm chuang lovin a lang bawk. Chû Davida thlahtu chhuina, Jesaia bulpui (royal line) aţang ngei chuan Isua Krista a lo chhuak a ni. Hê lehkhahu hi Kohhran thlîrlâwkna ang pawhin thlîr theih a ni: Ruthi, Jentail mi (Judate hmuhsit, Moab-mi lehngghâl) si chu Krista thlahtu a nih bâkah Krista mo a lo nih dân hi a chhinchhiah tlâk hlê a ni. Ruthi chanchin hian Kristian nun a khai chhuak zo hle. (a) Mo rinawm Ruthi'n a pasala nu Naomi chu thlah lova a vawn tlat avânga Israelte Pathian ringtu a lo nih dân te, (b) Ruthi rawngbâwlâna te, (c) Rinawm leh fel taka a nun avânga a phu loh lâwmman, pasal mi lian leh hausa a hmuh dân leh, (d) Moab nu mâwl ve mai si, Israel lal ropui ber Davida leh Krista thlahtu nu a nih dân chhuichhuahna a ni bawk. Ruthi bu hi Bible-a bu riatna a ni a; Bung 4 a awm a, châng 85 a awm bawk.

BUNG 1

ELIMELEKA TE CHHUNGKUA MOAB-AH AN PÊM

¹Rorêltuten ro an rêl lai khân, ram chhûngah ţâm a tlâ a. Judai rama Bethlehema mi pakhat chu, a nupui leh a fapa pahnihte nê Moab rama awm tûrin an pêm a.

²Chû pa hming chu Elimeleka a ni a, a nupui hming chu Naomi a ni; a fapa pahnihte hming chu Mahlona leh Kiliona te an ni a—Judai ram Bethlehema Ephratha mi an ni. Moab ramah chuan an va kal a, chutah chuan an va awm ta a.

³Naomi pasal Elimeleka chu a thi a; amah leh a fapate pahnih chauh an ni ta a.

⁴Anni chuan Moab hmeichhia nupuiah an nei a: pakhat hming chu Orpi a ni a, pakhat dang hming chu Ruthi a ni. Chutah chuan kum sâwm lai an awm a.

⁵Mahlona leh Kiliona te pawh chu an thi vê vê a; tichuan, chû nu chu a pasal leh a fapa pahnihten an thihsan ta a ni.

NAOMI CHU RUTHI NEN AN LO KIR

⁶Moab rama a awm lai chuan, LALPAN a mite ei tûr pe tûrin arawn kan leh ta tih a lo hria a; tichuan, Moab ram aţanga hâu leh tûrin a mote nê chuan an tho va.

⁷An awmna hmun aţangin a mo pahnihte nê chuan an kal chhuak a; Judai rama kîr leh tûrin an chhuak ta a.

⁸Naomi chuan a mo pahnihte hnênah chuan, “Kal ula, in nute in lamah hâu tawh zâwk rawh u. Mitthi chungah leh keima chungah in tih ang hian LALPAN lainat takin in chungah ti ve rawh

se.

⁹LALPA chuan in pasalte inah thlamuang taka awmna tûr pe vê vê che u rawh se,” a ti a. Tichuan anni chu a fâwp a, awrâwl chhuahin an ţap ta râwih râwih a.

¹⁰Anni chuan a hnênah, “I mite hnênah chuan kan lo kal ve zâwk ang e,” an ti a.

¹¹Naomi chuan, “Ka fanute u, min kîrsan rawh u; engah nge ka hnênah in lo kal ve ang le? In pasal tûr fa ka la pai cheu dâwn em ni?

¹²Hâu mai rawh u, ka fanute u—pasal han nei leh tûrin ka upa lutuk tawh si a. Ka la beisei reng e tûin, zân inah hian pasal neiin, fa te han pai dâwn pawh ni ila,

¹³an puitlin thlengin in nghâk dâwn em ni? Pasal lovin in awm reng dâwn em ni? A ni thei lo, ka fanute u; LALPA kut ka tuar ta mai hi, nangmahni avâng hian ka rilru a na êm êm a ni!” a ti a.

¹⁴Tichuan, awrâwl chhuah bawkin an ţap leh ta a. Orpi chuan a nu chu a fâwp ta a; Ruthi erawh chuan a vuan tlat thung a.

¹⁵Ani chuan, “En teh, i mopui chu a chhûngte leh a pathiante hnên lamah a hâwn leh tâk saw; i mopui saw zui ve mai rawh,” a ti a.

¹⁶Mahse Ruthi chuan: ‘Nangmah kalsan tûr leh nangmah zui lova, Hâwsan tûr che chuan min ti lul suh; I kalna apiangah ka kal ang a; I riahna apiangah ka riak ve ang; I mite chu ka mite an ni ang a, I Pathian chu ka Pathian a ni ang.

¹⁷I thihna hmunah chuan ka thi ve ang a, Chutah chuan min phûm ve mai ang. LALPAN a duh duhin min ti rawh se, chu aia nasa pawhin, Nang leh kei hi thihna chauh lo chuan engmahin min ţhen suh se,” a ti a.

¹⁸Amah zui zêl a tum ruhzia a hmuh chuan, a ngawihsan ta a.

¹⁹Tichuan, an pahnih chuan Bethlehem thlengin an kal dîn ta a. Bethlehem an va thlen chuan, anmahni avângin a khawnâwtin mite chu an za ruai mai a; hmeichhiate chuan, “Hei, Naomi* kha a ni mâw?” an ti a.

²⁰Mahse ani chuan, “Naomi min ti tawh suh u; Marai* min ti zâwk rawh u, Engkimtitheia min tih dân rêng mai hi a runthlâk êm mai!

²¹Muk takin ka chhuak a, LALPA chuan kutbêngin minrawn hâwn tîr leh ta a nih hi. LALPAN heti khawpa min tuartîr a, min tihrehawm hnûah engah nge Naomi min la tih cheu ang le?” a ti a.

²²Chutiang chuan Naomi chu, a monu Ruthi, Moab mi nê, Moab ram aţangin an kîr leh ta a ni. Bethlehem an lo thlen lai hi barli buhseng ţantirh lai a ni a.

BUNG 2

RUTHI'N BOAZA A TAWNG

¹Naomi pasala laichîn, Elimeleka chhûngkaw zîngah chuan mi neinung tak a awm a. A hming chu Boaza a ni.

²Tichuan, Moab mi Ruthi chuan Naomi hnênah, “Buţo zawngin lo lamah ka va feh vê ang âw, min khawngaihtute pawh ka tawng mial thei asin,” a ti a. Ani chuan, “Kal ta che, ka fanu,” a

ti a.

³Tichuan a kal ta a, buhsengtute seng hmaih chu a va zawn g ta a. Elimeleka laichîn hnai, Boaza lo vah tak mai chuan a kal fuh hlah mai a.

⁴Ngai teh, Boaza pawh chu Bethlehem aţangin a lo kal a, buhsengtute hnênah, “LALPA chu in hnênah awm rawh se!” a ti a. Anni pawhin, “LALPAN malsâwm che rawh se!” tiin an lo chhâng a.

⁵Boaza chuan a chhiahhlawh buhsengtu hotu hnênah chuan, “Hê mi hi tute nula nge?” a ti a.

⁶Chû chhiahhlawh, buhsengtu hotu chuan a chhâng a, “Moab nula, Naomi hnêna Moab ram aţang lo kal vê kha a nih hi.

⁷Khawngaih takin buhsengtuten buhphal an khâwm hmaih ka lo zawn ve ang e,’ arawn ti a. Tichuan, a lo kal a, ina rei lo tê a han châwl zawk tih loh chu, zîng aţangin tûn thlengin a la thawk ve ta reng a ni,” a ti a.

⁸Boaza chuan Ruthi hnênah, “Ka fanu, ka thu hi i ngaitla duh ang em? Lo dangah buţo zawn gin kal duh suh, hmun dangah pawh kalsawn lo la, kan nulate bulah hian awm ve reng ang che.

⁹Buh an sengna lam lam chu hawi ve zêl la, zui zêl ang che. Tlangvalhote pawh nangmah khawih lo tûrin ka hrilh vek tawh a. I tui a hâl hunah, tlangvâlthe châwi sâ tuibêla mi hi i in thîn dâwn nia,” a ti a.

¹⁰Ani chu hmaia lei siin a kûn a, a hnênah, “Kei, ram dang mi mai, hetia min lo hre ve duha, min lo khawngaih ta mai hi engtizia nge ni ta?” a ti a.

¹¹Boaza chuan a chhâng a, “I pasal thih hnûa i pasala nu tâna i thiltih dân zawn g te, i nu leh i pa leh i pianna ram te pawh kalsana, i la hriat ngai loh mite hnêna i lo kal thûte hi miin min hrilh vek asin.

¹²LALPAN i thawhrimna chu rûl che sela, a thlazâr hnuaia himna i rawn pan LALPA Israelte Pathian chuan a kimin lâwmman pê che rawh se,” a ti a.

¹³Ani chuan, “Ka pu, i duhsak zâwn ga awm zêl ka duh e; i chhiahhlawnute zîngah tel ve pha lo mah ila, i ţawngkam ţa hian i bâwihnu hi min tithlamuang ta huai mai,” a ti a.

¹⁴Chaw ei a lo hun chuan Boaza chuan a hnênah, “Hetah chaw rawn fâk ve rawh, chhang te hi ei ve la, uain thûrah chhang te hi han chiah ve teh,” a ti a. Buhsengtute ţhutna sîrah chuan a va ţu vê a, ani chuan chhangpêr a lo pê a; tichuan puar takin a ei a, a ţhen a fûn a.

¹⁵Buţo zawn g tûra a kal chhuah dâwn lai chuan, Boaza chuan tlangvâlthe chu a hrilh a, “Buhphal zînga mi pawh la sela, hau lo vang che u.

¹⁶A têl aţang pawhin buh vuite chu a rawn chhar khâwm tûrin thlah zauh zauh ula, hau rêng rêng suh u,” a ti a.

¹⁷Lovah chuan buţo chu tlai thlengin a zawn g a, a chhar khâwm zawn g chu a vua a, barli ephah khat lai a tîng a.

¹⁸A phur a, khuah chuan a hâwnpui a, a nu chuan a buţo lakkhâwm chu a lo hmu a. A chhang ei bâng chu a phawrh a, a nu chu a pê a.

¹⁹A nu chuan a hnênah, “Vawiin chuan khawiah nge buţo i va zawn? Khawiah nge i va thawh? Nangmah lo hre ve duhtu che chu malsâwm awm rawh se,” a ti a. Tichuan, a nu hnênah chuan tu hnêna va thawk nge a nih a hrilh a, “Vawina ka va thawhna hming chu Boaza a ni,” a ti a.

²⁰Naomi chuan a fanu hnênah, “Mi nung leh mitthite chungah zângaihna bânsan ngai lo LALPA chu fakin awm rawh se!” a ti a. Naomi chuan, “Chû mi chu kan laichîn, kan laina hnai tak a ni asin,” a ti a.

²¹Moab mi Ruthi chuan, “Ka buh hi an seng zawn vek thlengin kan tlangvâlhote kiangah hian tel ve reng ang che,’ min ti nghe nghe asin,” a ti a.

²²Naomi chuan a fanu Ruthi hnênah chuan, “A ţat chu ka fanu, a hnathawk nulahô zîngah hlîr kal ve la, lo dangah chuan mi hmuh tûr pawhin awm lo mai ang che,” a ti a.

²³Tichuan, Boaza hnathawk nulate kiangah chuan, barli leh wheat seng zawn thlengin a awm tluan ta a; a nu hnênah chuan a awm reng a.

BUNG 3

RUTHI TÂN TLANTU

¹A nu Naomi chuan, “Ka fanu, i tâna inngah ngamna tûr zawnsak che ila a ţa lâwm ni?

²A chhiahhlawh nulate hnêna hnâ i va thawhna pa Boaza hi kan laichin hnai a ni lo vem ni? Zânin hi a hruih zâwla barli a zahfai zân a ni nghe nghe asin.

³Chuvângin, inbual fai la, hriak inchulh bawk la, i incheina kawr ţa ber hân, hruihzâwl chu pan thla ve rawh; amaherawhchu, a eia a in zawn hmâ chuan inhriattîr suh ang che.

⁴A mut hunah, a mutna hmun chu chhinchhiah la; i zu lût ang a, a kê hlîm la, i mu ve dâwn nia; ani chuan i tih tûr chu a lo hrilh mai ang che,” a ti a.

⁵Ani chuan a hnênah, “I sawi zawn g zawn g chu ka ti ang e,” a ti a.

⁶Tichuan, hruih zâwlah chuan a kal thlâ a, a nuin a chah ang zêl chuan a ti a.

⁷A eia a in zawn chuan Boaza rilru chu a hlim hle a, buh chhûn vûm sîrah chuan a va mu ta a; ani chu zawitêin a lo kal a, a kê a va hlîm a, a mu ve ta a.

⁸Zanlaiah chuan Boaza chu a harh thut a, a han inher a; a ke bulah chuan hmeichhia a lo mu ve reng a.

⁹“Tu nge i nih?” a ti a. Ani chuan a chhâng a, “I chhiahhlawh Ruthi ka ni e. I chhiahhlawnu hi i puan mi han zâwn ve rawh, laichîn hnai kan ni alâwm,” a ti a.

¹⁰Ani chuan, “Ka fanu, LALPAN malsâwm che rawh se! Tlangvâl rethei emaw, hausa emaw lam i hawi loh dânah hian, i duhawmna hi a tîr lam aiin a tâwp lamah hian i tilang lehzu a nih hi.

¹¹Hlauthâwn g suh, ka fanu. I duh ang apiang chu ka hlensak ngei ang che, kan khuah mi zawn g zawn g pawhin hmeichhe fel tak i ni tih an hre vek a ni.

¹²In laichîn bul pawh ka ni rêng a; mahse, kei aia laichîn bulhnai zâwk mi pakhat a la awm a.

¹³Zânin chu hetah hian riak phawt la, naktûk zîngah laichîn bul chuan a tih tûr a tihsak che chuan a thâ ang; ti ngei bawk sela. I laka a tih tûr a hlen duh loh chuan, LALPA nung renga chhâlin, keiman ka ti ngei ang! Khawvâr thlengin mu ang che,” a ti a. ¹⁴Ani chu a ke bulah chuan zîng khawvâr thlengin a mu a, miin an hmuh chian theih hmân a tho va. “Hruih zâwlah hmeichhia a lo kal tih tûma’n hre suh se,” a ti a. ¹⁵Amah bawk chuan, “I puan bah kha han la la, lo vuan ta che,” a ti a. A han pharh a, barli epha ruk a teh a, a phurhtîr a. Ani chu khuaah a hâwng ta a. ¹⁶A nu hnên a han thlen chuan, “Ka fanu, eng nge i rawn an le?” a lo ti a. Chû miin a chung a thil a tih dân zawng zawng chu a hrilh vek a. ¹⁷“Hê barli epha ruk hi min pe bawk a; ‘I nu hnênah kutruakin hâw suh ang che,’ mi ti bawk a ni,” a ti a. ¹⁸A nu chuan, “Ka fanu, engtiangin nge thil a lo awm dâwn tih i hriat hmâ chu lo awm hlê hlê ang che; chû mi chuan wawiina a thil tih tûr hi a chinfel hmâ chuan a awm mai mai dâwn si lo va,” a ti a.

BUNG 4

BOAZAN RUTHI A TLAN

¹Boaza chu kulh kawngkâah a chho va, tah chuan a thû a; ngai teh, laichîn bul, Boazan a sawia kha a lo kal a. Boaza chuan, “Unaupa, lo kal la, rawn thû teh khai,” a ti a. Ani chu a lo kal a, a thû a.

²Chû khuaa upate chu a sâwm khâwm bawk a, an hnênah chuan, “Thû teh u khai,” a lo ti a. An thû ta a.

³Tichuan, an laichîn bula hnênah chuan, “Naomi, Moab ram aṭanga lo kîr leh hian, kan unaupa Elimeleka ram kha hralh a duh a.

⁴Nangmah hi hrilh che ka duh a, ‘Hêng kan mite zînga upate leh heta chêngte mithmuhah hian nangin tlan ta che. I tlan duh chuan tlan la; i tlan duh loh erawh chuan, ka lo hriat theih nân min hrilh leh ang che; nang lo chu tlantû tûr dang an awm lo, kei hi nangmah dawttu chu ka ni leh mai,’” a ti a. Ani chuan, “Ka tlan ang e,” a ti a.

⁵Boaza chuan, “Naomi hnên aṭanga lo i lei nî-ah, mitthi nupui, Moab mi Ruthi chu i lei tel nghâl bawk tûr a ni, mitthi hming dai lova a ro luahtu tûr an awm zêl theih nân,” a ti a.

⁶Chû laichîn bul chuan, “Chuti chu, keima tân ka tlan thei lo a nih chu, keima ro luah tûrin a khawloh phah zâwk ang. Chuvângin, tlantû tûr ka nihna chu nangin chang zâwk mai rawh, kei zawngin ka tlan thei lo ve,” a ti ta a.

⁷Hman laiin Israelho zîngah intlanna te, thil an inthleng te hian, a nemngheh nân a hralhtuin a pheikhaw a phelh a, a leitu hnênah a pe thîn. Hei hi Israelte zînga an tihdân nghet a ni.

⁸Tichuan, chû laichîn bul chuan Boaza hnênah, “Nangman lei mai zâwk ta che,” a ti a. A pheikhaw a phelh ta a.

⁹Boaza chuan upate leh mi zawng zawng hnênah, “Wawiinah hian Elimeleka thil neih zawng zawng te, Kilionah leh Mahlona te thil neih zawng zawng te chu Naomi hnên aṭangin ka lei ta tih mi hriatpuitute in ni e.

¹⁰Chû bâkah, mitthi hming chu dai lova, a ro luahtu siamsak tûr leh mitthi chu a chipuite zîngah leh kulh kawngkâa hriat reng a nih theih nân, Moab mi Ruthi, Mahlona nupui chu ka nupuiah ka nei ta e. Wawiinah hian nangmahni hi hriatpuitute in ni e,” a ti a.

¹¹Kulh kawngkâa awm zawng zawng leh upate chuan, “Thuhriatpuitute kan ni e. I ina hmeichhe lo lâwi chu Rakili leh Leaii te pahnih anga Israel chhûngkaw dintuah LALPAN siam rawh se; Ephratha khuaah hian lo hmuîngîl ula, Bethlehemah hian in hming lo thang rawh se.

¹²LALPAN hê hmeichhe lakah hian tû leh fa a la pêk dâwn che avângin, Tamarin Juda a hrin sak Pereza chhungte ang maiin in chhungkua chu lo awm rawh se,” an ti a.

BOAZA LEH RUTHI THLAHTE

¹³Boaza chuan Ruthi chu a hruai a, a nupui a lo ni ta a; ani chu a pâwl a, LALPAN nau a paitîr a, fapa a hring a.

¹⁴Nuho chuan Naomi hnênah, “Wawiina laichîn bul tlachham lova awmtirtu che LALPA chu fakim awm rawh se; a hming chu Israelte zîngah lo thang chhuak rawh se!

¹⁵Ani chu i nun tiharhtu leh i tar lama châwmtu lo ni sela; i monu, nangmah hmangaihtu, fapa pasarih aia ṭha zâwk chuan, ani chu a hrinsak si che a,” an ti a.

¹⁶Naomi chuan naute chu a lâ a, a pawm a, a awm thîn a.

¹⁷An thênawm nuho chuan a hming an sâ a, “Naomi tân fapa a lo piang ta,” an ti a. A hmingah Obeda an sa a. Ani chu Davida pa, Jesaia pa a ni.

¹⁸Hei hi Pereza te chhûngkaw inthlah chhâwn dân a ni: Perezan Hezrona a hring a;

¹⁹Hezronan Rama a hring a; Raman Amminadaba a hring a;

²⁰Amminadaban Nahsona a hring a, Nahsonan Salmona a hring a;

²¹Salmonan Boaza a hring a, Boazan Obeda a hring a;

²²Obedan Jesaia a hring a, Jesaian Davida a hring.

1 SAMUELA

Ziah tu: Hriat loh • Ziah kum: B.C. Zabi 10-na.

Samuela bû hi a ziaktu hming tar lan loh a ni. Samuela leh Davida te hun, B.C. 1204-1035 chhûnga thil thleng chanchin, hun hran hrana ziah, B.C. zabi 10-na vêla tuinemaw a lo hlâwm khâwm ni tûr a ni. A ziaktu zîngah Samuela ngei pawh tel ve thei a ni a; a thih hnûah mi dangin an ziah chhunzawm thei baw. Mi thenkhat chuan zâwlnei Isaia (B.C. zabi 8-na) a nih an ring. Babulon saltân lai vêla tlâi khawhnûa ziah nia ngai an awm baw. A tirah Samuela 1 leh 2 hi bu khat a ni a, B.C. 280-180 vêla Grik jawnga Bible an lehlin Septuagint bû aţang khân bu hnihah then hran a ni ta a ni. Samuela 1-na hian Rorêltute hun aţanga Israelten lal an neih ţan hun pawimawh lai chanchin a sawi a. Puithiam Elia huna sualna lo punlun zia te, Pathian ţih mi Levi hnam puithiam Samuela rawngbawl hun chhûnga thil thleng te, Israel lal hmasa atâna Saula chu hriak thih a nih dân leh a rorêl dân te, Pathian thú a âwih loh avânga hnâwl a nih dân leh a thih dân te; amah thlâktu atân Davida chu hriak thih a nih tâk thú leh, Saula rorêlna buai tak hnuaia Davida hun hmasâ, harsatna kêra lalram a đin dân chanchinin a bu chhûng a luah a ni. 1 Samuela hi Bible-a bu kua-na a ni. A chhûngah hian bung 31 a awm a, châng 810 a awm.

BUNG 1

ELKANA CHHUNGKUA

¹Ephraim tlâng rama Ramathaim Zophim khuah chuan mi pakhat a awm a, a hming chu Elkana a ni a; Ephraim mi, Jehorama fapa, Elihua fapa, Tohua fapa, Zupha fapa a ni.

²Nupui pahni a nei a; pakhat hming chu Hani a ni a, a pakhat zâwk hming chu Penini a ni. Penini chuan fate a nei a, mahse Hani erawh chuan fa a nei ve lo va.

³Chû mi chu Sipaihote LALPA be tûr leh inthâwi tûrin an khuah aţangin kum tin Silo-ah a han kal ţhîn a. Chutah chuan Elia fapa pahni Hophnia leh Phinehasa, LALPA puithiamte an awm a.

⁴Elkanan inthâwina hun a hman apiangin a nupui Penini leh a fanu leh a fapate tân chanvo a sem ţhîn a.

⁵Hani erawh chu a hmangaih êm avângin chan hnih a pe ţhîn a, mahse LALPAN a chhûl a khârsak mai pawh a ni.

⁶LALPAN a chhûl a khârsak denchenin a khingpuinu chuan amah tihrehawm tûrin nasa takin a deusawh ţhîn a.

⁷Tichuan kum tinin, LALPA ina an kal chhoh apiangin rilru na takin a siam ţhîn a; ani chu a ţap a, chaw pawh a ei lo va.

HANI INTIAMNA

⁸A pasal Elkana chuan a hnênah, “Hani, engati nge i ţah? Engah nge chaw i ei duh loh? Engin nge i rilru tinâ? Fapa sâwm ai pawhin kei hi i tân ka ţha zâwk lo vem ni?” a ti a.

⁹Chutia Silo khuah chaw an eia an in zawh chuan Hani chu a tho va. Chutih lai chuan puithiam Elia chu LALPA biakbûk

kawngka ban bul thutthlêngah a lo thú a.

¹⁰Hani rilru chu a na ngawih ngawih a, LALPA hnênah mangang taka ţap chungin a ţawngţai a.

¹¹Tihian thú a tiam ta a, “Aw, Sipaihote LALPA, i bâwihnu hrehawmzia hi mi rawn hriatsaka, i bâwihnu hi mi theihngihl lohva, i bâwihnu hi fapa i pêk chuan, a dam chhûng zawng LALPA tân ka hlân ve thung ang a, a lû pawh meh a ni ngai lo vang,” a ti a.

¹²Chutia LALPA hmâa a ţawngţai, a hmui phun mawlh mawlh chu Elia chuan a lo en reng a.

¹³Hani chuan a thinlungin a sawi a; a hmui chauh a phû a, a âw chu hriat a ni lo va. Chuvângin Elia chuan zû a rui emaw a ti a.

¹⁴Elia chuan, “Engchen nge zû i ruih zêl dawn? I zû chu dah bo ta che!” a va ti a.

¹⁵Hani chuan a chhâng a, “Rui lo ve ka pu, hmeichhe lungngai tak ka ni a. Uain emaw, zû rêng rêng emaw ka rui lo va, LALPA hmâah ka nun hi ka bun chhuak zâwk a ni.

¹⁶I bâwihnu hi *Beliala fanu ang êmah chuan mi ngai lo la, ka lungngaih manganna thú ka inbun chhuak zâwk a ni e,” a ti a.

¹⁷Elia chuan a chhâng a, “Thlamuang takin kal tawh la, Israelte Pathian chuan a hnêna i thil dîl chu pê che rawh se,” a ti a.

¹⁸Ani chuan, “I chhiahhlawhnu hi i duhsak mi lo ni zêl rawh se,” a ti a. Hmeichhia chu a kal ta a, chaw te a ei a, lungngai hmêl pawh a pu ta lo va.

SAMUELA PIAN LEH HLANNA

¹⁹Zîng takah an tho va, LALPA chu chibai an bûk a, an awmna Rama khuah chuan an haw leh ta a. Elkana chuan a nupui Hani chu a pâwl a, LALPA chuan ani chu a hre reng a.

²⁰Hun a lo kal zêl a, Hani chuan nau a pâi a, fapa a hring a, “LALPA ka dîl chhuah a ni,” tiin a hmingah Samuela a sâ a.

²¹Elkana leh a chhûngte zawng zawng chu an kum tin thilhan hlâna an thutiam hlen tûrin LALPA inah an chho va.

²²Mahse Hani chu a tel vê lo, a pasal hnênah, “Naute hnute hnêk bân hunah le; chumi hnûah erawh chuan, LALPA hmâa a inlan theih nân ka hruai tawh dân nia, chutah chuan a awm hlen tawh ang chu,” a ti a.

²³Tichuan, a pasal Elkana chuan a hnênah, “Thâ i tih ang chuan ti la; nau a tlei hmâ chu i ngâk dân nia. LALPA chuan a thú chu tinghet phawt mai rawh se,” a ti a. Hmeichhia chu a awm ta a, a fapain hnute hnêk a bân hmâ chuan a awm ţhîn a.

²⁴Hnute hnêk a bân tîr hnûah chuan a fapa chu a hruai a, bawngpa pathum nê, chhangphut epha khat leh uain bûr khat kengin Silo-a LALPA inah an kalpui ta a. Naupang chu a la tê hlê a.

²⁵Bawngpa chu an talh a, naupang chu Elia hnênah an va hruai a.

²⁶Ani chuan, “Aw ka pu! I nunna chhâl ngein le, ka pu, hê laia i awmna bula ding, LALPA hnêna ţawngţai hmeichhia kha ka ni asin.

²⁷He naute dîl hian ka ţawngţai a, LALPA chuan ka dîl ang tak chu min pe ta a.

²⁸Chuvângin, LALPA hnênah karawn pe lêt vê ta e; a dam chhông atân LALPA hnêna hlan a ni tawh e,” a ti a. Chutah chuan LALPA chibai an bûk a.

BUNG 2

HANI TAWNGTAINA

¹Hani chu heti hian a tawngtai a: “Ka thinlung hi LALPA-ah a lâwm a; Ka kî chu LALPA-ah châwi sân a ni ta. Ka hmêlmâte chu nui hmêl ka hmuh a, I chhandamnaa ka hlim êm avângin.

²LALPA anga thianghlim an awm lo, Nang lo chu tû dang mah an awm lo va, Kan Pathian ang lungpui dang rêng an awm hek lo.

³Chapo takin tawng tawh suh u; Chaltlai takin tawng hek suh u, LALPA chu hriatna Pathian a ni si a; Amahah chuan thiltihte chu bûk a ni.

⁴“Mî chakte thal chu tihtliahin a awm a, Tlûte chu chaknain a thuan leh thîn.

⁵Tlai puarte chu ei tûr zawnin an inhlawhfa thîn a, Riltâmte chu an lo tlai ta. Ching te pawhin fa pasarih an hring a, Fa ngah takte pawh an lo chau ta.

⁶“LALPA chuan a tihlum thîn a, a tinung bawh thîn; Thlânah a chhuktîr thîn a, a la chhuak bawh thîn.

⁷LALPA chuan a tirethei thîn a, a tihausa bawh thîn; A hnûk hniam thîn a, a châwi kâng bawh thîn.

⁸Retheite chu vaivut ata a kai tho thîn a, Pachhiate chu êkdûr ata a châwi kâng thîn, Miliante zînga a awmtîr theih nân Ropuina thutthlêng a luahtîr thîn a ni. “Leilung nghahchhan hi LALPA ta a ni a, A chungah khawvêl hi a ngah a.

⁹A mi thianghlimte kê a vêng ang a, Mi suaksualte chu thim zîngah an ngâwi reng ang. “Chakna ringawta hneh thei tûr tûmah an awm lo.

¹⁰LALPA hmêlmâte chu vuak sawm an ni ang a; Vân aţangin a khawpui riin a do vang. LALPA chuan leilung tâwp thlengin ro a rêl ang. “A lal chu chakna a pê ang a, A hriak thiha kî chu a châwi sâng ang,” tiin.

¹¹Elkana chu Rama khuua a inah chuan a hâw ta a. Naupang erawh chuan puithiam Elia hnênah LALPA rawng a bâwl vê ta a.

ELIA FAPA SUAKSUALTE

¹²Elia fapate chu Beliela* fate an ni a; LALPA pawh an hre lo.

¹³Chûng puithiamte chin dân chu, miin inthâwina thil an hlan sâ an chhum so laiin puithiam tîrchhiah chu sa thurna thîrkut ha thum nei kengin a lo kal thîn a.

¹⁴Bêl dar te, bêl tung te, bêl khai chi te leh bêl pangngai chhûnga mi chu a zu chhun a; thîrkutin a thâm chhuah theih zât zât chu puithiamten an la mai thîn a. Chutiang chuan Silo khuua Israel mi lo kal zawn zawnge thil chu an lo khawhsak thîn.

¹⁵Sa thau an la hâl hmâ te hian puithiam tîrchhiah chu a lo kal ang a, inthâwina hlântu hnênah, “Puithiamin in sa chhum a ei duh lo, kan ro tûr sa tî, la chhum loh a ni a duh ni,” an ti thîn a.

¹⁶Chuta inthâwina hlântu chuan, “A thau te chu hâl hmasâ sela; chumi zawhah chuan i duh zât zât lâ ang che,” a tih pawhin, “Ni lo, tûnah mi pe ngâh rawh; mi pêk loh pawhin ka la dâwn tho

tho,” a ti thîn a ni.

¹⁷Chutichuan, chûng tlangvâlho sualna chu LALPA mithmuhah a nasa hlê mai a, mite chuan LALPA hnêna inthâwi chu an lungten ta hial a.

SAMUELA NAUPAN LAI RAWNGBÂWLNA

¹⁸Naupang tê mah ni se Samuela chuan puan zai sîna siam puithiam kawr hân LALPA rawng a bâwl a.

¹⁹A nu pawhin kum tinin kawrfual tê a rawn thuisak thîn a, kum tin inthâwina hlan tûra a pasal nêna an lo kal apiangin a rawn kensak thîn a ni.

²⁰Elia chuan Elkana leh a nupui chu mal a sâwm a, “LALPA tâna fa in hlan tâk avângin LALPA chuan hê hmeichhia hi thlah tam tak pe rawh se,” tiin. Tichuan an in lamah an hâw leh ta a.

²¹Nau a pâi leh theih nân LALPA chuan Hani chu a rawn kan a; tichuan nau a lo pâi leh a, fapa pathum leh fanu pahni a hring ta a. Naupang Samuela pawh LALPA hmâah chuan a lo seilian ve zêl a.

ELIA CHHÛNGKAW CHUNGCHÂNGA HRILHLÂWKNA

²²Elia chu a lo tar ta hlê a; a fapaten Israel mite chungah an thiltih dân zawn zawnge te, biakbûk kawngka bula lo kal hmeichhiate an lo mutpui thîn thû te a hria a.

²³Tichuan an hnênah, “Engvângin nge hetiang thil te in tih le? In thil sual tih hi mi zawn zawnge hnên aţangin ka lo hria asin.

²⁴Hetianga tûr a ni lo, fate u! In chanchin ka hriatte hi a thâ lo hlê mai. LALPA mite in bawhchhiattîr thîn a nih hi.

²⁵Mi pakhatin mi dang chungah thil sual ti se, Pathianin ro a rêlsak ang. Mahse, miten LALPA chungah thil sual an tihin tu nge sawipui tâ ang?” a ti a. Chutichung pawh chuan an pa thû chu an pawisa duh chuang lo, LALPAN tihlum lâw lâw a duh tawh zâwk avângin.

²⁶Naupang Samuela chu a lo thanglian zêl a, Lapa leh a mite duhsak a hlawh a.

²⁷Elia hnênah chuan Pathian mi a va kal a, a hnênah, “LALPA chuan heti hian a ti: ‘Aigupta rama Pharoa bâwih in nih lai khân in thlahtute hnênah fiah takin keimah ngei hi ka inhriattîr a ni lo vem ni?

²⁸Ka maichâma thil hlâna, rimtuite hâla, ka hmâa puithiam kawr ha tûrin Israel hnam zawn zawnge zîng aţanga ka puithiam atâna ka thlan chhuah a ni lo vem ni? Israel faten meia thil an rawn hlan tinrêngin in thlahtute ka vûr thîn a ni lo vem ni?

²⁹Engvângin nge ka awmna hmuna hlan tûr ka tâna inthâwina leh ka hnêna thilhlante in hmuhsit tâk? Engvângin nge kei aia i fapate dah pawimawha, ka mi Israel fate thil hlan thâ ber ber chu mahni in chawm thau nâna i lo hman?” a ti a ni.

³⁰LALPA Israelte Pathian chuan, “I chhûngte leh i pa chhûngte chu kumkhuua ka rawngbâwl tûrin ka lo ti tawh nâ a. Tûnah erawh chuan LALPAN heti hian a ti a ni: ‘Rawng chu in bâwl tawh tawp lo vang; kei mi chawimâwitu chu ka chawimâwi ang a, kei mi hmusittu chu ka hmusit vê ang.

³¹Ngai rawh, i bân leh in thlahtu chhûngkaw bân ka sah thlâk nî a la thleng ngei ang, i inah hian tar kûna dam thleng tûr tûmah

an awm lo vang.

³²Israelte chungah Pathianin thil thâ a ti reng chung hian ka chênna in ngeiah hmêlmâ i la hmû ang. I inah hian tar thlenga dam tûr tûmah an awm lo kumkhua tawh ang.

³³Ka maichâm aţanga ka tihborał vê loh i mite lah chu i mit tikhamtu leh i rilru tihah tu mai an ni ang. I thlahte, i inchhûng aţanga lo piang rêng rêng chu vânglaiin an thi zêl ang.

³⁴I fapa pahnih, Hophnia leh Phinehasa te chungah chhinchhiahna lo thleng tûr chu hei hi a ni: an pahnihin ni khat thil thûah an thi vê vê ang.

³⁵Chumi hnûah chuan keima tân puithiam rinawm, ka thinlung leh ka rilrûa awm ang apiang ti tûr mi ka din tha leh ang. Nghet takin chhûngkua ka dinsak ang a, ka hriakthiha hmâah kumkhua in a awm reng ang.

³⁶I chhûngte zînga la dam chhunte chuan kûn chungah chhang them leh tangka dîlin kut an la dawh ang a, “Chhang tlang hnih khat ei tûr kan hmuh theih nân puithiam hnâ chhetê tal min thawhtîr vê rawh,” an la ti ang, a ti, a ti a.

BUNG 3

SAMUELA THU SAWI HMASA

¹Mipa naupang Samuela chuan Elia bulah LALPA rawng a bâwl a. Chûng hun lai chuan LALPA thû a thleng khât hlê a; inlârna thupuan pawh a awm meuh lo.

²Chutih lai chuan Elia chu ama hmunah a mû a, a mit pawhin khua hmu tha thei lovin a thim ţan tawh a,

³Pathian bâwm awmna LALPA biakbûk chhûnga Pathian khâwnvâr an tihmih hmâin Samuela chu a mû a,

⁴LALPA chuan Samuela chu a ko va. “Heta hi ka awm e!” tiin a lo chhâng a.

⁵Elia hnênah chuan a tlan vat a, “Mi ko a nih chuan, hei ka awm e,” a va ti a. Ani chuan, “Ka ko lo che; va mu leh rawh,” a lo ti a. Tichuan a kal a, a va mu leh ta a.

⁶LALPA chuan a ko leh a, “Samuel!” a ti a. Samuela chu a tho va, Elia hnênah a va kal a, “Min ko a nih chuan heta hi ka awm e,” a va ti leh a. Ani chuan, “Ka fapa, ka ko lo che; va mu leh rawh,” a lo ti a.

⁷(Samuela chuan LALPA chu a la hre rih lo va, LALPA thû pawh a hnênah puan a la ni hek lo.)

⁸LALPA chuan Samuela chu a vawi thumna atân a ko leh a. A tho va, Elia hnênah bawka kal leh a, “Mi ko a nih chuan, heta hi ka awm e,” a va ti leh a. Elia chuan naupang chu LALPAN a ko tih a lo hre ta a.

⁹Elia chuan Samuela hnênah, “Kal la, va mû la; a koh leh che chuan, ‘LALPA, thû sawi rawh, i chhiahhlawhin a ngaithlâ e,’ ti ang che,” a ti a. Samuela chu a kal a, a mut hmunah chuan a va mu leh a.

¹⁰LALPA chu a lo kal a, a ding a, a hmâa a koh ang khân, “Samuel, Samuel!” a ti a. Samuela chuan, Thû sawi rawh, i chhiahhlawhin a ngaithlâ e,” a ti a.

¹¹LALPA chuan Samuela hnênah: “Ngai teh, Israel ramah hian a hria apiang thin tiţhâwnng dawt tûr thil ka ti dawn a ni.

¹²Chumi hunah chuan, Elia chhûngkaw chungchângka ka sawi tawh zawng zawng kha, a bul aţanga a tâwp thlengin ka thlentîr ang.

¹³A fapaten thil sual tak an ti a, an intibawhlhlahw vek tih hre reng chungah a khap loh avângin an chhûngkua chu ka hrem kumkhua dawn tih ka hrilh tawh si a.

¹⁴Chuvângin Elia chhûngkaw suahsualna hi inthâwina emaw, thilhan emawa thâwi dam theih a ni lo tiin Elia chhûngkaw chungah chhia ka lo chham tawh a ni,” a ti a.

¹⁵Samuela chu a tûk zîng thlengin a mu a, LALPA in kawngkhâr te chu a hawng a. Samuela chuan a inlârna hmuh chu Elia a hrilh ngam lo va.

¹⁶Elia chuan Samuela chu a ko va, “Ka fapa Samuel!” a ti a. Ani chuan, “Heta hi ka awm e,” a ti a.

¹⁷Ani chuan, “LALPA chuan eng thû nge a hrilh che? Ka lakah chuan engmah zêp suh. I hnêna a sawi zawng zawng i zêp chuan Pathianin a duh ang angin a khawih mai ang che, chû aia nasa zâwk pawhin,” a ti a.

¹⁸Samuela chuan engkim a hrilh ta a, pakhat mah a zêp ta lo va. Ani chuan, “LALPA tih a ni miao va. Thâ a tih ang zêlin ti mai rawh se,” a ti a.

¹⁹Samuela chu a ţhang lian deuh deuh va, a hnênah LALPA a awm a, a thu sawi chu leilungah a riral ngai lo.

²⁰Dan aţanga Beerseba thlengin Israel mi zawng zawngin Samuela chu LALPA zâwlnei a ni tih an pawm vek a.

²¹LALPA chu Silo khuaah a inlâr leh a. LALPA chu Samuela hnênah Siloah LALPA thu hmangin a lo inpuang tawh si a.

BUNG 4

PATHIAN BÂWM AN MAN

¹Samuela thû chuan Israel mi zawng zawng hnên a thleng ta a. Israelte chu Philistia-ho do tûrin an kal chhuak a, Ebenezer bulah ţanhmun an khuar a; Philistia-ho chu Aphek-ah an inkulh vê bawka a.

²Philistia-ho chu Israelte bei tûrin an inzâr darh a. An han indo va, Philistia-ho chuan Israelte chu an hneh ta a, indona hmunah chuan sipai sângli lai an that a.

³Mipuite chu an riahhmuna an lo kîr leh chuan Israel upate chuan, “Engvângin nge Philistia mite hmâah LALPAN min tihtlâwm tâk le? Hawh u, LALPA thuthlung bâwm Silo-a mi kha han lâ ila, kan hnêna a awm chuan kan hmêlmâte lakah min chhanhim thei ang chu,” an ti a.

⁴Tichuan, mipuite chuan cherubte inkâra awm Sipaihote LALPA thuthlung bâwm va la tûrin Silo-ah mi an intîr a. Elia fapa pahnih, Hophnia leh Phinehasa te chuan Pathian thuthlung bâwm chu an lo awmpui a.

⁵LALPA thuthlung bâwmin an riahhmuna a lo thlen chuan Israelho zawng zawng chu lei nghawr nghing khawpa ringin an âu dur dur a.

⁶An âu thâwm chu Philistia mite chuan an lo hria a, “Hebrai-ho riahhmuna âu ri ta dur dur mai chu eng an tihna nge ni le?” an ti a. LALPA thuthlung bâwmin an riahhmun a thleng ta tih an lo hre ta a.

⁷Philistia-ho chuan, “An riahhmunah Pathian a lo kal ta zu nia!” an ti a, an hlau hlê mai a. “Kan chung a pik ta! Chutiang thil chu a la thleng ngai si lo va.

⁸Kan chung a va pik êm! Chûng pathian chak takte lakah chuan tu nge min chhan chhuak thei ta ang le? Chûng pathiante chu thlalêra Aigupta mite hrichhe tinrênga tihlumtute kha an ni si a.

⁹Mahse Philistia mite u, intichak ula, mipa takin awm rawh u; tichuan, in chhiahhlawha an awm ang khân Hebrai-ho chhiahhlawhah chuan in awm ve dawn lo nia. Chuvângin huaisen takin bei rawh u le!” an ti a.

¹⁰Tichuan, Philistia mite chuan an bei vak a, Israel-ho chu an hneh ta a, an puan in lamah an tlânchhe vek a. Israelho chu an sâm thlu hnem khawp a, ke sipai 30,000 lai an thi a.

¹¹Pathian bâwm pawh an lâksak daih a; Elia fapa pahni, Hophnia leh Phinehasa te pawh an thi tel bawh a.

ELIA THIH THÛ

¹²Chumi ni vêk chuan Benjamin mi pakhat, indona ațanga tlân chhuak chu, kawr ƣet hniang hnuang, lûa bâl kai liam luam chungin Silo khua chu a lo thleng a.

¹³Chû pa chu Elia chuan kawng sîra thûin a lo thlir reng a, Pathian bâwm avâng chuan a tirilah a khûr der der a. Chû mi chuan khua a lo thlena, chanchin a han sawi chuan a khuain an ƣap ta chuah chuah a.

¹⁴Elia chuan ƣap chuah chuah thâwm a han hriat chuan, “Engtizia ta nuai nuai nge ni?” a ti a. Chû mi chu a lo kal vat a, Elia chu a rawn hrilh a.

¹⁵Elia chu kum 98 a upa a ni a, a mit a thim tawh êm avângin khua a hmu fiah thei tawh lo va.

¹⁶Chû mi chuan Elia hnênah, “Indona ațanga lo kal ka ni a. Vawiinah indona ațangin ka rawn tlânchhia a ni,” a ti a. Ani chuan, “Eng thil nge thleng ta, ka fapa?” a ti a.

¹⁷Chanchin rawn thlentû chuan a chhâng a, “Israel mite chu Philistia-ho hmâah an tlânchhia a, mi tam tak an that chiam a. I fapate pahni, Hophnia leh Phinehasa te pawh an thi a; Pathian bâwm pawh an chhuhsak ta,” a ti a.

¹⁸Pathian bâwm chanchin a rawn sawi vêleh Elia chu a ƣhutna kawngkhâr bula ƣhutthlêng ațang chuan zangthalin a tlâ a, a ring a sawh tliak a, a thi ta a, amah a tar tawh vâng leh a rih êm vâng a ni a. Israelte chungah kum sawmli chhûng ro a rêl a ni.

IKABODA

¹⁹A monu, Phinehasa nupui nau pài chu a hrin a hun hlê a; Pathian bâwm an lâk bosak thû te, a pasal leh a pasala pa thih thu te a hriat vêleh a kûn ngâwih a, nau a vei ngâh a, a hring ta a.

²⁰A hnuk a chat ƣep tihin a bula ding hmeichhiate chuan, “Hlau suh, hei fapa i hring a nia,” an ti a. Mahse a ngaihsak lo va, a chhâng bawh hek lo.

²¹Ani chuan a fa hming chu Ikaboda a sa a, Pathian bâwm an laksak avâng leh a pasal leh a pasala pa te an thih tâk avângin, “Ropuina chuan Israelte a chhuahsan ta!” a ti a.;

²²“Pathian bâwm an chân tâk avângin ropuina chuan Israel a chhuahsan ta,” a ti leh a.

BUNG 5

PHILISTIA-HO LEH PATHIAN BÂWM

¹Philistia mite chuan Pathian bâwm chu an lâ a, Ebenezer ațangin Asdod khuah an kalpui a.

²Philistia mite chuan Pathian bâwm an lâk chu Dagona biak inah an la lût a, Dagona bulah chuan an hûng a.

³A tûk zînga Asdod mite an han thawh chuan, Dagona chu a bawkkhup zâwngin LALPA bâwm hmâah chuan hmâia lei siin a lo tlu bul mai a. Dagona chu a dinna ngaiah an dintir leh a.

⁴A tûk leh zînga an han tho leh chu, LALPA bâwm hmâah chuan Dagona chu hmâia lei sî bawkin a lo tlu leh dêr mai a. Dagona lu leh kutphah khinghni bungte chu kawngka bulah chuan a lo lum rem rum mai a; Dagona taksa chauh chu a la awm a.

⁵Chû thil avâng chuan Dagona puithiam te, Dagona biak ina kal thîn rêng rêngte pawhin Asdod khuah Dagona kawngka bul chu tûn thlengin an la rap ngam lo.

⁶LALPA kut chu Asdod mite chungah chuan a tawrhhlhawm ta hlê mai a, Asdod leh a chhehvêl rama mite chu hripui a veitir chiam a.

⁷Asdod miten thil awm dân an han hmuhin, “Israelte Pathian bâwm hi kan hnêna awm reng chi a ni lo ve, kan chungah leh kan pathian Dagona chung a kutthlâk hi a na êm mai,” an ti a.

⁸Tichuan, Philistia milianho zawng zawng an ko khâwm a, “Israelte Pathian bâwm hi engtin nge kan tih dawn?” an ti a. Anni chuan, “Israelte Pathian bâwm chu Gath khuah kalpui rawh u,” an ti a. Tichuan Israelte Pathian bâwm chu an kalpui ta a.

⁹Chutia an phurh bo hnû chuan, LALPA chuan chû khuah chuan chhiatna râpthlâk tak a thlentir a; a lian a têin chû khuah mite chuan ngâwt na tak an vei ta a.

¹⁰Tichuan, Pathian bâwm chu Ekron khuah an thawn a. Pathian bâwmin Ekron khua a va thlen chuan, Ekron khaw mite chuan, “Keini leh kan mite tihlum tûrin Israelte Pathian an rawn la lût a nih hi!” tiin an au chêt chûl a.

¹¹Philistia milian-ho zawng zawng chu an ko khâwm a, “Israelte Pathian bâwm hi la bo teh u, keimahni leh kan mite a tihlum zêl loh nân a awmna ngaiah kîr leh rawh se,” an ti a. Khua chu a pumin chhiatna nasa takin a sawisa a; Pathian kut thlâkna chuan a delh rit nasa hlê mai si a.

¹²A thi bângte lahin ngâwt hrî an vei sup sup a, khaw mipuite ƣap thâwm chuan vân a han thleng hial a.

BUNG 6

ISRAEL RAMAH THUTHLUNG BÂWM A KIR

¹LALPA thuthlung bâwm chu Philistia ramah chuan thla sarhi a awm hman a.

²Philistia mite chuan puithiamte leh dâwithiamte an ko va, “LALPA thuthlung bâwm hi engtin nge kan tih tâk ang? A awmna ngaia thawn lêt dân min hrilh rawh u,” an ti a.

³Anni chuan, “Israelte Pathian thuthlung bâwm in thawn kîr chuan, a ruak maiin thawn kîr suh u; a hnênah bawhchhiat thâwina tûr nê in thawn lêt ngei ngei tûr a ni. Tichuan, tihdam in lo ni ang a, in laka a kut a lâk kian loh chhan pawh in hre mai ang,” an ti a.

⁴Anni chuan, “A hnêna bawhchhiat thilhlân atân eng nge kan pêk ang?” an ti a. “Philistia lal zâtin rangkachak ngâwt lem pangâ leh rangkachak chaichîm lem pangâ ni rawh se. In zavaia chungah hri lêng leh in lalte chungah hri lêng hi hri chi khat a ni si a.

⁵Chuvângin, in ngâwt vei mêk lim leh in ram ei chhetu chaichîm lim in siam tûr a ni a, Israelte Pathian chu in chawimâwi tûr a ni; tichuan nangni te, in pathiante leh in ram chungah hian a kut a la kiang deuh mahna le.

⁶Engvângin nge Pharoa leh Aigupta mite ang maia in thinlung in tihsak tlat ang le? An zîngah khân thil nasa tak tak a han tih tâkah khân, khâng mipuite kha an chhuahtîr leh tho si a ni lo vem ni?

⁷Tûnah hian tawlaîlîr thar siam ula, bâwngpui pahni, hnute sâwr lai, nghâwngkaw l la bêt ngai lo buatsaih baw l ula, tawlaîlîrah chuan bêt ula; an notê te chu in lamah hrui hâw daih rawh u.

⁸LALPA thuthlung bâwm chu lâ ula, tawlaîlîrah chuan dah ula; bawhchhiat thâwi nâna in pêk kîr tûr rangkachaka siam thilte chu thingremah dah ula, a sirah dah rawh u. Tichuan thlah ula, kaltîr rawh u.

⁹Thlîr reng ula: Ama awmna ram Beth Semes lam a pan nal nal chuan hê chhiatna râpthlâk tak hi Ama tih a ni ngei ang. Chutianga a kal loh erawh chuan, min hremtu chu Amah ni lovin–kan chungah lo thleng vê hrim hrim a ni ang,” an ti a.

¹⁰Chutiang tak chuan mite chuan an ti a; a hnute sâwr lai bawngpui pahni an kai a, tawlaîlîrah chuan an thlung a, an notê te chu inah an dah hrang daih a.

¹¹LALPA thuthlung bâwm chu, an ngâwt lim siam leh chaichîm lim rangkachaka siam an dahna thingrem nê tawlaîlîrah chuan an hlâng ta a.

¹²Bâwngpuite chuan Beth Semes kalna kawngpui chu dîng takin an pan nal nal a; bû chung zêlin kawngpui chu an zawh a, dîng lamah emaw, vei lamah emaw an pêng hauh lo. Philistia miliante chuan Beth Semes ramrî thlengin an zui a.

¹³Beth Semes khuah mite chuan ruamah hian buh an lo seng a; an han hawî vê a, thuthlung bâwm an han hmuh chuan an lâwm ngei mai.

¹⁴Tawlaîlîr chu Beth Semes khuah Josua lovah chuan a lût a, tah chuan a dîng ta a; chumi hmunah chuan lung lian tak a awm a. Tichuan, tawlaîlîr thingte chu an ek phel a, LALPA hnêna hâlral

thilhlân atân bâwngpuite chu an hmang a.

¹⁵Levia chîte chuan LALPA thuthlung bâwm leh a bula thingrem, rangkachaka siam thil dahna chu an la thlâ a, lung lianpui chungah chuan an hûng a. Beth Semes mite chuan hâlral thilhlân leh inthâwina chu, chumi ni lâ lâ chuan LALPA hnênah an hlân a.

¹⁶Philistia miliante chuan chûng thilte chu an lo en reng a, chumi ni vêk chuan Ekronah an kîr leh ta a.

¹⁷Chûng Philistia miten rangkachâk ngâwt lim, LALPA hnêna bawhchhiat thâwi nâna an hlan te chu: Asdod tân pakhat, Gaza tân pakhat, Askelon tân pakhat, Gath tân pakhat, Ekron tân pakhat a ni a;

¹⁸rangkachaka siam chaichîm lim, Philistia lal pangâte awmna kulh nei leh nei lo khaw awm zât a tel baw l a; LALPA bâwm hûnna Abel lungpui lian pawh Beth Semes khaw mi Josua lovah tûn thlengin a la awm.

¹⁹LALPA bâwm chhûng an en avângin Beth Semes mite chu a hrem a. Mi 50,070 lai a tihlum a, chuti taka nasaa LALPAN mipui a tihlum avâng chuan mipuite chuan lû an sîn a.

KIRJATH JEARIM-AH THUTHLUNG BÂWM

²⁰Beth Semes khaw mite chuan, “Tu nge LALPA Pathian thianghlim hmâah dîng thei ang le? Kan hnên atângin tu hnênah nge a kal leh tâk ang?” an ti a.

²¹Kirjath Jearim khuah mite hnênah zualkote an tîr a, “Philistia-hoten LALPA thuthlung bâwm an rawn dah kîr a; lo chhuk thlâ ula, rawn la chho ta che u,” an ti a.

BUNG 7

¹Tichuan, Kirjath Jearim khuah mite chu an lo kal a, LALPA thuthlung bâwm chu an lâ a, tlâng chungah awm Aminadaba inah an dah a, a fapa Eleazara chu LALPA thuthlung bâwm enkawl tûrin an serh hrang ta a.

SAMUELAN ISRAELTE RO A RÊL

²Thuthlung bâwm chu Kirjath Jearimah chuan hun rei tak, kum sawmhnih lai a awm a. Israela chhûngkua zawng zawng chu LALPA lamah an khuah har hlê a.

³Samuela chuan Israela chhûngte zawng zawng hnênah, “LALPA hnênah thinlung zawng zawng in kîr leh dâwn a nih chuan, ram dang pathiante leh Astorethi-te ho hi in hnên ata paih bo vek ula, LALPA tân in thinlung buatsaih ula, ama rawng chauh bawl rawh u; tichuan Philistia-ho kut ata a chhan chhuak dâwn che u nia,” a ti a.

⁴Israel fate chuan Baala te leh Astorethi-te chu an paih bo va, LALPA rawng chauh an bawl ta a.

⁵Samuela chuan, “Israel mi zawng zawng chu Mizpa khuah lo kal khâwm vek ula, LALPA hnênah ka tawngtâisak ang che u,” a ti a.

⁶Mizpa khuah chuan an lo kal khâwm vek a, tui an châwi a, LALPA hmâah an leih bua a. Chumi ni chuan chaw an ngei a, “LALPA lakah kan lo sual ta a ni,” an ti a. Samuela chuan Mizpa khuah Israelte ro a rêlsak a.

⁷Israel fate Mizpa khuaah an intâwk khâwm tih thu Philistia-hovin an lo hriat chuan, Philistia lallo chu Israelte do tûrin an thawk chho va. Israel faten an lo hriat chuan Philistia-ho chu an hlau hlê a.

⁸Israel fate chuan Samuela hnênah, “Philistia mite laka min chhan chhuah theih nân bâng lovin LALPA kan Pathian hnênah min ngensak zêl rawh,” an ti a.

⁹Samuela chuan berâm no hnute hne lai a lâ a, LALPA hnênah a pumin hâlrâl thilhlana a hlân a. Tichuan, Samuela chuan Israelte tân LALPA chu a âu va, LALPA chuan a lo chhâng a.

¹⁰Samuelan hâlrâl thilhlana a hlan mêk laiin, Philistia-ho chu Israelte bei tûrin an lo hnâi tuau tuau va. Mahse chumi ni chuan LALPA chuan Philistia-ho chu khawpui ri nasa takin a zu thâwng thut a, an chí-ai zo ta vek a, Israel mite hmâah chuan an tlâwm ta a.

¹¹Israel mite chu Mizpa aţang chuan an lo chhuak a, Philistia-ho chu an ûm a, Beth Kar hnuai thleng rawkin an nawr lêt a.

¹²Samuela chuan lung a lâ a, Mizpa leh Sen inkârah chuan a phun a, “Hei chen hi LALPAN min ţanpui a ni,” tiin ‘Ebenezer’ tih hming a vuah ta a.

¹³Tichuan, Philistia-ho chu an tlâwm ta a, Israel ram chhûnghah an lo lût zui ta lo va. Samuela dam chhûngh chuan LALPA kut chuan Philistia mite lakah a hum tlat a.

¹⁴Ekron aţanga Gath khua thlengin Philistia-hovin Israel khua an lo lâk tawhte chu an la kîr leh a; Philistia-ho kut aţangin Israelte chuan an ram hloh tawh chu an la lêt leh ta a. Chû bâkah Israelte leh Amor-hote inkârah muanna a awm bawk a.

¹⁵Samuela chuan a dam chhûngin Israelte ro a rêlsak a ni.

¹⁶Kum tinin Bethel te, Gilgal leh Mizpa te chu a tlawh kual thîn a, chûng hmunah chuan Israelte tân ro a rêlsak a.

¹⁷Mahse, ama in awmna Rama khuaah a kîr leh thîn a ni. Chutah pawh chuan Israelte tân ro a rêlsak a, LALPA tân maichâm a siam bawk a.

BUNG 8

ISRAELTEN LAL NEIH AN PHÛT

¹Samuela chu a lo upa ta hlê a, a fapate chu Israelte chungah rorêltûah a siam ta a.

²A fa tîr hming chu Joela a ni a, a dawttu hming chu Abija a ni a; anni chu Beersebaa rorêltu an ni.

³Nimahsela, a fate chuan an pa kawng an zawh lo va; eirûkna sum leh pai an ûm a, dik lo taka rorêlin, thamna te an lâ a.

⁴Israel upa zawng zawng chu an inpun khâwm a, Rama khuaah Samuela hnênah an lo kal a;

⁵a hnênah, “Hei le, i upa tawh si a, i fapate lahin i kawng an zawh bawk si lo va. Chuvângin hnam dang zawng zawngte pawhin an neih angin, kan chungah rorêltu tûr lal min siamsak mai ta che,” an ti a.

⁶Chutia “Ro min rêlsaktu tûr lal min pe rawh,” an va ti ta mai chu Samuela ngaihdân a ni lo hlê mai a. Samuela chuan LALPA

hnênah a thlen ta a.

⁷LALPA chuan Samuela hnênah, “Mipuiten i hnêna an sawi zawng zawng chu lo ngaihsak rawh; nangmah an duh lo che a ni lo va, an chungah ro ka rêl loh nân keimah min hnâwl a ni zâwk.

⁸Aigupta aţanga ka hruai chhuah ni ata tawh vaviin thlenga an thiltih dân rêng mai hi, mi an phatsan a, pathian dang rawng an bawl ang bawh hian i lakah pawh an ti ve ta a nih hi.

⁹Chuvângin an thû chu ngaihlâksak ang che. Amaherawhchu, i duh lohzia tihtak zetin hrilh la, an chungah rorêltu lal la rawn chêt dân tûr hrilhin, vaukhân lâwk ang che,” a ti a.

¹⁰Samuela chuan lal neih ngêntu mipuite hnênah LALPA thuchhuak zawng zawng chu a hrilh vek a.

¹¹Ani chuan, “Hetiang hi in chungah rorêltu lal khawsak dân tûr chu a ni e: In fapate chu a tawlailîr leh a sakawr khalhtu atân a chhawr ang a, tawlailîr hmâa tlân tûr te pawh an awm ang.

¹²Thenkhat chu a sipai sâng hotûah te, sawmnga hotûah te a ruat ang a, thenkhat chu a leilettûah te leh a buhsengtûah te a ruat ang a, thenkhat chu indona râlthuam siamtûah te leh a tawlailîr thuam siamtûah te a ruat ang.

¹³In fanute chu rimtui siamtûah te, chaw chhûmah te leh chhang siamtûah te a la chhawr ang.

¹⁴In lo te, in grêp huan te, in olive huan te chu a thâ thâ a chhuhsak ang che u a, a chhiahhlawhte a pê ang.

¹⁵In buh thar leh in grêp thar aţangin sâwma pakhat a lâksak zêl ang che u a, a hnathawk hotute leh chhiahhlawhte a pê ang.

¹⁶In chhiahhlawh mipa te, in chhiahhlawh hmeichhia te, in tlangvâl thâ thâ te, in sabengtung te a chhuhsak ang che u-a, ama hnathawkah a chhawr ang.

¹⁷In berâm rual zînga sâwma pakhat a lâksak ang che u-a. A chhiahhlawh in ni nghâl bawh ang.

¹⁸Chutih hunah chuan in lal atâna in thlan avâng ngei chuan iak iak mah ula, chumi hunah chuan LALPAN a ngaithla dawn lo che u a nia,” a ti a.

¹⁹Mahse, mipuite chuan Samuela zilh lâwkna thû chu an pawm duh chuang lo va, “Ni lo ve, lal kan nei ngei tûr a ni,

²⁰hnam dang zawng zawngte ang kan ni ve tawh zâwk dawn asin. Kan lal chuan kan chungah ro a rêl ang a, indonaah te hmâ min hruaisak thîn dawn alâwm,” an ti tlat a.

²¹Samuela chuan mipuite thusawi zawng zawng chu a ngaithla a, LALPA hnênah a thlen leh vek a.

²²LALPA chuan Samuela hnênah, “An thû chu zâwm la, lal chu siamsak rawh,” a ti a. Samuela chuan Israel mite hnênah chuan, “Mi tin mahni khaw lamah hâw tawh rawh u,” a ti a.

BUNG 9

LAL ATAN SAULA THLAN A NI

¹Benamina thlah, mi huaisen tak pakhat, a hming Kisa a awm a; ani chu Abiela fapa, Zerora fapa, Bekoratha fapa, Aphia fapa a ni a.

²Fapa hmelt̃hâ leh thlan nahawm tak a nei a, a hming chu Saula a ni. Israel fate zingah amah aia hmelt̃hâ rêng an awm lo. A koki chena sâng pawh tûmah an awm lo.

³Saula pa Kisa sabengtungte chu a bo va. Kisa chuan a fapa Saula hnênah, “Tho la, chhiahhlawh pakhat hruaiin, sabengtung zawng tûrin kal ta che,” a ti a.

⁴Tichuan, Ephraim tlâng ram chu a fang kual vek a, Salisa ram pawh a pal tlang a, mahse an hmu lo va. Saalim ramah an zawng leh a, chutah pawh chuan a awm lo va. Benjamin ram an fang leh a, chutah pawh chuan an hmu chuang lo va.

⁵Zuph ram an lo thlen chuan Saula chuan a chhiahhlawh hruai hnênah, “Ti teh, i kîr leh mai ang, chuti lo zawng, ka pa hian sabengtung hre chang lovin keimahnî zâwk min lo ngaihtuah ang e,” a ti a.

⁶Ani chuan, “Ngâwi teh, hê khuah hian Pathian mi, mi zahawm tak a awm a; a sawi apiang a thleng dik zêl asin. Chutah chuan i kal ang hmiang; kan kalna tûr kawng min kawhmmuh thei mial mahna,” a ti a.

⁷Saula chuan a chhiahhlawh hnênah, “Mahse va kal ta ngawt ila, chû mi chu eng nge kan pêk ang? Kan chhang fûnna bâwm lah chu a ruak zo tawh a, chû Pathian mi chu engmah pêk tûr kan nei si lo va. Eng nge kan la neih le?” a ti a.

⁸Chhiahhlawh chuan Saula chu a chhâng leh a, “En teh, tangkâ sekel hmun lîa thêna hmun khat chu ka nei a. Pathian mi chu ka pê ang a, kan kalna tûr min hrilh mai ang,” a ti a.

⁹(Tûn hmâ chuan Israel ramah miin Pathian mi a râwn duh chuan: “Ti rawh, hmutheitûa i pan teh ang” an ti thîn; tûna zâwlnei an tih hi tûn hmâ chuan hmutheitu an ti thîn.)

¹⁰Saula chuan a chhiahhlawh hnênah, “A thât hlauh chu; ti rawh, i va kal tak ang hmiang,” a ti a. Tichuan Pathian mi awmna khuah chuan an va kal ta a.

¹¹Khawpui pana an kal chhoh lai chuan tui chawî tûr nula rual an tâwk a, an hnênah, “Hetah hian hmutheitûa a awm em?” an ti a.

¹²Anni chuan, “Awm e, in hmâ lawkah sâwn a awm e. Hmanhmawh ula; waviinah hian hmun sângah mi an inthâwî dâwn avângin hê khuah hian a lo kal a ni.

¹³Khawpuia in luh vele, hmun sângah chaw ei tûra a kal chhuah hmân in va hmu hman ngei ang. Inthâwina sâ chu mal a sâwm dâwn avângin, amah a thlen hnûah chauh chaw ei tûra sâwmte chuan an ei thei ang. Chuvâng chuan, tûnah hian han kal chho ula, in han hmu mai ang,” tiin an hrilh a.

¹⁴Khuah chuan an chho ta a. Khuah an luh lai takin, hmun sâng lam pana Samuela kal chho tûr nêan an han intâwk ta hlauh va.

¹⁵Saula kal hmâ ni khân LALPA chuan Samuela chu heti hian a lo hrilh tawh a,

¹⁶“Naktûk hetih hunah hian Benjamin rama mî mi pakhat ka rawn tîr dâwn a, Philistia mite kut aţanga ka mite a chhan chhuah theih nân, ka mi Israelte hotu atân hriak i lo thih tûr a ni; ka mite ţap thâwm chuan ka hnên a lo thleng ta si a,” a ti a.

¹⁷Samuelan Saula a han hmuh chuan, LALPA chuan a hnênah, “Sâw mi saw ka hrilh che kha a nih saw. Hê mi hian ka mite chungah ro a rêl tûr a ni,” a ti a.

¹⁸Saula chuan pâwn kawngkhâr bula Samuela awm chu a va hnaih a, “Khawngaih takin min hrilh rawh, hmutheitûa in chu khawiah nge?” a ti a.

¹⁹Samuela chuan Saula hnênah, “Kei hi hmutheitûa chu ka ni e. Hmun sâng lam panin ka hmâah chho vê la, waviin hian ka bulah chaw i ei vê tûr a ni; naktûkah chuan ka kaltîr tawh ang che a, i rilrûa i pây zawng zawng pawh ka hrilh vek ang che.

²⁰Ni thum kal tawha i sabengtung bo chungchâng pawh ngaihtuah duh suh, an hmu tawh e. Israelte beisei ber chu tu nge ni? Nangmah leh i pa chhûngkua an ni lo vem ni?” a ti a.

²¹Saula chuan a chhâng a, “Kei hi Benjamin mi, Israel hnam zînga a tê ber, Benjamin hnam zîngah pawh a chhûngkaw nêp ber kan ni lehngghâl lo vem ni? Engvângin nge chutiang thû ka hnêna i sawi tâk mai?” a ti a.

²²Samuela chuan Saula leh a chhiahhlawh chu pindan zau chhûngah a hruai lût a, an mi sâwmho zînga thutna ţa berah a thutîr a; chutah chuan mi sawmthum vêl an lo awm a.

²³Samuela chuan eisiam hnênah, ‘Dah hrang rawh’ tia ka pêk che kha rawn la rawh le,” a ti a.

²⁴Tichuan, eisiam chuan a bawp leh a chung lam sâ chu Saula hmâah chuan a hlui a. Samuela chuan, “Hei le, ka lo dah hransak che a nih hi. I chanpual liau liau a ni. Ei rawh le, hê hun atân hian ka lo khêksak che a ni, mite pawh ka lo sâwm khâwm tawh hi,” a ti a. Chumi ni chuan Saula chuan Samuela bulah chaw a ei ta a.

²⁵Hmun sâng aţanga khuah an chhuk hnû chuan in chung zâwlah Samuela chuan Saula chu a tîtîpui a.

²⁶Zîng takah an tho va; khuah a vâd dâwnah Samuela chuan Saula chu, “Tho rawh le, ka kaltîr tawh ang che,” a ti a. Saula chu a tho va, Samuela nêan chuan an chhuak dînn ta a.

LAL ATÂN SAULA HRIAK THIH A NI

²⁷Khaw dâia an chhuk thlâk laiin Samuela chuan Saula hnênah, “Chhiahhlawh hi kan hmâah lo va kal hmasak tîr rawh,” a ti a. Ani chu a kal ta a. “Nang chu hetah hian dîng rih rawh, Pathian thû ka lo hrilh ang che,” a ti a.

BUNG 10

¹Samuela chuan hriak bûr chu a phawrh a, a lû-ah a leih a, a fâwp a: “LALPA chuan a rochante chungah hotu atân hriak a thih che a ni lo vem ni?”

²Waviinah hian mi i kalsan hnûah, Benjamin rama Zelza hmuna Rakili thlan bulah mi pahni i tâwk ang a; anni chuan i hnênah, ‘I sabengtung zawn kha hmuh a ni tawh e. Tûnah chuan i pain sabengtung ngaihtuah tawh lovin, nangmah mawlh a ngaihtuah tawh che a, “Ka fapa chu engtin nge ka tih tâk ang le?” a tî a ti mai,’ an ti ang a,

³Chuta ţang chuan i kal zêl ang a, Tabor hmuna sasaw thing dinna i va thleng ang a. Chutah chuan Bethel khuah Pathian hnêna kal tûr mi pathumin an tâwk ang che a, pakhat chuan kêl no pathum a phur ang a, mi dangin chhang tlang thum a keng ang

a, a dang lehin uain bûr a keng bawk ang.

⁴An lo chibai ang che a, chhang tlang hnih chu an pê ang che a, an kut ațangin i dawng tûr a ni.

⁵Chumi hnûah chuan Philistia sipaite inkulhna hmun Pathian tlang i va thleng ang a. Khuua i va luh chuan, hmun sâng ațanga lo chhuk thlâ zâwlnei rual, țințang te, thinrik te, phênglâwng leh țințang tumtute chu i tâwk ang a; Pathian thuchah an puang chhuak tuarh tuarh ang.

⁶LALPA Thlarau chu i chungah a lo thleng ang a, anniho thu puan dual dualnaah chuan nang pawhin i puang chhuak ve ang a, mi danglam daih i lo ni tawh ang.

⁷Chûng chhinchhiahnate chu i chungah a lo thlen hunah a thawh dân ang zêlin i che chhuak ve thîn tawh dân a ni; Pathianin a awmpui si che a.

⁸Gilgal-ah chuan ka hmâah i lo zu kal ang a; kei pawh hâlral thilhlân hlân tûr leh remna inthâwina hlân tûrin ka lo chhuk ngei ang. I tih tûr entûr tûr chea ka lo kal hmâin ni sarhi mi lo ngâk tûr a ni,” a ti a.

⁹Samuela hnên ațanga a kal sawn hnû lawk ațang chuan Pathianin thînlung thar a pê a; chumi ni lâ lâ chuan chûng chhinchhiahna zawng zawng chu a lo thleng kim vek a.

¹⁰Tlâng an lo thlen chuan amah hmuak tûr zâwlnei rualte chu an lo awm reng a; tichuan Pathian Thlarau chu a chungah a lo thleng a, an zingah chuan thû a puang ve ta chiam mai a.

¹¹Tûn hmâin eng ang mi nge a nih hriaten zâwlneite zinga Pathian thû a puang ve ta chiam mai an han hmuhin, “Kisa fapa chungah hian eng thil nge lo thleng ta le? Saula pawh zâwlneite zingah a tel ve ta em ni?” an ti a.

¹²Chumi hmuna awm mi pakhat chuan, “Anniho pawh tû fa nge an nih bik?” a lo ti a. Chutichuan, “Saula pawh zâwlnei a ni ve ta elo?” tih hi ățawngka lamah an ching ta a ni.

¹³Thlarauva thû a puan zawh chuan hmun sângah a kal chho va.

¹⁴Saula pami chuan amah leh a chhiahhlawh chu, “Khawiah nge in kal?” a lo ti a. Ani chuan, “Sabengtung kan zawng a. Hmuh tûr reng a awm loh avângin Samuela hnênah kan kal ta a ni,” a ti a.

¹⁵Saula pami chuan, “Samuela chuan eng thû nge a lo hrilh che min hrilh ta che,” a ti a.

¹⁶Saula chuan a pami hnênah, “Sabengtung chu hmuh a nih tawh thû min lo hrilh mai a ni,” a ti a. Samuelan lalna chungchâng a lo hrilh dân erawh chu a hrilh lo.

SAULA CHU LALAH AN PUANG

¹⁷Samuela chuan mipuite chu Mizpaah LALPA hnêna lo kal tûrin a ko khâwm a,

¹⁸Israel fate hnênah chuan, “LALPA Israelte Pathian chuan, ‘Israel te chu Aigupta ațangin ka hruai chho va, Aigupta-ho leh lalram zawng zawng leh nangmahni awp bettute ațangin ka chhan chhuak che u a ni,’ a ti a.

¹⁹Vawinah erawh chuan in harsatna zawng zawng leh in manganna zawng zawng laka chhan chhuaktu che u in Pathian

chu in hnâwl a; ‘A ni lo ve, lal min siamsak rawh!’ in tih kha. Chuvângin, a nham leh a chí chiîn LALPA hmâah rawn inlan rawh u,” a ti a.

²⁰Samuelan Israel nham zawng zawng amah hnaih tûra a koh khâwm lai chuan, Benjamin nham chu thlan chhuah a ni ta a.

²¹Benjamin nhamte chu an chhûngkua ang zêla an rawn hnaih laiin Matri chhûngkua chu thlan an ni a. Kisa fapa Saula chu thlan a ni ta a. Ani chu an han koh chuan, hmuh tûr a lo awm lo va.

²²LALPA an han râwn nawn leh a, “Ani chu a lo kal tawh em?” an ti a. LALPA chuan, “Sâwta bungraw zingah sâwn a birû,” a ti a.

²³An va tlân a, chuta ățang chuan an va hruai chhuak a; mipui zinga a han dân chuan a lo sâng filawr luah mai a, a koki khûm pawh an awm lo va.

²⁴Samuela chuan mipui zawng zawng hnênah, “LALPA mi thlan chu en ta che u, amah ang hi an awm em ni?” a ti a. Mipui zawng zawng chuan, “Lal chu dam reng rawh se!” tiin an âu va.

²⁵Samuela chuan mipuite chu lal awm dân leh a tih tûr te a hrilhfiah a, lehkhâbûah a ziaa a, LALPA hmâah a dah ta a. Samuela chuan mipuite chu anmahni in lam țeuhvah a hâwtîr ta a.

²⁶Saula pawh chu Gibeah-ah a hâw a; mi huaisen tak tak, an thînlung Pathianin a khawih tawhten an zui a.

²⁷Nimahsela Beliala* fapate chuan, “Hê mi hian engtin nge min chhandam theih ang?” an ti a. An hmusit a, thilpêk pawh an pe hek lo. Mahse ani chu a ngâwi reng a.

BUNG 11

SAULAN JEBES GILEAD A CHHAN CHHUAK

¹Ammon mi Nahash-a chu a lo thawk a, Jabes Gilead khua chu a rawn hual a; Jabes khuua mi zawng zawng chuan Nahas-a hnênah, “Thuthlung min siampui la, tichuan i rawng kan bâwl ang e,” an ti a.

²Ammon mi Nahas-a chuan, “Thû ka thlunpui dân tûr che u chu hetiang hi a ni: in mitmu ding lam kher chhuah veka, Israel mi zawng zawng tihmualpho hi a ni,” a ti a.

³Jabes khaw upate chuan a hnênah, “Israel ram pumah zualko kan tîrh vek theih nân, ni sarhi chhûng lo ngaichâng rawh. Tûmah min rawn chhantu an awm loh chuan i hnên panin kan lo chhuak ang e,” an ti a.

⁴Zualkote chu Saula khua Gibeah-ah an lo kal a, mipui hriatah thil awm dân chu an hrilh a. Mipuite chu ring takin an ățap ta vak vak mai a.

⁵Saula chu a bâwng rual khalhin, lo ațangin a lo hâw a; Saula chuan, “Engin nge mipuite chu tițap ta vak mai le?” a ti a. Anni chuan Jabes mite thu rawn sawi chu an lo hrilh a.

⁶Chû thû chu a hriat vêleh Pathian Thlarau chu Saula chungah a lo thleng a, a thinur ta êm êm a.

⁷Bâwngpa a talh a, a sâ chu a chan sawm vek a, zualkote chu Israel ram pumah a sem darhtîr a, “Indo tûra Saula leh Samuela te zui duh lo chu, an bâwng chungah hetiang hian tih a ni ang,” tiin a hrilh vek a. Mipuite chuan LALPA chu an hlau ta êm êm a, thu

khat vuain an lo thawk chhuak vek a.

⁸Bezék hmunah chuan a lo chhiar a, Israel fate chu 300,000 an ni a, Juda mite chu 30,000 an ni.

⁹Zualko rawn kalte hnênah chuan, “Jabes Gilead mite hnênah: ‘Naktûk ni sat hunah tanpuina in hmu ang,’ tiin va hrilh rawh u,” a ti a. Tichuan, zualkote chu an hâu a, Jabes mite chu an va hrilh a, an lo lâwm hlê a.

¹⁰Chutichuan, Jabes mite chuan, “Naktûkah in hnênah kan lo chhuak ang a, thâ in tih ang takin min lo ti dawn nia,” an ti a.

¹¹A tûkah chuan Saula chuan mipuite chu pâwl thumah a then a; zîng khawvâr tirhin an riahmun chu an luhchilh a, chhûn nisat hun thlengin Ammon-ho chu an that a. An thah bângte chu pahni leka awm dîn thei lo khawpin an tlân darh vek a.

¹²Mipuite chuan Samuela hnênah, “Tute nge ni, ‘Saulan kan chungah ro a rêl tehlul ang maw?’ titute kha? Chûng mite chu rawn hruai la, kan lo tihlum ang e,” an ti a.

¹³Mahse Saula chuan, “Vawiinah hian tumah tihlum tûr a ni lo ve; vawiinah hian LALPAN Israelte tân chhandamna min thawh chhuahsak ta si a,” a ti a.

¹⁴Samuela chuan mipuite hnênah, “Lo kal ula, Gilgalah lalram i dîn thar leh ang u,” tiin a ko hlawm a.

¹⁵Mipui zawng zawng chu Gilgal-ah an kal a, Saula chu Gilgal-ah chuan LALPA hmâah lalah an siam ta a. Chutah chuan LALPA hmâah remna inthâwina thil te an hlân a, chutah chuan Saula leh Israel mi zawng zawng chu an hlim êm êm a.

BUNG 12

SAULA LALLUKHUM KHUMTIR NIA SAMUELA THUSAWI

¹Samuela chuan Israel mi zawng zawng hmâah: “In thu sawi apiang ka lo ngaihthlâksak che u a, in chungah lal tûr pawh ka siamsak che u a.

²Tûnah lal chu heta hi a awm e, in hmahruaitu chu; kei chu ka upain ka lu a tûak tawh a, en teh u, ka fapate pawh in hnêna an awm hi. Ka naupan lai aţanga vawiin thlengin in hmâ ka hruai thîn a.

³Heta hi ka awm e. LALPA leh a hriakthih hmâah hian ka dik lohna han sawi teh u: Tû bâwngpa nge ka chhuhsaka, tû sabengtung nge ka chhuhsaka, tu nge ka bum? Tûte nge ka lo rah beha, tû hnên aţangin nge khaw hmu lo lêka thamna ka lâk? Ka rûl leh vek ang che u,” a ti a.

⁴Anni chuan, “Min bum lo va, min hrêk bet ngai hek lo; tû hnên aţang mahin eng thil mah i lâksak ngai baw lo ve,” an ti a.

⁵“Ka kutah eng thil mah in hmu lo tih nangni laka thuhretu chu LALPA a ni a, a hriakthiha pawh hi vawiina thuhretu a ni e,” a ti a. Anni chuan, “Ani hi thuhretu chu a ni e,” an ti a.

⁶Samuela chuan mipuite hnênah, “LALPA chu Mosia leh Aarona te châwi kângtu a ni a, Aigupta ram aţanga in thlahtute rawn hruai chhuaktu pawh a ni e.

⁷Chuvângin, LALPAN nangni leh in thlahtute chungah dik taka thil a lo tih dân zawng zawng hi LALPA hmâa ka chhûtpui theihna tûr che u-in ngâwi rengin lo ding mai rawh u:

⁸Aigupta rama Jakoba a luh hnû khân in thlahtute chuan LALPA an âu va, LALPA chuan Mosia leh Aarona te a tîr a, anni chuan in thlahtute chu Aigupta aţangin an hruai chhuak a, hê hmunah hian a chêtîr ta a.

⁹LALPA an Pathian chu an theihngihl a, Hazor sipai hotu Sisera kutah te, Philistia-ho kutah te leh Moab lal kutah te a hralh thîn a; anni chuan an rawn do thîn a ni.

¹⁰Tichuan, LALPA chu an âu va, ‘LALPA kalsana Baala te leh Astorethi te rawng kan lo bâwl avângin kan lo sual ta a ni; tûnah erawh chuan kan hmêlmâte lakah min chhan chhuak rawh, i rawng kan bâwl tawh ang,’ an ti a.

¹¹LALPA chuan kil tina awm in hmêlmâte kut aţanga chhan chhuak tûr che u-in Jerubaala te, Bedana te, Jephthaa te leh Samuela te a rawn tîr a; him takin in awm ta a ni.

¹²Ammon lal Nahas-a chu nangmahni bei tûra a rawn thawk chhuak in hmuha, LALPA in Pathian chu in lala awm reng sî khân nangnin, ‘Ni lo ve, kan chungah lalin ro rêl rawh se,’ in han ti ngat a nih kha.

¹³Chutichuan, in duh tak leh in thlan ngei, in lal chu heta hi a awm ta a. LALPAN lal a siamsak ta che u a nih hi.

¹⁴LALPA chu in tîh dêka, a rawng in bâwla, a thû in âwiha, LALPA thupêkte laka in hel loh baw chuan, nangni leh in chungah rorêltu lal nêl LALPA in Pathian chu in zui zêl thei dawn a ni.

¹⁵Nimahsela, LALPA thû in âwih lohva, LALPA thupêkte in helsan erawh chuan, in thlahtuten LALPA kut an tuar ang khân nangni pawhin in tuar ve ngei ang.

¹⁶“Chutichuan, LALPAN in mithmuha thil ropui tak a tih tûr enin lo ding reng rawh u;

¹⁷Tûn hi buh seng hun a ni lo vem ni? LALPA ka âu vang a, ani chuan khawpui rî leh ruah a rawn tîr ang a; tichuan, nangmahni tâna lal in dîl ta mai hi LALPA mithmuha sualna nasa tak a nihzia in man thiam thei ang,” a ti a.

¹⁸Tichuan, Samuela chuan LALPA a âu va, chumi ni chuan LALPAN khawpui rî leh ruah a rawn tîr a; mipuite chuan LALPA leh Samuela chu an hlau ta êm êm mai a.

¹⁹Mipui zawng zawng chuan Samuela hnênah, “Kan thih loh nân LALPA i Pathian hnênah min dîlsak rawh; keimahni tâna lal kan lo dîl ta kha kan sual belhchhahtu a lo ni reng mai maw!” an ti a.

²⁰Samuela chuan mipuite hnênah, “Hlau suh u. Hê suahsualna hi in lo ti ngei a; mahse LALPA in zui lai hi pên bosan lo ula, in thinlung zawng zawngin LALPA rawng bâwl rawh u.

²¹Thil ho mai mai, hlâwkna pawh nei lo leh mi pawh chhan thei hlei lo lakah pên bosan rêng rêng suh u; engmah lo mai an ni.

²²A hming a ropui êm avângin LALPA chuan a mite chu a phatsan dawn si lo, ama mi ni tûra a lo siam che u hi LALPA lâwm zâwng a ni asin.

²³Chu chang a ni lo, tawngtaşak che u hi ka bânsan teuh lo mai, bânsan ila chu LALPA laka thil sual ti ka ni dawn asin; thil thâ leh kawng dik erawh chu ka zirtîr ang che u.

²⁴LALPA hi tîh phawt mai ula, in thinlung zawng zawngin, thutakin a rawng chu bâwl ula; in tâna a thiltih ropuzia te hi

chhût thîn rawh u. LALPA hi tih phawt mai ula, in thínlung zawng zawngin, thutakin a rawng chu bawl ula; in tâna a thiltih ropuizia te hi chhût thîn rawh u.

²⁵Heti chung pawha in la sual lui cheu a nih chuan, nangmahni leh in lalte nên lam in la boral vek ang,” a ti a.

BUNG 13

DÂN LOVIN SAULA A INTHÂW

¹Saula chuan kum khat ro a han rêl a, Israelte chung a kum hnih ro a rêl leh hnû chuan

²Saula chuan Israel mi 3,000 a thlang chhuak a. Mi 2,000 te chu Mikmas-ah leh Bethel tlangah Saula hnênah an awm a, mi 1,000 chu Benjamin biala Gibeah khuaah Jonathana hovin an awm a. Mi dang zawng chu anmahni in lamah a hâwntîr vek a.

³Jonathana chuan Geba khuaa Philistia sipai hmun chu a bei a, Philistia-ho chuan an lo hria a. Saula chuan ram zawng zawngah tâwtawrâwt a hamtîr a, “Hebrai miten lo hre rawh se!” a ti a ni.

⁴Saulan Philistia sipai hmun a bei tih thû leh, Israelte chu Philistia-ho tân tenawm mai an ni an tih thute chu Israel zawng zawngte chuan an lo hre ta a. Mipuite chu Saula hnênah Gilgal-ah koh khâwm an ni a.

⁵Philistia-ho pawh Israelte bei tûrin tawlailîr 30,000 leh sakawr chung chuang mi 6,000 nên an inpun khâwm a, mipui tam lam chu tuifinriat kama tiauvut ang mai an ni. An rawn thawk chho va, Beth Aven chhak, Mikmasah tanhmun an khuar a.

⁶Israelten dinhmun hlauhawmah an ding tih an han inhmuh chuan (mipuite chu an mangang ruai mai si a), pûkah te, hnim hnawk kârah te, lungpui kârah te, lei kawrawngah te leh khuarkhurumah te an birû a.

⁷Hebrai-mi thenkhat chu Jordan lui kânin Gad leh Gilead ramah te an tlânchhia a. Saula chu Gilgalah a la awm reng a, mi zawng zawng chuan khûr chungin an zui a.

⁸Samuela hun ruat angin ni sarih a lo nghâk a. Nimahsela, Samuela chu Gilgal-ah chuan a lo la kal si lo va; mipuite chu a hnên ata an tlân darh ta a.

⁹Saula chuan, “Hâlrâl thilhlân tûr leh remna thilhlân tûr chu hetah rawn la teh u,” a ti a. Hâlrâl thilhlân chu a hlân ta mai a.

¹⁰Hâlrâl thil a hlan zawh rual rualin Samuela chu a lo thleng a; amah lo hmuaka chibai bûk tûrin Saula chu a va kal chhuak a.

¹¹Samuela chuan, “Eng thil nge i tih tâk?” a ti a. Saula chuan, “Ka hnên aţangin mite an tlân darh ka hmuh khân, i lo kal tûr hun ruata i lo la thlen bawk si loh avâng leh, Philistia-ho lah Mikmas-ah an rawn pung khâwm hmur tawh tih ka hriatin,

¹²Philistia-ho chu min bei tûrin Gilgal an lo thleng têt pawh a, LALPA hnênah tanpui tûra dîlna ka la thlen si lo,’ ka ti a. Chuvângin a tûlnain mi nawr a, hâlrâl thilhlân ka lo hlân ta mai a ni,” a ti a.

¹³Samuela chuan Saula hnênah, “Âthlâk takin thil i lo ti zu nia. LALPA i Pathianin i zawm tûra a pêk, a thupêk che chu i zâwm ta lo a ni a. LALPAN Israelte chung a lalram hi kumkhuaa tihngheh a tum vei nên le.

¹⁴Tûnah zawng i lalram hian a daih rei dâwn ta lo ve. LALPAN ti tûra thû a pêk che i tih loh avângin, LALPA chuan ama thínlung ang pu mi ama tân a zawng a, a mite chung a hotu atân a ruat tawh ngê ngê a ni,” a ti a.

¹⁵Samuela chu a tho va, Gilgal aţang chuan Benjamin biala Gibeah khuaah a chho va. Saula chuan a hnêna awmte chu a chhiar a, zaruk vêt an ni a.

SIPAITE RÂLTHUAM AN NEI LO

¹⁶Saula chu a fapa Jonathana leh an hnêna awm hote nên Benjamin biala Gibeah khuaah an awm a. Philistia-ho chuan Mikmas-ah tanhmun an khuar a.

¹⁷Philistia-ho chu an hmunpui aţangin rûntu tûr pâwl thumin an lo thawk chhuak a. Pâwl khat chuan Ophrah kawngah, Shuala ram chhûng lam an pan a,

¹⁸pâwl khat dang chu Beth Horon kawngah an kal a, pâwl dang leh chuan thlâlêr lam panna, Zeboim Ruam lam hawi ramri kawng an zawh a.

¹⁹Philistia-ho chuan, “Hebrai mite hian khandaih leh fei te an chher palh ang e,” an tih avângin Israel ram pumah thîrchher pawh hmuh tûr rêng rêng an awm lo va.

²⁰Israel mi zawng zawng chuan an bâwngtuthlawh te, leilehna lungrâl te, hreipui te, favah te tah hriamtîr tûrin Philistia mite chu an zu pan thîn a;

²¹bawngtuthlawh leh leilehna lungrâl te, thîrkut te, hreipui te leh chhunting zum tahhriam man chu pim* khat zêl a ni a.

²²Chuvângin an indo nîah pawh Saula leh Jonathana hnêna awm tûma’n khandaih emaw, fei emaw an nei lo. Saula leh a fapa Jonathana te chauhvîn an nei a.

²³Philistia sipaite chu Mikmas kalkhân lamah an kal a.

BUNG 14

JONATHANAN PHILISTIA-HO A HNEH

¹Ni khat chu Saula fapa Jonathana chuan a râlthuum kengtu tlangvâl hnênah, “Hawh teh, râl lehlama Philistia sipai riahhmunah sâwn i va lût teh ang,” a ti a. A pa chu a hrilh lo va.

²Saula chu Gibeah khawfê, Migron hmuna theibuhfai kûng hnuaiah a tûa a. A hnêna mi awm te chu mi zaruk vêt an ni a.

³Silo khuaa LALPA puithiam, Elia fapa Phinehasa fapa, Ikaboda unau, Ahituba fapa Ahija chu puithiam kawr hân a awm vê a. Mahse Jonathana a kal ta daih tih chu tûma’n an hre lo.

⁴Jonathanan Philistia sipai riahhmuna kal kâi a tumna sîr tawn tawnah chuan lung tohlâwt hriam a awm vê vê a. Pakhat hmîng chu Bozez a ni a, a pakhat dang hmîng chu Seneh a ni.

⁵Pakhat chuan hmar lama Mikmas lam a ep a, a pakhat zâwk chuan chhim lama Gibeah a ep a.

⁶Jonathana chuan a râlthuum kengtu tlangvâl hnênah chuan, “Ti rawh le, hêng serhtan loh-ho riahhmunah sâwn i va kal teh ang; LALPAN thil min tihsak hlauh mai thei asin. LALPAN min chhandam dâwn chuan tam leh tlêmin kawngro a su lo vang,” a ti a.

⁷A râlthuum kengtu chuan a hnênah, “I thinlunga a lo awm dân apiang chu ti mai rawh. Kal la, i rilru ang takin ti la, ka thlâwp zêl ang che,” a ti a.

⁸Jonathana chuan, “A thâ e, hênggho awmnaah hian va kâi ila, an hmaah kan va inlan tûr a ni.

⁹In hnêna kan lo kal hmâ chu lo nghâk rawh u,’ an lo tih chuan, kan awmna hmunah kan ding reng ang a, kan chho lo vang.

¹⁰Amaherawhchu, ‘Kan hnênah lo chho rawh u’ an tih chuan kan chho dâwn nia. Chû chu, LALPAN kan kutah min pe tawh tih chhinchhiahna ni rawh se,” a ti a.

¹¹Tichuan, an pahnih chuan Philistia sipai awmnaah chuan an han inlan ta a. Philistia-hote chuan, “En teh u, Hebrai-ho hi an tawmrûkna kua aţangin an lo chhuak ta a nih hi,” an ti a.

¹²Riahhmuna mite chuan Jonathana leh a râlthuum kengtu hnênah chuan, “Kan hnênah lo chho rawh u, thil kan lo entîr ang che u,” an ti a. Jonathana chuan a râlthuum kengtu hnênah chuan, “Mi rawn zui rawh le, LALPA chuan Israelte kutah a pe ta e,” a ti a.

¹³Jonathana chu kut leh kê thawhin a vâk chho va, a hnungah a râlthuum kengtûin a zui a; Jonathana hmâah chuan an tlu zawih zawih a, a râlthuum kengtu chuan a rawn that zêl a.

¹⁴Jonathana leh a râlthuum kengtûin tîn chanve hmun leka zau chhûnghah mi sawmhnih an that a.

¹⁵Tichuan, sipaiho zawng zawng, riahhmun chhûnga awm te, phûla awm zawng zawngte chu an vaiin an khûr a. Râlvêng sipaite leh râl hmatâwnghote pawh an khûr bawk a; lîr a lo nghîng leh ta nghâl a, namên lovin an khûr ta chiam mai a.

¹⁶Benjamin biala Gibea khuaa Saula râlvêngte chuan an han thlîr a, mipui mangang chu an lo t̄eh darh chum chum a; lehlah lehlamah an zi nuk nuk a.

¹⁷Saula chuan a hnêna mipui awm te hnênah chuan, “Han inchhiar ula, kan hnên aţangin tu nge kal bo han hre teh u,” a ti a. An han inchhiar chuan, rin loh takin Jonathana leh a râlthuum kengtu chu an lo awm lo va.

¹⁸Saula chuan Ahija hnênah, “Pathian thuthlung bâwm hetah han la teh,” a ti a (chutih lai chuan Pathian thuthlung bâwm chu Israel fate hnênah a awm a).

¹⁹Saulan puithiam a la biak lai chuan, Philistia-ho riahhmuna thâwm rî chu a ring tial tial a; Saula chuan puithiam hnênah, “Dah kîr leh mai rawh,” a ti a.

²⁰Saula leh a hnêna mipuite chu an awm khâwm vek a, indo tûrin an thawk ve ta a; an lo chî-aî nasa khawp a, anmahni leh anmahni chu khandaihin an lo inbei nuaih nuaih a.

²¹Chû bâkah, Hebrai mi, chulai ram leh a chheh vêla mi, tûn hmâa Philistiaho lama t̄ang leh an riahhmuna awm vête chu Saula leh Jonathana hnêna awm Israel mite lamah an t̄ang ta hlahu va.

²²Chutiang bawkin, Ephraim tlângrama birû Israel mi zawng zawng chuan Philistia-ho an tlânchhia tih an lo hria a, indo tûrin an lo chhuak a, an ûm ve ta ngat ngat a.

²³Tichuan, chumi nî chuan LALPAN Israelte a chhandam a, indona chu Beth Aven lamah a insawn ta a.

SAULA THUTIAM ÂTTHLÂK

²⁴Chumi nî chuan Israelte chu an mangang hlê a, Saulan mipui zawng zawng chu thutiam hnuaiah khuahkhirhin, “Kan hmêlmâte laka phubâ kan lâl hmâ leh khawthim hmâa chaw ei chu ânchhe dawngin awm rawh se,” a ti a. Chuvângin tûma’n chaw rêng rêng an ei lo.

²⁵Mipuite chuan ramhnuai an va thleng a; leiah chuan khawizû te a lo awm a.

²⁶Ram ngaw chhûnga mipuite an va kal chuan, khawizûte chu a lo luang a; mahse chhechhamna thû an hlahu avângin tûma’n an kut pawhin an pir ngam lo.

²⁷Jonathana erawh chuan a pain thutiam hmangin mipuite a phuar vek tih kha a hre vê si lo va; a tiang hmawrin khawithlâr chu a chhun a, a han ei chuan a lo harh sawt a.

²⁸An zînga mi pakhat chuan, “I pain thutiam hmangin khauh takin min vau va, ‘Vawîina chaw ei apiangin ânchhia dawng rawh se,’ a ti,” a ti a. Mipuite chu an chau hlê mai si a.

²⁹Jonathana chuan, “Ka pa hian mite tân harsatna a siam mai mai zu nia. En teh u, hê khawizû hi tlêm tê chauh ka tem pawhin ka lo meng harh sawt a ni a.

³⁰Kan hmêlmâte thil kan hmuh apiang kha duh tâwkin mipuite hian ei ta se an t̄atpui zâwk dâwn tehrêng nê! Tûnah te hian Philistia-ho chu kan that hnem zâwk daih tawh lo vang maw?” a ti a.

³¹Chumi nî chuan Philistia-hote chu Mikmas aţangin Aijalon thlengin an nawr kîr a. Mipuite chu an chau hle mai a.

³²Râllâk thil te chu an bawh pawp pawp a, berâm te, bâwngpa te leh bâwng no te chu leiah chuan an talh a; a sate chu a thisen chawpin an ei tawp tawp a.

³³Saula chu an hrilh a, “En teh, mipuiten sâ a thisen chawpa eiin LALPA lakah thil sual an ti e!” an ti a. Ani chuan, “Verther takin thil in ti a nih chu; wawîinah hian lung lian tak mi han lâl teh u,” a ti a.

³⁴Saula chuan, “Mipui zîngah vak darh ula, ‘In bâwngpate leh in berâmte chu hetah rawn kai ula, in talh ang a, in ei dâwn nia; LALPA laka thil sual ti tûrin a thisen chawp chuan ei suh u,’ tîin hrilh rawh u,” a ti a. Chumi zân chuan mi tinin an bâwngpa te an rawn kâi a, chutah chuan an talh a.

³⁵Saula chuan LALPA tân maichâm a siam a. Chû chu LALPA tâna a maichâm siam hmasak ber a ni.

³⁶Saula chuan, “Zânah hian Philistia-ho chu bei zui ila, zîng khawvâr thlengin i rawk ang u; tûmah kan zuah dâwn lo nia,” a ti a. Anni chuan, “Thâ i tih ang zêlin ti mai rawh,” an ti a. Puithiam chuan, “Hetah hian Pathian i hnaih phawt ang u,” a ti a.

³⁷Saula chuan Pathian a râwn a, “Philistia mite chu ka bei zêl ang em? Israelte kutah i pe dâwn em?” a ti a. Mahse chumi ni chuan a chhâng lo.

³⁸Saula chuan, “Mipui hotu zawng zawngte u, lo kal khâwm ula, wawîinah hian eng kawngah nge kan lo sual t̄ak hriat chhuah i tum ang u.

³⁹Israelte nunna chhanhimtu LALPA hming chhâlin, ka fapa Jonathana pawhin thil sual a ti a nih chuan, a thi ngei tûr a ni,” a

ti a. Nimahsela, mipui zîng aţangin tûma'n an chhâng lo.

⁴⁰Israel mi zawng zawng hnênah chuan, “A nih leh, nangni lehlamah ţang ula, kei leh ka fapa Jonathana hi a lehlamah kan ţang ang e,” a ti a. Mipuite chuan Saula hnênah, “Thâ i tih ang takin ti mai rawh,” an ti a.

⁴¹Saula chuan LALPA Israelte Pathian hnênah, “A dik tak chu han tilang ang che,” a ti a. Thumvâwr chu Saula leh Jonathana te chungah a tlâ a, mipui lam an fihlîm thung a.

⁴²Saula chuan, “Kei leh ka fapa Jonathana inkârah thum vâwr rawh u,” a ti leh a. Jonathana chungah a tla ta a.

⁴³Saula chuan Jonathana hnênah, “Eng thil nge i tih min hrilh rawh,” a ti a. Jonathana chuan a hrilh a, “Ka tiang hmâwra khawizu kai chu ka tem hlek chauh a ni. Chuvângin ka thi mai tûr a ni!” a ti a.

⁴⁴Saula chuan, “Jonathan, i thi ngei tûr a ni; Pathianin a duh dân dânin min ti rawh se, chu aia nasa pawhin,” a ti a.

⁴⁵Nimahsela, mipuite chuan Saula hnênah, “Israel ram chhan chhuaktu ropui Jonathana hi a thi ang maw? A teuh lo mai! LALPA nung renga hmingin, a samzai khat pawh leiah a tla lo vang, wawiinah hian Pathian nên an ţang dîn asin,” an ti ta dual mai a. Tichuan, mipuiten Jonathana chu an chhan a, tihhlum a ni ta lo va.

⁴⁶Saula chuan Philistia mite a ûmzui lai chu a kîrsan a, Philistia-ho pawh anmahni ram lamah an hâu ta a.

SAULAN RÂL A DO ZÊL

⁴⁷Saula chuan Israelte chungah a thuneiha a sawh nghet sauh sauh va, kil tina a hmêlmâ—Moab mi te, Ammon mi te, Edom mi te, Zoba lal te leh Philistia mite chu a do zêl a. A hawina lam apiangah a hneh zêl a.

⁴⁸Sipaite a khâwm a, Amalek-ho a do va, anmahni rawktute kut aţangin Israel mite chu a chhan chhuak a.

⁴⁹Saula fapate chu Jonathana te, Jisui a te leh Malkisua te an ni. A fanu pahnihte hming chu hêng hi an ni: a upa zâwk chu Merabi a ni a, a naupang zâwk hming chu Mikali a ni.

⁵⁰Saula nupui hming chu Ahinoami a ni a, Ahimaaza fanu a ni. A sipai hotu hming chu Abnera a ni a, Saula pami, Nera fapa a ni.

⁵¹Saula pa chu Kisa a ni a, Abnera pa Nera chu Abiela fapa a ni.

⁵²Saula dam chhûng zawng chu Philistia-ho nêna nasa taka indonain a khat a. Saula chuan mi chak tak emaw, mi huaisen deuh emaw a hmuh phawt chu a hnêna thawk tûrin a la zêl a.

BUNG 15

SAULAN LAL AGAG-A A ZUAH

¹Samuela chuan Saula hnênah, “LALPAN a mi Israelte chungarorêltu atâna hriak thih tûr che-in mi tîr a. Chuvângin LALPA âw hi ngun takin ngaithlâ ang che.

²Sipaihote LALPA chuan heti hian a ti: ‘Aigupta aţanga Israelte lo chhuah laia kawng laka an lo beih buai êm avângin Amalek-ho hi ka hrem dâwn a ni.

³Tûnah kal la, Amalek-ho chu va bei la, an thil neih zawng zawng tiboral vek la, engmah zuah suh ang che. A hmei a pain,

naupang leh hnute hne lai chenin, bâwngpa leh berâm te, sanghâwngsei leh sabengtung te nên that vek rawh,’ a ti a che,” a ti a.

⁴Tichuan, Saula chuan mipuite chu a khâwm a, Telaim khuaah a chhiar a, sipai 200,000 leh Juda mi 10,000 an ni a.

⁵Saula chuan Amalek khua a va thleng a, ruamah chuan lambun tumin an lo châng a.

⁶Saula chuan Ken-ho hnênah, “Kal kiang ula, Amalek-ho zîng ata inthiarfihlîm rawh u, chuti lo zawng ka tiboral vê palh ang che u. Nangni chuan Israel fate Aigupta ram aţanga an lo chhoh lai khân khawngaihna in lo lantîr si a,” a ti a. Tichuan, Ken-ho chuan Amalek-ho chu an chhuahsan ta a.

⁷Saula chuan Amalek-ho chu Havila aţanga Aigupta chhak lama awm Sur kawng thlengin a bei ta a.

⁸Amalek lal Agag-a chu a nung chungin a man a, chuta awm mipuite chu khandaihin a rawt chimit vek a.

⁹Nimahsela, Saula leh a mite chuan Agag-a leh an berâm thâ thâ te, bâwngpa thâu thâu te, berâm note leh an thil neih zînga a ţha ber ber chu a zavaia tihboral vek an phal lo va. A ţha lo leh tlâktlai lo deuhthe erawh chu an tiboral vek a.

SAULA LALNA HNÂWL A NI

¹⁰LALPA thû chu Samuela hnênah a lo thleng a,

¹¹“Lal atâna Saula ka lo siam ta chu pawl ka ti hlê mai, kei mi zui lovin mi hnuchhawn a, ka thupêkte pawh a zâwm hek lo,” a ti a. Chû chuan Samuela chu a tilungngai ta êm êm a, zankhuain LALPA a âu va.

¹²A tûkah chuan Samuela chu Saula hmuak tûrin hmâ takah a tho va, miten, “Saula chu Karmel-ah a kal a, ama tân hriatrengna lung a phun a; a kal kual zêl a, Gilgalah a chhuk ta,” tiin Samuela chu an hrilh a.

¹³Samuela chu Saula hnênah chuan a kal a, Saula chuan a hnênah, “LALPAN malsâwm che rawh se! LALPA thupêk ang takin ka ti ta e,” a lo ti a.

¹⁴Mahse Samuela chuan, “Chû, berâm bê leh bâwng bû thâwm ka hriat te chu eng nge ni ta?” a ti a.

¹⁵Saula chuan, “Amalek mite tâ an rawn lâksak a ni e; LALPA i Pathian hnêna inthâwi nân mipuiten berâm leh bâwng thâ thâ an zuah a; a dang zawng chu kan tiboral vek a ni,” a ti a.

¹⁶Samuela chuan Saula hnênah, “Ngâwi rawh! LALPAN nizâna ka hnêna a sawi chu ka hrilh ang che,” a ti a. Ani chuan, “Sawi ta che,” a lo ti a.

¹⁷Samuela chuan, “Nangma ngaiha te tak têa i inhmuh lai khân, Israel hnam hotu i ni tho lo'm ni? LALPAN Israelte lal atân hriak a thih che a ni lo vem ni?”

¹⁸LALPA chuan tih tûr pên a tîr chhuak che a, ‘Kal la, Amalek mi sualho chu va that vek la, an boral zawh vek hmâ chu bei rawh,’ a ti che a.

¹⁹Engvângin nge LALPA âw chu i zawm loh? Engvângin nge râllâk thil chu i chuh vê tâka, LALPA mithmuha thil sual i tih tâk?” a ti a.

²⁰Saula chuan Samuela hnênah, “LALPA thú ka zâwm alâwm, LALPA mi tirhna lamah kalin Amalek lal Agaga pawh ka rawn man a; Amalek mite pawh ka that fai vek a ni.”

²¹Amaherawhchu, mipuiten râlâk thil, berâm te, bâwngpa te leh tihbora vek tûr zînga a thâ thâ chu LALPA i Pathian hnêna Gilgala i hlan atân an rawn lâ a ni,” a ti a.

²²Samuela chuan: LALPA chuan hâlral thilhlân inthâwina aiin LALPA thu âwih chu a lâwm zâwk dâwn lo vem ni? Ngai teh, inthâwina aiin thuâwihna a tha zâwk a, Berâmpa thâu aiin a thu zawm a tha zâwk a ni.

²³Helna hi dâwithiamna sual nêna inang reng a, Luhulna hi suahsualna leh mîlem biakna ang a ni. LALPA thú i hnâwl tâk avângin Ani pawhin lal i nihna a hnâwl vê a che,” a ti a.

²⁴Saula chuan Samuela hnênah, “Ka lo tisual ta a nih chu: mipuite ka hlauhthâwna, an thú ka ngaihcân luatah LALPA thupêk leh nangmâ thú ka bawhchhiat phah ta a nih chu.

²⁵Chuvângin, ka sualna hi khawngaih takin min ngaidam la, LALPA chibai ka bûk theih nân min hâwnpui leh hrâm rawh,” a ti a.

²⁶Nimahsela, Samuela chuan Saula hnênah, “Ka hâwpui hlek lo vang che, LALPA thú i hnâwl tâk avângin LALPA pawhin Israelte lal i nihna aţangin a hnâwl tawh a che,” a ti a.

²⁷Samuelan kalsan tuma a han inher lai chuan Saula chuan a puan fêm chu a lo chelh ţawk ţawk a, a thlêr ta a.

²⁸Samuela chuan a hnênah, “Vawiin aţang hian LALPAN Israel lalram chu i hnên aţangin a ţhen darh ta a, nang aia thâ, i ţhenawm hnênah a pe ta.

²⁹Israel Michaka chu a daw lo vang a, a inlamlêk hek lo vang. Mihring ang leka inlamlêk chî a ni vê lo,” a ti a.

³⁰Ani chuan, “Ka lo sual ta a ni; mahse, ka mite zînga upate leh Israelte hmâah hian kei mi zahderna tal han tilang leh hrâm teh, LALPA i Pathian chibai ka bûk theih nân khawngaih takin mi hâwnpui leh lul rawh,” a ti a.

³¹Samuela chuan a hâwnpui a, Saula chuan LALPA chu chibai a bûk ta a.

³²Samuela chuan, “Amalek lal Agaga chu ka hnênah rawn hruai teh u,” a ti a. Agag-a chu tím deuhin a lo kal a. Agag-a chuan, “Thih hlauhawm lai chu ka kal pêl tawh êm ang chu,” a ti a.

³³Samuela erawh chuan, “I khandaihin hmeichhe tam tak fa nei lova a siam ang bawkin i nu chu hmeichhe fa nei lo zîngah awm ve rawh se,” a ti a. Gilgal hmuna LALPA hmâah chuan Samuela chuan Agag-a chu a sât sawm ta vek a.

³⁴Samuela chu Rama khuah a kal ta a, Saula pawh ama chênna Saula khuah Gibeah a chho ta a.

³⁵Samuela chu a thih thlengin Saula hmu tûrin a kal ngai tawh lo. Chutichung chuan Saula avângin Samuela chu a lungngai takzet a, LALPA lahin Israelte lal atâna Saula a lo siam ta chu pawî a ti êm êm a.

BUNG 16

LAL ATAN DAVIDA HRIAK THIH

¹LALPA chuan Samuela hnênah, “Israel lal a nihna aţanga ka hnâwl tawh tih hre reng chungin Saula avâng hian engchen nge lungngaia i kûn dâwn? I hriak dahna kî-ah hriak thun khat la, kal rawh; Bethlehem mi Jesaia hnênah ka tîr ang che. A fapate zînga mi lal atân ka ruat diam tawh a ni,” a ti a.

²Samuela chuan, “Engtin nge ka kal theih ang? Saulan hria se mi that duh mai ang asin,” a ti a. Mahse LALPA chuan, “Bâwng lâ kâi la, ‘LALPA hnêna inthâwi tûrin ka kal a ni,’ i ti ang a.

³Chû inthâwinaah chuan Jesaia sâwm la, i tih tûr chu ka hrilh zêl ang che; a hming ka lam apiang chu hriak i thih tûr a ni,” a ti a.

⁴Samuela chuan LALPA sawi angin a ti a, Bethlehem-ah a kal ta a. Khuah upaten a lo kal tih an hriat chuan an lo khûr a, “A muanawm zâwng a lo kal i ni êm ang chu mâw?” an lo ti a.

⁵Ani chuan, “A muanawm zâwng ni e; LALPA hnêna inthâwi tûra lo kal ka ni e. Intithianghlim ula, inthâwinaah lo kal vê rawh u,” a ti a. Jesaia leh a fapate chu a thian thianghlim a, inthâwinaah chuan a sâwm a.

⁶An lo kal khâwm lai chuan, Eliaba chu a lo en reng a, “LALPA hmâa mi hi a hriak thiha chu a nih ngei dâwn hi!” a ti a.

⁷LALPA chuan Samuela hnênah, “A hmêl lan dân leh a pianhmang lam ngawt en suh, ani hi chu ka duh lo. LALPA chuan mihring hmuh dân angin a hmu vê si lo; mihring chuan pâwn lam lan dân a thlîr a, mahse LALPA chuan thinlung lam a ni a en zâwk ni,” a ti a.

⁸Jesaia chuan Abinadaba a ko leh a, Samuela hmâah chuan a inlantîr a. Ani chuan, “Hei pawh hi LALPA thlan a ni lo,” a ti a.

⁹Jesaia chuan Samma a va kaltîr a. Ani chuan, “Hei pawh hi LALPA thlan a la ni lo fo mai,” a ti a.

¹⁰Jesaia chuan a fapa pasarihte chu Samuela hmâah a inlantîr vek a. Samuela chuan Jesaia hnênah, “LALPAN hênggho hi a thlang lo,” a ti a.

¹¹Samuela vekin Jesaia hnênah, “Hetah hian i fate an awm kim em?” a ti a. Ani chuan, “A naupang ber a la awm a, berâm a vêng a ni,” a ti a. Samuela chuan Jesaia hnênah, “Va kohtîr rawh. Ani lo thlen hmâ chu kan ţhu lo vang,” a ti a.

¹²Tichuan, a va kohtîr a, an rawn hruai a. Ani chu sâr veng vawng, mitmeng êng sâr, hmêl tha tak a ni. LALPA chuan, “Tho la, he mi hi hriak chu thih rawh; hei ngei hi a ni e!” a ti a.

¹³Samuela chuan hriak dahna kî chu a lâ a, a unaute hmâah chuan a thih ta a; chumi ni aţang chuan LALPA Thlarau chu Davida chungah a lo thleng ta a ni. Samuela chu a tho va, Rama khuah a kal ta a.

THLARAU SUALIN SAULA A TIBUAI

¹⁴LALPA Thlarau chuan Saula chu a chhuahsan a, LALPA tîrh thlarau sualin a tibuai ta a.

¹⁵Saula chhihhlawhte chuan, “Pathian rawn tîrh thlarau sualin a tibuai ta che a nih ngei hi.

¹⁶Kan pu hian a chhiahhlawhte hi ƣingƣang tum thiam min zawntîr sela; tichuan, Pathian hnêna mi thlarau sualin arawn khawih che apiangin ani chuan ƣingƣang a tum ang a, i ƣha leh mai ang,” an ti a.

¹⁷Saula chuan a chhiahhlawhte hnênah, “Chutiang tum thiam chu va zawnɡ ula, ka hnênahrawn hrui ta che u,” a ti a.

¹⁸Chhiahhlawh zînga pakhat chuan, “En teh, Bethlehem mi Jesaia fapa ka hmu tawh asin, ƣingƣang tum thiam tak, mi chak huaisen, râlđo mi, thu sawi thiam, hmêlƣha tak a ni; LALPAN a awmpui baw si a,” a ti a.

¹⁹Tichuan, Saula chuan Jesaia hnênah mi a tîr a, “I fapa Davida, berâm vênga awm chu ka hnênahrawn tîr rawh,” a ti a.

²⁰Jesaia chuan chhang te, uain bûr leh kêl no pakhat chu sabengtung chungah a hlâng a, Saula hnêna pêk atân a fapa Davida chu a kentîr a.

²¹Davida chuan Saula hnên a va thleng a, a hmâah a dîng a. Ani chuan a lo ngaina hlê mai a, a râlthuan kengtûah a ƣang ta a.

²²Saula chuan Jesaia hnênah, “Davida hian ka mit a tlung riau mai a, ka hnênah awm rawh se,” a ti a.

²³Tichuan, Pathian tîr thlarau sualin Saula a tihbui apiangin Davida chuan ƣingƣang a lâ a, a tum ƣhîn a. Tibuaitu thlarau sual chuan a chhuahsan a, Saula chu a lo harh a, a dam leh ƣhîn a ni.

BUNG 17

DAVIDA LEH GOLIATHA

¹Philistia-hote chuan indo tûrin an sipaite an ko khâwm a, Juda ram chhûnga Soko-ah an kal khâwm a; Ephes Damim biala Soko leh Azeka inkârah hmun an khuar a.

²Saula leh Israel mipuite pawh an inko khâwm a, Ela Ruamah an inkulh baw a, Philistia-ho do tûrin ƣanhmun an khuar a.

³Philistia-ho chu tlâng pangah an awm a, Israel-ho chu a ep tlâng lehlamah an awm a, an inkârah ruam a awm a.

⁴Philistia sipai hmunpui aƣang chuan an mi chak chhuanvâwr, a hming Goliatha, Gath khuua mi, tawng ruk leh khâp khata sâng chu arawn chhuak a.

⁵Dâr lukhum a khum a, thîrkawr a hâ a, a thîrkawr rih zâwnɡ chu dâr sekel 5,000 lai a ni a.

⁶A ngalah dâr ngalphâw a vuah a, a hnungah dârfei a thiat a.

⁷A fei ngul chu puantahtute themkawl ang hi a ni a, a fei kibâr thîr rih zâwnɡ chu sekel 600 a ni a; a phaw kengtu chu a hmâah chuan a kal a.

⁸A dîng luah mai a, Israel sipaite chu tihian a han au va, “Engah nge indo tûra in inzâr darh le? Nangni Saula chhiahhlawhte u, kei hi Philistia mi ka ni lo vem ni? In zînga mi kharawn inthlang chhuak ula, mi bei tûrin lo kal rawh se.

⁹Mirawn beituin mi tihlum theih chuan, in chhiahhlawhah kan ƣang nâng e. Nimahsela, keiin hnehna ka chana, ka thah erawh chuan kan chhiahhlawhah in awm ang a, kan rawng in bawl ang,” tiin.

¹⁰“Vawiinah hian Israel sipaiho hi ka cho a che u; mi ngam chu lo kal sela, kan lo inbei ang chu le,” tiin chu Philistia mi chu a au

lûng lûng a.

¹¹Saula leh Israel mi zawnɡ zawnɡten chû Philistia mi thu sawi an han hriat chuan an zâm chhe dêr a, an hlau êm êm mai a.

¹²Davida chu Judai ram Bethlehem khuua Ephrath mi, Jesaia fapa a ni a, ani chuan fa pariat a nei a. Saula hun lai chuan tar tak, kum upa tak a ni tawh a.

¹³Jesaia fa û mipa pathumin indonaah Saula hnung an zui a. A fapa pathum indonaa tel hming te chu, a upa ber Eliaba te, a dawttu Abinadaba leh a pathumna Samma te an ni.

¹⁴Davida chu a naupang ber a. A upa lam pathumte chuan Saula an zui a.

¹⁵Davida erawh chu Saula hnên aƣang Bethlehem a pa berâm vênpu tûrin a hâw pheizauh zauh ƣhîn a ni.

¹⁶Chû Philistia mi chu ni sawmli chhûng tûk tin leh tlai tinin arawn kal hnâi a, arawn inlan ƣhîn a.

¹⁷Jesaia chuan a fapa Davida hnênah, “Mîm kan-ro epha khat leh chhang tlâwn sâwm hi i ûte hnênah, an riahhmunah va tlânpu rawh.

¹⁸Hnute khal tlang sâwm hi sâng hotu kensak baw ang che; i ûte chu engtin nge an awm tih an chanchinrawn hria ang che,” a ti a.

¹⁹Saula leh anniho chu Israel mi zawnɡ zawnɡ nêna Ela Ruamah Philistia-ho bein an awm a.

²⁰Davida chu zîng takah a tho va, berâmte chu a vêngtu kutah a kawltîr a, a pa Jesaia thupêk angin a thil kente nêna chuan a kal ta a. An riahhmun a va thlen chuan sipaiho chu âu dur dur chungin râl bei tûrin an lo chhuak mêk a.

²¹Israel-te leh Philistia-ho chu indo tûra ƣanhmun insiamin, sipai leh sipai chu an inep ƣup mai a.

²²Davida chuan a ei tûr ken chu vêngtu kutah chuan a dah a, sipaiho zîngah chuan a va tlân a, a ûte chu a va chibai a.

²³An inbiak lai chuan Philistia mi chhuanvâwr, Gath khaw mi Goliatha chu, Philistia sipaiho zîng aƣang chuan a lo chhuak a; a thu sawi ngai chu sawiin arawn âu leh a. Chû chu Davida chuan a lo hria a.

²⁴Israel mi zawnɡ zawnɡ chuan chû pa chu an hmuh chuan hlauvin an tlanchhia a.

²⁵Israel mite chuan, “Khâ pâ, tûna lo chhuak kha i lo hmu em? Israelte cho tûra lo chhuak a nih kha; khâ mihring kha a that thei apiang chu lalin hausak lawihna thamin a vûr ang a, a fanu a neihtîr baw ang a, an chhûngkaw pa ber hovin Israel ramah chhiah an âwl baw ang,” an ti a.

²⁶Davida chuan a bula dîngte hnênah, “Hê Philistia mi hi thata, Israelte mualphona la kiang theitu chu engtia tih tûr â ni? Hê serhtan loh Philistia mi hi tu nge maw a niha, Pathian nung sipaite a han cho ngam vei chu le?” a ti a.

²⁷Mite chuan tihian an chhâng a, “A tihlumtu apiang chu kan sawi tâk ang kha tihsak a ni ang,” an ti a.

²⁸Chutia mite hnêna a thu sawi chu an upa ber Eliaban a lo hria a; Eliaba chu Davida lakah chuan a ƣhîn a ur ta hlê mai a, “Eng vânga lo chhuk thla ve rawk nge i nih? Thlalêra berâm tlêm

tê kha tu nge i rawn vêtîr? Indo en tûr tea i lo kal mai mai, i chapožia leh i luhlulzia hi ka hai hlei nê̄m,” a ti a.

²⁹Davida chuan, “Eng thil nge ka tih le? A chhan a awm a ni lo’ m ni?” a ti a.

³⁰Tichuan, mi dang hnên lam a hawisan a, a sawi ngai baw k a sawi leh a; chûng mite pawh chuan a hmâa mi sawi ang bawkin an lo chhâng leh a.

³¹Davida thu sawi hriate chuan Saula an va hrilh a; ani chuan a ko ta a.

³²Davida chuan Saula hnênah, “Hê pa vâng hian tûmah zâm suh se; i chhiahhlawh hian hê Philistia mi hi ka va bei ang e,” a ti a.

³³Saula chuan Davida hnênah, “Nang êm zawngin hê Philistia mi hi i bei thei lo vang; tleirâwl mai i la ni a, ani chu a tleirâwl lai aţang tawha râl do mi a ni asin,” a ti a.

³⁴Mahse Davida chuan Saula hnênah, “I chhiahhlawh hian a pa berâmte a vêng thîn a, sakeibaknei te, sawawmten ran rual zînga mi an rawn lâk te hian

³⁵ka ûm a, ka vaw hrep a, an kâa mi pawh ka chhuhsak thîn asin; min rawn beih chuan, an baksamah ka tşâm lawk a, ka tşuai a, ka that tşîn a ni.

³⁶I chhiahhlawh hian sakeibaknei leh sawawm a that vê vê tawh a; hê serhtan loh Philistia mi pawh hi chuti tho tûr chu a ni ang, Pathian nung sipaite a han cho rêng rêng mai chu le,” a ti a.

³⁷Davida chuan, “Sakeibaknei leh sawawm kutbâwr laka min chhan chhuaktu LALPA chuan, hê Philistia pa kut aţang pawh hian min chhan chhuak ngei ang,” a ti a. Saula chuan, “Nih leh, kal ta che le, LALPAN awmpui che rawh se!” a ti a.

³⁸Saula chuan Davida chu ama râlthuaamin a han thuam a, dâr lukhum a khumtîr a; thîrkawr a hâktîr baw k a.

³⁹Davida chuan a thîrkawr hâk chungah chuan khandaih a pâi baw k a, kal a han tum chhin a, a lo la ti ngai si lo va. Davida chuan Saula hnênah, “Ka thiampui hauh lo mai, kal pawh ka kalpui thei lo ve,” a ti a. Davida chuan a hîp a.

⁴⁰A tiang a hawl a; kawr kama tşiau lung mûm tşha deuh pangâ a chhar khâwm a, a berâm vên iptê-ah a ak a, a virvawm chu a keng a. Chû Philistia mi chu a va pan hnai a.

⁴¹Philistia mi pawh chu a lo kal a, Davida chu a rawn hnaih tşan a, a phaw kengtu chu a hmâah a kal a.

⁴²Philistia mi chu a han hawi vêl a, Davida a hmuh chuan a ngainêp hlê mai a; ani lah chu râwlthar vê mai, hmâi tai tîk têk, hmêlţha ving veng hi a ni reuh si a.

⁴³Philistia mi chuan Davida hnênah, “Uicho ka ni em ni, tiang nêna i lo kal tâk?” a ti a. Philistia mi chuan a pathiante hming chhâlin ânchhia a lo lawh a.

⁴⁴Philistia mi chuan Davida hnênah, “Lo kal teh, i sâte kha chunglêng savâte leh ramsâte châw atân ka lo pe teh ang!” a ti a.

⁴⁵Davida chuan Philistia mi hnênah, “Nang kha, khandaih te, fei kibâr leh fei zum te nê̄n i lo thaw k a. Kei chu i cho êm êm Israelte Pathian, Sipaihote LALPA hminga lo kal ka nih hi.

⁴⁶Vawiinah hian nang hi ka kutah LALPAN min pe dâwn a, ka that ang che a, i lû ka lâ ang. Israelte hnênah Pathian a awm tih leilung zawng zawngin an hriat theih nân, vawiinah ngei hian Philistia sipaiho ruangte hi chunglêng savâte leh ramsâte châw atân ka pe dâwn a ni.

⁴⁷LALPAN khandaih leh fei hmangin a chhandam kher lo tih heta pung khâwmho zawng zawngte hian an hria ang; indona chu LALPA indona a ni a, nang hi kan kutah min pe dâwn a ni,” a ti a.

⁴⁸Philistia mi chuan Davida chu a pan hnai a, Davida pawh chû Philistia sipai tâwk tûr zâwng chuan a tîlân vat a.

⁴⁹Davida chuan a iptêa mi lung a phawrh a; a virvawmin chu Philistia mi chaldârah tak chuan a vawm fuh a, lung chu a chalah chuan a lût a, bawkkhupin a tlu ta a.

⁵⁰Tichuan, Davida chuan virvawm leh lungtêin Philistia mi chu a hneh a, Philistia mi chu a that ta a. Davida chuan khandaih pawh a keng vê lo.

⁵¹Davida chu a va tîlân vat a, Philistia mi chungah chuan a va ding a, chû pa khandaih chu a pâi aţangin a phâwi a, a that a, a lu a lâ a. Philistia mite chuan an mi chhuanvâwr a thî tih an han hmuh chuan an tîlânche ta a.

⁵²Israel mite leh Judate chu an lo tho va, âu dur dur chungin phaizâwl luhna leh Ekron kulh kawngkhâr thleng rawkin Philistia-ho chu an ûm a. Philistia-ho hliamte chu Saraim kawng tuanin, Gath khua leh Ekron khaw thlengin an tlu rem rum a.

⁵³Israel fate chuan Philistia-ho an ûm chu an kîrsan a, an bûkte chu an suasam a.

⁵⁴Davida chuan chû Philistia lû chu a lâ a, Jerusalem-ah a kalpui a, a râlthuaam erawh chu ama puan inah a dah a.

⁵⁵Philistia mi bei tûra Davida a kal chhuah lai khân Saulan a sipai hotu Abnera hnênah, “Abner, hê tlangvâl hi tû fa nge?” a ti a. Abnera chuan, “Aw lalber, i nunna chhâlin ka hre hauh lo mai â,” a ti a.

⁵⁶Lal chuan, “Hê tlangvâl hi tû fa nge a nih zâwt chhuak ang che,” a ti a.

⁵⁷Davidan Philistia mi a thah hnû khân Philistia lû khâi chungin Abneran Saula hnênah a hruai a.

⁵⁸Saula chuan, “Tlangvâl, tû fa nge i nih?” a ti a. Davida chuan, “Bethlehem mi, i chhiahhlawh Jesaia fapa ka ni e,” a ti a.

BUNG 18

SAULAN DAVIDA A ITSÎK

¹Saula hnêna chu thû a sawi zo chu, Jonathana nunna leh Davida nunna chu a insuih zawm a, Jonathana chuan amah a inhmangaih tlukin ani chu a hmangaih ta a.

²Chumi ni aţang chuan Saula chuan a hauh ta tlat a, a pa hnêna a va hâw pawh a phalsak ta lo va.

³Jonathana chuan ama nunna ang maia a hmangaih avângin Davida chu thû a thlunpui a.

⁴Jonathana chuan a kawrfual hâk lai a hîp a, David a pê a; a silhfên te, a khandaih leh a thal ngul leh a kâwnghrên chenin David a chu a pê a.

⁵Saulan a tirhna apiangah Davida chu fîng takin a awm thîn a. Saula chuan râllo mite hotûah a dah a, mi zawng zawng leh Saula chhiahhlawhte mit a lung êm êm a.

⁶Philistia mi thata Davida a lo hâu chuan, Israel khawpui tin aţanga hmeichheho lo chhuak chuan, dârbenthek leh rimâwi dangte nêh hlim taka zaia lâh chungin Lal Saula chu an lo hmuak a.

⁷Hmeichhiaten lâh paha an hla sak chu: “Saulan a sâng a sâng a that a, Davidan a sîng a sîng a that e,” tih a ni.

⁸An âu-hlâ chuan Saula thîn a khe riaw mai a, a thînur ta êm êm a; “Davida chu a sîng têt thata, kei erawh chu a sâng têt chauh thatah min ngai a nih hi. A bâk eng nge la awm chuang, ka lalram tih loh chu?” a ti a.

⁹Chumi ni aţang chuan Saula chuan Davida chu a mitmei ta reng a.

¹⁰A tûkah chuan Pathian tîr thlarau sual chuan Saula a rawn man a, inchhûngah chuan thû a puang ta chiam mai a. Davida chuan ni dang ang bawkin rimâwi a tum leh a; Saula chuan fei a hûm rûn mai a.

¹¹“Davida hi bangah sâwn ka khawh bet tlat teh ang!” a ti a, fei chu a khawh ta a. Davida chu tum hnih a tawlh kiang hman a.

¹²Davida chu LALPAN a awmpui tlat avangin Saula chuan a hlâu ta hlê mai a, ani Saula erawh chu a chhuahsan tawh si a.

¹³Chuvângin, Saula chuan a bul hnaia awmtîr lovin sâng hotûah a siam a; tichuan, mipui hmâa lût thîn, chhuak thînin a awm ta a.

¹⁴Davida chu kawng tinrêngah fîng takin a awm a, LALPAN a awmpui zêl a.

¹⁵Fîng takin a awm thîn tih Saulan a lo hmuh chuan a hlau tlat thîn a ni.

¹⁶Nimahsela, Davida chu an hmaa lûta chhuak thîn a nih avângin Israel mi zawng zawng leh Judate chuan an ngaina vek thung a.

DAVIDAN MIKALI NUPUIAH A NEI

¹⁷Saula chuan Davida hnênah, “Hei le, ka fanu upa zâwk Merabi hi, nupui atân ka pê ang che. Huai takin mi tan phawt mai la, LALPA indona chu bei zêl ang che,” a ti a. Saula chuan, “Keima kut ni lovin, Philistia-ho kut tuar zâwk rawh se,” a ti rilru a ni.

¹⁸Davida chuan Saula hnênah, “Kei hi tu nge maw ka niha, ka nunna leh ka pa chhûngkua hi Israel ramah hian eng nge maw an niha, lal makpa ka han ni mai tûr chu le?” a ti a.

¹⁹Mahse, Saula fanu Merabi chu Davida neihtîr hun a lo thlen chuan, Meholath mi Adriela nupui atân a pe ta daih a.

²⁰Saula fanu Mikali chuan Davida chu a hmangaih a; chû thû Saula an han hrilh chuan a lo lâwm hlê a.

²¹Saula chuan, “A tân thang a lo nih theih nân ani hi han neihtîr ila, Philistia-hovin a chung a kut an rawn thlâkna remchâng a ni mai,” a ti a ni. Tichuan, a tum hnihna atân Saula chuan Davida hnênah, “Vawinah hian ka mâkpâ ni ang che,” a ti a.

²²Saula chuan a chhiahhlawhte hnênah, “A rûk têin Davida hnênah chuan, ‘Lalber hi i chungah a lâwm hlê a, a chhiahhlawh zawng zawngte pawhin an ngaina che a. Tûnah chuan lal makpa lo ni tawh ang che,’ tiin hrilh rawh u,” a ti a.

²³Saula chhiahhlawhte chuan chû thû chu Davida an hrilh a. Davida chuan, “Mi rethei leh mi ngaihsân hlawh ve phâk lo, keini ang tân lal mâkpâ han nih te chu tih rual em ni dâwn le?” a lo ti a.

²⁴Saula chhiahhlawhte chuan, “Chutiang chuan Davidan a lo ti e,” tiin an va hrilh a.

²⁵Saula chuan, “Hetiang hian Davida hnênah va sawi rawh u: ‘Lalin thum engmah a phût lo ve; mahse lal hmêlmâte chung a phuba lâk nân, Philistia mite serhvun zâ a duh tâwk mai e,’ ti rawh u,” a ti a. Davida chu Philistia-ho kuta a thih theih dân tûr a ngaihtuah a ni.

²⁶Tichuan, a chhiahhlawhten chû thû Davida an va hrilh chuan, Davida chuan lalber mâkpâ nih chu a lo phûr hlê a. An hun tiam erawh chu a la ral lo va;

²⁷Davida chu a hote nêh an va rammû a, Philistia mi 200 an that a. Davida chuan an serh hmâwr vun chu a hâwn a, lal mâkpâ nih theih nân, a tuk zât chu a kimin lal an va pê a. Saula chuan a fanu Mikali chu nupui atân a pe ta a.

²⁸Davida hnênah LALPA chu a awm a, a fanu Mikali pawhin a hmangaih tih Saula chuan a hmûin a hre chiang ta a;

²⁹mahse, Saula chuan Davida chu a hlâu telh telh a. Tichuan, Davida chu Saula hmêlmâ a lo ni ta reng mai a.

³⁰Philistia lalte chu indo tûrin an thawk chhuak thîn a. Mahse, Philistia sipaiten an rawn beih châng pawhin Davida chu Saula sipai hotu dangte aiin a fîngin chet dân a thiam zâwk thîn a, a hming pawh a lo thang ta hlê a.

BUNG 19

SAULAN DAVIDA A TI-NAWMNAH

¹Saula chuan a fapa Jonathana leh a chhiahhlawh zawng zawng chu Davida that tûrin a hrilh a; mahse, Davida chu Saula fapa Jonathana mi kawmngaih ber a ni si a.

²Jonathana chuan Davida hnênah, “Ka pa Saula hian thah a tum che a. Chuvângin naktûk zîng thlengin invêng fîmkhur hlê la, hmun himah biru ta che.

³I bihrûkna phûl vêlah ka pa nêh kan lo kal chhuak ang a, i chungchâng hi ka pa ka sawipui ang a. Chuta ţanga ka thil hmuh dân chu ka hrilh leh dâwn che nia,” a ti a.

⁴Tichuan, Jonathana chuan a pa Saula hnênah Davida chanchin chu a fak zâwng hlîrin a sawi a, “Lal hian a chhiahhlawh Davida chungah hian thil sual ti lul suh se, i pawî engmah a khawih lo va, a hnathawhte hi i tâna ţa tak tak hlîr a ni zâwk asin.

⁵Thih huamin kha Philistia mi kha a that a, LALPA chuan Israelte tân chhan chhuahna ropui min thawhsak a. Chû chu nang pawhin i hmû a, i lâwm hlê si a. Eng aiah nge chhan awm hlei lovin, pawî sawi lo Davida hi i tihlum tehlu ang le?” a ti a.

⁶Tichuan, Saula chuan Jonathana thû chu a pawm a, “LALPA hming chhâlîn, tihlum a ni lo vang,” tiin Saula chuan chhia a chham ta a.

⁷Jonathana chuan Davida chu a ko va, chûng thil zawng zawng chu Jonathana chuan a hrilh vek a. Tichuan, Jonathana chuan Davida chu Saula hnênah a hruai a, tûn hmâ ang khân a hnênah a awm leh ta a.

⁸Indona a lo awm leh a; Davida chu a thawk chhuak a, Philistia-hote chu a bei a, a chêt nat êm avangin anni chu a hmâ ata an tlânchhia a.

⁹Mahse, LALPA tîrh thlarau sual bawkin Saula chu a ina fei kenga a thut laiin a rawn man leh a. Davida chuan rimâwi a lo tum a.

¹⁰Saula chuan Davida chu a fei chuan banga khawh beh a tum a, mahse Saula lakah chuan a per sawn hman hlahv va; fei chu bangah chuan a khawh bûr ngur mai a. Davida chu a tlânchhia a, chumi zân chuan a him hrâm a.

¹¹Saula chuan Davida chu a in lam va enthlâa, a tûk zînga that tûrin mi a tîr a. Davida nupui Mikali chuan, “Zân inah hian i tlân chhuah loh chuan naktûkah an that dawn che a nia,” tiin a hrilh a.

¹²Tichuan, Mikali chuan Davida chu tukverhah a uaithlaktîr a. Him takin a pût chhuak ta a.

¹³Mikali chuan milim a lâ a, kumah a mut a, a lu lamah kêt hmul lukham a dah a, puanin a khuh a.

¹⁴Saulan Davida man tûra mi a va tîrhte hnênah, “A dam lo ve,” a lo ti a.

¹⁵Saula chuan a mi tîrhte chu Davida hnênah a tîr kîr leh a, “A khum chawpin va zâwn chhuak ula, ka lo that ang e,” a ti a.

¹⁶Mi tîrhte an va luh chuan, milim leh a lu lama kêt hmul mai chu kumah chuan a lo awm si a.

¹⁷Saula chuan Mikali hnênah, “Engati nge hetiang a mi buma, ka hmêlmâ i tlân chhuatîr le?” a ti a. Mikali chuan Saula chu a chhâng a, “Min kaltîr mai rawh! Ka that palh mai ang che, min ti si alâwm,” a ti a.

¹⁸Davida chu him takin a tlân chhuak a, Rama khuua Samuela hnênah a va kal a, a chung a Saula thiltih dân zawng zawng chu a va hrilh a. Samuela nê chuan Naioth-ah an kal a, tah chuan a awm ta a.

¹⁹“Davida chu Rama khuua Naioth-ah a awm tih lo hre rawh!” tiin Saula chu an hrilh a.

²⁰Saula chuan Davida va man tûrin mi a tîr a. Chûng miten Samuela hova zâwlnei rual Pathian thu lo sawi dual dual an va hmuh chuan, Saula mi tîrhte hnênah chuan Pathian Thlarau a lo thleng vê a, thû an sawi vê dual dual mai a.

²¹Chû thû Saula an va hrilh chuan, mi dang a tîr leh a, chûng mite pawh chuan chutiang bawkin thu an va hril ve a. A tum thum nân Saula chuan mi dang a tîr leh a, chûng mite pawh chuan a ngai bawkin thû an va hril vê leh a.

²²Amah ngei chu Rama khuah chuan a va kal a, Seku hmuna tuichhunchhuah lian tak awmna a lo thleng a. “Khawiah nge Samuela leh Davida te hi?” tiin a zâwt a. Chuta mi tuemaw chuan, “Ngai teh, Rama khuua Naioth-ah an awm e,” a ti a.

²³Tichuan, Rama khuua Naioth-ah chuan a va kal a. Pathian Thlarauvin a lo man vê a, Rama khuua Naioth a thlen thlengin Pathian thû a puang vê ta loh loh mai a.

²⁴A thuamhnaw te a hlip a, chuta mite tih ang chuan Samuela hmâah chuan thû a puang zêl a, nilêng leh zankhuain saruakin a mû a. Chuvângin, “Saula pawh zâwlnei zîngah a tel vê ta elo?” an ti ta a ni.

BUNG 20

DAVIDA LAKA JONATHANA RINAWMZIA

¹Davida chu Rama khuua Naioth atang chuan a tlânchhia a, Jonathana hnênah a kal a, “Eng thil nge maw ka tih le? Eng nge ka bawhchhiat, i pa lakah eng nge ka tihsuala, hetia mi thah a tum reng mai le?” a ti a.

²Jonathana chuan, “I thi tawp lo vang! I thi tûr a ni lo! Ka pa chuan a lian a tein eng thil mah min hrilh hmasa lovin a ti ngai lo va. Eng aiah nge hê thil hi ka lakah a zêp tehlul ang le? A zêp hauh lo vang,” a ti a.

³Davida chuan intiamkam meuhvin a sawi leh a, “I pa hian i mi duhsakzia hi a hai tawh lo va, tihian a ti a, ‘Hei hi Jonathana chuan hre ve suh se, a rilru a na palh ang e,’ a ti a ni ngei ang. LALPA leh i nunna chhâlin thudik tak ka sawi ang, thihna nêna kan inkâr chu pên khat chauh a ni ta,” a ti a.

⁴Jonathana chuan Davida hnênah, “I duh apiang ka tihsak zêl ang che,” a ti a.

⁵Davida chuan Jonathana hnênah, “Naktûk hi Thla thar Ni a ni a, lal hnêna chaw kîl ve ngei tûr ka ni a. Mahse min kaltîr ta la, a ni thum ni tlâi thlengin phûlah ka birû ang e.

⁶I pain ka awm lo tih a hre chhuak ta a nih chuan, ‘Davida chuan an khua Bethlehem a va kal lawk min dîl ngawih ngawih a, an chhûngkuain kum tina inthâwi a neih hun a ni si a,’ ti la.

⁷‘A that chu,’ a tih chuan, i chhiahhlawh tân a muanawm ang a. Mahse, a thinur a nih chuan, thil tha lo tih a tum tih i hre mai dawn nia.

⁸I chhiahhlawh hi LALPA hmâah thû i thlunpui ta sâ sâ, chuvângin, i chhiahhlawh hi lainat takin ti ang che. Amaherawhchu, keimahah hian sualna a awm a nih chuan nangma’n min that zâwk mai rawh, engah nge i pa hnênah min thlen kher ang le?” a ti a.

⁹Jonathana chuan, “A teuh lo mai! Ka pa hian i chungah thil tha lo a phiar tih hre ngat îla chu ka hrilh loh che i ring em ni?” a ti a.

¹⁰Davida chuan Jonathana hnênah, “I pa chuan bung takin lo chhâng ta che sela, tûin nge min hrilh ta ang?” a ti a.

¹¹Jonathana chuan Davida hnênah, “Ti teh, phûlah sâwn i va kal teh ang,” a ti a. Tichuan, an pahnihin phûlah chuan an kal chhuak a.

¹²Jonathana chuan Davida hnênah: “LALPA Israelte Pathian chu thuhretu a ni e! Naktûkah emaw, a ni thum niah emaw, ka pa chu ka han thâwi vêl ang a, Davida tâna thu tha a niha, ka rawn hriattîr loh che chuan,

¹³LALPAN Jonathana hi a duh duhin ti rawh se, chu aia nasa pawhin. Mahse ka pain i chung a thil tha lo tih a tum chuan, him taka i kal bo theih nân chanchin ka rawn hrilh leh ngei ngei ang che. LALPA chu ka pa hnêna a awm thîin ang khân i hnênah pawh

awm zêl rawh se.

¹⁴Ka dam chhûng hian LALPA khawngaihna chu ka thih loh nân maia lantîr lovin;

¹⁵LALPAN lei chung aţanga Davida hmêlmâte a tihbora vek hunah pawh, kan chhûngkaw chungah hian i ngilneihna hi kumkhuain la kiang suh ang che,” a ti a.

¹⁶Tichuan, Jonathana chuan Davida chhûngkua chu thû a thlunpui a, “LALPA chuan Davida hmêlmâte chenin hremtûah hmang rawh se,” a ti a.

¹⁷Jonathana chuan Davida chu a hmangaih êm avângin thû a tiamtîr leh a; mahni a inhmangaih ang tak takin ani chu a hmangaih si a.

¹⁸Jonathana chuan Davida hnênah, “Naktûk hi Thla Thar a ni a; i ţhutna a ruah dâwn avângin i awm lo tih a lang ngei dâwn a.

¹⁹Ni thum i awm hnûah chhuk thla thuai la, thû kan thlun nia i awmna ngaiah khân biru leh la; Ezel lungpui phênah chuan awm reng ang che.

²⁰Inthemthiam ni âwm takin thal pathum ka rawn kâp ang a;

²¹naupang rawn tîrin, “Thal chhar tûrin va kal ta che,” ka ti ang a. Naupang hnênah chuan, ‘En teh, thal chu i sîrah khân a awm e; kal la, va chhar khâwm rawh,’ ka tih chuan—LALPA chhâlin ka sawi e, i tân a him a, a hlahawm lo a ni ang.

²²Mahse naupang hnênah, ‘En teh, thalte chu i piah lama saw a awm,’ ka tih chuan—kal bo mai ang che, LALPAN lo inthiarfîhlîm tûrin a ti che a ni ang.

²³Nangmah nêna kan thusawite hi, nang leh keia inkârah LALPA chu min hriatpuitu ni kumkhua rawh se,” a ti a.

²⁴Davida chu phûlah chuan a biru ta a. Thla Thar ni a lo thlen chuan, lal chu chawhlui kîl tûrin a ţhû a.

²⁵Lal chu ni danga a ţhutna ţhin bang bulah chuan a ţhû a. Jonathana chu a tho va, Abnera chu Saula sîrah a ţhû a, Davida hmun chu a ruak a.

²⁶Chumi nî chuan Saula chuan engmah a sawi lo va, “Eng emaw vâng mai a ni ang e; amah hi a thian loh nî a ni ang, a thianghlîm lo a ni khawp ang,” a ti rilrû a.

²⁷A tûk, thla thar ni hnih nî pawhin Davida ţhutna chu a la ruak ta cheu va. Saula chuan Jonathana hnênah, “Engtizia nge Jesaia fapa hi nîminah pawh, waviinah pawh chaw ei tûra a rawn lan loh?” a ti a.

²⁸Jonathana chuan Saula chu a chhâng a, “Davida chuan Bethlehem kal mi đil ngawih ngawih a.

²⁹Khawngaihin min kaltîr mai rawh, kan chhûngkuain khuaah inthâwina an hlân a, ka unauten awm ve ngei tûrin min ti si a. I mi duhsak tlâk ka nih hlah chuan, ka unaute hmu tûrin min kaltîr hrâm rawh,’ a ti tlat a. Tichuan, lal chawhlui a rawn kîl vê ta lo a ni,” a ti a.

³⁰Saula chu Jonathana chungah chuan thinurin a ling ta phut mai a, “Nang, hmeichhe lepchiah leh helhmang fapa i nih hi! Nangma mualphona tûr leh i nu saruakna hlîm mualpho tûr lekin Jesaia fapa hi i ţan tlat tih ka hai hlei nêm.

³¹Jesaia fapa hi leilunga a dam chhûng chu nangmah leh i lalram hi i đin nghet dâwn lo tih hre ta che. Tûnah hian ka hnênah rawn hrui rawh, a thi ngei tûr a ni,” a ti tûn tûn a.

³²Jonathana chuan a pa Saula chu a chhâng a, “Engvângin nge tihhlum a nih ang? Eng nge a tihsual?” a ti a.

³³Saula chuan tihhlum tumin feiin a khawh ta mai a, chuta ţang chuan a pain Davida thah a lo tum ngei tih Jonathana chuan a hre Chiang ta a ni.

³⁴Jonathana chuan thinrim êm êmin dawhkân chu a thawhsan a, chumi thla ni hnih nîa chaw pawh chu a ei duh ta lo va, a pain chuti taka Davida a tihmualpho avâng chuan a rilru pawh a na takmeuh a ni.

³⁵A tûkah chuan Davida nêna an hun tiamah chuan Jonathana chu naupang hruiain, phûlah chuan a va kal a.

³⁶Naupang hnênah, “Ka thal kah chhar tûrin tlân rawh le,” a ti a. Naupang tlân lai chuan a piah daiha tla tûrin thal chu a kâp a.

³⁷Naupangin Jonathana thal tlâkna lai vêl a va thlen chuan, Jonathana chuan naupang chu a âu va, “Thal chu i piah lamah khân a tlâ a ni lo’m nî?” a ti a.

³⁸Jonathana chuan naupang chu a âu va, “Hmanhmawh rawh, muang khawtlai suh!” a ti a. Jonathana naupang chuan thalte chu a chhar khâwm a, a pu hnênah a lo kîr leh a.

³⁹Naupang chuan engmah a hre ve lo. Jonathana leh Davida te chauhin thil awm dân chu an hria a.

⁴⁰Jonathana chuan naupang chu a hriamhreite a kentîr a, ‘Kal ta la, khuaah lo va hâwpui rawh,” a ti a.

⁴¹Chû naupang kal liam vêleh chuan Davida chu a awmna chhim lam aţang chuan a lo chhuak a, a bawkkhup a, wawi thum a kûn a. An infâwp a, an ţap dîn ta a, Davida pheih chu a ţap nasa lehual a.

⁴²Jonathana chuan Davida hnênah, “Thlamuang takin kal ang che, ‘LALPA chu nang leh keia inkârah leh, i thlahte leh ka thlahte inkârah kumkhuain awm reng rawh se,’ tia LALPA hminga thû kan tiam dun tlat tawh kha,” a ti a. Tichuan a tho va, a kal ta a, Jonathana pawh khaw chungah a haw ta a.

BUNG 21

DAVIDA LEH CHHANG THIANGHLIM

¹Davida chu Nob khuaa puithiam Ahimeleka hnênah a kal a. Davida a han hmuah chuan Ahimeleka chuan a lo hlâu va, “Engtizia nge tûmah kalpui lova, i rawn maltlat tâk mai?” a ti a.

²Davida chuan puithiam Ahimeleka hnênah, “Lalin tihtîr min tuk a, ‘Ka thil tihtîr tum che leh ka thupêk che hi tûma’n hre suh se,’ a ti tlat a. Ka hote pawh hmun hrang hrangah ka dah a.

³Tûnah eng nge i neih le? Chhang tlâwn ngâ min pe teh, thil dang i neih ang ang pawh,” a ti a.

⁴Puithiam chuan Davida chu a chhâng a, “Chhang pangngai chu ka nei hauh lo; chhang thianghlîm chauh ka nei a ni, tlangvâlthe chu hmeichhe laka an thian lai a nih phawt chuan,” a ti a.

⁵Davida chuan puithiam chu a chhâng a, “Dik takin, karawn kal chhuah aṭanga ni thum chhûng chu hmeichhe lakah ka thiange. Tlangvalho bungbêlthe pawh a thianghlim a, chhang pawh bungbêl chhûnga wawiina serh hran a ni mai pawh a, chhang narân vê tho a ni alâwm,” a ti a.

⁶Tichuan, puithiam chuan chhang thianghlim chu a pê a; chutah chuan LALPA hnêna hlan chhangserh chauh lo chu chhang dang a awm si lo va; chhang hlui chu lâk chhuah niin a thar an dah khat leh thîn a ni.

⁷Chumi ni chuan Saula chhiahhlawh mi pakhat, LALPA hmâa hrên a awm vê a. A hming chu Doega a ni a, Edom mi, Saula ran rual vêngtu zînga hotu ber a ni.

⁸Davida chuan Ahimeleka hnênah, “Hetah hian fei emaw, khandaih emaw a awm lo mâw? Lalin min tîr hmanhmawh êm avângin khandaih emaw, hriamhreî emaw karawn keng hman ta si lo va,” a ti a.

⁹Puithiam chuan, “Ela Ruama i thah tâk Philistia mi Goliatha khandaih kha a awm a, puithiam kawr phênah hian puana tuamin a awm e. Chû chu i duh chuan la ta chê. Chû chauh lo chu hetah eng dang mah a awm lo ve,” a ti a. Davida chuan, “Chû lo liam maw lê; min pe ta che,” a ti a.

GATH KHUAH DAVIDA A TLÂNCHHIA

¹⁰Davida chu a tho va, Saula lakah tlân bovin Gath khaw lal Akis-a a pan a.

¹¹Akis-a chhiahhlawhte chuan, “Hê mi hi an ram lal Davida chu a ni lo vem ni? ‘Saulan a sâng a sâng a that, Davidan a sîng a sîng’ tia zai leh lâma an châwimâwia khâ?” an ti a.

¹²Davida chuan chûng an thu sawite chu a lo hre kiau va, Gath lal Akis-a chu a hlâu ta hlê mai a.

¹³Tichuan, an mithmuhah chuan a insiam danglam vak a, a â der ta chiam mai a, kawngkhârte chu a ham vak vak a, a chilthlîte chu a khabe hmulah a uai duah duah bawk a.

¹⁴Akis-a chuan a chhiahhlawhte hnênah, “En ta che u, hê pa hi mi â a nih hi. Engah nge hetiang mi ka hnênah in rawn hruai?”

¹⁵Mi â ka tlâkchham vângin hê pa hi ka kiangah âtso tûrin in rawn hruai amaw? Hê mi hi mâw ka inah lo kal ang?” a ti a.

BUNG 22

DAVIDA-HO MI 400 RUAL

¹Davida chuan chu hmun chu a chhuahsan a, Adullam pûkah a tlân ta a. A unaute leh a pa chhûngte zawng zawngin an lo hriat chuan, amah chu an zu fin thlâ a.

²Mi mangang te, leiba nei te, lungâwi lohna nei apiangten amah chu an pan khâwm a. An chungah hotu a lo ni ta a. A hnêna awmte chu mi 400 vêl lai an tling ta a.

³Chuta ṭang chuan Davida chu Moab rama Mizpa khuah a kal a; Moab lal hnênah, “Pathianin thil min tihsak tûr ka hriat hmâ chu khawngaih takin ka nu leh pate hi i bulah lo awmtîr ta che,” a ti a.

⁴Tichuan, Moab lal hnênah chuan a hruai ta a, Davida chu pûk-ah te a awm chhûng zawng chuan ani hnênah chuan an awm

ta a.

⁵Davida hnênah zâwlnei pakhat Gada chuan, “Pûkah chuan awm reng suh; chhuahsan la, Judai ramah kal rawh,” tiin a hrilh a. Tichuan, Davida chu a chhuak a, Heret ngaw chhûngah a lût a.

SAULAN PUTTHIAMHO A RÂWT

⁶Saula chuan Davida leh a hote awmna chin hriat chhuah a ni tawh tih a lo hria a. Saula chu Gibeah khuah Rama hmuna sasaw thing hnuaiah fei keng chungin a ṭhû a, a chhiahhlawh zawng zawngten an din hual a.

⁷Saula chuan a chhiahhlawh a kiana dingte hnênah chuan, “Nangni Benjamin mite u, ngaithla teh u! Jesaia fapa hian in vaiin lote leh grêp huante a pê che u-in, sâng hotu-ah leh za hotu-ah te a siam vek dâwn che u em ni?”

⁸In zavai hian min phiar a, ka fapain Jesaia fapa nênthlûng an lo siam reng tih pawh tûma’n min hrilh hek lo; ka fapain ka chhiahhlawh mi do tûr leh, wawiinah pawh mi châng ru tûrin a fuih thû pawh tûmahin in sawi duh si lo va, tûmahin pawh min tihpui hek lo,” a ti a.

⁹Edom mi Doega, Saula chhiahhlawh chuan a chhâng a, “Jesaia fapa chu Nob khuah, Ahituba fapa Ahimeleka hnêna a kal ka hmû a.

¹⁰Ani chuan LALPA hnênah a lo ṭawngṭaisak a, ei tûr a pê a, Philistia mi Goliatha khandaih pawh a lo pe bawk,” a ti a.

¹¹Tichuan, lal chuan Ahituba fapa, puithiam Ahimeleka leh a pa chhûngte zawng zawng leh Nob khuah puithiamte chu a kohtîr a. Lal hnênah chuan an va kal a.

¹²Saula chuan, “Ahituba fapa, ngaithla rawh!” a ti a. Ani chuan, “Ka pu, heta hi ka awm e,” tiin a chhâng a.

¹³Saula chuan a hnênah, “Engah nge nang leh Jesaia fapa hian min lo phiara, chhang leh khandaih i lo pêka, Pathian i lo biakrâwsak avânga kei mi do tûra wawiinah pawh mi chân tâk reng mai le?” a ti a.

¹⁴Ahimeleka chuan lal chu a chhâng a, “I chhiahhlawh zawng zawng zîngah hian lal mâkpâ, i tîrhna apianga kal thîn, in chhûngkaw tizahawmtu Davida anga rinawm hi tu nge awm le?”

¹⁵A tân Pathian ka râwsak ṭan chauh em ni? Ni suh e! Lal hian kei leh ka pa chhûngkua rêng rêng min puh lul suh se. I chhiahhlawh hian hêng thil hi hriatna rêng rêng ka nei ve lo ve,” a ti a.

¹⁶Lal chuan, “Ahimelek, nang leh i pa chhûngkua zawng zawng hi in thi vek tûr a ni!” a ti a.

¹⁷Lal chuan a kiana vêngtu sipai dingte hnênah chuan, “LALPA puithiamho hi, Davida thlâwptu an nih vâng leh, a tlânchhia tih hre reng chungah min hrilh loh avângin that rawh u,” a ti a. Nimahsela lal chhiahhlawhte chuan LALPA puithiamte that tûrin kut an lek ngam lo.

¹⁸Lal chuan Doega hnênah, “Nang kha inher la, puithiamte chu that rawh!” a ti a. Tichuan, Edom mi Doega chu a inher a, puithiamte chu a bei a, chumi ni chuan puithiam kawr zai sîn hâ zawng zawng mi 85 lai a that a.

¹⁹Puithiamte awmna Nob khua pawh chu khandaihin a sâm vak a, a hmei a pain, naupang leh hnute hne lai chenin, bâwngpa te, sabengtung te leh berâm te nên khandaihin an rãwt vek a.

²⁰Ahituba fapa Ahimeleka fapate zînga pakhat, a hming Abiathara chu a tlân chhuak a, Davida hnênah a tlânchhia a.

²¹Saulan LALPA puithiamte a thah thû chu Abiatharan Davida a va hrilh a.

²²Davida chuan Abiathara hnênah, “Edom mi Doega khân Saula hnênah a hrilh ang tih ka ring rêng a ni. I pa chhûngkua zawng zawng thihna thlentü ka nih tâk chu.

²³Nang chu ka bulah awm ang che; hlâu rêng rêng suh. Mi thah tumtu hian nang pawh thah ve che a tum a, mahse ka bulah chuan i him ang,” a ti a.

BUNG 23

DAVIDAN KEILA KHUA A HUM

¹Davida hnênah chuan miten, “En teh, Philistia-hovin Keila khua an bei a, hruihzâwla buhte chu an lâksak vek mai,” tiin an hrilh a.

²Tichuan, Davida chuan LALPA a rawn a, “Chûng Philistia mite do tûr chuan ka thawk chhuak ang em?” a ti a. LALPA chuan Davida hnênah, “Kal la, Keila khua chhan tûrin Philistia mite chu zu bei ta che,” a ti a.

³Mahse, Davida hote chuan, “Ngâwi teh, Judai ram aţang pawhin kan hlâu a ni a. Keilaa zuk kala Philistia sipaite zu beih lek pheî chu a hlauhawm hlê lo maw?” an ti a.

⁴Davida chuan LALPA a rawn nawn leh a. LALPA chuan a chhâng a, “Tho la, Keilaah chuan zuk kal rawh. Philistia-ho chu i kutah ka pe dawn alâwm,” a ti a.

⁵Davida leh a hote chu Keilaah an chhuk thlâ a, Philistia-ho chu an zu bei a, an that chiam a, an ran rualte an lâksak a. Tichuan Davida chuan Keila khaw mite chu a chhan chhuak ta a ni.

⁶Ahimeleka fapa Abiathara chu Davida hnênah pana Keila khuaa a tlânchhiat lai khân puithiam kawr kenga kal a ni a.

⁷Keila khuaah Davida a kal tih Saula an hrilh a. Saula chuan, “Pathianin ka kutah min pe ta zu nia, kulh kawngka nei khuaah a inkalhhung ta si a,” a ti a.

⁸Saula chuan a mite zawng zawng chu indo tûrin, Keila khuaa zuk kala, Davida leh a mite zuk hual tûrin a ko khâwm a.

⁹Saulan a chungah thil tha lo a phiar mêk tih Davidan a lo hriat chuan, puithiam Abiathara hnênah, “Puithiam kawr chu mi rawn lâk ta che,” a ti a.

¹⁰Davida chuan, “Aw LALPA, Israelte Pathian, keimah avângin Keilah khua tichhe tûrin Saula a lo kal dawn tih i chhiahhlawh hian a lo hria a.

¹¹Keila khuaa mite hian ani kutah chuan min hlân ang em? I chhiahhlawhin a hriat angin Saula hi a lo chhuk dawn em? Aw LALPA, Israelte Pathian, khawngaih takin i chhiahhlawh hi min hrilh rawh,” a ti a. LALPA chuan, “A lo chhuk dawn,” a ti a.

¹²Davida chuan, “A nih leh, Keila khuaa mite hian kei leh ka mite hi Saula kutah min hlân ang em?” a ti a. LALPA chuan, “An hlân ang che,” a ti a.

¹³Tichuan, Davida leh a mite, mi 600 vêl chu an tho va, a remna lam apianga kal tûrin Keila khua chu an chhuahsan ta a. Davida chuan Keila a chhuahsan tawh tih Saula chu an hrilh a; tichuan, rûn tûra kal a tum chu a thulh ta a.

THLALÊRAH DAVIDA A INKULH

¹⁴Davida chu thlalêra pûkah te, Ziph Thlalêr tlâng ramah te chuan a tawm ta reng a. Saula chuan ni tin a zawng a, mahse a kutah Pathianin a pe si lo va.

¹⁵Davida chuan amah thah tumin Saula chu a lo thawk chhuak tih a hria a. Chuvângin Davida chu Ziph Thlalêra ngaw chhûngah chuan a awm ta reng a.

¹⁶Saula fapa Jonathana chu a tho va, ramhnuaiah Davida hnênah chuan a kal a, Pathianah a kut chu a tihchaksak a.

¹⁷A hnênah, “Hlau suh âw, ka pa Saula kutah hian man i ni lo vang. Israelte chungah i lo la lal ngei dawn a, kei hi i dawttu ka ni ang. Ka pa Saula pawhin chû chu a hre reng a ni,” a ti a.

¹⁸An pahnih chuan LALPA hmâah thû an thlung a. Davida chu ramhnuaiah a awm reng a, Jonathana erawh chu ama in lamah a haw ta a.

¹⁹Ziph mite chu Gibe khuaa Saula hnênah an va kal a, “Davida chu Hakila tlâng ram, Jesimon chhim lama ramngaw chhûngah, kan bul hnai maiah a biru reng a ni lo vem ni?”

²⁰Chuvângin, âw lalber, thâ i tih ang takin lo chhuk la; kan lo tih ve tûr chu lal kuta amah lo pêk mai hi a ni e,” an ti a.

²¹Saula chuan, “LALPAN malsâwm che u rawh se, min lo khawngaih ta si a.

²²Va kal ta ula, a bihrûkna hmun tak hre tûr te, tute nge va hmu thîn tih te pawh va zawng chhuak ang che u. Finrâwl a chhuah thiam hlê tih miin min hrilh a ni.

²³Chuvângin, a bihrûkna hmunte chu va dap chhuak vek ula; thil chinchâng fiah taka in hriat hnûah lo kîr leh ula, ka rawn zui dawn che u nia. Ram chhûngah a awm a nih ngat chuan, Juda hnam tin zîng aţangin ka dap chhuak ngei ngei ang,” a ti a.

²⁴Tichuan, an tho va, Saula kal hmân Ziph-ah chuan an kal ta a. Davida leh a mite chu Maon Thlalêrah, Jesimon chhim lam ruamah chuan an kal ta a.

²⁵Saula leh a hote chu amah zawng tûrin an lo thawk chhuak tih Davida an hrilh a. Ani chu Maon thlalêr lungpui hmunah a insuan ta a. Saulan chû chu a lo hriat chuan, Maon Thlalêrah Davida chu a ûmzui zêl a.

²⁶Saula hote chu tlâng pang lehlamah an kal a, Davida leh a mite chu a lehlam tlâng pangah an kal ve thung a. Saula leh a hoten hual beha man an tumna laka tlân chhuah tumin Davida chu a hmanhmawh hlê a.

²⁷Nimahsela, zualko pakhat chu Saula hnênah a lo kal a, “Lo haw vat rawh, Philistia-hoten kan ram an rawn rûn e!” a rawn ti a.

²⁸Tichuan, Saula chuan Davida a ûm lai chu bânsanin Philistia-ho do tûrin a kîrsan ta a; chuvângin, chû hmun chu Tlân

Chhuahna Lungpui an tih phah ta a ni.

²⁹Chuta ƣang chuan Davida chu a chho va, En Gedi pŭkah a tawm ta a.

BUNG 24

DAVIDAN SAULA A ZUAH

¹Saulan Philistia mite a ũm zo lo hâu chu, “Ngai teh! Davida chu En Gedi Thlalêrah a awm e,” tiin an lo hrih a.

²Saula chuan Israel mi zawng zawng aƣanga thlan chhuah mi 3,000 hruaiin, Sathâr Lungpui hmunah Davida leh a hote zawng tŭrin a thawk chhuak leh ta a.

³An kalna kawng sîrah chuan berâm huang, pŭk awmna hmun a va thleng a; Saula chu inthiar lawk tŭrin a va lŭt a (Davida leh a hote chu pŭk chhungril lamah chuan an awm a).

⁴Davida hote chuan a hnênah, “Vawiin hi LALPAN i hnêna, ‘Ngai teh, i duh ang anga i tih atân i hmêlmâ chu i kutah ka hlân ang,’ a tih ni kha a nih hi,” an ti a. Davida chu a tho va, a rŭk têin Saula kawrfual hmâwr chu a va hlep a.

⁵Saula kawrfual a hleh hnû chuan Davida chu a rilrŭin a inthiam leh si lo va.

⁶A hote hnênah, “LALPA hriak thih, kan hotupa chungah hetiang thil ka lo ti hi ka tih loh tawp tŭr a ni; LALPA hriak thih a ni tih ka hre reng si a,” a ti a.

⁷Chŭng thŭ chu sawiin Davida chuan a hote chu a khap dâi a, Saula chungah kutthlak chu a remti ta lo va. Saula pawh chu pŭk aƣang chuan a chhuak a, a kal leh ta a.

⁸Davida pawh chu a hnû lawkah, pŭk aƣang chuan a chhuak a, Saula chu a au zui a, “Ka pu, lalber!” a ti a. Saula chu a lo lehawi a, Davida chu lei lamah a kŭn a, chibai a bŭk a.

⁹Davida chuan Saula hnênah: “Engtizia nge ni miten, ‘Davidan tihchhiat che a tum’ tia an sawi chu i âwih mai le?”

¹⁰En teh, vawiinah ngei hian pŭk chhŭngah khân LALPAN ka kutah a hlân che tih nang pawhin i hmuh kha, that tŭr chein mi ƣhenkhat chuan min nawr nasa asin. Mahse i nunna hi keima’n ka zuahsak che a ni, ‘Ka pu lakah zawng kut ka thlâk lo vang, LALPA hriak thih a ni si a,’ ka ti a ni.

¹¹En ta che, ka pa! Ka ken lai hi i kawrfual hmâwr a nih hi! I kawrfual hmâwr kha ka hlep a, mahse ka that lo che a; i chungah engmah tihsual ka nei lo va, i lakah helna leh thil ƣa lo tih tumna pawh ka nei hauh lo tih lo hria ang che. Nang erawh chuan mi thah tumin min veh reng mai si a.

¹²LALPA chu nang nêna kan inkâra rorêltu ni rawh se, ka phubâ chu LALPAN i lakah la zâwk rawh se. Kei erawh chuan i chungah kut ka thlâk lo vang che.

¹³Hmanlai thufingin, ‘Suahsualna chu mi suaksual vêk hrin chhuah a ni’ a ti a. Kei chuan kut ka thlâk lo vang che.

¹⁴Israel lal meuh hi tu zawngin nge a lo thawh chhuah? Tu nge i ũm? Uî thi sâwn maw? Nge, uihlî?

¹⁵Chuvângin, nang nêna kan inkâr thŭ hi LALPAN rêl rawh se, ani chuan min ngaihtuahsak sela, i kut ata hi min chhan chhuak mawlh rawh se,” a ti a.

¹⁶Davidan chŭng thŭ Saula hnêna a sawi zawhin Saula chuan, “Hei hi nangma âw a ni mâw, ka fapa David?” a ti a. Saula chu ring zetin a ƣap chhuak ta a.

¹⁷Davida hnênah: “Kei aiin i lo dik fê zâwk mai â; kei chuan sualin ka thungrŭl che a, nang erawh chuan ƣatnain mi thungrŭl zâwk a nih hi.

¹⁸Ka chungah i ƣatzia chu vawiinah hian i tilang ta a nih hi; LALPAN i kuta keimah a pêk lai che pawhin nang chuan mi that duh lo a ni a.

¹⁹Miin a hmêlmâ hmu sela, him takin a chhuahtŭr dâwn em ni? Chuvângin, vawina ka chungah i thiltih avâng hian LALPA chuan ƣatnain vŭr che rawh se.

²⁰Lal i la ni ngei dâwn tih ka hre ta a, Israel lalram hi i kutah nghet taka din a ni ang tih pawh ka hre Chiang ta e.

²¹Chuvângin, ka thlahte chu rawn tiboral lo tŭr leh, ka pa chhŭngkua aƣanga ka hming thâi bo lo tŭrin LALPA hmingin chhia chham ta che,” a ti a.

²²Davida chuan Saula hnênah chhia a chham a. Tichuan Saula chu a hâu ta a, mahse Davida leh a hote chu an bihrŭkna lamah an chho ta a.

BUNG 25

SAMUELA THIH THU

¹Samuela chu a thŭ ta a; Israel mipuite chu an lo pung khâwm a, amah chu an sŭn a, Rama khuua ama inah an phŭm a. Davida chu a tho va, Paran Thlalêr lamah a chhuk a.

DAVIDA LEH NABALA NUPUI

²Maon khuah chuan mi hausa tak pakhat, Karmel hmuna ram nei a awm a. Berâm 3,000 leh kêl 1,000 a nei a. Karmel-ah chuan a berâm hmul a mêt thŭn a.

³Chŭ pa hming chu Nabala a ni a, a nupui hming chu Abigaili a ni. Ani chu hmeichhe bengvar leh hmêlƣa tak a ni a; chŭ pa erawh chu mi tawhkhirh leh sual zet mai a ni a, Kaleba thlaha mi a ni.

⁴Nabalan a berâm hmul a mêt tih Davidan thlalêr aƣanga a lo hriat chuan,

⁵Davida chuan tlangvâl sâwm a tŭr a; Davida chuan tlangvâlte hnênah, “Karmelah chho ula, Nabala hnênah in kal ang a, chibai min rawn bŭk vê dâwn nia.

⁶Chŭ mi neinung taka hnênah chuan heti hian ti ang che u: ‘I hnênah te, i chhŭngte hnênah te, i thil neih zawng zawng chungah te thlamuanna awm rawh se!

⁷I berâm hmul i mêt tih ka lo hria a. I berâmpu pawh kan hnênah an khawsa thŭn a, an pawî engmah kan sawi ngai lo va, Karmela an awm chhŭngin engmah a bo ngai hek lo.

⁸I tlangvâlte pawh zâwt la, an hrih thei ang che. Chuvângin, in ruai ƣeh nî-ah hian ka hote hi lo duhsak vê la. I chhiahhlawhte leh i fapa Davida hi i neih ang ang lo pe tŭrin ka ngên a che,’ va ti rawh u,” a ti a.

⁹Davida tlangvâlte an va thlen chuan, chŭng thu zawng zawng chu Davida hmingin Nabala chu an hrih vek a, an lo ngâk ƣap

a.

¹⁰Nabal chuan Davida mi tirhte chu a chhâng a, “Davida chu tû â ni? Jesaia fapa pawh chu tu nge a nih? Tûn lai hian mahni pûte tlân bosan mai mai tâwk hi an awm zut mai a.

¹¹Ka chhang te, ka tui te, ka berâm hmul mêtute tâna ka talh sâte chu, khawi lama mi nge an nih pawh ka hriat lohte hnênah ka pe tehlul ang maw?” a ti a.

¹²Tichuan, Davida tlangvâlthe chu an kîr leh a; chûng thû zawng zawng chu an va hrilh vek a.

¹³Davida chuan a hote hnênah, “Mi tinin in khandaih pâi theuh rawh u,” a ti a. Tichuan, khandaih an pâi theuh va, Davida pawhin a pâi bawh a. Davida chu mi 400 vêlin an zui a, mi 200 in bungrua an lo vêng a.

¹⁴Chhiahhlawh zînga pakhat chuan Nabala nupui Abigaili hnênah, “Ih ê, Davidan thlalêr aţangin kan pu chibai bûk tûrin mi a rawn tîr a; ani lahin a lo deusawh hrep mai si a.

¹⁵Hêng mite hi kan chung a an that tehlul nê, kan pawî an khawih ngai lo va, phûla kan awm ho chhûng zawng khân thil bo engmah kan hre ngai lo.

¹⁶Berâm vênga an hnêna kan awm chhûng khân achhûn azânin kan tân kulh an ni ngawt mai si a.

¹⁷Chuvângin tih dân tûr ngaihtuah mai teh, kan pu chungah leh a chhûngkua zawng zawng chungah thil tha lo a inmung a nia. Ani lah hi Beliala fapa tih takah mi butut, eng thu mah sawipui theih a ni si lo va,” a ti a.

¹⁸Tichuan, Abigaili chu hmanhmawh takin a in buatsaih a, chhang tlang 200 leh uain bûr pui hnih, berâm puah sa pangâ, mîm kan bûk ngâ, grêp-ro bâwr zâ leh theipui hlâwm 200 chu a la khâm a, sabengtung a phurhtîr a.

¹⁹A chhiahhlawhte hnênah, “Ka hmâah lo va kal ula; kei pawhin ka rawn zui ang che u,” a ti a. Mahse a pasal Nabala chu a hrilh lo.

²⁰Sabengtungah a chuang a, tlang phênah a chhuk a; chutah chuan ama lam rawn pana lo chhuk thlâ Davida leh a hote nê chuan an intâwk ta a.

²¹Davida chuan, “Thlalêrah khân hê pa thil neih zawng zawng hi, engmah bo lovin, a thlâwn maiin kan lo vênsak lek a nih hi. Tûnah hian thâ chu sualin mîn rûl leh si a.

²²Naktûk khawvâr thlenga Davida hmêlmâ te hi, an mipa pakhat tê pawh ka zuah a nih chuan, Pathianin a duh duhin, na lehzuat pawhin mîn ti rawh se,” a lo ti tawh a.

²³Abigaili’n Davida a hmuh chuan, a sabengtung aţangin a chhuk vat a, Davida hmâah chuan a bawkkhup a, chibai a bûk a.

²⁴A ke bulah bawkkhupin: “Ka pu, hê sual mawh hi ka chungah tla rawh se! I chhiahhlawhnuin i hnêna ka sawi hi, khawngaih takin mîn ngaihlaksak ang che.

²⁵Khawngaih takin hê Nabala, Beliala fapa thu hi ka pu hian engah mah ngai lo hrâm turin ka ngen a che. A hming put Nabala hi ama nihna chiaah a ni a, â takin thil a ti thîn! Ka pu tlangvâl rawn tirhte kha i chhiahhlawhnu hian ka lo hmu lo atin ni.

²⁶Chuvangin, ka pu, LALPA nunna leh i nunna ka chhâl e, thisen chhuah lo tûr leh i phubâ chu nangma’n la lo tûra a vên tlat che avângin, i hmêlmâte leh ka pu chung a thil sual tih tumte chu Nabala ang hi lo ni zâwk rawh se.

²⁷I chhiahhlawhnuin ka pu tâna thilpêk a rawn ken te hi, ka pu zuitu tlangvâl hoten lo chang hlawm rawh se.

²⁸I chhiahhlawhnu bawhchhiatna hi khawngaih takin ngaidam ang che. Ka pu chuan LALPA indona a dopui thîn avâng leh, i dam chhûnga nangmahah sual rêng rêng hmuh tûr a awm loh avângin, LALPA chuan ka pu chu chhûngkaw ngêlnghet tak a dinsak ngei ngei dâwn a ni.

²⁹Mi pakhat chuan i nunna lâk tumin a ûm thîn che a, nimahsela ka pu nunna chu LALPA i Pathian nunga nê phuar zawm tlat a ni ang a; i hmêlmâte nunna erawh chu virvawma lungtê an vawm bo daih ang ni rawh se.

³⁰LALPA chuan Israelte chung a rorêltu atân a ruat tawh si che a; chuvângin i chungchâng a thil thâ a lo sawi tawh zawng zawng chu, ka pu chungah hian a thlentîr ang,

³¹chhan awm lova thisen i chhuah lohva, nangma phubâ i lâk loh bawh hian, i tân inchhîr zuina tûr emaw, rilru natna tûr emaw a awm lo vang. LALPAN ka pu hi hamthamna a pêk hunah, i chhiahhlawhnu hi mîn han hre reng ang che,” a ti a.

³²Davida chuan Abigaili hnênah: “Vawiina mîn rawn hmuak tûra nang rawn tirtu che LALPA Israelte Pathian chu fakîn awm rawh se!

³³Thisen chhuahna lakah leh phuba lâkna laka ka kut mîn vênsak avângin i thurâwn leh nangmah ngei pawh malsâwmin awm ang che.

³⁴LALPA Israelte Pathian, nangmah tina lo tûra mîn chelhtu chhâlin ka sawi e, mîn rawn hmuak vat lo tâ la, naktûk khua a vâ meuh chuan Nabala mi leh sâ mipa tawh phawt chu tûmah nung damin ka chhuah lo vang!” a ti a.

³⁵Tichuan, Davida chuan a kut aţangin a thil rawn kensakte chu a lo dawng a, “I inah thlamuang takin hâw tawh le. I thu sawi ang chu ka pawm a, i inpêkna pawh a zahawm hlê mai,” a ti a.

³⁶Abigaili chu Nabala hnênah a va hâw a, a inah chuan lal ang maiin ruai a lo theh a. A rûi bawh a, a hlim sûrh mai a; chuvângin a tûk khua a vâ hmâ chuan a thâwi tham pawhin engmah a hrilh lo.

³⁷A tûk zînga Nabala ruhi a lo reh chuan, a nupui chuan thil awm dân zawng zawng a han hrilh chuan, a mit sulh a, lung tum ang maiin a khawng ta reng a.

³⁸Ni sâwm vêl hnûah chuan Nabala chu LALPA kut tuarin a thi ta a.

³⁹Davidan Nabala a thi tih a lo hriat chuan, “Nabala mîn hmuhsitna mîn lâk kiansaktu, thil tha lo ka tihna tûr laka a chhiahhlawh mîn humtu LALPA chu fakîn awm rawh se! LALPA chuan Nabala suahsualna chu ama lu chungah a tlaktîr ta si a,” a ti a. Davida chuan Abigaili chu nupui atâna va be tûrin mi a tîr a.

⁴⁰Davida mi tirhten Karmel an va thlen chuan Abigaili hnênah, “Davidan a nupui atâna be tûr chein mîn tîr asin,” an va ti a.

⁴¹Ani chu a lo tho va, lei lam hawiin a kûn a, “Hei le, in chhiahhlawhnu, ka pu chhiahhlawhte ke silsaktu tûra chhiahhlawh ka ni ta e,” a ti a.

⁴²Abigaili chu a sabengtung chungah a chuang kai thuai a, a tirhkah nula pangâten an zui bawh a; Davida mi tirhte chu an zui a, a nupui a lo ni ta a.

⁴³Davida chuan Jezreel khuaa mi Ahinoami a lo nei tawh bawh a, an pahnih chuan a nupui an ni ta a.

⁴⁴Saula erawh chuan a fanu Mikali, Davida nupui kha Gallim khuaa mi, Laisa fapa Paltia nupuiah a lo pe daih a.

BUNG 26

DAVIDAN SAULA A ZUAH LEH

¹Ziph-ho chu Gibea khuaa Saula hnênah an lo kal a, “Davida chu Jesimon ep, Hakila tlângah a birû a ni lo’m ni?” an va ti a.

²Saula chu a tho va, Ziph thlalêrah chuan a zuk kal a, Israel mi 3,000 thlan chhuah hruaiin Davida zawng chhuak tûrin Ziph Thlalêr chu a pan ta a.

³Saula chuan Jesimon epa Hakila tlang kawng sîrah awmhmun a khuar a. Davida chuan amah zawng tûrin Saula chu thlalêrah a lo kal tih a hria a, mahse thlalêrah chuan a la awm reng tho va.

⁴Davida chuan enthlatute a tîr chhuak a, Saula chu a lo kal ngei tih a hre Chiang ta a.

⁵Tichuan, Davida chu a tho va, Saula tanhmun khuarna hmunah chuan a va kal a. Davida chuan Saula mutna hmun leh a sipai hotu Nera fapa Abnera mutna hmun pawh a hmû a. Saula chu riahhmun lai takah a mû a, a vêlah chuan a miten an mut hual a.

⁶Davida chuan Hit mi Ahimeleka leh Zerui fapa Abisaia, Joaba unau te hnênah, “Saula-hote riahhmunah chuan tu zâwkin nge min zui dâwn?” a ti a. Abisaia chuan, “Keima’n ka zuk kalpui ang che,” a ti a.

⁷Zânah chuan Davida leh Abisaia chu sipaiho awmnaah chuan an kal ta a; Saula chu riahhmun lai takah chuan a lo mû a, a fei chu a lu bulah a vit bûr a. Abnera leh sipai dangte chu a vêlah chuan an mû a.

⁸Abisaia chuan Davida hnênah, “Vawîinah hian Pathianin i hmêlmâ hi i kutah a pe ta che a nih hi. Chuvângin, fei hian leiah ka’n kilh bet hmiah mai teh ang âw; chhun nawn leh a ngai tawh hauh lo vang!” a ti a.

⁹Nimahsela, Davida chuan Abisaia hnênah, “That lo ve; LALPA hriak thih chungah kut thlâka thiam chang thei tu nge awm thei ang?” a ti a.

¹⁰Davida bawh chuan, “LALPA nunna chhâlin ka sawi e, LALPAN a la khawih mai dawn alâwm, a nih loh pawhin a thih hun a thleng ve mai ang, a nih loh leh, indonaah a la boral mai thei bawh a nia.

¹¹LALPAN a hriak thih chungah kut thlâk lo tûrin min khap tlat alâwm. Mahse a lu bula fei leh tuithâwl hi la ila, i kal tawh mai ang le,” a ti a.

¹²Tichuan, Davida chuan Saula lu bula fei leh tuithâwl chu a lâ a, an kalsan ta a; tûma’n an hmu lo va, an harh hek lo. LALPAN tui taka a muthilhîr avângin an muhîl bawrh bawrh mai a.

¹³Davida chu a râl lehlamah chuan a kal a, hla taka tlâng chhîpah a han chuang a, an inkâr pawh hla tâwk tak a ni a.

¹⁴Davida chuan sipaihote leh Nera fapa Abnera chu a han âu va, “Abner, min chhâng dâwn lo’m ni?” a ti a. Abnera chuan a chhâng a, “Chutia lal te i han auh vei chu lê, tu nge i nih?” a ti a.

¹⁵Davida chuan Abnera hnênah, “Mipa i ni na ngê? Israel ramah hian nang ang hi tu nge awm? I pu, lal kha engah nge i vên that loh? I pu thah tuma mi an lo kal kha le.

¹⁶I thiltih dân hi a tha lo tawp mai. LALPA hriak thih, i pu i vên that loh avângin thi tlâk i ni tih LALPA hming chhâlin ka sawi e. A lu bula lal fei leh a tuithâwl kha khawiah nge a awm han en teh,” a ti a.

¹⁷Saula chuan Davida âw chu hriain, “Ka fapa David, nangma âw a ni elo?” a ti a. Davida chuan, “Aw lalber, keima âw ngei a ni e, ka lalpa,” a ti a.

¹⁸Ani chuan, “Engtizia nge ka lalpa hian a chhiahhlawh hi arawn ûm leh tâk mai? Eng thil nge ka tiha, ka kutah thil sual eng nge awm?”

¹⁹Chuvângin lalber, ka lalpa chuan a chhiahhlawh thû hi lo ngaithla teh se: LALPAN min bei tûra a chawh tho che a nih chuan, chumi thâwina chu lo pawm lul rawh se. Mihring thiltih mai a nih chuan LALPA hmâah ânchhia dawng se la, vawîinah hian LALPA ro ka luah theih lohna tûra mi hnawh bova, ‘Kal bo la, pathian dangte rawng va bâwl daih rawh,’ in tihna ang chauh a ni si a.

²⁰Chuvângin, LALPA hmâah ka thisen hi leiah fartîr lul suh. Miin tlânga varung an veh ang maiin, Israel lal hi uihlî mai ûmin a lo thawh chhuak si a,” a ti a.

²¹Saula chuan, “Ka lo sual ta a ni. Ka fapa David, lo kîr leh rawh. Vawîinah hian i mithmuhah ka nunna i lo ngaihhlut êm avâng hian, kei pawhin kutthlâk che ka tum leh tawh ngai lo vang. Âthlâk takin ka lo ti a, ka lo tusual dêr a ni,” a ti a.

²²Davida chuan a chhâng a, “Heta hi lal fei chu a awm e. Tlangvâl pakhat lo kal sela, rawn la rawh se.

²³LALPA chuan mi tin an dikna leh an rinawmna ang zêlin rûl vek rawh se; vawîinah hian nang hi LALPAN ka kutah min pe nâ a, LALPA hriak thih chungah kut ka lek duh ta lo a nih kha.

²⁴Vawîinah hian i nunna ka ngaihhlutsak che ang bawkin, LALPAN ka nunna hi ngaihlu sela, manganna zawng zawng lakah mi chhan chhuak lul rawh se,” a ti a.

²⁵Saula chuan Davida hnênah, “Ka fapa David, malsâwmnain vûr che rawh se! Thil ropui tak te ti la, hnehna chang zêl ang che,” a ti a. Tichuan, Davida chu a kal sawn ta a, Saula pawh a in lamah a hâw ta a.

BUNG 27

DAVIDAN PHILISTIA-HO THIANAH A SIAM

¹Davida chuan a rilrûin, “Engtikah emaw chuan Saula kutah hian ka la thi ngê ngê dâwn a nih hi. Philistia mite rama tlan bo vat tluka thâ a awm thei tak tak dâwn lo ve; tichuan, Israel ram chhûngah mi zawng beidawng ang a. A kut ațang hian ka him tawh ang,” a ti a.

²Davida chu a tho va, a hnêna awm mi 600 chuang te nêen Gath lal, Maoka fapa Akis-a hnênah an kal ta a.

³Davida chu a hote nêen, an chhûngkua theuh nêen, Gath khuua Akis-a hnênah chuan an awm ta a; Davida chu a nupui pahni, Jezreel mi Ahinoami leh Nabala nupui, Karmel mi Abigaili te nêen an khawsa ho va.

⁴Davida chu Gath khuuaah a tlânchhia tih Saulan a lo hriat chuan a zawng zui tawh lo.

⁵Davida chuan Akis-a hnênah, “Duhsak tlâka min ngai vê a nih chuan i ram chhûnga khawi hmun emaw hi min pe vê la, chutah chuan kan awm ang e. Engah nge i chhiahhlawh hi lal khuuaah a chên ve reng ang le?” a ti a.

⁶Akis-a chuan chumi nî chuan Ziglag a pê a. Tichuan Ziglag chu tûn thlengin Juda lal chan a lo ni ta a.

⁷Philistia rama Davida awm hun chhûng chu kum khat leh thla li a ni.

⁸Davida leh a hote chu an chho va, Gesur te, Girzi te leh Amalek hote an va rûn a. Chûng hnamte chu hmânlai ațangin Sur leh Aigupta thlenga luahtute an ni a.

⁹Davidan mi ram a rûn rêng rêngin, a hmei a pain tumah a zuah ngai lo; mahse, an berâm te, an bâwngpa te, an sabengtung te, an sanghâwngsei te leh an thuamnâwte erawh chu lâksakin, Akis-a hnênah a lo kîr leh thîn a.

¹⁰Akis-a chuan, “Vawinah khawî lam nge i va rûn?” a ti a. Davida chuan, “Judai ram chhim lam te, Jerameel chhim lam te leh Ken ram chhim lam zêl kan hrût a ni,” a ti a.

¹¹Davida chuan Gath khuua chanchin thlena, “Davidan chutin khatin a ti,” ti tûr pawh awm lo tûrin, a hmei a pain a that vek zêl a. Chutiang chu Philistia rama a awm chhûnga a tih dân a ni.

¹²Akis-a chuan Davida chu a ring ta hlê a, “Ama chipui Israelte tân huatthlala takin a insiam ta bawk a; tichuan, ka chhiahhlawhah awm kumkhua teh se,” a ti a ni.

BUNG 28

¹Chûng hun lai chuan Philistia-ho chuan Israelte do tûrin an sipaite an ko khâwm a. Akis-a chuan Davida hnênah, “Nang leh i hote hian indonaah chuan min telpui vê ngei dâwn tih lo hria ang che,” a ti a.

²Davida chuan Akis-a hnênah, “Chuti chu, i chhiahhlawh hian eng thil nge a tih theih i hre mai ang,” a ti a. Akis-a chuan Davida hnênah, “A thâ e, ka sipai hotu lûah ka siam kumkhua mai dâwn che nia,” a ti a.

SAULAN DÂWITHIAM A RUAI

³Samuela chu a thi tawh a, Israel mi zawng zawng pawhin an sûn a, ama khua Rama-ah an phûm a. Saula chuan râuazâwlte leh mitthi thlarau betute chu a ram ațangin a hnawt chhuak vek tawh a.

⁴Philistia-ho chu an inpun khâwm a, Sunem khuuaah tanhmun an khuar a. Saula pawhin Israelho zawng zawng a khâwm vek a, Gilboa hmunah tanhmun an khuar bawk a.

⁵Saulan Philistia sipai rual a han hmuh chuan, a hlâu va, a tiril a khûr zawih zawih a.

⁶Saulan LALPA a râwn pawhin, LALPA chuan mumang emaw, Urim emaw, zâwlnei hmangin emaw a chhâng si lo va.

⁷Saula chuan a chhiahhlawhte hnênah, “Mitthi thlarau be thei dâwithiamnu pan tûr leh va râwn theih tûr min zawnsak teh u,” a ti a. A chhiahhlawhte chuan, “En Dor khuuaah râuazâwnu a awm asin,” an ti a.

⁸Tichuan, Saula chu thawmhnaw dang hân a inbâwl danglam a, mi pahni hruaiin a kal ta a; hmeichhe hnênah chuan zânah an va kal a. Ani chuan, “Thlarau min râwnsak rawh, a hming ka sawi apiang min koh chhuahsak dâwn nia,” a ti a.

⁹Hmeichhia chuan a hnênah, “E khai, Saula thiltih dân i hria alâwm, râu-zâwlte leh dâwithiamte chu a ram chhûng ațangin a tiboral vek tawh a. Engati nge ka thihna tûra thang i kam le?” a ti a.

¹⁰Saula chuan LALPA hming chhâlin chhia a chham a, “LALPA hming chhâlin ka sawi e, hê thil avâng hian i chungah hremna a thleng tawp lo vang,” a ti a.

¹¹Hmeichhia chuan, “A nih leh tu nge ka koh chhuahsak ang che?” a ti a. Ani chuan, “Samuela mi koh chhuahsak rawh,” a ti a.

¹²Hmeichhia chuan Samuela a han hmuh chuan a têt tuarh tuarh a. Hmeichhia chuan Saula hnênah, “Engah nge mi bum? Saula i ni reng si a!” a ti a.

¹³Lal chuan a hnênah, “Hlâu suh. Eng nge i hmuh?” a ti a. Hmeichhia chuan Saula hnênah, “Lei ațanga lo chhuak thlarau ka hmû,” a ti a.

¹⁴Ani chuan a hnênah, “Eng ang hmêl pu nge a nih?” a ti a. Ani chuan, “Putar a lo chhuak a, kawrfual a hâ,” a ti a. Saula chuan Samuela a ni tih a hre ngâl a, bawkkhupin chibai a bûk a.

¹⁵Samuela chuan Saula hnênah, “Engah nge mi tibuai tûra mi rawn koh chhuah?” a ti a. Saula chuan, “Ka mangang êm atin ni; Philistia-hoten min rawn bei a, Pathian lahin min hawisan tawh bawk si; zâwlnei emaw, mumang lamah emaw eng thû mahin min chhâng tawh si lo va. Chuvângin, engtin nge ka tih dâwn min hrilh tûrin ka ko ngawt mai che a nih hi,” a ti a.

¹⁶Samuela chuan: “LALPAN a kalsan tawh che a, i hmêlmâ a nih tawh bawk si chuan engah nge mi la zawh cheu le?”

¹⁷LALPAN ka hnêna a sawi tawh ang khân a ti ta a nih chu. LALPA chuan lalram chu i kut ațangin a chhuahsak che a, i thenawm David a pêk tawh kha.

¹⁸LALPA thû i âwih lohva, a thinrimna nasa tak chu Amalek-ho chungah i hlen chhuah loh avângin, vawinah hê thil hi LALPAN i chungah a thlentîr ta a nih hi.

¹⁹Chû mai a ni lo, LALPAN Israel chu nangmah chawpin Philistia-ho kutah a pe dâwn a ni. Naktûkah nang leh i fapate chu ka hnênah in rawn awm ve tawh ang. LALPA chuan Israel sipaite chu Philistia-ho kutah a pe bawk dâwn a ni,” a ti a.

²⁰Chû vêleh Saula chu leiah chuan a thu thuai a, Samuela thu sawi chu râpthlâk a tiin a hlâu êm êm a. Nîlêng zankhuua chaw ei tawh lo a nih avângin a thâ a zawi zo vek a.

²¹Saula bulah chuan hmeichhia chu a lo kal a, a manganzia chu a hria a, a hnênah, “En teh, i chhiahhlawhnu hian i thû a zâwm a, thih pawh dâwn lovin i sawi ang takin ka ti ta mai a.

²²Tûnah chuan i chhiahhlawhnu thû hi âwih ve tûrin ka ngên a che, i ei âtân chhang ka rawn pe ang che a; chû chu ei la, tichuan, i hâu kawng âtân thahrui i nei thei dâwn nia,” a ti a.

²³Mahse ani chuan, “Ka ei lo vang,” tiin a hnial tlat a. A chhiahhlawhte leh hmeichhia chuan ei tûrin an nawr a; an thu chu a pawm ta a. Tichuan lei aţang chuan a lo tho va, khumah chuan a thû a.

²⁴Chû hmeichhia chuan an inah bâwng no châwm thau a nei a, hmanhmawh takin a talh a. Chhangphut a lâ a, a hmet a, chû chuan dâwidim telh loh chhang a ur a.

²⁵Saula leh a chhiahhlawhte hmâah chuan a va hlui a, an ei ta a. Tichuan an tho va, a zân a zânin an kal chhuak leh ta a.

BUNG 29

PHILISTIA-HOVIN DAVIDA AN HNAR

¹Philistia-ho chuan an sipai zawng zawng Aphek hmunah an khâwm a, Israel-ho pawh Jezreel hmuna tuikhur bulah ţanhmun an khuar bawk a.

²Philistia lalho chu a za rual te, a sâng rualtein an kal thup thup a, Davida leh a hote chuan Akis-a hovin hnû an dâl a.

³Philistia lalhote chuan, “Hêng Hebrai hote hian eng nge an tih ve dawn?” an ti a. Akis-a chuan Philistia lalhote hnênah, “Hê mi hi Davida, Israel lal Saula chhiahhlawh, ka hnêna hun engemaw chen awm tawh a ni lo’ m ni? Ka hnêna a rawn tlûk luh ni aţanga vawiin thleng hian amahah dik lohna rêng ka hmu lo asin,” a ti a.

⁴Nimahsela, Philistia lalhote chu a lakah an thinrim a; tichuan, Philistia lalhote chuan a hnênah, “Hê pa hi a awmna tûra i dahna hmunah chuan hawtîr leh rawh, indonaah te zawng kan zîngah kaltîr ve tûr a ni lo, indona hmunah chuan kan hmêlmâah a ţang daih mai tûr asin. A pu nêna inremleh nân hêng kan mite lu lâk tluka remchâng a awm dâwn em ni?

⁵Hê Davida hi a ni lo vem ni lâm chungâ— ‘Saulan a sâng a sâng a that a, Davidan a sîng a sîng a that’ tia zaia an awih kha?” an ti a.

⁶Tichuan, Akis-a chuan Davida chu a ko va, a hnênah, “LALPA nunna chhâlin ka sawi e, mi dik tak i ni a, ka sipaite nêna in lût leh chhuak thîn hian ka mit a tlung hlê a. Ka hnêna i lo thlen ni ata vawiin thleng hian nangmahah sual rêng rêng ka hmu lo. Mahse lalhote hian an duh tlat si lo che a.

⁷Chuvângin, kîr leh mai rawh, Philistia lal dangte tihlungâwi loh ai chuan kîr leh ta mai la, ngaihngam takin kal ang che u,” a ti a.

⁸Davida chuan Akis-a hnênah, “Eng thil nge ka tihsual? I hnêna ka awm chhûng zawngin, vawiin thleng hian i chhiahhlawh hian eng thil nge ka tih i hmuha, ka pu, lal hmêlmâ dopui thei lova ka lo awmna chhan hi eng nge ni ta?” a ti a.

⁹Akis-a chuan Davida chu a chhâng a, “Ka mithmuhah Pathian Vântirhkoh ang maia ţha i ni tih ka hria; nimahsela, Philistia lalhoten, ‘Indonaah kan hnênah a han kal ve tûr a ni lo,’ an ti tlat si alâwm.

¹⁰Chuvângin, nangmah rawn kalpuitu i pu chhiahhlawhte nên naktûk zîng takah tho ula. Zînga in thawha, khua a ên vêleh in hâu mai dâwn nia,” a ti a.

¹¹Tichuan, Davida leh a hote chu, Philistia rama kîr leh tûrin zîng takah an tho va. Philistia-hote erawh chu Jezreel-ah an chho ta a.

BUNG 30

DAVIDA LEH AMALEK-HO INDO

¹Ni thum nia Davida leh a hoten Ziglag an va thlen chuan Amalek-hovin Chhim lam leh Ziklag khua chu an lo rûn a, Ziklag chu an lo hâl vek mai a.

²Hmeichheho leh chû khuaa awm zawng zawng chu, a lian a têtin salah an lo kâwi vek a; tumah that lovin an hruai a, an hâwnpui vek a.

³Davida leh a hoten khua an va thlen chuan, a lo kâng vek a; an nupuite, an fapate leh an fanute chu salah an lo hruai vek a.

⁴Davida leh a hnêna mite chu an ţap vak vak a, râwl chhuak tûr awm tawh lo khawpa châu hnêpin an ţap a.

⁵Davida nupui pahni, Jezreel mi Ahinoami leh Nabala nupui thihsan, Karmel mi Abigaili te pawh salah an man tel a.

⁶Mi tin mai chu an fanute leh an fapate avângin an lungngai êm êm a, mite chuan Davida chu lunga den hial an sawi tâk avângin ani chu a mangang ta hlê mai a. Mahse, LALPA a Pathianah chuan a intichak sauh sauh a.

⁷Davida chuan puithiam Abiathara, Ahimeleka fapa hnênah, “Khawngaih takin puithiam kawr kha mi rawn lâk ta che,” a ti a. Abiathara chuan puithiam kawr chu Davida a rawn kensak a.

⁸Davida chuan LALPA a zâwt a, “Hêng sipaiho hi ka ûm ang em? Ka la ûmphâ ang em?” a ti a. Ani chuan, “Ûm rawh, i la ûmpa ngei ngei ang a, i chhan chhuak leh vek baw ang,” tiin a lo chhâng a.

⁹Tichuan, Davida chu a hnêna mi 600 te nên chuan an thawk chhuak ta a; Besor Lui an va thleng a, an mi hnutchhiahte chu chutah chuan an lo awm a.

¹⁰Davida leh a ho mi 400 te chuan an ûmzui zêl a; Besor Lui kân zo lo mi châu zual 200 te chu an hnutchhiaht a.

¹¹Phûlah hian Aigupta mi pakhat an hmû a, Davida hnênah an hruai a; chhang an pê a, a ei a, tui an intîr bawk a.

¹²Theipui chhang hlâwm khat leh grêp rah ro an pe bawk a. Chûng thil a ei hnû chuan a lo harh leh ta a; ni thum leh zan thum chhûng chaw ei lovin, tui pawh in lovin a lo awm tawh a.

¹³Davida chuan a hnênah, “Tû lama țang nge i niha, khawi lama mi nge i nih?” a ti a. Anî chuan, “Aigupta tlangvâl, Amalek-mi chhiahhlawh ka ni; ni thum kal ta khân ka dam loh avângin ka puin min kalsan daih a.

¹⁴Kereth chhim lam ram te, Juda ram chhûng te, Kaleba ram chhim lam te kan rûn a; Ziklag khua kan hâl bawh,” a ti a.

¹⁵Davida chuan a hnênah, “Chûng sipaite awmnaah chuan min hruai thei ang em?” a ti a. Anî chuan, “Min that lo tûr leh, ka pu kuta min pe lêt lo tûrin, Pathian hmingin chhia chham rawh u; tichuan, chûng sipaiho awmnaah chuan ka hruai dâwn che u nia,” a ti a.

¹⁶Chutia a zuk hruai thlen chuan, anniho chu hmun tinah an lo awm darh nuaih a, Philistia ram leh Juda ram ațanga râlîak sum tam tak an lâk avânga ruai țhehin an eiin an in a, an lo lâm hut hut a.

¹⁷Davida chuan khawthim ațanga a tûk tlai thlengin a bei a. Sanghâwngseia chuanga tlânchhia mi 400 bâk chu tumah damin an chhuah lo.

¹⁸Davida chuan Amalek-hovin an lâksak zawnz zawnz chu a chhuh leh vek a, Davida chuan a nupui pahnihte pawh a chhan chhuak bawh a.

¹⁹An fanute leh an fapate chu, a lian a têin, an râlîakte leh an thil lo lâksakte rêng rêng hmuh kîr loh an nei lo; Davida chuan a la lêt leh vek a ni.

²⁰Davida chuan berâm rual leh ran rual zawnz zawnz chu a lâ a, ran rual dangte hmâah an kaltîr a, “Hei hi Davida râlîak a nih hi,” an ti a.

²¹Mi zahnih rual, an chauh êm avânga Davida zui thei ta lo, Besor Luia an awmtîr tâkte awmna chu Davida chuan a va thleng a. Anni chuan Davida leh a hnêna mite chu an lo hmuak a. Davida pawhin an hnên a va thlen chuan chibai a bûk a.

²²Mahse Davida zuitute zînga misualho leh Beliala fapate chuan, “Kan hnêna an kal vê loh avângin, râlîak thil kan va lâk lêt leh te hi kan pe vê tûr a ni lo, an nupuite leh an fâte chauh pê îla, kal bo ngâl se a ni mai,” an ti a.

²³Nimahsela, Davida chuan, “Ka unaute u, min rîntu sipai rual kan kuta min petu leh min humhimtu LALPA thil min pêkte hi chutiingin in ti tûr a ni lo.

²⁴Chutia in tihin tu nge pawm thei ang che u? Chuvângin, indonaa zuk kalte leh bungraw vênga lo awmte hian an chang ve tûr a ni; inang vekin kan chang tlang țheuh tûr a ni,” a ti a.

²⁵Chumi ni ațang chuan tih dânah an neih ta a; tûn thleng hian Israelte dân leh thupêkah hman a ni ta zêl a ni.

²⁶Davidan Ziklag khua a lo thlen chuan, a râlîak țhenkhat chu a țhian Juda upate a sem hlawm a, “LALPA hmêlmâte laka râlîak ațangin thilpêk ka rawn thawn e,” tiin—

²⁷Bethela awm te, Chhima Ramotha awm te, Jattira awm te,

²⁸Aroera awm te, Sipmoth-a awm te, Estemoa awm te,

²⁹Rakala awm te, Jerameel khuua awm te, Ken khuua awm te,

³⁰Hormaa awm te, Korasana awm te, Athaka awm te,

³¹Hebrona awm te leh, Davida leh a hote vahvêl tawhna hmuna awm zawnz zawnz pawh a thawn vek a.

BUNG 31

SAULA LEH A FATE THIH DAN RUNTHLAK

¹Philistia-ho chuan Israelte chu an bei ta a; Israel mite chu Philistia mite hmâah chuan an tlânchhia a, Gilboa Tlângah chuan an that țeuh va.

²Philistia-ho chuan Saula leh a fapate chu ngawrh takin an ûmzui zêl a. Philistia-ho chuan Saula fapa Jonathana leh, Abinadaba leh Malkisua te an that a.

³Saula chu nasa takin an bei a. Thal kâptute chuan an kâp fuh ta a, an kahna chu a hliam na hlê a.

⁴Saula chuan a râlthuam kengtu hnênah, “I khandaih phâwi la, mi han vit tlang mai teh, chuti lo zawnz, hêng serhtan-lohho hian min rawn chhun tlang ang a, min rawn uankhum rêu rêu ang e,” a ti a. Mahse a râlthuam kengtu chuan a hlauh êm avângin a ti ngam lo va. Saula chuan a khandaih chu a lâ a, a bawh ta a.

⁵A râlthuam kengtuin Saula a thi ta tih a han hmuh chuan, a khandaih chu a bawh vê a, an thi dîn ta a.

⁶Tichuan, Saula te, a fapa pathum te, a râlthuam kengtu leh a mite zawnz zawnz chu chumi nî chuan an vaiin an thi ta a ni.

⁷Ruam lehlama awm Israel mite leh Jordan râla mite chuan Israel-ho an tlânchhia a, Saula leh a fapa pathumte pawh an thi ta tih an hriat chuan, an awmna khuate chu an rauhsan a, an tlânchhe ta a. Philistia-ho an lo kal a, an rawn luah ta a.

⁸A tûka an râl thahte thuam hlihsak tûra Philistia-ho an va kal chuan, Gilboa Tlânga Saula leh a fapa pathum thi ta te ruang chu an va hmû a.

⁹A lu an lâ a, a râlthuam an hlihsak a, mi zawnz zawnz lo hriat atân Philistia ram pumah thû an thawn kual a, an milem biak inah te chuan an puang darh vêl a.

¹⁰A râlthuam chu Astoreth tempul-ah an dah a, a ruang chu Beth San kulh bangah an phuar bet a.

¹¹Jabes Gilead khuua miten Philistia hovin Saula an tih dân an lo hriat chuan,

¹²chuta mi huaisen zawnz zawnz chu an tho va, zan khuain an kal a, Beth San kulh banga Saula ruang leh a fapate ruang chu an va hlâwm a; Jabes-ah an rawn lâ a, chutah chuan an hâl ta a.

¹³An ruhte chu an lâ a, Jabes khuua tamarisk thing hnuaiah an phûm a, ni sarih chhûng chaw an nghei ta a.

2 SAMUELA

Ziah tu: Hriat chian loh • Ziah kum: B.C. 930 vêl

Samuela Bu Khatna ang bawh khân Samuela Bu Hnihna pawh hi a ziaktu hming târ lan loh a ni a. Israel lal hmasâ Saula thih ațanga Davida lo lal țin dân leh a rorêl lai, kum 40 chhûnga thil thleng chanchinin a luah vek a. Chû chuan B.C. 1010-970, kum sawmli chhûng a huam. A bu hming putu ni mah se, 2 Samuela hi Samuela thih hnû chanchin a nih avângin hê bu hi Davida dam lai leh a thih hnû chanchin hria, Israel chanchin ziah awm sâte ațanga B.C. zabi 10na emaw, a hnû deuhva ziaak hrang hrang fâwk khawm a ni thei ang. Chûng zîngah chuan zâwlnei Isaia (B.C. 743-683) ziah a nih ring an awm. 2 Samuela bû-ah hian Israel lal ropui leh thiltithe Davida rorêlna hnuaia Israel fate intuai thar leh dân te, Pathian chu a mite chungah rorêltu tak a nihzia te, Jerusalem lâk leh Israelte khawpui a lo nih tâk dân te, Davida hnuaia Israelten an hmêlmâte hneha ram zau tak an awp thû te, Davida suala a tlûk thû leh, chû sualnain ram pum a nghawng chhiat dân te kimchanga tarlan a ni. Hê lehkhabin Davida nun leh Israel ram awm dân a tar lan ațang hian Pathian thu âwih chu malsâwmna, Pathian dân pawisak loh chu ânchhia leh hremna, chhiatna thlentü a nihzia kan hmu Chiang hlê. 2 Samuela hi Bible a lehkhabu 10-na a ni a, bung 24 a awm a, châng 695 a awm bawh.

BUNG 1

SAULA THIH THU

¹Saula thih hnûa, Davidan Amalek-ho a va thah chiam zawha a lo hâu chuan, Davida chu Ziklag khuah ni hnih a châm a,

²mi pakhat chu Saula riahhmun ațangin a lo kal a, a kawr chu a țin pheng phung a, a lû-ah te chuan lei a kai luam a. Davida hnên a lo thlen chuan a bawkkhup a, chibai a bûk a.

³Davida chuan a hnênah, “Khawi ațanga lo kal nge i nih?” a ti a. Ani chuan, “Israelte riahhmun ațangin ka lo lân chhuak a ni,” tiin a rawn sawi a.

⁴Davida chuan a hnênah, “Eng thil nge lo thleng ta? Khawngaihin min hrilh teh,” a ti a. Ani chuan, “Indona ațangin mi an tâlchhia a, mi tam tak an that a, Saula leh a fapa Jonathana te pawh an thi tel vê a ni,” a ti a.

⁵Davida chuan chû thu rawn hrilhtu tlangvâl hnênah, “Engtin nge Saula leh Jonathana te an thi tih i hriat?” a ti a.

⁶Chanchin hrilhtu tlangvâl chuan, “Gilboa tlangah engemaw avângin ka awm vê hlahu va, Saula chu a fei rinchhanin a ding a; tawlaifirte leh sakawr chungchuan mite chuan an rawn ûmpa țin tawh a.

⁷Hnung lam a rawn hawi a, mi rawn hmuh chuan min âu va. Kei chuan, ‘Heta hi ka awm e,’ ka ti a.

⁸Ani chuan ka hnênah, “Tu nge i nih?” a ti a. ‘Amalek-mi ka ni e,’ tiin ka chhâng a.

⁹Ka hnênah chuan, ‘Ka chungah rawn ding la, mi han that teh, lungngaihna min tlâkbuak ta, mahse ka la thi si lo,’ a ti a.

¹⁰Tho leh thei rual lova tlu a ni tih ka hmuhin, amah chu ding chungah rap betin ka that ta a ni. A lûa lallukhum leh a bânun pawh hei, ka pu hnên ka rawn thlen a ni,” a ti a.

¹¹Chû vêleh Davida leh a kianga mite chuan an puan te an pawt thlêr a.

¹²Chutia khandaiha thah an nih tâk avâng chuan Saula leh a fapa Jonathana te chu sînin LALPA mi Israelte leh Israel chungkaw tân an țin a, tlai thlengin chaw an nghei a.

¹³Davida chuan chanchin hrilhtu tlangvâl chu, “Khawi lam mi nge i nih?” a ti a. Ani chuan, “Ram dang mi, Amalek fapa ka ni,” a ti a.

¹⁴Davida chuan a hnênah, “Eng aiah nge LALPA hriak thih tihlum tûra kut i han thlâk ngam chu le?” a ti a.

¹⁵Davida chuan tlangvâl pakhat a ko va, “Va hnaih la, va that teh!” a ti a. A va sât hlum ta a.

¹⁶Davida chuan chû mi hnênah chuan, “I thisen mawh chu nangma chungah tla rawh se, ‘LALPA hriak thih ka that e,’ i ti a, nangma kâ ngein thiam loh a chantîr a che,” a ti a.

THAL NGUL HLÂ

¹⁷Davida chuan Saula leh a fapa Jonathana te chu hê hlâ hian a sîn a,

¹⁸hê Thal ngul Hlâ hi Juda thlahte zirtîr zêl tûrin a hrilh a; Jasara Bu-ah pawh ziah a ni:

¹⁹Israel mâwina chu i hmun sângah a fam ta maw! Mi chakte pawh an tlu ta!

²⁰Gath khuah chu hrilh suh u, Ashkelon khawlaiah puang hek suh u— Philistia fanute an lâwm ang a, Serhtan loh fanute an pângng lu dah ang e.

²¹Aw, Gilboa tlangah te chuan Ruah leh dâi tla suh se, Lote pawhin rah chhuah suh se. Tah chuan mi chak phâw an theh thal reng si a! Saula phâw-in hriak a kâi lo ve.

²²Thahte thisen ațang leh, Mi chakte thâu ațangin. Jonathana thal a lêt ta lo, Saula khandaiha a lêt thlawn lo ve.

²³Saula leh Jonathana, nun duhawm leh mâwi, Inthen lovin an fam dîn ta; Mupui aiin an zam a thâ, Sakeibaknei aiin an chak zâwk si.

²⁴Saula chu țin chiam r’u, Israel nute u, Puan senlâr a sintîr che u-a; Rangkachaka a chei maw che u kha.

²⁵“Indonaah mi chakte an tlu ta mâw! In hmun sângah Jonathana a fam ta.

²⁶Ka unaupa Jonathan, ka va lainat tak che êm! Ka tâna i nêlawm țin zia te kha; I mi hmangaihna chu a mak êm a, Nu hmangaihna a khûm hial e.

²⁷“Mi chakte an tlu ta si a, Râlthumte pawh a boral zo ta!”

BUNG 2

JUDA LAL HRIAKTHIH DAVIDA

¹Chumi hnûah chuan Davidan LALPA chu a rawn a, “Judai ram khuaah te ka han chuang chhuak dawn em ni?” a ti a. LALPA chuan a hnênah, “Han chho ta che,” a ti a. Davida chuan, “Khawiah nge ka han kal ang?” a ti a. Ani chuan, “Hebron khuaah” a ti a.

²Tichuan, Davida chu a nupui pahnih, Jezreel mi Ahinoami leh Karmel mi Nabala nupui thihsan Abigaili te nêan an chho ta a.

³Davida chuan a hnêna awm te chu a chhûngkua kuain a hruai chho va. Hebron khuaah chuan an awm ta a.

⁴Judai rama mite chu an lo kal a, Davida chu Juda mite chungah lal atân hriak an rawn thih a. “Saula phûmtute chu Jabes Gilead mite an ni,” tih Davida chu an hrilh a.

⁵Davida chuan Jabes Gilead mite hnênah zualko a tîr a, “In pu Saula chungah lainatna lantîra, in lo phûm avângin LALPA chuan malsâwm che u rawh se.

⁶LALPA chuan zahngaihna leh thutak in chungah lantîr sela. Hê zahngaihna thil in lo tih avâng hian ka la rûl ve ang che u.

⁷Tûnah hian in kutte chu tihchakin lo awm sela, huai takin lo awm rawh u; in pu Saula chu a thi ta a, Juda chhûngkua chuan an lal atân hriak min thih vê ta a ni,” tih thû a thawn a.

ISRAEL LALAH ISHBOSETHA AN SIAM

⁸Nimahsela, Nera fapa Abnera, Saula sipai hotu chuan Saula fapa Isbosetha chu Manahaim-ah a hruai a;

⁹Gilead chungah te, Asur chungah te, Jezreel chungah te, Ephraim chungah te, Benjamin chungah te leh Israel ram pum chungah te chuan lalah a siam a.

¹⁰Saula fapa Isbosetha chu Israel lal a lo nih tan lai chuan kum sawmlîa upa a ni a, kum hnih chhung ro a rêl a. Juda hnam te chauhvîn Davida lam an zawm a.

¹¹Hebron khuaa Judate chungah Davida rorêl chhûng chu kum sarîh leh thla ruk a ni.

ISRAEL LEH JUDA AN INDO

¹²Nera fapa Abnera leh Saula fapa Isbosetha hote chu Manahaim aţangin Gibeon-ah an kal a.

¹³Zeruii fapa Joaba leh Davida hote pawh an lo kal chhuak bawh a, Gibeon dîl kamah an intâwk a. Dîl kam tawn tawnah chuan inepin an thû thup a.

¹⁴Abnera chuan Joaba hnênah, “Kan tlangvâlthe hi tho sela, kan hmâah hian han inbei ang hmiang,” a ti a. Joaba chuan, “Lo tho ang hmiang,” a ti a.

¹⁵Tichuan, zât leh zât chhiarin an tho va, Saula fapa Isbosetha lamţang Benjamin mi sawm pahnih leh, Davida lamţang sâwm pahnih an lo chhuak bawh a.

¹⁶An samah inman vê vêin an nâkah khandaihin an invit tawn a, an tlu ta vek a. Chuvângin chu lai hmun hming chu Khandaihi Hriam Hmun an ti ta a, Gibeon hmuna awm a ni.

¹⁷Tichuan, chumi ni chuan nasa takin an inbei a, Abnera leh Israel mite chu Davida hote hmâah chuan an tlâwm ta a.

¹⁸Zeruii fapa pathumte chu: Joaba, Abisaia leh Asahela te an ni a. Asahela chu sazuk ang maia ngalchak a ni a.

¹⁹Asahela chuan Abnera chu a ûm a, Abnera a ûm lai chuan ding lam leh vei lama pêng miah lovin a tlân dîng nal nal a.

²⁰Abnera chuan hnung lam a han hawi a, “Asahela i ni elo?” a ti a. Ani chuan, “Ni ang chu,” a ti a.

²¹Abnera chuan a hnênah, “I ding lam emaw, i vei lam emawah pêng la, tlangvâl pakhat kha man la, a râlthum kha lâksak ta che,” a ti a. Mahse Asahelan amah a ûm lai chu a pênzan duh lo va.

²²Abnera chuan Asahela hnênah, “Mi ûm tawh suh. Engah nge ka chhun thlûk kher ang che? I u Joaba hmêl ka hmu ngam dawn em ni?” a ti leh a.

²³Mahse a pênzan duh si lo va. Tichuan, Abnera chuan a fei bil zâwngin a pumah a chhun a, a hnung lamah fei chu a tlang zawk a; chutah chuan a tlu tawp a, a thi ta a. Asahela a tlûka a thihna hmun lo thleng apiang chu an ding chawt zêl a.

²⁴Joaba leh Abisaia te pawhin Abnera chu an ûm bawh a. Gibeon Thlalêr panna kawng, Giah thlen hmâ, Amma tlâng an lo thlen chuan ni a tlâ tawh a.

²⁵Benamina thlahte chu Abnera bulah chuan an pung khâwm a, pâwl khatah intêl khâwmin, tlâng chhîpah chuan tan an lo khawh a.

²⁶Abnera chuan Joaba chu a âu va, “Khandaihin min ei ral zêl dawn em ni? A tâwpah chuan a lungchhiatthlâk viau dawn tih i hre lo vem ni? Engtikah nge i mite chu an unaute ûm tawh lo tûra i hrilh dawn?” a ti a.

²⁷Joaba chuan, “Pathian nung chhâlin ka sawi e, engmah han sawi lo la chuan naktûk zîng thleng rawkin an unau zawng zawng chu an ûm mai dawn asin,” a ti a.

²⁸Tichuan, Joaba chuan tâwtawrâwt a hâm a; mipui zawng zawng chu an ding ta vek a, tûma’n Israel-ho chu an ûm zui ta lo va, an inbei zui ta lo va.

²⁹Abnera leh a mite chu chumi zân chuan zankhuain phai zâwlâh chuan an kal a, Jordan lui an kân a, Bithron an kal tlang a; Manahaim an va thleng a.

³⁰Joaba pawhin Abnera a ûm chu a kîrsan a. A mite chu an vaiin a ko khâwm a, Davida mi leh sâ chu Asahela bâkah sâwm pakua-in an kim lo va.

³¹Davida hote erawh chuan Benjamin mite leh Abnera hote chu mi zathum leh sawmruk lai an that a.

³²Asahela ruang chu an lâ a, Bethlehem khuaa a pa thlânah an phûm a. Joaba leh a hote chu zankhuain an kal a, khawvârah Hebron an thleng ta a.

BUNG 3

¹Saula chhûngkua leh Davida chhûngkua chu rei tak an indo va. Davida chu a lo chak tial tial a, Saula chhûngkua erawh chu an chak lo telh telh a.

DAVIDA FATE

²Davida chuan Hebron-ah fapate a nei a: A fa û ber chu Ammona a ni a, Jezreel mi Ahinoami laka mi a ni;

³a pahniha chu Kileaba a ni a, Karmel mi, Nabala nupui thihsan Abigaili laka mi a ni; a pathumna chu Absaloma a ni a, Gesur lal, Talmaia fanu, Maakai fapa a ni;

⁴a palina chu Adonija a ni a, Hagithi fapa a ni; a pangâna chu Sephatia a ni a, Abitali fapa a ni;

⁵a parukna, Davida nupui Eglai laka mi chu Ithreama a ni. Hêngte hi Davida fa, Hebron khuua piang te chu an ni.

DAVIDA LAMAH ABNERA A TANG

⁶Saula chhûngkua leh Davida chhûngkua an indo chhûngin Saula chhûngkaw chungah Abnera chu a thù tial tial a.

⁷Saula khân hmei a nei a, a hming chu Rizpai a ni a, Aia fanu a ni. Isbosetha chuan Abnera hnênah, “Engati nge ka pa hmeinu hnêna i luh ve rîkngawt?” a ti a.

⁸Isbosetha tawngkam chuan Abnera chu a titinur ta êm êm mai a, “Juda uicho lû mai em ni ka lo nih? I pa Saula chhûngte, a unaute leh a thianta tân vaviin thlengin rinawm takin ka lo thawk a, nang pawh Davida kutah ka hlân duh lo che a; tânah hê hmeichhe chungah thil tisualah min puh ang maw?”

⁹Davida hnêna LALPA thutiam hlen chhuak tûrin a lamah ka tang daih ang maw le, ka tih lohva ai chuan Pathianin Abnera hi a duh duhin ti rawh se, chû aia nasa pawhin—

¹⁰chuvângin hê lalram hi Saula chhûngkaw hnên ațanga lâksak a ni ang a, Israel chungah te, Judai ram chungah te, Dan ațanga Beerseba thlengin Davida lalthutthlêng chu tundin a ni ang,” a ti a.

¹¹Abnera chu a hlahu êm avângin a chhâng zui ngam lo.

¹²Abnera chuan Davida hnênah palai a tîr a, “Hê ram hi tu ta nge? Tirawh, inremna siam ila, Israel ram pum hi i lama tang vek tûrin ka pui ang che,” a ti a.

¹³Davida chuan, “A thâ e, inremna thuthlung kan siam dân nia. Mahse, thil pakhat ka phût teh ang che: mi hmu tûra i lo kal chuan, Saula fanu Mikali rawn hruai hmasa lovin ka hmêl i hmu thei lo vang,” a ti a.

¹⁴Tichuan, Davida chuan Saula fapa, Isbosetha hnênah, “Philistia mi serhvu zâ zeta ka lei, ka nupui Mikali kha min pe rawh,” a ti a.

¹⁵Isbosetha chuan mi a tîr a, ani chu a pasal Paltiel, Laisa fapa hnên ațang chuan an va hruai a.

¹⁶A pasal chuan tap chungin Bahurim thlengin a zui a. Abnera chuan, “Kîrsan tawh rawh!” a ti a. A kîr ta a.

¹⁷Abnera chuan Israel upate chu a be kual a, “Tûn hmâ khân Davida chu in lal atân in lo duh thîn kha.

¹⁸Tûnah hian nei tawh rawh u le! LALPAN Davida chungchâng sawiin, ‘Ka chhiahhlawh Davida kutin ka mi Israelte chu Philistia mite kut ațang leh an hmêlmâ zawng zawngte kut ațangin ka chhan chhuak ang’ a lo tih tawh kha,” a ti a.

¹⁹Abnera chuan Benjamin mite hnênah a sawi bawk a. Tichuan, Abnera chu Davida hmu tûrin Hebron-ah chuan a va kal

a, Benamina chhûngte leh Israel mi zawng zawngin thâ an tih thù chu a va hrilh a.

²⁰Abnera chu Davida hnênah mi sawmhnih hruaiin Hebron-ah a va kal a. Davida chuan Abnera leh a hnêna mite tân ruai a thehsak a.

²¹Abnera chuan Davida hnênah, “Ka tho vang a, Israel mi zawng zawngin ka pu hi an lal atâna thù an rawn thlunpui vek theih nân leh, i thînlung duh zâwng ang taka ro i rêl theih nâna sâwm khâwm tûrin ka kal tâng e,” a ti a. Tichuan Davida chuan Abnera chu a thlah liam a, ngaihtâ takin a kal ta a.

JOABAN ABNERA A THAT

²²Chutih lai chuan Davida mite chu Joaba hova an rammutna ațangin an lo hâw a, râllâk thil tam tak an rawn hâwn a. Abnera chu a tîrh hâw leh tawh avângin Hebronah a awm ve lo va, ngaihngam takin a kal ta kha a ni a.

²³Joaba leh a hnêna sipai zawng zawng an lo hâw chuan, Joaba hnênah, “Nera fapa Abnera chu lal hnênah a lo kal a, ani chuan a thlah liam leh tawh a, lungmuang takin a kal leh ta a ni,” tiin an lo hrilh a.

²⁴Joaba chu lal hnênah a lo kal a, “Eng thil nge i lo tih tâk? En teh, Abnera a lo kal a; engati nge i kaltîr leh tâk mai, a kal bo leh daih tawh si a?”

²⁵Nera fapa Abnera chu i hria alâwm, i chêtlat dân leh i lût leh chhuak te en thlîthlai tûr leh nangmah bum che tumin a lo kal a ni,” a ti a.

²⁶Davida hnên ata a chhuak chu, Joaba chuan Abnera ûm tûrin mi a tîr a, anni chuan Sira tuikhur ațangin an rawn hruai kîr leh a. Davida erawh chuan a hre lo va.

²⁷Abnera chu Hebron khuua a lo kîr leh chuan, Joaba chuan kulh kawngkhâr bulah a fâla biak tum angin a hruai hrang a, chutah chuan a dulah a vit a, a thi a, a nau Asahela thisen phubâ chu a la ta a.

²⁸A hnûah, chû thù Davidan a han hriat chuan, “Nera fapa Abnera thisen chhuah thûah hian ka lalram leh kei chuan LALPA mithmuhah thiam kan chang kumkhua ang.

²⁹Joaba lu chungah leh a pa chhûngkua zawng zawngah tla rawh se; Joaba chhûngkua chuan thipût te, phâr te, tiang rinchan ngai te, khandaiha thî te leh rilâtam te emaw tlachham ngai suh se,” a ti a.

³⁰Joaba leh a nau Abisaia chuan Gibeon indonaa an nau Asahela thattu a nih avângin Abnera chu an that a ni.

DAVIDAN ABNERA A SÛN

³¹Davida chuan Joaba leh a hnêna awm mipuite hnênah chuan, “In puante kha pawt thlêr ula, saiip puan sinin Abnera sùn rawh u,” a ti a. Lal Davida chuan kuang chu a zui vê a.

³²Abnera chu Hebron-ah chuan an phûm a; Abnera thlânah chuan lal chu ring takin a tap hawm hawm a, mipuite pawh an vaiin an tap bawk a.

³³Lal chuan Abnera sûnna hlâ a sâ a: “Abnera chu mi â thihin a thî ang maw?”

³⁴I kutte chu phuar a ni si lo, I kêin kawl a bun hek lo; Misual kut tuartute angin Nang pawhin i tuar ve tâk hi,” tiin. Mipui zawng zawng chuan an ãah leh a.

³⁵Chhûn laiah chuan Davida chu chaw ei tûrin mite chuan anrawn thlêmrawn luai luai a; mahse ani chuan, “Ni tlâk hmâa châw leh thil dang rêng rêng ka ei chuan Pathianin a duh duhin min ti rawh se, chû aia nasa pawhin!” tiin chhia a lo chham tawh si a.

³⁶Mipuiten chû thû an lo hriat chuan an thin a dam huai a, lal thiltih dân apiang chuan mi lawm a hlawn thei êm êm zêl a.

³⁷Chumi ni chuan mipuite leh Israel mi zawng zawng chuan Nera fapa Abnera thah thû-ah lal chu a inhnâmhnawih ve lo tih an lo hre chiang ta a ni.

³⁸Lal chuan a chhiahhlawhte hnênah, “Vawiinah hian Israel ramah mi lian leh mi ropui a thî tih in hre lo vem ni?”

³⁹Lal atâna hriak thih ni mah ila, vawiinah hi zawng ka la chak lo deuh êm a; hêng mi, Zeruii fate hi ka tân chuan an pâwng lutuk ta deuh a ni. LALPA chuan thil sual titute chu an suahsualna ang zêlin a thungrûl vê ang,” a ti a.

BUNG 4

ISBOSETHA A TUALTHI

¹Saula fapain Hebron khuah Abnera a thî tih a hriat chuan a rilru a zuai rawih mai a, Israel mi zawng zawng pawh an mangang a ni.

²Saula fapa chuan sipai hotu pahni a nei a. Pakhat hming chu Baana a ni a, a pakhat zâwka hming chu Rekaba, Beeroth mi, Benjamin hnam a ni a, Rimmona fapate an ni. (Beeroth chu Benjamin rama bial khat a ni a,

³Beeroth mite chu Gittaim-ah an tlânchhia a, tûn thlengin an la awm.)

⁴Saula fapa Jonathana chuan fapa kebâi a nei a. Jezreel hmun ațanga Saula leh Jonathana te thih thû an hriat lai khân kum nga mi chauh a la ni a; a enkawltu nu chuan a pawm a, a tlanchhiatpui ta a. Hmanhmawh taka a tlânchhiat lâia a tlûkpuina lamah a kê a bân phah ta a ni. A hming chu Mephiboseta a ni a.

⁵Beeroth mi Rimmona fapa Rekaba leh Baana te chuan chhûn khaw lum lai takin, Isbosetha chhûn mut hahchawlh lai chuhin a in lam chu an va pan a.

⁶Inchhûngah chuan buh va lâk tum ni âwm takin an lût a, a pumah an vit a. Tichuan, Rekaba leh a unau Baana te chu an pût bo leh daih a.

⁷In chhûnga an va luh khân ama khum pindanah a lo mû a; tichuan an vit a, an that ta a; a lû an tansak a, an lâ a, zankhuain phâi lam kawngah an kalpui a.

⁸Isbosetha lû chu Hebron khuah Davida hnên an va thlen a, lal hnênah chuan, “Hei le, i hmêlmâ Saula fapa, nangmah thah tumtu Isbosetha lû a nih hi; ka pu lalber phubâ chu LALPAN Saula leh a thlahte lakah vawiinah hian a la ta a nih hi,” an va ti a.

⁹Nimahsela, Davida chuan Beeroth mi Rimmona fapa Rekaba leh a unaupa Baana te chu chhângin, “Ka manganna zawng zawng laka ka nunna chhan chhuaktu LALPA nunna chhâlin ka sawi e,

¹⁰thu lâwmawm minrawn hriha inngaiin, ‘En teh, Saula chu a thî ta,’ tia, a thiltih lâwmman ka pêk beiseitu mi pakhat chu ka man a, Ziklag-ah ka tihhlum tawh kha.

¹¹Mi dik, ama inah, ama khum laizâwla mu lai lehngghâl that duhtu misualte chu eng ang fakauva nasâa hrem tûr nge ni ang? Chuvângin, a thisen mawh chu in lakah phûtin, eng aiah nge leilung ata ka tihbora loh ang che u?” a ti a.

¹²Davida chuan tlangvâlho chu thû a pê a, an that a, an kut leh kê tanin, Hebron dîl bulah an khâi a. Ishbosetha lû erawh chu an lâ a, Hebron khuah Abnera thlânah an phûm vê ta a.

BUNG 5

DAVIDAN ISRAEL RAM PUMAH RO A RÊL

¹Israel hnam zawng zawng chu Hebron-ah Davida hnênah an lo kal a, “I thisen zawmpuite kan ni e.

²Tûn hmâa, kan chungsa Saula a lal lai pawh khân Israelte hruai chhuaka hruai lûtta ber i ni a; LALPAN i hnênah, ‘Ka mi Israelte vêngtu leh, Israelte lalah i la awm ang,’ a tih che kha,” an ti a.

³Tichuan, Israel upa zawng zawng chu Hebrona lal hnênah chuan an kal a, Lal Davida chuan Hebron-ah chuan LALPA hmâah thuthlung a lo siampui a. Davida chu Israel lal atân hriak an thih ta a.

⁴Davida chu a lal tirhin kum sawmthuma upa a ni a, kum sawmli chhûng a lal a.

⁵Hebron-ah chuan Judate chungah kum sarhi leh thla ruk a lal a, Jerusalemah Israel zawng zawng leh Judate chungah kum sawmthum leh kum thum a lal a ni.

JERUSALEM AN HNEH

⁶Lal leh a mite chu, chû rama lo chêng Jebus-ho do tûrin Jerusalem panin an kal a. “Davida pawh a lo lût thei lo vang,” tiin, a luh theih pawh ring lovin, “Hetah zawng i lo lût thei hauh lo vang; mitdel leh kebaite pawhin an lo dang zo vang che,” an lo ti thîn a.

⁷Chutichung chuan Davida chuan Zion kulhpui chu a la ta mai a (chû chu Davida Khawpui a ni a).

⁸Chumi ni chuan Davidan a hote hnênah, “Tûpawh tui luankawra lâwn chhova, Jebus-ho (mitdel leh kebâi, Davidan a huat êm êm-ho) han hneh thei chu hotu leh thuneitu an ni ang,” a ti a. Chuvâng chuan a ni, “Mitdel leh kebâite chu inah an lût ve thei lo vang,” an tih tâk ni.

⁹Davida chu kulhah chuan a awm ta a, Davida Khawpui tih a lo ni ta a. Millo ațanga a chhûng lam chu a vêlin Davida chuan a din ãha vek a.

¹⁰LALPA Sipaihote Pathian chuan a awmpui a, a ropui telh telh a.

¹¹Tura lal Hirma chuan Davida hnênah palaite a tîr a, sidar thing te, mistiri te leh lungchher thiamte a thawn a. Davida chu in an saksak a.

¹²Davida chuan amah chu Israelte lal atân LALPAN a ruat nghet ta tih leh, a mi Israelte tân lalram chu a châwi sâng ta tih a hre chiang ta a.

¹³Hebron aṭanga Jerusalema a insawn hnûah, Davida chuan hmei leh nupuite a neih belh a. Davida chuan fanu leh fapate a neih belh zêl bawk a.

¹⁴Hêngte hi Jerusalema piangte hming chu an ni: Sammua, Sobaba, Nathana, Solomona,

¹⁵Ibhara, Elisua, Nephega, Japhia,

¹⁶Elisama, Elida leh Elipheleta te an ni.

PHILISTIA-HO HNEH THÛ

¹⁷Israelte lal atân Davida chu hriak an thih ta tih Philistia-hovin an lo hriat chuan, Philistia mi zawng zawng chu Davida zawng chhuak tûrin an rawn thawk chho va. Chû thû Davidan a lo hriat chuan kulhah a chhuk thlâ a.

¹⁸Philistia-ho chuan Rephaim Ruamah ṭanhmun an siam bawk a.

¹⁹Davida chuan LALPA a râwn a, “Philistia-ho bei tûrin ka chho ang em? Ka kutah min pe dâwn em?” tiin a zâwt a. LALPA chuan Davida hnênah, “Chho ta che, Philistia-ho chu i kutah ka pe ngei ang che,” a ti a.

²⁰Tichuan, Davida chu Baal Perazimah a kal a, chutah chuan Davidan a hneh a; “Tuikhuah sah ang maiin LALPA chuan ka hmêlmâte chu min tâwn darhsak ta,” a ti a. Chuvângin chû hmun hmingah chuan Baal Perazim a ti a ni.

²¹Chutah chuan an milimte chu an kalsan a, Davida hote chuan an lâk bosak a.

²²Philistia-ho chu an rawn thawk chho leh a, Rephaim Ruamah ṭanhmun an khuar a.

²³Chutichuan, Davida chuan LALPA a râwn leh a, Ani chuan, “Han chho suh u; an hnung lamah han hual ula, thingtheihmu hmun aṭangin bei rawh u.

²⁴Thingtheihmu lêra sipai kalrem ri ṭhup ṭhup thâwm in hriat vêleh in bei thut tûr a ni. Philistia sipaite bei tûrin in hmâah LALPA a kal ta tihna a ni,” a ti a.

²⁵Davida chuan LALPA thupêk ang chuan a ti a; Philistia-ho chu Geba aṭangin Gezer thlengin a ûm kîr ta a ni.

BUNG 6

JERUSALEM-AH THUTHLUNG BÂWM AN LALUT

¹Davida chuan Israelte zînga mi thlan chhuah ṭhiau, mi 30,000 a ko khâwm a.

²Davida chu a tho va, cherubte inkâra awm Sipaihote LALPA hming châwia sak Pathian thuthlunna bâwm chu, Baale Judai aṭanga la tûrin a ho zawng zawngte nên an thawk chhuak a.

³Pathian thuthlung bâwm chu tawlailîr tharah an hlâng a, tlânga Aminadaba in aṭangin an la chhuak a; Aminadaba fapa Uzaa leh Ahiova-ten tawlailîr thar chu an khalh a.

⁴Tlâng chung a awm Abinadaba in aṭang chuan Pathian thuthlung bâwm chu an la chhuak a; Ahiova chuan hmâ a hruai a.

⁵Davida leh Israel mi zawng zawng chuan fâr thinga siam rimâwi chi hrang hrang, ṭingṭang te, perhkhuang te, thinrîk te, dârbenthek leh tâwtawrâwt te nên nasa takin LALPA an fak a.

⁶Nakona hruih zâwl an lo thlen chuan bâwngpa chu a petek avângin Uza chuan a kuta banin Pathian thuthlung bâwm chu a va dawm a.

⁷LALPA chu Uzaa chungah a thinrim a, a thiltih dik loh vângin Pathianin kut a thlâk a; Pathian thuthlung bâwm bulah chuan a thi ta a.

⁸LALPA thinrimin Uzaa chung a ṭuan ta mai chuan Davida a tithinur hlê a; chû hmun hming chu Perez Uza a ti a, tûn thlengin a pu hlen ta a ni.

⁹Chumi ni chuan Davida chuan LALPA chu a hlâu hlê a; “Engtin nge LALPA thuthlung bâwmin ka hnên a thlen theih tâk ang?” a ti a ni.

¹⁰Davida chuan LALPA thuthlung bâwm chu Davida Khawpuiah chuan a thlenpui duh ta lo va; Davida chuan Git mi Obed-Edoma inah a dah lût ta thung a.

¹¹LALPA thuthlung bâwm chu Git mi Obed-Edoma inah chuan thla thum a awm a. LALPA chuan Obed-Edoma leh a chhûngte zawng zawng chu mal a sâwm a.

¹²Lal Davida hnênah chuan, “Pathian bâwm avângin Obed-Edoma chhûngte leh a thil neih zawng zawng LALPAN mal a sâwm ta,” tih thû an hrilh a. Chuvâng chuan Davida chuan Pathian bâwm chu Obed-Edoma in aṭangin Davida Khawpuiah chuan hlim takin a la chho ta a.

¹³LALPA bâwm zâwnuten pên ruk an han pên ta tihah bâwngpa leh berâm châwm thâuvîn inthâwina a hlân a.

¹⁴Davida chu LALPA hmâah chuan a theih tâwpin a lâm a; Davida chuan puan zaisîna siam puithiam kawr a hâ a.

¹⁵Davida leh Israel mi zawng zawng chuan âu chungin, tâwtawrâwt rî nên LALPA thuthlunna bâwm chu an la chho ta a.

¹⁶LALPA thuthlunna bâwmin Davida Khawpui a lo thlen laiin Saula fanu Mikali chuan tukverh aṭangin a lo thlîr a, LALPA hmâa Lal Davida lâm dūr dūrha a zuang vêl te chu a lo hmû a; a hmusit rilru hlê a.

¹⁷Tichuan, LALPA thuthlunna bâwm chu an la lût a, biakbûk lai taka a dahna tûr Davidan a lo siamah chuan an dah fel ta a. Davida chuan LALPA hmâah hâlrâl thilhlante leh remna thilhlante a hlân a.

¹⁸Davidan hâlrâl thilhlante leh remna thilhlante a tih zawh chuan Sipaihote LALPA hming chhâlin mipuite chu mal a sâwm a.

¹⁹Mipui zawng zawng, Israel mipui zawng zawng chu, a hmei a pain chhang tlang khat leh sa hrang khat leh grêp ro bâwr khat ṭeuh an sem vek a. Tichuan, mipui zawng zawng chu mahni in lamah an haw darh ta a.

²⁰Davida pawh a chhûngte malsâwm tûrin a hâw a. Saula fanu Mikali chu Davida hmuak tûrin a lo chhuak a, “Vawiin chu Israel lal a ropui kher mai, mi lepchiah tak takte an inhlîm ruak ang maia a chhiahhlawh nula rual hmâa saruaka a inhlîm lan vak mai le!” a lo ti a.

²¹Davida chuan Mikali hnênah, “E hê, i pa leh a chhûngkua zawng zawng ai pawha min thlangtu LALPA, Israelte chung a rorêltûa min ruattu LALPA hmâah asin ka lâm ni. Chuvângin, LALPA hmâah chuan zaiin ka lâm zêl ang.

²²Hei ai maha zahpuaiawm hian ka la awm ang a, ât ka la so deuh deuh dâwn asin. Mahse chhiahhlawhnu i ngaihnêp tak takte khân min ngaisâng zâwk ang,” a ti a.

²³Chuvângin, Saula fanu Mikali chu a thih thlengin fa nei lovin a awm ta a ni.

BUNG 7

DAVIDA HNENA PATHIAN THUTHLUNG

¹LALPAN a hmêlmâ, a vêla awm zawng zawng laka râlmuang taka a chawlhîr a, lal chu ama ina a awm laiin

²lal chuan zâwlnei Nathana hnênah, “Hei le, kei chu sidar thinga sak inah ka awm ta der der mai a; nimahsela, Pathian thuthlung bâwm erawh chu puan in maiah a awm si a,” a ti a.

³Nathana chuan lal hnênah, “Ni e, LALPA i hnênah a awm a, thâ i tih ang tak chuan ti ta che,” a ti a.

⁴Chumi zân chuan Nathana hnênah LALPA thû a lo thleng a,

⁵“Ka chhiahhlawh Davida hnênah hê thû hi va hrihl rawh, ‘LALPA chuan, “Ka chênna tûr in mi saksak dâwn em ni?”

⁶Aigupta aţanga Israel fate ka hruai chhoh achin tûn thlengin inah ka la awm lo va, puan in leh biakbûkah te ka awm thîn a.

⁷Hmun hrang hranga Israel fate ka hruai kualna tinrêngah hian tû hnam hnênah nge ka mite enkawl tûra thû ka pêka, ‘Engati nge sidar thingin in mi saksak loh le?’ tiin, mi dang hnênah thû ka pê tawh rêng em ni?” a ti.

⁸Chuvângin, ka chhiahhlawh Davida chu hrihl rawh, ‘Sipaihote LALPA chuan a sawi e: “I berâm vênna leh berâm huang aţangin, ka mi Israelte chung a rorêl tûrin ka la chhuak che a.

⁹I kalna apiangah ka awm zêl a, i hmâ ata hmêlmâ zawng zawng ka ûm bosak che a, lei chung a mi ropui tak takte angin hming ropui tak ka siamsak tawh bawh che a.

¹⁰Chû bâkah, ka mi Israelte tân hmun ka ruatsak ang a, insawn tawh lova, anmahni awmna hmun ngeia an awm reng theih nân chutah chuan ka phun nghet tlat ang; tûn hmâ ang khân mi suaksualten an tinawmnah tawh lo vang a,

¹¹ka mi Israelte chung a rorêltute ka dah laia mi ang pawh kha ni lovin, i hmêlmâ zawng zawng lakah ralmuang takin i awm tawh ang. LALPA chuan ‘chhûngkua ka dînsak ang che,’ a ti a ni.

¹²“I ni a lo kin huna, i thlahtute hnêna i chawlh hunah pawh, i tû leh i fate chu ka tung dîng chho zêl ang a, a lalram chu ka tinghet dâwn a ni.

¹³Ani chuan ka hming pu tûr in a sa ang a, a lalrama lalthutthlêng chu kumkhua atân ka rem nghet ang.

¹⁴A Pa ka ni ang a, ani chu ka fapa a ni ang. Thil sual a tih erawh chuan, mihring tiang leh mihring fate vuaknain ka thunun ang.

¹⁵Nimahsela, i hmâ ata ka dah bo tâk Saula ang kha chuan ka khawngaihna chuan a kalsan vê lo vang.

¹⁶I hmâah hian in chhûngkua leh i lalram chu kumkhuaa dîn ngheh a ni ang a. I lalthutthlêng pawh kumkhuaa tihngheh a ni bawh ang,’ a ti e,” a ti a.

¹⁷Nathana chuan chûng thûte leh inlârna thûte chu Davida hnênah a hrihl vek a.

PATHIAN HNÊNA DAVIDA LÂWMTHÛ

¹⁸Lal Davida chu a lût a, LALPA hmâah chuan a thû a; “Aw Lalpa PATHIAN, tu nge maw ka nih le? Ka chhûngte pawh chu tute nge maw an niha, hei chen min hruai mai le?

¹⁹Aw Lalpa PATHIAN, nanga mithmuhah chuan hei hi tê tham tê a ni a; mahse, i chhiahhlawha chhûngkuate tûnhnu awm zêl dân tûr thlengin i sawi lâwk duai mai si a. Hei hi mihringte awm dân tûr rêng em ni le, Aw Lalpa PATHIAN?

²⁰Davida hian i hnênah eng nge sawi tûr a neih leh chuan? Lalpa PATHIAN, nang chuan i chhiahhlawh hi i hre Chiang alâwm.

²¹I chhiahhlawhin a lo hriat theih nân, hêng thil ropui tak takte hi i thû avâng leh i rilru taka i tih a ni si a.

²²Aw Lalpa PATHIAN, i va ropui tak êm! Nangmah ang rêng hi tûmah an awm lo, kan hriat phâkah nangmah lo chu Pathian dang pawh an awm hek lo.

²³I mi Israelte ang hi tu dang nge awm ang le—Pathian meuhvin ama hming pu atân lei chung a hnamte zîng ata ama mi ni tûra a hnam puma a chhan chhuah ngat—i tân thil ropui leh i ram tâna thil râpthlâk ti tûra—Aigupta leh hnam tinte leh an pathiante lak ata i ta ni tûra i tlan chhuah te ang hi tû dang nge awm ang le?

²⁴I mi Israelte hi kumkhuaa nangma ta ni tûrin i siam ta a; LALPA, nangmah ngei hi an Pathian chu i lo ni ta si a.

²⁵“Aw LALPA Pathian, tûnah hian hê i chhiahhlawh leh an chhûngkaw chungchânga i lo tiam tâk te chu kumkhua in hlen la, i lo sawi tawh ang ngeiin ti ang che.

²⁶Sipaihote LALPA chu Israelte Pathian a ni,’ tiin i hming chu chawimâwiin awm kumkhua sela. I chhiahhlawh Davida chhûngkua pawh i hmâah dîn nghet ang che.

²⁷Aw, nang Sipaihote LALPA, Israelte Pathian chuan i chhiahhlawh hnênah hian, ‘Chhûngkua ka dînsak ang che,’ tiin i lo puang ta si a. Chuvângin, i chhiahhlawh hian a thînlung takin, heti hian i hnênah dîlna arawn thlen a ni.

²⁸Aw Lalpa PATHIAN, nang chu Pathian i ni a, i thûte chu a dik a, i chhiahhlawh hnênah hian i thâtna chu i lo tiam tawh sâ reng a ni.

²⁹Chuvângin, i chhiahhlawh te chhûngkua hi kumkhuaa i hmâa an awm reng theih nân malsâwm mawlh ang che; aw Lalpa PATHIAN, nang chuan i sawi tawh si a, i malsâwmna ngei chuan i chhiahhlawh chhûngkua hi kumkhua in malsâwm ang che,” a ti a.

BUNG 8

DAVIDA A CHAK ZEL

¹Chumi hnûah chuan Davidan Philistia-ho a bei a, a hneh a. Davida chuan Metheg Ama chu Philistia-ho kut ata a chhuhsak a.

²Chumi hnûah Moab-ho a hneh leh a. Leiah a mut tlatîr a, tehna hruin a teh vek a. Chû tehna hrui tlûk hnih zêla mite chu thah tûr an ni a, hrui tlûk khat huam chin zêla mite chu zuah tûr

an ni. Tichuan, Moab mite chu Davida thuhnuaiah an lo awm ta a, chhiah an rawn pe thîn a.

³Davida chuan Euphrates Lui bula ram la lêt leh tûra a kal pahin Zoba lal, Hadadezera, Rehoba fapa chu a hneh a.

⁴Chû mi hnên aţang chuan tawlaillîr 1,000 leh, sakawr chungchuan mi 700 leh sipai 22,000 a mansak a. Davida chuan tawlaillîr za hnûk tûr a zuah a, chumi bâka an sakawr kaihza tha zawng zawng chu a chhahsak vek a.

⁵Zoba lal Hadadezera pui tûrin Damaska aţangin Suria-ho an lo kal a, Davida chuan mi 22,000 a lo that a.

⁶Davida chuan Suria khawpui Damaskaah chuan sipai a dah a; Suria mite chu Davida thuhnuaiah an lo awm ta a, chhiah an pe thîn a. Chutiang chuan Davida chu a kalna apiangah LALPAN a vêng him zêl a.

⁷Davida chuan Hadadezera hote hnên aţangin rangkachak phâwte a lâksak a, Jerusalemah a hawn a.

⁸Hadadezer khawpui Beta leh Berothai aţangin Lal Davida chuan dâr tam tak a hawn bawk a.

⁹Hamath lal Toia chuan Davidan Hadadezera sipai zawng zawng a hneh tih a lo hriat chuan

¹⁰Toia chuan Hadadezera dova hnehtu Lal Davida chu lo va hmuak a, malsâwmna hlân tûrin, a fapa Jorama a tîr a (Toia leh Hadadezera te hi indo thîn an ni a); Jorama chuan tangkarua te, rangkachak leh dâra siam thil tam tak a pê a.

¹¹Lal Davida chuan chûng ram hrang hrang a hneh tâkte hnên aţanga a lâk tangkarua leh rangkachak te chu LALPA hnênah a hlân zel bawk a.

¹²chûngte chu Suria mite, Moab mite, Ammon mite, Philistia mite, Amalek mite leh Zoba lal, Hadadezera, Rehoba fapa hnên aţanga a râllâk te a ni.

¹³Davida chuan Chi Ruamah Suria mi 18,000 a that a, chû chuan a tihmingthang lehzuat a.

¹⁴Edom ramah sipai a dah bawk a; Edom ram pumah sipai a dah thliah thluah a, tichuan Edom mite chu Davida hnuaiah an lo awm ta a. LALPA chuan Davida chu a kalna apiangah a vêng him zêl a.

DAVIDA RAM AWP DÂN

¹⁵Davida chuan Israel ram pumah ro a rêl a; Davida chuan a mi zawng zawng chungah dik takin ro a rêl thîn a.

¹⁶Zeruii fapa Joaba chu sipai hotu ber a ni a; Ahiluda fapa Jehosaphata chu chanchin ziaktu a ni;

¹⁷Ahituba fapa Zadoka leh Abiathara fapa Ahimeleka te chu puithiam an ni a; Seraia chu ziaktu a ni;

¹⁸Jehoiada fapa Benaia chu Kereth-mite leh Peleth-mite hotu a ni a, Davida fapate chu rorêltu lûte an ni.

BUNG 9

MEPHIBOSETHA CHUNGA DAVIDA NGILNEIHNA

¹Davida chuan, “Jonathana avânga khawngaihna ka lantîr theihna tûr Saula chhûngkaw zîngah hian nungdama awm an la awm em âw?” a ti a.

²Saula chhûngkaw chhiahhlawh pakhat, a hming Ziba a awm a. Ani chu Davida hnênah an rawn hruai a, lal chuan, “Ziba i ni em?” a lo ti a. Ani chuan, “Aw, ni e!” a ti a.

³Lal chuan, “Pathian khawngaihna ka lantîr theihna tûrin Saula chhûngkaw zîngah hian nungdama awm an la awm em?” a ti a. Ziba chuan lal hnênah, “Jonathana fapa pakhat, kebâi a la awm,” a ti a.

⁴Lal chuan a hnênah, “Khawiah nge a awm?” a ti a. Ziba chuan lal hnênah, “Lo Debar khuua Amiela fapa Makira inah a awm e,” a ti a.

⁵Lal Davida chuan Lo Debar khuua Amiela fapa Makira ina mi chu a va hruaitîr a.

⁶Saula fapa, Jonathana fapa Mephibosetha chu Davida hnên a lo thlen chuan, a hmâa kûnin chibai a bûk a. Davida chuan, “Mephiboseth?” a ti a. Ani chuan, “Heta hi i chhiahhlawh chu ka awm e!” a ti a.

⁷Davida chuan a hnênah, “Hlâu suh, i pa Jonathana avângin ka khawngaih mawlh ang che, i pu Saula ram zawng zawng kha ka pêkîr leh vek ang che a; ka chaw ei dawhkân hi i kîl ve reng tawh dâwn nia,” a ti a.

⁸Ani chu a kûn a, “I chhiahhlawh hi eng nge ka niha, kei, ui thisâwn ang hi chuti taka min duhsak le?” a ti a.

⁹Lal chuan Saula chhiahhlawh Ziba chu a ko va, a hnênah, “I pu fapa hnênah Saula in leh lo zawng zawng ka pe tawh a.

¹⁰Chutichuan, nang leh i fapate leh i chhiahhlawhten a hna tinrêng in thawhsak ang a, i pu faten ei tûr an neih theih nân buh leh bâl i tharsak tûr a ni. I pu fapa Mephibosetha erawh chuan ka kiangah chaw a kîl thîn tawh dâwn a ni,” a ti a. Ziba chuan fapa sâwm leh pangâ leh chhiahhlawh sawmhnih a nei a.

¹¹Ziba chuan lal hnênah, “Lalin a chhiahhlawh hnêna thû a pêk zawng zawng chu i chhiahhlawh hian a ti ang,” a ti a. Lal chuan, “Mephibosetha erawh chuan lal fapate zînga mi ang bawkin, ka dawhkân a kîl ve tawh ang,” a ti a.

¹²Mephibosetha chuan fapa la naupang tak a nei a, a hming chu Mika a ni. Zibaa ina awm zawng zawng chu Mephibosetha chhiahhlawh an ni a.

¹³Tichuan, Mephibosetha chu Jerusalemah a awm a, lal dawhkân chu a kîl ve ta zêl a. A ke chu a khinghnihin a bâi a.

BUNG 10

AMON LEH SURIA HNEH AN NI

¹Chumi hnûah chuan Ammon-ho lal chu a thî a, a aiah a fapa Hanuna chu a lo lal ta a.

²Davida chuan, “Nahasa fapa Hanuna chungah hian khawngaihna ka lantîr teh ang, a pain mi a lo khawngaih êm avângin,” a ti a. Tichuan, Davida chuan a pa chungchâng thûa va

thlamuan tûrin a chhiahhlawhte a tîr a. Davida chhiahhlawhte chu Ammon ramah chuan an va kal a.

³Amon mi lianho erawh chuan an pu Hanuna hnênah, “Davida hian nangmah thlamuantu tûr arawn tîr hi i pa a zah tak tak vâng niin i ring em ni? Davida hian khawpui tihchhiat dân dapin enthlature arawn tîr lek a ni zâwk lo mâw?” an ti a.

⁴Tichuan, Hanuna chuan Davida chhiahhlawhte chu a man a, an khabe hmul zâtvê a ziah kâwnsak a, an thawmhnâwte chu a laiah, an mawng zâwnah a tan bunsak a, chutiang chuan a hâwntîr leh ta a.

⁵Chû thû chu Davida an hrilh a, an zah êm avângin anmahni lo hmuak tûr mi a tîr a. Lal chuan, “In khabe hmul a chawr sei hmâ chu Jerikoah khân nghâk rih ula, tichuan in lo hâw dân nia,” a ti a.

⁶Amon mipuite chuan Davida huat zâwngah an insiam ta tih an inhriat chuan, Beth Rehob-a Suria sipai leh Zoba-a Suria sipai 20,000, Maaka lal hnên ațangin sipai 1,000 leh, Ish-Tob ațangin mi 12,000 an ruai a.

⁷Chû thû chu Davidan a lo hriatin, Joaba hovin a sipai rual chak tak mai chu a tîr a.

⁸Amon-ho chu an lo chhuak a, kulh kawngkhâr bulah chuan țanhmun an khuar a. Zoba Suria mite, Beth Rehob te, Ish-Tob te leh Maaka-ho chu a hrangin phûlah an awm a.

⁹Joaba chuan an hma lam leh an hnung lam ațangin anrawn bei dân tih a hriatin, Israel sipai zînga a thâ thâ chu Suria-ho lo ep tûr zâwngin țanhmun a remtîr a.

¹⁰Mi dang zawng chu a unaupa Abisaia kutah dahin, indonaa Amon-ho hmachhawn tûrin a rem fel a.

¹¹“Suria-ho hi ka hneh dân loh chuan minrawn pui dân nia; Amon-ho in hneh dân loh erawh chuan nangmahni pui tûrin ka lo kal ang.

¹²Huai takin awm ula, kan mite tân leh kan Pathian khawpuite tân i intichak sauh sauh ang âw le. LALPAN thâ a tih ang zêlin ti rawh se,” a ti a.

¹³Tichuan, Joaba leh a hote chuan Suria-ho chu an va bawh ta a, an hmâah chuan an tlânchhe ta a.

¹⁴Amon-miten Suria-ho tlânchhia an hmuh chuan Abisaia hmâah chuan an tlânchhe vê ta a, khuah chuan an tlân lût a. Tichuan, Joaba chuan Amon-ho chu a kîrsan a, Jerusalemah a hâw ta a.

¹⁵Suria-ho chu Israelte lakah an tlâwm tih an inhriat chuan an inpun khâwm thâ leh a.

¹⁶Hadadezera chuan Lui râl lehlama awm Suria-ho chu a va hruai chhuak a, Helam khuah an lo kal a. Hedadezera sipai hotu Sobaka chuan an hmâ arawn hruai a.

¹⁷Chû thû chu Davida an hrilh a, ani chuan Israel mi zawng zawng a ko khâwm a, Jordan lui kânin Helam-ah chuan an va kal a. Suria-ho chu Davida bei tûrin an inzâr darh a, an inbei ta a.

¹⁸Suria-ho chu Israelte hmâah chuan an tlânchhia a; Davida hote chuan Suria sipai, tâwlailîra chuang mi 700 leh sakawr chungchuang mi 40,000 an that a, an sipai hotu Sobaka pawh an that a, chumi hmunah chuan a thî a.

¹⁹Tichuan, Hadadezera chhiahhlawh, a hnuaia lal zawng zawngten Israelte lakah an tlâwm tih an hmuhin, Israelte chu inremna an siampui a, an chhiahhlawhah an awm ta a. Chuvângin, Suria mite chuan Amon-mite chu an pui leh ngam tawh lo.

BUNG 11

DAVIDA, BATHSEBI LEH URIA

¹Thâl lai a ni a, lalte chu indo tûra an thawh chhuah hun lai a ni a, Davida chuan Joaba leh a hote leh Israel sipai zawng zawng chu a tîr chhuak a; Amon mite chu an va sawp hrep a, Rabba khawpui an hual a. Davida erawh chu Jerusalemah a awm a.

²Tlai khat chu, a khum ațangin Davida chu a tho va, lal in chung zâwlah chuan a han vei kual a. Inchung ațang chuan hmeichhe pakhat inbual lai hi a zu hmû a, chû hmeichhia chu a hmêlthâ kher mai a.

³Davida chuan chû hmeichhia chu tu nge a nih a zawh fiahtîr a. “Hê mi hi Eliama fanu Bathsebi, Hit mi Uria nupui a ni lo vem ni?” tiin an hrilh a.

⁴Davida chuan zu hruai tûrin mi a tîr a; ani chu a lo kal a, a lo mutpui a, a thian lohna ațanga a fihlîm lai tak a ni a; tichuan, a in lamah a hâw leh ta a.

⁵Hmeichhia chu a râi ta a; “Nau ka pâi a nia,” tiin Davida chu a hrilh a.

⁶Davida chuan Joaba hnênah, “Hit mi Uria kharawn tîr hâw teh,” tiin mi a tîr a. Joaba chuan Davida hnênah Uria chu a kaltîr a.

⁷Uria chu Davida hnên a lo thlen chuan Davida chuan Joaba chanchin te, sipaiho dinhmun te leh indonaah an che thâ em tih te a lo zâwt a.

⁸Davida chuan Uria hnênah, “I inah zuk hâw la, i kê te zu silfai ta che,” a ti a. Uria chu lal in ațang chuan a chhuak a, lal hnên ațanga ei tûr thilpêkin a ûmzui bawk a.

⁹Uria erawh chu ama ina hâwng lovin, lal in kawngkhâr bulah chuan a pu chhiahhlawhte zîngah chuan a mu ve ta mai a.

¹⁰“Uria chu a inah a hâw thla duh lo,” tih Davida hnênah an hrilh a; Davida chuan Uria hnênah, “Zin hâwng i ni lo’m ni? Engati nge i in lama i hâw loh?” a ti a.

¹¹Uria chuan Davida hnênah, “Pathian bâwm te, Israelte leh Judate chu puan inah an awm a, ka pu Joaba leh ka pu chhiahhlawhte chu ramhnuaiah an inkulh mêk a ni a. Kei hi ei leh in tûr leh, ka nupui bula mu tûrin ka hâw bîk ang maw? I nunna leh i thlarau nunna chhâlin, chutiang chuan ka awm bîk hauh lo vang,” a ti a.

¹²Davida chuan Uria hnênah, “Waviin chu hetah nghâk leh rih la, naktûkah ka kaltîr tawh ang che,” a ti a. Uria chu chumi nî leh a tûkah chuan Jerusalemah a awm leh rih a.

¹³Davida chuan a ko va, a hmâah chuan a eiin a in a; a hrai rûi a. Zânah chuan ama ina hâw duh lovin, a pu chhiahhlawhte bulah bawk a riak leh ta a.

¹⁴A tûk zîngah Davida chuan Joaba tân lehkhathawn a ziak a, Uria kutah a thawn a.

¹⁵Chû lehkhathawnah chuan, “Uria hi indona râl hmatâwng berah awmtîr la, an rawn tihhlum ngeina tûrin tawlh kîrsan ang che,” tih thû a ziaak a.

¹⁶Joaba chuan khua chu a hual ta a, vêngtu mi huaisente awm ngeia a rin zâwn takah Uria chu a awmtîr a.

¹⁷Khawpuia mite chu an lo chhuak a, Joaba chu an rawn bei a. Davida sipai thenkhat chu an that a; Hit mi Uria pawh a thi tel vê a.

¹⁸Joaba chuan Davida hnênah indo chanchin zawng zawng chu a hrilh a,

¹⁹a mi tirh hnênah chuan, “Lal hnênah indo chanchin i hrilh zawh hunah,

²⁰lal chu a thinur thut a: ‘Engah nge kulh bang hnaih lutuka in va beih? Kulh bang ațangin an rawn kâp dâwn che u tih in hre reng lo vem ni?

²¹Jerubesetha fapa Abimeleka kha tu thah nge? Hmeichhiain buh râwtsawmna lung chungnung zâwkin kulh ațangin a zuk dêng a, Thebez-ah a thi a ni lo vem ni? Engah nge kulh bang bulah in va kal?’ a lo tih che chuan—‘I chhiahhlawh Hit mi Uria pawh a thi tel ve asin’ i ti dâwn nia,” a ti a.

²²Tichuan, a mi tirh chu a kal ta a, Davida hnênah chuan Joaba thuchah zawng zawng chu a hrilh vek a.

²³Zualko chuan Davida hnênah, “Mite chuan min rawn hneh hlê a, an lo chhuak a, phûlah min rawn bei a; mahse kulh kawngka thleng rawkin kan nawr lêt leh a.

²⁴I chhiahhlawhte hi kulh bang ațangin thalin min rawn kâp ta vak a; lal chhiahhlawh thenkhat chu an thi a, i chhiahhlawh Hit mi Uria pawh a thi tel vê asin,” a ti a.

²⁵Davida chuan zualko hnênah, “Joaba hnênah heti hian ti rawh: ‘He thil hian in rilru tihnual suh se, khandaih chuan mi a suat tawn vê vê alâwm. Khawpui chu han bei zual sauh ula, tichhe vek rawh u,’ tiin. Chutiang chuan va fuih ang che,” a ti a.

²⁶Uria nupuiin a pasal Uria thih thû a lo hriat chuan, a pasal chu a sîn a.

²⁷A sîn hunbî a lo zawh chuan Davida chuan a inah a hruai a, a nupui a lo ni ta a, fapa a hrinsak a. Nimahsela, Davida thiltih chuan LALPA a tilâwm lo hlê a.

BUNG 12

NATHANA TEHKHIN THU LEH DAVIDA INPUANNA

¹LALPA chuan Davida hnênah Nathana a tîr a. Ani chu a va kal a, a hnênah: “Khaw pakhtah hian mi pahni an awm a, pakhat chu mi hausa a ni a, pakhat zâwk chû mi rethei a ni a.

²Mi hausa chuan berâm rual leh bâwng rual tam tak a nei a.

³Mi rethei erawh chuan berâm nu tereuh tê, ama suma a lei, duat taka a vulh bâk chu engmah a nei lo va; amah leh a fate zînga lo țhang lian vê a ni a. An ei ang apiang ei vein, an in ang apiang a in vê a, a kuah heuh heuh țhîn a; a fanu ang maiin a en a.

⁴Mi hausa pa hnênah chuan khualzin pakhat hi a va thleng a, chû pa chuan a mikhual eipui atân ama berâmte chu talh phal lovin chû mi rethei berâm no chu a chhuhsak a, a mikhual pa ei

atân a talhsak ta a,” a ti a.

⁵Chû pa lakah chuan Davida chu a thinur ta thut mai a, Nathana hnênah, “LALPA nunna chhâlin, chutiang thil titu chu a thi ngei tûr a ni!

⁶Khawngaihna nei hauh lo va chu a thil tih avâng chuan, berâm no chu a lêtli-in a rûl leh bawk tûr a ni,” a ti a.

⁷Nathana chuan Davida hnênah, “Chû pâ chu nangmah hi i ni asin! Chuvângin, LALPA Israelte Pathian chuan, ‘Israelte chungah lal atân hriak ka thih che a, Saula kut ata ka chhan chhuak che a.

⁸I pu in leh lo te, i pu nupuite pawh i thlazâr hnuiaia awm tûrin ka pê che a, Juda chhûngte leh Israel chhûngte chenin ka pe vek che a. A la tlêm lutuk a nih chuan a aia tam pawh ka pe belh zêl tûr che a ni a!

⁹Engah nge LALPA thupêk chu i ngaihnêpa, a mithmuha thil sual i tih tâk chu le? Hit mi Uria chu khandaih in i that a; a nupui chu i nupui atân i chhuhsak a, Amon-ho khandaih hmangin i tihhlumtîr leh ta nghâl a.

¹⁰Chuvângin, min pawisak lohva, i nupui atâna Hit mi Uria nupui i neihsak avângin, i chhûngkua hi khandaih in a chhuahsan tawh ngai lo vang,’ a ti a.

¹¹LALPA chuan, ‘Lo ngai reng rawh, nangma chhûngkua ațang ngei hian buaina ka chhuahtîr dâwn a ni; i mithmuha lai ngeiin i nupuite chu i thenawm pa ka pê ang a, i nupuite chu chhûn pachangah an la mutpui ve thung dâwn a ni.

¹²A rûk a râla i thiltih hi kei chuan Israel mi zawng zawng hmuhah, chhûn êngah a ni ka tih dawn ni,’ a ti e,” a ti a.

¹³Davida chuan Nathana hnênah, “LALPA chungah thil sual ka lo ti ta a nih hi,” a ti a. Nathana chuan Davida hnênah, “LALPA chuan i sualna chu a lâk kiansak ta a che; thih zawng i thi lo vang le.

¹⁴Nimahsela, hê i thiltih hmanga LALPA hmêlmâte tâna Pathian sawi chhiatna remchâng i siamsak nasat êm avângin, i fa lo piang tûr chu a thi ngei tûr a ni,” a ti a.

DAVIDA FA THIH THU

¹⁵Tichuan, Nathana chuan a in lamah a hâwsan ta a. Uria nupuiin a hrinsak Davida fa chungah chuan LALPAN kut a thlâk a, a damlo ta a.

¹⁶Davida chuan naupang tân Pathian hnênah a ngên chiam a, Davida chuan châw a ngei a, inchhûngah lûtin zankhuain chhuatah chuan a mû a.

¹⁷An chhûngkuaa upate chu an tho va, a hnênah chuan an va lût a, a mutna chhuat ata kaihtawh an tum a. Mahse a tho duh lo va, an zîngah châw pawh a ei duh hek lo.

¹⁸A ni sarih nî chuan naupang chu a thi ta a. Davida chhiahhlawhte chuan naupang thih thû chu Davida an hrilh ngam lo va. “Naupang la dam lai mahin a hnêna kan thu sawi a ngaithla duh lo a ni a. Engtin nge naupang thih thû kan hrilh theih ang le? Amah a intihnat phah mai ang asin!” an ti a.

¹⁹Davida chuan a chhiahhlawhte phunrûk sep sep dân ațang chuan, naupang chu a thi tâ tih a hria a. Tichuan, a chhiahhlawhte hnênah Davida chuan, “Naupang chu a thi ta em ni?” a ti a. Anni

chuan, “A thi ta a ni,” an ti a.

²⁰Davida chu chhuat aṭang chuan a lo tho va, a inbual a, hriak a inthih a, a thawmhnâw a inthlâk a; LALPA inah a va lût a, chibai a bûk a. Ama inah a lo hâu leh a; chaw ei tûr a lam a, anrawn hlui a, a ei ta a.

²¹A chhiahhlawhte chuan a hnênah, “I thiltih dân hi eng nge a awmzia? Naupang la dam lai khân chaw i nghei a, i ṭap a; naupang chu a thi ta lêm a, i tho va, chaw i ei leh tâk si le?” an ti a.

²²Ani chuan, “Naupang la dam chhông khân chaw ngheiin ka ṭap rêng a; ‘LALPAN min khawngaihin, naupang chu a tidam leh hlauh lo vang tih tu nge sawi thei?’ ka tih vâng a ni.

²³Tûnah erawh zawng a thi tawh a; eng atân nge chaw ka la nghei cheu vang? Ka ko kîr leh thei dân em ni? Kei chu a hnênah ka la kal ve ang a, ani erawh chu ka hnênah a lo kîr leh dân tawh lo ve,” a ti a.

SOLOMONA A PIANG

²⁴Davida chuan a nupui Bathsebi chu a thlamuan a, a hnênah a lût a, a mutpui a. Fapa a hring a, a hmingah Solomona a sâ a. LALPA chuan ani chu a hmangaih a,

²⁵zâwnei Nathana hnênah thû a chah a: LALPA avângin a hmingah Jedidia a sâ a.

RABBA KHUA AN LÂ

²⁶Joaba chuan Ammon mite khawpui Raba chu a bei vak a, an lal khawpui chu a la ta a.

²⁷Joaba chuan Davida hnênah thû a thawn a, “Raba khua ka bei a, a khawpui tui tlan lai chu ka lâksak ta e.

²⁸Chuvângin, sipai la awmte rawn khâwm belh la, khawpui hi hual la, lâ ang che, keima’n ka lâk chuan ka hming a pu dah ang e,” a ti a.

²⁹Davida chuan a sipai zawng zawng a khâwm vek a, Raba-ah chuan a kal a, a va bei a, a la ta a.

³⁰An lalin a khum lai lallukhum chu a lâksak a. A rih zâwn chu lunghlûte nên chuan rangkachak talent khat hû a ni. Davida an khumtîr a. Khawpuia mi râlâk sum tam tak an la bawk a.

³¹Chû khaw mipui chu a hruai chhuak vek a, thingzaina te, leilehna thîrzum leh thîr hreipua hna thawk atân te, leirawhchan siamtu atân te a chhawr a. Chutiang chuan Ammon khawpui danga mite pawh a ti vek a. Tichuan, Davida leh a mite chu Jerusalemah an kîr leh ta a.

BUNG 13

AMNONA LEH TAMARI

¹Chumi hnûah chuan Davida fapa Absaloma chuan farnu hmêlṭha tak a nei a, a hming chu Tamari a ni; Davida fapa Amnona chuan a ngaizâwnghê mai a.

²A farnu Tamari chu nula thianghlim a ni a, Amnona tihngaihna hre lo chuan a âtchilh a, a dam loh phah ta a. Amnona tân chuan han chêt vak ngaihna a awm si lo va.

³Amnona chuan ṭhian a nei a, a hming chu Jonadaba a ni, Davida unaupa Simea fapa a ni a. Jonadaba chu fîng vervêk tak a

ni.

⁴Chû mi chuan, “Engtizia nge ni le, nang lal fapa ve lêm, a ni têla i chêr telh telh mai le? Eng nge a chhan min hrilh dân lo’m ni?” a ti a. Amnona chuan, “Ka unaupa farnu Tamari hi ka ngaizâwnghê atin ni,” a ti a.

⁵Jonadaba chuan a hnênah, “Na der vak la, khumah mu tlat la. Nangmah kan tûra i pa lo kal hunah, ‘Khawngaih takin ka farnu Tamari kha chaw min pe tûrin rawn kaltîr la, ka mithmuh lai ngheiin ei tûr min siamsak sela, a kut aṭangin ka lo ei ang e,’ lo ti la a ni mai alâwm,” a ti a.

⁶Tichuan, Amnona chu a na der a, a mu reng a; amah kan tûra lal a lo kal lai chuan, Amnona chuan lal hnênah, “Khawngaih takin ka farnu Tamari rawn tîr la, ka hmuh laiin chhangpêr pahni min siamsak sela, a kuta mi ngei ka lo ei ang e,” a ti a.

⁷Davida chuan Tamari hnênah, “I nuṭa Amnona inah va kal la, ei tûr va siamsak ta che,” tia hrilh tûrin mi a tîr a.

⁸Tichuan, Tamari chu a nuṭa Amnona inah chuan a va kal a; ani chu a lo mu reng a. Chhangphut a la a, a hmet a, a hmuh lai ngheiin chhangpêr a siam a, a ur hmin ta a.

⁹Thlêng a lâ a, a hmâah chuan a va hlui a, mahse a lo ei duh lo va. Amnona chuan, “Mi dang zawng kha chhuahṭîr vek rawh u,” a ti a. Ani chu an chhuahsan ta vek a.

¹⁰Amnona chuan Tamari hnênah, “Chaw chu ka khum pindanah rawn lâ la, i kuta mi ngei ka lo ei ang e,” a ti a. Tamari chuan a chhang siam te chu a lâ a, a nuṭa Amnona hnênah a khum pindanah chuan a keng lût a.

¹¹Eitîr tûra a va hnaih lai chuan, ani chuan a lo chelh a, “Hawh teh, ka farnu, min mutpui teh,” a ti a.

¹²Mahse ani chuan, “Âih ka duh lo, ka unaupa, min tilui suh, Israel ramah hetiang hi tih chí a ni lo. Hetiang thil zahthlâk hi ti lul suh!

¹³Ka mualphona chu khawi lamah nge ka thlenpui tâk ang? Nang pawh, Israel mi âte zînga mi mai i ni dân asin. Khawngaih takin lal hnênah sawi zâwk rawh, mi neihṭîr che a hnial lo vang,” a ti a.

¹⁴Mahse a thû a pawisa duh lo va; amah aiin a chak zâwk si a, tharum thawhin a pâwl lui ta a.

¹⁵Amnona chuan huat namên lohvin a haw lehngâl ta si a, a ngaihzâwn laia a hmangaihna ai khân a huatna chu a nasa ta daih zâwk a. Amnona chuan, “Tho la, kal bo daih rawh!” a ti a.

¹⁶Ani chuan, “Ni lo, a ni thei lo! Hetia mi hnawh chhuah hi ka chung a i tih tâk ai khân a ṭha lo lehṭual a ni,” a ti a. Mahse, a thu sawi chu engahmah a ngai duh chuang lo va.

¹⁷Amah viltu chhiahhlawh chu a ko va, “Hei! Hê nu hi ka hnên aṭangin dah chhuak la, kawng kha kalh tlat rawh,” a ti a.

¹⁸Lal fanu nula la thianghlimten an hâk ṭhin kawrfual ze hrang hranga chei kawr hâ a ni a. Tichuan, a tîrchhiah chuan a nam chhuak a, kawng chu a kalh ta a.

¹⁹Tamari chuan a lû-ah vut a phul a, a hâk lai kawrfual ze ṭial chu a pawt thlêr a, a chhîpah a kut a ngat a, lungchhe taka ṭap chungin a kal sawn ta a.

²⁰A nuța Absaloma chuan, “I nuța Amnona chuan a lo khawih che a ni maw? Mahse ka farnu, lo ngâwi reng rawh. I nuța a ni alâwm; la runthlâk duh suh âw,” a ti a. Tichuan, a nuța Absaloma inah chuan chavâi takin a inkhung ta reng a.

²¹Chû thil chu Lal Davidan a lo hriat chuan a thinur hlê a.

²²Absaloma chuan a unaupa Amnona chu thu chhia thu tha engmah a sawipui duh baw lo va. A farnu Tamari a pâwngsual avângin Absaloma chuan Amnona chu a haw ta êm êm a.

ABSALOMAN AMNONA A THAT

²³Kum hnih pumhlûm a ral hnûah chuan Ephraim bula Baal Hazor-ah Absaloma chuan berâm hmul a mehtîr a; Absaloma chuan lal fapa zawng zawng chu a sâwm vek a.

²⁴Absaloma chu lal hnênah a lo kal a, “Hei le, i chhiahhlawhin berâm hmul a mêt dâwn a; khawngaih takin lal leh a thuihruaite chu i chhiahhlawh rualin kal ve rawh se,” a va ti a.

²⁵Mahse lal chuan Absaloma hnênah, “E, ni lo ve ka fapa, kan vâia kan rawn kal chuan kan tihautak lutuk ang che,” a lo ti a. A phût hlê nân a kal duh chuang lo va; mal a sâwm thung a.

²⁶Absaloma chuan, “I kal theih loh leh ka unaupa Amnona tal chu lo kal vê ang hmiang,” a ti a. Lal chuan a hnênah, “Engah nge maw ani chu a kal bik ang le?” a ti a.

²⁷Nimahsela, Absaloma chuan a nawr tlat si a; tichuan, Amnona leh lal fapa zawng zawng chu a kaltîr ta a.

²⁸Absaloma chuan a chhiahhlawhte chu thû a lo pê a, “Lo thlîr reng ula, Amnonan uain a ruih phûr lai takin, ‘Amnona chu bei r’u le!’ ka tih vêleh that nghal ang che u. Hlau rêng rêng suh u. Thû ka pê che u a ni lo’ m ni? Huaisen tak leh mipâ takin in che dâwn nia,” a ti a.

²⁹Absaloma chhiahhlawhte chuan Amnona chung a ti tûra Absaloma thupêk ang chuan an ti ta a. Lal fapa dang zawng zawng chu an tho va, an sabengtung chungah an zuang kai a, an tlânchhe ta vek a.

³⁰Kawnga an la thang lai mêkin, “Absaloman lal fapate a that fâi vek a, tumah a zuah lo!” tih thû Davida chuan a lo dawng a.

³¹Lal chu a tho va, a puan a pawt thlêr a, chhuatah a mû a, a chhiahhlawh zawng zawngte pawh an thawmhnaw thlêr hniang hnuang chungin a bulah chuan an dîng a.

³²Davida unau, Simea fapa, Jonadaba chuan, “Ka pu chuan lal fapa zawng zawng an thah vek chu ring suh se, a thî chu Amnona chauh a ni. A farnu Tamari a pâwngsualsak ni aţang tawh khân Absaloma chuan he thil hi tih a tum sa rêng a ni.

³³Chuvângin, ka pu chuan lal fapa zawng zawng thi ta ang êm chuan ngai suh se. A thi chu Amnona chauh a ni e,” a ti a.

ABSALOMA GESUR-AH A RÂTLÂN

³⁴Absaloma chu a tlân bo ta a. Tin, vêngtu tlangvâl chu a han hawi vêl a, an hnung lam tlâng pang kawnga mi tam tak lo kal a hmû a.

³⁵Jonadabada chuan lal hnênah, “En teh, i chhiahhlawhin a sawi ang ngei khân lal fapate chu an lo hâwng ta e,” a ti a.

³⁶A sawi zo chauh tihah lal fapate chu an lo thleng nghâl a, aw râwl chhuahin an ţap hlawm a. Lal leh a thuihruaihote pawh

lungchhe takin an ţap baw lo a.

³⁷Absaloma erawh chu Amihuda fapa Talmaia, Gesur lal hnênah a tlânchhia a. Davida chuan a fapa chu ni tin a sîn a.

³⁸Absaloma chu Gesur-ah a tlânchhia a, chutah chuan kum thum a awm a.

³⁹Lal Davida chuan Absaloma hnêna va kal a châk hlê a. Amnona thî a ngaihna chu a lo reh ve tawh baw lo a.

BUNG 14

JERUSALEMAH ABSALOMA A LO KIR

¹Lal chuan a rilru takin Absaloma chu a ngai hlê tih Zeruii fapa Joaba chuan a lo hria a.

²Joaba chuan Tekoa khuaa mi nu fîng tak hnênah mi a tîr a, “Lusûn angin awm der la, lusûnna thuamnâw inbel baw lo; hriak inthih lovin, rei tak lusûn tawh hmeichhe awm dân angin awm ang che.

³Tichuan, lal hnênah kal la, heti hian i va ti dâwn nia,” a ti a. Chutianga sawi tûr chuan Joaba chuan thû a chah a.

⁴Tekoa hmeichhia chu lal hnêna a va kal chuan, a hmâia lei siin a bawkkhup a, “Min pui rawh, âw lalber!” a va ti a.

⁵Lal chuan a hnênah, “Engin nge timangang che le?” a lo ti a. Ani chuan, “Hmeithai ka ni a, ka pasalin min thihsan a,” a ti a.

⁶I bawihnu hian fapa pahni a nei a; an pahni chuan ramhnuaiah an insual a, tumah thêlhtu an awm si lo va, pakhat zawk chuan a unaupa chu a vua a, a that ta mai a.

⁷A chhûngkaw pum mai chuan i bâwihnu hi min ep ta tlat mai a, ‘A unaupa thattu kha min pe rawh, a unaupa a thah aiah kan lo tihlum ve tûr a ni; ro luah thei bik lovin kan han siam teh ang,’ an ti a. Chutianga an tih chuan ka meiling la nung chhun hi min tihhlumsak ang a, ka pasal chu thlah nei lovin, lei chungah hian a hming a dâi hlen mai dâwn si a,” a ti a.

⁸Lal chuan hmeichhe hnênah, “I inah hâw leh ta la, i chungchângah thupêk ka rawn siamsak ang che u,” a ti a.

⁹Mahse Tekoa hmeichhia chuan lal hnênah, “Aw lalber, ka pu, bawhchhiatna mawh chu keimah leh ka pa chhûngte chungah tla rawh se, lal leh a lalţhutthlêng chu fihlîm zâwk rawh se,” a ti a.

¹⁰Tichuan lal chuan, “Tûpawhin i hnênah eng thû pawh rawn sawi se, ka hnênah rawn hrui la, an khawih buai tawh lo vang che,” a ti a.

¹¹Tin, ani chuan, “Phuba lâk tumtute chu min khapsak a, ka fapa hi an tihlum mai loh nân LALPA i Pathian chu lal hian hre reng tûrin ka ngên a che,” a ti a. Ani chuan, “LALPA nunna chhâlîn ka sawi e, i fapa samzai khat pawh leiah a tla lo vang,” a ti a.

¹²Chutichuan hmeichhia chuan, “Khawngaih takin, ka pu lal hnênah hian i bâwihnu hian ţawngkam khat chauh ka sawi leh thei ang em?,” a ti a. Ani chuan, “Sawi ta che,” a ti a.

¹³Hmeichhia chuan: “Engvângin nge Pathian mite dodâl zâwnga thil tih i tum si le? Lal hian ama laka tlân bo tâa kha a hrui kîr leh loh avângin tûnah pawh lal hi thiam loh chang anga thu sawi a ni ta dêr mai.

¹⁴Tuisik leia baw hnû ruh leh theih loh ang maiin, kan la thi vek dawn. Pathian chuan nunna hi a la bo lo va; tlan bote chu a lak ata hnawh chhuah an nih loh nân tih dân kawng a ruat zâwk a ni.

¹⁵Chuvângin, mipui lam ka vênthâwn êm avângin hê thil hi ka pu lalber hnêna sawi tuma lo kal ka ni a. I bâwihnu hian, ‘Lal hnênah ka thlen mai teh ang; a bâwihnu thû hi lal hian a lo tihputlinsak mial mai thei asin.

¹⁶Tichuan, lal chuan a bâwihnu leh a fapa hi Pathianin ro luah tûr min pêk ram ațanga min tihboral tumtute laka min chhan tûrin ka âw hi min lo ngaihlâksak êm ang chu,’ ka ti a.

¹⁷I bâwihnu hian, ‘Ka pu, lalber âw chu thlamuanawm tak lo ni sela; ka pu chu Pathian Vântirhkohte ang maia thu ța leh ța lo thliar thiam a ni si a. LALPA i Pathian chu i hnênah awm mawlh rawh se,’ ka ti asin,” a ti a.

¹⁸Lal chuan hmeichhia chu a chhâng a, “Ka zawh apiang che chu ka lakah zêp lovin mi chhâng zêl ang che,” a ti a. Hmeichhia chuan, “Tehlul mai, ka pu, lalber chuan min zâwt mawlh ang che,” a ti a.

¹⁹Tichuan lal chuan, “Hêng thil hi Joaba tihtîr che a ni em?” a ti a. Hmeichhia chuan, “Ka pu lalber, i nunna chhâlin ka sawi e, lalberin a sawi tawh chu tûma’n vei lamah emaw, ding lamah emaw an her danglam thei lo. I chhiahhlawh Joaban thû min pê a, hêng thûte hi i bâwihnu hnênah a hrilh vek a ni.

²⁰A ța zâwna her danglam tûrin Joaba’n hêng thil hi a ti a ni; nimahsela, Pathian Vântirhkohte finna ang maiin ka pu hi i fing êm êm a, leilunga thil zawng zawng i hre vek si a,” a ti a.

²¹Lal chuan Joaba hnênah, “A ța e, hê thil hi ka remtih zâwna a ni e. Tichuan, kal ta la, tlangvâl Absaloma chu va hruai hâu ta che,” a ti a.

²²Joaba chu hmâia lei siin a bawkkhup a, chibai a bûk a, lal chu lâwmthû a hrilh a. Joaba chuan, “Lal chuan a chhiahhlawh ngenna chu a tihhlawhtîr avângin, âw lalber, ka pu, vawinah hian i chhiahhlawh chungah i lungâwi tih ka hriat tâk hi le,” a ti a.

²³Joaba chu a tho va, Gesur-ah chuan a va kal a, Absaloma chu Jerusalemah a rawn hruai hâu a.

²⁴Lal chuan, “Ama inah hâu nghâl sela, kei chu min rawn hmu suh se,” a ti a. Tichuan, Absaloma chu ama inah chuan a hâu ta a, lal hmêl chu a hmu lo va.

DAVIDAN ABSALOMA A NGAIDAM

²⁵Israel mi zawng zawng zingah Absaloma ang rênga hmêltha leh fak hlawh tumah an awm lo. A ke lêr ațanga a lu chhîp thlengin sawisêl tûr rêng a awm lo va.

²⁶A sam chu a rih tham êm avângin kum tawp lamah hian a lû a mêt ziah thîn a, a lûa a sam rih zâwna chu lal bûknaa bûkin sekel zahnih* a tling thîn a ni.

²⁷Absaloma chuan fapa pathum bâkah fanu pakhat, a hming Tamari a nei a. Nula hmêltha tak a ni.

²⁸Absaloma chu kum hnih Jerusalemah a awm a, nimahsela lal hmêl pawh a la hmu chuang lo va.

²⁹Absaloma chuan lal hnêna kalpui atân Joaba chu a chah a, mahse a lo kal duh lo va. A vawî hnihnaa a kohtîr leh pawhin a lo kal duh chuang lo va.

³⁰Tichuan, a chhiahhlawhte hnênah, “Khai le, Joaba lo chu ka lo kiang lawk a ni a, chutah chuan barli buh a chîn kha; va kal ula, va hâl rawh u,” a ti a. Absaloma chhiahhlawhte chuan lo chu an va hâl ta a.

³¹Joaba chu a tho va, Absaloma inah chuan a va kal a, “Engati nge i chhiahhlawhten ka lo an hâl rîkngawt?” a va ti a.

³²Absaloma chuan Joaba hnênah, “En teh, ka rawn ko thîn che a, ‘Lo kal la, lal hnênah ka tîr ang che a, ‘Eng atân nge Gesur ațanga ka lo kîr? La awm reng îla a ța zâwk daih tûr,’ tia lal hnêna mi va sawisak tûrin ka kohtîr thîn che alâwm.’ Tûnah hian lal min va hmuhtîr tawh teh khâi; ka tlâk ngang lo a nih leh ama’n min tihlum mai rawh se,” a ti a.

³³Joaba chuan lal chu a va hrilh a. Ani chuan Absaloma chu a ko ta a; lal hnên a lo thlen chuan hmâia lei siin, kûnin lal chu chibai a bûk a. Lal chuan Absaloma chu a lo fâwp a.

BUNG 15

ABSALOMA HELNA

¹Chumi hnû chuan Absaloma chuan tawlaîlîr leh sakawr bâkah a hmâa tlan tûr mi sawmngâ a buatsaih a.

²Absaloma chu zing takah a tho va, kulh kawngka bulah chuan a lo ding thîn a. Thubuai nei, lalin a chin felsak duha lo kal apiangte hnênah Absaloma chuan, “Khawî khuua mi nge i nih?” a lo ti thîn a. Anni chuan, “I chhiahhlawh hi Israel hnam chumi khami chu kan ni e?” tiin an chhâng thîn a.

³Absaloma chuan, “I thû hi a dîkin a ța khawp mai; mahse lo ngaihtuhsaktu tûr che lalin ruat a nei si lo va,” a lo ti thîn a.

⁴Chubâkah, Absaloma chuan, “Ram rorêltu chu han ni ve îla chuan thubuai nei te, ngaihtuhsak ngai apiang te chu ka hnênah an lo kal ang a; dik takin ro ka lo rêlsak tûr le,” a lo ti baw thîn a.

⁵Chutiang chuan mi tûpawh amah chibai bûk tûra lo kal apiangte chu a lo banin a lo kuah a, a lo fâwp thîn a ni.

⁶Absaloma chuan Israel mi lal hnêna thu pawî sawi tûra lo kal apiang chu chutiang chuan a lo ti zêl a. Tichuan, Absaloma chuan Israel mite thinlung chu a hneh ta a.

⁷Kum li* a lo ral a, Absaloma chuan lal hnênah, “LALPA hnêna ka thutiam ka hlen theih nân khawngaih takin Hebronah mi kaltîr ta che.

⁸I chhiahhlawh hian Suria rama Gesur-a a awm lai khân, ‘LALPAN Jerusalemah min hruai hâu leh chuan, LALPA rawng ka bawl ang,’ tiin thû ka lo tiam tawh si a,” a ti a.

⁹Lal chuan a hnênah, “Thlamuang takin kal ta che,” a ti a. Tichuan, a tho va, Hebronah chuan a kal ta a.

¹⁰Absaloma chuan Israel hnam zawng zawng zingah enthlature a tîr chhuak vek a, “Tâwtawrâwt rî in hriat vêleh, ‘Absaloma chu Hebron-ah a lal ta!’ tiin in lo âu dawn nia,” a ti a.

¹¹Absaloman Jerusalem ațanga a sâwm chhuah mi 200 an kal vê bawk a, anni chu rilru ța takin an kal ve mai a, engmah

chinchâng an hre ve lo va.

¹²Absaloma chuan inthâwina a hlan laiin Gilon mi Ahithophela, Davida rorêlpui chu a awmna khua Gilo ațangin a chah bawk a. Phiarrûkna chu a kal vung ta hlê a, Absaloma lamțang chu an pung tual tual a.

DAVIDAN JERUSALEM A TLÂNCHHIATSAN

¹³Davida hnênah chuan zualko a lo kal a, “Israel mite rilru chu Absaloma lamah a thle ta dual mai,” arawn ti a.

¹⁴Chû vêleh Davida chuan Jerusalema a hnêna awm a chhiahhlawh zawng zawng hnênah, “Tho ula, insaseng vat rawh u, Absaloma lakah zawng tumah kan him lo vang. Chhuak tûrin hmanhmawh rawh u, minrawn nangchîng thut ang a, khawpui hi khandaiha arawn beih vak mai chuan, kan chungah chhiatna zâkhua arawn thlen mai dâwn asin,” a ti a.

¹⁵Lal chhiahhlawhte chuan lal hnênah, “I chhiahhlawhte kan ni a, kan pu lalberin thû i pêk apiang ti tûrin kan inpeih e,” an ti a.

¹⁶Lal chu a kal chhuak a, ama chhûngkua zawng zawngin an zui a. Mahse lal chuan in lo nghâk tûrin hmeichhe zînga a hmei-ho sâwm a hnutchhiaa a.

¹⁷Tichuan, lal chu mipuite chuan an zui chhuak vek a, khaw daiah chuan an châwl a.

¹⁸Ama mi zawng zawng chu a hmâah chuan an kal tlang theuh va; Keret mite, Peleth mite, Git mite leh Gath khua ațanga amah zuitu mi zaruk te chu lal hmâah chuan an kal tlang vek a.

¹⁹Lal chuan Git mi Ittaia hnênah, “Engtizia nge kan zînga i lo kal vê? Kîr leh la, lal hnênah chuan awm ang che. Nang chu ram dang mi, i awmna ațanga râltlân vê mai i ni si a.

²⁰Nimin maia lo thleng i ni lehngâl a. Kalna lam tûr pawh hre lovin wawiin ațang hian ka vahvaihpui nghâl dâwn che em ni? Kîr leh ta la, i unaute pawh hruai vek ang che. I chungah zahngaihna leh thutak chu awm rawh se,” a ti a.

²¹Nimahsela, Ittaia chuan lal chu a chhâng a, “LALPA leh ka pu lalber nunna chhâlîn ka sawi e, ka pu, lalber awmna apiangah, kan thih pawhin, kan dam pawhin, i chhiahhlawh hi a awm ve zêl ang,” a ti a.

²²Davida chuan Ittaia hnênah, “Chuti chu kal ula, lui chu kân rawh u,” a ti a. Git mi Ittaia leh a hnêna mi zawng zawng chuan a pui a nâwiin lui an kân ta a.

²³An kal ta chu ring takin an țăp a, a ram țăhin an țăp chuah chuah mai a, mipuite chuan lui chu an kân vek a. Lal pawhin Kidron Lui chu a kân a, mipui zawng zawng chuan thlalêr lam an pan ta a.

²⁴Zadoka pawh Levia mite zawng zawng nêl LALPA thuthlung bâwm zâwn chungin a lo kal vê a. Pathian thuthlung bâwm chu an ngat a, mipuiten khua an chhuahsan zawh vek hnûah Abiathara chu a kal chho va.

²⁵Lal chuan Zadoka hnênah, “Pathian thuthlung bâwm kha khuah zâwn lêt leh rawh u. Ka chungah LALPA a lungâwi chuan min hruai lêt leh ang a, hê mi leh a awmna in hi mi hmuhtîr leh ang.

²⁶Amaherawhchu: ‘I chungah lâwmna rêng ka nei lo,’ a tih erawh chuan țăh a tih ang angin min ti mai rawh se,” a ti a.

²⁷Lal pawh chuan puithiam Zadoka hnênah, “Hmutheitu i ni lo vem ni? Nang leh i fapate pahni, i fapa Ahimaza leh Abiathara fapa Jonathan te nêl hian thlamuang takin khawpuiah kîr leh rawh u.

²⁸En teh, thû minrawn hriattîr hmâ loh chu thlalêr phaiah khuan ka lo nghâk reng ang e,” a ti a.

²⁹Tichuan, Zadoka leh Abiathara te chuan Pathian thuthlung bâwm chu Jerusalema an zâwn hâw leh a. Chutah chuan an awm ta reng a.

³⁰Tichuan, Davida chu Olive Tlânga chhohna kawngah chuan țăp chungin a chho zêl a; a lû a khuh a, ke lâwngin a kal a. A hnêna awm zawng zawngte pawh an lu khuhin an kal chho va, țăp chungin an chho nguai nguai a.

³¹Mi tuemaw hian Davida hnênah, “Ahithophela chu Absaloma lamah phiarrutute zîngah a țăng ta,” tiin a hrih a. Davida chuan, “Aw LALPA, Ahithophela remruatna chu âthlâk thilah lek chantîr tûrin ka ngên a che!” a ti a.

³²Davidan Pathian chibai a bûkna tlang chhîp a han thlen chuan—Arki mi Husaia chuan a kawrfual thlêr tawh leh a lûa vut kâi luam chungin a lo hmuak a.

³³Davida chuan a hnênah, “Ka hnêna i lo kal ve chuan ka tân hnawksak mai i ni dâwn asin.

³⁴Khawpuiah kîr leh ta la, Absaloma hnênah, ‘I chhiahhlawhah ka awm ang e, âw lalpa; i pa chhiahhlawhah ka lo awm țin a; tûnah erawh chuan i chhiahhlawhah ka awm tawh ang,’ ti la; tichuan, Ahithophela remruat i hnialthla țin dâwn nia.

³⁵Puithiam Zadoka leh Abiathara te pawh an awm vê a ni lo’m ni? Chuvângin, lal ina i thil hriat apiang chu puithiam Zadoka leh Abiathara te i hrih țin dâwn nia.

³⁶Anni pawhin chumi hmuna awm fapa pahni, Zadoka fapa Ahimaza leh Abiathara fapa Jonathan te an neih kha: thu thar i hriat apiang chu anni hian minrawn hrih țin dâwn nia,” a ti a.

³⁷Davida țin Husaia chu khaw chhûngah a lût a. Absaloma chuan Jerusalem a lo lut ta a.

BUNG 16

MEPHIBOSHETA CHHIAHHLAWH

¹Davida chuan tlang chhîp a pêl chauh tihin Mephiboshetha chhiahhlawh Ziba chuan a lo hmuak a, a sabengtung pahnihte chuan chhang tlang zahni leh grêp ro bâwr zâ, nipui thei zâ leh uain bûrpui khat an phur a.

²Lal chuan Ziba hnênah, “Eng atân nge hêng hi i tih?” a ti a. Ziba chuan, “Sabengtungte hi lal chhûngte chuanna tûr a ni a; chhang leh nipui thei te hi tlangvâlthei ei atân a ni a, uain hi thlalêra chau apiangte in tûr a ni e,” a ti a.

³Lal chuan, “Khawng e i pu fapa hi?” tiin a zâwt a. Ziba chuan lal hnênah, “Ani te chu Jerusalema a awm alâwm, ‘Wawiinah Israel chhûngkua chuan ka pa ram kha ka hnênah min pe kîr leh dâwn,’ a tih kha,” a ti a.

⁴Lal chuan Ziba hnênah, “Aw le, Mephibosetha thil neih zawng zawng chu i ta a ni ta e,” a ti a. Ziba chuan, “Aw lalber, ka lalpa, kei mi tlâwm hian chibai ka bûk a che, i lâwm zâwna awm zêl ka tum tlat ang!” a ti a.

SIMEIAN DAVIDA ÂNCHHIA A LAWH

⁵Lal Davidan Bahurim a lo thlen chuan Saula chhûngkaw zînga mi, Gera fapa Simeia chu a lo chhuak a. Ânchhia lawh bawrh bawrh chungin a lo kal a.

⁶David leh Lal Davida thuihruai zawng zawng chu lungin a vawm a. Mipuite leh mi chakho zawng zawng chuan ani chu ding lam leh vei lamah an din hlah ta a.

⁷Simeia chuan tihian ânchhia a lawh a: “Nang thisen chhuah hman Beliala fapa! Chhuak daih rawh! Chhuak daih rawh!”

⁸Saula chhûngkaw thisen mawh chu i chungah LALPAN a rawn thungrûl ta che a nih hi, a rorêlna i luahlân vei a; LALPA chuan lalram chu i fapa Absaloma kutah a pe ta. I thisen chhuah man chhياتna chu i têt ta a nih hi,” a ti a.

⁹Zerui fapa Abisaia chuan lal hnênah, “Hê ui thisâwn hian ka pu lalber hi eng vanga ânchhia lawh nge a nih? Khawngaih takin a lû hi mi va lâktîr ta che!” a ti a.

¹⁰Mahse lal chuan, “Nangni Zerui fapate u, lo inrawlh vê duh suh u. LALPAN a hnênah ‘Davida ânchhia lawh rawh’ a lo ti a nih si chuan, tihian min lawh mai teh se. ‘Engah nge hetiang i tih?’ ti thei tu nge awm le?” a ti a.

¹¹David chuan Abisaia leh a chhiahhlawhte hnênah, “En teh u, ka fapa, ka rîla rah ngei pawhin mi thah a tum a ni a. Hê Benjamin mi phei hi chuan a tum lehzuâl dâwn lo vem ni? Engtin mah ti lo ula, a duh tâwkin ânchhia chu lawh mai mai rawh se; LALPAN a tihîr miau si a.

¹²LALPA chuan ka tuarna hi min hriatpui ang a, vawiina ânchhia min lawh hi LALPA chuan thil thâin min la rûl lêt hlauh thei asin,” a ti a.

¹³David leh a mite chu kawngah chuan an kal zêl a, Simeia pawh râl lehlahm tlang pangah chuan ânchhia lawha, lung te vawma, vaivutte theh tuarh tuarh chungin a kal zêl a.

¹⁴Lal leh a hnêna mite chu an chhau hle a; chumi hmunah chuan an intiharh a.

AHITHOPHELA REMRUAT

¹⁵Chutih chhûng chuan Absaloma leh a hnêna awm, Israel mi zawng zawng chuan Jerusalem an lo thleng a; Ahithophela pawh an zingah a tel vê a.

¹⁶Arki mi Husaia, Davida thian chu Absaloma hnênah a lo kal a, Husaia chuan Absaloma hnênah, “Lalber chu dam reng rawh se! Lalber chu dam reng rawh se!” a rawn ti a.

¹⁷Absaloma chuan Husaia hnênah, “I thian laka i rinawm dân chu hetiang hi mâw ni? Engah nge i thian hnênah chuan i kal vê loh?” a ti a.

¹⁸Husaia chuan Absaloma hnênah, “Kal teh suh e, LALPA leh hênga mite leh Israel mi zawng zawngin an thlana thû thûin ka awm ang a, a lamah ka tang zêl ang.

¹⁹Tû dang rawng nge ka bâwl ang le? A fapa rawng chu ka bâwlsak tûr a ni dâwn lo’ m ni? I pa tâna ka thawk ang bawkhân i hnênah ka thawk ve mawh ang,” a ti a.

²⁰Absaloma chuan Ahithophela hnênah, “Tih dân tûr rem han ruat ta che,” a ti a.

²¹Ahithophela chuan Absaloma hnênah, “I pâ hmei, in ngâk tûra a dahte chu va mutpui la; Israel zawng zawngin i pa lungten zâwn takin i awm ta tih lo hre rawh se. Tichuan, i lama tangte zawng zawng kut i tichak sauh dâwn a ni,” a ti a.

²²Absaloma pualin lal in chungah chuan puan in an kaih a, chutah chuan Israel mipui zawng zawng mithmuhin Absaloma chu a pâ hmeite mutpui tûrin a lût ta a.

²³Chûng hun lai chuan Ahithophela remruat apiang chu Pathian thu chhuak ang maia ngaih a ni a. Chutiang tho chuan Davida leh Absaloma te pawhin Ahithophela remruat chu an ngaisang a ni.

BUNG 17

¹Ahithophela chuan Absaloma hnênah, “Mi 12,000 ka thlang chhuak ang a, zân inah ngei Davida chu ka va ûm ngâh teh ang.

²A chauh chhiat lai takin ka va nangchîng ang a, hlau takin ka va siam teh ang. Tichuan, a hnêna awm zawng zawng an tlânche vek ang a, lal chauh chu ka va that mai dâwn a ni.

³Tichuan, mi zawng zawng i hnênah ka rawn hruai kîr vek ang a. I mi zawn ber tel lova an zavaia an lo kîr chuan, mi zawng zawng chu râlmuangin an awm tawh mai dâwn alâwm,” a ti a.

⁴Absaloma leh Israel upa zawng zawng chuan thâ an ti hlê a.

HUSAIA THURÂWN

⁵Absaloma chuan, ‘Arki mi Husaia kha han ko ve teh u, sawi tûr eng nge a neih i lo ngaihla vê ang u hmiang,” a ti a.

⁶Husaia chu Absaloma hnên a lo thlen chuan Absaloma chuan a hnênah, “Ahithophela chuan heti hian a sawi a. A sawi anga tih chî a ni em? A nih loh chuan, han sawi vê ta che,” a ti a.

⁷Husaia chuan Absaloma hnênah, “Tûn hun atân chuan Ahithophela remruat dân hi a tha lo.

⁸“I pa leh a mite hi i hriat angin mi chak an ni a, phûla savawm, a no an lâksak ang maia kawlh, thinrimna pâi ruh tlat an ni a; i pa lah chu indo mi a ni a, mipui zingah pawh a riak kher lo vang.

⁹Tûnah pawh hian pûkah emaw, hmun dangah emaw a biru daih ngei ang. A tîrah mi thenkhat lo that ta se, a hria apiangin, ‘Absaloma sipaite an that chiam mai le,’ tiin an sawi darh ang a.

¹⁰Mi huaisen, sakeibaknei thinlung ang pû te meuh pawh an zâm chhe mai ang. Israel mi zawng zawngin i pa chu mi chak a nihzia leh a thuihruaite huaisenzia an hai si lo va.

¹¹Chuvângin, Israel mi zawng zawng, Dan atanga Beerseba thlengin, tuihui kama tiauvut ang maia tam sipai khâwm vek ni se, nangmah ngein chu indona hmâ chu hruai la ka ti a ni.

¹²A awmna ngei tûr hmunah hlah miah lo tûrin kan luhchilh ang a, dâi tlân lei chung a tuam angin kan tuam chhuak vek ang a. Amah leh a hote pawh pakhat mah kan zuah tûr a ni lo.

¹³Khawpui chhûnga a tlân lût a nih pawhin, Israel mi zawng zawngin chû khuah chuan hruizên an rawn keng theuh ang a; lung intiang pakhat pawh zuah lovin luih kan hnûk thla vek mai ang,” a ti baw a.

¹⁴Tichuan, Absaloma leh Israel mi zawng zawng chuan, “Arki mi Husaia remruat chu Ahithophela remruat aiin a tha zâwk e,” an ti a. LALPA chuan Absaloma chung a chhiatna a lo thlen theih nân Ahithophela thurâwn tha tak chu paih thlâk a lo tum rêng a.

HUSAIA TLÂNBO TÛRIN DAVIDA A HRILH

¹⁵Husaia chuan puithiam Zadoka leh Abiathara te hnênah, “Ahithophelan chutiang khatiang chuan Absaloma leh Israel upate thû a râwn a, keiin chutiang khatiangin thurâwn ka pê a.

¹⁶David a hrilh tûrin mi tîr thuai ula, “Zân inah thlalêr phai zâwlah awm mai mai suh u, lui kha kân thuai rawh u, chuti lo zawng, lal leh a hnêna mi zawng zawng an rawn lem zo vek dah ang e,” tiin hrilh rawh u,” a ti a.

¹⁷Jonathana leh Ahimaza te chu khawpui chhûnga miten an hmuh lohna tûrin En Rogelah an awm a; tichuan anni chu hrilh tûrin chhiahhlawh hmeichhia a va kal thîn a, anni chu Davida hrilh tûrin an zu kal leh thîn a ni.

¹⁸Nimahsela, tlangvâl pakhat hian anni chu a lo hmu hlauh va, Absaloma a va hrilh a. Mahse, anni pahni chu an kal bo thuai a, Bahurima mi pakhat inah an tlân lût a, chû mi chuan a kawt tualah tuichhunchhuah a nei a, a chhûngah chuan an lût a.

¹⁹Tuichhunchhuah luhna kawngka chu hmeichhiain a chhîn a, a chungah buh a pho hnan a; tûma’n an hre ve lo.

²⁰Absaloma chhiahhlawhte chu hmeichhe inah chuan an va kal a, “Ahimaza leh Jonathana te hi khawiah nge?” an ti a. Hmeichhia chuan an hnênah, “Lui an kân tawh hial ang,” a lo ti a. An zawng hmu zo lo va, Jerusalema an kîr leh ta a.

²¹An kal liam hnû chuan tuichhunchhuah aţang chuan an lo chhuak a, an kal ta a, Lal Davida chu an va hrilh a; Davida hnênah chuan, “Tho ula, lui hi kân thuai rawh u. Ahithophelan i chhiatna tûrin rem a lo ruat a ni,” a ti a.

²²Tichuan, Davida leh a hnêna mipui awm zawng zawng chu an tho va, Jordan lui chu an kân a. Khua a vâr chuan Jordan lui an kân zo hman a.

²³Ahithophela chuan a remruat dân an zâwm duh lo tih a hriatin, a sabengtung a thuan a, a tho va, a awmna khuah ama inah chuan a hâw ta a. An chhûngkaw ro a rêl fel a, a inâwkhluam a; a thi a, a pa thlânah an phûm ta a.

²⁴David a chu Manahaim-ah a kal a. Absaloma pawhin a lamţang Israelho zawng zawng chu Jordan lui a kânpui a.

²⁵Absaloma chuan a sipai hotu atân, Joaba aiah Amasa a dah a. Amasa chu Israel mi Jithra fapa, Abigaili hrin a ni; ani chu Joaba nu Zeruii laizâwn, Nahasa fanu a ni a.

²⁶Tichuan, Israelte leh Absaloma te chuan Gilead ramah ţanhmun an khuar a.

²⁷Davidan Mahanaim a va thlen chuan, Ammon mi, Rabbah khuah Nahasha fapa Sobia te, Lo Debar khuah Ammiela fapa Makira leh, Gilead mi Rogelim khuah Barzillaia te chuan,

²⁸khum te, chawhtawlh te, belthlêng te, wheat te, barli leh chhangphut te, chhangpêr leh betê te, dailuah leh mîm kan te;

²⁹khawizû leh hnute khal te, berâm leh bâwnghnute khal te chu Davida leh a mite ei tûrin an rawn keng a. “Mipuite chu thlalêrah rilţâm tuihâlin an chau zo ta,” tiin an lo va hrilh si a.

BUNG 18

ABSALOMA A TLÂWM, AN THAT

¹David a chuan a hnêna mipui awm zât chu a chhiar a, sâng chung a hotute leh za chung a hotute a ruat a.

²David a pâwlte zînga hmun thuma then hmun khat chu Joaban a ho va, hmun khat chu Zeruii fapa Abisaia, Joaba unaupain a ho va, hmun khat dang chu Git mi Ittaian a ho baw a. Lal chuan a mite hnênah, “Kei pawh in hnênah ka rawn thawk chhuak vê dâwn a nia,” a ti a.

³Nimahsela a hote chuan, “Kal chhuak ve lul lo ve! Keinite chu tlânchhiat pawh lo ngai se, eng teh vakah min ngai lo vang; a zâtve lai hi va thi pawh ni ila, eng hû-ah mah min ngai tham lo vang. Nang ber mai hi, mi sâng sâwm tluka hlu i ni a. Khaw chhûnga i lo awm ringawt pawh hi kan ţangkaipui zâwk ang che,” an ti a.

⁴Lal chuan an hnênah, “Thâ in tih ang tak chuan ka awm ang e,” a ti a. Lal chu kulh kawngka bulah chuan a dîng a, sipaiho zawng zawng chu a za pâwl te, a sâng pâwl tein an kal chhuak ta a.

⁵Lal chuan Joaba te, Abisaia te, Ittaia te hnênah chuan, “Keimah vâng talin tlangvâl Absaloma chu va dîm deuh rawh u âw,” tiin a chah a. Absaloma chungthû lalin sipai hotute thu a pêk chu mite chuan an hre vek a.

⁶Tichuan, sipaiho chu Israel-te bei tûrin indona hmun panin an chhuak ta a. An indona hmun chu Ephraim ramhnuaiha a ni.

⁷David a chhiahhlawhte chuan Israel mite chu an that chiam a, chumi ni chuan mi 20,000 zet an that a.

⁸Indona chuan chu lai ram pum chu a tuam chhuak vek a, khandaiha an thah te ai mahin ramhnuaiha tlu hlum chu an tam zawk a ni.

⁹Absaloma chuan Davida hote chu a tâwk ta a. Absaloma chu sabengtung chungah a chuang a. Sabengtung chu terebinth thing buk tak hnuaiaha a tlân lût a, a lû chu thing zârah chuan a tâng a; tichuan lei si lo, vân si lovin a inkhâi ta reng mai a. A chuanna sabengtung chuan a tlânsan daih a.

¹⁰Mi pakhat hian a va hmû a, Joaba hnênah, “Terebinth thing buka Absaloma inkhâi reng ka hmu asin!” tiin a va hrilh a.

¹¹Joaba chuan amah hrilhtu hnênah chuan, “I hmu chiah mâw! Engah nge leiah i sâthlak tawp ngâl loh le? Chutiang chuan han ti la chuan, tangka sekel sâwm leh kâwnghrên ka pe mai tûr che a nia,” a ti a.

¹²Mahse chu mi chuan Joaba hnênah, “Tangka sekel sângkhat pawh dawng dâwn mah ila, lal fapa chu ka khawih chuang lo vang. Kan hriat phâk ngeiah lalin nang leh Abisaia leh Ittaia te hnênah, ‘Tlangvâl Absaloma khawih lo tûrin fimkhur rawh u âw!’ tia a chah che u kha.

¹³Lo that ta ila, dik lo taka thil titu ka ni dâwn asin. Lal lakah hian engmah thup theih a ni si lo va, nang lahin ka thlavâng i

hauh leh âwm si lo va,” a ti a.

¹⁴Joaba chuan, “Ka khawtlâipui hman lova che,” a ti a. Fei pathum a la lawk a, terebinth thing buka tâng, lo la nung reng Absaloma thinnhûnah chuan a chhun a.

¹⁵Joaba râlthuan kengtu tlangvâl sâwmte chuan Absaloma chu an din hual a, an chhun hlum ta a.

¹⁶Tichuan, Joaba chuan tâwtawrâwt a hâm a, sipaihoten Israel mi an ûm lai chu an kîrsan ta a. Joaba chuan mipuite chu a kokîr ta si a.

¹⁷Absaloma ruang chu an lâ a, ngaw chhûnga khuarkhurum zau takah chuan an paih lût a, a chungah chuan lung an tiang vûm thûr a. Tichuan, Israelho chu anmahni in lamah an tlânchhe vek a.

¹⁸Absaloma chuan a dam laiin Lal Ruamah dam lai lung a phun a. “Ka hming pu tûr fapa ka nei si lo va,” a ti a ni. Chû lung chu ama hming châwiin a phun a. Tûn thlengin Absaloma Hriatrengna Lungphun tih a la ni ta reng a ni.

DAVIDAN ABSALOMA THIH THÛ A HRIA

¹⁹Zadoka fapa Ahimaza chuan, “Ka va tlan ang a, LALPAN a hmêlmâte chungah phubâ a lâksak thû hi lal ka va hrilh ang e,” a ti a.

²⁰Joaba chuan, “Hê thû hi chu vawiinah chuan la hrilh lo ve, ni dangah hrilh zâwk ang che. Vawiin hi zawng, lal fapa thih ni a ni a, vawiin la lâa va hrilh chí a ni lo ve,” a ti a.

²¹Joaba chuan Kush mi hnênah, “Kal la, i thil hmuh hi lal va hrilh rawh,” a ti a. Kush mi chu Joaba hmâah a kûn a, tichuan a tlan ta vang vang a.

²²Zadoka fapa Ahimaza chuan Joaba hnênah, “Eng thil pawh thleng se, Kush mi hnungah tal sâwn min tlântîr ve hrâm teh,” a ti leh a. Joaba chuan, “Ka fapa, engah nge i tlan vê kher ang, chanchin hrilh tûr peih fel a la ni si lo va,” a ti a.

²³“Eng pawh ni rawh se, ka tlan rêng rêng dâwn,” a ti a. Ani chuan, “Tlan rawh le,” a ti a. Tichuan Ahimaza chu phai lamah a tlan a, Kush mi chu a tlan pêl a.

²⁴Davida chu kulh kawngka pahni inkârah chuan a lo thû a. Vêngtu chu kulh bang kawngka chungah chuan a han lâwn a, a mit lênin a han hawi vêl a, mi pakhat, amah maia lo tlan hi a hmû a.

²⁵Vêngtu chu a âu va, lal chu a hrilh a. Lal chuan, “Pakhat mai a nih chuan, thu ken a nei a nih chu,” a ti a. Ani chu chak takin a lo hnai zêl a.

²⁶Vêngtu chuan mi dang lo tlan a hmu leh a, vêngtu chuan kawngkhâr vêngtu hnênah, “Mi dang pakhat a lo tlan leh e!” a ti a. Lal chuan, “Chû pawh chuan chanchin a keng ngei a nih chu,” a ti a.

²⁷Vêngtu chuan, “A hmasa zâwk tlan dân aţang chuan Zadoka fapa Ahimaza tlan dân a ang hlê mai,” a ti a. Lal chuan, “Mi thâ a ni a, thu thâ a rawn keng a nih chu,” a lo ti a.

²⁸Tichuan, Ahimaza chu a âu va, lal hnênah chuan, “Engkim a thâ vek e!” a ti a. Lal hmâah chuan hmâia lei sîin a kûn a, “Ka pu, lalber laka helho i kuta petu LALPA i Pathian chu fakin awm rawh

se!” a ti a.

²⁹Lal chuan, “Tlangvâl Absaloma chu a him em?” a ti a. Ahimaza chuan a chhâng a, “Joaban lal chhiahhlawh leh kei mi tîrh laiin, an buai mur mur tih ka hmû a, eng thil nge a nih chu ka hre lo,” a ti a.

³⁰Lal chuan, “A sîrah hian lo ding rih rawh,” a ti a. A sîrah chuan a va ding a.

³¹Chutih lai chuan Kush mi chu a lo thleng vê a, Kush mi chuan, “Ka pu, lalber, chanchin a thâ e! Nangma laka helho zawng zawng chungah LALPAN phubâ a lâksak ta che a ni,” a ti a.

³²Lal chuan Kush mi hnênah, “Tlangvâl Absaloma chu a him em?” a ti a. Kush mi chuan a chhâng a, “Ka pu lalber tihchhiat tuma helho zawng zawng chu, chû tlangvâl ang chu lo ni rawh se!” a ti a.

DAVIDAN ABSALOMA A SÛN

³³Lal chu a mangang ta êm êm a, kulh kawngka chung pindanah chuan a chho va, a ţap a. A kal pahin, “Aw ka fapa Absalom—ka fapa, ka fapa Absalom— nang ai hian han thi teh ila âw! Aw Absalom, ka fapa, ka fapa!” tiin a ţap a.

BUNG 19

¹Joaba hnênah chuan, “Ngai teh, lal chu a ţap a, a fapa Absaloma chu a sîn hlê mai,” tiin an hrilh a.

²Tichuan, chumi nîa hnehna chu mi zawng zawng tân mitthi sîinna nî-ah a lo chang ta. “Lal chu a fapa ngaiin a ţap a ţap,” tih chu mite chuan an hre vek si a.

³Indona aţanga tlânchhe hâw lam ang maiin, mipuite chu khuaah chuan zak takin an rawn lût nghiai nghiai a.

⁴Lal chuan a hmâi a khuh a, “Aw ka fapa Absalom! Aw Absalom, ka fapa, ka fapa!” tiin lal chu ring takin a ţap a.

⁵Joaba chu lal inah chuan a va lût a, “Vawiin hian i nunna te, i fapate leh i fanute, i nupuite leh i hmeite nunna chhantu i chhiahhlawh zawng zawngte hi min tizak zo ta dêr mai,

⁶i thiantie aiin i hmêlmâte i lo hmangaih zâwk a nih hi. Hotute leh i mite hi engah mah min ngai lo tih vawiina i awm dân hian a tilang vek a ni; Absaloma hi dam zâwkah ţang se, keini hi vawiin hian thi vek ila, i lâwm zâwk dâwn a lo nih reng hi.

⁷Chuvângin tho la, va kal chhuak la, i chhiahhlawhte thâwi dam tûrin thû va sawi rawh. I chhuak duh lo a nih ngat chuan, LALPA chhâlin chhia ka chham e, zân inah ngei hian lamţang pakhatmah i nei lo vang. Chû thil chu i tleirâwl tîrh aţanga i chungah chhiatna lo thleng tawh zawng zawng ai pawha chhe zawk daih tûr a ni ang,” a ti a.

⁸Lal chu a tho va, kulh kawngkâah chuan a ţu ta a. “E khai, lal chu kulh kawngkâah a ţu ta e,” tiin mi zawng zawng an inhrilh a. Lal hmâah chuan mipui chu an lo pung khâwm ruih ruih a. Israel-ho lah anmahni puan in lamah an tlânchhe vek tawh si a.

JERUSALEM-AH DAVIDA A KÎR

⁹Israel hnam pum zîngah chuan nasa taka inhnialna a lo chhuak a, “Lalin kan hmêlmâte kut ata min chhan him a, Philistia-hote kut ata min chhan chhuak bawk a, tûnah hian Absaloma avângin ram a tlânchhiatsan a.

¹⁰Kan lal atâna hriak kan thih Absaloma lah indonaah a thi ta si a. Engtizia nge lal hruai kîr leh chungchâng hi in sawi hauh loh le?” tiin an inhnial a.

¹¹Tichuan, Lal Davida chuan puithiam Zadoka leh Abiathara te hnênah mi a tîr a, “Juda upate hnênah va sawi rawh u, ‘Israel mi zawng zawngin lal hi ama ina hruai hâw leh rawtna thûin lal beng a lo thleng châmchî a, nangni vê lêh hi, engtizia nge a muang bera in tan mai le?”

¹²Ka thisen zawmpui, ka unaute ngawih ngawih in ni a. Engtizia nge maw lal hruai kîr leh chungchângah a tûanfûm bera in tan mai le?” tiin.

¹³Amasa hnênah pawh, “Ka thisen zawmpui i ni lo vem ni? Joaba aia sipai hotu ni zêl tawh tûra ka siam loh che chuan, Pathianin a tih tihin min ti rawh se, chû aia nasa pawhin,” a ti, va ti rawh u,” a ti a.

¹⁴Chutiang chuan Juda mi zawng zawng thinslung chu mi pakhat thinslung ang maiin a hmin duak mai a, anni chuan lal hnênah, “I mite zawng zawng nêl lo hâwngh leh rawh u!” tiin thû an thawn ta a.

¹⁵Tichuan, lal chu a hâw leh ta a, Jordan lui a va thleng a. Judate chu lal lo hmuaka, lal chu Jordan lui kaipui tûrin Gilgal-ah chuan an lo kal a.

¹⁶Gera fapa Simeia, Benjamin mi, Bahurim khuua mi chu Lal Davida hmuak tûrin Juda mite rualin hmanhmawh takin a lo kal vê a.

¹⁷Amah chu Benjamin mi sângkhatin an tawîawm a, Saula chhûngte zînga mi Ziba leh a fapa sâwm pangâ leh a chhiahhlawh sawmhnih an tel bawk a; lal hmâa inlan tûrin Jordan lui chu an lo kân a.

DAVIDAN SIMEIA A NGAIIDAM

¹⁸Lal chhûngkaw hruai kai nân leh a tûl anga hman tûrin lawng an chhawp bawk a. Lalin Jordan lui a kân vêleh a hmâah chuan Gera fapa Simeia chu a bawkkhup a.

¹⁹Lal hnênah chuan, “Ka pu hian ka chungah khawlohna ngat lul suh se, lalber ka pu-in Jerusalem i chhuahsan nia i chhiahhlawhin dik lo taka a tihna che kha hre reng lul suh la, lal thinslung hian pâi lul suh se aw.

²⁰Kei, i chhiahhlawh hian ka sual tih ka hre si a. Chuvângin a ni, Josepha chhûngte zîngah ka pu lalber hmu tûra ka lo chhuk hmasak ni,” a ti a.

²¹Mahse Zeruii fapa Abisaia chuan a lo chhâng a, “LALPA hriakthih chungah ânchhia a lawh avângin Simeia hi tihlum tûr a ni dâwn lo’em ni?” a ti a.

²²Davida chuan, “Zeruii fapate u, in lo sawi ve tûr eng nge awma, vawiin hian mi hnial kalhtûa in tan mai le? Vawiinah hian Israel mi rêng rêng tihlum tûr a ni em ni? Vawiinah hian Israelte lal ka ni tih ka hre dâwn lo vem ni?” a ti a.

²³Tichuan, lal chuan Simeia hnênah, “I thi lo vang,” a ti a. Lal chuan chhia a chham a.

DAVIDA LEH MEPHIBOSETHA AN INTÂWK

²⁴Saula tupa Mephibosetha chu lal hmuak tûrin a lo chhuk vê a. Lal a kal chhuah aţanga râlmuang taka a lo hâw leh thlengin a kê pawh a sil duh lo va, a khabe hmul a mêt hek lo, a puan te pawh a su bawk hek lo.

²⁵Jerusalema lal hmu tûra a va kal chuan, lal chuan, “Mephiboseth, engati nge mi i rawn zui ve loh?” tiin a lo zâwt a.

²⁶Ani chuan a chhâng a, “Ka lalpa, âw lalber, ka chhiahhlawhin min tihder vâng a ni. I chhiahhlawh hi kebâi a nih vângin, ‘Lal hnêna kal ve tûrin ka chuanna tûr sabengtung ka thuam ang e,’ ka ti a.

²⁷Mahse ka pu, lalber hnênah i chhiahhlawh hi dâwtin min hêk a, mahse ka pu, lalber hi Pathian Vântirhko ang mai a ni a. Thâ i tih ang zêlin ka chungah ti ang che.

²⁸Ka pa chhûngte zawng zawng chu ka pu lalber hmâah hian mitthi mai kan ni a. Chuti chung chuan, i chhiahhlawh hi i dawhkân kîltu zîngah min telh vê duh a. Chuvângin, lal hnênah hian eng dang nge ka beisei leh chuan ang?” a ti a.

²⁹Lal chuan a hnênah, “Engah nge i chungchâng thû hi i la sawi fo? ‘Nang leh Ziba hian ram chu insem rawh u,’ ka tih tawh kha,” a ti a.

³⁰Mephibosetha chuan lal hnênah, “Ka pu lalber hi ama in ngeiah thlamuang takin a lo kîr tawh bawk a, duh leh a vaiin chang vek rawh se,” a ti a.

BARZILAIA CHUNGA DAVIDA THATNA

³¹Gilead mi Barzilaia chu Rogelim khuua aţangin lal chu Jordan kaipui tûrin a lo chhuk a, Jordan lui chu lal rualin a kâi ve a.

³²Barzilaia chu tar tak, kum sawmriata upa a ni. Mi hausa tak a ni bawk a, Mahanaim khuua lal a awm chhûng khân ei tûr a lo tumsak thîn a ni.

³³Lal chuan Barzilaia hnênah, “Ka hnênah lo kai vê la, Jerusalema ka hnêna i awm chhûng chuan ka lo chawm ve thung ang che,” a ti a.

³⁴Barzilaia erawh chuan lal hnênah, “Jerusalema lal hnêna kal ve tûr chuan kum engzah nge maw ka la dam dâwn le?”

³⁵Tûnah kum sawmriat ka ni tawh a. A thâ leh thâ lo pawh ka thliar hrang thei ngû em ni le? I chhiahhlawh hian ei leh inah a tui leh tui lo pawh ka hre thei tawh em ni le? Mipa leh hmeichhe zai rî te pawh ka hre thei tawh ngû emaw chu? Eng aiah nge i chhiahhlawh hi ka pu lalber tihautaktu maiah ka tan ang le?

³⁶I chhiahhlawh hian lalber hi Jordan râl maia thlah che ka tum a. Engah nge lalin chutiang lâwmman te mi pêk ang le?

³⁷Ka thih huna ka nu leh ka pa thlân kiana min phûm theih nân khawngaih takin i chhiahhlawh hi min hâwtîr zâwk ang che. I chhiahhlawh Chimhama erawh chu heta hi a awm e; thâ i tih ang zêla i chhawr atân ka pu lalber hnênah chuan kal ve rawh se,” a ti a.

³⁸Lal chuan, “Chimhama chuan min zui sela, thâ i tih angin a chungah ka ti ang e. Ti tûra min duh apiang ka tihsak zêl ang che,”

a ti ta a.

³⁹An vâiin Jordan lui chu an kân ta a. Lal chuan lui a kân zawhin Barzilaia chu a fâwp a, mal a sâwm a, a awmna lamah a kîr leh ta a.

LAL CHUNGCHÂNGA INHNIALNA

⁴⁰Lal chu Gilgalah chuan a kal a, Chimhama chuan a zui zêl a. Juda mipui zawng zawng leh Israel mipui zâtve te chuan an vêng a.

⁴¹Chutih lai chuan Israel mi zawng zawng chu lal hnênah chuan an lo kal a, lal hnênah, “Engati nge kan unau Judate hian lal leh an chhûngkua te, Davida mi zawng zawng chu a rûk a râlâ Jordan lui an hruai kâi bîk che lê?” an rawn ti a.

⁴²Juda mi zawng zawng chuan Israel mite hnênah, “Lal hi kan chipui a nih vâng mai a ni. Engah nge chutiang thil te in hriat thiam loh le? Lal hi kan ei hêksak ngai em ni? Lâwmman pawh kan dawng bîk em ni?” tiin an chhâng a.

⁴³Israel mite chuan Judate chu an chhâng a, “Lal nihnaah hian chan sâwm kan nei asin; chuvângin, nangni aiin Davida chungah hian chanvo kan ngah zâwk a ni. Engah nge mi in palzût tâk mai—kan lal hruai kîr leh rawt hmasatu kan ni lo vem ni?” tiin an tawng pâwr hle mai a. Nimahsela, Israel mite thû aiin Juda mite chuan thû an la duh rum zâwk mah a.

BUNG 20

SEBAA HELNA

¹Chumi hmun vêkah chuan Beliala fapa pakhat Sebaa, Bikria fapa, Benjamin hnam a awm a. Tâwtawrâwt a hâm a, tihian a sawi a: “Davida-ah hian chanvo kan nei vê lo, Jesaia fapaah ro luah tûr kan nei hek lo; Aw Israelte u, in puan inah hâw vek rawh u!” a ti a.

²Tichuan, Israel mi zawng zawng chuan Davida chu an hawisan duak a, Bikria fapa Sebaa chu an zui ta a. Juda mite erawh chuan Jordan aţangin Jerusalem thlengin rinawm takin an lal chu an vuan tlat a.

³Davida chuan Jerusalema ama in chu a thleng ta a. Lal chuan hmeichhe sâwm, in lo nghâk tûra a dah, a hmeite chu a hruai a, a khung hrang a, a enkawl zui zêl a, mahse an hnênah a lût tawh lo. An thih ni thlengin a khârkip tlat a, hmeithai angin an awm ta mai a ni.

⁴Lal chuan Amasa hnênah, “Ni thum chhûngin Juda mite hi ko khâwm la, nang pawh hetah lo awm vê ang che,” a ti a.

⁵Tichuan, Amasa chu Juda mite ko khâwm tûrin a kal ta a. Mahse Davida hun tiam aiin a rawn khawtlâi a.

⁶Davida chuan Abisaia hnênah, “Bikria fapa Sebaa hian Absaloma aiin pawl a tawh nasa zâwk dâwn tlat mai. I pu chhiahhlawhte hi hruai la, va ûm rawh, kulh nei kuaah te lûtin a pût bo dah ang e,” a ti a.

⁷Tichuan, Joaba hote, Keret mite, Pelet mite leh mi huaisenho zawng zawng chuan ani chu an zui chhuak a. Bikria fapa Sebaa ûm tûrin Jerusalem aţangin an chhuak a.

⁸Gibeon lungpui lian an va thleng a, Amasa chuan an hmâah a lo thlen khalh a. Joaba chuan râltuam a inbel a; a khandaih chu a pâi nê a kâwngah a hrêng a; a kal zawngin a dawh chhuak a.

⁹Joaba chuan Amasa hnênah, “Unaupa, i dam thâ mâw?” a ti a. Joaba chuan fawh tum ni âwm takin a kut dîng lamin Amasa khabe hmul a chelhsak a.

¹⁰Nimahsela, Amasa chuan Joaba kutah khandaih a awm tih rêng a hre lo. Chû chuan a pumah a vit a, leiah chuan a rîlte chu a tla nuaih a; a vit nawn lo. Tichuan a thi ta a. Joaba leh a unau Abisaia te chuan Bikria fapa Sebaa chu an ûmzui a.

¹¹Joaba hote zînga mi pakhat chu Amasa ruang bulah a dîng a, “Joaba leh Davida lamţang apiangin—Joaba zui rawh u!” a ti a.

¹²Amasa ruang chu kawng laiah thisenin a bual nuai a. A bul lo thleng apiang an dîng chawt zêl a. Chutia mi zawng zawngin an dinchilh zel tih a hmuhin, mi pakhat chuan Amasa ruang chu kawng aţangin phûlah a hnûk thla a, puanin a khuh a.

¹³Kawng aţanga a hnuh sawn hnû chuan mi zawng zawng chuan Joaba chu zuiin Bikria fapa Sebaa chu an ûmzui leh ta a.

¹⁴Ani chuan Abel leh Beth Maaka thlengin Israel hnam tin a tlawh chhuak vek a, Beri mite pawh a tlawh a. Tichuan mite chu an inpun khâwm a, Sebaa chu an ûmzui zêl a.

¹⁵An kal zêl a, Beth Maaka Abel khua chu an va hual a; kulh bang hrûlah lei an chhûng pâwng a, kulh rinchhanin a dîng luah a. Joaba sipaite chuan tihchim tumin kulh bang chu an chhu bur bur a.

¹⁶Hmeichhe fîng tak pakhat, kulh aţanga rawn âu chuan, “Lo ngaithla teh u! Khawngaih takin Joaba hnênah, ‘Thû ka lo hrilh theih nân rawn kal hnâi rawh se,’ tih min han hrilhsak teh u,” a ti a.

¹⁷Ani chu a lo kal hnâi a, hmeichhia chuan, “Joaba i ni em?” a lo ti a. “Keimah hi ka ni e,” tiin a chhâng a. Ani chuan, “I bâwihnu thû hi lo ngaithla ta che,” a ti a. Ani chuan, “Ka ngaithlâ e,” a ti a.

¹⁸Ani chuan, “Hmânlai chuan heti hian an ti a, ‘Abel-ah thurâwn la rawh se,’ tiin; tichuan, thubuai an ching fel thîn a ni.

¹⁹Kei hi Israel rama inremna duh leh mi rinawmte zînga mi ka ni. Mahse nang chuan Israel ram leh a khawpui hlun tihchhiat i tum si a. Engah nge LALPA rochan ram hi nuai bo i tum tâk?” a ti a.

²⁰Joaba chuan a chhâng a, “Ni lo ve, tihchhiat leh nuai bo che u ka tum rêng rêng lo asin!

²¹Chutiang chu ni lo ve. Ephraim tlâng rama mi, a hming Sebaa, Bikria fapa chuan lal Davida lakah helna a chawh chhuak a. Amah chiah kha mîn pe ula, khua hi kan kalsan mai ang,” a ti a. Chu hmeichhia chuan Joaba hnênah, “Lo en ula, a lû chu kulh pâwnah kan rawn paih chhuak ang e,” a ti a.

²²Chû hmeichhia chuan remhre takin mipuite chu a râwn kual vek a. Bikria fapa Sebaa lû chu an lâ a, Joaba te awmna lamah an theh chhuak a. Ani chuan tâwtawrâwt a hâm a, khua aţang chuan an insaseng a, mi tin mahni in lamah an hâw ta a. Joaba pawh chu lal hnênah Jerusalema a kîr leh ta a.

DAVIDA SORKAR HOTUTE

²³Joaba chu Israel sipai zawng zawng hotu a ni a; Jehoiada fapa Benaia chu Kerit mite leh Pelet mite hotu a ni;

²⁴Adorama chu hnathawkho vêngtu a ni a; Alihuda fapa Jehosaphata chu thil chhinchhiahtu a ni;

²⁵Seva chu ziaktu a ni a; Zadoka leh Abiathara te chu puithiam an ni a;

²⁶Jairi mi Ira chu Davida upa min a ni.

BUNG 21

DAVIDAN GIBEON-HO PHUBA A LAKSAK

¹Davida lal laiin a zâwnin kum thum tām a tlā a; Davida chuan LALPA a rawn a. “Saula leh a chhūngte thisen chhuah vāng a ni, Gibeon mite a that si a,” tiin LALPA chuan a lo chhāng a.

²Tichuan, lal chuan Gibeon mite chu a ko va, a bia a. Gibeon mite chu Israel fate an ni lo va, Amor-ho la dam chhunte an ni; Israel fate khân anmahni veng him tûrin thû an lo tiam tawh a, mahse Saula khân Israelte leh Juda thlahte tâna a thahnemngaih luatah tihhlum vek a lo tum a.

³Chuvāngin Davida chuan Gibeon-ho hnēnah, “Eng nge ka tihsak ang che u? LALPA ro chante hi mal in sâwm theih nân engtin nge ka thâwi dam ang che u?” a ti a.

⁴Gibeon mite chuan a hnēnah, “Saula leh a chhūngte hnēn aṭāngin tangka leh rangkachak kan duh lo va, keimahni avāngin Israel ramah tūmah tihlum tûrin kan ti baw lo che a ni,” an ti a. Ani chuan, “In duh chu sawi ula, ka tihsak ang che u,” a ti a.

⁵Anni chuan lal chu an chhāng a, “Israel ram khawi hmun aṭāng pawha mi tihboral vek tuma min phiara, min tihboral tumtu pa kha,

⁶kha pa thlahte zīngā mi pasarih min pe la, LALPA mi ruat Saula awmna khua Gibeah LALPA hmāah ngei kan khai hlum ang e,” an ti a. Lal chuan, “Ka pe ang che u,” a ti a.

⁷Nimahsela, Saula fapa Jonathana leh Davida ten LALPA hmāah thu an lo tiam tawh avāngin, lal chuan Saula fapa Jonathana fapa Mephibosetha chu a zuah a.

⁸Tichuan, lal chuan Armonia leh Mephibosetha, Aia fanu Rizpa-in Saula laka a fapa hrin pahni te, Mehloth mi Barzilaia fapa Adriela tana Saula fanu Mikali hrinsak fapa pangāte chu a hruiatir a;

⁹Gibeon-ho kutah a pê a, tlāng chungah chuan LALPA hmāah an khai hlum ta a. An pasarih chuan an thi a, an tihhlum ni chu barli buh seng ṭan ni khat ni a ni.

¹⁰Aia fanu Rizpai chuan saiip puan a la a, lung chungah a zâr a, buh seng ṭantirh aṭāngā vān aṭāngā ruah hnuhnung lo tlāk hun thlengin a awmchilh a. Chhūnah chunglêng savâ rawn fu tûr leh zâna ramsāte lakah ruangte chu a vêng tlat a.

¹¹Aia fanu, Saula hmei, Rispai thiltih dân chu Davida an hrilh a.

¹²Davida chu a kal chhuak a, Gilboa hmuna Philistia-hovin Saula an thaha a ruang an khâi kâna Beth San kawthlêr aṭāngā va ru chhuaktu Jabes Gilead mite hnēn aṭāngin Saula ruh leh a fapa Jonathana ruhte chu a va khāwm a.

¹³Chuta ṭāng chuan Saula ruh leh a fapa Jonathana ruhte chu a va lâ a; an khai hlum ho ruh pawh a khāwm baw lo a.

¹⁴Saula leh a fapa Jonathana ruhte chu Benjamin rama Zela hmunah, an pa Kis-a thlānah chuan an phûm ta a. Lal thupêk ang zêlin an ti a. Chumi hnû aṭāng chuan, ram tâna ṭawngtâna chu Pathianin a ngaihthlāksak ta a.

PHILISTIA MI LIAN-HO TIHBORAL

¹⁵Philistia-ho leh Israelte chu an indo leh a, Davida chu a hote nēn an thaw lo thlā a, Philistia-ho chu an zu bei a; Davida chu a chhau ta a.

¹⁶An mi lian thlahte zīngā mi Isbi-Benoba chuan Davida chu thah a tum a, a dâr fei rih zāwng pawh sekel zathum a ni a, khandaih thar a pāi baw lo a.

¹⁷Mahse Zeruii fapa Abisaian a rawn pui a, Philistia mi chu a chhun vak a, a that ta a. Davida hote chuan a hnēnah, “Tlēmāh tlēmāh Israelte khāwnvâr i timit lo chauh a nih hi le, indonaah kan zīngāh i kal ve tawh tûr a ni lo,” tiin chhia an chham khum a.

¹⁸Chumi hnûah pawh Gob hmunah Philistia-ho nēn indona a awm leh a. Chumi ṭum chuan Husath mi Sibekaia chuan an mi lian thlahte zīngā mi Sapha chu a that a.

¹⁹Gob hmunah baw lo Philistia-hote nēn indona a awm leh a. Chumi ṭum chuan Git mi Goliatha nau chu Bethlehem khuaa mi Jaare-Oregima fapa Elhananan a that a, chû pa fei ngul chu themkaw lo ang mai a ni.

²⁰Gath khuaah chuan indona a lo awm leh a, chutah chuan mi lian pui, kut zungṭāng paruk leh ke zungṭāng paruk theuh nei, a vaiin sawmnhnih pali nei a awm a; chu pa pawh chu mi lian thlah zīngā mi a ni a.

²¹Israel mite chu a rawn cho va, Davida û Simea fapa Jonathana chuan a lo that a.

²²Gath khuaa chhūng mi lian thlah palite chu Davida leh a hote kutah an thi fâi vek a ni.

BUNG 22

PATHIAN CHHAN CHHUAH AVANGA FAKNA

¹LALPAN a hmêlmâ zāwng zāwng leh Saula kut ata a chhan chhuah ni chuan Davidan hēng fakna hlāte hi LALPA hmāah a chham ta a.

²Tihian a sawi a: “LALPA chu ka lungpui leh ka kulhpui, Mi chhandamtu a ni;

³Ka chakna Pathian a ni a, Amahah chuan ka rinna ka ngat ang; Amah chu ka phāw leh mi chhandamna kî a ni a, Ka bihrûkna kulhbīng sâng a ni; Ka chhandamtu, nangin pāwngnêkna lakah mi humhim a.

⁴Faktlāk LALPA chu ka ko zêl ang a, Ka hmêlmâte lakah ka him ang.

⁵Thihna tui fāwntēn min chîm laiin, Pathian do-na tui lianin min tihlāu ṭhîn.

⁶Hremhmun lungngaihna min mi hual vêl a; Thihna thāngin min chāng reng ṭhîn.

⁷Ka mangan laiin LALPA chu ka ko va, Ka Pathian chu ka âu va; A tempul aṭāngin ka âw a lo hria a, Ka âw chu a bengah a lût ta a.

⁸“Lei chu a ngñing a, a khûr a; Vãn lungphûmte lam a ngñing ður ður a, A thinrim êm avângin.

⁹A hnâr aţangin mei a khu chho ngut ngut a, A kâ aţangin kângraltu mei a chhuak a, Mei an tuah hlauh hlauh a.

¹⁰Vãn a kuai kûn a, a rawn uai thlâ a; A ke hnuaì lam a thim a.

¹¹Cherub chung a chuangin a thlâwk vêl a; Thli thla chung a chuang lai an hmu a.

¹²Thim chhah mupin a intuam a, Vâna ruahthimpui leh chhûm chhah tak chu.

¹³A hmâa êng chuan, Mei a tialh hlauh hlauh thîn.

¹⁴LALPAN vãn aţangin âw a chhuah a, Chungnungbera chu a âu va.

¹⁵Thalte tîr chhuakin a tidarh a; Têkte dentîrin a titlâwm zo ta.

¹⁶LALPAN a han zilh tak tak a, A hnâra thaw chhuaka a han chhêm zet chuan Tuipua kawngte chu a lo lang a, Leilung nghahchhante chu tihlan a ni ta.

¹⁷“Chung lam aţanga rawn banin min kâi a, Tui tam tak ata min hnûk chhuak a.

¹⁸Ka hmêlma chak tak aţang te, Mi hawtute lakah min chhan chhuak a; Ka tân chelh rual an ni si lo va.

¹⁹Ka mangan laiin min rawn bei a, Mahse LALPA chu min puitu a ni.

²⁰Ani chuan hmun thâwl takah min dah a; Mìn ngainat vângin min chhan thîn a.

²¹“LALPA chuan ka dikna ang zêlin min rûl thîn a, Ka kut thianghlim ang zêlin min thungrûl thîn.

²²LALPA kawng chu ka vuan tlat a, Ka Pathian chu ka sual bosan hek lo.

²³A rorêlnate chu ka hmâah a awm vek a; A dân thû pawh ka pênсан lo.

²⁴A lakah sawisêl ka kâi lo va, Sual lakah ka invêng thîn.

²⁵Chuvângin, LALPAN ka dikna ang zêlin min rûl thîn a, A mit hmuha ka thianghlim ang zêlin.

²⁶“Zahngai theite chungah zahngaihna i lantîr ang a; Sawisêl bo lakah sawisêl bovin i inlantîr baw ang.

²⁷Mi thianghlim lakah chuan thianghlimin i inlantîr ang a; Mi luhlulte lakah luhlul takin i inlantîr ang.

²⁸Mi tlâwmte chu i chhandam ang a, Mahse chapote chu tihnam tûrin i mitmei reng dawn si a.

²⁹“Aw LALPA, ka khâwnvâr chu i ni a; LALPAN ka thimna chu a tiêng zêl ang.

³⁰I puihna chuan sipai rual pawh ka cho a ni, Ka Pathian puihnain kulh pawh ka zuan khûm thei ang.

³¹Pathian kawng chu a ţha famkim a, LALPA thû chu fiah vek tawh a ni; Amah ringtute tân ani chu phâw a ni si a.

³²“LALPA chauh lo chu Pathian dang rêng an awm em ni? Kan Pathian chauh lo chu lungpui dang tu nge awm?

³³Pathian chu ka chakna leh thahrui a ni, Ka kawng a tifamkim thîn.

³⁴Zukpui kê ang kê mi siamsak a, Ka hmun sânghahte mi awmtîr a.

³⁵Ka kut hi indo mi zirtîr thîn a, Dâr thalngul pawh ka kuai kûl zo ve ta.

³⁶“I chhandamna phâw min pe baw a; I zaidamnain mi siam lian a ni.

³⁷Ka kawng zawh lai min tihzauhsak a, Ka tawlh thlu mai lo vang.

³⁸Ka hmêlmate ka ûm a, ka hneh a; Ka tihboral hmâ chuan ka kîrsan ngai lo.

³⁹Ka hneh a, hliam ka tuartîr a, An tho thei tawh lo vang; Ka rap bet reng si a.

⁴⁰Indo tûrin chaknain min thuam a, Mi dotute chu nangin min hnehîr ta hlawm a.

⁴¹Ka hmêlmâte nghâwng pawh min pe tawh baw a, Chuvângin mi hawtute chu ka tiboral ve ang.

⁴²Hawi vêl ruai mahse, chhantu an nei lo; LALPA pawhin anni chu a chhâng ðuh si lo va.

⁴³Leia vaivut angin ka râwt dip hlawm a; Khawlaia chirhdiak angin ka chîl pherh vek a, Ka theh ðarh zo ta.

⁴⁴“Mìn beitu ka mite lakah pawh mi chhanhim a; Hnam puma lû ber atân min hum a. Ka hriat loh miten ka rawng an bâwl ang.

⁴⁵Ka hnênah ram dang mi an inpê a; Ka sawi apiang an âwih zêl a.

⁴⁶Hnam dangte chu an chuai zo ta, An tawmna ata khûr chungin an lo chhuak ta.

⁴⁷“LALPA chu a nung reng si a! Ka Lungpui chu fakin awm sela! Pathian chu châwimâwiin awm rawh se, Mi chhandamna Lungpui ngei chu!

⁴⁸Pathian chu phubâ mìn lâksaktu a ni, Hnamte chu ka hnuaiah a tudawl zo ta;

⁴⁹Ka hmêlmâte lakah mi chhan chhuak a. Mi dotute chung daihah mi châwi sângha ta; Mì nunrâwng lakah mìn hum baw a.

⁵⁰Chuvângin, âw LALPA, Jentailte zîngah hian lâwmthû ka hrilh ang che, I hming fakin ka zâi zêl ang.

⁵¹“Ani chu a lal tân chhandamna kulhbîng a ni a, A hriakthih chungah zah a ngai zêl ang, Kumkhuaïn, Davida leh a thlahte chungah chuan.”

BUNG 23

DAVIDA THUCHAH HNUHNUNG

¹Hêngte hi Davida thu hnuhnungte chu a ni. Jesaia fapa Davida chuan tihian a ti; Sângha taka châwi sâna chuan heti hian a ti, Jakoba Pathian hriak thih, Israelte fakna hla mâwî siamtu thûte chu:

²“LALPA Thlarauvin keimahah thû a sawi a, A thû chu ka leiah a awm a.

³Israelte Pathianin a sawi a, Israel-te Lungpui chuan mi bia a: ‘Mi chungah rorêltu chu a dik tûr a ni, Pathian tîh chungin a rêl tûr a ni.

⁴Chû mi chu zîng khaw ênga ni lo chhuak ang a ni tûr a ni a, Zîng kêra chhûm awm lo ang leh, Ruah sîr zawh khaw thianga Leia hnîm hring lo chawr chhuak ang mai hian.’

⁵“Kan chhûngkua hi chuti taka Pathian lamtang ni pha lo mah ıla, Kumkhua atân ka hnênah thû a thlung a, Kawng engkimah min tihim ta. Hei zawng hi ka chhandamna leh ka duhaisâm a ni e; A la tipung cheu lo vang maw?

⁶Beliala fate erawh chu hling anga thel mâm an ni ang, Kut lâwnga khawih ngam an nih loh avângin.

⁷A khawihthu chu thîr leh fei ngulin a inthum tûr a ni a, An awmna hmunah hâl ral vek tûr a ni.”

DAVIDA MI CHAKTE

⁸Hêng hi Davida mi chakte hming chu an ni: Takmoni mi Joseb-Basebeta chu sipai hotu lû ber a ni. Ezni mi Adinoa an ti a, tum khatah mi 800 zet a that.

⁹A dawtah chuan Ahohi mi, Dodoa fapa Eleazara a ni; chû mi chu Philistia mite indo tûra an pun khâwma, Israelho an hnungtawh laia hmêlmâte lo hmachhawntu, Davida kianga sipai huaisen pathumte zînga pakhat kha a ni.

¹⁰Ani chu a tho lawk a, Philistia-ho chu a bei chiam a, a kut kham tawngkhawng lutuk chu khandaihah chuan a kut chu a bet hial a ni. Chumi nî chuan LALPAN hnehna ropui tak a thlensak a; sipaite chu rallâk thawmhnaw chuh tûr ringawtin an lo kîr leh phah a ni.

¹¹A dawt lehtu chu Harari mi, Agea fapa Samma a ni. Philistia sipai-ho chu dailuah chinna hmun pakhatah an pung khâwm a. Israel mite chu Philistia-ho lakah an tlânchhe ta a.

¹²Ani erawh chu a tanhmunah chuan a ding a, a lo vêng tlat a, Philistia-ho chu a that a. LALPAN hnehna ropui tak a thlentîr ta a.

¹³Buh seng laiin mi huaisen deuh deuh sawmthum zînga pathumte chuan Adullam pûka Davida hnên an zu thleng a. Philistia sipaite chuan Rephaim Ruamah tanhmun an khuar a.

¹⁴Chutih lai chuan Davida chu kulh chhûngah a awm a, Philistia sipaiho chuan Bethlehem an luah a.

¹⁵Davida chuan, “Aw, Bethlehem kulh kawngkhâr bula tuikhur tui ngei kha tuinemaw min va châwisak se ka va ti tak êm!” a ti vawng vawng a.

¹⁶Mi chak pathumte chuan Philistia sipai hmunpui chu tâwn tlangin Bethlehem kulh kawngkhâr bul tuikhur tui chu an va châwi a, Davida hnênah anrawn kalpui a. Mahse ani chuan a lo in phal lo va, LALPA tân a bun chhuak ta zâwk a.

¹⁷Heti hian a ti a, “Aw LALPA, hê tui hi ka in loh tûrza mai chu! Mahni nun tâpa kalte thisen chu ka in ang maw?” a ti a. Tichuan a in duh ta lo va. Chûng chu hêng mi chak pathumte tih hi a ni a.

¹⁸Joaba unau Abisaia, Zeruii fapa chu pathumte zînga an hotu ber a ni a. A fei hmangin mi zathum a that a, chûng mi pathumte ang bawh chuan a hming a chher ve ta a ni.

¹⁹Pathumte zîngah chuan châwimâwi phû ber a ni lo’m ni? Chuvângin, an hotu pawh a ni rêng a. Mahse a filawr pathumte zîngah chuan a tel pha lo.

²⁰Kabzeel khuua mi huaisen, Jehoiada fapa Benaia chuan thil ropui tak a ti bawh. Sakeibaknei ang mai Moab mi pahni a that a. Vûr tlâk hun laiin pûka tawm sakeibaknei a that bawh.

²¹Aigupta mi rothap tak pawh a that a. Chû Aigupta mi chuan fei a keng a; ani chuan tiang nê a zu bei a, Aigupta pa fei ken chu a chhuhsak a, amah thah nân a hming ta hlauh a ni.

²²Jehoiada fapa Benaia chuan chûng thilte chu a ti a, mi chak pathumte zîngah hming a chher vê ta bawh

²³Sawmthumte zînga châwimâwi phû zâwk nimahse, a filawr bîk pathumte zîngah a tel pha lo. Davida chuan amah vêngtu hotu atân a ruat a.

²⁴Joaba nau Asahela chu sawmthum zîngah chuan a tel a; Bethlehem mi, Dodoa fapa Elhana te,

²⁵Harod mi Samma te, Harod mi Erika te,

²⁶Palti mi Heleza te, Tekoa mi Ikkesa fapa Ira te,

²⁷Anathoth mi Abiezera te, Husath mi Mebunaia te,

²⁸Ahohi mi Zalmona te, Netopha mi Maharaia te,

²⁹Baana fapa Heleba (Netopha mi) te, Gibea khuua Benamina thlah, Ribaia fapa Ittaia te,

³⁰Pirathon mi Benaia te, Gash lui kama mi Hiddaia te,

³¹Arbath mi Abi-Albona te, Barhum mi Azvametha te,

³²Saalon mi Eliaba (Jasena fapa) te, Jonathana te,

³³Harar mi Samma te, Harar mi Sarara fapa Ahimaia te,

³⁴Maakath mi, Ahasbaia fapa Elipheleta te, Gilon mi Ahithophela fapa Eliama te,

³⁵Karmel mi Hezraia te, Arbi mi Paraia te,

³⁶Zoba mi Nathana fapa Igala te, Gad mi Bania te,

³⁷Ammon mi Zeleka te, Beeroth mi Naharaia (Zeruii fapa Joaba râlthum kengtu) te,

³⁸Ithri mi Ira te, Ithri mi Gareba te,

³⁹Hit mi Uria te an ni a: an vâiin mi sawmthum pasarih an ni.

BUNG 24

DAVIDAN ISRAEL LEH JUDA CHHIARNPUI A NEI

¹Israelte chungah LALPA thinurna a lo thawk leh a, an chhiatna tûr zâwngin, “Kal la, Israelte leh Judate chhiar rawh,” tiin Davida rilrû chu a chawh tho va.

²Lal chuan a hnêna awm, a sipai hotu Joaba hnênah chuan, “Kal ta la, Dan atanga Beer-seba thlengin Israel hnam tinte hi fang chhuak vek la, mi engzât nge awm tih ka hriat theih nân a zât chhiar vek ang che,” a ti a.

³Joaba chuan lal hnênah, “LALPA i Pathian chuan i mit ngeia i hmuh tûrin i mite hi tûna mi lêt zâ pawhin tipung rawh se. Mahse ka pu lal hian eng vânga hre châk teh tlat nge maw a nih le?” a ti a.

⁴Nimahsela, Joaba leh sipai hotute thû ai chuan lal thû chu a tlang ta zâwk si a. Tichuan Joaba leh sipai hotute chu Israel mite chhiar tûrin lal hnên ata chu an chhuak ta a.

⁵Jordan an kân a, Gad rama lui kuam lai taka awm Aroer kuaah awmhmun an kuar a, Jazer lam an pan zêl a.

⁶Gilead ram leh Tahtim Hodsi ram an lo thleng a; Dan Jaan-ah leh Sidon bialah an kal zêl a;

⁷kulh awmna Tura khua te, Hiv-ho leh Kanaan-ho khua zawng zawng te an va thleng a. Judai ram chhim lama Beerseba thlengin an kal a.

⁸Chutia ram pum an fan chhuah zawh hnû, thla kua leh ni sawmhni an thang hnûah chuan Jerusalemah an lo kîr leh a.

⁹Joaba chuan mipui an chhiar chhuah zât chu lal hnênah a hlân a. Israel ramah khandaih hmang thiam, mi huaisen nuai riat an awm a, Judai ramah nuai ngâ an awm a.

DAVIDA THIL TIHSUAL HREMNA

¹⁰Mipui a chhiar zo chu, Davida rilrû chu a inthiam leh ta si lo va. Davida chuan LALPA hnênah, “Aw LALPA, ka lo va tisual nasa tak êm; i chhiahhlawh sualna hi min lâk bosak lul rawh, ka ngên che a ni, ka thiltih hi a âthlâk êm mai,” a ti a.

¹¹Davida chu zîng a han tho va, Davida zâwlnei Gada hnênah chuan LALPA thû a lo thleng a,

¹²“Davida hnênah va kal la, ‘LALPA chuan, “I chung a ka thlentîr tûr thil pathum ka pê ang che a, chûng zînga mi chu thlang rawh le,’ tiin va hrih rawh,” a ti a.

¹³Tichuan, Gada chu Davida hnênah a va kal a, a hnênah, “I ramah hian kum sarîh chhûng tàm a tla ang nge, i hmêlmâten thla thum chhung an ûm ang che nge, i ram pumah ni thum chhûng pulh hri a lo lêng zâwk ang? Min tîrtu hnêna ka thlen leh tûrin a eng ber hi nge i thlan dâwn inngaihtuah rawh,” a ti a.

¹⁴Davida chuan Gada hnênah, “Ka mang a va ang tak êm! LALPA kutah min tlûk luhtîr mai rawh, a zahngaihna a nasa si a; mihring kutah zawng min pe lul suh,” a ti a.

¹⁵Tichuan, LALPA chuan zîng aţangin a hun tiam chhûng zawng chu Israelte chungah pulh hrî a lêtîr a. Dan aţangin Beerseba thlengin mi 70,000 zetin an thih phah a.

¹⁶Vântirhkohvin tihchhiat tuma Jerusalem chung a kut a han phar chuan, LALPA chuan tihchhiat a tum chu a sût leh a, mipui tihlumtu Vântirhkoh hnênah chuan, “Tâwk rawh se; i kut la thla tawh rawh,” a ti a. LALPA Vântirhkoh chu Jebus mi Arauna hruih zâwl bulah chuan a awm a.

¹⁷Davida chuan mipui tihlumtu Vântirhkoh a hmuh chuan LALPA hnênah, “Ka lo sual ta a ni, suahsualna thil ka lo ti a ni; mahse hêng berâmte hian eng nge an tihsual? Kei leh ka pa chhûngkaw chungah i kut thlâk zâwk mai rawh, ka ngên a che,” a ti a.

HRUIH ZÂWLAH MAICHÂM

¹⁸Chumi ni chuan Gada chu Davida hnênah a lo kal a, a hnênah, “Chho la, Jebus mi Arauna hruih zâwlah LALPA tân maichâm han siam rawh,” a ti a.

¹⁹Tichuan, LALPAN Gada hnêna thû a pêk ang chuan Davida chu a han chho va.

²⁰Arauna chuan a awmna lama lal leh a ţhuihruai lo kalte chu a lo hmû a. Tichuan, Arauna chu a lo kal chhuak a, lal chu

bawkkhupin chibai a lo bûk a.

²¹Arauna chuan, “Engtizia nge ka pu lalber chu a chhiahhlawh hnênah a lo kal le?” a ti a. Davida chuan, “Mipui laka pulh hrî a kian theih nân, i hruih zâwl hi LALPA maichâm siam nâna lei tumin ka lo kal a ni,” a ti a.

²²Arauna chuan Davida hnênah, “Ka pu lalber chuan ţhâ a tih ang takin, thil hlan nân hmang rawh se. Hei, hâlrala hlan tûr bâwngpate pawh a awm a, hruih hmanruate leh bâwng nghâwngkawlte pawh thingtuah atân a awm baw e.

²³Aw lalber, hêng zawng zawng hi, Arauna chuan lal hnênah a pe vek e,” a ti a. Arauna vêk chuan lal hnênah, “LALPA i Pathian chuan lo pawmsak ngei che rawh se,” a ti a.

²⁴Lal chuan Arauna hnênah, “Ni suh e, a man pê-in ka leisak zâwk ang che; LALPA ka Pathian hnênah hian engmah insêngso lovin hâlral thilhlân ka hlân tawp lo vang,” a ti a. Tichuan, Davida chuan hruih zâwl leh bâwngpate chu tangka sekel sawmngân a leisak ta a.

²⁵Davida chuan LALPA tân maichâm a siam a, hâlral thilhlân leh remna inthâwina a hlân a. LALPA chuan ram tâna ţawngtâina chu a lo ngaithlâ a, pulh hrî chu Israel ram aţangin a lo kiang ta a ni.

1 LALTE

Ziah tu: Hriat chian loh • Ziah kum: 561-538 B.C.

Lalte Lehkhabu Pakhatna ziaktu hi a bu chhûng aţang chuan hriat chian theih a ni lo. A chhûnga thu awm dân leh lehkhahu dangte nêna khaihkinin, a ziaktu ni thei zîngah zâwlnei lian Isaia leh Jeremia te chu a khân deuh an ni. Atûa te ziah pawh ni se, hê lehkhahu ziah nâna an thu hnârah Judate leh Israel lalte chanchin ziahna (chronicles) bu, hmun tam taka lo langte chu hmang ţangkaiin, a ziaktu hian a hun laia thil thleng, mit ngeia hmutute hmuh dân anga ziakin, Pathian ţanpuinain bu khatah fel takin a hlâwm khâwm a, a hnûah bu hnihah an lo ţhen hrang leh ta a ni. 1 Lalte bu hi Solomona, Israel lal a nih aţanga Israel lal sual Ahaba tluk chhiat hun lai chanchin a ni. Solomona chu Davida lalram dân sâ tung dingtu leh tiropuitu ber a ni. Lal Davida thih thû (1-2) te; Solomona chanchin leh Tempul a dân thû (3-10) te; Rehoboama leh Jeroboama hnuaia Israel leh Juda lalram inţhen thû (11-14) te; Judai rama Abija leh Asa rorêl thû leh Israel rama Baasha leh Omria rorêl chanchin (15-16) te; Elija rawngbâwlana chanchin (17-19) te; Ahaba rorêl dân leh a tlûk chhiat thû (20-22) te kan hmu a ni. Lalte Bu Khatna hi Bible bu 11-na a ni a; a chhûngah hian bung 22 a awm a, châng 816 a awm.

BUNG 1

ADONIJAN LAL NIH A TUM

¹Davida chu a upain a tar ta hlê a; puan an sintîr pawhin a mu lum zo ta lo va.

²Tichuan, a chhiahhlawhte chuan a hnênah, “Kan pu lal tân hian nula thianghlim i zawnsak mai teh ang u, ani chuan lal hi enkawlin awmchilh chawt mai sela; a bulah a mu vê ang a; tichuan, kan pu lal hi a nghêng lum thei dawn nia,” an ti a.

³Tichuan, Israel ram dungţluanin nula duhawm an zawng ta a, Sunam mi Abisagi chu lal hnênah an rawn hruai a.

⁴Chû nula chu a duhawm hlê a; lal chu duat takin a enkawl ta a; mahse lal chuan a pâwl lo.

⁵Hagithi fapa Adonija chuan, “Kei hi lal tûr ka ni asin,” tiin a indah sâng ta hlê a; tichuan, tawlwailir leh sakawr chung chuang mite a buatsaih a, a hmâa tlân hmasa zêl tûr mi sawmngâ a ruat bawk a.

⁶(A pa lah chuan, “Engati nge hetiang a i tih le?” ti pawhin a khak ngai si lo va. A hmêl chu a ţha hlê a. A nuin Absaloma dawt chiaha a hrin a ni a.)

⁷Ani chuan Zerui fapa Joaba leh puithiam Abiathara te chu a rawn a, anni chuan Adonija chu thlâwpin an ţanpui ta a.

⁸Nimahsela, puithiam Zadoka te, Jehoiada fapa Benaia te, zâwlnei Nathana te, Simeia te, Reia leh Davida mi chakho erawh chu Adonija lamah an ţang ve duh lo va.

⁹Adonija chuan berâm te, bâwngpa te leh ran châwm thau tam tak chu En Rogel bula Zohelêth lungpuiah a talh a; chutah chuan

a unau zawng zawngte, lal fapate, Judai rama lal khâwnbâwl zawng zawngte chu a sâwm vek a.

¹⁰Mahse, zâwlnei Nathana te, Benaia te, mi chakho leh a unau Solomona te erawh chu a sâwm vê lo.

¹¹Nathana chuan Solomona nu Bathsebi hnênah, “Kan lalpa Davida hriat lohvin Hagithi fapa Adonija chu lal a ni ta tih i hre na nge?”

¹²Ti teh khai, lo kal la, i himna tûr leh i fapa Solomona himna tûr ka lo hrilh teh ang che.

¹³Lal Davida hnênah va kal thuai la, a hnênah, ‘Aw lalber, ka lalpa, i bâwihnu hnênah hian, “I fapa Solomona hi ka aia lal tûr a ni a, ka lalţhutthlêng hi a la luah ngei ngei ang,” tiin min tiam tawh a ni lo’ m ni? Engtizia nge Adonija hi lal a lo nih tâk mai le?’ va ti ang che.

¹⁴Chutia lal i va biak lai ngei chuan, i thusawi nemngghet tûrin kei pawh ka lo lût vê ang e,” a ti a.

¹⁵Tichuan, Bathsebi chu lal pindanah chuan a va lût a. (Lal chu a tar tawh hlê a, Sunam mi Abisagi chuan lal chu a lo enkawl a.)

¹⁶Bathsebi chuan kûnin lal chu chibai a bûk a. Lal chuan a hnênah, “Eng nge i duh le?” a lo ti a.

¹⁷Ani chuan, “Ka lalpa, i bâwihnu hnênah hian, ‘I fapa Solomona hi ka aiawhin a la lal ang a, ka lalţhutthlêng hi a la luah dâwn a ni,’ tia LALPA i Pathian hminga i tiam kha.

¹⁸Mahse, lo ngai teh âw! Hei, Adonija hi a lal ta reng mai! Ka pu lalber, nang lahin i hre hauh si lo va.

¹⁹Berâm te, bâwngpa te leh ran châwm thau tam tak a talh a, lal fapa zawng zawng leh puithiam Abiathara te, sipai hotu Joaba te a sâwm vek a; i chhiahhlawh Solomona erawh chu a sâwm ve lo a nih hi.

²⁰Aw lalber, ka pu, i aiawhin tû ber nge lalţhutthlêngah i ţuttîr dâwn tih hi Israel mi zawng zawngin an thlîr ţhup a ni.

²¹Hei hi i chin fel loh chuan, ka pu lalber hi a thlahtute hnêna a chawlh hunah, kei leh ka fapa Solomona hi mi sualah min chhiar mai dâwn asin,” a ti a.

²²Chû thû lal hnêna a la sawi lai mêk chuan zâwlnei Nathana pawh a lo lût vê a.

²³Lal hnênah chuan, “Heta hi zâwlnei Nathana a lo lût e,” an ti a. Ani chu lal hmâa a lo luh chuan bawkkhupin lal chu chibai a bûk a.

²⁴Nathana chuan, “Aw lalber, ka pu, ‘Adonija hi ka aiah a lal ang a, ka lalţhutthlêngah hian a ţhû ang,’ tiin i lo sawi rêng em ni?”

²⁵Amah chu vawiinah ngei hian a chhuk a, berâm te, bâwngpa te leh ran châwm thau engemaw zât a talh a, ngai teh, lal fapa zawng zawng te, sipai hotu lal te, puithiam Abiathara te a sâwm asin! A hmâah chuan an eiin an in ho va; ‘Lal Adonija dam reng rawh se!’ tiin an âu dual dual a ni.

²⁶Nimahsela, kei, i chhiahhlawh hi puithiam Zadoka te, Jehoiada fapa Benaia te leh i chhiahhlawh Solomona te nên min sâwm vê hauh lo va.

²⁷Hê thil hi ka pu, lalber thiltih a nih si chuan, ama aiawha lalţhutthlênga ţhu leh tûr hi ka pu lalber hian a chhiahhlawhte hi

min hrih ve lo a ni ang mâw?" a ti a.

DAVIDAN SOLOMONA LALAH A PUANG

²⁸Lal Davida chuan a chhâng a, "Bathsebi kha han ko teh," a ti a. Tichuan, ani chu lal hnênah chuan a va kal a, lal hmâah chuan a va ding a.

²⁹Lal chuan tihian chhia a chham a, "Manganna tinrêng laka min chhanhimtu LALPA nunna chhâlin,

³⁰I fapa Solomona hi ka aiawhin a la lal ngei ang a, ka lalthutthlêng hi a la luah dâwn a ni,' tia LALPA, Israelte Pathian hminga i hnêna ka tiam kha, vawiinah ngei hian ka hlen mawlh ang," a ti a.

³¹Bathsebi chuan hmaia lei siin lal chu chibai a bûk a, "Ka pu Lal Davida chu kumkhuain dam reng rawh se!" a ti a.

³²Lal Davida chuan, "Puithiam Zadoka te, zâwlnei Nathana te, Jehoiada fapa Benaia te han ko teh u," a ti a. Anni chu lal hmâah chuan an lo kal a.

³³Lal chuan an hnênah, "In pu mi lianhote hi hruai ula, Solomona chu keima sabengtung chungah chuantîr ula, Gihon-ah hruai thla rawh u.

³⁴Chû hmunah chuan puithiam Zadoka leh zâwlnei Nathana-ten Israel lal atân hriak thih sela; tâwtawrâwt hâm ula, 'Lal Solomona dam reng rawh se!' tiin âu ang che u.

³⁵Chumi zawhah in rawn zui chho ang a, ani chu lo kalin ka lalthutthlêngah a thû ang a, ka aiah a lal tawh dâwn a ni. Israelte leh Judate chungah rorêltu atân ka lo ruat tawh si a," a ti a.

³⁶Jehoiada fapa Benaia chuan lal hnênah chuan, "Amen! LALPA, ka pu lalbera Pathian pawhin remti ve rawh se.

³⁷Ka pu lalber hnêna LALPA a awm thîn angin Solomona hnênah pawh awm vê sela, a lalthutthlêng chu ka pu Lal Davida lalthutthlêng ai mahin tiropui zâwk rawh se," a ti a.

³⁸Tichuan puithiam Zadoka te, zâwlnei Nathana te, Jehoiada fapa Benaia te, Kereth mite leh Peleth mite chu an chhuk thlâ a, Solomona chu Lal Davida sabengtungah an chuantîr a, Gihon-ah chuan an chhukpui ta a.

³⁹Puithiam Zadoka chuan biakbûka mi hriak dahna kî a lâ a, Solomona chu hriak a thih ta a. Tâwtawrâwt an hâm a, mipui zawng zawng chu, "Lal Solomona dam reng rawh se!" tiin an âu dur dur a.

⁴⁰Tichuan, mi zawng zawngin an zui chho va; mipuite chuan phênglâwnge an tum a, an hlim êm êm a, an thâwmah chuan lei pawh khi chat thei hiala mâwi a ni.

⁴¹Adonija leh a mi sâwmte ruai kîl zo chuan an thâwm chu an lo hria a. Joaban tâwtawrâwt rî a han hriat chuan, "Engtizia nge khawpuiah thâwm a rîk dur dur mai le?" a ti a.

⁴²A sawi lai mêkin, puithiam Abiathara fapa Jonathana a lo thleng a. Adonija chuan a hnênah, "Lo lût teh khai, nang mi challang chuan chanchin tha i rawn thlen ngei ang chu," a lo ti a.

⁴³Jonathana chuan Adonija hnênah, "Thlen teh suh e! Kan pu Lal Davida chuan Solomona chu lalah a siam ta a.

⁴⁴Lal chu puithiam Zadoka te, zâwlnei Nathana te, Jehoiada fapa Benaia te, Kereth mite leh Peleth miten a hnung an zui a; lal

sabengtung chungah an chuantîr a.

⁴⁵Puithiam Zadoka leh zâwlnei Nathana ten Gihon-ah lal atân hriak an thih a; chuta tang chuan hlim takin an chho va, chû chuan khawpui chu a nghawr nghing dur dur a. Chû thâwm chu tûna in lo hriat hi a ni e.

⁴⁶Solomona chu lalram lalthutthlêngah a thû tawh bawk a.

⁴⁷Chû bâkah lal khâwnbâwlhoten kan pu Lal Davida hnênah, 'Pathianin i hming aiin Solomona hming tiṭha lehzuah sela, a lalthutthlêng pawh i lalthutthlêng aiin tiropui zâwk rawh se,' tiin mal an sâwm a. Lal pawh ama khumah a lo kûn vê nghê nghê a.

⁴⁸Lal chuan tihian a ti a, 'Vawiinah hian ka mithmuha ka lalthutthlênga thû tûr min petu LALPA, Israelte Pathian chu fakín awm rawh se!' a ti bawk a ni," a ti a.

⁴⁹Chû vêleh Adonija hnêna awm, a mi sâwmho chuan an hlau va, an tho va, anmahni hmun theuhah an kal darh ta vek a.

⁵⁰Adonija pawh chuan Solomona chu a hlau va; a tho va, maichâm kî-te chu a va vuan ta a.

⁵¹Solomona hnênah chuan, "Adonija chuan Lal Solomona a hlau va; 'Lal Solomona chuan a chhiahhlawh hi khandaiha that lo tûrin chhia chham rawh se,' tiin maichâm kîte chu a vuan reng mai," tiin miten an hrih a.

⁵²Solomona chuan, "Mi rinawm a nihzia finfiah a nih chuan a samzai khat pawh leiah a tla lo vang; nimahsela, amahah suahsualna hmuh a nih erawh chuan a thi ngei tûr a ni," a ti a.

⁵³Tichuan, Lal Solomona chuan maichâm aṭanga va hruai chhuak tûrin mi a tîr a. Ani chu a lo kal a, Lal Solomona hmâah chuan a bawkkhup a; Solomona chuan, "I inah hâw tawh rawh le," a lo ti a.

BUNG 2

SOLOMONA HNENA DAVIDA THUCHAH

¹Davida thih hun chu a lo hnâi ta hlê a, a fapa Solomona hnênah heti hian mawhphurhna a hlân a:

²"Leilung dân angin ka kal ve dâwn ta a; chuvângin intichak la, patling takin lo awm ang che. "Leilung dân angin ka kal ve dâwn ta a; chuvângin intichak la, patling takin lo awm ang che.

³LALPA i Pathianin tih tûr a pêk che chu vawng tlat la: a kawng zawh tûr te, a dân zawm tûr te, a thupêk te, a rorêlna te, a thuhriattîrte rêng rêng-Mosia Dân bûa inziakte chu vawng tlat la, tichuan i thiltih apiangah leh i kalna apiangah i lo hmuvingil dâwn nia;

⁴LALPAN keima chung thû-ah, 'I thlahte chu an thinlung zawng zawng leh an thlarau zawng zawngin an awm dânah te an fimkhura, ka mithmuha thutaka an kal zêl chuan, Israelte lalthutthlênga thû tûr i tlachham ngai lo vang,' tia a sawi kha a hlen chhuak thei dâwn a ni.

⁵Chû bâkah, Zeruii fapa Joaban ka chungah a thiltih dân te, Israel sipai hotu, Nera fapa Abnera leh Jethera fapa Amasa te pahnih a tihlum dân te kha hre reng ang che. Ram chhûng a râlmuan lai pawhin thisen a chhuah duh tho va, indona thisen chu a kâwnghah a hrêng a, a pheikhawkah a bun hnan bawk a.

⁶Chuvângin i remhriat dân anginrawn ti la, a lû-a kêlsam pu khawpa thlamuanguin thlânah liamtîr hauh suh ang che.

⁷Gilead mi Barzillaia thlahte chungah erawh chuan khawngaihnarawn lantîr la, i dawhkân kiltute zîngah teltîr vê ang che; i unaupa Absaloma laka ka tlânchhiat laia min lo khawngaihtute an ni si a.

⁸I hnênah hian Gera fapa Simeia, Bahurim khuua mi Benamina thlaha mi hi, hê pa hian Mahanaim khuua ka kal lai khân ânchhia mi lawh vak vak a. Mahse Jordan luih khân mi hmuak tûrin a lo chhuk thla ta baw si a, 'Khandaihin ka that lo vang che,' tiin LALPA hmingin chhia ka chham a.

⁹Nimahsela, hrem lohvin chhuah suh ang che, pa fîng tak i ni a, a chungah tih dân tûr chu i hre mai ang; a samtuak chu thlânah thisen nêni liamtîr tûr a ni," a ti a.

DAVIDA THIH THÛ

¹⁰Davidachu a thlahtute hnênah a muhîl a, Davida Khawpuiah chuan an phûm ta a.

¹¹Israelte chungah Davida rorêl hun chhûng chu kum sawmlî a ni a; Hebron-ah kum sarîh ro a rêl a, Jerusalem-ah kum sawmthum leh pathum ro a rêl a ni.

¹²Solomona chu a pa Davida lalthutthlêngah chuan a tûr ta a; a lalram chu ngêlghet takin a lo dîng ta a.

SOLOMONAN ADONIJA A TIHLUM

¹³Hagithi fapa Adonija chu Solomona nu Bathsebi hnênah a va kal a. Ani chuan, "A t̃ha zâwnga lo kal i ni em?" a lo ti a. Ani chuan, "A t̃ha lam a ni e," a ti a.

¹⁴Amah baw chuan, "I hnênah sawi duh ka nei a," a ti a. Ani chuan, "Sawi ta che," a lo ti a.

¹⁵Ani chuan, "Lalram hi ka ta a ni tih i hria a, rorêltu tûr ka ni tih hi Israel mi zawnzawn beisei dân pawh a ni a. Nimahsela, ka unaupa chanpual atân a inher danglam ta a; chû chu LALPA remruat a lo ni baw k a.

¹⁶Tûnah hian thil pakhat dîl duh che ka nei a; min hnial lo hrâm rawh," a ti a. Ani chuan a hnênah, "Sawi ta che," a ti a.

¹⁷Ani chuan, "Khawngaih takin Lal Solomona min biaksak rawh, i thû chu a hnial lo vang; Sunam mi Abisagi hi nupui atân min pe rawh se," a ti a.

¹⁸Bathsebi chuan, "Ni ang hmiang, lal chu ka lo biaksak dâwn che nia," a ti a.

¹⁹Tichuan, Bathsebi chu Adonija tâna Lal Solomona be tûr chuan a kal ta a. Lal chu amah chibai bûk tûrin a lo tho va, a hmâah chuan a kûn a, a lalthutthlêngah chuan a tûr a, lal nu thut nân lalthutthlêng a remsak a; tichuan, a dîng lamah chuan an thutîr a.

²⁰Ani chuan, "Thil t̃e tham t̃e pakhat ka dîl duh che a; min remtihsak hrâm ang che," a ti a. Lal chuan a hnênah, "Dîl ta che, ka nu, ka hnial hauh lo vang che," a ti a.

²¹Ani chuan, "Sunam mi Abisagi hi i unaupa Adonija nupuih neihîr ta che," a ti a.

²²Lal Solomona chuan a nu chu a chhâng a, "Engtizia nge Sunam mi Abisagi chu Adonija nupui atân mi dîl tâk mai? Lalram

pawh hi ani tân dîlsak nghâl la ti nia-ka ù a ni alâwm-ama tân te, puithiam Abiathara tân leh Zerui fapa Joaba tân pawh dîl lâw lâw ta che," a ti a.

²³Lal Solomona chuan LALPA hmingin chhia a chham a, "Adonija chuan ama thihna tûr thu sawi a nih loh nâk chuan Pathianin a duh duhin min ti mai rawh se, chu aia nasa pawh ni rawh se!

²⁴Chuvângin, ka pa Davida lalthutthlênga min thutîra min nemnghettu leh, a thutiam anga chhûngkua min dînsaktu LALPA hming chhâlin ka sawi e, Adonija chu wawinah ngei hian tihhlum ni rawh se!" a ti a.

²⁵Tichuan, Lal Solomona chuan Jehoiada fapa Benaia chu a tîr a; ani chuan kut a va thlâk a, a that ta a.

ABIATHARA HNAWH CHHUAH LEH JOABA TIHHLUM

²⁶Lal chuan puithiam Abiathara chu, "I awmna hmun Anathoth khuah va hâw daih rawh, thi tlâk lek zawnzawn i ni nâ a; mahse ka pa Davida hmâah LALPA Pathian bâwm i lo zâwn thîn avâng leh, ka pa hrehawm tuarna apianga i lo tuarpui ve thîn avângin tûnah chuan ka tihlum rih lo vang che," a ti a.

²⁷Tichuan, Solomona chuan Abiathara chu LALPA puithiam a nihna ata a bân ta a; Silo khuua Elia chhûngte chungchânga LALPA thu sawi kha a lo thleng ta a ni.

²⁸Chû thû chuan Joaba hnên a lo thleng a, Absaloma lamah t̃ang lo mahse, Adonija lamah a lo t̃ang ta si a. Tichuan, Joaba chu LALPA biakbûkah a tlân lût a, maichâm kî-te chu a va vuan a.

²⁹Lal Solomona hnênah chuan, "Joaba chu LALPA biakbûkah a tlân lût a; maichâm bulah a awm e," tiin an hrilh a. Solomona chuan Jehoiada fapa Benaia chu a tîr a, "Kal la, va that rawh," a ti a.

³⁰Tichuan, Benaia chu LALPA biakbûkah chuan a va kal a, a hnênah, "Lalin 'Lo chhuak rawh!' a ti a che," a va ti a. Ani chuan, "Ni lo, hetah hian ka thi zâwk ang," a lo ti a. Benaia chu lal hnênah chuan a va kîr leh a, "Joaban chutiang chuan min lo chhâng a," tiin a va sawi a.

³¹Lal chuan a hnênah, "A sawi ang chuan ti ang che, va that la, phûm nghâl rawh; tichuan, keimah leh ka pa chhûngte at̃angin Joaban paw sawi lo thisen a chhuahna mawh hi min lâk kiansak dâwn nia.

³²LALPAN a thisen chu ama lu chungah ngei a lêtîr dâwn a ni, amah aia mi dik leh mi t̃ha zâwk pahni-Nera fapa Abnera, Israel sipai hotu leh Jethera fapa Amasa, Juda sipai hotute kha ka pa Davida hriat lohvin khandaihin a lo that a nih kha.

³³An thisen mawh chu Joaba lu chungah leh a thlahte lu chungah kumkhuain awm reng rawh se. Davida chungah leh a thlahte, an chhûngkua leh a lalthutthlêng chungah erawh chuan LALPA hnên ata kumkhuain thlamuanna awm reng rawh se," a ti a.

³⁴Tichuan, Jehoiada fapa Benaia chu a han chho va, a han that ta a; thlâlêra ama inah chuan an phûm ta a.

³⁵A aiah Jehoiada fapa Benaia chu lal chuan sipai hotu lû berah a dah ta a, lal chuan puithiam Zadoka chu Abiathara aiah a dah baw k a.

SIMEIA TIHHLUM A NI

³⁶Lal chuan Simeia chu a kohtîr a, a hnênah, “Jerusalem-ah hian in sâ la, tah chuan awm la, khawiah mah kal chhuak suh.

³⁷I kal chhuaha, Kidron Lui i kân nî lâ lân i thi ngei dâwn tih hria ang che; i thisen mawh chu i lu chungah a tlâ ang,” a ti a.

³⁸Simeia chuan lal hnênah, “I thu sawi chu a t̃hâ e. Ka pu lalin a sawi ang chuan i chhiahhlawh hian ka ti ang,” a ti a. Tichuan, Simeia chu ni rei tak Jerusalem-ah chuan a awm ta a.

³⁹Kum thum hnûah chuan Simeia chhiahhlawh pahnihte chu Gath lal, Maakaa fapa Akis-a hnênah an tlân bo va. Simeia hnênah chuan, “En teh, i chhiahhlawhte chu Gath khua-ah an awm!” tiin an hrilh a.

⁴⁰Simeia chu a tho va, a sabengtung a thuam a, a chhiahhlawhte zawng tûrin Gath khuaa Akis-a hnênah chuan a kal ta a. Gath khua aţang chuan Simeia chuan a chhiahhlawhte chu a rawn hruai hâw a.

⁴¹Simeia chu Jerusalem aţangin Gath khuaah a zu kal a, a lo hâw leh ta tih thû Solomona chu an hrilh a.

⁴²Lal chuan Simeia chu a kohtîr a, a hnênah, “LALPA hming chhâlin, ‘I zin chhuah ni chu i thih nî tûr a nî,’ tiin chhe chhamin ka zilh lâwk lo che em nî? Nangmah ngei pawhin, ‘Ka thu hriat hi a t̃hâ e,’ i tih ngei kha.

⁴³Engah nge LALPA hminga i chhe chham tawh chu i zawm lohva, ka thupêk che chu i bawhchhiat le?” a ti a.

⁴⁴Lal chuan Simeia hnênah vêk chuan, “Ka pa Davida chung a i suahsualna zawng zawngte kha i hai loh kha, i thinlung pawhin a hre reng a nih kha; chuvângin, LALPA chuan i suahsualna hi i lu chungah vêk a rawn tlâktîr leh ngei ang le.

⁴⁵Lal Solomona erawh chu malsâwmin awm sela, Davida lalthutthlêng pawh chatuanin LALPA hmâah tihnghehin awm zêl rawh se,” a ti a.

⁴⁶Tichuan, lal chuan Jehoiada fapa Benaia chu thû a pê a; ani chu a va kal chhuak a, a kut thawhin a va tihlum ta a. Tichuan lalram chu Solomona kutah nghet takin a lo awm ta a.

BUNG 3

FINNA DILIN SOLOMONA A TAWNGTAI

¹Solomona chuan Aigupta lal Pharoa nê inremna siamin, Pharoa fanu chu nupuih a nei a; ama in te, LALPA in te a sak zawha, Jerusalem kulh te a hung chhuah hmâ loh chuan Davida Khawpuih a awmtîr a.

²Chûng hun lai chuan LALPA hminga tâna in sak a la awm loh avângin mite chu hmun sângah te an inthâwi mai thîn a.

³Solomona chuan LALPA a hmangaih a, a pa Davida zirtîrnate chu a zâwm thîn a; amaherawhchu, hmun sângah te inthâwiin rimtui a hâl thîn mai pawh a ni.

⁴Lal chu inthâwina hmun sâng ropui awmna Gibeon-ah a kal a, chuta maichâmah chuan Solomona chuan hâlral thilhlân sâng khat a hlân a.

⁵Gibeon-ah chuan LALPA chu zânah Solomona mumangah a inlâr a; Pathian chuan a hnênah, “Dîl rawh le! Eng nge ka pêk ang

che?” a ti a.

⁶Solomona chuan: “I chhiahhlawh ka pa Davida kha i hmâah thutak leh dikna nê thinlung dik tak pûa i laka a awm tlat avângin a chungah khawngaihna nasa tak i lo lantîr a; hê ngilneihna ropui tak a chung a lantîr hi chhunzawm zêlin nang chuan vawiina a lalthutthlêng luah tûr fapa i pe ta a lo ni a.

⁷Tûnah hian, âw LALPA ka Pathian, ka pa Davida aiawh tûrin i chhiahhlawh hi lal atân i lo siam ta si a, mahse naupang chhia mai ka la ni si a; thu kal lam leh hâw lam pawh ka la thliar hrang thiam si lo va.

⁸I chhiahhlawh hi i hnam thlan, chhiar sên loh khawpa tam mipui zînga awm ve mai ka ni si a.

⁹Chuvângin, i chhiahhlawh hian i mite ro a rêlsak theih nân hriat thiamna thinlung pê ang che; tichuan, a chhia a t̃hâ ka thliar hrang thiam dâwn nia. Chuti lo zawng, tu nge hêng mipui zozâite ro han rêlsak thei awm ang le?” a ti a.

¹⁰Solomonan chutiang thil a dîlna chuan LALPA a tilâwm hlê a.

¹¹Pathian chuan a hnênah: “Hetiang thil i dîl avâng leh, i tân dam reina pawh dîl lova, nangma tân hausakna te, i hmêlmâte thihna tûr pawh dîl lova, dik taka rorêl dân hriat thiamna i dîl zâwk avâng hian

¹²i dîl ang takin ka ti ta e; en teh le, finna leh hriatthiamna thinlung ka pê a che, nang ang hi i hmâah tûmah an la awm ngai lo va, i hnûah pawh tûmah an lo chhuak leh tawh hek lo vang.

¹³I dîl tel hauh loh, hausakna leh ropuina ka pe bawh ang che a; tichuan, i dam chhûngin lal dangte zîngah nangmah tluk rêng rêng an awm lo vang.

¹⁴I pa Davida ang khân ka kawng te i zawh a, ka dân leh ka thupêkte i zawm phawt chuan i dam chhûng ni ka pawh seisak ang che,” a ti a.

¹⁵Solomona chu a lo harh chuan a mumang a lo ni a. Jerusalem-ah a hâw ta a, LALPA thuthlunna bâwm hmâah a ding a, hâlral thilhlân te, remna thilhlân te a hlân a, a chhiahhlawh zawng zawng tân ruai a t̃heh bawh a.

SOLOMONA RORÊLNA FING

¹⁶Nawhchizuar hmeichhe pahnihi hi lal hnênah an lo kal a, a hmâah chuan an rawn ding a.

¹⁷Hmeichhe pakhat chuan, “Aw ka lalpa, hê nu nê hian in pakhatatah kan khawsa dún a; chû ina a awm vê lai chuan nau ka hring a.

¹⁸Nau ka neih aţanga ni thum niin hê nu hian nau a hring vê a. Awm dún kan ni a; keini pahnihi bâkah chû inah chuan awm vê dang tûmah an awm lo.

¹⁹Zânah chuan hê nu fapa hi a thî a, a delh hlum vâng a lo ni a.

²⁰Zân laiah chuan a tho va, i bâwihnu muthilh hlânin ka kianga mû ka fapa chu a lâ a, a pawm ta a, a fapa thî chu ka kiangah chuan a lo dah a.

²¹Ka fapa hnute pe tûra zînga ka han thawh chuan, a lo thi reng mai a. Zînga ka han en chian nâk chuan ka fapa ka hrin kha a lo ni hauh lo mai a,” a ti a.

²²Nu pakhat zâwk chuan, “Ni lo ve! A dam zâwk hi ka fapa a ni a, a thi zâwk hi i fapa a ni,” a ti a. A hmasa zâwk nu chuan, “Ni teh suh e! A thi zâwk hi i fapa a ni a, a dam zâwk hi ka fapa a ni,” a ti a. Chutiang chuan lal hmâah chuan an inhniat a.

²³Lal chuan, “Pakhatin, ‘A dam zâwk hi ka fapa a ni a, a thi zâwk hi i fapa a ni,’ a ti a; pakhat zâwk lahin, ‘Ni lo! A thi zâwk hi i fapa a ni a, a dam zâwk hi ka fapa a ni,’ a ti bawk si a,” a ti a.

²⁴Tichuan, lal chuan, “Khandaih kha min han pe teh u,” a ti a. Khandaih chu lal hmâah chuan an rawn lâ a.

²⁵Lal chuan, “Naute dam zâwk hi hmun hniah tan bung ula, a chanvê chu pakhat pê ula, a chanve dang chu pakhat zâwk pe rawh u,” a ti a.

²⁶Chû veleh naute dam zâwka nu chuan a fapa chu a lainat lutuk a, lal hnênah chuan, “Aw ka lalpa, amah hi pe mai rawh, that lul suh âw!” a lo ti a. Pakhat zâwk erawh chuan, “Tû tâ mah ni bik suh se, bung mai rawh u,” a lo ti a ni.

²⁷Tichuan, lal chuan a chhâng a, “Naute chu that suh u, hmeichhe hmasa zâwk hi pe rawh u; a nu dik tak a ni e,” a ti ta a.

²⁸Israel mi zawnzawngin lal rorêl dân chu an lo hria a; Pathian finna chu a rorêl dân ațanga an hmuh tâk avângin an zah ta êm êm a.

BUNG 4

SOLOMONA SORKAR HOTUTE

¹Tichuan, lal Solomona chu Israel ho zawnzawng chungah lal a lo ni ta a.

²Hêngte hi a mi liante chu an ni: Zadoka fapa Azaria chu puithiam a ni a;

³Sisaa fapa Elihorepa leh Ahija te chu ziaktu lian an ni a; Ahiluda fapa Jehosaphata chu ziaktu a ni;

⁴Jehoiada fapa Benaia chu sipai hotu a ni a; Zadoka leh Abiathara te chu puithiam an ni;

⁵Nathana fapa Azaria chu mi liante hotu a ni a; Nathana fapa Zabuda chu puithiam leh lal thian bul an ni;

⁶Ahisara chu lal chhûngkaw enkawltu a ni a; Abda fapa Adonirama chu hnathawkho enkawltu a ni.

⁷Solomona chuan Israel ram pumah lal leh an chhûngkaw tâna ei tûr petu governor sâwm leh pahni a nei a; pakhat zêlin thla khat chhûnga an ei tûr an ngaihtuah thîn.

⁸An hming chu hêngte hi an ni: Ephraim tlâng ramah Ben-Hura;

⁹Makaz, Saalbim, Beth Semes leh Elon Beth Hanan khuaah Ben-Dekera;

¹⁰Aruboth-ah Ben-Heseda; ani hian Sokoh leh Hepher ram zawnzawng a enkawl a;

¹¹Dor bial pumpui enkawltu chu Ben-Abinadaba a ni a; Solomona fanu Taphati chu nupuiah a nei a;

¹²Ahiluda fapa Baana chuan Taanak leh Megiddo te, Jezreel khaw hnuai, Zaretan bul, Beth Sean ațanga Abel Mehola leh Jokneam ram dep thlengin, Beth Sean pumpui nêl a enkawl a;

¹³Ramoth Gilead-ah Ben-Gebera; ani hian Gilead rama Manasea fapa Jaira khawpuite a enkawl a; Basan rama Argob biala kuhl leh a hawlh kalhna dâr tlâwn nei khaw sawmruk a enkawl baw;

¹⁴Manahaim khuaah Iddoa fapa Ahinadaba;

¹⁵Naphtali-ah Ahimaaza; ani hian Solomona fanu Basemathi chu nupuiah a nei a;

¹⁶Aser leh Aloth khuaah Husaia fapa Baana;

¹⁷Issakar bialah Parua fapa Jehosaphata;

¹⁸Benjamin bialah Ela fapa Simeia;

¹⁹Gilead ram chhûng, Amor lal Sihona ram Gilead te, Basan lal Oga ram nêna enkawltu chu Uria fapa Gebera a ni a. Ani hi chumi ram mi governor awmchhun a ni.

SOLOMONA LAL CHHÛNGA HAUSAKNA LEH FINNA

²⁰Juda leh Israel te chu tuipui kama țiauvut anga tam an ni a, an eiin an in a, an hlim êm êm a.

²¹Solomona chuan Luipui ațanga Philistia ram inkâra lalram zawnzawng, Aigupta ramri thlengin a awp a. Solomona dam chhûngin a rawng an bawl a, chhiah an rawn pe thîn a ni.

²²Solomona ni khat tla tâwk chu, chhangphut țha chi kor* 30, chhang kor 60,

²³bâwngpa châwm thau 10, bâwngpa ram tla lai 20, berâm 100 bâkah, sakhi te, sazuk te, sazâ te leh âr châwm thau te a tel baw.

²⁴Luipui thlang lama ram zawnzawng, Tipsah ațanga Gaza thlengin, an lalte chungah thû a nei vek a; a chhehvêl kil tin mai chu a râlmuang hlawn a.

²⁵Solomona dam chhûngzawngin Judate leh Israelte chu, Dan ațanga Beerseba thlengin, mi tin chu mahni grêp huan leh theipui huanah chuan him takin an awm thîn a.

²⁶Solomona chuan sakawr tawlailîr dahna pindan 40,000 leh sakawr chung chuang mi 12,000 a nei a.

²⁷Ram awptute chuan anmahni chan thla apiangin Lal Solomona leh Lal Solomona dawhkâna chawhlui kîltute tân ei tûr an rawn tumsak thîn a. Tlâkchham engmah a awm ngai lo.

²⁸Anmahni chan hun theuhvah sakawrte tân buhpâwl leh barli te an rawn pe baw thîn.

²⁹Pathianin Solomona chu namên lova finna leh hriatna ropui a pê a, tuipui kama țiauvut ang maia zâu rilru a pe baw a.

³⁰Solomona finna chuan Khawchhak mite finna zawnzawng leh Aigupta finna zawnzawng a khûm vek a ni.

³¹Mi zawnzawng aia fîng a ni a— Ezra mi Ethana te, Mahola fapa Hemana te, Kalkola leh Darda te ai pawhin a fîng zawk a; an bul vêla hnam zawnzawng zîngah a hming a lo thang ta a.

³²Thu fîng sângthum zet a sawi a, a hlalte chu sâng khat leh pangâ a ni.

³³Thing chanchin pawh Lebanon sidar thing ațanga banga țe thîn hussop chenin a hril thiam a; ramsâ te, savâ te, bawkvâka kal chîte leh sangha chanchin thlengin a hril thîn.

³⁴A finzia hre phâk hnam tina mite leh, lei chung a lal zawng zawngte pawh Solomona finna thú ngaihlâ tûrin an lo kal thîn a ni.

BUNG 5

SOLOMONAN TEMPUL SAK A PUAHCHAH

¹A pa aiawha lal atâna hriak thiñ a nih thú a lo hriatin Tura lal Hiram chuan Solomona hnênah a chhiahhlawhte a rawn tîr a, Hiram chuan Davida kha a lo ngaina êm êm thîn a.

²Solomona chuan Hiram hnênah heti hian thú a thawn a:

³Ka pa Davida khân a chhehvêl kil tin atanga amah dotu hmêlmâte kha LALPAN a kephah hnuiaia a dahsak hmâ khân LALPA a Pathian puala in a sak hman lohzi a hriatpui kha.

⁴Tûnah erawh chuan LALPA ka Pathianin kil tinah hahchawlhna min pe ta a; hmêlmâ an awm tawh lo va, a chhe zâwnga thil thleng a awm ta hek lo.

⁵Ih ê, LALPAN ka pa Davida hnênah, “I fapa, i lalthutphah rawn luah tura ka ruata chuan Keima hming pualin in a rawn sâ ang,” tia a lo hrih tawh angin, LALPA ka Pathian hming awm nân in sak ka tum ta a ni.

⁶Chuvângin, Lebanon tlânga sidar thingte mi kihsak tûrin thú lo pe ta che, ka chhiahhlawhte pawh i chhiahhlawhte zingah rawn tel vê sela; i chhiahhlawhte hlawn chu i sawi ang apiang ka pe zêl ang che. Ka mite zingah Sidon mite anga thing kih thiam an awm lo tih i hriat kha,” tiin.

⁷Solomona thuchahte a hriat chuan Hiram chu a lâwm hlê a, “Hê hnam ropui tak chung a rorêl tûr Davida hnêna fapa fîng tak petu LALPA chu fakin awm rawh se!” a ti a.

⁸Hiram chuan Solomona hnênah: “I thu rawn chahte kha ka lo hria a, sidar thing leh fâr thing chu i duh tâwkin ka lo pe mawlh ang che.

⁹Ka chhiahhlawhten Lebanon atangin tuipui an rawn thlen thlâ ang a; tuipuih chuan pûmin ka rawn tawhlthîr ang a, i duhna hmun ruatah in lo hlâng thlâ ang a; i miten an lo la tawh mai dâwn nia. Tichuan, kan chhûngkaw tân ei leh bâr tûr mamawh min lo tumsak vê mai ang chu,” a ti a.

¹⁰Tichuan, Hiram chuan Solomona duh zât sidar leh fâr thing chu a pe ta a.

¹¹Solomona pawhin Hiram chhûngkaw ei tûr chhangphut kor singhniñ leh hriak sâwr kor sawmnhniñ a pê a. Solomona chuan kum tinin Hiram chu a pe thîn a ni.

¹²LALPA chuan a lo tiam tawh angin Solomona chu finna a pê a; Hiram leh Solomona chu an inngeih hlê a, an pahniñ kârah chuan thú te an thlung bawh a.

¹³Lal Solomona chuan Israel mipuite atangin rawih luiha thawktu tûr mi a lâ a; chûng rawih luiho chu mi sîngthum lai an ni.

¹⁴Lebanon-ah chuan mi sîngkhat zêlin thla khat chhûng a inchhâwktîr a: Lebanon-ah thla khat an awm a, anmahni inah thla hniñ an awm thîn; Adonirama chu rawih luih hna thawk pâwl hotu a ni.

¹⁵Solomona chuan thawmhnaw phurtu mi sîngsarih a nei a, tlâng ramah lung chher mi sîngriat a nei bawh a,

¹⁶chûng bâkah Solomona mi liante zîng atangin hnathawk vêngtu mi sîngthum leh zathum an awm bawh.

¹⁷Lalin thú a pêk angin tempul lungphûma rem tûr lung lian pui pui te, lung man tam te leh lung chher sâte chu an rawn lakhâwm a.

¹⁸Solomona mistirî-te, Hiram mistirî-te leh Gibal mite chuan lungte chu an chher a; tichuan, thing te leh lung te chu tempul sak nân an buatsaih a.

BUNG 6

SOLOMONAN TEMPUL A SA

¹Israel faten Aigupta ram an chhuah san atanga kum zali leh sawmriatna, Israelte chung a Solomona rorêl kum lîna, Ziv thlâ, thla hniñnaah chuan LALPA in chu a sa fan ta a.

²Lal Solomonan LALPA tâna in a sak chu a dung tawng sawmruk, a vâng tawng sawmnhniñ leh a sân lam tawng sawmthum a ni.

³A in chhûng hmun thianghlim hma lamah hulhliap, a in vâng lam tawng sawmnhniha zau leh tawng sâwma thui a awm leh a.

⁴A bangah chuan tukverh têtê frêm nein a siam hlawn a.

⁵Tempul bang nghêngin hmun thianghlim leh hmun thianghlim ril zâwk bang rinchanin a kual chhuakin pindan a siam vek a. Chutiang chuan pindan tepên pawh a kual chhuakin a siam vek bawh a ni.

⁶Pindan hnuaihnnung ber chu tawng ngâa zâu a ni a, a laitâ chu tawng ruka zâu a ni a, a pathumna chu tawng sariha zâu a ni; a zâ-in tempul bang rinchan ngai lo tûr zâwngin tempul pâwn lamah chuan a kual chhuakin chhawrdawh a siam a.

⁷Tempul an sak lai chuan, lung lâkna hmuna lung chher sa vek an hman a, chuvângin, chûng lungte chu tempula an rem laiin tuboh chhut rî emaw, thîr leh thîrkhen emaw rî rêng rêng hriat tûr a awm lo.

⁸Pindan laita luhna kawngkâ chu tempul dîng lamah a awm a. Chû pindan laitâ chu pan tûrin rahbî a kal chho va, chuta tang chuan pindan pathumnaah a lâwn chho leh a ni.

⁹Chutiang chuan tempul chu a sa zo va, tempul chhûng lam chu sidar thingphelin a thua vek bawh a.

¹⁰Tempul nghêngin tawng ngâa sâng theuhvin pindan a siam chhuak vek a; sidar thingin tempul nêñ a hawlh zawm a.

¹¹LALPA thú chu Solomona hnênah a lo thleng a:

¹²“Hê tempul i sak mêk chungchângah hian ka dân thûte i zawma, ka rorêlna anga i tihhlawhtlîna, ka thupêkte zâwma i zui dâwn phawt chuan, i pa Davida hnêna ka lo sawi tawh ang khân ka thûte chu i lakah ngei hian ka hlen ang.

¹³Tempul kawmchâr lamah chuan tawng sawmnhniha zâu pindan a siam a, a chhuat atanga a sîling thlengin sidar thingphelin a thua a; chû chu hmun thianghlim chhûngril zâwk, Hmun Thianghlim Ber atân liau liauva a buatsaih a ni.

¹⁴Tichuan, Solomona chuan tempul a sak chu a zo ta a.

¹⁵Tempul bang chhûng lam chu sidar thingphelin a thua a; tempul chhuat aṭanga a siling thlengin thingphelin a thua vek baw a; tempul chhuat chu fâr thingphelin a rem vek a.

¹⁶Tempul kawmchâr lamah chuan tawng sawmhniha zâu pindan a siam a, a chhuat aṭanga a siling thlengin sidar thingphelin a thua a; chû chu hmun thianghlim chhûngril zâwk, Hmun Thianghlim Ber atân liau liauva a buatsaih a ni.

¹⁷Chumi hma lama tempul hmun thianghlim chu a dung tawng sawmli a ni.

¹⁸Tempul chhûng lam chu, pangpâr kuhmûm leh a pâr parh lema chei, sidar thinga thua a ni. Sidar thing vek a ni a, lung hmêl pawh hmuh tûr a awm lo.

¹⁹Tempul chhûnga hmun thianghlim pindan ril zâwk chu LALPA thuthlunna bâwm dahna tûrin a buatsaih a.

²⁰Chu pindan ril zâwk chu a dung tawng sawmhniha, a zâu zâwng tawng sawmhniha, a sân zâwng pawh tawng sawmhniha a ni a. Rangkachak hlangin a luan vek a, sidar maichâm pawh a luan baw a.

²¹Solomona chuan a chhûng lam zawng chu rangkachak hlangin a luan chhuak vek a. Hmun thianghlim ril zâwk luhnaah chuan rangkachak khaidiat a thlung a, chû chu rangkachakin a luan leh a.

²²Tempul chhûng lam zawng zawng chu rangkachakin a luan chhuak vek a; hmun thianghlim ril zâwka maichâm pawh a vâiin rangkachakin a luan vek baw a.

²³Hmun thianghlim ril zâwkah chuan olive thingin Cherub lem pahniha, tawng sâwma sâng vê vê a siam a.

²⁴Cherub thla pakhat chu tawng ngâa sei a ni a, a thla dang pawh tawng ngâa sei baw a ni a: a thla hmâwr aṭanga a thla lehlam hmâwr chu tawng sâwm a ni.

²⁵Cherub pakhat zâwk pawh chu tawng sâwm baw a ni; cherub pahnihte chu a inang chiaha a, a intiat chiaha baw a.

²⁶Cherub pakhat sân zawng chu tawng sâwm a ni a, cherub pakhat zâwk pawh chuti baw chu a ni a.

²⁷Tichuan, Cherubte chu pindan chhûngril zâwkah chuan a hûng fel a; Cherub pakhat thla hmâwr chuan bang a va sî a, Cherub pakhat zâwk thlâ pawh chuan bang lehlam a va si baw a. Pindan lai takah chuan an thla hmâwr vê vê chu a insî a.

²⁸Cherubte chu rangkachakin a luan vek baw a.

²⁹Tempul bang chhûng lam leh pâwn lam te, hmun thianghlim pâwn zâwk leh chhûngril zâwk bangah te chuan Cherub lem te, tûm thing leh pangpâr parh lem te an ker chhuak vek a.

³⁰Tempul chhuat chu, hmun thianghlim leh hmun thianghlim ber te nê a pumin rangkachakin a luan a.

³¹Hmun thianghlim ber luhna kawngkhâr chu olive thingin a siam a; a kawngka biang leh kawngka lu chung chu a bang hmun ngâa ṭhena hmun khata zau a ni.

³²Kawngkhâr pahnihte chu olive thinga siam a ni a; tah chuan Cherub leh tûm thing leh pangpâr parh lem te a ker a, rangkachakin a luan leh a; Cherubte leh tûm thing te chu rangkachak a hnawih baw a.

³³Hmun thianghlim luhna kawngkâ chu, a bang hmun lia ṭhena hmun khat awin, a kawngka biang atâna olive thing hmangin a siam baw a.

³⁴Kawngkhâr pahnihte chu fâr thinga siam a ni a; kawngkhâr phêk hnih chu kaih thleh theih a ni a, kawngkhâr phêk hnih dang pawh kaih thleh theih baw a ni.

³⁵Chûngah chuan Cherub lem te, tûm thing leh pangpâr parh lemte a ker a, chûng thil ker te chu rangkachaka rual taka luan vek a ni.

³⁶Kawt zâwl chhûng lam zâwk chu lungchher tlar thum leh sidar thingphel thlûr katin a hung a.

³⁷Kum li-na, Ziv thlâah LALPA in lungphûm chu phûm a ni a.

³⁸Kum sawmpakhatna, Bul thlâ, a thla riatnaah chuan, ruahman dân ang thlapin tempul chu peih fel a ni ta a. Tichuan, a sak chung chu kum sarhi a ni.

BUNG 7

SOLOMONA INSAK DANGTE

¹Solomona chuan ama in sak nân kum 13 lai a hmang a; tichuan a in sak chu a zo ta a.

²Lebanon Ngawpui In a sa baw a; a dung lam tawng 100, a vâng lam tawng 50, a sân zâwng tawng 30 a ni a, sidar ban tlar liin a phun a, a liangah sidar tlâwn a hmang a.

³Ban ding 45 chungah chuan sidar thingin a zâ a kham a, tlar khatah 15 zêl khamin a za chung chu sidar thingphêka khuh a ni.

⁴Tukverhte pawh tlar thumin frêm neiin a siam a, chûng tlar thumte chu lehlam lehlam a inzâwn vek a.

⁵Kawngkâte leh kawngkhârte chuan frêm killi an nei ṭheuh va; tukverh tarte chu lehlam lehlamah a inzâwn vek a ni.

⁶Ban nei hulhliap zâu tak: a dung tawng 50, a vâng tawng 30-a sei a sa baw a; a hma lamah chuan ban neiin bathlâr a awm a, a hma lamah chungkhuh a awm baw a.

⁷Ro a rêl huna a lalṭhutpah hûnna tûr hulhliap te, rorêlna hmun zâu te a siam a; a chhuat aṭanga a siling thlengin sidar thingphelin a thua vek a.

⁸Ama chênna inah pawh hulhliap chhûngah rorêlna pindan, mi themthiamten uluk taka an siam chu a awm baw. Hetiang pindan zâu hi nupuia a neih Pharoa fanu tân a saksak baw.

⁹Hêng zawng zawng hi a lungphûm aṭanga a liang thlengin, a pâwn tual zâwl zau lam ep te nê, lung man to chi, a chhûng lam leh pâwn lam pawh uluk taka nawh mâm a ni.

¹⁰A lungphûm pawh lung man to chi, lung lian pui pui, a ṭhen phe chu tawng sâwm te, ṭhenkhat chu tawng riat zeta lian te a ni.

¹¹Chumi chung chu lung man to, sidar thing kham nêna inrem chiaha chher a ni baw.

¹²A kawtzâwl zau chu lung chher thua thum leh sidar thing thua khata hung a ni a. Chutiawng bawkin LALPA in kawt zâwl chhûngril zâwk leh a hulhliap pawh chuti baw chuan hung a ni.

MI THEMTHIAM HURAMA

¹³Lal Solomona chuan Tura khuua mi Hirama a kohtîr a.

¹⁴Ani chu Naphtali hnama mi, hmeithai fapa a ni a, a pa chu Tura mi, dâr chher mi a ni; dâr chher dân tinrêng thiam, fîng si, remhre baw k si a ni. Ani chu Lal Solomona hnênah chuan a lo kal a, hna tinrêng a thaw k ta a.

TEMPUL DÂR BAN TE

¹⁵Dârin ban pahni, tawng 18-a sâng vê vê a chhûng a, chû chu teh kualin tawng 12 vê vêa lian a ni.

¹⁶Ban chhîpa dah tûr dâr hlûm a siam baw k a. Chu dâr hlûm pakhat sân zâwng chu tawng ngâ a ni a, a pakhat zaw k sân zâwng pawh tawng ngâ baw k a ni a.

¹⁷Ban chung a inhûng chûng dâr hlûmte chu khaidiat cheimâwiin a vêt kaw kalh chiat a: a hlûm pakhat chu waw i sarih a vêt a, a hlûm dang pawh waw i sarih a vêt baw k a.

¹⁸Chutiang chuan ban te chu a siam a, a lu bâwka khaidiat invêt chungah chuan theibuhfai lem thlûr hnihin a vêt leh a; a lu bâw k dang pawh chutiang chuan a ti baw k a.

¹⁹Hulhliap ban chhîp chung a bâwkte chu lily pangpâr pianhmang hi a ni a, tawng lîa sâng a ni.

²⁰Khaidiatin a veh kual ban pahni chhîp bâw k chungah chuan theibuhfai lem a awm baw k a; a bâw k mûm chu thlûr hnihin theibuhfai lem zahnihin a hual vêt baw k a ni.

²¹Chûng bante chu tempul hulhliapah chuan a phun a; dîng lama a ban phun hming chu Jakin a ti a, vei lama a ban phun hming chu Boaz a ti a.

²²Ban chung lam chu lili pâr ang mai a ni a. Tichuan, ban phun hnâ chu a zo ta a.

DÂR BÊL LEH BÂWNGPATE

²³Dâr bêl lian pui, a kotlâng lehlam lehlam tawng sâwm a siam a, a bial pup a. A sân zâwng chu tawng ngâ a ni a, a tlâng chu teh kualin tawng sawmthum a ni.

²⁴Dâr bêl kotlâng hnua i chu a cheina kuhmûm lemin a kual chhuak vek a, tawng khatah sâwm zêl a awm a. A cheina kuhmûmte chu tuizêm an chhûn rualin tlar hnih zêlin an chhûng a.

²⁵Bâwngpa 12 chungah a inngat a: pathumin hmar lam a haw i a, pathumin thlang lam, pathumin chhim lam, pathumin chhak lam a haw i a; a mawng lam chu a inhnungchhawn tawn vek a, chumi chungah chuan bêlpui chu a inhûng a.

²⁶Kutpah bawka chhah a ni a; a kotlâng chu no tlâng ang a siam, lili par pianhmang ang a ni. Tui bath* sanghni dawng a ni.

DÂR TAWLAILÎR LEH TUIZÊM

²⁷Dârin taw lailîr bâwm sâwm a siam baw k a; bâwm khat zêl chu tawng lîa sei, a vâng lam tawng lî, a sân zâwng tawng thum a ni.

²⁸Taw lailîr pianhmang chu hetiang hi a ni: Tlângkâwm a nei vek a, a tlângkâwm chu a frêm inkârah a awm a;

²⁹a tlângkâwm inkârah chuan sakeibaknei te, bâwngpate leh cherub lem te a awm a. A frêm chungah chuan nghahchhan a awm a. Sakeibakneite leh bâwngpate hnua i lam chu ze tial chiata chei a ni a.

³⁰Taw lailîr tinin dâra siam ke pali, dâr tlâwna invuah a nei vek a, a ke palîte chuan nghahchhan a nei vek baw k a. Chawhtawlh hnua i chuan a sîra cheimâwina bâkah, dâra siam hûnchhan a nei theuh va.

³¹A kotlâng kual chu hawlh tlanga tawng khata zau a ni a; a kotlâng chu a hûnchhan ang bawka bial a ni a, tawng khat leh a chanvêa zau a ni; a kotlâng kual chu thil kera chei mâwi a ni a, a tlângkawmna erawh chu bial lovin killi nei a ni thung.

³²A tlângkâwm hnuaia h a ke pali chu a awm a, a za hmanga taw lailîr nêna hawlh zawm a ni. Taw lailîr ke sân zâwng chu tawng khat leh a chanvê a ni a.

³³A ke siam dân chu sakawr taw lailîr ke siam dân ang baw k a ni; a tlâng kual te, a chhun kalhna te, a laia a invuahna bawr te chu dâra chhûn vek a ni.

³⁴Taw lailîr killi tinah hûnchhan a awm vek a; chûng hûnchhante chu taw lailîra bet vek a ni baw k.

³⁵Taw lailîr chung lam tawng chanvêa sâng chu a bial a. Taw lailîr hûnchhante leh a tlângkâwmte chu chhûn zawm vek a ni baw k.

³⁶A hûnchhan pangah te leh a tlângkawmna hmun remchâng laia h te chuan cherub te, sakeibaknei leh tûm thîngte chu a chuantîr a, a chei mawinain a vêt chhuak vek baw k a.

³⁷Chutiang chuan taw lailîr sâwm a siam a. A pianhmang te, a len zâwng te inang vekin, thil sakhata siam vek a ni.

³⁸Dârin tuibêl sâwm a siam leh a; tuibêl tin chu bath 40 dawng a ni a, tuibêl tin chu tawng lîa lian a ni. Taw lailîr sâwm chungah tuibêl pakhat a awm theuh va.

³⁹Taw lailîr pangâ chu in dîng lamah a dah a, panga dang chu in vei lamah a dah baw k a. Belpui chu in dîng lam, chhim chhak kilah a hûng a.

TEMPUL CHHÛNG CHEINA

⁴⁰Hurama chuan tuibêl te, vutlawh te leh chawhtawlh te a siam a. Tichuan, Hurama chuan Lal Solomona tâna LALPA in a saksak hna zâwng zâwng chu a zo ta a:

⁴¹chûngte chu ban pahni te, ban pahni chhîpa a lu bâw k pahni te; ban pahni chhîpa a lu bâw k pahni vêt chiata chei mâwina te;

⁴²ban chhîp lam lu bâw k pahni chei nâna theibuhfai lem zalî te nê (ban chhîp bâw k chu theibuhfai lem tlar hnih vê vêin a kual chhuak a);

⁴³taw lailîr sâwm leh, taw lailîr chung a tuibêl sâwm te;

⁴⁴Belpui pakhat leh Belpui hnuaia bâwngpa sâwm pahni te;

⁴⁵tuibêl te, vutlawh te, chawhtawlh te chu a siam zo ta a. Chûng bungbêl zâwng zâwng, LALPA in atâna Huraman Lal Solomona a siamsakte chu dâr tle chîa siam vek a ni.

⁴⁶Lal chuan Jordan phâia Sukkoth leh Zaretan inkâra bellei hmunah chûngte chu a chhûntîr a ni.

⁴⁷Bungbêl te chu a tam êm avângin Solomona chuan a bûk chhuak sêng lo va; chuvângin dâr te chu engti taka rit nge tih pawh hriat a ni lo.

⁴⁸Tichuan, Solomona chuan LALPA ina bungbêl zawng zawng chu a siam zo ta a: rangkachak maichâm te, chhangserh dahna rangkachak dawhkân te;

⁴⁹Hmun Thianghlim chhûngril zâwk tawn tirha hûn tûr rangkachak hlanga siam khâwnvâr dahna, vei lamah pangâ, ding lamah pangâ, a pangpârte leh khâwnvârte leh rangkachak chaicheh te nê;

⁵⁰thlêng dar te, khâwnvar phita cheh rualna te, chawhtawlh te, fianpui te leh rangkachak hlanga siam rimtui hâl bûr te nê; tempul luhna kawngkhâr leh pindan ril zâwk (Hmun Thianghlim Ber) luhna kawngkhâr atân rangkachak kawpzâte nê.

⁵¹Tichuan, LALPA in atâna mamawh Lal Solomonan a siam zawng zawng chu zawh a ni ta a; a pa Davidan a lo serh hran tawh: silvar leh rangkachak leh thil chei mâwina te chu Solomona chuan a la lût a. LALPA ina sum bâwm chhûnghah chuan a dah ta a.

BUNG 8

THUTHLUNNA BÂWM TEMPULA LAK LUH

¹Solomona chuan Israel upate, hnam tina an puipate leh Israel thlahte zînga an puipa zawng zawng chu, Davida Khawpui Zion atângin Jerusalem Lal Solomona hnênah LALPA thuthlunna bâwm chu zâwn chho tûrin a ko khâwm a.

²Tichuan, thla sarihna, Ethanîm thlâah Israel mi zawng zawng chu Lal Solomona hovin kût hman tûrin an pung khâwm vek a.

³Israel upa zawng zawng an lo kal a, puithiamten bâwm chu an zâwn a.

⁴LALPA bâwm te, inbiakna puan in leh, biakbûk chhûnga bungbêl thianghlim zawng zawng chu an la chho vek a. Puithiamte leh Levia chîten an zâwn chho va.

⁵Lal Solomona chu a hnêna Israel mipui pung khâwmho zawng zawngte nê bâwm hmâah chuan an awm a, berâm leh bâwngpa tam tak, chhiar sên rual loh kawpa tam an talh a.

⁶Puithiamte chuan LALPA thuthlung bâwm chu tempul chhûngril zâwk, Hmun Thianghlim Ber chhûnga, cherubho thlazâr hnuaiah chuan an dah lût ta a.

⁷Cherubte chuan bâwm chungah an thla pahnihte chu an zâr duai a, bâwm leh a zâwnngulte chu cherubte chuan an khu duai a.

⁸A zâwnngul hmâwr lehlam lehlam, hmun thianghlim ril zâwk atanga filawr vê vê chu hmun thianghlim atângin a hmuh theih a; pawns lam atang chuan a hmuh theih loh va. Chutah chuan tûn thlengin a la awm reng a ni.

⁹Bâwm chhûnghah chuan thil dang engmah awm lovin, Aigupta an chhuahsan laia LALPAN Israel fate hnêna thû a thluna, Horeb hmuna Mosian lungphêk pahni a dah te chauh a awm a ni.

¹⁰Puithiam-hovin Hmun Thianghlim an chhuahsan vêleh LALPA in chu chhûmin a khat ta mup mai a,

¹¹chhûm avâng chuan puithiamte chuan rawng an bâwl zawm thei ta lo va; LALPA ropuinain LALPA in chu a tikhat vek si a.

¹²Solomona chuan thû a sawi a: “LALPA chuan thim chhah mupah a chêng ang tih a sawi reng a ni.

¹³In ropui tak ka saksak ta che a, Chatuana i chên rengna tûr chu,” a ti a.

HNA THAWH ZAWHA SOLOMONA THU SAWI

¹⁴Israel mipui zawng zawng chu an ding thup a, lal chuan anmahni lam a hawi a, Israel mipuite chu an zâin mal a sâwm a.

¹⁵“Ka pa Davida hnêna ama kâ ngeia lo sawitu leh, ama kut ngei thawha hlen chhuaktu LALPA Israelte Pathian chu fakin awm rawh se,

¹⁶Aigupta atanga ka mi Israelte ka hruai chhuah ni atang khân ka hming awmna tûrin Israel hnamte zîngah khawi khua mah ka la thlang ngai lo; nimahsela, ka mi Israelte hotu atân Davida ngei ka thlang ta a ni,” a ti a.

¹⁷Ka pa Davida thinlungah khân LALPA Israelte Pathian hming pualin tempul sak a lo tum reng a.

¹⁸Nimahsela, LALPA chuan ka pa Davida hnênah, ‘Ka hming awmna atân tempul sak duhna rilru i pu tlât hi i ti thâ e.

¹⁹Mahse, nang chuan tempul chu i sa tûr a ni lo, i fapa, nangma hrin ngei chuan keima hming awmna atân tempul chu a sa zâwk tûr a ni,’ a lo ti tawh a.

²⁰LALPA chuan a lo sawi tawh ang ngeiin a hlen ta a; kei hian ka pa Davida hmun chu ka lo luah ta a, LALPAN a lo tiam ang takin Israel lalthutthlêngah ka thû ta a; tichuan LALPA Israelte Pathian hming awmna atân tempul ka din ta a ni.

²¹Chutah chuan, Aigupta atanga a hruai chhuah laia kan thlahtute hnêna LALPAN thû a lo thlunna Bâwm dahna hmun chu ka siamsak ta a ni,” a ti a.

ṬAWNGṬAIA SOLOMONA THILHLAN

²²Solomona chu Israel mipui pung khâwmho zawng zawng hmuhah LALPA maichâm hmâah chuan a ding a, vân lamah a kut a phar chhuak a;

²³heti hian a ti a: “LALPA Israelte Pathian, chung lam vânah leh hnuaî lam leiah hian an thinlung zawng zawnga i thû zâwmtu, i chhihhlawhte tâna thuthlung vawngtu leh anmahni lainattu Pathian hi tû dang mah an awm lo ve.

²⁴I chhihhlawh ka pa Davida hnêna i thutiam chu i hlen ta a; i kâa i lo tiam tawh chu wawinah hian i kut ngeiin i hlen chhuak ta a nih hi.

²⁵Chuvângin LALPA, Israelte Pathian, ‘I fate hian fimkhur taka an kawngte an zawh a, ka hmâa i awm thîn anga i hmâah pawh an awm ve phawt chuan Israelte lalthutthlêngah hian ka hmâa thû tûr i haihchham lo vang,’ tia i chhihhlawh ka pa Davida hnêna i lo tiam kha hlen mawlh ang che.

²⁶Aw, Israelte Pathian, i chhihhlawh, ka pa Davida hnêna i thu sawi kha a takah chantîr tûrin ka ngên a che.

²⁷Mahse Pathian meuh chu leiah a chêng vê ang mâw? Ngai teh, vân leh vânte vânah te pawh i leng lo a ni a. Hê tempul ka sak vê phei hi chu a va beitham leh zual ve le!

²⁸Mahse Aw LALPA ka Pathian, i chhihhlawh ṭawngṭaina leh dîlna hi lo ngaithlâ la, wawinah hian i hmâa i chhihhlawhin ṭawngṭaia a dîlna leh âu âw hi lo ngaihlâksak mawlh ang che:

²⁹Chutah chuan ka hming a awm ang,' i tihna hmun lam hi lo hawi la, achhûn azânin hê tempul lam hirawn thlîr reng ang che, tichuan hê hmun lam hawia i chhiahhlawh ãawngtâinate chu i hriat theih nân.

³⁰Tichuan, i chhiahhlawh leh i mi Israelten hê hmun lam hawia an ãawngtaiin lo ngaithlâ ang che. I chênna vân ațangin lo ngaithlâ la; dîlna anrawn thlen hunah nanging lo ngaidam ang che.

³¹“Mi a ãhenawm lakah a lo sual a, chhia an chham luihtîra, i hmâa chhechham tûra hê tempul maichâma a lo kal hunah

³²vân ațangin lo ngaithlâ la, nang lo chê ang che; i chhiahhlawh chungthû chu rêlsak la, mi suaksual hremna chu ama lu chungah thlen la, mi dik erawh chu a dikna angin thiam chantîr ang che.

³³I mi Israelte hian thil sual an tih avânga hmêlma hmâa tihlâwma an awmin, i hming țana, i lam hawia an sualte an puan a, hê tempulah hian ãawngtaia i hnêna an dîlin

³⁴vân ațangin lo ngaithlâ la, i mi Israelte sualna chu ngaidam ang che; tichuan an thlahtute hnêna i pêk ramah hian hruai kîr leh ang che.

³⁵“I laka thil sual an tih avânga vân hi khârpîn a niha, ruah sîr tîr pawh a awm loh hunah, hê tempul lam hawia i hming țana an ãawngtaia, i tuartîrna azâra an sual an hawisan chuan

³⁶vân ațangin lo chhâng la, kawng țha zawh tûra i zirtîr theih nân, i chhiahhlawh, i mi Israelte sualna chu ngaidam ang che; tichuan, an ro luah tûra i mite tâna i pêk ramah chuan ruah sîrtîr ang che.

³⁷Ram chhûngah țam te a lo tlâk a, hri chhia emaw, thlai hrî emaw, hmuar hrî emaw a lo lên a, khaukhuap te a lo puan a; hmêlmâten khuua mite anrawn hual a; hri chhia leh natna engpawh a lo awmin;

³⁸mimalin emaw, Israel mipui zawng zawngin emaw, an thinlunga hriatthiamna nei chungah hê tempul lam hawia an kutte phara, ãawngtâina leh dîlna te anrawn thlen chuan:

³⁹i chênna vân ațangin lo ngaithlâ la, ngaidam la, mi tin an thinlung i hriatsak anga an awm dân ang zêlin an chungah ti ang che (nang chauh hi mihring fate thinlung zawng zawng hretu awmchhun chu i ni si a);

⁴⁰tichuan, an pi leh pute hnêna i pêk rama an awm chhûngin an țih ang che.

⁴¹Chû bâkah ram dang mi, i mi Israelte ni lo, i hming avânga ram hla tak ațanga lo kalte chenin

⁴²(i hming ropuizia te, i kut chakzia te leh i bân phar thûte chu anni pawhin an la hre vê ngei dâwn a, hê tempul lam hawia ãawngtai tûra an lo kal hunah,

⁴³i chênna vân ațangin lo ngaithlâ la, ram dang miin a koh chhan che ang takin ti ang che; tichuan i mi Israelten an tih ang bawkin leia mi zawng zawngin i hming an hria ang a, an țih baw ang che a; tichuan hê tempul ka sak tâk pawh hi i hming châwia sak a ni tih an lo hre thei dâwn nia.

⁴⁴I mite i tirhna lam apianga an hmêlmâte do tûra an thawh chhuahin, khawpui atâna i thlan leh i hming awmna tûra tempul ka sak lam hawia LALPA hnêna ãawngtâina anrawn hlanin

⁴⁵vân ațangin an ãawngtâina leh an dîlna te chu lo ngaithla la, an lamah țang tlat ang che.

⁴⁶“I lakah an lo suala (tûmah thil sual ti lo an awm si lo va), i thin an tih-ura, hmêlma kuta i pêka, ram hlâ leh hnâiah pawh hmêlmâten sala an hruai hunah;

⁴⁷sala an hruai bona ramah chuan an inhriat chhuaha, an inchhîr a, ‘Kan lo sual ta a, dik lo takin khawlohna sual kan lo ti ta a ni,’ tia sala mantute awmna ram ațanga i hnêna ãawngtaia an dîla;

⁴⁸sala hruai botute ramah chuan an thinlung leh thlarau zawng zawng nêna i lam an lo hawi leha, an thlahtute hnêna i pêk tawh an ram leh khawpui atâna i thlan leh i hming awmna tûra tempul ka sak lam hawia i hnêna anrawn ãawngtai hunah:

⁴⁹i awmna vân ațangin an ãawngtâinate leh an dîlnate chu lo ngaithlân anmahni țan tlat la,

⁵⁰i miten i laka an sualna te, i dân an bawhchhiatna zawng zawngte chu ngaidam la, sala mantuten an lainat theih nân khawngaihtîr ang che,

⁵¹(anni chu i mite leh i ro chan, rawhtuina mei, Aigupta ram ațanga i hruai chhuahte an ni si a);

⁵²nangmah an auh hun apiang chea i lo ngaihtlâk tûrin leh i chhiahhlawh dîlna leh i mi Israelte dîlna lama i mit i men theih nân.

⁵³Aw Lalpa PATHIAN, Aigupta ram ațanga kan thlahtute i hruai chhuah laia i chhiahhlawh Mosia i hrilh ang khân leia hnam tin zîng ata i rochan ni tûra i serh hran te an ni si a,” tiin.

SOLOMONAN MIPUIE MAL A SÂWM

⁵⁴Solomona chuan LALPA hnêna ãawngtâina leh dîlna tinrêng a hlan zawh chuan a kutte chu vân lamah a phar chho va, a ãingthitna hmun LALPA maichâm hmâ ata chu a lo tho va.

⁵⁵A ding chhuak a, aw ring taka âuvin Israel mipui zawng zawng chu heti hian mal a sâwm a:

⁵⁶“A tiam ang ngeia a mi Israel mipuite hnêna chawlh hahdamna petu LALPA chu fakin awm rawh se. A chhiahhlawh Mosia kal tlanga a thutiam zawng zawng chu pakhat mah lothlâwn a awm si lo va.

⁵⁷Kan thlahtute hnêna a awm ãhîn angin LALPA kan Pathian chu kan hnênah awm zêl sela. Mîn kalsanin mîn thlahthlam lul suh se,

⁵⁸kan thlahtute hnêna thû a lo pêk tawh anga a kawng zawng zawng zawh tûr te, a thupêkte, a thuruatte, a rorêlte zâwm tûra kan thinlungte ama lama a hawitîr theihna tûrin.

⁵⁹Hêng ka thu sawi, LALPA hnêna ka dîlna zawng zawngte hian achhûn azânin LALPA kan Pathian chu hnaih reng sela, ni tina kan mamawh a nih avângin a chhiahhlawh leh ama mi Israelte thlavâng chu hauh reng rawh se;

⁶⁰tichuan, leia mi zawng zawngin LALPA hi Pathian a ni a; tû dang mah an awm lo tih an lo hriat theih nân.

⁶¹Tûn anga a thuruatte leh a thupêkte zâwm tûr hian in thinlung chu LALPA in Pathianah rinawm rawh se,” a ti a.

SOLOMONAN TEMPUL A HLÂN

⁶²Lal leh a hnêna awm Israel mipui zawng zawng chuan LALPA hmâah inthâwina an hlân a.

⁶³Solomona chuan remna inthâwi nân bâwngpa 22,000 leh berâm 120,000 LALPA hnênah a hlân a. Tichuan, lal leh Israel fate zawng zawng chuan LALPA in chu an hlân ta a.

⁶⁴Chumi ni chuan lal chuan kawt tual laitâ, LALPA in hma zâwn taka mi chu a hawng baw a; LALPA hmâa dâr maichâmah chuan an thilhlân tur hâlral thilhlân te, buhbâl thilhlân te, remna thilhlân sathâu te chu a len loh avângin, chûng hâlral thilhlân te, buhbâl thilhlân te, remna thilhlân sathâu te chu kawt zâwlah chuan a hlân ta a ni.

⁶⁵Chumi tum chuan Solomona leh a hnêna awm Israel mi zawng zawng chuan, Hamath luhna atanga Aigupta lui inkâra mipui tam takin LALPA kan Pathian hmâah ni sarih leh ni sarih dang—ni sawmpali chhûng kût ruai an t̃heh a.

⁶⁶A ni riat nî chuan mipui chu a t̃in darht̃ir a; a chhihhlawh Davida leh Israel mipui chung a LALPA t̃hatna zawng zawng avângin thinlung hlim leh lâwm êm êmin lal chu duhsakna an hlân a, anmahni in lamah an hâw darh ta a.

BUNG 9

SOLOMONA HNENA PATHIAN INLÂR VAWI HNIHNA

¹Chutianga Solomonan LALPA in leh lal in a sak zawha, Solomonan a tih duh zâwng zawng zawng a tih zawh vek hnû chuan,

²Gibeon khuua a hnêna a inlâr ang khân LALPA chu Solomona hnênah a inlâr leh a.

³LALPA chuan a hnênah: “Ka hnêna i t̃awngt̃aina leh i thil d̃ilte kha ka lo hria a; hê in i sak hi kumkhuua ka hming awmna t̃urin ka serh hrang tawh a, hetah hian ka thinlung leh ka mit a fu kumkhua tawh dâwn a ni.

⁴I pa Davida anga rinawmna leh dikna thinlung p̃ua ka mithmuha i awm renga, tiht̃ir ka tuk apiang che i tiha, ka thuruat leh ka rorêlnate i zawm zêl chuan,

⁵i pa Davida hnêna, ‘Israel lal̃thut̃hlênga t̃hu t̃ur i haihchham lo vang,’ tia ka lo tiam tawh ang khân, Israel lalram chung a i lal̃thut̃hlêng hi kumkhua in ka tihnghehsak dâwn che a ni.

⁶Amaherawhchu, nangin emaw, i faten emaw mi zui lohva, min hawisana, in zawm t̃ura thû ka p̃ekte leh ka thuruatte in pawm duh lohva, pathian dang in biaka an rawng in bâwl chuan,

⁷Israel hnam hi hê ram ka p̃ek at̃ang hian ka hnawt chhuak ang a; keima hming awmna at̃ana ka serh hran hê in ngei pawh hi ka hmuh phâk lohva ka hnâwl bo daih mai ang. Tichuan, Israel hnam chu hnam tin nuihzabûr leh tihel nâna hman a ni tawh ang.

⁸Hê in, sâng taka chawi sân ngei pawh hi a kianga kal apiangte mak tih khawpin, ‘Engtizia nge LALPAN hê ram leh hê in hi heti taka a tih mai le?’ tiin an la chek khum tlawk tlawk ang.

⁹Mite chuan, ‘Aigupta ram at̃anga an pi leh pute hrui chhuaktu LALPA an Pathian an phatsan a, pathian dangte lamah pakâia, chibai bûka an rawng te an bâwlsan tak avângin, LALPA chuan hêng chhiatna hi an chungah a thlent̃ir ta a nih hi,’ an la ti

dâwn a ni,” a ti a.

SOLOMONA LEH HIRAMA-TEN THILPÊK AN INHLÂN

¹⁰Solomonan in pahnih, LALPA in leh lal in a sak chhûng, kum sawmhnih a lo vei hnû chuan

¹¹(Tura lal Hiram chuan Solomona hnênah sidar leh fâr thing leh rangkachak a duh zât zât a p̃e a) Lal Solomona pawhin Hiram chu Galili rama khaw sawmhnih a pe baw a.

¹²Solomonan a p̃ek khawpuite en t̃ur chuan Hiram chu Tura at̃angin a va kal a, mahse a duh zâwng a lo ni hlawm lo va.

¹³“Unaupa, hetiang khua nek hi maw min lo p̃ek le?” a ti a. Chûng chu Kabul ram a vuah a, t̃un thlengin chu hming chu a pu ta reng a ni.

¹⁴Hiram chuan lal chu rangkachak talent 120 a thawn ta tho va.

SOLOMONA THILTIH DANGTE

¹⁵Lal Solomonan rawih luih hnathawktu a chhawr chhan te chu: LALPA in sa t̃ur te, ama in te, Millo te, Jerusalem kulh bang te, Hazor leh Megiddo leh Gezer khaw din t̃ur te in a ni.

¹⁶(Aigupta lal Pharoa chuan Gezer khua a lâ a, a hâl a, khaw chhûnga chêng Kanaan-ho a that a, a fanu, Solomona nupui chhawm at̃an a p̃e a.)

¹⁷Solomona chuan Gezer khua te, Beth Horon chuanhnuai te,

¹⁸Baalath leh Judai rama thlalêr khua Tadmor te a din a,

¹⁹Solomona bungraw dah khâwmna khua zawng zawng te, tawilail̃ir leh sakawr chung chuang mite awmna khua te bâkah, Solomonan Jerusalem-ah te, Lebanon-ah te leh a ram awp chhûnga sak t̃il a tihna hmun zawng zawngah chuan a sa vek a.

²⁰Israel mi ni ve lo, Amor-ho te, Hit-ho te, Periz-ho te, Hiv-ho te leh Jebus-ho te chu—

²¹Israel faten an tihbora vek theih loh, ram chhûnga an thlah la châmângte an ni a—chûng mite chu Solomonan rawih luihah hmangin, t̃un thlengin an chhawr ta reng a ni.

²²Israel fate erawh chu Solomonan t̃umah rawih luihin a chhawr ṽe lo, indo mi leh a hnêna thawkte an ni a: a puipa te, hotute, tawilail̃ir-pute leh sakawr chungchuwang p̃awlte an ni si a.

²³Mi dang zawng chu Solomona hna chung a hotu lawk te an ni: hna thawkho ṽengtu hotu 550 an awm a.

²⁴Pharoa fanu erawh chu ama puala Solomonan in a sakah chuan Davida Khawpui at̃angin a chho va. Chumi zawhah Millo a din leh a.

²⁵Solomona chuan LALPA tâna a din maichâmah chuan hâlral thilhlân leh remna thilhlân kum tin vawî thum a hlân t̃hin a, LALPA hmâa maichâmah chuan rimtuite a hâl tel t̃hin. Tichuan, tempul sak hnâ chu a zo ta a.

²⁶Lal Solomona chuan Edom rama Tuipui Sen kam, Elath kianga awm, Ezion Geber-ah lawng rual a din a.

²⁷Hiram chuan a hnuaia thawk tuifinriat chinchâng hre mite chu Solomona hote thawhpui t̃urin a lawngte ñen a t̃ir a.

²⁸Ophir-ah an kal a, chuta t̃ang chuan rangkachak talent 420 an rawn hân a, Lal Solomona hnênah an hlân a.

BUNG 10

SEBA LALNUIN SOLOMONA A FAK

¹Solomonan LALPA hming avânga a hmingthan pahzia Seba lalnuin a lo hriat chuan, zawhna khirhkhân hmanga fiah tumin a rawn pan ta a.

²Thuihruai thahnem tak hruaiin, mawsawla te, rangkachak leh lunghlu tam tak phur sanghâwngsei rual nên a lo kal a; Solomona hnên a lo thlen chuan a thinlunga a pâi zawng zawng phawrhin zawhna a zâwt a.

³Solomona chuan a zawhna zawng zawng chu a chhâng vek a; lal tâna hrilh fiah harsa khawp engmah a awm lo va.

⁴Solomona fin dân kawng tinrêng te, a in sak zawng zawngte chu Seba lalnuin a han hmuha,

⁵dawhkâna a chawhlui te, a mite thutna inrem dân te, a tirhchhiahho chêt vêl dân leh an inthuum dân te, a no hlântute, LALPA in a pan chhohna kawng te a han hmuh chian chuan rilru mûmal pawh a nei ta lo hial a.

⁶Lal hnênah chuan: “I thu chhuak leh i fin dân an sawi thin, kan ram ațanga ka hriat kha a lo dik ngei a nih hi.

⁷Mahse ka lo kala, keima mit ngeia ka hmuh hmâ chuan an sawi chu ka ring zo lo va; a zahvê pawh min lo la hrilh lo zâwk a nih hi. I finna leh i neihnunzia hi an sawi uar ang ai pawha nasa a lo nih hi.

⁸I mite leh i chhiahhlawhte, i bula awm renga, i finna thû ngaithla phâka awmte chu an va nihlawh êm!

⁹I chung a lâwma, Israelte lalthutthlênga nangmah hlâng kaitu LALPA i Pathian chu fakin awm rawh se! LALPAN Israelte hi kumkhuaa a hmangaih avângin diknaa rorêl tûrin lalah a siam che a lo nih reng hi,” a ti a.

¹⁰Tichuan, lal hnênah chuan rangkachak talent 120 leh mawsawla leh lunghlu tam tham tak a pê a. Seba lalnuin Lal Solomona hnêna mawsawla chuti taka tam a pêk ang chu a dawng leh ngai tawh lo.

¹¹Hirama lawng rualten Ophir ațanga rangkachak an rawn lâk luh bâkah, Ophir ațang chuan almug thing leh lunghlu tam tak an rawn hawn bawh a.

¹²Lal chuan almug thing chu LALPA in leh lal in kailâwn siam nân te, hla satute tân tîngtang leh perhkhuang siam nân te a hmang a. Chutiang almug thing chu tân thleng hian a anpui pawh lak luh tûr a awm leh tawh ngai lo.

¹³Lal Solomona pawhin lal a nihna anga duhsakna thilpêk a hlan bâkah, Seba lalnuin a dîl apiang chu lal thilphal dân a zir zêlin Solomona chuan a pe bawh a. Tichuan, amah leh a mite nên chuan an ram lamah an hâw leh ta a ni.

SOLOMONA HAUSAKZIA

¹⁴Kum tina Solomona hnêna rangkachak lo lût chu talent 666 bûk a ni a,

¹⁵chûng bâkah chuan sumdâwnga zin veivâk ațang te, dâwrkâte sum pêk luh ațang te, Arabia lal zawng zawng hnên ațang te leh, a ram chhûnga governor tinte hnên ațanga lût a la awm bawh.

¹⁶Lal Solomona chuan rangkachaka chher phâw hlai chi 200 a siam a; phâw pakhat siam nân rangkachak sekel 600 lai a duh a ni.

¹⁷Rangkachaka chher phâw 300 a siam bawh a; phâw pakhat siam nân rangkachak mina thum zel a duh a. Chûngte chu lal chuan Lebanon Ngawpui Inah a dah tha a.

¹⁸Chubâkah lal chuan sainghovin lalthutthlêng ropui a siam a, rangkachak hlangin a luan leh vek a.

¹⁹Lalthutthlêng chuan rahka paruk a nei a, a hnung lam chhîp chu a kual pap a; a thutna sîr tawnah vawnbân a awm vê vê a, a vawnbân sîrah chuan sakeibaknei lem pahni a ding a.

²⁰Rahka paruk sîr tawnah chuan sakeibaknei lim pakhat zêl dingin sakeibaknei sâwm pahni a ding a; khawi lalramah mah chutiang taka siam chu a awm vê lo.

²¹Lal Solomona thil inna no rêng rêng chu rangkachaka siam vek a ni a, Lebanon Ngawpui Ina bungbêlte pawh rangkachak hlang vek a ni. Solomona hun lai chuan silvar chu eng hû-ah mah ngaih a nih loh avângin silvara siam engmah a awm lo.

²²Lal chuan tuipuih sumdâwng lawng neiin Hirama lawng rualte nên an inkawp a. Kum thum danah chûng sumdâwng lawngte chuan rangkachak te, silvar te, saingho te, zâwngtê leh zâwng lian chîte an rawn phur hâw thin.

²³Tichuan, Lal Solomona hausakna leh finna chuan leia lal dang zawng zawngte chu a khûm vek a ni.

²⁴Pathianin a thinlunga a pêk finna thû ngaithla tûrin khawvêl zawng zawngin Solomona chu an rawn pan huai huai thin a.

²⁵Mi tinin thilpêk an rawn pê a: silvar leh rangkachak bungbêl te, silhên te, râlthuum te, mawsawla te, sakawr te leh sabengtung te chu a kum biin an rawn pe thin.

²⁶Solomona chuan tawlailîr leh sakawr chung chuang mite a khâwm a; tawlailîr 1,400 leh sakawr chung chuang mi 12,000 a nei a, chûngte chu tawlailîr dahna khuahte leh Jerusalema lal hnênah a dah a.

²⁷Silvar chu lung ang maia tam, sidar thing pawh phaibâwm sikamor thing ang maia ngaih khawpa tamin lal chuan Jerusalema a chhêk a.

²⁸Solomona chuan Aigupta leh Keveh ațangin sakawr a chaw lût bawh a; lal sumdâwngten Keveh-ah a man pangngaiin an lei thin a.

²⁹Aigupta ațanga an chawh luh tawlailîr pakhat chu silvar sekel 600 man a ni a, sakawr pakhat man sekel 150 a ni; tichuan, an aiawhte kal tlangin Hit lalte leh Suria lalte hnênah an thawn chhuak thin.

BUNG 11

SOLOMONA THINLUNGIN LALPA A HAWISAN

¹Solomona chuan hnam dang nula ngaihzâwng a nei zut a, Pharoa fanu bâkah: Moab te, Ammon te, Edom te, Sidon leh Hit hmeichhiate an ni a—

²LALPAN Israel fate hnênah, “Chûng mite nên chuan inneih pawh hauh suh u. An pathiante lamah in thinlung an hruai bosak

mai dâwn che u asin,” tia a sawi nham te an ni si a. Solomona erawh chuan chûng mite chu a ngaizâwnng miau si a.

³Nupuih lal fanu 700 a nei a, hmei 300 a nei bawh a; a nupuite chuan a thinlung chu an kuai pêng ta ngei a.

⁴Solomona lo upat hnû chuan a nupuite chuan a thinlung chu pathian dangte lamah an hruai kâwisak ta tak tak a; a pa Davida thinlung a rinawm ang khân a thinlung chu LALPA a Pathian lakah a rinawm ta lo va.

⁵Tichuan, Solomona chuan Sidon pathian nu Astoreti te, Ammon pathian tenawm Milkoma te chu a zui ve ta a.

⁶A pa Davidan LALPA hnung a zui tuan ang khân ani chuan a zui tuan thei ta lo va, Solomona chuan LALPA mithmuhah thil sual a ti ta a ni.

⁷Moab pathian tenawm Kemosa tân leh, Ammon pathian tenawm Moleka tân Jerusalem chhak lam tlang chungah hmun sâng a din ta a.

⁸Chutiang bawkin a nupui ram dang mi zawnz zawnge te tân a tihsak vek a, anni chu rimtui hâlin an pathiante hnênah an inhâwî thîn a.

⁹A hnêna vawi hnih ngawt a inlâr chung pawha LALPA Israelte Pathian chu a thinlunga a hawisan tâk avângin Solomona chungah LALPA chu a thinur ta hlê a;

¹⁰pathian dangte a zui tûr a ni lo tiin thû a lo pe tawh si a; chutichung chuan LALPA thupêk chu a zâwm duh chuang lo.

¹¹Chuvângin, LALPA chuan Solomona hnênah, “Ka thuthlung leh ka dân thuruat, zâwm tûra ka pêk che zâwm duh lova, heti taka i chêt avâng hian i lalram hi ka thiat darh vek ang a, i chhiahhlawh hnênah ka pê ang.

¹²Mahse, i pa Davida avâng chauhvîn, i dam chhûng chuan ka ti êm lo vang; i fapa hunah erawh chuan ka then darh ngei ang.

¹³Lalram pawh a pum êm chuan ka thiat darh vek lo vang; ka chhiahhlawh Davida avâng leh, duh taka ka lo thlan tawh Jerusalem avângin i fapa hnênah nham khat chu ka pê ang,” a ti a.

SOLOMONA HMÊLMÂTE

¹⁴LALPA chuan Edom mi Hadada chu Solomona hmêlmâ ni tûrin a din chhuak ta a; ani chu Edom lal thlaha mi a ni a.

¹⁵Edom rama Davida awm laia Edom rama mipa a thah zawnz zawnz phûm tûrin a sipai hotu Joaba chu a han chho va,

¹⁶(Joaban Edom mipa zawnz zawnz a râwt chimih hmâ loh chuan, Israel mi zawnz zawnge te nên thla ruk chhûng an han awm chilh a),

¹⁷Hadada chu a pa chhiahhlawh mi thenkhatte nên Aigupta ramah an tlânchhia a. Chutih lai chuan Hadada chu naupang tê a la ni.

¹⁸Midian ram aţangin Paron ramah an kal a; Paron rama mite hruaiin Aigupta ramah an kal a, Aigupta lal Pharoa hnên an zu thleng a, ani chuan in te, ei tûr te, ram te a lo pê a.

¹⁹Hadada chu Pharoa chuan a lo duhsak hlê a, nupui atân pawh ama nupui, Lalnu Tahpenes-i laizâwnnu a lo pê a ni.

²⁰Tahpenes-i laizâwn chuan fapa Genubatha a hrinsak a, Pharoa inah chuan Tahpenes-i chuan a hnute hnêk a bânîr a. Genubatha chu Pharoa chhûngkuaah awmin Pharoa fapate zîngah chuan a awm vê ta a.

²¹Davida chu a thlahtute hnênah a chawl tawhin a sipai hotu Joaba pawh a thi tawh tih thu Hadadan Aigupta aţanga a lo hriatin, Hadada chuan Pharoa hnênah, “Min kaltîr la, kan ramah chuan ka han hâw tawh ang e,” a ti a.

²²Pharoa chuan, “Ka lakah tlâkchham i nei ta em ni, chutia in rama hâw i duh tak thut le?” a ti a. Ani chuan, “Eng dang ni lo ve, min kaltîr mai rawh,” a ti a.

²³Pathianin amah dotu tûr hmêlma dang a din chhuak leh a, Eliada fapa Rezona, a pu Hadadezera, Zoba lal hnên aţanga tlan bo ta chu a ni.

²⁴Davidan Zoba mite a thah lai khân ani chuan mite a lo hui khâm a, hel pâwl hruaitûah a ţang ta a. Damaska khuah a kal a, chutah chuan a va awm reng a, Damaskaah chuan a lal ta a.

²⁵(Hadadan harsatna a thlensak bâkah) Solomona dam chhûng zawnz Israelte hmêlmâah a ţang a; Israelte chu a haw hluah hluah a, Suria ram chungah chuan ro a rêl a.

JEROBOAMA HELNA

²⁶Solomona chhiahhlawh Jeroboama, Nebata fapa, Ephraim nham, Zereda khuah mi, hmeithai Zeruii fapa chu lal lakah a hel ve bawh a.

²⁷Lal laka a helna chhan chu hei hi a ni: Solomonan Millo a siam a, a pa Davida Khawpui tlabal lai a thawm tha a.

²⁸Jeroboama chu mi chak huaisen tak a ni a; Solomonan chu tlangval taihmakzia chu a hmuhin, Josepha chhûngkaw tâna hnathawktu chhawr luihte enkawltu hotu berah a siam a.

²⁹Jeroboama chu Jerusalem aţangin a va kal chhuak a, kawngah chuan Shilon mi zâwnei Ahija hian a lo tâwk a; thawmhnaw thar a inbel a, ramhnuaiyah chuan an pahnih chauhvîn an awm a.

³⁰Ahija chuan a silhfên thar inbel lai chu hmun 12-ah a pawt thlêr a.

³¹Jeroboama hnênah chuan, “Phel sâwm hi la rawh, LALPA Israelte Pathian chuan, ‘Ngai teh, Solomona kut aţangin lalram hi ka phel darh vek ang a, nham sâwm ka pe ang che,

³²(ani chuan ka chhiahhlawh Davida avâng leh, Israel nham zawnz zawnz aţanga ka khawpui atâna ka thlan Jerusalem avâng liau liauvîn nham khat a chang vê ang),

³³kei mi hawisan a, Sidon-ho pathiannu Astoreti te, Moab pathian Kemosa te, Ammon mite pathian Milkoma te an biak tâk avâng leh, a pa Davida anga ka dân thuruatte leh ka rorêlna te zâwm duh lova, ka mithmuha dik taka ka kawng pawh a zawn duh loh vang a ni.

³⁴Mahse lalram chu a kut aţangin a vâi chuan ka chhuhsak vek lo vang, ka chhiahhlawh, ka thupêk leh ka dân thuruat a zawn tlat avânga ka thlan Davida avângin a dam chhûnga lal tûrin ka lo ti tawh si a.

³⁵Mahse a fapa kut ațang zâwkin lalram hi ka chhuhsak ang a, i hnênah nham sâwm ka pê ang che.

³⁶A fapa hnênah nham khat chu ka pê ang; tichuan, ka hming awm nâna ka thlan Jerusalema ka chhiahhlawh Davida khâwnvâr chu a awm reng theih nân.

³⁷Nang erawh chu ka hruai ang che a, i duh angin ro i rêl ang a, Israelte chungah lal ni ang che.

³⁸Thû ka pêk apiang che i zawma, ka chhiahhlawh Davida anga ka thuruatte leh ka thupêkte i zawm zêla, ka mithmuha dik taka tia, ka kawngte i zawh tlat chuan i hnênah ka awm zêl ang a, Davida tân chhûngkua ka dînsak ang bawkin chhûngkaw nghet ka dînsak ve ang che a, Israel nham hi ka pê ang che.

³⁹Hê thil avâng hian Davida thlahte chu ka tuartîr dâwn a; amaherawhchu, kumkhua atân chuan a ni lo vang, a ti, tiin a hrilh a.

⁴⁰Tichuan, Solomona chuan Jeroboama chu thah a tum ta a. Nimahsela, Jeroboama chu a tho va, Aigupta ramah, Aigupta lal Sisaka hnênah a tlânchhia a, Solomona thih hmâ chu Aigupta ramah chuan a awm ta reng a.

SOLOMONA THIH THÛ

⁴¹Solomona thiltih dang zawng zawng, a finna thûte chu Solomona thiltih bûah ziah a ni lo vem ni?

⁴²Solomonan Jerusalema Israel mi zawng zawng chungah ro a rêl hun chhûng chu kum 40 a ni.

⁴³Solomona chu an thlahtute hnênah a muhîl ta a, a pa Davida Khawpuiah an phûm a. A aiah a fapa Rehoboama chu a lo lal ta a.

BUNG 12

REHOBAMA LAKA HELNA

¹Rehoboama chu Sekemah a kal a, lala siam tûrin Israel mi zawng zawng chu Sekemah an kal bawk a.

²Nebata fapa Jeroboaman a lo hriat chuan (Aigupta ramah a la awm reng a, Lal Solomona hnên ata a tlânchhia kha Aigupta ramah a la awm reng a),

³ani chu an zuk ko va. Tin, Jeroboama leh Israel pung khâwmho zawng zawng chu Rehoboama hnênah an kal a,

⁴I pa khân kan phur a tirit êm êm a; tûn ațang chuan i pân phurrit min siamsak leh kan chungah nghâwngkaw rit tak a nghah hi min tihzânsak la, tichuan i rawng kan bawl ang e,” an ti a.

⁵Ani chuan an hnênah, “Nî thum chhûng lo va kal kiang rih ula, in lo kîr leh dâwn nia,” a ti a. Mipuite chu an kal kiang ta a.

⁶Lal Rehoboama chuan a pa Solomona dam laia a hmâ ding thîn upate chu a rawn a, “Hêng mipuite hi engtin nge ka chhân dâwn le?” a ti a.

⁷Anni chuan a hnênah, “Hêng mite hi i tih that chuan, an rawng bawlsakin, an ngen ang chu tha takin chhâng la, tichuan i chhiahhlawhah an awm kumkhua mai ang,” an ti a.

⁸Nimahsela, upaho thurâwn chu a pawm duh lo va, a seilenpui thalai rual, a hmâ ding thînte chu a rawn leh ta zâwk a.

⁹An hnênah, “Engtin nge thurâwn min pêk dâwn le? ‘I pain kan chungah nghâwngkaw a nghah hi min tihzânsak deuh rawh,’ titute hi engtin nge kan chhân dâwn le?” a ti a.

¹⁰Chûng thalai rual, a seilenpui chuan a hnênah, “‘I pain kan chungah nghâwngkaw a nghah hi min tihzânsak deuh rawh,’ titute chu hetiang hian lo chhâng ang che—an hnênah heti hian ti rawh: ‘Ka kutzungtê pawh hi ka pa kâwng aia lian zâwk a ni asin!’

¹¹Ka pain nghâwngkaw rit a bahtîr che u a, kei chuan in nghâwngkaw kha ka belhchhah sauh dâwn; ka pain talhfiakin a hlap thîn che u a, kei chuan hruihrualin ka hrem ang che u!’ ti ang che,” an ti a.

¹²Tichuan lal chuan, “Nî thum nî-ah lo kal leh ang che u,” tia thû a pêk angin a ni thum nî chuan Jeroboama leh mipui zawng zawng chu Rehoboama hnênah an lo kal a.

¹³Lal chuan a upate thurâwn chu hnâwlin, mipuite chu buluk takin a lo chhâng a;

¹⁴tlangvâlho thurâwn ang zâwkin, “Ka pa khân in nghâwngkaw a lo tirit a, kei chuan in nghâwngkaw chu ka belhchhah sauh vang; ka pain talhfiakin a hlap thîn che u a, kei chuan hruihrualin ka hrem ang che u!” a ti ta a.

¹⁵Tichuan, lal chuan mipuite thû chu a ngaithla duh lo va; chû thil chu LALPA tihtîr a ni miau si a, Silo mi Ahija hmanga Nebata fapa Jeroboama hnêna LALPA thu sawi kha a taka a lo thlen theih nân.

¹⁶Lalin an thû a ngaithla duh lo tih Israel mi zawng zawngin an han hriat chuan mipuite chuan lal hnênah: “Davida lakah chanvo eng nge kan neih? Jesaia fapa lakah rochan kan nei lo ve. Aw Israelte u! in lamah hâw vek rawh u. Aw David, nangma chhûngkua chu ngaihtuah vê mai teh,” an ti a. Tichuan, Israel mite chu anmahni in lamah an hâw darh ta vek a.

¹⁷Mahse, Rehoboama chuan Juda khawpuia chêng Israel fate chungah ro a rêl tho va.

¹⁸Chumi hnû chuan Lal Rehoboama chuan leiman enkawltu Adorama chu a tîr a; mahse Israel mite chuan lungin an lo dêng a, a thi ta a. Chû vêleh Lal Rehoboama chu a tâwlailîrah chuangin hmanhmawh takin Jerusalem a tlân hâw ta a ni.

¹⁹Tichuan, Israel-ho chu Davida chhûngkaw lakah tûn thleng hian an hel ta reng a.

²⁰Chûng lai chuan Israel mipuiten Jeroboama a lo kîr leh tih an lo hriatin, an pun khâwmna hmunah chuan ani chu an ko va, Israel zawng zawng chungah lalah an siam ta a. Juda nham tih chauh loh chu, Davida chhûngkaw lama țang an awm ta lo.

²¹Rehoboama chuan Jerusalem a lo thlenin Juda leh Benjamin chhûngkua chu a ko khâwm vek a, Israelte do tûr leh, lalram chu Solomona fapa Rehoboama hnuaia dah lêt leh tûrin sipai huaisen thiau mi 180,000 a thlang chhuak a.

²²Nimahsela, Pathian mi Shemaia hnênah Pathian thu a lo thleng a,

²³“Solomona fapa Rehoboama, Juda lal hnênah leh Juda leh Benjamin chhûngkua zawng zawng leh mi dang zawngte hnênah heti hian sawi ang che,

²⁴LALPA chuan, “In unau Israel fate do tûrin in kal chho tûr a ni lo. Hê thil hi keima tih a ni a, chuvângin mahni in lamah kîr leh vek rawh se,” a ti, ‘tiin hrilh rawh,’ a ti a. Tichuan, LALPA thù chu an zâwm a, LALPA thù ang takin an kîr leh ta a.

JEROBOAMA RANGKACHAK BÂWNG-NO

²⁵Jeroboama chuan Ephraim tâng ramah Sekem khu a din a, chutah chuan a awm ta a. Chuta tâng chuan a kal chhuak a, Penuel khu a din baw k a.

²⁶Jeroboama chuan a rilrûin, “Lalram hi Davida chhûngkaw hnênah a tlu lût leh mai ang a:

²⁷Hêng mipuite hi inthâwina hlân tûra Jerusalema LALPA ina an kal chhoh fo chuan mipuite thîlung hi an pu Rehoboama, Juda lal lamah a thle leh ang a, kei hi min that ang a, Juda lal Rehoboama lamah an pakâi leh mai ang a,” tiin a ngaihtuah a.

²⁸Lal chuan mite a râwn a, rangkachak bâwng no lem pahni a siam a, mipuite hnênah chuan, “Jerusalema han chhoh fo hi in tân a hautak si a. Aw Israelte u, hêngte hi Aigupta ram ațanga hruai chhuaktu che u in pathiante an nih hi!” a ti a.

²⁹Pakhat chu Bethel-ah a dah a, a pakhat zâwk chu Dan-ah a dah baw k a.

³⁰Tichuan, mipuite chu pathian be tûrin Dan thlengin an kal thîn a; mahse chu chu an tân thil sual a lo ni ta a.

³¹Hmun sângah te maichâm a siam a, Levia fate pawh ni lo, mi narante pawh puithiamah a hmang ta hial a.

³²Jeroboama chuan Judai rama kût ni an ruat angin, thla riatna ni 15 ni chu kût ni atân a ruat ve mai a, maichâmah inthâwina a hlân a. Bethel-ah chuan a bâwng no siam hnênah a inthâwi ta a. Bethel-ah vêk chuan hmun sâng puithiam a ruatte chu a dah baw k a.

³³Tichuan, a duh dân ang taka a ruat angin thla riatna, ni 15 ni chuan Bethel khu a maichâm a siamah inthâwina chu a hlân a. Israel fate kût hman dân tûr pawh amahin a ruat a, maichâmah inthâwina a hlân a, rimtui te a hâl a.

BUNG 13

PATHIAN MI THUCHAH

¹Ngai teh, LALPA thûin Pathian mi pakhat chu Judai ram ațangin Bethel-ah chuan a va kal a, Jeroboama chu rimtui hâl turin maichâm bulah a lo ding a.

²LALPA thûin chû maichâm chu a hau va, “Aw maichâm, maichâm! LALPAN heti hian a ti: ‘Ngai rawh, Davida chhûngkua ațangin nâu, a hming Josia a lo piang ang a; i chungah rimtui hâl thîn hmun sâng puithiamte chu i chungah ngei inthâwi nân a rawn hmang ang a, i chungah hian mihring ruhte a rawn hâl dâwn a ni,’ tiin,” a ti a.

³Chumi nî chuan chhinchhiahna a pê a, “Hei hi LALPAN chhinchhiahna a sawi chu a ni: Maichâm hi a la phel phawk ang a, a chungah vut te hi leihbuak a ni ang,” tiin.

⁴Chutia Pathian miin Bethela maichâm a hâu thâwm chu Lal Jeroboaman a lo hriatin maichâm ațang chuan a kut a lek chhuak a, “Man rawh u!” a ti a. Tichuan, man tuma a kut phar chhuah chu a khawng ta tlat a, a la thla thei ta lo va.

⁵Pathian miin LALPA thù anga chhinchhiahna lo awm tûr a sawi ang ngeiin maichâm chu a phel phawk a, maichâm meivâpte chu a baw vek a.

⁶Lal chuan Pathian mi hnênah, “Khawngaih takin LALPA i Pathian chu min ngensak teh, ka kut hi a dam leh theih nân min tawngtaisak rawh,” a ti a. Pathian mi chuan LALPA hnênah a dîlsak a, tichuan lal kut chu a ngai ang chiahin a lo dam leh ta a.

⁷Lal chuan Pathian mi hnênah, “Ka inah lo kal la, intiharh la, lâwmman ka pê ang che,” a ti a.

⁸Mahse Pathian mi chuan lal hnênah, “I in leh lo zâtê pawh mi pe dâwn la, i hnênah ka lo kal chuang lo vang; hê hmunah hian chhang pawh eiin, tui pawh ka in hauh lo vang.

⁹LALPA thù chuan ka hnênah, ‘Chhang i va ei tûr a ni lo va, tui pawh i va in tûr a ni lo va, i va kalna kawng ngaiah pawh i lêt leh tûr a ni hek lo,’ min ti tlat a ni,” a ti a.

¹⁰Tichuan, Bethel a rawn panna kawng ni lo, kawng dangah a hâu leh ta a.

PATHIAN MI THIH THÛ

¹¹Bethel-ah chuan zâwlnei putar a awm a, chumi nîa Pathian miin Bethela a thiltih zawng zawng chu a fapate chuan an va hrilh a; lal hnêna a thu sawite pawh an pa chu an hrilh baw k a.

¹²An pa chuan, “Khawi lam kawngah nge a kal tâk?” a ti a. A fapate chuan Judai ram ațanga lo kal Pathian mi hâu lehna kawng chu an lo hmu reng a.

¹³A fapate hnênah chuan, “Sabengtung mi han buatsaihsak teh u,” a ti a. Tichuan, sabengtung chu a chuan nân an siamsak a; a chuang ta a,

¹⁴Pathian mî chu a va ûm a, sasaw thing hnuai a thù chu a va hmû a. A hnênah chuan, “Nang hi Judai ram ațanga lo kal Pathian mî chu i ni em?” a ti a. Ani chuan, “Ni e,” a ti a.

¹⁵Tichuan a hnênah, “Mî zui hâu leh la, chaw i ei dâwn nia,” a ti a.

¹⁶Ani chuan, “I hnêna kîr leh thei ka ni lo va, i ruala kal thei ka ni hek lo; hê hmunah hian nangma hnêna ei leh in thei pawh ka ni baw k hek lo.

¹⁷LALPA thûin ka hnênah, ‘Hê hmunah hian i eiin i in tûr a ni lo va, i va kalna kawng ngaiah i hâwng leh tûr a ni hek lo’ min ti a ni,” a ti a.

¹⁸Ani chuan, “Kei pawh nang ang bawka zâwlnei ve tho ka ni asin, LALPA thûin Vântirhkhovin, ‘I inah chaw te eia, tui in tûrin hruai kîr leh rawh’ min ti a ni,” a ti a (Dâwt a hrilh a ni a.)

¹⁹Chu mî rual chuan a kîr leh ta mai a, a inah chuan chaw te a ei a, tui te a in ta a.

²⁰Dawhkân kîla an thut lai chuan, amah hruai kîrtu zâwlnei hnênah chuan LALPA thù a lo thleng a;

²¹Judai ram ațanga lo kal Pathian mî hnênah chuan aw ring takin, “LALPA chuan, ‘LALPA thù i âwih lohva, LALPA i Pathianin a thupêk zâwm tûra a tih che kha i zawm lohva,

²²LALPAN, “Chhang rêng rêng i va ei tûr a ni lo, tui pawh i va in tûr a ni lo,” a tihna hmun ngeiah i lo kîr leh a, chhang i ei a, tui i in baw k avângin, i ruang chuan in thlahtute thlân a thleng ve lo

vang, 'a ti e," a ti a.

²³Tichuan, chaw te a ei a, tui te a in zawhin a hruai kîr leh tâk zâwlnei chu sabengtunga a chuanna tûr a siamsak a.

²⁴A kal liam hnû chuan, kawng lakah sakeibaknei nêen an intâwk a, a lo seh hlum a. A ruang chu kawng laiah a theh thal dêr a, sabengtung chu a bulah a ding reng a. Sakeibaknei pawh ruang bulah chuan a ding ve reng baw a.

²⁵Kawnga mi kalte chuan kawng laia miruang lo let reng leh, a bula sakeibaknei ding chu an hmû a. Zâwlnei putar awmna khuah chuan an va kal a, an va sawi ta a.

²⁶Kawng laka amah va hruai kîr lehtu zâwlnei khân a lo hriat chuan, "Pathian mî, LALPA thu âwih lo ngeia kha a nih chu. LALPAN a thû ama hnêna a sawi ang ngeiin sakeibaknei hnênah a pê a, lo pawt darhin a lo tihlum ta zu nia," a ti a.

²⁷A fapate hnênah chuan, "Sabengtung kha mi lo buatsaihsak leh teh u," a ti a. Tichuan, an buatsaih ta a.

²⁸A va kal a, kawng laia miruang lo let reng leh, a bula sabengtung leh sakeibaknei ding reng chu a va hmû a. Sakeibaknei chuan ruang chu a ei lo va, sabengtung pawh chu a seh hek lo.

²⁹Zâwlnei chuan Pathian mi ruang chu a hlâwm a, sabengtung chungah chuan a hlâng a, a kîrpui ta a. Zâwlnei putar chuan sîn leh phûm atân khuah chuan a luhpui a.

³⁰Ruang chu ama thlânah a zalh a; "Unaupa, a va zia lo êm!" tiin an ãah a.

³¹Chutia a phûm hnû chuan a fapate hnênah, "Ka thih hunah hê Pathian mî phûmna thlânah hian min rawn phûm ve ula; a ruh bulah hian ka ruhte pawh rawn dah vê ang che u.

³²Bethel khuah maichâm leh, Samari khawpuia inthâwina hmun sâng zawng zawng LALPA thupêka a ânkhumna thûte kha a takin a lo la thleng ngei dâwn si a," a ti a.

³³Chu thil thlen hnûah pawh chuan Jeroboama chuan a nun dân sual chu a bânsan chuang lo va, vântlâng mi chi tin aţangin hmun sâng puithiam hnâ thawk tûrin mi a ruat a; a duh apiang a serh hrang mai a, amah pawh hmun sâng puithiamte zînga pakhat a lo ni ta hial a.

³⁴Chû thil chu Jeroboama chhûngkaw tân leilung ata tihborala tihchimihna tling khawp sual a lo ni ta a ni.

BUNG 14

JEROBOAMA CHHUNGKAW CHUNGA RORELNA

¹Chûng lai chuan Jeroboama fapa Abija chu a dam lo va.

²Jeroboama chuan a nupui hnênah, "Tho la, Jeroboama nupui i ni tih tûma'n an hriat lohna tûrin insiam danglam la, Silo-ah va kal ta che. Chutah chuan zâwlnei Ahija a awm a, ani chuan hêng mite lal ka la nih tûr thû pawh min lo hrihl lâwk nghê nghê asin.

³Chhang tlang sâwm leh chhang-kêk engemaw zât nêen, khawizu ûm khat nêen keng la, a hnênah chuan va kal ta che; naupang awm dân tûr a lo hrihl dâwn che nia," a ti a.

⁴Chutiang tak chuan Jeroboama nupui chuan a ti a; a tho va, Silo khuah chuan a va kal a, Ahija in chu a va thleng a. Ahija chu

a tar tawh hle a, a mit a thim tawh avângin khuah pawh a hmu ãah thei tawh lo va.

⁵LALPA chuan Ahija hnênah, "Heta hi Jeroboama nupui a lo kal a, a fapa damloh chungchângah thil zâwt tûrin a rawn pan che a ni. A lo luh hunah hmeichhe dang daih angin a rawn inlan dâwn avângin, hetiang hian lo chhâng ang che," a ti a.

⁶Tichuan, kawngka bula a lo lût ke pên ri Ahijan a lo hriat chuan, "Lo lût teh khai, nang Jeroboama nupui. Engah nge mi dang anga i inbâwl danglam le? Chanchin ãah lo tak hrihl tûr chea tîrh ka ni zâwk asin.

⁷Kal la, Jeroboama hnênah, 'LALPA Israelte Pathian chuan, "Mipui zîng ata ka châwi sâng che a, ka mi Israelte chungah rorêltu atân ka siam baw a,

⁸David a chhûngkua aţangin lalram ka chhuhsak a, i hnênah ka pê che a; nimahsela, ka chhiahhlawh David a ang pawhin i awm duh si lo, ani kha chuan ka thupêka a zâwm a, ka mithmuha thil ãah chauh ti tûrin a thîlung zawng zawngin mi zui thîn a ni;

⁹nang erawh chuan i hmâa mi zawng zawng aiin thil sual i ti nasa zâwk a, mi tithinur tûrin pathian dangte i insiam chawp lehngâl a, milimte i chhûng a, mi hnuchhawn vei a-

¹⁰lo ngai reng rawh! Jeroboama chhûngkaw chungah chhiatna ka thlen ang a, Jeroboama hnên aţang hian Israel rama mipa zawng zawng, sal pawh, zalên pawh ni se, ka tiboral vek dâwn; mîin bawlhhlawh an phiat fai kêl ang mai hian Jeroboama chhûngkuaa la dam chhunte thlengin ka nuai bo vek ang.

¹¹Jeroboama chhûngkuaa mi khawpuia thi rêng rêng chu uiin an ei ang a, ramhnuia thîte chu chunglêng savaten an ei baw a; LALPAN a lo sawi tawh si a! a ti a ni.'

¹²Tikhân tho la, i inah va hâwng tawh rawh. I kêin khawpui chhûng a rah vêleh, naupang chu a thî ang.

¹³Israel mi zawng zawngin an sîn ang a, an phûm baw a; Jeroboama chhûngkaw zîngah chuan LALPA Israelte Pathian tâna ãhatna engemaw tak nei a nih avângin, thlâna phûm hlawh tûr awmchhun a ni.

¹⁴"Jeroboama chhûngkua tiboral tûrin LALPA chuan ama tân Israelte chungah lal tûr a rawn tung ding baw a; chumi nî chu a thlen tâk hi. Eng nî chu nge? E le, tûn hi a ni e!

¹⁵Tuiin rairuang a lên phe suau suau ang hian, LALPAN Israelte chu a sâwi nghing vê ang. LALPA thinurna chaw thî avângin hê ram ãah tak, an thlahtute hnêna a pêk aţang hian Israel-ho hi a pawt chhuak vek ang a, Luipui piah lamah a sawn darh vek ang.

¹⁶Thil sual tia, Israelte hruai sualtu Jeroboama sualna avângin Israelte chu a hawisan vê thung dâwn a ni," a ti a.

¹⁷Tichuan, Jeroboama nupui chu a tho va, a chhuak ta a, Tirza khuah a thleng a. An in kawngka a kân chiah tihin naupang chu a thi ta a.

¹⁸An phûm a; LALPAN a chhiahhlawh zâwlnei Ahija kal tlanga thû a sawi tâk ang khân, Israel-ho zawng zawngin an sîn ta a.

JEROBOAMA THIH THÛ

¹⁹Jeroboama thiltih dang, a rorêl dân leh râl a do thûte chu Israel lalte chanchin ziahnaah a chuang a.

²⁰Jeroboama rorêl hun chhûng chu kum 22 a ni. Tichuan, an thlahtute hnênah a muhîl ta a. A aiah a fapa Nadaba a lo lal ta a.

JUDAI RAM LAL REHOBAMA

²¹Solomona fapa Rehoboama chu Judai ramah a lal a. Lal a nihin Rehoboama chu kum 41 a upa a ni. Israel hnam zawng zawng zingah a hming awmna khawpui atâna LALPAN a thlan Jerusalem-ah kum 17 chhûng ro a rêl a. A nu hming chu Naamahi a ni a, Ammon mi a ni.

²²Juda-ho chuan LALPA mithmuhiin thil sual an ti a, an pute ai maha nasâa thil sual an tih tâk avângin a thîkthû an chawk tho ta a.

²³Hmun sâng te an dân a, tlâng sâng tinah leh thing hring tin hnuaiah ban serh te phunin thing milimte an siam vek a.

²⁴Ram chhûngah lah awmherh tak tak, mawngkawhur te an awm a. Israel fate hmâa LALPAN a hnawh chhuah tâk hnamho chin dân tenawm tinrêng an ching vê a.

²⁵Lal Rehoboama lal kum ngânaah chuan Aigupta lal Sisakan Jerusalem a rawn rûn a.

²⁶Lal ina ro te, LALPA ina ro hlu awmte chu a lâ a; engkim a la fai vek a. Solomonan rangkachak phâw a siam zawng zawngte pawh a la tel vek a.

²⁷Chûng thil thlâkna tûrin Lal Rehoboama chuan dân phâwte a siam a, lal in kawngkhâr vêngtu hotute kutah a dah a.

²⁸LALPA in chhûnga lal a luh apiangin vêngtute chuan an keng zêl a; tichuan, vêngtute pindana an dah lêt leh thîn a ni.

²⁹Rehoboama thiltih leh a chanchin dangte chu Juda lalte chanchin ziahna bû-ah a chuang lo vem ni?

³⁰Rehoboama leh Jeroboama te chu an dam chhûngin an indo reng a.

³¹Rehoboama chu a thlahtute hnênah a muhîl ta a, Davida khawpuia a pute kiangah an phûm a. A nu chu Ammon mi Naamahi a ni. A aiawhin a fapa Abijama chu a lo lal ta a.

BUNG 15**JUDAI RAM LAL ABIJAMA**

¹Nebata fapa Lal Jeroboama chu kum 18 a lal kumin Abijama chu Judai ramah a lo lal a.

²Jerusalemah kum thum a lal a. A nu chu Abisaloma tunu Maaki a ni.

³A pain sualna kawng tinrêng a lo zawh thîn ang kha a zawh vê a; a pu Davida thinlung a rinawm angin, LALPA a Pathian lamah rinawmna thinlung a pu vê bawh hek lo.

⁴Nimahsela, Davida zârah LALPA a Pathianin Jerusalemah khâwnvâr a pê a, a thih hnûa Jerusalem tung ding zêl tûr fapa a pê a;

⁵Davida chuan LALPA mithmuhiin thil thâ a ti tlat a, Hit mi Uriah chungchâng tih chauh lovah chuan a dam chhûngin a

thupêkte rêng rêng a hawisan ngai lo.

⁶A dam chhûngin Rehoboama leh Jeroboama te chu an indo reng a.

⁷Abijama thiltihte leh a chanchin dangte chu, Juda lalte chanchin ziahna bû-ah a chuang a ni lo vem ni? Abijama leh Jeroboama te chu an indo reng a.

⁸Abijama chu a thlahtute hnênah a muhîl ta a, Davida Khawpuiah an phûm a. A aiah a fapa Asa chu a lo lal a.

JUDAI RAM LAL ASA

⁹Israel lal Jeroboama lal kum 20naah chuan, Asa chu Juda lalah a lo awm tan a.

¹⁰Jerusalemah kum 41 a lal a. A pi hming chu Maaki, Abisaloma tunu a ni.

¹¹Asa chuan a pu Davida angin LALPA mithmuhiin thil thâ a ti tlat a.

¹²Ram chhûng aţangin mawngkawhurte chu a hnawt chhuak a, a puten an lo siam mitem pathiante chu a paih bo vek a.

¹³A pi Maaki pawh Aseri pathian milim tenawm a siam avângin lalnu a nihna a hlihsak hial a. A milim tenawm tak chu a kih thlûksak a, Kidron Luiah a hâl a.

¹⁴Mahse hmun sângte erawh chu nuai bo a ni vê lo. Amaherawhchu, Asa chuan a dam chhûngin LALPA lamah rinawmna thinlung a pu reng a ni.

¹⁵A pain a lo hlan tawhte leh amah ngeiin a hlan tawh thil: silvar te, rangkachakte leh bungbêlte chu LALPA inah a seng lût a.

¹⁶An dam chhûngin Asa leh Israel lal Baasa te inkârah indona a awm reng a.

¹⁷Israel lal Baasha chu Judai ram do tûrin a rawn thawk chho va, Juda lal Asa hnênah mi tûmah an luha an chhuah theih loh nân Rama khua chu a hung thâ a.

¹⁸Asa chuan lal in leh LALPA in sum bâwma ro sum, silvar leh rangkachak la awm zawng chu a la vek a, a chhiahlawhte kutah a hlân a. Lal Asa chuan Suria lal, Heziona fapa, Damaska khuaa mi Tabrimmona fapa BenHadada hnênah a thawn a,

¹⁹“I pa leh ka pa inkâra inhriat thiamna ang kha nang leh keia inkârah hian awm zêl rawh se. Hei le, silvar leh rangkachak thilpêk ka rawn thawn che a. Israel lal Baasa hi ka hnên aţanga a inhnuhdawh theih nân, amah nêna in inremna chhu chatin rawn thawk chhuak ta che,” a ti a.

²⁰Ben-Hadada chuan Lal Asa thû chu a zâwm a, Israel khawpuite rûn tûrin a sipai hotu rual a tîr a. Ijon te, Dan te, Abel Beth Maaka te leh Chinereth bâkah Naphtali ram zawng zawng a rûn ta a.

²¹Baasha chuan chû thû chu a lo hriatin, Rama khuaa a siamthat hnâ chu a chawhlsan a, Tirza khuaah a awm ta hlê hlê a.

²²Lal Asa chuan Judai ram zawng zawngah thupêk a chhuah a; tûmah an âwl thei lo. Rama khaw din that nâna Baashan lung leh thing a chhêk khâwm sâ chu an thiar chhuak vek a; Benjamin biala Geba leh Mizpa khaw din that nân Lal Asa chuan a hmang ta a.

²³Asa thiltih dang te, a chakzia te, khawpui a din chanchinte chu Juda lalte chanchin ziahna bûah a chuang a ni lo vem ni? A upat hnûah erawh chuan ke na hri a vei ta a.

²⁴Tichuan, Asa chu a pute hnênah a muhîl ta a, a pu Davida Khawpuih a thlahtute kiangah an phûm a. A aiah a fapa Jehosaphata a lo lal ta a.

ISRAEL LAL NADABA

²⁵Juda lal Asa rorêl kum hnihnaah chuan Jeroboama fapa Nadaba chu Israel lalah a țang a, Israelte chungah kum hnih a lal a.

²⁶A pa kawng chu rawn zawh vên LALPA mithmuhah thil sual tak a ti a, a sualna chuan Israel mite a hruai sual ta a.

²⁷Isakar chhûngkuah mi Ahija fapa Baasha chuan ani chu a phiar rû a. Nadaba hova Israel mi zawng zawngin Philistia ram chan chhûnga Gibethon khua an hual laiin, Baasha chuan Gibethon-ah chuan a that ta a.

²⁸Juda lal Asa lal kum thumnaah Baashan a that a, a aiah a lal ta a ni.

²⁹Chutia a lo lal vêleh chuan Jeroboama chhûngte zawng zawng chu a that fai vek a. LALPAN a chhiahhlawh Ahija, Silo khuah mi hmanga a lo sawi tawh ang khân, a thah chimih vek hmâ loh chuan Jeroboama mi leh sâ, thaw thei tawh rêng rêng chu tûmah a zuah lo;

³⁰chû chu Jeroboama sualna avânga lo awm a ni, a thil sual tihin Israel mite a tikhawlo vek a, chuvâng chuan LALPA Israelte Pathian thinurna a chawh tho ta a ni.

³¹Nadaba thiltih dangte leh a chanchinte chu Israel lalte chanchin ziahna bû-ah a chuang a ni lo vem ni?

³²Asa leh Israel lal Baasha te chu an dam chhûngin an indo reng a.

ISRAEL LAL BAASHA

³³Juda lal Asa lal kum thumnaah chuan Ahija fapa Baasha chu Tirza khuah Israel zawng zawng lalah a țang a, kum 24 chhûng ro a rêl a.

³⁴LALPA mithmuhah thil sual a ti tîn a, Jeroboama kawng a zawh bawh a, a sualna chuan Israel mite chu sual lamah a hruai khawlo vek a.

BUNG 16

¹Baasha tâna chanchin țha lo, LALPA thû chu Hanania fapa Jehua hnênah a lo thleng a:

²Vaivut zîng ata ka châwi sâng che a, ka mi Israelte chungah lalah ka siam che a; nimahsela, Jeroboama kawng i zawh tlat a, ka mite chu sualah i chantîr a, an sualna chuan mi tithinur ta a.

³Chuvângin, Nebata fapa Jeroboama chhûngkaw chungah ka tih ang bawkin Baasha thlahte leh an chhûngkuah hi mathei lovin ka tiboral dâwn a ni.

⁴Baasha mi leh sâ, khawpuia thîte chu uiin an ei ang a, ramhnuia thite chu chunglêng savâten an ei ve thung ang,” a ti a.

⁵Baasha chanchin te, a thiltihte leh a chakzia te chu Israel lalte chanchin bûah ziah a ni lo vem ni?

⁶Baasha chu an thlahtute hnênah a muhîl vê ta a, Tirza khuah an phûm a. A aiah a fapa Elaha chu a lal ta a.

⁷LALPA mithmuha thil sual tak a tiha, a thinurna chawh tho tûrin a kut ngei a thawha, Jeroboama chhûngkuah ang maia a awm avâng leh, a tihhlum vek avângin Baasha leh an chhûngkuah demin LALPA thû chu Hanania fapa zâwlnei Jehua hnênah a thleng ta a ni.

ISRAEL LAL ELAHA

⁸Juda lal Asa rorêl kum 26-naah, Baasha fapa Elaha chu Israelte chungah a lo lal a, Tirza khuah kum hnih ro a rêl a.

⁹A hote zînga mi pakhat, a tawilîr zâtve hotu Zimria chuan a phiar rû a, chutih lai chu Tirza khuah a in enkawltu Arza inah zû a in ruih lai a ni a.

¹⁰Zimria chu a va lût a, a va bei a, a that a, a aiah a lal ta a; chû thil chu Juda lal Asa kum 27 a lal kuma thleng a ni.

¹¹Chutia ro a rêl țana, lalthutthlêng a luah vêleh Baasha chhûngkuah mi zawng zawng a that vek a; a chhûngkhat hnâi leh a tîante chenin mipa pakhat tê pawh a zuah lo.

¹²Tichuan, Baasha chungah thil țha lo lo thleng tûr, LALPA thû zâwlnei Jehua hmanga a sawi ang khân Zimria chuan Baasha chhûngkuah chu a rawt chimit vek a,

¹³chû thil chu Baasha leh a fapa Elaha sualna zawng zawng te leh, Israelte an hruai sual a, an milem pathiante hmanga LALPA Israelte Pathian an tithinur êm avânga lo thleng a ni.

¹⁴Elaha thiltih leh a chanchin dang zawng chu, Israel lalte chanchin ziahna bû-ah a chuang a ni lo vem ni?

ISRAEL LAL ZIMRIA

¹⁵Juda lal Asa lal kum 27-naah chuan Zimria chu Tirza-ah ni sarih a lal a. Sipaihote chu Philistia khua Gibethon huala an inkulh lai a ni a.

¹⁶Hualtu sipaite chuan, “Zimrian lal a phiar rû a, a that” tih thû an lo hria a. Tichuan, Israel-ho zawng zawng chuan an sipai hotu Omria chu an riahhmunah chuan Israel lalah an siam a.

¹⁷Tichuan, Omria chu Israel mi zawng zawng nêen Gibethon ațang chuan an chho va, Tirza khua chu an hual a.

¹⁸Khua an la ta tih Zimrian a hmuh chuan lal in chhûnga kulhah a tîn lût a, lal in chawp chuan amah a inhâl khum a, a thi ta a;

¹⁹chû thil chu LALPA mithmuha thil sual a tih avâng leh, Jeroboama kawng zawh a, ama sualnain Israelte a hruai sual vânga lo thleng a ni.

²⁰Zimria thiltih chanchin dang te, a phiarrûk dân te chu Israel lalte chanchin ziahna bûah a chuang a ni lo vem ni?

ISRAEL LAL OMRIA

²¹Israel mite chu pâwl hniah an ințhen phawk a: mipui zâtve chuan Ginatha fapa Tibnia chu thlâwpin lalah siam an tum a, a zâtve dang chu Omria lamah an țang a.

²²Omria lama tâng mipuite chuan Ginatha fapa Tibnia lama tângte chu an hneh ta a. Tichuan, Tibnia chu a thì a, Omria chu a lal ta a ni.

²³Juda lal Asa lal kum 31-naah chuan Omria chu Israelte lal a lo ni ta a, kum 12 chhâng ro a rêl a. Tirza-ah kum ruk a lal a.

²⁴Samari tâng chu Semera hnên a tângin silvar tangka talent hnihin a lei a; tâng chungah chuan khua a din a, a khaw siam hmingah chuan a tâng neitu hmasa Semera hming châwiin Samari a ti a.

²⁵Omria chuan LALPA mithmuhah thil sual a ti a, a hmâa mi zawng zawngte ai pawhin a che khawlo nasa zâwk a.

²⁶Nebata fapa Jeroboama kawng a zawh a, Israel mite chu sualna kawng zawhtîrin a hrui khawlo vek a, an mitem pathiante hmangin LALPA Israelte Pathian thinurna a chaw tho ta a.

²⁷Omria thiltih chanchin dang te, a chakzia a lantîr dân te chu Israel lalte chanchin ziahna bûah a chuang a ni lo vem ni?

²⁸Tichuan, Omria chu an thlahtute hnênah a muhîl ta a, Samari khuah an phûm a. A fapa Ahaba chu a aiah a lal ta a.

ISRAEL LAL AHABA

²⁹Juda lal Asa lal kum 38-naah chuan, Omria fapa Ahaba chu Israelte chungah a lo lal a; Omria fapa Ahaba chu Samari khuah kum 22 chhâng a lal a.

³⁰Omria fapa Ahaba chuan a hmâa mite zawng aiin LALPA mithmuhah thil sual a ti nasa zâwk a.

³¹Nebata fapa Jeroboama sualna kawng zawh te chu eng thamah mah ngai lo ang maiin Sidon lal Ethbaala fanu Jezebeli chu nupuih a nei a; Baala rawngbâwlin chibai a bûk ta hial a.

³²Samari khuah Baala tempul a sakah chuan Baala tân maichâm te a din leh ta zêl a.

³³Ahaba chuan thing milim pathian a siam a. Tûn hmâa Israel lal lo awm tawh zawng zawng aiin Ahaba chuan LALPA Israelte Pathian chu a tithinur nasa zâwk a ni.

³⁴A hun laiin Bethel mi Hielan Jeriko a din thâ a. LALPA thû anga Nuna fapa Josua lo sawi tawh angin chû mi chuan a fatîr Abirama chânin a lungphûm a phûm a, a fapa naupang ber Seguba chânin kulh kawngkâ a siam leh bawk a ni.

BUNG 17

ELIJAN KHAWKHÊNG TUR A PUANG

¹Gilead rama Tishbe mi Elija chuan Ahaba hnênah, “LALPA Israelte Pathian, a hmâa dinga chibai ka bûk thina nunna chhâlin, ka thû chauh lo chuan kum engemaw chen chu ruah leh dai rêng rêng a tla lo vang,” a ti a.

²LALPA thû chu a hnênah a lo thleng a,

³“Heta tâng hian kal bo la, khawchhak lam pan la, Jordan luia luang lût Kerith Luia chuan va biru rawh.

⁴Chû lui tui chu i tlan ang a, chutah chuan nangmah chawm tûrin choakte thû ka pe tawh e,” a ti a.

⁵Tichuan a kal a, LALPA thû ang tak chuan a ti a, Jordana luang lût Kerith Lui bulah chuan a va awm ta a.

⁶Choakte chuan zîngah chhang leh sâ an rawn pê a, tlaiah chhang leh sa an rawn pe leh thîn a; lui tui chu a tlan bawk a.

⁷Ram chhângah ruah rêng rêng a sîr loh avângin chu lui tui pawh chu a kang ta a.

ELIJA LEH HMEITHAI

⁸LALPA thû chu a hnênah a lo thleng a,

⁹“Tho la, Sidon rama Zarephath-ah va kal la, chutah chuan awm reng ang che. En teh, chuta hmeithai pakhat chu chawm tûr chein thû ka pe tawh e,” a ti a.

¹⁰Tichuan a tho va, Zarephath-ah chuan a kal ta a. Khaw kulh kawngka bul a lo thlen chuan hmeithai pakhat hian thing a lo fawm a. Ani chu a han ko va, “Ka in tûr tui fianin tlem min suahsak ta che,” a ti a.

¹¹Tui la tûra a kal lai chuan a han âu leh a, “Khawngaihin chhang tlem mi rawn lâksak bawh rawh âw,” a ti a.

¹²Ani chuan, “LALPA i Pathian nung renga hmingin ka sawi e, chhang pawh ka nei lo va, bêla chhangphut veikhat lek leh bûra hriak tlem tê chauh ka nei a; en teh hei, ka fapa nêna kan ei tûr siam nân thingtâng ka fawm a nih hi, tichuan kan ei ang a, kan thi tawh mai ang chu,” a ti a.

¹³Elija chuan, “Hlauthâwng mah ta che; i sawi ang chuan va ti la, mahse i chhang siam chu min pe hmasa phawt la; chumi zawhah i fapa nêna in ei tûr chu i siam leh dawn nia.

¹⁴LALPA Israelte Pathian chuan heti hian a ti: ‘LALPAN leiah ruah a sîrtîr hmâ chuan bêla chhangphut chu ei zawh a ni lo vang a, bûra hriak pawh a kang hek lo vang,’ tiin,” a ti a.

¹⁵Tichuan a va kal a, Elija sawi ang chuan a va ti a; amah leh ani leh a chhângte chuan ni rei tak an eiho ta a.

¹⁶LALPA thû Elijan a sawi ang takin chhangphut bêl chu phâi lovin, hriak bûr pawh chu kang lovin a awm ta reng a.

ELIJAN HMEITHAI FA A TINUNG

¹⁷Chumi hnûah chuan in neitu hmeichhe fapa chu a dam lo va. A dam lohna chu a nasat êm avângin a thâw pawh a awm tawh lo va.

¹⁸Elija hnênah, “Nang Pathian mî, ka chungah hian eng nge i tih dawn? Ka sualna mi hriat chhuahtîra, ka fapa tihlum tûr hian em ni i lo kal?” a ti a.

¹⁹Ani chuan a hnênah, “I fapa chu mi han pe teh,” a ti a. Tichuan, a pawm lai chu a lâksak a, a awmna pindan chungnungah a kalpui a, ama khumah chuan a muttîr a.

²⁰LALPA chu a âu va, “Aw LALPA ka Pathian, ka thlen-in hmeithai chungah chhiatna thlentîrin a fapa hi i tihlum ta em ni?” a ti a.

²¹A chungah chuan wawi thum a zuk bawh a, LALPA a âu leh vak vak a, “Aw LALPA ka Pathian, hê naupang nunna hi a hnênah rawn pe kîr leh tûrin ka dîl che a ni,” a ti a.

²²LALPA chuan Elija âu âw chu a lo ngaithlâksak a; naupang nunna chu amahah chuan a lo kîr leh a, a lo harh chhuak leh ta a.

²³Elija chuan naupang chu a pawm a, pindan chungnung a tâng chuan in chhângah a chhukpui a, a nu chu a hlân a. Elija chuan,

“En teh le, i fapa chu a lo dam leh tâk hi!” a ti a.

²⁴Hmeichhia chuan Elija hnênah, “Hei vâng hian Pathian mi i ni tih tûnah ka hre Chiang ta a, LALPA thú i kâa mi pawh thutak a ni tih ka hre ta e,” a ti a.

BUNG 18

AHABA HNENA ELIJA THUCHAH

¹Ni tam tak hnû, a kum thumnaah LALPA thú chu Elija hnênah a lo thleng a, “Kal la, Ahaba hnênah va inlan la, lei chungah hian ruah karawn sûtîr tawh dâwn e,” a ti a.

²Tichuan, Elija chu Ahaba hnêna inlan tûrin a kal ta a; Samari ram chu an tîm nasa hlê a.

³Ahaba chuan a in enkawltu Obadia chu a ko va. (Obadia chuan LALPA a tîh êm êm a.

⁴Jezebelin LALPA zâwlneite a râwt vak lai pawh khân Obadia chuan zâwlnei zâ a hruai a, sawmngâ vê vên pûkah a thukrû a, chaw leh tuiin a lo chawm tîin a ni.)

⁵Ahaba chuan Obadia hnênah, “Ram chhûnga lui tê leh tuikhur awmna zawng zawng va fang chhuak vek îla; sakawrte leh sabengtunge hi tihhlum êm ngai lovin hlobet tlêm talin kan la chawm nung thei mial mahnâ,” a ti a.

⁶Tichuan, an fan tûr ram chu an insem a; Ahaba chu amahin a kal chhuak a, Obadia pawh amahin kawng dangah a kal baw a.

⁷Obadia chu kawnga a kal laiin Elija nêan an intâwk thut a; tu nge a nih a hre ngâh mai a, a bawkkhup a, “Ka pu Elija, nang i ni mâw?” a ti a.

⁸Ani chuan, “Ni e. Kal ta la, i pu hnênah, ‘Elija chu heta hi a awm e,’ va ti ta che,” a ti a.

⁹Ani chuan, “Eng thil sual nge ka tiha, i chhiahhlawh hi thi tûr ringawta Ahaba kuta min hlan mai dâwn le?”

¹⁰LALPA Pathian nung chhâlin ka sawi e, ka pu hian nangmah zawng chhuak tûra mi a tîr lohna ram leh hnam a awm tawh hlei nê; ‘Hetah a awm lo,’ an tih chuan chû ram leh hnam hnênah chuan an hmu lo tak tak che a ni tih finfiah nân chhia a chhamtîr zêl asin.

¹¹Nang erawh chuan, ‘I pu hnênah va kal la, “Elija chu heta hi a awm e,” tîin va hrilh rawh,’ mi ti mai si a!

¹²Ka kalsan vêleh che hian LALPA Thlaraubin ka hriat loh hmunah a hruai bo daih si ang che a; kei chu Ahaba hrilh tûrin ka va kal ang a, a rawn hmuh leh si loh che hian min that mai dâwn asin. Mahse, kei i chhiahhlawh hi ka tleirâwl lai a tanga LALPA tîh mi ka ni a.

¹³Jezebelin LALPA zâwlneite a thah chiam laia ka thiltih: LALPA zâwlnei zâ, sawmngâ vê vên pûka ka thuhrûka, chaw leh tuia ka chawm thúte kha, nang ka pu hi an hrilh lo che em ni?

¹⁴Tûnah, ‘I pu hnênah va kal la, “Elija chu heta hi a awm e,” tîh hrilh tûrin mi ti si a. Mi lo that ngei ang maw le!” a ti a.

¹⁵Elija chuan, “Sipaihote LALPA, a hmaa dinga chibai ka bûk thina nunna chhâlin ka sawi e, mathei lovin waviinah hian ani hnênah chuan ka inlan ngei tûr a ni,” a ti a.

¹⁶Tichuan, Obadia chu Ahaba hmu tûrin a kal a, a va hrilh ta a; Ahaba pawh Elija hmu tûrin a lo kal vê ta a.

¹⁷Ahaban Elija a han hmuh chuan, “Nang hi mâw Israelte chaw buaitu chu?” a ti a.

¹⁸Ani chuan, “Israelte hi ka chaw buai awzâwng lo ve, nang leh i pa chhûngkua hian LALPA thupêkte in hawisan a, Baala te in zui tâk avânga chaw buaitu chu nangmahni hi in ni zâwk asin.

¹⁹Chuvâng tak chuan Israel mi zawng zawng leh, Baala zâwlnei 450 leh, Aseri zâwlnei 400 rual, Jezebeli dawhkân kîl thînte kha ko khâwm la, Karmel Tlângah ka hnênah rawn kaltîr vek rawh,” a ti a.

KARMEL TLÂNGA ELIJA HNEHNA

²⁰Tichuan, Ahaba chuan Israel mi zawng zawng chu a kohtîr a, zâwlneite pawh Karmel Tlângah chuan a ko khâwm baw a.

²¹Elija chu mipui zawng zawng lamah a kal a, “Tuilairapin eng chen nge in awm dâwn? LALPA hi Pathian a nih chuan zui ula; Baala zâwk hi a ni in tih leh zui ta che u,” a ti a. Mahse mipui chuan kam khat mahin an chhâng lo.

²²Elija chuan mipuite hnênah, “Kei chauh hi LALPA zâwlnei awmchhun chu ka ni ta; Baala zâwlneite erawh chu mi 450 lai an ni a.

²³Chuvângin, bâwngpa pahni min rawn pê ula; bâwngpa an duh zâwk chu annin thlang sela, chan sawm sela, thing chheh chungah dah rawh se; a hnuaiah chuan mei chhêm hauh suh se; keiin bâwngpa pakhat zâwk chu ka buatsaih vê ang a, thing chungah ka chhep ang a, a hnuaiah mei ka chhêm bîk lo vang.

²⁴In pathiante hming chu lamin in âu ang a, kei pawhin LALPA chu a hmingin ka âu ve baw ang a; meia rawn chhângtu Pathian zâwk zâwk chu, Pathian ni rawh se,” a ti a. Tichuan, mipuite chuan an vâiin, “A tîa khawp ang chu,” an ti a.

²⁵Elija chuan Baala zâwlneite hnênah, “Bâwngpa in duh zâwk zâwk hi thlang ula, buatsaih hmasa ta che u, a tam zâwk in nih hi; tichuan, in pathian chu in âu dâwn nia; mahse a hnuaiah tûma’n mei chheh loh tûr a ni,” a ti a.

²⁶Tichuan, bâwngpa an pêk chu an lâ a, an buatsaih a, “Aw Baal, min lo ngaithla teh!” tîin, Baala chu zîng a tângin chhûn lai thlengin an âu va. Mahse, aw rî emaw, chhânna emaw engmah a awm lo. An maichâm siam vêlah te chuan an tûm tawt tawt a.

²⁷Chhûn lai a lo ni a, Elija chuan nuihsawh chungin, “Ring lehzualin âu ta che u, pathian a ni alâwm; a la inngaihtuah mêk emaw, a la buai deuh emaw, a zin bo emaw, a muthlû emaw a nih tâkin kâi harh teh u,” a lo ti a.

²⁸Tichuan, an âu ring sauh sauh va, an tih thîin dânin thi chhuak zawih zawih khawpin chemtê leh feiin an inzai pem a.

²⁹Chawhnu her a lo ni a, tlai lam inthâwi hun thlengin thuchham an sawi rual dual dual a. Nimahsela, aw rîvâ rêng a awm lo; tûmah chhângtu an awm lo va, rawn ngaihventu pawh an awm hek lo.

³⁰Chutah le, Elija chuan mipui zawng zawng hnênah, “Mi rawn hnaih rawh u le,” a ti a. Tichuan, mipui zawng zawng chuan an rawn hnaih a. LALPA maichâm tihchim tawh chu a siam thâ a.

³¹“I hming chu Israela a ni tawh ang,” tia LALPA thú a lo thlenna, Jakoba fapa hnam 12 zâtin Elija chuan lung a lâ a.

³²Chûng lung hmang chuan LALPA hmingin maichâm a siam a; maichâm chu a vêlin thlai chi tehkhâwngh hnih lenga zauvin a lai khuar a.

³³Thing a chhep a, bâwnghpa chu a chan sawm a, thing chheh chungah chuan a dah a, “Tuibêl palî-ah tui tikhat ula, hâlrâla hlan tûr leh thing kha leih huh rawh u,” a ti a.

³⁴Han leih nawn leh teh u,” a ti a, a vawî hnih nân an leih leh a; “Han vawî thum teh u,” a ti a, tûm thum an leih nawn ta a.

³⁵Tichuan, maichâm vêlah chuan tui chu a luanin a luang a; lai khuarah chuan a tling khat ta hial a.

³⁶Tlai lam inthâwî hunah chuan zâwlnei Elija chu a lo kal hnâi a, “LALPA, nang Abraham a te, Isaaka te, Israela te Pathian, vawîinah hian nang hi Israelte Pathian i ni a, kei hi i chhiahhlawh ka ni a, hêng thilte hi i thú ngeia ti ka nihzia rawn lantîr ang che.

³⁷Aw LALPA, min lo ngaithla la, hêng mite hian nang chu LALPA Pathian i nihzia leh, nangma hnêna an thînlunga an inlamlêl leh theih nân min ngaihthlâksak mawlh ang che,” a ti a.

³⁸Tichuan, LALPA mei a lo tlâ a, hâlrâl thîlhlan chu thing te, lung te leh a vaivut chawp chuan a rawn kâng ral vek a, lai khua tui pawh a hîp kang vek a.

³⁹Mipui zawng zawngin chû chu an hmû a, an bawkkhup vek a; “LALPA hi Pathian ngei chu a lo ni e! LALPA hi Pathian chu a lo ni e!” an ti a.

⁴⁰Elija chuan an hnênah, “Baala zâwlnei-ho kha man rawh u! Tûmah chhuah suh u!” a ti a. Tichuan an man a; Elija chuan Kishon Luiah a hruai thlâ a, chutah chuan a that ta vek a.

KHAWKHÊNG A TÂWP

⁴¹Elija chuan Ahaba hnênah, “Han chho la, eiin in tawh rawh le; ruah pui sîr tûr thâwm a awm ta e,” a ti a.

⁴²Tichuan, Ahaba chu eia in tûrin a chho ta a. Elija pawh Karmel tlâng chhîpah a chho va; leiah a kûn a, a khûp kârah a hmai a zu rawlh a,

⁴³a chhiahhlawh hnênah, “Chho la, tui pui lam han thlîr teh,” a ti a. A han chho va, a han thlîr vêl a, “Engmah a awm lo,” a ti a. Ani chuan “Han kal leh rawh,” tiin vawî sarîh a tîr nawn a.

⁴⁴A vawî sarîhnaah chuan, “Chhûm tereuh tê, mîhring kutphah tiat lek hi tui pui aţangin a chho ve!” a ti a. Ani chuan, “Ahaba hnênah han kal la, ‘I tawîlîr buatsaih la, ruahin a dan hmâ che hian chhuk thla ngâh rawh,’ tih han hrîlh rawh,” a ti a.

⁴⁵Chutih lai chuan chhûm leh thlîin vîn chu a tuam thim mup mup tawh a, ruahpuivânâwn a sîr ta a. Tichuan, Ahaba chu a tlân chhuak a, Jezreel khuah a kal ta a.

⁴⁶LALPA kut chuan Elija chu a awmpui a; a puan ven sâwî chhîngin, Jezreel kawtchhuah thlengin Ahaba hmâah chuan a tlân ta a.

BUNG 19

ELIJAN JEZEBELI A TLAN BOSAN

¹Ahaba chuan Elija thiltih dan leh, khandaiha zâwlnei zâwngh zâwngh a thah vek thú chu Jezebeli a hrilh a.

²Jezebeli chuan Elija hnênah, “Khâng mite i tihdân anga naktûk hetih huna i nunna chungah ka tih vê loh tâkah, pathianten an tih tihin, nasa lehzual pawhin mi ti rawh se,” tiin mi a va hrilh tîr a.

³Chû thú a lo hriat chuan a tho va, sahimna zawngin a tlânchhe ta a. Judai rama Beerseba-ah a kal a, chutah chuan a chhiahhlawh chu a hnutchhiah a.

⁴Ani erawh chu thlalêr ni khat kala hlâah a kal zêl a, juniper thing hnuaiah a va thú a. Chutah chuan thih dîlin a tawngtai a, “A tâwk ta e; LALPA, tûnah hian ka nunna hi la tawh mai rawh, ka pute aîin ka t̃ha chuang si lo!” a ti a.

⁵Chutia juniper thing hnuaia a muthilh lai chuan chawp leh chilhin Vântirhkohin a rawn khawih a, a hnênah, “Tho la, ei rawh,” a ti a.

⁶A han hawî vêl a, a lu bulah chuan meilinga ur hmin sâ chhang leh tuithâwl a lo awm a. Tichuan, a eiin a in a, a mu leh ta a.

⁷LALPA Vântirhkoh chu a lo kal leh a, a rawn khawih leh a, “Tho la, ei rawh, i kalna tûr a hla si a,” a ti a.

⁸Tichuan a tho va, a ei a, a in ta a; chû chuan chakna a pê a; tichuan, Pathian tlâng, Horeb thlengin ni 40 leh zan 40 a kal ta a.

⁹Chumi hmuna pûk chhûnghah chuan a lût a, zân a riak a; ngai teh, a hnênah chuan LALPA thú a lo thleng a, “Elija, hetah hian eng nge i tih?” a ti a.

¹⁰Ani chuan, “LALPA, Sipaihote Pathian tân t̃hahnem ka ngai êm êm t̃hîn a; Israel faten i thuthlung an hawisan a, i maichâmte an tichhia a, i zâwlneite chu khandaihin an that a. Kei chauh hi ka awm tawh a; ka nunna lâk tumin min zawng a nih hi,” a ti a.

ELIJA HNÊNA PATHIAN INPUANNA

¹¹Ani chuan, “Kal chhuak la, tlâng chungah sâwn LALPA hmâah va dîng rawh,” a ti a. LALPAN a kal pelh chuan thli nâ leh chak tak maiin tlâng chu a chhêm chim a, LALPA hmâah chuan lungpuite chu a tikeh rem rum a; mahse, LALPA chu thlî-ah chuan a awm lo; thlî teh zawhah chuan lîr a ngîngah a; mahse lîrngîngah chuan LALPA chu a awm lo;

¹²lîrngîngah zawhah mei a lo chhuak a; nimahsela, LALPA chu meiah chuan a awm lo; mei zawhah chuan aw nêam dam diai a lo chhuak a.

¹³Chû chu Elijan a lo hriat chuan a puanin a hmai a tuam a, a va chhuak a, pûk kawngkâah a va dîng a. Chawp leh chilhin âw chuan, “Hetah hian eng nge i tih, Elija?” a ti a.

¹⁴Ani chuan, “LALPA, Sipaihote Pathian tân t̃hahnem ka ngai êm êm a; Israel faten i thuthlung an hawisan a, i maichâmte an tichhia a, i zâwlneite chu khandaihin an that a. Kei chauh hi ka awm tawh a; ka nunna lâk tumin min zawng a nih hi,” a ti a.

¹⁵LALPA chuan a hnênah: “Damaska Thlalêr kawngah kîr leh ta la; i va thlen hunah Hazaela chu Suria lal atân hriak thih ang

che.

¹⁶Nimshia fapa Jehua chu Israel lal atân hriak thih bawk la. Abel Mehola khuaa Saphata fapa Elisa chu i aiawh tûrin zâwlnei atân hriak i thih bawk tûr a ni.

¹⁷Heti hi a ni ang, tûpawh Hazaela khandaih pumpelh apiang Jehuan a lo that ang a; tûpawh Jehua khandaih pumpelh apiang Elisan a lo that ang.

¹⁸Chutiang chu nimahse, Baal hmâa la ethingthi ngai lo leh, an hmuï pawha la fâwp ngai lo Israel ramah hian mi 7,000 ka tân ka la khêk asin,” a ti a.

ELISAN ELIJA HNUNG A ZUI

¹⁹Tichuan, chû hmun chu a kalsan a, Saphata fapa Elisa chu a hmâa bâwngpa tuak 12 nên lei leta, a tuak 12-na amahin a lo khalh lai a va hmû a. Elija chuan ani chu kal pelh pahin a puan chu a bahtîr a.

²⁰Ani chuan bâwngpate chu kalsanin Elija chu a ûm a, “Khawngaihin ka pa leh ka nu te ka va fâwp phawt ang a, tichuan ka zui dâwn che nia,” a ti a. Ani chuan, “Va kîr leh ta che: thil ka tihsak che kha i hria mâw?” a ti a.

²¹Elisa chu a va kîr a, a bâwng chhawr laite chu a kâi a, a talh a, bâwngpa thuamte chuan a sâ chu a chhûm a, mite chu a sem a, an ei ta a. A tho va, Elija chu a zui a, a chhiahhlawhah a tang ta a.

BUNG 20

AHABAN SURIA-HO A HNEH

¹Suria lal Ben-Hadada chuan a sipai zawng zawng a khâwm a; a lama tangho an sakawrte leh an tâwlailîrte nêna lo thawk chu lal 32 an ni a. Samari khua chu bei tûrin an pan chho va, an hual ta a.

²Khawpui chhûnga Israel lal Ahaba hnênah mi a tîr a, “Ben-Hadadan heti hian a ti:

³I tangkarua leh i rangkachakte kha ka tâ a ni a; i nupui duhawm ber berte leh i fanaute pawh ka tâ an ni,” a ti e,” an ti a.

⁴Israel lal chuan a chhâng a, “Aw lalber, ka pu, i sawi ang tak chuan keimah leh ka neih zawng zawng hi i tâ a ni e,” a lo ti a.

⁵A mi tirhte chu an va kal leh a, “Ben-Hadada chuan, ‘I hnênah mirawn tîrin, “I tangkarua leh rangkachak te, i nupuite leh i fanaute kha min pe tûr a ni,” tiin karawn chah nâ a;

⁶naktûk tûn ang hunah hian ka mite karawn tîr ang a, i in leh i chhiahhlawhte in chu anrawn dap ang. I mit latu thil engpawh anmahni kut ngeiin la zâwk rawh se,” a ti e,” an ti a.

⁷Tichuan, Israel lal chuan a ram chhûnga puipate chu a ko va, “En teh u, hê mihring hian buaina chawh chhuah a tum dân hi, ka nupuite, ka fanaute, ka tangkarua leh ka rangkachakte a hnêna pe vek tûrin mirawn ti a; ka hnial pawh a ni si lo va,” a ti a.

⁸Puipate leh mipui zawng zawng chuan, “Bengkawn tawh suh la, rem ti bawk hek suh,” an ti a.

⁹Tichuan, Ben-Hadada mi tirhte hnênah chuan, “Ka pu lal hnênah chuan, ‘I chhiahhlawh hian irawn chah hmasak ang khân ka ti ang, mahse tûna mi hi chu ka ti thei lo vang,’ a ti, tiin va hrilh rawh u,” a ti a. Mi tirhte chu an chhuak a, chû thû chu an va thlen a.

¹⁰Ben-Hadada chuan mi a tîr leh a, “Samari khuaah hian ka hoten vei khat theuhva an insem tham vaivut ka hnutchhiah a nih vaih chuan pathianten duh tâwkin min sawisa rawh se, chû aia nasa pawhin,” a ti a.

¹¹Israel lal chuan, “Heti hian va hrilh rawh u, ‘Râl bei tûra inthuan lain râlthuan hlîp thla tawh ang hrima i han uan vei le a ti,’ va ti rawh u,” a ti a.

¹²Chû thû Ben-Hadadan a lo hriat chuan lal dangte nên puan inah chuan zu an lo in ho va, a hote hnênah chuan, “Inpeih rawh u le,” a ti a. Khawpui bei tûr chuan an inbuatsaih ta a.

¹³Chû vêleh Israel lal Ahaba hnênah zâwlnei a lo kal nghâl a, “LALPA chuan, ‘Heng sipai rual zozâi hi i hmû mâw? Ngai rawh, vawinah hian i kutah ka pê ang a, tichuan kei hi LALPA ka ni tih i hria ang,’ a ti,” arawn ti a.

¹⁴Ahaba chuan, “Tu hmangin nge ni ang?” a ti a. Ani chuan, “LALPA chuan, ‘Ram then hrang hranga thalai hruaitute hmangin le,’ a ti,” a ti a. Ani chuan, “A nih leh, tu nge râl hmahruai ang?” a ti leh a. “Nangma’n le,” a ti a.

¹⁵Tichuan, ram then hrang hranga thalai hruaitute chu a khâwm a, mi 232 an ni a; anniho zawhah chuan mipui lam a tangin Israel fa zawng zawng a khâwm leh a—sângsarih an ni a.

¹⁶Chhûn laiah an thawk chhuak a. Chutih lai chuan Ben-Hadada leh a lamtang lal 32 te chuan an sipai hmunpuiah zû an lo rûi hlê a.

¹⁷Ram bial thena thalai hruaitute chu an chhuak hmasâ a. Ben-Hadada chuan enthlatu pâwl a tîr chhuak a, anniho chuan, “Samari khua a tangin mi an lo chhuak ê!” an ti a.

¹⁸Ani chuan, “Rem thu sawi tûra lo kal an nih chuan a nung chungin lo man ula; indo thu sawi tûra lo kal an nih pawhin a nung chung bawkin lo man rawh u,” a ti a.

¹⁹Chûng bial thena thalai hruaitute chu anmahni zuitu sipaite nên khaw pâwnah an chhuak a.

²⁰Mi tinin an bitum theuh an that a; Suria-ho chu an tlânchhe ta a, Israelte chuan an ûmzui a; Suria lal Ben-Hadada chu sakawr chung chuang mite nên sakawrin an pût chhuak a.

²¹Israel lal chu a lo chhuak a, sakawrte leh tawlwailîrte chu arawn bei a, Suria-ho chu tam tak a that a.

²²Zâwlnei kha Israel lal hnênah a lo kal a, “Kal la, intichak sauh sauh rawh; i tih tûrte chu chhinchhiah la, nakum thâlah nangmah bei tûrin Suria lal hi a lo thawk leh dâwn a nia,” a ti a.

SURIA-HO AN TLÂWM LEH

²³Suria lal hnênah a mi liante chuan, “An pathiante chu tlâng pathiante an ni a. Chuvâng maia keini aia chak ta zâwk an ni a; phâi zâwlah bei tawh ila chuan kan chak tawh ngei ang le.

²⁴Heti hian ti rawh: Lalho hi an dinhmun a tangin bân vek la, an aiah sipai hotute dah zâwk ang che;

²⁵sipai i hloh zât sipai dang khâwm leh la, sakawr leh tawlwailîr i hloh tawh zât dah khat leh bawk la. Tichuan phâizâwlah kan bei ang a; anni ai chuan kan chak ngei ngei tawh ang,” an ti a. An thurâwn ang tak chuan a ti ta a.

²⁶Tichuan, a kum leh thâlah chuan Ben-Hadada chuan Suria-ho chu a khâwm chiam a, Israelte bei tûrin Aphek khuah a han chho va.

²⁷Israel fate pawh an pung khâwm vê a, ei tûr te an chhêk khâwm a, inbei tûrin an chhuak ta a. Israela thlahte chu anniho lakah chuan kêl no tlêm tê hlâwm hniha bawh khâwm ang lekin an lang a; Suria-ho erawh chu a ram khahin an khat hmur mai a.

²⁸Israel lal hnênah chuan Pathian mi a va kal a, “LALPA chuan, ‘Suria-hovin, “LALPA chu tlâng Pathian a ni a, phâizâwl Pathian a ni vê lo,” an ti a; chuvângin hêng sipai rual tam tak hi i kutah ka pê ang che a; tichuan, kei hi LALPA ka ni tih i hria ang,’ a ti e,” a ti a.

²⁹Ni sarhi chhûng chu an inep reng a. A ni sarhi nî chuan an inbei ta a; ni khat thil thû-ah Israela thlahte chuan Suria ke sipai nuai khat an that a.

³⁰A la bâng zawng chu Aphek khuah chuan an tlân lût a; mahse a la bângho mi 27,000 te chu bang chimin a lo delh leh si a. Ben-Hadada chu khawpui chhûngah a tlân lût a, pindan chhûngrilah chuan a tawm a.

AHABAN BEN-HADADA THÛ A THLUNPUI

³¹A hote chuan a hnênah, “En teh, Israel lal chhûngkuate hi mi khawngaih thei tak an ni tih kan lo hria a. Ti teh, saiip puan veng ila, kan nghâwngah hruizên hling chungin, Israel lal hnênah i va kal mai teh ang; i nunna a lo zuah mial mahnâ,” an ti a.

³²Tichuan, saiip puan an veng a, hruizên an awrth a, Israel lal hnênah chuan an lo kal a, “I chhiahhlawh Ben-Hadadan, ‘Khawngaih takin ka nunna min zuah hrâm rawh se,’ a ti e,” an ti a. Ani chuan, “A la dam reng a ni mâw? Ka unaupa alâwm,” a lo ti a.

³³Chûng mite chuan a hmêl aţang chuan zahngaihna a lantîr dâwn em tih an lo thlîr reng a; a thu sawi behchhanin, “Ni e, i unaupa Ben-Hadada,” an lo ti vat a. Ani chuan, “Va hruai rawh u,” a ti a. Ben-Hadada chu a lo chhuak a; tawlailîrah a lo chuantîr a.

³⁴Ben-Hadada chuan a hnênah, “Ka pain i pa laka khua a lo lakte kha ka pekîr leh ang che a; ka pain Samari khuaa a tih ang khân, Damaska khawpuih sumdâwnna hmun i siam ve dâwn nia,” a ti a. Ahaba chuan, “Chû i thutiam avâng chuan ka chhuah leh ang che,” a ti a. Tichuan, thû a thlunpui a, a chhuah ta a.

THIAM LOH CHANG AHABA

³⁵Zâwlnei fapate zînga mi pakhat hian a thenawm hnênah LALPA thûin, “Khawngaihni mi han vaw teh,” a ti a. Chû mi chuan a vaw duh lo va.

³⁶Chu mi hnênah chuan, “LALPA thû i âwih duh loh avângin, mi kalsan vêleh hian sakeibakneiin a seh ang che mawlê,” a ti a. A kalsan vêleh chuan sakeibakneiin a lo hmû a, a tihlum ta a.

³⁷Midang a va hmu leh a, a hnênah, “Khawngaih takin mi vaw teh,” a ti a. Chû mi chuan a vua a, a vaw hliam a.

³⁸Zâwlnei chu a kal chhuak a, kawngah chuan lal lo kal tûr chu a lo nghâk a, inbâwl danglamin a mit a tuam a.

³⁹Lal a lo thlen chuan lal chu a lo âu va, “I chhiahhlawh hi indona kârah a va kal a; mi pakhat hi a mi man hruaiin an lo kal a, ‘Hê mi hi lo vêng tha rawh; a tlân bo vaih chuan a aiah i nunna in a

tuar ang, a nih loh leh tangkaraw talent khat i châwi tûr a ni,’ a ti a.

⁴⁰I chhiahhlawh hi ka buai lai takin a lo pût bo daih mai si a,” a ti a. Israel lal chuan a hnênah, “Chutiang tak chuan i chungah thleng ang hmiang; nangma’n i lo rêl fel diam tawh chu,” a ti a.

⁴¹Chû vêleh a mit tuamna chu a phelh sawk sawk a; zâwlneite zînga mi a lo ni reng tih lal chuan a hre ta a.

⁴²Ani chuan a hnênah, “LALPAN heti hian a ti: ‘Thi tûra ka mi ruat tawh chu nangin i kut aţang ngeia i lo chhuah tâk avângin, a nunna aiah i nunna in, a mite aiah i miten an tûar ang,’ a ti,” a ti a.

⁴³Tichuan, Israel lal chu lunghnûr leh thinur ţeuh chungin Samari khuah chuan a hâu ta a.

BUNG 21

NABOTHA, A GRÊP HUAN AVANGA TIHHLUM

¹Chumi hnû chuan Jezreel mi Nabotha chuan Samari lal Ahaba in bulah grêp huan a nei a.

²Ahaba chuan Nabotha hnênah, “Ka in bul lawka i grêp huan hi thlâi chin nâna ka hman theih nân min pe teh khai; hei aia grêp huan tha zâwk ka pe dâwn che nia. I duh zâwk chuan a man âwm tâwk tangkâ ka pê ang che,” a ti a.

³Nabotha erawh chuan Ahaba hnênah, “Mi thlahtute ro pêk che chu LALPAN a phal lo vang!” a lo ti a.

⁴Chutianga Jezreel mi Nabothan a lo chhân avâng chuan Ahaba chu lunghnûr tak leh thinur ţeuh chungin a hâu ta a; “Mi thlahtute ro chu ka pe thei lo vang che,” a lo ti mai si a. Khumah a mû a, lehlam a hawi a, chaw pawh a ei duh ta lo va.

⁵A nupui Jezebeli a lo kal a, a hnênah, “Engtizia nge chaw ei peih lo khawpa i tûm bûr mai le?” a ti a.

⁶Ani chuan, “Jezreel mi Nabotha ka va bia a, ‘I grêp huan hi pawisain mi lei tîr rawh; i duh zâwk pheih chuan grêp huan dangin ka thleng ang e,’ ka ti a. Ani chuan, ‘Ka grêp huan chu ka pe lo vang che,’ tiin mi lo chhâng a,” a ti a.

⁷A nupui Jezebeli chuan, “Israelte chungah hian thuneihna lek kawh ta che! Tho la, chaw te ei la, han intihlim deuh teh khai; Jezreel mi Nabotha grêp huan chu keima’n ka pe dâwn che nia,” a ti a.

⁸Ahaba hmingin lehkha a ziaak a, a chârna in a châr leh a, Nabotha awmna khuaa upate leh mi liante hnênah lehkha a thawm darh a.

⁹Lehkathawnah te chuan heti hian a ziaak a, “Chawnghei thû puang ula, Nabotha chu mipui zîngah langsâr takin thuttîr rawh u;

¹⁰a hmâah chuan amah hêktu tûr Beliala* fate pahni thuttîr ula, ‘Pathian leh lal i sawi chhia a ni,’ tiin hêk sela. Tichuan hruai chhuak ula, deng hlum ang che u,” tiin.

¹¹Tichuan, chû khuaa awm mipuite, upate leh mi liante chuan an hnêna Jezebelin lehkha a thawna a ziah ang tak chuan an ti a.

¹²Chawnghei thû an puang a, Nabotha chu mipui zîngah langsâr takin an thuttîr a.

¹³*Beliala fate pahnih chu an lo lût a, amah epin an thû a; mipui hmâah chuan Beliala fate chuan, “Nabotha hian Pathian leh lal a sawi chhia a ni!” tiin an hêk a. Tichuan khaw pawnsan an hruai a, lungin an deng hlum ta a.

¹⁴Jezebeli hnênah, “Nabotha chu lungin an deng a, a thi tawh e,” tiin an va hrilh a.

¹⁵Jezebeli chuan Nabotha chu lungin an deng hlum ta tih a lo hriatin, Ahaba hnênah Jezebeli chuan, “Tho la, Jezreel mi Nabotha grêp huan, pawisâa a leitir phal loh che kha va nei tawh rawh le; Nabotha chu a dam tawh lo, a thi tawh alâwm,” a ti a.

¹⁶Ahaban Nabotha a thi tih a hriat chuan a tho va, Jezreel mi Nabotha grêp huan nei tûr chuan a chhuk thla ta a.

LALPAN AHABA A HNÂWL

¹⁷LALPA thû chu Tishbi mi Elija hnênah a lo thleng a,

¹⁸“Tho la, Israel lal Ahaba zuk hmu rawh, Samari khuah a awm e. Nabotha grêp huan neihsak tumin a chhuk thla a, chutah chuan a awm mêk a ni.

¹⁹Tihian hrilh ang che, ‘LALPA chuan heti hian a ti: “Tual i that a, a ro i chhuhsak lehzêl ang maw?”’ tiin. Heti hian hrilh bawh rawh, ‘LALPA chuan, “Uiin Nabotha thisen an liahna hmunah i thisen ngei pawh an la liak vê ang,” a ti,’ tiin,” a ti a.

²⁰Ahaba chuan Elija hnênah, “Ka hmêlma pa, mi rawn hmu ta maw?” a ti a. Ani chuan, “LALPA mithmuhah thil sual ti tûra i inhralh tâk avângin ka rawn hmu ta che a nih hi:

²¹“Lo ngai reng rawh, i chungah chhiatna ka rawn thlen dâwn. I chithlahte ka nuai bo vek ang a, Israel rama Ahaba thlah zînga mipa tawh phawt chu sal pawh, zalên pawh, ka tiboral vek ang.

²²In chhûngkua chu Nebata fapa Jeroboama chhûngkua ang leh, Ahija fapa Baasa chhûngkua ang maiin ka siam ang, Israelte thil sual i tihtir avâng leh, ka thinurna i chawh thawh tâk avângin,’ a ti a.

²³Jezebeli chungchângah LALPA chuan, ‘Jezreel kulh bangah uichovin Jezebeli sâ an la ei ang,’ a ti bawh a.

²⁴Ahaba chhûngkua mi rêng rêng khawpuia thîte chu uiin an ei ang a, ram hnuaia thi apiangte sâ chu chunglêng savâten an tlan thung ang,” a ti a.

²⁵LALPA mithmuh ngeia sual ti tûra mahni inhralh Ahaba ang hi tûmah an la awm ngai lo, amah fuihpawrhtu Jezebeli chu nupuia a nei tlat si a.

²⁶Israela thlahte hmâa LALPAN a hnawh chhuahsak Amor-ho chin dân tinrêngin milemte biain tenawm takin thil a ti thîn a.

²⁷Ahaban chûng thûte a hriat chuan, a silhfênte a pawt thlêr a, saip puan a sin a, chaw a nghei a, saip puanah a mû a, lungngai takin a vâk ruai ruai a.

²⁸LALPA thû chu Tishbi mi Elija hnênah a lo thleng a,

²⁹“Ka hmâa Ahaba inngaihtlâwmzia hi i hmû em? Ka hmâa a inphah hniam tâk êm avâng hian a dam chhûng chuan chhiatna ka thlen lo vang. A fapa lal hun chhûngin an chhûngkuaah chhiatna ka thlentir zâwk ang,” a ti a.

BUNG 22

MIKAIAN AHABA A ZILH

¹Suria leh Israel te chu kum thum chung indo lovin an awm a.

²A kum thum kumah chuan, Juda lal Jehosaphata chu Israel lal tlawh tûrin a zuk zin a.

³Israel lal chuan a hote hnênah, “Gilead biala Ramoth khua hi kan ta a ni a, mahse Suria lal kuta mi chhuhsak hi kan hreh deuh a ni lo maw?” a ti a.

⁴Tichuan, Jehosaphata hnênah, “Ramothe Gilead han bei tûrin min kalpui ve thei ang em?” a ti a. Jehosaphata chuan Israel lal hnênah, “Kei leh nang te chu, ka mite leh i mite nê, ka sakawr leh i sakawrte nê, inang reng kan ni alâwm,” a ti a.

⁵Jhosaphata chuan Israel lal hnênah chuan, “Khawngaihin vawinah hian LALPA thû i ngaichâng phawt ang hmiang,” a ti a.

⁶Israel lal chuan zâwlneite chu a ko khâwm a, zali lai an ni a, an hnênah, “Ramothe Gilead khua khi ka bei dâwn nge, ka la ngawi rih dâwn?” a ti a. Anni chuan, “Han chho rawh, Pathianin lal kutah hian a pe dâwn e,” an ti a.

⁷Jhosaphata chuan, “Amah kan râwn theih nân, hetah hian LALPA zâwlnei tuemaw tal a la awm lo maw?” a ti leh a.

⁸Israel lal chuan Jehosaphata hnênah, “LALPA min râwnsak thei tûr mi pakhat a la awm tak e, Imla fapa Mikaia a ni a; mahse ka chungchâng hi a tha zâwngin a sawi ngai lo va, a chhe zâwng hlîra a puan thîn avângin ka lâwm lo teh a nia,” a ti a. Jehosaphata chuan, “Lal meuhvin chutia i tih mai le!” a ti a.

⁹Israel lal chuan hotu pakhat a ko va, “Imla fapa Mikaia va hruai vat teh!” a ti a.

¹⁰Israel lal leh Juda lal Jehosaphata te chu anmahni kawrfual hân an lalthutthlêngah an thû vê vê a; Samari kulh kawngka luhna bula hruih zâwlah an thû a; an hmâah chuan zâwlnei zawng zawng chuan thû an puang dual dual a.

¹¹Kenaana fapa Zedekia chuan thîrin sa ki lemte a insiam a; tihian a sawi a, “LALPAN: ‘Suria-ho chu hêngte hian i si hlum thak dâwn a ni,’ a ti e,” a ti a.

¹²Zâwlneiho zawng zawng pawhin, “Ramothe Gilead-ah chuan tuang takin han chho ang che, LALPAN lal kutah a pe dâwn si a,” tiin thû an puang a.

¹³Mikaia ko tûra an mi tirha chuan a hnên a va thlen chuan, “Lo ngaihtla teh, zâwlneiho chuan thukhat vuain, lal tân a tha zâwng hlîrin thû an puang vek a. Nang pawhin an thupuan angin a tha zâwnga sawi i tum hrâm dâwn nia,” a ti a.

¹⁴Mikaia chuan, “LALPA nunna chhâlin, LALPAN min hrilh chiah ka sawi ang,” a ti a.

¹⁵Ani chuan lal hnên a lo thleng a; lal chuan a hnênah, “Mikai, Ramothe Gilead bei tûrin kan kal dâwn nge kal dâwn lo?” a ti a. Ani chuan, “Kal rawh, i tuang khawp ang, LALPA chuan lal kutah a pe dâwn si a!” a ti a.

¹⁶Lal chuan a hnênah, “Thutak chauh mi hrilh tûrin LALPA hmingin waw engzât nge maw chhia ka chhamtir dâwn che le?” a ti a.

¹⁷Ani chuan, “Israel mi zawng zawng chu vêngtu nei lo berâm anga tlâng chung a vâk darh vêlin ka hmû a. LALPA chuan, ‘Hêngte hian hruaitu an nei ta lo ve. Mi tin mahni inah lungmuang takin hâw dial rawh se,’ a ti e,” a ti a.

¹⁸Israel lal chuan Jehosaphata hnênah, “Keima chungchângah a chhe lam ngawt lo chu engmah a tha lam puan tûr a nei lo tih ka hrilh lo che em ni?” a ti a.

¹⁹Mikaia chuan, “Chuvângin LALPA thû hi ngaithla teh: LALPA chu a lalthutthlênga thûa, a ding leh veiah vân mipui zawng zawng ding thupin ka hmu a.

²⁰LALPA chuan, ‘Ramothe Gilead khu a han tlûk chhiat theih nân Israel lal Ahaba khu tu nge thlêm thlu thei ang?’ a ti a. Mi pakhatin kawng khatin a sawi a, mi dangin kawng dangin an sawi a.

²¹Thlarau pakhat hi a lo pên chhuak a, LALPA hmâah a va ding a, ‘Keima’n ka zu thlêm thlû ang e,’ a ti a.

²²LALPA chuan, ‘Engtiangin mâw?’ a ti a. Ani chuan, ‘Ka chhuak ang a, a zâwnei zawng zawng kâah khuan thlarau dawtheiah ka zu chang ang e,’ a ti a. LALPA chuan, ‘Zu thlêm ta che, i hlawhtling ngei ang; kal ta la, chutiang chuan zuk ti ang che,’ a ti a.

²³En rawh le! LALPA chuan hêng i zâwneiho zawng zawng kâah hian thlarau dawthei a dah vek tawh a, i chhiatna tûr pawh LALPAN a puang vek tawh,” a ti a.

²⁴Kenaana fapa Zedekia chuan a va hnaih a, Mikaia biangah a va bêng a, “LALPA thlarauvin i hnêna thû sawi tûrin khawi laiah nge mi chhuahsan le?” a ti a.

²⁵Mikaia chuan, “Pindan ril zâwka biru tûra i luh niin i la hria ang mawle!” a ti a.

²⁶Israel lal chuan, “Mikaia hi hruai kîr leh ula, khaw awptu Amona leh lal fapa Joasa hnênah hruai ula;

²⁷heti hian sawi rawh u: ‘Lal chuan, “Hê pa hi tân inah khung ula, dam taka ka lo hâw leh hmâ chu, hrehawmna chaw leh tihduhdahna tuiin lo chawm ang che u,” a ti,’ tiin,” a ti a.

²⁸Mahse Mikaia chuan, “Dam taka i lo hâw leh a nih ngai chuan LALPA hian ka hnênah thû a sawi lo tawp tihna a ni ang,” a ti vê ngat a. “Nangni mipui zawng zawng khân lo hre rawh u!” a ti bawk a.

INDONAAH AHABA A THI

²⁹Israel lal leh Juda lal Jehosaphata te chu Ramoth Gilead panin an chho ta a.

³⁰Israel lal chuan Jehosaphata hnênah, “Ka inchei danglam ang a, indonaaah ka lût vê ang e; nang chuan i kawrfual hâ ang che,” a ti a. Tichuan, Israel lal chu a inbawl danglam a, indona hmunah a lût ve ta a.

³¹Suria lal chuan tawlwailîr pu 32 ama hnêna awm te chu, “Israel lal tih chauh lo chu tûmah a lian pawh, a tê pawh bei suh u,” tiin thû a lo pe diam a.

³²Tichuan, tawlwailîr pâwl hotuten Jehosaphata an hmu chuan, “Israel lal a nih ngei saw!” an ti a. Amah chu beiin an va hual a; Jehosaphata chu a âu vak a.

³³Tawlwailîr puten Israel lal a ni lo tih an hriat chuan, amah an ûm lai chu an kîrsan leh ta a.

³⁴Mi pakhat hian tinzâwn bîk nei lovin thal a kâp a, Israel lal chu a râlthuam inthuzawmna kârah tak chuan a fuh a. A tawlwailîr khalhtu hnênah, “Inher la, indona hmun aţang hian mi chhuahpui teh, ka inhliam tlat mai,” a ti a.

³⁵Chumi nî chuan an inbei nasa hlê a, Israel lal chu a tawlwailîrah Suria-ho hmachhawn zâwngin tlâi thlengin an chelh ding a; tlâiah chuan a thi ta a. A hliam aţang chuan a thisen chu tawlwailîrah chuan a luang thla nguai nguai a.

³⁶Ni tlâk vêl lai chuan, “Mi tin mahni khuah, mi tin mahni awmna ramah hâw vek tûr a ni!” tiin sipai zawng zawng zîngah thû an puang a.

³⁷Tichuan, lal chu a thî a, Samari khuah chuan an hâwpui a. Samari khuah chuan lal chu an phûm ta a.

³⁸Mi tuemaw hian Samari khaw dîl kamah tawlwailîr chu a sil a; LALPA thu sawi ang ngei khân nawhchizuarho an inbual laiin uite chuan a thisen kâi te chu an lo liak ta a.

³⁹Ahaba chanchin dang te, a thiltih zawng zawng te, saingho in a sak te leh khua a dîn zawng zawng chanchinte chu Israel lalte chanchin ziahna bûah a chuang a ni lo’ m ni?

⁴⁰Tichuan, Ahaba chu an thlahtute hnênah a muhîl a. A fapa Ahazia chu a aiah a lal a.

JUDA LAL JEHOSEPHATA

⁴¹Asa fapa Jehosaphata chu Israel lal Ahaba rorêl kum 4-naah Juda lal a lo ni a.

⁴²Jehosaphata chu lal a nihin kum 35 a upa a ni a, Jerusalemah kum 25 chhûng ro a rêl. A nu hmîng chu Azubai, Silhia fanu a ni.

⁴³A pa Asa kawng zawng zawng a zawh a. Pênsan lovin LALPA mithmuhah dik takin a ti thîn. Chutichung chuan, hmun sângte chu tihbo a ni chuang lo va, mipui pawhin hmun sângah te chuan inthâwina te hlânin rimtui an hâl cheu va.

⁴⁴Jehosaphata chuan Israel lal nên inremna a siam bawk.

⁴⁵Jehosaphata chanchin dang te, a chakzia a lantîr dân te, a râldo thû te chu Juda lalte chanchin ziahna bûah a chuang a ni lo’ m ni?

⁴⁶A pa Asa hun laia mi tawh mawngkawhur la awmte kha a ram aţangin a hnawt chhuak vek a ni.

⁴⁷Edom chuan lal a nei lo va, lal aiawhtûin ro a rêl thîn a.

⁴⁸Jehosaphata chuan Ophir-a rangkachak phur tûrin sumdâwng lawngte a tuk a; mahse Ezion Geber-ah lawng te chuan chhiat an tâwk a, an kal thei ta lo.

⁴⁹Ahaba fapa Ahazia chuan Jehosaphata hnênah, “Ka mite hi i mite nên lawngah zin ho teh se,” a ti a. Mahse Jehosaphata chuan a remti lo.

⁵⁰Jehosaphata chu an thlahtute hnênah a muhîl a, a pu Davida Khawpuiah a puteho zîngah an phûm a. A aiah a fapa Jehoramah chu a lal a.

ISRAEL LAL AHAZIA

⁵¹Juda lal Jehosaphata rorêl kum 17-naah Ahaba fapa Ahazia chu Samari khuaah Israel lal a ni a, Israelte chungah kum hnih ro a rêl.

⁵²A nu leh a pa kawng zawhin LALPA mithmuhah thil sual a ti a, Israelte thil sual tihîrtu Nebata fapa Jeroboama kawng a zawh bawh a;

⁵³a pa tihdân zawng zawng zâwma Baala rawng bâwla chibai a bûk thin avângin LALPA Pathian thinurna a chawh tho ta a ni.

2 LALTE

Ziah tu: Hriat chian loh. • Ziah kum: 561-538 B.C.

Lalte Lehkhabu Pakhatna ang bawkin a Bu Hnihna ziaktu hi hriat chian a ni lo va, a bu hmasa zâwk chhunzawmna a ni. A ziaktu hi tûpawh ni se, Babulona Juda saltânna hmun ațanga ziah a ni a. Israel lalte leh Juda lalte chanchin a chhui a, a indawt dân ang diak diaka chhui lovin, LALPA Pathian an hawisan avânga Pathian hremna: chhiatna leh tuarna a tawn tawna an tawh chhan leh a tâwpa hmar lam Israel chu Assuria kutah (B.C. 723), chhim lam Juda ram chu Babulon kutah (B.C. 586) sala an tân vê vê thûin a tâwpa a ni. Dikna leh ținatnain hnam a châwimâwi a, Pathian thu âwih loh sualnain hnam tûk chhiatna a thlen thîn tih hi Lalte lehkhabu 1-na leh 2-na thupui a ni. Pathian țin mi an lal chuan ramin malsâwmna a dawng thîn a, Pathian țin lo leh a dân pawisa lo miin ro a rêl erawh chuan hremna leh chhiatna a thleng thîn. 2 Lalte bûah hian zâwlnei Elisa rawngbâwlna a langsâr hlê. Zâwlneiten an nun dân te siam țin tûa theih tâwpa thû an hril pawhin sualna khurah an lût thûk hlê tho thîn a; chuvângin, an hmabâk chhiatna lakah chhan chhuah zawh rual an ni lo. Mahse Pathian khawngaihna saltânna ațanga chhan chhuah leh a tiam chu an beiseina neihchhun a ni. 2 Lalte bu hi Biblea lehkhabu 12-na a ni a, a chhûngah bung 25 leh châng 719 a awm.

BUNG 1

AHAZIA CHUNGA PATHIAN RORÊLNA

¹Ahaba thih hnû chuan Israel lakah Moab-ho an hel a.

²Ahazia chu Samari khuua pindan chungnung hungna ațangin a tla a, a inhliam a; ama mite a tîr a, “Va kal ula, Ekron pathian Baal-Zebuba hnênah hê ka hliam hi ka dampui leh dâwn em tih va râwn teh u,” a ti a.

³Mahse, LALPA Vântirhkhovin Tishbi mi Elija hnênah, “Tho la, Samaria lal mi tirhte tâwk tûrin va kal la, an hnênah, ‘Israel ramah hian Pathian a awm loh vâng em ni Ekron pathian Baal-Zebuba râwn tûa in kal tâk?’

⁴Chuvângin, LALPAN heti hian a ti: ‘I kâi chhohna khum ata kha i chhuk thla leh tawh lo vang a, i thi ngei ang,’ ti ang che,” a ti a. Tichuan, Elija chu a chhuak ta a.

⁵A mi tirhte an va lêt leh chuan, “Engvângin nge in lo kîr leh mai?” a lo ti a.

⁶A hnênah chuan, “Mîn tâwk tûa lo kal mi pakhatin, ‘Kal ula, nangmahni rawn tirtu lal hnênah chuan kîr leh ula, ‘LALPA chuan, ‘Israel ramah hian Pathian a awm loh vâng em ni Ekron pathian Baal-Zebuba râwn tûa mi i tîr? Chuvângin, i kâi chhohna khum ata kha i chhuk thla leh tawh lo vang a, i thi ngei ang,’ a ti,” tiin va hrilh rawh u,’ mîn ti a ni,” an ti a.

⁷Ani chuan an hnênah, “Chutiang thu hrilh tûa lo tâwktu che u chu eng ang mi nge a nih?” a ti a.

⁸Anni chuan, “Pa hmul der dur, a kâwng vêta savun kâwnghrên hrêng,” an ti a. Ani chuan, “Tishbi mi Elija a nih chu,” a ti a.

⁹Lal chuan a sipai sawmnga hotu chu sipai 50 nên a va tîr a. A hnênah chuan a han chho va; ani chu tâng chhîpah a lo thû a. A hnênah, “Nang Pathian mi, lal-in, ‘Lo chhuk rawh!’ a ti che,” a han ti a.

¹⁰Tichuan, vân ațangin mei a lo tla a, amah leh a mi sawmngâte chu a rawn kâng ral ta a.

¹¹Ani chuan mi sawmngâ, an hotu nên a tîr leh a. A hnênah: “Nang, Pathian mi, lalin ‘Lo chhuk thla thuai rawh!’ a ti che,” a ti a.

¹²Elija chuan anniho chu a chhâng a, “Pathian mi ka nih takzet chuan vân ațangin mei lo tla sela, nang leh i mi sawmngâte kha kâng ral vek rawh se,” a ti a. Vân ațang chuan Pathian mei a lo tla a, chu mi leh a mi sawmngâte chu a kâng ral leh ta vek a.

¹³A wavi thumna atân sawmnga hotu leh a mi sawmngâte a tîr leh a. Sawmnga hotu chu a kal chho leh a, Elija hmâah chuan kûnin a ținthî a, a han ngên chiam a, a hnênah: “Nang Pathian mi, ka nunna leh hêng mi sawmngâte nunna hi mîn ngaihhlutsak hrâm ang che.

¹⁴En teh, vân ațangin mei a lo tla a, sawmnga hotu pahnihte leh sawmngaho hnihte kha an kâng ral ve ve tawh a. Tûnah erawh chuan ka nunna hi mîn ngaih hlutsak hrâm ang che,” a ti a.

¹⁵LALPA Vântirhkhoh chuan Elija hnênah, “A rual hian chhuk thla vê rawh; ani chu hlau suh,” a ti a. Tichuan a tho va, an rualin lal hnênah chuan a chhuk thla ta a.

¹⁶A hnênah, “LALPAN heti hian a ti: ‘Ekron pathian Baal-Zebuba râwn tûa mi i tîr kha, Israel ramah hian râwn tûr Pathian a awm loh vâng em ni? Chuvângin, i lâwn kâina khum ațang kân chhuk thla leh tawh lovin i thi ngei ngei dâwn a ni,’ a ti e,” a ti a.

¹⁷Tichuan, Ahazia chu LALPA thû, Elija puan ang chuan a thi ta a. Fapa a neih loh avângin a aiah Jehorama chu Juda lal Jehosaphata fapa Jehorama lal kum hnihnaah a lo lal ta a ni.

¹⁸Ahazia thiltih dangte chu Israel lalte chanchin ziahna bû-ah a chuang a ni lo’ m ni?

BUNG 2

ELIJA VÂNA LAK CHHOH

¹LALPAN ținwngaleivir hmanga Elija vâna a lâk chhoh dâwnin Elija chu Elisa nên Gilgal ațangin an kal chhuak a.

²Elija chuan Elisa hnênah, “Hetah hian lo awm ta che, LALPAN Bethela kal tûrin mi tîr si a,” a ti a. Nimahsela, Elisa chuan, “LALPA nung renga leh i nunna chhâlin ka sawi e, ka lo awm bosan bîk lo vang che!” a ti a. Tichuan Bethelah chuan an kal thla ta a.

³Bethela zâwlnei fapate chu Elisa hnênah an lo kal a, “I pu hi LALPAN vawiinah hian a lâksak dâwn che tih i hria em?” an lo ti a. Ani chuan, “Aw, ka hria alâwm; ngâwi ula a ni mai!” a ti a.

⁴Elija chuan a hnênah, “Elisa, hetah hian awm mai teh, LALPAN Jeriko-a kal tûrin mîn tîr si a,” a ti a. Mahse ani chuan, “LALPA nung renga leh i nunna chhâlin ka sawi e, ka kalsan tawp

lo vang che!” a ti a. An pahnih chuan an kal dân zêl a.

⁵Jeriko khuua zâwlnei fapate chu Elisa hnênah chuan an lo kal a, “I pu hi LALPAN waviinah hian a lâksak dân che tih i hria em?” an lo ti a. Ani chuan, “Aw, ka hria alâwm; ngâwi mai rawh u!” a ti a.

⁶Elija chuan, “Elisa, hetah hian lo awm mai teh, LALPAN Jordan luia kal tûrin min tîr si a,” a ti a. Nimahsela, ani chuan, “LALPA nung renga leh i nunna chhâlin ka sawi e, ka kalsan tawp lo vang che!” a ti a. An pahnih chuan an kal ta zêl a.

⁷Jordan lui kama an pahniha an dân reng lai chuan zâwlnei fapa 50 rual hi anmahni epin hla deuhvah an dîng a.

⁸Elija chuan a puanbah chu a lâ a, a tumtêl a, tui chu a vua a; lehlam lehlamah a lo inthen a, tichuan an pahnih chuan lei ro-ah an kal kâi ta a.

⁹Lui an kal kâi zawh chuan, Elija chuan Elisa hnênah, “I hnên ațanga lâk bo ka nih hmâin eng nge ka tihsak theih ang che? Dîl rawh le!” a ti a. Elisa chuan, “Khawngaihin i thlarau chan lêt hnih ka chungah thleng rawh se,” a ti a.

¹⁰Ani chuan, “Thil harsa tak i dîl a nih chu. Nimahsela, i hnên ata lâk bova ka awm lai mi hmuh chuan i chang ngei dân nia; min hmuh loh erawh chuan, i chang lo vang,” a ti a.

¹¹Chutia tîti chungah an kal lai chuan, thâwklehkhatat mei tawlaillîr leh mei sakawr a lo lang thut a, anni pahnih chu a rawn su then a; Elija chu thâwngaleivirin vânah a la chho ta a.

¹²Elisa chuan a lo en reng a, “Ka pa, ka pa, Israelte tawlaillîr leh sakawra chuante u!” tiin a âu va. Mahse, a hmu zui ta lo va. Ama puan sin lai chu a chelh a, phel hnihin a pawt thlêr a.

¹³Elija puan lo tlâ pawh chu a chhar a, a kîr leh a, Jordan kamah chuan a dîng a.

¹⁴Elija hnên ațanga puan lo tlâ a ken chuan tui chu a vua a, “Elija LALPA Pathian chu khawiah nge a awm?” a ti a. Tui a han vuak chuan lehlam lehlamah tui chu a lo inthen a; Elisa chu a kal kâi ta a.

¹⁵Jeriko a awm zâwlnei fatehovin an lo hmuh chuan, “Elija thlarau chu Elisa chungah a lo awm ta a nih hi,” an ti a. Amah tâwk tûrin an lo kal a, a hmâah chuan bawkkhupin chibai an bûk a.

¹⁶Anni chuan a hnênah, “En teh hei, i chhiahhlawhte hian mi chak tak tak sawmngâ kan nei asin. I pu zawng tûrin kaltîr ta che; chuti lo zawng, LALPA Thlarau hian la chhovin khawi lai tlâng chung daihah emaw, ruamah emaw a lo dah mai thei a nia,” an ti a. Mahse ani chuan, “Tûmah kaltîr a ngai lo ve,” a ti a.

¹⁷Nimahsela, a tân zahthlâk khawpa an nawr tlat avângin, “Kaltîr ta che u!” a ti ta a. Tichuan, mi sawmngâ an tîr a, ni thum chhûng an zawng a, an hmu si lo va.

¹⁸A hnêna an lo kîr leh chuan, Jeriko-ah a lo awm tawh a, “Kal suh u’ ka ti mawlh mawlh lo vem ni?” a lo ti a.

ELISAN THIL MAK A TI

¹⁹Khuua mite chuan Elisa hnênah, “Han en vêl la, kan puin i hmuh ang hian hê khawpui awm dân hi nuam tak a ni a; mahse tui tlan a ța lo va, nau chhiatna ram a ni,” an ti a.

²⁰Ani chuan, “Bêl thar rawn la ula, a chhûngah chî phul rawh u,” a ti a. Tichuan an rawn pê a.

²¹Tuikhur hnâr lamah a han kal a, chutah chuan chî a phul a, “LALPAN: ‘He tui hi ka titui tawh e; heta țaang hian thihna leh nau chhiatna a awm tawh lo vang,’ a ti a ni,” a ti a.

²²Elisa sawi ang tak chuan chû tui chu tûn thlengin a tui hlen ta a ni.

²³Chuta țaang chuan Bethel-ah a chho va; kawnga a kal chhoh laiin khuua ațanga lo kal tlangvâl thenkhatin an lo nuihsawh a, “Lukawlh pa! chho tak rawh; lukawlh pa! chho tak rawh,” tiin an lo âu nawmna a.

²⁴Chûng mite lam chu hawiin LALPA hmingin ânchhia a lawh a. Tichuan, Ngâw ațangin savawmpui pahnih an lo chhuak a, an zînga țaalai 42 chu an rawn seh ta nek mai a.

²⁵Chuta țaang chuan Karmel Tlângah a kal zêl a, chumi hnûah Samari khuah a kîr leh a.

BUNG 3

ISRAEL LAKAH MOAB A HEL

¹Juda lal Jehosaphata lal kum 18-naah chuan Samari khuah Ahaba fapa Jehorama chu Israel lalah a lo țaang a, kum 12 chhûng ro a rêl a.

²LALPA mithmuhah thil sual a ti thîn a; nimahsela, a pa leh a nu te ang lo takin, a pain Baala tâna ban serh a phunte kha a paih bo ta a.

³Chutichung chuan, Israelte hruai sualtu Nebata fapa Jeroboama sualna kawng chu a zawh lui tlat a; a bânsan duh lo va.

⁴Moab lal Mesha chu berâm vulhtu a ni a, Israel lal hnênah berâm no nuai khat leh berâmpa nuai khat hmul a pe zat zat thîn a.

⁵Ahaba a lo thih khân Moab lal chu Israel lal lakah a hel ta a.

⁶Lal Jehorama chu Samari khuah ațangin a kal chhuak a, Israel sipaite a khâwm vek a.

⁷Juda lal Jehosaphata hnênah mi a tîr a, “Ka lakah Moab lal a hel a. Moab-ho chu mi han beihpui thei ang em?” a ti a. Ani chuan, “Beihpui thei tehrêng mai; kei chu nangmah ang mai, ka mite chu i mite, ka sakawrte pawh i sakawr ang an ni alâwm,” a ti a.

⁸Ani chuan, “Khawi lam kawngah nge kan chhoh vang?” a ti a. “Edom Thlalêr kawng lamah khân le,” tiin a rawn chhâng a.

⁹Tichuan, Israel lal chu Juda lal leh Edom lal te nên chuan an chhuak ta a, kawng kual lamah ni sarih an kal a; sipaiho leh anmahni zuitu rante chuan tui an tlachham ta a.

¹⁰Israel lal chuan, “E khai! Hêi, lal pathumte hi Moab-ho kuta hlan mai atân LALPAN min lo ko khâwm reng a nih hi,” a ti a.

¹¹Nimahsela, Jehosaphata chuan, “LALPA kan râwn theih nân hetah hian LALPA zâwlnei a awm lo vem ni?” a ti a. Israel lal hnuaia hotu pakhat chuan, “Saphata fapa Elisa a awm vê alâwm, Elija kuta tui bunsak thîntu a ni a,” a lo ti a.

¹²Jehosaphata chuan, “Chu mi hnênah chuan LALPA thû a awm dân chu,” a ti a. Tichuan, Israel lal leh Jehosaphata leh

Edom lal chuan ani chu an zu pan ta a.

¹³Elisa chuan Israel lal hnênah, “Tihsak tûr che eng nge ka neih le? I pa zâwlneite leh i nu zâwlneite kha va pan zâwk mai ta che,” a lo ti a. Nimahsela, Israel lal chuan, “Ni suh e, LALPAN keiniho lal pathumte hi Moab kuta pêk tûrin min ko khâwm a lo ni lek thei asin,” a ti a.

¹⁴Elisa chuan, “Sipairote LALPA, a hmâa ka din tîna nunna chhâlin ka sawi e, Juda lal Jehosaphata hmâi hi ka zah êm a, chuti ni lo se i lam hi ka hawi lo vang a, hmuh pawh ka hmu hek lo vang che.

¹⁵Mahse, rimâwi tum thiam han ko phawt teh u,” a ti a. Chutia rimâwi an han tumrik chuan LALPA kut chu a chungah a lo thleng ta a.

¹⁶“LALPA chuan: ‘Phâi zâwlah hian khur han lai khuar khat chuk mai teh u,’ a ti a ni.

¹⁷LALPA chuan heti hian a ti: ‘Thli thâw in hre lo vang a, ruah sûr in hmu hek lo vang; nimahsela, phâi zâwl hi tuiin a khat ang a, tichuan, in ran rual te, in ramsâten an tlan dawn nia,’ tiin.

¹⁸LALPA ngaihah hetiang te chu thil ho tê a ni a; Moab-ho pawh in kutah a pe dawn che u asin.

¹⁹Kulh nei khuate leh duhthlan khuate chu hneh vek ang che u; an thing thâ thâte kit zêl ula, an tuikhurte hnawhsak vek ula, an ram t̄ha laite chu lungin vawm khat vek rawh u,” a ti a.

²⁰A tûk zînga buhbâl thilhan an hlan lai chuan, Edom kawng lam ațangin tui a lo chhuak phut a, a ram chu tuiin a lo khat ta a.

²¹Anmahni bei tûrin lalho an lo kal tih Moab miten an lo hriatin, râlthuam lek thei tîr ațanga upa deuh thlengin an inpun khâwm a; ramrîah t̄an an lo khawh a.

²²Zîng takah an han tho va, tuite chu nîin a zuk chhun a; râl lehlama awm Moab-ho chuan tui chu thisen ang maia sen rûmin an rawn hmû a.

²³“Thisen a ni reng mai; lalho chu anmahni leh anmahni an inbei a, khandaihin an inthat chiam a ni ngei ang; chuvângin Moab mite u, râl lak sum i va chuh ang u!” an ti a.

²⁴Chutia Israelho riahmun an lo thlen chuan Israelho chu Moab-ho lo bei tûrin an tho chhuak a, an hmâah chuan an tlanche ta a; an ram chhûngah an ûm lût a, Moab-ho chu an that zawih zawih a.

²⁵An khawpuite an chhu chhia a, mi tinin an ram t̄halai laiah lung an vawm khat a; an tuihnâ zawng zawng an hnawh ping a, thing thâ thâ an kit fai vek bawk a. Kir Haraseth lungremte erawh chu khawih lohvin an dah a. Mahse virvawm hmangtuten an hual a, an bei ta tho va.

²⁶Moab lal chuan indona chu a chelh zawh loh khawpa hautak a ni tih a hmuhin, khandaih chelek thiam mi 700 hruaiin Edom lal awmna zâwna sut tlang a tum a, mahse a su tlang thei lo va.

²⁷Chutah le, a fapa upa ber, a aiawha rorêltu tûr chu kulh bang kotlângah chuan hâlral inthâwi nân a hlân ta mai a; Israelho an huatna chu a nasa ta êm êm a. Tichuan, ani chu an kîrsan a, anmahni ram lamah an hâw leh ta a.

BUNG 4

ELISA LEH HMEITHAI SAHRIAK

¹Zâwlnei fapaho zînga pakhat nupui hian Elisa hnênah, “I chhiahhlawh, ka pasal chu a thi ta a, i chhiahhlawh khân Pathian a t̄hizia lah i hai lo va. A leibatna pa chu ka fapa pahnihte hi sala hruai tûra lo kal a tum a nia,” a ti a.

²Elisa chuan a hnênah, “Eng nge ka tihsak theih ang che? I inah eng nge i neih min hrilh teh?” a ti a. Ani chuan, “I chhiahhlawhnu hian sahriak bûr khat mai lo chu inah engmah neih ka nei lo,” a ti a.

³Ani chuan, “Kal ta la, i t̄henawm zawng zawng leh hmun tin ațangin bêl ruak va hawh khâwm rawh; t̄lêm tham tê ringawt chu hawh suh.

⁴I ina i luh hunah, nang leh i fapate chu kawng inkhâr khum ula; chûng bêl ruakah te chuan chhûng lût vek ula, a khatte chu dah hrang zêl ang che u,” a ti a.

⁵Tichuan a va kal a, amah leh a fapa, bêl ruak lakhâwmtute nên chuan kawng an inkhâr khum a; hriak chu a bun chhuak ta a.

⁶Bêl a chhûn khah apiangin a fapa hnênah, “Bêl dang han la leh rawh,” a ti zêl a. Ani chuan a nu hnênah, “Bêl dang a awm tawh lo,” a ti a. Tichuan, hriak hâw pawh chu a tawp ta nghâl a.

⁷Pathian mi hrilh tûrin a kal ta a. Ani chuan, “Va kal ta la, hriak chu hralh la, i leibâ chu rûl ang che; chumi bâng chuan nang leh i fapate nên in khawsa dawn nia,” a ti a.

ELISAN SHUNNAM FAPA A KAI THO

⁸Ni khat chu nu khawsa thei tak awmna Shunem khuah Elisa chu a va kal a, chû nu chuan chaw eiah a lo sâwm a. Nî dangah pawh khaw i lo a kal paha ei tûr lam nân a hmang zui ta zêl a.

⁹Chû nu chuan a pasal hnênah, “Ih maw, hê mi, min rawn tlawh fotu hi Pathian mi thianghlim a ni tih ka hria a.

¹⁰Inchung bang hrûlah khian pindan tê siam ila; khum te, dawhkân te, t̄hutphah te, khâwnvar dahna te siamsak ila; tichuan, a lo kal chângin chên nân a hmang t̄hin dawn nia,” a ti a.

¹¹Ni khat chu a va kal leh a, mu zâl tûrin pindan chungnungah chuan a lût chho va.

¹²A chhiahhlawh Gehazia hnênah chuan, “Hê Shunam nu hi han ko teh,” a ti a. Ani chu a hmâah chuan a rawn ding a.

¹³“A hnênah tihian hrilh rawh, ‘Hei le, keini hi heti khawp hian min lo duat t̄hin a. Tihsak theih che u ka nei vê em? Lal hnênah emaw, sipai hotu hnênah emaw thlensak duh te in nei em?’ a ti e,” a ti a. Ani chuan, “Ka mi leh sâte zînga chêng ka ni alâwm le,” a ti a.

¹⁴“Eng nge ka tihsak t̄ak ang âw?” a ti a. Gehazia chuan, “Fapa a nei si lo va, a pasal lah a tar tawh si a,” a ti a.

¹⁵Chuti chu, “Han ko teh,” a ti a. A va koh chuan kawngka bulah a rawn ding a.

¹⁶“Nakkum tûn ang hunah hian fapa i pawm tawh ang,” tiin a lo hrilh a. Ani chuan, “Ka pu, a ni lo vang. Nang, Pathian mi hian i chhiahhlawh hi dâwt hrilh teh suh!” a ti a.

¹⁷Nimahsela, hmeichhia chuan nâu a pâi a, Elisa lo sawi lâwk tawh anga a hun a lo thlen chuan fapa a hring ta a.

¹⁸Naupang chu a lo thang lian a. Ni khat chu a pa hnênah, buhsengtute awmnaah a kal chhuak vê a.

¹⁹A pa hnênah, “Ka lu hi, ka lu hi!” a ti a. Ani chuan chhiahhlawh hnênah, “A nu hnênah paw hâu teh,” a ti a.

²⁰A nu hnên a va thlenpui a, a nu mal chungah chuan chhûnlai thlengin a thû a, a thi ta mai a.

²¹In chungah a chhohpui a, Pathian mi khumah chuan a mut a, kawng a khar khum a, a kal chhuak a.

²²A pasal a ko va, “Tlangvâlho zînga pakhat leh sabengtung zînga pakhatrawn kaltîr teh, Pathian mi hnênah khân ka va tlan ang a, ka lo kîr leh mai ang,” a ti a.

²³Ani chuan, “Engati nge wawiin ber khera kal i tih le? Thla thar pawh a ni lo va, Sabbath pawh a ni baw si lo,” a ti a. Ani chuan, “A thatna tûr zâwk a ni,” a ti a.

²⁴Sabengtung chungah thutna a siam a, a chhiahhlawh hnênah chuan, “Hma lam panin khalh rawh le; ka hrilh che a nih loh chuan timuang hauh suh ang che,” a ti a.

²⁵A kal chhuak a, Karmel Tlânga Pathian mi hnênah chuan a va kal ta a. Hla tak aţangin Pathian mi chuan a lo hmû a, a chhiahhlawh Gehazia hnênah, “En teh, Shunam nu kha a nih saw!”

²⁶Amah hmuak tûrin va tlan teh, ‘In dam tha maw? I pasal a tha em? Naupang a dam tha zêl em?’ ti ang che,” a ti a. Ani chuan, “Tha e,” a ti mai a.

²⁷Tlânga Pathian mi hnên a lo thlen chuan, a kêah a rawn vuan chawt a, Gehazia chuan nam kian tumin a va hnaih a. Nimahsela Pathian mi chuan, “Awmtîr hlê hlê rawh; a rilru a mangang a nih hi, LALPAN ka lakah a thup a, min la hrilh si lo va,” a ti a.

²⁸Ani chuan, “Ka pu hnênah fapa ka dîl che a ni lo’ m ni? ‘Min tihder suh,’ ka ti lo che em ni?” a ti a.

²⁹Gehazia hnênah chuan, “Inpeih thuai la, ka tiang kengin lo va kal teh khai. Mi tûpawh tâwk la, chibai bûk lo vang che; mi tûpawhin chibai che sela, chhâng lêt lo vang che; ka tiang hi naupang hmaiah i va kham dawn nia,” a ti a.

³⁰Naupang nu chuan, “LALPA nunna leh i nunna chhâlin ka sawi e, ka thlah lo vang che,” a ti bur mai a. Tichuan, a tho va, a zui hâu ta a.

³¹Gehazia chu an hmâah a lo va kal a, tiang chu naupang hmaiah chuan a han kham a; mahse âw-kâ rêng a awm lo va, engmah a hre baw si lo va. Tichuan, amah hmu tûrin a tlan lêt leh a, “Naupang chu a harh chhuak hauh lo mai,” tiin a hrilh a.

³²In chhûnga Elisa a va luh chuan, naupang chu ama khumah, thîin a lo la mu reng a.

³³Tichuan, a va lût a, anni pahnih chu kawng a khâr hnan a, LALPA hnênah a tawngtai a.

³⁴A tho va, naupang chu a bawh a, a hmu leh ama hmûi chuktuahin, a mit leh ama mit, a kut leh ama kut a chuktuah a; naupang chungah chuan a phar duai a, tichuan, naupang pangti chu a lo lum tial tial a.

³⁵Inchhûngah a chhuak thla a, a lo chho leh a, a vei tawn sek a, naupang chungah chuan a zangphar leh a; tichuan, naupang chu wavi sarih a hahchhiau va, naupang chu arawn meng ta a.

³⁶Gehazia a ko va, “Shunam nu kha han ko rawh le,” a ti a. A zu ko va. A hnêna a lo luh chuan, “I fapa hi pawm rawh le,” a lo ti a.

³⁷Ani chu a lo lût a, a ke bulah a bawkkhup a, lei siin a kûn ngawih ngawih a; tichuan, a fapa chu a pawm a, a chhuak ta a.

ELISAN RAM ÂWMPÂWNG BÊL A THIAN FAI

³⁸Elisa chu Gilgalah a kîr leh a, ram chhûngah chuan tîm a tlâ a. Zâwlneiho fapate chu a hmâah anrawn thû a; ani chuan a chhiahhlawh hnênah, “Zâwlneiho fapate ei tûrin bêlpuiakhân sawhchiar siamsak rawh,” a ti a.

³⁹Mi pakhat chu ram hnuaiah anhnah la tûrin a chhuak a, ram hruizâm a va hmû a, a rah, ram âwmpâwng chu arawn fûn hâu t̄euh va, eng nge a nih hre lovin an chan sawm a, sawhchiarah chuan an thlâk ve ta mai a.

⁴⁰Chûng mite ei tûr chuan an suak chhuak a. Mahse, sawhchiar an han ei chuan, “E heu, Pathian mi, bêl chhûngah hian thihna a awm!” tiin an âu chhuak a. An ei thei ta lo va.

⁴¹Ani chuan, “Chhangphut han la teh u,” a ti a. Bêlah chuan a phul a, “Tikhân mite ei tûrin suak ula, sem rawh u,” a ti a. Bêlah chuan eng thil mah hlauhawm a awm ta lo va.

ELISAN MI ZÂ A HRÂI

⁴²Chutih lai chuan mi pakhat, Baal Salisa aţanga lo kalin Pathian mi tân thlai thar hmasa aţanga siam chhang te, barli chhang tlang 20 leh buh thar hûm ama ip-in arawn keng a. Ani chuan, “Khâng mite kha eitîr zâwk ta che,” a lo ti a.

⁴³Mahse a chhiahhlawh chuan, “Eng â ni? Mî zâ lai ei tûrin heti lek hi ka hlui ang maw?” a ti a. Ani chuan, “Miten an ei theih nân pe mai teh; ‘An ei ang a, an ei bâng pawh a la awm cheu vang,’ tih hi LALPA thu chhuak a ni,” a ti baw a.

⁴⁴Tichuan, an hmâah chuan a va hlui a; an han ei a, LALPA thû ang ngei chuan an ei bâng hial a.

BUNG 5

NAAMANA PHÂR TIHDAM

¹Naamana chu Suria lal sipai hotu a ni a, amah hmanga LALPAN Suria ram tâna hnehna a thlen thîn avângin a pu ngaihah mî ropui leh zahawm tak a ni. Mî chak huaisen a ni baw a, mahse phâr a ni tlat mai a.

²Suria-ho chu mî rûn tûrin an thawh chhuak thîn a, Israel ram aţangin hmeichhe naupang an man hi anrawn hawn a. Naamana nupui enkawltûah a awm a.

³Ani chuan a pi hnênah, “Ka pu hi Samari khuua zâwlnei hnênah va kal ta sela âw! A phâr hi a lo tidam mai dawn asin le,” a ti a.

⁴Naamana chu a pu hnênah a va kal a, “Israel ram hmeichhia t̄e khân chutiang chuan zu sawi reuha maw le,” tiin a pu chu a va hrilh a.

⁵Suria lalpa chuan, “Chuti chu va kal ta che, Israel lal hnênah lehkhaw pawh ka lo zia ang e,” a ti a. Tichuan, tangkarua talent

sâwm leh, rangkachak sekel 6,000 leh thawmhnaw inthlâkna sâwm kengin a kal chhuak ta a.

⁶Israel lal ta tûr lehkhâ a keng bawk a, chutah chuan, “Hê lehkhâ rual hian, ka chhiahhlawh Naamana hi a phâr natna i lo tihdamsak tûrin karawn tîr a ni e,” tih thû a chuanga a.

⁷Chû lehkhâ Israel lalin a lo chhiar chuan a puan a pawt thlêr a, “Mi tihluma tinung leh thei Pathian em ni ka niha hê mi hian ka tihdam tûra phâr a rawn tîr tāk mai? Mi tihbuaina tûr remchâng a zawng tih hi ngaihtuah ve ta che u,” a ti a.

⁸Israel lalin a puan a pawt thlêr tih thû Pathian mi Elisan a lo hriat chuan, “Engah nge i puan te i pawh thlêr le? Ka hnênah rawn kaltîr la, Israel ramah hian zâwlnei a awm tih a hre dâwn alâwm,” tiin lal hnênah chuan mi a tîr a.

⁹Naamana chu a sakawrte leh a tawilailîrte nê a va kal a, Elisa kawngka bulah chuan a va dîng a.

¹⁰Elisa chuan, “Kal la, Jordan luih wawî sarih va inbual la, tichuan, pangti pangngai i pu leh ang a, i lo thianghlim tawh ang,” tia hrilh tûrin mi a tîr a.

¹¹Mahse, Naamana ngaihdân a ni ta lo va, thinrima kal sawn pah chuan, “Ka lo rilrûk dânin, ‘Ka hnênah ngei a lo chhuak ang a, LALPA a Pathian hming a lam ang a, a phârna lai zâwnah a kut thênin a tidam ang chu,’ ka lo ti asin.”

¹²Tih êmah chuan, Damaska rama Abana leh Pharpar luite kha Israel rama tui zawng zawngte ai chuan a t̃ha fê zâwk lo vem ni? Chûngah chuan inbualin ka intithianghlim ve thei tho lo vem ni?” a ti a. Thinrim engphiarin a hâw tâu ta a.

¹³A chhiahhlawhte chuan an va hnaih a, “Ka pa, zâwlnei khân thil lian tham tak tih tîr ta che sela, i ti mai lo’ng maw? ‘Va inbual la, i lo thianghlim ang,’ a tih chuan, tih âwm tak a ni zâwk lo maw?” an ti a.

¹⁴Tichuan, a chhuk thlâ a, Pathian miin a hrilh angin Jordan luih chuan wawî sarih a inhnim a; nausên pangti ang mai hian a tisa chuan ngâi a lo awh leh a, a lo thianghlim leh ta a.

¹⁵A thuihruiho zawng zawng nê Pathian mi hnênah chuan an va kîr leh a, a hmâah an va dîng a; “Tûnah zet chuan, Israel ramah tih loh, lei chung zawng zawngah hian Pathian a lo awm hauh lo tih ka hre ta; chûvângin, i chhiahhlawh thilpêk che hi mi lo dawn sak hrâm teh khai,” a ti a.

¹⁶Mahse, ani chuan, “A hmâa ka dinna thin LALPA nunna chhâlîn, engmah ka la lo vang e,” a ti a. La tûra an innawr chiam pawhin a hnial tlat a.

¹⁷Naamana chuan, “A nih leh, khawngaihin i chhiahhlawh hi sabengtung pahni phur lei min pe ta che; i chhiahhlawh hian LALPA hnênah chauh lo chuan, pathian dangte hnênah hâlral thilhlân leh inthâwina ka hlân tawh dâwn si lo va.

¹⁸Mahse, hê thilah hian LALPAN i chhiahhlawh hi min ngaidam lul rawh se: ka pu hi Rimmon tempulah chibai bûk tûra a kala, ka bân a rinchhana, Rimmon tempula ka lo kûn vê a nih pawhin—Rimmon tempula ka kûn vê chungchângah LALPA chuan i chhiahhlawh hi min ngaitiam hrâm rawh se,” a ti a.

¹⁹Ani chuan a hnênah, “Thlamuang takin kal tawh le,” a ti a. Tichuan, a hnên a tâng chuan a kal chhuak a, engemaw chen a kal

hman a.

GEHAZIA DUHÂMNA

²⁰Nimahsela, Pathian mi Elisa chhiahhlawh Gehazia vê thung chuan, “Ka pu hian hê Suria mi Naamana thil rawn kente kha, a kut ata engmah dawn sak lovin a chhuah leh ta mai si a; khawî nge, LALPA nunna chhâlîn, ka ûm ang a, engemaw tal ka lâksak tûr a ni,” a ti a.

²¹Gehazia chuan Naamana chu a ûm a. A hnunga a tlân lai Naaman a lo hmuh chuan amah lo hmuak tûrin tawilailîr a tângin a chhuk a, “Engkim a t̃ha maw?” a lo ti a.

²²Ani chuan, “Engkim a t̃hâ e. Ka puin, ‘Ephraim tlâng ram a tângin zâwlnei fapa tlangval pahni an lo kal a. Tangkaraw talent khat leh thawmhnaw inthlâkna pahni pe ta mai che,’ tiin min rawn tîr a ni,” a ti a.

²³Naamana chuan, “E khai, talent hnih hi la rawh,” a ti a. La tûrin a nawr a, tangkaraw talent hnih chu thawmhnaw inthlâkna pahni nê têl hnihin a têl a; a chhiahhlawh pahnihte hnênah keng tûrin a pê a, a hmâah chuan an kal ta a.

²⁴Kulh an va thlen chuan, an kut a tângin a lâksak a, a in chhûngah a dah t̃ha a; mite chu a kaltîr a, an chhuak ta a.

²⁵Ani chu a pu hnênah a va lût a, a hmâah a va dîng a. Elisa chuan, “Gehazi, khawiah nge i va kal le?” a ti a. Ani chuan, “I chhiahhlawh hi khawiah mah a kal lo,” a ti a.

²⁶Ani chuan a hnênah, “Nangmah tâwk tûr chea khâ pa tawilailîr a tanga a chhuk lai khân ka rilrûin a zui ve zêl lo che em ni? Tangkâ te, thawmhnâw te, olive huan leh grêp huan te, berâm leh bawngpa te, bâwihpa leh bawihnu te buaipui hun a ni em ni?”

²⁷Chûvângin, Naamana phâr khân nang leh i thlahte thlengin kumkhuain a bâwm tawh ang che,” a ti a. Tichuan, a hnên ata chu vûr ang maia phâr vâ uarh chungin a kal chhuak ta a.

BUNG 6

HREIFANG TUIA LÂNG

¹Zâwlnei fapate chuan Elisa hnênah, “Han en la, kan chênna hi kan tân chuan a tê lutuk a.

²Jordan-ah zuk kal ila, chuta thing chak te chu mi tinin kan pu t̃heuh ang a, kan awmna tûr in kan sâ ang e,” an ti a. Ani chuan, “Kal ta che u,” a ti a.

³Pakhat chuan, “I chhiahhlawhte rual hian kal ve hrâm teh âw,” a ti a. Ani chuan, “Kal ang hmiang,” a ti a.

⁴An hnênah chuan a kal vê ta a. Jordan lui an zu thlen chuan, thingte chu an kit a.

⁵Mi pakhat chuan thing a kih laiin a hreifang chu tuih a titla palh a; “A khai âw, ka pu! Mi ta ka hawh a ni si a,” tiin a âu va.

⁶Pathian mi chuan, “Khawî laiah nge a tlâk â?” tiin a zâwt a. A tlâkna lai a hrilh a. Ani chuan thing tâng a tan bung a, chutah chuan a khawh lût a; thîr chu a rawn lêng ta a.

⁷Ani chuan, “Nangman chhar rawh le,” a ti a. Tichuan a han ban a, a la ta a.

SURIA MI MITDEL MAN THŨ

⁸Suria lal chuan Israel arawn do va; a puipate rawn kualin, “Kan tanhmun tûr chu chumi khami hmunah chuan a ni ang,” a ti a.

⁹Pathian mi chuan Israel lal hnênah, “Chumi hmun chu kal pêl lo tûrin fimkhur rawh, Suria-ho an lo kal dawn e,” tiin thû a chah thîn a.

¹⁰Pathian miin chumi hmun a sawi chu Israel lal chuan mite tûrin an va enthlithlai thîn a. Chutiang chuan fimkhur tûrin vawi engemaw zât a lo hrilh lâwk thîn.

¹¹Chutiang a nih avâng chuan Suria lal thinlung chu a lo mangang ta hlê a; a hote a ko va, “Kan zînga tû ber hi nge Israel lal lama tang min hrilh dawn em?” a ti a.

¹²A hote zînga pakhat chuan, “Ka pu, âw lalber, chutiang mi chu tûmah an awm lo; amaherawhchu, Israel rama zâwlnei Elisa sâwn i khum pindana i thu sawi chenin Israel lal hnênah a hrilh thîn a ni zâwk,” a ti a.

¹³Ani chuan, “Kal ula, chû mi chu khawiah nge a awm va enthla teh u, a mantu tûr ka tîr dawn nia,” a ti a. “Chu mi chu Dothan-ah a awm e,” tiin an va hrilh a.

¹⁴Chutichuan, sakawr te, tawlailîrte leh sipai rual tam tak nênzânah an va kal a, khua chu an va hual a.

¹⁵Zîng takah chuan Pathian mi chhiahhlawh chu a tho va, a han kal vêl a, sakawrte leh tawlailîrte nênzânah an va kal a, khua chu an va hual khup mai hi a lo ni a. Chhiahhlawh chuan a pu hnênah, “Khai âw, ka pu! Engtin nge kan tih tâk ang le?” a ti a.

¹⁶Ani chuan, “Hlâu suh, anni lama tang ai chuan keini lama tang an tam zâwk daih asin,” a ti a.

¹⁷Elisa chu a tawngtâi a, “LALPA, a hmuh theih nân a mit hi han tihmensak tûrin ka ngên a che,” a ti a. LALPA chuan chû tlangvâl mit chu a tihmensak a, a hmu ve ta a. Ngai teh, Elisa hual vêlin tlang chu mei sakawr leh mei tawlailîrin a lo khat hmur mai a.

¹⁸Suria-ho chuan an rawn hual hnâi tual tual a, Elisa chuan LALPA hnênah, “Hênggho mit tidel tûr hian ka ngên a che,” tiin a tawngtâi a. Elisa dîlna ang chuan an mit a tihdelsak ta vek a.

¹⁹Elisa chuan an hnênah, “Hei hi kawng a ni lo, hei hi khua pawh a ni lo. Mi zui ula, in mi zawn hnênah ka hruai ang che u,” a ti a. Samari khuaah a hruai ta hlah va.

²⁰Samari khua an thlen chuan Elisa chuan, “LALPA, hêng mite hian an hmuh theih nân an mit han tihmensak teh,” a ti a. LALPA chuan an mit a tihmensak a, an hmu thei ta a; Samari khaw chhûngah an lo awm reng a.

²¹Israel lalin a lo hmuh chuan, Elisa hnênah, “Ka pa, hênggho hi ka that dawn em? Ka that mai ang âw?” a ti a.

²²Ani erawh chuan, “I that tûr a ni lo. I khandaih leh thal hmangin sala i mante chu i that dawn em ni? Chaw leh tui pe ula, eiin in sela, an pu hnênah kal tawh rawh se,” a ti a.

²³Tichuan ruai ropui tak a thehsak a; an eia an in hnû chuan a hawtîr a, an pu hnênah an kal ta a. Tichuan, Suria sipai zînga mi rûntu pâwl te chuan Israel ram chu an rûn zui leh tawh lo.

SURIA-HOVIN TÂM TUAR SAMARI KHUA AN HUAL

²⁴Chumi hnûah Suria lal Ben-Hadada chuan a sipai zawng zawng a khâwm a, an thawh chho va, Samari khua chu an hual a.

²⁵Samari khuaah chuan tâm nasa tak a tlâ a; sabengtung lu chu silvar tangka 80 man a niha, thuro êk kab* khat hmun lia thêna hmun khat chu silvar tangka sekel nga man a nih thlengin khua chu an hual bet a.

²⁶Israel lal chu kulh bang chung zâwla a kal laiin, nu pakhat hian, “Aw lalber, ka pu, min pui rawh!” tiin a lo âu va.

²⁷Ani chuan, “LALPAN a puih ngawt loh che chuan engtin nge ka puih theih ang che? Hruih zâwl aţangin emaw, uain sâwrkhur lam aţangin emaw?” a ti a.

²⁸Lal chuan a hnênah, “Engin nge tibuai che?” a ti a. Ani chuan, “He nu hian, ‘I fapa thawh la, waviinah kan ei ang a, naktûkah ka fapa kan ei ve dawn nia,’ tiin min hrilh a.

²⁹Tichuan, ka fapa chu kan chhûm a, kan ei ta a. A tûkah chuan a hnênah, ‘Kan ei atân i fa thawh vê tawh rawh le,’ ka ti a; nimahsela, a fapa chu a thukru leh daih si a,” a ti a.

³⁰Chû hmeichhe thusawi lalin a han hriat chuan, a puan a pawt thlêr a; kulh bang chung zâwla a kal lai chu miin an lo thlîr a, a puan hnuai pang depah saip puan a lo sin reng a.

³¹Ani chuan, “Saphata fapa Elisa hian a lu hi waviin thlenga a la pu reng a nih chuan, Pathianin a tih tihin, nasa lehzuai pawhin min ti rawh se!” a ti a.

³²Elisa erawh chu ama inah a thû a, a bulah chuan upate an thû baw a. Lal chuan a hmâah mi a lo tlân hmasaktîr a, a mi tîrh lo thlen hmân a upate hnênah, “Hê tualthattu fapa hian ka lû la tûrin mi arawn tîr tih in hria em? En teh u, a mi tîrhthe lo kal hunah kawngka hi khâr ula, lo chelh tlat ang che u. Chû, a hnunga mi chu a pu pên thâwm a ni lo’ m ni?” a ti a.

³³An hnêna thû a la sawi lai mêkin a mi tîrh chu arawn thleng thla ngâl a; lal chuan, “Hê chhiatna hi LALPA hnêna mi a ni pawt mai; engah nge LALPA ka ngaihchân kher ang le?” a ti a.

BUNG 7

¹Elisa chuan, “LALPA thû hi lo ngai thla teh. LALPA chuan: ‘Naktuk tûn ang hunah hian Samari kulh kawngkâah chhangphut dip kg. ruk chu sekel khatin an hralh tawh ang a; barli kg. ruk bûk hnih chu sekel khatin an hralh baw ang,’ a ti,” a ti a.

²Lal vêngtu sipai hotu, lalin ngenchhan bera a neih chuan Pathian mi hnênah, “En ta che, LALPAN vân tukverhte hawng pawh ni se, chutiang pui pui chu a thleng ngûn nâ maw chu?” a lo ti a. Ani chuan, “I mit ngeiin i la hmu dawn alâwm, mahse nang chuan i ei vê lo vang,” a ti a.

SURIA-HO TLÂNCHHIA

³Kulh kawngka bulah chuan phâr pali an awm a; an tîti ho va, “Engah nge hetia thih hun ngâka kan awm ngawt mai le?”

⁴Khaw chhûngah i lût ang u,’ ti dawn ila, khaw chhûng an tâm nasa a, kan va thi mai dawn si a. Heta kan thut reng lahin thih mai hmabâk kan ni baw si. Ti teh u, Suria sipaiho hnênah sâwn i va tlu lût ngawt mai teh ang u. Min lo zuah leh, kan nung ang a; min lo tihhlum leh kan thi mai a ni ang chu,” an ti a.

⁵Tichuan, Suria-ho riahhmun panin thim hlimah an va kal ta a; Suria-ho riahbûk tawntirh an va thlen chuan, tûmah an awm lo va, mak an ti hlê a.

⁶LALPA chuan Suria sipaiho chu sakawr leh tawlailîr rual tlan ri dur dur thâwm te, sipai rual kal thup thup thâwm te a hriattîr a; “E heu, Israel lal hian min bei tûrin Hit-ho lal te, Aigupta lal te a ruai a nih hi!” tiin an inbia a.

⁷Tichuan, an tho lawk a, thim hlimah chuan baklêngin an tlânchhia a, an riahbûk te, an puan in te, an sakawrte leh an sabengtungte chu a ngai ngaiin, mahni sahim nân an tlan chhiatsan vek hi a lo ni a.

⁸Chûng phârten riahbûk tawntirh an va thlen chuan puan in pakhtah an lût a, an eiin an in a, chuta tangkâ leh rangkachak leh thuamhnâwte chu an lâ a, an va thukrû a; an lo kîr leh a, puan in dangah an lût leh a, chuta thilte pawh chu an lâ a, an va thukru leh a.

⁹An sawiho ta a, “Kan tihdân hi a dik hauh lo mai! Wawiin hi chanchin tha thlen ni a ni a, kan ngâwi reng mai si a. Heti ringawta zîng khawvâr hun kan nghah thlen mai chuan hremna kan tâwk ngei ang. Ti rawh u, va kal ila, lal chhûngte i va hrilh ang u,” an ti a.

¹⁰Tichuan, an kal a, khaw kulh kawngkhâr vêngtu chu an âu va, tihian an hrilh a, “Suria-ho riahhmunah kan va kal a, mak tak maiin tûmah an lo awm lo va, mihring thâwm pawh a awm lo—sakawr te leh sabengtung thlun te chauh a awm a, an riahbûk pawh a ngai ngaiin a la awm vek a ni,” an ti a.

¹¹Kawngkhâr vêngtute chuan an ko lût vat a, anni chuan lal inchhûnga mite chu an va hrilh a.

¹²Lal chu a zân a zânin a lo tho va, a hote hnênah, “Suria-ho min tih tum dân hi ka hrilh ang che u. Kan rilâtâmzia an hai lo va; chuvângin riahhmun chhuahsanin ramhnuaiyah an birû a, ‘Khua aţangin lo chhuak teh se, a nung chungin kan man ang a, khaw chhûngah kan lût dân nia,’ an ti a nih hi,” a ti a.

¹³A hote zînga pakhat chuan a chhâng a, “Khaw chhûnga sakawr la awmchhun pangâ hi mi thenkhatin va hruai sela. Israel mipui la dam zawng zawng ang tho an ni thei a; Israel mipui thih hmabâka awm zawng zawngte ang tho an ni thei bawk a; va chian tûrin i tîr tehrêng ang u,” a ti a.

¹⁴Tichuan, tawlailîr pahnih leh sakawrte chu an hruai a; Suria sipaiho awmna lamah lal chuan a kaltîr a, “Kal ta ula, va chian teh u le,” a ti a.

¹⁵Jordan lui thlengin an va kal a; Suria-hovin hmanhmawh taka an paih thuamhnaw leh râltuamte chu kawng tluan mai chuan a darh nuai mai a. Tichuan, chûng mi tirhte chu an lo kîr a, lal chu an hrilh a.

¹⁶Chû vêleh mipuite chu an va chhuak a, Suria-ho puan inte chu an rawk chiam a. LALPA thû angin chhangphut dip kg. 6 chu sekel khatin, barli kg. 12 chu sekel khatin an hralh ta a.

¹⁷Lal chuan sipai hotu, a kut a rinchhan bika chu kulh kawngka vêngtûah a ruat a. Mahse kawngkâah chuan mipuiin an chîl a, a hnêna lal a zuk kal laia Pathian miin a lo sawi lâwk tawh ang khân a thi ta a.

¹⁸Pathian miin lal hnêna, “Sekel khatin barli kg. 12, sekel khatin chhangphut dip kg. 6 naktûk tûn ang hunah Samari khaw kulh kawngka bulah hralh a ni ang,” tia a lo sawi tawh ang ngei chuan a lo awm ta a ni.

¹⁹Lal vêngtu sipai hotu khân Pathian mi hnênah, “En teh, LALPAN vân tukverhte hawng pawh ni se, chutiang thil êm chu a thleng ngûd dân em ni?” a lo ti a. Ani chuan, ‘I mit ngeiin i la hmu dân nia, mahse nang chuan i ei vê lo vang,’ a lo ti rêng a.

²⁰Chutiang tak chuan ama chungah ngei chuan a lo thleng a, kawngka bulah mipuiin an chîl a, a thi ta a ni.

BUNG 8

LALIN SHUNAM MI HNENAH RAM A PE LÊT

¹Elisa chuan a fapa a tihdamsak hmeichhe hnênah chuan, “Tho la, nang leh i chhûngte nêen kal chhuak ula, in remchanna hmunah awm rawh u; LALPAN tûm a tlaktîr dân e, chû chuan ram chhûng hi kum sarih a tuam dân a ni,” a ti a.

²Tichuan, hmeichhia chu Pathian mi thu âwihin a tho va, an chhûngkuain an kal a, Philistia ramah kum sarih an zu awm a.

³Kum sarih a lo zawh chuan hmeichhia chu Philistia ram aţangin a kîr leh a; a in leh a ram pek kîr leh dîl tûrin lal hnênah a kal a.

⁴Lal chuan Pathian mi chhiahhlawh Gehazia kha, “Elisa thiltih ropui zawng zawng min hrilh teh,” tiin a zâwt a, an lo inkawm lai tak a ni a.

⁵Mitthi a kaihthawh chanchin lal hnêna a lo hrilh lai takin, a fapa thi tawh a tihunsak hmeichhia kha lal hnênah chuan a lo kal a, a in leh a ram pe lêt tûrin lal chu a rawn dîl a. Gehazia chuan, “Aw lalpa, ka pu, hê hmeichhia hi alâwm Elisan a fapa thi hnê a tihunsak leh chu,” a ti a.

⁶Lalin a han zawh chuan, hmeichhia chuan a hrilh ta a. Lal chuan hotu pakhat a ruatsak a, “A thil lo neih sâ zawng zawng te, ram a kalsan aţanga wawiin thlenga a ramin a thar chhuah mante nêen chhût chhuak la, pe vek ang che,” a ti a.

BEN-HADADA THIH THÛ

⁷Elisa chu Damaska khuaah a va kal a, Suria lal Ben-Hadada chu a lo dam lo va; “Pathian mi hetah a lo kal e,” tiin an hrilh a.

⁸Lal chuan Hazaela hnênah, “I kutin thilpêk keng la, Pathian mi hmu tûrin va kal la, ‘Hê natna aţang hian ka dam leh ang em?’ tiin LALPA min râwnsak rawh se,” a ti a.

⁹Hazaela chu amah hmu tûrin, thilpêk atân Damaska khuaa thil tha tinrêng, sanghâwngsei 40 phur kengin a kal a; a hmâah chuan a va ding a, “I fapa Ben-Hadada, Suria lalin mi rawn tîr a, ‘Hê natna aţang hian ka dam chhuak leh ang em?’ a ti e,” a ti a.

¹⁰Elisa chuan a hnênah, “Kal ta la, a hnênah, ‘I dam leh ngei ngei ang’ tih va hrilh rawh. Amaherawhchu, LALPAN a thi tawh dân tih min hmuhtîr a ni,” a ti a.

¹¹Chû vêleh a tâna zahthlâk khawpin a melh ta reng mai a; Pathian mi chu a ţap ta hial a.

¹²Hazaela chuan, “Ka pu chu engtizia nge a ţah le âw?” a ti a. Ani chuan, “Israel fate chungah thil tha lo i rawn thlen tûr hi ka hre

si a: an kulh te i hâlsak dâwn a, an tlangvâlthe chu khandaihin i sâthlum ang a; an fasênte chu i la paih sawm ang a, hmeichhe nau pâite chu i la pir thlêr dâwn si a,” a ti a.

¹³Hazaela chuan, “Kei i chhiahhlawh hi eng nge ka nih—uicho mai hian chûng thil ropuite chu engtin nge ka tih theih ang le?” a ti a. Elisa chuan, “Suria mite chungah i la lal dâwn tih LALPAN min hmuhtîr alâwm,” a ti a.

¹⁴Elisa hnên ata chu a chhuak a, a pu hnên a va thlen chuan, “Elisa chuan eng thû ngê a lo hrihl che?” a lo ti a. “I dam chhuak leh ngei dâwn tih min hrihl a ni,” a ti a.

¹⁵Nimahsela, a tûkah chuan puan chhah tak a la a, tuiah a hnim huh a, a pu hmai chu a up bet a, a thi ta a; a aiah Hazaela chu a lal ta a ni.

JUDA LAL JEHORAMA

¹⁶Israel lal Ahaba fapa Jorama lal kum nganâah chuan Jehosaphata (Judai ram lala lo tâng tawh Jehosaphata) fapa Jehorama chu Judai ram lal a lo ni a.

¹⁷Lal a nihin kum 32 a upa a ni a, Jerusalemah kum riat ro a rêl a.

¹⁸A nupui chu Ahaba fanu a nih avângin Ahaba chhûngte tih dânin Israel lallo kawng a zawh vê a; LALPA mithmuhah thil sual a ti thîn a.

¹⁹Mahse LALPAN Judai ram chu a chhiahhlawh Davida avângin a tiboral duh êm lo va, a thlah kal zêlte chena khâwnvâr pêk a lo tiam tawh si a.

²⁰A hun laiin Edom-ho chu Juda thuneihna lakah an hel a, anmahniin lal an insiam a.

²¹Tichuan, Jorama chu a tawlailîr zawng zawng nêen Zair-ah a kal a. A zân a zânin a tho va, amah leh a tawlailîr pute hualtu Edom-ho chu a bei ta a; sipaiho chu anmahni puan in lamah an tlânchhe ta a ni.

²²Edom-ho chu Judate lakah tûn thlengin an la hel reng a. Khatih hun lai khân Libna pawh a hel bawh.

²³Jorama thiltihte leh a chanchin dangte chu Juda lalte chanchin ziahna bû-ah a chuang a ni lo'm ni?

²⁴Jorama chu a thlahtute hnênah a muhîl a, a pute zîngah Davida Khawpuiah an phûm a. A aiah a fapa Ahazia a lal ta a.

JUDA LAL AHAZIA

²⁵Israel lal Ahaba fapa Jorama lal kum 12-naah Juda lal Jehorama fapa Ahazia chu a lal tan a.

²⁶Ahazia chu lal a nihin kum 22 mi a ni a, Jerusalemah kum khat a lal a. A nu chu Israel lal Omria tunu Athaliahi a ni.

²⁷Ahaba tupa a ni bawh a, Ahaba chhûngte tih dân kawng zawhin LALPA mithmuhah thil sual a ti thîn a.

²⁸Ahaba fapa Jorama nêen Suria lal Hazaela bei tûrin Ramoth-Gilead-ah an kal a, Suria-hovin Jorama chu an lo hliam a.

²⁹Suria lal Hazaela an va beih tûmin, Suria-ho chuan Rama khuah an lo hliam a, lal Jorama chu a hliam awm dampui tûrin Jezreel khuah a kîr leh a. Juda lal, Jehorama fapa Ahazia chu

Ahaba fapa Jorama damlo kan tûrin Jezreel-ah a zu kal a.

BUNG 9

JEHUA ISRAEL LAL ATANA HRIAK THIH

¹Zâwlnei Elisa chuan zâwlneiho fapate zînga mi pakhat chu a ko va, a hnênah, “Insiam la, hê hriak bûr hi keng la, Ramoth Gilead-ah va kal rawh.

²Chumi hmun i va thlen chuan, Nimsia fapa, Jehosaphata fapa Jehua zawng chhuak la, inchhûngah lût la, mi dang lakah pindan chhûngrilah hruai hrang ang che.

³Hriak bûr hi keng la, a lu chungah leih la, ‘LALPA chuan, “Israelte chungah lal atân hriak ka thih a che,” a ti,’ va ti rawh,” a ti a. Kawngka hawng vat la, muang lovin tlân chhuak nghâl ang che,” a ti a.

⁴Tichuan, zâwlnei chhiahhlawh tlangvâl chu Ramoth Gilead-ah chuan a va kal a.

⁵A va thlen chuan, sipai hotute an lo tû khâwm a; ani chuan, “Sipai hotu, i hnênah thu sawi tûr ka nei a nia,” a ti a. Jehua chuan, “A tu ber hi nge i tih?” a ti a. Ani chuan, “Sipai hotu, nangma tân a ni e,” a ti a.

⁶Ani chu a tho va, inchhûngah a lût a. A lûah chuan hriak a leih a, “LALPA Israelte Pathianin, ‘LALPA mi Israelte chungah lal atân hriak ka thih a che.

⁷Ka chhiahhlawh zâwlneiho thisen leh, Jezebeli laka LALPA chhiahhlawh zawng zawng thisen phubâ ka lâl theih nân i pu Ahaba chhûngte chu that vek ang che.

⁸Ahaba chhûngkaw pum pui hi an chimit vek tûr a ni; Israel rama Ahaba thlah mipa zawng zawng chu sal pawh, zalên pawh ni se ka tiboral vek dâwn a ni.

⁹Ahaba chhûngkua hi Nebata fapa Jeroboama chhûngkua ang mai leh, Ahija fapa Baasha chhûngkua ang maiin ka siam ang.

¹⁰Jezebeli sa chu Jezreel tual zâwlah uiin an ei ang a, phûmtu pawh tûmah an awm lo vang,’ a ti,” a ti a. Kawngka a hawng a, a tlânsan ta daih a.

¹¹Jehua chu a pu chhiahhlawhte hnênah a va chhuak a, mi pakhat hian, “A t̃ha lam a ni em? Kha mi â kha engtia i hnêna lo kal nge a nih?” a ti a. Ani chuan an hnênah, “Amah leh a t̃awngkam chu in hriat kha,” a ti mai a.

¹²Anni chuan, “A dik lo! Sawi t̃ha mai rawh,” an ti a. Ani chuan, “A thu sawi chu hei hi a ni, ‘LALPAN heti hian a ti: “Israel lal atân hriak ka thih ta a che’ tih thû min hrihl a ni,” a ti a.

¹³Chû vêleh mi tinin an puan an hlîp sawk sawk a, kailâwn chungah Jehua dân nân an phahsak a; t̃awtawrâwt hâmin, “Jehua hi lal a ni ta!” tiin an âu va.

ISRAEL LAL JORAMA AN THAT

¹⁴Tichuan, Nimsia fapa, Jehosaphata fapa Jehua chuan Jorama chu a phiar ta a. (Amah Jorama leh Israel-ho zawng zawng chuan Suria lal Hazaela lakah Ramoth Gilead chu an vêng a.

¹⁵Mahse lal Jorama chu Suria lal Hazaela a beihnaah Suria-hovin an hliam a, awm dam tûra Jezreel-a a kîr lai a ni a.)

Jehua chuan, “In ngaihdân a nih chuan, Jezreel-ah chanchin an thlen loh nân tûma’n khua hi chhuahsan suh se,” a ti a.

¹⁶Jehua chu tawlailîrah chuangin, dam lova Jorama awmna Jezreel-ah chuan a kal a; Juda lal Ahazia pawh Jorama tlawha a awm ve lai tak a ni a.

¹⁷Jezreel râlvên insânga vêngtu chu a lo ding reng a, Jehua-ho lo kal chu a lo thlîr a, “A ruala mi lo kal ka hmû e,” a ti a. Jorama chuan, “Sakawra chuangin lo va hmuaktu tûr tîr la, ‘A tha lam a ni em?’ tiin lo va zâwt rawh se,” a ti a.

¹⁸Sakawr chung chuang mi chu amah lo va hmuak tûrin a kal a, “Lal chuan, ‘A tha lam thila lo kal in ni em?’ a ti e,” a va ti a. Jehua chuan, “A tha lam thû chu eng atân nge i tih? Inher la, mi zui rawh,” a ti a. Tichuan, vêngtu chuan, “Kan mi tirha khân an hnên a va thleng a, mahse a lo kîr leh hauh lo mai,” a ti a.

¹⁹Sakawra chuang mi a tîr leh a, a va thlen chuan, “Lalin ‘A tha lam thu a ni em?’ a ti e” a va ti a. “A tha lam thu chu eng atân nge i tih? Inher la, mi zui rawh,” a ti leh a.

²⁰Vêngtu chuan a rawn sawi leh a, “An hnên a va thleng a, a lo kîr leh chuang lo; a khalh dân saw Nimsia fapa Jehua khalh a ang hlê mai, a khalh vung kher mai!” a ti a.

²¹Jorama chuan, “Inpeih rawh u,” a ti a. A tawlailîr chu an siam peih ta a. Tichuan, Israel lal Jorama leh Juda lal Ahazia te chu anmahni tawlailîr vê vêa chuangin Jehua hmuak tûrin an chhuak a, Jezreel mi Nabotha huanah an va tâwk a.

²²Joraman Jehua a hmuh chuan, “A tha lam a ni ang chu mâw, Jehu?” a ti a. Ani chuan, “Eng tha lam thu â ni, i nu Jezebelin nawhchizawrhna leh ramhuai biakna dâwi heti taka a tihhluar chhûng hian engtin nge a tha lam a awm theih ang?” a ti a.

²³Jorama chu a inher a, tlânchhiat pahin Ahazia hnênah, “Inphatsanna a ni, Ahazia!” a ti a.

²⁴Jehua chuan a thal ngul chu theitâwpin a kuai vak a, Jehorama dâr leh dâr inkarah a kâp a, thal chuan a lung a chhun tlang a, a tawlailîrah chuan a tlu sawp rawp a.

²⁵Jehua chuan a sipai hotu Bidkara hnênah, “A ruang saw Jezreel mi Nabotha huanah sâwn va paih rawh; a pa Ahaba hnunga tawlailîra kan chuan dun lai khân, LALPAN a chungah hê phur hi a lo ngah tawh kha hre reng ang che:

²⁶LALPAN, ‘Niminah khân Nabotha thisen leh a fapa thisen ka lo hmû a,’ a tih kha; ‘hê hmunah ngei hian ka thungrûl ang,’ LALPAN a ti a ni. Chuvângin, LALPA thû ngeiin va lâ la, hê hmunah hian paih ang che,” a ti a.

JUDA LAL AHASIA THAH A NI

²⁷Juda lal Ahasian thil awm dân a han hmû chu Beth Haggan kawngah a tlânchhia a. Jehua chuan a ûm a, “Tawlailîra a chuang chung sâwn kâp mai rawh u,” a ti a. Gur chhohna hmun, Ibleam bulah an kâp a. Ani chu Megiddo khuaah a tlân a, tah chuan a thi ta a.

²⁸Ama miten tawlailîrin Jerusalemah an phur chho va, an thlahtute hnênah Davida Khawpuiah ama thlânah an phûm ta a.

²⁹Ahaba fapa Jorama lal kum 11-naah Ahazia chu Juda-te chungah a lal tan a ni.

JEZEBELI THIH DÂN RÂPTHĀK

³⁰Jehua’n Jezreel khua a lo thlen thu chu Jezebeli chuan a lo hria a; a mitte a dum a, a sam te a lo chei a, tukverhah chuan a dâk chhuak a.

³¹Kulh kawngkâa Jehua a luh laiin ani chuan, “Zimri, mahni pute thattu, thil tha lama lo kal i ni em?” a lo ti a.

³²Tukverh lam chu a han hawi chho va, “Ka lama tang in awm em? Tu nge ni?” a ti a. Tichuan, mitilreh pahnih emaw, pathum emaw hi an lo dâk chhuak a.

³³Ani chuan, “Rawn paih thla rawh u,” a ti a. Tichuan an paih thlâ a, a thisen chu bangah leh sakawrah te chuan a per chuai a; a lo chîl zui baw k a.

³⁴Inchhûngah a lût a, a eiin a in a. Ani chuan, “Kal ula, hê ânhhedawng hmeichhia hi en teh u, lal fanu a ni vê miao si a, phûm rawh u,” a ti a.

³⁵Phûm tûra va kalte chuan a luruh te, a kê ruh te, a kut ruh te bâk hmuh tûr an va hre ta lo va.

³⁶Chuvângin, an lo kîr leh a, an rawn hrilh a. Ani chuan, “Hei hi LALPA thû, a chhiahhlawh Tishbe mi Elija hmanga a lo sawi, ‘Jezreel tual zâwlah Jezebeli sa chu uiin an la ei ang;

³⁷‘Hetah hian Jezebeli a awm,’ tia sawi tûr awm thei lovin, Jezebeli ruang chu Jezreel khaw bula êk dîr maiah a la chang ang,’ tia a sawi kha a lo thleng ta a nih chu,” a ti a.

BUNG 10

AHABA FAPA 70 SUAT MANG

¹Ahaba chuan Samari khuaah fapa 70 a nei a. Jehua chuan Samariah te, Jezreel khaw hotute leh Ahaba fa enkawltute hnênah te lehkha a thawn a:

²“In pu fapate kha in hnênah an awm a, sakawr leh tawlailîrte in nei baw k a, kulh nei khuate leh râltuamte in nei vek baw k a, hê lehkha hian in hnên a rawn thlen veleh,

³in pu fapate zînga a tling ber thlang chhuakin a pa lalthutthlêngah thuttîr ula, in pu chhûngkua chu râldopui rawh u,” tiin.

⁴Anni chuan an hlâu ta êm êm a, “Ngaihtuah teh u, lal pahnih pawhin an chelh lo a ni a; keini tehlul hian engtin nge kan ngam ang?” an ti a.

⁵Lal in enkawltute, khawpui awptute, puipate, lal fapa lo enkawltute chuan Jehua hnênah mi an tîr a, “I chhiahhlawhte kan ni alâwm, tih tûr min hrilh apiang kan ti zawk ang; amaherawhchu tûmah lal dang siam kan tum lo ve. Thâ i tih ang takin ti mai rawh,” an ti a.

⁶Tichuan an hnênah lehkha a vawihnihna atân a thawn leh a: “Ka lama tang in niha, ka thû in zawm dâwn chuan, in pu fapate lû kha la vek ula, naktuk tûn ang hunah ka hnênah Jezreel-ah in lo kal tûr a ni,” tiin. Lal fapate chu 70 lai an ni a, anmahni châwm tleitu khaw chhûnga mi lianho hnêna awm an ni a.

⁷Lehkha an hmuh vêleh lal fapate chu an hrui a, a sawmsarih chuan an that a, an lûte chu bâwm chhûngah an khung a, Jezreel-ah an thawn ta a.

⁸Zualko a lo kal a, “Lal fapate lû chu an rawn thlen tawh e,” a rawn ti a. Ani chuan, “Kulh kawngka bulah khawvâr thlengin hmun hnihah chhep rawh u,” a ti a.

⁹A tûkah chuan a va chhuak a, a din chillh a, mi zawng zawng hnênah, “Nangni chu mi dik tak in ni a. Kei chuan ka pu ka phiar a, ka that ngei a; a nih leh, hênggho zawng zawng hi tute thah nge ni vê?”

¹⁰LALPA thûin Ahaba chhûngkaw chungchâng a lo sawi tawh kha leiah hian engmah a thâmral lo tih tûnah hian hre rawh u; a chhiahhlawh Elija hmanga a lo sawi tawh angin LALPA tih a nih hi,” a ti a.

¹¹Tichuan, Jezreel khuua Ahaba chhûngte la awm zawng zawng, a mi lianhote leh a thian te, a puithiam-ho zawng zawng chu hmaih awm miah lovin a that fâi vek a.

AHAZIA UNAU 42 THAH AN NI

¹²Tichuan a tho va, a kal chhuak a, Samari khuuah a kal ta a. Kal kawnga Berâmpute Hmulmehna in bulah

¹³Jehua chuan Juda lal Ahazia unaute a tâwk a, “Tute nge in nih?” a ti a. Anni chuan, “Ahazia unaute kan ni a; lal fapate leh lalnu fapate chibai bûk tûrin kan chhuk thla dâwn a ni,” an ti a.

¹⁴Ani chuan, “A nung chungin man rawh u!” a ti a. Tichuan, a nung chungin an man a, berâm hmulmehna khur bulah chuan an that a, mi 42 an ni a; tûmah a zuah lo.

AHABA CHHÛNGKUA AN SUATMANG

¹⁵Chû hmun a chhuahsan lai chuan, amah hmuak tûra lo kal Rekaba fapa Jehonadaba nêan an intâwk a; ani pawhin chibai a bûk vê a, a hnênah, “I laka rilru dik ka pû ang hian ka lakah rilru dik i pu vê em?” a ti a. Jehonadaba chuan, “Pu tehlul mai,” a ti a. Jehua chuan, “Chuti chu, i kut mi han pe rawh le,” a ti a. A kut chu a han pe a, ani chuan a tawilailrah a pawt kâi a.

¹⁶Ani chuan, “Ka hnênah hian awm vê la, LALPA tâna ka thahnemngaihzia hi han hmu vê teh khai,” a ti a. Tichuan, a tawilailrah chuan a chuanpui ta a.

¹⁷Samari khuua a lo thlen chuan, Elija hmanga LALPAN a lo sawi tawh angin Samari khuua Ahaba mi leh sa la awm zawng zawng chu a suat vek a.

BAALA BETUTE AN THAT

¹⁸Jehua chuan mipui chu a ko khâwm vek a, an hnênah, “Ahaba khân Baala rawng a bâwl nêp hlê a, Jehua hi zawngin a bâwl uar hlê dâwn a ni.

¹⁹Chuvângin, Baala zâwlnei zawng zawng te, a chhiahhlawhte leh a puithiam zawng zawngte kha ka hnênah rawn ko rawh u. Tûmah kim lo awm suh se, Baala tân inthâwina ropui tham hlan tûr ka nei e. A tel vê lo apiang tihhlum tûr an ni,” a ti a. Jehua chuan Baala betute tihboral tumin finrâwl a chhuah a ni.

²⁰Jehua chuan, “Baala tân inkhâwmpui urhsûn puang rawh u,” a ti bawk a. Tichuan an puang ta a.

²¹Jehua chuan Israel ram zawng zawngah a thawn chhuak a; Baala chibai bûktute chu an lo kal vek a, kal lo rêng rêng an awm lo. Baala tempulah chuan an rawn thleng khâwm a, Baala tempul kil tin mai chu an luah khat vek a.

²²Thuamhnaw enkawltu mi pakhat hnênah, “Baala betu zawng zawngte hâk tûr puithiam kawr va la chhuak teh,” a ti a. Puithiam kawr chu a va la chhuak a.

²³Jehua leh Rekaba fapa Jehonadaba te chu Baala tempul chhûngah chuan an va lût a, Baala betute hnênah, “In zîngah hian LALPA chhiahhlawhte an lo awm palh tâkin zawng chhuak rawh u, Baala betute chauh an awm tûr a ni,” a ti a.

²⁴Tichuan, inthâwina leh hâlrâl thilhlân hlân tûrin an lût a. Jehua chuan pâwnah mi 80 a lo ruat sâ diam a, “Hêng mi in kuta ka pêk tawhte hi an chhuah vaih chuan, chu mi nunna aiah chuan a chhuahtu nunna chuan a tuar ang,” a ti a.

²⁵Chutia hâlrâl inthâwina a hlan zawh vêleh Jehua chuan vêngtute leh sipai hotute hnênah, “Lût ula, va that vek rawh u; tûmah lo chhuak suh se!” a ti a. Tichuan, khandaihin an that ta zawih zawih a; vêngtute leh sipai hotute chuan an theh chhuak zêl a, Baala tempul chhûngrilâh an lût a.

²⁶Baala tempul aţang chuan an thing serh phun te chu an la chhuak a, an hâl a.

²⁷Baala thing serh phunte chu an tichhia a, Baala tempul chawp chuan an chhu chhe vek a, tûn thlengin bawhlhlawh paih khâwmna hmunah a chang ta a ni.

²⁸Chutiang tak chuan Jehua chuan Israel ram aţangin Baal biakna chu a tiboral ta a ni.

²⁹Amaherawhchu, Nebata fapa Jeroboaman Israelte a hruai khawlohna sual lakah Jehua chu a fihlîm tlat lo: Bethel leh Dan khuua rangkachak bâwng no lem biakna chu a bânsan si lo va.

³⁰LALPA chuan Jehua hnênah, “Ka mithmuha thil dik chu tha taka i tih avâng leh, ka duh dân taka Ahaba chhûngte chung a i tih tâk avângin, i thlahten chhuan lîna thlengin lalthutthlêng an luah dâwn a ni,” a ti a.

³¹Nimahsela, Jehua chuan a thinlung zawng zawng chuan LALPA Israelte Pathian dân chu a zâwm duh lo va; sualna kawnga Israelte hruai khawlotu Jeroboama sualna kawngte chu a hawisan duh lo va.

JEHUA THIH THU

³²Chûng lai chuan LALPA chuan Israel ram chu a nawr chêp ţan a; Hazaela pawhin Israel ram zawng zawng chu a hneh zo tawh a.

³³Jordan aţanga chhak lam zawng: Gilead ram pum pui te—Gada te, Reubena te leh Manasea ram—Arnon Lui kama awm Aroer aţangin Gilead leh Basan ram thlengin a hneh vek a ni.

³⁴Jehua thiltihte, a chakzia leh a chanchin dangte chu Israel lalte chanchin ziahna bû-ah a chuang a ni lo’ m ni?

³⁵Tichuan, Jehua chu an thlahtute hnênah a muhîl a, Samari khuuah an phûm a. A fapa Jehoahaza chu a aiah a lal ta a.

³⁶Jehuan Samari khuua Israelte chung a ro a rêl chhûng chu kum 28 a ni.

BUNG 11

JUDA LALNU ATHALIAH-I

¹Ahazia nu Athaliahi chu a fapa a thî tih a hriatin a tho va, lal thlahho rêng rêng chu a that vek a.

²Amaherawhchu, Lal Jorama fanu Jehoseba-i, Ahazia farnu chuan Ahazia fapa Joasha chu lal fapate an thah mêk laiin a ru bo va; a awmtu nêen khum pindana a thukrû a, Athaliahi chuan a tihlum ve ta lo va.

³Athaliahin ram rorêlna a chan hun chhông zawngin LALPA inah kum ruk zet an thukrû a.

JUDA LALAH JOASH-A A TANG

⁴A kum sarihnaah chuan Jehoiadan vêngtu sipaite zînga sipai za hotute chu a ko va— LALPA inah, ama hnênah a ko khâwm a, LALPA inah chuan anniho nêen thuthlung siamin chhia a chhamtîr a, lal fapa chu an hmâah a hruai chhuak a.

⁵An hnênah thû a pê a, “Hetiang hian in ti tûr a ni: Sabbath nia vên hnâ chang tûra lo kalte zînga hmun thuma thena hmun khatin lal in vêng ula,

⁶hmun thuma thena hmun khat chu Sur kawngkâah, hmun thuma thena hmun khat dangin vêngtu hnung lam kawngkâ an vêng ang. In chu tihchhiat a nih loh nân tha takin vêng ang che u.

⁷Sabbath nia pâwl hnih thawk vê lo tûrte chuan LALPA in leh lal in chu ngun takin an vêng tûr a ni.

⁸Lal hi kil tinah râlthum nêen a vêlin in vêng reng tûr a ni; tûpawh hnai deuhva lo kal apiang chu thah zêl tûr a ni. Lal chu a lût leh a chhuak in zui reng bawk tûr a ni,” a ti a.

⁹Tichuan, sipai za hotute chuan puithiam Jehoiada thupêk ang zêlin an ti a. An hote zînga mi Sabbath nia châwl tûrte leh thawk tûrte chu an hruai a, puithiam Jehoiada hnênah an va kal thîn a.

¹⁰Puithiam chuan sipai za hotute hnênah LALPA ina Lal Davida fei leh phâwte chu a pê a.

¹¹Vêngtu sipaite chuan an râlthumte kengin tempul ding lam ațanga tempul vêi lamah, in leh maichâm kiangah chuan lal chu a hualin an vêng tlat a.

¹²Lal fapa chu arawn hruai chhuak a, lallukhum a khumtîr a, Hriattîrna thû chu a pê a; hriak an thih a, lalah an siam a, “Lalber dam reng rawh se!” an ti a, kut an bêng dur dur a.

ATHALIAH-I THIH THÛ

¹³Athaliah-in vêngtuho leh mipui thâwm a lo hriat chuan, LALPA tempulah chuan mipui zîngah a va kal a.

¹⁴A han en nâk chuan lal chu tihdân pangngaiin ban bulah a lo ding a, hnam hruaitute leh tâwtawrâwt hâmtute chu lal bulah chuan an lo awm thup a. A ram mipui zawng zawng chu an hlim êm êm a, tâwtawrâwt an hâm ruai ruai a. Athaliah-i chuan a puan te a pawthlêr a, “Phiarrûkna! Phiarrûkna!” tiin a âu va.

¹⁵Puithiam Jehoiada chuan sipai za hotute leh sipai hotute hnênah, “Pâwn lamah vên chungin va hruai chhuak ula, a hruaitute chuan khandaihin va that rawh se,” tiin thû a pê a. “LALPA inah chuan thah tûr a ni lo ve,” tiin a lo sawi tawh si a.

¹⁶Tichuan, an man a; lal in panna sakawr kawngka lamah an kalpui a, chutah chuan an va that ta a.

¹⁷Jehoiada chuan LALPA leh lal leh mipuite inkârah chuan LALPA mi an nih theih nân thuthlung a siam a, lal leh mipui inkârah thû a thlung bawk a.

¹⁸Mipui zawng zawng chu Baala tempulah an kal a, an chhu chhia a. Maichâm leh milimte chu an chhu sawm vek a, maichâm hmâah chuan Baala puithiam Mattana chu an that a. Puithiam chuan LALPA in vêngtu atân hotute a ruat bawk a.

¹⁹Sipai za hotute, lal vêngtute leh ram chhông mipuite chu a hruai vek a; LALPA in ațang chuan lal chu an hruai thlâ a, vêngtute kawngka lamah lal in chhôngah chuan an hruai lût ta a. Tichuan, lalhote thutna thîn lalthutthlêngah chuan a thû ta a.

²⁰Mipui zawng zawng chu an lâwm a; Athaliah-i chu khandaiha lal ina an thah tâk avângin khawpui chhông pawh a râlmuang ta a. Jehoasa chu lal a nihin kum sarikh mi a ni.

BUNG 12

JEHOASAN TEMPUL A SIAM THA

¹Jehua lal kum sarikh kumin, Jehoasa chu a lo lal tan a, Jerusalemah kum 40 chhông ro a rêl a. A nu hming chu Beerseba mi Zibiahi a ni.

²Jehoasa chuan puithiam Jehoiada kaihhraina anga a awm chhông chuan LALPA mithmuah dik takin thil a ti thîn.

³Mahse, hmun sângte chu tihbo a ni lo va; mite chuan hmun sângte chu rimtui hâla inthâwi nân an hmang reng a.

⁴Jehoasa chuan puithiamte hnênah, “LALPA ina dah luh tûr thilpêk sum serh hran tawh zawng zawng—mi tin pêk tur zât chhinchhiah tawh te, mimal intiamna sum te—mahni duh thûa LALPA ina anrawn pêk rêng rêng chu,

⁵puithiamten an mi hriat zâwng theuh ațangin lo dawng sela; tempul chhe lai an hmuh apiang siam that nân hmang rawh se,” a ti a.

⁶Nimahsela, Lal Jehoasa lal kum 23-naah pawh puithiamte chuan tempul chhe laite chu an la siam tha ta chuang lo va.

⁷Tichuan, Lal Jehoasa chuan puithiam Jehoiada leh puithiam dangte chu a ko va, an hnênah, “Engah nge tempul chhia in la siam that loh cheu le? Chuvângin, in hmêlhriatte ațangin pawisa engmah lo dawng tawh suh ula, tempul siam that nân pe zêl tawh zâwk rawh u,” a ti a.

⁸Puithiamte chuan mite hnên ațanga pawisa dawng tawh lo va, tempul chhia siam that pawh anmahnin tih loh mai an remti ta a ni.

⁹Puithiam Jehoiada chuan thingrem a lâ a, a chhin a rek pawp a, LALPA ina lo kalte tân ding lamah, maichâm sirah a hûng a; kawngka vêngtu puithiam chuan LALPA ina pawisa anrawn pêk apiang chu chutah chuan a thlâk zêl a.

¹⁰Thingremah pawisa a tla tam tâwk ta tih an hriat hunah, lal lehkhaziaktu leh puithiam lalber an lo kal a, ipah an khung a, LALPA ina pawisa awm zât chu an chhiar thîn a.

¹¹Pawisa zât an chhiar tawh chu LALPA in siam thât hna thawk hotute hnênah an pê a; anni chuan LALPA ina hnathawktute leh mistirite,

¹²lung chhertute leh lung latu rawih nân te, thingzai leh lungchher sa lei nân te, LALPA in chhe siam thât nâna mamawh thil apiang atân te an pe thîn a ni.

¹³Mahse, LALPA ina sum anrawn kente chu LALPA ina hman tûr silvar chawhtawh te, khâwnvar phita chehrualna te, berhbû te, tâwtawrâwt te, rangkachak leh silvâr bungbêl siam nân rêng rêng an hmang lo.

¹⁴Hnathawktute hnênah an hlân zêl a, annin LALPA in chhe lai apiang an siamthâ a.

¹⁵Hnathawktute hnêna hlawh an pêk chhuah ațanga pawisa an hman dânah an rinawm êm avângin endiksak rêng an ngai lo.

¹⁶Bawhchhiat thâwina sum leh sual thâwina sum chu LALPA inah chuan an pe lût lo. Puithiamte chanpual a ni.

HAZAEAN JERUSALEM A VAU

¹⁷Suria lal Hazaela chu a han thawk chho va, Gath khua a bei a, a lâ a; Hazaela chuan Jerusalem pawh beih zêl a tum a.

¹⁸Juda lal Jehoasa chuan a pute, Juda lal Jehosaphata te, Jehorama te leh Ahazia te thil serh hran tawhte leh amah pawhin a lo hlan tawhte bâkah, LALPA inah leh lal ina sum bawma rangkachak awm zawng zawng nêna khâwm vek a, Suria lal Hazaela hnênah a thawn a. Tichuan Jerusalem chu a kiansan ta a ni.

JOASA THIH THÛ

¹⁹Joasa thiltih dangte leh a chanchin chu Juda lalte chanchin ziahna bûah a chuang lo vem ni?

²⁰Ama mite chu an tho va, an phiar rû a, Silla pan chhuknaa Millo inah Joasa chu an thât a.

²¹Ama mi, Simeatha fapa Jozakara leh Somera fapa Jehozabada-ten an thât a. A thi ta a, Davida Khawpuia an thlahtute zingah an phûm a. A aiah a fapa Amazia chu a lal ta a ni.

BUNG 13

ISRAEL LAL JEHOAHAZA

¹Juda lal, Ahazia fapa Joasa lal kum 23-naah Jehua fapa Jehoahaza chu Israelte chungah Samari khuaah a lal ƣan a, kum 17 chhûng ro a rêl a.

²LALPA mithmuhah thil sual a ti thîn a, Israel-ho hruai sualtu Nebata fapa Jeroboama sualna kawng a zawh tlat a. A pênсан duh lo va.

³Israelte chungah LALPA thinurna a chawh tho ta a, a hun chhûng zawngin Suria lal Hazaela kutah leh Hazaela fapa Ben-Hadada kutah te a pe thîn a.

⁴Jehoahaza chu LALPA hnênah a ƣawngtâi a, LALPA chuan a lo ngaihthlâksak a; Suria lalin Israelte a hnehchhiazhia leh, Israelte chungah Suria lal invilikzia chu a hmu reng si a.

⁵Tichuan, LALPAN Israelte hnênah chhanchhuaktu a pê a, Suria-ho kut ata chu a chhuahthîr a; a hmâ ang bawkin Israel fate

chuan anmahni in leh lo chu an luah lum leh thei ta a ni.

⁶Chutichung pawhin, Israelte hruaisualtu Jeroboama chhûngkaw sualna khâ an bânsan chuang lo va, an zui tlat a; Samari khuaah pawh thinga siam milim a la dîng fer fur a.

⁷Jehoahaza sipai kawh chhun chu, sakawr chung chuang mi sawmngâ, tawhlailîr sâwm leh, kêa kal sipai rual sîngkhat chiaa a ni; Suria lalin a tihboralsak vek a, vaivut ang lekin a lo chîl darhsak tawh si a.

⁸Jehoahaza chanchin dang te, a thiltihte leh a chakzia te chu Israel lalte chanchin ziahna bû-ah a chuang a ni lo'm ni?

⁹Tichuan, Jehoahaza chu a pute hnênah a muhîl a, Samari khuaah an phûm a. A aiah a fapa Joasa a lo lal ta a.

ISRAEL LAL JEHOASA

¹⁰Juda lal Joasa lal kum 37-naah chuan Samari khuaah Jehoahaza fapa Jehoasa chu Israel ramah a lal ƣan a, kum 16 chhûng ro a rêl a.

¹¹LALPA mithmuhah thil sual a ti a. Israelte hruai sualtu, Nebota fapa Jeroboama sualna zawng zawng kha bânsan duh lovin a ti lui tlat zâwk a.

¹²Joasa chanchin dangte, a thiltihte leh Juda lal Amazia nêna indova a chak dân te chu, Israel lalte chanchin ziahna bûah a chuang a ni lo'm ni?

¹³Tichuan, Joasa chu a pute hnênah a muhîl a. A lalthutthlêngah chuan Jeroboama arawn ƣu ta a. Joasa chu Samari khuaah Israel lalte zingah an phûm a.

ELISA THIH THÛ

¹⁴Elisa chu a thihpui tûr natnain a tlâkbuak tawh a. Israel lal Joasa chuan a zuk kan a, a chungah chuan, “Aw ka pa, ka pa, Israelte tawhlailîr leh sakawr chung chuang mi chu i ni si a!” tiin a ƣah a.

¹⁵Elisa chuan a hnênah, “Thal ngul leh thalte han la teh,” a ti a. Tichuan, thal ngul leh thalte chu a lâ a.

¹⁶Israel lal hnênah chuan, “Thal ngul kha chelh rawh le,” a ti a. Tichuan, a han chelh a, Elisa chuan lal kut chungah a kut a ngat a.

¹⁷“Chhak lam tukverh kha hawng rawh le,” a ti a; a hawng a. Elisa chuan, “Kâp rawh,” a ti a; a kâp ta a. “LALPA chhan chhuahna thal a nih kha, Suria laka chhan chhuahna thal chu; Suria-ho chu Aphek hmunah ral raih khawpin i la sawp dân asin,” a ti a.

¹⁸Ani chuan, “Thalte kha han la teh,” a ti a; a la leh a. Israel lal hnênah chuan, “Lei kha han chhun sawk sawk teh,” a ti a; tichuan wavi thum a han chhun a, a duh tâwk mai a.

¹⁹Pathian mi chu ani chungah chuan a thinur a, “Wavi nga wavi ruk lai chhun ta che le; Suria-ho i chhu chhe vek mai tûr a ni nâ ale! Suria-ho chu wavi thum chauh i sawisa dân a nih kha,” a ti ta a.

²⁰Elisa chu a thî a, an phûm a. Chumi kum nipui laiin Moab ațanga rûntuten ram chhûng anrawn rûn a.

²¹Mi pakhat hi an phûm dân lai takin rûntu sipai pâwl an hmu thut a; chu mi chu Elisa thlânah an dah a; a ruang chu an

thlâk thlâ a, Elisa ruh a zuk deh veleh a lo nung leh a, a kêin a ding chhuak leh ta mai a.

ISRAELTEN SURIA-HO KUTA KHUATE AN LA LÊT

²²Suria lal Hazaela chuan Jehoahaza hun chhûng zawng chuan Israelte a rawn chaw buai a.

²³Nimahsela, LALPA chuan a lainatin a khawngaih êm êm a, a ngaihven reng a, Abrahama te, Isaaka te leh Jakoba te hnêna thû a lo thlun tawh avângin an boral a phal lo va, a hnên ațanga paih bo a phal hek lo.

²⁴Suria lal Hazaela chu a thi ta a. A aiah a fapa Ben-Hadada a lal a.

²⁵Jehoahaza fapa Jehoasa chuan a pa Jehoahaza kut ațanga indonaa an lâksak tāk khuate chu Hazaela fapa Ben-Hadada kut ațangin a chhuh lêt leh a. Joasa chuan vawi thum ngawt a hneh a, Israel khawpuite chu a la lêt leh ta a ni.

BUNG 14

JUDA LAL AMAZIA

¹Israel lal, Jehoahaza fapa Joasa lal kum hnihnaah Joasa fapa Amazia chu Judai ramah a lal ățan a.

²Lal a lo nihin kum 25 a upa a ni a, Jerusalema kum 29 chhûng ro a rêl a. A nu hming chu Jerusalema mi Jehoaddani a ni.

³A pu Davida chu tluk lo mahse LALPA hmuhah thil dik a ti thîn a; a pa Joasa tih angin a ti ve zêl a ni.

⁴Hmun sângte erawh chu a tibo lo va, mite chuan rimtui hâlin inthâwi nân an la hmang reng a.

⁵Lalram chu ama kutah a chelh nghet sauh sauh va, a pa, lal thattu hnuai thawkte chu a that vê a.

⁶Nimahsela, tualthattu fate chu a that vê lo, “Fate avângin an pate tihhlum tûr a ni lo va, an pate avângin an fate tihhlum tûr a ni hek lo; mi tin mahni sual avâng ngeia tihhlum an ni zâwk tûr a ni,” tia LALPA thupêka, Mosia Dân Bûa inziak ang khân.

⁷Chi Ruamah Edom-ho mi sîngkhat a that a, Sela khua chu a bei a, a la bawk a, Joktheel tiin a hming a vuah a, tûn thlengin a la pu ta reng a ni.

⁸Amazia chuan Jehua fapa, Jehoahaza fapa Jehoasa, Israel lal hnênah chuan palai a tîr a, “Lo kal la, hmaichhanah i lo inbei teh ang,” a ti a.

⁹Israel lal Jehoasa chuan Juda lal Amazia hnênah, “Lebanon lênglîng hian Lebanon sidar thing hnênah, ‘I fanu kha ka fapa nupuih min pe rawh,’ a ti vei rawk a; Lebanon sakawlh a lo kal a, lênglîng chu a chîl thlu tawp mai asin.

¹⁰Edom i han hneh ve dêk dêk a, i rilru a chapo hlê mai mâw. I chapon a kha tawmpui hlê hlê ta che; engah nge nang leh Juda hnam i tlûk chhiatpui tûr ringawta buaina chawh chhuah i tum le?” a ti a.

¹¹Mahse, Amazia chuan a pawisa duh si lo va. Tichuan, Israel lal Jehoasa chu a thawk chhuak ta a; Juda ram chhûnga Beth Semes-ah Juda lal Amazia nêh hmaichhanah an inep ta a.

¹²Judaho chu Israelte chuan an hneh ta ngei a, meikhupin an tlân haw ta a.

¹³Israel lal Jehoasa chuan Juda lal Amazia, Ahazia fapa, Jehoasa fapa chu Beth Semes-ah chuan a man a; Jerusalema-ah a chho zêl a, Jerusalema kulh chu Ephraim Kawngka ațangin Bangkil Kawngka thleng-tawng 400 zet a chhut chhiatsak a.

¹⁴LALPA in leh lal ina sum bâwm ațanga rangkachak leh silvar zawng zawng leh bungbêl an hmuh theih zawng zawng chu, sala mante nêh a la vek a, Samari khaw lamah a haw leh ta a.

¹⁵Jehoasa chanchin dangte, a thiltih te, a chakzia te leh Juda lal Amazia nêna an indo chanchinte chu-Israel lalte chanchin ziahna bûah a chuang a ni lo’m ni?

¹⁶Jehoasa chu a pute hnênah a muhîl a, Israel lalte zîngah Samari khuaah an phûm a. A fapa Jeroboama chu a aiah a lo lal ta a.

¹⁷Juda lal Amazia chu Israel lal, Jehoahaza fapa Jehoasa thih hnûah kum 15 a la dam a.

¹⁸Amazia thiltih dangte chu, Juda lalte chanchin ziahna bûah a chuang a ni lo’m ni?

¹⁹Jerusalema phiarrutu pâwl an insiam a, Lakis khuaah a tlânchhia a; mahse Lakis-ah pawh chuan an va ûmzui zêl a, chutah chuan an va that ta a.

²⁰Sakawrin an rawn phur hâwng a, Jerusalema, Davida Khawpuia an thlahtute zîngah an phûm ta a ni.

²¹Juda mipuite chuan kum 16 mi Azaria chu an hruai a, a pa Amazia aiah lalah an siam ta a.

²²A pa, lal kha an thlahtute hnêna a muthil hnûin Elath chu Juda ramah a la lêt leh a, khua a dîn ța leh a.

JEROBOAMA II-NA, ISRAEL LAL

²³Joasa fapa Juda lal Amazia lal kum 15-naah Israel lal Jeroboama, Joasa fapa chu Samari khuaah a lal ățan a, kum 41 chhûng ro a rêl.

²⁴LALPA mithmuhah thil sual a ti thîn a; Israelte hruai sualtu Nebata fapa Jeroboama sualna kawng chu a bânsan duh lo va.

²⁵LALPA Israelte Pathianin a chhihhlawh zâwlnei Jona, Amittai fapa, Gath Hepher mi hmanga a lo sawi ang khân Hamath luhna ațanga Araba tuipui inkâr ramte chu a la lêt leh a ni.

²⁶Israelten an tawrh nasatzia chu LALPA chuan a hmu reng a; sal emaw, zalên emaw tân pawh nise, Israelte tân ățanpuitu rêng an awm si lo.

²⁷LALPA chuan vân hnuai ata Israel hming a thâi bo dâwn tih a sawi lo rêng rêng a; Joasa fapa Jeroboama hmangin a chhan chhuak ta zâwk a ni.

²⁸Jeroboama chanchin dang te, a thiltih zawng zawng-a chakzia leh râl a do dân te, Juda rama lo bet thîn- Damaska leh Hamath khua Israelte tâna a lâk lêt leh thûte chu-Israel lalte chanchin ziahna bûah a chuang a ni lo’m ni?

²⁹Tichuan, Jeroboama chu a pu Israel lal hote hnênah a muhîl ve ta a. A aiah a fapa Zekaria chu a lo lal ta a ni.

BUNG 15

JUDA LAL AZARIA

¹Israel lal Jeroboama lal kum 27-naah Amazia fapa Azaria chu Juda lalah a lo awm òan a.

²Lal a nihin kum 16 mi a ni a, Jerusalem kum 52 chhông ro a rêl. A nu hming chu Jekoliahi, Jerusalem mi a ni.

³A pa Amazia ang bawkin LALPA mithmuhah thil òa a ti òin a,

⁴hmun sângte erawh chu a tibo tel lo va; mite chuan chûng hmun sângte chu rimtui hâla inthâwi nân an la hmang reng a.

⁵Chuvângin, LALPA chuan lal chu kut a thlâk a, a thih thlengin a phâr ta a; in fâl takah a inkhung hrang ta reng a. Lal fapa Jothama chuan lal chhôngkua enkawlin ram mipuite chungah ro a rêl ta a ni.

⁶Azaria thiltih leh chanchin dangte chu Juda lalte chanchin ziahna bûah a chuang a ni lo'm ni?

⁷Tichuan, Azaria chu an thlahtute hnênah a muhîl a, Davida Khawpuiah chuan a pute zîngah an phûm a. A fapa Jothama chu a aiah a lo lal ta a.

ISRAEL LAL ZEKARIA

⁸Juda lal Azaria lal kum 38-naah Jeroboama fapa Zekaria chuan Israelte chungah Samari khuah thla ruk chhông ro a rêl a.

⁹A pa lo tihdân angin LALPA mithmuhah thil sual a ti òin a; Israelte hruai sualtu Nebata fapa Jeroboama sualna kawng a hawisan duh lo va.

¹⁰Jabesa fapa Salluma chuan ani chu a phiar a, mipui hmâah a bei a, a that a; a aiah a lal ta a.

¹¹Zekaria thiltih chanchin dangte chu, Israel lalte chanchin ziahna bûah a chuang.

¹²Chû chu Jehua hnêna LALPAN, "I thlahte chuan Israel lalthutthlêng chu chhuan lî-na thlengin an luah ang," tia a lo sawi kha a ni a. Chutiang tak chuan a lo thleng ta a ni.

ISRAEL LAL SALLUMA

¹³Juda lal Uzzia lal kum 39-naah chuan Jebesa fapa Salluma chu a lo lal a; thla khat chhông Samari khuah a lal hman.

¹⁴Gadia fapa Menahema chu Tirza aţanga lo chhovin Samari khuah a lo kal a, Samari-ah chuan Jabesa fapa Salluma chu a bei a, a that a; a aiah a lal ta a.

¹⁵Salluma thiltih dang te, a phiarrûk dân chanchin te chu Israel lalte chanchin ziahna bû-ah a chuang.

¹⁶Tirza aţangin Menahema chuan Tipsa khuah te, a chhônga awm zawng zawngte leh a ramte chu a bei a. A hnêna an inpêk duh loh avânga bei a ni a. Hmeichhe râl lai zawng zawng chu an dul a pir thlêrsak a.

ISRAEL LAL MENAHEMA

¹⁷Juda lal Azaria lal kum 39-naah Gadia fapa Menahema chu Israel lal a lo ni a, Samari khuah kum sâwm chhông ro a rêl.

¹⁸LALPA mithmuhah thil sual a ti òin a; Israelte hruai sualtu Nebata fapa Jeroboama sualnate chu a dam chhôngin a kalsan lo.

¹⁹Assuria lal Pula chu an ramah chuan arawn lût a; a lalram chu ama kuta tihchak zêl a nih theih nân Menahema chuan Pula chu silvar tangka talent 1,000 a lo pê a.

²⁰Menahema chuan Assuria lal hnêna pêk tûrin Israel rama mi hausa deuh deuhthe hnên aţangin sekel 50 zêl a khawn khâwm a. Tichuan, Assuria lal chu a ram chhônga awm reng lovin a kîr leh ta a.

²¹Menahema chanchin dang te leh a thiltihthe chu, Israel lalte chanchin ziahna bû-ah a chuang a ni lo'm ni?

²²Menahema chu an thlahtute hnênah a muhîl a. A aiah a fapa Pekahia a lo lal a.

ISRAEL LAL PEKAHIA

²³Juda lal Azaria lal kum 50-naah Menahema fapa Pekahia chu Samari khuah Israel lal a lo ni a, kum hnih chhông ro a rêl.

²⁴LALPA mithmuhah thil sual a ti òin a; Israelte hruai sualtu Nebata fapa Jeroboama sualnate chu a hawisan duh lo va.

²⁵Ama sipai hotu, Remalia fapa Peka chuan amah chu a phiar a, Samari khuah lal in chhôngah Argoba leh Ariela te nân an that a; a lamţang Gilead mi 50 rual an awm a. A thah hnûah a aiah a lo lal ta a.

²⁶Pekahiaa chanchin dang leh a thiltih zawng zawngte chu Israel lalte chanchin ziahna bû-ah a chuang.

ISRAEL LAL PEKA

²⁷Juda lal Azaria lal kum 52-naah Remalia fapa Peka chu Samari khuah Israel lal a lo ni a, kum 20 chhông ro a rêl.

²⁸LALPA mithmuhah thil sual a ti òin a; Israelte hruai sualtu Nebata fapa Jeroboama sualna a hawisan duh lo va.

²⁹Israel lal Peka hun lai hian Assuria lal Tiglat-Pileseran arawn rûn a, Ijon te, Abel Beth Maaka te, Janoa te, Kades te, Hazor te, Gilead leh Galili te, Napthali ram pum te a la vek a; Assuria ramah salah a hruai hlawm a.

³⁰Elaha fapa Hosea kaihhruaiin Remalia fapa Peka chu an phiar a, an bei a, an that a; tichuan, Uzzia fapa Jothama lal kum 20-naah chuan ani chu a lo lal ta a ni.

³¹Peka chanchin leh a thiltih dang te chu Israel lalte chanchin ziahna bû-ah a chuang.

JUDA LAL JOTHAMA

³²Israel lal, Remalia fapa Peka lal kum hnihnaah chuan Uzzia fapa Jothama chu Judai ramah a lal òan a.

³³Lal a nihin kum 25 mi a ni a, Jerusalem kum 16 chhông ro a rêl. A nu hming chu Zadoka fanu Jerusai a ni.

³⁴A pa Uzzia tih dân ang bawkin LALPA mithmuhah thil òa a ti òin a.

³⁵Hmun sângte erawh chu a tibo tel lo va; chûng hmun sângte chu mite chuan rimtui hâla inthâwi nân an hmang reng a ni. LALPA in Kawngka Chung chu a siam a.

³⁶Jothama chanchin dang, a thiltih te chu Juda lalte chanchin ziahna bûah a chuang a ni lo'm ni?

³⁷Chúng hun lai chuan Juda-ho do tûrin LALPAN Suria lal Regina te, Remalia fapa Peka te a tîr ẵn a.

³⁸Jothama chu a thlahtute hnênah a muhîl a, a pu Davida Khawpuiah an phûm a. A fapa Ahaza chu a aiah a lo lal ta a.

BUNG 16

JUDA LAL AHAZA

¹Remalia fapa Peka lal kum 17 naah Juda lal, Jothama fapa Ahaza chu a lo lal ẵn a.

²Ahaza chu lal a nihin kum 20 mi a ni a, Jerusalemah kum 16 chhûng ro a rêl a; a pu Davida tih angin LALPA a Pathian hmuhah thil thâ a ti vê lo va.

³Israel lalte nun dân kawng a zui zâwk a; Israel fate hmâa LALPAN a hnawh chhuah tâk hnamho chîn dân tenawm tak tak angin a fapa chu meiah a kal tlangtîr* a.

⁴Hmun sângah te, tlâng chungah te, thing hring tin hnuaiah te a inthâwî a, rîmtui a hâl thîn a.

⁵Suria lal Rezina leh Remalia fapa Peka, Israel lalte chu Jerusalem bei tûrin an lo kal a; Ahaza chu an rawn hual a, mahse an la thei lo.

⁶Chúng lai chuan Suria lal Rezina chuan Elath chu Suria ram tân a la lêt leh a, Elath aẵng chuan Judate chu a hnawt chhuak a. Edom-ho chu Elath-ah an va kal a, tûn thlengin an luah ta a.

⁷Ahaza chuan Assuria lal Tiglat-Pilesera hnênah palai a tîr a, “I fapa leh i chhiahhlawh ka ni alâwm. Lo kal la, min dotu Suria lal leh Israel lal kut aẵng hian min rawn chhan chhuak ta che,” a ti a.

⁸Ahaza chuan LALPA in leh lal ina sum bawma silvar leh rangkachak a hmuh theih zawng chu Assuria lal hnênah thilpêk atân a kentîr a.

⁹Assuria lal chuan a lo ngaihven hlê a; Damaska do tûrin a kal a, khua chu a la a, mipuite chu Kîr-ah sal atân a hruai a, Rezina chu a that a.

¹⁰Lal Ahaza chu Assuria lal Tiglat-Pilesera hmu tûrin Damaska-ah a va kal a, Damaska khuaa maichâm chu a va hmû a; Lal Ahaza chuan chu maichâm siam dân ziarâng leh pianhmang chu puithiam Urija hnênah a thawn a.

¹¹Puithiam Urija chuan Lal Ahazan Damaska aẵng tih dân tûr a chah ang tak chuan maichâm chu a đin ta a. Damaska aẵng Lal Ahaza lo kîr leh hmân puithiam Urija chuan a lo siam peih hman vek a.

¹²Damaska aẵng lal a lo kîr leh chuan lal chuan maichâm chu a hmû a; lal chuan maichâm chu a va pan a, inthâwina thil hlan nân a hmang a.

¹³Hâlrâl thilhlân leh buhbâl thilhlân a hlân a; in tûr thilhlân a leih a, remna thilhlân thisenin maichâm chu a theh a.

¹⁴LALPA hmâa đâr maichâm, tempul hma lama mi–maichâm thar leh LALPA in inkâra mi chu a la sawn a– maichâm thar hmar lamah a hûng a.

¹⁵Lal Ahaza chuan puithiam Urija hnênah, “Maichâm thar lianah hian zing lam hâlrâl thilhlân te, tlai lam buhbâl thilhlân te, lal puala hâlrâl leh buhbâl thilhlân te, ram mipui zawng zawng

tâna hâlrâl thilhlân te, in tûr thilhlân te hâl thîn la; chumi chungah chuan hâlrâl thilhlân thisen zawng leh inthâwina thisen zawng zawng chu theh vek ang che. Đâr maichâm hi chu inbiakrâwn nâna ka hman tûr a ni e,” a ti a.

¹⁶Chutianga Lal Ahaza thupêk ang tak chuan puithiam Urija chuan a ti a.

¹⁷Lal Ahaza chuan tawlailîr bawmte chu a thiat a, insilna bêlte chu a dah bo va; belpui chu a inhûnna dârsen bawngpa lim chung aẵng in a la thlâ a, lungrem chungah a hûng a.

¹⁸Assuria lal avângin Tempul chhunga Sabbath hulhliap an siam chu a dah bo va, LALPA in aẵng lal in luhna kailâwn pawh a dah bo vek a.

¹⁹Ahaza thiltih leh chanchin dang te chu Juda lalte chanchin ziahna bû-ah a chuang a ni lo’ m ni?

²⁰Ahaza chu a thlahtute hnênah a muhîl a, Davida Khawpuiah a pute zingah an phûm a. A fapa Hezekia chu a aiah a lo lal ta a.

BUNG 17

ISRAEL LAL HOSEA

¹Juda lal Ahaza lal kum 12-naah Ela fapa Hosea chu Israel lalah a awm ẵn a, Samari khuaah kum kua ro a rêl.

²LALPA mithmuhah thil sual a ti thîn a; mahse a hmâa Israel lalho ang êm erawh chu a ni lo.

³Amah rûn tûrin Assuria lal Salmanesera a rawn thawk chho va; Hosea chu a thuhnuaiah, chhiah châwiin a awm ta a.

⁴Hosea chuan phiarrûkna thil a ti tih Assuria lal chuan a lo hria a; Aigupta lal Soa hnênah palaite tûrin Assuria lal hnênah kum tina a pêk thîn chhiah a pe ta lo bawk a. Chuvângin, Assuria lal chuan a kharkhip tlat a, phuor chungin tân inah a khung ta a.

ISRAEL MITE ASSURIA SALA HRUAI BO

⁵Assuria lal chuan ram chu a fang chhuak a, Samari khuaah a chho va, kum thum chhûng a hual a.

⁶Hosea kum kua a lal kumah Assuria lal chuan Samari khua chu a lâ a, Israel mite chu Assuria salah a hruai bo va, Halah-ah te, Gozan Lui bula Habor-ah te leh Medai-ho khuaah te a dah hlawm a.

⁷Chutiang thil a lo thlenna chhan chu, Israelte Aigupta lal Pharoa thuhnuaia an kûn laia Aigupta ram aẵng hruai chhuaktu LALPA an Pathian an sualsan a; pathian dangte an biaksan avâng leh,

⁸LALPAN Israel fate hmâah leh, Israel lalte hmâa a hnawh chhuahsak hnamte tihdân leh chîn dân an zui ve tâk vâng a ni.

⁹Chû lo pawh, Israel fate chuan a rûkin LALPA an Pathian duh loh zâwng thil chu dik lo takin an ti thîn a, râlven insâng aẵng kulh nei khawpui tinah hmun sângte an siam vek bawk a.

¹⁰Tlâng sâng tinah leh thing hring tin hnuaiah lungphun serh te leh thinga siam milimte an phun thliah thluah a.

¹¹LALPAN an hmâa lo awm hnam a hnawh bote ang maiin hmun sâng zawng zawngah rîmtui an hâl sup sup thîn a; LALPA thinurna chawh tho tûrin suahsualna thil an ti reng a,

¹²LALPAN, “Hetiang thil rêng rêng hi in ti tûr a ni lo,” a tih pathian lem rawng an bâwl tlat si a.

¹³LALPA chuan Israel te, Juda te, a zâwlnei-ho leh hmutheitu zawng zawng hnênah, “In nun dân sual hi kalsan ula, ka dân thuruat leh ka thupêk, in thlahtute hnêna ka chhiahhlawh zâwlneite hmanga ka hriattîr tawh chu zâwm rawh u,” a ti tîn a.

¹⁴Chuti chung pawh chuan an ngaithla duh lo va, LALPA an Pathian thû âwih duh lovin, an pi leh pute ang bawkin an ring an tikhawng lui tlat a.

¹⁵An pipute hnêna a pêk a thuthlung te, a thuruat te leh, a hriattîrna thûte chu an pawisa duh lo va; an vêla hnam dangte awm dân anga awm hauh lo tûra LALPAN a khap tlat chung pawhin mîlem pathian zuiin mîlem betu an lo ni zo ta a.

¹⁶Tichuan, LALPA an Pathian thupêk zawng zawng chu an hlanchhiah a, anmahniin milim leh bâwng no lem pahni an chhûng chawp a, thing pathian lim te siam chawpin vâna thil tinrêng khi an bia a, Baala rawng an bâwl a.

¹⁷An fapate leh an fanute meiah an kal tlangtîr a, dâwithiamna leh aien te an chng a, LALPA tihthinrim nân a mithmuha thil sual ti tûrin an inphalrai ta a.

¹⁸Chutichuan, Israelte chungah LALPA chu a thinur êm êm a, a mithmuh ata a hnawt bo ta daih a; Juda hnam chauh chu hnutchhiahin an awm ta a ni.

¹⁹Juda hnam pawhin LALPA an Pathian thupêk chu an zâwm bik lo va, Israelte dân siam chawpte chu an zâwm vê zêl zâwk a.

²⁰LALPA chuan Israela thlahte zawng zawng chu a hnâwl ta vek a, a tirethei a, a hmuh phâk lohva a hnawh bo hmâ chu anmahni rawktute kutah a pe ta a.

²¹Davida chhûngkua aţangin Israel chu a paih chhuak a, Nebata fapa Jeroboama chu lalah an siam a. Jeroboama chuan LALPA zui lo tûrin Israelte chu a hruai pêng daih a, sual râpthlak tak a tihtîr a.

²²Israel fate chuan Jeroboama sualna zawng zawng chu an ti vê vek a; an sim duh rêng rêng lo va,

²³a chhiahhlawh zâwlnei zawng zawng hmanga a sawi tâk ang khân LALPA chuan a mithmuh ata a hnawt bo ta a ni. Tichuan, Israelte chu an ram aţangin Assuria ramah a hruai bo va, tûn thleng hian an la awm ta reng a ni.

ASSURIA-IN SAMARI RAM AN LUAH

²⁴Assuria lal chuan Babulon te, Kuthah te, Ava te, Hamath leh Sepharvaim aţang tein mi a chaw lût hlawm a, Israel fate awmnaah ni lo, Samari khuah te a sem darh a; Samari ram chu an nei a, a khawpuiah te chuan an awm ta a.

²⁵Chutiang chuan an awm tîrh aţang pawhin LALPA tîhna rêng an nei lo va; chuvângin LALPAN an zingah sakeibakneite a tîr a, mi engemaw zât a seh a.

²⁶Chuvângin Assuria lal chu an bia a, “A hnam hnama i sawn chhuah, Samari khuah i dah ho hian a ram mite Pathian biak dân an hre lo va; chuvângin an zingah sakeibakneite a rawn tîr a, a ram mite Pathian biak dân an hriat loh êm avângin mite chu an seh hlum a nia,” an ti a.

²⁷Assuria lal chuan, “Chumi hmun aţanga in hruai puithiam pakhat tîr ula; va kalin va awm vê sela, ani chuan a ram Pathian biak dân zirtîr rawh se,” tiin thû a pê a.

²⁸Tichuan, Samari ram aţanga puithiam an hruai zînga pakhat chu a lo kal a, Bethelah awmhmun a khuar a, LALPA an tîh dân tûr a zirtîr a.

²⁹Nimahsela, hnam tinin anmahni pathian an siam a, Samari miten hmun sâng an lo siam tawhna inah te, an chênna khuah te chuan hnam tinin an lo dah zêl tho si a.

³⁰Babulon-ho chuan Sukoth Benoth an siam a, Kuth miten Nergal, Hamath miten Asima,

³¹Avi-hovin Nibhaz leh Tartak an siam a; Sepharvi ho chuan Sepharvaim pathian Adram-melek leh Anammelek te hnênah an fate an hâl tîn a.

³²LALPA chu an hlâw hlê a, an zînga hnam tin chi tina mi chu hmun sâng puithiam atân an ruat mai a, chûng mite chuan hmun sânga inah te chuan inthâwina an hlân tîn a.

³³LALPA chu an tîh nâ a, mahse an rawn hruai chhuahna ram leh hnam te tihdân angin—anmahni pathian an be tho va.

³⁴Tûn thleng hian an tihdân hlui pangngai an la thlâk chuang lo; LALPA chu an tîh tak tak lo va, Jakoba thlah ‘Israel’ tih hming putute hnêna LALPAN tihtîr a pêk, a thuruat leh zirtîrna te, a dân leh thupêkte chu an zâwm bawk hek lo.

³⁵LALPAN an hnêna thû a thlun leh zawm tûra a tuk chu: “Pathian dangte chu in tîh ve tûr a ni lo, an hmâah in kûn tûr a ni lo va, an rawng te bâwlin an hnênah in inthâwi tûr a ni hek lo;

³⁶amaherawhchu, LALPA, Aigupta ram aţanga thiltihtheihna nasa tak leh bân phar meuhva hruai chhuaktu che u chu, amah chu in tîh ang a, chibai in bûk ang a, ama hnênah chuan inthâwina te in hlân tûr a ni.

³⁷A thuruat te, a zirtîrna te, a dân leh a thupêk in tâna ziahte chu fimkhur taka in zawm kumkhua tûr a ni a; pathian dangte chu in tîh ve tûr a ni rêng rêng lo.

³⁸Nangni nêna thuthlung ka siam hi in theihngihlîh tûr a ni lo va, pathian dang in tîh tûr a ni hek lo.

³⁹LALPA in Pathian chu in tîh dêk tûr a ni a; tichuan in hmêlmâ zawng zawng lakah a chhan chhuak dâwn che u nia,” tih hi a ni a.

⁴⁰Nimahsela, an âwih duh lo va, an tihdân ngai rengin an kalpui zêl a.

⁴¹Tichuan, hêng hnamte hian LALPA chu tîh ve tak mahse, an milimte rawng an bâwl tho va; an fate leh an thlah kal zêlte pawhin an pi leh pute tihdân an la kalpui zêl tho a ni, tûn thleng hian.

BUNG 18

JUDA LAL HEZEKIA

¹Israel lal, Elaha fapa Hosea lal kum 3-naah Juda lal Ahaza fapa Hezekia chu Judai ramah a lal tan a.

²Lal a nihin kum 25 mi a ni a, Jerusalemah kum 29 chhûng ro a rêl. A nu hming chu Abii, Zekaria fanu a ni.

³A pu Davida tihdân apiang ti vêin, LALPA mithmuhah thil tha a ti thîn a.

⁴Hmun sângte leh an lungphunte a tichhe vek a, an pathian lim thingphunte a kit a, Mosia dâr rûl siam chenin a chhu sawm vek a; a chhan chu, chûng hun lai thleng chuan Israel faten rimtui hâl nâna hmanga, Nehushtan tia an lo vuah tak vâng a ni.

⁵LALPA Israelte Pathianah chuan a inngat tlat a, a hmâ leh a hnûah pawh, Juda lal zîngah chuan amah ang tûmah an awm lo.

⁶LALPA chu nghet takin a vuan tlat a; khaw dang hawisan lovin a zui a, LALPAN Mosia hnêna thupêk a pêk te chu a zawm tlat a.

⁷LALPA chu a hnênah a awm a; a kalna lam lamah a hmuîngîl zêl a. Assuria lal lakah a hel a, a hnuaiah a kûn duh lo va.

⁸Philistia-ho chu Gaza khaw thlengin, an ram chawpin, râlvênna insâng aţanga kulh nei khua te nêen lam a hneh fâi vek a.

⁹Lal Hezekia lal kum lî-na, Israel lal Elaha fapa Hosea lal kum sarihnaah chuan, Assuria lal Salmenesera chu a rawn thawk chho va, Samari khua a hual a.

¹⁰A kum thumna tâwpah chuan a la ta a. Samari khua an lâk chu, Hezekia lal kum rukna, Israel lal Hosea lal kum kuana a ni.

¹¹Assuria lal chuan Israel mite chu Assuria ramah salah a hruai a, Halah hmunah te, Gozan Lui kama Habor-ah te leh Media khawpuiah te a dah hlawn a,

¹²LALPA an Pathian âw pawh an ngaihlhâk duh lohva, LALPAN a chhiahhlawh Mosia hmanga zawm tûra a thupêk zawng zawng leh a thuthlung an bawhchhiat vâng a ni a; anni chuan an ngaihlhâ duh lo va, an zawm duh hek lo.

¹³Lal Hezekia lal kum 14-naah, Assuria lal Sennakeriba chu Judai rama kulh nei khua zawng zawng rûn tûrin a rawn thawk chho va, a la ta hlawn a.

¹⁴Juda lal Hezekia chuan Lakis khuua Assuria lal hnênah mi a tîr a, “Ka lo tisual a ni e; min kiansan tawh la; i phû ang chu ka pe dâwn che nia,” a ti a. Assuria lal chuan Juda lal Hezekia châwi tûrin silvar talent 300 leh rangkachak talent 30 a tuksak a.

¹⁵Tichuan, Hezekia chuan LALPA inah leh lal in sum bâwma silvar awm zawng zawng chu a pe fâi vek a.

¹⁶Hezekia chuan LALPA tempul kawngkhâra mite leh, Juda lal Hezekia’n ban tuam mâwi nâna a lo hmante thlengin a khaw vek a, Assuria lal chu a pe ta a.

SENNAKERIBAN LALPA A UAN KHUM

¹⁷Assuria lal chuan Lakis aţangin Tartan te, Rabsaris leh Rabsake te chu sipai rual ropui tak nêen Jerusalemah, Lal Hezekia do tûrin a tîr a. Jerusalemah chuan an chho va. An han thlen chuan dîl chhakta zâwk aţanga tuikawng bul, Puansutu Hmun kawng kamah chuan an ding a.

¹⁸Lal chu an han âu va, Hilkia fapa Eliakima, lal chhûngkaw enkawltu te, ziaktu Sebna te leh, Asapha fapa Joaha, ziaka chhinchhiahtu te chu an lo kal chhuak a.

¹⁹Rabsake chuan an hnênah, “Hezekia hnênah chuan, ‘Assuria lal, lal ropui chuan heti hian a ti: “Eng hi nge maw rinchhana i han neih tehlul le?”

²⁰Râl rêl thiam leh chak tâwk i inti a; chûngte chu ţawngka mai a ni e. Tu hi nge maw i han rinchhan a, ka lakah te i han hel vei le?”

²¹En ta che! I rinchhan Aigupta hi luang sâwp tiang ang lek a nih hi, miin a rinchhan vaih chuan, a therin a kut a lo chhun mai dâwn asin. Chutiang lek chu Aigupta lal Pharoa chung a inngathte awm dân zuk nia.

²²LALPA kan Pathianah asin kan inngah le,’ i ti a nih chuan, Hezekia kha a ni lo vem ni, a hmun sângte, a maichâmte la bo va, Judate leh Jerusalem hnêna, ‘Jerusalemah hê maichâm hmâah hian chibai bûk rawh u,’ titu kha?” ti rawh u.

²³Tûnah hian, ka pu Assuria lal hnênah chuan intiam mai ula, a chuang thiam mi in neih dâwn phawt chuan, sakawr 2,000 ka pe ang che u!

²⁴Aigupta sakawr chung chuang mite leh tawlailîrte rinchhan chung hi chuan engtin nge ka pu hnuaia hotu tê ber pawh in nawr lêt theih ang?

²⁵Hê hmun tichhe tûr hian LALPA thû lovin ka lo kal dâwn em ni? LALPA chuan, “Hê ram bei tûr hian han chho la, han tichhe ngâl rawh,’ min ti asin,” a ti a.

²⁶Tichuan, Hilkia fapa Eliakima leh Joaha te chuan Rabsake hnênah, “I chhiahhlawhte hnênah hian Aramik ţawngin sawi ta che, kan hre thiam alâwm; kulha awm vê mipuite hriat tûrin Hebrai ţawng chuan ţawng lo hrâm teh,” an ti a.

²⁷Nimahsela, Rabsake-a chuan, “Ka pu hian in pute leh nangmahni hnên chauhva hêng thû sawi chhuak tûr hian min tîr lo va, nangmahni ang bawka mahni zun leh êk la ring mai tûr kulh chung a ţuho hnênah pawh mi tîr ve tho a ni lo vem ni?” a ti a.

²⁸Tichuan, Rabsake-a chu a ding a, Hebrai ţawngin ring takin a âu va, “Assuria lal, lal ropui thû hi lo ngaihlhâ teh u!

²⁹Lal chuan heti hian a ti, ‘A kut ata chhan chhuak thei lotu tûr Hezekia hi inbumtîr rêng rêng suh u;

³⁰“LALPAN min chhan chhuak ngei dâwn asin; hê khawpui hi Assuria lal kutah pêk a ni lo vang,” tiin Hezekia hian LALPA rintîr che u suh se.’

³¹Hezekia thû chu ngaihlhâ suh u; Assuria lal chuan heti hian a ti asin: ‘I inrem ang u khai, thilpêk hlân tûrin lo kal chhuak ula; tichuan mi tinin mahni grêp in ei ang a, mi tinin mahni theipui in ei baw ang a, mi tinin mahni tui zêma mi theuh in tlân dâwn nia;

³²nangmahni ram ang, buh leh uaiin ram, chaw leh grêp huan awmna ram, olive kûng leh khawizu tamna ramah hian thi lova in nun theih nân ka rawn hruai dâwn che u alâwm. Hezekia thû kha ngaichâng suh u, chuti lo zawng, “LALPAN min chhan chhuak mai ang,” tiin a bum mai ang che u.

³³Khawi hnam pathianin nge Assuria lal kut ata an ram chhan chhuak tawh ngai rêng rêng le?”

³⁴Hamath leh Arpad pathiante chu khawiah nge an awm? Sepharvaim te, Hena te leh Ivah pathiante chu khawiah nge? Samari khawpui hi ka kut ata an chhan chhuak em ni?

³⁵Ram zawng zawng pathian zîngah tu nge ka kut ata an ram chhan chhuak thei awm le? LALPA pawh hian ka kut ata Jerusalem hi a chhan chhuak thei ngû ang maw ?’ a ti e,” a ti a.

³⁶Mipui chu an ngâwi ðhuap a, kam khat mahin an chhâng lo; lalin “Chhâng hauh suh u,” tih ðhû a lo pe tawh si a.

³⁷Hilkia fapa Eliakima, lal chhûngkaw enkawltu te, ziaktu Sebna te leh Asapha fapa Joaha, thil chhinchhiahtute chu an puan te thlêr pheng phung chungin Hezekia hnênah an va kal a, Rabsake thu sawite chu an va hrilh a.

BUNG 19

ISAIAN CHHAN CHHUAHNA THU A PUANG

¹Hezekian a lo hriat chuan a puan a pawt thlêr a, saiiip puan a sin a, LALPA inah a lût a.

²A inchhûng enkawltu Eliakima te, ziaktu Sebna leh, puithiam upate chu saiiip puan sin chungin Amoz a fapa, zâwlnei Isaia hnênah a tîr a.

³A hnênah, “Hezekia chuan: Vawiin hi buaina te, inhauhna leh insawi chhiatna nî a ni; nau pian a hun tawh a, mahse hring chhuak tûrin chakna a awm si lo.

⁴LALPA i Pathian chuan Rabsake thu sawite kha a lo hre vek ngei ang a, a pu Assuria lalin Pathian nung sawi chhe tûra a rawn tîrh a ni a, LALPA i Pathian chuan a thu hriatte chu a lo zilhau lêt ve êm ang chu. Chuvângin, a la dam chhunte tân ðawngtâi rawh khai’ a ti a ni,” an ti a.

⁵Tichuan, Hezekia mite chu Isaia hnênah chuan an va kal a.

⁶Isaia chuan, “In pu hnênah chuan heti hian sawi ang che u, ‘LALPA chuan: “Assuria lal chhiahhlawhin kei mi sawi chhiatna ðhû i hriatte chu hlau suh.

⁷A hnênah chuan thlarau ka tîr ngei ngei ang, thuthang a la hria ang a, ama ram lamah a hâu mai ang; ama ramah ngei khandaihin ka tlûtîr dâwn a ni” a ti e,’ a ti a.”

SENNAKERIBA VAUNA LEH HEZEKIA ðAWNGTAINA

⁸Rabsake chu a kîr leh a, Assuria lal chuan Lakis a chhuahsan tawh tih hriain Libna khua a lo bei lai chu a va hmû a.

⁹Lal chuan Ethiopia lal Tirhaka chanchin a lo hriatin, “En ta che, nangmah do tûra a rawn thawh chhuah tâk hi,” a ti a. Tichuan Hezekia hnênah palai a tîr leh a,

¹⁰“Juda lal Hezekia hnênah chuan: ‘I Pathian i rin êm êma chuan, “Jerusalem chu Assuria lal kutah pêk a ni lo vang,” tiin dâwtin bum che suh se.

¹¹En ta che! Assuria lalten ram zawn zawn tichhe tûrin an vâihmâ duak duak tih i hai loh kha; nang tehlul kha i him bîk ang maw?

¹²Ka pâten an tichhiat tâk Gozan te, Haran te, Rezeph te leh Thelasar-a awm Eden mite kha an hnam pathiante khân an chhan chhuak em le?

¹³Hamath lal te, Arpad lal te, Sepharvaim khawpui lal te, Hena leh Ivah lalte kha khawiah nge an awm zawn tâk?’ tiin va hrilh rawh u,” a ti a.

¹⁴Hezekia chuan chû lehkha chu palaite hnên aţangin a lo dawng a, a chhiar a; Hezekia chu LALPA inah a chho va, LALPA hmâah a pharh a.

¹⁵Hezekia chu LALPA hmâah a ðawngtâi a: “Aw LALPA, Israelte Pathian, cherubte kârah i awm a, leilunga lalram zawn zawn chungah nang chauh hi Pathian i ni. Vên leh lei hi i siam a ni a.

¹⁶Aw LALPA, i beng lo chhi la, lo ngaithla teh; i mit meng la, Aw LALPA han en teh; Pathian nung meuh sawi chhe tûra Sennakeriba thu rawn sawite hi lo ngaithla lul teh.

¹⁷LALPA, Assuria lalho hian hnamte leh ramte hi an tichhe duai duai si a,

¹⁸an pathiante chu meiah an paihsak zêl baw k a; chûngte chu pathian tak tak pawh ni lo va, mihring kutchhuak—thing leh lung an ni mai a. Chuvângin an tichhe rêng baw k a.

¹⁹Aw LALPA kan Pathian, leilunga lalram zawn zawn nang chauh hi Pathian awm chhun i lo ni tih an hriat theih nân, a kut aţanga min chhan chhuak tûrin ka ngên a che,” a ti a.

SENNAKERIBA CHUNGCHANGA LALPA THÛ CHU

²⁰Amoz a fapa Isaia chuan Hezekia hnênah, “LALPA Israelte Pathian chuan heti hian a ti: ‘Assuria lal Sennakeriba do zâwna i ðawngtâina kha ka lo hria a.’

²¹Hei hi ama chungthûa LALPA thu chhuak chu a ni: ‘Nula thianghlim, Zion fanu chuan, A hmusit che a, a nuih zat a che; Jerusalem fanu chuan, I hnung lamah lu a thin khum a che!

²²Tu nge i deu leh i sawi chhiat hi? Tû chungah nge râwl i tihrin veia, I han hawi pir khum le? Israel Mî thianghlim chungah a ni asin.

²³I mi tîrh hmangin Lalpa i deusawh vêl a, “Ka tawilailîr tam tak nêl Tlâng sâng ka rawn chuan a, Lebanon tâwp rêl thlengin; A sidar thing sângte ka kit ang a, A fâr thing thâ thâte nêl; A ram tâwp thlengin ka luh chhuak ang a, A ramngaw lai ber thlengin.

²⁴Tui danglam tak lâi chhuakin ka in rûi a, Ka ke artuiin ka tikang ta An invênna lui zawn zawn chu,” i ti vei a.

²⁵Hmân aţang khân i lo hre na nge? Keima siam a ni a, Hmasâng ata ka siam tawh a ni. Tûnah chuan kulh nei khawpuite chhu chhiaa, Thil chhe hlâwma chantîrtu atân maia ruat i ni e.

²⁶Chuvângin, a luahtute chakna a beitham a; Mak tiin an chî-ai a; Phâi tual hlobet ang leh Hnim hring ang mai, Inchunga hnim ðo ang leh Buh, a len hmâa vui ang mai an ni.

²⁷Mahse i chênna hmun te, I lût leh chhuak te leh, Ka laka i thinurna chenin ka hria a che.

²⁸Ka laka i thinurna leh mi tihbuaina chuan Ka beng a lo thleng ta; Chuvângin i hnârah thîr kawm I hmuiah thîrbarh ka vuah ang a, Ka hnûk kîr leh dâwn che- I lo kalna lamah chuan.

²⁹Hei hi i tân chhinchhiaha tûr a ni ang; Kuminah buh amaha ðo in ei ang, Nakumah buh amaha ðo-a mi in ei leh ang; Kum thumnaah chîng ula, seng ula, Grêp huan siamin a rahte ei rawh u.

³⁰Juda chhûngkuua a dam chhunte chuan Hnuai lamah zung an kâih leh ang a, Chung lamah rah an chhuah ang.

³¹Jerusalem aţangin a la bângho an lo chhuak ang, Zion Tlâng a la dam chhunte nêl. Sipaihote LALPA ðahnemngaihna chûng chu a ti ang.’

³²Chuvângin LALPAN Assuria lal chungchângah heti hian a ti: ‘He khawpui hi a lo lût tawp lo vang a, Hetah hian thal pawh a kâp hek lo vang, Phaw kengin a rawn hnaih lo vang a, A hualna lei a chhûng pângng baw lo vang.

³³A lo kalna kawngah, Chumi lamah chuan a kîr leh zâwk ang; Hê khawpui hi a lo lût lo vang,’ LALPAN a ti.

³⁴Keimah avâng leh ka chhiahhlawh Davida avângin Hê khawpui chhanhim tûr hian ka vêng tlat dâwn,’ tih hi,” a ti a.

SENNAKERIBA A TLÂWM, A THÎ

³⁵Chumi zân chuan LALPA Vântirhko chu a kal chhuak a, Assuria-ho riah bûkah mi 185,000 a tihlum a; zîng takah mi an han tho va, mitthi ruang hlîr an lo awm ta mai a.

³⁶Assuria lal Sennakeriba chuan a chhuahsan a, a kal bo va, inah a hâw a, Ninevi-ah chuan a va awm ta reng a.

³⁷Nisroka tempula a pathian chibai a bûk laiin a fapa Adrammeleka leh Sarezera te chuan khandaihin an vit hlum a; Ararat ramah an tlân bo va. A fapa Esarhaddon chu a aiah a lal ta a.

BUNG 20

HEZEKIA NUNNA PAWHSEI

¹Chûng lai chuan Hezekia chu a dam lo va, a thi lek lek a. Amoza fapa zâwlnei Isaia chu a hnênah a va kal a, “LALPA chuan: ‘Dam chhuak zo lovin, i thi ngei dâwn a, chuvângin in chhûngkaw ro hi rêl fel rawh’ a ti a che,” a ti a.

²Ani chuan bang lam a hawî a, LALPA hnênah a tawngtai a,

³“Aw LALPA, i hmâah hian thutak leh rinawmna thinlung pûa ka awm thinzia te, i mithmuha thil thâ ka tih te kha hre reng ang che,” a ti a. Hezekia chu lungchhe takin a t̃ap zawîh zawîh a.

⁴Isaian tual zâwl lai tak a thlen hmâin a hnênah LALPA thû a lo thleng a,

⁵“Kîr leh la, ka mite hruaitu Hezekia hnênah chuan, ‘LALPA, i pu Davida Pathian chuan: ‘I tawngtaina ka lo ngaithlâ a, i mittui tlâ pawh ka hmû a; ka tidam mawlh ang che. Ni thum nîah LALPA inah i han kal dâwn nia.

⁶I damchhûng ni chu kum 15 in ka belhchhah ang che. Assuria lal kut aţangin hê khawpui hi ka chhan chhuak ang a; keimah avâng leh ka chhiahhlawh Davida avângin hê khawpui hi ka humhim baw ang,” a ti,’ tiin va hril rawh,” a ti a.

⁷Isaia chuan, “Theipui rah hlâwm khat han la teh u,” a ti a. An rawn lâksak a, khawihlî-ah chuan an han bel a, a lo dam ta a.

⁸Hezekia chuan Isaia hnênah, “LALPAN min tidam dâwn a, ni thum nîah LALPA inah ka kal dâwn ngei tih chhinchhiahna chu eng nge ni?” a ti a.

⁹Isaia chuan, “LALPAN a sawi tawh angin a hlen ngei ang tih chhinchhiahna chu hei hi a ni: hlimthlâin hma lam panin rahbi sâwm kal se nge i duh, hnung lamah rahbi sâwm a tawlhkîr ang?” a ti a.

¹⁰Hezekia chuan, “Hlim thlâin hma lam zâwna rahbi sâwm a tawlh te chu thil harsa a ni nâng; mahse hlimthlâin rahka sâwm tawlhkîr zâwk ang hmiang,” a ti a.

¹¹Tichuan, zâwlnei Isaia chuan LALPA chu a âu va, ani chuan Ahaza ni zung tehnaah chuan ni hlimthlâ liam tawh chu rahka sâwm in a tawlhkîr tîr ta a.

BABULON PALAI

¹²Chutih lai chuan Babulon lal Baladana fapa Berodak-Baladana chuan Hezekia dam loh thû hriain, Hezekia hnênah lehkhathawn leh thilpêkte a thawn a.

¹³Hezekia chuan anni chu a lo lâwm a, a ro hlu dahna in zawng zawnga silvar te, rangkachak te, mawsawla leh hriak manto te, a râlthum zawng zawng leh a ro bâwma hmuh theih zawng zawng a entîr vek a. Hezekia chuan a inchhûnga mi leh a lalram chhûnga mi chu entîr loh pawh a nei lo.

¹⁴Lal Hezekia hnênah chuan zâwlnei Isaia chu a va kal a, “Khâng mite kha khawî aţanga lo kal nge an niha, i hnênah eng nge an rawn sawi?” a va ti a. Hezekia chuan, “Ram hla tak, Babulon aţanga lo kal an ni,” a ti a.

¹⁵Ani chuan, “I inah hian eng thilte nge an rawn en?” a ti a. Hezekia chuan, “Ka ina thil awm zawng zawng an en vek a ni; ka sum bâwma mi chu entîr loh pawh ka nei hlei nê,” tiin a chhâng a.

¹⁶Isaia chuan Hezekia hnênah, “LALPA thû hi ngaithla teh:

¹⁷Ngai rawh, i ina thil zawng zawng, tûn thlenga i pute aţanga an lo chhêk khâwl tawh sâ hi Babulon-ah an kal bopui vek ni a lo la thleng dâwn a; a kuangbâng pawh an hnutchhiah lo vang,’ LALPAN a ti.

¹⁸I tu leh fate, i thlah lo la piang tûrte ngei pawh an la hruai bo ang a; Babulon lal inah mi tilreh mi mai an la ni ang,’ a ti e,” a ti a.

¹⁹Hezekia chuan Isaia hnênah, “LALPA thû i sawi chhuah tâkte chu a thâ e!” a ti a. “Ka dam chhûng tal hian muanna leh thutak a awm dâwn lo’ m ni?” a lo ti tawh si a.

HEZEKIA THIH THÛ

²⁰Hezekia thiltih dang te—a chakzia te, dîl leh tui kawng te siama, khawpuia tui a lâk luh dân te chu—Juda lalte chanchin ziahna bû-ah a chuang a ni lo’ m ni?

²¹Hezekia chu a pute hnênah a muhîl a. A fapa Manasea chu a aiah a lal ta a.

BUNG 21

JUDA LAL MANASEA

¹Manasea chu lal a lo nihin kum 12 mi a ni a, Jerusalema kum 55 chhûng ro a rêl a. A nu hming chu Hepziba-i a ni.

²LALPAN Israel fate hmâa a hnawh chhuah hnamte tih dân tenawm tak takte tiin LALPA mithmuah thil sual a ti thîn a.

³A pa Hezekian a lo tihchhiat tawh hmun sângte a dîn thar leh a; Israel lal Ahaba tih dân ang khân Baal tân maichâm a tung dîng leh a, thîngin pathian lim a siam a; vâna thil awm zawng zawng a bia a, an rawng a bâwl baw a.

⁴LALPAN, “Jerusalema ka hming ka awmtîr ang,” a tihna hmun, LALPA inah pawh maichâm a dîn hial a.

⁵Vâna thil awm tinrêng tân LALPA in tual hnihah maichâm a din bawk a.

⁶A fapa pawh meiah a kal tlangtîr bawk a, aien te a chîng a, dâwi a hmang a, ramhuai zâwl leh aien thiam hmanga râu biak te a chîng a. LALPA thinurna chawh tho zâwngin a mithmuhah nasa takin thil sual a ti thîn a ni.

⁷LALPA inah meuh pawh ama kerchawp Aseri lim te a hûng leh ta zêl a. Chû in chu Davida leh a fapa Solomona te hnêna, “Jerusalemah hê in hi kumkhuaa ka hming awmna tûra Israel hnam zawng zawng zîng ata ka thlan chhuah a ni a;

⁸ka thupêk zawng zawng leh ka chhiahhlawh Mosia hmanga dân ka pêk zawng zawng chu fîmkhur taka an zawm chauhvîn—an thlahtute hnêna ka pêk ram aţang chuan Israelte kê chu ka vahvaihtîr tawh ngai lo vang,” a tih kha a ni a.

⁹Mahse, an pawisa duh lo va, LALPAN Israel fate hmâa a hnawh chhuah tâk hnamte sualna aia nasa zâwka sual tûrin Manasea chuan a hruai khawlo vek a.

¹⁰LALPA chuan a chhiahhlawh zâwlneite hmangin thû a puang ta a,

¹¹“Juda lal Manasea hian hêng thil tenawm tak takte hi a tih avângin (an hmâa lo awm tawh Amor-ho aia sual burû zâwk a ti a, Judate chu pathian lem biakna suala a hruai lût si a)

¹²LALPA Israelte Pathianin: ‘Lo ngai reng ula, Jerusalem leh Judai ramah hian chhiatna râpthlak, a hria apiang beng khinghnhî tikhawrh rum rum tûr thil ka thlentîr ang.

¹³Samari tehna hrui leh Ahaba chhûngkaw endikna thîr mûm khâi chu Jerusalem teh nân ka hmang vê ang a; mîin thlêng an hru fai angin Jerusalem chu ka hru fai duak ang a, ka khaikhup bawh ang.

¹⁴Ka rochan la awm chhun te pawh ka hawisan ang a, an hmêlmâte kutah ka pê ang; an hmêlmâ zawng zawngten an rawka, an sawisak tûr mai an ni ang,

¹⁵Aigupta ram aţanga an thlahtute lo chhuah aţanga tûn thlenga ka mithmuha thil sual tia, min tihthinrim reng vâng a ni,’ a ti e,” a ti a.

¹⁶LALPA mithmuha thil sual tia, Judai ram a hruai sual tawh bâkah, Manasea chuan Jerusalem dung leh vâng chu pawî sawi lo thisen chhuahnain a tikhat tlat bawh a.

¹⁷Manasea chanchin dang te—a thiltih te, a thil sual tihte chu Juda lalte chanchin ziahna bû-ah a chuang a ni lo’m ni?

¹⁸Manasea chu an thlahtute hnênah a muhîl a, Uzzaa huan, ama in bul huanah chuan phûm a ni a. A fapa Amona chu a aiah a lal ta a.

AMONA RORÊLNA LEH A THIH THÛ

¹⁹Amona chu lal a nihin kum 22 mi a ni a, Jerusalemah kum hnih chhûng ro a rêl. A nu hming chu Jotbah mi Haruza fanu Mesullemethi a ni.

²⁰A pa Manasea ang bawkin LALPA mithmuhah thil sual a ti thîn a.

²¹A pa kawng zawh ang chu a zawh ve zêl a; a pain milim pathian rawng a bâwl angin, ani pawhin milimte chu chibai bûkin

an rawng a bâwl a.

²²An thlahtute LALPA Pathian chu a hawisan daih a, LALPA kawng rêng a zawh duh lo.

²³Amona mite chuan an phiar a, lal chu ama inah an that a.

²⁴Nimahsela, a ram mipuite chuan Lal Amona phiartute chu an that vek a. Mipuite chuan a fapa Josia chu a aiah lalah an siam ta a ni.

²⁵Amona thiltih leh chanchin dangte chu Juda lalte chanchin ziahna bû-ah a chuang a ni lo’m ni?

²⁶Uzza huana ama thlânah an phûm a. A aiah a fapa Josia chu a lal ta a.

BUNG 22

JUDA LAL JOSIA

¹Josia chu lal a nihin kum riat mi a ni a, Jerusalemah kum 31 chhûng ro a rêl. A nu hming chu Bozkat mi Adaia fanu Jedida-i a ni.

²LALPA mithmuhah dik takin thil a ti thîn a, a pu Davida awm dân ang zawng zawngin a awm a; ding lamah emaw, vei lamah emaw a pênsan ngai lo.

HILKIAN DÂN BÛ A HMU CHHUAK

³Josia lal kum 18-naah chuan, lal chuan Mesulama fapa, Azalia fapa Saphana, lehkhia ziaktu chu LALPA ina kal tûrin a tîr a:

⁴Puithiam lal Hilkia hnênah han kal ta la, thawhlâwm pawisa LALPA ina lo lût, kawngkhâr vêngtuten mipui hnên aţanga an lâk khâwm chu a zât chhiar rawh se.

⁵LALPA ina hnathawk lai enkawl hna chelhtute hnênah pê sela; anni chuan LALPA in chhe lai siamthatute hlawh atân pê sela, LALPA in chhe lai siamthatu—

⁶thing mistirite leh in satute leh lungchhertute tân te—in sak thatna tûr thing leh lung chher sa lei nân te hmang rawh se.

⁷Nimahsela, rinawm taka thil an tih thîn avângin an kuta sum pêk chhuah chu en zuipui a ngai lo vang,” a ti a.

⁸Puithiam lalber Hilkia chuan lehkhaziaktu Saphana hnênah, “LALPA inah Dân Lehkhabu ka chhar hlah mai,” a ti a. Hilkia chuan lehkhabu chu Saphana a pê a, ani chuan a chhiar a.

⁹Lehkhaziaktu Saphana chu lal hnênah a va kal a, lal hnênah chuan, “I chhiahhlawhten in chhûnga tangka an hmuhte chu an la khâwm a, hna thawkho, LALPA ina hna thawk viltute kutah an hlân tawh e,” a ti a.

¹⁰Lehkhaziaktu Saphana chuan, “Puithiam Hilkian lehkhabu min pe bawh asin,” tiin lal chu a entîr a. Lal hmâah chuan Saphana chuan a chhiar a.

¹¹Lalin Dân Lehkhabu thûte a lo hriat chuan a puan a pawt thlêr a.

¹²Lal chuan puithiam Hilkia te, Saphana fapa Ahikama te, Mikaia fapa Akbora te, lehkhaziaktu Saphana te leh lal enkawltu Asaia te hnênah chuan,

¹³“Va kal ula, hê lehkhabu chhar chhuahin a sawi chungchâng hi keima tân te, mipuite leh Juda pumpui tân LALPA min va

râwnsak rawh u; hê lehkhabin a sawi zawng zawng hi kan thlahtuten an lo zawm tawh loh avângin kan chung a LALPA thinurna hi a lo nasa tawh hle a nih hi,” a ti a.

¹⁴Puithiam Hilikia te, Ahikama te, Akbora te, Saphana te leh Asaia te chu thuamhnaw enkawltu, Harhasa fapa, Tikva fapa, Salluma nupui, zâwlnei-nu Hulda-i hnênah an va kal a. (Ani chu Jerusalem Vêngthara awm a ni a.) Amah chu an va bia a.

¹⁵Ani chuan an hnênah, “LALPA Israelte Pathian chuan heti hian a ti, ‘Ka hnêna nangni rawn tirtu chu heti hian hrilh rawh u,

¹⁶“LALPA chuan: ‘Ngai teh, Juda lalin a chhiar tâk lehkhabin thu chuang ang tak khân, hemi hmunah leh a chhûnga chênggho chungah chhiatna ka thlen dâwn-

¹⁷kei min kalsan a, pathian dangte hnênah rimtute an hâl a, an kut chhuak thil tinrêng hmang hian ka thinrimna an chawh tho ta. Chuvângin, hê hmuna ka thinurna hi tihdaih rual lohvin a sosâng tawh a ni,’ a ti,” a ti a.

¹⁸Mahse, LALPA râwn tûra nangni rawn tirtu, Juda lal hnênah chuan heti hian ti rawh u, ‘LALPA Israelte Pathian chuan: “I thu chhiar tâk chungthûah chuan-

¹⁹i thinlung i tih-nêm a, LALPA hmâa i intihtlâwm avâng te, hemi hmun leh a chhûnga chêngte chu ânhhia khuma, an la ram dêr tûr thu ka sawi i hriata, i puan te i pawh thlêr a, ka hmaa i tãh avângin, kei pawhin i thû chu ka lo ngaitla reng a ni,” LALPAN a ti.

²⁰Chuvângin, nang chu in thlahtute hnênah ka hruai ang che a, thlamuang takin thlânah thlah liam i ni ang; hê hmuna chhiatna ka thlen tûr zawng zawng chu i mitin a hmu ve lo vang,’ a ti a ni,” a ti a. Chû thû chu lal hnênah an va thlen a.

BUNG 23

JOSIAN PATHIAN BIAK DAN DIK A SIAM

¹Lal chuan Judai ram leh Jerusalema upa zawng zawng chu a hnêna kal tûrin a ko khâwm a.

²Lal chu Judai rama mi zawng zawng leh Jerusalema awm zawng zawng- puithiamte, zâwlneite leh mipui zawng zawng nêan a lian a têin, LALPA inah chuan an kal chho vek a. LALPA ina an chhar, Thuthlunna Lehkhabin chuang zawng zawng chu an vâia hriatah a chhiar chhuak a.

³Lal chu ban bulah a ding a, LALPA hnung zuia, a thupêkte, a thuhriattirte, a dân thûte chu rilru leh thinlung zawng zawng lehkhabin inziak thuthlung thû anga zâwma tinghet tûrin LALPA hmâah chuan thû a thlung ta a. Mipui zawng zawng pawh thuthlungah chuan an ding nghet bawh a.

⁴Lal chuan puithiam lal Hilikia te, amah dawttu puithiam dang leh, kawngkhâr vêngtute hnênah chuan Baal tân leh Aseri tân leh vâna arsihote tâna an siam thil rêng rêng chu LALPA in chhûng ata la chhuak vek tûrin thû a pê a; chûng chu Jerusalem khaw pawn Kidron phûlah chuan a hâl a, a vâpte chu Bethel-ah a kalpui a.

⁵Chumi hnûah chuan Juda laltena hmun sângte leh Judai ram khawpuite bâka, Jerusalem chhehvêl zawng zawng rimtui hâl tûra an lo ruat milem biak hmang puithiamte leh, Baala te, nî te,

thlâ te, arsi rual leh vâna thil awm tinrêng tâna rimtui hâl thîntute chu a bân vek a.

⁶Thinga siam milim chu LALPA in aţangin Jerusalem pawns, Kidron Luiyah a la chhuak a, Kidron Luiyah chuan a hâl a, a râwt sawm vek a, a vâpte chu vântlâng thlânmuah a theh darh a.

⁷LALPA ina mawngkawhurho tawmbûk, hmeichhiaten thinga siam pathian lim tâna puan an tahna hmun chu a thiahsak a.

⁸Judai ram khawpui puithiamho chu a hruai chhuak vek a, Geba aţanga Beerseba thlengin puithiamten rimtui an hâl na hmun sângte chu hman tlâk lohvin a tihbawrhbânsak vek a; kulh kawngka vei lama khawpui awptu Josua kawngka luhna bula hmun sângte pawh a thiahsak bawh a.

⁹Hmun sâng puithiamte chu Jerusalema LALPA maichâmah chuan an kal vê ngai lo nân, dâwidim telh loh chhang erawh chu an unaute zingah an kîl ve thîn.

¹⁰Tûman an fapa emaw, an fanu emaw Moleka hnêna meia an kal tlangtîr tawh loh nân, Hinnoma Fapate Ruama awm Tophet chu hman tlâk loh tûrin a tihbawrhbânsak a.

¹¹Juda lalten Nî pathian tâna an serh sakawr, LALPA in luhna bula hotu lian Nathan-Meleka pindan kianga mite chu a dah bo va; Nî pathian tawlaîr chu a hâl bawh a.

¹²Ahaza pindan chungnung chhîpa Juda lalten maichâm an lo siam te leh, Manasean LALPA in hung chhûng tual zâwl pahniha maichâm a siam te chu lal chuan a thiat a, a tisawm vek a, a kehnaute chu Kidron luiyah a paih a.

¹³Jerusalem chhak, Hlemhlêna Tlâng chhim lama Sidon-ho pathian tenawm Astoreti tân te, Moab-ho pathian tenawm Kemosa tân te, Amon-ho pathian tenawm Milkoma tân tea Solomonan hmun sâng a lo siamsak te chu lal chuan a tihbawrhbânsak vek a.

¹⁴An lungphun serhte chu a vaw keh vek a, an thing-pathian limte chu a kîr a, chûng hmunte chu mihring ruhîn a vawm khat a.

¹⁵Chû bâkah Bethel khuah maichâm, Israelte hruai sualtu Nebata fapa Jeroboaman a lo siam maichâm leh hmun sângte chu a vawthiat a; hmun sângte chu a hâl a, a râwt sawm vek a, thing milimte chu a hâl bawh a.

¹⁶Josia chu a hawi vêl a, tlâng chungah thlân te chu a va hmû a. Thlân chhûnga ruhte chu a phawrh chhuak a, chûng thu lo puangtu Pathian miin LALPA thûa a sawi angin maichâm chungah a hâl a, a tibawrhbang ta a.

¹⁷“Sâwta thlân ka hmuh saw tû thlân nge?” a ti a. Khawpui mite chuan, “Judai ram aţanga lo kal Pathian mi, Bethel maichâm chungah i thiltih tâk ang taka lo sawi lâwktu thlân a nih saw,” an ti a.

¹⁸“Tikhân awm mai sela; tûman a ruhte chu khawih sawn suh se,” a ti a. Tichuan, a ruhte chu Samari aţanga lo kal zâwlnei ruhte nêan chuan an khawih ve lo.

¹⁹Josia chuan Samari khaw tina an hmun sâng milem pathian biakna in zawng zawng, LALPA thinurna chawh tho tûra Israel lalten an lo siam te chu a la bo vek a; Bethel khuah a tih dân ang bawh khân a tihsak zêl a.

²⁰Chuta lo awm hmun sâng puithiam zawng zawng chu maichâm chungah chuan a that vek a, a chungah chuan mihring ruhte chu a hâl a; Jerusalema a hâw leh ta a.

²¹Lal chuan mipuite hnênah, “Hê Thuthlunna Lehkhabûa inziak ang hian LALPA in Pathian hnênah Kalhlên Kût hmang rawh u,” tiin thû a pe a.

²²Chutiang takin Kalhlên Kût chu rorêltuten Israelte chung a ro an rêl chhûng khân an hmang ngai lo va, Israel lalte leh Juda lalte hun chhûng pawh khân an hmang ngai hek lo.

²³Lal Josia lal kum 18-naah chuan, Jerusalema, LALPA hmâah Kalhlên Kût chu an hmang ta a ni.

²⁴Chû bâkah, puithiam Hilkian LALPA ina a chhar lehkhâbûa chuang dân thûte ang taka a hlen chhuah theih nân, ramhuai râuzâwlte leh mitthi thlarau biak pawh chîngte, chhûngkaw pathiante leh milimte, Judai ram leh Jerusalema an chîn dân tenawm hmuh theiha awm rêng rêng chu Josia chuan a paih bo vek a.

²⁵Mosia Dân Bu ang taka thinlung zawng zawng leh, thlarau zawng zawng leh chakna zawng zawnga, LALPA lam hawi amah ang hi, tûn hmân lal tûmah an la awm ngai lo va; a hnûah pawh an awm leh tawh hek lo.

JUDAI RAMAH CHHIATNA A HNÂI

²⁶Chuti chung pawh chuan, LALPA chuan a thinurna nasa tak chu a beng dâi thei lo va, Manasean a lo cho thinrim nasat tawh êm avângin Judah chung a thinrimna sosâng chu a dâi chuang lo.

²⁷LALPA chuan, “Israel-ho ka sawn bo ang bawkin Juda-ho pawh ka hmuh phâk ata ka sawn bo vang a, ka thlan tawh sâ hê Jerusalem khawpui leh, ‘Ka hmung chu chutah chuan a awm ang,’ ka tihna in nêl lam hian ka hnâwl bo vek ang,” a ti a.

INDONAAH JOSIA A THI

²⁸Josia chanchin leh a thiltih dang te chu, Juda lalte chanchin ziahna bû-ah a chuang a ni lo’m ni?

²⁹A lal laiin Aigupta lal Pharo Neko chu Assuria lal tanpui tûrin Euphrates Lui a han chho va; amah lo bei tûrin lal Josia chu a kal chhuak a. Megiddo hmuna an inbeihnaah Pharo Neko chuan a lo that ta a ni.

³⁰A ruang chu ama miten Megiddo aţangin an hlâwm a, Jerusalema an kalpui a, ama thlânah an phûm a. A ram mipuite chuan Josia fapa Jehoahaza chu hriak an thih a, a pa aiawhin lalah an siam ta a.

JEHOAHAZA LALNA LEH SALTÂNNA

³¹Jehoahaza chu lal a nihin kum 23 mi a ni a, Jerusalema thla thum chiah a lal hman a. A nu hmung chu Libna mi Jeremia fanu Hamutali a ni.

³²A pute zawng zawng tihdân angin, LALPA hmâah thil sual a ti thîn a.

³³Jerusalema rorêl thei lo tûrin Pharo Neko chuan Hamath rama Ripla khuah a tântîr a; a ram chu chhiah châwi tûr silvar tangka talent 100 leh rangkachak talent khat a tuk a.

³⁴Pharo Neko chuan Josia fapa Eliakima chu a pa Josia aiah a laltîr a, Jehoiakima tiin a hmung a thlâk a. Pharo chuan Jehoahaza chu Aiguptaah a hrui thlâ a, chutah chuan a thi ta a ni.

JUDA LAL JEHOIAKIMA

³⁵Jehoiakima chuan Pharo chu tangkarua leh rangkachak a pe thîn a; Pharo thupêk ang zêlin leiman chhiah a khawn a; Pharo Neko hnêna pêk tûr chu mipui dinhmun azir zêlin tangkarua leh rangkachak an pek tûr zât a tuksak a.

³⁶Jehoiakima chu lal a nihin kum 25 mi a ni a, Jerusalema kum 11 chhûng ro a rêl a. A nu hmung chu Ruma mi Pedaia fanu Zebudahi a ni.

³⁷A pute tihdân ang bawkin, LALPA hmuhah thil sual a ti thîn a.

BUNG 24

HMELMATEN JUDAI RAM AN HNEHLÂK

¹A lal laiin Babulon lal Nebukadrezzara chu a lo kal ta a, Jehoiakima chu kum thum a thuhnuai a awm a. Chumi hnûah a hel ta a.

²Amahrawn rûn tûrin Kaldai sipai te, Suria sipai te, Moab sipai te leh Ammon-ho sipaite LALPAN arawn tîr a; LALPAN a chhiahhlawh zâwlneite hmanga a lo sawi tawh ang khân Judai ram tichhe tûra arawn tîrhte an ni.

³Manasea suahsualna leh a thiltih zawng zawngte avâng khân, LALPAN Judai ram hi a mithmuh phâk lohva dah bo daih tûrin, a thupêk ngeiin chûng thilte chu a thlentîr a,

⁴pawi sawi lo thisen a chhuah vânga lo awm a ni baw; Jerusalem chu paw sawi lo thisen chhuahnain a tikhat tawh si a, LALPA pawhin a ngaidam duh tawh lo a ni.

⁵Jehoiakima thiltih dangte chu Juda lalte chanchin ziahna bû-ah a chuang a ni lo’m ni?

⁶Jehoiakima chu a thlahtute hnênah a muhîl a. A fapa Jehoiakima chu a aiah a lal a.

⁷Aigupta lal chu ama awmna ram aţangin a lo kal chhuak leh tawh ngai lo, Aigupta hnuaia awm thîn, Aigupta Lui aţanga Euphrates Lui inkâr ram zawng chu Babulon lalin arawn chhuhsak tâk avângin.

JEHOIAKINA LALNA LEH SALTÂNNA

⁸Jehoiakina chu lal a nihin kum 18 mi a ni a, Jerusalema thla thum a lal hman a. A nu hmung chu Jerusalem mi Elnathana fanu Nehushta-i a ni.

⁹A pa tih thîn dân angin LALPA mithmuhah thil sual a ti thîn a.

¹⁰Chûng lai chuan Nebukadrezzara ho chu Jerusalem bei tûrin anrawn thawk chho va, khawpui chu an hual a.

¹¹A hoten khuah an hual laiin Babulon lal Nebukadrezzara ngei pawh a lo kal vê a.

¹²Tichuan, Juda lal Jehoiakina chu a nu nêl, a hote nêl, puipate leh hotu liante nêl Babulon lal hnênah an va kal chhuak a; kum riat a lal kumin, Babulon lal chuan a lo man a.

JERUSALEM SALTÂNNA

¹³LALPA in leh lal ina sum bâwma sum zawng zawng chu a khawrh fâi vek a, LALPAN a lo sawi tawh angin, Solomonan LALPA tempul tâna rangkachak bungbêl a siam zawng zawng chu a sât sawm vek a.

¹⁴Jerusalem mipui zawng zawng: sipai hotute leh mi chak huaisen sîngkhat zet, thîrdêngte leh kut themthiamho zawng zawng nên salah a hruai vek a. Ram chhûnga mi rethei zual tih loh chu a kâwi khâwm vek a.

¹⁵Jehoiakina chu Babulon salah a hruai a. Lalpa nu te, lal nupuite, a mi lianho leh a rama mi chakte chu Jerusalem aţangin Babulon sala tâng tûrin a hruai vek a.

¹⁶Pasalţha huaisen 7,000, kut themthiam leh thîrdêng 1,000, mi chak leh indo mi zawng zawng nên Babulon lal chuan Babulon salah a hruai vek a.

JUDA LAL ZEDEKIA

¹⁷Babulon lal chuan Jehoiakina pa nau Matania chu a aiawh tûrin lalah a siam a, Zedekia tiin a hming a thlâk a.

¹⁸Zedekia chu lal a nihin kum 21 mi a ni a, Jerusalemah kum 11 ro a rêl a. A nu hming chu Hamutali, Libna mi Jeremia fanu a ni.

¹⁹Jehoiakima ang bawkhân LALPA mithmuhah thil sual a ti thîn a.

²⁰LALPA thin a rim êm a, a hmai hmâ aţanga a paih bo daih theih nân Jerusalemah leh Judai ramah hê thil hi a lo thleng ta a ni. Tichuan, Babulon lal lakah Zedekia chu a hel ta a.

BUNG 25**JUDATE TLÛKNA LEH SALTÂNNA**

¹Nebukadnezara chu a lal kum 9-na, thla 10-na, ni 10 nî chuan a sipai zawng zawng nên Jerusalem do tûrin a rawn thawk a, a vêlin awmhmun a khuar a; bang dâi an theu hual vek a.

²Lal Zedekia lal kum 11-na thlengin khawpui chu an hual bet tlat a.

³Chumi kum, a thla lê-na, ni 9-nî chuan khaw chhûngah ei tûr rêng rêng awm lo khawpin an tîm ta a.

⁴Kaldaihovin khawpui hual vêlin tînhmun an khuar chungin kulh bang chu an rek pawp a, indo mi zawng zawng chu lal huan bula bang pahni kâra kulh kawngkâah chuan a zân a zânin an tîl chhuak vek a. Lal chuan phâi lam a pan a.

⁵Mahse, Kaldai sipaiho chuan lal chu an ûm a, Jeriko phâiah an ûmphâ a. A sipaite chuan an tîl bosa vek a.

⁶Tichuan, lal chu an man a, Babulon lal hnênah Ribla khuaah an hruai a, a chungthû an rêl a.

⁷Zedekia fapate chu a mithmuh ngeiah an that a, Zedekia mitmu an kher chhuak a, dârkawl an buntîr a, Babulonah an hruai ta a.

⁸A thla ngâna, chumi thla ni sarih (Babulon lal Nebukadnezara lal kum 19-na) nî chuan Babulon lal hnuaia mi lian, vêngtu sipai hotu Nebuzaradana chu Jerusalemah a lo kal a.

⁹LALPA in leh lal in chu a hâl a; Jerusalema in zawng zawng, mi ropuite in zawng zawng chu a hâl vek a.

¹⁰Vêngtu sipai hotu hnuaia mi Kaldai sipai zawng zawng chuan Jerusalem kulh bang chu a vêlin an chhu chhe vek a.

¹¹Khawpui chhûnga mi la awm zawng zawng, Babulon lal hnêna lo inpê te leh mipui la awm zawng chu vêngtu hotu Nebuzaradana chuan salah a hruai bo vek a.

¹²Mahse, a rama mi rethei berh zualte chu grêp huante leh thlawh hma enkawl tûrin vêngtu hotu chuan a hnutchhiah a.

¹³LALPA ina dâr ban te, LALPA ina tawlailîrte leh dâr belpui te chu Kaldaiho chuan an vaw sawm vek a, a dâr chu Babulonah an hân a.

¹⁴Bêl te, suahdûr te, khâwnvâr phita cheh rualna te, fian te, puithiamho rawngbâwlna dâr bungbêl zawng zawng pawh an la bo vek a.

¹⁵Vutlawh te, chawhtawlh te, silvar leh rangkachaka siam te rêng rêng chu vêngtu sipai hotu chuan a khâwm vek a.

¹⁶LALPA in atâna Solomonan ban pahni leh tui zêmpakhat leh tawlailîr siam nâna dâr a hman zât chu teh sên rual a ni lo.

¹⁷Ban pakhat sân zâwng chu tawng sâwmpariat a ni a, a chhîpah a lu bâwk, dâra siam a awm a. A lu bâwk sân zawng chu tawng thum a ni a, a vêl cheina leh theibuhfai lem te chu dâra siam a ni. Ban pahni hna pawh chutiang chiaha siam leh chei chu a ni a.

¹⁸Vêngtu hotu chuan puithiam lal Seraia te, a dawttu puithiam Zephania leh kawngkhâr vêngtu pathum te chu a hruai a.

¹⁹Khawpui aţang chuan indo lam zir tîrtu te, lal mi leh sâ khawpuia la awm mi pangâ te, sipaia tâng tûr hming ziaktu, mipui zâizâptu te leh mi sawmruk dang khawpuia la awmte chu a khawrh chhuak bawkh a.

²⁰Tichuan, vêngtu hotu Nebuzaradana chuan chûng mite chu Ribla khuaah, Babulon lal hnênah a hruai a.

²¹Babulon lal chuan Hamath rama Ribla-ah a lo that a. Tichuan, Judate chu anmahni ram aţangin sala hruai bo an lo ni ta a ni.

JUDA RAM AWPTU GEDALIA

²²Babulon lal Nebukadnezara hnutchhiah Judai rama mi la awmte awptu atân Saphana fapa, Ahikama fapa Gedalia chu governor-ah a ruat a.

²³Sipai hotu zawng zawng leh an hote chuan Babulon lalin Gedalia chu governor atân a siam tih an hriatin Mispa khuaa Gedalia hnênah an lo kal a, chûngte chu— Nethania fapa Ismaela te, Karea fapa Johanana te, Netophath mi Tanhumeta fapa Seraia te, Maakatha fapa Jaazania te leh an mite an ni a.

²⁴Anniho leh an mite hmâah Gedalia chuan thû a lo tiam a, “Kaldai sawrkar hnathawkho hi hlâuh duh suh u. Ram chhûngah hian khawsa vê mai ula, Babulon lal thuhnuai hian awm tîa hlê hlê ula, in tîn a tîa ang,” a ti a.

²⁵Nimahsela, Elisama fapa, Nethania fapa Ismaela, lal thlah zînga mi chuan mi dang 10 hruaiin, chumi kum thla sarihnaah chuan Mizpa khua a pan a, Gedalia chu an bei a, an that a, a hnêna

awm Judate leh Kaldai mite pawh an that bawk a.

²⁶Mi zawng zawng chu a lian a têin, sipai hotute nêen chuan an tho va, Aigupta-ah an kal ta a; Kaldaiho an hlau ta si a.

TÂN IN ATA JEHOIAKINA AN CHHUAH

²⁷Juda lal Jehoiakina saltân kum 37-na, thla 12-na, chumi thla ni 27 ni chuan Babulon lal Evil-Merodaka chuan a rorêl tan kumin Juda lal Jehoiakina chu tân in aţangin a chhuah a.

²⁸Ani chu tha takin a bia a, Babulona a hnêna awm vê lal dangte aiin a dinhmun a châwi sâng a.

²⁹Tichuan, Jehoiakina chuan a tânna silhfênte a thlâk a, a dam chhûngin lal bulah lal châw kîlin a awm ta a.

³⁰Lal chuan tha takin a enkawl a, a ni tin mamawh ang zêlin a pe a, a dam chhûngin a châwm ta a ni.

1 CHRONICLES

Ziah tu: Ezra • Ziah kum: B.C. 450 vêl

A tîra Hebrai bu-ah chuan Chronicles 1-na leh 2-na hi hlâwm khat a ni a, a hnûah bu hnihah an then hrang ta a ni. Lalte bu 1-na leh 2-na thù nêna inang a tam hlê. A bikin Juda hnam chanchin, Saula thih ațanga Babulon saltân inkâr zawng a huam a. Chithlah chhuina lam a uarin, Adama ațanga saltâng chhuah leh hun thlenga chhui a ni a, Juda chanchin a thlûr bîk a, hmar lama Israel hnam sâwm te chanchin a sawi mang lo. Hmasâng Judate leh Talmud bu bâkah Kristian mithiamten Chronicles 1 & 2-na ziaktu ni thei bera an kawh rawn chu Ezra a ni. A bu hming vuahtu erawh chu Latin Vulgate siamtu Jerome-a (AD 400) a ni thung. Chronicles bute hi Juda saltâng kîr lehten an thlahtu bul te, Pathian thununna an tawh hnû pawha chhan chhuaha an awma, an rama an kîr leh theihna chu Davida hnêna Pathian thu lo tiam tawha innghat a ni tih hriattîr a ni. Nakin zêla an hnam din chhuahna tûr pawh Davida thlah Messia lalram lo ding tûr nêna thlunzawm a ni zêl. Israelte hnam ziaa an thil ngaih pawimawh êm êm chu an nihna (identity) tichiang tûra thlahtu chhuina hi a ni. 1 Chronicles hi hmun thumah then theih a ni: (i) Thlahtu chhuina (1-9); (ii) Saula leh Davida chanchin (10-12) te leh, (iii) Davida rorêlna chanchin leh a thih thu (13-29) te a ni. 1 Chronicles hi Bible a bu 13-na a ni a, a chhûngah bung 29 leh châng 942 a awm.

BUNG 1

ADAMA THLAHTE - SETHA ATANGA ABRAHAMA

- ¹Adama, Setha, Enosa,
- ²Kainana, Mahalalela, Jareda,
- ³Enoka, Methusela, Lameka,
- ⁴Nova, Sema, Hama leh Japheta te.
- ⁵Japheta fapate chu Gomera, Magoga, Madaia, Javana, Tubala, Mesheka leh Tirasa te an ni.
- ⁶Gomera fapate chu Askenaza, Diphatha leh Togarma te an ni.
- ⁷Javana fapate chu Elisa te, Tarsisa te, Kittima te leh Rodanima te an ni.
- ⁸Hama fapate chu Kusha te, Misraïma te, Puta te leh Kanaana te an ni.
- ⁹Kusha fapate chu Seba te, Havila te, Sabta te, Raama te leh Sabteka te an ni. Raama fapate chu Seba leh Dedana te an ni.
- ¹⁰Kusha chuan Nimroda a hring a; lei chung a mi chak a lo ni tan ta a.
- ¹¹Mizraïma chuan Ludima te, Anamima te, Lehabima te, Naphtuhima te a hring a,
- ¹²Pathrusima te, Kasluhima te (hê mi lakah hian Philistia-ho leh Kaphtor-ho an lo chhuak a).
- ¹³Kanaana chuan a fatir Sidona leh Hetha te;

- ¹⁴Jebus-ho te, Amor-ho te leh Girgasho te;
- ¹⁵Hiv-ho te, Arki-ho te leh Sin-ho te;
- ¹⁶Arvad-ho te, Zemar-ho te leh Hamath-ho te a hring a.

¹⁷Sema fapate chu Elama te, Assura te, Arphaxada te, Luda te, Arama te, Uza te, Hula te, Gethera te leh Mesheka te an ni.

- ¹⁸Arphaxadan Sela a hring a, Selan Ebera a hring a.

¹⁹Ebera lakah fapa pahni an piang a; pakhat hming chu Pelega a ni a, a hun laiin lei chu tihthen a ni a; a unaupa hming chu Joktana a ni.

²⁰Joktana chuan Almodada te, Selepa te, Hazarmavetha te, Jera te,

- ²¹Hadorama te, Uzala te, Diklaa te,

- ²²Ebala te, Abimaela te, Seba te,

²³Ophira te, Havila te leh Jobaba te a hring a. Hêngho zawng hi Joktana fapate an ni.

- ²⁴Sema te, Arphaxada te, Sela te,

- ²⁵Ebera te, Pelega te, Reuva te,

- ²⁶Seruga te, Nahora te, Tera te,

- ²⁷Abrama chu Abrahama a ni a.

- ²⁸Abrahama fapate chu Isaaka leh Ismaela te an ni.

ISMAELA THLAHTE

²⁹Hêng hi an thlahte an ni: Ismaela fatîr chu Nebajotha a ni a; Kedara te, Adbeela te, Mibsama te,

- ³⁰Misma te, Duma te, Massa te, Hadada te, Tema te,

³¹Jetura te, Naphisa te leh Kedema te an ni. Chûng chu Ismaela thlahte an ni a.

KETURI THLAHTE

³²Abrahama hmei Keturi fapate chu, Zimrana te, Joksana te, Medana te, Midiana te, Isbaka te leh Sua te an ni. Joksana fapate chu Seba leh Dedana te an ni.

³³Midiana fapate chu Ephra te, Ephera te, Hanoka te, Abida te leh Elda te an ni. Hêng hi Keturi fate chu an ni.

ISAACA THLAHTE

³⁴Abrahaman Isaaka a hring a. Isaaka fapate chu Esauva leh Israela te an ni.

³⁵Esauva fapate chu Eliphaza te, Reuela te, Jeusa te, Jaalama te leh Kora te an ni.

³⁶Eliphaza fapate chu Temana te, Omara te, Zephia te, Gatama te leh Kenaza te leh, Amaleka, Timnai laka mi te an ni.

³⁷Reuela fapate chu Nahatha te, Zera te, Samma te leh Miza te an ni.

SEIRA THLAHTE

³⁸Seira fapate chu Lotana te, Sobala te, Zibeona, Ana te, Disona te, Ezera leh Disana te an ni.

³⁹Lotana fapate chu Horia leh Homama te an ni a; Lotana farnu chu Timnai a ni.

⁴⁰Sobala fapate chu Aliana te, Manahatha te, Ebalá te, Sephia te leh Onama te an ni. Zibeona fapate chu Aja leh Ana te an ni.

⁴¹Ana fapa chu Disona a ni. Disona fapate chu Hamrana te, Esbana te, Ithrana te leh Cherana te an ni.

⁴²Ezera fapate chu Bilhana te, Zaavana te leh Jaakana te an ni. Disana fapate chu Uza leh Arana te an ni.

EDOM LALTE

⁴³Israel fate chungá rorêltu lal an la awm hmâ khân, Edom rama rorêltu lalte chu hêngte hi an ni: Beora fapa chu Bela a ni a, a khawpui hming chu Dinhabah a ni.

⁴⁴Bela chu a thî a, a aiah Bozra mi Zera fapa Jobaba a lal a.
⁴⁵Jobaba chu a thî a, Teman-ho rama mi Husaman a ai a awh a.

⁴⁶Husama chu a thî a, Bedada fapa Hadada, Moab rama Midian-ho va dotu kha a aiah a lal a. A khawpui hming chu Avit a ni.

⁴⁷Hadada chu a thî a, Masreka mi Samla chu a aiah a lal a.

⁴⁸Samla a thihin Luipui kama Rehobot mi Saula chu a aiah a lal a.

⁴⁹Saula chu a thî a, Akbora fapa BaalHanana chu a aiah a lal a.

⁵⁰Baal-Hanana chu a thî a, a aiah Hadada a lal a; a khawpui chu Pai a ni. A nupui hming chu Mezahaba fanu, Matreda fanu Mehetabeli a ni.

⁵¹Hadada pawh chu a thî a. Edom puipa hote chu, Puipa Timna te, Puipa Alia te, Puipa Jetheta te,

⁵²Puipa Aholibama te, Puipa Ela te, Puipa Pinona te,

⁵³Puipa Kenaza te, Puipa Temana te, Puipa Mibzara te,

⁵⁴Puipa Magdiela te leh Puipa Irama te an ni. Chûngte chu Edom puipa hote chu an ni.

BUNG 2

ISRAELA THLAHTE

¹Israela fapate chu hêngte hi an ni: Reubena, Simeona, Levia, Juda, Issakara, Zebuluna,

²Dana, Josefa, Benjamina, Naphtalia, Gada leh Asera.

JUDA AṬANGA DAVIDA THLENG

³Juda fapate chu Era, Onana leh Sela te an ni. Hêngte hi Kanaan mi Sua fanu laka piang te an ni. Juda fa u ber Era chu LALPA mithmuhah mi suaksual a ni a; chuvângin a tihlum ta a ni.

⁴A monu Tamari chuan Perezá leh Zera te a hrinsak a. Juda fapate chu an vaiin pangâ an ni.

⁵Perezá fapate chu Hezrona leh Hamula te an ni.

⁶Zera fapate chu Zimria, Ethana, Hemana, Kalkola leh Dara te an ni a, an vaiin pangâ an ni.

⁷Karmia fapa chu Akara, Israelte timangangtu, ânchhedawng thila bawh chhetu kha a ni.

⁸Ethana fapa chu Azaria a ni.

⁹Hezrona laka piang a fapate chu Jerameela te, Rama te leh Kelubaia te an ni.

¹⁰Raman Amminadaba a hring a, Amminadaban Nahsona, Juda hnam puipa a hring a;

¹¹Nahsonan Salmaa a hring a, Salman Boaza a hring;

¹²Boazan Obeda a hring a, Obedan Jessaia a hring a;

¹³Jesaian a fatîr Eliaba a hring a, a dawttu chu Abinadaba a ni a, a pathumna Simea,

¹⁴a palîna Nethanela, a pangâna Raddaia,

¹⁵a parukna Ozema leh a pasarihna Davida te an ni.

¹⁶An farnute chu Zeruii leh Abigaili te an ni. Zeruii fapate chu Abisaia, Joaba leh Asahela—pathum an ni.

¹⁷Abigaili chuan Amasa a hring a; Amasa pa chu Ismael mi Jethera a ni.

HEZRONA THLAHTE

¹⁸Hezrona fapa Kaleban a nupui Azubahi leh Jerioti te lakah fa a nei a. A fapate chu: Jesera, Sobaba leh Ardona te an ni.

¹⁹Azubahi chu a thî a, Kaleba chuan nupui Ephrathi a nei a, ani chuan Hura a hrinsak a.

²⁰Hura chuan Uria a hring a, Uria chuan Bezalela a hring a.

²¹Hezrona chu kum 60-a upa a nihin Gileada pa Makira fanu nupuiah a nei a; ani chuan Seguba a hrinsak a.

²²Seguban Jaira a hring a, ani chuan Gilead ramah khaw 23 a nei.

²³(Gesura leh Suria chuan Jaira khua te, Kenath leh a khuate nên khaw 60 an lâksak a.) Chûngte chu Gileada pa Makira fapate ram vek a ni a.

²⁴Kaleb Ephratha khuaa Hezrona thih hnûin, Hezrona nupui Abija chuan Asura a hrinsak a, ani chu Tekoa pa a ni.

JERAMEELA THLAHTE

²⁵Hezrona fa û ber Jerameela fatîr chu Rama a ni a, a dangte chu Buna te, Ozema te, Ahija te an ni.

²⁶Jerameela chuan nupui dang, a hming chu Atari a nei a; ani chu Onama nu a ni.

²⁷Jerameela fatîr Rama fate chu Maaza te, Jamina te leh Ekerá te an ni.

²⁸Onama fapate chu Sammaia leh Jada te an ni. Sammaia fapate chu Nadaba leh Abisura te an ni a.

²⁹Abisura nupui hming chu Abihaili a ni a, ani chuan Ahbana leh Molida te a hrinsak a.

³⁰Nadaba fapate chu Seleda leh Appaima te an ni; Seleda chu fa nei lovin a thî a.

³¹Appaima fapa Isia, Isia fapa Sesana, Sesana fapa chu Ahlaia a ni.

³²Sammaia unaupa Jada fapate chu Jethera leh Jonathana te an ni a; Jethera chu fa nei lovin a thî a.

³³Jonathana fapate chu Peleta leh Zaza te an ni. Hêngte hi Jerameela fapate chu an ni.

³⁴Sesana chuan fapa nei lovin fanu chauh a nei a. Sesana chuan chhiahhlawh Aigupta mi, a hming Jarha a nei a.

³⁵Sesana chuan Jarha tân a fanu chu nupuiah a neihtîr a, fapa Attaia a hrinsak a.

³⁶Attaia chuan Nathana a hring a, Nathanan Zabada a hring;

³⁷Zabadan Ephlala a hring a, Ephlalan Obeda a hring;

³⁸Obedan Jehua a hring a, Jehuan Azaria a hring;

³⁹Azarian Heleza a hring a, Helezan Eleasa a hring;

⁴⁰Eleasan Sismaia a hring a, Sismaian Salluma a hring;

⁴¹Salluman Jekamia a hring a, Jekamian Elisama a hring.

KALEBA THLAHTE

⁴²Jerameela unaupa Kaleba thlahte: a fatîr chu Zipha pa Mesha a ni a, ani chu Hebrona pa Maresa fapate an ni.

⁴³Hebrona fapate chu Kora te, Tappua te, Rekema leh Sema te an ni.

⁴⁴Sema chuan Jarkoama pa Rahama a hring a, Rekema chuan Sammaia a hring.

⁴⁵Sammaia fapa chu Maona a ni a, Maona chu Beth Zura pa a ni.

⁴⁶Kaleba hmei Ephai chuan Harana te, Moza te leh Gazeza te a hring a; Haranan Gazeza a hring.

⁴⁷Jadaia fapate chu Regema te, Jothama te, Geshana te, Peleta te, Ephaha te leh Saapha te an ni.

⁴⁸Kaleba hmei Maakai chuan Sebera leh Tirhana a hring a.

⁴⁹Madmana pa Saapa te, Makbena pa Seva te, Gibeia pa te a hring baw. Kaleba fanu chu Aksai a ni.

⁵⁰Hêngte hi Kaleba thlahte chu an ni a: Hura fapa, Ephrathi fa û ber, Kirjath Jearim dintu chu Sobala a ni a,

⁵¹Bethlehem dintu chu Salma a ni a, Beth Gader-ho thlahtu chu Harepa a ni.

⁵²Kirjath Jearim dintu Sobala chu Haroeh-ho leh Manuhoth-ho zâtve thlahtu a ni.

⁵³Kirjath Jearima thlahte chu Ithraho te, Put-ho te, Sumath-ho te leh Mishra-ho te an ni. Hêngho lakah hian Zora mite leh Estaol mite an lo chhuak a.

⁵⁴Salma thlahte chu Bethlehem-ho te, Netopha ho te, Atroth Beth Joab ho te, Manaheth-ho te leh Zor-ho te an ni a.

⁵⁵Jabez-a chêng lehkhaziaktu thlahho chu Tirath-ho leh Sukath-hote an ni. Hêngho hi Rekab-ho thlahtu Hamath aţanga lo kal Ken mite an ni.

BUNG 3

DAVIDA THLAHTE

¹Hebrona piang Davida fapate chu hêngte hi an ni: A fa û ber chu Amnona, Jezreel mi Ahinoami laka mi a ni a; a dawttu Daniela chu Karmel mi, Abigaili laka mi a ni;

²a pathumna chu Absaloma, Talmaia fanu Maaki fapa a ni; a palina chu Haggiti fapa Adonija a ni a;

³a pangâna chu Abitali laka mi Sephatia a ni; a parukna Ithreama chu a nupui Egli laka mi a ni.

⁴Hêng mi parukte hi Hebron khuua piang an ni. Chutah chuan kum sarih leh thla ruk chhûng ro a rêl a, Jerusalemah kum 33 chhûng ro a rêl baw.

⁵Jerusalemah piangte chu hêngte hi an ni: Simea te, Sobaba te, Nathana te leh Solomona te an ni a—an pali chuan Ammiela fanu Bathsu-i laka piang an ni.

⁶Hêng bâkah hian Ibara te, Elisama te, Elipheleta te,

⁷Noga te, Nephega te, Japhia te,

⁸Elisama te, Eliada leh Elipheleta te— an vaiin pakua an ni.

⁹Hêngte hi Davida fapate vek an ni a, hmei fate tiam lovin; Tamari chu an farnu a ni.

¹⁰Solomona fapa chu Rehoboama a ni; chu mi fapa chu Abija a ni a, chu mi fapa chu Asa a ni a, chu mi fapa chu Jehoshaphata a ni,

¹¹chu mi fapa chu Jorama a ni a, chu mi fapa chu Ahazia a ni a, chu mi fapa chu Joasa a ni,

¹²chu mi fapa chu Amazia a ni a, chu mi fapa chu Azaria a ni a, chumi fapa chu Jothama a ni a,

¹³chu mi fapa chu Ahaza a ni a, chu mi fapa chu Hezekia a ni a, chu mi fapa chu Manasea a ni a,

¹⁴chu mi fapa chu Amona a ni a, chu mi fapa chu Josia a ni.

¹⁵Josia fapate chu Johanana, a fatîr te, a pahnihna Jehoiakima te, a pathumna Zedekia te leh, a palina Salluma te an ni.

¹⁶Jehoiakima fapate chu Jekonia leh Zedekia te an ni.

JEKONIA THLAHTE

¹⁷Jekonia fapate chu Asira te, a fapa Sealtiel te,

¹⁸Malkirama te, Pedaia te, Senazara te, Jekamia te, Hosama te, Nedabia te an ni.

¹⁹Pedaia fapate chu Zerubbabela leh Simeia te an ni. Zerubbabela fapate chu Mesullama te, Hanania te, an farnu Selomithi te,

²⁰Hasuba te, Ohela te, Berekia te, Hasadia te, Juhab-Heseda te—an vaiin pangâ an ni.

²¹Hanania fapate chu Pelatia leh Jesaia te an ni a, chu mi fapa chu Rephaia a ni a, chu mi fapa chu Arnana a ni a, chu mi fapa chu Obadia a ni a, chu mi fapa chu Sekania a ni.

²²Sekania fapa chu Semaia a ni. Semaia fapate chu Hattusa te, Igala te, Baria te, Nearia leh Saphata—an vaiin paruk an ni.

²³Nearia fapate chu Elioenai te, Hezekia te, Azrikama te—an vaiin pathum an ni.

²⁴Elioenai fapate chu Hodavia te, Eliasiba te, Pelaia te, Akkuba te, Johanana te, Delaia te leh Anania te— an zâin pasarih an ni.

BUNG 4

JUDA THLAHTE

¹Sobala fapa Reaia chuan Jahatha a hring a, Jahathan Ahumaia leh Lahada a hring a. Hêngte hi Zoratha thlahte chu an ni.

²Hêng hi Etama pa thlahte an ni: Jezreela te, Isma te, Idbasa te an ni a; an farnu hming chu Hazelelponi a ni;

³Penuela chu Gedora pa a ni a, Ezera chu Husa pa a ni. Hêngte hi Bethlehem dintu Ephrathi fatîr Hura thlahte chu an ni.

⁴Penuela chu Gedora pa a ni a, Ezera chu Husa pa a ni. Hêngte hi Bethlehem dintu Ephrathi fatîr Hura thlahte chu an ni.

⁵Tekoa pa Asura chuan nupui pahnih, Heli leh Naari te a nei a.

⁶Naari chuan Ahuzzama te, Hephera te, Temenia te, Haahashtaria te a hrinsak a. Hêngte hi Naari fapate chu an ni.

⁷Hela fapate chu Zeretha te, Zohara te, Ethnana te an ni a;

⁸Koza chuan Anuba te, Zobeba te leh, Haruma fapa Aharhela thlahte a hring a.

⁹Jabeza chu a unaute aiin a zahawm zâwk a, “Na tuar chungka ka hrin a nih hi” tiin a nu chuan a hmingah Jabeza a sâ a.

¹⁰Jabeza chuan Israelte Pathian hnênah, “Aw, mal min sâwm la, ka ram min zauhsak rawh; i kutin min chelh reng la, lungngaia ka awm loh nân sual lakah min vêng tlat ang che!” tiin a ngên a. Tichuan, a dîl angin Pathianin a tihsak ta a.

¹¹Suha unaupa Keluba chuan Mehira a hring a, ani chu Eshtona pa a ni.

¹²Eshtona chuan Beth-Rapha te, Pasea te, Tehina te a hring a, ani chu Ir-Nahasa pa a ni a. Hêngte hi Reka mite chu an ni.

¹³Kenaza fapate chu Othniela leh Seraia te an ni. Othniela fapate chu Hathata te,

¹⁴Ophraha hringtu Meonothaia te an ni. Seraia chuan Joaba, Ge-Harasima pa a hring a, mi themthiamho an ni a.

¹⁵Jephunea fapa Kaleba fapate chu Irua te, Ela te, Naama te an ni. Elaa fapa chu Kenaza a ni.

¹⁶Jehalelela fapate chu Zipha te, Ziphaha te, Tiria te, Asarela te an ni.

¹⁷Ezra fapate chu Jethera te, Ephera te, Jalona te an ni. Mereda nupui chuan Miriama te, Sammaia te leh Ishba, Eshtemoa pa te a hring.

¹⁸(A nupui Jehudijai chuan Gedor thlahtu Jereda te, Soko thlahtu Hebera te, Zanoa thlahtu Jekuthiela te a hring a.) Hêngte hi Mereda nupui, Pharoa fanu Bithiahi fapate an ni.

¹⁹Nahama farnu, Hodia nupuia fapate chu Garmi-ho thlahtu Keila pa leh Maakath-ho thlahtu Estemoa te an ni.

²⁰Simona fapate chu Amnona te, Rina te, Ben-Hanana te, Tilon a te an ni. Ishia fapate chu Zohetha leh Ben-Zohetha te chu an ni.

²¹Juda fapa Sela fapate chu Leka pa Era te, Maresa pa Laada te, puan zaisîn tah thiam Asbea hote an ni;

²²Kozeba mi Jokima leh Joasa nê; Moab leh Jasubi-Lehema rorêltua awm Sarapha nê. An chanchin ziaik hi a hmanlai tawh hle.

²³Hêng mite hi Netaim leh Gedera khuua chêng, bêlvawtu an ni a. Lal hna thawkin a hnênah an awm a ni.

SIMEONA THLAHTE

²⁴Simeona fapate chu Nemuela te, Jamina te, Jariba te, Zera te, Saula te an ni a,

²⁵chu mi fapa chu Salluma a ni a, chu mi fapa chu Mibsama a ni a, chu mi fapa chu Misma a ni.

²⁶Misma fapa chu Hamuela a ni a, chu mi fapa chu Zakura a ni a, chu mi fapa chu Simeia a ni.

²⁷Simeia chuan fapa 16 leh fanu 6 a nei a; a unaute erawh chuan fa an nei tam vê lo va, an thlahte pawh Juda thlahte angin an pung chak vê hek lo.

²⁸Beersheba-ah te, Molada-ah te, Hazar Sual-ah te an chêng a

²⁹Bilhah-ah te, Ezem-ah te, Tolad-ah te,

³⁰Bethuel-ah te, Horma-ah te, Ziklagah te,

³¹Beth Markaboth-ah te, Hazar Susim-ah te, Beth Biri-ah te leh, Saaramah te an chêng. Davida rorêl thleng khân hêng hi an khawpuite chu a ni.

³²An khawpuite chu Etam te, Ain te, Rimmon te, Token te, Ashan te— khawpui pangâ- ³³an chhehvêla awm khaw hrang hrangte nê, Baal thlengin. Chûng chu an chênna hmunte a ni a, an thlahtute chanchin ziahna an nei bawk:

³⁴chûngho chu Mesobaba te, Jamleka te, Amazia fapa Josa te;

³⁵Joela te, Josibia fapa Jehua, chu mi chu Asiela fapa, Seraia fapa a ni a;

³⁶Elioenaia te, Jaakoba te, Jesohaia te, Asaia te, Adiela te, Jesimiela te, Benaia te;

³⁷Siphia fapa Ziza te, Allona fapa te, Jedaia fapa te, Simria fapa te, Semaia fapa te

³⁸hênga hming langte hi an chhûngkaw khai pate an ni a, an chhûngkua chu an pung nasa hlê a.

³⁹Tichuan, an ran tlatna tûr hmun zawngin Gedor luhna lamah, phâi zâwl chhak lam thlengin an kal a.

⁴⁰Ran tlatna tûr hnim thatna, ram reh zau tak leh hmun râlmuang an hmu ta a; chutah chuan tûn hmân Hama thlah thenkhat an lo chêng tawh thîn.

⁴¹Juda lal Hezekia lal lai khân hêng hming ziaka langho hi an va lût a; chuta Meun-mi an va hmuh-ho puan inte chu an tichhia a, tûna a awm dân ang hian an tiboral vek a. An rante tân chaw a that avângin an awmna chu an luahlân hlen ta a ni.

⁴²An zînga mi thenkhat, Simeona thlahte aţanga mi 500 te chu Seir Tlângah an kal a, an hrutute chu, Isia fapa Pelatia te, Nearia te, Rephaia leh Uzziela te an ni.

⁴³Amalekho la dam chhunte chu an hneh vek a. Tûn thlengin chutah chuan an awm ta zêl a ni.

BUNG 5

REUBENA THLAHTE

¹Israela fa û ber Reubena thlahte— fatîr chu ni tehmeuh mahse, a pa khum pui a tihbawhlhlawh avângin fatîr nihna chu Israela fapa Josefa thlahte hnênah pek a ni a, chuvângin thlahtu hming ziah dân hi upat dân chhui a ni ta lo.

²Juda pawhin a unaute a khûm miao va, fatîr nihna chu Josefa chan nimahse, amah aţang hian rorêltu a lo chhuak ta zâwk a ni.

³Israela fatîr Reubena fapate chu Hanoka te, Pallua te, Hezrona te, Karmia te an ni.

⁴Joela fapa Semaia, chu mi fapa Goga, chu mi fapa Simeia,

⁵chu mi fapa Mika, chu mi fapa Reaia, chu mi fapa Baala,

⁶chu mi fapa Beera chu Assuria lal Tiglat-Pileseran salah a hruai bo ta a. Reubena thlahho hruaitu a ni.

⁷Anniho thlah kal zêl hming ziah dânin: an puipa Jeiela leh Zakaria te,

⁸Azaza fapa Bela, a pa Sema, a pa Joela te an ni a, an chênna chu Aroer leh Nebo leh Baal Meon thlengin a ni.

⁹Chhak lam Euphrates Luipui he lam, thlalêr tawntirh thlengin an luah a, Gilead ramah an ran rual a pung nasa ta si a.

¹⁰Saula hun lai khân Hagri-ho nên an indo va, an hneh a; tichuan, Gilead chhak ram pumpui chu puan in kaihin an luah vek a ni.

GADA THLAHTE

¹¹Gada thlahte chu an dawt chiah Basan ramah Salka thlengin an chêng a.

¹²An hotu ber chu Joela a ni a, a dawtah Saphama, a dawt leh chu Basan rama Jaanaia leh Saphata te an ni a,

¹³an thlahtu lama an unaute chu: Mikaela te, Mesullama te, Seba te, Joraia te, Jakana te, Zia te, Ebera te— an vaiin pasarih an ni.

¹⁴Hêng hi Abihaila thlahte an ni: ani chu Huria fapa, Jaroa fapa, Gileada fapa, Mikaela fapa, Jesisaia fapa, Jahdoa fapa, Buza fapa a ni a;

¹⁵Ahia chu Abdiela fapa, Gunia fapa a ni a, amah chu an chhûngkaw thlah puipa a ni.

¹⁶Gad-ho chu Gilead-ah te, Basan-ah te, khaw hrang hrangah te leh, Saron ram chhûnga ran tlatna hmunah te an chêng a.

¹⁷Hêng thlahtu chanchin zawng zawng hi Juda lal Jothama hun lai leh Israel lal Jeroboama hun laia ziah fel a ni.

¹⁸Reubena thlah te, Gada thlah te leh Manasea hnam zâtê te chuan mi chak huaisen, phâw leh khandaiah hmang thiam, thal kâp thiam leh indo mi 44,760 an nei a.

¹⁹Hagri ho te, Jetur-ho te, Naphis-ho leh Nodab-ho te nên an indo thîn a.

²⁰Indonaah Pathian auh nachâng an hriat avângin tanpuina an dawng a, Hagri-ho chu an kutah pêk an ni a. Ama chungah rinna an ngah avângin an tawngtâinate chu a lo ngaihthlâksak a ni.

²¹An ran rualte an mansak a— sanghawngsei 50,000, berâm 250,000, sabengtung 2,000 bâkah mi 100,000 an man bawk a;

²²Indona chu Pathian indona a nih avângin mi tam tak an that a. Saltân hmâ zawng khân chûng mite ramah chuan an chêng ta a ni.

MANASEA THLAHTE (CHHAK LAM)

²³Tichuan, Manasea hnam zahvê te chu chû ramah chuan an chêng a. Basan aţangin Baal Hermon te, Senir te leh Hermon Tlâng thlengin an lo pung zêl a.

²⁴Hêngte hi an chhûngkaw puipa deuh deuhte an ni: Ephera te, Isia te, Eliela te, Azriela te, Jeremia te, Hodavia te, Jahdiela te an ni. Mi chak huaisen leh hmingthang, an thlahtu chhûngkaw puipate chu an ni.

²⁵An thlahtute Pathian lakah an rinawm lo va, Pathianin an hmâa lo awm a tihboraal tâk pathiante lakah an uirê a.

²⁶Chuvângin Israelte Pathian chuan Assuria lal Pula, Assuria lal Tiglat-Pilesera ni bawk rilru chu a chawk tho va. Reuben-ho te, Gad-ho te leh Manasea hnam zâtê te chu salah a hruaitîr a. Hala-ah te, Habor-ah te, Hara-ah te leh Gozan luah te tûn thlengin a awmtîr ta reng a ni.

BUNG 6

LEVIA THLAHTE

¹Levia fapate chu Gershona te, Kohatha leh Meraria te an ni.

²Kohatha fapate chu Amrama te, Izara te, Hebrona leh Uzziela te an ni.

³Amrama fate chu Aarona te, Mosia leh Miriami te an ni. Aarona fapate chu Nadaba te, Abihua te, Eleazara leh Ithamara te an ni.

⁴Eleazaran Phinehasa a hring a, Phinehasan Abisua a hring a;

⁵Abisuan Bukkia a hring a, Bukkian Uzia a hring a;

⁶Uzian Zerahia a hring a, Zerahian Meraiotha a hring a;

⁷Meraiothan Amaria a hring a, Amarian Ahituba a hring a;

⁸Ahituban Zadoka a hring a, Zadokan Ahimaaza a hring a;

⁹Ahimaazan Azaria a hring a, Azarian Johanana a hring a;

¹⁰Johananan Azaria a hring a (ani chu Jerusalema Solomonan tempul a sak laia puithiam a ni);

¹¹Azarian Amaria a hring a, Amarian Ahituba a hring a;

¹²Ahituban Zadoka a hring a, Zadokan Salluma a hring a;

¹³Salluman Hilkia a hring a, Hilkian Azaria a hring a;

¹⁴Azarian Seraia a hring a, Seraian Jehozadaka a hring a.

¹⁵LALPAN Judate leh Jerusalem khawpui Nebukadnezzara kuta sala a mantîr lai khân Jehozadaka pawh salah a tâng vê a ni.

¹⁶Levia fapate chu Gersona te, Kohatha te, Meraria te an ni.

¹⁷Hêng hi Gersona fapa hmingte chu an ni: Libnia leh Simeia.

¹⁸Kohatha fapate chu Amrama te, Izara te, Hebrona te, Uzziela te an ni.

¹⁹Meraria fapate chu Mahlia leh Musia te an ni. Hêngte hi an chhûngkaw kal dân anga Levia thlahte chu an ni.

²⁰Gersona thlahte, a fapa Libnia, chu mi fapa Jahatha, chu mi fapa Zimma,

²¹chu mi fapa Joaha, chu mi fapa Iddova, chu mi fapa Zera, chu mi fapa Jeatheraia.

²²Kohatha fapate chu, Amminadaba a ni a, chu mi fapa chu Kora a ni a, chu mi fapa chu Asira a ni a,

²³chu mi fapa chu Elkana a ni a, chu mi fapa chu Ebiasapha a ni a, chu mi fapa chu Asira a ni a,

²⁴chu mi fapa chu Tahatha a ni a, chu mi fapa chu Uriela a ni a, chu mi fapa chu Uzias a ni a, chu mi fapa chu Saula a ni.

²⁵Elkana fapate chu Amasaia leh Ahimotha an ni.

²⁶Elkana thlahte, Elkana fapate chu Zophaia te, chu mi fapa chu Nahatha a ni a,

²⁷chu mi fapa chu Eliaba a ni a, chu mi fapa chu Jerohama a ni a, chu mi fapa chu Elkana a ni.

²⁸Samuela fapate chu, a fatir Joela a ni a, a dawttu chu Abija a ni.

²⁹Meraria fapate chu Mahlia a ni a, chu mi fapa chu Libnia a ni a, chu mi fapa chu Simeia a ni a, chu mi fapa chu Uzias a ni a,

³⁰chu mi fapa chu Simeia a ni a, chu mi fapa chu Haggia a ni a, chu mi fapa chu Asaia a ni.

LALPA INA RIMAWI TUMTUTE

³¹Heng mite hi thuthlung bawm dah luh hnua LALPA ina hla hruiat atana Davidan a ruatte an ni.

³²Solomonan Jerusalem LALPA in a sak hma zawng khân inbiakna puan in awmna hmâah rimawi nêan rawng an bawl thin a, a inchnawkin rawng an bawl thin a ni.

³³Chung rawngbawltute leh an thlahte chu: Kohatha thlahte chu, hla satu Hemana, Joela fapa, Samuela fapa,

³⁴Elkana fapa, Jerohama fapa, Eliela fapa, Toa fapa,

³⁵Zupha fapa, Elkana fapa, Mahatha fapa, Amasaia fapa,

³⁶Elkana fapa, Joela fapa, Azaria fapa, Zephania fapa,

³⁷Tahatha fapa, Asira fapa, Eliasapha fapa, Kora fapa,

³⁸Izara fapa, Kohatha fapa, Levia fapa, Israela fapa te an ni.

³⁹A unaupa Asapha chu a ding lama ding thin a ni a, Asapha chu Berakia fapa, Simeia fapa,

⁴⁰Mikaela fapa, Baaseia fapa, Malkija fapa,

⁴¹Ethnia fapa, Zera fapa, Adaia fapa,

⁴²Ethana fapa, Zimma fapa, Simeia fapa,

⁴³Jahatha fapa, Gersona fapa, Levia fapa a ni a.

⁴⁴An unau, vei lama ding thin Meraria fapate chu Kisia fapa Ethana, Abdia fapa, Malluka fapa te an ni.

⁴⁵Hasabia fapa, Amazia fapa, Hilikia fapa,

⁴⁶Amzia fapa, Bania fapa, Samera fapa,

⁴⁷Mahlia fapa, Musia fapa, Meraria fapa, Levia fapa a ni.

⁴⁸An unau Levia-ho chu Pathian ina biakbûk rawngbawl hna hrang hrang atana ruat an ni.

AARONA THLAHTE

⁴⁹Arona leh a thlahte erawh chuan hârlal thil hlanna maichâm leh rimtui maichâma inthawina hlan tûr te, Israelte tâna tlanna siamsak tûr leh Hmun Thianghlim Bera hna zawng zawng chu an chang vek a ni, Pathian chhiahhlawh Mosian thû a lo pêk tawh zawng zawng ang khân.

⁵⁰Hengte hi Aaron a fapate chu an ni: a fapa chu Eleazara, chu mi fapa Phinehasa, chu mi fapa Abisua,

⁵¹chu mi fapa Bukkia, chu mi fapa Uzias, chu mi fapa Zerachia,

⁵²chu mi fapa Meraiiotha, chu mi fapa Amaria, chu mi fapa Ahituba,

⁵³chu mi fapa Zadoka, chu mi fapa chu Ahimaaza a ni.

LEVIA CHÎTE CHÊNNA

⁵⁴Hengte hi anmahni ram chhûnga an chenna hmun te chu a ni: thum an vawr a, a chang hmasa Aaron a thlah, Kohathho awmna chu:

⁵⁵Judai rama Hebron khua leh a chhehvêl ran tlatna hmun te an pê a.

⁵⁶Mahse khawpui lo ramte leh a khawperte chu Jephunea fapa Kaleba hnênah pêk a ni a.

⁵⁷Aaron a thlahte chu inhumhimna khuate zînga pakhat, Hebron an pê a; Libna leh a ran tlatna hmun, Jattir leh Estemoa, an ran tlatna hmun te a tel baw;

⁵⁸Hilen leh a ran tlatna hmun te, Debir leh a ran tlatna hmun te,

⁵⁹Asan leh a ran tlatna hmun te, Beth Semes leh a ran tlatna hmun te nêan.

⁶⁰Benjamin hnam atangin: Geba leh a ran tlatna hmun te, Alemeth leh a ran tlatna hmun te, Anathoth leh a ran tlatna hmun te nêan. An chhûngkaw awmna tûra an ruat khawpuite chu a vaiin13 a ni.

⁶¹Kohath hnam la bang zawngte tân Manasea hnam zâtve te ram chan atangin thumvawrin khaw 10 an pê a.

⁶²Gersona thlahte chu an chhûngkua ang zêlin Isakar hnam chanpuala mite, Aser hnam chanpuala mite, Naphtali hnam chanpuala mite, Basan rama Manasea hnam chanpuala mite hnên atangin khaw 13 an pê a.

⁶³Meraria thlahte chu an chhûngkua ang zêlin Reuben hnam chanpuala mi te, Gad hnam chanpuala mi te, Zebulun hnam chanpuala mi te atangin khaw 12 an pê a.

⁶⁴Tichuan, Israel fate chuan heng khuate leh an ran tlatna hmunte chu Levia chite hnênah an pe ta a ni.

⁶⁵Juda hnam chan atang te, Simeon hnam chan atang te leh, Benjamin hnam chan atangte, heng khuate hi an hming ang zêlin thum vawrin an pê a.

⁶⁶Kohatha thlah mi thenkhat chu Ephraim hnam chanpual atangin khaw thenkhat pêk an ni a.

⁶⁷Ephraim tâng rama Sekem khua leh a ran tlatna te, Gezer khua leh a ran tlatna te chu inhumhimna khua atân an pe bawk a,

⁶⁸Jokmeam leh a ran tlatna te, Beth Horon leh a ran tlatna te,

⁶⁹Aijalon leh a ran tlatna te, Gath Rimón leh a ran tlatna te nêñ.

⁷⁰Manasea hnam zâtve chanpual ațangin: Aner leh a ran tlatna te, Bileam leh a ran tlatna hmunte chu Kohatha chhûngkua la bânghtoten an chang a.

⁷¹Manasea hnam zâtve chanpual ațangin Basan rama Golan leh a ran tlatna te, Astaroth leh a ran tlatna te chu Gersona thlahte tâna pêk a ni.

⁷²Isakara hnam chanpuala mi: Kedes leh a ran tlatna te, Daberath leh a ran tlatna te,

⁷³Ramoth leh a ran tlatna te leh, Anem leh a ran tlatna te nêñ.

⁷⁴Aser hnam chanpual ațangin: Masal leh a ran tlatna te, Abdon leh a ran tlatna te,

⁷⁵Hukok leh a ran tlatna te leh Rehob leh a ran tlatna te nêñ.

⁷⁶Naphtali hnam chanpual ațangin: Galili biala Kedes leh a ran tlatna te, Hammon leh a ran tlatna te leh, Kirjathaim leh a ran tlatna te nêñ.

⁷⁷Zebulun hnam chanpual ațangin Meraria thlah la bânghtote tân Rimón leh a ran tlatna te, Tabor leh a ran tlatna te an pê a.

⁷⁸Jordan râl lehlam, Jeriko khaw zâwn, Jordan chhak lamah Reuben hnam chanpual ațangin: thlalêra Bezer leh a ran tlatna te, Jahzah leh a ran tlatna te,

⁷⁹Kedemoth leh a ran tlatna te, Mephaat leh a ran tlatna te nêñ.

⁸⁰Gad hnam chanpual ațangin: Gilead rama Ramoth leh a ran tlatna te, Manahaim leh a ran tlatna te,

⁸¹Heshbon leh a ran tlatna te leh, Jazer leh a ran tlatna nêñ.

BUNG 7

ISAKARA THLAHTE

¹Isakara fapate chu Tola te, Pua te, Jasuba te, Simrona te an ni—an vaiin palî an ni.

²Tola fapate chu Uzzia te, Rephaia te, Jeriela te, Jahmaia te, Jibsama te, Semuela te an ni a, an chhûngkaw puipate an ni. Tola fapate chu an hun laia mi chak huaisen an ni a; Davida hun lai khân mi 22,600 an ni.

³Uzzia fapa chu Izrahia a ni a, Izrahia fapate chu Mikaela te, Obadia te, Joela te leh Isia te an ni. Anni mi pangâte hi a puipa theuh an ni.

⁴An chhûngkaw chhiarnaah chuan indo tûra inpeih reng mi 36,000 an awm a ni; nupui ngah tak, fa pawh tam tak nei an ni si a.

⁵Isakar hnam chhiarnaah an unaute nêñ vek, mi chak huaisen 87,000 an awm.

BENJAMINA THLAHTE

⁶Benamina fapate chu Bela, Bekera leh Jediaela te—pathum an ni.

⁷Bela fapate chu Ezbona te, Uzzia te, Uzziela te, Jerimotha te, Iria te— pangâ an ni. Anmahni chhûngkuaa puipa an ni a, an thlahho chhiarnaah chuan mi chak huaisen 22, 034 an awm.

⁸Bekera fapate chu Zemira te, Joasa te, Eliezera te, Elioenai te, Omria te, Jerimotha te, Abija te, Anathotha leh Alemetha te an ni. Hêng hi Bekera fapate chu an ni.

⁹Anmahni chhûngkuaa puipa an ni a, an thlahho chhiarnaah chuan michak huaisen 22,200 an awm.

¹⁰Jediaela fapa chu Bilhana a ni a, Bilhana fapate chu Jeusa te, Benamina te, Ehuda te, Kenaana te, Zethana te, Tarsisa leh Ahisahara te an ni.

¹¹Hêng Jediaela thlahte zawng zawng hi an chhûngkuaa puipate an ni a; michak huaisen, indonaa tel thei chin ngat pawh 17,200 an awm. ¹²Suppima leh Huppima te chu Ira fapate an ni a, Husima chu Ahera fapa a ni.

NAPHTALIA THLAHTE

¹³Naphtalia fapate chu Jaziela te, Gunia te, Jezera te, Salluma te an ni a, Bilhai fate an ni.

THLANG LAM MANASEA THLAHTE

¹⁴Manasea thlahte: a hmei Suria mi chuan Gileada pa, Asriela pa Makira a hrinsak a.

¹⁵Makira chuan Huppima leh Suppima te farnu nupuih a nei a, a hming chu Maaki a ni. Gileada tupa hming chu Zelophehada a ni a, mahse Zelophehada chuan fanu chauh a nei a.

¹⁶(Makira nupui Maaki chuan fapa a hring a, a hmingah Peresa a sâ a. A unaupa hming chu Seresa a ni a, a fapate chu Ulama leh Rakema te an ni.

¹⁷Ulama fapa chu Bedana a ni.) Hêngte hi Manasea fapa, Makira fapa Gileada thlahte chu an ni.

¹⁸A farnu Hamoleketi chuan Ishoda te, Abiezera te, Malaa te a hring a.

¹⁹Semida fapate chu Ahiana te, Sekema te, Likhia te, Aniamia te an ni.

EPHRAIMA THLAHTE

²⁰Ephraima thlahte chu: a fapa chu Suthela a ni a, chu mi fapa chu Bereda a ni a, chu mi fapa chu Tahatha a ni a, chu mi fapa chu Elada a ni a, chu mi fapa chu Tahatha a ni a,

²¹chu mi fapa chu Zabada a ni a, chu mi fapate chu Suthela, Ezera leh Eleada te an ni. An ran rual lâksak tuma an lo chhuk thlâ chu chumi hmuna piang Gath khaw mite chuan an lo that a.

²²An pa Ephraima chuan ni tam tak a sîn a, amah hnêm tûrin a unaute pawhin anrawn kan a ni. ²³A nupui chu a pâwl a, a rai a, fapa a hring a; an chhûngkuaah vanduaia a lo thlen avângin a hmingah Beria a sâ a.

²⁴A fanu chu Seerai a ni a, BethHoron chuanhnuai leh chuanchung dintu a ni;

²⁵a fapate chu Repha leh Rephesa an ni a, chu mi fapa chu Tela a ni a, chu mi fapa chu Tahana a ni a,

²⁶Chumi fapa chu Laada a ni a, chu mi fapa chu Ammihuda a ni a, chu mi fapa chu Elisama a ni a,

²⁷Chumi fapa chu Nuna a ni a, chumi fapa chu Josua a ni. ²⁸An chanpualte leh an chênna hmunte chu Bethel khua leh a chhehvêl khuate a ni: chhak lamah Naaran, thlang lamah Gezer leh a

khawperte, Sekem leh a khawperte, Ayah leh a khawperte nêan a ni a;

²⁹Manasea thlahte ramah chuan Beth Sean leh a khawper te, Taanak leh a khawper te, Megiddo leh a khawper te, Dor leh a khawper te an ni. Hêng khuah hian Israela fapa Josepha thlahte chu an chêng a.

ASERA THLAHTE

³⁰Asera fapate chu Imna te, Isva te, Isvia te, Beria te leh an farnu Serai te an ni.

³¹Beria fapate chu Hebera leh Birzaitha pa Malkiela te an ni.

³²Heberan Japhleta te, Somera te, Hothama te leh an farnu Suai te a hring a.

³³Japhleta fapate chu Pasaka te, Bimhala te, Asvatha te an ni. Hêngte hi Japhleta fate chu an ni a.

³⁴Semera fapate chu Ahia te, Roga te, Jehubba te, Arama te an ni.

³⁵A unaupa Helema fapate chu Zopha te, Imna te, Selesa te, Amala te an ni.

³⁶Zophaa fapate chu Sua te, Harnephera te, Suala te, Beria te, Imra te,

³⁷Bezera te, Hoda te, Samma te, Silsa te, Jithrana te, Beera te an ni.

³⁸Jethera fapate chu Jephunnea te, Pispia te, Ara te an ni.

³⁹Ulla fapate chu Ara te, Haniela te, Rizia te an ni.

⁴⁰Hêng zawng zawng hi Asera thlah, an chhûngkaw hotu, mi chak huaisen thlan chhuah, hotu lawk deuh deuhte chu an ni. An hnam chanchin ziahnaah pawh indonaa kal tlâk thiau an ni a; mi 26,000 lai an ni.

BUNG 8

BENJAMIN MI LAL SAULA THLAHTE CHANCHIN

¹Benamina chuan a fatîr Bela a hring a, a dawttu Asbela leh a pathumna Ahara te,

²a palîna Noha te, a pangana Rapha te nêan.

³Bela fapate chu Addara te, Gera te, Abihuda te,

⁴Abisua te, Naamana te, Ahoa te,

⁵Gera te, Sephuphana leh Hurama te an ni.

⁶Hêngte hi Ehuda fapa, Geba khuah an chhûngkaw puipa, Manahath-a an thawn bo tâkte an ni:

⁷Naamana te, Ahija leh Gera te thawn botute chu. Ani chuan Uzza leh Ahihuda te a hring a.

⁸Saharaima chuan a nupui Husimi leh Baari te a tirh bo hnûin Moab-ah fate a nei a.

⁹A nupui lakah Jobaba te, Zibia te, Mesa te, Malkama te,

¹⁰Jeuza te, Sakia te, Mirma te a hring a. Chûngte chu a thlahte zînga an chhûngkaw puipate an ni.

¹¹Husimi lakah Abituba leh Elpaala a hring.

¹²Elpaala fapate chu Ebera, Misama leh, a khawperte nêan Ono leh Lod dintu Semeda te an ni a;

¹³Aijalona chêng chhûngkaw puipa Beria leh Sema te an ni a, Gath khuah chêngte hnawt chhuaktu an ni bawkw.

¹⁴Ahioa te, Sashaka te, Jeremotha te,

¹⁵Zebadia te, Arada te, Edera te,

¹⁶Mikaela te, Ispa leh Joha te chu Beria fapate an ni.

¹⁷Zebadia te, Mesullama te, Hizkia te, Hebera te,

¹⁸Ismeraia te, Jizlia leh Jobaba te chu Elpaala fapate an ni.

¹⁹Jakima te, Zikria te, Zabdia te,

²⁰Elienaia te, Zillethaia te, Eliela te,

²¹Adaia te, Beraia leh Simratha te chu Simeia fapate an ni.

²²Ispana te, Ebera te, Eliela te,

²³Abdona te, Zikria te, Hanana te,

²⁴Hanania te, Elama te, Antothija te,

²⁵Ipdeia leh Penuela te chu Sashaka fapate an ni.

²⁶Samsheraia te, Seharai te, Athalia te,

²⁷Jaaresia te, Elija leh Zikria te chu Jerohama fapate an ni.

²⁸Hêng hi an hun laia an chhûngkuah puipa, hotute chu an ni a. Jerusalema chêng an ni.

²⁹Gibeona pa nupui hming chu Maaki a ni a, Gibeona chêng a ni a.

³⁰A fa û ber chu Abdona a ni a, a fa dangte chu Zura te, Kisa te, Baala te, Nadaba te,

³¹Gedora te, Ahioa te, Zekera te,

³²Miklotha, Simea hringtu te an ni. Anni pawh an chhûngkhatte hrûlah an unaute nêan Jerusalema an chêng.

³³Nera chuan Kisa a hring a, Kisa chuan Saula, Saulan Jonathan te, Malkisua te, Abinadaba leh Esh-Baala te a hring a.

³⁴Jonathana fapa chu Merib-Baala a ni a, Merib-Baalan Mika a hring a.

³⁵Mika fapate chu Pithona te, Meleka te, Tarea leh Ahaza te an ni.

³⁶Ahazan Jehoadda a hring a; Jehoaddan Alemetha te, Azmavetha leh Zimria te a hring a; Zimrian Moza a hring a.

³⁷Mozan Binea a hring a, chu mi fapa chu Rapha a ni a, chu mi fapa chu Eleasa a ni a, chu mi fapa chu Azela a ni a.

³⁸Azelan fapa paruk a nei a, an hmingte chu: Azrikama te, Bokerua te, Ishmaela te, Searia te, Obadia leh Hanana te an ni. Hêng zawng zawng hi Azela fapate an ni.

³⁹A unaupa Eseka fapate chu, a fatîr Ulama te, a dawttu Jeusa te, a pathumna Elipheleta te an ni.

⁴⁰Ulama fapate chu mi chak huaisen— thalkah thiam an ni a. Tu leh fa tam tak an nei a—an zavaiin 150 an ni. Hêngte hi Benamina thlahte an ni.

BUNG 9

¹Tichuan, Israel mi zawng zawng hming chu an chhinchhiah vek a, Israel lalte lehkhahûah a chuang vek a ni. Juda-ho erawh chu an rinawm tâk loh avângin Babulon salah hruai bovin an awm ta a.

²An ro chan ram luaha chêng hmasate chu Israel mi te, puithiam te, Levia chi te leh Nethinim ho te an ni.

JERUSALEM LUAHTUTE

³Jerusalemah chuan Juda thlahte, Benamina thlah mi thenkhatte leh, Ephraima leh Manasea thlahte an chêng a:

⁴Uthaia chu Amihuda fapa, Omria fapa, Imria fapa, Bania fapa, Juda fapa Peresa thlahte an ni.

⁵Shilon-hote chu: a fatîr Asaia leh a fapate an ni a.

⁶Zera fapate: Jeuela leh a unaute—mi 690 an ni.

⁷Benamina fate: Mesullama fapa Sallua, Hodovia fapa, Hassenua fapa;

⁸Ibneia, Jehorama fapa; Ela, Uzzia fapa, Mikria fapa; Mesullama, Sephatia fapa, Reuela fapa, Ibnijaa fapa;

⁹an unau inthlahchhawng hote chu 956 an ni. Hêng mite hi anmahni chhûngkaw zîngah chuan chhûngkaw puipate vek an ni.

JERUSALEM PUITHIAMTE

¹⁰Puithiam hote chu: Jedaia te, Jehoiariba te, Jakina te an ni a;

¹¹Azaria chu Hilikia fapa, Mesullama fapa, Zadoka fapa, Meraiotha fapa, Pathian in enkawltu Ahituba fapa;

¹²Adaia chu Jerohama fapa, Pasura fapa, Malkija fapa a ni a; Maasaia chu Adiela fapa, Jazera fapa, Mesullama fapa, Mesillemitha fapa, Immera fapa a ni;

¹³an unau, chhûngkaw puipate chu 1760 an ni. Pathian ina rawngbâwl hna thawk mi tak an ni hlawm a.

JERUSALEMAH LEVIA MITE

¹⁴Levia mite: Semaia, Hasshuba fapa, Azrikama fapa, Hasabia fapa, Meraria fapate;

¹⁵Bakbakkara te, Heresa te, Galala te leh Mattania te chu Mika fapa, Zikria fapa, Asapha fapa an ni a;

¹⁶Obadia chu Semaia fapa, Galala fapa, Jeduthuna fapa a ni a; Berekia chu Asa fapa, Elkana fapa, Netophath-ho khuua awm a ni.

KAWNGKA VÊNGTU LEVI-HOTE

¹⁷Kawngka vêngtute chu Salluma te, Akkuba te, Talmona te, Ahimana te leh, an unaute an ni a. Salluma chu an hotu a ni.

¹⁸Chumi hmâ zawng chuan Lal Kawngka chhak lama Levi mite riahhmun kawngka vêngtûah an tang thîn a ni.

¹⁹Korea fapa Salluma, Ebiasapha fapa, Kora fapa leh a unaute, an chhûngkua Kora-hote chu rawngbâwl hna ùl apiang enkawltu, biakbûk kawngka vêngtute an ni. An pute pawh LALPA biakbûk luhna vêngtu an ni thîn a.

²⁰Eleazara fapa Phinehasa chu tûn hmâ chuan an chungah hotu a ni thîn a; LALPAN a awmpui tlat a.

²¹Meselemia fapa Zekaria chu inbiakna puan in kawngka vêngtu a ni.

²²Kawngka vêngtu atâna thlan chhuah zawng zawng chu 212 an ni. Anmahni khuah theuhvah chhinchhiah vek an ni a. Davida leh hmutheitu Samuela te khân hna thawh tûr an lo ruatsak a ni.

²³Tichuan, anni leh an thlahte chungah LALPA in kawngka leh inbiakna puan in kawngka vêng tûrin mawhphurhna an kovah dah a ni a.

²⁴Kawngka vêngtute chu sîr tinah: chhak lam, thlang lam, hmar lam leh chhim lamah te chan an insem vek a ni.

²⁵An unau thingtlâng khuua awmte nêni sarih chhûng zêla hun bî thliahin an lo kal thîn tûr a ni.

²⁶He hna pawimawh thawk tûr hian vêngtu hotu palî an awm a; Levia mite an ni. Anni chu Pathian ina sum dahna bâwm leh pindan enkawltute an ni a.

²⁷An kova mawhphurhna a awm avâng leh tûk tina kawng hawngtu an nih avângin Pathian in vêlah chuan an khawsa chawt mai a ni.

LEVI HNAMA MI DANGTE MAWHPHURHNA

²⁸Mi thenkhatin bungbêl an enkawl a, a lût leh chhuak zât chu an chhiar vek zêl a.

²⁹Mi thenkhatin bungrua te, hmun thianghlina hmanraw tinrêng te, chhangphut dip leh uain te, berâw leh rimtui te an enkawl a.

³⁰Puithiam fapa thenkhat chuan hriak rimtui te an buatsaih a.

³¹Levi hnam ami Matithia, Salluma fatîr, Kora thlah ami chu bêla thil kan tûr lam mawhphurtu a ni.

³²Kohatha thlahte zînga an unau thenkhat chuan Sabbath ni apianga dah tûr chhangserh an buatsaih thîn.

³³Anniho chu hla satute an ni a, Levia chhûngkaw puipa, pindan nghâktu an ni; chûng hnâte chu achhûn azâna thawk thîn an nih avângin hna dangah an âwl thung.

³⁴Chûng Levi hnam puipate chu chhuan zawng zawng hotu an ni a. Jerusalema chêng an ni a.

LAL SAULA THLAHTE

³⁵Gibeona pa Jeielâ nupui hming chu Maaki a ni a, Gibeon-ah a awm a.

³⁶A fapa upa ber chu Abdona a ni a, a naute chu Zura te, Kisa te, Baala te, Nera te, Nadaba te,

³⁷Gedora te, Ahioa te, Zekaria leh Miklothâ te an ni.

³⁸Miklothâ chuan Simeama a hring a. Jerusalema chuan an chhûngkhat leh an unaute bulah an khawsa vê a.

³⁹Nera chuan Kisa a hring a, Kisan Saula a hring a, Saulan Jonathana te, Malkisua te, Abinadaba leh Esh-Baala te a hring a.

⁴⁰Jonathana fapa chu Merib-Baala a ni a, Merib-Baala chuan Mika a hring a.

⁴¹Mika fapate chu Pithona te, Meleka te, Tahrea leh Ahaza te an ni a.

⁴²Ahazan Jara a hring a; Jaran Alemetha te, Azmavetha leh Zimria te a hring a; Zimrian Moza a hring a;

⁴³Mozan Binea a hring a, a fapa Rephaia, a fapa Eleasa, a fapa Azela a ni a.

⁴⁴Azelan fapa paruk a nei a, an hming chu: Azrikama te, Bokerua te, Ishmaela te, Searia te, Obadia leh Hanana te an ni a; hêngte hi Azela fapate chu an ni.

BUNG 10

SAULA LEH A FAPATE TÂWP DAN RÂPHTLAK

¹Philistia-ho chuan Israel mite chu an rawn rûn a; Israel mite chu Philistia-ho hmâah chuan an tlânchhia a, Gilboa Tlângah chuan an that chiam a.

²Philistia-ho chuan Saula leh a fapate chu an ûmzui zêl a. Philistia-ho chuan Saula fapa Jonathana te, Abinadaba te, Malkisua te chu an that a.

³Saula chu nasa takin an bei zui a. Thal kâp mite chuan an kâp fuh a, an hliam ta a.

⁴Saula chuan a râlthuam kengtu hnênah, “I khandaih phâwi la, mi rawn vit tlang teh, hêng serhtan loh mite hian min rawn uankhum dâwn asin,” a ti a. Mahse a râlthuam kengtu chuan a hlauh êm avângin a ti ngam lo va. Saula chuan a khandaih chu a la a, a bawh ta a.

⁵A râlthuam kengtuin Saula thî a hmuh chuan a khandaih chu a bawh a, a thi ve ta a.

⁶Tichuan, Saula fapa pathum te chu an thî a, an chhôngkuain an thi ta a ni.

⁷Saula leh a fapate an thi ta tih leh phai zâwla Israelho awm zawng zawng an tlanche ta tih an han hmuh chuan, an awmna khua te chu an tlan chhuahsan ta a; Philistia-ho chu an lo kal a, an rawn luah ta a.

⁸A tûka an mi thahte thuamhnaw hlihsak tûra Philistia-ho an va kal chuan Saula leh a fapate ruang chu Gilboa Tlângah chuan an va hmû a.

⁹A thuamhnaw an hlihsak a, a râlthuam lâksakin a lû an la bawk a, Philistia ram pumah chuan mipuite hnênah leh an milem pathian tempulah te thû an thawn darh a.

¹⁰A râlthuam chu an pathian tempulah an dah a, a lu chu Dagon tempulah an târ a.

¹¹Jabes Gilead a miten Saula chung a Philistia-ho tihdân zawng zawng chu an lo hria a,

¹²an mi huaisenho zawng zawng chu an thawk chhuak a, Saula ruang leh a fapate ruang chu an va hlâwm a; Jabes khuaah an la phei a, Jabes khuaa tamaris thing hnuaiah an phûm a, ni sarhi chaw an nghei a.

¹³Tichuan, LALPA hnêna a thutiam a rinawm loh avâng te, LALPA thu a zawm loh avâng te, a awm dân kawhhmuh tûra ramhuai be mi a rawn avângin Saula chuan a thih phah ta a ni.

¹⁴Ani chuan LALPA a rawn duh lo va; chuangin a tihhlum phah ta hial a; a lalram chu Jesaia fapa Davida hnênah a hlân ta a ni.

BUNG 11

DAVIDA, ISRAEL RAM PUM LAL

¹Israel mi zawng zawng chu Hebron khuaa Davida hnênah an lo kal khâwm a, “I ruh leh i thisen zawmpui kan ni si a.

²Tûn hmâa Saula lal lai pawh khân Israel mite hruai chhuak a, hruai lût thîntu i nih kha; LALPA i Pathianin i hnênah, ‘Ka mi Israelte i enkawl ang a, ka mi Israelte chung a rorêltu ni ang che,’ a tih kha,” an ti a.

³Tichuan, Israel puipa zawng zawng chu Hebrona awm lal hnênah chuan an kal khâwm a, Hebron-ah chuan Davida chuan LALPA hmâah thû a thlunpui a. Samuela hmanga LALPA thuchhuak angin anni chuan Davida chu Israel lal atân hriak an thih ta a.

DAVIDA KHAWPUI

⁴Davida leh Israel mi zawng zawng chu Jerusalemah an kal a, chû hmuna chêngte chu Jebus-ho an ni a, a hmingah Jebus an ti a.

⁵Jebus-a michêngte erawh chuan Davida hnênah, “Hetah hian i lo lût tûr a ni lo!” an lo ti a. Nimahsela, Davida chuan Zion kulh chu a lâksak ta a (Davida Khawpui a lo ni ta a).

⁶Davida chuan, “Jebus-ho han bei hmasa apiang chu sipai hotu lû berah aţang ang,” a ti a. Zeruii fapa Joaba chu a han chho hmasa ber a, hotu berah a ţang ta a ni.

⁷Davida chuan kulh chhûng chu a luah ta a; chuvângin Davida Khawpui an ti ta a ni.

⁸Millo aţanga a chhehvêl zawng zawngah khawpui a din a. A bâk zawng chu Joaban a siam thâ a.

⁹Davida chu a lo ropui telh telh a, Sipaihote LALPA chu a hnênah a awm a.

DAVIDA MI CHAKTE

¹⁰Hêng mite hi Davida michak leh hotu deuh deuh, LALPAN Israelte chungchâng a lo sawi anga, lala siam tûr leh, lalram dinnghet tûra Israel mi zawng zawng nêna ţangho chu an ni.

¹¹Davida mi chakte chu hêngte hi an ni: Hakmon mi fapa Jasobeama chu sipai hotu a ni a; fei a han lek a, ţum khatah mi zathum a that a ni.

¹²A dawtah Dodoa fapa Eleazara, Aho mi chu mi chak pathum an tih zînga mi a ni.

¹³Pasdammim-ah khân Davida bulah a awm a. Indo tûrin Philistia-hote chu an inhâwr khâwm a, chumi hmunah chuan barli an chîng khat tlat a. Philistia-ho lakah chuan mipuite chu an tlânchhe ta a.

¹⁴Anniho erawh chu chû thlawhhma lai takah chuan an ding a, ţanhmun an lo khawh a, Philistia-ho chu an lo that a. Tichuan, LALPAN hnehna ropui tak a thlentîr ta a ni.

¹⁵Sipai hotu sawmthum zînga pathum chu lungpui awmna lamah, Adullam pûk chhûnga Davida hnênah chuan an chhuk thlâ a; Philistia sipaiho chuan Rephaim Ruamah ţanhmun an lo khuar mup mup a.

¹⁶Davida chu kulh chhûnghah a awm a, Philistia sipaiho chu Bethlehem-ah an awm a.

¹⁷Davida chuan, “Bethlehem kulh kawngka bula tuikhura mi ngei kha in tûr min va châwisak thei han awm hlauh sê âw!” a ti vawng vawng a.

¹⁸Tichuan, chûng mi pathumte chuan Philistia-ho riahhmun chu tâwn tlangin, Bethlehem kulh kawngka bula tuikhur tui chu an va châwi a, Davida hnên anrawn thlen a. Nimahsela, Davida chuan a lo in phal lo va, LALPA tân a bun chhuak ta zâwk a.

¹⁹Tihian a ti a, “Aw ka Pathian, hei hi zawng ka in loh tûrzia mai chu! Hêng mahni nun thâptute thisen hi ka in ang maw? Thih huama va châwi an ni si a,” a ti a. Tichuan, a in duh ta lo va. Chûng chu mi huaisen pathumte thiltih a ni a.

²⁰Chûng mi pathum zînga a hotu ber chu Joaba unaupa Abisaia a ni. A feiin mi zathum a malbeih a, a that vek a, mi pathum zînga tel theiin hming a chher ta a ni.

²¹Pathum zînga pahnh dangte ai chuan châwimâwi a hlauh zâwk a. Chuvângin an hotu a ni rêng a. Mahse a lawk zual pathum zîngah chuan a tel pha lo.

²²Benaia chu Jehoiada fapa, Kapzeel khaw mi huaisen fapa, thil ropui tam tak titu a ni. Sakeibaknei ang maia huaisen Moab mi pahnh a that a. Vûr tlâk laiin khur chhûnga tawm sakeibaknei pawh a luhchilh a, a that mai a ni.

²³Aigupta mi lian, tawng ngâ zeta sâng pawh a that bawh a. Aigupta pa chuan fei ngul, themkawh ang mai hi a hûm rûn mai a; chu mi chu tiang nê a pan chhuk a, Aigupta pa fei chu a chhuhsak a, chû fei chu amah chhun hlum nân a hmang nghâl a ni.

²⁴Chûng chu Jehoiada fapa Benaia tih a ni a, mi huaisen pathumte zîngah hming a chher ve ta a.

²⁵Mi sawmthum zînga châwimâwi phû ber nimahse, a hmasa ber pathumte zîngah chuan a tel pha lo. Davida chuan amah vêngtu zînga hotûah a ruat a.

²⁶Mi chak huaisen zîngah chuan Asahela, Joaba nau te, Bethlehem mi Dodoa fapa Elhanana te bâkah,

²⁷Haror mi Sammotha, Pelon mi Heleza,

²⁸Tekoa mi Ikkesa fapa Ira, Anathoth mi Abiezera,

²⁹Hushath mi Sibbekaia, Aho mi Ilaia,

³⁰Netophath mi Maharaia, Netophath mi Baana fapa Heleda,

³¹Benamina thlahte zînga Gibe a mi, Ribaia fapa Ithaia, Pirathon mi Benaia,

³²Gaas lui ami Huraia, Arbath mi Abiela,

³³Baharum mi Azvametha, Saalbon mi Eliaba,

³⁴Gizon mi Hasema fapate, Harar mi Sageha fapa Jonathana,

³⁵Harar mi Sakara fapa Ahima, Ura fapa Eliphala,

³⁶Mekerath mi Hephera, Pelon mi Ahija,

³⁷Karmel mi Hezroa, Ezbaia fapa Naaraia,

³⁸Nathana unaupa Joela, Hagria fapa Mibhara,

³⁹Ammon mi Zeleka te, Beroth mi Naharaia (Zeruii fapa Joaba râltuam kengtu),

⁴⁰Ithri mi Ira, Ithri mi Gareba,

⁴¹Hit mi Uria, Ahlaia fapa Zabada,

⁴²Reuben mi Siza fapa Adina (Reuben-ho puipa) te leh a hote mi 30 nê,

⁴³Maaka fapa Hanana, Mithna mi Josaphata,

⁴⁴Asterath mi Uzzia, Aroer mi Hothama fapa Sama leh Jeiel a,

⁴⁵Simria fapa Jediaela leh a unaupa Tiz mi Joha,

⁴⁶Mahav mi Eliela, Elnaama fapate Jeribaia leh Josaviaha, Moab mi Ithma,

⁴⁷Eliela, Obed a leh Mezoba mi Eliela, Obed a leh Jaasiela te an ni.

BUNG 12

DAVIDA SIPAI CHAK ZÊL DÂN

¹Kisa fapa Saula laka a tlânchhiat lai khân, Ziglag hmunah hêng mite hi David a hnênah an lo kal a; indonaa puitu tângkai, mi chakte zînga mi an ni a,

²thalngul nêna inthumin, ding lam leh vei lam chu inang rengin thal kah nân leh virvawm vawm nân an hmang thiam a. Benjamin mi, Saula chipuite an ni.

³An hotu ber chu Ahiezera a ni a, a dawtah Gibe a mi Semaa fapa Joasa a ni a; Azvametha fapa Jeziela leh Peleta te; Beraka te, Anathoth mi Jehua te;

⁴Gibeon mi Ismaia, mi chak huaisen 30 zînga mi, mi 30 hotu te; Jeremia te, Jahaziela te, Johanana te leh Gederath mi Jozabada te;

⁵Eluzaia te, Jerimotha te, Bealia te, Semaria te, Haruph mi Sephatia te;

⁶Kora mi Elkana te, Jissia te, Azarela te, Joezera te, Jasobeama te;

⁷Gedor mi Jerohama fapa Joela leh Zebadia te an ni.

⁸Gad-ho mi thenkhat pawhin David a chu a awmna thlâlêr kulhah an va fin ve a; mi chak huaisen pui pui, indona lama mi hrât khawkhêng, phâw leh fei chelek thiam, sakeibaknei hmêl ang pû, tlâng rama sazâ ang maia zuanzâng te an ni a:

⁹Ezera chu a hmasa ber a, a dawtah Obadia, pathumna Eliaba,

¹⁰palina Mismanna, pangana Jeremia,

¹¹parukna Attaia, pasarihna Eliela,

¹²pariatna Johanana, pakuana Elzabada,

¹³sâwmna Jeremia leh, sawmpakhatna Makbanaia a ni.

¹⁴Hêng mite hi Gada thlaha an sipai hotute an ni a; a nêp ber pawhin mi zâ a hen a; a chak ber pheichuan sâng a hen a ni.

¹⁵Hêngho hi an ni, thla khatnaa Jordan lui kuang zawng zawng a liam hum hum laia va kâi a, phâi ruama chênggho chhak lam leh thlang lama va ûm darhtute chu.

¹⁶Benamina leh Juda thlah mi thenkhat pawh Davida hnênah kulhan an lo kal vê a.

¹⁷Anmahni hmuak tûrin Davida chu a va chhuak a, an hnênah, “Min pui tûr leh inrem duha lo kal in nih chuan, thinlung takin kan inzawm nghal mai ang; ka hmêlmâte hnêna mi mantîr in tum a nih erawh chuan, ka kut hian pawl a khawih lo bawh a, kan thlahtute Pathianin rawn en sela, in chungchâng rêl rawh se,” a ti a.

¹⁸Tichuan, an zînga hotu lian Amasaia chungah Thlarau a lo thleng a: “Aw David, i mite kan ni e; Aw Jesaia fapa, i lamtâng kan ni e! I hnênah thlamuanna awm rawh se, Nangmah tanpuitute chungah nê! I Pathianin a pui si che a,” a ti a. Tichuan, Davida chuan a lo lâwm a, a sipai hotûah te a lo dah ta hlawm a.

¹⁹Saula bei tûra Philistia-ho zînga Davida a kal vê lai khân, a lamah Manasea mi thenkhat an rawn pakâi a; mahse an pui hman ta lo, Philistia hotuten, “A pu Saula lamah a pakâi hlauh ang a, kan tân a la hlauhawm thei asin,” tiin an thawn kîr leh ta a ni.

²⁰Ziklag khuua a kîr leh lai khân a hnêna Manase-ho rawn inpête chu Manasea sipai sâng hotu Adna te, Jozabada te, Jediaela te, Mikaela te, Jozabada te, Elihua leh Zillethaia te an ni.

²¹Mi chak huaisen leh sipai hotute an ni a, rawlrâla che ho Davidan a beihnaah an tanpui tha hlê a ni.

²²Chûng lai chuan Davida lama tâng tûrin ni tin an lo kal belh zut zut a, Pathian sipaiho ang maia sipai pâwl ropui tak an lo ni ta a.

HEBRONA DAVIDA SIPAITE

²³LALPA thu anga Saula lalram Davida kuta hlâng kai tûra indo peih sa sipai rual Hebron khuua lo kal zât chu hetiang hi a ni:

²⁴Juda thlah, phâw leh fei keng, inrâlthum sa 6,800.

²⁵Simeona thlah mi chak huaisen, indo peih sa 7,100;

²⁶Levia thlahte 4,600;

²⁷Aarona thlahte zînga an hotu Jehoiada ho mi 3,700;

²⁸Zadoka, tlangvâl chak leh huaisen, a pa chhûngkuua mi sipai hotu 22;

²⁹Saula laichîn Benamina thlahte aţangin mi 3,000 (khatih hun thleng khân a tam zâwk chu Saula chhûngte lamah an la tâng a);

³⁰Ephraïma thlahte aţangin mi 20,800, an thlahtute aţang rênga mi chak huaisen hmingthang an ni a;

³¹Manase hnam zâtvê aţangin mi 18,000 chu lal atâna Davida siam tûra hminghmerha ruat an ni a;

³²Isakara thlah, a hun lai thil awm dân hre thiam mi, Israelte tân tih tûr leh tih loh tûr te pawh hre thiam, hotu deuh deuh mi 200 an awm a, an unau zawnzawngte chu an thuhnuia awm an ni;

³³Zebuluna thlah aţangin mi 50,000, râlthum chi tinrêng indo nâna hmang thiam, mi pâukhauh pui pui, tângruâl thiam bawh te;

³⁴Naphtali thlah aţangin sipai hotu 1 000 leh an hnêna mi phâw leh fei keng 37,000;

³⁵Dana thlahte aţangin indo thiam 28,600;

³⁶Asera thlah aţangin râldo thei, indo dân chinchâng hria, mi 40,000;

³⁷Jordan râl lehlama Reubena leh Gada hnam bâkah Manasea hnam zâtvê aţangin indona hmanraw chi tinrênga inrâlthum sâ mi 120,000;

³⁸Hêng indo mi, indo dân thiamte hi rinawmna thinlung pûin, Davida chu Israel mi zawnzawng chungah lala siam tumin Hebron-ah an lo kal mup mup a; Israel midang zawnzawng pawhin rilru hmun khat pûin Davida chu lala siam an duh vek a ni.

³⁹Davida hnênah chuan ni thum an châm a, an unauten ei tûr an lo buatsaih sâ chu eiin an in a.

⁴⁰Hnaivai deuha awmte bâkah, hmun hla taka awm Isakar leh Zebulun leh Naphtali ami te pawhin sabengtung leh sanghâwngsei te, sakawr leh bâwngpa tein-châw te, chhangphut te, theipui kêk te, grêp ro kêk te, uain te, hriak te, bâwngpa leh berâmte an rawn chhêk khâwm t̄euh va, Israel ramah hlim leh lâwmna a thleng ta si a.

BUNG 13

KIRJATH JEARIM AţANGIN THUTHLUNG BÂWM AN LÂ

¹Davida chuan sipai sâng hotute, za hotute leh hotu zawnzawngte chu a berâwn a.

²Tichuan, Davida chuan Israel pung khâwmho zawnzawng hnênah, “Thâ in tih zâwng a niha, LALPA kan Pathianin rem a tih chuan, Israel ram puma kan unau la awm te, puithiamte leh Levia chîte awmna khuah leh an dâi vêla mite chenin, kan zînga rawn tel vê tûrin i sâwm khâwm vek ang u khai;

³tichuan, kan Pathian bâwm hi kan hnênah i la lêt leh tawh ang u, Saula hun lai ata tawh kan ngaihven zui ta si lo va,” a ti a.

⁴Pung khâwmho zawnzawng chuan thâ an ti a, mipuite pawhin tih âwm takah an ngai vek bawh a.

⁵Davida chuan Kirjath Jearim aţanga Pathian bâwm lâknaa tel tûrin Aigupta rama Sihor aţanga Hamath luhna thlenga Israel zawnzawngte chu a pun khâwm vek a.

⁶Davida leh Israelho zawnzawng chu Judai rama Baala hmun Kirjath Jearim-ah chuan a hming puan chhuahna, cherub inkâra awm LALPA Pathian bâwm la tûrin an kal chho vek a.

⁷Pathian bâwm chu Abinadaba in aţangin tawlailîr tharin an phur a, Uzza leh Ahioa te chuan tawlailîr chu an khalh a.

⁸Davida leh Israelho zawnzawng chuan an theihtâwpin Pathian hmâah fak hlâ sâin, tîngtâng te, perhkhuang te, kutkhuang te, darbenthek te, tâwtawrâwt te nêan an ri ruai ruai mai a.

⁹Kidona hruih zâwl an lo thlenin, bâwngte chu an petek nawk nawk avângin Uzza chuan bâwm chu chelh tumin a han ban a.

¹⁰Bâwm a khawih avângin Uzza chungah LALPA thin a ur a, a chungah kut a thlâk a; Pathian hmâah chuan a thi ta a.

¹¹Uzza chungah LALPAN kut a thlâk avângin Davida chu a thinur ta a; chu lai hmun chu Perez Uzza an ti ta a ni, tûn thlengin.

¹²Davida chuan Pathian chu a hlâu va, “Engtin nge Pathian bâwm chu in ka thlenpui ngam tâk ang?” a ti a.

¹³Chuvangin, Davida chuan bâwm chu Davida Khawpuia thlen ta lovin Git mi Obed-Edoma inah a dah ta zâwk a.

¹⁴Pathian bâwm chu Obed-Edoma chhûngte hnênah chuan thla thum a awm a. LALPA chuan Obed-Edoma chhûngkua leh an neih zawng zawng chu mal a sâwm a.

BUNG 14

JERUSALEMAH DAVIDA A INBÊGBEL

¹Tura lal Hirama chuan Davida hnênah palai a tîr a, a in sak nân sidar thing te, lung chher mite leh mistiri-te a thawn a.

²Tichuan, Davida chuan amah chu Israel lal âtân LALPAN a lo nemnghet reng a ni tih leh, a mi Israelte avângin a lalram chu sâng takah a châwi kâng tih a hre thiam ta a.

³Jerusalemah chuan Davida chuan nupuite a neih belh a, Davida chuan fanu fapate a nei zêl a.

⁴Jerusalema a fa neihthe chu hengte hi an ni: Sammua, Sobaba, Nathana, Solomona,

⁵Ibhara, Elisua, Elpeleta,

⁶Noga, Nephega, Japhia,

⁷Elisama, Beeliada leh Elipheleta.

PHILISTIA-HO AN TLÂWM

⁸Philistia-hovin Davida chu Israel zawng zawngte lal âtân hriakthih a ni tih an lo hriat chuan, Davida bei tûrin Philistia-ho zawng zawng chu an thawk chhova. Chû chu Davidan a lo hriat chuan lo bei lêt tûrin a thawk chhuak vê ta a.

⁹Philistia-ho chuan Rephaim Ruam chu an rûn a.

¹⁰Davida chuan Pathian a râwn a, “Philistia-ho hi ka bei ang em? Ka kutah min pe dâwn em?” tiin a zâwt a. LALPA chuan, “Han chho la, i kutah ka pe dâwn che nia,” a ti a.

¹¹Tichuan, Baal Perazim-ah an chho va, Davida chuan a han hneh ta a. Davida chuan, “Pathianin ka hmêlmâte keima kutin tuikhuah sah ang maiin min sahsak ta,” a ti a. Chumi hmun hming chu Baal Perazim an ti ta a.

¹²Chutah chuan an pathiante chu an tlânsan a, chûngte chu Davida thupêkin an hâl ta a.

¹³Philistia-ho chuan ruam lai chu an rûn nawn leh a.

¹⁴Davida chuan Pathian a râwn leh a, Pathianin a hnênah, “Ûmzui lovin han hual la; thingtheihmu hmunah sâwn lo bei zâwk ang che.

¹⁵Thingtheihmu lêra sipai kal thâwm i hriat vêleh che nghâl vat ang che, Philistia-ho hneh tûrin Pathian chu i hmâah a kal chhuak tawh si a,” a ti a.

¹⁶Davida chuan Pathian thupêk angin a ti a, Philistia sipaite chu Gibeon ațanga Gezer thlengin a nawr lêt ta a.

¹⁷Davida hming chu ram tinah a thang zêl a, LALPA avângin amah chu hnam tinin an hlâu ta êm êm a.

BUNG 15

JERUSALEMAH THUTHLUNG BÂWM AN LALÛT

¹Davida Khawpuiah chuan Davidan ama chênna in a sâ a; Pathian thuthlung bâwm dahna tûr hmun buatsaihin puan in a kaih a.

²Davida chuan, “Pathian thuthlung bâwm hi Levia mite lo chuan tûman an zâwn thei lo vang, anniho hi Pathian bâwm zâwn tu âtân leh kumkhuaa a hmâa rawngbâwl tûra a thlante an ni si a,” a ti a.

³Tichuan, Davida chuan LALPA thuthlung bâwm chu a dahna tûr hmun a buatsaih hmuna zâwn chho tûrin Israel mi zawng zawng chu Jerusalema a ko khâwm vek a.

⁴Davida chuan Aarona leh Levia thlahte chu a khâwm a:

⁵Kohatha thlah-ho, an puipa ber Uriela leh a unau mi 120 te nê;

⁶Meraria thlahte-ho, an puipa ber Asaia leh a unau mi 220 te nê;

⁷Gersoma thlah-ho, an puipa ber Joela leh a unau mi 130 te nê;

⁸Elizaphaa thlah-ho, an puipa ber Semaia leh a unau mi 200 te nê;

⁹Hebrona thlah-ho, an puipa ber Eliela leh a unau mi 80 te nê;

¹⁰Uzziela thlah-ho, an puipa ber Amminadaba leh a unau mi 112 te nê.

¹¹Davida chuan puithiam Zadoka leh Abiathara te, Levia thlahho: Uriela te, Asaia te, Joela te, Semaia te, Eliela leh Amminadaba te chu a ko va.

¹²An hnênah, “Nangniho hi Levi thlahte zînga a puipate in ni a; LALPA Israelte Pathian thuthlung bâwm chu a awmna tûr ka buatsaihna hmuna in lâk chhoh theih nân in unaute nê han intithianghlim rawh u.

¹³A hmâ pawh khân nangni hian in zâwn loh avâng leh, a tihdân tûrah amah kan râwn loh avângin LALPA kan Pathian chu kan chungah a ƣan ta a nih kha,” a ti a.

¹⁴Tichuan, puithiamte leh Levia-hote chu LALPA Israelte Pathian thuthlung bâwm zâwn chho tûrin an intithianghlim ta a.

¹⁵Levi hnamte chuan Pathian thuthlung bâwm chu, LALPAN Mosia hnêna thû a pêk angin a zâwnfungin an zâwn a.

¹⁶Davida chuan Levi hnam puipate chu rimawi te tuma, perkhuang te, ƣingtang te, darbenthekte nêna hlim taka an âw chhuahtu tûr an unaute zînga mi zaipâwl te a ruattîr a.

¹⁷Levi-ho chuan Joela fapa Hemana te; a unaute zînga mi Berekia fapa Asapha te; an unaute zînga mi Meraria fapa te, Kusaia fapa Ethana te nê an ruat a;

¹⁸anmahni dâwltu an unaute chu: Zekaria te, Bena te, Jaaziela te, Semiramotha te, Jehiela te, Unnia te, Eliaba te, Benaia te, Maaseia te, Mattithiaha te, Elipheleha te, Mikneia te, Obed-Edoma te leh kawngkhâr vêngtu Jeiela te an ni a;

¹⁹zaimi Hemana, Asapha leh Ethana te chu dârbenthek bêng tura ruat an ni a;

²⁰Zekaria te, Aziela te, Semiramotha te, Jehiela te, Unnia te, Eliaba te, Maaseia leh Benaia te chu perhkhuang nêna Alamothe sa tûra ruat an ni a;

²¹Mattithia te, Elipheleha te, Mikneia te, Obed-Edoma te, Jeielah leh Azazia te chu tîngtang ri thûm chi nêna Seminit hla hruaitu tûr an ni;

²²Levi-ho hruaitu Kenania chu thiamna bîk nei a nih avângin rimâwi tumtu hotu a ni a;

²³Berekia leh Elkana te chu thuthlung bâwm awmna kawngkhâr vêngtute an ni a;

²⁴Sebania te, Joshaphata te, Nethanela te, Amasaia te, Zekaria te, Benaia leh puithiam Eliezera te chu Pathian thuthlung bâwm hmâa tâwtawrâwt hâmtu tûr an ni a; Obed-Edoma leh Jehia te chu thuthlung bâwm awmna kawngkhâr vêngtu an ni baw.

²⁵Tichuan, Davida chu Israel puipate leh sâng chungah hotute nêna Obed-Edoma in aţanga LALPA thuthlung bâwm la tûr chuan hlim takin an kal chhuak a.

²⁶LALPA thuthlung bâwm zâwntu Levi-hote chu Pathianin a ţanpui a, bâwngpa pasarih leh berâmpa pasarih an inthâwi a.

²⁷Davida chuan puan zai sîn kawrfual a hâ a, bâwm zâwntute, zaipâwlte, zaipâwl hruaitu Kenania te, Levi-ho zawng zawng pawh chutiang chuan an inthum vek a. Davida chuan puithiam kawr zai sîn a inbel baw a.

²⁸Tichuan, Israel mi zawng zawng chuan LALPA thuthlung bâwm chu âu dur dur chungin, berâm kite hâmin, tâwtawrâwt leh dârbenthek rîte nêna, tîngtang leh perhkhuang tum rîte nêna an chhawm chho va, an ri bûng bûng mai a.

²⁹LALPA thuthlung bâwm Davidah Khawpui a lo thlen chuan, Saula fanu Mikali chu tukverhah a zu dâk a, rimawi tum chungah Lal Davidah lîm dûrh dûrh chu a zu hmû a; a hmsit rilru hle a.

BUNG 16

BIAKBÛKAH THUTHLUNG BÂWM AN DAH LÛT

¹Pathian thuthlung bâwm an rawn hawn chu a dahna tûra Davidan a buatsaih biakbûk chhûngah chuan an dah ta a. Pathian hmâah chuan hâlral thilhan leh remna thilhan te an hlan a.

²Davida chuan hâlral thilhan leh remna thilhan te a hlan zawhin mipuite chu LALPA hmingin mal a sâwm a.

³Israel mipui zawng zawng chu a hmei a pain chhang tlang khat leh sa hrang tlang khat leh, grêp ro hlâwm khat t̃heuh a sem vek a.

⁴LALPA thuthlung bâwm hmâa rawngbâwla, LALPA Israelte Pathian chu hre renga, lâwmthû sawia, amah fak tûrin Levi-ho mi t̃henkhat a ruat a:

⁵Hotu ber chu Asapha, a dawt lehtu Zekaria, a dawt lehah Jeielah te, Semiramotha te, Jehiela te, Mattithia te, Eliaba te, Benaia te leh Obed-Edoma te an ni a: Jeielah chuan perhkhuang leh tîngtang a tum a, Asapha chuan dârbenthek a tum t̃hin.

⁶Benaia leh puithiam Jahaziela te chuan Pathian thuthlung bâwm hmâah tâwtawrâwt chu a hun takah an hâm t̃hin a ni.

DAVIDA LÂWMTHU SAWINA HLA

⁷Chumi ni chuan Davidan hê fakna hlâ hi Asapha leh a unaute hnênah LALPA hnêna lâwmthu sawi nân a hlan a:

⁸Aw, LALPA hnênah lâwmthu hrilh ula! A hmingin ko rawh u; Mite hnênah a thiltihte chu puang rawh u!

⁹Fakna hlâ nêna Amah fakni zâi rawh u; A thil mak tihte chu puang rawh u!

¹⁰A hming thianghlim chu chhuang ula; LALPA zawngtute thilung chu hlim rawh se!

¹¹LALPA leh a chakna chu zawngh ula; A hmêl chu thlîr reng rawh u!

¹²A thil mak tihte chu hre reng ula, A rorêlna kamchhuakte chu a mak si a,

¹³Aw, a chhiahhlawh Israela chi-te u, Jakoba thlah, a thlante u!

¹⁴Ani chu LALPA kan Pathian a ni a; A rorêlna chu lei chung zawngh zawngh a awm vek si a.

¹⁵A chatuan thuthlung chu hrereng ula, Chhuan sângkhat thlenga a thupêk chu,

¹⁶Abrahama hnêna a thuthlung te, Isaka hnêna a chhechham te chu,

¹⁷Jakoba hnênah dân angin a nemngnet a, Israelte tâna kumkhaw thuthlung chu.

¹⁸“Kanaan ram hi ka pê ang che I ro luah atân ni rawh se,” a ti a.

¹⁹Mi t̃lêm t̃e in nih laia Khualzin mai in nih lai khân.

²⁰Hnam tin zînga an vahvaih laia Ram tina an kal vêl lai khân,

²¹Tû hnehchhiah mah a phal lo va; Lalte pawh a zilhhau t̃hin.

²²“Ka hriak thih-a te hi khawih suh ula, Ka zâwlneite hi tina suh u,” tiin.

²³LALPA chu fak rawh u, leilung zawngh zawngh u, Ni tin a chhandamna chanchin t̃hâ chu puang rawh u.

²⁴Hnam tin hnênah a ropuizia puang ula, Mi tin hnênah a thil mak tihte chu puang rawh u.

²⁵LALPA chu a ropui êm a, nasa taka fak tûr a ni a; Amah chu pathian dang zawngh zawngh aia t̃ih tûr a ni.

²⁶Hnam dangte pathian zawngh zawngh chu milem mai an ni si a, LALPA chuan vânte hi a siam a ni.

²⁷Ropuina leh chawimâwina chu a hmâah a awm a; Chakna leh hlimna chu a hnênah a awm.

²⁸Aw, chitin hnam tinte u, LALPA hnênah, LALPA hnên ngeiah chuan ropuina leh chakna chu pe rawh u. ²⁹LALPA hming chu a phû ang takin chawimâwi ula; Thilpêk hlânin a hmâah lo kal rawh u. Aw, LALPA chu mâwina thianghlimin chibai bûk rawh u!

³⁰Leilung zawngh zawngh u, a hmâah khûr rawh u. Khawvêl hi ngnet takin a din a, A ng̃hng mai mai lo vang.

³¹Vânte hi hlim sela, leilung pawh lâwm rawh se; Hnam tin hnênah, “LALPAN ro a rêl,” ti rawh se.

³²Tuifinriat leh a chhûnga awm zawng zawng chu ri hum hum sela; Khawmual leh a chhûnga awm zawng zawng chu hlim rawh se.

³³Ramngâwa thingte pawh LALPA hmâah hlim rawh se, Leiah hian rorêl tûrin a lo kal dâwn si a.

³⁴Aw, LALPA hnênah lawmthu hlân rawh u, ani chu a ̣a si a! Kumkhuaa zahngai thei a ni si a.

³⁵Aw, Min chhandamtu Pathian, min chhandam rawh; Min hruai khâwm la, Jentailhote lakah min chhan chhuak la, I hming thianghlim kan châwimâwia, Nangmah fak tûra kan hneh theih nân,” ti rawh u.

³⁶LALPA Israelte Pathian chu fakim awm rawh se– Chatuan ạanga chatuan thlengin! Mi zawng zawng chuan, “Amen!” tiin LALPA an fak a.

PATHIAN BIAK DÂN

³⁷Tichuan, LALPA thuthlung bâwm hmâah chuan, ni tina a ̣ul ang zêla rawngbâwl tûrin, Asapha leh a unaute chu a dah ta a;

³⁸Obed-Edoma leh a unau 68 te bâkah, Jeduthuna fapa Obed-Edoma leh Hosa te chu kawngkhâr vêngtu atân a dah a;

³⁹puithiam Zadoka leh a unau puithiam dangte chu Gibeon hmun sânga LALPA biakbûk hmâa awm tûrin a dah baw a,

⁴⁰LALPAN Israelte hnêna thû a pêk, LALPA dâna zia ang taka hâlral thilhlân maichâm chungah, a tûk a zâna hâlral thilhlân hlân reng tûrin a ruat a ni;

⁴¹an zînga tel tûrin, Hemana leh Jeduthuna leh mi dang, hming hmerha thlan chhuahte chu a zahngaihna chatuana kang ngai lo LALPA fak tûra ruat an ni a;

⁴²anniho leh Hemana leh Jeduthuna te chu tâwtawrâwt leh dârbenthek te leh Pathian hla remna rimâwi hmanraw dangte ring taka tum tûr an ni a. Jeduthuna fapate chu kawngkhâr vêngtu an ni.

⁴³Tichuan, mi tin chu anmahni inah an hâw vek a; Davida pawh a chhûngkua malsâwm tûrin a hâw vê ta a.

BUNG 17

DAVIDA HNÊNA PATHIAN THUTHLUNG

¹Davida chu a ina a awm laiin, zâwlnei Nathana hnênah chuan Davida vêkin, “Hei le, kei chu sidar inah ka chêng a, nimahsela LALPA thuthlung bâwm erawh chu puan in maiah a awm si a,” a ti a.

²Nathana chuan Davida hnênah, “I thinlunga awm ang chuan ti ta che, Pathianin a awmpui reng che alâwm,” a ti a.

³Nimahsela, chumi zânah chuan Nathana hnênah Pathian thû a lo thleng a,

⁴“Ka chhiahhlawh Davida hrilh tûrin va kal la, ‘LALPA chuan, “Nang chuan ka awmna in chu i sa tûr a ni lo ve.

⁵Israel fate ka hruai chhuah ạanga tûn thlengin inngahna in ka la nei lo va; puan in ata puan inah, biakbûk ata biakbûkah ka la

insawn mai mai a ni.

⁶Israel mite nêna kan kal tawhna rêng rêngah ka mite enkawl tûra rorêltu tû hnênah mah, ‘Engah nge sidar thingin in mi saksak loh le?’ ka la ti ngai lo,” a ti e,’ tiin va hrilh rawh.

⁷Chuvângin, ka chhiahhlawh Davida hnênah chuan, ‘Sipaihote LALPA chuan, “Berâm huang ạangin i berâm vên lai ata ka mi Israelte chungah rorêl tûrin ka la chhuak che a.

⁸I kalna apiangah ka awmpui zêl che a, i hmâ ata i hmêlmâ zawng zawng ka tiboral vek a, leilunga mi ropuite angin i hming ka chhersak che a.

⁹Ka mi Israelte chu anmahni puala an chênna tûr hmun ka thlansak ang a, an insawn fo tawh lohna tûrin chutah chuan ka phun nghet ang a; tûn hmâ ang khân suahsualna faten an hnehchhiah tawh hek lo vang a.

¹⁰tûn hmâ, ka mi Israelte chungah rorêltute ka ruat lai ang khân mi sual faten an tiduhdah tawh hek lo vang. I hmêlmâ zawng zawngte pawh ka tihtlâwmsak baw a ang che. Chu bâkah, LALPAN chhûngkua a dinsak ang che tih ka hrilh baw che a ni.

¹¹I nîte a lo kin huna i thlahtute hnêna i liam dâwnah, i hnûa lo awm tûr chithlah, i fapa zînga mi ka tung ding ang a; lalram nghet ka dinsak ang.

¹²Amah zâwk chuan in mi saksak ang a, a lalthutthlêng chu kumkhua atân ka din nghet baw a ang.

¹³A tân Pa ka ni ang a, ani pawh ka Fapa a ni ang; i hmâa mi hnên ata ka lâk bosak ang khân, ama hnên ạang chuan ka zahngaihna ka la kiang lo vang.

¹⁴Ka inah leh ka lalramah kumkhua in ka tung ding ang a; a lalthutthlêng chu chatuana ti nghet a ni ang,” a ti,’ ti ang che,” a ti a.

¹⁵Chû inlârna thû zawng zawng chu Nathana chuan Davida a hrilh a.

¹⁶Lal Davida chu a va lût a, LALPA hmâah a thû a; “Aw LALPA Pathian, tu nge maw ka nih le? Ka chhûngkua pawh hi eng nge maw a niha, hei leh chen mi hruai zêl mai le?

¹⁷Aw Pathian, i mithmuah chuan hei pawh hi tê tham tê mai a la ni si a; i chhiahhlawhte chhûngkua pawh rei tak daih tûrin i ti leh zêl a, âw LALPA Pathian, mi ropui tak ang maia mi ngaih tak hial mai le.

¹⁸I chhiahhlawh Davida hian eng nge sawi leh chuan tûr a neih tawh ang? I chhiahhlawh lah chu i hre Chiang si a.

¹⁹Aw LALPA, i chhiahhlawh avâng leh, i rilrûk dân ang zêla hêng thil ropuite hriattûr tûr hian hêng thil ropui zozâi hi i lo ti vek a nih hi.

²⁰Aw LALPA, kan beng hriat phâkah nangmah ang rêng hi tûmah an awm lo va, nangmah lo chu Pathian dang an awm hek lo.

²¹I mi Israelte anga lei chungah hnam khat, Pathian meuhvin a hnam puma a tlan chhuah–i hming tiropuina tûra nanging thil mak tak takte i tihsak, Aigupta ram ata i tlan chhuah, an hmâa hnam dang i hnehsak zêl baw si ang hi tû hnam nge awm?

²²I mi Israelte chu kumkhuaa nangma tâ ni tûrin i siam a; LALPA, nang chu an Pathian i lo ni bawk si a.

²³Aw LALPA, tûnah hian i chhiahhlawh leh an chhûngkaw awm dân tûr i sawite kha, kumkhua atân tinghet la, i sawi ang ngeiin ti ang che.

²⁴Israelte Pathian, Sipaihote LALPA chu Israelte Pathian ngei a ni, tia i hming an tihropui theih nân tinghet mawlh ang che. I chhiahhlawh Davida chhûngkua hi i hmâah din nghet tlat ang che.

²⁵Aw ka Pathian, i chhiahhlawh hnênah hian chhûngkua i dînsak dâwn tih i lo hriattîr ta si a. Chuvângin, i chhiahhlawh hian i hmâah hetiaanga dîl ngamna thînlung hi a lo pu ta a ni.

²⁶LALPA, nang chu Pathian i ni a, i chhiahhlawh hnênah hian thil thâ i lo tiam ta si a.

²⁷I chhiahhlawhte chhûngkua hi i hmâa kumkhuaa an awm reng theih nân malsâwmna i hlân tawh bawk a; Aw LALPA, nang berin mal i sâwm tawh chuan chatuan atâna malsâwmna a ni dâwn si a,” a ti a.

BUNG 18

DAVIDA’N RAM A ZAUH ZÊL

¹Chumi hnûah chuan Davida’n Philistia-hote chu a bei a, a hneh a, Philistia-ho kut aţangin Gath leh a vêl khuate chu a lâksak bawk a.

²Moab ram a hneh leh a, Moab-mite chu Davida thuhnuaiah chhiah châwiin an awm ta a.

³Davida chuan Euphrates Luipui thlenga a thuneihna din nghêh tuma a kalna lamah Zoba lal Hadadezera chu Hamath thlengin a hneh a.

⁴Chû mi chu tawilâir 1,000 leh, sakawr chung chuang mi 7,000 leh ke sipai 20,000 a mansak a. Davida chuan tawilâir hnûktu sakawr kaihza thâ a chhahsak vek a, tawilâir 100 hnûk tûr chauh a zuahsak a.

⁵Zoba lal Hadadezera ţanpui tûrin Damaska aţangin Suria-ho an lo kal a, Davida chuan chûng Suria mi 22,000 chu a lo that a.

⁶Davida chuan Suria rama Damaska khuaah kulh vêngtu sipai a dah a; Suria mite chu Davida thuhnuaiah an awm ta a, chhiah an rawn pe thîn a. Chutiang chuan Davida chu a kalna apiangah LALPAN a vêng zêl a.

⁷Davida chuan Hadadezera khâwnbâwlte chu rangkachak phâwte a lâksak a, Jerusalemah a hawn a.

⁸Hadadezera khua Tibhat leh Kun aţangin Davida chuan dâr thahnem tak a hawn bawk a, chûngte chu Solomona chuan dâr tuiţem te, ban te, dâra siam bungbêl dang siam nân te a hmang a.

⁹Davidan Zoba lal Hadadezera sipai zawng zawng a hneh vek tih Hamath lal Toua chuan a lo hria a,

¹⁰Lal Davidan Hadadezera a dova a hneh avâng chuan va lawmpui a, duhsakna va hlân turin a fapa Hadorama a tîr a (Hadadezera leh Toua chu indo thîn an ni si a); Hadorama chuan rangkachak leh silvar leh dâr bungbêl tinrêng a kensak a.

¹¹Chûngte chu ram dang—Edom aţang te, Moab aţang te, Ammon mite, Philistia mite leh Amalek mi a hneh tâk zawng

zawng hnên aţanga a lâk khâwm silvar leh rangkachak te nên Davida chuan LALPA hnênah a hlân a.

¹²Chû bâkah, Zeruii fapa Abisaia chuan Chi Ruamah Edom mi 18,000 a that bawk a.

¹³Edom ramah kulh vêng tûrin sipai a dah bawk a, Edom mi zawng zawng chu Davida thuhnuaiah an awm ta a. LALPA chuan Davida chu a kalna apiangah a vêng zêl a.

DAVIDA SORKAR

¹⁴Davida chu Israel mi zawng zawng chungah lal a ni a, Israel mi tinte chungah dik takin ro a rêl a.

¹⁵Zeruii fapa Joaba chu sipai hotu ber a ni a; Ahiluda fapa Jehosaphata chu chhinchhiahtu a ni a;

¹⁶Ahituba fapa Zadoka leh Abiathara fapa Abimeleka te chu puithiam an ni a; Savsa chu ziaktu a ni;

¹⁷Jehoiada fapa Benaia chu Kerith leh Perith mite hotu a ni a; Davida fapate chu lal khâwnbâwl hotute an ni.

BUNG 19

AMMON-HO LEH SURIA-HO HNEH AN NI

¹Chumi hnûah chuan Ammon-ho lal Nahasa chu a thî a, a fapa chu a aiah a lo lal a.

²Davida chuan, “Nahasa fapa Hanuna chungah hian that ka chhuah teh ang, a pa khâ ka chungah a tha si a,” a ti a. Davida chuan a pa thih thûah va thlamuan tûrin a mite a tîr a. Tichuan, Davida mite chu Ammon-ho ramah Hanuna hnêm tûrin an va kal a.

³Ammon mi lianho chuan Hanuna hnênah, “Davida hian i pa hi sîn tak taka hnêm tûr chein mi a râwn tîr niin i ring em ni? A mite hi ram tihchhiat tuma rawn enthlîthlai tûra lo thawk chhuak lek an ni lo mâw?” an ti a.

⁴Tichuan, Hanuna chuan Davida mite chu a man a, an hmul a ziah kâwnsak a, an silhfên chu an mawng lang vekin a tansak a, a hâu tîr leh ta hlawn a.

⁵Chutia a lo tihdân chu thenkhatin Davida hnênah an va hrihl a; ani chuan lo hmuak tûrin mi a tîr a, zahthlâk an ti hlê mai si a. Lal chuan, “In hmuihmul a chawr sei thlengin Jeriko-ah khân châm rih mai ula, tichuan, in lo hâu dâwn nia,” a ti a.

⁶Ammon mite chuan Davida hmêlmâah an insiam ta tih an inhriat chuan Hanuna leh Ammon mite chuan Mesopotamia aţang te, Suria rama Maaka leh Zoba aţangtein tawilâir leh sakawr chung chuang mite rawih nân silvar tangka talent 1,000 an thawn a.

⁷Tichuan, tawilâir 32,000 an ruai a, Maaka lal chu a hote nên an lo kal a, Medeba bulah an inkhuar a. Ammon mite pawh an khawpui aţangte chuan indo tûrin an lo thawk chhuak a.

⁸Davidan chûng chu a lo hriat chuan Joaba hovin a sipai chakho zawng zawng a tîr a.

⁹Ammon-hote chu indo tûrin khawpui kulh bulah ţanhmun an rem a, an lama ţang tûr lalhote chu ram lamah an awm thung a.

¹⁰Hma lam leh hnung lamah hmêlmâten an rawn bei dâwn tih Joaban a han hmuh chuan Israelho zînga a thâ thâ a thlang

chhuak a, Suria-ho bei tûrin a rem fel a.

¹¹A dang zawng chu a unaupa Abisaia thuhnuai a dah a, Ammonho bei tûrin an inrem fel baw a.

¹²“Suria-ho hi kan hneh dawn loh chuan minrawn tanpui ang a; Ammonho hi in hneh dawn loh chuan karawn pui ang che.

¹³Huaisen takin awm la, kan mipuite leh kan Pathian khawpuite tân chak takin i awm ang âw. LALPA chuan thâ a tih angin a ti mai dawn a ni,” a ti a.

¹⁴Tichuan, Joaba leh a hote chuan Suria-ho bei tûrin an va hnaih a, an hmâah chuan an tlânchhe ta a.

¹⁵Ammon-hovin Suria-ho tlânchhia an hmuh chuan, a unaupa Abisaia hmâah chuan an tlânchhe ve ta a, khaw chhûngah an lût a. Joaba chu Jerusalemah a kal ta a.

¹⁶Suria-ho chuan Israel lakah an tlâwm ta tih an inhriat chuan, Lui piah lama Suria-hote chu an va pun a; Hadadezera sipai hotu Sophaka chuan hmâ arawn hruai a.

¹⁷Chû thû chu Davida an va hrilh a, ani chuan Israel mi zawng zawng a khâwm vek a, Jordan lui a kân a, anniho awmna chu a va thleng a, indo tûrin tanhmun a rem ta a. Chutia Suria-ho bei tûra Davidan tanhmun a rem lai chuan an inbei ta a.

¹⁸Suria-ho chu Israelte hmâah chuan an tlânchhe ta a; Davida chuan Suria sipai tawilâira chuang mi 7,000 leh ke sipai 40,000 a that a, an sipai hotu Sophaka pawh a that baw a.

¹⁹Hadadezera mite chuan Israelten an hneh ta tih an hmuhin Davida thuhnuai kûn tûrin inremna an siam ta a. Tichuan, Suria-ho chuan Ammon-ho chu an pui leh duh tawh lo.

BUNG 20

RABBA HNEH A NI

¹Kum a lo thar a, indo tûra lalte an thawh chhuah thin hun, nipui lai hian Joaba chuan sipai rualte hruaiin Ammon mite ram chu a va suasam a, Rabba khua chu a hual a. Davida erawh chu Jerusalemah a awm a. Joaba chuan Rabba khua chu a hneh a, a chhu chhia a.

²Davida chuan an lal lallukhum khum lai chu a lâksak a, rangkachak talent khat bûk a ni a, a chhûngah chuan lunghlûte pawh a awm a. Davida lû-ah an khumtîr a. Chû khua aţang chuan râllâk sum tam tak an la baw a.

³Khaw chhûnga mite chu a kâwi khâwm a, thingzaitu atân te, lungrâl nêna hnathawktu atân leh thing kittu atân te a chhawr a. Chutiang chuan Davidan Ammon khaw tina mite chu a ti vek a. Tichuan, Davida leh a mi zawng zawngte chu Jerusalemah an hâw leh ta a.

PHILISTIA MI LIAN TIHHLUM THŪ

⁴Chumi hnûah chuan Gezer-ah Philistia mite nêna indona a chhuak leh a, chutah chuan Hushath mi Sibbekaia chuan mi lian thlahte zînga mi Sippaia a that a. An tlâwm ta a.

⁵Philistia-ho nêna indona a chhuak leh a, Jaira fapa Elhanana chuan Git mi Goliatha nau Lahmia chu a that a, chû pâ feingul chu themkaw ang mai a ni.

⁶Gath kuaah chuan indona a lo awm leh a, chutah chuan mi lian pui, kut leh ke zungtang 24 nei, kutzungtang 6 vê vê nei, kezungtang pawh 6 vê vê nei hi a awm a; mi lian thlaha mi baw a ni.

⁷Chu mi chuan Israelte chu a cho vei a, Davida unaupa Simea fapa Jonathana chuan a that ta a ni.

⁸Chûng mite chu Gath kuaa mi lian thlah an ni a, Davida leh a hote kutah an thi ta hlawn a ni.

BUNG 21

ISRAEL LEH JUDA CHHIARPUI

¹Setana chu Israelte do tûrin a lo thawk a, Israel mipuite chu chhiar tûrin Davida chu a thlêm thlû a.

²Tichuan, Davida chuan Joaba leh mi liante hnênah, “Beerseba aţanga Dan thlengin Israel mite chhiar tûrin kal ula, a zât ka lo hriat theih nân mirawn hrilh leh rawh u,” a ti a.

³Joaba chuan, “LALPA chuan a mite chu tûn aia a lêt zân tipung rawh se. Amaherawhchu ka pu lalber, ka pu chhiahhlawhte vek an ni tho lo’ m ni? Ka pu hian engtizia nge hetiang hi a mamawh tâk? Engah nge Israelten thiam loh kan chan phah ang le?” a ti a.

⁴Mahse, lal thû chu Joaba thu ai chuan a chak zâwk si a. Tichuan, Joaba chu a kal ta a, Israel ram pum chu a fang chhuak a, Jerusalemah arawn kîr leh a.

⁵Joaba chuan mihring awm zât chu Davida a hrilh a. Israel ramah khandaih keng mi maktaduai khat leh nuai khat an awm a, Judai ramah khandaih keng mi nuai lî leh sîngsarih an awm a.

⁶Mahse Levi leh Benjamin mite chu a chhiar tel lo, lal thû chu Joaban a ei lo êm êm mai si a.

⁷Chu thil chuan Pathian a tlâwm lo hle baw si a; Israelte chu a hrem ta a.

⁸Davida chuan Pathian hnênah, “Hê thil ka lo ti kher kher hi chu, ka lo va sual tak êm; tûnah hian i chhiahhlawh sualna hi la kiang tûrin ka ngên a che, âthlâk takin ka lo ti ta si a,” a ti a.

⁹LALPA chuan Davida zâwlnei Gada chu a hrilh a,

¹⁰“Kal la, Davida hnênah chuan, ‘LALPA chuan, “Duhthlan tûr thil pathum ka pê a che; a eng ber nge ka hlen dawn thlang rawh,” a ti che,’ va ti rawh,” a ti a.

¹¹Gada chu Davida hnênah chuan a lo kal a, “LALPA chuan, ‘I duh thlang rawh le:

¹²kum thum chhûng tâmpui tuar nge, i hmêlmâten khandaih nên ûmphâ chein thla thum chhûng tihtlâwma awm nge, ni thum chhûng LALPA khandaih tuar-ram puma hripui, LALPA Vântirhkovin Israel ram zawng zawng a eichhiat vek?’ a ti a ni. Mi tîrtu hnêna ka hrilh lêt theih nân i thlan tûr chu ngaihtuah rawh,” a ti a.

¹³Davida chuan Gada hnênah, “Ka va mangang tehlu êm! LALPA kutah min tlûk luhtîr mai rawh, a zahngaihna a nasa êm êm si a; mihring kutah chuan min tlûk luhtîr lul suh âw,” a ti a.

¹⁴Tichuan, LALPA chuan Israelte chungah hrî a lêtîr a, Israel mipa puitling 70,000 an thi a.

¹⁵LALPA chuan Jerusalem tichhe tûrin Vântirhkoh a tîr a. A tichhiat lai mēk chuan LALPA chuan a han en a, chhiatna thleng tûr lakah chuan inlamlêtin tiboraltu Vântirhkoh hnênah chuan, “A tâwk e; i kut kha la kiang rawh,” a ti a. LALPA Vântirhkoh chu Jebus mi Ornana hruih zâwlah chuan a dîng ta a.

¹⁶Davida chu a hawi vêl a, LALPA Vântirhkoh chu khandaih phâwi sâ kenga Jerusalem lam tin chung a lei leh vân inkâra dîng a hmu ta a. Tichuan, Davida leh a puipate chu saiip puan sinin an bawkkhup a.

¹⁷Davida chuan Pathian hnênah, “Mipui zât chhiar tûra thupetu chu keimah hi ka ni lo vem ni? Keimah hi thil sual titu, thil tha lo titu chu ka ni alâwm; mahse hêng berâmte hian eng thil nge an tih vê le? Aw LALPA ka Pathian, keimah leh ka pa chhûngkaw chungah hian i kut thlâk zâwk rawh, i mite erawh chu hî hi tuatîr tawh lo tûrin ka ngên a che,” a ti a.

¹⁸Tichuan, LALPA Vântirhkoh chuan Davida chu, Jebus mi Ornana hruih zâwlah LALPA tân maichâm siam tûra Davida hrilh tûrin Gada chu thû a pê a.

¹⁹Gadan LALPA hminga thu a sawi ang zêlin Davida chu a chho ta a.

²⁰Ornana chu a han leh hawi a, Vântirhkoh chu a hmû a; a fapa palîte chu an biru vek si a, Ornana erawh chuan a buh chîl lai chu a chhunzawm zêl a.

²¹Davida chu Ornana hnênah a lo kal a, Ornana chuan Davida chu a lo hmû a. A hruih zâwl aţang chuan a kal chhuak a, bawkkhupin chibai a lo bûk a.

²²Davida chuan Ornana hnênah, “Hê hruih zâwl hi LALPA tâna maichâm ka din theih nân min pe ta che. Mipuite laka hîr lâl kian a nih theih nân, a man tûr pawh a kimin chhiar ang che,” a ti a.

²³Ornana chuan Davida hnênah, “Nei mai rawh ka pu, lal chuan thâ a tih ang takin ti se la. Hei, hâlrâla inthâwi nân bâwngpa te, a tuah tûr thing atân hruih hmanrua te, chhangphut hlan tûr wheat te pawh ka pe baw ang che a; ka tum vek mai ang e,” a ti a.

²⁴Lal Davida chuan Ornana hnênah, “Ni lo ve, a man dik takin ka lei tûr a ni, i ta hi a thlâwnin LALPA tân ka la lo vang a, insêngso lovin hâlrâl thilhlân pawh ka hlân hek lo vang,” a ti a.

²⁵Tichuan, Davida chuan chû hmun lei nân chuan Ornana chu rangkachak sekel 600 a pe ta a.

²⁶Chutah chuan Davidan LALPA tân maichâm a siam a, hâlrâl thilhlân te, remna thilhlân te hlânin LALPA chu a âu va; ani chuan vân aţangin hâlrâl thilhlanna maichâm chu meiin a rawn chhâng ta a.

²⁷LALPA chuan Vântirhkoh chu thû a pê a, a khandaih chu a pâiah a khung leh ta a.

²⁸Jebus hnam Ornana hruih zâwla LALPA rawn chhân dân Davidan a lo hmuhin, chumi hmunah chuan a inthâwi ta a.

²⁹Chûng lai chuan, LALPA biakbûk leh hâlrâl thilhlanna maichâm, Mosian thlalêra a siam kha Gibeon khuua hmun sângah a la awm reng a.

³⁰Mahse Davida chu, LALPA Vântirhkoh khandaih a hlaugh avângin, Pathian rawn tûr pawhin chutah chuan a kal ngam lo va.

BUNG 22

DAVIDAN TEMPUL SAKNA TÛR A PUAHCHAH

¹Davida chuan, “Hei hi LALPA Pathian in a lo ni reng mai â, hei ngei hi Israelte tâna hâlrâl thil hlanna tûr maichâm chu a lo nih hi,” a ti a.

²Tichuan, Davida chuan Israel rama hnam dang awmte chu a ko khâwm a; Pathian in sakna tûr lung chher turin lungchher mite a ruat a.

³Davida chuan a kawngkhâra vuah tûr thîrkilhna te leh a kawpzâ tûr thîr tam tak a chhertîr a, dâr phei chu bûk sên loh khawpa tam a ni a,

⁴sidar thing pawh a awm rei rui a; Sidon leh Tura miten Davida hnênah a tama tam an rawn chhêk khâwm si a.

⁵Davida chuan, “Ka fapa Solomona hi a la naupangin, chinchâng a la hre rih si lo va, LALPA tâna in sak tûr chu ram zawng zawnga mâwi ber, hmingthang ber leh ropui ber tûr a ni a. Tûn aţang hian ka lo puahchah lâwk a nih hi,” a ti a. Chuvângin, Davida chu a thih hmâ ngeiin nasa takin a lo inbuatsaih lâwk a.

⁶A fapa Solomona chu a ko va, LALPA Israelte Pathian tâna in sa tûrin mawhphurhna a hlân a.

⁷Davida chuan Solomona hnênah: “Ka fapa, LALPA ka Pathian hming awmna tûr in saksak hi ka rilrûk thîn rêng a;

⁸mahse LALPA thû ka hnênah a lo thleng a, “Thisen i chhuah hnemin, indona nasa taka bei mi i ni si a; lei chungah hian ka mithmuhah thisen i chhuah hnem êm avângin nang chuan ka hming awmna tûr in chu i sa tûr a ni lo.

⁹Ngai rawh, muanna duh mi fapa i la nei ang; a vêl zawng zawnga hmêlmâte lakah râlmuan ka pê ang. A hming chu Solomona a ni ang, a hun chhûngin Israelte tân râlmuan leh thlamuan ka pe dâwn si a.

¹⁰Ani chuan ka hming awmna tûr in chu a sâ ang; ka fapa a ni ang a, kei pawh a Pa ka ni ang; Israelte chungah a lalram chu kumkhuain ka din nghet ang,’ a ti a ni.

¹¹Ka fapa, tûnah hian LALPA chuan awmpui che sela; i hnêna a sawi tawh ang khân LALPA i Pathian in chu sâ la, hmuingîl zêl ang che.

¹²LALPA chuan finna leh hriatthiamna te pê che sela, LALPA i Pathian dân chu i vawn tlat theih nân, Israelte chungah thuneitûah dah che rawh se.

¹³Tichuan, Israelte hnêna Mosian a lo pêk thuruatte leh rorêl dân te tipuitling tûra i fimkhur thiam phawt chuan, i lo hmuingîl zêl dâwn nia. Chak tak leh huai takin awm rawh; hlâu suh la, zâm hek suh.

¹⁴LALPA in sak nân theitâwp chhuahin rangkachak talent nuai khat leh silvar talent maktaduai khat ka lo khâwl tawh a, dâr leh thîr te phei chu a tam nangiang a, bûk sên rual a ni lo. Thing leh lung pawh ka peih diam tawh a, duh chuan i belhchah thei baw ang.

¹⁵Hêng bâkah pawh hian hnathawktu tam tak: thingzaitute leh lungchhertute, hna tinrêng thawk tûra mi themthiam lah i ngah êm êm a.

¹⁶Rangkachak te, silvar te leh dâr chher thiam lah rawih sên loh an awm a. Tho la, thawk tan tawh mai rawh; LALPAN a awmpui zêl ang che,” a ti a.

¹⁷David a chuan Israel puipa zawng zawng chu a fapa Solomona pui tûrin thû a pê a,

¹⁸“LALPA in Pathian chu in hnênah a awm lo vem ni? Kîl tinah râlmuang takin a awmtîr che u a ni lo'm ni? Ram chhûnga mi zawng zawng hi ka kutah mi pê a, ram hi LALPA leh a mite thuhnuai a awm tawh si a.

¹⁹In thinlung leh in nunna chuan LALPA in Pathian lam hawi tlat sela. LALPA thuthlung bâwm leh Pathian bungbêl thianghlime chu LALPA hming awm nâna sak ina in lâk luh theih nân tho ula, LALPA Pathian hmun thianghlim chu sa rawh u le,” a ti a.

BUNG 23

LEVI-HO INSEM DARH DÂN

¹David a chu a upain a lo tar ta hlê a, a fapa Solomona chu Israelte lalah a siam ta a.

²Israel puipa zawng zawng chu puithiamte leh Levi-hote nêan a ko khâwm vek a.

³Levi hnam kum 30 achin chung lam an chhiar a; mipa zawng zawng chu 38,000 an ni.

⁴Chûng zînga 24,000 te chu LALPA in sak hna enkawltu tûrte an ni a; 6,000 te chu hotu leh rorêltute an ni a,

⁵mi 4,000 te chu kawngkhâr vêngtu an ni a, mi 4,000 dangte chu Davidan, “rimâwi rema LALPA faktu tûra ka siam an ni,” a ti a ni.

⁶David a chuan Levia thlahte chu a pâwlin a then a: Gersona te, Kohatha leh Meraria pâwl te an ni a.

⁷Gerson-ho chu Laadana leh Simeia te an ni.

⁸Laadana fapate chu: a hmasa berin Jahiela, a dawtah Zethama leh Joela— an vaiin pathum an ni.

⁹Simeia fapate chu: Selomitha te, Haziela leh Harana—an vaiin pathum an ni. Hêngte hi Laadana chhûngkaw puipate chu an ni.

¹⁰Simeia fapate chu: Jahatha te, Zina te, Jeusa leh Beria te an ni. Hêng hi Simeia fapa palîte chu an ni.

¹¹A hmasa chu Jahatha a ni a, a dawt Ziza a ni. Jeusa leh Beria te chuan fapa an ngah vê lo va; chûvângin chhûngkaw khat anga chhiar an ni.

¹²Kohatha fapate chu: Amrama te, Izara te, Hebrona te leh Uzziela te—an vaiin palî an ni.

¹³Amrama fapate chu: Aarona leh Mosia te an ni; Aarona chu a fapate nêan kumkhua atâna serh hran an ni a, LALPA hmâah rimtui hâla thil thianghlim ber hlân thianghlim tûr leh, ama rawng bâwla, ama hminga kumkhuaa malsâwmna pe tûra tih an ni.

¹⁴Pathian mi Mosia fapate chu Levia thlah zînga chhiar an ni.

¹⁵Mosia fapate chu Gersona leh Eliezara te an ni.

¹⁶Gersona fapate zîngah Sebuala chu an puipa ber a ni.

¹⁷Eliezara fapate zîngah Rehabia chu an puipa ber a ni. Eliezara chuan fapa dang a nei lo va, Rehabia fapate chu tam tak an ni.

¹⁸Izara fapate zîngah Selomitha chu an puipa ber a ni.

¹⁹Hebrona fapate zîngah Jeria chu an puipa ber a ni a, a dawttu chu Amaria a ni a, a pathumna chu Jahaziela leh a palîna chu Jekameama a ni.

²⁰Uzziela fapate zîngah Mika chu an puipa ber a ni a, a dawttu chu Jessie a ni.

²¹Meraria fapate chu Mahlia leh Musia te an ni. Mahlia fapate chu Eleazara leh Kisa te an ni.

²²Eleazara chu fapa nei lovin a thî a, fanute erawh chu a nei a; an nuṭa Kisa fapate chuan nupuia an neih hlawm a.

²³Musia fapate chu Mahlia te, Edera te leh Jeremotha te—an vaiin pathum an ni.

²⁴Hêng hi Levia thlah, a chî chî leh a chhûngkua ang zêla an hming pawh ziah—chhûngkaw puipate nêan, kum 20 achin chung lam, LALPA ina rawngbâwl tûra chhiar te chu an ni.

²⁵Davidan, “LALPA Israelte Pathianin a mite chu râlmuangin a awmtîr a, Jerusalemah kumkhua in an awm thei tawh ang,” a lo ti tawh si a;

²⁶Levi hnamte hnênah pawh, “Biakbûk leh a rawngbâwlna bungbêlte rêng rêng an zâwn sawn tawh ngai lo vang,” a ti bawk a.

²⁷David a thupêk hnuhnung angin Levi hnam chu kum 20 achin chung lam zawng chhiar an ni si a;

²⁸an hna chanvo chu LALPA inah te, tual zâwl leh pindan chhûngah te leh, Pathian ina rawngbâwl hnâ leh thil thianghlim rêng rêng thian fai tûra Aarona fapate tanpui a ni a,

²⁹chhangserh leh buhbâl thilhlân atâna chhangphut dip te, dâwidim telh loh chhangpêr leh bêla kan te, a pawlh tûr leh a lian leh a tê chia lo buatsaih vêlte nêan;

³⁰tûk tin leh tlai tina LALPA faka chawimâwi nâna ding tûr te;

³¹Sabbath leh Thla Tharah te, kûn ni ruatah te tih tûr an tuk ang zêla LALPA hmâa hâlral inthâwina hlan apianga LALPA hmâa inlan ziah tûr te;

³²inbiakna puan in leh hmun thianghlina thil tûl apiang enkawl te, Aarona thlahte leh an unauten LALPA ina an hnathawh lo tanpui te a ni.

BUNG 24

PUITHIAM-HO PÂWLA INSIAM DÂN

¹Hêng hi Aarona fapate chanvo insem dân chu a ni. Aarona fapate chu Nadaba te, Abihua te, Eleazara leh Ithamara te an ni a.

²Nadaba leh Abihua te chu fa nei lovin an pa thih hmâin an thî a; chûvângin Eleazara leh Ithamara—ten puithiam rawngbâwl hnâ an thawk ta a ni.

³David a chuan Eleazara fapa Zadoka leh Ithamara fapa Ahimeleka te chu rawng an bâwl dân tûr a semsak a.

⁴Ithamara fapate aiin Eleazara fapate zîngah hruaitu tling an tam zâwk a, pâwlah an insem darh a. Eleazara thlahte zîngah an chhûngkaw puipa 16 an awm a, Ithamara thlahte zîngah chuan an

chhûngkaw puipa pariat an awm a.

⁵Eleazara thlahte leh Ithamara thlahte aţangin hmun thianghlim enkawltu leh Pathian in enkawltu an awm vê vê avângin, thumvâwrin pâwl nhihin an inţhen a.

⁶Ziaktu Semaia, Nethanela fapa, Levi hnama mi chuan lal hmâah te, an puipate, puithiam Zadoka te, Abiathara fapa Ahimeleka te leh, puithiamho leh Levi-ho chhûngkaw puipate, Eleazara chhûngkua leh Ithamara chhûngkaw aiawh pakhat vê vê te hmâah a ziaak chhuak ta a.

⁷An thumvâwr thum khatna chu Jehoiariba chungah a tlâ a, thum nhihna Jedaia chungah,

⁸thum thumnaah Harima, thum lînaah Seorima,

⁹thum ngânaah Malkija, thum ruknaah Mijamina,

¹⁰thum sarihnâah Hakkoza, thum riatnaah Abija,

¹¹thum kuanaah Jesua, thum sâwmnaah Sekania,

¹²thum sâwm pakhatnaah Eliasiba, thum sâwm pahnihaah Jakima,

¹³thum sâwm pathumnaah Huppa, thum sâwm palînaah Jesebea,

¹⁴thum sâwm pangânaah Bilga, thum sâwm paruknaah Immera,

¹⁵thum sâwm pasarihaah Hezira, thum sâwm pariatnaah Happizeza,

¹⁶thum sâwm pakunaah Hezira, thum sâwm hnihaah Jehezekela,

¹⁷thum sawmhnih pakhatnaah Jakina, thum sawmhnih pahnihaah Gamula,

¹⁸thum sawmhnih pathumnaah Delaia, thum sawmhnih palînaah Maazia.

¹⁹Hetiang hi LALPA Israelte Pathianin an thlahtu Aarona hnêna tihdan tûr thû a lo pêk, LALPA ina rawng an inbâwl chhâwk dân tûr chu a ni.

LEVI THLAH MI DANGTE

²⁰Levia thlah dangte zîngah: Amrama fapate zîngah Subaela; Subaela fapate zîngah Jehdeia.

²¹Rehabia chungchângah, Rehabia fapate zînga a puipa ber chu Issia a ni.

²²Izar mite zîngah Selomotha; Selomotha fapa zîngah Jahatha.

²³Hebrona fapate zîngah Jeria a hmasa ber a, Amarian a dawt a, a pathumna Jehaziela, a palina Jekemeama a ni.

²⁴Uzziela fapate zîngah Mika; Mika fapate zîngah Samira.

²⁵Mika unaupa Issia; Issia fapate zîngah Zekaria.

²⁶Meraria fapate chu Mahlia leh Musia te an ni; Jaazia fapa Benoa.

²⁷Meraria thlahte zîngah Jaazia fapate chu Benoa, Sohamia, Zakura leh Ibria.

²⁸Mahlia thlah zîngah Eleazaran fapa a nei lo.

²⁹Kisa: Kisa fapa Jerameela.

³⁰Musia fapate zîngah Mahlia, Edera leh Jerimotha. Hêng hi an thlahtu ang zêla Levia thlahte chu an ni.

³¹Hêngte pawh hian an unau Aarona fapa dangte ang bawkin Lal Davida te, Zadoka te, Ahimeleka te leh puithiamho chhûngkaw puipate leh Levi hnamte hmâah thum an vâwr vê tho. An chhûngkaw puipa ber pawhin a nâu zâwkte tih angin an ti ve zêl a ni.

BUNG 25

RIMÂWI TUMTUTE

¹Davida leh sipai hotute chuan Asapha te, Hemana te leh Jeduthuna fapate zîng aţangin ţingţang te, perhkhuang te leh dârbenthek hmanga thuchah puangtu tûr bik an la hrang a. Thiamna bik nêna rawngbâwl tûr ho zât chu:

²Asapha fate chu: Zakura te, Josepha te, Nethania te leh Asarela te an ni a; Asapha fapate chuan Asapha kaihhruaina hnuaia lal thu chhuak ang zêlin an puang thîn a ni.

³Jeduthuna, Jeduthuna fapate: Gedalia te, Zeria te, Jeshaia te, Simeia te, Hasabia te leh Mattithia te, mi paruk, an pa Jeduthuna kaihhruaina hnuaia awm an ni a, ţingţang nêl LALPA fakin lâwmna thû an puang chhuak thîn.

⁴Hemana, Hemana fapate: Bukkia te, Mattania te, Uzziela te, Sebuella te, Jerimotha te, Hananiaha te, Hanania te, Eliatha te, Giddaltia te, Romamti-Ezera te, Josbekasa te, Mallothia te, Hothira te leh Mahaziotha te an ni.

⁵Hêngho zawng zawng hi Pathian thûa lal zâwlnei Hemana fapa, a ki châwimâwitu tûrte an ni. Hemana chu Pathianin fapa 14 leh fanu pathum a pe rêng a ni.

⁶Hêngho zawng zawng hi an pa ber kaihhruaina hnuaia dârbenthek te, perhkhuang te leh ţingţang te nêna LALPA ina rawngbâwl tûr an ni. Asapha te, Jeduthuna te leh Hemana te chu lal thuneihna hnuaia awm an ni a.

⁷Tichuan, anniho leh an unau, thiam taka LALPA fakna hlâ sa tûra zirtîrna dawngte chu mi 288 an ni.

⁸An thawh hun hriat nân a lian a têtin, zirtîrtu leh zirlaite tân thum an vâwr thîn.

⁹Asapha tâna thumvâwr wavi khatna chu Josephan a chang a; a wavi hniha Gedalia leh a unaute leh a fapate nêl, sâwm leh pahni;

¹⁰wavi thumna chu Zakura leh a fapate leh a unaute, sâwm leh pahni;

¹¹wavi lîna chu Jizria leh a fapate leh a unaute, sâwm leh pahni;

¹²wavi ngâna chu Nethania leh a fapate leh a unaute, sâwm leh pahni;

¹³wavi rukna chu Bukia leh a fapate leh a unaute, sâwm leh pahni;

¹⁴wavi sarihnâ chu Jesarela leh a fapate leh a unaute, sâwm leh pahni;

¹⁵wavi riatna chu Jesaia leh a fapate leh a unaute, sâwm leh pahni;

¹⁶wavi kuana chu Mattania leh a fapate leh a unaute, sâwm leh pahni;

¹⁷vawî sâwmna chu Simeia leh a fapate leh a unaute, sâwm leh pahni;h;

¹⁸vawî sâwm pakhatna chu Azarela leh a fapate leh a unaute, sâwm leh pahni;h;

¹⁹vawî sâwm pahni;hna chu Hasabia leh a fapate leh a unaute, sâwm leh pahni;h;

²⁰vawî sâwm pathumna chu Subaela leh a fapate leh a unaute, sâwm leh pahni;h;

²¹vawî sâwm palîna chu Mattithia leh a fapate leh a unaute, sâwm leh pahni;h;

²²vawî sâwm pangâna chu Jeremotha leh a fapate leh a unaute, sâwm leh pahni;h;

²³vawî sâwm parukna chu Hanania leh a fapate leh a unaute, sâwm leh pahni;h;

²⁴vawî sâwm pasari;hna chu Josbekasa leh a fapate leh a unaute, sâwm leh pahni;h;

²⁵vawî sâwm pariatna chu Hanania leh a fapate leh a unaute, sâwm leh pahni;h;

²⁶vawî sâwm pakuana chu Mallothia leh a fapate leh a unaute, sâwm leh pahni;h;

²⁷vawî sawm;hni;hna chu Eliatha leh a fapate leh a unaute, sâwm leh pahni;h;

²⁸vawî sawm;hni;h leh pakhatna chu Hothira leh a fapate leh a unaute, sâwm leh pahni;h;

²⁹vawî sawm;hni;h leh pahni;hna chu Gidaltia leh a fapate leh a unaute, sâwm leh pahni;h;

³⁰vawî sawm;hni;h leh pathumna chu Mahaziotha leh a fapate leh a unaute, sâwm leh pahni;h;

³¹vawî sawm;hni;h leh palîna chu Romamti-Ezera leh a fapate leh a unaute, sâwm leh pahni;h an ni.

BUNG 26

KAWNGKHÂR VÊNGTUTE

¹Kawngkhâr vêngtu pâwl ðhen dân: Kora hote, Kora fapa Meselemia te, Asapha fapate.

²Meselemia fapate chu, a fatîr Zekaria te, a dawttu Jediela te, pathumna Zebadia te, palîna Jathniela te,

³pangana Elama te, parukna Jehohanana te, pasari;hna Eliehoenaia te an ni.

⁴Obed-Edoma fapate chu, a fatîr Semaia, a dawttu Jehozabada, pathumna Joa, palîna Sakara, pangâna Nethanela te,

⁵parukna Ammiela, pasari;hna Issakara, pariatna Peulthaia te an ni; Pathianin mal a sâwm si a.

⁶A fapa Semaia aţanga fapa lo piangte chu mi thei filawr tak tak an nih avângin an thlahtu chhûngkaw enkawltu an ni.

⁷Semaia fapate chu Othnia, Rephaela, Obeda leh Elzabada te an ni a, an nau Elihua leh Semakia te chu mi thiltithe; tak an ni.

⁸Hêng mi zawng zawngte hi Obed-Edoma thlahte an ni a, anni leh an fapate leh an unaute chu, mi chak leh thil tithe; tak tak:

Obed-Edom mi 62 an ni.

⁹Meselemia fapate leh a unaute chu mi chak 18 an ni a.

¹⁰Meraria thlahte zîngah Hosa chuan fapate a nei a: Simria chu an puipa ber a ni (fatîr ni lo mahse, a pain hotu berah a siam tlat a ni),

¹¹a dawttu Hilikia, a pathumna Tebalia, a palîna Zekaria; Hosa fapa te chu an vaiin 13 an ni.

¹²Kawngkhâr vêngtuho pawh a pâwlin an inðhen a, an hotute pawhin an nau dangte ang bawkin LALPA inah chuan ang khat vekin rawng an bâwl ho va.

¹³An chhûngkua a len leh a têt azir zêlin kawngkhâr vêngtu tûr chu ðhumvâwrin an insem ðhin.

¹⁴Chhak lam Kawngkhâr chu Selemian a chang a. A fapa, remruattu fîng tak Zekaria tân ðhum an vâwr a, ama chana lo tlâ chu Hmar lam Kawngkhâr a ni a;

¹⁵Obed-Edoman Chhim lam Kawngkhâr a chang a, a fapaten bungraw dahna in an chang a.

¹⁶Suppima leh Hossa te tâna an ðhumvâwr chu Thlang lam Kawngkhâr bâkah, kal chhohna kawngpuia Salleketh Kawngkhâr nêna—a inepin vêngtute pawh an awm a.

¹⁷Chhak lamah Levi hnam mi paruk, hmar lamah ni tin palî, chhim lamah ni tin palî baw, bungraw dahna inah pahni;h vê vê an awm a.

¹⁸Thlang lama Parbar-ah chuan, kawngpuiah palî, Parbar-ah pahni;h in an vêng a.

¹⁹Kora fapate leh Meraria fapate zîngah pawh kawngkhâr vêngtu chu a pâwlin an insem vê baw.

SUM BÂWM VÊN HNÂ LEH A DANGTE

²⁰Levia chite zînga Ahija chu Pathian ina sum bâwm chungah leh thil hlu dang serh thianghlim tawh chungah enkawltu hotu a ni.

²¹Laadana thlah, Gerson mi Laadana thlah zînga, Gerson mi Laadan chhûngkaw puipa chu: Jehielia a ni.

²²Jehielia fapate, Zethama leh a nau Joela te chu LALPA ina sum bâwm vawngtute an ni a.

²³Amram mi te, Izar mi te, Hebron mi te leh Uzziel mi te zîngah chuan:

²⁴Sebuela, Gersoma fapa, Mosia fapa chu sum bâwm endiktu a ni a.

²⁵A naua Eliezera fapate chu Rehabia te, Jesaia te, Jorama te, Zikria leh Selomitha te an ni.

²⁶Chû Selomitha leh a unaute chu Lal Davida leh thlahtu puipa, sipai sâng hotute, za hotute leh sipai pâwl hotuten an serhhran rosum enkawltute an ni.

²⁷Indonaa râlâk sum ðhenkhat chu LALPA in enkawl nân an serh hrang ðhin a.

²⁸Zâwlnei Samuela te, Kisa fapa Saula te, Nera fapa Abnera te, Zerui fapa Joaba-ten an serhhran, thil an serhhran tawh rêng rêng chu Selomitha leh a unaute kuta awm a ni.

²⁹Izar mi Kenania leh a fapate chu Israel ram chhûng, Jerusalem pâwn lam zawng chungah hotu leh rorêltu an ni.

³⁰Hebron mi Hasabia leh a unaute, mi chak tak tak 1,700 te chu Israel ram, Jordan thlang lam zawnga LALPA hnâ leh an lal rawngbâwl hnâ zawng zawngah mawhpurtu an ni.

³¹Hebron-ho zîngah Jerija chu Hebron-ho thlahte zînga hotu ber a ni. Davida rorêl kum 40-na laia an chhui khân Gilead rama Jazer khuuah mi thil tithei tak tak an lo awm tawh reng a ni.

³²A unaute chu mi thil tithei tak tak 2,700 an ni a, chhûngkaw puipate an niin Pathian lam thilah leh an lal chungchâng thil engkimah Reuben hnam te, Gad hnam te leh Manase thlah zâtve hote chungah thuneitua Lal Davidan a ruatte an ni.

BUNG 27

SIPAI PÂWL THEN DARH DÂN

¹Israel fate chu, an tam dân ang zêlin chhûngkaw puipate, sâng hotute, za hotute leh, an chungah hotute chu sipai pâwlah insiamin, kawng tinrêngah an lal hnâ an thawk a. Chhûng pâwl then te chu a thla bi zêla lût leh chhuakin, kum tluanin a thlakipin an inchhâwk thîn a, pâwl tinin mi 24,000 an nei theuh a ni.

²Pâwl khatna, a thla khatna changtu chu Zabdiela fapa Jasobeama a ni a, a pâwlah chuan mi 24,000 an awm a;

³Pereza thlah a ni a, a thla khatnaa sipai pâwl hotu zawng zawnga lû ber a ni.

⁴A thla hnihnaa pâwl changtu chu Aho mi Dodaia a ni a, a pâwlah chuan Mikloth a hotu ber a; chumi pâwlah chuan mi 24,000 an awm.

⁵A thla thumnaa sipai pâwl thumna hotu chu Benaia, puithiam Jehoiada fapa a ni a, an hotu ber a ni; a pâwlah mi 24,000 an awm a.

⁶Hê mi, Benaia hi mi chak 30 zînga mi, 30 zînga chungnung taka kha a ni a; a pâwlah chuan a fapa Ammizabada pawh a tel.

⁷A thla lîna hotu palîna chu Asahela, Joaba unaupa a ni a, a thachhang dâltûah a fapa Zebadia a awm a; a pâwlah mi 24,000 an awm.

⁸A thla ngâna hotu pangâna chu Izra mi Samhuta a ni a, a pâwlah mi 24,000 an awm.

⁹A thla rukna hotu parukna chu Teko mi Ikkesa fapa Ira a ni a, a pâwlah mi 24,000 an awm.

¹⁰A thla sarihna hotu pasarihna chu Ephraima thlah, Pelon mi Heleza a ni a, a pâwlah mi 24,000 an awm.

¹¹A thla riatna hotu pariatna chu Zarhi thlah, Husat mi Sibbekaia a ni a, a pâwlah mi 24,000 an awm.

¹²A thla kuana hotu pakuana chu Benamina thlah, Anathoth mi Abiezera a ni a, a pâwlah mi 24,000 an awm.

¹³A thla sâwmna hotu sâwmna chu Zarhi thlah, Netophath mi Maharaia a ni a, a pâwlah mi 24,000 an awm.

¹⁴A thla sâwm pakhatna hotu sâwm pakhatna chu Ephraim thlaha mi, Pirathon mi Benaia a ni a, a pâwlah mi 24,000 an awm.

¹⁵A thla sâwm pahniha hotu sâwm pahniha chu Othniela thlaha mi, Netophath mi Heldaia a ni a, a pâwlah mi 24,000 an awm.

CHI BIL HRUAITUTE

¹⁶Hêng bâka Israel hnam hotute: Reuben hnam hotu chu Zikria fapa Eliezera; Simeon hnam hotu chu, Maaka fapa Sephatia;

¹⁷Levi hnam hotu, Kemuela fapa Hasabia; Aaron hnam hotu, Zadoka;

¹⁸Juda hnam hotu Elihua, Davida unau zînga mi; Isakar hnam hotu, Mikaela fapa Omria;

¹⁹Zebulun hnam hotu Obadia fapa Ismaia; Naphtali hnam hotu Azriela fapa Jerimotha.

²⁰Ephraim hnam hotu, Azazia fapa Hosea; Manase hnam zâtve hotu Pedaia fapa Joela;

²¹Gilead rama Manase hnam zâtve hotu, Zekaria fapa Iddova; Benjamin hnam hotu, Abnera fapa Jaasiela;

²²Dan hnam hotu, Jerohama fapa Azarela. Hêng mite hi Israel hnam hrang hrang hotute chu an ni.

²³Davida chuan kum 20 leh a hnua lam a chhiar tel lo, LALPAN Israelte chu vâna arsi angin a la tipung dâwn tih a lo sawi tawh si a.

²⁴Zerui fapa Joaban chhiar tan tawh mah se, chû chhiarpui chuan Israelte chungah thinurna a thlen avângin a chhiar zo hman lo; Lal Davida lal laia chanchin ziaakna bû-ah pawh a zât chhinchhiah a ni bawh hek lo.

SORKAR HOTU DANGTE

²⁵Adiela fapa Azmavetha chu lal sum vawngtu a ni a; Uzzia fapa Jehonathana chu lo lamah te, khawpuiah te, khawperah leh kulh chhûnga chhêkin enkawltu a ni.

²⁶Keluba fapa Ezria chu lo lama leilet hna thawkho enkawltu a ni.

²⁷Ramath mi Simeia chu grêp huan enkawltu a ni a; Shipmit mi Zabdia chu grêp huana thar chhuah aţanga uain dah khâwmna enkawltu a ni.

²⁸Geder mi Baal-Hanana chu olive huan leh phâia theipui huan enkawltu a ni a; Joasan hriak dahkhâwm lam a enkawl a.

²⁹Saron mi Sitraia chuan Saron ran tlatna hmuna ran rual a enkawl a; Adlaia fapa Saphata chuan phâi zâwla ran rual a enkawl bawh.

³⁰Ismael mi Obilan sanghâwngsei a enkawl a; Meronoth mi Jehdeia chu sabengtung enkawltu a ni a,

³¹Hagri mi Jaziza chu berâm rual enkawltu a ni. Hêng mi zawng zawngte hi Lal Davida sum leh pâi enkawltute an ni.

³²Davida pami Jehonathana chu remruattu, mi fing leh ziaaktu a ni a; Hakmonia fapa Jehiela chu lal fapate enkawltu a ni.

³³Ahithophela chu lal thurâwntu a ni a; Arki mi Husaia chu lal kaihza vêngtu a ni.

³⁴Ahithophela hnûah chuan Benaia fapa Jehoiada te, chumi hnûah Abiathara-ten an thlâk a. Lal sipai hotu ber chu Joaba a ni.

BUNG 28

TEMPUL SA TÛRIN SOLOMONA THÛ PÊK A NI

¹Davida chuan Israel hnam puipa zawng zawng: hnam tina hotute, lal hna thawktu pâwl hotute, sâng hotute leh za hotute, lal leh a fapate neih sum leh pâi zawng zawng enkawltute leh an hotute, mi huaisente leh mi chak thil tithei zawng zawng chu Jerusalemah a ko khâwm vek a.

²Lal Davida chu a dîng chhuak a, “Ka unaute leh ka khua leh tuite u, min lo ngaithla teh u: LALPA thuthlung bâwm dahna tûr in leh kan Pathian ke nghahchhan tûr sak hi ka rilrûah a lian êm êm a, chumi sakna tûr chu ka puahchah diam tawh a.

³Mahse Pathianin, ‘Nang zawng thisen i chhuah hnemin, indona nasa taka bei mi i nih avângin ka hming puala in chu i sa tûr a ni lo,’ min ti a.

⁴Amaherawhchu, LALPA Israelte Pathianin kei hi ka pa chhûngkua zawng zawng zîngah kumkhuaa Israelte lal atân mi lo thlang ta a, Juda hnam hi rorêltu atân a lo thlang ta si a. Juda hnamah pawh ka pa chhûngte leh ka pa fapate zîngah Israelte lal atân min lo duhsak ta a ni.

⁵Ka fapa zawng zawng zîngah (LALPAN fapa thahnem tak min pe si a) LALPA lalna rama Israelte chung a lal̄hutthlênga th̄u tûrin ka fapa Solomona hi a lo thlang ta a.

⁶Heti hian min hrilh a, ‘I fapa Solomona hi ka in leh a kawtlai te satu tûr chu a ni; ka fapa atân ka thlang tawh a, a tân pawh Pa ka ni bawh ang.

⁷Chu mai a ni lo, ka thupêkte leh ka rorêl dân te vawiin ni anga nghet taka a zawm tlat chuan, a lalram chu chatuanin ka dîn nghehsak dâwn a ni,’ a ti a ni.

⁸Tûnah hian, Israel mi zawng zawng, LALPA mi pung khâwmho mithmuhah leh, kan Pathian hriatah hian LALPA in Pathian thupêk zawng zawng chu fimkhur takin zâwm ula, tichuan hê ram tha tak mai hi in nei ang a, in thlahte thlengin an rochung kumkhua dâwn nia.

⁹Nang, ka fapa Solomon, i pa Pathian hi bêl Chiang la, rinawmna thinlung pûin lungsi takin a rawng bâwl ang che; LALPA chuan thinlung lam a en thîn a, rilrûin a tum dân zawng zawng pawh a hre tlang vek a ni. Amah i zawn chuan i hmu ngei ang; i hawisan erawh chuan kumkhua in a hnâwl mai ang che.

¹⁰LALPA chuan a hmun thianghlina in sa tûrin a thlang che tih hria la; intichak la, thawh chhuak tawh mai rawh,” a ti a.

¹¹Davida chuan a fapa Solomona hnênah biak in sak dân tûra a lo ruahmanna zawng zawng chu a pê a—a hulhliap te, a in te, sum bâwm te, pindan chungnung te, pindan chhûngril zâwk leh zahngaihna thutphah awmna tûr te;

¹²Thlarauvin a ruangâm a lo hriattîr tawh dân zawng zawng te, LALPA in tualzâwl te, a vêla pindan zawng zawng te, Pathian ina sum dahna in te, thil hlu serh hran bîk dahna in tûr te nê;

¹³puithiamte leh Levia chîte a pâwla an inrêlbâwl hran dân tûr te, LALPA ina hna thawh dân tûr tinrêng te leh, LALPA ina bungbêl enkawl dân tûr te nê.

¹⁴Rangkachaka siam tûr bungbêl tinrêng atân rangkachak hman zât tûr chu a bûkin a pê a; silvara siam tûr bungbêl tinrêng

atân pawh silvar hman zât tûr nê lam a bûkin a pe zêl a;

¹⁵rangkachak khâwnvâr dahna tûr leh a rangkachak khâwnvâr rih zâwnng te, khâwnvâr leh a hûnna rih zâwnng te pawh bûk thlap zêl a ni a; silvar khâwnvâr dahna leh a khâwnvâr hûnna te pawh khâwnvâr dahna hmun azira dân ang taka bûk vek zêl a ni.

¹⁶Chhangserh dahna tûr rangkachak dawhkân atân te, silvar dawhkân atân te, dawhkân tina a ngai zât chu a bûka pêk chhuah zêl a ni;

¹⁷rangkachak hlangin thîrkut te, chawhtawlh te, rangkachak no te, rangkachak bêldar siam nân—bêldar pakhat zêlah a bûkin rangkachak a pê a; silvar bêldar atân pawh bêl tin daih tûr a bûk vek zêl a;

¹⁸rimtui hâlna maichâm siam nân rangkachak thlitfîm te, tawhlailîr siam nân te, LALPA thuthlung bâwm chung khuhna cherub thlân a zâr hliap tûr rangkachak hman zât lamin a bûk vek a.

¹⁹“Hêng ruahman dân tinrêng hi LALPAN ama kuta ziakin min hriatthiamtîr vek a ni,” tiin Davida chuan a sawi a.

²⁰Davida chuan a fapa Solomona hnênah, “Chak tak leh huai takin awm la, thawk tan nghâl rawh; hlâu suh la, zâm hek suh. LALPA Pathian chu ka Pathian a ni si a—a awmpui zêl ang che. LALPA in sak hna tinrêng i zawh vek hmâ chuan a kalsan lo vang che a, a phatsan hek lo vang che.

²¹Pathian in sak hna tinrêng thawk tûrin puithiam-hote leh Levi-hote chu a pâwl pâwlin an inrem fel tawh a; hna tûl tinrêng thawk tûrin mi themthiam leh thawk tûra inpe zo tak tak an awm zêl ang; chûnga hruiatute leh mi zawng zawng chu i thû thûa awm vek tûr an ni asin,” a ti a.

BUNG 29

TEMPUL SAKNA THAWHLÂWM

¹Lal Davida chuan pung khâwm ho zawng zawng hnênah: “Ka fapa Solomona, Pathianin a thlan chhun hi, a la naupangin chinchâng a la hre rih lo va; hna thawh tûr hmabâk a ko nasa si a, tempul lah chu mihring tân ni lovin Pathian tân a ni bawh si a.

²Ka Pathian in tân hian theitâwp tak meuh ka lo chhuah tawh a: rangkachaka siam tûr rangkachak thil te, silvara siam tûr silvar thil te, dâra siam tûr dâr thil te, thîra siam tûr thîr te, thinga siam tûr thing te, a bel tûr onuk lung te, lungmâwi rawng chi hrang hrang, lunghlu chi tinrêng te, sailungvâr te chu a awmin a awm rei rui a.

³Chûng bâkah chuan, ka Pathian in tûr hi ka vei êm avângin in thianghlîm sak nâna ka inpuahchahna zawng zawng bâkah, ka Pathian in pual hian keima sum bâwm bika mi rangkachak leh silvar heti zât hi ka pe bawh:

⁴a inchhûng bang chei nân rangkachak talent 3, 000 Ophir rangkachak ngat leh, silvar rawh thianghlîm talent 7,000 nê;

⁵rangkachaka siam tûr rangkachak thil te, silvara siam tûr silvar thil te chu, a tûl apianga kut themthiamte hman tûr a ni. Vawiin hian tu nge LALPA tâna mahni thil hlân duh vê le?” a ti a.

⁶Tichuan, chhûngkaw tin hotute, Israel hnam puipa te, sâng hotute leh za hotute, lal hnathawk hotute chuan phal takin thilpêk

an hlân zung zung a.

⁷Pathian in sakna tûra an thil pêk khâwm zawng zawng chu rangkachak talent sâng ngâ leh darik sîng khat, silvar talent sîng khat, dâr talent sîng khat leh sâng riat leh, thîr talent nuai khat zet a ni.

⁸Lunghlu nei apiangin LALPA ina sum bâwmah chuan Gerson mi Jehiela kutah an pe zêl baw k a.

⁹Mipuite chuan LALPA tâna rilru sakhat pûa, phal taka an pêk avângin an hlim ta êm êm a; Lal Davida phe chu hlim tak têin a hlim a ni.

DAVIDA'N PATHIAN A FAK

¹⁰Pung khâwmho zawng zawng hmâah Davida chuan LALPA a fak a; Davida chuan: “LALPA Israelte Pathian, Kan Pa chu chatuana fakin awm ang che,” a ti a.

¹¹Aw LALPA, ropuina te, Thiltihtheihna te, mâwina te, Hnehna te leh zahawmna te chu i ta a ni; Lei leh vâna thil tinrêng hi i ta a ni si a; Aw LALPA, lalram hi i ta a ni a, Thuneitu chungnung ber i ni e.

¹²Hausaknate leh chawimawina chu i hnêna mi a ni a, Engkim chungah rorêltu i ni. I kut hi chakna leh thiltihtheihna a ni a; I kut hi mi tihropuina leh, Mi tin tân chakna petu a ni.

¹³“Chuvângin kan Pathian, Lawmthû kan hrilh chein I hming ropui kan fak e.

¹⁴Mahse, kei leh ka mite hi tute nge maw kan niha, Heti taka kan inpêk phal tâk mai le? Engkim i hnêna mi a ni si a, I ta tho a ni kan pêk che ni.

¹⁵I hmâah mikhual châmbâng mai kan ni, Kan thlahtute ang mai khân; Kan lei kumte lah hlimthlâ ang maia Beisei bo a ni si a.

¹⁶“Aw LALPA kan Pathian, i hming thianghlim puala hêng in sakna tûr kan chhêk khâwm zozâi hi i kuta mi a ni a, i ta vek a ni.

¹⁷Ka Pathian, nang chuan thinlung lam i fiah thîn a, mi nun ngîlte hi i lâwm zâwn an ni tih ka hria a. Kei pawhin ka thinlung takin hêng thilte hi phal takin ka pê a ni; i mi heta awmte pawhin phal tak leh lâwm takin an pê tih ka hmuh hian mi tilâwm êm êm a ni.

¹⁸Aw LALPA, kan pu Abrahama te, Isaaka te, Israela te Pathian, hetiang tak hi i mite rilru puthmang lo ni kumkhua sela, an thinlung hi nangma lamah chelh tlat ang che.

¹⁹Ka fapa Solomona hian i thupêk te, i thuhriattîr te, i dân te a zawm tlat a, tempul sak nâna châk ka lâk khâwm zawng zawngte thawk chhuak thei tûrin rinawmna thinlung pe ang che,” a ti a.

²⁰Davida chuan pung khâwmho zawng zawng hnênah, “Tûnah LALPA in Pathian chu fak rawh u le,” a ti a. Mipui zawng zawng chuan an thlahtute LALPA Pathian chu an fak a, LALPA leh lal hmâah chuan an kûn a, chibai an buk dual dual a.

SOLOMONA, LAL ATÂNA HRIAK THIH

²¹LALPA hnênah an inthâwi a, a tûkah chuan LALPA hnênah hâlral thilhlân atân: bâwngpa sâng khat, berâmpa sâng khat, berâm no sâng khat, in tûr thilhlante nê, Israel mi zawng zawng huapin inthâwina an hlân mup mup a.

²²Chumi ni chuan LALPA hmâah hlim êm êmin an eiin an in a. Davida fapa Solomona chu lalah an puang nawn leh a, LALPA hmâah an lû ber ni tûr leh, Zadoka chu an puithiam ni tûrin hriak an thih a.

²³Tichuan, Solomona chu LALPA lalthutthlêngah chuan a pa Davida aiah a thû ta a, a lo hmuingîl hlê a; Israel mi zawng zawngin a thû an zâwm a.

²⁴Hotute leh mi chak zawng zawng te, Lal Davida fapa zawng zawngte pawh Lal Solomona hnênah chuan an intulût vek a.

²⁵LALPA chuan Solomona chu Israel mi zawng zawng mithmuhah nasa takin a châwi sâng a, tûn hmâa Israel lalten an hlawh phâk ngai loh lal ropuina a chungah hlan a ni ta a.

DAVIDA LALNA A TÂWP TA

²⁶Chutiang chuan Israelte chungah Jesaia fapa Davida lalna chu a lo tâwp ta a.

²⁷Israelte chungah kum 40 chhûng ro a rêl a; Hebronah kum 7, Jerusalemah kum 33 chhûng ro a rêl a ni.

²⁸Kum upa tak a nihin a thî a, hausakna leh chawimawina dawngin, a dam chhûng hun pawh kokim takin a hmang zo a ni.

²⁹Lal Davida thiltithe chu, a bul aţanga a tâwp thlengin hmutheitu Samuela lehkhâbûah te, zâwlnei Nathana lehkhâbûah te, hmutheitu Gada lehkhâbûah te,

³⁰a rorêl dân leh a chakzia te, a thil tawn te, Israelte leh ram tin lalrama thil thleng chanchinte nê a chuang a ni lo vem ni?

2 CHRONICLES

Ziah tu: Ezra • Ziah kum: B.C. 450.

¹Chronicle bu ang bawkin 2 Chronicle hi Ezra ziah a ni tih hi a zirtute pawm tlân dân ber a ni. Lal Solomona rorêl hun atanga Juda lalte chanchin chhui chhovin Babulon sala an tân hun thleng, kum 427 chhûnga thil thleng chanchin a ni. 2 Chronicle thu chah chu, Juda saltâng chhuak lehten thlarauva an dinhmun an hriat chian a, an hnam chanchina a thim lam ngawt en lova, Pathian biak dân dik tak thar thawhleha lam hawi zâwng leh, a êng lamah chuan nakina anmahni ram ngeia Messia lalram lo indinthar leh tûr beiseina siamsak a ni. Bible-in revival chanchin a sawi zinga sei leh chipchiar ber, Hezekia leh Josia te lal laia mi pawh fiah taka târlan a ni. 2 Chronicle hi Bible-a bu 14-na a ni a; a chhûngah hian bung 36 leh châng 822 a awm.

BUNG 1

SOLOMONAN FINNA A DÎL

¹Davida fapa Solomona chu a lal ramah chuan ngêlghet takin a lo awm ta a, amah awmpuitu LALPA a Pathian chuan nasa takin a châwi sâng a.

²Solomona chuan Israel mi zawng zawng te, sâng hotute leh za hotute, rorêltute, Israel ram puma hotute leh chhûngkaw puipa zawng zawngte chu a bia a.

³Solomona leh a hnêna mipui awm zawng zawng chu Gibeon hmun sângah chuan an kal a; chutah chuan thlalêra LALPA chhiahhlawh Mosia siam Pathian biakbûk kha a awm a.

⁴Pathian thuthlung bâwm erawh chu Davidan Kirjath Jearim aţangin a la chho va, a dahna tûrin Jerusalemah chuan Davidan puan in pawh a kaih tawh bawh a.

⁵Hura fapa, Uria fapa Bezalela siam dâr mâichâm kha LALPA biakbûk hmâah a dah a; Solomona leh mipuite chuan Amah chu chutah chuan an pan a.

⁶Biakbûk puan in bula dâr maichâm awmnaah chuan Solomona chu LALPA hmâah a kal chho va, hâlral thilhlân sâng khat a hlân a.

⁷Chumi zân chuan Solomona hnênah Pathian a inlâr a, “Dîl rawh le! Eng thil nge ka pêk ang che?” a ti a.

⁸Solomona chuan Pathian hnênah: “Ka pa Davida chungah zahngaihna nasa tak i lantîr a, a aiawhin lalah te min siam ta hial a.

⁹Tûnah hian âw LALPA Pathian, ka pa Davida hnêna i thutiam kha hlen ang che, leia vaivut zât zeta tam mipui chungah lalah mi siam ta si a.

¹⁰Hêng mipuite hmâa lûta chhuak thei tûr hian hriatna leh finna min pê ang che; i mi heti zozâi chungah tu nge rorêl thei ang le?” a ti a.

¹¹Pathian chuan Solomona hnênah: “Hausakna leh sum leh pâi te, châwimâwina te, i hmêlma nunna te dîl lova, dam reina pawh

dîl chuang lova—ka mite chungah lala ka siam chhan che anga an tân fel taka ro i rêl theih nâna finna leh hriatna dîl duh zâwkna thînlung i put avângin—

¹²finna leh hriatna chu pêk i ni ta e; tûn hmâa lal lo awm tawhte leh tûn hnûa lo la awm tûrte pawhin an neih phâk loh hausakna te, sum leh pâi te leh châwimâwina te chu ka pe bawh ang che,” a ti a.

SOLOMONA SUM HNÂR LEH SIPAI CHAKNA

¹³Solomona chu Gibeon hmun sâng biakbûk puan in atang chuan Jerusalemah a hâw leh ta a, Israelte chungah ro a rêl ta a.

¹⁴Solomona chuan tawlaillîr leh sakawr chung chuang mite a khâwm a; tawlaillîr 1,400 leh sakawr chung chuang mi 12,000 a nei a, chûngte chu tawlaillîr khawpuiah te leh Jerusalemah lal awmnaah te a dah a.

¹⁵Lal rorêlna hnuaia Jerusalemah rangkachak leh silvar tamzia chu lung ang mai a ni a, sidar thing lah chu phâia theipui kûng ang maiin a tam bawh a.

¹⁶Solomona chuan Aigupta leh Keveh atangin sakawr a tawlh lût a; lal sumdâwngten Keveh aţangin an lei thîn a.

¹⁷Tawlaillîr chu Aigupta aţangin an lei a, an tawlh lût a, tawlaillîr pakhat lei nân silvar sekel 600 zêl, sakawr pakhat manah sekel 150; chutiang chuan Hit mite leh Suria lal zawng zawngte hnênah sumdawnggho kal tlangin an hralh chhâwng leh thîn a ni.

BUNG 2

SOLOMONAN TEMPUL SAK A PUAHCHAH

¹Solomona chuan LALPA hming pualin tempul sak leh a lal in sak chu a tum nghet tlat a.

²Solomona chuan bungraw thiar tûrin mi 70,000, tlânga lung chher tûrin mi 80,000 leh, hnathawk vêngtu mi 3,600 a thlang chhuak a.

³Solomona chuan Tura lal Hirama hnênah tihian lehkha a thawn a: “Ka pa Davida hnêna a chênna in sakna tûr sidar thing i lo thawn thîn ang khân mi rawn thawn vê ta che.

⁴Ngai teh, LALPA ka Pathian hmingin tempul ka sa dawn a, chû chu a tâna serh thianghlîma, a hmâa rimtui hâla, chhangserh dah rengna tûr te, Sabbath nîah te, Thla Tharah te leh LALPA kan Pathian tâna kût hunah te tuk tin leh tlai tin hâlral thilhlân hlanna tûr a ni a.

⁵Kan Pathian hi pathian dang zawng aia ropui zâwk a nih avângin ka sak tum tempul pawh a ropui hlê dawn a ni.

⁶Nimahsela, vîn leh vânte vîn pawhin a khuap zo lo a ni a, tu nge tempul te han saksak thei ang le? A hmâa hâlral thil hlân mai loh chu, tempul meuh sa tûr hian kei hi eng nge maw ka nih le?

⁷Chuvângin mi themthiam—rangkachak te, silvar te, dâr leh thîr lam chher thiam, puan senduk leh senlâr leh puan dumpâwl te duang thiam, Judai leh Jerusalem vêla mi themthiam rual, ka pa Davida lo rawih thînte nêna thawk ho tûr, kermâwi lam thiamte tûnah min rawn thawn ta che.

⁸Chû lo pawh sidar thing te, fâr thing te, algum thing te chu Lebanon aţangin min rawn thawn la, i mite zîngah Lebanona

thing kih thiam tak tak an awm tih ka hria a; i mite chu ka chhiahhlawhten an rawn pui ang a,

⁹Tempul ka sak tîr hi a lena a ropui tham dâwn êm avângin thing pawh a ngai hnem dâwn si a.

¹⁰Tichuan, i chhiahhlawh thing kittute chu wheat kor 20,000, barli kor 20,000, uain bath 20,000 leh hriak kor 20,000 ka lo pe dâwn nia,” a ti a.

¹¹Tura lal Hirama chuan Solomona hnênah chhânna lehkha a ziaak a: “LALPA chuan a mite a hmangaih êm avângin an chungah lalah a lo siam ta che a nih hi,” tiin.

¹²Hirama chuan: “LALPA Israelte Pathian, lei leh vân siamtu chu fakin awm rawh se; Lal Davida hnênah LALPA tâna tempul leh mahni puala lal in sa thei khawpa finna leh hriat thiamna nei fapa fing chu a lo pe si a!

¹³Hei le, mi themthiam tak, hriatthiamnaa thuam, ka mi thiam filawr Hurama chu ka rawn tîr e,

¹⁴(ani chu Dana thlah hmeichhe fapa a ni a, a pa chu Tura mi a ni a), mi themthiam a ni a, rangkachak leh silvar te, dâr leh thîr lam te, lung leh thing te, puan senduk leh a dumpâwl te, puan zai sîn leh a sen lâr te a khawih thiam vek a, thîl ker mâwi lam pawh sawi ang apiang a duang chhuak thiam a; i mi themthiamhote leh ka pu, i pa Davida mi thiamhote zîngah rawn thawk ve rawh se.

¹⁵Ka pu-in a lo sawi tâk wheat te, barli te, hriak te leh uain te chu a chhiahhlawhte hnênah hian rawn thawn sela.

¹⁶Keini'n Lebanon aţangin thing chu i mamawh zât zât kan lo kit ang a; Joppa tuipei kam thlengin pûmin kan rawn tawlh ang a, nangin Jerusalemah i thiar chho dâwn nia,” a ti a.

¹⁷Solomona chuan a pa Davidan a lo chhiar tawh ang khân, Israel rama hnam dang mi awmzât chu a chhiar ta a; mi 153,600 an awm a.

¹⁸Chûng zînga mi 70,000 chu thîl phurtu atân, mi 80,000 chu tlâng lama lungchhertu atân, mi 3,600 chu hnathawkho viltu atân a chhawr ta a.

BUNG 3

SOLOMONAN TEMPUL A SÂ

¹Solomona chuan a pa Davida hnêna LALPA inlârna hmun Jerusalemah Moria Tlâng Jebus mi Ornana hruih zâwl, Davidan a lo ruahman tawhna hmunah chuan LALPA in chu a sa ţan ta a.

²A sak ţan hun chu a lal kum lî-na, thla hnihna, a ni hnih niin a ni.

³Hei hi Solomonan Pathian in sak dân tîr thupêk a dawn dân chu a ni: A dung lam tawng 60 a ni a (chû chu a tehna tawng hlui a ni a), a vâng lam chu tawng 20 a ni.

⁴Hmun thianghlim hma lama hulhliap chu in vâng lam chen, tawng 20a sei a ni a, a sân lam chu 120* a ni. A chhûng lam chu rangkachak hlangin a luan chhuak vek a.

⁵Pindan zâu zâwk bang chu fâr thingin a thuah a, rangkachak ţa chhîn a tuam leh vek a, tûm thing leh khaidiat lem ker an chuantîr vek bawk a.

⁶In chei mâwi nân lunghlûin an chei a, rangkachak chu Parvaim aţanga an lâk a ni.

⁷In chu—a kalkhang te, a kawngka biang te, a bangte leh a kawngkhâr te chu rangkachaka luan vek a ni a; a bangah chuan cherub lemte an ker thluah a.

⁸Hmun Thianghlim Ber a siam a. A dung lam chu in pum vâng lam chen, tawng 20, a vâng lam pawh tawng 20 bawk a ni. Rangkachak ţa chi talent 600-in a luan chhuak vek a ni.

⁹A kilhna rih zâwng chu rangkachak sekel 50 bûk a ni a; pindan chungnung chu rangkachakin a luan a.

¹⁰Hmun Thianghlim Berah chuan cherub pahni a siam a, a kerin an ker a, rangkachakin an luan leh a.

¹¹Cherub thlâte chu kaih pharha tawng 20 a sei a ni: cherub thla pakhat chu tawng ngâ zêl a ni a, pindan bang a va tawh pha chiah a, a thla lehlam pawh tawng ngâ bawk a ni a, cherub pakhat zâwk thlâ nêl a insi tâwk leh chiah a;

¹²cherub pakhat zâwk thlâ pawh tawng ngâ bawk a ni a, chû chuan pindan bang lehlam a va dek chiah a, chû thlâ tawng ngâ sei chuan cherub pakhat zâwk thla hmâwr a va si leh bawk a ni.

¹³Hêng cherub thlazâr pharh te hian tawng 20 a hawlh phâk a. A chhûng lam hawiin an kein an dîng vê vê a ni.

¹⁴Puan zai sînin puanzâr chu a dumpâwl te, a senduk te leh a senlâr tein an ţial a, cherub lemin an zep ţial vek bawk a.

¹⁵Tempul hma lamah chuan tawng 35-a sâng ban pahni a phun a, ban chhîpa a lu bawk chu tawng ngâ vê vê sâng a ni bawk.

¹⁶A ban lu bawkah chuan, hmun thianghlim chhûngril zâwka an tih ang bawkin khaidiat ang hian a zem kual chiat a; khaidiat lemin a zem chungah chuan theibuhfai lem zâ lai a tlar tiar a.

¹⁷Chûng bante chu tempul hma lama dîng lam leh vei lamah a phun vê vê a; a dîng lama mi chu Jakin a ti a, a vei lama mi chu Boaza a ti a.

BUNG 4

TEMPUL CHHÛNG CHEIMÂWINA

¹Dârin maichâm a siam a: tawng 20 a sei, tawng 20-a zâu, tawng 10 a sâng a ni.

²Dârin tuizêm lian pui, a tlâng leh tlâng hawlh tlanga tawng sâwm a siam a; a kual siam a ni. A sân zâwng chu tawng ngâ a ni a, a tlâng chu teh kualin tawng 30-a sei a ni.

³A pang hnuai lamah bawngpa lemin an hualtîr a, tawng khatah sâwm zêl a awm a, tuizêm chu a kual chhuak vek a ni. An chhûn laiin bawngpa lemte chu tlar hnihin an chhûng a.

⁴Bawngpa 12 chungah a inngat a: pathumin hmar lam an hawi a, pathumin thlang lam, pathumin chhim lam, pathum dangin chhak lam an hawi a; inhnuchhawn zâwng theuhva dîng khâwm chungah tuizêm chu an hûng a ni.

⁵Tuizêm chhah zâwng chu kutphah bawk a ni a; no angin a tlâng chu a kual a, lili pâr pianhmang ang deuh a ni. Chû chuan bath 3,000 a dawng a.

⁶Chawhtawlh sâwm a siam a, insil nân vei lamah pangâ a dah a, dîng lamah pangâ a dah bawk a; hâlral thil an hlan dâwna insilna tûr a ni a, tuizêm erawh chu puithiamte insilna tûr a ni.

⁷Rangkachakin khâwnvâr dahna sâwm, pianhmang inang vekin a siam a, tempul chhûnghah chuan dîng lam leh vei lamah hmun nga vê vê-ah a hûng a.

⁸Dawhkân pawh sâwm a siam a, tempul chhûnghah chuan dîng lamah leh vei lamah panga vê vê a hûng a. Rangkachakin chawhtawlh zâ a siam bawk.

⁹Chûng bâkah chuan puithiamho chanpual kawt zâwl te, kawt zâwl zâu leh a luhna kawngkhâr te a siam a; chûng kawngkhârte chu dâra tuam a ni a.

¹⁰Tuizêm chu dîng lam, chhim chhak lamah a hûng a.

¹¹Hurama chuan bêl te, vutlawh te, chawhtawlh te a siam bawk a. Tichuan, Pathian in atâna Lal Solomonan tih tûr a tuk zawng chu Hurama chuan a ti zo ta a.

¹²Ban pahnih leh ban chhîpa lu bâwk, no bial tlâng arh ang te; a chei mâwina khaidiatin thlûr hniha a zem te;

¹³a thlûr hnih atâna a cheimâwina theibuhfai zali intlar (thlûr tinah theibuhfai zahnih vê vê, ban lu bâwk no bial tlâng arh hual vêla awm) te;

¹⁴tawllailîr leh tawllailîr chungah chawhtawlh te a siam bawk a;

¹⁵Tuizêm leh a hnuaia bâwnghpa 12 te nê;

¹⁶bêl te, vutlawh te, thîrkut te leh bungbêl zawng zawngte nê, kut themthiam hotu Hurama chuan LALPA in pual leh Lal Solomona pual atân dâr tle chiin a siam bawk a.

¹⁷Jordan phaia Sukkoth leh Zereda inkâra bellei hmun aţanga lalin a chhûntîr a ni.

¹⁸Solomona chuan chûng dâra siam bungbêlte chu a chhûng hnem khawp a, a bûk zât pawh hriat sên rual a ni lo.

¹⁹Chutiang chuan Solomonan Pathian ina bungbêl tinrêng chu a siam a: rangkachak maichâm leh chhangserh dahna dawhkân te;

²⁰hmun thianghlim ril zâwk hmâa, dân ang zêla chhit tûr, rangkachak hlanga siam khâwnvâr dahna leh a khâwnvâr te,

²¹rangkachak pangpâr te, khâwnvâr te leh a phita cheh rualna te chu rangkachak thianghlim ber chia siam a ni a;

²²khâwnvâr phita cheh rualna te, chawhtawlh te, fian te, rimtui hâl bûr te chu rangkachak hlang a ni a. Hmun thianghlima luhna, Hmun Thianghlim Ber kawngkhâr chhûngril te, tempul pindan zâu luhna kawngkhâr te chu rangkachak a ni.

BUNG 5

¹Tichuan, LALPA in sak hnâ zawng zawng chu Solomona chuan a zo ta a; a pa Davidan a lo serh hran thil: tangkarua te, rangkachak te leh hmanraw dang zawng zawng chu Solomona chuan a la lût vek a. Pathian ina sum bâwmah a dah a.

TEMPULAH THUTHLUNG BÂWM AN LA LÛT

²Solomona chuan Israel puipa te, hnam tina hotute, Israela thlah chhûngkaw puipa zawng zawng te chu, Davida Khawpui Zion aţanga LALPA thuthlung bâwm an lâk chho theihna tûrin Jerusalemah a ko khâwm vek a.

³Chutichuan, Israel mipa zawng zawng chu thla sarihna kûtah chuan lal hnênah an kal khâwm vek a.

⁴Israel mi zawng zawng an lo thlen khâwm lai chuan Levi-hote chuan bâwm chu an zâwn ta a.

⁵Thuthlung bâwm te, biakbûk puan in te, biakbûk chhûnga bungbêl thianghlim zawng zawngte chu an zâwn chho vek a.

⁶Lal Solomona leh a hnêna Israel mipui, thuthlung bâwm hmâa pung khâwmho zawng zawng chuan berâm leh bâwnghpa te chu chhiar sên loh khawpa tam an talh a, an inthâwi mup mup a.

⁷Puithiamte chuan LALPA thuthlung bâwm chu a awmna tûr hmun, tempul hmun thianghlim chhûngril zâwk, cherub thlâten an zârna hnuai, Hmun Thianghlim Berah chuan an dah ta a.

⁸Cherub-te chuan thuthlung bâwm chungah chuan thlâ an zâr duai a, bâwm leh a zâwnfungte chu cherub thlâte chuan an khuh a.

⁹A zâwnfungte chu a sei avângin a hmâwr chu hmun thianghlim chhûngril zâwk hma lamah a rawn lawr chhuak a, hmun thianghlim aţang pawhin a hmuh theih a; pâwn lam aţang chuan a hmuh theih loh thung. Tûn thlengin chutiang chuan a la awm.

¹⁰Bâwm chhûnghah chuan thil dang engmah a awm lo, Aigupta aţanga Israel fate lo chhuah laia LALPAN an hnêna thû a lo thlunpuina lungphêk pahnih, Mosian Horeb tlânga a dah tih loh chu.

¹¹Hmun Thianghlim Ber aţanga puithiamho an lo chhuah chuan (chuta puithiam awm zawng zawngte chu, a pâwl pâwla inthen chuang lovin an inserh thianghlim vek si a)

¹²Levi-ho zînga zâi mite, Asapha, Hemana leh Jeduthuna te chu an fapate leh an unaute nê puan zai sîn vâra inthuamin, dârbenthek te, tîngtang leh perhkhuangte kengin maichâm chhak lam kilah an dîng a, an zîngah chuan tâwtawrâwt hâm pâwl puithiam 120 an awm a—

¹³tichuan, tâwtawrâwt hâmtute leh hla satute chuan a rualin LALPA hnêna lâwmthu sawiin fakna hlâ an rem a, tâwtawrâwt leh dârbenthek leh rimâwi chi hrang hrang nê LALPA fakin, mi pakhat ang maiin a rualin: “Ani chu a ţha si a, A ngilneihna chu kumkhuain a awm dâwn si a,” tia an han âu dual dual chuan chû in, LALPA in chhûng chu chhûmin a rawn bawh khat ta mup mai a,

¹⁴chhûm avâng chuan puithiamte pawh chuan an rawngbâwl hnâ chu an chhunzawm thei ta lo va; Pathian in chu LALPA ropuinain a tikhat ta mup mai si a.

BUNG 6

¹Solomona chuan tihian a ti a: “LALPA chuan chhûm dum zîngah a awm dâwn tih a sawi kha.

²In ropui tak ka saksak ta che a, Kumkhuaa i awmna hmun tûr chu,” tiin.

TEMPUL HLAN NĪA SOLOMONA THU SAWI

³Lal chuan mipui lam hawiin Israel mipui pung khâwmte chu mal a sâwm a, Israel mipuite chu an dîng thup a.

⁴Ani chuan: “LALPA Israelte Pathian, ka pa Davida hnêna thu a lo sawite a kut ngeia hlen chhuaktu chu fak in awm rawh se.

⁵Ani chuan Aigupta ram aţanga ka mite ka hruai chhuah ni ata tawh Israel hnam zînga eng khua mah hi ka hming awmna tûr in sak nân ka la thlang ngai lo va; ka mi Israelte chung a rorêltu tûr mi pawh ka la thlang ngai hek lo.

⁶Tûnah chuan ka hming awmna tûrin Jerusalem ka thlang ta a, Davida chu ka mi Israelte chung a rorêltu atân ka thlang ta a ni,’ a ti a.

⁷Ka pa Davida khân LALPA Israelte Pathian hming awmna tûr in sak a lo rilrûk tlat a.

⁸Mahse, LALPA chuan ka pa Davida hnênah, ‘Ka hming awmna tûra tempul sak i rilrûk thîn a, hetiang duhna thinlung i pû hi i tiţha e.

⁹Nimahsela, nang chuan tempul chu i sa tûr a ni lo, i rila rah i fapain tempul chu keima hming pualin a rawn sa zâwk tûr a ni,’ a ti a.

¹⁰LALPA chuan a thu sawi ang chu a rawn hlen chhuak a, kei chu ka pa Davida aiawhin, LALPAN a lo tiam tawh angin Israel lalţhutthlêngah chuan ka lo ţhu ta a; tihian LALPA Israelte Pathian hming pualin tempul chu ka lo sa ta a nih hi.

¹¹Chutah chuan LALPAN Israel fate nêna thû an thlunna bâwm chu ka dah ta baw a ni,” a ti a.

SOLOMONAN TAWNGTAIIN A HLÂN

¹²Solomona chu LALPA maichâm hmâah Israel mipui pung khâwmho zawng zawng mit hmuhah chuan a dîng chhuak a, a bân a phar a.

¹³(Solomona chuan dârin dawhkân, tawng ngâa sei, tawng ngâa zâu, tawng thuma sângin tualzâwlah chuan a dawh kâng a; tah chuan a dîng chhuak a, Israel mipui pung khâwmho zawng zawng hmâah chuan a ţhingthî a, a bân chu vân lamah a phar chhuak a),

¹⁴“LALPA, Israelte Pathian, nang ang hi lei leh vânah Pathian dang rêng an awm lo; an thinlung zawng zawng a kawng zawhtu i chhiahhlawhte hnênah i thuthlung leh i zahngaihna i lantîr thîn a.

¹⁵I chhiahhlawh ka pa Davida hnênah i thutiam i wawng tlat a; wawiina kan hmuh ang hian i kâa i sawi chu i kutin i hlen chhuak thîn a.

¹⁶Chuvângin, LALPA Israelte Pathian, i chhiahhlawh ka pa Davida hnêna, ‘Nangmah ang bawka i thlahten ka dânte zâwm tûr leh an kawng zawh lai te fimkhur taka an zawh chuan, ka hmâah hian Israel lalţhutthlênga ţhu tûr i tlachham lo vang,’ tia i lo tiam tawh kha hlen ang che.

¹⁷Tûnah hian âw LALPA, Israelte Pathian, i chhiahhlawh Davida hnêna i sawi tâk ang ngeiin i thû chu thlen diktîr ang che.

¹⁸“Mahse, Pathian meuh chu lei mihringte zîngah a chêng vê ang maw? Ngai teh, vân leh vânte vân pawhin a dâwl zo lo che a ni a. Hê tempul ka sak phei hi chuan a va dâwl zo lo lehzuâl dâwn che êm!

¹⁹Chuvângin, i chhiahhlawh tawngţaina leh dîlna hi lo ngaithla la, Aw LALPA ka Pathian, i hmâa i chhiahhlawh âu âw leh tawngţaina hi lo ngaithla mawlh ang che:

²⁰I hming awmna tûra i tihna hmun ngei, hemi hmun lam hawia i chhiahhlawh tawngţainate chu i lo ngaithlâk theih nân, a chhûn a zânin hê tempul lamah hian i mit rawn lèn reng ang che.

²¹I chhiahhlawh leh i mi Israelten hê hmun lam hawia an tawngţaiin, an dîlnate chu lo ngaihlâksak ang che. I chênna hmun vân aţangin lo ngaithlâ la, i hriat hunin lo ngaidam ang che.

²²“Mi tûpawhin a thenawm laka sual a lo tih a, chhia an chhamtîr a, hê tempula i maichâm hmaa chhia an chham chuan

²³nangin vân aţangin lo ngaithla la, lo chê ang che; mi sual chu a sual man a lu chungah tlâ sela, mi dik chu a dikna ang zêlin thiam chantîrin, i chhiahhlawhte ro rêlsak ang che.

²⁴“I mi Israelte hi i laka an lo sual avânga an hmêlmâten an hneh a, i hming ţana an rawn inlamlêt a, hê tempulah hian tawngţaiia i hnêna an rawn ngen chuan

²⁵vân aţangin lo ngaithlâ la, i mi Israelte sualna chu ngaidam ang che; anmahni leh an pipute hnêna i pêk ramah hian hruai kîr leh bawk ang che.

²⁶“I chung a sual avânga vân a lo inkhâr pina, ruah rêng rêng a sîr loh va, mahse i hming ţana hê hmun lam hawia an tawngţaiia, i tihrehawmna avânga an sualte an sim chuan,

²⁷vân aţang khân lo ngaithla la, i chhiahhlawhte leh i mi Israelte sualna chu ngaidam chungin an kalna tûr kawng thâ chu kawhmuh zêl la; i mite hnêna an ro luah tûra i pêk ramah chuan ruah sîrtîr ang che.

²⁸“Ram chhûngah ţâm a lo tlâk a, hrî emaw, thlai hrî emaw, hmuar hrî emaw a lo lèn a, khaukhuap leh khau te a lo puan a; an hmêlmâten an khuah te an rawn hual beh a; eng hrichhia leh eng natna pawh a lo thlenin,

²⁹mimalin emaw, i mi Israel zawng zawngten emaw tawngţaiia dîlna an rawn thlena, mi tinin mahni tâwka phurrit leh lungngaihna neia an inhriata, hê tempul lam hawia bân an rawn phar chuan:

³⁰i chênna vân aţang khân lo ngaithlâ la, ngaidam ang che; tichuan, mi tinte chu an thinlunga an awm dân i hriatsak ang zêlin an chungah ti ang che (nang chauh hi mihring fate thinlung hretu i ni si a);

³¹tichuan nang chu an ţih ang che a, kan thlahtute hnêna i pêk rama an awm chhûngin i kawng chu an zawh thei dâwn nia.

³²“Hêng bâkah hian hnam dang, i mi Israel ni vê lo, i hming ropui leh i kut chaka bân i phar avânga ram hla tak aţanga lo kaltan hê tempula an rawn tawngţai chuan

³³i awmna vân aţang khân lo ngaithla la, ram dang mite pawhin an koh dân ang zêl chein an chungah ti ang che. Tichuan, i mi Israelte ang bawkin khawvêla hnam zawng zawngten i hming an lo hria ang a, an ţih vê ang che a, hê in hi i hming pûa ka sak a

ni tih an hre vê dâwn nia.

³⁴“An hmêlmâte do tûra i mite an chhuahin, khawiah pawh tîr la, hê khawpui i thlan leh, i hming awmna atâna ka sak hê tempul lam hawia i hnêna an ãawngtai chuan,

³⁵vân ațangin ãawngtai an dîl te chu lo ngaithla la, an thu chu lo ãan tlat ang che.

³⁶“I laka an lo sual a (sualna nei lo tûmah an awm si lo va), an chungah i thinur a, hmêlmâte kuta i pêk a, ram hla leh hnâiah sala hruai an nih hunah;

³⁷sala hruaia an awmna ramah chuan anmahni inhre chhuakin, ‘Kan lo sual ta a, kan tidik lo va, suaksual takin kan lo ti ta a ni,’ tia inlamlêta, sala an tâna ram ațanga i hnêna an ãawngtai chuan—

³⁸sala an tâna ram ațanga an thinlung leh an thlarau zawnzawng nên i lam an hawi leh a, an thlahtute i pêk ram leh, i thlan khawpui leh i hming awm nâna tempul ka sak lam hawia an rawn ãawngtai hunah

³⁹i chênna vân ațangin an ãawngtainate leh an dîlnate chu lo ngaithla la, an thû chu lo ãan tlat la, i laka i mite tihsualna chu ngaidam ang che.

⁴⁰Tûnah hian ka Pathian, hê hmuna ãawngtainaah hian i mit menga i beng lo chhi tûrin ka ngên a che.

⁴¹“Khai le, tûnah hian Aw LALPA Pathian, i chawlhna hmunah hian lo tho teh, Nang leh i chakna bâwm nên khân. Aw LALPA Pathian, i puithiamte chu chhandamnain thuam la, I mi thianghlimte chu ãatnain hlim rawh se.

⁴²“Aw LALPA Pathian, i hriakthiha hmêl hi hawisan suh la; I chhiahhlawh Davida lainatnate kha hre reng ang che,” a ti a.

BUNG 7

SOLOMONAN TEMPUL A HLÂN

¹Solomona ãawngtai zawnzawng chuan vân ațangin mei a lo tlâ a, hâlrâl thilhlante leh inthâwinate chu a kâng ral ta vek a; LALPA ropuina chuan tempul chu a luah khat ta a.

²LALPA ropuinain LALPA in chu a luah khah vek avângin puithiamte chu LALPA inah chuan an lût thei ta lo va.

³Israel mipui zawnzawngten mei lo tlâk thlâk dân leh, tempula LALPA ropuina an han hmuh chuan, chhuat zâwlah chuan an bawkkhup a, LALPA chu fakîn chibai an bûk a: “Ani chu a ãa si a, A ngilneihna chu kumkhuain a awm dâwn si a,” tiin an sawi dual dual a.

⁴Lal leh mipui zawnzawng chuan LALPA hmâah inthâwina thil an hlân a.

⁵Lal Solomona chuan bâwngpa sîngnhîh leh sângnhîh leh berâm nuai khat inthâwi nân a hlân a. Chutiang tak chuan lal leh mipuite chuan Pathian in chu an hlân ta a ni.

⁶Puithiamte chuan an hnâ ãeuh an han thawk a; Levi-hoten LALPA fakna tûr rimâwi chi tinrêng, LAL Davidan LALPA fak nâna a lo phuah sâ, “A ngilneihna chu kumkhuain a awm dâwn si a,” tih chu Davidan a lo hlan ãin angin an sa ãup ãup a. Israel mipui zawnzawng dinna ep zâwngin puithiamte chuan

tâwtawrâwt an hân tuar tuar a.

⁷Solomona chuan LALPA in hmâ chiaha tual zâwl chu a hlân thianghlim bawk a; chutah chuan hâlrâl thilhlân te, remna thilhlân sa thau te a hlân a, Solomonan dâr maichâm a siamah khân chûng hâlrâl thilhlân te, buhbâl thilhlân te leh sa thâu te chu han leng ziazâng a ni si lo va.

⁸Chumi ãum chuan Solomona leh Israel mi zawnzawngin ni sarih chhûng kût an hmang a, Hamath luhna ațanga Aigupta Lui thlengin mipui tam tak an pung khâwm a.

⁹Ni riat nâah chuan inkhâwmpui thianghlim an hmang a, maichâm hlan nân ni sarih, kût nân ni sarih an lo hmang tawh a.

¹⁰Thla sarihna, ni 23-ni chuan Davida chungah te, Solomona leh ama mi Israelte chungah te LALPA ãat êm avângi thinlung hlim leh lâwm chungin mipuite chu anmahni in lamah a ãintîr ta a.

¹¹Tichuan, Solomona chuan LALPA in leh lal in chu a sa zo ta a; a tum dân ang takin LALPA in leh ama in chu Solomona chuan tuang takin a sa puitling ta a ni.

SOLOMONA HNÊNA PATHIAN INLÂR VAWI 2-NA

¹²LALPA chu Solomona hnênah zânah a inlâr leh a: “I ãawngtainate ka lo hria a, hê hmun hi keima hnêna inthâwina in atâna ka thlan a ni.

¹³Vân ka khâra, ruah a sûr loh emaw, ram ei chhe tûra khaukhuap rual ka koh emaw, ka mite zîngah hrî ka lêtîr emaw a nih pawhin,

¹⁴ka hming pû ka mite chu an inngaihtlâwm a, an ãawngtai a, ka hmêl an zawn, an awm dân sualte an hawisan chuan vân ațangin ka lo ngaithla ang a, an sualte ka ngaidam ang a, an ram chu ka tidam leh ang.

¹⁵Hê hmuna ãawngtainaah hian ka mit ka lo meng ang a, ka beng ka lo chhi bawk ang.

¹⁶Hê in hi kumkhuaa ka hming a awm theih nân ka thlang tawh a, ka serh hrang tawh a; hetah hian ka mit leh ka thinlung a chêng kumkhua tawh ang.

¹⁷Nang pawh, i pa Davida anga ka bula i awm reng a, thû ka pêk che ang zêla i tih a, ka thuruatte leh ka rorêlnate i zawn reng chuan

¹⁸i pa Davida hnêna thû ka thlun tâk ang khân, i lalrama lalthutthlêng hi ka tinghet tlat ang a, ‘Israelte rorêltu tûr i tlachham ngai lo vang.’

¹⁹“Mahse, ka thuruatte leh ka thupêk i hmâa ka dahte zâwm lova i hawisana, pathian dangte rawngbâwl tûra i pênisan a, chibai i bûk vaih chuan

²⁰an hnêna ka pêk tawh hê ka ram ațang hian anniho chu ka paih chhuak ang a; ka hming puala hê in ka lo serh thianghlim tawh pawh hi ka hmuh phâk lohva ka hnâwl bo daih ang a, mi tin tân diriam chungah kamchhe tleuhna ang lekah ka la siam ang.

²¹“Hê in châwi sâna awm hi a bul vêla kal apiangin mak tiin, ‘Engtizia nge LALPAN hê ram leh hê in hi hetia a tih tâk mai?’ an la ti ang a.

²²Heti hian an la ti ang, ‘LALPA, an thlahtute Pathian, Aigupta ram aṭanga hruai chhuaktu chu an phatsan a, pathian dangte vuanin chibai an bûk a, an rawngte an bâwlsan a; chuwângin hetiang chhiatna hi an chungah a thlentîr ta a ni,’ tiin,” a ti a.

BUNG 8

SOLOMONA HLAHWTILINNA DANGTE

¹Solomonan LALPA in leh ama in a sak chhûng kum sawmhnih a lo vei chuan,

²Hiraman Solomona a pêk tâk khuate chu Solomona chuan a din ṭha a; chutah chuan Israel fate chu a chêntîr a.

³Solomona chu Hamath Zoba khuah a kal a, a va la a.

⁴Thlalêrah Tadmor khuah leh Hamath bialah bungraw dahna khuah te a din bawk a.

⁵Beth Horon Chuanchung leh Beth Horon Chuanhnuai kulh nei khuate chu an kulh bang te, kawngkhâr te leh a kalhna te a din nghet a,

⁶Baalath khuah leh Solomonan bungrua a dahna khuah te, tawllailîr dahna leh sakawr chung chuang mite awmna khuah zawng zawng te, Jerusalem leh Lebanon leh a lalram chhûnga in sak a duhna hmun zawng zawngah te chuan a sa zo ta a.

⁷Israel mi ni vê lo Hit mite, Amor mite, Periz mite, Hiv mite leh Jebus mite zînga a kuangbâng—

⁸Israelten an tihbora tâk lohte thlah kal zêl, ram chhûnga la awm vê te— chûng mite chu rawih luiha hnathawktu atân Solomona chuan a chhawr ta a ni, tûn thleng hian.

⁹Solomona chuan Israel fate chu hetiang chhiahhlawh hnâ hi a thawhtîr vê lo. Ṭhenkhat chu indo mite, a sipai hotute, a tawllailîr pâwl hotute, a sakawr chung chuang hotûah te an ṭang zâwk a ni.

¹⁰Mi dangte chu Lal Solomona sorkara miliente an ni: mipuite tâna thawktu mi zahnih sawmngâ an awm a.

¹¹Solomona chuan Pharoa fanu chu Davida Khawpui aṭangin a tâna a saksak inah a hruai lût a, “Ka nupui chu Israel lal Davida ina awm reng tûr a ni lo ve, LALPA thuthlunna bâwm thlenna hmun thianghlim a ni si a,” a ti a ni.

¹²Solomona chuan hulhiap kawta LALPA maichâm a siamah chuan LALPA hnênah hâlral thilhlân a hlân a,

¹³Mosia thupêk angin ni tina hlan tûr chí te, Sabbath nîa hlan tûr te, Thlathar nîa hlan tûr te leh kum khat chhûnga ṭum thum hman tûr kût hrang hrang— Chhang dâwidim tel lo Kût te, Chawlhkâr Kût te leh Bâwkte Kût te a ni a.

¹⁴A pa Davida remruat ang zêlin, puithiamho rawngbâwl hunbî te, Leviho rawngbâwl hunbî (puithiamte hmâa fakna hlân a sak dân tûr) te chu a ni biîn a siam remsak a; kawngka tin vêngtute chenin, Pathian mi Davida thupêk angin a ruat felsak bawk a.

¹⁵Sum bâwm enkawl dânah pawh puithiamte leh Levi-hote tâna lal thupêk chu tidanglam lovin an zawm zêl a ni.

¹⁶LALPA in sa tûra lung an phûm ni aṭanga an sak zawh thlengin Solomona hnathawh zawng zawng chu a fel vêl vek a. Tichuan, LALPA in sak chu zawh a ni ta a.

¹⁷Solomona chu Edom rama tuipui kam khuah, Ezion Geber leh Elath-ah chuan a va kal a.

¹⁸Hirama chuan a mite zînga tuipui chinchâng hriate kutah lawngte a thawn a. Chûng mite chu Solomona mite nêl Ophir-ah an kal a, chumi hmun aṭang chuan rangkachak talent 450 an rawn hâwn a, Lal Solomona hnênah an rawn thlen a.

BUNG 9

SHEBA LALNUIN SOLOMONA A FAK

¹Sheba Lalnuin Solomona hming thanzia a lo hriat chuan, Solomona chu thu khirh tak tak nêna fiah tumin Jerusalemah a rawn pan a; mawsawla te, rangkachak te leh lungmantam ṭahnem tak sanghâwngsei phurh tîrin ṭhuihruai tam tak nêl a lo thawk a; Solomona hnên a lo thlen chuan a rilrûa a pâi zawng zawng chu a phawrh fâi vek a.

²Solomona chuan a zawhna zawng zawng chu a chhâng vek a; Solomona chuan chhân theih loh khawpa harsatna engmah a nei lo.

³Sheba lalnuin Solomona finzia te, a insak te,

⁴a dawhkâna ei tûr chhawp te, a khâwnbâwlho ṭhutna rem dân te, tîrhchhiahho chêt vêl dân leh an incheina te, a no hlântute leh an inchei dân te leh LALPA in a panna kawng te a han hmuh meuh chuan rilru mûmal pawh a nei ta lo va.

⁵Lal hnênah chuan, “Kan rama i chanchin leh i finzia an sawi ṭhinte kha a lo dik ngei a nih hi.

⁶Mahse keimah ka lo kal a, ka mit ngeia ka rawn hmuh hmâ chuan ka âwih duh lo va; dik tak chuan, i finna ropuizia hi a chanvê pawh min lo la hrilh lo zâwk a nih hi. I hmingthanzia ka lo hriat kha i khûm daih mai.

⁷I mite hi an vannei teh e, i finna thû ngaithla phâa awm hêng i chhiahhlawhhote hi an va nihlawh tak êm!

⁸LALPA i Pathian, duat taka a lalṭhutthlênga lal atâna hlâng kâitu che LALPA i Pathian chu fakin awm rawh se! I Pathian chuan Israelte hi a hmangaih êm avânga kumkhuah a dinngheh nân, diknaa rorêl tûrin an lal atân a lo siam che a nih hi,” a ti a.

⁹Ani chuan rangkachak talent 120 leh, mawsawla leh lungmantam ṭahnem tham tak a rawn ken chu lal hnênah a hlân a; Sheba lalnuin Lal Solomona a pêk mawsawla anga ṭhâ rêng rêng a la awm ngai lo.

¹⁰Hirama chhiahhlawhte leh Solomona chhiahhlawhte pawhin Ophir aṭangin rangkachak te, algum thing leh lunghlûte an rawn phur hâw zut zut ṭhîn a.

¹¹Lal chuan algum thingte chu LALPA in leh lal in inkâr kawng chhuatphah atân te, zai mite ṭingṭang leh perhkuang tuk nân te a hmang a; Judai ramah tûn hmâin chutiang chu an la hmu ngai rêng rêng lo.

¹²Lal Solomona chuan Sheba lalnu chu a duh apiang leh a dîl apiang a pê a, lal tâna a rawn kensak aia tam fê a pê a ni. Tichuan, ani chu a ṭhuihruaite nêl chuan an ram lamah a haw leh ta a.

SOLOMONA HAUSAKNA ROPUI

¹³Kum tina Solomonan rangkachak a lâk luh chu talent 666 zet a ni—

¹⁴sumdâwngte leh dâwrkâite pêk luh vê tiam lovin. Arabia lal zawng zawngte leh a ram chhûnga governorten Solomona chu rangkachak leh silvar an rawn pe thîn a.

¹⁵Lal Solomona chuan rangkachakin phaw lian chi 200 a chhertîr a; phaw pakhatat rangkachak sekel 600 zêl a hmang a.

¹⁶Rangkachaka chher phâw 300 a siam a; phaw pakhatat rangkachak sekel 300 zêl a hmang a. Lal chuan chûngte chu Lebanon Ngawpui In-ah a dah a.

¹⁷Lal chuan sâinghovin lalthutthlêng ropui a siam a, rangkachak hlangin a luan leh vek a.

¹⁸Lalthutthlêng chuan kailâwn paruk a nei a, rangkachaka siam ke nghahna chu lalthutthlêng nêen a inzawm a; thutthlêng sîr tuakah vawnbân a awm vê vê a, vawnbân sîrah sakeibaknei pahnih lem a ding vê vê bawk a.

¹⁹Rahka sîr tinah pakhat zêl, rahka paruk sîr tuakah chuan sakeibaknei lem sâwm leh pahnih an ding tlar a, khawi lalram dang mahin chutiang chu an siam ngai lo.

²⁰Lal Solomona thil inna note chu rangkachaka siam vek a ni a, Lebanon Ngawpui Ina bungbêlte pawh rangkachak hlang vek a ni. Silvara siam pakhat mah a tel lo, Solomona hun lai chuan silvar chu engah mah an ngai si lo va.

²¹Lal lawngte chu Hiram lawng mite nêen Tarsis lamah an zin chhuak thîn a. Chûng an sumdâwng lawngte chuan kum thum danah rangkachak te, silvar te, saingho te, zâwng lian leh zâwngtê te an rawn phur hâw thîn a.

²²Lal Solomona hausakna leh finna chuan khawvêl lal zawng zawng chu a khûm vek a ni.

²³A thilunga Pathianin finna thu a dah te chu ngaihlâk châkin khawvel lal zawng zawngte pawhin Solomona chu an rawn pan huai huai thîn.

²⁴Mi tinin thilpêk an rawn keng zêl a: silvar leh rangkachak bungbêl te, silhên te, râlthum te, mawsawla te, sakawr te leh sabengtung te chu pêk zât tûr bi thliahin kum tin an rawn pe zut zut thîn a ni.

²⁵Solomona chuan sakawr leh tawlailîr dahna in 4,000 a nei a; sakawr chung chuang mi 12,000 a nei bawk. Chûngte chu tawlailîr dahna khuaah te, Jerusalema lal hnênah te a awmtîr a.

²⁶Tichuan Luipui aţanga Philistia ram leh Aigupta ramri thlenga lallo zawng zawng chung a lal berah a awm ta a ni.

²⁷Lal chuan Jerusalema chuan silvar chu lung ang maia tamin, sycamore thing pawh phaia theipui kung anga tamin a siam a.

²⁸Aigupta leh ram tin aţangin Solomona hnênah sakawrte an rawn tawlh lût thîn a ni.

SOLOMONA THIH THÛ

²⁹Solomona thiltih dang te chu, a bul aţanga a tâwp thlengin zâwlnei Nathana lehkhahbûah te, Silon mi Ahija hrilh lâwkna bûah te leh Nebata fapa Jeroboama chungchânga hmutheitu Iddova inlârna bûah te a chuang a ni lo'm ni?

³⁰Solomona chu Jerusalema Israelte chungah kum sawmli a lal a.

³¹Tichuan, Solomona chu a pute hnênah a muhîl a, a pa Davida Khawpuiah chuan an phûm a. A fapa Rehoboama chu a aiah a lal ta a.

BUNG 10

REHOBAMA LAKA HELNA

¹Rehoboama chu Sekem khuaah a kal a, amah chu lala siam tûrin Israelho zawng zawng pawh Sekemah an kal vek a.

²Chû thû a lo hriat chuan Nebata fapa Jeroboama (Lal Solomona laka tlânchhia, Aigupta rama la awm mêk) chu Aigupta ram aţang chuan a lo kîr leh ta a.

³Amah zu ko tûrin mi an tîr a. Jeroboama leh Israel mi zawng zawng chu Rehoboama hnênah an lo kal a,

⁴"I pa khân kan phur a tirit êm êm a; tûn aţang chuan i pain phurrit min siamsak leh kan chungah nghâwngkawh rit tak a nghah kha min tihzânsak la, tichuan i rawng kan bâwl zêl ang," an ti a.

⁵Ani chuan an hnênah, "Ni thum hnûah in lo kîr leh dâwn nia," a ti a. Mipuite chu an kal kiang ta a.

⁶Lal Rehoboama chuan a pa Solomona dam laia a hmâa ding thîn upate chu a râwn a, "Hêng mipuite hi engtin nge ka lo chhân dâwn le?" a ti a.

⁷Anni chuan a hnênah, "Hêng mite chungah hian zah i ngaiha, an lâwmna tûr zâwnga ţa taka thû i sawipui chuan i chhiahhlawhah an awm kumkhua mai ang," an ti a.

⁸Nimahsela, upaho thurâwn chu a pawm duh lo va, a seilenpui thalai rual, a hmâa ding thînte chu a râwn ta zâwk a.

⁹An hnênah, "Engtin nge thurâwn min pêk dâwn le? 'I pain kan chungah nghâwngkawh a nghah hi min tihzânsak deuh rawh,' titute hi engtin nge kan chhân dâwn le?" a ti a.

¹⁰Chûng thalai rual, a seilenpuite chuan a hnênah, "'I pain kan chungah nghâwngkawh a nghah hi a rit êm a, min tihzânsak deuh rawh,' titute chu hetiang hian lo chhâng ang che—an hnênah heti hian lo ti rawh: 'Ka kutzungtê pawh hi ka pa kâwng aia lian zâwk a ni asin!'

¹¹Ka pain nghâwngkawh rit a bâl che u a, kei chuan in nghâwngkawh kha ka belhchhah sauh dâwn; ka pain talhfiakin a hlap thîn che u-a, kei chuan hrualhruin ka hrem ang che u! ti ang che," an ti a.

¹²Lalin, "Ni thum nîah lo kal leh ang che u," tia thû a pêk angin, a ni thum niin Jeroboama leh mipui zawng zawng chu Rehoboama hnênah chuan an va kal leh a.

¹³Lal chuan khauh takin a lo chhâng a. Lal Rehoboama chuan a upate thurâwn chu a hnâwl a,

¹⁴tlangvâlho thurâwn angin, “Ka pa khân in nghâwngkaw! a lo tirit a, kei erawh chuan ka belhchhah sauh zâwk ang; ka pain talhfiakin a hlap ðhin che u-a, kei chuan hrualhruin ka hrem ang che u!” a lo ti ta a.

¹⁵Tichuan, lal chuan mipuite thú chu a ngaithla duh lo va; chú thil chu LALPA tihtîr a ni miao si a, Silo mi Ahija hmanga Nebata fapa Jeroboama hnêna LALPA thusawi kha a taka a lo thlen theih nân.

¹⁶Lalin an thú a ngaithla duh lo tih Israel mi zawng zawngin an han hriat chuan mipuite chuan lal hnênah: “Davida lakah chanvo eng nge kan neih? Jesaia fapa lakah rochan kan nei lo ve. Aw Israelte u! in lamah hâw vek rawh u. Aw nang David, i chhûngkua chu ngaihtuah ve tawh mai rawh!” an ti ta a. Tichuan, Israel mite chu anmahni in lamah an hâw darh ta vek a.

¹⁷Rehoboama erawh chuan Juda khawpuia chêng Israel fate chungah ro a rêl a.

¹⁸Chumi hnû chuan Lal Rehoboama chuan leiman enkawltu Hadorama chu a tîr a; mahse Israel mite chuan lungin an lo dêng a, a thi ta a. Chú vêleh Lal Rehoboama chu Jerusalema tlânchhiat tumin hmanhmawh takin a tawilailîrah a chuang a.

¹⁹Tichuan, Israelhote chu Davida chhûngkaw lakah tûn thleng hian an hel ta reng a ni.

BUNG 11

¹Jerusalem a lo thlenin Rehoboama chuan Juda leh Benjamin chhûngkuate chu a ko khâwm vek a, Israelte do tûr leh, lalram chu Rehoboama hnuiaia dah lêl leh tûrin, sipai huaisen ðhiau mi 180,000 a thlang chhuak a.

²Nimahsela, Pathian mi Shemaia hnênah Pathian thú a lo thleng a,

³“Solomona fapa Rehoboama, Juda lal leh Juda leh Benjamin chhûngkua zawng zawng leh mi dang zawng zawngte hnênah heti hian sawi ang che,

⁴LALPA chuan, “In unau Israel fate do tûrin in kal chho tûr a ni lo! Hê thil hi keima tih a ni a, chuvângin mahni in lamah kîr leh vek rawh se,” a ti’ tiin hrilh rawh,” a ti a. Tichuan, LALPA thú chu an zâwm a, Jeroboama beih an tum chu an ðhulh leh ta a.

REHOBAMAN KULH A TINGHET

⁵Rehoboama chu Jerusalema chuan a awm a, Judai ram ven him nân khuate a din ðhâ a.

⁶Bethlehem te, Etam te, Tekoa te,

⁷Beth Zur te, Soko te, Adullam te,

⁸Gath te, Maresa te, Ziph te,

⁹Adoraim te, Lakis te, Azeka te,

¹⁰Zora te, Aijalon leh Hebron, Juda leh Benjamin rama mi, kulh nei khuate an ni.

¹¹Chûng kulh nei khuate chu a din nghet a, a enkawltute a dah a, ei tûr te, hriak te, uain te a chhêk khâwm a.

¹²Khaw tinah chuan phâw leh fei te a chhêk a, khaw nghet takah a siam hlawm a. Judai leh Benjamin ram chu ama lamtang an ni a.

PUITHIAM LEH LEVI HNAME JUDAI RAMAH AN LÛT

¹³Israel rama puithiamte leh Levi hnamte chu an awmna ram tin a tangin ama lamah an tang ta vek a.

¹⁴Levi hnamte chuan an ran tlatnate leh an ram luah laite chu chhuahsanin, Judai ram leh Jerusalem khawpui an rawn bêl a; Jeroboama leh a fapaten LALPA puithiam an nihna leh an rawngbâwlina an hnâwlsak ta si a.

¹⁵Ramhuaite leh bâwng no lim a siam chawpte biak nân hmun sânga puithiam hna thawk tûr a ruat chawp ta mai si a.

¹⁶Levi hnamten an chhuahsan hnû chuan Israel hnam tin a tang a LALPA Israelte Pathian zui duhna thinlung pûte chuan an thlahtute LALPA Pathian hnêna inthâwi tûrin Jerusalem chu an rawn pan zêl a ni.

¹⁷Tichuan, Juda lalram chu an tinghet a, kum thum chhûng Davida leh Solomona kawng an zawh avângin Solomona fapa Rehoboama chu an tichak ta hlê a.

REHOBAMA CHHÛNGKUA

¹⁸Rehoboama chuan Davida fapa Jerimotha fanu Mahalathi chu nupuih a nei a, ani chu Jesaia fapa Elia fanu Abihaili fanu a ni.

¹⁹Fapa a hrinsakte chu: Jeusa te, Sammaria te, Zahama te an ni.

²⁰Ani chu a nei hnûah Maaka-i, Absaloma tunu chu a nei leh a; Abija te, Attaia te, Ziza te, Selomitha te a hrinsak a.

²¹Rehoboama chuan Absaloma tunu Maaka-i chu a nupui dangte leh a hmeite aiin a hmangaih bik a; nupui 18 leh hmei 60 lai a nei a, fapa 28 bâkah fanu 60 a nei a ni.

²²Rehoboama chuan Maaka-i fapa Abija chu a unaute zînga hotu berah a ruat a; lala siam a rilrûk a.

²³Fing takin hmâ a lâ a, a fapa dangte chu Judai leh Benjamin ram puma kulh nei khaw tinah a awm darhtîr a; an mamawh ei tûr tinrêng a pê a. Nupui tam tak a neihsak hlawm a.

BUNG 12

AIGUPTA-IN JUDAI RAM A RÛN

¹Rehoboaman a lalna a insawhngheh a, a lo intihchak tâk hnû a tang chuan amah leh Israel mi zawng zawngte nêchuan LALPA dân an hawisan ta mai a.

²Lal Rehoboama lal kum 5-naah chuan LALPA dân an bawhchhiat avângin Aigupta lal Sisaka chu Jerusalem rûn tûrin a rawn thawk chho va,

³Aigupta a tangin tawilailîr 1,200, sakawr chung chuang mi 60,000 bâkah, sipai chhiar sên loh khawpa tam—Lubhote, Sukki-hote leh Ethiopia-hote nêchuan an ni a.

⁴Judai rama kulh nei khuate chu a lâ a, Jerusalem pawh a lo thleng a.

⁵Sisaka hlâuva Jerusalema rawn tlân khâwm Juda hruiute leh Rehoboama hnênah chuan zâwlnei Semaia a lo kal a, an hnênah, “LALPA chuan, ‘Min hawisan vei a, chuvângin Sisaka kutah ka hnutchhiah tâk che u hi,’ a ti e,” a ti a.

⁶Tichuan, Israel hruaitute leh lal chu an inphah hniam a; “LALPA chu a dik a ni,” an ti a.

⁷LALPA chuan an intitlâwm ta tih a hmuhin LALPA thù chu Semaia hnênah a lo thleng a, “An intitlâwm ta a; chuvângin ka tiboral lo vang a, chhan chhuahna thenkhat ka pê ang. Ka thinrimna chu Jerusalem chungah Sisaka hmangin ka leih baw lo vang.

⁸Nimahsela, a thuhnuaiah an kûn tûr a ni, keima rawngbâwl leh khawvêl lalram rawngbâwl danglam zia han hre teh se,” a ti a.

⁹Tichuan, Aigupta lal Sisaka chuan Jerusalem chu a bei ta a, LALPA ina ro hlûte leh lal ina ro hlûte chu a lâksak a; engkim a la vek a. Solomona siam rangkachak phâw te pawh a la bo vek a.

¹⁰Lal Rehoboama chuan chûng hnawh khah nân chuan dâr phâw te a siam a, lal in luhna vengtu sipai hotute kutah a kawltîr a.

¹¹LALPA ina lal a luh apiangin vêngtute chuan an va la chhuak thîn a; chumi zawhah vêngtu pindanah chuan an dah tha leh thîn.

¹²A inphah hniam tâk avângin tiboral êm lovin LALPA thinurna chu lak kiansak a ni ta a; Judai ram pawh a tha leh ta hlê a.

REHOBOAMA RORÊL TÂWP LAM

¹³Chutiang chuan Lal Rehoboama chuan Jerusalemah ro a rêl a, a intinghet zêl a. Lal a lo nih khân Rehoboama chu kum 41 a upa a ni a; Jerusalemah chuan kum 17 chhûng ro a rêl a, chû khawpui chu Israel hnam tin zînga ta LALPAN ama hming awmna tûra a thlan a ni a. A nu hming chu Naami, Ammon mi a ni.

¹⁴LALPA zawng tûra a thinlung a buatsaih loh avângin thil sual a ti thîn a.

¹⁵Rehoboama thiltih te chu, a bul aţanga a tâwp thlengin zâwlnei Semaia lehkhâbûah te, hmutheitu Iddova thlahtu ziahna bûah te a chuang lo vem ni? Rehoboama leh Jeroboama te chuan indo rêng rêngin an hun an hmang zo va.

¹⁶Rehoboama chu an thlahtute hnênah a muhîl ta a, Davida Khawpuih an phûm a. A aiah a fapa Abija a lo lal a.

BUNG 13

JUDAI RAMAH ABIJA A LAL

¹Lal Jeroboama lal kum 18-naah chuan Abija chu Judai ramah a lo lal a.

²Jerusalemah kum thum a lal a. A nu hming chu Mikaii, Gibeia khuua Uriela fanu a ni. Abija leh Jeroboama chu an indo va.

³Abija chuan sipai huaisen thlan chhuah thiau nuai li nênd indo a hmachhawn a. Jeroboama pawhin lo do lêt tûrin sipai chak leh huaisen thlan chhuah thiau nuai riat nênd a lo ep ve bawh a.

⁴Tichuan, Abija chu Ephraim tlâng rama Zemaraim Tlâng chungah chuan a dîng a, “Jeroboama leh Israel mi zawng zawng te u, min lo ngaithla teh u:

⁵LALPA Israelte Pathian chuan Israel lalram hi Davida leh a thlahte hnênah kumkhua atân chi thuthlung hmangin a pe tawh tih in hre lo vem ni?

⁶Mahse Nebata fapa Jeroboama, Davida fapa Solomona chhiahhlawh chu a pu lakah a lo hel ta si a.

⁷Mi tlâktlâi lo ho Beliala faten an bâwr a, Rehoboama chu naupang chinchang hre lo a nih vanga anmahni a la dodâl theih loh lai khân, Solomona fapa Rehoboama kalh zâwngin an lo intichak sauh sauh va.

⁸Tûnah hian Davida fapate kuta awm, LALPA lalram hi dodâl theih in inring ta a; a tam zawng in tam khawp mai, in zîngah khân Jeroboaman pathian atâna a siamsak che u rangkachak bâwng no lim a awm kha.

⁹Levi hnam, Aarona thlah, LALPA puithiamte meuh pawh in hnawt chhuak a, ram dang mite tih dân ang lekin, puithiam in insiam chawp a; chuvângin bâwng tuai leh berâm pasarih nêna inhlân duh apiang chu, pathian ni hlei lo tân puithiamah an ţang chawp mai mai a ni lo vem ni?

¹⁰Keini erawh chu, LALPA hi kan Pathian a ni a, amah kan hawisan ve hek lo; LALPA rawngbâwltute chu Aarona thlah puithiam ngat an ni a, Levi hnamten an hnâ an thawk reng bawh a ni.

¹¹LALPA hnênah tûkzânin hâlral thilhlante leh rimtuite an hâl thîn a; chhangserh pawh rangkachaka siam dawhkân thianghlamah an rem fel diam thîn a, rangkachak khâwnvâr dahnaa khâwnvârte chu tlai tin an chhi bawh a; keini zawngin LALPA kan Pathian thupêk a ni kan zawm ni, nangni erawh chuan amah chawpin in hawisan ta a nih hi.

¹²En teh u, amah Pathian ngeiin kan hotu angin min awmpui asin, a puithiamte pawhin nangmahni thâwng tûrin tâwtawrâwt an hâm a ni a. Aw, Israel fate u, LALPA in thlahtute Pathian chu do lul suh u, in hmuingîl hauh lo vang!” a ti a.

¹³Nimahsela, Jeroboama chuan an hnung lamah a châng rutute chu a kal hualtîr a; tichuan, hma zâwnga Judate an ep laiin, hnung lam aţangin a châng rututen an hual bawh si a.

¹⁴Hma lam leh hnung lamah hualchêpin an lo awm reng tih Judate chuan an han hmu thut mai a; LALPA chu an âu ta a, puithiamte chuan tâwtawrâwt an hâm tuar tuar a.

¹⁵Judate chu an âu dur dur a; Juda mipui au dur dur lai chuan Abija leh Judate hmâah chuan Jeroboama leh Israel mi zawng zawng chu Pathianin a khawih ta a.

¹⁶Pathianin an kutah a pê a, tichuan Israelho chu Judate hmâah chuan an tlânchhe ta a.

¹⁷Abija leh a hote chuan an sâm ta chiam mai a; tichuan Israel mi thlan thiau nuai ngâ zet an that ta a ni.

¹⁸Chumi ţum chuan Israel fate chu an tlâwm hneh hlê mai; Juda-te chuan LALPA an thlahtute Pathiana an inngah tlât avângin hnehna an chang ta a ni.

¹⁹Abija chuan Jeroboama chu a ûm zui zêl a, hêng khuate hi a lâksak a: Bethel leh a khawper te, Jesana leh a khawper te leh, Ephraim leh a khawperte nênd.

²⁰Tichuan, Abija lal chhûng chuan Jeroboama chu a dîng chhuak zo ta lo va; LALPAN a hrem a, a thi ta a ni.

²¹Abija erawh chu a chak telh telh a, nupui 14 a nei a, fapa 22 leh fanu 16 a nei a.

²²Abija thiltih dangte, a awm dân leh a thu sawite chu zâwlnei Iddoa chanchin ziahna bûah a chuang.

BUNG 14

¹Tichuan, Abija chu a pute hnênah a muhîl a, Davida Khawpuiah an phûm a. A aiah a fapa Asa chu a lo lal a. A hun chhûngin ram chu kum sâwm râlmuangin a awm a ni.

JUDAI RAMAH ASA A LAL

²Asa chuan LALPA a Pathian mit hmuhah tha tak leh dik takin thil a ti thîn a,

³ram dang pathian maichâmte leh hmun sângte a tibo vek a, milem lungphun te a tichhia a, an thing milim pathian te a kit a.

⁴Judate chu LALPA an thlahtu Pathian zawnga a dân leh thupêkte zâwm tûrin thû a pê a.

⁵Judai ram khawpui tina hmun sângte leh rimtui hâlra maichâm zawng zawng chu a paih bo vek bawk a, a rorêlra hnuaiah chuan lalram chu râlmuang takin a awm a.

⁶Ram chu a râlmuangin tâk avângin Judai ramah chuan kulh nei khuate a din hlawm a; LALPAN râlmuanna a pêk avângin chûng hun lai chuan do tûr pawh a nei lo.

⁷Judate hnênah, “Hêng khuate hi i din tha ang u, a hungna kulh te, râlven in sâng te, kawngkhâr leh a kalhna te kan siam ang a; LALPA kan Pathian kan zawn tâk avângin ram hi kan kutah a la awm thei a nih hi; amah kan zawng a, ani chuan kil tinah chawlh hahdamna min pê a ni,” a ti a. Tichuan, tuang takin an din tha ta a.

⁸Asa chuan Judai ram aţangin phâw leh fei keng thiau sipai nuai thum a nei a, Benjamin ram aţangin phâw leh thal hman thiam sipai nuai nhih leh sîng riat a nei bawk a; hêng mite hi mi chak huaisen hlîr an ni.

⁹Ethiopia mi Zera chuan sipai maktaduai khat leh tawilîr zathum nêan anmahni do tûrin Maresa a lo thleng a.

¹⁰Amah lo bei tûrin Asa chu a thawk chhuak a, Maresa hmuna Zephatha Ruamah a sipaite chuan indo tûrin tanhmun an khuar a.

¹¹Asa chuan LALPA a Pathian a âu va, “LALPA, mi tam tak an ni emaw, chakna rêng nei lo an ni emaw pawh ni se, i tân puih a har chuang lo; Aw LALPA kan Pathian, nangmahah kan inngah tlat avângin min pui ang che, hêng mipui zozâi hi i hmingin kan do dân a. Aw LALPA, nang chu kan Pathian i ni si a; chuvângin, mihring mai hi inhnehtîr suh ang che!” a ti a.

¹²Tichuan, Asa leh Juda-ho hmâah Ethiopia-ho chu Pathianin a khawih ta a, Ethiopia-ho chu an tlânchhe ta a.

¹³Asa leh a hote chuan Gerar thlengin an ûm zui a. Ethiopia-ho chu LALPA leh a sipai hote hmâah tihtlâwm an nih avângin ding chhuak leh thei lo khawpin an tlâwm hneh a. Râlâl sum pawh tam tak an lâksak a.

¹⁴Gerar khua leh a chhehvêl khuate pawh an hneh vek a, LALPA chu an lo hlau êm êm mai si a; chûng khua zawng zawng chu an rawk a, râlâl sumte chu a awm rei rui mai a.

¹⁵Ran rual an dahna hmunte pawh an bei bawk a, berâm leh sanghâwngsei tam tak an mansak a, Jerusalem an kîr leh ta a.

BUNG 15

ASA THIL SIAM THATTE

¹Pathian Thlarau chu Odeda fapa Azaria hnênah a lo thleng a.

²Asa hmu tûrin a va kal chhuak a, a hnênah: “Nangni Asa, Judate leh Benjamin mite u, lo ngaithla teh u. A lama in tan chhûng chuan LALPA chu in lamah a ţang zêl ang. Amah in zawn chuan in zawng hmû ang; in hawisan erawh chuan ani pawhin a hawisan vê ang che u.

³Hun rei tak chhûng chu Israel ram hian Pathian tak nei lovin, zirtîrtu puithiam leh dân pawh nei lovin a awm a;

⁴mahse an mangana, LALPA Israelte Pathian lam an hawia, amah an zawn chuan an hmu leh thîn a ni.

⁵Chûng lai chuan a lût lam leh kal chhuakte tân râlmuanna rêng a awm lo va, ram chhûnga mi zawng zawng tân namên lova buaina a awm thîn a.

⁶Tichuan, Pathianin chhiatna tinrêng a thlentîr avângin hnam leh hnam, khua leh khua an intichhe tawn thîn a nih kha.

⁷Nangni erawh chu chak takin awm ula, in thâ thlah suh u; in thiltih man chu in hmu dân si a!” a ti a.

⁸Chûng thûte leh zâwlnei Odeda thupuanthe Asan a han hriat chuan a intihuai sawt a, Judai ram leh Benjamin ram pum aţang te, Ephraim tlang rama khua a lâk tâkte aţangin milem tenawm zawng zawng chu a paih bo vek a; LALPA hulhliap kawta awm thîn LALPA maichâm chu a siam tha leh a.

⁹Judai leh Benjamin ram puma mite leh, Ephraim leh Manase leh Simeon rama mi a hnêna chêng vête nêan chuan a ko khâwm vek a; LALPA a Pathianin a awmpui tlat tih an lo hriatin Israel ram aţang pawhin mi tam takin anrawn pan khâwm bawk a.

¹⁰Tichuan, Asa lal kum 15-na, thla thumna, ni sâwm panga ni chuan Jerusalem an intâwk khâwm a.

¹¹Chumi ţum chuan LALPA hnênah râlâl sum anrawn hawn zînga mi bâwngpa 700 leh berâm 7,000 an hlân a.

¹²An thinlung zawng zawng leh an thlarau zawng zawnga LALPA an thlahtute Pathian zawng tûrin thû an thlung a;

¹³mi tupawh LALPA Israelte Pathian zawng duh lote chu, milian leh mitê pawh ni se, a hmei a paa tihlum tûr an ni.

¹⁴Chumi zawhah chuan, ring taka au âw chhuahin, tâwtawrâwt leh berâmpa ki ham rîk nêan chhia an chham a.

¹⁵Juda mi zawng zawngin an thinlung zawng zawnga chhia an chham tâk avângin an hlim êm êm a; rilrûa tihtak zeta amah an han zawn chuan an hmu ta bawk si a; LALPA chuan hmun tinah râlmuangin a awmtîr ta a ni.

¹⁶Lal Asa nu Maaki pawh milem tenawm tak, Aseri lim a lo siam avângin alber nu a nihna chu a hlihsak ta hial a; Asa chuan a milim tenawm tak chu a kihsak a, a wawsawm vek a, Kidron Lui ruamah a hâlral ta a.

¹⁷Israel rama hmun sângte erawh chu tihbo a ni vê lo. Nimahsela, Asa thinlung chu a dam chhûngin a rinawm tuan zak a ni.

¹⁸A pain thil a lo serh hran tawhte leh amah pawhin a serh hran thil: silvar te, rangkachak te leh bungbêl te chu Pathian inah chuan a dah lût zêl a.

¹⁹Asa chu a lal kum 35-na thlengin indo rêng rêng a awm lo.

BUNG 16

ASA LEH SURIA INREMNA

¹Asa lal kum 36-naah chuan Israel lal Baasha chu Judai ram do tûrin a rawn thawk chho va, Juda lal Asa hnênah mi tûmah an luha an chhuah theih loh nân Rama khuah chu a hung thâ a.

²Asa chuan LALPA in leh lal in sum bâwma ro sum, silvar tangka leh rangkachak te chu a lâ a, Suria lal BenHadada, Damaska khuah mi hnênah a thawn a,

³“I pa leh ka pa inkâra inremna ang kha, nang leh keia inkârah awm zêl rawh se. Hei le, tangka leh rangkachak ka rawn thawn e; Israel lal Baasha hi ka hnên ațanga a inhnudawh theih nân, amah nêna in inremna chhu chatin rawn thawk chhuak ta che,” a ti a.

⁴Ben-Hadada chuan Lal Asa thû chu a zâwm a, Israel khawpuite rûn tûrin a sipai hotu rualte a tîr a. Ijon te, Dan te, Abel Maim te leh Napthali biala bungraw dahna khuah zawn zawn a rûn ta a.

⁵Baasha’n chû thû a lo hriat chuan Rama khuah a thiltih lai chu a chawhlsan ta a.

⁶Lal Asa chuan Juda mi zawn zawn chu a hruai a, Rama khaw din ătat nâna Baasha’n lung leh thing a chhêk khâwm sa chu a thiar chhuak vek a; chûng chu Geba leh Mizpa khaw din ătat nân a hmang ta a.

ASA TÂNA HANANIA THUCHAH

⁷Chûng lai chuan hmutheitu Hanania chu Juda lal Asa hnênah a lo kal a, a hnênah: “LALPA i Pathian ring lova Suria lal i rinchhan zâwk avângin, Suria lal sipaite chu i kut ata an pût chhuak ta.

⁸Ethiopia-ho leh Lub-hote kha sipai rual tam tak, tawlailîrte leh sakawr chung chuang mi tam tak an ni lo vem ni? Mahse, LALPA i rinchhan khân anniho chu i kuta a pêk che kha.

⁹Ama lama thinlung dik tak putute tâna a chakzia tilang tûrin LALPA mit chuan khawvêl pum pui hi a thlîr kual ruai ruai thîn asin. I thiltih dân hi a âthlâk hlê mai; tûn ațang chuan dorâl i nei reng tawh ang,” a ti ta a.

¹⁰Asa chu hmutheitu chungah chuan a thinrim ta a, a thu sawiin a tihthinur êm avangin tân inah a khung ta hial a. Asa chu mi dang lakah pawh a thin a ram ta hlê a.

ASA DAMLOH LEH THIH THÛ

¹¹Asa thiltithe chu a bul ațanga a tâwp thlengin Juda leh Israel lalte chanchin ziahna bûah a chuang a ni.

¹²A lal kum 39-naah chuan Asa chuan ke na hrî a vei a, a natna chu a zual ta hlê a; chuti chung pawh chuan a natnaah LALPA rawn lovin dâktawrte a rawn zâwk a.

¹³Tichuan, Asa chu a pute hnênah a muhîl ta a; a lal kum 41-naah a thi ta a ni.

¹⁴Davida Khawpuia ama thlân atâna a lo siamah chuan an phûm a; mawsawla leh hriak rimtui chi tinrênga sâwngbâwl khumah an zalh a. Ama pualin meipui an chhep bawk a.

BUNG 17

JUDA LAL JEHOSEPHATA

¹A fapa Jehoshaphata chu a aiah a lo lal a, Israelho lakah chuan a intichak sauh sauh va.

²Judai rama kulh nei khuah zawn zawnah sipai a dah a, Judai ramah leh a pa Asa’n Ephraim biala a lo lâk khuah te chuan vêngtu sipai a dah bawk a.

³A pu Davida kawng zawn kha a zawn vê avângin LALPA chu Jehosaphata hnênah a awm a; Baala te lam a âwn duh vê lo va,

⁴Israelho thiltih dân ang lo takin a pa Pathian chu a zawn tlat a, a thupêk te a zâwm thîn a.

⁵Chuvângin, LALPA chuan a kutah lalram chu a tinghet a; Juda mi zawn zawnin Jehosaphata chu thilpêkte an pê a, a lo hausain, nasa taka chawimâwina a khum ta a ni.

⁶LALPA kawng zawn chu a thinlung duh zâwn a ni a; Judai ram ațangin hmun sângte leh thinga siam milimte a paih bo va.

⁷A rorêl kum thumnaah chuan a puipa deuh deuh, Ben-Haila te, Obadia te, Zekaria te, Nethanela leh Mikaia te chu Judai ram khawpuiah mite zirtîr tûrin a tîr chhuak a.

⁸An zîngah chuan Levi nham: Semaia, Nethania, Zebadia, Asahela, Semi-ramotha, Jehonathana, Adonija, Tobija leh Tobadonija, Levi mite an tel a; puithiam Elisama leh Jehorama te pawh an tel bawk.

⁹LALPA Dân Bu an keng a, Judai ramah an zirtîr a; mite zirtîr chungin Judai ram khuah zawn zawn an fang chhuak a.

¹⁰Judai ram chhehvêla lalram zawn zawnah mite chuan LALPA chu an hlâuh êm avângin Jehosaphata do ngam pawh an awm lo.

¹¹Philistia mi thenkhatte pawhin Jehosaphata chu thilpêk leh silvar te an rawn pe vê hial a; Arabia miten ran rual, berâmpa 7,700 leh kêlpa 7,700 an rawn pe bawk a ni.

¹²Tichuan, Jehosaphata chu a lo chak tial tial a, Judai ramah chuan kulh leh bungraw dahkhâwmna khuah te a din a.

¹³Judai ram khuah te chuan sum leh pâi a ngah êm êm a; indo mite, mi chak huaisente chu Jerusalemah an awm a.

¹⁴An thlahte, a chhûngkuate ang zêla an tam dân chu hetiang hi a ni. Juda hnamah sâng chungah hotute: an hotu pa Adna leh a hote mi chak huaisen nuai thum;

¹⁵a dawta hotu chu Jehohanana a ni a, a hote chu mi nuai hnih leh sîngriat;

¹⁶a dawt leh chu Zikria fapa Amasia, LALPA tâna phal taka inpê a ni a, ama ho mi chak huaisente chu mi nuai hnih an ni.

¹⁷Benjamin hnamah: Eliada, mi chak huaisen chuan thal leh phâwa inrâlthuam mi nuai hnih a ho va;

¹⁸ani dawttu Jehozabada chuan indo tûra inpeih mi nuai khat leh sîngriat a ho va.

¹⁹Hêngte hian lal tân an thawk a, hêng bâkah hian Judai rama kulh nei khawpui zawng zawngah lal chuan a dah hlawm bawk.

BUNG 18

MIKAIAN AHABA A ZILH LÂWK

¹Jehoshaphata chu a hausain miten an ngai ropui hlê a; Ahaba nênn inneihnain inkungkaihna an siam a.

²Kum engemaw zât hnûah chuan Ahaba tlawh tûrin Samari khuuah a chhuk a; amah leh a hote chu Ahaba chuan berâm leh bâwnghpa tam tak a lo talh a, ani chuan Ramoth Gilead khuah han chhohpuiah a lo sâwm a.

³Israel lal Ahaba chuan Juda lal Jehosaphata hnênah, “Ramoth Gilead han bei tûrin min kalpui ve thei ang em?” a ti a. Ani chuan, “Kei leh nang te chu ka mite leh i mite nênn inang reng kan ni alâwm; indonaah chuan ka pui mawlh ang che,” a ti a.

⁴Jehosaphata chuan Israel lal chu, “Khawngaihin waviin hian LALPA thû lo ngaichâng phawt ta che,” a ti a.

⁵Israel lal chuan zâwlneite chu a ko khâwm a, zali lai an ni a, an hnênah, “Ramoth Gilead khuah khi kan bei dâwn nge, kan la ngâwi rih dâwn?” a ti a. Anni chuan, “Han chho rawh, Pathianin lal kutah hian a pe dâwn e,” an ti a.

⁶Mahse, Jehosaphata chuan, “Amah kan râwn theih nân, hetah hian LALPA zâwlnei tuemaw tal a la awm lo maw?” a ti leh a.

⁷Israel lal chuan Jehosaphata hnênah, “LALPA min râwnsak thei tûr mi pakhat a la awm tak e; mahse ka chungchâng thû hi a tha zâwnghin a sawi ngai lo va, a chhe zâwngh hîra a puan thîn avângin ka lâwm lo teh a nia. Imla fapa Mikaia a nih kha,” a ti a. Jehosaphata chuan, “Lal meuhin chutia i tih mai le!” a ti a.

⁸Israel lal chuan hotu pakhat a ko va, “Imla fapa Mikaia va hruai vat teh!” a ti a.

⁹Israel lal leh Juda lal Jehosaphata te chu an lal kawrfual hân an lalthutthlêngah an thû vê vê a; Samari kulh kawngka luhna bula hruih zâwlah chuan an thû a; an hmâah chuan zâwlnei zawng zawng chuan thû an puang dual dual a.

¹⁰Kenaana fapa Zedekia chuan thîrin seki lemte a insiam a; tihian a sawi a, “LALPAN: ‘Suria-ho chu hêngte hian i si hlum thak dâwn a ni,’ a ti e,” a ti a.

¹¹Zâwlneiho zawng zawng pawhin, “Ramoth Gilead-ah chuan han chho la, i tuang ngei ang, LALPAN lal kutah a pe dâwn si a,” tiin thû an puang a.

¹²Mikaia ko tûra an mi tirhin a hnên a va thlen chuan, “Lo ngaithla teh, zâwlneiho chuan thu khat vuain lal tân a tha zâwngh hîrin thu an puang vek a. Nang pawhin an thu puan angin a tha zâwngha sawi i tum hrâm dâwn nia,” a ti a.

¹³Mikaia chuan, “LALPA nunna chhâlin, ka Pathianin a sawi chiah chu ka sawi ang,” a ti a.

¹⁴Ani chuan lal hnên a lo thleng a; lal chuan a hnênah, “Mikai, Ramoth Gilead bei tûrin kan kal dâwn nge kal dâwn lo?” a ti a. Ani chuan, “Kal rawh, i tuang khawp ang, i kutah a pe dâwn che nia!” a ti a.

¹⁵Lal chuan, “Thutak chauh mi hrilh tûrin LALPA hmingin wavi engzât nge chhia ka chhamtîr dâwn che?” a ti a.

¹⁶Ani chuan, “Israel mi zawng zawng chu, vêngtu nei lo berâm anga tlânga vâk darh ka hmû a. LALPA chuan, ‘Hêngte hian hruaitu an nei ta lo ve. Mi tin mahni inah lungmuang takin hâw dial rawh se,’ a ti e,” a ti a.

¹⁷Israel lal chuan Jehosaphata hnênah, “Keima chungchângah a chhe lam ngawt lo chu, engmah a tha lam puan tûr a nei lo tih ka hrilh lo che em ni?” a ti a.

¹⁸Mikaia chuan, “Chuvângin LALPA thû hi ngaithla teh: LALPA chu a lalthutthlênga thûa, vân mipui zawng zawng chu a ding leh veia ding thupin ka hmû a.

¹⁹LALPA chuan, ‘Ramoth Gilead khuah a han tlûk chhiat theih nân Israel lal Ahaba khu tu nge thlêm thlu thei ang?’ a ti a. Mi pakhatin kawng khatin a sawi a, mi dangin kawng dangin an sawi a.

²⁰Thlarau pakhat hi a lo pên chhuak a, LALPA hmâah a va ding a, ‘Keima’n ka zu thlêm thlû ang e,’ a ti a. LALPA chuan, “Engtin nge i tih ang?” a ti a.

²¹Ani chuan, ‘Ka chhuak ang a, a zâwlneiho zawng zawng kâah khuan thlarau dawtheiah ka zu chang dâwn a ni,’ a ti a. LALPA chuan, ‘Zu thlêm ta che, i hlawhtling ngei ang; kal ta la, chutiang chuan zuk ti ang che,’ a ti a.

²²Han en teh khai! LALPA chuan hêng i zâwlneiho zawng zawng kâah hian thlarau dawthei a dah vek tawh a, i chhiatna tûr pawh LALPAN a puang vek tawh,” a ti a.

²³Kenaana fapa Zedekia chuan a va hnaih a, Mikaia biangah a va bêng a, “LALPA thlarauvin i hnêna thû sawi tûrin khawi laiah nge mi chhuahsan le?” a ti a.

²⁴Mikaia chuan, “Pindan ril zâwka biru tûra i luh niin i la hria ang chu!” a ti a.

²⁵Israel lal chuan, “Mikaia hi hruai kîr ula, khaw awptu Amona leh lal fapa Joasa hnênah hruai teh u;

²⁶Lal chuan, “He pa hi tân inah khung ula, dam taka ka lo hâw leh hmâ chu hrehawmna chaw leh tihduhdahna tuiin lo chawm ang che u,” a ti e,’ va ti rawh u,” a ti a.

²⁷Mahse Mikaia chuan, “Dam taka i lo hâw leh a nih ngat chuan, LALPA hian ka hnênah thû a sawi lo tawp tihna a ni ang,” a ti vê ngat a. “Nangni mipui zawng zawng khân lo hre rawh u!” a ti bawk a.

INDONA AHABA A THÎ

²⁸Tichuan, Israel lal leh Juda lal Jehosaphata te chu Ramoth Gilead panin an chho ta a.

²⁹Israel lal chuan Jehosaphata hnênah, “Ka inchei danglam ang a, indonaah ka lût vê ang e; nang chuan i kawrfual hâ ang che,” a ti a. Tichuan, Israel lal chu a inbawl danglam a, indona hmunah a lût vê ta a.

³⁰Suria lal chuan a hnêna tawilair pute hnênah, “Israel lal tih chauh lo chu, tûmah a lian pawh, a tê pawh bei suh u,” tiin thu a lo pe sâ diam a.

³¹Tichuan, tawilailir pâwl hotuten Jehosaphata an hmuh chuan, “Israel lal a nih saw!” an ti a. Amah bei tûrin an hual a; Jehosaphata chu a âu vak a, LALPA a tanpui a, an lak ata Pathianin a hruai pêng daih a.

³²Tawilailir puten Israel lal a ni lo tih an hmuhin amah an ûm lai chu an kîrsan leh ta a ni.

³³Mi pakhat hian tinzâwn bik pawh nei lovin thal a kâp a, Israel lal chu a râltuam inzawmna kârah a va fuh a. A tawilailir khalhtu hnênah, “Inher la, indona hmun aţang hian mi chhuahpui teh, ka inhliam tlat mai,” a ti a.

³⁴Chumi ni chuan an inbei nasa hlê a, Israel lal chu a tawilailirah Suria-ho hmachhawn zâwngin tlâi thlengin a inchelh ding a; ni tlâk lai vêlin a thi ta a.

BUNG 19

¹Juda lal Jehoshaphata erawh chu Jerusalema ama inah him takin a hâw ta a.

²Hmutheitu Hanania fapa Jehua chu amah hmuak tûrin a lo chhuak a, Lal Jehosaphata hnênah chuan, “Mi sual pa tanpuiin LALPA hawtute chu i hmangaih anga maw? Chuvângin, LALPA thinurna chu i chungah a awm ta.

³Nimahsela, nangmahah hian tţatna engemaw tak i nei a, chû chu, ram chhûng aţanga pathian limte paih bova, Pathian zawng tûra i thinlung i buatsaih ţhin hi a ni,” a ti a.

JEHOSHAPHATA SIAM TŢATNA

⁴Jehoshaphata chu Jerusalema a awm a; Beerseba aţanga Ephraim tlâng ram thlengin a mite zîngah a kal chhuak leh a, an thlahtu LALPA Pathian lamah mite a hruai kîr leh a.

⁵Judai rama kulh nei khua zawng zawngah, khaw tinah rorêltute a dah chhuak vek a,

⁶rorêltute hnênah chuan, “In thiltihah hian fimkhur rawh u, mihring tân maia ti ni lovin, rorêlnaa in hnêna awm reng LALPA tâna rorêl in nih hi.

⁷Chuvângin, LALPA hi ţih dêk ula; fimkhur takin ti ang che u, LALPA kan Pathianah chuan khawlohna te, hleihnehna te, thamna lâk te a awm vê si lo va,” a ti a.

⁸Jerusalema chuan, LALPA tâna rorêl tûr leh thubuai rem tûrin Jehosaphata chuan Jerusalema lo kîr leh ta Levi hnamte leh puithiam ţhenkhatte leh, Israel hnam puipa ţhenkhatte a ruat a.

⁹An hnênah thû a pê a, “LALPA ţih dêk chungin, rinawm tak leh thinlung sakhat pûin in ti tûr a ni:

¹⁰Anmahni chênna khua aţanga in unauten thu pawh engpawh an rawn thlen chuan, thisen chhuah thû te, dân leh thupêk bawhchhiat thû te, thuruat leh dân bu bawhchhiat thû te pawh ni se, LALPA dân an bawhchhiat loh nân fimkhur tûrin zilh rawh u; chuti lo zawng, in unaute chungah thinurna a lo thleng palh ang e. Chutiang chuan ti ula, thiam loh in chang dâwn lo nia.

¹¹In chhinchhiah tûr chu: Amaria, puithiam lal hi LALPA thil tinrêngah a lalber ang a; Ismaela fapa Zebadia hi, lal hna tinrêngah Juda chhûngkuua thunei ber a ni ang; Levi-ho chu in hotute an ni ang. Huaisen takin ti zêl ula, LALPA chu mi tţâte lamah a ţang zêl dâwn asin,” a ti a.

BUNG 20

AMMON, MOAB LEH SEIR TLÂNG AN HNEH

¹Chumi hnûah chuan Moab-hote chu Ammon-hote nêh, Ammon mite bâkah mi dang tam tak nêh, Jehosaphata do tûrin an lo thawk chhuak a.

²Mi ţhenkhat chu Jehosaphata hnênah lo kalin, “Nangmah bei tûrin Suria ram, tuipui râlt aţangin mi tam tak an lo kal mup mup a; Hazazon Tamar (chû chu En Gedi a ni)-ah an awm tawh a ni,” an ti a.

³Jehosaphata chuan a hlâu hlê a, Pathian zawng tûrin a inbuatsaih a, Judai ram pumah chaw nghei tûr thû a puang bawk a.

⁴Judate chu LALPA tanpuina dîlin an kal khâwm a; Judai ram khaw tin aţangin LALPA zawng tûrin mi an lo kal zung zung a.

⁵Jehosaphata chu LALPA in kawt zâwl thara Judai leh Jerusalem mipui pung khâwm hmâah chuan a ding a,

⁶“Aw LALPA kan thlahtute Pathian, nang chu vâna Pathian, hnam tin lalram chungah rorêltu, i kuta thiltihtheihna leh chakna hi tuma chelh rual loh a ni lo vem ni?

⁷Hê rama lo chêng hmasa-hote pawh i mi Israelte tâna hnawh chhuahsaktu, i ţhian Abrahamah thlahte hnêna chatuana petu Pathian kha i ni lo vem ni?

⁸Chûngah chuan an chêng a, i hming pualin hmun thianghlim an din bawk a;

⁹“Kan chungah chhiatna lo thleng ta se—khandaih te, hremna te, hrî te, ţâm te emaw a lo tlâkin—i awmna hmun hê tempul hmâa lo dingin (i hming chu hê tempulah hian a awm si a), hrehawmna avânga kan auh che chuan nangin min lo ngaithlâ ang a, min chhandam ang,” an tih kha.

¹⁰Tûnah hei, Ammon hote, Moab leh Seir Tlâng mite—Aigupta ram aţanga an lo chhuah laia an chungah Israelte kutthlâk i phal loh avânga tiboral lova an rawn kîrsan leh tāk hote kha an ni a;

¹¹tûnah hian, kan ro luah tûra i ram min pêk ngei aţanga mi hnawh chhuah tumin, min rawn thungrulh an tum ta a nih hi.

¹²Aw kan Pathian, anniho chu ro i rêlsak dâwn lo’m ni? Min bei tûra lo kal mipui chû zozâi chu lo bei vê thei kan ni si lo; tihngaihna rêng kan hre lo va, i lam kan lo hawi ringawt mai a ni,” a ti a.

¹³Tichuan, Juda-ho zawng zawng, an fanau tê tê, an nupui te leh an fate chu LALPA hmâah chuan an ding vek a.

¹⁴LALPA Thlarau chu mipui zînga mi Jahaziela chungah a lo thleng ta a, ani chu Zekaria fapa, Benaia fapa, Jeiela fapa, Mattania fapa, Levi hnam Asapha fapa a ni a.

¹⁵“Lo ngaithla rawh u, nangni Judai ram leh Jerusalem mipui zawng zawng te leh nang Lal Jehosaphat! LALPA chuan, ‘Hêng mipui tam takte hi hlâu suh ula, zâm hek suh u, indona chu nangni indona a ni lo va, Pathian indona a ni zâwk e.

¹⁶Naktûkah zuk bei rawh u. Ziz Chhoh-kaiah an lo chho ngei dawn a, Jeruel Thlalêr thlen hmâa ruam tâwp lamah in zu hmû mai ang.

¹⁷Hê indonaah hian in chêt vê pawh a ngai lo vang. Tanhmun lâ ula, lo ding ringawt mai ula; in lama țang LALPA chhandamna chu lo thlîr mai rawh u. Aw Judate leh Jerusalem mite u: hlâu suh ula, zâm hek suh u; naktûkah anmahni bei tûrin thawk chhuak rawh u, LALPA chu in lama țang a ni si a,” a ti a.

¹⁸Jehosaphata chu hmâia lei siin a kûn a, Judate leh Jerusalem mi zawng zawngte pawh LALPA chibai bûkin LALPA hmâah an kûn a.

¹⁹Levi hnam, Kohatha thlahte leh Kora thlahte chu LALPA Israelte Pathian fak tûrin an ding a, ring takin an zâi a.

²⁰A tûkah chuan hmâ takah an tho va, Tekoa Thlalêrah an lût a; an kal chhuah pah chuan Jehosaphata chu a ding a, “Aw Judate leh Jerusalem mipuite u, min lo ngaithla teh u: LALPA in Pathian chu ring tlat ula, a tinghet ang che u; a zâwlneite chu ring ula, in lo hmuingîl dâwn nia,” a ti a.

²¹Mipuite a biakrâwn zawhin, sipaite hmâa kal chung a LALPA chawimâwina leh a mâwina thianghlimzia faka zaiin: “LALPA chu fak rawh u, A ngilneihnain kumkhua a daih dâwn si a,” titu tûrte a ruat a.

²²Chutia fakna hlâ an sak vêleh chuan Ammon-ho te, Moab-ho te leh Seir Tlânga mi, Judate bei tûra lo kalte chu a rûka lo châng tûrin LALPAN mi a ruat a; tichuan an tlâwm ta a.

²³Ammon-hote leh Moab-hote chuan Seir Tlânga chêngte chu thah chimih vek tumin an bei ta chiam mai a. Seir tlânga mite an thah chimih zawh vêleh, anmahni leh anmahni an insâm leh ta vak mai a.

²⁴Tichuan, Juda mipuiten thlalêr ram thlîrna hmun an zu thlena, mipuiho awm dân an zuk thlîr nâk chuan, mitthi ruang hlîr mai chu leiah an lo tlu rem rum mai a. Tûmah tlân chhuak pawh an awm lo.

²⁵Jehosaphata leh a hote chu râlîlak sum la tûrin an thawk thlâ a, mitthiho zîng ațanga an lâk thil hlu tak takte leh lunghlûte chu a lo tam khawp a, an phur sêng lo va; a tam êm avângin a chhêk khâwm nân pawh ni thum ngawt a duh a ni.

²⁶A ni lî ni chuan Beraka Ruamah an kal khâwm a, chutah chuan LALPA an fak a; chuvângin chu hmun hmingah chuan tûn thlengin Beraka Ruam an ti ta a ni.

²⁷Jehosaphata chuan hmâ hruaiin, Judate leh Jerusalem mipuite chu hlim takin Jerusalemah an kîr ta a, LALPAN an hmêlmâte chungah hlim takin a awmtîr tawh si a.

²⁸Tichuan, tîngtang leh perhkhuang te, tâwtawrâwt rî te nên Jerusalemah LALPA in chu an lo thleng leh ta a.

²⁹LALPAN Israelte hmêlmâ a bei tih an lo hriatin ram tina lalramte chuan Pathian chu an hlâu ta a.

³⁰Chutichuan, Jehosaphata lalna chu a lo râlmuang ta hlê a, a Pathianin kil tinah muanna a pê a.

JEHOSHAPHATA LALNA A TÂWP

³¹Jehoshaphata chu Juda lal a ni a. Lal a nihin kum 35 a upa a ni a, Jerusalemah kum 25 chhûng ro a rêl. A nu hming chu Azubai, Silhia fanu a ni.

³²A pa Asa kawng a zawh tlat a, chû chu pên-san lovin LALPA mit hmuhah dik takin a ti thîn.

³³Nimahsela, hmun sângte chu tihbo a ni chuang lo va, mipuite lahin thinlung taka an thlahtute Pathian lama hawi nachâng an hre bawh hek lo.

³⁴Jehosaphata thiltih dangte chu, a bul ațanga a tâwp thlengin, Hanania fapa Jehua lehkhâbûah ziah a ni a, Israel lalte chanchinah a chuang bawh.

³⁵Chumi hnû chuan Juda lal Jehosaphata chuan Israel lal Ahazia, suaksual taka thil ti thîn chu a thurualpui ta a.

³⁶Tarsis-a kal tûr lawng siam lamah an thawk ho va, Ezion Geber-ah lawng rual an tuk a.

³⁷Nimahsela, Maresa mi, Dodavah-a fapa Eliezera chuan Jehosaphata dodâlna thû a puang a, “Ahazia i thurualpui avângin LALPA chuan i hnathawh a tichhiatsak a che,” tiin. Tichuan, lawngte chuan chhiat an tâwk a, Tarsis lamah chuan a kal thei ta lo va.

BUNG 21

JUDA LAL JEHORAMA

¹Jehoshaphata chu a pute hnênah a muhîl a, an thlahtute zîngah Davida Khawpuiah phûm a ni. A aiah a fapa Jehorama a lo lal a.

²A unau, Jehosaphata fapate chu: Azaria te, Jehiela te, Zekaria te, Azariahua te, Mîkaela leh Sephatia te an ni; hêngte hi Israel lal Jehosaphata fapate an ni.

³An pa khân thilpêk ropui tak tak, silvar leh rangkachak leh thil hlu tak takte leh Judai rama kulh nei khuate a pe hlawm a; lalram erawh chu fa tîr a nih avângin Jehorama hnênah a hlân a.

⁴Jehorama chu a pa lalramah chuan a insawh nghetin a intichak sauh sauh va, a unau zawng zawngte chu khandaihin a that vek a, Israel puipate zînga mi pawh a that bawh a.

⁵Jehorama chu lal a nihin kum 32 a upa a ni a, Jerusalemah kum riat a lal a.

⁶Israel lalte kawng zawhin, Ahaba chhûngkaw tihdân a zui vê a, nupuiah Ahaba fanu a nei rêng bawh a; LALPA mit hmuhah thil sual a ti a.

⁷Chuti chung chuan LALPAN Davida chhûngkua chu a tiboral duh êm lo va, Davida hnênah thû a lo thlung tawh si a, amah leh a thlah kal zêlte hnêna kumkhua atâna khâwnvâr pêk a lo tiam tawh vâng a ni.

⁸A lal chhûngin Edom-ho chu Juda thuneihna lakah an hel a, lal an insiam hran ta a.

⁹Jehorama chu a sipai hotute leh a tawilailîr zawng zawng nên a thawk chhuak a. A zân a zâna thovin amah leh a tawilailîr pute hualtu Edom-ho chu a bei chiam a.

¹⁰Tichuan, Edom-ho chu tûn thlengin Juda-te lakah an la hel ta reng a ni. An thlahtute Pathian, LALPA chu a hawisan avângin, chumi hun lai bawh chuan Libna pawh a lakah a hel bawh a.

¹¹Chû achhapah, Juda tlâng ramah te hmun sâng a siam a, Jerusalemah mi chêngte chu a uiretîr a, Judate chu kawng dik

lovah a hruai bo va.

¹²A hnênah chuan zâwlnei Elija lehkhâ a lo thleng a, “LALPA, i pu Davida Pathianin heti hian a ti a che: I pa Jehosaphata kawng te, Juda lal Asa kawng te i zawh duh loh avâng leh,

¹³Israel alte kawng i zawh tâk zâwk avâng te, Judate leh Jerusalema mite chu Ahaba chhûngkaw uirêna ang maia i uirêtir a, i unaute leh i pa chhûngte, nangmah aia tha zawkte ngei pawh i thah avângin,

¹⁴lo ngai reng rawh, LALPA chuan i mite-i fanau te, i nupui te leh i neih zawng zawngte kha hripui râpthlâk takin a hrem dâwn a ni;

¹⁵nang ngei pawhin rîlpui nâ nasa tak i vei ang a, i rîl chu a chhuah zawh vek thlengin ni tinin a tla fual tual tual ang,” a ti, a ti a.

¹⁶Tichuan, LALPA chuan Jehorama bei tûrin Ethiopia mite kianga awm Philistia-ho leh Arabia-ho rilru a chawh tho va.

¹⁷Judai ram rûn tûrin an rawn thawk chho va, lal inchohinga an thil neih zawng zawng an la fâi vek a, a fapate leh a nupuite chenin; a fapa naupang ber Jehoahaza tih loh chu tûmah an hnutchhiah lo.

¹⁸Chumi hnû chuan LALPAN natna tiham theih loh hmangin a rîl chu a khawih zui ta a.

¹⁹Kum hnih a lo ral dâwnah chuan a natna nasa tak avâng chuan a rîl chu a rawn chhuak ta hial a; natna râpthlâk tak tuar rêng rêngin a thi ta a ni. A mite chuan a pute angin meipui pawh an chhehsak vê lo.

²⁰Lal a nih khân kum 32 a upa a ni a. Jerusalema kum riat ro a rêl a, suntu mumal pawh nei lovin a thi ta a ni. Davida Khawpuiah chuan an phûm vê nâ a, lallo thlânmuah pawh an phûm vê lo.

BUNG 22

JUDA LAL AHAZIA

¹Jerusalema mi chêngte chuan a fapa naupang ber Ahazia chu a aiah an laltîr a, a fa ûte zawng zawng chu Arabia mite nêna mi rûn tûra lo kalte khân an that vek si a. Tichuan, Jehorama fapa Ahazia, Juda lal chuan ro a rêl ta a.

²Ahazia chu lal a nihin kum 42 mi a ni a, Jerusalema kum khat ro a rêl a. A nu hming chu Athaliah-i, Omria tunu a ni.

³Thil dik lo tak ti tûra a nu thurâwn chuan a hruai sual a, Ahaba chhûngte kawng bawh a zawh vê ta a.

⁴Chuvângin, Ahaba chhûngte ang bawkin, LALPA mit hmuhah thil sual a ti a; anni chu a pa thih hnûa thurâwn petu ber, a chhiat phahna tûr kawnga hruai sualtu an ni ta a ni.

⁵An thû a zawm avângin Ramoth Gilead-ah Suria lal Hazaela do tûrin Israel lal Ahaba fapa Jehorama* a han kalpui a; Suria-ho chuan Jorama chu an lo hliam a.

⁶Suria lal Hazaela an va beihnaah Rama khuaah hliam a va tuar a, chû hliam chu enkawl dam tûrin Jezreel-ah a kîrpui a. Juda lal, Jehorama fapa Azaria chu Ahaba fapa Jehorama* damlo kan tûrin Jezreel-ah chuan a zu chhuk a.

⁷Jorama hnêna a kal chu Ahazia tlûk chhiatna tûra Pathian remruat a ni a; a zu thleng thla chauh va, Jehorama chuan Nimsia fapa Jehua bei tûrin a lo kalpui nghâl mai a, chû mi chu Ahaba chhûngkaw suat mang vek tûra LALPA hriak thih a lo ni si a.

⁸Jehuan Ahaba thlahho timang tûra beihpui a thlâk lai chuan Juda lal fapate leh Ahazia unau fapaten Ahazia rawng an bâwl lai a hmû a, chûngho chu a that a.

⁹Ahazia chu a zawng zêl a; an man ta a (Samari khuaah a lo birû a), Jehua hnênah an hruai a. An tihhlum lai chuan, “E khai, hê mi hi chu—thinlung zawng zawnga LALPA zawngtu Jehosaphata fapa a ni tlat mai,” tiin tha takin an phûm ta a ni. Tichuan, Ahazia chhûngkua aţang chuan lalram han chelh zui tûr pawh an awm ta lo.

ATHALIA-I JUDA LAL

¹⁰Ahazia nu Athalia-i chuan a fapa a thi tih a hriatin a tho va, Juda lal fapa ro luah thei tûr zawng zawng chu a that fai vek a.

¹¹Mahse, lal fanu Jehosabeathi chuan Ahazia fapa Joasa chu lal fapa an thah tûrte zîng aţangin a hruai bo va, amah leh a awmtunu chu khum pindana a thukru ta a. Tichuan, Lal Jehorama fanu, puithiam Jehoiada nupui (Ahazia farnu a ni a) Jehosabeath-i chuan Athalia-i laka a thuhruk avângin a that tel vê ta lo a ni.

¹²Athaliah-i'n ram chhûnga ro a rêl chhungin LALPA inah kum ruk an thukrû a.

BUNG 23

JUDA LALAH JOASA AN SIAM

¹A kum sarihnaah chuan Jehoiada chu a intichak sauh sauh va, sipai zahotute chu thû a thlunpui a, chûngte chu: Jehorama fapa Azaria te, Jehohanana fapa Ismaela te, Obeda fapa Azaria te, Adaia fapa Maaseia te leh Zikria fapa Elisaphata te an ni.

²Judai ram an fang chhuak vek a, Judai ram khaw tin aţangin Levia-hote, Israel hnam puipate an sâwm khâwm a, Jerusalema an lo kal a.

³Chuta pung khâwmho zawng zawng chuan Pathian inah, lal hnênah chuan thû an thlung a. Ani chuan an hnênah, “En teh u, LALPAN Davida fapate chungchânga a lo sawi tawh angin, lal fapa ngei hi a lal tûr a ni.

⁴Heti ang hian ti ang che u: Puithiamte leh Levi-ho Sabbath nia lo kalte zînga hmun thuma thena hmun khatin kawngkhârte hi vêng ula;

⁵hmun thuma thena hmun khatin lal in vêng sela; hmun thuma thena hmun khat chu Lungphûm Kawngkâah awm sela. Mi dang zawng chu LALPA in tualah awm vek rawh se.

⁶Mahse puithiamte leh rawngbâwl lai Levi-hote tih loh chu tûmah LALPA inah lût suh se. Anni chu serh thianghlim lai an nih avângin an lût thei e; mi dang zawng zawng chu LALPA thû ngaichânga inring renga awm vek tûr a ni.

⁷Levi-hoten lal chu an din hual ang a, hriamhrei an keng theuh tûr a ni; tûpawh ina lo lût apiang chu thah tûr a ni. Lal chu a lût leh a chhuak vêngin a kalna apiangah zui zêl tûr a ni,” a ti a.

⁸Tichuan, Levi-hote leh Juda zawng zawngte chuan puithiam Jehoiada thupêk ang tak chuan an ti a. An hote zînga mi Sabbath

nia châwl tûrte leh thawk tûrte chu an hruai zêl a; puithiam Jehoiada chuan a fîn tûr pâwlte kha a la hawtîr lo va.

⁹Puithiam Jehoiada chuan sipai za hotute hnênah chuan Lal Davida fei te, a phaw lian leh phaw tê te nê Pathian tempula mi chu a pe chhuak a.

¹⁰Tichuan, vêngtute chu an vâiin a rem fel vek a, râlthuum kengtute chu tempul dîng lam ațanga tempul vei lamah te, maichâm dung zui zâwng leh tempul kiangah te chuan lal hual vêlin a dintîr vek a.

¹¹Lal fapa chu anrawn hruai chhuak a, lallukhum an khumtîr a, Hriattîrna thû chu a pê a; lalah an siam ta a. Jehoiada leh a fapate chuan hriak an thih a, “Lal ber chu dam reng rawh se!” an ti a.

ATHALIA-I THIH THÛ

¹²Athaliahi'n mipui tlan vêl leh lal an châwimâwi thâwm a lo hriatin, LALPA inah chuan mipui zîngah a lo kal vê a.

¹³Arawn hmuh nâk chuan lal chu kawngka luhna ban bulah a lo dîng a; an puipate leh tâwtawrâwt hântute chu lal kiangah chuan an lo awm thup a. Ram chhûnga mipuite chu an hlim êm êm a, tâwtawrâwt an hâm ruai ruai a, hla hruaituten rimâwi tinrêng nê fakna hlân a rem a. Athalia-i chuan a puan te a pawt thlêr a, “Phiarrûkna! Phiarrûkna!” tiin a âu va.

¹⁴Puithiam Jehoiada chuan sipaite chung a awm tûra a ruat sipai za hotute hnênah, “Pâwn lamah vên chungin hruai chhuak ula, a zuituten khandaihin that rawh se,” tiin thû a pê a. “LALPA inah chuan thah tûr a ni lo ve,” tiin puithiam chuan a lo sawi tawh si a.

¹⁵Tichuan an man a; lal in panna Sakawr Kawngka lamah an chhuahpui a, chutah chuan an that ta a.

¹⁶Jehoiada chuan amah leh lal leh mipuite inkârah chuan LALPA mi an nih zêl theih nân thuthlung a siam a.

¹⁷Mipui zawng zawng chu Baal tempulah an kal a, an chhu chhia a. Maichâm leh milimte chu an chhu sawm vek a, maichâm hmâah chuan Baal puithiam Mattana chu an that a.

¹⁸Jehoiada chuan LALPA in enkawl hna thawk tûrin Davidan LALPA ina thawk tûra a lo ruat tawh puithiamte leh Levi-hote chu a ruat thar a; Mosia Dân bûa inziak anga hâlral thilhlân te hlânin, Davida thupêk anga hlim taka zâi chungin an ti tûr a ni.

¹⁹LALPA inah chuan thian lohna nei chung a mi tûmah an luh lohna tûrin kawngkhârah te chuan vêngtute a dah a.

²⁰Chumi zawhah sipai za hotute, milian-hote, mipui awptute, ram chhûnga mipui zawng zawng nê, LALPA in ațang chuan lal chu a hruai thlâ a; lal in luhna Kawngka Chung Zâwkah chuan an lût tlang a, lalram lalthutthlêngah chuan lal chu a thuttîr a.

²¹Tichuan, ram chhûng mipui zawng zawng chu an lâwm a; Athalia-i chu khandaiha an thah tâk avângin khawpui chhûng pawh a lo râlmuang ta a.

BUNG 24

JOASAN TEMPUL A SIAM THA

¹Joasa chu lal a nihin kum sarih mi a ni a, Jerusalemah kum 40 ro a rêl a. A nu hming chu Zibiahi, Beerseba mi a ni.

²Joasa chuan puithiam Jehoiada dam chhûng zawngin LALPA mit hmuhah dik takin thil a ti thîn.

³Jehoiada chuan nupui pahnih a neihsak a, fapate leh fanute a nei a.

⁴Chumi hnûah Joasa chuan a rilrûin LALPA in chu siam thât tumna a lo nei ta a.

⁵Puithiamte leh Levi-hote chu a ko khâwm a, an hnênah, “Judai ram kuaah te kal chhuak ula, Israelho mi zawng zawng hnên ațangin kum tina in Pathian chênna in siam thât nân thawhlâwm va khawn khâwm rawh u, rang takin ti ang che u,” a ti a. Nimahsela, Levi-hote chu an che vat duh lo va.

⁶Chuvângin, lal chuan puithiam lal Jehoiada chu a ko va, a hnênah, “Engati nge Levi-hote chu Judai ram leh Jerusalem ațanga thawhlâwm i khawntîr loh? Hei hi hriattîrna biakbûk atâna LALPA chhiahhlawh Mosia leh Israel mipui pung khâwmho thupêk a ni lo vem ni?” a ti a.

⁷Mi suaksualnu Athalia-i fapate kha Pathian inah an lût lui a, LALPA in chhûnga thil serh thianghlim zawng zawng chu Baala te an lo pe vek tawh si a.

⁸Tichuan, lal thupêkin bâwm an siam a, LALPA in kawngkhâr pâwnah an hûng a.

⁹Jerusalem leh Judai ram zawng zawngah Pathian chhiahhlawh Mosian thlalêrah Israel mite thawh tûr bî a tuk angarawn thawh vek tûrin thû an puang ta a.

¹⁰Chû chuan mipuite leh an hruaitute chu a tilâwm a, hlim takin thawhlâwmte anrawn lakhâwm a, mi tinin an pê a, bâwmah chuan an chhûng lût thîn a.

¹¹Tangka a tam tâwk ta tih an hriat vêleh, Levi-hote chuan lal puipate hnênah bâwm chu an la lût a; lal lehkhaziaktu leh puithiam lal te an lo kal a, bâwm chu an bun ruak a, a hmun ngaiah an dah leh thîn a. Chutiang chuan ni tin an ti a, tangka chu tam tham tak an khâwl khâwm ta a ni.

¹²Lal leh Jehoiada chuan LALPA in siam thât hnathawk hotute hnênah an pê a; anni chuan LALPA in siamthatu tûr lung chhertute leh mistirite, thîr leh dâr chhertute rawih nân an lo hmang leh thîn a ni.

¹³Chutiang chuan hnathawktuten rim takin an thawk a, an thawk zo ta a; Pathian in chu a tûra mi ang tak khân an tinghet leh ta a ni.

¹⁴Thawh tûr an thawh zawh chuan an hman bâng sum chu lal leh Jehoiada hnênah anrawn pê lêt leh a; anni chuan LALPA ina hmanraw hrang hrang siam nân te, rawngbâwl nân leh thil hlanna atân bungbêl te, rangkachak leh silvara siam fiante leh bungbêl ilo siam nân te an lo hmang a. Jehoiada dam chhûng chuan LALPA inah hâlral thilhlân chu an hlân reng thîn a ni.

JOASA'N PATHIAN A HAWISAN

¹⁵Jehoiada chu a lo upain a tar ta hlê a, a thi ta a; a thih chuan kum 130 a upa a ni.

¹⁶Davida Khawpuiah an phûm a, Israel ramah Pathian tân leh a In tân thil a ti tha êm a, lallo zîngah an phûm hial a ni.

¹⁷Jehoiada thih hnû chuan Juda puipate chu an lo kal a, lal hmâah chuan kûnin chibai an bûk a. Lal chuan an thû a lo ngaithlâ a.

¹⁸Tichuan, an thlahtute Pathian, LALPA in chu an chhuahsan a, thing milim leh milem pathian rawng an bâwl ta a; an bawhchhiatna avângin Judai ram leh Jerusalem chungah thinurna a lo thleng ta a.

¹⁹Chuti chung pawhin LALPA hnêna hruai kîr leh tûrin an hnênah zâwlneite a tîr hrâm hrâm thîn a; an tihdik lohzia te an hrilh thîn a; chuti chung pawhin an lo ngaithla duh chuang lo.

²⁰Pathian Thlarau chu puithiam Jehoiada fapa Zekaria chungah a lo thleng a; mipuite chungah a ding a, an hnênah, “Pathianin, ‘Engati nge hmuîngîl theih loh phah khawpa LALPA thupêk chu in bawhchhiat? LALPA chu in hawisan avângin ani pawhin a hawisan che u a nih hi,’ a ti,” a ti a.

²¹Tichuan, ani chu an phiar a, lal thupêkin LALPA in tualzâwlah ngei chuan lungin an deng hlum ta a.

²²A pa Jehoiadan a laka that a lo chhuahna zozâite chu hre zui duh lovin, Joasa chuan a fapa chu a thahsak zâwk a; a thi tûr chuan, “LALPAN hmu sela, thungrûl vê rawh se!” a ti a.

JOASA THIH THÛ

²³Kum a lo thar a, Suria sipaite chuan an rawn rûn ta a; Judai ram leh Jerusalem an lo thleng a, mipui zînga hruaitute zawng zawng an that fai vek a, an râlâlâk sum zawng zawng pawh Damaska lal hnênah an thawn vek a.

²⁴Suria sipai lo kalte chu tlênte chauh an ni; mahse LALPA an thlahtute Pathian an hawisan avângin, an sipai rual tam tak chu chûngho kutah chuan LALPAN a pê a. Chutiang chuan Joasa chungah hremna an rawn lek kawh ta a ni.

²⁵An hâwsan hnû chuan (ani chu hliam nasa tak tuarin an kalsan a), puithiam Jehoiada fapa a thah avângin khân ama mite ngeiin an phiar a, khuma a mu lai chu an that a. Tichuan a thi ta a. Davida Khawpuiah an phûm a, mahse lallo thlânah pawh an phûm vê lo.

²⁶Amah phiartute chu: Ammon mi Simea fapa Zabada leh, Moab mi Simritha fapa Jehozabada te an ni.

²⁷A fate chungchâng te, ama chungchâng thu lo thleng te leh Pathian in a thawm that thû te chu lalte chanchin ziahna bûah a chuang. A fapa Amazia chu a aiah a lo lal a.

BUNG 25

JUDA LAL AMAZIA

¹Amazia chu lal a lo nihin kum 25 mi a ni a, Jerusalemah kum 29 chhûng ro a rêl a. A nu hming chu Jehoaddani, Jerusalem mi a ni.

²LALPA mit hmuhah thil dik a ti thîn a, mahse rinawmna thinlung nêna ti a ni lo.

³A lal rama a insawhngheh vêleh a chhiahhlawhte zînga a pa, lal thattute chu a tihlum ve ngêl a.

⁴Nimahsela, tualthattu fate chu a that vê lo, LALPA thupêka, Mosia Dân Bûa inziak ang khân, “Fate avângin an pate tihhlum

tûr a ni lo va, an pate avângin an fate tihhlum tûr a ni hek lo; mi tin mahni sual avâng ngeia tihhlum an ni zâwk tûr a ni,” tih ang khân.

EDOM NÊNA INDONA

⁵Amazia chuan Judate a ko khâwm a, Judai leh Benjamin ram pumah a chi chûin sipai pâwla sâng hotûah te, za hotuah te a siam a; kum 20 chin chung lam zawng a chhiar a, indo mi, thlan chhuah thiau, fei leh phaw hmang thiam mi nuai thum an awm a.

⁶Israel rama mi chak huaisen nuai khat zet tangkarua talent zâ-in a ruai baw k a.

⁷Mahse a hnênah Pathian mi a lo kal a, “Aw lalber, Israel sipaite hi i hruai vê tûr a ni lo, LALPA chu Israel mite lamah a tang vê si lo—Ephraïma thlahte zîngah pawh.

⁸I kal a nih vêk chuan, kal mai rawh! Indonaah chuan huai takin che ang che, chuti lo zawng, Pathianin hmêlma hmâah a titlâwm mai ang che; Pathian chu tichak theitu leh titlâwm theitu a ni si a,” a ti a.

⁹Amazia chuan Pathian mi hnênah, “Israel sipaite hnêna talent zâ ka pêk tâk kha engtin nge kan tih tâk ang?” a ti a. Pathian mi chuan, “LALPA chuan hei aia tam daih hi a pe thei che asin,” tiin a chhâng a.

¹⁰Tichuan, Ephraïm ram aţanga sipai rual lo kalte chu kîr leh tûrin a tîr hâu ta a. Anni erawh chu Judate lakah an thinrim ta êm êm a, thinrim engphiarin an hâu ta a.

¹¹Amazia chu a intichak sauh sauh va, a mite hruaiin Chi Ruamah a kal a, Seir tlânga mi mi sîng khat a that a.

¹²Juda thlahte chuan a nung chungin mi sîng khat an man baw k a, khâm ko chungah an hruai a, lungpui chhîp aţang chuan an nam thla chiam a, an insawh tliak rem rum hlawm a.

¹³Nimahsela, Amasian indonaa kal vê a phal loh, sipai rual a hawtîrte khân Juda khua, Samari aţanga Beth Horon thlengin an lo rûn a, mi 3,000 an that a, râlâlâk sum tam tak an la baw k a.

¹⁴Amasian Edom-ho a sâm vak hnû chuan, Seir-ho pathiante chu a hâwn a, a pathian atân a cheibâwl a, an hmâah chuan a kûn a, chibai a bûk a, an hmâah rimtui te a hâl ve ta mai a.

¹⁵Chumi avâng chuan Amazia chungah LALPA thin a thaw k a, a hnênah zâwlnei a tîr a, “I kut aţanga anmahni mi leh sâte pawh chhan chhuak thei hlei lo an pathiante chu eng vânga chibai bûk ta mai nge i nih?” a ti a.

¹⁶Chutianga thû a hrilh lai mêkin lal chuan, “Lal thurâwn petûah kan siam che em ni? Ngâwi mai teh! Engah nge i thih phah kher ang?” a lo ti a. Zâwlnei chuan, “Hetiang thil i tih hnû pawha ka thurâwn i ngaihsak duh loh avâng hian Pathianin tihboral che a tum tih ka hai lo asin,” a ti a, a ngawihsan ta a.

ISRAELTEN JUDATE AN HNEH

¹⁷Juda lal Amazia chuan thurâwn lâin Jehua fapa, Jehoahaza fapa Joasa, Israel lal hnênah chuan, “Indonaah i han inbei teh ang hmiang, lo kal ta che,” tia cho tûrin mi a tîr a.

¹⁸Israel lal Joasa chuan Juda lal Amazia hnênah, “Lebanon lênglîngin Lebanon sidar hnênah, ‘I fanu chu ka fapa nupuih mi pe rawh,’ a ti a; Lebanon ram sakawlh a lo kal a, lênglîng chu a

chıl thlu ta mai a.

¹⁹Nang hi, Edom i han hneh ve dêk dêk a, i rilru a chapo nghâl mai mâw. Inah khân tawm hlê hlê la ti nia; engah nge i tlûk chhiatna tûra buaina chawh chhuah i tum tâk, nang leh Juda ram chawp hian?” tiin a chhâng lêt a.

²⁰Mahse, Amazia chuan a pawisa duh lo va, Edom pathian an biak tlat avângin an hmêlmâte kuta a pêk theihna tûra Pathian tih a lo ni a.

²¹Tichuan, Israel lal Joasa chu a thawk chhuak ta a; amah leh Juda lal Amazia chu Juda chan ram, Beth Semes-ah chuan an inhmachhawn ta ngei a.

²²Israelte chuan Judate chu an hneh ta a, mahni in lamah an tlânchhe vek a.

²³Israel lal Joasa chuan Juda lal Amazia, Joasa fapa, Jehoahaza fapa chu Beth Semes-ah chuan a man a; Jerusalemah a hruai a, Jerusalem kulh chu Ephraim Kawngka ațanga Bangkil Kawngka thlengin tawng zalîa thui a chhu chhe vek a.

²⁴Pathian in leh Obed-Edoma rangkachak leh silvar leh bungbêl an hmuh theih zawng zawng, lal ina sum dahna bâwma mi nê a la fâi vek a, mite chu salah a man baw a, Samari khaw lamah a hâwpui ta a.

AMAZIA THIH THÛ

²⁵Juda lal Amazia chu Israel lal, Jehoahaza fapa Joasa thih hnûah pawh kum 15 a la dam a.

²⁶Amazia thiltih dangte chu, a bul ațanga a tâwp thlengin Juda lalte leh Israelte chanchin ziahna bûah a chuang a ni lo'm ni?

²⁷Amazian LALPA zui a bânsan hnu chuan Jerusalem-ah phiarrutu an insiam a, ani chu Lakis khuaah a tlânchhia a; mahse Lakis-ah pawh chuan an ûm zui zêl a, chutah chuan an that ta a ni.

²⁸Sakawrin anrawn phur hâwng a, Jerusalem-ah, Judate Khawpuia an thlahtute zingah an phûm ta a ni.

BUNG 26

JUDA LAL UZZIA

¹Juda mipuite chuan kum 16 mi Uzzia chu an hruai a, a pa Amazia aiah lalah an siam ta a.

²Lal a thiha, an thlahtute hnêna a muthilh hnû chuan ani chuan Elath chu Juda ramah a la lêt leh a, khua a dîn ța leh a.

³Uzzia chu lal a nihin kum 16 mi a ni a, Jerusalemah kum 52 chhûng ro a rêl. A nu hming chu Jekolia-i, Jerusalem mi a ni.

⁴A pa Amazia tih dân ang bawkin, LALPA mit hmuhah dik takin a ti thîn a.

⁵Pathian inlârna hre thiam Zekaria dam chhûng khân Pathian a zawng tlat thîn a; LALPA a zawn chhûng zawng chuan Pathianin a tihmuingîl zêl a.

⁶Philistia-ho do tûrin a thawk chhuak a, Gath khaw kulh bang te, Jabne kulh bang leh Ashdod kulh bangte a chhu chhia a; Ashdod chhehvêlah leh Philistia-ho zingah khua a dîn thluah a.

⁷Philistia-ho lakah te, Gur Baal-a awm Arab-hote leh Meun-hote lakah Pathianin a țanpui a.

⁸Ammon-hote pawhin Uzzia hnênah chhiah an pe thîn a. A lo chak tâk êm avângin Aigupta ram thlengin a hming pawh a thang ta hlê a.

⁹Uzzia chuan Jerusalema Bangkil Kawngkhârah te, Ruam Kawngkhâr-ah te leh bang kil kâwi chhah laiah te in sâng a sâ a; kulh chu a thuan nghet baw a.

¹⁰Thlâlêrah te in sâng a sâ a. Ran rual a ngah avângin phai zâwl leh hmun hniam deuhah tuikhur tam tak a lâi chhuak a; lo neih lam ngaina mi a nih avângin tlâng ramah te leh Karmel-ah huan neitute leh grêp huan enkawltute a nei a.

¹¹Uzzia chuan a pâwl pâwla râldo tûra chhuak thîn râldo pâwl a nei a, ziaktu Jeiela leh hotu Maaseia-ten an hming an ziah dân ang zêla lal sipai hotu Hanania enkawlina hnuaia awm an ni a.

¹²Mi chak huaisen pâwl hotute chu an vaiin 2,600 an ni.

¹³An hnuaiah chuan chakna nêl râldo, hmêlma laka an lal țanpui inpeih sâ reng sipai 307,500 an awm.

¹⁴Uzzia chuan a sipai zawng zawng tân phâw te, fei te, thîrlukhum te, thîrkawr te, thalngul te leh lung vawmna virvawm te a siamsak vek a.

¹⁵Jerusalemah chuan, in sâng leh kulh kila dah theih tûr, thalte leh lung lian pui pui kah chhuahna, mithiamte hmuh chhuah khâwl a siam chhuak a. A hming chu ram zâu leh hla takah te a thang chhuak a, chak tak a nih thlengin mak tak taka țanpuina a dawng thîn a ni.

CHAPO VÂNGIN UZZIAN HREM A TUAR

¹⁶Chutia a lo chak êm êm lai chuan a tlâk chhiatna tûrin a thînlung a lo chapo va; LALPA a Pathian dân bawhchhiain rimtui maichâma rimtui hâl tûrin LALPA tempulah a lût ta mai a.

¹⁷Puithiam Azaria chuan a va ûm zui vat a, a hnênah chuan LALPA puithiam sawmriat mi huaisen rual an awm a.

¹⁸Lal Uzzia chu an va khap a, a hnênah, “Uzzi, LALPA hnêna rimtui hâl hi i tih vê tûr a ni lo, rimtui hâl tûra inserh thianghlim puithiamte leh Aarona fapate chauh tih tûr a ni. Hmun thianghlim ațang hian chhuak rawh, dân i bawhchhiat tâk hi! LALPA Pathian hnên ațangin châwimâwina dawn tûr engmah i nei chuang lo vang,” an ti a.

¹⁹Uzzia chu a thinur ta a; rimtui hâl tumin a hâlna bûr a keng a. Puithiamho chung a thinrim taka a awm lai chuan LALPA ina puithiamte hmâah, rimtui maichâm bulah, LALPA ina puithiamho hmâah chuan a chal chu a lo phâr chhuak ta uarh mai a.

²⁰Puithiam lal Azaria leh puithiamho zawng zawng chuan amah chu an en a, a chal chu a phâr ta mai si a; chû hmun ațang chuan an nam chhuak ta a. LALPA chutianga a hrem avâng chuan ani pawh chu hmanhmawh takin a chhuak ta a.

²¹Lal Uzzia chu a thih thlengin a phâr ta reng a. Phâr a nih avângin in hrangah a awm ta a; LALPA in ațanga hnawh chhuah a ni baw si a. A fapa Jothama chuan lal chhûngkua enkawlin an ram mipuite ro a rêlsak a.

²²Uzzia thiltih dang te chu, a bul ațanga a tawp thlengin Amozia fapa zâwlnei Isaian a ziak.

²³Tichuan, Uzzia chu an thlahtute hnênah a muhîl a. “Phâr a ni,” an ti si a, tichuan an thlahtute thlanmual, lal thlanmualah an phûm a. A aiah a fapa Jothama chu a lal a.

BUNG 27

JUDA LAL JOTHAMA

¹Jothama chu lal a nihin kum 25 mi a ni a, Jerusalema kum 16 ro a rêl a. A nu hming chu Jerusai, Zadoka fanu a ni.

²A pa Uzzia tih ang zawm vekin, LALPA mit hmuhah dik takin a ti thîn a (LALPA tempulah erawh chuan a lût vê lo chauh a ni). Mipuite chu tenawm takin an la khawsa zui reng a.

³LALPA in panna Kawngkhâr Chhak-tâ chu a siam thâ a, Ophel kulh bang phei chu nasa takin a chei tha a.

⁴Juda tlâng ramah khaw tam tak a din a, ngaw chhûnghah kulh leh râlven insâng tam tak a sa bawk.

⁵Ammon lal nê an indo va, a hneh a. Chumi kum chuan Ammon miten silvar talent zâ, wheat kor sîngkhat leh barli kor sîngkhat an pê a. Ammon mite chuan a kum hnihna leh a kum thumnaah pawh chutiang zât bawk chu an pê a.

⁶Jothama chu LALPA a Pathian hmâa a awm dân te a rêl fel thîn avângin a lo chak ta hle a.

⁷Jothama thiltih dang te, a râlđo te leh a nun dân te chu Israel leh Juda lalte chanchin ziahna bû-ah a chuang.

⁸Lal a lo nihin kum 25 mi a ni a, Jerusalema kum 16 chhûng ro a rêl.

⁹Tichuan Jothama chu an thlahtute hnênah a muhîl a, Davida Khawpuiah an phûm a. A fapa Ahaza chu a aiah a lo lal a.

BUNG 28

JUDA LAL AHAZA

¹Ahaza chu lal a nihin kum 20 mi a ni a, Jerusalema kum 16 chhûng ro a rêl a; a pu Davida angin LALPA mit hmuhah dik takin thil a ti lo va.

²Israel lalte nun dânin a nung ta zâwk a, Baalte tân milim te a chhûntîr a.

³Hinnoma Fapa Ruamah rimtui a hâl a, LALPAN Israel fate hmâa a hnawh chhuah hnam dangte chin dân tenawm angin a fate pawh meiah a hâl ta hial a.

⁴Hmun sângah te, tlâng chungah te leh, thing hring tin hnuaiah te a inhâwi a, rimtui a hâl thîn a.

SURIA LEH ISRAELIN JUDA RAM AN HNEH

⁵Chuvângin, LALPA a Pathian chuan ani chu Suria lal kutah a pê a. Tichuan, an rawn sawisâ a, mipui tam tak salah an hruai a, Damaska khuaah an kâwi hâw duah duah a. Israel lal kutah pawh pêk an ni bawk a, ani phei chuan mi tam tak a that chiam a.

⁶LALPA an thlahtute Pathian an hawisan vei a, Remalia fapa Peka chuan an mi huaisen zawng zawng, mi 120,000 zet ni khat thil thû-ah a that vek a.

⁷Ephraim mi chak Zikria chuan lal fapa Maaseia te, chhûngkaw puipa Azrikama te leh lal dawttu Elkana te a that a.

⁸Israelte chuan an hnampui hmeichhia te, an fanu leh fapa nuai hnih lai salah an mansak a; râlâk sum tam tak an chhuhsak tâkte nê Samari khua an thlenpui a.

ISRAELTEN SAL AN CHHUAH

⁹Mahse LALPA zâwlnei a lo awm hlauh va, a hming chu Odeda a ni; Samari-a lo hâw tûr sipaite hmâah a lo kal chhuak a, an hnênah: “En teh u, LALPA in thlahtute Pathian chu Judate laka a thinrim vâng chauhvîn in kutah a pê che u-a; heti tak maia thinrima in lo thah ve vak vakna hian vîn a han tawng ta hial a.

¹⁰Tûnah hian Juda leh Jerusalem mipui a hmei a pain salah siam luih in la tum leh ta zêl a; LALPA in Pathian hmâah in dik lohzia hi in inhre na nge?

¹¹Tûnah hian ka thû hi ngaithla ula, in unaute laka in man salte hi hâwtîr rawh u, in chungâ LALPA thinurna hi a ling nasa teh a nia,” a ti a.

¹²Tichuan, Ephraim hnam hruiat lian thenkhat Johanana fapa Azaria te, Mesilemotha fapa Berekia te, Salluma fapa Jehizkia te, Hadlaia fapa Amasa te chu indona ațanga lo hâw te dodâlin an lo ding chhuak a,

¹³an hnênah, “Hetah hian sal in rawn thlen tûr a ni lo, LALPA thin kan tiur tawh reng a ni. Kan sualna leh thiam lohzia belhchhah in tum a nih hi; kan sualna hi a nasa tawh a, Israel lakah hian thinurna a nasa tawh a ni,” an ti a.

¹⁴Tichuan, sipaite chuan salte leh an bungraw lâksakte chu hotute leh mipui pung khâwm zawng zawng hmâah chuan an hnutchhiah ta a.

¹⁵Hminghmerha an lam chhuah tâk hote chu an tho va, salte chu an hrui a, thuamhnaw nei lote chu an râlâk sum ațang chuan an thuam a, silhên te leh pheikhaw bun tûrte an pê a, chaw ei tûr leh in tûr an pê a, hriak te an thih a; an zînga chak lo zualte chu sabengtung chungah te an chuantîr a. Tichuan tûm khawpui, Jeriko khua an unaute hnên an va thlen a. Samari khuaah an kîr leh ta a.

ASSURIA-IN JUDATE A PUI DUH LO

¹⁶Chutih lai chuan Lal Ahaza chuan Assuria lal chu amah rawn pui tûrin a va sâwm a;

¹⁷Edom-hovin Judate an rawn bei leh a, sala an hrui bo vâng a ni a.

¹⁸Philistia-ho pawhin phâi lam leh Juda chhim lam khuate an lo rûn a, Beth Semes te, Aijalon te, Gederot te, Sokoh te leh an khawperte, Timna leh a khawper te, Gimzo leh a khawperte an lâksak a; chûngte chu an luahsak a.

¹⁹LALPAN Judate a hnuh hniamna chhan chu, Israel lal Ahaza chuan Judai ram mite nunah inthlahdahna a tipunlun zêl a, LALPA laka rinawm lo taka a awm reng vâng a ni.

²⁰Assuria lal Tiglath-Pilesera pawh a lo kal a, tanpui ahnêkin a timangantu lekah a țang zâwk a.

²¹Ahaza chuan LALPA in ațang te, lal in ațangte leh milianho hnên ațangtea sum a dap khâwmte chu Assuria lal hnênah a hlân

a, mahse ani chuan a lo tanpui duh chuang lo va.

PATHIAN HAWISANNA LEH AHAZA THIH THŪ

²²A mangan lai pawhin Lal Ahaza chu LALPA lakah a rinawm lo deuh deuh zâwk a. Chû chu Lal Ahaza awm dân a ni.

²³Amah titlâwmtu Damaska pathiante hnênah a inthâwi a, “Suria lalte hi an pathianten an tanpui thin avângin, min tanpui ve nân an hnênah ka inthâwi teh ang,” a ti a ni. Nimahsela, amah leh Israel zawng zawng tân chhiatna a ni ta hlauh si a.

²⁴Tichuan, Pathian ina bungbêlte chu a khâwm vek a, Pathian ina bungbêlte chu a sât sawm vek a, LALPA in kawngkhârtê chu a kalh vek a, Jerusalem khawpui kil tinah maichâm a siam a.

²⁵Juda khawpui tinah pawh pathian dangte hnêna rimtui hâlta tûrin hmun sâng a siam vek a, an thlahtute Pathian, LALPA thinurna chu a chawh tho ta a ni.

²⁶A thiltih dangte leh a awm dân zawng zawngte chu, a bul ațanga a tâwp thlengin Judate leh Israel lalte chanchin ziahna bû-ah a chuang.

²⁷Tichuan, Ahaza chu an thlahtute hnênah a muhîl a, Jerusalemah, khawpuiah an phûm a, Israel lalte thlânah chuan an phûm ve lo. A aiah a fapa Hezekia a lo lal ta a.

BUNG 29

JUDAI RAMAH HEZEKIA’N RO A RÊL

¹Hezekia chu lal a nihin kum 25 mi a ni a, Jerusalemah kum 29 chhûng ro a rêl. A nu hming chu Abijai, Zekaria fanu a ni.

²A pu Davida tihdân ang zêlin, LALPA mit hmuhah dik takin thil a ti thin a.

HEZEKIA’N TEMPUL A THIAN FAI

³A lal kum khatna, thla khatnaah chuan, LALPA in kawngkhârtê chu a hawng a, a siam tha bawh a.

⁴Puithiamte leh Levi hnamte chu a hruai lût a, chhak lam tual zâwlah a ko khâwm a,

⁵an hnênah: “Levi-hote u, min lo ngaithla teh u! Intithianghlim ula, LALPA in thlahtute Pathian in pawh hi tithianghlim rawh u, hmun thianghlim ațangin bawhlhlawhte chu thiar chhuak rawh u.

⁶Kan pate khân LALPA kan Pathian mit hmuhah thil sual tiin an lo bawhchhia a; amah an bânzan a, LALPA awmna hmun ațang ngeiin amah chu hawisanin an hnuchhawn ta a.

⁷Hulhliap kawngkâte an khâr ping vek a, khâwnvârte an timit a, Israelte Pathian hmun thianghlimah rimtui hâl a awm tawh lo va, hâlrâl thilhlân an hlân tawh hek lo.

⁸Chuvângin, LALPA thinrimna chu Judate leh Jerusalem chungah a tlâ a, hetia mita in hmuh ang hian, baihvai tak leh hrehawm tuar rêng rênga mite nuihzabûr lek atân a siam ta a nih hi.

⁹Hei vâng tak hian kan pate-ho kha khandaiha sawisakin an awm a; kan fanu kan fapate leh kan nupuie salah an man a nih kha.

¹⁰“Tûnah hian LALPA kan Pathian thinurna nasa tak hi kan hnên ata ama’n min lâk kiansak theih nân thuthlun ka rilrûk a ni.

¹¹Ka naute u, inthlahdah suh u, LALPA chuan a hmâa ding tûr te, a rawngbâwl tûr tein a thlang si che u-a; tichuan, a rawng bâwlin, rimtui hâl thin rawh u,” a ti a.

¹²Tichuan, chûng Levi-hote chu an tho va: Kohatha thlaha mi Amasaia fapa Mahatha leh Azaria fapa Joela te; Meraria thlaha mi, Abdia fapa Kisa leh Jehalelela fapa Azaria te; Gershona thlaha mi Zimma fapa Joaha leh Joaha fapa Edena te;

¹³Elizaphana thlaha mi Simria leh Jeielia te; Asapha thlaha mi Zekaria leh Mattania te;

¹⁴Hemana thlaha mi Jehiela leh Simeia te; Jeduthuna thlaha mi Semaia te leh Uzziel a te an ni.

¹⁵An unaute an khâwm a, lal thupêk ang chuan an intithianghlim a, LALPA thû angin LALPA in chu an thian thianghlim ta a.

¹⁶Puithiamte chu LALPA in chhûngril zâwk thian tûrin an lût a, LALPA tempul chhûnga hnâwmhnawh an hmuh zawng zawng chu LALPA in tualah chuan an rawn la chhuak a. Chuta țang chuan Levi-hoten Kidron Luiah an thliar thlâ a.

¹⁷A thla khatna, ni khat ni ațangin an thian fâi tan a, chumi thla ni riat ni chuan LALPA hulhliap thlengin an thian fâi hman a. Tichuan, ni riat chhûngin LALPA in chu an thian thianghlim a, a thla khatna, ni sâwmparuk nî-ah an zo ta a ni.

¹⁸Lal Hezekia hnênah an va lût a, “LALPA in chu kan thian fâi zo ta e, hâlrâl thilhlanna maichâm leh a bungbêl zawng zawng te, chhangserh dahna dawhkân leh a hmanrua zawng zawngte nê.

¹⁹Chû bâkah, Lal Ahaza lal laia suahsual rawng a bâwl laia bungbêl a paih darh-ho zawng zawngte pawh kan rem tha vek a, kan tithianghlim tawh e; LALPA maichâm hmâah a awm ta e,” an ti a.

HEZEKIA’N TEMPUL A HLÂN THAR

²⁰Lal Hezekia chu hmâ takah a tho va, khawpui awptute a khâwm a, LALPA inah an chho ta a.

²¹Lalram tân te, hmun thianghlim tân te leh Judai ram tân tea sual thâwi nân bawngpa pasarih, berâmpa pasarih, berâm no pasarih leh kêlpa pasarih an rawn lâ a. LALPA maichâma hlân tûrin Aarona thlah puithiamte chu thû a pê a.

²²Tichuan, bawngpate chu an talh a, puithiamte chuan a thisen an lo dawh a, maichâmah chuan an theh a. Chutiang bawkin berâmpate an talh a, a thisen chu maichâmah chuan an theh leh a. Berâm note pawh an talh a, maichâmah a thisen an theh leh bawh a.

²³Chumi zawhah chuan lal leh mipuiho hmâah sual thâwina kêlpate an rawn kai a, an lu chungah an kut an ngat a.

²⁴Puithiamte chuan an talh a; a thisen chu Israel mi zawng zawng tlanna tûra sual thâwi nân maichâmah an hlân a, hâlrâl thilhlân leh sual thâwina chu Israel zawng zawngte tâna siam tûrin lalin thû a pê a

²⁵Davida te, lal zâwlnei Gada te leh zâwlnei Nathana te thupêk angin, Levihote chu dârbenthek te, țingțang leh perhkhuangte nê LALPA inah chuan a awmtîr a; chutiang chu a zâwlneite hmanga LALPA thupêk a ni si a.

²⁶Levi-hote chuan Davida siam rimâwi tum rîk ðhinte an keng a, puithiamten tâwtawrâwt an keng baw k a.

²⁷Tichuan, Hezekia chuan maichâma hâlrâl thilhlân chu hlân tûrin thú a pê a. Hâlrâl thil an hlan ðan laiin LALPA fakna hlâ pawh tâwtawrâwt leh Israel lal Davida siam rimawi tumrîkte nê an inðan vê nghâl a

²⁸Mipui zawng zawngin Pathian chibai an bûk a, zâimiten hlâ an sâ a, tâwtawrâwtputen an hâm a; hâlrâl thilhlân an hlan zawh hmâ chuan an lo tum reng a.

²⁹Thilhlân an zawh chuan, lal leh a hnêna awm zawng zawngin kûnin Pathian chibai an bûk a.

³⁰Davida leh zâwlnei Asapha-ten LALPA fakna hlâ an phuah sa tûrin Lal Hezekia leh hruaitute chuan Levia mite chu thu an pê a. Tichuan hlim takin fakna hlâ an sâ a, kûnin Pathian chibai an bûk a.

³¹Hezekia chuan an hnênah, “Tûnah chuan LALPA tân in inserh thianghlim ta baw k a, lo hnâi ula, LALPA inah hian inthâwinate leh lâwmthu sawina thilhlante rawn hlân rawh u le,” a ti a. Tichuan, mipuite chuan inthâwina te, lâwmthu sawina thilhlante an rawn hlân a, a duh apiangin hâlrâl thilhlân an rawn hlân baw k a.

³²Mipuiten hâlrâl thilhlân an rawn ken zât chu bâwngpa 70, berâmpa 100 leh berâm no 200 a ni a; chung zawng zawng chu LALPA hnêna hâlrâl atâna an rawn pêk a ni.

³³Thil serh hrante chu bâwngpa 600 leh berâm 3,000 a ni.

³⁴Puithiamte chu an tlêm lutuk a, hâlrâl thilhlân vun te chu an lip sêng lo va; chuvângin an unau Levi-hote chuan a vâia an peih hmâ, puithiam dangte inthen thianghlim zawh hmâ chuan an pui a, Levi-hote chuan puithiamte ai mahin inthen thianghlim lam an taima zâwk si a.

³⁵Hâlrâl thilhlân chu a tam khawp a, hâlrâl thilhlân hlan tin atâna remna thilhlân sathâu leh in tûr thilhlân te pawh a tam êm êm a. Chuvâng chuan LALPA ina rawngbâwl dân chu an siam rem ta a.

³⁶Tichuan, Hezekia leh mipui zawng zawng chu chutiang taka ranga tifel thei tûra Pathianin a lo buatsaih avâng chuan an hlim êm êm a.

BUNG 30

HEZEKIA’N KALHLEN KÛT A HMANG

¹Hezekia chuan Israel leh Juda ram zawng zawngah mite a tîr a, Ephraim leh Manase ramah te pawh lehkha a thawn a, LALPA Israelte Pathian tân Jerusalema LALPA inah Kalhlên Kût hmanga lo kal khâwm vek tûrin a chah a.

²Lal leh an puipa hote leh Jerusalema mipui zawng zawngte chuan Kalhlên Kût chu thla hnihnâa neih an remti vek a.

³Puithiam inthian thianghlimho an la indaih loh avâng te, mipui lam pawh Jerusalema an la pun khâwm loh avâng tein a hun pangngaiha an kût thei lo va.

⁴An remruat dân chu lal leh mipuite pawhin ðhâ an ti a.

⁵Hun rei tak chhông dân anga an tih mûmal tawh loh avângin LALPA Israelte Pathian tân Jerusalema Kalhlên Kût hmanga kal khâwm vek tûr thú chu Israel ram pum, Beerseba aþanga Dan thlenga puang tûrin an titlû a.

⁶Tichuan, lehkha tlânputute chu lal leh a puipate lehkha kengin Israel leh Judai ram zawng zawngah an kal chhuak a, lal thupêkin tihian an hrilh zêl a, “Israela thlahte u, LALPA Abrahamate, Isaka te, Israela te Pathian lam rawn hawi leh rawh u; tichuan, Assuria lallo kut aþanga la dam khawchhuak chhunte lam hi a lo hawi leh thei dân nia.

⁷In pate leh in unauten an thlahtute LALPA Pathian dân an bawhchhiat avânga a tihborallo in hmuh tâkte ang khân awm vê suh u.

⁸In thlahtute angin luhlul hek suh ula, LALPA hnênah intulût zâwk rawh u; kumkhuaa a tihthianghlim tawh a hmun thianghlimah chuan lo lût ula, LALPA in Pathian rawng chu bâwl rawh u; tichuan, a thinurna nasa tak chu in hnên ata a la kiang dân nia.

⁹LALPA lam in lo hawi leh phawt chuan in unaute leh in fate sala mantuten lainat takin an lo enkawl ang a, hê ramah hian an lo kîr leh dân nia; LALPA in Pathian hi mi khawngaih thei leh zahngai thei tak a ni si a, a hnêna in inlamlêl leh phawt chuan a hawisan hauh lo vang che u,” a ti a.

¹⁰Tichuan, lehkha kengtute chuan Ephraim leh Manase ram te, Zebulun ram thlengin khaw tin an fang chhuak vek a; mahse mite chuan an lo nuihzat a, an lo nuihsawh vêl a.

¹¹Aser hnam te, Manase leh Zebulun hnama mi ðhenkhatte erawh chu innngaitlâwm takin Jerusalema an lo kal a.

¹²Judai ramah pheih chuan LALPA thúin, an lal leh an hotute thú chu thinslung sakhat pûa âwih tûrin Pathian kutin an chungah hnâ a thawk baw k a.

¹³Thla hnihnâah chuan mipui tam tak, a tama tam chu Chhang Dâwidim Telh Loh Kût hmang tûrin Jerusalema an kal khâwm a.

¹⁴An tho va, Jerusalema maichâmte leh rimtui hâlâna maichâm zawng zawng chu an lâ a, Kidron Luiha an paih vek a.

¹⁵Thla hnihnâa, ni 14 ni chuan Kalhlên Kût berâm note chu an talh a. Puithiamte leh Levi-hote chu an inzhapui a, an inthian thianghlim a, hâlrâl thilhlante chu LALPA inah chuan an rawn la ta a.

¹⁶Pathian mi Mosia Dân ang takin, anmahni hmun ðeuhvah an ding vek a; puithiamte chuan Levi-ho hnên aþanga an dawn thisen chu an theh a.

¹⁷Mipui zingah chuan inthian thianghlim vê lo tam tak an awm si a; chuvângin, LALPA tâna tithianghlim tûrin, la inthian thianghlim vê lote pualin Levi-ho chuan Kalhlên Kûtna berâmte chu an talhsak a.

¹⁸Ephraim mite, Manase mite, Isakar mite leh Zebulun mi lo kal tam takte chu la inthian thianghlim lo an ni a, mahse an ziaik dân kalhin Kalhlên Kût sâ chu an ei ve tho si a. Hezekia chuan anniho chu tihian a ðawngðaisak a, “LALPA ðha taka chuan mi tûpawh

¹⁹a thinlunga Pathian zawngtu, LALPA an thlahtute Pathian ngei zawng tûra inbuatsaih apiang chu, hmun thianghlim dân anga then thianghlim lohte pawh nise, ngaidam theuh rawh se,” a ti a.

²⁰LALPA chuan Hezekia ãawngtaina chu a lo ngaithlâ a, mipuite chu a tidam ta a.

²¹Tichuan, Jerusalema awm Israel hote chuan Chhang Dawidim Telh Loh Kût chu hlim takin ni sarih an hman a; Levi-ho leh puithiamte chuan ring takin rimâwi nê LALPA fakna hlâ sain, ni tin LALPA an châwimâwi a.

²²Hezekia chuan LALPA thù ãha taka zirtîrna petu Levi-ho zawng zawng chu a fuih sauh sauh va; an thlahtute Pathian, LALPA hnênah chuan remna thilhlante an hlân a, an sual thuphâ châwiin, ni sarih chhûng zawng kût ruai an ãheh mup mup a.

²³Mipuite chuan ni sarih dang kût nawn leh an remti tlang a, tichuan hlim takin ni sarih dang pawh chu an kût leh ta a.

²⁴Juda lal Hezekia chuan mipuite hnênah bâwngpa 1,000 leh berâm 7,000 a thawh a, an puipate pawhin mipuite tân bâwngpa 1,000 leh berâm 10,000 an lo thawh vê bawh a; puithiam tam tak an lo inthian thianghlim tawh bawh a.

²⁵Juda mipuite, puithiamte leh Levi hnamte, Israel ram ațanga mipui lo kalte leh Israel ram ațanga Judai rama khawsaho zawng zawngte chu an hlim êm êm a.

²⁶Tichuan, Jerusalema hlimna ropui a lo thleng a; Israel lal Solomona, Davida fapa hun lai ata tawh chutiang chu Jerusalema a la awm ngai lo.

²⁷Puithiam Levi hnamte chu an tho va, mipuite chu mal an sâwm a, an âw chu hriat sakin a awm a; an ãawngtaina chuan a chênna hmun thianghlim vân a han thleng a.

BUNG 31

HEZEKIA SIAM TATNA HNATHAWH

¹Chhûng thilte an tih zawh chuan chuta awm Israel mi zawng zawng chu Judai ram khawpuiah te an kal darh a, Judai ram leh Benjamin ramah te, Ephraim leh Manase ram zawng zawngah te thing milim zawng zawng an kit a, an sât sawm vek a, hmun sâng leh maichâmte chu a zavâia an tihboral vek thlengin an sawp chhe vek a. Tichuan, Israel mi zawng zawng chu an awmna khaw lamah, mahni in ãheuhvah an hâu ta a.

²Hezekia chuan puithiamte leh Levihote chu a pâwl pâwlin a ãhen a, mimal te pawh an chanvo ang zêlin a dah vek a; puithiamte leh Levi-hote chu hâlral thilhlân leh remna thilhlân hlân tûr te, rawngbâwl tûr te, LALPA in kawngkâa lâwmthu sawia fakna hlâ sa tûr tein a ruat a.

³LALPA Dâna inziak angin, zîng leh tlâia hâlral thilhlân te, Sabbath leh Thla Thar leh hunbi nei kûta hâlral thil hlân atân lal chuan a neihsam ațanga a thawh vê tûr pawh a ruat a.

⁴Chû bâkah, puithiamte leh Levi-hoten LALPA Dâna an inpêk reng theih nân Jerusalema awmte chu ãanpuina thawhlâwm pe tûrin thù a pê a.

⁵Thupêk chhuah a nih vêleh Israel fate chuan an buhbâl leh uain te, hriak leh khawizu te leh, thlawhhmâ ațanga an thlâi thar

hmasate chu anrawn pe khâwm ãeuh va; an deh chhuah tinrêng ațanga sâwma pakhat nêna an pêk khâwm chu tam tham tak a ni.

⁶Israelte leh Judate, Judai khawpuia chêngte chuan an sâwma pakhat bâwngpa leh berâmte anrawn lâ a; LALPA an Pathian tâna thil thianghlim an serh hrante chenin anrawn chhêk vûm thûr thûr a.

⁷Thla thumna ațangin anrawn chhêk ãan a, thla sarihnaah an chhûng khâwm zo chauh a ni.

⁸Hezekia leh an puipa hoten an thil chhêk khâwmte an han hmuh chuan, LALPA leh a mi Israelte chu an fak a.

⁹Hezekia chuan engtianga chuti zozai chhêk khâwm thei chunge an nih tiin puithiamte leh Levi-hote chu a zâwt a.

¹⁰Puithiam lal Azaria, Zadoka chhûngkuua mi chuan a chhâng a, “Mipuiten LALPA ina thilpêk anrawn hlan tih ațang khân ei tûrah kan hnianghnâr a, LALPA a mite mal a sawm zêl avângin a la bâng rei rui mai a; heti zozai hi ei sên loh a la awm cheu a nih hi,” a ti a.

¹¹Hezekia chuan LALPA inah chuan a dah khâwmna tûr pindan siam tûrin a ti a, an siam ta a.

¹²Tichuan thilpêk, sâwma pakhat leh serh hran thilte chu rinawm takin an pe lût ãap zêl a; Levi mi Kononia chu enkawltu atân an ruat a, a unaupa Simeian a ãanpui a.

¹³Lal Hezekia leh Pathian in hotu Azaria te thupêkin Kononia leh a unau Simeia te hnuaiah Jehiela te, Azazia te, Nahatha te, Asahela te, Jerimotha te, Jozabada te, Eliela te, Ismakia te, Mahatha te leh Benaia te chu a enkawltu atân ruat an ni.

¹⁴Chhak Lam Kawngka vêngtu Imna fapa Korea, Levi hnam chu mahni duhthûa Pathian hnêna thilpêk enkawltu leh, LALPA tâna thilpêk leh thil thianghlim ber berte semtu a ni a.

¹⁵Ani hnuaiah chuan Edena te, Miniamina te, Jesua te, Semaia te, Amaria te leh Sekania te an awm leh a; anniho chu puithiam awmna khuua an unau mi lian leh mi têtê hnêna a pâwl pâwla rinawm taka an thil dawn tûrte semtu an ni.

¹⁶Hnam tin ziah luhnaa chuang mipa kum thum chung lam te bâkah, a pâwl pâwla LALPA ina rawngbâwla lût ãhin apiangte pawhin an ni tin chanvo an chang vek a,

¹⁷puithiamten an thlahtu chhûngkuua ang zêlin an dawng a; Levi-ho kum sawmhni chîn chung lam te erawh chuan an hna thawh hun ruat dân ang zêlin an dawng a,

¹⁸thlahtu ziahna bûa hming chuang zawng zawngte chuan an fanaute leh an nupuite, an fanu an fapate nê, an zavâiin-rinawm taka thianghlim tûra an inserh hran avângin an dawng bawh a.

¹⁹Puithiam Aarona thlah, an awmna khaw daifêma awmte bâkah, khaw tina awmte tân, puithiamte leh Levia thlahte ziahnaa mipa hming chuang apiangte chanpual sem tûrin, hming hmerha mi ruat bîk an awm bawh.

²⁰Chutiang chuan Hezekia chuan Judai ram dung thuanin a ti vek a, LALPA a Pathian hmâah thil ãha leh dik chu rinawm takin a ti ãhin a ni.

²¹Pathian ina rawngbâwlnaah te, dân leh thupêk lamah te, a Pathian zawng tûra bul a ãanna rêng rêngah a thinlung zawng zawngin a ti ãhin a. Tichuan, a lo hmuingil ta êm êm a ni.

BUNG 32

SENAKERIBA LALPA A UANKHUM

¹Hetianga rinawm taka thil tih a nih hnôah hian Assuria lal Senakeriba chu lo kalin Judai ramah a rawn lût a; kulh nei khuate chu hneh tumin a hual a.

²Hezekia chuan Senakeriba lo kal thu leh, Jerusalem rawn beih a tum tih a lo hriatin

³Khawpui pawns lama tuikhurte chu titâwp tûrin a milianho leh sipai hotute chu thûrân a pê a, anni chuan an lo thlâwp a.

⁴Tichuan, mi tam tak an lo pung khâwm a, “Engah nge Assuria lalten tui tam tak an rawn neih mai ang le?” tiin, tuikhur zawng zawng leh a ram chhûnga tui luang rêng rêng chu an chhilh bo vek a.

⁵A intichak sauh sauh va, kulh bang chhe laite a thawm thâ a, râlvên in sâng chenin a rem sân belh a, pawns lamah kulh bangin a thuah bawk a; Davida Khawpui chhûnga Millo chu a thuam thâ a, râltuam leh phâw a siam t̃euh bawk a.

⁶Mipuite kaihrui tûrin sipai hotute a ruat a, khawpui kulh bula mual zâwlah chuan a ko khâwm a, fuihna thûchah a sawi a,

⁷“Chak tak leh huai takin awm ula; Assuria lal leh a sipai rual tam takte hmâah hian zâm suh ula, hlâu hek suh u; a lama t̃ang aini kan lama t̃ang an tam zâwk a ni.

⁸A lama t̃ang chu tîsâ mai an ni a; kan lama t̃ang erawh chu LALPA kan Pathian, kan indona min dopuia, min t̃anpuitu tûr a ni si a,” a ti a. Juda lal Hezekia thu sawi chuan mipuite chu a tihuai sawt a.

⁹Chumi hnôah chuan, Assuria lal Senakeriba chuan a hote chu Jerusalemah a tîr a (amah leh a sipai zawng zawngte chuan Lakis khua an hual mêk a), Juda lal Hezekia leh Jerusalema awm Juda mipui zawng zawngte hnênah chuan,

¹⁰“Assuria lal Senakeriba chuan, “Tû puihna nge in beisei a, Jerusalema hual beh kher in ngaih dâwn le?

¹¹Hezekia hian, “LALPA kan Pathian chuan Assuria lal kut ata min chhan chhuak dâwn,” tiin ril̃tâm leh tuihâl tuar tûrin a lo hmin che u a ni mâw?

¹²Hezekia tho hi a ni lo vem ni, a hmun sângte leh a maichâmte la bova, Judate leh Jerusalem mite hnênah, “Maichâm pakhatath Pathian in bia ang a, rimtui in hâl tûr a ni, tih thu petu kha?”

¹³Kei leh ka paten ram dang mi zawng zawng chung a kan thiltihte kha in hre lo vem ni? Chûng ramte leh hnam pathiante zîngah tu nge ka kut ata chhan chhuak thei tawh ngai le?

¹⁴Ka puten an tihbora t̃ak hnamte pathian zawng zawng zîngah tû pathianin nge ka kut ata chhan chhuak tawha, nangni Pathian tehlu hian ka kut ata engtin nge a chhan chhuah theih bik ang che u?

¹⁵Chuvângin, Hezekia thû kha ngaichâng suh ula, chutiang thû mai mai chu inbumtîr suh u; eng hnam leh eng lalram pathian mahin ka pute kut ata leh ka kut ata an chhan chhuak thei lo va. Nangni Pathian phei chuan ka kut ata hi a chhan chhuak thei lo lehual dâwn lo vem ni?’ a ti e,” a ti a.

¹⁶Chu bâkah, a mi tirhte chuan LALPA Pathian leh a chhiahhlawh Hezekia chu nasa lehualin an sawi chhia a.

¹⁷LALPA Israelte Pathian sawichhiatna lehkha a ziaak bawk a, “Ram tin leh hnam tin pathiante pawhin ka kut ata an chhan chhuak thei lo ang bawkin, Hezekia Pathian tehlu hian ka kut ata a chhan chhuak thei lo vang,” tiin.

¹⁸Khawpui chu an lâk ngei theih nân, Jerusalem mipui, kulh t̃lânga awmte chu tih̃thaiha, tichî-ai tûrin Hebrai t̃awngin an âu khum vak vak a.

¹⁹Jerusalem Pathian chu lei mite pathian pakhat vê ang leka ngaiin— mihring kutchhuak ang lekah an sawi chhia a.

SENAKERIBA TLÂWM LEH THIH THÛ

²⁰Chû thil avâng chuan Lal Hezekia leh zâwlnei Isaia, Amoza fapa chu an t̃awngtai a, vân lam an âu va.

²¹LALPA chuan Assuria lal sipai hmunpuiah a Vântirhkoah a tîr a, an mi chak huaisen te, an sipai hotute leh hmahruaitute chu a tihlum vek a. Tichuan, zak êm êmin ama ram lamah a hâu ta a. A pathian tempul chhûnga a va luh laiin ama rîla rah ngei ten khandaihin an that ta a ni.

²²Tichuan, LALPA chuan Hezekia leh Jerusalem mipuite chu Assuria lal Senakeriba lakah leh, mi dang zawng zawng lakah a chhan chhuak a, kil tin a t̃angin a vêng zêl a.

²³Jerusalemah chuan mi tam takin LALPA hnênah thilpêk rawn kengin Juda lal Hezekia hnênah an rawn hlân zut zut a, chuta chin chu hnam tinte hmuhah châwi sânin a awm ta a.

HEZEKIA A INTITLÂWM

²⁴Chûng lai chuan Hezekia chu thih ngamin a dam lo va, a thi lek lek a, LALPA hnênah a t̃awngtai a; ani chuan chhinchhiahna pên a lo chhâng a.

²⁵Nimahsela, Hezekia thinlung chu a lo chapo tawh avângin duhsakna dawng a ni tih rêng a inhre duh ta lo va; chuvângin amah leh Judai ram leh Jerusalem chungah chuan thinurnain a rawn chîm ta a.

²⁶Hezekia chu a thinlung chapona ata amah leh Jerusalema mite nêan an intitlâwm ta a; chuvângin Hezekia hun chhûng chuan LALPA thinurna chu a lo thleng ta lo a ni.

HEZEKIA HAUSAKNA LEH ROPUINA

²⁷Hezekia chu namên lovin a hausa a, a ropui êm êm a. A thil neih silvar te, rangkachak te, lunghlû te, mawsawla te, phâw te leh thil thâ leh duhawm tinrêng dahna tûr tangka in a siam hial a;

²⁸buh thar te, uain te leh hriak dah khâwmna tûr chhêk in a sa bawk a; ran tinrêng dahna tûr te leh berâm huangte a siam bawk a.

²⁹Khuate pawh a dîn a, bâwng rual leh berâm rual a ngah êm êm a; Pathianin namên lovin a tihausa ta si a.

³⁰Hezekia bawk chuan Gihon Chhak Zâwk lui tui luang lai chu titâwpin tui kawng a verh a, tui chu Davida Khawpui thlang lamah a luan luhtîr a. Hezekia chu a hnathawh tinrêngah a hmuîngîl êm êm a.

³¹Amaherawhchu, a ram chhûnga thil mak tih chungchâng zâwt thlîthlai tûra Babulon mi lianten palai an rawn tîr thûah erawh chuan a rilrûa awm zawnzawngte fiahna hmanga a hriat theih nân Pathianin a thlahthlam ta a ni.

³²Hezekia thiltih dang te, a thâtna te chu Amozâ fapa zâwlnei Isaia inlârna bûah leh Juda leh Israel lalte chanchin ziahna bûah a chuang.

³³Tichuan, Hezekia chu an thlahtute hnênah a muhîl a, Davida thlahte thlânmuah chuanchung zâwkah an phûm a; a thih chuan Judate leh Jerusalema awm zawnzawng chuan amah zahna an lantîr a. A aiah a fapa Manasea chu a lo lal ta a.

BUNG 33

JUDAI RAM LAL MANASEA

¹Manasea chu lal a nihin kum 12 mi a ni a, Jerusalema kum 55 chhûng ro a rêl a.

²Mahse, LALPA mit hmuhah thil sual, Israel fate hmâa LALPAN a hnawh chhuah tâk hnamten thil tenawm an chîn thîn ang chu a chîng ve a.

³A pa Hezekian a tihchhiat tawh hmun sângte a dîn thâ leh a, Baalte tân maichâm te a tung dîng a, thingin milim a dîn a; vâna awm zawnzawngte chu chibai bûkin, an rawng te a bawl a.

⁴“Jerusalema ka hming a awm kumkhua ang,” tia LALPAN a lo sawi, LALPA inah pawh maichâmte a dîn ta hial a.

⁵LALPA in tual zâwl pahniha vâna awm zawnzawng tân maichâmte a siam a.

⁶A fapate pawh Hinnoma Fapa Ruamah meiah a kal tlangtîr a; aien te, dâwi leh bawlhlo hmanga indâwi te a chîng a, ramhuaizâwl rawih leh râu biak a chîng baw a. LALPA thinurna chawh tho tûrin a mit hmuhah thil sual nasa tak a ti thîn a.

⁷A milim chhûn, pathian lim a siam ngei chu Pathian inah a dah lût hial a; chû hmun chu Pathianin Davida leh a fapa Solomona hnênah, “Hê in leh Jerusalem hi kumkhuaa ka hming awmna tûra Israel hnam zawnzawng zînga ta ka thlan chhuah a ni a;

⁸Mosia hmanga ka thupêk zawnzawng, dân thû te, thuruat te, zirtîrna thûte chu fimkhur taka an zawn phawt chuan an thlahtute hnêna ka pêk Israel ram aţang hian ka hnawt chhuak leh tawh ngai lo vang,” tia a lo hrilh hmun ngei kha a ni si a.

⁹Mahse, Israel fate hmâa a tihboral tâk hnamte aia hluar zâwkin, Manasea chuan Judate leh Jerusalem mipuite chu nasa zâwkin thil sual a tihîr ta a.

INCHHÎRIN MANASEAN NGAI A AWH LEH

¹⁰LALPA chuan Manasea leh a mite hnênah thû sawi thîn mahse an ngaithla duh chuang lo va.

¹¹Chuvângin, LALPA chuan Assuria lal sipai hotute a rawn tîr a, anni chuan Manasea chu thîr kawm an bahtîr a, dâr kawl an buntîr baw a, Babulon ramah an hruai bo ta daih a.

¹²Chutia lungngai taka a awm lai chuan, LALPA a Pathian hnênah a ţawnţai a, a pi leh pute Pathian hmâah chuan tihtak zetin a intilâwm a,

¹³A hnênah a ţawnţai a; ani chuan a thil dîl leh ngen te chu a ngaihlâksak a; Jerusalema ama lalramah ngei chuan a hruai hâw leh ta a. Manasea chuan LALPA chu Pathian a nihzia a hre fiah ta a ni.

¹⁴Chumi hnû chuan Davida Khawpui kulh pâwn zâwk chu Gihon thlang lam, ruam zâwl aţanga Sangha Kawngka panna thlengin a siam thâ a; Ophel hualin sâng takin a dîn a. Judai ram kulh nei khua zawnzawngah sipai hotute a dah a.

¹⁵LALPA in aţangin ram dang pathiante leh milimte chu a la bo vek a, LALPA in tâng leh Jerusalema maichâm a lo siam zawnzawngte pawh a la bo vek a; khaw pâwnah a pail chhuak vek a.

¹⁶LALPA maichâm chu a siam thâ a, remna thilhlan leh lâwmna thilhlan a hlân a, Judate chu LALPA Israelte Pathian rawngbâwl tûrin thû a pê a.

¹⁷Tichuan, mipuite chu hmun sângah te la inthâwi thîn mahse, LALPA an Pathian hnênah chauh an inthâwi ta a ni.

MANASEA THIH THÛ

¹⁸Manasea chanchin dang, a Pathian hnêna a ţawnţai thû te, LALPA Israelte Pathian hminga zâwlneiin a hnêna thû an sawi te chu Israel lalte lehkhâbûah ziah a ni.

¹⁹A ţawnţaina leh Pathianin a dîlna a lo ngaihlâksak dân te, a inphahhniam hmâa a thil sual tih leh a bawhchhiat dân te, hmun sâng a dîn dân leh thing pathian lem leh milim ker chawp a siam thû te chu Hozaia chanchin ziahna bû-ah a chuang.

²⁰Manasea chu an thlahtute hnênah a muhîl a, ama inah an phûm a. A aiah a fapa Amona chu a lal ta a.

AMONA LAL DÂN LEH THIH THÛ

²¹Amona chu lal a nihin kum 22 mi a ni a, Jerusalema kum hnih ro a rêl.

²²Nimahsela, a pa Manasea tih dân ang bawkin LALPA mit hmuhah thil sual a ti thîn a; a pa Manasean milem pathian a ker chawp-ho zawnzawng hnênah Amona chu a inthâwi a, an rawng a bawl thîn a.

²³A pa Manasea intihtlâwm ang khân Amona chu LALPA hmâah a intihtlâwm duh lo va, a bawhchhe tam telh telh a.

²⁴Ama mite chuan an phiar a, ama inah ngei an that ta a ni.

²⁵Mahse Lal Amona thattute chu a ram mipuiten an tihlum vek a. Mipuite chuan a fapa Josia chu a aiah lalah an siam ta a.

BUNG 34

JUDA LAL JOSIA

¹Josia chu lal a nihin kum 8 mi a ni a, Jerusalema kum 31 ro a rêl.

²LALPA mit hmuhah dik takin a ti thîn a, a pu Davida kawng a rawn zawn ve a; vei lamah emaw, dîng lamah emaw a pên bosan ngai lo.

³Naupang tê la ni chung a kum riat a lal kumin, a pu Davida Pathian chu a zawnţan a; kum 12 a lal kum chuan hmun sâng te, thing pathian lem te, milim ker chawp leh chhûn chawpte chu Judai ram leh Jerusalem aţangin a thian fâi hman vek a ni.

⁴A mit hmuh lai ngein Baala maichâmte chu an chhu chhia a, a chung a rimtui maichâmte chu an kit a; thing pathian lem te, milim ker chawp leh chhûn chawpte chu a sât sawm a, a râwt dip a, chûngho hnêna inthâwî thînte thlânah chuan a theh darh vek a.

⁵An puithiamho ruhte chu an maichâmah chuan a hâl a, Judai ram leh Jerusalem chu a thian fâi a.

⁶Chutiang tak chuan Manasea te, Ephraim te, Simeon te leh Naphtali rama khawpuite leh a chhehvêl zawng zawng chu hreipui hmangin a thian vek a ni.

⁷Israel ram puma maichâm te leh thing pathian lim te a tihchhiata, milim kerchawpte a râwt sawm vek a, rimtui hâlana maichâm te a kih thlûk vek hnû chuan Jerusalemah a hâu ta a.

HILKIAN DÂN BÛ A HMU CHHUAK

⁸A rorêl kum 18-naa a ram chhûng leh tempul te a then fai zawh chuan Azalia fapa Saphana te, khaw awptu Maaseia te, chhinchhiahna vawngtu Joahaza fapa Joa te chu LALPA in thawm tha tûrin a tîr a.

⁹Puithiam Hilkia hnên an lo thlen chuan, Pathian ina an dah tangka, kawngkhâr vêngtu Levi nhamten an lo dawn khâwm chu an pê a; chûngte chu Manase leh Ephraim te, Israelho la awmchhun te, Juda leh Benjaminho zawng zawngten Jerusalema an rawn lâk khâwm a ni.

¹⁰LALPA in enkawltute kutah an hlân a; anni chuan LALPA in siam that hna thawktute rawih nân an hmang a.

¹¹Insatute leh mistiri rawih nân te, lungchher sâ lei nân te, Juda lalten an lo tihchhiat tawh avânga a in rel leh a chhuat phah thawm thatna tûr thingzai lei nân te an hmang a.

¹²Hna thawktute chuan rinawm takin an thawk a. Hna thawk enkawltute chu Meraria thlah Levi nham Jahatha leh Obadia te, Kohatha thlah Zekaria leh Mesulama te an ni. Rimâwi hmanraw tum thiam tak Levi-hote an tel bawk a,

¹³chûngho chu thil phurh sawn vêl leh hna thawhna kawng tinrênga hotute an ni. Levi-ho thenkhat chu lehkhaziaktute, hotute leh kawngkhâr vêngtute an ni.

¹⁴LALPA ina pawisa an dah khâwm an han phawrh chuan puithiam Hilkia chuan Mosia pêk LALPA Dân Bû chu a hmu chhuak ta a.

¹⁵Hilkia chuan lehkhaziaktu Saphana hnênah, “LALPA inah Dân Bû ka chhar hlah mai,” a ti a. Hilkia chuan lehkhahu chu Saphana a pê a.

¹⁶Saphana chuan lehkhahu chu lal hnênah a va kalpui a, a hnênah, “I chhiahlawhten tih tûr i tuk zawng zawng chu an ti mêk a.

¹⁷LALPA ina pawisa chu an chhûng khâwm a, hna thawktute leh enkawltute kutah an hlân tawh e,” tiin a va hrilh a.

¹⁸Saphana chuan lal hnênah, “Hê lehkhahû hi puithiam Hilkia’n min pê a,” a ti a. Lal hmâah chuan Saphana chuan a han chhiar a.

¹⁹Lalin Dân thû a han hriat chuan a silhfênte a pawt thlêr a.

²⁰Lal chuan puithiam Hilkia te, Saphana fapa Ahikama te, Mikaia fapa Abdona te, lehkhaziaktu Saphana te leh lal enkawltu

Asaia te hnênah chuan,

²¹“Va kal ula, hê lehkhahu chhar chhuahin a sawite hi keima tân leh, Israel leh Juda pumpui tân LALPA min va râwnsak rawh u; hê lehkhahûin a sawi zawng zawng anga kan thlahtuten an lo zawm loh avângin kan chung a LALPA thinurna hi a lo nasa tawh hlê a nih hi,” a ti a.

²²Tichuan, puithiam Hilkia leh lalin a ruatte chu thuamhnaw enkawltu, Hasra fapa, Tokhatha fapa, Salluma nupui, zâwlnei-nu Hulda-i hnênah an va kal a. (Ani chu Jerusalem Vêngthara awm a ni a.) Amah chu an va bia a.

²³Ani chuan an hnênah, “LALPA Israelte Pathian chuan, ‘Ka hnêna nangni rawn tîrtu che u chu heti hian hrilh rawh u,

²⁴“LALPA chuan, Ngai teh, Juda lal hriata an chhiar tâk lehkhahûa inziak chhiatna ânhhia zawng zawng chu, hemi hmunah ngei hian a chhûnga chênggho chungah chhiatna ka thlen dawn a ni—

²⁵a chhan chu, keimah min kalsan a, pathian dangte hnênah rimtute an hâl a, an kutchhuak tinrêng hmanga an thiltih hian min tihthinrim zawhzai tawh vâng a ni. Chuvângin, hê hmuna ka thinurna hi tihdaih rual lohvin a sosâng tawh a ni,’ a ti a.

²⁶Nimahsela, LALPA râwn tûra nangmahni rawn tîrtu che u Juda lal hnênah erawh chuan heti hian hrilh ang che u, ‘LALPA Israelte Pathian chuan, “I thu chhiar tâk chungthûah chuan—

²⁷i thinlung i tihnêm a, Pathian hmâa i intihtlâwm avâng te, hemi hmun leh a chhûnga chêngte chu ânhhia khuma, an la ram dêr tûr thû ka sawi i hriata, i puan te i pawh thlêr a, ka hmâa i thah avângin, kei pawhin i thû chu ka lo ngaithla reng a ni,” LALPAN a ti.

²⁸Chuvângin, nang chu i thlahtute hnênah ka hrui ang che a, thlamuang takin thlânah thlah liam i ni ang; hê hmuna chhiatna ka thlen tûr zawng zawng chu i mitin a hmu vê lo vang,’ a ti a ni,” a ti a. Chû thû chu lal hnênah an va thlen a.

JOSIAN PATHIAN BIAK DÂN DIK A DIN THAR

²⁹Lal chuan Judai ram leh Jerusalema upa zawng zawng chu a hnênah a ko khâwm a.

³⁰Lal chu Judai rama mi zawng zawng leh Jerusalema awm zawng zawng—puithiamte, Levi-hote leh mipui zawng zawng nê, a lian a tain LALPA inah chuan an kal chho mup mup a. LALPA ina an chhar, Thuthlunna Bûa chuang zawng zawng chu an vaia hriatah a chhiar chhuak a.

³¹Lal chu a dinna tûr hmunah chuan a ding a, LALPA hnung zuia, a thupêkte, a thuhriattîrte, a dân thûte chu rilrû leh thinlung zawng zawng lehkhahûa ziak thuthlung thû anga zâwma, tinghet tûrin LALPA hmâah chuan thû a thlung ta a.

³²Jerusalema awmte leh Benjamin-ho chu chutiang taka ti tûr chuan a ti a. Mipui zawng zawng pawh thuthlungah chuan an ding nghet a. Tichuan, Jerusalema awmte chuan an thlahtute Pathian biak thîn, Pathian thuthlung ang tak chuan an ti ta a.

³³Josia chuan Israel fate awmna ram zawng zawng ata thil tenawm tinrêng a tibo vek a, Israel ram chhûnga awm zawng zawng te chu thahnemngai takin LALPA an Pathian rawng a bâwlîr a. A dam chhûng chuan LALPA an pipute Pathian hnung

an zui zêl a, khawi lamah mah an pênсан lo.

BUNG 35

JOSIAN KALHLÊN KÛT A HMANG

¹Josia chuan Jerusalemah LALPA tân Kalhlên Kût a hmang a; thla khatna, ni 14-na niin Kalhlên Kût berâmno an talh a.

²Puithiamte chu an tih tûr bîk a ruatsak hlawm a, LALPA ina rawngbâwl tûrin a fuih a.

³Israelho zawng zawng zirtirtu Levi hnam, LALPA tâna serh hrante hnênah: “Israel lal Davida fapa Solomona in sakah chuan bâwm thianghlîm chu dah tawh rawh u. In koki tân phurrit a ni tawh lo vang. LALPA in Pathian leh a mi Israelte rawng bâwl tawh rawh u.

⁴Israel lal Davidan thupêk a ziah ang leh a fapa Solomonan thupêk a ziah angin, a chhûngkua ang leh, a pâwl ang zêlin inbuatsaih rawh u.

⁵In unaute chu chhûngkuua an inthliar hran dân leh, Levi-hote chhûngkaw inthliar hran dân azir zêlin, hmun thianghlîmah chuan ding rawh u.

⁶Kalhlên kût thilhlante chu talh ula, inserh hrang rawh u; LALPAN a thû Mosia hmanga a pêk anga ti tûrin in unaute tân pawh buatsaih rawh u,” a ti a.

⁷Josia chuan chuta awm mi zawng zawng chu Kalhlên Kûta hlan tûrin ran rual zînga mi berâm no leh kêl no 30,000 leh bâwngpa 3,000 a pê a; chûngte chu lalin a neih sâ a rawn thawh a ni a.

⁸A milian hote pawhin mipuite leh puithiamte leh Levi-hote tân phal takin an rawn thawh a. Pathian in hotu Hilikia te, Zekaria te leh Jehiela te chuan puithiamte hnênah Kalhlên Kût thilhlana an pêk khâwm ran rual zînga mi 2,600 leh bâwngpa 300 an pe bawh a.

⁹Konania te, a unau Semaia leh Nethanela te, Hasabia leh Jeiela leh Jozabada, Levi hnam zînga hotute pawhin Levi-ho hnênah Kalhlên Kût thilhlân atân berâm leh kêl 5,000 leh bâwngpa 500 an thawh bawh.

¹⁰Tichuan, puithiamte chu anmahni hmunah an ding a, Levi-hote pawhin anmahni pâwl theuhvah lalin thû a pêk ang zêlin rawngbâwl hnâ chu an buatsaih mup mup a.

¹¹Kalhlên Kûtna thilpêk rante chu an talh a; puithiamte chuan an kutin sa thisen chu an theh a, Levi hovin a vun an lo lip a.

¹²Mosia Lehkhabûa ziah anga chhûngkaw thlah hlâwm zêla LALPA hnêna an hlan atân hâlral thilhlante chu an sem a. Bâwngpate pawh chutiang chuan an ti bawh a.

¹³Dân ang tak chuan Kalhlên Kût sâ chu an hem hmin thîn a ni; thilhlân thianghlîm dangte erawh chu bêl te, bêl tung te leh thîrbêl tein an chhûm a, mipuite hnênah an sem thuai thuai a.

¹⁴Chumi zawhah anmahni leh puithiamte tân an buatsaih leh thîn; a chhan chu, puithiamho, Aaron a thlahte chu hâlral thilhlân leh a thâu te hâlîn zân thlenga an buai thîn vâng a ni; chûvângin Levi-hote chuan anmahni tân leh Aaron a thlah puithiamte tân a hranin an buatsaih thîn a ni.

¹⁵Davida te, Asapha te, Hemana leh Jeduthuna, lal zâwlnei te thupêk angin, zaipâwlho Asapha fate chu anmahni hmunah an awm a. Kawngkhâr vêngtute pawh kawngka tinah an awm a; an unau Levi-hoten khawsak an rêl kêp thîn avângin an awmhmun kalsan a ngai lo a ni.

¹⁶Tichuan, Kalhlên Kût hmang tûr leh LALPA maichâma hâlral thilhlân hlân tûrin LALPA rawngbâwlna thil zawng zawng chu Lal Josia thupêk angin a ni lâ lalin an buatsaih a.

¹⁷Israel fa chuta awmte chuan chumi ni chuan Kalhlên Kût an hmang a, Chhang Dâwidim Telh Loh Kût pawh ni sarih chhûng an hmang bawh.

¹⁸Zâwlnei Samuela awm aţang khân Israel ramah chutiang tak chuan Kalhlên Kût an la hmang ngai lo; Josian puithiam leh Levi-hote, Juda leh Israel rama mite leh Jerusalem a awm zawng zawng huapa Kalhlên Kût a hmang angin Israel lal tûmahin an lo la hmang ngai hek lo.

¹⁹Chû Kalhlên Kût an hman chu Josia lal kum 18-na a ni.

INDONAAH JOSIA A THI

²⁰Chûng thil thlen hnûa Josian tempul siam that a zawh chuan Aigupta lal Neko a chu Euphrates kama Karkhemis beih tumin a lo thawk chho va; amah lo do tûrin Josia chu a thawk chhuak a.

²¹Ani chuan palai a rawn tîr a, “Nang Juda lal, i lo inrawlh vêna tûr eng nge awm? Vawîin hian nangmah do tûrin ka lo kal hlei nê, keima dorâl bei tûra lo kal zâwk ka ni e; Pathianin hmanhmawh tûrin thû mi pê asin. Ka lama ţang Pathian thilah hian lo inrawlh suh, a tiboral palh ang che,” a ti a.

²²Nimahsela, Josia chuan a kîrsan duh lo va, amah a beih theih nân a insiam danglam a, Neko a kâ hmanga Pathian thuchah chu a pawisa duh hek lo. Megiddo Phaizâwlah chuan indo tûrin a han kal lui ngat a.

²³Thalkâp miten Lal Josia chu an lo kâp fuh a; lal chuan a mite hnênah, “Hliampui ka tuar ta, min hrui hrang mai teh u,” a ti a.

²⁴A hoten a chuanna tawilâlîr aţangin an la chhuak a, ama tawilâlîr dangah an chuantîr a, Jerusalem an thlenpui a. A thi ta a, an thlahtute zînga thlân pakhatan an phûm a. Judate leh Jerusalem a mi zawng zawngin Josia chu an sîn a.

²⁵Jeremia pawhin Josia chu a sîn a. Tûn thleng hian hmeichhe zaithiam te leh mipa zaithiamten Josia an sînna an la chham thîn. Israel ramah chuan dânah an neih ta a; ʔah hlâah te a chuang rêng a ni.

²⁶Josia thiltih dangte leh a thatna te chu LALPA Dâna chuang ang hi a ni a,

²⁷a thiltihte chu a bul aţanga a tâwp thlengin Israel leh Juda lalte chanchin ziahna bû-ah a chuang.

BUNG 36

JEHOAHAZA RORÊL LEH SALTÂN

¹Ram chhûng mipuite chuan Josia fapa Jehoahaza chu an hrui a, Jerusalem a pa aiah lalah an siam a.

²Jehoahaza chu lal a nihin kum 23 mi a ni a, Jerusalem a thlah thum chhûng ro a rêl.

³Aigupta lalin Jerusalema a lalna a bân a; a ramin chhiah an châwi tûr silvar talent 100 leh rangkachak talent khat a tuksak a.

⁴Aigupta lal chuan Jehoahaza unaupa Eliakima chu Juda leh Jerusalem lalah a siam a, Jehoiakima tiin a hming a thlâksak a. A unaupa Jehoahaza chu Neko a chuan Aigupta ramah a hruai thla daih a.

JEHOIAKIMA RORÊLNA LEH SALTÂNNA

⁵Jehoiakima chu lal a nihin kum 25 mi a ni a, Jerusalema kum 11 chhûng ro a rêl. LALPA a Pathian mit hmuhah thil sual a ti thîn a.

⁶Amah rûn tûrin Babulon lal Nebukadnezara a rawn thawk a, a rawn man a, dâr kawl a buntîr a, Babulona a hruai bo ta a.

⁷Nebukadnezara chuan LALPA in aţangin bungbêl thenkhat Babulona a lâ a, Babulona ama tempulah a dah ta a ni.

⁸Jehoiakima chanchin dang te, thil tenawm tak tak a tih te leh a awm dân dik lo chanchin chu Israel leh Juda lalte chanchin ziahna bûah a chuang. A fapa Jehoiakima chu a aiah a lal ta a.

JEHOIAKINA RORÊLNA LEH SALTÂNNA

⁹Jehoiakima chu lal a nihin kum 8 mi a ni a, Jerusalema thla thum leh ni sâwm ro a rêl. LALPA mit hmuhah thil sual a ti thîn a.

¹⁰Kum a lo veî chuan, Lal Nebukadnezara a ko va, LALPA ina bungbêl man to tak takte nê Babulona a hruai a, Jehoiakima unaupa Zedekia chu Judai ram leh Jerusalem chung a lal atân a siam a.

¹¹Zedekia chu lal a nihin kum 21 mi a ni a, Jerusalema kum 11 chhûng ro a rêl.

¹²LALPA a Pathian mit hmuhah thil sual a ti thîn a, LALPA kamchhuak thupuangtu zâwlnei Jeremia hmâah pawh a intitlâwm duh hek lo.

¹³Pathian hminga chhechhamtîrtu Lal Nebukadnezara lakah a hel lehngâh a; chû achhapah LALPA Israelte Pathian lam hawi duh lovin a ring a tikhawng lui a, a thinlung a tisak tlat a.

¹⁴Puithiam lalho zawng zawng leh mipuite pawhin hnam dangte thil tenawm chin ang apiang chingîn dân an bawhchhe nasa deuh deuh va; Jerusalema a serh thianghlim tawh LALPA in chu an tibawrhbang a.

JERUSALEM TLÛKCHHIAT THÛ

¹⁵LALPA, an thlahtute Pathian chuan a mite leh ama chênna hmun chu a lainat êm avângin, anmahni zilh lâwk tûrin an hnênah a tirkhohte a tîr fo thîn a.

¹⁶Nimahsela, Pathian mi tirhte chu an lo nuihzat a; a thû chu ngainêpin a zâwlneite chu an lo nuihsawh a; chuvângin LALPA thinurna chu a mite chungah a lo ling ta a, tihdam rual a ni ta lo a ni.

¹⁷Chuvângin, anmahni hrem tûrin Kaldai lal a rawn hruai ta a, chû mi chuan an tlangvâlte chu an hmun thianghlimah ngei khandaihin a that a; an nula thianghlim leh tlangvâl te, kum upa leh tar chak tawh lo te pawh lainatna rêng rêng a nei lo va; a kutah chuan thil engkim a dah vek si a.

¹⁸Pathian ina bungbêl zawng zawng, a lian pawh, a tê pawh, LALPA ina sum dah khâwm zawng zawng te, lalin sum a dah khâwm leh a mi lian hote sum dah khâwm te chenin Babulona a la vek a.

¹⁹Pathian in chu an hâl a, Jerusalem kulh an tichim a, a lal in zawng zawng an hâl vek a, an thil hlû zawng zawng an tichhe fâi lêng a.

²⁰Khandaiha thah bângte chu Babulon lamah a hruai bo vek a, Persia lalramin a rawn awp hmâ zawng chuan amah leh a fapate chu salah an awm ta a ni.

²¹Jeremia kâa LALPAN, ‘ramin Sabbath a serh theih leh hmâ chu,’ tia a sawi kha a lo thlen famkimna tûrin. Kum 70 chhûng a ram chhe tlawk tlawk ang a, ram chuan Sabbath serhin a châwl dêr dâwn a ni.

KURA THUPUAN

²²Persia lal Kura rorêl kum khatnaah chuan, Jeremia kâa LALPA thu sawi kha a taka a lo thlen theih nân LALPA chuan Persia lal Kura thinlung chu a chawk tho va, tichuan a lalram chhûngah thupuan a chhuah a, hetiang hian ziakin chhuah a ni ta a:

²³Persia lal Kura chuan heti hian a ti: “Leilunga lalram zawng zawng hi LALPA, vân Pathian mi pêk a ni a. Judai rama Jerusalem khuaah in saksak tûrin thû min pê a. In zingah hian ama mite chu tute nge in nih? LALPA an Pathian chuan awmpui sela, han thawk chho rawh se!” tiin.

EZRA

Ziah tu: EZRA • Ziah kum: B.C. 450 vêl.

Ezra bu ziaktu hi amah Ezra a ni tihah hian a bu chhung thu te, Judate leh Kristiante an inlungual. Hê lehkhabu hi Juda saltângho an kîr leh (B.C. 538) hnûa lehkhabu chhuak hmasa ber pâwl a ni awm e. Persia lal Kura thupêka saltângho kîr leh phalna thú te, Zerubbabela hova an kîr thú te, tempul sak that leh thú te, an hmêlmâte laka dodâlna te, harsatna kâra tempul an sak zawh thúte leh tempul rawngbâwlna lo inñan leh dân te a sawi a. Bung 7 ațanga a tawp thleng hi, mithiam leh langsar tham Ezra hova saltâng kîr wavi hnihna chanchin a ni a. Mosia dân anga an sakhaw biak dân thar thawhleha (revival) chungchâng te, hnam dangte nêna inneih pawlh loh thú leh simna chungchângte hi a thupui deuh te a ni. Ezra bu hian kum 70 zet mi rama sala an tân bo tawh hnûah, Pathianin Judate hruai kîr leh a lo tiam tawh ang ngeia a hlensak thú te, chumi tipuitling tûra Persia lal hrang hrang pathum thinlung a buatsaih dân te, Jerusalem khawpui leh an tempul din ța leh tûra Pathianin hruaitu ța leh huaisen bâkah an Pathian biak dân zirtîrtu tling tak tak a pêk thúte hi Ezra bu ațang hian a chhinchhiah tlâk hle. Saltâng chhuakte chuan Juda mi dik an la ni reng em tih finfiah tûrin thlahtu chhuina lam a uar hle. Ezra hi Bible-a lehkhabu 15-na a ni a, a chhûngah hian bung 10 leh châng 280 a awm.

BUNG 1

BABULON SALTÂN A TÂWP

¹Persia lal Kura lal kum khatnaah chuan, Jeremia kâa LALPA thuchhuak a lo thlen kim theih nân, Persia lal Kura thlarau chu LALPAN a chawk tho va; tichuan, a lalram pum puiah thupêk a chhuah a, ziakin a chhinchhiah bawk a,

²Persia lal Kura chuan heti hian a ti: “LALPA vân Pathian chuan lei chung a lalram zawng zawng mi pe ta a. Judai rama Jerusalemah ama tân in saksak tûrin thú mi pê a.

³In zîngah hian ama mite chu tute nge in nih? LALPA in Pathian chuan awmpui che u sela, Judai rama Jerusalemah chuan han thawk chho rawh u; Jerusalema awm, LALPA Israelte Pathian (Ani chu Pathian a ni) pualin in han saksak ngei ang che u.

⁴Mi tupawh, an awmna chu khawii hmun pawh ni se, an awmnaa mite chuan Jerusalema Pathian in sakna tûra mahni duhthú ngeia thawhlâwm an pêk bâkah, tangkarua leh rangkachak te, bungruate leh ran tein lo ƣanpui rawh se,” tiin.

⁵Tichuan, Juda leh Benjamin hnam puipa te, puithiamte leh Levi-ho te leh, Pathianin an thlarau a khawih harhho zawng zawng chu, Jerusalema LALPA in sa tûr chuan an tho ta a.

⁶An kiang vêla mi zawng zawngte chuan phal taka an thawh bâkah, anmahni tihthatho nân silvar leh rangkachak bungbêl te, bungruate leh rante leh thil hlu tam tak an pê khâwm a.

⁷Lal Kura pawhin LALPA ina bungbêlte kha arawn la chhuak bawk a, chûngte chu Nebukadnezzaran Jerusalem ațanga a lâk, ama pathian tempula a dah tâk te kha a ni a;

⁸Persia lal Kura chuan sum vawngtu Mithredatha chu a lâk chhuahtîr a, Judate hotu ber Sesbazara hmâah chuan a chhiar chhuak a.

⁹A zât chu hei hi a ni: rangkachak thlêng 30, silvar thlêng 1000, chemtê 29,

¹⁰rangkachak chawhtawlh 30, silvar chawhtawlh chi hrang hrang 410 leh bungbêl dang 1,000 a ni.

¹¹Rangkachak leh silvar bungbêl zawng zawng chu 5,400 a ni. Chûng chu Sesbazaran sal tângho Babulon ațanga Jerusalema a hruai hâu lai khân a keng ta a ni.

BUNG 2

JERUSALEMA SALTÂNG KÎR LEHTE

¹Hêngte hi saltâng chhuak lo kîr leh te chu an ni. Babulon lal Nebukadnezzara khân Babulon-ah a hruai a, mi tin mahni khaw lama haw tûrin Jerusalem leh Judai ramah an lo kîr leh ta a ni.

²Zerubbabela ruala lo kîr lehte chu Jesua te, Nehemia te, Seraia te, Reelaia te, Mordekaia te, Bilsana te, Mispara te, Bigvaia te, Rehuma te leh Baana te an ni. Israel mi patling zât chu:

³Parosa thlahte, 2,172;

⁴Sephatia thlahte, 372;

⁵Ara thlahte, 775;

⁶Jesua leh Joaba thlaha mi Pahath-Moab mite, 2,812;

⁷Elama thlahte, 1254;

⁸Zattua thlahte, 945;

⁹Zakkaia thlahte, 760;

¹⁰Bania thlahte, 642;

¹¹Bebaia thlahte, 623;

¹²Azgada thlahte, 1222;

¹³Adonikama thlahte, 666;

¹⁴Bigvaia thlahte, 2,056;

¹⁵Adina thlahte, 454;

¹⁶Hezekia mi Atera thlah, 98;

¹⁷Bezaia thlah, 323

¹⁸Jora thlah, 112;

¹⁹Hasuma thlah, 223;

²⁰Gibbara thlah, 95;

²¹Bethlehem mite, 123;

²²Netopha mite, 56;

²³Anathoth mite, 128;

²⁴Azmavetha thlah, 42;

²⁵Kirjath Arim te, Kephira te, Beeroth mite, 743;

²⁶Rama leh Geba mite, 621;

²⁷Mikmas mite, 122;

²⁸Bethel leh Ai khaw mite, 223;

²⁹Nebo mite, 52;

³⁰Magbis mite, 156;
³¹Elam danga mite, 1254;
³²Harima thlahte, 320;
³³Lod te, Hadid te, Ono mite, 725;
³⁴Jeriko mite, 345;
³⁵Senaa thlahte, 3,630.
³⁶Puithiamte: Jedaia fapate, Jesua chhungkuaa mite, 973;
³⁷Immera thlahte, 1,052;
³⁸Pasura thlahte, 1,247;
³⁹Harima thlahte, 1,017;
⁴⁰Levia-hote: Hodavia thlah Jesua leh Kadmiela thlahte, 74;
⁴¹Zâi mite: Asapha thlahte, 128;
⁴²Kawngkhâr vêngtu thlahte: Salluma thlahte, Atera thlahte, Talmona thlahte, Akkuba thlahte, Hatita thlahte, Sobaia thlahte, an vaiin 139;
⁴³Nethinim-ho: Ziha thlahte, Hasupha thlahte, Tabbotha thlahte,
⁴⁴Keroa thlahte, Siaha thlahte, Padona thlahte,
⁴⁵Lebana thlahte, Hagaba thlahte, Akkuba thlahte,
⁴⁶Hagaba thlahte, Salmaia thlahte, Hanana thlahte,
⁴⁷Giddela thlahte, Gahara thlahte, Reaia thlahte,
⁴⁸Rezina thlahte, Nekoda thlahte, Gazzama thlahte,
⁴⁹Uzza thlahte, Pasea thlahte, Besaia thlahte,
⁵⁰Asna thlahte, Meunima thlahte, Nephu-sima thlahte,
⁵¹Bakbuka thlahte, Hakupha thlahte, Harhura thlahte,
⁵²Bazlutha thlahte, Mehida thlahte, Harsa thlahte,
⁵³Barkosa thlahte, Sisera thlahte, Tama thlahte,
⁵⁴Nezia thlahte, Hatipha thlahte.
⁵⁵Solomona chhiahhlawhho thlahte: Sotaia thlahte, Sopheretha thlahte, Peruda thlahte,
⁵⁶Jaala thlahte, Darkona thlahte, Giddela thlahte,
⁵⁷Sephatia thlahte, Hattila thlahte, Zebaim mi Pokeretha thlahte leh Amia thlahte.
⁵⁸Nethinim-ho leh Solomona chhiahhlawhho thlahte chu an vaiin 392 an ni.
⁵⁹Hêng mite hi Tel Mela te, Tel Harsa te, Keruba te, Addan leh Immer ațanga lo chho te an ni a; mahse Israel mi an nihna tifiyah tûrin an chhûngkua leh an thlahtu bul an chhui thei lo:
⁶⁰Delaia thlahte, Tobia thlahte leh Nekoda thlahte, 652;
⁶¹puithiamho thlahte: Habaia thlahte, Koza thlahte leh Barzilliaia thlahte, Gilead mi Barzilliaia fanu zînga a nupui neih hming a chhawm ngâh a ni.
⁶²Hêng mite hian thlahtu hming ziaaknaa tel vê an dîl a, mahse an hming an hmu zo vê lo va; chuvângin intibawrhâng tân ngaiin, puithiama pawm an ni ta lo.

⁶³Ram awptu chuan Urim leh Thummim hman thei puithiam awm hmâ chu thil serh thianghlîm eî a khapsak ta a.

⁶⁴Mipui pungkâwmho zawng zawng chu 42,360 an ni a,

⁶⁵an chhiahhlawh mipa leh hmeichhia 7,337 te chu an chhiar tel vê lo; zaipâwl mipa leh hmeichhia 200 an nei bawh.

⁶⁶An sakawr chu 736 a ni a, an sabengtung chu 245 a ni a,

⁶⁷an sanghawngsei chu 435, an sakawr tê chi chu 6,720 a ni.

⁶⁸Jerusalem LALPA in an va thlen chuan chhûngkaw puipa thenkhatte chuan, Pathian in chu a hmun ngaia din leh nân phal takin thilpêk an hlân a:

⁶⁹An theih anga sum bâwma an thawh khâwm chu, rangkachak drakma* 61,000, tangkarua mina** 5,000 leh puithiam kawr 100 a ni.

⁷⁰Tichuan, puithiamte leh Leviah hote, mi thenkhatte, zaipâwlte, kawngkhâr vêngtute leh Nethin-hote chu anmahni khuaah, Israel mi dang zawng pawh chu anmahni khuaah an awm ta a.

BUNG 3

JERUSALEMAH PATHIAN BIAK AN ȚAN

¹Thla sarihna a lo thlenin, Israel fate chu khuaah te an awm a, mipuite chu Jerusalema chuan mi pakhat ang Țapin an intêlkhâwm a.

²Jozadaka fapa Jesua leh a unau puithiamte leh, Sealtia fapa Zerubabela leh a unaute chu an tho va, Pathian mi Mosia Dân bûin a ziaak anga hâlral thilhlân hlan nân, Israelte Pathian maichâm an din a.

³Chûng lai vêla mite chu hlâu hlê mahse, maichâm chu a awmna hmun ngaiah an din a; LALPA hnênah hâlral thilhlân te hlânin, zîng lamah leh tlai lamah hâlral thilhlân an hlân Țin a.

⁴Bâwkte kût te an hman a, ni tina hlan tûr zât an ziaak angin ni tinin hâlral thil an hlân a.

⁵Chumi hnûah chuan hâlral thilhlân an hlan ziah Țin te, Thla Thar thilhlân te, LALPA tâna kût ni an ruata an serh apianga thilhlân te, mahni duhtûa phal taka LALPA hnêna thilpêkte chu an hlân a.

⁶LALPA tempul lungphûm chu la phûm rih lo mahse, thla sarihna, ni khat ni ațang chuan LALPA hnênah hâlral thilhlân an hlân Țan ta a.

⁷Lung chhertute leh thing mistirite chu tangka pein an chhawr a; Persia lal Kuran a phal dân ang zêlin, sidar thing lâa, Lebanon ațanga tuipei kam, Joppa thlenga tawh thlatu tûr Zidon mite leh Tura mite chu buhfai te, in tûr te leh hriak te an pê a.

TEMPUL SAK HNA A INȚAN

⁸Jerusalem Pathian in an lo thlen achin kum hnihna, thla hnihnaah chuan, Sealtia fapa Zerubabela te, Jozadaka fapa Jesua te leh an unau dang zawng zawng, puithiamte leh Leviah mite leh, saltâng chhuak Jerusalema chho zawng zawngte chuan hnâ an thawh Țan a, Leviah mi kum 20 achin chung lam chu LALPA insak hna enkawltu atân an ruat a.

⁹Jesua chu a fapate leh a unaupate nê, Kadmiela pawh a fapate nê, Juda fapate nê, Henadada fapate, an fapate leh an unau Levia mite nê an tho va, Pathian in sak hna kaihruaituah an tang tlâng ta a.

¹⁰Insatuten LALPA tempul lungphûm an phûm laiin, puithiamho chuan an puithiam kawra inthiamin tâwtawrâwt an keng a, Levia chi Asapha thlahten dârbenthek nê, Israel lal Davida remruat ang khân, LALPA fak tûrin an ding thup a.

¹¹LALPA hnênah fakna leh lâwmthu hrilhin, hla sâin an inchhawn tawn a: “Ani chu a tha si a, Israelte chung a ngilneihna chu kumkhuain a awm dâwn a ni,” an ti a. Chutia LALPA in sakna lungphûm an phûm tâk avâng chuan, mipui zawng zawng chu LALPA fakin, nasa takin an âu dur dur a.

¹²Nimahsela, puithiamte, Levia chîte leh chhûngkaw puipa tam tak zînga tempul hmasa zâwk hmu pha putarhote chuan, an mithmuh ngeia tempul lungphûm phûm lai an han hmuh chuan an tah ta chiam mai a. Mi tam tak chu lâwmin an lo âu thung a,

¹³Tichuan, mite chuan lâwm avânga âu ri leh tap rî pawh an thliar hrang thei lo hial a, mipui authâwm rî chu a ring êm êm a, hla tak a tang pawhin hriat theih a ni.

BUNG 4

TEMPUL SAK THAT DODÂLNA

¹Judate leh Benjamin-ho hmêlmâte chuan saltâng kîrlehten LALPA Israelte Pathian tempul an sâ tih an lo hriat chuan,

²Zerubabela leh an hnam puipate hnênah an lo kal a, “Kan sakpui vê ang che u, in Pathian in zawn ang bawh hian keini pawhin kan zawng vê tho asin; hê hmuna min hruaitu, Assuria lal Esarhaddona hun a tang khân a hnênah kan inthâwi ve reng alâwm,” an ti a.

³Nimahsela, Zerubabela leh Jesua leh Israel hnam puipate chuan an hnênah, “Kan Pathian in saknaah hian tel vê-na reng in nei lo ve; Lal Kura, Persia lal thupêk angin, LALPA kan Pathian in chu keimahni chauhvîn kan sa ang,” an ti a.

⁴Chû rama mi lo awmte chuan Juda mite chu tihbuai dân ngawt an zawng a. An in sa lai chu an chawh buai a,

⁵Persia lal Kura lal hun chhûng zawng leh Persia lal Daria lo lal hun thleng khân an thiltum tihbahlah tumin sawi buaitu tûr an ruai thîn a.

JERUSALEM DIN THAT LEH DODÂLNA

⁶Ahasuera rorêl laia, a lal tantirh laiin, Judai leh Jerusalema awmte hêkna lehkha an thawn a.

⁷Artazerzia hunah pawh Bislama te, Mithredatha te, Tabela te leh an lamtangte nê Persia lal Artazerzia hnênah lehkha an thawn a; an lehkha chu Aramik hawrawpa zia, Aramik jawnga lehlin a ni.

⁸Ram awptu Rehuma leh zia,ktu Simsaia-ten Jerusalem mite hêkin hetiang hian Lal Artazerzia hnenah lehkha an zia,kt:

⁹Ram awptu Rehuma te, zia,ktu Simsaia leh an thawhpuite a tangin- Dinai mite, Apharsath mite, Tarpeli mite, Persia te, Ere,kt te, Babulon leh Susan te, Dehai leh Elam mite,

¹⁰mi ropui leh zahawm Osnappara'n sala a man hnam hrang hrang, Samari khawpuia a dahhote leh Luipui piah lama awmte leh a dangte a tangin:

¹¹(Hetiang hi an lehkhathawn chu a ni) “Lal Artazerzia hnênah, i chhiahhlawh Luipui thlang lam leh a chheh vêla awmte a tangin:

¹²I hnên a tang a lo chho Judate kha kan hnênah Jerusalemah an lo kal a, helna leh sualna khawpui an din mêk a, a kulh bangte an sa zo têt a, a lungphûmte an thuamtha mêk tih hi lalin lo hre lul rawh se.

¹³Hê khawpui hi din a niha, a kulhte hi sak zawh a nih chuan chhiah te, leiman te, sumdâwng chhiah te an pe duh lo vang a, lal sum hnâr a kiam phah dâwn a ni tih lal chuan lo hre rawh se.

¹⁴Lal chhawmdâwlna dawngtu kan nih avângin, lal mâwi lohna hmuh hi kan tân a dik dâwn si lo va; chuvângin lal hi kanrawn hriattîr che a ni a,

¹⁵in thlahtute chhinchhiahna pawh hâi chhuah ni sela. Chû chhinchhiahna bû a tang chuan hê khua hi helhmang khua a ni a, lalte leh ramte tâna buaithlâk tak, tûn hmâ a tang tawha buaina chawh chhuaktu an lo ni tawh thîn a, chuvânga hê khua hian tihchhiat pawh tâwk a ni reng a.

¹⁶Hê khua hi an din leha, kulh bangte hi an rem zo leh a nih chuan, Luipui thlang lamah chuan ram i chên duai dâwn a ni mai,” tiin an zia,kt a.

¹⁷Lal chuan heti hian a chhâng a: “Ram awptu Rehuma te, zia,ktu Simsaia te, Samari khuua an thawhpuite leh Luipui thlang lama awmte hnênah: Chibai u le.

¹⁸In lehkharawn thawn chu ka hmâah fiah taka chhiar chhuah a ni.

¹⁹An chanchin dap chhuak tûrin thû ka pê a, tûn hmâ a tang tawhin hê khua hi lal laka buaina siam thîn, sorkar pawh khawih zâwnga helna chawh chhuak thîn a ni tih hmuh chhuah a ni.

²⁰Jerusalemah khân lal thiltithei tak takin Luipui thlang lam zawng chungah te ro an lo rêl tawh thîn a; an hnênah chhiah te, leiman te leh sumdâwnna chhiah te an lo pe thîn a.

²¹Tichuan, khâng mite kha an hnâ chawhlsan tûrin thû lo pê ula, thu dang ka neih leh hmâ chu hê khawpui hi din ni leh tawh suh se.

²²Hê thil hirawn ti ngei bawh rawh u. Engah nge lal tâna chhiatna tûr a pun zêl ang le?” tiin.

²³Lal Artazerzia lehkhathawn chu Rehuma te, zia,ktu Simsaia te leh an thawhpuite hriata an han chhiar chuan, hmanhmanh takin Jerusalema Judaho hnênah chuan an thawh chho va, tharumin an han tihtâwpsak ta a.

²⁴Tichuan, Jerusalema Pathian in sak hnâ chu a chawh ta a, Persia lal Daria lal kum hnihna thlengin, chhunzawm lohvin a awm ta a ni.

BUNG 5

TEMPUL SAK AN CHHUNZAWM

¹Zâwlnei Haggaia leh Iddoa fapa Zakaria te chuan Israelte Pathian, an chung awm reng hmingin, Judai ram leh Jerusalema awm Judate hnênah thú an puang a.

²Tichuan, Sealtiel fapa Zerubabela leh Jozadaka fapa Jesua te chu an tho va, Jerusalema Pathian in sak hnâ chu an tan leh ta a; Pathian zâwlneite chuan anmahni awmpuiin an lo tanpui a.

³Chû vêleh Tatenai, Lui râl ram awptu leh Sethar-Boznaia leh an thiante chu an lo kal vat a, an hnênah, “Tu nge hê tempul sa tûr leh hê kulh hung zo tûr hian thú pê che u?” an ti a.

⁴Tichuan, an zawh angin chû in satute hming chu kan lo hrilh a.

⁵Nimahsela, an Pathian mit chu Juda upate chungah a fû a, Daria hnêna chanchin an thlen leh hmâ chuan an hnâ thawh lai chu an chawltîr thei ta bîk lo va. Tichuan, chumi chungchângah chuan lehkhâ an thawh lêt leh ta a.

⁶Hetiāng hi Tatenai lehkhathawn chu a ni: “Luipui piaha ram awptu leh, Sethar-Boznaia leh a thiante, Luipui piaha awm Persia hoten lal Daria hnênah.

⁷(A hnêna lehkhâ an thawh chu hetiāng hi a ni:) “Lal Daria hnênah thlamuanna awm rawh se.

⁸Lalin hei hi lo hria sela, Judai rama Pathian ropui tempulah kan va kal a, lung lian pui pui rema sak a ni a, a bang atân thing an hmang a; hnâ pawh an thawk rimin an sa chak hlê a.

⁹Chuta an puipate chu kan zâwt a: “Tu nge hê tempul sa tûr leh hê kulh hung zo tûr hian thú pê che u?” tiin.

¹⁰I hnêna kan rawn hriattîr theih nân che, an hotu deuh deuh hmingte pawh kan zâwt chhuak vek a.

¹²Mahse, kan thlahtuten vân Pathian thin an tiur a, Babulon lal Nebukadnezara, Kaldai mi kutah a pê a, ani chuan hê tempul hi a tichhia a, mipuite chu Babulon-ah a hruai bo vek a.

¹³Babulon lal Kura lal kum khatnaah khân, Lal Kura chuan hê Pathian in sa tha leh tûr hian thupêk a chhuah a.

¹⁴Pathian ina rangkachak leh silvara siam bungbêl, Nebukadnezaran Jerusalema Pathian ina mi a lâk, Babulon tempula a dah luhte chu—Lal Kura chuan Babulon tempul aṅga la chhuakin, mi pakhat, a hming Sesbazara, ram awptu atâna a siam hnênah a hlân a.

¹⁵Tihian a ti a: ‘Hêng bungbêlte hi la ula, kalpui rawh u; Jerusalema tempul hmun va thlen ula, Pathian in chu a hmun ngaiah din thar leh ni rawh se,” tiin.

¹⁶Tichuan, chû Sesbazara chu a lo kal a, Jerusalema Pathian in lungphûm chu a phûm a; chuta ṅanga tûn thlengin insak hnâ chu chhunzawm zêl a ni a, an la sa zo rih lo,” tiin.

¹⁷Tûnah hian, lalin thâ a tih chuan, Babulona awm, lal robâwm in chu dap chhuah ni se, Jerusalema Pathian in sa tûrin Lal Kuran thupêk a lo chhuah rêng em tih hi enfiah ni se, hemi chungchângah lal thuchhuak chu min hrilh ve rawh se,” tiin a ziaak a.

¹¹Hetiāng hian min chhâng a: “Lei leh vân Pathian chhiahhlawhte kan ni a, kum tam tak kal tawha Israel lal ropui

takin a sak zawh tawh kha, kan sa tha leh mêk a ni.

BUNG 6

DARIA THUPÊK

¹Lal Daria chuan thupêk a chhuah a, Babulona rohlû leh sorkar chhinchhiahna hlui dahkhâwmna in chu an dap ta a.

²Media biala lal in awmna Akmetha-ah chuan, lehkhabu zial an hmu chhuak a, chutah chuan heti hian a lo inziak a:

³Lal Kura kum khatnaah, Jerusalema Pathian in chungchângah Lal Kura chuan thupêk a chhuah a: “Inthâwina an hlanna hmunah chuan in chu sak ni rawh se; a lungphûm pawh nghet taka rem ni se, a sân lam tawng 60, a zâu zâwng tawng 60 ni sela,

⁴lung lian pui pui tlar thumah rem sela, thingphêk thar tlar khat siam rawh se. A sakna sênso chu lal sum aṅga pêk tûr a ni.

⁵Pathian ina rangkachak leh silvar bungbêlte, Nebukadnezaran Jerusalem tempul aṅga a lâk Babulon-a a rawn lâkte pawh pèkkîr ni sela, Jerusalema tempulah, a awmna hmun ngaia dahkîr ni se; Pathian inah chuan an dah lêt tûr a ni,”

⁶Chuvângin, Tatenai, Lui râl ram awptu leh Sethar-Boznaia leh in thian, Lui râl awm Persia mite kha lo inthiarfihlîm daih rawh u.

⁷Pathian in an saknaah hian lo inrawlh vê suh u; Judai ram awptu leh Juda puipaten hê Pathian in hi a hmun ngaiah sa rawh se.

⁸Chû bâkah, hê Pathian in an sakna tûrah hian, hêng Juda puipate hnêna in tih tûr thupêk ka chhuah bawh a ni: A sakna tûr sênso chu lal sumin a tum ang a, Euphrates lui khawthlang bial chhiah aṅga pêk tûr a ni; an hna a khaihlak loh nân, hei hi pêk nghal thuai tûr a ni.

⁹An mamawh apiang—bâwngpa tuai te, berâmpa te, berâm no te leh, vân Pathian tân hâlral thilhlân atân wheat te, chí te, uain te leh hriakte chu, Jerusalema puithiamten an mamawh ang zêlin—mathei lovin ni tin pêk ni ziah rawh se,

¹⁰vân Pathian hnênah rimtua inthâwina te hlân sela, lal leh a fapate an dam rei nâna an ṅawngṅaisak theihna tûrin.

¹¹Tûpawh hê thupêk tidanglam apiang chu, chû mi in sakna thing chu phâwi chhuaha, phun a nih hnûah amah khaihlum nâna hman tûr a ni; a in chu bawlhhlawh chhekhâwm nâna hman ni rawh se.

¹²Hê thupêk tidanglam emaw, Jerusalema Pathian in tichhe tûra an kut lektu chu lal pawh, mi tûpawh nise, chû hmuna a hming awmtîrtu Pathian chuan tiboral vek rawh se. Kei Daria hian hê thupêk hi ka chhuah a; tihtak zeta hlen chhuah ni rawh se,” tiin.

TEMPUL SAK ZAWH LEH HLÂN

¹³Tichuan, Tatenai, Lui râl ram awptu te, Sethar-Boznaia te leh an thiante chuan Lal Daria thú chu ṭahnemngai takin an zâwm ta vat vat a.

¹⁴Chû bâkah zâwlnei Haggaia leh Iddoa fapa Zekaria te thupuan chu an sâwtpui hlê a; chuvângin Juda puipate chuan

tuang takin an sâ a. Israelte Pathian thupêk ang leh, Persia lal Kura te, Daria te leh Artazerzia te thupêk ang zêl chuan an sâ a, an zo ta a.

¹⁵Tempul chu Adar thlâ ni thum niin an sa zo va, chû chu Lal Daria lal kum rukna a ni.

¹⁶Israela fate, puithiamte leh Levia mi, saltâng lo kîr leh zawng zawngte chuan Pathian in hlanna chu hlim leh lâwm takin an hmang a.

¹⁷Chû Pathian in hawwnaah chuan bâwngpa 100, berâmpa 200, berâm no 400 inthâwi nân an hlân a, Israel mi zawng zawng sual thâwi nân, Israel hnam zâtin, kêlpa 12 an hlân baw a.

¹⁸Mosia Lehkhabûa ziaak angin, Jerusalema Pathian rawngbâwl hnâ chu puithiamte leh Levia chîten a pâwl pâwla thawh dân tûr an ruatsak a.

KALHLÊN KÛT AN HMANG

¹⁹Sal chhuakhote chuan thla khatna, ni 14 niin Kalhlên Kût an hmang a.

²⁰Puithiamte leh Levia hote chu an inthian thianghlim a; dân angin an lo thiag ta vek a. Sal chhuakhote, an unau puithiamte leh anmahni tân Kalhlên Kûtna berâm no te an talh a.

²¹Israel fate zînga saltâng lo kîr lehte leh, chumi rama hnamte bawhlhlawhna laka inthiarfihlîm apiangte chuan, LALPA Israelte Pathian zawng tûrin ruai chu an kîl ho va.

²²Chhang Dâwidim Telh Loh Kût chu ni sarîh chhûng hlim takin an hmang a; LALPAN hlimna a siamsak a, Pathian in saknaa an kut tichak tûrin, Israelte Pathian chuan Assuria lal thinlung chu anmahni lam ngawt a hawitûr ta si a.

BUNG 7

EZRA A LO THLENG

¹Chûng thil hnûah chuan, Persia lal Artazerzia lal laiin, Ezra, Seraia fapa, Azaria fapa, Hilkia fapa,

²Salluma fapa, Zadoka fapa, Ahituba fapa,

³Amaria fapa, Azaria fapa, Meraiotha fapa,

⁴Zerahia fapa, Uzziâ fapa, Bukkia fapa,

⁵Abisua fapa, Phinehasa fapa, Eleazara fapa, puithiam lalber Aarona fapa—

⁶Ezra chu Babulon aţangin a lo chho vê a; ani chu lehkhâ ziaak thiam tak, LALPA Israelte Pathianin a pêk Mosia Dân hria a ni. LALPA a Pathian kutin a hruai dân ang zêlin, mamawh a dîl zawng zawng chu lal chuan a pe vek a.

⁷Lal Artazerzia lal kum sarîhnaah chuan Israel mi thenkhat, puithiamte, Levia mite, zâimite, kawngkhâr vêngtute leh Nethinim ho chu Jerusalema an lo chho va.

⁸Jerusalema Ezra lo kal chu, lalin kum sarîh ro a rêl kum, thla ngâna a ni.

⁹Babulon aţanga a chhuah chu thla khatna, ni khat nî a ni a, Pathian duhsakna kutin a hruai ang zêlin, thla ngana, ni khat nî chiahin Jerusalem a thleng ta a ni.

¹⁰Ezra chuan LALPA Dân chu zawng zêl tûr leh, zâwm tûr te, chû dân thû leh a thuruatte chu Israel rama zirtîr tûrin, thinlung takin a lo inbuatsaih thîn a ni.

EZRA HNÊNA ARTAZERZIA LEHKHATHAWN

¹¹Hei hi Lal Artazerzian puithiam Ezra, lehkhâ ziaaktu, Israelte tâna LALPA thupêk leh thuruat zir thiam mi hnêna a lehkhathawn chu a ni:

¹²Artazerzia, lalte lalin puithiam Ezra, vân Pathian Dân lehkhâ ziaaktu hnênah: Thlamuanna kim i chungah awm rawh se.

¹³Ka ram chhûnga Israel mi zawng zawng leh, puithiamte leh Levia chite, Jerusalema kal ve duh apiang chu, i ruala kal vê tûrin phalna ka pê e.

¹⁴Lal leh a khâwnbâwl pasarihten Jerusalem leh Judai rama thil awm dân leh, i Pathian Dân i kuta kawltîr chu enthlîlthlâi tûrin kan tûr che a ni a;

¹⁵Lal leh a khâwnbâwlten Jerusalema chêng, Israelte Pathian tâna phal taka kan pêk silvar leh rangkachakte hi i keng dân nia;

¹⁶Babulon bial zawng zawng aţanga silvar leh rangkachak i hmuh theih zawng zawng leh, mipuite leh puithiamten anmahni inphalnaa an pêk khâwmte chu, Jerusalema an Pathian in tân lâwm taka hlan tûr a ni a;

¹⁷chuvângin, fimkhur takin hêng pawisa te hi bâwngpa te, berâmpa te, berâm no te, an buhbâl leh an in tûr thilhan lei nân te lo hmang sela, Jerusalema in Pathian in maichâmah chuan hlân zêl rawh se.

¹⁸Silvar leh rangkachak in hman bângte chu, nangni leh in unaute nên thâ in tih angin hmang ula, in Pathian duh zâwng ang zêlin ti rawh u.

¹⁹In Pathian ina rawngbâwlna tûr bungbêl an pêk che pawh kha, Jerusalema Pathian hmâah a kimin dah lût ang che u.

²⁰I Pathian in tâna hman tûr tûl dang a awm phawt chuan, lal sum aţangin lo pe zêl ang che.

²¹Kei, keimah, lal Artazerzia ngei hian, Luirâl biala sum vawngtu zawng zawngte hnênah puithiam Ezra, vân Pathian Dân lehkhâ ziaaktuin a mamawh apiang chu, thahnemngai takin lo tihsak zêl tûrin thupêk ka chhuah e,

²²silvar talent 100, wheat kor 100, uain bath 100, hriak bath 100 leh, chî chu a tûl zât zât ni rawh se.

²³Vân Pathianin thû a pêk apiang chu, a pêk dân ang takin vân Pathian in tân thahnemngai taka tih ni rawh se. Engah tehlul nge lalram leh a fate chu thinurnain a tlâkbuak ang le?

²⁴Puithiam te, Levia chî te, zâimi te, kawngkhâr vêngtu te, Nethin te leh hê Pathian ina rawngbâwltute hian chhiah te, leiman te leh sumdâwnna chhiah rêng rêng an chawî ve tûr a ni lo.

²⁵Nang Ezra, Pathianin finna a pêk ang zêl chein, i Pathian dân hre mite zînga mi rorêl tûr leh thubuai remtu tûr ruat la, Luirâl biala mi zawng zawngte thubuai rêlsak sela; hre lote chu zirtîr zêl rawh se.

²⁶I Pathian dân leh lal dân zâwm duh lote chu, an chungthû rang taka ngaihtuah vat tûr a ni a, tihlum emaw, ram ata hnawhchhuah emaw, bungraw chhuhsak emaw, tân ina khung

emawa hrem nghal zêl tûr a ni,” tiin.

²⁷Jerusalema LALPA in cheimâwi tûra, lal thinlunga chuti taka thû lo sawitu, LALPA kan thlahtute Pathian chu fakin awm sela,

²⁸ka chungah zah a ngaihzia chu lal leh a khâwnbâwlte leh lal milian ropui tak takte hmâah a lantîr ta si a. LALPA ka Pathian kut chu ka chungah a awm avângin, min tichak ta êm êm a; ka ruala chho vê tûrin Israel mi pawimawhte ka hûi khâwm thei ta a ni.

BUNG 8

EZRA RUALA KÎR VÊ CHHÛNGKAW HOTUTE

¹Hengte hi chhûngkaw puipa deuh deuh, lal Artazerzia lal laia ka ruala hâw chho vête chu an ni a, an thlahte hming chu:

²Phinehasa thlahte zînga mi Gersoma; Ithamara thlahte zînga mi Daniela; Davida thlahte zînga mi Hatusha;

³Sekania thlahte, Parosa thlahte zînga mi Zekaria; mipa hming ziaak zât 150;

⁴Pahath-Moaba thlahte zîngah, Zerahia fapa Eliehoenaia nên mipa 200;

⁵Sekania thlahte zîngah BenJahaziela nên mipa 300;

⁶Adina thlahte zîngah Jonathana fapa Ebada nên mipa 50;

⁷Elama thlahte zîngah Athalia fapa Jesaia nên mipa 70;

⁸Sephatia thlahte, Mikaela fapa Zebadia nên mipa 80;

⁹Joaba thlahte, Jehiela fapa Obadia nên mipa 218;

¹⁰Selomitha thlahte, Ben-Josiphia nên mipa 160;

¹¹Bebaia thlahte, Bebaia fapa Zekaria nên mipa 28;

¹²Azgada thlahte, Hakatana fapa Johanana nên mipa 110;

¹³Adonikama thlah hnahnungte, an hmingte chu—Elipheleta, Jeiela leh Semaia te nên— mipa 60;

¹⁴Bigvaia thlahte, Uthaia leh Zabbuda nên mipa 70.

TEMPULA RAWNGBÂWLTUTE

¹⁵Ahava lama luang lût lui kamah ka hruai khâwm a, chutah chuan ni thum kan awm a. Mipuite leh puithiamho ka han en vêl a, Levia chîa mi tûmah ka hmu ve lo va.

¹⁶Tichuan, hruaitu deuh deuh, Eliezera te, Ariela te, Semaia te, Elnathana te, Jariba te, Elnathana te, Nathana te, Zekaria leh Mesullama te chu ka kohtîr a; hriatthiamna nei mi Joariba leh Elnathana te nên.

¹⁷Kan Pathian ina rawngbâwltu tûrrawn hruai tûrin, Kasipia hmuna an hotu ber Iddoa chu thû ka pê a—Kasipia hmuna Iddoa leh a unaute Nethin-ho hnêna an sawi tûr thû ka chah a.

¹⁸Kan Pathian khawngaihna kut chu kan chungah a awm a, hriatthiamna tha tak nei mi, Israela fapa, Levia thlah, Mahlia thlah, a hming Serebia chu, a fate leh a unau 18 te nêan anrawn hruai ta a;

¹⁹Meraria thlah Hasabia leh Jesaia te leh an unau leh an fa mi 20 nêan;

²⁰Nethin-ho, Davida leh a puipaten Levia-ho rawngbâwlsak tûra an ruatte zînga mi Nethin-ho 220 te nêan. An hming theuhva

ziaak a ni.

VÊNHIM NÂN CHAWNGHEIA TAWNGTAI

²¹Kan Pathian hmâa kan intihtlâwm a, keini leh kan fanau têtê tân leh kan thil neih zawng zawngte nêan kalna tûr kawng dika min hruai theih nân, Ahava lui kamah chuan chawnghei ka puang a.

²²Kal kawnga hmêlmâte laka min vêngtu tûr sipaite leh sakawr chungchuang mi lal hnêna dîl lah chu ka zak tawh si a; a hmâ lawk khân, “Kan Pathian kut chuan ama hnêna thil tha zawngtute a awmpui thîn a, a thiltihtheihna leh a thinurna chu amah hawisantute chungah a awm thîn,” tiin lal hnênah ka lo sawi tawh si a.

²³Tichuan, chaw nghein chumi chungchâng chu Pathian hnênah kan ngên chiam a, kan tawngtaina min chhâng a.

TEMPUL PUALA THILPÊK

²⁴Puithiamho zînga hruaitu deuh deuh 12 ka ko hrang a—Serebia te, Hasabia leh an unau sâwm te nêan—

²⁵kan Pathian in tâna lal leh a khâwnbâwlte leh a milian hote, chuta awm vê Israel mi zawng zawngin an pêk khâwm silvar te, rangkachak leh bungbêlte chu an hnênah ka bûk chhuak vek a.

²⁶Bûksâa an kuta ka hlan zât chu, silvar talent 650, silvara siam bungbêl talent 100 a rit, rangkachak talent 100,

²⁷rangkachak thlêng sawmhnih, drakma 1000 hû leh, rangkachak ang maia hlû bungbêl pahnih, dâr tle chî-a siam te a ni.

²⁸An hnênah, “LALPA tâna serh hran in ni a; bungbêlte pawh serh hran a ni bawh a; silvar leh rangkachak te hi LALPA, in thlahtute Pathian tâna miten phal taka an hlan a ni a.

²⁹Chuvângin, Jerusalema LALPA in pindan chhûnga, puithiam lalte leh Levia chîte leh Israel hnam puipate hmâa in va bûk chhuah leh hmâ chu, vêng ula, kawl tha rawh u,” tiin ka hrilh a.

³⁰Tichuan, puithiamte leh Levia mite chuan, Jerusalema kan Pathian ina ken pheî tûrin silvar te, rangkachak leh bungbêlte chu a bûk zât nêan an la ta a.

JERUSALEMA AN KÎR THU

³¹Tichuan, thla khatna, ni 12 nî chuan Jerusalem pan tûrin Ahava lui chu kan chhuahsan a. Kan Pathian kutin min awmpui a, kawng thuanin hmêlmâte min lambun theihna lakah min chhan him zêl a.

³²Jerusalem chu kan lo thleng ta a, ni thum kan châm a.

³³A ni lî ni chuan silvar leh rangkachak leh bungbêlte chu kan Pathian inah chuan puithiam Uria fapa Meremtha’n a bûk chhuak a, a hnênah chuan Phinehasa fapa Eleazara a awm a; Levia mi Jesua fapa Jozabada leh Binnuia fapa Noadia te an awm bawh a,

³⁴thil engkim chu bûka, chhiar vek a ni a. A bûk zât chu an chhinchhiah zêl a.

³⁵Sala hruai bo lo kîr lehte chuan Israelte Pathian hnênah hâlral thilhlân an hlân a, Israel zawng zawng pualin bâwngpa 12, berâmpa 96, berâm no 77, sual thâwi nân kêlpa 12 an hlân a. Hêng

zawng zawng hi LALPA hnêna hârlal thilhlân vek a ni.

³⁶Lal thupêkte chu lal hnuaia thawk miliante leh Luirâl biala ram awptute hnênah chuan an hlân a. Tichuan, mipuite leh Pathian in ãanpuina atân an pe ta a.

BUNG 9

HNAM DANGTE NÊNA INNEIH PAWLH

¹Chûng thilte an zawh chuan, an puipate chu ka hnênah an lo kal a, “Israel mite, puithiamte leh Levia mite chu hê rama mi Kanaan-ho te, Hit-ho te, Periz-ho te, Jebus-ho te, Ammonho te, Moab-ho te, Aigupta-ho te leh Amor-ho te leh an thil chin tenawm lakah inthiarfihlîm nachâng rêng an hre lo va.

²Chûngho fanute chuan an tân leh an fapate tân nupuiah te an nei ta mai mai a; chûvângin, chi thianghlîm hi a rama mite nên an chawhpawl zo ta. Hê dân bawhchhiatnaah hian kan milianho leh rorêltute hi a hleihluakah an ãang leh ta nghâl a,” an ti a.

³Chû thû ka han hriat chuan, ka silhfên leh ka kawrfualte ka pawthlêr a, ka lûa sam leh khabe hmul te ka pawt ãil a, mak tiin ka ãu hnawk a.

⁴Tichuan, sala hruai bo hote bawhchhiatna avânga Israelte Pathian thûa khûr apiangte chu ka hnênah an lo kal khâwm a; kei chu tlai lam inthâwi hun thlengin, a ngaihna hre lovin ka ãu reng a.

⁵Tlai inthâwinaah chuan ka chawngheina aãangin ka tho va; ka silhfên leh kawrfual thlêr chung chuan ka ãingthî a, LALPA ka Pathian lamah bân ka phar chhuak a.

⁶Tihian ka ti a: “Aw ka Pathian, i lam lo hawi tûr hian ka va zakin, mualphothlâk ka va ti tak êm, ka Pathian; kan sualnate hian kan lû a chîmpil daih a, kan diklohnain vân a tawng ta.

⁷Kan pute hun aãanga vawiin thlengin kan thiam lo hmin dêr a, kan sualnate avângin kan lalte, kan puithiamte chu ram dang lallo kuta hlan an ni a, tûn ang reng hian khandaih te, sal tân te, rawk te, mualphona te an tâwk ãhîn a.

⁸Tûnah hian LALPA kan Pathianin, a la dam chhunte min chhan chhuaha, a hmun thianghlîma min phun nghet tûr leh, kan mitte min tihvârsaka, kan sal tâna khur ata min kâiharh leh tûrin, khawngaihna hun tlêmtê min temtîr mai a nih hi.

⁹Sal kan lo ni tawh a. Mahse, kan Pathian hian kan saltânnaah pawh min kalsan lo va; min tiharh leh tûr te, kan Pathian in sa ãhâa, a chhe tawh tung ding leh tûr te, Judai ram leh Jerusalemah kulh min pe leh tûrin, Persia lalte mithmuhah hian kan chungah zah a ngai êm êm a ni.

¹⁰Tûnah hian âw kan Pathian, eng nge kan sawi leh tâk ang le? I thupêkte chu kan hawisan ta si a,

¹¹i thupêka i chhihhlawh zâwlneiten an sawi ãhîn, ‘Luah tûra in va luhna tûr ram chu ram bawhlhlawh a ni a, a rama mi chêngte bawhlhlawhna tenawm tak chuan ram tin kil tin a tikhat vek a ni.

¹²Chûvângin, in fanute chu an fapate nupuiah neihtîr suh ula, an fanute pawh in fapate tân neihsak hek suh u; hê ramah hian chak taka in awma, a rama thil ãhâ te in ei a, in thlahte tân kumkhaw rotling in hnutchhiah theih nân, anmahni nêna inremna leh hamãhatna rêng rêng ûm suh u,’ an tih ãhîn kha.

¹³“Kan thiltih sual avâng leh kan thiam loh nasat êm avânga kan chungah thil thleng zawng zawng te, kan suahsualnain a phû tâwk aia nêp hremna kan Pathianin min pê a, hetianga min chhan chhuah lai mêk hian,

¹⁴a ngai bawkin i thupêkte bawhchhiain, hêng thil tenawm chîngtute nên hian kan inneih pawlh leh ang maw? Tûmah zuah leh thi bâng pawh awm lo khawpin i thinurna hian min eiral vek dâwn lo vem ni?

¹⁵Aw LALPA, Israelte Pathian, nang chu i dik a, keini chu tûn ang hian, a kuangbâng chauh kan nih hi. Hei vâng hian, tûmah i hmâa ding tlâk kan awm lo va, inthiam lo tak chungin i hmâah kan lo ding ringawt mai a nih hi!” ka ti a.

BUNG 10

DÂN LOVA INNEITE INPUANNA

¹Chutia Ezra a ãawngtaia, a sualte a puana, ãap chungah Pathian in hmâa a kûn reng lai chuan, Israel mipa leh hmeichhia, naupangte chenin an rawn pungkhâwm ruih ruih a; mipuite chu lungchhe takin an ãap vak vak a.

²Elama thlahte zînga mi, Jehiela fapa Sekania chu a lo ãawng chhuak a, Ezra hnênah, “Kan Pathian dân kan lo bawhchhia a, hê rama mi hnam dang mi nupuiah te kan lo nei ta mai a; mahse, heti chung hian Israelte tân beiseina a la awm cheu a ni.

³Chûvângin, hêng nupui zawng zawngte leh an laka fa piangte hi dah kiang vek tûrin Pathian hnênah thû thlung ila, nang ka pu leh kan Pathian thupêka khûr ãhînte remruat ang zêl ni sela; dân ang taka tih ni rawh se.

⁴Tho rawh le, hê thil hi i mawhphurhna a ni e. Kan thlâwp tlat ang che. Huai takin awm la, i tih tûr chu ti rawh le,” a ti a.

⁵Ezra chu a tho va, puithiam zînga a puipa deuh deuh te, Levia mite leh Israel mi zawng zawng chu, chû thû ang taka chhechham tûr chuan a hrilh a. Tichuan chhia an chham ta a.

⁶Tichuan, Pathian in hma aãang chuan Ezra chu a tho va, Eliasiba fapa Jehohanana pindana chuan a lût a; chuta a va thlen chuan, saltâng chhuakte thil sual tih chu a lâknat êm avângin chaw pawh a ei duh lo va, tui pawh a in duh hek lo.

⁷Judai ram pum leh Jerusalemah saltâng chhuakho zawng zawng chu, Jerusalemah kal khâwm vek tûrin thupêk an chhuah a,

⁸tah chuan, tupawh an hruaitute leh an upate thupêk âwih lova, ni thum chhûnga lo kal lo apiang chu, a neih zawng zawng chhuhsak a ni ang a, amah ngei pawh saltâng chhuakho inpâwlkhâwm aãangin ensan tûr a ni, tiin thupêk an chhuah a.

⁹Tichuan, Judai ram leh Benjamin rama mi zawng zawng chu ni thum chhûngin Jerusalemah an lo kal khâwm vek a. Thla kuana, ni 20 nî a ni a; mipuite chu Pathian in tual zâu laiah chuan an ãhû a, chû thû avâng leh ruahsûr nasa avâng chuan an khûr an khûr mai a.

¹⁰Puithiam Ezra chu a lo ding chhuak a, an hnênah, “Hnam dang nupuiah te in lo nei a, dân in bawhchhia a, Israelte tân thiamlohna in belhchhah a.

¹¹Chûvângin, a duh zâwng ti tûrin, LALPA in thlahtute Pathian hnênah chuan in sualte puang ula; hê rama mite lakah leh hnam

dang nupuite lakah inthiarfihlîm rawh u,” a ti a.

¹²Tichuan, mipui zawng zawng chuan ring takin, “Aw le! I sawi ang takin kan ti ang.

¹³Mahse mi an tam hlê si a; ruah sîr hun lai a ni a, pâwnah hian kan ding reng thei lo a ni. Hê thil hi ni hnih khat hnâ mai pawh a ni lo va, mi tam takin hê dân hi kan bawhchhe ta si a.

¹⁴Khawngaih takin, kan puipaten mipui zawng zawng aiawh sela; hê thil avânga kan Pathian thinurna nasa tak hi, kan hnên ata a kian hmâ chuan, kan khua theuhva hnam dang mi nupuia neite chu hun ruatah, khaw upate leh rorêltute nênrawn inlan rawh se,” an ti a.

¹⁵Asahela fapa Jonathana leh Tikva fapa Jahazia te chauhvin hê thû hi an hnial a, Mesullama leh Levia mi Sabbethaia-ten an lo thlâwp ve bawk a.

¹⁶Tichuan, saltâng chhuakhote chuan chutiang tak chuan an ti a. Puithiam Ezra chuan an chhûngkaw puipate zînga mi chu, an hming theuhvin a ruat hrang vek a; thla sâwmna, ni khat nîah chû thil endik tûr chuan an thukhâwm a.

¹⁷Thla khatna, ni khat nîah chuan, hnam dang nupui nei zawng zawng chu an zâwt chhuak hman vek a ni.

HNAM DANG NUPUI TE DAHKIAN AN NI

¹⁸Puithiam fapate zînga hnam dang nupui nei an hriatte chu, Jozadaka fapa Jesua fapate leh an unaute: Maaseia te, Eliezera te, Jariba te leh Gedalia te an ni.

¹⁹An nupuite chu then tûrin thû an tiam a; thiam loh an chan avângin, an bawhchhiat thâwi nân berâm rual zînga berâmpa pakhat an pê a.

²⁰Immera fapate: Hanania leh Zebadia;

²¹Harima fapate: Maaseia, Elija, Semaia, Jehiela leh Uzzia;

²²Pasura fapate: Elioenai, Maaseia, Ismaela, Nethanela, Jozabada leh Elasa.

²³Levia chite zîngah: Jozabada, Simeia, Kelaia (Kelita nân thuhmun), Pethahia, Juda leh Eliezera.

²⁴Zaimite: Eliasiba; kawngkhâr vêngtute zîngah: Salluma, Telema leh Uria.

²⁵Israel mi dang zawng: Parosa fapate: Ramia, Jezia, Malkia, Mijamina, Eleazara, Malkija leh Benaia;

²⁶Elama fapate: Mattania, Zekaria, Jehiela, Abdia, Jeremotha leh Elia;

²⁷Zattua fapate: Elioenai, Eliasiba, Mattania, Jeremotha, Zabada leh Aziza;

²⁸Bebaia fapate: Jehohanana, Hanania, Zabbaia leh Athlaia;

²⁹Bania fapate: Mesullama, Malluka, Adaia, Jasuba, Sheala leh Ramotha;

³⁰Pahath-Moaba fapate: Adna, Kelala, Benaia, Maaseia, Mattania, Bezalela, Binnua leh Manasea;

³¹Harima fapate: Eliezera, Isijaha, Malkija, Semaia, Simeona,

³²Benjamina, Malluka leh Semaria;

³³Hasuma fapate: Mattenaia, Mattatta, Zabada, Elipheleta, Jeremaia, Manasea leh Simeia;

³⁴Bania fapate: Maadaia, Amrama, Uela,

³⁵Benaia, Bedeia, Keluha,

³⁶Vania, Meremotha, Eliasiba,

³⁷Mattania, Mattenaia, Jaasaia,

³⁸Bania, Binnua, Simeia,

³⁹Selemia, Nathana, Adaia,

⁴⁰Maknadebaia, Shashaia, Sharaia,

⁴¹Azarella, Selemia, Semaria,

⁴²Salluma, Amaria leh Josepha;

⁴³Neboa fapate: Jeiela, Mattithia, Zabada, Zebina, Jaddaia, Joela leh Benaia te an ni.

⁴⁴Hêng mi zawng zawngte hian hnam dang nupui an lo nei vek a, thenkhat chuan an nupuite lakah fate pawh an lo nei hman a ni.

NEHEMIA

Ziah tu: Nehemia • Ziah kum: B.C. 430

Nehemia bu hian Babulon saltâna ațanga a huhova Judate kîr leh țin thumna chanchin ziakin, Thuthlung Hluia Israel history kal lai chu arawn khâr ta a ni. Hê lehkhâbûah hian Ezra leh Nehemia te an langsâr ber a; Ezra bû leh Nehemia bûte hi Hebraiah chuan bu khat a ni ngê ngê. Anni pahni hi hê lehkhâbûa ziaktua ngai theih an ni vê vê baw. Ezra bûa thupui ber chu tempul dinthar lehna a nih laiin, Nehemia bu erawh chuan Jerusalem kulh chhe tawh tundin țin leh chu a thupui ber a ni. Tempul an din zawh hnû khân Juda saltâng kîr lehte khân an hmêlmâte diriam leh hmuhsit tâwk khawpin kulh din țin an ngaisak lo va. An chan chhiatzia thû Nehemian a lo hriatin a la na êm êm a, Persia lal Artazerzia no hlantu dinhmun sâng a chel lai chu lal phalnain a chawhsan hial a. Pathian a rinchhan tlat avângin, a hmêlmâte mak tih khawpa chakin Jerusalem kulh chu a tungding zo leh ta a ni. Nehemia bu hian Jerusalem kulh chhe tawh tundin leh chungchang bâkah, thlarau lama dinthar lehna a uar hlê, ‘Hawh u, i din thar leh ang u,’ tih hi a thupui a ni. Thuthlung Hluiah hnam hruiatua zînga ținwngtai nasa berte zînga mi, a mite sualna pawh ama ko ngeia inbeltu, mi dik leh rinawm thuantling a ni. Nehemia hi Bible-a bu 16-na a ni a, a chhûngah hian bung 13 leh châng 406 a awm.

BUNG 1

A MITE TÂN NEHEMIA A ȚAWNGȚAI

¹Hakalia fapa Nehemia thûte. Kum 20-na, Kisleu thlaa Susan lal ina ka awm laiin,

²Judai rama mi tute emaw an lo kal a, ka unaupa Hananian a rawn hrui a; Juda saltâng chhuakho chanchin leh Jerusalem chanchin ka lo zâwt a.

³Anni chuan, “Saltâng chhuak, chû rama kîr lehte chu mite hmuhsit leh chan chhe takin an awm a. Jerusalem kulh chu a chim rem rum a, a kawngkhârte pawh a kâng chhe vek a,” an ti a.

⁴Chûng thû ka han hriat chuan ka țin hnaw a, ka țin a, lungngaiin ni tam tak ka sîn a; vîn Pathian hmâah chuan chawngheiiin ka ținwngtai ngat ngat a.

⁵“Aw LALPA, vîn Pathian, nang chu Pathian ropui leh ținbaiaawm i ni a, nangmah hmangaiha, i thuthlung vawnga i thupêk zâwmtute chungka khawngaihna lantîrtu,

⁶I chhiahhlawhin i mi Israelte tân, a chhûn a zâna i hnêna ka dîlna hi lo ngaithla tûrin, i beng lo chhi la, i mit lo meng ang che. Israel faten i chungah thil sual kan lo tih zozai hi ka rawn inpuang e. Kei leh ka pa chhungkua hi kan lo sual êm a ni.

⁷I chungah khawlo takin kan lo ti țin a, kan zawm atâna i chhiahhlawh Mosia kal tlanga i thupêk te, i dân te leh i thuruatte chu kan zâwm duh si lo va.

⁸I chhiahhlawh Mosia hnêna thû i pêk khân, ‘Rinawm lo taka in awm chuan hnam tin zîngah ka tidarh vek ang che u;

⁹mahse ka hnêna in lo kîr leha, ka thupêkte pawma in zawm chuan, in zînga mi tam tak hi vîn tâwp rêtah pawh hnawh darhin awm tawh mah ula, chûng ațang chuan ka hrui khâwm leh ang che u a, ka hmîng awmna tûra ka ruatna hmunah chuan ka hrui kîr leh ang che u,’ tia i thupêk kha hre reng tûrin ka ngên a che.

¹⁰Hêng mite hi, i thiltihtheihna leh i kut chak taka i tlan chhuah tawh, i chhiahhlawhte leh i mite an nih hi.

¹¹Aw LALPA, i chhiahhlawh ținwngtainaah hian i beng lo chhi la, i hmîng țin duh êm êmtu dîlna hi lo ngaithla ang che; vawiinah hian i chhiahhlawh hi min hlawhtlîntîr la, hê mi mithmuhah hian zahngaihna lantîr tûrin ka dîl che a ni,” tiin ka ținwngtai a. Kei chu lal no hlântu ka ni a.

BUNG 2

JUDAI RAMAH NEHEMIA A KAL

¹Lal Artazerzia lal kum 20-na, Nisan thlâah chuan, a hmâah uain an rawn chhawp a, uain chu ka la a, lal chu ka pê a. Tûn hmâin lal hmâah lungngai hmêl ka la pu ngai reng reng lo va.

²Lal chuan ka hnênah, “Damlo pawh i ni si lo va, engvânga lungngai hmêl pû nge i nih le? Eng dang a ni lo, lungngaihna i nei a nih hi,” a ti a. Kei chu ka hlauthâwng ta êm êm mai a,

³lal hnênah chuan, “Lalber chu dam reng rawh se! Ka pute thlân awmna khawpui chu a ram dêr a, a kulh kawngkhârte a kâng chhe vek a, lungngai hmêl pu lo thei ka ni em ni?” ka ti a.

⁴Lal chuan ka hnênah, “Eng nge mi dîl duh i neih le?” a ti a. Tichuan, vîn Pathian hnênah ka ținwngtai a.

⁵Lal hnênah chuan, “Lalin rem a tiha, i chhiahhlawh hian i duhsakna ka dawng a nih chuan, ka pute thlân awmna khawpui va din țin leh tûrin, Judai ramah min kaltîr la ka duh hlê mai,” ka ti a.

⁶Lal chuan ka hnênah (lalnu pawh a bulah a țin vê a), “Engtia rei nge i thang bo ang? Engtikah nge i lo kîr leh ang?” a ti a. Tichuan, lal chuan ka kal min phalsak ta a; ka haw leh hun tûr pawh ka hrilh a.

⁷Chû bâkah lal hnênah chuan, “Lalin rem a tih chuan, Lui râl biala ram awptute hnênah, Judai ram thlenga an biala ka kal tlang min phalsak theih nân lehkhâte min pe ta che;

⁸lal ngawpui vêngtu Asapha hnênah pawh tempul kawngkhâr tûr te, khawpui kulh atân te, ka awmna in sakna tûr thing min pêk theih nân lehkhâ siam ni se,” ka ti a. Ka Pathian chu ka chungka a țin êm avângin lal chuan ka dîl apiang min pê a.

⁹Tichuan, Luirâl bial awptute hnênah chuan ka kal ta a, lal lehkhâte chu ka pê a. Lal chuan sipai hotute leh sakawr chungchuang mite chu ka hnênah a kaltîr vê a.

¹⁰Mahse, Horon mi Sanballata leh Ammon mi Tobia, sorkar hotuten an lo hriata, Israel fate hamțhatna zawngtu a lo kal tih an hriat chuan an lâwm lo hlê a.

NEHEMIAN JERUSALEM KULH BANG A ENDIK

¹¹Tichuan, Jerusalem ka thleng ta a, ni thum chhûng ka awm a.

¹²Zânah chuan ka tho va, kei leh ka hnêna awm mi dang tlênte nê; Jerusalema ka tih tûr, ka rilrûa Pathianin a dah chu tûmah

ka hrilh lo; ka chuanna chauh lo chu sa dang pawh kan keng lo.

¹³Zânah chuan Ruam Kawngkaah ka chhuak a, Rûl Tuikhur leh Bawlhhlawh Kawngka lamah ka kal a, kal pahin Jerusalem kulhbang chim te, a kawngkhâr kâng chhia te chu ka thlîr zêl a.

¹⁴Tuichhunchhuah Kawngka leh Lal Dîl awmna thlengin ka kal zêl a, mahse ka chuanna sa kal tlang theihna rêng rêng a awm lo va.

¹⁵Tichuan, zânah lui ruam zawh chhovin, kulh bang chu ka thlîr chho zêl a; tah chuan ka lêt leh a, Ruam Kawngkaah bawh ka lût a, ka hâw leh ta a.

¹⁶Hotute chuan khawiah nge ka kal a, eng nge ka tih pawh an hre lo; Judate, puithiamte, milianhote, hotute leh hnathawktu mi dangte rêng rêng pawh ka la hrilh duh rih lo va.

¹⁷An hnênah chuan, “Kan chan chauh zia hi in hmû a, Jerusalem chu a ram dêr a, a kawngkhârte pawh a kâng chhe vek a nih hi. Hawh u, sawi chhiat kan nih tawh loh nân, Jerusalem kulh chu i dinthar leh ang u,” tiin ka hrilh a.

¹⁸An hnênah chuan ka Pathianin mi duhsakzia leh ka hnêna lal thusawite ka hrilh a. Tichuan, anni chuan, “Khai ule, i din thar leh tak ang u,” an ti a. Chû hna thâ thawk tûr chuan an inpuahchah ta a.

¹⁹Nimahsela, Horon mi Sanballata te, sorkar hotu Tobia leh Arab mi Gesema-a ten an lo hriat chuan hmusit takin min nuihsawh a, “Eng thil nge maw tih in tum le? Lal laka hel te hi in tum elo?” an ti a.

²⁰Anni chu tihian ka chhâng a, “Vân Pathianin min tihmuingîl zêl ang a; keini a chhihhlawhte hi kan tho vang a, kan sa mai dâwn a ni; nangni vê hian Jerusalemah hriatreng tûrin chanvo leh thuneihna engmah in nei lo ve,” tiin.

BUNG 3

KULH DIN THAR LEH THÛ

¹Puithiam lal Eliasiba chu a unau puithiam dangte nêan an thawk chhuak a, Berâm Kawngkhâr an din thâ a; an hlân thianghlim a, kawngkhâr an vuah a. Hammea Vên Insâng leh Hananela Vên Insang thleng vê vên kulh an din thâ a, an hlân thianghlim a.

²Eliasiba dawta dintute chu Jeriko mite an ni. A dawt lehah Imria fapa Zakkura hovin an siam a.

³Hasena-a fapaten Sangha Kawngkhâr an siam a; a kawngka biang te leh a kawngkhâr te an vuah a, a kalhna leh a bahnate an siam vek a.

⁴Anni dawtah chuan Koza fapa, Urija fapa Meremotha hovin an siam thâ a. A dawt lehah Mesezabela fapa, Berekia fapa Mesullama hovin an siam thâ a. Anni dawtah Baana fapa Zadoka hovin an siam thâ a.

⁵A dawt lehah Tekoi hovin an siam thâ a; mahse an milianho chu an Lalpa hnaah an inrawlh ve duh lo va.

⁶Pasea fapa Jehoiada leh Besodeia fapa Mesullama-ten Kawngka Hlui an siam thâ a; a kawngka biang te leh a kawngkhâr te an vuah a, a kalhna leh a bahnate an siam vek a.

⁷Anni dawtah chuan Gibeon mi Melatia te, Meronoth mi Jadona te, Gibeon leh Mizpa khaw mite chuan Luirâl ram bial awptu in an chei thâ a.

⁸Ani dawt chu Harhaia fapa Uzziela, rangkachak chhertute zînga mi chuan a siam thâ a. A dawtah Hanania, rimtui siamtu zînga miin a siam thâ a; Bang Chhah lai thlengin Jerusalem chu an thuam nghet a.

⁹Anni dawtah Hura fapa Rephaia, Jerusalem bial chanve hotu hovin an siam thâ a.

KULH DIN THAR LEH THU

¹⁰Anni dawtah Harumapha fapa Jedaia chuan ama in hmazâwn a siam thâ a. A dawt leh chu Hasabnia fapa Hattusan a siam thâ a.

¹¹Harima fapa Malkija leh PahathMoaba fapa Hasuba-ten an chanvo bâkah, Meipui Chhehna Insâng pawh an siam thâ a.

¹²Ani dawt chu Halloohesa fapa Salluma, Jerusalem bial then hotu chan a ni; amah leh a fanuten an siam thâ a.

¹³Hanuna leh Zanoa chêngten Ruam Kawngkhâr an siam thâ a. An din thâ a, a kawngkhâr te an vuah a, a kalhna leh a bahnate an siam a, Bawlhhlawh Kawngka thlengin kulh chu tawng sâng khata thui an thuam thâ a ni.

¹⁴Rekaba fapa Malkijama, Beth Hakerem bial hotu chuan Bawlhhlawh Kawngka chu a siam thâ a; a kawngkhâr te an vuah a, a kalhna leh a bahnate an siam vek a.

¹⁵Kol-Hozeha fapa Salluna, Mizpa bial hotu chuan Tuikhur Kawngka a siam thâ a; a din thâ a, a khuah a, a kawngkhâr te an vuah a, a kalhna leh a bahnate an siam vek a, Lal Huan kianga Sela Dîl hungna kulh chu Davida Khawpui ațanga chhuk thlâkna kailâwn thlengin a siam thâ a.

¹⁶Ani dawt chu Azbuka fapa Nehemia, Beth Zur bial hotu chuan Davida thlân zâwna lal in thlengin, tui khuah leh Mi Huaisente Bûk thlengin a siam thâ a.

¹⁷Ani dawtah Levi ho, Bania fapa Rehuma hovin an siam thâ a. A dawt leh chu Hasabia, Keila bial zahvê hotu chuan ama bial hmingin a siam thâ a.

¹⁸A dawtah chuan an unaute, Keila bial zahve dang hotu, Henadada fapa Bavaia hovin an siam thâ a.

¹⁹Ani dawtah Jesua fapa Ezera, Mizpa khaw hotuin, kulh bang kila râlthuam dahna pan chhohna zâwn thlengin a siam thâ a.

²⁰Ani dawtah Zabbaia fapa Barukan a chanpual, kulh bang rem chhah lai hmun ațanga puithiam lal Eliasiba in kawngkhâr thlengin uluk takin a siam thâ a.

²¹Ani dawtah Koza fapa, Urija fapa Meremotha chuan a chanpual, Eliasiba in kawngkhâr ațanga Eliasiba in tâwp zâwn thlengin a siam thâ a.

²²Ani dawtah puithiam, phaia chêng hovin an siam thâ a.

²³Anni dawtah Benamina leh Hasuba ten anmahni in zâwn an siam thâ a. Anni zawhah Anania fapa, Maaseia fapa Azarian a in bul a siam thâ a.

²⁴Ani zawhah Henadada fapa Binnuia chuan Azaria in ațanga a kil banpui awmna thlengin a siam thâ a.

²⁵Uzaia fapa Palala chuan kulh banpui ep, tân in bula lal in chungnung zâwk ațanga filawr, insâng zâwn a siam ță a. Ani dawtah Parosa fapa Pedaian a siam ță a.

²⁶Ophel-a awm Nethin-hovin chhak lam Tui Kawngka zâwn leh insâng filawr thlengin an siam ță a.

²⁷Anni dawtah Tekoi-hovin hmun dang, in sâng lian pui filawr zâwn ațanga Ophel kulh thlengin an siam ță a.

²⁸Sakawr Kawngka piah lam chu, puithiam-hoten anmahni in zâwn țeuh an siam ță a.

²⁹Anni dawtah Immera fapa Zadoka chuan ama in zâwn a siam ță a. Ani dawtah Sekania fapa Semaia, Khawchhak Kawngka vêngtu chuan a siam ță a.

³⁰Ani dawtah Selemia fapa Hanania leh Hanuna, Zalapha fapa parukna chuan chan khat a siam ță a. Ani zawhah Berekia fapa Mesullaman ama chênna zâwn a siam ță a.

³¹Ani zawhah Malkija, rangkachak chhertu chuan Nethin-ho in leh dâwrkâi hmun, Miphkad Kawngka zâwn leh bang kila pindan chungnung awmna thlengin a siam ță a.

³²Bang kil pindan chungnung ațanga Berâm Kawngkhâr thlengin rangkachak chhertute leh sumdâwngten an siam ță a ni.

BUNG 4

HMÊLMA LAKA KULH VÊNHIM DÂN

¹Sanbalatan kulh kan din țăt țăt a lo hriat chuan a thinur hle a, a ngaihdân a ni lo tawp mai a, Judate chu a nuihsawh vêl a.

²A unaute leh Samari sipaite hmâah, “Hêng Juda nêp tak takho hian eng nge maw an tih le? Kulh ka din e, an ti elo? Inthâwina an hlân tehchai ang maw? Ni khatah an zo dâwn em ni? Hnâwm hnawk zîng ațangin lung kâng út tawh an tuai thar leh ang maw?” tiin a âng buan buan a.

³A kiangah chuan Ammon mi Tobia pawh a awm a, “Han din tehrêng sela, an lungremte chu sihal pawhin a chuan chim mai ang chu,” a lo ti bawk a.

⁴Aw kan Pathian, min lo ngaithla teh, hmuhsitin kan awm a nih hi; min sawi chhiatna hi anmahni lu chungah thlentîr la, ram dang daihah salah tântîr vê ang che!

⁵An khawlohna hi khuhbo suh la, kulh siam țătute hmâah an cho thinur êm che avâng hian, an sualnate hi i hmâah țăi bo suh ang che,” ka ti a.

⁶Tichuan, kulh chu kan siam a, mipuite chuan an hnâ chu an lâk ngawrh êm avângin, bang zawng zawng chu a sânzâwng zâtve in kan zawn chhuak thei ta mai a.

⁷Sanbalata te, Tobia te, Arab-hote, Ammon hote leh Ashdod hote chuan Jerusalem kulh kan din chakzia leh a chhe lai kan hnawh khah sâwtzia an lo hriat chuan an thinrim êm êm a,

⁸an vâiin Jerusalemah lo kala, mi rawn beiha, mi chawhbuai tumin an inthural a.

⁹Nimahsela, keini chu kan Pathian hnênah kan țăwngțai a, anni lakah chuan achhûn azânin vêngtute kan insiam a.

¹⁰Juda-ho chuan, “Thawktute an châu zo dâwn ta, hnâwmhnawk then tûr a tam êm avângin kulh siam hnân a tawrh

phah ta hial mai,” an ti a.

¹¹Kan hmêlmâte chuan, “An zîngah han lût ila, anmahni kan that ang a, an hnâ kan tihțawpsak hmâ loh chuan engmah an hre lo vang a, min hmu hek lo vang,” an ti a.

¹²Tichuan, an kiang hnâia chêng Judate an lo kal a, “Khawi hmun ațang pawhin min rawn bei thei reng a ni,” tih ță vawi sâwm lai min hrilh a.

¹³Tichuan, hmun ualau deuh, kulh hniam lai phênah te chuan țănhmun khuarin mite ka dah zêl a; an khandaih te, an fei te leh an thal ngulte nên a chî chîin ka dah hlawn a.

¹⁴Ka han hawi vêl a, ka tho va, milian te, puipate leh mipuite hnênah, “Anni chu hlâu rêng rêng suh u. Lalpa ropuizia leh țăhbaiawm zia hi hre reng zâwk ula, in unaute, in fapate, in fanute, in nupuite leh in chhûngkaw tân in bei dâwn nia,” ka ti a.

¹⁵Pathianin an thiltih tum chu a tihthlawnsak a, kan hmêlmâte pawhin an thiltih tum kan lo hria tih an hre bawk a; tichuan kan zain kulh lama mahni hnathawhna hmunah chuan kan kîr leh ta a.

¹⁶Chuta chin chu, ka mite zînga a zatvein hna an thawk a, a zâtve dang chu fei te, phâw te, thal ngul te kengin an inrâlthum a; puipate chuan Juda chhûngkuate chu an lo thlâwp țăt a.

¹⁷Kulh siamtute, bungraw thiartute pawhin kut khing khatin hnâ an thawk a, kut khingkhatin hriamhrei an keng a.

¹⁸Insatute chuan hnâ an thawh pahin khandaih an pai țeuh va. Tâwtawrâwt hâmtu pawh ka bulah a awm chawt a.

¹⁹Milian hote, rorêltute leh mipuite hnênah chuan, “Kan hnathawh tûr hi a la tamin a la thui hlê mai a, kan thawhna lai kulh bange hi a inhlat hlawn si a.

²⁰Chuvângin tâwtawrâwt rî in hriatna apiangah lo kal khâwm ula. Kan Pathian chuan min dosak mai dâwn a ni,” ka ti a.

²¹Tichuan, hnâ chu rim takin kan thawk a, mipa zînga a zâtvein khawvâr ațanga arsi lan thlengin fei an keng reng a.

²²Chutih lai chuan mipuite hnênah, “Mi tin mahni chhiahhlawhte nên Jerusalemah riak vek rawh se, tichuan zân lamah vêngtu an ni ang a, chhûn lamah thawktu ni bawk rawh se,” ka ti a.

²³Tichuan, kei leh ka unaute, min vêngtu ka chhiahhlawhte rêng rêng pawhin, an inbual dâwnah chauh lo chuan, kan thawmhnâw pawh kan inhliip hman lo rêng rêng a ni.

BUNG 5

NEHEMIAN RETHEITE A ȚÂNPUI

¹Juda unaute chungah chuan mipuite leh an nupuite chu an phun ta nuaih nuaih a.

²Mi ținekhat chuan, “Keiniho hi, kan fapate leh kan fanute nên kan țăhnhem si a; rilțâma kan thih loh nân, ei tûr kan duh a ni,” an ti a.

³Mi ținekhat chuan, “Kan țăm si a, buh lei nân kan ram te, kan grêp huan leh kan inte kan dahkham hial a ni,” an ti bawk a.

⁴Țhenkhat leh chuan, “Lal chhiah pêk tûr sum kan pûk a, kan ram leh kan grêp huan te kan dahkham ringawt mai.

⁵Kan tisa chu kan unaute tisa ang, kan fate pawh an fate ang bawh an ni si a; kan fapate leh kan fanute chu bawihah kan hnûklût a ni ber a, kan fanu thenkhatte phei chu salah an tâng dêr tawh a ni. Kan ramte leh kan grêp huante chu mi kutah a awm tawh avângin, chhan chhuak thei dinhmunah kan dîng tawh lo,” an ti a.

⁶Chûng mangang au âw ka lo hriat chuan ka thinur êm êm a.

⁷Ngunthlûk taka ka ngaihtuah hnûah, miliante leh rorêltute chu ka zilh hrep a, “In chipuite lakah a pung ûmin sum in lo pûktîr vek a lo nih hi,” ka ti a. An chungchâng thû ngaihtuah tûrin mipui ka kokhâwm a.

⁸An hnênah, “Kan chipui Juda unau, hnam dangte hnêna hralh tawh tlan nân keini chuan theihtâwp kan chhuah a. Nangni hian in unaute in hralh anga mâw? Anih loh leh, keini hi min leitîr dâwn em ni?” ka ti a. Mi chhân ngaihna hre lovin an ngâwi reng a.

⁹Tihian ka ti zui a, “In thiltih dân hi a tha lo tawp mai. Kan hmêlmâ hnam dangten min sawi chhiat mêk lai hian, kan Pathian hi in tîh dêk tûr a ni lo vem ni?”

¹⁰Kei leh ka unau leh ka thuihruaite pawhin sum leh buh te chu kan lo pûktîr vê tho asin. A pung ûma pûktîr hi zawng, i bânsan teh ang u!

¹¹An ram te, an grêp huan te, an olive huan te, an in te bâkah, an pawisa leh an buh te, an uain thar leh hriak hmun zâa thena hmun khat in lo lâk tawhte nêk khân, wawiinah ngei hian pe kîr leh vek rawh u,” ka ti a.

¹²Anni chuan, “Kan pekîr leh vek ang a, an lakah engmah kan phût lo vang; i sawi ang takin kan ti ang,” an ti ta a. Tichuan, puithiamte chu ka ko va, an thutiam ang ngeia ti tûrin chhia ka chhamtîr a.

¹³Ka puan ven chu ka thing thla a, “Hetiang bawh hian hê thutiam hlen duh lo chu Pathianin a in aţangin a thil neih zawng zawng thin thlâksak vek sela. Engmah nei lovin thing ruak vek rawh se,” ka ti a. Mipui pungkhâwmho zawng zawng chuan, “Amen!” an ti dual dual a, LALPA an fak a. Mipuite chuan chu thutiam ang chuan an ti ta a.

NEHEMIA THILPHALZIA

¹⁴Judai rama governor ni tûra ruat ka nih aţang khân, Lal Artazerzia lal kum 20 aţanga a lal kum 32-na, kum 12 chhûng zawng khân, kei leh ka unauten ram awptu hlauh la lovin kan awm ngar ngar a ni.

¹⁵Ka hmâa governor hote chuan mite tân phurrit an lo siamsak thîn a, chhang leh uain te bâkah silvar tangka sekel 40 an lo chawitîr thîn a ni. An thuihruaite pawh mipuite tân phurrit an tling a, kei erawh chuan Pathian ka tîh avângin chutiang chuan ka ti ve lo.

¹⁶Hê kulh siam that hnâah hian ka bûr ngar ngar a, ram pawh kan lei vê hman lo. Ka thuihruaiho zawng zawngte pawhin hê hnâ ringawt hi an buaipui vek a ni.

¹⁷Châw min kîlpui rengtu Judate leh rorêltu mi 150 bâkah, kan chhehvêl hnamte aţangin engemaw zâtin min bawr vê reng bawh a.

¹⁸Ni tina khawsak rêl nân bawngpa pakhat leh berâm duhthlan thiau paruk talh a ni thîn a. Âr te pawh min buatsaih sak thîn a, ni sâwm danah uain chi hrang hrang tam tâwk nêk. Heti chung hian, mipuite tân phur a rih dâwn êm avângin governor chanvo ang hi ka phût vê ngai lo.

¹⁹Ka Pathian, hê hnam tâna ka thiltih zawng zawng avâng hian, a tha zâwngin min hre reng ang che.

BUNG 6

NEHEMIA AN PHIAR

¹Sanbalata te, Tobia te, Arab mi Gesema te leh kan hmêlmâ zawng zawngin kulh ka dîn zo ta tih an lo hriata, pawp lai zeuh pawh a awm tawh lo tih an lo hriat chuan (khatih lai khân kawngkâah te khân kawngkhâr ka la vuah lo va),

²Sanbalata leh Gesema te chuan lehkha min thawn a, “Lo kal la, Ono phai khuaah inhmukhâwm ang u hmiang,” an ti a. Mahse mi tihchhiat tum lek an ni si a.

³An hnênah mi ka tîr a, “Hna ropui tak ka thawh a, ka lo chhuk thei lo. Engah nge hna kal lai tichâwl khawpa nangni hnêna ka lo chhuk tehlul ang?” ka ti a.

⁴Chutiang thû hlîr chu wawi lî min thawn a, kei pawhin a ngai hlîrin ka chhâng bawh a.

⁵Sanbalata chuan a hmâ ang bawkin a wawi ngâna atân a chhiahhlawh kutah lehkha châr loh a rawn kentîr leh a.

⁶Heti hian a ziaa: Hnam tina mite leh Gesema hnên aţangin, nang leh Judaten hel in tum tih thû ka lo dawng a; chûng titi aţang chuan, an lal nih tumin kulh pawh i dîn tha leh ta a ni.

⁷Zâwneite pawh ruatin, “Judai ramah lal a awm e!” tiin Jerusalemah nangma chungchâng i vawrh darh chiam bawh a. Hêng thûte hi lal hnêna thlen ngei tûr a ni a. Chuvângin lo kal la, i lo inrâwn dîn teh ang,” tiin.

⁸Kei chuan a hnênah, “I sawi ang thil eng mah a awm lo ve, i rilrûa i phuachawp mai a nih chu,” ka ti a.

⁹“An thahrui kan chhahsak chuan, an hnathawh an puitlin thei dâwn lo nia,” tiin mi tihthaih dân an zawng lek a lo ni si a.” Chuvângin âw Pathian, ka kut hi min tihchak sak ang che.

¹⁰Chumi hnûah chuan Mehetabela fapa, Delaia fapa Semaia inah ka kal a, ani chu a rûka thu hrilhtu a ni a; ani chuan, “Pathian inah inhmû ang hmiang, tempul chhungah, nangmah thah tum an lo kal dâwn avângin tempul kawngkhârte kan khâr vek dâwn nia; zânah that tûr chein rawn kal an tum a ni,” a lo ti a.

¹¹“Kei ang mi hi tlânchhe mai tûr emaw ka nih le? In humhim nân tempul chhûnga tlân lût duhin mi ngai em ni? Ka lût awzâwng lo vang!” ka ti a.

¹²Pathian tîr a lo ni hauh lo tih ka man chhuak a, Tobia leh Sanballatan an lo ruai a, chuvângin keima chungchâng thû a lo puang vêl mai mai hi a lo ni a.

¹³Hlauthâwng deuhva mi siam a, an duh dân anga awma thil mi tihsualtîr a, tha lo deuhva mi sawichhiatna remchâng zawng tûrin an tham hi a lo ni a.

¹⁴Ka Pathian, Tobia leh Sanbalata te hi an thiltih ang tak hian hre reng la, zâwlneinu Noadii leh zâwlnei dang, mi tihthai tumtu dang zawngte nêh hian.

KULH AN SIAM ZO

¹⁵Tichuan, kulh chu ni 52 chhûngin, Elul thla, ni 25 niin zawh fel a ni ta a.

¹⁶Kan hmêlmâ zawng zawngten an lo hriata, kan vêla hnam tinten hêng thil hi an lo hmuh tâkah chuan, an zâmin an meng khup ta a; hê hnâ hi kan Pathian tih a ni tih an hre kar mai si a.

¹⁷Chûng lai chuan Juda milianten Tobia hnênah lehkhâ tam tak an thawn a, Tobia lehkhate pawh an lo dawng bawh a.

¹⁸Ani chu Ara fapa Sekania mâkpa a nih avângin Juda mi tam takin an thlâwp a; a fapa Jehohanana chuan Berekia fapa Mesulama fanu chu nupuih a lo nei si a.

¹⁹A thiltih thâte chu ka hnênah an rawn sawi fo va, ka thusawite pawh a hnênah an thlen bawh a. Tobia chuan mi tihzâm tumin lehkhâ a rawn thawn thîn a ni.

BUNG 7

¹Kulh chu sak zawh a niha, a kawng khâr te ka vuaha, kawngkhâr vêngtute, zâipâwl te leh Levi hote tih tûr ka ruat fel hnûah chuan,

²Jerusalem awp tûrin ka unaupa Hanania ka ruat a, Hanania chu mi rinawm leh mi tam tak aia Pathian tihmi a nih avângâ kulhbîng lam hotu atâna ruat ka ni a.

³An hnênah, “Jerusalem kulh kawngkhârte hi ni a tlângsân hmâ chuan hawn loh tûr a ni a; vêngtu an la awm lai ngeia khâra, a kawngkhâr chu kalh thîn tûr a ni a; a vêngtu atân Jerusalema awmte ruat ni sela, pakhatin râlvênna hmunah, mi dangin mahni kawtkâi vêng theuh rawh se,” ka ti a.

SALTÂNG JERUSALEMA LO KÎR LEHTE

⁴Khawpui chu a lianin a zâu hle a, michêngte erawh chu an tlêm a, in te pawh sak loh a la ni hlawn a.

⁵Tichuan, ka Pathianin milian hote, rorêltute leh mipuite chu an thlahtute hming ziaq chhuak tûrin ka thinlungah min hriattîr a. A lo kîr hmasa hote hming ziahna pawh ka hmu a, hetiang hian a inziak a:

⁶Hêngte hi saltâng chhuak lo kîr lehte an ni, Babulon lal Nebukadnezzara khân Babulon-ah a hruai a, mi tin mahni khaw lama hâu tûrin Jerusalem leh Judai ramah an lo kîr leh ta a ni.

⁷Zerubbabala ruala lo kîr lehte chu, Jesua te, Nehemia te, Seraia te, Reelaia te, Mordekaia te, Bilsana te, Mispara te, Bigvaia te, Nehuma te leh Baana te an ni. Israel mi patling zât chu:

⁸Parosa thlahte, 2,172;

⁹Sephatia thlahte, 372;

¹⁰Ara thlahte, 652;

¹¹Jesua leh Joaba thlaha mi PahathMoab mite, 2,818;

¹²Elam thlahte, 1,254;

¹³Zattua thlahte, 845;

¹⁴Zakkaia thlahte, 760;

¹⁵Binnua thlahte, 648;

¹⁶Bebaia thlahte, 628;

¹⁷Azgada thlahte, 2,322;

¹⁸Adonikama thlahte, 667;

¹⁹Bigvaia thlahte, 2,067;

²⁰Adina thlahte, 655;

²¹Hezekia mi Atera thlah, 98;

²²Hasuma thlahte, 328;

²³Bezaia thlah, 324;

²⁴Haripha thlahte, 112;

²⁵Gibeona thlahte, 95;

²⁶Bethlehem mite leh Neptopha, 188;

²⁷Anathoth mite, 128;

²⁸Beth Azmaveth mite, 42;

²⁹Kirjath Jearim, Kephira leh Beeroth mite, 743;

³⁰Rama leh Geba mite, 621;

³¹Mikmas mite, 122;

³²Bethel leh Ai mite, 123;

³³Nebo pakhat zâwka mite, 52;

³⁴Elam mi dang zâwka thlahte, 1,254;

³⁵Harima thlahte, 320;

³⁶Jerikoa fapate, 345;

³⁷Loda, Hadida leh Onoa fapate, 721;

³⁸Senaa thlahte, 3,930.

³⁹Puithiamte: Jesua chhûngkuua Jedaia thlahte, 973;

⁴⁰Immera thlahte, 1,052;

⁴¹Pashura thlahte, 1,247;

⁴²Harima thlahte, 1,017.

⁴³Levia chîte: Jesua, Kadmiela leh Hodeva thlahte, 74;

⁴⁴Zâimite: Asapha thlahte, 148.

⁴⁵Kawngkhâr vêngtute: Salluma thlahte, Atera thlahte, Talmona thlahte, Akkuba thlahte, Hatita thlahte, Sobaia thlahte, 138.

⁴⁶Nethin-hote: Ziha thlahte, Hasupha thlahte, Tabbaotha thlahte,

⁴⁷Keroa thlahte, Sia thlahte, Padona thlahte,

⁴⁸Lebana thlahte, Hagaba thlahte, Salmaia thlahte,

⁴⁹Hanana thlahte, Giddela thlahte, Gahara thlahte,

⁵⁰Reaia thlahte, Rezina thlahte, Nekoda thlahte,

⁵¹Gazzama thlahte, Uzza thlahte, Pasea thlahte,

⁵²Besaia thlahte, Meunima thlahte, Nephishesima thlahte,

⁵³Bakbuka thlahte, Hakupha thlahte, Harhura thlahte,

⁵⁴Bazlitha thlahte, Mehida thlahte, Harsa thlahte,

⁵⁵Barkosa thlahte, Sisera thlahte, Tama thlahte,

⁵⁶Nezia thlahte leh Hatipha thlahte.

⁵⁷Solomona chhiahhlawh thlahte: Sotaia thlahte, Sopheretha thlahte, Perida thlahte,

⁵⁸Jaala thlahte, Darkona thlahte, Giddela thlahte,

⁵⁹Sephatia thlahte, Hattila thlahte, Zebaim mi Pokeretha thlahte leh, Amona thlahte.

⁶⁰Nethin-ho zawng zawng leh Solomona chhiahhlawh thlahte chu 392 an ni.

⁶¹Hêng mite hi Tel Mela te, Tel Harsa te, Kerub te, Addon leh Immer aṅga lo chho te an ni a; mahse Israel mi an nihna tifiath tûrin an chhûngkua leh an thlahtu bul an chhui thei lo:

⁶²Delaia thlahte, Tobia thlahte, Nekoda thlahte, 642;

⁶³puithiamte: Habaia thlahte, Koza thlahte, Barzillaia thlahte, Gilead mi Barzillaia fanu zînga a nupui neih hming a chhawm ngâl a.

⁶⁴Hêng mite hian thlahtu hming ziaaknaa tel vê an dîl a, mahse an hming an hmu zo vê lo va; chuvângin intibawrhâng tân ngaiin, puithiam pawm an ni ta lo.

⁶⁵Ram awptu chuan Urim leh Thummim hmang thei puithiam awm hmâ chu thil serh thianghlime chu an ei a khap tlat a.

⁶⁶Mipui pung khâwmho zawng zawng chu 42,360 an ni a,

⁶⁷an chhiahhlawh hmeichhia leh mipa 7337 te chu an chhiar tel vê lo; zaipâwl hmeichhia leh mipa 245 an nei bawk.

⁶⁸An sakawr chu 736 a ni a, an sabengtung chu 245 a ni a,

⁶⁹an sanghâwngsei chu 435, an sabengtung 6,720 a ni.

⁷⁰Jerusalema LALPA in an va thlen chuan chhûngkaw puipa thenkhatte chuan chû hnâ atân chuan thawhlâwm an thawh a. Governor chuan sum bâwmah rangkachak drakma 1,000, chawhtawlh 50 leh, puithiam thawmhnaw 500 a pe a. ⁷¹Chhûngkaw puipa thenkhat chuan hnathawhna atâna sum bâwma an pêk luh chu, rangkachak drakma 20,000 leh, silvâr mina 2,200 a ni.

⁷²Mi dang zawngin an pêk khâwm chu, rangkachak drakma 20,000, silvar mina 2,000 leh, puithiam thuam 67 a ni.

⁷³Tichuan, puithiamte, Levia chîte, kawngkhâr vêngtute, zâimite, mi thenkhatte, Nethin-hote leh, Israel mi zawng zawng chuan khuate chu an luah ta a. Thla sarihna a lo thlen chuan, Israel fate chuan anmahni awmna khua an luah fel hman vek a.

BUNG 8

EZRAN DÂN BÛ A CHHIAR

¹Mipuite chu Tuikhur Kawngka bula tual zâwl zâu laiah chuan inthural takin an awm khâwm vek a; LALPAN Israelte thû a pêk angin, Dân-hremi Ezra chu Mosia Dân Bûrawn la chhuak tûrin an ti a.

²Tichuan, thla sarihna ni khat ni chuan, puithiam Ezra chuan a hre thiam thei tûr hmeichhia leh mipa pungkhâwm hmâah chuan Dân bu chu arawn la chhuak a.

³Tui Kawngka zâwn hmun zâu laiah chuan, a hre thiam thei tûr hmeichhia leh mipate hmâah chuan, zîng aṅga chhûn lai thlengin a chhiar a; mi zawng zawngin Dân Bû chu ngun takin an ngaihla ṭhuap a.

⁴Chuta tâna thingphela dawhsân an siamah chuan, dân hremi Ezra chu a ding a; a sîr ding lamah chuan Matithia te, Sema te, Anaia te, Urija te, Hilkia te, Maaseia te an ding a; a vei lamah Pedaia te, Misaela te, Malkija te, Hasuma te, Hasbadana te, Zekaria te, Mesullama te an ding a.

⁵Ezra chu mi dangte aia sângah a ding a, mi zawng zawng hmuh theihin Ezra chuan lehkhabu zial chu a phelh a; a phelh lai chuan mi zawng zawng an ding ṭhup a.

⁶Ezra chuan LALPA Pathian ropui chu a fak a. Mi zawng zawng chuan an bân pharin, “Amen, Amen!” tiin an lo chhâwn dual dual a. An kûn a, hmâia lei sîin LALPA chu chibai an bûk a.

⁷Mipui chu an hmun ngaiah an ding leh a; Jesua te, Bania te, Serebia te, Jamina te, Akkuba te, Sabbethaia te, Hodija te, Maaseia te, Kelita te, Azaria te, Jozabada te, Hanana te, Pelaia te leh Levia-hote chuan mipuite hnênah Dân thû chu an hrilhfiah zêl a.

⁸Tichuan, Pathian Dân bu chu fiah takin an chhiar a; an hriatthiam nân a awmzia an hrilhfiah zêl a.

⁹Ram awptu Nehemia te, puithiam leh dân hremi Ezra te leh mipuite zirtirtu Levia-hote chuan mipuite hnênah, “Vawiin hi LALPA in Pathian tân ni thianghlime a ni a; lungngai suh ula, ṭah pawh ṭap hek suh u,” tiin an fuih a. Dân thû an han hriat khân mipui zawng zawng chu an ṭap chuah chuah mai si a.

¹⁰Ani chuan an hnênah, “Tihian hâw tawh ula, a thâu thâ thâ te eiin, a thlum thlum in ula, ei tûr nei ve lote chanpual tûr pe vê rawh u; wawiin hi kan LALPA tân ni thianghlime a ni a. Lungngaih tûr a ni lo ve, LALPA chungâ lâwm taka awm hi in chakna a ni si a,” a ti a.

¹¹Tichuan, Levia-hote chuan, “Vawiin hi ni thianghlime a ni a, ngâwi hlê hlê tawh rawh u; lungngaih tûr a ni lo ve,” tiin mipui ṭap chu an thlêm a, an ngawi thei ta a.

¹²Mipui zawng zawng chuan, an hnêna thupuan tâkte chu hre thiamin, duh tâwka eia in tûr leh, mi dangte pawh sem vê tûrin, hlim takin an ṭin darh ta a.

BÂWKTE KÛT

¹³A ni hnih ni chuan hnam tin chhûngkaw puipate chu puithiamte leh Levia chite nên dân hremi Ezra hnênah, Dân thû zir Chiang tûrin an kal khâwm a.

¹⁴Chutah chuan, thla sarihna kût chhûngin Israel fate chu chhâwlbûkah an awm tûr a ni, tia LALPAN Mosia hnêna thû a pêk, Dân bûa chuang an hmu chhuak a,

¹⁵chutah chuan, “Tlângah te kal ula, olive zâr te, hriak nei kung zâr te, lenhmuî zâr te, tûmkau te, hnahchhâwl te chu chhâwlbûk sak nân va la rawh u, tih ziaak a ni,” tiin, khaw tinah leh Jerusalemah an puang darh tûr a ni a.

¹⁶Tichuan, mite chu an kal chhuak a, an va lâ a, an chhâwlbûk siam chung khuh nân te an hmang a, anmahni inchung zâwlah te, Pathian in tual zâwlah te, Tui Kawngka bul leh Ephraim Kawngka

bul zâwl zâu laiah te chuan chhâwlbûk an siam ta hlawm a.

¹⁷Chutichuan, saltâng kîr lehho zawng zawng chuan chhâwlbûk an sâ a, chhâwlbûk hnuaiah chuan an awm vek a; Nuna fapa Josua hun ațanga chutih hun thleng chuan Israel faten an lo hmang ngai tawh lo kha a ni a. An phûr bawk a, hlim pui a lo thleng ta a ni.

¹⁸A țantîrh ni ațanga a tâwp ni thlengin Pathian Dân Bûa mi chu ni tin a chhiar țin a. Kût chuan ni sarîh chhûng a awh a; a ni riat nî chuan, dân ang takin inkhawmpui urhsûn an hmang a.

BUNG 9

MIPUITEN AN SUAL AN PUANG

¹Chumi thla, ni 24 nî chuan Israel fate chu saiip puan sinin, an lûah vaivut phulin an lo pungkhwam a.

²Israela thlahte chu ram dang mite lakah an intihrang tawh a; anmahni sualna leh an thlahtute sualnate puangin an dîng țin a.

³Chumi ni chanve zahvê chu LALPA an Pathian Dân Bu chhiarin anmahni hmun țeuhvah an dîng reng a; ni chanve zahve dang chu an sual puan nân leh LALPA an Pathian chibai bûk nân an hmang a.

⁴Levia-ho dawhsânah chuan Jesua te, Bania te, Kadmiela te, Sebania te, Bunnia te, Serebia te, Bania te leh Kenania te chu an dîng a, LALPA an Pathian hnênah chuan ring takin an âu va.

⁵Levia mi Jesua te, Kadmiela te, Bania te, Hasabnia te, Serebia te, Hodija te, Sebania te leh Pethahia te chuan: “Dîng ula, LALPA in Pathian chu fak rawh u, Chatuan chatuanin! I hming ropui chu fakin awm rawh se, Fakna leh chawimâwina chung daiha mi chu!”

⁶Nang chauh hi LALPA chu i ni a; Vân te i siam a, Vânte vân leh a chhûnga awm zawng zawngte nê, Lei leh a chhûnga awm zawng zawng, Tuipui leh a chhûnga awm zawng zawngte nê, Vâna awm zawngten chibai an bûk che.

⁷Nang chu LALPA Pathian, Abrahama thlangtu, Kaldai rama Ur ata hruai chhuakin, A hmingah Abrahama i lo sa a;

⁸I hmâah rinawmna thinlung nein, Amah chu thû i thlunpui a, Hêng Kanaan ram te, Hit-ho ram te, Amor-hote, Periz-ho te, Jebus-ho te, Girgas-ho ram te nê— A thlahte rochuntîr tûrin. I thû chu i hlen ta a, Nang chu mi dîk i ni si a.

⁹Aiguptaa kan thlahtute hrehawmzia i hmû a, Tuipui Sen kama an âu âw te i hria a.

¹⁰Pharoa dovin chhinchhiahna leh thil mak i entîr a, A chhiahhlawh zawng zawngte nê, A ram chhûnga mipui zawng zawngte nê. An lakah chapo taka an tih ținzia i hria a. Tichuan, i hming i chher ta a, tûn ang hian.

¹¹An hmâah tuipui chu i kaițhen a, Leichârah tuipui chu an kal kâi a; Anni tiduhdahtute chu tuipuih i paih a, Tui thûk taka lungtum thlâk ang vang vang hian.

¹²Chhûnah chhûm dîngin i hruai a, Zânah meialh dîngin, An zinna kawng ên tûrin i hruai țin a.

¹³Sinai Tlângah khân i lo chhuk a, Vân ațangin i rawn bia a, Thuruatna dîk leh dân dikte, Dân ținê leh thupêkte i pê a.

¹⁴I Sabbath thianghlim i hriattir a, Dân thûte, thuruatte leh thupêkte i chhiahhlawh Mosia kutah i pê a.

¹⁵An rilțamin vân ațangin chaw i pê a, An tuihâlin lungpui ata tui i pê a, An hnênah chhechhama i tiam Ram chu luah tûrin i hrilh a.

¹⁶Anni leh kan thlahtute khân chapo takin, An ring an lo tikhawng a, I thupêkte an pawisa bawk si lo.

¹⁷I thû an âwih lo va, An zînga i thil mak tihte kha An ngaihsak duh hek lo. An hel tlat a, an ring an tikhawng lui a, Bâwiha lût leh tûr lekin Hotute an insiam chawp a. Mahse nang chu, ngaidam tûra inpeih, Khawngaihna leh lainatna ngah, thinnel, Ngilneihnaa khat Pathian i ni a, Anmahni i hawisan ve si lo va.

¹⁸Bâwng no lim an chhûng chawp a, ‘Hei hi a ni e Aigupta ațanga Mîn Hruai chhuaktu pathian chu,’ tiin, Huatthlala taka an tih lai khân,

¹⁹I zahngaihna nasa tak avângin Thlalêrah khân i hawisan lo va. An kalna kawnga hruai tûrin Chhûnah chhûm dîngin a kalsan lo va; Zânah an kalna kawng ên tûrin Mei dîngin a kalsan hek lo.

²⁰I Thlarau țin takin zirtîrna i pe țin a, Mannaa i chawmna i tikîr hek lo, An tuihâlin tui i pe zêl zâwk a.

²¹Thalêrah kum sawmlî i enkawl a; Tlâkchham rêng an nei lo; An thawmhnâw a chul thei lo va, An kê pawh a vûng hek lo.

²²Lalram leh hnamte i pe bawk a, Bialah i țin hrang a. Sihona ram an lâksak a, Hesbon lalram te, Basan lal Oga lalram te nê.

²³An thlahte chu vâna arsi anga tamin i tipung a, An thlahtute hnêna i lo pêk Ram chu luah tûrin i hruai lût ta a.

²⁴Mipuite chu an lût a Ram chu an luah ta a; A ram mite i hnehsak a, Kanaan-hote chu, An ram te, an lal te, an mite chu An duh duha an tih atân, An kutah i pê a.

²⁵Khawpui nghet takte leh ram hausa takte an lâ a, Thil țin khat in te an neihsak a, Tuikhur laih sa, grêp huan, olive huan, Thei kung tinrênga khat an neihsak a. Duh tâwka eiin an puar a, an lo thâu ta a, I ținatna zâr zovin nuam an chên a.

²⁶‘Nimahsela, thû an âwih lo va i lakah an hel a, I dânte chu an hnuchhawn a i lam hawitîr tuma hrilhtu i zâwlneite an lo that a, Huatthlala takin thil an ti țin a.

²⁷Chuvângin, an hmêlmate kutah i pê a, Anmahni hnuaichhiahtute hnênah chuan; An mangan vêleh an âu che a, Vân ațangin i lo ngaithlâ a; I zahngaihna nasatzia ang zêlin An hmêlmate kut ațangin Chhanchhuaktu i pe leh țin a.

²⁸‘Nimahsela, râlmuaanga an han awm hlekin, I hmâah thil sual an ti lehngâl mai a. An hmêlmate kutah bawk i pe leh țin a, An thuhnuaiah an awm leh a; Mahse inlamlêta an auh che chuan, Vân ațangin i lo ngaithla a; I zahngaihna ang zêlin i chhan chhuak leh țin.

²⁹I dân hnuaia awm tûrin i zilh țin a. Mahse an chapo êm a, I thupêkte chu an pawisa duh lo va, I rorêlna kalhin thil sual an ti a, ‘Miin a awm chuan, a nunpui tûr a ni’ tih thûte chu, An hnuchhawnsan a, an ring tikhawngin, An ngaithla duh lo va.

³⁰Kum tam tak i lo dawhthei a, I zâwlneite hmangin i Thlarauvin i zilh țin a. Mahse an ngaithla duh chuang lo; Chuvângin, a ram mite kutah i pe ta a.

³¹Chuti chung chuan, i zahngaihna nasa tak avângin I tiboral vek lo va, i hawisan hek lo; Khawngaih leh zahngaithei Pathian i ni si a.

³²“Chuvângin kan Pathian, Pathian ropui, thiltitheh leh tîhbâiawm, Thuthlung hlena khawngaihna lantîrtu: Kan chung manganna lo thleng zawng zawng, kan lalte leh kan miliante, Kan puithiamte leh kan zâwlneite, Kan pipute leh mipui zawng zawng chung lo thleng te hi, Assuria lalte lal lai ațanga tun thleng hian, Min ngaihnêpsak suh ang che.

³³Nang chu kan chung thil thleng tinrêngah i dik a; Rinawm takin i ti si a, Keini chuan suaksual takin kan ti tîhn a.

³⁴Kan lalte, kan miliante, Kan puithiamte, kan pi leh puten I dân an zawm duh lo va, I thupêkte leh i thuhriattîrte, Anmahni i zilhna thûte an pawisa hek lo.

³⁵An chungah tătatna i vûr nasat vei nêh, An lalna ramah i rawng an bâwl chuang lo va; Ram zâu leh t̃ha tak i pêkah chuan an khawsa a, Mahse an suahsualna thiltih an sim duh chuang lo.

³⁶“Vawinah hian bâwih mai kan ni ta! Min thlahtute hnêna ram i pêkah hian, A rahte eia tlan mai tûr kan nih laiin, Chhiahhlawh mai kan nih tāk hi!

³⁷Kan sual avânga kan chung lala i dahte tân rah tam tak a chhuah a; Keini erawh chu kan taksa leh kan ran chungah nawmsip an bâwl a; Kan mangang takzet a ni.

³⁸“Hêng zawng zawng avâng hian, Thuthlung nghet tak siamin kan ziaa a; Kan puipa, Levia-ho leh puithiamten an nemnghet ta a ni,” an ti a.

BUNG 10

THUTHLUNG NEMNGHETTUTE

¹Thuthlung chhinchhiaha nem nghettute chu: Governor Nehemia, Hakalia fapa leh Zedekia te, 1:1

²Seraia te, Azaria te, Jeremia te,

³Pashhura te, Amaria te, Malkija te,

⁴Hattusa te, Sebania te, Malluka te,

⁵Harima te, Meremotha te, Obadia te,

⁶Daniela te, Ginnethona te, Baruka te,

⁷Mesullama te, Abija te, Mijamina te,

⁸Maazia te, Bilgaia te leh Semaia te an ni. Hêngho hi puithiam an ni a.

⁹Levia-hote: Azania fapa Jesua te, Henadada fapa Binnua leh Kadmiela te.

¹⁰An unaute: Sebania te, Hodija te, Kelita te, Pelaia te, Hanana te,

¹¹Mika te, Rehoba te, Hasabia te,

¹²Zakura te, Serebia te, Sebania te,

¹³Hodija te, Bania leh Beninua te an ni.

¹⁴Mipui lam hotute: Parosa te, PahathMoaba te, Elama te, Zattua te, Bania te,

¹⁵Bunnia te, Azgada te, Bebaia te,

¹⁶Adonija te, Bigvaia te, Adina te,

¹⁷Atera te, Hezekia te, Azzura te,

¹⁸Hodija te, Hasuma te, Bezaia te,

¹⁹Haripha te, Anathotha te, Nebaia te,

²⁰Magpiasa te, Mesullama te, Hezira te,

²¹Mesezabela te, Zadoka te, Jaddua te,

²²Pelatia te, Hanana te, Anaia te,

²³Hosea te, Hanania te, Hasuba te,

²⁴Halohesa te, Pilha te, Sobeka te,

²⁵Rehuma te, Hasabna te, Maaseia te,

²⁶Ahija te, Hanana te, Anana te,

²⁷Malluka te, Harima te leh Baana te an ni.

AN NEMNGHEH THUTHLUNG CHU

²⁸Mi dang zawng zawng-puithiamte, Levia chîte, kawngkhâr vêngtute, zâimite, Nethin-mite leh, Pathian Dân zawm tûra chulai rama mite laka inthiarfihlîm t̃a te leh an nupui fanaute zînga thil chinchâng hrethiam chin zawng chuan-

²⁹an unaute leh an miliante chu thlâwpin, Pathian chhiahhlawh Mosia pêk Pathian Dân zui tlat tûr leh, LALPA kan Pathian thupêk te, a thuruatte leh a dân thûte zâwm zêl tûrin thû an thlung ta a:

³⁰Chû rama mite hnênah chuan kan fanute chu an nupuih kan pe lo vang a, an fanute pawh kan fapate tân kan nei hek lo vang;

³¹hê rama mite hian ei tûr buh leh bungrua eng pawh Sabbath niinrawn zuar se, Sabbath nî leh ni serh ni dangah rêng rêng kan leisak lo vang; kum sarih kumah kan rama thil rah kan seng lo vang a, leiba rêng rêng kan t̃hing bawh hek lo vang.

³²Kan Pathian in enkawl nân, kum tin sekel hmun thuma t̃hena hmun khat thawh tûrin thû kan intiam bawh a:

³³chhangserh atân te, buhbâl thilpêk atân te, Sabbath ni leh Thla Thar leh hunbi nei kût huna hâlral thilhlân atân te; thil thianghlîm atân te, Israelte tlan nâna sual thâwina atântê leh Pathian enkawl na hna tinrêng atâna hman tûr a ni.

³⁴Dân bûa ziaa angin, LALPA kan Pathian ina hâlral thilhlana hman tûr t̃hingtuah lakhâwm tûrin, thlahtu chhûngkua ang zêla kum tin a hunbi ruata tum tûrin, puithiamte leh Levia chîte leh mipuite zîngah t̃hum kan vâwr a.

³⁵Kum tinin, kan huanthlai thar hmasa te, theirah hmasâ te chu LALPA ina thlen hmasa zêl tûrin kan intiam bawh a;

³⁶kan fapa piang hmasa te leh kan bâwng rual leh berâm rual zînga piang hmasa berte chu, Dân bûa inziak angin, kan Pathian inarawn lâ a, kan Pathian ina rawngbâwltu puithiamte hnênarawn thlen zêl tûr te;

³⁷kan chhang hmeh hmasa te, kan thilhlân te, t̃hingrah tinrêng te, uain thar leh hriak tharte chu, kan Pathian ina dahkhâwmna pindana dah tûra puithiamte hnênarawn thlen zêl tûr te; Levia chîte hi khaw tina kan thlai thar ațanga sâwma pakhat dawng tûr an nih angin, Levia chîte hnênah hian sâwma pakhat kan pê ang.

³⁸Levi-hoten sâwma pakhat an dawn laiin Aarona thlah puithiamte chu Levi mite hnênah an lo awm ve tûr a ni a; Levi-hote chuan sâwma pakhat ațanga sâwma pakhat chu Pathian inah, a dahkhâwmna pindanah an dah lût ve bawk tûr a ni.

³⁹Israel fate leh Leviah thlahten buh te, uain thar leh hriak thilhlân te chu, hmun thianghlîm bungbêlthe, rawngbâwl lai puithiamte, kawngkhâr vêngtute, zâipâwlhote awmna pindanah an dah zêl tûr a ni; kan Pathian in hi kan thlahthlam tûr a ni lo, tiin dân kan siam a ni.

BUNG 11

JERUSALEMA CHÊNGTE

¹Mipui hotute chu Jerusalemah an chêng a; a bâk mipui zîng ațangin mi sâwma pakhat zêl chu khaw thianghlîm, Jerusalema awm tûrin thum vâwrin an inruat a, sâwm zînga pakua zêl chu khaw danga awm tûr an ni a.

²Mahni duhthûa Jerusalema awm tûra inpe zawng zawng chu mipuite chuan duhsakna an hlân a.

³Ram bial tin hotu Jerusalema awmte chu hêngte hi an ni. (Judai ram khuah te chuan Israel mi tin, puithiam te, Leviah chî te, Nethin-ho leh Solomona chhiahhlawh thlahte chu anmahni khuah an chêng theuh va.)

⁴Jerusalemah chuan Juda thlahte leh Benjamina thlahte an awm bawk a. Juda thlahte chu: Athaia, ani chu Uzziâ fapa, Zekaria fapa, Amaria fapa, Sephatia fapa, Mahalalela fapa, Perezâ fapa a ni a;

⁵Maaseia chu, Baruka fapa, KolHozeha fapa, Hazaia fapa, Adaia fapa, Joiariba fapa, Zekaria fapa, Silonia fapa a ni.

⁶Perezâ thlah, Jerusalema awm zawng zawng chu mi huaisen 468 an ni.

⁷Hêng hi Benjamina thlahte chu an ni: Sallua chu, Mesullama fapa, Joeda fapa, Pedaia fapa, Kolaia fapa, Maaseia fapa, Ithiela fapa, Jesaia fapa a ni;

⁸ani dawtah chuan Gabbaiâ leh Sallaia, mi 928 an ni.

⁹Zikria fapa Joela chu an hotu a ni a, Senua fapa Juda chu khawpui hotu ber dawttu a ni.

¹⁰Puithiamte zîngah: Joiariba fapa Jedaia leh Jakina an awm a;

¹¹Pathian in hotu ber chu Seraia a ni a, ani chu Hilkia fapa, Mesullama fapa, Zadoka fapa, Meraiotha fapa, Ahituba fapa a ni.

¹²An unau, ina hnathawktute chu mi 822 an ni a; Adaia chu Jerohama fapa, Pelalia fapa, Amzia fapa, Zekaria fapa, Pashura fapa, Malkia fapa a ni a,

¹³a unaute leh an chhûngkaw puipate nê 242 an ni; Amasaia chu Azarela fapa, Ahzaia fapa, Mesilemothâ fapa, Immerâ fapa a ni a,

¹⁴an unauvâh hian mi chak huaisen 128 an awm. An hotupa chu Zabdiela, mi ropuite zînga mi fapa a ni a.

¹⁵Levia mite zînga mi: Semaia chu Hassubâ fapa, Azkiramâ fapa, Hasabia fapa, Bunnia fapa a ni a;

¹⁶Sabbethaia leh Jozabada te chu Leviah mite zînga hotute an ni a, Pathian in pâwn lam hnâ enkawltu an ni;

¹⁷Tawngtaia lâwmthu sawi tantu Mattania chu Mika fapa, Zabdia fapa, Asaphâ fapa a ni; an unaute zînga a pahnihna Bakbukia te; Sammua fapa, Galala fapa, Jeduthuna fapa Abda te an ni.

¹⁸Khaw thianghlîm Leviah mi awm zawng zawng chu 284 an ni.

¹⁹Chu bâkah kawngkhâr vêngtu Akkuba te, Talmona te leh an unau kawngka vêngtute chu mi 172 an ni.

²⁰A bâk Israel mite, puithiamte leh Leviah mite chu Judai ram khaw tinah, anmahni in leh lova chêng an ni.

²¹Nethin-hote erawh chu Ophel-ah an awm a. Ziha leh Gispa te chu Nethin hotute an ni.

²²Jerusalema Leviah mite hotu chu Uzziâ, Bania fapa, Hasabia fapa, Mattania fapa, Mika fapa, Pathian ina zaia rawngbâwlta Asaphâ fapate zînga mi a ni.

²³Lal thupêkah chuan zaimite chu ni tina inthlak kual tûra tih an ni.

²⁴Pethania, Mesezabela fapa, Zera thlah, Juda fapa chu mipuite awp tûra lal aiawhtu a ni.

JERUSALEM PÂWNA MIPUITE CHÊNNA

²⁵An awmna khuah leh huan avângin Juda thlah mi thenkhat chuan Kirjath Arba leh a chhehvêl khuah te, Dibon leh a chhehvêl khuah te, Jekabzeel leh a chhehvêl khuah te chuan an awmchilh a;

²⁶Jesua, Molada leh Beth Peleth ah te,

²⁷Hazar Shual-ah te leh Beerseba leh a khawperah te nê;

²⁸Ziklag-ah te, Mekona-ah te leh a khawperah te;

²⁹En Rimmon-ah te, Zora-ah te, Jarmuth-ah te,

³⁰Zanoa-ah te, Adullam leh a khawperah te; Lakis-ah leh a ramah te; Azeka leh a khawper-ah te nê. Beerseba ațanga Hinnom Ruam thlengin an luah a.

³¹Benjamina thlahte pawh Geba ațangin Mikmas-ah te, Aija-ah te leh Bethel leh a khawperah te an awm a;

³²Anathoth leh Nob-ah te, Anania-ah te;

³³Hazor-ah te, Rama-ah te, Gittaimah te;

³⁴Hadid leh Zeboim-ah te, Neballatah te;

³⁵Lod-ah te, Ono-ah te leh Mi Themthiam-ho Ruamah te an awm a.

³⁶Judai rama Leviah-ho thenkhat chu Benjamin ramah an insem darh a.

BUNG 12

PUITHIAMTE LEH LEVIA-HOTE

¹Hêng puithiamte leh Leviah mite hi Sealtielâ fapa Zerubabela leh Jesua te ruala lo chho an ni: Seraia te, Jeremia te, Ezra te,

²Amaria te, Malluka te, Hattusa te,

³Sekania te, Rehuma te, Meremothâ te,

⁴Iddoa te, Ginethoia te, Abija te,

⁵Mijamina te, Maadia te, Bilga te,
⁶Semaia te, Joiariba te, Jedaia te,
⁷Sallua te, Amoka te, Hilkia te leh Jedaia te an ni. Jesua hunah hêng mite hi puithiamte leh an unaute zînga hotute chu an ni.
⁸Levia chite chu: Jesua te, Binnuia te, Kadmiela te, Serebia te, Juda te leh, lâwmthu sawi fakna hla hruaitu Mattania leh a unaute an ni.
⁹Bakbukia leh Unnia leh an unaute chu rawngbâwlin anmahni epin an ding a.
¹⁰Jesuan Jehoiakima a hring a, Jehoiakiman Eliasiba a hring a, Eliasiban Joiada a hring a,
¹¹Jehoiadan Jonathana a hring a, Jonathanan Jaddua a hring a.
¹²Jehoiakima hun laia puithiam te, an thlahtu puipate chu: Seraia te, Meraia te; Jeremia te, Hanania te;
¹³Ezra thlaha mi Mesullama; Amaria thlaha mi Jehohanana;
¹⁴Melikua thlaha mi Jonathana; Sebania thlaha mi Josepha;
¹⁵Harima thlaha mi Adna; Meraiotha thlaha mi Helkaia;
¹⁶Iddoa thlaha mi Zekaria; Ginnethona thlaha mi Mesullama;
¹⁷Abija thlaha mi Zikria; Minjamina fapa; Moadia thlaha mi Piltaia;
¹⁸Bilga thlaha mi Sammua; Semaia thlaha mi Jehonathana;
¹⁹Joiariba thlaha mi Mattenaia; Jedaia thlaha mi Uzzia;
²⁰Sallaia thlaha mi Kallaia; Amoka thlaha mi Ebera;
²¹Hilkia thlaha mi Hasabia; Jedaia thlaha mi Nethanela te an ni.
²²Persia lal Daria lal laia, Eliasiba te, Joiada te, Johanana te leh Jaddua te dam laiin, Levias chîte leh puithiamho chu an chhûngkaw puipate nêna chhinchhiah fel a ni.
²³Eliasiba fapa Johanana hun lai thleng khân, Levias thlah chhûngkaw puipate chu chanchin ziaakna bûah chhinchhiah an ni.
²⁴Levia-ho puipate chu Hasabia te, Serebia te, Kadmiela fapa Jesua te leh an unau, Pathian mi Davida remruat dân anga a pâwl pâwla inchhâwna fak leh lâwmthu sawitu tûrte nêan an ni.
²⁵Mattania te, Bakbukia te, Obadia te, Mesullama te, Talmona te leh Akkuba te chu kawngkhâr vêngtu an ni a, bungraw dahna kawngkhâr an vêng a.
²⁶Hêngho hi Joiakima, Jesua fapa, Jozadaka fapa dam laia mi, Nehemia governor a nih lai leh, dân hremi ni baw, puithiam Ezra hun laia mite an ni.

NEHEMIAN KULH A HLÂN

²⁷Jerusalem kulh an hlan dâwnah chuan dârbenthek te, perhkhuang leh tîngtangte nêan hlim taka zâia lâwm thû hlan tûrin, Levias mi zawng zawng chu an awmna hmun t̃heuh aţangin Jerusalema kal tûrin an kokhâwm a.
²⁸Zâimite leh an fapateho chu Jerusalem chhehvêl khua te leh Netophath-ho khuate aţangin an lo kal khâwm a;

²⁹Gilgal chhûngkua aţang te, Geba leh Asvameh ram aţang te nêan; zaimite chuan Jerusalem chheh vêlah te an chênna tûr khua an din a.

³⁰Tichuan, puithiamte leh Levias chîte chu anmahni an inthian thianghlim phawt a, chumi zawhah mipuite, kawngkâte leh kulh te chu an thian thianghlim ta a.

³¹Juda hruaitute chu kulh tlângah chuan ka hruai chho va, lâwmna hla rem tûrin zaipâwl pâwl lian tak pahni ka ruat a. Pâwl khat chu Bawhlhlawh Kawngka lamah, kulh ding lam chungah chuan an kal a.

³²Anni chu zuiin Hosaia leh Juda hruaituho zâtve te,

³³Azaria te, Ezra te, Mesullama te,

³⁴Juda, Benjamina, Semaia leh Jeremia te,

³⁵puithiam fapa t̃henkhatte chu tâwtawrâwt nêan—Zekaria, Jonathana fapa, Semaia fapa, Mattania fapa, Mikaia fapa, Zakkura fapa, Asapha fapa te,

³⁶a unau Semaia te, Azarela te, Milalaia te, Gilalaia te, Maaia te, Nethanela te, Juda te leh Hanania te chuan Pathian mi Davida rimâwi tum chî kengin an zui a. Dân hremi Ezra chuan an hmâ a hruai a.

³⁷Tuikhur Kawngkâ an thlenin, an hmazâwna Davida Khawpuia chhohna kâilâwnah an chho va, Davida in chhakah an kal a, chhak lama Tui Kawngkâ thlengin an kal a.

³⁸Lâwmna hla remtu pâwl dangte chu anniho ep zawngin an kal a, kei chu an hnungah, mipui zâtve nêan Meipui Chhehna Insâng kalpêlin, Kulh Zâu thlengin kan zui a,

³⁹Ephraim Kawngka chungah te, Kawngka Hlui chungah te, Sangha Kawngka chungah te, Hananela Vên Insâng chungah te, Hamea Vên Insang chungah te leh, Beram Kawngka thlengin; Tân In Kawngkâah chuan an ding ta a.

⁴⁰Tichuan, lâwmna hla remtu pâwl nhihte chu Pathian inah chuan an ding a, kei leh rorêltu zâtve te chu kan awm baw a;

⁴¹puithiam Eliakima te, Maaseia te, Minjamina te, Mikaia te, Elioenaia te, Zekaria te leh Hanania te chuan tâwtawrâwt an keng a;

⁴²Maaseia te, Semaia te, Eleazara te, Uzzia te, Jehohanana te, Malkija te, Elama te leh Ezera te nêan. Zâipâwlho chu an hruaitu Jezrahia hovin ring takin an zâi t̃hup t̃hup a.

⁴³Chumi ni chuan inthâwina ropui chu hlim takin an hlân a, Pathianin nasa taka a tihhlim avângin, hlim taktêin an hlim a; hmeichhiate leh naupangte pawh an hlim nasa a, Jerusalem hlim thâwm chu hla tak aţang pawhin a hriat theih a ni.

TEMPUL MAWHPHURHNATE

⁴⁴Chutih lai chuan thilpêk te, rah hmasate, sâwma pakhat te Dânin a sawi anga khaw tin thlawhhma aţanga puithiam leh Levias-ho chanvo tûr lakkhâwm dahna in enkawltu tûrte chu an ruat a; Judate chu rawngbâwltu puithiamte leh Levias chite chungah an lâwm tak meuh si a.

⁴⁵Zaipâwlte leh kawngkhâr vêngtute pawhin Pathian rawng bâwl dân leh inthen thianghlim dân, Davida leh a fapa Solomona te thupêk chu an zâwm a.

⁴⁶Davida leh Asapha te hun lai khân zâipâwl hotute, Pathian hnêna fakna leh lâwmna hla sa pâwl hotute an awm thîn a.

⁴⁷Zerubabela hun lai leh Nehemia hun lai chuan, Israel mi zawng zawngin zâipâwlte leh kawngkhâr vêngtute hnênah an ni tin tla tâwk chanvo an pe thîn. Levia-hote tân thil thianghlim an hlân thîn a, Levia-hote chuan Aarona thlahte tân an serh hrsank leh thîn.

BUNG 13

INTHIARFIHLÎM DÂN

¹Chumi ni chuan mipuite hriatah Mosia lehkhabu an chhiar a, chutah chuan Ammon mite emaw, Moab mite emaw rêng rêng chu Pathian mite inkhâwmnaah an tel vê ngai tûr a ni lo tih inziakna lai an hmu chhuak a,

²Israel fate kha chaw leh tui nêna lo hmuak lova, anmahni ânhhia lawh tûra Balaama an lo rawih vâng a ni a. Mahse, Pathianin ânhhia chu malsâwmnaah a chantîr ta hlah si a.

³Chutia Dân thû an han hriat chuan, Israel mite zîng aţangin chawhpawlhtu hnam dang zawng zawng chu an thliar hrang ta vek a.

NEHEMIA DÂN SIAMTHATTE

⁴Chumi hmâ chuan, Pathian ina bungraw dahna pindan chungah thuneitu lal, puithiam Eliasiba chu Tobia nêan an lo ţang dîn thîn a.

⁵Tûn hmaa Levi-hote, zâipâwlte, kawngkhâr vêngtute chanvo tûra ruat buhbâl thilhlân te, rimtui te, bungbêl te, buhtar sâwma pakhat te, uain leh hriak te leh, puithiamte tâna thilpêk dah nâna an lo hman thînah chuan pindan zau tak a lo siamsak a.

⁶Chûng hun lai zawng chu Jerusalema ka awm loh lai a lo ni si a. Mahse Babulon lal Artazerzia lal kum 32-na kum khân, lal hnênah ka kîr leh a. Ni engemawti hnûah lal hnên aţangin kîr leh phalna ka hmû a,

⁷Jerusalem ka lo thlen lehin, Eliasiba'n Tobia tâna thil ţha lo tak a lo tihsak, Pathian in hung chhûng meuhvah pindan a lo buatsaihsak tih chu ka hre chhuak ta a ni.

⁸Mi tilâwm lo takzet a; chuvângin pindan chhûnga Tobia bungrua zawng zawng chu a vaiin ka paih chhuak vek a.

⁹Pindante chu thianfâi tûrin thû ka pê a; Pathian ina bungbêlte, buhbâl thilhlante leh rimtuite chu ka dah lût leh ta a ni.

¹⁰Levia-miten an chanpual dawn tûr engemaw zât an dawng lo tih ka hre chhuak baw a; chuvâng chuan Levia mite leh zâimiten an rawngbâwl hna an zawhin, anmahni lo lamah an kîr leh vek thîn hi a lo ni a.

¹¹Tichuan, rorêltute hnênah, “Engati nge Pathian in hi in thlahthlam le?” tiin ka chhuahchhâl a. Anniho chu ka ko khâwm a, anmahni awmna hmun ţheuhvah ka awmtîr leh vek a.

¹²Chutichuan, Juda mi zawng zawng chuan an buhtar te, an uain thar te leh hriak aţanga sâwma pakhat chu thilpêk dahkhâwmna inah chuan an rawn dah khâwm ta zut zut a.

¹³Thilpêk dahkhâwmna in hotu atân puithiam Selemia leh dân hremi Zadoka leh Levi-ho zînga mi Pedaia te ka ruat a; anmahni puibâwmtû atân chuan Matania fa Zakura fapa Hanana a awm a; mi rinawma ngaih an ni a, an hnathawh tûr chu an unaute chan tûr sem chhuah a ni.

¹⁴Aw ka Pathian, hê thilah hian min hre reng la, ka Pathian in leh a rawngbâwl na atâna ka thil tih ţhatte hi thâi bo suh ang che!

¹⁵Chûng lai chuan Juda miten Sabbath niin grêp an rap sâwr a, sabengtungin an buhpah te, uain te, grêp te, theipui te leh phurh theih chi tinrêng, Sabbath niin Jerusalema an phur luh thîn chu ka hmû a. Sabbath nia thil an hralh thîn chu ka khap ta a.

¹⁶Tura mi chuta khawsa vête pawhin sangha leh bungraw tinrêng an rawn phur lût a, Jerusalema Sabbath niin Juda mite hnênah an zuar thîn a.

¹⁷Tichuan, Juda miliante chu ka zilh hrep a, “Sabbath nî tibawrhbâng khawpin eng thil sual nge in tih tāk le?”

¹⁸Hetianga in thlahtuten an tih avângin keini leh hê khawpui chungah hian Pathianin chhiatna a thlentîr thîn a ni lo vem ni? Sabbath bawhchhiat avângin Israelte chungah thinurna in belhchhah leh ta ngih a nih hi,” ka ti a.

¹⁹Tichuan, Jerusalem kulh kawngkâte chu, Sabbath inţan dawn khawthim hmâa khâr vek tûr leh, Sabbath ral hmâa hawng lo tûrin thû ka pê a. Sabbath niah engmah phurh luh a nih loh nân, kawngkhâr chu ka mite ngei ka vêngtîr a.

²⁰Tichuan, sumdâwngte leh bungraw tinrêng zuartute chu Jerusalem pâwnah ţum hnih khat tal an riak thîn a.

²¹Anniho chu ka zilhâu va, “Engvângin nge kulh bulah te in riah thîn? In riah leh chuan, in chungah kut ka thlāk ang che u!” ka ti a. Chuta chin chu Sabbath niin an lo kal ngai ta lo.

²²Levi-hote chu inthianfai a, Sabbath nî hlân thianghlim tûr leh, lo kala, a kawngkate vêng tûrin thû ka pê a. Aw, ka Pathian, hê thilah pawh hian min hrereng la, i zahngaihna nasat ang zêlin mi zuah ang che!

²³Chûng lai chuan Judaten Ashdod hmeichhia te, Ammon leh Moab hmeichhiate nupuiah an nei tih ka hria a.

²⁴An fate zahvêin Ashdod ţawng an hmang a, Juda ţawng an thiam lo va, pakhat zâwk emaw, a dang zâwk ţawng emawin an ţawng mai a ni.

²⁵Anniho chu ka hâu va, ânhhia ka lawh a; ţhenkhat chu ka vua a, an sam ka pawh ţilhsak a, “In fanute hi an fapate in neihtîr tûr a ni lo va, an fanute chu in fapate tân in nei tûr a ni hek lo,” tiin Pathian hmingin chhia ka chhamtîr a.

²⁶Israel lal Solomona sualna kha hêng thil hi a ni lo vem ni? Chuti chung pawhin, hnam tam tak zîngah amah anga lal, Pathianin a hmangaih hi tûmah an awm lo; Israel mi zawng zawng chungah lalah Pathianin a siam si a. Chuti chung chuan, ani lehzel pawh kha hnam dang hmeichhiaten thil sual an tihtîr ta a nih kha.

²⁷Hnam dang hmeichhia neiin, Pathian dân bawhchhiatna sual râpthlāk in ti hi kan la hmu thei reng dawn che u em ni?” ka ti a.

²⁸Puithiam lal Eliasiba fapa Joiada fapa pakhat chu Horon mi Sanballata mâkpâ a ni a; chuvângin ka hnên ata ka hnawt chhuak

ta a ni.

²⁹Aw, ka Pathian, puithiam nihna leh puithiamna thuthlung leh Levia chi nihna an tihbawrhban dân hi hrereng ang che.

³⁰Tichuan, hnam dang thila an lo inhnammhnawihna tinrêng lakah ka thianfâi vek a. Puithiamte leh Levi mite chu an thawh tûr theuh ka ruatsak bawk a,

³¹a hun bîa thingtuah leh thlai thar hmasa rawn thlen zêl tûrin ka hrilh bawk. Aw, ka Pathian, a tha zâwngin min hre reng ang che!

ESTHERI

Ziah tu: Ezra • Ziah kum: B.C. 460-400

Estheri Bû ziaktu hi Judate thurochhiah leh Talmud sawi dânin Ezra a ni. Mordekaia leh Nehemia te hi a ziaktu ni thei vê tho an ni bawk. A ziaktu hi khatih laia Persia ram awmdân hnaivai taka hmutu (eyewitness), Juda rilru pu bawk si, saltâng zînga tel ve ngei, a hnua Israel rama kîr ve leh tâ ni tûr a ni. Estheri hming awmzia chu arsi tihna a ni. Juda hnam tihchimih vek tuma phiarrûkna lakah Lalnu Estheri hmanga Pathianin a mite tâna chhan chhuahna ropui a buatsaih thû hi a bu chhông thupui a ni. Estheri bûah hian Pathian hming a lang lo na a, a mite a enkawla, a humhalhzia erawh chu a lang fiah hle. Hei hi Persia rama Judate chhan chhuahna ropui: Judate Kûtpui Purim lo irhchhuah dan chanchin a ni (Kalhlên Kûtin Aigupta aţanga Judate chhan chhuah dân a entir ang hian). Lalnu Estheri hi Juda hnam boral tûr chhandamtu mai a ni lo; an saltânna ram, khatih laia khawvêl lalram ropui ber Persia Empire pum puia Juda hnam zahawmna khaidingu leh dinhmun sânga hlângkaitu a ni. Chû châwi sâna avâng chuan a hnua lal lo awm leh te pawhin Juda mi Nehemia kha ram vênhimna lama security officer lian tak, lal tâna mi rinawm tawpkhâwk te chauhin an chelh theih 'lal no hlântu'-ah an hman phah a; ani Nehemia khân an ram lalber phalnain, sorkar sum ngatin Jerusalem kulh chhia a han dinthar leh theih phah bawk a, Saltân hnu (post-exilic) a Juda history siamtu pawimawh a tling. Hê lehkhahu hi thupui pathumin a then theih :- (1) Persia lal Ahasuera nupui Vashti paihthlaa, a aiah Juda nula Estheri lalnu a lo nih thu te, (2) Juda hnam tihboral tumtu Hamana phiarrukna laka Lalnu Estheri kal tlanga Juda hnam pum chhan chhuah an nih dân te, (3) Judate Kûtpui Purim lo pian chhuah dân chungchâng te a ni. Estheri bu hi Bible-a a bu 17-na a ni a, bung 10 a awm a, châng 167 a awm bawk.

BUNG 1

LALIN LALNU VASHTI A PAIHTHLÂ

¹Ahasuera lal laiin heng thilte hi a lo thleng a (hê Ahasuera hi India aţanga Ethiopia thleng a ram then 127 chungah rorêltu a ni a),

²chûng lai chuan Ahasuera chu a khawpui Susan-ah, a lalrama lalthutthlêngah a thû a,

³a lal kum thumnaah chuan a milianho zawnzawng leh a chhiahhlawhte tân ruai a theh a—Persia leh Media thuneitute, miliante, ram bial tina ram awptute chu a hmâah chuan an awm vek a—

⁴a lalram hausakna leh ropuina te, a lalna chungnunnzia te chu ni tam tak, a zavaiin ni 180 chhông a entîr a.

⁵Chûng nîte a lo zawn chuan, lal chuan a khawpui Susana awm mi zawnzawng, alian atêin, lal in huan chhôngah chuan ni sarikh ruai a thehsak a.

⁶Chutah chuan puan zaisîn vâh leh dumpâwl te chu, puan zaisîn leh a hrui sendukin, sailungvâr bana silvar kualah chuan an

vêt chuat a; rangkachak leh silvara siam thutthlêng leh mutna dúp chî te an pharh duai a, a chhuat zâwl chu lungmâwi dumpâwl te, a tle sep sep chî te, sailungvâr leh a dum chîte an phah vek a.

⁷An thil inna no te chu rangkachak, inanglo veka chi hrang hranga siam a ni a; lal thilphal dân ang zêlin, uain te chu ren rual lohva tam an sem zur zur reng a.

⁸Dân ang chuan zu in tûra intihluhna a awm lo; mi tinin duh tâwk tâwka an in theih nân lal chuan a officer-ho chu tih dân tûr a lo hrilh lâwk diam a.

⁹Lalnu Vashti pawhin Lal Ahasuera lal inah bawk chuan hmeichheho tân ruai a lo theh vê a.

¹⁰A ni sarikh nî chuan, lal thilung chu zû-in a chawkpûr ta sûrh mai a, Lal Ahasuera hmâa rawngbâwltu, mi tilreh pasarih Mehumana te, Bizthaa te, Harbona te, Bigtha te, Abagtha te, Zethara te, Karkasa te chu thû a pê a,

¹¹Lalnu Vashti chu, a lallukhum nêna inthuaama, a miliante leh mipuite hmâa a hmel thatzia rawn inpho lang tûrin a kohtîr a, a hmêl pawh a tha nangianga a.

¹²Mahse, Lalnu Vashti chu lalin mi tilrehho hnêna thu a pêk ang chuan a kal duh ta awzâwng lo mai a; lal chu a thinrim ta êm êm a, thinurin a puakkeh lo chauh a ni ta mai a.

¹³Tichuan, lal chuan thil chinchâng hria mi fingte chu a hrilh a (lal chuan dân leh rorêlna lam thiam mite a râwn thîn rêng a,

¹⁴ama thachhang dâwltu, Persia leh Media rama milian pasarihte chu, Karsena te, Sethara te, Admatha te, Tarsisa te, Meresa te, Marsena leh Memukana te an ni a; chûng mite chu lal hmêl hmu phâ, lalram chhônga dinhmun sâng ber ber luahtute an ni:)

¹⁵“Mi tilrehte hmanga Lal Ahasuera thupêk a zawn duh loh avângin, Lalnu Vashti hi, dân angin a chungah engtia tih tûr nge ni dân?” tiin a zâwt a.

¹⁶Memukana chuan milianho hmâah chuan lal chu a chhâng a: “Lalnu Vashti hian lal chungah chauh a tisual a ni lo va, Lal Ahasuera lalram chhônga milianho leh mipui zawnzawng chungah tisual a ni.

¹⁷Lalnu thiltih dân hi nuho zawnzawngin an lo hria ang a, ‘Lal Ahasuera pawhin a bulah Lalnu Vashti kal tûrin a ti rawk a, a lo duh dêr si lo,’ tiin an han sawi darh ang a, an pasalte thû an pawisa lo ngâl mai dân asin.’

¹⁸Vawiin lâ lâ hian Persia leh Media milian nuhovin, lalnu thiltih dân an lo hriat chuan, lal miliante chungah pawh an ti ve zêl ang a. Chuvângin, inhmuhisitna leh thinurna zâkhua a thleng mai ang.

¹⁹Lalin thâ a tih chuan, Vashti hi Lal Ahasuera hmâah lo lang leh tawh suh se, tih thû hi, lal hian thupêk chhuah sela, chû chu tihdanglam leh tawh loh tûrin, Persia leh Media dân bûah chhinchhiah ni sela; lal chuan hê nu aia thâ midang hnênah lalnu nihna pe zâwk rawh se.

²⁰Lal thupêk chu a ram pumpuia puan chhuah a nih hun chuan (ram zâu tak a ni si a), a milian a mitê pawh nise, an nupuiten an pasalte an zah thiam tawh dân a ni,” a ti a.

²¹Chû chhânna thû chuan lal leh milian hote a tilungâwi hlê a, lal chuan Memukana thû ang chuan a ti ta a.

²²Tichuan, lalram bial chhûng zawng zawngah lehkhâ a thawn chhuak a, ram bung tinah anmahni hawrawp leh an tawng theuhvin, chhûngkaw tinah mipain thû an nei tûr a ni, tih thû chu tawng tina puan zâr tûrin thû an chhuah ta a.

BUNG 2

ESTHERI LALNU A NI TA

¹Chumi hnûa, Lal Ahasuera thinrim a lo daih hnû chuan, Vashti leh a thiltih dân te, ani chungâ thupêk a chhuah tâkte chu a hre reng a.

²Lal khâwnbâwlho, a bula awm phâ te chuan: “Lal tân nula hmêlthâ leh thianghlîm zawn ni sela;

³lal chuan lalram bial zawng zawngah officer-te ruat sela, anni chuan an biala nula thianghlîm leh hmêlthâ zawng zawng chu a khawpui Susanah, hmeichheho awmna hmunah, hmeichheho chênna enkawltu lal mi tilreh Hegaia hnuaiah rawn hruai rawh se. An incheina tûr pawh pêk ni sela.

⁴Nula tûpawh, lalin duh a thlan apiang chu Vashti aiah lalnu ni rawh se,” an ti a. Lal chuan thâ a ti a, chutiang chuan a ti ta a.

⁵Susan khawpuiah chuan Juda pakhat, a hming Mordekaia, Jaira fapa, Simeia fapa, Kisa fapa, Benjamin mi a awm a.

⁶Kisa chu Babulon lal Nebukadnezzeran Juda lal Jekonia sala tâng tûra a hruai ruala Jerusalem aţanga a hruai tel kha a ni.

⁷Mordekaia chuan a pami fanu Hadasî, Estheri an tih chu a enkawl seilian a, nu leh pa a nei tawh si lo va. Nula chu duhawm tak, hmêlthâ si a ni. A nu leh a paten an thihsan hnûin Mordekaia hian ama fanu angin a enkawl ta a ni.

⁸Lal thupêk leh dân siam thû an lo hriata, Hegaia enkawlna hnuaia nula tam tak Susan khawpuia an hruai khâwm laiin, Estheri pawh lal ina hmeichheho awmna, Hegaia enkawlna hmunah chuan an hruai vê ta a.

⁹Nula chu thâ a lo tiin, a duhsakna pawh a dawng nghâl mai a; a incheina tûr leh a chanvo tûr thil chu a pe thuai a. Amah enkawltu tûr lal ina chhiahhlawh nula thlan chhuah pasarih a pê a, amah leh a chhiahhlawh nulate nêh hmeichhe awmna pindan tha berah a awmtîr a.

¹⁰Estheri chuan eng hnam nge a niha, tute nge a chhûngte tih a sawi lo, Mordekaian puangzâr lo tûrin a lo khap tlat a.

¹¹Estheri chu engtin nge a awm tâka, a chungah eng thil nge thleng tih hriat tumin, Mordekaia chu hmeichheho awmna kawt zâwnah chuan ni tin a kal thîn a.

¹²Lal Ahasuera hnêna an inlan hun thlen hmâa, hmeichhiate tâna dân an siamah chuan, inbuatsaih hun chhûng hian thla 12 a awh thîn a; an inbuatsaih dân chu: thla ruk chhûng murra hriakin an chulh a, thla ruk dang chu rimtui te leh hmêl tihthât nain an chei leh thîn a ni.

¹³Chutiang taka an inbuatsaih hnû chuan, nulate chu lal hnênah an kal a, lal ina luhpui tûrin hmeichhe awmna hmuna an thil duh apiang an pe thîn a.

¹⁴Tlâi lamah an lût a, a tûkah hmeichhe awmna pahniha, hmei-ho awmnaah, lal mi tilreh Shaasgaza enkawlna hnuaiah an kîr leh thîn a. Lal duh zâwn a niha, an hming lama a koh loh chu, lal hnênah an kal nawn leh tawh ngai lo.

¹⁵Modekaian a pami Abihaila fanu, ama fa anga a enkawl Estheri chu lal hnêna a kal hun a lo thlen chuan, hmeichhe enkawltu, lal mi tilreh Hegaian tûl a tih bâk chu engmah a phût lo. Estheri chu a hmêl hmutu apiangte duh zâwn a ni hlih hlih mai a.

¹⁶Tichuan, Estheri chu Lal Ahasuera lal inah, thla sâwmna, Tetheth thlâ, a lal kum sarihnaah chuan an hruai lût ve ta a.

¹⁷Lal chuan Estheri chu hmeichhe dang zawng zawng aia a lo ngaizâwn a, nula thianghlîm dang zawngte aia a nginat leh a duhsak zâwn a ni a; a lû-ah chuan lallukhum chu a khumtîr a, Vashti aiah lalnûah a siam ta a.

¹⁸Lal chuan a miliante leh a chhiahhlawhte tân, Estheri hming ngei chuan ruai ropui tak a theh a; chumi nî chuan a ram pumah chawlh a puang a, lal chuan phal takin thilpêk a sem ur ur a.

MORDEKAIA’N PHIARRÛKNA A MAN CHHUAK

¹⁹A wawi hnihna atân nula thianghlîmte an koh khâwm leh laiin, Mordekaia chu lal in kawngka bulah a thu a.

²⁰A têtê aţanga Mordekaia thû a lo zâwm thîn angin, a hnam leh an chhûngkua tûmah hrilh lo tûra Mordekaian a tih tlat avângin Estheri chuan tûmah a hrilh lo.

²¹Lal in kawngka bula Mordekaia a thut thîn lai chuan, lal mi tilreh pahni, Bigthana leh Teresa, kawngkhâr vêngtute chu an thinur hlê a, Lal Ahasuera chungâ kutthlâkna remchâng an dap ta a.

²²Chû thû chu Mordekaian a lo hriat chuan, Lalnu Estheri hnênah a hrilh a, Estheri chuan Mordekaia hmingin lal chu a hrilh ta a.

²³Chû thû an han chhui chian chuan, a lo dik ngei tih an man chhuak a, an pahni chuan thingah an khaihlum ta a; lal hriatpuinain chanchin ziahna bûah an ziaik lût a.

BUNG 3

HAMANA’N JUDATE A PHAR

¹Chûng thil thlen hnûah chuan, Lal Ahasuera chuan Agag mi Hammedatha fapa Hamana chu a kaisantîr a, milian dang zawng zawngte aia sângin a dinhmun a châwi sâng a.

²Lal chhiahhlawhho, lal kawngka bula awm zawng zawng chu Hamana chibai bûkin an kûn dual dual a, chutianga ti tûrin lalin thû a pe rêng a. Nimahsela, Mordekaia chuan kûnin chibai a bûk vê duh lo va.

³Tichuan, lal in kawngkâa awm vê lal chhiahhlawhte chuan Mordekaia hnênah, “Engvângin nge lal thupêk i bawhchhiat?” an ti a.

⁴Ni tin an hrilh chung pawha a ngaihthlâk duh chuan loh avângin, Mordekaia thû chu a dingchang dâwn nge dâwn lo tih hriat nân Hamana chu an hrilh ta a; Mordekaia chuan Juda mi a ni tih a lo hrilh tawh hlawn si a.

⁵Mordekaian kûnin chibai a bûk vê duh lo tih Hamanan a lo hriat chuan, thinrimnain a khat ta a.

⁶Mahse, Mordekaia chung chauhva kutthlâk chu nêp lutukin a hria a, Mordekaia chu eng hnam nge tih an lo hrih tawh bawk nê. Chuvângin Mordekaia chipui—Ahasuera lalram puma Judaho zawng zawng nê lama tihchimih vek chu Hamana chuan a tum ta zâwk a.

⁷Thla khatna, Nisan thla, Lal Ahasuera lal kum 12-naah chuan, Hamana hmâah chuan Pur (thum vâwr) an tih chu, a ni leh thla hriat nân an vâwr a, a thla 12-na, Adar thlaah a tlâ a.

⁸Hamana chuan Lal Ahasuera hnênah, “I lalram bial tinah hian hnam chi khat, midangte zînga darhsarh deuhva chêng an awm a; an dân chu hnam dang zawngte dân aiin a danglam bîk a, lal dân pawh an zâwm duh vê lo va. Chuvângin, hêngho zuah reng hi lal tân pawh a him lo vang.

⁹Lalin rem a tih chuan, tihboral vek tûrin thupêk chhuah ni sela, lal sumbâwma dah luh atân, chû hnâ thawktute kutah chuan silvar tangka talent sîngkhat ka thawh ang e,” a ti a.

¹⁰Lal chuan a hming nemna zungbun a kuta mi chu a phâwi a, Judate hmêlmâ, Agag mi Hammedatha fapa Hamana chu a pê a.

¹¹Lal chuan Hamana hnênah, “Pawisa leh mite chu i duh ang ang a tih atân i kutah ka pê a che,” a ti ta a.

¹²Tichuan, thla khatna, ni 13-niin lal lehkhaziaktute chu an ko va, Hamana thupêk angin lal aiawhtute, ram bial tina governor te, mipui hotute hnênah chuan an awmna ram bial tina an tawng leh an hawrawp theuhva thuziak chu an thawh chhuak a. Chutah chuan Lal Ahasuera hming a chuang a, lal zungbunin an nemkai bawk a.

¹³Lalram bial tina Judaho zawng zawng chu thalai pawh, tar pawh, naupang leh hmeichhia te nê, an vâiin ni khatah, thla 12-na, Adar thla ni 13 ni taka tihborala, thah chimih veka, an thilneihte chu rawksak tûrin lehkhâ an thawh darh ta a.

¹⁴Chû dân thupêk zîak chhâwn chu, bial tina miten chumi nîa an lo inrâlirin theih nân, mipui zawng zawng hnênah puan darh a ni.

¹⁵Lehkha kengtute chu lal thupêkin hmanhmawh takin an kal chhuak a; chû thupêk chu Susan khawpuiah chuan an puang ta a. Lal leh Hamana te chu thuthmun remin zû an in dân a, Susan khuaa mite erawh chuan a ngaihna rêng an hre lo.

BUNG 4

ESTHERI’N JUDATE TĀNPUI A REMTI

¹Mordekaian thil awmzia a lo hriat chuan, a silhfênte a pawthlêr a, saiip puan sinin vut a inphul a, khawpui laiî deuh deuhah chuan a kal chhuak a. Lungchhe takin, ring zet zet in a tapan ruai ruai a.

²Lal in kawngkâah saiip puan sin chung chuan tûmah an luh theih loh avângin lal in hungna kawngka zâwn thlengin a kal a.

³Lal thupêk leh dân thuziak in a thlenna ram bial tina Judate chu an lungngai êm êm a, chaw an nghei a, tapan an chiau vawng vawng a; mi tam tak chu saiip puanah te, vut zîngah te an mû a.

⁴Estheri chu a tirhchhiah nulate leh mi tilrehten an rawn hrih a, tichuan lalnu chu a lungngai ta êm êm a. Mordekaia chu a saiip puan thlâk nân silhfên a thawh a, mahse a lo ha duh lo va.

⁵Estheri chuan amah vil reng tûra ruat lal mi tilreh pakhat, Hathaka chu a kova, Mordekaia chu engtia chutia awm nge a nih zâwt tûrin thû a pê a.

⁶Tichuan, Hathaka chu lal in hungna kawt, khawpui mual zâwla thû Mordekaia hnênah chuan a va kal a.

⁷Mordekaia chuan a chung thil thleng zawng zawng hrihlin, Judate tihboral vekna tûra lal sum bâwma silvar tangka Hamanan pêk a tiam zât lamin a hrih a.

⁸Tihborala an awm vekna tûr thupêk Susan khawpuia an puan tâk ziah chhâwn chu a pe a, Estheri hnêna entîr a, a awmzia hrihfhiah tûr leh, ani chu lal hnêna va kal a, a mite tâna ngensak tûrin a chah a.

⁹Tichuan, Hathaka chu Estheri hnênah a kîr leh a, Mordekaia thusawi chu a hrih a.

¹⁰Estheri chuan Mordekaia hnêna zu hrih leh tûrin Hathaka chu a tîr a:

¹¹“Lal ram chhûnga mi tupawh, ahmei apain, koh lohva lal in chhûngrila lût apiang, lalin a rangkachak laltiang a lo lekchhuahsak a nih chauh loh chuan tihhlum tûr a ni tih chu dân dinglai a ni tih hi lal chhiahhlawhte leh mi zawng zawng hriat a ni a. Hei, ni sawmthum lai chu a hnêna lût tûrin min la ko rih lo a ni,” a ti a.

¹²Tichuan, Estheri thuchah chu Mordekaia an va hrih a.

¹³Mordekaia chuan Estheri hnêna sawi dân tûr a hrih a: “Juda mi zawng zawngin an pumpelh loh chuan lal inah pawh khân him tûrah lo inngai bîk suh.

¹⁴Tûn ang hun a ngawih reng chuan, hmun dang atangin Judate tâna chhan chhuahna leh thawvanna lo awm pawh ni se, nang leh i pa chhûngkua chu kan boral dâwn a ni. Lal nihna i lo chang hi hetiang hun atân hian a ni lo vang tih tu nge hria?” a ti a.

¹⁵Estheri chuan Mordekaia hnêna sawi dân tûr a hrih a:

¹⁶“Anih leh va kal ta ula, Susana Juda awm zawng zawngte va khâwm ula, ka tân chaw lo nghei rawh u; ni thum leh zan thum chhûng engmah eiin in suh se. Kei pawh ka chhiahhlawh nulahote nê chaw kan lo nghei ve ang. Lal hnênah chuan dân lovin ka lût ang a; thih a tûl leh ka thi mai a ni ang chu!” a ti a.

¹⁷Tichuan, Mordekaia chu a kal a, Estheri thupêk ang zêlin a ti a.

BUNG 5

ESTHERIN RUAI A THEH

¹A ni thum nî chu a lo thleng ta a, Estheri chuan a lal thumate a inbel a, lal pindan hual chhûng tualzâwl, lal awmna kawt hmai zâwn chiah-ah chuan a va ding a, lal chu a kawngka lam hawi zâwngin a lalthutthlêngah chuan a lo thû a.

²Lal chuan tual zâwla Lalnu Estheri ding a han hmuh chuan, duhsak hmêl a lo hmuh a, lal chuan rangkachak laltiang a ken chu Estheri lamah a lek chhuak a. Estheri chuan a va pan hnâi a,

laltiang hmâwr chu a va dek a.

³Lal chuan a hnênah, “Lalnu Esther, eng nge i duh? Eng thil nge duh i neih? Lalram zahve thleng pawhin i hnênah pêk a ni ang!” a ti a.

⁴Estheri chuan, “Lal tâna ruai ka buatsaih hi, lalin rem a tih chuan, Hamana nêwawinah min rawn kîlpui rawh u,” a ti a.

⁵Tichuan lal chuan, “Estheri sawi angin Hamana chu rawn kaltîr thuai rawh u,” a ti a. Lal leh Hamana chu Estheri ruai buatsaih kîl tîr chuan an kal ta a.

⁶Uain an in lai chuan lal chuan Estheri hnênah, “Eng nge ni i dîl khâ? Ka pe dâwn che nia. I thil dîl chu eng nge ni, ka lalram zâtvê em ni? Ka pe ngei ang che!” a ti a.

⁷Estheri chuan a chhâng a, “Ka dîlna leh ka ngen chu hei hi a ni:

⁸Lal duhsak zâwng ka niha, ka dîlna chu lalin min pêk phala min hlawhtintîr dâwn chuan, lal leh Hamana tân ruai ka buatsaihah chuan naktûkah lo kal ula, lalin a sawi ang chuan ka hrilh dâwn che nia,” a ti a.

HAMANAN MORDEKAIA A PHIAR

⁹Chumi ni chuan Hamana chu phûr tak leh rilru hlim takin a kal chhuak a; mahse lal in hungna kawngkâah Mordekaia chu a hmâa dîng lo va, khûr baw lova a awm a han hmuh chuan, Mordekaia lakah chuan thinrimnain a khat a.

¹⁰Nimahsela, Hamana chu a inbengdâi hrâm hrâm a, inah a hâu a, a nupui Zeresi leh a thianta a ko khâwm a.

¹¹A hausakna ropuizia te, tû leh fa a ngahzia te, engkimah lalin a kaisântîr dân te, lal khâwnbâwlte leh hotu dangte chungah lêng a nih tâkzia te chu Hamana chuan a hrilh hlawm a.

¹²Hamana chuan, “Chû mai a la ni lo, Lalnu Estheri’n ruai a buatsaihah mi dang tûmah sâwm lovin, lal nêwawinah min sâwm a; naktûkah hian lal nêwawinah min sâwm leh ta deuh deuh va.

¹³Nimahsela, lal in hungna kawngkâ bula Juda mi Mordekaia thû ka hmuh chhûng chuan hêng zâwng zâwng hi ka tân engtihna mah a ni lo ve,” a ti a.

¹⁴Tichuan, a nupui Zeresi leh a thian zâwng zâwngte chuan, “Khaihhlumna tûr tawng sawmngâa sângin siam ni sela, chutah chuan Mordekaia khaihlum tûrîn zîng lamah lal hnênah rawt la; tichuan ruaitheh tûrîn lal nêwawinah hlim takin in kal tawh mai dâwn nia,” an ti a. Hamana pawm zâwng tak a ni a; tichuan, khaihlumna chu a siamtîr ta a.

BUNG 6

LALIN MORDEKAIA A CHÂWIMÂWI

¹Chumi zân chuan lal chu a muhil thei lo va. Thil hlui chhinchhiahna bu a lâk chhuatîr a; lal hmâah chuan an chhiar a.

²Chutah chuan lal kawngkhâr vêngtu, mi tilreh pahnih, Bigthana leh Teresa te chuan Lal Ahasuera chungah kutthlâk an tum tih Mordekaia a hriattîr thû a chuang a.

³Lal chuan, “Hê thil avâng hian Mordekaia hian châwimâwina leh lâwmman eng nge a dawn tawh?” a ti a. Lal chhiahhlawhte chuan, “Engmah tihsak a la ni lo,” an ti a.

⁴Tichuan lal chuan, “Tu nge kawt hung chhûnga awm saw?” a ti a. Chutih lai tak chuan Hamana chu khaihlumna tûr a siamah Mordekaia khai hlumtîr dân tûr lal sawipui tumin, kawt hung pawm zâwkah chuan a lo lût vê chiah a.

⁵Lal chhiahhlawhte chuan, “Hamana a nih saw, kawt laia saw a dîng e,” an ti a. Lal chuan, “Rawn luhtîr rawh u,” a ti a.

⁶Hamana chu a lo lût a, lal chuan a hnênah, “Lalin mi pakhat châwimâwi a duh a, engtia tih nge thâ ang le?” a ti a. Hamana chuan, “Kei lo chu lalin châwimâwi tûr a nei chuang dâwn em ni?” a ti rilru a.

⁷Hamana chuan lal hnênah, “Lalin mi châwimâwi a duha tân chuan,

⁸lalin a hâk thîn lal kawrfual te, lalin chuan nâna a hman thîn sakawr te, lalin a khum thîn lallukhum te rawn lâksak ni sela.

⁹Lalin châwimâwi a duha chu kawrfual a hâktîra, sakawr chungah a chuantîr theih nân, lal miliante zînga a ropui ber kutah pêk ni sela. Sakawr chungah chuangin khawpui kawthlêr fanpui ni sela, a hmâah kalin: ‘Lalin a châwimâwi duha chu hetiang hian tih a ni ang,’ tiin puang zêl sela!’” a ti a.

¹⁰Lal chuan Hamana hnênah, “I thurâwn ang ngei chuan lal puan leh sakawr chu va la thuai la, lal kawngka bula thû thîn, Juda mi Mordekaia chungah va ti rawh le! I sawi ang kha pakhat mah hmaih lo vang che,” a ti a.

¹¹Tichuan, Hamana chuan lal kawrfual chu a va la a, sakawr chu a va kâi a, Mordekaia chu a va hâktîr a, sakawr chungah a chuantîr a, khawpui kawthlêr chu a fanpui a, a hmâah chuan, “Lalin châwimâwi a duha chu hetiang hian tih a ni ang!” tiin a puang zêl a.

¹²Chumi hnû chuan Mordekaia chu lal kawngka bulah baw lo kîr leh a. Hamana erawh chu lunghnûr takin, inlukhuh chungin ama inah a hâu vang vang a.

¹³Hamana chuan a nupui Zeresi leh a thian zâwng zâwngte hnênah a chungah thil thleng chu a hrilh vek a, a mi fingte leh a nupui Zeresi chuan a hnênah, “I chêt chhiatna bul Mordekaia hi, Juda mi a nih si chuan i chelh hauh lo vang le, a hmâa tlâkchhiat mai i hmabâk zu nia,” an ti a.

¹⁴Chutia an sawi lai mêk chuan, lal mi tilrehte chu an lo kal a, Estheri’n ruai a buatsaihnaa kal tûrîn Hamana chu hmanhmawh takin an hruai ta a.

BUNG 7

MORDEKAIA AIAH HAMANA AN KHAHLUM

¹Tichuan, lal leh Hamana chu Estheri hnêna chaw ei tûr chuan an kal ta a.

²A ni hnih nî, uain ruai nî chuan lal chuan Estheri hnênah, “Lalnu Esther, eng thil nge i dîl chu le? Pêk i ni ngei ang. I dîl pawt chuan ka lalram zâtvê pawh ka pê ang che!” a ti a.

³Lalnu Estheri chuan, “Aw lalber, i duhsakna ka dâwn dâwn a niha, lalin rem a tih chuan, ka nunna hi min zuahsak la, ka hnampuite nunna pawh zuahsak tûrîn ka dîl che a ni.

⁴Kei leh ka hnampuite hi tihboral tûr leh tihhluma, tihchimih vek tûra hralhin kan awm dêr tawh a ni. Lalin a chân nasat dân

tûr hi hmêlma pa rulh sên rual ni lo mahse, ahmei apâa bâwiha hralh tûr ni chauh ıla chuan engmah sawi lovin ka ngawi mai tûr a ni a,” tiin a chhâng a.

⁵Lal Ahasuera chuan Lalnu Estheri hnênah, “A rilru ngawt pawha chutiang thil han ti ngam chu tu nge a niha, khawiah nge a awm?” a ti a.

⁶Estheri chuan, “Min dotu kan hmêlmâ chu hê mi suaksual pa Hamana hi a ni!” a ti ta a. Chû vêleh chuan Hamana chu lal leh lalnu hmaah chuan hlauvin a khûr ta a.

⁷Lal thinur lutuk chu uain ruai thehna hmun ațang chuan lal huanah a chhuak ta daih a; Hamana chuan a chungah lalin thil tha lo a thlen ngei dâwn tih a hmuhin, a nunna zuahsak dîlin Estheri hmâah chuan a dîng a.

⁸Lal chu huan ațanga uain ruaithehna hmuna a lo kîr leh chuan, Hamana chu Estheri awmna khumah chuan a lo bawk a. Lal chuan, “Inchhûnga ka awm lai ngei ngei pawhin lalnu lo pâwngsual a tum a ni mâw?” arawn ti a. Chû thû chu lalin a chhâk chhuah vêleh Hamana hmai chu an khuh nghâl a.

⁹Mi tilrehte zînga mi Harbona chuan lal hnênah, “En teh! Lal tâna thurâwn tha rawn hriattîrtu Mordekaia khaihlumna tûr Hamanan tawng sawmngâa sâng a siam a, chû chu Hamana hian ama inah a phun asin,” a ti a. Lal chuan, “Chutah chuan va khaihlum rawh u!” a ti a.

¹⁰Tichuan, Mordekaia khaihlumna tûra a siamah chuan Hamana zâwk chu an khaihlum ta a. Chumi hnû chuan lal thinur chu a lo dâi ta a.

BUNG 8

ESTHERIN JUDATE A CHHAN CHHUAK

¹Chumi ni chuan Lal Ahasuera chuan Judate hmêlmâ Hamana in chu Lalnu Estheri a pê a. Estheri’n an inlaichîn dân a lo hrilh tawh avângin Mordekaia chu lal hmâah a va kal a.

²Lal chuan a hming nemna zungbun, Hamana hnêna mi a lâk chu a phâwi a, Mordekaia a pê a; Estheri chuan Hamana in leh lo chungah hotûah Mordekaia chu a ruat a.

³Estheri chuan lal chu a be leh a, a ke bulah a bawkkhup a, Agag mi Hamanan Judate tiboral tûra thil a lo ruahmanna tha lo tak mai chu sût leh tûrin, mittui nêl lal chu a ngên ngawih ngawih a.

⁴Lal chuan a rangkachak tiang chu Estheri lamah a lek a. Tichuan, Estheri chu a tho va, lal hmâah chuan a dîng a.

⁵Lalin rem a tiha, min khawngaih takzeta, lalin tha a tih bawka, a lâwm zâwnng mi ka nih chuan, Agag mi Hammedatha fapa Hamana remruatnaa lalram bial tina Juda-te tihchimih vek tûra thupêk a lo ziah sûtina lehkhâ zia ni sela.

⁶Ka mite chungah thil tha lo tak lo thleng tûr hi hmû ta ıla, engtin nge ka tuar theih ang? Ka hnampuîte boral tûr hi ka ngaingam hlawl lo va, engtin nge tuar pawh ka tuar zawh ang?” a ti a.

⁷Lal Ahasuera chuan Lalnu Estheri leh Juda mi Mordekaia hnênah, “Hamana in chu Lalnu Estheri ka pe tawh a, Judate chungah kutthlâk a tum avângin amah pawh an khaihlum tawh

bawk a.

⁸Nangmah ngeiin i duh ang takin Judate chungchângah chuan keima hmingin thupêk ziahtîr la, lal hmingnemna zungbunin nem ang che; lal hminga ziah leh lal hming chuanna zungbuna châr tawh chu tuma sût theih a ni tawh lo ve,” a ti a.

⁹Tichuan, chutih hun, thla thumna, Sivan thla ni 23 ni chuan lal lehkhaziaktute chu an ko va. Mordekaia thupêkin Judate hnênah te, ram bial tin hotu te, governor te, India ram ațanga Ethiopia thlenga ram bial then hrang hrang 127 a rorêltute hnêna thawn tûrin lehkhâ an zia a, ram then tinah chuan anmahni hawrawp theuhvin, Judate pawh anmahni tawng leh anmahni hawrawpa zia a thawn chhuak ta a.

¹⁰Lal Ahasuera hmingin a zia a, lal hmingnemna zungbunin a nem leh a, lehkhate chu sakawrin an phurhtîr a, lal tâna sakawr chak chî an vulhah te chuangin an tânpui a.

¹¹Chûng lehkhâah chuan, Juda-ho khaw tina awmte chu lo inpun khâwma, anmahni lo invênga, anmahni beih tumtute chu eng mi leh eng biala mi pawh ni rawh se, naupangte leh hmeichhiate pawh ni se—lo bei lêta, lo thata, lo râwt chimit vek tûr leh, an neih zawng zawng pawh chhuhsak tûrin lal chuan phalna a pe ta a,

¹²chû chu thla 12-na, Adar thlâ ni 13 ni chuan Lal Ahasuera ram bial chhûng zawng zawnga an lo tihdân tûr a ni.

¹³Chû thupêk ziah chhâwn chu ram tinah dân thupêk anga an lo hman tûrin mi tin hnêna puan tûr a ni a; tichuan, Judate chu chumi ni chuan an hmêlmâte chungah phubâ la tûrin an lo inrâlring thei dâwn a ni.

¹⁴Sakawr chungchuanng mi lehkhâ tânpuitute chuan hmanhmawh takin, lal thupêkin lal sakawr chak chîa chuangin an lîm chhuak zut zut a. Chû thupêk chu Susan khawpuiah pawh an puang a.

¹⁵Mordekaia chu lal incheina puan dumpâwl leh a vâ inbelin, rangkachak lallukhum ropui tak a khum a, puan zaisîn leh senduk bât chungin lal in ata chu a kal chhuak a; Susan khawpui chu an hlimin an lâwm ta êm êm a.

¹⁶Judate tân lâwmna te, hlimna leh châwimâwina kâwl a lo êng ta.

¹⁷Ram bial tinah leh khawpui tina lal thupêk a thlenna hmun apiangah chuan, Judate chu an hlimin an lâwm êm êm a, châwl hahdamin ruai te an theh a. Ram chhûnga mi tam tak chuan Judate chu an hlauh tâk êm avângin Judate lamah an țang hial a.

BUNG 9

JUDATEN AN HMELMATE AN TICHIMIT

¹Thla 12-na, Adar thlâ ni 13 ni chu lal thupêk an hlen chhuah ni tûr a ni a. Chumi ni chu Judahô hmêlmâten hnehna an chan ni atân an beisei a ni a; nimahsela, a leha lingin Judaten anmahni hawtute chungah hnehna an channa ni a lo ni ta zâwk a.

²Judahote chu anmahni tihchhiat tumtute lo bei lêl tûrin, Lal Ahasuera ram bial then zawng zawnga an awmna khawpuiahte chuan an pungkhâwm a. Tûma do ngam rual an ni ta lo va, anmahni chu mi zawng zawngin an hlâu ta zâwk a.

³Ram bial tina milian te, rorêltu te, governor te leh lal hnuaia sorkar hnathawk zawng zawngte chuan Mordekaia an hlauh êm avângin, Judate chu an ãanpui ta zâwk a.

⁴Mordekaia chu lal inah chuan a langsâr ta hlê a, ram bial ãhen zawng zawngah chuan a hming a thang chhuak vek a; Mordekaia chu a lo ropui ta êm êm a.

⁵Tichuan, Judate chuan an hmêlmâ zawng zawng chu khandaihin an sâm a, an that a, an tiboral a, anmahni hawtute chungah chuan duh tâwk an ngah ta a.

⁶Susan khawpuih chuan Judaten mi 500 thatin an tiboral a.

⁷Parsandatha te, Dalphona te, Aspatha te,

⁸Parotha te, Adalia te, Aridatha te,

⁹Parmasta te, Arisaia te, Aridaia leh Vajezatha te—

¹⁰Hammedatha fapa Hamana fapa sâwm, Juda hmêlmâte chu an that vek a; an bungrua erawh chu an khawihsak lo.

¹¹Chumi nî chuan, Susan khawpuih mi an thah zât chu lal hnênah an va hrilh a.

¹²Lal chuan Lalnu Estheri hnênah, “Judate chuan Susan khawpuih mi zanga leh Hamana fapa sâwm an that a, an tiboral ta. Lalram bial dangah engti takin ti ang maw? Khai le, eng thil nge i dîl leh dâwn? Ka pe ngei ang che. Dîl duh dangte i la nei em? Ka tihsak leh dâwn che nia,” a ti a.

¹³Estheri chuan, “Lalin rem a tih chuan, Susan khawpuih Judaten vawin atâna thupêk ang hian naktûkah ti leh sela. Hamana fapa sâwmte chu khaihlumnaah khaiân ni rawh se,” a ti a.

¹⁴Lal chuan chutiang taka ti tûr chuan thû a pê a; chû thupêk chu Susan khawpuih chuan an chhuah a, Hamana fapa sâwmte chu an khâi ta a.

¹⁵Susan khawpuih Judate chu Adar thla, ni 14 niin an kal khâwm leh a, Susan-ah chuan mi 300 an that a; mahse an bungrua an khawihsak lo.

¹⁶Lalram bial ãhen danga Juda dang zawng zawngte pawh mahni invêngin an kal khâwm a, an hmêlmâte lakah râlmuangin an awm ta a, an hmêlmâ mi 75,000 lai an that a; an bungruate erawh chu an khawihsak lo.

¹⁷Chumi nî chu Adar thlâ ni 13 nî a ni. Chumi thlâ ni 14 nî chuan an châwl a, hlimna nî-ah an siam a, ruai an ãheh a.

PURIM KÛT

¹⁸Susan khawpuih Juda hote erawh chu ni 13 nî leh ni 14 niin an kal khâwm a; ni 15 niin an châwl a, lâwmna nîah an siam a, ruai an ãheh ta a ni.

¹⁹Chuvângin, kulh nei lo khuaa Judate chuan Adar thla ni 14 nî chu hlimna leh ruaiãhehna nî bâkah, chawlh hahdamna nî angin, ei tûr inpêk tawna nî atân an hmang ta a ni.

²⁰Mordekaia chuan chûng thilte chu ziakin, Lal Ahasuera ram bial ãhen chhûnga Juda zawng zawng, hmun hlâ leh hnâia mite chu lehkha a thawn a,

²¹kum tinin Adar thla ni 14 leh ni 15 hi awmni khamin an hmang tûr a ni a,

²²an hmêlmâte lakah Judaten hahchawlhna nî atân te, lungngaihna chu hlimnaa a chan thlâ, ãahna nî chu hahchawlhna nîa chantîr nî atân te an hmang tûr a ni; chuvângin, hlim taka ruai ãheh nî atân leh, thilpêkte inhlan tawna, mi retheite hnêna thilpêk nî atâna hmang tûrin a ti a.

²³Tichuan, Judate chuan Mordekaia thupêk chu zâwmin, bul an lo ãan tawh chu chhunzawm zêl atân an hmang ta a,

²⁴an tihchhan chu, Agag mi Hammedatha fapa Juda hmêlmâ Hamana’n Judate tihboral vek tumin Pur (ãhumvâwr)-in a lo phiar a;

²⁵mahse, lal hnênah Estheri chu a va kala, lalin thupêk a chhuah avângin, Judate chungah phiarrûkna suaksual tak chu, ama lu chungah a lo ãa ta thung a; amah leh a fapate chu ãingah an khai ta a ni.

²⁶Chuvângin, hêng nîte hi Pur hming châwiin Purim an ti ta a. Tichuan, hemi chungchânga an thil hmuh leh an chungah thil lo thleng chungchânga lehkha thûte chu,

²⁷Judate chuan anmahni leh anmahni la rawn zâwm zêl tûr an thlahten hêng ni hnih, a nî leh thlâ inziak ang hian kum tin hmang tûrin an nemnghet a,

²⁸an thlah kal zêl te thlengin chhûngkaw tinin, ram bial tinah leh khaw tinah, hêng Purim nîte hi Judate chuan an hmang ngei tûr a ni a, an thlahte zîngah pawh chû thil hriatrengna chu engtikah mah a ral tawh tûr a ni lo, an ti a ni.

²⁹Tichuan, Lalnu Estheri, Abihaila fanu leh Juda mi Mordekaia te chuan an thuneihna zawng zawng nê, Purim chungchânga thupêk pahniha nemnghehna tûr lehkha an thawn leh a.

³⁰Mordekaia chuan chûng lehkate chu Ahasuera ram bial ãhen 127-a Judaho zawng zawng hnênah thlamuanna thuchah nê a thawn a,

³¹hêng Purim nîte hi a hun ruatah hmanga, anmahni leh an thlahte tân chawnghei leh sûnna nîa hmang tûra an lo inpêk tawh angin, Juda mi Mordekaia leh Lalnu Estheri te chuan an nemnghet ta a ni.

³²Tichuan, Estheri thupêk chuan Purim chungchâng chu a nemnghet a, lehkhâbûah ziah luh a ni ta a ni.

BUNG 10

MORDEKAIA KAISÂNNA

¹Lal Ahasuera chuan ram chhûngah leh thliarkârah te chhiah a chawitîr a.

²A thiltitheihna leh a chakna te, Mordekaia ropuizia, lalin a châwi kân zia te chu Media leh Persia lalte chanchin ziahna bûah a chuang a ni lo vem ni?

³Juda mi Mordekaia chu Lal Ahasuera dawttu a ni a, Judate zîngah a ropuian, a unau mipui tam takin an ngaisâng êm êm a; a mite ãatna tûr zawng ãat mi leh, a mi zawng zawngte tithlamuang zâwnga thû sawi ãhin mi a ni.

JOBA

Ziah tu: Hriat chian loh • Ziah kum: Hriat chian loh

Joba bu hi Biblea lehkhahu upa ber pàwl nia rin a ni a; a hun lai khawvêl awm dân enin, Joba kha kum 200 lai a dam avângin, Mosia hun hmâ daih, Abrahama te hun (B.C. 2000 vêl) emaw, a aia hmâ mah pawh a ni thei bawk. A bu chhûng thu kalhmanga a changtute awm dân aţangin Joba ziaa a ni kher dâwn em ni? a tih theih bawk. Talmud bûa Judate thurochhiaa pakhat chuan Mosia ziaa niin a ngai. Ani Mosia kha Joba chênna Uz ram bul, Midian ramah kum 40 lai han khawsâ a ni a. Mahse Mosia Dân leh thupêk awm hmâa ziaa a ni tih a lang thei thung. A bu chhûngah hian Sinai Tlânga Pathianin Israelte hnêna a pêk dân thû pawh a la lang hman lo. A ringhlel zâwnga Bible zirtu (Liberal critics) te chuan Joba hi Mosia sawi bo an tum ang thovin, a taka awm pawh ni lo, pipu thawnthû ang vêlah an ngai. Mahse Thuthlung Hlui leh Thuthlung Thar (Ezekiela 14:14, 20 leh Jakoba 5:11) te hian Joba hi a taka awm ngei (historical person) a nihzia an nemnghet thung. Engvângin nge mi dikte chungah tuarna a thlen? tih hi hê lehkhâbû-a zawnha leh a thupui ber a ni. Mi dik tak, amaha dik lohna pawh inhmû lo Joba'n a tuar ta vak mai chu, a thian pathumten a chhan leh vâng dapin, Pathian thununna tâwk ta anga chan chhuah an tum a; Joba lah a tlâwm duh bau si lo va, a inthiam tlat mai si. An inhnial tawnnain engmah korî a tu thei lo. A tâwpah Pathian chu thiltihtheihna nêna a rawn inlâr tâkah chuan, mahni thiam inchantîr thîn Joba chu amah leh amah intenin, a hriat phâk lohzia te inhmûin, 'meivâp leh vaivut mai hian ka sim ta e,' a ti ta a ni. Engvânga tuarna hi lo awm nge tih chhânna chu, Pathianin a mifel Joba dikzia Setana hmanga fiah a phalna aţanga lo awm a ni kan ti thei ang. Setanan tihchhiat hlen dêr a tum laiin, Pathian remruatnaah chuan, tuarna aţanga malsâwmna hi Joba nun aţangin kan hmû thung a ni. Joba bû hi Bible-a lehkhahu 18-na a ni a, a chhûngah hian bung 42 leh châng 1,070 a awm.

BUNG 1

JOBA LEH UZ RAMA A CHHÛNGKUA

¹Uz ramah chuan mi pakhat a awm a, a hming chu Joba a ni; chu mi chu sawisêl kâi lo leh mi dik, Pathian tîh mi, sual lam hawisan tlat mi a ni.

²Fapa pasarih leh fanu pathum a nei a.

³Chû bâkah, berâm 7,000, sanghawngsei 3,000, bâwngpa a kawpin 500, sabengtungpui 500 leh chhûngkaw hung tak a nei a; hêngte avâng hian hê mi hi Khawchhak mi zawng zawng zînga ropui ber a ni.

⁴A fapate chu anmahni in theuhvah an hun ruat ang zêlin, ruai an inthêh chhâwk thîn a, an farnu pathumte chu an hnêna eia bâr tûrin an sâwm thîn a.

⁵Chutia an ruaithehte an zawh chuan, Joba chuan anni chu a ko khâwm a, a thian thianghlim hlawn a; zîng takah a tho va, an

hming kimin hâlral inthâwina a hlân thîn a. Joba chuan, "Ka fapate hian an rilrûah Pathian sawichhiain, thil sual an lo ti reng thei si a," a ti a ni. Joba chuan chutiang chuan a ti ziaa thîn a ni.

SETANAN JOBA NUNGCHANG A BEI

⁶Pathian fapate chu LALPA hmâa an inlan ni a lo thleng a, Setana pawh an zîngah a lo tel ve a.

⁷LALPA chuan Setana hnênah, "Khawi aţanga lo kal nge i nih?" a ti a. Setana chuan LALPA hnênah, "Leia ka vahvêlna aţang leh, hnung lam hma lam ka kâr tawn vêlna aţangin," tiin a chhâng a.

⁸LALPA chuan Setana hnênah, "Ka chhiahhlawh Joba anga sawisêl kâi lo leh mi ngîl, Pathian tîha, sual lam hawisan tlat mi ang hi leiah hian tû dang mah an awm lo, tih i ngaihtuah ngai em?" a ti a.

⁹Setana chuan LALPA chu a chhâng a, "Chhan leh vâng awm lovin Joba hian Pathian a tîh em ni?"

¹⁰A chhûngkua leh a neih zawng zawng nêl, kil tinah i hung vêl vek a ni lo'm ni? A kutkawihte mal i sâwm a, a hausakna te chu ram chhûngah hian a pung thûr thûr a nih hi.

¹¹Tûnah hian i kut han lek la, a thilneih zawng zawngte hi han khawih teh rêng, i hmaichhanah a sawichhe ngîl mai ang che!" a ti a.

¹²LALPA chuan Setana hnênah, "Chuti chu, a thilneih zawng zawng chu i kutah a awm ta e; amah tak erawh chu khawih suh ang che," a ti a. Tichuan, LALPA hnên aţang chuan Setana chu a chhuak ta a.

JOBAN A ROSUM LEH A FATE A CHÂN

¹³Ni khat chu, a fapate leh a fanuten an û ber ina chaw an eia, uain an in laiin,

¹⁴Joba hnênah zualko a lo tlân a, "Bâwngpate chuan lei an leha, an kianga sabengtungte an tlat laiin,

¹⁵Sabian-hovin an rawn rûn a, min chhuhsak vek a—chhiahhlawhte chu khandaihin an that a; kei chauh hi hrilh tûr chein ka lo tlân chhuak a ni!" a ti a.

¹⁶A la sawi lai mêkin midang a lo kal a, "Vân aţangin Pathian mei a lo tla a, berâm rualte leh chhiahhlawhte chu a rawn tikâng a, an kângral vek a; kei chauh hi hrilh tûr chein ka lo tlân chhuak a ni!" a ti a.

¹⁷A la sawi lai mêkin midang a lo kal leh a, 'Kaldai-ho pàwl thumah insiamin, sanghawngseite chu an rawn bei a, an man vek a, chhiahhlawhte chu khandaihin an that a; kei chauh hi hrilh tûr chein ka lo tlân chhuak a ni!" a ti a.

¹⁸A la sawi lai mêkin midang a lo kal leh a, "I fapate leh i fanuten an û ber ina chaw an eia, uain an in laiin,

¹⁹thlâlêr aţangin thlipui a lo thawk thut a, in chu a kil lî-ah a rawn nuai a, nula leh tlangvâl hote chu a delh a, an thi vek a; kei chauh hi hrilh tûr chein ka lo tlân chhuak a ni!" a ti a.

²⁰Tichuan Joba chu a tho va, a kawrfual a pawt thlêr a, a lu a ziat kawh a; leiah bawkkhupin Pathian chibai a bûk a.

²¹Heti hian a ti a: "Ka nu chhûl aţangin saruakin ka lo piang a, Saruak vêkin ka kîr leh dâwn a nih hi. LALPAN a pê a, LALPAN a la leh ta a; LALPA chu fakim awm rawh se," a ti a.

²²Hêng thil zawng zawngah hian Joba chuan tihsual a nei lo va, Pathian pawh a mawchhiat hek lo.

BUNG 2

SETANA'N NATNAIN JOBA A BEI

¹Pathian fapate chu LALPA hmaa an inlan ni a lo thleng leh a, Setana pawh LALPA hmaa inlan tûrin an zingah a lo tel ve a.

²LALPA chuan Setana hnênah, Khawi lam ațanga lo kal nge i nih?" a ti a. Setana chuan LALPA hnênah, "Leia ka vahvêlna ațang leh, hnung lam hma lam ka kâr tawn vêlna ațangin," tiin a chhâng a.

³Tichuan, LALPA chuan Setana hnênah, "Ka chhiahhlawh Joba anga sawisêl kai lo leh mi ngîl, Pathian țîha, sual lam hawisan tlat mi ang hi leiah hian tu dang mah an awm lo, tih i ngaihtuah ngai em? Chhan awm hauh lova mi tichhiattîr chung pawhin a ngai renga a la rinawm tlat hi," a ti a.

⁴Tichuan, Setana chuan LALPA chu a chhâng a, "Vun aiah vun le! Mahni nun thâp nân chuan miin engpawh a huam ang chu.

⁵Tunah i kut han lek la, a ruh leh tisa han khawih sak teh, i hmaichhan ngeiah ânchhia a lawh ngîl mai ang che!" a ti a.

⁶LALPA chuan Setana hnênah, "Nih leh le, i kutah a awm ta e, a nunna erawh chu zuah ang che," a ti a.

⁷Tichuan, Setana chu LALPA hma ata a chhuak a, Joba chu a kephah ațanga a chhîp thlengin pânchhia na tak a tuartîr ta a.

⁸Ani chuan inhih nân bêl keh them a la a, vaivut zingah a țhu a.

⁹A nupui chuan a hnênah, "I la rinawm tlut reng dâwn em ni? Pathian chu ânchhia lawh la, thi la a ni mai!" a ti a.

¹⁰Mahse ani chuan, "Nang hi hmeichhe mâwl te sawi âwm lek i sawi a nih hi. Pathian hnên ațang chuan thil țha kan hmuh ang bawkin, thil țha lo pawh kan hmu dâwn lo vem ni?" a ti a. Hêng thil zawng zawngah hian Joba chuan a kâ-in thil a tusual lo.

JOBA ȚHIAN PATHUMTE

¹¹Chûng thil țha lo tak tak Joba chung a lo thlen thû chu a țhian pathumten an lo hriatin, an awmna hmun țheuh ațangin an lo kal a—Teman mi Eliphaza te, Shuhi mi Bildada te leh Naamathi mi Zophara te an ni a. Amahrawn tuarpui a, rawn thlamuan tûra a huhova lo kal tumin hun an ruat a.

¹²Râl khat ațanga han en mai chuan tû a nih pawh an hre lo va, awrâwl chhuahin an țap râwih râwih a; an kawrfual te pawt thlêrin an lu chungah vaivut an vawrh a.

¹³Leiah chuan ni sarîh leh zan sarîh an țhutpui a, a lungngaih nasat zia an hmuhin, tûman a hnênah thu kamkhat mah an sawi lo.

BUNG 3

JOBA'N PIAN LOH A THLANG

¹Chumi hnu chuan Joba chu a rawn țawng chhuak a, a pianni chu ânchhia a lawh a.

²Joba chuan tihian a sawi a:

³"Ka pian ni kha boral thei sela aw, 'Mîpa fa a pai ta' An tih zân nêh kân.

⁴Khâ nî kha thim lo ni se; Chung Pathianin ngaihsak lo se, A chungah êng pawh chhuah lo se.

⁵Thim leh thihna hlimah chang sela; Chhûmin khuh reng sela; Chhûnah thimin tihlau rawh se.

⁶Chumi zân chu, thimin tuam tlat sela; Kum tluanin nîte zingah hlim ve suh se, Thla chhiarnaah pawh tel ve suh se.

⁷Chi thlah loh zân lo ni hlauh sela aw! Hlimna authâwm pawh lo lût suh se!

⁸Chû nî chu miten ânchhia lawh sela, A thei chuan Leviathan chawh tho se.

⁹Vârțian arsîte chu thim sela; Êng zawng se, hmu si lo sela, Khawvâr êng pawh hmu hek suh se;

¹⁰Ka nu chhîl kawng a khârpîn lohva, Ka mithmuha lungngaihna a thup loh vâng a ni si a.

¹¹"Engah nge thi saa ka lo pian loh le? Chhîl ata ka chhuah lai kân ka lo thih mai loh?

¹²Engah nge mal chung a mi lo châwi? Engah nge hnutêa mi lo chawm le?

¹³Ka mu ang a, ka reh hlen mai tûr, Ka muhil veng veng ang a; Ka chawh hlen daih tawh tûr.

¹⁴Leia lalte leh thurâwntute, Mahni chhiatna tûr satute nêh chuan,

¹⁵Anih loh leh, rangkachak ngah lal fapate, An in khata silvar chhêk khâwltute nêh;

¹⁶Engah nge thi saa piang anga thup lohva, Khaw êng hmu pha lo naupangte ang maia ka lo awm loh le?

¹⁷Misualten an tihbuai lohna hmunah, Chaute an chawlhna hmunah chuan.

¹⁸Tah chuan mi tângte an chawh a; Hnehchhiahtu âw an hre tawh lo.

¹⁹Milian leh mi tê an chêng za a, Sal te pawh an pute lakah an zalên a.

²⁰"Engah nge hrehawm tuarten êng an hmuh renga, Thlarauva na tuarte an dam reng?

²¹Thih châk ngawih ngawih, hmu si loten, Rophûm rûk ai pawhin an zawng nasa si a;

²²Thlân an hmuh mai pawhin A tihlim êm êm a ni lo'm ni?

²³Mi, a kawng thup saka hnênah engah nge êng pêk a niha, Pathianin a hung vêl tlat le?

²⁴Chaw ka ei dâwnin rûmna a lo thleng a, Ka rûm rîte chu tui angin a baw zawih zawih a.

²⁵Ka hlauh zâwng takin mi rawn nâng ta a, Ka râp zâwng takin mi chîm ta.

²⁶Ka hahdam lova, ka chawh thei hek lo; Manganna lo thlengin min awmtîr hle hle thei lo a nih hi," a ti a.

BUNG 4

ELIPHAZA: JOBA'N A TISUAL

¹Temani mi Eliphaza chuan heti hian a chhâng a:

²“Kam khat lek han sawi ve dâwn ila, i chauh phah ang em? Mahse tu nge tawng insûm reng thei bik ang?

³Mi tam tak i lo zirtîr tawh a, Kut chak lote i tichak tawh thîn a.

⁴I thûte chuan tlûte a chelh dîng a, Khûp zawite i tihchak sak tawh bawk a;

⁵I chung a lo thlen ve meuh chuan, i chau dêr mai maw! A han khawih che a, i buai ta mai si a.

⁶Amah i zahna chu i inngahna a ni lo vem ni? I rinawmna kawng chu i beisei chhan a ni lo'm ni?

⁷Han ngaihtuah teh, pawisawi lo tihbora an ni ngai em ni? Mi nunngîl tûte nge hnawh chhuah tâwk ngai?

⁸Ka hriat ve chinah pawh, Khawlohna tuhtu chuan, A ngai vêk manganna a seng thîn.

⁹Pathian thliin a tibora thîn a, A thinurna thâw-ah an rîral thîn.

¹⁰Sakeibaknei rûm te, sakeibaknei kawlh hâhum te, Sakeibaknei vanglai nghote chu tihtliah a ni.

¹¹Sakeibaknei tar chu ei tûr tlachhamin a bora a, Sakeibakneipui no hruaite an darh thîn.

¹²“A rûktein thu ka lo hria a, Ka bengin a phun ri a lo hria a.

¹³Mite an muttui lai taka, Ngaihtâlo deuha zân mumang ka ngaihtuah laiin,

¹⁴Hlauhna mirawn man a, ka khûra, Ka ruhte chu a inkhâwng hlawk hlawk a.

¹⁵Ka hmâah hian thlarauvin min pêl thuak a, Ka hmulthî a dîng ur ur a.

¹⁶A dîng reng a, A pianhmang ka hmu fiah thei lova. A rîruang erawh chu ka hmu vuai a ni; A rehina reh tlawk tlawk a; Tichuan, âw ka hre ta a:

¹⁷Thi thei mihring hi Pathian aiin a dik thei dâwn em ni? Mihring hi a Siamtu aiin a thianghlim thei em ni?

¹⁸A chhiahhlawhte pawh ring zo lova, A Vântirhkohte pawh tisuala a puh si chuan,

¹⁹Hlum ina chêngte phei chu a va ring lo lehzuâl dâwn êm! Vaivuta siam mai an ni a, Phêngphehlep ang leka derdêp a ni lo vem ni?

²⁰Zîng leh tlai inkâra keh sawm mai thei an ni a; Ngaihsaktu awm lovin an ral hlen thîn.

²¹An chungnunnain a kalsan a ni lo'm ni? Finna nei lovin, an thi mai a ni.’

BUNG 5

ELIPHAZA: PATHIANIN JOBA A THUNUN

¹“Han ko teh le; Rawn chhângtu tûr an awm emaw chu? Mi thianghlim tû ber chu nge i auh dâwn?

²Thinrimna hian mi â a tihlum thîn a, Itsiknain mi mâwl a that thîn.

³Mi â zungkai lai ka hmu a, Mahse a chênna chu ânchhia ka lawh nghal a.

⁴A fapate chu an him lo hle a, Kawngkaah chîl thlûkin an awm ang a, Chhantu an awm lo vang.

⁵Riltâmten a buhtar an ei zawhsak a, Hlîng kâra mi pawh an laksak ang a, A hausakna pawh rûkruten an rûksak ang.

⁶Tuarna hi vaivut aţanga awm a ni ngawt lo, Buaina hi lei aţanga lo chawr chhuak mai a ni hek lo.

⁷Meisî chung lamah a chho angin, Mihring hi buai tûra lo piang a ni zâwk.

⁸“Kei erawh chuan Pathian ka zawng ang a, Pathian hnênah ka chungthû ka thlen ang.

⁹Ani chu thil ropui leh chhui chhuah rual loh, Thilmak chhiar sen loh titu a ni si a.

¹⁰Leilung tân ruah a pê a, Lote chu tuiin a châwm a.

¹¹Mi tlâwmte chu a chawisâng a, Lungngaite chu hmun himah a dah kâng daih thîn.

¹²Mi vertherte remruat a hlawnchhamtîr a, An thil ruahman anga an puitlin loh nân.

¹³Mifingte chu an vervêkna thangin a âwk a, Mi vertherte remruatna chu anmahni chungah a lêt thuai thîn.

¹⁴Chhûn ênah pawh thimna an tâwk a, Chhûnah pawh zân angin an dap thîn.

¹⁵Pachhiate chu khandaih lakah te, Michak kâ aţangte, an kut aţangte in A chhan chhuak thîn.

¹⁶Tichuan, retheiten beiseina an lo nei a, Hleihneihnain a kâ a chip thîn.

¹⁷“Ngai teh, Pathianin mi a thunun chu a nihlawh e; Chuvângin Engkimtithêia thununna chu hmusit suh.

¹⁸A tihliam a, a tuam leh a; A tina a, a kutin a tidam leh thîn.

¹⁹Buaina paruk ata a chhan chhuak ang che, Ni e, thil t̃ha lo pasarih pawhin a khawih lo vang che.

²⁰Tâm a tlâkin thihna ata a chhan chhuak ang che a, Indonaah khandaih lakah a chhanhim ang che.

²¹Tawng chhe pui pui lakah thuhrûk i ni ang a, Chhiatna pawh lo thleng se, i hlau lo vang.

²²Chhiatna leh tâm te chu i nuihsan ang a, Leia sakawhlte i hlau hek lo vang.

²³In lova lungte nê in inrem tawh ang a, Ramsate nê in inrem tawh bawk ang.

²⁴I puan in chu a râlmuang tih i hria ang a, I chênna i fang vêl ang a, kim lo engmah a awm lo vang.

²⁵I thlahte chu tam tak an ni tih i hria ang a, I thlahte chu leia hnim ang mai an ni ang.

²⁶A hun taka buhpah an seng angin, Kum tling zânin thlanah i liam ang.

²⁷Ngai teh, hei hi ka chhui chhuak a; A dik ngei a ni. Ngaithla la, nangma tân hria ang che,” a ti a.

BUNG 6

JOBA: KA VUINA HI A DIK A NI

¹Joba chuan a chhâng a:

²“Aw, ka lungngaihna hi a vaia bûk han ni sela, Ka vanduinah hi bûknaah chuan han chhep ta ila!

³Tuipuia ãiau aia rit a ni ang— Chuvângin ka thu chhuak pawh hi bung tak a ni.

⁴Engkimtithia thal chuan mi chhun reng a, Ka thlarauvin a tûr chu a in ta a; Pathian ãihbaiawmna chuan mi châng reng a.

⁵Ram sabengtung chu hnim a peh laiin a hrâmin, Bâwngpa hian a chaw a bû khum ngai em ni?

⁶Chi tel lovin hânna nei lo chaw an ei ngai em ni? Artui pâwnvâr hian hânna a nei em ni?

⁷Ka nun hian khawih pawh a khawih duh lo ve, Ka tân luak tichhuak châw mai a ni.

⁸“Aw, ka dîl hi han hmu thei teh ila, Pathianin ka châk ngawih ngawih hi min pe phal sela aw!

⁹Tichuan, Pathianin min râwtsawmin, A kutin mi han tan chhum hmawk mai se aw!

¹⁰Chuti pawh ni se, thlamuanna ka la nei cheu vang, Lungngaihna kârah ka intipachang ang, Min dîm hauh suh se, Mî Thianghlina thu chu ka phat loh avângin.

¹¹Beisei tûr eng chakna nge ka la neih? Ka nun pawtsei ila, eng nge ka tâwpna tûr ni ang le?

¹²Lung ang maia chak ka ni em ni? Ka tisa hi dâr a ni em ni?

¹³Mahnia ãang tûr ka awm ta na nge? Finna chuan mi kiansan ta daih em ni?

¹⁴“Tihhrehawm tuara chu a ãianten an lainat tûr a ni a, Engkimtithia ãihna lo hawisan tawh mahse.

¹⁵Ka unaute chu kawrte anga bumhmang an ni, Kawrte tui relhrû ang mai hian,

¹⁶Vûr avânga a tui chu dum kûk, Chuta vûr inphûm ãhin ang chu.

¹⁷Khua a lumin a luang thei lo va; A sat veleha kangchat leh mai ãhin ang hi an ni.

¹⁸An kawng chu a kawî ãhin a, Khawî mah thleng lovin a riral ãhin.

¹⁹Tema sumdawngte chuan an en a, Sheba sumdawngten an beisei ãhin.

²⁰An rina chuan a tibeidawng a, Hrilhai tûr lekin anrawn pan a.

²¹Tunah hian engmahlo mai in ni a, Ka tlâkchhiat dân in hmu a, in hlau va.

²²“Englo min pe teh u’ ka ti ngai em? ‘In neih ãtin ka dîl ngai che u em?’

²³“Hmêlma laka chhan chhuah ka dîl ãhin che u em ni?’ ‘Hnehchhiahtu kut ata chhan chhuah ka ngên che u em le?’

²⁴“Min zirtir ula, ka ngawi na’ng e; Ka diklohna min hrilhfiah teh u.

²⁵Thudik chuan thil a tithei asin! Nangni thu hian eng nge a chanchhuah ve le?

²⁶Ka thusawiah mi zilhau tumin, Mi mangang kamchhuak hi thlî ang lekah in chan ang maw?

²⁷Pa neilo te in chhaih buai a, In ãiante tlâkna tûrin khur in lai duh a.

²⁸Chuvângin, min han en ta che u, In hmaichhanah ka daw ngai lo asin.

²⁹Inlamlêt ula, diklo takin ti teh suh u! Tlâwm hreh suh u, ka dikna hi a la ãing reng asin!

³⁰Ka leiah hian diklohna eng nge awm? Diklo chu ka thliar hrang thei lo vem ni?

BUNG 7

JOBA: THIL HREHAWM KA TUAR

¹“Lei mihring tân hun ruat a awm a ni lo’m ni?” A nîte chu inhlawhfâkna nî ang lek a ni lo vem ni?

²Chhiahhlawh daihlim thlahlel êm êm ang leh, Inhlawhfain a hlawh tûr a lungkham ang hian,

³Engmahlovah a thlâ têlin khawh ralna hun min pê a, Ka tân zan hrehawm ruatsak ka ni a.

⁴Ka mutin, ‘Engtikah tak tho ang i maw, Engtikah tak khua chu vâ ang maw?’ ka ti a. Khawvâr dâwn thleng in ka let ka let ãhin.

⁵Ka tisa hi lung leh vaivutin a khat a, Ka vun hi a pill a, a khawk diai duai a.

⁶“Ka hunte hi puantahtu khawhthei aiin a kal chak a, Beisei tûr nei lovin a liam mai mai a.

⁷Ka nunna hi thlî mai a ni tih hre reng la! Ka mit hian thil ãha a hmu tawh dâwn si lo.

⁸Min hmutu mit pawhin min hmu leh tawh lo vang; Ka chung a i mit a fûk hun chuan hmuh tûr ka awm tawh lo vang.

⁹Chhûm a kiang a, a ral ãhin ang hian, Thlâna chhuk thla tawh an lo chho leh ngai si lo.

¹⁰A inah pawh a kîr tawh dâwn hek lo, A awmna hmun pawhin a hre tawh hek lo vang.

¹¹“Chuvângin insûm lovin ka ãawng zêl dâwn; Thinlung ngui takin ka ãawng ang a; Rilru na ngawih ngawihin ka han vui teh ang.

¹²Tuipui leh, tuipui rûl ang zia zânga, Heti taka min vên tlat mai le?

¹³Khum hi chuan mi a tihahdam anga, Mut chuan vuivaina pawh a tinêp deuh ang chu,’ ka ti a;

¹⁴Mangchhiain min tihthaih a, Inlârnain min tihthaih baw si a.

¹⁵Hetiàng hrepa taksaa dam reng ai chuan Ka nun hian rehhlum mai a thlang thîn.

¹⁶Nun hi ka ning hluah hluah a, Dam reng pawh ka peih ta lo ve. Min awmtîr hle hle teh u, Ka dam chhûng nite hi engmahlo mai a ni ta si a.

¹⁷“Mihring hi eng nge maw a niha, i châwisâna, I thinlung a luah tlat le?

¹⁸Tûk tina i kan ziaha, I fiah châmchî mai le?

¹⁹Min en reng loh lai hi engtia rei nge? Chil lem chhûng tal khawdang i hawi dâwn lo'm ni?

²⁰Ka lo sual ta em ni? Aw, mihringte vêngtu, i chungah eng nge ka tih tak? Engah nge thlûr bîk tûra min siam a, Mahni tân pawha phurrit ka nih tak le?

²¹Engah nge ka bawhchhiatna i ngaihdam lohva, Ka sualna i lakbo mai loh le? Tunah te hian vaivut zînga mûin, Min rawn zawng chîam mah ula, Hmuh tûr ka awm tawh hauh lo tûr,” a ti a.

BUNG 8

BILDADA: JOBA HI INLAMLÊT RAWH SE

¹Shuhi mi Bildada chuan a chhâng a:

²“Hêtiàng thû hi engchen nge i sawi anga, I tawngkâ chu thlichhia ang maia a nat reng dâwn le?

³Pathianin rorêlna hi a tikhawlo ngai em ni? Engkimtitheian dikna a kailek em ni?

⁴Ani chungah i fate an sual chuan, An bawhchhiat avânga paih thlak an ni ang.

⁵Thahnemngai taka Pathian i zawna Engkimtitheia hnêna dîlna i thlen chuan.

⁶Mi thianghlim leh dik i nih chuan, I tân a rawn harh chhuak ngei ang; I awmna tûr dik takah a tihmuingîl bawh ang che.

⁷I bulâanna chu beitham deuh mahse, I tâwpna lamah i lo buk luai dawn asin.

⁸“Hman lai hunte kha chhui kîr la, Pipute thil hmuh chhuahte kha ngaihtuah ta che;

⁹Keini nimin lawka piangte hian engmah kan hre lo ve, Kan lei nun hi hlimthlâ ang lek a nih hi.

¹⁰Anni chuan zirtîra, hrilh che u-in, An rilru tak an sawi lo vang em ni?

¹¹“Dûm lovah papyrus a tō thei em ni? Tui awm lohnaah phairuang a t̃hang duang thei em ni?

¹²Sah thlûk lohva a la hrin reng lai pawhin, Hnim dangte aiin a uai hma thîn.

¹³Chutiàng chu Pathian theihngihltute kawng a ni; Mi vervêkte beiseina chu a boral ang,

¹⁴An rinchhan chu tihtlihsak a ni ang a, An inngahchhan chu maimawm rîl mai a ni.

¹⁵A in chu rinchhan mahse, a dâwl zo lo vang. Vuan tlat mahse, a dîng zo chuang lo vang.

¹⁶Ni êngah a chawr hring dup a, A huanah chuan a tawi buk luai a.

¹⁷Lung kârah zung a thlak a, Lung zîngah hmun a dap thîn.

¹⁸A awmnaa tihchhiat a nih chuan, ‘Ka hmu ngai lo che,’ tiin a phat ang.

¹⁹“En teh, a kawnga hlimna chu hei hi a ni, Lei aţangin a dang an lo tō chhuak ang.

²⁰Ngai rawh, Pathianin sawisêl kailote chu a paih bo dâwn lova, Thilsual titute lah a tungding dâwn hek lo.

²¹I kâ chu nuihnain a tikhat ang a, I hmu pawh hlimnain.

²²Nangmah hawtute chu zahnain a tuam ang a, Mi suaksual chênna chu engmah lovah a chang ang,” a ti a.

BUNG 9

JOBA: PALAI AN AWM LO

¹Joba chuan a chhâng a:

²“Chutiàng chu a dik tih ka hria alâwm, amaherawhchu Mihring hi engtin nge Pathian hmâah mi dik a nih theih ang?

³Hnial ve chu châk thîn mahse, Vawi sângah vawi khat pawh a chhâng thei lo vang.

⁴Pathian chu thinlunga fing, chaknaa thiltithe i a ni. Tu nge alakah intingêng chungah hmuîngîl thei le?

⁵Tlângte a sawn bova, mah se Thinura a sâwi danglam lai pawh an hre hek lo.

⁶Lei hi a awmna ngai ata a sawinghîng a, A bante chu a ngîng dur dur a;

⁷Nî chu thû a pê a, a lo chhuak lo va; Arsîte chu a khârkip tlat a;

⁸Amah chauhvîn vîn a kaipharh a, Tui fâwn chungah te a kal a;

⁹Zângkhua te, Chhohreivûng te, Sirukte a siam a, Chhim lam arsi bâwrte nê;

¹⁰Chhui chhuah rual loh thilmakte a ti a, Ni e, thilmak chhiar sên rual loh chu.

¹¹Ka bulah hian lo kal se, ka hmu thei lo vang a; Min kal pêl dâwn se, ka hre hauh lo bawh ang.

¹²Eng pawh la bo dâwn se, tu nge dâl thei ang? ‘Eng thil nge i tih?’ tia hnial thei an awm em ni?

¹³Pathianin a thinur a bengdai lo vang a, A hnuaia mi chapote chu an kûn reng mai ang.

¹⁴“Amah chu engtin nge ka chhân theih anga, A hnialna tûr tawngkam ka thlan theih ang?

¹⁵Dik pawh ni ila, ka chhâng thei chuang lo vang; Ro mi rêlsaktu hnênah ka dîl zawh ang.

¹⁶Ka kohva mi chhân pawhin, Ka âw a ngaihchân vângah ka ngai chuang lo vang.

¹⁷Thlîpui hmangin mi sawp nek a, Chhan awm lovin mi hliam belh ta a.

¹⁸Thâwk lâkna awm thei lo khawpin, Khâkna hlîrin mi tikhat a.

¹⁹Chakna thu-ah chuan, ani zawng a chak alâwm; Rorêlna thu-ah tu nge ka din hun mi ruatsak ang?

²⁰Dik pawh ni ila, keima kê ngein thiam loh mi chantîr ang a, Sawisêl bo pawh ni ila, ka khawlohma a hailang tho vang.

²¹“Dem kai lo ni mah ila, tu nge ka nih ka inhre chuang lo vang; Ka nun hi ka ngainêp a ni.

²²Hei hi thil pakhat a ni e; Chuvângin ‘Tha famkim leh mi sual pawh a tiboral vê vê,’ ka ti ta a ni.

²³Chhiatnain thihna a thlen thut chuan, Pawisawi lote chan chu a nuihzat ang.

²⁴Lei hi mi suaksual thû thûa dah a ni. A rorêltute hmai a khuh a, Amah ni lo se, tû dang nge ni ang?

²⁵“Mi tlân chakte aiin ka hun hi a liam chak a; Thil tha pawh hmu lovin an thlâwk bo daih a.

²⁶Lawng chak chi angin an liam vut vut a, Mupui bir vang vang ang hian.

²⁷Ka vuina hi ka theihngihl tawh anga, Lungngai hmêl dah bovin, hlim hmêl ka pu ang,’ ti mah ila,

²⁸Ka tuarna zawng zawng hian min tihlau va; Pawisawi lovah min ngai dawn si lo.

²⁹Thiam loh min chantîr se, Engah nge tûl lova ka intihhah ni?

³⁰Vûr tua inbualin, ka kutte hi, Sahbawnin sil mah ila,

³¹Chirhah min paih lût tho vang a, Ka silhfên te pawhin mi ten hial ang.

³²“Ani chu keimah anga Ka chhân theih tûr mihring a ni si lo va, Rorêlna hmuna kal dunpui chi pawh a ni hek lo.

³³Kan chung a bân phar tûr, Kan kêra palai tûr pawh an awm si lo va.

³⁴A tiang chu ka lakah la bo sela, A tihbaiawmna chuan mi tihthaih suh se.

³⁵Tichuan, amah hlau lovin ka sawi ang, Mahse chutiang chuan ka ti thei si lo.

BUNG 10

JOBA: PATHIAN HNÊNAH KA DIL ANG

¹“Ka awm dân hi ka nun hian a ning hluah hluah a; Duh tâwkin ka’n âng vak teh ang, Rilru na takin a ni ka sawi dawn ni.

²Pathian hnênah heti hian ka ti ang, ‘Mi dem lul suh la; Engvânga mi bei vak nge i nih mi hrilh rawh.

³Nangin hnehchhiah taka mi tiha, I kut chhuak ngei i han hmuhsita, Mi suaksualte remruat lawmpui hi, tha i ti dawn em ni?

⁴Tisa mitte i nei ve em? Mihring hmuh angin i hmu ve em?

⁵I nîte chu thi thei mihringte ni ang a ni ve em? I kumte pawh mi chakte kum ang a ni em ni?

⁶Ka khawlohnate zawnga Ka sualnate i dap chhuah na tûrin.

⁷Mi suaksual ka ni lo tih hre reng mah la, I kut ata chhan chhuak thei tumah an awm lo.

⁸I kutin mi din a, Sakhatin mi zawm khâwm vek a, Min tiboral leh si a.

⁹Hlum ang lekin min siam tih hre reng la, Vaivutah mi chantîr leh dawn em ni?

¹⁰Hnute tui anga mi bun chhuakin, Hnute khal angin min hlâwm a,

¹¹Vun leh tîsain mi tuam a, Ruh leh thahruiin min phuar khâwm lo vem ni?

¹²Nunna leh duhsakna min hlân a, Min enkawlin ka thlarau i vawng him a.

¹³I thinlungah hêng hi i lo thup a; I hnêna mi a ni tih ka hria e:

¹⁴Tisual ila, min chhinchhiah tlat a, Ka khawlohma ata mi chhuah dawn si lo.

¹⁵Mi suaksual ni phei ila, ka chung a va pik dawn êm; Mi dik pawh ni ila, ka hawi sâng thei chuang lo. Mualpho takin ka awm a; Ka chan chhiatzia tak chu âw!

¹⁶Lo indah sâng ila, Sakeibaknei kawlh pêl takin min pêl dawn si, Ka laka i awmdan hi chu râpthlak tak a ni.

¹⁷Min hêkna tûr i zawng thar zêl a, Ka chung a i lawmlohna i tipung zêl si a; Mi beih dan i thlak reng mai a nih hi.

¹⁸Engah nge chhûl aţang khân mi lak chhuah ni? Tûma hmuh lohvin lo thi daih ila aw!

¹⁹Awm lo ang mai ka lo ni ang a. Chhûl ata thlân ka pan nghal mai tûr.

²⁰Ka dam chhûng nite hi tawitê a ni lo vem ni? Châwl se! Thâwk lâk chhûng tal mi kiansan teh se,

²¹Kîr leh tawh lohna hmuna ka kal hma ngei hian, Thihna ram leh thihna hlimah chuan,

²²Thimna ang maia thimna ram, Thihna hlim anga mumal rêng rêng awm lohna, Êng pawh thim ang mai a nihna hmunah chuan,” a ti a.

BUNG 11

ZOPHARAN JOBA SIM TÛRIN A NAWR

¹Naamathi mi Zophara chuan heti hian a chhâng a:

²“Chutiang thu zozai chu chhân loh chi em ni? Tawng tui tam vânga thiam chan tûr em ni dawn?

³I tawng tamna khân min tingawi ang maw? Mi i nuihsawh hian zilh i tâwk dawn lo vem ni?

⁴I insawi dânin, ‘Ka thu hi a dik a, I mithmuhah ka thiang e’ i ti rawk a.

⁵Pathian hirawn tawng chhuakin, Han kamkhat deuh che sela zawng,

⁶Finna thurûk a entîr tûr che a nia le! I finna chu a lêtin a han tipung mai tûr. Chuvângin, Pathianin i khawlohnain a phû aia nêpin A tuartîr che tih hria ang che.

⁷Pathian thuril i zawng chhuak thei em ni? Engkimtitheia thlen chin i hre pha em ni?

⁸Vân aia sâng a ni a, eng nge i tih ve theih? Hremhmun aia thûk a ni a, i hre phâ em ni?

⁹An tehna chu kawlkil aia thui Tuifinriat aia zau a ni asin.

¹⁰“Lo kalin, man che sela, rorêlnaah hruai che sela, Tu nge dodâl thei ang le?

¹¹Bumhmangte chu a hria a, Suahsualna pawh a hmu reng bawk a. A la ngaihtuah dawn lo vem ni?

¹²Ram sabengtung no mihringa a pian chuan, Mi chhawih pawh a fîng ve mahna.

¹³“I thinlung i buatsaih a, A lama kut i phar chuan;

¹⁴I kuta khawlohna i dah bo daih chuan, I puan inah suahsualna a chêtîr dawn lo zu nia;

¹⁵Tichuan, hmêlhem lovin i hawi chhuak thei ang a; Ni, hlau lovin, ngaihngam takin i awm thei tawh ang;

¹⁶I lungngaihna i theihngihl ang a, Tui luang liam ta daih angah i ngai tawh ang,

¹⁷I nun chu chhun lai aiin a êng zawk ang. Thim pawh ni la, zîng angin i êng ang.

¹⁸Beisei tûr a awm avângin, i lungmuang tawh ang; I hawi vêl ang a, ngaihngam siahin i châwl dawn nia.

¹⁹I mu siai siai ang a, tuman an tihlau lo vang che; Ni, mi tam takin an tlawn ang che.

²⁰Mi suaksualte mit chu a del ang a, An pumpelh hauh lo vang, An beisei tûr chu--thih a ni mai!” a ti a.

BUNG 12

JOBAN AMAH HNIALTUTE A CHHÂNG

¹Joba chuan a chhâng a:

²“Nangni hi in lo fin takzet hi le, In finna pawh nangmahni rualin a thi ve dawn si a!

³Nangni tluk zetin kei pawhin ka hre ve bawk asin; In lakah ka nêp bik lo ve. Hetiang thilte hre lo tu nge awm?

⁴“Kei zawng thiante nuihzatbûr ka ni a, Mahse Pathian au va, au ei ngeitu ka ni a, Mi dik leh famkim hi miten an nuihzat thîn rêng a nia.

⁵Nuamsa taka awmte rilruah vanduaite hmuhsitna a awm a, Rahbi tleute tâna khawrêlah an ngai thîn.

⁶Rûkrûte puan in chu a hmuîngîl a, Pathianin an kuta thil a pêkte hmang ngeia Pathian cho thinurtute hi an him phian a.

⁷“Ramsate hi zawt teh, an lo zirtîr ang che; Chunglêng savate pawh zâwt la, an hrilh thei ang che;

⁸Leilung pawh hi zâwt la, a zirtîr ang che a; Tuipuia sanghate pawhin an hrilhfiah thei ang che.

⁹Hêng hi LALPA kutchhuak vek a ni tih Hre lo fa tu nge awm ang?

¹⁰Tû kutah nge nungcha tinrêng nunna a awma, Mihring zawng zawng thâw a awm le?

¹¹Beng hian a thu hriat a thliar hrangin, Kâ pawhin ei tûr a tem thîn lo vem ni?

¹²Upa te chu an fîng deuh nge nge a, Dam reiten hriat thiamna an nei bawk.

¹³“Finna leh chakna chu ama hnêna awm a ni a, Remruatna leh hriat thiamna hi a ta a ni.

¹⁴A thiat tawh chu sak that leh rual a ni lo; A khârkip tawh mihring tân chhuahna rêng a awm lo.

¹⁵Tuihnâ khâr se, leilung a ro vawng vawng ang a; Arawn leih buak chuan, leilung a chîm leh thîn.

¹⁶Chakna leh finna hi a hnêna awm a ni a. Bumtu leh a buma chu ama tâ tho an ni.

¹⁷Remruattute chu saruakin a hruai bo va, Rorêltute pawh a ti â thîn.

¹⁸Lalte phuarna a phelh a, Kâwnghrênin an kâwngha a hrêng a.

¹⁹Miliente chu rawkin a hruai bo va, Mi chakte a paih thla a.

²⁰Mi rin tlâkte thusawi a hnâwl a, Upate hriatna a lak bosak thîn.

²¹Miliente a hmusit a, Mi chakte chakna a chhuhsak a.

²²Thim zîng ata thil thûk a hai chhuak a, Thihna hlim chu êngah a chantîr.

²³Hnamte a tiropui thîn a, a tiboral bawk thîn; Hnamte a tilian a, a kaihrui thîn.

²⁴Leia lalte hriat thiamna a lak bosak a, Thlalêr kawng awm lohna hmunah a vahvaihtîr thîn.

²⁵Êng awm lohna thim zîngah an dap an dap a, Zu rui ang maiin an pai an pai thîn.

BUNG 13

¹“Han en teh u, hêng hi ka mitin a hmu vek a, Ka bengin a hria a, a man thiam asin.

²In hriat ang chu, kei pawhin ka hre ve bawk asin; Nangni aiin ka nêp bik hek lo.

³Engkimtitheia hnênah thu thlen ka duh a, Pathian nêna sawi dun ka châk a ni.

⁴Nangni erawh chu dâwt phuachhawptu in ni a, Râwn tlâk loh daktawr in lo ni e.

⁵Ngawi hlê hlê ula, In tân a finthlâk zâwk tûr!

⁶Ka thu hi lo ngaithla ula, Tawngkaa ka ngenna hi min lo bengkhawn teh u.

⁷Pathian tân chimawm deuhin in tawng dawn em ni? Amah tan inti siin, bumna hmangin in tawng ang mâw?

⁸Hleih nei chungin amah ka thlâwp, in ti ang mâw? Pathian tân in tang takmeuh ang maw?

⁹Chhui chhuak che u sela, tha in ti ang em? Mihring angin in nuihzatin, in diriam thei em ni?

¹⁰Arûka hleih in neih vaih chuan A zilh hrep mai ang che u.

¹¹A that chungchuanna chuan tihlau che u-in, A tîhbaiawmna chuan a delh bet dawn lo che u em ni?

¹²In thufing sawi ve te lah vaivut thufing lek a ni a, In invênate chu hlum mai a nih kha.

¹³“Lo ngawi mai ula, keima’n ka’n sawi ang e, Anih nih ka ni mai ang chu!

¹⁴Ka tisa hi ka hân ka pet anga, Ka nunna hi ka kutah ka dah dâwn em ni?

¹⁵Mi tihlum dâwn mahse amah chu ka ring cheu vang. A hmâah chuan ka awm dân ka tan zêl ang.

¹⁶Amah chu mi chhandamtu a ni bawk ang, Pathian hmâah mi verther an lang ngam si lo va.

¹⁷Ka thu hi ngun takin lo ngaithla ula, Ka thupuanah in beng lo chhi teh u.

¹⁸En teh u, ka thiamthu ka peih fel tawh a, Thiam ka chang dâwn tih pawh ka hria.

¹⁹Tu nge min hnialtu tûr chu? Tûna ka ngawih mai ai chuan ka boral zâwk na’ng e.

JOBA BEIDAWNG TAWNGTAI

²⁰“Thil pahnih chiah mi tihsak suh ang che, Tichuan, i lakah ka inthup dâwn lo nia:

²¹I kut hi ka hnên ata lakiang daih la, I tihbaiawmnain mi tihlau suh se.

²²Tichuan, mi ko la, ka chhâng ang che; A nih loh leh, kei tawng îla, nangin mi chhâng ang che.

²³Ka bawhchhiatna leh sualnate hi engzata tam nge? Ka bawhchhiatna leh ka sualna min hrilh rawh.

²⁴Engah nge i hmêl i thup tlata, Hmêlma anga mi en tâk mai?

²⁵Hnahtel tihthaihin i chhaih dâwn nge? Buhpâwl ro i ûm zui dâwn?

²⁶Ka chanchin chhe lai lai i ziaak a, Ka tlangvâl lai khawlohna mawh mi awrhtîr a.

²⁷Ka kêah kawl mi buntîr a, Ka kalna kawng zawng zawng mi enthla a. Ka hniak lamin i lo chhinchhiah a.

²⁸“Mihring hi mawih ral mai tûr ang leh, Thîm ei hnu silhfên ang chauh a lo ni e.

BUNG 14

¹“Hmeichhe hrin mihring chu Rei lo te daih, buainaa khat a ni.

²Pangpâr anga lo chhuakin, a vuai leh mai thîn; Hlimthlâ angin a ral a, a awm hlen lo;

³Chutiang mi lek chu i hmu-mawhin, I rorêlna hmaa khin thamah mi ruat rêng em ni?

⁴Tu nge bawhlhlawh aţanga thil thianghlim la chhuak thei? Tû mahin!

⁵A dam rei tûr chin chu ruatsa a nih avângin, A thla zât lamin i kuta awm a ni a; Ramri i kamsak tawh a, a pêl thei lo vang.

⁶A chawlh theih nân khawdang hawisan rih la, Inhlawhfâ anga a nî a hman zawh thlengin.

⁷“Thingah hi chuan beiseina a awm a, An kih hnuah pawh a lo chawr leh thei a, Tâwp lovin zîk thar a chhuah leh thîn.

⁸zungte chu leiah lo tar zêlin, A bul pawh lei seh chinah thi mahse,

⁹Tui rim a hriat chuan a lo chawr a, Thlai angin zâr a chhuah leh thîn.

¹⁰Mihring erawh chu a thi a, a riral thîn a; Ni e, mihring chuan a thlarau a thlah a, Khaw nge a awm tâk?

¹¹Tuipui aţangin tuihû a chhuak thîn angin, Lui te chu a kangchat a, a ro thîn a,

¹²Chutiangin mihring pawh a muhîl a, a tho leh lo va. Vânte awm loh vek hmâ chuan, An thangharh lo vang a An muhîl pawh kaihthawh an ni hek lo vang.

¹³“Aw, thlânah mi thukru daih la ka va ti êm! I thînur daih hmâ zawng min thukrû la, Hunbi mi ruatsakin, mi han hre reng teh aw!

¹⁴Mi a thih hian a nung leh dâwn em ni? Ka thawhrim chhûng zawng hian ka nghâk reng anga, Tihdanglama ka awm hun thlengin.

¹⁵Mi ko vang a, tichuan ka chhâng ang che; I kutchhuak chu i ngaina dâwn si a.

¹⁶Tunah hian ka pên zât chenin i chhiar a, Ka sual erawh chu chhui suh ang che.

¹⁷Ka bawhchhiatna chu ip chhûngah i châr tlat a, Ka khawlohna min khuh bosak ta a.

¹⁸“Tlâng te a chim a, a riral ang leh, Lungpuite pawh an awmna hmun ata an insawn thîn ang hian;

¹⁹Tuiin lung te a hrût ral ang leh, Tuihâwkin lei a hrût ral hiau hiau ang hian; Mihringte beiseina i tih bosak thîn.

²⁰Kumkhua atân i hneh a, a ral ta a; A hmêl awmdan tidanglamin, i tîr bo ta a.

²¹A fapaten an rawn châwimâwi a, ani chuan a hre ve lo; Tihlâwmin awm mahse, a rawn hre pha tawh lo.

²²A tisa erawh chuan nâ a tuar ang a, A thlarauvin amah chu a sîn ang,” a ti a.

BUNG 15

ELIPHAZA’N JOBA MI Â-AH A PUH

¹Teman mi Eliphaza chuan a chhâng a:

²Mi fîng chuan hriatna thu ho tak taka chhângin, Khawchhak thlîin a inhâmpuar ang mâw?

³Hlâwkna awm lo tawngin a hnial anga, Tthatna paw chhuak thei lo thûte a sawi ang mâw?

⁴Hlauhna pawh i nei ta lo va, Pathian hmaa tawngtai i thlahthlam ta a.

⁵I kê hi i khawlohnain a thunun a, Vervêkna tawngkam i thlang ta zat zat mai le.

⁶Keima kê ni lovin, nangma kê ngeiin a thiam lo che a ni; Nî e, i hmuî ngeiin a hêk che hi.

⁷“Mihring zîngah i piang hmasa ber em ni? Tlângte awm hmaa siam i ni em ni?

⁸Pathian remruat i hre pha em ni? Finna hi i tâ bîk emaw i ti em ni?

⁹Kan hriat loh eng nge i hriat bîk? Kan neih loh eng ang hriat thiamna nge i neih bîk?

¹⁰Kum upa leh sam ãuak vâv vek tawh, I pa aia upate pawh kan zîngah an awm a.

¹¹Pathian thlamuanna hi tē tham i ti a, A ãawngka nēm chu i khawpkham lo vem ni?

¹²Engah nge i thinlung hian a hruai bo che a, Engtizia nge i men tâl tawp tawpa,

¹³I thlaraubin Pathian lam a do tlata, Chutiang thute i kê ata i puh chhuah tâk mai?

¹⁴“Mihring hi eng nge a niha, engtin nge a thianghlim theih ang? Hmeichhe hrin chu engtin nge mi ãhâ a nih theih ang?”

¹⁵Pathian hian a mi thianghlimte pawh a rin zawh lohva, A mithmuhah vânte pawh a thianghlim lo a nih chuan,

¹⁶Mi tenawm leh bawlhhlawh, khawlohna tui in ãhîn Mihring chu a va thianghlim lo lehzuâl dâwn êm!

¹⁷“Lo ngaithla la, ka han hrilh ang che; Ka hmuh angin ka puang mai dâwn a ni,

¹⁸Mi fîngten an lo sawi ãhîn, An piputen engmah zêp lova an lo hrilh chhâwn chu,

¹⁹Ram dang miten an luahpui hmaa, Anmahni chauh a pêkte hnēna mi chu:

²⁰Mi suaksual chu a dam chhûngin na tuarin a awm a, A kum zât lah chu tiduhdahtu laka thup a ni si a.

²¹A bengin ãhâwm râphtlak tak takte hriain; A nawmsak lai takin tiboraltuin a rawn bei a.

²²Thim ata a chhuah leh theih a inring lova, Khandaihin a lo châng reng si a.

²³Ei tûr zawngin, ‘Khawiah nge?’ tiin a vâkvai a. Thimna ni chu a lo hnai ta tih a hria a.

²⁴Manganna leh lungngaihna in a tihlau va; Indo tûra inpeih lalin a hneh angin, an hneh ta.

²⁵Pathian do zawnga kut a lek avângte, Luhul taka Engkimtitheia a do avâng te,

²⁶Pawisa lo taka amah dova, a phaw cheimâwi nēna a tlân luih zêl avângin.

²⁷“A thau chuan a hmai chu tuamin, A ãulah thau chhêk mahse,

²⁸Khawpui ram hnuah te a chêng a, Tûma luahloh inah te chuan, Chûng chu tlu chhe mai tûr a ni a.

²⁹A hausa lo vang a, A hausa zui zêl hek lo vang a, A thilneihte chu leiah a ãarh zau hek lo vang.

³⁰Thim ata a chhuak lo vang a; Meialhin a zârte a hliau ro ang a, A kâa ãhâwvângin a kal bo vang.

³¹Mahni inbumin, thil lawilovah inngat suh se, A hlawh chu engmahlo mai a ni dâwn si a.

³²A hun hmaa tlingtla mai tûr a ni a, A zâr pawh a hring hman lo vang.

³³Grêp hrui angin a rah helte a sawi ãil ang a, Olive angin a pâr a thlawn vek ang.

³⁴Mi vervêk pâwlte chuan rah an chhuah lo vang a, Thamnaa sak puan inte chu a kângral ang.

³⁵Pawikhawih tûr an ãap a, khawlohna an hring a; An chhûl âtangin bumna a lo intintuah sa reng a ni,” a ti a.

BUNG 16

A ȚHIAN LAINATNA NEILOTE JOBA’N A HAU

¹Joba chuan a chhâng a:

²“Chûng thil chu ka hre hnem ta e; Thlamuantu tuarhlelhawm mai in lo nih hi!

³Thu puarpawlêng hian chin lêm a nei em ni? Engin nge chhâng tûra han chawktcho che chu le?

⁴I sawi ang chu ka sawi ve thei tho asin, Ka awmdan ang hian awm ve ula zawng, Thû hlîr thû hlîrin ka chhilh vûm hnawt thei ang che u-a, Lû ka thinkhum bawt ang che u.

⁵Mahse, ka kê hian ka tichak zawt ang che u a, Ka kamchhuak hian in lungngaihna a chhâwt dâwn nia.

⁶“Thu sawi mah ila, ka lungngaihna a chhâwt chuang si lo; Ngawi reng ila, ka hah a ãam phah bawt si lo.

⁷Tunah chuan, aman min tichau ta a; Ka ãhianta i hnawt ãiau zo ta.

⁸Nangin mi sâwr fû zo va, Chû chu keimah mi hêktu a ni zui a; Ka chêrzia hian ka nihna a tilang reng a, Ka hmai zûr pawhin a entîr a ni.

⁹A thinurin mi taithlêr a, min hua a; Hachang min ãhialkhum a; Ka hmêlma chuan min melh rum ûl a.

¹⁰An kê min ânkhum zuau zuau va, Hmuset takin biangah min bêng a, Min bei tûrin an inhâwrkhâwm a.

¹¹Pathian chuan ringlo mite kutah min pê a, Mi suaksualte kutah min hlân a.

¹²Thlamuanga ka awm laiin min tisawm vek a; Ka nghâwngah ãhâmin, min ãhîng ãarh a, A tînzâwnah mi hmang si a.

¹³A ãhalkâptuten min hual a. Ka thinah min vit tlang a, min lainat si lo; Leiah ka mît a tibua a.

¹⁴Hliam chungin hliam mi tuartîr a; Pasalãha ang maiin mi ûmzui a.

¹⁵“Ka vun khuh nân saip puan ka ãhui a, Vaivut chungah lû ka ngat a.

¹⁶Hmai sen vek khawpin ka ãap a, Ka mit kovah te hian thihna hlim a zâm a;

¹⁷Keima dik lohna avâng erawh chu a ni lo, Ka ãawngtâi ngei pawh a thianghlim bawt si a.

¹⁸“Aw leilung, ka thisen hi khuh bo suh la, Ka ãah hian chawlhna hmun rêng nei suh se!

¹⁹Tûnah hian ka thu mi hriatpuitu chu vânah a awm a, Chung lamah ka thu dikzia finfiahna a awm.

²⁰Ka ãhianten min nuizhat a; Pathian hnēnah ka mittui hi a sûrin a sûr a.

²¹Miin a thenawm tân a ngensak ang hian, Pathian hnêna min sawisaktu han awm teh sela aw!

²²Kum rei lo tê a ral hnûah zawng, Kîr leh tawh lohna kawng chu ka zawh ve tawh ang.

BUNG 17

JOBA'N HAHCHAWLH A DÎL

¹Ka thlarau a mang zo ta, Ka nîte pawh a ral ta a, Thlân pawh ka tân a inpeih ta e.

²Nuihsantuten min hual vêl a ni lo vem ni? Min diriamna lamah ka mit a fu lo vem ni?

³Nangman ka tân thu min tiam ta che, Tû chungah nge kut ka nghah dâwn le?

⁴An thinslung chu hriatthiamna lakah a thupsak a; Chuvângin, anni chu i chawisâng dâwn si lo va.

⁵A thiante fakderna thu sawitu chu, A fate mit chenin a del ang.

⁶“Mahse mite kamchhe tleuhna lekah min siam a, Mite chil chhâkkhum hi ka chan tawh a ni ta.

⁷Lungngaihna hian ka mit a tivâi zo ta a, Ka taksa pêng tinte hi hlithlâ ang mai an chang zo ta.

⁸Hei hi mi nun ngîlte mak tih a ni: Mi vertherte lakah pawisawi lote thin a thawh ta zâwk hi.

⁹Mi dik chuan a awmdan chu a vuan tlat ang a, Kut fai chu a lo chak telh telh ang.

¹⁰“Mahse in zavai khân lo kîr leh lul teh u, In zîngah mi fing pakhat pawh ka hmu dâwn si lo.

¹¹Ka hun a liam ta, Ka tum dan a phêt zo tawh a, Ka thinslunga ngaihtuahna thlengin a mang zo ta.

¹²Zân hi chhûnah an chantîr a; Thim zîngah chuan ‘Êng a hnai e,’ an ti a.

¹³Thlân chu ka in ang maiah ka ngai a, Thim zîngah mutna ka siama,

¹⁴Khawlohna hnênah, “Ka pa i ni,’ ka tiha, Taksa-lungte hnênah, ‘Ka nu leh ka farnu i ni,’ ti îla,

¹⁵Beiseina khaw’nge ka neih tak ang? Ka beisei chu tu nge hmu thei ang?

¹⁶Seol kawngkaah an chhuk thla dâwn em ni? Nge, vaivutah kan châwl ho mai dâwn?” a ti a.

BUNG 18

BILDADA: MI SUAKSUALTE CHU HREM AN NI

¹Shuhi mi Bildada chuan a chhâng a:

²“Eng chen lek nge maw i tawng dâwn le? Hriat thiamna nei phawt la, kan la sawi zawm ang chu.

³Engtizia nge ramsa ang leka min ngaiha, Min hmuh mâwl viau mai le?

⁴Nang, thinura mahni intaithlêrtu, I tân lei hi hnuchhawn tûr maw a nih? Lungpui pawh a hmun ata paih sawn a ni ang mâw?

⁵“Mi suaksual êng chu a la mit ang a, A mei alh pawh a êng tawh lo vang.

⁶A puan inah chuan êng pawh a thim a, A kianga khâwnvâr pawh tihmih a ni.

⁷A ke pên chakna chu tihtawi a ni ang a, Ama remruatnaa paih thlak a ni ang.

⁸Ama kê ngeiin lênh a in âwk ang a, Thang valh chuan a hling ang.

⁹Lên chuan a ke artuih a hling ang a, Thang chuan a lo âwk ang.

¹⁰Thang valh chu leiin an thup a, Kawngah thang an lo kam a.

¹¹Kil tin aţangin tihţhaih a ni a, An tlânchhiattîr reng ţhîn.

¹²Rilţâmna in a chakna a phet a, A kiangah chhiatna a lo inpeih reng.

¹³A vun a eichhia ang a; Thihna fatîrin a kut-kê a ei zo vang.

¹⁴A himna puan in aţangin an pawt phâwi ang a, Rîkrâptu lal hnênah an hrui ang.

¹⁵A puan in chu a mi ni loten an luah ang; A chênnaah chuan kât an theh darh ang.

¹⁶A zung chu chhûng lamah tihro a ni ang a, Chung lama a zârte chu a vuai bawh ang.

¹⁷Lei aţanga amah hriatrengna a bo va, Mi hmingthangte zîngah a hming a lang ve ta lo.

¹⁸Êng aţanga thimah hrui luh a ni ang a, Khawvêl ata ûm chhuah a ni ang.

¹⁹A mite zîngah tu leh fa rêng a nei lo vang a, A chênna in luah lumtu tûr pawh a nei hek lo vang.

²⁰Thlang lama miten mak an ti ang a, Chhak lama mite an thlabâr ang.

²¹Chutiang chu mi suaksualte chan tûr a ni ang a, Chû ngei chu Pathian hre lote awm dân tûr a ni ang,” a ti a.

BUNG 19

JOBA'N A TLANTU A RING

¹Joba chuan a chhâng a:

²“Engchen nge ka nun hi min nghaisak anga, Tawngkaa mi vuak sawm in tum le?

³Vawi sâwm zet min chirhthet ta a; Dik lo taka mi puh chhiat in zak si lo va.

⁴Ka dik lo pawh ni tehrêng se, Ka dik lohna chu ka pâi mai ang chu.

⁵Ka laka intithei vêl in niha, Ka chan chhiatna hi remchânga la in nih chuan,

⁶Pathian zawkin min paih thla tih leh, A lénin min âwk tih lo hre rawh u.

⁷“Thil dik lo a awm tiin âu dâwn îla, tûma’n min ngaithla lo vang. Ring takin âu mah îla, dikna a awm phah hek lo vang.

⁸Ka kal kawng min hunghnan tlat a, ka kal tlang thei si lo; Ka kawng pawh thimnain a lo khuh bawk si.

⁹Ka ropuina mi hlihsak a, Ka lua lallukhum mi chhuhsak bawk.

¹⁰Kil tinah mi phet thlu zêl si a, Ka riral zo ta a ni e; Ka beiseina pawh thing angin mi phâwisak ta.

¹¹A thinrimna chu ka chungah a chhêmalh a, A hmêlmate zînga pakhat angin mi chhiar a.

¹²A sipaite a rawn khâwm a Mi beihna tûr kawng an rawn sial a, Ka puan in vêlin min rawn hual a.

¹³“Ka unaute chu min dah hlatsak daih a, Ka thiante pawh ka lakah mi hrang an chang zo ta.

¹⁴Ka chungkhatche an hla zo va, Ka thian bulten min theihngihl ta.

¹⁵Ka ina chêng leh ka awmpui nulate pawhin, Mihrang enin min en a; Ram dang mi ang lekah min ngai ta.

¹⁶Ka chhiahhlawh pawh ka âu eih zo ta lo; Ka biaktlawn a ngai ta hial mai.

¹⁷Ka nupui tân ka thaw rim a chhia a, Ka fa hrin ngei te tân pawh tenawmah ka chang zo ta.

¹⁸Naupangte chenin min hmusit a; Han tho ila, min âu nawmna a.

¹⁹Ka thian bulhnaiten min ten hluah hluah a, Ka hmangaihten min do va.

²⁰Ka ruhte hi ka vun leh tisaah a bet a, Ka hahnîte erawh chu ka la chang hrâm a ni.

²¹“Aw, ka thiante u, mi khawngaih rawh u, mi khawngaih rawh u, Pathianin ka chungah kut a thlak ta si a!

²²Engah nge Pathian ang maia min tihduhdaha, Tisaa ka tuarna hi tâwk in tih loh le?

²³“Ka thute hi ziaak han ni teh sela aw! Lehkhabûah ngei han chuang ve teh sela aw!

²⁴Ziakna thîr leh suanin, Kumkhaw daih tûrin lungah han ker ve sela!

²⁵Mi Tlantu chu a nung tih ka hre si a, Hun tâwpah hê leiah hian a lo la ding ang;

²⁶Hei hi ka hria, ka vun hi tihboral a nih hunah, Ka tîsain Pathian ka la hmu ang.

²⁷Keima tân ngei ka la hmu ang a, Mi dang ni lovin, ka mit ngei hian a la hmu ang. Ka thinlung chhûngril hian a va ngai tak êm!

²⁸“Engtin nge ani chu kan tihduhdah ang?’ A chhan bulpui keimah a ni tih hriat chhuah a ni si a,’ in tih chuan,

²⁹Khandaih chu hlau hle rawh u; Thinurna chuan khandaiha hremna a thlen si a, Tichuan, rorêlna a awm ngei tih in hre thei ang,” a ti a.

BUNG 20

MI SUAKSUAL CHUNGA ZOPHARA SERMON

¹Naamathi mi Zophara chuan a chhâng a:

²“Chhân ve tûl tihna rilrûin min nawr a, Keimahah hian min turtu a awm si a.

³Keimah mi tai rânna zilhna kha ka lo hria a, Hriat thiamna thlarau chuan chhâng tûrin min ti ta a ni.

⁴Hman laia leilunga mihringte lo awm tan aţang khân, Hei hi i hre lo vem ni?

⁵Mi suaksualte hnehna chan chhûng hi a rei lo va, Mi vertherte hlimna chu mitkhap kâr chauh a ni, tih hi.

⁶A chapona chuan vân han tawng hial mahse, A lu chuan chhûmte han thleng pha hial mahse,

⁷Ama êk anga ral kumkhua tûr a ni; Amah hmu tawhte chuan, ‘Khawiah nge a awm tâk?’ an ti ang.

⁸Mumang angin a thlawk bo vang a, hmuh tûr a awm tawh lo vang; Ni e, zân inlârna anga ûm bo a ni ang.

⁹Amah hmutu mit chuan a hmu leh tawh lo vang a, A awm thinna hmun pawhin a hmu tawh lo vang.

¹⁰A faten mi retheite hnênah kut an la dawh ang a, A kut chuan a hausakna a thlen leh ang.

¹¹A ruhte chu a tleirawl lai angin a la chak ang a, Mahse ama ruala vaivuta la chang mai tûr a ni.

¹²“Sualna chu a kâah thlum mahse, A lei hnuaiah thukru thîn mahse,

¹³Thlah phal lovin zuah tlat se, A ka chhûngah hmuam reng mahse,

¹⁴A chaw ei chu a pumah tûrah a chang ang a, Amahah chawngkawr tûr a lo ni mai ang.

¹⁵Hausakna chu lem thla duak mahse, A luak chhuak leh tho ang; Pathianin a pum aţangin a paih chhuak si a.

¹⁶Chawngkawr tûr a hîp lût ang a, Rûlrial tûr chuan a tihlum ang.

¹⁷Lui luangte chu a hmu pha tawh lo vang, Khawizû leh hnutekhal tuia luang chu.

¹⁸A thawhrimnain a rûl leh ang a, Lem pawh a lem thla lo vang; A khâwlkhâwm sâte pawh A hlimpui chuang lo vang.

¹⁹Retheite a hnehchhiahin a thlahthlam vei a, A sak loh in chu tharumin a chhuhsak a.

²⁰“A thinlungah chawlh hahdamna rêng a awm loh avângin, A duh angin engmah a khâwl lo vang.

²¹Engmah ei tûr a nei lo vang a; A thât lai hunin a daih rei hek lo vang.

²²A hausak lai takin a tlachhia ang a; Mi mangangten an beihrawn ang.

²³A pum tihpuar a tum lai takin, Pathianin thinur takin a paih thla ang a, A ei mêk laiin a sûr khum ang.

²⁴Thîr râltuam a tlanchhiatsan ang a; Dâr thalin a lo kâp tlang dâwn a ni.

²⁵A phâwi a, a taksa aţangin a lo chhuak a, A hmâwr tlê chu a mît aţangin a lo chhuak a. Thil râpthlâkin a rawn nang ta;

²⁶A rosum atâna khêksak chu thim mup a ni. Chhêm loh meiin a kângal vek ang a; A puan ina la chêngte chan chu a va chau dân êm.

²⁷Vânten a khawlohna an hailang ang a, Lei pawhin amah a rawn do ve ang.

²⁸A ina thil pung rêng rêngin an chhuahsan ang a, A thinrim niah chuan a bungruate chu a luang ral vek ang.

²⁹Hei hi Pathian ațanga mi suaksualte chanvo chu a ni a, A roluah tûra Pathian ruat chu a ni,” a ti a.

BUNG 21

MI SUAKSUAL CHUNGCHANGA JOBA THUSAWI

¹Joba chuan a chhâng a:

²“Ka ẵwng hi fimkhur takin lo ngaithla ula, Chû chu in mi hnemna pawh ni rawh se.

³Min lo hrethiam ula, ka han sawi ang e, In duh leh, ka sawi zawhah min deu zui dân nia.

⁴“Mihring lakah em ni ka lo phunnawi le? Ni ila, engah nge ka dawhtheih bik ang le?

⁵Mi han en ula, mak in ti thlâwt ang a; In kê in hup tawp mai ang.

⁶Ka ngaihtuah ringawt pawhin mi tihlau va, Ka tirilah ka khûr zawih zawih ẵn a ni.

⁷Engvângin nge mi suaksualte hi tar kûn thlenga an dama, Ni e, an lena an chak thûr thûr le?

⁸An tu leh fate chu hmuh theihin An dam tângin an ngelnghet viau baw si a.

⁹An in leh lo te chu hlauhawm lakah a him pial a, Pathian hremna tiang an tuar ve baw si lo.

¹⁰An bâwngpain khêl lovin chỉ a thlah a; An bâwngpuiten no an chhiat ve ngai hek lo.

¹¹An fanaute chu ranrual ang maiin an chhuahtîr duah duah a, An naupangte chu an tualchai siau siau va.

¹²Kutkhuang leh ẵngẵng remin an zai a, Phênglâwng tumrîkin a tihlim êm êm a.

¹³An dam chhûng hun nuam takin an hmang a, Mîtkhap kê lovah thlânah mual an liam ve mai a.

¹⁴Pathian hnênah erawh chuan, ‘Min kiansan rawh, I kawng thûte hi kan hre chhâk lo ve.

¹⁵Engkimtithia chu tu nge a niha, a rawng kan bawl tehchai ang le? A hnêna kan ẵwngẵiin eng nge hlâwkna kan hmuh ang?’ an ti mai a.

¹⁶An hausakna chu an kuta awm a ni si lo va; Mi suaksual remruatna chuan mi hlat daih asin.

¹⁷“Mi suaksualte khâwnvâr chu wavi engzat nge a tihmihsak tawha, Engti takin nge Pathian thinurin lungngaihna a pêk ẵn?

¹⁸Thlipui hmaa buhpâwl ang leh, Buhsî thliin a len bo ang hi an ni zâwk.

¹⁹Anni chuan, ‘Khawloh man hi an fate têl tûrin Pathianin a dah’ in ti a; An inhriat chhuah theih nân, anmahni chungah thlentîr zâwk ang hmiang.

²⁰Anmahni ngeiin tihborala an awmzia te hmu se, Engkimtithia thinurna chu amahin in rawh se.

²¹A kalsan hnua engtin nge a chhûngte a ngaihsak theih ang, A hun hman tûr thla pawh a zahvea tihtawi a nih te chuan?

²²“Tu nge Pathian chu hriatna zirtîr thei ang, Chung lam mite rêl saktu zâwk a ni si a?

²³Nuam tak leh muang taka an awm laia, An chak vanglaia thi te an awm a;

²⁴Anmahni chu an thau mûm tula, An thlîngte pawh a mawm ẵat lai a ni a.

²⁵Thenkhat, rethei rêng rênga thi an awm, Chaw tuihnai ei tûr pawh hmu zo lovin.

²⁶Vaivutah ang khat rengin an mu tâng a, A lungin an lo bâwm ẵn.

²⁷“En teh u, in rilru kha ka hria asin, Dik lo taka mi tih in tum dân chen khân.

²⁸Tihian in ti a, ‘Khawng kan milian in chu? Mi suaksual chênna puan in chu khawiah nge?’ tiin.

²⁹Khualzinte in zâwt ngai lo vem ni? An chhinchhiahnate in hre Chiang lo vem ni?

³⁰Mi suaksualte chu chhiatna nî atân khêk an ni a; Thinurna nî-ah hruai chhuah an ni ang.

³¹Tu nge a diklohna hmai hmâah chachhuah ang? A thiltithe chu tu nge rûl ang?

³²Mahse thlânah phûm a ni ang a, Thlân chu an vêng ang.

³³Ruama lei tlangte chu atân duhawm a ni ta; Mi tinin an zui zêl a, An hmaa chhiar sên lohte ang khân.

³⁴Engtin nge thu lawilo mai mai chuan min hnem tâk ang aw, Dâwt thuin min chhâng kual vel mai mai si a?” a ti a.

BUNG 22

ELIPHAZA'N JOBA MI SUAKSUALAH A PUH

¹Teman mi Eliphaza chuan a chhâng a:

²“Mihring hi Pathian tân a ẵngkai thei em ni? Amah chu fingin ama thilah chuan ẵngkai hle mahse?

³Mi dik i nihna chu Engkimtithia lâwmna a ni ngût ang maw? Sawisêl bova i awm chu hlâwkpuin nân a lo hmang chia em?

⁴“Amah i ẵi vâng em ni a zilh che a, Rorêlnaah a luhpui che?

⁵I suahsualna a nasat êm avâng leh, Chin tâwk nei lova i khawloh êm vâng a ni zâwk lo maw?

⁶ẵl lovah i unaute lakah dahkham i phût a, Saruakte pawh an silhên i hlihsak a.

⁷Chaute hnênah in tûr tui i pe lo va, Rilẵmte chaw ei tûr i hrênsak a.

⁸Tharumin mi ram i neihsak a, A chhungah mi zahawma chu a chêng ta a.

⁹Hmeithaite chu kut bêngin i tîr bo va, Paneilote thahrui i chhahsak a.

¹⁰Chuvângin, i vêlin thang a inkam chuk a, Hlahu thut neiin i tâl buai thîn a,

¹¹I hmuh theih si loh thimna leh, Tui tam takin a vûr pil che a nih hi.

¹²“Pathian chu vân sânga awm a ni lâwm ni? Arsi sang berte khi en la, an sânzia khi!

¹³Nang erawh chuan, ‘Pathian hian eng nge a hriat ang? Thim chhah pui khi kal tlangin a rawn rêl thei em ni?

¹⁴Chhûm dumin a hlah tlat a, a hmu thei nâng, Vân kual chungah daih a kal thîn si a,’ i ti a.

¹⁵Nang, kawng hlui bawh em ni i zawh dâwn, Mi suaksualten an zawh thîn kha?

¹⁶An hun hmaa tihborala awma, An lungphûm tuilianin a len bote kawng kha?

¹⁷Pathian chu, ‘Min kiansan rawh! Engkimtithia’n eng nge tihsak theih a neih le?’ an ti a.

¹⁸Chuti chungin, an inte chu thil thain a tikhat a; Mi suaksual remruat chuan mi hlat daih a.

¹⁹“Mi dikte chuan an hmu a, an lâwm a, Pawikhawih lote chuan an nuihsan a;

²⁰“Kan hmêlmate chu tihboral an ni a, A thi bângte chu meiin a kângal ta,’ an ti a.

²¹“Ama hnênah intulût la, amah chu rempui rawh; Tichuan, thil tha a lo thleng dâwn nia.

²²A kê ațanga zirtirna chu dawng la, A thu chu i thinlungah chhêkkhâwl rawh.

²³Engkimtithia hnênah kê leh la, a dinthar leh ang che; I puan in ata bawhchhiatna i paih bo chuan.

²⁴Tichuan, rangkachak chu vaivutah i dah ang a, Ophir rangkachakte pawh luite lung zingah i dah tawh ang.

²⁵Ni e, Engkimtithia chu i rangkachak leh, I tangka hlu a ni ang;

²⁶Engkimtithia chu i lâwmna a lo ni ang a, Pathian lam i hawi tawh ang.

²⁷A hnênah i ƣawngƣai ang a, A lo ngaihlaksak ang che a, Tichuan, i thutiam i hlen dâwn zu nia.

²⁸Rem i ruat ang a, Nemnghehsak i ni ang; Tichuan, i kawng chu a chhun êng mai ang.

²⁹An paihthlak che chuan, ‘Chawikâna a la awm ang!’ ti la, Tichuan, mi inngaitlâwma chu a chhandam dâwn a ni.

³⁰Pawi khawih lo ni lem lo pawh a chhan chhuak tel ang; Ni e, i kut thianghlimna azârah chhan chhuah a ni ang,” a ti a.

BUNG 23

JOBA’N PATHIAN RORÊLNA DIK A PUANG

¹Joba chuan a chhâng a:

²“Vawiina ka vuina hi runthlâk tak a ni asin; Ka rûm nasat êm avângin ka kut pawh ka chêt thei lo.

³Aw, amah ka hmuh theihna tûr chu hria ila, A ƣhutna lam chu ka pan tûr!

⁴A hmâah chuan ka thû ka thlen anga, Ka kê hi thiamthu-in ka’n tikhat tûr.

⁵Ani mi chhânna tûr te hriat ka duh hle a, Ka hnêna a sawi tûr lo hriat thiam pawh ka duh a.

⁶A thiltihtheihna ropui chuan mi hnial dâwn em ni? Ni lovang! Mi lo ngaihven zâwk ang.

⁷Mi nunngîl chuan a hnênah thu a thlen thei ang a, Ka Rorêltu chuan mi chhuah hlen vang vang tawh ang.

⁸“En teh, hma lamah ka kal a, amah chu a awm lo va, Hnung lamah pawh amah ka hmu thei chuang lo va;

⁹Kut vei lama a thawh laiin, ka hmu thei lova; Kut ding lama a thawh laiin, ka hmu thei hek lo.

¹⁰Mahse ani chuan ka awmna lam a hria a; Mi fiah hunah chuan, rangkachak angin ka chhuak ang.

¹¹Ka kê hian a hniakhnung a zui tlat a; A kawng chu ka zawh a, ka pênсан si lo va.

¹²A thupêk chu ka pênсан lo va; A kamchhuak thute chu Ka ei tûr chaw aiin ka hlut zâwk a ni.

¹³“Ani erawh chu mi danglam bîk a ni a, tu nge her danglam thei ang? A rilru duhzâwng apiang a ti mai a ni.

¹⁴Ka chana ruat chu a hlen ang a, Chutiang thil tam tak chu a hnênah a awm.

¹⁵Chuvângin, a bula awm ka hlau va; Ka ngaihtuah hian, amah chu ka hlau thîn.

¹⁶Pathianin ka thinlung a tichau va, Engkimtithian min tihlau a;

¹⁷Thimna ata min la dah hrang si lo va, Thim chhah tak chu ka lakah a thukru bawh si lo.

BUNG 24

JOBAN LEI CHUNGA THARUM THAWHNA A DEM

¹“Hunte hi Engkimtithia lakah thuhrûk a ni si lo va, Engah nge amah hretute hian a hunbîte hi an hriat tel loh le?

²“Mi thenkhatin ramrite an sawn a; Mi ranrualte an chhuh lui a, an eisak mai mai a;

³Paneilo sabengtung an hnawh bosak a; Dahkham atân hmeithai bawngpa te an laksak a.

⁴Kawng ata mi retheite an nêk chhuak a; Rama mi retheiten himna zawnga bihrûk an ngai a.

⁵Thlalêra ram sabengtung ang maiin, Ei tûr dapin an hna thawk tûrin an feh chhuak a. Thlalêr chuan anmahni leh an fate ei tûr a lo tumsak a.

⁶Ramah chuan ei tûr an lakhâwm a, Mi suaksual grêp huana an lawh hmaihte an vâi a.

⁷Zanah puanthuah lovin, saruakin an mu a, Khawvawta sin tûr an nei lo.

⁸Tlânga ruah sûrin a nan huh a, Tawm hulna nei lovin lungpui an bêl a.

⁹“Paneilo hnute hne lai te an phih thlaksak a, Mi retheite laka dahkhamah an hmang a.

¹⁰Retheite chu silhfên lovin, ruakin an kaltîr a; Rilâtâmte kuta buhphalte an chhuhsak a.

¹¹An hung chhûngah hriak an sâwr a, Rilâtâm chungin grêp sâwrnaah te an rapsâwr a.

¹²Khawpuiah thih hmabâka rûm mêk an awm a, Hliam tuarte thlarau a âu chhuak a; Pathian lahin tidiklotute a mawhchhiat baw si lo.

¹³“Thenkhatin êng lam an hnuchhawn tlat a; A kawng pawh an hre duh lo va A êngah pawh an awm duh hek lo.

¹⁴Tualthattu chu vârtianah a tho va; Mi rethei leh pachhiate a that a; Zân lamah rûkru angin a che vêl a.

¹⁵Uîrê chîng chuan khawthim hun a nghak a, “Tûma’n min hmu lo vang’ a ti a; A hmêl a thup a.

¹⁶Zânah mi in an rek pawp a Chulai chu chhûnah an lo chhinchhiah lâwk a; Êng lam rêng rêng an hre duh lo.

¹⁷An tân zîng chu thihna hlim nêl an inang reng; Anmahni lo hriate tân chuan, Thihna hlim tîhbaiawmna hmuna awm te ang an ni.

¹⁸“Tui chungah chak taka len bo an ni ang, Leia an chanpual chu ânchedawn mai a ni ang a, An grêp huan pawh tûma’n an pan duh lo vang.

¹⁹Khawthâl leh lumin vûr a em tui ang hian, Misualte chu thlânin a la eiral ve ang.

²⁰Chhûlin theihngihl sela, An lungten tui ti takin lo tlan nuai nuai rawh se; Tûma’n an hre reng baw hek lo vang a, Suahsualna chu thîng anga fik hmawk tûr a ni.

²¹Fa nei thei lo chingte a vehin a veh a, Hmeithaite chungah thil tha rêng a ti hek lo.

²²“Mahse Pathianin mi chakte chu a thiltihtheihnain a hnawt kiang a, A tho va, mahse tûma’n an dam chin tûr an hre lo.

²³Himna a pê a, tah chuan an châwl a; Nimahsela, an nun dân a enthla reng thîn.

²⁴Rei lote chhûng châwikânin an awm a, Tichuan, an ral leh thîn a. Hnuh hniamin an awm leh mai a; Buhvui an ât chhum thîn ang hian, Mi dangte ang bawkin mual an liam thîn.

²⁵“Chutiang ni lo se, tu nge dâwheh min ti thei ang a, Tu nge ka thusawi pawh engmah a ni lo,” ti thei ang?” a ti a.

BUNG 25

BILDADA: MIHRING HI ENGTIN NGE A DIK THEIH ANG?

¹Shuhi mi Bildada chuan a chhâng a:

²“Lalna leh hlauhawmna chu Ama ta a ni; A hmun sângah te inremna a siam a.

³A sipai tamzia chu chhiar rual em ni dâwn? Tû chungah nge a êng a chhuah loh?

⁴Mihring hi Pathian hmâah engtin nge mi dik a nih theih ang? Hmeichhe hrin hi engtin nge a thianghlim theih ang?

⁵Thla ngei pawh khi a êng tak tak lo, Arsite pawh a mithmuhah chuan an thianghlim hlei nêl,

⁶Mihring lek phei chu, êk lung mai a ni a, Mihring fapa pawh changpât mai a ni,” a ti a.

BUNG 26

JOBA: MIHRING DERDÊPZIA LEH PATHIAN ROPUIZIA

¹Joba chuan a chhâng a:

²“Chutiang chuan maw ni chakna neilote i puih thîn le? Chutiang chuan maw thahrui nei lo bân i chhan thîn?

³Chutiang chuan maw finna nei lo te i zilh dâwn? Chutiang chu maw mi tam tak hnêna thurâwn tha i pêk thîn?

⁴Tû hnênah nge thû i sawi a? A tû thlarau chu nge maw i chan le?

⁵“Thi tate kha an khûr a, Tui hnuai leh a chhûnga chêng hote chu.

⁶Hremhmun chu a hmâah a lang vek a, Boralna hmun chuan khuhtu a nei lo.

⁷Hmar lam hmun ruakah chuan vân a kaipharh a; Lei chu engmah lo hmangin a khâi kâng a.

⁸A chhûm chhah chu tui a paitîr a, Mahse chhûmte chu a keh darh si lo.

⁹A chungah a chhûm a zîntîr a, A lâlthutphah hmai a khuh a.

¹⁰Tui chîm chin kâwlkil a rîn kual a, Thim leh êng inrînaah chuan.

¹¹Vân dona bante chu a ngîng dur dur a, A zilh hauhna avângin mak an ti a.

¹²A thiltihtheihnain tuipui chu a chawk thova, A thiamnain thlipui a vai darh a.

¹³A Thlarau chuan vânte a cheimâwi a; A kutin rûlpui tlânchhe lai a vit tlang.

¹⁴Hêng hi a thiltih zînga tlênte chauh a ni a, A chanchin kan hriat vê hi a va beitham êm! A thiltihtheihna thâwm chu tu nge hrethiam le?” a ti a.

BUNG 27

JOBA’N A RINAWMNA A VAWNG TLAT

¹Joba chuan a tehkhin thu a sawi chhun zawm zêl a:

²“Ka dikna dah kiangtu Pathian leh, Kha taka ka nun min siamsaktu Engkimtithêia chhâlin,

³A thâwka ka la thâwk theih chhûng leh, Ka hnâra Pathian thâw a la awm chhûng chuan,

⁴Ka hmuï hian suahsualna thû a sawi lo vang a, Ka leiin bumna thû a sawi hek lo vang.

⁵In tidik e' tiin engtin mah thiam ka chantîr hauh lo vang che u; Ka thih thlengin ka rinawmna hi ka vawng tlat ang.

⁶Ka dikna hi ka vuan tlat ang a, ka thlah lo vang; Ka dam chhûngin ka thinlung pawhin mi dem hek lo vang.

⁷Ka hmêlma chu mi suaksual ang lo ni zâwk sela, Mi dotu chu mi dik lo ang lo ni rawh se.

⁸Mi vertherte beisei chu eng nge ni? In lamuk tên tûn mahse, Pathianin a nunna laksak ta se eng nge a hlâwkna?

⁹A chungah manganna a lo thlenin Pathianin a âu âu a hre duh dâwn em ni?

¹⁰Engkimtitheia chungah chuan a lâwm ang em? Pathian a âu thîn ang em le?

¹¹Pathian kut chungchang hi ka zirtîr ang che u-a; Engkimtitheia hnêna awm pawh ka thup lo vang.

¹²In zavai hian in hmu reng si a; Engah nge awmzia nei lêk lova in khawsak mai mai le?

¹³Pathian laka mi suaksual chan tûr leh, Engkimtitheia laka mi nunrâwngte rochun tûr chu hei hi a ni:

¹⁴A fate pawh lo pung mahse, khandaih tuar tûr mai an ni; A thlahten chaw khawp kham an nei lo vang.

¹⁵A thih hnua la damte chu thihnain phûm an ni ang a, An nupui thihsanten an t̄ah lo vang,

¹⁶Silvar chu vaivut anga tiang khâwmin, Silhfênte chu hlum ang maiin chhep el ul mah se—

¹⁷A chhêkkhâwl sâ chu mi dikten an la sin zawk ang a, Pawi sawi loten silvar chu an la insem ang.

¹⁸A insak chu maimawm rîl zam ang lek a ni a, Vêngtu tâna bûkte ang chauh hi a ni.

¹⁹Mi hausa chu a mu ang a, A tho leh tawh lo vang; A mit a han men chuan, Engmah a lo awm tawh lo vang.

²⁰Tuilian angin thlaphânain a chîm ang a, Zânah thlipuiin a lên bo ang.

²¹Khawchhak thliin a lên bo ang a, a awm tawh lo vang; A awmna hmun ata a nuai bo ang.

²²Dîm hauh lovin a nuai hrep ang a; A chakna lakah baklêngin a tlânchia ang.

²³Mite chuan kut an ben khum ang a, A awmna hmun ata an eu-chhuak ang.

BUNG 28

JOBA'N FINNA THU A SAWI

¹Silvar laihchhuahna khur a awm a, Rangkachak thlitfimna hmun a awm bawk.

²Thîr hi lei aṭanga lak chhuah a ni a, Leilung aṭangin dâr an chhuang tui bawk.

³Mihringten thimna an ûm kiang a, Hmun kilkhâwr tin an dap a Thim tham leh thihna hlima lung te an dap chhuak a.

⁴Lei chhûngrilah kua an hreuh a, A chungah kalte pawhin an hre lo Mi awmlohna hla takah an inkhai kual a; An then tawn vêl thîn.

⁵Lei pawn lâng hian chaw a thar chhuak a, A chhûngril chu meipui inlet but but ang a ni;

⁶Chûng lungte chu saphir hmun a ni a, Rangkachak nâwi a tel bawk.

⁷Chû kawng chu eng sava mahin an hre lo va, Mupui mitin a hmu hek lo.

⁸Sakeibaknei ngêng takte pawhin an tlawh loh, Sakeibaknei kawlhate kal ngai lohna hmun a ni.

⁹Miten lung changah kut an thlak a; Tlâng te chu a bulṭhutam an lepsê leuh a.

¹⁰Lung zîngah tui kawng an verh kua a, A mitin thil hlu tinrêng a hmu chhuak a.

¹¹Lui tuite hnâm hauh lovin an khuap chat a; Thil thuhrûkte chu êngah an la chhuak a.

¹²“Mahse finna chu khawi lama hmuh tûr nge? Khawi hmunah nge hriat thiamna a awm?

¹³Mihringin a hlutzia a hre phâk lo va, Minung ramah hmuh tûr a awm hek lo.

¹⁴Tuithûk chuan, ‘Keimahah a awm lo ve,’ a ti a; Tuipui pawhin, ‘Ka hnênah pawh a awm lo,’ a ti bawk a.

¹⁵Rangkachaka lei chí a ni lo va, A manah tangkaruaa bûk chí pawh a ni hek lo.

¹⁶Ophir rangkachak hlut zâwngte leh, Onix leh saphir lunglhu te nêk khaikhin phâk a ni lo.

¹⁷Rangkachak leh kristal lungfimin a tluk lo va, Rangkachak lunglhu ṭha mîa thleng theih a ni hek lo.

¹⁸Koral te, lungfîm dangte chu sawi loha lum a ni, Finna man hi rubi aiin a chungnung zâwk a.

¹⁹Ethiopia topaz pawhin a tluk lova, Rangkachak hlang eng ang pawhin a tluk lo.

²⁰“Finna chu khawi aṭanga lo kal nge? Hriat thiamna chu khawi hmuna awm nge?

²¹Thilnung zawng zawng mit laka thup a ni a, Chunglêng savate laka thuhrûk a ni.

²²Boralna leh Thihna te chuan, “A thâwm thangvâ chu kan bengin kan hria,’ an ti a.

²³Pathianin a kawng a hria a, A awmna hmun pawh a hre bawk.

²⁴Kâwlkil tâwp thlengin a thîr vêl a, Vân hnua hi a pumin a hmu vek a,

²⁵Thli kal dân a teh chhuah lai leh, Tui rihzâwng a teh chhuah lai khân.

²⁶Ruah sîr dân tûr a duan lai a, Ṭêk tlâkna tûr kawng a siam lai khân,

²⁷Finna chu a hmu a, a puang chhuak a; A zawng chhuak vek a, a tinghet ta a.

²⁸Mihringte hnênah chuan, ‘Ngai rawh, Lalpa ṭih hi finna a ni a, Sual kalsan hi hriat thiamna a lo ni e,’” a ti a.

BUNG 29

JOBA THIAMTHU TAWI

¹Joba chuan a tekhin thu a sawi chhunzawm zêl a:

²“Thla tam tak kal tawhah te khân awm thei ila aw, Pathianin min venhim hun lai vêlah te khân;

³Ka lu chung a khâwnvâr a chhit êna, Thim zingah pawh ama ênga ka kal tlang hun laite;

⁴Ka vânglai huna ka awm laia, Ka puan inah Pathianin thian ang maia thurâwn min pêk lai te;

⁵Engkimtithian min awmpuia, Ka fate pawh ka kiana an awm nek nek laia;

⁶Ka ke pên tin chu hnutekhalin a bual hlawp hlawa, Lungpuiin hriak mi sâwr chhuahsak tluk tluk laite kha!

⁷Khawpui kulh kawngkaa ka kal chhuah laia, Mual zâwla thuthmun ka rem lai te khân,

⁸Tlangvâltên min hmuhin an biru chawn chawn a, Upate chu thovin an lo ding chhuak a;

⁹Hotute titi lai pawh an reh thap a, An kutin an kê an hup a;

¹⁰Milianho pawh an ngâwi thup a, An lei chu an dangah a bet a.

¹¹Ka thâwm hriaten mal min sâwm a, Mita min hmututen min fak tliar tliar a;

¹²Mi rethei leh paneilote leh, tanpuitu nei lova tap te Ka lo chhan chhuah thin vâng a ni a.

¹³Mi boral mêkte malsâwmna ka chungah a lo thleng a, Hmeithaite chu thinlung hlim takin ka zaitîr thin.

¹⁴Dikna chu silhfên angin ka inbel a, Ka rorêlna chu kawrfual leh diarkhim ang a ni.

¹⁵Mitdelte tân mit ka ni a, Kebaite tân kê ka ni baw k.

¹⁶Retheite pa ka ni a, Ka hmêlhriatloh thubuai thlengin ka dap chhuahsak thin.

¹⁷Mi suaksualte ngho ka tihtliahsak a, An hâa an lo sehte chu ka pawh chhuahsak thin.

¹⁸“Tihian ka ti a, ‘Ka inah ngei ka thi ang a, Tiauvut ang maiin ka dam chhông ka tipung ang.

¹⁹Tui awmna lamah ka zung a zâm darh ang a, Ka zârahte chuan zankhuain dai a châm reng ang.

²⁰Ka ropuina a thar zêl ang a, Ka thalngul hi ka kutin a tuaihnûm leh thin a ni,’ tiin.

²¹“Miten ka thu ngaichângin min nghâk thup thin a, Ka thurâwn ngaihvenin miten an beng an dawh thin.

²²Thu ka sawi zawh chuan engmah an sawi zui tawh ngai lo, Ka thusawi chu an chungah dai angin a tla thin a ni.

²³Ruah sîr tûr nghah takin min nghâk thin a, Thal ruah châng ang maiin an kê an lo âng hlawm a.

²⁴Ka nuihsawh deuh pawhin, ti tak takah min ngai phal lo, Ka hlim hmêl hian an rilru hnual tûr a vêng thin a ni.

²⁵An kawngte thlansakin, lal angin ka thu a; Sipai hotu lal ang tein ka awm a, Lusûnte hnêmtu ang ka ni mai thin.

BUNG 30

¹“Tunah erawh zawng, ka aia nauten min nuihzat tawh a, An pate chu ka ranrual vêngtu, ui zînga ka telh duh lohte kha an ni a.

²An bân tha chakna chu ka tân hlâwkna tûr eng nge awm? An thâ a thum tawh si a.

³Tlachham leh rilâtamin an chêr a, Thlalêr chhengchhia leh tlawh loh ramah an tlânchhia a,

⁴Ei âtân thlalêr hnim hnahte an thliak a, Hmunphiah kûng zungte an lai a.

⁵Mi zîng aţangin hnawhchhuah an ni a, Rukrû ang maiin an eu zui a.

⁶Ruam kumkârte an bêl a, Khuarkhurum leh lung pûk kêr te nê.

⁷Hnim zingah te an têt thawt thawt a, Hlîngbuk kârah te an tawm khâwm a.

⁸Mi â-te fa an ni a, A ni, mi tlâktlailo tak tak fate; Ram aţanga hnawhchhuahho an ni.

⁹“Tûnah zawng an hla sak nawmnaah ka chang ta a; Ni e, an kamchhe tleuhna mai ka ni ta.

¹⁰A tenin min ten a, ka lakah an insaseng daih a; Ka hmaia chil chhâk pawh an hreh lo.

¹¹Ka thalhruin min tihdulsaka, min sawisak avâng hian, Anni pawhin ka lakah insûmkârna an thlah thak a.

¹²Ka ding lamah mi sahâwkho an lo tho va; Ka kê an phet lawp lawp a, Mi tihchhiat tumin min bei a.

¹³Ka kawng an tichhia a, Ka chhiatna tur thil an ruahman a; Tanpuitu an nei si lo.

¹⁴Kulh chim zau laiah an lo lût a, A chim hnuaiah an lo lût huk a.

¹⁵Thil hlauhawmin mi nangchîng a, Ka zahawmna chu thli angin an ûm a, Ka neihnunnate chu chhûm angin a kiang zo ta.

¹⁶“Ka chan chhiat êm avângin ka thlarau pawh leih buakin a awm a; Lungngaihna nûn mi rawn tlâk buak ta.

¹⁷Ka ruhte hian zan lamah mi kher ngut ngut thin a, Chawlh lai nei lovin a na ngawt ngawt mai a.

¹⁸Thahrui chak takin ka kawr a pawt tawm vek a, Ka kawr ngâwng ang maiin mi phuar a.

¹⁹Chirhdûpah mi paih lût a, Meivâp leh vut mai ka ni ta.

²⁰“Ka âu che a, mi chhâng si lo; Ka din pawhin mi ngaihsak chuang lo va.

²¹Ka lakah hian i râwng ta hle mai a; I kut chakin mi do tlat si a.

²²Nangin thli-ah mi vawrh chho va, a chungah mi chuantîr a; Ka hlawhtlinna tûr i tikhawlo va.

²³Nangnin min tihlum dâwn tih pawh ka hria e, Chû in, minung zawng zawng tâna ruatah chuan.

²⁴“Thil chhe hlâwm chungah êm chuan a kut a thlak lo vang, Manganga tanpui diltu chungah chuan.

²⁵Manganna tawkte tân ka ɲap lo ngai em ni? Mi retheite ka tuarpui ɲhîn lo vem ni?

²⁶Thil ɲa ka zawn laiin, thil ɲa lo a lo thleng a; Êng ka ngah laiin, thim a lo thleng a.

²⁷Ka thinlung hi a buai a, a awm hle hle thei lo va; Lungngaih ni hian mi hmachhawn reng si a.

²⁸Ni êng awm lohnaah lusûnin ka vâkvêl a; Pungkhâwmho zîngah dîngin, ɲanpui dîlin ka âu va.

²⁹Sihal unau ka ni mai a, Ostrih ɲhian ka ni bawh a.

³⁰Ka vun chu a hâng zova, a khawh ur ur a; Khawsik vângin ka ruhte a sa vung vung a.

³¹Ka perhkhuang chu sînnâ rî a lo chang ta, Ka phênglâwng pawh ɲah remtu-ah a chang ta.

BUNG 31

¹“Ka mit tân ɲhî ka tiam a; Engah nge nula ka ngaihmêl ang le?

²Chung Pathian laka ka chan tûr leh, Chung lam Engkimtiheia laka rochan tûr chu eng nge ni?

³Mi suaksualte tân tihboralna, Khawlohna thil titute tân chhiatna a ni lo vem ni?

⁴Ka kawngte hi a hmu reng ɲhîn a, Ka ke pên zât chenin a chhiar vek lo vem ni?

⁵“Diklohna kawngah kalin, Mi bum tûrin ka ngalthâ chak ta viau mai se,

⁶Pathianin ka rinawmzia fiah tûrin, Bûkna dîkin min bûk rawh se.

⁷Kawng dik ata pêng bovin, Ka mit hian ka thinlung hi hrui pêngin, Ka kutah bawhlhlawh kai ta se,

⁸Ka tuh sate chu mi dangin ei mai sela, Ka rah seng tûr chu pawt chhuak vek rawh se.

⁹“Hmeichhe îtna thinlung ka lo puta, Ka ɲhenawm pa kawngkaa châng rû ka lo nih chuan,

¹⁰Ka nupui chuan mi dang rawng bawh sela, Mi dangin mutpui rawh se.

¹¹Chutiang chu sual chimawm chi a ni a; Khawlohna sual, hrem ngei tlâk a ni.

¹²Chutiang chu kângraltu mei a ni si a, Ka sum neih zawng zawng pawh a kâng ral ang.

¹³“Ka chhihhlawh ahmei apa ten an harsatna thu ka hnêna an rawn thlenin, Keiin lo ngaihsak duh ta lo îla,

¹⁴Pathian a rawn chêt hunah engtin nge ka tih ang? Rawn hrem dawn se, engtin nge ka lo chhân ang?

¹⁵Chhûla min dintu kutchhuak an ni ve tho lo vem ni? Chhûla min siamtu chu a thuhmun reng lo vem ni?

¹⁶“Retheite mamawh ngawih ngawih ka hrênsak a, Hmeithaite tibeidawngtu ka nih emaw,

¹⁷Mahni maia ei tûr ka lo pumbila, Fahrahten ei tûr an nghei phah chuan

¹⁸(Ka tleirâwl lai ata ani chu pa nihna angin ka enkawl a, Hmeithaite chu an nute chhûl aɲanga ka kaihhrui tawh an ni);

¹⁹Silhfên tlâkchham avânga boral tûr ka hmuhin, Sin tûr nei lo mi rethei ka hmuha,

²⁰Ka berâm hmula ka tuam lum loh avânga Mal min sâwm lo a nih chuan;

²¹Rorêlnaah min ɲantu an awm tih hriat vânga Fahrahte chung a kut lek ka nih vaih chuan;

²²Ka bân hi ka koki aɲangin bal hlawk sela, Ka bân hi a invuahna ata thlawn rawh se.

²³Pathian kuta tihboral hi ka hlau êm êm a, A ropui êm avângin ka tuar zo dâwn si lo.

²⁴“Rangkachakah beiseina nei ta îla, Rangkachak ɲa chi hnênah, ‘Ka rinchhan ber i ni’ ti ta îla;

²⁵Ka hausak nasat êm avâng leh, Ka kutin sum a lakluh hrem avânga hlim ka nih chuan;

²⁶Ni êng te thlir kual, Thla êng kal lai te thlir vung vungin,

²⁷A rûk têa ka thinlung a lo hîp veng veng a, Ka kutin ka kâ a lo fâwp mai a nih chuan;

²⁸Hei pawh hi khawlohna hrem ngei phû a ni, Chung Pathian ka phatsan tihna a ni ang.

²⁹“Mi hawtu chhiatnaah ka lâwm viau va, Thil ɲa lovin a tlâkbuak avânga ka chapopui chuan.

³⁰(Dik takin, a nunna chung a ânhhe lawh tûrin Ka hmui hi sual ti tûrin ka phal lo);

³¹Ka puan ina chêng ve ten, ‘A chaw leh saa inhrai tlai lo tu nge awm?’ an ti ngai lo.

³²(Mikhualte chu khawlaiah an riak ngai hek lo, Zin veivâkte tân kawng ka hawn reng avângin);

³³Adama anga bawhchhiatna zêp ka niha, Ka khawlohna chu keimaha ka thup a nih chuan,

³⁴Mipui tam hrim hrim hlauh avâng te, Chhûngte dem hlauh vânga, Ngawi renga, lèn pawh lêng chhuak ngam lo ka nih chuan—

³⁵Min ngaihthlak saktu han nei teh îla âw! Hei hi ka chhinchhihna chu a ni. Engkimtiheia’n mi rawn chhânsakin, Ka Khingpui hian a bu-in han zia sela aw!

³⁶Ka kokiin ka pû ang a, Lallukhum angin ka khum tûr ale;

³⁷Ka ke pên zâtin a hnênah ka puang ang a, Lal fapa angin amah chu ka lo pan tûr.

³⁸“Ka ram hian min duh lova au vin, Ka leilet thlûrte pawh an lo ɲap a nih ngai chuan;

³⁹A thar chhuahte man pe lova ka lo eia, A neitute nunin a chên phah a nih hlauh chuan;

⁴⁰Buh aiah hlîng ɲo sela, Barli aiah hlo har ɲo rawh se,” a ti a. Joba thute chu a tâwp ta.

BUNG 32

ELIHUA'N JOBA ȚHIANTE A HNIAL

¹Joba chu dik a intih êm avângin, chûng mi pathumte chuan an chhâng zui zêl ta lo va.

²Mahse Buz mi, Rama thlah, Barakela fapa, Elihua chu Joba chungah a thin a thawk thut a; Pathian ai maha a insawithiamna chuan a tithinur sauh bawk a.

³A Țhian pathumte chungah chuan a thinur bawk a, Joba chu thiam lo ti reng si, mahse chhân ngaihna rêng an hriat tâk loh avângin.

⁴Amah aia upa an nih avângin, Elihua chuan Joba hnêna sawi ve hun a lo nghâk reng a.

⁵Elihua'n hêng mi pathumte kê ațanga chhânna rêng a awm ta lo tih a hmuhin, a thinur zual sauh va.

⁶Tichuan, Buz mi Barakela fapa Elihua chuan a chhâng ta a: "Kum lamah ka la naupang a, nangni in upa a; Chuvângin ka tim a, In bulah ngaihdân ka sawi ngam lo va.

⁷Upaten Țawng sela, Kum upa zawkten finna an zirtîr ang chu,' ka lo ti a.

⁸Mahse, mihringah hian thlarau a awm a, Engkimtitheia thâw chuan hriat thiamna a pe Țhîn.

⁹Mi ropuite hi an fîng bîk lo fo va, Upaten rorêlna dik an hrethiam bîk hek lo.

¹⁰"Chuvângin, 'Mi lo ngaithla ula, Ka ngaihdân ka han sawi ve ang e.'

¹¹In thû ka lo ngaichâng reng a, Sawi tûr in dap vêl chhûng khân, in Țanhmunte ka lo ngaithla reng a.

¹²Chîk takin ka lo ngaithla che u-a; Atû amahin Joba kha in hnial hneh lo va, A thu pawh in leththla thei hek lo—

¹³Chuti lo zawng, 'Finna kan tawng ta a; Pathian tih loh, mihring tân hneh rual a ni lo,' in ti dah ang e.

¹⁴A thu khân min hmertel ve lo bawk a; In sawi dân ang mai khân ka chhâng dâwn hek lo.

¹⁵"Chhânna tûr hre lovin an dang reng a; Sawi tûr rêng an hre tawh lo.

¹⁶Ka lo nghâk reng a, an chhâng tawh si lo va, Chhân ngaihna hre lovin an dîng zum reng ringawt a.

¹⁷Keiman ka'n chhâng ve ang a, Ka ngaihdân pawh ka'n phawrh vê teh ang.

¹⁸Sawi tûr hlîrin ka khat a; Ka chhûnga thlarau hian a turin min tur tawh a ni.

¹⁹Ka pum hi uain hu chhuahna nei lo ang hian, Uain thar dahna ip ang maiin a puak keh lo chauh a ni.

²⁰Ka sawi chhuah chuan, ka thâwl huai mai ang; Ka kê ângin ka'n chhâng ang e.

²¹Tumah Țan bik neih ka tum lo va; Tumah fak der ka tum hek lo.

²²In fakder vêl hi ka thiam vê lo ve, Chuti lo chuan min Siamtu hian mi la bo mai ang asin.

BUNG 33

ELIHUA'N JOBA A HNIAL

¹"Khawngaih takin Joba, ka thu lo ngaithla la, ka thusawi zawng zawng hi lo ngaithla kar mai teh le.

²Tihian ka kê ka âng a; Ka leiin thu ka sawi dâwn e.

³Ka thute hi ka thinlung dik taka chhuak a ni; Ka hmuiin hriatna thiang tak a âu chhuahpui ang.

⁴Pathian Thlarau chuan mi siam a, Engkimtitheia thâw-in nunna mi pê a.

⁵I theih chuan mi chhâng la, I thute chu ka hmâah hian a indawtin rem fel la; Țan i lo khawh dâwn nia.

⁶Pathian hmaa i aiawha sawitu dik tak ka ni a, Kei pawh hluma siam ve mai bawk ka ni.

⁷I tân hlahu tûr engmah ka awm lo va, I tâna hahthlak tûr thu a awm hek lo.

⁸"Ka beng hriatah thu i sawi tawh ngei a, I Țawng rî pawh ka hria a, tihian i tih kha:

⁹"Bawhchhiatna nei lo, mi thianghlim ka ni; Pawisawi lo, khawlohna nei lo ka ni.

¹⁰Mahse mi kalh zawngin ka lakah remchâng a dap a, A hmêlmâah mi chhiar ta hial a;

¹¹Ka kê-ah kawl mi buntîr a, Ka kawng tinrengah mi enthla reng a,' tiin.

¹²"Lo ngawi teh, hê thilah kher hi zawng, i dik lo deuh a ni. Ka han chhâng teh ang che. Pathian hi mihring aiin a ropui zâwk si a.

¹³A thu-ah engmah a la sawi chian hmain Engah nge amah chu i khin mai le?

¹⁴Pathian chuan kawng hrang hrangin thu a sawi thei si a, Mahse mihring chuan a hre thei si lo.

¹⁵Mumangah te, zân inlârnaah te, Mite mut reh lai taka, Anmahni khuma an muttui lai takin,

¹⁶An beng chu a hawnsak a, Zirtîrna an dâwn chu a nemngnet Țhîn.

¹⁷Mihring chu a thiltih tum Țulhtîrin, Chapona lakah a vêng Țhîn,

¹⁸A thlarau chu Leilâwta tla lo tûr leh, A nunna chu khandaiha boral lo tûrin a vêng Țhîn a ni.

¹⁹"Mihring hi a khumlaizâwlah natnaa thununin a awm a, A ruhte chu a na ngawih ngawih Țhîn.

²⁰Tichuan, chaw ei te a châk lo va, A nunin chaw tuihnai te pawh a ngei zâwk Țhîn.

²¹A taksa chu hmuh theihin a chêr telh telh a, Ruhkawl mai a lo ni ta a.

²²A ni, a thlarau chu Leilâwtah a liam Țep a, A nunna chhattu tûr a lo hnai ta.

²³"A tâna sawisaktu tûr palai, Mihringte hnêna Pathian dikzia hrilhfiat tûr hian Mi sâng zîngah pakhat tal han awm teh sela,

²⁴Tichuan, ani chuan khawngaihna nêh, ‘Leilâwtah chhuk lo tûrin chhanhim rawh, A tlantu tûr ka hmu ta’ han ti teh mai sela;

²⁵A tîsate chu naupang tîsa ang a lo ni ang a, A vânglai nîte chu kohkîr a ni leh ang.

²⁶Pathian hnênah lawm êm êmin a tawngtai ang a, A hmêl chu hlim takin a hmu tawh ang, Mihring hnênah a dikna a pekîr leh a ni si a.

²⁷Tichuan, mite chu enin, “Ka lo sual a, dikna chu ka lo tikhawlova, Hlâwkpui nân pawh ka hmang lo,’ a ti a.

²⁸Tichuan, a thlarau chu Leilâwta kal lo tûrin a tlan chhuak ang a, A nunnain êng a hmu ang.

²⁹“Ngai rawh, hêng thil zawng zawng hi Pathianin Mihringte hnenah wavi hnih wavi thum a ti thîn a ni,

³⁰Leilâwt ata a thlarau hruai kîr a nih theih nân leh, Nunna ênga a lo harh chhuah leh theihna tûrin.

³¹“Joba, i beng lo chhî la, min ngaithla teh; Lo ngawi la, ka han sawi ang e.

³²Sawi tûr i neih chuan, mi chhâng ang che; Sawi rawh, thiam chantîr che hi ka chhâk asin.

³³Anih loh leh, mi lo ngaithla la; Lo ngawi tlat la, finna ka zirtîr ang che.”

BUNG 34

ELIHUA’N PATHIAN RORÊLNA A PUANG

¹Elihua chuan a sawi zêl a:

²“Nangni mi fîngte u, ka thu lo ngaithla rawh u; In beng lo chhi rawh u, nangni hriatna neite u.

³Kâ-in a tui leh tui lo a hria ang hian, Bengin thu t̃ha leh t̃ha lo a thliar thîn.

⁴Kan tân rorêlna dik chu thlang ila; A t̃ha chu eng nge a nih i hria ang u.

⁵“Joba erawh chuan, ‘Mi dik ka ni a, Mahse Pathianin ka dikna min laksak a;

⁶Ka dikna chungchangah ka daw dâwn em ni? Bawhchhiatna ka nei lo chung hian, hliam dam thei lo ka nei,’ a ti baw si a.

⁷Joba ang hi tu nge awma, Hmuhsitna tui ang maia ina,

⁸Khawlohna sual titute nêna inkâwma, Mi suaksualte nêna lêngo thîn hi?

⁹Ani chuan, ‘Pathiana lâwm taka awm hi Mihring tân sâwtina a awm lo ve,’ a ti si a.

¹⁰“Chuvângin, nangni hriatna neite u, min lo ngaithla teh u: Pathian chuan suahsualna thil a ti hauh lo vang a, Engkimtitheia chuan khawlohna sual a ti lul lo vang.

¹¹Mihring chu a thiltih ang zêlin a rûl thîn a, Mi tin an thiltih phû taw zêlin lâwmmman a hmuhtîr ang.

¹²Pathianin suaksual takin a ti ngai lo vang a, Engkimtitheia chuan rorêlna dik a kailek hek lo vang.

¹³Ani chu leilungah tu nge thu neihtîrtu? Khawwêl pum awptîrtu chu tu nge?

¹⁴A thînlungin tum tak takin, A Thlarau leh a thâw hi ama hnênah lâkîr leh ta ang se,

¹⁵Tisa zawng zawng chu a boral vek ang a, Mihring chu vaivutah a kîr leh ang.

¹⁶“Hriat thiamna in neih chuan, hei hi hria ula; Ka thusawi hi lo ngaithla teh u:

¹⁷Dikna hawtuin ro a rêl ang maw? Mi dik ber chu thiam loh i chantîr ang maw?

¹⁸Lal hnênah, ‘Tlâktlâi lo pa,’ tiin, Miliante hnênah, ‘Mi suaksual pa’ an ti ngai em ni?

¹⁹Mahse hotute pawh a duhsak chuang lo va, Mi retheite aiin mi hausate a ngaisâng chuang hek lo; An zâ-in a kutchhuak vek an ni si a.

²⁰Zan laiah, mitkhap kâr lovah an thi mai a; Khûr chungin mite chu an boral thîn; Michakte pawh kut lova lâk bovin an awm thîn.

²¹“A mit chuan mihringte awmdan a thlîr reng a, A ke pên zawng zawng a hmu vek a ni.

²²Khawlohna sual titute bihrûkna tûrin Thihna hlim emaw, thim chhah tâwk emaw a awm zo lo.

²³Pathian rorêlna hmâah mihring chungthû hi, Rêl t̃hat leh t̃ulna a awm lo.

²⁴Mi chakte pawh zâwt kher lovin a pawt sawm a, An aiah midangin a thlak mai a ni.

²⁵Chuvângin an thiltihte a hre vek a; Zânah anni chu a paihthla a, An boral a.

²⁶Mite mithmuh laiin anni chu Misual hrem in a hrem a,

²⁷Amah an hawisan avâng leh, A dânte an pawisak loh avângin.

²⁸Chuvângin, mi retheite âu thâwmin a beng a thlen phah a; Sawisak tuarte au âw chuan a beng a verh zak mai a ni.

²⁹Râlmuan na a pête chungah tu nge buaina siam thei awm? A hnam pum pawh, mimal pawh ni se, A hmêl a thup laiin, tu nge hmu thei?—

³⁰Mipuite bumna thanga an awh loh nân Mi vervêkten rorêlna an chelh tûr a ni lo.

³¹“Tu nge Pathian hnênah, ‘Thununna ka tuar a; Pawi ka khawih tawh lo vang;

³²Ka hmuh lohte chu min zirtîr rawh; Khawlohna ka lo tih pawhin, ka ti leh tawh lovang’ tia sawi le?”

³³I duh ang kherin em ni a thungrulh dâwn che, Nang chuan i phatsan vâng em ni? Kei ni lovin, nangman i thlang tûr a ni; Chuvângin, i hriat ang chu sawi rawh.

³⁴“Mi chinchâng hriaten min hrilh a, Mi fîngten ka thu an ngaithla thîn asin:

³⁵Joba hi hriatna lovin a tawng mai mai a, A thu-ah hian finna rêng a awm lo.’

³⁶Aw, Joba hi misual tawnga a la tawng avângin A tâwphâwk thlenga fiah ni teh se!

³⁷A helna hian a sual a belhchhah a; Kut min han benkhum vêl a, Pathian sâwt zâwngin thû a tuitam mai mai a ni.”

BUNG 35

ELIHUA’N MAHNI INTIFEL A DEM

¹Elihua chuan a chhâng zêl a:

²“Hei hi dik i ti chiah maw? ‘Pathian ai pawha dik zawk ka ni’ i tih khâ?

³Nang chuan, ‘Thil sual ka ti emaw, tisual lo emaw, i tan eng nge pawî ang a, ka tân hlâwkna eng nge awm?’ i ti maw?

⁴“Ka han chhâng teh ang che, Nang leh i thianteho nên.

⁵Vânte khi thlîr la, han en vêl teh; Chhûmte pawh khi han en la— Nang aia sâng an nih khi.

⁶Thil i tihsualin, amah i khawih pawî vak em ni? I bawhchhiatna a punin, i khak buai tak tak em ni le?

⁷I dik pawhin, eng nge i pêk chuan le? I kut aţangin eng hlâwkna nge a dawn?

⁸I suahsualna chuan nang ang mihring chauh a khawih a, I dikna pawhin mihring fa bâk a khawih hlei nê.

⁹“Tihduhdahna an tuar nasat avângin an rûm tlawk tlawk a; Mi chakte bân avângin ţanpuitu tûr an âu va.

¹⁰Mahse tûmahin, ‘Mîn Siamtu Pathian hi khawiah nge, Zân lama hla mîn saktîrtu chu,

¹¹Leia ramsate aia nasa zawka mîn zirtîrtu, Chunglêng savate aia mîn tifingtu chu?’ ti rêng an awm lo.

¹²Tichuan, an âu chhuak a, mahse tûma’n an chhâng lo, Mi sualte chapo êm avângin.

¹³Pathian chuan thu lawilo mai mai a ngaithla lo vang a, Engkimtitheian a ngaisâng hek lo vang.

¹⁴Amah chu ka hmu lo ve i ti nân, Rorêlna chu a hmâah a awm a, amah chu i nghak tûr a ni.

¹⁵Tunah hian thinrima mi a hrem loh avâng leh, Sualna hi a ngaimawh mai loh avângin,

¹⁶Joba hi a thlâwnin a ţawng mai mai a ni; Hriatna nei lovin thu a tuitam duah a nih hi.”

BUNG 36

ELIHUA’N PATHIAN THATNA A PUANG

¹Elihua chuan a sawi zawm zêl a:

²“Mîn lo hrethiam la, ka entîr ang che, Pathian hminga sawi tûr ka la nei cheu mai.

³Hla tak aţangin hriatna ka fawm khâwm a; Dikna chu mîn Siamtu vângah ka ruat dawn a ni.

⁴Ka thusawi tûr hi dâwt a ni lo va; I kiangah hriatna famkim nei a awm hi.

⁵“Ngai teh, Pathian chu a chak a, tumah a hmusit lo; Hriatna leh chakna lamah a ropui a ni.

⁶Mi suaksualte nunna a zuah lo va, Tihduhdahte chu diknain a rêlsak thîn.

⁷Mi dikte lakah a mit a lasawn lo va, Lalţutthlênga lalte nên chuan, Kumkhuaa a ţuttîr avângin, Chawisânin an awm thîn.

⁸Miten kawî an buntîr a, Tuarna hruia phuar an nih chuan,

⁹An thiltihte leh an bawhchhiat dân te a hrilh a Luhul taka an lo tih thîn dan thlengin,

¹⁰Zirtirna ngaithla tûrin an beng a hawnsak a, An bawhchhiatna ata inlamlêl tûrin thû a pê a.

¹¹Thu âwiha a rawng an bâwl chuan, Hmuingîlna nên dam chhûng nî an hman ang a, Nuamsa takin an awm baw ang.

¹²Mahse thû an âwih loh chuan, Khandaiha tihhlum an ni ang a, Hriatna nei lovin an thi ang.

¹³“Thinlung depdê-te chuan thinurna an khâwlkhâwm a, Phuara an awm lai pawhin ţanpuina dîlin an âu duh chuang lo.

¹⁴An vânglai takin an thi ang a, Mi rilru herh tak takte nên an nun a la tâwp ang.

¹⁵Retheite chu an tuarna lakah a chhan chhuak thîn a, Hnehchhiahnain an beng a tihvârsak thîn.

¹⁶“Nang pawh manganna tâwp aţangin a hruai chhuak ang che a, Dîpdâltu awm lohna hmun thâwlah a awmtîr ang che; I dawhkânah hamţhatna tinrêng a hlui ang che.

¹⁷Mahse nang chu, mi suaksualte chan tûr rorêlnain i khat a; Dikna leh rorêlna chuan a man ta che a nih hi.

¹⁸Thinurna a awm avângin fimkhur rawh, Chuti lo zawng wawi leh khatah a hnâwl bo mai ang che a; Sum tam tak pawhin a tlan chhuak zo lo ang che.

¹⁹I hausakna te, i chakna zawng zawngten Manganna ata a vêng thei dawn che em ni?

²⁰Zân lam hi thlahlel duh suh, Mahni tapchhak zâwla boralna hun a ni asin.

²¹Khawlohna lam hawi lo tûrin fimkhur ang che, Chû chu hrehawm tuar aia i thlan a ni si a.

²²“Ngai teh, Pathian chu a thiltihtheihnaa chawisân a ni; Tu nge amah ang zirtîrtu awm?

²³Tu nge a awmdan tûr ruatsaka, Tu nge, ‘I ti dik lo ve’ ti thei le?

ELIHUA’N PATHIAN ROPUIZIA A PUANG

²⁴“A hnathawh châwimâwi tûrin hre reng la, Miten a fakna hla an sak thîn hi.

²⁵Mi tinin an hmu a; Miten hla tak aţangin an en thîn.

²⁶“Ngai teh, Pathian chu a ropui a, kan lo hre lo êm a; Kum engzât nge a nih hriat chhuah rual a ni lo.

²⁷Tui mal far tê tê a hîp chho va, Chhûma inthlifîmin ruah a sûtîr a,

²⁸Chhûm chuan a rawn sûtîr a, Mihringte chungah a sûr chur chur thîn.

²⁹Chhûm lo zâm darh dân te leh, Chung lama khawpui ri dur durte hi tu nge hre thiam le?

³⁰En teh, a êng a de tawn zawr zawr a, Tuifinriat mawng thlengin a tuam a.

³¹Hêng hmanh hian mite tân ro a rêlsak a, Ei tûr tam tak a pe thîn.

³²A kutte chu kawlpê-in a khuh a, A khawh chhuatîr zawk zawk thîn.

³³A khawpui rîin a puang a, Ranrualte pawhin thlipui tleh tûr te an lo hrethiam tlat a ni.

BUNG 37

¹“Hei pawh hian ka thinlung a tikhûr a, A phu dâwrh dâwrh thîn.

²A awrâwl ri dur durte chu ngun takin lo ngaithla teh, A kê aţanga lo chhuak ri rum rum te chu.

³Vân hnuai hmun tinah a thawh chhuak a, Kâwlpête chu kâwlkil thlengin a phêttîr a.

⁴Chumi zawhah a lo ri rum rum a; A awrâwl ropui chhuahin têt a tla ri thuai thuai thîn a, A awrâwl ri chu hriat a nihin a khap dai duh lo va.

⁵Pathianin a âw chu mak takin khawpui rîin a rîktîr a; Hriat thiam phâk loh thil ropui a ti thîn.

⁶Vûr hnênah chuan, ‘Leiah sîr rawh’ a ti a; Chutiang bawkin ruah phingphisiau leh ruahpuivânawn hnênah a ti bawk a.

⁷Mi tin kut chu a phuarsak a, Mi tinin a hnathawh an hriat theih nân.

⁸Ramsate chu an pûkah an lâwi a, An buzâwlah an tawm reng a.

⁹Chhim lam aţangin thlipui a lo thawk a, Hmar lam thli kawng aţangin khawvâwt a lo tleh a,

¹⁰Pathian thâw avângin vûr a lo awm a, Tuipui zau tak te a khang thîn.

¹¹Chhûm chhah takte chu hnâwngin a tikhat vek a, A chhûm vârtakte chu a tidarh a.

¹²A thupêk ang zêlin chhûmte chu an vir muai muai a, A thupêk ang zêla hna an thawh theih nan lei pumpui chungah hian a inzâr darh a ni.

¹³A awmtîrna chhan chu Mite siamţhat nân te, Ama ram tân te leh, A khawngaih vângin a ni.

¹⁴“Aw Joba, hei hi lo ngaithla teh; Ngawi rengin ding la, Pathian hnathawh makzia hi ngaihtuah rawh.

¹⁵Pathianin engtîn nge a thawh darh, tih leh, A chhûm zînga kâwl a phettîr dân i hria em?

¹⁶A inbûk tâwka chhûm awmdan te hi i hria em? Hriatna famkim neitu thilmak tih ropuizia te hi i hre pha em?

¹⁷Chhim thli hmanga leilung a tihreh duka, I silhfên a lo lum mai dân te hi i hria em?

¹⁸Amah nêl vân in kaiphah dîn tawh ngai em? Thîr chhûn dâthlalang ang maia khauh a ni si a?

¹⁹“A hnêna kan sawi ve tûr min zirtîr ta che, A thim êm avângin engmah kan buatsaih thei si lo va.

²⁰Ka sawi duh hi amah hrilh tûr em ni ang? Miin amah chu be ta se, lem pil daih a ni mai ang.

²¹Tunah pawh thli thâw in vân khi a chhêm kian chuan, Vâna êng khi a êng êm a, en ngam a nih loh hi.

²²Hmar lam aţangin rangkachak êng mawi angin a lo zâm a; Pathian ropuizia hi tihbaiawm tham a ni.

²³Engkimtithia chu kan hmuh theih rual a ni lo va; A thiltithieihzia chu a ropui a, Rorêlna leh diknaah a chungchuan a; Tûmah a hnuaichhiah lo.

²⁴Chuvângin miten an tih a; Intifingte pawh pawisak bik a nei chuang lo,” a ti a.

BUNG 38

LALPAN ENKIMTITHEI A NIHZIA JOBA A HRILH

¹LALPA chuan thâwngaleivir aţangin Joba chu a chhâng a:

²“Hriatna tello thu hmanga Ka remruatna tithimtu hi tu nge a nih?

³Mipa takin lo inbuatsaih la; Thil ka zâwt ang che a, mi chhâng tûr a ni.

⁴“Leilung nghahchhan ka phûm lai khân khawiah nge i awm? Hriatna nei i nih ngai chuan, mi hrilh teh le.

⁵A zau zâwngte hi tû ruahman nge? I hre ngei ang chu! A chungâ rîn hi tû zam nge?

⁶A nghahchhan chu engtia tihngheh nge a niha, A kila lung chu tû phûm nge?

⁷Eng tik lai khân nge zîng lam arsita an zai dial diala, Pathian fapate zawng zawng hlim taka an âu le?

⁸“Tuipui chu chhûl ata a lo pût chhuah lai khân, Tû-in nge kawng lo khâr nnan?

⁹A silhfên atân chhûm ka siam a, Thim chhah tak chu a tuamna puanah ka hmang a;

¹⁰A chîm chin tûr ka ruat a, A khârna leh kalhna ka vuah a;

¹¹Hemi chin hi chîm la, a bâk pêl suh, Chapo taka i fâwnvêl chu hetah hian tâwp rawh se!’ ka tih kha.

¹²“I pian achinah khaw vârtûrîn thû i pe tawh ngai em? Khawvâr ţanna hmun tûrte i hriattîr tawh em?

¹³Mi suaksualhote tawmna ata vawrh chhuak tûrîn, Kâwlkil tâwp thlengarawn pho lang vek tûr tih i hria em?

¹⁴Hlum chungâ an nembei ang maiin, Lei hi puan zia angin a ze tjal chuat a ni.

¹⁵Mi suaksualte lakah an êng chu hrênsak a ni a, An bân lek sân thîn pawh tihtliah a ni.

¹⁶“Tuipui hnârah te i lût tawh em? Tui thûk hmun te i fang chhuak tawh em?

¹⁷Thihna kawngkate an kawhmmuh tawh che em? Thihna hlim kawngkhârte i hmu chhuak tawh em?

¹⁸Leilung zauzia i hre phâk em le? Hêng zawng zawng hi i hriat chuan mi hrilh rawh.

¹⁹“Êng chênna in kawng hi khawiah nge? Thim hi khawi hmuna awm nge a niha,

²⁰A awmna rama i hruai thlen theih nân, A awmna in kawng i hria em?

²¹I hria ang chu mawle, i piang tawh a, I kum pawh a tam ve tawh a ni lâwm ni?

²²“Vûr dahkhâwlina hmunah i lût tawh em? Rial dahkhâwlina hmun pawh i hmu tawh em?

²³Buai hun atâna ka khêk a ni a, Inbeihna leh indo nia mi tûr a ni asin.

²⁴Êng hi engtianga taidarh nge ni a, Khawchhaka thli hi lei chungah engtia taidarh nge?

²⁵“Tu nge tuilian luan liamna kawng siala, Têk tân kalkawng lo siamsak le?

²⁶Tûma awm lohna ramah leh, Tûma chên lohna thlalêra ruah sûtîra;

²⁷Ram ro leh ramchhia tihnâwnga, Hlobet hring tötirtu hi tu nge?

²⁸Ruah hian pa a nei em? Dai fim te hi tû hrin nge?

²⁹Vûr hi tû chhûl aţanga lo chhuak nge? Vân aţanga vûr lo sûr hi tû hrin nge?

³⁰Tui hi lung ang maia sakín a khal thei a, Tuithuk chung chu a khal thín.

³¹“Sirukte khi phuar khâwmin, Chhohreivûng hlâwmho khi i phelâ darh thei em le?

³²Arsi bâwrho khi an hunbíah i khalh chhuak thei em ni? Zângkhua leh a notê-te khi i kaihruai thei em?

³³Vân lama dân thuruatte khi i hria em? Lei chungah hian thu i neihtîr thei ang em?

³⁴“I chungah ruahpui sûtîr tûrin Chhûm aţangin ruah i ko thla thei em?

³⁵Kâwlpête hi i tîr chhuak thei em ni? I hnênah, ‘Heta hi kan awm el’ an rawn ti ang em?

³⁶Rilru chhûnga finna hi tû dah nge? Thinlunga hriat thiamna hi tû pêk nge?

³⁷Chhûmte khi finnaa chhiar thei tu nge awma, Vân tuizênte khi tu nge leih baw thei?

³⁸Engtik laiín nge vaivutte hi a inhlâwm khâwma, Lei tlangte hi a lo inbelhbawm le?

³⁹“Sakeibaknei hi sa i pêlsakin, A notê te hi i châwm tlai thei emaw chu?

⁴⁰An pûkah te an bawh vêla, An bihrûknaa sa seh tûr an chân lai hian?

⁴¹Choâk te hi, ei tûr tlachhama an vahvaih laia, An notêten Pathian hnêna chaw dila an hrâm laiín, Tu nge ei tûr pê?

BUNG 39

¹“Khâma chêng sathârte no neih hun i hria em? Sazuk no neih hunbi i hria em?

²An no pai chhûng thla zât i chhiar thei em? No an hrin hun te i hre thei em?

³An kûn a, no an hring a, Tichuan, an vei zo mai a.

⁴An notête chu hrisêl tak an ni a, Chaw eiín an tşang lian zêl a, An tla hrang a, an kîr leh tawh lo.

⁵“Ram-sabengtung hi tu nge chhuah zalen? Ram-sabengtung thlun hi tû chhuah nge?

⁶Tû chênna in nge thlalêrah ka siamsaka, Ram chhengchhiaa chêng ta hi?

⁷Khawpui hulûm te chu a duh ve lo va, A khalhtu âw pawh a ngaihsak hek lo.

⁸Tlang dungte chu a tlatna hmun a ni a, Thil hring tawh phawt chu a zawng mai a ni.

⁹“Ram-bâwngpa hi i chhawr thei em? I ran inah a riak duh ngût emaw chu?

¹⁰Ram-bâwngpa chu leilehna hrui i bahtîr thei em? I hnungah a thlûr a rawn hrût rual duh ang em?

¹¹A thahrui chak vâng ngawtin i ring thei ang em? A kutah i hnathawh tûr i kawltîr ngam ang em?

¹²I buh tharte chu ina rawn phur hâwnga, I hruihzâwla lakhâwm tûrin i ring thei ang em?

¹³“Ostrik hian a thlate hi chhuang takín a pharh vel a, Mahse, kânghlai zaidam thla leh hmulte a tluk em ni?

¹⁴A tuite chu leiah a hnutchhiaa mai a, Vaivutin a khuh lum a;

¹⁵Miten an rap keh thei tih leh, Ramsaten an chîl keh thei tih rêng a ngaihtuah lo.

¹⁶A hrin ni lo ang maiín a notê te a dîm lo a; A enkawl hahpuina chu thlâwn mahse a pawisa lo.

¹⁷Pathianin finna tlachham tûr zâwng leh, Hriat thiamna nei lo tûr chia a siam vâng a ni.

¹⁸Tlân tûra a han intihpuk meuh chuan, Sakawr leh a chungchuantge chu a tham lo teh asin.

¹⁹“Sakawr chakna hi nangma pêk em ni? A tuang ri hluk hluk thei hi i siam em ni?

²⁰Khau angin i tihthaih thei em ni? A hnâr tum thâwm pawh a râpthlak theih êm hi.

²¹Phai ruamah inhrosain a ke a phiât tlut tlut a; Indona hmunah pawh a lîm lût puat puat mai a ni.

²²Hlauhna hi a nuihzat a, hlauvin a chiaí ve lo; Ngûnhnâm lakah a tîm ve hek lo.

²³Thal bâwm a inkhak ri rawk rawk a, Fei leh thal a tle zawr zawr a.

²⁴Thinrim leh thatho takín a lîm puat puat a, Tawtawrâwt ri pawhin a chelh dîng zo hlei nê.

²⁵Tawtawrâwt rî a hriat chuan, ‘Khai aw le!’ a ti a. Indona chu râl aţangin a hre thei a, Hotute au âw leh thâwm rî nê.

²⁶“A thla pharha, chhim lama mupui thlawk thín hi, Nangma finna avâng a ni em?

²⁷Muvanlai a invawrh chho va, sâng taka bu a chhep hi, Nangma thupêk em ni?

²⁸Khâm kovah te an chêng a, Lungpui kâr hmun himah te chuan.

²⁹Chuta tâng chuan a sa man tûr a thlîr vêl a; A mit chuan hla tak tak a hmu phâk a.

³⁰A notê-ten thisen an dâwt a; Saruang awmnaah chuan, an awm chawt thîn,” a ti a.

BUNG 40

¹LALPA chuan Joba hnenah chuan:

²“Engkimtithia hnialtu chuan i han tihdiktîr dâwn em ni? Pathian pawh zilhtu chuan han chhâng sela,” a ti a.

PATHIAN HNÊNA JOBA CHHÂN LÊTNA

³Joba chuan LALPA chu a chhâng a:

⁴“Ngai teh, mi tlâktlai lo mai ka ni; Engtin nge ka chhân theih ang che? Ka kê ka hup ringawt mai ang.

⁵Vawi khat ka tawng tawh a, ka chhâng tawh lo vang; Ka wawi hnih ta, ka chhâng zawm tawh lo vang,” a ti a.

JOBA HNÊNA PATHIAN CHONA

⁶LALPA chuan thâwngaleivir a tângin Joba chu a chhâng a:

⁷“Khai le, mipa takin lo inbuatsaih la; Thil ka zâwt ang che a, mi chhâng tûr a ni:

⁸“Ka remruat dân mi sîtsak i tum chiah mâw? Thiam i chan theih nân thiam loh mi chantîr ang mâw?

⁹Pathian angin bân i nei em ni? Amah angin khawpui rî ang âw i chhuah thei em ni?

¹⁰Tichuan, lalna leh zahawmna inbel la, Ropuina leh mâwinain han inthuah teh le.

¹¹I thinrimna nasa tak chu hnawt kiang la; Mi chapo apiangte chu en la, han titlâwm teh le.

¹²Mi chapo apiang chu en vek la, hnûk hniam la; Mi suaksualte chu anmahni hmunah chîl hrep ang che.

¹³Vaivutah a huhovin thukrû la, Hmun thimah an hmai han tuam la.

¹⁴Tichuan, i kut dîng lam ngeiin a chhanhim thei che tih Kei pawhin ka pawm dâwn nia.

¹⁵“Behemoth hi han en teh, nangma ruala ka siam a ni a; Bâwngpa angin hniam a pet ve a.

¹⁶Tunah en la, a chakna chu a kâwng bâwrah a awm a, A thiltihtheihna chu a pumpui tihrawlah a awm.

¹⁷Sidar thing angin a mei chu a hêm a; A malpui thâ te chu nghet takin a inphiar chuat a.

¹⁸A ruhte chu dâr ban ang mai a ni a, A nâkruchte chu thîr tlâwn tun thût ang a ni.

¹⁹Pathian thilsiam entîrna hmasa a ni a; A siamtu chauhin a khandaib bulah a awmtîr thei asin.

²⁰Tlângte chuan a tân chaw an tharsak thîn a, Chû hmunah chuan ramsa zawng zawng an tualchai thîn.

²¹Lotus thing hnuaiah te a bawk a, Rairuang leh chirhdûmah te a inthup thîn.

²²Lotus thingbuk chuan a zâr hliah a; Lui kama tuipuisut-hlah kungten an hual a.

²³Tui lian but but chu a hlau lo va, A chî-ai phah lo. A kê thlengin Jordan chu lian mahse, a pawisa chuang lo.

²⁴A mit tuama man rual a ni lo va, A hnârah thîr zuma vih tlang theih pawh a ni lo.

BUNG 41

¹“Leviathan hi nghakuaiin i khai chhuak thei em le? Hruuin a lei i phuar thei emaw chu?

²Phairuang kuangin a hnâr i verh tlang thei em? Nghakuaiin a khabe i thil tlang thei em?

³I hnênah a ngen tlut tlut ang em? Zaidam takin a bia che ang em?

⁴Thu a thlunpui duh che ang em? I chhawr kumkhua thei dâwn em ni?

⁵Sava angin i chhaih fiam thei ang em? In nuho chaih atân i hling thei ang em?

⁶I thianten ruai theh nân an talh thei ang em? Sumdawngtuten an inchansem thei ang em?

⁷A vunah feikibâr chhun khatin, A lû-ah nghafei i chhunbûr thei em?

⁸A chungah i kut han thlak teh rêng; In inbeih dan tûr chu, i hre mai anga— I ti leh tawh ngai lo vang!

⁹Hetiang tihtlâwm tum chu beidawnthlak mai a ni; En mai pawhin a beidawnthlak a ni lo’ m ni?

¹⁰Amah chhaih kawlh ngam tumah an awm lo. Chuti chu, tu nge ka hmaa dîng thei awm?

¹¹Tu nge ka rulh leh tûra thil mi pe hmasa le? Vân hnuaia thil engkim hi ka tâ a ni.

¹²“A fûkê chungchang ka thup lo vang, A chakzia te, a pianhmang inchawihzia te nê.

¹³Tu nge a vun pawnlâng lip thei? Tu nge a khabe pahni pan hnai thei?

¹⁴Tu nge a hmai kawngkapui leh, A hapui râpthlak leh kual thut mai kuai kau thei?

¹⁵A puhlip inthuah thût chu a chhuang a, Châr ngheh ang maiin a insi phui tlat a;

¹⁶A insîk phui tlat avângin A kârah boruak pawh a kal tlang thei lo;

¹⁷A insi phui tlat a, A inzawm vek a, kaihtên thei a ni lo.

¹⁸A hahchhiau pawhin êng a puh chhuak zuai zuai a, A mit chu zîng lam angin a de rû mai a ni.

¹⁹A kê a tângin meialh a puh chhuak a; Meisi a têt chhuak chuai chuai a.

²⁰A hnâr a tângin mei a khu chhuak hluah hluah a, Tui chhuan so bêl leh rairuang mût khû ang mai a ni.

²¹Meihâwl chhêm vâm khawpin a thaw hulh hulh a, A kê-in meialh a tichhuak zuai zuai thîn.

²²A ngâwnng chu a chakna bulpui a ni a, A hmâah chuan hlauhawm a tualchai reng a.

²³A pangti inthlepte chu a inzawm vek a, Kaiht̃hen theih lohvin a inzawm nghet bur mai a ni.

²⁴A thîlung chu lung anga sak a ni a, Râwtsawmna lung hnuai zawk ang maia chang a ni.

²⁵Arawn thawh meuh chuan, mi chakte pawhin an hlau a; A rîk buaih buaih tawh chuan, mahni pawh an inhre chang tawh thîn lo.

²⁶Khandaiha beihin awmzia a nei pha lo; Fei te, thal te, fei kibâr te pawh eng tihna mah a ni lo.

²⁷Thîrte chu buhpâwl ang lekin a ngai a, Dâr te chu thing mawih ang lek a ni.

²⁸Thalin a hnawt tlan zo lo va; Vîrvawm te chu buhpâwl ang lekah a ngai a ni.

²⁹Thalte chu buhkuang ang lekah a ngai a; Feikibara vauna chu a nuih mai a.

³⁰A dul chu bêlkeh hriam ang mai a ni a; Leilehnain a rîn khuar angin a hnuhma a thlûr sung a.

³¹Tui thûkte pawh bêl angin a tiso burh burh a; Tuipui chu hriak bêl angin a tiphuan a.

³²A kalna hnu tui chu a vâ buah thîn a, Tuipui sam a t̃uak vâ ta emaw tih mai t̃ur a ni.

³³Leilungah hian amah ang rêng an awm lo, Hlauh nei lova siam a ni.

³⁴A mit chuan thil sâng tinrêng a en thîn a; Mi inlulingte chungah chaponalal a ni.”

BUNG 42

JOBA INLAMLÊTNA LEH NGAI-AWH LEHNA

¹Joba chuan LALPA chu a chhâng a:

²“Engkim i ti thei tih ka hria a, I tum chu engmahin a dâl zo lo.

³Tu nge hriatna tel lova remruatna thuptu chu? tiin i zâwt a. Chuvângin, ka hriat thiam loh thilte ka sawi mai mai a, A mak lutuk a, ka hre phâk lo a ni.

⁴Khawngaihin mi lo ngaithla la, min sawit̃r lul rawh; “Thil ka zâwt ang che a, mi chhâng t̃ur a ni,” i tih kha.

⁵“Benga hriatna maiin ka lo hre thîn che a, Tûnah erawh chuan ka mit ngeiin a hmuh t̃ak che hi.

⁶Chuvângin, mahni pawh ka inten a, Meivâp leh vaivutah ka sim ta e,” a ti a.

⁷LALPA chuan Joba hnêna chûng thute a sawi hnû chuan, LALPA chuan Teman mi Eliphaza hnênah, “Nang leh i thiante pahnih khân ka thîn in tiur nasa hle a ni, ka chhiahhlawh Joba angin keima chungchang dik taka in sawi ve loh avângin.

⁸Chuvângin, tunah hian bâwngpa pasarih leh berâmpa pasarih nêna chhiahhlawh Joba hnênah kal ula, in tân hâlral thilhlân va

hlân rawh u; ka chhiahhlawh Joba’n a lo t̃awngt̃aisak ang che u. Chû chu ka lo pawm dawn nia, chuti lo chuan in âtzia ang zelin ka ti palh mai t̃ur che u asin; ka chhiahhlawh Joba angin ka chanchin dik takin in sawi ve si lo va,” a ti a.

⁹Tichuan, Teman mi Eliphaza te, Shuhi mi Bildada te, Naamathi mi Zophara te chu an va kal a, LALPA thupêk ang zêl chuan an ti a; LALPA chuan Joba dîlna chu a lo pawm sak a.

¹⁰Joba a thiante a han t̃awngt̃aisak chuan, LALPA chuan Joba chu a ngai angin a siam leh a. LALPA chuan Joba chu a hmaa a neih lêthnih a pe a.

¹¹Tichuan, a unau zawng zawng te, a farnu zawng zawng te leh, tun hma lama a hmêlhriat zawng zawngte kha, a hnênah an lo kal a, a inah chuan chawhlui te an kîl tlang leh ta a. LALPAN tuarna tinrêng a chungah a thlent̃r chungchangah an tuarpui a, an thlamuan a, mi tinin silvar tangka tlang khat leh zungbun pakhat theuh an pê a.

¹²LALPA chuan Joba hun hnuhnung lam chu at̃r lam aia nasain mal a sâwm a; berâm 14,000, sanghawngsei 6000, bâwngpa kawp 1000 leh sabengt̃ungpui 1000 a nei a.

¹³Fapa pasarih leh fanu pathum a nei a.

¹⁴A fanu upa ber hmingah Jemimai a sa a, a pahnihna hming chu Keziai a ni a, a pathumna hming chu Keren-Happuki a ni.

¹⁵Joba fanute anga hmêltha chu ram zawng zawngah hmuh t̃ur an awm lo; an pa chuan an nũtate zîngah rochan a sem ve a.

¹⁶Chumi hnûah chuan Joba chu kum 140 a la dam a, a tu leh fate, chhuan lina thlengin a hmu pha a.

¹⁷Tichuan, Joba chu tarkûn a nih thlenga damin, upa takin a thi ta a.

SAM

*Ziah tu: Davida leh Mi Dangte. • Ziah kum: Mosia hun a_anga Babulon
Saltân Hnû (B.C. 1440-400)*

Sam Bu hi Grik ɣawnga psalmos tih aɣanga lâk a ni a, a awmzia chu ‘rimâwi tum rîk rema hla sak’ tihna a ni. Hê Grik ɣawngkam Thuthlung Thara a lo lanna (1 Kor. 14:26; Eph. 5:19; Kol. 3:16)-ah te chuan ‘Fakna Hlâ’ tia sawi a ni. Hebrai ɣawngin hê lehkhahu hi Sepher Tehillim an ti. Fakna Lehkhahu tihna bawk a ni a. A thupui khâi khâwm̄tu châng chu: “Engkim thaw thei tawh phawt chuan Lalpa chu fak rawh se,” (150:6) tih hi a ni. A tîr takah chuan hêng fakna hlâte hi Israel mipuiten Pathian an fakna tûra buatsaih a ni. Hêng Fakna hla 150 zînga 73 te chu Davida phuah a ni a; 12-te chu Asapha (50; 73-83); pahni chu Solomona (72; 127); pakhat Mosia (90); pakhat dang chu Ethana (89); 12-te chu Kora fate leh Levi hnama zâi mite (42-49; 84, 85, 87, 88) phuah a ni. Hêng Fakna hlâten an sawi ber chu hun kal tawha Pathian thiltih ropuizia te, tûn hun atân leh hun lo la kal zêl tûra Pathian mamawhna nasatzia te, a lalzia leh ɣhatzia fakna te a ni. Fakna hlâah te hian Messia chungchâng sawi lâwkna a tam hlê: a tuarna lam te (22; 69), Krista lalna te (2; 21; 45; 72), a lokallehna lam te (50; 97; 98), Pathian Fapa, Puithiam a nihna (110) leh a dang dangte a ni. Thuthlung Tharah hian Sam Bû aɣanga thu lâk chhuah (quotation) 186 zet a awm. Sam bû hi Israelte chanchin (history)-in a luah khat a ni ber a-lei leh vân siam aɣanga saltân hun inkâr chanchin hrang hrang a chuang. Hmun tinah Pathian ɣhatna leh rinawmna, a rin tlâkzia leh inngahna tlâk a nihna te, amah ringtute tâna châwimâwi tlâk Pathian a nihzia te leh mihringte dawrâwm sî zia te chu a inzep chhuak vek a. Sam bû hi Bible-a a bu laiî, hmâsânga mite leh tûnlaia miten an ngainat tâwp theih loh, Thuthlung Hlui leh a Thar chhun êngtu Varparh Arsi ang mai a ni. Sam Bû hi hlâwm ngâ-in an ɣhen: (1) Sam 1-41; (2) Sam 42-72; (3) 73-89; (4) Sam 90-106 leh (5) Sam 107-150. Sam Bû hi Bible-a bu 19-na a ni a, bung 150 a awm a, châng 2461 a awm bawk.

BUNG 1

MI ɤHÂTE KAWNG LEH MI SUALTE TÂWP DÂN TÛR

¹Pathian ngaihsak lote remruat dân a awm ngai lova, Mi sualte kawngah pawh dîng ngai lova, Hmusittute ɣhutphah pawha ɣhu ngai lo mi chu a nihlawh e;

²LALPA dân chu a lâwmna a ni zâwk a, Chû dân thû chu achhûn azânin a ngaihtuah ɣhîn.

³Lui kama thingphun ang a ni a, A hun takah rah a chhuah ɣhîn; A hnahte pawh a uai ve ngai lo va, A thiltih apiangah a hmuîngîl zêl ang.

⁴Pathian ngaihsak lote erawh chu chutiang an ni lo va; Buh sî thliin a len bo ɣhîn ang hi an ni.

⁵Chuvângin, Pathian ngaihsak lo mite chu rorêlna hmâa dîng zo an awm lo vang a; Mi sualte chu mi ɣhâte inkhâwmnaah an tel

ve hek lo vang.

⁶LALPA chuan mi dikte kawng chu a hriatsak si a, Pathian ngaihsak lote kawng erawh chu a boral ang.

BUNG 2

MESSIA HNEHNA LEH A LALRAM

¹Engah nge hnamte chu an thinura, Mi tinin engmah lo mai an phiar ɣhîn le?

²LALPA leh a Hriakthiha do tûrin Leia lalten ɣanhmun an khawh a, Rorêltute an inrâwn khâwm a,

³“Hawh u, an phuarnate hi tichat vek ila, An hrualhruite hi kan hnên ata i paih bo daih ang u,” an ti hlawm a.

⁴Vâna ɣhûa chu a nui ang a: Lalpa chuan anniho chu nuihzabûrah a siam dâwn si a.

⁵Thinrimin anniho chu a vîn tuar tuar ang a, A thinurna nasa tak chuan a timangang dâwn a ni:

⁶“Ka tlâng thianghlim Zion-ah chuan Keima’n ka Lal chu ka dîn tawh si a.”

⁷Thupêk chu ka puang ang a: LALPAN ka hnênah, ‘Nang hi Ka Fapa chu i ni e, Vawiinah hian ka hring a che.

⁸Mi dîl la, tichuan i rochan atân Hnam tin ka pê ang che a, Lei pum pui hi i ro atân ka pê ang che.

⁹Anni chu ɣhîrtiangin i vaw keh ang a; Bêlvawtu bêl ang maiin i vaw sawm vek ang,” a ti a.

¹⁰Chuvângin, âw lalte u, fîng rawh u, Nangni, leia rorêltute u, zilhna hi pawisa rawh u.

¹¹ɤh dêkin LALPA rawng bâwl ula, Khûr chung pawhin lâwm rawh u.

¹²Fapa chu fâwp rawh u, chuti lo chuan a thinur ang a, Kawng lakah in boral mai tûr asin, A thin chu thawk ɣhêt a ni si a. Amaha rinna nghattute erawh chu an nihlawh e.

BUNG 3

ZÎNG LAM ɤAWNGTAINA.

¹LALPA, mi tibuaite hi an va pung chak êm! Mi dotute hi an va tam êm.

²Ka chungchâng thû an sawi a, “Pathianin a pui lo vang,” an ti a.

³Nang erawh chu, âw LALPA, ka phâw i ni a; Ka ropuina leh ka lu châwi kângtu i ni.

⁴Ka âwin LALPA chu ka âu va, A tlâng thianghlim aɣangin mi chhâng ɣhîn a.

⁵Ka han tluzâl chu ka lo muhîl dêr a; Ka han harh leh a, LALPA chuan mi lo chelh reng si a.

⁶Chuvângin mi dova, mi hualvêltute hi, Sâng sâwm rual pawh ni se ka hlau lo vang.

⁷Tho ta che, âw LALPA; Mi chhandam ang che, âw ka Pathian! Ka hmêlmâ zawng zawngte biang ruhah i vaw ta si a; Mi sualte hâ pawh i vaw bal tawh a.

⁸Chhandamna chu LALPA tâ a ni: I malsâwmna pawh i mite chungah a ni a awm ni.

BUNG 4

TLAI LAM TAWNGTAINA.

¹Aw, ka dikna Pathian! Ka koh hun chein mi chhâng ang che; Ka manganna ata nangin mi chhâwk a; Mi khawngaih la, ka tawngtaina ngaithla ang che.

²Aw mihring fate u, eng chen nge Ka ropuina hi mualphonaah in chantîr dâwn le? Engmah lo mai hi eng chen nge in thlâkhlelh ang a, Dâwt thù mai in zawn dâwn le?

³LALPA chuan Pathian ngaihsak mi chu ama tân a serh hrang tih hre rawh u: LALPA chuan ka koh hunah mi lo ngaithla dâwn si a.

⁴Thinrim ula, thil sual chu ti suh u: In khum laizâwlah chuan ngâwi rengin inngaihtuah rawh u.

⁵Diknaa inthâwinat chu hlân ula, LALPA-ah chuan in rinna ngat rawh u.

⁶“Tu nge t̃hatna rêng rêng mi hmuhtîr ang le?” titu an tam si a. LALPA, kan chungah hian i hmêl êng ngei khân min han ên ang che.

⁷Ka thilunga lâwmna mi dahsak hi, An buh leh uain thar hlâwk tuma an lâwmna aiin a nasa zâwk si a.

⁸Thlamuang takin ka tluzâl ang a, ka muhîl siai siai tawh ang; Aw LALPA, nang chauh hi i ni him taka mi awmtîr t̃hîntu chu ni.

BUNG 5

HUMHIM DÎLNA

¹Aw LALPA, ka thù hi lo ngaithla la, Ka ngaihtuahna hi mi lo hriatsak ang che.

²Ka âu thâwmah i beng lo chhi la, Ka Lal leh ka Pathian, I hnênah a ni ka tawngtai dâwn ni.

³Aw LALPA, ka âw hian zîngah i hnên a lo thleng ang a; Zîng aţangin i lam ka hawi ang a, Ka rawn thlîr chho reng ang che.

⁴Sualnaa lâwm thîin Pathian i ni lo va, Sual rêng rêng chu i hnênah a awm thei hek lo.

⁵Mi chapote chu i mithmuha dîng thei rual an ni dâwn si lo; Thil sual titu zawng zawng chu i haw si a.

⁶Mi dawhehte chu i tiboral daih ang a, Thisen chhuah hmang leh bum hmang chu LALPA ten zâwng a ni.

⁷Kei erawh chu i ngilneihna nasa tak avângin, i inah ka lo lût ang; Nangmah t̃ih dêkin i tempul thianghlim lam hawiin chibai ka bûk ang che.

⁸Aw LALPA, ka hmêlmâte avâng hian i dikna chuan mi hrui la; Ka hmâah hian i kawng chu tingîl ang che.

⁹An kâah rinawmna rêng a awm lo va, An chhûng lam chu chhiatna mai a ni. An hrawk chu thlân inhawng a ni a; An leiin mi an fak der thîin.

¹⁰Aw Pathian! thiam loh chantîr ang che, Anmahni remruat ngei chu tlûk phah nân hmang sela; An bawhchhiatna tam tak

avâng chuan paih chhuak ang che, I lakah an hel si a.

¹¹Nangmaha rinna nghattute zawng zawng chu hlim sela; I vên him thîin avângin hlimin âu reng mai rawh se: I hming ngainatute pawh Nangmahah chuan lâwm rawh se.

¹²Aw LALPA, mi dikte chu mal i sâwm ang a; Ani chu phâw angin duhsaknain i hual tlat dâwn si a.

BUNG 6

ZAHNGAIHNA DÎLA TAWNGTAINA

¹Aw LALPA, i thinur laiin mi hâu lo la, I thinrim laiin mi thunun suh ang che.

²Aw LALPA, mi khawngaih rawh, ka châu zo ta si a: Mi tidam ang che; ka ruhte hi a na thêh thûm a,

³Ka nun pawh hi nasa takin a mangang ta; Aw LALPA, eng chen nge mi rial dâwn le?

⁴Aw LALPA, mi chhan chhuak tûrin lo kîr leh rawh. I zahngaihnain mi chhan ang che!

⁵Thihnaah hian nangmah hriat rengna a awm si lo va: Thlânah chuan tu nge lâwm thu hrilh ang che le?

⁶Ka rûmna lamah ka châu zo ta; Zan tinin ka mutna khum chu, Ka mittuiin ka chiah huh thîin.

⁷Lungngaihna avângin ka mitte pawh a chhe zo va; Ka hmêlmâ zawng zawngte avângin a thim zo ta.

⁸Nangni sual rawngbâwtute u, mi kalsan vek rawh u; LALPAN ka t̃ap thâwm a lo hre tawh si a.

⁹LALPAN khawngaih ka dîlna a lo ngaithla tawh bawk a; LALPA chuan ka tawngtaina chu a lo pawm ngei ang.

¹⁰Ka hmêlmâ zawng zawng chu mualphovin, nasa takin chí-âi sela, Kîr leh sela, mualphona tâwk thut rawh se.

BUNG 7

CHHAN CHHUAH DÎLA TAWNGTAINA

¹Aw LALPA ka Pathian, nangmahah ka rinna ka ngat a; Mi tiduhdahtute zawng zawng lakah mi chhandam la, Mi chhan chhuak ang che.

²Chuti lo zawng, sakeibakneiin a pawt thlêr angin, Chhantu nei lova ka awm lai hian Mîn pawt sawm dah ang e.

³Aw LALPA ka Pathian, hetiang ti ka lo niha, Ka kutah hian sualna a lo awm renga,

⁴Ka t̃hian kawmngaih lai chu suala thungrûl ka lo nih emaw, Ka hmêlmâ hi chhan awm lova rawk mai ka lo nih chuan,

⁵Hmêlmâ chuan mi ûmin, mi ûmpa sela; Ni e, leiah hian mi chîl thlu nek sela, Ka zahawm vê-na te pawh hi vaivutin chhîlh rawh se.

⁶Aw LALPA, thinurin lo thawk la, Ka hmêlmâte hi an thinrim êm a, nangin rawn hrâwk teh; I thupêka rorêlnaah mi t̃an tûrin lo dîng chhuak ang che!

⁷Tichuan, mipui pung khâwmhoten an hual vêl ang che a, Anni avâng chuan hmun sângah kîr leh ang che.

⁸LALPAN mite ro a rêlsak ang a; Aw LALPA, ka dikna ang zêlin ro rêl la, Keimaha dikna awm ang zêlin min rêlsak ang che.

⁹Aw, mi suaksualte سوالنا chu lo tâwp tawh sela, Mi dikte erawh chu tinghet ang che: Thatna Pathian chuan thinlungte leh rilrûte a fiah thîn si a.

¹⁰Ka himna chu Pathian a ni a, Ani chuan mi nun ngîlte chu a chhandam thîn.

¹¹Pathian chu rorêltu dik a ni a, Pathian chu mi sualte chungah ni tin a thinrim thîn.

¹²A inlamlêl duh loh chuan Ani chuan a khandaih a tât hriam ang a; A thalngul chu kâp tûrin a kuai kûl ang.

¹³Ama pualin thihna hriamhreite a buatsaih thîn a, Thal alh thei pawh a siam baw a.

¹⁴En teh, mi suaksual chuan سوالنا a thlen a, A ni, buaina a suangtuah a, dâwt thû a puh chhuak a.

¹⁵Khuarkhurum a siam a, thûk takin a lâi a, Ama khur laihah chuan a tla ta a.

¹⁶A thil sual tih chu ama lu chungah baw a tla leh ang a. Râwng taka a thiltih chu ama chhîp chungah baw a tlâ ang.

¹⁷LALPA chu a dikna ang zêlin ka fak ang a, LALPA Chungnungbera hming chu fakin ka zai tawh ang.

BUNG 8

PATHIAN ROPUINA LEH MIHRING THUNEIHNA

¹Aw LALPA, kan Lalpa, Lei chung zawng zawngah hian, i hming hi a va tha êm! I ropuina chu vân chungachte khian i din a.

²I hmêlmâ leh phuba latute i tihtlâwm theih nân, Nausênte leh hnute hne laite kâa chhuak aţangin I hmêlmâte do thei tûr chakna i tinghet ta.

³I kutchhuak vân te, Thlâ leh arsite tâna i remruat dân ka ngaihtuah thîn a.

⁴Mihring hi eng nge maw a niha i ngaihtuah êm êma, Mihring fapa pawh hi eng vânga rawn kan thîn nge i nih le?

⁵Ani chu Vântirhkohte aia hnuai deuh chauhvîn i siam a, Ropuina leh châwimâwina i khumtîr a.

⁶I kutchhuak chungah thunei takin i siam a; A ke hnuaiah engkim i dah baw a,

⁷Berâm leh bâwng zawng zawng te— Ramhnuaia ramsa zawng zawngte nê;

⁸Chunglêng savâ te, tuipui sângah te, Tuifinriat chhûnga chêng zawng zawngte nê.

⁹Aw LALPA, kan Lalpa, Lei chung zawng zawngah hian I hming hi a va tha tehlul êm!

BUNG 9

HMÊLMA HNEHNA CHUNGA LÂWMTHU

¹Aw LALPA, ka thinlung zawng zawngin ka fak ang che a; I thil mak tih zawng zawng chu ka hril zêl ang.

²Nangmahah hian lâwmin ka hlim ang a; Aw, Chungnungber, i hming fakin ka zai ang.

³Ka hmêlmâte an tlânchhiat hun chuan I hmâah an tlu ang a, an boral ang.

⁴Rorêlna thutthlêngah diknain ro i rêl a, Ka dikna leh ka thiamthu i ţan tlat si a.

⁵Hnam tin i zilhhau va, Mi suaksualte chu i tiboral a; An hming chu chatuan atân i thai bosak ta a. ⁶Aw, hmêlmâte u, kumkhua atâna tihboral in ni ta! Khawpuite chu i tichhia a, Tumahin an hre zui tawh lo.

⁷LALPA erawh chu chatuana awm reng tûr a ni a; A rorêlna lalthutthlêng pawh a buatsaih ta.

⁸Ani chuan diknain khawvêl ro a rêlsak ang a, Dik takin mi tin chungthû a rêl ang.

⁹LALPA chu hnehchhih tuarte tân himna kulh a ni ang a, Mangan laia bihrûkna hmun a ni ang.

¹⁰I hming hretute chuan nangmahah rinna an ngat ang a; LALPA, nangmah zawngtute chu i kalsan ngai si lo va.

¹¹Ziona awm LALPA chu fakin zai ula! Mite hnênah a thiltithe chu puang rawh u.

¹²Thisen chhuahna phubâ a lâksakte chu a hre reng thîn a. Mi tlâwmte au thâwm pawh a theihngihl ngai lo.

¹³Aw LALPA, mi khawngaih rawh! Mi hawtute avânga ka manganna hi hria ang che, Nang chu thihna kawngkhâr ata mi châwi kângtu i ni si a.

¹⁴Tichuan, Zion fanu kawngkâ aţang hian Nangmah fakna thu tinrêng ka hril thei tawh ang a; I mi chhandamna chu ka hlimpui tawh ang.

¹⁵Hnamte chu an khuarkhurum siamah an tla pil a: A rûka lên an kam chhûngah anmahni kê a âwk ta.

¹⁶LALPA chu a rorêl dân aţangin tu nge a nih a hriat si a; Mi suaksual chu ama thang kamah baw a âwk thîn.

¹⁷Pathian ngaihtahthu hnam zawng zawngte leh, Mi suaksualte chu hremhmunah an tlâ ang.

¹⁸Pachhiate chu theihngihl an ni reng bik lo vang a, Reteite beiseina chu a bo kumkhua dâwn hek lo.

¹⁹Aw LALPA, lo tho la, Mihring mai chuan ngam che suh se. I mithmuh ngeiah hnamte chungthû hi rêlsak ang che.

²⁰Aw LALPA, hlâu thlabârin awmtîr la, Hnamte hian mihring mai an ni tih inhre hlawm teh se.

BUNG 10

PATHIANIN SUAL A HNEHNA HLÂ

¹Aw LALPA, eng vangin nge hla takah i dina, Engah nge mangan laia i inthup reng mai le?

²Mi sualte chuan an chaponain mi retheite an tiduhdah thîn; Thil tha lo an phiar rûk ngei chuan âwk rawh se.

³Mi suaksual chuan a thinlung duh zâwng ringawt a uanpui thîn a, LALPA hnâwlin mi duhâm a duhsak thîn.

⁴Mi sual chu chapo hmêl a put dân aţang rêngin Pathian zawng chî a ni lo; A ngaihtuahnaah Pathian a leng hek lo.

⁵A khawsak lah a tluang phian a; I rorêlnate lah a hmuh phâk loh, chung lamah daih a ni si a; A hmêlmâ zawng zawng a nuihsawh thîn a.

⁶A rilrûah chuan, “Ka tla chhe mai mai lo vang; Eng tikah mah ka pachhe tawh ngai lo vang,” a ti vêl a.

⁷A kê chu ânchhe lawhna te, bumna te leh inhnuaiichhiahna tein a khat a; A lei hnuaiah chuan buaina leh khawlohma a khat tlat a.

⁸Khaw tinah hmun biru lâi a chuh a; Hmun birûah pawî sawi lote a that thîn; Chhantu nei lote chu a rûkin a lo mitmei reng a.

⁹Sakeibakneiin a pûka a châng rû angin, a rûkin mi a châng ru reng a; Mi rethei man tûrin a châng thîn; Mi rethei chu a man a, tichuan a lêngin a hnûk bo thîn.

¹⁰Mi man tumin hniam têah a bawk phêk a, Chhantu nei lote chu a zuan thlu thîn.

¹¹A rilrûin tihian a ti a, “Pathianin a theihngihl tawh a; A hmêl pawh a thup daih a; A hmu leh tawh ngai lo vang,” tiin.

¹²Aw LALPA, lo tho teh! Aw Pathian, i kut han lek chhuak la! Mi tlâwmte chu theihngihl suh.

¹³Eng vângin nge mi suaksualte hian Pathian an hnâwl thîn? A rilrûin, “Engah mah a ngai tham lo vang” a ti thîn a ni.

¹⁴Nang chuan tuarna leh manganna i lo hmu tawh reng a, I kuta i thungrullh tûr pawh i hmu reng a. Mi rethei chu i kutah a intlûl a, Nang chu pa nei lote tanpuitu i ni si a.

¹⁵Mi suaksual leh mi sual pa bân chu titliak la; A suahsualna chu dap chhuak vek ang che.

¹⁶LALPA chu chatuana Lalber a ni a; A ram aţangin hnamte chu an boral ta.

¹⁷LALPA, mi tlâwmte duh zâwn i hria a; An thinlung chu i buatsaih ang a; I beng i rawn chhi bawk ang;

¹⁸Lei mihringten an rah beh tawh loh nân, Pa nei lo leh hnehchhiahna awmte thlawng chu a rawn hauhsak tawh ang.

BUNG 11

PATHIAN HNÊNA BIHRÛKNA

¹LALPA-ah chuan ka rinna ka ngat a; Engtizia nge ka nunna hnênah hian, “I tlângah chuan savâ angin thlâwk bo rawh,” i tih mai le?

²En teh u! Mi suaksualten thalngul an kuai a, A hruiah thal an vuah diam tawh saw. Thinlung dik pute a rûka kah nân an ti a ni.

³Lung phûmte chu tihchhiat lo ni ta se, Mi dikin eng nge a tih theih ang?

⁴LALPA chu a tempul thianghlimah a awm a, LALPA lalthutthlêng chu vânah a awm; A mitin a thlîr a, A mitmeiin mihring fate a fiah thîn.

⁵LALPA chuan mi dik chu a fiah thîn a: Mi suaksual leh tharum thawh chîngte chu a nunin a hua a ni.

⁶Mi sualte chungah chuan meiling a sûtîr ang a; An no chan tûr chu mei leh kêt te, mei-thlî te a ni ang.

⁷LALPA chu a dik a; Dikna a ngaina a; A hmêlin mi ngîlte lam a hawi thîn.

BUNG 12

MI SUALTE HNEHCHHIAHNA

¹LALPA, mi tanpui rawh, mi rinawm an bo zo takngial dâwn! Mihring fate zîngah Pathian ngaihsak mi an rîral takngial dâwn.

²An thenawmte nêl thu lawilo mai mai an sawi ho va; Fak derna hmuî leh bumna thinlung nêl thû an sawi thîn.

³LALPA chuan fak derna hmûi zawng zawng leh Chapona lei chu hlep vek rawh se.

⁴Anni chuan tihian an ti a, “Kan lei hmangin kan hneh ang a; Kan hmuîte lah kan ta a ni si a; Tû lêmîn nge kan chungah thu nei ang?” tiin.

⁵“Retheite an hnehchhiah avânga pachhiate rûmna avângin, Ka tho chhuak nghâl e; A thlâkhlêh êm êm himna hmunah ka awmtîr ang,” LALPAN a ti.

⁶LALPA thû chu thu thianghlîm a ni; Rawhtuina meipua silvar an rawh thianghlîm anga Vawi sarîh thlîtfîm nawn ang hi a ni.

⁷Aw LALPA, anni chu vêng him rawh, Hêng thangtharho lakah hian kumkhuaîn humhim ang che.

⁸Mihring zînga sualnain hmun a chan lai chuan Mi suaksualte chu kil tinah an inlâr sup sup thîn.

BUNG 13

CHHAN CHHUAH DÎLNA

¹Aw LALPA, mi theihngihl kumkhua dâwn em ni? Eng chen nge ka lakah i hmêl i thup dâwn?

²Ni tina rilrûa lungngai tak chung hian Eng chen nge mahnia rem ka ruat ka ruat mai dâwn le? Ka hmêlmâte hi ka chungah eng chen nge an inlulin dâwn?

³Aw LALPA ka Pathian, ngaihtuah la, mi ngaithla teh; Ka mit mi tihvârsak ang che, Chuti lo zawng, ka lo mu hlum mai ang asin.

⁴Ka hmêlmâ chuan, “Amah ka ngam ta,” a lo ti ang a; Ka tlûk mai chuan mi dotute an lâwm dâwn si a.

⁵Kei erawh chuan i ngilneihna hi ka rinchhan ber a ni; I mi chhandamna hian ka thinlung a tlâwm ang:

⁶Ka chung a that êm avâng hian, LALPA chu fakin ka zâi ang.

BUNG 14

MI SUALTE AWM DÂN

¹Mi â chuan a rilrûin, “Pathian a awm lo,” a ti mai a. An khawlo zo tawh a, Thil tenawm tak tak an ti a, Tûmah thil tha ti rêng an awm lo.

²LALPA chuan vâ aţangin mihring fate hi a zuk en a, Pathian zawnga hrethiam an awm nge awm lo, tiin.

³An pêng bo zo va, An khawlo zo vek a; Tûmah thil tha ti an awm lo, Pakhat tê mah an awm lo.

⁴Thil sual titu zawnz zawnz te hian hriatna rêng an nei lo vem ni, Châw ang maia ka mite an lem zawnz thîn? LALPA koh nachâng an hre dêr si lo.

⁵Pathian chu mi dik thlahte zîngah a awm si a, Anni ve chu hlauthâwnz takin an awm thîn.

⁶Retheite remruat chu in nuihsawh vei rawk a, A inhumhimna chu LALPA a ni asin.

⁷Israelte chhandamna chu Zion aţangin lo chhuak teh sela âw! LALPAN a mite saltâng a hruai kîr leh hunah, Jakob-ho chu an hlim ang a, Israel-ho chu an lâwm ang.

BUNG 15

PATHIAN RINGTU AWM DÂN

¹LALPA, i puan inah chuan tu nge lo chêng anga, I tlangz thianghlimah chuan tu nge lo awm ang?

²Kawng ngîl tak zawnz, Dik taka tîa, A rilru put dân dik taka sawi mi a ni ang chu.

³A lei pawh mi rêl nâna hmang ngai lova, A thenawm chungah thil sual ti ngai lova, A vêngte hming pawh sawi chhe ngai lo mi a ni bawh ang.

⁴Mi sual takte chu hmuhsitna mita ena, LALPA tihute châwimâwi thiam a; Chhechhama a lo tiam tawh chu mahni tâna pawî tûr pawh ni se tidanglam duh lova,

⁵A pung ûma a tangka pûktîr ngai lova, A thiam zâwk thiam loh chantîr tûra thamna la duh lo mi chu; Chûtiang mi chu engtikah mah a ngîng lo vang.

BUNG 16

PATHIANA INNGAHNA

¹Min hualhim rawh, âw Pathian, Nang chu ka rinchhan ber i ni si a.

²Aw ka nunna, i LALPA hnênah chuan, “Nang chu ka LALPA i ni a, Nangmah lovin thâtna rêng ka nei si lo,” i ti a.

³Leia mi thianghlim awmte chu, “Mi thâ tak tak, mi tilâwmte ber an ni,” i tih kha.

⁴Pathian dang thlangtute lungngaihna chu tihpun a ni ang a; In tûra thisen an hlante chu ka hlân ve lo vang a, Ka hmuî hian an hmingte chu ka lam hek lo vang.

⁵Aw LALPA, ka ro chan tûr leh ka no chan tûr chu i ni e; Nangin ka chanpual mi tihnghehsak si a.

⁶Ka chanpual chu ram thâ takah a inrîn lût a, Ni e, rochan thâ tak ka luah ta.

⁷Rem mi ruatsaktu LALPA chu mal ka sâwm ang; Zân lamah te pawh ka thinlung hian awm dân tûr mi zirtîr thîn a ni.

⁸LALPA chu ka hmâah hian ka dah hmasa thîn a, Ka kut dîng lama awm a nih avângin ka ngîng lo vang.

⁹Chuvângin, ka thinlung hi a lâwm a, ka ropuina pawh a hlim bawh a; Ka tîsa pawh beiseinain a châwl hahdam ang.

¹⁰Ka thlarau chu Hremhmun-ah i hnutchhiah dâwn si lo va: I mi thianghlim tawihral i phal dâwn hek lo.

¹¹Nangin nunna kawng chu mi hriattîr ang a: I awmnaah chuan hlim taka khah liamna a awm a; I kut dîng lamah chuan kumkhaw nawmna tûr a awm si a.

BUNG 17

VÊNG HIM TÛRA TAWNGTAINA

¹Aw LALPA, ka thiam thû lo ngaithla la, Ka âu thâwm hi lo ngaithla teh; Dâwt sawi lo hmûi aţanga chhuak ka tawngtainaah hian beng lo chhî ang che.

²Ka thiamchanna chu i hmâ aţangin lo chhuak sela; I mit chu mi dikte chungah fu reng rawh se.

³Ka thinlung hi i fiah tawh a; Zânah pawh mi tlawh tawh bawh a; Mi fiah tawh a, eng mah i hmu si lo va; ‘Ka kâin thu sual a sawi lo vang,’ ka ti tlat a.

⁴Mihring thiltih chungchângah chuan, Nangma hmûia thu chhuak avângin Tichhetu kawng zawnz lo tûrin ka invêng reng a ni.

⁵I kawng zawnz tûrin ka kê chheh hi vêng ang che, Tichuan, ka tawh thlu dâwn lo nia.

⁶Aw Pathian, ka koh che hi, mi chhâng ang che; Ka lamah i beng rawn dawh la, ka thu sawi hi lo ngaithlâ ang che.

⁷I kut dîng lam chuan i ngilneihna mak tak chu lantîr ang che, Aw, nangmaha rinna ngat apiangte chu Anmahni beitate lakah chuan i chhan him si a.

⁸I mit nautê angin mi vêng tlat la, I thlazâr hnuaiah mi thukrû ang che,

⁹Mi awpbettu mi sualho lakah leh, Ka hmêlma hlauhawm mi hual vêl tute lakah hian.

¹⁰An thinlung thâu* takte chu an khâr a, Chapo takin an tawng uang vêl thîn.

¹¹Kan ke pênna apiangah min hual vêl tawh a, Min melh reng chungin min veh dîn dîn a,

¹²Sakeibaknei sa seh chhâk tak ang leh, Sakeibaknei tuaiin hmun birû aţanga a lo chhâng reng ang mai an ni.

¹³Aw LALPA, lo tho la, Hmachhawn la, han phih thlu teh; I khandaihin ka nunna hi mi sual lakah chhanhim ang che,

¹⁴Aw LALPA, i kutin hêng mihring, Khawvêla duh tâwk ngahho lak ata hi mi chhanhim ang che. An pum chu i ro hlu thuhîkin i tihkhahsak a, An fâteah an lungâwi tâwk a, An tu leh fate hnutchhiah tham sum an nei bawh si a.

¹⁵Kei erawh chuan diknain i hmêl ka hmû ang a; Nangmah anna neia ka thannharh hunah chuan ka lungâwi tak zet ang.

BUNG 18

CHHANDAMTU, PATHIAN CHUNGNUNG

¹Aw ka chakna LALPA, ka hmangaih tlat ang che.

²LALPA chu ka lungpui leh ka kulhpui, mi chhan chhuaktu a ni; Ka Pathian, ka chakna, ka inngahna a ni; Ka phâw leh ka chhandamna kî leh ka kulhpui a ni.

³Fak tlâk LALPA chu ka ko vang a, Tichuan, ka hmêlmâte lakah chhandamin ka awm ang.

⁴Thih hlawhawnnain mi hual vêl a, Pathian ngaihsak lohna tuiliante chuan mi tihlâu va.

⁵Hremhmun lungngaihnnaten mi hual vêl a, Thihna thangte chuan mi ep reng a.

⁶Ka mangang chuan LALPA chu ka âu va, Ka Pathian chu ka âu vak vak a; A tempul ațangin ka âu a lo hria a. A lama ka âu thâwm chuan a beng a thleng ta a.

⁷Lei chu a nğhng a, a khûr a, A thinur êm avângin Tlângte chu a nğhahchhante lamin a nğhng dur dur a.

⁸A hnâr ațang chuan meikhû a chho va, A kê ata mei a alh zuai zuai a, Thingfâkte chu a tialh dur dur a.

⁹Ani chuan vânte pawh a tikûl a, a lo kûl thla ta a; A ke hnuaia chu thim chhah mup a ni a.

¹⁰Cherub chungah a chuang a, a thlâwk a. Thli thla chungah chuan a thlâwk vur vur a.

¹¹Thim chu tawmrûkna hmunah a siam a; A vêla tuamtu chu tui thim mup leh, Vâna chhâm chhah tak a ni a.

¹²A hmâa êng takah chuan, A chhâm chhah mupte leh Rial tlâ leh mei sîr te chu a kiang ta a.

¹³LALPA chu vân ațangin a ri dur dur a, Chungnungbera chuan a âu a chhuah a; Rial leh meiling a sîr buan buan a.

¹⁴A thalte chu a kâp chhuak a, a hmêlmâte chu a ûm darh a, Kâwl a phe zuai zuai a, a titlâwm ta a.

¹⁵Tuifinriat mawngte chu a lo lang a, Leilung nğhahchhante chu tihlanin a awm baw a, Aw LALPA, i zilhhauhna avâng leh I hnâra thâwin a chhêm avângin.

¹⁶Chung lam ațangin mirawn chelh a, Tui thûk tak ata mi hnûk chhuak a.

¹⁷Ka hmêlma chak tak lakah chuan mi chhan chhuak a, Mi hawtute lakah nê; Anni chu ka chelh rual lohva chak an ni si a.

¹⁸Anni chuan ka vânduai niin mi bei a, Nimahsela, LALPA chu ka lama țang a ni.

¹⁹Ani chuan hmun thâwl takah mi hruai chhuak a; Ka chung a lâwm avângin mi chhan chhuak ta.

²⁰LALPA chuan ka dikna ang zêlin lâwmman mi pê a, Ka kut thianghlim dân ang zêlin Mi rûl lê vê ta.

²¹LALPA kawngte chu ka vawng tlat a, Ka Pathian chu ka sual bosan ngai hek lo.

²²A rorêlna thûte chu ka hmâah a awm vek a, A dân thû chu ka hnâwl ngai hek lo.

²³A hmâah sawisêl bovin ka awm thîn a, Keima khawlohnâ lak ata ka inthiarfihlîm thîn.

²⁴Chuvângin, LALPA chuan ka dikna ang zêlin mi lo rûl ta e, A mithmuha ka kut thianghlimna ang zêlin.

²⁵Mi khawngaih thei tak hnênah chuan khawngaih thei takin i inlantîr ang a; Sawisêl bo hnênah chuan sawisêl bovin i inlantîr baw a.

²⁶Mi thianghlim hnênah chuan thianghlim takin i inlantîr ang a; Mi luhlul hnênah chuan luhlul takin i inlantîr ang.

²⁷Mi inngaitlâwmte chu i chhandam ang a; Mi hawi pir takte chu i hnûk hniam daih dâwn si a.

²⁸Nangin ka khâwnvâr mi chhitsak ang a; Tichuan, LALPA ka Pathian chuan ka thimna a tiêng ang.

²⁹Nangma puihnain sipai rual ka ûm thei a, Ka Pathian tanpuinain kulh bang pawh ka zuan khûm thei a ni.

³⁰Pathian chu a kawng te rêng pawh tha famkim a ni a, LALPA thû chu fiah a ni tawh; Ani chu amaha rinna nğhat zawng zawngte tân phâw a ni.

³¹LALPA chauh lo chu tu nge Pathian dang awm le? Kan Pathian chauh lo chu tu nge lungpui awm le?

³²Chaknaa mi thuamtu chu Pathian a ni a, Kawng tha famkim min sialsak ta.

³³Ani chuan ka kê hi sazuk kê angin a siam a, Ka hmun sâng takahte mi awmtîr thîn.

³⁴Ka kutte hi indo a zirtîr thîn a, Chuvâng tak chuan ka bânthe hian dân thalngul a kuai kûl zo hial a.

³⁵I chhandamna phâw mi pe tawh si a; I kut dîng lamin mi chelh dîng a, I nunnêmna chuan mi siam lian ta.

³⁶Ka rahbi tlêu loh nân nangin Ka kalkawng chu mi zauhsak a, Tichuan ka tawlh thlu ta lo va.

³⁷Ka hmêlmâte ka ûm a, ka ûmphâ a, Tihboral vek an nih hmâ chuan ka kîrsan lo.

³⁸Tho leh thei tawh lo tûrin Hliampui ka tawrhîr ta; Ka ke hnuaiah an thal dêr a.

³⁹Indo tûrin nangin chaknain mi thuam tawh a, Mirawn beiteute chu ka hnuaiah hian i tudawl ta hlawn a.

⁴⁰Ka hmêlmâte chu i tlânchhiattîr a, Chuvângin mi hawtute chu ka tiboral ta.

⁴¹Anni chu âu chiam mahse, chhantu tûr tûmah an awm lo; LALPA pawh âu vak mah se, ani chuan a chhâng chuang lo vang.

⁴²Chû vêleh vaivut, thliin a lèn thîn ang mai hian ka chhu dip vek a; Kawthlêra bawhlhlawh ang maiin ka paih chhuak ta a ni.

⁴³Nang chuan mi insual buai lai te lakah mi chhan chhuak a, Hnam tin lû-ah mi siam ta a; Ka hriat ngai loh miten ka rawng an la bawl ang.

⁴⁴Ka âu-kâ an hriat vêleh ka thû an zâwm a: Ram dang mite pawh ka hnênah an intulût ta.

⁴⁵Ram dang mite chu an zâm zo ta a, An tawmrûkna ațangin thlabârin an lo chhuak ta.

⁴⁶LALPA chu a nung reng e! Ka Lungpui chu fakin awm rawh se! Mi chhandamtu Pathian chu chawimâwiin awm sela:

⁴⁷Pathian chu phubâ mi lâksaktu a ni a, Ka hnuaia mite titlâwmte a ni.

⁴⁸Ka hmêlmâte lakah mi chhan chhuak a; Mi dotute chung daihah mi chawî kâng a, Mi nunrâwng lakah mi chhanhim ta.

⁴⁹Chuvângin âu LALPA, Jentailte zîngah lâwmthû ka hrilh ang che a, I hming fakin ka zai baw a.

⁵⁰Ani chuan a lal tân chhan chhuahna ropui a pê a, A hriakthih Davida leh a thlahte chungah chuan Kumkhuai a ngilneihzia a lantîr zêl ang.

BUNG 19

PATHIAN THÛ LEH A HNATHAWH

¹Vânte khian Pathian ropuizia a puang a; Boruak zâu tak hian a kut chhuak chu a entîr thîn a.

²Chhûn hian chhûn hnênah thû a sawi zêl a, Zân hian zân hnênah hriatna a pe thîn.

³Thu sawi leh tawng chhuak pawh a awm lo va, An âw chu beng a hriat theih a ni hek lo.

⁴An tehna hrui chuan leilung a phan chhuak vek a, An thuchah pawhin kâwlkil thlengin a fan chhuak a. Nî pawh khi puan a zârsak a,

⁵Chû nî chu mo neitu tûr a pindan aţanga lo chhuak ang chu a ni a, A tlânna tûr kawnga hlim taka mi chak tlân tûr ang chu a ni.

⁶A tlân ţanna chu chhak lam kil a ni a, A tlân kualna chu a tâwp lehlam a ni a; A satzia hre lo tûrin engmah thuhrûk a awm thei lo.

⁷LALPA dân chu a ţha famkim a, nunna a siam thar leh thîn; LALPA hriatpuina thû chu a fiah êm a, mi mâwlte a tifing thîn;

⁸LALPA dân thûte chu a dik a, thînlung a tilâwm thîn; LALPA thupêk chu a thianghlim a, mit a tivâr thîn.

⁹LALPA ţihna chu a felfâi a, chatuan daih a ni si a; LALPA rorêlnate chu a tak a, a dik fâi vek a ni.

¹⁰Rangkachak aia duhawm zâwk a ni a, Nî e, rangkachak thianghlim tam tak ai pawhin; Khawizû leh khawithlâr aiin a thlum zâwk si a.

¹¹Chûng thil hmang chuan i chhiahhlawh hi i zilh thîn a, Chûng thu zawm avânga lâwmman chu a tam êm êm a ni.

¹²Tu nge mahni dik lohna man chhuak thei le? Sual inthupte lakah mi thian fâi ang che.

¹³Thil سوال tilui lo tûrin i chhiahhlawh hi mi chelh tlat la; Ka chungah hian سوالin thû nei suh se. Tichuan, dem kai lovin ka awm ang a, Bawhchhiatna nasa tak lakah ka fihlîm dâwn nia.

¹⁴Aw LALPA, ka chakna leh mi Tlantû, Ka kâa thu chhuakte leh ka thînlungin a ngaihtuahte hi i mithmuhah pawm tlâk lo ni rawh se.

BUNG 20

HNEH THEI TURA DÎLNA

¹Mangan ni chuan LALPAN chhâng che sela; Jakoba Pathian hming chuan vêngghim che rawh se;

²Hmun thianghlim aţang chuanrawn ţanpui che sela, Zion aţang chuan tichak che rawh se;

³I thilhlân zawng zawng chu hre reng sela, I hâlral thilhlân chu lo lâwm rawh se.

⁴I thînlung duh zâwng chu pe phal che sela, I tum dân zawng zawng chu puitlinsak che rawh se.

⁵I chhandamnaah chuan kan hlim ang a, Kan Pathian hmingin kan puanzârte chu kan zâr ang; LALPA chuan i dîlna zawng zawng chu hlawhtlîntîr che rawh se.

⁶LALPAN a hriak thih-a hi a chhandam tih tûnah ka hre ta; A vân thianghlim aţang khian a lo chhâng ang, A chhandamna kut ding lama chakna ngei chuan.

⁷Thenkhatin tawlailîrte an ring a, thenkhatin sakawrte an ring a; Keini erawh chuan LALPA kan Pathian hming chu kan hrereng* zâwk ang.

⁸Anni chu an ding âwn a, an tlu ta a; Keini erawh chu kan tho va, kan ding char ta zâwk a ni.

⁹LALPA, chhandam rawh! Kan koh hunin Lalber chuan min chhâng rawh se.

BUNG 21

LALBER HNEHNA

¹Aw LALPA, i chaknaah hian lal chu a lâwm ang a, I chhandamnaah chuan a va hlim nasa dâwn êm!

²A thînlung duh zâwng chu i pe si a, A hmûia a thil dîl pawh i hnial hek lo.

³Thatnaa malsâwmnain i hmuak a; A lûah rangkachak thianghlim lallukhum i khumtîr a.

⁴I hnên aţangin nunna a dîl che a, nanging i lo pê a; Kumkhuua dam rengna chu.

⁵A ropuina chu i chhandamnaah chuan a nasa si a; A chungah chuan châwimâwina leh ropuina i ngat a.

⁶Kumkhua atân malsâwmna nasa tak dawngtûah i siam si a; I hmâah chuan nasa taka hlimnain i tilâwm a.

⁷Lal chuan LALPA chu a ring tlat a, Chungnungbera ngilneihna avângin a ngêng lo vang.

⁸I kutin i hmêlmâ zawng zawng a man chhuak vek ang a; I kut ding lamin nangmah hawtute chu a zawng chhuak ang.

⁹I thînur hunah anni chu rawhtuina meipui angin i siam ang; LALPAN anni chu thînurin a lem zo vang a, Mei chuan a kâng ral vek ang.

¹⁰An thlahte chu lei ata i tiboral ang a, An thlahte chu mihring fate zîngah an rîral vek ang.

¹¹I chungah khân thil سوال tih an tum a; An tihhlawhtlin loh tûr thil te an phiar vêl a.

¹²Chuvângin, nang chuan anni chu i tlânchhiattîr ang a; I thal hruite chu an hmâia tin chungin i kâu reng dâwn si a.

¹³Aw LALPA, i chaknaah chuan châwimâwiin lo awm ang che! Tichuan, i thiltitheihzia fakin kan zai ang.

BUNG 22

MESSIA TUARNA

¹Ka Pathian, ka Pathian, engah nge mi kalsan? Engah nge mi ţanpuitu tûrin mi hlat daiha, Ka rûmna aţanga i hlat êm êm le?

²Aw ka Pathian, chhûnah ka âu va, mahse mi chhâng si lo va; Zân lamah pawh ka ngâwi chuang lo.

³Nang erawh chu i thianghlim a, Lal̤thuthlêngah i ̤hû a, Israelhovin an fak a che.

⁴Min thlahtute chuan an ring che a, Nangmahah an innghat a, tichuan nangin i lo chhan chhuak ta a.

⁵An âu che a, chhan chhuahin an lo awm ta a; An ring che a, an mualpho ta lo va.

⁶Kei erawh chu changpât mai ka ni a, mihring pawh ka ni zo lo ve; Mihringte sawi chhiat leh hmuhsit mai ka ni.

⁷Mi hmu apiangin mi nuihsan a; An hmûiin min ner khum a, an lû an thing a,

⁸“LALPA-ah a innghat alâwm, ani chuan chhan chhuak ang hmiang; A chungah a lâwm bawh a, ani chuan a chhan chhuak ngei ang chu,” an ti-el vêl a.

⁹Nang erawh chu chhûl ata mi la chhuaktu i ni a: Ka nu hnute ka hnêk lai ațangin nangmah mi lo rintîr daih tawh a.

¹⁰Pian tîrh ațang rêngin nangma lama vawm bei ka ni a; Ka nu pum chhûng ațang rêngin Nang chu ka Pathian i ni si a.

¹¹Mi hlat lul suh ang che, Hlahhawm a hnaih êm hi; Tanpuitu tûr rêng an awm si lo.

¹²Bâwngpa tam takin mi hual vêl a; Basan rama bâwngpa chak pui puite chuan mi hual khep khup a.

¹³An kê chuan mi ânkhum a Sakeibaknei koham hâhum ang maiin.

¹⁴Tui anga leih buakin ka awm a, Ka ruh chuktuah zawng zawngte pawh a pelhsawlh zo va; Ka thinlung hi sathau khâwnvâr ang a ni a; Ka kawchhûngah a tuiral zo ta.

¹⁵Ka thahrui hi hlum bêl keh them ang maiin a ro zo va; Ka lei hi ka dangah a bet tlat a; Thihna vaivutah mi hruai lût ta a nih hi.

¹⁶Uite pawhin min hual vêl a; Misual pung khâwmten min hual tlat a; Ka kut leh ka kête hi an chhun tlang a.

¹⁷Ka ruh zawng zawng ka chhiar thei hial a; Anni chuan min melh tlawk tlawk a:

¹⁸Ka silhfênte an insem a, Ka kawr atân ̤hum an vâwr a.

¹⁹Aw LALPA, nang chuan mi hlat lul suh; Aw ka Chakna, mi pui thuai ang che!

²⁰Khandaih lakah mi chhan chhuak la; Ka nunna hlu tak hi ui thiltihtheihna lakah chhanhim ang che.

²¹Sakeibaknei kê ata mi chhanhim la, Selepa ki lakah mi chhan ang che! Nang chuan mi chhân tâk hi.

²²Ka unaute hnênah i hming ka puang ang a; Pung khâwmho zîngah ka fak ang che.

²³LALPA ̤htute u, amah chu fak rawh u! Jakoba thlah zawng zawngte u, amah chu châwimâwi ula, Israela thlah zawng zawngte u, amah chu ̤ih rawh u.

²⁴Ani chuan tihnata awm te tuarna chu a hmuhsit si lo va; A lakah a hmêl a thup hek lo; Amah chu a ̤ah-awh a, ani chuan a lo ngaithlâ a.

²⁵Inkhâwmna ropui taka ka fak ber chu nangmah i ni; Amah ̤htute hmâah chuan ka thutiam ka hlen ang.

²⁶Retheite chu eia bârin an tlai puar ang a; Amah zawngtute chuan LALPA chu an fak ang. In thinlung chu kumkhuain harh reng rawh se.

²⁷Kâwlkila mi zawng zawngte pawhin An hria ang a, LALPA lam an hawi ang; Hnam tin chi tinte i hmâah an kûn ang.

²⁸Lalram hi LALPA tâ a ni, Hnam tin chungah ro a rêl si a.

²⁹Leia mi neinung zawng zawngten An ei ang a, chibai an bûk ang; Vaivuta chhuk tûr zawng zawng, Mahnia invawng nung zo lote chenin A hmâah an la kûn ang.

³⁰A chithlahten a rawng an bâwl ang. ̤hangthar lo la awm zêlte hnênah LALPA chanchin chu an hril ang.

³¹La piang zêl tûrte hnênah chuan A ̤hatzia puang tûrin an lo kal ang a, LALPAN hei hi a ti zo tawh, an la ti ang.

BUNG 23

BERÂMPU ̤HÂ

¹LALPA chu ka Berâmpu* a ni a; Tlachhamin ka awm lo vang.

²Ani chuan hlobet hring dup hmunahte mi bawhtîr ̤hin a; Chawlhna tui kamahte mi hruai ̤hin.

³Ka nun hi mi siam tharsak ̤hin a, Ama hming avângin dikna kawng chu mi zawhtîr ̤hin.

⁴Ni e, thihna hlim ruam zawh mah ila, Thil ̤ha lo engmah ka hlâu lo vang; Nangin mi awmpui reng si a; I talhtum leh i tiangin min thlamuan ̤hin a ni.

⁵Ka hmêlmâte mithmuhah ka hmâah hian ei tûr mi buatsaisak a; Ka lû-ah hriak mi thih a, Ka no hi a liam zawih zawih a.

⁶Mathei lovin ̤atna leh zahngaihna chuan Ka dam chhûngin mi zui zêl ang a; Tichuan, LALPA inah kumkhuain ka châwl hlen tawh ang.

BUNG 24

LAL ROPUINA

¹Leilung leh a chhûnga thil awm zawng zawng hi LALPA tâ a ni a, Khawvêl leh a chhûnga chêngte nêh hian.

²Tuifinriat chungah te a din nghet a, Tuipui chungah te a rem nghet bawh a.

³LALPA tlângah chuan tu nge chho vanga, A hmun thianghlimah pawh tu nge ding thei ang?

⁴Kut fâi leh thinlung thianghlim neia, Milem be tûra a rilru pe ngai lova, Dâwta chhechham ngai lo mi ngei a ni ang.

⁵Chû mi chuan LALPA malsâwmna a dawng ang a, A chhandamna Pathian hnên ata ̤atna a dawng bawh ang.

⁶Hei ngei hi nangmah zawngtu, I hmêl zawngtu Jakoba thlahte awm dân chu a ni.

⁷Aw kulh kawngkâte u, in lûte kha châwi sâng ula! Nangni chatuan kawngkhâte u, inkhâi sâng rawh u! Tichuan, Ropuina Lal hi a lo lût dân nia.

⁸Chû ropuina Lal chu tu nge ni? LALPA mi chak leh thiltithe, LALPA indonaa mi chak chu a ni.

⁹Aw kulh kawngkâte u, in lûte kha châwi sâng ula! Nangni, chatuan kawngkhârte u, inchâwi sâng rawh u; Tichuan, ropuina Lal hi a lo lût dâwn nia.

¹⁰Chû ropuina Lal chu tu nge ni? Sipaihote LALPA chu, Amah ngei hi ropuina Lal chu a ni.

BUNG 25

HRUAINA, VÊNHIMNA LEH NGAIHDAM DÎLNA

¹Aw LALPA, ka nun hian i lam a lo hawi e.

²Aw ka Pathian, nangmahah ka innghat si a; Mualpho chuan mi awmtîr suh la; Ka hmêlmâte hi ka chungah hnehna chantîr suh ang che.

³Nangmah nghâktu apiang chu tûmah mualphovin awmtîr lo vang che; A chhan awm lova tenawm taka titute chu zak takin awm rawh se.

⁴Aw LALPA, i kawngte chu mi hriattîr la; I kalkawng chanchinte chu mi zirtîr ang che.

⁵I thutakah chuan mi hruai la, mi zirtîr ang che, Nang chu mi chhandamtu Pathian i ni a; Nîlênga ka nghah thîn che hi.

⁶Aw LALPA, i lainatnate leh i ngilneihnite chu vawng tlat ang che, Hmâsâng ațanga awm tawh a ni si a.

⁷Ka tleirâwl sualnate leh ka bawhchhiatnate chu hre reng lo la; I ngilneihna leh i tthatna avâng zâwkin Aw LALPA, mi hre reng ang che.

⁸LALPA chu a thâin a dik si a; Chuvângin mi sualte chu kawngah chuan a zirtîr thîn.

⁹Mi nun tlâwmte chu diknain a hruai a, Inngaitlâwmte chu a kawng chanchin a zirtîr bawk thîn.

¹⁰A thuthlung leh a hriatpuina zâwmte tân chuan LALPA kawng zawng zawng hi zahngaihna leh thutak vek a ni.

¹¹Aw LALPA, ka sualna nasa tak hi I hming avângin ngaidam ang che.

¹²LALPA tihdêktu chu tu nge ni? Chû mi chu a kawng zawh tûr thlan dân a la zirtîr ang.

¹³Hmuingîl takin a la awm ang a; A thlahte chuan lei hi an la rochung ang.

¹⁴LALPA thurûk chu amah tihute hnênah a awm a, A thuthlung chu anmahni a entîr ang.

¹⁵Ka mit hian LALPA lam a thlîr reng a; Ani chuan lêna ka ke tâng chu a la chhuak dâwn si a.

¹⁶Ka lam lo hawi la, mi khawngaih ang che, Khawhar leh hrehawm tuar ka nih hi.

¹⁷Ka thinlunga mangannate chu a lo pung zêl si a; Ka manganna ata mi hruai chhuak ang che!

¹⁸Ka tuarna leh ka nâ hi lo en la, Ka sual zawng zawng ngaidam ang che.

¹⁹Ka hmêlmâte hi ngaihtuah teh, an tam êm hi; Huat tak têin mi haw lehngâl a.

²⁰Ka nun hi mi vawnsak la, mi chhanhim ang che. Nangmaha rinna ka nghah tlat avângin mualpho chuan mi awmtîr suh ang che.

²¹Rinawmna leh diknain mi chhanhim rawh se, Ka nghah reng che hi.

²²Aw Pathian, Israel mite hi An buaina zawng zawng ata chhan chhuak ang che!

BUNG 26

DAVIDA RINAWMNA

¹Aw LALPA, thiam mi chantîr rawh, Rinawm takin ka nung si a. LALPA-ah chuan ka innghat tlat a, Ka tawlh thlu lo vang.

²Aw LALPA, mi en fiah la, mi chhui chhuak ang che; Ka rilru leh thinlung hi fiah ang che.

³I ngilneihna chu ka hmâah a awm reng a, I thutakah a ni ka awm thîn ni.

⁴Milem betute zîngah ka tâl ve ngai lo va, Mi vervêkte chu ka kâwm hek lo vang.

⁵Thil sual titute inhâwrkhâwm hi ka hua a, Mi sualte chu ka kâwm ngai lo vang.

⁶Pawi khawih lovin kut ka sil fai ang; Tichuan, âw LALPA, i maichâm chu ka kal hual dâwn nia;

⁷Lâwmthu sawiîn âw ka chhuaha, I thil mak tih zawng zawng ka puan darh theih nân.

⁸LALPA, i awmna in hi ka ngaina a, I ropuinain a chênchilh hmun ngei chu.

⁹Ka nun hi misualte zîngah hmer tel suh la, Thisen chhuah hmangete zîngah telh hek suh.

¹⁰Chûng mite kut chu thil sual tihna a ni a, An kut ding lam chu thamnain a khat si a.

¹¹Kei erawh chu dik takin ka awm zêl ang; Mi tlan chhuak la, mi khawngaih ang che.

¹²Ka kê hian lei rem a rap ta a; Pung khâwmho zîngah LALPA chu ka châwimâwi ang.

BUNG 27

KA KULHPUI

¹LALPA chu ka êng leh mi chhandamtu a ni; Tu nge ka hlahu tawh ang? LALPA chu ka nunna atân chakna a ni a; Tu nge ka hlahu vang?

²Mi dodâl tûra mi sualte an lo kal laia, Ka sa ei zawh an rawn tum lai khân Ka hmêlmâ leh mi dotute chu An inchhuih a, an tlu ta hlawm a.

³Sipai rualin min beih tumin min ep mah se, Ka thinlung hian a hlâu lo vang a; Ka chungah indona lo chhuak mah se, Mahni ka inring tâwk a ni.

⁴LALPA hnênah duh zâwng pakhat ka dîl a, Chû mawlh chu ka zawng ang; LALPA mâwizia hmu tûr leh, A tempula thil ka zawh fiah tûr chu, Ka damchhûng zawnga LALPA ina Ka chên hlen theih dân tûr thû hi a ni.

⁵Buaina lo thlen hunah pawh A bûk têah chuan mi thukrû ang a, A bâwk te hmun biru tak maiah chuan Mi thukru dawn si a; Lungpui chungah chuan mi hlâng kâi ang.

⁶Tûnah hian mi dova mi hual veltute chung daihah ka lû hi châwi kânin a awm ang a; Tichuan, a puan inah chuan hlimna inthâwinate ka hlân ang; Ka zâi ang; ni e, LALPA fakin ka zâi ang.

⁷Aw LALPA, aw râwl chhuaha ka auh che chuan lo ngaithlâ ang che! Mi khawngaih la, mi chhâng ang che.

⁸“Ka hmêl zawng rawh u,” tia i sawi lai khân Ka thinlung chuan i hnênah, “LALPA, i hmêl ka zawng ang,” a ti a.

⁹Ka lakah hian i hmêl thup suh la; I chhiahhlawh hi thinurin hnar bo suh ang che; Nang chuan mi tanpui thîn a; Mi kalsan suh la, mi hnar lul suh, Aw, ka chhandamna Pathian.

¹⁰Ka nu leh paten min kalsan hunah pawh LALPAN mi lo enkawl dawn si a.

¹¹Aw LALPA, i kawng chu mi zirtîr la, Ka hmêlmâte avâng hian kawng rualremah mi hruai ang che.

¹²Ka hmêlmâte tihnamnah atân mi pe lul suh ang che; Hretu derten min bei a, Mi tihnat tumna thû ringawt an chhâk chhuak si a.

¹³Mi nung ramah hian LALPA thâtna hmuh beisei lo ila chuan Ka bei dawng dêr tawh ang chu.

¹⁴LALPA chu nghâk reng rawh; Intihuai sauh sauh la, I thinlung chu a tichak zêl dawn asin; LALPA chu nghâk fan fan rawh! ka tih hi.

BUNG 28

ṬAWNGTAI CHHÂN AVÂNGA LÂWMNA

¹Aw LALPA ka Lungpui, ka âu vang che: Ka biak che hian ngâwi reng suh la, Nangin mi ngawihsan reng chuan Leilâwta chhukho ang mai ka ni dah ang e.

²Nangmah ka auh che a, I hmun thianghlim lama ka kut ka phar laiin Ka dîlna âw hi lo ngaithla ang che.

³Misualte zîngah mi dah bo suh la, Thil sual titute zîngah mi dah hek suh; Chûng mite chuan an thenawmte hnênah inremna thû an sawi a, An thinlung lam a sual hlê si a.

⁴An thiltih ang zêlin rûl vê ang che. An suahsualna thiltih dân leh, An kuta an thil tih ang zêlin An phû tâwkin thungrûl ang che.

⁵LALPA hnathawhte an ngaihsak duh lohva A kutchhuakte an pawisak loh avângin; Chûng mite chu siam tha lovin A la tiboral zâwk dawn a ni.

⁶Ka dîlna âw mi ngaihlâksak tâk avângin LALPA chu fakin awm rawh se!

⁷LALPA chu ka chakna leh ka phâw a ni; Ka thinlungin amah chu a ring a, ka sâwtpui baw a; Chuvângin, ka thinlung a hlim êm êm a, Keima hlâ ngeiin amah chu ka fak ang.

⁸LALPA chu anni tân pawh chakna a ni a, A hriak thiha tân chhandamna kulhpui a ni.

⁹I mite hi chhandam ang che, I rochan pawh chu malsâwm la; Châwm baw la, Kumkhuain pawm reng ang che.

BUNG 29

LALPA ÂW

¹Aw, mi chakte u, LALPA hnênah pê ula, LALPA hnênah chuan ropuina leh chakna chu pe vek rawh u.

²LALPA chu a hmingin a phû êm êm ropuina chu pê ula; LALPA chu mâwina thianghlim nêl chibai bûk rawh u.

³LALPA âw chu tui chungah a rî a; Ropuina Pathian chu a lo ri dur dur a; LALPA chu tui tam tak chungah awm a ni si a.

⁴LALPA âw chuan thil a tithei a; LALPA âw chu ropuinaa khat a ni.

⁵LALPA âw chuan sidarte a titliak a; Ni e, LALPA chuan Lebanon sidar thingte chu a tiphel seng sung thîn.

⁶Lebanon chu bâwng no angin a lîmtîr zek zek thîn a; Sirion* tlângte pawh sele no ang mai an ni.

⁷LALPA âw chuan meialhte a then darh thîn a.

⁸LALPA âw chuan thlalêr a nghawr nghing dur dur a; LALPA chuan Kadesh thlalêr pawh a sawi nghing a.

⁹LALPA âw chuan zukpui chu no a neihtîr a, Ngawpui thinghnahte chu a tiñl vek a; A tempulah chuan mi tinin, “A ropui ê!” an ti thîn.

¹⁰LALPA chu Tuilêt lai khân lalah a thû a, LALPA chu kumkhuain a lal reng ang.

¹¹LALPA chuan a mite hnênah chakna a pê ang a, LALPA chuan a mite chu thlamuannain mal a sâwm ang.

BUNG 30

ZÎNG LAMA LÂWMNA

¹Aw LALPA, ka châwimâwi ang che, nangin mi châwi sân tâk avâng leh, Ka hmêlmâten min nuihsawh tûr i phal loh avângin.

²Aw LALPA, ka Pathian, ka âu vak che a, Nangin mi lo tidam ta.

³Aw LALPA, nangin ka nunna hi thlân aţangin i hruai chhuak a; Leilâwta ka chhuk lohna tûrin nangin mi tinung a.

⁴A mi thianghlimte u, LALPA fakin zai rawh u, A hming thianghlim hriatrenga hnênah chuan lâwmthû hlân rawh u.

⁵A thinurna chu mit khap kâr chauh a ni a, A duhsakna chu dam chhûng tân a ni; Ṭahna chuan zan khat a daih a ni mahna, A tûk zîng erawh chuan hlimna arawn thlen thîn.

⁶Ka neihnun hlê lai chuan, “Engtikah mah ka tlachhe lo vang,” ka ti a.

⁷LALPA, nangma duhsakna avângin ka tlâng chu i din nghehtîr ta; I hmêl i thup erawh chuan ka mangang thîn a ni.

⁸Aw LALPA, nangmah ka auh che hi; LALPA hnênah ngei a ni ka ṭawngtai ni:

⁹Leilâwtah chhuk thla vê ngawt ila, Ka thisen tân eng nge hlâwkna awm? Vaivutin a fak dawn che em ni? I thutak pawh a puang dawn em ni?

¹⁰Aw LALPA, ngaithlâ la, mi khawngaih rawh; LALPA, mi tanpuitu ni mawlh ang che!

¹¹Ka lusûnna hi lâmnâah i chantîr a; Ka saiip puan mi hlihsak a, hlimna puan mi sintîr ta zâwk a,

¹²Ka ropuina hi nangmah faka a zâia, a ngawih mai mai loh nân. Aw LALPA ka Pathian, lâwmthû ka hrilh ang che, kumkhuain.

BUNG 31

VÊN HIM DÎLNA

¹Aw LALPA, nangmahah ka rinna ka nghat tlat a; Mualphovin mi awmtîr ngai suh ang che; I thatnain mi chhan chhuak ang che.

²Ka lamah i beng rawn dawh la; Mi chhan chhuak thuai ang che; Ka bihrûkna lungpui lo ni la, Ka himna kulhpui ni ang che.

³Ka lungpui leh ka kulhpui i ni si a; Tichuan, i hmingin Mi hruai la, mi kai ang che.

⁴Ka awh nân a rûka lèn an zâr lakah chuan mi hnûk chhuak ang che; Nang chu ka chakna i ni si a.

⁵Aw LALPA, thutak Pathian, I kutah ka thlarau ka kawltîr e; Nangin mi tlan tawh si a.

⁶Milem tlâktlai lo betute chu ka huat zâwng tak an ni; Kei erawh chuan LALPA ka ring tlat zêl ang.

⁷I ngilneihna avângin ka hlimin ka lâwm ang, Ka manganna mi hmuhpui tawh a; Ka pachhiat lai pawhin ka nunna i hre si a.

⁸Hmêlmâte kutah mi dah lût êm lo va; Ka kê hi hmun thâwl takah i nghat ta zâwk a.

⁹Aw LALPA, mi khawngaih rawh, ka mangang êm mai; Lungngaihna avângin ka mit a vai zo ta, A ni, ka thlarau leh ka taksa chenin.

¹⁰Lungngaiin ka nun ka hmang zo va, Kum tam tak ka lo rûm tawh a; Ka khawlohna hian ka thâ a tiþum a, Ka ruhte pawh a mawih zo ta.

¹¹Ka hmêlmâte kamchhe tleuhna ka ni a, Ka thenawmte zîngah a zual bîk a, Ka hmêlhriatte tân ngeiawm mai ka ni a; Khawlaia mi hmutute lahin min tlânsan thîn.

¹²Mitthi anga theihnghilhin ka awm a; Hlum bêl keh sawm ang lek ka ni.

¹³Mite min sawi chhiatna rî-vâ ka hria a, Kil tinah hlauhawm a awm a; Ka nunna tihboral tumin Min phiar huai huai si a.

¹⁴Kei erawh chuan aw LALPA, ka ring tlat ang che a; “Ka Pathian i ni,” ka ti a ni.

¹⁵Ka hunte chu i kuta awm a ni a; Ka hmêlmâte kut ata mi chhan chhuak ang che, Mi tiduhdahtute lakah pawh.

¹⁶I chhiahlawh chungah hian i hmêl êntîr la; I ngilneihnain mi chhandam ang che.

¹⁷Aw LALPA, mualphovin mi awmtîr suh aw, ka koh mawlh mawlh che hi; Mi suaksualte chu mualpho sela, Thlânah ngawi vang vang teh se.

¹⁸Hmui dawtheite chu ngawi reng tûra dah ni sela, Chapo leh hmusit chungin þawng chaltlai tak takin mi dik an sawi chhe thîn a.

¹⁹Aw, i thatna hi a va nasa êm, Nangmah þihtute tân i khâwl khâwm bawk si a, Mihring fate mithmuha nangmaha rinna nghattute tâna i buatsaih chu!

²⁰Anni chu mihring phiarna lakah i ângchhûng hmun birû-ah chuan i thukru daih ang a; Sawichhetute lakah leh inhnial buaina þawngkam aþangin I bûk chhûngah i thukru dâwn si a.

²¹LALPA chu fakin awm rawh se; A ngilneihna mak tak chu khawpui nghet takah mi hmuhtîr ta a!

²²Kei lahin, “I mithmuh ata paih bovin ka awm ta,” ka lo ti hman tawh a; Nimahsela, ka auh che khân, I hnêna ka dîlna âwte chu i lo hriat kha.

²³Aw, a mi thianghlim zawng zawngte u, LALPA chu hmangaih rawh u! LALPA chuan mi rinawm chu a hum tlat a, Mi chapo erawh chu a thungrûl ang.

²⁴LALPA beiseitu zawng zawngte u, Huaisen takin awm rawh u, In thinlung a tihchaksak dâwn si che u-a.

BUNG 32

NGAIHDAMNA HLIMAWMZIA

¹A bawhchhiatna ngaihdamsaka, A sualna pawh hliahkhuhksaka chu a nihlawh e.

²LALPAN sual nei lova a ruat leh, A thlarauva bumna nei lo mi chu a nihlawh e.

³Ka ngawih reng laia nilênga ka rûm thîn avâng khân, Ka ruhte hi a mawih zo vek a ni.

⁴A chhûn a zânin i kutin mi delh reng a; Nipui sen sâ hian mi tichâu zo ta.

⁵Ka sualna te chu i hnênah ka puang a, Ka khawlohna pawh ka thup lo va. “LALPA hnênah ka sual ka puang ang,” ka ti a, Nang chuan ka khawlohna sual chu i lo ngaidam ta a.

⁶Hei vâng tak hian Pathian ngaihsak mite chu i hnênah þawngtai rawh se, Hmuh theiha i awm lai ngei hian; Tuite chu lo lian cham pût mah se, Anni chu a rawn chîm pha dâwn si lo va.

⁷Nang chu ka bihrûkna hmun i ni a; Buaina lakah mi humhim ang a; Chhan chhuahna hlâte chuan mi hual vêl dâwn si a.

⁸I kawng zawh tûr dik tak i zawh theih nân ka zirtîr ang che a, Ka mita en reng chung chein ka kawhhmuh ang che.

⁹Sakawr leh sabengtung ang leka Thirbarha thunun ngai, hriat thiamna pawh nei lo, Duh lam lama kaih her theih ang lekin awm suh u.

¹⁰Lungngaihna tam tak chu misualte chan a ni ang a; LALPA ringtu erawh chu zahngaihna in a hual vêl zâwk ang.

¹¹Mi dikte u, LALPA-ah chuan hlimin lâwm ula; Thinlung dik tak pu zawng zawngte u, hlimin âu rawh u!

BUNG 33

SIAMTU FAKNA

¹Aw, mi dikte u, LALPA-ah chuan hlim rawh u! Mi rilru ngîl tân chuan Pathian fak hi a mâwi si a.

²Tingtang nên LALPA chu fak ula; Perhkhuang hrui sâwm nei chhîn rimâwi tumsak rawh u.

³A hnênah hla thar sa ula; Hlimna âu râwl nên thiam takin rem rawh u.

⁴LALPA thû chu a dik si a, A thiltihte chu thutaka tih vek a ni.

⁵Felna leh rorêlna dik a ngaina a; Leilung hi LALPA thatnain a khat a ni.

⁶LALPA thûin vânte hi siam a ni a, Vâna awm zawnz zawnzte pawh chu a kâa thâw chuan siam an ni bawh a.

⁷Ani chuan tuifinriat tuite chu a chhêk khâwm a; Tui thûk tak chu a zêmah a chhûnghkhâwm a.

⁸Lei pum pui hian LALPA tih sela; Khawvêla mi chêng zawnz zawnzten amah chu hlau rawh se.

⁹Ni rawh se, a tih chu a ni nghal mai si a; Thû a pê a, a dîng nghet mai a ni.

¹⁰LALPAN hnamte remruat chu engmah lovah a chantîr a; Mipuite remruatna pawh awmze nei lovah a siam thîn.

¹¹LALPA remruat chu chatuan daih a ni a, A thînlunga a thil tumte chu chhuan zawnz zawnz thlengin a awm ang.

¹²LALPA Pathiana neih hnam chu an nihlawh e; Ama rochan atâna a thlan chhuahte chu.

¹³LALPA chuan vân aţang khian a rawn thlîr a; Mihring fate zawnz zawnz chu a rawn hmu vek a.

¹⁴A chênna hmun aţang ngei khian, Lei mihring zawnz zawnz hi a rawn thlîr thîn;

¹⁵Mi mal tin thînlung a siamsak a; An thiltihte pawh a en vek thîn.

¹⁶Sipai ngah vâng ringawtin lal chu a him dâwn lo va; Mi chak pawh an chak êm êm vâng ngawtin an him chuang lo vang.

¹⁷Sakawr hi inchhanhimna tlâk a ni lo va; A chakna ringawtin tûmah a chhanhim lo vang.

¹⁸Ngai teh, LALPA mit chu amah tihute chungah chuan a fu reng thîn, A zahngaihna thlîrtute chungah chuan:

¹⁹Thihna aţanga an nun chhan him tûr leh, Tâmpui laka châwm nung tûrin.

²⁰Kan nunna hian LALPA chu a nghâk reng a; Ani chu min tanpuitu leh kan phâw a ni.

²¹Amahah chuan kan thînlung a hlim ang, A hming thianghlim kan rin avângin.

²²Aw LALPA, i khawngaihna chu kan beisei ang tak hian Kan chungah awm zêl rawh se.

BUNG 34

LALPAN MI FELTE A CHHAN CHHUAK

¹Eng hunah pawh LALPA chu ka fak ang a; Amah fakna chu ka kâah hian a awm reng ang.

²Ka nun hian LALPA chu chhuan berah a neih ang a; Mi tlâwmten an lo hria ang a, an lâwm ang.

³LALPA chu mi fakpui rawh u, A hming chu i châwimâwi tlang ang u.

⁴LALPA chu ka zawnz a, ani chuan min lo chhâng a, Ka hlauhna zawnz zawnz lakah min chhan chhuak ta.

⁵Amah an en a, an hmêl chu a lo êng a; Zak hmêl pawh an pu tawh lo.

⁶He mi rethei hi a âu va, LALPA chuan a lo hria a, A buaina zawnz zawnz laka ta a chhan chhuak ta.

⁷Amah tihute chu an vêlah LALPA Vântirhkoh chuan a awm chilh a, A chhanhim thîn.

⁸Aw, LALPA thatzia hi tem ula, han enchhin ve teh u; Amaha rinna nghattute nihlawhzia hi!

⁹Aw, a mi thianghlimte u, LALPA chu tih rawh u! Amah tihute tân tlâkchham reng a awm si lo.

¹⁰Sakeibaknei vânglaite chuan ei tûr tlachhamin rilţâm an tuar fo va; LALPA zawnztute erawh chuan thil ţa reng reng an tlachham lo vang.

¹¹Hawh u, naupangte u, ka thû hi ngaithlâ ula; LALPA tih dân ka lo zirtîr ang che u.

¹²Tu nge nun dân ţaa nung duha, Tu nge thil ţa hmu tûra dam rei ngaina mi chu?

¹³I lei chu sual lakah vêng thâ la, I hmu chu bumna thu sawi lo tûrin vêng ţa rawh.

¹⁴Sual kalsan la, thil ţa ti rawh; Remna zawnz la, ûm zêl ang che.

¹⁵LALPA mit chu mi dikte chungah a fû a, An âu rî hre tûrin a beng a lo chhi thîn.

¹⁶LALPA hmêl chuan thil sual titute chu a do zêl ang a, Leiah pawh hian tuma'n an hre zui tawh lo vang.

¹⁷Mi dikten amah an auh hian LALPA chuan a lo ngaithla thîn a, An buaina zawnz zawnz ata a chhan chhuak thîn a ni.

¹⁸Thînlunga lungchhiate tân LALPA chu a hnaï a, Thlarau nun tliak tawhte pawh a tuam dam leh thîn.

¹⁹Mi dikte tuarna chu tam tak a ni a, Mahse, LALPAN chûng zawnz zawnz lakah chuan a chhan chhuak thîn.

²⁰A ruh zawnz zawnz a vênhimsak a, Pakhat mah tihliah a ni lo vang.

²¹Mi sualte chu thil ţa lovin a tihlum ang a; Mi dik hawtuten thiam loh an chang ang.

²²LALPA chuan a chhihhlawhte nunna chu a tlan chhuak a, Amaha rinna nghattute chu tûmah thiam loh chang an awm lo vang.

BUNG 35

HNEHNA DÎLA TAWNGTAINA

¹Aw LALPA, mi beitute chu nanging bei la; Mi dotute chu nanging do ve ang che.

²Phaw tê leh phaw lian vilik la, Mi pui tûrin dîng tlat ang che:

³Fei pawh phâwi chhuak la, Mi ûmtute chu lo dang tlat ang che. Ka nunna hnênah hian, “I chhandamna ka ni e,” ti bawh ang che.

⁴Ka nunna lâk tuma mi zawngtute chu zahthlâk khawpin timualpho la; Mi tihchhiat tuma mi phiartute chu Mangangin tlânchhiattîr ang che.

⁵Thliin buhsî a len darh ang mai lo ni hlawm sela, LALPA Vântirhkhovin ûm bo daih rawh se.

⁶An kawngte chu thimin nâl hlê sela, Tah chuan LALPA Vântirhkhovin ûm vak rawh se.

⁷Chhan awm lovin mi awh nân khuarkhurumah lên an phah rû a, Chhan awm lovin ka tlâk nân lei an lai kuar si a.

⁸A inrin loh hlânin a chungah chhiatna thleng thut sela; A rûka a lên zârah chuan amah zawk chu âwk sela; Chû chhiatna hmunah chuan amah chu tla rawh se.

⁹Tichuan, ka nunna hi LALPA-ah chuan a hlim ang a; A chhandamnaah chuan a lâwm ang.

¹⁰Ka ruh zawng zawng hian LALPA, “Nangmah ang hi tu nge awm? An aia chakte lakah mi retheite i chhan chhuak a, Ni e, rethei leh pachhia te chu Suamhmang lakah i humhim ta,” an ti ang.

¹¹Thuhretu derte an lo chhuak a, Ka hriat loh thilah min chhâl a. ¹²Thil thâ chu سوالين mi rûl a, Ka nun an tilungngai a ni.

¹³Kei erawh chuan an dam loh laiin Saiip puan ka inbel a; Chaw ngheiin ka intitlâwm a, Ka tawngtâina ngai bawh ka thinlungah a lo kîr leh thîn.

¹⁴Thiante leh unaute sîn ang maiin ka vei ka vei a, Mahni nu te sîn ang hrimin ka kun ngawih ngawih a.

¹⁵Anni erawh chu ka chan chhiat avânga lâwmin An inko khâwm vêl a; Mi beitung min hual tuau tuau va, Hriat pawh ka lo hre si lo va; Chîn tâwk nei lovin min sawisa nek a;

¹⁶Nuihsawhtute chuan ruaithehnaah Ha chang min thial khum a.

¹⁷LALPA, eng chen nge maw i thlîr reng dâwn le? Mi tihchhiat an tumna lakah mi chhan la, Sakeibaknei lakah chuan ka nunna hlu tak hi hum ang che.

¹⁸Tichuan, mipui pung khâwm tam tak hmâah lâwmthû ka hrilh ang che a, Mipui tam tak zîngah ka fak dâwn che nia.

¹⁹Dik lo takin ka hmêlmâten nuihabûrah mi siam suh se; Chhan leh vâng awm lova mi hawtuten an mit pawh mi siai khum suh se.

²⁰Remna thû rêng an sawi lo va, Hê rama mite an ngawih hlê hlê laiin Inbumna thil ringawt an buaipui a.

²¹An kê chuan mi ân khum zuau zuau va, “Chhei le, chhei le! Kan mitin kan hmu ta le,” an ti a.

²²Aw, LALPA, hei hi i hmu reng si a, Ngâwi mai suh ang che. Aw, LALPA, mi hlat lul suh ang che.

²³Intiharh la, mi chhan tûrin lo tho rawh, Ka Pathian leh ka LALPA, thiam mi chantîr ang che.

²⁴Aw LALPA ka Pathian, ka thiam thû hi i thâtna ang zêlin rêl ang che, Anniho hian mi diriam hauh suh se.

²⁵An rilrûin, “I hi le, kan duh a thleng ta,” mi tihkhum suh se; “Kan lem zo ta,” min ti hek suh se.

²⁶Ka chhiatna chungah lâwmte chu Mualpho tak leh buai nuaihin awm hlawm sela; Ka chungah intilalte chu mualpho leh zak takin awm rawh se.

²⁷Ka dikna mi lâwmpuitute chu Hlim leh lâwm takin âu sela; A chhiahhlawh hamthâtna duhsaktu LALPA chu châwimâwiin awm rawh se, ti zêl rawh se.

²⁸Tichuan, ka lei hian i thâtna thû a sawi ang a, Nilêngin nangmah a fak thîn dâwn che nia.

BUNG 36

MIHRING SUALZIA LEH PATHIAN HMANGAIHNA

¹Mi sualte sualzia hian ka thinlung chhûngah heti hian thu a sawi: A mithmuh phâkah Pathian hlauhna chhe tê pawh a nei lo.

²Ama sualzia leh huatthlalâkzia a hmuh lai ngei pawhin Amah leh amah a inthiam chawp leh tho thîn.

³A kâa thu chhuakte chu سوالنا leh bumna thû mai a ni a; Finna leh thil thâ tih a bânsan hmiah mai si a.

⁴A khum laizâwlah thil سوال a suangtuah thîn a; Kawng thâ lo lam a zawh lui tlat a, Soal a haw phal lo.

⁵Aw, LALPA, i zahngaihna chu vânahte khian a awm a; I rinawmna hian chhûm a han tawng hial a.

⁶I thâtna chu tlâng lianpui ang mai a ni a; I rorêlna chu tui thûk tak ang a ni; Aw LALPA, mihring leh sâ i humhim thîn.

⁷Aw Pathian, i ngilneihna chu a va hlu êm! Mihring faten i thlazâr hnuai an bêl thîn.

⁸I inchhûnga thil thâte chuan an intitlai thîn a, I lâwmna lui tui chu i intîr bawh a.

⁹Nunna tuikhur chu i hnênah a awm si a; I êngah chuan êng kan hmu ve thîn a ni.

¹⁰Aw, nangmah hretute chungah chuan ngilnei zêl la, Thinlung dik tak pûte hnênah i thâtna chu lantîr zêl ang che.

¹¹Chapo kê chuan mi rawn chhuih suh se, Mi soal kut pawhin mi hnar bo hek suh se.

¹²Sâw, thil soal titute chu an tlûk reng saw; Paih thlûk an ni a, an tho thei tawh lo vang.

BUNG 37

LALPA KUTA INNGHAHNA

¹Thil soal titute avângin intilungngai duh suh la, Dik lo taka tite awm dân pawh awt suh.

²Hlobet anga ah thlûk an ni thuai dâwn a, Hnim hring vuai leh mai tûr ang an ni.

³LALPA chu ring la, thil thâ ti zêl rawh; Hê ramah hian inbêngbel la, a rinawmnaah inngat rawh.

⁴LALPA-ah chuan lâwm phawt mai la; Tichuan, i thinlung duh zâwnge chu a pê ang che.

⁵I awm dân tûr chu LALPA-ah ngat la; Amah chu rinchan bawk la, Ama'n a tihsak vek ang che.

⁶I dikzia chu êng angin a lan chhuahtîr ang a, I thiam chanzia pawh chhûn lai ang mai a ni ang.

⁷LALPA-ah chuan châwl la, dawhthei takin amah chu ngâk rawh; Hausa thûr thûrte awm dân avângin intilunghnûr mai suh, Thil sual ti reng chung a tuang viau si te avâng pawhin.

⁸Thinur hi bânzan la, thinrim hi thlah daih rawh. Lunghnûr takin awm reng suh, pawl khawihna chauh a thlen thîn a ni.

⁹Thil sual titute chu tihboral an la ni ang a; LALPA ngâktute erawh chuan Lei hi an la rochung dâwn a ni.

¹⁰Mi dik kê chuan finna thû a sawi thîn a, A lei chuan dik taka rorêlna thû a sawi thîn.

¹¹Mi inngaitlâwmte erawh chuan ram hi an la rochung ang a, Hlim tak leh râlmuang takin an lêng tawh ang.

¹²Mi sual chuan mi thâ a phiar thîn a, Ha chang a thial khum thîn.

¹³A hun tâwp a hnâi tih a hmuh reng avângin LALPAN chu mi chu a nuihsan ve ang.

¹⁴Mi sualte chuan khandaih phâwiin An thalngul an kâu reng bawk a, Rethei leh pachhiate titlu tûr leh, Dik taka nungte chu tihhlum an tum a.

¹⁵An khandaih chuan anmahni thinlung a leh-chhun zâwk ang a, An thalngulte pawh tihthiahsak an ni ang.

¹⁶Mi suaksual tam takte hausakna ai chuan Mi dik thil tlêmteneih chu a thâ zâwk.

¹⁷Mi sual bânthe chu tihthiah a ni ang a, Mi thâ erawh chu LALPAN a tung ding ang.

¹⁸LALPA chuan mi dikte hunbi a hriatsak si a, An rochun tûr chu chatuan daih a ni.

¹⁹Hun thâ lovah an mualpho lo vang a; Tâmb kumah pawh an tlai dâwn a ni.

²⁰Mi sualte erawh chu an boral ang a, LALPA hmêlmâte chu, Phûl hnim duah ang maiin an rîral ang a, Meikhû-ah an la zâm ral vek ang.

²¹Mi sual chuan a pûk a, a rûl leh si lo va; Mi thâ erawh chuan a khawngaihna a lantîr a, a pe bawk thîn.

²²A malsâwmna dawngte chuan lei hi an la rochung dâwn si a, Ânchhia a lawhte erawh chu tihboral an ni ang.

²³LALPA chuan mi thate rahbi rah tûrte chu a kawhmmuh thîn a, A awm dânah chuan a lâwm thîn a ni.

²⁴Tlu mah sela, pailh thlâk dêr chuan a awm lo vang; LALPAN a kutin a chelh reng si a.

²⁵Naupang ka nih aţanga tuna ka lo tar hnû thleng hian, Mi thâ thlahthlama an awm ka hre ngai lo, A thlahte chaw khawn pawh ka hmu ngai hek lo.

²⁶Mi a khawngaih thei reng a, a pûktîr a, A thlahte pawhin malsâwmna an dawng zêl a ni.

²⁷Sual kalsan la, thil thâ ti rawh; Tichuan, kumkhuain dam reng ang che.

²⁸LALPA chuan rorêlna dik a ngaina a, A mi thianghlimte chu a thlahthlam ngai lo va; Chatuana wawn him an ni zâwk thîn; Mi sual thlahte erawh chu tihboral an ni ang.

²⁹Mi thâte chuan ram hi an luah ang a, A chhûngah kumkhuain an chêng hlen tawh ang.

³⁰Mi dik kê chuan finna thû a sawi thîn a, A lei chuan dik taka rorêlna thû a sawi thîn.

³¹A thinlungah a Pathian dân chu a awm a; A rahbî pawh a tlêu ve lo vang.

³²Mi sual chuan mi dik chu a en thla ru reng a, Tihhlum dân a zawng ruai thîn.

³³Chutiang mi sual kutah chuan LALPAN a dah lo vang a, A chungthû rêl a nih hunah pawh thiam loh a chantîr phal hek lo vang.

³⁴LALPA chu ngâk la, A kawng chu zawh rawh, Tichuan ram luah tûrin a châwi sâng ang che: Mi sualte tihborala an awm lai pawh i la hmu ngei ang.

³⁵Mi sual chu thuneihna sâng tak chelha, Thing buk anga tawi luai hian ka hmû a.

³⁶Nimahsela, a thi leh ta mai a, Ngai teh, hmuh tûr a awm leh tawh lo; Ka zawng vêl a, hmuh tûr rêng a awm tawh lo.

³⁷Sawisêl bo mi chu chhinchhiah la, mi dik awm dân pawh lo thlîr reng mah teh; Chutiang mi chan tûr chu thlamuanna a ni dâwn asin.

³⁸Bawhchhetute erawh chuan chhiatna an la tâwk vek ang a; Mi sualte hmabâk chu boralna a ni ang.

³⁹Mi thâte chhandamna erawh chu LALPA hnêna mi a ni; Ani chu mangan laia an chakna a ni si a.

⁴⁰LALPAN anni chu a ţanpui a, a chhanhim bawk thîn, Amahah chuan an tlûk luh thîn avângin Mi sualte lakah chuan a chhan chhuak a, A chhandam thîn.

BUNG 38

MI SUAL NA TUAR TAWNGTAINA

¹Aw LALPA, thinurin mi zilhhâu suh la, Thinrimin mi thunun suh ang che.

²I thal zumin thûk takin mi chhun a, I kutin mi nem kun tlawk tlawk a.

³I thinurna avângin ka tisaah hian dam lai rêng a awm lo; Ka sualna avângin ka ruhte lah him dam rêng a awm hek lo.

⁴Ka khawlohnaten ka lû hi a chîm pil a, Ka zawh rual loh phurrit ang mai a ni.

⁵Ka âtna avângin ka pemte hi a huai sual a, a uih vung vung a.

⁶Na tuarin ka kun tlawk tlawk a; Nilêng lêngin lungngaiin ka rûm thîn.

⁷Ka kâwnge te hi a vûng bêr bûr a, Ka pangti hi dam lai rêng a awm lo ve.

⁸Ka châu va, ka sil ûrh a; Ka thinlung zîng mup mup avângin ka hui pawp pawp thîn.

⁹LALPA, ka duhzâwng zawng zawng i hmâah a awm a; Ka rûmna pawh i lakah thup a ni lo ve.

¹⁰Ka thin a phu der der a, thâ rêng ka nei ta lo va; Ka mit lah a thim tial tial si a.

¹¹Ka duh takte leh ka thianten ka hri vei avâng hian min hnaih duh tawh lo va, Ka laichînte pawh an hla zo ta.

¹²Ka nunna mi lâksak tumtuten ka awh nân thangte an kam thîn a; Ka chhiatna zawngtute pawhin thu tha lo pui pui an sawi a, Nîlêngin mi bum dân tûr ngawt an buaipui thîn. ¹³Kei erawh chuan bengngawng ang maiin engmah ka hre lo va; Tawng thei lo ang maiin ka kâ ka âng hek lo.

¹⁴Tichuan, hriatna nei lo ang maia awmin, Chhâng lêt vê thei lo ang maiin ka awm thîn.

¹⁵Aw LALPA, nangmah a ni ka beisei ni; Aw LALPA ka Pathian, mi lo chhâng ang che.

¹⁶“Mi ngaihthlâksak loh chuan min diriamin min nuihsawh zui ang a, Ka rahbî a tlêu vêleh an lâwm nasa ting mai dâwn si a,” ka ti a.

¹⁷Tlu mai thei ka ni a, Ka lungngaihna hian mi chîm reng a.

¹⁸Ka khawlohma chu ka puang mai teh ang, Ka sualna hian mi tilungngai dâwn a nih hi;

¹⁹Ka hmêlmâte chu an chakin an tawrhlelhawm si a; Dik lo taka mi hawtute lah an pung tual tual bawk si.

²⁰Thil thâ suala thungrûltu ka hmêlmâten Tha taka ka awm hlê hlê min er tlat si a.

²¹Aw LALPA, mi kalsan suh la; Aw ka Pathian, mi hlat lul suh ang che!

²²Aw LALPA, ka chhandamna i ni si a! Mi pui tûrin hmanhmawh ang che.

BUNG 39

DAM CHHÛNG TÂWIZIA

¹“Ka kalna kawng hi ka en ngun teh ang, Chuti lo zawng, ka lei hian thil sual ka lo ti dah ang e, Mi sualte chu hmuh phâk renga an awm laiin Ka hmûi hi ka phuar tlat dâwn a ni,” ka ti a.

²Tichuan ka ngâwi reng a, Thil tha pawh sawi lovin ka ngâwi reng a; Ka lungngaihna a kai tho ta a.

³Ka thinlung chu chhûng lamah a sa huam huam a; Ka ngaihtuah mêk laiin mei a rawn alh chhuak a. Ka lei chuan thû a sawi tan leh ta a.

⁴LALPA, ka tâwp chin tûr mi hrilh la, Ka dam chin tûr pawh mi hriattîr teh, Ka derthâwnzia ka hriat theihna tûrin.

⁵Ka dam chen tûr hi kutpah chen lekin i siam a; Ka kum pawh hi i tân eng tham mah a ni lo va; Mîhring hi a that lai ber pawhin tuihû ang lek a ni si a.

⁶Mi tin hi himthlâ angin an lêng a, Engmah ni hlei lo an buaipui a; Sum a khâwl tûn tûn a, Tû ta tûr nge tih a hre dêr si lo.

⁷Lalpa, eng hi nge maw ka nghah reng le? Ka beiseina chu nangmahah a ni asin.

⁸Ka bawhchhiatna zawng zawng ata mi chhan chhuak la; Mi â-te nuihzatbûrah chuan mi siam lul suh ang che.

⁹Nangma thû ka âwih avângin Ka ngâwi reng a, ka kâ pawh ka âng hek lo.

¹⁰I mi hremna hi mi lâk kiansak lul rawh, I kutthlâk ka tuar zo dâwn lo ve.

¹¹Mite sualna i hâuwha i zilh hian An mâwina chu thîm angin i tichhe thîn a; Mi tin mai hi tuihû ang lek an ni si a.

¹²Aw LALPA, ka tawngtâina hi ngaithlâ la, Ka âu âwah i beng lo chhî ang che; Ka mittui tlâ hi ngawihsan suh ang che; Min thlahtuteho ang mai khân Khualzin, rei lo te châm tûr lek ka ni si a.

¹³Chakna ka neih leh theih nân, mi enbingna mit hi la sawn ang che, Ka kal bova, zamual ka liam daih hmâ hian.

BUNG 40

LÂWMTHÛ LEH TANPUI DÎLNA

¹LALPA chu ka nghâk fan fan a; Tichuan, ka lam a lo hawi a, Ka âu âw chu a hre ta a.

²Khuarkhurum tihbâiawm tak aţangin mi lachhuak a, Chirhdûp hmun aţang chuan Ka rahbî mi tihnghehsak a, Mi din nghehtîr ta a.

³Ka kâah hla thar a dah a, Kan Pathian fakna hlâ chu; Mi tam takin an hmuhin an tih ang a, LALPA chu an la ring vê ang.

⁴LALPA rinchan bera neihthu chu a nihlawh e, Mi chapote ngaisâng lova dâwt thu lama pêng bo lote chu an nihlawh e.

⁵Aw LALPA ka Pathian, i thil mak tihte chu a va tam êm! I kut chhuak vek a ni si a; Nangin thil min buatsaihsakte hi, A indawta chhiar sên rual a ni lo; Hrilin sawi thei teh rêng ila âw! Chhiar sên rual a ni mawlh si lo va.

⁶Inthâwina leh thilhlante chu i duh zâwng a ni lo va; Ka hriatna beng mi hawnsak ta. Hâlrâl thilhlân leh sual tâna thilhlân lah i phûh hauh si lo va.

⁷Kei chuan, ‘Ngai teh, ka lo kal e; Lehkhabu ziala thuziak chu keima chungchâng a ni.

⁸Aw ka Pathian, i duh zâwng tih hi ka lâwm zâwng a ni asin, I dân thû chu ka thinlungah a awm e,” ka ti a.

⁹Inkhâwmna ropui takah chuan Dikna Chanchin Tha ka tlângâupui thîn; Sawi lo tûrin ka insûm hek lo, Aw LALPA, nangmah ngein i hria alâwm.

¹⁰I dikzia hi ka thinlungah thup rual a ni lo va; I rinawmzia leh i chhandamna thu ka tlângâupui zâwk thîn; Inkhâwmna ropui takah chuan I ngilneihna leh i thutak ka ngawihpui mai mai lo asin.

¹¹Aw LALPA, duat taka mi lainatna hi titâwp lul suh ang che; I ngilneihna leh i thutak chuan mi hum reng zâwk rawh se.

¹²Sual chhiar sên lohvin mi hual vêl a, Ka khawlohnaten mi chîm buai avângin chung lam ka hawi chho thei hek lo; Ka sual hi

ka samzâi aiin a tam zâwk a; Chûngte chuan ka thinlung a tichâu a ni.

¹³Aw LALPA, mi chhan chhuak lul rawh; Aw LALPA, mi pui tûrin hmanhmawh ang che.

¹⁴Ka nunna tihbora tuma zawngtute chu Mualpho tak leh mangang takin buai nuai nuai teh se. Ka chhiatna ringawt duhtute chu Zahthlâk taka hnawh bovin awm rawh se.

¹⁵“Chhei raw! Chhei raw!” mi titute chu, A ngaihna hre lo khawpin mualpho hlawm rawh se.

¹⁶Nangmah zawngtu zawng zawngte chu nangmahah hlimin lâwm sela; I chhandamna thlahleltute chuan, “LALPA chu chawimâwiin awm rawh se!” ti zêl rawh se.

¹⁷Kei zawng mi rethei leh pachhia ka ni a, Mahse, LALPAN mi ngaihtuah thîn. Nang chu mi tanpuitu leh mi chhan chhuaktu i ni a; Muang lul suh ang che, âw ka Pathian.

BUNG 41

ṬANPUI NGAITE TÂNA ṬANPUINA

¹Retheite ngaihsak mi chu a nihlawh e, Harsatna a tawh hunah ani chu LALPAN a chhan chhuak ve ang.

²LALPAN ani chu a vêng him ang a, a dam reng ang, Tichuan, leiah hian malsâwm a ni ang; A hmêlmâte tihnamnahn atân i pe phal dâwn si lo va.

³LALPAN a dam lohna khumah pawh a la tichak zêl ang a; Natna khum chungah pawh a awmpui tlat dâwn a ni.

⁴Aw LALPA, mi khawngaih rawh, Min tidam leh rawh, i chungah thil sual ka lo ti ta si a,” ka ti a. ⁵Ka hmêlmâten, “Engtikah nge a thih ang a, a hming thâi bo a nih ang?” tiin Dengkhâwng takin min ṭawng khum thîn.

⁶Mi rawn tlawh chhun lahin dâwt ringawt a sawi a; A thinlungin sualna a dap khâwm a; A kal chhuahna hmunah a pu darh thîn.

⁷Mi hawtu zawng zawngte chuan min rêl a, an inbe ru ser ser thîn a; Mi tihchhiatna tûr ngawt an suangtuah thîn.

⁸“Natna ṭha lovin a man ta hlah mai le; A dam chhuak leh tawh lo vang,” te an lo ti vêl râwl nê.

⁹Ka ṭhian kawmngaih leh ka rin êm êm, Ka chaw kîlpui ngei pawhin A kê mi leng khum ta.

¹⁰Mahse âw LALPA, mi khawngaih la, mi tung ding leh ang che, Anniho hi ka thungrull lêt ve theih nân.

¹¹Hê thilah hian ka chungah i lâwm tih ka hria e, Ka hmêlmâ pawhin ka lakah hnehna a chang rêng rêng lo.

¹²Rilru dik tak ka put avângin mi hum la, I mithmuhah kumkhuain mi dah reng ang che.

¹³LALPA, Israela Pathian chu, Chatuan ata chatuan thlengin Fakin awm rawh se! Amen, Amen.

BUNG 42

PATHIAN NGAI VAWNG VAWNG

¹Luite tui châka sakhi a thaw huam huam ang hian Aw Pathian, ka nun hian a ngai che a ni.

²Ka nun hi Pathian ngaiin, Pathian nung thlahlelin a tuihâl huam huam a. Engtikah nge Pathian hmâa inlan tûra ka lo kal ve dâwn le?

³Ka mittui hi achhûn azânin ka chaw a ni a, “Khawiah nge i Pathian chu?” tiin min lo zawt châmchî a.

⁴Hêng thil hi ka hriat chhuah châng chuan Keima chhûngah hian ka nun hi ka bun ruak hawk hawk thîn a ni. Pathian biak in pana mipui ka hruai duah duah lai te, Hlim taka fakna hla kan sak dual dual lai te, Apui anâwia kût pui kan ur mup mup lai te kha âw.

⁵Aw ka nunna, engah nge i kun reng le? Engah nge ka kawchhûngah hian i buai thîn? Pathian beisei rawh, amah chu ka la fak cheu dâwn asin, A hmêl êngin mi tuam dam dâwn si a.

⁶Aw ka Pathian, ka nun hi a ngui reng a; Chuvângin Jordan ram aṭang te, Hermon tlâng sâng aṭangte leh, Mizar tlâng aṭangtein ka hre reng ang che. ⁷I tui khawthla inchhawk rî-ah tui thûk leh tui thûk an inchhâwn a; I tuifâwn phûl bulh bulhte chuan mi chîm pil ta.

⁸Chhûnah chuan LALPA ngilneihna chuan thû a pê ang a, Zânah chuan a hlâin mi âwi ang, Chû chu ka nunna Pathian hnêna ka ṭawngṭaina a ni si a.

⁹Ka Lungpui Pathian hnênah chuan, “Engah nge mi theihngihl tāk le? Ka hmêlmâte min dodâlna avâng maiin engah nge ka lungngaih bik ang le?” tiin ka la hrih ang.

¹⁰Ka hmêlmâten nilêng lênga, “Khawiah mâw i Pathian chu?” tîa, Min lo elsên reng avâng hian, Ka ruhte hi a tliak sawm ta emaw ka ti thîn.

¹¹Aw, ka nunna, engah nge i kun reng? Engah nge ka chhûngah hian i buai thîn? Pathian beisei rawh; Amah chu ka la fak cheu dâwn asin, Mi tidamtu leh ka Pathian a ni si a.

BUNG 43

MANGAN LAIA ṬAWNGṬAINA

¹Aw Pathian, thiam mi chantîr la, Pathian pawisa lo hnam chungah hian ka chungthû mi sawipui ang che; Aw, bumhmang leh mi dik lo lakah chuan mi chhan chhuak ang che!

²Nang chu ka chakna Pathian i ni si a; Engah nge mi thlauhtlâk mai le? Engah nge hmêlmâte dodâlna avânga ka lungngaih viau ang le?

³Aw, i êng leh i thutak chu tîr chhuak ta che! Anni chuan mi hruai rawh se; I tlâng thianghlim leh i puan inah te chuan mi hruai thleng rawh se.

⁴Tichuan, Pathian maichâmah ka kal ang, Nasa taka mi tihlimtu Pathian hnênah ngei chuan; Aw Pathian, ka Pathian, Ṭingṭangin ka fak chiam ang che.

⁵Aw ka nunna, engah nge i ngui reng? Engah nge ka chhûngah hian i buai thîn? Pathian beisei rawh; Amah chu ka la fak cheu

dâwn asin, Mi tidamtu leh ka Pathian a ni si a.

BUNG 44

ISRAELTE VUIVÂINA

¹Aw Pathian, hmâsânga kan pipute huna I thiltihte kha keini min hrilh chhâwng a, Kan bengin kan lo hre vê ta.

²I kut ngeiin hnamte chu i hnawt chhuak a, Kan thlahtute chu nangma phunte an ni; Hnam dang mite chu i tuartîr a, i hnawt chhuak a.

³Ram hi anmahni khandaih hmanga an lâk pawh a ni lo va, Anmahni kuta inchhandam an ni hek lo; I kut ding lam leh i bân leh i hmêl êng avâng chauhvâ lâ an ni zâwk, I duhsak êm avângin.

⁴Aw Pathian, nang hi ka Lal i ni; Jakoba tân hnehna thupêk pê ang che.

⁵Nangma zârah kan hmêlmâte chu kan hneh ang a; I hmingin min beitate chu kan chîl hrep ang.

⁶Ka thalngul hi ka ring dâwn lo va, Ka khandaihin mi chhan dâwn hek lo.

⁷Nangma'n kan hmêlmâte lakah min chhandam ta zâwk a, Min hawtute chu i timualpho ta a.

⁸Nilêngin Pathian chu kan chhuang a, I hming chu kan fak kumkhua tawh ang.

⁹Amaherawhchu, tânah chuan nanging min thlauhtlâ a, Min timualpho va, Kan sipaite i ho tawh ngai hek lo.

¹⁰Hmêlmaho hmâah min tlânchhiattîr thîn a, Mi hawtute chuan an duh tâwkin min rawk a.

¹¹Nang chuan berâm talh tûr ang maiin mi kalsan a, Hnam tin zîngah min tidarh ta si a.

¹²I mite hi engmah lovah i hralh a, Anniho hralhna man chu i hausak phah chuang si lo.

¹³Kan thenawmte diriam atân chauh min lo siam a nih hi, Kan vêla mite hmuhsit leh nuihsan in min awmtîr bawk si.

¹⁴Hnam tinte kamchhe tleuhna ang lekah min siam a, Miten an lu min thin khum thîn.

¹⁵Zak takin ka kimki reng a, Ka mualphona hian mi chîmpil ta,

¹⁶Mîn sawi chhiaa min ânkhumtu avâng leh, Hmêlmâ leh phuba latu avângin.

¹⁷Chûng zawng zawng chuan min tlâkbuak ta a; Nimahsela, kan theihngihlil ngai lo che a, I thuthlung pawh kan bawhche hek lo.

¹⁸Kan rilru pawh a vâk bo lo va, I kawng lah kan pên bosan hek lo;

¹⁹Nang erawh chuan sihalte awmna hmunah min sawisa nek a, Kan chungah thihna thlâ i zâr duai a.

²⁰Kan Pathian hming kan theihngihlil emaw, Ram dang pathian biain kan kutte phar ta ila,

²¹Pathian chuan a hre chhuak nghâl dâwn lo vem ni? Thinlung thurûkte hretu a ni si a.

²²Nangma hming avângin nilêng lênga tihhlumin kan awm thîn; Berâm talh tûrte anga ngaih kan ni si a.

²³Aw LALPA, harh teh! Engah nge i muthilh? Tho la! Mîn thlauthla hlen suh ang che.

²⁴Eng vângin nge i hmêl i thup reng a, Sawisak leh tihduhdah kan tuar hi engah nge i theihngihlil thîn?

²⁵Lei sîin kan nun hi a kûn reng a; Vaivutah kan bawk phêk reng mai a ni. ²⁶Mîn tanpui tûrin tho la, I ngilneihna avângin min tlan chhuak ang che.

BUNG 45

LAL NUPUI NEIH HLA

¹Ka thinlung hi hla mâwiin a luang liam a; Lalber fakna hlâ ka chham chhuak ang; Ka lei hi lehkhâ ziaktu pen ang a ni.

²Mihring fapate aiin i duhawm zâwk; I hmûiah khawngaihna leih buak a ni a; Chuvângin, Pathianin kumkhua in mal a sâwm a che.

³Aw, Mi Chak, i khandaih kha i kâwngah vawng la, I ropuina leh i mâwina nêh khân.

⁴Thutak avâng te, tlâwmna leh dikna te avângin i ropuina chu chungnung zêl sela; Tichuan, i kut ding lamin thil mak tak takte a zirtîr dâwn che nia.

⁵I thal hriam chuan Lalber hmêlmâte thinlung chhun tlang sela; I hnuaiah chuan tlu pheng phung teh se.

⁶Aw Pathian, i lalthutthlêng chu chatuan atân a ni a; Dikna laltiang chu i lalrama mi tûr a ni.

⁷Dikna i ngainâ a, suahsualna i huat kha; Chuvângin Pathian, i Pathian ngei chuan hriak a thih che a, I thiante aia nasâa hlimna hriak a thih che hi.

⁸I silhfên zawng zawngah murra te, aloe leh thakthîng rimte a nam veng veng a; Sainghova chei lal inte chuan a tihlim che a.

⁹I hmeichhe zahawmte zîngah lal fanute an tel vê a; I ding lamah Ophir rangkachaka incheiin lalnu chu a ding a.

¹⁰Aw ka fanu, ngaihlâ teh, Ngaihtuah la, i beng chhi rawh; I mite leh i pa ina mite chu theihngihlil rawh;

¹¹Tichuan, Lalberin i duhawmna chu a thlahlel êm êm dâwn asin; I Lalpa a nih avângin amah chu chibai bûk ang che.

¹²Tura fanu chuan thilpêk a rawn keng ang a; A hausâ-sâin an tlawn ang che.

¹³Lal in chhûnga lal fanu chu a nalh ber a, A silhfên chu rangkachaka chei a ni.

¹⁴Puan zeh mâwi tak sinin lalber hnênah an hruai ang a; Amah zuitu nula thianghlim rual te chu i hnênah an rawn hruai ang.

¹⁵Hlim leh lâwm takin an rawn hruai ang a; Lalber inah chuan an lût ang.

¹⁶I thlahtute aiah i fate an awm ang a, Anni chu lei chung zawng zawnga lalah i siam bawk ang.

¹⁷I hming hi chhuan zawng zawng hriat reng tûrin ka siam ang a; Tichuan, miten chatuan chatuanin an fak tawh ang che.

BUNG 46**KAN HIMNA KULHPUI PATHIAN**

¹Pathian chu kan himna kulhpui leh kan chakna, Mangan laia tanpui vartu hnâi reng a ni.

²Chuvângin leilung hi lo insawn bovin Tlângte hi tuifinriat lâiah insawn daih mah sela, kan hlâu lo vang;

³A tuite chu ri hum humin so but but mah sela, A fawn nasa chuan tlângte chu tinghîng dur dur mah se, Kan hlâu chuang lo vang.

⁴Lui pakhat a awm a, chu mi pêngte chu Pathian khawpui tihlimtute an la ni ang, Chungnungbera chenna hmun thianghlîm chu.

⁵Pathian chu a chhûnghah chuan a awm a, a nghîng dâwn si lo va; Khua a vâ vêleh Pathianin a tanpui ang.

⁶Hnam tin an buai a, lalramte a nghîng a; Ani chuan a âw a chhuah a, leilung hi a tuiral zo ta a.

⁷Sipaihote LALPA chu kan hnênah a awm a; Jakoba Pathian chu kan himna kulhpui a ni.

⁸Hawh u, LALPA thiltihte hi en rawh u, Leilunga thil a tihchhiat zozâi hi.

⁹Ani chuan indonate chu kâwlkil thlengin a titâwp thîn a; Thalte a titliak a, feite a tibung a; Tawlailîrte chu meiah a rawh ral thîn.

¹⁰Ngâwi ula, Pathian ka ni tih hre rawh u; Hnam tin zîngah châwimâwiin ka awm ang a, Leiah hian châwimâwiin ka awm ang!

¹¹Sipaihote LALPA chu kan hnênah a awm a; Jakoba Pathian chu kan himna kulhpui a ni.

BUNG 47**PATHIAN CHUNGNUNGBER**

¹Aw, mi tinrêngte u, in kut bêng ula! Hneha âwin Pathian hnênah âu rawh u!

²LALPA Chungnungbera chu a tihbaiaawm si a; Lei pum puia Lal ropui a ni asin.

³Kan hnuaia kûn tûrin mi tin a tudawl ang a, Kan ke hnuaiah hnam tin a dah bawk ang.

⁴Kan ro luah tûr chu ama'n min thlansak ang a, A hmangaih Jakoba chhuan tlâk ni tûrin.

⁵Pathian chu au thâwm nêh a chho va, LALPA chu tâwtawrâwt ri nêh a chho ta.

⁶Pathian fakin zai ula, fak rawh u! Kan Lalber fakin zai ula, fak rawh u!

⁷Pathian chu khawvêl puma Lalber a ni si a; Hriat thiamna nêh amah fakin zai rawh u.

⁸Pathian chu hnam tin chung a lal a ni a; Pathian chu a lalthutthlêng thianghlîmah rorêlin a thû a.

⁹Abrahama Pathian mi leh sâ ni tûrin Mipui zînga lalhote an kal khâwm a; Leilung phâwte chu Pathian ta a ni si a; Ani chu nasa taka châwimâwi a ni.

BUNG 48**ZION ROPUINA**

¹LALPA chu a ropui êm a, nasa taka fak tûr a ni, Kan Pathian khawpuiah, Ama tlâng thianghlîmah ngei chuan.

²Zion tlâng, hmar lama mi chu, A sângin a mâwi teh asin, Khawvêl pum pui hlimna a ni, Lal ropui tak khawpui a ni si a.

³A lal inahte chuan Pathian a awm a, A himna kulhpui, tia hriat a ni.

⁴Ngai teh, lalte chu an inpun khâwm a, An rawn kal hnâi a.

⁵An han hmuh chuan mak an ti a; An mangang chu an kal bo leh thuai a.

⁶Chutah chuan hlauhna in a man a, Hmeichhe nâu vei nâ ang maiin.

⁷Khawchhak thli hmanga Tarsis lawng liante i tihchhiat thîn ang mai khân.

⁸Benga kan lo hriat sâ ang takin Sipaihote LALPA khawpui, Kan Pathian khawpui chu kan hmu ta: ` Pathianin chatuan atân a tinghet ang.

⁹Aw Pathian, i tempul chhûngrilah chuan I ngilneihzia kan chhût fo thîn a.

¹⁰Aw Pathian, i hming put ang ngeiin Nangmah fakna chuan kâwlkil a thleng a; I kut dîng lam chu diknaa khat a ni.

¹¹I rorêlnate avângin Zion Tlâng chu hlim sela, Juda fanute pawh hlim bawk rawh se.

¹²Zion chu vêl chhuak ula, Kal hual vêl rawh u. Râlvên in sâng awm zât te chu chhiar rawh u.

¹³A kulhte chu ngun takin chhinchhiah ula; A lal inte pawh chhût tel rawh u; Thangthar lo awm zêlte hnêna in hrilh chhâwn theih nân.

¹⁴Hê Pathian hi kumkhuaa Kan Pathian a ni zêl ang a; Min hruaitu a ni zêl ang, Thihna hmun thleng pawhin.

BUNG 49**HAUSAKNAA INNGHAH ÂTHLÂKZIA**

¹Mi tinrêngte u, hei hi ngaithla ula; Khawvêla michêng zawng zawngte u, beng lo chhi rawh u:

²Mi tê leh mi lian te, Mi hausa leh mi retheite pawh.

³Ka kâ hian finna thû a sawi ang a; Thinlunga ka ngaihtuahna chuan hriat thiamna a pê ang.

⁴Thufing lamah ka beng ka chhi ang a; Ka thu khirh sawi chu tîngtângin ka hrilh fiah ang.

⁵Ni tha lovah eng nge ka hlauh vang a, Sualna chuan ka ke bulah mi rawn hual mah se, engah nge ka hlauh vang?

⁶Mahni hausakna sum ring a, An sum neih tam chhuangtute chuan,

⁷An unaute ngei pawh an tlan thei tawp lo vang a, Pathian hnênah tlanna man an pêksak thei hek lo vang:

⁸An nun tlanna man tûr chu a to êm a, Tûma pêk tlâk rual a ni lo.

⁹Leilâwta tla lo tûr leh Chatuan nunna chang tûr meuh chuan.

¹⁰Mi fîng thîte pawh a hmu a, Mi â-te leh mi mâwlte pawh an boral a, An sumte chu mi dangte kutah an hnutchhiah mai thîn tih pawh an hai hek lo.

¹¹An rilru chhûngrilah chuan an inte chu kumkhaw daih tûrah an ngai a, An chênna hmun te pawh thangthar zêlte tân an ruahman thîn a; An ram hmingah anmahni hmingte an puttîr thîn.

¹²Nimahsela, mihring hian dinhmun tha a chelh reng bik lo va; Boral leh mai thîn ramsâte ang hi an ni.

¹³Chutiang chu mi-âte awm dân a ni thîn a, An thû la rawn zâwmtute pawh chutiang bawh chu an ni.

¹⁴Talh tûr berâmten thihna hmun an pan mêk ang an ni; Thihna chuan a lo lem zo zêl dâwn si a; Mi dikte chuan khawvâr hunah an chungah ro an rêl ang a; An taksa mâwina chu an chênna aţanga hla takah, Thlânah chuan a la ţawih ral ang.

¹⁵Ka thlarau erawh chu thlân thil tihtheihna ata Pathianin a tlan chhuak ang a, Ani chuan mi lo lâwm dâwn si a.

¹⁶Mi tuemaw a lo hausak thûr thûra, An chhûngkaw ropuina a lo len tual tual pawhin hlâu suh ang che;

¹⁷A thih hunah engmah a chhawm thei dâwn si lo va, A ropuina pawhin a zui thla thei dâwn hek lo.

¹⁸A dam laiin vannei inti hle mahse, (I hlawhtlin avângin miten an fak thîn che a),

¹⁹An pate kalnaah chuan an kal ve ang a; Engtikah mah êng an hmu leh tawh ngai lo vang.

²⁰Dinhmun thâa ding, hriat thiamna nei si lo mihring chu Ramsa ang leka boral thîn a ni.

BUNG 50

RORÊLTU PATHIAN

¹LALPA Pathian, Michaka chuan Leilung hnênah thû a sawi e, Leilung hi ni chhuahna aţanga a tlâkna thlengin a ko ta.

²Zion aţang chuan mâwina famkim Pathian chu a êng chhuak ang.

³Kan Pathian chu a lo kal ang a, a ngâwi mai mai lo vang; A hmâ ata chu meiin a kâng fâi vek ang. A vêl chu thlipui na tak hual vêl ang a ni ang.

⁴A mite ro a rêlsak theihna tûrin chung lam aţangin vânte a ko vang a, Lei hi a ko bawh ang;

⁵“Ka mi thianghlimte ka hnênah rawn hruai khâwm rawh u, Inthâwina hmanga ka hnêna thu thlungtute kha,” a la ti ang.

⁶Vânte khian a dikzia puang chhuak rawh se, Amah Pathian ngei chu rorêltu a ni si a.

⁷“Aw ka mite u, ngaithla rawh u, thû ka sawi dâwn e; Aw Israel, ka chhuahchhâl dâwn che hi; Kei hi Pathian, i Pathian chu ka nih hi!

⁸I inthâwina leh i hâlral thilhlân te avângin Ka zilhhau lo vang che; Chûng chu ka hmâa awm reng a ni si a.

⁹I in ata bâwngpa rêng rêng ka la chhuak lo vang a, I ran huang aţangin kêlpate pawh ka la chhuak hek lo vang.

¹⁰Ramhnuaia ramsa tinrêng hi ka tâ a ni a, Tlâng sângkhat chung a ran rualte pawh ka tâ vek a ni.

¹¹Tlânga sava zawng zawng hi ka hre vek a, Ramhnuaia ramsâte pawh ka tâ a ni.

¹²Ka ril pawh tâm se, ka hrilh lo vang che; Leilung leh a chhûnga thil awm zawng zawng hi ka tâ a ni si a. ¹³Bâwngpa sâte chu ka ei anga, Kêl thisen ka dâwt ang mâw?

¹⁴Pathian hnênah lâwmthu sawi inthâwina chu hlân zâwk la; Chungnungbera laka i thutiam chu hlen rawh:

¹⁵Mangan nîah mi ko la; Ka chhanhim ang che a, tichuan mi chawimâwi dâwn nia.”

¹⁶Mi suaksual hnênah erawh chuan Pathianin: “Ka thupêk hi engtizia nge i lo puana, Ka thuthlung hi eng vânga i kâa puang thîn nge i nih?

¹⁷Thununna i hua a, ka thûte chu hnung lamah i hnâwl zêl a.

¹⁸Rukrû i hmuhin i thurualpui mai a, Uirê chîngte pawh i kawp zêl si a.

¹⁹I kâ hi sual hnênah i pê a, I leiin bumna thû a puang chhuak thîn.

²⁰Thuthmun i rem a, i unau i sawisêl a; I pianpui unau ngei i sawi chhe thîn.

²¹Chûtiang thil i ti chung pawhin ka ngâwi reng a; Nangmah ang lek tûrah mi ngai a; Mahse ka zilhhau hlek ang che a, I mit hmuhah ngei ka remfelsak tawh ang che.

²²“Nangni Pathian theihngihltute u, hei hi ngaihtuah rawh u, Ka pawt sawm vek mai tûr che u asin, Chhanhimtu rêng in nei dâwn si lo.

²³Lâwmthu sawi inthâwina hlân apiangin Kei mi chawimâwi a ni; Dik taka a awm dân vawngtu hnênah Pathian chhandamna ka entîr ang,” a ti a.

BUNG 51

INCHHÎRNA HLÂ

¹Aw Pathian, ka chungah zahngai la, I ngilneihna a nasat êm kha; Lainatna i ngah êm avângin Ka bawhchhiatnate hi thâi bo vang che.

²Ka khawlohna hi fâi takin mi silsak la, Ka sual hi mi tlen fâisak mawlh ang che.

³Ka bawhchhiatna chu ka hre kiau si a, Ka sualna hian mi hmachhawn reng a.

⁴Thû i sawia thiam i chan theih nân leh, Ro i rêla sawisêl bo i nih theih nân, I chungah, i chung ngeia thil sual ti ka ni a, Hê thil sual hi i mithmuh ngeia ti ka ni e.

⁵Ngai teh, khawlohnaa đin ka ni a; Ka nu’n sual sâin mi pâi a.

⁶Ngai teh, i duh chu chhûngril lama takna a ni a, Chhûng lam nunah finna mi zirtîr ang che.

⁷Husop-in mi hru fâi la, tichuan ka fâi ang; Mi tlêng fâi la, tichuan, vûr aiinka vûr ang.

⁸I ruh tihtliah hnûte hi a hlim leh theih nân, Hlimna leh lâwmna thâwm mi hriattîr ang che.

⁹Ka sualname lakah i hmâi hup la, Ka khawlohna zawng zawng thai bo vang che.

¹⁰Aw Pathian, keimahah thinlung thianghlim mi siam sak la; Keimahah hian thlarau dik tak* siam thar leh ang che.

¹¹I hnêna ta mi paih bo lul suh la; I Thlarau Thianghlim chu ka hnên aţangin mi lâksak suh ang che.

¹²I mi chhandam hlimna chu mi pe lêt leh la, I Thlarau tihnuam tak chuan mi chelh reng ang che.

¹³Chutichuan, bawhchhetute chu i kawng thû ka zirtîr ang a; Mi sualten i lam an lo hawî dâwn nia.

¹⁴Aw Pathian, mi chhandamtu Pathian, Thisen chhuah avânga ka thiam lohna ata mi chhan chhuak rawh, Tichuan, ka lei hian ring takin i thatzia hlân ka sâ dâwn nia.

¹⁵Aw LALPA, ka hmuî hi hawng ang che; Tichuan, ka kê hian a fak mawlh mawlh dâwn che nia.

¹⁶Inthâwina hi i lawm zâwng a ni si lo; ni se ka hlân daih tawh tûr; Hâlral thilhlân lah i lâwm bawk si lo.

¹⁷Pathian duh zâwnga inthâwinate chu thlarau lungchhia hi a ni zâwk si a, Aw Pathian, thinlung lungchhia leh inchnîr ngawih ngawih hi i hmusit dâwn si lo va.

¹⁸I duh zâwngin Zion chungah chuan thil tha ti la; Jerusalem kulh bangte pawh din thar leh ang che.

¹⁹Tichuan, dikna inthâwinaah te, Hâlral leh pumhâl thilhlanahte chuan i lâwm tawh ang a, I maichâm chungah te chuan bâwngpa te an hlân thei tawh ang.

BUNG 52

BUMHMANGHO CHUNGA RORÊLNA

¹Aw, mi chak pa, engati nge thil sual i chhuan tlat le? Pathian thatna chu a pângngai reng asin.

²I lei chuan bakmeh chem hriam angin Bumna hmangin tihchhiat tûr ngawt a ngaihtuah thîn.

³Thatna aiin sual i ngaina zâwk a, Dikna thû aiin dâwtthû i ngaina zâwk si a.

⁴Mi chhiatna tûr thû ringawt i tuipei hi, Nang, lei dawthei pa.

⁵Chuvângin, Pathianin kumkhua atân a tichhe vê ang che; I chênna hmun ata a hnûk chhuak chein a hruai bo daih ang che a, Mi nung ram ata a phih chhuak daih ang che.

⁶Mi dikte pawhin an hmu ang a, an hlâu ang a, Chu mi chu an nuihsan ang,

⁷“En teh u, hê mi hi a ni Pathian chakna mamawh lova chu, A thil sual tih hmanga intihchak tuma chu a nih hi,” an la ti ang.

⁸Kei erawh chu Pathian ina oliv thing hring ang ka ni; Pathian zahngaihna chu kumkhua in ka ring zâwk ang.

⁹I thiltihte avâng hian Nang chu kumkhua in ka fak ang che, I mi thianghlimte mithmuhah, I hming chu ka ngâk reng ang, chû chu thil tha a ni si a.

BUNG 53

MIHRING SUALZIA

¹Mi â chuan a rilrûin, “Pathian a awm lo,” a ti thîn a. An khawlo zo tawh a, thil sual tenawm tak an ti thîn; Tûmah thil tha ti reng an awm lo.

²Hriat thiamna neia Pathian zawng an awm nge awm lo tih hre tûrin Pathianin vân aţangin mihring fate hi a zuk en a.

³Mi tinin kawng an bo theuh va; An khawlo zo vek tawh a; Tûmah thil thâ ti pawh an awm lo, Pakhat mah an awm lo.

⁴Thil sual titute chuan hriatna reng an nei lo vem ni? Chhang ei angin ka mite an ei zo vek a, Pathian hming pawh an lam ngai hek lo.

⁵Hlah tûr awm lohnaah pawh Hlau êm êmin an awm a, Nangmahni hualtute ruh chu Pathianin a paih darh vek tawh a; Pathianin anniho chu a hnâwl avângin Mualpho takin i siam ta.

⁶Israelho chhandamna chu Zion aţangin lo chhuak tawh mai se âw! Pathianin a mite saltâng a hruai kîr leh hunah chuan, Jakob-ho an lâwm ang a, Israelho an hlim ang.

BUNG 54

CHHAN CHHUAH DÎLA TAWNGTAINA

¹Aw Pathian, i hmingin mi chhandam la, I chaknain ka thiam thû mi rêlsak ang che.

²Aw Pathian, ka tawngtai ngaithla la; Ka thu sawite mi lo ngaihtlâksak ang che.

³Mi bei tûrin hnam dangte an lo thawk a, Mi hnuaichhiahtuten mi tihhlum an rawn tum bawk a; Pathian pawisakna reng an nei si lo.

⁴Ngai teh, Pathian chu mi tanpuitu a ni a: LALPA chu ka nunna humtute hnênah a chêng a ni.

⁵Ani chuan ka hmêlmâte chungah chuan an sual man a la thungrûl vê ang; I thutak ngeiin tiboral ang che.

⁶Keima duhtthû ngeiin i hnênah inthâwina ka rawn hlân ang; Aw LALPA, i hming that êm avângin ka fak zêl ang che.

⁷Ka manganna zawng zawng lakah mi chhan chhuak ta si a; Ka hmêlmâte chungah ka duhtthusâm thil thleng chu ka mitin a hmu ta.

BUNG 55

THIANIN A PHATSANNA

¹Aw Pathian, ka tawngtaina hi lo ngaithla la, I khawngaihna ka dîl lai che hian mi hawisan suh ang che.

²Mi ngaithla la, mi chhâng ang che; Ka mangang hi awm hlê hlê thei lovin ka rûm ka rûm thîn;

³Hmêlmâte âu thâwm avâng leh, Mi sualte min nèkchêpna hian Min timangang êm êm a ni, An thinrim chuan min haw zêl si

a.

⁴Ka lungril a na ngawih ngawih a, Thih hlauhna mi man tlat si a.

⁵Hlau rêng rêng hian ka khûr ka khûr a, Hlauhna mi man si a.

⁶“Aw, thûro anga thla neih ka va châk êm! Ka thlâwk bo daih ang a, ka hah a dam tawh tûr. ⁷Hla takah ka lêng delh delh ang a, Thlalêrah ka va awmsan daih tûr le.

⁸Tichuan, hê khawdur leh thlipui hrâng tak mai hi, Himna hmun lam ka pansan daih mai teh ang,” ka ti a.

⁹Aw Lalpa, tiboral la, an tawngte chu tihhransak vek ang che, Khawpuia inpaungnêkna leh innghirngonate chu ka hmu si a.

¹⁰A chhûn a zânin kulh tângah khawpui chu an kal hual mup mup thîn a; Sualna leh manganna chuan a bu lum a luah bawk a.

¹¹Chhian chu a inthukphûm tlat a, Nêkchêpna leh bumna chuan a khawlai te chu a chhuahsan si lo.

¹²Mi sawi chhetu chu hmêlmâ a ni si lo va; Ni se, ka tuar thei zâwk tûr. Ka chung a inlek thîna hi mi hawtu pawh a ni hek lo; Ni sela chuan ka bihrûksan daih tûr le:

¹³Mahse nang, ka anpui, ka thian leh ka kawm ngeih chu i ni miao si a.

¹⁴Thu chhia a tha ka sawipui thîn, Mipui zînga Pathian biak ina ka inkhâmpui thîn ngeia chu a ni si a.

¹⁵Thihnain rawn nang thut teh se; A nung chungin hremhmunah liam thla duak sela; An awmna apiangah suahsualna a awm ve zêl si a.

¹⁶Kei erawh chuan Pathian ka ko vang a; LALPA chuan mi chhandam ang. ¹⁷Tlaiah te, zîngah te, chhûnah te Ka tawngtai ang a, ka âu vak vak ang a, Ani chuan ka âw a ngaihla dâwn si a.

¹⁸Mi dotute min beihna lakah him takin ka nunna a chhanhim ta, Mi dotu an tam tehlul nê.

¹⁹Pathianin mi ngaihla ang a, anni chu a la tuartîr ve ngei ang, Ani chu hmâsânga lo awm tawh a ni si a. Anni chu an inlamlêl duh lo va, Pathian thîna pawh an nei bawk hek lo.

²⁰Inremna a siampuute chungah pawh kut a thlâk duh a; Mahni thutiam bawhchhetûah a tâng thîn a ni.

²¹A kamchhuak chu hriak aiin a nâl a, Mahse a thilungin a tai reng si; A kamchhuak hriak aia nê chu Chemte phâwi sâ a lo ni reng si a.

²²I phurrit chu LALPA chungah ngat la, Ani chuan a lo chhâwk ang che; Mi dik tihtlûka an awm hi a phal ngai dâwn si lo va.

²³Nimahsela, âw Pathian, anni chu boralna khur thûkah i paih thla daih ang a; Thisen chhuah hmang leh, Bumhmangte chuan an dam chhûng chanvê pawh an hmang zo lo vang; Kei erawh chu nangmahah ka innghat tlat zêl ang.

BUNG 56

PATHIANA INNGHAHNA

¹Aw Pathian, ka chungah zahngai rawh, Miten min lem zo takngial dâwn; Nilêng lêngin min rap bet si a.

²Ka hmêlmâten nilêngin min zîm reng a, Aw Chungnungber, min beitate hi an tam si a.

³Ka mangan châng apiangin, Nangmah ka bêl zêl ang che.

⁴Pathianah chuan (A thu ka fak ang a), Pathianah ka rinna ka ngat ang; Ka hlau rêng rêng lo vang. Tisa-mihring hian eng nge mi khawih theih?

⁵Nilêngin ka thûte an kâi kâwi thîn a; An ngaihtuahna zawng zawng chu mi tihchhiat tumna hlîr a ni.

⁶An inhâwr khâwm thîn a, An birû a, ka hnû an chhui a, Thah tumin min lo châng ru thîn a ni.

⁷Sual chungin hrem an pumpelh ang maw? Aw Pathian, thînurin chûng mite chu paihthla zâwk ang che!

⁸Ka vahvaihia mi chhinchhiahsak a; Ka mittuite hi i bûr chhûngah i thun a; I lehkhâbûah pawh a chuang a ni lo vem ni?

⁹Nangmah ka koh hun che chuan, Mi dotute chu baklêngin an tângchia ang; Pathianin mi tâng avângin chu chu ka hria a ni.

¹⁰Pathianah chuan (A Thu ka fak ang a), LALPA-ah chuan (A Thu ka fak ang),

¹¹Pathianah chuan ka rinna ka ngat a; Ka hlau rêng rêng lo vang. Mihringin eng nge mi tih theih ang?

¹²Aw Pathian, i hnêna ka thutiamte khân mi phuar tlat a; I hnênah fakna ka hlân ang,

¹³Thihna lakah ka nunna i chhanhim si a. Minungte êng hnuaiah chuan, Pathian hmâa ka lên ve theih nân, Ka kête hi tlu lo tûrin i vêng a ni lo'm ni?

BUNG 57

TANPUI DÎLNA

¹Mi khawngaih rawh, âw Pathian, mi khawngaih lul rawh! Nangmahah ka innghat reng si a; I thla phênah chuan ka birû ang, Hêng vânduinate hian mi kiansan hmâ loh chuan.

²Pathian Chungnungbera chu ka âu vang; Engkim mi tihsaktu ka Pathian ngei chu.

³Mi tihboral tumte laka mi chhan tûrin, Vên aţangin mi puitu tûr a rawn tîr ang. Pathianin a ngilneihna leh a thutak chu a rawn lantîr dâwn si a.

⁴Sakeibaknei zîngah ka awm a; Mi hâl hlum duh reng mihring fate zîngah ka mu thîn a, An hâte chu fei leh thal anga zum a ni a, An leite chu khandaih anga hriam a ni.

⁵Aw Pathian, nang chu vên chung daihah khian châwimâwiin awm la; I ropuina chu lei pumpui chungah hian awm rawh se.

⁶Ka kêa awh nân lên an phan a; Mangangin ka kûn ngawih ngawih a; Ka kalna kawngah ka tlâkna tûr khur an lo lai a; Mahse, anmahni ngei an tla ta zâwk a.

⁷Ka thinlung hi a nghet a, âw Pathian, ka thinlung hi a nghet a ni; Hlâ ka sâ ang, fakna hlâ ka sâ ang.

⁸Ka ropuinâ, harh rawh le! Perhkhuang leh țințangte û, harh rawh u! Khawfing ka au chat dâwn asin.

⁹Aw LALPA, mipui zingah ka fak ang che; Hnam tin zingah nangmah fakin ka zai ang.

¹⁰I ngilneihna chuan vân a tawng a, I thutak chuan chhâm zînna hmun a han thleng si a.

¹¹Aw Pathian, nang chu vân chung daihah khian châwimâwiin awm ang che; I ropuina chu lei pum pui chungah hian awm rawh se.

BUNG 58

MISUAL HREM TÛRA DÎLNA

¹Nangni ngâwi renga-te u, dikna thû hi in sawi meuh mâw? Aw mihring fate u, dik takin ro in rêl tak meuh em?

²Rêl suh e, in thinlungah sual in tih kha; In kut ngeiin leia nurâwnna thil in tih chu a bûkin in bûk thîn.

³Mi sualte chu an nute pum chhông ațang rênga țin hran sâ an ni; An pian vêleh dâwt thû sawiin an kal sual nghâl thîn.

⁴An tûr chu rûl tûr ang a ni a; Chawngkawr bengngawng, mahni beng hup thîn ang hi an ni.

⁵Rûl dâwi â thiamte âw pawh a ngaithla chuang lo, chham thiam eltiang mah se.

⁶An hâte chu vuak balsak rawh, Aw Pathian! Sakeibaknei vânglai nghote chu vaw bal vek ang che, Aw LALPA!

⁷Tui luang chak tak angin luang ral vek rawh se; A thalngul chu a kawih kûl hunah, A thalte chu chhum bung vek rawh se.
⁸Hnapkhâwn vâk vêl a tuihal zêl ang hian tui ral vek sela, Khaw êng hmu pha lo tûra hmeichhe nauchhiat ang lo ni rawh se.

⁹In bêlte chuan hling buk kâng lum a hriat hmâ pawhin Ani chuan thâwngaleivir lâk ang maiin a la bo daih ang, A hrin lai leh thinurna meia a alh chhuah lai reng pawhin.

¹⁰Phuba lâkna lo thleng chu a hmuhin mi dik chu a lâwm ang a; Mi sual thisenin a kê a la sil ang.

¹¹Tichuan miten, “Mi dik tân chuan lâwmman a lo awm tak tak a; Leiah hian rorêltu Pathian a lo awm tak zet a nih hi,” an ti ang.

BUNG 59

TANPUITU NEI LO TÂNĀ TANPUINA

¹Aw ka Pathian, ka hmêlmâte lakah mi chhan chhuak la, Mi dotute lakah mi humhim ang che.

²Thil sual titute lakah mi chhan chhuak la, Thisen chhuah hmangte lakah mi chhandam ang che.

³Ngai teh, mi thah tumin min châng rû a, Mi chakte chu mi bei tûrin an pung khâwm a, Aw LALPA, ka bawhchhiat leh ka sual vâng a ni lo.

⁴Ka tihsual ni lovah pawh an tlân vêl a, min bei tûrin an inbuatsaih a. En teh, mi tanpui tûrin intiharh thuai ta che!

⁵Aw LALPA, sipaihote Pathian, Israelho Pathian i ni a, Hnam tinte chu thunun tûrin lo tho la, Bawhchhetu mi sualte chu lainat suh ang che.

⁶Tlai lamah an lo kîr leh a, Ui ang maiin an ngur a, Khawpui chu an vêl thur thur a.

⁷Ngai teh, an kâin an irh chhuak a; Khandaihte an pet kawh hlawm a, “Tu nge hria le?” an ti a.

⁸Mahse, âw LALPA, anni chu nuihsan ang che, Hnam tin chu i nuihzabûr mai an ni si a.

⁹Ama chakna i nih avângin ka nghâk reng ang che; Pathian chu ka himna a ni si a. ¹⁰Mi khawngaihtu Pathian chuan mi hmuak ang a; Pathianin ka hmêlmâte chungka ka duhtusâm thleng lai mi hmuhtîr ang.

¹¹Anni chu that suh, chuti lo zawng ka miten an theihngihl dah ang e; Aw LALPA, kan phâw i ni a, I thiltihtheihnain tidarh la, Paih thla dêr ang che.

¹²An kamchhuak sualna leh an hmûia thu chhuak avângin An chapona ngei chuan man rawh se; Ânhche lawh leh dâwt sawi an chin êm avâng pawhin.

¹³Anniho chu thinur takin tiboral la, Awm tawh lo tûrin tiboral ang che; Kâwlkil thleng pawhin Jakob-ho zingah Pathianin ro a rêl tih hre hlawm rawh se.

¹⁴Tlai lamah chuan lo kîr leh sela, Ui ang maiin ngur chhur chhur sela, Khawpui chu vêl vêl rawh se.

¹⁵Tichuan, ei tûr zawngin an vâk an vâk a, An tlai khawp an hmuh loh leh an û chuah chuah mai a ni.

¹⁶Kei erawh chuan i chakzia hlân ka sa ang a; Ni e, zingah chuan i ngilneihzia ring takin ka sâ ang; Nang chu ka himna i ni si a, Ka mangan laia ka inhumhimna chu. ¹⁷Aw ka Chaknâ, nangmah fakin ka zai ang; Pathian chu ka inhumhimna a ni, Ka Pathian, ngilneia ngei chu.

BUNG 60

TANPUI TÛRA DÎLNA

¹Aw Pathian, nangin min thlauthlâa; Mi tichhe ta dêr a; I lung a âwi baw si lo va; Min tung ding leh hrâm ang che âw!

²Lei hi i tikhûr a; i tikhi zo va; A khûr reng a, a kakte hi tiphui leh ang che.

³I mite hi thil khirh tak tak i entîr a; Buaina uain te min intîr a.

⁴Nangmah țintute chu puanzâr i pe ta a, Thutak avânga an zâr theihna tûrin.

⁵I duh laite hi chhan chhuah an nih theih nân I kut ding lamin chhandam la, min chhâng ang che.

⁶Pathianin a thianghlimnain tihian a sawi a: “Ka lâwm ang a; Sekem khua chu ka țin ang a, Sukoth ruam chu ka teh chhuak baw ang.

⁷Gilead ram chu ka tâ a ni a, Manase ram pawh ka tâ a ni; Ephraim ram pawh ka lû atân thîr lukhum a ni a; Juda ram chu ka dân petu a ni.

⁸Moab ram chu ka insilna bêl a ni a; Edom chungah ka pheikhawk ka paih ang; Keimah avângin Philistia chungah hnehna âu âu ka chhuah ang.”

⁹Khawpui nghet takah chuan tûin nge mi hruai lût ang? Edom ramah tûin nge mi hruai ang?

¹⁰Aw Pathian, min thlauhthlatu, nangmah ngei hi i ni lo vem ni? Aw Pathian, kan sipai rualte zînga tel ve ta lo chu nangmah hi i ni lo vem ni?

¹¹Mangan laiin mi tanpui ang che, Mihring tanpuina chu engmah lo mai a ni si a.

¹²Pathian zârah huai takin kan bei ang, Ani chu kan hmêlmâte rap bettu tûr a ni si a.

BUNG 61

PATHIANA HIMNA

¹Aw Pathian, ka âu âu hi lo hria la; Ka dîlna hi lo ngaithlâ ang che.

²Ka thinlung a chauh lai hian Kâwlkil aţangin ka ko vang che; Kei aia sâng zâwk lungpuiah chuan mi hruai ang che.

³Nang chu ka tân himna i ni si a, Hmêlmâte laka ka invênna kulhpui chu.

⁴I puan inah chuan kumkhuain ka awm ang a; I thlazâr hnuaiah chuan ka tlu lût ang.

⁵Aw Pathian, nang chuan ka thutiamte i ngaithlâ a; I hming tîhtute rochan chu mi pê a.

⁶Lal dam chhûng hi tihseisak la, A kum pawh chhuan tam tak daih ni rawh se.

⁷Pathian hmâah kumkhuain a awm ang a, Aw, amah humhim nân ngilneihna leh thutak buatsaih ang che!

⁸Tichuan, ka thutiamte chu ni tin ka hlena Kumkhuaa i hming faka ka zai theih nân.

BUNG 62

PATHIAN NGHAIH VENG VENG

¹Pathian chu ka nghâk fan fan a; Ka chhandamna hi amah aţanga lo awm a ni si a.

²Amah chauh chu ka lungpui leh mi chhandamtu a ni; Ka inhumhimna a ni a; Nasa takin ka nghîng lo vang.

³Eng chen nge mi pakhat in beihrawn dâwn le? Nangni kha, pal tlu tûr leh bang tlu âwn tawh anga Tihtlûk vek in ni zâwk ang.

⁴A dinhmun sâng aţanga paih thlâk tum ringawtin an inrâwn khâwm a; Dâwt sawi hi an lawm zâwng a ni. An kâin mal an sâwm a, Mahse, an rilrûin ânehhia an lawh si a.

⁵Ka nunna, Pathian chauh nghâk fan fan rawh; Amah chauh chu ka beiseina a ni si a.

⁶Amah chauh chu ka lungpui leh ka chhandamna a ni; Ka himna kulhpui a ni a; Chuvângin ka nghîng lo vang.

⁷Pathianah chuan ka chhandamna leh ka ropuina a awm a; Ka chakna lungpui leh ka inhumhimna chu Pathianah a awm.

⁸Nangni mipuite u, eng lai pawhin amah chu ring ula; A hmâah chuan in thinlung chu leih baw rawh u; Pathian chu kan tân inhumhimna a ni.

⁹Mi hnuaiahnungte hi tuihû mai an ni a, Milianhote pawh hi dâwt mai an ni; Bûknaah chuan bûk ni ta se, Tuihû aiin an zâng zâwk ang.

¹⁰Inhnehchhiaahna hi inngah nân hmang suh, Mi thil chhuhsak sâ pawh hlâwkpuin nân hman tum hek suh. Hausakna pawh lo pung se, In rilru ngah nân hmang suh u.

¹¹Pathianin vawi khat a sawi a, Hê thû hi vawi hnih ka hre ta: Thiltihtheihna hi Pathian tâ a ni.

¹²Aw LALPA, zahngaihna pawh i tâ bawka a ni; Mi tin an thiltih ang zêlin i rûl si a.

BUNG 63

PATHIAN CHÂKA TUIHÂLNA

¹Aw Pathian, ka Pathian i ni a; Zîng takah ka zawng ţhin ang che; Ka nunna hi nangmah ngaiin a tuihâl a; Ram ro leh lei châr, Tui awm lohna hmuna awm ka nih avângin Ka tîsa pawh hian a ngai che a ni.

²I thiltihtheihna leh i ropuina hmu tûra Hmun thianghlimah pawh ka zawn che kha.

³I ngilneihna hi nunna aiin a ţha zâwk a, Chuvângin, ka hmûi hian a fak ang che.

⁴Tichuan, ka dam chhûng zawngin ka fak ang che a; I hmingin ka kut ka phar chhuak ang.

⁵Ka nun hi thlîng leh thâuva châwm angin a tlai ang a; Ka hmûi leh kâ hian hlim takin a fak bawka ang che;

⁶Khum laizâwlah ka hre reng che a, Zânkhaw tairêk thlengin ka ngaihtuah ţhin che asin.

⁷Nang chu mi tanpuitu i nih avângin I thlazâr hnuaiah chuan hlim takin ka awm ang.

⁸I kut dîng lamin mi chelh reng a; Ka nun hian hnai takah a zui zêl ang che.

⁹Mi tihhlum tuma mi zawngtute chu, Lei hnuaia thûk zâwkah an lût thla daih ang.

¹⁰Khandaiha sah thlûkin an awm ang a, Sihalte ei tûr chaw mai an ni tawh ang.

¹¹Lal erawh chu Pathianah a hlim ang a: Amah chhâla chhechham apiang chuan an chawimâwi ang; Dâwt sawi hmangte kâ erawh chu an la hupsak dâwn a ni.

BUNG 64

PATHIAN VÊNHIM DÎLNA

¹Aw Pathian, ka mangang au âu hi lo ngaithlâ la; Hmêlmâte rîkrâpna lakah ka nunna humhim ang che.

²Mi سوال phiarrûkna lakah mi thukrû ang che, Thil سوال tia inhâwr khâwmhote lakah chuan.

³Chûng mite chuan an leite chu khandaih angin an tât hriam a, An thal hmâwra thu khâ chuan mite kâp tûrin an tin reng a,

⁴A rûka mi pawî sawî lote an lo kah theihna tûrin; Tichuan an kâp thut a, pawisak pawh an nei lo.

⁵Thil sual ti tûrin an infuih a; A rûka thang kam dân an sawi hova; “Tu nge hmu chuang ang?” an ti thîn.

⁶Sualna kawng an dap chhuak thîn a; “Kan ruahman fel ta e,” an ti a. Mihring chhûng lam ngaihtuahna leh thînlung hi a thûk hlê si a.

⁷Mahse, Pathianin anniho chu thalin a kâp ang a; Hliam pui an tuar thut zâwk ang.

⁸An tawngka chhuakah ngei chuan an la inchhuih thlû ang a; A hmu apiangte chuan an tlânsan ang.

⁹Mi zawng zawngin an hlâu ang; Pathian thiltih a nihzia an puang ang a; A hnathawh dân an hre thiam tawh dâwn si a.

¹⁰Mi dikte chu LALPA-ah an lâwm ang a, amah chu an ring tlat ang. Thînlung dik tak pute chuan an chawimâwi ang.

BUNG 65

PATHIAN ENKAWLNA THATZIA

¹Aw Pathian, Zion-ah chuan faknain a nghâk reng a che; Thutiam pawh i hnênah hlen a ni ang.

²Aw tawngtâina ngaithlatu, I hnênah mi zawng zawng an lo kal ang.

³Sualna hian mi hneh thîn a; Kan khawlohnate avâng hian Nang chuan tlanna i la siamsak dâwn a ni.

⁴I mi thlan chu malsâwm la, Nangma lamah hip ang che, Tichuan, i inah a chêng ve thei dâwn nia. I ina thil thâte chuan kan intitlai ang, I temple thianghlim thatna ngei chuan.

⁵Nang chuan diknaa tih thil mak tak tak hmangin mi chhâng ang, Aw, mi chhandamtu Pathian, Nang chu kâwlkila mi zawng zawngte, Tuifinriat hla taka awmte tân rin pui ber i ni si a;

⁶A chaknaa tlângte din nghettu chu Thiltihtheihnain a inthum a;

⁷Tuifinriat ri hum hum te, Tuipui fâwn inchhawk rî te leh, Mipui thawm ri mur mur tingâwi thupatu i ni.

⁸Kâwlkil tâwp rêta awmte pawhin i chhinchhiahna te chu an hlâu thîn a; Zîng leh tlâi lo thlengte chuan lâwmna a rawn thlen thîn.

⁹Lei hi i kan thîn a, tuiin i chawm a, Hausaknain i vûr thîn a ni; Pathian lui chu tuiin a khat reng a; Buh te an thar theih nân Lei hi i buatsaih si a.

¹⁰Leilet rih thlûrte chu hneh takin tuiin i chawm a; A thlûr pâwngte pawh i timuk a; Ruahtuiin i tinêm a, Thil tôte chu mal i sâwm thîn.

¹¹Kumtluanin i thatnain i vûr a, I kalna kawng chu hausaknain a luang liam a.

¹²Thlâlêra hnim tona hmun te chu a duah hluah hluah a, Mualte pawh kil tinah a hring dup a.

¹³Ran tlatna hmunte chu ran rualin a dâpin an dâp a; Ruamah te pawh buh a tlim hmur a; Hlimin an âu va, hlâ an sa bawk a.

BUNG 66

PATHIAN MALSÂWMNA AVÂNGA LÂWMTHÛ

¹Leilung zawng zawngte u, Pathian hnênah hlim takin âu rawh u!

²A hming ropuina chu hlân châwi ula; Ropui takin chawimâwi rawh u.

³Pathian hnênah, “I thiltihte chu a va râpthlak êm! I thiltihtheihna a nasat êm avângin I hmêlmâte chu i hnênah an tlu lût ang.

⁴Leilunga mi zawng zawngin chibai an bûk ang che a, Nangmah fakin an zâi ang; I hming fakin an zâi zêl ang,” ti rawh u.

⁵Hawh u, Pathian thiltihte hi i en ang u; Mihring fate tâna a thiltihte hi a mak a nia.

⁶Ani chuan tuipui chu lei rovah a chantîr a; Luipuiah chuan kên an kal kâi a: Chutah chuan ama zârah kan hlim ang.

⁷A thiltihtheihnain kumkhuain ro a rêl a; A mitin hnam tin a thlîr thîn; Helhmangte chu inluling hauh suh se.

⁸Aw, mi tinte u, kan Pathian chu fak rawh u! Amah fakna ri chu hriat tham ni rawh se;

⁹Ani chuan minungte zîngah min telh zêl a, Kan inchhuih thlûk pawh a phal lo.

¹⁰Aw Pathian, nangin min fiah a; Tangkaraw fiah angin mi fiah ta a.

¹¹Nangin lénin mi âwk a; Kan kovah phurrit min phurhtîr a.

¹²Kan lu chungah mite i chuantîr a, Mei leh tui lian kan pal tlang a; Mahse hlawhtlinna hmunah min hruai chhuak a lo ni hlahu si a.

¹³Chuvângin, hâlrâl thilhlante nêen i inah ka lût ang a; Ka thutiamte chu i lakah ka hlen ang,

¹⁴Chû chu ka hmûiin a sawi chhuak tawh a, Ka mangan laiin ka kâ ngeiin a lo puang chhuak tawh si a.

¹⁵Hâlrâl thilhlân atân i hnênah ran thâu thâ thâ ka hlân ang a, Berâmpa hâl rimtui nêen; Bâwngpa leh kêlte nêen ka hlân ang.

¹⁶Pathian tîhtu zawng zawngte u, lo kal ula, ngaithla rawh u, Ka tâna thil mi tihsak hi ka lo hriattîr ang che u.

¹⁷Amah chu ka kâin ka âu va, Ka lei ngei hian chawimâwi a ni si a.

¹⁸Ka thînlung hian sual lam a ngainat chhûng chuan LALPAN mi ngaithla tawp lo vang;

¹⁹Mahse Pathianin mi ngaithla tak tak a; Tawngtâia ka âu âw pawh a lo ngaihsak thîn a ni.

²⁰Ka dîlna min lo hnar ngai lo va, A zahngaihna pawh a chuai chuang lo; Pathian chu fakin awm rawh se!

BUNG 67

LÂWMTHU SAWINA

¹Pathianin min khawngaihin mal min sâwm sela, A hmêlin min rawn ên rawh se;

²Tichuan, lei chungah hian i kawng chu hriat theih a lo ni ang a, I chhandamna pawh hnam tinrêng zînga hriattîr a nih theih nân.

³Aw Pathian, mi tinin fak che rawh se; Mi tinrêngte chuan fak mawlh mawlh che rawh se.

⁴Aw, hnam tin chu lâwm sela, hlimin zai rawh se! Nang chuan fel takin mi tinte ro i rêlsak ang a, Leia hnamte chu i awp vek dâwn si a.

⁵Aw Pathian, mipuiten fak che sela; Mi tinrêngte chuan fak mawlh mawlh che rawh se,

⁶Lei hian rah a chhuah țeuh ang a; Pathian, kan Pathian ngei chuan mal min sâwm ang.

⁷Pathianin mal min sâwm ang a; Lei mihring zawng zawngte hian amah chu an țih dêk ang.

BUNG 68

HNEHNA HLA

¹Pathian chu lo tho sela, A hmêlmâte rawn hnawt darh sela; Amah hawtute pawh chu a hmâ ata tlânchhe rawh se.

²Mei khû zâm ral ang hian, Chûng mite chu lên bo vek ang che; Meiah sathâu khâwnvâr a tuiral angin Mi sualte chu Pathian hmâah boral rawh se.

³Mi dikte erawh chu lâwm sela; Pathian hmâah hlim bawh rawh se; Ni e, nasa takin hlim rawh se.

⁴Pathian fakin zai ula, a hming fakna hla sa rawh u; Chhûm chungah chuanga chu châwimâwi ula, YAH-a hming ngeiin A hmâah chuan hlim rawh u.

⁵Pa nei lote tân Pa, hmeithâte thlavâng hauhsaktu, Pathian chu a hmun thianghlimah chuan a awm si a.

⁶Mahni chauhva awmte chu Pathianin chhûngkua a pe țin a; Phuara awmte chu hamțhatna hmunah a hruai chhuak țin; Helhmangte erawh chu ram rovah an awm țin.

⁷Aw Pathian, i mite hma hruaia i lo chhuaha Thlalêra i kal tlang lai khân. Selah:

⁸Lei a ngîng dur dur a; Pathian hmâah vânin ruah a sûtîr a; Sinai tlang pawh Pathian hmâah, Israel-ho Pathian hmâah a insâwi hlawk hlawk a nih kha.

⁹Aw Pathian, nang chuan ruah tam tak i sûtîr a, Chu chuan i rochan ram ro tak chu I tiduah thar leh ta.

¹⁰Tah chuan i miten awmhmun an khuar a; Aw Pathian, mi retheiten i ținatna zâr an zo ta a ni.

¹¹LALPAN thû a pê a; Chanchin hriltu* pâwl lian tak an lo awm ta a:

¹²“Lalte leh sipaihote chu baklêngin an tlânchia a; Innghâk hmeichhiaten râlâlâk sum chu an sem a.

¹³Huang chhûnga berâm zîngah mu mahla, Tangkaruaa tuam ținuro thlâ ang mai i ni ang a, A thla hmâwr pawh rangkachak enga tuam ang mai chu.”

¹⁴Engkimttheian lalte a tihdarh lai chuan Zalmon tlanga vûr ang maiin a vâ a.

¹⁵Basan tlang chu Pathian tlang a ni a; Basan tlangah chuan tlang chhîp tam tak a awm.

¹⁶Nangni tlang chhîp zozâte u, engah nge itsikna mita in men reng le? Hei hi Pathianin chên a châk êm êmna tlang chu a ni asin; Ni e, hetah hian LALPA chu kumkhuain a chêng dâwn a ni.

¹⁷Pathian tawlailîr chu sîngnih a ni a, A sânga sâng tam tak a ni; LALPA chu Sinai tlanga a awm ang khân, Chûng zîngah chuan hmun thianghlimah a awm ta.

¹⁸Nang chu chung lamah i chho va, Saltânna chu salah i hruai a, Mihringte zîngah thilpêkte i dawng a, Helhmangte hnên ațang pawha LALPA Pathian chu an hnêna a chên theih nân.

¹⁹Lalpa chu fakin awm rawh se, Ni tin malsâwmnaa min vûrtu, Mîn chhandamtu Pathian ngei chu!

²⁰Kan Pathian chu chhandamtu Pathian a ni; Thihna ata chhan chhuahna pawh Lalpa PATHIAN tâ bawh a ni.

²¹Pathianin a hmêlmâte lû-ah hliam a tuartîr ang, Thil sual tilui zêltu lu buk lûah ngei chuan.

²²LALPA chuan, “Basan ram ațangin ka hruai leh ang a, Tuipui thûk tak ata chu ka hruai kîr leh ang.

²³Tichuan, i kête chuan in hmêlmâte thisen a dâi bawrh bawrha, In uiten duh tâwka an lo liah theih nân,” a ti a.

²⁴Aw Pathian, i kal lai te an hmû a, Ka Pathian, ka Lalber, hmun thianghlima a kal lai chu.

²⁵Hla sa pawlten hmâ an hruai a, Tîngtang tum-hovin an zui a; An zîngah nula rualin kutkhuang an bêng ri ținep ținep țin.

²⁶Inkhâwmnahte chuan Pathian chu fak ula, Israelte tuikhur ațang chuan LALPA chu fak rawh u.

²⁷Hnam tîem Benjamin-hovin hmâ an hruai a, Juda mi lian tam takin an zui a, Jebulun leh Naphtali mi lianten an zui leh a.

²⁸I Pathian chuan i chakna chu a sawh nget a; Aw Pathian, kan tâna i lo tih tawh țin ang khân intichak zêl rawh.

²⁹Jerusalema i tempul avângin, Lalhoten thilpêk an rawn kensak ang che.

³⁰Phairuang zînga ramsate chu zilh la, Bâwngchal leh bâwng la rualte pawh, An tangkâte i hnêna an rawn pêk vek hmâ chuan Indo châk mite chu hnawt darh ang che.

³¹Aigupta ațangin mi liante an lo chhuak ang a; Ethiopia-hovin Pathian lamah bân an phar thuai tawh ang.

³²Khawvêl lalramte u, Pathian fakin zai ula; Aw, LALPA chu fakin zai rawh u,

³³Hmâsânga vân chung sânga chuang țin hnênah ngei chuan! Ngai teh, a âw a chhuah e, Aw ropui tak mai chu.

³⁴Pathian chu a chak a ni, ti rawh u; A ținatzia chu Israel-ho chungah a awm a, A chakna chu chhûmah te khian a awm a.

³⁵Aw Pathian, i hmun thianghlimte ai mahin i ținbaiawm lehual a ni. Israelte Pathian chu a mite hnêna chakna leh thiltihtheihna pe ținintu a ni. Pathian chu fakin awm rawh se!

BUNG 69

CHHAN CHHUAH DĪLNA

¹Min chhandam rawh, âw Pathian! Tuite chuan ka nghâwng thlenga mi chîm tâk hi.

²Chirhdûp thûk takah ka pil a, Rah chhan rêng rêng a awm si lo; Tui thûk takah ka pil ta a, Tui liante chuan mi vûr pil ta.

³Châu tak chungin ka âu ka âu va; Ka dang pawh a ro zo va; Ka Pathian ka nghah chhûngin ka mit a vâi zo ta.

⁴Chhan awm lova mi hawtute chu Ka lûa samzai ai hian an tam zâwk a; Mi tihboral tumtute chu mi chak an ni a, Chhan awm lovin mìn haw ringawt a; Engmah rûk ka ru lo chung pawhin Ka rulh leh tho a ngai si a.

⁵Aw Pathian, ka âtzia i hria e; Ka sualte hi i lakah thup a ni si lo.

⁶Aw LALPA, sipaihote PATHIAN, Nangmah nghâktute chu keimah avângin zak suh se; Aw, Israel-ho Pathian, Nangmah zawngtute chu keimah vângin tihmualpho ni suh se.

⁷Nangmah vângin sawi chhiat ka tâwk a, Men ngaihna pawh ka hre ta lo.

⁸Ka unaute lakah mikhual ang mai ka ni a, Ka pianpui unau ngeite tân pawh ram dang mi ang mai ka ni zo ta.

⁹I in tâna ka thahnemngaihna mi ei zo va; Nangmah an demna che chu ka chungah a lo tla ta.

¹⁰Tap chung leh chaw ngheia mahni ka inthunun lah chu Mite min demna lekah a chang si.

¹¹Saiip puan ka sin leh, Mî nuih tizâ mai ka ni bawk si a.

¹²Kulh kawngkâa thûte chuan min rêl a, Zungawlveite hlâ ka nih tâk hi.

¹³Mahse kei chu i hnênah ka tawngtai a, Aw LALPA, he hun lâwmawmah hian; Aw Pathian, lainatna i ngah êm avângin I chhandamna belhfâkawm tak chuan mi chhâng ang che.

¹⁴Chirhdûp ata mi chhan chhuak la, Mi pil botîr lul suh ang che; Mi hawtute lakah mi chhan la, Tui thûk tak ata mi chhan chhuak ang che.

¹⁵Tui lian chu mi len botîr suh la, Tui thûk takin mi lem pil suh se; Khur thûk* pawhin a kawng mi khar hnan suh se.

¹⁶Aw LALPA, mi chhâng ang che; i ngilneihna chu a tha si a; I lainatna nasa tak nên ka lam lo hawî ang che.

¹⁷I chhiahhlawh lakah hian i hmai thup suh la, Mangangin ka awm si a; Mi chhâng thuai ang che.

¹⁸Ka nun hirawn hnaih la, mi tlan chhuak ang che; Ka hmêlmâte avângin mi chhan him ang che.

¹⁹Mi mìn sawi chhiatna te, ka mualphona te leh ka zahzia nangin i hre vek a; Mi dotute pawh i hmâah an awm vek a.

²⁰Sawi chhiatna hian ka lung a tichhia a; Ka rilru a hah êm êm a; Mi lainattu tûr ka dap ruai ruai a, tûmah rêng an awm si lo; Mìn hnêmtu tûr ka zawng a, ka hmu si lo.

²¹Ka ei tûr âtn thil khâ mìn pê a, Ka tuihâl laiin uain thûr mìn pê a.

²²An dawhkân kîl lai chu thangah lo chang sela; An nawmsakna chu an tân mangkhâwng lo ni rawh se.

²³An mitin khua a hmuh theih loh nân tihthimin awm sela; An kâwngte chu khûr reng rawh se.

²⁴I thinurna chu an chungah leih bua la, I thinrimna chuan anni chu thâm bet tlat rawh se.

²⁵An chênna hmun chu tihram vek ni sela; An puan inahte chuan tûmah chêng suh se.

²⁶I thununa-te chu an lo tinawmna si a, I hliama-te tilungngai zâwngin an lo tawng khum a.

²⁷Chuvângin, an sualna chu sualna vêkin belh chhah la; I thatnaah chuan lo lût vê hek suh se.

²⁸Mi nungte lehkhabu atângin anni chu thâi bo daih ni sela, Mi dikte zînga ziah tel ni vê suh se. ²⁹Kei erawh chu mi rethei leh mi lungngai ka ni a; Aw Pathian, i chhandamna chuan mi châwi kâng daih rawh se.

³⁰Pathian hming chu hlân ka fak ang a, Lâwmthu sawiin amah chu ka châwimâwi ang.

³¹Kî leh tin nei bâwngchal te, bawngpa te aiin hei hian LALPA a tilâwm zâwk ang.

³²Mi inngaitlâwmten chû chu an hmu a, an lâwm thîn; Nangni Pathian zawngtute u, in thîlung chu a nung reng ang.

³³LALPAN pachhiate chu a ngaithla thîn a, Ama mi tângte chu a hmsit si lo.

³⁴Lei leh vânten amah chu fak rawh se, Tuifinriat leh a chhûnga chêng zawng zawngten fak rawh se.

³⁵Pathianin Zion chu a chhan chhuak ang a, Juda khuate chu a din leh ang; Chutah chuan an chên reng a, a neitu an nih theih nân.

³⁶A chhiahhlawhho thlahte pawh chuan an rochung zêl ang a, A hming ngainatute chu a chhûngah chuan an chêng reng ang.

BUNG 70

CHHAN CHHUAH DĪLNA

¹Aw Pathian, mi rawn chhan thuai teh! Aw LALPA, mi tanpui thuai ta che!

²Mi tihhlum tumtute chu Mualpho leh zak takin awm sela; Ka chhiatna zawngtute chu Baklêngin tlânchhe rawh se.

³“Chei! Chei! mi tikhumtute chu Zak êm êmin tlânchhe rawh se.

⁴Nangmah zawngtute erawh chu nangmahah hlim leh lâwm takin awm vek sela; I chhandamna ngainatute chuan “Pathian chu châwimâwiin awm rawh se,” ti reng mai rawh se.

⁵Kei erawh chu mi rethei leh pachhia ka ni a; Aw Pathian! mi rawn pui thuai ang che. Nang chu mi tanpuitu leh mi chhan chhuaktu i ni si a; Aw LALPA, rei rial suh ang che.

BUNG 71

TAR TÂNA ƧAWNGƧAINA

¹Aw LALPA, nangmahah ka rinna ka ngat tlat a; Mi timualpho ngai suh ang che.

²I Ƨhatnain mi chhan chhuak la, tlânchhuahna mi siamsak ang che; Ka lamah i bengrawn chhî la, mi chhandam ang che.

³Ka tân himna kulhpui ni la, Ka pan fo Ƨhin lo ni ang che; Nangin mi chhandam tûrin thû i pê a; Ka lungpui leh ka kulhpui i ni si a.

⁴Aw ka Pathian, mi sual kut ata mi chhan chhuak ang che, Mi dik lo leh mi nurâwng kut aƧang hian.

⁵Aw Lalpa PATHIAN, nang chu ka beiseina i ni a; Ka tleirâwl lai ata tawh ka inngahna i ni asin.

⁶Ka pian tîr aƧang rêngin nangin mi lo tung dîng a; Ka nu chhûl aƧanga mi la chhuaktu i ni a; Nang chu ka fak zêl ang che.

⁷Mi tam tak tân thil mak ang ka ni a; Nang erawh chu ka himna kulh nghe i ni.

⁸Ka Ƨawngka chhuak hi nangmah faknain khat sela, Nilêngin a châwimâwi dâwn che nia.

⁹Ka tar hunin mi thlauhthla suh la; Ka thâ a Ƨhum hunin mi kalsan suh ang che.

¹⁰Ka hmêlmâten min sawi chhe Ƨhin a; Mi thah tumtute chu an inhâwr khâwm bawh a,

¹¹“Pathianin a kalsan ta e; Ûm ula, man rawh u; chhantu tûr pawh an awm loh hi,” an ti a.

¹²Aw Pathian, mi hlat lul suh âw; Aw ka Pathian, mi rawn Ƨanpui vat ang che!

¹³Thah tuma mi beitate chu Mualpho taka tihboralin awm rawh se; Mi tihchhiat tumtute chu Hmuhsitna leh mualphonain tlâkbuak rawh se.

¹⁴Kei erawh chuan ka beisei tlat ang che a, Ka fak zual deuh deuh ang che.

¹⁵Ka Ƨawngka chhuak hian i Ƨhatzia a puang ang a, I chhandamna thû chu nilêngin a âupui bawh ang. A tamzia ka hre phâk si lo va.

¹⁶Lalpa PATHIAN chaknain ka kal zêl ang; Nangma dikna thû chauh ka sawi ang, Nangma dikna ngei chu.

¹⁷Aw Pathian, ka tleirâwl tîr ata mi lo zirtîr tawh a; Tûn thleng hian i thil mak tihte chu ka puang zêl Ƨhin.

¹⁸Tûna ka lo tara, ka lû a Ƨuah tâk hnû a, Tun lai Ƨhangtharte leh, lo la piang tûr zawng zawngte hnêna I chakna te, i thiltihtheihna te ka puan chhuah hmâ loh chuan, Aw Pathian, mi kalsan lul suh ang che.

¹⁹Aw Pathian, i dikna hi a sâng êm êm a; Nang, thil ropui tak tak ti Ƨhîntu, Aw Pathian, nangmah ang hi tu nge awm le?

²⁰Nang, hrehawmna leh manganthlâk thil mi hmuhtirtu chuan, Mi tuai thar lehin Lei thûk tak aƧang hian mi hruai chhuak leh ang che.

²¹Nangin ka ropuina mi tihpunsak leh la, Kil tinah mi thlamuan ang che,

²²Perhkhuanin ka fak bawh ang che, Aw ka Pathian, i rinawmna ka fak ang! Aw nang Israel-ho Mi Thianghlim, ƧingƧang nênzaiin ka fak ang che.

²³Nangmah faka ka zai hun chuan ka hmûi hi a va hlim dâwn êm! I tlan chhuah tawh ka nun hi a hlim lehzual ang.

²⁴Ka lei pawh hian nilêngin i dikna thû a sawi Ƨhin ang; Mi tihchhiat tumtute chu Tihmanganin an awm a, Tihmualphovin an awm ta.

BUNG 72

LAL TANA DÎLSAKNA

¹Aw Pathian, lah hnênah hian i rorêlnate chu pê la, I dikna chu lah fapa hnênah pê ang che.

²I mite chu diknain ro a rêlsak ang a, I mi retheite pawh dik takin ro a rêlsak dawn nia.

³Tlângte chuan mite hnênah thlamuanna an rawn thlen ang a, Mualten dikna an rawn thlen bawh ang.

⁴Ani chuan pachhiate tân rorêlna dik a rawn thlen ang; Rethei fate chu a chhandam ang a, Hnehchhiahtu erawh chu a chan sawm vek ang.

⁵Ni leh thlâten an daih chhûng chuan, Ƨhangthar lo chhuak zêlte hian An Ƨih zêl ang che.

⁶Ani chu hlobet ah chhûm hmâa ruah sûr angin a lo chhuk thlâ ang, Leilung châwmtu ruah sûr ang maiin.

⁷A hun lai chuan mi dikte chu an duah hluah hluah ang a, Thla êng khian a daih chen chen chu Thlamuanna nasa tak a awm ang.

⁸Ani chuan tuipui aƧanga tuipui lehlam thlengin, Luipui aƧanga kâwlkil tâwp thlengin lalna a chang ang.

⁹Thlalêra chêngte chu a hmâah an kûn ang a; A hmêlmâte erawh chuan vaivut an liak ang.

¹⁰Tarsis ram leh thliarkâra lalte chuan Thilpêk an rawn keng ang a; Sheba leh Seba ram lalte pawhin Thilpêkte an rawn hlân ang.

¹¹Ni e, a hmâah chuan lal zawng zawng an bawkkhup ang a; Hnam tinrêngin a rawng an bâwl ang.

¹²Retheiten an âu ang a, ani chuan a chhan chhuak ang, Pachhiate leh Ƨanpuitu nei lote pawh a chhan chhuak bawh ang.

¹³Mi rethei leh pachhiate chu a zuah ang a, Pachhiate nunna chu a chhandam ang.

¹⁴Hnehchhiahtu leh tharum thawhna lakah an nun a tlan chhuahsak ang a; An thisen chu a mithmuah-ah hlu tak a ni ang.

¹⁵Ani chu a nung reng ang a, Sheba ram rangkachak chu ama hnênah pêk a ni ang; ƧawngƧaina pawh ama hnênah a kal reng ang a, Ni tinin an châwimâwi ang.

¹⁶Leiah hian buh tam takin an thar ang a, Tlâng chung te chu a vûm thêr thûr ang; A rah bâwrte chu Lebanon angin a ngêng suau suau ang a, Khawpuia mite chu leia hlobet angin an duah hluah hluah ang.

¹⁷A hming chu kumkhuain a dâi tawh lo vang a; Nî a ên chhûng chuan a hming chu a awm zêl ang. Amahah chuan miten malsâwmna an dawng ang a; Hnam tinrêngin amah chu fak tlâk an ti ang.

¹⁸Israelte Pathian, LALPA Pathian chu fakin awm rawh se, Amah chauh chu thilmak titu a ni si a!

¹⁹A hming ropui chu kumkhuain fakin awm sela; Lei pum pui hi a ropuinaa tihkhah ni rawh se. Amen, Amen.

²⁰Jesaia fapa Davida ãawngtãinate chu a tâwp ta.

BUNG 73

BU III - MISUALTE VANNEIHNA AVANGA HARSATNA

¹Pathian chu Israelte chungah a va ãha êm, Thinlunga thianghlim takte chungah chuan.

²Kei erawh chuan ka rap pelh lek lek a; Ka tawlh thlu mai dâwn alâwm le.

³Mi sualte vânnêihzia ka hmuh hian Mi chapote hi ka va thîk thîn tak êm.

⁴An thih pawhin an tuar na vê si lo va, An ngêlnghet viau bawk si a.

⁵Mi dangte angin harsatna pawh an nei lo va, Mi dangte angin engmah an tuar na ve bawk si lo.

⁶Chapona chu a awrhin an awrh a; Vaupûng an tinâin silhfen angin an inbel a.

⁷Mit pâwng hlut khawpin an in-ei thâu va; Duhthusâm phâk bâkin an neinung a.

⁸Mi diriama nuihsawh chungin tham lo takin an ãawng khum a; Chapo takin an ãawng thîn.

⁹An ãawngkâ chuan vâ a nêk hial a, An ãawngkâ ringawt pawhin leilung a hrût chhuak vek a ni.

¹⁰Chuvângin a mite chu chutah chuan an kîr leh a, Nova khat tui chu an in fai kêlh a.

¹¹“Pathianin engtin nge a hriat ang? Chungnungberan a lo hria ang mâw?” an ti a.

¹²En teh, hêng mite hi Pathian ngaihsak lote an nih hi, Engto nei lovin an khawsa a, An hausa thûr thûr lawi si.

¹³A thlâwn maiin thinlung ka lo invawng thianghlim a, Pawi khawih lovin kut ka lo sil ve tawh si a.

¹⁴Nilêng lêngin ka tuar tlawk tlawk thîn a, A tûkin tuarna bawk a rawn thlen leh thîn.

¹⁵“Chutiang chuan ka sawi ang,” ti ta îla; Ngai teh, i fa, tûnlai ãhangtharte chungah dik lo taka ti ka ni dâwn bawk si.

¹⁶Pawm thiam dân kawng ka han ngaihtuah hian Ka tân a na lutuk a ni.

¹⁷Mahse, Pathian hmun thianghlima ka va luh hnû chuan Chûngho tâwp dân tûr chu ka hre thiam ta.

¹⁸Boralna hmun a hnâwl thlâk atân Hmun nâl takah i dah an lo ni reng a.

¹⁹I hi, an tlaran leh ta dêr mai, mit khap kâr chhûng lekin maw! Chhiatna râpthlâkin a ei zo leh ta dêr mai.

²⁰Harh chhuah hnûa mumang ral leh ta mai thîn angin, Aw LALPA, i harh hun chuan, I tân hlimthla hmusitawm mai an la ni dâwn si a.

²¹Chuvângin, ka rilrû a lungngai a, Ka ngaihtuahna pawh a buai a ni.

²²Hriatna nei lo mi mâwl ka ni a; I lakah chuan ramsa ang lek ka ni si a.

²³Mahse i hnênah ka awm reng a; Ka kut ding lam i lo chelh thîn.

²⁴Nangin i remruatnain mi hrui ang a, Chu mi hnûah chuan ropuinaah khian mi lâwm lût ang.

²⁵Vânah khian nang lo chu tu nge ka neih? Leiah pawh hian nang aia ka duh tûr tû dang mah an awm lo.

²⁶Ka tîsâ leh ka thinlung a châu ta; Nimahsela, Pathian chu kumkhuaa ka thinlung chakna leh ka chanvo a ni.

²⁷Nangmah hlata awmte chu an la boral ngei dâwn a ni; Nangmah uirêsantute pawh i tihboral vek tawh kha.

²⁸Keia tân zawng Pathian hnaih hi a ãha a ni; I thiltih zawng zawng ka puan theih nân, Lalpa PATHIAN-ah chuan ka rinna ka ngat tlat a.

BUNG 74

PATHIAN MITE CHHAN TÛRA DÎLNA

¹Aw Pathian, engati nge hei leh chen mi hnâwl tâk le? Engati nge i ran tlatna hmun berâmte chungah i thinurna mei a khûk reng?

²I mi pungkâwmhote, hmâsânga i lei tawh, I rochun tûr hnam, i tlan sâte hi I chênna thîn hê Zion tlâng nên hian han hre reng ang che.

³Khaw ram chhe dêr tawh chu rawn fang leh la, Hmêlmâten hmun thianghlima thil engkim an tihchhiat tawh hi.

⁴I mite inkhâwmna hmunah i hmêlmâte an âu dur dur a; Anmahni chhinchhiahnate an târ thliah thluah a.

⁵Ram ngaw vât tûr ang maiin, Hreipui an lek iaih uaih hlawm a.

⁶Wawi leh khatah, thil ker mâwi zawng zawng chu Hrei leh tubohvin an chhu chhe vek a.

⁷I hmun thianghlim chu an hâl chhia a; I hming awmna pawh an tibawhlhlawh zo ta.

⁸An rilrûin, “I tichhe vek ang u,” an ti a. Ram chhûnga Pathian biakna hmun zawng zawng an hâl chhe zo ta.

⁹Kan chhinchhiahnate pawh kan hmu zo ta lo; Zâwlnei tûmah an awm bawk si lo va; A rei chin hria rêng an awm lo ve.

¹⁰Aw Pathian, hmêlmâ chuan eng chen nge a sawi chhiat dâwn che? Hmêlmâ chuan i hming a sawi chhe kumkhua mai dawn êm ni?

¹¹Engati nge i kut, i kut ding lam leh zêl i lakkîr tâk? Rawn vilik chhuak leh la, anni chu tiboral ta che.

¹²Pathian chu hmâsâng ata ka Lal a ni a, Leiah hian chhandamna arawn thlen si a.

¹³Nangin i chaknain tuipui kha i tiñhen a; Tuipui chhûnga rûlpuiho lûte chu i vaw keh a.

¹⁴Nang chuan Leviathan lûte chu i vaw sawm vek a, Thlalêra mi chêngte chaw atân i pê a.

¹⁵Nang chuan tuikhur leh tui lian hnâr i sah hawnsak a; Luipui tuite pawh i tikangchat a.

¹⁶Chhûn hi i tâ a ni a, zân pawh i tâ bawh a ni a; A êntu atân ni khi i siam a.

¹⁷Leilung tân ramrî i kamsak vek a; Nipui leh thlasik te i siam a.

¹⁸Aw LALPA, hmêlmâten an sawi chhiatzia che hi hre reng ang che, Hnam mâwlhoten i hming an sawi chhiat tâk hi.

¹⁹Aw, i thûro nunna hi ram sakawlh te hnênah chuan pe lul suh la; I mi rethei tak takte nunna hi theihngihl hlen lo vang che.

²⁰I thuthlung kha ngai pawimawh zêl la; Lei hmun thim lai apiangah nun râwnna hlîr a khah tâk hi.

²¹Rahbeha awmte chu mualphovin kîrtîr lul suh ang che! Rethei leh pachhiate chuan i hming fak mawlh che rawh se.

²²Aw Pathian, tho la, i thû hi rawn din chhuahpui teh, Mi â-ten nilêng-lênga an dêu thinzia che hi hre reng ang che.

²³I hmêlmâte thâwm rî pawh theihngihl suh la; Nangma laka helho thawm rî a ring tual tual si a.

BUNG 75

MISUAL CHUNGA PATHIAN RORÊL

¹Aw Pathian, lâwmthû kan hrilh che a; lâwmthû kan hlân a che! Thilmak tak tak i tihte hian i hming a hnai tih an hriattîr thîn a ni.

²Hun dik tak ka ruat hunah Dik takin ro ka rêl ang.

³Lei leh a chhûnga chêng zawng zawngte chu an tuirol zo va; A bante chu nghet takin ka phun a.

⁴Mi inlulingte hnênah chuan, “Intivei suh u,” ka ti a; Mi sualte hnênah, “In kî kha vilik suh u.

⁵In kî kha chung lamah lek sâng hek suh ula; Chapo takin tawng mai mai suh u,” ka ti bawh a.

⁶Châwisânna chu chhak lam ațangin emaw, Thlang lam emaw, chhim lam emaw ațanga lo kal a ni lo.

⁷Pathian chu rorêltu a ni zâwk: Ani chuan pakhat a tihniam a, Pakhat a châwi sâng thîn.

⁸LALPA kutah chuan no a awm si a, Uain chu a sen a; A inchawhpawlh vek hnûah a bun chhuak a; A mawng nâwite nêl lam lei chung a Mi suaksual zawng zawngten an in fâi kêl ang.

⁹Kei chu Jakoba Pathian fakin ka zai ang a, Kumkhuain ka puang zêl ang.

¹⁰Mi sualte kî zawng zawng chu ka tan bûl vek ang a; Mi dikte kî erawh chu châwisânin a awm ang.

BUNG 76

PATHIAN THILTIHTHEIHNAIN A HNEH

¹Judai ram chuan Pathian an hria a; Israel ramah a hming a ropui a.

²Salem-ah chuan a bâwktê chu a awm a, A chênna hmun chu Zion a ni.

³Chutah chuan thalte chu a tichhia a, Indona phâw leh khandaihte nêl.

⁴Nang chu indona tlângte ai chuan i ropuiin i mâwi chuang e.

⁵Pasalthâte chuan rawk an tâwk a; An mû chu an muhil hlen ta a; Mi chak tuma’n kut an lek kâng thei ta lo.

⁶Aw Jakoba Pathian, i zilhauhna avângin Tawlailîr leh sakawr te pawh an thal dêr mai.

⁷Nang zawng i lo hlauhawm ngei e; I thin a rim tawh chuan, I hmâah tu nge dîng thei ang le?

⁸I rorêlna thû vân ațanga i rawn hriattîr tawh hi chuan, Lei hi hlauvin a ngâwi t̃huap thîn.

⁹Leia rahbeha awmte chhan chhuak a, An ro rêlsak tûra Pathian a lo thawh chhuah lai khân.

¹⁰Mihring thinur chuan a fak ang che a; I thinur hrîkthlâk bângte chu i tâiah i la hrêng ang.

¹¹LALPA in Pathian hnênah thû tiam ula, hlen bawh rawh u; A vêla mi zawng zawngte chuan T̃ih tûra hnênah hian an thilpêkte chu rawn hlân rawh se.

¹²Ani chuan rorêltute chapona chu a chhu chat ang; Leia lalte tân ani chu a hlauhawm si a.

BUNG 77

MANGAN LAIA THLAMUANNA

¹Ka âwin Pathian chu ka âu va; Ka aw ngeiin Pathian chu ka âu va, Tichuan, ani’n mi lo ngaithla ta a.

²Ka mangan ni chuan Lalpa chu ka zawng a; Zânah chuan ka bân hi thlah lovin ka phar reng thîn a, Ka nun hian thlamuan pawh a duh ngai lo.

³Pathian ka ngaihtuah hian ka mangang a; Ka vui deuh lahin ka thlaraubin a chauh phah bawh si a.

⁴Ka mit i timeng reng a; Tawng nachâng hre lo khawpin ka mangang thîn.

⁵Hmânlai hunte ka dâwn kîr a, Hmâsâng hun kal tawhte kha.

⁶Zânah hian ka hlâte hi ka chhût neuh neuh va, Ka lungrûkah ka dâwn vêl a, Ka thlarau pawhin thahnemngai takin a zawng a.

⁷Lalpa hian min thlauhthla hlen dâwn êm ni âw? A lâwm lo hlen mai dâwn em ni le?

⁸A zahngaihna chu a tâwp ta mai em ni? A thutiam chu a hlawhchham kumkhua mai dâwn em le?

⁹Pathian chuan khawngaihna a mangngihl ta em ni? Thinurin a lainatnate chu a khâr ta êm ni le?

¹⁰“Hei hian mi tilungngai a; Mahse, Chungnungbera kut ding lam kumte chu ka hre reng ang,” ka ti a.

¹¹LALPA hnathawhte kha ka hre reng ang a, Hmâsânga i thilmak tihte pawh ka theihnghilh lo vang.

¹²I hnathawh zawng zawng ka chhût lét ang a, I thiltihte pawh ka sawi chhâwng thîn ang.

¹³Aw Pathian, i kawng chu hmun thianghlimah a awm a; Kan Pathian ang êm êma ropui hi Pathian dang tu nge awm?

¹⁴Nang chu thilmak ti thîntu Pathian i ni a, Mite hnênah i chakzia i hriattîr thîn.

¹⁵I mite, Jakoba leh Josefa fate chu I bânin i tlan chhuak ta a.

¹⁶Aw Pathian, tuite chuan an hmû che a; Tuiten an hmuh che chuan an hlâu va; Tui thûk takte pawh hlâuvîn an khûr bawh a.

¹⁷Chhûmte khian ruah an sûtîr a; Vîn khi a ri dur dur a; I thal lêngte pawh a phe zawk zawk a.

¹⁸I khawpui ri thâwm chu thâwngaleivir chhûnghah a awm a; Kawlpêhte chuan khawvêl hi a dêt zawr zawr a; Lei hi a ngingh a, a khûr dur dur a.

¹⁹I kalkawng chu tuifinriatah a awm a, I kalna kawngte chu tuipui zauvah a awm bawh a, I hniakte erawh chu hmuh theih rual a ni lo.

²⁰Mosia leh Arona te kutin I mite chu berâm rual angin i hruai thîn.

BUNG 78

ISRAEL CHANCHIN AṬANGA ZIR TÛR

¹Aw ka mite u, ka dân thû hi ngaichâng ula; Ka ṭawngka chhuakah in beng lo chhi rawh u.

²Tehkhin thûin ka kâ ka âng ang a; Hmâsâng thu rilte ka puang chhuak dân a ni.

³Chûng chu kan hriata kan ngaihthlâk tawh, Kan pute min lo hrilh thîn kha a ni.

⁴An fate lakah kan zêp lo vang a, Ṭhangthar lo la awm turte hnênah LALPA fakawmzia te, A chakzia leh a thil mak tihte chu kan hril zawk ang.

⁵Jakob-ho tân hriattîrna a tihnghehsak a, Israel ramah dân thû a pê a, An fate hnêna an hlan chhâwn zêl theih nân Mîn thlahtute chu zâwm tûrin thû a pê a.

⁶Ṭhangthar lo la awm turten an lo hriata, Nau lo la piang tûrte pawhin an hriata, Chûngte chu lo thovin, an fate an la hrilh chhâwn zêl tûr thû a ni a,

⁷Pathiana beiseina an nghah theih nân te, Pathian thiltihte an theihnghilh lohva, A thupêkte an zawm zêl theih nân;

⁸An thlahtute an chhun lohva, Chhuan luhlul leh hel hmang ni ve lo va, Chhuan thinlung dik lo pu mi pawh ni bawh lova, Pathian tâna rilru rinawm lo pu an nih hek loh nân a ni.

⁹Ephraima thlah râlthuama inthuum, thalngul kengho chu, Indo nî chuan an tlânchhe ta si a.

¹⁰Pathian thuthlung chu an zâwm lo va; A dân angin an nung duh bawh si lo.

¹¹A thiltihte chu an theihnghilh a, A thil mak tih a entîr ngeite pawh an hre reng lo.

¹²An thlahtute mithmuhah thil mak takte a ti thîn a, Aigupta rama Zoan phaizâwlah khân.

¹³Tuipui chu a tiṭhen phawk a, anni chu a kal kaitîr a; Tuite chu thil intiang vûm thûr angin a dintîr luah a.

¹⁴Chhûnah chuan chhûmin a hruai a. Zanah mei êngin zan khuain a hruai thîn a.

¹⁵Thlalêrah chuan lungpuite a tiphel a, Tui thûka tui ang maiin hnianghnâra in tûr tui a pê a.

¹⁶Lungpui aṭang chuan luite tui a luantîr a, Luipui ang maiin tui chu a luan thlâktîr a.

¹⁷Chuti chung pawh chuan amah do zâwngin an sual deuh deuh zâwk a, Thlalêrah khân Chungnungbera lakah an hel ta a.

¹⁸An ei chhâk zâwng tak dîlin An thinlungin Pathian an fiah a.

¹⁹Ni e, Pathian an sawi chhia a: “Thlalêrah hian Pathianin ruai a ṭheh thei emaw chu?” an ti a.

²⁰Ngai teh, lungpui chu a vua a, Tui te chu a rawn inkhawh chhuak zur zur a, Lui chuan a kuang a luang liam dîl dîl mai a ni. “Châw pawh a pe thei dân em ni? A mite hi sâ mîn hlui thei emaw chu?” an ti leh zêl a.

²¹LALPAN a lo hriat chuan a thinur a; Jakob-ho lakah mei a lo alh ta a, Israel-ho chungah pawh a thinurna a sosâng ta a;

²²Pathian an rin loh va, A chhandamna pawh an rin loh avângin.

²³Chuti chung chuan chung lama chhûmte chu thû a pê a, Vîn kawngkhârte a hawnsak a;

²⁴An ei atân manna chu a sûtîr a, Vîn lam châwin a hrai ta a.

²⁵Mihrinten Vântirhkoh chaw an ei a: Hnianghnâra ei tham chaw a pê a.

²⁶Khawchhak thlî chu vânah a tlehtîr a; A thiltitheihnain chhim thlî a hruai a.

²⁷Vaivut ang maiin sa ei tûr chu a sûrin a sûtîr a, Sava thla neite chu tuifinriat ṭiauvut ang maiin an tam a;

²⁸An riahhmunah chuan a ṭumtîr a, An awmna tual vêl zawng zawngah te chuan.

²⁹Tichuan, êl euhvin, puar takin an ei a; An ei chhâk tak chu a pe ta a.

³⁰Amaherawhchu, châkna reh khawpin an ei kham hman lo, An sa ei te pawh an la ṭhial mêk laiin,

³¹Pathian thinurna chu an chungah a lo thleng thut a, An mi sanṭha deuh deuh te chu a tihlum a, Israel tlangvâl chhuanvâwr rualte chu a tihlum ta hlawm a.

³²Chuti chung pawhin an la sual ta deuh deuh a, A thil mak tihte chu an ring chuang lo.

³³Chuvângin, an dam chhûng nite chu engmah lovah a chansak a, Hlauthâwng rêng rêngin hun an hmang zo va.

³⁴Anmahni a tihlum apiangin amah chu an zawng thîn a, Inlamlêtin ṭahnemngai takin Pathian an zawng thîn.

³⁵Tichuan, Pathian chu an lungpui a ni tih an lo hre chhuak leh thîn a, Pathian Chungnungbera chu an tlantu a ni si a.

³⁶Nimahsela, amah chu an kân an fak der a, An leiin dâwt thû an hrilh thîn.

³⁷An thinlung chu a lakah a nghet si lo va, A thuthlungah pawh an rinawm hek lo.

³⁸Ani erawh chu lainatnaa khat a nih avângin an sual te a ngaidam a, A tiboral ta êm lo a ni. Ni e, a thinrimna chu wawi tam tak a inbengdai leh thîn a, A thinurna zawng zawng a chawk tho vek duh lo va.

³⁹Tîsâ vê mai an ni tih a hriatsak reng a, Thâw, lo lêt leh tawh lo tûra thâwk chhuah ang mai an ni si a.

⁴⁰Thlalêrah khân an va han tithinur zingin, Ram rovah khân lungngaiin an va siam zing tak êm!

⁴¹Ni e, wawi tam tak Pathian an fiah a, Israel Mi Thianghlima chu an timangang thîn a ni.

⁴²A thiltihtheihzia an hre reng duh lo va, Hmêlma laka a chhanhim nî te pawh an hre duh hek lo,

⁴³Aigupta ramah khân thil mak tak tak a ti a, Zoan phaizâwla a thil mak tih te;

⁴⁴An luipui thisena a chantîr te, An tuikhurte pawh in theih loh tûra thisena a chantîr te kha an hre reng duh chuang lo.

⁴⁵Anmahni ei kawnkâw vek khawpin tho a puantîr a; Chungû-te a tîr baw a, chûngte chuan anni chu a tichhe vek a.

⁴⁶An thlâite pawh pangang ei âtn a pê a, An thlâi thar chu khaukhuap a pe baw a.

⁴⁷An grêp hruite chu rial a den chhiattîr a, An theipui kungte pawh chu vûrin a hmet hlum a.

⁴⁸An rante pawh rial chhut tûrin a pê a, An ran rualte chu tîkin a dêng a.

⁴⁹An zîngah chhiatna thlentu Vântirhkoh a tîr baw a Thinrimna te, beidawna te, manganna te nê, A thinurna râpthlâk tak chu an chungah a leih bua a.

⁵⁰A thinur hrîkthlâkna tûr kawng a hawng a, Thihna lakah an nunna a humsak lo va, Hri chhia a pe ta zâwk a;

⁵¹Aigupta mite fa tîr zawng zawng a tihlum a, Chûngte chu Hama puan ina an chakna rah hmasâte an ni a.

⁵²Ama mite erawh chu berâm angin a hruai chhuak a, Ran rual angin thlalêrah khân a hruai zêl a.

⁵³Hmun himah a hruai a, engmah hlahh tûr an nei lo; An hmêlmâte erawh chu tuipuiin a chîm pîl ta vek a ni.

⁵⁴Anni erawh chu a ram thianghlimah a hruai thleng a, Chu tlâng, a kut dîng lama a lo lâk tawh ngeiah chuan.

⁵⁵An hmaa hnam dang lo awmte chu a hnawt chhuak a, An rochan tûr a teh chhuahsak a, Israel hnamte chu anmahni puan inahte chuan a awmtîr ta a.

⁵⁶Nimahsela, Pathian Chungnungbera chu an fiah a, an tithinur a, A thu hriattîrte chu an zâwm si lo va,

⁵⁷An thlahtute ang thovin an hawi kîr a, vervêk takin an khawsa leh ta mai a; Thalngul kâwi ang leka rintlâk lohvin an kal

kâwi a.

⁵⁸An hmun sângte chuan a thinrimna a chawk tho va, An mitem ker chawpte chuan a thîkthû an kâi chhuak a.

⁵⁹Pathianin chûng thilte chu a lo hriatin, a thinrim êm êm a, Israel-ho chu a ten ta hluah hluah a.

⁶⁰Chuvângin mihringte zînga a hûn Silo Biakbûk pawh a kalsan ta hial a.

⁶¹A chakna chu salah a tântîr a, A ropuina chu hmêlmâte kutah a mantîr baw a.

⁶²A mite chu khandaih a hmachhawntîr a, A rochan chungah chuan a thinur a.

⁶³An tlangvâlte chu meipuiin a kâng ral a, An nupaten pasal tûr pawh an hmu zo lo va.

⁶⁴Khandaihin an puithiamte thah an ni a, An hmeithaite pawhin sûn ngaihna an hre lo hial a.

⁶⁵Tichuan mi chak, zu ruia an âu lûng lûng thîn ang hian LALPA chu, muhîl ang maiin a lo thangharh a.

⁶⁶A hmêlmâte chu a ûm kîr leh a, Kumkhaw hmingchhiatna a khumtîr ta a.

⁶⁷Chu bâkah Josefa puan in chu a hnâwl a, Ephraim hnam chu thlang duh lovin,

⁶⁸Juda hnam chu a thlâng ta zâwk a, A hmangaih Zion tlâng ngei chu.

⁶⁹A hmun thianghlîm chu sâng takin a sâ a, Leilung ang maiin kumkhuain a tinghet a.

⁷⁰A chhihhlawh Davida chu a thlang a, Berâm huang aţangin a thur chhuak a;

⁷¹Berâmpui no hruai lâi a zui thînna ata Ama mi Jakob-hote leh, A rochan Israel-hote enkawltu âtn a hruai chhuak ta a.

⁷²Tichuan, a thinlung thâtzia ang zêlin anniho chu a enkawl a, A kut themthiamnain a hruai ta a.

BUNG 79

RORÊLSAK TÛRA DÎLNA

¹Aw Pathian, i rochanah hian hnamte chu an lo lût a; I tempul thianghlîm an tibawhlhlawh a; Jerusalem chu an tichim rem rum a.

²I chhihhlawhte ruang chu Chunglêng savâte châwah an pê a, I mi thianghlîmte tîsâ chu ramsâte an pê a.

³An thisen chu Jerusalem vêlah tui angin an leih bua a, Phûmtu tûr tumah an awm si lo.

⁴Kan vêla mite sawi chhiatin kan lo awm ta a, Kan dep vêla mitem hmusit takin min nuihsan ta.

⁵LALPA, i thinur kumkhua dâwn êm ni? I thîkna chu mei angin a alh êm dâwn êm ni?

⁶Nangmah hre duh lo hnamte chungah chuan i thinur chu leih baw zâwk la, I hming lam duh lo ram chungahte nê.

⁷Jakob-ho chu an suatmang zo va, An awmna chu an tihramsak ta vek si a.

⁸Hmâna kan sualna mawh te kha kan chungah thlentîr suh ang che! I lainatna chuan min hmuak vat rawh se, Kan dinhmun a hniam ta rawih rawih mai si a.

⁹Aw, mi chhandamtu Pathian, min pui rawh, I hming a lo ropui theih nân; Kan sualte hi tlêngfai la, min chhandam ang che, I hming avâng ngein!

¹⁰Engati nge hnamte chuan, “Khawiah nge an Pathian a awm?” an tih le? I chhiahhlawhte thisen chhuak phubâ i la tih hi kan mithmuh ngeiah Hnam tin zîngah hriat ni rawh se.

¹¹Mi tângte rûm thâwm chu i hmâah thleng sela; I thiltihtheihna nasatzia ang zêlin, Thi tûra ruatte chu lo hum ang che;

¹²Aw LALPA, nangmah an sawichhiatna che kha, Kan vêla mite ângchhûngah a leh sarihin rûl leh ang che.

¹³Chutichuan, keini i mite, i ran tlatna hmuna berâmte hian Kumkhuain lâwmthu kan hrilh ang che: Chhuan zawng zawng thlengin nangmah kan fak chhâwng zêl ang che.

BUNG 8o

HNAM TUNGĐING LEH TÛRA DÎLNA

¹Aw Israelte Berâmpu, min lo ngaithla teh, Berâm rual anga Josefa-ho hruai thîntu; Nang, cherubte inkâra chênga chu, lo êng chhuak ta che!

²Ephraim-hote, Benjamin-hote leh Manase-hote hmâah hian I chakna kha chawh tho teh, Lo kal la, min chhandam ang che!

³Aw Pathian, min din thar leh la; I hmêl kha kan chungah êntîr ang che, Tichuan, chhandam kan ni dâwn nia!

⁴Aw LALPA, sipaihote Pathian, I miten tawngtaina an hlân chung hian Engchen nge i thinur dâwn le?

⁵Anni chu chaw mittui chuan i châwm a, Duh tâwka an in atân mittui i pe si a.

⁶Nangin kan vêla mite tân inhnialnaah min chantîr a, Kan hmêlmâte chu an innuih vur vur thîn.

⁷Aw sipaihote Pathian, min din thar leh la; I hmêl kha kan chungah êntîr ang che, Tichuan, chhandamin kan awm thei dawn nia!

⁸Aigupta ram ata grêp hrui i rawn lâ a; Hnamte chu i hnawt chhuak a, i phun ta a.

⁹A tân hmun i buatsaihsak a, Thûk takin zung a kâi a, Ram pum a awh khat ta vek a.

¹⁰Tlângte chu a hlim chuan a khuh duai a, A zârte chu sidar thing lianpui ang mai a ni.

¹¹A tângte chuan tuifinriat a zu thleng a, A zârte chuan Luipui an zâr phâk a.

¹²Engati nge a palte chu i thiah tâk mai? Miten a rahte chu an kalpah zen mai lo vang mâw?

¹³Ramhnuia sanghalin an nawr chhia ang a, Ram sâte pawhin an tlan mai dâwn asin.

¹⁴Aw sipaihote Pathian, lo kîr leh tûrin kan ngên a che; Vân aţang khân rawn hawi thla teh, Hê grêp hrui hi rawn tlawh ang

che.

¹⁵I grêp huana kut ding lama i phun kha a ni a, A pêng, i tâna i zuah bika nên hian.

¹⁶Meiah a kâng a, an kit ta mai le; Hmâihmâ ngeia i zilhna tuar zo lovin an riral ta.

¹⁷I kut ding lama mihring chungah khân i kut kha awm sela, Mihring fapa i tâna i tihchaka chungah chuan.

¹⁸Chutichuan, kan kîrsan lo vang che; Min tiharh la, tichuan i hming kan lam dâwn nia.

¹⁹Aw LALPA, sipaihote Pathian, min din thar leh la; I hmêl kha êntîr leh ang che, Tichuan, chhandamin kan awm dâwn nia!

BUNG 8i

PATHIAN BIAK DÂN DIK

¹Kan chakna Pathian fakin ring takin zai ula; Jakob-ho Pathian chawimâwi nân hlim takin au rawh u.

²Fakna hlâ sa ula, kutkuang bêng ri ula, Perhkuang leh tingtang rimâwite chu rem rawh u.

³Thla thar hunah tâwtawrâwt hâm ula, Kan kût urhsûn hun, thlahleinga zânah ngei hâm rawh u.

⁴Hei hi Israel-ho tâna dân thu ruat a ni a, Jakoba Pathian thupêk a ni si a.

⁵Chû chu Josefa-ho zînga hriatpuina tûra ruat a ni a, Aigupta ram pum a fan lâi khân Kan hriat thiam loh tawng kan hriat kha.

⁶An kokia an rit phurh ka paihsak a; An rit chawina bâwm te chu ka dah kiansak bawh a.

⁷In mangan laiin mi ko va, ka chhan chhuak che u-a; Khawpui rîkna hmun ril tak aţangin ka chhâng che u-a; Meriba tuahte khân ka fiah che u kha.

⁸Aw, ka mite u, ngaithla ula, ka zilhhaah dâwn che u hi! Aw Israel-hote u, ka thû ngaithla teh u!

⁹In zîngah ram dang pathian an awm tûr a ni lo va; Ram dang pathian rêng rêng in be tûr a ni hek lo.

¹⁰Kei hi LALPA in Pathian chu ka ni, Aigupta ram ata hruai chhuaktu che u chu; In kâ âng zâu ula, ka tikhat dâwn nia.

¹¹Nimahsela, ka mite chuan ka âw an ngaithla duh si lo va, Israel-hoten engah mah min ngai bawh hek lo.

¹²An duh ang ang awm tûrin An luhlulna thinlung chu ka thlahthlam ta.

¹³Aw, ka mite hian ka thû ngaithlân, Israel-ho hian ka kawngte hi zawh sela âw!

¹⁴An hmêlmâte chu ka titlâwm thuai ang a, Anmahni dotute chungah kut ka lek vat mai tûr.

¹⁵LALPA hawtute chu a hnênah a derin an intulût vêl ang a, Mahse, an chan a chhe kumkhua ang.

¹⁶Nangni chu chaw tui ber chîin ka châwm ang che u-a, Lungpuia khawizûin ka titlai ang che u.

BUNG 82

DIK TAKA RORÊL TÛRA DÎLNA

¹Pathian chu mi chakho inkhâwmnaah a ding a; Anni pathianho zingah chuan ro a rêl a.

²Eng chen nge dik lo taka ro in rêl ang a, Misualte chu in duhsak bîk dâwn?

³Retheite leh pa nei lote thlavâng hauh ula; Hrehawm tuarte leh pachhiate chu dik takin rêlsak rawh u.

⁴Retheite leh pachhiate chu chhan ula; Mi sual kut ațangin chhuah zalên rawh u.

⁵An hre lo va, hriat thiamna an nei hek lo; Thimah chuan an vak vêl thîn a; Leilung nghahchhan zawng zawng hi derthâwng tak vek a ni asin.

⁶“Nangni hi pathiante in ni a, In zâin Chungnungbera fate in ni.

⁷Mahse mihring ang leka thi leh mai tûr in ni a, Mi lian zînga pakhat angin in la tlu vê ang,” ka ti a.

⁸Aw Pathian, tho la, lei chungah hian ro han rêl ang che; Hnam tinte hi i rochun tûr an ni si a.

BUNG 83

HMÊLMA TLÂWM NÂNA DÎLNA

¹Aw Pathian! Ngâwi rengin awm lo la; Ƨawng lovin awm reng suh ang che, Aw Pathian, ngâwi reng suh ang che!

²Ngai teh, i hmêlmâte chu an ri mur mur a; Nangmah hawtute chu an inluling vêl a.

³I mite hi vervêk takin an phiar a, I mi thuhrûkte chhiatna zawngin an inrâwn khâwm a.

⁴“Hawh u, hnama indin thei lo tûrin i nuai bo ang u khai, Israel tih hming pawh hriat reng ni suh se,” an ti a.

⁵Thu khat vuain an inrâwn khâwm a; Nangmah do tûrin an intiam rual a:

⁶Edom-ho leh Ismael-ho puan in te; Moab-ho leh Hagar-hote;

⁷Gebal-hote, Amon-hote leh Amalek-hote; Philistia-ho leh Tura khuua awmte nê:

⁸Asuria-ho pawh an lamah an țang ve ta bawk a; Lota thlahte chu an Ƨanpui a. (Selah)

⁹Anni chu Midian-ho chungah i tih ang te, Kison luia Sisera leh Jabina chungah i tih ang khân ti ve rawh:

¹⁰Chûng mite chu Endor khuah an boral a; Lei chungah êkdûr maia an chan kha.

¹¹An mi liante chu Oreba leh Zeeba ang khân siam la, Ni e, an lal zawng zawngte chu Zeba leh Zalmuna ang khân siam ang che.

¹²Chûng mite chuan, “Pathian ran tlatna hmun chu i luahsak ang u,” an tih kha.

¹³Aw ka Pathian, anniho chu vaivut thli len vir mup mup angah chantîr rawh, Buhsî thliin a len bo ang mai hian!

¹⁴Ramhnuai thing buk kâng ang leh, Tlâng panga mei kâng hluah hluah ang mai hian

¹⁵Anni chu i thlichhiain ûm la, I thlipui na takin tihthaih ang che.

¹⁶Aw LALPA, i hming an zawn theih nân An hmêl chu sen awp awp khawpin tizak ang che.

¹⁷Mualpho leh mangang rêng rêngin kumkhuain awmtîr ang che; A ni, zak êm êmin boral rawh se.

¹⁸Tichuan, nang chauh hi LALPA hming pu, Leilung zawng zawnga Chungnungber i nih an hriat theih nân.

BUNG 84

PATHIAN IN THLÂKHLELHAWM

¹Aw, sipaihote LALPA! I chênna hmunte chu a va duhawm êm!

²Ka nun hian LALPA biak in tualzâwl chu A ngai êm êm a, a ni, a thidang ta hial a; Ka thinlung leh ka tisa hian Pathian nung chu a au tak meuh va.

³Aw sipaihote LALPA, ka Lal leh ka Pathian, I maichâm bulachte chuan Chawngzawngin bû a chhep a, Vamûr pawhin a notête awp tûrin A bu lum chu a luah ve thîn.

⁴I ina awmte chu an nihlawh e; Nangmah chu an fak zêl ang che.

⁵I chaknaa innghatte chu an nihlawh e; Hmun thianghlim pan duhna thinlung pûte chu.

⁶Ƨahna Ruam an zawh lai pawhin Tui hnâ-ah an chantîr a, Ruahtui pawhin tuikhurah a chantîr bawk thîn.

⁷Chakna ațangin chak lehzualin an kal a, Zion-a Pathian hmâah chuan mi tin an inlan thîn.

⁸Aw LALPA, sipaihote Pathian, ka dîlna hi lo ngaithlâ la; Aw Jakoba Pathian, i beng lo chhi ang che.

⁹Aw Pathian, kan phâw hi lo en la, I hriak thiha hmêl hi lo thlîr ang che. ¹⁰I biak in tuala ni khat awm pawh hi, hmun danga ni sâng khat awm aiin a Ƨha zâwk si a. Suahsualna puan ina chên ai chuan, Kan Pathian ina kawngkhâr vêngtu nih pawh ka thlang zâwk a ni.

¹¹LALPA Pathian chu nî leh phâw a ni si a; LALPA chuan khawngaihna leh ropuina a pê ang a; Dik taka awmte tân chuan eng thil Ƨha mah a ui lo vang.

¹²Aw sipaihote LALPA, Nangmah ringtu chu a va nihlawh êm!

BUNG 85

DUHSAKNA DAWNG LEH TÛRA DÎLNA

¹LALPA, i ram chungah i lâwm thîn kha; Jakob-ho chu saltâna ațangin i hruai kîr leh ta a.

²I mite khawlohnate pawh i ngaidam a; An sualna zawng zawng i khuh bosak ta a.

³I thinrimna zawng zawng pawh i la bo va; I thinurna nasa tak chu i la kîr ta a.

⁴Aw mi chhandamtu Pathian, min siam thar leh lul rawh, Kan chungah i thinurna chu la kiang ang che.

⁵Kan chungah hian i thinur kumkhua dâwn êm ni? I thinur chu chhuan zawng zawng thlengin i pawt sei zêl dâwn êm ni?

⁶I mite hi nangmahah an hlim theih nân Min tiharh leh dâwn lo vem ni?

⁷Aw LALPA, i ngilneihna chu min hmuhtîr la, I chhandamna chu min pe ang che.

⁸LALPA Pathianin thû a sawi tûr chu ka lo ngaithla ang, A mite leh a mi thianghlime hnênah chuan Thlamuanna thû a sawi dâwn si a; Chuvângin, anni chu âtnaah baw kîr leh tawh suh se.

⁹A chhandamna chu amah tîhtute tân a hnai bîk a, Chû chu kan rama ropuina a chên theih dân tûr a ni.

¹⁰Ngilneihna leh thutak a intâwk a; Dikna leh remna a infâwp a.

¹¹Thutak chu lei aţangin a chawr chhuak a; Dikna chuan vân aţangin arawn thlîr thlâ a.

¹²A ni, LALPA chuan thil   a a p   ang a; Kan ramin a thil thar chhuahte hi a lo hl  wk   m   m tawh ang.

¹³A hm  ah chuan dikna a kal ang a, A hniakte chu kan kawng at  n a siam ang.

BUNG 86

S  NNA LEH NGENNA

¹Aw LALPA, i beng rawn dawh la, mi ch  ng ang che; Rethei leh pachhia ka nih hi.

²Ka nunna hi vawng him ang che; serh hran tawh ka ni si a; Ka Pathian i ni a; Nangmah ringtu, i chhiahhlawh hi chhandam ta che!

³Aw LALPA, mi khawngaih ang che, Nil  nga ka auh che hi.

⁴I chhiahhlawh nun hi rawn tihlim ang che, Aw LALPA, ka nun hian i lam chauh a hawi si a.

⁵LALPA, nang chu i      a, ngaihdam i inpeih a, A kotu apiang che chungah lainatna i ngah     n a ni.

⁶Aw LALPA, ka   awng  aina hi lo ngaithl   la; Khawngaih ka d  lna   w hi mi lo hriatsak ang che.

⁷Ka mangan ni chuan ka ko vang che, Nangin mi ch  ng d  wn si a.

⁸Aw LALPA, pathiante z  ngah nang ang hi tumah an awm lo; I thiltihte ang ti ve thei t  mah an awm hek lo.

⁹Aw Lalpa, i siam hnam tinr  ngte chu an lo kal ang a, chibai b  kin i hm  ah an lo k  n ang a; I hming chu an rawn ch  wim  wi ang.

¹⁰Nang chu i ropui   m a, thil mak tak takte i ti     n si a; Nang chauh hi Pathian chu i ni e.

¹¹Aw LALPA, i kawng chu mi zirt  r la; I thutakah ka awm ang; I hming chauh      t  r  n thinlung sakhat mi putt  r ang che.

¹²Aw Lalpa, ka Pathian, ka thinlung zawng zawngin ka fak ang che, I hming chu kumkhuan ka ch  wim  wi ang.

¹³Ka chung a ngilneihna hi a nasa   m   m a, Hremhmun th  k lai ber a  ngin ka nunna i chhan chhuak ta si a.

¹⁴Aw Pathian, mi chapote chuan mi bei a, Mi r  wng tak tak int  lkh  wmte chuan ka nunna hi l  k tumin an zawng a, Nang chu an hm  ah an dah si lo che a.

¹⁵Aw LALPA, nang erawh chu, lainatnaa khat, mi khawngaih thei, Thinnel, ngilneihna leh thutaka khat Pathian i ni e.

¹⁶Aw, ka lam lo hawi la, mi khawngaih rawh! I chhiahhlawh hn  nah hian i chakna p   la, I bawihnu fapa hi chhandam ang che.

¹⁷I mi duhsakzia hi a takin ent  r ang che; Mi hawtuten ch   chu an hmuha, zak taka an awm theih n  n, LALPA, nangin mi   npui a, mi thlamuan     n si a.

BUNG 87

ZION, PATHIAN KHAWPUI

¹A lungph  m chu t  ng thianghlimehte chuan a awm a.

²Jakob-ho ch  nna zawng zawng aiin LALPA chuan Zion kulh kawngkh  rte chu a ngaina z  wk si a.

³Aw Pathian khawpui, I chanchin ropuizia hi an va sawi duh   m!

⁴  Mi hretute t  n Rahab leh Babulon chung  ng thu ka  n sawi teh ang; En teh u, Philistia leh Tura hi, Ethiopia n  n hian:   H   mi hi chuta piang chu a ni,   an la ti ang.

⁵Zion chanchin heti hian an sawi ang,   H   mi leh saw mi saw amaha piang an ni a; Chungnungbera ngei chuan amah chu a tinghet ang,   tiin.

⁶LALPAN mi tin hming a ziah hunah chuan,   He mi hi chuta piang chu a ni,   tiin a la chhinchhiah ang.

⁷Hla satute leh rim  wi tumtute chuan,   Ka tuihn   zawng zawng chu nangmahah a ni a awm ni,   an ti a.

BUNG 88

MANGANG   U   W

¹Aw LALPA, mi chhandamtu Pathian, Ach    n az  nin i hm  ah ka au     n a;

²Ka d  lna hian i hn  n thleng sela; Ka auna lamah hian i beng rawn dawh ang che.

³Ka nun hi mangannain a khat a, Thl  n khur lam ka hnaih ta hle mai si a.

⁴Seol a chhuk thlate z  nga chhiar tel ka ni a; Chakna r  ng nei lo mi ang mai ka ni.

⁵R  l thahho thl  na zalhte anga Mitthi z  nga paih thl  k ka ni a; Ch  ngte chu i hriat tawh loh leh, I kut a  nga i tan fithl  k tawhte an ni si a.

⁶Seol mawng berah mi dah a, Hmun thim th  k tak maiah chuan.

⁷I thinrimna chuan mi delh tlat a, I tuif  wn zawng zawng chuan mi ch  m mangang zo ta.

⁸Ka hm  lhriat hote lah chu mi dah hlatsak daih hlawm si a; An t  na tenawm maiah mi siam leh ta ng  l a; Mi kh  rkhip tlat a, ka chhuak thei ta lo.

⁹Tuarna avângin ka mitte hi a vâi zo ta. LALPA, ni tinin ka ko che a, I lamah ka kutte ka phar a.

¹⁰Mitthîte tân thil mak i ti dâwn em ni? Mitthite chu lo thovin, an fak dâwn che em ni?

¹¹I ngilneihzia chu thlânah zu puangin, I rinawmzia chu boralna hmunah zu hriattîr a ni dâwn em ni?

¹²I thil mak tihte chu thim zîngah hriat a ni dâwn em ni? I dikna chu theihnghilna ramah hriat a ni dâwn em ni?

¹³Aw LALPA, kei erawh chuan ka âu ka âu che asin; Zîngah chuan ka ƣawngtâina hian a lo hmuak ƣhîn ang che.

¹⁴LALPA, engati nge ka nun hi i thlauhtlâk tâk mai? Engati nge ka lakah i hmêl i thup?

¹⁵Ka tleirawl tîrh ata natna tuarin ka thi lek lek ƣhîn a; I ƣihbaiawmnain ka thâuvah mi man a; Ka bîng chûk chûk a.

¹⁶I thîrim nasa tak chuan mi chîm pil a; I hlauhawmna chuan mi tikulcho dêr a.

¹⁷Chûngte chuan tui angin nilêngin mi chîm reng a, Mi hual khup mai a ni.

¹⁸Mi hmangaihtu leh ka ƣhianta lah mi dah hlatsak daih a, Ka hmêlhrîatte chu thim zîngah i awmtîr baw si a.

BUNG 89

DAVIDA THUTHLUNGA FAKNA HLA

¹LALPA ngilneihzia chu kumkhuain hlân ka sâ ang a; I rinawmzia hi chhuan zawng zawng thlengin ka hril zêl ang.

²“Ngilneihna chu kumkhuaa din ngheh a ni ang a; I rinawmna chu vânah khian i tinghet ang,” ka ti tawh si a.

³“Ka mi thlan hnênah thû ka thlung ta a, Ka chhiahhlawh Davida hnênah chhia ka chham tawh bawk a:”

⁴I thlahte chu kumkhuain ka tinghet ang, I lalƣhutthlêng pawh chhuan zawng zawng daihin ka rem chho vang,’ tiin.

⁵Aw LALPA, vânte khian i thil mak tih an fak ang a; Mi thianghlimte inkhâwmnaah i rinawmna chu an fak bawk ang.

⁶Vânah khian LALPA khing pha tûr tu nge awm? Mi thiltithe fate zîngah LALPA ang hi tu nge awm thei ang le?

⁷Mi thianghlimte inkhâwmnaah chuan Pathian chu nasa taka ƣih tûr a ni a, A kiang vêla mi zawng zawngte pawhin an zah êm êm tûr a ni.

⁸Aw LALPA, sipaihote Pathian, Aw LALPA, nang anga mi chak tu nge awm? I rinawmna chuan a hual vêl si che a.

⁹Tuifinriat fâwn chungah ro i rêl a; A tuifâwn invawrh laite chu i hau reh ƣhîn a ni.

¹⁰Nang chuan Rahab chu râl ang maia thatin i tisawm vek a; I hmêlmâte chu i bân tha chakin i vai darh ta a.

¹¹Vân khi i tâ a ni a, lei pawh hi i tâ bawk a ni a; Khawvêl leh a chhûnga thil awm zawng zawng hi nangma din vek a ni.

¹²Chhim leh hmar hi nangma siam a ni a; Tabor leh Hermon tlângte chuan i hming avângin hlim takin an fak a che.

¹³Nang chuan bân chak tak i nei a; I kut hi a chakin, I kut ding lam chu a sâng lehzuah a.

¹⁴Dikna leh rorêlna dik chu i lalƣhutthlêng nghahchhan a ni a; Ngilneihna leh thutak chu i hmâah a kal ƣhîn.

¹⁵Thâwm hlimawm tak hre ƣhîn mite chu an nihlawh e! Aw LALPA, anni chu i hmêl êngah chuan an lêng si a.

¹⁶I hming avângin nilêngin an lâwm a, I dikna zârzova châwikân an la ni ve ang.

¹⁷Nang chu an chakna ropui i ni si a, I duhsakna avângin kan kí chu lek sânin a awm ƣhîn.

¹⁸Kan phâw hi LALPA tâ a ni a, Kan lal hi Israel Mi Thianghlîma tâ a ni.

¹⁹I mi thianghlîma hnênah chuan inlârnain thû i sawi a, “Mi chak pakhat chu ƣanpuina ka pê a; Mipuite zînga thlan chhuaha chu ka châwimâwi ta.

²⁰Ka chhiahhlawh Davida chu ka chhar ta a; Amah chu ka hriak thianghlîm ka thih tawh bawk a ni.

²¹Ka kut hian ka chelh nghet tlat ang a; Ka bân hian ani chu a tichak ang.

²²Hmêlmâ chuan a bum thei lo vang a, Misual fa chuan a tina thei hek lo vang.

²³Amah dotute chu a hmâah ngei ka vaw thlû ang a, Amah hawtute chu hri chhia ka veitîr ang.

²⁴“Ani hnênah erawh chuan ka rinawmna leh ka ngilneihna a awm reng ang, Ka hming avângin a kí chu chawimâwiin a awm bawk ang.

²⁵A kut chu tuifinriat chungah thû ka neitîr ang a, A kut ding lamin luipuih thu a nei ang.

²⁶Ani chuan, ‘Nang chu ka Pa i ni a, Ka Pathian, mi chhandamtu lungpui i ni,’ tiin mi âu ang.

²⁷Kei pawhin ani chu fa tîrah ka siam ang a, Leia lalte zînga ropui berah ka siam ang.

²⁸Ka ngilneihna chu kumkhuain a tân ka vawn ƣhatsak ang a, Ka thuthlun chu a hnênah a awm nghet ang.

²⁹A chi thlahte chu kumkhaw daihin ka awmtîr ang a, A lalƣhutthlêng pawh vân awm chhung daih a ni bawk ang.

³⁰“A faten ka dân hi an hawisan a, Ka rorêlnate anga an awm lohva,

³¹Ka thuruatte an bawhchhiata, Ka thupêkte an zawm loh erawh chuan,

³²An bawhchhiatnaah thîrtiangin ka hrem ang a, An khawlohna avangin vuak an tuar ang.

³³Mahse, ka ngilneihna chu a hnên aƣangin ka lâksak vek lo vang a, Ka rinawmna chu a thlâwna a rîral ka phal hek lo vang.

³⁴Ka thuthlung chu ka bawhchhe lo vang a, Ka hmuia thu chhuak tawh chu ka tidanglam hauh lo vang.

³⁵Vawi khat ka thianghlîmna chhâlin chhia ka chham a; Davida hnênah dâwt ka sawi lo vang;

³⁶A chithlahte chu kumkhaw daih an ni ang a, A lalthutthlêng chu ka hmâah ni angin a ding nghet ang.

³⁷Thlâ angin kumkhua atân tihngheh a ni ang a, Chung lam vâna hretu rinawmte ang khian,” i ti a.

³⁸Nimahsela, nang chuan i thlah thlân i duh lo va, I hriak thiha chungah i thinrim ta a.

³⁹I chhiahhlawh thuthlun chu i hnâwl fithla dêr a; A lallukhum chu leia paih thlâk sak in i titlâwm baw k a.

⁴⁰A pal hung zawng zawng i titlû a; A kulhbîngte i tichhia a.

⁴¹Kawnga kal apiangten thil an lâksak thîn a, A vêla mite sawichhiatin a lo awm ta a.

⁴²A hmêlmâte kut i tichaksak ta hlah va; A hmêlmâ zawng zawng chu i tiphûr ta zâwk a.

⁴³A khandaih hriam chu i tihbilsak a, Indonaah i pui baw k si lo va.

⁴⁴A ropuina i tihtâwpsak a, A lalthutthlêng chu leia i paih thlâ a.

⁴⁵A vanglai nite chu i tihtâwisak a; Mualphona puan i sintîr ta zâwk si a.

⁴⁶Aw LALPA, engtia rei nge ni ang le? I biru kumkhua mai dâwn em ni? I thinurna chu mei angin a alh reng mai dâwn em ni?

⁴⁷Hun ka neih tâwizia hi hria ang che; Mihring fate zawng zawng hi i va siam ho-lam tak êm!

⁴⁸Thih ni hmêl hmu lo tûra nung tu nge awm? Thlan thiltihtheihna laka mahni nunna chhan chhuak thei tu nge awm?

⁴⁹LALPA, hmân laia i ngilneihna hmasâ kha khaw nge a nih a, Davida hnêna chhechhama i tiamte kha khaw nge a awm tâk?

⁵⁰Lalpa, i chhiahhlawhte an sawi chhiat dân hi hre reng ang che; Mi tam tak sawi chhiatna chu keima'n ka lo tuar tlawk tlawk thîn a,

⁵¹Aw LALPA, i hmêlmâten an tham lohzia che hi, I hriakthiha hi a kalna apiangah an chêksawlh thîn.

⁵²LALPA chu kumkhua in fak in awm rawh se. Amen, Amen.

BUNG 90

BU IV : PATHIAN LEH THI THEI MIHRING

¹Lalpa, nang chu chhuan zawng zawng chenah kan chênna hmun i ni a.

²Tlângte lo pian chhuah hmâa, Leilung leh khawvêl i din hmâ pawh khân, Chatuan ata chatuan thleng pawhin, nang chu Pathian i ni si a.

³Nang chuan mihringte hi vaivutah i kirtîr leh thîn a, “Mihring fate u, kîr tawh r'û le,” i ti thîn.

⁴Nanga ngaih chuan kum sâng khat hi Nimin ral ta ang lek kha a ni a, Zân lam râl vên khat chhûng ang lek a ni.

⁵Anni chu tuilian angin i lên bo thîn; Thang khat mû ang chauh an ni a, Zingah chuan hlobet chawr no ang an ni.

⁶Zing lama a chawr no chu a lo duah hluah a; Tlai lamah chuan an ât chhum a, a vuai mai thîn.

⁷I thinurnain mi lem zo va, I thinrimnain min timangang baw k si a.

⁸Kan khawlohnate chu i mithmuhah i dah a, Kan sual zêp rûkte chu i hmêl êngah i pho chhuak thîn a. ⁹I thinurna hnuaiah kan dam chhûng nite hi kan hmang ral thîn a; Dam chhûng hun hi rûm chungin kan hmang zo thîn.

¹⁰Kan dam chhûng rei zâwng hi kum sawmsarih a ni a; Chakna avângin kum sâwmriat pawh a ni thei e, Mahse, a reina chu thawhrimna leh lungngaihna chauh a ni; A ral thui a, keini pawh kan thlâwk bo thîn a.

¹¹I thinurnain a thawh natzia hi tu nge hre phâk i le? I thinrim lah chu nangmah tîh i phû ang zeta nasa a ni si a.

¹²Chuvângin, kan dam chhûng hun chhiar dân tûr min zirtîr ang che, Finna thinlung min neihthîrna tûr lo ni rawh se.

¹³Aw LALPA, inlamlêt leh rawh! Engtikah nge ni ang? I chhiahhlawhte chungah hian zahngai ang che.

¹⁴Aw, i zahngaihna chuan min thlamuan leh thui ang che, Dam chhûng hun hi hlim leh lâwm taka kan hman theih nân!

¹⁵Thil tha lo tak tak kan tawh laia Nangin min tihrehawm hun chhûng te ang khân, Lâwmnain min rûl leh vek ang che.

¹⁶I hnathawh chu i chhiahhlawhte hmuh theihin lang sela, I ropuina chu an fate chungah lang rawh se.

¹⁷LALPA kan Pathian mâwina chu kan chungah awm sela, Kan kutkawihte hi kan tân min tihnghehsak la; Ni e, kan kutkawihte hi tinghet mawlh ang che.

BUNG 91

BIHRÛKNA HMUN HIM

¹Chungnungbera awmna hmun biru taka chênga chu, Engkimtithia thlazâr hnuaiah chuan a awm reng ang.

²“Ani chu ka inhumhimna leh ka kulhpui, Ka Pathian, ka rina chu a ni,” tiin LALPA chungchâng ka sawi ang.

³Ani chuan thangkamtû thang lakah leh, Hri chhe lakah chuan a chhanhim ngei ang che.

⁴A thlâ-in a khuh ang che a, A thla hnuaiah chuan i tlu lût ang; A thutak chu i tân invenhimna phâw a ni.

⁵Zâna thil hlauhawmte chu i hlau lo vang a, Chhûna thal lêng vêlte pawh i hlau hek lo vang.

⁶Thim zînga hrilêng thîn chu i hlau lo vang a, Chhûn pachanga chhiatna thleng mai thei te pawhin a tihlâ lo vang che.

⁷I sîrah a sâng têt tlu rem rumin, I ding lamah a sîng têt tlu del dul mah se, I awmna hmun a rawn hnaih lo vang.

⁸I mit ringawt pawhin han en ta la, Misualte chan chhiatzia chu i hmu mai ang.

⁹LALPA chu ka himna kulhpui atân i lo siam tâk avângin, Chungnungbera meuh pawh chên nân i hmang ta hial a nih hi,

¹⁰Chuvângin eng thil tha lo mah i chungah a thleng lo vang a, Eng ang hri chhia mahin i bul hnai a lo thleng hek lo vang.

¹¹I kalna kawng tinrênga humhim tûr chein A Vântirhkohte chu nangmah vêng tûrin thû a pe dâwn si a.

¹²An kutin an dâwm ang che, Chuti lo chuan lungah i inchhuih hlah dah ang e.

¹³Sakeibaknei leh chawngkawr te chu i rap nawk nawk ang a; Sakeibaknei vânglai leh rûlpuite chu i chîl nek dâwn nia.

¹⁴“Ka chungah a hmangaihna a dah tlat avângin ka chhanhim ang; Ka hming a hriat tâk avângin dinhmun sângah ka hlâng kâng dâwn a ni.

¹⁵Ani chuan mi ko vang a, ka chhâng ang; A mangan laiin a hnênah ka awm ang a: Ka chhan chhuak ang a, ka chawimâwi baw ang.

¹⁶Damreinain ka tilungâwi ang a, Ka chhandamna chu ka hmuhtîr ang.”

BUNG 92

PATHIAN HMANGAIHNA LEH RINAWMNA

¹LALPA hnêna lâwmthu sawi hi a va thâ êm! Aw Chungnungber, i hming faka zâi hi a tha si a;

²Zîng lama i ngilneihzia leh, Zân tina i rinawmzia te chu,

³Ţîngtang hrui sâwm nei te, Phenglâwng te, perhkhuang te leh, Rimâwi tumrîk chi hrang hrang te nêna hrlin kan puang chhuak ang.

⁴LALPA, i thiltihte hian min va tilâwm tak êm! I kutchhuak thiltihte avângin hnehna hlâ ka sa ang.

⁵Aw LALPA, i thiltihte chu a ropui mang e, I ngaihtuahate chu a va thuk êm!

⁶Mi mawl chuan hei hi a hre pha lo va, Mi â-in a hre thiam hek lo.

⁷Misualte chu hlobet ang maia an lo chawr hluaha, Thil sual titute zawng zawng an lo len thûr thûr hian, Chatuana an boralna tûr a lo ni zâwk thîn.

⁸LALPA, nang erawh chu sâng takah, chatuanin i awm si a.

⁹Aw LALPA, i hmêlmâte hi han en teh, I hmêlmâte hi an la boral ngei ang a; Thil sualtitute zawng zawng chu hnawh darhin an awm vek ang.

¹⁰Ka kî erawh chu bâwngchal kî angin i châwi sâng a; Hriak thar mi thih baw a.

¹¹Ka hmêlmâte chungah thleng se ka tih chu a thleng tih ka mitin a hmu ta; Ka beng pawhin mi dotute chungah thleng tûra ka duhthusâm thleng thâwm a hre vê ta.

¹²Mi dik chu tûm thing angin a duah hluah ang a, Lebanon tlânga sidar thing angin a thang duang ang.

¹³LALPA ina phunte chu Kan Pathian in tualah chuan an duah hluah hluah ang.

¹⁴A upat thleng pawhin a rah thîn ang a; A hring duah hluah hluah ang,

¹⁵Chû chuan LALPA chu mi dik tak a ni tih a lantîr ang; Amah chu ka lungpui a ni a, Amahah chuan dik lohna rêng rêng a awm si lo va.

BUNG 93

PATHIAN ROPUIZIA

¹LALPAN ro a rêl a, ropuinain a inthuum a; LALPA chu chaknain a inthuum ta a. Khawvêl pawh hi tihsawn theih a nih loh nân tihngheh tlat a ni.

²I lalthutthlêng chu hmasâng aţanga din ngheh a ni a; Nang chu chatuana awm tawh i ni si a.

³Aw LALPA, tuiliante an lo sosâng a, Tuipuite chuan an âw an chhuah a; Tuipuite chu nasa takin an fâwn ri hum hum a.

⁴LALPA, hmun sâng taka mi chu, Tui tam tak ri hum humte aain, Tuipui fâwn ri te ai pawha ropui zâwk a ni.

⁵I thuhriattîrte chu a Chiang êm êm a; Aw LALPA, i in chu Thianghlimnain kumkhua atâna cheimâwi a ni.

BUNG 94

PHUBÂ LAK: PATHIAN CHANVO

¹Aw LALPA Pathian, nang phuba latu, Nang, phuba lâkna chungah thuneitu Pathian, lo êng chhuak rawh!

²Tho ta che, âw, nang leia rorêltu; Mi chapo-ho hi han hrem hlawm teh.

³LALPA, mi sualte chu eng chen nge, Mi sualte chu eng chen nge an inlulin dâwn le?

⁴Duh duh an sawi a, chaltlai takin an ţawng mai mai a; Thil sual titute zawng zawng chu mahni an infak chawp thîn.

⁵Aw LALPA, i mite chu an chan darh a, I rochante hi an tiduhdah thîn a ni.

⁶Hmeithai leh mikhual te an tihlum a, Pa nei lo te an that a.

⁷“LALPAN a hmu chuang lo ve, Jakob-ho Pathian pawhin a hre thiam chuang lo vang,” an ti a.

⁸Mi mawlte u, ngun takin ngaihtuah ta che u; Nangni mi â-te u, engtikah nge in fin dâwn le?

⁹Hriatna beng siamtu hian a hre thei lo vang em ni? Mit siamtu hian a hmu thei lo vang maw?

¹⁰Hnam tin zirtîrtu hian a tihdiksak thei lo vang maw? Mihring hnêna hriatna zirtîrtu a ni lo vem ni?

¹¹LALPA chuan mihring ngaihtuahte hi a hre vek a, Engmah lo mai a ni a.

¹²Aw LALPA, i zirtîra chu a nihlawh e, I dân thû i zirtîr si a.

¹³Mi sualte tlâkna tûr khur lai h zawh a nih hmâ chu, An harsatna lakah i chawlhîr dâwn si a.

¹⁴LALPA chuan a mite chu a paih thla dâwn si lo va, A rochan pawh a kalsan hek lo vang.

¹⁵Rorêlnain dikna lam a hawi leh ang a, Thinlung dik tak pu zawng zawng te chuan an zâwm ang.

¹⁶Tu nge thil sual titute mi beihsak tûrin tho vang? Tu nge thil sual titute ep tûrin ka aiah ding ang?

¹⁷LALPA chuan mi pui lo sela chuan Reh hlen vang vangna hmun ka thleng daih tawh ang chu.

¹⁸“Ka rahbi a tlêu,” ka tih lai khân, Aw LALPA, i ngilneihna chuan mi lo châwi kâng a.

¹⁹Ka rilrûa ka ngaihtuah buai êm êm laiin Ka thlâ i timuang a, mi tilâwm thîn a ni.

²⁰Suahsualna lalthutthlêng, verther taka dân tlawhchhana duan chu, Nangmah nêan a inrem thei dâwn em ni?

²¹Mi fel tihhlum tumin an inhâwr khâwm thîn a, Pawi sawi lo thisen chu thiam loh an chantîr a.

²²LALPA erawh chu mi humhimtu a ni a, Ka Pathian chu ka bihrûkna lungpui a ni.

²³Ani chuan an sual ang ngeiin an chungah a tlâktîr a, An khawlohna avângin a tan fithla dêr ang a; LALPA kan Pathian chuan a tiboral vek ang.

BUNG 95

PATHIAN BIAKNA LEH THUÂWIHNA

¹Aw, lo kal ula, LALPA i fak ang u! Min chhandamna Lungpui chu fakim hlim takin i âu ang u.

²Lâwmthu sawiin a hmâah i kal ang u khai; Fakna hlâ sâin hlim takin amah chu i châwimâwi ang u.

³LALPA chu Pathian ropui a ni si a, Amah chu pathian zawng zawng chungah Lal ropui ber a ni.

⁴A kutah chuan lei thûk ber chu a awm a; Tlâng chhîp sâng takte pawh a tâ a ni.

⁵Tuifinriat hi a siam a nih avângin a tâ a ni a; Khawmual pawh hi a kutchhuak a ni.

⁶Aw lo kal ula, chibai bûkin i kûn ang u; LALPA min Siamtu hmâah chuan i thingthi ang u.

⁷Amah chu kan Pathian a ni a, Keini hi a ran tlatna hmuna mite kan ni a, A kuta awm berâmte kan ni si a. Wawin hian a âw in hriat dâwn chuan:

⁸Thlalara fiahna hmuna an awm laia, A laka an hel lai ang khân in thinslung tikhauih suh u,

⁹Khatah khân in thlahtuten mi fiah a, Ka thiltihte hmu reng chungin mi fiah lui tlat a.

¹⁰Khâng mipuite chungah khân kum sawmli chhûng ka lungâwi ta lova, “Rilru kâwi pu tlat mi an ni a, Ka kawng te pawh an hre duh lo a ni,” ka ti a.

¹¹Tichuan, thinurin chhia ka chham ta a: ‘Ka chawlnaah chuan an lût tawp lo vang,’ tiin.

BUNG 96

PATHIAN ROPUIZIA FAKNA

¹Aw, LALPA chawimâwiin hla thar sa ula! Khawvêl zawng zawngte u, LALPA chawimâwiin zai rawh u. ²LALPA fakim zai ula, a hming chu fak rawh u; Min chhandamna Chanchin Tha chu ni tin puang chhuak rawh u.

³Hnam tin hnênah a ropuizia hril vêl ula, Mi tin hnênah a thil mak tihte chu puang chhuak rawh u.

⁴LALPA chu a ropui êm avângin nasa taka fak tûr a ni a; Amah chu pathian dang zawng te aia tih tûr a ni.

⁵Hnam dang pathiante chu milem mai an ni si a, LALPA erawh chu vân siamtu a ni.

⁶A hmâah chuan ropuina leh chawimâwina a awm a; A hmun thianghlimah chuan chakna leh mâwina a awm.

⁷Aw, chhûngkaw tinrêngte u, LALPA chu châwimâwina pê ula, Ropuina leh chakna chu LALPA hnênah hlân rawh u.

⁸LALPA chu a phû êm êm hming ropui pê ula; Thil hlan tûr kengin a biak in tualzâwlah chuan lo kal rawh u.

⁹Aw, mâwina thianghlim inbelin LALPA chu chibai bûk ula! Leia mi zawng zawngte u, a hmâah chuan khûr rawh u.

¹⁰Hnam tin hnênah, “LALPAN ro a rêl a; Khawvêl pawh hi nghet taka din a ni a, A insawn mai mai lo vang a; Ani chuan dik takin mi tinte ro a rêlsak ang,” ti rawh u;

¹¹Vânte khi lâwm sela, lei pawh hi hlim rawh se; Tuifinriat leh a chhûnga thil zawng zawng hi ri hum hum sela;

¹²Lo leh a chhûnga thil zawng zawng hi lâwm bawk sela, Tichuan, ramhnuaia thing zawng zawng pawh an hlim ang.

¹³LALPA hmâah chuan an hlim ang; Ani chu a lo kal leh dâwn si a; Leiah hian rorêl tûrin a lo kal leh ang. Diknain khawvêlah hian ro arawn rêl ang a, Thutakin mi tin chungah ro a rêl ang.

BUNG 97

LAL ROPUI BER

¹LALPAN ro a rêl e; Leilung hi hlim sela; Thliarkâr tam tak chu lâwm rawh se!

²Chhûmte leh thim chhah mup chuan a hual vêl a; Dikna leh rorêlna dik chu a lalthutthlêng nghahchhan a ni.

³A hmâah chuan mei a kal a, Amah hualtu a hmêlmâte chu a hâl ral thîn.

⁴A kâwlpête chuan khawvêl hi a dêt zawr zawr thîn a; Lei chuan a hmuhin a khûr ta a.

⁵LALPA hmâah chuan tlangte chu sathau khâwnvâr angin a tûral a, Lei pumpui LALPA hmâah ngei chuan.

⁶Vânte khian a dikzia a puang chhuak thîn a, Mi tinrêngten a ropuizia an hmu ta.

⁷Milem ker chawp betute zawng zawng chu mualpho vek rawh se, Milim mai mai chhuangtute chu. Nangni pathian zawng zawngte u, amah chu chibai bûk rawh u.

⁸Zion chuan a lo hriatin a lâwm a, Aw LALPA, i rorêlnate avângin Juda fanute pawhin an hlimpui êm êm a ni.

⁹LALPA, nang chu lei pum puiah hian i chungnung ber a; Nang chu pathian zawng zawng chung daihah chawisânin i awm si a.

¹⁰Nangni LALPA hmangaihtute u, sual chu haw rawh u! A mi thianghlimte nun a vawng him thîn a; Mi sualte kut aţangin a chhan chhuak thîn.

¹¹Mi dikte chu a chhun êng thîn a, Thinslung dikte tân lâwmna a lo thleng thîn.

¹²Nangni mi dikte u, LALPA-ah chuan lâwm takin awm ula; A hming thianghlim chu hre rengin lâwmthû sawi rawh u.

BUNG 98

LALPA FAKNA

¹Aw, LALPA fakin hla thar sa rawh u! Thil mak ropui tak te a ti si a; A kut ding lam leh a bân thianghlim chuan hnehna a chang a.

²LALPA chuan a chhandamna chu a hriattîr tawh a; A dikzia chu hnam tinte hmuh tûrin a lantîr ta.

³Ani chuan Israel chhûngte chung a ngilneihzia leh a rinawmzia chu a hre reng a; Khawvêl pum hian kan Pathian chhandamna chu an hmu tawh si a.

⁴Khawvêla mi zawng zawngte u, LALPA châwimâwiin hlim takin au rawh u; Fakna hla sâin hlim takin au tuar tuar rawh u.

⁵Ṭingtang nêen LALPA chu fakin zai rawh u; Ṭingtang tum rî leh fakna hla mawi nêen,

⁶Tâwtawrâwt lian leh tâwtawrâwt tê chi nêen, Lalber, LALPA hmâah chuan hlim takin âu rawh u.

⁷Tuifinriat leh a chhûnga awm zawng zawng chu ri hum hum sela; Khawvêl leh a chhûnga chêngte nêen hian;

⁸Luipuite chuan an kut bêng dur dur sela; Tlângte pawh hlim tlâng dial dial rawh se,

⁹LALPA hmâah chuan. Leiah hian rorêl tûrin a lo kal dâwn si a. Khawvêl hi dik takin ro a rêlsak ang a, Thlei bîk nei lovin mi tinte chungah ro a rêl ang.

BUNG 99

PATHIAN THIANGHLIMZIA FAKNA

¹LALPAN ro a rêl e; Mipuite chu khûr zawih zawih rawh se! Ani chu cherubte inkâra chêng a ni a; Leilung hi ngêng rawh se!

²LALPA chu Zion-ah chuan a ropui a, Mi zawng zawng chung daiha mi a ni.

³Anni chuan i hming ropui leh hlauhawm chu fak rawh se; Ani chu a thianghlim si a.

⁴Lalber chakna chuan dikna a ngaina a; Hleih neih lohna i din nghet a, Jakob-ho zîngah dikna leh felna i kengkawh thîn a ni.

⁵LALPA kan Pathian chu chawi sâng ula, A ke rahchhanah chibai bûk rawh u; Ani chu a thianghlim si a.

⁶Mosia leh Arona te kha a puithiamte zînga mi an ni a, Samuela chu a hming lamtute zînga mi a ni; Anni chuan LALPA chu an ko va, ani chuan a lo chhâng a.

⁷Chhûm ding aţang chuan thû a rawn sawi thîn a; A thuhriattîrte leh dân thû a pêkte chu an zâwm a.

⁸Aw LALPA kan Pathian, nangen anni chu i chhâng a; An thiltih chungah phubâ la thîn mah la, Nang chu anmahni ngaidamtu Pathian i ni alâwm.

⁹LALPA kan Pathian chu châwisâng ula, A tlâng thianghlimah chuan chibai bûk rawh u; LALPA kan Pathian chu a thianghlim si a.

BUNG 100

LÂWMTHU SAWINA HLÂ

¹Ram zawng zawngte u, LALPA hnênah hlim takin âu rawh u!

²Lâwm chungin LALPA rawng bâwl ula: Hla sa chungin a hmâah lo kal rawh u.

³LALPA chu Pathian a ni tih hria ula; Amah chu min siamtu a ni a, mahnia insiam kan ni lo. Ama mite leh a ran tlatna hmuna berâm rualte chu kan ni.

⁴Lâwmthû sawiin a kawngkhârah chuan lût ula, Fak chungin a biak in kawt zâwlah chuan lût rawh u. A hnênah lâwmthû sawi ula, a hming chu fak rawh u.

⁵LALPA chu a ţa êm a; A zahngaihna chu kumkhuain a awm ang a, A rinawmna chu chhuan zawng zawng thlengin a awm ang.

BUNG 101

RINAWMNA THUTIAM

¹Ngilneihna leh dikna hlâ ka sâ ang a; Aw LALPA, nangmah fakin ka zai ang.

²Ṭha tak leh fing takin ka awm zêl ang. Aw, engtikah nge ka hnênah i lo kal ang le? Ka inah chuan thinlung ṭha famkimin ka awm dâwn asin.

³Ka hmuh phâkah thil ṭha lo rêng rêng ka dah lo vang; Tlûksantute thiltih dân hi ka hua a; Ka ngaih theih loh zâwng tak a ni.

⁴Thinlung kâwi chuan mi kalsan sela; Suahsualna thil hi hriat pawh ka hre duh lo ve.

⁵Tûpawh a rûka thenawmte sawi chhiat chng chu, Chû mi chu ka tiboral ang; Mi hawi pir leh thinlung chapote chu, Ka ngaithei tawp lo vang.

⁶Hê rama mi rinawmte chungah hian ka mit a fû ang, Ka hnêna an chên ve theih nân; Kawng ṭha famkim zawhtu chuan Ka rawng a bâwl ang.

⁷Bumhmang chu ka inchhûngah an chên vê ka phal lo; Mi dawheh pawh ka hmuh phâkah a awm tûr a ni lo.

⁸He rama misual zawng zawng hi ka tiboral thuai ang; LALPA khawpui aţanga thil sual titute ka tihbo vek theih nân.

BUNG 102

LALPA CHATUAN HMANGAIHNA

¹Aw LALPA, ka ṭawngţaina hi ngaithlâ la, Ka ṭap rî hian i hnên lo thleng rawh se.

²Ka mangan laiin ka lakah i hmêl thup suh la; Ka lamah i beng rawn chhî la; Ka koh hun chuan mi chhâng thuai ang che.

³Ka dam chhûng nîte hi meikhû angin a zâm ral a, Ka ruhte hi thuk sâ ang maiin a kâng sa vut vut a.

⁴Ka thinlung hi hlobet em vuai ang maia hliamin a awm a, Chaw ei te pawh ka theihngihl hial thîn.

⁵Ka rûm thâwm a nat êm avângin Ka ruh leh vunte hi a inchâr hial a.

⁶Thlâlêr tuivalawng ang ka ni a; Khaw ram chhimbuk ang mai ka ni.

⁷Ka mô hi ka harh reng a, Chawngzawng, in chung a amah chauhva fû ang mai ka ni.

⁸Mi dotute chuan nilêng lêngin min sawi chhe thîn a; Mi diriamtuten chhechhamin ânhhia mi lawh thîn.

⁹Vut hi chaw angin ka ei a, Ka in tûr leh ka mittui te hi a inpawlh thîn a,

¹⁰I lungâwi loh êm avâng leh i thinur nasat êm avângin Mi la kâng a, mi paih bo ta si a.

¹¹Ka dam chhûng hun hi tlai ni tlâk dâwn, hlim thla âwn sei tawh ang a ni a; Hlobet angin ka vui ral ta.

¹²Aw LALPA, nang erawh chu kumkhuaa awm reng tûr i ni a, Nangmah hriat rengna chu chhuan zawng zawng thlengin a awm ang.

¹³Zion tâng lainat tûrin rawn thawk chhuak ang che; Ani chu duhsak a hun tawh si a, Ni e, chu hun tiam chu a lo thlen tâk hi.

¹⁴I chhiahhlawhte chuan a lung te lamin an ngainâ a, A vaivut takngial pawhin an lung a lên thîn a ni.

¹⁵Chuvângin hnam tinin LALPA hming chu an tîh ang a, Leia lal zawng zawng chuan i ropuina chu an zah baw ang.

¹⁶LALPA chuan Zion khawpui chu a din leh dâwn si a, A ropuinaa inthuaamin a lo lang leh ang.

¹⁷Pachhiate tawngtâina chu a ngaihsak ang a, An dîlnate chu a hmusit lo vang.

¹⁸Chû chu thangthar lo la awm tûrte tâna ziaak a ni ang a, A la din tûr hnamte chuan LALPA chu an fak ang.

¹⁹Ani chuan sâng taka a hmun thianghlim aţangin a zuk thlîr a, LALPA chuan lei hi vân aţang khian a rawn thlîr reng thîn.

²⁰Mi tângte rûm thâwm ngaithla tûr te, Thi tûra an rêlho chhuah zalên tûr te,

²¹Zion-a LALPA hming puang chhuaka, Jerusalema amah fak tûr leh

²²LALPA rawngbâwl tûrin mi tinte, Lalram tinte chu a la hruai khâwm ang.

²³Kawng lakah ani chuan ka thâ a tiţhum a; Ka dam chhûng ni a pawt tâwi a.

²⁴Aw ka Pathian, ka vânglai chuan mi la bo suh ang che, Nanga kumte chuan chhuan zawng zawng a huap si a.

²⁵Leilung nghahchhan hi hmasânga i phûm tawh a ni a, Vânte pawh i kut chhuak a ni.

²⁶An la boral ang a, nang chu i awm reng ang; Chûng chu silhfên angin an la hlui ang a; Puan angin i thlâk thar leh ang a, Tihdanglam an lo ni tawh ang.

²⁷Nang erawh chu i pangngai reng a, I kumte chu a tâwp ve ngai dâwn si lo va.

²⁸I bâwihho fate pawh an awm reng ang a, An thlahte chu i hmâah ngelnghet takin an awm tawh ang,” ka ti a.

BUNG 103

LALPA ZAHNGAIHZIA FAKNA

¹Âw ka nunna, LALPA chu fak la; Ka chhûngrila awm zawng zawngte u, a hming thianghlim chu fak rawh u!

²Âw ka nunna, LALPA chu fak la, A ţatna zozâi hi theihngihl suh.

³Ani chuan i khawlohna zawng zawng a ngaidam a, I natna zawng zawng tidamtu a ni.

⁴I nunna pawh boralna aţangin a tlan chhuak che a, Ngilneihna leh lainatnain a vûr thîn che a,

⁵I kê pawh thil ţa takin a titlai thîn a; Tichuan, i tleirâwl na chu mupui anga siam thar a lo ni leh thîn.

⁶LALPA chuan dikna a tung ding thîn a, Hnehchhiaha tuar zawng zawngte tân dik takin ro a rêlsak thîn.

⁷A kawngte chu Mosia hnênah a lo hriattîr tawh thîn a, A thiltihte pawh Israel fate a hriattîr baw a.

⁸LALPA chu mi khawngaih thei, lainatna ngah, thinnel leh Ngilneihnaa khat a ni.

⁹Ani chuan mi a khang ve ngai lo va; A thinurna pawh a pai kumkhua hek lo vang.

¹⁰Kan sual ang êmin kan chungah a ti lo va, Kan khawlohna ang pawhin min hrem hek lo.

¹¹Vân khi lei chung sâng takah a awm angin, Amah ţihtute chungah a ngilneihna chu a nasâ a ni.

¹²Chhak leh thlang a inhlat ang hian, Kan bawhchhiatnate chu kan hnên ata a dah kiang daih a.

¹³Pain a fate a lainat thîn ang hian, LALPA chuan amah ţihtute chu a lainat thîn.

¹⁴Kan taksa ruângâm hi a hre Chiang a; Vaivut mai kan ni tih a hre reng a.

¹⁵Mihring zawng, a dam chhûng nîte chu hlobet ang lek a ni a; Phûl pangpâr angin a han vul vê a.

¹⁶Thlîin a chhêm a, a lêng bo ta mai a; A awmna pawh hriat zui a ni leh tawh thîn lo.

¹⁷LALPA ngilneihna erawh chu Amah ţihtute tân chatuan ata chatuan thlengin a awm ang a, An thlah kal zêl thlengin a ţatna chu a awm ang;

¹⁸A thuthlung zawm duhtute leh, A thupêk âwih tuma chhinchhiah tlattute chungah chuan.

¹⁹LALPA chuan a lalthutthlêng chu vânah khian a rem nghet a; A lalam chuan engkim chungah ro a rêl thîn.

²⁰A Vântirrhok, a mi chak chungchuan, A rawngbâwltu leh a thu zâwmtute u, LALPA chu fak rawh u.

²¹Nangni a sipaiho zawng zawng, A rawngbâwltu leh a duh zâwng titute u, LALPA chu fak rawh u.

²²A thiltih zawng zawng avâng hian, A lalna ram chhûng zawng zawngha LALPA chu fak rawh u. Aw ka nunna, LALPA chu fak rawh!

BUNG 104

SIAMTU PATHIAN FAKNA

¹Aw ka nunna, LALPA chu fak rawh! Aw LALPA ka Pathian, i ropui êm a: Zahawmna leh ropuinaa thuam i ni a,

²Silhfên angin êng hian a tuam che a, Vânte khi puanzâr angin i kâi pharh a.

³Ani chuan tui chungah te khian pindan chungnung a siam a, Chhûmte khi tawlailîrah a siam a, Thli thla chung te chu kal vêl nân a hmang a,

⁴A Vântirhkohte chu thlarauahte a chantîr a; A rawngbâwltute chu mei alhah te a chantîr bawh thîn.

⁵Nang chu leilung nghahchhan hi Kumkhuaa nging lo tura phûmtu i ni si a.

⁶Nang chuan leilung hi puan angin tui thûk takin i tuam a; Tuite chuan tâng sâng chungte chu a chîm pil vek a.

⁷I han zilhhauh chuan tui chu a tâl bo va; I khawpui rî-ah chuan an kiam ta duak a.

⁸Tlâng chungahte a luang liam a, Kawr ruamahte a luang thla zêl a, An awm dân tûr i ruatsak a.

⁹A pelh loh tûrin ramrî i kamsak a, Lei chîm pil tûra a rawn lêt tawh loh nân;

¹⁰Ani chuan kawra luang tûrin tuihnâte a siam a; Tlâng kârah an luang chhuak a.

¹¹Ramsa tinrêngte chênna in tûr an pe thîn a; Ram sabengtungte pawhin an tuihâl an tireh thîn.

¹²A kamahte chuan chunglêng savâten bû an khuar a; Thing zârahte chuan an hrâm thîn.

¹³A pindan chungnung aţangin tlângte chu ruahtuiin a châwm a; I hnathawh rahah leilung hi a tlai thîn a ni.

¹⁴Rante tân hlobet a ʔotîr a, Mîhringte tân thlâte a ʔiahtîr bawh a, Lei chuan ei tûr a chhuah thîn a ni:

¹⁵Mîhring thinlung tilâwmtu uain te, A hmai tuai hnûmna hriak te leh, Mîhring tâna chakna siamtu chaw nê.

¹⁶LALPA thingte chu tuihnângin a khat a; Lebanon tlânga sidar thing a phun te chu.

¹⁷Chutah chuan savâten bu an chhep thîn; Fâr thingte chu kânghlâte chênna in a ni a.

¹⁸Khâm sângte chu sathârte tân a ni a; Lungpui keh kârte chu sangâwite tawmkûk a ni thung.

¹⁹Ani chuan thlâ khi hunbi thliah nân a ruat a; Nî khian tlâk hun a hai ngai hek lo.

²⁰Nangin thim i siam a, chû chu zân a ni a; Ramhnuaia sa tinrêngte tân vah chhuahna hun a ni ve thung.

²¹Sakeibaknei tuaite chuan an sa seh tûr an rûm khum a, Pathian hnên ata chaw an zawn thîn.

²²Ni a lo chhuak a, an inpan khâwm a, An awmna pûkah an bawh a.

²³Mîhring chu hna thawk tûrin a feh a, Tlâi thlengin a thawk thîn.

²⁴Aw LALPA, i thiltihte chu a va tam êm! Finnaa i siam vek an ni. Leilung hi i hausaknain a khat a ni.

²⁵Sâw tuipei zau leh lian takah sâwn, Nungcha chhiar sên loh an zi nuai nuai a, Nungcha lian leh tereuhtê te nê.

²⁶Sâwta saw, lawng liante an kal ruau ruau mai; Leviathan pawh a awm bawh a, Infiam tûra i siam anga a lêu zuai zuai saw.

²⁷An zavaiin nangmah an ngaichang vek che a, A hun taka chaw i pêk theihna tûrin.

²⁸I pêk ang ang chu an lo chhar mai thîn a; I kut i han phar chuan, thil thain an lo tlai thîn a ni.

²⁹I hmel i thup chuan an mangang a; An thâw i laksak chuan an thi a, vaivutah an kîr leh thîn.

³⁰I Thlarau chu i tîr chhuak a, siam an lo ni ta mai a; Leilung lan dân pawh i siam thar leh thîn.

³¹LALPA ropuina chu kumkhaw daih ni se; LALPA chu a hnathawhah hlim rawh se.

³²Ani'n lei a han en a, a lo khûr thîn a; Tlângte chu a han khawih a, a lo khu chhuak a.

³³Ka dam chhûngin LALPA ka chawimâwi ang a; Nung dama ka awm chhûng zawn ka Pathian fakîn ka zai ang.

³⁴Ka ngaihtuahna hi a tân lo thlum veng veng sela; Tichuan, LALPA-ah ka hlim ang.

³⁵Mi sualte chu lei aţanga tihbora ni sela, Mi suaksualte chu awm tawh suh se. Aw ka nunna, LALPA chu fak rawh! LALPA chu fak rawh u.

BUNG 105

A MITE TÂNA PATHIAN RINAWMZIA

¹Aw, LALPA chu lâwmthû hrilh rawh u! A hmingin ko ula; Mi tin hnênah a thiltihte chu hriattîr rawh u!

²Amah chawimâwiin hla sa ula, zai rawh u; A thil mak tih zawn zawn chu sawi darh rawh u.

³A hming thianghlim chu zah ula; LALPA zawngtute thinlung chu hlim rawh se!

⁴LALPA leh a chakna chu zawn ula; A hmêl chu zawn fo rawh u.

⁵A thil mak tihte chu hre reng ula, A thil makte leh a kâa rorêlna thûte nê.

⁶Aw, a chhiahhlawh Abrahama thlahte u, Nangni Jakoba thlahte u, a thlan che u kha!

⁷Amah chu LALPA kan Pathian a ni a; A rorêlnate chuan lei pum pui a dâp chhuak vek a.

⁸A thuthlun tawh chu a hre reng thîn a, Chhuan sâng khat thleng pawhin a thupêk chu a hre reng thîn;

⁹Abrahama hnêna a thuthlun leh, Isaaka hnêna a chhechham chu.

¹⁰Chûng chu Jakoba thlahte tân dân nghetah a siam a, Israelte tân kumkhaw thuthlung a ni:

¹¹“Kanaan ram hi ka pê ang che, I chanpual atân,” tiin a tiam a,

¹²Mi tlênte chauh an nih lai khân; A ni, an tlêm bâkah, mikhual mai an ni lehngal a.

¹³Hnam hrang hrang kârah an pêm kâwi thîn a, Ram khat aṭangin ram dangah an kal zêl a.

¹⁴Tûma tihduhdah a phal lo va; Ni e, anmahni chhanin lalte pawh a zilhhâu va,

¹⁵“Ka hriakthiha-te hi tawk suh ula, Ka zâwlneite pawh hi khawih rêng rêng suh u,” a ti thîn a ni.

¹⁶Chû ramah chuan tām a tlâktîr a; An buh leh bâl zawng zawng a tihchhiatsak vek a.

¹⁷An hmâah mi a tîr a; Josefa chu sal anga hralh a ni a.

¹⁸A kêah kawl an buntîr a; Thîr khaidiatin an thlung a.

¹⁹A thu lo sawi lâwk anga a lo thlen hmâ loh chuan, LALPA thû chuan ani chu a fiah thîn a.

²⁰Lal chuan chhuah tûrin mite a tîr a, Mipui rorêltu chuan a chhuah zalên ta a.

²¹An chhûngkaw chungah hotûah a siam a, A neih zawng zawng chungah thuneitu berah a dah ta a,

²²A mi liante chu a duh duha thû pê a, A upahote chu finna zirtîr thîn tûrin.

²³Israela pawh chu Aigupta ramah a zuk kal a; Tichuan, Jakoba chu Hama ramah chuan a chêng ve ta a.

²⁴A mite chu nasa takin a tipung a, An hmêlmâte aia chak zâwkin a siam a.

²⁵A chhiahhlawhte chungah verther taka inluling tûrin, An thinlung chu ama mite a huattîr ta a.

²⁶A chhiahhlawh Mosia chu a tîr a, A mi thlan Arona nê.

²⁷A chhinchhiahnate chu mite hnênah chuan an entîr a, Hama ramah chuan thil makte an entîr a.

²⁸Thim a awmtîr a, a lo thim ta vek a; A thû chu an hnial thei ta lo va.

²⁹An tuite chu thisenah a chantîr a, An sanghate chu a tihlum vek a.

³⁰An ram chu chungû-in a khat a, An lalte pindanah pawh a khat vek a.

³¹Thû a han pe leh a, tho a lo puang ta a, Hrik pawh an ram chhûng zawng zawngah a puang baw a.

³²Ruah aiah rial a pê a, An ramah chuan mei alh de zuai zuai a pe tel baw a.

³³An grêp hruite leh an theipui kûngte a nuai chhiatsak a; An rama thingte chu a phîn darh vek a.

³⁴Thû a pe leh a, khaukhuap a lo puang ve thung a, Khaukhuap chhiar sên loh a lo awm ta a,

³⁵Chûngte chuan an rama thlai zawng zawng an ei zo va, An thlâi tharte chu an ei zo ta vek a.

³⁶An ram puma an fa tîr zawng zawng a tihlum baw a, An fa hmêl hmuh hmasak berte chu.

³⁷Silvar leh rangkachak nê a hruai chhuak ta a, A mite zîngah mi chhumchhia bîk pawh an awm lo.

³⁸Anmahni hlauhna an thâuvah a man tlat avângin An kal chhuah lai chuan Aigupta-ho chu an lâwm hle a.

³⁹Daihlîm atân chhûm a zâmtîr a, Zan thim tiêng tûrin êng a pê a.

⁴⁰Mite chuan an ngên a, tichuan vahmîm arawn tîr a, Vên lam chaw-in a hrai tlai a.

⁴¹Lungpui chu a han hawng a, tui a lo chhuak huau huau va; Ram rovah chuan lui ang maiin a luang dum dum a.

⁴²A chhiahhlawh Abrahamah hnêna A thutiam thianghlîm kha a hriat reng avângin.

⁴³Tichuan, a mite, a mi thlante chu, Hlim leh lâwm takin a hruai chhuak ta a.

⁴⁴Jentailho ramte chu an tân a pê a, Hnam dangho thawh chhuah sâ chu an va neihsak ta a,

⁴⁵A thupêkte an âwih a, A dânte an zawm theih nân. LALPA chu fak rawh u!

BUNG 106

PATHIAN LAKA ISRAELTE RINAWM LOHZIA

¹LALPA chu fak rawh u! Aw, LALPA hnênah lâwm thû sawi rawh u, ani chu a ṭha si a! A ngilneihna chu chatuan daih a ni si a.

²Tu nge LALPA thiltih ropui takte chu sawi thei a, Tu nge a fakawmzia hril zo thei ang?

³Englai pawha ṭha taka titute leh, Dikna vawng tlattute chu an nihlawh e!

⁴Aw LALPA, i mite i duhsakna rilru khân mi hre reng la, Aw, i chhandamna nê mi kan ang che,

⁵Tichuan, i mi thlante nihlawhzia ka hmuh theih nân leh, I hnamte lâwmna chu ka hlimpui ve a, I rochanho ka lo chhuan ve theih nân.

⁶Mîn thlahtute nê khân kan lo sual ta si a, Thil sual kan ti a, Sual takin kan ti a ni.

⁷Mîn thlahtuten Aigupta rama i thil mak tihte kha an hre thiam lo va; I zahngaihna nasatzia lah an hre thei dêr si lo va, Tuipui Sen kamah te khân an hel leh ta ngâl a.

⁸Chutichung chuan, ama hmîng avâng chauhvin anni chu a chhandam a, A thiltihtheihna ropui a hriattîr theihna tûr a ni si a.

⁹Tuipui Sen pawh a han zilh a, a kangchat ta mai a; Tichuan, tui thûk tak chu paltlangin, Ram rova kal angin a hruai kai a.

¹⁰Anmahni hawtute kut aṭang chuan a chhan chhuak a, Hmêlma kut aṭangin a tlan chhuak ta a.

¹¹Hmêlmâte chu tuiin a vûr pil vek a, Pakhat mah dama chhuak an awm lo.

¹²Tichuan, a thû chu an âwih ta a; Amah fakin an zâi dual dual a.

¹³Mahse, a thiltihte chu an theihngihl leh thuai a; A thû pawh an ngaichâng duh leh ta lo va,

¹⁴Thlalêrah chuan an tîsa châkna a sosâng nasa hlê a, Thlalêrah khân Pathian an fiah ta hial a.

¹⁵An thil ngiat chu a pê a, Mahse an thlarau nunah chêrna a pe tel a.

¹⁶An riahhmuna Mosia an itsik hnû chuan, LALPA mi thianghlim Arona pawh an hmer tel vê nghâl a,

¹⁷Lei chuan a kê a âng a, Dathana chu a lem pil daih a, Abirama pâwlte pawh a chhill bo vek a.

¹⁸An pâwl zîngah chuan kângmei a lo chhuak a; Meialh chuan misualho chu a kâng ral ta a.

¹⁹Horeb tlângah khân bâwng no lim an chhûng a, Chû milim chhûn chawp chu biain chibai an bûk ta a.

²⁰Chutiang chuan an ropuina chu Hlobet pet thîn bâwng lim ang lekah an chantîr ta a ni.

²¹Aigupta rama a thiltih ropuite leh Anmahni chhandamtu Pathian meuh pawh an theihngihl ta a,

²²Hama rama thil mak tak tak a tihte, Tuipui Sen kama thil ropui a tihte kha an theihngihl ta si a.

²³Chuvângin, tihboral vek a tum thû a sawi kha, A mi thlan Mosia khân dan kîr tumin, An kârah khân ding lo se zawng, A thinrim khân a tiboral vek ang chu.

²⁴Chumi hnûah ram duhawm tak chu an han iai leh vêl a; A thû kha an âwih duh thlâwt lo va ni.

²⁵An puan inahte khân an phun mur mur a, LALPA âw pawh an ngaithla duh lo va.

²⁶Chuvângin anniho chu thlalêra tlûk hlumtîr vek tûrin, Chhe chhamin kut a phar khum ta a,

²⁷An thlahte chu hnam tin zînga a tihtlûk a, Ram tina a hnawh darh theih nân.

²⁸Peor hmunah khân Baala an biaksan leh bawk a, Mitthi thlâi chhiahna sâ chenin an ei vê ta zêl mai a.

²⁹Chûng thiltihte chuan a tithinur a, An chungah pulh hrî a lo lêng ta a.

³⁰Phinehasa kha lo ding chhuakin a rawn inrawlh vat a, Hrilêng chu a kiang ta a.

³¹Chû chu ama thiamchannaa ruat a ni ta a ni, Kumkhuain, chhuan zawng zawng thleng pawhin.

³²Meriba tuiah pawh khân an tithinur tawh bawk a, Anmahni avângin Mosia pawhin chhiat a tawh phah ta a nih kha.

³³A Thlarau laka an hel avângin, Ani khân sawi loh tûr tûr a sawi phah ta a ni.

³⁴LALPAN tiboral tûra thu a pêk angin An hmêlmâteho chu an tichimit duh lo va,

³⁵Jentail hnamte nêan an inchawh pawlh a, An tih dante an zir ta zâwk a;

³⁶An milimte rawng an bâwl a, An tân thangah an lo chang ta a.

³⁷Inthâwi nân an fapate hial an hlân a, An fanute chu ramhuaiho hnênah an hlân bawk a,

³⁸Pawi sawi lo thisen an chhuah a, An fapate leh an fanute thisen ngei chu. Chûngte chuan Kanaan ram milem pathiante hnênah an inthâwi a; Thisen chhuahnain ram chu an

tibawlhhlawh ta a ni.

³⁹Chutichuan, an thiltih ngeiin an inti khawlo zo va, Anmahni thiltih ngeiin an lo uirê ta.

⁴⁰LALPA thinurna chu a mite chungah a alh chhuak a, A rochanhote chu a ten ta hluah hluah a.

⁴¹Anni chu Jentailte kutah a pê a, Anmahni hawtute chuan an chungah ro an rêl ta a.

⁴²An hmêlmâte chuan an rap bet a, An thuhnuaiah an kûn ta tlawk tlawk a.

⁴³Vawi tam tak a chhan chhuak thîn a; Mahse an hel lui zêl a, An khawloh êm avângin pailh thlakim an awm leh thîn a ni.

⁴⁴Mahse, manganga an âu thâwm a lo hriat chuan A ngaihsak leh nge nge thîn a.

⁴⁵Anmahni tâna thû a thlunsak chu a theihngihl thei si lo va, A ngilneihna nasa tak avângin a inhnûk hniam leh thîn a ni.

⁴⁶Sala hruaitu zawng zawngte pawh Anmahni a khawngaihtîr a.

⁴⁷Aw LALPA kan Pathian, min chhan chhuak la, Jentail hnam zîng aţang hian min hruai khâwm leh ang che, I hming thianghlim fak tûr leh Chhuang taka kan fak theihna tûr chein.

⁴⁸LALPA, Israel-ho Pathian chu fakin awm rawh se, Chatuan ata chatuan thlengin! Mi zawng zawngin, “Amen,” ti rawh se. LALPA chu fak rawh u!

BUNG 107

BU V : PATHIAN CHHAN CHHUAHNA ROPUI FAKNA

¹Aw, LALPA hnênah lâwmthu sawi rawh u; ani chu a ţa si a! A ngilneihna chu kumkhua atân a ni si a.

²LALPA tlante chuan chutiang chuan sawi rawh se, Anni chu hmêlma kut ata a tlan chhuahte an ni si a.

³Ram tin aţangin a hruai khâwm a, Chhak lam aţang te, thlang lam aţang te, Chhim lam aţang te, hmar lam aţangtein.

⁴Thlalêr ram kilkhâwrahte chuan an vâk an vâk a; Chênna tûr khua rêng an hmu si lo va.

⁵Rilţâm leh tuihâl rêng rêngin, An chhûng lam nun pawh a chau zo ta.

⁶An mangan êm avângin LALPA chu an âu va, Ani chuan an harsatna ata chu a chhan chhuak a.

⁷Mihring chênna khua an thlen theih nân Kawng ngîl takah a hruai ta a.

⁸Aw, mihringte hian LALPA ţatna avâng leh, Mihring fate tâna a thil mak tihte avâng hian lâwmthu sawi teh sela aw!

⁹Ani chuan thlarauva tuihâlta a titlai a, Nun rilţâmna chu ţatnain a titlai a.

¹⁰Mi thenkhat chu thim hnuaiah leh thihna hlimah an ţhû a, Hrehawmna leh khaidiata phuar an ni;

¹¹Pathian thupêk an helsan avâng leh, Chungnungbera remruat an ngaihnêp avângin

¹²An thinlung chu thawhrimnain a pawt kûn a; An tlûkpui a, tanpuitu tûr rêng an awm lo.

¹³Chutia an buai lai chuan LALPA chu an âu va, Ani chuan an manganna ata chu a chhan chhuak ta a.

¹⁴Thim hnuai ata leh thihna hlim ata chu a hruai chhuak a, An phuarna khaidiatte chu a paih darh a.

¹⁵Aw, mihringte hian LALPA thatna avâng leh, Mihring fate tâna a thil mak tihte avâng hian lâwmthû sawi sela âw!

¹⁶Ani chuan dâr kawngkhârtte chu a tichhia a, A kalhna thîr tlâwnte chu a tibung a.

¹⁷Mi â-te chu an bawhchhiatna avâng leh, An khawlohnate avâng hrehawm tuar an ni.

¹⁸Ei chỉ tawh phawt chu an nunin a ngei a, Thlân kotlâng an hnaih tial tial a.

¹⁹Chutianga an mangannaah chuan LALPA chu an âu va, Ani chuan an hrehawmna ata chu a chhan chhuak thîn.

²⁰A thû chu a tîr chhuak a, anni chu a tidam thîn a, An boralna tûr lakah a chhan chhuak leh thîn.

²¹Aw, mihringte hian LALPA thatna avâng leh, Mihring fate tâna a thil mak tihte avâng hian lâwmthû sawi teh sela âw!

²²Lâwmthu sawi inthâwinatê chu hlân sela, A thiltihte chu hlim takin hril rawh se.

²³Mi thenkhat tuifinriatah lawnga zina, Tuipui zâu a sumdâwng thînten,

²⁴Hengte hian LALPA hnathawh an hmu a, Tui thûk chhûnga a thil mak tak takte nen.

²⁵Ani chuan thû a pê a, thlipui a tlehtîr a, Chû chuan tuifâwnte chu a vawrh sang thîn.

²⁶A vânvawrh chho vak vak a, Thûk takah an tla thla leh thîn a; An manganna avângin an nun chu a tuiral vek thîn.

²⁷Zu rui angin an thle tawn a, an pai nawk nawk a, Mû leh mal nei lo lêkin an awm thîn.

²⁸An thlaphân êm avângin LALPA chu an âu va, Ani chuan an manganna ata chu a hruai chhuak thîn.

²⁹Thlipui chu a tireh a, Tichuan, tuifâwnte chu a reh duak thîn.

³⁰Chutia a reh tâk avâng chuan an lâwm a; An duhna hmun ralmuangah chuan a hruai thleng thîn a ni.

³¹Aw, mihringte hian LALPA thatna avâng leh, Mihring fate thilmak a tihsak avâng hian lâwmthû sawi teh sela âw!

³²Mipui pun khâwmna hmunah te chuan amah chu han fak tehrêng sela, Upaho zîngah te pawh fak rawh se.

³³Ani chuan luipuite chu thlalêrah a chantîr a, Tuihnâte chu lei rovah a chantîr bawh thîn.

³⁴A chhûnga chêngte suahsualna avângin Ram tha chu ram chhiaah a chantîr thîn.

³⁵Thlalêr chu dilah a chantîr a, Ram ro chu tuihna awmna hmunah a chantîr bawh thîn.

³⁶Chutah chuan rilâtête chu a awmtîr a, Chênna tûr khawpui an din theih nân.

³⁷Thlawhmmâte an nei a, grêp huante an siam a, Hlâwk taka thlai an thar theih nân.

³⁸Ani chuan mal a sâwm a, nasa takin a tihpunsak a; An ranvulhte an rîral a phal lo va.

³⁹Hnehchhiahnate, hrehawmna te leh lungngaihate hmanga, Tihlâwma hnuh hniam an nih laiin,

⁴⁰Ani chuan an mi liante chungah hmuhsitna a thlen a, Kawng pawh awm lohna thlalêrah a vahvaihtîr a.

⁴¹Retheite chu hrehawmna ruam aţangin hmun sângah a châwi kâng thîn a, Ran rual ang maiin chhûngkaw hung tak a siamsak a.

⁴²Chû chu an hmuhin mi dik takte chu an lâwm thîn a, Suahsualna kê zawng zawng chu a ngâwi ta reng a.

⁴³Mifing tûpawhin hêng thûte hi an vawng tha ang a, LALPA ngilneihzia chu an hrethiam ang.

BUNG 108

PATHIAN CHAKNAA HNEHNA

¹Aw Pathian, ka thinlung hi a nghet a ni; Hlâ ka sâ ang, amah fakna hlâ chu, thinlung takin ka fak ang.

²Perkhkuang leh tîngtangte u, harh r'û! Kei chuan khawfing ka âu chat dâwn asin.

³Aw LALPA, mite hmâah ka fak ang che, Hnamte hmâah pawh nangmah fakin ka zai ang.

⁴I ngilneihna nasatzia chuan vâna a khûm a, I thutak chuan chhûmte khi a han tawng pha hial a.

⁵Aw Pathian, nang chuan vâna aia sâng daihin châwimâwina chang la, I ropuina chu lei pum pui chungah hian châwimâwi ni bawh rawh se.

⁶I duh laite hi chhan chhuah an nih theih nân, I kut ding lamin chhandam la, min chhâng ang che.

⁷Pathianin a thianghlimnain tihian a sawi: “Ka hlim ang a; Sekem khua chu ka then ang a, Sukoth ruam chu ka phel darh vek ang.

⁸Gilead chu ka tâ a ni a; Manase pawh ka tâ a ni; Ephraim hi ka lû atân thîr lukhum a ni a; Juda chu ka lalna hmun a ni.

⁹Moab chu ka insilna bêl a ni a; Edom chungah ka pheikhawk ka paih ang a; Philistia chungah hnehna ka chang ang,” tiin.

¹⁰Khawpui nghet takah tuin nge mi hruai lût ang? Edom-ah tûin nge mi hruai ang?

¹¹Aw Pathian, nang hi i ni lo'm ni min thlauhthlatu chu? Aw Pathian, kan sipaihote zîngah i tel vê ta si lo.

¹²Kan manganna lakah min tanpui ang che, Mihring puihna te chu eng tihna mah a ni si lo va.

¹³Pathian zârah huai takin kan chê ang, Ani chu kan hmêlmâte rap bettu tûr a ni si a.

BUNG 109

HMÊLMÂTE DO TÛRA NGENNA

¹Aw, ka fak nin loh Pathian! Ngâwi reng suh ang che;

²Mi sual leh bumhmangte chuan Ka lakah an kâ min ânkhum tâk hi; An lei dawthei tak mai chuan min sawi chhe buan buan a.

³Huatna thù hlîrin mi hual vêl a, Chhan awm lovin min bei reng a.

⁴Ka hmangaih tehrêng nê, mi hêktûah an tâng hlahv va, Tawngtâi lamah ka ramtâng ta ringawt mai a ni.

⁵Anni chuan thil thâ chu sualin mi thungrûl a, Ka hmangaihna chu huatnain mi rûl bawh a.

⁶Nangin a chungah mi sual dah la, A dîng lamah Setana dintîr ang che.

⁷Rorêl saka a awm hunah thiam loh chang rawh se, A tawngtâina pawh sualah chang rawh se.

⁸A dam chhûng nite chu tâwi sela, Mi dangin a dinhmun chu luah rawh se.

⁹A fate chu pa nei lovin awm sela, A nupui chu hmeithaiah chang rawh se.

¹⁰A fate chu vâkvâi rêng rêngin awm sela, kut dawh sela; An ei tûr chu an in ram chhe kâr aţangin dap rawh se.

¹¹Tangka puktîrtuin a neih zawng zawng chu a bâ aiah lâksak vek sela, Hriat loh miten a thawh chhuah sâ chu rawk vek rawh se.

¹²A chungah tuma'n lainatna lantîr hauh suh se; Fapa a nei lo chu tuma'n lainat hek suh se.

¹³A thlahte pawh thi mang vek sela, Thangthar lo chhuak tûr awm lovin an hming chu bo hlahv rawh se.

¹⁴An thlahtute khawlohma chu LALPA hmâah hriat reng ni sela, A nu sualna chu thâi bosak ni suh se.

¹⁵Chûngte chu LALPA hmâah lang reng sela, Lei aţanga anmahni hriat zuina a bo vek theih nân;

¹⁶Ngilneihna lantîr nachâng a hriat loh avâng te, Mi rethei leh pachhiate a tihduhdaha, Thinlunga lungchhiate tihhlum a tum thîn avângin.

¹⁷Ânhhe lawh hmang mi a nih ang ngeiin ama chungah tlâ sela; A ngaihnêp êm êm malsâwmna chuan amah chu hlat daih rawh se.

¹⁸Ânhhe lawhna chu kawr angin a ha thîn a, Tichuan, a kawchhûngah tui angin lût sela, A ruhahte chuan hriak angin lût bawh rawh se.

¹⁹Chû chu a silhfên inbel thîn ve rêng angin awm sela, Kawnghrên angin a tâiah inhrêng reng rawh se.

²⁰Chûng chu mi hêktute chungah LALPA thungrulhna ni sela, Keimah min sawi chhiat vâng a hlawh ni rawh se.

²¹Nimahsela, âw Lalpa PATHIAN, Kei chu i hming avângin tha takin mi ti ang che; I ngilneihna a thât êm avângin mi chhan chhuak bawh ang che.

²²Mi rethei leh pachhia ka ni a, Ka lungriah hian hliam ka tuar si a.

²³Hlimthlâ fiah tawh lo ang ruai hian ka thâm ral ri ai ri ai a; Khaukhuap anga len bovin ka awm a.

²⁴Ka khûpte hi chawnghei vângin a zâwi zo tawh a; Ka chêr chhe ngawih ngawih a.

²⁵Anni tân lah sawi chhiatna remchângah ka lo tâng bawh si; Min hmuhin an lû mi thîn khum thîn.

²⁶Aw LALPA, ka Pathian, min pui rawh! I ngilneih êm avângin mi chhandam ang che.

²⁷Chû chu i kutthlâk a ni tih an lo hriat a, LALPA, nangma tih ngei a ni tih an lo hriat theihna tûrin.

²⁸Anni chuan ânhhia lawh se, nang chuan malsâwm zâwk ang che; Lo tho sela, mualpho sela, I chhiahhlawh erawh chu hlim rawh se.

²⁹Mi hêktute chuan mualphona puan sin sela, Hmingchhiatna puanin anmahni chu khuh vek rawh se.

³⁰Ka kâin LALPA chu nasa takin ka fak chiam ang; Ni e, mipui hmâah ngei amah chu ka fak ang.

³¹Ani chu pachhiate dîng lamah a dîng ang a, Thiam loh chantîrtute lakah a chhan chhuak bawh ang.

BUNG 110

PUITHIAM-LALBER FAKNA

¹LALPA chuan ka Lalpa hnênah, “I hmêlmâte i ke ngahchhana ka siam hmâ loh chu Ka dîng lamah thu rawh,” a ti a.

²LALPA chuan i chakna tiang chu Zion aţangin a tîr chhuak ang. I hmêlmâte zîngah rorêl ang che!

³Thiltitheia i awm nîah chuan, I mite chu anrawn inpe zung zung mai ang, Mâwina thianghlim inbelin, zîng khaw lo vâ aţang chuan, I tleirawl lai daifim chu i chhar leh ang.

⁴LALPAN chhia a chham tawh a, A thù chu a sût tawh lo vang, “Nang zawng Melkizedeka awm dân anga chatuana puithiam i ni e,” tiin.

⁵LALPA chu i dîng lamah a awm a; A thinur nîah lalte chu a la tihlum ang.

⁶Hnam tinte ro a rêlsak ang a, Hmun tinah mitthi ruang a lum rem rum ang a, Ram tam tak lalte chu a tihlum ang.

⁷Kawng sîra luite tui a in ang a; Tichuan, a lû chu a chawisâng tawh ang.

BUNG 111

PATHIAN THILTIH MAKTE AVÂNGA FAKNA

¹LALPA chu fak rawh u! Mi dikho kal khâwm leh inkhâwmpuinaah chuan Ka thinlung zawng zawngin LALPA chu ka fak ang.

²LALPA thiltithe chu a ropui a, A nginatuten ngun takin an chhût thîn.

³A thiltithe chu a zahawmin a ropui a, A dikzia chu chatuan daih a ni.

⁴Ani chuan a thil mak tihte chu hriat reng tûra a tih a ni a; LALPA chu mi khawngaih thei leh lainatnaa khat a ni.

⁵Amah thitute chu ei tûr chaw a pe thîn a; A thuthlung chu a ngaihven zui reng ang.

⁶A hnathawh aṭangin a thiltihtheihzia a mite hnênah a puang a, Hnam tin rochan chu anmahni a pe ṭhîn.

⁷A kuta a thiltihte chu thutak leh dikna a ni a; A thupêk zawng zawng chu a rintlâk vek a ni.

⁸Chûng chu kumkhuain a dîng nghet ang, Thutak leh diknaa thawh chhuah a ni si a.

⁹Ani chuan a mite tân tlanna a siamsak a; A thuthlung chuan chatuan daih tûrin thû a pê a: A hming chu Thianghlim leh ṭhîbaiawm a ni.

¹⁰LALPA ṭih hi finna ṭobul a ni a; A thupêk zâwmtute chuan hriat thiamna ṭhâ an nei ṭhîn. Amah faknain chatuan a daih si a.

BUNG 112

MI DIKTE NIHLAWHZIA

¹LALPA chu fak rawh u! A thupêkte tihtakzeta lâwmpuitu, LALPA ṭih mi chu a nihlawh e.

²A thlahte chu leiah hian an chak zêl ang a; Mi nun ngîl thlahte chuan malsâwmna an dawng ang.

³A inah sum leh hausakna a awm ang; A dikna chu chatuan daih a ni.

⁴Mi nun ngîl tân chuan thimah pawh êng a lo chhuak ṭhîn; Ani chu mi khawngaih thei, lainatna leh diknaa khat a ni.

⁵Mi ṭhâ chuan phal takin a pûktîr ṭhîn a, Dik takin thil a ti ṭhîn.

⁶Engtikah mah a nghîng lo vang a; Mi dik chuan kumkhuaa mi hriat a hlawh ṭhîn.

⁷Chanchin ṭha lo tak takin a tihlau ve lo vang; LALPA a rinchhan a, a thinslung chu a nghet tlat a.

⁸A thinslung chu tihngheh a ni a; A hlau lo vang. A hmêlmâte chung a duh ang thil thleng a la hmû ang.

⁹A sem darh a, Pachhiate a pê a; A dikna chu kumkhaw daih a ni a; A kî chu zahawm taka châwi sân a la ni ang.

¹⁰Mi sualin a lo hmuh chuan, a thinur ang a; A ha chang a ṭhial ang a, a tui al ang; Tichuan, mi sual duh zâwng chu a boral ang.

BUNG 113

LAINATTU PATHIAN FAKNA

¹LALPA chu fak rawh u! Aw, LALPA chhiahhlawhte u, fak ula, LALPA hming chu fak rawh u!

²LALPA hming chu fakîn awm rawh se. Tûn aṭanga kumkhuain!

³Ni chhuahna aṭanga a tlâkna thlengin LALPA hming chu fak tûr a ni.

⁴LALPA chu hnam zawng zawngte chung daiha mi a ni a, A ropuina chu vân aia sân a ni.

⁵Hmun sân taka chêng, LALPA kan Pathian ang hi tu nge awm thei ang?

⁶Vâna thil awmte leh leia thil awmte en tûra Intitlâwm thei hi tu nge awm?

⁷Ani chuan mi rethei chu vaivut ata a tung dîng ṭhîn a, Pachhia chu êkdûr aṭangin a châwi kâng ṭhîn;

⁸Mi liante nêna zâi khata an luan theih nân, Ama mi lianhote zîngah ngei chuan.

⁹Hmeichhe ching hnênah chênna in a pê a, Chhangchhe nu ang maiin a hlim ta. LALPA chu fak rawh u!

BUNG 114

ISRAEL MITE CHHAN CHHUAHNA HLA

¹Israelten Aigupta an chhuahsan a, Jakoba faten awze ṭawng hmangte an kalsan lai khân,

²Juda-ho chu a hmun thianghlim an lo ni a, Israel ram chu a lalna ram a ni bawk a.

³Tuifinriatin a lo hmû a, a tlân bo va; Jordan lui chu luan kirtîr a ni a.

⁴Tlâng liante chu berâmpâte angin an zuang a, Tlâng têtê chu berâmno angin an zuang bawk a.

⁵Aw nang tuipei, engtizia nge i tlânchhiat le? Aw nang Jordan, engati nge i luan kîr leh tâk?

⁶Aw tlâng liante u, berâmpa anga in zuan le? Aw tlâng têtê u, berâm no anga in zuan tâk?

⁷Aw leilung, LALPA hmâah chuan khûr rawh, Jakob-ho Pathian hmâah ngei chuan,

⁸Ani chu lungpuite dila chantîrtu a ni a, Meilung pawh tuihnâa chantîrtu a ni.

BUNG 115

MILEM AIA PATHIAN RINTLÂKZIA

¹Aw LALPA, keini ni lovin, keimahni pawh ni hek lovin, I hming chauh chu ropuina pê ang che, I ngilneihna leh i thutak avângin.

²Engati nge Jentailten, “Khawiah nge an Pathian chu?” an tih le?

³Kan Pathian chu vânah a awm a, A duh apiang a ti ṭhîn a ni.

⁴An milemte chu tangka leh rangkachak a ni a, Mihring kut chhuak mai an ni.

⁵Kâ an nei a, mahse an ṭawng thei si lo; Mit an nei a, mahse an hmu thei si lo;

⁶Beng an nei a, mahse an hre thei si lo; Hnâr an nei a, mahse rim an hre thei si lo;

⁷Kut an nei a, mahse engmah an khawih thei si lo; Kê an nei a, mahse an kal thei si lo; An hrawkin rî an chhuah thei hek lo.

⁸Heti ang siamtute hi, an thilsiamte nên angkhat reng an ni; Anmahni ringtute pawh an dang chuang lo.

⁹Aw Israel, LALPA chu ring rawh; Ani chu anmahni puitu leh an phâw a ni.

¹⁰Aw Arona chhûngte u, LALPA chu ring rawh u; Ani chu anmahni puitu leh an phâw a ni.

¹¹Nangni LALPA tihntute u, LALPA chu ring rawh u; Ani chu anmahni puitu leh an phâw a ni si a.

¹²LALPA chuan min hre reng a; Mal min sâwm ang; Israela chhângte chu mal a sâwm ang a; Arona chhângte chu mal a sâwm ang.

¹³LALPA tihntute chu mal a sâwm ang, Mi liante pawh, mi tète pawh.

¹⁴LALPA chuan nangni leh in fate nê, Tipung deuh deuh che u rawh se.

¹⁵Lei leh vân siamtu LALPA chuan Malsâwm che u rawh se.

¹⁶Vân khi LALPA vân a ni a; Leilung erawh chu mihring fate hnêna a pêk a ni.

¹⁷Mithhîte chuan LALPA an fak lo va, Ngawih rengna hmuna chhukte pawhin an fak hek lo.

¹⁸Keini erawh chuan LALPA chu kan fak tawh ang, Tûn ațanga kumkhuain. LALPA chu fak rawh u!

BUNG 116

CHHAN CHHUAH AVÂNGA LÂWMTHÛ

¹Ka âu âw leh ka dîlnate mi ngaithlâksak tâk avângin LALPA chu ka hmangaih a ni.

²Ka lamah a beng a rawn dawh thîn avângin, Ka dam chhâng zawngin amah chu ka ko thîn ang.

³Thih hlauhna mi hual vêl a, Hremhmun natnaten mi thâm bet a; Lungngai leh mangangin ka awm a.

⁴Chû vêleh LALPA hming lam chungin tihian ka ti a: “Aw LALPA, khawngaih takin ka nunna hi chhan chhuak ang che,” tiin.

⁵LALPA chu mi khawngaih thei leh mi dik a ni a; Ni e, kan Pathian chu mi lainat thei tak a ni.

⁶LALPA chuan mi mâwlte chu a humhalh tlat a; Kei chu tihhniamin ka awm a, ani chuan mi chhandam ta a.

⁷Aw ka nunna, i chawlhna hmunah chuan kîr leh rawh, LALPAN a tihthât êm che hi.

⁸Ka nunna hi thihna lakah i chhan chhuak a, Ka mitte hi mittui lakah i hnêm a, Ka kête hi tûkna lakah i vêng him thîn a ni.

⁹Chuvângin mi nungte awmna ramah hian LALPA hmâah ka lêng dâwn a ni.

¹⁰Ka ring bawk a, ka sawi bawk a, “Nasa taka tihhrehawm ka tuar a nih hi.”

¹¹“Mi zawng zawng dawheh vek an ni,” Tiin ka sawi ta mai a.

¹²Ka chung a thil tha a tih zozâi avâng hian LALPA chu eng nge ka pêk ve dâwn le?

¹³Chhandamna no ka lâ ang a, LALPA hming chu ka lam mai ang.

¹⁴Ka thutiamte chu LALPA hnênah ka hlen ang, Ama mi zawng zawngte hmâah chuan.

¹⁵LALPA ngaiha hlu tak mai chu A mi thianghlimte thihna hi a ni.

¹⁶Aw LALPA, i chhiahhlawh dik tak ka ni e, I chhiahhlawh, i bâwihnu fapa ka ni; Ka kawlbun mi phelhsak tawh si a.

¹⁷Lâwmthu sawi inthâwina i hnênah ka hlân ang a, Tichuan, LALPA hming chu ka lam ang.

¹⁸Ama mi zawng zawng hmâah hian LALPA hnênah ka thutiam ka hlen ang.

¹⁹Aw Jerusalem, i hmun laili takah, LALPA biak in tual zâwlah chuan ka hlen mawlh ang. LALPA chu fak rawh u!

BUNG 117

MI TIN TANA LALPA FAKNA

¹Aw, hnam zawng zawngte u, LALPA chu fak ula! Mi zawng zawngte u, amah chu fak rawh u!

²A ngilneihna chu kan chungah a nasâin, LALPA thutak chu kumkhuain a awm dâwn si a, LALPA chu fak rawh u!

BUNG 118

HNEHNA AVÂNGA LÂWMTHU

¹A thât êm avâng hian Aw, LALPA hnênah lâwmthu hrilh rawh u! Kumkhuain ngil a nei dâwn si a.

²“A ngilneihna chu kumkhuain a awm ang,” tiin Israelten sawi rawh se.

³“A ngilneihna chu kumkhuain a awm ang,” tiin Arona chhângte chuan sawi rawh se.

⁴“A ngilneihna chu kumkhuain a awm ang,” tih hi, LALPA tih tute chuan sawi rawh se.

⁵Mangang taka ka awm laiin LALPA chu ka âu va; LALPA chuan mi lo chhâng a, Hmun thâwl takah mi awmtîr ta a.

⁶LALPA chu ka lama țang a ni alâwm; Ka hlâu lo vang. Mihringin eng nge mi tih theih ang?

⁷LALPA chu ka lama țang, mi puitu a ni; Chuvângin, mi hawtute chung a duhtusâm thleng chu ka la hmu ngei ang.

⁸Mihring rin chhan ai chuan LALPA-a rinna nghah hi a tha zâwk.

⁹Mi liante rinchhan ai chuan LALPA-a rinna nghah hi a tha zâwk.

¹⁰Hnam tinin min hual tuau tuau va; Mahse chungho chu LALPA hmingin ka tiboral vek ang.

¹¹Anni chuan min rawn hual khup a, Ni e, min rawn hual rawh se; Mahse, chûngho chu LALPA hmingin ka tiboral vek ang.

¹²Khuai rual angin mi bâwr mah se, Hlîngbuk alh thêlh mih anga tihhlumin an awm ang; Anniho chu LALPA hminga ka tihboral dâwn avângin.

¹³Mi tihlûk tumin min nawr nasa a, Mahse LALPAN mi lo pui tlat a.

¹⁴LALPA chu ka chakna leh ka hlâ a ni a, Ka chhandamna a lo ni ta.

¹⁵Lâwmna leh chhandamna âw chu Mi felte puan inah a awm thîn a; LALPA kut dîng lam chuan huai takin a ti thîn a ni.

¹⁶LALPA kut ding lam chu chawisânin a awm a; LALPA kut ding lam chuan huai takin a ti thîn a ni.

¹⁷Thi lovin ka nung zâwk ang a, LALPA thiltihte chu ka hriattîr zâwk ang.

¹⁸LALPA min thununna natzia hi âw, Ka thih êm a la phal rih lo a ni chauh mai!

¹⁹Dikna kawngkhârte chu mi hawnsak la; Chutah chuan ka lût ang a, LALPA chu ka fak tawh ang.

²⁰Hei hi LALPA kawngkâ, Mi dikte luh tlangna tûr chu a ni e.

²¹Ka fak fo vang che, Ka dîlna mi chhâng a, Mi chhandamtu i ni si a.

²²In satute duh loh lung kha A inngahna lungpui a lo ni ta.

²³Chû chu LALPA tih ngei a ni a; A makzia kan hmû a ni.

²⁴Hei hi LALPA ni ruat chu a ni e; Chuvângin kan hlimin, kan lâwm a ni.

²⁵Aw LALPA, min chhandam tûrin kan ngên a che; Aw LALPA, min hlawhtlîntîr tûrin kan ngên a che.

²⁶LALPA hminga lo kal chu a nihlawh e! LALPA in aţang hian mal kan sâwm a che u.

²⁷LALPA chu Pathian a ni a, Ani chu êng min petu a ni; Inthâwina tûr chu hruin maichâm kî ngeiah chuan thlung rawh u.

²⁸Nang chu ka Pathian i ni a, ka fak zêl ang che.

²⁹A  at êm avâng hian, âw, LALPA hnênah lâwmthu hrilh rawh u! A ngilneihna chuan kumkhua a daih dâwn si a.

BUNG 119

PATHIAN THUA LÂWMNA - ALEPH

¹LALPA dân zâwmtu, Mi tha famkim, kawnga mite chu an nihlawh e,

²Thinlung zawng zawnga amah zawngtu, A thuhriattîr zâwmtute chu an va nihlawh êm!

³Anni chuan thil dik lo an ti ve lo va; A kawng dik tak an zawh zâwk thîn.

⁴Nang chuan i thupêkte chu taima taka Zâwm tûrin thû min pe si a.

⁵Aw, i thupêkte hi  ha taka zâwmtu han ni thei îla âw!

⁶I thupêk zawng zawng chu ka vawng tlat ang a, Ka mualpho dâwn si lo va.

⁷I rorêlna dikzia ka zir chhuah hun chuan, Dikna thinlungin lâwmthû ka hrilh ang che.

⁸I thupêkte chu ka zâwm mawlh ang; Mi paihthla lul suh âw!

BETH

⁹Tleirâwlin engtin nge a awm dân a vawn thianghlim ang?  ha taka i thu zawm hi a ni e.

¹⁰Ka thinlung zawng zawng hian ka zawng che a; Aw, i thupêkte hi ka pên bosan phal suh ang che!

¹¹I laka thil sual ka tih loh nân I thû chu ka thinlungah ka vawng tlat a.

¹²Aw LALPA, nang chu faktlâk i va ni tak êm! I thupêkte chu mi zirtîr ang che.

¹³I kamchhuak thû zawng zawng chu Ka hmuiin ka puang chhuak ta.

¹⁴I thuhriattîrte chuan mi tihlim thîn a, Hausakna tinrêngin a tihhlim thîn ang mai hian.

¹⁵I thupêkte chu ka ngaihtuah fo vang a, I kawng chanchinte chu ka chhût thîn ang.

¹⁶I thupêkahte chuan ka lâwm ang a; I thû chu ka theihnghilh ngai lo vang.

GIMEL

¹⁷I chhiahhlawh chungah hian  ha takin ti ang che, Tichuan, i thû zâwmin ka nung tlat dâwn nia.

¹⁸I dân thûa thil makte ka hmuh theih nân Ka mitte hi mi tihvârsak ang che.

¹⁹Leiah hian mikhual ka ni a; I thupêkte chu ka lakah thup lo vang che.

²⁰I remruatna thû ngai êm êmin Ka nun hi a vâ ruai ruai thîn.

²¹Mi chapo, ânchhedawng sî te chu i zilhhau va, I thupêk vah bosantu an ni si a.

²²I thupêkte ka vawn tlat avângin, Sawi chhiatna leh hmuhsitna mi lâk bosak ang che.

²³Mi liante pawh mi rêl tûrin an  hu khâwm thîn a, I chhiahhlawh erawh chuan i dân thû hi a ngaihtuah reng thîn a ni.

²⁴I hriattîrna thûte chu mi tilâwmtu leh Rem mi ruatsaktu a ni.

DALETH

²⁵Ka nun hi vaivut nên a inhne reng a; I thû ang zêlin mi kai harh ang che.

²⁶Ka kawngte chu ka hriattîr tawh che a, nanging mi lo chhâng a; I thupêkte chu mi zirtîr ang che.

²⁷I remruat dân chu mi hriat thiamtîr la, Tichuan, thil mak tak tak i tihte hi ka ngaihtuah thîn dâwn nia.

²⁸Lungngaihna hian ka thlarau a tichau thîn a; I thû ang zêlin mi tichak ang che.

²⁹Kawng dik lo aţangin mi dah sawn la, Khawngaih takin i dân chu mi pê ang che.

³⁰Kawng dik chu ka thlang tawh si a; I rorêlna thû chu ka vawng tlat thîn a ni.

³¹I thuhriattîr pawh ka vuan tlat a; Aw LALPA, mi timualpho suh âw!

³²Ka thinlung mi hawn zauhsak hunah chuan, I thupêk kawngah chuan ka tlân tawh ang.

HE

³³Aw LALPA, i dân thu zâwm tûrin mi zirtîr ang che, Tichuan, a tâwp thlengin ka zawm dâwn nia.

³⁴Hriat thiamna mi pê la, tichuan i dân chu ka vawng tlat ang; Ni e, ka thinlung zawng zawngin ka zâwm mawlh ang.

³⁵I thupêk zawm kawngah mi kai ang che, Ka tân kawng zawh nuam a ni si a.

³⁶I thuhriattîr lamah ka thinlung hi hawitîr la, Duhâmna lam erawh chu ni suh se.

³⁷Thil ho mai mai en lo tûrin ka mit la pêng la, I kawng lamah mi tiharh zâwk ang che.

³⁸I chhiahhlawh hnênah hian i thu dikzia nemnghet la, Tichuan, nangmah a tîh tlat dâwn che nia.

³⁹Mi sawi chhiata awm ka hlauh tak mai hi mi lâk kiansak ang che, I remruatnate chu a t̃ha si a.

⁴⁰Ngai teh, i kaihhruaina dân hi ka hre châk t̃hîn a, I t̃hatna avângin mi tiharh ang che.

WAW

⁴¹Aw LALPA, i ngilneihnate chuan mi rawn thleng vê rawh se, I thû ang taka i chhandamna chu.

⁴²Tichuan, mi demtu chu ka chhang lêt thei tawh ang, I thû chu ka ring si a.

⁴³Ka kê aţang hian thutak mi lâk bosak suh ang che, Beisei takin i thuchhuak ka ngaichâng si a.

⁴⁴Tichuan, kumkhaw tlaitluanin I dân chu ka zâwm reng dâwn nia.

⁴⁵I dân thûte chu ka zawn t̃hîn avângin, Engthâwl takin ka lêng tawh ang.

⁴⁶Lalho hmâah i thuchahte ka puang ang a, Ka zahpui hauh lo vang.

⁴⁷Kei chuan i thupêkte chu ka hlimpui zêl ang, Ka ngainat zâwn a ni si a.

⁴⁸I thupêk lamah bân ka phar chhuak ang, Ka ngainat zâwn a ni a. I dân thû chu ngun takin ka ngaihtuah t̃hîn ang.

ZAYIN

⁴⁹I chhiahhlawh hnêna i thutiam chu hre reng ang che, Chû chuan beiseina mi neihtîr a.

⁵⁰Chû chuan ka hrehawmnaah pawh mi thlamuan t̃hîn, I thutiam chuan mi tinung si a.

⁵¹Mi chapote chuan nasa takin mi diriam a, Mahse i dân chu ka pên bosan phah lo ve.

⁵²Aw LALPA, hmasânga i remruat dân te chu ka hre reng a, Chûngte chuan ka lo inthlamuan t̃hîn.

⁵³I dân bânsantu misualte avângin Lungâwi lo takin ka awm t̃hîn.

⁵⁴Ka khualzinna ramah hian I dân thû chu ka hlâ ber a ni e.

⁵⁵Aw LALPA, zân lamah pawh i hming ka hre reng t̃hîn a, I dân thû pawh ka zâwm t̃hîn.

⁵⁶I dân thû chu ka vawn tlat avângin, Ka ta-neih ta hial a.

HETH

⁵⁷Aw LALPA, nang chu ka chanvo i ni a; I thû ka zâwm tlat ang tih ka sawi tawh kha.

⁵⁸Ka thinlung zawng zawngin i duhsakna ka ngên a; I thû ang zêlin mi khawngaih ang che.

⁵⁹Ka awm dân hi ka ngaihtuah t̃hîn a, I thuhriattîr lamah ka kê ka pên ta.

⁶⁰I thupêkte zâwm tûrin Ka hmanhmawh a, ka muangchâng lo.

⁶¹Mi سوال hruihrualte chuan mi zêm buai reng a, I dân erawh chu ka theihngihl lo.

⁶²Zanlai pawh sawi lovin lâwmthu hrilh tûr chein ka tho t̃hîn ang, I rorêl dân a fel t̃hîn êm avângin.

⁶³Nangmah t̃htu zawng zawng leh, I dân zâwmtute t̃hian ka ni.

⁶⁴Aw LALPA, leilung hi i ngilneihnain a khat a; I dân thûte chu mi zirtîr ang che.

TETH

⁶⁵Aw LALPA, i thû ang zêlin I chhiahhlawh hi i t̃iţha t̃hîn.

⁶⁶Remruat dân t̃ha leh hriatna mi zirtîr ang che, I thupêkte chu ka ring si a.

⁶⁷Tihrehawma ka awm hma khân ka vâk bo t̃hîn a, Tûnah erawh chuan i thû ka zâwm ta.

⁶⁸Nang chu i t̃ha êm a, i t̃iţha bawk si a; I dân thûte chu mi zirtîr ang che.

⁶⁹Mi chapote chuan mi hêkna tûrin dâwt an phuah chawp a, Kei erawh chuan ka thinlung zawng zawngin i dân thûte chu ka vawng ang.

⁷⁰An thinlung chu sahriak angin a thâu va; Kei erawh chu i dânah ka lâwm t̃hîn.

⁷¹I dân thû zir thei tûra Tihrehawma ka awm kha ka tân a t̃hâ a ni.

⁷²Rangkachak leh tangka sâng tam tak ai chuan I kâa chhuak dân thû chu ka tân a t̃ha zâwk a ni.

YOD

⁷³I kuta i siam leh i din chhuah ka ni a; I thupêkte chu ka zir theih nân hriat thiamna mi pê ang che.

⁷⁴Nangmah t̃htuten kei mi hmuh hun chuan an lâwm hlê ang, I thû chu ka beisei tlat avângin.

⁷⁵Aw LALPA, fel takin ro i rêl t̃hîn a, Mi i lo tihrehawm pawh kha, rinawmna nêna ti i ni tih ka hre ta.

⁷⁶I chhiahhlawh hnêna i tiam tawh ang khân, I ngilneihna chu ka thlamuanna atâna min siamsak tûrin ka ngên a che.

⁷⁷Ka nun theih nân i zahngaihna chu ka chungah thlentîr ang che; I dân thû chu ka lâwmna a ni si a.

⁷⁸Mi chapote chu mualpho rawh se, Dâwt thûin dik lo takin min tibuai si a; Kei erawh chuan i dân thûte ka chhût t̃hîn ang.

⁷⁹Nangmah t̃htute leh I hriatpuina thu hretute chuan ka lam lo hawi rawh se.

⁸⁰Ka mualpho lohna tûrin, Ka thinlung hi i dân thu chungah te chuan sawisêl bo lo ni rawh se.

KAPH

⁸¹I chhandamna ngaiin ka thlâ a châu va, I thû erawh chu ka beisei reng thîn.

⁸²I thutiam thlîrin ka mit a vâi zo va, “Engtikah nge mirawn thlamuan ang le?” ka ti thîn.

⁸³Savun ip meikhu ur un tawh ang ka ni a, I dân thûte erawh chu ka theihngihl lo ve.

⁸⁴I chhiahhlawh hi eng chen dam tûr nge a niha, Engtikah nge mi tiduhdahtute chungah ro i rêl dân?

⁸⁵I dân pawisa lotu mi chapote chuan Ka tlâk nân khuarkhurumte an lâi a.

⁸⁶I thupêk zawng zawng chu a rinawm a; Anni chuan dik lo takin min tiduhdah si a; Mî tanpui ang che.

⁸⁷Anni chuan lei aţangin mi tiboral lek lek a, Kei erawh chuan i dân thûte chu ka hawisan lo.

⁸⁸I ngilneihna ang zêlin mi tiharh ang che; Tichuan, i kamchhuak hriatpuina thû chu ka vawng tlat dân nia.

LAMED

⁸⁹Aw LALPA, i thû chu vânah khian Chatuana tihngheh tawh a ni.

⁹⁰I rinawmna chuan chhuan zawng zawng a daih dân si a; Leilung hi i din nghet a, a awm reng ang.

⁹¹Tûn thleng hian i remruat angin an awm a, Engkim hi i thuhnuai a awm vek an ni.

⁹²I dân hi ka lâwmna ber ni lo sela chuan, Hrehawm ka tuar lai khân ka boral daih tawh ang chu.

⁹³I dân thûte chu engtikah mah ka theihngihl lo vang, Chûng hmang chuan mirawn tiharh thîn si a.

⁹⁴I tâ ka nih hi, mi chhandam ang che; I dân thu zawngtu ka ni si a.

⁹⁵Mi sualte chuan mi tihboral tumin min lo châng thîn a, Mahse, i hriatpuina thû chauh ka ngaihtuah ang.

⁹⁶That famkimna pawhin chin tâwk a nei vê tho tih ka hria a, I thupêk erawh chu a zau êm a ni.

MEM

⁹⁷Âw, i dân hi ka va ngaina êm! Nîlêng lênga ka ngaihtuah thîn a ni.

⁹⁸I thupêkte chuan ka hmêlmâte aia fîng zâwkin mi siam a; Ka hnênah a awm reng si a.

⁹⁹Min zirtîrtu zawng zawngte aiin hriatthiamna ka ngah zâwk, I thuhriattîrte hi ka ngaihtuah ber a nih avângin.

¹⁰⁰Hmânlai mite ai pawhin hriat thiamna ka ngah zâwk, I dân thû ka vawn tlat avângin.

¹⁰¹I thû ka zawm theihna tûrin Sualna kawngah kê ka pên tawp lo vang.

¹⁰²I rorêlnate chu ka pênsan lo ve, Nangmah ngeiin mi zirtîr si a.

¹⁰³I thûte hi ka tân a va thlum êm! Ka kâ atân chuan khawizû aiin a thlum zâwk a ni.

¹⁰⁴I dân thûte aţangin hriat thiamna ka chhar ta a; Chuvângin kawng dik lo rêng rêng chu ka hua a ni.

NUN

¹⁰⁵I thû hi ka kê tân khâwnvâr a ni a, Ka kawng tân êng a ni.

¹⁰⁶I rorêlna dik zâwm tûr hian Chhechhamin ka nemngheh tawh a.

¹⁰⁷Nasa taka tihmanganin ka awm a; Aw LALPA, i thû ang zêlin mi tiharh ang che.

¹⁰⁸Aw LALPA, fakna ka hlan che hi mi lo pawmsak la, I rorêlnate chu mi zirtîr bawh ang che.

¹⁰⁹Ka nunna hi ka kutah a awm reng a, I dân erawh chu ka theihngihl pah lo.

¹¹⁰Mi sualte chuan ka awh nân thang an kam a, Mahse i dân thûte chu ka pên bosan lo.

¹¹¹I hriatpuina thû chu kumkhaw ro atân ka nei ta, Ka thinlung tihlimtu a ni si a.

¹¹²I remruat dân anga che tûrin ka rilru ka siam fel ta, Kumkhuain, a tâwp thleng pawhin.

SAMEK

¹¹³Rilru mûmal nei lote chu ka hua a, I dân erawh chu ka ngainâ a ni.

¹¹⁴Nang chu ka bihrûkna hmun leh ka phâw i ni a; I thû chu ka beisei ber a ni.

¹¹⁵Ka Pathian thupêkte chauh ka vawn tlat dân avângin, Nangni thil sual titute u, mi kalsan rawh u!

¹¹⁶Ka dam khawchhuah ve theih nân I thu ang zêlin mi tung dîng la; Ka beiseina che chu timualpho suh ang che.

¹¹⁷Mi kâi ang che, tichuan ka him ang a, I dân thûte chu ka zâwm tlat dân nia.

¹¹⁸I thupêk pên bosantute zawng zawng chu i hnâwl vek a, An bumna chu dâwt thû mai a ni si a.

¹¹⁹Leia mi suaksual zawng zawngte chu êk chhia angin i paih bo thîn a; Chuvângin, i hriattîrna thûte chu ka ngaina a ni.

¹²⁰Nangmah hlâuvîn ka tisâ hi a khûr a, I rorêlnate chuan mi tihlâu thîn a ni.

AYIN

¹²¹Fel tak leh dik takin ka ti thîn a; Chuvângin, mi tiduhdahtute kutah mi pe lul suh ang che.

¹²²I chhiahhlawh tân hian tanpuitu nghet lo ni la; Mi chapote chuan min rapbet lul suh se.

¹²³I chhandamna leh i thatna thutak thlîrin ka mit a vâi zo ta.

¹²⁴I chhiahhlawh chungah hian i ngilneihna lantîr la, I dân thûte chu mi zirtîr ang che.

¹²⁵I chhiahhlawh ka ni a; Hriat thiamna mi pê ang che, I hriatpuina thû ka lo hriat theih nân.

¹²⁶Aw LALPA, i tân chêt a hun ta e, I dân chu engmah lovah an siam tâk hi.

¹²⁷Chuvângin, i thupêkte chu rangkachakte aiin, A ni, rangkachak thami ai pawhin ka ngaina zâwk a ni.

¹²⁸Chuvângin, engkim chung a dân siamte hi Dik ka ti a; Kawng dik lo rêng rêng chu ka hua a ni.

PE

¹²⁹I thuhriattîrte chu a mak êm a; Chuvângin ka nun hian a vawng reng thîn a ni.

¹³⁰I thu luhna kawngkâ chuan a tiêng a; Mi mawltên an lo hriatthiam phah thîn.

¹³¹I thupêkte hriat châk êm êmin, Thaw huam huamin kâ ka âng reng a.

¹³²Mirawn en la, mi khawngaih ang che, I hming ngainatute i khawngaih thîn ang khân.

¹³³I thûin ka ke pête hi kaihrui la, Khawlohna hi ka chungah thû neihtîr suh ang che.

¹³⁴Mihring awpbehna lakah chuan mi chhanhim ang che, Tichuan, i dân thûte chu ka zâwm dâwn nia.

¹³⁵I hmêl khân i chhihhlawh hirawn chhun êng la, I thupêkte chu mi zirtîr ang che.

¹³⁶Miten i dân an zâwm duh loh avângin, Ka mit ata luipui a luang chhuak thîn a ni.

TSADE

¹³⁷Aw LALPA, mi dik i ni a, I rorêlte pawh a dik a ni.

¹³⁸Hriatpuina thû i pêt te chu A dîkin a rinawm êm êm a.

¹³⁹Ka hmêlmâte'n i thû an theihnghilh hmin dêr avânga Ka thahnemngaihna chuan mi ei zo ta a nih hi.

¹⁴⁰I thû hi a fir hlang hlak a ni a; I chhihhlawh hian a ngaina rêng a ni.

¹⁴¹Mi hmuhsit tâwk leka tê tham tê mah ni ila, I dân thûte chu ka theihnghilh ngai rêng rêng lo.

¹⁴²I dikna chu kumkhuaa dikna a ni a, I dân pawh thutak a ni.

¹⁴³Manganna leh nguina mi tlâkbuak ta a, Chuti chung chuan i thupêkte hi ka lăwmna a la ni reng.

¹⁴⁴I thuhriattîr dikzia chuan chatuan a daih dâwn si a; Ka nun reng theih nân, hriatthiamna mi pê ang che.

QOPH

¹⁴⁵Ka thinlung zawnzawngin ka âu che a; Aw LALPA, mi lo ngaithlâ ang che! I dân siamte chu ka vawng tlat dâwn nia.

¹⁴⁶Ka ko vak vak thîn che a; Mi chhandam la, tichuan i hriattîrna thûte chu ka zâwm tlat ang.

¹⁴⁷Khawvâr hmâin ka tho va, Tanpuina dîlin ka âu thîn che a; I thû chu ka beisei thîn a ni.

¹⁴⁸Rilru dîng taka i thû ngaihtuah hian Zan te hi ka meng tlang zak thîn.

¹⁴⁹I ngilneihna ang zêlin ka âu âw hi lo ngaithlâ la; Aw LALPA, i remruat dân ang zêlin mi tiharh ang che.

¹⁵⁰Thil sual tih chîngte chu anrawn hnâi zêl a; I dân aţang chuan hla taka awm an ni si a.

¹⁵¹Aw LALPA, nang chu i hnâi a; I thupêk zawnzawng chu thutak a ni.

¹⁵²I thuhriattîr chungchâng hi, Kumkhua atân i tinghet tawh tih hmân aţang khân ka lo hre tawh si a.

RESH

¹⁵³Ka hrehawm tuar hi ngaihtuah la, mi chhan chhuak ang che, I dân chu ka theihnghilh ngai si lo va.

¹⁵⁴Mi sawipui la, mi tlan ang che; I thutiam ang zêlin mi tiharh baw ang che.

¹⁵⁵I dân thu an zawn duh loh avângin Mi suaksualte lakah chuan chhandamna chu hla tak a ni.

¹⁵⁶Aw LALPA, i lainatnate chu a va nasa êm; I remruat ang zêlin mi tiharh ang che.

¹⁵⁷Ka hmêlmâ leh mi tiduhdahtute chu an tam hlê nâ a, I thuhriattîrte erawh chu ka pên bosan ve lo.

¹⁵⁸Mi vertherte awm dân ka hmuh hian ka ten hluah hluah a, I thû hi an zâwm duh dêr si lo.

¹⁵⁹I thupêkte ka ngainatzia ngaihtuah la; Aw LALPA, i ngilneihna ang takin mi tiharh ang che.

¹⁶⁰I thû chu a zavâin thutak a ni a; Dik taka i rorêlnate chu a zavâin chatuan daih vek a ni si a.

SHIN

¹⁶¹Hotuten chhan awm lovin mi tiduhdah a, Ka thinlung erawh chuan i thûte hi a hlah ber a ni.

¹⁶²Sum tam tak hmu chhuaktu ang maiin I thûah hian ka hlim thîn.

¹⁶³Dâwt thû hi ka huain ka ten a, I dân erawh chu ka ngaina a ni.

¹⁶⁴Dik taka ro i rêl thîn avângin Ni khatah vawi sarih ka fak thîn che a.

¹⁶⁵I dân ngainatute chu an thlamuang êm êm a, Engmahin a titlu ve ngai lo.

¹⁶⁶LALPA, i chhandamna ka beisei tlat a, I thupêkte ka zâwm thîn.

¹⁶⁷Ka nun hian i dân thûte chu a zâwm thîn a, Ka ngaina tak meuh a ni.

¹⁶⁸I dân thûte leh i thuhriattîrte chu ka zâwm thîn a, Ka kawng zawnzawng pawh i hmâah a awm vek a ni.

TAU

¹⁶⁹Aw LALPA, ka âu âw hian i hnênrawn thleng rawh se; I thû ang zêlin hriatthiamna mi pê ang che.

¹⁷⁰Khawngaih ka dîlna hian i hnên thleng sela; I thû ang zêlin mi chhan chhuak ang che.

¹⁷¹Ka hmu hian nangmah fak che rawh se; I dân thûte mi lo zirtîr thîn kha.

¹⁷²Ka lei hian i thû puang zêl rawh se, I thupêk zawng zawng chu a dik si a.

¹⁷³I dân thûte chu ka thlang tawh a, Chuvângin, i kut chuan mi lo pui rawh se.

¹⁷⁴Aw LALPA, i chhandamna chu ka thlahlel ngawih ngawih thîn a, I dân hi ka lâwmna a ni.

¹⁷⁵Ka nunna hi harh chhuak sela, tichuan a fak dawn che nia; I rorêlnate pawhin mi tanpui rawh se.

¹⁷⁶Berâm bo angin ka vâk bo va; I chhiahhlawh hi zawng chhuak ang che, I thupêkte ka theihngihl si lo va.

BUNG 120

TANPUI DÎLNA

¹Ka mangan laiin LALPA chu ka âu va, Anin mi lo ngaithlâ a.

²Aw LALPA, ka nunna hi hmuí dawtheite lakah vêng la, Bumhmang leite lakah pawh mi hum ang che.

³In hnênah eng nge a pêk ang che u-a, In chungah engti lekin nge a tih dawn che u, Nangni lei bumhmangte u?

⁴Râldo mi thal zum takte leh, Thing chang ling a nih ngâh lohvin!

⁵Ka chung a va pik êm! Mesek-ho ramah leh, Kedar-ho puan inah ka chêng vê ta si a!

⁶Inremna hawtute zingah hian Ka lo khawsa rei lua a nih hi.

⁷Kei chuan inrem ka duh a; Anni erawh chuan indo ringawt an thupui si a.

BUNG 121

KHUALZIN FAKNA HLA

¹Tlâng lam hawiin ka thlîr chho reng ang a, Khawi lam aţangin nge mi tanpuina tûr a lo kal ang?

²Mi tanpuina tûr chu lei leh vân siamtu LALPA hnên aţangin a lo kal ang.

³Ani chuan i tawlh thlûk a phal lo vang a; Nangmah vêngtu chu a muthlu lo vang.

⁴Ngai teh, Israel-ho vêngtu chu A muthlu lo vang a, a muhîl hek lo vang.

⁵LALPA chu nangmah vêngtu a ni a; LALPA chu i ding lama hliakhkuhtu che a ni.

⁶Chhûnah ni sâin a em lo vang che a, Zânah thlâin a em hek lo vang che.

⁷LALPA chuan sual tinrêng lakah a vêng ang che a; I nunna pawh a vawng him ang.

⁸LALPA chuan i lût leh i chhuak chu a vêng ang che, Tûn aţanga kumkhuain.

BUNG 122

JERUSALEM TÂNA DÎLNA

¹“LALPA inah i kal ang u,” Tia min sâwm lai khân ka lâwm a.

²Aw Jerusalem, i kulh kawngkhâr chhûngah Kêa kan din reng hi!

³Jerusalem khawpui chu, Hlâwm tha taka rem a ni a,

⁴Tah chuan hnamte chu an kal chho thîn, LALPA hnamte chu; Israelho hnêna thu hriattîr tûr te, LALPA hminga lâwmthû hlân tûr tein an chho thîn a ni.

⁵Tah chuan rorêl nân lalthutthlêngte an hûng a, Davida chhûngkaw lalthutthlêng ngei chu.

⁶Jerusalem râlmuanna tûr chu dîl rawh u: “Nangmah duhsaktu chu vannei rawh se.

⁷I kulh chhûngah râlmuanna awm sela, I lal inahte chuan hmuíngîl na awm rawh se.

⁸Ka unaute leh ka thiante avângin “I chhûngah thlamuanna awm rawh se,” ka ti ang.

⁹LALPA kan Pathian chênna in a nih avângin I thatna tûr ka zawng ang.

BUNG 123

KHAWNGAIH DÎLNA

¹I lamah ka mit ka lên chho thîn, Aw nang, i chênna vân lamah chuan.

²Ngai teh, chhiahhlawhten an pu thuchhuak an ngaichâng thîn ang leh, Chhiahhlawhnuin a pi kamchhuak a châng reng angin, Anin min khawngaih hmâ loh chuan Kan mit hian LALPA kan Pathian lam a thlîr reng thîn.

³Aw LALPA, min khawngaih rawh, min khawngaih lul rawh! Hmuhsitna kan tâwk tam lua e.

⁴Mi nuamsâte deusawhna leh, Mi chapote diriamna hlîrin Kan nun a chîmpil ta a nih hi.

BUNG 124

KAN LAMA TANG LALPA

¹“LALPA chu kan lama tang ni lo se chuan,” tih hi, Israel-hovin sawi rawh se

²“Miten min beih lai khân LALPA chu kan lama tang ni lo sê chuan,

³A nung chungin min dawlh vek tawh ang chu, Kan chungah an thinur nasa si a;

⁴Tui liante pawhin min lên bovin, Lui tê chuan kan nun hi a chîm pil tawh ang;

⁵Tui lianrawn sosângte khân Kan nun hi a vûr pil daih tawh ang.”

⁶An ei zawh mai tûr laka min humtu LALPA chu fakin awm rawh se.

⁷Thangkamtute thang lakah sava a chhuak angin, kan nun a zalên ta; Thangngul chu a tliak a, kan zalên ta e.

⁸Min tanpuina chu lei leh vân siamtu LALPA hmingah chuan a ni a awm ni.

BUNG 125**LALPA MITE HIMZIA**

¹LALPA ringtute chu Zion Tlâng anga tihngihñ rual loh, Kumkhuaa awm reng tûr an ni.

²Tlângte chuan Jerusalem an hual vèl angin, LALPA chuan a mite a hual vèl thîn, Tûn aṭanga chatuan thleng pawhin.

³Mi sualte chuan mi dikte chan ram chungah lalna an chang dâwn si lo; Chuti lo chuan, mi dikte kut chuan khawlohna a ban vè dah ang e.

⁴Aw LALPA, ṭha taka awmte chu ṭha takin ti vè la, Thinlung dik tak pute chungah pawh ṭhat chhuah bawk ang che.

⁵Kawng dik lova pên bo chîngte erawh zawng, Thil sual titute nêñ LALPAN a hnâwl bo vek ang. Israelte chungah thlamuanna awm rawh se!

BUNG 126**ZION-A KÎR LEHNA**

¹LALPAN saltângte Ziona a hruai kîr leh lai khân, Mumang ang mai kan ni a.

²Kan kâ chu nuihna hlîrin a khat a, Kan lei lah chu hlâin a khat bawk a. Hnamte zîngah chuan, “LALPAN an tân thil ropui a tihsak a nih hi,” an ti a.

³LALPAN thil ropui min tihsak a, Kan lâwm a ni.

⁴Aw LALPA, sala kan tâng hi min hruai kîr leh ang che, Chhim lama luite ang mai khân.

⁵Mittui ṭla chungah buh chî tuhtute chuan Hlim takin an seng dâwn a ni.

⁶Ṭap chungin buh chi feh chhuahpui mah sela, An buhphalte kengin, hlim takin an lo hâw leh ang.

BUNG 127**LALPA MALSÂWMNA**

¹LALPAN in a sak loh chuan, A satute chu an rim thlâwn mai a ni; LALPAN khawpui a vên loh chuan, A vêngtute chu an meng hah thlâwn mai a ni.

²Zîng takah in tho va, Tlâi takah in bâng a, Thawhrimna chaw in ei ṭhîn hi, in tân a thlâwn mai a ni; A mi duh takte chu muttuina te a pe ṭhîn asin.

³Ngai teh u, fanâute hi LALPA laka kan rochan an ni a; Rîla rah hi a lâwmman pèk chu a ni.

⁴Râl do mi kuta thal awmte ang maiin, Vânglai fate chu chak tak an ni.

⁵Thal bâwm khat khawpa fa ngah chu mi nihlawh an ni asin; An hmêlmâte chu kulh kawngkâa an hmachhawn hunah pawh An mualpho lo vang.

BUNG 128**PATHIAN ṬIHTUTE MALSÂWMNA**

¹LALPA ṭihtute chu an nihlawh e, A hniakhnung zuitute chu.

²I kut thawhrim rah i ei hunah chuan, I hlim ang a, i lo hmuingîl bawk ang.

³I nupui chuan i in chhûngril luahin, Grêp rah duh chi anga bâwrin a rah ang a, I dawhkân vèlah chuan i fate chu, Oliv ṭiak angin an awm dial dial ang.

⁴Ngai teh, LALPA ṭih mi chuan Chutiang chuan malsâwmna an dawng ang.

⁵LALPA chuan Zion aṭangin mal a sâwm ang che a, Tichuan, Jerusalem malsawmna chu I dam chhûngin i dawng tawh ang.

⁶Ni e, tu-mawng pawh i la bêng ngei ang. Israel-ho chungah chuan thlamuanna awm rawh se!

BUNG 129**TIH DUHDAH TUARTE DÎLNA**

¹“Ka tleirâwl tîrh ata miten min timangang zîng tawh mang e,” Israel-hoten ti rawh se.

²“Ka tleirâwl tîrh ata miten min timangang zîng tawh mang e; Mahse min la hneh thei chuang lo.

³Leilettuten ka hnungzâng an rît a, Thui tak takin an rîn thlûr sung a.”

⁴LALPA chu a dik a; Mi sualho hruihrualte chu a zai chhum rem rum a.

⁵Zion hawtute zawng zawng chu, Mualpho taka tlânchhiattîr ni hlawm rawh se.

⁶In chungah hlobet chawr, A ṭhan sân hmâa vuai mai ṭhîn ang chu ni rawh se,

⁷Chutiang chu tuma’n an seng lo vang a, Tuma’n an têt khâwm hek lo vang.

⁸A bul vèla kalte zîngah “LALPA malsâwmna chu in chungah awm rawh se; LALPA hmingin mal kan sâwm a che u!” tia sawi pawh an awm hek lo vang.

BUNG 130**CHHAN CHHUAHNA NGHÂKIN**

¹Aw LALPA, khur thûk tak aṭang hian ka âu a che;

²LALPA, ka âw hi ngaithla teh! Khawngaih ka dilna âw a nih hi, I bengin lo ngaithla mawlh ang che.

³LALPA, sualnate i chhinchhiah zêl chuan Aw LALPA, tu nge ding thei ang le?

⁴Mahse, i hnênah ngaihdamna chu a awm a, Tichuan, miten an ṭih zêl ang che.

⁵LALPA chu ka ngâk reng a, ka nun hian a ngâk reng a, A thû pawh ka beisei a ni.

⁶Vêngtuten khawvâr hun an thlîr aia nasâin, Ni e, vêngtuten khawvâr an thlîr aia nasa mahin, Ka nun hian LALPA chu a thlîr reng ṭhîn.

⁷Aw Israel-hote u, LALPA chu beisei rawh u; LALPA hnênah ngilnehna a awm si a, A hnênah ṭlanna tam tak a awm bawk a.

⁸Ani chuan Israel-ho chu An khawlohna zawng zawng laka ta a chhan chhuak ang.

BUNG 131

KHAWNGAIHNAA THANG LIAN

¹LALPA, ka thinlung hi a chapo lo va, Ka hawi sâng hek lo. Thil ropui takahte ka inrawlh ngai lo va, Ka phâk loh thil ropui ka khêl ve ngai hek lo.

²Mahni ka insûm a, ka ngâwi hlê hlê a, Nautêin a nu hnute hnêk a bâng tawh angin, Kei pawh naute hnute nghei tawh angin ka nun hi a lungâwi ta.

³Aw Israelhote u, LALPA chu beisei rawh u, Tûn ațanga kumkhuain.

BUNG 132

DAVIDA PATHIAN CHU RING RAWH

¹LALPA, Davida chu hre reng la, A hrehawm tuarna zawng zawng pawh hriatpui ang che;

²LALPA hnêna a chhechham te, Jakoba Mi Chaka hnêna a thutiam te kha:

³“Ka chênna in chhûngah ka lût tawp lo vang, Khumpui pawh ka kai hek lo vang;

⁴Ka mit hi ka hahchawhtîr lo vang a, Mutmu ka tuah hek lo vang,

⁵LALPA leh Jakoba Pathian Chaka tân, Chênna hmun ka zawn hmuh hmâ loh chuan.”

⁶Ngai teh, Ephratha-ah a chanchin kan hria a, Ramhnuaiah kan hmu ta a.

⁷A puan inah chuan i kal ang u; A ke bulah chibai kan bûk dân nia.

⁸Aw LALPA, tho la, i chawlhmunah châwl ta che, Nangmah leh i chakna bâwm nên khân.

⁹I puithiamte chu diknain inthum sela; I mi thianghlimte chu hlim takin âu rawh se.

¹⁰I chhiahhlawh Davida vângin I Hriakthiha hmêl chu hawi kîrtîr suh ang che.

¹¹LALPA chuan Davida hnênah tihtak zetin chhia a chham tawh a; A sût leh tawh lo vang: “I lalthutthlêngah chuan i rîla rah ami ngei ka thutîr ang.

¹²I fate chuan ka thuthlung an zawma, Anmahni ka la zirtîr tûr hriattîrna thû an zawm bawh chuan, An fapate pawh kumkhuain i lalthutthlêngah chuan an rawn thû zêl ang,” tiin a tiam si a.

¹³LALPA chuan Zion chu a thlang ta; Ama chênna atân a duh si a:

¹⁴“Hei hi kumkhuaa ka chawlhna hmun chu a ni; Hetah hian ka chêng reng ang, ka duh zâwng a ni si a.

¹⁵A mamawh tinrêngah mal ka sâwm rei rui ang a; A mi retheite chu buhchangrumin ka hrai puar ang.

¹⁶A puithiamte chu chhandamnain ka thum ang a, A mi thianghlimte chu hlim takin an âu chiam ang.

¹⁷Chutah chuan Davida kî chu ka chawr chhuahtîr ang a; Ka hriakthiha tân chuan khâwnvâr ka buatsaih ang.

¹⁸A hmêlmâte chu mualphona ka khumtîr ang a, Ani lallukhum erawh chu a ropui deuh deuh ang.”

BUNG 133

INNGEIH DIAL DIALA CHÊNHÔ

¹Ngai teh u, unau inngeih dial dila chênho hi A va thâin a va nuam êm!

²Hriak hlu tak, lûa thih, Khabe hmula luang thla ngiai ngiai, Aarona khabe hmul ngeia luang thlâ a, A kawrfual tlânga luang thla diah diah ang hi a ni;

³Hermon daifim, Zion tlâng vêla tla seng seng ang hi a ni; Chutah chuan LALPAN malsâwmnain a vûr si a, Kumkhuaa nunna tûr chu.

BUNG 134

TLÂI LAM FAKNA

¹Hawh u, nangni LALPA chhiahhlawh zawng zawng, LALPA ina zâna ding thînte u, LALPA chu i fak ang u!

²In kutte chu hmun thianghlîm lamah phar ula, LALPA chu fak rawh u.

³Lei leh vân siamtu LALPA ngei chuan Zion ațangin malsâwm che u rawh se!

BUNG 135

SIAMTU PATHIAN FAKNA

¹LALPA chu fak rawh u! LALPA hming chu fak ula; Aw, LALPA chhiahhlawhte u, amah chu fak rawh u!

²Nangni LALPA ina dinga, Kan Pathian in tual zâwla ding thînte u,

³LALPA chu fak rawh u; LALPA chu a țha si a; A hming fakin zai rawh u, a hlimawm si a.

⁴LALPA chuan Jakob-ho hi ama tân a thlang tawh a, Israel-ho hi a rohlu atân a thlang bawh a.

⁵LALPA ropuizia chu ka hre tawh a, Kan Lalpa chu pathian dang zawng aia chungnung daih a ni.

⁶LALPA chuan a duh apiang a ti thîn, Vânah te, leiah te, tuifinriatah te, Tuipui leh tui thûk zawng zawng chhûngah te pawh.

⁷Ani chuan tuihûte chu kâwlkil ațangte chuan a chhohtîr thîn a; Ruah te tân kâwlphê te a siam a; A dah khâwna in ațang te chuan thlî a ko chhuak thîn.

⁸Aigupta rama mihringte leh an rante, An fa tîrte a tihhlumsak a.

⁹Aw Aigupta, in zîngah chhinchhiahna leh thil makte a rawn tîrh kha, Pharaoh leh a chhiahhlawh zawng zawng chungah khân.

¹⁰Ani chuan hnam tam tak a hneh a, Lal thilitthei tak takte a tihlum a;

¹¹Amor-ho lal Sihona te, Basan lal Oga te leh, Kanaan lalram zawng zawng te nêh.

¹²An ram chu rochan atân a pê a, Ami Israel-ho rochan atân.

¹³Aw LALPA, i hming chu kumkhuain a awm ang a; Aw LALPA, chhuan zawng zawngah i hming a dâi lo vang.

¹⁴LALPA chuan a mite ro a rêlsak ang a, A chhiahhlawhte chu a lainat dâwn si a.

¹⁵Hnam tinte milim pathian chu tangkarua leh rangkachak a ni a, Mihring siam chawp mai a ni.

¹⁶Kâ an nei a, mahse an tawng thei si lo; Mit an nei a, an hmu thei si lo;

¹⁷Beng an nei a, an hre thei si lo; An kâah thaw rêng rêng a awm hek lo.

¹⁸Chutiang siamtute chu an thil siam ang lek chu an ni; Milim ringtute chu milem ang lek chu an ni e.

¹⁹Aw Israela chhûngte u, LALPA chu fak rawh u! Aw Aarona chhûngte u, LALPA chu fak rawh u!

²⁰Aw Levia chhûngte u, LALPA chu fak rawh u! LALPA tihute u, LALPA chu fak rawh u!

²¹Jerusalema chêng LALPA chu Zion ațanga fakin awm rawh se! LALPA chu fak rawh u!

BUNG 136

LALPA NGILNEIHNA THÛKZIA

¹Aw, LALPA hnênah lâwmthû hrilh rawh u, ani chu a ța si a! A ngilneihna chuan kumkhua a daih dâwn si a.

²Aw, pathiante Pathian hnênah chuan lâwmthu hrilh rawh u! A ngilneihna chuan kumkhua a daih dâwn si a.

³Aw, Lalte lal hnênah chuan lâwmthû hrilh rawh u! A ngilneihna chuan kumkhua a daih dâwn si a.

⁴Amah chauhva thil mak ropui titu chuan, Kumkhuain ngil a nei dâwn si a.

⁵Finnaa vân siamtu chuan Kumkhuain ngil a nei dâwn si a.

⁶Tui chung a leilung hûngtu chuan Kumkhuain ngil a nei dâwn si a.

⁷Êng ropui tak takte siamtu chuan Kumkhuain ngil a nei dâwn si a.

⁸Chhûn rorêltu atana nî siamtu chuan Kumkhuain ngil a nei dâwn si a.

⁹Thlâ leh arsiho, zân lam rorêltu atâna siamtu chuan Kumkhuain ngil a nei dâwn si a.

¹⁰Aigupta mite fatîr tihlumtu chuan Kumkhuain ngil a nei dâwn si a.

¹¹Anni laka Israel-ho hruai chhuaktu chuan Kumkhuain ngil a nei dâwn si a.

¹²Kut chak leh bân phar chhuaktu chuan Kumkhuain ngil a nei dâwn si a.

¹³Tuipui Sen tițhentu chuan Kumkhuain ngil a nei dâwn si a.

¹⁴A laia Israel-ho kal kâitirtu chuan Kumkhuain ngil a nei dâwn si a.

¹⁵Pharaoa leh a sipai rual Tuipui Sena paihthlatu chuan Kumkhuain ngil a nei dâwn si a.

¹⁶A mite thlalêra hruai tlangtu chuan Kumkhuain ngil a nei dâwn si a.

¹⁷Lal ropui tak takte tihlumtu chuan, Kumkhuain ngil a nei dâwn si a.

¹⁸Lal hmingthang tak tak tihlumtu chuan Kumkhuain ngil a nei dâwn si a.

¹⁹Amor-ho lal Sihona tihlumtu chuan, Kumkhuain ngil a nei dâwn si a.

²⁰Basan ram lal Oga tihlumtu chuan Kumkhuain ngil a nei dâwn si a.

²¹Rochan atâna an ram petu chuan Kumkhuain ngil a nei dâwn si a.

²²A chhiahhlawh Israelte tâna rochan petu chuan Kumkhuain ngil a nei dâwn si a.

²³Dinhmun tlâwm taka kan awm laia min hre rengtu chuan Kumkhuain ngil a nei dâwn si a.

²⁴Kan hmêlmâte laka min chhan chhuaktu chuan Kumkhuain ngil a nei dâwn si a.

²⁵Tisâ zawng zawng hnêna ei tûr petu chuan Kumkhuain ngil a nei dâwn si a.

²⁶Aw, vân Pathian hnênah chuan lâwmthu hrilh rawh u! Kumkhuain ngil a nei dâwn si a.

BUNG 137

SALTÂNGTE ȚAH HLA

¹Babulon lui kamahte chuan Kan țhû a; A ni, Zion ngaiin kan Țap Țhîn.

²Lui kama tuipuisuthlah-ahte chuan Kan Țingțangte kan bâng Țhîn a.

³Sala min hruai botuten hlâ sa tûrin min ti a, Min tiduhahtuten himna hlâ sa tûrin min duh bawk si a, “Zion hlâ pakhat tal min saksak rawh u!” tiin.

⁴Mi ramahte chuan LALPA hlâ engtin nge kan sak theih ang?

⁵Aw Jerusalem, ka theihngihl che chuan Ka kut ding lam hian a thiam thil hi theihngihl vê rawh se!

⁶Ka hriat reng loh che chuan Ka lei hi ka dangah bet tlat rawh se; Ka himna ber aia Jerusalem ka thlan zâwk loh chuan.

⁷Aw LALPA, Edoma thlahte hi a chhe zâwngin hre reng ang che, Jerusalem chhiat nîa, “Tichim rawh u, tichim rawh u, A lungphûm nêh lam tichhe rawh u,” titute an nih kha.

⁸Tihborala awm tûr, aw Babulon fanu, Kan chung a i tih anga thungrûltu che chu lâwm takin awm rawh se!

⁹I fanau tê têtê chhuhsaka, lungpui vuak nâna hmangtu tûr chu Lâwm takin awm rawh se!

BUNG 138

LAWMTHU SAWINA HLA

¹Ka thinlung zawng zawngin ka fak ang che; Nangmah fakin pathian dangte hmâ ngeiah ka zai ang.

²I tempul thianghlim lam hawiin chibai ka bûk ang che a, I hming pawh ka fak bawh ang; I ngilneih êm avâng leh i thutak avângin I thû chu i hming put dang zawng aiin i châwi sâng si a.

³Ka koh lai che khân nangin mi lo chhâng a, Ka nun hi tichakin mi tihuai ta sauh va.

⁴Aw LALPA, leia lal zawng zawngte chuan an fak ang che, I kamchhuak thûte chu an hre tawh si a.

⁵Ni e, LALPA awm dân chanchinte chu hlâin an châwi ang, LALPA chu a ropui êm êm si a.

⁶LALPA chu sâng takah awm mah sela, Mi tlâwmte chu a ngaihsak thîn a; Mi chapote erawh chu hla tak aţang pawhin a hai si lo.

⁷Harsatna kârah lêng mah ila, Nangin mi tiharh leh ang che; Ka hmêlmâte bei tûrin i kut phar la, I kut dîng lamin mi chhandam ang che.

⁸LALPA chuan ka tâna a thiltih tum chu a hlen ang; Aw LALPA, i ngilneihna hian kumkhua a daih dâwn si a; I kutchhuak thiltihte hi bânsan suh ang che.

BUNG 139

ENGKIM HRETU LEH AWMPUITU PATHIAN

¹Aw LALPA, nangin mi en fiah a, mi hre tlang vek a.

²Ka thuta ka dîn dân chenin i hria a; Ka ngaihtuahna hi hla tak aţangin i hre tlang vek a.

³Ka kal pawhin, ka mut pawhin, mi hmu tlang vek a, Ka awm dân zawng zawng hi i hriat sâ a ni.

⁴Ngai teh, âw LALPA, nangin i hre vek a, Ka leiah hian i hriat loh thû engmah a awm lo.

⁵Nangin ka hnung lam leh ka hma lamah min hual a, Ka chungah i kut i ngat bawh si a.

⁶Chuti taka hriatna chu ka tân a mak lutuk a; A sâng êm a, ka phâk lo a ni.

⁷I Thlarau hnêna ta hi khawiah nge ka kal ang? I hmâa ta hi khawiah nge ka tlân bo vang?

⁸Vânah lâwn ila, chutah chuan i awm si a; Hremhmunah mutna siam mah ila, ngai teh, chutah chuan i awm bawh si a.

⁹Zîng thlâ zârin, Tuifinriat tâwpah va awm daih pawh ni ila,

¹⁰Chutah pawh chuan i kutin mi hruai ang a, I kut dîng lamin mi chelh dâwn si a.

¹¹“Thimin mi khuh bo daih se, Ka vêl êng hi zân thim ni se,” ti mah ila;

¹²Thim pawhin i lakah chuan engmah a hliah si lo va, Zân hi chhûn angin a êng zâwk a ni; I tân chuan thim leh êng hi thuhmun reng a ni si a.

¹³Ka chhûngril lam hi i siam a ni a; Ka nu chhûlah nangin mi tuam hlâwm a.

¹⁴Tîhbâiawm leh mak taka siam ka nih avângin ka fak ang che; I hnathawh dân hi a va mak ngai êm! Ka nun hian a hre chiang hlê mai.

¹⁵A rûka siama ka awm laia, Lei hmun hnuaiahnung berah remhre taka dîn ka nih lai khân, Ka ruangâm chu i lakah thup a ni si lo.

¹⁶Riruang ka la neih hmâ pawhin, i mit chuan mi lo hmu tawh reng a, I lehkhâbûah chuan ziah vek a ni a, Thil dang engmah la awm hmâ khân, A ni têla dîn chhoh zêl ka ni a.

¹⁷Aw Pathian, i ngaihtuah dân hi ka tân a va hlu êm! A infin khâwm phei chu a va ropui êm!

¹⁸Chhiar dâwn ila, tîauvut ai pawhin a tam zâwk daih ang chu; Ka han thânarh chuan i kiangah bawh ka lo la awm reng thîn.

¹⁹Aw Pathian, misualte chu i tihlum ngei dâwn si a! Chuvângin, nangni thisen chhuah hmange u, mi thlawh bosan rawh u.

²⁰Hêngho hian an sawichhe vak vak thîn che a, I hmêlmâte hian i hming hi an sawi nawmnah thîn.

²¹Aw LALPA, nangmah hawtute chu ka haw ve lo vem ni? Nangmah dotute chu ka haw hluah hluah lo vem ni?

²²Chûnggho chu huat tak têin ka hua a; Ka hmêlmâah ka ngai rêng bawh a.

²³Aw Pathian, mi en fiah la, ka thinlung hi hria ang che; Mi fiah la, ka thil veite hi mi hriatpui ang che;

²⁴Keimahah hian sual lam kawng a awm nge awm lo en la, Chatuan kawngah chuan mi hruai ang che.

BUNG 140

CHHAN CHHUAH DÎLNA

¹Aw LALPA, misualho lakah chuan mi chhanhim la; Mi nunrâwngho lakah chuan mi hum ang che.

²An thinlungah thil sual an ngaihtuah thîn a; Indo tûrin an inhâwr khâwm reng si a.

³An lei chu rûl angin an tât hriam a; An hmui chhûng lamah chuan rulrial tûr a awm a.

⁴Aw LALPA, mi sualho lakah mi vêng la, Nunrâwngho lakah mi hum ang che, Anni chuan mi petektîr dân tûr ngawt an ngaihtuah si a.

⁵Mi chapote chuan hruihruala min awh tumin thang an valh rû a, Kawng sîrah te chuan lên an zâr a; Mi awh tumin thang an kam thluah a.

⁶LALPA hnênah chuan, “Ka Pathian i ni a; Aw LALPA, khawngaih ka dîlna âw hi lo ngaithlâ ang che.

⁷Aw Lalpa PATHIAN, mi chhandamna leh chakna chuan Indo nîa ka lû mi hliahkhuh kha.

⁸Aw LALPA, mi sualho duh zâwngho chu pe hauh suh la; Khawlohna sual tih an tum chu puitlîntîr suh ang che, Chuti lo zawng, an lo chapo dah ang e.

⁹Mi hual veltute lû chu, An hmuia thu ða lo an sawi ngei chuan chîm hnan rawh se;

¹⁰An chungah meiling tlâ sela; Meiah paih luhin awm hlawm rawh se; An lo chhuah theih lohna tûrin khuarkhurum thûk takah paih thlâkin awm rawh se.

¹¹Mi rêl chîng chu leilungah hian ngêlghet suh se; Mi nunrâwng chu thil ða lovin tihchhiat tumin ùm rawh se.

¹²LALPA chuan tihrehawma awmte thlavâng a hauhsak ang tih ka hria, Pachhiate chungthû pawh dik takin a rêlsak ang.

¹³Mathei lovin mi dikte chuan i hming an fak ang a; Mi nunngîlte chuan i ângchhûng an bêl reng ang.

BUNG 141

MI SUAL LAKA VÊN HIM DÎLNA

¹LALPA, ka koh che hi, Ka hnênah lo kal thuai teh! Ka kohna âw hi lo ngaithlâ ang che.

²Ka ðawngtâina hi i hmâah rimtuiin lo thleng sela, Ka kut phar hi tlai lam inthâwinaah lo chang rawh se.

³Aw LALPA, ka kamsîrah hian vêngtu dah la; Ka hmûi kawngka hi vêng ang che.

⁴Ka thîlung hi thil ða lo lam hawitîr lo la, Thil sual titute zîngah Sual rawng bâwtîr hek suh la, An ei leh bâr duh zâwng mi temtîr ve suh ang che.

⁵Mi dik chuan mi vaw hrep rawh se, Khawngaihna nê a ni dâwn si a. Mi zilhhâu rawh se; Lû-a hriak thih ang mai a ni dâwn si a; Ka lû chuan lo inthîn khum suh se. Ka ðawngtâina pawhin mi sualte chu a dodâl cheu dâwn a ni.

⁶An rorêltute chu khâm pangah paih thlâkin an awm a, Anni chuan ka thû an ngaithla tawh ang, a thlum si a.

⁷Miin lei a let a, lei a chêk phut ang mai hian Kan ruhte hi thlân kovah an theh darh vêl a.

⁸Aw Lalpa PATHIAN, ka mit hian nangma lam chauh a thlîr thîn; Nang chu ka bihrûkna i ni a; Saruak mai chuan mi hnutchhiah suh ang che.

⁹Min awhna tûr thang an kam lakah chuan mi hum ang che, Thil sual titute thang lakah pawh.

¹⁰Zalên taka chhan chhuah ka nih laiin Mi sualte chu anmahni lên zâr chuan âwk rawh se.

BUNG 142

MANGANG AU ÂW

¹Ka âwin LALPA chu ka âu va; LALPA hnênah khawngaihna dîlin ka âu va.

²Ka mangan thû chu a hnênah ka thlen a; A hnênah chuan ka mangan thû ka hrilh a.

³Ka kawchhûnga ka thlarau a chauh lai khân Nang chuan ka kawng zawh lai i hriat kha. Ka kalna kawngah chuan Ka awh nân a rûk têtin thang an lo kam a.

⁴Ka dîng lam hi thlêk la, en teh, Tûmah mi hria rêng an awm loh hi; Behchhan tûr ka nei lo va; Ka nun ram min dâwnpui tûr

tûmah an awm si lo.

⁵Aw LALPA, ka âu che a, “Nang chu ka inhumhimna leh, Mi nung rama ka chanvo i ni,” ka ti a.

⁶Ka âu âw hi lo ngaithla ta che, Ka chan a chauh tâk êm hi; Min tiduhdahtute lakah mi chhanhim rawh, Kei aiin an chak zâwk si a.

⁷I hming ka fak theih nân Tân in aţang hian mi hruai chhuak ang che, Nangin ða takin mi enkawl la, Mi dikten ka vêlin min hual tawh rawh se,” ka tih hi.

BUNG 143

TAŊPUI DÎLNA

¹Aw LALPA, ka ðawngtâina hi ngaithlâ la, Khawngaihna ka dîl che hi lo ngaithlâ ang che! I rinawm êm avângin mi chhâng la, I ðatna avângin mi chhâng ang che.

²I chhiahhlawh chungthû hi rêl mai suh âw, I mithmuah tumah thiam chang thei an awm dâwn si lo.

³Hmêlmâ chuan ka nunna a nghaisâ a; Ka nunna hi lei chârah a râwt sawm a; Thi daih tawhte ang maiin Hmun thimah a khalh lût a.

⁴Chuvângin, ka chhûng lam thlarau nun hi a chau va; Ka rilru chhûngril hi a ruak dêr a.

⁵Hmânlai hunte kha ka hre reng a; I hnathawh zawng zawng hi ka chhût ka chhût thîn; I kutchhuakte chu ka ngaihtuah thîn si a.

⁶Ka kut hi i lamah ka phar thîn a; Lei châr, ram tuihâl ang hian nangmah ngaiin ka tuihâl thîn.

⁷Aw LALPA, mi chhâng thuai ang che; Ka thlarau a chau ta! Ka lakah hian i hmêl thup suh la, Chuti lo zawng, khuarkhuruma chhukte ang mai ka lo ni dah ang e.

⁸Zîngah chuan i ngilneihna thû mi hriattîr ang che, Nang chu ka rin chhan ber i ni si a; Ka kalna tûr kawng mi hriattîr ang che, Ka nunna hian nangmah a rawn thlîr reng che hi.

⁹Aw LALPA, ka hmêlmâte lakah chuan mi chhan chhuak ang che; Nang chu ka himna i ni si a.

¹⁰I duh zâwng chu mi zirtîr rawh, Ka Pathian i ni si a; Dikna ramah chuan mi hruai ang che, I Thlarau chu a ða si a.

¹¹Aw LALPA, i hming avângin mi tiharh la, Ka manganna ata hi ðatnain mi hruai chhuak ang che.

¹²I ngilneihna avângin ka hmêlmâte chu tiboral la, Mi timangangtute chu tiboral vek ang che; I chhiahhlawh ka ni si a.

BUNG 144

LAL TAŊPUI

¹Ka Lungpui LALPA chu fakin awm rawh se, Ka kutte hi indo dân a zirtîr thîn a, Ka kut zungtangte hi inbeih dân a zirtîr bawh thîn:

²Ka tâna hmangaih ngilneihna leh ka kulhpui, Ka kulhbîng sâng leh mi chhanchhuaktu, Ka phâw leh ka inhumhimna, Ka mite ka hnuaia kûn tûra mi hnehsaktu a ni.

³LALPA, mihring hi eng nge maw a nih a, i hriat thîn ni? Mihring fapa pawh hi eng nge maw a niha, i ngaihven thîn le?

⁴Mihring hi thâw ang chauh a ni a; A dam chhûng hun chu ral leh mai thîn hlimthlâ ang hi a ni.

⁵Aw LALPA, i vânte chu rawn tihnia la, lo chhuk teh; Tlângte chu khawih la, tichuan a lo khu chhuak ang.

⁶Kâwl phêttîr la, anni chu phîn darh vek ang che; I thalte chu kâp chhuak la, tiboral vek ang che.

⁷Chung lam aţang khân i kut rawn ban la; Ka hmêlmâte laka ta hi Mi chhan chhuak la, tui lian lakah mi chhanhim ang che.

⁸An kâ chu dâwt sawina a ni a, An kut ding lam chu dik lohna a ni.

⁹Aw Pathian, nangmah châwimâwiin hla thar ka sâ ang a; Perhkhuang hrui sâwm nei mi nên nangmah fakin ka zai ang.

¹⁰Amah chu a ni, lalho hnêna chhandamna pê a, Khandaih hlauhawm laka A chhiahhlawh Davida chhan chhuaktu chu ni.

¹¹Ka hmêlmâ, dâwt thû ringawt chhâk chhuak thîn te leh, An kut ding lam pawh dik lohna hlîra khatte kut ata chu Mi chhan chhuak ang che.

¹²Kan fapate chu thlâi ang maiin ţang duang sela; Kan fanute pawh lal in kila Lung chher mâwi ang lo ni rawh se;

¹³Kan buhzênte chu lo khat liam sela, Thlâi thar tinrêngin lo vûm thêr thûr sela, Kan berâmte pawhin no sâng tam tak neiin Kan ram chhûngah chuan sîng tam tak hring sela,

¹⁴Kan bâwngpaten thiar zut zut sela, Ran rual rawktu emaw, hruai botu emaw awm lovin, Khawlaiah pawh mangang âu thâwm awm lo bawk sela.

¹⁵Chutiang dinhmunâ dingte chu an nihlawh e; Pathiana LALPA nei mite chu an va nihlawh êm!

BUNG 145

KHAWNGAIHTU PATHIAN FAKNA

¹Aw Lalber, ka Pathian, ka châwimâwi ang che, I hming pawh kumkhuain ka fak ang.

²Ni tinin ka fak ang che a; I hming chu kumkhuain ka fak ang.

³LALPA chu a ropui a, nasa taka fak tûr a ni; A ropuizia chu chhui chhuah rual a ni lo.

⁴Chhuan khatin chhuan dang hnênah i thiltihte chu an fak chhâwng zêl ang a, I thiltih ropui takte chu an hriattîr ang.

⁵I ropuina mawizia hi ka chhût ka chhût thîn ang, I thilmak tihte chawp hian ka ngaihtuah bawk ang.

⁶Miten i thiltih chakzia leh râpthlâkzia an sawi darh ang a, Kei pawhin i ropuizia ka puang bawk ang.

⁷I ţatna ropui an hriat reng chu an sawi thîn ang a, I dikzia chu hlân an châwi ang.

⁸LALPA chu mi khawngaih thei, lainatnaa khat; Thinnel leh ngilnei tak a ni.

⁹LALPA chu mi zawng zawng chungah a ţa a; A lainatnate chu a thil sîam zawng zawng chungah a awm a.

¹⁰Aw LALPA, i thilsiam zawng zawngten lâwmthû an hril ang che a, I mi thianghlimte pawhin an fak ang che.

¹¹I Lalram mâwizia an la sawi ang a, I thiltihtheihzia chu titi nân an la hmang ang.

¹²Mihring fate hnênah a thiltih ropui takte leh, A lalram mâwina ropuizia hriattîr tûrin.

¹³I lalram chu chatuan lalram a ni a, I thuneihna chuan chhuan zawng zawng awm chhûng a daih dâwn si a.

¹⁴LALPA chuan tlû zawng zawngte chu a chelh ding thîn a, Kûn ngawih ngawiha awm zawng zawng chu a kâi tho thîn.

¹⁵Thil zawng zawng hian beisei takin an thlîr reng che a, Nangin a hun takah an chaw i pe thîn.

¹⁶I kut i han phar chuan Thil nung tinrêngte mamawh chu i titlai thîn.

¹⁷LALPA chu kawng tinrêngah a dik fâi vek a, A thiltih apiang chu khawngaihnaa tih vek a ni.

¹⁸LALPA chuan amah kotute chu a hnaih thîn, Thutaka amah kotu zawng zawngte chu.

¹⁹Amah tihtute duh zâwng chu a hlawhtlintîr thîn ang; An âu rî a lo ngaithlâ ang a, anni chu a chhandam ang.

²⁰LALPA chuan amah hmangaihtute zawng zawng chu a humhalh tlat a; Mi sualte erawh chu a tiboral vek ang.

²¹Ka kâ hian LALPA fakna thû a sawi ang a, Tîsa zawng zawng hian a hming thianghlim chu an fak ang, Chatuan chatuanin.

BUNG 146

KHAWNGAIHTU PATHIAN

¹LALPA chu fak rawh u! Aw ka nunna, LALPA chu fak rawh!

²Ka dam chhûng zawngin LALPA chu ka fak ang a; Nung dama ka awm chhûng zawngin ka Pathian fakin ka zai ang.

³Mi liante chungah inngat suh ula, Mi ţanpui thei hlei lo mihring fate chu ring hek suh u.

⁴A thlarauvin a chhuahsan a, ani chu leiah bawk a kîr leh a; Chu mi ni lâ lâ chuan a thil ruahmante chu a boral ngâl thîn.

⁵Ĳanpuitu atâna Jakoba Pathian vuan tlattu chu a nihlawh e, A beiseina chu LALPA a Pathianah chuan a awm si a.

⁶Ani chu lei leh vân te, Tuifinriat leh a chhûnga awm zawng zawngte siamtu a ni; Ani chu chatuana thutak vawng rengtu a ni.

⁷Ani chuan awpbeh tuarte tân ro a rêlsak a; Rilţâmte hnênah chaw a pê a. LALPA chuan mi tângte a chhuah zalên thîn.

⁸LALPA chuan mitdelte mit a tivâr a; LALPA chuan kûn ngawih ngawihthe chu a kai tho thîn a; LALPA chuan mi dikte chu a hmangaih si a.

⁹LALPA chuan mikhualte chungah ţat a chhuah thîn a; Pa nei lo leh hmeithaite a chhawmdâwl thîn; Mi suaksualte kawng erawh chu a tiletling thîn a ni.

¹⁰LALPA chuan chatuanin ro a rêl ang, Aw Zion, i Pathian chu chhuan zawng zawng thlengin a lal dâwn si a. LALPA chu fak rawh u!

BUNG 147

ISRAELTE HRUAI KÎR LEHNA

¹LALPA chu fak rawh u! Kan Pathian faka zai hi a tha si a; Fak hi a nuamin a mâwi a ni.

²LALPA chuan Jerusalem chu a din thar leh ta a; Hnawh chhuah tawh Israel-hote chu a hruai khâwm leh ta.

³Thinlunga lungchhiate chu a tuam dam a, An hliamte chu a tihdamsak thîn.

⁴Arsi awm zât te a chhiar a; An vaiin an hmingin a ko hlawm a.

⁵Kan Lalpa chu a ropui a, a thiltihtheihna chu a nasa si a; A finna chu tâwp chin nei lo a ni.

⁶LALPA chuan mi tlâwmte chu a chawi kâng thîn a; Mi suaksualte erawh chu leiah a paih thla thîn.

⁷Lâwmna hla sa chungin LALPA chu fak ula; Kan Pathian fakin tîngtang nên zai rawh u.

⁸Ani chuan chhûmin vân khi a zâm hliahtîr a, Leilung tân ruah a buatsaihsak a, Tlângachte chuan hlobet a tötîr thîn.

⁹Ani chuan ramsâte tân chaw a pê thîn, Choak no rilâma hrâm thînte hnênah pawh.

¹⁰Ani chu sakawr chaknaah chuan a lâwm lo va; Mihring kête chungah pawh lâwmna rêng a nei hek lo.

¹¹LALPA chu amah tîhtute chungah a lâwm thîn, A ngilneihna beiseitute chungah pawh.

¹²Aw Jerusalem, LALPA chu fak rawh! Aw Zion, i Pathian chu fak mawlh rawh.

¹³Ani chuan i kulh kawngkhâr kalhna thing tlâwnte a tikhauh va; I ângchhûnga i fanau awmte chu mal a sâwm thîn a ni.

¹⁴I ram chhûngah chuan remna a siam a, Buh tha ber chiin a hrai tlai thîn si che a.

¹⁵A thupêk chu leiah hian a tîr chhuak a; A thû chu a darh chak êm êm a ni.

¹⁶Sahmul vâr angin vâr a sûtîr a, Vûr khangte chu vut angin a theh darh thîn.

¹⁷Rialte chu chhang them nâwi angin a theh chhuak thîn a; A vawhzia chu tu nge tuar thei ang?

¹⁸A thû chu a tîr chhuak a, a tituirîl a; A thlî a tlehtîr a, tichuan tuite chu a lo luang ta a.

¹⁹A thû chu Jakob-ho hnênah a puang a, Israelte hnênah a dân leh rorêlnate a puang bawh thîn.

²⁰Chutiang tak chuan hnam dang chungah engmah a ti ngai lo; A rorêl dân pawh engmah an hre hek lo. LALPA chu fak rawh u!

BUNG 148

THILSIAMTEN PATHIAN AN FAK

¹LALPA chu fak rawh u! Vân aţangte khian LALPA chu fak ula; Sâng takahte khian amah chu fak rawh u!

²A Vântirhkoh zawng zawngte u, amah chu fak ula; A sipaiho zawng zawngte u, amah chu fak rawh u.

³Ni leh thlâte u, amah chu fak ula; Arsi ênggho zawng zawngte u, amah chu fak rawh u.

⁴Vân sângte u, amah chu fak ula! Vân chung a tui awmte u, amah chu fak rawh u.

⁵Anniho chuan LALPA hming chu fak rawh se, Ani chuan thû a pê a, siam an lo ni ta mai a.

⁶Ani chuan anniho chu kumkhua atân a tinghet a; Boral leh tawh ngai lo tûr thupêk a siam a ni.

⁷Lei aţang hian LALPA chu fak rawh u, Nangni nghapuite leh tui thûk zawng zawngte u;

⁸Mei leh rial te, vâr leh chhûmte u; A thu thlen diktîrtu thlipuite u;

⁹Tlâng lian leh tlâng tê zawng zawngte u; Thing rah duh chi leh sidar thing zawng zawngte u;

¹⁰Ram sâte leh ran zawng zawngte u; Rannungte leh chunglêng savâte u;

¹¹Leia lalte leh mi tinrêngte u; Mi liante leh leia rorêltu zawng zawngte u;

¹²Nula leh tlangvâlte u, Putarte leh naupangte u,

¹³LALPA hming chu fak rawh u, A hming chauh chu chawî sân a ni a; A ropuina chuan lei leh vân a khûm si a.

¹⁴A mite kî chu a chawîmâwi bawh a, A mi thianghlim zawng zawng fakna te, Israel fate leh An bul hnaia mite pawhin LALPA chu fak rawh u!

BUNG 149

ZION FATE FAKNA

¹LALPA chu fak rawh u! LALPA chawîmâwiin hla thar sâ ula, Mi thianghlimte inkhâwmnaah chuan fak rawh u.

²Israel-ho chu an siamtu chungah chuan lâwm sela; An Lalber chungah Zion fate chu lâwm rawh se.

³A hming chu lâmin fak sela; Kutkhuangte leh tîngtangte nên amah fakin zai rawh se.

⁴LALPA chu a mite chungah a lâwm si a; Mi tlâwmte chu chhandamnain a thuam mâwi ang.

⁵Mi thianghlimte chu ropuinaah lâwm sela; An khum laizâwlah te hlim takin zai rawh se.

⁶Pathian chawîmâwina chu an kâah khat sela, An kutin khandaih hriam tawn keng bawh rawh se;

⁷Hnam tin chung a phuba la tûr leh, Mi tin chung a hremna thlentîr tûr te,

⁸An lalte khaidiata phuar a, An mi liante thîr kawh buntîr tûr leh,

⁹An chungthu rêl, ziaka awm tawh sa anga hlen chhuak tûrin, Chû chu a mi thianghlim zawng zawngte ropuina a ni si a. LALPA chu fak rawh u!

BUNG 150

LALPA CHU FAK RAWH U

¹LALPA chu fak rawh u! Pathian chu a hmun thianghlimah chuan fak ula; Vn boruak ropui takah khian amah chu fak rawh u!

²A thiltih ropui takte avnngin amah chu fak ula; A ropui nasat em avnngin amah chu fak rawh u.

³Twtawrwat rin amah chu fak ula; Perhkhuang leh tngtangin amah chu fak rawh u.

⁴Kutkhuangte leh lmin amah chu fak ula: Tngtang chi hrang hrang leh phnglwngin amah chu fak rawh u.

⁵Drbenthek ri ring takin amah chu fak ula; Drbenthek khawn rin amah chu fak rawh u.

⁶Engkim, thaw thei tawh phawt chuan LALPA chu fak rawh se. LALPA chu fak rawh u!

THUFIGNTE

Ziah tu: Solomona leh Mi Dangte • Ziah kum: B. C. Zabi 10 vêl

Thufingte hi thu sawi chi hrang hrang, tawi tê tê, fiah tak tak si fâwk khâwmna bû a ni a. Tehkhinna leh entîrna a nih hlawm avângin, a châng chuan inkalh ang te pawhin a lang thei a. Chutiang kârah chuan thudik leh thutak a lo lang thîn a. Thufing tâwi ang chi hi hmasâng khawvêlah khân a lâr viau ni tûr a ni. Chuvângin Solomona thufing bûah pawh hian hnam dang thufing leh thusawite pawh a tel nual. 1 Lalte 4:32-a kan hmuh dânin Solomona khân thufing sâng thum zet a sawi chhuak. Hê Thufingte bû aţang hian finna thu hrang hrang te, pafa infuihna te, thilphalna te, chhûngkaw thilah leh sumdawnna thila rinawmna pawimawhzia te, mahni inthunun leh nun uluk a ʔulzia bâkah inngaihtlâwmna, dawhtheihna leh mi dangte nêna inlaichinna ʔa neih thû te a langsar hlê a. Thufingte bûah hian ei leh in chungchânga insûm dân te, dâwt thû te, thatchhiatna te, nawmchenna thil te, inhnial buaina leh ʔhian ʔa lo kawm te chu thil ʔa lo a sawi zînga langsar deuhte a ni. Thufingte bû hi a thupui hmangin heti hian thliar hrang ila: (1) Pa-fa thurâwn, 1-9; (2) Finna leh Pathian ʔihna, 10-24; (3) Solomona thufingte, 25-29; (4) Belhchhahna, Agura leh Lemuela te thufing, 30-31. Thufingte bû hi Bible-a lehkhabu 20-na a ni a, bung 31 leh châng 915 a awm.

BUNG 1

FINNA BUL

¹Israel lal Davida fapa Solomona thufingte:

²Finna leh zirtîrna pawmpui tûr te, Hriatthiamna thu man chhuak thiam tûr te,

³Finna te, dikna te, rorêlna leh hleih neih loh dân kawnga zirtîrna dawng thei tûr te;

⁴Mimâwlte chu fimkhur thiamna neihtîr tûr te, Tlangvâlte tân hriatna leh hmang châng hriatna neihtîr kawngah te hian

⁵Mi fîng chuan a ngaithlâ a, hriatna a belhchhah ʔhîn a, Hriatthiamna nei mi chuan thurâwn fîng a dawng bawk ʔhîn,

⁶Thufing leh thu har tak takte hre thiam, Mifingte thû leh thu khirhkhân man thiam nân a ʔul a ni.

⁷LALPA ʔih hi finna ʔobul a ni a, Mi â-te erawh chuan finna leh zirtîrna an hmusit ʔhîn.

THURÂWN DIK LO HNRAR RAWH

⁸Ka fapa, i pa zirtîrna che chu ngaithlâ la, I nu zirtîrna che chu ngaiththah suh.

⁹I lû atân mâwi taka chei lukhum a ni ang a, I nghâwng atân ʔhî a ni ang.

¹⁰Ka fapa, mi sualin an thlêm che chuan Zâwm ve rêng rêng suh.

¹¹“Ti rawh le, thisen chhuah tûrin i châng ang khai, Chhan leh vâng awm lovin, pawî sawi lote hi i lo châng ru teh ang;

¹²Seol angin a nung chungin kan lo dawlh zêl ang a, Khuarkhuruma tlâ ang vang vangin han pil bo teh se;

¹³Thil hlu tinrêng kan lâksak ʔeuh ang a, Chûng thilte chuan kan in chu kan chhêk muk dâwn nia.

¹⁴Kan zîngah hian lo tel vê la, Zêm khat kan zen tlâng dâwn nia,” te an tihin,

¹⁵Ka fapa, an zîngah tel vê suh la, An kawng chu zawh vê hek suh.

¹⁶Sualna kawng lamah hlîr kê an pên a, Thisen chhuah tûrin an phî ruai ʔhîn.

¹⁷Savâ hmuh lâwk theih tûra Lên zâr chu a thlâwn mai a ni si a.

¹⁸Hêng mite erawh chu mahnia thisen inchhuah hun nghâk lek an ni, Mahni nunna châng rû chauh an ni zâwk.

¹⁹Chutiang chu mi duhânte awm dân a ni rêng a; Mahni hnuk chhattu nihna mai a ni e.

FINNA ÂU ÂW

²⁰Finna chu ring takin kawt laiah a âu va, Kawng pêng ʔhuamahte chuan a âw a chhuah a;

²¹Mipui lunna lai takahte a âu va, Khawpui luhna kawngkhâr bulah A âu vak vak a:

²²“Nangni mi mâwlte u, eng chen nge mâwlna hi in ngainat dâwn? Hmusittute chuan indiriamna hi an hlimpui a, Mi âte lahin finna an haw tlat a.

²³Ka zilhna che u hi ngaihven rawh u; Mathei lovin in chungah ka thlarau ka leih ang a, Ka thû pawh ka hriattîr ang che u.

²⁴Ka ko che u-a, in duh lo va, Ka kut ka phar a, tuma’n in ngaisâng bawk hek lo;

²⁵Ka thurâwn zawng zawngte chu in ngainêp a, Ka zilhna che u pawh in pawm duh si lo.

²⁶Vanduaina in tawh hunah ka nuihzat vê ang che u-a; In thlaphân hunah ka nuihsawh vê ang che u.

²⁷Hlahna thlipuiin a nuai che u-a, ʔhâwngaleivirin a tihchhiat che u-a, Manganna leh lungngaihna a lo thlen hunah, ka nuihsan vê ang che u.

²⁸“Chumi hunah chuan min ko vang a; mahse ka chhâng lo vang; ʔhahnem ngai takin min zawng ang a; mahse min hmu lo vang.

²⁹Hriatna chu an huat avâng leh, LALPA an ʔih duh loh avângin.

³⁰Ka thurâwn pakhat mah an duh lo va, Ka zilhna tinrêng an pawisa duh hek lo.

³¹Chuvângin, an khawsak dân rah chu an la seng ngei ang, An suangtuahna chuan lo intitlai mai mai teh se.

³²Mi mâwlte chuan an pên bona chu an la thihpui dâwn a, Ngaihʔha âwma an awm ve rîkngawtna chuan mi â-te chu a tiboral ang.

³³Ka thu zâwm apiangte erawh chu him takin an awm ang a, Thil ʔa lo hlau lovin him takin an awm ang.

BUNG 2

FINNA HLUTZIA

- ¹Ka fapa, ka thûte hi i ngaihthlâka, Ka thupêkte i ngaihhluta,
²Finna lam i ngaihvena, Hrethiam tûra i thinlung i pêk chuan;
³Ni e, hriatfiah lehzial duha i auhva, Hriatthiam theihna pawh i auh bawka;
⁴Tangkarua ang maia i zawna, Ro phûm rûk anga i zawn chuan;
⁵LALPA ãih nachâng i lo hria ang a, Pathian hriatna chu i chhar chhuak ang.
⁶LALPA chuan finna a pe ãhîn a, A kê aţang chuan finna leh hriatthiamna a lo chhuak ang;
⁷Mi dikte tân finna ãha a khâwl khâwmsak a, Mi nun ngîlte tân amah chu phâw a ni;
⁸Diknaa rorêlna kalkawng a vêng tlat a, A mi thianghlimte awm dân a wawng him ãhîn.
⁹Tichuan, felna leh dikna chu i lo hrethiam ang a, Hleih neih lohna leh kawng ãha tinrêng pawh i hrethiam bawk ang.
¹⁰I thinlungah finna a lo luh chuan I nunin hriatna chu a hlimpui dân a ni.
¹¹Hmang châng hriatnain a hum ang che a; Hriat thiamnain a chelh tlat ang che.
¹²Sual kawng ata a chhan chhuak chein, Khawlo taka thu veivir chîngte lakah a chhan chhuak ang che;
¹³Mi dikte kal kawng pênsantute aţang leh A thim lam pan tlattute aţang pawhin a chhan chhuak ang che.
¹⁴Thil سوال tih chu an lâwm zâwng a ni a, Mi sualte awm khawloh dân te chu an tuipui tâwk a tling a;
¹⁵An awm dân chu a herh tlat a, Kawng laka pêñ bo hmang an ni;
¹⁶Hmeichhe awmherh lakah a chhanhim ang che, Fakderna ânkaa mi thlêm chîng-i lakah chuan,
¹⁷A tleirâwl lai ãhian bânsana, A Pathian thuthlung theihnghilhtu aţang pawhin.
¹⁸Chû nû in panna kawng chuan thihna lam a hawi a, A kawngte pawhin mitthi lam a hawi;
¹⁹A hnên pan tawh rêng rêng chu an kîr leh tawh ngai lo va, Nunna kawng an zawh leh tawh ngai hek lo.
²⁰Thatna kawng chu zawh zâwk la, Dikna kawng chu zawh zêl ang che.
²¹Mi dikte chuan ram hi an luah ang a, Sawisêl bote chu a chhûngah an awm reng ang.
²²Mi suaksualte erawh chu lei aţang hian tihboral an ni ang a, Mi rinawm lote chu paih chhuahin an awm ang.

BUNG 3

THALAITHE HNÊNA THURÂWN

- ¹Ka fapa, ka dân hi theihnghilh suh la, I thinlungin ka thupêkte chu zâwm reng zâwk rawh se;
²Dam reina ni leh kum te, Thlamuannate a pêk belhchhah dân che nia.
³Khawngaihna leh thutak hian hnuchhawn che suh se, I nghâwngah zem tlat la, I thinlung phêkah zia ang che.
⁴Tichuan Pathian leh mihring mithmuhah Duhsakna leh hmîng thatna i hlawh dân nia.
⁵I thinlung zawng zawngin LALPA chu ring la, Nangma hriatnaah innghat suh;
⁶I thiltihna rêng rêngah amah chu hre reng la, Tichuan, i kalna tûr kawngte chu a kawhhmuh ang che.
⁷Mahni ngaihin intifing suh; LALPA ãih la, سوال kalsan rawh.
⁸I taksa tân hrisêlna a ni ang a, I ruh tân chakna a ni ang.
⁹I sumin LALPA châwimâwi rawh, I thil lo pung hmasa zawng zawngte nêñ;
¹⁰Tichuan, i chhêk in a lo khat liam ang a, I uain sâwrkhur pawh uain tharin a luang liam ang.
¹¹Ka fapa, LALPA thununna che chu ngainêp suh la, A zilhauhna che chu ngai haw suh.
¹²Pain a fa duh takte a zilhâu ãhîn ang hian LALPA chuan a hmangaihte chu a zilhâu ãhîn.
¹³Finna chhar chhuaktu chu mi nihlawh a ni a, Hriat thiamna neih hi mi nihlawh nihna a ni.
¹⁴Tangkaraw peipun aiin a hlêp a ãha zâwk a, Rangkachak ãha mi ai pawha hlâwk zâwk a ni.
¹⁵Lungmantam aiin a hlu zâwk a, I duhthusâm thil zawng zawngte pawhin a tluk pha lo vang.
¹⁶A kut dîng lamah damreina a awm a, A kut vei lamah sum leh ropuina a awm bawk.
¹⁷A kawngte chu a zâl nuam a, A kawng tuanin inremna a awm.
¹⁸A vuantute tân nunna thing a ni a, ãha taka kawltute chu mi nihlawh an ni.
¹⁹LALPA chuan finnain leilung a dîn a; Hriat thiamnain vân a tinghet a;
²⁰A hriatnain tuifinriatte a ãhên darh a, Chhûmte chuan dâi an fartîr a.
²¹Ka fapa, thil dangah i mit la sawn suh la, Finna leh hmangchâng hriatna dik chu wawng tlat rawh;
²²I thlarau tân nunna a ni ang a, I nghâwng tân khawngaihna a ni ang.
²³Tichuan, i kawng chu him takin i zawh ang a, I kê pawh a petek hek lo vang.
²⁴I mut hunah pawh i hlau lo vang a; Ni e, tui takin i muhil siai siai tawh ang.

²⁵Hlauhawm pawh lo thleng thut se hlau suh la, Mi sualte chungah chhiatna a lo thlenin hlau lo vang che.

²⁶LALPA chu i himna a ni a, I kê chu thanga awh theihna lakah a vêng ang.

²⁷A phû ngawih ngawihte tân thil thâ ui suh, Titheitu dinhmunah dîng i nih phawt chuan.

²⁸I thenawm hnênah, “Kal leh rih la, lo kal leh ang che, Naktûkah ka pè ang che,” ti suh, Pêk tûr i kawl reng si chuan.

²⁹I thenawm chungah thil thâ lo tih tum suh, Nangma zârah ngaihthâ takin i kiangah a khawsa vê si a.

³⁰A chhan thâ tâwk awm lovin tumah khing suh, I pawh engmah a khawih si loh chuan.

³¹Mi nurâwng chu awt suh la, A awm dân pawh la ve hek suh.

³²Kawhmawh bâwl chîng chu LALPA ngaihah mi tenawm a ni; A thurûk erawh chu mi rilru ngîlte hnênah a râwlrûk thîn.

³³Mi sual inah LALPA ânchhia a châm reng a, Mi dikte chênna in erawh chu mal a sâwm thîn.

³⁴Hmusittute chu a hmusit thîn a, Mi tlâwmte erawh chu khawngaihna a pe thîn.

³⁵Mifingte rochun tûr chu ropuina a ni a, Mi â-te rochun tûr erawh chu mualphona a ni.

BUNG 4

FINNA AVÂNGA HIMNA

¹Ka fate u, pa zirtîrna chu ngaithla ula, Hriat thiamna nei tûrin ngaihtuah rawh u;

²Zirtîrna thâ ka pè che u-a: Ka dân chu bânsan hauh suh u.

³Ka pa fapa ka ni a, Ka nu fa mal duat lai ka nih hi.

⁴Heti hian min zirtîr thîn a: “Ka thû hi i thinlungin vawng tlat la; Ka thupêkte zâwm bawk la, nunpui rawh.”

⁵Finna nei la! Hriatthiamna nei rawh! Theihngihlîh suh la, ka kâa thu chhuakte chu hnar suh ang che.

⁶Hawisan lo la, a humhim ang che; Hmangaih la, a vêng ang che.

⁷A thupui ber chu finna a ni a; Chuvângin finna chu nei ang che. I thil neih zawng zawng zîngah hriat thiamna tel rawh se.

⁸Châwimâwi la, a châwi sâng ang che; Pawm tlat la, mi zahawmah a siam ang che.

⁹I lûah khawngaihna lukhum cheimâwi a khumtîr ang che a, Mâwina lallukhum a hlân ang che.”

¹⁰Ka fapa, ka thu sawi hi pawm la, I dam chhûng kum a lo tam dâwn nia.

¹¹Finna kalkawng ka zirtîr che a; Kawng dik takah ka hruai che hi.

¹²Pheikhâi zâng takin i kal thei ang a, I tlân pawhin i inchhuih lo vang.

¹³Zirtîrna thû chu vuan tlat la, thlah leh tawh suh; Vawng tlat rawh, i nunna a ni si a.

¹⁴Mi suaksual kawngah chuan lût suh la, Sualna kawng pawh zawh hek suh.

¹⁵Pumpelh la, a kawngah pawh kal suh; Hawisan la, kalsan daih rawh.

¹⁶Pawi an khawih phawt loh chuan an mu thei lo va, Tute emaw tal an tihbui zet loh chuan an mu thei thîn lo.

¹⁷Suaksualna châw an bâr a, Nunrâwnna zû an in thîn.

¹⁸Mi dikte kawng erawh chu ni êng ang a ni a, Chhûn laia a êng zual lai ang hi a ni.

¹⁹Mi suaksualte kawng chu thim chhah mup ang a ni a; Engin nge titlû tih pawh an inhre hek lo.

²⁰Ka fapa, ka thu sawi ngaithlâ la, Ka thu sawiah beng lo chhi rawh.

²¹I hmuh phâk lohvah chhuah botîr suh; I thinlung chhûngrilah pâi tlat ang che.

²²A hmu fuhte tân nunna a ni a, An taksa pum tân hrisêlna a ni.

²³I thinlung kha fimkhur takin vawng thâ ang che, Nunna lo luan chhuahna hnâr a ni si a.

²⁴Bumhmang lei chu i lakah dah hla daih la, Bumhmang hmûi chu i hnên ata dah kiang daih rawh.

²⁵I mitin ngîl takin hma lam en la, Dîng takin i hma lam thlîr rawh.

²⁶I kalna tûr kawng chu chhût hmasa thîn la, I kawng zawng zawng tihngheh ni rawh se.

²⁷Dîng lamah emaw, vei lamah emaw pêng suh la; Sual lakah i kê chu dah kiang daih rawh.

BUNG 5

UIRÊ HLAUHAWMZIA

¹Ka fapa, ka finna thû hi ngaithla la, Ka hriatnaah hian i beng lo chhi ang che.

²Ngaihruat thiamna i lo neih theih nân leh I leiin hriatna a vawn theih nân.

³Hmeichhe lepchiah hmûi chu khawizû angin a thlum a, A kâ chu hriak aiin a nâl bawk si;

⁴A tâwpna erawh chu sâi angin a khâ, Khandaih hriam tawn ang maiin a hriam.

⁵A kê chu thihna lam panin a chhuk a, A ke pênin hremhmun lam a hawi.

⁶Nunna kawng zawh nachâng pawh a hre lo; Kawng mûmal lovah a kal a, Eng kawng nge a zawh tih pawh a hre lo.

⁷Chuvângin ka fate u, mi ngaithla ula, Ka thu sawi hi pên bosan suh u.

⁸A lakah chuan inthiarfihlîm daih ula, A kawngka bul pawh va hnaih dêk suh u.

⁹I zahawmna hi mi dang hnênah i pe hlauh ang a, Nunrâwng lakah i hun thâ i tlakral dah ang e.

¹⁰Ram dang miten i hausakna chu intihtlai nân an hman ang a, I thawh chhuah sâ chu hmêl hriat loh inah a insawn palh hlauh ang e.

¹¹I tîsâ leh taksa a chauh chhiat hunah I la ʔahpui leh si ang a,

¹²“Engtizia nge zirtîrna chu ka lo huata, Ka thinlungin zilhhauhna a lo ngaihsak loh le!

¹³Mîn zirtîrtu thû ka lo âwih ta lo va, An thu mîn hrilh ka lo bengkhawn duh loh vâng a ni.

¹⁴Mîpuite leh pung khâwmho zîngah, Chhiatna ka tâwk lo chauh a nih hi,” i ta ni ang.

¹⁵Nangma tuiizêm ami ngei tui in rawh, Nangma tuikhur aʔanga lo luang chhuak ngei chu.

¹⁶I tuihnâte chu ram tinah luang darhin Kawthlêrahte lui angin a luang ral dâwn em ni?

¹⁷Nangma tân chauh ni sela, Mi dangte ʔawmpui vê atân a ni lo.

¹⁸I tuikhur chu malsâwmin awm sela, I tleirâwl lai nupuiah chuan lungâwi ang che.

¹⁹Zukla duhawm leh zukchal pâ tak iangin A ʔang nêchuan i lung dum sela; A hmangaihna chuan âwi tlei hliah hliah che rawh se.

²⁰Engah nge nang, ka fapa hian hmeichhe lepchiah chu i ngaihzâwn anga, A ʔang nêma i bei tlat ang le?

²¹Mihring awm dân tinrêng hi LALPAN a hmu vek a, A kalkawngte chu a hmu tlang vek asin.

²²Ama suahsualna ngei chuan mi suaksual chu a man ang a, A suahsualna hruizên ngei chuan a hling ang.

²³Zilhna tlâkchham avângin a thi ang a, A ât êm avângin a bo vang vang ang.

BUNG 6

THUTIAM HLAUHAWM

¹Ka fapa, i ʔhian tâna mawhpurtûa i intiama, Mi hrang tâna i lo insawi âwk laklawh tawh a nih chuan,

²I ʔawngka chhuak ngeiah i tawlh thlû a; I ʔawngkâ ngeiin i inbât tâng tihna a ni.

³Chuvângin ka fapa, hetiang hian inhlih kian tum ang che; I ʔhian thuhnuaia intulût i ni ta si a: Inphahhnuai takin a hnênah va kal la; A ngaihthiamna va dîl mai rawh.

⁴Mutthlûksan lo la, Muthilhsan hek suh.

⁵Sakhîin sa pêltu a tlân bosan angin pût chhuak la, Sava vehtu laka sava a thlâwk chhuak angin thlawh bosan rawh.

THATCHHIAT ÂTTHLÂKZIA

⁶Nang, thatchhe pâ! fanghmîr hnênah kal la, An awm dân aʔangin finna va zir rawh,

⁷Anni chuan hotute, endiktute leh rorêltute nei lo mah se,

⁸Nipuiah chaw an chhêk khâwl a, A seng hunah ei tûr an seng khâwm ʔhîn.

⁹Aw, thatchhe pâ! eng chen nge i mut dâwn? Eng tikah nge i ʔanharh dâwn le?

¹⁰“Mu leh phawt teh ang, chhîng hlek ang, Kut kuanguahin chawh hlek ila,” i tih chhûngin

¹¹Retheihna chuan zânvâk angin a rawn nang thut ang che a, Tlâkchhamnain sipai angin a rawn man thut ang che.

MI SUAKSUAL PA

¹²Mi tlâktlai lo, mi sual pa chu, ʔawng duk dak lo pui pui nêchuan a vâk vêl a;

¹³Mit siai chungin thû a sawi a, A kê chu a phiat vêl a, A kut zungtangin a kâwk kual zut zut ʔhîn.

¹⁴Khawlohna thinlung a pu tlat a, Sual lam hlîr a suanguah a, Innghirngghona chî a tuh ʔhîn.

¹⁵Chuvângin, chhiatnain a rawn nang thut ang a, Tihdam theih lohvin a chungah chhiatna a lo thleng thut ang.

¹⁶Hêng thil parukte hi LALPAN a hua, Nî e, a ten zâwnng thil pasarih a awm;

¹⁷Chapona mit te, Lei daw thei te, Pawi sawi lo thisen chhuahna kut te,

¹⁸Thil ʔa lo suanguah ʔhîn thinlung te, Thil sual ti tûra ngalchak te;

¹⁹Hretu der mi dawheh te, Unau kêra inrem lohna tuhtute hi.

UIRÊNA LAKA FÎMKHUR

²⁰Ka fapa, i pa thupêk chu zâwm la, I nu zirtîrna chu hawisan suh.

²¹I thinlungah chêtîr reng la, I ngâwnghawh awrh reng rawh.

²²I vah vêlna apiangah an hruai ang che a; I mut hunin an vêng reng ang che a; I harh vêleh an lo be ngâl bawk ang che.

²³Thupêk chu khâwnvâr a ni a, Dân chu êng a ni si a; Inzilhhauhna hi nun dân kawng a ni;

²⁴Hmeichhe che khawlo leh Mi thlêm chîng kam thlum tak lakah a vêng ang che.

²⁵I thinlungin a tîtuai nalhna ît suh la, A mitmeng no chuan hîp che suh se,

²⁶Nawhchizuar avângin Patling hi chhang themah a chang ʔhîn asin; Uirenu chuan nunna hlu tak chu a vehin a veh dâwn si a.

²⁷Miin a thawmhnaw hâk lai tikâng lovin Meiling a kuah thei êm ni?

²⁸A kê tikâng lovin meiling chungah Mi a kal thei em ni?

²⁹A ʔhenawm pa nupui mutpuitu pawh chutiang bawk chu a ni; A va khawihthu chuan thiam a chang tawp lo vang.*

³⁰A rilʔâm tihreh nâna miin rûk a rûk hian Miten an hmuhsit phah lêm lo va;

³¹Mahse man chhuah a nih chuan a leh-sarihin a rûl tûr a ni; A ina a sum zawng zawngin a tawrh phah hial ang.

³²Mi nu uirêtu chu mi mâwl a ni; Mahni nun ngei tichhia a ni si a.

³³Hliam tuar bawh, hming hliaw bawkin a awm ang a, A hming chhe kumkhua tawh ang.

³⁴Thĩkthũ hi pasal thinrimna a ni, Phubâ a lâk hunah a dĩm hauh lovang.

³⁵Thlēm lungâwi rual a ni lo vang a, Thilpêk tam taka tlawn lungâwi chĩ a ni hek lo vang.

BUNG 7

¹Ka fapa, ka thu zâwm la, Ka thupêkte hi ngai pawimawh hlê ang che.

²Ka thupêkte zâwm la, nunpui ang che, Ka dân hi i mit nautê angin vawng tlat rawh.

³I zungtạngah vêt la; I thinlung lungphêkah ziaak rawh.

⁴Finna hnênah chuan, “Ka farnu i ni,” ti la, Hriat thiamna chu i laina hnai berah neih ang che.

⁵Tichuan, hmeichhe lepchiaah lakah a vêng ang che a, Tawngkam thluma mi lēm thiam lakah a vêng ang che.

NAWHCHIZUAR VERVÊK

⁶Kan tukverh zâwngdaikalh âwng ațang chuan ka han thlĩr a,

⁷Tlangval rualho zĩng ațang chuan Hriat thiamna nei lo vâl lungmâwl tak ka hmu a.

⁸Kawthlêra chũ nũ awmna zâwn a va thlen chuan, A in panna pêng chu a zawh ta a.

⁹Tlai lam thim thut thutah, Zân thimtham hnuaiah chuan.

¹⁰Chutah chuan hmeichhia, Nawhchizuar incheia inchei, vervêkna thinlung pũin a lo tâwk a.

¹¹A awm hlê hlê thei lo va, Luhul si, ri hawr hawr mai a ni.

¹²Kawthlêrah te, pêng thum laiah te a awm a, Kĩl tin ațangin a châng thĩn.

¹³Ani chuan a lo kuah chawt a, a lo fâwp a, Zâm lo tak mai hian a hnênah,

¹⁴“Remna thilhlân hlân tũr ka ni a, Vawiinah ka thutiam ka hlen ta a.

¹⁵Chuvângin, nangmah tâwk tũrin ka lo chhuak a ni, Ka melh ruai ruai che a, Ka tawng ta hlahu che a nih hi.

¹⁶Ka khumah âwngphah nalh deuh mai, Aigupta lazâia tĩal mâwi ka phah diam a,

¹⁷Ka khum chu berâw te, aloe te, thakthĩngtein ka tirimtui asin.

¹⁸Tĩ rawh le, zankhuain hmangaihna i lo chên dũn ang khai, Hmangaihna in kan intihlim dâwn nia.

¹⁹Kan pa awm loh lai tak a ni lehngghâl a; Hla takah a zin bo daih a;

²⁰Tangka ip a keng a, A hun tiamah a lo hâu leh chauh dâwn asin,” a ti a.

²¹A tawngkam thiamna chuan a hneh ta a, A kam thlum tak chuan a thlēm thlu ta a.

²²Tichuan, bawngpain sa talhna hmun a pan ang leh, Kawl buntĩr tũra mi â a kal ang leh,

²³Savain a awhna tũr thang a pan a, Thalín a thĩnhnũn a chhun tlang ang mai hian, Chũ nũ chu a zui lût ta ruak ruak a, A nunna a

chân phah dâwn tih rêng a hre lo.

²⁴Chuvângin ka fate u, ka thu hi lo ngaithla ula, Ka kâa thu chhuakte hi ngaihven rawh u:

²⁵In thinlungin chũ nu awmna lam chu hawi suh sela, A kawng zawh lamah chuan pêng bo hek suh se.

²⁶Mĩ tam tak a lo hlĩam tawh a, A mi thahte lah chu mi chak tak tak hlĩr an ni si a.

²⁷A in chu hremhmun lamlian a ni a, Thihna khur chhũng lam a chhun lût ruah mai a ni.

BUNG 8

FINNA THATZIA

¹Finna chu âu chhuakin, Hriatna chuan a âw a chhuah lo vem ni?

²Tlâng sâng chungah te thuthmun a rem a, Kawng sĩrah te, kawng pêng thummahte a dĩng thĩn a.

³Kawngka pui bulah te, khaw luhna kawngpui bulahte ring takin a âu va.

⁴Aw nangni mihringte u, ka auh che u hi, Ka âw hi mihring fate tân a ni.

⁵Aw, nangni mi mâwlte u, remhriatna hi lo man thiam teh u, Nangni mi âte u, hriat thiamna thinlung lo nei teh u.

⁶Ngaithlâ ula, thil tãa ka sawi dâwn hi, Ka kam chhuak chu thu dik a ni e.

⁷Ka kâ hian thutak a sawi chhuak ang a, Suahsualna hi ka hmui tân thil tenawm a ni.

⁸Ka kâa thu awm zawng zawng chu a dik vek a, Thu kâwi leh khawlo rêng rêng a awm lo.

⁹Hre thiamte tân chuan a fiah vek a, Finna chhartute tân pawh a dik vek a.

¹⁰Tangka ni lovin, ka zirtirna hi dawng zâwk rawh u, Rangkachak tãa chi aiin hriatna chu thlang zâwk rawh u.

¹¹Finna hi lungflu sen chi aiin a tãa zâwk a, Duhthusâm thil engmahin a khĩng pha lo.

¹²“Kei, finna hi remhre takin ka awm a, Hriatna leh ngaihruat thiam dân ka hâi chhuak thĩn.

¹³LALPA tĩh dân chu sual huat hi a ni; Chapona te, intihveina te, awm dân sual te, Tawng chaltlâi te hi ka huat zâwng a ni.

¹⁴Remruatna leh finna dik hi ka tâ a ni a; Hriat thiamna ka ni a, chakna pawh ka nei a ni.

¹⁵Keimah vângin lalten ro an rêl a, Hotuten dik takin thũ an rem thĩn.

¹⁶Keimah vângin lalte, miliante, Leia rorêltu zawng zawngten rem an ruat thĩn.

¹⁷Mĩ hmangaihtu chu ka hmangaih a, Taima taka mi zawngtute chuan min hmũ ang.

¹⁸Hausakna leh zahawmna hi ka hnêna mi a ni a, Hausak dân dik leh tlo a ni.

¹⁹Ka rah chhuah chu rangkachak aiin a ƣa zâwk a, ni e, rangkachak ƣa chi ai pawhin Ka sum lâk luh chu tangkaraw ƣa mi aia ƣa zâwk a ni bawk.

²⁰Dikna kawng chu ka kal tlang a, Dikna rorêlna kawng laiah chuan;

²¹Tichuan, mi hmangaihute chu sum ka rochuntîr thei ang a, An ro bâwmte pawh ka tikhahsak thei ang.

²²“LALPA chuan bul a ƣan lai khân mi nei tawh sâ reng a, Hmasânga thil a siam hmâ pawh khân.

²³Chatuan aƣanga din ka ni a, Leilung la awm hmâ, a bul tê aƣang khân.

²⁴Tuipui thûk la awm hmâ daihin ka piang tawh a, Tuihna tinrêng luan chhuah hmâ khân.

²⁵Tlângte lo indin chhuah hmâa Mualte lo awm hmâin ka piang tawh a;

²⁶Leilung leh ramte a la siam chhuah hmâa Khawvêla vaivut lo awm hmâ khân.

²⁷Vânte a din ngheh laiin ka awm tawh a, Tuifinriat chung a kâwlkil bial mup a siam lai te,

²⁸Vân boruaka chhûm a zâmtîr lai te, Tuithûkpui hnâ a sawh ngheh lai te,

²⁹Tuiin a thupêk an bawhchhiat loh nâna Tuipui chîm chin tûr a ruatsak lai te, Leilung nghahchhan a phûm lai te khân,

³⁰Kut themthiam angin a kiangah ka lo awm vê reng a; Ni tin amah tilâwmtu ka ni a, A bulah chuan ka hlim êm êm ƣîn a ni.

³¹Chênna tûra khawvêl a siam hian mi tilâwm a, Mihring fate hian min tilâwm êm êm a ni.

³²“Khai le, ka fate u, ka thû ngaithla rawh u le, Ka kawng zawhtute chu an nihlawh si a.

³³Zirtîrna thû chu ngaithlâ ula, fîng rawh u, Ngainêp hauh suh u.

³⁴Ni tin ka kawngkhâr bulah min nghâk a, Ka kawngka sîrah mi châng reng a, Ka thu ngaithlatu chu a eng a thâwl e.

³⁵Tûpawh mi hmû chu nunna hmû a ni, LALPA duhsakna pawh a dawng ƣîn;

³⁶Ka chung a sual erawh chuan ama nun ngei a tikhawlo va, Mi hawtu rêng rêng chu thihna thlang an ni mai.”

BUNG 9

FINNA KAWNG

¹Finna chuan ama in a sâ a, Ban pasarih a phun a;

²Ran te a talh a, Zû te a chawhpawlh a, Dawhkânah pawh ei tûr a chhawp a.

³A awmpui nulate a tîr kual a, Khawpuia hmun sang ber aƣangin a âu va,

⁴“Mi mâwl apiang hetah lo kal rawh u!” a ti a. Hriat thiamna nei lote hnênah tihian a ti a,

⁵“Lo kal ula, ka chhang ei ula, Ka uain chawhpawlh hi in rawh u,” tiin.

⁶Âtna bânsan zâwngin nung ula, Hriatna kawng chu zawh rawh u.

⁷“Inhmuhisit chîng mi zilhtu chuan zahna a hmû ang a, Mi sual zilhtu chuan beih lêt nek a tâwk ang.

⁸Inhmuhisit chîng mi chu zilh duh suh, a huat phah mai ang che, Mi fîng i zilh chuan a hmangaih sawt ang che.

⁹Mi fîng zilh la, a fin belh sauh ang a; Mi dik zirtîr la, a inzir thiam phah bawk ang.

¹⁰“LALPA ƣih hi finna ƣobul a ni a, Mi Thianghlina hriat chian hi finvârna chu a ni.

¹¹I nîte chu ka tihpunsak ang che a, I dam chhûng kumte belhchhahsak i ni dâwn nia.

¹²I lo fin chuan i tâna fîng i ni ang a, Nuihsawh chîng mi i nih chuan nangmah chauhvîn i tuar ang.”

MI Â-TE AWM DÂN

¹³Hmeichhe â chu a ƣê chûl ƣîn a, Engmah hre lo khawpa mâwl a ni.

¹⁴Ama kawngkâah chuan a ƣhû a, Khawpuia ƣhutna hmun langsâr ber a chuh a,

¹⁵Kawnga mi kal te chu a âu vêl ƣîn a, Mahni kawnga kal mêkte chu.

¹⁶“Mi mâwlte u, hetah lo kal r’u,” a ti a; Hriatna tlachhamte hnênah chuan,

¹⁷“A rûka rûk tui chu a thlum a, A rûka chhang ei chu a tui duh bîk,” a ti bawk a.

¹⁸Mahse chu pa chuan chutah chuan mitthi an awm tih rêng a hre lo, Chû nu mi sâwmte chu hremhmun chhûngrilah an awm tih pawh a hre hek lo.

BUNG 10

SOLOMONA THUFINGTE

¹Solomona thufingte: Fapa fîng chuan a pa a tilâwm ƣîn a, Fapa â erawh chuan a nu a tilungngai ƣîn.

²Dik lo taka sum khâwl khâwm hian hlâwkna a nei lo va, Dik taka tihna chuan thihna lakah a chhanhim ƣîn.

³LALPAN mi dik rilƣâm tuartîr a phal lo va, Mi suaksual duhthusâm erawh chu a paih bosak ƣîn.

⁴Zawmthaw taka thawktu kutin retheihna a thlen a, Taihmâkna kut erawh chuan hausakna a thlen ƣîn.

⁵Nipui laia buh chhêk khâwl nachâng hria chu fapa fîng a ni a; Buh seng lai muthilh santu erawh chu fapa, mualphona thlentu a ni.

⁶Mi dik lû-ah chuan malsâwmnate a awm a, Mi suaksual kê erawh chuan tharum thawhna a hmuam reng a ni.

⁷Mi dik hriat rengna chu malsâwm dawng a ni a, Mi suaksual hming erawh chu a ƣawih ral ang.

⁸Mi fîng thinslung chuan thupêkte a dawng ƣîn a, Mi â kamtam erawh chu a tlu chhia ang.

⁹Dik taka awmte kalkawng chu a him a, Mahni kawng tikhawlotu chu hriat chhuah a la ni ang.

¹⁰Mit siai khum ching chuan lungngaihna a thlen a, Mi â kamtam si chu a tlu chhia ang.

¹¹Mi fel kê chu nunna tuikhur a ni a, Mi suaksual kê erawh chu tharum thawhnain a tuam reng mai.

¹²Huatna chuan innghirngghona a chawh tho va, Hmangaihna erawh chuan sual zawng zawng a hliahkhuh thin.

¹³Hriat thiamna nei mi kêah chuan finna a awm a, Hriatna reng nei lo mi hnungzang tân vuakna tiang a awm thung.

¹⁴Mi finge chuan hriatna an khawl khawm a; Mi a kê erawh chuan chhiatna a hnaih reng.

¹⁵Mi hausa hausakna chu a tân khawpui kulh nghet a ni a; Mi retheite boralna chu an pachhiatna a ni.

¹⁶Mi dik thawhrimna chuan nunna a thlen a, Mi suaksual hlauh chu sual bawh a ni.

¹⁷Thununna zâwm thâ chu nunna kawngah a awm a, Zilhhaui haw mi erawh chu kal sual a ni.

¹⁸Huatna thuptu chu hmûi dawthei a ni a, Mi sawi chhiatna thu theh darhtu chu mi â a ni.

¹⁹Thu a tam viau chuan tihsual pawh a tam ngê ngê thin a, A hmûi veng thiam chu mi fîng a ni.

²⁰Mi dik lei chu tangkaraw tha mi ang a ni a, Mi suaksual thinlung erawh chuan hlutna reng a nei lo.

²¹Mi dik kê chuan mi tam tak a chawm a, Mi â erawh chu finna tlachhamin a thi thin.

²²LALPA malsâwmna chuan mi a tihausa a, Lungngaihna a belhchhah vê lo.

²³Mi a tân chuan thil sual tih hi nawmsip bawlna ang a ni a, Hriat thiamna nei mi erawh chu finna neitu a ni.

²⁴Mi sual chungah chuan a hlauh ang ngei thil a lo thleng ang a, Mi dik erawh chu a duh zâwnng pèkin a awm ang.

²⁵Thâwngaleivir lo thawk se, mi suaksual chu a bo daih mai ang, Mi dik erawh chuan chatuan lungpui a nei thung.

²⁶Mi thatchhe tîr chu, Uain thûrin hâ a tîtim a, meikhûin mit a ur thîp ang mai hi a ni.

²⁷LALPA tîhna chuan dam chhûng ni a tisei a, Mi sualte dam chhûng hun erawh chu tihtâwi a ni ang.

²⁸Mi dik nghahfâk chu lâwmna a ni ang a, Mi suaksualte hmachhuan erawh chu a boral ang.

²⁹Mi dik tân LALPA kawng chu chakna a ni ang a, Mahse, thil sual titute tân chhiatna a lo thleng ang.

³⁰Mi dikte chu hnar bo an ni ngai lo vang a, Mi suaksualte erawh chuan lei hi an luah lo vang.

³¹Mi dik kê chuan finna a chhâk chhuak a, Mi khawlo lei erawh chu tan chhum a ni ang.

³²Mi dik hmûi chuan pawm tlâk chin a hria a, Mi khawlo kê aţang chuan khawlohna bawh a lo chhuak thin.

BUNG 11

¹Bûkna dik lo hi LALPA tân thil tenawm a ni a, Tehna dik tak hi a lâwm zâwnng a ni.

²Chapona a lo awmin mualphonain a zui thin; Inngaitlâwmnaah finna a awm.

³Mi rilru ngîl te rinawmna chuan anmahni a kaihruai ang a, Mi rinawm lote chu an vervêkna ngeia tihbora an ni ang.

⁴Thinurna ni a lo thlenin sum leh pâiin awmzia a nei pha lo, Dikna erawh chuan thihna ata a chhan chhuak thin.

⁵Dem kê lo mi fel chuan kawng dik a kawhmmuh ang a, Mi suaksual erawh chu ama suahsualna ngeiin a titlû ang.

⁶Mi dik chuan a thatnain anmahni a chhan chhuak ang a, Mi rintlâk lote chu anmahni châkna sual ngeia man chhuah an ni ang.

⁷Mi sual a thihin, a hmachhuan thilte nê a bo nghal vek ang a, Mi dik lo beiseina pawh a boral ang.

⁸Mi dik chu manganna lakah chhan chhuah a ni thin a, Chû manganna chu misual hnênah a pakâi hlauh thin.

⁹Mi verther chuan a ţawngkân a thenawmte a tikhawlo thin a, Mi dik erawh chu hriatna avânga chhan chhuahin a awm ang.

¹⁰Mi dikte an hmuingîl lai chuan khawpui chu a lâwm a, Mi suaksual an thihin mite chu hlim takin an thaw huai thin.

¹¹Mi dikte malsâwmna azârah khua lamin chawimâwi a ni thin a, Mi suaksualte ţawngka erawh chuan thil a tikhawlo vek thin.

¹²Finna nei lo mi chuan a thenawm a hmsit thin a, Chinchang hre thiam mi erawh chuan ngawih a chuh hlauh thin.

¹³Mi kamtam tei ruai mi chuan thurûkte a hâi lang a, Rinawmna thinlung nei mi chuan thil a thup thin.

¹⁴Kâihruaitu tha awm lohnaah chuan mite an tlu thin a, Remruat thiam an tam chuan a him ngê ngê thin.

¹⁵Hriat chian loh mite tâna mawh latu chuan a tuar phah ang a, Chutiang laka inthiarfihlîm chu himna a ni.

¹⁶Hmeichhe thâ chuan zahawmna a keng a, Mi tawrawtho chuan sum ringawt an chuh thin.

¹⁷Zahngai thei mi chu ama tâna thil tha ti a ni, Lainatna nei lo mi erawh chu mahni a intibuai mai a ni.

¹⁸Mi suaksual chuan mi bum dân tûr a buaipui ber a, Dikna chí tuhtu erawh chuan lâwmman a dawng ngei ang.

¹⁹Dikna chuan nun kawngah mite a hrui thin laiin, Sual kawng zawhtu chuan a thih phah thin.

²⁰Thinlung kâwi tlatte chu LALPA tâna tenawm an ni a, Dem kai lote awm dân erawh chu amah tilâwmntu a ni.

²¹Inthurual mahse mi suaksualte chu hrem lohvin an chhuak lo vang a, Mi dik thlah kal zêlte erawh chu chhuah zalen an ni ang.

²²Hmeichhe hmêl thâ, dân tawi si chu Vawh hnâra rangkachak khang vuah ang hi a ni.

²³Mi dik duh zâwnng chu thil tha chauh a ni a, Mi suaksual beisei chu thinurna mai a ni.

²⁴Pêk chhuah tam hi pun lehzuahna a ni a, Mamawh tâwka liam kawmpui chuan Tlâkchhiatna a thlen thîn.

²⁵Mi thilphal chu tihhausak a ni ang a, Tuia châwmtu chu mahni inchâwm a ni.

²⁶Buhfai chheprelhtu chu miin ânchhia an lawh ang a, Phal taka hralhtu chu malsâwmnain a vûr ang.

²⁷Thahnemngai taka thil tha zawngtu chuan duhsakna a hmû ang a, Thil sual duha zawngtu chu mangannain a tlâkbuak ang.

²⁸Suma innghat mite chu an tlachhia ang a, Mi dikte chu hnah angin an duah hluah hluah ang.

²⁹Mahni chhûngkua chawh buaitu chuan thlî mai a rochung ang a, Mi â chu mi rilru finge chhiahhlawh a ni ang.

³⁰Mi dikte rah chu nunna thing a ni a, Thlarau bo mantu chu mi fîng a ni.

³¹Leiah hian mi dikte mah thungrulh an nih chuan, Pathian ngaihsak duh lo leh misualte thungrulhna chu engti fakauva nasâ ni ang maw!

BUNG 12

¹Fuihna thu ngaina mi chuan hriatna pawh a ngainâ a ni, Zilhhauhna ngai thei lo mi erawh chu mi mâwl a ni.

²Mi thâ chuan LALPA duhsakna a dawng thîn a, Rilru tha lo pu mi erawh chu thiam loh a chantîr ang.

³Suahsualna hian mihring a tung ding ngai lo va, Mi dik zung kaihna erawh chu tihchêr rual a ni lo.

⁴Nupui tha chu a pasal tân lallukhum a ni a, Zahpuiawm taka khawsa thîn erawh chu a pasal ruh timawihtu ang a ni.

⁵Mi dikte chu an ngaihtuahna pawh a dik a, Mi suaksualte remruat erawh chu bumna mai a ni.

⁶Misualte tawngkam chu, “Thisen chhuah tûr i châng ang âw,” tih a ni, Mi dik kam chhuak erawh chuan a chhan chhuak thung.

⁷Misualte chu paih thlâk an ni a, an bo daih ang, Mi dik chhûngkua erawh chu a ding chang ang.

⁸Mi an fin dân ang zêlin an chanchin sawi a ni a, Mi rilru kâwi erawh chuan hmuhsit a hlawh ang.

⁹Mahni inngaihlu viau si, ei tûr tlachham bawh si ai chuan, Tuma ngaihsân lohva chhiahhlawh kawh thei nih chu a tha zâwk.

¹⁰Mi tha chuan a ran vulh duat nachâng a hria a, Mi suaksualten zahngaihna an neih vê pawh hi râwng tak a la ni tho.

¹¹Ama lei lettû chuan ei tûr a ngah ang a, Mi lêlo tih dân zawm vê ngawt chu mâwlma mai a ni.

¹²Mi suaksual chuan mi sualte ei rûk sâ an awt a, Mahse mi dikte zung kaih hian a ni rah chhuah thîn ni.

¹³Mi sual chu ama tawngka chhuak ngein a âwk thîn a, Mi dik erawh chuan harsatna pawh a pal tlang thîn.

¹⁴Miten mahni kamchhuak rah thâin an intitlai ang a, Mahni kutkawih rah chhuak ngei chu an seng dâwn a ni.

¹⁵Mi â chuan ama awm dân chu dik berah a ngai a, Fuihna thu zâwm thiam mi erawh chu mi fîng a ni.

¹⁶Mi â chuan a thinur ang angin a tichhuak mai thîn a, Mi fîng erawh chuan mualphona tûr thil pawh a thup thiam thîn.

¹⁷Thu dik sawi hian thatna a entîr a, Thuhretu derin vervêkna a entîr thung.

¹⁸Thenkhat thu sawi chu chemtêa vih angin a nâ a, Mahse mi fîng âw-kâ chuan a tuam dam thîn.

¹⁹Thu dik sawina hmûi chu kumkhuaa tihngheh a ni ang a, Lei dawthei chu rei lo tê ân chauh a ni.

²⁰Thil tha lo suangtuahtute thinlungah bumna a awm a, Remna duhtute thil neih chu lâwmna a ni.

²¹Buaina lian thamin mi dikte chu a tlâk buak vê lo vang a, Mi sualte erawh chu thil tha lova tihkhah an ni ang.

²²Hmûi dawthei hi LALPA ten zâwng a ni a, Dik taka tite erawh chu a lâwm zâwng an ni.

²³Mi fîng chuan thiamna a thup thiam a, Mi a rilru erawh chuan thu âthlâk tak tak a puh chhuak thîn.

²⁴Mi taima kut chuan ro a rêl ang a, Mi thatchhia chu rim taka thawh luihtîr a ni ang.

²⁵Rilrûa vei neihna hian thinlung a tingui a, Tawngkam thâ chuan mi a tilâwm thîn.

²⁶Mi suaksualte khawsak dânin mi a hruai bo thîn avângin Mi dik chuan fimkhur takin thian kawm tûr thlang rawh se.

²⁷Mi thatchhia chuan a sa kah sâ hem hmin pawh a peih lo; Taihmâkna hi mihring ro hlu a ni.

²⁸Dikna kawngah chuan nunna a awm a, Chu kawngah chuan thihna a awm lo.

BUNG 13

¹Fapa fîng chuan a pa zirtîrna a pawisa thîn a, Inhmuhisit chîng mi erawh chuan zilhhauhna a ngaihlâ duh thîn lo.

²Mi thâ chuan a kam chhuak rah chu puar khawpin a tân ang a, Tharum thawhna hi bumhmangte tân chaw a ni.

³A lei vêng thâ chu ama nunna vêng thâ a ni, Zâu tak taka mahni kâ âng thîn chuan chhiatna a tâwk ang.

⁴Mi thatchhe rilru chuan a awt ringawt a, engmah a nei chuang lo, Mi taima erawh chu tihhausak a ni ang.

⁵Mi dik chuan dâwt sawi a hua a, Mi suaksual erawh chu mualphona thlentû tenawm a ni.

⁶Sawisêl kai lova awmte chu dikna chuan a vêng thîn a, Suahsualna erawh chuan mi sual chu a paih thla thîn.

⁷Hausa nia inngai, engmah nei si lo an awm a, Reteia inngai, hausâ si an awm.

⁸Mi hausâ chuan intlanna tûr sum a nei a, Mi rethei erawh chuan vauna a tawh ve lo.

⁹Mi dikte êng chu êng mâwi tak a ni a, Mi suaksualte khâwnvâr chu tihmihsak a ni ang.

¹⁰Chapona chuan inngirngihona a thlen thîn a, Thurâwn thâ dawn erawh chu finna a ni.

¹¹Dik lo taka sum lâk luh chu a rîral leh mai thîn a, Rim taka thawh chhuah erawh chu a pun belh zâwk thîn.

¹²Nghahfâk tihkhawtlâi hian rilrû a tihnual a, Duhthusâm thleng erawh chu nunna thing a ni.

¹³Thurâwn hmusittu chuan chhiat a tâwk ang a, Thupêk pawisatu erawh chuan lâwmman a dawng ang.

¹⁴Mi finge dân thû chu nunna tuikhur a ni a, Thihna thang pumpelhna kawng a ni.

¹⁵Hriat thiamna thâ chuan duhsakna a thlen a, Mi tlâktlai lote kawng hi a ni zawh harsâ zâwk chu ni.

¹⁶Remhria apiangin thiamnain an thawk a, Mi â erawh chuan a âtzia a pho lang thîn.

¹⁷Zualko rintlâk loh chuan thil a chawh hnawh thîn a, Palai rinawm erawh chuan a tuam dam thîn.

¹⁸Zilhhauhna ngainêptu chungah pachhiatna leh mualphona a thleng ang a, Thurâwn ngai pawimawhtu erawh chu châwimâwi a ni ang.

¹⁹Duhthusâm tihpuitlin hian nun a tinuam a, Mi â-te chuan sual kalsan hi an thinhrik hlauh thung.

²⁰Mi finge awm dân angin awm la, i lo finge vê mai ang, Mi â te i pâwl thîn chuan i chhiat phah ang.

²¹Mi sual chu thil sualin a ûmzui thîn, Mi dik erawh chuan thil thâ a dawng lêt thîn.

²²Mi thâ chuan a tûte chena rochun tûr a hnutchhiah thîn a, Mi sualte hausakna chu mi thate tâna khâwl khâwm a ni hlauh thîn.

²³Mi retheite leilet chuan buh tam tak a thar thei a, Rorêlna dik lo chuan riralna a thlen thîn.

²⁴Talhfiak hmang duh lo chu mahni fa hua a ni, Hmangaihtu erawh chuan a thunun thuai thîn.

²⁵Mi dik chuan puar takin châw a ei thîn a, Mi suaksual erawh chuan ei tûr a tlachham fo vang.

BUNG 14

¹Hmeichhe finge chuan ama in a sâ a, Hmeichhe â erawh chuan a kutin a sawi thiat thîn.

²Mi nun ngîl chuan LALPA a ãih a, Mi awmkhawlo erawh chuan a hmusit thîn.

³Mi a kam chhûngah chapona tiang a awm a, Mi finge kamchhuak erawh chuan anni chu a hum thîn.

⁴Bâwngpa awm loh laiin bâwng chaw pêkna thlêng a fâi thîn a; Mahse bâwngpa tha chakna avângin buh thar a lo hlâwk thîn.

⁵Hriatpuitu rinawm chu a daw lo vang a, Hretu der erawh chuan dâwt a phuahchawp thîn.

⁶Hmusittu chuan finna zawng mah se a hmu thîn lo va; Hriat thiamna neitu tân awlsam taka hmuh theih a ni.

⁷Mi â chu kal bosan mai rawh, A lakah hriatna dawn tûr a awm chuang lo.

⁸Mahni nihna inhriat hi mi finge finna a ni a, Inbumna hi mi â te âtna a ni.

⁹Mi â-te chuan sual an nuizhat mai mai a, Mi dik zîngah chuan duhsakna a awm thung.

¹⁰Thinlung hi a natzia lo tuartu tak chu a ni a, Mi dangte chuan kan lâwmna pawh min tawmpui tak tak lo.

¹¹Mi suaksual chhûngkua chu tihtlûkin an la awm ang a, Mi dik puan in erawh chu a vul zêl ang.

¹²Mi ngaiha kawng dik ni âwm taka lang, A tâwp thihna kawng ni si a awm.

¹³Nuih lai pawhin rilrûah lungngaihna a awm thei a, Hlimna hi lungngaihnain a tâwp thei.

¹⁴Thinlunga hnungtawlh mi chu ama duh dânin a khat ang a, Mi tha lungawina erawh chu chung lama mi a ni thung.

¹⁵Mi mâwl chuan eng thû pawh a ring mai zêl a, Mahse mi finge chuan a ke penna tûr a en fel thîn.

¹⁶Mi finge chuan hlauhthawn nachâng hriain sual a kalsan thîn a; Mi â erawh chu mahni inring tâwkin a intiuhai thîn.

¹⁷Mi thinram chu âthlak takin a che buan buan a, Mi rilru chhia chuan huat a hlauh thîn.

¹⁸Mi mâwl chuan âtna an rochung a, Mi remhria erawh chu hriatna khumtîr a ni.

¹⁹Mi tha lo chu mi tha hmâah a kûn ang a, Mi suaksual chu mi dikte kawngka bulah a kûn ang.

²⁰Mi rethei chu a thenawmte ngei pawhin an hua a, Mi hausia erawh chuan thian tam tak a nei thung.

²¹Mahni thenawmte hmuhsit hi sual a ni; Mi rethei lainattu erawh chu mi nihlawh a ni.

²²Thil sual tih tum tlattute tluka kawng bo an awm em le? Zahngaihna leh thutak erawh chu thil tha ngaihtuhtute tâ a ni.

²³Thawhrimna zawng zawngah hian hlâwkna a awm a, A sawia sawi ringawt chuan retheihna mai a thlen thîn.

²⁴Mi finge lallukhum chu an hausakna hi a ni a, Mi â-te âtna chu an mâwlina hi a ni.

²⁵Thuhretu dik tak chuan mi nun a chhan chhuak thîn a, Thuhretu der erawh chuan dâwt a sawi thîn.

²⁶LALPA ãihna tak takah chuan mi a ding huai thîn a, A fate pawhin awmna hmun him an chang ang.

²⁷LALPA ãihna chu nunna tuikhur a ni a, Thihna thang a pumpelhthîr thei.

²⁸Mipui ngah hi lal ropuina a ni a, Mi an tlêm chuan lalin tlâkchhiat a hmabâk thîn.

²⁹Mi thinnel chuan hriat thiamna a ngah a, Thil tih thut chîng mi erawh chuan âtna a châwisâng a ni.

³⁰Rilru dam dai chu taksa tân nunna a ni a, Itsikna erawh chu ruh mawihna a ni.

³¹Mi retheite rahbeh hi anmahni Siamtu hmuhsitna a ni a, Pachhiate lainattu chuan anmahni Siamtu a châwimâwi a ni.

³²Mi suaksual chu ama suahsualna ngeiin a hnawt chhuak a, Mahse mi dik chuan a thih pawhin himna hmun a la nei fo.

³³Hriat thiamna neitu thinlungah chuan finna a chêng thîn a, Mî â-te ngaihtuahna chu a inlailang mai a ni.

³⁴Diknain hnam a châwimâwi a, Mahse sualna hi hnam tin tân hmingchhiatna a ni.

³⁵Chhiahhlawh fîng chu lalin a duhsak thîn a, Mualphona thlentu chungah chuan a thinur thîn.

BUNG 15

¹Chhâna aw nêmin thinur a tikiang a, Râwl vîn erawh chuan thinurna a chawk tho thîn.

²Mî fîng lei chuan finna thû dik takin a sawi a, Mî â erawh chuan a kê aţangin thu âthlâk pui pui a chhâk chhuak thîn.

³LALPA mit chu hmun tinah a lêng ruai ruai a, Thil thâ leh tha lo te a enthla reng thîn.

⁴Aw zaidam chu nunna thing a ni a, Khawlohna erawh chuan lungchhiatna a thlen thîn.

⁵Mî â chuan a pa zilhna thû a ngainêp a, Zilhhauna pawmtu chu mî fîng a ni.

⁶Mî dik inah chuan rohlu tam tak a awm a, Mîsualte hlêp erawh chu buaina a ni.

⁷Mî fîng hmûi chuan hriatna a sem darh thîn a, Mî mâwl thinlungin chutiang thil chu a ti vê ngai lo.

⁸Mî suaksual inthâwina chu LALPA tân tenawm a ni a; Mî dik ẵngtaina erawh chu a lâwm zâwng a ni.

⁹Mî suaksualte awm dân chu LALPA tân tenawm a ni a, Dikna kawng zawhtu erawh chu a hmangaih thîn.

¹⁰Kawng dik pên bosantute chu na taka thunun an ni thîn a, Zilhhaun hawtu chu a thi mawlh ang.

¹¹Hremhmun leh Boralna hmunte chu LALPAN a hmu tlang vek a, Mîhring thinlung phei chu a va hmu Chiang dâwn êm!

¹²Hmuhsit chîng mî chuan zilhhaun a ngaithei lo va, Mî fîng pawh a pan duh hek lo.

¹³Thinlung hlimin hmêl a tihlim thîn a, Thinlung ngui erawh chuan thlarau a vaw châu thîn.

¹⁴Hriat thiamna thinlung pû chuan hriatna a zawng thîn a, Mî â erawh chu thil âthlâk bawkin a inhrâi tlai thîn.

¹⁵Hrehawm tuartu tân ni tha rêng rêng a awm lo va, Thinlunga hlim mî chuan ruai a ẵh reng a ni.

¹⁶LALPA ẵhna nêna tlêmtê neih chu Tam tak neih buai hrep aiin a ẵh zâwk.

¹⁷Hmangaihna nêna thlâi hnah châwa rin chu Inhuatna nêna bâwng châwm thâu sa ei aiin a ẵh zâwk.

¹⁸Mî thinchhia chuan inngիրnghona a chawk tho va, Mî thinnel chuan boruak sosâng tûr pawh a tidâi thîn.

¹⁹Mî thatchhe kawng chu hlingin a khat a, Mî nun ngilte kalkawng chu lamlian a ni.

²⁰Fapa fîng chuan a pa a tilâwm a, Mî â chuan a nu a hmusit thîn.

²¹Finna rêng nei lote tân ât hi hlimna a ni a, Hriat thiamna nei mite erawh chu ngil takin an kal thîn.

²²Remruat lâwk lova thil tih a hlawhtling duh lo va, Remhria an tam chuan a hlawhtling thîn.

²³Chhâna dik hian mî a tihlim a, A hun taka thil sawi chhuah hi a va ẵh êm!

²⁴Mî fîng tân nunna kawng hian chung lam a pan chho zêl a, Hnuai lam hremhmun a hlat tial tial.

²⁵LALPAN mî chapote in chu a ẵhiat ang a, Hmeithâite ramrî chu a humhalh sak ang.

²⁶Mî suaksualte ngaihtuahna chu LALPA tân tenawm a ni a, Mî thianghlimte thu sawi erawh chu hriat nuam tak a ni.

²⁷Mî duhâm chuan ama chhûngkua a chawk buai thîn a, Thamna hawtu erawh chu a nung zâwk ang.

²⁸Mî dik thinlung chuan chhâna dik a ngaihtuah lâwk a, Mî suaksual kê chuan thil tha lo a chhâk chhuak thîn.

²⁹LALPA chu mî suaksual lakah chuan a hlâ a, Mî dik ẵwngtâi chu a ngaihla thîn.

³⁰Hmêl hlim hian thinlung a tilâwm a, Chanchin lâwmawm hi ruh tân hrisêlna a ni.

³¹Nun siam ẵh tûra zilhna pawmtu chu Mî fîng zînga awm ve reng a ni.

³²Zirtûrna ngainêptu chuan ama nun a hmusit a ni, Zilhna pawisatû chuan hriat thiamna a nei thîn.

³³Finnain a zirtûr chu LALPA ẵh hi a ni, Inngaihtlâwmna hmâah châwimâwina a awm thîn.

BUNG 16

¹Rilrûa lo ruahmanna chu mîhring lam chan a ni a, A hlawhtlinna erawh chu LALPA hnêna mî a ni.

²Mîhring hian ama mithmuhah thianghlim a inti a, Mahse LALPA chuan a tihchhan lam a bûk zâwk thîn.

³I hnathawhte chu LALPA kawltîr rawh, Tichuan i thil ruahmante chu a tihnghehsak ang che.

⁴Thil zawng zawng hi LALPAN ama tâna a siam vek a ni, Nî e, mî suaksualte pawh hun ẵh lo atâna siam an ni.

⁵Thinlunga chapo apiangte chu LALPA tân tenawm an ni; Inthurual mah se, hrem lohvin an chhuak lo vang.

⁶Zahngaihna leh thutakin Khawlohna chu tlen fâi a ni a, LALPA ẵhnain miin sual a kalsan thîn.

⁷LALPA lâwm zâwnga mî a awm phawt chuan A hmêlmâ nêl lam inremin a awmtîr thîn.

⁸Dik lo taka sum hâi luh ẵh ai chuan Dik taka deh chhuah tlêmtê neih a ẵh zâwk.

⁹Mîhring rilrûin a kawng a ruahman a, Mahse LALPAN a kê pên a hrui thîn.

¹⁰Lal kê aţangin Pathian thu puan chhuah tûr a awm a; A kê chuan ro a rêl sual tûr a ni lo.

¹¹Bûkna leh tehna dik hi LALPA tâ a ni a; Ip rih zâwngte chu a kuta awm vek a ni.

¹²Lal̄thutthlêng chu diknaa tihngheh a nih avângin, Suahsualna thiltih hi lalte tân thil tenawm a ni.

¹³Dikna hmûi chu lal tân thil lâwmawm a ni a, Thu dik tak sawitu chu an ngaina thîn.

¹⁴Lal thinurna chu thihna thuchah ang a ni a, Mifing erawh chuan a thlêm dài thîn.

¹⁵Lal hmêl hlimah chuan nunna a awm a, A duhsakna chu ruah hnunung thlentü chhâm ang a ni.

¹⁶Rangkachak aiin finna neih hi a va tha zâwk êm! Nî e, tangkarua ai chuan hriat thiamna hi thlan zâwk tûr a ni.

¹⁷Mi tuangte lamlian chu sual kalsan hi a ni a; A kawng vêng tha chuan ama nunna a humhim thîn.

¹⁸Chhiatna lo thlen hmâin chapona a lo kal hmasa thîn a, Tlûk chhiat hmâ lawk hian chapona thlarau a che thîn.

¹⁹Mi chapote zînga râlâk sum chan vê ai chuan Mi tlâwmte zînga rilru tlâwm taka awm a tha zâwk.

²⁰Fimkhur taka mi thu ngaihchân hi thil tha dawnna a ni a, LALPA ringtu apiang chu mi nihlawh an ni.

²¹Ngaihtuahna finge chu mi hmang châng hria tih an ni ang a, Tawngkam ngaihno bei chuan thiamna a belhchhah thîn.

²²Hriat thiamna hi a neitu tân chuan nunna tuikhur a ni a, Mi â te tân insiam that hi âthlâk mai a ni thung.

²³Mi fîng thîlung chuan a kê a thunun thîn a, A hmûiah thiamna a belhchhah thîn.

²⁴Tawngkam thlum chu khawithlâr ang a ni a, Rilru a fan riari riari a, ruh tân hrisêla a ni.

²⁵Mi ngaiha kawng dik ni âwm taka lang, A tâwp thihna kawng ni si a awm.

²⁶Hna thawk mi chu ama tâna thawk rim a ni a, Ril̄tâmnain a nawr kal a ni.

²⁷Pathian ngaihsak lo mi chuan thil tha lo a dap chhuak thîn a, A hmûi chu meialh ang mai a ni.

²⁸Mi khirh tak chuan innghirngona chi a tuh thîn a, Sesêa thu lâk hmang chuan thian tha berte pawh a tiñen thîn.

²⁹Tharum thawh hmang mi chuan a thenawmte a hruai sual thîn a, Kawng tha lovah a hruai thîn.

³⁰A maimitchhîn leh, thil tha lo a suangtuah a, A heh a peh fun tawh chuan, thil tha lo a thlen thîn.

³¹Lu tuak vâh hi ropuina lallukhum a ni a, Dikna kawnga kalten an dawng thîn.

³²Mi thinnelte hi michak ai chuan an tha zâwk a, Mahni rilru thunun thei mi chu khawpui latu aiin a tha zâwk.

³³Mal chungah thumvâwr a ni a, Thu tlûkna erawh chu LALPA hnêna mi a ni.

BUNG 17

¹Inngeih lo chhûngkuaa ruaiñheh luih luih ai chuan, Inngeih dial dila chaw ñing ei tlânna in a tha zâwk.

²Chhiahhlawh fîng chuan fapa, mualphona thlentü chungah thû a nei ang a, Unau rokhâwmtu zîngah chanvo a nei vê ang.

³Tangkarua an thli fim a, rangkachak an rawh tui bawk a, Thinlung erawh chu LALPAN a fiah thîn.

⁴Thil sual titu chuan hmûi dawthei thû bawk a bengkhawn thîn. Mi dawthei chuan mi thu sawi sual a lo châng thîn.

⁵Mi rethei nuihsawhtu chu a Siamtu hmusit a ni a, Mî vânduai laia lo diriamtu chu hrem lohvin a chhuak lo vang.

⁶Tu leh fate hi an pate châwimâwitu an ni a, Fate tiropuitu chu an pate an ni thung.

⁷Mi â nih leh thu sawi ropui a inhmeh lo va, Hmûi dawthei leh lal fapa nih a inhmeh lo lehzuai.

⁸Thilpêk hi a dawngtu mitah chuan lunghlu ang mai a ni a, A hawina lam apiangah a hlawhtling thîn.

⁹Bawhchhiatna hliahkhuhtu chu hmangaihna zawngtu a ni, Sawi ngai sawi chhuak fo mi chuan thian tha a tiñen thîn.

¹⁰Mi â wavi za vuak ai chuan, Mi fîng wavi khat zilhhauh pawh a sâwt zâwk.

¹¹Mi tha lo chuan vuivâihna tûr ngawt a dap a, Chuvângin zualko nunrâwng nêan la intawng ang.

¹²Mi â te ât vânglai nêna intawh ai chuan Savawm, a no chhuhsak lai nêna intawhchilh a thlanawm zâwk.

¹³Thatna suala thungrûltu chu Sualin an chhûngkua a kiansan lo vang.

¹⁴Inhnial hi tuikhuah aţanga tui pût tîr ang a ni a, Chuvângin intihbuai hmâin inhnialna chu titâwp thuai rawh.

¹⁵Misual thiam chantîra, mi dik zâwk thiam loh chantîrtu chu LALPA tân an tenawm dân a inang reng.

¹⁶Engvângin nge mi mâwl kutah finna leina tûr sum a awm tlat le? Fin duhna thinlung nei pawh a ni si lo va?

¹⁷Thian hi chuan englai pawhin a hmangaih reng a, Unaupa erawh chu mangan ni atâna piang a ni.

¹⁸Hriatna tlachham mi chu mite tân a intiam mai zêl a, A thenawmte tân mawhphurtûah te a insiam thîn.

¹⁹Dân bawhchhiat ngainatu chuan innghirngô pawh a ngainâ a, A dài kawngkhâr sân vaktu chuan chhiatna a zawng a ni.

²⁰Bumhmang thinlung putu chuan thil tha rêng a hmu lo vang a, Mi hrâm tlhawlh chu sualah a tlu lût ang.

²¹Mi nuihsawh chîng hringtu chuan ama lungngaihna a thlen a, Fapa â hringtu chuan lâwmna a nei lo.

²²Thinlung hlim hi damdâwi ang a ni a, Thinlung lungchhia erawh chuan ruhte a tiro thîn.

²³Mi suaksual chuan hnung lam aţangin thamna a lâ a, Rorêlna pawhin a chingpen phah thîn.

²⁴Finna chu hriat thiamna neitu hnênah a awm a, Mi a mit erawh chuan kâwlkil lam a hawi daih thîn.

²⁵Fapa â chu a pa tilungngaitu a ni a, A hringtunu tân pawh a runthlâk a ni.

²⁶Mi dik hrem hi thil tha a ni lo, Mi liante pawh an that chung chungah vuak chi an ni hek lo.

²⁷Mi chinchâng hria chu a thu sawiah a insûm thiam a, Hriat thiamna nei mihring rilrû chu a dam dap thîn.

²⁸Ngawih a chuh miao chuan mi â pawh mi finga chhiar a ni, Ngawi hlê hlê chuan mi fîng nih an hlawh thîn.

BUNG 18

¹Mahnia inla hrang mi chuan ama duh zâwng ngawt a zawng a, Rorêlna fîng zawng zawng chu a do tlat thîn.

²Mi â chuan hriat thiamna pawh a lâwmpui thiam lo va, A thinlung duh zâwng bâk sawi tûr a hre hek lo.

³Misual a lo kal chuan inhmuhisitna pawh a lo thleng ve ngâl a, Zilhauhna hi mualphonain a ken tel a ni.

⁴Mihring kam chhuak hi tui thûk ang a ni a; Finna tuikhur hnâr erawh chu lui tê angin a luang.

⁵Mi suaksual duhsak a tha lo va, Rorêlna mi dikte paih thlâk a tha bawh hek lo.

⁶Mi â-te hmûi chuan inhauhna a thlen a, A kam chhuak chuan vuak a chawh thîn.

⁷Mi a tawngka chu a tân chhiatna a ni a, A hmûi pawh chu a tân thang a ni.

⁸Titi vawrh darhtu thu sawi chuan chaw tui tak angin Thinlung chhûngril ber a fan thîn.

⁹A hna thawha mi dâwngdah chu Tiboraltûa unaupa a ni.

¹⁰LALPA hming chu kulhpui nghet a ni a, Mi dik chu a tlan lût a, a him thîn.

¹¹Mi hausa kulhpui chu a sum chu a ni a, Ama ngaih chuan kulh bang sâng ang a ni.

¹²Chhiat tawh hmâa mihring rilrû chu chapo tak a lo ni thîn a, Châwimâwina chan hmâin inngaihtlâwmna a lo awm thîn.

¹³Ngaihlâka hmâa chhâng lêtta chu A tân âtna leh mualphona a ni.

¹⁴Mihring thlarau hi damloh lai pawha min chelh dingtu a ni a, Thlarau hlîam chu tu nge tuar dam thei ang?

¹⁵Mi rilru nei tak chuan hriatna a dawn belh thîn a, Mi fîng beng chuan hriat belh tûr a dap thîn.

¹⁶Thilpêk pêk hian kawng a su kaw thei a, Mi ropuite hnên a hruai thleng thei.

¹⁷Amah chhâl lêt tûr a thenawmte an rawn lan ve hmâ chuan Mahni thiam thu lo sawi hmasatu chu dik zâwkin a lang thîn,

¹⁸Thumvâwr hian inhniálna a titâwp a, Mi chakte inkâr a rem fel thîn.

¹⁹Unau nawrh chîng tihlungâwi tum chu Khaw pum hneh tum aiin a khîrh zâwk; Inhniálna hi thîr pala inhung hnân ang a ni.

²⁰A kam chhuak rah chuan mi a tipuar ang a, A thu chhuakin a zir chuan a tlai ang.

²¹Nunna leh thihna hi lei thuhnuiaia awm a ni a, A ngainatuten a rah an seng ang.

²²Nupui hmû chu thil tha hmû a ni a, LALPA duhsakna dawng a ni.

²³Mi rethei chuan a dîl dêk dêk a, Mi hausa erawh chuan a lo vîn khur khur thîn.

²⁴Thian siamtu chu thian thâah a insiam vê tûr a ni, Mahni unaute aia hnâi zâwk thian an awm bawh.

BUNG 19

¹Hmûi dawthei, â bawh si ai chuan Rinawm taka mi rethei nih a thlanawm zâwk.

²Hriatna nei lova awm hi thlarau tân pawh a tha chuang lo, Mi hmanhmawh chuan a dâi pelh ngê ngê thîn.

³Âtna hian mihring kawng zawh lai a tikhawlohsak a, LALPA chungah pawh a vuitîr thîn.

⁴Sum hian thian tam tak a siam a, Mi rethei erawh chu a thiante pawhin an hransan thîn.

⁵Thuhretu der chu hrem lohvin a chhuak lo vang a, Dâwt sawitu pawhin hrem a pumpelth lo vang.

⁶Mi tam takin duhsakna beiseiin mi liante an tlawng a; Thilpêk petu tân chuan mi tin mai hi thian an ni.

⁷Mi rethei chu a unaute pawhin an huat rawn a, A thiante phei chu a lakah an va hla lehzuâl êm! Tawng thâin ûmzui mah se, an kalsan daih thîn.

⁸Finna dawngtu chuan ama nunna pawh a ngaihlû sawt thîn a; Hriat thiamna vawngtu chuan thil tha a hmu ang.

⁹Thuhretu der chu hrem lohvin a chhuak lo vang a, Dâwt sawitu chu a boral ang.

¹⁰Mi â-te tân nawmchen a inhmeh lo va, Lal chhûngkaw chungah chhiahlawhin ro a rêl hi a inhmeh lo lehzuâl.

¹¹Hmang châng hriatnain thin a tinel a, Mî diklohna haider saktu nih hi ropuina a ni.

¹²Lal thinrim chu sakeibaknei rûm ang a ni a, A duhsakna erawh chu hlobet chungah dâi tlâ ang a ni.

¹³Fapa â chu a pa tân chhiatna thlentû a ni a, Nupui ânceh chu tui far reng ang hi a ni.

¹⁴In leh hausakna chu pâte laka rochun a ni a, Nupui remhria erawh chu LALPA laka mi a ni.

¹⁵Thatchhiatna hian mut duhna a thlen a, Mi dawngdah chuan rilâtam a tuar ang.

¹⁶Thupêk vawng thâ chuan a nun pawh a vawng thâ a, Duhdah taka khawsa mi chuan a la thih phah ngei ang.

¹⁷Mi rethei khawngaihtu chuan LALPA a pûktîr a ni, A lo insênso tawhte chu a rûl leh ngei ang.

¹⁸Beiseiawm a la nih laiin i fapa chu thunun la, Boral mai tûrah ngai suh.

¹⁹Mi thinchhia chuan hremna a tuar lêt ang, Chhan chhuak mah la, chhan chhuah bawh a ngai leh thîn.

²⁰Zilhna thu hi pawm la, thununna pawisa rawh, I hun kal zêla i lo fin theih nân.

²¹Mihring thinlung hian thil tam tak a ruahman a, Mahse LALPA remruat chauh a ding chang ang.

²²Hring nuna thil duhawm tak chu ngilneihna hi a ni, Mi dawthei ai chuan mi rethei pawh an duhawm zâwk.

²³LALPA ñhna chuan nunnaah a hruai a, Chû nun neitu chuan a lungâwipui reng ang a, Thil ñha lo pawhin a tlâkbuak hek lo vang.

²⁴Mi thatchhia chuan chawthlêng a zen a, A chaw bâr chu a kê takngial pawh a thlen peih lo.

²⁵Mi nuihzat chîng mi chu vua la, chû mi mâwl chu a fimkhur deuh mahna; Mi remhria zilh la, hriatna a chhar phah dâwn nia.

²⁶Pâ te tirethei a, nû te hnawt chhuak chu Fapa, mualphona leh hmingchhiatna thlent u a ni.

²⁷Ka fapa, fuihna thu zir i bânsan mai zawngin Finna kawng aţangin i pêng bo mai dâwn asin.

²⁸Thuhretu tlâktlâi lo chuan rorêlna dik a hmusit a, Mi suaksual kê chuan khawlohna a lem zo ñhîn.

²⁹Rorêlna hi hmuhsit chîngte tâna buatsaih a ni a, Vuakna talhfiak chu mi â-te hnungzâng tân a ni.

BUNG 20

¹Uain hi nuihzabûra mi siamtu a ni a, Rakzû hi mi tirui buaitu a ni; Chutiang thilin a bum ñhîn mi fîng an awm lo.

²Lal thinurna chu sakeibaknei rûm ang a ni a, A thinrimna chawk thotu chu mahni nunna chung a pawî khawih a ni.

³Intihbuaina ñhel daitu nih a zahawm a, Mi â-ten intihbuai an peih reng thung.

⁴Mi thatchhia chuan thlasik avângin lei a let peih lo va; Chuvângin buh seng hunah kut a dawh ang a, engmah a nei lo vang.

⁵Mihring thinlunga thurâwn awm chu tui thûk tak ang a ni a; A ngaihna hria erawh chuan a hîp chhuak ang.

⁶Mi tam ber sawi duh zâwng chu mahni ñat vena lam hi a ni, Mi rinawm hi tu nge hmu chhuak thei ang le?

⁷Mi dik chu rinawm takin a nung ñhîn a; A fate pawhin a malsâwmna zâr an zo ñhîn.

⁸Rorêlna ñhutthlênga lal ñhû chuan A hmuh phâk thil ñha lo zawng zawng a tibo ñhîn.

⁹“Ka thinlung ka thian fai a, Ka sual lakah ka thiàng ta,” tu nge ti thei?

¹⁰Bûkna leh tehna in-ang lo zut hi, LALPA mithmuhah angkhat rengin thil tenawm vek a ni.

¹¹Naupang tê pawh hi a thiltih dânin eng ang mi nge a nih a tilang ñhîn, A thiltih thiànglim dân emaw, a dik dân emaw aţangin.

¹²Hriatna beng leh hmuhna mitte hi LALPA siam vè vè a ni.

¹³Mut hi thlahlel suh, i pachhiat phah mai tûr asin; I mit kha meng la, tichuan chaw kham khawp i thar dâwn nia.

¹⁴A lei lai chuan, “A ñha lo êm mai,” a ti a, A lei hnûah erawh chuan a thil lei ñhatzia ngawt a chhuang leh si a.

¹⁵Rangkachak te, lungflu sente chu a tam mai, Hriatna hmûi erawh chu tuikeplung hlû a ni.

¹⁶Hmêl hriat loh leiba rulhsak tiamtu kawr chu hrêng la, Nawhchizuar laka dahkhamah amah chu hrêng ang che.

¹⁷Mi chhang ei rûk hi a tui duh bîk a, Ei hnûah erawh chuan kâa ñaulung hnawh khah ang mai a ni.

¹⁸Ruahmannate hi inrâwn fel hnûa duan chhuah a ni ñhîn a, Thurâwn fîng tak hnuaiah râl chu do chauh vang che.

¹⁹Mi kamtam tei vèl ruai chuan thurûkte a hâi lang a; Chuvângin, a hmûia fakdertu che chu kâwm nêl suh.

²⁰A nu emaw, a pa emaw ânhche lawhtu chu Thim chhah laiah a khâwnvâr tihmihsak a ni ang.

²¹Atîra rochan sum hûi khâwm ñeuh hi A tâwpah malsâwm a ni lo vang.

²²“Sual chu ka thungrûl ngei ang mawle,” ti duh suh, LALPA ngaichâng zâwk la, ani’n a chhan mai ang che.

²³Bûklung in-ang lo zut hi LALPA mithmuhah thil tenawm a ni a, Tehna rintlâk lote hi thil ñha lo a ni.

²⁴Mihring ke pên hi LALPA ruat a ni a; Engtin nge mihringin ama kawng a hriat theih ang?

²⁵Pathian tâna thil serh hran thuai thuai hi thanga awh ang a ni, Intiam tawh zet hnûa inchhîrna mai a ni e.

²⁶Lal fîng chuan mi sualte a thliar hrang a, Buhchîlna khâwlin a chîl ñhîn.

²⁷Mihring thlarau chu LALPA khâwnvâr a ni a, A thinlung chhûngril zawng zawng a chhui chhuak ñhîn.

²⁸Zahngaihna leh thu takin lal chu a vawng ñha a, A lalñhutthlêng chu zahngaihnaa tun dân a ni.

²⁹Tlangvâlte ropuina chu an chakna thahrui a ni a, Putarte mâwina chu an luţuak a ni.

³⁰Na thama vuakna chuan thil ñha lo a tlêng fâi a, Vuakna vual chuan thinlung chhûngril a thianfâi ñhîn.

BUNG 21

¹Lal thinlung chu LALPA kuta awm a ni, Luia tui luangte ang hian A duhna lam lamah a hruai kâwi ñhîn.

²Mahni mitah chuan dik tâwkin kan inngai ñeuh va, LALPA erawh chuan thinlung lam a bûk ñhîn.

³LALPA tâna pawmawm zâwk chu, inthâwina lam ni lovin Dik taka tih a, fel taka rorêl hi a ni.

⁴Mi hawi sâng, thinlung chapo leh, Mi sualte khâwnvâr chu sualna hi a ni.

⁵Mi taima ruahmannate chuan hlâwkna a thlen a, Mi hmanhmawhte hmalâkna chuan retheihna a thlen.

⁶Dâwt hmanga sum deh chhuah chu Thihna zawngtute suangtuahna lêng vèl mai a ni.

⁷Mi suaksualte nunrâwnna chuan anmahni zâwk a tiboral ang, Fel taka rorêlna an hnâwl si a.

⁸Thiam loh changte awm dân chu a kâwi tlat a, Rilru fim thiltih dân erawh chu dikna a ni.

⁹Nupui phunchiar tak nêna in zau taka chên dun ai chuan Inchung kila khawsak pawh a tha zâwk.

¹⁰Mi sual chuan thil tha lo hlir a duh a, A thenawmten a mitmengah duhsakna an hmu lo.

¹¹Mi nuihsawh chingten hremna an tawhin, mi mawltan an lo finvâr phah a; Mi fingin zirtîrna a dawn chuan hriatna a dawng thin.

¹²Dikna Pathianin misual chhungkaw awm dân a ngaihtuah a, Mi suaksual chu an sualna avângin a paih thla thin.

¹³Mi rethei âu thâwm ngaithla duh lo chuan Manganga a âu vê hunah ngaihsak a hlawh bik lo vang.

¹⁴A rûka thilpêkin thinur a tireh a, A phêna lâwmman pêkin thinurna nasa pawh a tidâi thin.

¹⁵Rorêlna fel chuan mi felte a tihlim a, Thil sual titute tân boralna a lo thleng ang.

¹⁶Hriatna kawng vah bosantu chu Mitthi awm khâwmte zînga châwl vê mai tûr a ni.

¹⁷Nawmsak thil thlahlel mi chu a la rethei dân si a, Uain leh hriak ngaina mi chu a hausa lo vang.

¹⁸Mi suaksual chu mi dik tlan nâna hman a ni ang a, Mi rintlâk lo chu mi dik tlan nâna hman a ni bawh ang.

¹⁹Hmeichhe ânceh leh phunchiar nêna khawsak dun ai chuan Thlalêra awm daih a tha zâwk.

²⁰Mi fing awmnaah chuan ro leh hriak hlu tak a awm a, Mi â erawh chuan a tiriral mai thin.

²¹Dikna leh zahngaihna zuitute chuan Nunna te, felna te, châwimâwinate an hmu thin.

²²Mi fing chu mi chak khawpuiah a lâwn liam a, Khawpui kulh nghet chu a tichim thin.

²³Tûpawh a lei leh kê vêng tha chu, Buaina laka mahni invêng him a ni.

²⁴Mi chapo leh mi intivei chu A hming pawh “Hmusittûa” tih a ni; Intivei tak leh chapo takin a che thin.

²⁵Mi thatchhia chuan a duhthusâm chu a thihpui ang, A kutin hnâ a thawk peih si lo.

²⁶Nilêngin duhâm takin a awt kual vêl a, Mi tha erawh chuan engmah ui lovin a pe thin.

²⁷Mi sual inthâwina chu thil tenawm mai a ni a, Sual tih duhna rilru nêna inthâwi phei chu a va tenawm lehzual dân êm!

²⁸Thuhretu der chu a boral ang a; A lo ngaithlatu erawh chuan thu a sawi reng dân a ni.

²⁹Misual chu a meng rum ôl a, Mi dik erawh chuan a kawng a rêl fel thin.

³⁰LALPA kalh zâwngin finna leh hriatna te, Remruatnate a awm lo.

³¹Sakawr chu indo hun atâna buatsaih a ni a, Chhanchhuahna erawh chu LALPA hnêna mi a ni.

BUNG 22

¹Sum tam tak aiin hming that hi thlan zâwk tûr a ni a, Tangka leh rangkachak aiin duhsakna chu thlan zawk tûr a ni.

²Mi hausa leh retheiten an neih tlan chu hei hi a ni, LALPA kutchhuak theuh an ni, tih hi.

³Mi chinchâng hria chuan thil tha lo a hmuhin a bihrûksan daih a; Mi mawl erawh chuan a tâwn mai a, a tuar phah thin.

⁴Inngaihtlâwmna leh LALPA tihna chuan Hausakna te, châwimâwina te, nunna te a thlen thin.

⁵Mi luhlulte kawngah chuan hling te, thangte a awm a, A nun kawng vêng tha chuan a hlat daih ang.

⁶Naupang chu a kalna tûr kawng zirtîr la, A puitlin hunah pawh a pênzan lo vang.

⁷Mi hausate chu mi retheite chungah an inluling a, Pûktu chu a pûktîrtu chhiahhlawh a ni.

⁸Dik lohna chi tuhtu chuan lungngaihna a seng ang a, A thinurna tiang chu a tliak ang.

⁹Mi thilphal chuan malsâwmna a dawng ang, Mi retheite hnêna ei tûr a pêk thin avângin.

¹⁰Mi dêuhsawh chingte chu hnawt bo la, inhnialna a kiang mai ang; Ni e, inngirngihona te, inpuhtawna te a reh mai ang.

¹¹Thinlung thianghlim ngainaa, Khawngaihna hmûi pu bawh chu Lal thian tha a ni mawlh ang.

¹²LALPA mit chuan hriatna nei mi chu a vêng tlat a, Ring lo mi thû erawh chu a hnâwl thin.

¹³Mi thatchhia chuan, “Pâwnah sakeibaknei a awm a, Kawthlêrah min tihlum mai ang,” a ti thin.

¹⁴Hmeichhe leplêr kê chu khur thûk a ni a, Tah chuan LALPA huat zâwngte chu an tla lût ang.

¹⁵Âtna hi naupang thinlunga bet tlat a ni a; Thununna tiang erawh chuan a hnawt kiang daih ang.

¹⁶Hlâwkna ûma mi retheite nêk chêp a, Mi hausa tlawn ching chu, a rethei tawlh tawlh ang.

MI FINGTE THU SAWI

¹⁷Mi finge thu sawi hi ngun takin lo ngaithlâ la, I thinlung khân ka finna thû hi lo dawng ang che.

¹⁸I chhûngrila i vawn phei chuan pâi nuam tak a ni asin; I hmûiah pawh bei tlat rawh se.

¹⁹Tichuan, LALPA-ah i rinna chu i nghat tawh ang; Wawiinah hian nangmah ngei ka hriattîr che hi.

²⁰Remruat dân leh hriatna thû te, Thil tha tak takte ka ziahsak chein,

²¹Rintlâk thu dikte pawh ka hriattîr che ahnû hmanah, A zâwtu che apiang hnênah Chhânna dik thutak i pêk theih nân.

²²A pachhiatna remchânga lăin mi rethei chu rawk suh, Kulh kawngka bulah hnehchiahna tuartute rap bet hek suh;

²³LALPAN an chungthû a sawipui dâwn si a, Anmahni rawktute ngei chu a rawn rawk ve dâwn asin.

²⁴Mi thinchhia chu thianah neih suh, Mi kawlhse tak pawh kawp hek suh.

²⁵A tih dân i zir ve palh ang a, I in-âwk hnawk mai tûr asin.

²⁶Mi leiba rulhsak tûra intiamkamte zingah tel suh la, Leiba atâna dahkhamah pawh tang hek suh.

²⁷Rulhna tûr i neih si loh chuan, I mutna khum chawpin an lâksak dâwn lo che em ni?

²⁸In pi leh puten hmân laia ramri an lo kham chu sawn suh u.

²⁹Mahni hnâ tha taka thawk thîn mi i hmu ngai em? Mi narân zingah awm reng lovin Lalho hmâhte a la ding dâwn asin.

BUNG 23

¹Rorêltute nê chawhlui in kîl tlan hunah I hmâah chuan eng nge an chhawp tih chik takin ngaihtuah rawh;

²I ril a tîm deuh a nih pawhin, Insûm hrâm hrâm ang che.

³A tuina ringawt thlîr lo la, Chaw mangkhâwng a ni tih hre reng ang che.

⁴Hausak tumin thawk rim lutuk suh la; Mahni finna rinchan pawh bânzan rawh!

⁵Thil awm lo thlengin i beisei tlat dâwn em ni? Hausakna hian thlâ a insiam a; Mupui angin vân lamah a thlâwk bo thîn asin.

⁶Mi uikawm chaw chu eisak suh, Ei tûr tuihnâi a neih te pawh ît duh suh.

⁷A rilrûa nî-a a inhriat ang chu a nihna a ni thîn. “Ei la, in rawh,” a ti ang che a, Mahse a duhsak vâng che a ni lo.

⁸I thil ei chhun pawh i luak chhuak ang a, Amah i fak tlawrna thû pawh a lo thlâwn mai ang.

⁹Mi â te beng hriatah chuan thû sawi suh, I zilhna thufingte chu engah mah a ngai dâwn si lo va.

¹⁰Hmasânga ramri kham sâ sawn suh, Pa nei lote ram pawh khawih hek suh.

¹¹Anmahni Tlantu chu mi chak a ni si a; An lamah tangin a khing lêt dâwn che asin.

¹²Zirtîrna lamah i rilrû pê la, Hriatna thû dawng tûrin i beng chhi rawh.

¹³Tîm lovin naupang chu thunun rawh, Vaw thui thui mah la, a thih pah lo vang.

¹⁴Tiangin i vua ang a, Hremhmun lakah a nun i chhan chhuak dâwn zu nia.

¹⁵Ka fapa, rilru fîng tak han ni teh la aw, Ka thinlung hi a va lâwm dâwn tehlûl êm!

¹⁶Ni e, i hmuin thu dik tak a sawi chuan Ka chhûngril thleng hian a hlim ang.

¹⁷I thinlung chuan mi sualte awt suh se; Nilêngin LALPA tih zâwk rawh se.

¹⁸Tâwpna hun a lo la thleng ngei dâwn a, I beiseina chu tihthlawn a ni lo vang.

¹⁹Ka fapa, ngaihlâ la, fîng la, I thinlung chuan kawng dik zawh zêl rawh se.

²⁰Uain heh mite zingah tel suh la, Sa heh mite zingah tel hek suh;

²¹Zungawl veite leh sa heh mite chu an rethei dâwn si a, Puan chhia ang maiin nguain a la tuam ang.

²²Nangmah hringtu i pa thû ngaihlâ la, I nu chu a tar hnâh hmusit suh.

²³Thu dik chu lei la, hralh leh tawh suh, Finna te, zirtîrna te, hriat thiamnate pawh.

²⁴Mi dik chuan a pa chu nasa takin a tilâwm ang a, Fapa fîng hringtu chu a fa chungah a lâwm êm êm ang.

²⁵I nu leh i pa chu hlim takin awm sela, Nangmah hringtu che chu hlim takin awm rawh se.

²⁶Ka fapa, i thinlung mi pê la, Ka awm dante hi i mit chuan lo thlîr rawh se.

²⁷Nawhchizuar chu khur thûk a ni a, Hmeichhe lèpchiah chu tuichhunchhuah zîm a ni;

²⁸A man theih tûr mî a lo châng ru thîn a, Pâho zingah rinawm lohna tipungtu a ni.

²⁹Tute nge chungpik thîn le? Tute nge lungngai thîn? Tute nge inhâu buai thîn? Tute nge thubuai nei thîn? Tute nge a chhan leh vâng awm si lova hliam tuar thîn? Tute mit nge sen rêm rûm thîn?

³⁰Zu hmuna tâp tlat thîn te, Zu chi hrang hrang chawhpawh thînte an ni.

³¹Zu sen kâk mai chu thlîr reng suh, No chhûnga a pawn berh berha, A luan thlâk zaih zaih lai te chu a melh pawh melh suh.

³²A tâwpah rûl angin mi a chû a, Rûlنگان ang maiin mi a chu thîn.

³³I mit chuan thil mak pui pui a hmu zut zut ang a, I ngaihtuahna a buai mup mup ang a, ni lo lovin i râk vak vak mai ang.

³⁴Ni e, tuipui chungah mu zâl ang lek i ni ang a, Lawng puanzârna chhîpa mu zâl ang chauh i ni mai ang.

³⁵“Mîn vua a, a na si lo, Mîn vêl a, nâ ka hre hek lo, Engtikah nge ka lo harh ang a, a ngai bawka ka ruih leh ang?” i ti ang.

BUNG 24

¹Mi sualte chu awt suh la, An zingah tel pawh chik hek suh.

²Pawi khawih tûr ngawt an ngaihtuah a, Mi tihbuai dân tûr ringawt an sep thîn.

³Finnain in chu sak a ni a, Hriat thiamnaa tihngheh a ni.

⁴Pindan chu ro hlû leh thil duhawm tak takte leh, Hriatnaa hnawh khah a ni.

⁵Mi fîng chu a chak a, Ni e, hriatna ngah mi chu a chak deuh deuh thîn;

⁶Indo hmân fîng taka râl rel hmasak tûr a ni a, Remruattu an tam chuan a him ngê ngê.

⁷Finna hi mi â-te tân a sâng lutuk a; Kulh kawngkâah sawi tûr a hre ve lo.

⁸Thil ٲa lo tih tuma phiartute chu Miten ‘pawi khawih hmang’ an ti ang.

⁹Mi â-te ngaihtuahna chu sual a ni a, Mi tham loh chngm mi chu mihring tân pawh tenawm an ni.

¹⁰Mangan laia i chauh nghal mai chuan Chakna i lo nei tlêm a ni mai.

¹¹Thi tûra an hruai mêkte chu chhan chhuak la, Thah mai tûra an hruai laite chu ko kîr leh hrâm rawh.

¹²“Ngâwi teh, hei chu kan hre lo,” in ti hlauh ang e, Thinlung bûktu ngaihtuah tûr a ni dâwn lo’ m ni? I nun vawngtu chuan a hre lo vang maw? Mi tin an thiltih ang zêlin a rûl dâwn lo’ m ni?

¹³Ka fapa, khawizû in rawh, a ٲâ a nia, Tui i tih êm êm khawithlâr ngei chu.

¹⁴Chutiang tak chuan hriatna fing pawh i nun atân lo ni rawh se; I chan hunah chuan hmabâk beisei tûr a la awm zui ang a, Chû i beiseina chu a thlâwn hek lo vang.

¹⁵Aw, mi suaksualpa, mi felte chenna chu lo châng ru suh. A chawlhna hmun pawh rawk hek suh;

¹⁶Mi dik chu vawî sarih pawh tlu mah sela, A tho leh ٲhîn asin, Mi suaksualte erawh zawng chhiatnain a sawp thlu hlen ٲhîn.

¹⁷I hmêlmâ a tlûkin lâwm ngawt suh, A petek laiin i rilru lo hlim suh se;

¹⁸LALPAN a hmû chein, a lâwm lo mai ang che a, Chu mî laka a thinrimna chu a la kîr daih mai tûr asin.

¹⁹Thil sual titute avângin intilungngai duh suh la, Mi suaksualte pawh awt hek suh.

²⁰Mi sual tân chuan beisei tûr engmah a awm dâwn loh avângin Mi sual khâwnvâr chu tihmihsak a ni ang.

²¹Ka fapa, LALPA leh lal chu hlâu thiam la, Rilru nghet lo mite chu kawp suh;

²²An chungah chhiatna a thleng thut thei asin, Anni pahnih chuan eng ang chhiatna nge an thlen theih tu nge hria?

THUFING DANGTE

²³Hêngte pawh hi mi finge ٲû a ni e: Hleih nei taka rorêl hi thil ٲa lo a ni.

²⁴Mi suaksual hnênah, “Nang chu i fihlîm e,” titu chu Mi tinin ânychia an lawh ang a, Hnam tinin an hua ang.

²⁵Mi suaksual zilhhâtute erawh chu an hlim ang a, Malsâwmna ٲa taka vûrin an awm ang.

²⁶Chhânna dik taka chhân hi hmûia fawh ang a ni.

²⁷I pâwn lam hnâ ching fel la, I thlawhmmâa thawk tûrin inpeih rawh; Chu mi zawhah i awmna in tûr i sa dâwn nia.

²⁸Chhan ٲa tê a nih loh chuan i ٲhenawmte khing zâwngin thuhretûah ٲang suh, I kâ chu bum nân hmang hek suh.

²⁹“Ka chung a tih angin a chungah pawh ka ti vê ang a, A thawh ٲhû tâwk ang zêlin ka pê ang,” ti suh.

³⁰Mi thatchhe lovah ka va kal a, Hriatna nei lo mi grêp huan ka va fang a;

³¹Hlîngin a lo bâwm khat vek a, A chhûng chu a hnim phui tlat a; A hungna lung palte chu a chim rem rum a.

³²Ka en reng a, ngun takin ka ngaihtuah a, Mi zirtîr a nei tih ka hre chhuak ta a:

³³“Mu leh phawt teh ang, chhng hlek ang, Kut kuanguahin châwl hlek ila,” i tih chhûngin

³⁴Retheihna chuan zânvâk angin a rawn nang thut ang che a, Tlâkchhamna chuan sipai angin a rawn nang thut ang che.

BUNG 25

SOLOMONA THUFING DANGTE

¹Hêng pawh hi Solomona thufing, Juda lal Hezekia miten an ziah chhâwn chu a ni.

²Thil thup hi Pathian ropuina a ni a, Thil zawn chhuah hi lal ropuina a ni.

³Vân sânzia leh lei thûkzia ang hian, Lalho thinlung pawh chhût chhuah rual a ni lo.

⁴Tangkarua aٲangin a êkchhia paih la, A chhertûin thil mâwi tak a chhuah thei ang.

⁵Lal hmâ aٲangin mi sual chu tîr bo ula, Tichuan, a lalthutthlêng chu diknaa tihngheh a ni ang.

⁶Lal hmâah chuan inchâwimâwi suh la, Mi ropuite hmunah ding vê hek suh.

⁷Mi lian ٲhutna kian tûra tîrh sawn nih ai chuan, “He lamah lo ٲhu chho rawh,” tia sâwm nih chu a ٲa zâwk e.

⁸Thubuai rêltute hnêna kal chu hmanhmawh suh; I ٲhenawmten zahthlâk deuhvin an rawn hâi mualpho ang che a, A tâwpah engtin nge i tih tâk ang?

⁹I thubuai chu i ٲhenawmpa nên sawi dûn phawt ula, Thurûk chu mi dang hnênah puang suh;

¹⁰Chuti lo zawng, a hrerututen an puang darh ang a, I hming a chhiat phah mai tûr asin.

¹¹A hun taka sawi tûr tak sawi chhuah hi Tangkaraw bâwma rangkachak tlang dah ang a ni.

¹²Fing taka zilhtu zilhna ngaichângtu tân Rangkachak bengbeh leh rangkachak ٲa chia cheimâwina ang a ni.

¹³A tîrtute tâna palai rinawm chu Buh seng laia vûr vâwt ang a ni. A ٲûte nunna tiharhtu a nih avângin.

¹⁴A pêk loh pui pêa insawia, uanpui chu, Ruahtui pâi lo chhûm leh thlî ang a ni.

¹⁵Dawhtheihnain rorêltu rilru chu hmin theih a ni a, Ânka nêmin ruh a deng tliak thei.

¹⁶Khawizû i hmu ٲhîn êm? I mamawh tâwk lekin in rawh, Chuti lo zawng, a ngei ang che a, i luak chhuak leh dah ang e.

¹⁷I ٲhenawm in tlawh khât deuh rawh, Chuti lo zawng, an ning ang che a, an ngei mai ang che.

¹⁸Mahni thenawm do zâwna thuhretu dera ƣang chu, Talhtum te, khandaih leh thal zum tak ang a ni.

¹⁹Mangan laia mi rinawm lo chung a rinna nghah chu, Ha muat leh ke ruh pelh ang a ni.

²⁰Khaw vawh nia silhfên hlih ang leh, Chingala thil thûr leih ang mai a ni, Mi lungngai hnêna hla satu ang nê.

²¹I hmêlmâ a rilƣam chuan ei tûr pê la, A tui a hâl chuan in tûr pe rawh.

²²Chutianga i tih chuan a lu chungah meiling i chhêk a ni ang a, LALPAN lâwmman a pe dâwn che nia.

²³Hmâr thliin ruah a rawn thlen ƣhîn a, Mî rêl hmang lei chuan thinur hmêl a kai chhuak ƣhîn.

²⁴Hmeichhe phunchiar nêna in lian puia awm ai chuan, In chung chhîp kila awm pawh a ƣa zâwk.

²⁵Ram hla taka chanchin lâwmawm hriat hi Mî châu tân chuan tuisik vâwt ang a ni.

²⁶Mi suaksual hmuha mi fel che khawlo chu Tuikhur hnuchhawn hnû leh tuihnâ tikhawloh ang a ni.

²⁷Khawizu in tam a ƣa lo va, Chutiang bawkin mahni ropuina zawn hi ropuina a ni lo.

²⁸Mahni rilru thunun zo lo mi chu Khawpui chim kulh nei lo ang a ni.

BUNG 26

¹Nipuia vûr tlâ leh buh seng laia ruah sîr a inhmeh lo angin Mî â-te chawimâwi hi a inhmeh thei lo.

²Chawngzawng thlazâp lai leh vamûr lêng lai angin Chhan awm lova ânhhe lawh chu tû chungah mah a tla lo vang.

³Sakawr tân vuakna hrui, Sabengtung tân thirbarh, Mî â-te hnungzâng tân vuakna tiang hman a ni.

⁴Mî â chu a ât dân angin chhâng suh, Chuti lo chuan amah ang i ni vê dah ang e.

⁵Mî â chu a ât dân azirin chhâng rawh, Chuti lo zawng, mi fîng emaw a inti dah ang e.

⁶Mî â-te kuta thuchah thawntu chu Ama kê tan bûl a, chhiatna tui in ang a ni.

⁷Kebâi kê te chu a ƣên a ƣên ƣhîn ang hi Mî â te kâa thufing pawh a ni.

⁸Mî â-te hnêna chawimâwina hlan chu, Sairawkherha saihlum phuar beh tlat ang a ni.

⁹Mî â-te kâ in thufing a sawi vê hi, Hlîngin zu ngawlvei kut a chhun ang hi a ni.

¹⁰Engkim siamtu Pathian ropui chuan Mî â pawh ruaiin bawhchhetu pawh a hlawn tâwk a pe tho.

¹¹Uiin a luak hnu a ei leh ƣhîn ang hian Mî â chuan a âtzia a tilang nawn leh ƣhîn.

¹²Mahni ngaiha intifing i hmu ngai êm? Chû mi ai chuan mi â-ah beisei tûr a tam zâwk.

¹³Mî thatchhia chuan, “Kawngah sakeibaknei a awm, Kawthlêrah sakeibaknei a awm!” a ti ƣhîn.

¹⁴Kawngkhâr kawpzâ a her vêl angin Mî thatchhia chu a khum laizâwlah a her vêl ƣhîn.

¹⁵Mî thatchhia chuan chawthlêng a zen a, A kâah pawh a inbarh peih lo.

¹⁶Thil chhût thiam mi pasarih ai pawhin Mî thatchhia chu fîng zâwkah a inngai.

¹⁷Mî intihbuaina kâra lo va inrawlh vê ringawt hi Ui kal lai a beng a lo mantu ang a ni.

¹⁸Mî â ang maia meichher te, thal te, thihna tea mi tihƣaih a,

¹⁹“Ka fiamthû a ni e!” ti baw si chu a ƣhenawmte tihdertu a ni.

²⁰Thingtuah a ral chuan mei chu a mit mai a, Sêsêa thu lâk ching an kian chuan inngirngghona pawh a reh ƣhîn.

²¹Meiling chu meihawl tivâmtu leh, thing chu mei tialhtu a ni angin Mî hnial hrât chuan buaina a chhêm alh ƣhîn.

²²Sêsêa thu lâk chingte thû chu ei tûr tuihnâi ang mai hi a ni a, Kawchhûng ril ber pawh a fan thla ƣhîn.

²³Tawngkam ƣa viau si, thinlung sual si chu, Silvar tuiêka hlumbêl an luan ang hi a ni.

²⁴Mî huat zawng nei chuan a hmûiin a thup a, A thinlungah bumna a up rûn mai a ni;

²⁵Zâidawh takin thû sawi mahse âwih duh suh, A thinlungah thil tenawm pasarih a pâi reng si a;

²⁶A huatna chu bumna in thup mah sela, A suahsualna chu tlang hriatah lai hlan a ni tho vang.

²⁷Khur lait chu ama khur lai hah a tlâ ang, Lung lum khumtu hnênah lung chu a lo lum lêl leh ang.

²⁸Mî dawthei chuan hliam a tuartîrte thlengin a haw ƣhîn a, Fak derna kâ chuan chhiatna a thlen ƣhîn.

BUNG 27

¹A tûka thil lo awm tûr chhuang lâwk suh, Eng thil nge a rawn thlen dâwn i hre si lo.

²Nangmah infak lovin, mi dangin fak zâwk che rawh se; Nangma hmûi ni lo, hmêl hriat loh hmûiin fak zâwk che rawh se.

³Lung hi a rit a, ƣiau vaivut pawh a rit baw a; Mahse hêng thil pahnih ai hian mi â te thinurna chu a rit zâwk.

⁴Thinurna hi a râwng a, thinrimna pawh a so but but a, Mahse, thikthû hi tu nge tuar zo ang le?

⁵A rûka hmangaih ai chuan, A langa zilhhauh a ƣa zâwk.

⁶ƣhiantê min hliamna chu a tak a, Hmêlmâte min fawhna chu a der mai a ni.

⁷Tlai puar tân chuan khawithlâr pawhin luak a tichhuak a, Mahse rilƣam tân chuan thil kâ pawh a tui zêl.

⁸Mahni in leh lo awp lum nachâng hre lo chu Ama bu awp lum ngai lo sava ang hi a ni.

⁹Hriak leh thil rimtuiin rilru a tihlim angin Inƣhian ƣhatna duhawm tak nêna thurâwn inpêk hian mi a tihlim ƣhîn.

¹⁰I pa ðian emaw, nangma ðian emaw chu thlauhthla suh, Chhiat i tawh laiin i unaupa chu a inah pan suh; Lam hlâa unaute aiin ðian bul hnâite an ðangkai zâwk.

¹¹Ka fapa, fîng la, ka thinlung hi tilâwm rawh, Min sawi chhe ðhîntu ka chhân lêt theih nân.

¹²Mi fîngin thîl ða lo a hmuhin a birû a, Mi mâwl erawh chuan a tâwn mai a, a tuar phah ðhîn.

¹³Hmelhriat loh leiba rulhsak tiamtu kawr chu hrêng la, Nawhchizuar lakah amah chu dahkham mai rawh.

¹⁴Zîng taka thova, ring taka a ðian malsâwm tu chu Ani tân chuan ânchhiaa ngaih a ni ang.

¹⁵Khawchhiat nîa tui far reng leh, Hmeichhe ânchêh an inang reng.

¹⁶Chutiang hmeichhe khap beh tum chu Thlî hup beha, kuta hriak hûm khâwm tum ang a ni.

¹⁷Thîr chu thîr vêka tahhriam a ni a, Chutiang bawkin miin a ðian a tuai hriam ðhîn.

¹⁸Theipui kûng enkawltu chuan a rah pawh a tân ang a, Mahni pu te enkawltu chu châwimâwi a ni ang.

¹⁹Tuiah hian mahni hmêl a lo lang ðhîn angin Mihring thinlung chu mihringah vêk a lang chhuak ðhîn.

²⁰Hremhmun leh Boralnain chin lêm an nei lo va, Mihring mit pawhin chin tâwk tih rêng a nei lo ve.

²¹Thlît fimna bêl chu silvar tân a ni a, rawh tuina mei chu rangkachak tân a ni, Mihring chu mite sawi duh dân aţangin eng mi nge a nih fiah a ni.

²²Mi â chu sumah buh nên sukin dêng chawrh chawrh mah la, A âtna chuan a thlah chuang lo vang.

²³I berâm rualte dinhmun hriat tumin taihmâk chhuah la, I ran rualte chu vêng ða rawh:

²⁴Hausakna hi chatuan atân a ni lo va; Lallukhumin chhuan zawng zawng a daih hek lo.

²⁵Ran châw an sât a, a lo chawr no leh a, Tlâng panga hnîm hnahte pawh an la khâwm ðhîn.

²⁶Berânten silhfên an lo tumsak che a, Kêlte chuan lo leina man an lo tum baw a;

²⁷Kêl hnûtê hnianghnâra in tham i nei ang a, In chhûngkaw tân châwa rin tham, In awmpui nulate rin khawp a ni ang.

BUNG 28

¹Mi suaksualte chu tûma ûm lohvin an tlânchhia a, Mi dikte erawh chu sakeibaknei anga huai an ni.

²Ramin a bawhchhiat chuan hruaitu an inthlâk zut ðhîn; Mi hmang châng hria leh hriatna neitute avângin Ramin a din rei phah ðhîn.

³Mi retheiin rethei dang a hnehchhiah hi Ruah sûrin ei tûr a lên bo ang hi a ni.

⁴Dân pawisa loten mi sual an ðan a, Dân zâwmtute erawh chuan chutiang mite chu an dodal ðhîn.

⁵Mi sualten rorêlna dik an hre thiam lo va; LALPA zawngtute erawh chuan an hre thiam vek si a.

⁶Mi rethei, rinawm taka awm hi Mi hausa awm khawlo aiin an duhawm zâwk.

⁷Tûpawh dân zâwmtu chu fapa fîng a ni, ðian vir tak tak kawptu chuan a pa mualphona a thlen ðhîn.

⁸A pung ûma hlêp tuma intihausate chuan Mi rethei khawngaihtute tân an khâwlsak mai a lo ni ðhîn.

⁹Dân pawisa lova bengkhawn duh lo chu A ðawngtâina pawh tenawm mai a ni.

¹⁰Kawng dik lova mi fel hruai botu chu Ama khur lai ngeiah chuan a tlâ ang. Dem kâi lo mi ðate erawh chuan thîl ða an rochung ang.

¹¹Mi hausa chu ama ngaihîn a fîng a; Mi retheite hre thiamtu chuan thîl a hmu tlang vek thung.

¹²Mi felten lalna an chan chuan ropuina nasa tak a awm ðhîn a; Mi sualten thuneihna an chan erawh chuan mite an biru ðhîn.

¹³A sualte zêptu chu a hmuîngîl lo vang a, Zêp lova inpuanga inlamlêtte chuan zahngaihna an chang ang.

¹⁴LALPA ðih tlat mi chu a nihlawh e, Mahse thinlung tikhauh rengtu chuan vanduin a tâwk ang.

¹⁵Mi rethei chung a rorêltu sual awm dân chu Sakeibaknei hâhum leh mi seh tûr savawm ang a ni.

¹⁶Hriatna tlachham rorêltu ni si chu mi awp beh hmang a ni a, Duhâmna hawtu chu a dam chhûng hun pawh seisak a ni ang.

¹⁷Thisen chhuahtu chu khurah a tân lût ang a; Tuma'n lo ðanpui suh se.

¹⁸Nun ngîl taka nung chu chhanhim a ni ang a, Khawlo taka nung erawh chu a tlu chhe thut ang.

¹⁹Ama lei lettû chuan buhbâl a ngah ang a, Mi nikhua lo zuitu hmabâk erawh chu retheihna chauh a ni.

²⁰Mi rinawm chuan malsâwmna a ngah ang a, Hausak thut tumtu erawh chu hrem lohvin a chhuak lo vang.

²¹Mi thlei bîk neih hi a ða lo va, Thamna tême tê avângin miin dân a bawhchhiat phah ðhîn.

²²Mi sual chuan huamhap takin sum a ûm ruak ruak a, Retheihnain a hmuak tih rêng a dân pha lo.

²³Mi fak dertu ai chuan mi zilhhâutu chuan A hnûah fak a hlawh zâwk ang.

²⁴A nu emaw, a pa emaw rawk a, “Dân bawhchhiatna a ni lo,” titu chu Tiboraltu ðian a ni.

²⁵Mi chapo thinlung chuan buaina a chawh chhuak ðhîn a, LALPA ringtu erawh chu a hmuîngîl ang.

²⁶Mahni ngaih dân kalpui tlat mî chu mi â a ni a, Fîng taka awm thiam mi erawh chu chhan chhuah a ni ang.

²⁷Rethei hnêna thîl petu chuan tlâkchham a nei lo vang a, Maimitchhînsantu erawh chuan ânchhia a dawng ðeuh vang.

²⁸Mi suaksualten lalna an chanin miten an bihrûksan a; Chutiang mite chu an boralin mi dik an pung ðhîn.

BUNG 29

¹Zilhhauh fo pawha luhlul zêl chuan Chhiat a tâwk thut ang a, tihdamna a awm lo vang.

²Mi thaten thuneihna an chanin mipui an lâwm a; Mi sualten rorêlna an chan chuan mipui an rûm thîn.

³Finna ngainatu chuan a pa a tilâwm thîn a, Nawhchizuar kawp ching chuan a sum a tlakral thîn.

⁴Lalin dik taka ro a rêlin ram a phuisui thîn a, Thamna lâk a chîn erawh chuan ramin a chhiat phah thîn.

⁵A thenawm fak dertu chuan A kêa awhna tûr lên a zam a ni.

⁶Mi dik lote chu suahsualna thang chuan a hling tlat a, Mi fel erawh chu hlim takin a zâi thîn.

⁷Mi dik chuan mi retheite tânghmâ a hâisak a, Mi sual erawh chuan hriat tum pawhin a ngaihen peih lo.

⁸Hmusittuten khawpui an chawk buai a, Mi finge chuan thinurna an tikiang thîn.

⁹Mi fingin mi â a khin chuan A thinur pawhin, a nuih pawhin, inremna a awm chuang lo.

¹⁰Thisen chhuah chingten mi dik an hua a, Mi nun ngilte erawh chuan mi dikte thlavâng an hauh thîn.

¹¹Mi â chuan a rilrû ang ang a tilang mai a, Mi fîng erawh chu a inbengdâi thîn.

¹²Rorêltuin dâwtthû a pawisak loh chuan A chhiahhlawh zawng zawngte pawh an sual ve nghal mai.

¹³Mi retheite leh rapbettuten thil in tâwm an nei: LALPAN an mit a tivâr vê vê.

¹⁴Dik taka mi retheite rorêlsaktu lal chu Kumkhuain a lal thutthlêng tihngheh a ni ang.

¹⁵Tiang leh zilhhauhna hian mi a tîfing a, Naupang thlahthlam chuan a nu tân hmingchhiatna a thlen thîn.

¹⁶Mi sualho an punin bawhchhiatna a pung a, Mi dikte erawh chuan chûng mite tla chhe hmêl chu an la hmu ang.

¹⁷I fapa chu thunun la, hahdamna a pê ang che; Ni e, i rilru tihlimtu a ni ang.

¹⁸Inlârna a awm loh chuan mipuite an rîral thîn a; Dân zâwmtu erawh chu mi nihlawh a ni.

¹⁹Chhiahhlawh chu tawngka maia thunun chî a ni lo; Hre reng mahse, a zâwm chuang lo vang.

²⁰Thu sawi puat puat ching mi i hmu ngai em? Chutiang mi ai chuan mi â-ah beisei tûr a awm zâwk.

²¹Têt tê aţanga chhiahhlawh duat sual chuan A tâwpah fa nihna a chuh hial ang.

²²Mi thinchhia chuan buaina a chawk chhuak a, Mi thinram chuan dân a bawhchhe rem rum thîn.

²³Chapona hi mi hnûk hniamtu a ni a, Rilrûa inngaitlâwmten mite zah an kâi thîn.

²⁴Rûkru thurualpuitu chuan ama nun pawh a hua tihna a ni; Thu dik sawi tûrin chhia a chham a, engmah a sawi leh si lo.

²⁵Mihring pawisak luat hian thang angin mi a âwk thîn a, Mahse, LALPA-a innghat apiang an him thîn.

²⁶Rorêltute duhsakna ûmin mi an khu ruai a, Mahse, mihring tâna rorêlna dik chu LALPA hnêna mi a ni.

²⁷Mi dik lo chu mi felte tân an tenawm a, Dik taka awmte hi mi sualte tân tenawm an lo ni vê bawk si a.

BUNG 30**AGURA THUFING**

¹Jakea fapa Agura thufing chu. Chû mi chuan Ithiela hnênah Ithiela leh Ukala te hnênah heti hian a ti:

²“Mi mâwl ber ka ni a, mihring hriatna ang pawh ka nei vê lo.

³Finna hi ka zir vê lo va, Mi Thianghlima hriatna pawh ka nei hek lo.

⁴Tu nge vânah lâwna, tu nge lo chhuk leha chu? A kuta thli hûm khâwmtu chu tu nge? A puana tui fûn khâwmtu chu tu nge? Kâwlkil zawng zawng tinghetu chu tu nge? A hming chu tu nge ni a, a Fapaa hming pawh chu tu nge, i hria êm?

⁵LALPA thu tin hi tihthianghlim vek a ni a; Amaha innghat zawng zawngte tân ani chu phâw a ni.

⁶A thûte chu belhchhah suh, Chuti lo zawng, mi dawthei i ni mai ang.

⁷Thil pahnih ka dîl a che, (Ka thih hmâin mi remtihsak ang che):

⁸Ka hnên ata dik lohna leh dâwtthû mi dah bosak daih la; Retheihna emaw, hausakna emaw mi pe lo la, Ka mamawh chawin mi chawm ang che;

⁹Chuti lo zawng, duh tâwk ka ngah ang a, ka phat ang che a, “LALPA chu tu nge ni?” ka ti dah ang e; A nih loh vêk leh, ka lo rethei ang a, rûk ka rû ang a, Ka Pathian hming ka tihliao dah ang e.

¹⁰Chhiahhlawh chu a pu hnênah rêl suh, Chuti lo chuan ânhhia a lawh ang che a, Thiam loh i chang hlauh dah ang e.

¹¹Thangtharho zîngah mahni pate ânhhia lawha Mahni nute duhsak nachâng hre lo an awm.

¹²Thangtharho zîngah mahni ngaiha intithianghlim an awm bawk a, An bawhlhlawhna tlen fâi a ni si lo.

¹³Tûnlai mite zîngah hawi sâng tak an awm bawk a, An va han hawi sâng ngai ve le!

¹⁴Thangthar zîngah khandaih ang maia ha hriam, An ngho chu chemtê ang maia zum, Hê lei aţanga mi retheite leh, Mihringte zînga pachhiate ei zawh tum an awm.

¹⁵Vangvat hian fanu pahnih a nei a “Min pe rawh, min pe rawh!” an ti thîn. Thil pathum, kham lêm nei lo an awm a, “A tâwk ei” ti ngai lo thil palîte chu:

¹⁶Thlân te, Chhûl ching te, Tui khawpkham lo leilung leh, “A tâwk e,” ti ngai lo mei te hi.

¹⁷Mahni pa nuihzattu mit leh, Mahni nute thu âwih duh lo mit chu, Phâi choâkin an kher chhuak ang a, Mupui noten an ei ang.

¹⁸Thil pathum ka tâna mak lutuk a awm a, Ni e, ka hriat thiam loh thil palîte.

¹⁹Boruaka mupui thlawhna kawng te, Pialtlêp chung a rûl tlangna kawng te, Tuipui chung a lawng kalna kawng te leh, Mipain nula a rîmna kawng te hi a ni.

²⁰Hei hi hmeichhe uirê chîng awm dân a ni: A ei a, a hmûi a hru fâi a, “Thil sual engmah ka ti lo,” a ti thîn.

²¹Thil pathumin leilung hi a timangang a, Ni e, thil pali, tawrhhlêlawm tak takte chu:

²²Chhiahhlawhin ro a han rêl vê mai te, Mi â-in ei leh bâr a hnianghnâr viau mai te,

²³Hmeichhe huatthlala takin pasal a han nei te, Chhiahhlawh nulân a pi a luahlan te hi.

²⁴Lei chungah hian thil te reutê pali an awm a, Mahse an fîng hlê reuh hlawn si:

²⁵Fanghmîrte hi chak lo tak an ni a: Mahse nipuiahi ei tûr khâwl khâwm nachâng an hria.

²⁶Sangâwite hi rannung chak lo tak an ni a; Mahse lung keh kârte chu chênna inah an siam thîn.

²⁷Khâte hian lal an nei hran lo nâ a; A lal dân indawtin a rualin an kal thîn.

²⁸Maimawmte hi thiam takin an kê in an inham tâng a, Mahse lal inahte an chêng si.

²⁹Thil pathum kal chak tak tak an awm a, Ê, pali a ni, kal chak tak takte chu.

³⁰Sakeibaknei chu ramsa zînga chak tak a ni a, Engmah dang kîr zo an awm lo;

³¹Ui sa thiam te, Kêlpate chenin, Sipai rualin an vên khup lal te nê.

³²Mahni inchâwimâwi khawpin âi i lo so tawh a, Thil tha lo i lo ruahman tawh a nih chuan, i kê hup mai rawh.

³³Hnute tui chawh kêwiin hnute khal a tichhuak ang leh, Hnâr han sâwra thî a lo chhuak angin, Thinrimna chawh thawh hian intihbuaina a hring chhuak thîn.

BUNG 31

LAL LEMUELA NU THUFINGTE

¹Lal Lemuela thufing, a nu'n a zirtîrte chu:

²Eng nge ni ta, ka fapa? Eng nge ni le, ka rîla rah? Ka thu tiam fapa, lo ngaithla teh.

³Lalte pawh tichhe thîn hmeichhe hnênah I chakna chu pe lul suh âw.

⁴Aw Lemuel, lalho tân a ni lo ve, Lalte tân zû hi in tûr a ni lo asin, Rorêltute pawhin zû an rûi tûr a ni lo;

⁵Zû an in chuan dân an theihngihl ang a, Mi retheite chanvo hlanchhiahin ro an rêl dik lo mai ang.

⁶Boral mêkte chu zu chak chi pê ula, Rilru nâte chu zû intîr rawh u.

⁷In sela, a pachhiatna chu theihngihl sela, A lungngaihna theihngihl thak rawh se.

⁸Tawng thei lote chu sawisakin i kê âng la, Thi tûra an chungthu rêlsakho chu sawipui baw rawh.

⁹I kê âng la, dik takin ro rêl la, Mi rethei leh tlachhamte tân ngensak rawh.

NUPUI THÂ

¹⁰Nupui fel tak hi tu nge hmu thei ang le? Lungmantam aiin a hlu zâwk asin.

¹¹A pasal chuan a lakah rinna a ngat a, Engmah tlâkchham a nei lo.

¹²A dam chhûng chu thil tha tih nân a hmang a, Thil tha lo a ti vê ngai lo.

¹³Berâm hmul leh lâ a zawng khâwm a, Lungâwi takin kutin a thawk melh melh thîn.

¹⁴Sumdâwng lawng ang mai a ni a, Ram hla tak ata ei tûr a la khâwm thîn.

¹⁵Khawvâr hmâin a tho va, A chhûngte ei tûr a pê a, Chhiahhlawh nulate tih tûr a sem thîn.

¹⁶Huan tûr ram a en a, a lei a; A hlêp aţangin grêp huan a siam a.

¹⁷Chakna thahruiin a kâwng a hrêng a, A bante a tichak sauh sauh va.

¹⁸A sumdâwnna a hlâwk tih a hria a, Zânah pawh a khâwnvâr a mit hman lo.

¹⁹A kutin hmui thlûr a chelh a, A kut lehlatin lâ a kâi a.

²⁰Mi retheite pui tûrin a kut a phar reng a, Ni e, tlachhamte thlengin a ban phâk a.

²¹Vûr pawh tlâ se, a chhûngte tân engto tûr a awm lo; A chhûngte zawng zawngin puan sin lum tûr an nei theuh si a.

²²Chhuatphah atân puan mâwi a insiam a, A silhfên chu maimaw puan leh puan senduk a ni.

²³A pasal chu kulh kawngkâah pawh challang tham a ni a, Ram chhûnga hotute zîngah a thû thîn a ni.

²⁴Maimaw puan a tah a, a zuar thîn a, Sûmdâwngte hnênah kâwnghrênte a hralh thîn.

²⁵A inthumna chu chakna leh zahawmna a ni a; Hun lo la kal tûrah pawh a lâwm zêl ang.

²⁶Fîng takin a ţawng chhuak thîn a, A ţawngka chhuak te lah a dam baw si.

²⁷An chhûngkaw khawsak dân a rêl fel a, A inthlahdah ngai lo.

²⁸A fate chuan an nu chu an fak a, A pasal pawhin a fak baw a.

²⁹“Nûtlîng tak tak an tam mai, Mahse nang chuan i khûm vek a ni,” a ti a.

³⁰Ngaihno beina hian mi a bum a, Hmêlthâtna pawh a chuai leh mai a, Lalpa ţihtu hmeichhia erawh chuan fak a hlawn ang.

³¹A kuta a thawh rah chu pê ula, Ama thil tha tihte chuan kulh kawngkâah fak rawh se.

THUHRILTU

Ziah tu: Solomona • Ziah kum: B.C. 935

Thuhriltu tih hi Grik jawngin 'ekklesiates' an ti a, Hebraiin 'Kohaleth' an ti a, a awmzia chu 'thuhriltu' tihna ve ve a ni. A bu ziaktu hian vân hnuaia mihring nun leh khawsak dân tinrêng a ngaihtuah a. Nuih hun a awm a, ʔah hun a awm a; pianni a awm a, thih ni pawh a awm. Lâk khâwm hun a awm a, theh darh hun a awm bawh a. Hê thuhriltu, mi fîng tak hian mihringin a dam chhûnga a thil tawn a han thlîr lêtin, 'Ni hnuaia thil tinrêng hi ho mai mai, engmah lo mai' niin a hmu a. 'Davida fapa, Jerusalem lal' a nih thu te, finna zirtîr a, thufîng tam tak sawitu a nih avângin a bu ziaktu hi tû dang ni lovin, Lal Solomona a ni tih a tichiang a; a ziaak hun pawh ama hun hnahnung lam, B.C. 931 hma lam chu ni ngei tûr a ni. Khawvel lâwmna leh mawina zawng zawng hian chatuan an tling zo lo. Pathian aʔang lo chuan hausakna te, lalna leh ropuinate hi engtihna mah a ni lo, tih hi, a ziaktu Solomona hian duhtâwka khawvêl a chen hnua a hmuh chhuah a ni a. Chuvângin, vânglai huna Pathian hre reng mi ni tûrin thurâwn a pê a ni. A thuchah khai khâwmna pawh: Pathian ʔih la, a thupêkte zâwm rawh. Hei zawng hi mihring tih tûr chu a ni mai, tih hi a ni. Thuhriltu bû hi hlâwm thumah then theih a ni: (1). A ziaktu tawn hriat dân a thil zawng zawng hi engmah lo mai a nih thu (1-4) te; (2) chutiang a nih avânga awmdân ʔha infuihna (5-10) te leh, (3) a thu khai khâwmna (11-12) te a ni. Thuhriltu hi Bible-a bu 21-na a ni a. A chhûngah hian bung 12 leh châng 220 a awm.

BUNG 1

HRINGNUN HO-LAM ZIA

¹Jerusalem lal, Davida fapa, Thuhriltu thusawite chu.

²Thuhriltu chuan, "A ho êm mai"; "Thil zawng zawng hi holam mai a lo ni e," a ti a.

³Mihringin ni hnuaia a thawhrimna aʔang hian, Hlâwkna eng nge a hmuh?

⁴Chhuan khat an liam a, chhuan dang an lo chhuak leh a, Leilung erawh chu a awm reng a ni.

⁵Ni a lo chhuak a, ni chu a tla leh a, A lo chhuahna lam a pan leh vut vut a.

⁶Thlî chu chhim lamah a tleh a, Hmar lamah a rawn tleh kual leh a; Tichuan a tleh kual vêl reng a, A kawng ngai bawh a zawh leh ʔhin.

⁷Lui zawng zawng chu tuifinriatah an luang lût a, Mahse tuifinriat kuang chu a khat chuang lo; Tuite chu a hnâr lamah a kîr leh ʔhin a, A luan ngai bawkin a luang leh ʔhin.

⁸Engkim mai hi hahthlak thil vek a ni; Sawi ngaihna pawh a awm lo ve. Mit hian thil a hmu kham thei lo va, Beng lah a tlaï zo hek lo.

⁹Thil awm tawh chu lo awm leh tûr a ni a, Tih tawh pawh tih leh zêl tûr a ni, Ni hnuaiah hian thil thar rêng a awm lo ve.

¹⁰"En teh u, hei chu thil thar a ni," Tia han sawi tûr a awm em? Kan awm ve hmâ daih, hmasânga lo awm tawh a ni.

¹¹Tûn hma thilte kha hriatreng a ni lo va, Nakina lo la awm tûrte pawhin Thil lo la awm tûrte chu an hre reng bik lo vang.

MIFING LUNGNGAIHNA

¹²Kei, Thuhriltu hi Jerusalem-ah Israel lal ka ni a.

¹³Vân hnuaia thiltih zawng zawng hi finna hmanga dap chhuah ka rilrûk a; mihring fate thawh chhuah tûra Pathianin a lo pêkte hi hna hahthlak zet a ni a.

¹⁴Ni hnuaia hnathawh tinrêng hi ka hmu tawh a; thil zawng zawng hi ho lam mai mai, thli hup beh tum ang lek a ni.

¹⁵A kawi chu elh ngîl theih a ni lo va, A kim lo zât pawh chhiar theih a ni lo.

¹⁶Ka rilrûin, "Ka ropui mang e aw, ka hmaa Jerusalema lo awm tawh zawng zawngte aiin ka fîng zawk daih si a. Ka thil lungin finna leh hriatna a dap chhuah hnemzia hi a va namai lo êm," ka ti a.

¹⁷Finna bâkah âtna leh mâwl na thil chenin hriat zêl ka han tum ta a. Hei pawh hi thli hup beh tum ang tho a ni tih ka lo hre ta.

¹⁸Finna a tam chuan lungkham tûr a tam a, Hriatna a pun leh a manganthlak ting mai a nih hi.

BUNG 2

NAWMSIP BÂWL HO-LAMZIA

¹Ka rilruin, "Khai le, nawmsip i han bâwl teh ang âw; a nuam dân emaw han infiah tehrêng ila," ka ti a; mahse, hei pawh hi thil ho mai mai a ni.

²Nuih huau huau te hi a lo "mâwl" thlak tawp; hlimhlawp pawh hi, 'A eng ual chuang em ni?'

³Vân hnuaia mihring fate tân an dam chhûng hun hman dân tûr ʔha hmuh chhuah tumin, âtna thil kuah bet chung a finna kawnga kal zêl tum bawh, uain-a intihlungawi tum bawh siin ka han bei ta a.

⁴Hna ropui tak tak ka thawk a, ka awmna in te sâ-in, grêp huante ka siam a.

⁵Huante, thei huante ka siam a, chûngah chuan theikung chi tinrêng ka phun a.

⁶Thing kungte châwm lenna tûrin tui te ka khuap a.

⁷Ahmei apain chhiahhlawh ka nei a, ka ina piangte pawh an awm a. Tûn hmaa Jerusalema awm zawng zawngte aiin bâwng rual leh berâm rual ka ngah zâwk a.

⁸Lalte leh ram bial then aʔangin tangkarua leh rangkachak tangka tam tak ka chhêkhâwl a. Zaithiam mipa leh hmeichhiate ka nei a, mipa fate lâwm zâwng tak mai nê, rimawi tum chi chi hrang hrangte nê.

⁹Tichuan, ka lo ropui ta êm êm a, Jerusalema ka awm hmaa lo awm tawh zawng zawngte chu ka khûm vek a. Ka finna pawh keimahah hian a awm bawh a.

¹⁰Ka mit it zâwng tawh phawt chu ka hlah lo a ni tawp mai. Nuam ka tih zâwng eng thilah mah ka insûm hek lo, Ka

thawhrimna zawng zawngah ka rilru a lâwm si a; Chû chu ka thawhrim lâwmman a ni.

¹¹Ka kut hnathawh zawng zawng ka han en a, Rim taka ka hnathawhte chu; A zavaïin engmahlo mai mai, thli hup beh tum ang mai a lo ni. Ni hnuaiah hian engmah hi hlâwk a lo awm lo ve.

MIFING LEH MI Â-TE TÂWPNA

¹²Finna te, âtna te leh mâwlana te hi eng tak nge ni tih ka chhui Chiang a; Lalrawn thlaktu hian eng thil nge maw tih theih a neih le, A hmaa mi te lo tih dân anga tih ve mai loh chu?

¹³Thim aiin êng a tha zâwk ang hian Âtna ai chuan finna a tha zâwk.

¹⁴Mifing mitte chu a lû-ah chuan a awm a, Mi â erawh chu thimah a kal thîn. Mahse an chungah chuan Khawrêl thuhmun a thleng tih ka hria.

¹⁵Ka rilrûin heti hian ka ti a, “Mi â-te hnêna thil thleng hi, Ka hnênah pawh a thleng thova, An aia ka fin bîkna chu eng vâng nge?” Tichuan, ka rilru chuan, “Hei pawh hi ho deuh a lo ni?” ka ti a.

¹⁶Mi â te aiin mi fingen hriatreng an hlawh chuang lo, Tun thilte pawh hi nakinah theihngihl a la ni vek ang. Engtin nge mi finge an thih? E le, mi â-te thih dân ang thovin!

¹⁷Tichuan, ni hnuaia hnathawh tinrêng hi mi tilungngaitu vek, ho-lam mai mai leh thli hup beh tum ang lek a lo nih avângin, nun hi ka ning ta hluah hluah a.

¹⁸Ka hnêna mi lo awm leh tûrte tâna, hah thikûla ni hnuaia thawk mai ka ni tih ka inhriatin, ka thawhrimna zawng zawngte pawh chu ka haw ta hlur mai a.

¹⁹Mi fîng nge mi â a la nih dân tu nge hria? Mahse fîng inti taka ni sensa hnuaia ka thawhrim rah chungah thu a larawn nei dân ngei mai si a. Hei pawh hi a ho teh e.

²⁰Tichuan, ni hnuaia ka lo thawhrimna zawng zawngte avângin ka rilru chu inchhîrin a beidawng ta hial a.

²¹Miin finna te, hriatna leh thiamna tein hna a thawk tauh tauh a; mahse a thawk hah ve hlei lo rochun a tâna hnutchhiah tûr a ni si a. Hei pawh hi thil tha lo tak leh ho mai mai a lo ni.

²²Miin a thawhrimnaah leh rilru sênga ni hnuaia a thawhna zawng zawngah chuan eng nge chan a neih?

²³A dam chhûng hunte chu lungngaihna leh thawhrimnain a khat a; zânah pawh lung muangin a châwl thei lo. Hei pawh hi ho tak a lo ni e.

²⁴Mihring tân duh tawka ei leh ina, mahni hnathawh rah chen bâka liama thil tha a awm chuang lo. Hei pawh hi, Pathian kuta mi liau liau a ni tih ka hria a ni.

²⁵Kei aia ei nasa leh chên nasa hi tu nge awm chuang ang?

²⁶Pathian chuan a mithmuha mi tha hnênah finna leh hriatna a pe si a; Pathian hmuha mi tha te hnêna an pêk theih nân misual hnênah chuan, lâkkhâwm leh chhêkkhâwm hna a pe mai a ni. Hei pawh hi ho mai mai, thli hup beh tum ang chauh a ni.

BUNG 3

ENGKIM TÂN HUN RUAT

¹Engkim tân hunbî ruat a awm theuh va, Vân hnuaia ruahmanna tinte hian hun an nei vek a ni:

²Pian hun a awm a, Thih hun a awm; Phun hun a awm a, Phun tawh phâwi leh hun a awm;

³Tihhlum hun a awm a, Tihdam hun a awm; Thiat hun a awm a, Tundin hun a awm;

⁴Thah hun a awm a, Nuih hun a awm; Lusûn hun a awm a, Lâwm hun a awm;

⁵Lung paih darh hun a awm a, Lung lâk khâwm hun a awm; Inkuah hun a awm a, Inkuah loh hun a awm;

⁶Hlâwk hun a awm a, Chên hun a awm; Vawn that hun a awm a, Paih bo hun a awm;

⁷Pawhthlêr hun a awm a, Thui hun a awm; Ngawih hun a awm a, Tawng hun a awm;

⁸Hmangaih hun a awm a, Huat hun a awm; Indo hun a awm a, Inrem hun a awm.

PATHIAN PÊK HNÂ

⁹Thawktuin a thawhrimna atangan eng hlâwkna nge a hmuh?

¹⁰Mihring fate buaipui tûra Pathianin hna a pêk chu ka hmû a.

¹¹Mahni hun theuhah engkim hi mâwi taka siam an ni. A bul atanga a tâwp thlenga Pathian thilsiam chu tuman an hmuh chhuah theih lohna tûrin, an thinlungah chuan chatuan* a dah baw a.

¹²Hlim taka awma, dam chhûnga thil tha tih tûr tih bâka tha hi eng dang mah awmin ka hre lo,

¹³mi tinin an thawhrim rah thil tha zawng zawng chu eiin, in rawh se, chu chu Pathian thilpêk a ni si a.

¹⁴Pathianin thil a tih rêng rêng hi, Chatuan atân a ni tih ka hria. Engmah belchhah theih a ni lo va, Engmah lâk then theih a ni hek lo. Mihringen amah an tih nâna Pathian tih a ni.

¹⁵Tuna thil awm hi lo awm tawh a ni a, Thil lo awm tûr pawh lo awm tawh baw a ni; Pathianin thil kal tawh pawh a phûl lêt thîn a ni.

RORÊLNA DIK LO A LAL ZÂWK

¹⁶Ni hnuaia ka hmuh dang leh chu: Rorêlna dik hmunah Suahsualna a awm a; Dikna hmunah Khawloha a awm.

¹⁷Ka rilruin, “Pathianin mi dikte leh mi suaksualte chungah ro a rêl ang a, Tumna leh thawhna tinrêng tân hun a awm,” ka ti a.

¹⁸Mihring fate dinhmun thû-ah, anni pawh ramsa ang tho an ni tih inhre tûrin Pathianin a fiah a ni,” ka ti a.

¹⁹Mihring fate chanvo leh ramsate chanvo hi thuhmun reng a ni; an thil tawn pawh a inang reng, thi tûr vek an ni. Thâwk dan thuhmun rengin an thaw vek a; mihringin ran aia chan that bîkna a nei chuang lo, engkim hi ho mai mai a ni si a.

²⁰An vaiin hmun khatah an kal vek: vaivuta mi vek an ni a, tichuan an vaiin vaivutah baw an kîr leh ang.

²¹Mihring fate thlarau chu chung lamah a chhova, ramsa thlarau chu hnuai lam leiah a chhuk tih tu nge hria?

²²Chuvângin, mihring chu a hnathawhah hlim takin awm sela, chu tluka tha a awm chuang lo tih ka hmu a; chû chu a chanvo a ni mai. A thih hnua thil thleng entîr tûrin tu ngerawn hruai thei ang?

BUNG 4

¹Ni hnuaia intihduhdahna nasatzia hi ka ngaihtuah ta a: En ta che, tihduhdah tuartute mittui hi, Thlamuantu an nei si lo va, Hnêmtu pawh an nei hek lo; Anmahni rapbettute lamah chuan thuneihna a awm tlat si a.

²Chuvângin, nung dama la awmte aiin, Thi tawhte chu awhawm zâwk mahin ka hre ta a.

³Chûngte ai maha tha zâwk chu la piang ve lote an ni, Ni hnuaia thil tha lo tih rêng rêng an hmu ve si lo va.

MAHNI TANGHMA ÛM HOH-ZIA

⁴Thawhrimna leh themthiamna zawng zawng hi thenawmte laka rualawh vâng a ni tih ka hmu a. Hei pawh hi holam mai mai, thli man beh tum ang mai a ni.

⁵Mi â chuan a kut a kuangkua a, Ama tisa chu a ei mai a.

⁶Hahdam taka vei khat lek neih hi Vei hnih neih tuma hah thikûla thawhrima neih aiin a tha zâwk.

⁷Ni hnuaia thil ho-lam tak takte chu ka han thlîr leh a:

⁸Mi pakhat a awm a, thian pawh nei lovin: Fapa leh unau pawh a nei lo va. Chin tâwk nei lova thawk reng mai, Hausak tâwk tih rêng nei lo a ni a. “Tu tâna thawkrim nge ka niha, a tui thâ thâ ka ei ngam loh le?” tih nachâng pawh a hre lo. Hei pawh hi vanduaithlak, thil ho mai mai a ni.

THIAN THA HLUTNA

⁹Pakhat aiin pahnih an tha zâwk. An thawh rah a hlâwk duh zâwk bawh.

¹⁰Pakhat a tlûkin pakhatin a kaitho thei si a. Mahni chauhva awm chu mi vanduai a ni, A tlûkin kaithotu tûr a nei dawn si lo va.

¹¹Pahnih chu mutnaah pawh an inngêng lum thei a; Mahni chauhin engtin nge a intihlum theih ang?

¹²Pakhat tâna hneh loh chu pahnih tân hneh theih a ni. Hruithum hrualkawp chu a chat mai mai lo.

HMINGTHANNA A CHUAI THEI

¹³Thurawn ngaithla duh lo lal putar â aiin, Tleirawl rethei leh fing an tha zâwk.

¹⁴A lalramah rethei taka lo piang ni mahse; Lal tûrin tân in aţangin a lo chhuak si a.

¹⁵Ni hnuaia kal mi nung zawng zawng ka lo hmu a, Lal aiawh tûr tleirawl lamah an lo ţang vek a.

¹⁶Lala siamtu mipuite chu chhiar sên rual loh an ni a; Mahse, a hnua lo awmte chuan an châwimâwi zui chuang lo. Hei pawh hi ho mai mai, thli hup beh tum ang mai a ni.

BUNG 5

PATHIAN TH LA, I THUTIAM HLEN RAWH

¹Pathian ina i kalin fimkhur la; mi â-ten thil tha lo an ti tih pawh hre lova inthâwi thîn ai chuan, thu ngaithla tûrin va hnaih zâwk ang che.

²Tawng chhuak thut thut suh la, Pathian hnêna thu sawi tûrin i thinlung chu hmanhmawh suh se. Pathian chu vânah a awm a, nang leiah i awm si a; Chuvângin i thu tuitam suh.

³Vei êm êm thilte hi mangphan a ni duh a, Mi a âw chu thu a tuitam dân aţanga hriat a ni.

⁴Pathian hnêna i thutiam hlen tûrin tikhawtlai suh; Mi â-te chungah lâwmna a nei hauh lo a nia. I lo tiam tawh chu hlen rawh

⁵Tiam zeta hlen si loh ai chuan, tiam loh law law a tha zâwk.

⁶I kam chhuakin soal tihtîr chein, Pathian tirhko hmaah tihsual palh a ni tiin sawi suh. Engah nge i chhuanlam thilin Pathian a tithinur ang a, i kut chhuak thilte a tihboral phah ang le?

⁷Mumang a tama, thu a tam duah hian engmah a sâwt chuang lo. Pathian th zawk rawh.

HLAWKNA LEH CHÂWIMÂWINA HOHZIA

⁸Ram bial then chhûnga mi retheite rah beh an nihzia te, tihluhnaa an dikna leh rorêlna palzûtsak an nihzia i hmuh pawhin mak ti duh lêm suh; thuneitu sâng chu thuneitu sâng dangten an enthla reng a, an chungah thuneitu sâng lehzuall an la awm zêl bawh si.

⁹Chubâkah, leilung hlâwkna hi mi tin tân a ni a; lal meuh pawh thlawhhma aţanga châwm ve tho a ni.

¹⁰Tangka sum ngainatu chuan tangka sumah duh tâwk a hmu lo vang; Hausak ûmtuin chin tâwk a nei hek lo vang. Hei pawh hi holam tak a ni.

¹¹Sum leh pai a lo pun hian, A eiraltu an pung ve mai a ni; A neituin hlâwkna a chan chu A mita a hmuh zawng chu a ni mai lovm ni?

¹²Hnathawk rim chu, a ei tam pawhin, a ei tlem pawhin, Tui takin a mu thîn. Sum ngahte erawh chuan an mut theih loh phah thîn.

¹³Ni hnuaia thil tha lo tak ka hmuh chu: Mahni chhiat pahna tûr leka sum khâwlkhâwm hi a ni.

¹⁴Chûng sumte chu vânduaina avângin a rîral a; Fate tâna hnutchhiah tûr takngial pawh a nei ta lo hi a ni.

¹⁵A nu chhûl aţanga saruaka a lo piang angin, Saruak vêkin a kîr leh dâwn si a. A thawhrim rah chhawm tûr pawh a nei lovang.

¹⁶Hei pawh hi thil pawh tak a ni, A lo kal ang chiaha mual a liam leh tûr hi. Thli mai ûma a thawhrim hian hlâwkna eng nge a neih?

¹⁷A dam chhûngin thim hnuaiah a ei a, Lungngaiin, dam lovin, thînur ţeuhin a awm lehngal a.

¹⁸Ka thil hmuh tâk chu hei hi a ni: Miin ni hnuaia a thawhrim rah Pathianin a pêk chu ei leh ina, nuam ti taka a hman chu a thain a âwm hliah hliah a ni; a chanvo a ni si a.

¹⁹Pathianin hausakna sum leh pai a pêk apiangten ei leh in thei a, an chanvo pêk ang pawh chang thei a, an thawhrim rah chên theia an awm hian: hei ngei hi Pathian thilpêk a ni.

²⁰Pathianin a thinlungah lâwmna nên a tikhah tlat avângin damchhûng ni lungkham hman lo khawpin a awm phah thîn a ni.

BUNG 6

¹Ni hnuaia thil tha lo tak ka hmuh thîn, miten an tawn fo chu:

²Mi thenkhat chu Pathianin sum leh pai te, zahawmna te a pê a, an duhzâwng apiang tlachham lovin an awm a; mahse Pathianin chûng thil ei theihna te chu pe si lovin, mi dangin an chên hlauh thîn a. Hetiang hi a hovin, a manganthlak a ni.

³Miin fa za lai neiin, kum tam tak damin, a dam chhûng pawhin kum tam tak daih mahse, a duh zâwng thil tha kham khawp nei lovin, phûmtu mumal pawh nei lo se, chutiang mi ai chuan hlamzuiha thil pawh a thlanawm zawk, ka ti a ni.

⁴A lo chhuah dân pawh engmah lo, thim zînga kîr leh, a hming pawh thimin a khuh bo mai a ni si a.

⁵Ni êng pawh hmu lovin, engmah hre ve lo mahse, kha mi ai kha chuan a châwl hahdam zâwk.

⁶Kum sâng pawh, a lêt hnih pawh dam se thil tha chên thei si lo ai chuan a chan a tha zawk a ni. Hmun khata liam zâ vek tûr an ni lâwm ni?

⁷Mihring thawhrimna zawng zawng hi an hrawk châwmna a ni a, Mahse kham khawp a hmu zo chuang lo.

⁸Mi fîng hian mi â aia hlâwkna eng nge a neih bîk? Mi rethei, mite hmaa nun dân thiamin eng nge a neih?

⁹Duhthû sâmb kwal reng ai chuan neih sâ hi a tha zâwk. Hei pawh hi holam thil, thli hup beh tum ang mai a ni.

¹⁰Thil awm tawh rêng rêng chuan hming an nei vek a, Mihring pawh hi a nihnaa hriat a ni si a; Ani aia chak zâwka chu a tân ngam rual a ni lo.

¹¹Holam tak tak tipung thei an tam êm a, Mihring pawh hi eng ruai a ni bîk em le?

¹²Mihring dam chhûng nun ho-lam tak, hlim anga ral leh mai tûr a hman chhûnga thil tha ber tûr tu nge hria? Ni hnuaiah hian eng thil nge lo la thleng dâwn tih tu nge sawi thei?

BUNG 7

FINNA HMAN THIAM HLUTZIA

¹Hming tha hi a tha zâwk e, hriak manto aiin, Thihni a tha zâwk, pianni aiin;

²Lusûn ina kal a tha zâwk, Ruaithehna in aiin, Chu chu mi zawng zawng tâwpna a ni a, La damten an la-runthlak zâwk ang.

³Lungngaih a tha zâwk, nuh aiin, Ngui hmêl hian thinlung a siam tha thîn.

⁴Mi fîng thinlung chu lusûn inah a chêng reng a, Mi â-te thinlung chu hlimhlawp inah a châm tlat thung.

⁵Mi fîng zilhna dawngtu nih a tha zâwk Mi â-te hla sak ngaihthlak aiin.

⁶Bêl hnuaia hling kâng puak ang hi, Mi â-te nui rî chu a ni. Hei pawh hi ho mai mai a ni.

⁷Hnuaichhiahna hian mi fîng rilru a ti â thîn a, Thamna lâkin rilru a tihnam thîn.

⁸A tâwpna a tha zawk, a bulţanna aiin; Dawtheihna a tha zawk, chapona rilru aiin.

⁹I rilruin thinur hmanhmawh suh se, Mi â-te rilru chuan thinrimna a pai reng thîn.

¹⁰“Engati nge tunlai aia hmanlai hun kha a that zawk?” ti suh. Zawnna fîng lo tak zâwt i ni ang asin.

¹¹Finna hi inrochun atân a tha, Nungdama awmte tân a hlâwk si.

¹²Pawisa hi invenna a ni angin finna pawh invênna a ni, Hriatna thatzia chu, finna neitute hnêna nunna petu a ni.

¹³Pathian hnathawh hi han ngaihtuah teh; A tih-kawih tawh tu nge ti-ngîl leh thei?

¹⁴I hausak laiin hlim la, I pachhiat hunah ngaihtuah rawh: A pahnih hian Pathian ruat vê vê a ni e, Mihringin nakina thil lo awm tûrte a hre dâwn si lo va.

¹⁵Hê dam chhûng ho-lam taka ka thil hmuh chu: Mi tha, dik taka nunga boral ta mai si te, Mi suaksual, sual taka nunga dam rei viau si te hi.

¹⁶Intifel lutuk suh la, Intifing lutuk bawh hek suh: Engah nge mi nuihzat lekah i insiam ang le?

¹⁷Sual lutukin awm suh, Mâwl lutuk bawh hek suh: Engah nge a hun hmaa i thih ang?

¹⁸Hei hi vuan tlat la, a tha ang, I chelh tawh chu thlah hauh suh; Pathian tihthu chu hêng thilah hian a fihlîm vek ang.

¹⁹Khawpuia rorêltu sâwm aiin Finna hian mi fîngte a tichak zâwk.

²⁰Leiah hian mi dik, thil tha chauh tia, Sual ti hauh lo chu tumah an awm lo.

²¹Mi thu sawi nazawng chu ngaimawh duh suh, I chhiahhlawhin ânhhia a lawh che i hre palh ang e.

²²Nang pawhin mi dangte ânhhia i lawh thîn tih I thinlungin wavi tam tak a hre chhuak thîn a ni.

²³Hêng zawng zawng hi finnain ka lo chian tawh a. “Ka fîng deuh tawh ang” ka ti a; Mahse a hnai lo hle mai.

²⁴A hla êm a, a thûk si a, Tu nge hmu chhuak thei ang le?

²⁵Finna leh thil bul awm chhan dap chhuaka, Hre thiam tûrin ka rilru ka han hmang a, Suahsualna hi mâwlina a nihzia te, Mâwlina lo âthlâkzia thlengin ka zir a.

²⁶Thihna aia kha tûr ngut zawk ka hmuh tâk chu Hmeichhia leh thang leh lên ang lek thinlung pu te, Kawl mi buntîr thei khawp kut nei te hi an ni. Pathian tilâwmtu chuan a inthiarfihlîmsan ang a, Misual erawh chu a âwk ngei ang.

²⁷Thuhriltu chuan, “Ka thil hmuh chhuah chu hei hi a ni,” a ti, “A chhan ka man chhuak belh zêl a,

²⁸Ka rilrûin a la dap reng, ka la hmuh chhuah theih loh chu: Mîpa sang khat zîngah (mi dik) pakhat ka hmu a, Hmeichhe

zîngah (mi dik) pakhat mah ka hmu ve lo hi a ni.

²⁹Hei chiah hi ka hmuh chhuah chu a ni: Pathianin mihring hi tluangtlam taka nung tûrin a siam a, Mahse anmahni zâwkin an tikhirhkhân zo vek a ni,” a ti a.

BUNG 8

¹Mi fîng ang hi tu nge awm? Thil hrilhfiah thiam tu nge awm le? Mihring finna chuan a hmêl a kâp êng sar a, A hmêl dur pawh a inthlak danglam daih a ni.

PATHIAN VÂNGA HOTUTE THU ÂWIIH

²“Pathian hnêna i thutiam avângin lal thupêkte chu zâwm rawh,” ka ti a che.

³Hmanhmawh takin a hma ata chhuak bo suh. Thil tha lo chu tan tlat suh, a duh dân dân thil ti thei a ni si a.”

⁴Lal thu-ah chuan thuneihna a awm a; “Eng thil nge i tih?” ti thei tu nge awm?

⁵A thupêk zâwmtu tân thil pawh a thleng lo vang; Mifing thinlung chuan a hun azira rorêl dân a thliar thiam a,

⁶Thil tinrêng hian hun bîk leh a zei an nei vek si a, Mahse mihring tâna buaina erawh chu a pung zêl a ni.

⁷Eng thil nge lo thleng dân tih a hriat loh avângin, A lo thlen hun tûr tu nge hrilh thei ang?

⁸Thlarau chelh khawtlai tûra thlarau chung thunei tumah an awm lo, Thih niin tûma’n thu an nei thei hek lo. Indo laiin chawlh lâk theih a ni lova, Suahsualna pawhin a kuta mite a chhuah lo vang.

⁹Hêng zawnz zawnz hi ka hmu a, ni hnuaia thiltih tinrêng ka ngaihtuah a: Miin ama tâna tha lo tûrin midang chungah thuneihna hun a lo nei rêng a ni.

THIHNA, MI TIN CHUNGA THLENG

¹⁰Mi suaksualte an phûm lai ka hmu a, hmun thianghlina lo lûta chhuak leh thîn an ni a, chutiang an tihna khawpuiah ngei pawh theihngihl an ni ve tho. Hei pawh hi ho mai mai a ni.

¹¹Thil sual tituten hrem an tawh mai thîn loh avângin, mihring fate thinlung hi sual tih duhnain a khat thîn.

¹²Misual chuan wawi zâ pawh thil sual tiin, dam rei hle mahse, Pathian tîha amah zahtute chu an la tluang fo zâwk ang tih ka hre Chiang a ni.

¹³Mi suaksualte chu an tluang lo vang a; an dam chhûng nî-te chu an pawt sei thei hek lo vang, Pathian an tîh loh avângin himthlâ ang lek an ni ang.

¹⁴Lei chung thil ho deuh mai chu, mi suaksualte chung thleng âwm tak mi dikte chung thleng si te; mi dikte chung thleng âwm tak mi suaksualte chung thleng tlat si te hi a ni. Hei pawh hi ho ka ti ngei mai.

¹⁵Chuvângin, ei leh ina intihhlîm a lo liama thil tha hi, ni hnuaiah hian awm chuangin ka hre ta lo ve; hei hi ni hnuaia a dam chhûnga Pathianin a pêk ang zêlin, a thawh rimna kâra tel ve reng tûr a ni e.

¹⁶Finna hrethiam tûr leh, lei chung mite hnathawh dân zira, chhûn leh dân pawh mu lova ka rilru ka han hman tâkah chuan,

¹⁷Pathian hnathawh zawnz zawnz hi, ni hnuaia mihringte tân hmuh chhuah zawh rual a ni lo tih ka hre ta. Theihtawpin miten zawnz mahsela an hmu chuang lo vang; mi fîng pawhin hriat tum sateh mahse, a hre chhuak chuang lo vang.

BUNG 9

¹Mi dik te, mifingte leh an hnathawh te hi Pathian kuta awm an ni, tih hi puang chhuak thei tûrin, ka rilrûin ka chhût ka chhût thîn a. Mihringte hian hmangaihna nge huatna an la tawh dân tih engmah an hre lâwk lo.

²Mi tin chung thil thleng hi thil thuhmun vek a ni: Chû thil thuhmun chu mi dik leh mi suaksual chungah te; Mi tha leh thianghlîm te leh mi bawhlhlawh chungah te; Inthâwina hân thîn leh hân ve duh lo chungah te a thleng vek a. Mi tha chungah te, misual chungah te; Chhechhama thutiamtu leh chhechham duh lo mi chungah nê.

³Ni hnuaia thil tinrêng zînga tha lo tak mai chu: mi tin chung thil thuhmun thleng thîn hi a ni. Mihring fate thinlung hi suala khat a ni a; an dam chhûng zawnz an thinlungah âtna a bet tlat a, chumi hnua mitthite awmnaah an kal thîn a ni.

⁴Mahse, minungte zînga la telte tân chuan beiseina a awm asin; sakeibaknei thi ai chuan ui dam lai pawh a tha zawk.

⁵Nung dama awmtan an la thi dân tih an hria a; Thi tawhte chuan engmah an hre tawh si lo, Lâwman pawh an nei tawh lo va, Hriatreng pawh an hlawh tawh hek lo.

⁶An hmangaihna te, an huatna te, an îsîkna te chenin a boral tawh a; Ni hnuaia thiltih rêng rêngah hian Chanvo pawh an nei pha tawh lo.

⁷Kal la, tui takin chaw va ei la, Rilru hlim takin i uain chu in rawh; Pathianin i hnathawh a pawmsak tawh si che a.

⁸I silhfênte chu vâ sar sela, I lû-in hriak tlachham suh se.

⁹Hê ni hnuaia nun holam tak a pêk che-ah hian, i nupui i hmangaih tak nê dam chhûngin hlim takin hmang rawh; chû chu hê nun holam taka i awm chhûnga i chanvo, ni hnuaia i thawhrim rah chu a ni e.

¹⁰I kutin khawih tûr a hmuh ang zêlin, theihtawpin ti ang che; i kalna tûr thlânah chuan thawh tûr te, thil ruahman te, hriatna te, rinna te a awm dân si lo va.

¹¹Ka thlîr vêla, ni hnuaia ka hmuh chu Intlânsiak hi tlân chak tân a ni chuang lova, Indona hi mi chak tâ bîk a ni hek lo, Mi fingin ei tûr an ngah bîk lo va, Mi thiam an hausa chuang hek lo, Themthiamten duhsak an hlawh kher lova; Hun leh khawrêl lo thlen dan azir a ni mai.

¹²Mihringin ama hun inher dân pawh a hre lo; Lên hlauhawma sangha an man ang leh, Thanga âwk sava ang maiin, Mihring fate pawh hun tha lo vah, Thangin arawn âwk phut thîn a ni.

MÂWL ÂT AIA FINNA CHUNGNUNZIA

¹³Heti ang finna hi ni hnuaiah chuan ka hmu a, ropui hlein ka hria:

¹⁴Khaw te taktêah hian mi chêng tlênte an awm a; lal ropui tak hian arawn rûn a, a hual bet a, a vêlin thang dai a theu hnan a.

¹⁵Chutah chuan mi rethei fing tak a awm a, a finnain khua chu a chhan chhuak a. Mahse chu mi rethei chu tûma'n an hre zui chuang lo.

¹⁶Tihian ka ti ta a: “Finna hi chakna aiin a tha zawk. Mahse mi rethei finna chu hmuhsit a ni a, A thû pawh an bengkhawn duh lo.

¹⁷Mi fîngte thû chu zawitêa sawi pawh ni se, Rorêltu âte au vak vak ai chuan, ngaihlthlak zâwk tûr a ni.

¹⁸Indona râltuam aiin finna a tha zâwk a; Mi sual pakhat pawhin thil a va tichhe nasa thei tak êm.”

BUNG 10

¹Tho thiin hriak rimtuina a tichhia a, Rimchhia a chhuah phah thîn; Âtna hotê pawhin finna te, ropuina te, zahawmna te a chhilih thei.

²Mi fîng thinlung chu a kut dîng lamah a awm a, Mi a thinlung chu a vei lamah a awm thung.

³Mi â chu kawnga a kal lai pawhin, Finna a tlachham a, Mi tin hmuhah a âtzia a târlang thîn.

⁴Rorêltu thlarauvin a do che chuan, I awmhmun kalsan lo la; Zâwldawhna hian lungnih lohna a tidai thei.

⁵Ni hnuaiah thil tha lo ka hmu a, Rorêltu tih dik loh anga thil lo awm hi a ni:

⁶Mâwlina an châwisâng êm êm a, Mi hausa chu hniam takah an thuttîr si a.

⁷Chhiahhlawh sakawr chung chuangte ka hmu a, Miliante lah chhiahhlawh angin kêin an kal si.

⁸Khur laitu chu a khur laiha a tla ang, Pal thiattu chu rûlin a chû ang.

⁹Lung chhertu chu lungin a chilh thîn a, Thing ektu tân inhliam a hlauhawm.

¹⁰Hreifang a bil hnua Tah hriam a nih loh chuan, Thahrui a la tam lehzual thîn a; Finna erawh chuan hlawhtlinna a thlen thîn.

¹¹Dâwi ât loh rûl chuan mi a chuk thei a; Dâwi ât thiama pawh a thliar chuang lo.

¹²Mi fîng kam chhuak chu a ngainatawm a, Mi a hmûi chuan amah a lempil ang.

¹³A tawngkam chu âtnain a inñan a, A thu tâwp lam chu ât bâwrâwna a ni.

¹⁴Mi â chuan thu a tuitam duah thîn. Thil lo awm tûr tûma'n an hre lo; Nakina thil lo awm tûr tu nge sawi thei?

¹⁵Mi â-te chuan chau hnêp khawpin an thawk a, Khawpuia hawn kawng pawh an hre lo!

¹⁶Naupang chhia lala nei ramte u, in chan a chau teh e, In lalhoten zîng zîngah ruai an theh si a!

¹⁷Mi zahawm fapa lala neih ram te u, in nihlawh e, In lalten a hun takah, ruih nân ni lo, chak nân ruai an theh si a!

¹⁸Thatchhiatna avângin in a tlabal a, Kut dawngdahna avângin in a far thîn.

¹⁹Ruaiin mi a tinui dur dur thîn a, Uain pawhin hlimna a siam; Mahse, engkim sithlutu chu sum a ni.

²⁰Lal chu ânchhia lawh suh, i rilru pawhin; Mi hausate ânchhia lawh suh, in khum laizâwlah pawh; Chunglêng savate pawhin i âw an pu darh ang a, Thlâwktheiten an puangzâr palh ang e.

BUNG 11

TAIHMAL HLUZIA

¹Tui chungah i chhang paih rawh, Ni tam tak hnûah i hmu leh dâwn asin.

²Mi pasarih pariat hnênah an chan tûr sem rawh, Lei chungah eng chhiatna nge lo thleng dawn i hre si lo.

³Chhûm tui pai te chuan, Lei chungah an inbunruak thîn; Thing chu chhim leh hmar hawia a tlûk chuan, A tlûkna hmunah chuan a awm reng tûr a ni.

⁴Thli awmdan thlîrtu chuan a tuh lo vang a, Chhûm awmdan nghâktu pawhin a seng hek lo vang.

⁵Thli kal dân leh kawng i hre si lo va, Hmeichhe chhûla nau ruh than dân i hre baw lo va, Chuvângin, engkim siamtu Pathian hnathawh dân i hre lo a ni.

⁶Zîngah i thlai chîng la, Tlaiah pawh i kut chawltîr suh; A thang duang tûr zâwk i hre si lo, A khawi zâwk hi nge, i ti a. An duah tha vê vê thei baw asin.

⁷Êng hi a duhawm takzet a, Ni êng hi hmuh pawh a nuam a ni.

⁸Miin kum rei tak a dam a, Chûngte chu nuam a tih pawhin, Thimna hun a la sei dâwn tih hre reng rawh se. Thil lo la awm tûr chenin holam thil vek a ni.

TLEIRAWL LAIA PATHIAN ZAWN

⁹Thalaite u, in thatlai hun hi lâwm ula, In vânglai hian in thinlung chu lâwm rawh se; In thinlung lâwm zâwn chu zawng ula, In hmuh duh zâwn lam chu en rawh u; Amaherawchu, hêng thil zawng zawng chungah hian Pathianin ro a la rêl dawn tih hria ang che u.

¹⁰Chuvângin, lungngaihna thinlung dah kiang ula, In taksaa sual chu dah bo vek rawh u, Naupan lai leh vânglai hun te hi a ho êm mai.

BUNG 12

¹I vânglai hian i Siamtu hre reng rawh, Hun harsa a lo thlen hmâ leh, “Engmah thlâkhlelh ka nei tawh lo” I tih kumte a lo hnaih hmâ ngei hian.

²Nî te, êng te, thla te leh arsîte An lo thim hmaa, Ruah sùr zawha chhûm a lo kîr hmâ ngei hian;

³In leh lo vêngtute an lo khurha, Mi chakte pawh an kun ngawih ngawiha, Buh râwtsawmtute an tlêm avânga an tâwp hiala, Tukverha dâk chhuakte hmêl pawh a dur khup a;

⁴Kawthlêra kawngkate a inkhâr thupa, Râwtsawmna thâwm ri a zuai raih a; Sava hrâm rî-ah pawh mi an tho zawk zawk a, Rimawi tum mite an zuai rawih hmâ hian.

⁵Hmun sâng hlek chu an hlau tawh a, Kawng laka hlauhawmte nê; Theite a lo pâr hunah, Khâu pawh phurrit a niha, Châkna te a zuai a. Mihring chu a chatuan in lam a pan a, Sûntuten kawthlêr an fan hmâ ngei hian.

⁶I Siamtu chu hre reng rawh, silvar zai an phel a, Rangkachak no chu a keha, Tuikhurah hlumbêl a keha, Tawlailîr chu tuikhura a chhiat hmâ hian.

⁷Tichuan, vaivut chu a hmâ angin leiah a chang leh ang a, Thlarau pawh a petu Pathian hnênah a kîr leh ang.

⁸Thuhriltu chuan, “Thil ho mai mai, “Engkim hi ho-lam mai a lo ni,” a ti a.

⁹Thuhriltu chu a fîng a, mite hnênah hriatna thû a zirtîr zêl a; thufîng tam tak a ngaihtuah a, a dap chhuak a, a rem fel a.

MIHRINGTE TIH TÛR

¹⁰Thuhriltu chuan thu pawm tlâkte a zawng chhuak a; a ziak chhuahte chu a dik a, chû ngei chu thutak thû chu a ni.

¹¹Mi fîngte thû chu tiang hmawr zum ang a ni a, mithiamte thû chu Berâmpuin a pêk, themthiamin perek an khenluh ang hi a ni

¹²Ka fapa, hêng thûte hian zilh che rawh se. Lehkhabu tam tak siam hian tawpintai a nei dâwn lo va; nasa taka zirna hi taksa tân a rim thlâk a ni.

¹³A thu pumpui khaihâwmna i lo ngaithla teh ang: Pathian òih la, a thupêkte zâwm rawh, Hei zawng hi mihring tih tûr chu a ni mai.

¹⁴Pathianin kan thiltih tinrêng chungah ro a la rêl dâwn, A chhia a òhain, a rûka kan thiltihte nê lam hian.

SOLOMONA HLA TE

Ziah tu: Solomon • Ziah kum: B.C. 960 vèl

Mizo Bible lehlín hmasain ‘Hla Thlan Khâwmte’ a ti a, lehlín thar zâwkin ‘Hla Chhuanvâwr’ a ti bawk a. A Hebrai hmingah ‘Hlate Hla’ (shîr ha-shîrîm) tih a ni a. Chutianga sawi dân hrang hrang kârah King James Bible kalpui dânin Solomona Hlate tia sawi a remchangin a bu awmzia a tifiâh thei nghâlin a lang a, bung 1:1 hian ‘Hlate Hla, Solomona phuah chu’ tiin bul a tan rêng a. A phuahtu hi Israel lal ropui, kum 40 chhûng rorêltu lal Solomona (B.C. 971-931) a ni. A hre thiamloten engah nge hetiang nula tlangvâl inkâra inngaihzhâwnna thû leh hla mai mai Bible-a an lo telh le? tiin an ngai thîn a. Mahse hê lehkhahua Solomona leh Sulam nula inkâra inhmangaihna--thû leh hlaa an han inlêm tawna, nula hmêlthatzia leh duhawmzia te hi a huatthlala lo va; dik takin nulat tlangval inngaihzhâwnna piah lamah, atîra Pathianin inneihna a siam chhan, nupa kâra inhîp tawna nun hi Pathian remruat dan a ni a, hlim taka inhman tawn theih hi a zalên a, a thianghlim tih min zirtîr a ni. Solomona hlate hian hmangaihna thianghlim tak chu lili pârlêh saron pârlêh anga mawî, uain anga thlum nêl a tehkhin a. Heti taka Solomonan thingtlang nula tû tih hriat loh lungchim taka a va chhai lai kha a za têla nupui a neih hmâ, a tlangvâl that lai hun niin a rin theih. Chû hmangaihna chu Kristan Kohhranho a hmangaihna lo thlirlâwkna atân Solomona hian a lo chham chhuak a ni. Solomona Hla hi Bible-a lehkhahu 22-na a ni a, bung 8 a awm a, châng 117 a awm bawk.

BUNG 1

RUAI THEHNA

¹Hlate hla, Solomona phuah chu.

²SULAM NULA Min han fâwp se âw, a hmuia fawhna ngei chuan, I hmangaihna a thlum zâwk, uain aiin.

³I hriak tha, rimtui si avângin, I hming pawh bun chhuah anga rimtui; An hmangaih che, Tawn loh lânuten.

⁴I lamah min hîp rawh! JERUSALEM FANUTE A ûmin kan ûm na’ng che. SULAM NULA A pindan chhûngah lalpa chuan min hruai lût ta! JERUSALEM FANUTE I tâwnah kan hlimin kan lâwm ang; Uain aiin i hmangaihna kan hre reng zâwk ang. SULAM NULA An ngaina che hi a âwm rêng e.

⁵Ka hâng nâ a, ka nalh asin, Aw Jerusalem fanute u, Kedar puan inte leh, Solomona puanzârte ang mai ka ni.

⁶Ka han avâng hian min hnualsuat suh u; Ni em uk mai ka ni alâwm. Ka nu fapate ka chungah an thinur a; Grêp huan vêngah min siam a, Keima pual huan erawh ka vêng si lo.

⁷(A HMANGAIHA HNÊNAH) Min hrih la âw, ka hmangaih chuan, I ran rual chaw pêkna hmun leh I chhûn chawltîrna hmun chu. Eng vânga mahni inthupa I thiantan ranrual kianga tla tûr nge ka nih?

⁸A TLANGVÂL PA I hre lo a nih chuan âw nang, Hmeichhia zawng laia duhawm ber, Ran rual hniakhnû chu zui la, I kêltête chu tlattîr ta che, Berâmpuete puan in kiangah chuan.

⁹Ka khaiikhin che, ka hmangaih, Pharaoh tawlaifîr hnûktu sakawr lâ nêl.

¹⁰A inchawih e, i biang leh i incheina, I rangkachak thi awrh nêl lam khân.

¹¹JERURALEM FANUTE Rangkachak tlereuh incheina kan chhersak na’ng che, Tangkaruaa thlâwp mawî chu.

¹²SULAM NULA Dawhkân kila lalpa awm laiin A lam hawiin ka spiknard rim a chhuak e.

¹³Zankhuua ka tâng bêl thîntu murra tumtêl ang a ni, ka hmangaiha chu.

¹⁴Ka hmangaiha chu henna pârlêh buk En Gedi grep huana mi ang chu a ni.

¹⁵A TLANGVÂL PA Ngai teh, duh lai, i nalh mang e! Ngai mah teh, i duhawm thlâwt mai! Thîro mit i pu si a.

¹⁶SULAM NULA Ngai teh, ka duhlai, i va hmêltha êm! Ni chiah, i duhawm a ni! Kan zâlâna laikhum a hring nghial e.

¹⁷Kan khanchhukte chu sidar thing, Kan inchhunte lah fâr thing.

BUNG 2

¹Ka lo ni e, Sharon rose pârlêh Phaizâwl lili.

²A TLANGVÂL PA Hlîng zînga lili ang hi a lo ni e, Ka hmangaih chu, lânute zîngah.

³SULAM NULA Ngaw hnuaî thing zînga apple kûng ang A ni ka duh taka chu, tlangvâlte zîngah. A daihlim hnuaiah chuan hlim takin ka chawî a, A rah pawh a thlum e, ka tân hian.

⁴SULAM NULA-IN JERUSALEM NULATE HNÊNAH Ruai thehna inah kei mi hruai a, A mi hliakhkhuhna puanzâr pawh hmangaihna.

⁵Grep rah rêp chhangin mi chawm a, Mi tiharh teh u, apple theiin, Hmangaihnaah ka uai zawh tâk hi.

⁶A kut vei lam chu lukhamin, A kut dîng lamin mi kuah se.

⁷Ka ngên tak meuh che u, Aw, Jerusalem fanute u, Saza leh ramzukupui chhâlin, Hmangaihna chu chawh thova tiharh lo tûrin; Amahin a duh hmâ loh chuan.

DUHLAI NGENNA

⁸SULAM NULA Ka duh tak âw chu, chû le! Ngai rawh, tlangvâla chu lo kalin Tlângah te chuan zuang tûmin, Mualah te chuan a zuang lîm e.

⁹Ka duh tak chuan a ang, saza nge ni, zuktuai zâwk. Ngai rawh, a dîng e kan bang phênah; Tukverhah te rawn dâk lûtin Zâwngdaikalh kârah a rawn thlîr vawng vawng a.

¹⁰Ka duh tak chuan heti hian mi han ti a: “Tho la, ka hmangaih, ka enchimloh, Lo kal ta chê maw.

¹¹Thlasik a kiang ta, Ruah pawhin mual a liam fel tawh hi.

¹²Leiah pangpârte an lo lang a, Zâi vâwr hun a lo thleng a; Mîmsîrikût zâi ri pawh kan ramah Hriat a ni ta.

¹³Theipui kûngin rah a chhuah a, Grep hruite chu lo pâr vulin An rimtui chhuak a lêng vêl e. Tho la, ka hmangaih, ka enchimloh, Lo kal ta chê mâw!

¹⁴“Âw ka thûvâ, lungpui keh kâra mi, Khâm chhawrdawha mi chuan, I hmêl min hmuhtîr la, I awrâwl min hriattîr ta che; I âw a mâwiin, i hmêl a duhawm si.”

¹⁵A NUṬÂTE Sihalte chu min mansak ula, Grêp huan tichhetu sihal notête chu, Kan grêp huante a pâr vul mêk si a.

¹⁶SULAM NULA Ka duh tak chu ka tâ a ni, kei pawh a tâ ka ni e. Lili hmunah a berâm rual a tlattîr e.

¹⁷(A DUH TAKA HNÊNAH) Khua a lo vâra Hlim a her bo leh hmâ loh zawng, Ka duh lai, Sazuk tê chi pian nalh tak emaw Bether tlânga zuktuai-ah emaw chang rawh.

BUNG 3

MANGAN ZÂN

¹SULAM NULA Ka zân mutna laikhumah ka dâwn thîn, ka duh tak chu; Ka zawng ruai ruai, ka tawng si lo.

²“Ka tho tawh teh ang, Tichuan, khawpui ka vêl ang a; Kawthlêr leh mual laiah te chuan Ka hmangaih chu ka zawng zêl ta’ng e,” ka ti a. Ka zawng ruai a, ka tawng si lo ve.

³Khawpui huala vêngtuten mi hmû a, “Ka hmangaih chu in lo hmû emaw?” ka han ti a.

⁴Anmahni’n mi pelh hnû lawk chuan, Ka tawng ta e, ka hmangaih chu. Thlah leh phal lovin ka chelh ta a, Ka nu inah, mi pâitu pindan chhûngah, Amah ka hruai luh hmâ loh chuan.

⁵Ka ngên tak meuh che u, âw Jerusalem fanute u, Saza leh ramzukpui chhâlin, Hmangaihna chu chawh thovin tiharh suh u Amahina a duh hmâ loh chuan.

SOLOMONA LO KAL THÛ

⁶SULAM NULATE Tu nge meikhu ding ang maia Thlalêr atâ lo chhuaka, Murra leh beraw rimtui inchulha, Sumdâwngtu paudar rim chena nam rum rum hi?

⁷Hei, Solomona zâwnna tawlai chu, Râlhrât sawmrukin an din hual e, Israel râlhrât zînga mi an ni.

⁸Khandaih an pâipawn vek a, Indo thiam mi an ni. Mi tinin an khêlah khandaih an pai, Zân thim râl hlahv vângin.

⁹Lebanon ngaw thing aţangin Ama tân a insiam e zâwnbâwm, Lal Solomona chuan:

¹⁰Tangkaruain a bânate a siam a, A ngenchhanah rangkachak, A thutphahah puansenduk, A chhûng chu duhawmnain an rem Jerusalem fanute chuan.

¹¹Kal chhuak ula, âw Zion fanute u, Lallukhum khum Lal Solomona chu va en teh u; A nu’n a khumtîr kha-lallukhum, A nupui neih nî a, a thinslung lâwmna nîah chuan.

BUNG 4

MONEITUIN MO A FAK

¹A TLANGVÂL PA Khai aw, i nalh mang e, ka duh lai! Ngai teh, i nalh a ni! Thûro mit an iang e, hmaikhuhna phêna i mitte chuan. I bahsamin Gilead Tlâng ata lo chhuk Kêl rual a iang e.

²I hâte chu berâmpui rual hmul meh hlim, Bual zawh hlim ang chu a ni a, An zâ-in phîr an pây theuh va, An zîngah a nu ching rêng an awm lo.

³I hmuiten an iang e, sâpsen zai, I kê lah a duhawm bawk nê. I hmaikhuh phêna i biangten An iang e, theibuhfai phel.

⁴I nghâwngin a iang e, Davida kulhbîng sâng, Râlthuam dah nâna siam chu, An bâng e tah chuan, phaw sâng khat, Râlhrâtho phâw vek a ni.

⁵I hnute pahnih hian an iang e, zuk no pahnih, saza phîr, Lili pâr zînga tlâte chu.

⁶Khua a vâwr hmâa Hlim a bîk bo hmâ loh chuan, Ka kal na’ng e, murra tlâng leh Beraw mual lamah chuan.

⁷I tha chungchuan e, ka hmangaih, A hâng rêngin a kâp lo che.

⁸Lebanon atâ ka rualin lo kal ta che, ka thiannu, Ka rualin Lebanon aţang chuan. Amana chhip aţanga thlîrin, Senir leh Hermon chhip aţang te, Sakeibakneite pûk aţang te, Keitête tlâng aţangtea thlîrin.

⁹Ka thinslung i hneh zo ta, Ka laina, ka thiannu; I wavi khat mi melhnaah Ka thinslung i chî-âi zo ta, I thival khat nê chuan.

¹⁰A va duhawm êm, i hmangaihna, Ka laina, ka thiannu! Uain ai pawha thlum zâwk chu i hmangaihna, Hmuimer dang zawng ai pawha rimtui zâwk chu, i hriak rimtui!

¹¹I hmuite chu âw, ka thiannu, A far e, khuaipei zû angin; I ânka chu khawizu leh hnuteui; I silh leh fên rim nise Lebanon rimtui ang a ni.

¹²Huan humhalh a ni Ka laina, ka thiannu chu, Tuihna humhalh, Tuikhur humhalh chu.

¹³I thlai huan chu theibuhfai hmun Rah tha tak tak chhuah thîn, Henna rimtui leh spiknard nê,

¹⁴Spiknard leh saffron, Fû leh thakthîng tiamin, Beraw thing chi tinrêng nê, Murra leh aloe Rimtui nei zawng nê lam.

¹⁵Nang chu huana tuihnâ, Tuichhunchhuah nung, Lebanon ata lo luang luitê chu i ni.

¹⁶SULAM NULA Harh la, âw hmar thlî, Lo kal la, nang pawh chhim thlî! Ka huan hi han chhêm ula, A rimtui lêng chhuak rawh se. Ka duh tak chu a huanah lo lût se, A rah tui thâ thâ chu rawn tlân rawh se.

BUNG 5

¹A TLANGVÂL PA Ka huanah chuan ka lo lût e, ka laina, ka thiannu; Ka murra leh rimtui te chu ka lâwr khâwm a; Ka khawizu chu a thlâr chawpin ka ei a, Ka uain leh hnuteui chu ka in a. (A ṬHIANTE HNÊNAH) Ei rawh u, âw thiante u! Ni e, in theuh mai teh u, Âw ka duh takte u.

SULAM NULA MANGAN TLAI

²SULAM NULA Ka mu nâ a, ka thinlung erawh a harh; Chû âw chu ka duh tak âw a ni e! Rawn kik pahin, “Min hawn rawh, ka laina, ka hmangaih, Ka ðhuro, ka sawisêl bo; Daiin ka lu a tihuh zo ta e, Zân daiin a far e, ka sam chhâwllêng,” a ti a.

³Ka kawrfual ka phelh a; Engah nge ka hâk zui fo vang? Ka kê ka sil ta; Engah nge ka tihbawlhhlawh ang?

⁴Ka duh tak chuan a chelh Kawngkhâr hawlh kalhna chu, Ka thinlung hian amah chu a ngai a ni.

⁵Ka duh tak kawng hawn tûrin ka va tho va, Ka kutte chu murra-in a bual, Kawngkhâr dawmfung thlengin a bual.

⁶Ka duh tak chu kawng ka hawnsak ta, Mahse mâw, ka duh tak chu inherin lâm ang lêt e. A râwl pawh ka hre thei ta lo, Ka zawng ruai a, ka tawng si lo; Ka âu âw rêng mi chhâwn hek lo.

⁷Khawchhûng viltute chuan min rawn phâwk ta. Min chîl rawn a, min hliam a; Kulh vêngtute chuan ka hmaikhuh chu min phih hlîmsak a.

⁸Ka ngên che u, âw, Jerusalem fanute u, Ka hmangaih chu in lo hmuh chuan, Ka lunglên thû hi rawn hlân teh u!

⁹JERUSALEM FANUTE Atû teh fakau chu mâw Rual tin khûma i hmangaih chu, Âw, hmeichhia azawnga ðha chungchuang! Zâlêng rual dang zawng aia i âtchilh, I hmangaih chu tu maw a niha Min zawh teh chiam chu le?

¹⁰SULAM NULA Ka hmangaih chu tisenin a kâp ngo siah a, Mi sâng sâwm zîngah pawh a chungnung ber.

¹¹A lu ûm chu rangkachak ðha ber chî; Sam herh chît chiat, Choâk ianga dum zîn zên.

¹²A mitte chu ðhuvâ Lui kama fû ang chu a ni a, Meng paw riai, A duana duan lâwk sâ hlauh.

¹³A biangte lah hlo rimtui hmun, Hlo rimtuaia khat lui kam, A heh nise lili pâ, Murra hriaka bual.

¹⁴A kutte lah rangkachak tlâwn, Lunglhu eng mîa thuam. A sakruang sainghova ker Lunglhu dumpâwla hawlphûm.

¹⁵Chû pâ fû kê chu sailungvâr ban, Rangkachak fir chung a inngat, A zia rêngah Lebanon iangin, Sidar thing angin a ðha hluan e.

¹⁶A ânka a thlum chungchuang, Ni, a duhawm famkim asin. Chû chu alâwm ka lungkhama chu, Ka ðhian nih chenin a fâwmkêm, Âw Jerusalem fanute u!

BUNG 6

¹JERUSALEM FANUTE I duh tak chu khaw'nge a liam, Âw nang, hmeichhia zawng laia duhawm? A ðuansanna lam che chu I zûl zuiin ka'n han zawng tlâng tûr?

²SULAM NULA Ka duh tak chu a huanah a lût a, Hlo rimtui hmunah chuan, A ran rual tlattîr paha Lili pâ lâwr tûrin.

³Ka hmangaiha tâ ka ni a, Amah pawh ka tâ a ni baw. Lili pâ hmunah chuan a ran rual a tlattîr.

SULAM NULA HMÊLTHATZIA FAKNA

⁴A TLANGVÂL PA Âw ka hmangaih, Tirezah tluk zetin i hmuhnawm, Jerusalem tlukin i duhawm, Sipai puanzâr angin i ðihbâiawm si!

⁵Mi melhna mit hi lakiang rawh, Ka tuar zo dâwn nêw le! A iang e i bahsamin kêl rual Gilead ata lo chhuk thla chu.

⁶A iang e i hâ in berâmpui rual, Bual-kuang atâ lo tla chhuak hlîm; Phîr an pâi vek a, A nu ching rêng an awm lo.

⁷Theibuhfai phel a iang I hmaikhuh phêna i ðhialpâwnin.

⁸Lalnu sawmruk leh Hmei sawmriat an awm a, Nula thianghlîm chhiar sên loh nêw.

⁹Ka ðhuro, ka sawisêl bo chu Pakhat chauh a ni a, A nu fanu neihchhun, A hringtunu en chim loh chu. Hmeichhiaten amah an hmu a, Nihlawh an ti a, Lalnu leh hmeite pawhin Amah chu an fak ðhîn.

¹⁰Tû ni maw zîng êng anga lo lang, Chhawrthlapui ianga mâwi, Tûrni ianga Chiang, Sipai puanzâr anga ðihbâiawm chu?

¹¹SULAM NULA Thei pilsak hmunah ka zuk kal a, Ruama a chawrno en tûr leh Grep a kuhmûm tawh emaw, Theibuhfai a pâ r tawh emaw tiin.

¹²Ka hriat loh hlânin Ka nunna chuan mi lo dah, Kan hnam khawnbâwl tawilîrahte chuan.

¹³A HMANGAIH LEH A THIANTE Kîr rawh, kîr rawh, âw nang Sulam mi; kîr rawh, kîr rawh, Kan thlîr theih nân che! SULAM NULA Eng hmuh beiseiin nge Sulam mi chu i thlîr Mahanaim lâma lâm ang hialin?

BUNG 7

FAKNA THU SAWIFIAHNATE

¹A TLANGVÂL PA I vawthlep bunna ke mâwizia chu, Âw nang lal fanu! I mal mûmin lunglhu iang e, Themthiam kutchhuak tak chu le.

²I laibu lah berhbu hûn, Uain pawlh sa phâi ngai lo. I tâi bâwr chu buh chhûn vûm, Lili pâ zînga chhûn chu.

³I hnute bu phîrin a ang sazuk no ðhiang, Sazuk nalh chî phîr hrin.

⁴I nghâwngin a iang e, saingho kulhbîng sâng, I mitin Hesbon dîl A iang Bath Rabbim dai kawngkhâr kianga mi chu. I hnârin a iang Lebanon kulhbîng, Damaska lam hawi chu.

⁵I thlunglûin a iang Karmel tlâng, I bahsam nise, a dum zîr ziar; Lalin a tuar zo lo, i bahsam chhâwllêng.

⁶I va han nalhin lung i va dum êm! Âw hmangaih, i hlîm hmêl te hlei hlei hian!

⁷I tlâwntlai hian tûm thing a iang a, I hnute bute lah a rah bâwr ang.

⁸“Tûm thing chu ka lâwnkhung ang a, A rahte chu ka han vuan tlat teh ang,” ka ti a. I hnute buin grep bâwr ang thung se, I thaw rimtuiin apple.

⁹SULAM NULA I ânkâ uain ðha mi angin thlum se. Ka duh tak tân uain a luang dêl dêl, Muhîlte dang hnâwn nân a luang ngiai

ngiai.

¹⁰Ka duh tak tâ ka ni tawh e, A duh zâwng kawltu ka ni si.

¹¹Law hâw teh, ka duh tak, I feh chhuak dūn ang âw; Khawperahte chuan i riak dun teh ang.

¹²Hmâ takah thovin grêp huanahthe chuan, I en dūn ang grêp, a kuhmûm hlawm tawh emaw, A pâr parh chhuak tawh emaw chu, Theibuhfai a vul tawh emaw chu. Tah chuan ka hlân ang che, ka hmangaihna.

¹³Zâwlaidi hlovin rim a chhuah a, Kan daikawngkhârah thei tha tinrêng A awm rui e, a hlui leh thar, I tâna ka chhêk chu, ka duh lai.

BUNG 8

¹Chhei, ka nuṭa ang mai i ni, Ka nu tâng bêla a hnute tuia chāwm chu! Pâwna ka hmu che a nih pawhin, Ka fâwp ang chia; Dem ka hlawh chuang lo vang.

²Ka hruai ang chia, Ka nu inchhûngah chuan ka hruai lût ang che, Ani chuan thil mi lo zirtîr ang. Keiin uain rimtui tulhna châng che ka hriat phah ang a, Ka theibuhfai sâwr tui chu.

³(JERUSALEM FANUTE HNÊNAH) A kut vei lam chu ka lukham a, A kut dîng lamin mi kuah a.

⁴Ka ngên tak meuh che u, âw Jerusalem fanute u, Hmangaihna chu chawh thova tiharh lo tûrin, Amahin a duh hma loh chuan.

LEBANON-AH HMANGAIHNA TIHTHAR LEH

⁵LAICHÎN Tû a ni nge hei, thlalêr ata lo chhova, A duh tak rinchhantu hi? Apple kûng hnuaiah chuan ka tihharh tâk che hi. Chutah chuan i nu'n a pâi chia; Chutah chuan a pâitu che chuan veiin a hring che.

⁶SULAM NULA-IN A HMANGAIH TÂN I thinlungah chârnaïn mi nemkai la, I bânah mi nemchâr tlat rawh; Thihna tlukin a chak, hmangaihna hi, Thlân anga nunrâwng a ni, thîkthu chu; A alh chhuak chu kângmei a ni, Kângmei nasa ber chu.

⁷Tui tam taka chiah daih chi a ni lo, hmangaihna hi, Tuilianin a chîm pil thei hek lo. Hmangaihna tlakral nân patlingin A chhungkaw ro sum a khawhral chuan Namên lova dem a hlawh ngei ang.

⁸SULAM NUṬÂTE Farnu tê tak tê kan nei a, A hnutê pawh a la um tham lo. Kan farnu hi rawn betu awm ta se Engtin nge kan tih tâk ang?

⁹Amah chu kulh bang a lo nih chuan, Kan dinsak ang, Tangkaraw kulhbîng; Amah chu kawngkhâr lo ni sela, Sidar thing phelin kan thlawp zui ang.

¹⁰SULAM NULA Ka ni alâwm, kulhbang, Ka hnutêin a iang, kulhbîng sângte; A mithmuhah chuan kei chu Muanna chhartu ka lo ni ta.

¹¹Solomona chuan Baal Hamon-ah grêp huan a nei; Huanpute kutah grêp huan chu a dah a; A thawktu tawh phawt chuan theirah thar chhuah tûr Tangkaraw sângkhat man an tlin theuh.

¹²(SOLOMONA PUAL) Ka grêp huan chu keima pual a ni. Âw nang Solomon, a sâng bi chin i pual, Huanpute chuan zahnih chin.

¹³A TLANGVÂL PA Nang, huanah te chênga lêng thîn chu, Mite chuan i aw an châng thîn Kei pawh mi ngaihthlâktîr vê rawh!

¹⁴SULAM NULA Thuai vat le, ka duh lai, Sazuk pian mâwi tak lo ni la, Rimtui tlânga zuktuaiah chang rawh.

ISAIA

Ziah tu: Isaia • Ziah kum: B.C. 740-700

Isaia hming awmzia chu LALPA chhandamna tih a ni a, zâwlneite lehkhahu ziah zînga ropui ber a ni. A thu pawh a phawk chhahin, a huam pawh a zau hle: chatuan Pathian rorêl dân leh hê lei leh vân (universe) siam dân bul tânin, lei thar leh vân thar siam leh dân tûrin a tâwp a (65:17; 66:22). Hê khawvêla thil thleng zawng zawng hi Isaia hrilhlâwkna bûin a lo hmuh lâwk chhûnga vir vêl a ni. Malkhaiah chuan kan Bible bu 66 zînga 'kim ber leh ropui ber' an ti rêng a ni. Amah Isaia pawh hi Jerusalema mi challang tham, Juda lal pali: Uzzia, Jothama, Ahaza leh Hezekia te rorêl hun, kum 60 chhûng (B.C. 740-680) vêla LALPA zâwlnei rinawm, huaisen leh dik a ni. Simna thuchah a puan an âwih loh avânga Israel Hmar lam hnam sâwm Assuria sala tâng tûra an hruai kawi duah duah lai (B.C. 722-721) te pawh mit ngeia hmutu a ni. Liberal taka Bible zirtu thenkhatin Isaia bu ziaktu pahnih/pathum awm ang ziazânga an sawi hi an rinthu mai a ni a; Bible-in a sawi chu Amozâ fapa Isaia chiahi a ni. Isaia Bu hi "Bible-tê" tiin an sawi hial thîn. Bible pumah bu 66 a awm a, Isaia bûah pawh bung 66 a awm a, hlâwm hniha then a ni. Thuthlung Hluiah lehkhahu 39 a awm angin, Isaia bu hlâwm khatnaah pawh hian bung 39 a awm a; Thuthlung Tharah bu 27 a awm ang bawkin Isaia Bu then hnihnaah bung 27 a awm ve chiahi a. Isaia lehkhahu then hmasa lamah hian Israel mite chungâ rorêlna khirh tak leh, invaukhanna thu te, sala an tân thû te a sawi a. Then hnihnaah chuan Israel faten Pathian zahngaihna te, a thlamuanna te leh chatuana himna, an nghahfâk an Messia lokalleh huna taksâ leh thlarau lam malsâwmnaa vûr an la nih tûr thu lâwmawm a lang thung. Isaia Bu tiropuitu ber zâwk chu Messia, Krista lo pian tûr thû, a Pathianna, a rawngbâwlâna, a thihna leh hun hnununga hê leia kum sâng rorêl (millenium) (Isa. 2; 11; 65) lo thleng tûr chungchâng te hi a ni. A bu thu tângpui chu: (1) Israelte sala an tân thu leh sala mantute hremna, (2) Babulon sala an awm dân, (3) Messia chu ingaihtlâwmna tâwpkhaw nêna a lo lan tûr thu; (bung 53), (4) Jentailten Chanchin T̄ha an dawn ve tûr thu, (5) Messia rorêlna leia lo la thleng tûr, (6) Lei thar leh vân thar chanchin te a ni. Isaia hi Bible-a lehkhahu 23-na a ni a. A chhûngah hian bung 66 leh châng 1,292 a awm.

BUNG 1

JUDA-HO SUAHSUALNA

¹Amozâ fapa Isaian inlârna, Judate lal Uzzia te, Jothama te, Ahaza te leh Hezekia te lal laia Judai ram leh Jerusalem chungchâng a hmuh chu:

²Aw vânte u, lo ngaihla ula, Aw leilung, i beng lo chhi rawh! LALPAN thû a sawi tawh si a: "Ka fanau chawm seilenten Min helsan tâk hi;

³Bâwngpa chuan a pu a hria a, Sabengtung pawhin a pu chaw pèkna thlêng a hai lo va; Israelte erawh chuan an hre lo va, Ka mite hian an ngaihven duh hek lo," a ti a ni.

⁴Khai âw, sual tih ching hnam, Khawlohnaa khat, Sual tih hrâtho thlah, Fa nikhualo ho tak chu âw! LALPA an hawisan a, An tithinrim a, Israel Mi Thianghlama chu, An hnuchhawn ta daih a.

⁵Engah nge vuak tuar leh thîn tûra In la hel deuh deuh ang le? Lû hi a pumin a na tawh a, Thinlung pawh a pumin a chaw zo ta.

⁶Kephah hnuai aţanga lu chhîp thlengin, A dam lai rêng rêng a awm lo va, Pem te, vuak duk chur te, pân rimchhiatein a khat a; Ching chu an tiphui lo va, an tuam baw lo va, Hriak pawh an hnawih hek lo.

⁷Nangni ram te chu tihram vek a ni a, In khuate pawh meini a kânral tawh hi; In mithmuhah in ram chu hnam dangten an eiralsak che u a; Hnam dangte sawisak anga a chhiat zawh tâk hi.

⁸Chuvângin Zion fanu chu grêp huana vênbûk ang maiin, Fanghma huana thlâm ang leh Hualbeh khawpui ang maia thlahthlam a ni ta.

⁹Sipaihote LALPA chuan Tihboral bâng tlêmtê min zuah lo se, Sodom ang mai kha kan ni tawh ang a, Gomorra ang maia siam kan ni tawh ang.

¹⁰Nangni Sodom rorêltute u, LALPA thû chu ngaihla ula; Kan Pathian dân hi bengkhawn teh u, Nangni Gomorra mite u:

¹¹LALPA chuan, "Ka hnêna in inthâwina zozâi hi eng atân nge ni ta? Hâlral atâna in hlan berâmpa te, Bâwng no chawm thâte hi ka hnê zo ta. Bâwngpa thisen te, berâm no leh kêl thisente hian Mi tilâwm zo tawh lo ve.

¹²"Ka hmâa rawn inlan tûr leh, Ka tualzâwl chîl phûl tûr hian, Tu nge rawn phûl che u le?

¹³Awmze nei lo thil mai mai rawn hlân tawh suh u; In rimtui tih te hi ka tân tenawm mai. Thla Thar te, Sabbath te, inkhâwmpui in tih chhên hi— Inkhâwmpui urhsûn leh khawlohna hi ka kham zozai ta e.

¹⁴In Thla Thar kûl leh in kûl ruat belhte hi Ka nun hian a huatin a hua a ni; Min tihnawktu chauh a ni ta, Ka tuar peih ta lo ve.

¹⁵In kutte in phar hun pawhin Ka maimitchhînsan ang che u; Tawngtai tlut tlut mah ula, Ka ngaihla chuang lo vang. In kutte hi thisena khat a ni si a.

¹⁶"Insil ula, intifai rawh u; Ka hmuh phâk lohva in thilsual tihte hi dah bo ula; In thil chin t̄ha lo hi bânzan rawh u.

¹⁷Thil t̄ha tih zir ula; Rorêlna dik zawng rawh u, Tiduhdahtu chu hau ula; Pa nei lote thlavâng hauh baw ula, Hmeithaite chu dîlsak rawh u.

¹⁸"Hawh u, i ngaihtuah tâng teh ang u," LALPAN a ti. "In sualte chu senlâr angin sen tawh mahse, Vûr angin a vâ leh ang; Senduk cher chur tawh mahse, Sahmul angin a awm leh ang.

¹⁹Tihnuam tak leh thuâwih taka in awm chuan, Ram hausakna chu in tlan ang;

²⁰Mahse in duh lohva in hel tlat chuan Khandaiha suat rêm in ni ang;" LALPA kâ ngeiin a sawi tawh si a.

KHAWPUI TLA-RAN

²¹Engtizia nge khawpui rinawm tak chu nawhchizuara a lo chan tâk? Diknaa khat a nih thîn vei nê; Dikna lên vênna hmunah chuan, Tualthattute an lo awm ta.

²²In silvar te chu êkchhia mai a ni ta, In uain lah tui pawlh dal mai.

²³In miliante lah hel hmang, Rûkrûte thian an ni a; Mi tin mai chu thamna ngaina, Thilpêk beisei tlat mi zu nia. Fahrahte thlavâng an hauhsak lo va, Hmeithaite thûin an hnên a thleng pha lo ve.

²⁴Chuvângin Lalpa, Sipaihote LALPA, Israel Michaka chuan heti hian a ti, “Khai le, ka hmêlmâte chungah phubâ ka la ang a, Ka hmêlmâte hi ka han vai kiang vek teh ang.

²⁵I chungah kut ka thlâk ang a, I êkchhe kai chu ka tihfaisak vek ang che a, I tuiêk zawnzawng ka lakiang ang.

²⁶I rorêltute chu a ngai angin ka dah leh ang a, I remruattute pawh a tîra mi angin ka dah leh ang. Chumi hnûah chuan dikna khawpui, khawpui rinawm, an ti ang che.”

²⁷Zion chu diknaa chhan chhuah a ni ang a, Sual simte pawh diknain chhan chhuah an ni ang.

²⁸Bawhchhetute leh misualte chu a ruala tihboral an ni ang a, LALPA hawisantute chu tihboral an ni ang.

²⁹In ngainat tak terebinth thing te chu in la zahpui ang a; In duhthlan huan avângin in la hrilhai hle ang.

³⁰Terebinth thing hnah vuai tawh ang leh Tui hmu lo huan ang in ni ang.

³¹Michak chu meibû ang a ni ang a, A hnathawh chu meisi ang mai a ni ang; An kâng vê vê ang a, Tûma’n an thêlh mit lo vang.

BUNG 2**PATHIAN IN LO LA DING TÛR**

¹Judai ram leh Jerusalem chung châng a Amozâ fapa Isaia thu dawn chu:

²Ni hnuhnunga thil awm dân tûr: LALPA in awmna tlâng chu, Tlâng chungah te a inrem nghet ang, Tlâng dangte chungah châwisân a ni ang a; Hnam zawnzawngin an pan dûl dûl ang.

³Mi tam tak lo kalten heti hian an la ti ang, “Ti rawh u, LALPA tlângah i chho vang u, Jakoba Pathian in ngeiah chuan; Ani chuan a kawngte min lo zirtîr ang a, A kawngahte chuan kan kal ang,” tiin. Zion aţang chuan dân thû a lo chhuak dâwn si a, Jerusalem aţangin LALPA thû a lo chhuak tawh ang.

⁴Hnam tin kârah ro a rêl ang a, Mi tam tak a zilhhâu thîn ang; An khandaihte chu leilehna atân chherin, An feite chu thil ahchhum nân an la chher ang; Eng hnam mahin khandaih an inlek khum tawh lo vang a, Indo dân pawh an zir tawh hek lo vang.

LALPA NÎ

⁵Aw, Jakoba chhûngte u, ti rawh u, LALPA êngah chuan i lêng zâ ang u.

⁶Khawchhak mite awm dân an chin tâk avângin, I mi Jakoba chhûngkua chu i kalsan ta si a; Philistia mite ang maiin dâwi te an ching vê a, Ram dang mite nê an inkawp tlat a.

⁷An ram te chu silvar leh rangkachakin a khat a, Chhiar sên loh sum an nêi a; An ram chu sakawrin a khat bawk a, An tawlailîr pawh chhiar sên rual a ni lo.

⁸An ram chu milemin a khat a; Anmahni kut chhuak chibai an bûk a, An kutzungtanga an siam ngei chu.

⁹Mite chu an kûn dual dual a, Mi tin an inphahhniam vek a; Chuvâng chuan ngaidam hauh suh ang che.

¹⁰LALPA tîhbaiawmna lakah leh A zahawmna ropui lakah chuan; Lungpui kârah lût ula, vaivut zingah biru rawh u.

¹¹Mihring chaponâ chu tihlâwmin a awm ang a, An inlulinna chu tihhniamin a awm ang, Chumi nî chuan LALPA chauh châwimâwi a ni ang.

¹²Sipaihote LALPA nî chu mi chapote, Inngaihlûte chungah te a lo thleng ang a, Châwi sâna awm apiang chu— Hnuh hniamin an awm vek ang—

¹³Lebanon tlângâ sidar thing sâng zawnzawngte leh, Basan rama sasaw thing chungah te;

¹⁴Tlâng lian leh tlâng tê zawnzawng, Châwi sâna awm zawnzawngte nê;

¹⁵Inchhâwng sâng tinrêng te, Kulh sâng tak tak chungah te nê;

¹⁶Tarsis lawng zawnzawng chungah te, An lawng puanzâr mawi tak tak chungah te nê.

¹⁷Mihringte inchâwisânna chu tihhniamin a la awm ang a, An chaponâ chu paihlâksak a ni ang, Chumi nî-ah chuan LALPA chauh châwimâwi a ni ang a,

¹⁸Milim pathiante chu a tiboral vek ang.

¹⁹Lei hi hneh taka a sâwi ngîn hun chuan, LALPA tîhbaiawmna lakah leh A zahawmna ropui tak lakah Mite chu lung kârah te an birû ang a, Pûkah te an tlan lût ang.

²⁰Chumi nî-ah chuan chibai bûk atâna an siam Silvar leh rangkachak milimte chu an paih ang a, Buikelek leh bâkte hnênah an paih ang.

²¹Lei hi hneh taka a rawn sâwi ngîn hunah, LALPA tîhbaiawmna lakah leh A zahawmna ropui tak lakah chuan, Mite chu khâm kâr leh a kehkâk kârah te, Lungpui leh pûk kârah te an birû ang.

²²A hnâr chauha thâw nêi mihring lakah inla hrang daih rawh u; Anni chu eng atân nge i tih ang?

BUNG 3**JUDAI RAM LEH JERUSALEM CHUNGA RORÊLNA**

¹Ngai teh, Lalpa, Sipaihote LALPA chuan, Jerusalem leh Judai ram aţangin An ei tûr dah khâwm sâ a lâk bosak dâwn e, An rinpui ber chaw leh an tui tlan zawnzawng nê;

²Mi chakte leh an pasalthâ te, Rorêltute leh zâwneite, Aientute leh upate;

³Sawmnga hotute leh mi zahawmte, Remruattute leh kut themthiamte leh, Dâwithiamte nêan a la bo vek ang.

⁴“An hotu-ah naupang mai ka pê ang a, Nausênten an chungah ro an la rêl ang.

⁵Mipuite chu rahbehin an awm ang a, An thenawmte nêan an inrapbet tawn ang; Naupangte pawh upate lakah an chapo hlê ang a, Mi nêp ve takte pawhin mi zahawmte an pawisa lo vang.”

⁶Miin a pa inah a unaupa chu a chelh ang a, “Silhfên pawh i neih hi maw lê; Kan chungah rorêltûah tang la, Hêng thil chhiate hi i thuhnuaiah awm teh se,” an la ti ang.

⁷Chumi nî-ah chuan ani chuan lo hnialin, “I damlote chu ka tidam thei bîk lo ve, Ka inah pawh ei tûr leh thawmhnâw a awm lo va; Mite chungah rorêltûah mi siam suh,” a la ti ang.

⁸An tawngka leh thiltihah, LALPA thu an kalh tlat a, A ropuina mit timîm khawpa an tihthinur avângin Jerusalem chu a tîu a, Judai ram pawh a chhe ta.

⁹An hmêl lan dânin anmahni a hêk a, Sodom angin an sual pawh an puang mai a; An zêp hek lo. Mahni chhiatna tûr an thlen avângin, An chung a va pik êm!

¹⁰“Mi dikte hnênah chuan an thatna tûr a ni tih hrilh rawh u, An thiltih rah an la seng dâwn si a.

¹¹Mi suaksualte chung chu pik tak rawh se! An chan a la chhe dâwn si a, An kuta an thiltih man chu an la hmu ngei ang.

¹²Ka mite chu naupangten an awpbet a, An chungah hmeichhiaten ro an rêl a. Aw, ka mite u! In hotuten an hruai sual che u a, In kalkawngte an tichhia a nih hi.”

HNEHCHHIAHNA LEH NAWMCHENNA CHU DEMIN A AWM

¹³LALPA chu a mite tan tûr leh, A mite rorêlsak tûrin a dîng chhuak ta.

¹⁴LALPA chuan a mite zînga upate leh hotute ro a la rêlsak dâwn: “Nangni hian grêp huante in ei zo va; Mi retheite sum in lâksakte chu in inah te in kaw! a.

¹⁵Engah nge ka mite in rahbeha, Retheite hmâi in rahbeh tlat le?” Sipaihote LALPA Pathian chuan a ti.

¹⁶LALPA chuan heti hian a ti baw: “Zion fanute chu an inluling êm a, Hawi pir vâ chungin an kal a, An han meng no vêl a, An kêa tengeng tiri pahin Intizei fahranin an pêri chhek chhek a,

¹⁷Chuvângin Lalpa chuan uithak a veitîr dâwn a ni, Zion fanute chu an chhîp vun thlengin a veitîr ang a, An zahmawh te pawh LALPA chuan a hlîm lang hial ang.”

¹⁸Chumi nîah chuan LALPAN an incheina a la chhuhsak ang: An kêa tengeng bun te, an lu hrênna te, an thi kual te;

¹⁹bengbeh te, ngûn te, hmai kuhna te;

²⁰lukhim te, ke cheimâwina te, lu hrên te; Rimtui bâwm te, invên nâna târmawî te,

²¹zungbun leh hnâr vuah te,

²²an puan ropui te, an puan bah te; kawrchung te, ip khâi mâwi te,

²³dârthlalang te; puan zaisîn te, diar khim te leh an kawrfual te nêan.

²⁴Heti ang hian a awm ang; Rimtui aiah thil uih rimchhia; Kâwnghrên aiah hruihual; Sam cheimâwi aiah lukawlh; Puan ropui aiah saiip puan; Hmêlthat aiah thîr linga deh sawrbawl a ni ang.

²⁵In mipate chu khandaiha tihhlum an ni ang a, In mi chakte chu indonaah an thî ang.

²⁶A kulh kawngka tualah tah leh rûmna a awm ang a, Hnuchhawnin a awm ang a, vaivutah a thû ang.

BUNG 4

¹Chumi hunah chuan nu pasarihin pa pakhat an bâwr ang a, “Keimahniin ei tûr leh silhfên kan intum ang a; Kan hmingchhia chhilh nân I hming chauh min puttîr hrâm rawh,” an la ti ang.

ZION TUNDIN LEHNA

²Chumi hunah chuan LALPA Zâr chu mâwi takin a chawr duah hluah ang a; leiin rah a thar chhuahte chu Israelte zînga dam chhuak-hote tân a duhawmin, itawm tham a ni ang.

³Zion-a hnutchhiaha awmte leh Jerusalema nungdama awm, an hminga chhinchhiaha zawng zawngte chu ‘mi thianghlim’ an ti ang.

⁴Chutih hunah chuan, rorêlna thlarau leh kanfaina thlarauvin LALPA chuan Zion fanute bawhlhlawhna chu a thian fai ang a, Jerusalem thisen kai chu a sil fai tawh ang.

⁵LALPA chuan Zion tlânga awm zawng zawngte chungah leh, chumi hmuna pungkâwmhote chungah chuan chhûnah chhûm leh meikhûin, zânah meialh êng takin a tuam ang. Ropuina hmun zawng zawng chu a khuh vek dâwn si a.

⁶Bâwktê a awm ang a, chhûn ni sa laka zâr hliahtu, inhumhimna hmun leh, thli leh ruah laka phêntu tûr a ni ang.

BUNG 5

PATHIAN GRÊP HUAN BEIDAWNTHLÂK

¹Ka Duhtaka hnênah a grêp huan chungchâng chu hlâin ka han hril ang e: Ka Duhtaka chuan grêp huan a nei a, Lei thatna mual nuam takah chuan.

²Lei a chêk dîr a, lungte a thian fâi a, Grêp hrui tha chí a phun a. A laiah in sâng a sâ a, Grêp sâwr-khur a siam baw a; Grêp tha tak taka rah a beisei a, Mahse grêp suak a lo rah ta si a.

³Tûnah hian aw, Jerusalema chêngte leh Judate u, Ka grêp huan nêna kan inkâr thû hi khawngaihin han rêl teh u.

⁴Ka grêp huanah hian tih tûr ka tih tawh bâkah Eng nge ka tih lehchuan ang le? Grêp rah tha tak ka beisei êm êm laiin, Engati nge grêp suaka a lo rah mai le?

⁵Chuvângin, ka grêp huan chungah ka tih dân tûr ka hrilh ang che u: A hungna pal ka that ang a, ka hâl vek ang; A lung bange ka that ang a, an chîl hrep ang.

⁶Ka tiram vek ang a; an sât no lo vang a, An rih vîr hek lo vang, Buar leh hnîm hîngneiin a khat ang. Ruah sûtîr hauh lo tûrin Chhûm chu thû ka pe baw ang.”

⁷Sipaihote LALPA grêp huan chu Israel chhôngkua hi a ni a, Juda mipuite chu a thlâi chín duhawm tak te chu an ni. Rorêlna dik a beisei laiin, ngai teh, inhnehchhiahna hlîr; Dikna aiah mangang au âw a lo awm ta si a.

SUAL HREM HUN A HNAI

⁸Mi dangte awm vena leng lo zâwna Ram laiah mahni chauhva an invalh theih nân Mi dang nêk a, in leh lo zauh va, Mi lova ram zauh zêl chingte chu an chung a pik e.

⁹Sipaihote LALPA chuan ka benghriatah heti hian a ti, “In tam tak, lian leh mâwi tak takte chu Luah lohvin a la ram chhe vek ang.

¹⁰Grêp huan tîn sâwm hmunah tîn khat chauh a thar ang a, Buh phur sâwm an tuhnaah phur khat chauh a thar bawk ang,” tiin.

¹¹Zîng tak taka zu in tûra tho thîn te, Zân rei tak tak thlenga zu rui khut khut thînte chu, An chung a va pik êm!

¹²Zu hmunah chuan tîngtang leh perhkhuang nê, Dârbenthek leh phênglâwnng nê an ri bûng bûng thîn a; LALPA hnathawh erawh chu an ngaihven duh lo va, A kuta a thiltihte pawh an hre duh hek lo.

¹³Hriatna neih loh avângin ka mite chu salah an tâng ta a ni; An mi zahawmte pawh rilâtamin an awm a, An mipuite chu tuihâl dangchârin an awm ta.

¹⁴Tichuan, Hremhmun chu a intizau vak a, Teh rual loh khawpa zâuvîn a kê chu a âng huau va; An ropuina leh an mipui zozâte nê, An hlimnate chawpin chutah chuan an liam thla duak ang.

¹⁵Mipuite chu hnuh hniam an ni ang, Mi tin mai chu tihhniam an ni vek ang a, Mi chapote pawh tihtlâwm an la ni ang.

¹⁶Sipaihote LALPA erawh chu rorêlna châwi sân a ni ang a, Pathian thianghlim chu dikna nêna zah tûr a ni.

¹⁷Berâmte chu an tlatna hmunah an tla zâ ang a, Mi hausu hmun tihram tawha thilte chu mikhualten an tlan ang.

¹⁸Chapona hruihruala khawlohnâ hnûka Tawlailîr anga sualna hruia hnûktu chung chu a pik e;

¹⁹“Kan lo hmuh theih nân A thiltih tûr chu ti vat teh se; Kan lo hriat vê theihna tûrin Israelte Mi Thianghlima remruat chu lo thleng vat ang hmiang,” titute chu.

²⁰Thil tha lo chu tha ti a, a tha chu tha lo ti a; Êng chu thim ti a, thim chu êng ti a; Thil thlum chu kê ti a, thil kê chu thlum titute chung a pik e!

²¹Mahni ngaiha intifingte chung a pik e, Finga inngai mai an ni si a!

²²Zu heh takte chu an chung a pik e, Zu chawhpawh rûia vaupûng tina thîn te chung a pik e.

²³Thamna lâk vânga mi sual thiam chantîra Mi dikte dikna chhuhsak ching mite chu!

²⁴Chuvângin, meiin buhpawl a kâng ral thîn ang leh, Mei alhin buhsî a kâng ral thîn angin, An zung chawpin a tawihral ang a, An vul laiin vaivut angin an zâm ral ang; Sipaihote LALPA dân hnâwla Israelte Mi Thianghlima thû an hmuhsit avângin.

²⁵Chuvângin, LALPA thinrim chu a mite chungah a puak keh ta a; A kut ngei lek chhuakin a khawih ta e. Tlângte chu a nghing dur dur a, An ruangte chu khawlai hnâwmhnawk angin a let rem rum a; Chuti taka a tih hnûah pawh a thinrim a la reh lo va, A kut a lek zui zêl a.

²⁶Ram hla taka hnamte tân puanzâr a zâr chhuak ang a, Kâwlkil tâwpa mite chu faifûkin a ko vang; Chûng mite chu hmanhmawh takin an lo kal dâwn a ni.

²⁷Mi tûmah an hah lo vang a, an petek hek lo vang, Muthlû leh muhîl pawh an awm lo vang; An kâwnghrên a inphelh dul lo vang a, An pheikhawh thûina pawh a chat hek lo vang;

²⁸An thalte chu a zum hlê a, An thalngulte chu an kuai kûl sâ vek a; An sakawr tinte chu meilung ang mai, An tawlailîr kête pawh thâwngaleivir ang mai a ni.

²⁹An rûm thâwm chu sakeibaknei hâhum ang a ni a, Sakeibaknei vânglai angin an hâhum ang; Rûm chung a an sa seh tûr chu manin Hmun himah an kal bopui daih ang a, Tuma’n an chhan chhuak lo vang.

³⁰Chumi niah chuan tuipui ri hum hum angin, anni chu a rûmthaihl dâwn a ni. Miin khawmual lam a thlîr chuan, Ngai teh, thim leh lungngaihna hlîr; Êng lah chu chhûmin a hliah thim bawk si a.

BUNG 6

ISAIA, ZÂWLNEI ATÂNA KOHNA

¹Lal Uzzia thih kum khân, lalthut thlêng sâng taka châwi sân chungah Lalpa chu thûin ka hmû a, a kawrfual chuan tempul chu a luah khat vek a.

²A chungah chuan seraf-ho an ding a; thla paruk an nei theuh va: an thla pahnihin an hmâi an khuh a, pahnihin an kê an khuh a, pahnih dangin an thlâwk a.

³Sipaihote LALPA chu a thianghlim e, a thianghlim e, a thianghlim e; A ropuinain lei pumpui a khat e!” tiin an inchnâwn a.

⁴Chû âu thâwmah chuan kawngka bante chu a nghing dur dur a, in chu meikhûin a khat ta a.

⁵Kei chuan: “Ka chung a va pik êm, ka boral ta a nih hi! Hmûi bawlhhlawh pu mi ka ni a, Hmûi bawlhhlawh pu mite zînga chêng ka ni si a; Ka mitin Lalber, Sipaihote LALPA chu a hmu ta si a,” ka ti a.

⁶Seraf-te zînga pakhat chuan maichâma meiling chaicheha a cheh chu a kutin a keng a, ka lam panin a rawn thlâwk a.

⁷Chû chuan ka hmui a dehtîr a: “Aw le, hei hian i hmui a dek ta a; I khawlohnâ chu lâk bo a ni ta a, I sualna pawh tlen fâi a ni ta,” a ti a.

⁸Lalpa âw ka hre bawk a, ani chuan: “Tu nge ka tîr ang a, Tu nge kan tân kal ang?” a ti a. Kei chuan, “Heta hi ka awm e! Mi tîr ta che,” ka ti a.

⁹Ani chuan, “Kal la, hêng mite hi va hrilh rawh: ‘Ngaithla reng chungin in hre thiam lo vang; Hmu reng chungin a ngaihna in hre lo vang.’”

¹⁰“Hêng mite thinlung hi tichawlawl la, An bengte pawh tingawng la, an mitte tidel rawh; Chuti lo zawng, an mitin an hmû ang a, An bengin an hria ang a, An thinlungin an hre thiam ang a, Inlamlêtin, tihdam an ni mai dâwn si a,” a ti a.

¹¹Kei chuan, “Lalpa, eng hun a mi tûr nge?” ka ti a. Ani chuan: “Khawpuite chu luahtu awm lova tihram vek a niha, Ina awm tumah an awm loh va, Ram chu an tihchhiat vek a,

¹²LALPAN chûng mite chu hla taka a sawn bova, Ram chhûnga rauhsan hmun tam tak a awm hunah a ni ang.

¹³Sâwma pakhat la bâng pawh chu, Tihbora atâna kîr leh mai an ni ang, Sasua leh terebinth thing an kih hnûa, A kûng bul a la awm reng ang hian, Chi thianghlim chu a kung bul ang chu a ni,” a ti a.

BUNG 7

LAL AHAZA HNÊNAH ISAIA AN TÎR

¹Juda lal Uzzia fapa, Jothama fapa Ahaza lal laiin Suria lal Rezina leh, Remalia fapa Peka, Israel lal te chu Jerusalem bei tûrin an thawk chho va, mahse an hneh thei lo va.

²Dauida chhûngte hnênah chuan, “Suria sipaite chuan Ephraim bialah tanhmun an khua e,” tiin an hrilh a. Tichuan, amah leh a mipuite thinlung chu thliin thingkûng a chhêm nghing ang mai hian a nghing zo ta a.

³LALPA chuan Isaia hnênah, “Nang leh i fapa Shear-Jasuba nêh Ahaza va hmu rawh u, dîl chhakta zâwk tuilâkna tâwp, Puansutu Phûl lamliah a awm a,

⁴tihian hrilh ang che u: ‘Fîmkhur la, ngawi tlat rawh; Suria lal Rezina leh Remalia fapa te thinurna chu engti taka nasa pawh nise hlâu suh la, zâm hek suh; thingthu bung khû mai an ni e.

⁵Suria leh Ephraim leh Remalia fapate chuan nangmah an phiar che a,

⁶“Judai ram chawh buai tûrin i han thawk chho ang u khai, an kulh bang te kan chhu chhia ang a, Tabela fapa hi an lal atân kan siam dâwn nia,” an ti a—

⁷LALPA Pathian chuan: “An phiar ang chuan an puitlin hauh lo vang, An tum angin a kal hek lo vang.

⁸Suria lû chu Damaska a ni a, Damaska lu chu Rezina a ni leh mai a. Kum 65 ral hmân Ephraim chu tihchhiat a ni ang a, Michêng an awm tawh lo vang.

⁹Ephraim lû chu Samari a ni a, Samari lû lah chu Remalia fapa a ni mai a. In rin duh loh chuan, In ding chhuak tawh hauh lo vang,” a ti, tiin,” a ti a.

IMMANUELA HRILHLÂWKNA

¹⁰LALPA chuan Ahaza hnênah thû a sawi leh a,

¹¹“LALPA i Pathian hnênah chhinchhiahna dîl la; thûk tak aţangin emaw, sâng tak aţangin emaw ni rawh se,” a ti a.

¹²Ahaza erawh chuan, “Ka dîl lo vang a, LALPA chu ka fiah hek lo vang!” a ti a.

¹³Ani chuan, “Aw, Dauida chhûngte u, lo ngaithla teh u! Mihring tih-hah pawh a nêp loh vei nêh, ka Pathian lehzeîl in ti-hah ang maw?

¹⁴Hei vâng hian, Lalpa zâwkin chhinchhiahna a pe ang che u: Ngai teh u, nula thianghlim chu a rai ang a, Fapa a hring ang a, a hmingah Immanuela an sâ ang.

¹⁵Thil tha thlang a, thil tha lo hnâwl nachâng a hriat theih nân hnute khal leh khawizû a ei thîn ang.

¹⁶Naupangin thil tha thlang a, thil tha lo hnar nachâng a hriat hmâ pawhin i hlah em em ram chu an lalten an kalsan vê vê ang.

¹⁷Judai ram aţanga Ephraim an inlâk hran hnûa thil la thlang ngai lo nang leh i mite leh i pa thlahte chungah LALPAN Assuria lal a rawn hruai lût dâwn a ni,” a ti a.

¹⁸Chumi nia thil awm dan tûr chu hetiang hi a ni ang: Aigupta lui hla bera awmte chu LALPAN faifûkin a ko ang a, Assuria rama khuaita pawh a ko bawh ang.

¹⁹An lo thawk ang a, an zavai chuan Kawr ruam leh lungpui kârah te, hling bukah te, ran tlatna hmunah te an fu thup ang.

²⁰Chumi ni chuan Luipui piah rama mi leh, Assuria lal hnêna mi bakmehchem hawhin, In lu leh in ke hmul te, In khabe hmul te thlengin LALPAN a ziat kawh vek ang.

²¹Chumi ni-ah chuan mi pakhatin bâwng la pakhat leh berâm pahni a vulh ang;

²²Hnute tui an ngah avângin hnute khal a ei thîn ang a; Chumi rama la awm chhunte pawhin khawizû leh hnute tui an ring vek ang.

²³Chumi ni-ah chuan grêp kung sâng awmna, Tangkaraw sekel sâng khat man awmna hmun chu, Hling leh buar hmun mai a la ni ang.

²⁴Chûngah te chuan thal leh thalngul nêh mi an ramvâk ang, Ram chu hling leh buar hmun mai a nih dâwn avângin.

²⁵Tuthlawha an thlawh fâi thîn mual tin mai chu, Hling leh buara khat a nih avângin kal peihna chi a ni lovang; Bâwng rual leh berâm rual tlatna hmunah a chang tawh ang.

BUNG 8

ASSURIA-IN A RAWN RÛN DÂWN

¹Chubâkah LALPA chuan ka hnênah, “Ziahna phêk hlâi tak lâ la, tah chuan mihring ziaikna pen hmangin, Maher-Shalal-Hash-Baza tih ziaik rawh.

²Keimah min hriatpuia lo chhinchhiahtu atân hretu rinawm, puithiam Uria leh Jeberekia fapa Zekaria ka hmang bawh ang,” a ti a.

³Tin, zâwlneinu hnênah ka kal a, nau a pâi a, fapa a hring a. LALPA chuan ka hnênah, “A hmingah Maher-Shalal Hash-Baza ti ang che;

⁴naupang chu a ţaha, ‘A nu’ ‘A pa’ tia koh nachâng a hriat hmân, Damaska hausaknate leh Samari hausakna sumte chu Assuria lalin a lâk bosak vek dâwn si a,” a ti a.

⁵LALPA chuan mi be leh a:

⁶“Hêng mite hian Shilo tui, dam têa luang dêl dêl chu duh lovin; Rezina leh Remalia fapa an lâwm zâwk vei a;

⁷Ngai teh, Luipui tui chak leh khauh, Assuria lal chu a ropuina zawng zawng nêl LALPAN an chungah arawn chîmtîr ngei ang a; a tui kawng te leh a lui kuang zawng zawng pawh a luang liam ang.

⁸Juda ram chu a luang tlang vek ang a, A luang liam hum hum baw ang a, Nghâwng thlengin a chîm ang; A thlâ a han zâr ang a, âw Immanuel, I ram vâng lam chu a luah khat hmuk dâwn a ni.

⁹“Keh sawm rawh u, aw mipuite u, keh sawm vek rawh u! Ram hla taka mite u, in beng chhi rawh u. Inrâlring ula, kehsawm rawh u; Inrâlring ula, kehsawm rawh u.

¹⁰Pathian chu kan hnênah a awm e, tiin Inrâwn khâwm vêl mah ula, engtih namah a ni lo vang; Thû sawi mah ula, a sâwt lo vang.”

PATHIAN TÎH LA, A THÛ PAWISA RAWH

¹¹LALPA chuan hêng mite kawng hi zawh vê lo tûrin kut chak takin thû min chah a:

¹²Hêng miten ‘Phiarrûkna a awm’ tia an sawi Phiarrûkna an tih nazawng chu âwih ve suh, An vauna pawh hlau suh la, chí-ai hek suh.

¹³Sipaihote LALPA hi i zah tûr chu a ni; I tîh bera chu lo ni sela, I hlah ber lo ni zâwk rawh se.

¹⁴Amah chu himna hmun a ni ang a; Israela chhûngkaw hnihte tân chuan Tlûkna lung leh bawhchhiatna lungpui a ni thung ang a, Jerusalema chêngte tân thang leh fal a ni baw ang.

¹⁵An zîngah mi tam tak an tû ang; An tlu ang a, an kehsawm baw ang, Thangah âwkin, manin an awm dâwn si a,” a ti a.

¹⁶Hriatpuina thû hi tuam t̃ha la, Dân thû hi ka hnungzuite zîngah châr tlat rawh.

¹⁷LALPA chu ka ngâh ang, Ani chuan Jakoba chhûngte lakah a hmêl a thup si a; Amah chu ka beisei zêl ang.

¹⁸Kei leh LALPA mi pêk naupangte nêl heta hi kan awm ê! Zion Tlânga chêng sipaihote LALPA hnên ata Israel tâna chhinchhiahna leh thilmak chu kan ni e.

¹⁹Miten in hnênah, “Râuzâwl aienthiam leh dâwi hla chham bul bulte chu râwn ve rawh u,” an tih chuan, “Mipuite hian an Pathian ngei an râwn zâwk tûr a ni lo vem ni? Minungte tân mitthi thlarau mâw an râwn zâwk ang?

²⁰Dân thû leh hriatpuina thû zâwk an râwn tûr a ni! Hê thû anga miten an sawi loh chuan, anmahni âng a awm loh vâng a ni ang.

²¹Harsa ti tak leh riltâm chungin an vâk an vâk ang a; an riltâm thinur chuan vân lam enin an lal leh an Pathian chu ânchhia an lawh bawrh bawrh ang.

²²Tichuan, lei lam an han en ang a, manganna te, thim khup te, mangan avânga ngui ruai te mai chu an hmû ang a; thim chhah mup lamah chuan khalh luhin an awm ang.

BUNG 9

THUTIAM FAPA RORÊLNA

¹Mangang taka awm t̃hînte tân nguina tûr a awm tawh lo vang, A t̃rah chuan Zebulun ram leh Naphtali ram chu Hmuhsitawm takin a awmtîr a; Chumi hnûah chuan ropui takin a siam tawh ang, Jordan râla tuipui panna kawnga Jentailte Galili-ah chuan.

²Thim hnuaia awmte chuan Êng ropui tak an hmu ta a; Thihna hlim rama awmte chungah chuan Khua a lo vâp ta.

³Hnamte pawh i tipung a, An hlimna pawh i tipung ta; Buh seng lai hlimna ang maiin i hmâah an hlim a, Miten râlâl sum an sema an hlim ang mai hian.

⁴A ritphurhna nghâwngkaw te, a kokia zâwnfung te leh, Tiduhdahtu talhtum te chu Midian-ho hneh ni ang khân i tihtlihsak ta si a.

⁵Indonaa pasal̃tha pheikhawk te leh, An silhfên thisen kai hnungte chu, Meia rawh ral mai tûr a ni si a.

⁶Kan tân Nau a lo piang a, Fapa min pe ta a; Rorêlna chu a kokî-ah a inngat ang a. A hmingah chuan Maka, Remruattua, Pathian Chaka, Chatuan Pa, Remna Lal an ti ang.

⁷A sorkarna leh remna chu a pung zêl ang a, Engtikah mah a tâwp tawh lo vang. Davida lalthutthlenga thûin, a lalam chungah Diknaa rorêlna a din ang a, a tinghet ang, Chumi hun aṭanga kumkhua. Sipaihote Lalpa thahnemngaihna chuan chûng chu a hlen chhuak tawh ang.

SAMARI MITE HREMNA

⁸LALPAN Jakob-ho do zâwngin thu a thawn a, Israel-ho chungah a tla a.

⁹Mi zawng zawngin an hria ang a— Ephraim leh Samari khuua awmtên— Inlung leh chapona rilru nêna an sawi chu:

¹⁰“Leirawhchan bangte chim mahse, Lung chherin kan din t̃ha leh mai ang; Theipui thingte chu kit mah sela, Sidar thingin kan thlâk leh mai ang,” an ti a.

¹¹Chuvângin, LALPA chuan anmahni do tûrin Rezina hmêlmâte chu a ruat ang a, A hmêlmâte chu a chawk tho vang,

¹²Hma lamah Suria-ho, hnung lamah Philistia-ho; An kê ângin Israelte chu an dawlh zo vek ang. Chuti pawhin a thinrim a la kiang lo va, A kut chu a la lek ta cheu va.

¹³Mite chuan anmahni hremtu lam an hawi chuang lo va, Sipaihote LALPA chu an zawn phah hek lo.

¹⁴Chuvângin, LALPA chuan Israelho lû leh mei chu Tûmkâu leh phairuang angin ni khat thilah a la chhawk vek ang.

¹⁵An upa leh mi zahawm chu an lû a ni a; Dâwt thu zirtirtu zâwlnei chu an mei a ni.

¹⁶An hruiatuten hêng mite hi an hruiatual a, An hruiatute chuan an boral phah t̃hîn.

¹⁷Chuvângin, Lalpan an tlangvâlta a lâwm lo vang a, An fahrahte leh an hmeithâte pawh a lainat hek lo vang; Mi verther leh sual titu vek an ni si a, An kê-in thu âthlak hlîr an sawi a. A thinurna chu a kiang chuang lo va, A kut chu a la lek ta cheu va.

¹⁸Suahsualna chu mei angin a alh a; Hlîng leh buarte a kâng ral ang a, Ramngaw pik zîngah a kâng a, Mei khu chho ngut ngut ang hi a ni ang.

¹⁹Sipaihote LALPA thin a rim êm avângin Ram hi a kâng chereu va, Mipuite lah tuah tûr thingfâk ang lek an ni a; Mahni unau hum thei pawh an awm lo ve.

²⁰An ding lama mi an hlep thlâ ang a, An rilâm a reh lo vang; An vei lama mi pawh an ei ang a, An puar phah chuang lo vang; Mi tinin mahni bâl sâ te pawh an la ei mai ang.

²¹Manasean Ephraïma a hmawm ang a, Ephraïman Manasea; An pahnihin Juda-ho an beihrawn ang. Heti pawh hian a thinurna chu a kiang chuang lo va, A kut chu a la lek ta cheu va.

BUNG 10

¹“Dân chimawm duang chhuak a, Mite tuartîr tûr zâwna dân khermei duang chhuaktute u, In chung a pik e.

²Mi retheite dikna in rûksak a, Ka mi mi-harsa vê tê tete chan-âi in chhuhsak baw k a, Hmeithaite neih ei saka, Fahrahte in rawk thin hi.

³Hremna nîah, hla tak aţanga tichhetu lo thlen hunah Engtia tih nge in tum? Tû hnênah nge ţanpuina dîla in tîlân dâwn? Khawiah nge in ropuina chu in hnutchhiah tâk ang?

⁴Ka tel loh chuan sal-ho zîngah an kûn dual dual ang a, Tihhlumho zîngah an tlu ve ang,” a ti a. Chutichung pawhin a thinurna chu a kiang chuang lo va, A kut chu a la lek ta cheu va.

ASSURIA CHAPO TAK CHU HREM A NI

⁵Ka thinurna talhfiak leh ka lungâwilohna tiang kengtu Assuria chung chu a pik e.

⁶Pathian hre duh lo hnam bei tûrin ka tîr ang a, Ka thin tiurtute sawp hrep tûrin thû ka pê ang; Râllâk sum va lâksaka duh tawka va suam tûr leh, Kawtthlêr chirdiak anga va rap pherh tûrin.

⁷Ani chuan chutianga tih chu a tum lo va, A rilrûk dân pawh a ni hek lo; Hnam tam tak tihchhiata Tihbora vek a tum zâwk a lo ni a.

⁸Ka milianhote hi lal an ni vek lo'm ni?

⁹Kalno hi Karkhemis ang a ni lo vem ni? Hamath pawh Arpad ang mai a ni lo vem ni? Samari hi Damaska ang a ni lo vem ni?

¹⁰Jerusalem leh Samari khuua milem kerchawpte aia thâ, Milemho lalramte chu ka kut hian a dap chhuak ta a,

¹¹Samari khuua leh a milemte chungka ka tih angin, Jerusalem leh a milemte chungah ka ţuan vê lo vang maw?’ a ti si a.

¹²Chuvângin, LALPAN Zion Tlângah leh Jerusalema a thawh tûr a thawh zawhah, “Assuria lal hi, a mi chaldelhna thinlung leh a inngaih ropuina hmêl chawp hian ka hrem dâwn a ni,” a ti a.

¹³Tihian a ti a: “Keima kut chakna ngeia ka tih a ni a, Mithiam ka nih avângin keima finnaa ka tih a ni; Mipuite ramrî ka sawnsak a, An sumbâwmte ka rawk a; Tichuan, mi huaisen angin a mi chêngte ka paihthla ta.

¹⁴Mite hausakna chu sava bu angin ka kut hian a dap chhuak a, Sava tui la bâng an thâm ang hian Leilunga mite ka khâwm vek a;

Tûma'n thlâ pawh min khawn khum lo, Min ânkhum min bihthla ngam pawh an awm lo,” a ti vêl a.

¹⁵Hreipui hian thil chêktu chu a uankhum ngai em ni? Thingzaina hian a zaitu chu a inlek khum dâwn em ni? Talhtumin a lektute lek khum a tum ve ang leh, Tiangin thing ni lo ang maia inchâwisân a tum ang lek hi a ni e!

¹⁶Chuvângin, LALPA, Sipaihote LALPA chuan, A mi thâuete zîngah chêrna hrî a thlentîr ang; A ropuina chuan meialh ang maiin A tikâng dâwn a ni.

¹⁷Israelte Êng chu meiah a chang ang a, A Mi Thianghlima pawh meialhah. Hlîng leh buarte chu ni khat thil thûah a kâng ral vek ang.

¹⁸A ramngâw leh huan ţha tak mâwina te, A nunna leh taksa chawpin a kâng ral ang; Natna avânga damlo an râwp ral ang mai hi a ni ang.

¹⁹A ramngâwa thing la ding chhunte chu Naupang chhiar tham lekin a tlêm tawh ang.

ISRAEL MI LA DAMCHHUN KÎR LEHTE

²⁰Chumi nîah chuan Israel mi la dam chhun, Jakoba chhûngte zînga thi bâng la awmte chuan Anmahni tiretheitute chu an bêl tawh ngai lo vang a, LALPA, Israelte Mi Thianghlima chu thutakin an rinchhan tawh ang.

²¹Jakoba thlah la dam chhun, a thi bâng hote chu an lo kîr leh ang, Pathian Chaka hnênah chuan.

²²Aw Israel, i mite chu tuipui kama ţiauvut zât ang ni mahse, A dam chhunte chauh an lo lêt leh ang; An boralna tûr dân thupêk chu dikna nêna rêl a ni tawh si a.

²³Lalpa, Sipaihote Pathian chuan ram zawng zawng lailiah tâwpna tûra a ruat chu a hlen ngei ang.

²⁴Chuvângin, LALPA, Sipaihote Pathianin: “Aw, ka khuua leh tui, Ziona chêngte u, Aigupta-ho tih angin talhtuma vua che u in, a tiang chu lek khum che u mahse, Assuria-ho chu hlâu suh u.

²⁵In chungka ka thinurna hi a reh thuai dâwn a, anmahni tiboral tûrin ka thinrimna hian anmahni lam a hawi tawh ang,” a ti a.

²⁶Sipaihote LALPAN Oreb lungpuia Midian-ho a that chîam ang leh, tuipui chungka a tiang a han lek a, Aigupta mite a sawisâ ang khân, anniho pawh a la hlap hrep ang.

²⁷Chumi nîah chuan a phurrit chu in ko ata a la bo ang a, A nghâwngkaw l chu in nghâwng aţangin a la kiang daih ang; Hriak thihna avângin nghâwngkaw l chu tihtliah a la ni ang.

²⁸Aiath khuua a lo thleng a, Migron a kal pêl a; Mikmas-ah a tuam a chhêk ta.

²⁹Tlâng dung an zawh a, Geba-ah riahhmun an khuar a. Rama khuua chuan a hlau hlê a, Saula khuua Gibeia pawh a tlânchhia.

³⁰Aw, Gallim fanute u, in âw chhuah r'û! Lais khuua mite hriat phâk khawpin le— Aw Anathoth, i va lainatawm tak êm!

³¹Madmena mite an tlânchhia a, Gebima chêngten bihrûkna an zawng.

³²Chumi ni chuan Nob-ah a chîam ang; Zion fanute awmna, Jerusalem tlâng chu A kuttum a lek khum ta.

³³Ngai teh, Lalpa, Sipaihote LALPA chuan, Râpthlâk takin a zârte chu a fik mai ang; A sâng apiang a râwt hniam ang a, Mi chapote chu a titlâwm hlê ang.

³⁴Ramhnuai pik tak chu thîr hriamhreiiin a vât ang a, Lebanon chu Michaka chuan a titlû ang.

BUNG 11

JESAIA THLAH LAL TÛR

¹Jesaia kungpui ațangin Chawrno a lo chhuak ang a, A zung ațangin Pêng a lo chawr chhuak ang.

²LALPA Thlarauvin a awmpui ang, Finna leh hriatthiamna Thlarau nê, Remruatna leh chakna Thlarau nê, Hriatna leh LALPA țihna Thlarau nê a ni ang.

³A lâwm zâwng chu LALPA țih a ni ang a, Mita a hmuh dân maiin ro a rêl lo vang a, A beng hriat dân maiin thû a titlu hek lo vang.

⁴Diknain retheite ro a rêlsak ang a, Leia mi inngaitlâwmte thû chu dik takin a remsak ang; A kamchhuak talhtum chuan lei hi a vua ang a, A thâw-in mi suaksualte a tihlum ang.

⁵A kâwng chu diknain a hrêng ang a, Kâwnghrênah rinawmna a hman ang.

⁶“Chinghnia chu berâm no nê an tla dîn tawh ang a, Keitê chu kêl no nê an bawk dîn tawh ang, Bâwng no te, sakeibaknei tuai te leh ran châwm thâte chu an tla zâ ang a, Naupang têin a kaihruai thîn ang.

⁷Bâwngpui leh savawm te an tla zâ ang a; An notê te pawh an bawk zâ del del thîn ang. Sakeibaknei chuan bâwngpa angin buhpâwl a ei tawh ang.

⁸Nau hnute hne laite chu chawngkawr kaw bulah an infiam ang a, Nau hnute hnêk bâng tawhten rûlângân pûkah kut an ngat ang.

⁹Ka tlâng thianghlim zawng zawngah chuan intihnat leh intihchhiat a awm tawh lo vang, Tuifinriat hi tuiin a khuh vek angin Leilung hi LALPA hriatnain a khat vek tawh ang.

¹⁰“Chumi nîah chuan Jesaia Zung chu a awm ang a, Mite tân chhinchhiahna ni tûrin a dîng ang; Jentailten amah chu an zawng ang a, A chawlhna hmun chu a ropui hlê ang.”

¹¹Chumi nîah chuan Lalpan a kut a ngat leh ang a, Ama mi an thah bâng, Assuria leh Aigupta rama mi te, Pathros leh Kush te, Elam leh Sinar te, Hamath leh tuifinriat thliarkâra hnutchhiaha awm te chu a hruai kîr leh ang.

¹²Hnam tinte tân chhinchhiahna a târ ang, Israel mi hnawhchhuahhote chu a hruai khâwm ang a, Juda mipui hnawh darh tâkte kha Kâwlkil lî ațangin a hruai khâwm leh ang.

¹³Ephraim-ho îtsikna chu a kiang ang a, Juda hmêlmâte chu tihboral an ni ang; Ephraim-ho chuan Judate chu an îtsik tawh lo vang a, Judaten Ephraim-ho an chawk buai tawh hek lo vang.

¹⁴Thlang lam hawiin Philistia mite kokia chuangin an thlâwk thla thung ang a; Chhak lama mite an rawk-ho bawk ang; Edom-ho leh Moab-ho chungah kut an thlâk ang a, Ammon mite chuan an thû an lo âwih tawh ang.

¹⁵LALPA chuan Aigupta litengsâwl chu a tichhe vek ang a; A thli chak tak hmangin a kuttum chu Luipui chungah a vilik ang a, Luite pasarihah inthen darhin Lei chârah mite an kal kâi tawh ang.

¹⁶Aigupta an chhuahsan laia Israel-ho tâna kawngpui a lo awm ang khân, Assuria rama an thah bâng mi la awm chhunte tân Kawngpui a awm bawk ang.

BUNG 12

LÂWMTHU SAWINA HLÂ

¹Chumi ni chuan heti hian in la ti ang: “Aw LALPA, lâwmthû ka hrilh ang che; Ka chungah thinur mah la, I thinrimna a kiang a, min tithlamuang ta.

²Pathian chu mi chhandamtu a ni, Ka ring ang a, ka hlau lo vang; ‘LALPA, YAH-a chu ka chakna leh ka hlâ a ni; Mi chhandamtu a lo ni ta bawk a,’ tiin.”

³Tichuan, chhandamna tuikhur ațangin Hlim takin tui in la châwi ang.

⁴Chumi nîah chuan: “LALPA chu fak ula, a hmingin ko rawh u; Mite hnênah a thiltihte puang ula, A hming chu châwi sân a ni tih sawi rawh u.

⁵LALPA fakin zai rawh u, A thiltihte a țha chungchuang si a; Chû chu leilung zawng zawngin hre rawh se.

⁶Aw, Zion-a chêngte u, âu vak vak rawh u, In zînga awm Israel Mi Thianghlima chu a ropui êm hi!

BUNG 13

BABULON CHHIATNA THUPUAN

¹Babulon phurrit, Amoza fapa Isaian a lo hmuh chu.

²“Tlâng sâng takah in puanzâr khai kâng ula, An lakah in râwl tiring ula, Miliante kawngkâa an luh theih nân in kutin lo hûi rawh u.

³Ka serh thianghlimte chu thû ka pê a, Ka mi chakho, châwisân ka niha mi lâwmpuitute chu— Ka thinur hrîkthlâk nân ka ko ta.”

⁴Tlânga thâwm ri mur mur chu Mi tam tak thâwm ang mai a nih chu! Ram tin hnam tina mipui awm khâwm thâwm a ni e! Sipaihote LALPAN indo tûrin a sipaite a khâwm a nih chu.

⁵Ram hla tak tak ațangin, Vân tâwp ațangtein an lo kal a— LALPA leh a thinrimna hriamhreiiin Ram pum a chhu chhe dâwn a ni.

⁶Rûm tlawk tlawk rawh u, LALPA nî chu a hnâi tawh si a! Engkimtithieia hnên ata chhiatna a lo thleng dâwn ta.

⁷Chuvângin, kut zawng zawng chu a zâwi vek ang a, Mi tin thinlung chu a tuiral vek bawk ang a,

⁸An va hlau dâwn êm! Natna leh lungngaihna a tlâkbuak ang a; Hmeichhe nau vei ang maiin nâ an ti ang; An hmêlte chu meialh ang mai a nih dâwn avângin, mak an va intitawn dâwn êm!

⁹Ngai teh, LALPA ni râwng tak mai chu, Thinurna leh thinrimna nasa tak nê, Ram chu tichhe vek tûrin a lo thleng dâwn e; Misualte chu a chhûng ata a tiboral vek ang.

¹⁰Vâna arsite leh arsi bâwrte pawhin An êng an chhuah dâwn si lo va; Nî lo chhuak pawh tihthim a ni ang a, Thlâ pawhin a êng a chhuah lo vang.

¹¹“Khawvêl sual tak hi ka hrem ang a, Mi suaksualte chu an khawlohna avângin ka hrem ang; Chapote inlulinna chu ka titâwp ang a, Mi bumrote chapona chu ka sawp zawi ang.

¹²Mihring hi rangkachak tha chỉ aia vâng zâwkin ka siam ang a, Mihring chu Ophir rangkachak aia vâng zâwkah ka siam ang.

¹³Sipaihote LALPA thinurna leh thinrim nasat ni chuan, Vân khi ka sâwi nghing chiam ang a, Lei hi a awmna hmun ațangin ka sawn chhuak bawk ang.

¹⁴Sakhi ûm hrep ang leh, Tûma vên loh berâm ang maiin Mahni mite awmna lam an pan mai ang a, Mahni ram lamah mi tin an tlan hâu ang.

¹⁵An hmuh apiang an chhun tlang ang a, An man apiang khandaihin an that ang.

¹⁶An naupangte pawh an mithmuh laiin an pawt sawm rem rum ang a; An inte chu an rawk ang a, an nupuite an pâwnsual ang.

¹⁷“Ngai teh u, anmahni bei tûrin Media-ho ka chawk tho dâwn e, Silvar tangka pawh ngaihsak lo, rangkachak pawh thlahlel lo mite chu.

¹⁸An thalin tlangvâlthe a phin darh ang a, Tû chhûl chhuak mah an lainat lo vang a; Naupangte pawh an zuah hek lo vang.

¹⁹Babulon khawpui, lalramte ropuina, Kaldai-hovin mâwi tia an chhuan êm êm chu, Sodom leh Gomorra te angin Pathianin a la titlâwm ang.

²⁰Tûma’n an luah leh tawh lo vang a, Thangthar zêlah pawh tûmah an chêng leh tawh lo vang; Chutah chuan Arab miten puan in an kaih lo vang a, Berâm vêngtuten beram huang an siam hek lo vang.

²¹Thlalêr ramsate an chêng zâwk ang a, An inte chu chhimbukin a khat tlat ang; Tah chuan Ostri-te an chêng ang a, Sathârte tualchâina a ni ang.

²²An kulhbîngah te chuan sihal an û ang a, An lal in nuamah te chuan chinghnia an hrâm ang. Chû hun chu a lo hnâi ta, A nî-te chu an pawt sei lo vang.”

BUNG 14

JAKOBA CHUNGA KHAWNGAIHNA

¹LALPA chuan Jakoba chu a khawngaih ang a, Israelte chu thlang zui zêlin anmahni ram ngeiah a chênthîr leh ang. Ram dang mite pawhin an rawn bêl ve ang a, Jakoba chhûngte chu an bêl tlat ang.

²Anni chuan anmahni awmna ramah an rawn hrui ang a, Israela chhûngkua chuan LALPA ramah chuan bâwih nu leh bâwih pa atân te an chhawr ang a; anmahni sala mantute chu salah an man lêt vê ang a, awpbettute chungah ro an la rêl vê ang.

BABULON LAL TLÛK CHHIAT THÛ

³LALPAN in lungngaihna ata a chawlhthîr che u a, in hlauhna leh rim taka an chhawr luihna che u laka a hahchawlhthîr hunah che u chuan,

⁴hê tihelna thû hi Babulon lal hnênah in chham khum dâwn nia: “Hnehchhiahtu chu a va reh ta vê, Rangkachak khawpui chu a bo ta elo mâw!

⁵LALPAN mi suaksualte vuakfung leh Rorêltute laltiang a titliak ta;

⁶Thinura mite vaw reng thîntu leh, Thinrima hnamte chungah rorêltu kha, Sawisakin a awm vê ta a, tûma’n an khap si lo.

⁷Lei pumpui hi a chawl a, a reh vung vung a; Puak thakin an zâi ta e.

⁸Fâr kûngte pawh an hlim siau siau, nangmah vângin, Lebanon sidar thingte pawhin, ‘Kih thlûka i awm hnûah min kittu tûr Tûmah an lo chho ta lo ve,’ an ti a.

⁹Hnuai lama hremhmun pawh hmuak tûr chein A lo phûr êm êm a; Mitthite chu i tlan an lo chawk tho hlawn a, Leia lallo zawng zawngte kha an ni a; Hnam tina lallo zawng zawngte thlarau kha, An lalthutthlêng ata a kai tho va.

¹⁰An vâiin i hnênah tihian an lo ti ang: ‘Keini ang maia chak lo i ni vê ta elo? Keimahni ang lek i ni ta em ni?’

¹¹I intihropuina chu Seol-ah hnuh thlâk a ni ta, I perhkhuang ri ruai ruaite nê; Êklung chu i âwngphah atân an phah a, Thil lungin an bâwm nuai nuai ang che,’ an ti ang.

LUCIFERA TLÛK THÛ

¹²“Aw Lucifer, zîng lam fapa! Engtizia nge vên ata paih thlâka i awm le? Hnam tin sawp châu thîntu kha Leiah paih thlâka i awm tâk dêr mai!

¹³I rilrûah heti hian i ti a: ‘Vânah ka chho vang a, Pathian arsite chungah ka lalthutthlêng ka châwi sâng ang; Hmar tâwp rêta inkhâwmna tlang chungah chuan ka thu bawk ang;

¹⁴Chhûm chung daihah khian ka chho vang a, Chungnungbera ang mai ka ni ang,’ i tih kha le.

¹⁵Nimahsela, hremhmunah hnuh thlâkin i awm dâwn si a, Khuarkhurum mawng berah chuan.

¹⁶“A hmû che apiangin an en luai luai ang che a, ‘Hê mi hi maw lei tikhûr dur dur a, Lalramte sawi nghing a,

¹⁷Thlalêr ang maia khawvêl siamtu leh khawpuite tichhetu, A sal mante chhuah duh lova chu?’ an la ti ang.

¹⁸“Hnam tin lal zawng zawngte chu, Anmahni in theuhvah ropui takin an muhîl a;

¹⁹Nang vê chu a zâr tenawm Thlân ațanga paih chhuah ang lek i ni a, Khandaiha an chhun tlang silhên leh, Khuarkhurum lung zînga chhuk-ho, Mitthi ruang rah hrual hrep ang chauh i nih tâk hi.

²⁰I ram i tihchhiata, i mite i thah avângin, Mi dang angin phûm thap pawh i hlawn vê lo vang. Thil sual titute hming pawh an lam ngai bawk hek lo vang.

²¹An pate bawhchhiat avângin an fate chu that zêl rawh u, Chuti lo zawng, lo thovin ram an rawn la leh ang a, Khawvêl hi khuain an tikhat lehpek ang e.”

BABULON TIHTLÛK A NI

²²Sipaihote LALPA chuan, “Anmahni bei tûrin ka thawk chhuak dawn,” a ti a. Babulon ațangin an hming leh a la dam chhunte, An thlah zawng zawng chu ka tiboral vek ang,” LALPAN a ti.

²³“Sakuh chênna hmunah ka siam ang a; Chirhdûm hmunah ka chantîr ang; Tihboralna hmunphiahin ka hnâwl chhe vek ang,” Sipaihote LALPA chuan a ti.

ASSURIA SORKAR A TLÛ

²⁴Sipaihote LALPA chuan heti hian chhia a chham a: “Ka ngaihtuah ang chu a lo thleng ang a, Ka tum ang ngeiin a dîng tlang bawk ang:

²⁵Ka ram chhûng ngeiah Assuria-ho ka sawp ang a, Ka tlâng chungah ngei ka chîl hrep ang. A nghâwngkaw! chu ka mite hnên ata ka hlîp ang a, An phurrit phurh chu an koki ata ka la bo vang.

²⁶Hei hi khawvêl puma ka tih tum chu a ni a, Hê kut hi hnam tin chungah ka lek chhuah chu a ni.

²⁷Sipaihote LALPAN tih a tum tawh chu Tu nge sîtsak thei ang? A kut a phar chhuak a, Tu nge pawt kîr leh thei ang?” tiin.

PHILISTIA-HO AN TLU TA

²⁸Lal Ahaza thih kuma phurrit lo thleng chu hei hi a ni.

²⁹“Nangni Philistia-hote u, nangmahni an vuakna tiang a tliah tâk avângin lâwm ngawt suh u; Rûl ațangin rûlmuk a lo chhuak dawn si a, Chû chuan rûl alh thlâwkthei a hring chhuak dawn asin.

³⁰Mi rethei fa tîr chuan ei a hmû ang a, Tlachhamte chu him takin an châwl ang; I fate erawh chu rilțâmin ka hrêk hlum ang a, Chû chuan a la dam chhunte pawh a tihlum ang.

³¹Aw kawngkhâr, rûm tlawk tlawk la, Aw khawpui, âu vak vak rawh! Philistia-ho chu in vâiin in tûral zo ta; Hmâr lam ata meikhû a zâm dawn si a, Mahni hunah tûmah an maltlat lo vang.”

³²Hnam palaite chu engtia lo chhân tûr nge ni ang? LALPA chuan Zion a dîn ta si a, Tah chuan a mi retheiten himna an hmu ang.

BUNG 15

MOAB CHHIATNA TÛR THUPUAN

¹Moab phurrit chu. Zan khat thil thûah Moab rama Ar khuah chu tihchhiata tihram dêr a ni, Zân khatah baw Moab rama Kir khuah chu tihchhiata tihram dêr a ni.

²A sîn tûrin tempulah te, Dibon-ah te, hmun sângah te a chho va. Moab-ho chuan Nebo leh Medeba te chu an țah khum chiam a. An lu a kawh vek a, an khabe hmul an mêt kâwng vek ang.

³Kawthlêrah te chuan saiip puan an sin ang a; An inchung zâwlah leh tual zâwlah te chuan Mi tinte chu lungchhe takin an țap hawm hawm ang.

⁴Hesbon leh Elealeh mite chu an țap ang a, An țap rî chu Jahaz thlenga hriat phâk a ni ang; Tichuan, Moab sipaite pawh thlaphângin an âu vang a; Anmahni pawh hnawksak an inti ang.

⁵“Moab-ho tân ka rilru a rûm ang a; Râlțlânho chu bâwngla kum thum mi angin Zoar-ah an tlânchhia ang. Luhith kawng chho-ah țap chungin an kal ang a; Horonaim kawngah an chhiat tawh avângin an țap vak vak ang.

⁶Nimrim tuite chu a kang chat vek ang a, Hnim hringte chu a vuai phah vek dawn si a; Hnim hring rêng rêng a awm tawh lo vang.

⁷Chuvângin, sum leh pâi an lo chhêk khâwlte chu Tuipuisuthlah Ruam lamah an kal bopui ang.

⁸Moab ramri vêlah chuan țap râwl a ri chuah chuah ang a, An țap thâwmin Eglaim leh Beer Elim a thleng hial ang.

⁹Dimon tuite chu thisenin a la bual khat ang a; Moab ram ațanga tlânchhiate leh ram chhûnga Thah bâng hote chungah sakeibaknei ka tîrh belh țeuh si a.”

BUNG 16

MOAB A TLU CHHIA

¹Sela leh thlalêr ațangin ram chhûnga rorêltu hnênah berâmno thawn rawh u, Zion fanu awmna tlângah chuan.

²A bû ațanga hnawh darh sava vâkvâi ang hian Arno lui kâiah Moab fanute pawh an la vâkvâi vê ang.

³“Thurâwn lâ la, dik takin rorêl rawh; Chhûn ni sâah i daihlim chu zân angin siam la; Hnawhchhuahte chu hum la, râlțlânthei chu phatsan suh.

⁴Aw Moab, ka mi vâkvâite chu i bulah chêtîr la; Anmahni suamtute lakah inhumhimna hmun lo ni ta che. Hnehchhuhtu hun a tâwp țep a, chhiatna hun a tâwp ta a, Rapbettute chu ram ata tihboral an ni ang.

⁵Lalțhutthlêng chu zahngaihaa dîn ngheh a ni ang a; Davida biakbûkah thutakin Mi Pakhat a la țhû ang a, Rorêlna dik zawng tlatin, dikna lamah țuan țha takin ro a rêl ang.”

⁶Moab-ho chapozia kan lo hria a— chapo tak an ni; Mi luhlul leh uangthuang tak, thinrim ûl reng mai a ni a; Mahse a uanchhan chu engmah a ni lo.

⁷Chuvângin Moab-ho chu Moab-ho vângin rûm sela, Mi tin rûm vawng vawng teh se. Kir Hareseth lungphûm chhia te in sîn ang a; Nâ zawng an tuar dawn khâwp mai.

⁸Hesbon lo te, Sibmah grêp hrui te chu a uai zo ta; Hnam tin lalte chuan a kung țha țha an chhat ta, Chûngte chu Jazer khaw thlengin a zâm a, Thlalêrah te a zâm lût a; A pêng zâm darh sung mai chuan tuipui a zâm kâi hial a.

⁹Chuvângin, Sibmah grêp chu Jazer mite sîn dâna țapin ka sîn ang; Aw, Hesbon leh Elealeh, ka mittuiin ka bual ang che; I nipui theite leh i buhseng chungah te chuan Hlimna au thâwm a dâi ta dak mai.

¹⁰Lâwmna chu lâk bo a ni a, thlawhhma hlâwk takte ațangin hlimna a bo ta; Grêp huanah hla sak tih rêng a awm tawh lo vang a, Thâwm hlimawm a awm tawh hek lo vang; Grêp sâwr-khur ata

tuma'n uain an sâwr chhuak tawh lo vang; An hlim thâwm ka tireh ta si a.

¹¹Chuvângin, ka thinlung chu tìngtang rî angin Moab sîнна rîkin a rî a, Kîr Heres chu ka lairilin a sîn.

¹²Moab-ho chuan hmun sângah an han inti-hah mai mai tih an inhriat hunah Tawnghai tûrin an hmun thianghlim an pan ang a; Mahse a sâwt tawh si lo vang.

¹³Hei hi chutih hun laia Moab chungchanga LALPA thu sawi chu a ni.

¹⁴Tûnah erawh chuan, "Hlawhfa kum chhiara kum thum chhângin Moab ropuina chu a mipui tam takte nêh hmuhsitawmah a chang ang a; a la dam chhunte chu mi chak lo tlêm tê chauh an ni ang," LALPAN a ti a ni.

BUNG 17

SURIA LEH ISRAELTE CHHIAT TÛR THUPUAN

¹Damaska phurrit chu. "Ngai teh u, Damaska chu khawpui a nihna lâksak a ni a, Thil chhe awm khâwm mai a ni ang.

²Aroer khuate chu rauhsan a ni a; Berâm rual tlatna hmun a ni ang a, Tûma ùm darh lohvin, muang takin an bawk dil del tawh ang.

³Ephraim-ah kulh a awm tawh lo vang a, Damaska lalram leh Suria mi la dam chhunte chu Israel fate ropuina chuai ta ang lekin an awm dâwn a ni," Sipaihote LALPA chuan a ti.

⁴Chumi nî-ah chuan Jakoba ropuina chu a chuai ang a, An taksaa thâu pawh a pan tawh hle ang.

⁵Buhsengtuin buh a seng khâwm a, Buhvui a hlehna hnû ang mai hi a ni ang; Rephaim Ruama buhsengna hnu vaitu ang maiin.

⁶Grêp rah lawh hmaih vâi tûr a la awm ang a, Olive rah an sawi tîl a, a zîka pahnih khat la awm emaw, A rah tam zârah pawh pali panga la awm ang lek hi a ni ang," LALPA Israelte Pathianin a ti.

⁷Chumi nîah chuan miin a Siamtu lam a hawi ang a, A mit chuan Israel Mi Thianghlima chu a zah tawh ang.

⁸Maichâm lam a thlîr tawh lo vang, Ama kutchhuak mai a ni si a; A kut zungtanga a siamte chu a zah tawh lo vang a, Thing milim leh rimtui maichâm te pawh a zah tawh hek lo vang.

⁹Chumi nî-ah chuan an khaw nghet takte chu, Thingbuk sahthlâk ziding a la awm angin Israela thlahte hmâa an tlânsan hnû ang khân An hmun chu a ram dêr ang.

¹⁰I chhandamtu Pathian chu i theihngihlil avâng leh, I chakna Lungpui i ngaihsak loh vâng a ni. Chuvângin thlai tha chîte i phun ang a, Ram dang thlai chîte i chîng bawh ang;

¹¹I thlai phunte chu a lo thang lian a, A tûkah chuan a lo pâr chhuak ta a; I buhseng tûr erawh chu lungngaihna mai, Mangan ni atâna inkhâwl lek a ni ang.

¹²Mipui tam tak ri mup mup, tuipei anga ri hum hum te, Tuilian anga ri hum hum hnamte chung chu a pik e!

¹³Hnamte chu tui luang huau huau angin an pî ruai a; Mahse Pathianin a zilh ang a, hla takah an tlân bo vang, Thlîin tlânga buhsî a lên ang leh, Tîhâwngaleivirin hnâwl a lên vir tup tup ang hian Ûm bovin an awm thuai ang.

¹⁴Ngai teh, tlai lam chu buaina a ni! Zîng khua a vâh hmain amah chu hmuh tûr a awm tawh lo. Hei hi min rawktute chanpual a ni a, Min suamtute chan tâwk a ni e.

BUNG 18

ETHIOPIA CHHIAT TÛR THUPUAN

¹Ethiopia lui râla awm, thla zâp hum humin a tuam ram chung a pik e,

²Tuipua phairuang lawng hmanga palai rawn tîrtu an ni; "Palai ngalchakte u, mi sâng tak leh vun mâm tak, Atîr aţanga tun thlenga hnam hlauhawm takte hnênah chuan kal rawh u; Hnam chak tak, mite rap hrual nawk nawk thîn an ni a, An ram pawh luiin a then darh sung a ni," titute an ni a.

³Lei chunga chêng leh khawvêla awm zawng zawngte u: Tlânga puanzâr an zâr hunah lo en ula; Tâwtawrâwt an ham hunah ngaihven rawh u.

⁴LALPA chuan ka hnênah heti hian a ti, "Ka châwl hlê hlê ang a, Khawlum nisân khua a tithiang vawl vawl ang leh, Buhseng khawlum laia chhûm zun ang hian, Ka awmna hmun aţangin ka thlîr ang," tiin.

⁵Grêp rah seng hun hmâa a pâr chu a raha a lo chana, A rah thûr chu grêp puam a lo nih huna A pêng zâm darh têtê te chu chemtêa a ât chhum ang hian.

⁶Chûngho chu tlânga sava kohamte ei tûr leh, Leia ramsate chan tûr an ni ang a; Sava kohamte tân nipui châw an ni ang, Leia ramsa zawng zawngte tân thlasik châw an ni ang.

⁷Chumi hunah chuan Sipaihote LALPA hming awmna Zion Tlângah chuan, Mi khânsâng leh vun mâm tak tak, A tîr ata tun thlenga hnam hlauhawm, Hnam thiltitheh leh mi chîl hman, An ram pawh Luipuiten a tan tlang hmuna mite chuan— Sipaihote LALPA hnênah thilpêk an rawn pê ang.

BUNG 19

AIGUPTA CHHIAT TÛR THUPUAN

¹Aigupta phurrit chu. Ngai teh, LALPA chu chhûm chak tak chungah chuangin Aigupta ramah a lo kal dâwn e; A hmâah chuan Aigupta milimte chu khûrin Aiguptaho thinlung chu a tuihal vek ang.

²Aigupta mi leh Aigupta mi ka indotîr ang a; Mi tinin mahni unau an bitum theuh ang a, Thenawm leh thenawmte an indo ang a, Khua leh khua, lalram leh lalram an indo ang.

³Aigupta chakna chu a che thei lo vang; An remruatna chu engmah lovah ka chan ang a, An milim te, an âikaihthiamte, An râuazâwte leh dâwithiamte an pan ruai mai ang.

⁴Aigupta-hote chu lal nunrâwng kutah ka pê ang a, Lal hrohrâng na takin an chungah ro a rêl ang," LALPA, Sipaihote LALPA chuan a ti.

⁵Tuipua tuite chu a kang ang a, Luite chu kang chatin a ro vek ang.

⁶Luite chu a lo rimchhia ang a; Lui têtê pawh a kang ang a, a ro bawh ang; Phâiruante leh dûm hnimte pawh a vuai vek ang.

⁷Lui kama phairuang kung, Luipui kama mi te, Luipui kama thil chĩnte rêng rêng pawh A vui ang a, hmuh tûr awm lova lăk bo vek a ni ang.

⁸Sangha mantute pawhin an sũn ang a; Luipuia nghakuai chiah thĩnte chuan an sũn bawh ang a, Tuia lēn dēngtute pawh an ngui rawih mai ang.

⁹La zâisĩn siamtute leh puan zâisĩn tahtute chenin an hrilhai ang;

¹⁰A nghahchhan ber chu a keh chhe dăwn a ni. Inhlawhfate chu an lungngai hlē ang.

¹¹Zoan khaw miliante chu an â zo ta a; Pharoa mi finge thurăwn pawh âthlăk mai a ni zo ta. Pharoa hnēnah, “Mifing fapa ka ni a, Hmasâng lalho fapa ka ni,” engtin nge i tih theih?

¹²Khawiah nge an awm? I mi finge chu khawiah nge an awm? Annin hrilh che sela, Sipaihote LALPAN Aigupta chungah thil thlen a tum hi hre rawh se.

¹³Zoan khaw miliante chu an â zo ta a; Noph khaw miliante pawh bumĩn an awm a; Aigupta pawh chu an bum bawh a, An hnam khaipa berte chu.

¹⁴LALPAN ani chu khawlohna thlarauvin a chawh buai ta; Ama luakah zurui a tăl buai ang hian Aigupta-ho chu an hnathawh tinrēngah a kal sualtĩr ta.

¹⁵Aigupta ramah chuan hnă rēng rēng a awm tawh lo vang a, Tũmkău leh phairuang te pawhin, Engti zăwng mahin țangkaina an nei tawh lo vang.

¹⁶Chumi năh chuan Aigupta chu hmeichheho ang maia dăwihzep a ni ang; Sipaihote LALPAN an chungah a kut a thĩn avăngin an zăm chhe dăwn a ni.

¹⁷Judai ram chu Aigupta mite țihkhăiah a chang tawh ang a; Sipaihote LALPA-in anmahni hrem a tum dăn sawi rĩk hlek an hriat pawhin an hlău zek zek tawh mai ang.

AIGUPTA, ASSURIA LEH ISRAELTE MALSĂWMNA

¹⁸Chumi năh chuan Aigupta rama khawpui pangăah Kanaan țawng an hmang ang a, Sipaihote LALPA hmingin chhia te an chham ang; khaw pakhat chu Chhiatna Khua an ti ang.

¹⁹Chumi năh chuan Aigupta ram laiah LALPA maichăm a awm ang a, a ramrăih LALPA hmingin ban an phun ang.

²⁰Chũng chu Aigupta rama Sipaihote LALPA tăn chhinchhiahna leh hriatpuitu a ni ang; tiduhdahtute avăngin LALPA an âu vang a, ani chuan Chhandamtu leh Michaka a tĩr ang a, a chhan chhuak ang.

²¹Chumi năh chuan Aigupta ramah LALPAN hriat a hlawh tawh ang a, Aigupta-hote chuan LALPA chu an hria ang a, a hnēnah inthăwina thil te an hlăn ang; ni e, LALPA hnēnah chhia te chhamin an hlen bawh ang.

²²LALPA chuan Aigupta chungah kut a thlak ang a, a vaw bawh ang a, a tidam bawh ang; LALPA hnēnah an kĩr leh ang a, a lam an hawĩ tăk avăngin anni chu a tidam leh ang.

²³Chumi năh chuan Aigupta ram ațanga Assuria ram thlengin kawngpui a awm ruah ang a, Assuria-ho chu Aigupta ramah lo kalin, Aigupta-ho chu Assuria ramah; chutiang chuan an

inkalpawh tawn ang a, Aigupta mite leh Assuria mite chuan rawng an băwl ho tawh ang.

²⁴Chumi năh chuan Israel ram chu Aigupta leh Assuria nēn ram pathum zĩnga mi a ni ang—ram lailiah malsăwmna an ni ang a,

²⁵Sipaihote LALPA chuan malsăwmin, “Ka mi Aigupta-hote, ka kutchhuak Assuria-ho leh, ka rochan Israelte chu malsăwmin awm rawh se,” a la ti ang.

BUNG 20

AIGUPTA LEH ETHIOPIA TÂN CHHIATNA TÛR CHHINCHHIAHNA

¹Assuria lal Sargona tirha Asdod khuua Tartana arawn kal kum kăn Ashdod chu a bei a, a lâ a,

²chutih lai chuan Amoza fapa Isaia hnēnah LALPAN, “Kal la, i saiip silhfēn inbel kha hlĩp la, i pheikhawh kha phelh rawh,” a ti a. Chutiang chuan a ti a, saruak leh ke lăwngin a kal ta a.

³LALPA chuan, “Aigupta leh Ethiopia chungah vănduaina ai chhinchhiahna leh thil mak atăna kum thum chhũng saruak leh ke lăwnga ka chhiahlawh Isaia a kal ang hian,

⁴Assuria lal chuan Aigupta-ho a mante leh Ethiopia-ho sala a hruai te chu, Aigupta tihmualpho năn, naupang deuh leh upa lam thlengin saruak leh ke lăwngin, mawngtam langin a hruai bo vang.

⁵Ethiopia lo ring êm êmtute leh, Aigupta lo chhuang thĩnte chu beidawng leh zak takin an awm ang.

⁶Chumi năh chuan chũng lai rama chēngte chuan, ‘Assuria lal laka min chhan tũra kan tăn luhna ber lah chu heti mai hi a ni ta si a; engtin nge kan tăn chhuah theih tăk ang le?’ an la ti ang,” a ti.

BUNG 21

BABULON CHHIAT TÛR HRILHLĂWKNA

¹Tuipui thlalēr phurrit chu. Thăwngaleivirin Chhim lam a hrũt țlang thĩn angin thlalēr ram țihbăiawm tak ațangin a lo thawh e.

²Inlărna manganthlăk tak min hmuhtĩr a; Vervêk taka tituten vervêk takin an ti a Rawktuin a rawk a. Aw Elamho, chho ta che u! Aw Mediaho, hual rawh u! An rũmna zăwng zăwng pawh ka tireh ta.

³Chũ văng chuan ka kăwng a na zova; Hmeichhe nau vei ang maiin natnain mi man ta. Ka hriat phat ațangin ka mangang nghăl a; Ka hmuh phei chuan min tithlaphăng hial a.

⁴Ka thĩn a phu zăwih zăwih a, hlauhna mi man a; Ka lo nghahhlel hian chu hlauhna mi tuam zăn a lo ni ta.

⁵Ei tũr buatsai hula, In sângah vêngtu dah rawh u, Ei ula, in rawh u. Nangni miliante u, tho ula, Phăw te kha hriak chulh rawh u le!

⁶LALPAN ka hnēnah heti hian a ti: “Kal la, rălvêngtu dah la, A thil hmuh apiang sawi zêl rawh se,” tiin.

⁷Sakawr chung chuang mi pahnih leh tawlailĩr te, Sabengtungte leh sanghăwngseiten an hnuh tawlailĩrte a hmu a,

ngun takin a lo ngaichâng reng a.

⁸“Sakeibaknei a ni reng mai, ka lalpa! Chhûnah râlvên in sângah ka ding reng a; Ka râlvên hmunah chuan zan tin ka awm ziah baw a.

⁹Hei le, sakawr chungchuang pahni leh tawilâir a lo kal e!” a ti a. Ani chuan a chhâng a, “Babulon chu a tlâwm ta, a tlâwm ta! An mîlem pathian kerchawp zawnz zawnz chu Leiah a tikeh darh ta,” a ti a.

¹⁰Aw, ka hruihzâwla buh chîl sâ hi! Sipaihote LALPA hnêna mi ka hriat, Israelte Pathian chu i hnênah ka puang ta e.

EDOM CHHIAT TÛR THUPUAN

¹¹Dumah phurrit chu. Seir tlâng aţangin min âu va, “Râlvêngtu, zân hi engtia rei nge ni tawh? Râlvêngtu, zân hi a rei tawh em?” a ti a.

¹²Râlvêngtu chuan, “Khua a vâv dâwn e, zân pawh a lo thleng dâwn. In zawn duh leh, zâwt ula; Lo kîr leh mawlh teh u!” a ti a.

ARABIA CHHIATNA TÛR THUPUAN

¹³Arabia chung a phurrit chu. Aw, nangni Dedan khualzin pâwlte u, Arabia ramhnuaiah in riak dâwn a nia.

¹⁴Aw, Tema rama chêngte u, Tuihâl tân tui han châwi ula; Râltlântê chu ei tûr nêl lo hmuak rawh u.

¹⁵Khandaih leh khandaih phâwi sa lakah leh, Thalngul kawih sa leh indona hlauhawm laka tlânchhia an ni si a.

¹⁶LALPAN ka hnênah heti hian a sawi: “Inhlawhfa kum chhiar dâna kum khat chhûngin Kedar ropuina chu a chuai vek ang;

¹⁷Kedar mite zînga an michakte leh thal kâp mi la dam chhunte chu tlênte an ni ang; LALPA Israelte Pathianin a sawi tawh a ni,” tiin.

BUNG 22

JERUSALEM CHHIATNA TÛR THUPUAN

¹Inlârna Ruam chung a phurrit chu. Eng natna nge i tawh a, inchunga in lâwn zawn vek mai le?

²Nang hi ri chêl chûl thîn, Khawpui hlim leh ri nuaih nuaih thîn kha i ni lo vem ni? I mi an thahte kha khandaiha thah an ni lo va, Indonaa thi an ni hek lo.

³In rorêltute chu a rualin an tlânchhe vek a; Thalkâp miten an lo man a. In hnêna mi an hmuah apiang an phuar hlâwm zêl a; Hla tak aţanga tlânchhiate an ni.

⁴Kei chuan, “Mi en tawh teh suh u, Lungchhe takin ka ţap dâwn a nia; Ka fanuten suam an tâwk ta si a, Mi hnem pawh tum duh ting suh u,” ka ti a.

⁵Inlârna Ruamah Lalpa sipaihote Pathianin Manganna ni te, inpâwnghîlna leh chî-aina nî te, Kulh bang thîata, tlângah te an ţah vak vakna nî te a thlentîr si a.

⁶Elam-ho chu thal bâwm kengin sakawr tawilâirah an chuang a, Kir-hovin an phâw an lek chhuak ta a.

⁷I phaizâwl remchâng lai chu tawilâirin a la khat ţhup ang a, Sakawr chung chuang mite chu kulh kawngka bulah an inrem ang.

⁸Judai ram invênhimna a lâk bosak a. Chumi hunah chuan Ramngaw Ina râltuam chu in en tawh a;

⁹Davida khawpui chhe laite in hmu baw a, A chhe nasa hle a; Dîl thlang tui chu in thiar khâwl a.

¹⁰Jeruselema in awm zâtte in chhiar a, Kulh tuam ţat nân inte in thiat a.

¹¹Dîl hlui tui dah khâwl nân kulh pahni inkârah tuikhuah in siam baw a. Mahse a Siamtu lam reng in haw lo va, Hmâsânga lo dintu chu zah nachâng in hre hek lo.

¹²Chumi ni chuan sipaihote LALPAN Ţap tûr te, lu sîn tûr te, Lu mêt kawla saiip puan sin tûr tein a ko che u a.

¹³Mahse intihhlîma intihlâwm tumin Bâwngpa leh berâmte in talh a, “I eiin i in ang u, naktûkah kan thi mai dâwn si a!” in ti a; In ei a, zû in in ta thung a.

¹⁴Sipaihote LALPA chuan ka beng hriatah min hrilh a, “He bawhchhiatna hi in thih hmâ chuan tlenfai a ni tawh lo vang,” Sipaihote LALPA chuan a ti a ni.

SHEBNA CHUNGA RORÊLNA

¹⁵Lalpa, sipaihote PATHIAN chuan heti hian a ti: “Hê sum enkawltu Shebna hnênah hian kal la, heti hian va hrilh rawh:

¹⁶Hetah hian eng nge i neiha tu nge i neiha, Hetah hian thlân i kerkuak tâk mai le? Ko pang lung bang sâng laia Mahni thlân tûr ni âwm tak i ker tâk mai?

¹⁷Aw, nang michak ni mahla, LALPAN a man bet ang che a, A paih bo daih ang che.

¹⁸Bâwl mûm angin a tuaivir hrep ang che a, Ram zau takah a vawrh daih mai ang che; Chutah chuan i thî ang a, I intihropuina tawilâir chu i pu chhûngte timualphotu a ni ang.

¹⁹I office aţangin hnawh chhuah i ni ang a, I hnâ aţanga bân i ni ang.

²⁰Chumi nîah chuan ka chhiahhlawh Eliakima, Hilikia fapa chu ka ko dâwn a ni.

²¹Ani chu i kawrfual ka haktîr ang a, I kawnghrênin ka hrêng nghet ang; I thuneihna kha a kutah ka hlân ang. Jeruselema chêngte leh Judai rama mite tân pa a ni ang.

²²David a chhûngkaw chabi chu a mawhpurhnaah ka dah ang a; Tichuan a hawng ang a, tûma’n an khâr lo vang; A khâr ang a, tûma’n an hawng hek lo vang.

²³Hmun hima kilh beh angin amah chu ka tinghet tlat ang a, A pa chhûngkaw tân ropuina lalthutthlêng a ni ang.

²⁴A pa chhûngkaw ropuina zawnz zawnz, a tu leh fa te, an bungbêl lian leh tê zawnz zawnz, no leh tuidahna bêl chênin amahah chuan an bel ang.

²⁵Sipaihote LALPA chuan heti hian a ti, ‘Chumi nîah chuan hmun hima kilhnaa kilh beh tlat chu lâk bova sah thlâk a ni ang a, a uai rittu chu lâk bo a ni tawh ang; LALPAN chû chu a sawi tawh si a,’ tiin.

BUNG 23

TURA CHHIAT TÛR THUPUAN

¹Tura khaw chungah phurrit chu. Nangni Tarsis lawngte u, rûm vawng vawng rawh u! Tihchhiat in ni tawh si a, Lawng chawlhna leh chenna in pawh a awm tawh lo tih, Kupra ram aṅanga puan a ni e.

²Tuipui kama chêngte u, ngawi ṭhiap ula, Nangni Sidon sumdâwngte u, Tuipui chu kânin in inla muk a.

³Shihor buh thar, tuipua an phurh ṭhin, Luipuiin a thar chhuah chu a sum hnâr a ni a, Hnam tam tak sumdâwnna hmun a ni.

⁴Aw Sidon, zak ta che; tui pui chu a ṭawng a, tuipui chakna chuan a sawi ta, “Nau ka vei ngai lo va, fa ka hring ngai hek lo; Fapa ka châwm lian ngai lo va, Fanu nula pawh ka châwm lian hek lo,” tiin.

⁵Chû ṭhû chuan Aigupta a thlena Tura chanchin an hriat hunah nâ an ti hlê ang.

⁶Tarsis-ah chuan va kâi ula; Vaukama chênghote u, ṭap vak vak rawh u!

⁷Hei hi mâw ni in khaw hlim tak, Hmâkhawsânga mi, a kêa hla taka mite hrûaitu chu?

⁸Hê Tura khaw ropui, a sumdâwngte pawh milianho ngat, Leia sumdâwng zahawm tham an ni a, An chungah ṭhil ṭhleng ta mai chu tû remruat nge?

⁹E le, sipaihote LALPA remruat maw lê, An chapopui êm êm leh an intihropuina chu tihmualphova Leia mi zahawmhote chu hmuhsitawma siam a tum a ni.

¹⁰Aw, Tarsis fanu, luipui angin i ramah luang liam rawh, Chakna rêng i neih tâk loh hi.

¹¹Tuipui chungah chuan a kut a phar chhuak a, Lalramte a tinghîng a; LALPA chuan Kanaan rama kulhte tichhe tûrin ṭhû a pe ta a.

¹²“Aw, rahbeha awm nang Sidon nula thianghlim, I hlim tawh hauh lo vang le: Tho la, Kupra va kâi ta che; Chutah pawh chuan i hahdam dâwn si lo,” a ti a.

¹³Ngai teh, Kaldaiho ram saw, Hêng mite hi an awm tawh lo va; Assuria-hovin ṭhlalêr ramsate tân an lo siam ta. A vên insângte an sâ a, A lal inte an châwi sâng a, Tichuan, an tichhe ta vek a ni.

¹⁴Nangni Tarsis lawngte u, rûm vawng vawng rawh u, In chakna chu a riral zo ta si a.

¹⁵Chumi hunah chuan, lal pakhat dam chhûng, kum 70 chhûng zet Tura chu theihngihlin a awm ang. Kum 70 a lo ral chuan Tura chu nawhchizuar hlâ ang a ni ang:

¹⁶“Perhkhuang nêñ vângkhua fang leh na’ng che, Theihngihlin hnû nang nawhchizuar; Rimâwi tumin hla tam tak sa zêl la, An lo hre leh dâwn che nia,” tiin.

¹⁷Kum 70 a ral hnû chuan, LALPA chuan Tura chu a tharthawh leh ang a. A inzawrh dân ngaiin a inzuar leh ang a, lei chungah lalram zawng zawng hnênah a inzuar leh ang.

¹⁸A hlawh chhuah leh a hlâwkna chu LALPA tâna serh hran tûr a ni a; khâwl khâwma chheprelh lovin, a deh chhuahte chu LALPA hmâa awmtên hnianghnâra an ei tûr leh silhfên ṭhâ lei nân an hmang ang.

BUNG 24

KHAWVÊL HREMNA LO THLENG TÛR

¹Ngai teh u, LALPAN leilung hi a tiruak a, a tiram vek a, Leilung hmêl a tidanglam vek a, A michêngte pawh a tidarh vek a ni.

²Hetiāng hi a ni ang: Mipuite angin puithiam chungah a ti vê ang; Chhiahhlawh angin a pu chungah a ti vê ang; Bawihnu angin a pu chungah a ti ve ang; A leitu angin a hralhtu chungah a ti ve ang; A pûktu angin a pûktîrtu chungah a ti ve ang; A battîrtu angin a leibatu chungah a ti ve ang.

³Lei hi a puma tihruah veka rawk fâi lêng tûr a ni, LALPAN hê ṭhû hi a sawi tawh si a.

⁴Lei chuan a sôn ang a, a chuai zo vang a, Khawvêl pawhin a sônin a ngui ruai ang; Leia mi chapote chuan an tuar hlê ang.

⁵Leilung hi a mi chêngte hnuaiah hian a bawhlhlawh zo ta, Dân an bawhchhiat avâng leh, Dân an tihdanglam avângin Chatuan thuthlung chu an bawhchhe zo ta.

⁶Chuvângin, ânhchia chuan leilung hi a ei zo va, A mi chêng ṭlêmtê chu an ngui zo ta. Tichuan, leia mi chêngte chu an kâng ta a, Mi ṭlêmtê chauh hnutchhiah an ni.

⁷Uain thar a chawmawlh zo va, grêp hrui a vuai a, Thinlunga hlim ho zawng zawngte chu an rûm zo ta.

⁸Dârbenthekte hlimna a reh a, Hlim ṭhâwm ri a reh a, Perhkhuang hlim rî a tawp ta.

⁹Hla sa chungin uain an in lo vang; Zu chak tak chu a intute tân a khâ.

¹⁰Buaina khawpui chu a chhe ta a; Tûma luh loh nân, in tin khâr a ni.

¹¹Khawlaiah zu châkin an ṭap a, Hlimna zawng zawng a ngui zo va, Lei hlimna a bo zo ta.

¹²Khawpui chu ram dêra hnutchhiah a ni a, Kulh kawngkâte pawh tihchhiat a ni.

¹³Ram lailia michêng la awm chhunte chu, Olive rah a kûnga mi an sawi ṭilh hnua mi ang leh, Grêp lawh hnûa lawh hmaih la awm zeuh zeuh ang hi a ni.

¹⁴Chûng mite chu âw chhuahin an zâi ang a; LALPA ropuina pualin, tuipui aṅangin ring takin an âu ang.

¹⁵Chuvângin, vâṭṭianah LALPA châwimâwi ula, LALPA Israelte Pathian chu tuifinriat kamah te châwimâwi rawh u.

¹⁶Kâwlkil tâwp aṅanga fakna hlâ an sak: “Mi Dika chu châwimâwi rawh u!” an tih kan hria. Nimahsela kei chuan, “Ka chung a va pik em! Ka chhe ta, ka chhe zo ta! Vervêk taka tîte chuan vervêk takin an ti a, Mi vervêkte chu an lo vervêk takzet a nih hi,” ka ti ta a.

¹⁷Aw, leia chêngte u, Hlahawm te, khur ṭhûk te leh thangten a lo hmuak che u a nia.

¹⁸Tichuan, hlauhawm thâwm tlânchhiatsantute chu khur thûkah an tlâ ang a, Khur ata lo chhuakte chu thangah an âwk ang; Vân tukverh sâng taka mi te chu a inhawng a, Lei lungphûmte a tinghîng a.

¹⁹Lei hi nasa takin a keh chhia a, Lei hi a khichat ruah a, Lei hi namen lovin a khûr a.

²⁰Zu rûi ang maiin lei hi a inthing khûr hlawk hlawk a, Bûktê angin a nghîng lâwp lâwp a; A bawhchhiatna chuan a delh rit lutuk ang a, A tlu sawp ang a, a tho leh tawh lo vang.

²¹Chumi nîah chuan sâng taka châwi sâna awmte leh, Lei chung a lei lalte chu LALPAN a la hrem dawn a ni.

²²Khuarkhuruma mitângho ang maiin an la kâwi khâwm ang a, Tân inah an khung khâwm ang; Nî tam tak hnûah hrem an ni ang.

²³Tichuan, Sipaihote LALPAN Zion Tlâng leh Jerusalemah A puipate hmâa ropui taka ro a rêl hunah chuan Thlâ khi a la zak ang a, Nî pawh khi a la mualpho ang.

BUNG 25

PATHIAN FAKNA HLÂ

¹Aw LALPA, nang chu ka Pathian i ni a. Ka châwimâwi ang che a, I hming pawh ka fak ang, Thilmak tak takte i ti si a; Hmâsânga i remruatte chu rinawmna leh thutak a ni.

²Khawpui chu khaw ramah i siam si a, Kulh nei khawpui chu i rauh dêr a; Ram dang mite lal in awmna khua chu Dîn thar leh ngâi tawh loh tûrin i siam ta a.

³Chuvângin mi chakte chuan an châwimâwi ang che a; Hnam hlauhawmte khawpui chuan a hlau ang che.

⁴Mi retheite tân chakna i ni a, An mangan laia pachhiate chakna, Thlipui laka himna, Ni sensa laka daihlim i ni si a; Mi bumrote thâw chu thlipuiin bang a nam sawk sawk ang hi a ni.

⁵Ram ro khawlum ang hian ram dang mite thâwm i tireh ang a; Chhûmin khawlum a tidai huai ang hian Mi bumro-ho hlâ chu i tireh ang.

⁶He tlângah hian sipaihote LALPA chuan Mi zawng zawng tân ruai tuihnâi a theh ang; Uain thâ, tâifêa chiah, A sa hmui tui lai leh a thlîngte nê, A fê âtanga uain thlitfîm ngei mai chu.

⁷Puan anga hnam tinte khuh bo va, mi tinte zâr hliah tlattu chuan Hê tlângah hian a la tiboral ang.

⁸Thihna chu chatuanin a lem zo vang, Lalpa PATHIAN chuan mi tin an mit ata mittui a hrûk hulsak vek ang a; A mite mualphona chu lei hmun tina ta a lâk bosak ang; LALPAN a lo sawi tawh si a.

⁹Chumi hunah chuan: “Ngai teh u, hei hi kan Pathian a ni asin; Amah chu kan nghâk reng a, min chhandam ang. Hei hi LALPA chu a ni a. Kan lo nghâk reng a; A chhandamnaah chuan kan lâwmin kan hlim ang,” an la ti ang.

¹⁰LALPA kut chu hê tlângah hian a inngat dawn si a, Ekdûra buhpâwl an chîl pil thîn ang hian Moab-ho chu a rap phûm daih ang.

¹¹Tui hleuhvin a bân a vai chhuak ang hian An chungah a kut a vai ang a, An vervêkna kut thiam thil leh an chapona chu a dah

hniam daih ang.

¹²I kulh bang sâng tak takte chu a râwt hniam ang a, Leiah, vaivut zîngah a tichim rem rum ang.

BUNG 26

CHHANDAMNA HLÂ

¹Chumi nîah chuan Judai ramah hê hla hi an sâ ang: “Khawpui nghet tak kan nei a; Pathianin chhandamna kulh bang atân min ruatsak ang.

²Thutak zâwmtu hnam dikte an luh theih nân kawngkâte chu hawng rawh u.

³Nangmah rinchhana thinlunga vuan tlattu che chu Thlamuang taka awm tûrin i vêng dawn si a.

⁴LALPA chu kumkhuain ring tlat rawh u, LALPA YAH-a chu chatuana chakna a ni si a.

⁵Hmun sânga chêngte chu a hnûk hniam ta e, Khawpui sâng tak chu; A dah hniam a, Leiah a hnûk thlâ a, Vaivut zîngah a paih thlâ ta.

⁶Mi retheite kêin a rap hrual ang— Pachhiate kê ngein,” tiin.

⁷Mi thâte kawng chu dikna a ni a; Aw, Nang Midik ber, Mi thâte kawng chu i bûk thîn.

⁸Ni e, i rorêlna kawng ngei chu, Aw LALPA, kan nghâk reng e. I hming hi kan nunnain a ngaina êm êm a, Nangmah hriatreng che a duh a ni.

⁹Ka nun hian zânah a ngai thîn che a, Ni e, keimaha awm ka thlarau hian zîng takah ka zawng thîn ang che; Lei chung a i rorêlna a lo awm hun chuan Khawvêla chêngten dikna an zir tawh ang.

¹⁰Mi suaksual hnênah khawngaihna entîr mah la, Dikna a zir phah chuang lo vang. Dikna ramah pawh dik lo takin a ti ang a, LALPA ropuina chu a hmu lo vang.

¹¹LALPA, i bân i phar hunah pawh an hmu ve lo vang a; Nimahsela, mi dangte an îtsîkzia an inhmu ang a, an zak hle ang; Ni e, i hmêlmate mei chuan anniho chu a kâng ral vek ang.

¹²LALPA, nangin inremna min siamsak ang; Keimahnîah hna tinrêng min thawhsak si a.

¹³Aw LALPA kan Pathian, nang chauh lo pawh, Hotu dangte pawhin min awp tawh thîn a; Mahse nang chauhvin i hming min lamtîr a ni.

¹⁴An thî a, an nung leh tawh lo vang; Tho leh tawh lo tûrin mual an liam ta. Chuvângin i hrem a, i tiboral a, Hriat zui rêng hlauh lovin i siam ta.

¹⁵Aw LALPA, hnam chu i tipung a; Hnam chu i tipung ta a; Châwimâwi i ni e; Ram hi a rî zawng zawng nê i zauh zêl a.

¹⁶LALPA, an mangan vêleh anrawn pan che a, I thununna an chung a tlâk laiin an tawngtai mawlh mawlh thîn.

¹⁷Hmeichhe naupâi chu a hrin a lo huna, A nau vei na tuar a râr tuarh tuarh thîn ang hian, Aw LALPA, chutiang chuan i hmâa kan lo awm thîn kha.

¹⁸Nau kan pâi vê a, nâ pawh kan tuar ve a; Mahse thli ang lek kan hring chhuak si a; Leiah hian chhan chhuahna kan thlen lo va, Khawvel mite tân pawh kan thlen hek lo.

¹⁹I mitthite chu an nung leh ang; Keima ruang nê a rualin an tho leh ang. Vaivuta awm te u, harh ula, zâi rawh u; In daifim chu thlaite tâna dâifim ang a ni a, Lei hian mitthite chu a la paih chhuak dâwn si a.

RORÊLNA LO AWM TÛR LAKA HIMNA

²⁰Ka mite u, lo kal ula, in pindanah lûtin Kawng inkhârkhum rawh u; Thinurna hi a kian hmâ chuan lo biru teh u.

²¹LALPA chu leia bawhchhetute hrem tûrin Ama awmna hmun aţangin a lo chhuak e; Lei hian a thisen chhuahtute a hai lang tawh ang a, An mi thahte pawh a khuh bo tawh lo vang.

BUNG 27

¹Chumi nîah chuan LALPAN a khandaih ropui leh chakin Rûl tlânchhia Leviathan chu a hrem ang, chu rûl vial ngial ngual, Tuipui rûl chu a that mawlh ang.

ISRAELTE TUNDIN LEHNA

²Chumi nîah chuan hlâ saksak rawh, “Uain sen chhuahtu grêp huan chu!

³Kei, LALPA hian ka enkawl a, Tuiin ka châwm reng ang a; Tûma’n an khawih loh nân A chhûn a zânin ka vêng ang.

⁴Thinrimna pawh ka nei lo. Tu nge hlîng leh buar hmanga min dodâl tûr awm? Ka pal tlang vek ang a, ka hâl ral vek ang.

⁵A nih loh leh, keimah mi rem a duh chuan, Ka chakna rawn rinchhan mai sela, Amah ngeiin kei hi mi rawn rem rawh se.”

⁶Jakoba thlah kal zêlte chuan zung an la kâi ang a; Israel chu chawr novin a lo pâi leh ang a, A rah chuan khawvêl a tikhat ang.

⁷Anmahni vawtu a vuak ang takin Israelte chu a vaw ve em? Mî dang a tihhlum ang takin anni chu tihhlum an ni vê em?

⁸I hnawt chhuak a, a âwm tâwkin i hnial bawk a. Khawchhak thli tleh nîah thli hrâng tak hmangin a lèn bo ta.

⁹Chutiang chuan Jakob-ho khawlohna chu hliahkhu a ni ang; Maichâm lung tinrêng chinai lung anga an chhut sawm hunah Thing milimte leh rimtui maichâmte chu a bo tawh ang, Chû chu an sual lâk bona rahchhuak vek a ni ang.

¹⁰Mahse kulh nei khawpui chu a ram dêr tho dâwn a, A mi chêngte pawh thlalêr ang maiin miten an hnuchhawn ang; Bawngnote chu tlân an bawk ang a, thinghnahte an ei ang.

¹¹A zârte chu a vuai hunah tihthia a ni ang a; Hmeichhiaten thingtuah atân a fawm ang, Hriatthiamna nei lo mi an nih avângin. Chuvângin, an siamtu chuan anni chungah zah a ngai lo vang a, Anmahni dintuin a khawngaih hek lo vang.

¹²Chumi nîah chuan Luipui leh Aigupta Lui inkârah LALPAN buh angin a vua ang; Aw, nangni Israelte u, pakhat khatin a lâwr khâwm ang che u.

¹³Chumi nîah chuan heti hi a ni ang: Tâwtawrâwt ropui chu an hâwm ang a; Assuria rama pil bo mêkte chu an lo kîr leh ang a, Aigupta rama hnawh chhuahho chu an lo kîr bawk ang, Tichuan,

Jerusalem tlâng thianghlimah LALPA chu chibai an bûk tawh ang.

BUNG 28

EPHRAIM LEH JERUSALEM CHUNGPIKNA

¹Ephraim zu ruih hmangho chapona lallukhum, An mâwina pawh pangpâr chuai lam, Ruam rai ţa tak kianga mi, Zûin a chiah hnehote chung a pik e!

²Lalpa chuan mi chak leh thiltithe a nei a, Rial thlipui leh thli chhiain thil a nuai chhe buan buan ang leh, Tuilian luang liam hum hum ang maiin Anni chu leiah a la hnûk thla ang.

³Zu ruih hmang Ephraimho chapona lallukhum chu rah hrual hrep a la ni ang;

⁴A mâwina ropui chu pangpâr chuai lam Ruam rai kianga awm ang hi a ni, Nipuia thei hmin hmasâ, a hmutûin a lawha A hmawm tâk mai ang hi a ni.

⁵Chumi nîah chuan sipaihote LALPA chu A mi la dam chhunte ropuina lallukhum leh mâwina lallukhum a ni ang.

⁶Rorelna thute tân rorêl dikna thlarau a ni ang a, Kulh kawngkâa hmêlma lo beitate tân chakna a ni ang.

⁷Mahse anni pawh zû avângin an dik thei bîk lo, Zû ruiin an pai an pai a; Puithiamte leh zâwlneite pawh zû ruiin an thle kâwi reng a, Zûin a lem zo tawh zâwk a, Zû ruiin kawng sirah an thle mai mai a ni; Inlârna dik lo an dawng a, an rorêl lah a fuh thei hek lo.

⁸Dawhkân te chu luak leh bawhlhlawhin a khat a; Hmun fâi lâi rêng a awm lo.

⁹Hriatzâuna te chu tû tak han zirtîr ang maw? Tûte hnênah tak thuchah chu hrilh hre dâwn ni maw? Hnute hne lai mêkte leh hnute hnêk bâng hlimte hnênah em ni dâwn?

¹⁰“Dân chungah dân chher chhuana, dân chungah dân baw, Tlar chungah tlar chher chhuana, tlar chungah tlar baw, Hetah tlêmte, khatah tlêmte.”

¹¹Hêng mite hnênah hian dang-âwk takin, Ram dang mite ţawng hmangin thû a sawi ang,

¹²“Hei hi châute tâna hahchawlhna hmun a ni,” tih leh, “Hei hi an intihharhna tûr a ni,” a ti a; Mahse an ngaithla duh chuang lo.

¹³LALPA thû erawh chu an hnênah a awm a, “Dân chungah dân chher chhuana, dân chungah dân baw, Tlar chungah tlar chher chhuana, tlar chungah tlar baw, Hetah tlêmte, khatah tlêmte,” Chû chu an hnungtawlh a, an tlûkchhiat a, Thangah âwka, man beha an awmna tûr kawng chu a ni.

¹⁴Nangni, mi hmuhsit chîng, Jerusalema hêng mite chungah rorêltute u, LALPA thû hi ngaihven rawh u.

¹⁵“Thihna nê thû kan thlung ta a, Hremhmun nê kan inrem tawh. Hremna tuilian lo thleng mahse, Mîm chîm vê lo vang, Inhum nân dawththû kan hmang a, Dâwththû hmangin kan inphên ta,” in ti vei a.

ZION-A LUNGPHÛM

¹⁶Lalpa PATHIAN chuan heti hian a ti: “Ngai teh u, Zion-ah lungphûm ka phûm a, A thatzia fiah tawh, a kila lung ţangkai, nghahchhan rinawm chu; Chu mîa rinna nghattu chu a buai phîli ve lo vang.

¹⁷A tehna hrui atân rorêlna dik ka hmang bawk ang a, A en ngîl nân dikna hman a ni ang; Dâwta an inhumna chu rialin a deng chhe vek ang a, An bihrûkna hmun chu tuiin a chîm pil vek ang.

¹⁸Thihna nêna in thuthlung chu sût a ni ang a, Hremhmun nêna in inremna pawh a ding chhuak lo vang; Invuakna hruihual namên lo a lo thawh hunah, a rap pêr vek ang che u.

¹⁹A luan tlang apiangin a la zêl ang che u a; Atûk têlin a lo luang hum hum ang a, Achhûn azânin a lo thawk dâwn si a; A chinchâng hriat ngawt pawh thil râpthlâk a ni ang,” tiin.

²⁰Khum chu thluanna tham lohva tâwi a ni a, Puanthuah lah inkhuhna tham lohva tawngchham a ni si a.

²¹LALPA chu Perazim Tlânga a tho ang khân a tho vang a, Gibeon Ruama a thinur ang khân a thinur ang— Ama hnâ a rawn thawk ang, a hna râpthlâk tak chu, A hnathawh danglam tak chu a hlen ang.

²²Chuvângin, mi nuihzattu ni suh u, In saltânna a nghet sauh mai tûr asin; Sipaihote Lalpa PATHIAN hnên ațanga ka thu hriat chu Khawvêl puma chhiatna thlentîr a tum thû hi a ni.

PATHIAN THU ZIRTÎRNA NGAIHThLÂK

²³In beng chhi ula, ka âw hi ngaithla rawh u, Ngaithla ula, ka thû hi lo hre teh u.

²⁴Leilettuin thlai chi theh tûrin nilêng lêngin a let ngai em ni? Lei tlang vaw kehin lei chu a rît phut reng dâwn em ni?

²⁵Lei a chûl rual zawhin pârdî te, zira te a thehin, Buh te a tlara phunin, Barli te, buhtun te a chinna tûr hmunah A ching thîn lo vem ni?

²⁶A Pathian chuan a zirtîr a, Dik taka awm dân tûr a hrilh thîn.

²⁷Buh chîlna khâwlin zira an chîl ngai lo va, Tawlailîr kê-in pârdî an chîl ngai hek lo; Zira chu talhtumin an vaw tîl a, pârdî chu hmawlin an vaw thîn.

²⁸Buh chu an chîl reng lo, an deng fai zâwk thîn; Tawlailîr an chîl khehtîr lo va, Sakawr an chîl diptîr ngai hek lo.

²⁹Hei pawh hi sipaihote LALPA hnên ațanga lo chhuak a ni, Ani chu remruattu mak tak leh hruaitu ța chung chuang a ni.

BUNG 29

JERUSALEM CHUNGPIKNA

¹Ariel, Davida chênna khawpui Ariel chung chu a pik e! Kum lo belh zêl ula, Kût te pawh lo thleng rawh se.

²Ariel hi zawng ka timangang dâwn; Phurrit leh lungngaihna in a chîm ang, Ka lakah chuan Ariel a nih ang chiahin a awm ang.

³Nang do tûr che hian ka hual bet tlat ang che a, Lei chhûn pâwnin ka hung ang che, Palin dâi ka theu hnan bawk ang che.

⁴Paihthlâkin i awm ang a, lei ațangin i rawn țaung chhuak ang; I âw chu lei ațanga lo chhuak ramhuai âw ang a ni ang a, Vaivut ațangin zâwi têin a rawn ri chhuak sê sê ang.

⁵I hmêlma rual tam takte chu vaivut dip ang mai an ni ang a, Mi bumro pui puite pawh buhsî angin an rîral mai ang; Ni e, thawk leh khatah a lo thleng thut ang.

⁶Sipaihote LALPA chuan khawpui rî te, lîrnging te, Ri nasa tak te, țaungaleivîr te, thlipui te leh, Kanral hmang mei alhin a hrem ang che u.

⁷Ariel beitu hnam zawng zawng leh, A kulh huala timangangtu zawng zawng chu, Zân lam inlârnaa mumang ang mai an la ni ang.

⁸Mi rilțâmin a mangah chaw a lo ei a; A han țaungharh a, a ril a la țaung reng ang hi a ni ang; A nih loh leh, tuihâl takin a mangah tui a lo in a; A han harh a, a lo la chawvin a tui a lo la hâl huam ang hi a ni ang. Tichuan, hnam zawng zawngte chu Zion Tlâng dotute ang chuan an la awm ang.”

THU ÂWIIH LOTE MITDELZIA

⁹Ngâwi ula mak ti rawh u! In mit tidel ula, mitdelin awm rawh u! An rûi a, zû vâng a ni si lo; An pai khut khut a, zu ruîh vâng a ni si lo.

¹⁰LALPA chuan mut duhna thlarâuvîn a zêm che u-a, In mit-zâwneite chu a maimitchhîntîr a; In lû-hmutheiteute chu a khuh ta a nih hi.

¹¹Inlârna hi nangni tân chuan lehkhahu châr hnan chhûnga thû ang hi a ni a, a chhiar thiam hnênah, “Hei hi khawngaihin han chhiar teh,” an tiha, ani’n, “Châr hnan a ni a, ka chhiar thei lo,” a tih ang hi a ni e.

¹²Lehkhahu chu lehkhah chhiar thiam lo hnênah, “Hei hi khawngaihin han chhiar teh,” an ti a, ani’n, “Lehkhah ka chhiar thiam hlei nê,” a lo ti si a.

¹³Chuvângin Lalpa chuan: “Hêng mite hian an kê-in mi hnaih a, An hmuîn mi chawimâwi a, An thîlung chuan mi hlat daih si a, An mi tîh ve dân chu mihring thupêk inzirtîrna mai a ni.

¹⁴Chuvângin, hêng mite zîngah hian thil mak ka ti leh ang a, Thil mak leh a thawh dân danglam tak chu; An mi fingte finna chu a boral ang a, An mithiamte thiamna chu thup a ni tawh ang.”

¹⁵An thiltîh tum LALPA laka thûk taka thup tumtute chu an va châr rua lo êm! Thim zîngah thil an ti a; “Tu nge mîn hmu ang le?” an tih bâkah, “Tu nge mîn hre tehlul ang ni?” an ti a.

¹⁶A letling zawngin thil in kalpui teivet a nih hi! Bêlvawtu leh bellei hi angkhat rengah in ngai dâwn em ni? Thilsiam hian a siamtu chu, “Ani siam ka ni lo ve,” a ti dâwn em ni? Thil dintu chu a thil din chuan, “Engmah i hre lo ve,” a ti dâwn em ni?

FINNA LO LA AWM TÛR

¹⁷Lebanon chu lo ța takah changin, Lo ța hmun pawh chu ramngaw a la nih hun tûr hi A rei tawh lo a ni lo’m ni?

¹⁸Chumi nîah chuan lehkhahu thûte chu bengngawngten an la hria ang a, Mitdelte mit chuan hmun birû leh thim zînga thilte chu a hmu tawh ang.

¹⁹Mi tlâwmte chu LALPA-ah an hlim zual zêl ang a, Mi zînga retheite chu Israel Mi Thianghlîma-ah chuan an lâwm tawh ang.

²⁰Mi bumro chu engmah lova siam a ni a, Hmusittu chu tihbo a ni a, Khawlohna thlahlelte chu tihboral an ni—

²¹Chûngho chuan țaungkâin mi dangte misualah an puh a, Zilhâutute awh nân kawngka bulah thang an kam a, Mi dikte chu thu ho mai maiin an nâmnûl thîn.

²²Chuvângin LALPA, Abrahamia tlantu chuan Jakoba thlahte chungchâng heti hian a sawi: “Jakoba chu a mualpho tawh lo vang a, A hmêl pawh dâng khawpin a awm tawh hek lo vang;

²³A tû leh fa, ka kutchhuakte an zînga mi a hmuhi Ka hming chu an zah tawh ang a, Jakoba Mi Thianghlîma chu an zah ang a, Israela Pathian chu an tîh ang.

²⁴Thlarauva kawng bote pawhin an hrethiam tawh ang a, Phunnâwi thînte pawhin thurin lam an zir tawh ang,” tiin.

BUNG 30

RINTLÂK LOH AIGUPTA

¹“Helhmang fate chu an chan a chhe dâwn mang e,” LALPAN a ti, “Kei mi râwn lovin, mi dang an râwn a, Ka Thlarau tel lovin thil an ruahman a, Sualna chu sualin an belh ta a;

²Kei min râwn lovin Aigupta lamah an chhuk a, Pharoa chaknaa intih chaka, Aigupta hlimthlâ chu rin an tum ta!

³Chuvângin, Pharoa chakna chu in mualphona tûr a ni a, Aigupta hlim in ring chu in la zahna tûr a ni.

⁴A miliante chu Zoan khuua awm an ni a, A palaite chu Hanes khuuah an lo kal a.

⁵An tân hlâwkpui aia anmahni tizaktu tûr mi an ni zâwk a, Hlâwkpui ahnehin, mualphona leh dem an kai phahna tûr zâwk an ni.”

⁶Chhim lam sakawlte phurrit chu. Buaina leh lungngaihna ram kal tlanga Sakeibakneinu leh sakeibakneipa te, Rûlâng leh rûl alh thlawk thei te lo chhuahna a ni a, An hausaknate chu sabengtung tuaite chungah, An sumte chu sanghâwngsei hnungzângah phurhtîrin, an hlâwkpui loh tûr hnamte hnên an panpui ang;

⁷Aigupta tanpuina chu a lothlawn mai, engtihna mah a ni lo. Chuvângin, ‘Rahab awm mai mai’ ka ti a ni.

HELMANG MITE

⁸Kal la, ziajna phêkah an hmâah zia la, Hun lo la kal zêl tûr leh chatuan atân Lehkhâbûah chhinchhiah rawh:

⁹Helhmang leh dawthei thlahte an ni a, LALPA dân ngaihven duh lo fa an ni;

¹⁰Hmutheitate hnênah, “Hmu suh u,” tia, Zâwlneite hnêna, “Thil dikte hi min hrilh lâwk suh u; ngaihthlâk nuam deuh sawi ula, dâwtthû hi puang mai mai teh u.

¹¹Kal kiang ula, kawng sîrah pênisan daih ula, Israel Mi Thianghlîma hi kan hma ata tibo daih teh u,” an ti a.

¹²Chuvângin, Israel Mi Thianghlîma chuan heti hian a ti: “Hê thû hi in ngaihnpê êm avâng leh, Inrahbehna leh a kâwi zâwnga thu la herha, Rinchhana in neih duh zâwk avângin,

¹³Hê in khawlohna hi in chungah a tlâ ang a, Lung bang sâng tak, puar pup tawh, chim thla thut thei ang hi a ni ang.

¹⁴Bêlvawtuin hlumbêl a tikeh angin a vaw sawm vek ang a, Engmah zuah lovin a chhu sawm vek ang. A keh them zîngah meî lâkna tlâk emaw, Tui thâl nâna hman tlâk emaw pawh a hmu lo vang.”

¹⁵Lalpa PATHIAN, Israel Mi Thianghlîma chuan heti hian a sawi e: “In lo kîr leha in chawlh chuan chhandam in ni ang; Inring tâwka awm hlê hlê hi in chakna a ni,” tiin. Mahse in duh si lo va.

¹⁶“Kan duh lo ve, sakawrin kan tlânchhe zâwk ang,” in ti a. “Sakawr chak tak chungah kan chuang ang,” in ti a— Nangmahni ûmtu che u pawh an chak hlê ang!

¹⁷Pakhatin mi sang rual a ûm tlân ang che u a, Panga hlâuvîn in vâi tlânchhiat ang, Tlâng chhîpa ban phun leh, mual chungah puanzâr ang maia hnutchhiatin in la awm zel zul ang.

PATHIANIN MI A KHAUNGAIH ANG

¹⁸Chutichung chuan, a khawngaihna in chan theih nân LALPAN a nghâk che u a, In chungah zah a ngaih theih nân amah chu châwi sânin a awm ang. LALPA chu dikna Pathian a ni si a; Amah nghâktu zawng zawng chu an nihlawh e.

¹⁹Mite chu Jerusalema Zion-ah an chêng leh dâwn si a; In tap leh tawh lo vang. In âu râwl chu lainat êm êmin a lo ngaihthlâ ang; A hriat vêleh a chhâng dâwn che u nia.

²⁰Lalpa chuan lungngaihna chaw leh Hrehawmna tui pê che u mah sela, In zirtirtute chu hmun kilkhâwra sawn an ni tawh lo vang a, In mitin zirtirtute chu a hmu pha reng zâwk ang.

²¹Ding lamah emaw, vei lamah emaw in pên dâwn chuan, “Hei hi kawng chu a ni e, zawh rawh u,” tiin, Hnung lam aţangin thû in hria ang.

²²Silvara siam in pathian lem tuamna leh, Rangkachaka in chhûn milim leh a cheinate chu in tichhia ang a, Bawlhhlawh paihin in paih ang a, “Thlâwk bo rawh!” in ti tûr a ni.

²³Tin, ani’n leia buh chî in tuh theih nân Ruahtui a pê ang che u a, Lei chuan chaw a thar chhuak ţeuh ang a; a hlâwk hlê ang. Chumi nîah chuan ran tlatna hmun zâu takah in rante chu an tla dual dual ang.

²⁴Chutiang bawkin, bawngpa leh sabengtung leileta in chhawrtê chuan Ranchaw thianghlîm an ei ang a, Sisêp leh thîrkuta thliar fai sâ an ei tawh ang.

²⁵Tlâng sâng tin leh mual pawng sâng tin aţangin Luipui te, luitê te chu an luang dur dur ang, Nasa taka inthah nîa râlvên in sângte a chim ni chuan.

²⁶LALPAN a mite vuakna hliam a tuamsak a, An pemte a tihdam nîah chuan Thlâ chu ni êng tluk zetin a êng tawh ang a, Ni êng chu a lêt sarihin, ni sarih chhûnga a êna belh khâwm tlukin a êng ang.

ASSURIA CHUNGA RORÊLNA

²⁷LALPA hming chu hla tak aţangin Thinurna mei alh leh a phurrit tak nêna a lo kal e, A hmu chu lunghnûrnain a khat a, A lei chu kan ral hmang mei ang a ni.

²⁸A thaw chu nghâwng thleng zeta chîmtu luipui Luang liam hum hum ang hi a ni a, Tihboralna thlangrân hnamte chu a thlei hrang ang; Anmahni hruai sual tûrin an kâah lakam a barh ang.

²⁹Nangni chuan kût thianghlîm an hman tan zân angin Phênglâwng tuma kal chungin rilru hlim tak nêna hlâ in sa ang a, LALPA tlângah, Israel Michaka hnênah in lo kal ang.

³⁰LALPA chuan a aw ropui tak chu a chhuah tawh ang a, Mi tin hmuah a kut a thlâk thlâ ang. A thinurna meialh te, mi kâng ral thei meialh te, Ƨo ruah thlîpui leh rial tla buan buan te nêna a lo thleng ang.

³¹LALPA âw chuan Assuria chu a hlap thlû ang a, Talhtumin a vaw thlû ang.

³²LALPA ruat anga hremna tiang chelekna hmun apiangah Dârbenthek leh perhkhuangte nêna rem a ni zêl ang; Indona hriamhrei vilik chungin anmahni a bei ang.

³³Tophet chu hmânlai aţang tawha Lal hâl nâna buatsaih tawh a ni. Thûk tak leh zau taka siam, Thinga chheh khah tlat a ni; LALPA thâw, mei leh kâta alh, lui ang maia luang chuan a tikâng ta a.

BUNG 31

PATHIAN RIN LOH ÂTTHLÂKZIA

¹Aigupta ţanpuina beiseia chhuk thlaho, Sakawr chakna leh tawlaîlîr tam tak chung rinna nghata, Sakawr chung chuang mite âwmkhauhna hmachhuan avânga Israel Mi Thianghlim lam hawi duh lova, LALPA pawh zawng duhlote chu, an chung a pik e!

²Ani chu a fingin chhiatna thlentîr dân a thiam a, A thû lah a sût dâwn si lo va, Thil sual titu thlahate leh, khawlo taka titute leh, chûngho lo puitute do tûr chuan a thawk chhuak ang.

³Aigupta-ho hi mihring mai an ni a, Pathian an ni lo ve; An sakawrte chu tisa an ni a, thlarau an ni lo. LALPAN a bâna phar chhuah hunah Anmahni lo ţanpuitute leh an ţanpuia te chu an tlu chhia ang a, An boral vek ang.

PATHIANIN JERUSALEM A CHHAN CHHUAK DÂWN

⁴LALPAN ka hnênah heti hian a ti: “Sakeibaknei leh sakeibaknei vânglaite an saseh hauha an rûm laiin (Berâm vêngtu tam takinrawn âu khum huai huai mah se, An âw chuan a tihlâu chuang lo va, An thâwmin a tibuai tham lo ang hian) Sipaihote LALPA chu a lo chhuk thla dâwn, Zion Tlâng leh a mual tâna do tûrin.

⁵Savaten an thlâwh hual thîna ang hian, Sipaihote LALPA chuan Jerusalem chu a vêng ang. A vêng ang a, a chhan chhuak baw ang; A uap reng ang a, a humhim ang.”

⁶Israel faten an lo helsan dêr tawh hnênah chuan kîr leh rawh u.

⁷Chumi nîah chuan mi tinin an pathian lim, silvara siam te, rangkachaka siamte chu an la paih bo vek ang— sualna, nangmahni kut ngeia in din chu.

⁸“Tichuan Assuria chu mihring ni lo, khandaiha tihtlûk a ni ang, Mihring ni lo, khandaihin a ei zo vang. Amah chuan khandaiha tlânchhiatsan ang a, A tlangvâlhote chu rawih luih hnathawktu an la ni ang.

⁹Ani chuan hlauvin a kulh a pan ang a, A milianten chhinchhihna chu an hlâu hlê ang,” LALPAN a ti. A mei chu Zion-ah a awm a, A meipui pawh Jerusalemah a ni a awm ni.

BUNG 32

DIKNAA RORÊLNA

¹Ngai teh, lal chuan dik takin ro a rêl ang a, Miliante’n dik takin ro an rêl tawh ang.

²Mihring chu thlipui laka bihrûkna hmun leh, Thlipui hrâng laka inhumhimna ang a ni ang; Ram rova lui luang ang leh, Thlalêra lungpui lian pui hlim duai ang hian.

³A hmu duhtute mit chu a thim lo vang a, A ngaithla duhten ngun takin beng an dawh ang.

⁴Mi hmanhmawh thîna pawhin hriatna a man thiam ang a, Dangâwk te pawh nâl takin an ţawng tawh ang.

⁵Mi â chu thil phal an ti tawh lo vang a, Mi uikawm pawh thilphal an ti hek lo vang;

⁶Mi â chuan thu âthlâk bâk a sawi lo, A thinlung chuan khawlohna ngawt a ngaihtuah thîna: Pathian pawisak lohna lamah te, LALPA elsên zâwnng thû te chhâk chhuakin Rîlţâmte a dah rîlţâm tlawk tlawk a, Tuihâlthe tui in tûr a tihbuaksak duh hial a.

⁷Phiarrutu thil phiar chu thil ţa lo a ni; A thil ruahman suahsualna thilte chu Pachhiain dik taka a sawi pawhin, Dâwta mi rethei tihchhiat te a tum thîna.

⁸Mi thilphal erawh chu a inhawng zâu va, A thilphalna chu a dinpui tlat ang.

NGAIH TIHTHAT MAI PAWIZIA

⁹Nangni nuho, ngaihtâa awm thla ngawtte u, tho teh u, Ka âw hi ngaithla rawh u; Fanu, ngaih tiţha chawpho te u, Ka thu sawi hi lo ngaithla teh u.

¹⁰Kum khat leh ni tlêmte hnûah Nu ngaihsamhote u, in la tâl buai hlê ang; Grêp lawh tûr a awm dâwn lo va, Theirah lawh tûr a awm dâwn hek lo.

¹¹Khûr rawh u, nangni nu dâwnгдаhte u; Mangang rawh u, nangni mi ngaihsamte u; Inhlîp ula, saruakin awm rawh u, Saiip puan fêng rawh u.

¹²Thlawhhma duhawm tak te, grêp rah duh tak thînte avângin, Mite chu an âwm chûmin an la ţap ang.

¹³Ka mite ram chu hlîng leh buarin a la bawh ang, Khawpui hlim thei tak leh chhûngkaw hlim tak te pawh;

¹⁴Lal inte chu an la hnuchhawn dâwn avâng leh, Khawpui lûn tak chu an la rauhsan dâwn avângin. Kulhte leh râlvên in sângte chu pûkah a chang kumkhua ang a, Ram sabengtungte tân lâwmna, ran rualte tlatna hmun a ni ang.

¹⁵Chung lam aţanga Thlarau minrawn leih huna, Thlalêrte chu thlawhhma ţa tak a niha, Lo ţa takte chu ramngaw anga ngaih a nih hunah.

PATHIAN LALNA MUANAWM

¹⁶Thlalêrah chuan dikna a lêng tawh ang a, Ram ţa takah te chuan dikna a lêng tawh ang.

¹⁷Diknain a thawh chhuah chu thlamuanna a ni, Dikna rahchhuak chu kumkhuaa thlamuang tak leh ngaihngam taka awm hi a ni.

¹⁸Ka mite chu hmun râlmuangah an chêng ang a, Chênna hmun him leh râlmuangah an châwl der der tawh ang.

¹⁹Ramngâwte chu rialin dêngin, Khawpui chu mualpho takin hnûk hniam mahse.

²⁰Tui luanna kam tluana thlai chîngtute u, Bâwngpa leh sabengtung chhuah zalên thînte u, in nihlawh e.

BUNG 33

MANGAN TÂWPA TAWNGTAINA

¹Rawk tâwk ngai lovin mi i rawk a; Bum tâwk ngai lovin vervêk takin mi i bum a, i chung a pik e! Mi rawk i bânsan hunah Miin an la rawk vê ang che a, Mi bum i bânsan hunah Vervêk takin miin an la bum vê ang che.

²Aw LALPA, kan chungah zahngai rawh; Kan ngah reng che hi. Tuk tinin an bân lo ni la, Mangan laia kan chhandamna lo ni ang che.

³Intihbuai thâwmah mite an tlânchhia a; Nang meuh i chêt chuan hnam tin an darh vek ang;

⁴I râlâlâk sumte chu pangangin thil an bâwm mur mura, Khaukhuap rual kat noh noh ang maiin, Miten an chuh huai huai ang.

⁵LALPA chu sâng taka awm a ni a, châwi sân a ni bawh a; Zion chu rorêlâ fel leh diknain a tikhat ta.

⁶Finna leh hriatna chu in hun vawng nghettu, Chhandamna atâna chakna a ni ang; LALPA tîh hi a tân ro hlu a ni.

⁷An pasalthâte chu pawnsah an âu ruai ruai ang a, Remna palaite chu lungchhe takin an t̃ap ang.

⁸Kawngpuite chu a t̃hing thuap a, Khualzin veivâk an châwl t̃hup a. Thuthlung a bawhchhia a, Khuate chu hmusitin, tûmah pawisak a nei lo.

⁹Leilung chuan sūnin, a ngui ruai a, Lebanon chu zak takin a vuai a; Sharon chu thlalêr ang mai a ni a, Basan leh Karmel te chuan an rahte an t̃hing thla a.

ZION HREMNA A HNÂI

¹⁰“Tunah ka tho vang a, châwi sânin ka awm ang; Tûnah ka han inçhâwi sâng teh ang.

¹¹Favâi in p̃ai ang a, buhpâwl in hring ang; In thâw chuan mei angin a kâng ral ang che u.

¹²Mite chu chinai lung rawh ang mai an ni ang a, Hlîng kûng cheh chhum angin meia tuah an ni ang,” a ti a.

¹³Nangni hla taka mite u, ka thiltihte hi bengkhawn ula; Nangni hnâivâia awmte u, ka chakzia hi hre teh u.”

¹⁴Zion-a misualte chuan an hlâu va; Mi vervêkte chu hlauhna in a man ta e: “Tu nge kan zîngah mi kâng ral thei meiah khawsa ang? Tu nge kan zîngah kumkhaw mei tuar thei?” an ti a.

¹⁵Dik taka awma, dik taka thusawi mi, Hneh chhuahna ațanga hlâwkna duh miah lo, Kut thin khum meuhva thamna hnâwl t̃hin, Thisen chhuahna thû rêng rêng laka beng huptu, Thil sual hmu duh lova maimitchhînsan t̃hîntu chu:

¹⁶Sâng takah a awm ang a; Lung kulhte chu a invênhimna a ni ang; Châw-in an châwm ang a, Tui pawh a tlachham lo vang.

LAL ROPUI AWMNA RAM

¹⁷I mitin lal chu a ropuina nêen a la hmû ang a; Hla taka awm ram chu an la hmû ang.

¹⁸I thinlungin thil râpthlâk tak tak a ngaihtuah ang: “Khawiah nge ziaktu kha? Bûktu kha khawiah nge? Râlven in sâng zât chhiartu kha khaw’nge?”

¹⁹Mi kawlhse pui puite i hmû fo tawh lo vang a, Tawng danglam leh hriat thiam har tak taka tawng t̃hînte leh, I hriat thiam loh dangâwk tawngte pawh i hre tawh lo vang.

²⁰Zion khawpui, kût kan hmanna tûr hi thlîr ve teh u; Muanna in Jerusalem chu, in mitin a hmu ngei ang, T̃hiah leh tawh loh tûr biakbûk a ni a; A khen nghehnate chu phâwi a ni tawh lo vang a, A kaihna hruite pawh a chat leh tawh ngai lo vang.

²¹Chutah chuan LALPA ropuinain min awmpui ang a, Lui zâu tak takte leh lui t̃ête luanna hmun chu Indo lawng lian karfung neiten an pal tlang lo vang a, Lawng lian pui puite pawhin an kal p̃el hek lo vang.

²²(LALPA chu kan Rorêltu, LALPA chu Dân min petu, LALPA chu kan Lalber a nih avângin min chhandam ang);

²³I hruizên chu a dul a, lawng ngulah an thlung nghet thei ta lo, Lawng puanzâr an kai pharh thei bawh hek lo. Tichuan, râlâlâk sum tam tak an sem ang a, Kebâite takngial pawhin an chang vê ang.

²⁴Chû hmuna chêngte chuan, “Ka dam lo,” an ti ngai lo vang a, Chuta chêngte khawlohna chu ngaihdamsak an ni bawh ang.

BUNG 34

HNAM TIN CHUNGA HREMNA

¹Nangni hnamte u, thu ngaithla tûrin lo hnâi ula; Nangni mi tinte u, ngaihven rawh u! Leilung leh a chhûnga awm zawng zawngten hria sela, Khawvêl leh a chhûng ata lo chhuak zawng zawngte nêen.

²LALPA chu hnam tin chungah a thinur a, An sipaiho zawng zawng chungah a thinrim a; A tiboral vek dawn a, thah vek tûrin a pe tawh e.

³An mi ruangte chu paih daih tûr a ni a; An ruang chu a uih vut vut ang a, Tlâng pangte chu an thisenin a bual zêih zûih ang.

⁴Vân lama thil zawng zawng pawh khi a la tuihal vek ang a, Vânte pawh khi lehkhâ angin a la inzial bo vek ang; Vâna thil awm zawng zawng khi an la tla vek ang, Grêp hnahte a t̃l a, theipui rah a kûng ațanga a tla ang mai hian.

⁵“Ka khandaih chu vânah tihfai a ni ang a; Edom chungah a lo chhuk thlâ ang, Hrem tûra ânchhia ka lawh-ho chungah nêen.

⁶LALPA khandaih chu thisenin a bual khat a, Thâuvîn a far liam zawih zawih ang, Berâm no leh k̃el thisen te, berâmpa kal thâu ngei chuan. LALPA chuan Bozra-ah inthâwina a hlân a, Edom ramah chuan nasa taka insâmna a thlen bawh.

⁷Selepa te, bâwngpa tuai te, bâwng chal te nêen an talh bawh ang; An ramah chuan thisen a luang zêih zûih ang a, An vaivutte

chu hriakin a timawm vek ang.”

⁸LALPA phuba lâkna nî a ni si a, Zion tâna thungrulhna kum chu.

⁹An ram luite chu alkatra-ah a chang ang a, A vaivutte chu kâta a chang baw ang; A ram chu alkatra alh hluah hluah ang a ni ang.

¹⁰A chhûn a zânin thelh mih a ni lo vang a; Chatuanin a khu chho reng tawh ang. Thangthar lo la awm zêlah pawh a chhe tlawk tlawk ang a; Kumkhua pawhin tûma'n an pal tlang lo vang.

¹¹Kânghlâte leh sakuhten an ta-neih ang a, Chhimbuk leh choâk te an chêng ang. A chungah chuan buaina hrui leh lung kawrawng a khâi ang.

¹²An miṭhaho zînga mite chu rorêl tûrin an ko ang a, Mahse tûmah koh tlâk awm lovin an milian te chu engmah lo mai an ni ang.

¹³A lal in te chu hlingin a bâwm khat ang a, A kulh chu kângthai leh hlo-harten an bawh khat ang; Sihalte tawmbûk a ni ang a, Ostrikte tualchâina a ni ang.

¹⁴Thlalêr ramsate chu sihalte nêan an insûl zut ang a, Sathâr chu an ṭhiante kovin an bê vêl ang; Tah chuan zân lam sâte pawh an chawl vê ang a, Riabhûk khuarna tûr an haihchham lo vang.

¹⁵Chutah chuan chingpirinu in bû a chhep ang a, a tui baw ang, No a keu ang a, a thla hnuaiah a awp khâwm ang; Chutah chuan muchhiate pawh kawppui nei fir ferin an awm ang.

¹⁶“LALPA lehkhâbûah zawng ula, chhiar teh u: Chûng zîngah chuan kim lo engmah a awm lo vang a; Kawppui nei lo pawh a awm hek lo vang. Ka kâin thû a pe tawh a, A Thlaraubin a hrui khâwm tawh si a.

¹⁷An chan tûr ṭheuh ṭhum a vâwr a, Tehna hrui nêan an chan tûr ram ṭheuh a kutin a semsak a. Chû chu kumkhuaa an rochun tûr a ni a; An thlah lo la awm zêlte pawhin an rawn luah zêl ang.”

BUNG 35

ZION LA ROPUI TÛRZIA

¹Thlalêr leh ram chhia chu a lâwm ang a, Thlalêr chu rose par angin hlim takin a la pār ang;

²Hlim takin a la pār vul chûk ang a, Hlim leh lâwm takin an zâi ang. Lebanon ropuina chu a hnênah pêk a ni ang a, Karmel leh Sharon ropuina pêk a ni baw ang. LALPA ropuina leh kan Pathian mâwina chu An la hmu dâwn a ni.

³Kut chak lote chu tichak ula, Khûp zâwite pawh tichak rawh u.

⁴Hlâuthâwnna rilru pûte hnênah, “Hlâu suh la, intichak sauh sauh rawh u! Ngai rawh, in Pathian chu phuba la tûrin a lo kal dâwn, Pathian thungrulhna rawn hlen zo tûrin; A lo kal ang a, a rawn chhandam ang che u,” ti ang che u.

⁵Mitdelte mit chu tihmen a ni ang a, Bengngawngte beng chu tihvârin a awm tawh ang.

⁶Kebâte chu sakhi angin an zuang ang a, Ṭawngtheilo lei chu a zâi tawh ang. Thlalêrah chuan tui a lo chik chhuak zur zur ang a, Ram rovah te chuan lui a luang tawh ang.

⁷Lei châr laiah dîl a cham pût ang a, Ram ro chu tuihnâah a chang ang; Sihalte tuallênna leh an riahna hmun chu Hlobet te, phairuangte leh di hmunah te a chang ang.

⁸Chutah chuan kawngpui a awm ang a, kawngtûm nêan, ‘Thianghlimna Kawngpui’ an ti ang. Mi bawhlhlawh te chu an kal vê lo vang, Nimahsela, chûng mite tân chuan a ni baw si ang. Chutah chuan mi â-te pawh kal se, kawng an bo lo vang.

⁹Tah chuan sakeibaknei a awm tawh lo vang a, Ramsa koham pawh an kal hauh lo vang a, Hmuh tûr pawh a awm tawh hek lo vang. Tlan sâte erawh chu chutah chuan an lêng vêl tawh ang.

¹⁰LALPA tlan sâte chu an lo kîr leh ang a, Hla sa chungin Zion an lo thleng ang, An lû chungah chuan chatuana lâwmna an khum ang. Hlimna leh lâwmna an chang tawh ang a, Lungngaihna leh rûmna a kiang tawh ang.

BUNG 36

SENAKERIBAN LALPA A UAN KHUM

¹Lal Hezekia lal kum 14-naah chuan Assuria lal Senakeriba chu Judai rama kulh nei khuawng zawng rûn tûrin a lo thawk chho va, a la duai duai a.

²Assuria lal chuan Lakis khuawng Jerusalema Lal Hezekia hnênah sipai rual tam tak, ama aiawh Rabsake hovin a tîr a. Puansutu hmun panna kawngpui kianga dîl chhakta zâwk tuilâkna bulah chuan a ding a.

³Hilkia fapa Eliakima, lal chhûngkaw enkawltu te, ziaktu Sebna te, Asapha fapa Joaha te chu an va kal chhuak a.

⁴Chû Rabsake chuan an hnênah, “Hezekia hnênah hrilh rawh u, ‘Lal ropui, Assuria lalin heti hian a ti: “Tû lakah chuan nge rinna i nghah tlat dâwn le?”

⁵Indo tûrin chak tâwk leh remruat dân ṭha tâwk neiin i insawi ngawt a; thu puarpawlêng mai a ni e. Tûnah hian tû hi nge i rinchhana, ka laka i han hel ngam vei chu le?

⁶En ta che! I rinchhan Aigupta hi luang sâwp tiang ang lek a nih hi, miin a rinchhan vaih chuan, a sâwp ang a, a kut a chhun mai dâwn asin. Chutiang lek chu Aigupta lal Pharoa chungah innghatte awm dân zuk nia.

⁷“LALPA kan Pathianah asin kan inngah le,’ i ti a nih chuan, Hezekia kha a ni lo'm ni, a hmun sângte, a maichâmte la bova Judate leh Jerusalem hnêna, ‘Hê maichâm hmâah hian chibai in bûk tûr a ni,’ titu kha?”

⁸Tûnah hian, ka pu Assuria lal hnênah chuan intiam mai ula, a khalh thiam mi in nei dâwn phawt chuan sakawr 2,000 ka pê ang che u!

⁹Aigupta sakawr chung chuang mite leh tawlailîrte rinchhan chung hi chuan, engtin nge ka pu hnuaia hotu tê ber pawh in nawr lêt theih ang?

¹⁰Hê hmun tichhe tûr hian LALPA thû lovin ka lo kal dâwn em ni? LALPA chuan, ‘He ram bei tûr hian han chho la, han tichhe ngâl rawh,’ min ti asin,” a ti a.

¹¹Tichuan, Hilkia fapa Eliakima leh Joaha te chuan Rabsake hnênah, “I chhihhlawhte hnênah hian Aramik ṭawngin sawi ta che, kan hre thiam alâwm; kulha awm vê mipuite hriat tûrin

Hebrai Ƨawng chuan sawi lo hrâm teh,” an ti a.

¹²Mahse Rabsake chuan, “Ka pu hian in pu leh nangni hnên chauhva sawia, kulh chung a Ƨuhho, nangmahni ang bawka mahni zun leh êk la ring mai tûrte hnênah pawh mi tîr ve tho a ni lo vem ni?” a ti a.

¹³Tichuan, Rabsake chu a Ƨing a, Hebrai Ƨawngin ring takin a âu va, “Assuria lal, lal ropui thû hi lo ngaithla teh u!

¹⁴Lal chuan heti hian a ti e: ‘Hezekia hi inbumtîr suh u, a chhan chhuak thei dâwn hauh lo che u a nia;

¹⁵“LALPAN min chhan chhuak ngei dâwn asin; hê khawpui hi Assuria lal kutah pêk a ni lo vang,” tiin Hezekia hian LALPA rintîr che u suh se.”

¹⁶Hezekia thû chu ngaithla suh u; Assuria lal chuan heti hian a ti asin: ‘I inrem ang u khai, thilpêkte hlân tûrin lo kal chhuak ula; tichuan mi tinin mahni grêp in ei ang a, mi tinin mahni theipui in ei baw ang a, mi tinin mahni tuikhur Ƨeuh a mi in tlân dâwn nia;

¹⁷nangmahni ram ang, buh leh uaiin ram, chaw leh grêp huan awmna ram, olive kûng leh khawizu tamna ramah hian thi lova in nun theih nân ka rawn hruai dâwn che u alâwm.

¹⁸Chuvângin, Hezekia thu kha ngaichâng suh u, chuti lo zawng, “LALPAN min chhan chhuak mai ang,” tiin a bum mai ang che u. Khawi hnam pathianin nge Assuria lal kut ata an ram chhan chhuak tawh rêng rêng le?

¹⁹Hamath leh Arpad pathiante chu khawiah nge an awm? Sepharvaim pathiante chu khawiah nge? Samari khawpui hi ka kut ata an chhan chhuak em ni?

²⁰Ram tina pathian zawng zawng zîngah ka kut ata an ram chhan chhuak thei an awm tawh rêng em ni? LALPA hian ka kut ata Jerusalem hi a chhan chhuak bik ang maw?” a ti a.

²¹Mipuite chu an ngâwi Ƨhuap a, kam khat mahin an chhâng lo; “Chhâng hauh suh u,” tiin lalin thû a lo pe tawh si a.

²²Hilkia fapa Eliakima, lal chhûngkaw enkawltu te, ziaktu Sebna te leh thil chhinchhiahtu, Asapha fapa Joaha te chu an puan te pawt thlêr chungin Hezekia hnênah an va kal a, Rabsake thu sawite chu an va hrilh a.

BUNG 37

ISAIAH CHHAN CHHUAHNA THÛ A PUANG

¹Hezekian a lo hriat chuan a puan a pawt thlêr a, saiip puan a sin a, LALPA inah a lût a.

²A in chhûng enkawltu Eliakima te, ziaktu Sebna te leh, puithiam upate chu saiip puan sinin Amaza fapa, zâwlnei Isaia hnênah a tîr a.

³A hnênah, “Hezekian heti hian a ti: ‘Vawiin hi buaina te, zilhauhna te leh sawi chhiatna ni a ni; nau pian a hun tawh a, mahse hring chhuak tûrin chakna a awm si lo.

⁴LALPA i Pathian chuan Rabsake thu sawi zawng zawngte kha a lo hre ngei ang a, a pu Assuria lalin Pathian nung sawichhe tûra a rawn tîr a ni a, LALPA i Pathian chuan a thu hriatte chu a lo zilhâu lêt ve êm ang chu. Chuvângin a la damchhunte tân Ƨawngtai rawh khai,’ a ti a ni,” an ti a.

⁵Tichuan, lal Hezekia mite chu Isaia hnênah chuan an va kal a.

⁶Isaia chuan, “In pu hnênah chuan heti hian sawi ang che u, ‘LALPA chuan heti hian a ti: “Assuria lal chhihhlawhin Kei min sawi chhiatna thû i hriatte chu hlâu suh.

⁷A hnênah chuan thlarau ka tîr ngei ngei ang, thu thang a la hria ang a, ama ram lamah a hâu mai ang; ama ramah ngei khandaihin ka la tlûktîr dâwn a ni,” a ti e,’ a ti a.

SENAKERIBA VAUPÛNG LEH HEZEKIA ƧAWNGTAINA

⁸Rabsake chu a kîr leh a, Assuria lal chuan Lakis a chhuahsan tawh tih hriain, Libna khua a lo bei lai chu a va hmû a.

⁹Lal chuan Ethiopia lal Tirhaka chanchin, “Nangmah do tûrin a rawn thawk chhuak ta,” tih thû a hriat chuan, Hezekia hnênah zualko a tîr leh a,

¹⁰“Juda lal Hezekia hnênah chuan: ‘I Pathian i rin êm êma chuan, “Jerusalem chu Assuria lal kutah pêk a ni lo vang,’ tiin bum che suh se.”

¹¹En ta che! Assuria lalten ram zawng zawng tichhe tûrin an vâihmâ duak duak tih i hai loh kha; nang tehlul kha i him bik ang maw?

¹²Ka pate-hovin an tihchhiat tâk Gozan te, Haran te, Rezech te leh Telesara awm Eden mite kha an hnam pathiante khân an chhan chhuak em le?

¹³Hamath lal te, Arpad lal te, Sepharvaim khawpui lal te, Hena leh Ivah lalte kha khawiah nge an awm zawh tâk?’ tiin va hrilh rawh u,” a ti a.

¹⁴Hezekia chuan chû lehkha chu zualkote hnên a Ƨangin a lo dawng a, a chhiar a; Hezekia chu LALPA inah a chho va, LALPA hmâah chuan a pharh a.

¹⁵Hezekia chu LALPA hmâah chuan a Ƨawngtai ta a:

¹⁶“Aw, Sipaihote LALPA, Israelte Pathian, cherubte kâra awma chu, leilunga lalram zawng zawng chungah, nang chauh hi Pathian i ni. Vên leh lei hi i siam a ni a.

¹⁷Aw LALPA, i beng lo chhi la, lo ngaithla teh; i mit meng la, Aw LALPA, han en teh; Pathian nung meuh sawi chhe tûra Senakeriba thu rawn sawite hi lo ngaithla mawlh teh.

¹⁸LALPA, Assuria lalhote hian hnamte leh ramte hi an tichhe buaih buaih mai si a,

¹⁹an pathiante chu meiah an paihsak zêl baw a; chûngte chu pathian tak tak pawh ni lo, mihring kutchhuak—thing leh lung mai an nih avângin an tichhe rêng baw a.

²⁰Tûnah hian, aw LALPA kan Pathian, leia lalram zawng zawngin nang chauh hi Pathian awmchhun i ni tih an lo hriat theih nân a kut a Ƨang hian min chhan chhuak ang che,” a ti a.

SENAKERIBA CHUNGCHÂNGA LALPA THÛ CHU

²¹Amaza fapa Isaia chuan Hezekia hnênah, “LALPA Israelte Pathian chuan heti hian a ti: ‘Assuria lal Sennakeriba do zâwng a i Ƨawngtai avângin,

²²hei hi ama chungchânga LALPA thuchhuak chu a ni: “Nula thianghlim, Zion fanu chuan, A hmusit che a, a nuihzat a che; Jerusalem fanu chuan I hnung lamah lû a thin khum a che!

²³Tu nge i dêu leh i sawichhiat hi? Tû chungah nge râwl i tihrin veia Tu nge i han hawipir khum chu le? Israel Mî Thianghlîma chungah a ni asin.

²⁴I mi tîrh hmangin LALPA i han dêu sawh vêl a, ‘Ka tawlaillîr tam tak nên Tlâng sâng ka rawn chuan a, Lebanon tâwp rêl thlengin; A sidar thing sângte ka kit ang, A fâr thing thâ thâte nên; A ram tâwp thlengin ka luh chhuak ang a, A ramngaw thâ lai ber thlengin.

²⁵Ka tui lai chhuah chu ka rûi a, Ka ke artuiin ka tikang ta, A rinchhan luite tui zawng zawn chu,’ i ti vei a.

²⁶“Hmân aţang khân i lo hre na nge? Keima siam a ni a, hmasâng ata ka siam tawh a ni, tih hi? Tûnah chuan kulh nêi khawpuite chhu chhia a Thil chhe hlâwma chantîrtu atân maia ruat i ni e.

²⁷Chuvângin a luahtute chakna a beitham a; Mak tiin an chí-âi a; Phaitual hlobet ang leh Hnim hring ang mai, In chungah hnim tó ang leh Buh a len hmâa vuai ang mai an ni a.

²⁸Mahse i chênna hmun te, I lût leh chhuak te leh, Ka laka i thinurna chenin ka hria a che.

²⁹Ka laka i thinurna leh i vaupûng chuan Ka beng a lo thleng ta, Chuvângin i hnârah thîr kawm, i hmuiah thîrbarh ka vuah ang a, I lo kalna lamah bawk chuan ka hnûk kîr leh ang che,” tih hi.

³⁰“Hei hi in tân chhinchhiaha tûr a ni ang; Kuminah buh lo thar chu in ei ang, Nakumah a hlî aţanga thar in ei leh ang; Kum thumnaah chîng ula, seng ula, Grêp huan siamin a rahte ei rawh u.

³¹Juda chhûngkuua a la dam chhunte chuan Hnuai lamah zung an kâih leh ang a, Chung lamah rah an chhuah ang.

³²Jerusalem aţangin a la bângho an lo chhuak ang a, Zion Tlâng aţanga him dama la awmte an lo chhuak ang. Sipaihote LALPA thahnemngaihna chûng chu a ti ang,’ a ti a ni.

³³Chuvângin, LALPAN Assuria lal chungchângah heti hian a ti: ‘Hê khawpuiah hian a lo lût tawp lo vang, Hetah hian thal pawh a kâp hek lo vang, Phaw kengin a rawn hnaih dêk lo vang a, A hual nân lei an chhûng pâwng hek lo vang.

³⁴A lo kalna kawngah, Chu lamah chuan a kîr leh daih dâwn; Hê khawpuiah hian a lo lût lo vang,’ LALPAN a ti.

³⁵Keimah avâng leh ka chhiahhlawh Davida avângin Hê khawpui chhanhim tûr hian ka vêng dâwn si a,” a ti a.

SENNAKERIBA A TLÂWM, A THÎ

³⁶Chumi zân chuan LALPA vântirh koh chu a kal chhuak a, Assuria-ho riabûkah mi 185,000 a tihlum a; a tûk zînga mi an lo thawh chuan, mitthi ruang hlîr an lo ni ta mai a.

³⁷Tichuan, Assuria lal Sennakeriba chuan a chhuahsan a, a kal bo va, inah a hâw a, Nineviah a awm ta reng a.

³⁸A pathian Nisroka tempulah chibai bûka a awm laiin, a fapa Adrameleka leh Sarezera te chuan khandaihin an sât hlum a; Ararat ramah an tlân bo va. A fapa Esarhaddona chu a aiah a lo lal ta a.

BUNG 38

HEZEKIA NUNNA PAWHSEI

¹Chûng lai chuan Hezekia chu a dam lo va, a thi lek lek a. Amoa fapa, zâwlnei Isaia chu a hnênah a va kal a, “LALPAN heti hian a ti: ‘Dam chhuak zo lovin, i thi ngei dâwn a; chuvângin i chhûngkaw ro hi rêl fel rawh’ a ti a che,” a ti a.

²Ani chuan bang lam a hawi a, LALPA hnênah a ţawngtai a,

³“Aw LALPA, i hmâah hian thutak leh rinawmna thinlung pûa ka awm thînzia te, i mithmuha thil thâ ka tih te kha hre reng ang che,” a ti a. Hezekia chu lungchhe takin a ţap zawih zawih a.

⁴Isaia hnênah chuan LALPA thû a lo thleng a,

⁵“Kal la, Hezekia va hrilh rawh, ‘LALPA, i pa Davida Pathian chuan heti hian a ti: ‘I ţawngtai tih ka lo hria a, i mittui tlâ pawh ka hmû a; I damchhûng hun chu kum 15-in ka belhchhah ang che.

⁶Assuria lal kut aţangin hê khawpui hi ka chhan chhuak ang a; hê khawpui hi ka humhim bawk ang,” a ti,’ tiin va hrilh rawh,” a ti a.

⁷LALPA chuan a sawi tawh angin a hlen ngei ang tih chhinchhiaha chu hei hi a ni:

⁸En teh, Ahazaa ni zung tehnaa ni hlim kal tawh saw rahbi sâwmin ka tawlh kîrtîr ang,” a ti a. Tichuan, ni hlim tla hniam tawh chu rahbi sâwm a tawlhkîr leh ta a.

⁹Hei hi Juda lal Hezekia dam lovin a dam leh tâk hnûa a thuziak a ni:

¹⁰“Ka vânglai takin Seol kawngkâah ka lût ang a; Kum ka la neihte chu mi tihtâwpsak dâwn a nih hi,” ka ti a.

¹¹Hê minung ramah hian LALPA, YAH-a hi ka hmu dâwn lo ve; Khawvêla chêngte zîngah mi tûmah ka hmu pha dâwn lo ve.

¹²Ka dam chhûng hun a zo ta, Berâmpute puan in angin min hlihsak a; Puantahtu tih dan angin ka nunna hi ka tan tâwi a. Ani’n pawnbu ata mi chep thlâ a; Nangin achhûn azânin tâwpna mi thlen zêl a nih hi.

¹³Khawvâr thlengin ka chhût ka chhût a Sakeibaknei angin ka ruh zawn zawn a titliak vek ang a; Nang chuan chhûn aţanga zan thlengin min titâwp zêl si a.

¹⁴Kânghlâi leh vamûr ang maiin ka chîar nawk nawk a; Tûro angin ka rûm thîn a; Chung lam thlîrin ka mit a vâi zo va. Aw LALPA, hnehchhiaha ka awm tâk hi; Ka thlavâng min hauhsak teh!

¹⁵“Eng nge ka sawi tâk ang? Ama’n a sawi a, a ti vek zêl si a. Ka nun hrehawm tak avâng hian Ka dam chhûngin dîm têin ka kal dêm dêm tawh ang.

¹⁶Aw LALPA, miten hêng hi an nunpui thîn a; Hêng thil zawn zawnah hian ka thlarau nun pawh a awm a; Chuvângin, mi dînthar leh la, mi tinung leh ang che.

¹⁷Hrehawmna nasa tak ka lo tuar kha, Thlamuanga ka awm theihna tûr a lo ni si a; Chhiatna khur ata ka nun hi lainat takin mi chhan chhuak a, Ka sual zawn zawn i hnung lamah i paih bo daih a.

¹⁸Seol-in lâwmthû a hrilh thei lo che a, Thihnain a fak thei hek lo che; Leilâwta chhuk thlaten i thutak an beisei pha tawh hek lo.

¹⁹Mi nungten an dam lai ngeiin an fak zâwk ang che, Vawiina ka fak che ang hian; Pa chuan a fate hnênah i thutak chu a hriattîr tûr alâwm.

²⁰“LALPA chu min chhandam tûrin a inring reng a; Kan dam chhûngin LALPA inah Tîngtang nêen fakna hlâ kan sâ tawh ang,” ka ti a.

²¹Isaia chuan, “Theipui rah hlâwm khat han lâ sela, khawihlî pân laiah chuan bel sela, a dam mai ang,” a lo ti tawh a.

²²Hezekia chuan, “LALPA inah ka kal chho thei ang tih chhinchhiahna chu eng nge ni?” a ti a.

BUNG 39

BABULON PALAITE

¹Chutih lai chuan Babulon lal, Baladana fapa Merodak-Baladana chuan Hezekia dam loh thû leh a dam leh tâk thûte a lo hriatin, Hezekia hnênah lehkhâ leh thilpêkte a thawn a.

²Hezekia chuan anni chu a lo lâwm a, a ro hlu dahna in zawng zawnga silvar te, rangkachak te, mawsawla leh hriak man to te, a râlthum zawng zawng leh a ro bâwma hmuh theih thil awm zawng zawng chu a entîr vek a. Hezekia chuan a inchhûnga mi leh a lalram chhûnga mi entîr loh pawh a nei lo.

³Lal Hezekia hnênah chuan zâwlnei Isaia chu a va kal a, “Khâng mite kha khawî aţanga i hnêna lo kal nge an niha, i hnênah eng nge an rawn sawi?” a va ti a. Hezekia chuan, “Ram hla tak, Babulon aţanga lo kal an ni,” a ti a.

⁴Ani chuan, “I inah hian eng thilte nge an rawn en?” a ti a. Hezekia chuan, “Ka ina thil zawng zawng chu an en vek a; ka sum bâwma mi chu entîr loh pawh ka nei lo,” tiin a lo chhâng a.

⁵Isaia chuan Hezekia hnênah, “Sipaihote LALPA thû hi lo ngaithla teh le:

⁶Ngai rawh, i ina thil zawng zawng, tûn thlenga i pute aţanga an lo chhêk khâwl tawh sâ hi Babulon lama an kal bopui vek nî a lo la thleng ang; a kuangbâng pawh an hnutchhiah lo vang,’ LALPAN a ti.

⁷I tu leh fate, i thlah lo la piang tûrte ngei pawh an la hruai bo ang a; Babulon lal inah mi tilreh mai an la ni ang,’ a ti a.

⁸Hezekia chuan Isaia hnênah, “LALPA thû i sawi chhuah tâkte chu a ţha e! Ka dam chhûng tal chuan muanna leh thutak awm phawt mai sela,” a lo ti tawh reng a ni.

BUNG 40

PATHIAN MITE THLAMUANNA

¹“Thlamuan rawh u, ni e, ka mite hi thlamuan rawh u!” in Pathianin a ti a ni.

²Jerusalem hnênah thlamuanna thû sawi ula, Ama indona chu a tâwp tawh a, A khawlohnate chu ngaihdam a ni ta; LALPA kut ata a sualna zawng zawng lêt a lo tuar tawh si a.

³Thlalêra mi âu âw chuan: LALPA lamlian sial ula, Kan Pathian tân ram rovah lamlian tinglî rawh u.

⁴A ruam lai apiang tihsân a ni ang a, Tlâng tin mual tin tihhniam a ni ang; A kâwi laite tihngîl a ni ang a A bumboh laite tihrua a ni ang;

⁵LALPA ropuina chu tihlan a ni ang a, Mi zawng zawngin an hmu vek ang; LALPA kâ ngeiin a sawi tawh si a.”

⁶Âw chuan, “Âu chhuak ta che!” a ti a. Ani chuan, “Eng thu nge ka âupui ang?” a ti a. “Mi zawng zawng hlobet an ni a, An duhawmna zawng zawng pawh phûl pangpâr ang a ni.

⁷LALPA thâw-in a chhêm avângin Hlobet chu a vuai a, pangpâr chu a chuai a; Mihringte pawh hlobet mai an ni.

⁸Hlobet chu a vuai a, pangpâr chu a chuai a, Kan Pathian thû erawh chu chatuanin a awm reng ang.”

⁹Aw Zion, nang, chanchin ţha thlentu, Tlâng sâng chungah khian lâwn kâi rawh; Aw Jerusalem, nang, chanchin ţha thlentu, Ring takin i âw chhuah rawh, Âu vak rawh, zâm suh; Juda khuate hnênah, “In Pathian hi en rawh u!” ti ang che.

¹⁰Ngai teh u, Lalpa PATHIAN chu kut chak tak nêen a lo kal dâwn, A bânin ro a rêlsak ang; A lâwmman chu ama’n a kawl a, A tih tûr chu a hmâah chuan a awm bawk a.

¹¹Berâmpu angin a ran rualte a châwm ang a; Berâm notête chu a kuah khâwm ang a, A ângchhûngah pawmin, a no hruaite chu duat takin a enkawl ang.

¹²Tu nge mahni kutphaha tui teh ngaia, Tu nge vân zâu zâwngh khâpa teha, Tehna bûra leia vaivut zât teh chhuak tawh ngai le? Tu nge tlângte leh mualte hi bûknaa khâi chhuak thei le?

¹³Tu nge LALPA Thlarau chu kaihruaia, Tu nge remruatsaka, zirtîr thîin le?

¹⁴Tu hnênah nge thurâwn a lâka, hriattîrna a dawna, Tu nge rorêlna dik lo zirtîr thîin le? Tuin nge hriatna lo zirtîra, Hriatthiamna kawng lo entîr thîin le?

¹⁵Ngai teh, hnam tinte hi bâlţîna tui far khat ang lek, Bûkthlênga vaivut nâwi ang leka chhiar an ni; En teh, thliarkârte hi thil tereuhte angin a châwikâng nelh nelh a.

¹⁶Lebanon thingte chu tuah tham a ni lo va, A ramsate pawh hâlrâla inthâwina tham a tling hek lo.

¹⁷A hmâah chuan hnam tinte chu engmah lo ang an ni a, Engmah lo aia nêp leh tlâktlâi lo zâwk an ni.

¹⁸Pathian chu tû tlukah nge in ruat? Amah chu eng nêen nge in khâikhin?

¹⁹Hnathawktuin milim a chhûng a, Rangkachak chhertuin rangkachakin a luan a, Silvar chhûngtûin silvar khaidiat a chhûng thîin.

²⁰Chutiang pawh tlin vê lo mi retthei chuan Thing mawih lo tûr a thlang a; Amaha nghet taka hûn theih tûr milim ker thiam mi a zawng thîin.

²¹In hre ngai na nge? In ngaithla ngai lo maw? A tîr aţangin an hrilh lo che u em ni? Leilung din tîrh aţang khân in hre thiam lo maw?

²²Ani chu leilung kualkhungna chungah a thû a, A chhûnga chêngte chu khau ang lek an ni, Ani chuan vânte khi puan angin a zâr pharh a, Chêna tûra puan in an kâi pharh ang hian.

²³Miliente chu engmah lovah a dah a; Leia rorêltute pawh hman tlâk lohvah a siam a.

²⁴Phun ngheh an ni lo vang a, An chîng hek lo vang, Leah zung an kaih baw lo vang, Ani chuan a chhêm ang a, an vuai mai ang, Buhpâwl angin thlipuiin a nuai bo ang.

²⁵Mi Thianghlîma chuan, “Tû nêh hian nge min khaikhin ang a, Ka tlukpui âwm chu tu nge ni?” a ti.

²⁶In mit chu sâng takah lèn ruai ruai ula, Hêngte hi tû siam nge han en teh u, Sipai rual ang maia hrui chhuak thîntu chuan An zâa hmingin a ko va, a chakzia leh A thiltihtheihna a nasat êm avângin, Pakhat mah kim lo a awm lo.

²⁷Aw, Jakob-ho, engati nge hetia in tiha, Aw Israel-ho, engati nge “Ka kawng hi LALPA lakah thup a niha, Ka chanvo dik tak hi ka Pathianin min lâk bosak,” in tih ni?

²⁸In hre lo vem ni? In ngaithla ngai na nge? LALPA, chatuan Pathian, kâwlkil tâwpte Siamtu chu, A châu ngai lo va, a hah ngai hek lo. A finzia lah chhui phâk rual a ni lo.

²⁹Châte hnênah chakna a pê a, Chakna nei lote chu a tichak thîn.

³⁰Tlangvâlte pawh an hahin an châu ang a, Thalaite pawh an châu hnêp ang,

³¹LALPA nghâktute erawh chuan An chakna an tithar leh ang a; Mupuite angin thlâ-in an thlâwk chho vang, An tlan ang a, an hah lo vang, Kêin an kal ang a, an châu lo vang.

BUNG 41

PATHIANIN ISRAELTE A TÂNPUI DÂWN

¹Aw thliarkârte u, ka hmâah hian ngâwi thiap ula, Mipuiten an chakna tithar leh rawh se! Lo hnâi sela, thû te sawi ve rawh se; Rorêl tûrin i inhnaih tlang ang u.

²“Tu nge khawchhak lama mi kâi tho le? Diknain tu nge a ke bulah a koh? Tu nge a hnênah hnamte pê a, lalte chungarorêltua siam? Tu nge a khandaih lakah vaivut ang leka chantîra, Buhsî ang maia a thal hmâa awmtîr chu?

³Tu nge ûmzui a, a la rah ngai loh kawngah Him taka kaltîr zêl chu le?

⁴A tîr ata chhuan zawng zawngte biaa, Tih tûr hlen chhuak zêltu hi tu nge? ‘Kei, LALPA hi hmasa bera ka ni a; Kei hi hnunung bera ka ni baw.

⁵Thliarkârten an hmuhin an hlâu va, Kâwlkilte pawhin an hlâu baw a, Anrawn pan khâwm a.

⁶Mi tinin mahni thenawmte an pui a, An unaute hnênah, “Huai takin awm rawh u!” an ti a.

⁷Tichuan, mi themthiam chuan rangkachak chher mi a fuih a; Tuboha chher mîmtuin dolung chhana dengtu a fuih baw a, “A châr ngheh theih ta e,” a ti a; Che thei lo tûrin, a kilhnain a kilnget a.

⁸“Mahse nangni Israelte u, ka chhiahhlawh in ni a, Nangni Jakob-ho, ka mi thlan in ni a, Abrahama thlahte u, ka thiante in ni e.

⁹Nangni, kâwlkil aţanga ka lâk chhuah te u, Ram hla ber ata ka koh chhuah te u, ‘Ka chhiahhlawh in ni a, Paih thla lova ka thlan zâwk che u hi:

¹⁰Hlâu suh u, ka awmpui tlat che u hi; Zâm hek suh u, in Pathian ka ni si a. Ka tichak ang che u a, Ka ţanpui mawlh ang che u, Ka ţatna kut ding lamin ka chelh tlat ang che u.’

¹¹Ngai teh u, in laka thinur thîn zawng zawng chu, Mualpho tak leh zak takin an awm ang; Nangmahni khingtute chu engmahlo ang mai an ni ang a, an la boral vek ang.

¹²Nangmahni khing thintute chu— Zawng mah ula, hmuh tûr in hre tawh lo vang. Nangni dotute chu, engtih namah an ni lo vang a, Awm lo ang mai an ni ang.

¹³Kei, LALPA in Pathian hian in kut ding lam ka chelh tlat ang a, ‘Ka ţanpui dâwn che u alâwm, hlau suh u,’ ka ti ang.

¹⁴“Nangni changpât mai, Jakob-hote u, hlâu suh u, Nangni Israel mite u! Ka ţanpui dâwn che u hi,” tiin LALPA, Nangmahni Tlantu, Israel Mi Thianghlîma chuan a sawi e.

¹⁵“Buhchîlna khâwl thar ha hriam takah ka siam ang che u; Tlângte chu chîlin, in phîn darh vek ang a, Tlâng pâwngte chu favai ang lekah in siam ang.

¹⁶In zâp ang a, thliin a chhêm lêng mai ang.; Thâwngaleivirin a lèn darh vek ang; LALPA-ah chuan in lâwm ang a, Israel Mi Thianghlîma chu in chawimâwi ang.

¹⁷“Retheih leh pachhiaten tui an zawng a, mahse a awm si lo, Tuihâl dangchârin an awm ta. Kei, LALPA hian ka lo ngaichâng ang a; Kei, Israelte Pathian hian ka kalsan lo vang.

¹⁸Tlâng chârâh te lui ka luan chhuatîr ang a, Ruam laiah chuan tuihnâ ka tipût dûl dûl ang; Thlalêr chu dîlah ka chantîr ang a, Ram rovah tuihnâ ka luanîr ang.

¹⁹Thlalêrah sidar te, thingrî te, lénhmui leh hriak nei thing te ka phun ang a; Thlalêrah chuan fâr leh tufâr te, box* thing te ka phun ang.

²⁰Tichuan, chûng chu an hmuha, LALPA kutchhuak a ni tih an hriata, Israel Mi Thianghlîma siam a ni tih an man thiam theih nân.

MILEM BIAK SÂWT LOHZIA

²¹“In thiam thû chu sawi ta che u,” LALPAN a ti e. “In ţanfung ţa tâwka in ngaihte chu han chhuah rawh u,” Jakobho Lalberin a ti.

²²“Eng thilte nge lo thleng dâwn tih mi entîr rawh se; Kan lo ngaihtuah zui atân thil kal tawh te pawh mi entîr ang hmiang, Tâwpna lo thlen dân tûrte pawh kan lo hriatthiam phah mahna; A nih loh leh, thil thleng tûr min puan lâwsak teh se.

²³Tûn hnûa thil lo awm tûrte han entîr teh u, Eng ang pathian teh fakau nge in nih kan lo hriat theih nân, Mak ti taka kan lo thlîr theih tûr Thil ţa emaw, thil ţa lo emaw han ti ta che u.

²⁴Engmah in lo ni tak tak lo ve, In hnathawh pawh engmah lo mai a ni; Nangni thlangtute lah mi tenawm mai an ni asin.

²⁵“Hmar lam aţangin mi pakhat ka tung ding a, a lo kal dâwn e; Ni chhuah aţangin ka hming a lam ang a; Bêl vawtuin a hlum a rap kawî ang hian Miliente chu chirh angin a chîl nek ang.

²⁶Kan hriat theih tûrin tu nge atîr aţanga sawi chhuak ngai le? ‘Mi dik’ tia sawi tûr an awm em? Tûma’n an entîr thei lo va, Puang lâwk thei pawh an awm lo, In thu sawi ngaithlatu pakhat pawh an awm loh hi.

²⁷Kei chu Zion hnênah, ‘En rawh le, sâwta saw an awm saw!’ tia sawi hmasatu ka ni a. Jerusalem tân chanchin ţha thlentü mi pakhat ka pê ang.

²⁸Ka han en a, tûmah an awm lo va; An zîngah chuan ka han mitmei a, remruattu rêng an awm lo va, Thu zawha min chhâng thei tûr pawh an awm hek lo.

²⁹Mi tlâktlai lo vek an ni; An hnathawhte chu engmah lo mai a ni; An milim chhûnte pawh thlî leh buaina mai a ni e.

BUNG 42

LALPA CHHIAHHLAWH

¹“En teh! Ka Chhiahhlawh, ka chelh reng ţhin, Ka Thlan, ka rilru tilâwmtu chu! A chungah chuan Ka Thlarau ka dah tawh a; Jentailte chu dik takin ro a rêlsak ang.

²Aw-râwl chhuahin a âu lo vang a, Kawthlêrah hriat tûrin âw a chhuah hek lo vang.

³Luang sâwp a titliak lo vang a, Vaiza kuang mût a timit lo vang; Thutakin rorêlna dik a kengkawh ang.

⁴Leiah hian rorêlna a din hmâ chuan, Ani chu a beidawng lo vang a, a hlawhchham hek lo vang. Thliarkârte chuan a dân thû chu an ngaichâng reng ang.”

⁵LALPA Pathian, vânte siama kâi pharhtu, Lei leh a chhûnga thilte din chhuaktu, Leilung leh a chhûnga awmte kâi pharha A chhûnga awm mihringte hnêna thâwkna leh, A chung a kalte hnêna thlarau petu chuan heti hian a ti:

⁶“Kei, LALPA hian diknain ka ko che a, I kut ka chelh reng ang a; Mi tin thuthlung atân ka vêng reng ang che a, Jentailte êntu atân ka siam ang che;

⁷Mitdelte mit tivâr tûr te, tân ina saltângte leh, Tân in thim hnuaia ţhûte chhuah zalên tûrin.

⁸LALPA ka ni a, chû chu ka hming a ni; Ka ropuina chu mi dang hnênah ka pe lo vang a, ka fakawmna hi milim ker chawpten min ţâwmpui hek lo vang.

⁹Ngai teh u, thil hmasâte chu a her liam ta a, Thil thar ka puang e; A lo thlen hmâ hian ka hrilh che u hi.”

LALPA FAK RAWH U

¹⁰LALPA hnênah hla thar sa rawh u, Kâwlkil tin aţangin Amah chu fak ula, Nangni tuifinriata chhuk thlâte leh a chhûnga awmte leh, Thliarkârte leh a chhûnga chêngte u, fak rawh u!

¹¹Thlâlêr leh a khawpuite chuan an âw chhuah sela, Kedar-ho chênna khuate pawhin fak rawh se. Sela khuaa awmte chu zâi sela, Tlâng chhîp aţangin âu vak vak rawh se.

¹²LALPA hnênah ropuina hlân sela, Thliarkârah te chuan Amah fakna thû puang rawh se.

¹³LALPA chu mi chak tak angin a thawk chhuak ang a; Indo mi angin Ama ţahnemngaihna chu a chawkw tho vang. A âu chhuak ang a, ring taka âuvin A hmêlmâte chu a hneh ang.

LALPA TÂNPUINA THUTIAM

¹⁴“Hun rei tak ka ngâwi a, zah ka ngai ţhin a, Tûnah zawng, hmeichhe nau vei ang maiin ka ţê tuarh tuarh tawh dâwn, Thâwk lâ-in ka bei thut tawh mai ang.

¹⁵Tlâng leh mualte ka tichhia ang a, Chuta hnim hringte chu ka tiro vek ang; Luite chu thliarkârah ka chantîr ang, Dîlte chu ka tichâr vek bawkw ang.

¹⁶Mitdelte chu an la hriat loh kawngah ka hruai ang a; An la hriat ngai loh kalkawngah te chuan ka hruai dâwn a ni. An hmâa thim chu êngah ka siam ang a, Kawng kâwi pawh ka tingîl bawkw ang. Hetiang hian ka tihsak dâwn a, Ka kalsan hauh lo vang.

¹⁷Milim siam chawp ringa, an milim chhûn chawp hnêna, ‘Kan pathiante in ni e,’ titute chuan Hnar kîr an la tâwk ang a, an la mualpho hlê ang.

¹⁸Nangni bengngawngte u, ngaithla teh u; Nangni mitdelte u, en rawh u, tichuan in hmu thei dâwn nia.

¹⁹Tu nge ka chhiahhlawh anga mitdela, Tu nge ka mi tirh anga bengchhêt le? Tu nge LALPA chhiahhlawh anga mitdel, Mi fankim, mitdel si hi le?

²⁰Thil tam tak in hmû a, in pawisa si lo va; In ngaithla nâ a, in hre thiam si lo.

ISRAELTE LUHLULZIA

²¹LALPA chu Ama dikna ngei chuan a tilâwm a; Dân chu châwi sângin, zah tlâkah a siam dâwn a ni.

²²Hêng mite erawh hi chu rawk leh suam tâwk an ni a; An zâin thang khurah an âwk vek a, Tân in chhûngah thup bo an ni a; Chhantu awm lova tuarna hmabâk mai an ni; “Chhuah leh rawh u!” titu tûmah an awm si lo.

²³In zîngah tu nge lo bengkhawn ta ang? Lo ngaihvena lo ngaichâng zui zêl tûr chu tu nge?

²⁴Tu nge rawk atân Jakoba pê a, suam atâna Israela petu chu? Kan suahsual khum ţhin LALPA chu a ni lo vem ni? A dân zâwm duh lovin, a duh angin an nung duh hek lo.

²⁵Chuvângin, a thinurna mei chu a chungah a bun ta a, Indona nasa tak mai chu; A vêlin meiin hâlkhang mahse, A hre si lo va; Meiin kâng chawrh chawrh mahse, A pawisa duh hek lo.

BUNG 43

ISRAELTE CHHANTU

¹Tûnah hian, aw Jakob, nangmah siamtu LALPA chuan heti hian a ti, Aw Israel, nangmah dintu chuan: “Hlau suh, ka tlan chhuak tawh che asin; I hmingin ka ko che a, ka tâ i ni e.

²Tuite chu in dâi kâi lai pawhin ka awmpui zêl ang che u-a; Lui in kân hunah pawh a chîm pil lo vang che u. Meia in kal tlang hunah pawh in kâng lo vang a, Mei alh pawhin a hliau ve lo vang che u.

³Kei hi LALPA i Pathian, Israel Mi Thianghlîma, I chhandamtu chu ka ni si a; Nangni tlan chhuah in nih theih nân Aigupta ka pê a, In aiah Ethiopia leh Seba ka pe ta.

⁴Ka ngaiha hlu tak in nih avângin Ngaihsân in hlawh ta e, Ka hmangaih si che u a; Chuvângin, in tân mite pên, in aiah mi

dangte nunna ka pê ang.

⁵Hlau suh u, in hnênah ka awm si a; Khawchhak ata in thlahte ka rawn hruai ang a, Khawthlang ațangin ka hruai khâwm ang che u;

⁶Hmar lam hnênah chuan, ‘Chhuah rawh u!’ ka ti ang a, Chhim lam hnênah pawh, ‘Chelh khawtlai suh u!’ ka ti bawh ang. Ka fapa hla taka mite chu rawn hruai ula, Ka fanute chu kâwlkil ațangin rawn hruai rawh u—

⁷Tûpawh ka hming pu tawh phawt chu Ka ropui nâna ka siam a ni si a; Ka siam leh ka din ngei a ni.”

⁸Mit nei renga mitdel, beng nei renga bengngawngte chu rawn hruai rawh u.

⁹Nham tinrêngte chu lo kal khâwm sela, Mi tinrêngte chu rawn inkhâwm rawh se. Tu nge an zîngah thil hmasâte puanga entîr thei le? Thiam an chan theih nân hriatpuitu rawn hruai sela, A nih loh leh ngaithla sela, “Thutak a ni,” ti rawh se.

¹⁰“Ka thuhretute in ni,” LALPAN a ti, “Ka chhiahhlawh, ka thlan in ni a, Kei hi Amah chu ka ni tih in hriata, in rina, in man thiam theih nân, Ka hmâah khân Pathian dang rêng siam a ni lo va, Keima hnûah tû dang mah siam an awm zui bawh hek lo.

¹¹Kei, Keimah ngei hi LALPA chu ka ni a, Keimah lo chu chhandamtu dang tûmah an awm lo.

¹²Keima’n ka sawi a, ka chhandam a, ka puang a, In zîngah ramdang pathian a awm lo; Chuvângin, ka thuhriatpuitute in ni, Kei hi Pathian chu ka ni,” LALPAN a ti.

¹³Hun leh ni awm hmâ pawhin Kei chu ka awm tawh a; Ka kut ata mi chhuh thei tûmah an awm lo; Ka tih tawh vêk chu, sût leh thei tu nge awm?”

¹⁴LALPA, nangmahni Tlantû, Israel Mi Thianghlîma chuan heti hian a ti: “Nangmah vângin Babulonah ka tîr ang, Kaldai-hote chu an intihhlîma lawngte nê, Râltlân angin an rawn kâwi vek ang.

¹⁵Kei hi LALPA, in Mi Thianghlîma, Israel-ho Dintu, in Lalber chu ka ni.”

¹⁶LALPA, tuipua kawng siamtu, Tuipui zâu taka kawngpui sialtu,

¹⁷Sakawr leh tawllailîr, sipai leh chakna rawn thlentû chuan, (Chûng chu an tlu vek ang a, an tho leh tawh lo vang; Tihchimih an ni ang a, khâwnvâr anga herh-mih an ni ang):

¹⁸“Thil awm hmasâte kha hre reng lo ula, Thil hluite pawh ngaihtuah suh u.

¹⁹Khai le, thil thar ka ti dâwn a nia, A lo irh chhuak nghâl mai dâwn, Hre thiam tak che u maw? Thlâlêrah te pawh kawng ka sial ang a, Ram rovah luite ka luanîr ang, ka mi thlan, ka mite tui in tûr chu.

²⁰Ramhnuiaia ramsaten min châwimâwi ang, Sihalte leh ostrikte chena thlâlêra tui ka pêka, Ka thlan, ka mite in tûra ram rovah lui ka luanîr dâwn avângin.

²¹Ka tâna ka siam hêng mite hian min fak zêl ang.

RINAWM LO ISRAELTE TÂNA NGENNA

²²“Aw Jakob, nang chuan min la âu lo ta cheu va; Aw Israel, min ning ta a nih hi.

²³I hâlral thilhlân atân berâm mi rawn lâksak duh lo va, I inthâwina hmangin mi châwimâwi ngai hek lo. Thil hlâna rawngbâwl tûrin ka phût che a ni lo, Rimtui ngiatin ka tihautak hek lo che.

²⁴Tangkân fû mi leisak ngai lo va, I inthâwina thâuvîn mi titlai ngai hek lo; Mahse i sualate hian mi delh rit a, I khawlohnate hian mi ti-hah hluah hluah thîn.

²⁵“Kei hi, keima tân liau liauva in bawhchhiatnate thâi botu ka ni a; In sualate chu ka hre reng tawh lo vang.

²⁶Thil kal tawh thlîr kîr îla, I sawiho ang u hmiang; Thiam in chan theih nân in thiam thû sawi rawh u.

²⁷In thlahtu hmasa ber kha a lo sual ta a, In palaite pawhin ka lakah an bawhchhe bawh a.

²⁸Chuvângin, hmun thianghlîma hotute chu ka hnâwl ang a, Jakob an chhahia khum se, Israela chu hauh bûrah chang rawh se.

BUNG 44

ISRAELTE CHUNGA PATHIAN MALSÂWMNA

¹“Lo ngaithla teh, âw, nang Jakob, ka chhiahhlawh, Ka mi thlan Israela i ni a.

²LALPA, nangmah siamtu, Chhûl ata dintu che chuan a țanpui ang che: ‘Hlâu suh, âw, ka chhiahhlawh Jakob; Nang pawh Jeshurun, ka thlan tawh che kha.

³Tuihâl chu tui ka intîr ang a, Lei châr chu tui ka chîmtîr ang; I thlahte chungah Ka Thlarau ka leih ang a, I tû leh fate mal ka sâwm ang;

⁴Hnim hring zîngah an lo chawr chhuak ang, Tui luang kama tuipuisuthlahte ang hian.’

⁵Mi pakhatin, ‘LALPA tâ ka ni’ a ti ang a; Mi dangin Jakoba hming a inchhâl ang; Mi dang lehîa kutah ‘LALPA tâ’ tia ziakin A hmingah Israela a pû bawh ang.

PATHIAN DANG AN AWM LO

⁶LALPA, Israelte Lalber leh an Tlantû, Sipaihote LALPA chuan heti hian a ti: ‘Kei hi Hmasabera leh Hnuhnungbera ka ni; Keimah lo chu Pathian dang rêng an awm lo.

⁷Keimah anga thil puang lâwk thei tu nge awm? Han puang sela, a indawtin mi han remsak ang hmiang, Hman laia mite kha ka ruat vek an ni asin. Thil thleng mêk leh lo thleng tûrte chu han entîr ve teh se.

⁸Hlâu suh ula, zâm hek suh u; Khâng hun ațang khân ka puangin ka hrilh tawh lo che u em ni? Nangni hi ka thuhriatpuitute in ni. Keimah lo hi Pathian dang a awm rêng em ni? Lungpui pawh a dang rêng a awm lo; pakhat tê pawh a awm ka hre hek lo.’

MILEM BIAK ÂTTHLÂKZIA

⁹Milim siamtute chu, an vâin engmah lo mai an ni a, An ngaihhlut thilte chu an hlâwpui hauh lo vang; Mahni tâna thuhretua awm mai an ni; An mualphona tûr lek a nih hre thei lo leh hmu thei lo an ni.

¹⁰Tu nge mahni tâna tângkai hlei lo pathian lem dina milim chhûng thîn le?

¹¹A thurualpuite pawh an la mualpho vek ang; Hnathawktute pawh mihring vê mai an ni a. Rawn kal khâwmin dîng khâwm pawh ni se Hlâu êm êmin an mualpho tâng dâwn a ni mai.

¹²Thiridêng chuan chaicheh nêl meilingin hna a thawk a, Tubohvin a chher a, A bân thâ a chhawr a. A rilthâm chuan a thâ a zawi a, tui a in loh chuan a châu thîn.

¹³Mistiri-in a tehnain a teh vêl a, pensil-in a rîn kual a; A nawh mâmna in a nâwt a, a tehnain a chhinchhiah a, Mihring lemah a chhuah ta a, A in chhûnga hûn mawî atân mihring lem tha tak a siam thîn.

¹⁴A hman tûrin sidar thing a kit a, Fâr leh sasaw thing a lâ a; Ramngâwa thing zîngah zuah bîk te a nei a, Fâr thing a phun a, ruahin a chhâwm a.

¹⁵Miten thingtuah atân an hmang ang a, A then chu intih-lum nân an fawm ang, A tuah alh ang a, chhang a ur ang; Chumi chuan pathian a siam a, a bia a; Milim ker a siam a, bawkkhupin chibai a bûk a.

¹⁶A zâtve thing tuah-ah a hmang a; A zatve danga a sa chhûm chu a ei a; Sâ a hem hmin a, a in ei puar ta a. Meiah a in ai lum a, “E khai! a va lum ta vê, meî pawh ka hmu ta e,” a ti thîn.

¹⁷Mi dang leh chuan pathian lim a siam a, Milim a ker a. A hmâah a bawkkhup a, chibai a bûk a, A tawngtâi a, “Mi chhandam rawh, ka pathian i ni si a!” a ti a.

¹⁸An mawl êm a, hriat thiamna rêng an nei lo; Ani chuan an hmuh theih loh nân an mit a hupsak si a, An hriat thiam theih loh nân an thînlung a khârsak bawk a.

¹⁹Tûma’n thînlung taka ngaihtuah an awm lo, Thil chinchâng hriaa, a awmzia hria pawh an awm hek lo, “A zahvê meiah ka tuah a, a vâmin chhang ka ur a; Sa ka hem hmin a, ka ei ta a; A bân zawnng tenawm tih nân ka hmang ang maw? Thing tum hmâah ka kûn ang maw?”

²⁰Meivâpin a inchâwm a; bum hnû thînlung chuan a hruai sual a; A nunna pawh a inchhanhim thei si lo, “Ka kut dîng lamah hian bumna a awm a ni ang?” tih nachâng rêng a hre pha lo.

ISRAEL CHU THEIHNGHILH A NI LO

²¹Aw Jakob, hêngte hi hre reng la, Nang Israel, ka chhiahhlawh i ni a; Ka dîn che a, ka chhiahhlawh i ni bawk a; Aw Israel, ka theihngihlil ngai lo vang che!

²²I sualna chhûm zîng mup leh Chhûm chhah tak ang a i bawhchhiatna chu ka thai bo ta. Ka tlan tawh si che a, ka hnênah lo kîr rawh le.”

²³Aw vânte u, zâi rawh u, LALPAN a tizo ta! Nangni lei hnui lama mite u, âu rawh u; Nangni tângte, ramngâw leh a chhûnga thing tîrêngte u, Zâin âu dîr dîr rawh u. LALPA chuan Jakob-ho chu a tlan tawh a, Israelte zîngah a inchâwimâwi ta e.

JUDATE TUNDIN LEH TÛR THÛ

²⁴LALPA, nangmah Tlantu, chhûl ata siamtute che chuan tihian a ti: “Kei hi engkim siamtute LALPA ka ni a, Mahni chauhvâ vâv kâi pharhtu ka ni a; Mahni chauhvâ leilung phah chhuaktu ka ni;

²⁵Dawheh-ho chhinchhiahna tikhawlohsaka Aienthiante ti â-tu ka ni a; Mi fîngte finna kalhthlatu, an hriatna mawlzia hâi langtu ka ni.

²⁶Mahni chhiahhlawh thûte nemnghehtu, Mahni tîrkohte remruat ang tihputlinsaktu ka ni a; Jerusalem hnêna, ‘An luah leh ang che,’ ti-a, Juda khuate hnêna, ‘Dîn thar leh in ni ang,’ titu chu ka ni. A hmun chhe laite ka siam tha leh ang, titu chu ka ni.

²⁷Tui thûk hnêna, ‘Lo kangchat rawh! I luite pawh ka tikang vek dâwn’ tia hrilhtu;

²⁸Kura chungchâng, ‘Ani chu ka berâmpu a ni a, Ka duh zâwnng a rawn hlen chhuak ang,’ ti-a, Jerusalem hnêna, “Dîn thar leh i ni ang,” ti-a, Temple hnêna, “I lungphûm chu an rem tha leh dâwn,” titu chu ka ni.

BUNG 45

PATHIAN MI RUAT KURA

¹LALPA chuan a hriakthih Kura, A hmâa hnamte tudawla, lalhote râlthuam hlihsaka, A hmâa kawngka chu hawnga, tuma khâr tawh loh tûra A kut dîng lam ka chelh tlata hnênah chuan heti hian a ti:

²I hmâah ka kal ang a, kawng kâwite ka tîngîl ang; Dâr kawngkhârte chu ka chhu sawm ang a, A kalhna thîr tlâwnge pawh ka titliak ang.

³Thim zînga ro inphûm te, Hmun ril taka hausakna thuhrûkte ka pê ang che; Tichuan Kei, i hming ngeia kotu che LALPA hi Israelte Pathian chu ka ni tih i hriat theih nân.

⁴Ka chhiahhlawh Jakoba avâng leh, Ka thlan Israela avângin i hming ngein ka ko che a; Min hre lo mahla, i hming hi keima sak a ni asin.

⁵Kei hi LALPA ka ni a, tû dang mah an awm lo va; Keimah lo chu Pathian dang rêng an awm lo. Min hre lo mahla, i tâiah ka hrêng reng ang che,

⁶tichuan, keimah lo chu tû dang mah an awm lo, tih hi ni chhuah a tanga ni tlâk thlenga an hriat theih nân. Kei hi LALPA ka ni a, tû dang mah an awm lo.

⁷Êng ka siam a, thim pawh ka siam bawk a, Vanneihna ka siam a, vanduaîna ka siam bawk; Kei, LALPA hian hêng zawnng zawnng hi ka tih a ni.’

⁸Nangni vânte u, chung lam a tâng khân han sûtîr ula, Vânte khian dikna rawn sûtîr rawh se; Leilung chu lo inhawngin chhandamna rah chhuak sela, Dikna nêl lo tî chhuak ho rawh se. Kei, LALPA hian ka siam tawh si a.

⁹Mahni Siamtu khin chîng chu a chung a pik e! Leia bellei leh bêl keh them chu lo indo rawh se! Hlum chuan bêl vawtu hnênah, ‘Êng atân nge mi siam dâwn?’ a ti thei em ni? I thilsiam chuan, ‘A themthiam lo êm mai’ a ti dâwn che em ni?

¹⁰Mahni pa te hnênah, ‘Êngah nge min hrin?’ tia, a nu hnênah, ‘Êngah nge heti khara mi lo hrin?’ titu chung chu a pik e.”

¹¹LALPA, Israelte Mi Thianghlisma leh anmahni Siamtu chuan heti hian a ti: “Ka fate awm dân tûr chungchângah mi chachhuah a; Ka kutchhuak thilah thu neih in tum a nih hi.

¹²Lei hi ka siam a ni a, A chhûngah mihringte ka siam baw k a. Keima kut ngeiin vânte khi ka kâi pharh a, A chhûnga awm zawng zawng ka thuhnuaia mi an ni asin.

¹³Ani chu diknain ka kâi tho va, A kalna apiangah ka hruai zêl ang; Ani chuan ka khawpui chu a siam leh ang a, Ka saltângte a chhuah zalên dâwn a ni, Lâwmman beisei vâng ni lovin,” Sipaihote LALPAN a ti.

LALPA CHU CHHANDAMTU AWMCHHUN

¹⁴LALPA chuan heti hian a ti: “Aiguptaho thawhrim rah te, Kushho sumdâwnna te, Sabea ho mi chak pui puite chu in tâ ni tûrin kaw l bun chungin an lo kal ang a, Khaidiat bun chungin an lo kal ang; Kûnin chibai an la bûk ang che u; ‘Nangmahniâh Pathian a awm Chiang a, Tû dang hnênah mah a awm lo, Pathian dang rêng a awm lo,’ tiin in duhsakna an la dîl ang,” tiin.

¹⁵Pathian inthup chu i va han ni tak êm, Aw Israelte Pathian, Chhandamtu!

¹⁶An vâiin an la zak ang a, an la mualpho baw k ang; Milem siamtute chu, an la buai nuaih nuaih ang.

¹⁷Israelte erawh chu, chatuan chhandamnain LALPAN a la chhandam ang a; Zahna leh mualphona chu chatuanin i tâwk tawh lo vang.

¹⁸Vânte siamtu LALPA chu, Pathian a ni a, Lei hi a din a, a siam a, A tinghet baw k a, A lothlâwn maiin a siam lo va, Chên nân a siam zâwk a ni: “Kei hi LALPA ka ni a, tû dang mah an awm lo.

¹⁹A rûk têa lei hmun thima thu sawi ka ni lo; Jakoba thlahte hnênah, ‘A thlâwn maiin min zawng rawh u,’ ka ti ngai hek lo; Kei, LALPA hian diknain thu ka sawi a, Thu dik tak a ni ka puan thîn ni.

²⁰“In ko khâwm ula, lo kal rawh u; Hnam tin ata lo tlan chhuakte u, lo hnâi teh u. Thing tum kerchawp milim zâwn a, Mi chhandam thei lo pathian hnêna tawngtai thînte hian Engmah hriatna rêng an nei lo.

²¹In thû chu rawn thlen ula, rawn inrâwn khâwm teh u. Hêng hi tu nge hmâsâng ata lo puanga lo sawi tawh le? Kei, LALPA hi ka ni lo vem ni? Keimah lo chu Pathian dik leh Chhandamtu, Pathian dang rêng an awm lo; Keimah lo chu tû dang mah an awm hauh lo.

²²“Kâwlkila mi zawng zawngte u, Mi en ula, chhandamin awm rawh u! Kei hi Pathian ka ni a, tû dang mah an awm lo ve.

²³Mahni inchohlin chhia ka chham tawh a; Thû chu diknain ka kâ ata a chhuak tawh a, a lo kîr tawh lo vang. Ka hmâah khûp tinrêng an thîngthî ang a, Ka hnênah lei tinrêngin chhia an la chham ang.

²⁴LALPA-ah chauh hian a ni dikna leh chakna ka neih ni. A hnênah mite an lo kal ang a, A laka thinur zawng zawng chu An la zak hle dâwn a ni,’ a la ti ang.

²⁵Israela thlah zawng zawngte chu LALPA-ah Thiam changin, chawimâwiin an awm ang.’

BUNG 46

PATHIAN NUNG LEH NUNNA NEI LO MILEM

¹Bela chu a kûn reng a, Neboa chu a bungbû a; An milimte chu sa leh ran chungah an hlâng a. In tawllailrte chu in phurh hnemtîr si a, Rante tân a ritsak mang e.

²Kûnin an bungbu dîn ta reng mai; Phurrit an inchohlin thei si lo, Anmahni pawh sala tâng tho an ni si a.

³“Aw, Jakoba leh Israela chhûngte zînga la damchhun zawng zawngte u, Ka thû hi lo ngaithla rawh u; Chhûla in awm lai aţanga ka chelh reng, Pian tirh aţanga ka pawm tlei in ni a.

⁴In tar thlengin Keimah ka ni reng ang, Lu tûakte chenin ka pua ang che u! Ka siam in ni a, ka paw baw k ang che u; Ka chaw lianin ka hum tlat ang che u.

⁵“Tû tlukah nge min chan anga Tû nê nge min khaikhin dâwn le?

⁶Ip aţangin rangkachak an bun chhuak tawh va, Bûknain silvar an bûk chhuak a; Rangkachak chhertu an ruai a, ani chuan pathianah a lo siam a; Tichuan, bawkkhupin chibai an bûk ta a.

⁷An koki-ah an zâwn a, a hûnna tûrah an hûng a; An dahna hmunah chuan a dîng reng a, a che sawn thei si lo va. Âu vak vak mahse, a chhâng lêt thei chuang lo va, An manganna ata a chhan chhuak thei hek lo.

⁸“Rilru puitling takin ngaihtuah ula; Ngaihtuah chhuak leh thîn ta che u, âw, nangni bawchhetute u.

⁹Hman lai thilte chu hre reng rawh u, Kei hi Pathian ka ni a, tû dang mah an awm si lo; Pathian ka ni a, keimah ang tûmah an awm hek lo,

¹⁰A tîr ata a tâwp leh dân tûr chena Hmasâng aţanga thil lo la awm tûrte chu puang chhuakin, ‘Ka remruat chu a dîng nghet ang a, Ka duh zâwnng chu ka ti vek ang,’ ka tih thîn kha.

¹¹Khawchhak aţangin mupui rilâm ka ko va, Ka thurâwn ang hlen chhuak tûr mi pakhat, ram hla taka mi chu. Ka sawi tawh a; a lo thleng ngei ang. Ka tum tawh chu ka hlen chhuak ngei baw k ang.

¹²“Nangni mi luhlul, dikna hlat taka awmte u, lo ngaithla teh u:

¹³Ka dikna ka rawn chhawp hnâi a, a awm hla tawh lo vang; Ka chhandamna chu a khawtlâi dâwn lo ve. Zion-ah chuan chhandamna ka dah ang a, Israel tân ka ropuina ka dah ang.

BUNG 47

BABULON MUALPHONA

¹“Aw, Babulon nula thianghlism, Lo chhuk la, vaivutah thu rawh; Lalthutthlêng awm lohna leiah kân thu la, Aw, Kaldaiho fanu! ‘Hmêltha dâwn tuaite,’ tih i hlauh tawh dâwn si lo.

²Buhher khâwl vuan la, buh her rawh. I khuh puan dah la, i pawnfên hlîm rawh, I mal hlîm la, luite dâi kâi rawh.

³I saruakna chu hlîm lan a ni ang a, Ni e, i zahmawh chu miten an hmu ngei ang; Phuba ka la dâwn a, tûmah ka dîm lo vang.”

⁴Min Tlantu chu, a hming Sipaihote LALPA a ni, Israelte Mi Thianghlisma chu.

⁵“Aw, Kaldaiho fanu, ngâwi rengin thû la, thim zîngah lût rawh; ‘Lalramte Lalnu’ an ti tawh lo vang che.

⁶Ka mite chungah chuan ka thinur a; Ka rochan chu ka tibawrhâng a, Anni chu ka pê che a. An chungah lainatna rêng i lo lantîr lo va; Tarhote pawh phurrit namên lo i lo bel zêl si a.

⁷Kei hi kumkhuaa lalnûa awm reng tûr ka ni,’ te i ti vêl a, Tichuan, hêng thilte hi i bengah rawngah i thun duh lo va, A tâwp dân tûr lah i bengkhawn duh hek lo.

⁸“Chuvângin, nang, nuamtâwl ringawt thlahlela Thlamuang âwm taka awm der der nu, hei hi hre rawh, I rilruin, ‘Keimah lo liam tû dang mah an awm lo ve; Hmeithâi mai zawng ka ni lo vang, Fa lu pawh ka hloh hek lo vang,’ i ti vei a.

⁹Mahse hêng thil pahnihte hi, ni khat thil thûah i chungah a lo thleng thut dâwn: Fate i chân bākah, i la hmeithâi ngei ang. I dâwi thil chi tinrêng nêng engtiang pawhin invên tum er teh mahla, I chungah na takin a lo thleng dâwn tho tho.

¹⁰“I suahsualna chu ngaihangam phah nân i hmang a; ‘Tûma’n min hmu lo ve,’ te i ti a; I finna te, hre ve tâwka i inngaihna te khân a bum che a; I rilrû-ah ‘Keimah lo liam tû dang mah an awm bik lo ve’ i ti a.

¹¹Chuvângin, thil tha lo i chungah a lo thleng dâwn, A lo chhuahna chin i hre lo vang. Mangannain a tlâkbuak dâwn che a, I pumpelth thei hauh lo vang. I chungah chhiatna a lo thleng thut ang a, A ngaihna rêng i hre lo vang.

¹²“I dâwithiamna leh i âikaih thiamnate nêng lo tâng ta che, I tleirâwl tîrh aţanga dâwi i lo zir tawh zawng zawngte hmang la– I hlâwkpuî mial mahna le, Hnehna pawh i chang khiah mahnâ.

¹³In remruat zozaita chuan a tibeidawng che a nih hi; Khai le, arsi thlirtute, arsi hmanga aientute, a thla kipa thil sawi lâwktute chu han ruai la, I chungah thil lo thleng tûr laka chhan tûr chein lo dîng chhuak hlawn teh se.

¹⁴Ngâwi teh, buhpâwl ang leka Meia kâng ral mai tûr zu nia; Mei alh thiltihtheihna lakah An inchhanhim zo dâwn lo ve; Intih-lum nâna mei chhêm, ai lum tûr ang chí a ni bawh si lo!

¹⁵Chutiang lek chu a ni, i tleirâwl lai aţanga i thawhpui leh, I sumdâwnpuite awm dan tûr chu; Mi tinin mahni in lamah an tînsan ang che a, tûma’n an chhan lo vang che.

BUNG 48

PATHIAN ROPUIZIA A LAN NÂN ISRAELHO THLIFÎM

¹“Aw Jakoba chhûngkua, Israel hming pu, Juda tuihnâ aţang tea lo chhuak, LALPA hminga chhia te pawh chham thîn leh Israelte Pathian hming lam thîn te u, lo ngaihthla teh u, thutak leh diknain in ti si lo.

²Khawpui thianghlim hming an inchhâl a, Israelte Pathian rinchhantu an in ti a; A hming chu Sipaihote LALPA a ni:

³“Hmânlai thilte kha a tîr aţangin ka puang lâwk a; Ka kâ aţanga chhuak, an beng hriat ngeia ka hrilh an ni. Ka tih ang takin a lo thleng ngâh mai rêng a.

⁴Mi luhlul tak in ni tih ka hai lo va, In ngâhwng thâ lah thîrhruî hlauh, in chal lah chu dâr ang mai.

⁵Atîr ata in hnêna ka lo puan lâwk tawh a ni a; A lo thlen hmâ khân ka hriattîr che u kha, Chuti lo zawng, ‘Ka mîlem tih a ni a, Ka mîlim ker leh ka mîlim chhûnte thupêk a ni,’ in ti dah ang e.

⁶“In hre ta a; hêng hi en vek rawh u. In puang thei tawh lo’ m ni? Tûn aţang chuan thil thar ka hriattîr ang che u, Thil inthup, in la hriat ngai lohte chu.

⁷A tîra siam ni lovin, tûna siam an ni a; Hemi hma hian in la hre rêng rêng lo a ni, Chuti lo zawng, ‘Kan hriat hnû alâwm,’ in lo ti dah ang e.

⁸In la ngaihthla ngai lo va, In la hre ngai hek lo; Tûn hmân in bengah a la lût ngai lo. Vervêk takin thil in ti dâwn tih ka hai lo va, Chhûla awm lai aţanga bawhchhetu tih in ni tawh rêng a.

⁹“Keimah avângin ka thinurna ka khêk rih ang a, Fak tlâk ka nih avângin in lakah ka insûm ang, Ka tiboral êm lo vang che u.

¹⁰Ngai teh u, silvar ang ni lovin ka thlifîm che u-a; Hrehawmna meipua ka fiah tawh che u hi.

¹¹Keima tân, Keima tân liau liauvîn a ni ka tih dâwn ni. Engah nge Ka hming chu tihhliau a nih tehlul ang? Ka ropuina hi mi dang hnênah ka pe lo vang.

ISRAELTE TLAN TÛRA HMÂSÂNGA PATHIAN REMRUAT

¹²“Aw Jakob, mi ngaihthla la, âw Israel, ka thlan tawh i ni a: Kei hi Amah chu ka ni, Hmasa bera ka ni a, Hnuhnung bera ka ni bawh.

¹³Leilung nghahchhan hi keima kut ngeia phûm a ni a, Vânte hi ka kut dîng lamin a kaih pharh a ni; Anni chu ka han ko va, An lo dîng tlâng ta a.

¹⁴“In vâiin lo kal khâwm ula, ngaihthla rawh u! An zînga tû berin nge hêng hi lo puang lâwk vê? LALPAN ani chu a hmangaih a; Babulon chungah a duh ang takin a ti ang a, A bânin Kaldaiho chungah kut a thlâk ang.

¹⁵Kei, Keimah ngeiin ka sawi tawh a; ni e, ka ko bawh a, Karawn hruai a, a kawng pawh a hmuîngîl ang.

¹⁶“Minrawn hnaih ula, hei hi ngaihthla teh u: A tîr aţangin a rûkin engmah ka sawi ngai lo; A awm tîrh aţangin kei pawh ka awm. Tûnah hian Lalpa PATHIAN leh a Thlarau chuan mi tîr ta a ni.”

¹⁷LALPA, i Tlantu, Israel Mi Thiang hlima chuan heti hian a ti: “Kei, LALPA i Pathian hi, i thatna tûra zirtîr che a, I kalna tûr kawnga hruaitu che ka ni.

¹⁸Ka thupêkte hi han pawisa teh la âw! I thlamuanna chu lui ang mai a ni ang a, I dikna chu tuipei ang maiin a fâwn vêl tûr le.

¹⁹I thlahte pawh tîauvut anga tam an ni ang a, I tû leh fate chu tîauvut ang maia tam an ni ang; A hming chu ka hmâ ata thâi bo a ni lo vang a, tihboraal a ni hek lo vang.”

²⁰Babulon ata chu chhuak ula! Kaldaiho lak ata chu tlân bo rawh u! Hla sa chungin âu ula, kâwkil tâwp thlengin puang vêl chiam rawh u; “LALPA chuan a chhihhlawh Jakob-ho a tlan chhuak tâ!” tiin.

²¹Thlalêra a hruai tlang lai khân an tuihâl lo va; Lungpui aţang khân an tân tui a luan chhuahtîr a; Lungpui a tikhî a, tui a lo luang chhuak huau huau va.

²²“Mì suaksual tân râlmuanna rêng a awm lo,” LALPAN a ti.

BUNG 49

JENTAILTE TIÊNGTU CHHIAHHLAWH CHU

¹“Min lo ngaithla teh u, âw thliarkarte u, Nangni hla taka mite u, ngaithla rawh u! LALPA chuan chhûl aţangin mi ko va; Ka nu pum chhûnga ka awm lai aţangin ka hming a lo lam tawh a.

²Ka kâ hi khandaih hriam angin a siam a; A kutpahin mi hliakhkhuh a, Thal tle varah mi siam a, A thal bâwmah mi thukrû a.”

³“Ka hnênah, ‘Aw Israel, nang hi ka chhiahhlawh, Châwimâwia ka awmna tûr chu i ni,’ tiin.

⁴Kei chuan, ‘A thlâwn maiin ka thawk rim a, Engmah lovah ka tha leh zung ka sêng thlâwn a; Mahse ka lâwmman dik tak chu LALPA-ah chuan a awm a, Ka hnathawh pawh Pathian hnêna awm a ni,’ ka ti a.”

⁵“LALPA, chhûl aţanga a chhiahhlawh atâna mi dintu chuan heti hian a ti, A hnênah Jakoba hruai kîra, Israelte hruai khâwm tûrin mi ti a (LALPA hmâah châwimâwiin ka awm ang a, Ka Pathian chu Ka chakna a ni si a),

⁶Heti hian a ti a, ‘Jakoba thlahte kâi thova, Israelte tung dîng leh tûra Ka chhiahhlawh i ni hi thil tê tham tak a ni; Jentailte tân êng ni tûrin ka ruat baw ang che a, Kâwlkil tâwp thlengin ka chhandamna lo ni ang che,’ tiin.

⁷LALPA, Israelte Tlantu, an Mi Thianghlîma, Mite hmuhsita, hnamten an thinhrik, rorêltute Chhiahhlawh hnênah: “Lalten amah an hmuhin an tho vang a, Miliente pawhin chibai an bûk ang, LALPA Israelte Mi Thianghlîma chu a rinawm avâng leh, Nang a lo thlan che avângin,” a ti a.

⁸LALPA chuan heti hian a ti: “Khawngaihna hunah ka ngaithlâ che a, Chhandamna nîah ka ţanpui che; Mite tâna thuthlung ni tûr te, leilung dîn thar leha Ram hlui chhe tawh luahtîr leh tûrin ka humhim ang che a;

⁹Tichuan, lung in tângte hnênah, ‘Chhuak rawh u,’ i ti ang a, Thim hnuaia awmte chu, ‘Rawn inlan rawh u,’ i ti thei ang. “Kawng lakah ei tûr an hmu ang a An tlatna hmun chu tlâng kawlh vel vul te a ni ang.

¹⁰An ril a ţâmin an tui a hâl lo vang, Khaw lum leh ni sâin a tihrehawm hek lo vang; Anmahni lainattu chuan a hruai dâwn si a, Tui awmna bulah te a hruai ang.

¹¹Ka tlâng tinah kawng ka sial ang a, Ka lamliante chu châwi sân a ni ang.

¹²Hêngte hi hla tak aţangin an lo kal ang; En teh u! Sâw le, hmar lam leh thlang lama mi an nih saw, Sâw mite saw Sinim ram aţanga lo kal an ni.”

¹³Aw vânte u, zâi ula! Aw leilung, hlim takin awm rawh! Aw tlângte u, zâi dual dual rawh u! LALPA chuan a mite a thlamuan ta si a, A tihrehawmhote chu a khawngaih ang.

PATHIANIN ZION A HRE RENG DÂWN

¹⁴Mahse Zion chuan, “LALPAN min kalsan tawh a, Ka Lalpan min theihngihl tawh,” a ti a.

¹⁵“Hmeichhiain a fa hnute hne lai a theihngihl theiin A rîla rah a fapa chu a lainat lo thei dâwn em ni? Anni chuan an theihngihl thei a ni mahnâ, Kei erawh chuan ka theihngihl lo vang che.

¹⁶En teh, ka kutphahah hian i hming ka ziaik tawh asin; I kulh bangte chu ka hmâah hian a awm reng e.

¹⁷I fapate chu an hmanhmawh hle ang; Nang tichhetute leh titlarantuten an kal bosan ang che.

¹⁸Dâk chhuak la, i mit han lên vêl teh; Hênghote hian an rawn pan khâwm che hi. Ka nunna chhâlin,” LALPAN a ti, “Anniho chu inthuan mâwi nân i la hmang ngei ang, Mo a inchei angin hêngho hi chei mawi nân i la hmang ve ang.

¹⁹“I hmunhma ram hnû leh khawhar, A ram kehchhe ta chu A luahtute tân a chêp lutuk tawh dâwn a; Nangmah tichhetuteho kha hlate khuaah an awm tawh baw ang.

²⁰I fate i sîn tawh hnûah fa dang i la nei leh ang a, Heti hian an la ti ang, ‘Hê hmun hi kan tân a tê lutuk a; Chênna tûr hmun dang min pe rawh,’ tiin.

²¹Nang chuan i rilruin, ‘Hêngho hi tû min hrinsak nge? Kei chuan ka fate ka chân a, khawhar takin salah tângin ka vâkvâi a ni si a, Tu nge hêngte hi lo châwm lian le? Mahnia hnutchhiaha awm ka ni si a, Hêngho hi khawia mite nge?’ i la ti ang.”

²²Lalpa PATHIAN chuan heti hian a ti: “Ngai rawh, hnam tin hnênah chhechhamin ka kut ka phar ang a, Mi tin hnênah ka duh dân ka zam ang; In fapate chu an rawn pawm hâw ang a, In fanute chu an rawn ko-chhuan ang;

²³Lalte chu in pahrawnte an ni ang a, An lalnute chu in fate awm tleitu an ni ang; Hmâia lei sîin chibai an bûk ang che u a, In kephaha vaivut an la liak fai ang. Tichuan, kei hi LALPA ka ni tih in hria ang, Kei mi ngâktute chu an mualpho ngai lo vang.”

²⁴Mi chak râlâl sâ te hnehchhuhin, Sala an mante chhuahsak an ni ngai em ni?

²⁵Mahse LALPA chuan heti hian a ti: “Mì chak salmante pawh an la chhuahsak ang a, Mì kawlsente sal man pawh an chhuahsak baw ang; Nangmah khingtu chu ka khing lêt vê ang a, I fate chu ka chhandam dâwn a ni.

²⁶Nangmah tiduhdahtute chu anmahni sâ ka eitîr ang a, Uain thlum rûi angin anmahni thisen vêk an la rûi ang. Tîsâ zawng zawngin Kei hi LALPA, in Chhandamtu leh Tlantu, Jakob-ho Michaka chu ka ni tih an hria ang.”

BUNG 50

ISRAELTE BEISEI CHHIAHHLAWHA CHU

¹LALPAN heti hian a ti: “In nu ka tîrh bo laia ka mâkna lehkha chu khawiah nge? Anih loh leh, ka leibatna tu ber hnênah nge ka hralh che u? In khawlohna avânga mahni inhralh zâwk in ni a, In bawchhiatna avânga in nu chu tîrh bo a ni.

²Engati nge ka lo kal laia tûmah in awm loh? Engah nge ka koh che u-a tûma’n min chhân loh? Tlan chhuak thei lo tûrin ka kut hi a tâwi em ni? Mî chhan chhuak tûrin thiltihtheihna ka nei lo vem ni? Tuipui pawh ka hau va, a ro ţawt mai asin, Luite pawh thlalêrah ka chantîr mai a ni; Tui awm loh vângin an sanghâ te

chu tuihâlin an thî a, a uih vung vung a.

³Vânte chu thimnain ka tuam a, saipui puan ka sintîr a nih kha.”

⁴“Lalpa PATHIAN chuan Mithiamte lei mi pê a, Châte hnênah a hun taka thu ka sawi thiam theih nân. Tûk tinin mi kêi harh thîn a, Mithiamte thû ngaithla tûrin ka beng a tivâr a ni.

⁵Lalpa PATHIAN-in ka beng mi hawnsak a; Kei chu ka hel lo va, ka pên bosan hek lo.

⁶Min vawtute hnênah ka hnungzâng ka dawh a, Khabe hmul min pawh tîhsak pawhin ka biang ka dawh a; Min tihmualphova chil mi chhâkkhum nân ka hmâi ka hup hek lo.

⁷“Lalpa PATHIAN chuan min tanpui dâwn avângin ka mualpho lo vang; Tichuan, ka hmâi pawh meitalh lung ang maiin ka tichang a, Tihmualpho ka ni lo vang tih ka hria.

⁸Thiam mi chantîrtu chu a hnâi reng a; Tu nge min do ngam ang? Kan han ding tlâng tûr le. Ka hmêlmâ chu tu nge ni? Ka bulah lo hnâi teh se.

⁹Lalpa PATHIAN chuan min tanpui dâwn si a; Tu nge thiam loh mi chantîr ang? Silhfên angin an la hlui vek ang a, Thîmin a ei zawh mai tûr an ni e.

¹⁰“In zîngah tu nge LALPA tîh le? A Chhihhlawh thu zâwmtu chu tu nge? Tu nge êng nei lo va thim zînga kal thîn? LALPA hming chu ring sela, A Pathianah chuan innghat rawh se.

¹¹En teh u, nangni mei chhêma meisîa inhungte u: In mei êngah leh in mei chhêm têt êngah chuan kal rawh u— Ka kut aţanga in dawn tûr chu: na tuarin in la lum reng dâwn, tih hi a ni.

BUNG 51

LALPAN ZION A THLAMUAN

¹“Nangni, dikna kawng zawhtute u, min ngaithla teh u, Nangni, LALPA zawngtute u: An chher chhuahna che u lungpui chu en ula, An laih chhuahna che u khur chu en rawh u.

²In pa Abraham lam chu en ula, Nangmahni pâitu Sari lam pawh en bawh rawh u; Amah chauh chu ka ko va, Malsâwmin ka tipung ta a ni.”

³LALPAN Zion a thlamuan dâwn si a, A hmun chhia zawng zawngte pawh a thlamuan ang; A thlalêr hmunte chu Eden angin a siam leh ang a, A ram ro chu LALPA huan angin a siam ang; Tah chuan hlimna leh lâwmna a awm ang a, Lâwmthu sawina thâwm leh rimâwi rî nê.

⁴“Ka mite u, min ngaithla teh u; Aw, ka hnamte u, min lo bengkhawn teh u: Ka hnên ata dân a lo chhuak ang a, Ka rorêlna dik chu mi tin Êng atân ka chawltîr ang.

⁵Ka dikna chu hnâi te a ni a, Ka chhandamna chuan a thawh chhuak ta, Ka bante hian mi tin ro a rêlsak ang; Thliarkârte chuan min nghâk ang a, Ka bân hi an la rinchhan ang.

⁶In mitin vân lam thlîr chho rawh u, Hnuai lam leilung pawh thlîr ula, Vânte chu meikhû angin a la zâm ral dâwn si a, Leilung pawh hi silhfên anga chul tûr a ni a, A chhûnga chêngte pawh chutiang bawka la thi tûr chu an ni; Ka chhandamna erawh chu chatuan daih a ni a, Ka dikna chu hnâwlin a awm lo vang.

⁷“Nangni, dikna hretute u, min ngaithla teh u, Thinlunga ka dân vawngtute u: Mihringte sawi chhiatna chu hlâu suh ula, An deusawhna che u pawh hlâu hek suh u.

⁸Thîmin silhfên a ei chhe thîn ang leh, Sûlrûlin sahumul puan a ei chhia ang hian, Anniho chu a la ei chhia ang. Ka tnatna erawh chu kumkhua atân a ni a, Ka chhandamna pawh tşangthar zêlte tân a ni.”

⁹Harh la, harh la, chakna inbel rawh, Aw, LALPA bân! Hmâsânga, hmânlai mite huna i harh ang khân. Rahab sât chhuma, rûlpui hliamtû bân kha i bân a ni lo'm ni?

¹⁰Nang hi tuipui thûk tak, Tuifinriat tikangchattu i ni lo vem ni? Tlan sâte kal kaina tûra tuipui thûk taka kalkawng sialtu i ni lo vem ni?

¹¹Tichuan, LALPA tlan tawhte chu an lo kêi leh ang a, An lu chungah chatuan hlimna nê, Hlâ sa chungin Zionah an lo kal ang. Lâwmna leh hlimna an chang tawh ang a, Lungngaihna leh rûmna a thlâwk bo tawh ang.

¹²“Kei, Keimah ngei hi nangmah thlamuante chu ka ni. Engah nge thi ve mai tûr mihring i hlauh viau ang le? Mihring fa chu hlobet ang lek a la ni dâwn lo vem ni?

¹³Nangmah Siamtu LALPA chu i theihngihl a, Anî chu vânte kêi pharha, leilung nghahchhan phûmtu a ni asin; Engah nge tiduhdahtu thinurna hlâu rêng rênga ni tin in awm tât le? Hnehchhiahtu thinurna leh tihboral a tum chu khawiah nge?

¹⁴Saltâng vâkvâi chuan a tânnâ khur chhûnga thi lova, Ei tûr pawh tlachham lova awma chhuah hlân a ngâkhlel thîn.

¹⁵Nimahsela, Kei hi LALPA i Pathian, Tuipui fâwn ri hum humte then hrangtu chu ka ni a— A hming chu Sipaihote LALPA a ni.

¹⁶I kê-ah ka thû ka dah tawh a; Ka kutphahin ka hliahkhuh tawh che a, Vân khi ka dân a, leilung nghahchhan ka phûm a, Zion hnênah, ‘Ka mite in ni e’ ka ti a ni.”

PATHIAN THINURNA A KIANG TA

¹⁷Aw Jerusalem, harh la, harh la, tho rawh! Nang, LALPA thinurna nova mi intû chuan; Khurnha nova mi chu a mawng nawi thlengin i tlâk tşak a, i rui ta a.

¹⁸A fapa hrinho zîngah tûmah amah kaihruaitu tûr an awm lo va; A châwm seilen a fapate zîngah a bâna kâitu tûr an awm hek lo.

¹⁹Hêng thil pahnih hi i chungah a lo thleng ta; Tu nge han manganpui dâwn che le?— Tihchhiatna leh tihtiauna, tîmna leh khandaih— Tuin nge han thlamuan dâwn che âw?

²⁰I fapate chu an thidang a, kawthlêr tinah an tlu rem rum a, Thanga sathâr âwk ang mai an ni; LALPA thinurna an tuar a ni, i Pathian thununna chu.

²¹Chuvângin nangni, zû ni si lo rûia, Tihrehawm tuartute u, hei hi lo hre lul teh u.

²²LALPA in Pathian, a mite mamawh dîlpuitu, in Lalpa chuan heti hian a ti: “Khai le, khurnha no chu i kut ata ka la kiang ta, Ka thinurna zu no a mi A êkchhia chu i in leh tawh lo vang.

²³Nangmahni tiduhdahtute kutah ka dah sawn ang, ‘Kan rah hruai tûrin bawkkhup rawh’ titute, Kawtthlêrah lei ang maia an zawh tûra bawhkuhtirtu che ho hnênah chuan,” tiin.

BUNG 52

LALPAN JERUSALEM A TLAN

¹Harh la, harh la! Aw Zion, i chakna inbel rawh! Aw Jerusalem, khawpui thianghlim, I kawr mâwi takte khân inchei rawh! Serhtan loh leh mi bawhlhlawhte an lo lût tawh dâwn si lo va.

²Aw Jerusalem, tho la, i vaivut kai kha thing thlâ la, thu chhuak rawh! Aw, Zion fanu saltâng, i nghâwnga thlunna kha phelh rawh!

³LALPA chuan heti hian a ti: “Engmah lovah in inhralh a, Pawisa tel lova tlanchhuah leh in ni ang,” tiin.

⁴Lalpa PATHIAN chuan heti hian a ti: “Ka mite chu Aigupta rama awm tûrin an chhuk thla phawt a; Chumi hnûah, chhan leh vâng awm lovin Assuria-hovin an tiduhdah leh a.

⁵Tûnah hian eng nge ka la neih?” LALPAN a ti, “Ka mite chu awmze nei lova lâk bovin an awm a, An chung a intilalten an rûmtîr tlawk tlawk lo vem ni?” LALPAN a ti. “Ka hming hi an sawi chhe ni tin mai a ni.

⁶Chuvângin, ka miten ka hming an hria ang a; Chumi niah chuan Keima sawi ngei a ni a: ‘Ngai teh u, Keimah ngei ka ni,’ tih an hre tawh ang,” a ti a.

⁷Tlâng chung a chanchin tha rawn thlentute kê chu a va mâwi êm! Remna thû an rawn puang a, Chanchin tha lâwmawm an rawn thlen a, Chhandamna thû an hria a, Zion hnênah tihian an ti a, “I Pathianin ro a rêl e!” tiin.

⁸I râlvêngten âw an chhuah ang a, Ring takin an zâi dual dual tawh ang; LALPA chu Zion-a a lo kîr leh hun chuan mit ngeiin an hmu tawh ang.

⁹Nangni Jerusalem hmun chhe tawhte u, Hlim taka zâiin, au dur dur rawh u! LALPA chuan a mite chu a thlamuan tawh dâwn si a, Jerusalem pawh a tlan chhuak ta.

¹⁰LALPA chuan a bâl thianghlim chu Hnam tin hmuh tûrin a hlim lang ta; Tichuan, kan Pathian chhandamna chu Kâwlkila mi zawng zawngten an hmû ang.

¹¹Chhuak r’u! Chhuak r’u! Chuta tâng chuan chhuak ula, Thil bawhlhlawh rêng rêng khawih suh u; An zînga ta chhuak rawh u, Nangni LALPA bungbêl phurtute u, intithianghlim rawh u.

¹²Hmanhmawh takin in kal chhuak lo vang a, Baklêngin in chhuak dâwn hek lo; LALPA chuan in hmâ a hruai ang a, Israelte Pathian chuan in hnung a dâl ang.

SUAL PHURTU CHHIAHHLAWH

¹³Ngai teh, ka Chhiahhlawh chuan remhre takin a ti ang; Châwimâwiin, sâng taka châwi kânin a awm ang.

¹⁴Mi tam takin mak an tih khawp hialin Mi dang zawngte aia tihhmêlhemîn a awm a, Mihring fapate pianhmang ni âwm lo hiala nghaisak a ni;

¹⁵Hnam tam takte chu a theh ang a. Lalte chuan an kâ an hupsan ang; A chanchin an la hriat lohte chu an hmu ang a, An la hriat ngai lohte chu an hre thiam tawh ang.

BUNG 53

¹Kan thu sawi chu tu nge pawma LALPA bâl chu tû hnênah nge tihlan a nih?

²Thlâi tiak hlim angin a hmâah chuan a tâng lian ang a, Lei ro a tâng zung chawr no ang maiin. Pianhmang leh hmêl mâwina rêng a nei lo; Amah kan hmuhin, ngaihzâwnna tûr khawpa duhawmna rêng a nei si lo.

³Mihringte hmuhit leh hnâwl hnû, Mi lungngai, mangang thîn mi a ni. Miten an hmuh lehlan an hawisan thîn ang hian, Ani chu miten an hmuhit a, keini pawhin kan ngaisâng baw si lo.

⁴Ani chuan kan natnate a tuar tak meuh va, Kan lungngaihate a phur a; Keini lahin hrem tuar âwm rêngah kan ngai a, Pathian vuak tuarah kan ngai si a.

⁵Nimahsela, kan bawhchhiatnate avângin hliam a tuar a, Kan sualnate avângin ani chu an nghaisa a; Kan thlamuanna tûrin a chungah thununna tuartîr a ni a, An vuakna hliamah kan lo dam ta.

⁶Kan zâ hian berâm angin kan vâk bo va; Mahni kawng kawngah kan bo theuh va; Kan zâa sual mawh chu LALPA chuan ani chungah a ngat ta a.

⁷Ani chuan tihretheih leh nghaisak a tuar a, Mahse a kâ pawh a âng lo; Berâmno talh tûra an hruai ang leh, A hmul mettu hmâa ngawi reng berâm angin, A kâ pawh a âng lo.

⁸Ani chu tân in leh rorêlna ata lâk kian a ni a, A hun laia mite hnênah tu nge puang ang? Ani chu minung ram ata tihbo a ni ta si a; Ka mite bawhchhiatna avângin ani chu an nghaisa a.

⁹Mi suaksualte phûmna hmunah a thlân tûr an siamsak a— A tih chuan mi hausa thlânah an phûm ta zâwk a, Tharum rêng a thawh vê ngai lo va, A kâ-in bumna thû a sawi ngai hek lo.

¹⁰Mahse vuak tuartîr chu LALPA duh dân a ni si a, Lungngai takin a siam ta a ni. A nunna chu sual thâwi nâna i hman hunah A chithlah a hmu tawh ang a, A dam chhûng ni a pawhsei sak ang, A kutah LALPA duh zâwng chu a hlawhtling tawh ang.

¹¹A nunna thawhrim rah chu a hmû ang a, a lungâwi tawh ang. Ka Chhiahhlawh Dika chuan a hriatnain mi tam tak thiam a chantîr ang, An khawlohnate chu a phurhsak dâwn si a.

¹²Tichuan, ani chu mi liante chanpual ka sem vê ang a, Ani pawhin râllâk sumte chu mi chakte a sem vê ang; A nunna chu thihpui khawpa a leih buaka, Bawhchhetute zînga an chhiar tel ve avângin; Mi tam tak sual a phur a, Bawhchhetute tân a tawngtai a.

BUNG 54

INREMNA THUTHLUNG NGHET

¹Aw nang, naupâi thei lo, hlimin zâi rawh! Zâi vak vak la, ring takin âu rawh, Nau pawh i la vei ngai loh hi! Pawm lai nei nuho aiin, Khawhar nuten fa an ngah duh zawk,” LALPAN a ti.

²I puan in hmun chu zauh zêl la, I awmna puan zâr chu kâi parh rawh; Ren lovin a thlunna hruai chu tisei zêl la, A khenkilhna chu tinghet rawh.

³Ding leh veiah i arh zau zêl dâwn si a, I thlahte chuan hnam tin an la rochung ang a, Khaw ram tawhte pawh an luah leh ang.

⁴“Hlâu suh, i mualpho lo vang; Zah pawh zak suh, tihmualphovin i awm dân si lo; I tleirâwl laia i hmingchhiatna chu i theihngihl daih tawh dân a, I hmeithai hmingchhiatna pawh i hre reng tawh hek lo vang.

⁵I pasal chu nangmah Siamtu a ni alâwm, A hming pawh Sipaihote LALPA a ni e; Israel Mi Thianghlisma chu i Tlantu a ni si a; Amah chu leilung zawng zawng Pathian, an ti a ni.

⁶Mi nupui mâk hnû, lungngai taka awm ang leh, vânglaiin a nupui a hnâwl leh tâk ang chauh i ni a, mahse LALPA chuan a ko leh ta a che,” i Pathianin a ti.

⁷“Mî khap kâr lek ka mâ che a, Mahse zahngaihna nasa tak nêh ka hruai kîr leh ang che.

⁸Thinurin ka hmêl ka han thupsan zawk che a ni a; Mahse zahngaihna tâwp lovin i chungah zah ka ngai ang,” Nangmah Tlantu LALPA chuan a ti a ni.

⁹“Hei hi ka tân chuan Nova tuilêt ang kha a ni e; Nova tuilêt ang khân lei ka chîm piltîr leh tawh lo vang, tia ka tiam angin i chungah ka thinur tawh lo vang a, ka hâu tawh hek lo vang che, tia chhia ka chham tâk hi.

¹⁰Tlângte chu sawn bovin mualte chu tibo daih mahse, Ka khawngaihna hian a kalsan lo vang che a, Keima remna thuthlung pawh tihbo a ni hek lo vang,” LALPA, nangmah lainattu chuan a ti a ni.

¹¹“Aw, nang, tihrehawm tuartu, Thlipui nuai hrep, thlamuan pawh hlauh lo, Ngai teh, lung mâwi tak takin ka rem tha ang che a, Sapphir lung ngatin i lungphûm ka phûm ang.

¹²Rubi lungin i chhîp zum ka rem ang a, I kawngkhârte chu dârthlalangin, I kulh bang chu lunghlûin ka tuam chhuak ang.

¹³I fate zawng zawng chu LALPAN a zirtîr ang a, I fate chu râlmuang takin an awm der der tawh ang.

¹⁴Diknaa tihngheh i ni ang a; Tiduhdahtute an hla tawh dân a, I hlâu tawh hauh lo vang; Thil hlauhawmte pawhin an hnaih tawh lo vang che.

¹⁵An la inhâwr khâwm ngei ang a, mahse Keima tih a ni lo vang. Nangmah bei tûra pung khâwm apiang nangmah vângin an tlâwm vek ang.

¹⁶“En ta che, meihawl chhêm linga, Hriamhrei chhertu thîrdêng hi keima siam a ni a; Thil tichhetu tûr pawh keima siam bawh a ni.

¹⁷Nangmah beih nân eng râlthuam pawh siam se a hlawhtling lo vang, Rorêlnaa nangmah khingtuten an beihna che lei tinrêng chu Thiam loh i chantîr zêl ang. Hei hi LALPA chhiahhlawhte rochan a ni a, An dikna chu Keima hnêna mi a ni,” LALPAN a ti.

BUNG 55

NUN TAM NEI TÛRA SÂWMNA

¹“Khai le! Tuihâl apiangte u, Tuiachte hian lo kal rawh u; Nangni, tangka pawh nei lote kha, lo kal rawh u, Lei ula, ei rawh u. Lo kal ula, uain leh hnudetui hi Tangka lovin, man awm lovin lei rawh u.

²Châw pawh ni lovah engah nge sum in sên? Puar leh fânna ni lovah engah nge in hlauh chhuah sa in khawh ral? Ngun takin min lo ngaithlâ ula, chaw tha chu ei rawh u, Hniahngnâra awm hi in nunin hlimpui rawh se.

³In beng dawh ula, ka hnênah lo kal rawh u. Ngaithlâ ula, in nunna chu a lo nung dân nia; Tichuan, kumkhua atân thû ka lo thlunpui ang che u— Davida hnêna zahngaihna ka tiam ang khân.

⁴Ani chu mi tin tân thuhretûah te, Mipui hruiatûah leh hotu atân ka ruat a ni.

⁵LALPA i Pathian leh Israel Mi Thianghlisma chuan a châwimâwi tawh che avângin i hriat loh hnam chu duh duhin i la ko ang a, i hriat ngai loh hnamten an rawn pan thîn ang che.”

⁶Hmuh a la awlsam lai hian LALPA chu zawng ula, Min hnaih lai hian ko rawh u.

⁷Mi suaksual chuan a nun dân chu bânsan sela, Mi dik lo chuan a ngaihtuah thîn chu bânsan rawh se; LALPA hnênah kîr leh rawh se, A chungah zah a lo ngai dân si a; Kan Pathian hnênah kîr leh rawh se, Ani chuan a lo ngaidam ngei ngei dân a ni.

⁸“Ka ngaihtuah angin i ngaihtuah vê si lo va, i awm dân hi ka awm dân a ni hek lo,” LALPAN a ti.

⁹Vânte khi lei aia a sâng zâwk angin, Ka awm dânte chu i awm dânte aiin a sâng zâwk a, Ka ngaihtuahnte hi i ngaihtuahnte aiin a sâng zâwk a.

¹⁰“Vân aţanga ruah a rawn sîra, Vîr a rawn tla thîn hi, A kîr leh ringawt lo va, Leilung a tihnâwng thîn a, Thlâte tiţiakîn, chawr no a chhuah a, Thlâi chîngtu tân thlai chí a pê a, A eitu tân ei tûr a pe thîn.

¹¹Chutiang chuan ka kâa thuchhuak pawh a awm bawh ang a, A thlâwn maia tih nei lovin a lo kîr leh lo vang; Ka duh zâwng chu a tizo vek ang a, Ka tîrhna chhan chu tuang takin a hlen chhuak zâwk ang.

¹²Hlim takin in kal chhuak ang a, thlamuang takin an hruai ang che u; In hmâah tlâng lian leh tlâng têtê chu an zâi-ho ang a, Ramhnuaia thingkûng zawng zawngin kut an bêng bawh ang.

¹³Hlîng aiah fâr thing, buar aiah lêngmui kûng a ʔo tawh zâwk ang; Chû chu LALPA hriatrengna a ni ang a, Tihbora lohva kumkhuaa chhinchhiahna tûr a ni ang.”

BUNG 56

JENTAILTE TÂNA CHHANDAMNA

¹LALPA chuan tihian a ti: “Dik takin ro rêl ula, diknain ti rawh u, Ka chhandamna chu a lo thleng dân ta a, Ka thatna pawh thilan a ni ang.

²Chutiang thil ti-a vawngtu mihring fapa, Sabbath bawhchhe lova serhtu leh, Thil tha lo rêng rêng laka a kut vêngtu chu a nihlawh e.”

³LALPA zawmtu ram dang miin hetiang hian ti suh se, “LALPAN a mite lakah min enhrang bîk mang e,” ti suh se; Mi tilreh pawhin, “Kei zawng, thing ro mai ka ni,” ti hek suh se.

⁴LALPA chuan heti hian a ti: “Mi tilreh, Ka Sabbath-te serh a, ka duh zâwng ang duh vê a, Ka thuthlung vuan tlattu chu,

⁵Ka inchnhângah leh kulh hung chhângah ngei hian, Fanu leh fapate aia dînhmun leh hming ãa zâwk ka pê ang a; Boral tawh ngai lo tûr kumkhaw hming ka pê ang.

⁶“Ram dang mi fapate, LALPA rawngbâwl tûra amah zawma, LALPA hming ngainat vânga a chhiahhlawh nih duha– Sabbath bawhchhe lo tûra serha, Ka thuthlung vawngtute pawh–

⁷Anni pawh ka tlâng thianghlimah ka hruai ang a, Ka ãawngtâina inah hlim takin ka awmtîr ang. An hâlral thilhlân leh inthâwinat chu Ka maichâmah lâwm taka pawm a ni ang; Ka in chu hnam tin tân ãawngtâina in an ti dâwn si a.”

⁸Israel mi hnawh chhuahho ko khâwmtu LALPA Pathian chuan, “A hnêna hruai khâwm tawhho bâkah mi dangte pawh ka la hruai khâwm ang,” a ti a ni.

ISRAEL HRUAITU TLÂKTLÂI LOTE

⁹Phûla ramsate leh ngâwa ramsa zawng zawngte u, Ei zo tûrin lo kal rawh u.

¹⁰A râlvêngtute chu mitdel an ni a, Hriatna nei rêng an awm lo; Bauh thei lo ui, bauh nachâng hre lo hlîr an ni; Mut duh mi, muhîla mu zawi nguai reng mi an ni.

¹¹Ni e, ui koham an ni a, duh tâwk tih rêng an nei lo. Berâmpu mâwl, hriatna nei lo an ni; Mahni hmâkhua chauh thlîra, Awmhmun ațanga mahni hlâwkna chauh ûmtute an ni.

¹²“Hawh teh u, uain ka rawn lâ ang a, Duh tâwkin zû i in teh ang u; Naktûkah phei chuan vawiin aia tam kan in dâwn nia,” an ti a.

BUNG 57

ISRAELTE MILEM BIAK SÂWT LOHZIA

¹Mi thâ an thî a, uitu pawh an awm lo va; Mi khawngaihthei takte chu lâk bo an ni a, Mi ãhate chu thil ãa lo laka lâk kian an ni tih tûma’n an ngaihtuah lo.

²Mi nunngîla nungte chu hahdam takin An khumlaizâwlah an mu siai siai ang a, Thlamuanna hmunah an lût ang.

³“Hetah hian lo kal teh u, Nangni dâwithiamnu fapa, uirê chng leh nawhchizuar thlahte u!

⁴Tu nge in nuihzatbûr? Tu nge âng phauu chungah lei in chhuah khum le? Bawhchhiatna fâ, dawthei thlahte in ni lo’m ni?

⁵Thing hring tin hnuaiah in pathiante nênuam in tâwl a, Ruama lung khawkrâwk kârah naupangte in talh ãhîn maw?

⁶Lui kam lung mânu zînga mi chu I chanvo a ni; Chngte chu i chan tâwk a ni e! An hnênah chuan in tûr thilhlân i leih a, Buhbâl thilhlân i hlân bawk a, Chngte chu ka lâwm dâwn em ni?

⁷“Tlâng sâng tak tak chungah I khum i rem a; Inthâwina hlân tûrin i chho ãhîn a.

⁸Kawngkhâr leh a ban phênah te chuan I hriatrengna thil chu i hûng a; Ka lakah ni lovin chngte hmuhah chuan i inphelh a, I kâi chhohpui ãhîn a; Khum chu i zauh va, Thû i thlunpui ta a; An saruak lai i hmuhna khuma mut chu i châk ve ta a ni.

⁹Hriak kengin lal hnênah i kal a, Rimtui i inchulh uar sauh va; I mi tirhte chu hla takah i tîr a, Hremhmun thlengin an chhuk thla ãhîn.

¹⁰I kalna kawng thui chu i chauh pah nâ a; Mahse, ‘A beidawnthlâk mang e’ pawh i ti duh si lo va. Chakna thar i dawn belh zêl avângin i chauh pah chuang lo va.

¹¹“Tu nge i hlauh va, dâwt te i sawi a, mi hriat reng ahnêka, Mi i ngaihthah tâk viau mai le? Hmâsâng ațanga ka ngawih reng vângin Mi hlâu ta lo vem ni?

¹²Dik i intihzia leh i hnathawhte chu ka puang ang a, I hlâwkpu i lo teh ang chu.

¹³Manganga i ãah hunah i milem khâwl khâwmte khân chhan che sela ti nia. Mahse thlîa a lên bo vek dâwn a, ãhwin a chhêm bo vang. Keima chungah rinna nghatte erawh chuan ram hi an rochung ang a, Ka tlâng thianghlâm chu an luah ang.”

HNUNGTAWLHTE TÂNA TIHDAMNA

¹⁴Mi pakhat chuan, “Chhâng vûm r’u! chhâng vûm r’u! Kawng lo kian ula, Ka mite kawng dâltu chu thian zêl r’u,” a ti ang.

¹⁵Tichuan, Mi Sâng-taka, chatuana nung renga, Mi Thianghlîma chuan heti hian a ti: “Kei hi hmun sâng leh thianghlîmah ka awm a, Rilrûa inngaitlâwm leh inchnhîna neitute nunah, rilrûa inngaitlâwmte kâi harha, Thîlunga inchnhîr ngawih ngawihthe tiharh tûra awm ka ni e.

¹⁶Anni chu kumkhua in ka do lo vang a, ka thîrim reng hek lo vang; Thlarau leh nunna ka siamte chu ka hmâah an châu mai dâwn si a.

¹⁷A duhâmna sual avângin, ka thîrimin kut ka thlâk a, Thîrimin ka bihrûksan a, ani chu a thîlung duh zâwngin a hnungtawlh ta zêl a ni.

¹⁸A nun dânte chu ka hmu reng a, ka tidam dâwn a ni; Ka hruai zêl ang a, amah leh a sûtute chu thlamuangin ka awmtîr leh ang.

¹⁹“Hmuite tân rah ka siam a: Ram hlâ leh hnâia mite tân muanna, muanna chu a lo awm ang. Ani chu ka tidam leh ngei ang,” LALPAN a ti.

²⁰Mi suaksualte chu tuifâwn bulh bulh, châwl thei lo, chirhdiak leh bawhlhlawh so chhuak ãhîn ang hi an ni.

²¹“Mi suaksualte tân thlamuanna rêng a awm lo,” ka Pathianin a ti.

BUNG 58

PATHIAN LÂWM ZÂWNGA CHAWNGHEI

¹“Insûm lovin âu tuarh tuarh la, Tâwtawrâwt ângin i âw chhuah rawh; Ka mite chu an bawhchhiatna hrilh la, Jakoba chhngte chu an sualna hrilh rawh.

²Ni tinin min zawng a, ka duh zâwng an hre châk bawk a, Dikna ngaina hnam ang maiin, An Pathian thupêk pawh an hlamchhiah lo. Dik taka rorêl dân min zâwt ãhîn a; Pathian hnaiha awm pawh nuam an ti a ni.

³Châw kan nghei vê lêm a, engati nge nâgin min hmuhpui si loh le? Kan intihrehawm a, engah nge min ngaihsak si loh?’ an ti ãhîn a. “Dik takin, in chaw nghei nîin in intâwllên a, In hlâwfate in chhawr tho si alâwm.

⁴Inhniala intibuai tâwk lekin châw in nghei a, Suahsualna kuttum vilik tâwk vêlin. Chung lamin in âw an hriat dâwn chuan,

Vawiina chaw in nghei dân ang hian in ti tawh tûr a ni lo.

⁵Ni khat atâna intihrehawm ringawt hi ka duh zâwna chawnghei a ni em ni? Phairuang anga lu kai kûn a, saiip puan phaha vut phul mai hi em ni? Hetiang hi LALPA pawm tlâk chawnghei nî, in ti ang maw?

⁶“Ka duh zâwna chawnghei chu hetiang hi a ni: Suahsualna phuar phelhsaka, Mite phurrit hlihsaka, saltângte chhan chhuaha, Nghâwngkawltinrêng tihtlihsak te hi a ni lo vem ni?”

⁷I chaw ei tûr rilâtante hnêna sem vê te, Rethei vâkvâite i inchhûnga hruai luh te; Saruaka awmte tân sin tûr pêk te, I chipuite laka inthuhruk loh te hi a ni lo vem ni?

⁸Tichuan, i êng chu khawvâr angin a lo êng chhuak ang a, Dam pawh i dam sawt sawt mai ang, I dikna chuan i hmâ a hruaisak thîn ang che a; LALPA ropuina chuan i hnung a dâlsak zêl ang che.

⁹LALPA chu i ko ang a, ani’n a lo chhâng ang che a; I âu ang a, ani chuan, ‘Heta hi ka awm e,’ a lo ti zêl ang. “In zînga ta nghâwngkawlti i lâk bosaka, kutzungtanga mî kawh chin te, Tawng khawlo hman te in tih bo va,

¹⁰Rilâtante tân i inphal a, nghaisak tuarte thlavâng i hauhsak chuan, I êng chu thim zîngah pawh a lo êng ang a, I thimna lai pawh chhûn êng ang mai a ni ang.

¹¹LALPA chuan a vil reng ang che a, Khawkhêngah pawh i nun a titlai ang a, I ruhte pawh a tihchak sak ang che; Tuia chawm huan ang mai i lo ni ang a, Tuikhur kang ngai lo ang chu i ni ang.

¹²In zînga mite chuan hmun hlui chhe tawhte chu an din tha leh ang a; Chhuan tam takte lungphûm hluite chu an phûm tha leh ang; Tichuan, nang chu, ‘A chhe lai siamthatu, Chênna tûr kawthlêr dinthatu’ an ti ang che.

¹³“Sabbath bawhchhe lo tûra i kê i vên thata, Ka ni thianghlimah nawmsip bâwl lova, Sabbath hi LALPA zahawmna ni thianghlîm, ni hlimawm, tia, Amah chu chawimâwia, nangma duh dân dah thâa, I nawmsakna lam ngawt ûm lova, i duh zâwn sawi nâna i hman loh chuan,

¹⁴LALPA-ah chuan i lâwm êm êm ang a; Leilung tlâng sâng tak chungah te ka chuantîr ang che a, In pa Jakoba ro sumin ka chawm ang che. LALPA kê chuan a sawi tawh si a.”

BUNG 59

PATHIAN LAKA TIH HRAN

¹Ngai teh u, chhan thei lo tûrin LALPA bân chu tihtâwiin a awm lo va; Hre thei lo tûrin a beng a ngawng hek lo.

²Pathian laka tihrangtu che u chu in sualna hi zu nia; In laka a hmêl hliahtu pawh in sualna baw hi a ni, Chuvângin, in âw pawh a hre thei lo a nih hi.

³In kutte chu thisenin a tibawhlhlawh a, In kutzungtanga lah bawhchhiatnain; In hmuin dâwt in sawi a, In leiin thu lawi lo in sawi a.

⁴Tûma’n rorêlna dik an lam lo va, thutak tana ding an awm hek lo. Thu lawi lo maia innghatin, dâwt an sawi a; Thil tha lo an ngaihtuah a, sualna an hring chhuak a.

⁵Maimawm rîl an zam a, Rûl tûr nei tui an awp kêu va; A tui eituten an thih phah a, An tihkeh aţangin rûl tûr nei a lo piang chhuak a.

⁶Maimawm rîl an tah chu puanah a chang lo vang a, An kutchhuakte chu inthumna tlâk a ni hek lo vang; An hnathawhte chu khawlohna hlîr a ni a, An kutte chu tharum thawhnain a khat si a.

⁷Sual lamah an kê a pên chak a, Pawi sawi lo thisen chhuah tûrin an hmanhmawh a; An rilru chuan khawlohna ngawt a ngaihtuah thîn; An kawngah chuan chhiatna leh rîralna bâk a awm lo.

⁸Thlamuanna kawng rêng an hre lo va, An kawngah chuan rorêlna dik a awm hek lo; Kawng kîkâwi tak tak an insiam a; Chuta kalte chuan thlamuanna rêng an hre lo vang.

SUAL PUANNA

⁹Chuvângin, rorêlna dik chu kan tân a hlâ a, Diknain min ûmpha thei hek lo; Êng kan beisei a, mahse thim a lo ni a! Êngah ni lovin, thim zîngah kan kal si a nih hi!

¹⁰Mitdel ang maiin bang kan dap a, Mit nei lo angin a dapin kan dap a; Zan thim angin chhûnah pawh kan inchhuih a; Ram reh taka mitthi ang mai kan ni.

¹¹Kan vâiin savawm ang maiin kan hûk a, Thuro angin lungngai takin kan rûm thîn; Rorêlna dik kan thlîr a, a awm si lo va; Chhandamna lah chu kan lakah a hla viau si a.

¹²Kan bawhchhiatnate hi i hmâah a pung telh telh a, Kan sualnate hian i hmâah min hêk a; Kan bawhchhiatnate chu kan pâi reng a, Kan sualnate hi kan hre reng si a:

¹³LALPA lakah bawhchhiain dâwt kan sawi a, Pathian kan hawisan a, innêkchêpna leh hel thû kan sawi a, Thinlungin chhuanlam tûr dapin dâwt te kan sawi a.

¹⁴Rorêlna chuan min hnuchhawn ta, Dikna chu hla takah a ding a; Thutak chu kawthlêrah a tlu reng mai, Dikna chuan a luhchilh thei si lo.

ZION TLANTU CHU

¹⁵Tichuan, dikna chu a fam ta a, Sual kalsantu tân tawrh a hlauhawm ta zâwk mah si a. Rorêlna dik rêng rêng a awm lo tih LALPAN a hmuhin, a lâwm lo êm êm a.

¹⁶Mihring tumah rêng an awm lo va, Tawngţaisaktu tumah an awm lo chu mak a ti a; chuvângin, ama bân ngeiin chhandamna a insiam ta mai a; Ama dikna ngeiin a kengkawh ta a.

¹⁷Dikna chu âwmpâw-ah a inbel a, A lû-ah chhandamna thîr lukhum a khum a; Phuba lâkna silhfên a inbel a, Thahnemngaihna kawrfual a hâ a.

¹⁸An thiltih ang zêlin a rûl leh ang, A hmêlmâte chungah a thînur êm êm a, Chuvângin, a hmêlmâte chu a thungrûl ang; Thliarkârte pawh a thungrûl vek ang.

¹⁹Tichuan, LALPA hming chu thlang lam aţangin an tih ang a, Ni chhuahna lam aţangin a ropuizia an chawimawi ang; Hmêlma chu tuilian anga a lo luh hunah, LALPA Thlarau chuan hneh takin a lo bei lêt ang.

²⁰“Tlantu chu Zion-ah chuan a lo kal ang a, Jakob-ho zînga sual simte hnênah pawh a lo kal ang,” LALPAN a ti.

²¹“Keima lamah chuan hei hi an hnêna ka thuthlung chu a ni,” LALPAN a ti: “Ka Thlarau i chungah awm leh, i kâa ka dah tawh Ka thû chuan i kâ a chhuahsan tawh lo vang a, i thlahte leh an thlah kal zêlte kâ pawh a chhuahsan tawh hek lo vang, tûn aţanga kumkhuain,” LALPAN a ti.

BUNG 60

JENTAILTEN ZION-HO MAL AN SÂWM

¹Tho la, êng rawh; I êng a lo thlen tâk hi! LALPA ropuina pawh i chungah a lo chhuak ta e.

²Ngai teh, thimin lei a tuam dâwn a, Thim chhah takin mite a khuh dâwn a ni; Mahse LALPA chu i chungah a lo chhuak ang a, A ropuina chu nangma chungah an la hmû ang.

³Jentailho chu i êngah an lo kal ang a, I lo chhuahna êng lamah lalhote pawh an lo kal ang.

⁴“Dâk chhuak la, i mit lên kual vêl teh: An vâia pung khâwmin i hnênah an lo kal a nih hi; I fapate chu hla tak ata an lo kal ang a, i bula awm i fanute chu duat taka enkawl an ni ang.

⁵Chûng thil i hmuh hun chuan i hmêl a êng sawt ang a, I thimlung chu himnain a khat liam ang; Tuipui hausakna chuan a vûrin a rawn vûr dâwn che a, Jentailho rosum chu i hnênah an rawn chhûng lût ruih ruih ang.

⁶Sanghâwngsei rualte chu i ram khahin an khat ang, Midian leh Ephah sanghâwngsei rualte pawh, Seba rama mi zawng zawng nêna an lo kal ang a; Rangkachak leh rimtuite an rawn phur ang a, LALPA fakin an âu dual dual bawh ang.

⁷Kedar-ho ran rual zawng zawng pawh i hnênah an rawn khalh khâwm ang a, Nebaioth berâmpate chuan i rawng an bâwl ang a, Ka maichâmah ka lo pawm ang a, Tichuan, ka ropuina in chu ka châwimâwi ang.

⁸“Sâwnggho, chhûm anga thlâwka, parvâ, an bûa an thlâwk lût anga thlâwk thînte saw tute nge ni?”

⁹Thliarkârte chuan min nghâk thup ang a; Ram hla taka i fapate chu, an silvar leh an rangkachakte nêna rawn hruai tûrin, Tarsis lawngte chuan hmâ an rawn hruai ang, LALPA in Pathian leh Israelte Mi Thianghlîma hming avângin A châwimâwi tawh si che a.

¹⁰“Ram dang mi faten i kulh bang an sa tlut tlut ang a, An lalten in rawng an la bâwl ang; Ka thinurin ka vaw tak nâ che a, Duhsak takin ka lainat ta che a nih hi.

¹¹Jentailte hausakna chu an rawn thiar luh zut zuta, An lalhote pawh an lo luh reng theih nân, I kawngkhârte chu a inhawng reng tawh ang; Achhûn azânin khâr a ni tawh lo vang.

¹²I rawngbâwl duh lo hnam leh lalram chu an boral dâwn si a, Chûng hnamte chu tih-mang thak an ni ang.

¹³“Lebanon ropuina chu i hnênah a lo kal ang a, Fâr te, tufâr te, phân thingte hmangin, Ka hmun thianghlîm cheimawi a ni ang; Ka ke nghahna hmun chu ka tiropui dâwn si a.

¹⁴Nangmah tiduhdahtu thlahte pawh i hnênah kûnin an lo kal ang a, Nangmah hmusittu zawng zawngten i ke bulah bawkkhupin chibai an bûk ang che; Nang chu ‘LALPA Khawpui’ tiin, ‘Zion, Israelte Mi Thianghlîma’ an ti ang che.

¹⁵“Tûma tlawh duh loh, mite hawisan leh huat i hlawh aiah, Kumkhua atâna tha chungchuanhang ka siam ang che a, Chhuan tam takte lâwmna i la ni ang.

¹⁶Jentailte hnudetui i tlân ang a, Lalho hnudetui pawh i la sâwr ang; Kei, LALPA hi i Chhandamtu ka ni tih i la hria ang I Tlantu, Jakoba Michaka ngei chu.

¹⁷“Dâr aiah rangkachak, thîr aiah silvâr, thing aiah dâr, Lung aiah thîr ka rawn lâksak ang che. In hotu atân ‘remna’ ka siam ang a, In rorêltu atân ‘dikna’ ka ruat bawh ang.

¹⁸In ramah tharum thawhna thâwm hriat a ni tawh lo vang a, In ramri chhûngah rîralna leh chhiatna a awm tawh hek lo vang; In kulh bang chu ‘Chhandamna’ in ti ang a, In kawngkhâr chu ‘Fakna’ in ti bawh ang.

A MITE TÂN ROPUINA PATHIAN

¹⁹“Nî khi chhûna êntu che a ni tawh lo vang a, Thlâ pawhin ênna a pe tawh hek lo vang che; LALPA chu i tân chatuana êng a ni tawh zâwk ang a, I Pathian chu i ropuina a ni ang.

²⁰I nî chu a tla ngai tawh lo vang a, I thlâ pawh a ral tawh hek lo vang; LALPA chu chatuana i êng a ni dâwn si a, I lusûn nîte chu a tâwp tawh ang.

²¹I mite chu an vâiin mi dik vek an ni ang a; Kumkhuain ram chu an luah tawh ang, Châwimâwia ka awm theih nâna Ka thing phun zâr te, Ka kutchhuakte an ni.

²²Tlênte kha sângkhat an lo ni ang a, Tereuhtê pawh hnam chak tak an ni ang. Kei, LALPA hian a hun takah ka thlentîr thuai dâwn a ni.”

BUNG 61

CHHANDAMNA CHANCHIN THA

¹“LALPA Pathian Thlarau chu ka chungah a awm a, Rianguvâite hnêna chanchin tha hril tûrin LALPA chuan hriak mi thih a; Thimlunga hliamte tuam dam a, saltângte hnêna chhuahna leh, Tân ina phuarte phelhna thû puang tûr te;

²LALPA lungâwi kum leh kan Pathian phuba lâk ni puanga, Lusûn zawng zawngte hnêm tûr te,

³Zion-a lungngaia awmte thlamuana, Vut aiah pârthî pê a, lusûn aiah himna hriak thih tûr te, Nguina thlarau aiah fakna silhfên tea thuam tûrin mi tîr a ni. Tichuan, ani chu châwimâwia a awm theih nân, LALPA thing phun, ‘dikna thing’ tia hriat a lo ni tawh ang.”

⁴Hmun hlui chhe tawhte chu an din thar leh ang a, Hmun ram tawhte pawh an tuai thar leh ang, Khawpui chhe tawh, chhuan tam tak lo ram tawhte chu an din tha leh ang.

⁵Hnam dangten in ran rualte an châwmsak ang che u a, Ram dang mite chu in leilettu leh in grêp huan enkawltu an la ni ang.

⁶Nangni erawh chu ‘LALPA puithiamte’ tih in ni ang a, ‘Kan Pathian rawngbâwltute’ an la ti dâwn che u a ni. Jentail hnamte

hausakna chu in tlan ang a, An ropuinate chu in la inchhuan phah zâwk ang.

⁷In hmingchhiat aiah a lêta châwimâwi in ni ang a, An buai thinna aiah an chanvo chu an hlimpui êm êm ang. Tichuan, anmahni ramah chanvo lêt hnih an chang ang a; An chanvo chu kumkhaw lâwmna a ni ang.

⁸“Kei, LALPA hian rorêlna dik ka ngaina si a; Rûkrûk thil hmanga hâlrâl thilhlân hi ka hua a ni; An hnathawh chu thutakin ka hruai ang a, Anni chu kumkhaw thuthlung ka thlunpui ang.

⁹An thlahte chu Jentailte zîngah an hriat bîk larh ang a, An chithlahte pawhin mite zîngah hriat an hlâw ang. Anmahni hmû apiangin LALPA duhsak hnam an ni tih an hre zêl ang.”

¹⁰LALPA-ah chuan ka va hlim nasa dâwn êm! Ka nun hi ka Pathianah chuan a lâwm hliah hliah dâwn a ni; Chhandamna kawr mi hâktîr ta si a, Dikna kawrfualin mi thuam bawk a, Moneitu chu incheimâwina nêna a inchei ang leh, Mo chu lunglhu tinrênga a inthuan ang mai hi a ni e.

¹¹Leiin thlâi tiak a chawr chhuahtîr ang leh, Huana thil chînte a lo tiak tiar ang hian, LALPA Pathian chuan dikna leh fakna chu hnam tinte hmâah a lan chhuahtîr ang.

BUNG 62

ZION TÂNA CHHANDAMNA LÂWMAWM

¹Zion avâng hian ka ngâwi reng tawh lo vang a, Jerusalem avâng hian ka awm hlê hlê tawh hek lo vang. A dikna chu êng anga a chhuaha, A chhandamna chu khâwnvâr anga chhit ên a nih hmâ chuan.

²Jentailhoten i dikzia an la hmû ang a, Lal zawnz zawnkten i ropuina an la hmû ang. LALPA kâin a la puan tûr hming tharin an ko tawh ang che.

³LALPA kutah ‘ropuina lallukhum’ i la ni ang a, I Pathian kutah ‘châwimâwina lallukhum’ i ni bawh ang.

⁴Mâk-hnû’ an ti tawh lo vang che a, I ram pawh ‘Hnuchhawn ram’ an ti tawh hek lo vang; ‘Hepzîba-i’* an ti tawh ang che a, i ram pawh ‘Beula-i’** an ti ang; LALPAN a lawm êm che avângin, i ram chu nupui angin a pawm leh dâwn a ni.

⁵Tlangvâlin nula thianghlim nupuia a nei ang hian, I fapaten nupuia an nei ang che; Moneitu chu mo chung a hlim angin, I Pathian pawh i chungah a hlim dâwn si a.

⁶Aw Jerusalem, i kulh chungah râlvêngtute ka dah a; Achhûn azânin an châwl lo vang. Nangni LALPA hming lamtute u, ngâwi hlê hlê suh ula,

⁷Jerusalem chu a din ngheha leiah hian fakawma a siam hmâ loh chuan Amah pawh chu awm hlê hlê tîr suh u.

⁸LALPA chuan a chakna bân, a kut ding lamin chhia a chham a: “I buh chu i hmêlmâte châw atân ka pe tawh ngai lo vang a; Hnam dang faten i thawhrim rah, i uain thar chu an insak tawh lo vang che.

⁹A seng khâwmtuten an ei tawh ang a, LALPA chu an fak ang; A lakhâwmtuten Ka thianghlimna tualzâwlah an in-ho tawh ang.”

¹⁰Kal chhuak r’u, kulh kawngkâah kal chhuak rawh u! Mite tân kawng buatsaih rawh u; Chhûng vûm ula, Kawngpui chu siam rawh u! Lungte chu chhar fai ula, Mite hmuhah chhinchhiahna târ rawh u!

¹¹LALPAN kâwlkil tâwp thlengin thû a puang e: “Zion fanu chu hrilh rawh, ‘I chhandamna a lo thleng ngei dâwn e; En teh, a lâwmman chu amahin a kawl a, A hnathawh chu a hmâah a awm ta,” tiin.

¹²Anniho chu ‘Mi Thianghlim, LALPA Tlan sâte’ an ti ang a; Nang pawh ‘Zawn chhuah, Kalsan loh Khawpui’ an ti ang che.

BUNG 63

LALPA RORÊLNA LEH CHHANDAMNA

¹Tu nge Edom ram aţanga lo kala, Bozra khaw puan sena inthuaama, Ropui taka incheia, a chakna nasa tak nêna lo kal saw?– “Kei, diknaa thu sawi thîn, Chhandamtu Chaka chu ka ni e.”

²Engati nge i silhfênte kha a sena, Grêp sâwr khura rap sâwrtu silhfên ang maia a sen le?

³“Mahniin grêp sâwr khurah ka rap sâwr a, Mipui zîng aţangin tûmah ka hnênah an tel vê lo. Ka thinurin anni chu ka rap sâwr a, ka thinrimin ka chîl nek a; An thisen chuan ka silhfênte hi a per chuai chuai a, Ka puan a tisen zo ta a nih hi.

⁴Ka thinlungah hian phuba lâk nî chu a awm reng a, Ka tlan sâte hun a lo thleng tawh bawh a.

⁵Ka hawi vêl a, tûmah ţanpuitu tûr an awm lo va, Chelh dingtu tûr pawh an awm lo chu mak ka ti a; Chuvângin, keima bân ngeiin chhandamna mi rawn thlen a, Ka thinrimna chuan mi thunun ta a.

⁶Ka thinrim chuan mite chu ka rapsâwr a, Ka thinurna chuan ka tîrûi a, An chakna chu leiah ka phih thlâksak ta a ni.

PATHIAN ZAHNGAIHNA HAI RUAL LOH

⁷LALPA ngilneihzia leh LALPA fakawmzia te, LALPAN kan chung a thil min vûr zawnz zawnz te, Israela chhûngte tâna a ţatna nasatzia te leh, A khawngaih dân ang zêla an chung a vûra, A ngilneih nasatzia te hi ka’n puangzâr teh ang.

⁸Ani chuan, “Dâwt sawi vê ngai lo tûr fa, ka mite ngei an ni,” a ti a. Chuvângin, anmahni Chhandamtu a lo ni ta a.

⁹An tuarna zawnz zawnz chu a tuar ve a, Anmahni Awmpuitu Vântirhkhovin anni chu a chhandam a; A hmangaihna leh lainatnain a tlan chhuak a; Hmasâng hunah te khân a pawm a, a paw thîn a ni.

¹⁰Mahse a lakah an hel a, a Thlarau Thianghlim chu an tilungngai a; Chuvângin, an hmêlmâ angin anmahni dotûah a ţang a, Anniho chu a bei ta thîn a ni.

¹¹Hmânlaia Mosia leh a mite kha a hre reng a, tihian a ti a: “A berâm rual vêngtu, tuiptui ata anniho hruai chhotu kha khawiah nge? Anmahni chhûnga a Thlarau Thianghlim dahtu kha khawiah nge?

¹²A bân ropuia Mosia kut ding lama kaitu, an hmâa tui tiţhentû, Kumkhua atâna hming thâ chhertu kha tu nge?

¹³Thlâlêrah sakawr ang maia An inchhuih lohna tûra Tui thûka hruai kâitu kha tu nge?”

¹⁴Ruama ramsâte an chhuak thîn angin LALPA Thlarau chuan a chawlhîr a, Tichuan, hming ropui tak chher tûrin, I mite chu a kaihruai ta a.

INCHHÎR TAWNGTAINA

¹⁵Vân aţangin rawn thlîr thlâ la, I chênna thianghlim leh ropui aţang khân han en teh. I thahnemngaihna leh i chaknate, I rilrûa min thlâkhleh ngawih ngawihna leh i zahngaihnaate kha khawiah nge a nih tâk? A dâi zo ta em ni?

¹⁶Nang chu kan Pa ngei i ni a, Abrahama kha chuan min hre phâk lo va, Israelan min hre pha hek lo. Aw LALPA, nang hi kan Pa chu i ni; I hming chu Chatuan ata Min Tlantu a ni.

¹⁷Aw LALPA, engah nge i kawng aţanga min pên botîra Nangmah tîh lo tûra kan thînlung i tihluhlul thîn le? I roluah hnam, i chhiahhlawhte avâng talin lo kîr leh ang che.

¹⁸I mi thianghlimte chuan rei lo tê chauh an chang hman a; Kan hmêlmâten i hmun thianghlim chu an chîl chhe ta.

¹⁹An chungah pawh ro i rêl ngai loh hmân laia mite, I hminga koh pawh hlauh ngai lo ang mai kan lo ni ta.

BUNG 64

¹Vânte khi rawn kâi thlêr teh la aw! Tichuan i lo chhuk thla ang a, I hmâah chuan tlângte chu a khûr hlawk hlawk mai tûr!

²Meiin thingţang a ti-alha, Tui chhuan a so bawrh bawrh ang mai hian I hmêlmâte hnêna i hming hriattîr nân, I hmâah chuan hnam tinte chu an khûr zawih zawih mai tûr!

³Kan hmuh lohva thil râpthlâkte i tih lai pawh khân i lo chhuk thlâ a, Tlângte chu i hmâah an khûr a nih kha.

⁴Khawvêl pian tîr ata mite hriat ngai loh, Bengin a la hriat ngai loh, mit pawhin a la hmuh ngai loh, Amah nghâktute tâna thil ti thîntu chu Aw Pathian, nang chauh hi i ni si a.

⁵Hlim taka awma, dik taka tia, i kawngte zawha hre rengtu che chu I lo lâwm thîn a. Kan sual avângin i thînur a—kan sual zêl baw si a; Chhandam kan ngai a ni.

⁶Kan zâ hian thil bawhlhlawh ang mai kan ni a, Kan that vêna zawng zawngte chu pawnhche tenawm ang lek a ni; Hnah angin kan vuai zo vek a, Kan sualnate hian thlî angin min lên bo va.

⁷I hming lam duh pawh tûmah an awm lo, Nangmah vuan tlat tûra chechâng duh pawh an awm hek lo; Kan lakah i hmêl i thup ta si a, Kan sualnate avângin min tiboral ta a.

⁸Mahse, âw LALPA, tunah zawng, Kan Pa i ni a; Keini hi bellei kan ni a, nang chu bêlvawtu i ni; Kan zâ hian i kutchhuak vek kan ni e.

⁹Aw LALPA, thînur suh la, Kan sualnate hi hre reng lovang che; Khawngaihîn min han en la— Kan zâ hian i mite kan ni e!

¹⁰I khaw thianghlimte chu thlâlêr an chang zo va, Zion pawh a ram vek a, Jerusalem pawh a ţiau zo ta.

¹¹Kan tempul thianghlim leh mâwi tak mai, Kan thlahtuten an lo fak thîinna che chu, meiin a kâng zo va; Kan thil neih thâ thâte chu a chhe zo ta.

¹²Aw LALPA, hêng thil avângte hian i insûm thei tawh lo'm ni? Nge, ngâwi rengin min la vaw na zêl mai dâwn?

BUNG 65

PATHIAN RORÊL DIKZIA

¹“Mi ko ngai lote zawnin ka awm a, Mi zawng lote hmuhin ka awm a. Ka hming pu lo hnam hnênah chuan, ‘Heta hi ka awm e, heta hi ka awm e,’ ka ti a.

²Helhmang mite tân nilêngin bân ka phar a, An duh dân dânin kawng tha lo an zawh si a;

³Hêng mite hian ka hmaichhan ngeiah min titihur a; Huanah te an inthâwi a, leirawhchan maichâmah rimtui te an hâl vêl a;

⁴Thlânah te an thû a, Thlân pûkah te an riak a; Vaw sa te an ei a, an bêlah sa ţawphnawk chhum tuihângte an chhawp a;

⁵Nangmahin awm la, mi rawn hnaih suh, Nang aia ka thianghlim zâwk hi!’ an ti thîn a. Chûngho chu ka hnâra meikhu nung, nilênga kâng thîn chu a ni.

⁶“En ta che, ka hmâah ziaak vek a ni a: Ka ngawihsan mai dâwn lo, ka thungrûl zâwk dâwn a ni— Anmahni ângchhûngah ngei ka thungrûl ang—

⁷In sualnate leh in thlahtute sualna te nêl,” LALPAN a ti. “Tlâng chungah te rimtui an hâl a, Mualah te chuan min sawi chhia a; Chuvângin, an thil lo tih tawh man chu anmahni ângchhûngah ngei ka teh chhuak vek ang.”

⁸LALPA chuan heti hian a ti: “Grêp bâwrah uain thar hmuh a ni thîn a, ‘Tichhe suh, khâ khân malsâwmna a keng asin,’ an tih thîn angin, An vâia ka tihboral vek loh nân, ka chhiahhlawhte avâng chauhvîn ka zuah ang.

⁹Jakoba aţangin chithlah ka la chhuak ang a, Juda aţangin ka tlângte luahtu tûr ka la chhuak ang; Ka mi thlante chuan an rochung ang a, tah chuan ka chhiahhlawhte chu an chêng reng ang.

¹⁰Sharon chu berâm rualte huang a ni ang a, Akor Ruam chu bawng rual bawhna hmun niin, Kei mi zawngtu ka mite tâ a ni ang.

¹¹“Nangni erawh chu LALPA hawisana, Ka tlâng thianghlim theihngihltute in ni a; Gad pathian tâna dawhkân buatsaiha, Meni pathian tâna in tûr hlântute in ni.

¹²Chuvângin in tân khandaih ka ruat ang a, Sa anga talh tûrin in vâiin in la kûn vek ang; Ka koh laiin min chhâng duh lo va, Ka thu sawi in ngaithla duh hek lo, Ka mithmuhah thil tha lo in ti duh zâwk a, Ka lâwm loh zâwng zêl in thlang lui tlat si a.”

¹³Chuvângin, LALPA Pathianin heti hian a ti: “Ka chhiahhlawhten an ei laiin, nangni rilţâmin in lo awm ang a; Ka chhiahhlawhten an in laiin, nangni tuihâlin in awm ang; Ka chhiahhlawhte an hlim ang a, nangni chu in zak hlê ang.

¹⁴Ngai rawh, ka chhiahhlawhte chu thînlunga lâwmin an zâi ang a, Nangni erawh chu thînlung na ngawih ngawihin in ţap ang a, Thlarauva lungngaiin in rûm dâwn a ni.

¹⁵In hmingte chu ka mi thlante tân ânchhia anga hnutchhiah a ni ang; LALPA Pathianin a tihlum ang che u-a, A chhiahhlawhte

pawh hming dangin a ko tawh ang;

¹⁶Tichuan, leia mahni mal insâwmtu chuan thutak Pathianah mal an insâwm tawh ang; Leia chhechhamtu chuan thutak Pathianah chhia a chham tawh ang; Tûn hma lama buainate chu theihngihl a nih tâk avâng leh, Ka hmuh loh tûra thup bo a nih tawh avângin.

THIL SIAM THAR ROPUIZIA

¹⁷“Ngai teh u, vân thar leh lei thar ka siam a; A hmasa zâwk chu hriatreng a ni tawh lo vang a, rilrûah pawh a lang tawh hek lo vang.

¹⁸Ka thil siamah chuan kumkhuain lâwm ula, hlim rawh u; En teh u, Jerusalem chu hlim nâna ka siam a ni a, A mite pawh an hlim reng tawh ang.

¹⁹Jerusalem chungah chuan ka hlim ang a, Ka mite chungah pawh ka lâwm bawh ang; Chutah chuan tap thâwm hriat tûr a awm tawh lo vang a, Mangang âu âw pawh hriat a ni tawh hek lo vang.

²⁰“Chutah chuan nausên hlamzuiha thî an awm lo vang a, Tar, dam chhûng hun tlingtla zo lo an awm hek lo vang; Kum za mi leka thî chu naupang thî anga ngaih a ni ang a, Kum za pawh dam zo lo misual chu ânchhe dawnga ngaih a ni ang.

²¹In te an sâ ang a, an chêng ang; Grêp huan te an siam ang a, a rah an tlan bawh ang.

²²Mi dangte luahsak tûr ringawtin in an sa tawh lo vang a; Mi dangte ei zawhsak mai atân thlâi an ching hek lo vang; Ka mite chu thing dam chen an dam ang a, Ka mi thlante chuan an kut hna thawh rah chu rei tak an chên ang.

²³An thawhrimna chu a thlawn tawh ngai lo vang a, Buaina tûr ringawtin fa an hring hek lo vang; An tû leh fate chenin LALPA duhsak dawngte thlah an ni si a.

²⁴“Hetiang hi a ni ang a: min koh hmâ pawhin ka lo chhâng ang a; An la sawi lai mêkin ka lo ngaithlâ ang.

²⁵Chinghnia leh berâm no te an tla zâ tawh ang a, Bâwngpa angin sakeibakneiin buhpawl a ei tawh ang, Vaivut chu rûl chaw a ni tawh ang. Ka tlâng thianghlim zawng zawngah chuan intihnat leh intihchiat rêng rêng a awm tawh lo vang,” LALPAN a ti.

BUNG 66

PATHIAN BIAK DÂN DIK LEH DIK LO

¹LALPA chuan heti hian a ti: “Vân hi ka thutphah a ni a, Lei hi ka ke ngahchhan a ni. Khawiah nge in mi saksak ang le? Ka chawlhna hmun tûr chu khawiah nge?”

²Chûng zawng zawng chu ka kut chhuak vek a ni, Thil awm zawng zawngte nêh hian,” LALPAN a ti. “Hê thil pakhat hi ka lo thlîr ang; Mi rethei, rilrûa inchhîr ngawih ngawih, Ka tû avânga khûr thîn mi chu.

³“Miin bâwngpa talh se, mihring a that ang mai a ni a; Inthâwi nân berâm no hlân se, ui ring a titliak ang mai a ni; Buhbâl thilpêk hlântu chu, vawh thisen hlântu ang a ni; Rimtui hâltu chu milem malsâwmtu ang a ni. An duhnâ lam lam an thlang thîn angin, An nun pawhin thil tenawm a lâwm thîn.

⁴Chuvângin, anmahni bum nân thil ka thlansak teh ang, An hlauh zâwng tak ka thlentîr dâwn a ni; Ka koh laiin tûma’n min chhâng lo vei a, Ka thu sawi lah tûma’n an bengkhawn si lo; Ka mithmuh ngeiah thil sual an ti a, Ka lâwm loh zâwng an thlang lui tlat si a.”

LALPAN ZION A TÂN

⁵LALPA thû hi lo ngaithla teh u, nangni a thûa khûr thînte u: “In unau, nangmahni hawtu, Keima hming avânga nangni hnawt chhuaktuten, ‘In hlim hmêl kan hmuh theih nân, LALPA chu chawmâwiin awm rawh se,’ an ti vêl a. Mahse, anmahni chu an la mualpho zâwk ang.

⁶Chû thâwm chu khawpui aţanga lo chhuak a ni reng mai! Tempul aţangin a lo ri chhuak a! LALPA âw a ni, a hmêlmâte thungrûltu thâwm chu!

⁷“Nau vei hman lovin fâ a hring a; Nâ pawh a tuar hmâin Mipa a hring ta dêr mai.

⁸Chutiang chu tu nge hre ngaia, Tu nge hmu ngai le? Lei hi ni khatah fa wawi hnih a hrintîr theih dâwn em ni? Wawi leh khatah hnam a piang thut thei em ni? Zion erawh chuan nau a vei vêleh a fate a hring ta mai a.

⁹Nau neih hun thlentîr siin ka hrintîr dâwn lo vem ni?” LALPAN a ti. “Kei, nau hrintirtu hian chhûl chu ka khâr ping leh si ang maw?” i Pathianin a ti.

¹⁰“Jerusalem chu lâwmpui rawh u, Nangni amah ngainatute u, lâwmpui rawh u; Amah tuarpuitate u, lâwm takin hlimpui rawh u;

¹¹Tichuan, thlamuanna a lo chan lehna hnudetui chu duh tâwkin lo tlan ula, A ropuina nasa tak chu chêna, Duh tâwka in lo intihtlai theih nân.”

¹²LALPAN heti hian a ti: “Ngai teh u, inremna chu luipui angin ka luanîr ang a, Jentailte ropuina pawh luitê angin a kuang a liam zawih zawih ang, Chumi chuan in inchâwm tlai ang; A pawm ang che u-a, a mal chungah a sêp thîn ang che u.

¹³Nûin a fa a duat hliau hliau thîn ang hian, Kei pawhin ka duat hliau hliau ang che u; Jerusalemah chuan thlamuang takin in awm tawh ang.”

PATHIAN RORÊLNA LEH A LUNGAWI LOHNA

¹⁴Hêng hi in hmuh hunah in thîlung a lâwm ang a, In ruhte chu hnim hring angin a duah ang; LALPA kut a ni tih a chhiahhlawhte chuan an hria ang a, A hmêlmâte chuan a lungâwi lohna an hre thung ang.

¹⁵Ngai teh u, LALPA chu a thinurna hrithlâa A zilhauhna meialh thlen tûrin Thâwngaleivir ang tawlailîr leh meipui nêh a lo thawk dâwn e.

¹⁶Mei leh khandaih hmangin LALPA chuan mi zawng zawng chungah ro a rêl dâwn; LALPA tihhlumte chu an tam teh ang chu.

¹⁷“Milem be tûra inthian thianghlim a, inserh hrang a, Huana inzui lût dum dum a, Vawh sâte, chaichîm sâte leh tenawm dang eitute chu a ruala tihboral vek an ni ang,” LALPAN a ti.

¹⁸“An ngaihtuahnate leh an thiltih dân chenin ka hria a. Hnam tin tawng tinte ka la hruai khâwm ang; an lo kal hunah chuan ka ropuina chu an hmû ang.

¹⁹An zîngah ka chhinchhiahna ka dah ang a; a dam chhuak zînga mite chu hnam tin hnênah ka tîr ang: thal kâp thiamte chu Tarsis te, Pul leh Lud hnênah te, Tubal leh Javan hnênah te leh, ka hmingthanzia la hre lo leh ka ropuina la hmu ngai lo hla taka thliarkârte hnênah ka tîr ang. Jentailte zîngah ka ropuizia an la puang ang.

²⁰Israel faten bungbêl thianghlîma an thil hlan tûr LALPA ina an rawn la lût thîn ang hian, LALPA hnêna thil rawn hlân tûrin, hnam tinrêng zîng aţangin in unau zawnz zawnge chu sakawr chungah te, tawlailîrah te, zâwn bâwmah te, sabengtung leh sanghâwngei chungah te chuangin, ka tlâng thianghlîm Jerusalemah chuan an rawn hruai ang,” LALPAN a ti.

²¹An zînga mi thenkhat chu puithiam atân te, Levia mi atân te ka lâ ang,” LALPAN a ti.

²²“Vân tharte leh lei thar ka la siam tûrte chu Ka hmâa a awm zêl dâwn ang hian, In thlahte leh in hming chu a awm reng tawh dâwn a ni,” LALPAN a ti.

²³Hetiang hi a ni ang: Thla Thar pakhat aţanga a thar dang thlengin, Sabbath ni khat aţanga sabbath ni dang thlengin, Chibai mi bûk tûrin ka hmâah mi zawnz zawnz an lo kal thîn ang,” LALPAN a ti.

²⁴“An kal chhuak vêl te chuan ka dân bawhchhetute ruang chu an thlîr thîn ang a; An ţawih lungte chu a thi thei tawh si lo va, Anmahni kângtu mei pawh thelmih rual loh a ni si a; Mi zawnz zawnz tân tenawm tak an ni ang.

JEREMIA

Ziah tu: JEREMIA • Ziah kum: B.C.627-587

Juda hnam sualna leh an sim duh loh avânga a hnam pum tâna hremna lo thleng tûr hrilhlâwkna leh, Pathian thu âwih lohnain chhياتna a thlen thû hi Jeremia bu thupui ber a ni. Jeremia hi Anathoth khuua mi, naupang tak a la nih lai aţanga puithiam hna thawka, hrilhlâwktu zâwlnei a ni. Pathian tâna a nun pum pe tawp mi, nun dân thianghlina nung, hnama Chiang a ni. A chipuite sualna veia, sim tûra ngêna au ruai ruai thîn a ni a; chuvânga ‘Zâwlnei Tahbelh’ tih hming puttîr a ni. Mahse a thuchah chu bengkhawn a hnêkin amah chu an tiduhdah zâwk si a. Juda lal Josia lal kum 13-na, B.C. 626 kuma Pathian kohna dawng, zâwlnei Zephania leh Habakuka te hun laia mi a ni. A hrilh lâwk ang taka Babulon sipaiten an rawn rûna, Jerusalem an lâka, mipui nâwlpui sala an hruai duah duah lai te pawh mit ngeia hmutu a ni. B.C. 586-a Jerusalem a tlûkchhiat hnû khân Jeremia chu Nebukadnezara’n Babulon-a kal vê a duh leh duh loh a zâwt a; ani chuan Jerusalem a awma, sala hruai bâng mi rethei chhifâ-ho zînga rawngbâwl zêl a thlang a. Mahse Babulon-ho kal liam hnûah Juda mi la awmchhunen a duh lo chung Aigupta ramah an chhuk thlâkpui a, chutah pawh chuan, a thih hmâ chu theihtâwpin a mite hnênah simna thû a hril zui zêl a ni. Jeremia chuan hun hnunungah saltângte Israel rama an lo kîr leh tûr thû a hrilh lâwk bawk. Jeremia Bû hi Bible-a bu 24-na a ni a, bung 52 a awm a, châng 1,364 a awm bawk.

BUNG 1

ZÂWLNEI KOHNA

¹Hilkia fapa Jeremia thûte, amah chu Benjamin rama Anathoth khuua puithiamte zînga mi a ni a,

²a hnêna LALPA thu lo thlen lai chu, Juda lal, Amona fapa Josia lal kum 13-na hun lai a ni a.

³Juda lal Josia fapa Jehoiakima lal laia Juda lal, Josia fapa vêk, Zedekia lal kum 11-na tâwp, a thla 5-na laia Jerusalem khawpuia mite sala hruai bo an nih thleng a huam bawk.

ZÂWLNEI KOHNA

⁴LALPA thû chu ka hnênah a lo thleng a:

⁵“Chhûla ka siam hmâ che khân ka hria che a; I pian hmâin ka lo serh hrang tawh che a; Hnamte hnêna zâwlnei atân ka lo ruat fel tawh che a ni,” a ti a.

⁶Kei chuan: “Khai âw, Lapa PATHIAN! En teh, ka la naupang si a, thu pawh ka sawi thei lo vang,” ka ti a.

⁷LALPA chuan ka hnênah: “ ‘Ka naupang,’ ti suh, Ka tirhna che apiang hnênah i kal tûr a ni a, Sawi tûra thû ka pêk apiang che chu i sawi tûr a ni.

⁸An hmâi zah tina duh hauh suh, Chhanhim tûr chein ka awmpui zêl dawn che nia,” tiin LALPA chuan min hrilh a.

⁹Tichuan, LALPA chuan a rawn ban a, ka kâ a khawih a, LALPA chuan ka hnênah: “Khai le, ka thûte chu i kâah ka dah tawh e.

¹⁰En teh, a zung pawt chhuaka nam thlu tûr te, Tichhe tûr leh paih thla tûr te, Din tha tûr leh phun tûr tein Vawiinah hian hnamte chungah leh lalramte chungah ka dah tâk che hi.”

¹¹Chubâkah, LALPA thuchhuak chuan ka hnênah, “Jeremia, eng nge i hmuh?” mi ti a. Kei chuan, “Theite ţang ka hmû,” ka ti a.

¹²LALPA chuan ka hnênah, “I hmu dik hlê mai, ka thu hi ka hlen thuai tawh dawn si a,” a ti a.

¹³A wavi hnihna atân LALPA thû chu ka hnênah a lo thleng leh a, “Eng nge i hmuh?” a ti leh a. Kei chuan, “Hmar lam hawisan zâwna bêl so bawrh bawrh,” ka ti a.

¹⁴LALPA chuan ka hnênah: “Ram puma chêng zawng zawng chungah hmar lam aţangin chhياتna a lo thleng dawn.

¹⁵En teh, hmar lam lalram zawng zawng ka ko dawn,” LALPAN a ti. “An lo kal ang a, Jerusalem kulh kawngka bulah te, a kulh bange hual vêl vekin, Judaî ram khawpui zawng zawngte pawh hualin, an lalthutthlêng an hûnhnan theuh ang.

¹⁶An suahsualna zawng zawng avângin an lakah ka rorêlna thû ka puang dawn: Kei min hawisan avâng te, pathian dangte hnênah rimtui an hâl thîn avâng te, anmahni kutchhuak mai mai an pathian tâk avângte hian.

¹⁷“Chuvângin inrâlring la, tho rawh, Thû ka pêk zawng zawng che chu an hnênah sawi rawh. An hmâah zâm rêng rêng suh, Chuti lo chu, an hmâah ka timualpho mai ang che.

¹⁸Ngai teh, vawiinah hian Judaî ram pum leh an lal zawng zawng te, An milianho leh an puithiamho zawng zawngte, Ram chhûnga mipui zawng zawng te ep tûrin Khawpui kulh nghet leh thîr ban leh Ngên kulh bang ni tûrin ka siam a che.

¹⁹An rawn bei huai huai ang che a, Mahse an hneh lo vang che. Chhan chhuak tûr chein ka awmpui tlat ang che,” LALPAN a ti.

BUNG 2

ISRAEL CHUNGA PATHIAN LUNGÂWI LOHNA

¹LALPA thû chu ka hnênah hetiang hian a lo thleng a,

²“Kal la, Jerusalem mite hriat tûrin heti hian âu ang che, ‘LALPA chuan heti hian a ti a ni: “I vânglaia i ngilneihzia te, Kan inhual laia min hmangaihzia te, Engmah chín lohna thlalêr rama mi zui dante kha ka hre reng asin.

³Israel chu LALPA tâna thianghlîm, A rah pung hmasa a ni. Amah eiraltu apiang chu thil sual ti an ni; An chungah chhياتna a lo thleng ang,” LALPAN a ti.”

⁴Aw, Jakoba chhûngte leh, Israela chhûngkua zawng zawngte u, LALPA thû hi lo ngaithla teh u.

⁵LALPA chuan heti hian a ti: “In thlahtute khân keimahah dik lohna eng nge an hmuha, Ka hnên ata hla taka an kal bova, Milem zuia, milem betu in lo nih tâk mai le?

⁶LALPA, Aigupta ram ata min hruai chhuaktu, Thlalêra min hruai tlangtu, Thlalêr ramro leh khuarkhurum hmun, Khawkhêng ram leh thihna hlim, Tûma kal tlang ngai lohna ram, Tûma chên

lohna hmun ata min hruai chhuaktu kha khaw nge a nih tāk?’ tih nachâng pawh an hre si lo.

⁷Ram ṭha takah, a rah tlâna a ṭhatna chên tûrin Ka hruai lût che u a. Mahse in han lût a, ka ram chu in tibawhlhlawh a, Ka rochan chu tenawmah in chhuah ta zâwk a.

⁸Puithiamte pawhin, ‘LALPA chu khawiah nge?’ tih nachâng pawh an hre lo. Dân kengkawhtute pawhin min hre hek lo; Rorêltuten ka dân an bawhchhia a; Zâwlneite lahin Baala thû te an hril ta mai mai a, Hlâwkna nei lo thil mai an ûm a.

⁹“Chuvângin, ka khing dawn a che u,” LALPAN a ti. In fâte fâ lehte chenin ka khing zêl ang.

¹⁰Kupra thliarkâr pêl rawkin va en teh u, Kedar-ah te mi tîr ula, chutiang thil chu a awm tawh ngai emaw ngaihtuah chiang rawh u.

¹¹Pathian tak pawh ni hlei lo akâra, Mahni pathian thlâk thleng chîng hnam an awm ngai em ni? Mahse ka mite chuan an Ropuina chu engmah lo nên zu thlâk thleng â!

¹²Aw vânte u, mak tiin, hlâuvîn râp hial ula, Kimki châwih châwih rawh u,” LALPAN a ti.

¹³“Ka mite chuan thil ṭha lo pahni an ti a: Kei, nunna tuikhur hi min hawisan a, Tuikhur an inkerchawp a, tuikhuah khî, tui tling thei lo chu.

¹⁴“Israelte hi chhihhlawh em ni? Sala piang rêng em ni? Engati nge rawk an tawh le?

¹⁵Sakeibaknei vânglaiten rûm khumin an hâhum a; A ram chu an tichereu vek a; A khawpuite pawh luah theih lohvin an hâlsak a.

¹⁶Noph leh Tahpanhes hoten i chhîp an tikawh zo ta.

¹⁷LALPA i Pathianin kawnga a hruai lai chea I hawisan avâng a hê thil hi nangman i chung a thlentîr a ni lo vem ni?

¹⁸Sihor lui tui in tûrin engah nge Aigupta kawng i zawh mai? Engah nge luipui tui in tûra Assuria kawng i zawh tāk?

¹⁹I suahsualna hian a la hrem ang che a, I hnungtawlhna hian a la zilh ngei ang che. LALPA i Pathian i hawisan hi Thil ṭha lo leh kha tak a nihzia hria la, hmu fiah rawh, Kei mi ṭihna rêng pawh i neih tāk loh hi, Sipaihote LALPA Pathian chuan a ti a ni.

²⁰“Hmânah khân i nghâwngkawh ka tihtlihsak che a, An phuarna che ka tihchahsak tawh bawh che a; Nangin, ‘Ka bawhchhe tawh lo vang,’ i ti a, Mahse tlâng sâng tin leh thing hring tin hnuaiah Nawhchizuar ang maia i mut zâl vêl kha le.

²¹Grêp kung dik tak leh a chi ṭha mi ah ka phun che a. Engah tehlul nge grêp chhe chi leh A suak leka i lo chan leh tāk mai?

²²Chîngal leh sahbawn tam takin insil mah la, I sualna chu ka hmâah hian chhinchhia a ni,” Lalpa PATHIAN-in a ti.

²³Engtin nge, ‘Ka intibawhlhlawh lo, Baala pawh ka zui hek lo?’ i tih theih? Ruama i awm dân te kha en ta che; I thiltih tāk te kha hria la: Sanghâwngsei hur ang maia i zat ruai ṭhin kha.

²⁴Thlalêra awm ṭhin ram sabengtung, A hur laia hnâr lên ruai ruai ṭhin hi; A châkna a chhuah tawh chuan tûin nge dang zo vang? A zawngtute chu intihah duh ting suh se; A hunbîah chuan an hmu leh mai ang.

²⁵Pheikhawk bun lo leh dang rovin awm suh. Nang chuan, ‘Beisei tûr a awm lo. Ramdang mite ka ngai a, anmahni ka ûm ang,’ i ti a.

²⁶“Rûkrû chu an man chhuaha a zak ṭhin ang hian, Israela chhûngte pawh an la zak ang; Anmahni leh an lalte, an miliante, an puithiamte leh an zâwlneite nên,

²⁷Thingbul hnênah, ‘Ka pa i ni,’ tiin, Lungtum hnênah, ‘Min bringtu i ni,’ zuk ti a! An hmêl ni lovin, an tukkhum chhah min chhawn a. Mahse an mangan hunah, ‘Tho la, min chhan rawh,’ an ti leh si ang.

²⁸In pathian siamchawp te kha khaw nge an awm tāk? In mangan laia an chhan theih che u chuan, lo tho ang hmiang; Aw Judate u, in khawpui zât pathian in nei alâwm.

²⁹“Engah nge min la khin zui fo ang le? Ka lakah chuan bawhchhe vek in ni,” LALPAN a ti.

³⁰“A lo-thlâwn maiin in fate ka hrem a, An ṭhat phah chuang si lo. Sakeibaknei kawh ang maiin, In khandaih chuan in zâwlneite a ei ral ta.

³¹“Aw ṭhangtharte u, LALPA thû hi lo hre teh u! Israel tân thlalêr leh ram ṭhim ka ni em ni? Engah nge ka miten, ‘Milian kan ni a; I hnênah kan lo kal tawh lo vang’ an tih hi?

³²Nula thianghlamin a incheinate theih nghilhin, Mo-in a thuam a theihngihl thei em ni? Mahse ka mite min theihngihl reizia hi chhût rual a ni lo.

³³“Engah nge ngaihzâwng zawn nân i inchei vak le? Hmeichhe sualte pawhin i awm dân an zir tāk hi.

³⁴I pawnfênah mi rethei pawî sawi lote thisen a kâi e. A rûka ka dap chhuah pawh a ni lo, Hêng thilahte hian a lo lang mai a ni.

³⁵Nang erawh chuan, ‘Pawî ka khawih si lo va, A thinurna chu a kiang mai ang,’ i ti lehngghâl a. ‘Ka sual lo ve,’ i ti bawh a, i chungthû ka ngaihtuah ang.

³⁶Engah nge i awm dân thlâkthlenga i vir vêl ruai ni? Assuria i zahpui ang bawkin Aigupta pawh i la zahpui ang.

³⁷I kut khum chungin anni chu i la chhuahsan dawn a ni; I rin êm êm i ṭhianta chu LALPAN a hnâwl tawh si a, Hamṭhatna an thlen hauh lo vang che.

BUNG 3

ZAH NACHÂNG HRE LO ISRAEL

¹“Miin a nupui ṭhen se, Amah chu chhuahsanin Mi dang nupuiah va awm ta sela, Chû nû chu a pawm leh dawn em ni?” A ram chawpin a bawhlhlawh phah zâwk dawn lo vem ni? Nang chuan tlangvâl tam tak i va hur kual pui hnûah Ka hnênah i lo kîr leh chauh va,” LALPAN a ti.

²“Hawi chho la, tlâng kawh vel vulte khi han thlîr teh: Mipa i mutpui lohna hmun a awm em? Thlalêra Arabia mi ang maiin anmahni chângin kawng sîrah te i ṭhu reng ṭhin a; I nawhchizawrh leh suahsualnain ram i tihbawrhbâng zo ta.

³Chuvângin, ruah pawhin a sûr loh phah a, Ruah hnunung pawh a sûr hek lo. Nawhchizuar hmêl i pu ta a; Zah pawh i hre duh dêr si lo.

⁴“Ka pa, ka tleirâwl laia mi kaihruiat, tiin Mi ko ãan leh tawh dân lo’ m ni?”

⁵A thinur kumkhua dân em ni? A tâwp thlengin a ur reng dân em ni? Ti chungin, ngai teh, a sual thei ang berin thil i la ti zui zêl ang maw?”

SIM TÛRA SÂWMNA

⁶Josia lal lai khân LALPAN ka hnênah heti hian a ti: “Hnungtawlh hmang Israel thiltih dân kha i hmu em? Tlâng sâng apiangah chhovin, thing hring tin hnuaiah nawhchizuarin a lêu kual ãin a ni.

⁷Chûng zawng zawng a tih zawh hnûah pawh kei chuan, ‘Ka hnênah lo kîr rawh,’ ka la ti cheu va. Mahse a lo kîr duh lo. A laizâwnnu, bumhmang Juda pawhin a hmu ve reng a.

⁸Hnungtawlh hmang Israel uirêna chhante chu a vaia ka han hmuh chuan, ka ma ta a, inmâkna lehkha ka pê a; mahse a laizâwnnu, bumhmang Juda chuan a lo hlau awzâwng lo mai a, a va inzuar vê ta zâwk a.

⁹Chutianga nawmnah taka a hur kual lai chuan ram chu a tibawrhâng zo ta a, thing bul lung bul lakah te a uirê ãin a.

¹⁰Chuti chung pawhin a laizâwn, bumhmang Juda chu a thinlung taka lo kîr lovin, a der maiin a lo kîr si a,” LALPAN a ti.

¹¹Tichuan, LALPA chuan ka hnênah, “Bumhmang Juda aiin hnungtawlh ãin Israel chu ãa zâwkin a intârlang a.

¹²Kal la, hmar lamah hê thu hi va puang rawh: ‘Hnungtawlh chûng Israel, lo kîr leh rawh,’ LALPAN a ti a che; ‘Ka thinurna hi i chungah ka tlâktîr lo vang. Zahngai thei tak ka ni si a, Ka thinur kumkhua hek lo vang,’ LALPAN a ti.

¹³LALPA i Pathian laka i bawhchhiatzia te, Thing hring tin hnuaiah ram dang pathiante hnêna i inphalrai dân te, Ka thuchhuak i âwih duh lohzia te hi lo inhre mawlh teh,’ Tih hi LALPA thuchhuak a ni.

¹⁴LALPA chuan, “Aw, hnungtawlh fate u, lo kîr leh rawh u, nupuih ka nei tawh si che u a. In zînga mi khawpui aingan pakhat, chhûngkua aingan pahni la chhuakin, Zionah ka hrui ang che u.

¹⁵Ka thinlung ang pu mi berâmpuete ka pê ang che u a, anni chuan hriatna zau leh hriat thiamnain an chawm ang che u.

¹⁶“Tichuan, in lo pun zêl a, in lo tam hlê hunah chuan, ‘LALPA thuthlunna bâwm’ tih hi an sawi leh tawh ngai lo vang,’ LALPAN a ti. Rilrûah pawh a lang tawh lo vang a, tûman an hre reng tawh hek lo vang; tûman an tlawh baw lo vang a, an siam leh tawh hek lo vang.

¹⁷“Chutih hunah chuan Jerusalem chu LALPA Lalthutthlêng an ti ang a, Jerusalemah chuan LALPA hming avângin hnam tinrêng an lo pung khawm ang. An thinlung chu sual kaihhruiin an awm tawh lo vang.

¹⁸“Chûng niah te chuan Juda chhûngkuate chu Israel chhûngkuate nêan an lêng zâ ang a, hmar lam ram aingan in thlahtute hnêna ro luah tûra ka pêk ramah chuan an lo kal khawm ang.

¹⁹“Kei erawh chuan: ‘Hnamte zîngah roluah tûr duhawm tak leh, Ram nuam tak pêk che a, Fanaute zînga telh che hi ka duh dân a ni lo’ m ni? “Ka Pa,” tia min kohva, Mi hawisan loh hi ka lo beisei dân a nih tehlul nêan.’

²⁰Nimahsela, aw Israela chhûngte u, Pasal te bum chûng nupui rinawm lo angin Mi in uirêsan ta a nih hi,” LALPAN a ti.

²¹Tlâng sâng reh tak chungah thawm an hria e, Israel fate ãap leh dân a thawm a ni. An awm dân an tikhawlo zo tawh a; LALPA an Pathian an theihngihl ta si a.

²²“Nangni hnungtawlh fate u, lo kîr ula, In hnungtawlhate chu ka lo tidam dân nia.” “Hei le, i hnênah kan lo kal e; Nang chu LALPA kan Pathian i ni alâwm.

²³Tlâng aingan chhandamna beisei chu a thlawn mai a ni, Tlângte chu eng zâta tam pawh ni mahse; Israelte chhandamna chu LALPA kan Pathianah hian a ni a awm ni.

²⁴Kan tleirâwl lai ata, kan pate thawhrim rah chu An berâm leh bâwng rual te, an fanu fapate nêan, Mualphona chuan a ei zo ta.

²⁵Zak takin kan mû a, sawi chhiatnain min khuh a. LALPA kan Pathian lakah kan lo sual ta si a, Keini leh kan thlahtuten, kan tleirâwl aingan tûn thlengin, LALPA kan Pathian âw-kâ rêng kan zâwm duh si lo.”

BUNG 4

¹“Aw Israel, i lo kîr leh dân chuan, Ka hnênah ngei lo kîr leh ang che,” LALPAN a ti; Ka hmuh phâk lohva i tenawmnate i paih bo chuan, Sawi bo i tâwk tawh lo vang.

²“LALPA nunna chhâla’ thutak leh diknaa ro i rêl fela, chhia i chham chuan, Hnamte chuan amahah mahni leh mahni mal an insawm ang a, Amah chu an ropui phah ang.”

³LALPA chuan Judate leh Jerusalem mite hnênah heti hian a ti: “In lei khêk laite chu let ula, Hlîng zîngah thlai chi thlâk suh u.

⁴Nangni Judate leh Jerusalema chêngte u, LALPA hnênah in serh tan ula, In thinlung serh tan rawh u. Chutulo chu in thil sual tih avânga ka thinrim hi mei angin a alh chhuak ang a, Tûma thelh mih rual lohvin a kâng mai tûr asin.”

RÛNTU AN LO HNÂI

⁵Judai ramah leh Jerusalemah heti hian puang chhuak rawh u: “Ram pumah tâwtawrâwt hâw rawh u; ‘Lo kal khawm ula, Kulh nei khuaah te i kal khawm vek ang u,’ Tiin âu rawh u.

⁶Zion lam hawiin chhinchhiahna tâw rawh u. Himna zawng r’u! Muang suh u! Hmar lam aingan chhiatna karawn thlen dân a nia, Chhiatna râpthlâk tak mai chu.”

⁷Pik zîng ata sakeibaknei a lo chhuak ta, Hnamte tichhetu tûr a lo kal e. I ram sawp chhe tûrin a awmna hmun arawn chhuahsan ta. I khawpuite chu luahtu awm lovin a tiram vek ang.

⁸He thil avâng hian, saip puan sin la, Lungngaiin chiau vak vak mai teh u. LALPA thinurna nasa tak hian Min la kiansan si lo va.

⁹“Chumi ni chuan heti hi a ni ang,” LALPAN a ti, “Lal leh hotute thinlung chu a zâm chhe vek ang, Puithiamte chu an chî-âi zo vang a; Zâwlneite chuan mak an ti êm êm ang,” tiin.

¹⁰Kei chuan, “E khai, Lalpa PATHIAN! Hêng mite leh Jerusalem hi i lo bum let dêr a nih hi, ‘Muanna in nei ang,’ i ti a, Khandaihin thinnun a chhun ta zawk a nih hi,” ka ti a.

¹¹Chutih huna an sawi dân tûr chu, Hêng mite leh Jerusalem hnênah, Ka fanute zâp dâia chhêm fai tûr ni lo, Thlalêr tlâng sângah thli ro ka tlehtir ang.

¹²Chûng mite tân chuan thli na tak ka thlentir ang; Tûnah hian anmahni hrem dân tûr ka rêl dâwn a ni.”

¹³“En teh, chhûm angin a lo chho mup mup ang a, A tawlailir chu thâwngaleivir ang mai. A sakawrte chu mupui aia chak an ni. Chan a va châu êm, min rawk kawnkaw dêr mai!”

¹⁴Aw Jerusalem, i suahsualna thinlung chu silfai la, Chhandam i ni dâwn nia. I ngaihtuahna sual chuan eng chen nge a luah dâwn che?

¹⁵Dan ram ațanga thil puang âw a lo awm a Ephraim Tlâng ațangin tuarna thû an puang:

¹⁶“Hnamte chu hriattir ula, Jerusalemah puang rawh u, Ram hla tak ațangin rûntute an lo kal a, Judai ram khawpuite anrawn âu khum ta e.

¹⁷Thlawhhma vêngtute ang maiin an hual vêl khup a, Ka chung a hel tlat avângin,” LALPAN a ti.

¹⁸“I awm dân leh i thiltih vâng hêng hi i chung a lo thleng a nih hi. I suahsual vâng vek a ni a, a na êm a, I thinnun a chhun tlang ta a ni.”

HNAM BORAL TÛR TÂN LUNGNGAIHNA

¹⁹Aw ka nunna, ka nunna! Ka rilru a va na tak êm! Ka lungphû a ri dawt dawt a; Ka awm hlê hlê thei lo, Aw ka nunna, tawtawrâwt ri i hre ta a, Indona râlkhêl thâwm chu.

²⁰Chhiatna chung a chhiat leh zualna an ti, Ram pumin rawk a tâwk ta. Ka puan in leh ka puan zârte chu kâr lovah a riral zo ta.

²¹Indona puanzâr hi engtia rei nge ka hmuh anga, Eng chen nge tâwtawrâwt ri ka hriat dâwn le?

²²“Ka mite lah chu an â si a, Mî pawh an hre lo ve. Naupang â mai an ni si a, hriat thiamna pawh an nei lo. Thil ța lo tih zei hlê si hian Thil ța tih an thiam leh si lo.”

²³Lei hi ka han en a, pianhmang nei lova ruak mai a ni a; Vânte pawh khian êng an nei nêmlê.

²⁴Tlângte hi ka han en a, an khûr dur dur a, Tlângtête chu an insâwi hlawk hlawk a.

²⁵Ka han en a, mihring tûmah an awm lo va, Chunglêng savâte pawh an thlâwk bo zo va.

²⁶Ka han en a, LALPA thinurna nasa tak hmâah chuan, Ram ța tak chu thlalêrah a chang ta a, An khawpuite pawh a chhe zo ta.

²⁷LALPA chuan heti hian a ti: “Ram pum pui chu a cherêu vek ang a; Mahse ka titâwp hlen êm lo vang.

²⁸Hei vâng hian lei hi a ngui ruai ang a, chung lam vânte pawh a thim baw ang, Ka ățawng chhuak tawh a, Ka tum tawh chu ka sût lo vang a, Ka inlamlêl hek lo vang.

²⁹Khawpuia mite chu sakawr chungchuan leh thalkâp mite thâwmah an tlânchhe vek ang a. Ramhnuaik pikah te, lungpui chungah te an lăwn ang. Khawpui zawng zawng an rauhsan ang a, Tûmah luahtu an awm lo vang.

³⁰“An rawk ve hun che chuan engtin nge i tih ang? Puan senlârin inthiamin vâk mah la, Rangkachak incheina nen inchei mah la, I mitte chu han hnawih dūr kual vêl mah la, A thlăwn maia inchei i ni ang; I ngaihzâwngten an hmusit che ang a, Tihhlum an tum hial zawk ang che.

³¹“Hmeichhe nău vei tē tuar tuar ri ang ka hriat chu, Fa tir vei ang maia lungngai thâwm a lo ni a, Zion fanu mangang âu thâwm a ni reng mai! A kut phar chhuakin, “Tualthattute avângin Ka nun a châu zo ta, ka chung a va pik tak êm!” a ti a.

BUNG 5

PATHIAN RORÊLNA DIK

¹Jerusalem kawthlêrah te tlân vêl ula; A tual zâwla mi hmuh tûr zawngin hriat tum teh u khai; Dikna nêna rorêl tuma, thutak zawngtu mi pakhat tal in hmuh hlah chuan, Khawpui chu ka ngaidam ang.

²LALPA nunna hmingin, ‘tiin han chhâl’ ve teh mahse, A dera chhechham mai an ni thîn.”

³Aw LALPA, thutak chu i thlir reng a ni lo m ni? Han vaw thîn mah la, mangan nachâng an hre si lo; I thunun hlê chung pawhin an insiam ța duh chuang lo. An hmêlte chu lungtum aiin an tisak si; Inlamlêl rêng an tum lo ve.

⁴Chuvângin kei chuan, “Hêng mite hi rethei si, â baw si an nih hi; LALPA kawng rêng an hre lo va, An Pathian remruat dân pawh an hre hek lo.

⁵Mi lianho va pan ıla, ka va be mai teh ang, Anni chuan LALPA dân pawh an hriat kha maw, An Pathian remruat dân kha,” ka ti a. Mahse chûng mite pawh chuan intiam rualin nghâwngkaw l an titliak a, Phuarna hrui te chu an sât chat a.

⁶Chuvângin ngăwa sakeibakneiin a rawn seh ang a, Thlalêr chinghniain a ei zo vang; An khawpuite chu keitêin a vil reng ang a, A tlân chhuak apiang a pawt sawm zêl ang, An bawhchhiatnate a tam êm avâng leh, An hnungtawlhate a pun zêl avângin.

⁷“Eng aiah nge ka ngaihdam dâwn che le? In faten min hawisan a, pathian ni hlei lo hming an chhâl a. Ka chăwm tlai sauh sauh va, min uirêsan leh si a, Nawhchizuar inah te an vir lut lut a.

⁸Sakawr chăwm thău za ruai ang maiin, Thenawmpa nupui itin an za ruai mai.

⁹Hêngte avâng hian ka hrem dâwn lo vem ni? Hetiang hnam lakah hian phubâ ka la lo vang maw?” LALPAN a ti.

¹⁰A bangah te lăwn ula, tichhia ula, Mahse tichhe zo êm suh u. A zârte chu la bo vek rawh u, LALPA ta pawh a ni si lo va.

¹¹Israela chhûngte leh Juda chhûngte chuan Ka chungah vervêk takin an ti ta si a,” LALPAN a ti.

¹²LALPA chungchângah dăwt an sawi a, “Ama tih pawh a ni lo ve. Thil ța lo kan chungah a thleng lo vang, Khandaih leh ățam pawh kan tuar lo vang.

¹³Zâwlneite pawh thlî ang lek an ni, Anmahniah thu pâi rêng an nei lo. Chutiang chuan an chungah tih ni rawh se,” an ti a.

¹⁴LALPA Sipaihote Pathian chuan heti hian a ti: “Hetiang thû i sawi avâng hian, ngai teh, Ka thûte hi i kâah meiah ka chantîr ang a, Hêng mite hi thingah chang se an la kângral vek ang.

¹⁵En teh, ram hla tak aţangin nangmah dotu tûr hnam ka rawn hruai ang, Aw, Israela chhûngte u,” LALPAN a ti. “Hnam chak tak leh hnam upa tak an ni a, An  awng chu i hriat ngai loh, An thusawi pawh i hriat thiam loh a ni ang.

¹⁶An thalb awm chu thl an inhawng ang mai a ni; Mi chak pui pui hl r an ni si a.

¹⁷In buhseng t r leh in chaw ei t r an eisak ang che u, In fanu fapate ei t r ngei chu. In ran rualte leh in ber mte an eisak ang che u a; In gr p leh in theipui pawh an ei zawhsak ang che u; In rinchhan ber, in khawpui kulhneite chu khandaihin an tichhia ang.

¹⁸“Nimahsela, ch ng hunah chuan ka tiboral vek  m lo vang che,” LALPAN a ti.

¹⁹Engati nge LALPA kan Pathianin heti taka kan chungah a tih le?’ an tih chuan, ‘Nangnin Kei mi hawisan a, in ramah ram dang pathian rawng in b wlsan ang bawkin, nangmahni ram ni lovah ram dang mite rawng kan la b wl ve ang,’ tiin in chh ng t r a ni.

²⁰“Jakoba chh ngte hn nah hei hi hrilhl ula, Judai ramah heti hian puang rawh u,

²¹“Hei hi lo ngaithla teh u,  w, nangni mi  , Hriat thiamna nei lote u, Mit nei si, hmu si lo, Beng nei si, hre thei si lote u:

²²“Min t h lo vang maw?’ LALPAN a ti. ‘Kei, tuipui ch m chin at na  iaupho daha, A liam lohna t ra thup k nghet n na delhkilhtu hm ah hian in kh r lo vang maw? Tuif wnte chuan rawn v r hlup hlup th n mah se, An luang liam thei chuang lo vang; Ri hum hum mahse, an rawn p l thei chuang lo vang.

²³Mahse h  mite hi luhlulna leh helna thinlung p  an ni a, An hel a, an kal bo va.

²⁴“A hun taka ruah hmasa leh ruah hn nung min petu, Buhseng hunbi min ruatsaktu LALPA kan Pathian chu i t h ang u,” tih duhna thinlung pawh an nei lo.

²⁵H ng thilte hi in bawhchhiatnain a hnar bo va, In sualna hian in lakah thil  a a dang r th n a ni.

²⁶Ka mite z ngah mi suaksual an awm a, Thangkamt  ang maiin an ch ng reng a; Thang an kam a; Mihring an  wk si.

²⁷B wm hi sav a a khat angin, An inte chu inbumnain a khat a. Ch  chu hausak phahin, an lian th r th r th n.

²⁸An thau m m tul a, an s r hlur a; Mi suaksualte thiltih chu an kh m h l a; Fahrahte hm khua r ng an ngai lo; An hmu ng l viau bawk si a, Nimahsela, tlachhamte ham hat v na t r an d wnpui duh si lo.

²⁹H ng thilte av ng hian ka hrem d wn lo vem ni? Hetiang thil titu hnam chungah hian phuba ka la lo vang maw?’ LALPAN a ti.

³⁰“Ram chh ngah hian Thil mak leh r pthlak tih a ni ta:

³¹Z wlneiten a derin th  an puang a, Puithiamten an th  th in ro an r l a; Ka mite ngainat z wng a lo ni bawk si a. Mahse, a

t wpah engtin tak ti ang che u maw?

BUNG 6

HMAR LAM ATA CHHIATNA A HN I

¹“Aw, nangni Benjamina thlahte u, Jerusalem tl nsan t rin inko kh wm rawh u! Tekoa khuaah t wtawr wt h m ula, Beth Hakerem-ah chhinchhiahna mei d t rawh u; Hmar lam a angin chhiatna a lo lang ta e, Chhiatna nasa tak mai chu.

²Zion fanu chu nula hm   a leh duhawm tak n n ka kh ikhin a.

³Ber mpute leh an ber m rualte a hn nah an lo kal ang. A v lin an puan inte an kai  kual v l ang a, Mahni awmna hmun      hah an t a z  ang.”

⁴“Amah do t rin inbuatsaih rawh u; Tho ula, chh n laiah i chho ang u. Ni a her liam ta mai, a v nduaithl k mang e, T   lam ni a hlim ta duai mai si a.

⁵Tho ula, z nah i kal mai ang u, A l l inte pawh kan tichhe d wn nia.”

⁶Sipaihote LALPA chuan heti hian a ti: “Thingte kit ula, Jerusalem hual n n lei chh ng p wng rawh u. Hei hi hrem t r khawpui chu a nih hi. A chh ngah inhnehchhiahna a khat si a.

⁷Tuikhurah tui a p t chhuak angin, A suahsualna a tip t chhuak th n. A chh ngah inrawk leh p wngn k a awm a. Ka hm  h lungngai leh hl am tuar an awm reng.

⁸Aw Jerusalem, lo fimkhur teh, Chuti lo chuan, ka nun hian a hransan dai  ang che a; Luah loh ram cher  -ah ka siam mai t r che asin.”

⁹Sipaihote LALPA chuan heti hian a ti: “Israel la dam chhunte chu gr p lawh hmai  angin an v i vek ang; Gr p lotu angin, a z r bukte chu k u nawn leh rawh u,” tiin.

¹⁰Tu nge ka hrilhin, tu nge ka zil  anga, Tuin nge lo dawngsawng ang le? Tihv r loh beng an p  a, engmah an hre thei lo. LALPA th  chu anmahni demna th  angah an ngai a; An l wm thei t t lo a ni.

¹¹Chuv ngin, LALPA thinurnain ka khat a, Ka ins m zo ta lo ve. “P wna naupangho hn nah ka leih bua ang a,       awm kh wmhote chungah pawh; P sal pawh a nupui ruala man a ni ang a, Upa leh tarte pawh an b ng bik lo vang.

¹²An inte chu mi dang kuta hlan a ni ang, An lote leh an nupu te n n; Ch  rama ch ngte chungah chuan Ka kut ka lek d wn si a,” LALPAN a ti.

¹³“A t  ber a anga a lian ber thlengin, Mi tin duh mnain an khat a; Z wlneite leh puithiamte chenin, Dik lo taka ti duh     h an ni si a.

¹⁴Ka mite hl am chu a hming lekin an tuam ve a, ‘A dam mai ang, a   a mai ang!’ an ti a, A dam hau  si lo va.

¹⁵Thil tenawm an tih n an zak ve deuh em? Zak su  e! An zak thl wt lo; An hm   pawh a sen eih lo. Chuv ngin, tl   z ngah an t u ve ang a, Ka hrem hun chuan, ka pai thla hneh khawp ang,” LALPAN a ti.

¹⁶LALPA chuan: “Kawng pêngah te dingin, en vêl ula, Kawng hlun leh kawng ða awmna chu zâwt rawh u, Chû kawng chu zawh ula, tichuan, in nun a hahchâwl dâwn nia,” a ti a. Anni erawh chuan, ‘Chutah chuan kan kal lo vang,’ an ti a.

¹⁷Râlvêngtute pawh ka ruatsak che u-a, Tâwtawrâwt rî chu ngaithla rawh ul’ ka ti a. Mahse anni chuan, ‘Kan ngaithla lo vang,’ an ti tlat a.

¹⁸Chuvângin, hnamte u, ngaithla ula, Aw, pung khâwmhote u, in zîngah eng nge awm tih hre rawh u.

¹⁹Aw leilung, ngaithla teh! En rawh, hêng mite hnênah hian manganna ka thlen ngei ang maw le; An suangtuahnain a hrin chhuah ngei chu, Ka thûte an pawisak lohva, ka dânte an hnâwl fithlâk dêr avângin.

²⁰Seba aţanga beraw rîmtui te, Ram hla aţanga fu thlum mi rawn lâksak te hi Eng atân nge ka tih ang? In hâlral thilhlante hi pawm tlâk a ni lo va, In inthâwinatê hi ka tân a thlum awzâwng lo ve.”

²¹Chuvângin, LALPAN heti hian a ti: “Hê mite hmâah hian tlûkna tûr ka dah ang a, Pâte leh fapate chu la tlu khâwm reih ruih teh se. An thenawm leh thian te pawh tlu hlum rawh se.”

²²LALPA chuan heti hian a ti: “En teh, hmar lam aţangin mipui an lo kal e, Leilung tâwpa hnam ropui chu kaihtawh a ni ang.

²³Thal leh fei an keng a; Mi nunrâwng, zahngaihna nei lo an ni; Sakawr chungah chuangin, tuipui angin an ri hum hum a, Aw Zion fanu, indo mite chuan an rawn bei dâwn a che.”

²⁴An chanchinte kan lo hriatin, Kan bân te a tizawi zo vek a. Hmeichhe nauvei nâ angin, mangannain min man ta.

²⁵Ram lamah chhuak suh ula, kawngah pawh kal suh u. Hmêlma khandaih avângin kil tin a râlmuang ta lo ve.

²⁶Aw, ka fanute u, Sai ip puan sin ula Vaivutah tâl rawh u! Fapa mal sîn angin, a runthlâk ber chíin tuar teh u; Rawktu chuan min rawn nang thut dâwn si a.

²⁷“Ka mite zîngah kulh leh râlvên in angah ka siam che a, An awm dân hre Chiang tûra i enchhin theih nân.

²⁸Mi luhlul, helhmang, mi rêl kual vak vak chîng, Dâr leh thîr tum ang mai, Hlêprûk chîng vek an ni.

²⁹Pûmin an zâp a, suan chu meîin a titui thîn; Mi suaksualte lâk kian an nih phawt loh chuan, Suan êkchhia chu thlithfai theih a ni tawh lo,

³⁰LALPAN a hnâwl tawhote chu, Miten ‘silvâr êkchhia’ an la ti ang.

BUNG 7

BUMNA THÛ AN RING

¹LALPA thuchah Jeremia hnêna lo thleng chu:

²“LALPA in kawngkâah va dîng la, hê thû hi va puang rawh, ‘Nangni, Juda mi zawng zawng, LALPA be tûra hêng kawngkâa lûtte chuan LALPA thû hi lo ngaithla rawh ul’”

³Sipaihote LALPA, Israelte Pathian chuan heti hian a ti: “In awm dân leh in thiltihah insiam ða rawh u, tichuan hê hmunah hian ka chêtîr ang che u.

⁴Hêngte hi LALPA tempul a ni, LALPA tempul a ni, LALPA tempul a ni,’ titute dâwtthû hi âwih suh u.

⁵“In awm dân leh in thiltih dânah tihtak zeta in insiam ðata, tihtak zeta mite leh an thenawmte kâra dik taka ro in rêlsaka,

⁶hnam dang mite, fahrah te, hmeithai te in rahbeh lohva, hê hmunah hian pawisawi lo thisen in chhuah lohva, in chhiatna tûr maia pathian dangte in zui loh bawh chuan,

⁷hmasâng ata in thlahtute hnêna ka pêk, hê ramah ngei hian kumkhuain ka chêtîr ang che u.

⁸“En ta che u, in hlâwkpuî hauh loh dâwtthû mai a ni in rin ni.

⁹Rûkrûk te, tualthah te, uirê te, dâwta chhechham te, Baal hnêna rîmtui hâla inthâwi te, in hriat ngai loh pathian dangte thlah hauh si lovin,

¹⁰hê in, Keima hming pu inah hian ka hmâah lo kalin, ‘Hêtiang thil tenawm ti tûra chhan chhuah kan ni,’ in ti ang maw?

¹¹Keima hming ngei putu hê in hi suamhmangte pûkah in lo ngai reng a ni maw? En teh u, Kei pawhin ka hmuh reng hi,” LALPAN a ti.

¹²“Tûnah hian Silo khua, a tûra keima hmun atâna ka hming ka awmtîrnaah khân va kal ula, ka mi Israelte suahsualna avânga ka thiltih te kha va en teh u.

¹³Hêng hi in tih avâng hian ka ko mawlh mawlh che u a; mahse min ngaithla duh lo va; ka koh lawm lawm che u pawhin min chhâng duh si lo,” LALPAN a ti.

¹⁴Chuvângin, Silo chungah ka tih ang bawh khân, hê hmun, in thlahtute hnêna ka pêk, Keima hming putu, in rin êm êm hê in chungah hian ka ti ve dâwn a ni:.

¹⁵Tichuan, in unau Ephraim hnam pumpui ka paih chhuah ang khân, nangni pawh ka hmuh loh tûrin ka paih chhuah ang che u.

¹⁶“Chuvângin, hêng mite hi ðawngtaşak suh ula, an tâna ðawngtaşin âw pawh chhuah suh ula, ka hnênah pawh dîlsak hek suh u; ka lo ngaithla lo vang che u.

¹⁷Juda khawpuiah te leh Jerusalem kawthlêra an thiltih thîn te chu i hmu lo vem ni?

¹⁸Naupangten thingtuah tûr an fawm khâwm a, an paten meî an chhêm a, hmeichhiaten vân lalnu tân chhang ur tûr an hmet a; pathian dangte hnênah in tûr thilhlân an thli chhuah thîn a, ka thîn an tiur êm êm a ni.

¹⁹Ka thinrimna an chawktô a ni lo vem ni?” LALPAN a ti. “Mahni mawng hlîm lek an ni lo vem ni?”

²⁰Chuvângin, Lalpa PATHIAN chuan heti hian a ti: “Lo ngai reng mah rawh u, ka thinurna leh thinrimna hi hê hmunah te—mi leh sa chungah te, ramhnuai thing leh huana theirah chungah te ka leih bua ang a. A kâng chu tûmâ thelh mih rual a ni lo vang.

²¹Sipaihote LALPA, Israelte Pathian chuan heti hian a ti: “In inthâwinaah chuan hâlral thilhlante belhchhah ula, a sâte pawh ei rawh u.

²²Aigupta ram ata ka hruai chhuah lai khân, in thlahtute hnênah hâlral thilhlân leh inthâwina chungchângah thupêk ka nei lo va, eng thil mah ka hrilh hek lo.

²³Mahse, hei hi an hnêna ka thupêk chu a ni, ‘Ka thù hi zâwm ula, in Pathian ka ni ang a, nangni pawh ka mite in ni ang. Ka thupêk zawng zawng in zawm chuan, in tân a tha ang,’ ka ti a.

²⁴Nimahsela, an zâwm duh lo va, an bengkhawn duh hek lo; anmahni duh dân leh an thinlung sual lam âwn tlat chuan a hrui pêng a, hma lam pan ahnehin an hnungtawlh ta zâwk a.

²⁵In thlahtuten Aigupta ram an chhuahsan nî ațanga vawiin thleng hian ka chhiahhlawh zâwlnei zawng zawngte chu, kâwla ni chhuak chhiarin in hnênah karawn tîr thîn a.

²⁶Chuti chung pawhin ka thu âwih duh lovin, mi bengkhawn duh hek lovin, an ring an tikhawng lui tlat a. An thlahtute aiin an sual zaw mah a.

²⁷“Tichuan, hêng thûte hi i hrilh vek ang a, mahse an âwih duh chuang lo vang. Anniho chu i âu vang a, mahse an chhâng duh lo vang che.

SAKHAW BAWLHHLAWH HREMNA

²⁸“An hnênah heti hian ti la, ‘Hê nham hi LALPA an Pathian âw ngaithla duh lo leh zilh harh zawh loh nham an ni. Thu dik a boral a, an kê ata lâk bo a ni ta.

²⁹I sam hlep la, paih daih la, lusûn tûrin tâng sâng hmun fianrialah chho rawh; LALPAN a thin tiurtu chhuan hote chu a paihthla ta si a.’

³⁰Juda thlahte chuan ka mithmuhah thil sual an ti ta si a,” LALPAN a ti. “Ka hming putu in tibawhlhlawh tûrin an thil tenawmte chu an hûng lût ta a.

³¹An fanute, an fapate hâl nân Hinnoma Fate Ruamah Tophet in sâng an sâ a; chutiang ti tûrin thù ka pe si lo va, ka thinlungah pawh a lang hek lo.

³²“Ngai teh u, nîte chu a lo thleng dâwn,” LALPAN a ti. “Chutih hunah chuan Tophet an ti tawh lo vang a, Hinnoma Fate Ruam an ti tawh hek lo vang, Insâmna Ruam an ti tawh zâwk ang a, phûmna hmunin a daih loh thlengin Tophet-ah chuan mi an phûm dâwn si a.

³³Hêng mite ruang hi chunglêng savâte leh leia ramsâte châw a la ni ang. Tûma’n an hnawt bo thei lo vang.

³⁴Juda khuate leh Jerusalem kawthlêrah te chuan hlim thâwm te leh lâwmna au ri te, moneitu âw te, mo âw te hriat tûr awm lovin ka siam ang. Ram pum chu tihram vek a ni dâwn si a.

BUNG 8

¹“Chutih hunah chuan Juda lallo ruhte, milianho ruhte, puithiamho ruhte, zâwlneiho ruhte leh Jerusalema chêngo ruhte chu an thlân ațangin an phawrh chhuak ang,” LALPAN a ti.

²Duh taka rawng an lo bâwlsak thîn, an zawn a ni zuia, chibai an bûk thîn, nî te, thlâ te, vâna awm zawng zawngte hmâah chuan an la pho chhuak ang. An ruangte chu tûma’n an hlâwm lo vang a, an phûm hek lo vang; lei chung a hnâwmhnawk mai an ni ang.

³Hê nham sual tak zînga la dam chhunte chuan ka hnawhdarhna hmunahte chuan dam aiin thih an la thlang zâwk ang,” Sipaihote LALPA chuan a ti.

ZIRTÎRNA DIK LO HLAUHAWMZIA

⁴“An hnênah thù sawi rawh, ‘LALPA chuan heti hian a ti: “An thu ang a, an tho leh lo vang mâw? Kawng an bo ang a, an lêt leh lo vang mâw?”

⁵Engati nge hê mite hi an hnungtawlh leh thîn a, Engati nge Jerusalem hi a hnungtawlh kumkhua mai le? Inbumna an thlah thei lo va, An inlamlêt duh tawh hek lo.

⁶Bengchhiin ka ngaithlâ a, mahse thu dik rêng an sawi lo. ‘Eng thil nge ka lo tih tâk?’ tia an suahsualna sim tum pawh an awm lo. Indona hmuna sakawr tlan lût ang maiin, Mahni hmazâwn lam an pan ngut ngut hlawn a.

⁷Vâna kâwlhâwkte pawhin an hunbî an hria a; Thuro te, vamûr te leh lêngdêr te pawh a hun takah an lo lang thîn a. Ka mite erawh chuan LALPA rorêl dân rêng an hre lo.

⁸“Engtin nge ‘Mi fîng kan ni a, LALPA dân chu kan hnênah a awm’ in tih theih? Leikhaziaktute pen dawthei chuan dâwtah bawh a chantîr thîn.

⁹Mi fîngte chu an zak a, a ngaihna hre lovin mak an ti a. En teh, LALPA thù an hnâwl tawh si a, Khawi lam finna nge an neih tâk ang le?”

¹⁰Chuvângin, an nupuite chu mi dang ka pê ang a, An lote pawh a luahtu tûrte hnênah ka pê ang; A tê ber ațanga a lian ber thlengin duhâmna an khat a; Zâwlnei ațanga puithiam chenin mi bum chîng an ni si a.

¹¹Ka mite hlîam tuar chu a hming lekin an tuam ve a, ‘A râlmuang e, a râlmuang e!’ an ti vêt mai mai a. A râlmuang hauh si lo va.

¹²Thil tenawm an tihin an zak ve deuh em? Zak suh e! An zak thlâwt lo; An hmai pawh a sen eih lo. Chuvângin, tlûte zîngah an tlu ve ang a, Ka hrem tak tak hunah chuan Ka paihthla hneh khawp ang,” LALPAN a ti.

¹³“Ka tiboral ngei ngei ang,” LALPAN a ti. “Grêp kungah grêp a rah lo vang, Theipui kungah theipui a rah hek lo vang a, A hnah te chu a uai ang; Thil ka lo pêk tawhte chu an hnên ata a rîral vek ang.”

¹⁴“Engah nge kan thut reng chu le? Kal khâwm ula, kulh nei khuaah te i lût ang u khai, Chutah chuan i va ngâwi reng teh mai ang u. LALPA kan Pathianin min ngawihtîr a, LALPA laka kan tihsual tâk avângin Tui kha tak min intîr ta si a.

¹⁵“Muanna kan zawng a, mahse eng thil tha mah a lo thleng si lo; Tihdamna hunah buaina a lo awm hlah si a!

¹⁶A sakawr hnâr tum rî chu Dan ațanga hriat a ni a. A sakawr chak hrâm riin ram pum a tikhûr a; An lo thlen tâk avângin ram leh a chhûnga awm zawng zawngte, Khawpui leh a chhûnga chêngte nêan an lem zo ta vek a.”

¹⁷“Ngai teh u, in zîngah rûlte karawn tîr ang, Rûl tûr nei, khâwi ngam theih loh chu, Chûngte chuan an chuk ang che u,” LALPAN a ti.

ZÂWLNEIIN MIPUI A SÛN

¹⁸Lungngaihna in ka inhnêm teh mai ang; Ka thinlung pawh a chau zo ta.

¹⁹Ngaithla teh u! Ka mite fanu ƿap ƿhâwm a ni, Ram hla tak ami chu: “Zion-ah LALPA a awm lo vem ni? “A Lal chu a chhûngha a awm lo’ m ni?” “Engah nge an mitem kerchawp te, Ram dang pathian lim hmanga min tihthinur ni?”

²⁰“Buh seng hun a liam a, Nipui pawh a liam ta, Chhandam kan la ni si lo!”

²¹Ka mite fanu natnaah chuan ka na ve si a. Nâ ka tuar a. Lû ka sîn a; Hlahnain ka ƿhâuvah mi man ta.

²²Gilead-ah damdawi a awm lo vem ni? Chutah chuan tidamtu a awm na nge? Engati nge ka fanu a hrisel lohva, a dam theih loh le?

BUNG 9

¹Aw, ka lu hi tui han ni se, Ka mit hi mittui hnâr ni baw se, Ka mite fanu an thahte tân chhûn zânin ka ƿap tûr!

²Khualzinte tân thlalêrah khualbûk nei ila âw! Ka mite kalsanin, ka awm bosan daih tûr! An zân uirê ching leh, Mi bumhmang awm khâwm mai an ni si a.

³Thal ngul kawihkûl angin an leite chu dâwt sawi tûrin a inkâu reng si a. Leiah hian thutak ƿan tûrin an huaisen si lo. An sual zual zêl a, mi pawh an hre ta lo,” LALPAN a ti.

⁴“Mahni ƿhenawm lakah an fimkhur dūk mai a, Unau pawh an inring zo ta lo; Unaute chu an la inlân tawn dâwn chauh si a, ƿhenawm kârah an inrêl tawn ƿheuh si a.

⁵Mahni ƿhenawm ƿheuh an bum ang a, Tûma’n thu dik an sawi lo vang; Dâwt sawi nân an lei an tâthriam a, Ning hlâwi khawpin thil sual an ti ƿhîn.

⁶Inbumna hmunah i chêng a; Bum an chîn vângin kei min hre duh lo,” LALPAN a ti.

⁷Chuvângin, sipaihote LALPA chuan heti hian a ti: “Ngai teh, fiahna hmangin ka thlifim dâwn; Ka fanute hi engti takin nge ka tih dâwn le?

⁸An lei chu thal kah chhuah ang mai hian Bumna thú an chhâk chhuak ƿhîn; A ƿhenawm hnênah inremna thú a sawi hluam hluam a, A thinlungin a châng ru reng baw si a.

⁹Hêng avângte hian ka hrem dâwn lo vem ni? Heti ang hnam lakah hian phubâ ka la lo vang maw?” LALPAN a ti.

¹⁰ƿap chungin tlângte chu ka sîn ang a, Thlalêra chênna hmunte chu ka tuarpui baw ang, Tûma tlawh tlâk loh khawpin a kâng ral vek si a; Ranrual ƿhâwmte pawh hriat tûr a awm ta lo. Chunglêng savâte leh ramsate an bibo zo va, an awm ta lo.

¹¹“Jerusalem chu thil chhe hlâwm, sihalte pûk ang lekah ka siam ang a, Juda khuate chu luahtu awm lovin ka tiram vek ang.”

¹²Heti ang hrethiam thei tûr mi fîng tu nge awm le? Tu nge puang tûra LALPAN a lo hrih? Engati nge tlawh ngai loh thlalêr hmun ang maia ram hi a kan ral ták le?

¹³LALPA chuan, “An hnêna ka pêk ka dân an hawisan a, ka âw kâ rêng an pawm duh lo va, an nunpui baw hek lo,

¹⁴an thinlungin a kaihhrui ang angin, an thlahtuten an lo zirtîr ƿhîn Baala hnung an zui ta zâwk a,”

¹⁵chuvângin Sipaihote LALPA, Israelte Pathian chuan heti hian a ti: “Ngawi tak rawh u, hê mite hi thil khâ ka barh ang a, in tûr tui khâ ka pe baw ang.

¹⁶An thlahtute leh anmahni pawhin an hriat ngai loh Jentail hnamte zingah ka hnawt darh ang. Ka tihbora vek hmâ chu khandaih ka ûmtîr dâwn a ni,” a ti a.

MIPUITEN AN CHUNGTHU RÊL AN SÛN

¹⁷Sipaihote LALPA chuan heti hian a ti: Ngaihtuah ula, hmeichhe lusûn mite ko ula, lo kal rawh se; Hmeichhe ƿap thiam hote ko ula, Lo kal hlawm teh se.

¹⁸Lo kal thuai se, minrawn ƿahkhum sela, Kan mittui te a sûr zung zunga, Mit ata mittui a luan thlâk zawih zawih theih nân.

¹⁹Zion-ah chuan ƿap ƿhâwm an hre ta: ‘Min va rawh nasa ve le! Kan mualpho nasa ngei mai, Kan ram kan kalsan ták avâng leh, Kan chênna aƿanga hnawh chhuah kan nih vâng a ni.’

²⁰Aw, nute u, LALPA thú hi ngaithla ula, A ƿawngka chhuak thú chu lo bengkhawn teh u; ƿhenawmte hnênah khawhar hla zirtîr rawh u.

²¹Thihnain kan tukverh a rawn kal tlang a, Kan lal inahte a lût a, Pâwn lama awm naupangte tihluma, Khawlaia lêng tlangvâlte tihlum tûrin!

²²“LALPA chuan: ‘Mitthi ruangte chu hnâwmhnawk angin tuallaiah a let rem rum ang a, Buh seng hmaih angin tûman an khâwm lo vang’ tih sawi rawh,” a ti a ni.

²³LALPA chuan heti hian a ti: “Mi fîng chuan a finna chhuang suh se, Mi chak pawhin a chakna chhuang hek suh se, Mi hausu pawhin a hausakna chhuang baw suh se;

²⁴Amaherawhchu, chhuan tûr duh chuan hei hi chhuang rawh se, Kei, LALPA hi leiah hian ngilneiha te, rorêlha te leh dikna te kengkawhtu ka ni Tih hria se, man thiam rawh se. Chûng chu ka lâwm zâwng a ni,” LALPAN a ti.

²⁵“Ngai teh u, serhtan lohho ang maia serhtanho ka hremna ni a lo thleng dâwn,” LALPAN a ti.

²⁶Chûng chu Aigupta te, Juda te, Edom te, Ammon leh Moab mite leh thlalêr hmun kilkhâwr bera chêngte an ni. Chûng mite chu serhtan loh hnam vek an ni a, Israela chhûngte erawh chu thinlunga serhtan loh vek an ni baw si a,” a ti a.

BUNG 10

PATHIAN DIK LEH MILEMTE

¹Aw, Israel mite u, in hnêna LALPA thusawi hi lo ngaithla teh u.

²LALPA chuan heti hian a ti: “Jentailte nun dân hi zir ve suh u; Vâna chhinchhiahnate khian tithlaphâng ve che u suh se, Jentailte chuan an hlau êm êm mai si a.

³Hêng mite chîn dân hi engmahlo mai a ni; Ngâwa thing te an kit a, Chû chu kut themthiamin hreiin a tuk a.

⁴Silvar leh rangkachakin an cheimâwi a; A tlûk loh nân tuboh leh perekin an kilh a.

⁵Tûm thing angin an ding ngîl âwt a, An ƿawng thei lo; Mahnia kal sawn thei lo, Put sawn ngai an ni, Chutiang te chu hlau teh suh

u, Thil sual pawh an ti thei lo va, Thil tha pawh an ti thei hek lo.”

⁶Aw LALPA, nangmah ang hi tumah an awm lo (Nang chu i ropui a, i hming chu thiltitheihna ropui a ni),

⁷Aw hnam tinte Lalber, tu nge hlau lo vang che? Chû chu i chanvo dik tak a ni si a. Hnam tin leh an lalram zawng zawnga An mifing zawng zawngte zingah, Nangmah ang reng hi tumah an awm lo.

⁸Anni erawh chu fingvâr si lo, â bawk si an ni; Thinga siam milim hi a rintlâk hlau lo ve.

⁹Silvâr chu an deng phêk a, Tarsis aţangin an rawn phur a, Rangkachak pawh Uphaz aţangin, Kut themthiam leh thîrchher thiam kutchhuak a ni; Puan dumpâwl leh sendukin an chei a; Chûng chu mi themthiamte kutchhuak vek a ni.

¹⁰LALPA erawh chu Pathian dik tak a ni; Pathian nung, chatuana Lalber a ni. A thinurin lei hi a khûr a, Hnamte tân a thinrim chu tuar zawh rual a ni lo.

¹¹Chuvângin an hnênah: “Vânte leh lei siamtu ni ve lo pathiante chu lei aţang leh hêng vân hnuai aţangte hian an la boral vek ang,” tih hriattîr rawh.

¹²Ani chuan a thiltitheihnain lei hi a siam a, A finnain khawvêl hi a din nghet a, A thuneihnain vânte khi a kâi pharh a.

¹³A âw a chhuah a, vânahte khian tui tam tak a lo awm ta a: “Tuihûte chu kâwlkil tin aţangin a chohtîr a, Ruah tân kâwlphê a siam a, A robâwm ata thli a tlehtîr a.”

¹⁴Mi tinte hi hriatna nei lo leh mâwl tak an ni a; Rangkachak chhertuten an milim chu an la zahpui ang; An milim chher chu dâwt mai, thaw thei hlei lo an ni si a.

¹⁵Sâwtina nei lo, siam sual thil mai an ni; Hrem an nih hunah an boral ang.

¹⁶Jakoba Chanvo chu hetiang mai hi a ni ve lo, Ani chu thil engkim Siamtu a ni zâwk a, Israel hi a rochan hnam a ni a, A hming chu Sipaihote LALPA a ni.

JUDATE SALAH AN TÂNG DAWN

¹⁷Aw, kulh chhûnga chêngte u! Ram aţang hian in bungruate têt khâwm rawh u.

¹⁸LALPA chuan heti hian a ti si a: “En teh u, tûn tûm chu hê rama chêngte hi ka paih chhuak ang a, An hai rual loh tûrin ka timangang teh ang.”

¹⁹Ka nâ hian min va tirethei tak êm! Hliampui a ni ka tuar ni. Mahse, “Na hlê mahse ka tuar tûr a ni si a,” ka ti a.

²⁰Ka puan in an rawk a, Ka hrui thlunte a chat vek a; Ka faten min kal bosan a, an awm tawh si lo va. Ka puan in kaihtu tûr leh ka puanzâr Kâipharhtu tûr tûmah an awm ta lo.

²¹Berâmpute lah an mâwl tawh tawh a, LALPA zawn nachâng pawh an hre lo; An tân hmuingîl ngaihna a awm lo, An berâmpute an darh zo mai ang.

²²Chu le, thuthang a lo thleng ta, Hmar lam ram aţangin a buai ta nuaih nuaih mai, Sihalte tawmna tlâk leka Juda khawpuite rawn siamtu tûr chu.

²³Aw LALPA, mihring nun kawng hi mahni kuta awm a ni lo tih ka hria; A ke pênna kawng hruiatu pawh ama kuta mi a ni hek lo.

²⁴Aw LALPA, mi zilh rawh, mahse a tâwk têtin âw; Thinur lovin ni se, chuti lo zawng, min tiboral dah ang e.

²⁵Nangmah hre lo Jentailho chungah te, I hming lam duh lo chhûngkaw chungah te i thinurna leih bua ang che; Jakoba chu an ei zo va, An hmawm a, an dawlh zo ta a, A chênna hmun an tihram vek avângin.

BUNG 11

THUTHLUNG BAWHCHHIATNA

¹Jeremia hnêna LALPA thu lo thleng chu,

²“He thuthlunna thû hi ngaithla ula, Juda mite leh Jerusalema chêngte hnênah hrilh rawh u;

³thian ti ula, ‘LALPA Israelte Pathianin heti hian a ti: “Hê thuthlunna thu âwih duh lo apiangin ânchhia dawng rawh se,

⁴in thlahtute, Aigupta rama thîr rawhtuina ata ka hrui chhuah lai khân, an hnênah thû ka pê a, ‘Ka thû hi zâwm ula, thû ka pêk ang zêlin ti rawh u; tichuan ka mite in ni ang a, kei pawh in Pathian ka ni ang,’

⁵in thlahtute hnêna chhechhama, ‘khawizû leh hnutetua luang ram’ pêk ka lo tiam tawh chu ka hlen ngei ang,” wawiina mi ang tak hian,” “a ti a. Kei chuan, “Ni rawh se, LALPA,” tiin ka chhâng a.

⁶LALPA chuan ka hnênah, “Hêng thûte hi Judai khawpuiah te leh Jerusalem khawlaiah te puang vek la, an hnênah: ‘Hê thuthlung thûte hi ngaithla ula, zâwm rawh u.

⁷In thlahtute kha Aigupta ram aţanga ka hrui chhuah ni ata tûn thlengin thahnemngai takin ka fuih thîn a, “Ka thû hi âwih rawh u,” tiin wavi duai lo ka lo zilh thîn a.

⁸Mahse ka thû an âwih duh lo va, min bengkhawn duh hek lo, mi tinin an thinslung sual duh dân an zui a; chuvângin, hê thuthlunna thû ang taka ti tûra thû ka pêk, an tih duh lohte hi an chungah ka la thlentîr vek dân a ni,” a ti a.

⁹LALPA chuan ka hnênah, “Juda mite zingah leh Jerusalema chêngte zing aţangin phiarrûkna hmuh chhuah a ni.

¹⁰Ka thû ngaithla duh lovin, an thlahtute sualnaah khân an lêt leh a, pathian dangte rawngbâwl tûrin an kal bo ta; Israel mite leh Juda miten an thlahtute hnêna ka thuthlun chu an bawhchhe ta.”

¹¹Chuvângin, LALPA chuan heti hian a ti: “Lo ngai reng rawh, an pumpelh hauh loh tûr thil tha lo an chungah ka rawn thlen ang; mi rawn âu sateh mah se ka chhâng hlek lovang.

¹²Tichuan, Juda khuua mite leh Jerusalema chêngte chuan inthâwina rimitui an hlan thîn pathian lemte hnênah kalin an âu vang a; mahse an manganna lakah an chhan thei dân dêr si lo va.

¹³Aw Juda, i khawpui zât zet pathian i nei a; Baala hnêna rimitui hâlna tûr maichâm lah chu Jerusalem kawthlêr zât ngawt in lo din hi, a va zahthlâk vê.

¹⁴“Chuvângin, hê mite tân hian ɬawngtai suh la, an tân âw chhuahin ɬawngtai hek suh; an mangan avâng a min auh hunah ka lo bengkhawn dawn si lo va.

¹⁵“Ka duhtak hian ka inah eng nge tih tûr a neih tâk le, Mi tam tak a hur bopui tawh si a? Inthâwina sa thianghlime hlân reng chungin Sual rawng i bâwl a, i la hlimpui viau lehngâl a.

¹⁶LALPA chuan i hmingah ‘Olive Thing Hring, Duhawm’ leh ‘Rah Duh’ a ti che a, Ri dur dur khawpin a chungah mei a chhêm a, A zârte pawh a tliak zo ta.

¹⁷“Nangmah phuntu Sipaihote LALPA chuan, Israel chhûngte leh Juda chhûngten anmahni tâna thil ɬa lo tak tia, Baal hnêna rimtui hlâna min tihthinur êm avângin, an chungah chhiatna a puang ta.”

JEREMIA NUNNA A HIM LO

¹⁸LALPA chuan hriatna mi pê a, ka lo hre ta; an thiltih dân chu mi hmuhtîr ta si a.

¹⁹Kei erawh chu berâm no nunnêm, talh tûra an hruai ang mai ka ni a; min lo phiar rû tih rêng ka lo hre si lo va; anni erawh chuan, “Thing chu a rah chawpin kit ila, mi nung ram ata i dah bo daih ang u; tichuan, a hming pawh tûma’n an hre zui dawn lo nia,” an lo ti a.

²⁰Mahse, âw, Sipaihote LALPA, Nang chu diknaa rorêltu i ni a, Rilru leh thinlung lam i fiah ɬîn a, An chung a i phuba lâk chu mi hmuhtîr ang che, Ka chungthû chu i hnênah karawn thlen e.

²¹“Chuvângin, Anathoth mi, nangmah thah tuma, ‘LALPA hmingin thû puang tawh suh, kan kutah i thi palh ang e,’ titute chungchângah LALPAN heti hian a ti:

²²Sipaihote LALPA thû chu hei hi a ni: ‘Lo ngai reng la, anni chu ka la hrem dawn e. Tlangvâlte chu khandaihin an thi ang a, an fanu fapate chu ɬâm tuarin an la thi ang;

²³hrem an tuar kum lâ lăin, Anathoth mite chungah chhiatna ka thlen ang a, thi bâng eih pawh an awm lo vang,’” tiin.

BUNG 12

JEREMIA ZAWHNA

¹Aw LALPA, i lakah thupawi thlen mah ila, nang chu i dik tho tho va; I rorêl dânah hian i hnênah thlen duh ka nei. Engati nge mi suaksualte kawng hi a tuan zurh mai le? Engati nge hlemhle taka che ɬhînten nuam an tâwl bîk?

²Anni chu i phun a, ni e, zung an kaih ɬuai a; An ɬang zêl a, a ni, rah an chhuah bawk a. An hmuï chuan a hnaih che a, Mahse an thinlungin a hlat si che a.

³Mahse, âw LALPA, nang chuan mi hria a, mi hmu a, I laka ka thinlung put dân mi fiah tawh kha. Anni erawh chu berâm talh tûr angin hnûk chhuak la, Anmahni talh nî tûr ruatsak ang che.

⁴Engtia rei nge ram chuan a sîn anga, Lova thlaite chu engchen nge an la vuai dawn? A chhûnga chêngte suahsualna avângin Ramsâte leh savâte an riral zo va, “Kan hun tâwp dân a hmu teuh lo,” an tih che avângin.

LALPAN JEREMIA ZAWHNA A CHHÂNG

⁵“Kea kal mite i intlânsiakpuia i chauh mai chuan, Engtin nge sakawrte chu i el phâk ang le? I rin êm êm, i thlamuanpui ramah pawh i chauh mai chuan, Jordan lui ruamah pheï chuan engtin nge i awm ang?

⁶I unau, i pa chhûngkuua mi ngeite pawhin I chungah depdê takin an ti duh a ni a; Ni e, an au zui vak vak che a. Chuvângin, an biak ɬat viau che pawhin âwih duh suh.

⁷Ka in leh lo kalsanin ka rochan ka hnutchhiah a; Ka nunin a ngaih êm êm pawh a hmêlmâte kutah ka pe ta.

⁸Ka rochan chu ka tân ramhnuaia sakeibaknei ang a ni; Min rûm khum avângin ka huat phah ta a ni.

⁹Ka rochan chu ka tân mulukawl ɬial ang a ni; Mulukawlhten an hêl an hêl mai. Khai le, ramsa zawng zawng han khâwm ula, Rawn ei zo vek rawh se!

¹⁰“Berampu* tam takin ka grêp huan an tichhia a, Ka chanvo chu an chîl hrep a; Ka chan ram nuam tak chu ram rovah an chantîr ta.

¹¹An tiram zo vek a; A ram ta mai chu ka tuar na hle; Ram pum chu an tiram zo vek a, Tûma’n pawï an ti bawk si lo.

¹²Thlalêr tlang sâng kawlh vel vulah te chuan Mi rawk hmangete chu an lo kal a, LALPA khandaih chuan a ei zo vek ang. A ram tâwp aɬanga a tâwp lehlam thlengin Tûmah him an awm lo vang.

¹³Buh an chîng a, hling an seng a; An thawhrim ang hûin an hlâwk si lo. LALPA thinurna a nasat êm avângin an rah chhuah chu an la zahpui ang.”

¹⁴LALPA chuan heti hian a ti: “Ka mi Israelte roluah tûra ka tih lo khawih chingpentu, ka ɬenawm sual zawng zawngte chu an ram ata ka phih chhuak ang a, an zînga Juda chhûngte awm apiang ka pawt chhuak ang.

¹⁵Ka pawh chhuah hun chuan ka kîr leh ang a, anni chu ka khawngaih ang a; mi tin an rochan ɬeuh luah leh tûrin anmahni ramah ngei ka hruai haw leh ang.

¹⁶Ka mite awm dân ngun taka an zira, Baal hminga chhia chham tûra ka mite an lo zirtîr ɬhin anga LALPA nung renga hming chhâla thu an tiam ve chuan, ka mite zîngah an tel ve ang.

¹⁷Thû an âwih loh erawh chuan, chu hnam chu ka phih chhuak ang a, ka tiboral dêr ang,” LALPAN a ti a ni.

BUNG 13

HRÊNPUAN ZAISÎN CHHINCHHIAHNA

¹LALPA chuan heti hian a ti: “Kal la, puan zaisîn hrên chí va lei la, i kâwngah vêt rawh, tuih chuan hnim suh,” tiin.

²Tichuan, LALPA thû angin hrênpuan chu ka va lei a, ka kâwngah ka hrêng a.

³LALPA thû chu ka hnênah a lo thleng nawn leh a,

⁴“Hrênpuan i lei, i kâwnga i hrên chu kengin tho la, Euphrates-ah va kal la, chuta lung kâr kuaah chuan va thukru rawh,” a ti a.

⁵Tichuan, ka va kal a, LALPA thu min pêk angin Euphrates lui bulah chuan ka va thukru ta a.

⁶Ni rei tak hnûah chuan LALPAN ka hnênah, “Tho la, Euphrates luiah kal la, chutah chuan hrênpuan ka thuhrûktîr che kha va la chhuak rawh,” a ti a.

⁷Tichuan, Euphrates luiah ka va kal a, ka va hâi a, hrênpuan chu ka thuhrûkna hmun aţang chuan ka phawrh a; mahse hrênpuan chu a lo mawih chhe vek a. Eng atân mah a tlâktlai tawh lo va.

⁸LALPA thû chu ka hnênah a lo thleng a,

⁹“LALPA chuan tihian a ti a: ‘Hetiang bawh hian Judate chapona leh namên lova Jerusalem inchhuanna chu ka sawp chhia ang.

¹⁰Hêng misualho, ka thû ngaithla duh lova an thinlung duh dân chauh zuia, pathian dangte chibai bûka an rawngbâwl tûra ûmtute hi eng atân maha tlâktlai lo hê hrênpuan ang chauh hi an ni ang.

¹¹Hrênpuan chu a hrêngtu kâwnga a bet ang hian, Israela chhûngte leh Juda chhûngte chu ka mi ni tûr te, ka hmingthanna, ka mâwina leh ka ropuina ni reng tûra ka ruat an ni a; mahse an ngaihven duh si lo.’

UAIN BÛR CHHINCHHIAHNA 12

¹²“Chuvângin, hê thû hi hrilh rawh: ‘LALPA Israel Pathian chuan heti hian a ti: “Bûr zawng zawngah uain thun khah a ni ang,” tiin. “Anni chuan i hnênah, ‘Bûr zawng zawnga uain thun khah tûr chu kan hre ve lo vem ni?’ an ti ang a.”

¹³“Nangin an hnênah, ‘LALPA chuan heti hian a ti: “Ngai teh u, hê rama chêng, Davida thutthlênga thû lalhote, puithiam te, zâwlnei te leh Jerusalem chêng zawng zawngte chu zûin ka la hrai rui vek ang!

¹⁴Anni chu ka la insuttîr ang a, an pate leh an fapate an la intauh chawrh chawrh ang. Zahngaihna leh lainatna tel hauh lovin, tûmah pawh dîm hauh lovin ka tiboral vek ang,” a ti a.

SALTÂN HMÂA CHAPONA

¹⁵In beng dawh ula, lo ngaithla teh u: Chapo suh u, LALPAN a sawi tawh si a.

¹⁶LALPA in Pathian chu châwimâwi rawh u, Tlang thim taka in kête a petek hmâ leh, Thim a rawn thlentîr hmâ hian, Êng in beisei lai taka, thihna hlima a chantîra, Thim chhah taka a chantîr hmâ hian.

¹⁷In ngaihlak duh loh erawh chuan, In chapona hian ka nun hi a rûkin a tiţap ngei dâwn a; Lungchhe takin, mittui luang zawih zawihin ka ţap ang, LALPA berâmte chu sala an man dâwn tâk avângin.

¹⁸Lal leh a nu chu hrilh rawh u, “Inngaitlâwm ula, inphahhniam teh u; In lalna leh intihropuina lukhum chu a tlusawp dâwn si a,” tiin.

¹⁹Chhim lama kuate chu khârkip a ni ang a, Tûman an hawng tawh lo vang; Judaho zawng zawng salah an man vek ang a; An zavaiin salah an hruai bo vek ang.

²⁰Han hawi vêl ula, en teh u Hmar lam aţanga lo kal an nih saw. Berâm rual an pêk che kha khaw’nge anih tâk, I berâm duhawm takte kha?

²¹A hrem hun chein eng nge i sawi ve ang? I chungalalah leh hotu ni tûrin i zirtîr hlawn si a. Hmeichhe nâu vei angin nâ i ti dâwn lo vem ni?

²²I rilrûin, “Engati nge hêng thil hi ka chungalalah lo thlen?” i tih chuan, I sual êm avângin, i pawnfên an hlîmsak che a, Saruakin i awm ta a nih hi.

²³Ethiopia miin a vun rawng a tidanglamin, keitêin a zeţial a thup thei em ni? Chuti ni se, nangni sual ti dawklakho ngei pawhin thil ţha in ti thei ang chu.

²⁴“Chuvângin, thlalêr thliin buhpâwl a lén darh angin Ka tidarh ve ang che u.

²⁵Hei hi i chantâwk, ka laka i chanpuala ruat chu a ni,” LALPAN a ti, “Mi theihngihl a, dâwt thu mai i rin zâwk avângin,

²⁶I pawnfên chu i hmai khuh khawpin ka hlîm ang a, I lang mualpho hlê ang.

²⁷I uirê thîn dân te, i hur âu ri hawr hawr te, Daipâwn leh tlang chungalalah i inphalrai kual dânte chu Ka lo hmu reng si a. Aw Jerusalem, i chung a pik ngei e! Thenfaî loh hian eng chen nge i awm reng dâwn?”

BUNG 14

KHANDAIH, TÂM LEH HRÎ

¹Khawkhêng chungchângah LALPA thû Jeremia hnênah a lo thleng a.

²“Juda chuan lû a sîn a, A kulh kawngkâte a chul zo ta; A ram pawh a ngui ruai mai, Jerusalem chu ţapin a âu chhuak a.

³An milianten tuichâwi tûr an hote an zawntîr a; Tuikhurah chuan tui an hmu si lo. Tuibêl ruak nêen an kîr leh a; A ngaihna hre lovin an mangang a, Zak takin an lu an khuh ta.

⁴Ruah rêng rêng a sûr loh avângin, Lei chu a ro châr vek a, Leilettute pawh an zak a, An lû an khuh ringawt a.

⁵Ni e, zukpui pawhin ramah no a nei a, Hnim hring awm loh vângin a kalsan a.

⁶Ram sabengtung chu tlang chârâh a ding a; Sihal ang maiin a hnâr a lén vêl ruai a; Hnim peh tûr awm si lo, a mit a vai zo ta.”

⁷Aw LALPA, kan sualnaten min hêk mahse, I hming avâng talin min ţanpui ang che; Kan hnungtawlh tam zozâi ta a, I lakah kan sual bawh si.

⁸Aw, Israelte beisei chhan, mangan laia Chhanhimtu, Engati nge hê ramah hian zan khat riak khualzin ang leka i awm le?

⁹Engtizia nge chhantu nei lo pasaltîa ang maia I hawihaih tâk mai? Mahse âw LALPA, kan zînga awm i ni a, I hming putute kan ni a, min kalsan suh ang che!

¹⁰Hêng mite chungthû hi LALPAN tihian a ti: “Thêulêu mai mai an thlahlel a; Duh duhin an teihawi vêl a. Chuvângin, LALPA ngaih dân a ni ta lo va, An khawlohzia chu a hre reng ang a, An sualna angin a hrem ngei ang.”

¹¹LALPA chuan ka hnênah, “Hêng mite ţatna tûr hian ţawngţaisak tawh suh.

¹²Châw an nghei hunah pawh an âu âw ka ngaithlâksak lo vang a; hâlral thilhlân leh buhbâl thilhlân pawh hlân sela, ka pawmsak tawh hek lo vang. Khandaih te, tâm te leh hrêitein ka tiboral zâwk dâwn a ni,” a ti a.

¹³Kei chuan, “A khai âw, Lalpa PATHIAN! Zâwlneite chuan an hnênah, ‘Khandaih in tuar lo vang a, tâm pawh in tuar hek lo vang, hê hmunah hian thlamuang takin in awm reng ang’ an lo ti thîn asin,” ka ti a.

¹⁴LALPA chuan ka hnênah, “Zâwlneite chuan ka hmingin dâwt thû an puang mai mai a. Ka tîr lo va, thû ka pe baw lo va, biak pawh ka be hek lo; inlârna dawhâ tak tak te, aienna thil hrilh lâwk te, thil tlâktlai lo tak takte, an thinlunga bumna thûte an phuahchawp vèl mai a ni.

¹⁵Chuvângin, ka tîr si lohva, zâwlnei ka hminga thu puanga, ‘Hê ramah hian khandaih leh tâm in tuar lo vang’ titu ‘Zâwlneiho chu khandaih leh tâm in a eiral vek ang!

¹⁶An thuhrlil lo ngaithlatute chenin khandaih leh tâm avângin Jerusalem khawlaiah paih chhuah an ni ang; an suahsualna chu an chungah ka leih dâwn avângin anmahni leh an nupuite, an fanu fapate ngei pawhin phûmtu tîr an nei hauh lo vang.’

¹⁷“Chuvângin an hnênah heti hian ti ang che: ‘Ka mittui hi achhûn azânin luang sela, Hul rêng rêng suh se; Ka mite nula thianghlim chuan hliampui a tuar a, An khawih na êm a ni.

¹⁸Daipâwnah va chhuak ila, Khandaiha thah an tlu rem rum a! Khaw chhûnghah lût ila, tâm pui mitthî a ni ngawt a! Nî e, zâwlneite leh puithiamte pawhin hriat loh ram an pan ta,’ tiin.”

MITEN ZAHNGAIHNA AN DÎL

¹⁹Judate hi i thlauhthla ta dêr em ni? Zion hi i lungten ta em ni? Engah nge tihdam rual lohva min vuak nat le? Muanna kan thlîr a, thil tha a awm thei si lo; Damna hun tûrah mang a an tâk hi le.

²⁰Aw LALPA, kan sual tih kan hria e, Kan pute sualna chenin. I lakah kan lo sual êm a ni.

²¹I hming avâng talin min haw suh la; I ropuina lalthutthlêng chu tithangtlâwm suh ang che. Kan hnêna i thuthlung kha sût lovin, hre reng zâwk ang che.

²²Hnam dang pathiante zîngah tu nge ruah sùrtîr thei? Vântê khian ruah an sùrtîr thei ngawt em ni? Nang chauh hi i ni lo’m ni, aw LALPA kan Pathian? Chuvângin kan ngâk reng ang che, Hêng zawnz zawnz siamtu chu nangmah i ni si a.

BUNG 15

LALPAN THÛ A SÛT DÂWN LO

¹LALPA chuan ka hnênah, “Mosia leh Samuela-ten ka hmâahrawn dinpui mahse, hêng miho duhsakna rilru hi ka pu tawh chuang lo vang. Ka hmuh phâk lohva paih chhuak la, kal bo daih rawh se.

²“Khawiah nge kan kal tâk ang?’ tia an zawh che u a, in chhân dân tûr chu, ‘LALPAN tihian a ti: “Thi tûr chu thihna lamah; Khandaih tuar tûr chu khandaih lamah; Tâm tuar tûr chu tâmna lamah; Saltâng tûr pawh saltânna lamah,” tiin.

³“Tihboral dân tûr kawng chi lî ka ruatsak ta e,” LALPAN a ti: “Tihhlumna khandaih te, an sâ pu bo tûr ui te, an sâ eia tiboral tûr chunglêng savâte leh leia ramsâte chu.

⁴Juda lal, Hezekia fapa Manasean Jerusalema a thiltih avâng khân, leia lalram zawnz zawnge hnênah, mangang rêng rênga awm tûrin ka la thawn darh vek dâwn a ni.

⁵“Aw Jerusalem, tûin nge lainat tawh ang che? Tu nge sùn duh ang che? I awm zêl dân tûr chu tu nge bengkhawn tawh ang le?

⁶Mi hawisan ta si a,” LALPAN a ti. “I hnungtawh zêl si a. Chuvângin nangmah do tûr leh, tiboral tûr chein ka kut ka lek tawh dâwn e; Insûm reng hi ka ning ta!

⁷Hnâwmhnaw angin ram aţangin ka chhêm bo vek ang a; Fa nei lovin ka siam teh ang; An nun dân an sim duh loh avângin, Ka mite chu ka tiboral dâwn a ni.

⁸Tuipui kama tiauvut aia tamin an hmeithâte tihpun a ni ang; Chhûn laiah rawktu ka tîr ang a, An tlangvâl hringtu nuten an tuar ang; Manganna râpthlâk an chungah ka thlentîr thut ang.

⁹“Fa pasarih hringtu nu chu a zawi dêr a; A chatthla ta a; Chhûn lai takah a hun a liam a; Zak tak leh chî-âi takin a awm ta. A la dam chhunte chu an hmêlmâte hnênah Khandaiha thah tûrin ka pê ang,” LALPAN a ti.

JEREMIA VUINA

¹⁰Ka nu, ka chung a va han pik êm, Ram pum pui khingtu leh tibuitu ni tûr ringawta Kei mi lo hrin kher ni le! A pung ûma pûktîrtu ka ni lo va, Tûma’n a pung neiin min pûktîr hek lo. Thâwka phitah ânchhia min lawh zêl si a.

¹¹LALPA chuan tihian a ti a: “Tih tak zetin, a la dam chhunte tâna thatna tûr a ni e; Tih tak zetin, manganna leh hrehawmna hunah Dîlsak tûr chein i hmêlmâ ka la tîr dâwn asin.

¹²Tu nge hmar lam thîr leh ngên chu titliak thei le?

¹³In ram puma in sualna zawnz zawnz avângin, In hausakna sum leh paite chu Râllâk sumah a thlâwnin ka pe vek ang.

¹⁴In la hriat ngai loh ramah In hmêlmâte zîngah ka thawn bo daih ang che u; Ka thinurna mei a alh chhuak ta si a, Nangmahni kângtu tûr chu,” tiin.

¹⁵Aw LALPA, i hria alâwm; Min hre reng la, minrawn kan baw lo, Min tiduhdahtute chungah phubâ mi lâksak ang che. I dawhtheih êm hi, min la bo suh la. Nangmah avânga hauh ka tuar hi lo hria ang che.

¹⁶I thûte chu ka hmu a, ka ei a, I thû chu mi tihlimtu leh ka thinlung tilâwmtu a ni; Aw LALPA, sipaihote Pathian, I hming pawh ka put hi.

¹⁷Hmusittuho inkhâwmnaah ka thû lo va, Ka hlimpui ve baw hek lo; I kut avângin mahni chauhin ka thû a, Lungawi lohnain mi tikhat ta si a.

¹⁸Engati nge kan nat reng a, Ka hliam pawh a dam theih lohva, Dam rêng a tum loh le? Ka tân luite rintlâk loh, tui kang leh mai thîn ang hi i ni em ni?

LALPAN JEREMIA A THLAMUAN

¹⁹Chuvângin, LALPAN heti hian a ti: “Irawn inlamlê leh chuan, Ngai ka awhtîr leh ang che a, Ka hmâah ka dintîr leh ang che; Thil tlâktlai lo ațanga thil hlu i lâk chhuah chuan, Nang chu ka kâ ang mai i lo ni ang. Mitenrawn pan che sela, Nang chuan i pan ve tûr a ni lo.

²⁰Hê mite lakah hian ngên kulh nghet angin ka siam ang che a; Anrawn bei ang che a, Mahse an hneh hauh lo vang che; Chhandam tûr che leh, chhan chhuak tûr chein i hnênah ka awm si a,” LALPAN a ti.

²¹“Mi suaksual kut ata ka chhan chhuak ang che a, Mi bumro pâ thâm behna ata ka tlan chhuak ang che.”

BUNG 16**JEREMIA NUN DAN LEH A THUCHAH**

¹LALPA thu ka hnêna lo thleng chuan,

²“Hê hmunah hian nupui i nei tûr a ni lo va, fanu fapa pawh i nei tûr a ni hek lo,” tiin mi hrilh a.

³Chuvângin, hê hmuna piang fanu leh fapa te leh, hê rama anmahni hringtu an nu leh pate chungthu chu LALPAN heti hian a ti:

⁴“Râpthlâk taka thihna an la tâwk ang; tûma sîn loh leh tûma phûm lohvin, leiah hnawmhne ang lekin an la let pheng phung ang. Khandaih leh tamin a ei zo vang a, an ruangte chu chunglêng savâte leh leia ramsâte tân chaw a ni ang.”

⁵LALPA chuan heti hian a ti: “Khawhar inah lêng suh la, sîn tûr emaw, ƣap tûr emaw pawhin kal hek suh; ka mite ka lo thlamuanna te, ka lainatna te leh ka zahngaihna te chu hê ram ațang hian ka la bo tawh si a.

⁶Hê ramah hian mi lian te, mitê te pawh an la thi ang. Tûma’n an phûm lo vang a, tûma’n an sîn hek lo vang; anmahni sîn nân tûmah an inzai lo vang a, an inziat kâwng hek lo vang.

⁷Lusûnte thlamuan tûrin tûma’n chaw an pe lo vang a; an nu leh pate hnêm tûrin tûma’n in tûr pawh an pe hek lo vang.

⁸An hnêna eia, ina va ƣu vê tûrin, ruaithehna inah i lût tûr a ni hek lo,” LALPAN a ti.

⁹Israelte Pathian, Sipaihote LALPA chuan heti hian a ti: “Lo ngai reng la, in dam chhûng ngei hian in mithmuhah hlimna leh lâwmna au rî te, mo leh moneitu hlim thâwm rî vâ rêng rêng hê hmun ata hi ka titâwp vek ang.

¹⁰“Hêng mite hnênah hian chûng thû zawng zawng chu i hrilh hunah, annin, ‘Engah nge LALPA chuan heti taka chhiatna thû kan chungah arawn puan tâk mai le? Eng thil nge kan lo bawhchhiat? LALPA kan Pathian chungah eng thil nge kan lo tihsual?’ an tih chuan,

¹¹heti hian hrilh ang che, ‘In thlahtuten kei mi hawisan vâng a ni,’ LALPAN a ti; ‘pathian dangte hnung an zui a, chibai búkin an rawng an bawl a, kei min kalsanin, ka dân an zawm duh lo va.

¹²Ngai teh u, nangni phei chu in pate aiin in sual zâwk lehngâl a, mahni rilru sualna ang zêlin in awm a, tûma’n ka thû pawh in ngaithlâk duh loh hi.

¹³Chuvângin, in thlahtute pawhin an la hriat ngai loh ramah hê ram ata hi ka hnawt chhuak ang che u; ka khawngaih dân si lo che u-a, chutah chuan achhûn azânin pathian dangte rawng in bawl reng tawh mai ang,’ a ti a.

PATHIANIN ISRAEL A TUNG DING LEH ANG

¹⁴“Chuvângin, ngai rawh u, nîte chu a lo thleng dân e,” LALPAN a ti, ‘Aigupta ram ațanga hruai chhuaktu LALPA chu a nung reng alâwm,’ an ti tawh lo vang a,

¹⁵Hmar lam ram leh a tihdarhna ram zawng zawng ata Israelte hruai chhuaktu LALPA nung renga chu,’ an ti tawh zâwk ang. An pute hnêna ka pêk ram ngeiah chuan ka hruai kîr leh dân si a.

¹⁶“Ngai teh, anmahni man tûrin, sangha man mi tam tak ka tîr ang,” LALPAN a ti; “chumi hnûah chuan tlâng tin leh mual tinah, lungpui keh kâr chena khawrh chhuak tûrin sapêl mi tam tak ka tîr ang.

¹⁷An awm dân tinrêngah ka mit a fu reng si a; ka lakah thupin an awm lo va, an khawlohnate pawh ka hmuh loh tûra thuhrûk a awm hek lo.

¹⁸Ka ram an tihbawlhhlawh avângin an bawhchhiatna leh an sualna chu a lehnhin ka thungrûl ang; ka rochun ram chu saruang tenawm leh milem pathian huatthlala tak hmanga an tikhah tâk avângin.”

¹⁹Aw LALPA, ka chakna leh ka kulhpu, Mangan laia ka inhumhimna i ni, Jentailhote chu kâwlkil ațangin i hnênah an lo kal ang a, “Kan pûte khân dâwt thu te, thil tlâktlai lo, Hlâwkna nei lo thil ringawt min lo rochun a ni,” an la ti ang.

²⁰Mihringin pathian tak pawh ni hlei lo, Ama pathian tûr a siamchawp ang mâw?

²¹“Chuvâng tak chuan, ngai teh u, tûn tûm hi zawng, Ka kut leh ka thiltihtheihna hi ka han hriatîr teh ang; Tichuan, ka hming chu LALPA a ni tih an hria ang.

BUNG 17**JUDA SUALNA LEH HREMNA**

¹“Juda sualna chu thîr pen-a ziah a ni a; A hmâwr zum lunglhu chuan An thinlung pêkah leh, In maichâm kiah te ker a ni a,

²An fate chuan tlâng sânga thing hring hnuaia An maichâmte leh an thing milimte chu an hre reng a.

³Aw, nangni ka tlângte u, in hausakna rosumte, Ram chhûnga in sualna hmun sângte nên râlâk sumah ka pe vek ang.

⁴Nang pawh, i rochan atâna ka pêk che kha i chân ang a; I hriat loh ramah i hmêlmâte rawng ka bawltîr ang che; Kumkhuaa kâng tûr ka thinrimna mei i tih-alh tâk avângin.”

⁵LALPA chuan heti hian a ti: “Mihring rinchhana, tîsa thila intichak a, LALPA hawisantû thinlung chuan ânchhia dawng rawh se.

⁶Ani chu thlalêr hnim chawrchê ang lek a ni, Thil ƣa a lo thlen hunah a hmu ve lo vang; Thlalêr ram ro, chi lei al, tûmâ luah loh chu a chantâwk a ni ang.

⁷“LALPA rinchhantu, LALPA chungah beiseina nghat mi erawh chu a nihlawh e.

⁸Tui kianga thing phun, lui kama zung kai ang chu a ni, Khaw lum lo thleng pawh hlau lo, A hnah pawh hring reng, khawkhen kum pawh engto ve lo, Rah chhuah thulh ngai lo ang hi a ni.

⁹“Thinlung hi thil azawnga bumhmang ber, Chhe lailet dêr a ni; Tu nge hre thiam zo vang le?”

¹⁰Kei, LALPA hian thinlung lam ka en thîn a, Mi tin hi an nun dân leh, an thiltih rah ang zêla pe tûrin, An rilru put dân ka fiah thîn.

¹¹“Dik lo taka inti-hausate chu, Varung, mahni tui lo awpa, keu thei si lo ang mai hi a ni; A vânglai ngein a chên leh ang a, A tâwpah mi â a lo ni mai ang.”

¹²A tîr ata lalthutthlêng ropui leh sâng chu, Kan hmun thianghlim a ni si a.

¹³Aw LALPA, Israelte nghahfâk, Nangmah hawisantu zawng zawng chu mualpho takin an awm ang. “Kei mi hawisantute chu Vaivuta zia ang lek an ni ang, Nunna tuikhur, LALPA chu an hawisan avângin.”

JEREMIAN CHHAN CHHUAHNA A DÎL

¹⁴Aw LALPA, mìn tidam la, tichuan ka dam ang; Mìn chhan la, tichuan chhandamin ka awm ang, Nang chu ka chhuan ber i ni si a.

¹⁵Miten ka hnênah, “LALPA thû chu khawiah nge? Tunah hian lo thleng ang hmiang!” an ti a.

¹⁶I hnung zuitu berampu nihna bânsan hi ka hmanhmawh lo vang, Ni tha lo lah ka duh hek lo; Ka kam chhuakte chu i hmâah a dik tih i hre si a.

¹⁷Ka tân tîhbâiawm ni suh la; Vanduai nia ka beiseina i ni alâwm.

¹⁸Mìn tiduhdahtute chu timualpho ve la, Kei erawh chu mi timualpho suh ang che; Anni chu zak takin siam la, Kei erawh chu mi tizak suh ang che. An chungah chhiatna thlentîr la, Chhiatna thuah hnihin tiboral ang che!

SABBATH NI SERH CHUNGCHÂNG

¹⁹LALPA chuan ka hnênah heti hian a ti: “Kal la, mipui te leh Juda lalte an luha an chhuahna kulh kawngkâah va ding rawh, Jerusalem kulh kawngka zawng zawngah pawh va ding zêl la;

²⁰an hnênah, ‘Nangni Juda lalte, Juda rama mi zawng zawng te leh Jerusalema chêng, hêng kulh kawngkâa lût thîn zawng zawngte u, LALPA thû hi ngaithla rawh u.

²¹LALPA chuan heti hian a ti: “In awm dân hi lo fimkhur teh u. Sabbath nîin eng thil mah phur suh ula, Jerusalem kulh kawngkâah pawh engmah phur lût suh u.

²²Sabbath niin in in aţangin engmah phur chhuak suh ula, hnâ pawh thawk suh u; in thlahtute hnêna thû ka pêk angin, Sabbath ni hi in serh tûr a ni.

²³Anni khân zâwm duh lovin an ngaithla duh lo va, thupêk hriaa zâwm thei lo tûrin luhlul an chhuah tlat a.

²⁴LALPA chuan heti hian a ti: “Sabbath nia hê khawpui kawngkâa thil phur lût lo tûr te, eng hnâ mah in thawh lohva, Sabbath ni chu fimkhur taka in serh thianghlim chuan,

²⁵hê khawpui kulh kawngkâah hian, Davida thutthlênga thu tûr lalte leh miliante chu tawlailîrte leh sakawrah te chuangin an lo lût thîn ang a, anmahni leh an puipate, Juda mite leh Jerusalema chêngte nê; tichuan, hê khawpui hi kumkhuain a awm tawh ang.

²⁶Tichuan, Judai ram khawpui aţang te, Jerusalem chhehvêl aţang te, Benjamin ramte leh phai ram aţang te, tlâng ram aţangte leh Chhim lam aţang tein an lo kal ang a, hâlral inthâwina thilhlân te, buhbâl thilhlân leh rimtui te, fakna inthâwinate LALPA inah an rawn hlân thîn dawn a ni.

²⁷Mahse, Sabbath serh thianghlim lova, Sabbath nia Jerusalema engmah phur lût lo tûra ka thupêkte in zawm loh chuan, kulh kawngkâte hi ka hâl ang a, chû chuan Jerusalem lal inte a kâng ral vek ang a, an thelh mit tawh lo vang,”’ tiin.

BUNG 18

BÊLVAWTU LEH BELLEI

¹Jeremia hnênah LALPA thû a lo thleng a:

²“Tho la, bêlvawtu inah chhuk thlâ la, tah chuan ka thû ka hriattîr ang che,” tiin.

³Bêlvawtu hnênah chuan ka zu kal ta a, ani chuan a tihvirna khâwl hmang chuan thil a lo siam a.

⁴A bêl siam chu a kuta a lâk laiin a chhe ta a; bêlvawtu chuan tha a tih angin hlumbêl dang siam nân a hmang leh mai a.

⁵LALPA thû chu ka hnênah a lo thleng a:

⁶“Aw, Israel chhûngte u, hê bêlvawtu ang hian in chungah ka ti thei lo vem ni?” LALPAN a ti. “En teh u, bellei chu bêlvawtu kuta a awm angin, âw Israel chhûngte u, Keima kuta awm in ni asin!

⁷Eng hnam leh eng lalram pawh phih chhuaha, paih thlâka, tihchhiat tumin lo tawng chhuak tawh pawh ni ila,

⁸chû hnamin a chungthû ka sawi avânga a thil sual tih a sim chuan, a chungah chhiatna thlen ka tum chu ka sût leh ang.

⁹Eng hnam leh eng lalram pawh dina, phun ngheh tumin lo tawng chhuak pawh ni ila,

¹⁰ka mithmuha thil sual a tiha, ka âw kê a ngaihchân loh chuan, a tâna thil tha tih ka tum tawh pawh chu ka sût leh mai ang.

¹¹“Tûnah erawh chuan, Juda mite leh Jerusalema chêngte hnênah, ‘LALPA chuan: “Ngai teh u, in chungah thil tha lo tih tumin ka ruahman mêk a. Mi tinin an nun dân sual kalsan theuh sela, in awm dân te siam tha ula, thil tha ti rawh u,” a ti e,’ tiin hrih ang che,” a ti a

PATHIAN ZILHLÂWKNA AN PAWISA LO

¹²Nimahsela anni chuan, “Chu chu eng tihna mah a ni lo ve! Kan duh dânin kan ti ang a, a duh duhin anmahni thinlung luhlul zia ang zêlin ti mai rawh se,” an ti tlat a.

¹³Chuvângin LALPAN heti hian a ti: “Jentailhote hi han zâwt teh u, Tu nge chutiang thil hre ngai le? Nula thianghlim Israelin thil râpthlâk a tih tāk chu.

¹⁴Miin Lebanon vûr tui, lungpui kêra lo luang chhuak chu, A kalsan thei dawn em ni? Chû tui vâwt luang lai chu tui dang

avângah kalsan tûr em ni?

¹⁵“Ka miten min theihngihl tawh avângin, Mîlem tlâktlai lo hnênah rîmtui an hâl ta. Chû chuan an kawng zawh lai aţangin a petektîr a, Hmâsâng kawng hlun aţangin, Kawngpui ni lo, kawngrau an zawh ta.

¹⁶Mite chekkhum mai atân an ram chu an tichhia a; Veivâk apiangin mak tiin an lû an thin khum ang.

¹⁷Khawchhak thlî ang maiin, anni chu hmêlma hmâah ka vai darh ang a; An chhiat tawh ni-ah ka hmêl aiah tukkhum chhah ka chhawn ang.”

JEREMIA AN TIDUDDAH

¹⁸Anniho chuan, “Khai le, Jeremia hi i phiar teh ang; puithiam te hnên aţangin dân hi a bâng dawn chuang lo va, mi fîng te hnêna mi thurâwn te, zâwlnei te hnêna mi thu dawn tûr te a awm reng tho ve. Ti r’u, tawngkân va beihrawn îla, a thu sawi rêng rêng i bengkhawn duh lo vang u,” an ti a.

¹⁹Aw LALPA, min ngaihsak la, Mi dotute thû hi lo ngaithla kiau ang che!

²⁰Thatna hi suala thungrulh tûr em ni? Anni chuan ka tlâk nân khur an lai a. An tân thil t̃ha thlen tûr leh, An chung a i thinurna tikiang tûra i hmaa dîng ka ni tih hre reng ang che.

²¹Chuvângin, an fate chu t̃ampui tuartîr la, An thisen chhuah ang che Khandaih hmang ngein; An nupuite chu hmeithaiah chantîr la, An fate pawh sîn rawh se. An pate chu tihhlum ni sela, An tlangvâlte chu indonaah Khandaiha thah ni rawh se.

²²Sipaihoten an rûn thut hunah, An in aţangte chuan t̃ap thâwm hriat ni rawh se, Mi man tumin khur an lai a, Ka ke awhna tûr thangrûk an kam a.

²³LALPA, mi tihhlum tuma an inrâwn tawn vêl te hi, Nang chuan i hre vek si a. An khawlohna chu ngaidam suh la, I mithmuha an sualna thâi bosak suh ang che; I hmâah thehthal dêr la. I thinrim lai ngein sawp nek ang che.

BUNG 19

BÊL KEH CHHINCHHIAHNA

¹LALPA chuan heti hian a ti: “Kal la, bêl vawtu hlumbêl va lei la, mipui zînga upa thenkhat leh puithiam thenkhat hruai rawh.

²Bêlkeh Kawngka luhna bul, Hinnoma Fapate Ruamah va kal la; chutah chuan thû ka la hrilh tûr che chu puang ang che,

³Heti hian ti rawh, ‘Aw, Juda lalte leh Jerusalema chêngte u, LALPA thû hi ngaithla teh u. Sipaihote LALPA, Israelte Pathian chuan heti hian a ti: “Ngai teh u, hê hmunah ngei hian chhiatna râpthlâk, a hria apiangte beng nghawr dawt tham ka thlentîr ang.

⁴“Kei mi hawisan a, hê hmun hi ram dang ang maiah chantîr, anmahni leh an thlahtu, Juda lalte pawhin an la hriat ngai loh pathian dangte hnênah rîmtui an hâl a, hê hmun hi pawisawi lo thisen chhuahna hmunah an chantîr a.

⁵(Baala hnêna hâlrâl thilhlân atân an fate hâlna tûr, Baala hmun sângte an din lehngâl a; chutiang ti tûrin thû ka pe si lo va, ka rilrûah pawh a awm ngai hek lo),

⁶chuvângin, lo ngai reng ula, nîte chu a lo thleng dawn e,” LALPAN a ti; “hê hmun hi Tophet an ti tawh lo vang a, Hinnoma Fate Ruam an ti hek lo vang a, Insuatna Ruam an ti tawh zâwk ang.

⁷Hê hmuna Judate leh Jerusalem mite remruatna chu engmah lovah ka chantîr ang a; an hmêlmâte hmâah leh an nunna lâk tumtute kutah khandaihin ka tihhlumtîr ang; an ruangte chu chunglêng savâte leh leia ramsâte chaw atân ka pê ang.

⁸Hê khawpui hi ka tiram chhe vek ang a, a bula kal apiangin a chhiat nasatzia an hmuhin mak tiin an chek tlawk tlawk ang.

⁹An fanute leh an fapate sa ei ngai khawpin ka siam ang a, anmahni that tûra an hmêlmaten an hual beh avângah an mangan luath mahni thian te sâ pawh an inei sak tawn hial ang.”

¹⁰“tichuan, i kalpuite mithmuah i hlumbêl ken chu i tikeh ang a,

¹¹an hnênah, ‘Sipaihote LALPA chuan heti hian a ti: “Hetiang bawh hian hêng mite leh hê khawpui hi ka tikeh darh dawn a ni, bêlvawtu hlumbêl tihkeh tawh chu, tihpum leh theih a ni tawh lo ang hian; anniho chu Tophetah chuan phûmna hmunin a daih loh thlengin phûm an ni ang.

¹²Chutiang tak chuan hê hmun hi ka sawp dawn a ni,” LALPAN a ti; “hê khawpui leh a chhûnga michêngte pawh Tophet ang maiin ka siam ang.

¹³Jerusalem in te leh Juda lallo in te chu Tophet ang bawka tenawma siam a ni ang, an inchungte chu vânlam thil zawng zawngte hnêna rîmtui hâl nân leh, pathian dangte hnêna in tûr thilhlân bun chhuah nâna an lo hman tawh avângin.”

¹⁴Tichuan, Jeremia chu LALPAN thu puang tûra a tirhna Tophet aţang chuan a lo kal a; Lalpa in hung chhûngah chuan a dîng a, chuta mi zawng zawngte hnênah tihian a sawi a,

¹⁵“Sipaihote LALPA, Israelte Pathian chuan: ‘Ngai teh u, ka thu âwih duh lo tûra an ring an tihkhawng luih tlat avângin, hê khawpui leh a chhehvêl khuah zawng zawngah chhiatna lo thleng tûra ka puan tawh ang khân ka thlentîr ngei ang,’ a ti,” a ti a.

BUNG 20

PASHURA HNÊNA PATHIAN THÛ

¹Imera fapa Pashura, LALPA in enkawltu lû ber chuan Jeremia thupuantu chu a lo hria a.

²Pashura chuan zâwlnei Jeremia chu a vua a, LALPA in kianga Benjamina kawngkhâr chhakta zâwk rip chhûngah chuan a tântîr a.

³A tûkah Pashura chuan Jeremia chu rip chhûng ata a chhuah a. Jeremia chuan a hnênah, “LALPA chuan i hmingah Pashura ni lovin, Magor Misabiba* a ti zâwk a che.

⁴LALPA chuan: ‘Ngai rawh, nang leh i thiantu tân mi râpthlâk takah ka siam ang che; an hmêlmaten khandaiha an sah thlûk lai chu i mit ngein a la hmu ang. Judai ram pum hi Babulon lal kutah ka pê ang a, Babulon-ah sala tâng tûrin a kâwi duah duah ang a, khandaihin a that ang.

⁵Chû bâkah, hê khawpui hausakna zawng zawng, a thil deh chhuahte leh a thil hlu zawng zawngte, Juda lallo rohlu zawng

zawngte chu an hmêlmâte kutah ka pe vek ang a, anni chuan an rawk ang a, an chhuhsak ang a, Babulon-ah an kalpui vek ang.

⁶Pashur, nang leh i inchhônga awm zawng zawngte pawh salah in tâng vek ang. Babulon-ah chuan i kal ang a, chutah chuan i thî ang a, an phûm bawk ang che; nang leh i thian, dâwt thû i lo puan khumho zawng zawngte nên khân, a ti e, a ti a.

MITE NGAIHSÂN LOH JEREMIA RAWNGBÂWLNA

⁷Aw LALPA, nanging mi thlêm a, mi lo bum a; Kei aiin i chak si a, ka tang zo si lo va. Ni tinin miten min nuihzat a; Mi tin tâna nuihzabûrin ka awm ta.

⁸Thû ka sawiin, a âuvîn ka âu tuar tuar a; “Inpâwngnêkna leh inrawkna!” tiin ka âu va. Ka tân chuan LALPA thû chu ni tina mi dem leh sawi chhiat hlawnhna chauh a ni.

⁹“A chanchin ka sawi tawh lo vang, A hming pawh ka lam tawh hek lo vang,” ka ti a. Mahse a thû chu ka ruh chhôngah hian a in-up a, Ka thinlungah mei angin a kanin mi kâng a, A pâia pây daih rual a ni si lo.

¹⁰Mi tam takin min nuihzat tih ka hria a: “Kil tinah hlauhawm a hnâi!” “Hêk ula, keini pawhin kan hêk vê ang!” an ti a. Ka hmêlhriatho, ka tlûk hun chângtute chuan, “Thlêm thlûk theih a ni ang maw lê; Tichuan amah chu kan hneh ang a, A chungah phubâ kan la dâwn nia,” an ti a.

¹¹Mahse ka hnêna awm LALPA chu a hlauhawmin, thil a ti thei a. Chuvângin, mi tiduhdahtute chu an tlû ang a, min hneh lo vang. An la mualpho hlê ang a, an hmuângil hauh lo vang. Theihngihlil ngai loh tûrin kumkhuain an buai reng mai ang.

¹²Nimahsela, âw Sipaihote LALPA, Nang mi dikte fiaha, rilru leh thinlung entu, An chung a i thungrulhna chu mi hmuhtîr ang che; Ka chungthû i hnênah ka thlen tawh si a.

¹³LALPA chu fak ula! LALPA chu châwimâwi rawh u! Thil sualtitute kut ata mi rethei nunna a chhan chhuak ta si a.

¹⁴Ka pian ni chu ânchhe dawngin awm sela! Ka nu’n mi hrin ni pawh kha malsâwmin awm suh se!

¹⁵Ka pa hnênah “Fapa i nei ta!” tia, Thu lâwmawm rawn thlentû pawh chu Ânchedawngin awm rawh se.

¹⁶Chû pa chu, LALPAN lainatna tel lova a tihchhiat khawpuite ang chu lo ni rawh se; Zîngah tap thâwm, chhûnah âu thâwm hre rawh se.

¹⁷Chhûlah khân min lo tihlum ta mai se, A chhûl chuan mi tuam tlât ang a, Ka nu pum chu ka thlân a lo ni mai tûr.

¹⁸Engah nge thawhrimna leh lungngaihna chauh hre tûr leh, Zak rêng rênga dam chhûng ni hmang zo tûr ringawta ka lo pian le?

BUNG 21

JERUSALEM CHHIATNA TÛR CHU

¹Lal Zedekian Melkia fapa Pashura leh Maaseia fapa, puithiam Zephania te chu Jeremia hnêna a tîrh laia, a hnêna LALPA thu lo thleng chu,

²“Babulon lal Nebukadnezzara hian min rawn do ta si a, LALPA min lo rawn sak teh khai. LALPA chuan thilmak ropui tak

takte tiin, hê lal hian min kiansan mial thei asin,” an ti a.

³Jeremia chuan an hnênah, “Zedekia hnênah chuan heti hian in ti dâwn nia,

⁴LALPA Israelte Pathian chuan heti hian a ti: “Ngai teh, Babulon lal leh i kulh hualtu Kaldai-ho i dona hriamhreite kha engmah lovah ka siamsak ang che a; anniho chu hê khawpui lai takah hian ka hruai lût ang.

⁵Keimah zâwk hian ka bân chak tak pharin, thinur engphiarin, thinrimna nasa tak nên ka bei dâwn a che.

⁶Hê khawpuia chêng, mihringte leh rante hi ka nghaisâ ang a; hripui nasa takin an thi ang.

⁷Chumi hnûah chuan,” LALPAN a ti, “hê khawpuia hripui leh khandaih leh tãmpui tuara la thi bâng, Juda lal Zedekia te, a chhiahhlawhte leh mipuite hi Babulon lal Nebukadnezzara kutah leh an hmêlmâte kutah, anmahni tihhlum tumtute kutah ngei ka pê ang; ani chuan khandaihin a lo sâthlum ang. Khawngaihna leh lainatna rêng a nei lo vang a, tûmah a zuah hauh lo vang.”

⁸“Hêng mite hnênah hian va sawi rawh, ‘LALPA chuan heti hian a ti: “In hmâah hian nunna kawng leh thihna kawng ka dah a ni.

⁹Hê khawpuia awm rengte chu khandaih te, tãm te, hripui tein an thi ang a; kal chhuaka nangmahni hualtu Kaldai ho hnêna inpê te chu an him ang a, an nunna chu an tân lâwmman ang a ni ang.

¹⁰Hê khawpui tãatna tûr ni lovin, a chhiatna tûrin ka hawisan daih tawh a ni,” LALPAN a ti. “Babulon lal kuta pêk a ni ang a, ani chuan meiin a hâl chhe vek ang,” a ti a.

DAVIDA CHHÛNGTE HNÊNA THUCHAH

¹¹“Juda lal chhûngkaw chungchângah chuan, LALPA thû hi lo ngaihla teh u,

¹²Aw, Davida chhûngte u! LALPA chuan heti hian a ti: “Zîng lamah dik takin rorêl ula, Tiduhdahtute kut ata rawk tuarte chu chhan rawh u, Chuti lo zawng, in thil tihsual avângin, Ka thinurna mei hi tuma thêlh rual lohvin a kâng palh ang e.

¹³“Aw, nangni ruamah te leh lungpui zâwla chêngte u, Ka do a che u,” LALPAN a ti, “Tu nge mi bei tûrin lo chhuk ang? Tu nge kan awmnaah lo lût thei ang?” in ti rawk a.

¹⁴In thiltih rah ang zêlin ka hrem ang che u,” LALPAN a ti; “An ramngâw te ka hâl ang a, A vêla thil zawng zawng a kângral vek ang.”

BUNG 22

¹LALPA chuan tihian a ti: “Juda lal hnênah zu kal la, hê thu hi zu hrilh rawh,

²Aw, Judate lalpa, Davida thutthlênga thu, nang leh i khâwnbâwlte leh i mi hêng kulh kawngkaa lût thînte u, LALPA thu hi lo ngaihla teh u!’ ti ang che.

³LALPA chuan heti hian a ti: “Dikna nên rorêlna tha kengkawh ula, mi rawk tâwkte chu awpbettute lakah chhan chhuak rawh u. Mikhual te, pa nei lo te, hmeithai te chungah dik lohna leh tharum rêng rêng hmang suh ula, hê hmunah hian pawî sawi lo thisen in chhuah tûr a ni hek lo.

⁴Hetiàng taka in tih chuan, Davida ðhutthlênga ðhû lalte chu, an khâwnbâwlte leh mipuite nêñ, sakawr leh tawlaillîr chunga chuàngin, hêng kulh kawngkâah te hian in lût ðhin dâwn asin.

⁵Hêng ðhûte hi in ngaihtlâk loh erawh chuan, “hê in hi a la ram vek ang,” tih hi keima hming chhâlin ka tiam a ni,’ LALPAN a ti.”

⁶LALPA chuan Juda lal chhûngkaw chungthû heti hian a sawi: Nang hi ka tân Gilead ang, Lebanon chhîp ang i ni; Mahse luahtu awm lo khawpui, Thlalêrah ka chantîr ang che.

⁷Nangmah tichhetu tûr ka buatsaih ang a, Mi tinin râltuam an lek ðheuh ang; I sidar thing ðhâ ðhâ an kit ang a, Meiah an tuah ang.

⁸Hnam tam takin hê khua hi an pal tlang ang a; mi tinin a ðhenawm hnênah, ‘Engati nge LALPAN hê khaw ropui hi hetia a tih tâk le?’ an la ti ang.

⁹Anni chuan, ‘E le, LALPA an Pathian thuthlung an hawisan a, pathian dangte biain, an rawng an bâwl vâng mawlê,’ tiin an la chhâng ang.

¹⁰Thi ta chu ðah suh ula, sîn hek suh u; Kal bo ta erawh chu lungchhe takin ðah rawh u, A lo kîr tawh dâwn si lo va, A pianna ram chu a hmu tawh dâwn hek lo.

JOSIA FAPATE HNÊNA THUCHAH

¹¹Josia fapa, Juda lal Salluma, a pa Josia aia rorêltu, hê hmun ata kal bo ta chungthû chu LALPAN heti hian a ti: “Hetah hian a lo kîr leh tawh lo vang a,

¹²Sala an hruaina hmunah a va thi ang a, hê ram hi a hmu leh tawh lo vang.

¹³“Dik lo taka mahni in satu chu a chung a pik e Hleih neihna hmanga mahni pindan siamtu chu, Mahni ðhenawm a thlâwna chhawra, Hlawh pe ðuh si lo chu a chung a pik e.

¹⁴“Ka tân in lian leh pindan zau tak nei ka sâ ang a, Tukverhte ka hawng ang a, Sidar thingin ka thuah bawk ang a, Rawng sen ka hnawih ang,’ a ti a.

¹⁵“Sidar thing ina i chên avângin ro i rêl ang mâw? I pa khân a eiin a in a, ðha tak leh dik takin ro a rêl a, A lo hmuingîl ta a ni lo vem ni?

¹⁶Rethei leh tlachham te a ngaihsak a; A lo hmuingîl ta a. Hetiang hi mi hriat ve dân tûr a ni lo vem ni?” LALPAN a ti.

¹⁷“Nimahsela, i mit leh i thinlung chu ðuhâmna te, Pawi sawi lo thisen chhuah nân te, Tharum thawha mi nêksâwr nân te i hmang si a.”

¹⁸Chuvângin, Juda lal, Josia fapa Jehoiakima chungthû chu LALPAN heti hian a ti: “Sûntu pawh a nei lo vang, ‘Aw ka unaupa!’ ‘Aw ka farnu!’ titu a nei lo vang a; ‘Aw ka pu!’ ‘Aw, i ropui vei nêñ!’ tia ðahtu pawh a nei hek lo vang.

¹⁹Jerusalem kulh pâwnah an hnûk chhuak ang a, Sabengtung phûm dân ang lekin an phûm ang.

²⁰“Lebanon-ah chho la, han ðap teh, Basan ramah han âu vak vak la; Abarim aţang tein âu la, I lainâte an boral vek si a.

²¹I vanneih laiin ka bia che a, Nang chuan, ‘Ka ngaithla ðuh lo’ i ti a. Hetiàng ka ðhû i âwih lo hi I tleirâwl lai aţang i chin dân a ni

si a.

²²In puipate chu thliin a lên bo vek ang a, In lainâte pawh salah an tâng vek ang; I suahsualna zawng zawng avângin, I mualphovin i la zak ngawt ang le.

²³Aw, Lebanona chêng, sidar kûnga bu chheptute u, Hmeichhe nau vei nâ ang maia A lo thlen hunah chuan in lainatawm dâwn lo vem ni?

KONIA HNÊNA THUCHAH

²⁴“Ka nunna chhâlin ka sawi e,” LALPAN a ti, “Nang Konia, Jehoiakima fapa, Juda lal, ka kut ðing lama hming nemna pawh ni mah la, ka pawt chhuak tho tho ang che;

²⁵nangmah thah tuma zawngtute kutah, an hmêl hmu ringawt pawh i hlauh êm êm Babulon lal Nebukadnezzara kutah leh Kaldai-ho kutah ka pe dâwn a che.

²⁶I pianna ram ni lo, ram dangah nangmah hringtu i nu nêñ ka paih chhuak ang che u-a, chutah chuan in thi ang.

²⁷Kîr leh an châk êm êmna ramah chuan an kîr leh tawh hauh lo vang.

²⁸“Hê mi, Konia hi milim kehsawm tawh, hmuhsitawm Thil duhawm pâi lo bêl a ni lo vem ni? Engtizia nge amah leh a thlahte chu An hriat ngai loh rama paih chhuah an nih tâk?

²⁹Aw leilung, leilung, leilung, LALPA ðhû hi lo ngaithla teh!

³⁰LALPA chuan heti hian a ti: ‘Hê mi hi fa nei lo angin ziaak rawh, A dam chhûnga hmuingîl lo tûr te; A thlahte zîngah tûmah hmuingîl lo tûr te, Davida ðhutthlêngah tûmah ðhu lo tûr leh, Judai rama lal hauh lo tûrin,’” a ti a.

BUNG 23

DIKNA ZÂR

¹“Ka ran tlatna hmuna berâmte tidarha, tiboraltu berâmpute chu an chung a pik e!” LALPAN a ti.

²Chuvângin, ka mite enkawltu berâmpute chungthû chu LALPA, Israelte Pathianin heti hian a ti: “Ka berâm rualte in tidarh a, in ûm bova, in enkawl hek lo. Ngai reng rawh u, in thil ðha lo tih avâng hian ka rawn hrem dâwn che u a ni,” LALPAN a ti.

³“Ka berâm rual la dam chhunte erawh chu ka hnawh darhna ram tin aţangin ka hruai khâwm leh ang a, an huangah ka hruai kîr leh ang; an duah hlauh hlauh ang a, an pung ðhûr ðhûr ang.

⁴Anmahni chawmtu tûr berâmpute ka siamsak ang; an hlau tawh lo vang a, an mangang tawh hek lo vang, tlâkchham rêng rêng pawh an nei tawh hek lo vang,” LALPAN a ti.

⁵“Ngai teh u, nîte chu a lo thleng dâwn e,” LALPAN a ti, “Davida tân dikna zâr ka chhuahsak ang; Tluang takin Lal chuan ro a rêl ang a, Leiah hian dikna leh rorêlna ðha a hlen chhuak ang.

⁶A hun chhûngin Juda chu chhan chhuah a ni ang a, Israel chu him takin a awm ang; Hei hi an kohna tûr hming chu a ni: KAN DIKNA LALPA tih hi.

⁷Chuvângin, ngai rawh u, nîte chu a lo thleng mêk e,” LALPAN a ti. “Miten, ‘Aigupta ram ata Israel fate hruai chhuaktu LALPA nunna chhâlin,’ an ti tawh lo vang,

⁸“Ka hnawh darhna hmar lam leh ram zawng zawng ata Israel chhûngte hruai chhuaktu nunna chhâlin,” an ti tawh zâwk ang. Tichuan, anmahni ramah an chêng tawh ang.”

ZÂWLNEI DERTE LEH DÂWT THUPUANTE

⁹Zâwlneiho avângin ka thinlung a keh zo ta; Ka ruh zawng zawng a inkhâwng a. LALPA avâng leh a thu thianghlim avângin, Zû-in a chiah zawr, zu rui hnêp ang mai ka ni.

¹⁰Uire chîngten ram an luah khat a; Ânychhia avângin ram chuan a sîn a. Thlâlêr hmun nuam laite a khawro zo va. An kawng zawh chu sual a ni a, An chakna pawh a dik hek lo.

¹¹“Zâwlnei leh puithiam te lah mi bawhlhlawh an ni a; Ni, ka inah ngei an sualna ka hmu si a,” LALPAN a ti.

¹²“Chuvângin, an kalna chu kawng nâl tak ang a ni; Ka hrem hunah chuan thimthamah an tlânchhia ang a, An tawhlthlû ang, an chungah chhiatna ka thlen dâwn si a,” LALPAN a ti.

¹³“Samari zâwlneite zîngah thil âthlâlêr ka hmu: Baala hmingin thû an puang a, Ka mi Israelte an hruai sual ta.

¹⁴Jerusalem zâwlneiho zîngah pawh thil râphtlâlêr ka hmu: An uirê a, dâwt thu an nunpui a; Thilsual titute kut an tihchak avângin, An suahsualna laka inlamlêr an awm loh phah a. Ka tân Sodom ang lek an ni vek a, A mi chêngte lah Gomorra ang mai an ni.

¹⁵“Chuvângin, zâwlneiho chungthû chu Sipaihote LALPAN heti hian a ti: ‘Ngai teh, thil kha tak ka eitir ang a, Tui khâ ka intir bawh ang; Jerusalem zâwlneite hnên aţangin Ram pumah Pathian pawisak lohna hrî a darh chhuak ta si a.’”

¹⁶Sipaihote LALPA chuan heti hian a ti: ‘In hnêna thu puangtu zâwlnehote thû chu ngaithla suh u. Mi tlâktlai lovah an siam che u a ni; An rilru suangtuahna puang lek an ni a, LALPA thuchhuak a ni awzâwng lo ve.

¹⁷Kei mi hmusittute hnênah, “In tluang zêl ang” ‘LALPAN a ti,’ an ti châmchî a; Mahni duh dân dân khawsate hnênah, ‘In chungah thil ţa lo engmah a thleng lo vang,’ an ti a.

¹⁸LALPA remruatnaah tu nge dîng ve a, A thû lo dawnga, hre thei tu nge awm le? Tu nge a thû chu ngaithlâa, chhinchhiah le?

¹⁹Ngai teh, LALPA hnên aţangin thinrimna ţâwngaleivir a lo tleh ta e, Thâwngaleivir na tak mai chu! Mi suaksualte lû chu a nuai hrep ang.

²⁰LALPA thinrimna chu a kîr mai lo vang A thinlunga a tumte a hlen chhuah hma loh chuan. Hun hnuhnungah in la hre fiah dâwn a ni.

²¹“Zâwlneite chu ka tîrh hleih lohvin an tlân vêl a. Engmah hrilh lo mah îla, thû an puang tho va.

²²Ka thuruat dân ang hian han awmin, Ka thû hi ka mite hnênah han puang se zawng, An awm dân dik lote an kalsan ang a, An thiltih dik lo te chu an hawisan mai tûr.

²³“Hla taka awm Pathian ni lovin, Hnai tēja awm Pathian ka ni lo vem ni?” LALPAN a ti.

²⁴“Ka hmuh theih loh tûra hmun birûa bibo thei tu nge awm?” LALPAN a ti; “Lei leh vân hi ka awh khat vek lo vem ni?” LALPAN a ti a ni.

²⁵“Ka hming chhâla dâwt puang thîn zâwlneiten, ‘Mumangah ka mang e, mumangah ka mang e!’ tia an sawi ka hre thîn a ni.

²⁶Dâwt thu puang thîn zâwlneite thinlungah eng chen nge hetia an tih dâwn le? Mahni thinlung bum chawptu zâwlnei mai an ni si a,

²⁷mi tinin an thenawmte hnênah an mumang hrilhin, an paten Baala avânga ka hming an theihngihlîh tâk ang khân, ka mite chu ka hming theihngihlîhtîr an tum a.

²⁸“Zâwlnei mumang nei chuan, a mumang chu sawi mai rawh se. Ka thû dawngtu pawhin, rinawm takin ka thû chu sawi rawh se. Buhtak lakah buhsî hi eng nge a nih?” LALPAN a ti.

²⁹“Ka thû chu mei ang a ni lo vem ni? Lung chhut sawmna tuboh ang mai hi a ni lo vem ni?” LALPAN a ti.

³⁰“Chuvângin lo ngai teh u, mahni thenawmte laka ka thû inrûksak tawn chîng zâwlnehote chu ka do a ni,” LALPAN a ti.

³¹“Ngai teh u, zâwlnei mahni dang tinâl a, ‘LALPAN a ti,’ tih chîngte chu ka do a ni,” tih hi LALPA thuchhuak a ni.

³²Ngai teh u, mumang dâwtthû mai mai puang a, pawisakna nei lova dâwtthû hmanga ka mite kalsualtîrtu zâwlneite chu ka do a ni,” LALPAN a ti. Ka tîr si lo va, thû ka pe bawh hek lo; chuvângin, hêng mite tân hian ţangkaina rêng an nei lo ve,” LALPAN a ti.

³³“Tichuan, hêng mite hian emaw, zâwlneiin emaw, puithiamin emaw, ‘LALPA phurrit chu eng nge ni?’ tia an zawh che u chuan heti hian chhâng ang che u, ‘Eng phurrit â ni?’ an tih chuan, “Nangmahni ka hawisan tûr che u hi phurrit chu a ni e,” LALPA chuan a ti a ni.

³⁴Chuvângin zâwlnei emaw, puithiam emaw, mi tupawhin, ‘LALPA phurrit a ni,’ an tih mai chuan, chu mi chu an chhûngkuain ka hrem ang.

³⁵Tichuan, mi tinin mahni thenawm leh mahni unaute hnênah, ‘LALPAN engtin nge a sawi a, LALPAN engtin nge a chhân?’ in ti zâwk tûr a ni.

³⁶LALPA phurrit chungchâng hi in sawi tawh tûr a ni lo. Mi tupawhin thû a sawi chu ama tân phurrit a ni mai dâwn si a, Pathian nung, Sipaihote LALPA, kan Pathian thû hi in kailek vêl mai mai a ni e.

³⁷Tichuan, puithiam hnênah, ‘LALPAN engtin nge a lo chhân che?’ ‘LALPAN eng nge a sawi?’ in ti tûr a ni.

³⁸“LALPA phurrit a ni,’ ti tawh suh u, ka ti chung pawhin nangni chuan, ‘LALPA phurrit a ni,’ in la ti cheu si a; chuvângin LALPA chuan heti hian a ti: “LALPA phurrit a ni!” in la tih cheu avâng hian,

³⁹lo ngai reng ula, Kei, Keimah ngei hian ka theihngihlîhin, ka hawisan ang che u-a, nangni leh in thlahtute hnêna ka pêk tawh hê khawpui chawp hian ka hnên ata ka hnawt bo daih dâwn che u a ni.

⁴⁰In chungah kumkhuaa sawi chhiatna leh, theihngihlîh ngai tawh loh tûra kumkhuaa mualphona ka khumtîr ang che u.”

BUNG 24

THEIPUI RAH BÂWM HNIH CHHINCHHIAHNA

¹Juda lal, Jehoiakima fapa Jekonia leh Juda puipate, mistirite leh thîrdêng te, Babulon lal Nebukadnezzaran Jerusalem ațanga Babulon sala a hruai hnû khân, LALPA chuan theipui bâwm pahnih, LALPA tempul kawta inhûng chu mi entîr a.

²Bâwm khatah chuan theipui ța tak tak, theipui rah hmin hmasâ ang hi a awm a; bâwm dangah chuan theipui rah chhe deuh deuh, ei tlâk loh khawpa chhia a awm a.

³LALPA chuan ka hnênah, “Eng nge i hmuh, Jeremia?” a ti a. Kei chuan, “Theipui rah ța tak tak leh rah chhe tak tak, ei tlâk loh khawpa chhia ka hmu,” ka ti a.

⁴LALPA thû chu ka hnênah a lo thleng nawn leh a,

⁵“LALPA, Israelte Pathian chuan heti hian a ti: ‘Hêng theipui rah ța te ang hian, Juda saltâng, hê hmun ațanga Kaldai rama ka tirhte chu an țațna tûr a nih zâwkzia ka hriatpui dâwn a ni.

⁶An țațna tûrin ka mitin ka thlîr reng ang a, hê ramah hian ka hruai kîr leh ang; ka tung ding leh ang a, ka țațat tawh lo vang; ka phun leh ang a, ka pawt phâwi tawh lo vang.

⁷Kei hi LALPA ka ni tîh min hre thei tûr thîlung ka pê ang; tichuan, ka mite an ni ang a, an Pathian ka ni bawk ang, an thîlung zawng zawng nêh ka hnênah an lo kîr leh dâwn si a.

⁸Theipui rah ța lo kha ei tlâk loh hiala a awm ang khân an ța lo êm êm a,’ LALPAN heti hian a ti—‘Juda lal Hezekia leh a puipate, Jerusalema châmâng, hê rama la awmte leh Aigupta rama zu chêngte chu ka hawisan hmiah dâwn a ni.

⁹Ka hnawh bona tûr khawvêl ram zawng zawng mite sawi chhiata, an nuihzata, fiamthu thawh nâna an hman tûr leh, ânchhe lawh chauh dawng tûrin ka thlahthlam ang.

¹⁰Anni leh an thlahtute hnêna ka pêk ram ata tihbora an nih hmâ loh chuan an zîngah khandaih te, țaț te, hrichhia te ka lêngtîr ang.”

BUNG 25

KUM SAWMSARIEH CHHÛNG TIHRAMNA

¹Juda lal Jehoiakima, Josia fapa lal kum lînaa Juda mipui zawng zawng chungchânga Jeremia hnêna thu lo thleng (chu chu Babulon lal Nebukadnezzara kum khatna a ni a),

²zâwlnei Jeremia Juda mipui zawng zawng leh Jerusalema chêng zawng zawngte hnêna a sawi chu:

³“Juda lal, Amona fapa Josia lal kum 13-na ațanga tûn thlenga LALPA thu ka hnêna a lo thlenna chîn chu, tûn hi a kum 23-na a lo ni ta a; in hnênah wavi duai lo thû ka sawi tawh thîh kha, mahse in ngaithla duh rêng rêng lo va.

⁴LALPA chuan a rawngbâwltu zâwlnei zawng zawngte in hnênah arawn tîr thîh a; chuti chung pawhin in lo ngaithla duh lo va, eng thu nge a nih hriat tum pawhin in bengkhawn duh hek lo.

⁵Anni chuan, “Tunah hian mi tinin an awm dân ța lo te, an thîl sual tih thînte sim sela, LALPAN nangni leh in thlahtute hnêna ram a pêk che u-ah hian kumkhuain chêng rawh u.

⁶Pathian dangte rawng bâwlin, chibai bûk tûrin kal suh ula, in kutchhuak thîl hmangin min tithinur lo bawk ula; tichuan ka tina lo vang che u,’ an ti thîh a.

⁷Chutichung pawhin min ngaithla duh chuang lo va, in kut hnathawh hmangin min cho thînur a, in intina ting mai a nih hi,” LALPAN a ti.

⁸“Chuvângin Sipairote LALPA chuan heti hian a ti: ‘Ka thu rêng rêng in ngaihlâk duh loh avângin,

⁹hmar lama hnam zawng zawng leh, ka chhihhlawh, Babulon lal Nebukadnezzara chu ka chah dâwn a, hê ram leh a michêngte, a chhehvêl zawng zawng hnamte chu a tichhe vek ang a, miten mak tia an chek khum atân leh, kumkhuuaa chhe ram dêr tûrin ka sawp dâwn a ni,’ LALPAN a ti.

¹⁰Chû mai a la ni lo, an hnên ata hlim thâwm leh lâwm thâwm te, moneitu âw leh mo âw te, buh dêng thâwmte leh khâwnvâr êng te chenin ka lâk bosak vek ang.

¹¹Tichuan, hê ram pum hi mak tak maiin a chhe ram vek ang a, hêng hnamte hian kum 70 chhûng Babulon lal rawngbâwl hnâ an thawk ang.

¹²Kum 70 a zawh hunah, Babulon lal leh chû ram, Kaldai-ho ram chu, an suahsualna avângin ka hrem ang a; chhe ram dêr tawh tûrin ka siam ang,’ LALPAN a ti.

¹³Tichuan, chû ram chhiatna tûra ka thu sawi zawng zawng, hê lehkhabu puma zia, Jeremia hnam zawng zawng chungchâng a lo puan lâwkte chu ka thlentîr ang.

¹⁴(Hnam tam takte leh lal ropui takte rawng an bâwlsak bawk ang a; an thiltihte leh an kut hnathawh ang zêlin ka la thungrûl ang.)’

HNAME CHUNGA RORÊLNA

¹⁵LALPA, Israelte Pathian chuan ka hnênah: “Ka kut ata hê thîurna uain no hi lâ la, ka tirhna che hnam zawng zawng intîr ang che.

¹⁶An in ang a, an pai chawn chawn ang a, an zînga ka thawn tûr khandaih chuan a ti â dâwn a ni,” a ti a ni.

¹⁷Tichuan, LALPA kuta mi no chu ka lâ a, LALPAN min tirhna hnam zawng zawngte chu ka intîr ta a:

¹⁸Jerusalem leh Juda khawpuite, an lalte leh an puipate chu tûna an awm dân ang hian ram chhe vekin, mite mak tihah changin, an chek khum a, ânchhia an dawn theih nân;

¹⁹Aigupta lal Pharoa te, a khâwnbâwltu, a puipate leh a mipui zawng zawng te;

²⁰mipui inawmpawlh zawng zawng te, Uz rama lal zawng zawng te, Philistia rama lal zawng zawng (Askelon te, Gaza te, Ekron te leh Ashdod mi la dam chhun te);

²¹Edom te, Moab te leh Ammon mipuite;

²²Tura lal zawng zawng te, Sidon lal zawng zawng te, tuiptu râl kam vêla lalte;

²³Dedan te, Tema te, Buz leh ram kilkhâw bera mi zawng zawng te;

²⁴Arabia lal zawng zawng leh thlalêra chêng mipui inchawhpawlhho lal zawng zawng te;

²⁵Zimri lal zawng zawng te, Elam lal zawng zawng te leh, Medes lal zawng zawng te;

²⁶hmar lam ram hla leh hnâia lal zawng zawng te; lei chungah awm khawvêl lalram zawng zawng te nêh. Chûngho in hnûah chuan Sesak lal pawhin a in ve ang.

²⁷“Heti hian hrilh rawh u, ‘Sipaihote LALPA, Israelte Pathian chuan heti hian a ti: “In ula, rui ula, luak rawh u! In zîngah khandaiah ka rawn tîh avângin tîl ula, tho leh tawh suh u,” ti ang che.’

²⁸I kuta no chu in tûra a lâk duh loh chuan, an hnênah heti hian ti ang che, ‘Sipaihote LALPA chuan heti hian a ti: “In in ngei tûr a ni!

²⁹Khai le, ka hming chuanna khawpuiah chhiatna ka thlentîr tan ta si a, nangni pawh hrem tuar lo dêr chuan in awm bîk dâwn em ni? In pumpelh bîk hauh lo vang. Leia awm zawng zawng chungah khandaiah ka lek dâwn si a,” Sipaihote LALPA chuan a ti a ni.’

³⁰“Chuvângin, an vâiin hêng thûte hi heti hian puan khum ang che: ‘LALPA chu sâng tak aţangin a rawn âu ang a, A awmna hmun thianghlim aţangin a âw a rawn chhuah ang; A chênna chu nasa takin a âu khum ang. Leilung luahtu zawng zawngte chu, Grêp sâwrtute angin a âu khum ang.

³¹Kâwlkil tâwp thlengin thâwm a lo awm ang, LALPAN hnamte a khin avângin; Tîsa zawng zawng chungah ro a rêl ang. Mi suaksualte chu khandaiah hnênah a pê ang,’ LALPAN a ti.”

³²Sipaihote LALPA chuan heti hian a ti: “Ngai teh, hnam tin aţangin chhiatna a chhuak dâwn e, Kâwlkil tâwp aţangin Thâwngaleivir nasa tak a lo thawk ang.

³³“Chumi nia LALPA tihhlumte chuan lei tâwp aţanga a tâwp lehlam thleng an dâp dul ang a. Sûn emaw, lâk khâwma phûm emaw pawh an hlauh lo vang a; lei chungah bawhlhlauh mai an ni ang.

³⁴“Berâmpuete u, ţap ula, âu rawh u! Vut dûrah khân lum tawp tawp rawh u. Nangni berâm rual zînga puipate u! Tihhluma tihdarha in awm hun a lo thleng ta e; Bêl hlu tak angin in la tlu dâwn si a.

³⁵Berâmputen tlan bona tûr an hre lo vang, Ranrual zînga hotuten pumpelh nachang an hre hek lo.

³⁶Berâmpuete ţap thâwm rîvâ te, Ranrual zînga hotute rûm rî hriat a ni e. LALPAN an tlatna hmun a tichhe ta si a.

³⁷LALPA thinurna nasa tak avângin, An chênna hmun ralmuang chu a ţing zo ta.

³⁸Sakeibaknei angin a tawmkûk a chhuahsan a; An ram chu a chhe zo tawh si a. Hnehchhiahtu nunrâwnna avâng leh, A thinurna nasat êm avângin.”

BUNG 26

THIHNA LAKAH JEREMIA CHHAN CHHUAH A NI

¹Juda lal, Josia fapa Jehoiakima lal tîh laia, LALPA hnên aţanga hê thu lo thleng chu,

²“LALPA chuan heti hian a ti: ‘LALPA in tual zâwlah ding la, Juda khua zawng zawng aţanga Pathian be tûra lo kalte hnênah, sawi tûra thu ka pêk zawng zawng che kha sawi vek la. Sawi hmaih hauh lo vang che.

³Mi tinin lo ngaithlain, an awm dân sualte an kalsan duh hlauh tâkin; tichuan, an thil sual tih avânga an chungah chhiatna thlentîr ka tum hi ka sût phah theih tâkin.’

⁴An hnênah, ‘LALPAN heti hian a ti e: “Min ngaihtlâk duh lohva, in hnêna ka dah tâk ka dân chu in zawm duh lohva,

⁵in hnênah vawi duai lo ka rawn tîh ţhin ka chhiahhlauh zâwlneihote thu pawh in ngaihsak duh lo zêl a nih chuan (in ngaihven lo hle si a),

⁶hê in hi Silo ang lekah ka siam ang a, hê khawpui pawh hi, leia hnam tinte ânchhia mai atân ka siam ang,” tiin.”

⁷Tichuan chûng thû, Jeremian LALPA ina a sawite chu puithiamte, zâwlneite leh mi zawng zawng chuan an lo hria a.

⁸Chutia LALPAN sawi tûra thû a pêk zawng zawng an hnêna a sawi zawh chuan, puithiamte, zâwlneite leh mipui zawng zawng chuan amah chu an man a, “I thi ngei ang maw le!

⁹“Eng aiah nge hê in hi Silo ang leka, luahtu awm lova ram chhe vek tûra LALPA hminga i puan chhuah vei chu le?” an ti a. Tichuan, LALPA inah chuan mipui zawng zawngin Jeremia chu an bâwr luih luih a.

¹⁰Juda hotuten chûng thûte chu an lo hriat chuan, lal in aţangin an lo kal a, LALPA in luhna Kawngka Thar bulah chuan an ţhû a.

¹¹Puithiamte leh zâwlneite chuan hotute leh mipuite hnênah, “Hê pâ hi thi tlâk a ni! In beng a in hriat ang khân, hê khawpui chhiatna tûr zâwnga thû a puan kha,” an ti a.

¹²Jeremia chuan hotu zawng zawngte leh mipui zawng zawng hnênah: “In thu hriat tâk zawng zawng ang tak khân, hê in leh hê khawpui chhiat tûr thu sawi tûr hian LALPA chuan mi tîr asin.

¹³Tûn aţang hian in awm dân leh in thiltih ţhin aţangin insiam ţha ula, LALPA in Pathian thu zâwm bawk rawh u; tichuan, in chungah chhiatna lo thleng tûr LALPAN a lo puan tawh pawh chu a sût leh dâwn nia.

¹⁴Kei chu heta hi, in kuta awm ka ni e; ţha in tih ang angin ka chungah ti ang che u.

¹⁵Min tihhlum erawh chuan, pawh sawi lo thisen mawh chu nangni leh hê khawpui leh a chhûnga chêngte chungah te in leih baw dâwn tih hria ang che u; hêng thû zawng zawng hi in hriata sawi tûrin LALPA chuan min tîr ngei si a,” a ti a.

¹⁶Chutichuan, hotute leh mipui zawng zawng chuan puithiamte leh zâwlneite hnênah, “Hê mi hi tihhlum tûr a ni lo ve. LALPA kan Pathian hmingin kan hnênah thu a sawi zâwk a nih hi,” an ti a.

¹⁷Chû rama upa ţhenkhat chu an lo ding a, mipui pungkhâwmho hnênah chuan tihian an ti a:

¹⁸“Moresbeth mi Mika khân Juda lal Hezekia lal laiin thu a puang lâwk a; Juda mipui zawng zawng hnênah, ‘Sipaihote LALPA chuan heti hian a ti: “Zion chu lei anga leh a ni ang a, Jerusalem chu thil chhe awm khâwm mai a ni ang, Tempul awmna tlâng chu ram hnuaia tlâng kawlh vûk ang mai a ni ang,” a lo tih kha.

¹⁹Juda lal Hezekia leh Juda mi zawng zawngte khân an tihlum ta em? LALPA hlauvin, LALPA duhsakna a zawng ta zâwk a ni lo vem ni? Chuvângin LALPAN an chung a chhiatna thleng tûr a puan tawh chu a sût leh a nih kha. Keini erawh chuan kan chungah thil tha lo tak kan thlentîr dâwn a nih hi,” an ti a.

²⁰LALPA hminga thu hrilhâwkta mi pakhat, Kirjath Jearim khuua mi, Semaia fapa Urija kha a awm baw k a; ani pawhin Jeremia thusawi zawng zawng ang bawkin, hê khawpui leh hê ram chhiat tûr thû a lo puang lâwk ve baw k a.

²¹Lal Jehoiakima leh a mi chak pui puite leh milianho zawng zawngten an lo hriat chuan, lal chuan tihhlum a tum a; mahse Urijan a hriatin, a hlau va, a tlan bo va, Aigupta ramah a kal ta a.

²²Lal Jehoiakima chuan Aigupta ramah mite a tîr a: Akbora fapa Elnathana leh mi dangte chu Aigupta ramah an zu kal a.

²³Urija chu Aigupta ram aţanga zu hruai chhuakin, lal Jehoiakima hnên an rawn thlen a, ani chuan khandaihin a lo that a, a ruang chu vantlâng thlânmuallah a paih a.

²⁴Nimahsela, Saphana fapa Ahikama chuan Jeremia chu a ţan tlat a; tichuan tihhlum tûrin mipuite kutah an pe ta lo a ni.

BUNG 27

NGHÂWNGKAWL LEH HRUI CHHIN CHHIAHNA

¹Juda lal, Josia fapa Jehoiakima lal tîrh lai khân, LALPA hnên aţangin Jeremia hnênah hê thû hi a lo thleng a,

²“LALPAN ka hnênah tihian a ti: ‘Nghâwngkawlte siam la, a hruite vuah baw k la, i nghâwngah bât rawh,

³chûngte chu Edom lal te, Moab lal te, Ammon lal te, Tura lal te leh Sidon lal te hnênah Juda lal Zedekia hnêna mi an rawn tîrh Jerusalema lo kalte kutah thawn ang che.

⁴An pute hnênah heti hian sawi rawh se, “Sipaihote LALPA, Israelte Pathian chuan in pute hnênah heti hian in sawi tûr a ni a ti:

⁵Leilung leh a chhûnga awm mihringte leh ramsâte hi ka thiltihtheihna ropui leh ka bân phar meuhvin ka siam a, pêk âwm ka tih apiangte hnênah ka pe mai a ni.

⁶Tûnah hian hêng ram zawng zawng hi ka chhiahhlawh, Babulon lal Nebukadrezzara kutah ka pe ta a; ramhnuaia ramsâte pawh ama rawngbâwl nân ka pe baw k a ni.

⁷A ram tâna hunbi lo thlen hmâ loh chuan, hnam tinin amah leh a fapa leh a tupate rawng an bâwl ang; chumi hnûah erawh chuan hnam tam takte leh lal ropuiten bâwihah an siam lêt ve ang.

⁸Babulon lal Nebukadrezzara rawng bâwl duh lo hnam leh lalram te, Babulon lal nghâwngkaw l bât duh lo hnam chu, khandaih te, ţâm te leh hripui tein ka hrem ang a, ama kut ngei hmangin ka tiboral vek ang,’ LALPAN a ti.

⁹Chuvângin “Babulon lal rawng in bâwl tûr a ni lo,” tia hrilhtu che u in zâwlnei te, in aienthiam te, in mumang hrilhfiahtute, in awm dân hrilhlâwkute, in dâwithiamte thu rêng rêng chu ngaithla suh u.

¹⁰In ram ata hla taka sawn bova in awm theih nân, dâwt thû an hrilh che u a ni; tichuan, keiin ka lo hnawt chhuak ang che u a, in boral phah dâwn a ni mai.

¹¹Mahse, Babulon lal nghâwngkaw l bâta, a rawng bâwl duh hnamte chu anmahni ramah ka awmtîr ang a, lei te an let ang a, an chêng reng thei ang,’ “ LALPAN a ti.

¹²Juda lal Zedekia hnênah pawh hêng thu ang diak diak hian ka sawi a, “Babulon lal nghâwngkaw l bât tûrin in nghâwng rawn dâwh ula, amah leh a mite rawng bâwl ula, in him dâwn nia!

¹³LALPAN Babulon lal rawng bâwl duh lo hnamte awm dân tûr a sawi tawh reng kha, engvângin nge nangni leh in mite chu khandaih te, ţâm te leh hripui tea in thih ang le?

¹⁴Chuvângin in hnênah, ‘Babulon lal rawng in bâwl tûr a ni lo,’ tia hrilhtu zâwlnei te thû chu ngaithla suh u, dâwt thu mai an hrilh che u a ni;

¹⁵ka tîr si lo va, mahse ka hming chhâlin dâwt thû mai an puang a; nangni leh in hnêna thu puangtu zâwlnei hote chawpa ka hnawh chhuaha, in boral phahna tûr a ni zâwk,” LALPAN a ti.

¹⁶Puithiamte leh hêng mi zawng zawng hi ka hrilh vek a: “LALPAN heti hian a ti: ‘In hnêna thusawitu zâwlneiten, “Ngai teh u, LALPA ina bungbêlte kha Babulon aţangin an rawn lakîr leh thuai dâwn e,” titute thû chu ngaithla suh u,’ in hnêna an thusawi hi dâwt thû mai a ni e.

¹⁷Anniho chu bengkhawn suh u; Babulon lal rawngbâwl ula, in him mai ang! Engah nge hê khawpui hi tihchhiat a nih ang le?

¹⁸Amaherawhchu, zâwlnei an niha, an hnênah LALPA thû a awm takmeuh a nih chuan, LALPA ina bungbêl la awm te, Juda lal inah leh Jerusalema la awmte hi Babulon-a lâk bo a nih loh nân, Sipaihote LALPA hnênah dîl ang hmiang.’

¹⁹“Sipaihote LALPA thuchhuak chuan ban sâng te, tuiţem te, a nghahchhan te leh, hê khawpuia bungbêl hnutchhiaha la awm chhun,

²⁰Babulon lal Nebukadrezzaran Juda lal, Jehoiakima fapa, Jekonia leh, Judai ram leh Jerusalema mi lianho zawng zawng, Jerusalem aţanga Babulon sala a hruai ţuma a lâk tel ve loh chungchâng chu heti hian a ti:

²¹ni e, Sipaihote LALPA, Israelte Pathian chuan LALPA in leh Juda lal in leh Jerusalema bungbêl la awm chungchângah heti hian a sawi:

²²Babulon-ah lâk bo a ni ang a, anmahni ka tlawh hun thlengin chutah chuan a awm reng ang,’ LALPAN a ti. ‘Chumi hnûah ka la kîr leh ang a, hê hmunah hian ka din thar leh ang,’ tiin.

BUNG 28

HANANIA DÂWT THÛ LEH A TLÂKCHHIATNA

¹Chumi kum, Juda lal Zedekia lal ʔan tîrh, a kum lîna thla ngânaah chuan, Gibeon mi Azura fapa zâwlnei Hanania chuan puithiamte leh midang zawnzawng awm lai ngeiin, LALPA inah ka hnênah thu a sawi a,

²“Sipaihote LALPA, Israelte Pathian chuan heti hian a ti: ‘Babulon lal nghâwngkaw l chu ka titliak ta e.

³Kum hnih a vei hnûah LALPA ina bungbêlte, Babulon lal Nebukadnezaran hemi hmuna mi a lâk, Babulon-a a kalpui zawnzawngte kha, hê hmunah ngei hian ka rawn la kîr leh vek ang.

⁴Hê hmunah hian Jekonia, Juda lal Jehoiakima fapa chu, Babulona kal ta Juda sal zawnzawngte nêh ka hruai kîr leh vek ang; Babulon lal nghâwngkaw l chu ka tihlihsak dâwn si a,’ LALPAN a ti,” a ti a.

⁵Zâwlnei Jeremia chuan puithiamte leh LALPA ina dîng mipui zawnzawng hmâah chuan zâwlnei Hanania chu a bia a,

⁶zâwlnei Jeremia chuan, “Amen! LALPA chuan chutiang tak chuan ti rawh se; LALPA ina bungbêlte leh sala an hruai zawnzawng, Babulon ata hê hmuna lo kîr leh vek tûra i sawi ang tak chuan LALPA chuan hlen chhuak ngei rawh se.

⁷Mahse hei, nangmah leh mipui zawnzawng hriata i hnêna ka sawi hi ngaithla teh:

⁸Nang leh keia awm hmâ daihin ram tam tak leh lalram ropui tak takah indo te, chhiatna te leh hrichhe lêng tûr te hi zâwlneiten an lo puang tawh ʔhîn a.

⁹Râlmuan na lam thu puangtu zâwlnei chu, a puan lâwk ang taka a lo thlen chuan, chû zâwlnei chu LALPAN a tîr ngei tih a hriat mai ang,” a ti a.

¹⁰Tichuan, zâwlnei Hanania chuan Jeremia nghâwnga mi nghâwngkaw l chu a hlip thla a, a titliak ta a.

¹¹Hanania chuan mipui zawnzawng hriatah, “LALPAN heti hian a ti: ‘Hetiang tak hian hnam tin chung Babulon lal Nebukadnezara nghâwngkaw l chu kum hnih pumhlûm chhûngin ka titliak vek dâwn a ti,” a ti a. Zâwlnei Jeremia chuan a kalsan ta a.

¹²Zâwlnei Hananian zâwlnei Jeremia nghâwngkaw l bah a tihlihsak hnû chuan Jeremia hnênah LALPA thû a lo thleng a,

¹³Hanania hnênah va kal la, tihian va hrih rawh, ‘LALPA chuan heti hian a ti: “Thinga siam nghâwngkaw l i titliak a, chumi aiah ʔhîr nghâwngkaw l i siam ta hlauh mai le.”

¹⁴Sipaihote LALPA, Israelte Pathian chuan heti hian a ti: “Babulon lal Nebukadnezara rawng an bâwl theih nân, hêh hnam zawnzawng hi ʔhîr nghâwngkaw l ka bahtîr ta; a rawng an bâwl ngei baw k ang. Rama ramsate nêh lam a hnênah ka pe baw k a ni,” tiin.

¹⁵Zâwlnei Jeremia chuan zâwlnei Hanania hnênah, “Hanani, hria ang che, LALPA chuan a tîr awzâwng lo che a, hêh mite hi dâwt i rintîr mai a lo ni e.

¹⁶Chuvângin, LALPA chuan heti hian a ti: ‘Lo ngai reng la, lei chung ata hi ka dah bo daih dâwn che. LALPA laka helna thû mite i zirtîr avângin kumin ngei hian i ʔhî ang,” a ti a.

¹⁷Tichuan, zâwlnei Hanania chu, chumi kum vêk, a thla sarihnaah chuan a ʔhî ta a.

BUNG 29

SALTÂNGTE HNÊNA JEREMIA LEHKHATHAWN

¹Hêh lehkhah hi Nebukadnezaran Jerusalem aʔanga Babulona sala a hruaiho la awmchhunte zînga an upate, puithiamte, zâwlneite leh mi dang zawnzawngte hnêna zâwlnei Jeremia Jerusalem aʔanga lehkhah a thawn te chu a ni.

²(Hei hi lal Jekonia te, lalnu te, mitilreh te, Juda leh Jerusalem milian te, mistiri te leh ʔhîrdêngten Jerusalem an chhuahsan hnûa ʔhîl thleng a ni a.)

³Chû lehkhah chu Juda lal Zedekian Babulon-ah, Babulon lal Nebukadnezara hnêna a mi tîrh, Saphana fapa Elasa leh Hilikia fapa Gemaria te kutah thawn a ni a, chutah chuan,

⁴Sipaihote LALPA, Israelte Pathian chuan sala hruai bo tâkho zawnzawng, Jerusalem aʔanga Babulon-a ka hruaitîr tâkte hnênah chuan:

⁵Inte sa ula, chûngah chuan chêng rawh u; huan te siam ula, a rahte chu ei rawh u.

⁶Nupuite nei ula, fanute, fapate nei rawh u; in fapate tân nupui neihsak ula, in fanute tân pasal neihsak baw k rawh u, fanu fapate an hrin theih nân-tichuan kiam lam pan lovin, in lo pung zêl dâwn nia.

⁷Sala tâng tûra nangmahni ka tîrhna khawpui tân râlmuan na zawnzawng ula, LALPA hnênah ʔawngtâisak rawh u; râlmuan na a neih ang zêlin nangni pawh in râlmuang dâwn si a.

⁸Sipaihote LALPA, Israelte Pathian chuan heti hian a ti: In zînga zâwlneite leh aienthiante chuan bum che u suh sela, in mangphan mumangte pawh chu ngaihaven duh suh u.

⁹Keima hming chhâlin dâwt thû an puang mai mai a, ka tîr hauh si lo va, LALPAN a ti.

¹⁰LALPA chuan heti hian a ti: Babulon-ah kum sawmsarih a tlin hunah ka rawn tlawh ang che u-a, in hnêna ka ʔhî ʔhî tak chu hlenin, hê hmunah hian ka hruai kîr leh ang che u.

¹¹In tâna ka remruatsak che u chu ka hria: ʔhîl ʔhî lo lam ni lovin, in ʔhatna tûr zâwk a ni a; in hmalam beiseina chu a taka thlentîr che u ka tum a ni, LALPAN a ti.

¹²Tichuan, kei hi min ko ang a, ka hnênah in rawn ʔawngtâi baw k ang a, ka lo ngaihlâksak ang che u.

¹³Min zawnzawng ang a, in thîlung zawnzawng min zawn hunah min hmu ang.

¹⁴In zawn hmuh tûrin ka awm ang a, in saltânna aʔangin ka hruai kîr leh ang che u, LALPAN a ti; nangmahni ka hnawh darhna hnam tin leh hmun hrang hrang aʔangin, sala ka tîrh bona che u hmunah ngei ka hruai kîr leh ang che u, LALPAN a ti.

¹⁵“LALPA chuan Babulonah pawh zâwlnei min dinsak e,” in ti vei a;

¹⁶chuvângin, LALPA chuan Davida lalthutthlênga thu tûr lal chungchâng te, hê khawpuia chêng mi zawng zawng chungchâng te, in unau, in hnêna sala tâng ve lote chungchâng chu heti hian a sawi,

¹⁷Sipaihote LALPA chuan heti hian a ti: Ngai rawh, an chungah khandaih te, tâm te, hrî te ka lêngtîr ang a, theipui tawih, ei tlâk loh khawpa chhia ang maiin ka siam ang.

¹⁸Khandaih te, tâm te leh hrî tein ka ûmzui ang; ka hnawh darhna hnam tin zîngah leia lalram zawng zawngte tân kamechhe tleuh nân te, mak an tiha an chek khuma, an sawi chhiat mai mai atân ka siam ang,

¹⁹an hnênah wawi duai lo ka chhiahhlawh zâwlneite tira, thu ka puantir fo chung pawha an pawisak duh loh vâng a ni, LALPAN a ti. Nangni pawhin in bengkhawn duh si lo, tih hi LALPA thuchhuak a ni.

²⁰Chuvângin, nangni Jerusalem aţanga Babulona ka tirh, sala tângho zawng zawngte u, LALPA thû hi lo ngathla teh u.

²¹Kolaia fapa Ahaba leh Maaseia fapa Zedekia, ka hming chhâla in hnêna dâwt thu puangtute kha, Sipaihote LALPA, Israelte Pathian chuan heti hian a ti: Ngai rawh u, Babulon lal Nebukadnezzara kutah ka mantîr ang a; in mit hmuh ngeiah a that dâwn a ni.

²²Babulona Juda saltâng zawng zawngte chuan, “Babulon lalin Zedekia leh Ahaba meia a rawh ang mai khân, i chungah LALPAN ti rawh se,” tiin ânchhe lawh nân an la hmang ang;

²³Israel ramah zahthlâk takin thil an ti a, an thenawm nupuite nêan an uirê a; thû ka pe hauh si lo va, ka hmingin dâwtthû an sawi a. Ka hre Chiang a, thuhretu ka nih hi, LALPAN a ti.

²⁴Nehelam mi Semaia hnênah pawh hê thu hi i sawi bawh tûr a ni,

²⁵Sipaihote LALPA, Israelte Pathian chuan heti hian a ti: Jerusalem mipui zawng zawng hnênah te, puithiam Maaseia fapa Zephania leh puithiam zawng zawng hnênah, nangma hming ngein lehkha i thawn a,

²⁶“LALPA chuan puithiam Jehoiada aiah puithiamah a siam che a, tichuan mi â, inti-zâwlnei chawp apiangte chu kawh te buntîra, tân ina i khung theih nân LALPA ina hotûah dah i ni a.

²⁷Chuti ni si, engah nge Anathoth khaw mi Jeremia, in hnêna inti-zâwlnei chu in khak loh le?

²⁸Ani chuan, ‘Hê saltân hun chhûng hi a rei dâwn a; chuvângin in te sa ula, chêng ula, huante siam ula, a rahte ei rawh u,’ tiin Babulon-ah thû min rawn thawn a ni,” tiin.

²⁹Chû lehkhathawn chu puithiam Zephania chuan zâwlnei Jeremia hriatah a chhiar a.

³⁰Tichuan, LALPA thû chu Jeremia hnênah a lo thleng a:

³¹Saltângho zawng zawng hnênah heti hian lehkha thawn rawh, Nehelam mi Semaia chungchângah LALPAN heti hian a ti: ‘Ka tirh pawh ni si lovin Semaia’n in hnênah thû a sawi a, dâwt thû mai a rintîr che u-a.

³²chuvângin, LALPA chuan heti hian a ti: Ngai rawh, Nehelam mi Semaia leh a thlahte chu ka hrem ang; hêng mite zîngah hian chênpuir tûr tûmah a nei lo vâng a, ka mite tâna thil t̃ha ka tih̃tûr

pawh a hmu ve hek lo vâng, LALPA laka helna thu a zirtîr avângin,’ LALPAN a ti.

BUNG 30

ISRAEL LEH JUDAI RAM TUNDIN LEHNA

¹Jeremia hnêna LALPA thu lo thleng chu,

²“LALPA Israelte Pathian chuan heti hian a sawi: ‘I hnêna thû ka sawi zawng zawng hi lehkhâbûah ziaak rawh.

³Ngai teh, nîte chu a lo thleng dâwn e,’ LALPAN a ti; ‘ka mi Israelte leh Juda saltângte ka hruai kîr leh dâwn si a,’ LALPAN a ti. An thlahtute hnêna ka pêk ramah chuan ka kîrtîr leh ang a, an luah leh ang.’

⁴Hêngte hi Israelte leh Judate chungchângah LALPA thu sawi chu a ni.

⁵“LALPA chuan heti hian a ti: ‘Hlâuthâwn aw khûr rî kan hria e, Muanna a ni lo, hlauthâwn âw zâwk a ni.

⁶Zâwt la, en vêl teh, Mipain nâu an vei ngai em ni? Hmeichhe nâu vei ang maia Engtizia nge hmêl dâng vek khawpa Mipain kâwn a dawm tâk ngawih ngawih le?

⁷Eheu! Chû ni chu a ropui teh e, Chû ang rêng chu a la awm si lo va; Jakoba mangan nî zet chu, Mahse, ani chu chhan chhuah a ni ang.

⁸“Chumi ni chuan heti hian a awm ang,’ Sipaihote LALPAN a ti, I ngâwn aţangin a ngâwnkawh chu ka titliak ang a, Nangmah an phuarna hrui ka tichat ang; Ram dang mite salah an tâng tawh lo vâng.

⁹LALPA an Pathian rawng an bâwl tawh ang a, An lal atân Davida ka tun dinsak bawh ang.

¹⁰“Aw ka chhiahhlawh Jakob, hlau suh la,’ Aw Israel, zâm hek suh,’ LALPAN a ti; Ngai teh, hla tak aţangin, i chithlahte nêan, An saltânna aţangin ka chhan chhuak ang che. Jakoba chu a kîr leh ang a, thlamuanguin a châwl tawh ang a, Tûma’n an tihlau leh tawh lo vâng.

¹¹Chhandam tûr chein i hnênah ka awm reng e,’ LALPAN a ti; Ka hnawh darhna che hnam zawng zawng chu tichimit vek mah îla, Nang chu ka tichimit ve lo vâng che. A âwm tâwkin ka zilh hlek ang che a, Hrem lohva chhuah̃tîr i ni bîk lo vâng.’

¹²“LALPA chuan heti hian a ti: ‘I natna hi tihdam theih a ni lo, I hlîam hi a na êm a nih hi.

¹³Tuam dam i nih theih nân, Sawipuitu tûr che tûmah an awm lo; Damdâwi engmah i nei si lo.

¹⁴Nangmah hmangaihtuten an theihngihlîh vek che a, An ngaihsak tawh lo che; Hmêlma hlîam takin ka hlîam ta che a, Dîm lo takin ka hrem bawh che a, I sualna a pun zêl avângin I bawhchhiatna hi a lo tam êm a ni.

¹⁵Engah nge i na tuar chu i t̃ahpui le? I lungngaihna chu tihdam rual a ni hleinê. I bawhchhiatna a tam êm vâng leh, I sualte a pun deuh deuh avângin, Hêng hi i chungah ka ti a ni.

¹⁶Chuvângin, a eiraltu zawng zawng che chu eiral an ni ang; I hmêlmâ zawng zawng chu, an vâiin salah an tâng vek ang; Nangmah rawktu chu an rawk ve ang, A chângtu che chu miin an

châng ve ang.

¹⁷Hrisêlna ka pe leh ang che a, I hliamte ka tidam leh ang, LALPAN a ti, ‘Hnawhchhuah tawh Zion a nih hi, Tia, tûma ngaihsak i hlawh loh avângin.”

¹⁸“LALPA chuan heti hian a ti: ‘Ngai teh, Jakob-ho puan in sal tâna ka la kîr leh ang a, A chênna hmunah te zah ka ngai ang; Khawpui chu a mual ngaiah din a ni leh ang a, Lal in pawh a awm dân ngaiin a awm leh ang.

¹⁹Chûng aţang chuan lâwmthu sawina te, Hlimna âu rî te a lo chhuak leh ang; Ka tipung thûr thûr ang a, an kiam tawh lo vang; Ka châwimâwi bawh ang, an tēnau dâwn si lo va.

²⁰An thlahte pawh tûn hmâ ang bawkin an awm ang, Ngêlnghet takin ka hmâah an pung khâwm thîn ang a; Anmahni tiduhdahtu zawng zawng ka hrem vek ang.

²¹An hotute chu anmahni zînga mi an ni ang a, Anmahni awptu tûr pawh an zînga mi bawh a ni ang; Keima lamah ka hîp hnai ang a, Ani pawhin mi rawn hnaih ang; Tu nge mahni thûa mi hnaih ngam awm le?’ LALPAN a ti.

²²“Ka mite in ni ang a, Kei pawh in Pathian ka ni ang.”

²³Ngai teh u, LALPA thlipui chu Thinurin a tleh chhuak ta, thlivir kal zêl chu; Mi suaksualte lû a nuai nek ang.

²⁴LALPA thinurna nasa tak chu a tum a hlen hmâin a inlamlêl lo vang, A thinlunga a tum anga a tih hmâ loh chuan. Ni hnunngah chuan in la chhui thiam ang.

BUNG 31

ISRAEL LA DAMCHHUNTE CHHAN CHHUAHNA

¹“Chutih hunah chuan, kei hi Israel chhûngkua zawng zawng tân Pathian ka ni ang a, anni pawh ka mîte an ni ang,” LALPAN a ti.

²LALPA chuan heti hian a ti: “Israelte chawlhna ka pêk lai khân, Khandaiha thah bângte chuan Thlalêrah khawngaihna an chang ta.”

³Hmânah ka hnêna lo lang LALPA chuan: “Ni e, hmangaih tâwp lovin ka hmangaih che a; Lainat takin ka hruai zêl che a ni.

⁴Ka din leh ang che a, din thar lehin i awm ang, Aw nula thianghlim Israel! Dârbenthek nêi i inthum leh ang a, Hlim taka lâmte zîngah i pên chhuak leh ang.

⁵Samari tlâng pangahte chuan grêp i chîng leh ang a; A phuntute chuan châw ang maiin a rah an ei ang.

⁶A hun leh ni a lo thleng dâwn Ephraim Tlângah vêngtute an âu ang a, ‘Tho ula, Zion-ah i chho ang u, LALPA kan Pathian hnênah,” tiin.

⁷LALPA chuan heti hian a ti: “Jakoba tân hlim takin hla saksak ula, Hnam ropuite zîngah âu chhuak rawh u; Puang chhuak ula, châwimâwi rawh u, ‘Aw LALPA, i mite hi chhandam rawh, Israel la damchhunte hi!’ ti rawh u.

⁸Ngai teh u, hmar lam ram ata ka rawn hruai ang a, Kâwlkil aţangin ka hruai khâwm ang, An zîngah mitdel leh kebâi te, Hmeichhe nau pawm leh vei mêkte nêi, Mipui tam tak an lo kîr leh ang.

⁹Tap chungin an lo kal ang a, Ka hruai ang a, an ţawngţai ang. An tlûk lohna tûr kawng tluang tha Lui kamah te chuan ka hruai dêl dêl ang; Ephraim chu ka fatîr a ni, Israelte tân Pa ka ni si a.

¹⁰“Aw hnamte u, LALPA thû hi ngaithlâ ula, Thliarkâr hla takah te puang rawh u, ‘Israelte tidarhtu chuan a hruai khâwm leh dâwn e, Berâmpûin a ranrual a kâwi khâwm thîn ang hian.’

¹¹LALPA chuan Jakob-ho a tlan chhuak a, Anni aia chak kut ata a chhan chhuak ta si a.

¹²Tichuan, Zion tlângah zaiin an lo kal ang a, LALPA ţhatna zâr an zo sîau sîau tawh ang. Buh te, uain thar te, hriak te, Berâm rual leh ranrual vânglaite nêi, Huan tuichâwm ţhat ang nun chênin, Lungngaihna rêng an nei tawh lo vang.

¹³“Nula thianghlimte chu hlim takin an lâm sîau sîau ang a, Tlangvâlte leh tarte pawh zai khatin an luang tawh ang; An lusûnna chu hlimnain ka thlâk ang a, Ka thlamuan ang a, an lungngaih chu lâwmah ka chantîr ang.

¹⁴Puithiamte chu puar tak leh tlai takin ka châwm ang a, Ka mite chu ka ţhatnain ka titlai bawh ang, LALPAN a ti.”

EPHRAIM TÂNA KHAWNGAIHNA

¹⁵LALPA chuan heti hian a ti: “Rama khuaah thâwm an hria, Lusûna tap vawng vawng thâwm chu, Rakili chuan a fate a ţah a, A fate ngaih vângin hnem pawh a duh lo, An awm tawh si lo va.”

¹⁶LALPA chuan tihian a ti: “Tap lo tûrin insûm la, i mittui pawh sûm rawh; I hnathawhin lâwmman a hmu ang, LALPAN a ti, Hmêlma ram aţangin an lo kîr leh dâwn si a.

¹⁷Hmabâk beiseiawm tak i nei a ni, LALPAN a ti, I thlahte pawh anmahni ram ngeiah an lo kîr leh ang.

¹⁸“Ephraima chuan amah a inţah tih ka lo hria: ‘Nangin min thunun a, thununin ka awm ta, Bawngpa sâwi zawi loh ang maiin; Min din thar leh la, tichuan ka lo kîr leh dâwn nia, Nang chu LALPA ka Pathian i ni si a.

¹⁹Ka hawikîr leh hnûin ka inlamlêl tak tak a; Mi zirtîr hnûah chuan, ka mal te ka chum vak vak a; Zak tak leh mualphovin ka awm a, Ka tleirâwl lai hmingchhiatna ka phurh avângin.’

²⁰Ephraima hi ka fapa duhlai a ni em? Naupang hlim thei a ni em? A chhiatna lam ka sawi chung pawhin, Ka ngaihtuah veng veng thîn; Ka lungriah hian a châm reng a, Amah chu ka lainat takzet ang, LALPAN a ti.

²¹“Chhinchhiahnate siam ula, Inkawhmmuhna siam zêl rawh u; Kawngpui lam chu thlîr tlat rawh u, In lo kal tawhna lam kawng chu. Aw nula thianghlim Israel, kîr leh rawh, I khawpui lamah kîr leh lul rawh.

²²Eng chen nge maw i fawr bo dâwn le, Aw, nang fanu hnungtawh hmang? LALPA chuan leiah hian thil thar a siam ta a, Hmeichhiain mipa a la rîm zâwk dâwn a ni.”

JUDATE LA HAUSAK TÛRZIA

²³Sipaihote LALPA, Israelte Pathian chuan heti hian a ti: “An saltâna aţanga ka hruai kîr leh hunah chuan, Judai ram leh a khawpuih te hê ţawngkam hi an hmang leh ang: ‘Aw, dikna rûn leh thianghlimna tlângte u, LALPAN malsâwm che u rawh sel!’ tiin.

²⁴Judai ramah leh a khawpuiah te chuan lo nei mite leh ran vulhute an chêng zâ tawh ang.

²⁵Rilru hahte ka tiharh a, mi lungngaite ka chhâwk tawh si a.”

²⁶Tichuan, ka harh ta a; ka han hawi vêl a, ka mu tui hlê a lo ni a.

²⁷“Ngai teh, nî-te chu a lo thleng mêk e,” LALPAN a ti, “Israel chhûngkua leh Juda chhûngkuaah chuan mihring chi leh ramsa chi ka tuh ang.

²⁸Anmahni pawt chhuaka, thiati darha, nam thlûa, tichhiaa tihrehawm tûra ka châng reng thîn ang khân, tûnah chuan tung ding tûr leh phun nghet tûrin ka ngaihven tawh zâwk dâwn a ni, LALPAN a ti.

²⁹Chûng nî ah te chuan: ‘An paten grêp thûr an ei a, An fate hâ a tim e,’ an ti tawh lo vang.

³⁰Mi tinin mahni khawlohna an thihpui zâwk ang a; grêp thûr eitu hâ ngei chu a tim ang.

THUTHLUNG THAR

³¹“Ngai teh u, nî-te chu a lo thleng mêk e, LALPAN a ti, chutih hunah chuan Israela chhûngte leh Juda chhûngte hnênah thuthlung thar ka siam ang.

³²Aigupta ram aţanga an thlahtute ka kut ngeia ka hruai chhuah laia an hnêna ka thuthlun ang kha ni lovin, an pasal ni mah ila, ka thuthlung chu an bawhchhe ta si a, LALPAN a ti.

³³Chûng ni hnêna Israel chhûngte hnêna thû ka thlun tûr chu hei hi a ni,” LALPAN a ti: “An rilrûah ka dân ka dah ang a, an thînlungah ka ziaak bawh ang; an Pathian ka ni ang a, anni pawh ka mîte an ni ang.

³⁴Mahni thenawmte leh mahni unaute hnênah, ‘LALPA hre rawh,’ tiin tûmah an inzirtîr tawh lo vang; mi tê ber aţanga mi lian ber thlengin min hre vek tawh dâwn si a,” LALPAN a ti. An bawhchhiatna chu ka ngaidam ang a, an sualna pawh ka hre reng tawh dâwn si lo va.”

³⁵LALPA chuan heti hian a ti, “Chhûn tiêng tûra nî petu, Zân tiêng tûra thlâ leh arsîte tâna dân petu, Tuifinriat chawktô tûra Tui tifâwn hum humtu, (A hming chu Sipaihote LALPA a ni):

³⁶“Chûng dânte chu ka hnên ata a bo chauhvîn Israel chi pawh hnam nihna ata a bo kumkhua ve chauh vang,” LALPAN a ti.

³⁷LALPA chuan heti hian a ti: “Vân khi teh chhuah theih a niha, Hnuai lama leilung nghahchhante hi zawn chhuah theih a nih ngai chuan, Israel chi hi an thil lo tih tawhte avângin ka paih bo ve chauh ang,” LALPAN a ti.

³⁸“Ngai teh u, nî-te chu a lo thleng mêk e, Hananela Kulhbîng sâng aţanga Kulh kil kawngka bul thlengin khawpui chu LALPA tân din thar a ni ang, LALPAN a ti.

³⁹Endikna rîn chu Gareb tlâng thlengin ngîl takin a kal ang a; chuta ţangin Goath lamah a kawî ang.

⁴⁰Mitthi ruang leh bawhlhlawh paihna ruam leh a vêl ram zawng zawng, Kidron luikawr thlengin, chhak lampanga Sakawr Kawngka kil thleng rawkin LALPA tân serh hran tûr a ni. Chû chu eng tikah mah thihaa paih dah a ni tawh lo vang.”

BUNG 32

JEREMIAN RAM A LEI

¹Juda lal Zedekia lal kum 10-na, Nebukadnezzara lal kum 18-naa Jeremiah hnêna LALPA thu lo thleng chu.

²Chutih lai chuan Babulon lal sipai rualten Jerusalem an hual a; zâwlnei Jeremiah chu Juda lal ina tân in hung chhûngah khârkhip a ni.

³Juda lal Zedekian tân ina a khung laiin a hnênah, “Engah nge hetiang thû te i puan lâwk le, ‘LALPA chuan heti hian a ti: “Ngai teh u, hê khawpui hi Babulon lal kutah ka pê ang a, a la ang;

⁴Juda lal Zedekia chu Kaldai mite kut ata a tâl chhuak lo vang a, Babulon lal kuta mantîr a ni ngei dâwn a, amah nên inhmachhawnin an inbia ang a, a mit ngeiin a la hmu dâwn a ni;

⁵Zedekia chu Babulonah a hruai ang a, amah ka tlawh hmâ chu chutah chuan a awm reng ang; Kaldaiho chu bei mah ula, in hneh chuang lo vang,” LALPAN a ti, ‘tia i sawi ni?’ a ti a ni.

⁶Jeremiah chuan, “LALPA thû ka hnênah a lo thleng a,

⁷Ngai teh, i pami Saluma fapa Hanamela i hnênah a lo kal dâwn a, “Anathoth khuah ka lo hi mi leisak ta che; a lei thei tûr leh ro khâwmtu tûr ber i ni bawh a,” arawn ti dâwn a nia,’ a ti a.

⁸LALPA thû ang chuan, ka pami fapa Hanamela chu vêngtu hung chhûnga ka awmnaah a lo kal a, ‘Benjamin ram chhûnga Anathoth khuah ka lo chu lei ta che; rokhwâm thei i ni a, i tlan tûr a ni bawh a; i tân lei ta mai che,’ arawn ti ta a. LALPA thû ngei a ni tih ka hre thiam mai a.

⁹Tichuan, Anathoth khuah ka pami fapa Hanamela lo chu ka lei a, a man atân tangkarua sekel 17 ka bûk chhuahsak ta a.

¹⁰Tangka chu a bûknain ka bûk a, hriatpuitute ka ko va, ram leina lehkhâah chuan hming ziaakin ka châr hnan a.

¹¹Tichuan, ram leina lehkhâ, dân ang thlapa châr leh châr loh chu ka la vê vê a;

¹²ka pami fapa Hanamela mithmuhah leh, ram leinaa hming ziaaka hriatpuitute leh tân in tuala Juda mi lo ţu ve zawng zawngte hmuh laiin Mahseia fapa, Neria fapa Baruka hnênah ka hlân a.

¹³“Anniho hmâah chuan Baruka chu thû ka pê a,

¹⁴Sipaihote LALPA, Israelte Pathian chuan heti hian a ti: “Hêng ram leina lehkhâ, lehkhâ châr leh lehkhâ châr lohte hi lâ la, rei tak daih tûrin hlum bêlah dah rawh,” a ti a.

¹⁵Tichuan, Sipaihote LALPA, Israelte Pathian chuan heti hian a ti: “Hê ramah hian in te, lo te, grêp huante an la nei leh dâwn a ni,” tiin.

HRIAT THIAMNA DÎLIN JEREMIA A TAWNGTÂI

¹⁶“Neria fapa Baruka hnêna ram leina lehkhâ ka hlân zawh chuan, LALPA hnênah ka tawngtai a:

¹⁷Aw Lalpa PATHIAN! Lo ngaithla teh, lei leh vân hi i thiltihtheihna ropui leh kutphar meuhva i siam a ni a. I tân thiltih harsa lutuk engmah a awm lo ve.

¹⁸Nang chu mi sâng tam tak chungah khawngaihna lantîrtu, pate sualna pawh an fate thlenga thungrûltu Pathian Chak leh

Ropui chu, a hming chu Sipaihote LALPA a ni.

¹⁹Nang chu remruattu ropui leh hnathawk chak, mihring fate awm dân leh an thiltih rah ang zêla ruh tûra hmu rengtu i ni a.

²⁰Aigupta ramah khân thilmak leh chhinchhiahnate i ti a, vawiin thleng hian Israel ramah leh mi dang zîngah i la ti zêl a; tûn thlengin i hming i chher ta a ni.

²¹I mi Israelte chu thilmakte leh chhinchhiahnate, kut chak tak leh bân pharin, rîkrâpna nasa tak nêh, Aigupta ram ata i hruai chhuak a;

²²an thlahtute hnêna i lo tiam tawh angin, hê “khawizû leh hnute tuia luang ram” hi an hnênah i lo pe tawh a.

²³Anni chu an lo lût a, an luah ta a; nimahsela, i thû an âwih lo va, i dân an zâwm hek lo. Ti tûra thû i pêk rêng rêng an ti duh lo va; chuvângin, hêng chhiatna zawng zawng hi an chungah i thlen ta a ni.

²⁴En la, khawpui lâk nân lei an chhûnpâwn tawh saw! Khawpui la tûrin an lo thleng tawh a; khandaih te, tîm te leh hrîpui te avângin khawpui hi Kaldaiho kutah pêk a ni ta. I sawi tâk te kha a lo thleng ta; sâw le, i hmuh tâk saw!

²⁵Aw Lalpa PATHIAN, nang chuan ka hnênah, “Lo chu lei la, thuhretute ko rawh!” i ti a, khawpui erawh chu Kaldaiho kutah pêk a ni baw si a, a ti a.”

PATHIANIN MIPUITTE HRUAI KÎR LEH A TIAM

²⁶LALPA thû chu Jeremia hnênah a lo thleng a,

²⁷“Ngai teh, kei hi LALPA, tîsa pu zawng zawng Pathian ka nih hi. Ka tân harsa lutuk a awm em ni?

²⁸Chuvângin LALPA chuan heti hian a ti: ‘Ngai teh, hê khawpui hi Kaldaiho kutah, Babulon lal Nebukadnezzara kutah ka pê ang a, ani chuan a la dâwn a ni.

²⁹Hê khawpui rûntu Kaldaiho chu an lo kal ang a, khawpui hi an hâl ang a, mi tithinur tûra Baala hnêna rimtui an hlanna leh, pathian dangte hnêna in tûr thilhlân an bun chhuahna inchungte chu a kâng vek ang;

³⁰Israel fate leh Juda thlahte hian an tleirâwl lai aţang rêngin ka hmâah thil sual ringawt an ti mai a. An kuta an thawh chhuah ngeiîn a ni Israel fate hian min tihthinur thîn ni,’ LALPAN a ti.

³¹Hê khawpui hi an din tîrh aţanga tûn thleng hian ka thîn tirim tûr leh mi tithinurtu a ni chho reng mai a; ka hma ata hi ka sawn bo daih dâwn a ni,

³²Israel fate leh Juda thlahte thil sual tih rêng rêng hi, kei mi tihthinurna tûra an tih vek a ni—anmahni bâkah an lal te, an milian te, an puithiam te, an zâwlnei te, Juda mite leh Jerusalem chêngte thlengin.

³³ka lam lo hawî duh lovin, an tukkhum chhah min chhawn tlat a. Zirtirna pe fo thîn mah ila, engti zâwn mahin an bengkhawn duh si lo.

³⁴Ka hming chuanna in tibawhlawh tûrin an thil tenawmte an hûng lût a.

³⁵Moleka hnêna an fanute leh an fapate meia kal tlangtîrna tûrin, Hinnoma Fate Ruamah Baala biakna tûr hmun sângte an din a; chutianga Judate hruai sual tûrin eng thû mah ka pe lo va,

hetiang thil tenawm tihîr hi ka rilrûah pawh a lang ngai baw hek lo.’

³⁶“Tûnah hian LALPA, Israelte Pathian chuan, ‘Khandaih te, tîm te, hripui tein Babulon lal kutah pêk a ni tawh,’ in tih thîn hê khawpui chungchâng thû chu heti hian a ti a ni:

³⁷Ngai teh u, ka thinrim leh ka thinur êm avânga ka thîn thawkin ka hnawh bona ram tin ata ka hruai khâwm leh ang a; hê hmunah ngei hian ka hruai kîr leh ang a, thlamuang takin ka awmtîr tawh ang.

³⁸Ka mite an ni ang a, kei pawh an Pathian ka ni ang;

³⁹Anmahni leh an fate hamţhatna tûrin, thinlung hmun khat leh nun dân kawng khat ka siamsak ang a; chû chu kumkhuaa kei mi tîh hlen theihna tûr a ni.

⁴⁰Anmahni nêh kumkhua atân thû ka thlunpui ang a, an ţhatna tûra tih hi ka bânsan ngai lo vang; anni zâwkin min hransan loh nân, kei min tîh nachâng hriatna thinlung ka puttîr ang.

⁴¹Ni e, anni thil ţa tihsak hi ka lâwm zâwn a ni zêl ang, ka rilru leh ka thinlung zawng zawng hian hê rama phun ngheh tlat hi a tum a ni.’

⁴²“LALPA chuan tihian a ti: ‘Hê mite chungah thil ţa lo nasa tak ka thlen ang baw khân, an tâna thil ţa ka tiamsak zawng zawngte khân ka vûr lêt ve thung dâwn a ni.

⁴³“Mihring leh sâ pawh awm lohna ram ruak; Kaldai-ho kuta pêk tawh,” in tih, hê ramah hian lote in lei leh dâwn a ni.

⁴⁴Mite chuan ramte chu tangkain an lei ang a, an zîak fel baw ang; hriatpuitute kovin an châr tlat ang, hêng Benjamin ramah te, Jerusalem khawpui vêlah te, tîang ram khawpuiah te, phai ram khawpuiah leh chhim lam khawpuiahte hian; saltânghote chu ka hruai kîr leh dâwn si a,’ LALPAN a ti.”

BUNG 33

HNAM TUNDIN LEH TÛR THATZIA

¹Tân in chhûnga a tân laiin Jeremia hnênah LALPA thu a lo thleng nawn leh a,

²“Siamtu LALPA, a din ngheh tûr siamtu LALPA chuan heti hian a ti (a hming chu LALPA a ni):

³“Mi âu la, ka chhâng ang che, tichuan, i la hriat phâk loh thil ropui leh inthupte chu ka entîr ang che.’

⁴“LALPA, Israelte Pathian chuan an lei chhûn pâwn leh khandaih lo do lêt nâna hê khawpui chhûnga ţanhmun sawhnghehna tûr in te, Juda lal inte an thîah tâk chungchângah heti hian a ti:

⁵Kaldai-ho bei tûrin lo thawk chhuak ve sateh mahse, an ruangin a hnawh khahna tûr hmun mai mai a ni ang, min tihthinura, min tihthinrim êm avânga ka thah tûrte an ni si a, an suahsualna zawng zawng avângin hê khawpui hi ka hmêl ka thupsan tawh a ni.

⁶Ngai teh, hrisêlna leh damna ka rawn thlen dâwn a ni; ka tidam ang a, thutak leh thlamuanna nasa tak ka hriattîr ang.

⁷Juda saltângte leh Israel saltângte chu ka hruai kîr leh ang a, chûng hmunte chu a tîra mi angin ka dîn thar leh ang.

⁸Ka lakah thil sual an tiha an khawlohma zawng zawng chu ka sil faisak ang a; ka laka an bawhchhiatna te, an sualnat leh an khawlohma zawng zawng chu ka ngaidam vek ang.

⁹An tâna thil tha ka tihsak hretu leia hnam tinte hmâah chuan hlimna te, fakna te leh châwimâwina te ka hlawn ve tawh ang; an chungah thatna leh hausakna tinrêng ka thlensak tâk te avângin hlauvin an khûr ang.’

¹⁰“LALPA chuan heti hian a ti: “Mihring leh sâ pawh awm lohna ram ruak” tia in sawi thîn Judai ram khawpui te, Jerusalem khaw ram, mihring awm lohna leh chên lohna, ramsâ pawh awm lohna,’ in tihna hmunah chuan hetiang hi a lo awm leh ang.

¹¹Hlim thâwm leh lâwmna âu rî te, moneitu leh mo au thâwm rî te leh: “Sipaihote LALPA chu fakin awm rawh se, LALPA chu a tha si a, A ngilneihnain kumkhua a daih dâwn si a,” titute âu thâwm te, LALPA ina fakna inthâwina rawn kengtute thâwm rîva te chu hriat a ni leh ang. Saltângte chu ka hruai kîr leh ang a, tûn hmâa an awm ang khân an awm leh ang,’ LALPAN a ti.

¹²“Sipaihote LALPA chuan heti hian a ti: ‘Hê hmun ram chhe ta, mihring leh sâ pawh awm lohna leh, khawpui zawng zawngah te chuan berâmpute tâna chênna tûr te, an berâmte tân chawlhna tûr hmun a awm leh ang.

¹³Tlângram khawpuiah te, phai ram khawpuiah te, chhim lam khawpuiah te, Benjamina ramah te, Jerusalem chhehvêl hmunah te, Juda khawpuiah te chuan, berâmte chu a zât chhiartute enkawl na hnuaiah an tla zâ dial dial dâwn a ni,’ LALPAN a ti.

¹⁴‘Ngai teh u, nîte chu a lo thleng mêk e, Israel chhûngte leh Juda chhûngte tâna thil tha ka lo tiam tawh chu ka hlen ngei ang, LALPAN a ti:

¹⁵‘Chûng nîte leh chûng hun lai chuan Davida tân Chawr No ka chhuahsak ang a; Ani chuan leiah hian dikna leh felnain ro a rêl ang.

¹⁶‘Chûng nîachte chuan Judate chu chhanhim an ni ang a, Jerusalem pawh him takin a awm tawh ang. Hei hi a hming put tûr chu a ni: LALPA CHU KAN DIKNA’ tih hi.

¹⁷“LALPA chuan tihian a ti: ‘Davida chuan Israel chhûngkaw lalthutthlênga thu tûr a tlachham ngai lo vang a;

¹⁸Puithiam Levia chîte pawhin ka hmâa hâlral inthâwi tûr te, buhbâl thil hlân tûr leh, inthâwina hlân zêltu tûr an tlachham ngai hek lo vang,’ tiin.

PATHIAN THUTHLUNG NGHEHZIA

¹⁹LALPA thû chu Jeremia hnênah a lo thleng a,

²⁰“LALPA chuan heti hian a ti: ‘Chhûn leh zân hi a hunbîa awm tawh lo tûr te, chhûn hnêna ka thuthlung leh zân hnêna ka thuthlung te hi i thiat thei a nih ngai chuan,

²¹ka chhiahhlawn Davidan a lalthutthlênga thu tûr te, Levia chîte, puithiamte, ka rawngbâwtute rawngbâwl zêl tûra ka thuthlung chu thiah a ni ve chauh ang.

²²Vâna arsîte khi chhiar sên rual loh, tuipui kama tiauvut te pawh chhiar sên rual loh an ni ang hian, ka chhiahhlawn Davida

thlahte leh ka rawngbâwtu Levia chîte pawh ka tipung deuh deuh ang,’ tiin.

²³Jeremia hnênah chuan LALPA thû chu a lo thleng a,

²⁴“Hêng miten, ‘LALPAN a thlan tawh chhûngkaw hnihte chu a hnâwl bo leh tawh,’ tia an sawi thîn hi i ngaihtuah ngai lo vem ni? An mithmuhah hnama chhiar tham lohva an awm theihna tûrin ka mîte an hmusit a.

²⁵“LALPA chuan heti hian a ti: ‘Chhûn leh zân hi ka remruat anga awm a nih lohva, lei leh vân awm dânte hi ka ruat anga awm a nih loh ngai chuan,

²⁶Jakoba thlahte leh ka chhiahhlawn Davida chu ka hnâwl bo daih ang a, an fate chu Abrahamah thlahte, Isaaka thlahte, Jakoba thlahte chungah rorêltu atân pawh ka thlang hek lo vang. An saltângte chu ka hruai kîr leh ang a, an chungah zah ka ngai dâwn si a.’

BUNG 34

PATHIANIN ZEDEKIA A ZILH

¹Babulon lal Nebukadnezzaran a sipaiho zawng zawngte, a thuhnuaia awm leia lalram zawng zawngte leh mipui zawng zawngten Jerusalem leh a khawpui zawng zawng an beih lai khân, Jeremia hnênah LALPA thû a lo thleng a,

²“LALPA, Israelte Pathian chuan heti hian a ti: ‘Juda lal Zedekia hnênah va kal la, hê thû hi va hrilh rawh, “LALPA chuan heti hian a ti: ‘Ngai teh, hê khawpui hi Babulon lal hnênah hian ka pê ang a, ani chuan a hâl ang.

³A kut ata chu i tâl chhuak hauh lo vang; a man ang che a, a kutah hlan i ni ang; i mit ngeiin Babulon lal hmêl chu i la hmu ang a, hmâichhanah a bia ang che a, nang chu Babulonah i kal ngei bawh ang.’

⁴Mahse âw Juda lal Zedekia! LALPA thû hi lo ngaithla teh. I chungthû chu LALPAN heti hian a ti: ‘Khandaih chuan i thi lo vang.

⁵Thlamuang takin a ni i thih dâwn ni; i hmâa lalte, i thlahtute angin rimtui an hâlsak ang che a, “Awi karei, lalpa!” tiin, dichim takin an tah ang che. Thû chu ka puang chhuak ta e,’ LALPAN a ti.

⁶Zâwlnei Jeremia chuan chûng thû zawng zawng chu Jerusalema awm Juda lal Zedekia hnênah a hrilh a,

⁷chû chu Babulon sipaiten Jerusalem leh Judai ram khawpui la awmchhun, Lakish leh Azeka khua an beih lai kha a ni a; Judai rama khawpuite zîngah hêng kulh nei khuate chauh hi a awmchhunte an ni tawh a.

SAL-HO ENKAWL DÂN TENAWM

⁸Lal Zedekian Jerusalem mipui zawng zawngte nênzalênna thuthlung an puan hnua Jeremia hnêna LALPA thu lo thleng chu:

⁹mi tinin an bâwihnû leh an bâwihpâ Hebrai mipa leh Hebrai hmeichhia an nih chuan an chhuah zalên tûr a ni a, tûma’n a Juda-pui chu salah a nei tûr a ni lo.

¹⁰Tichuan, thuthlung pawmtu milianho zawng zawng leh mipui zawng zawng chuan, an bâwihnû leh bâwihpâte an chhuah zalên ang a, tûma’n bâwihah an awmtîr tawh tûr a ni lo, tih thû an

lo hriat chuan an zâwm a, an chhuahtîr ta hlawm a.

¹¹Mahse, a hnû lawkah chuan an rilru an thlâk leh a, an chhuah zalen tawh an bâwihpâ leh bâwihpâ te chu an kîrtîr leh a, a hmei a pain bâwihah baw an siam leh ta a.

¹²Tichuan, LALPA hnên aţangin LALPA thu chu Jeremia hnênah a lo thleng a,

¹³“LALPA, Israelte Pathian chuan heti hian a ti: ‘Bawiha in tâna Aigupta ram aţanga in thlahtute ka hruai chhuah lai khân, an hnênah hetiang hian thû ka thlung a,

¹⁴“Kum sarih a ral vele, mi tinin an hnêna hralh tawh, an Hebrai pui te chu an chhuah zalên zêl tûr a ni; kum ruk chhûng hna an lo thawhsak tawh che u chuan, in hnên ata zalên takin in chhuahtîr tûr a ni,” tih hi a ni. Mahse, in thlahtute khân ka thû an âwih lo va, min bengkhawn hek lo.

¹⁵Tûn hnai lawk khân inlamlêtin, ka mithmuhah thil dik tak in ti a, mi tinin mahni chipuite tân zalênna in puan tâk kha; Keima hming chuanna inah ngei ka hmâah thû in thlung baw a.

¹⁶Mahse, ka hming tichhiain in inlamlêl leh a, in bâwihpâ leh bâwihpâ te chu in chhuah zalên zet a, an lâwm tawh vei nê, in hruai kîr leh a, in thuhnuaiah in bâwihpâ leh bâwihpâ atân baw in hnûk lût leh a.’

¹⁷“Chuvângin LALPA chuan heti hian a ti: ‘Ka thû zâwm duh lovin, mahni unau leh thenawmte hnênah pawh zalênna in puang duh lo vei a. Ngai teh u, khandaih te, tâm te leh hripui te tân zalênna ka puang ve ta!’ LALPAN a ti. Lei chung a ram tinah mangang rêng rênga awm tûrin ka pêk dâwn che u hi.

¹⁸Ka thuthlung bawhchhia a, bâwng no tanbun kâra kal tlang meuhva ka hmâa thuthlung an siam pawh zâwm duh lo

¹⁹Juda hotute, Jerusalema hruaitute, mitilreh te, puithiamte leh bâwng no kâra kal tlang mipui zawng zawngte chu

²⁰an hmêlmâte kutah leh anmahni thah tumtute kutah ngei ka pê ang. An ruangte chu chunglêng savâte leh leia ramsâte châw tûr a ni mai.

²¹Juda lal Zedekia leh a miliante chu an hmêlmâte kutah leh, anmahni thah tumtute kutah leh, Babulon lal sipai rual, nangmahni tînsantute kutah ka pê ang.

²²Ngai teh u, hê khawpuia lo kîr leh tûr hian thû ka pe dâwn a ni. Anrawn beî vak ang a, an lâ ang a, an hâl baw ang; Juda khuate pawh luahtu awm lo khawpin ka tiram vek dâwn a ni,” LALPAN a ti.

BUNG 35

MI THUÂWIIH REKAB-HOTE

¹Juda lal Josia fapa Jehoiakima lal laia LALPA thû Jeremia hnêna lo thleng chu,

²“Rekaba chhûngte hnênah va kal la, va bia la, LALPA ina pindan pakhatat hruai lût la, an in tûrin uain pê ang che,” a ti a.

³Tichuan, Habazinia fapa, Jeremia fapa Jaazania te, a unaute leh a fapa zawng zawngte leh, Rekaba chhûngkuate chu an vaiin ka hruai a,

⁴LALPA inah hruaiin, Pathian mi Igdalia fapa Hanana fate pindanah ka luhpui a, chû chu hotute pindan kiang lawk, kawngkhâr vêngtu Saluma fapa Maaseia pindan chung awm a ni.

⁵Rekaba chhûngkaw-ho hmâah chuan uain a khat chawhtawlh leh note chu ka chhawp a; an hnênah, ‘Uain hi in rawh u le,’ ka ti a.

⁶Mahse anni chuan, “Uain chu kan in lo vang, kan thlahtu Rekaba fapa Jonadaban thû min pê a, ‘Nangni leh in fate chuan kumkhuain uain in in tûr a ni lo.

⁷In pawh in sa tûr a ni lo, thlai in chîng tûr a ni lo va, grêp huan in siam tûr a ni hek lo, hêng thilte hi in nei ve tûr a ni lo; in mikhualna ramah hian in dam rei zâwk theih nân, in dam chhûng chu puan inah te in chêng zâwk tûr a ni,’ a lo ti si a.

⁸Chutiang chuan, kan thlahtu Rekaba fapa Jonadaba thu min pêk zawng zawng, kan dam chhûnga keimahni leh kan nupuite, kan fapate leh kan fanute chu uain in hauh lo tûr leh,

⁹kan awmna in pawh sa lo tûrin min ti a ni; chuvângin grêp huan te, lo te, thlai chî te chenin engmah kan nei ta lo a ni.

¹⁰Tichuan, puan inah te chêngin, kan thlahtu Jonadaban thû min pêk zawng zawng chu âwihin kan zâwm ta a ni.

¹¹Mahse, Nebukadnezzaran hê ram arawn rûn tâkah khân keini chuan, ‘Tî rawh u, Kaldai sipai rualte leh Suria sipai rualte hi an hlauhawm si a, Jerusalema i kal teh mai ang u,’ kan ti a. Tichuan, Jerusalema hian kan awm ve ta mai a ni,” an ti a.

¹²LALPA thû chu Jeremia hnênah a lo thleng leh a,

¹³“Sipaihote LALPA, Israelte Pathian chuan heti hian a ti: ‘Judai ram mite leh Jerusalema chêngte hnênah va sawi la, “Ka zirtîrna thûte hi in ngaithla duh lo vang maw?” LALPAN a ti e.

¹⁴“Rekaba fapa Jonadaba chuan a fapate hnênah uain in lo tûra thû a pêk chu an zâwm a; tûn thlengin an in lo va, an thlahtu thupêk chu an zâwm t̃ha hlê mai. Kei erawh chuan in hnênah vaw duai lo thû ka sawi t̃hin chung pawhin, ka thû rêng rêng in âwih duh si lo va.

¹⁵Ka rawngbâwltu zâwlnei karawn tîrh zawng zawngte khân, ‘Mi tinin in nun dân sualte kalsan vek ula, insiam t̃ha ula, pathian dangte rawng bâwl suh u; tichuan, nangni leh in thlahtute ka pêk ramah hian in chêng reng dâwn nia,’ tiin anrawn sawi t̃hin a. Mahse in bengkhawn duh lo va, ka thû pawh in âwih duh hek lo.

¹⁶Rekaba fapa Jonadaba thlahte chuan an zâwm tûr thû, an thlahtu lo pêk chu t̃ha takin an zâwm a; mahse hêng mite erawh hi chuan ka thû rêng an âwih duh si lo va.”

¹⁷Chuvângin, LALPA Sipaihote Pathian, Israelte Pathian chuan heti hian a ti: ‘Ngai teh u, Judai ram leh Jerusalema chêng zawng zawng chung a chhiatna lo thleng tûr ka sawi tawhte kha ka thlentîr ngei ang; anmahni ka hrilh ka hrilh chung pawhin an ngaithla duh lo va, ka koh lahin an êih duh hek lo,” tiin.

¹⁸Jeremia chuan Rekaba chhûngte hnênah, “Sipaihote LALPA, Israelte Pathian chuan heti hian a ti: ‘In thlahtu Jonadaba thupêk âwihin, a zirtîrna leh a thupêk zawng zawng in zawm tlat avângin,

¹⁹Sipaihote LALPA chuan heti hian a ti, “Rekaba fapa Jonadaba chuan kumkhuain ka hmâa ding tûr mi a tlachham ngai lo vang,” a ti a.

BUNG 36

TEMPUL-AH LEHKHABU ZIAL AN CHHIAR

¹Juda lal Josia fapa Jehoiakima lal kum linaah chuan, LALPA thú chu Jeremia hnênah a lo thleng a:

²“Lehkhabu zial lâ la, chutah chuan Israel chungchâng te, Juda chungchâng te, hnam tinte chungchâng ka hrilh zawng zawng che kha, i hnêna ka sawi ni ațang leh Josia lal lai ațanga tûn hun thleng hian ziaak rawh.

³Juda chhûngten an chung a chhiatna thlentîr ka tum dân zawng zawng an lo hriata, mi tinin an awm dân sualte an sim phah hlah chuan, an sualdate leh an khawlohnate chu ka ngaidam dân nia,” a ti a.

⁴Tichuan, Jeremia chuan Neria fapa Baruka chu a ko va; LALPAN a hnêna thú a sawi zawng zawng, Jeremian ziaak tûra a hrilh ang zêlin, Baruka chuan lehkhabu zialah chuan a ziaak ta a.

⁵Jeremia chuan Baruka hnênah, “Min khuahkhîr tlat avângin LALPA inah ka kal thei si lo va.

⁶Nang, va kal ta la, chawnghei nia LALPA ina lo awm mite hriatah, ka hrilh che anga LALPA thú, lehkhâ ziala ka ziahtîr che hi va chhiar chhuak ang che. Anmahni khuâ ațanga lo kal Juda mi zawng zawngte hriatah pawh chhiar ang che.

⁷Mi tinin an awm dân sualte simin, LALPA hmâah ngaihdam an dîl phah mial mahna. Hêng mite chung a LALPAN thinrimna leh thinurna a puan tawh chu a râpthlâk hlê si a,” a ti a.

⁸Tichuan, Neria fapa Baruka chuan a hnêna zâwlnei Jeremia thupêk zawng zawng chu a ti a, LALPA inah chuan lehkhâbua mi LALPA thú chu a va chhiar chhuak ta a.

⁹Juda lal Josia fapa, Jehoiakima lal kum ngâna, thla kuanaah chuan Jerusalema mi zawng zawng leh Judai ram khawpui ațanga Jerusalema lo kal zawng zawngte chuan, LALPA hmâa chaw nghei tûr thupêk an puang a.

¹⁰LALPA in luhna Kawngka Thar bula awm, tualzâwl chung zâwka ziaaktu Saphana fapa Gemaria pindan, LALPA inah chuan, Baruka chuan lehkhâbua Jeremia thusawite chu, mi zawng zawng hriatah a chhiar ta a.

LAL INAH PAWH AN CHHIAR

¹¹Saphana fapa, Gemaria fapa Mikaian chû lehkhabu ațanga LALPA thú zawng zawng a lo hriat chuan,

¹²lal inah a chhuk a, ziaaktu pindana a lût a; chutah chuan puipa zawng zawng an lo thú a, ziaaktu Elisama te, Semaia fapa Delaia te, Akbora fapa Elnathana te, Saphana fapa Gemaria te, Zedekia fapa Hanania leh puipaho zawng zawngte an ni a.

¹³Barukan mipui hriata lehkhabu a chhiara, a thu hriat zawng zawng chu Mikaia chuan anniho chu a hrilh vek a.

¹⁴Tichuan, puipaho zawng zawng chuan Kusia fapa, Selemia fapa, Nethania fapa Jehudia chu Baruka hnênah an tîr a, “Mipui hmâa i chhiar tâk lehkhâ zial keng khân lo kal teh khai,” a va ti a. Chutichuan, Neria fapa Baruka chuan lehkhâ zial chu kengin an hnênah chuan a va kal a.

¹⁵Anni chuan, “Tikhân thú la, kan hriatah han chhiar teh le,” an ti a. Tichuan, Baruka chuan an hriat tûrin a chhiar ta a.

¹⁶Chûng thú zawng zawng an han hriat chuan, anni chu hlauthâwng takin an inen hlawm a, Baruka hnênah chuan, “Hêng thúte hi lal kan hrilh ngei a ngai ang le,” an ti a.

¹⁷Baruka hnênah chuan, “Engtin nge hêng thúte hi ziaak tûra a tih che a, nanging i lo ziaak dân chu min hrilh teh khai?” an ti a.

¹⁸Baruka chuan, “Hêng thú zawng zawng hi tawngkâin a puang chhuak a, keiin lehkhâ tuiin a bû-ah ka ziaak ta a ni,” a ti a.

¹⁹Tichuan, puipaho chuan Baruka hnênah, “Tikhân kal ta la, Jeremia nên va biru rawh u; tûma’n in awmna hre suh se,” an ti a.

LALIN JEREMIA LEHKHA ZIAL A TICHHIA

²⁰Hung chhûngah chuan an lût a, lal hnênah chuan an va kal a; lehkhabu zial erawh chu ziaaktu Elisama pindana an dah ța a, lal hnênah chuan an thu hriat zawng zawng chu an hrilh vek a.

²¹Lal chuan chû lehkhabu zial la tûr chuan Jehudia a tîr a, ani chuan ziaaktu Elisama pindana mi chu a va lâ a. Jehudia chuan lal hriatah leh lal bula ding puipaho zawng zawngte hriatah a chhiar ta a.

²²Thla kuana a ni a, lal chu a thlasik inah a awm a, a hmâa thuka mei chu a alh hluah hluah a.

²³Jehudian lehkhabu zial thlûr thum thlûr lî vêl a chhiar hnû chuan, lal chuan ziaaktu chemte chuan a zai bung hmawh hmawh a, meiah a paih lût a, thukah chuan lehkhabu zial chu a hâl ral ta a.

²⁴Lal leh a khâwnbâwlho chuan chûng thú zawng zawng chu hre mahse, hlah nachâng pawh an hre lo va, an puan pawh an pawt thlêr hek lo.

²⁵Elnathana te, Delaia te, Gemaria te chuan lehkhabu zial hâl lo tûrin lal chu an ngên a; mahse a ngaitthla duh lo va.

²⁶Lal chuan lal fapa Jerameela te, Asriela fapa Seraia te, Abdeela fapa Selemia te chu ziaaktu Baruka leh zâwlnei Jeremia te man tûrin a tîr a, mahse LALPAN a thukrû a.

JEREMIAN A ZIAK ȚHA LEH

²⁷Jeremia tirha Barukan a ziahna lehkhabu zial lalin a hâlral hnû chuan, LALPA thú chu Jeremia hnênah a lo thleng a:

²⁸“Lehkhabu zial dang la leh la, Juda lal Jehoiakiman a hâlral tâk, bu hmasâa thu chuang zawng zawng kha ziaak leh vek ang che.

²⁹Juda lal Jehoiakima hnênah hrilh rawh, ‘LALPAN heti hian a ti: “Khâ lehkhabu zial kha i hâl vei a, ‘Babulon lal a lo kal dân a, hê ram hi a tichhia ang a, heta mihringte leh rante hi a nuai bo vek ang,’ tih thú engvangin nge i ziah?” te i ti a.

³⁰Chuvângin, LALPA chuan Juda lal Jehoiakima chungthû chu heti hian a ti e: “Davida thutthlênga thú tûr mi tûmah a nei lo vang a, a ruang pawh chhûn ni sâ leh zân vîr hnuaiah paih chhuah a ni ang.

³¹An khawloh êm avângin amah leh a chhûngte leh a rawngbâwtute ka hrem ang; anmahni bâkah, Jerusalema chêngte leh Juda mite chung a chhiatna lo thleng tûr ka puan tawh pawh kha ka thlentîr ang; min pawisa duh lo vei a,” tiin.

³²Jeremia chuan lehkhabu zial dang a lâ a, ziaaktu Baruka, Neria fapa hnênah a pê a; ani chuan Jehoiakiman a hâl ral tâk lehkhâbua Jeremia thusawi a ziah tawh sâ zawng zawnga thúte

kha a ziak leh a. Chubâkah chuan, a anpui thu dangte pawh a belh teh va.

BUNG 37

ZEDEKIA BEISEINA LO-THLÂWN

¹Babulon lal Nebukadnezzeran Judai ram lal atâna a siam, Josia fapa lal Zedekia chu Jehoiakima fapa Koniah aia lo lal ta a.

²Nimahsela, amah leh a puipate leh a ram mipui tûmahin zâwlnei Jeremia hmanga LALPA thu puante chu an ngaisak duh chuang lo.

³Lal Zedekia chuan Selemia fapa Jehukala leh, Maaseia fapa Zephania, puithiam te chu zâwlnei Jeremia hnênah, “LALPA kan Pathian hnênah min tawngtaisak rawh,” ti tûrin a tîr a.

⁴Jeremia chu tân inah an la khung lo bawh a, vântlâng zîngah duh duhin a la lêng vâk thei a.

⁵Pharoa sipaite chu Aigupta atângin an lo thawh chho va; chu thû chu Jerusalem hual mêktu Kaldai-hoten an lo hriat chuan, Jerusalem chu an tînsan a.

⁶LALPA thû chu zâwlnei Jeremia hnênah a lo thleng a,

⁷“LALPA, Israelte Pathian chuan heti hian a ti, ‘Juda lal, kei mi râwn tûra mi rawn tîrtu hnênah: “Ngai rawh, Pharoa sipai rual, nangmahni tanpui tûra lo kalte chu an ram Aiguptaah an kîr leh ang.”

⁸Kaldai hote erawh chu an lo lêt leh ang a, hê khawpui hi an rawn bei ang a, an lâ ang a, an hâl chhe vek ang.”

⁹LALPA chuan heti hian a ti: “Kaldai hote chuan min tînsan daih dâwn e,” tiin, nangmahni lo inbum suh u, an kiansan lo vang che u.

¹⁰Nangmahni dotu Kaldai sipai rualho hi an vaiin hneh vek mah ula, an zîngah hlîam tuarte chauh pawh la bâng mahse, an puan in atângin an lo tho chhuak leh vek ang a, khawpui hi an hâl chhe tho tho dâwn,” tiin.

JEREMIA AN TÂNTÎR

¹¹Pharoa sipai rual hlauva Kaldai sipaiten an hual mêk Jerusalem an kalsan lai khân,

¹²Jeremia chuan Benjamin rama mite zînga a ro chanpual la tûrin Jerusalem chu a chhuahsan a.

¹³Benamina Kawngkâa a awm lai chuan, vêngtu hotu, a hming Irija, Hanania fapa, Selemia fapa chu a lo awm a; ani chuan zâwlnei Jeremia chu, “Kaldai-ho lamah i tâng dâwn a ni mâw!” tiin a lo man a.

¹⁴Jeremia chuan, “Dâwt a nih chu! Kaldai-ho lamah ka tâng dâwn awzâwng lo ve,” a ti a. Mahse a thusawi chu a ngaithla duh lo va. Tichuan, Irija chuan Jeremia chu a man a, hotute hnênah a hruai ta a.

¹⁵Hotute chu Jeremia chungah an thinrim hle a, an vua a, ziaaktu Jonathana ina tân inah chuan an khung ta a. Chû chu tân ina an hman lai a ni a.

¹⁶Jeremia chu tân in pindan thim taka a luha, chu hmuna ni rei tak Jeremia a awm hnû chuan,

¹⁷lal Zedekia mi tirhten an va la chhuak a. Lal chuan a inah chuan a rûk tîn, “LALPA hnên atânga thu lo thleng a awm em?” tiin a zâwt a. Jeremia chuan, “Awm ê,” a ti a. Ani chuan, “Babulon lal kutah hlan i ni ang!” a ti a.

¹⁸Chû lo pawh, Jeremia chuan Lal Zedekia hnênah, “I chungah leh i chhiahhlawh hote leh, hêng mite lakah hian eng pawh nge ka sawia, tân ina min khung le?”

¹⁹Babulon lal chu nangmah leh hê ram rûn tûrin a lo kal lo vang’ tia thu lo puangtu i zâwlnehote chu khawiah nge an awm?

²⁰Aw ka pu Lalber, min lo ngaithla lul teh. Ka dîlna che hi khawngaih takin min pawmsak la, ziaaktu Jonathana inah chuan min thawn kîr tawh lul suh, chuti lo zawng ka thi mai ang,” a ti a.

²¹Tichuan, lal Zedekia chuan Jeremia chu tân in hung chhûnga dah tûr leh, chhang siamtute hnên atânga ni tin chhang tlang khat, khawpui chhûnga chhangin a daih chen chen pe tîin tûrin thû a pê a. Tichuan, Jeremia chu tân in hung chhûngah chuan a awm ta reng a.

BUNG 38

LEI HNUAI RIP CHHÛNGAH JEREMIA

¹Matana fapa Sephatia te, Pasura fapa Gedalia te, Selemia fapa Jukala te, Malkia fapa Pasura te chuan mipui zawng zawng hnêna Jeremia thusawi an lo hre ve a, chu thû chu,

²“LALPAN heti hian a ti: ‘Hê khawpuia awmte chu khandaih te, tîm te, hripui tein an thi ang; Kaldai-ho lama pakai apiang chu an him ang a; a nunna chu a tân lâwmmang ang a ni ang a, a dam phah ang,’ tih hi a ni a.

³Tichuan LALPAN heti hian a ti: ‘Hê khawpui hi Babulon lal sipai kutah hlan a ni ngei ngei dâwn a, an rawn la mawlh ang,’ tiin.

⁴Tichuan, hotute chuan lal hnênah, “Hê pâ hi tihlum tûrin kan ngên a che; mite hnêna chutiang thû a vawrh darh avângin, hê khawpuia awm pasalhtate leh mipui zawng zawng a tizâm zo mai dâwn. Hê pâ hian mipuite hamthatna zawng lovin, an chhiatna tûr a zawng zâwk a nih hi,” an ti a.

⁵Lal Zedekia chuan an hnênah, “Khai le, in kutah a awm e. Lal chuan nangni hnial zâwngin engmah a ti thei hlei nê,” a ti a.

⁶Jeremia chu an hruai a, tân in hung chhûnga awm, lal fapa Malkia lei hnuai khur thim takah chuan Jeremia chu hruin an thlak thlâ a. Chû khur thimah chuan chirhdiak chauh lo chu tui pawh a awm lo. Chirhdiakah chuan Jeremia chu a tla lût ta a.

⁷Lal ina mi tilreh awmte zînga pakhat, Ethiopia mi Ebed Meleka chuan Jeremia chu lei hnuai khur thimah an dah tih a lo hria a. Lal chu Benamina Kawngkâa a thut lai chuan,

⁸Ebed Meleka chu lal in atânga chhuakin, lal hnênah chuan:

⁹“Ka pu Lalber, hêng miten zâwlnei Jeremia lei hnuai khur thima an paih thlâ hi a suahsual thlâk êm mai, a awmna hmuna hriatamin a thi mai dâwn asin. Khawpuiah lah chhang a awm tawh bawh si lo va,” a ti a.

¹⁰Tichuan, lal chuan Ethiopia mi Ebed Meleka hnênah, “Heta tâng hian mi sawmthum hruai la, zâwlnei Jeremia chu a thih hmâ ngei khur thim ata chu va khai chhuak rawh u,” tiin thû a pê a.

¹¹Ebed Meleka chuan mite chu a hruai a, lal sum dahna in hnuaiah an lût a, chuta thawmhnaw hlui leh puan chhiate chu an la a, khur chhûnga awm Jeremia hnênah chuan hruin an thlâk a.

¹²Ethiopia mi Ebed Meleka chuan Jeremia hnênah, “Hêng thawmhnaw hlui chhiate hi i zak hnuaiah hruin hian hrên hnan rawh,” a ti a. Jeremia chuan chutiang chuan a ti a.

¹³Tichuan, lei hnua khur thim aţang chuan Jeremia chu an khai chhuak ta a. Tân in hung chhûngah chuan Jeremia chu a awm ve ta a.

ZEDEKIAN HLAUTHÂWNG CHUNGIN JEREMIA A RÂWN

¹⁴Lal Zedekia chuan zâwlnei Jeremia chu a ko va, LALPA in luhna kawngka pathumna-ah an rawn hruai a. Lal chuan Jeremia hnênah, “Thil ka zâwt ang che. Ka hnênah chuan engmah zêp suh,” a ti a.

¹⁵Jeremia chuan Zedekia hnênah, “Ka hrilh che chuan, min that duh mai lo vang mâw? Thurâwn pê che îla, i pawm duh âwm baw si lo va,” a ti a.

¹⁶Lal Zedekia chuan a rûk têtin Jeremia hnênah thu a tiam a, “LALPA, ka nunna siamtu hming chhâlin, ka tihlum hauh lo vang che a, nangmah tihlum tumtu hêng mite hnênah pawh hian ka pe hauh lo vang che,” a ti a.

¹⁷Jeremia chuan Zedekia hnênah, “LALPA, Sipaihote Pathian, Israelte Pathian chuan heti hian a ti: ‘Babulon lal hotute hnêna i inpêk chuan, i nunnain a him phah ang; hê khawpui pawh hi hâl chhiat a ni lo vang a, nang leh i chhûngte nunna pawh zuah in ni ang.

¹⁸Amaherawhchu, Babulon lal hotute hnêna i inpêk duh loh chuan, hê khawpui hi Kaldai-ho kutah pêk a ni ang; an hâl chhe vek ang a, an kut ata i tâl chhuak thei baw lo vang,” tiin a hrilh a.

¹⁹Lal Zedekia chuan Jeremia hnênah, “Kaldai-ho kuta inpe tawh Judate hi a ni ka hlauh ni, anniho kutah hian min pê ang a, min lo tinawmnah hrep ang asin,” a ti a.

²⁰Mahse Jeremia chuan, “An pe lo vang che. LALPA thû ka hrilh che hi âwih mai rawh. I tâna ţa tûr leh, nungdama i awmna tûr zâwk a ni e.

²¹I inpêk duh loh tlat erawh chuan, hei hi LALPA thu min kawhlmuh dân a ni:

²²Ngai teh, Juda lal ina hmeichhe la awm zawng zawng chu Babulon lal hotute hnênah an pe vek ang a, chûng hmeichhiate chuan tihian an la ti ang: “I ţhian ţhaten an hruai sual che a, An bum thlû che a; I kê chu chirhdiakah a tâng a, Anni’n an hawisan ta a che,” tiin.

²³Tichuan, i nupui zawng zawngte leh i fate chu Kaldai-ho kutah an pe vek ang. An kut ata i tâl chhuak tawp lo vang a, Babulon lal kutin a man zâwk ang che. Hê khawpui hâl chhiattîrtu i la ni zui baw ang,” a ti a.

²⁴Zedekia chuan Jeremia hnênah, “Hêng thûte hi tûman hre ve suh se, tichuan i thi dâwn lo nia.

²⁵Amaherawhchu, ka bia che tih hotuten an lo hriata, i hnênah, ‘Lal hnênah eng thû nge i sawi a, lalin i hnênah eng nge a sawi; kan hnênah engmah zêp lo la, tichuan, kan tihlum lo vang che,’ an rawn tih chuan,

²⁶tihian lo hrilh ang che, ‘Lal hnênah chuan, Jonathana ina thi tûra min dah lêt tawh lo tûrin ka va ngên a ni,’ tiin,” a ti a.

²⁷Tichuan, hotu zawng zawngte chu Jeremia hnênah lo kalin an rawn zâwt ta ngei a. Ani chuan sawi tûr thû, lalin a pêk ang chuan a lo hrilh hlawn a. Tichuan, ani chu an be zui ta lo va, an inbiakna thû pawh engmah an hre ta lo va.

²⁸Jeremia chu Jerusalem an lâk ni thlengin vêngtu hung chhûngah chuan a awm reng a. Jerusalem an lâk lai pawhin chutah chuan a awm a.

BUNG 39

JERUSALEM A TLU TA

¹Juda lal Zedekia lal kum kuana, thla sâwmnaah chuan, Babulon lal Nebukadnezzara leh a sipai rual zawng zawngte chu Jerusalem rûn tûrin an lo thawk a, an rawn hual a.

²Zedekia lal kum 11-na, thla îina, ni kuana ni chuan khawpui kulh chu an su tlang ta a.

³Tichuan, Babulon lal hnuaia hotu zawng zawng chu an lo lût a, Kawngka Laita bulah chuan ţhuthmun an rem a: Nergal Sarezzer-a te, Samgar Nebo-a te, Sarsekim-a te, Rabsaris-a te, Nergal-Sarezzer-a te, Rabmag-a te leh Babulon lal hotu dang zawngte an ni a.

⁴Juda lal Zedekia leh a sipai indo mi zawng zawngten an lo hmu a, an tlânchhe ta a, lal huan kawng, kulh bang pahni inkâr kawngah chuan zânah an pût chhuak a. Phai lam pan thlâkna kawngah a tlân ta a.

⁵Nimahsela, Kaldai sipai rualte chuan an ûmzui a, Zedekia chu Jeriko phaizâwlah an zu ûmphâ a. An man hnu chuan Hamath rama Ribla kuaah, Babulon lal Nebukadnezzara hnênah an hruai a, chutah chuan a chungthû a lo rêlsak a.

⁶Ribla-ah Babulon lal chuan Zedekia mithmuh lai ngeiin a fapate chu a tihlum a; Juda milianho zawng zawng pawh Babulon lal chuan a that vek baw a.

⁷Chû mai a ni lo, Zedekia mitmu a kher chhuahsak a, dar kaw l a buntîr a, Babulon-ah a hruai ta a.

⁸Kaldai-ho chuan lal in te, vântlâng inte chu an hâl a, Jerusalem kulh bangte chu an chhu chim ta a.

⁹Tichuan, sipai hotu Nebuzaradana chuan khawpuia mipui la awmte leh a hnêna va inpe lûtte leh mipui la awmchhunte nên Babulon-ah chuan salah a hruai a;

¹⁰Nimahsela, sipai hotu Nebuzaradana chuan Judai rama mi rethei, engmah nei lote chu a hnutchhiah a, an hnênah grêp huante leh lote a pe hlawn a.

JEREMIA AN CHHUAH ZALÊN

¹¹Babulon lal Nebukadnezzara chuan Jeremia chungchâng a tih dân tûr chu a sipai hotu Nebuzaradana hnênah heti hian a chah a,

¹²“Ani chu hruai la, ţa takin enkawl la, tina suh ang che; a hrilh che angin a chungah ti ang che,” tiin.

¹³Tichuan, sipai hotu Nebuzaradana chuan Nebusasban-a te, Rabsaris-a te, Nergal-Sarezzer-a te, Rabmag-a te leh Babulon lal

hotu lian zawng zawngte chu a tîr a;

¹⁴anni chuan Jeremia chu tân in chhûng ata hruai chhuak tûrin mi an tîr a, a enkawltu tûra an ruat Saphana fapa, Ahikama fapa Gedalia'n ama inah hruai rawh se, an ti a. Tichuan, vântlâng zîngah a awm ve ta a.

¹⁵Tân in hung chhûnga kharkhipa a awm lai khân LALPA thù chu Jeremia hnênah a lo thleng a,

¹⁶“Kal la, Ethiopia mi Ebed Meleka hnênah hê thù hi va hrilh rawh, ‘Sipairote LALPA, Israelte Pathian chuan heti hian a ti: “Ngai rawh, hê khawpui thatna tûr ni lovin, a chhiatna tûrin ka thù ka thlentîr ang a, i hmaiham ngeiah hlen chhuah a ni ang.

¹⁷Nang erawh chu, chumi nîah chuan ka chhanhim ang che a, i mi hlauh takte kutah pêk i ni lo vang,” LALPAN a ti.

¹⁸Ka chhan chhuak ngei ngei ang che a, khandaihah chuan i tlu lo vang; keimahah rinna i nghah avângin, i nunna chu i lâwmman lo ni rawh se,” LALPAN a ti, va ti rawh,’ ” a ti a.

BUNG 40

GOVERNOR GEDALIA HNÊNNAH JEREMIA A CHÊNG

¹Judai ram leh Jerusalem aţanga sala an man, khaidiat bun chungah Babulon lama an hruai chhohte zînga a tel ve laia, sipai hotu Nebuzaradanan Rama khua aţanga a chhuahtîr leh tâk hnûa, LALPA thù, Jeremia hnêna lo thleng chu.

²Sipai hotu chuan Jeremia chu hruaiin heti hian a hrilh a, “LALPA i Pathian chuan hê hmuna chhiatna lo thleng tûr hi a lo puang tawh a.

³LALPA rawn thlentîr a ni a, a sawi tawh ang ngeiin a ti a ni. I mite hian LALPA lakah thil sual an ti a, a thù pawh an âwih lo va, chuvângin hê thil hi in chungah a lo thleng ta a nih hi.

⁴Khai le, waviinah hian i kuta khaidiat bun chu ka phelhsak a che. Babulona lo kal ve i duh chuan ka hnênah lo kal ve la, tha takin ka lo enkawl ang che. Babulona lo kal ve chu tha lo zâwka i ngaih leh hetah hian i awm mai dâwn nia. En teh, ram chu i hmaa hi a awm duai alâwm; tha i tiha remchâng i tihna apiangah kal mai ang che,” a ti a.

⁵Jeremia chu a kîr leh hmain, Nebuzaradana chuan, “Babulon lalin Judai ram khawpuite chungah governor atâna a siam, Saphana fapa, Ahikama fapa Gedalia hnênah va kal ta la, mite zînga khawsain a hnênah i awm dâwn nia. A nih loh leh, rem i tihna apiangah kal mai ang che,” a ti a. Tichuan, sipai hotu chuan ei tûr leh thilpêk a pê a, a kaltîr ta a.

⁶Tichuan, Jeremia chu Ahikama fapa Gedalia hnênah Mizpa khuaah chuan a kal a, chumi rama la châmângho zînga chêng vên, ani hnênah chuan a khawsa ve ta a.

⁷Sipai hotute leh an hote, ramhnuia a awm zawng zawngte chuan Babulon lalin Ahikama fapa Gedalia chu ram chhûng governor atân a siam tih leh, ram chhûnga mi hmeichhiate, naupangte leh mi rethei ber ber, Babulon sala a hruai ve lohho enkawltu atân a ruat tih an lo hriat chuan,

⁸Gedalia hnênah Mizpa khuaah chuan an lo kal hlawn a. Nethania fapa Ismaela te, Karea fapa Johanana leh Jonathana te, Tanhumetha fapa Seraia te, Netophath mi Ephaiia fapa te leh

Maakath khuaa mi fapa Jezania te leh an hote an ni a.

⁹Saphana fapa, Ahikama fapa Gedalia chuan anmahni leh an hote hmâah chuan thù a tiam a, “Kaldai mite hnuaia thawh hi hlau rêng rêng suh u. Ram chhûngah hian awm tha hlê hlê ula, Babulon lal rawng hi bâwl ula, in thatna tûr a ni ang.

¹⁰Kei pawh hi, kan hnêna lo kal Kaldai mite rawng bâwlsak tûrin Mizpa khuaah hian ka awm dâwn a ni. Nangni erawh chuan uain te, nipui thei te, hriak te lakhâwm ula, in bêlah te khung khâwm ula, in lâk tâk khawpuiah te chuan chêng rawh u,” a ti a.

¹¹Chutiang bawkin, Juda mi Moab rama awm zawng zawng te, Edom rama Ammon-ho zînga mite leh ram tina mite chuan Babulon lalin Judai ramah mi engemaw zât a hnutchhiah a, anmahni awp tûrin Saphana fapa, Ahikama fapa Gedalia a dah tih an lo hriat chuan,

¹²Juda mi hnawh darha awm zawng zawng chu an awmna hmun tin aţangin an lo kîr a, Judai ramah lo kalin, Mizpa khuaa Gedalia hnên an lo thleng a, uain leh nipui theite chu an rawn seng khâwm t̄uh va.

¹³Karea fapa Johanana leh sipai hotu ramhnuia a awm zawng zawng chu Mizpa khuaa Gedalia hnênah an lo kal a,

¹⁴a hnênah, “Ammon-ho lal Baalisian Nethania fapa Ismaela chu nangmah that tûrin a tîr tih i lo hria em le?” an ti a. Nimahsela, Ahikama fapa Gedalia chuan a lo âwih lo va.

¹⁵Karea fapa Johanana chuan Mizpaa awm Gedalia hnênah chuan a rûk t̄in, “Nethania fapa Ismaela that tûr chuan min kaltîr mai ta che, tûma'n an hre dâwn lo nia. Eng aiah nge nangmah a rawn thah tehlu ang che a, nangmah bêla Juda lo tlan khâwmho zawng zawngte tihdarh leh an nih anga, Juda mi dam chhunte hi tihrial an nih ang le?” a ti a.

¹⁶Nimahsela, Ahikama fapa Gedalia chuan Karea fapa Johanana hnênah, “Hetiang thil hi ti rêng rêng suh, Ismaela chungchâng i sawi hi a dik lo a nia,” a tihsan mai a.

BUNG 41

GEDALIA LAKA HELNA

¹Thla sarihnaah chuan lal chhûngkuua mi leh lal khâwnbâwl zînga mi, Elisama fapa, Nethania fapa Ismaela chu mi sâwm hruaiin, Ahikama fapa Gedalia hnênah, Mispa khuaah a lo kal ta a. Mizpa khuaah chuan chaw an kîl tlan a.

²Chutah le, Nethania fapa Ismaela chu a mi hruai sâwmte nê chuan an che nghâl vat a, Saphana fapa, Ahikama fapa Gedalia, Babulon lalin governor atâna a dah chu khandaihin an that ta a.

³A hnêna Juda awm zawng zawng, Mizpa khuaa Gedalia bêltu zawng zawng bâkah, chumi hmuna Kaldai sipai, indo mite chu Ismaela chuan a that vek a.

⁴Gedalia a thah tûkah chuan, tû dang mahin an la hriat hmân,

⁵Sekem aţang te, Silo aţang te, Samaria aţang tein mi sawmriat, an khabê hmul ziahkâwna, silhfên thlêr hniang hnuang, mahnia inzai riak ruakin, an kuta thil hlan tûr leh rimtuite kengin, LALPA ina hlan tûrin an lo kal a.

⁶Nethania fapa Ismaela chu anmahni hmuak tûrin Mizpa khua aţangin a chhuak a, a kal pahin a ţap a; anniho a hmuh chuan,

“Ahikama fapa Gedalia hnênah lo kal rawh u!” a lo ti a.

⁷Chutia khawpui chhûng an lo thlen chuan, Nethania fapa Ismaela leh a thuihruaite chuan an lo that a, khuarkhurum an paih lût a.

⁸Nimahsela, an zînga mi sâwm erawh chuan Ismaela hnênah, “Min that suh u, keini chuan buh te, barli te, hriak te, khawizû te lovah kan dah khâwl t̃euh si a,” an ti a. Tichuan, anni chu an unaute zîngah chuan a that tel ta lo va.

⁹Chû khuarkhurum, Ismaelan Gedalia avânga a mi thahte ruang a paihna chu, lal Asa’n Israel lal Baasa a hlauh avânga a lai h khuar kha a ni a. Nethania fapa Ismaelan a mi thah ruang vawm khah nân a hmang ta a ni.

¹⁰Ismaela chuan Mizpa khuua mi la awm zawng zawng, lal fanute leh Mizpa khuua la châmbâng zawng zawng, sipai hotu Nebuzaradanah Ahikama fapa Gedalia enkawl tûra a dah te chu salah a kâwi khâwm a. Nethania fapa Ismaela chuan salah hruaiin, Ammon ram lamah a hruai chhuak vek a.

¹¹Nimahsela, Karea fapa Johanana leh a sipai hotu, a hnêna awm zawng zawng chuan Nethania fapa Ismaela thil sual tih thû an lo hriat chuan,

¹²Nethania fapa Ismaela bei tûrin mipa zawng zawng khâwmin an thawk chhuak a; Gibeon khaw kianga dîl lian tak bulah chuan an va tâwk ta a.

¹³Ismaela hnêna awm mipui zawng zawngte chuan Karea fapa Johanana leh a lamtâng sipai hotu zawng zawngte hmêl an han hmuh chuan an lo lâwm êm êm a.

¹⁴Tichuan, Ismaelan Mizpa khuua a tâng sala a hruai mipui zawng zawng chu an lo lêt a, Karea fapa Johanana lam an rawn pan ta dual a.

¹⁵Nimahsela, Nethania fapa Ismaela chu mi pariatte nêl Johanana lak ata chu an tlan chhuak a, Ammon mite hnên an pan ta a.

¹⁶Karea fapa Johanana leh a hnêna sipai hotu awmte chuan Nethania fapa Ismaelan Ahikama fapa Gedalia a thah hnêna Mizpa a tâng sala a man zawng zawng–indo mite, hmeichhia leh naupang te, mi tilreh te, Gibeon khuua a tâng a hruai kîr lehte nêl chuan a hruai vek a.

¹⁷An kal chhuak a, Aigupta lam an panna kawngah, Bethlehem kianga Chimham-ah chuan an châwl a,

¹⁸Babulon lalin governor atâna a dah Ahikama fapa Gedalia kha Nethania fapa Ismaelan a thah avâng khân Kaldai ho chu an hlau êm êm a.

BUNG 42

AIGUPTAA TLÂNCHHE LO TÛRA KHAPNA

¹Sipai hotu zawng zawng te, Karea fapa Johanana te, Hosaia fapa Jezania te leh mipui zawng zawng chu a tê ber a tâng a lian ber thlengin an lo kal hnai a,

²zâwlnei Jeremia hnênah, “Khawngaih takin kan dîlna hi min pawmsak la, keini a la dam chhunte tân hian LALPA kan Pathian hnênah min tawngt̃aisak rawh (i hmuh ang hian, tam tak ni thîn kha tlêm tê chauh hnutchhia kan ni ta si a),

³tichuan, LALPA i Pathian chuan kan kawng zawng tûr leh kan tih tûrte min kawhhmuh thei dâwn nia,” an ti a.

⁴Zâwlnei Jeremia chuan an hnênah, “Ka hria e. In sawi ang tak chuan LALPA in Pathian hnênah ka tawngt̃aisak mawlh ang che u a, LALPA min chhân dân ang zêlin in hnênah ka puang ang. In lakah engmah ka zêp lo vang,” a ti a.

⁵Anni chuan Jeremia hnênah, “LALPA i Pathianin kan tâna thû a hrilh che ang taka kan tih loh chuan, kan inkârah LALPA chu hriatpuitu dik leh rinawm ni rawh se.

⁶LALPA kan Pathian thû chu, a chhia emaw, a t̃ha emaw, kan âwih ngei ngei ang; LALPA kan Pathian thu âwih phawt mai hi, kan thatna tûr a ni si a,” an ti a.

⁷Ni sâwm hnêh LALPA thû chu Jeremia hnênah a lo thleng a.

⁸Tichuan, Karea fapa Johanana te, a hnêna awm sipai hotu zawng zawngte leh mipui zawng zawng, a tê ber a tâng a lian ber thlengin a ko va,

⁹an hnênah, “LALPA Israelte Pathian hnêna in dîlna thlen tûra min tîr kha, ani chuan heti hian a ti:

¹⁰“Hê rama in awm reng dâwn chuan, thiat lovin ka tung dîng ang che u; pawt chhuak lovin ka phun nghet ang che u. In chungah chhiatna ka thlentîr kha ka tinêp tawh si a.

¹¹In hlauh êm êm, Babulon lal hi hlau tawh suh u; nangmahni chhanhima, a kut ata chhan chhuak tûr che u-in kei in hnênah ka awm alâwm,’ LALPAN a ti.

¹²In chungah zahngaihna ka lantîr ang a, tichuan, ani pawhin in rama in kîr leh theih nân in chungah zah a ngai ve mai dâwn a ni.’

¹³“Amaherawhchu nangnin, ‘Hê ramah hian kan awm lo vang,’ tia LALPA in Pathian âw pawh in âwih duh lohva,

¹⁴Aigupta ramah kan kal zâwk ang, chutah chuan indo te, tâwtawrâwt thâwm te, ril̃tâm te a awm tawh lo vang a, chutah chuan kan chêng zâwk ang,’ in tih tlat chuan

¹⁵Aw, Juda mi la dam chhunte u, LALPA thû hi lo ngaihla teh u! Sipaihote LALPA, Israelte Pathian chuan heti hian a ti: ‘Aigupta rama awm tûra kal in tum lui t̃âl̃h a nih chuan,

¹⁶khandaiah in hlauh ngei khân Aigupta ramah chuan a ûmzui ang che u a; ril̃tâm in hlauh ngei khân Aigupta ramah chuan a nangchîng ang che u a; chutah chuan in thi baw ang.

¹⁷Chutiang chu Aigupta rama chêng tûra kal tum lui tlatte awm dân tûr a ni. Khandaiah te, t̃âm te, hrî tein an thi ang. An chungah chhiatna ka thlentîr tûr lakah tûmah himin emaw, damin emaw an chhuak lo vang.’

¹⁸Sipaihote LALPA, Israelte Pathian chuan heti hian a ti: Ka thinurna leh ka thinrimna Jerusalem luahtute chungah ka leih buak ang mai khân, Aigupta ram in luh hunah in chungah ka thinrimna ka leih baw ve ang. Mi ânchhia te, mak an tih huai huai te, mi kamchhe tleuhna leh sawi chhiat in ni ang a; hê hmun hi in hmu leh tawh ngai lo vang.’

¹⁹“Aw, Juda la dam chhunte u, LALPAN in chungchâng a sawi ta: ‘Aigupta-ah kal suh u!’ Wawiina ka hrâwkna che u hi in hre Chiang lo palh ang e.

²⁰LALPA in Pathian hnêna min tirha, ‘LALPA kan Pathian hnênah min ãawngtãisak la, LALPA i Pathianin a sawi apiang chu min hrilh la, kan ti zêl ang,’ in tih khân, vervêkna thínlung pûa ti in ni asin.

²¹Hei, vawinah hian in hnêna ka puan tâk hi; mahse, LALPA in Pathian âwka leh, in hnêna min tih chhan pawh in âwih duh leh si lo va.

²²Khai le, tûnah hian, chên in châk êm êmna hmun ngeiah chuan khandaih te, ãam te, hrî tein in zu thi mai mai dâwn a ni,’ tih hi lo hria ang che u,” a ti a.

BUNG 43

AIGUPTA RAMAH JEREMIA AN HRUAI

¹Jeremia chuan mipuite hnêna LALPA an Pathian thû zawng zawng, LALPA Pathianin an hnêna sawi tûra a tih zawng zawng a sawi zawh chuan,

²Hosaia fapa Azaria te, Karea fapa Johanana te leh mi chapo tak takte chuan Jeremia hnênah, “Dâwt i sawi a ni! LALPA kan Pathianin, ‘Aigupta rama chêng tûrin kal suh u,’ tiin a sawitîr lo vang che.

³Kaldai-ho kuta min hlana, min tihhlum theih nân leh, Babulon sala min hruai bo theihna tûrin, Neria fapa Barukan min bei tûrin a tîr zâwk che a nih hi,” an ti a.

⁴Tichuan, LALPAN Judai ramah awm reng tûra a tih chu, Karea fapa Johanana te, sipai hotu zawng zawngte leh mipui zawng zawng chuan an zâwm duh ta lo va.

⁵Karea fapa Johanana leh sipai hotu zawng zawng chuan Judah la dam chhun, hnawh darha an awmna ram tin ațanga Judai rama chêng tûra lo kîr te leh

⁶mipa te, hmeichhia te, naupang te, lal fanu te leh, mipui zawng zawng, sipai hotu Nebuzaradanan Saphana fapa Ahikama fapa Gedalia hnêna awm tûra a hnutchiah mi zawng zawng bâkah, zâwlnei Jeremia leh Neria fapa Baruka te nên chuan an hruai ta vek a.

⁷LALPA thû pawisa lovin, Aigupta ramah chuan an zu kal ta a. Tahpanhes thlengin an kal a.

⁸Tahpanhes khuaah chuan LALPA thû Jeremia hnênah a lo thleng a,

⁹Lung lian pui pui lâ la, Tahpanhes hmuna Pharoa in panna kawng sîrah leirawhchan siamnaa hlum chawh diakah chuan, Juda mite hmuh lai ngein phûm rawh;

¹⁰an hnênah tihian sawi la, ‘Sipaihote LALPA, Israelte Pathian chuan heti hian a ti: “Ngai teh, ka chhiahhlawh Nebukadnezzara, Babulon lal chu ka rawn tîr ang a, hêng lung ka thuhrûk chungah hian a lalthuthlêng a rawn hûng ang. A lalna puan in pawh hemi chungah hian a zâr dâwn a ni.

¹¹A lo kal hunah chuan, Aigupta ram hi a rawn nghaisa ang a, thi tûra ruatte chu thihnaah, sala tâng tûr saltânnaah, khandaiha thi tûr khandaih hnênah a pê ang.

¹²Aigupta pathian inahte chuan mei ka chhuah ang a, ani chuan a hâl ang a, salah a hruai ang. Berâmpuin ama puan a inbel angin, Aigupta ram chuan a inthuan ang a, chuta țang chuan

râlmuang takin a chhuak ang.

¹³Aigupta rama Bethsemes ban serhte chu a chhu chhia ang a; Aigupta pathian inte chu a hâl chhe vek ang,” a ti,’ ti ang che,” a ti a.

BUNG 44

AIGUPTA RAMAH ISRAELTEN HREM AN TAWK

¹Aigupta rama Juda-ho zawng zawng, Migdol leh Tahpanhes leh Noph khuua awmte leh, Pathros biala chêngte chungchanga Jeremia hnêna thu lo thleng chu,

²“Sipaihote LALPA, Israelte Pathian chuan heti hian a ti: ‘Jerusalem leh Judai ram khawpui zawng zawng ka tihchhiat dân in hmu a; vawinah hian tûmah an chêng tawh lo va, a ram chhe vek a,

³an suahsual êm avângin kei min tihthinura, in thlahtute, nangni leh anni pawhin an la hriat ngai loh pathian dangte biao rimtui an hâl thîn vâng a ni a.

⁴Ka chhiahhlawh zâwlnei zawng zawngte kha in hnênah ka rawn tîr thîn a, anni khân, “E khai, hê thil tenawm leh huatthlala tak hi chu ti lul suh u!” an rawn ti lawm lawm thîn a nih kha.

⁵Chuti chung pawhin an ngaithla duh chuang lo va, an sualna te sim tûr leh, pathian dangte hnêna rimtui hâl lo tûra ka thuchahte pawh an bengkhawn duh hek lo.

⁶Chuvângin, ka thinurna leh ka thinrimna sosâng chu Juda khawpuihte leh Jerusalem kawthlêrahte ka leih a, a alh ta duai duai a, vawiina a awm ang hian a ram chhe tlawk tlawk a nih hi.’

⁷“Tûnah hian LALPA, Sipaihote Pathian, Israelte Pathian chuan heti hian a ti a ni: ‘Engvâng teh fakauvin nge hê thil sual leh in tâna țha lo tûr, Judai rama tûmah an awm theih lohna khawpa mipa leh hmeichhia, naupang leh nausênte chena in boral vekna tûr thil in tih tâk mai le?

⁸Engah nge leia hnam zawng zawng zînga ânchhedawng leh sawi chhiat baw, hnâwl bo bawka in awmna tûra in kutchhuak ngeia mi tihthinura, in va chênna Aigupta ram pathiante hnêna rimtui te in va hâl leh tâk mai?

⁹In thlahtute suahsualna te, Juda lalte suahsualna te, an nupuite khawlohna te, nangmahni leh in nupuiten Judai ram leh Jerusalem kawthlêra in lo bawhchhiat tâkte kha in theihnghilh ta em ni?

¹⁰Tûn thleng hian an la intilâwm duh chuang lo va, min hlau baw hek lo; nangni leh in thlahtute tâna ka dân siam leh ka thupêk pawh an zâwm duh dêr lo va.’

¹¹“Chuvângin, Sipaihote LALPA, Israelte Pathian chuan heti hian a ti: ‘Ngai teh u, chhiatna tûr leh Juda zawng zawng tiboral tûrin ka hmachhawn dâwn che u hi.

¹²Juda-ho la damchhun, Aigupta rama chên tum tlat hote chu Aigupta ramah chuan an tû ang a, an chimite vek ang. Khandaih leh ãam tuarin an thi vek ang. A tê ber ațanga a lian ber thlengin khandaih leh ãamin an thi ang a; ânchhedawngin, mite mak tih khawpa mi kamchhe tleuhna leh sawi chhiatin an awm ang!

¹³Aigupta rama chêngte chu Jerusalema chêngte ka hrem ang bawkin, khandaih te, ãam te leh hri hmangin ka hrem dâwn si a,

¹⁴Chuvângin, Juda-ho la dam chhun, Aigupta rama chêng tûra zu kalte chu, Judai ramah an kîr leh ngâh loh chuan, a hnuah kîr leh châk mahse, tûmah kîr leh tûra dam khawchhuak zo an awm lo vang. A tlan chhuakte chauh lo chu tûmah an kîr tawh dawn si lo va,” a ti a.

¹⁵Mahse, Aigupta rama Pathros hmuna chêng zawng zawng, an nupuiten pathian dang hnênah rimtui an hâl thîn tih pawh hre reng, paho zawng zawng leh, an bula ding ve hmeichhia zawng zawng, mipui pung khâwm chuan Jeremia chu an chhâng a:

¹⁶“LALPA hminga kan hnêna i thusawite hi kan ngaihlâksak lo vang che!

¹⁷Kan kâa kan sawi tawh angin kan ti ang a, vân lalnu hnênah rimtui hâlîn a hnênah in tûr thilhlante kan bun chhuak ang; keini leh min thlahtute, kan lalte leh kan hotuten Judai ram khawpuihte leh Jerusalem kawthlêra an tih thîn ang khân kan ti ve ang. Chûng lai chuan ei tûr kan hnianghnâr a, kan hmuingil a, harsatna pawh kan tâwk hek lo.

¹⁸Mahse, vân lalnu hnêna rimtui hâl lo va, a hnêna in tûr thilhlân bun chhuah kan tihtâwp chinah chuan, engmah rêng kan nei ta lo va, khandaih leh tamin min ei zo ta a nih hi,” an ti a.

¹⁹Hmeichhe-ho pawhin, “Vân lalnu hnêna rimtui kan hâla, a hnêna in tûr thilhlân kan bun chhuah lai te, a tâna chhang kan ura, chibai kan bûka, a hnêna in tûr thilhlân kan bun chhuah laite khân, kan pasalte remtihnaa ti kan ni lo vem ni?” an ti baw k a.

²⁰Jeremia chuan amah chhângtu paho leh nuho leh mi dang zawng zawng hnênah chuan tihian a ti a:

²¹“Judai ram khawpuihte te, Jerusalem kawthlêrah te, nangni leh in thlahtute, in lalte, in hotute leh ram chhûng mipuiin milem biakna rimtui in hâl thîn tih LALPAN a hai rêng rêng lo va, a rilrûin a pai reng tih in hre lo vem ni?”

²²Chuvâng tak chuan, in thilsual tih thîn te, thil tenawm in tih thinte kha LALPAN a tuar reng thei ta lo a nih kha. Chuvâng vêk chuan in ram chu, tûna a awm dân ang hian a ram chhe dêr a, mite mak tih khawpin âchhe dawng ram, tûma luah lohvin a awm tâwl ta ringawt a nih hi.

²³Rimtui in hâl avâng te, LALPA chung a in sual avâng te, LALPA thû âwih lova a dân te, a thupêkte leh a thuhriattûrte in zawm duh loh avângin, wawiina in chan ang, hê chhiatna zâkhua hi in chungah a lo tla ta a nih hi,” a ti a.

²⁴Chû bâkah Jeremia chuan mipuite leh hmeichhia zawng zawngte hnênah, “LALPA thû hi lo ngaihlâ teh u, nangni Aigupta rama Juda zawng zawngte u!

²⁵Sipaihote LALPA, Israelte Pathian chuan heti hian a ti: ‘Nangni leh in nupuite kâa in sawi chu in kutin in hlen ta ngei a, “Vân lalnu hnêna rimtui hâl tûr leh, a hnêna in tûr thilhlân bun chhuahsak tûra kan thutiam tawh chu kan hlen dawn,” in tih tawh kha. In tiam ang ngei chuan vawng ula, hlen mawlh ang che u!

²⁶Chuvângin, LALPA thû hi lo ngaihlâ teh u, nangni Aigupta rama chêng Juda zawng zawngte u: ‘Ngai rawh u, ka hming ropui tak chhâlîn chhia ka chham ta,’ LALPAN a ti. ‘Aigupta rama Juda awm zawng zawng zingah tû kâ mahin “Lalpa PATHIAN nung chhâlîn” tiin ka hming hi an lam tawh tûr a ni lo.’

²⁷Ngai teh u, hêng mite hi an thâtna tûr ni lovin, an chhiatna tûr zawkin ka enthla reng a ni. Aigupta rama Juda mi zawng zawng hi khandaih leh tamin a ei zo vek ang a, an la tâwp dêr ang.

²⁸Khandaih laka thi bâng mi tlênte chauh Aigupta ram atangin Judai ramah an kîr leh ang a; Aigupta rama chêng tûra chhuk thla-ho zinga Juda la dam chhun zawng zawng chuan, anmahni thû nge ding chang zâwk Keima thû, tih an la hria ang.

²⁹Hei hi in tân chhinchhihna a ni ang, hê hmunah hian ka hrem dawn che u a; ka thûte chu in chhiatna tûr a lo ni ngei tih in hria ang,’ LALPAN a ti a ni.

³⁰“LALPA chuan heti hian a ti: ‘Ngai teh u, Aigupta lal Pharoa-Hophra chu a hmêlmâ, amah thah tumtu kutah ka pê ang, Juda lal Zedekia kha a hmêlmâ leh amah thah tumtu, Babulon lal Nebukadrezzara kuta ka pêk ang khân,’ ” a ti a.

BUNG 45

BARUKA HNÊNA THUTIAM

¹Juda lal Jehoiakima, Josia fapa lal kum linaah Jeremia kam chhuak thû, Neria fapa Barukan lehkhahu-ah a ziah laia zâwlnei Jeremia thusawi chu:

²“Aw Baruk, LALPA Israelte Pathian chuan i hnênah heti hian a ti:

³“Nang chuan, “Ka va mangang tehlul êm! LALPA chuan ka thil tuar achungah lungngaihna mi belhchhah ta si a. Châu hnêpin ka rûm a, chawlh hahdamna rêng ka hmu lo,” ” i ti a.

⁴“A hnênah heti hian sawi rawh, ‘LALPA chuan heti hian a ti: “Ngai rawh, ka sak tawh chu ka thiat leh ang a, ka phun tawh chu ka phâwi leh ang, a ram pum hian.

⁵Nangma tân thil ropui i zawng em ni? Zawng duh suh; ngai teh, tisa zawng zawng chungah chhiatna ka rawn thlen dawn si a,” LALPAN a ti. “I nunna erawh chu i kalna hmun tinah i lâwmmân atân ka pe ang che,” a ti e.

BUNG 46

AIGUPTA CHUNGA RORÊLNA

¹Hnamte awm dân tûr zâwlnei Jeremia hnêna LALPA thu lo thleng chu.

²Aigupta chungthu. Juda lal Josia fapa Jehoiakima lal kum linaah Nebukadrezzara, Babulon lalin Euphrates lui kam Karkhemis khuua a hneh tâk, Aigupta lal Pharoa Neko sipai rual chungchâng thû:

³“Phaw tê leh phaw lian peih ula, Indona hmun pan rawh u!

⁴Sakawrte thuam ula, Sakawrpute u, chuang rawh u! Lukhum te khum ula, Fei te tât hriamin, Indo kawr ha rawh u!

⁵Engati nge chî-âi taka an tawlhkîr tâk mai? An pasalthâte an titlû a; Baklêngin an tlânchhe ta, An hawî kîr ngam ta lo, Hlahuain kil tin a fân,” LALPAN a ti.

⁶“Mi tuanthâ tlan botîr suh la, Mi chak pawh tlan chhuak suh se; Euphrates Lui hmar lamah chuan Pai nawk nawkin an tû ang.

⁷“Lui ang maia lo lian hi tu nge ni, Tuilian anga luang dûl dûl hi?

⁸Tuilian angin Aigupta a sosâng e, Luipui luang hum hum ang maiin; ‘Leilung dâp khawpin ka lian ang a, Khawpui leh a michêngte ka sawp nek ang,’ a ti a.

⁹Aw, sakawrte u, lo kal ula, âw tawlailîrte u, tâwn vak rawh u! Michakte rawn thawk chhuak rawh se: Phaw keng Ethiopia leh Libia mite leh, Thal kap thiam Ludia hote nên khôn.

¹⁰Sipaihote Lalpa PATHIAN nî chu hei hi a ni, Phuba lâkna nî chu, A hmêlmâte chungah phubâ a la ang. Khandaihin a ei zo vang a; Rui hnêp khawpin an thisen chuan a intitlai ang; Hmar lam Euphrates lui kamah chuan Sipaihote LALPA chuan inthâwina a hlân ta si a.

¹¹“Gilead-ah chho la, thinghnâi damdâwi han la rawh, Aw, Aigupta fanu, nula thianghlîm; A thlâwnin damdâwi i hmang hnem êm mai; I dampui dâwn chuang si lo.

¹²Hnamten i mualphozia an hre ta, I ɣap thâwmin ram a tikhat e; Michak leh michak an intawng a; An tlu dîn ta dêr mai.”

BABULONIN AIGUPTA A SAWP DÂWN

¹³Babulon lal Nebukadnezzara lo kal tûrin Aigupta ram a sawp dân tûr LALPAN zâwlnei Jeremia hnêna a sawi chu.

¹⁴Aiguptaah puang ula, Migdol-ah hril rawh u; Noph-ah leh Tahpanhes-ah hril vêl ula; ‘Ding nghet ula, inbuatsaih rawh u, Khandaihin in vêl zawnz zawnz a ei zo ta,’ ti rawh u.

¹⁵Engati nge in mi chakte hnâwl bo an nih tâk? An ding thei lo, LALPAN a hnawh bo avângin.

¹⁶Mi a tama tam a tlûktîr a; Ni e, an indelh nêlh nûlh a. ‘Tho r’u!’ Khandaih rorêlna ata hi Kan mite hnênah i kîrsan ang u, Kan pianna ramah chuan,’ an ti a.

¹⁷Tichuan an au va, ‘Aigupta lal Pharoa hi thâwm chauh tinâ a ni a, A hun thâin a liamsan ta!’ tiin.

¹⁸Lalber, a hming Sipaihote LALPA chuan “Ka nunna chhâlîn, “Thlângte zîngah Tabor hi a awm ang leh, Tuipui kamah Karmel a awm angin, ani chu a lo kal ngei dâwn a ni.

¹⁹Aw nang hmeichhia, Aigupta chêng, Saltâng tûrin inpeih mai rawh! Noph khuah chu luah lohvin a chhe ram dêr dâwn si a.

²⁰“Aigupta chu bawngla duhawm tak ni mahse, Hmar lam aɣangin chhiatna a lo thleng ta si a.

²¹An zînga sipai rawihte pawh bawng thau ang mai an ni, Anni pawh an inher a, An tlânchhe duai duai a, Dîn pawh an dîng lo, Chhiatna nî chuan a rawn nang ta le, Hrem an tuarna nî chu.

²²Rûlpui angin an ri sung sung ang a, Sipai rual nên an lo thawk dâwn si a, Thingkittu ang maiin hreipui nên an rawn bei ang.

²³“A ramngâw te chu dâidar loh ni mah se, An rawn tam dâwn êm avâng leh, Khâu puang aia an tam dâwn avângin An rawn kit thlu vek ang,” LALPAN a ti.

²⁴Aigupta fanute chu an mualpho ang; Hmar lam mite kuta mantîra an la awm dâwn avângin.”

²⁵Sipaihote LALPA, Israelte Pathian chuan heti hian a ti: “Ngai teh u, No khuah Amona leh Pharoa te, Aigupta leh a pathian-hote, a lallo Pharoa leh amah lo rinchhantute chenin ka hrem ang.

²⁶Anmahni thah tumtute kutah ka hlân ang a, Babulon lal Nebukadnezzara leh a thuihruaiho kutah ka pê ang. Chumi hnâh chuan, tûn hmâ ang khôn an luah leh ang,” LALPAN a ti.

PATHIANIN ISRAELTE A HUMHIM ANG

²⁷“Hlau suh, âw ka chhiahhlawh Jakob ho, Aw Israel, zâm hlek suh u! Ngai teh, hla tak aɣangin i thlahte chu, An saltânna aɣangin ka chhan dâwn asin; Jakob-ho chu an kîr leh ang a, râlmuangin an châwl tawh ang a; Tûma’n an tihlau tawh lo vang.

²⁸Aw Jakob, ka chhiahhlawh, hlau suh,” LALPAN a tih che chu, “Ka awmpui si che a; Nangni ka hnawh darhna hnam zawnz zawnz chu ka titâwp vek ang a, Nang erawh chu ka titâwp êm lo vang che. Dik takin ka siam tha zâwk ang che a, Hrem loh êm chuan ka chhuah lo vang che.”

BUNG 47

PHILISTIA CHUNGA RORÊLNA

¹Pharoan Gaza khuah a beih hmâa, Philistia mite chhiat tûr chungchânga LALPA thû, zâwlnei Jeremia hnêna lo thleng chu.

²LALPAN heti hian a ti: “Hmar lam aɣanga tui lo lian saw thlîr teh u, A luang liam hum hum mai le; Ram chhûnga awmte a chîmpil ang, Khawpui leh a mi chêngte nên; Patlingte pawh an ɣap ang a, Ram chhûnga mi zawnz zawnz an rûm ang.

³An sakawr chak ke per ri thui thui te, An tawlailîr ri ruai ruai te, A ke vir kual thâwmah An fate lam hawi thei lo lêkin, Paho an zâm chhia ang.

⁴Philistia miten rawk an tawh nî a thleng ta a, Tura leh Sidona mi puitu awmchhunte dan chah nî chu; LALPA chuan Philistia-ho a rawk dâwn si a, Kaphtor rama mi la dam chhunte chu.

⁵Gaza chungah lukawlhna a thleng ta, Ashkelon chu a phai ruama mite lakah chhut chah a ni. Eng chen nge in inzai dâwn?

⁶“Aw nang, LALPA khandaih, I chawlh hun engtia rei nge la ni? I paiah khôn inkhung la, Châwl la, awm hlê hlê rawh!

⁷Engtin nge a chawlh theih ang, Ashkelon leh tuipui kam bei tûrin LALPAN tih tûr a tuk si te chuan? Chutiang ti tûra ruat a ni rêng si a.”

BUNG 48

MOAB CHUNGA RORÊLNA

¹Moab chhiat tûr thû. Sipaihote LALPA, Israelte Pathian chuan heti hian a ti: “Nebo chung a pik e! An rawk cherêu ta si a, Kirjathaim an lâ a, tihmualpho a ni; Kulh sâng chu tihmualphova tihchiâi a ni.

²Moab-in fak a hlawh ta lo. Heshbon-ah a chhiatna an phiar a; ‘Hawh u, hnam a nihna i tihbosak ang u,’ an ti a. Aw, Madmen mite u, an la paih thla ang che u! Khandaihin a ùm ang che u;

³Honoraim aɣangin an âu ang a: ‘Inrawkna leh tihchhiatna nasa tak chu!’ tiin.

⁴“Moab chu tihchhiat a ni a; A fanaute ɣap thâwm an hria e;

⁵Luhith Chhovah ɣap chungin an chho zêl a; Honoraim chhukah hmêlmâten chhiatna au thâwm an hria.

⁶“In nun humhim tûrin tân rawh u! Thlâlêra juniper kung ang ni rawh u.

⁷I hnathawh leh i sumah i inngah avângin, Nang pawh an man ve ang che. Khemosa chu a puithiamte leh a hotute nê, Sala man a ni ang.

⁸Mi rawk hmangten khaw tin an rûn ang a; Tûma’n an pumpelh lo vang. Phairuam pawh a boral ang a, LALPAN a sawi tawh angin, Phaizâwl chu tihchhiat a ni ang.

⁹“Moab hnênah thlâ pê ula, Tichuan, a thlâwk bo daih dawn nia; A khuate chu a ram chhe vek ang a, Tûma’n an luah lo vang.

¹⁰Thlahdah taka LALPA hna thawktu chuan ânchhia dawng rawh se, Khandaiha thisen chhuah duh lotu pawhin ânchhia dawng rawh se.

¹¹“Moab chu a tleirawl lai ata a nuamsa a; A mawng khal zîngah a awm reng, Bêl dangah pawh an ruak chhuak ngai lo va, Salah pawh a la tâng ve ngai hek lo. A tuina pawh amahah a awm reng a, A rim pawh a dang chuang lo.

¹²“Chuvângin, nîte chu a lo thleng mêk e,” LALPAN a ti, “Uain hnathawktu ka tîr ang a, Ani chuan chawk letin a bun chhuak ang a, Bêl chu a bun ruak ang a, A bûrte chu a tikeh vek ang.

¹³Moab chuan Khemos chu a la zahpui ang, Israela chhûngten an inngahna Bethel an zahpui ang khân.

¹⁴“Engtin nge ‘Mi chak leh indonaa mi huaisen kan ni’ i tih theih?

¹⁵Moab chu an rawk a, a khawpuite an rûn a; A tlangvâl thâ thâte chu thah tûrin an hruai ta,” tih hi Lalber, a hming Sipaihote LALPA chuan a sawi e.

¹⁶“Moab chhiat tawh hun a hnai ta, A tuar hun a thleng têt e.

¹⁷Nangni a kiang vêla miten sîn ula; A hming hretu zawng zawngten sîn rawh u, “Tiang khauh tak a tliak ta, Tiang mawi tak mai chu!” ti rawh u.

¹⁸“Aw, Dibona chêng hmeichhia kha, I ropuina aţang khân lo chhuk la, Tuihâlin ţhu rawh; Moab rawktu chuan arawn rûn dawn che a, I kulhpuite a tichim ang.

¹⁹Aw, Aroer khuua mite u, Kawngah dingin lo thlîr ula; Tlânchhia leh relhrûte hnênah: ‘Eng thil nge thleng ta?’ Tiin lo zâwt rawh u.

²⁰Moab a mualpho ta, an sawp chhe ta si a. Tâpin âu ruai ruai r’u! Moab an rawk ta tih Arnon khaw chhûngah hril rawh.

²¹“Phai ram chungah rorêlna a thleng ta e: Holon te, Jahzah te, Mephaath chungah te,

²²Dibon te, Nebo te, Beth Diblathaim te,

²³Kirjathaim te, Beth Gamul te, Beth Meon te,

²⁴Kerioth leh Bozra te leh, Moab ram khawpui zawng zawng, A hla leh hnaia mite chungah nê.

²⁵Moab kî chu tan chhum a ni ta, A bân pawh a tliak ta,” LALPAN a ti.

²⁶“Hrâi rui rawh u, LALPA lakah a intihropui êm avângin. Moab chu ama luakah a tâl ang a, Mite hmuhsit a ni bawh ang.

²⁷Israel pawh i hmusit ţhîn lo vem ni? Rûkru zîngah hmuh a ni em ni? Ama chungchâng i sawi apianga, Hmusit taka lu i ţhîn khum ţhîn kha.

²⁸Nangni Moab a chêngte u, Khuua kalsanin lung kârah chêng rawh u, Pûk kotlânga bu chhep ţhîn Tîrô angin awm rawh u.

²⁹“Moab chapona kan hria e (A chapozia chu âw), Mahni inngaisâng, luhlul, chapo leh, Inluling tak thinlung pu mi a ni.”

³⁰“A thinrim tih ka hria,” LALPAN a ti, “Mahse a dik hauh si lo; A dâwtthuîn engmah a siam ţha lo.

³¹Chuvângin Moab chu ka ţahpui ang a, Moab mi zawng zawng tân ka ţap ang; Kir Heres mite ka sînpui bawh ang.

³²Aw, Sibma grêp kung! Jazer ţah angin ka ţah ang che. I zârten tuipui an zâm kai a, Jazer tuipui an thleng e. Rawktu chu i nipui thei leh grêp rah chungah a ţuan ta.

³³Hlimna leh lâwmna an laksak ta Thlawhhma ţha aţang leh Moab ram aţang chuan; Uain sâwrkhur ka hlawhchhamtîr a; Hlima âu chungin an rap sâwr tawh lo vang Hlimna âu thâwm a ni lo vang!

³⁴“Heshbon ata Elealeh leh Jahaz thlenga âu âw chu, An âw an chhuah e, Zoar aţanga Honoraim thlengin, Bâwngla kum thum mi angin; Nimrim tuite pawh a khawro bawh ang.

³⁵“Chu lo pawh, Moab-ah chuan, Hmun sânga inthâwina thil hlântu leh A pathian hnêna rimtui hâltu chu ka titâwp ang,” LALPAN a ti.

³⁶Moab sînin ka thinlungin phênglâwng a tum ang, Tum rîk angin ka thinlung hi Kir Heres mite tân a rî a, An hausakna a rîral zo ta si a.

³⁷“An lû te ziat kawlhîn, an khabê hmul an mêk vek ang; An kutte zai thîin, saiip puan an sin vek ang

³⁸Lu an sîn ang, Moab in chungzâwlah te, An kawthlêrah te nê; Bêl chhia ang maiin Moab chu ka tikeh sawm ta si a,” LALPAN a ti.

³⁹“An ţap chuah chuah ang: ‘A va sawp chhe êm êm ve le! Moab chu zak taka hnung lam a hawi tâk hi!’ Tichuan, Moab chu mi nuihzatbûr leh A vêla mite mak tih huai huai a ni ang.”

⁴⁰LALPAN tihian a ti si a: “Ngai teh, mû angin mi a thlâwk ang a, Moab chungah thlâ a zâr ang.

⁴¹Kerioth an la leh ta, A kulhbîngte chu an thâwng thut a; Chumi nîa Moab mi huaisente thinlung chu Hmeichhe nâu vei na tuar ang mai a ni ang.

⁴²Moab chu a hnam anga tihboral an ni ang, LALPA aia amah a lo inngaihhlut êm avângin.

⁴³Aw, Moab a chêngte u, In chungah hlauhna te, khuarkhurum leh thang te a lo thleng dawn e,” LALPAN a ti.

⁴⁴“Hlauhna tlânsantu chu khuarkhurumah a tlâ ang a, Khuarkhurum chhuahsantu chu thangah a âwk ang. Moab chungah, chutah ngei chuan An hremna tuar kum ka thlentîr ang,” LALPAN a ti.

⁴⁵“Tlânchhiate chu Heshbon hlimah an ding ang, An châu dawn si a. Mahse Heshbon aţangin meî a lo chhuak ang a, Sihon aţangin meialh a lo chhuak ang, Moab-ho mithmul a tikang ang,

Chapo uangthuango chhîpsam nê.

⁴⁶Aw Moab, i chung a pik e! Khemos-ho an boral si a; I fapate salah an man a, I fanute salah an hruai ta si a.

⁴⁷“Mahse, ni hnunungahte chuan Moab saltângte chu ka hruai kîr leh ang,” LALPAN a ti. Chutiang chu Moab chung a hremna a ni.

BUNG 49

AMMON CHUNGA HREMNA

¹Ammon-ho chhiat tûr thû. LALPAN heti hian a ti: “Israelin fapa a nei na nge? Roluah tu pawh a nei lo vem ni? Engati nge Milkoma’n Gada ro a luaha, A khawpuiah a mite an chên tâk?”

²Ngai teh u, nî-te chu a lo thleng mek e,” LALPAN a ti, “Ammon ho awmna khua Rabba-ah Indo râlkhêl thâwm ka la hriattîr ang; Thil chhe hlâwm mai a chang ang a, A khuate chu meini a la kâng baw ang. Israelten an la rochun dâwn a ni,” LALPAN a ti.

³“Aw Heshbon, tap rawh, Ai khua an rawk ta si a! Rabba fanute u, chia u vak vak ula, Saiip puan sin rawh u! A sîn nân kulh bang vêlah tlan kwal ula; Milkoma chu salah an hruai dâwn si a. A puithiamte leh a milianhote nê.

⁴Aw, hnungtawh ching fanu, Engah nge i phai ruam te i uanpu i le? I hausakna chu i rinchan a, “Tu nge min bei tehlu ang?” i ti vei maw?

⁵Ngai teh u, in chungah hlauhawm ka rawn thlen dâwn,” Sipaiote LALPA chuan a ti, “In vêla mi zawng zawngte aţangin; Baklêngin an hnawt darh ang che u, Tlan darhho chu tuma’n an ko khâwm lo vang.

⁶Chumi hnûah chuan Ammon-ho saltângte chu ka hruai kîr leh ang,” LALPAN a ti.

EDOM CHUNGA RORÊLNA

⁷Edom chhiat tûr thû. Sipaiote LALPA chuan heti hian a ti: “Tema-ah finna a awm na nge? Mifing remhriatna a riral ta em ni? An finna a boral ta maw?”

⁸Aw, Dedana awmte u, lêt ula, khuarkhurum lamah tlanche rawh u! A chungah Esauva chhiatna ka rawn thlen dâwn, Hrem ka tum hunah ngei chuan.

⁹Grêp lotute an lo kalin, grêp lawh bang an nei dâwn lo vem ni? Zânah rûkrû an lo kalin, An duh tâwk hmâ chu an rawk zêl dâwn lo vem ni?

¹⁰Esauva chu kutbêngin ka siam ta; A bihrûkna hmun ka hâlang a, A biru thei tawh lo vang. A thlahte pawh an rawk vek a, A unaute leh a thenrualte chenin, An ralthûm ta dêr mai.

¹¹In fahrahte chu kalsan ula, Keima’n ka lo humhim ang e; I hmeithaite pawhin mi ring rawh se. ¹²LALPA chuan heti hian a ti: “Ngai teh u, nova mi in lo tura tihten an rui si a. Nang, hrem lohvin i chhuak ang maw? Hrem lohvin i chhuak tawp lo vang a, i in ngei baw ang.

¹³Mahni hming chhâlin chhia ka chham ta, Bosra chu hmun ram, mite sawi chhiat, thil chhe hlâwm leh ânhche dawng a ni ang. A khawpui zawng zawngte pawh a ram hlen tawh ang,”

LALPAN a ti.

¹⁴LALPA hnêna mi thuchah ka hria a, Hnamte hnênah palai a tîr a: “Anniho chu do tûrin rawn pung khâwm ula, Indo tûrin tho rawh u!”

¹⁵“Khai le, mite hmuhsit atân, Hnamte zingah te taktêin ka siam ang che.

¹⁶I inhrosakna thinlung chapo kân a bum che a ni, Aw nang, khâmpang lung kâra chênga, Tlâng chhip sâng awptu! Mû angin i bû chu sâng takah chhep mah la, Chuta tang chuan ka hnûk thlâ ang che,” LALPAN a ti.

¹⁷“Edom chan chhiat dân tûr hian, Mi veivâk apiangte mak tih a hlauh ang a, Mite chek tlawk tlawk khawpin a chhia ang.

¹⁸Sodom leh Gomorra leh a chhehvêl tihchhiat ang mai kha a ni ang,” LALPAN a ti. “Tûmah an awm tawh lo vang a, Tûma’n an luah tawh hek lo vang.

¹⁹“Ngai teh u, mi chakte chênna bei tura Jordan phaia sakeibaknei ang maiin a lo chho ang; A laka ta anni chu ka tlan chhiattîr nghal vek ang. Mi thlan, a chungah lal atâna ka ruat tûr chu tu nge? Keimah ang hi tu nge awm? Kei mi cho tûr tu nge awm? Mi dodâl ngam berâmpu chu tu nge ni?”

²⁰Chuvângin LALPA thurâwn, Edom chungah tih a tum leh, Temana chêngte chungah tih a tum chu ngaithla teh u: Ranruâl zinga a tê ber chenin a hnûk chhuak ang a, An chênna hmun chawpin a tiram vek ang.

²¹An tla thâwmin lei a nghawr nghing a, An tap thâwm chu Tuipui Sen thlenga hriat a ni ang.

²²Ngai teh u, mupui angin a lo thlâwk chho vang a, A thlâte chu Bozra chungah a zâr ang; Chumi nia Edom mi huaisente thinlung chu Hmeichhe nâu vei thinlung ang mai a ni ang.

DAMASKA CHUNGA RORÊLNA

²³Damaska chhiat tûr thu. “Hamath leh Arpad an mualpho ta, Chanchin tha lo an dawng ta si a. An zâm chhe zo ta; Tuipui ah buaina a chhuak a, Tihreh theih a ni ta lo.

²⁴Damaska a chûa ta; Tlânchhiat a tum a, Hlauhna in a thâuvah a man. Hmeichhe nâu vei angin lungngaiin a mangang ta.

²⁵Engati nge ka hlimna khawpui, fakna khawpui chu an rauhsan ve loh?

²⁶Chuvângin, a thalai rualte chu kawthlêrah an tlu ang a, Chumi ni chuan indo mite chu an that vek ang,” Sipaiote LALPA chuan a ti.

²⁷“Damaska kulh bang ka hâl ang a, Ben Hadada lal inte chu a kâng ral vek ang.”

KEDAR AND HAZOR CHUNGA RORÊLNA

²⁸Kedar leh Hazor lalram chungchang, Babulon lal Nebukadnezaran a tihchhiat tûr thu chu. LALPA chuan heti hian a ti: “Tho la, Kedar-ah chuan chho la, Khawchhak mite chu han tichhe vek rawh!”

²⁹An puan in leh an ranrualte an la bo ang. An puanzârte pawh an keng ang a, An bungbêlthe leh an sanghâwngseite nê; ‘Kil tinah hlauhawm a awm!’ tiin, Mite chuan an la âu khum ang.

³⁰“Aw Hazor luahtute u, Hla takah tlânchhia ula! Thûk takah chêng rawh u!” LALPAN a ti. “Babulon lal Nebukadnezzaran do tûr che u in thurawn a la a, In chungah tih dân tûr a ruahman ta.

³¹“Tho ula, him taka awm hnam hausate chu va bei rawh u, Kawngkhâr leh a kalhna pawh nei lo, Mahni maia khawsa an ni e,” LALPAN a ti.

³²An sanghâwngseite chu chhuhsaka, An bâwng rualte pawh laksak tûr atân mai a ni. Hmun kilkhâwr bera mite chu thli ka len botîr ang a, Kil tin aţangin chhiatna ka thlentîr ang,” LALPAN a ti.

³³“Hazor chu sihalte chenna, ram chhe hlen tûr a ni; Chutah chuan tûmah an chêng lo vang a, Mihring fa rêng an awm hek lo vang.”

ELAM CHUNGA RORÊLNA

³⁴Juda lal Zedekia lal tantîrh laia Elam chhiat tûr chungchângah zâwlnei Jeremia hnêna LALPA thu lo thleng chu,

³⁵“Sipaihote LALPA chuan heti hian a ti: ‘Ngai rawh, Elam thal ngul, a chakna hnâr chu Ka tihthiahsak dâwn a ni.

³⁶Elam bei tûrin, kâwlkil lî aţangin, Thli palite chu ka rawn tîr ang a, Chûng thli lam hawî chuan ka tlehtîr vek ang; Elam râltlanho kal lohna hnam rêng a awm lo vang.

³⁷An hmêlmate hmâah Elamho chu ka tichi-âi ang, Anmahni thah tumtute hmâah chuan. An chungah chhiatna ka thlen ang, Ka thinur êm a ni,’ LALPAN a ti; ‘Ka tihbora vek thlengin anmahni ûm tûrin khandaih ka tîr ang.

³⁸Elam-ah ka lalthutthlêng ka hûng ang a, Chuta ţang chuan an lal leh miliante ka tibora ang,’ LALPAN a ti.

³⁹‘Ni hnuhnungah erawh chuan heti hi a ni ang: Elam saltângte chu ka hruiakîr leh ang,’ LALPAN a ti.”

BUNG 50

BABULON CHUNGA RORÊLNA

¹Zâwlnei Jeremia hmanga Babulon leh Kaldai ram chhiatna tûra LALPA thuchhuak chu.

²“Hnamte hnênah puang rawh u, Puanzâr zâr ula, puang rawh u; Puang rawh u, thup suh u, ‘Babulon an lâ a, Bela chu a mualpho ta. Merodaka chu an vaw sawm a; A milimte an timalpho a, A milemte an tisawm ta,’ ti rawh u.

³Hmar lam aţanga hnam pakhatin a rawn do ang a, Chû chuan a ram chu a tichhe vek ang, Chutah chuan tûmah an chêng tawh lo vang. Mihring leh ramsâte chu an tlân bo vek ang.

⁴Chûng nî-te leh chumi hunah chuan LALPAN heti hian a ti, “Israel fate chu an lo kal ang a, Juda thlahte nêan an lo kal ho ang; Ƨap chungin an lo kal ang a, LALPA an Pathian chu an zawng ang.

⁵Zion kalna kawng an zâwt ang a, A awmna lam hawî chungin, ‘Hawh u, kumkhaw thuthlung, Theihngihl tawh loh tûr chu, LALPA nêan i thlung ang u,’ an la ti ang.

⁶“Ka mite chu berâm bo an ni. An berâmputen an hrui bo ta. Tlângah te an vah darhtîr mai mai a. Tlâng aţangin mualah te an kal thûl a; An chawlhmun awmna pawh an hre tawh lo.

⁷A hmu apiangin an lo seh zêl si a; An hmêlmate lahin, ‘Kan tisual hlei nêan, Dikna awmna LALPA, an thlahtute nghahfâk

LALPA laka thil sual an tih vâng a ni,’ an ti a.

⁸“Babulon kha tlân chhuahsan rawh u, Kaldai-ho ram ata kal chhuak ula, Kêl rual hmâa a pachal angin awm rawh u.

⁹Ngai teh u, Babulon bei tûr hnam ţangrual chak tak Hmar lam ram aţangin ka chawk tho ang a, Amah do tûrin an inbuatsaih mup mup ang; Chuta ţang chuan an rawn lâ ang. An thalte chu mi themthiam thal ang mai a ni ang a; Pakhat mahin an hlah lo vang.

¹⁰Kaldai-ho chu an rawk chiam ang a; A rawktuten duh tâwk an ngah vek ang,” LALPAN a ti.

¹¹“I hlimin, i lâwm hlê tak a, Nang, ka rochan ram tichhetu, Bâwng lâ luangno tlân thau ang ni mah la, Bâwngpa angin bû ruah ruah mah la,

¹²In nu chu a la mualpho tho tho ang; A hringtu che chu a la zak êm êm ang. Ngai teh, hnam azawnga nêp ber, Thlalêr ramro leh phûl mai a ni ang.

¹³LALPA thinrimna avângin Tûma luah lohvin, a ram tlawk tlawk ang. Babulona kal tlang apiangin râpthlâk an ti ang a, A chhiat êm avângin an chek khum tlawk tlawk mai ang.

¹⁴“Nangni thal kâpmi zawng zawngte u, Babulon chu hual ula, inzâr darh rawh u; Thalfang ren lovin kâp chur chur rawh u, LALPA laka an sual êm hi.

¹⁵A vêlin âu khum dur dur rawh u; A inpe ta e, A lungphûm a sawp ta, A kulh bang tihchim a ni ta; LALPA phuba lâkna a nih hi. A chungah khân phubâ la ve ula, A tih dân angin a chungah pawh ti ve rawh u.

¹⁶Chi thehtu chu Babulon ata ti bo ula, Buh seng hunah favah lektu nêan. Hnehchhiahtu khandaih hlauvin Mi tinin mahni mite pan ţeuh sela, Mi tin mahni ramah tlân hâw vek rawh se.

¹⁷“Israelte chu berâm tla darh ang an ni; Sakeibakneiten an ûm bo zo va. Assuria lalin a ei hmasa phawt a; A tâwpah hê Babulon lal hian a ruhte a titliak ta a ni.”

¹⁸Chuvângin Sipaihote LALPA, Israelte Pathian chuan heti hian a ti: “Ngai teh u, Babulon lal leh a ram chu ka hrem ang, Assuria lal ka hrem tâk ang mai khân.

¹⁹Israelte chu anmahni ramah ka hrui hâw leh ang a, Karmel leh Basan-ah te ka tlattîr leh ang; Ephraim leh Gilead Tlângah nun an titlai leh ang.

²⁰Chûng hun leh nî-ah te chuan, “Israelte sualna an zawng ang a, an hmu lo vang; Judate sualna pawh hmuh tûr an hre hek lo vang; Ka zuah chhunte chu ka ngaidam vek dâwn si a,” LALPAN a ti.

²¹“Merathaim ramah chho ula, han bei rawh u, Pekod-a chêngte pawh bei rawh u. Tibora ula, tiram dêr rawh u, Thû ka pêk zawng zawng ang zêlin ti rawh u,” LALPAN a ti.

²²Ram chhûngah indo thâwm a awm ta, Chhiatna nasa tak thlentû thâwm chu.

²³Lei pumpui tuboh meuh a han keh darh tâk mai le! Hnamte zîngah Babulon a han chhe ram dêr mai tûr chu! I awh nân thang ka kam si a le;

²⁴I âwk ta mâw, âw Babulon, Nang chuan i hre si lo va; An hre chhuak a, an man a che, LALPA i do tlat avângin.

²⁵LALPA chuan a râlthuanm bâwm a hawng a, A thinurna hriamhreite a phawrh ta, Hei hi Sipaihote LALPAN Kaldai rama a thiltih chu a ni.

²⁶Ramri tâwp ațangte khânrawn bei ula; A buhzênte hâihawng rawh u; Hnâwmhnaw ang maiin chhông khâwm ula, Tichhe vek rawh u, Engmah hmaih suh u.

²⁷A bânwngpate chu tihlum vek ula, A talhna hmunah khalh thla vek rawh u. An chan a va chhe dâwn êm! Anmahni hremna ni chu a lo thleng ta si a.

²⁸Babulon ram ațanga rawn tâl chhuak hote âw chuan LALPA kan Pathianin a tempul an tihchhiat phubâ A la ta tih Zion-ah an puang ta e.

²⁹“Babulon bei tûrin thal kâp thiamte ko khâwm r’u. Thal kâp mite u, hual vek rawh u le; Tûmah tâl chhuak hauh suh se. A thiltih ang tak khân thungrûl rawh u; A tih dân ang chiah khân a chungah ti ve rawh u; LALPA, Israelte Mi Thianghlîma chu, A lo uan khum tâk avângin.

³⁰Chuvângin, an tlangvâlthe chu kawthlêrah an tlu rem rum ang a, Chumi ni chuan an indo mite chu an that vek ang,” LALPAN a ti.

³¹Sipaihote LALPA Pathian chuan, “Ngai tak rawh, ka do a che, Nang, chapo pa!” a ti a che. “Ka hremna tûr che ni a thlen tâk hi.

³²A chapo deuh deuh an inchhuih ang a, an tlu ang, Kaitho tûr tûmah an awm lo vang; A khawpuite chu ka hâl ang a, A chhehvêl thlengin a kâng ral vek ang.”

³³Sipaihote LALPA chuan heti hian a ti: “Israelfaten hnehchhia an tuar a, Juda thlahte pawhin an tuar baw a; Sala mantuten an hrêk bet tlat a; An chhuah duh si lo va.

³⁴Anmahni Tlantu chu mi chak a ni; A hming chu Sipaihote LALPA a ni a. Ram chhôngah râlmuanna a thlen theih nân, an thû chu a țin tlat ang a, Babulon mite chu a chawkbua ve thung dâwn a ni.

³⁵“Khandaihin Kaldai-ho a do ta, Babulona michêngte leh, A miliante leh a mi finge pawh,” LALPAN a ti.

³⁶Khandaihin zâwlnei derte a do va, mi â an lo ni ang. Khandaihin a mi chakte a do va, an zâm zo vang.

³⁷Khandaihin an sakawrte leh an tawlailîrte a do va, An zînga inawmpawlhho zawng zawng nê; Hmeichhia ang lek an lo ni ang. Khandaihin an rohlute pawh a bei zêl a, rawk an tâwk ang.

³⁸An tui chungah khua a khêng a, an kang châr vek ang. Milim kerchawp awmna ram a ni si a, An milemte chu an âtchilh a.

³⁹“Chuvângin thlalêr ramsate leh chinghniate chutah chuan an chêng ang a, Ostrikte pawh an chêng baw ang. Engtikah mah an luah tawh lo vang a, Chhuan zawng zawng thlengin an luah tawh ngai lo vang.

⁴⁰Pathianin Sodom leh Gomorra leh an ținawmte a paih thla ang khân, “Chutah chuan tûmah an chêng lo vang a, A chhôngah mihring fate rêng an awm tawh lo vang.

⁴¹“Ngai teh, hmar lam ata mite an lo kal dâwn, Kâwlkil tâwp ațangin hnam ropui leh Lal tam tak an lo tho suau suau dâwn a ni.

⁴²Thal ngul leh fei an rawn keng ang a; An nun a râwngin, zahngaihna an lantîr lo vang. An âw chu tuipui angin a ri hum hum ang; Indona râlthuama inpei sâ vekin, Sakawra chuangin, an bei dâwn che, Aw, Babulon fanu.

⁴³“Chûng thûte chu Babulon lalin a hriatin A kut a zawi vek a; Lungngaihna an man ta, Hmeichhe nau vei nâ ang maiin.

⁴⁴“Ngai teh u, Jordan phaia sakeibaknei angin a lo chho ang a, Michak awmna hmun a rawn bei ang; A laka ta anni chu ka tâl botîr vat ang. Mi thlan, a chungah lal atâna ka ruat tûr chu tu nge? Keimah ang hi tu nge awm? Kei mi cho tûr tu nge awm? Mi dodal ngam berâmpu chu tu nge ni?”

⁴⁵Chuvângin LALPA thurâwn, Babulon chungah tih a tum leh, Kaldaia chêngte chungah tih a tum chu ngaithla teh u: Ranrual zînga a tê ber chenin a hnûk chhuak ang a, An chênna hmun chawpin a tiram vek ang.

⁴⁶Babulon an lâk thâwm chuan Lei a nghawr nghing a, An țin thâwm chu hnamte zîngah hriat a ni ta.

BUNG 51

BABULON CHHIATNA VÂWRTÂWP

¹LALPA chuan heti hian a ti: “Ngai rawh, Babulon-ho leh min dotute chungah Thli chhia ka tlehtîr teh ang.

²Babulon-ah chuan zâp darhtute ka tîr ang, A ram tiruak vek khawpin ani chu an zâp ang. Chhiat a tawh ni-ah chuan Kîl tin ațangin an do vek ang.

³A thal ngul kuai lai thal kâptuin kâp sela, A thirkawr pawh ha hman hek suh se. A tlangvâlthe chu zuah suh u; A sipai zawng zawng that vek rawh u.

⁴An mi thahte chu Kaldai ramah tlu rem rum sela, Khawlaiahte chuan vit tlang zawk zawk rawh se.

⁵Israel Mi Thianghlîma lakah an ram chu sualnain tikhat tawh mahse, Israelte leh Judate chu an Pathian, Sipaihote LALPA chuan a thlahthlam si lo va.”

⁶Babulon mite zînga ta tâl chhuak rawh u, Mi tinin mahni inchhanhim rawh se! A suahsualna kha boral phah ve suh u, Hei hi LALPA phuba lâk hun a ni e; A la thungrûl dâwn si a.

⁷Babulon chu LALPA kuta rangkachak no a ni țin a, Lei pum pui hrâi rûitu a ni. Hnam tinin a uain an in a; Chu chuan a ti-â zo ta a ni.

⁸Babulon chu a tlachhe rup a, an sawp chhe ta dêr mai. Amah chu sîn ula! A na laiah khân damdawi chulh rawh u; A dam mial mahna.

⁹Babulon chu tihdam kan tum na a, Mahse a dam thei si lo. Kalsan ila, mahni ram țin i pan ang u; A thiam lohnain vân a tawng a, vân lamah an vawrh sâng ta si a.

¹⁰LALPA chuan kan dikzia a tilang ta. Hawh u, LALPA kan Pathian thiltih chu Zion-ah i puang ang u.

¹¹Thalte chu nawt tle var ula! Phâwte la khâwm rawh u! LALPA chuan Medai lalte rilru a chawktho ta e. A thiltum chu Babulon tihchhiat a ni si a, LALPA phuba lâkna a nih vâng leh, A tempul phuba lâkna a nih avângin.

¹²Babulon kulh bangah chhinchhiahna târ ula, Vêngtute tichak sauh ula, Enthlatute dah bawk ula, Chên rûkna buatsaih rawh u. LALPA chuan Babulon mite chungah A tih tum a sawi chu a hlen ta si a.

¹³Aw, nang tui tamnaa chêng, Sum leh paia hausa kha, I hun tâwp a thleng ta, I duhâmna tehkhâwng chawpin.

¹⁴Sipaihote LALPA chuan mahni inchohlin tihian a ti: “Kha ang maia tam mihringin ka tikhat ang che a, An âu khum vak vak ang che.”

¹⁵A thiltitheihnain leilung a siam a; A finnain khawvêl a din nghet a, A hriatnain vânte khi a kâiphah a.

¹⁶A âu a han chhuah a Vânahte chuan tui tam tak a lo awm ta a: “Kâwlkil tin aţangin tuihû a zâm chhohtîr a; Ruah tân kâwlpê a siam a, A sumbâwm ata thlî a chhuah thîn.”

¹⁷Mi tin mai hi mi mâwl, hriatna nei lo an ni; Ker chawp milimin rangkachak chhertute a tizak a; An milim chhûn chu inbumna mai a ni si, Thâw pawh an nei si lo.

¹⁸Thil sâwt lo, kutchhuak dik lo an ni; Hrem an tawh hunah an boral ang.

¹⁹Jakoba Chanvo chu hetiang hi a ni ve lo, Engkim Siamtu a ni zâwk si a; Israel hi a rochan hnam a ni a, A hming chu Sipaihote LALPA a ni.

²⁰“Ka râl do hreipui leh indona hriamhrei i ni a: Nangmah nên hnam tin ka chhu darh ang a; Nangmah nên lalramte ka chhu chhia ang;

²¹Nangmah nên sakawr leh a chungah chuang ka tisawm ang a; Nangmah nên tawlaillîr leh a chungah chuang ka tisawm ang;

²²Nangmah nên hmeichhia leh mipa ka tisawm ang; Nangmah nên upa leh naupang ka tisawm ang; Nangmah nên nula leh tlangvâl ka tisawm ang;

²³Nangmah nên berâmpu leh berâm rual ka tisawm ang; Nangmah nên lo neitu leh bâwngpa chhawr lai ka tisawm ang; Nangmah nên governor-te leh rorêltute ka tisawm ang.

²⁴“Babulon leh Kaldai mi zawng zawng chu Zion-ah i mithmuha thil tha lo an lo tih tawh zawng zawng avângin Ka thungrûl ang,” LALPAN a ti.

²⁵“Ngai rawh, âu nang, tichhetu tlâng lian, Lei pumpui tichhetu, ka do che a ni,” LALPAN a ti. “Ka kut ka phar khum dâwn che hi, Lungpui aţangin ka lum thlâ ang che a, Tlâng kângah ka siam ang che.

²⁶I hnên ata a kila rem tûr lung an la lo vang a, Lungphûm tûr pawh an la hek lo vang, I ram chhe kumkhua tawh zâwk ang,” LALPAN a ti.

²⁷Chu ramah chuan chhinchhiahna târ ula, Hnamte hnênah tâwtawrâwt hâm rawh u! Amah do tûrin hnamte chu buatsaih ula, Amah do tûrin Ararat te, Minni leh Ashkenaz Lalramte chah khâwm rawh u: Amah do tûrin sipai hotu ruat ula; Khâu puang angin sakawr rual khâwm rawh u.

²⁸Amah do tûr hnamte chu inpeih sela, Media lalte, governorte leh rorêltute, A thuhnuaia ram zawng zawngte nên.

²⁹Ram chu mangangin a khûr ang; Babulon chungah LALPA thiltum hlen chhuah tûr chu, Luahtu awm lova Babulon ram tihchhiat vek a ni.

³⁰Babulon michakho an râlâng ta a, An kulh chhûngah an tawm reng mai; An thâ a zuai zo va, Hmeichhia ang mai an lo ni ta; An chênna hmunte an hâlsak ta si a, A kawngkhâr kalhnate a chhe zo ta.

³¹Zualko tlan chuan mi dang a tâwk a, An mi tîrh pawhin mi dang a tâwk bawk a, Khawpui chu kil tinah an la ta, tih thû Babulon lal hnêna hrilh tûrin;

³²Kal kawngte chu an dangchat a, Phairuange an hâl duai duai a, Indo mite pawh an zâm chhe ta.

³³Sipaihote LALPA, Israelte Pathian chuan heti hian a ti: “Babulon fanu chu buh chîl hun laia Hruihzâwl ang mai a ni; Buhseng hun chu a lo thleng thuai dâwn si a.”

³⁴“Babulon lal Nebukadnezzaran Mi ei zo va, mi râwtsawm ta; Bêl ruakah mi siam a, Ramsa hrâng angin mi dawlh a; Ka sa tui tuiin a pum a intipuar a, Mi chhâk chhuak ta a ni.

³⁵Keimah leh ka tîsa an tihduhdahna chu Babulon chungah tla rawh se,” tiin Ziona miten an la sawi ang; Jerusalem pawhin, “Ka thisen mawh chu Kaldai mite chungah awm rawh se!” a la ti ang.

³⁶Chuvângin, heti hian LALPAN a ti: “Ngai rawh, i lamah ka ţang ang a, i phubâ ka lâksak ang che. A tuipui ka tikang ang a, A tuikhur pawh ka tikang bawk ang.

³⁷Babulon chu thil chhe hlâwm khâwm, Sihalte chênna mai a ni ang a, Miten mak tiin an chek khum ang, Luahtu pawh an awm lo vang.

³⁸Sakeibaknei angin an hâhum ang a, Sakeibaknei note angin an ngur chher chher ang.

³⁹An phûr sôsân laiin ruai ka siamsak ang a; Hlim taka an awm theih nân Ka hrâi rûi dâwn a ni, Tho leh lova, an mut hlen dêrna tûrin,” LALPAN a ti.

⁴⁰“Sa talhna hmuna berâm no ang leh, Berâmpa leh kêlpa talh tûr angin, Ka hruai thla hlawm dâwn a ni.

⁴¹“Sesak an lâk dân tak chu âu! Lei pum puiin an chawimâwia chu man a ni ta le! Hnamte zîngah Babulon chu hnuchhawn ram a nih tâk chu!

⁴²Babulon chu tuipuiin a rawn chîm a; Tuifâwn nasa tak chuan a vûr pil ta.

⁴³A khawpuite chu a ţing ţup a, Thlalêr ramro maiah a chang ta, Tûma chên lohna, mihring fate rêng rêngin An paltlang lohna ramah a chang ta.

⁴⁴Babulon-ah chuan Bela ka hrem ang, A kâa a thil lem tawh pawh ka phawrsak ang; Tû hnam mahin an pan khâwm tawh lo vang, Ni e, Babulon kulhpui a chim dâwn si a.

⁴⁵“Ka mite u, a chhûng ata lo chhuak ula! LALPA thinurna namên lo chu tlânzan vek rawh u.

⁴⁶In thinlung a lo zâm chhe palh ang e, Chû rama thuthang chuan tithlaphâng che u suh se (Kum khatah thuthang pakhat a lo awm ang a, kum lehah a dang, Thu dang a lo thleng leh ang a, Ram chhûngah tharum thawhin, Rorêltu leh rorêltu an indo dâwn

si a),

⁴⁷Lo ngai reng mah teh u, Babulon milem kerchawpte ka hrem hun a lo thleng dâwn; A ram pumin a la zahpui ang a, Mi an thahte chu an zîngah an tlu rem rum ang.

⁴⁸Tichuan, vânte, leilung leh a chhûnga awm zawng zawngte chu Babulon avângin hlimin an zai thup thup ang; Hmar lam aţangin rawktute an lo kal dâwn si a,” LALPAN a ti.

⁴⁹Babulon-in Israel a thahte a tlûktîr ang khân, Babulon-ah chuan khawvêl puma mi thahte an tlu ve ang.

⁵⁰Nangni khandaih pumpelhtute u, Kiang daih ula! Ding khawtlai suh u! LALPA chu hla tak aţang pawhin hre reng ula, Jerusalem chu in rilruah riak tlat rawh se.

⁵¹Sawichhiatna thu kan hriatin min tizak a, Kan hnâr kan hmu lian lawrh lawrh mai, LALPA ina hmun thianghlimah pâwn lam mi an lût ta mai si a.

⁵²“Chuvângin, nî-te chu a lo thleng dâwn e,” LALPAN a ti, “A milim kerchawpte ka hrem dâwn si a, Hliam tuarho chu a ram dung tluanin an la rûm ang.

⁵³Babulon chu vân tawngin invawrh sâng mah se, Intichakin inrem sâng ûr ûr mah se, Ka hnên aţangin rawktute an lo kal dâwn,” LALPAN a ti.

⁵⁴Babulon aţangin ţap thâwm a lo rî a, Kaldai ho ram aţanga tihchhiatna namên lo thâwm nê,

⁵⁵LALPAN Babulon a rawk tâk avângin Tui tam tak angin fâwn ri hum humin, Ring zet zetin thâwm nei ţhin mah se, An thâwm rîte chu a tireh ta.

⁵⁶Babulon rîntute an lo kal tâk avângin, A mi huaisente an mansak ta. Mi tin thal ngulte chu an titliak vek a; LALPA chu phuba lâk hman Pathian a nih avângin, A la thungrîl ngei ang.

⁵⁷“A miliante leh a mi fîngte, A governor leh a puitute leh a mi chakte chu ka hrâi rûi teh ang. An mû chu an mu hlen daih ang a, An tho leh tawh lo vang,” tih hi, Lalber, A hming Sipaihote LALPA thuchhuak a ni.

⁵⁸Sipaihote LALPA chuan heti hian a ti: “Babulon kulh chhah takte chu an tichim vek ang a, A kawngka sângte chu hâl chhiat a ni ang; Mipuite thawhrimna chu a thlâwn ang a, Kângmei avângin hnamte chuan an chauh phah ang.”

SERAIA HNÊNA JEREMIA THUPÊK

⁵⁹Juda lal Zedekia rorêl kum lî-na kuma Babulon-a a kal khân, a ruala kal ve Seraia, Maaseia fapa Neria fapa hnênah zâwlnei Jeremian thû a pê a. Seraia chu bungraw enkawltu a ni a.

⁶⁰Tichuan, Jeremia chuan Babulon chung a chhiatna lo thleng tûr zawng zawng chu lehkhâbûah a ziaak vek a, chûng thûte chu Babulon chhiatna thû hlîr a ni.

⁶¹Jeremia chuan Seraia hnênah, “Babulon i thlen hunah hêng thû zawng zawng hi chhiar vek la,

⁶²tihian ti ang che, ‘Aw LALPA, hê hmunah hian mihring leh ramsa pawh an chên tawh lohna tûr leh, kumkhuaa ram dêr tûra tihchhiat i tum thû i sawi tawh kha,’ tiin.

⁶³Hê lehkhahu i chhiar chhuah zawhah, lungtum nê tawn belhbawm la, Euphrates luih paih ang che.

⁶⁴Tihian ti la, ‘Babulon chu hetiang hian a pil ang a, a chung a chhiatna ka thlentîr aţang hian a tho leh tawh lo vang. An châu dêr tawh ang,’” tiin. Chûng zawng chu Jeremia thûte chu a ni.

BUNG 52

JERUSALEM TLÛK DÂN THLÎRLETNA

¹Zedekia chu lal a nihin kum 21 a upa a ni a, Jerusalem-ah kum 11 a lal a. A nu chu Libna khaw mi Jeremia fanu Hamutali a ni.

²Jehoiakima tih dân ang bawkin LALPA mit hmuhah thil sual a ti a.

³LALPA thinurna avângin hê thil hi Jerusalem leh Judai ramah a thleng a, a tâwpah chuan anni chu a hnên ata a paih chhuak ta a ni. Chuvângin Zedekia chu Babulon lal lakah a hel ta a.

⁴A lal kum kuana, thla sâwmna, ni sâwmah chuan Babulon lal Nebukadnezara leh a sipaiho zawng zawng chu lo kalin, Jerusalem hualin an inkulh mup mup a; a vêlin kulh dâi an theu hnan a.

⁵Lal Zedekia lal kum sâwm pakhatna thlengin khawpui chu an hual a.

⁶Thla lîna, ni kua ni chuan, khawpui chhûng chu an ţâm nasat êm avângin, a ram chhûnga mipuite tân ei tûr a awm ta lo va.

⁷Khawpui kulh bang chu an rek pawp a, indo mi zawng zawng an tlânchhia a, Kaldai hovin khawpui bul hnaia an hual chungin, azân azânin bang pahnih kâra lal huan hrûlah chuan an tlân chhuak a. Phai lam kawng an zawh a.

⁸Nimahsela, Kaldai sipaite chuan lal chu an ûm a, Zedekia chu Jeriko phaiah an ûmpha a. A sipai zawng zawngte chu a hnên ata an tlân darh vek a.

⁹Lal chu an man a, Hamath rama Ribla khuaah Babulon lal hnênah an hruai a, ani chuan a chungthû a lo rêl a.

¹⁰Babulon lal chuan Zedekia mithmuh lai ngeiin a fapate chu a that a. Riblaah chuan Juda hotu zawng zawng chu a that vek a.

¹¹Zedekia mitmû a kher chhuahsak baw a; Babulon lal chuan dâr kawl a buntîr a, Babulon-ah a hruai a, a thih ni thlengin tân inah a khung ta a.

TEMPUL LEH KHAWPUI AN RAWK A, AN HÂL

¹²Thla ngâna, chumi thla ni sâwm ni (Babulon lal Nebukadnezara lal kum 19-na)-ah sipai hotu Nebuzaradana, Babulon lal rawngbâwltu chu Jerusalem-ah a lo kal a.

¹³LALPA in leh lal in te chu a hâl a; Jerusalema in zawng zawng bâkah milianho in zawng zawng pawh a hâl vek a.

¹⁴Sipai hotu ruala lo kal, Kaldai sipai rual zawng zawng chuan Jerusalem kulh chu a vêlin an chhu chhe vek a.

¹⁵Tichuan, sipai hotu Nebuzaradana chuan khawpui mi rethei la awmte leh khuaa mipui la awm zawng zawng te, Babulon lal hnêna inpe lûtte leh kut themthiam la awm chhunte chu sala tâng tûrin a khâwm vek a.

¹⁶Nimahsela, sipai hotu chuan ram chhûnga mi rethei thenkhatte chu grêp huan leh thlawhhma enkawl tûrin a hnutchhih a.

¹⁷LALPA ina dâr bante leh LALPA ina dâr tuizêm leh a nghahchhante chu, Kaldai ho chuan an vawkeh vek a, dâr chu Babulon-ah an la vek a.

¹⁸Belpui te, vutlawh te, khâwnvâr tihmihna te, maihûn te, thîrfian te leh puithiamten rawngbâwl nâna an hman dâra siam bungbêl zawng zawngte pawh an la fai vek a.

¹⁹Maihûn te, meivâp dahna te, thleng dar te, bêl te, khâwnvâr dahna te, thîrfian te, no te, rangkachak leh silvara siam thil rêng rêng chu sipai hotu chuan a khâwm vek a.

²⁰Ban pahnih, tuizêm pakhat leh a nghahchhan, a hnuai dâr bâwngpa lem sâwmpahnih chu LALPA in âtâna Solomona siam a ni a, an dâr hman pawh bûk sên loh khawpa tam a ni.

²¹Ban lian te: ban pakhat sân zâwng pawh tawng 18 a ni a, a len zâwng chu tawng 12 vêt a ni a, a chhah lam kut zungli bêng a ni a; a kawrawing a ni.

²²A chhîpah chuan dâr lubâwk a awm a; a lubâwk sân zâwng chu tawng ngâ a ni a, chu chu dâr hlanga chei theibuhfai lemin a tial chhuak a. Ban pahnihna pawh inang renga pomgraneta chei a ni.

²³A pangah te chuan theibuhfai 96 a awm a; a vêla theibuhfaia cheina zawng zawng chu 100 a ni.

BABULON SALAH MIPUITE AN HRUAI

²⁴Sipai hotu chuan puithiam lal Seraia te, amah dâwtu puithiam Zephania leh kawngkhâr vêngtu pathumte chu a man a.

²⁵Khawpui aţang chuan indo mite hotu te, khaw chhûnga lo la awm lal khâwnbâwl mi pasarihte, sipai ziaktu lian, ram mipui zat chhinchhiahtute leh, khawpuia an hmuh chhuah mi dang sawmruk te nêna a hruai chhuak baw.

²⁶Sipai hotu Nebuzaradana chuan chûng mite chu Ribla khuaah Nebukadnezzara hnênah a hruai a.

²⁷Babulon lal chuan Hamath rama Ribla khuaah chuan anni chu a lo tihlum a. Tichuan, Juda mite chu an ram ata sala hruai bovin an awm ta a.

²⁸Nebukadnezzaran sala a hruai mipuite chu hêngte hi an ni: a lal kum 7-naah chuan Juda mipuite chu 3023 an ni a;

²⁹Nebukadnezzara lal kum 18-naah chuan Jerusalem aţangin mi 832 salah a hruai a;

³⁰Nebukadnezzara lal kum 23-naah chuan Nebuzaradana, vêngtu pâwl hotu chuan Juda mi 745 salah a hruai a, an zavai chuan mi 4600 an ni ta a.

³¹Juda lal Jehoiakina chu sala a tân kum 37-na, thla 12-na, ni 25 nî tak chuan, Babulon lal Evil-merodaka chuan a rorêl kum khatnaah chuan Juda lal Jehoiakina chu a kâisântîr a, tân in aţang chuan a hruai chhuak a;

³²Tha takin a bia a, Babulon-a a hnêna awm lalhote lalthutthlêng aia sângin a lalthutthlêng chu a hûnsak a.

³³A tân in silhfênte chu a thlâksak a; tichuan, a dam chhûng zawng chuan a kiangah eia bârin a awm ve ta reng a.

³⁴A dam chhûng zawngin, a thih ni thlengin Babulon lal chuan amah châwmna tûr a chanvo chu ni tin a pe thîn a ni.

TAH HLA

Ziah tu: Jeremia • Ziah kum: B.C. 586-585

‘Zâwlnei Ƨahbelh’ an tih Jeremia’n Jerusalem khawpui a súnna Ƨah hla a ni. Israelten an Pathian kalsana, milem pathian laka an uirêsan avânga Pathianin Babulon sorkar hmanga a hrem tûr chu ngaingam lovin, chhiatna pumpelth tûrin a mite a ngên Ƨhîn a; an sim duh loh avânga Jerusalem khawpui thlu chhe mai tûr lungchhe taka a Ƨah khumna hlâte chu hê bu chhûnga thupui ber hi a ni. Hê Ƨah hla awmze ril zâwk erawh chu, Pathianin a hmangaih êm êm ama mite leh a khawpui ngainat Jerusalem miten a thu an âwih duh loh avânga hrem ngaia an awm ta chu a tuar na êm a ni. Jeremia hmanga LALPAN Ƨah hla a rawn chham chhuak ang bawh hian, kum za tam tak hnûah Isuan Jerusalem a rawn Ƨahkhum ve leh a ni (Mt.23:37-39). Ƨah Hla hi Bible-a bu 25-na a ni a, a chhûngah hian bung 5 a awm a, châng 154 a awm bawh. Kohhran hmangaih tak taktuten hetiang hian kohhran hi an Ƨahkhum fo Ƨhîn a ni.

BUNG 1

JERUSALEM LUNGNGAIHNA

¹A mi zalêng zawnge lènna vângkhua Hmun khawharah a chang ta maw! Hmeithai chan a lo chang ta, Hnam azawnga ropui a nih vei nê! Ram duhawm tak ni Ƨhîn khân Chhiah châwi khua a lo chang tâ!

²Zânah lungchhe takin a Ƨap A biangah mittui a luang a; A duhlai zawng zîngah Hnêmtu rêng a tawng lo ve. A Ƨhênruai zawnge ten vervêk takin an bum a; Dorâlâh an chang zo ta si.

³Mi sal a lo ni ta-Juda chu, Na tuar rêng rêngin a thawk rim; Hnam dangte zîngah chêngin, Chawlhna rêng a hmu lo; Nghaisatuten a mangan lai an nangchîng.

⁴Zion panna kawng a ngui ruai mai, Kût tûra kal rêng an awm ta si lo. A kawngkharte a chul zo ta; A puithiamte an rûm, A nula thianghlimenten nâ an ti, An tuar tlawk tlawk a.

⁵An hmêlmâten hotu nih an chang, An dorâlte lah hmuîngîl e; A sualna tam takte avângin LALPAN a tuartîr a ni si a. Sala tâng tûrin a fanaute râl hmâah kal dem dem.

⁶Zion fanu hnên ata A ropuinain a chhuahsan ta. An hotuten chaw peh tûr hmu lovin Zukchal, a ûmtute hmaa Chau hnêpa tlan ang mai a ni e.

⁷Hrehawm taka an vahvaih lai te khân Jerusalem chuan hnutiang mual liam a thlîr An hlim lai hun te zawnge kha. Tunah zawnge hmêlmate kutah an tlu lût ta, Puitu tûr rêng an awm lo ve, An chan chhiazia hmuin hmêlmâten Nuihzabûrah an hmange si.

⁸Jerusalem zawnge a lo sual êm a ni, A lo bawhlhlawh zo ta si a. Amah ngaisangtuten a saruakzia an hmuin An hmusit zo ta e; A ni, a rûm a, khaw dang a hawi ta.

⁹A bawhlhlawhna chu a pawnfênah a ni; Hma lam hun rêng a thlîr lo ve; Chuvângin a tlûkna pawh a thûk; Hnêmtu rêng a nei lo. “Aw LALPA, ka tuarzia hi mi han en teh, Hmêlmate

inchhek-arbâwm zia hi!”

¹⁰A thil neih hlu tinrêng chungah Hmêlma chuan kut a lek khum a; A hmun thianghlimah hnam dangho lût a hmu reng a, I mite pungkhâwm zînga Tel ve thiange lo, i tihte an ni si a. ¹¹A mite chu an rûm vawng vawng a, Ei tûr an dap a; An thil Ƨha Ƨhain ei tûr an lei, intunnun nân. “Aw LALPA, han en la, ngaihsak teh, min hmuhsit zia hi.”

¹²“Nangni kawng kalte u, in pawisa ve na nge? Han thlîr ve teh u, Ka chungah lungngaihna min tuartîr ang Lungngaihna hi a awm ngai a nih chuan; LALPAN a thinrim nasat laia a rawn thlen a ni si a.

¹³“Chung lam aţangin ka ruh chhûngah mei a rawn tîr a, Chû chuan a rawn hnehlâk a; Ka ke awh nân lèn a zâr a, Mi hawi lêtîr a; Khawhar takin mi siam a, Chau takin ni ka lêng Ƨhîn.

¹⁴“Ka bawhchhiatna nghâwngkawlin min phuar a, A kut ngeiin a phuar khâwm a; Ka nghâwngah mi bahtîr a, Ka tha a tichau zo ta; LALPA chuan ka do hneh lohte kutah min pe ta si a.

¹⁵“LALPA chuan ka hnêna mi huaisente chu a rap hrual a, Ka tlangvâlho tiboral tûrin mipui a pun khâwm a; Sâwrkhura grêp an rap sâwr angin LALPA chuan Juda nula thianghlîm a chîl ta.

¹⁶“Hêngte hian mi tiţap a; Ka mit ata mittui hi a đîrin a đîr a; Mîn thlamuantu, mîn tiharhtu tûr hian mi hlat êm êm si a. Hmêlmâten hnehna an chan avângin Ka fate chu khawharin an awm ta.”

¹⁷Zion chuan a kut phar chhuak mahse, thlamuantu rêng an awm si lo; LALPAN Jakob chungchanga thu a pêk chu A vêla mite a hmêlmâah an chan tûr thû a ni; Jerusalem pawh an zîngah thil bawhlhlawhah a lo chang ta.

¹⁸“A thupêk chu helsan tawh mah ila, LALPA chu a đik reng a ni. Mipui zawnge zawnge u, ngaithla ula, Ka lungngaihnia hi dâwn ve teh u; Ka nula thianghlîmte leh vâl rualte Salah an tân zawn ták hi.

¹⁹“Mîn ngainatute ka han ko va, Mahse mîn bum ta zâwk si a; Ka puithiam leh ka upate chu Intihharh nâna ei tûr an zawn laiin, Khawpuiah an fam ta si a.

²⁰“Aw LALPA, en teh, ka manganzia hi; Ka nun a chi-ai zo ta; Ka thinlung chhûng hi a buai a, Hel hmange ka lo nih Ƨhîn vâng a ni. Pawn lamah khandaih avânga lusûnna, Inah lah thihna ang mai a ni si.

²¹“Ka rûm thâwm an lo hria a, Mahse tuman mîn thlamuan si lo. Ka hmêlmâten ka mangang tih an hria a; I tih a ni tih an hriatin an lâwm. I hun tiam chu han thlentîr la, Ka chan ang han chang ve teh se.

²²“An suahsualna zawnge zawnge i hnên thleng sela, Ka bawhchhiatnate avânga ka chungah i tih angin, An chungah pawh ti ve ang che; Ka rûmna hi a tam si a, Ka thinlung pawh a chau zo ta.”

BUNG 2

JERUSALEM CHUNGA PATHIAN THINURNA

¹LALPA thinurna chhûmin Zion fanu a khuh tâk chu le! Israel mawina chu Vên aţangin leiah a paih thla a, A thinur nî-ah zet chuan a ke nghahchhan a dâwn chang lo.

²LALPA chuan Jakob-ho chenna zawng zawng a lem zo vek a, A lainat si lo va. Juda fanu kulhte chu a thinurin a tichim a; Lei seh chinah a nam thlu vek a; Lalram leh a hotute a titlâwm ta.

³A thinrimna nasa tak chuan Israel kî zawng zawng a sât chhum; Hmêlma hmâah a kut ding lam thawh lovin a lakîr. Meialh angin Jakob-ho a hâl alh a, A kâng fai ta duak mai.

⁴Hmêlmâ anga dingin, a thalngul a kuai; A kut ding lam nên hmêlma chan a chang, Zion fanu puan inah chuan, A mit latu apiang a that zo ta; A thinurna chu mei angin a leih ta.

⁵LALPA chu hmêlma ang mai a ni. Israel a dawlh zo va, A lal in zawng zawng pawh a lem vek; A kulhbingte a tichhia a, Juda fanute zingah hian Lusûnna leh ţahna a va tipung êm ve le.

⁶Huana bûk ang maiin, Ama biakbûk pawh a pawt ţiat ta; Ama mite punkhâwmna hmun pawh a tichhia a; LALPAN Zion-ah chuan kût ni leh Sabat-te pawh a theihngihlîr a, A thinrim hrî thlâin, lal leh puithiamte a hnâwl.

⁷LALPA chuan a maichâm a hnâwl a, A hmun thianghlim chu a hawisan ta a; A lal in bangte pawh hmêlmate kutah a pê. LALPA inah chuan kûtpui hmang tîr angin an ri dur dur a.

⁸LALPA chuan Zion fanu kulhpui chu tichhiat a tum tlat a ni. Tehnain a rîn chhuak vek a; Tichhiat nân a kut chu a sûm si lo; Kulh hmatâwng leh kulhte chu a tuartîr a; An ngui dîn e.

⁹A kulh kawngkate chawpin leiah a pil; A kalhnate a tichhum bung rem rum. A lal leh a puipate lah hnamte zingah an awm a; Dân pawh a awm ta lo va, A zâwlneiten LALPA hnên ami inlârna thu an dawng ta hek lo.

¹⁰Zion fanu upate chu Ngawi rengin leiah an ţhu; An lû-ah vaivut an phul a Saiip puan an sin. Jerusalem nula thianghlimte leiah an kûn.

¹¹Mittui vângin khua ka hmu thei ta lo, ka va mangang tak êm; Ka fanuten chhiat an tawha, Naute leh hnute hne laite pawh tuallaia an chauh dêr avângin, Ka thinlung hi leih buak angin a baw zawih zawih a.

¹²An nute hnênah, “Khaw nge chhang leh uain?” an ti a. Khawpui tuallaiah hliam ang maiin an thidang, An nute mal chungah fam dairial an chang ta.

¹³Aw, Jerusalem fanu, engtin nge maw ka hnem dâwn che a, Eng nên nge ka tehkhin ang che? Aw, Zion fanu thianghlim, engtinngê ka thlamuan tâk ang che? I chhiatna hi tuipui ang maia zau a ni si a; Tû takin tidam thei che maw le?

¹⁴I saltângte hruai kîr an nih theih nân, In zâwlneite lahin inlârna depdê leh dawhâ mai an hmuhsak che a; I sualna pawh an phawrh duh si lo, I tâna an hrilhlâwkna chu dâwtthu leh bumna mai a ni si a.

¹⁵A kal pêl apiangin kut an ben khum che a; Jerusalem fanu chuan lû thingin an chek khum: “Hê khawpui hi maw ni ‘mawina

famkim, Khawvel pum hlimna chu?” an ti a.

¹⁶I hmêlma zawng zawngten kâ an ânkhum che a; Hachang an ţhial khum che. “Kan lem zo ta le! an ti a, Kan nghahfâk chu hê ni hi a lo ni e. Kan hmu ta e, kan hmu ta e!” an ti a.

¹⁷LALPA chuan a thiltum a ti zo ta a; A thu pawh a hlen ta, Hmasânga thu a lo pêk tawh chu. Lainat hauh lohvin a paih thla a, I chungah a lâwmtîr, hmêlma chu; I dorâl hote ki a châwisâng ta.

¹⁸An thinlungin LALPA a au ta, “Aw, Zion fanu kulhpui, Mittui chu achhûn azânin lui angin luang sela; Chawl hahdam lovin, i mittui pawh hul suh se.

¹⁹“Tho la, azân azânin au rawh, Zân vên tîrh aţangin ţan la; LALPA hmâah i thinlung chu tui angin leih bua la, I naupangte an dam theih nan, a lam hawiin kut phar rawh, Kawthlêr tinah rilţama an chauh tawh hi.

²⁰“En teh, aw LALPA, ngaihtuah la! He thil hi tu nge maw i tichchan le? Hmeichhiaten an fa duat hliaw hliaw, An enchimloh fate sâ an ei ang maw? LALPA hmun thianghlimah puithiamte leh zâwlneite chu Thah mai mai tûr em ni le?

²¹“Naupang leh tarte pawh, Kawthlêrah an tlu rem rum a; Ka nula thianghlimte leh ka tlângvâlthe khandaih lakah an tlu; I thinrim nî-te khân i that a, Lainat lovin i sâm buan buan si a.

²²“Mîn hualtu mi hlauhawmte chu, Kût ni ang maiin i khâwm a. LALPA thinurna nî-ah chuan, Him dama chhuak rêng an awm lo. Ka hrin leh chawi tleite chu, Ka hmêlmaten an tiboral ta.”

BUNG 3

ZÂWLNEI LUNGNGAIHNA LEH BEISEINA

¹Kei hi a thinurna thîr tianga a tuartîr lai hmutu ka ni a.

²Hmun thim, êng awm lohnaah min hruai a, mi kaltîr a.

³A kutthlak chu ni khatah pawh wawi tam tak ka tuar a ni.

⁴Ka tîsa leh ka vun a titar zo va, Ka ruhte a titliak a.

⁵Mi hual vêl a, khâkna leh lungngaihna mi tuam tlat a.

⁶Thi daih tawh ang maiin hmun thimah mi awmtîr a.

⁷Chhuak thei lovin mi hung phui tlat a; Ka kawlbun a tirit êm êm a.

⁸Ţanpui dîla ka au ka au pawhin, Ka ţawngţaina mi khârsak zêl si a.

⁹Ka kawng chu lung chherin a hnawh ping a; Ka kawng chu mi herh kawhsak a.

¹⁰Ka lakah hian mi lo chângtu savawm ang leh, Sakeibakneiin mi châng rûn angin a awm.

¹¹Ka kawng ata mi hruai bovin mi pawtsawm a; Khawhar takin mi siam a.

¹²A thalngul a kuai a A kah tûrah mi târ chhuak a.

¹³A thal bâwma thalte chuan ka pum a kâp tlang ta.

¹⁴Ka mite zawng zawng nuihzabûr ka ni ta a– Nilêngin hla min sak el ţhîn.

¹⁵Khâkna hlîrin mi hnawh khat a, Thil kha tak mi intîr a.

¹⁶Lung ţhîlin ka hâ mi tauhbalsak a, Vaivutin mi khuh a.

¹⁷Muanna ata ka nun i lakiang daih a, Hausate awm dân pawh ka hre ta lo ve.

¹⁸“LALPA hnêna ka chakna leh ka beiseina a bo ta,” ka ti a.

¹⁹Ka tuarna leh vahvaihia te, Sai leh thil khâ te kha hre reng ang che.

²⁰Ka nunna hian a hre reng a, Mi chîmpil ta hial mai a.

²¹Hei hi ka han hriat chhuah hian, Beiseina ka lo nei leh ta.

²²Tihborala ka la awm lo hi LALPA zahngaihna a lo ni reng mai, A lainatnate chu a chuai ngai si lo va.

²³A thar zêl e, atûk têlin, A ropui e, i rinawmna hi.

²⁴“LALPA chu ka chanpual a ni,” ka nun hian a ti a, “Chuvângin amah chu ka beisei chhan a ni!”

²⁵Amah nghaktute chungah LALPA chu a tha a ni, Amah zawngtute chungah pawh.

²⁶LALPA chhandamna beiseia Nghah veng veng chu a tha si a.

²⁷Teirâwl lai aṭanga miin nghâwngkawh a bâh hi a tha a ni.

²⁸Pathianin a bahtîr a nih avângin Ngawi rengin thutpui hle sela;

²⁹A kê chu vaivutah dawh rawh se, Beisei tûr a la awm mahna.

³⁰A biang chu a bêngtu lamah dawh sela, Chirhthehnain lo khat zâwk rawh se.

³¹LALPA chuan a paih thla hlen dâwn si lo va.

³²Tilungngai thîn mahse, A khawngaihna ngahzia ang zêlin Lainatna a lantîr leh ngei ang.

³³Mihring fate tihlungngaiha, Tuartîr hi a duh dân a ni si lova.

³⁴Leia saltâng zawng zawngte A kephah hnuaia rahbeh te,

³⁵Chungnungbera mithmuha Mihringin a phû rêng dikna hnâwlsaka,

³⁶Thiamthu sawi thei lova awmtîr hi LALPAN a pawm lo.

³⁷LALPAN thû a pêk si lohva Thu puanga, thlentîr thei chu tu nge ni?

³⁸Chungnungbera kê aṭang hian a ni lo’ m ni Thu chhia aṭha a chhuah thîn ni?

³⁹Engati nge mihring hian ama sual vânga an hrema a phunnawi thîn?

⁴⁰Kan kawngte hi chhûtin, finfiah ila, LALPA lam i hawi leh ang u;

⁴¹Vâna Pathian lamah kan thinlung leh kutte hi i phar chho vang u.

⁴²Kan bawhchhia a, i lakah kan hel a; Min la ngaidam si lo va.

⁴³Thinrimnain i intuam a, i ûmzui a; Lainat hauh lovin i that ta a.

⁴⁴Ṭawngṭainaten an kal tlang theih loh nân Chhûmin i inkhuh tlat a.

⁴⁵Mite zînga bawhlhlawh leh hnâwmhnêah min siam ta a nih hi.

⁴⁶Kan hmêlma zawng zawngten min ânkhum a.

⁴⁷Thil hlauhawm leh thang te, Chhiatna leh rîralnaten min tlâkbuak a.

⁴⁸Ka fanute tihboral an nih avângin, Ka mittui hi lui angin a luang thîn.

⁴⁹Dan rual lohvin ka mittui a luang reng a, Hul lai rêng a nei lo,

⁵⁰LALPAN vân aṭanga mi rawn hmuh hma chuan.

⁵¹Ka khawpui fanu zawng zawngten, Tuarna mittui min thlen a ni.

⁵²Chhan awm lovin ka hmêlmâten sava angin min veh a.

⁵³Khur chhunga thlâka mi tihhlum an tum a, lungin min dêng a.

⁵⁴Tuite chuan ka lu a chîmpil vek a; “Ka thi dâwn ta a nih hi!” ka ti a.

⁵⁵Aw LALPA, khur thûk ber aṭangin I hmingin ka au lawm lawm che a.

⁵⁶Ka âw i lo ngaithla a: “Ka rûm a, ka mangang au âw lakah I beng lo hup suh ang che.”

⁵⁷Ka auh ni che khân mi lo hnaih a, “Hlau suh!” mi lo ti a.

⁵⁸Aw LALPA, ka chungthû mi sawisak a; Ka nun hi i tlan chhuak ta.

⁵⁹Aw LALPA, ka laka an dik lohzia i hmu a; Ka chungthû min rêlsak ang che.

⁶⁰Phuba an lâkna zawng zawngte, Kei mi phiarna zawng zawngte i hmuh tâk hi.

⁶¹Aw LALPA, keimah min sawichhiatna leh, Min phiarna tinrêng i hriat kha.

⁶²Aw LALPA, ka hmêlmâten ka chungchâng sawiin nilêng lêngin an phun sur sur a.

⁶³An thut leh an din dân te chu en la; An tihelna hlâ ber ka ni e.

⁶⁴Aw LALPA, kut an thlak ang zêlin Thunggrûl ve ang che.

⁶⁵Lungngaihna thinlung puttîr la; I ânchhia an chungah tla rawh se!

⁶⁶LALPA vân hnuaia aṭangin Thinrim takin ûm la, tiboral ang che.

BUNG 4

ZION TLÛKCHHIAT DÂN

¹Rangkachak chu a va thîm ta êm! Rangkachak fim chu a va danglam ta ve! Hmun thianghlim lungte chu Kawthlêr tinah a darh tâk nuaih mai le.

²Rangkachak fim anga hlu Zion fapate chu, Engtizia nge bêlvawtu hlum ang leka an ngaiha, Bêlvawtu kutchhuak ang leka ngaih a nih tâk!

³Sihalte takngial pawhin an hnutein an note an chawm a; Ka fanu vê te zawng, thlalêra ostrik ang maia nunrâwng an ni si.

⁴Nau hnute hne laite lei chu dang chârîn an dangah a bet a; Naupangten ei tûr an ngên a, Mahse tûman an pe si lo.

⁵Chaw tuihnai ei thînte chu Kawtlaiah an tàmchhâw a; Puan senduk sin te khâ Vutdûrah an tâk tak mai mai a.

⁶Ka fanute bawhchhiat hremna hi Sodom sual hremna aiin a nasa zâwk a, Kut thawh lohvin mitkhapkar maia tihchhiat a nih kha!

⁷A Nazarit-mite chu vûr aia vâ, Hnutetui aia vâ zawk an ni; Taksaah rubi-te aia sâr zâwk niin, An landânah Saphir ang mai an ni.

⁸Tunah zawng meihawl ang maia dum an ni a; Khawlaia an kal te pawh hriat theih an ni lo; An vunin an ruh a khuh tawk tawk a, Thing ang maiin an ro zo va.

⁹Khandaiha thi tate chan chu Rilâma thite chan aiin a tha zâwk; Lova thlaite ei châk ngawih ngawihin Lungngai takin an râwp ral si a.

¹⁰Lainatna ngah tak nû-te kut chuan An fate sâ an chhûm hial a; Ka fanuten chhiatna an tawh meuh chuan An ei ta hial mai le.

¹¹LALPA chuan a thinrimna a hrithla a, A thinurna nasa tak chu a leih baw ta. Zion-ah meipui a chhep a, A lungphûmte lamin a kâng ral ta.

¹²Leia lalte leh khawvela chêng zawng zawngte pawhin, Hmêlmâte leh rûntuten Jerusalem kulh chhûng Lût theiin an ring ngai lo a nih kha—

¹³A zâwneiho sualna avâng te, A puithiamho bawhchhiat vâng te a lo ni zâwk e, An zingah mi dik thisen an chhuah si a.

¹⁴Mitdelin khawlaiah te an vak vêl a; Thisen kaiin an intibawhlhlahw a, An silhfênte chu tûman an khawih duh lo.

¹⁵“Bawhlhlahwhho, kal bo rawh u! Kal bo rawh u, kal bo rawh u, Mìn khawih hlek ang e!” tiin miten an au khum a. An tlânchhia a, an vahvaihna rama mite lahin “Heta an awm kan phal tawh lo,” an lo ti bawk si.

¹⁶LALPA hmêlin a ûm darh hlawm a; A ngaihsak tawh si lo va. Mipuite pawhin puithiamte an pawisa tawh lova, Upate zahderna pawh an nei tawh hek lo.

¹⁷Mit tla dâwnin tanpuitu kan thlîr, Puitu tûr rêng an awm si lo; Mìn chhandam thei tûr hlei lo Hnam kan lo thlîr vak vak a.

¹⁸Kan hnû an rawn chhui zêl, Khawlai pawh kan rap ngam lo ve. Kan tâwp a hnai ta; Kan hun a liam a, Kan tâwpna ni a lo thleng ta si a.

¹⁹Mìn ûmtute chu chung a lêng mupuite aiin an chak si. Tlângah te mìn ûmzui zêl a, Phûlah te mìn lo châng a.

²⁰LALPA hriakthih, kan thâwkna hnâr ber chu, An khur chhûngah an âwk ta si a, “A thlazâr hnuaiah hnam dang kârah kan khawsa ve mai ang,” kan lo ti kha a ni a.

²¹Aw, Edom fanu, hlimin lâwm rawh, Uz rama chêng i nih kha! No chuan i hnên a rawn thleng ve ngei dâwn e, Saruaka insiam khawpin i la rui ve ang.

²²Aw, Zion fanu, i sual hremna chu I tlâk zo ta e; Salah chuan a tântîr tawh lo vang che. Nang, Edom fanu erawh chu, I khawlohna chu a rawn hmû ang a; I sualnate pawh a hâi lang ang!

BUNG 5

DINTHAR LEH DÎLA TAWNGTAINA

¹Aw LALPA, kan chung a thil thlengte kha hre reng ang che; En teh, kan mualpho zia tak kha aw!

²Kan rochan ram chu hnam dangten an luah ta, Kan inte pawh pâwn lam miten an nei ta a.

³Fahrah leh vâkvai mai kan lo ni ta, Kan nute chu hmeithai ang mai an ni e.

⁴Tuisik chenin a man pêk a ngai a, Kan thingtuahte pawh man nei vek a ni.

⁵Mìn ûmzui reng a; Chawl hman lèk lovin kan thawk rim a.

⁶Ei tûr kan hmuh theih nân Aigupta leh Assuria-ho kutah kan tlu lût a.

⁷Awm tawh lo kan thlahtute sual mawh chu, Kan chungah a lo tla ta si a.

⁸Chhiahhlawh takngialte pawh an intilal a; Anni laka min chhantu rêng an awm si lo.

⁹Khandaih avângin thlalêrah Thih huama ei tûr dap a ngai ta.

¹⁰Tâm hrî kan tawrh nasat avângin Kan vun hi thuk angin a sa huam a.

¹¹Zion-ah nû-te an pâwngsual a, Nulate chu Juda khawpuiah te an pawngsual a.

¹²Lal fate chu an bânah an khai a, Upate pawh an zah hek lo.

¹³Buhhernaah tlangvâltan buh an her a; Naupang thing phur an pai chawn chawn.

¹⁴Upaten kulh kawngka an chang pha ta lo, Tlangvâltan rimawi an tum tawh hek lo.

¹⁵Kan thinlung hlimna a reh ta a; Kan lâm chu lusûnnaah a chang zo ta.

¹⁶Kan lû ata lallukhum a tla. Chawh tak rawh i, kan sual rah a ni si a!

¹⁷Hei tak hian kan thinlung a tichau va; Hêng thilte hian kan mit a tivai zo ta;

¹⁸Sihalte tuallênna tâwk lekin Zion Tlâng a lo ram zo ta si a.

¹⁹Aw LALPA, nang chu chatuan mi i ni a; I lalthutthlêng pawh kumkhuaa awm tûr a ni e.

²⁰Engah nge hetia min theihnghilh renga, Hei chen min hawisan tâk le?

²¹Aw LALPA, i lam min hawitîr la, min dinthar leh rawh; Tûn hma ang khân min siamthar leh ta che,

²²Chîn lêm nei lova min hnâwl zêla, Kan chungah i thinur reng dâwn a nih êm loh chuan!

EZEKIELA

Ziah tu: Ezekielia • Ziah kum: B.C. 620-530

Ezekielia hming awmzia chu 'Pathianin a tichak ang' tihna a ni. Babulona Juda saltângte zîngah khan an hruai tel ve a. A lehkhahu ziah aţang hian mi rinawm leh tumruh, a puithiam hnaa inpe tlat mi a ni tih a lang. Daniela leh Hmangaih Johana te ang bawka Israel ram pâwna awm laia hrilhlâwkna thuhrlitu a ni a; mi dangte ang bawkin inlârna leh entîrna (symbol) a hmang uar hle. Ezekielia bu hi Israel hnam pumpui tâna LALPA âw a ni. Amah saltâng a ni ve baw a, chuvângin a thuchah pui ber chu: sualna avânga Israel hnam tlûkchhiatzia leh, an saltânna aţanga chhuak lehin, anmahni ramah hnam angin Pathianin a din thar leh dâwn tih thû chu saltângten rinna an hloh loh nân leh fuih nâna puan darh chu a ni. Jerusalem tlûkchhiat hma lawk khân LALPA ropuina chuan a lo chhuahsan tawh a (11:23); kum sâng lalramah chuan chû Lapa ropuina chu Jerusalemah a lo kîr leh dâwn a ni (43:2). Ezekielia bu hi thupui pasarihah then theih a ni: (1) Ezekielia Kohna, 1-3. (2) Jerusalem chung hremna lo thleng tûr laka zilhlâwkna (4-24). (3) Jentail Hnamte chung hremna (25-32). (4) Vêngtu a nihna anga Ezekielia mawhpurhna (33). (5) Hun hnuhnunga Israel ram thar lo din dan tûr (34-39). (6) Kum sâng lalram Tempul leh Pathian biak dân (40:1-47:12). (7) Kum sâng rorêl huna ram inthen dân tûr (47:13-48:35). Ezekielia hi Bible-a lehkhahu 26-na a ni a, a chhûngah bung 48 leh châng 1,273 a awm.

BUNG 1

EZEKIELA HNENA PATHIAN INLÂRNA

¹Kum 30-na, thla li-na, a ni ngâ nî chuan, Kebar Lui kama saltângte zîngah ka awm a, vânte chu a lo inhawng a, Pathian inlârna ka hmu ta a.

²Chumi thla ni ngâ nî chu, lal Jehoiakina saltân kum ngâna a ni a,

³LALPA thû chu puithiam Ezekielia, Buzia fapa, Kaldai rama Kebar Lui kama awm hnênah chuan a lo thleng a, a chungah chuan LALPAN a kut a ngah a.

⁴Tichuan, ka han hawi vêl a, ngai teh, hmar lam aţang chuan thlipui a lo thawk mup mup a, chhûm dur khup kârah chuan kâwl a phe zawr zawr a; a vêl chu a êng kual pup a, thi hna rawng sen ang hian a laia meipui awmna chu a vâm sen huam mai a.

⁵A chhûng aţang vêk chuan thil nung ang palî an lo chhuak a. An lan dân chu hetiang hi a ni: mihring nêna inanna an nei a.

⁶Hmai palî leh thla palî an nei theuh va.

⁷An kête chu a ngîl hle a, an kephah chu bâwng no ke tin ang a ni. Dâr nawhtlêt rawng ang hian an êng a.

⁸An panga thla palî hnuaiah chuan mihring kut ang hi an nei theuh va; hmai palî leh thla palî an nei theuh baw a.

⁹An thlâte chu a insi ţap a. Thilnungte chu an kal zâwngin inher chuang lovin, hma lam zâwng ang vekin an kal mai a ni.

¹⁰An hmêl lan dân chu, mihring hmêl ang an pu theuh va; ding lamah sakeibaknei hmêl ang, vei lamah bâwngpa hmêl ang a ni a, mupui hmêl ang an pu theuh baw a.

¹¹Chutiang hmêl chu an pu a. An thlâte chu chung lamah an zâr pharh a; an thla pahnih hmâwr intawk phâin an zâr a, an thla pahnihin an taksa an khuh a.

¹²Mahni hmazâwn theuhah an kal mai a; thlarauvin kal tûra a tihna apiangah, inher lovin, hma zâwngin an kal mai a ni.

¹³Chûng thilnungte lan dân chu, mei alh hluah hluah ang hi a ni a, thilnungte kârah chuan meichher ang hian a de tawn zawr zawr a. Meialh chu êng tak a ni a, chuta ţang chuan kâwlphe a lo de chhuak a.

¹⁴Thilnungte pawh chu kâwlphe angin hma lam leh hnung lamah an tlân tawn zawr zawr a.

¹⁵Chûng thilnungte ka en reng lai chuan, ngai teh, thilnung palîte zâwn theuhah chuan leia inngat tawlailîr ka hmu baw a.

¹⁶Tawlailîrte pianhmang leh thawh dân chu, beril lung rawng nêna a inang a, an palîa an landan chu a inang vek a ni. An hnathawh dân hmangah chuan, tawlailîr ke chhûnga tawlailîr dang awm ve ang hi a ni.

¹⁷An chêtsawn chuan, inher lovin, an sîr li zâwnah eng zâwng pawhin an che sawn thei a; an inher kual ve lo.

¹⁸Tawlailîr palîte ke tlâng bial chu, hlauhawm khawpa sâng a ni a; a kual chhuakin mit hlîrin a khat a.

¹⁹Thilnungho chu an chêtsawn chuan, an kête chu an sîrah an kal ve zêl a; thilnungte chu lei aţanga chawi kân an nih chuan, tawlailîrte pawh chu chawi kânin an awm ve zêl a.

²⁰Thlarau kal duhna apiangah an kal zêl a, chutah chuan thlarau pawh a kal ve zêl a; thilnungte thlarau chu ke kual chhûnga a awm avângin, tawlailîr kête nêna chuan a ruala châwi kânin an awm thîn.

²¹Chûngho an kal chuan, anni pawh an kal ve a; an din leh an ding ve zêl a; lei aţanga châwi kân an nih chuan, an rualin tawlailîrte pawh chu châwi kânin an awm ve zêl a, thilnungte thlarau chu ke kual chhûngah chuan a awm si a.

²²Thilnungho lu chung chu vân boruak dârthlalang fim tlang vek ang maia thiàng kûkin, an lu chungah chuan a inzâr pharh a.

²³Vân boruak zau hnuaiah chuan ngîl takin, a in hawi tawnin an thla an zâr a. An thla pahnih chu an zâr a, pakhatin sîr lehlam an khuh a, an thla dangin an pangti lehlam an khuh a.

²⁴An han kal sawn laia an thlazâp rî ka hriat chu, tui tam tak rî ang a ni a, Engkimtithia âw ang mai leh, sipai rual thâwm rî mur mur ang a ni; che lova an din chuan, an thlâte chu an khup a.

²⁵An dina, an thlâte an khup hnû chuan, an lu chung zâwn vân boruak aţang chuan âw a lo chhuak a.

²⁶An lu chung zâwn vân boruakah chuan lalthutthlêng ang tak hi a awm a, a lan dân chu sapphir lung ang hi a ni; lalthutthlêng ang tak chung sâng takah chuan mihring ang tak hi a awm a.

²⁷A kâwng achin chung lam lan dân ka hmuh chu, thi sen chi ang leh, mei ang takin a hual vêl vek ang mai hi a ni; a kâwng achin hnua lam lan dân ka hmuh chu, mei ang maia êng kual pup

hi a ni bawk.

²⁸Ruah sêr nia chhâm zînga chhimbâl lo zâm kual pup ang mai hian, a vêl zawng zawng chu a êng kual pup mai a ni. Hei hi LALPA ropuina anpui landân chu a ni a. Chutiang thil ka hmuh chuan, ka bawkkhup thlawp a, ka hnêna thusawitu âw chu ka hre ta a.

BUNG 2

HELMANG ISRAELTE HNENA TIRH EZEKIELA

¹Ani chuan ka hnênah, “Mihring fapa, i kêin ding la, tichuan, ka be dâwn che nia,” a ti a.

²Thlarau chu ka chhûngah a lo lût a, ka hnênah thu a sawi a, kêin mi dintîr a; min betu chu tu nge a nih ka hre ta a.

³Ani chuan ka hnênah: “Mihring fapa, Israel fa helhmang hnam, ka laka hel chîngte hnênah ka tîr ang che; an thlahtute leh anmahni ngei pawhin wawiin thleng hian ka lakah an la bawhche reng a ni.

⁴Zahna rêng nei lo, luhlul bawk si an ni a. An hnênah ka tîr ang che a, heti hian hrilh ang che, ‘Lalpa PATHIAN chuan heti hian a ti e.’

⁵Helhmang hnam an ni si a—chuvângin an ngaithla emaw, ngaithla lo emaw—an zîngah zâwlnei a awm tih an hre tûr a ni.

⁶“Nang, mihring fapa, lênglêng leh hnim hlîngnei zînga awm, khawmualkaikung zînga chêng pawh ni mahla, anni chu hlau suh la, an thu pawh hlau hek suh; hel hmang mai an ni a, an thu chuan vau dai che suh sela, an hmêl lan dânin a tizâm tûr che a ni hek lo.

⁷Hel hmang tak an nih avângin, an ngaithla emaw, ngaithla lo emaw, ka thu hi an hnênah sawi ngei ang che.

⁸Mihring fapa, nang erawh chuan ka thu hrilh che hi ngaithla rawh. Khângho helhmang hnam ang khân awm ve suh; i kê ang la, ka pêk apiang che hi ei ang che,” a ti a.

⁹Chutia ka han en chuan, kut hian mi rawn ban a; ngai teh, kutah chuan lehkhabu zial a awm a.

¹⁰Ka hmâah chuan a kaiphah a; a chhûng lam leh pâwn lamah chuan thuziak a awm a, chuta thu inziakte chu tahna te, sînna te leh chungpikna thûte a ni.

BUNG 3

¹Heti hian min hrilh bawk a, “Mihring fapa, i thil hmuh hi ei la; hê lehkhabu zial hi ei rawh, kal ta la, Israel chhûngkaw hnênah thu va sawi ang che,” a ti a.

²Tichuan, ka kê ka âng a, chû lehkhabu zial chu mi eitîr ta a.

³Ka hnênah, “Mihring fapa, i pum tikhat la, hê lehkhabu zial ka pêk che hian i pum hnawh khat rawh,” a ti a. Chutia ka han ei chu, ka kâah chuan khawizu ang maiin a thlum a.

⁴Ka hnênah: “Mihring fapa, Israel chhûngte hnênah kal la, an hnênah ka thû va sawi rawh.

⁵I tawng thiam loh leh tawng hriat harsate hnênah ni lovin, Israel chhûngkaw hnêna ka tîrh che hi,

⁶i hriatthiam loh leh tawng hriat harsa hmanngu mi tam tak hnênah a ni lo ve. Chûng mite hnênah chuan ka tîrh che hi, an

ngaithla duh zâwk ngei ang che.

⁷Israel chhûngkuate erawh chuan an bengkhawn duh lo vang che, kei pawh min ngaihsak duh lo a ni si a; Israel chhûngkua zawng zawng chu zahna rêng nei lo, luhlul bawk si an ni a.

⁸Ngai teh, anmahni lakah i tuang ka tihchahsak che a, anni lakah chuan tawhkhîrh takah ka siam che hi.

⁹I chal pawh meilung aia chang zawkin ka siam ta e; helhmang hnam ni mahse, anni chu hlau suh la, an hmêl lan dân maiin tizâm che suh se,” a ti a.

¹⁰Chu lo pawh ka hnênah: “Mihring fapa, thû ka hrilh apiang che chu i bengin ngaithla la, i thinlungah vawng tlat rawh.

¹¹Kal la, i chipui saltângte hnênah chuan va kal la, an hnênah thu va sawi rawh, an ngaithla emaw, ngaithla lo emaw, ‘Lalpa PATHIAN-in heti hian a ti,’ tiin va hrilh rawh,” a ti a.

¹²Thlarau chuan mi châwikâng a, ka hnung lamah chuan: “LALPA ropuina chu ama hmun aţangin châwimâwi rawh u!” tiin khawpui anga rî dur dur ka hrîa a.”

¹³Thilnunge thla hmâwr intawr rî te, an bula tawlailîr rî te leh thâwm ri huau huau chu ka hre bawk a.

¹⁴Tichuan, Thlarau chuan mi châwikâng a, mi labo ta a, kei chu thinrim t̄eh chungin ka kal a; mahse LALPA kut chu ka tân chelh rual a ni si lo va.

¹⁵Chutichuan, saltângho awmna, Kebar Lui kama Tel Abib chu ka va thleng a; an t̄hutnaah chuan ka va t̄hu ve a, chutah chuan mak ti takin ni sarih ka awm a.

RÂLVÊNGTU EZEKIELA

¹⁶Ni sarih hnûah chuan LALPA thû chu ka hnênah a lo thleng a,

¹⁷“Mihring fapa, Israel chhûngkaw tân râlvêngtûah ka siam che a; chuvângin ka kê aţangin thû ngaithla la, ka zilhna thû hi hril darh ang che:

¹⁸Mi suaksual hnênah, ‘I thi ngei dâwn a nia,’ ka tiha, nangin zilhhauhna i pêk si lohva, mi suaksual chuan a nun chhan nân, a sualna kawng kalsan tûra i zilh si loh chuan, chu mi suaksual chu a sualnaah chuan a thi ang; nimahsela, chu mi thisen mawh chu i lakah ka phû ang.

¹⁹Mi suaksual chu i zilh pawha, a suahsualna a kalsan duh loh erawh chuan, a sualnaah ngei chuan a thi ang a; nang erawh chu a lakah i fihlîm dâwn a ni.

²⁰“Mi dikin a dikna hawisana, thilsual a tiha, a hmâah t̄lûkchhiatna ka dah chuan, a thi ang; nangin, zilhhauhna i pêk loh avângin a sualnaah chuan a thi ang a, a thiltih avânga dikna a lo neih pawh hriatreng a ni lo vang; a thisen mawh erawh chu i lakah ka phû ang.

²¹Mi dik chu sual lo tûra i zilhhauhva, thil sual a tih loh bawk chuan, zilhhauhna a pawisak avângin a nung ngei ang a; i nunna pawhin a him phah bawk ang,” a ti a.

²²LALPA kut chu ka chungah a lo thleng a, “Tho la, phaizâwlah va kal chhuak la, tah chuan ka lo bia ang che,” min ti a.

²³Tichuan, ka tho va, phaizâwlah chuan ka va kal a, ngai teh, Kebar Lui kama ka hmuh ang mai khân, LALPA ropuina ding chu

ka va hmu a; ka bawkkhup a.

²⁴Thlarau chu keimahah a lo lût a, ka kêin mi dintîr a, mi bia a, tihian a ti a: “Kal la, i inchhûngah va inkhârkip rawh.

²⁵Aw, nang, mihring fapa, hruiin an hling ang che a, an zing ata i tâl chhuah theih loh nân, anmahni nân an phuar belhbawm tlat ang che.

²⁶I lei chu i dangah ka behtîr ang a, tichuan i tawng thei lo vang a, hetiang helhmang chhûngkaw tâna zilhtu pawh i ni tawh hek lo vang.

²⁷Mahse, nang nêna kan inbiak apiangin i kê hi ka hawnsak zêl ang che a, ‘LALPA Pathianin heti hian a ti,’ i ti tûr a ni. A duhin ngaithla sela, a duh lovin ngaithla lo mai rawh se; helhmang chhûngkua an ni miao si a.

BUNG 4

JERUSALEM HUAL DAN A LEMA ENTIR

¹“Nang pawh, mihring fapa, hlum phêk lâ la, i hmâah dah la, Jerusalem khawpui lem siam rawh.

²Khawpui hualna siam la, a vêlin leiin chhûng pawnsak vek rawh; sipai riabukte siam la, a vêlin kulh sut chhiatna rem chhuak vek ang che.

³Thîr phêk la bawk la, nang nêna in inkâr bang atân dah ang che. Khaw lem chu hmachhawn la, hual a lo ni ang a, nangmah ngeiin i hual tûr a ni. Chû chu Israel chhûngkaw tân chhinchhiahna tûr a ni.

⁴Vei lam delhin mu la, a chungah Israel chhûngkaw khawlohna chu ngat rawh. Chutianga i mut ni zât chu an khawlohna i phurh tûr chu a ni.

⁵An khawlohna kum chu i chungah ka ngat ang a, chû chu ni 390 a ni; chumi chhûnga Israel chhûngkaw khawlohna chu i phur dawn a ni.

⁶Chumi i tih zawhah i ding lam delh zawnngin mu leh la; Juda chhûngkaw khawlohna chu ni 40 chhûng i phur leh tûr a ni. Kum khat aiah ni khat zêl ka tuartîr ang che.

⁷Chuvângin, Jerusalem hual zawnngin hmachhawn rawh; i bâl hlim sauh sauh la, a chhiat tûr thu puan khum ang che.

⁸I hual nite i tlingtlâk hma loh chuan khawi lam maha inher thei lovin ka khuahkhîr tlat ang che.

⁹“Wheat te, barli te, bê te, dailuah te, buhtun te leh mîm te lakhawm la; bêl pakhatah dah khawm la, chûng chuan chhang insiam rawh. I vei lam delha ni 390 i mut chhûng zawnngin i ring tûr a ni.

¹⁰Ni khata i chaw ei tûr chu sekel sawmhni h bûk zêl a ni tûr a ni; i ei zauh zauh thîr tûr a ni.

¹¹Tui pawh hin khat hmun ruka thêna hmun khat zêl i in ang a; i in zauh zauh thîr tûr a ni.

¹²Barli chhang ei angin i ei ang a; an hmuhah mihring êk rovin i ur hmin tûr a ni,” a ti a.

¹³LALPA chuan, “Israel fate chuan ka hnawh chhuahna tûr Jentailho zingah hetiang chaw bawhlhlawh hi an la ei dawn a ni,” a ti a.

¹⁴Kei chuan, “Khai â, Lalpa PATHIAN! Ka tleirâwl tîr ata tun thlengin ka la intibawhlhlawh ngai hlei nê; sa thisawn sâ te, ramsa seh hlum te, sa tenawm rêng rêng ka kâ lûtin, ka la ei ngai lo,” ka ti a.

¹⁵Ani chuan ka hnênah, “A nih leh, mihring êk aiah bawnng êk ka pê ang che a, chu chuan i chhang ei tûr i siam dawn nia,” a ti a.

¹⁶Chû bâkah chuan ka hnênah, “Mihring fapa, Jerusalem mite chaw lâkna kawng ka dang chat dawn; an neihchhun pawh a bûk tê têin, mangang takin an ei ang; tui pawh hlauthawnng êm êm chungah teh ker kerin an in tûr a ni a,

¹⁷Ei tûr in tûr tlachham rêng rêngin, mak inti tawn chungin, an suahsualna avângin an la râwp ral dawn a ni.

BUNG 5

JERUSALEM DOTU TUR KHANDAIH

¹“Nang, mihring fapa, khandaih hriam lâ la, chû chuan bakmeh chem angin, i lû leh i khabe hmul ziat rawh; chûng samte chu a bûknain bûk la, sem darh rawh.

²Khaw hual chhûng ni a zawh hunah, hmun thuma thêna hmun khat chu khawpui lai takah i hâl tûr a ni; hmun thuma thêna hmun khat chu i sât sawm vek tûr a ni a, hmun thuma thêna hmun khat dang chu thli i len darhtîr tûr a ni a: khandaih phawiin ka lo ûmzui ve ang.

³A bâng tlênte chu i la hrang ang a, i kawr hmâwrah i tawn bet tûr a ni.

⁴Chuta mi chu i la thên ang a, meiah paih lût la, i hâlral tûr a ni. Chuta tang chuan Israel chhûngkua zawnng zawngah mei chu a kângkai vek dawn a ni.

⁵“Lalpa PATHIAN-in heti hian a ti: ‘Hei hi Jerusalem a ni a; hnamte zingah ka laitata, a vêlin hnamten an hual vel khup a.

⁶Hnam dangte aia nasa zawkin ka rorêlna lakah an hel a, ka dân thuruatte chu a vêla mite ai mahin an bawhchhe nasa zawk a; ka rorêlnate an hnâwl a, ka thuruat angin an awm duh hek lo.’

⁷Chuvângin, Lalpa PATHIAN-in heti hian a ti: ‘In vêla hnam dangte aia thuawihlohna tizualtua in tan avâng te, ka dân thûte leh ka remruatnate in zawm hek lohva, in chheh vêla hnam dangte tihdan pawh in zawn chuan loh avângin’—

⁸Lalpa PATHIAN chuan: ‘Kei, keimah ngei pawh hian ka do che u-a, hnam dangte mithmuh ngeiah ka hrem dawn che u a ni.

⁹In tenawmna tinrêng avângin, ni danga ka la tih ngai loh in zingah ka ti ang a, chutiang thil chu ka ti leh tawh ngai hek lo vang.

¹⁰Chutichuan, in zingah paten an fapate sâ an ei ang a, fapate pawhin an pate sâ an la ei ve ang; in zinga rorêlna ka hlen hunah chuan, in zinga la dam chhuna-te chu thli ka len darhtîr vek ang.

¹¹Chuvângin, ka nunna chhâlin ka sawi e, Lalpa PATHIAN-in a ti, ‘in thiltih tenawm tak takte hmanga ka hmun thianghlim in tihbawhlhlawh zozai avâng hian, kei pawhin tereuhtêah ka chhuah ve ang che u; ka dîm bik lo vang che u-a, ka lainat hek lo vang che u.

¹²Hmun thuma ðhena hmun khat pulh hr̄in in thi ang a, ðampui mitthiin a lem zo vang che u; hmun thuma ðhena hmun khat chu khandaih tihlum an ni ang a; a bâk hmun thuma ðhena hmun khat dang chu thl̄i ka len darht̄ir ang a, khandaihin ka ðmzui bawk ang.

¹³Tichuan, ka thinrimna a dai tawh ang a, an chungah phuba ka lâk fel hunah chuan, ka thinrimna chu a reh tawh ang; an chungah ka thinrimna ka hr̄ikthlâk hunah, kei, LALPA hian ðhahnemngai taka ka lo hr̄ilh ðinzia an hre tawh ang.

¹⁴Chû bâkah, in v̄ela hnamte leh veivâka kal zawng zawngte hmuhah r̄el b̄ur tlâk leka thil chhia-ah ka siam ang che u.

¹⁵Thinrim tak leh thinur tak chungah, ka zilhhauh che a, i chungthû ka r̄el zawh hunah chuan, i chheh v̄ela hnam zawng zawngte tân sawichhiat, nuihzabûr, elsên nâna an hman leh, mite mak tih lek in ni ang. Kei, LALPA hian ka sawi tawh hi.

¹⁶Nangmahni tichhe tûra, ðampui mitthi thalfang ka rawn thlâk hunah zet chuan, in chaw lâk luhna hnâr ka tiping vek ang a, in rilðamna pawh ka tizual sauh dâwn a ni.

¹⁷Tichuan, in hnênah ðamna leh ram sakawhlte ka rawn t̄ir ang a, lu an s̄unt̄ir ang che u. Pulh hr̄i leh thisenin a paltlang ang che u-a, in chungah khandaih ka l̄ent̄ir ang. Kei, LALPA hian ka sawi tawh hi,” a ti a.

BUNG 6

MILEM BIAK CHÎNG ISRAEL CHUNGA RORELNA

¹LALPA thû chu ka hnênah a lo thleng a:

²“Mihring fapa, Israel tlâng awmna lam hmachhawn la, an chungthû puang rawh,

³tihian ti la, ‘Aw Israel tlangte u, Lalpa PATHIAN thû hi lo ngaithla teh u! Lalpa PATHIAN chuan tlângte, mualte, kawrte leh phairuamte hnênah heti hian a ti: “Kei, keimah ngeiin khandaihin ka rawn bei dâwn che ua, in hmun sângte chu ka chhu chhia ang.

⁴In maichâmte chu a ram vek ang a, in rimtui hâlana maichâmte pawh tihchhiat a ni ang; in zînga mitthi ruangte chu in milim pathiante hmâah ka pail thla ang.

⁵Israel fate ruang chu an milim bulah ka dah ang a, in ruhte chu in maichâm v̄elah ka theh darh nuaih ang.

⁶In chênna hmun zawng zawnga khawpuite chu ka sawp chhe vek ang a, in hmun sângte chu a ram vek bawk ang a, in maichâmte pawh tihchhiata tihram dêr a ni ang; in milimte chu awm tawh hauh lo tûra tihsawm a ni ang a, in rimtui hâlana maichâmte chu kih thlûk a ni ang a, in kutchhuakte chu nuai bo vek a ni ang.

⁷Tihlumte ruang chu in zîngah a let rem rum ang a; tichuan, kei hi LALPA ka ni tih in hria ang.

⁸“Amaherawhchu, thi bâng tûr a zuahsak dâwn a, ram hrang hranga tihdarh in nih hunah pawh, hnamte zînga ta khandaih pumpelh tûr tâwk an la awm dâwn a ni.

⁹Hnam hrang hrangte hnêna sala an hruate zînga la dam chhunte chuan, an uirêna thinlung avânga kei min hransanzia te, an milimte laka nawhchizawrhna mit an put ðinziate chu an rawn hre rauh rauh dâwn a ni; tenawm tak taka an thil sual tihte

avângin anmahni leh anmahni pawh an la inten hial ang.

¹⁰LALPA ka ni tih min la hre dâwn a ni; an chungah chhiatna ka thlen tûr thu pawh a lothlâwn maia sawi ka ni hek lo.”

¹¹“Lalpa PATHIAN-in heti hian a ti: “In kuttuma chûmin in kê per ula, ‘E heu, Israel chhûngkaw sual tenawm dân zozai chu le! Khandaih te, ðam te leh pulh hr̄itein an thi dâwn si a.

¹²A awm hlâ deuh pulh hr̄in an thi ang a, a awm hnai deuh khandaihin an thi ang; a la bâng, hualbeha awmte chu ðâmin an thi ang. Chutiang chuan an chungah ka thinrimna ka hr̄ithla dâwn a ni.

¹³Tlâng sâng tinah te, tlâng chh̄ip chungah te, thing hring tin hnuaiah te, sasaw thingbuk tin hnuaiah te, an milimte hnêna rimtui an hlanna apiangah leh, an maichâm v̄ela an milim bulah te chuan an mitthi ruang a thal pheng phung hunah, kei hi LALPA chu ka ni tih in la hria ang.

¹⁴An chungah kut ka lek khum ang a, an chênna hmun tin mai chu ka tiram z̄el ang a, an chênna hmun zawng zawng chu, Dibla thlâlêr aia ram ro leh chhiaah ka siam ang. Tichuan, kei hi LALPA ka ni tih an hria ang,” a ti a.

BUNG 7

ISRAEL TANA RORELNA A HNAI

¹Hei bâkah hian LALPA thû ka hnênah a lo thleng a,

²“Nang, mihring fapa, Lalpa PATHIAN-in Israel ram hnênah heti hian thû a sawi e: ‘Tâwpna chu! A ram killi chungah tâwpna a lo thleng ta e.

³I chungah tâwpna a lo thleng ta e, Ka thinurna i hnênah ka leih bua ang a, I awmdân ang z̄elin ro ka rêlsak ang che a, I tenawmna zawng zawngah ka thungr̄ul ang che.

⁴Ka mitin a hmuh hmaih lo vang che a, Ka khawngaih hek lo vang che; I awm dân ang hian ka thungr̄ul ang a, I tenawmnain a chîm reng ang che; Tichuan kei hi LALPA ka ni tih in hria ang!’

⁵“Lalpa PATHIAN chuan heti hian a ti: ‘Chhiatrupna, chhiatna hlâwm chu Ngai teh, a lo thleng ta!

⁶Tâwpna a lo thleng a, Tâwp rêtna a lo thleng ta; I chungah lo thleng tûr a ni; Ngai teh, a lo thleng ta e!

⁷Nang, ram luahtu, i chungah chhiatna a lo thleng e; A hun pawh a thleng ta a, Buaina hun a lo hnai ta, Tlâng chungah intihhlumna lam a ni ta lo ve.

⁸I chungah ka thinurna ka leih baw thuai ang, Ka thinrimna hi i chungah ka hr̄ithla ang; I awm dân ang z̄elin ka rêlsak ang che, I tenawmna tinrêng ka thungr̄ul vek bawk ang.

⁹Ka mit hian a hmaih lo vang che a, Ka khawngaih hek lo vang che; I awm dân ang hian ka thungr̄ul ang a, I tenawmnate chuan a chîm reng ang che a; Tichuan kei hi LALPA, kutthlaktu ka ni tih in hria ang.

¹⁰“Ngai teh, chu ni tak chu! Ngai teh, a lo thleng ta! Chhiatna a chhuak a; Tiang chu a pâr ta a, Chapona pawh a kuhmûm ta.

¹¹Suahsualna tiangah tharum a chuang tawh a, Tûte mah zuah an ni lo vang; Mipui zînga mi tumah bâng bik an awm lo vang a, T̄ahtu pawh an nei hek lo vang.

¹²A hun chu a lo thleng e, A nî pawh a hnai ta. ‘Leitu chu hlim suh se, Hralhtu pawh lungngai suh se, An zaa chungah thinurna a awm vek si a.

¹³Hralhtu chu la dam reng pawh ni se, A thil hralh tawh a lalêt tawh lo vang; Inlârna chuan mipui a huap vek si a, Sût leh theih a ni lo; Sualnaa inhmang reng chungah mahni intichak thei Tûmah an awm lo.

¹⁴An tawtawrâwt hamah mi an inrâlring a, Mahse indo tûra chhuak an awm si lo; Ka thinrimna chu an zaa chungah a awm si a.

¹⁵Pâwnah khandaih a awm a, A chhûngah pulh hrî leh tîm a awm. Ram hnuaia awm apiang Khandaihin an thi ang; Khaw chhunga awm chu, Tîm leh pulh hriin a ei zo vang.

¹⁶A dam chhunte chu phaia tûro angin Tlângah te an tîl bo ang a, Mahni sualna theuh avângin Mi tin an rûm ang.

¹⁷Mi tin kut chu a zawi vek ang a, An khûpte chu tui anga nêam a ni ang.

¹⁸Saiip puan an sintîr ang a; Hlahnain a tuam ang; Mualphonain an hmêl a khuh baw ang a, An lu chu a kâwng vek ang.

¹⁹An silvârte chu khawlaiah an paih ang a, An rangkachak chu hnâwmhnê ang lek a ni ang; An silvâr leh rangkachakte chuan LALPA thinurna nî-ah chuan a chhan chhuak thei dâwn si lo; Duh tâwk pawh an ngah lo vang a, Tlai puar nân an hmang hek lo vang, Chûng chu anmahni tûktîrtu sual a nih avângin.

²⁰An incheimawina thilte chu, Ropui takin a târ chhuak a; Mahse chûngte chu mitem tenawmte leh, Ngeiawm tak taka chei nân an hmang si a; Chuvângin, hnâwmhnê ang lekah ka siamsak ta.

²¹Hnam dangte kutah an rawk atân ka pê ang, Leia mi suaksualten an suam tûrin; Anni chuan an tibawrhâng baw ang.

²²Anni chu lehlam ka hawisan ang a, Ka hmun serhte chu an tibawrhâng ang; Rûkrûte lûtin an tibawrhâng ang.

²³Khaidiat siam rawh u, ram chu thisen chhuahnaa a khah tâk hi, Khawpui lah tharum thawhnain a khat si a.

²⁴Chuvângin, Jentail zînga a sual berte ka rawn tîr ang a, An inte chu an rawn chhuhsak ang; Mi chakho intihropuina ka titâwp ang a, An hmun thianghlimte tihbawrhân a ni ang.

²⁵Tihchhiatna a lo thleng e; Muanna an zawng ang a, a awm dâwn si lo.

²⁶Chhiatna chungah chhiat lehzualna, Thuthang chungah thuthang dang a lo thleng zut zut ang. Zâwlnei hnên atângin inlârna an zawng ang a, Puithiamte lakah dân a boral ang, Upate pawhin thurâwn tûr an hre lo vang.

²⁷Lal chu a lungngai ang a, Milian chuan beidawwna silhên a sin ang, Vantlâng mite kut a khûr ang. An awm dân azir zêlin kut ka thlak ang a, An phû ang zêlin ro ka rêlsak baw ang; Tichuan, LALPA ka ni tih an hria ang!”

BUNG 8

TEMPULA THIL TENAWM

¹Kum rukna, thla rukna, chumi thla ni ngâ ni chuan, ka inah ka tû a; Juda upate pawh ka hmaa an tût ve lai chuan, Lalpa PATHIAN kut chu ka hnênah a lo thleng a.

²Ka han en a, mei ang deuh mai hi ka hmu a, a kâwng chin hnuai lam lan dân chu mei ang a ni a; a kâwng chin chung lam lan dân chu thisen rawng anga êng a ni.

³Kut ni âwm tak hian a rawn ban a, ka chhîp samah mi thâm a; Thlarau chuan lei leh vân inkârah mi châwi kâng a, Pathian inlârna chuan Jerusalemah, hmar lam tualzâwl chhûngril zâwk kawngkaah chuan, thikthu chawktotu, thikna lim tûththlêngah chuan mi hruai a.

⁴Ngai teh, Israelte Pathian ropuina, inlârnaa phaizâwla ka hmuh ang kha, chutah chuan a lo awm reng a.

⁵Ani chuan ka hnênah, “Mihring fapa, hmar lam saw han en teh,” a ti a. Tichuan, hmar lam chu ka han en a, hmar lam maichâm kawngkâah chuan, hê thikna lim hi a luhna laiah chuan a lo awm a.

⁶Tihian mi hrilh baw a, “Mihring fapa, eng thil nge an tih i hmu em? Ka hmun thianghlim pawh hla taka ka kalsan phah hial khawpa Israel chhûngten hê hmuna an thiltih tenawm zia hi? Han hawi vêl teh, hêng aia tenawm zawk hi i la hmu ang,” a ti a.

⁷Tichuan, hung chhûng luhna kawngkâah mi hruai a; ka han en a, bang chu a lo âwng huau va.

⁸Ka hnênah, “Mihring fapa, bang kha han keu zau teh,” a ti a; bang ka han keu chuan, kawngkhâr hi a lo awm a.

⁹Ka hnênah chuan, “Lût la, chuta an thil sual tih tenawmzia chu i hmu ang,” a ti a.

¹⁰Chutia ka han luh chuan, bawkvâka kal chi tinrêng, ramsa tenawm, Israel chhûngkuain an biak mitem zawng zawng chu bangah chuan a lo intâr del dul mai a.

¹¹An hmâah chuan Israela chhûngte zînga upa 70 an ding a, an zîngah chuan Saphana fapa Jaazania pawh a ding ve a. An kutin rimtui hâl bûr an keng theuh va, rimtui khû chhah tak chu a chho mup mup a.

¹²Ani chuan ka hnênah, “Mihring fapa, Israel chhûngkuua upaten thim hnuaia an thiltih kha i hmu em, mi tinin pindana anmahni milim chungah an tih dân kha? ‘LALPA chuan min hmu chuang hlei nêam, LALPA chuan ram hi a rauhsan daih tawh alâwm,’ an ti mai a ni,” a ti a.

¹³Ani chuan ka hnênah, “Han thlîr kual leh la, hei aia an thiltih tenawm hi i hmu ang,” a ti a.

¹⁴Tichuan, hmar lama LALPA in luhna kawngkâah chuan mi hruai a; mak ka tih êm êm chu, chutah chuan nuho hi an lo tû a, Tammuz-a* ngaiin an lo tap zu nia!

¹⁵Ani chuan ka hnênah, “Aw, mihring fapa, hei hi i hmu maw? Han thlîr vêl leh la, hei aia tenawm lehzual hi i la hmu ang,” a ti a.

¹⁶Tichuan, LALPA in hung chhûngril zâwkah chuan mi hruai lût a; chuta LALPA tempul kawngkâ, hulhliap leh maichâm inkârah chuan, patling 25 vêl hi LALPA tempul hnuchhawnin,

khawchhak lam an lo hawi a, chhak lam hawiin nî chu chibai bûkin an lo bia zu nia!

¹⁷Ani chuan ka hnênah, “Aw, mihring fapa, hei hi i hmu maw? Juda chhûngten hê hmun ngeia hetiang thil tenawm an ti hi thil namai a ni em ni? Ram hi inpâwngnêknain an tikhat tawh a; ka thinurna an chawktio leh ta nghal a. An hnârah hnahchhâwl an dah a nih hi.

¹⁸Chuvângin, thinrim takin ka che dâwn a ni. Ka mit hian hmuh hmaih emaw, lainatna emaw pawh ka nei lo vang a; ka beng hriatahrawn au chiam mahse, ka ngaihlâksak tawp lo vang,” a ti a.

BUNG 9

MISUALTE CHU TIHHLUM AN NI

¹Chutichuan, ring takin mi au va, “Khawpui enkawltute chu lo kal hnai sela, mi tinin inthahna hriamhreirawn lek chhuak theuh rawh se,” a ti a.

²Hmar lam kawngka chhak zâwk kalna ațang chuan mi paruk hi an lo kal thuai a, indona hreipui anrawn lek chhuak theuh va. An zînga mi pakhat puan zaisîn sin chuan lehkhatai bûr a pai a. An lût a, dâr maichâm bulah chuan an dîng a.

³Israelte Pathian ropuina chu a awmna thîn cherub ațangin a chho va, tempul luhna sumhmunah chuan a insawn a. Mipa, puan zaisîn sin, lehkhatai bûr paitu chu a ko va;

⁴LALPA chuan a hnênah, “Khawpui chu fang chhuak la, Jerusalem chu fang chhuak rawh; a chhûnga thil tenawm an tih avânga rûma tap thînte chu an chalah chhinchhiah ang che,” a ti a.

⁵Ka hriat phâkin midangte hnênah, “That zêl tûrin amah hi khawpuiah zui rawh u; tûmah hmuh hmaih suh ula, lainatna pawh nei hek suh u.

⁶Putar leh tlangvâl te, nula leh naupang te leh hmeichhia te chu that fai phiar rawh u; chhinchhiahna neite erawh chu a hnaih pawh hnaih suh ula, ka hmun thianglim ațang hian tan rawh u,” a ti a. Tichuan, tempul kawta upa awmho ațangin hma an la tan ta a.

⁷An hnênah, “Tempul hi tibawrhâng vek ula, tualzâwlte hi mi ruangin tikhat vek rawh u. Kal chhuak r’u le!” a ti a. Tichuan, an kal chhuak a, khawpuiah chuan mi an va that ta zawih zawih a.

⁸Chutianga mi an thah mawlh mawlh lai chuan, kei chu min kalsan vek a; ka bawkkhup a, ka au chhuak ta a, “E khai, Lalpa PATHIAN! Jerusalem chung a i thinurna leih buakah Israel mi la dam chhunte pawh i tiboral vek dâwn em ni?” ka ti a.

⁹Ani chuan ka hnênah, “Israel leh Juda chhûngte sualna hi a nasa lulai êm a nih hi, ram hi thisen chhuahnain a khat vek a, khawpui lah chu khawlohnain a khat zo vek baw si a; ‘Ram chu LALPAN a rauhsan vek tawh a, LALPA chuan hmuh pawh a hmu lo vang!’ an ti mai si a.

¹⁰Kei pawhin ka hmuh hmaih lo vang a, ka dîm baw hek lo vang; an sual mawh chu an lu chungah ka tlâktîr dâwn a ni,” a ti a.

¹¹Chumi hnû chuan, puan zaisîn sin, lehkhatai bûr pâi khân, “Thû mi pêk angin ka ti zo ta e,” tih thû arawn sawi a.

BUNG 10

ROPUINAIN TEMPUL A CHHUAHSAN

¹Ka han en a, cherub-ho lu chung vân boruakah chuan, saphir lung ang tak hi a lo lang a, a lan dânah chuan lalthutthêng ni âwm tak a ni.

²Puan zaisîn sin kha a bia a, a hnênah, “Cherub hnuaia tawllailîr ke kârah sâwn va kal la, cherub-ho zînga mi meiling saw va thûm la, khawpui chungah theh darh ang che,” a ti a. Ani chu ka en reng chungin a kal ta a.

³Chutia a va luh lai chuan, cherub-ho chu tempul chhim lamah chuan an lo dîng a, hung chhûng zâwkah chuan chhûm a zâm khat tlat a.

⁴Tichuan, LALPA ropuina chu cherub ațangin a chho va, tempul kawngkapui chungah chuan a dîng a; inchoh chhûmin a bawh khat tlat a, hung chhûng pawh chu LALPA ropuina chuan a ên chhuak vek a.

⁵Cherub-ho thla zâp rî chu hung pâwn zâwk ațang pawhin a hriat theih a, a tawng chu Pathian Engkimtitheia âw ang a ni.

⁶Puan zaisîn sin hnênah chuan, “Cherub-ho zînga mi, tawllailîr ke bialte kâra mei saw va la rawh,” tiin thû a pê a, ani chu a va lût a, tawllailîr ke bial sîrah chuan a va dîng a.

⁷Cherub pakhat chuan cherub-ho zînga mi, cherub-ho kâra mei chu a kutin a han ban a, a then a la a, puan zaisîn sin hnênah chuan a pê a, ani chuan a lo la a, a kal chhuahpui ta a.

⁸Cherub-ho chuan an thla hnuaiah mihring kut ang taka lang hi an nei a.

⁹Ka han en chuan, cherub-ho sîrah chuan tawllailîr pali a awm a, cherub pakhat bulah tawllailîr ke pakhat a awm zêl a; tawllailîr kete chu beril lung rawng nêan a inang a.

¹⁰An palia an lan dân chu a inang vek a—tawllailîr ke bial chhûnga ke bial dang awm ang hi a ni.

¹¹An han kal vêl chuan sîr lîin an kal thei a; an kal zâwngin an inher ve lo, pakhat hmaiin a hawi lam lamah an kal mai a ni. An kal rêng rêngin inher kual a ngai ve lo.

¹²An taksa pumpui, an hnung lam te, an kut te, an thla te, an paliin tawllailîr an neih te chu, mit hlîrin a kual khat vek a.

¹³Chû thil bial chu “Tawllailîr” tia an koh rî ka hria a.

¹⁴A pakhat theuhin hmêl pali a nei zêl a: a pakhatna hmêl chu cherub hmêl a ni a, a pahnihna hmêl chu mihring hmêl a ni a, a pathumna chu sakeibaknei hmêl a ni a, a palina chu mupui hmêl a ni.

¹⁵Cherub-ho chu châwi kân an ni ta a. Hei hi Kebar Lui kama thil nung ka hmuh ang kha a ni.

¹⁶Cherub-ho an kal sawn chuan, tawllailîrte chu an sîrah an kal ve zêl a; cherub-hovin lei ațanga thlawk chho tûra thlâ an zâr chuan, tawllailîrte pawh an rualin an chho ve zêl a.

¹⁷Cherub-ho an din lai chuan, tawllailîrte pawh chu an dîng vê zêl a, an chhoh leh anni pawh an chho vê leh mai a, thil nung thlarau chu an chhûngah a awm si a.

¹⁸LALPA ropuina chuan tempul kawngkapui chu a chhuahsan a, cherub-ho chungah chuan a dîng ta a.

¹⁹Cherub-ho chuan an thla an zâr a, ka hmuh lai ngeiin lei aţangin an thlawk chho ta a. An thlawh chhuah lai chuan, tawllailrte pawh an kiangah a awm ve a; LALPA in chhak lam luhna kawngkhâr bulah chuan an dîng a, Israelte Pathian ropuina chu an chungah chuan a awm a.

²⁰Hei hi Kebar Lui kama Israelte Pathian hnuaia ka hmuh thil nung kha a ni a, cherub-ho an ni tih pawh ka hria a.

²¹Hmai pali an nei theuh va, thla pali an nei theuh bawh a, an thla hnuaiah mihring kut ang an nei theuh bawh a.

²²An hmêl lan dân leh an mize awm dân pawh Kebar Lui kama ka hmuhho hmêlte nêna inang chiaah a ni. Hmazâwnga kal theuh an ni bawh.

BUNG 11

REM RUATTU SUAL HREMNA

¹Thlarau chuan mi chawi kâng a, LALPA in chhak lam, khawchhak hawi kawngkâah chuan mi hruai a; luhna kawngkhâr bulah chuan mi 25 an lo awm a, an zîngah chuan mipui hotu, Azura fapa Jaazania leh Benaia fapa Pelatia te pawh ka hmu a.

²Ani chuan ka hnênah: “Mihring fapa, hêng mite hi an nih hi, thil sual ngaihtuah chhuaka, hê khawpui tâna thurâwn ţha lo pui pui petute chu,

³In sak a la hun hlei nê; hê khawpui hi sa chhuan sona bêl a ni a, keini hi sâ chu kan ni alâwm,’ an ti a.

⁴Chuvângin, âw, mihring fapa, an chungthû chu puan khum teh, puang ngei ang che!” a ti a.

⁵LALPA Thlarau chu ka chungah a lo thleng ta a, ka hnênah, “Puang rawh! LALPAN heti hian a ti: “Aw, Israel chhûngte u, hetiang hian in ti tîn a; in rilrwa lo langte chenin ka hria asin.

⁶Khawpuia in mi thahte hi in tipung telh telh a, in mi thahte ruangin khawlai in tikhat ta a nih hi.”

⁷Chuvângin, Lalpa PATHIAN chuan heti hian a ti: “In mi thah, khawlaia in dah khâwmte chu, sa bêl chhûnga sa chu a ni; hê khua hi sa chhuan sona bêl a ni e; nangni erawh chu hemi zîng ata ka la chhuak ang che u.

⁸Khandaih in hlau bawh a; in chungah khandaih ka rawn lek dâwn a ni,” Lalpa PATHIAN-in a ti.

⁹“A lai ata ka la chhuak ang che u a, ram dang mite kutah ka pê bawh ang che u a, in chungah hlei an lên tawh ang.

¹⁰Khandaiha tihhlum in ni ang. In chungthû chu Israel ramrîah ka rêl bawh ang. Tichuan, LALPA ka ni tih in hria ang.

¹¹Hê khawpui hi in sa chhuan sona bel a ni lo vang a, nangni pawh a chhûnga sâ in ni hek lo vang. Israel ramrî-ah in chungthû ka rêl dâwn si a.

¹²LALPA ka ni tih in la hria ang; ka dân thûte in zâwm lo va, ka rorêlna thû pawh in hlen duh hek lo, in vêla Jentailho tihdân tinrêng zâwmin in khawsa ta zâwk a,” a ti a.

¹³Chutia thû ka puan lai chuan, Benaia fapa Pelatia chu a thi ta mai a. Kei chu bawkkhupin, ring takin ka au va, “E khai, Lalpa

PATHIAN! Israel la damchhunte hi min nuai chimit vek dâwn em ni?” ka ti a.

PATHIANIN ISRAELTE A TUNG DING LEH DÂWN

¹⁴LALPA thû chu ka hnênah a lo thleng leh a,

¹⁵“Mihring fapa, i unaute, i laichînte, i hnampuite leh Israel chhûngkua zawng zawng kha, Jerusalem luahtuten, “LALPA hnên ata awm hla daih rawh u; hê ram hi kan ta tûra pêk a ni asin,’ an tiha te kha in ni a.

¹⁶Chuvângin, ‘Lalpa PATHIAN chuan heti hian a ti: “Jentailte zîngah paih chhuakin, ram hrang hrangah hnawt darh mah ila, an tîn darhna ramah te chuan an tîn hmun thianghlimah ka chang zêl dâwn alâwm,” a ti a.

¹⁷Tin, ‘Lalpa PATHIAN-in heti hian a ti: “Hnam te zînga ta ka hruai khâwm leh ang che u-a, hnawh darha in awmna rama ta ka ko khâwm leh ang che u-a, Israel ram hi ka pe leh ang che u.”

¹⁸Chutah chuan an haw leh ang a, chuta thil tenawm leh huatthlala tak takte chu an tibo vek tawh ang.

¹⁹Thinlung hmun khat ka siamsak ang a, an chhûngah thlarau thar ka dah ang; an tîsa aţangin thinlung, lung anga sak chu ka lâkbosak ang a, tîsa anga nêmin thinlung ka pe ang,

²⁰tichuan, ka dânte an zâwm ang a, ka thuruatte vawngin, an nunpui thei tawh ang; anni chu ka mite an ni ang a, kei pawh an Pathian ka ni ang.

²¹Mahse, an thil chîn tenawm leh huatthlala tak tak la chhunzawm lui zêlte erawh chu, an awm dân ang zêlin an chungah ka thungrûl ang,” Lalpa PATHIAN-in a ti a ni.

²²Tichuan, cherub-ho chu an thla zârin, tawllailr bialte nêmin chuan an thlâwk a, Israelte Pathian ropuina chu an chung sâng takah chuan a awm ta a.

²³LALPA ropuina chu khawpui lai tak aţang chuan a chho va, khawpui chhak lama tlâng chungah chuan a han dîng a.

²⁴Tichuan, Thlarau chuan mi chawi kâng a, inlârnaah chuan Pathian Thlarauvin Kaldai rama saltângte hnênah mi hruai a. Inlârna ka hmuh chuan mi chhohsan ta a.

²⁵Tichuan, saltânna hmuna mite hnênah chuan LALPA thil min entîr zawng zawng chu ka hrilh vek a.

BUNG 12

JUDA SALTANG A LEMA ENTIR

¹LALPA thu chu ka hnênah a lo thleng a:

²“Mihring fapa, helhmang chhûngkaw zîngah i khawsa a, mit nei renga hmu si lo, beng nei renga hre thei si lo an ni a; helhmang chhûngkua an nih vâng a ni.

³Chuvângin, mihring fapa, saltâng thuamhnaw nêmin insiam la, an hmuh tûrin chhûn êngah saltâng tûrin chhuak rawh. I awmna hmun aţangin hmun dangah saltâng tûrin an hmuh laiin chhuak ang che. Helhmang hnam ni mahse, inngaihtuah nachâng an hriat phah mial takin.

⁴Chhûn êngah sala tâng tûr ang takin, an hmuh laiin i thuamhnawte chu la chhuak la; tlaiah chuan anniho hmuh tûr ngeiin, saltâng tûr angin kal chhuak ang che.

⁵An mithmuh laiin kulh bang chu rek pawp la, tah chuan i thuamhnawte chu chhuahpui ang che.

⁶An mithmuh laiin i kovah pô la, thim hlimah chhuahpui ang che; lei hmu lo tûrin i hmai tuam rawh, Israel chhûngte tân entîrnaah ka siam si che a,” a ti a.

⁷Tichuan, thupêk ka hmuh ang chuan ka ti a. Sala tâng tûr angin, chhûn êngah ka thuamhnaw ka la chhuak a, tlaiah chuan kulh bang chu kutin ka rek pawp a. Thim hlimah ka la chhuak a, an hmuh lai chuhin kokiâh ka pu ta a.

⁸Zîngah chuan LALPA thù ka hnênah a lo thleng a,

⁹“Mihring fapa, Israel chhûngkua, helhmang hnam chuan, ‘Eng nge maw i tih le?’ tiin an zâwt che em?

¹⁰An hnênah, ‘Lalpa PATHIAN-in heti hian a ti: “Hê phurrit hi Jerusalema puipate leh an zînga Israel chhûngte zawng zawng chungthû a ni.”

¹¹In tâna lo entîr lâwkna ka ni e. Ka tih ang tak hian, an hnênah hlen a ni ang; salah hruai bovin an la awm ang.’

¹²An zînga hotu ber chuan thim tham hnuaiah a kovin a pu ang a, a kal chhuak ang. Bang an rek pawp ang a, chutah chuan an chhuak ang. A mitin khua hmu thei lo tûrin a hmai a khuh tûr a ni.

¹³Amah chu ka lénin ka khuh ang a, ka thangah chuan a âwk ang. Kaldai rama Babulon-ah chuan ka hruai ang a; chutah chuan a thi ang a, mahse khua rêng a hmu lo vang.

¹⁴Amah pui tûra a bula awmte leh a sipai rual zawng zawngte chu thlî ang maiin ka len darhtîr vek ang a; khandaih phâwi sa nêh ka ûmzui baw ang.

¹⁵“Hnamte zînga ka hnawh darha, ram tina ka tihdarh hunah zet chuan, LALPA ka ni tih an la hria ang.

¹⁶An zînga mi thenkhat erawh chu khandaih te, tâm te, hripui te lakah chuan ka zuah dâwn a ni, an kalna apianga Jentailte zînga an thil chin tenawm tak tak an puan chhuah theih nân. Tichuan, LALPA ka ni tih an hria ang,” a ti a.

HREMNA HUN SAWN HLA LO

¹⁷LALPA thù chu ka hnênah a lo thleng a,

¹⁸“Mihring fapa, khûr chungin chây ei la, mangang taka khûr chungin tui in ang che.

¹⁹Ram chhûng mipuite hnênah heti hian hrilh rawh, ‘Lalpa PATHIAN chuan Jerusalem leh Israel rama chêngte hnênah heti hian a ti: “Mangang takin chaw an ei ang a, thlabâr takin tui an in ang, a chhûnga chêng zawng zawng an nunrâwn êm avângin, a ram aţangin a michêngte chu tihruah vek an ni ang.

²⁰An khawpui luah laite chu tihchhiat a ni ang a, a ram chu a chereu vek baw ang; tichuan, LALPA ka ni tih in la hria ang,” tiin.

²¹LALPA thù chu ka hnênah a lo thleng a,

²²“Mihring fapa, Israel ram chungchânga thufing tawi in neih thîn hi eng nge ni a, ‘Nikhua a reiin, inlârna rêng rêng a thlâwn leh mai thîn,’ in tih thîn kha?’

²³Chuvângin, ‘Lalpa PATHIAN chuan heti hian a ti: “Hê thufing tawi hi ka titâwp ang a, Israel ramah thufing tawi angin an sawi tawh lo vang.” Mahse, heti hian sawi rawh, “Inlârna tinrêng lo thlen dik hun a hnai ta.

²⁴Israel chhûngkaw zîngah inlârna dik lo leh infak derna lam thu hrilhâwkna a awm tawh lo vang.

²⁵Kei hi LALPA ka ni a. Ka sawi a, ka thu sawi ang chu a lo thleng ngei ang; tihkhawtlai a ni tawh lo vang; aw helhmang hnamte u, in hun chhûnga ka thu sawi ang hian, ka hlen ngei ang,” Lalpa PATHIAN-in a ti.”

²⁶LALPA thù chu ka hnênah a lo thleng leh a,

²⁷“Mihring fapa, en teh, Israel chhûngte chuan, ‘Inlârna a hmuhte hi nakin daiha mi, hla taka mi tûr a lo sawi lâwk mai a ni,’ an ti a.

²⁸Chuvângin an hnênah hrilh rawh, ‘Lalpa PATHIAN chuan heti hian a ti: “Ka thu sawi rêng rêng chu tihkhawtlai a ni tawh lo vang a, ka sawi ang takin hlen chhuah a ni ang,” Lalpa PATHIAN-in a ti,” tiin.

BUNG 13

ZAWLNEI Â-TE CHUNGPIKNA

¹LALPA thù chu ka hnênah a lo thleng a,

²“Mihring fapa, Israel zâwlneite zînga mahni thînlung duh zâwn hrilh lâwk chîngte hnênah, ‘LALPA thù chu ngaithla zâwk rawh u!’ tiin hrilh rawh.”

³Lalpa PATHIAN chuan heti hian a ti: “Zâwlnei â, mahni thlarau chan ringawt zuia, engmah hmuh nei si lote chung a pik e!

⁴Aw Israel, i zâwlneite chu thlalêra sihal ang lek an ni e.

⁵LALPA nîa indonaa ţang thei tûrin, Israel chhûngkaw kulh bang chhe lai thawm ţata, humhalh tum lah an awm hek lo.

⁶Inlârna-ho mai mai leh hrilhâwkna dik lo an puang a, ‘LALPAN a ti!’ an ti a. Mahse LALPAN a tîr hauh si lo va; chuti chung chuan, an thusawite chu a dik e, tiin mi dang an rintîr ve tho si a.

⁷Inlârna lothlâwn mai hmûa, hrilhâwkna dik lo sawi mai mai thîn in ni lo vem ni? ‘LALPAN a ti,’ in ti leh ta nghâl a; ka ti hauh si lo va.”

⁸Chuvângin, Lalpa PATHIAN-in heti hian a ti: “Ho mai mai sawia, inlârna dawhâ tak tak in puan thîn avângin, in lakah hian ka lâwm lo tawp a ni,” LALPAN a ti a ni.

⁹“Ka kut hian inlârna dawhâ mai mai hmua, dâwt thu puan lâwk chîng zâwlneite chu a dodâl ang a, ka mite inpâwl khâwmnaah an tel ve lo vang; Israel chhûngte hmîng ziaaknaah an tel ve hek lo vang a, Israel ramah an lût ve baw hek lo vang. Tichuan, Lalpa PATHIAN chu ka ni tih in hria ang.

¹⁰“Râlmuang hauh si lo va, ‘A râlmuang e!’ tia ka mite an bum thlûk avâng te, kulh bang an siam vê te lah, a chârna ţa lovin an châr mai mai si a,

¹¹chârna ţa lova chârtaute hnênah chuan a chim leh mai ang tih hrilh rawh u. Ruahpuite lo sûrin, âw, nangni rial lian pui puite u, in lo tla dur dur ang a; thlipui na takin a lên chhe leh vek mai ang.

¹²Kulh bang a chim hunah chuan, ‘In châr nghehna chu khawiah nge a nih tâk?’ an ti dâwn lo che u em ni?”

¹³Chuvângin, Lalpa PATHIAN chuan: “Ka thinur êm avângin thlipui ka nuaitîr hrep ang a; ka thinurna ruahpui a sîr tluk tluk ang a, tiboral tûrin ka thinurna rial hrâw pui puiin a deng hrep mai ang.

¹⁴Tichuan, chârna tha lova kulh bang in châr te chu ka tichim ang a, leiah a tlu sawp vek ang a, a lungphûmte lamin a lai lang vek ang; a chim ang a, chûng zîngah chuan tihboralin in awm bawk ang. Tichuan, LALPA ka ni tih in hria ang.

¹⁵“Chutiang chuan ka thinrimna chu kulh bangah leh chârna tha lova châtute chungah ka hrithlâ ang a; in hnênah, ‘Kulh bang leh a châtute chu an awm tawh lo ve,

¹⁶chûng mite chu, Jerusalem chungchâng puangtu Israel zâwlnei te, inlârnaah muanna a awm loh laia râlmuang anga hmutute sawina a ni,” tih hi Lalpa PATHIAN thuchhuak a ni.

¹⁷“Nang, mihring fapa, chutiang bawk chuan i mite fanu, an thinlung duh dân puang chhuak mai mai ho chu hmachhawn la, an dik lohzia puang ve rawh,

¹⁸“Lalpa PATHIAN chuan heti hian a ti, ti rawh: “Nangni hmeichheho, mahni kawr bâna dâwi hrui chillh beta, mi mit la tûr zâwnga lu khuh mâwina thui chîng hmeichhiate chung a pik e! Mahni sahîm nân ka mite nunna man beh in tum ang maw?

¹⁹In dâwt thu ka miten an âwih avângin, barli vei hnih khat leh chhang them tlêm tê hmatheha, thi âwm lo tak tak tihluma, thi ngei tûrte in zuah avângin, ka mite zîngah hian ka hming in tibawrhâng ang mâw?”

²⁰Chuvângin, Lalpa PATHIAN chuan heti hian a ti: “Ngai teh u, savâ ang maia mi nunna man tuma in vehthlêmna dâwi hrui chu ka hua a ni. In bân aţangin ka phih thlâksak ang che u-a, savâ ang leka mi nunna in man behte chu ka chhuah bawk ang.

²¹In lukhuhna te pawh ka phih thlêr ang a, in kut ata ka mite chu ka chhan chhuak ang a, in man mai mai tûrin an awm tawh hek lo vang. Tichuan, LALPA ka ni tih in hria ang.

²²“Keima tihlungngaih pawh ni lo, nangnin bumna hmangin mi dikte thinlung in lo tilungngai a; chu chuan mi suaksualte in fuihpawrh a, an nun chhanhimna tûra inlamlêl an duh loh phah a ni.

²³Chuvângin, inlârna daw-hâ mai in hmu tawh lo vang a, in hrilh lâwk tawh hek lo vang; in kut ata ka mite ka chhan chhuak ang a, kei hi LALPA ka ni tih in hria ang,” a ti a.”

BUNG 14

MILEM BIAK HREM TUR

¹Israel upa thenkhat chu ka hnênah an lo kal a, ka hmâah an rawn thû a.

²LALPA thû chu ka hnênah a lo thleng a,

³“Mihring fapa, hêng mite hian an milemte hi an thinlungin an vuan tlat a, anmahni tlûktîrtu an sualna chu hmathehah an hmang bawk si a. Anni mi râwn tûr ka ni rêng em ni?

⁴“Anniho chu bia la, heti hian hrilh rawh, ‘Lalpa PATHIAN-in heti hian a ti: “Israel chhûngkaw zînga mi tupawh an thinlunga pathian lem daha, anmahni tlûktîrtu sualna an hmâa dah reng chungah, zâwlnei hnêna lo kal chu, a milim ngah dân azirin kei, LALPA hian ka lo chhâng ang,

⁵an milimte avânga mi hawisantu, Israel chhûngte zawng zawng thinlung ka chhuh lêt leh theih nân.”

⁶“Chuvângin, Israel chhûngte chu hrilh rawh, ‘Lalpa PATHIAN chuan heti hian a ti: “Inlamlêl leh ula, in milem pathiante chu bânsanin, thil tenawm in chîn thîn zawng zawng chu hawisan vek rawh u.

⁷Israel chhûngkaw zînga mi tûpawh, Israel rama chêng mikhualte pawh, kei mi hransana, an thinlunga pathian lem daha, anmahni tlûktîrtu sualna an hmaa dah reng chungah, zâwlnei hnêna lo kal chu, kei, LALPA hian ka lo chhâng mawh ang.

⁸Chû mi chu hmai chhanah ka dodâl ang a, mite en bîk leh an sawi huai huai atân ka siam ang a, ka mite zînga ta ka paih chhuak bawk ang. Chutah zet chuan, kei hi LALPA ka ni tih in hria ang.

⁹“Zâwlnei chu eng thil pawh sawi tûra bumin awm se, kei, LALPA hi chû zâwlnei bumtu chu ka ni a, a chungah ka kut ka lek ang a, ka mi Israelte zînga ta ka tiboral ang.

¹⁰An sual mawh chu an phur ang; zâwlnei hremna chu amah râwnu hremna nêna a inang reng bawk ang;

¹¹tichuan, Israel chhûngte chu ka hnêna ta an vak bo tawh lo vang a, bawhchhiatna tinrêngin an intibawrhâng tawh hek lo vang; ka mite an ni tawh zawk ang a, kei pawh an Pathian ka ni ang,” Lalpa PATHIAN-in a ti.”

RINAWM DUH LOTE HREMNA

¹²LALPA thû chu ka hnênah a lo thleng leh a:

¹³“Mihring fapa, ram chuan ka lakah thil a tihsual luih zêl chuan, a chungah ka kut ka lek ang a, ei tûr an lâkna hnâr ka chhut chahsak ang; tãmpui ka thlen ang a, mihring leh sâte ka tiboral ang.

¹⁴Hêng mi pathum, Nova te, Daniela leh Joba te meuh pawh lo awm ve mahse, an dikna chuan anmahni chauh an inchhan thei ang,” Lalpa PATHIANin a ti.

¹⁵“Ram chhûngah ram sakawhlte ka tirha, an tihruah vek a, tuma kal tlang theih loh khawpa ka tih-ram chuan,

¹⁶hêng mi pathumte meuh pawh hi lo awm ve mahse, an fapate leh an fanute pawh an chhan thei chuang lo vang,” tih hi Lalpa PATHIAN-in a nunna chhâlin a sawi a ni; anmahni chauh an him ang a, ram chu a tiau vek ang.

¹⁷“Chû ramah chuan khandaih ka lêtîra, ‘Khandaih, ram chu hrût chhuak rawh,’ ka tiha, mihringte leh sâte tiboral dâwn ta ila,

¹⁸hêng mi pathumte hi lo awm ve mahse, an fapate leh an fanute pawh an chhan chhuak thei chuang lo vang a, anmahni chauh chu chhan chhuah an ni ang,” tih hi Lalpa PATHIAN-in a nunna chhâlin a sawi a ni.

¹⁹“Chû rama hrî ka lêtîra, ka thinurna hrithla tûra thisen ka chhuaha, mihringte leh sâte tiboral dâwn ta ila,

²⁰Nova te, Daniela te, Joba te hi lo awm ve mah se, an fapa leh an fanu te pawh an chhan chhuak thei chuang lo vang a, an thatna chuan anmahni chauh a chhan chhuak thei ang,” tiin Lalpa PATHIAN-in a nunna chhâlin a sawi a ni.

²¹Lalpa PATHIAN chuan heti hian a ti: “Mihringte leh sâte tiboral tûra, Jerusalem chungah ka hremna nasa zet zet pali-khandaih te, tâm te, ram sakawlh te leh hrî te ka tîrh hunah chuan, engtiang taka nasa ni ang maw?

²²Amaherawhchu, ngai teh, an fanu fapate zîngah thi bâng lâk chhuah tûr an awm dâwn a; i hnênah an lo kal ang a, an awm dân leh thiltih dân te chu i hmu ang. Tichuan, Jerusalem chungah chhhatna karawn thlentîr chungchangah ngaihangam takin i awm tawh ang.

²³An awm dân leh an thiltih dân i lo hmuh hunah chuan, i thlamuanpui tawh ang; chhan tha tē awm lovin thil ka ti lo tih i la hre dâwn a ni,” Lalpa PATHIAN chuan a ti.

BUNG 15

GREP HRUI PAIH CHHUAH

¹LALPA thu chu ka hnênah a lo thleng a, tihian a ti a:

²“Mihring fapa, ramngawa thing dang zawng aiin grêp kûng tang zâr hian eng nge that bikna a neih?

³Hmanruaa hman tûr thing a lâk chhuah theih em ni? Bungbêl khaina takngialah pawh miten an hmang ngai em ni?

⁴Meia tuah atâna an hman mai a ni zâwk a; mei chuan a hmawr tawnah te, a lai atang tein a kâng thîn a. Eng atâna tangkai nge a nih?

⁵A rêng thûah a tlâwna a la awm lai pawhin, eng siam nân mah a tlaktlai lo va. Meia tuah zawh a nih hnuah phei chuan a tangkai lo lehual dâwn lo vem ni?

⁶“Lalpa PATHIAN-in heti hian a ti: ‘Ram ngaw thing zînga grêp hrui chu tuah tûra ka paih lût angin, Jerusalem luahtute pawh chutiang chuan ka la ti ve ang;

⁷anmahni chu ka do dâwn a ni. Kângmei pakhat tlânas mahse, mei dangin a lo kâng ral tho vang. Tichuan, anni epa ka hmachhawn hunah, kei hi LALPA ka ni tih in hria ang.

⁸Min uirêsan thîn avâng hian ram chu ka tichereu vek dâwn,’ Lalpa PATHIAN-in a ti.”

BUNG 16

PATHIANIN JERUSALEM A HMANGAIH

¹LALPA thû chu ka hnênah a lo thleng leh a:

²“Mihring fapa, Jerusalem chu a tenawmzia hriattîr la,

³tihian ti rawh, ‘Lalpa PATHIAN chuan Jerusalem hnênah heti hian a ti: “I pian leh mûrna chu Kanaan mite ram hi a ni a; i pa chu Amor mi a ni a, i nu chu Hit mi a ni.

⁴I pian dânah, i pian ni khân i laihrui zai chhum a ni lo va, tuia bual fai i ni hek lo; chi an chulh lo che a, nausen puana tuam pawh i ni hek lo.

⁵Nangmah khawngaiha, hêng thil ti tûr hian, tûman lainat hmêlin an en lo che a; i pian hlîma i tenawmna ang ang khân, dai

pâwnah an paih chhuak daih che a.

⁶“Ka kal pelh lai che khân, i thisena i lo tâl âwrh âwrh kha ka hmu che a, i thisen hnênah chuan, ‘Nung rawh!’ ka ti che a ni. Ni e, i thisen hnênah chuan, ‘Nung rawh!’ ka ti ngei a ni.

⁷Ram hnim angin ka tiduah hlauh hlauh che a; i lo thang lian a, i lo puitlin chuan i hmêl a tha êm êm a. I hnute a lo um a, i sam te a lo sei a, mahse saruak mai i la ni a.

⁸“I bula ka lo kal leh chuan, ka han en che a, ngaihzâwnng nei rual i lo ni a; tichuan, ka thlâ kai pharhin, i saruakna chu ka khuh ta a. Ni e, i lakah chhia ka chham a, thu ka thlunpui che a, ka tâ i lo ni ta a,” Lalpa PATHIAN-in a ti.

⁹“Tuiin ka bual che a; a ni, i thisen kaite chu fai takin ka sil a, hriak ka hnawih che a.

¹⁰Puan zehmawi ka sintîr che a; savun tha chia siam pheikhawk ka buntîr che a; puan zaisîn leh maimaw puanin ka tuam che a.

¹¹Cheimâwinain ka chei che a, i bânah ngûn te, i nghâwngh rangkachak khaidiat te ka awrhîr che a.

¹²I hnârah hnârvuah te, i bengah bengbeh te, i lû-ah lukhim mawi tak te ka khimtîr che a.

¹³Tichuan, rangkachak leh silvâra chei i ni a, i thawmhnaw te chu puan zaisîn te, maimaw puan te leh puan zehmawi tea cheimâwi a ni a. Chhangphut tha chi te, khawizu te leh hriak te i tân a. I hmêl chu a tha êm êm a, lalnu i lo ni ta hial a.

¹⁴I hmêl thatna chu hnam tin zîngah a thang huai huai a, ka mâwina ropui ka bel che avângin sawisêl bo a ni si a,” Lalpa PATHIAN-in a ti.

NAWHCHIZUAR NU JERUSALEM

¹⁵“Nimahsela, i hmêlthatna chu i chhuang a, i hmingthanna chu i hurpui a, i inlêng apiang lakah i lo inphalrai zêl mai a.

¹⁶I thawmhnawte hlîpin, i hmun sângte chu rawng chi hrang hrangin i chei mâwi vêl a, chutah chuan i lo inzuar thîn a. Chûng chu thil awm tûr pawh ni lo, awm leh ngai lo tûr a ni si a.

¹⁷Ka rangkachak leh ka silvâr mâwi tak tak ka pêk che kha i la a, chûngte chuan mipa lim i siam a, i hurpui ta a.

¹⁸I thawmhnaw zehmawite chu tuam mâwi nân i hmang a, ka hriakte leh ka rimtuite chu an hmâah i hlân a.

¹⁹Ka ei tûr pêk che-chhangphut tha chi te, hriak te leh khawizû, i ei atâna ka tih te chu, an hnênah rimtui atân i hlân ta hlauh si a; heti hi a lo nih tâk hi,” Lalpa PATHIAN-in a ti.

²⁰“Chû mai a ni lo, i fanu i fapa, mi hrinsakte chu an hnênah hâlral atân i hlân lehngal a. Hetiang hurna thil tih hi i chîna,

²¹ka fanaute tihluma, mea kal tlangtîr tûra an hnêna i hlân thîn hi thil namai a ni em ni?

²²Hetiang thil tenawm leh hurna zawng zawng i tih lai hian, i naupan laia saruak mai, nangma thisena tâl mai mai i nihzia te kha i hre duh dêr si lo va.

²³“Hêng suahsualna zawng zawng i lo tih zawh hnûah zawng, ‘I chan a chhe hlê dâwn a nih hi!’ Lalpa PATHIAN-in a ti a ni;

²⁴kawthlêr tinah milem biakbûk te, hmun sâng te i siam thliah thluah a.

²⁵Pêngthuam tinah hmun sângte i din a, i duhawm vêna te pawh i tibawrhâng zo ta. A lo kal apiang lakah inphalraiin, i hurna chu i tipunlun sauh sauh va.

²⁶Tîsa lama i thenawm, Aigupta-ho lakah pawh i lo inzuar thîn a, ka thinurna chawh tho tûrin i hur zual deuh deuh va.

²⁷“Ngai rawh, i chungah ka kut ka lek tâk hi, i chanpual chu ka lâk hêksak tawh che a, nangmah hawtu Philistia fanu, i hur vânga diriamtu che hnênah chuan, duh duha an tih atân ka pe tawh che a ni.

²⁸Assuria-ho lakah pawh i lo inphalrai tawh lehngâh vei nêh, duh tâwk i ngah chuang lo va; chûngho hnênah chuan i va inzuar a, i la duh khawp lo cheu va.

²⁹Sumdâwngho ram, Kaldai-ho hnên thleng thlengin uchuak takin i va hur kual a; chûngha pawh chuan duh tâwk i ngah chuang si lo.

³⁰“Zah bosâl thaka i hurna thiltih zawng zawng han en hian, ‘I thinlung hi a va khawlo tak êm!’” Lalpa PATHIAN-in a ti.

NAWHCHIZUAR JERUSALEM

³¹Pêngthuam tinah milem biakbûk te i din a, kawthlêr tinah hmun sâng i siam bawh a. Inzawrh hlawh pawh i lak duh loh avângin, nawhchizuar satliah pawh i ni lo.

³²Nupui uirê chîng, mahni pasal te aia mi dang mutpui thîn i ni.

³³Nawhchizuar chuan hlawh an la thîn a ni ngâi a, nang erawh chuan nangmah mutpuitute chu hlawh i pê a, hmun hrang hranga mi hlawh neia rawn dâwr tûr chein i sâwm hial a.

³⁴Nawhchizuar hmeichhe dang lakah i danglam hle mai, inzuar tûrin tûma’n an sâwm lo che a; hlawh pawh an pe hek lo che a, nangmah zâwkin i pe thung a, i awm dân hi a letling teh zawng a nih hi.”

JERUSALEM NGAITUTE DORÂL AN CHANG

³⁵Aw nawhchizuar nû, tûnah chuan LALPA thû hi lo ngaitlha teh!

³⁶Lalpa PATHIAN chuan heti hian a ti: “I bawhlhlawhzia chu laihsanin a awm ta a, i ngaihzâwngte i hurpui laiin i saruak zahmawh an hlîm lang vek a; i milim tenawm zawng zawng te, i fate thisen an hnêna i hlan te nêh lam hailan a ni ta.

³⁷Chuvângin nangmah ngaitu, i nawmchenpuite leh i lo ngaih tâk zawng zawng bâkah, i huat zâwngte chenin ka ko khâwm ngei ang; kil tinah an dinhual ang che a, i saruakna zawng zawng an hmuh theih nân, an hmâah ka hlîm lang vek ang che.

³⁸Inneihna thuthlung chhu chata, thisen chhuah bawh hmeichhiate chungthû angin i chungthû ka rêl ang; thîkna nêh thinur takin i chungah thisen ka rawn thlen dâwn a ni.

³⁹An kutah ka pê ang che a, i milem biakbûk te, i hmun sângte an thîahsak ang che. I silhfênte an hlihsak ang che a, i lungflu mawi te an lâksak ang che a, saruak leh kutbêngin an kalsan ang che.

⁴⁰“Nangmah do tûrin an rawn inhâwrkhâwm ang a, lungin an dêng ang che a, an khandaihin an chhun tlang bawh ang che.

⁴¹I inte chu an hâlsak ang che a, hmeichhe tam tak hmuh laiin an hrem ang che; i nawhchizawrhna pawh ka tih tâwpsak ang che a, hlawh neiin tûmah i ruai tawh hek lo vang.

⁴²Tichuan, i lakah ka thinrimna ka hrithla ang a, ka thîkna che chuan a kiansan tawh ang che. Ka thinur chu a reh ang a, ka ngawi hlê hlê tawh ang.

⁴³I tleirâwl laia i awm dânte hre reng duh lova, hêtiang thil hmanga mi tihbuai êm avâng hian, i thiltih ang takin i lu chungah ka thungrûl ang che,” Lalpa PATHIAN-in a ti. Hêng i tenawmna zawng zawng belhchhah hian i hur zui tawh lo bawh ang.

SAMARI LEH SODOM AIA SUAL

⁴⁴“Thufing hmangtu apiangin hê thufing tawi: ‘A fanuin a nu a chhûn e!’ tih hi nangmah beih nân che an hmang ang.

⁴⁵Mahni pasal leh fate lungtentu, i nu fanu dik tak i lo ni e; i laizâwnte lah mahni pasal leh fate pawh lungtentu, chutiang laizâwn chu i lo ni a; i nu lah Hit mi, i pa pawh Amor mi a ni rêng a.

⁴⁶“I laizâwnnu, i u chu Samari a ni a, i awmna hmar lamah a fanute nêh an chêng a; i laizâwnnu, i nau Sodom leh a fanute chu, i awmna chhim lamah an chêng a.

⁴⁷An nûn dânin i nung ve lo va, an tenawmna angin i ti ve lo na a, anmahni aia i awm khawloh nasatzia ngaituahin, chûng thilte chu nêp tê a ni.

⁴⁸“Nang leh i fanuten in tih ang hi, i laizâwnnu Sodom leh a fanute pawhin an ti hlei nêh, tih hi keima nunna chhâlin ka sawi e,” Lalpa PATHIAN-in a ti.

⁴⁹En teh, i laizâwnnu Sodom sualna chu hêngte hi a ni: amah leh a fanute chu chaponate, ei puar lutuk te, dâwngdahna tein an khat a; mi rethei leh tlachhamte kut an tihchak sak duh hek lo.

⁵⁰Inluling takin ka hmâah thil tenawm an ti thîn a; chuvângin, tha ka tih angin ka nuai bo ta a ni.

⁵¹“Samari chuan i thil sual tih zatve pawh a ti lo; anni aia thil tenawm i tih hnem êm avângin, i laizâwnte chu thiam i chantîr mai dâwn alâwm le.

⁵²I laizâwnte rêlsaktu hian, i laizâwnte aia thil tenawm nasa zâwk i tih avângin i mualphona chu i khum ve tûr a ni; nang ai pawha dik zâwk an ni si a. Ni e, i laizâwnte thiam zâwkah i dah miao va, nang chuan zak takin i mualphona chu i phur ngei tûr a ni.

⁵³“An saltângte, Sodom leh a fanu saltâng te, Samari leh a fanu saltâng te ka hruai kîr leh hunah chuan, i saltângte pawh an zîngah ka hruai kîr ve ang a,

⁵⁴anmahni i thlamuan laia i thil lo tih zawng zawng avânga tihmualphova, zak taka i awm theih nân.

⁵⁵I laizâwn, Sodom leh a fanute an awmna ngaia an kîr leha, Samari leh a fanute pawh an awmna ngaia an kîr leh hunah chuan, nang leh i fanute pawh an awmna ngaiah an kîr leh ang.

⁵⁶I chapo lai khân i nau Sodom chu i sawi chhiat duh hauh loh kha,

⁵⁷I suahsualna hailan a nih hma zawng khân. Suria fanute leh a vêla mi zawng zawng leh Philistia-ho fanu, hmun tina nangmah hmusittuten an sawi chhe ve ta che ang hi a ni.

⁵⁸I hurna leh i tenawmna mawh i phur ta a nih hi,” LALPAN a ti.

⁵⁹Lalpa PATHIAN chuan heti hian a ti: “Thuthlung bawhchhiaa thutiam hmusittu, i thiltih ang zêlin i chungah pawh ka ti ve ang.

KUMKHAW THUTHLUNG

⁶⁰“Chuti chung chuan, i tleirâwl laia i hnêna ka thuthlung kha ka hriatsak reng ang che a, nangmah nêna kumkhaw thuthlung chu ka tinghet ang.

⁶¹I laizâwn, i û leh naute i lo lawm luh hunah chuan, i awm dân te kha hre chhuakin, i zak hle ang; mahse thu ka thlunpui che avâng ni lovin, anni chu i fanu atân ka pê ang che.

⁶²Thû ka lo thlunpui che kha ka tinghet dân a ni. Tichuan, LALPA ka ni tih i hria ang a,

⁶³i thil lo tih tawh zawng zawng ka ngaihdam hunah che chuan, i la inhre chhuak ang a, i zak hle ang, i zah avângin i kê pawh i âng tawh ngai lo vang,” Lalpa PATHIAN-in a ti a ni.”

BUNG 17

MUPUI LEH GREP HRUI

¹LALPA thu chu ka hnênah a lo thleng a,

²“Mihring fapa, thu khirh hmangin Israel chhûngte hnênah tehkhin thû sawi rawh,

³Lalpa PATHIAN chuan heti hian a ti, ti ang che: “Mupui lian pui, thla hlai leh sei tak nei, Hmul buk tak, rawng chi hrang hranga tjal chu, Lebanon-ah a lo thlâwk a Sidar lêra a zik ziding chu a thliak a.

⁴A zik no leh sâng ber chu thliakin Sumdâwngho ramah a thlawhpui a; Sumdâwnna khawpuih a va phun a.

⁵Chû rama thlai chîte pawh chu lăin Lei t̄atna hmunah a chîng a; Tui tamna hmunah a kui t̄iak a Tuipuisuthlah angin a tlar a.

⁶A lo t̄ang a, hniam taka grêp hrui zâm buk chi a lo ni a; A zârte chuan ama lam a hawi a, A hnuaiah chuan zung a thlak a. Tichuan, grêp kung a lo ni a, Zâr te a lo chhuah ta a.

⁷“Mahse, mupui dang, lian pui, thla hlai leh hmul ngah tak hi a awm ve a; Ngai teh, chu grêp zungte chuan ani lam chu an pan a, A zârte pawh chu a lam hawiin a zâm a, A phunna huan a t̄anga tui a hmuh theihna lamah chuan.

⁸Lei t̄a leh tui tamna hmuna phun a ni a, Pêngte a chhuaha, tam taka a raha, Grêp kung lian tak a lo nih theih nân.”

⁹“Tihian sawi rawh, ‘Lalpa PATHIAN chuan heti hian a ti: “A t̄ang duah zêl ang em? Nge, a zung chawpa pawh chhuakin, A rahte titla vekin, A dah vuai zâwk lo vang maw? A nipui hnahte pawh a vuai vek ang, A zung pawt tûrin thâ tam tak sên a ngai âwm si lo va.

¹⁰Ngai teh, phun a ni nâ a, A puitling meuh ang em? Khawchhak thliinrawn chhêm se a vuai mai lo vang maw? A t̄o chhuahna huanah ngei a vuai vek ang chu,” a ti a.”

¹¹Chû lo pawh, LALPA thû chu ka hnênah a lo thleng a,

¹²“Helhmang chhûngkua chu hrilh rawh: ‘Hêng thil awmzia hi in hre lo vem ni?’ ti rawh. ‘Babulon lal chu Jerusalem-ah a kal ngei a, an lal leh hotute chu manin, Babulon-ah pawh a hruai ngei bawh a.

¹³Lal fapa chu a hruai a, chhia chhamtûrin, thuthlung a siampui a. Ram chhûnga mi chakte pawh a hruai vek a,

¹⁴hê lalram hi mahnia dîng chhuak zo lo khawpa dah hniamin, thuthlung vuan chung chauhva a dîn chhuah leh theih nân.

¹⁵Mahse a hel ta si a, sakawrte leh mi tam tak dîl chhuak tûrin Aigupta ramah a palaite a tîr a. A hlawhtling ngû ang em? Chutiang ti chung chuan a tâl chhuak thei ang em? Thuthlung bawhchhetu chu a inhumhim thei dân em ni?

¹⁶Lalpa PATHIAN chuan heti hian a ti, ‘Ka nunna chhâlin ka sawi e, lala siamtu, lal hnêna a thutiam pawisa lova, a thuthlung pawh a bawhchhiatsaka chênna hmun ngei—Babulonah chuan a thi mawh ang.

¹⁷Mi tam tak dang bet tûra lei chhûn pâwn te siama, kulha an hung hnan hunah chuan, Pharoa sipai rual leh pâwl ropui tak pawhin indonaah engtin mah an pui thei lo vang.

¹⁸A chhechham pawh hmusita thuthlung a chhut chah bâkah, chûng thil zawng zawng chu a tih zêl avângin, a tâl chhuak hauh lo vang,” a ti a.

¹⁹Chuvângin, Lalpa PATHIAN chuan heti hian a ti: “Ka chhechham a hmusit a, ka thuthlung a bawhchhia a, a lu chungah ngei ka thungrûl ang, tih hi ka hming chhâlin ka sawi a ni.

²⁰Ka lénin ka khuh ang a, ka thangah a âwk ang. Babulonah ka hruai ang a, kei mi phatsan avângin chutah chuan a chungthû ka rêl ang.

²¹A sipai vâkvaiho chu khandaiha tihtlûk an ni ang a, a la bângte chu hmun tinah an darhsarh vek ang; kei LALPA hian hêng thu hi ka sawi tawh tih i hria ang.”

HUN HNUHNUNGA ISRAELTE TÂNA CHÂWIMÂWINA

²²Lalpa PATHIAN chuan heti hian a ti: Sidar thing zik sâng ber zînga mi chu thliakin ka phun ang. A lêra a zikno chu ka thliak ang a, tlang sâng leh langsâr tak chungah ka phun ang.

²³Israel tlang sâng chungah ka phun ang a; zârte a chhuah ang a, a lo rah t̄uah t̄uah ang a, sidar thing lian pui a ni ang. A hnuaiah te chuan sava tinrêng an chêng ang a; a zâr hlim te chu chên nân an hmang ang.

²⁴Ramhnuaia thing zawng zawng chuan kei, LALPA hian thing sângte ka râwt hniam a, thing hniamte ka tisâng t̄hin a, thing hringte ka tiro va, thing rote chu ka tihring t̄hin tih an hria ang; kei LALPA hian ka sawi bawh a, ka ti bawh a ni,” a ti a.

BUNG 18

THUFING DIK LO HNIAL THLAKNA

¹LALPA thû chu ka hnênah a lo thleng leh a,

²“Israel ram chungchânga hê thufing in hman t̄hin hi eng nge a awmzia: ‘Paten grêp thûr an ei a, Fate hâ a lo t̄im’ tih thû hi?

³Lalpa PATHIAN chuan, “Ka nunna chhâlin ka sawi e, hê thufing hi Israel ramah in hmang tawh lo vang.

⁴“Ngai teh u, nunna zawng zawng hi ka ta a ni; Pa nunna te, fapa nunna te hi ka ta a ni; Thil sual titu chu a thi ngei tûr a ni.

⁵Mahse, mihring chu a dik chuan Thil thianga leh dik chu a ti thin;

⁶Tlâng chungah te engmah a ei ve lohva, Israel chhûngkaw milim lam a hawi hek lohva, A thenawm nupui a tihbawrhân lohva, Hmeichhe thianghlîm loh lai a hnaih lohva.

⁷Tûmah a hnehchhiah lohva, Mi thil pûk dahkham te a pêkkîr zêla; Tihluihnaa tû thil mah a chhuhsak lohva, Rilâm hnêna ei tûr a pêka Saruakte puan a sintîr bawh a;

⁸A pung ûma sum pûktîr lova, A pung pawh la duh lova, Thil tha lo laka insûma Mite kêra dik taka a rêlsaka;

⁹Ka thupêkte a zawm a— Ka rorêlnate rinawm taka vawngtu chu— Mi dik a ni a; A nung ngei ang!” Lalpa PATHIAN-in a ti.

¹⁰“Fapa rûk hmang emaw, Thisen chhuah hmang a hrin emaw, Hetiang thil tih a chin emaw,

¹¹A tih tûra tuk ti si lo va, Tlângah te thil va eia, A thenawm nupui a tihbawrhâna;

¹²Rethei leh tlachhamte a hnehchhiah, Tharum hmanga mi thil a chhuha, Mi thil dahkham a pêkkîr duh lohva, Milim lam hawia, thil tenawm a tiha;

¹³A pung ûma a pûktîra A pung latu chu— A nung reng dawn em ni? Nung hauh lo vang! Hêng thil tenawm engpawh hi ti se, A thi ngei tûr a ni; A thisen mawh chu ama chungah a tla ang.

¹⁴“Amaherawhchu fapa a hrina, Chû mi chuan a pa thil sual tih zawng zawng a hmuha, Ti vê hauh lo tûra a rilru a siama;

¹⁵Tlâng chungah te engmah a ei ve lohva, Israel chhûngkaw milimte lam a hawi hek lohva, A thenawm nupui tibawrhâng lohva;

¹⁶Tûmah a hnuaichhiah lohva, Mi thil dahkham a hrênsak loh va, Tharumin mi thil a chhuah hek lohva, Rilâmte ei tûr a pêka Saruakte puan a sin tîra;

¹⁷Retheite lakah kut a thlak lohva A pung a ûm lohva, a lâk bawh lohva, Ka rorêlna anga thil a tih chuan A pa sualna avângin a thi lo vang a, A dam ngei zâwk ang!

¹⁸“A pa erawh chu Râwng taka mi a tihduhdaha, Tharum nêna mi a rawk avâng leh, A mite tâna thil tha lo a tih avângin, Ngai rawh, a sualna avângin a thi mawh ang.

INLAMLÊTIN NUNG RAWH U

¹⁹“Nangni erawh chuan, ‘Engah nge fapa chuan a pa sual mawh chu a phurh loh vang?’ in ti a. Fapa chuan dân ang tak leh dik taka a tiha, ka thuruatte a wawna a zawm tlat avângin, a nung ngei ang.

²⁰Thil sual titu chu a thi tûr a ni. Fapain a pa sual mawh a phur tûr a ni lo va, pain fapa sual mawh a phur tûr a ni hek lo. Mi dik chuan a dik man a têt ang a, mi sualin a sual man a phur bawh tûr a ni.

²¹“Nimahsela, mi suaksual chuan thil sual a lo tih zawng zawng a hawisana, ka dânte a wawn thata, dân ang tak leh dik taka thil a

tih chuan, a nung ngei ang a, a thi lo vang.

²²A lo bawhchhiat tawhna zawng zawng chu hriat reng a ni lo vang; dik taka thil a tih avângin, a nung ang.

²³Mi suaksual thihna avânga lâwmna chhan tûr ka nei rêng em ni?” “A awm dân te a inlamlêt a, a nun hi ka duh zâwng a ni zâwk lo vem ni? Lalpa PATHIAN-in a ti.

²⁴“Mahse, mi dik chuan a dikna hawisana, khawlo taka a tiha, mi suaksual ang maia thil tenawm ti ta se, a nung tho dawn em ni? Thil tha a lo tih tawh zawng zawng pawh hriatreng tlâkah ngaih a ni lovang a; rinawm lo taka thil sual a lo tih avânga thiam loh changin, chûngte avâng chuan a thi ang.

²⁵“Nangni erawh chuan, ‘Lalpa tih dân hi a rual lo mang e,’ in ti a. Aw Israel chhûngte u, lo ngaihla teh u, nangni tih dân hi a rual lo zâwkin, ka tih dân hi a rualkhâi zâwk a ni lo vem ni?

²⁶Mi dik chuan a dikna hawisana, thil sual a tiha, a thih phah chuan, a thil sual tih vânga thi a ni.

²⁷Mi suaksualin thil sual a lo tih thinte a hawisana, dân ang tak leh dik taka a tih chuan, ama nunna a chhanhim a ni.

²⁸Bawhchhiatna thil a lo tih tawh zawng zawng hawisan tûra a rilru a siam tâk avângin, a nun phah ngei ang a, a thi lo vang.

²⁹Chutichung pawhin Israel chhûngte chuan, ‘Lalpa thiltih dân hi a rual lo êm mai,’ an la ti fo va. Aw, Israel chhûngte u, ka tih dân hi a rual a, in tih dân a rual lo a ni zâwk lo vem ni?

³⁰“Chuvângin âw, Israel chhûngte u, in awm dân ang zêlin a nia mi tin chung a ro ka rêl dawn ni,” Lalpa PATHIAN-in a ti. “In sualnain chhiatna a thlen loh nân, inlamlêt ula, in bawhchhiatnate kha hawisan vek rawh u.

³¹In lo bawhchhiat tawh zawng zawng chu hnâwl bo vek ula, thinlung thar leh thlarau thar nei ang che u. Aw Israel chhûngte u, engah tehlu nge in thih ang le?

³²Mi an thih hian lâwmna rêng ka nei lo asin,” Lalpa PATHIAN-in a ti. “Chuvângin, inlamlêt ula, nung rawh u!”

BUNG 19

ISRAEL TIHTLÂWMNA

¹“Chu lo pawh, Israel puipate sînna hla phuah la,

²heti hian ti ang che: ‘I nu chu eng nge a nih? Sakeibaknei pui mawle: A bawh thin e, sakeibakneiho zîngah, A note a chawm, sakeibaknei vânglaite chu.

³A chawm lian e, a no pakhat chu, Sakeibaknei vânglai a lo ni a; Sa seh dân a zir ta e, A seh ta, mihringte.

⁴An lo hre ta e, hnamten; An khur chhûngah an âwk ta, Khaidiata phuar chungin Aigupta ram an thlen ta e.

⁵A nghahfâk ber beisei tûr a awm lo tih a hmuhi, No dang a chawm leh, sakeibaknei vânglai a lo ni a.

⁶Sakeibaknei zîngah a tâl vel a, Sakeibaknei vânglai a lo ni ta; Sa seh dân a zir a, Mihringte a seh ta.

⁷An hmun ram chenin a hria, An khawpuite a tihramsak a; Ram chu a hausakna nêna a tiavâi zo ta, A hâhum thawm avâng chuan.

⁸Ram tin kil tina hnamten an do rawn a, A chungah lèn an zâr hnan; An khur chhûngah an man ta.

⁹Kawl bunin bâwm chhûngah an khung, Babulon lal hnên an thlenpui; Lêna khuh chungin an hruai, Israel tlânga thâwm a neih tawh lohna tûrin.

¹⁰I nu chu i thisen zawmpui grêp hrui ang mai, Tui tamna hmuna phun, Tui a tam vânga rah duh tak chu.

¹¹Lal tiang ni tûrin zâr khauh tak a nei. A zâr buk chungah a filawr luah a, Zâr dang khûmin sang takah hmuh theih a ni.

¹²Mahse thinurin an thuai chhum ta, Paih thlak a ni, pialleiah, Khawchhak thliin a chhêm ro. A zâr khauh tliak ta chu a uai zo va; Senmeiin a kâng zo ta.

¹³An phun sawn ta, thlalêrah, Ramro leh ram tuihâlâh chuan.

¹⁴A zâr aţanga mei lo chhuak chuan, A rahte a kâng zo va, Lal tianga hman tlâk zâr khauh tha a nei ta lo.” Hei hi sûnna hla a ni a, insûn nâna hman tûr a ni.

BUNG 20

ISRAELTE HELNA

¹Kum sarihna, thla ngâna, a ni sâwm ni chuan Israel upa thenkhat chu LALPA râwn tûrin an lo kal a, ka hmâah chuan an thû a.

²LALPA thû chu ka hnênah a lo thleng a,

³“Mihring fapa, Israel puipate chu bia la, an hnênah, ‘Lalpa PATHIAN chuan: “Kei mi râwn tûrin maw in lo kal? Nangni râwn tûrin ka awm tawp lo vang, tih hi ka nunna chhâlin ka sawi a ni,” Lalpa PATHIAN-in a ti, ti rawh.”

⁴An chungthû hi, nang mihring fapa, i rêlsak dâwn lo’m ni? An thlahtute tenawmzia pawh an hnênah hriattîr nghal ang che.

⁵An hnênah, ‘Lalpa PATHIAN chuan heti hian a ti: “Israelte ka thlan ni khân, Jakoba thlahte hnênah kut pharin, Aigupta ramah khân an hnênah ka inhriattîr a; kut phara chhechhamin an hnênah, ‘Kei hi LALPA in Pathian ka nih hi,’ ka ti a.

⁶Chumi ni chuan kut pharin an hnênah, Aigupta ram ata ka hruai chhuak ang a, an tâna ka zawn chhuahsak, ‘khawizû leh hnutetua luang’ ram, rama zawnga duhawm berah ka hruai lût ang, tiin chhia ka chham a.

⁷An hnênah, ‘Aigupta milem pathiante hian intibawhlhlawh suh ula, mi tinin mahni hmaa thil tenawm chu paih bo vek rawh u. Kei hi LALPA in Pathian chu ka ni,’ ka ti a.

⁸Mahse ka lakah an hel a, ka thu pawh an âwih duh lo va. An mithmuha thil tenawm pawh an paih bo duh lo va, Aigupta milem pathiante pawh an hawisan duh hek lo. Heti a nih chuan, ‘An chungah ka thinrimna ka leih bua ang a, Aigupta ramah ngei ka thinurna ka hrithla teh ang,’ ka ti a.

⁹Mahse, an chênpuî Jentailho zîngah ka hming tihhliau a nih loh nân, ka hming humhalh tûrin ka ti ta zâwk a, an awmna rama mite mit hmuhah Aigupta ram aţanga hruai chhuaktu tûr ka ni tih ka lo inhriattîr tawh si a.

¹⁰“Tichuan Aigupta ram ata ka chhuahtîr a, thlalêrah ka hruai ta a.

¹¹Ka dân thuruatte chu ka pê a, ‘mi tûpawhin a zawm chuan, chûngte chu a nunpui tûr a ni’ tiin ka rorêlna thu ka hriattîr a.

¹²Chû lo pawh, kei leh anmahni inkâra chhinchhiahna atân Sabbath ni ka pe bawk a; kei hi anmahni serh hrangtu LALPA ka ni tih an hriat theih nân.

¹³Nimahsela, thlalêrah khân Israel chhûngte chu ka lakah an hel a; ka dân thuruat an zâwm duh lo va; ‘mi tûpawhin a zawma a nunpui tûr a ni’ tia ka rorêlna thûte chu an hmusit a, ka Sabbath nîte lah an bawhchhe nasa bawk si. Chuvângin, anmahni tiboral tûrin, thlalêrah lâ lâ khân ka thinrimna hi an chungah ka leih baw mai teh ang, ka ti hial a.

¹⁴Mahse, ka hruai chhuah lai lo hmutu Jentailhovin an sawi chhiat loh nân, ka hming chu ka humhalh ta zâwk a.

¹⁵Tichuan, anmahni ka pêk, ‘khawizû leh hnutetua luang’ ram, ram azawnga duhawm berah chuan ka hruai lût tawp lo vang, tiin, thlalêrah khân bân phar meuhvin chhia ka chham a,

¹⁶ka rorêlnate hmusitin, ka dân thuruatte an zâwm duh lo va, ka Sabbath nîte an bawhchhe bawk a; an thinlung chuan milem pathian lam a hawi tlat a.

¹⁷Chuti chung chuan, tiboral êm lovin ka mitin a zuah hrâm hrâm a. Thlalêrah khân ka tiboral ta êm lo va.

¹⁸“Thlalêrah khân an thlahte hnênah, “In thlahtute dân siam chu zâwm suh u, an thurêlte pawh zâwm suh ula, an milemte chuan intibawrhbâng hek suh u.

¹⁹Kei hi LALPA in Pathian ka ni a: ka dân thuruatte hi pawm ula, ka rorêlna thûte hi vawng ula, zawm rawh u;

²⁰ka Sabbath nîte hi serh ula, kei leh nangni inkâra chhinchhiahna a ni ang a, tichuan, kei hi LALPA in Pathian ka ni tih in hria ang,’ ka ti a.

²¹Nimahsela, an fate chu ka lakah an hel a; ka dân thuruatte an pawm duh lo va, ‘miin a zawm chuan a nunpui tûr a ni’ tia ka rorêlna thûte chu an pawisa duh hek lo; ka Sabbath nîte chu an bawhchhe ta zâwk a. Thlalêrah khân an chungah ka thinurna leihin, ka thinrim ka hrithla mai teh ang, ka ti hial a.

²²Mahse, ka insûm hrâm hrâm a, ka hruai chhuah lai lo hmutu Jentailho mithmuha sawi chhiat an nih loh nân, ka hming chu ka humhalh ta zâwk a.

²³Jentailho zîngah ka tidarh ang a, ram tinah ka hnawt darh dâwn tih thlalêrah khân bân phar meuhin chhia ka lo chham hnan tawh a,

²⁴ka rorêlna thû te an zawm duh lo va, ka thuruatte an hmusit a, ka Sabbath nîte bawhchhiain, an thlahtute milem pathian lamah an mit a fu tlat zâwk si a.

²⁵“Chuvângin, an tâna tha lo tûr dân ka siam a, an nun theih lohna tûr rorêlna thû ka pe bawk a;

²⁶an inthâwina thilhlalanah an fatîr zawng zawng meiah an kal tlangtîr thîn avângin tenawmah ka puang tawh a, ka tihchereu vek hunah, kei hi LALPA chu ka ni tih an lo hriat nân.”

²⁷“Chuvângin, mihring fapa, Israel chhûngte hnênah thu sawi rawh, ‘Lalpa PATHIAN chuan heti hian a ti: “Ka lakah depdê takin in thlahtute khân ka hming an sawi chhia a.

²⁸Chhechham meuhva bân phar chungka ka pêk rama ka hruai thlen lai khân, tlâng sâng tin leh thing buk an hmuh apiang kha inthâwina thil hlan nân an hmang a, an thilhlân hmangin min elsên a. Mîlem hnêna rimtui hlan tûrte siamin, in tûr thilhlante an bun chhuak a.

²⁹An hnênah, ‘Hmun sâng in kalnate hi eng nge ni?’ ka ti a. Chumi hming chu waviin thlengin Bamah* tih a ni ta a.”

³⁰Chuvângin, Israel chhûngte hnênah sawi la, ‘Lalpa PATHIAN chuan heti hian a ti: “In thlahtute ang bawkin in intibawrhângin, an tenawmna ang bawkin nawhchî in zuar ve ta em ni?”

³¹Inthâwina thilpêk in hlana, in fapate meia in kal tlangtîr hian, in mîlim zawnzawng nêntibawhlhlawh in ni asin, tûn thleng hian. Chuvângin, nangni râwn tûr ka ni em ni, âw, Israel chhûngte u? Ka nunna chhâlin ka sawi e, nangni râwn tûrin ka awm lo ve,” Lalpa PATHIAN-in a ti.

³²Ram danga Jentail chhûngkuate angin, thingbul lungbul biain kan awm ve mai ang,’ tia in rilrûa in tum ang khân in awm tawp lo vang.’

PATHIANIN ISRAELTE A TUNG DING LEH DÂWN

³³Lalpa PATHIAN chuan heti hian a ti, “Keima hming chhâlin ka sawi e, kut chak tak leh bân phar chungin, thinrimna leih baw puat puat chungin, in chungah ro ka rêl dâwn.

³⁴Hnamte zîng ata ka hruai chhuak ang che u-a, kut chak tak leh bân phar chungin, thinurna leih baw chungin, hnawh darha in awmna ram aţangin ka hruai khâwm leh ang che u.

³⁵Hnam dangte thlalêrah ka hruai ang che u-a, chutah chuan hmaichhanah in chungthû ka rêlsak ang che u.

³⁶Aigupta ram thlalêra in thlahtute chungthû ka rêlsak ang khân, in chungthû pawh ka rêlsak baw ang che u,” Lalpa PATHIAN-in a ti.

³⁷“Tiang hnuaiah ka luhtîr ang che u-a, thuthlungin ka phuar baw ang che u;

³⁸In zînga helhmangte leh ka laka bawhchhetute ka thianfai ang; an chênna ram aţangin ka hruai chhuak ang a, mahse Israel ramah erawh chuan an lût ve lo vang. Tichuan, kei hi LALPA ka ni tih in hria ang.

³⁹“Aw, nangni Israel chhûngte u,” Lalpa PATHIAN chuan heti hian a ti: “Ka thu in âwih duh loh ahnû–kal ula, mi tinin mahni mîlem pathian rawng chu va bawl teh rêng u; mahse, in thilhlân leh in mîlem hmangin ka hming thianghlim hi tibawrhâng tawh teh suh u.

⁴⁰Lalpa PATHIAN chuan heti hian a ti, “Israel tlâng sâng chungah, ka tlâng thianghlimah ngei chuan Israel chhûngkua leh a ram chhûnga mi tinin ka rawng an bawl ang a; chutah chuan ka lo lâwm ang a, in inthâwina thilpêk rah hmasate chu, in thilhlân thianghlim dang zawnge nêntibawrhâng tawh ang.

⁴¹Hnamte zînga ta ka lak chhuah che u-a, hnawh darha in awmna ram aţang tea ka hruai khâwm che u hunah chuan, rimtui tak angin ka lo pawm tawh ang che u-a; ka thianghlimna chu nangmahni hmangin Jentailho hmâah tihlan a ni tawh ang.

⁴²Kut phar meuhva in thlahtute hnêna pêk ka lo tiam tawh, Israel rama ka hruai luh hunah che u chuan, kei hi LALPA ka ni

ti in hria ang a.

⁴³Chutah chuan in lo chêt dân leh khawsak dân bawhlhlawhia in hre rauh rauh tawh ang; thil sual in lo tih zawnzawng avâng khân mahni leh mahni pawh in inten hluah hluah tawh baw ang.

⁴⁴Tichuan, in nun dân suahsual leh hlemhlêt vâng ni lovin, ka hming avâng liau liauva thil ka tihsak hunah che u chuan, aw, Israel chhûngte u, kei hi LALPA ka ni tih in hria ang,” Lalpa PATHIAN-in a ti.”

NGAW CHHÛNGA MEI CHHUAK

⁴⁵Hêng bâka LALPA thû, ka hnêna lo thleng chuan,

⁴⁶“Mihring fapa, chhim lam kha hawi la; chhim lam demin thu sawi la, chhim lama ram ngaw chu thû puan khum rawh,

⁴⁷Chhim lam ngaw hnênah chuan, ‘LALPA thû hi lo ngaithla teh khai! Lalpa PATHIAN chuan: “Ngai rawh, nangmahah mei ka chhuah ang a, nangmaha thing hring leh thing ro tinrêng a kâng fai vek ang; mei alh chu an thelh mit lo vang a, chhim aţangin hmar lam thlengin a kâng fai vek ang.

⁴⁸Tisa zawnzawngin kei, LALPA hâl ngei a ni tih an hmu ang a; thelh mih a ni hauh lo vang,” a ti e,” a ti a.

⁴⁹Kei chuan, “A, Lalpa PATHIAN! ‘Tehkhin thu sawi mai a ni lo maw?’ min ti asin,” a ti a.

BUNG 21

PATHIAN KHANDAIH, BABULON

¹LALPA thû chu ka hnênah a lo thleng a,

²“Mihring fapa, Jerusalem lam hawi la, hmun thianghlimte demin thû sawi la, Israel ram chu thû puan khum rawh;

³Israel ram hnênah, ‘LALPA heti hian a ti: “Ngai rawh, ka do che a ni, a pâi aţangin ka khandaih ka phâwi ang a, in zînga mi dik leh mi sualte chu ang khat rengin ka râwt vek ang.

⁴In zînga mi dik leh mi suaksual ka râwt vek dâwn avângin, chhim lam aţanga hmar lama mi zawnzawng râwt tûrin ka khandaih chu a pâi ata a chhuak ang a;

⁵tichuan, mi zawnzawngin kei LALPA hian ka khandaih chu a pâi ata ka phâwi tih an hria ang a; a inkhung lêt leh tawh lo vang.”

⁶Chuvângin, mihring fapa, rûm vawng vawng la, an mithmuhah lungchhe takin tap rawh.

⁷I hnênah, “Engtizia nge i chiauwak vak vak mai le?’ tia an zawh che chuan, ‘Chanchin thar avâng hian maw le; a lo thlen hunah chuan, mi tin thilung a tûral ang a, kut zawnzawng a zawi zo vek ang; thlarau a chau zo vang a, khûp zawnzawng pawh tui ang maia nêntibawrhâng ang. Ngai teh, a lo thleng mek a, a lo thleng ngei dâwn a ni,’ Lalpa PATHIAN-in a ti, ti ang che,” a ti a.

⁸LALPA thû chu ka hnênah a lo thleng leh a,

⁹“Mihring fapa, heti hian thû puang rawh, ‘LALPA chuan heti hian a ti!’ ‘Khandaih, khandaih chu tah hriama Nawhtlêt a ni ta e!

¹⁰An tât hriam e, mipui sâm nân, Nawhtlêt a ni, kâwlpê angin de rawh se! Kan la intihlim cheu ang maw? Thing dangte ang leka Ka Fapa laltiang a hmusit chung hian.

¹¹Tihtlêlêt tûrin a pe tawh a, Hman mai theih tûrin; Hê khandaih hi tahhriama nawhtlêlêt a ni, Tihlumtu kuta pêk tûrin.’

¹²“Mihring fapa, tap la chiauw vak rawh; Ka mite tuar tûr a ni si a, Israel puipa zawng zawng nê. Ka miten khandaih hlauhawm an tuar dâwn; Chuvângin, mangangin in khêl kha bêng ula a ni mai.

¹³“Fiahna a nih vângin, Khandaihin tiang a hmusit lehzêl ang maw? Tiang chu awm reng thei a ni lo ve,” Lalpa PATHIAN-in a ti.

¹⁴“Chuvângin, mihring fapa, thû puang la, I kut bêng thuai thuai rawh. Khandaih chuan a lêta chhiatna vawi thum se. Tihlumtu chu khandaih a ni alâwm, Mi ropuite thattu khandaih chuan A luhchilh, an pindan ril thlengin.

¹⁵An kawngka zawng zawngah khandaih zumin ka tin thup a, Thinlunga an zâm chhiat dêr a, Nasa lehzuala an tlâkchhiat nan; Khai le! an title ta vur mai; Mi thah nân an vilik ta e:

¹⁶“Khandaih a inpeih ta! Ding lamah vai rawh! A hriam lam hawitîr la! Vei lamah vai rawh— A hriam lamin a hawi lam lamah!

¹⁷“Kei pawhin kut ka lo bêng ang a, Ka thinrim pawh a dai tawh ang; Kei, LALPA hian ka sawi tawh hi,” tiin.

¹⁸LALPA thû chu ka hnênah a lo thleng leh a:

¹⁹“Babulon lal khandaih lo thlen theih nân kawng pahni sial tûrin lo inruat la; a pahni chuan ram pakhat ațanga chhuak vê vê a ni tûr a ni. Chhinchhiahna siam la; chû chuan khawpui panna kawngpui lam kawhtîr ang che.

²⁰Khandaih chuan Ammon khua Raba a luh theih nân kâwktu siam la, pakhatin Judai rama Jerusalem kulh kâwk rawh se.

²¹Babulon lal chu kawng pêngah chuan aien tûrin a ding a: a thal bâwm a thing a, a milim a rawn a, sa thin chu a thlîr vung vung a.

²²Jerusema a kalna tûr aienna chu a kut ding lamah a awm a: kulh bang sut chhiatna va bun tûr te, râl beih hukna tûra thu pe au rî te, kulh kawngkhâr sut chhiatna bun tûr te, kulh hung hnanna lei chhûn pâwn va siam tûr tea aienna a ni a.

²³An hnêna chhechhama thû an tiampuite tân chuan aienna dik lo angah an ngai ang; mahse, man an nih theih nân, an sualna chu a hriat chhuahtîr dâwn a ni.

²⁴“Chuvângin, Lalpa PATHIAN chuan heti hian a ti: ‘In sualnate hriat reng a nih theih nân, in bawhchhiatnate chu hailan a ni ta a, in thiltih apiangah in sualte a lo lang zêl a, hriat chhuah in lo nih tâk avângin man in la ni ang.

²⁵“Tûnah chuan, nang, Israel hotu suaksual, mi bawhlhlawh pa, khawlo taka i awm dân tâwpna ni chu a lo thleng ta e,

²⁶Lalpa PATHIAN chuan heti hian a ti: “Lukhim leh lallukhum kha hlip rawh, Engmah a ngaiin a awm lo vang. Mi tlâwmte châwi sâng la, mi sângte tihniaw rawh.

²⁷Tihtlâwmna, tihtlâwmna, Ka titlâwm ang! A awm reng tawh lo vang, A neitu dik tak a lo kal hmâ chu, Ama hnênah chuan ka pê ang.”

AMMON DOTU TÛR KHANDAIH

²⁸“Nang, mihring fapa, heti hian puang rawh, ‘Lalpa PATHIAN chuan Ammon-ho chungchâng leh min sawi chhiatna chungchângah heti hian a ti: ‘Khandaih, khandaih chu phâwi a ni a, Mi sâm nan nawh tlêt a ni ta, De zawr zawra tiboraltu tûr chu—

²⁹Inlârna dik lo an hmuhsak che a, Misualte khawlohnna a kin hunah Khandaihin an nghâwngah i chhun tlang dâwn, tia Âi an ensak che chu dâwt mai a ni.

³⁰“Khandaih chu a pâiah khung rawh. Siama i awmna hmun ngeiah i chungthû ka rêl ang, I pianna ramah chuan.

³¹Ka thinurna i chungah ka leih ang a; Ka thinrimna mei i chungah ka chhêm ang, Mi nunrâwng, tualthah hrâtho kutah ka hlân ang che.

³²Meia tuah mai tûr i ni ang; Ram chhûngah i thisen a chhuak ang. Tûma’n an hre zui lo vang che, Kei LALPA hian ka sawi tawh hi.’

BUNG 22

JERUSALEM SUALNA

¹LALPA thû chu ka hnênah a lo thleng a,

²“Khai le, mihring fapa, thisen chhuah hman khawpui chungthû chu i rêl dâwn em, i rêl ang chu mâw? Ni e, a tenawmzia pawh a entîr vek ang che!

³Tihian ti la, ‘Lalpa PATHIAN-in: “Hê khawpui hian ama hun tawng a thlen theih nân a chhûngah thisen a chhuah a; intibawlhhlawh tûrin milem pathian a insiam bawk a.

⁴Thisen i chhuah avângin thiam loh i chang a, milem pathian i siam avângin i intibawlhhlawh a. I tâwpna ni chu nangmah ngeiin i hnûk hnai a, i hun tâwp a thleng ta e; chuvângin, hnam tin rêl bûrah leh, ram tin tân nuihzabûrah ka siam tâk che hi.

⁵Hmingche tak leh buaina hlîra khat angin ram hlâ leh hnaia miten an nuihzat ang che.

⁶“En teh, Israel hotuten an thiltihtheihna chu in zînga thisen chhuah nân an hman theuh hi.

⁷I chhûngah hian miten nu leh pate an ngaiêp a; i chhûngah hian mikhualte in hnuaichhiah a; i chhûngah bawh hian miten fahrah leh hmeithaite an tiduhdah thîn a ni.

⁸Ka thil serh thianghlimte an zah lo va, ka Sabbath-te an bawh chhia a.

⁹I chhûngah chuan thisen chhuah tûra thu veivir chîng an awm a; thenkhatin tlâng chungah thil an han ei thîn laiin, in zînga mi thenkhat hur bo chîng an awm bawh.

¹⁰I chhûngah chuan mahni pate saruakna hlîm lang thîn an awm a; in zîngah hmeichhia, an bawlhhlawh laia awm hrang pâwl lui thîn an awm bawh.

¹¹Mahni thenawm pa nupui lakah tenawm taka lo khawsa an awm a; râwvâ taka mahni monu lo mutpui duh tâwk an awm a; in zînga thenkhat, mahni farnu, mahni pate fanu lo mutpui duh tâwk an awm bawh a ni.

¹²I chhûngah hian thisen chhuah tûrin thamna an la a; a pung ûmin thil an pûktîr a; thenkhatin an thenawmte hrêkin an hlep

ṭawk ṭawk a, min theihngihl dêr a ni,” Lalpa PATHIAN-in a ti a ni.

¹³“Ngai teh, depdê taka in hlêp ṭawk ṭawk avâng leh thisen in chhuah ṭhin avângin kut ka ṭhin khum a che u.

¹⁴In chungchâng ka rêl hunah zet chuan, in thinslungin a tuar zovin, in kut hi a chak ṭawk ngût ang emaw chu? Kei, LALPA hian ka sawi a, ka hlen ngei baw ang.

¹⁵Hnamte zîngah ka hnawt darh ang che u-a, nangmahnia bawhlhlawhna chu la bo tûrin ram tinah ka tidarh ang che u.

¹⁶Hnam tinte hmuhah in la intibawrbâng zo vang a; tichuan, kei hi LALPA ka ni tih in hria ang,” a ti a.”

ISRAELTE MEIPUIAH

¹⁷LALPA ṭhû chu ka hnênah a lo thleng a,

¹⁸“Mihring fapa, Israel chhûngkua hi ka tân êkchhia mai an lo ni ta; rawhtuina meia dâr chhia, ṭin chhia, ṭhîr chhia leh suan chhia mai an ni; silvâr ni ṭhîn kha, a êkchhiaah an chang ta.

¹⁹Chuvângin, Lalpa PATHIAN chuan heti hian a ti: ‘Ngai teh u, a êkchhia mai in nih tâk avângin, Jerusalem lailîah ka hnawh khâwm ang che u.

²⁰Miin silvâr te, dâr te, ṭhîr te, suan te leh ṭin te rawhtuina bêla an dah khâwmin, meiah an chhuang tui ṭhîn a; chutiang chuan thinur leh thinrim chungin ka dah khâwm ang che u-a, ka chhuang tui al ve dâwn a che u.

²¹A ni, ka dah khâwm che u-in, ka thinurna meiin ka chhêm ang che u-a, a laiah ka rawhtui vek ang che u.

²²Rawhtuina bêla silvâr an chhuang tui ang hian, nangni pawh a laiah chuan in tui al vek ang; kei, LALPA hian ka thinurna mei chu in chungah ka leih bua tih in hria ang,’ tiin.

ISRAEL HRUAITU SUAKSUALTE

²³LALPA ṭhû chu ka hnênah a lo thleng a,

²⁴“Mihring fapa, ani chu heti hian hrilh rawh: ‘Then fai loh ram, thinurna nîa ruahtui chang ve lo i nih hi.’

²⁵A chhûnga zâwlneiho an phiar dân chu, sakeibakneiin hâhum chung a sa seh tûr a zawng ang mai hi a ni; mite an that a; mi rosum leh ṭhil hlute an lâksak a; an zîngah hmeithai tam tak an awm phah a.

²⁶A puithiamten ka dân bawhchhiain, ka ṭhil serhte an tibawrbâng a; ṭhil serh leh serh lo te an thliar hrang lo va, thiang leh thiang lo te pawh an thliar hek lo; ka Sabbath nîte chu an haider avângin, an zîngah ka hmingchhiat phah ta a.

²⁷An zînga hotute chu chinghne koham ang mai, an hmuh apiang an seh a, an hlâwkna tûrah chuan thisen chhuah leh mi thah pawh an tîm hek lo.

²⁸An zâwlneite chuan a der maiin inlârna an hmu a, dâwtin âi an en a, ‘Lalpa PATHIAN-in chutiang chuan a ti,’ an ti a; mahse LALPA chuan engmah a sawi si lo va.

²⁹Ram chhûnga mite chuan inrahbeh leh rûkrûk te an chîng a, rethei leh tlachham te an tiduhdah a; dik lo takin mikhualte an nêkchêp ṭhîn.

³⁰Ram chu ka tihchhiat loh nân, a hungna chhe lai siamṭha tûr leh ram chhana ka hmâa ṭang tûr an zîng aṭangin mi ka zawng a; mahse pakhat mah ka hmu zo si lo.

³¹Chuvângin, an chungah ka thinrimna ka leih bua a; ka thinurna meiin ka tiboral a; an thiltih ang zêlin an chungah mawh ka phurhtîr ta,” Lalpa PATHIAN-in a ti.

BUNG 23

NAWHCHIZUAR UNAU

¹LALPA ṭhû chu ka hnênah a lo thleng leh a:

²“Mihring fapa, nu pakhat hian fanu, Hmeichhia pahni a nei a.

³Aigupta ramah an zu hur bova, An tleirâwl lai aṭanga inzuar an ni; An hnute te an lo dehsak a, An thianghligna an khâl chul vek a.

⁴An hming chu: a û zâwk Oholai, a nau Oholibai a ni; Ka tâ vê an ni a, Fanu leh fapate an hring ta a. Oholai hming chu Samari a ni a, Oholibai chu Jerusalem tih a ni.

A Û ZÂWK SAMARI

⁵“Ka tâ ni chungin Oholai chu a hur bo va, A ngaihzâwng, thenawma Assuria chu a zar hiam a,

⁶Anni chu puan senduka inthuan, Sipai lal leh hotute an ni a, Tlangvâl ît-awm tak tak hlîr, Sakawr chung chuang mi an ni.

⁷Chûngho lakah chuan a va inphalrai a, Assuria mi thlan ṭhiau an ni si a; Chûng mite laka châkna va hrithlân, An milemte lakah pawh a va intibawrbâng zo ta.

⁸Aigupta aṭanga a chîn chhuah a hurna chu a sim thei lo va, A tleirâwl têt ata mipa a mutpui ṭhîn, A thianghligna hloh ṭhak khawpin Miten duh ṭawk an lo tlingtlâkpui ṭhîn a ni.

⁹Chuvângin, ka thlah ta daih a, A ngaihzâwngte kutah chuan; Duh ṭawka a lo kawp ṭhîn, Assuria-ho kutah ngei chuan.

¹⁰Anni chuan an lo phelh ruak a, A fanute, a fapate an lak bosak a, Amah pawh khandaihin an that a; Hmeichheho insawi ṭhainna ber a ni ta, A chungchâng an rêl ta si a.

A NAU, JERUSALEM

¹¹“Chûng ṭhil chu a nau Oholibai chuan hmu reng mahse, a û ai mahin a la hur zâwk mah a, a hur dân chu a û ai mahin a uchuak zâwk a.

¹²“Thenawma Assuria-ho chu a tlawn hiam a, Sipai lal leh hotu, Ropui taka inthuan an ni a, Sakawr chung chuang mi, Tlangvâl ît-awm tak tak hlîr an ni.

¹³A chêt bawhlhlawhzia chu ka hmu reng a, Kawng thuhmun zawh vê vê an ni.

¹⁴A lo hur zual ta deuh deuh va; Banga mipa lem chuangte chu a thlîr a, Rawng sen lâra Kaldai mite lem chuan,

¹⁵An kâwngah kâwnghrên hrêngin, An lû-ah diar an khim uai siau siau va, Sipaihotu ang vek ni mai âwm an ni, Kaldai rama Babulon-ho tihdânin, An pianna ram a ni si a.

¹⁶Chûngho chu a lo hmuh rual rualin, Anmahni châkin a sosâng ngâl a, Kaldai ramah mi a tîr ta ngâl a.

¹⁷“Tichuan, Babulon-ho lo kal chuan inngaihna khum chu an panpui ta a, Râwvâ takin an khawih chingpen zo ta a; Duh tâwk an ngah hnûah chuan a ngei leh hlawm si a.

¹⁸An lakah inzuarin, an hnênah a inphelh ruak a. Chuvângin ani chu ka hawisan ta. A laizâwnnu ka hawisan ang khân.

¹⁹“Mahse a tleirâwl laia Aigupta rama a leplêr thinzia te a hre chhuak a, A hur a zual ta telh telh thung a.

²⁰Sabengtung tisa ang pûte chu a châk hiam hiam a, A kawp duh mite chu sakawr ang maia mi hur pui puite an ni.

²¹I nulât lai hnutê Aigupta miten an dehsak hrep che a, Nang lahin i tleirâwl lai hur vêl dân mawlh kha i lunglên leh thîn si a.

JERUSALEM CHUNGA RORÊLNA

²²“Chuvângin, nang Oholiba, Lalpa PATHIAN chuan heti hian a ti: ‘Ngai rawh, i ngaihzâwng, i hawisan tâk te kha, Nangmah do tûrin ka chawk tho ang a, Kil tin aţangin an rawn bei dân che a ni:

²³Babulon-ho leh Kaldai-ho, an vaiin, Pekod te, Shoa te, Koa te, Assuria-ho zawng nê, Tlangvâl îtawm pui pui hlîr an ni, Awptute, rorêltute, sipai hotu hmingthang deuh deuh te nê, Sakawr chung chuang mi vek an ni.

²⁴Indo tawllailîr te, bungraw phur tawllailîr te, indo sakawr te, Mipui tam tak nê an rawn rûn ang che. Phaw tê leh phaw lian te, thîr lukhumte nê an hual ang che. ‘An kutah rorêlna ka hlân ang a, An duh duhin i chungthû an rêlsak ang che.

²⁵I lakah thîkthû ka tichhe hle ang, Thinrim deuhin an sawisâ ang che; I hnâr leh i beng an sah thlaksak ang che a, A la dam chhunte chu khandaihin an thi ang; I fanu fapate chu an mansak ang che a, A la dam chhunte chu an kânglum ang.

²⁶I silhfên an hlihsak ang che a I thî mâwite an chhuhsak ang che.

²⁷Aigupta ram aţanga i rawn chhawm I hurna leh i nawhchizawrhna ka titawp ang, Anni pawh chu i melh fo tawh lo vang a, Aigupta pawh i hre reng tawh lo vang.’

²⁸“Lalpa PATHIAN chuan heti hian a ti: ‘I mi huatzâwng leh i hawisan tâk ho kutah ngei chuan ka pe dân a che.

²⁹Huatna nê an sawisa hrep ang che a, i thawh chhuah sa pawh an lâksak vek ang che a, saruak leh kutbêngin an kalsan ang che. Saruaka i nawhchizawrh thîinna chu an hai lansak ang che, i hur vânga i nawhchi zawrhna chu.

³⁰Jentailte zînga i inzawrha, an milemtea i intih bawhlhlawh avângin, hêng hi i chungah ka rawn thlen ang.

³¹I laizâwnnu awm dân angin i awm ve zêl a; chuvângin a chan tûr no chu i kutah ka dah ang.’

³²“Lalpa PATHIAN chuan heti hian a ti: ‘I laizâwnnu no chu i in mawlh ang, No lian leh dawng hlâwk tak chu; An hmusitin an nuihsawh ang che; A dawng hlâwk si a.

³³Ruihna leh lungngaihna in i khat ang, I laizâwnnu Samari no chu, Rîkrâpna leh chhiatna no a ni.

³⁴I in fai kêlh ang a, A no chu i tikeh ang a, Chû chuan i hnutê a tâithlêr ang; Ka sawi tawh si a,’ Lalpa PATHIAN-in a ti.

³⁵“Lalpa PATHIAN chuan heti hian a ti: ‘Kei mi theihngihla, mi hnuchhawn avângin, I hurna leh i nawhchizawrhna mawh chu Nangman i phur ngei ang,’” tiin.

LAIZAWN PAHNIH CHUNGA RORÊLNA

³⁶LALPA chuan heti hian a ti bawk: “Mihring fapa, Oholai leh Oholibai te chungthu i rêl dân lo’m ni? An tenawmzia puan khum ang che.

³⁷An uirê a, an kutah thisen a kai a. An milemte lakah an uirê a, ka tâna an hrin an fapate chenin inthâwi nân an hmang a, tiboral tûrin meiah an kal tlangtîr a.

³⁸Hei hi ka chung a ti an ni: Ka hmun thianghlim an tihbawrhân ni lâ lân ka Sabbath nîte an bawhche bawk a.

³⁹An milem pathiante tân an fate an thah nî lâ lân, ka hmun thianghlim tibawrhâng tûrin an lo kal lehngghâl thîn a; chutiang thil chu a ni, ka in chhûngah ngei an tih thîn ni.

⁴⁰“Chu bâkah, i hnêna kal tûrin hla taka mite i chah a; an lo kal ta ngei a. Nang chu i lo inbual fai a, i mitte i hnawih a, i lo intuaihnm vêl a.

⁴¹Khum ropui, a hmaa dâwhkân buatsaih sakah i thû a, chutah chuan ka thil rîmtui leh ka hriakte i chhawpsak a.

⁴²Mipui engthâwlho thâwmin a chiah a, Sabea-ho chu thlâlêr aţangin mi naranho nê an lo kal a; bânbunte bunin, an lû-ah lukhum mawi tak an khum a.

⁴³Tar thaka uirênaa lo inhmang tawh chungchângah kei chuan, ‘An hnêna awm ni mah se, ani ang hi an mutpui peih tawh dân emaw ni le?’ ka ti a.

⁴⁴Mahse, mipaten nawhchizuar an pan angin, ani hnênah chuan an lût ta tho va; tichuan, hmeichhe hur, Oholai leh Oholibai te hnênah chuan an lût ta a ni.

⁴⁵Mi dikte erawh chuan uirenute leh thisen chhuah chîngte chungthû an rêl angin an rêlsak ang; uirenu an nih avâng leh, an kuta thisen a kai tlat avângin.

⁴⁶“Lalpa PATHIAN chuan heti hian a ti: ‘Anmahni timangang tûr leh rawk chiam tûrin mipui rawn ko khâwm rawh u.

⁴⁷Mipui chuan lungin an dêng ang a, khandaihin an that ang; an fanute, an fapate pawh an that ang a, an inte an hâlsak ang.

⁴⁸Chutiang chuan hurna chu ram chhûng aţangin ka tireh ang a, hmeichhiate chu nangni anga hur tawh lo tûra zirtîr an ni ang.

⁴⁹In hur man hi in châwi ang a, milem biakna sual mawh in phur bawk ang. Tichuan, Lalpa PATHIAN ka ni tih in hria ang,’ tiin.

BUNG 24

BÊL CHHINCHHIAHNA

¹Kum kuana, thla sâwmna, a ni sâwm ni chuan, LALPA thû chu ka hnênah a lo thleng leh a,

²“Mihring fapa, hemi nî, Babulon lalin Jerusalem a beih ţan nî hi, eng nî nge tih ziak rawh.

³Helhmang chhûngkaw hnênah hê tehkhin thû hi sawi teh, ‘Lalpa PATHIAN chuan heti hian a ti: “Bêl chu hûng chhuak la, A

chhûngah tui chhûng lût rawh.

⁴A chhûngah chuan sahrangte dah ula, A sa thâ thâ, a bawp te leh a dâr te nê. A sa thâ thâin hnawh khat rawh;

⁵Ran rual zînga a thâ ber ni se. A hnuaiah thingfâk rawlh t̃euh la, So bawrh bawrhin, A ruhte chu inmund thuk thuk rawh se.”

⁶Lalpa PATHIAN chuan heti hian a ti: “Thisen chhuahna khawpui chu a chung a pik e, Bêl chhûnga a phûl bâl chu tihfai lohvin A la khir iarh uarh mai! Thliar hrang lovin a sa hrangte nê, A mal malin thur chhuak rawh u.

⁷A thisen chu amahah chuan a awm si a, Lungpui chungah te a lei h a; Lei chungah lei buak ni se, Vaivuta chhilh t̃ur a nih vei nê.

⁸Phuba la t̃ura mi tithinur t̃urin, A thisen chhuah chu ṽur lohvin, Lungpui chungah ka pho chhuak a ni.”

⁹Chuvângin, Lalpa PATHIAN chuan heti hian a ti: “Thisen chhuah hmang khawpui chu a chung a pik e! Kei pawhin thingfâk ka chhep t̃euh ang.

¹⁰Thingfâk chhep ṽum th̃ur ula, Hâl dur dur rawh u; Sa chu chh̃um kâwi vek ula, Mawsawla pawlh bawk ula, A ruh chenin út vek rawh se.

¹¹“Bêl ruak chu meiṽam chungah chhuang la, Bêl a lo sat hunah a dâr chu a ling ang a, A bawhlhlawhna nê a t̃ural veka, A bâl khirte pawh a kan ral vek theih ñan.

¹²Dâwt th̃u chuan a tichau ta, A phûl bâl khir chuan a kiansan hek lo. A phûl bâl chu k̃ang ral rawh se!

¹³I bawhlhlawhna chu i hurna hi a ni. Ka sil che a, i fai chuang si lo, I chungah ka thinrim ka hr̃ikthlâk hm̃a loh chuan, I bawhlhlawhna hi a fai tak tak lo vang.

¹⁴Kei, LALPA hian ka sawi tawh hi; A lo thleng d̃awn a, ka hlen ngei ang; Ka ins̃um lo vang a, ka d̃im d̃awn hek lo, Ka thu pawh ka zûk hek lo vang; I awm dân ang tak leh, I thiltih dân ang z̃êlin, An la rêlsak ang che,” Lalpa PATHIAN-in a ti.’

ZÂWLNEI NUPUI THIH THU

¹⁵LALPA th̃u chu ka hnênah a lo thleng a,

¹⁶“Mihring fapa, lo ngai teh, wavi leh khatah i mit titlaitu kha ka laksak ang che a; mahse i s̃unin i t̃ah t̃ur a ni lo va, i mittui pawh i titla t̃ur a ni hek lo.

¹⁷Ngâwi rengin r̃um mai la, mitthi chu engti kawng mahin s̃un lo vang che; i diar khim la, i pheikhawk bun rawh; i hmui tuam suh la, lus̃un ch̃aw r̃eng r̃eng ei suh ang che,” a ti a.

¹⁸Zîngah chuan mite hnênah ka hr̃ilh a, tlai lamah chuan ka nupui chu a thi ta mai a; a t̃uk zîngah chuan th̃u mi p̃êk ang chuan ka ti ta a.

¹⁹Mite chuan ka hnênah, “Hetiang a i awm hi kan tân eng thil nge a ent̃ir, min hr̃ilh d̃awn lo’ m ni?” an ti a.

²⁰Ani chuan a chh̃ang a, “LALPA th̃u chu ka hnênah a lo thleng a,

²¹Israel chh̃ungte hnênah sawi rawh, “Lalpa PATHIAN chuan heti hian a ti: ‘Ngai teh, in inchhuan chhan, in mit titlaitu leh in rilru tilâwmtu, ka hmun thianghlim hi ka tibawrhb̃ang d̃awn

khawp mai; in fanu in fapa in hnutchhiahho pawh khandaiha tihlt̃uk an ni ang.

²²Ka tih ang tak hian in ti ve t̃ur a ni a; in hmui in tuam t̃ur a ni lo va, lus̃un ch̃aw pawh in ei t̃ur a ni hek lo.

²³In l̃u-ah diar in khim ang a, pheikhawk in bun bawk t̃ur a ni; lu s̃un lovin, t̃ah pawh t̃ap hek lovin, in khawlohna aṽangin in tuar tlawk tlawk ang a, in iñtah tawn mai t̃ur a ni.

²⁴Ezekiela hi in tân chhinchhiahna a nih hi; a tih ang z̃êlin in ti ve t̃ur a ni; hei hi a lo thlen hunah Lalpa PATHIAN ka ni tih in hria ang.’

²⁵Nang, mihring fapa—an kulhpui te, an hlimna leh an ropuina te, an mit titlaitu te, an mit f̃ukna ber te, an fanu an fapate ka lâk bosak hunah chuan:

²⁶chumi ni chuan i beng hriata rawn hr̃ilh t̃ur chein, a tlân chhuak chuan a rawn pan d̃awn che a ni;

²⁷chumi ni chuan a tlân chhuak hnêna thu lo sawi t̃urin i kâ hawn a ni ang; ngawi reng tawh lovin th̃u i sawi tawh t̃ur a ni. An tân chhinchhiahna i ni ang a; tichuan, LALPA ka ni tih an hria ang.’

BUNG 25

AMMON CHHIAT TUR THUPUAN

¹LALPA th̃u chu ka hnênah a lo thleng a,

²“Mihring fapa, Ammon mite hmachhawn la, an chhiat t̃ur th̃u puang rawh.

³Ammon mite hnênah chuan, ‘Lalpa PATHIAN th̃u hi lo hre teh u! Lalpa PATHIAN chuan heti hian a ti: “Ka hmun thianghlim tihbawrhbân a nih lai te, Israel ram tihram veka a awm lai te, Juda chh̃ungte sala an tân laite k̃hân nuihsawh chungin, ‘Chhei le!’ in lo tih-el ṽel aṽangin,

⁴Khawchhak mite kuta awm t̃urin ka p̃ê ang che a, in zîngah b̃uk khuarin an ch̃enchilh thuk thuk ang che u-a; in theirahte an ei ang a, in hñutetui te an insak ang che u.

⁵Rabba chu sangh̃awngsei inah ka siam ang a, Ammon chu ran rual chawlh̃hmun a ni tawh ang a. LALPA ka ni tih i hria ang.”

⁶Lalpa PATHIAN chuan heti hian a ti: “Israel ram chhiatna chungah h̃musit tak leh lâwm taka kut i bena, kê i per khum aṽangin,

⁷i chungah hian ka kut ka lek ang a, hnamte tân rallâk sum maiah ka siam ang che; mite zînga ta ka paih bo daih ang che; ka tichhe vek ang che a, tichuan, kei hi LALPA ka ni tih i hria ang,” a ti a.

MOAB CHHIAT T̃UR THUPUAN

⁸“Lalpa PATHIAN chuan heti hian a ti: Moab leh Seir te chuan, ‘En r’u le, Juda chh̃ungkua hi hnam dang ang lek an nih tâk hi,’ an tih aṽangin,

⁹Moab ram ãtang hian an khawpui, an ramri hr̃ula awm leh, an ram timawitu Bethsimoth te, Baal Meon te leh Kirjathaim khawpuite hi ka vai kiang vek d̃awn a ni.

¹⁰Khawchhak mite tâ ni t̃urin, Ammon mite nê ka p̃ê ang; tichuan, Ammon mite chu hnam dangte zîngah hriat tham loh an

ni tawh ang.

¹¹Moab chungah rorêlna ka hlen ang a, LALPA ka ni tih an la hria ang.”

EDOM CHHIAT TÛR THUPUAN

¹²Lalpa PATHIAN chuan heti hian a ti: “Edom-in khati taka Judai ram chungah phuba a lâ kha, phuba lak dân huatthlala tak a ni.”

¹³Chuvângin Lalpa PATHIAN chuan heti hian a ti: “Edom chungah pawh kut ka lek ang a, mihring leh sâte ka râwt ang a, Teman ațangin ka tiram vek ang; Dedan chu khandaiha tihlûk a ni ang.

¹⁴Ka mi Israelten Edom chungah ka phuba an la ang a, ka thinrimzia leh ka thinur dân ang zêlin Edom chungah kut an thlak ang; chû chu ka phuba lâkna a ni tih an hria ang,” Lalpa PATHIAN-in a ti.

PHILISTIA CHHIAT TÛR THUPUAN

¹⁵Lalpa PATHIAN chuan heti hian a ti: “Philistia miten an hmanlai huatna avânga hmuhsitna thinlung pu rân chungah tihbora tuma phuba an lâk avângin,”

¹⁶Lalpa PATHIAN chuan heti hian a ti: “Philistia mite chungah kut ka lek ang a, Kereth mite chu ka râwt ang a, tuipui kama la dam chhunte chu ka tabora ang.

¹⁷Thinrim taka hrâwk hrep chungin, nasa takin an chungah phuba ka la ang; an chungah ka phuba ka lâk hunah chuan LALPA ka ni tih an hria ang.”

BUNG 26

TURA CHHIATNA TURA THUPUAN

¹Kum sâwm leh pakhatna, chumi thla ni khatnaah chuan, LALPA thû chu ka hnênah a lo thleng a,

²“Mihring fapa, Tura chuan Jerusalem deusawh takin, ‘I hi le! Hnamte chhuah-kâ ber Jerusalem chu a tlu chhe ta le; kan lam a rawn hawi ta; ka tlaipuar tawh khawp ang le; a chhe ram ta dêr si a,’ a ti vei a.

³“Chuvângin, Lalpa PATHIAN chuan heti hian a ti: ‘Ngai tak rawh, âw Tura, ka do che hi, tuipui fâwnin a vûr hlup hlup ang hian, nangmah do tûrin hnam tam tak ka rawn tîr dâwn a ni.

⁴Tura kulh chu an chhu chhia ang a, a insângte chu an tichim ang; a khaw vaivut nêl lam an rût fai kêlh ang a, lungpui chhîp ang maiin an siam ang.

⁵Tuipui kama lên an zârna hmunah a la chang ang, tia ka sawi tawh hi,’ Lalpa PATHIAN-in a ti; ‘hnam dangte rawk mai mai tûr lek a ni ang.

⁶A chhehvêl khawpera awmte pawh khandaiha thah an ni ang. Tichuan, LALPA ka ni tih an hria ang.’

⁷“Lalpa PATHIAN chuan heti hian a ti: ‘Ngai teh, hmar lam ațangin Babulon lal Nebukadnezzara, lalte lal chu sakawr te, tawhlair te, sakawr chung chuang mite leh sipai tam tak nêl ka rawn hruai lût ang.

⁸I chheh vêl khawpera awmte chu khandaihin a that vek ang; i vêlin lei chhûn pâwnin a hual ang che a, hualna bangin a hung hnan ang che a, phâw nêl a hual bet tlat ang che.

⁹I kulh bang chu a sut chhiatna khâwlin a tuttîr ang a, i vên insângte chu hreipuiin a chêk chhia ang.

¹⁰A sakawr rual pal khûk vaivut chuan a khuh ang che; kulh bang tihchim hnua sakawr chung chuangte, bungraw phur tawhlair te, an indo tawhlairte nêna an lût dur dur ang hian, an thâwm chuan i kulh bang a nghawr ngihng dur dur ang.

¹¹I kawthlêrte chu sakawr rual kêin an chîl phut vek ang; i mite chu khandaihin an that ang a, nghet taka i ban phun te chu a tlu sawp vek ang.

¹²I rosumte leh i sumdâwnna bungruate an rawk fâi lêng ang a; i kulh bangte chhu chhiain, i in nuam tak takte an chhu chhe vek ang; i lungpui te, i thingte leh i leilung chenin tuiah an paih lût vek ang.

¹³In zai thâwm te leh in tîngtang rîte chu hriat a ni tawh ngai lo vang.

¹⁴Lung kawlh chungah awm ang maiah ka siam ang che a; lên puan phorona hmunah ka siam ang che a, khua angin engtikah mah an dîn leh tawh lo vang che, kei LALPA hian ka sawi tawh hi,’ Lalpa PATHIAN-in a ti.

¹⁵“Lalpa PATHIAN chuan Tura hnênah heti hian a ti: ‘I tlûk chhiat hunah, i chhûnga mi an thaha, hliam tuarte rûm thâwmah, thliarkâra chêngte chu an khûr lo vang maw?

¹⁶Tuipui chungah lallo chu an lalthutthlêng ata lo chhukin, an lal puante chu an dah ang a, an puan chei mawite chu an hlîp thla ang; leiah thûin, an khûr zawih zawih ang a, mak an ti êm êm dâwn che a ni.

¹⁷Nangmah sînnâ hla an phuah ang a, i hnênah: Engtia chhe ta mai nge i nih, Aw, khawpui hmingthang? Tuipui mi hrângho chênna, Nang leh i chhûnga chêngte chu Tuipui chungah thilithei tak, Amah leh a chhûnga chêng zawng zawngte’n an hlauh thîn vei che nêl!

¹⁸I tlûk nî chuan thliarkârte chu an khûr an khûr a; Ni e, i awm ta lova, thliarkâra mite an mangang ta.”

¹⁹“Lalpa PATHIAN-in heti hian a ti: ‘Khawpui ram, tuma luah loh khaw ram maia ka siam hunah che chuan, tui thûk takin ka vûrtîr ang che a, tui tam takin a chîm pil daih ang che,

²⁰Leilâwta tla tawh, hmasânga mite hnênah ka tîr thla ang che a, engtikah mah luah i nih tawh loh nân hmasâng ata chhe ram der tawh, lei hnuaihnnung berah chuan, leilâwta chhuk thla tawhte zîngah ka chêtîr ang che; tichuan mi nung ramah ka ropuina ka tinghet tawh ang.

²¹Mite tîhkhâiah ka siam ang che, i awm tawh dâwn si lo; an zawn che pawhin hmuh tîr i awm leh tawh ngai lo vang,’ Lalpa PATHIAN-in a ti.”

BUNG 27

TURA SÛNNA

¹LALPA thû chu ka hnênah a lo thleng a,

²“Mihring fapa, Tura sūna hla phuah la,

³Tura hnēnah, ‘Nang, tuipui kama awma, thliarkār tam taka mite hnēna sumdāwng, Lalpa PATHIAN chuan heti hian a ti a che: “Aw Tura, ‘Ka mawi famkim e,’ I ti vei maw ni?”

⁴I ramrite chu tuipui laiah kham a ni a. A siamtuten an chei mawi hle che a.

⁵I thing phēkte chu Senir fār thinga siam a ni a, I lawng ngul atān Lebanon sidar an hmang.

⁶Basan sasua-in lawng karna an siam; Ashur-hovin Kupra thliarkāra mi sainghovin I lawng chhuat an phah a.

⁷Lawng puanzārah Aigupta la zaisīn chei mawi i hmang a; Elisa thliarkāra puan dumpāwl leh sendukin a chung i khuh a.

⁸“Sidon leh Arvad miten i lawng an khalh a; Aw Tura, i lawng khalhtute chu, I mifing-ho an ni si a.

⁹Gebal upate leh remhriate chu I lawng pawp thawmtu an ni; Tuipuia lawng zawng zawng leh an pute chu I tâna sumdāwngte an ni.

¹⁰“I sipaiho zīnga indo mite chu Persia te, Ludia te, Libia mite an ni; An phāw leh lukhumte an khai tuar a, An tiropui hle mai che a.

¹¹I sipai leh Arvad miten i kulh an vil kual reng a, I vên insāngah Gammad mite an awm; I kulh tlāng vêlin an phāwte an khai tuar a; I mawina tifamkimtu an ni.

¹²“Bungraw manto i ngah êm avāngin Tarsis chuan a dāwr thīn che a. I bungruate chu silvār te, thīr te, rāngva leh suan tein anrawn thlēng thīn a.

¹³Javan te, Tubal leh Mesekte chu i sumdāwnpuite an ni. I bungruate chu salte leh dār bēlte-in anrawn thlēng baw k thīn.

¹⁴Togarma mite pawhin i bungruate chu sakawr te, indo sakawrte leh sabengtung tein anrawn dāwr thīn che a.

¹⁵Dedan mite nēn in indāwr thīn a; thliarkār tam takte chu i sumdāwnpui an ni. Sainghote leh eboni thing tein i thil anrawn lei thīn a.

¹⁶Thil siam chhuah i ngah avāngin Suria pawhin a dāwr thīn che a. I bungraw lei nān lunghlu te, puan senduk te, thil zehmawi te, puan zaisīn te, tuikep leh rubi lungte anrawn ken thīn che a.

¹⁷Judai leh Israel ram te pawhin an dāwr che a. Minnit buh te, buhtun te, khawizû te, hriak te leh thinghnai damdawi tein i bungrua anrawn lei thīn.

¹⁸Thil siam chhuah i ngah avāng te, thil manto tak tak i ngah êm avāngin Damaska pawhin Helbon uain te leh sahuml vārin arawn dāwr thīn che a.

¹⁹Dan leh Javan te pawh i bungrua leiin, anrawn kal sek thīn a. Thīr chher sa te, thakthīng leh fû te chu i lo zuar thīn a.

²⁰Dedan chuan sakawr chungah phah chī puanin an dāwr che a.

²¹Arabia leh Kedar lallo zawng zawngin berām no te, berām leh kēl tein anrawn dāwr thīn che a.

²²Sheba leh Raama sumdāwngten an dāwr thīn che a. I zawrh sum, mawsawla tha ber chī te, lunghlu leh rangkachak te anrawn lei a.

²³Haran, Kanne, Eden, Sheba sumdāwngte, Assuria leh Kilmad te chu nangmah dāwrtu an ni.

²⁴Hēngho hian thil tha thlan thiau— puan senduk te, puan chei mawi te, chhuat phah ze thil chiai te, thawmhnaw phiar chī te-in an dāwr che a.

²⁵“Tarsis lawngten i thawmhnāw tūr anrawn phur zut zut a. Tuipui kamah chuan inlamukin, i lo ropui ta êm êm a.

²⁶I lawng khalhtuten tui tamna hmunah an thlen che a, Mahse tuipui laiah khawchhak thliin a nuai chhe ta che a.

²⁷I hausakna te, i bungrua leh zawrh sumte, I lawngpute leh lawng khalhtute, Lawng siamthātu leh sumdāwngte, I hnēna awm indo mi zawng zawng leh, I hnēna lawnga chuang zawng zawng chu, Chhiat i tawh nī chuan tuipuih an tla vek ang.

²⁸I lawng khalhtute mangang au âwin vaukam a tikhûr ang.

²⁹“Lawng karfung chelhtute leh lawngpu, Tuipuia lawng khalhtu zawng zawng te chu, An lawng ata chhukin vaukamah an ding ang.

³⁰Nangmah avāngin hriat thamin an au vak vak ang a; An lûa vut phulin an chiau vawng vawng baw ang a; Vut zīngah an lum tawp tawp mai ang;

³¹Nangmah vāngin an inziat kawlh rāwt hlawm ang a, Saiip puan veng chungin an thah baw ang che a, Thinlung na takin an rûm vawng vawng ang.

³²Lungchhe takin an thah ang che a, Sūna hla an phuah ang a, an sūn ang che: “Tura ang hi tu nge awma, Tuipuia dairial chang ta hi?”

³³I bungruate tuipuia an tawlh chhuah lai khān, Mi tam tak i tilungawi a; I thawmhnaw manto leh zawrh sumte hmanga Leia lalte i tihhausak thīn vei nēn.

³⁴Mahse tuipuih, tui thûk takah i keh chhia a; I sumdāwnna leh i thurualpuite chu i pilpui vek dāwn si a.

³⁵Thliarkara chēng zawng zawngin mak an ti ang che a; An lalten an rāp chein, Zām hmêl an put phah hial ang.

³⁶Mipui zīnga sumdāwngte chuan an chek khum ang che a; Mite thikhāiah changin, i ral hlen vang vang dāwn a ni.”

BUNG 28

TURA LAL CHHIAT TUR THUPUAN

¹LALPA thû chu ka hnēnah a lo thlēng leh a,

²“Mihring fapa, Tura lal hnēnah sawi rawh, ‘Lalpa PATHIAN chuan heti hian a ti: “I thinlung a chapo va, Heti hian i ti a, ‘pathian ka ni a, Chuvāngin, pathiante thutthlēngah Tuipui laiah ka thut hi,’ i ti vei a, Mihring mai i ni a, pathian i ni lo ve, I thinlung chu pathian thinlung emaw i ti mai a nih kha.

³(Khai le, Daniela aiin i fīng si a! I lakah eng thurûk mah a thup theih si lo va!

⁴I finna leh remhriatna hmangin I lo intihausa a, I sum bāwmah silvar leh rangkachak i chhep muk tēuh va;

⁵I sumdawn thiamna ropui takin i intihausa thûr thûr a, I hausakna chuan a tichapo ta che a ni),”

⁶Chuvângin, Lalpa PATHIAN-in heti hian a ti: “I thinlung chu pathian thinlung angah i ngai vèl a,

⁷Ngai rawh le, i hmêl hriat loh ka rawn tîr ang, Hnam azawnga tîhbâiawm ber chu; I finna duhawm chu khandaih an vilik khum ang a, I ropuina chu an tikhawlo vek ang.

⁸Khuarkhurumah an paih thlâ ang che a, Mi an thahte thih dânin i thi ang, Tuipui chungah chuan.

⁹“Nangmah thattu hmâah, ‘pathian ka ni,’ I la ti cheu vang maw? Nangmah thattu kutah chuan, pathian ni lovin, Mihring mai i ni zâwk ang.

¹⁰Ram dang mite kutah Serhtan loh thihin i thi ngei ang; Ka sawi tawh hi,” Lalpa PATHIAN-in a ti.”

TURA LAL SÛNNA

¹¹LALPA thù chu ka hnênah a lo thleng a,

¹²“Mihring fapa, Tura lal sûnna hlâ phuah rawh, ‘Lalpa PATHIAN-in heti hian a ti: “Nang chu tha famkima duan, Finnaa khat, mâwi chungchuang i ni.

¹³Pathian huan, Edenah i chêng a; Lungflu tinrênga thuan i ni: Sardias, topaz leh diamond, Beril, oniks leh jasper, Sapphir, tarkis, emerald leh rangkachak-in. I dârbenthek leh hamrîk te chu Siam a i awm ni ata i tâna buatsaih a ni a.

¹⁴“Nang chu vêngtu Cherub hriakthih i ni; Ka din nghet che a; Pathian tlâng thianghlimah i awm a; Lung êng tak zîngah i lêng vèl thîn.

¹⁵Siam a i awm laite khân tha famkimin i awm a, I sualna hmuh chhuah a nih thleng khân.

¹⁶“I sumdâwnna a len êm avângin Chhûng lama tharum thawnain i lo khat a, Sualah i tlu ta a; Chuvângin, Pathian tlâng aţangin Bawlhhlawh angin ka paih chhuak a che; Aw, vêngtu cherub, lung êng tak tak zînga ta ka hnawt chhuak a che.

¹⁷“I hmêlthata chuan i thinlung a tichapova; I ropuina chuan i finna lam a tikhawlo zo ta a nih kha; Lalte hmâah mualpho takin Ennawm anga an en theih nân che Leah ka paih thlâ che a.

¹⁸“I hmun thianghlime i tibawrhâng ta, I sualna tam tak avâng leh, I sumdâwn dân dik loh avângin; I chhûng aţangin mei ka chhuah ang a, A kâng ral ang che; Leia vaivutah ka chantîr ang chea, Miten an en huai huai ang che.

¹⁹Mi zînga a hria che apiangin mak an ti ang che; Mite tithlabârtu i lo ni ang a, I bo hlen vang vang tawh ang.”

SIDON CHHIATNA THUPUAN

²⁰LALPA thù chu ka hnênah a lo thleng a,

²¹“Mihring fapa, Sidon lam hmachhawn la, an chhiat tûr thù puang rawh,

²²“Lalpa PATHIAN-in heti hian a ti, ti la: “Aw Sidon, ngaithla teh, ka dodâl a che; In zîngah châwimâwiin ka la awm ang; A chungthû ka rêla, annin mîn tîh hunah LALPA ka ni tih an hria ang.

²³An chungah hripui ka lêngtîr ang a, A kawthlêrah thisen a luang ang; Hliam tuarte chuan kil tin aţangin Khandaiha rorêlna an tâwk ang; Tichuan LALPA ka ni tih an hria ang.

²⁴“An bul vêla anmahni hmusittute aţangin Israel chhûngte chhuntu tûr hling leh tinatu tûr hling an awm tawh lo vang. Chutichuan, kei hi Lalpa PATHIAN ka ni tih an hria ang.”

ISRAELTE TÂN BEISEINA

²⁵Lalpa PATHIAN chuan heti hian a ti: Israel chhûngte chu ka hnawh darhna rama mite zînga ta ka hruai khâwm leh a, Jentailte mithmuha châwimâwia ka awm hunah chuan, ka chhiahhlawh Jakoba hnêna ka pêk, anmahni ramah an chêng tawh ang.

²⁶Chutah chuan in te sâin, grêp huan te an siam ang a, thlamuang takin an chêng tawh ang; a ni, an vêla hmusittute zawng zawng chungthû ka rêl fel hunah chuan him takin an awm tawh ang. Tichuan, kei hi LALPA an Pathian ka ni tih an hria ang.”

BUNG 29

AIGUPTA CHHIAT TUR THUPUAN

¹Kum sâwmna, thla sâwmna, chumi thlâ ni 12 niin LALPA thù ka hnênah a lo thleng a,

²“Mihring fapa, Aigupta lal Pharoa hmachhawn la, amah leh Aigupta mi zawng zawng chhiat tûr thù puang rawh.

³“Lalpa PATHIAN-in heti hian a ti: “Ngai rawh, ka dodâl che a ni, Aw Pharo, Aigupta lal, Aw, nang, luipuia sa hrâng tak, ‘Ka Luipui hi ka tâ a ni, Ka tâna ka siam a ni,’ i ti vei a.

⁴Nghakuaiin i khabêah ka man ang che a, I luipui sanghate chu i puhlipah ka behtîr ang; I luipui lai ata ka phih chhuak ang che a, I luipuia sangha zawng zawng i puhlipah an bet vek ang.

⁵Thlalêrah ka hnutchhiah ang che a, Nang leh i luipuia sangha zawng nê; Ram palailêngah i tlu sawp ang a; Tûma’n an hlâwm lo vang che. Leia ramsâte leh chunglêng savate Châw atân ka pe tawh si che a.

⁶“Tichuan, Aigupta rama chêng zawng zawngin LALPA ka ni tih an hria ang, Israel chhûngte tân luang tiang mai an nih avângin.

⁷Kuta an vawn lai chein, I thing thlâ a, an koki a chhun thlêr a; An rawn nghenchhan che a, I tliak hmawk a, an hnungzâng zawng zawng i tikhûr hlawk hlawk a.”

⁸Chuvângin, Lalpa PATHIAN chuan heti hian a ti: “I chungah khandaih ka rawn chelek ang a, mi leh sâ ka râwt ang.

⁹Aigupta ram chu a ram chhe dêr dâwn a ni; chutah zet chuan, LALPA ka ni tih an hria ang, ‘Luipui hi ka tâ a ni a, keima siam a ni,’ te a lo tih vei avângin.

¹⁰Chuvângin, nang leh i luipuite chu ka do che a, Migdol aţanga Suene leh Ethiopia ramri thlengin Aigupta ram chu ka tiţauvin, ka tiruak vek ang.

¹¹Mihring pawhin, ramsate pawhin kêin an paltlang tawh hek lo vang; kum sawmli chhûng tuma luah lohvin a awm ang.

¹²Aigupta ram chu ram tichhiah tawhte zînga chhe ber pâwlah ka siam ang a; khawpui tichhiah tawh zînga chhe hneh ber pakhat niin, kum sawmli chhûng hluihlâwn a ni ang; Aigupta mite chu hnamte zîngah ka hnawt darh ang a, ram tinah ka tidarh ang.”

¹³Lalpa PATHIAN-in: “Kum sawm li a ral hun-ah Aigupta mite chu hnawh darha an awmnaa mite zînga ta ka hruai khâwm leh ang.

¹⁴Aigupta saltângte chu ka hruai kîr leh ang a, anmahni ram ngai, Pathros ramah chuan ka hruai haw leh ang a, tah zet chuan hnam tlâwm tak an lo ni tawh ang.

¹⁵Lalramte zînga a nêp ber a ni ang; hnam dangte lakah a inlek tawh ngai lo vang a, eng hnam chungah mah rorêl thei lo khawpin ka dah hniam dâwn si a.

¹⁶Israel chhûngte tân rintlâk an ni tawh lo vang a, anmahni an zawm laia an khawlohziâ an hriat chhuahna tûr a ni zâwk ang. Tichuan LALPA ka ni tih an hria ang.” a ti a.

BABULON-IN AIGUPTA A RAWK DÂWN

¹⁷Kum 27-na, thla khatna, a ni khat ni chuan LALPA thû chu ka hnênah heti ang hian a lo thleng a,

¹⁸“Mihring fapa, Babulon lal Nebukadnezzara chuan a sipaite hmangin nasa takin Tura a bei a; an chhîp te chu a kawlh râwt hlawm a, an kokîte a châr thawt bawk a; mahse Tura lakah chuan amah leh a sipaite chuan an thawh hah man engmah an hmu chuang lo.

¹⁹Chuvângin, Lalpa PATHIAN chuan heti hian a ti: ‘Aigupta ram chu Babulon lal Nebukadnezzara hnênah ka pe mai teh ang; a hausakna te, râlâk sum te laksak sela, rawk bawk sela; chûng chu a sipai rualte hlauh ni rawh se.

²⁰Ka tâna an thawh hah manah Aigupta ram chu ka pe ta a ni,’ Lalpa PATHIAN chuan a ti.

²¹“Chumi ni chuan Israel chhûngte tân ki ka chawr chhuah tîr ang a, an hnêna thu sawi tûrin i kê ka hawnsak ang che. Tichuan LALPA ka ni tih an hria ang,” a ti a.

BUNG 30

AIGUPTA LEH A THIANTE AN TLUCHHE DAWN

¹LALPA thû chu ka hnênah a lo thleng leh a,

²“Mihring fapa, heti hian thû puang rawh, ‘Lalpa PATHIAN chuan heti hian a ti e: “ ‘Ni lungngaihthlak tak mai chu,’ Tah rawh u.”

³Chû nî chu a hnai ta, LALPA nî ngei chu a hnai e; Chhûm zîn nî, Jentailte hun chu.

⁴Aigupta chungah khandaih a lo thleng dâwn, Ethiopia ramah lungngaih manganna, Aigupta mi thahte an tlûk laiin, An hausakna an laksak ang a, An inngahachhan a chim ang.

⁵“Ethiopia te, Libia te, Lusia te, hnam tin inpawlh ho, Kub leh a rama a thurualpuite chu khandaih an tlu vek ang.”

⁶LALPA chuan heti hian a ti: “Aigupta tung dingtute chu an tlu ang a, A uanpui thîn a chakna pawh a tlu chhia ang. Migdol aţanga Siene thlengin A chhûnga awmte nên khandaiha tihtlûk an ni ang,” Lalpa PATHIAN-in a ti.

⁷“Ram tihtiau tawhte zînga pakhat a ni ang a, A khawpuite pawh khawpui tihchhiat tawhte zînga mi a ni mai ang.

⁸Aigupta ramah mei ka chhuaha, A lo puitute zawng zawng ka tihboral hunah, LALPA ka ni tih an hria ang.

⁹Chumi nîah chuan, lawngin palaite ka tîr ang a, Ethiopia inring lo lai ka thâwng thut ang a, Manganna nasa takin a tlâk buak ang, Aigupta mite nî ang mai khân; Ngai teh, a lo thleng mêk e!”

¹⁰Lalpa PATHIAN-in heti hian a ti: “Babulon lal Nebukadnezzara kutin Aigupta mipui tam tak ka tiboral ang.

¹¹Amah leh a mipui, hnamte zînga tîhbaiaawm ber chu, Ram tichhe tûrin a lo kal ang; Aigupta-ho chu khandaih an sawisa ang a, A mi thahte ruangin ram a tikhat ang.

¹²Luipui ka tikangchat ang a, Mi sualte kutah ram chu ka hralh ang; Ram leh a chhûnga thil zawng zawng chu, Ram dang mite kutin ka tichhe vek ang. Kei, LALPA hian ka sawi tawh hi.”

¹³Lalpa PATHIAN chuan heti hian a ti: “Milimte pawh ka tichhia ang a, Noph aţangin milim ka tibo vek ang; Aigupta ram aţangin rorêltu tûr an awm tawh lo vang; Aigupta ramah thlabârna ka thlen ang.

¹⁴Pathros khua ka tiram vek ang a, Zoan khua ka hâl ang a No khuaah ro ka rêl ang.

¹⁵Aigupta chakna Sin chungah ka thinurna ka leih ang a; No khaw mipui ka râwt ang.

¹⁶Aiguptaah mei ka chhuah ang a, Sin chuan na tak a tuar ang, No khua chu then darh a ni ang a, Noph khua chu ni tin a mangang ang.

¹⁷Aven leh Pi Beseth tlangvâlte chu khandaihah an tlu ang a, Chûng khuate chu salah an tâng ang.

¹⁸Aigupta ngâwngkawh ka tihtiah hun chuan, Tehaphnehes-ah ni a thim ruai ang. A hmachhuan thîn a chakna thâ a thum zo ang; Amah chu chhûmin a khuh ang a, A fanute chu salah an hruai ang.

¹⁹Tichuan Aigupta chungthû ka rêl ang a, Tichuan, LALPA ka ni tih an hria ang.”

PHAROA CHHIAT TÛR THUPUAN

²⁰Kum sâwm leh pakhatna, thla khatna, chumi thla ni sarih ni chuan LALPA thû ka hnênah a lo thleng a,

²¹“Mihring fapa, Aigupta lal Pharoa bân ka titliak ta a; en la, tihtamna tûrin tuam pawh a ni lo vang a, khandaih lek thei tûr khawpin them vuah a ni hek lo vang.

²²Chuvângin, Lalpa PATHIAN chuan heti hian a ti: ‘Aigupta lal Pharoa chu ka do tak meuh a ni, a bân chak zâwk leh a tliak tawh sa nên ka tih tlihsak vê vê ang; a kut chuan khandaih pawh chelh zo lovin a thlah mai ang.

²³Aigupta mite chu hnamte zîngah ka tidarh ang a, ram tinah ka hnawt darh vek ang.

²⁴Babulon lal bân thâ ka tichak ang a, keima khandaih ka kentîr ang; Pharoa bân chu ka titliak ang a, a hmâah chuan ani chu thihpui khawp hliam tuar ang maiin a rûm ang.

²⁵Chutiang chuan Babulon lal bân thâ ka tichak ang a, Pharoa bân erawh chu a uai thla ang; keima khandaih ngei chu Babulon lal kutah ka dah a, Aigupta ram chungah a vilik hunah chuan kei hi LALPA ka ni tih an hria ang.

²⁶Aigupta mite chu hnamte zingah ka tidarh ang a, ram tinah ka hnawt darh vek ang. Tichuan, LALPA ka ni tih an hria ang.”

BUNG 31

AIGUPTA, THING KUNG ANGA KIH THLUK

¹Kum sâwm leh pakhatna, thla thumna, a ni khat ni-ah LALPA thû chu ka hnênah a lo thleng a,

²“Mihring fapa, Aigupta lal Pharoa leh a mipui hnênah thû sawi la: ‘I ropui dânah hian eng ang nge i nih?’

³Assuria chu Lebanon sidar thing a ni a, A tâwi luai a, ngaw a zâr hlim duai a, a sâng êm êm a; A lér chu thing dang chungah a buk luai a.

⁴Tuiin a châwm lian a; Lei hnuai tuiin a thantîr a, A dinna kung bula lui luang vêlte chuan, Rama thing dang zawng zawng tân lui a luan darhtîr a.

⁵Tichuan, ramhnuaiia thing dang zawng aia sângin A buk chu a thang zêl a, Tui a hnianghnâr avângin a zârte chu thui tak takin a thang zêl a.

⁶A zâr bukah te chuan chunglêng savaten bû an chhep a; A zâr hnuaiah te chuan ramsa tinrêngin no an nei a; A hlimah chuan hnam ropui tak takten bû an khuar a.

⁷A zâr te chu a thuiin, a buk pawh a mâwiin a ropui a ni, A zungin hnianghnâra tui a hmuh avângin.

⁸Pathian huana sidar thingte an hliah zo lo; A bukte chu fâr thingten an tluk lo va, A tang zâr ngawt pawh thingsia ten an tluk hek lo; Pathian huana thing zingah a aia mâwi a awm lo.

⁹Zâr tam tak neiin ka chei mâwi a, Chuvângin, Pathian huana awm, Eden thing dang zawngin an itsik a.’

¹⁰“Chuvângin Lalpa PATHIAN chuan heti hian a ti: ‘I lo than sân zêl avâng leh, thing kung sâng dangte chung a filawr luah khawpa sâng a nih avângin a thinslung a lo chapo ta hle mai a,

¹¹hnamte zinga mi chak kutah ka pê ang a, chumi chuan a lo hrem ngei ang; a suahsual êm avângin ka hnawt chhuak tawh a.

¹²Hnam azawnga kawlhse ber, ram dang miten an rawn kit a, an hluihlawn a; a tangte, a zâr buk tliakte chu tlângah te, ruamah te a tla darh a; a hlma chêng thîn leia hnam tinte chuan an rauhsan a, an kal bosan ta a.

¹³A tlu chhe chungah chuan chunglêng savâte an chêng ang a, Ramhnuaiia sâten a zârte chu an chîl ang.

¹⁴Tichuan, tui kiana thingte chu an sân êm avânga inchhuang thei tawh lo tûrin, tuia châwm thing buk tawh phawt chu thing dang chung a filawr bîk khawpa sângin an awm leh tawh ngai lo vang. ‘An zavaia thi tûra pêk an ni tawh si a, Lei chhûngril thûk takah, Khuarkhuruma chhuk thla mihring fate zinga kal tûr chuan.’

¹⁵“Lalpa PATHIAN chuan heti hian a ti: ‘Hremhmuna a chhuk thlâk niah chuan an sîn dâwn a ni. Chuvâng chuan tui thûk tak chu ka khuh a. A luite ka chawltîr a, tui tam tak chu dan kîr a ni. Lebanon chu ka sîntîr a, amah vângin rama thing zawng zawng a uai zo vek a.

¹⁶Leilâwta chhuk thlaho ruala ka paihthlâk lai khân, a tla thâwmah hnamte chu ka tikhûr a; Eden thing zawng zawng, Lebanon a thing tha tha, tuia châwm zawng zawng chu lei hnuai thûkah chuan an ngaih a ngam phah sawt a.

¹⁷Anni pawh khandaiha thahte nêh hremhmuna an chhuk thla duah duah a; hnamte zinga a hlim lo bêltu, a bân tha tichaktu ber berte pawh an tel vê a.

¹⁸“Eden thing zingah nang anga lian leh ropui an awm em ni? Nimahsela, Eden thingte nêh lei chhûngril thûk takah hnuh thlâk i la ni ang; serh tan loh mi, khandaiha an thahho zingah i mu vê ang. Chûng chu Pharoa leh a mite an ni,’ Lalpa PATHIAN-in a ti.”

BUNG 32

PHAROA LEH AIGUPTA SÛNNA

¹Kum 12-na, thla 12-na, chumi thla ni khat niah LALPA thû ka hnênah a lo thleng a,

²“Mihring fapa, Aigupta lal Pharoa sûnna hlâ phuah la, heti hian ti rawh: ‘Hnamte zingah sakeibaknei vânglai ang i ni a, Tuipua sa hlauhawm, i luipua lo chhuak, Tui rawn pal buan buan a, Lui tui tinu thîntu chu i ni.’

³“Lalpa PATHIAN chuan heti hian a ti: Nang leh mi dang tam tak ka lênin ka khuh ang che a, Ka lênin an hnûk chhuak ang che.

⁴Khawmualah ka theh chhuak ang che; leichârah ka theh thal dêr ang che a, chunglêng savâten an bâwr huai huai ang che. Lei pumpua ramsâte pawh ka titlai baw ang.

⁵I sâ chu tlângah te ka thêth darh ang a, I ruangin kawr ruam ka hnawh khat ang.

⁶“I thisen chu khawmualah ka luntîr ang a, Tlâng chungah te pawh; Lui luan kawrt pawh i luah khat baw ang.

⁷I êng ka tithim hunah chuan, Vântê khi ka khuh ang a, arsîte ka tithim ang; Ni chu chhûmin ka hliah ang a, Thla pawhin êng a chhuah lo vang.

⁸I chungah vâv êng zawng zawng ka tithim vek ang a, I ram chu a thim vek ang,’ Lalpa PATHIAN-in a ti.

⁹“I hriat ngai loh ram leh hnam kârah, i chung a chhiatna ka thlen hun chuan, mi tam tak thinslung ka timangang baw ang.

¹⁰Ni e, mi tam takin mak an la ti ang che a, an lalte hmâa ka khandaih ka vilik hunah phe chuan, hlauh tak tîn an la hlau dâwn che a ni; i tlûk chhiat niah zawng, mahni nunna chên ve hlauvin mi tin an khûr zawih zawih ang.’

¹¹“Lalpa PATHIAN chuan heti hian a ti: Babulon lal khandaih chuan i hnên a lo thleng ngei ang.

¹²Mi hrât khawkhêng rual thiau, hnam kawlhse bera mite khandaih hmangin, i mipuiho chu ka titlu ang. ‘Aigupta ropuina chu an rawk ang a, A rama mi zawng zawng an boral ang.

¹³Tui tam tak kam atângin A ramsâte chu ka tihlum vek ang; Mihring kêin a pal nu tawh lo vang, Ran kête pawhin an dai nu tawh hek lo vang.

¹⁴Tin, an tuite chu ka tifim ang a, An luite chu hriak angin ka luntîr ang,’ Lalpa PATHIAN-in a ti.

¹⁵Aigupta ram chu ka tihram vek huna, A rama thil awmte pawh ka tihruah veka, A mi chêngte ka râwt hunah zet chuan, LALPA ka ni tih an la hria ang.

¹⁶Hei hi amah an sînnâ tûra Sînnâ hlâ a ni ang; Hnam tin fanuten an la sîn ang; Aigupta leh a mipui zawng zawng chu an la sîn dâwn si a, 'Lalpa PATHIAN-in a ti."

AIGUPTA: LEILÂWTA PAIH THLÂK TÛR

¹⁷Kum 12-na, chumi thlâ ni 15 niin LALPA thû ka hnênah a lo thleng a:

¹⁸"Mihring fapa, Aigupta mipui chu ãah khum la, Amah leh hnam hmingthang tak tak fanute chu, Leilâwta chhuk thla hote nê, Lei chhûngril daihah paih thla rawh:

¹⁹"Mâwina lamah tu nge i khûm? Chhuk la, serhtan lohte zîngah zu awm rawh.'

²⁰"Khandaiha thahte zîngah an tlu ve ang; Khandaiha thah tûra pêk a ni ta, Amah leh a mi zawng zawngte nê.

²¹Mi chak zînga a huaisente chuan Amah leh amah ãanpuitute chu, Hremhmun chhûng aãangin an bia ang; An chhuk thla a, khandaiha thah Serhtan lohte zîngah an mu ve ang.'

²²"Chutah chuan Assuria leh a hote an awm a, An thlânte chuan a hual vêl a, An vaiin khandaiha tihhlum vek an ni.

²³A thlânte chu Leilâwt kilah an rem a, A hote chuan a thlân chu an hual vêl a, An vaiin khandaiha tihhlum vek an ni a, Minung ram ti râltitute an ni.

²⁴"Chutah chuan Elam leh an hote an awm a, An thlânte chuan a hual vêl a, An vaiin khandaiha tihhlum hnû vek an ni. Lei hnuaihnungah serhtan lohva chhuk thla te an ni a, Minung ram ti râltitute an ni; Leilâwta chhuk thla ho nê an mualpho tlang ta.

²⁵Mi thahte zîngah khum an siamsak a, A hote zawng zawng nê, An thlânte chuan a hual vêl a, An vaiin serhtan loh, khandaiha tihhlum hnû vek an ni; Minung ram ti râltitute ni ãhîn mahse, Leilâwta chhuk thlahote nê an mualpho va; Tihhlumho zîngah an dah ve ta.

²⁶"Mesek leh Tubalte pawh an hote nê an awm a, An thlânte chuan a hual vêl a, An vaiin serhtan loh, khandaiha tihhlum an ni; Minung ram tirâlãi ãhîntu an ni a.

²⁷Mi chakte zîngah an mu lo vang, Tlûte chu serhtan loh mite an ni si a, An indo râltuamte nê hremhmunah an chhuk a; An khandaihte chu an lukham a, An sualnate chu an ruhah a bet ang, Minung rama mi chakte inrîkrâpna avângin.

²⁸A ni, serhtan loh mite zîngah tihchhiat i ni ang a, Khandaiha thahte zîngah i mu ve ang.

²⁹"Chutah chuan Edom chu, A lalte, a hotute nê an awm a, An chak hle na a, Khandaiha thahte sîrah an zalh ta; Serhtan loh mite zîngah an mu ang a, Leilâwta chhuk hote nê an mu ang.

³⁰Hmar lam hotute pawh an awm bawk a, An vaiin Sidon mi vek an ni a, Thah-hote nê an chhuk thla a, An chakna hmanga mi an tihrâlãit avângin an zak a; Khandaiha thah serhtan lohte zîngah an mu a, Leilâwta chhuk thla hote nê an mualpho tlang ta.

³¹"Pharoan a lo hmu ang a, A mi zawng zawngten an tithlamuang ang, Pharoa leh a sipai, khandaiha thahho zawng

zawng chu," Lalpa PATHIAN-in a ti.

³²"Minung ramah inrîkrâpna ka thlen si a; Serhtan loh mite zîngah an muttîr ang, Khandaiha thahte zîngah leh, Pharoa leh a mipui zawng zawng nê," Lalpa PATHIAN-in a ti.

BUNG 33

RÂLVENG TU LEH A THUCHAH

¹LALPA thû chu ka hnênah a lo thleng leh a,

²"Mihring fapa, i chipuite hnênah heti hian thû sawi rawh: 'Ram chhûnga khandaih karawn lêtîr hunah, chû rama miten an ram chhûnga mi râlvêngtu an daha,

³ram chhûnga khandaih lo lêng a hmuh vêleh, mipuite inrâlrin nân tâwtawrâwt a hama,

⁴tûpawh tâwtawrâwt rî hriaa pawisa duh lotu chu, khandaihin arawn sawisak chuan, chû mi chuan ama thisen mawh chu a phur mai tûr a ni.

⁵Tâwtawrâwt rî hre reng chung a pawisak duh loh avânga a thisen mawh chu ama chungah a tla ang. A pawisatu erawh chuan a nun a humhim ang.

⁶Mahse, râlvêngtuin khandaih a lo thleng ta tih a hmuh pawha tâwtawrâwt a ham duh lohva, miten inrâlrin tûr tih an hriat lohva, khandaih chuan an zînga mi tûpawh mana, khawlohma nei chung lak bo a nih chuan, chû mi thisen mawh chu râlvêngtu lakah ka phût ang.'

⁷Tichuan nang, mihring fapa: Israel chhûngte tân râlvêngtûah ka siam che hi; chuvângin, ka kamchhuak thû ngaithla la, an inrâlrin nân mi hrilhsak ãhîn ang che.

⁸Mi suaksual hnênah, 'Aw nang mi suaksual, i ãhîngei tûr a ni!' ka tiha, mi suaksual chu a nun dân hawisan tûra i hrilh loh chuan, chu mi suaksual chu a sualnaah chuan a ãhî ang a; a thisen mawh chu i lakah ka phût ang.

⁹Mahse, chu mi suaksual chu a nun dân lamlêt tûra i zilh lâwk pawha a nun dân a inlamlêt duh loh chuan, a sualnaah chuan a ãhî ang; nang erawh chu a lakah i fihlîm ang.

¹⁰"Chuvângin âw, mihring fapa, Israel chhûngte hnênah: 'Heti hian ti la, "Kan bawhchhiatnate leh kan sualnate chuan min delh beta, min tichau vek a, engtin nge kan nun theih ang?" in ti a.'

¹¹An hnênah: 'Ka nunna chhâlin ka sawi e,' Lalpa PATHIAN-in a ti. 'Mi suaksual thihnaah hian lâwmna chhan tûr ka nei lo va; mahse, mi suaksualin a sualte a sim hian mi tilâwm zâwk a ni. Inlamlêt ula, in nun dân sual chu hawisan rawh u! Aw, Israel chhûngte u, engah nge in ãhî tehlu ang?'

PATHIAN RORÊLNA DIKZIA

¹²"Chuvângin, âw mihring fapa, i chipuite hnênah heti hian sawi rawh: 'Mi dik pawh hi an bawhchhiat si chuan, an dikna chuan a chhandam chuang lo vang a; mi suaksualte pawh an sualna an hawisan phawt chuan, an lo suahsual tawhna chuan a titlu lo vang; mi dikte pawhin thil sual an tih si chuan, an dikna chuan a chhandam hek lo vang.'

¹³Mi dik hnênah a nung ngei ang tih ka hrilha, ama dikna ngawta inngkata, thilsual a tih leh si chuan, a thil ãha tihte chuan

hriatreng a hlawh lo vang; a thil sual tih avângin a thi ang.

¹⁴Mi suaksual hnênah, ‘I thi ngei ang,’ ka tiha, a sual hawisana, dik taka a tiha, dân a zawma,

¹⁵mi suaksualin a thutiam a hlena, a thil rûkte a pêk kîra, nun dân tha zâwma, thil sual a tih loh chuan, a nung ang a; a thi lo vang.

¹⁶Thil sual a lo tihte pawh a lakah phûl lêt tûra hriat reng a ni tawh lo vang; dân zâwmin, dik takin a ti a ni a; a nung ngei tûr a ni.

¹⁷“Amaherawhchu, i miten, ‘LALPA tih dân hi a rual lo mang e,’ an ti a. Anmahni tih dân hi a ni, rual lo zâwk chu ni!”

¹⁸Mi dik chuan a dikna a hawisana, thil sual a tih chuan, chumi avâng chuan a thi tûr a ni.

¹⁹Nimahsela, mi suaksualin a suahsualna a hawisana, dân a zawma, dik taka a tih erawh chuan, chumi avâng chuan a nung ang.

²⁰Nangni erawh chuan, ‘LALPA tih dân hi a va rual lo êm,’ in ti si a. Aw, Israel chhângte u, mi tûte pawh ni se, in awm dân ang zêlin ro ka rêlsak dân che u hi,” a ti a.

JERUSALEM A TLU TA

²¹Kan saltân kum 12-na, thla sâwmna, chumi thla ni nga ni-ah chuan, Jerusalem aṅanga lo tlan chhuak mi pakhat ka hnênah a lo kal a, “Khawpui chu an la ta!” a rawn ti a.

²²Chû mi tlan chhuaka lo thlen hma tlai thlengin LALPA kut chuan mi delh reng a. Ani chuan ka kâ mi hawnsak ta a; chû mi chû a tûk zînga a lo kal chuan, ka kâ chu hawn ni tawhin, ṭawng thei lovin ka awm ta lo va.

²³LALPA thû chu ka hnênah a lo thleng a:

JUDAI RAM CHHIAT CHHAN

²⁴“Mihring fapa, Israel ram ṭiau chhe tawha chêngte chuan, ‘Abrahama, mi pakhat chauh pawhin ram chu a luah a. Keini erawh chu kan tam si a; ram chu kan rochun tûrin min pe tawh ngei ang chu,’ an ti a.

²⁵“Chuvângin, an hnênah heti hian ti rawh, ‘Lalpa PATHIAN chuan heti hian a ti: “A thisen chawpin sâ in ei a, in milimte lam ngawt in thlîr chho va, thisen in chhuah a. Chuti chung chuan ram chu in la luah cheu vang maw?”

²⁶“In khandaih in hmachhuan a, thil tenawm in ti a, mi nupuite in tibawrhâng zel zul a. Chuti chung chuan ram chu in la luah cheu vang maw?”

²⁷“An hnênah heti hian sawi rawh, Lalpa PATHIAN chuan heti hian a ti: “Ka nunna chhâlin ka sawi e, khaw ram chhe tawha chêngte chu khandaiha tihtlûk an ni ang a, ramhnuia awmte chu ramsâte ei atân ka pê ang a, kulh chhângah leh pûka awmte chu hrîin an thi ang.

²⁸Ram chu ka tichhe vek ang a, a uanpui ṭhin a chakna pawh a tâwp ang a, Israel tlangte chu tuma tlawh lohvin a ram chhe zo vek ang.

²⁹Thil tenawm tak tak an tih ṭhin avânga ram chu namên lova ka tichhiat hunah chuan, LALPA ka ni tih an hria ang.”

HRE SI A, ZÂWM DUH LO

³⁰“Mihring fapa, nang chu i miten kulh bang bulah te, kawngkhâr bulah te i chanchin an sawi sup sup ang a; mi tinin an unaute hnênah, ‘Ti rawh u, LALPA hnên ata thu lo thleng chu i va ngaithla ang u hmiang,’ an ti dân a ni.

³¹Tichuan, mite chu i hnênah an lo kal ang a, ka mite ang maiin i hmâah ṭhûin, i ṭhûte chu an ngaithla ang a, mahse an zâwm chuang lo vang; an kam te chu thlum hlê mahse, an thlunlung chuan hlâwkna tûr ngawt a zawnng si a.

³²Nang chu, an tân chuan zai thiam, aw mawi bawk si, rimawi tum thiam tak ang i ni ang; i ṭhûte chu an ngaithla ang a, mahse an zâwm si lo vang.

³³Hê thil hi a lo thleng ngei dân a, a lo thlen hunah chuan an zîngah zâwlnei a lo awm reng tih an la hria ang.”

BUNG 34

BERAMPU NI-KHUA-LOTE

¹LALPA thû chu ka hnênah a lo thleng a, ²“Mihring fapa, Israel berâmpute nikhua lohzia puang la, heti hian sawi rawh, ‘Lalpa PATHIAN chuan berâmpute hnênah heti hian a ti: “Mahni inchâwm mai mai Israel berâmpute chu an chung a pik e! Berâmpute chuan berâmte an châwm zâwk tûr a ni lo vem ni?” ³A thau thau in ei a, a hmul in sin bawk a; a thau ṭhâ ṭhâ in talh a, berâmte lah in châwm bawk si lo va. ⁴A sawngnawi deuh in duat lo va, an dam lohvin tihdam in tum lo va, ruh tliakte in tuam lo va, hnawh darha awmte in hruai khâwm lo va, a bo in zawnng hek lo; rum tak leh râwnng takin in hrêk bet a. ⁵Berâmpute awm loh avângin an tla darh mai mai a; an vah darhna lamah phûla ramsâte tân chaw an lo ni ta mai a. ⁶Ka berâmte chu tlang tin leh mual tinah an vâk darh a; ni e, ka berâm rual chu lei pum puiah an darhsarh vek a, anmahni zawnng khâwmte tûr tûmah an awm lo.” ⁷Chuvângin, nangni berâmpute u, LALPA thû hi lo ngaithla teh u: ⁸Lalpa PATHIAN chuan heti hian a ti, “Ka nunna chhâlin, “Berâmte enkawltu tûr an awm loh avâng te, ka berâmputen ka berâmte an zawn khâwm loh avânga ka berâmte chu seh mai theih, phûla ramsâte chaw an nih tâk avâng leh, berâmputen ka berâmte châwm lova, anmahni an inchâwm zâwk avângin,” ⁹âw, nangni berâmpute u, LALPA thû hi lo ngaithla mawlh teh u! ¹⁰Lalpa PATHIAN chuan heti hian a ti: “Ngai teh u, berâmpute chu ka do a ni, an kuta awm ka berâmte chungah mawh ka phurhtîr ang; berâm pawh an châwm tawh hek lo vang a, berâmputen anmahni an inchâwm tawh bawk hek lo vang; an kâ ata ka berâmte chu ka chhan chhuak ang a, chaw-ah pawh an ring thei tawh hek lo vang,” a ti a.

BERÂMPU DIK PATHIAN CHU

¹¹“Lalpa PATHIAN chuan heti hian a ti: “Keimah ngeiin ka berâmte chu ka zawng ang a, ka zawng chhuak baw ang.
¹²“Berâmpu in a berâm vâk darhte a zawng khâwm angin, ka berâmte chu khaw dur leh khaw thim hnuaia an darhna hmun tinrêng ațangin ka zawng chhuak ang a, ka chhan chhuak ang.
¹³Ram tina mite zînga mi la chhuakin, ka hruai khâwm ang a, anmahni ramah ka hruai lût ang; Israel tângah te, phai ruamah te, mi chênna hmun tinrêngah te ka châwm ang.
¹⁴Ei tûr t̃hatna hmunah ka châwm ang a, an chênna in chu Israel tâng sângah te a ni ang. Chawlhna hmun nuam takah an châwl der der tawh ang a, Israel tâng chungah hlobet t̃hatna hmunah an tla dial dial ang.
¹⁵Lalpa PATHIAN-in, “Ka berâmte chu ka châwm ang a, ka bawhtîr hlê hlê baw ang,” a ti a ni.
¹⁶“Bo tawhte pawh ka zawng ang a, hnawh bote nêh ka hruai kîr leh ang; ruh tliakte ka tuam dam ang a, damlote ka tichak ang; mi thau leh mi chakte ka tihlum ang a, dik takin ro ka rêlsak ang.”
¹⁷Nangni ka berâm rualte chungchâng chu Lalpa PATHIAN-in heti hian a ti: “Ngai teh u, berâm leh berâm inkâr thû te, berâmpa leh kêl inkâr thû te ka rêlsak ang.
¹⁸Chaw t̃ha in ei zawha, in ei bâng kêa in chîl chhe zuia—tui fim in in zawha, in in bâng in dai nu leh kher hi thil namai em ni?
¹⁹Ka berâmte hian kêa in chîl hrep hnu an ei a, in dai nut hnû an in leh t̃hin a ni.”
²⁰“Chuvângin, an hnênah Lalpa PATHIAN chuan heti hian a ti: “Ngai teh u, keimah ngeiin berâm thau leh chêr inkâr ro ka rêl dâwn.
²¹Nangni chuan a sawngnawi deuh deuh te chu in kîu leh in dâr te, in kîtein in nêk per lawp lawp a, in phîn darh zo vek a,
²²chuvângin, ka berâmho chu ka hum ang a, an seh mai mai thei tawh lo vang; berâm leh berâm inkâr thû pawh ka rêlsak tawh ang.
²³An chungah berâmpu pakhat, anmahni châwmtu tûr, ka chhiahhlawh Davida ngei ka ruatsak dâwn a ni. Ani chuan a châwm anga, an berâmpu a ni baw ang.
²⁴Kei, LALPA hi, an Pathian ka ni ang a, ka chhiahhlawh Davida chu an zîngah hotu a ni ang; Kei, LALPA hian ka sawi tawh hi.
²⁵“Anniho chu thû ka thlunpui ang a, ram chhûng ata sa kawlh tak takte chu ka tibo tawh ang; thlâlêrah te pawh râlmuang takin an awm ang a, ngaw hnuaiah te pawh an mu chiah chiah tawh ang.
²⁶Anmahni leh ka tâng chhehvêl zawng zawng chu malsâwmnaah ka chantîr ang a; a hun takah ruah te ka sûtîr ang; malsâwm ruahte chu a sûrin a sûr dâwn a ni.
²⁷Ram thingte chuan rah an chhuah ang a, lei chuan a thar hlâwk êm êm ang. An ramah chuan râlmuangin an awm ang a; an nghâwngkawlte ka tih tliahsaka, awp bettute kut ata ka chhan chhuah hunah chuan, kei hi LALPA ka ni tih an hria ang.
²⁸Hnam dangten duh duhin an chîl tawh lo vang a, ram sakawhlte seh mai mai tûr an ni tawh hek lo vang; him takin an awm tawh ang a, tûma’n an tithlabâr tawh hek lo vang.
²⁹Huan hmingthang tham ka siamsak ang a, an ramah t̃amin a ei chhe tawh ngai lo vang a, Jentail hnamte hmuhsitna an tuar tawh hek lo vang.
³⁰Tichuan, kei hi, an hnêna awm LALPA, an Pathian ka ni tih an hria ang a; anni Israel chhûngte chu ka mite an ni ang,” Lalpa PATHIAN-in a ti.”
³¹“Nangni hi ka berâm rual, ka ran tlatna hmuna ran rual chu in ni a; ka mite in ni a, kei hi in Pathian chu ka ni e,” Lalpa PATHIAN-in a ti.

BUNG 35

SEIR TLANG TANA RORÊLNA

¹LALPA thû chu ka hnênah a lo thleng a,

²“Mihring fapa, Seir Tlâng hmachhawin, an chhiat tûr thû puang rawh,

³anni chu hrilh rawh, ‘Lalpa PATHIAN chuan heti hian a ti: “Ngai teh, âw Seir Tlâng, ka do va che; I chungah ka kut ka phar ang a, Ka tiram dêr ang che;

⁴I khawpuite chu ka tițiau vek ang a, Hmun ram chhia mai i ni ang. Tichuan, LALPA ka ni tih i la hria ang.

⁵“Hmasâng ata tawh i huat renga, chhiat an tawh laia Israel fate chu khandaih thiltihtheihna hmanga thisen i chhuah avângin, an sualna a kin hunah chuan,

⁶Lalpa PATHIAN nunna chhâlin ka sawi e, “Thisen ka hmachhawin tîr ang che a, thisen chuan a ûm ang che; thisen chhuah pawh i huat loh avângin, thisen chuan a ûm dâwn che a ni.

⁷Tichuan, Seir Tlâng chu ka ticherêu vek ang a, chu hmuna lût leh chhuak te chu ka tihlum ang.

⁸Khandaiha thah ruangte chuan an tâng chung te, mual te, phaizâwl te leh an kawr ruam zawng zawng chu a hnawh khat vek ang.

⁹I chhe hlen vang vang tawh ang a, i khawpuite pawh luah lohvin a ram reng tawh ang; tichuan, LALPA ka ni tih i la hria ang.

¹⁰“LALPA a awm reng chungin, ‘Hêng hnam pahnihi leh ram pahnihte hi ka tâ a ni a, kan nei tûr a ni,’ i tih vângin,

¹¹minunga chu ka nih hi,” Lalpa PATHIAN-in a ti, “An chungah i thinurna leh anmahni i huata, i îtsîk ang tak hian i chungah ka t̃uan ve ang; i chungthû ka rêl hunah chuan an zîngah ka la inhriattîr ang.

¹²Tichuan, LALPA ka ni tih i la hria ang. Israel tângte chu, ‘An chhe zo ta; duh duhin kan sawisa thei ta,’ tia i sawichhiatna zawng zawng kha ka lo hre si a.

¹³Nangma kêa ngeiin mi uankhum a, ka lakah t̃awngkam i tui tam hle a; ka lo hre vek si a.”

¹⁴Tichuan, Lalpa PATHIAN chuan: “Ka tihram vek hunah che chuan, lei pumpui hi a lâwm hlê ang.

¹⁵Israelte rochun a ram chhiat vek avânga i lâwm ang bawh khân i chungah pawh ka ti ve ang; âw, nangni Seir tâng leh Edom zawng zawngte u, tihchhiat vek in la ni dâwn asin! Tichuan, LALPA ka ni tih an hria ang.”’

BUNG 36

ISRAELTE TANA MALSÄWMNA

¹“Nang, mihring fapa, Israel tângte hnênah thû puang la, heti hian ti rawh, ‘Aw, Israel tângte u, LALPA thû hi lo ngaithla teh u!

²Lalpa PATHIAN chuan heti hian a ti: “I hmêlmâten, ‘I hi le! Hmasâng ata an hmun sângte chu kan ta a ni ta,’” an tih avângin,’

³thû chu puang rawh, ‘Lalpa PATHIAN chuan heti hian a ti: “Hnam hrang hrang tâ ni tûra in ram an tihchhiata, kil tin ațanga an lem duak duak che u-a, mi kamtamte leh mite sawi chhiat tûra an awmtîr che u avângin—

⁴âw, Israel tângte u, Lalpa PATHIAN thû hi ngaithla teh u! Lalpa PATHIAN chuan tâng te, mual te, lui te, ruam te, hmun ram chhe tawh te, hnuchhawin tawh khawpui te, an chhehvêla

hnam dangte rawk leh hmuhsit tuarte hnênah,

⁵Lalpa PATHIAN chuan heti hian a ti: “Edom-ho zawng leh hnam hrang hrang, phûr tak leh hmuhsit chungka ka rochan ram an rawk theih nân, an tâ ang hrima lo insemute chu demin, thinrim engphiarin thû ka chhâk chhuak ta a ni.”

⁶Chuvângin, Israel ram chungchângah thû puang la, tâng te, mual te, lui leh ruamte hnênah, ‘Lalpa PATHIAN chuan heti hian a ti: “Ngai teh, hnam dangte hmuhsitna in tawrh avângin thîkna nê, thinur takin thû ka sawi ta a ni.”

⁷Chuvângin, Lalpa PATHIAN chuan heti hian a ti: “In vêla hnamte chuan an mualphona an la khum ngei ngei dâwn tih hi kut pharin chhia ka chham a ni.

⁸Aw, Israel tângte u, nangni chuan zârte chhuah ula, ka mi Israelte tân rah te chhuah bawh rawh u, an lo kal dâwn si a.

⁹In lama tâng ka ni si a, tichuan in lam ka lo hawi ang a, in lei te chu in let ang a, thlaite in ching leh ang.

¹⁰Israel chhûngte zawng zawng chu an zavaiin ka tipung ang; khawpuite chu an luah leh ang a, a chhe laite chu an siam t̃ha leh ang.

¹¹Mi leh sâ ka tipung ang; fate hringin an pung thûr thûr dâwn a ni; tûn hma ang khân ram chu ka luahtîr ang che u a, a tîra in awm dân hmasa aia t̃hain ka awmtîr ang che u. Tichuan, kei hi LALPA ka ni tih in hria ang.

¹²A ni, mipui, ka mi Israelte ngei chu, in chungah ka lêngtîr ang; an luah ang che a, an rochan i ni bawh ang; fate pawh i sîn tawh ngai lo vang.”

¹³Lalpa PATHIAN chuan heti hian a ti: “Nang chu mihringte ei raltu, mahni chipuite fa sîntîrtu i ni,’ an ti che a,

¹⁴chuvângin, mihringte chu i ei ral tawh lo vang a, i mi leh sâte pawh i sîn tawh ngai hek lo vang,” Lalpa PATHIAN-in a ti.

¹⁵Hnam dangten an elsênna thâwm i hre tawh lo vang. Mi sawi chhiat i tuar tawh lo vang a, i hnampui te titlutûah i tâng tawh hek lo vang,” Lalpa PATHIAN-in a ti.”

ISRAEL DINTHAR LEHNA

¹⁶LALPA thû chu ka hnênah a lo thleng a:

¹⁷“Mihring fapa, Israel chhûngten an rama an chên lai khân, an awm dân leh thiltihin ram chu an tibawrhâng a; hmeichhe thianghlim loh lai ang maiin ka hmâah an bawhlhlawh a.

¹⁸Chuvângin, ram chhûngah thisen an chhuah bâkah an milimte hmanga an tihbawhlhlawh avângin, an chungah ka thinrimna ka leih baw ta a ni.

¹⁹Tichuan, hnam dangte zîngah ka tidarh a, ram tinah ka hnawt darh a; an awm dân leh an thiltih ang zêlin ka hrem ta a ni.

²⁰An kalna hnam apiangte hnênah ka hming thianghlim an tibawrhâng zêl a, mite lah chuan, ‘Hêng mite hi LALPA mite an ni a, mahse ama ram an chhuahsan si a nih hi,’ an lo ti t̃hin a ni.

²¹Israel chhûngten an kalna apianga hnamte hnêna an tihhminghliaw thîn, ka hming thianghlim chu ka lainat a ni.

²²“Chuvângin Israel chhûngte hnênah chuan sawi rawh, ‘Lalpa PATHIAN chuan heti hian a ti: “Aw, Israel chhûngte u, hê thil hi

nangmahni vânga ti ka ni lo va, in kalna apianga in tihhminghliaw, ka hming thianghlim avâng chauhva ti ka ni zâwk.

²³Hnamte zînga in tihhminghliaw tâk, nangmahni ngeiin an hnêna in va tihhminghliaw, ka hming ropui chu ka serh thianghlim dâwn a ni; tichuan, nangmahniah serh thianghlimin ka awm tih, an mita an hmuh hunah, LALPA ka ni tih an hria ang,” Lalpa PATHIAN-in a ti.

²⁴Hnam dangte zîng ata ka la chhuak ang che u a, ram tin ata ka hruai khâwm bawh ang che u-a, in ram ngeiah chuan ka hruai lût dâwn si che u-a.

²⁵Tui thianghlimin ka theh ang che u a, in lo thianghlim tawh ang; in bawhlhlawhna leh in milim zawng zawng te lakah ka thianfai ang che u.

²⁶Thinlung thar ka pê ang che u a, nangmahni chhûngah thlarau thar ka dah bawh ang; in tîsaa mi lung anga sak thinlung chu ka la bo ang a, tîsa anga nêmin thinlung ka pê ang che u.

²⁷Nangmahniah Ka Thlarau ka dah ang a, ka dânte pawm thei tûrin ka siam ang che u a, ka thupêkte chu in vawng ang a, in zâwm bawh ang.

²⁸Tichuan, in pate hnêna ka pêk ramah chuan in chêng ang; ka mite in ni ang a, kei hi in Pathian ka ni ang.

²⁹In bawhlhlawhna zawng zawng lakah ka chhandam ang che u. Buh leh bâl ka ko ang a, ka tipung bawh ang a, in chungah t̃am a tla tawh ngai lo vang.

³⁰In thei kûngte chu ka ti-rah tiar tuar ang a, in thlawhmmâte ka tipung thûr thûr bawh ang; tichuan, t̃am avânga hnam dangte deusawhna in tuar ngai tawh lo vang.

³¹Tichuan, in awm dân sual te, in thiltih dân t̃hat lohziatê chu in hre reng ang a; in sualzia leh in tenawm êm avângin nangmahni ngei kha in la inten hluah hluah dâwn a ni.

³²Hê thil hi nangmahni avânga ti ka ni lo tih hria ang che u,” Lalpa PATHIAN-in a ti. Aw Israel chhûngte u, zak ngawih ngawih ula, in awm dân avâng khân kimki reng rawh u!”

³³Lalpa PATHIAN chuan heti hian a ti: “In khawlohna zawng zawng ka tlen fai nî-ah chuan, khawpuite chu luah leh thei tûrin ka siam ang che u a, hmun ram chhe tawhte chu din t̃hat leh a ni ang.

³⁴Veivâka kalte hmuh tûrin, hmun ram chhe tawh lei te chu an lai phut leh ang.

³⁵E heu! Hêng laia hmun ram chhiatê kha Eden huan ang mai a lo nih leh tâk hi; khawpui chhe ram leh hluihlâwn tawhte pawh, a kulhte hungin an luah leh ta reng mai,’ an la ti dâwn a ni.

³⁶In vêla hnam la awm vête chuan, kei, LALPA hian hmun chhe tawhte chu ka din t̃ha leh a, ram chhe tawh pawh ka tuai thar leh ta tih an hria ang. Kei, LALPA hian, ka sawi tawh chu ka hlen ngei ang.”

³⁷Lalpa PATHIAN chuan heti hian a ti: “Israel chhûngte ka tihsak theih nân, he i hi mi dîl tûrin ka ti ang a: tichuan, ran rual ang maiin an lo pung leh ang.

³⁸Inthâwina tûra ran rual an hlân ang leh, kût ni vângthlaa Jerusalema ran rual awm hmur t̃hînte ang maiin, khawpui chhe tawhte chu mihringin an la khat leh ang. Tichuan, kei hi LALPA

ka ni tih an hria ang.” ”

BUNG 37

RUHRO AN LO NUNG LEH

¹LALPA kut chuan min chelh a, LALPA Thlarau chuan min hruai chhuak a, ruam zâwl laiah chuan min dah a; ruh hlîr hian a lo khat a.

²Chûng chu mi fan kualtîr a, ngai teh, ruamah chuan a lo tam êm êm mai a; a vai chuan ruh ro hlîr a ni a.

³Ani chuan ka hnênah, “Mihring fapa, hêng ruhte hi an lo nung leh thei ang em?” tiin mi zâwt a. Kei chuan, “Aw, Lalpa PATHIAN, nangman i hria alâwm,” tiin ka chhâng a.

⁴Ani chuan ka hnênah, “Hêng ruhte hnênah hian heti hian thû puang rawh, ‘Aw, ruhrote u, LALPA thû hi lo ngaithla teh u!

⁵Lalpa PATHIAN chuan hêng ruhrote hnênah heti hian a ti: “Nangmahniah thâw ka luhtîr ang a, tichuan, in nung leh ang.

⁶Nangmahniah thahrui ka dah ang a, taksain ka tuam ang che u; vunin ka khuah ang che u-a, in chhûngah thâw ka awmtîr bawh ang a, tichuan, in nung ang. Tichuan, kei hi LALPA ka ni tih in hria ang,” ” a ti a.

⁷Tichuan, thupêk ka dawn ang chuan thû chu ka puang ta a; thû ka han sawi chuan thâwm a lo awm a, a lo ri rum rum a; ruhte chu an zawmpui theuhvah an invuah khâwm ta rup rup a.

⁸Chutia ka en reng lai chuan, thahrui leh taksa a lo awm a, vunin arawn tuam a; mahse anmahniah thâw a la awm lo va.

⁹Ani chuan ka hnênah, “Mihring fapa, thâw hnênah thu sawi la, puang bawh la, thâw hnênah chuan, ‘Lalpa PATHIAN-in heti hian a ti a che u: “Aw, Thâw te u, kâwlkil lî ata lo kal ula, hêng mi thahhote tinung leh tûr hian rawn thâwk khum rawh u,” ti ang che,’ a ti a.

¹⁰Tichuan, thû mi pêk angin ka han puang a, an chhûngah chuan thâw a lo lût a, an lo nung a, an kêin an lo dîng chhuak a, sipai rual ropui tak an lo ni a.

¹¹Ani chuan ka hnênah, “Mihring fapa, hêng ruhte hi Israel chhûngkaw pumpui an ni. Anniho pawhin, ‘Kan ruhte a ro zo va, kan beiseina a bo va, keimahni chawpin min hnâwl fithla ta!’ an tih thîn kha.

¹²Chuvângin, an hnênah puang la, ‘Lalpa PATHIAN chuan heti hian a ti: “Aw, ka mite u, ngai teh u, in thlân te ka hawng ang a, in thlân ata ka chhuahtîr ang che u a, Israel ramah ka hruai lût ang che u.

¹³Aw, ka mite u, in thlân te ka hawna, in thlân ata ka hruai chhuah hunah che u chuan, kei hi LALPA ka ni tih in hria ang.

¹⁴Nangmahniah ka Thlarau ka dah ang a, in nung ang a, in ramah chuan ka dah dawn che u a ni. Tichuan, kei, LALPA hian ka sawi tawh chu ka hlen ta tih in la hria ang,” LALPAN a ti.”

LALRAM PAKHAT, LAL PAKHAT

¹⁵LALPA thû chu ka hnênah a lo thleng leh a,

¹⁶“Nang, mihring fapa, tiang pakhat la la, ‘Juda leh Israel fate leh an kawppuite tân,’ tih ziaik rawh. Tiang dang la leh la, ‘Ephraïma tiang, Josepha leh Israel chhûngkua zawng zawng leh

an kawppuite tân,’ tih ziaik bawh rawh.

¹⁷Tiangte chu pakhat ni tûrin zawm la, tichuan i kutah tiang pakhat a lo ni ang.

¹⁸“I mite chuan i hnênah, ‘Hêng thil i tih hi a awmzia min entîr dawn lo vem ni?’ an tih chuan—

¹⁹an hnênah, ‘Lalpa PATHIAN chuan heti hian a ti: “Josepha tiang, Ephraïma leh Israel hnamte leh an kawppuite kuta mi chu ka la ang a; Juda tiang nêen ka zawm ang a, ka kutah hûm kawpin, tiang pakhat ka siam ang,” ti ang che,’ a ti a.

²⁰I thu ziahna tiangte chu an mithmuhah i kutin hûm kawp ang che.

²¹“An hnênah, ‘Lalpa PATHIAN chuan heti hian a ti: “Israel fate chu an vahvaihna hmun tin leh hnam tin zîng ata la chhuakin, kil tin aţangin ka khâwm ang a, an ramah ngei ka hruai lût ang;

²²an ram, Israel tlângah te chuan hnam pakhat ka siam ang; lal pakhat chu an zaa chung a lal a ni ang; hnam nhii an ni tawh lo vang a, lalram pahniha then hran an ni tawh ngai lo vang.

²³An milim te, an thil tenawm chîn thîn te leh an bawhchhiat thinnate chuan an intibawhlhlawh leh ngai tawh lo vang; suala an lo khawsak thinnata hmun ata chu ka chhan chhuak ang a, ka tlêng fai ang. Tichuan, ka mite an ni ang a, kei hi an Pathian ka ni ang.

²⁴“Ka chhiahhlawh Davida chu an chungah a lal ang a, an zavai atân berâmpu pakhat an nei ang; ka dân thuruatte zâwmîn, ka remruatna ang zêlin an awm ang a, an nunpui bawh ang.

²⁵Tichuan, in thlahtute lo chênna thîn, ka chhiahhlawh Jakoba hnêna ka pêk ramah chuan an chêng ang a; anmahni leh an thlah kal zêlte thlengin kumkhuain an chêng reng ang a; ka chhiahhlawh Davida chu kumkhuat atân an lal a ni ang.

²⁶Chubâkah, anmahni nêen remna thu ka thlung ang a, kan kâra kumkhaw thuthlung a ni ang; ngelnghet takin ka dah ang a, ka tipung bawh ang, an zîngah chuan kumkhuat atân ka hmun thianghlim ka din ngheet dawn a ni.

²⁷Ka biakbûk chu an zîngah a awm bawh ang; kei hi an Pathian ka ni ang a, anni chu ka mite an ni ang.

²⁸Ka hmun thianghlim chu chatuan atân an zînga a awm hunah, hnam dangte chuan kei, LALPA hian Israelte ka serh hran bîkzia an hria ang.” tiin,’ a ti a.

BUNG 38

GOG LEH A THURUALPUTEN ISRAEL AN BEI

¹LALPA thû chu ka hnênah he tiang hian a lo thleng a,

²“Mihring fapa, Magog rama Ros leh Mesek leh Tubal hotu ber Gog-ho hmachhawin, chhiat a tawh tûr thû puang la,

³Lalpa PATHIAN chuan heti hian a ti: “Ngai rawh, aw Gog, Ros, Mesek leh Tubal te hotu lû ber, ka do che a ni.

⁴I khabêah thîrkawm ka barh ang a, ka kuai vir ang che; i sipai rual te, i sakawr te, i sakawr chungchuan mi zawng zawng, ropui taka inthuan, pâwl ropui tak, phaw lian leh phaw tê leh khandaih keng thiaute nêen khân ka rawn kai chhuak vek ang che.

⁵Persia, Ethiopia leh Libia mi, phâw leh thîr lukhuma inthuan pawh an zîngah an tel vek a;

⁶Gomer leh a sipai rual zawng zawng nê; hmar lam daih ami Togarma chhôngkua leh a sipai rual zawng zawng-i hnêna mi tam tak nê.

⁷“Nang leh i hnêna i hruai khâwm, i pâwlpui zawng zawng pawh tiamin, inrâring la, inpeih rawh; an vêngtuah țang ang che.

⁸Ni rei tak nhuah i hnêan an rawn thleng ang. Chumi zawhah chuan khandaih laka chhan chhuahho, hnam tam tak ațanga Israel tlang ram, hun rei fê lo chhe ram tlawk tlawk tawhah chuan in lo kal khâwm ang; chûng mite chu hnamte zing ata hruai chhuah an ni a, tûnah chuan an vaiin râlmuang takin an khawsa ve ta a ni.

⁹Thlipui a lo thawha chhûmin ram a tuam mup mup ang hian, nang leh i lamțang i sipai rual tam tak nê i lo thawk chho dawn a ni.”

¹⁰“Lalpa PATHIAN chuan heti hian a ti: “Chumi niah chuan thil țha lo ti tûrin in rilrûah suangtuahna a lo lût ang:

¹¹“Kulh nei lo khuate awmna ramah ka kal teh ang; râlmuang taka awma, him taka awm hlê hlê te chênna, kulh pawh nei lova, kulh kawngkhâr leh a kalhnate pawh nei lova awmte chu ka va rûn teh ang,”—

¹²“va rawk ila, râlâl sum te va laksak ila, hmun ram hnû luah leh tawhte leh, hnam dangte zing ata hruai kîr leh tâkho, ran rual leh bungraw ngah tak, a ram lailia chêng hote chungah chuan kut i va thlak teh ang hmiang,” i ti rilrû ang.

¹³Seba te, Dedan te, Tarsis sumdâwngho leh an sakeibaknei vânglai zawng zawng chuan, ‘Rawk tûrin maw in lo thawh chhuah? Râlâl sum la tûr te, silvar leh rangkachak te, ran rual leh bungrua la tûr te, rawk chiam tûrin maw in sipai rual in rawn khâwm?’ an ti ang.”

¹⁴“Chuvângin, mihring fapa, Gog-ho hnênah chuan thû puang la, ‘Lalpa PATHIAN chuan heti hian a ti: “Râlmuang taka ka mi Israelte an awm hun chu i hre dawn lo vem ni?”

¹⁵Tichuan, i awmna hmar lam hla tak ațangin nang leh i mipui tam tak chu, sakawr chunga chuang țheuhvin, pâwl lian tak leh sipai rual ropui tak nê in lo thawk ang.

¹⁶Chhûmin ram a tuam mup mup ang maiin, ka mi Israelte rûn tûrin i lo la thawk ang. Ni nhuhnung lamah ka ram chu ka rûntîr dawn a che; aw Gog, nangmah vanga an mithmuhah zahawma ka awm hunah, hnamte chuan tu nge ka nih min la hria ang.”

¹⁷Lalpa PATHIAN chuan heti hian a ti: “Tun hmâa ka chhiahhlawh Israel zâwlneite hmanga ka lo sawi țhin, anmahni do tûra ka mi tîrh tûr, kum tam tak ka lo puan lâwtîr kha, nangmah ngei hi i ni lo vem ni?”

GOG CHUNGA RORÊLNA

¹⁸“Israel ram bei tûra Gog-ho an lo thawh chhuah hun chuan, thinur hmêl dur khuih nê ka lo hmachhawn ang,” Lalpa PATHIAN-in a ti.

¹⁹Ka thikna leh ka thinrim meialhin heti hian a sawi a: ‘Chumi nî-ah chuan Israel ramah lîrpui a lo ngîng dur dur ang a,

²⁰tichuan, luipua sangha te, chunglêng sava te, ramhnuaia ramsâ te, lei chunga bawkvâka kal zawng zawng te, lei chunga mihring zawng zawng nê ka hmâah an khûr ang. Tlangte chu a

min dur dur ang a, âwihpangte pawh a chim hum hum ang a, bang sang tinrêng chu leiah a tlu mâm vek ang.’

²¹Gog-ho do tûrin ka tlang zawng zawngah khandaih ka ko dawn a ni,” Lalpa PATHIAN-in a ti. “Mi tin khandaih chuan mahni unaute a bei dawn a ni.

²²Ani chu hripui leh thisen chhuahnain ka hrem ang; a sipai rual te, a țhuihruai mipui tam takte chu ruahpui vânwân leh rial lian pui puiin ka chhu hrep ang a, mei leh kât ka sûtîr chiam bawk ang.

²³Tichuan, ka ropuizia leh ka thianghlimzia ka lantîr ang a, hnam tam tak chuan min hre tawh ang. Kei hi LALPA chu ka ni tih an hria ang.”

BUNG 39

GOG SIPAI TIHBORALNA

¹“Nang, mihring fapa, Gog-ho chhiat tûr thû puang rawh, ‘Lalpa PATHIAN-in heti hian a ti: “Ngai teh, âw Gog, Ros, Mesek leh Tubal lalpa, ka do che a ni;

²ka kuai her ang che a, ka nawr kal zêl ang che; hmar lam hla tak ata ka hruai chhuak ang che a, Israel tlangte va bei tûrin ka hruai ang che.

³I kut vei lama thalngul chu ka titliak ang a, i kut ding lama thal pawh a tla ang.

⁴Israel tlangahte chuan nang leh i sipai rual leh i hnêna mipuite kha an tlu hlum ang; sahel ei chî sava chi tinrêng leh ramhnuaia ramsâte ei ral atân ka pe dawn che a ni.

⁵Ram tinah in tlu thal pheng phung dawn tih pawh ka sawi tawh hi,” Lalpa PATHIAN-in a ti.

⁶Magog chungah leh thliarkâra him taka awmte chungah mei ka tîr ang. Tichuan, kei hi LALPA ka ni tih an hria ang.

⁷Chutichuan, ka hming thianghlim chu ka mi Israelte ka hriattîr ang a, ka hming thianghlim chu an tihbawrhân ka phal tawh lo vang. Tichuan, hnamte chuan kei hi LALPA, Israel Mî Thianghlima chu ka ni tih an hria ang.

⁸A lo thleng ngei dawn a, a hlen ngei bawk ang,” Lalpa PATHIAN-in a ti. “Chû nî chu a ni, ka lo sawi țhin ni.

⁹“Chumi hnûah chuan, Israel khawpuia chêngte chu an lo chhuak ang a, râlthuum tinrêng, phaw lian leh phaw tê te, thalngul leh thal te, fei zum leh fei kibâr te chu hâlin meiah an tuah ang; kum sarîh chhông meiah an tuah ang.

¹⁰Chûng râlthuumte chu thing tuahah an hman dawn avângin rama thing an phur lo vang a, ngawa thing an kit hek lo vang; anmahni rawktute chu an rawk lêt ve ang a, anmahni suamtute chu an suam lêt ve ang,” Lalpa PATHIAN-in a ti.

GOG CHU PHÛM A NI

¹¹“Chumi hunah chuan Gog-ho phûm nân, Israel ram chhông, tuipui chhak lama zin mite ruamah chuan hmun ka ruat ang; Gog-ho leh an mipui zawng zawng an phûm dawn avângin, zin veivâkte pawh a dang buai hial dawn a ni. Chuvângin, chû hmun chu Hamon Gog Ruam an ti ang.

¹²Chûng mite phûm chuan Israela chhûngte chuan thla sarìh zet ram chhûng an thianfai ang.

¹³Ram chhûnga mi zawng zawngin an phûm ang a, chawimâwina ka chan ni chuan anni pawhin an hmingthan phah ve baw ang,” Lalpa PATHIAN-in a ti.

¹⁴“Ram pum fang chhuaka, ruang la phûm loh zawng chhuaka, phûm tûr leh, thian fai nghal zêl tûrin a hranpain mi ruat bîk an nei ang. Thla sarìh a ral hunah an zawng tan dâwn a ni.

¹⁵Zawngtu pâwl chuan ram pum an fang chhuak ang a; tupawhin mihring ruh a hmuh chuan, phûmtuten Hamon Gog Ruama an phûm fel hma chu, chutah chuan chhinchhiahna an târ tûr a ni.

¹⁶Chû khawpui hmingah chuan Hamona an sa ang. Chutiang chuan ram chu an thianfai dâwn a ni.”

HNEHNA KÛT

¹⁷“Nang, mihring fapa, Lalpa PATHIAN chuan heti hian a ti a che, ‘Sava tinrêng leh ramhnuia ramsa tinrêng hnênah thû sawi la: “Rawn pung khâwm ula, lo kal teh u; Ka ruaitheh kîl tûrin kîl tin aţangin lo pungkhâwm r’u, In tâna ka buatsaih a nih hi, Israel tânga ruai ropui tak ka thehah hian, Sâte hi ei ula, thisen te hi dâwt rawh u.

¹⁸Mi ropui tak tak sâte ei ula, Leia lalho thisen te chu dâwt rawh u, Berâmpa leh berâm no, kêl leh bâwngpa, Basan ran chawm thau hlîr an ni e.

¹⁹Sa thaute chu puar takin in ei ang a, Thisen te chu rui khawpin in in baw ang a, Inthâwina ruai ka theh chu Nangmahni tân a ni ka hlan ni.

²⁰Ka dawhkânah chuan Sakawr leh a chungchuang sâte, Mi chak leh indo thiamho sâte chu Puar takin in ei dâwn nia,” Lalpa PATHIAN-in a ti.

ISRAEL RAM TUN DIN LEHNA

²¹“Hnamte zîngah ka ropuina ka târlang ang a; tichuan, hnam tinrêngin an chungah kut ka lek a, rorêl na hlen chhuak ta tih an hmu ang.

²²Chumi ni aţang chuan Israel chhûngten kei hi LALPA an Pathian ka ni tih an hre tawh ang.

²³Jentailte pawhin Israelte hi an sual êm avânga sala tâng an lo ni tih an hre baw ang; ka laka an rinawm loh avângin an lakah ka hmêl ka thup ve thung a ni. An hmêlmâte kutah ka pê a, khandaihin an tlu ta vek a ni.

²⁴An bawhlhlawhna leh an bawhchhiatna ang zêlin ka hrem a, an lakah ka hmêl ka thup a ni.”

²⁵“Chuvângin, Lalpa PATHIAN chuan: “Tûnah erawh chuan Jakob-ho saltângte chu ka hruai kîr leh ang a, Israel chhûngkaw pumpui chungah zah ka ngai ang a; thikthu tichhe khawpin ka hming thianghlim hi ka tan tlat dâwn a ni—

²⁶an rinawm loh avânga ka laka an rinawm lohna leh an mualphonate an phurh zawh hnûah anmahni ramah râlmuang takin an awm tawh ang a, tûma’n an tithlabâr tawh lo vang.

²⁷Mi zîng aţanga ka hruai kîr leha, an hmêlmâte ram ata ka hruai khâwm leh hun chuan, hnam tam tak mithmuhin

anmahniâh chawimâwiin ka awm tawh ang a,

²⁸hnamte zînga sala tâng tûra tîr chhuaktu leh, pakhatmah hmaih lova anmahni rama hruai kîr lehtu chu, Kei, LALPA an Pathian hi ka ni tih an la hria ang.

²⁹An lakah ka hmêl ka thup tawh lovang; Israel chhûngkaw chungah ka Thlarau ka leih dâwn si a,’ Lalpa PATHIAN-in a ti.”

BUNG 40

KHAWPUI THAR, TEMPUL THAR

¹Kan saltân kum 25-na, kum bul thla ni 10, khawpui an lâk aţanga a kum 14-na, chumi nî chuan LALPA kut chu ka chungah a lo thleng a; chutah chuan mi hruai ta a.

²Pathian inlârnaah chuan, Israel ramah mi hruai a, tâng sâng tak chungah mi ngat a; chumi chhim lamah chuan khawpui riruang ang hi a lo lang a.

³Chutah chuan mi hruai a, ngai teh, mi pakhat, a landan chu dâr ang mai hi a lo awm a. A kutin hrui leh tehna tiang a keng a, kawngka bulah chuan a ding a.

⁴Chû mi chuan ka hnênah, “Mihring fapa, ka entîr tûr zawng zawng che hi i mitin thlîr la, i bengin ngaithla la, i rilrûah khung rawh; ka entîr tûr chein hetah hian hruai i ni si a. I thil hmuh zawng zawng hi Israel chhûngte hnênah puang ang che,” a ti a.

⁵Tempul pâwn chu bangin a inhung vêl vek a. Chû mî kutah chuan tehna tiang tawng ruka sei, tawng khat leh kutphah bawka sei theuh a awm a; kulh bang chhah zâwng chu a teh a, tiang tlûk khat a ni a; a sân zâwng pawh tiang tlûk khat a ni.

TEMPUL CHHAK LAM KAWNGKA

⁶Chhak lam ep kawngkaah chuan a va kal a; kailâwnah chuan a lâwn chho va, kawngka luhna rahka zâwl chu a teh a, tiang tlûk khata zau a ni a, rahka zâwl dang pawh chu tiang tlûk khata zau bawk a ni.

⁷Kawngka tina in tê dung leh vâng chu tiang tlûk khat zêl a ni; in têtê awmna inkâr hlat zâwng chu tawng ngâ zêl a ni; Hulhliap chhûng lama kalka biang inkâr chu tiang tlûk khat a ni.

⁸Kawngka chhûng lam hulhliap chu a teh a, tiang tlûk khat a ni.

⁹Hulhliap kalka zâwl chu a teh a, tawng riata zau a ni a; kawngka ban pahni chu tawng hniha sâng a ni. Hulhliap chu kawngka chhûng lamah a awm a.

¹⁰Khawchhak lamah chuan luhna sîr tawn tawnah kawngka luhna in tê pathum vê vê a awm a; a pathum chuan a intiat vek a; a tawn tawna kawngka bante pawh a intiat bawk.

¹¹Luhna kawngka panna vâng lam chu a teh a, tawng sâwm a ni a; tawng sâwm leh pathuma sei a ni.

¹²In te sîr lehlam lehlamah chuan hmun âwl tawng khat leka zau a awm vê vê a; in te pindante chu kil khat tawng ruk, kil lehlam pawh tawng ruk bawk a ni.

¹³Kawngka luhna chu intê pindan pakhat chung aţanga a lehlam chung thlengin a teh a, kawngkhâr in-ep vê vê inkâr chu tawng 25 a sei a ni.

¹⁴Luhna kawngka ban chu a teh a, tawng 60 a sâng a ni a, luhna leh ban inkâr chu a vêlin kawt zâwlin a hual a.

¹⁵A luhna tawntirh kawngkâ leh a kawngka chhûng zawk hulhliap inkâr chu tawng 50 a ni.

¹⁶In têah te leh tualzâwl hrûla hulhliap bangah chuan tukverh ker kuak a awm zêl a, a sîr bangah leh hulhliap ep-ah pawh chutiang baw chu a awm. Bang chhûng lamah pawh tukverh ker kuakte chu a awm kual chhuak vek a. Luhna ban tinah tûm kung lem a chuang hlawm.

HUNG PÂWN ZÂWK

¹⁷Hung pâwn zâwkah chuan mi hruai a; kawtzâwl chu lung phahin a hual chhuak vek a, pindan têtê pawh a awm vek baw a; lungrem hrûlah chuan pindan tê 30 lai a awm baw a.

¹⁸Luhna sirah chuan lungrem a awm a, kalkawng hrûlah chuan a inphah chhuak a; chu chu lungrem hnuaihning zâwk a ni.

¹⁹Luhna hnuai zâwk pawn lam aţanga a hung chhûng zâwk pawn lam zau zâwng chu a teh a, chhak lam leh hmar lamah tawng 100 vê vê a ni.

HMAR LAM KAWNGKA

²⁰Hung pâwn zâwk pawhin hmar lamah kawngka a nei a, a dung lam leh a vâng lam a teh a.

²¹A kawngka luhna sir tawn tawna pindan pathum vê vê te, kawngka ban te leh a kalkawngte chu kawngka hmasa ber nê a intiat a; tawng 50 a sei a ni a, a vâng lam chu tawng 25 a ni.

²²A tukverhte, a hulhliapte, a tûm thingte chu chhak lam kawngkaa mi nê a intiat vek a; a lâwn chhohna rahka pasarih a awm a, a hulhliap a han pawh a.

²³Hung chhûng luhna kawngka chuan chhak lam kawngka ang bawkin, a hmar lam kawngka a ep chiah a; kawngka pakhat aţangin kawngka dang chu a teh a, tawng 100 a ni a.

CHHIM LAM KAWNGKA

²⁴Chumi hnû chuan chhim lamah mi hruai a, chhim lam ep-ah chuan kawngka pakhat a awm a; a tehna ngaiin kawngka bante leh a hulhliapte chu a teh a.

²⁵Chutah chuan tukverhte a awm a, a hulhliap vêlin tukverh a awm vek a; a dung lam tawng 50, a vâng lam tawng 25 a ni.

²⁶A lâwn chhohna rahka pasarih a awm a, chu chuan hulhliap a han pawh a; a kawngka banahte chuan tûm thing lem a tawn tawnin a awm a.

²⁷Hung chhûng zâwkah chuan, chhim lam ep-in luhna kawngka a awm leh baw a; chhim lama kawngka leh kawngka inkâr chu a teh a, tawng 100 a ni a.

HUNG CHHÛNGRIL ZÂWK KAWNGKATE

²⁸Chhim lam kawngka aţangin a hung chhûngril zâwkah chuan mi hruai a; a tehna ngaiin chhim lam kawngka chu a teh a.

²⁹Kawngka pindante, kawngka bante, a hulhliapte chu a tehna ngaiin a teh baw a; chutah chuan tukverhte a awm a, a hulhliap vêlin tukverh a awm vek a; a dung lam tawng 50, a vâng lam tawng 25 a ni.

³⁰A vêlin hulhliap a awm a, a dung lam tawng 25 a sei, a vâng lam tawng nga a ni.

³¹A hulhliap chu a hung pâwn zâwk epa awm a ni a, a kawngka banah te chuan tûm thing lem a awm a, lâwn chhohna rahka pariat a awm baw.

³²Hung chhûng zâwk, chhak lam ep-ah mi hruai a; a luhna kawngka chu tehna pangngaiin a teh a.

³³Kawngka pindante, kawngka bante, a hulhliapte chu a tehna ngaiin a teh baw a; chutah chuan tukverhte a awm a, a hulhliap vêlin tukverh a awm a; a dung lam tawng 50, a vâng lam tawng 25 a ni.

³⁴A hulhliap chu a hung pâwn zâwk epa awm a ni a, a kawngka banah te chuan tûm thing lem a awm a, lâwn chhohna rahka pariat a nei a.

³⁵Hmar lam kawngkaa chuan mi hruai a, a tehna ngaiin a teh a—

³⁶a kawngka pindante, a kawngka bante, a hulhliap te nê. A vêlin tukverh a awm vek a; a dung lam tawng 50, a vâng lam tawng 25 a ni.

³⁷A kawngka bante chuan hung pâwn zâwk a ep a, a tawn tawnin banahte chuan tûm thing lem a awm a, lâwn chhohna rahka pariat a awm baw.

INTHÂWINA HMUN BUATSAIH DÂN

³⁸Pindan pakhat a awm a, a luhna chu kawngka ban awmna hrûlah a ni a, chu chu hâlral thilhlân silfaina hmun a ni.

³⁹Hulhliapa luhna kawngka sirah chuan dawhkân pahni a awm vê vê a, chû chu hâlral thilhlân te, sual thâwina leh bawhchhiat thâwina ran talhna hmun a ni.

⁴⁰Hulhliap pâwnah chuan, hmar lam kawngka luh chhohna sirah dawhkân pahni a awm a; hulhliap sîr lehlamah pawh dawhkân pahni a awm baw.

⁴¹Luhna kawng sîr lehlam lehlamah chuan dawhkân pali vê vê, a vaiin inthâwina sâ an talhna dawhkân pariat a awm.

⁴²Hâlral inthâwina atân lunga chher dawhkân pali, a dung leh a vâng tawng khat leh a chanve vê vê, tawng khata sâng a awm baw; chu chu hâlral inthâwina leh thilhlân talhna hriamhrei an dahna a ni.

⁴³A chhûngah chuan thîr kawm, kutpah bawka sei, an dah kual a; dawhkânah chuan inthâwina sâte chu a awm a.

ZAIPÂWL LEH PUITHIAMTE PINDAN

⁴⁴Hung chhûngril zâwka luhna kawngka pâwnah chuan zaipâwlho pindante a awm a, hmar lam kawngka bul ami chuan chhim lam a hawi a, chhim lam kawngka bula mi chuan hmar lam a hawi thung.

⁴⁵Ka hnênah chuan, “Hê pindan, chhim lam hawi hi, tempul enkawltu puithiamte tân a ni.

⁴⁶Hmar lam hawi pindan hi maichâm enkawltu puithiamte tân a ni a; chûngte chu LALPA rawngbawl tûra va hnaih thintu, Leviah thlahte zînga Zadoka thlahte an ni,” a ti a.

HUNG CHHÛNGRIL ZÂWK LEH HULHLIAP

⁴⁷Tualzâwl chu a han teh a, a dung lam tawng za, a vâng lam tawng za, killi nei a ni. Maichâm chu tempul ân chiahin a awm a.

⁴⁸Ani chuan tempul hulhliapah mi hruai a, hulhliap kawngka biang tawn tawn chu a teh a, a lehlam lehlamin tawng nga vê vê a ni a; a luhkâ zau zâwng chu a lehlam lehlamin tawng thum vê vê a ni baw.

⁴⁹Hulhliap dung chu tawng sawmhniha sei, a vâng lam chu tawng sawm leh pakhta zau a ni; a pan chhohna kailâwn sirah chuan, a lehlam lehlamin ban a awm vê vê baw.

BUNG 41**HMUN THIANGHLIM ZAU ZAWNG**

¹Hmun thianghlimah chuan mi hruai lût a, kawngka biang chu a teh a, a lehlam zau zâwng chu tawng ruk a ni a, a lehlam pawh tawng ruka zau baw a ni—chû chu a biakbûk vâng lam chen a ni.

²A luhna kawngka zau zâwng chu tawng sâwm a ni a, a luhna hrûla bang chu tawng nga a ni a, a bang lehlam pawh tawng nga baw a ni; biakbûk chu a teh a, tawng 40 a sei, tawng 20 a zau a ni.

³Pindan chhûnghah lûtin a kawngka biang chu a teh a, tawng hnih a ni a; a luhna kawngka chu tawng ruka sâng a ni a; a luhna chu tawng sariha zau a ni.

⁴Hmun thianghlim pindan ril zâwk chu a dung lam a teh a, tawng 20 a ni a, a vâng lam pawh tawng 20 baw a ni; ani chuan ka hnênah, “Hei hi Hmun Thianghlim Ber a ni” tiin mi hrilh a.

BANG SÎRA PINDANTE

⁵Tempul bang chu a teh leh a, tawng ruka chhah a ni a. Tempul hual vêla kil tina pindan intlarte chu tawng lîa zau vek a ni.

⁶A sîr pindante chu chhâwng thumin a inchherchhuan a, chhâwng tinah pindan 30 zêl a awm a; chûng pindante chu tempul banga vuah zawm lovin, pindan inngahna tûra chhawrdawh an siam kualachte chuan a inngahat vek a ni.

⁷Tempul bang chu kailâwn anga inrem chho a nih avângin, a vêla pindante pawh chu a sân dân ang zêlin a zau chho hret hret a; tichuan, a chhâwng hnuai ber aţanga a laita kaltlanga a sâng bera lâwn chhohvin, a insak pawh a zau tial tial a ni.

⁸Tempul chu a vêlin dawhsân awm zuiin ka hmu a; chûng dawhsân, tawng ruka sâng chu, a sîr pindante inngahna tûr a ni.

⁹A sîra pindan awmte bang pawns lam chu tawng ngaa chhah a ni a, tempul sîr pindante luah bâk hmun âwl a la awm baw.

¹⁰Tempul leh a hrûla pindante inkâr âwl chu tawng 20 zêlin a kual chhuak vek a ni.

¹¹A sîr pindante chuan hmun âwl lam, chhim leh hmar hawiin kawngkhar a nei vek a; chutiang hmun âwl tawng ngaa zau zêl chuan a kual chhuak vek a ni.

A KIL THLANG LAMA IN

¹²Kawtzâwlin a daidan, thlang lam kila in chu tawng 70 a zau a ni a; chû in bang chu tawng ngaa chhahin a kual chhuak vek a, a dung lam chu tawng 90 a ni.

TEMPUL HUAM CHHÛNG RUAHMAN DAN

¹³Tichuan, tempul chu a han teh a, tawng 100 a sei a ni a; in dang leh a bang nêna a inkâr daidangtu kawt zâwl chu tawng 100 baw a ni;

¹⁴tempul chhak lam leh a kawtzâwl chu tawng 100 a zau baw a ni.

¹⁵A kawmchâr lam kawtzâwl âna in ding chu, a dawhsân te nêna a teh a, a sîr tawn tawnin tawng 100-a sei a ni a, tempul chhûngril leh tual zâwl epa hulhliap leh,

¹⁶an kawngka biangte leh tukverh kawngka biangte nêna. Kawngka luhna epa dawhsân chhâwng thuma kual chhuak vek chu, a chhuat aţanga tukverh thlengin thingphela thua a ni a—tukverhte pawh thua tel a ni a

¹⁷kawngka chung lam aţangin, pindan ril zâwk nêna, a bang zawng zawng chu, chhûng lam leh pawns lam thlenga teh chhuah vek a ni.

¹⁸Cherub leh tûm thing lem ker a ni a, cherub leh cherub inkârah tûm thing a awm zêl a. Cherub tin chuan hmai hnih a nei theuh va,

¹⁹mihring hmêl chuan lehlamah tûm thing lam a hawi a, a lehlama sakeibaknei vânglai hmêl chuan a bula tûm thing lam a hawi a; chutiang chuan tempul chu a kual chhuak vek a ni.

²⁰A chhuat aţanga kawngka chung lam thlengin, hmun thianghlim pindan bangah te chuan, cherub leh tûm thing lem an ker chhuak vek a.

²¹Tempul kawngka biangte chu, hmun thianghlim tawntirh angin kil lîin a inbial vêl a; a lan dân pawh a inang reng a ni.

²²Maichâm chu thinga siam, tawng thuma sâng, tawng hniha sei a ni. A kil te, a dung lam te, a pangte pawh thingphel vek a ni; “Hei hi LALPA hmâa dawhkân chu a ni e,” tiin mi hrilh a.

²³Tempul leh hmun thianghlim chuan kawngka pahniha a nei a.

²⁴Kawngkhârte chu khâr hnih nei, thleh hniha thleh theih vê vê a ni a: kawngkhâr pakhatin khâr hnih, kawngkhâr dang pawhin khâr hnih baw a nei a.

²⁵Banga an ker ang bawkin tempul kawngkhârahte chuan cherubte leh tûm thing lemte an ker a. Hulhliap kawngka lu chungah chuan thingphel an zâr a.

²⁶Hulhliap sîr lehlam lehlamah chuan tukverh lem leh tûm thing lemte a awm a—tempul sîra pindanah te leh thingphel zâr chungah te pawh a awm baw a.

BUNG 42**PUITHIAMTE PINDAN**

¹Ani chuan hmar lam hung pawns zâwkah mi hruai chhuak a; daidangtu hmun âwl ep chiaha pindanah chuan mi hruai lût a, inpui nêna a hmar lamah a inep baw a.

²Hmar lam epa a dung sei zâwng chu tawng 100 a ni (a vâng lam tawng 50 a ni)

³Tawng 20 a zau hung chhûng zâwk leh a ep chiah hung pawns zâwk lung phah chu, a dawhsân te nêna inep chiahin chhâwng thum a awm.

⁴Pindan te hma lam, a chhûng lam tawng khatah tawng sâwma zau kalkawng a awm a; a kawngkhârtê chuan hmar lam a hawî a.

⁵Dawhkân nghahchhanin hmun a luah tam avângin a chhâwng hnuai leh a laita aiin a chhâwng chungnung pindante chu a tâwî zâwk a ni.

⁶Chhâwng thuma sak, mahse in dangte anga ban nei lo a ni a; chuvângin, a chhâwng chung ber chu a hnuai lam, a laita leh a bulthutte ai chuan a tawî zâwk a ni.

⁷Pâwn lam bang chu hung pâwn zâwk hawiin, pindantête hma lam nên a inep a; a sei zâwng chu tawng 50 a ni.

⁸Hung pâwn zâwk lam hawia pindan têtê tlar chu tawng 50 a sei a ni a, tempul ep lam sei zâwng chu tawng 100 a ni.

⁹Chhak lam sîr, pindan têtê chhâwng hnuai berah chuan, hung pâwn zâwk ațanga luhna a awm a.

¹⁰Chhak lam hawiin, bang chhah takah chuan pindan têtê a awm a, chûngte chuan hung chhûng leh inpui ber a ep a ni.

¹¹An hmâah chuan kalkawng a awm bawk a, an lan dân chu pindantê, hmar lam hawia an sak te ang a ni; a dangte ang bawka zau leh sei a ni a, chûnga luhna leh chhuahnte pawh chu fel taka rem vek a ni.

¹²Han luha, pindan têtê kawngka chhim lam hawî zâwn chiahah, kalkawng zâwnah chuan kawngka a awm a, chu kawng chu inpui bang hmâah chhak lam hawiin a kal a.

¹³Ani chuan, “Hmar lam pindante leh chhim lam pindan, kawt zâwl epa awmte chu pindan thianghlim, LALPA va pan hnaitu puithiamten inthâwina thil thianghlim ber an eina hmun a ni. Chutah chuan thilhlân thianghlim ber ber—buhbâl thilhlân te, sual thâwina te, bawhchhiat thâwina te chu an dah khâwm ang—chû chu hmun thianghlim a ni si a.

¹⁴Puithiamte an luh rêng rêngin, pindan thianghlim ațang chuan hung pâwn zâwkah an chhuak tûr a ni lo; chutah chuan an rawngbâwlna thuamhnaw an hnutchiah tûr a ni, serh thianghlim a ni si a. Silhfên danga an inthlak leh phawt hnûah vântlang zîngah an awm leh thei chauh tûr a ni,” a ti a.

TEMPUL PÂWN LAM ZAU ZÂWNG

¹⁵Tempul chhûng lam a teh zawh chuan, chhak lam chhawng kawngkaah chuan mi hruai chhuak a, a teh kual vek a.

¹⁶Tehna tiangin a sîr chhak lam chu a teh a, chu tehna tiang tlûk 500 chu a ni a.

¹⁷Hmar lam sîr zawng chu a teh a, chu tehna tiang tlûk 500 chu a ni a.

¹⁸Chhim lam sîr zawng chu a teh a, chu tehna tiang tlûk 500 chu a ni a.

¹⁹Thlang lamah a kal kual a, chu tehna tiang chuan a teh a, tlûk 500 a ni a.

²⁰A killî chuan a teh leh a; a vêlin bang a nei vek a, tawng 500 a sei, tawng 500 a zau a ni a; chû chu vântlang ram leh hmun thianghlim inkâra indaidanna tûr a ni.

BUNG 43

LALPA CHÊNNA TEMPUL

¹Chumi hnûah chuan chhak lam chhawng kawngkaah mi hruai leh a.

²Ngai teh, Israelte Pathian ropuina chu chhak lam ațangin a lo kal a. A âw chu tui tam tak ri hum hum ang a ni a; a ropuina chuan leilung a ên kulh mai a.

³A lan dân chu inlârnaa ka hmuh ang kha a ni—khawpui tichhe tûra a lo kal laia inlârnaa ka hmuh ang kha. Chû inlârna chu Kebar Lui kama inlârna ka hmuh ang mai kha a ni si a; kei chu bawkkhupin ka tlu thlawp a.

⁴LALPA ropuina chuan chhak lam ep kawngka kal tlangin tempulah a lût a.

⁵Thlarau chuan mi châwî kâng a, hung chhûngril zâwkah mi hruai lût a; ngai teh, LALPA ropuina chuan tempul chu a luah khat ta vek a.

⁶Tempul ațang chuan min bia tih ka hria a, chutih lai chuan ka kiangah mi pakhat a lo ding a.

⁷Ani chuan, “Mihring fapa, hê hmun hi ka lalthutthlêng awmna leh ka kephah nghahchhan, Israel fate zînga kumkhuaa ka chênna hmun tûr chu a nih hi. Israel chhûngte emaw, an lalten emaw, an nawhchizawrhna emaw, an hmun sânga an lal thite ruang hmangin emaw, ka hming thianghlim hi an tibawrhbâng leh tawh ngai lo vang.

⁸Bang indaidan lekin, ka kawngka bulah kawngka an hawng a, an kawngkhârin ka kawngkhâr an dawhzawm a, an thil tenawm tih avângin ka hming thianghlim an tibawrhbâng a; chuvângin, ka thinurin ka tiboral ta a ni.

⁹Tunah erawh chuan, an nawhchizawrhna leh an lalte ruang chu ka lak ata hla takah dah bo sela, tichuan, an zîngah kumkhuaan ka chêng reng tawh dâwn nia.

¹⁰“Mihring fapa, Israel faten an sual vânga zah nachâng an hriat theih nân, tempul chanchin hrilhfiah la; a pianhmang pawh tehtîr vek rawh.

¹¹An thil lo chîn thîn te avânga zah nachâng an hriat chuan, tempul pianzia leh a ruangâm te, a luhna leh a chhuahna te, a pianhmang pumpui, a thupêk leh dân tinrêng te chu hriattîr vek ang che. An mithmuhah zia chhuak la, tichuan a pumpuia a sak dân kalhmang leh a tih dân tûr zawng zawng an zawma, an sak theih nân.

¹²Hei hi tempul dân chu a ni: A tlâng chung hualtu ram pumpui chu hmun thianghlim ber a ni. Ngai teh, hei hi tempul dân chu a ni e.

MAICHÂM LEN ZÂWNG

¹³“Hêng hi a tawng bîa maichâm teh dân tûr a ni (tawng khat chu tawng khat leh kutpah bawk a ni): a nghahchhan chu tawng khata sâng, tawng khata hlai, a kotlâng khâp khat bial a ni. Hei hi maichâm sân zâwng a ni a:

¹⁴a innghahna lei ațanga a chhawrdawh hnuai zâwk chu tawng hnih a ni a; a chhawrdawh zau zâwng chu tawng khat a ni; a chhawrdawh tê zâwk ațanga a chhawrdawh lian zâwk chu tawng

lîn a sâng a; a zau zâwng chu tawng khat a ni.

¹⁵Maichâm thuk zâwl chu tawng lîa sâng a ni a, maichâm chung zâwl aţang chuan chung lamah ki pali a chawr chhuak a.

¹⁶Maichâm thuk zâwl chu a dung leh vâng tawng 12 vê vê, a biala killi nei a ni;

¹⁷a kotlâng parh chu a dung leh vâng tawng 14-a inbial vek a ni a, a tâng kawmna chu tawng chanve a ni; a nghahchhan chu a kualin tawng khat a ni; khawchhak lam hawiin a kailâwn a awm.”

MAICHÂM HLANNA

¹⁸Ani chuan ka hnênah, “Mihring fapa, Lalpa PATHIAN chuan: ‘Hâlrâl thil hlan tûr leh a chungâ thisen theh tûra maichâm an siam huna an tih dân tûr chu hetiang hi a ni.

¹⁹Sual thâwina bawngpa tuai chu puithiamte, Levia chi, Zadoka thlaha mi, ka rawngbâwl tûra mi rawn hnaihtute hnênah in pe tûr a ni,’ Lalpa PATHIAN-in a ti.

²⁰Thisen chu i lâ ang a, maichâm ki palî-ah te, a kotlâng killiah leh, a tângkawmna kual chhuakin i tât ang a; chutiang chuan i thian ang a, tlanna i siamsak tûr a ni.

²¹Sual thâwina bawngpa i la bawk ang a, tempul chhûng, hmun thianghlim pâwn lama a hâlna tûr hmun ruatah hâl rawh se.

²²Ni hnihnaah sual thâwi nân kêl no, hmêlhem lo i hlân tûr a ni; bawngpa hmanga an thian angin maichâm chu an thianfai tûr a ni.

²³I then thianghlim zawhah, bawngpatuai, hmêlhem lo leh a rual zînga mi berâmpa, hmêlhem lo i hlân tûr a ni.

²⁴LALPA hmaa i hlan hunah, puithiam chuan chí a lo phul ang a, tichuan, LALPA hnênah hâlrâl thilhlân angin an hlân tûr a ni.

²⁵Ni sarih chhûngin ni tin sual thâwina kêl i buatsaih tûr a ni; a rual zînga mi bawngpatuai leh berâm pa, hmêlhem lo vê vê buatsaih rawh se.

²⁶Ni sarih chhûng maichâm an then thianghlim hnûah chuan serh hran a lo ni tawh ang.

²⁷Chutianga nîte an hman zawhah, a ni riat nî leh a hnûah chuan, in hâlrâl thilhlante leh in remna thilhlante chu maichâmah chuan an rawn hlân ang a; ka lo pawmsak dâwn che u nia,’ Lalpa PATHIAN-in a ti.”

BUNG 44

KHAWCHHAK KAWNGKA LEH LAL CHU

¹Chumi hnû chuan hmun thianghlim kawngka pâwn zâwk, khawchhak lam hawiah chuan mi hruai kîr leh a, mahse khâr tlat a ni a.

²LALPA chuan ka hnênah, “Hê kawngka hi khâr reng rawh se; LALPA Israelte Pathian luhna a nih avângin hawn a ni lo vang a, tûmah an lût hek lo vang; chuvângin khâr tlat tûr a ni.

³Lal erawh chu, lal a nih avâng chauhvîn, LALPA hmâa chaw ei tûrin a      ve ang; hulhliap kawngkâah a lût ang a, chutah v  k chuan a chhuak leh t  r a ni,” a ti a.

TEMPULA AN LUHT  RTE

⁴Hmar lam kawngka aţangin tempul hma lamah chuan mi hruai bawk a; chutia ka han en chuan, ngai teh, LALPA ropuina chuan LALPA in chu a tikhat vek a; bawkkhupin ka t  u a.

⁵LALPA chuan ka hn  nah, “Mihring fapa, LALPA in hman dân te, a dân th   zawng zawng te hi    a takin chhinchhiah la, i mitin en la, i bengin ngaithla rawh. In puia l  t thei t  r mite leh hmun thianghlim a  anga an kal chhuah d  nte thlengin chhinchhiah    a h   ang che.

⁶“Helhmang, Israel chh  ngte hn  nah, ‘Lalpa PATHIAN-in: “Aw Israel chh  ngte u, in thil tenawm tih zozai hi t  wk tawh rawh se.

⁷Ram dang mi, thinlunga serhtan lohte, t  saa serhtan lohte chu ka in– ka hmun thianghlim ngei tibawhl  lawh t  rin in rawn hruai l  t a, ka chhang te, thau leh thisen te in hlan lai kh  n, in tenawmna tinr  ng av  ngin ka thuthlung bawhchhia an ni asin.

⁸Ka thil serh thianghlimte in vawng    a lova, in aiah ka hmun thianghlim vawng t  rin mi dang in ruai mai mai a,” a ti a ni.

⁹Lalpa PATHIAN chuan heti hian a ti: “Ram dang mi t  mah, thinlunga serhtan loh emaw, t  saa serhtan loh emaw, ka hmun thianghlimah an l  t t  r a ni lo, Israel fate z  nga ram dang mi awm vete pawh hei hian a huap vek a ni.

PUITHIAMTE KAIHHRUAINA D  N

¹⁰“Levia chi, mi hlat daiha awmho, Israelten an milimte av  nga mi vah bosan laia vak bo v   ho kh  n, an sual mawh an phur ang.

¹¹Mahse, ka hmun thianghlimah, in pui kawngka v  ngtu leh inpui t  na rawngb  wlt  ah an la awm z  l ang; h  lr  l thilhl  n rante leh mipui inth  wina s  te an la talh z  l ang a, an rawng b  wlsak t  rin an hm  ah an la d  ng z  l ang.

¹²Israel chh  ngte suala titlu t  ra an milimte rawng an b  wl av  ngin, anmahni do z  wnga chhechhamin, “an sual mawh an phur tiin b  n ka lo phar tawh a ni,” Lalpa PATHIAN-in a ti.

¹³Puithiam anga ka rawngb  wl t  rin min rawn hnaih t  r a ni lo, ka thil serh thianghlimte emaw, ka Hmun Thianghlim Ber emaw an rawn hnaih t  r a ni hek lo; an thil tenawm tih t  kte av  nga an mualphona chu an phur t  r a ni.

¹⁴Chuti chung chuan tempula hnathawh t  r leh tih t  r zawng zawng ti t  rin mawhphurhna ka pe tho vang.

¹⁵“Israel fate ka laka an vah bo laia ka hmun thianghlim enkawl tlattu puithiamte, Levia chite, Zadoka thlahte erawh chuan ka rawngb  wl t  rin min rawn hnaih t  r a ni; ka hm  ah d  ngin thau leh thisen te min hl  n th  n t  r a ni,” Lalpa PATHIAN-in a ti.

¹⁶“Ka hmun thianghlimah an l  t ang a, ka rawngb  wl t  rin ka dawhk  n bulah an lo kal ang a, mi enkawlt   ber an ni ang.

¹⁷Hung chh  ngril z  wk kawngk  a an luh apiangin, puan zais  n an inbel z  l t  r a ni; hung chh  ngril z  wkah emaw, in pui chh  ngah emaw rawng an b  wl laiin, sahmul puan r  ng r  ng an inbel t  r a ni lo.

¹⁸An l  ah puan zais  na siam di  r an khim ang a, puan zais  n kekawr an ha bawk t  r a ni; thlan titla thei chi r  ng r  ng an inbel t  r a ni lo.

¹⁹Hung pawns zâwkah emaw, hung pawns zâwk ațanga vantlâng hnênah emaw an chhuahin, an rawngbâwl na thuamhnaw hlipin, pindan thianghlimah an hnutchhiah ang a, silhfên dang an inbel tûr a ni; an silhfên thianghlim ha chungin mipui an thian thianghlim tûr a ni lo.

²⁰“An lû an ziat kâwng tûr a ni lo va, an sam an zuah sei tûr a ni hek lo, a tâwk lekin an mêt thîn tûr a ni.

²¹Hung chhûngril zâwka an luhin puithiam tûman uaiin an in tûr a ni lo.

²²Hmeithai emaw, mi mâk hnû emaw nupuih an nei tûr a ni lo va, Israel chhûngkuua mi nula thianghlim emaw, puithiam thihsan hmeithai emaw an nei tûr a ni.

²³“Ka mite hnênah thil serh leh serh loh danglamna an zirtîr tûr a ni a, a thiang leh thiang lo an thliar thiamtîr tûr a ni.

²⁴Thubuai rêltûah an țang ang a, ka rorêl dân ang takin an rem thîn tûr a ni. Ka kût ni ruat zawnz zawngha ka dân leh ka thupêk ang takin an hmang tûr a ni a, ka Sabbath nite an serh tûr a ni.

²⁵“Mahni intibawrhbang tûrin mitthi an hnaih tûr a ni lo. Mahni nu emaw, pa emaw, fapa emaw, fanu emaw, unaupa emaw, pasal nei lo farnu emaw te lakah chauh an intibawrhbang thei ang.

²⁶A inthen hnua, atân ni sarh an la chhiarsak leh tûr a ni.

²⁷Hmun thianghlima rawngbâwl tûra hmun thianghlim a pan niin, hung chhûngril zâwkah chuan ama sual thâwina a hlân thîn tûr a ni,” Lalpa PATHIAN-in a ti.

²⁸“An roluah tûr chungchângah chuan, kei hi an rochan chu ka ni ang. Israel ramah rochan engmah in pe tûr a ni lo, an rochan chu keimah hi ka ni si a.

²⁹Buhbâl thilhlân te, sual thâwina leh bawhchhiat thâwina thilhlante chu an ei vê ang a; Israel rama thil serh thianghlim rêng rêng chu an chanpual a ni.

³⁰Rah hmasa zînga a țha ber ber te, in thilhlân tinrênga a țha țha chu puithiam chanvo a ni ang; in ina malsâwmna a châm reng theih nân in chhang tlang țha ber chu puithiam in pe tûr a ni.

³¹Puithiamten satlâw rêng rêng, savâ te, ramsa te, amaha thi emaw, ramsa kawlh seh emaw te chu an ei tûr a ni lo.

BUNG 45

RAM BIAL SERH HRAN

¹Thumvâwra ro chan tûr ram in sem hunah, bial khat chu LALPA tân in serh hrang tûr a ni, chû chu ram bial serh hran a ni ang; a dung sei zâwng chu tawng 25,000, a vâng tawng 10,000 ni rawh se. A ram pumpui chu serh hran bîk a ni bawk ang.

²Chuta țang chuan, hmun thianghlim tân a ram dung leh vâng tawng 500 vê vê bial leh, a vêlin hmun âwl tawng 50 zei zei zuah bawk tûr a ni.

³Tichuan, hemi ram bial ațanga i teh tûr chu: a dung tawng 25,000, a vâng tawng 10,000 a ni a; a chhûngha hmun thianghlim, Hmun Thianghlim Ber a awm tûr a ni.

⁴Hê hmun serh hran hi LALPA rawngbâwl tûra hnaih thîntu, hmun thianghlima rawngbâwltu puithiamte chanpual a ni a; an in hmun atân leh hmun thianghlim atâna hmun serh hran bîk a ni

tûr a ni.

⁵Hmun dangah, a ram dung tawng 25,000 a sei, a vâng lam tawng 10,000-a zau chu tempula rawngbâwltu, Levia chite chanpual a ni ang; pindan sawmhnih chu anmahni tân an nei ang.

KHAWPUI LEH LAL CHAN TÛR RAM

⁶“Ram bial serh hran hrûlah chuan, khawpui chanpual atân, a vâng lam tawng 5000, a dung tawng 25,000 i ruat tûr a ni; chû chu Israel chhûngkaw pum chanpual tûr a ni.

⁷“Lal chuan ram bial serh hran leh khawpui chanpual tûr sîr tawn tawnah hmun a nei tûr a ni; ram serh hran tawh leh khawpui chan ram nêa inrî ang a, a ri thlang lama mi chu thlang lam zêlah chhukin, chhak lama mi pawh chhak lam zêlah a chho ang a, thlang lam ramri ațanga chhak lam ramri thlengin a dung sei zâwng chu, ram bung then khat chen a ni ang.

⁸Chû ram chu Israel rama a chanpual a ni ang; ka lalte chuan ka mite chu an awpbet tawh ngai lo vang a, hemi bakk ram zawnz zawnz chu Israel chhûngte hnênah, an hnam awm dân ang zêlin an pe tawh tûr a ni.”

LALTE KAIHHRUAINA DÂN

⁹“Lalpa PATHIAN chuan heti hian a ti: “Aw, Israel lalte u, a tâwk ta e! Tharum thawh leh inhnehchhuhna hi tibo ula, dik tak leh țha takin rorêl ula, ka mite thil in chhuhsak thîn hi titâwp tawh rawh u,” Lalpa PATHIAN-in a ti.

¹⁰“Bûkna dik tak hmang ula, epha bûklung leh bath teha no chu a dik tûr a ni.

¹¹Epha leh bath bûk hi a intluk chiah tûr a ni; tichuan bath khat chu homer hmun sâwma țhena hmun khat a ni ang a, epha khat pawh homer hmun sâwma țhena hmun khat bawk a ni ang; homer chu tehfunga hman tûr a ni.

¹²Gera 20 chu sekel khat a ni ang a; sekel 20, sekel 25 leh sekel 15 belhkhâwm chuan mina khat a tluk ang.

¹³“Hei hi thilpêk in hlan dân tûr a ni: wheat buh homer khat zêlah epha hmun ruka țhena hmun khat chu, barli homer khat zêlah epha hmun ruka țhena hmun khat nêa in pe tûr a ni.

¹⁴Hriak hlan dân, hriak an teha chu bath a ni a, kor khat zêlah bath hmun sâwma țhena hmun khat a ni. Kor khat chu homer khat, chu chu bath sâwm a ni; bath sâwm chu homer khat a ni bawk.

¹⁵Israel ran tlatna hmun țhaa berâm rual zahnih zîngah berâm no pakhat zêl pêk tûr a ni. Chûng chu buhbâl thilhlân atân te, hâlrâl inthâwina atân te, remna thilhlân atân te, anmahni nêna inremna siamsak nân te an hlân tûr a ni,” Lalpa PATHIAN-in a ti.

¹⁶“Ram chhûnga mi zawnz zawnghin hê thilhlân hi Israel rama lal tân an hlân tûr a ni.

¹⁷Kût nî-ah te, Thla Thar leh Sabbath-ah te, Israel chhûngkaw kûtni vângthla zawnz zawngha lal chuan hâlrâl thilhlân te, buhbâl leh in tûr thilhlân te a lo hlân thîn dawn a ni. Israel chhûngte tân tlanna siamsak tûrin, sual thâwina te, buhbâl thilhlân te, hâlrâl thilhlân te leh remna thilhlante a buatsaihsak thîn tûr a ni.”

KÛT HMAN DÂN TÛR

¹⁸Lalpa PATHIAN-in heti hian a ti: “Thla khatna, a ni khat niah bâwngpatuai hmêlhem lo hmangin, hmun thianghlim chu i thian fai tûr a ni.

¹⁹Puithiam chuan sual thâwina thisen chu a la ang a, tempul kawngka biangah te, maichâm killi hmâwr den denah te, hung chhûngril zâwk luhna kawngka banah te a tât tûr a ni.

²⁰Chutiang chuan, chumi thla ni sarihah chuan, tihpalh emaw, hriat loh vâng emawa thil tisualtute tân i tihsak bawk tûr a ni. Tichuan, tempul tân inremna i siam tûr a ni.

²¹“Thla hmasa ber, a ni 14-naah chuan ni sarih chhûnga tân Kalhlên Kût in serh tûr a ni; dawidim tello chhang chauh ei tûr a ni.

²²Chumi ni chuan lal chuan amah leh ram chhûng mipui zawng zawng tân sual thâwina bâwngpa a hlân tûr a ni.

²³Kût hun ni sarih chhûngin, LALPA tâna hâlrâl inthâwi nân, bâwngpa pasarih leh berâmpa pasarih, hmêlhem lo hlîr, ni tin a hlân tûr a ni a, sual thâwi nân kêl no ni tin a hlân bawk tûr a ni.

²⁴Buhbâl thilhlân atân bâwngpa pakhatâh epha khat, berâmpa pakhatâh epha khat leh, epha khat zêlah hriak hin khat a buatsaih tûr a ni.

²⁵“Thla sarihna, a ni 15-niah hetiang bawk hian ni sarih chhûng kût a buatsaih ang a, sual thâwina te, hâlrâl thilhlân te, buhbâl thilhlân te leh hriak te a hlân tûr a ni.”

BUNG 46

PATHIAN BIAK DAN

¹Lalpa PATHIAN chuan heti hian a ti: “Hung chhûngril zâwk chhak lam hawi kawngka chu, hnathawh hun ni ruk chhûng khâr tûr a ni a, Sabbath-niah leh Thla Thar niah te chuan hawn tûr a ni.

²Lal chu pâwn lam aţangin hulhliap kawngkâ-ah a lût ang a, kawngka ban bulah chuan a dîng tûr a ni. Puithiamte chuan a hâlrâl inthâwina leh a remna thilhlante chu an buatsaihsak tûr a ni a. Kawngka bulah chuan Pathian a be tûr a ni. Tichuan, a chhuak leh ang a, kawng erawh chu tlai lam thlengin khâr loh tûr a ni.

³Chutiang bawkin ram chhûnga mipuite pawhin Sabbath nî-ahte leh Thla Thar Kût nî-ahte chuan hê luhna kawngka bulah hian LALPA chibai an bûk tûr a ni.

⁴Sabbath nî-a lalin LALPA hnêna hâlrâl thilhlân a hlan tûrte chu, berâm no hmêlhem lo paruk leh, berâmpa hmêlhem lo pakhat a ni ang;

⁵buhbâl thilhlân atân berâmpa pakhatâh epha khat, berâm no a nih chuan chhangphut hlan tûr chu duh zat zat a ni a, epha khatah hriak hin khat a tel zêl bawk.

⁶Thla thar nî-ah, bawngpatuai hmêlhem lo pakhat, berâm no paruk leh berâmpa pakhat, a hmêlhem lo vek a ni tûr a ni.

⁷Chhangphut thilhlân atân, bâwngpa pakhatâh epha khat, berâmpa pakhatâh epha khat, berâm no-a chhangphut hlan tûr chu duh zat zat a ni a, epha khatah hriak hin khat a tel zêl bawk tûr a ni.

⁸Lal a luh dâwn chuan, hulhliapa luhna kawngkâah a lût ang a, chumi kawngah bawk chuan a chhuak leh thîn tûr a ni.

⁹Mipuite erawh chu kût nîa LALPA hmaa chibai bûk tûra an lo kalin, hmar lam kawngka aţanga lo lût chu chhim lam kawngkâah an chhuak tûr a ni a; chhim lam kawngkâ aţanga lo lût chu hmar lam kawngkâah an chhuak tûr a ni. An lo luhna kawngka ngaiah an chhuak tûr a ni lo va, an hmazâwn kawngkâah an chhuak zêl tûr a ni.

¹⁰Lal chu an zîngah a awm ve tûr a ni. An luh rualin a lût ve ang a; an chhuah rualin a chhuak ve tûr a ni.

¹¹Kûtte leh kûtpui niah chhangphut thilhlân atân bâwngpatuai pakhatâh epha khat, berâmpa pakhatâh epha khat, berâm no-ah chuan an pêk zât zât, epha khatah hriak hin khat a tel zêl a.

¹²“Lalin mahni duh thûa hâlrâl thilhlân emaw, mahni duh thûa remna thilhlân emaw, LALPA hnêna a hlan dâwn chuan, khawchhak lama luhna kawngka chu an hawnsak ang; hâlrâl thilhlân leh remna thilhlân chu Sabbath nîa an tih angin a hlân ang. A chhuak leh ang a, a chhuah hnuah kawng chu an khâr leh tûr a ni.

¹³“LALPA tân hâlrâl thilhlânah berâm no pakhat, kum khat mi, hmêlhem lo, ni tin i hlân tûr a ni; tûk tin i buatsaih thîn tûr a ni.

¹⁴Tûk tin chhangphut thilhlân atân epha khat hmun ruka ðhena hmun khat, chhangphut dîp tihhnâwn nân hriak hin khat hmun thuma ðhena hmun khat i buatsaih tûr a ni. Hê chhangphut thilhlân, LALPA hnêna hlan tûr hi, kumkhuaa tihdân ngheta neih tûr a ni.

¹⁵Heti ang hian berâm no te, chhangphutte leh hriak te chu, tûk tin hâlrâl thilhlân atân an buatsaih thîn tûr a ni.”

LAL LEH INROCHUNNA DÂN

¹⁶Lalpa PATHIAN chuan heti hian a ti: “Lalin a fapate zînga tû ber hnênah emaw ro chan a pêk chuan, a fapate chanpual a ni ang a; an rochan a lo ni mai ang.

¹⁷Mahse, a rochan chu a chhiahhlawhte zînga mi pe ta se, bawih ata a chhuah thlengin a chanpual a ni ang a, chumi hnênah chuan lal hnênah a lêt leh tûr a ni. Mahse, chû rochan chu a fapate chanpual a ni tawh ang a; an ta-neih tawh ang.

¹⁸Lal chuan an in leh lo aţanga hnawt chhuakin, an ro chan a chhuhsak tûr a ni lo; ama rochan ngeia mi chu a fapate hnênah a pe tûr a ni; tichuan, ka mite tûmah mahni in leh lo ata an vak darh dâwn lo nia,” a ti a.

THILHLÂN BUATSAIH DÂN

¹⁹Kawngka sîra luhna aţangin, puithiamte pindan thianghlim, hmar lam hawiah chuan mi hruai lût a; a khawthlang lam kilah chuan hmun pakhat a awm a.

²⁰Ani chuan ka hnênah, “Hei hi puithiamten bawhchhiat thâwina leh sual thâwina sâ an chhumna hmun, chhangphut thilhlân an ur hminna a ni a, hung pâwn zâwka keng chhuaka mipuite chu serh hrana an siam ve mai loh nâna an tih a ni.”

²¹Tichuan, hung pâwn zâwkah chuan mi hruai chhuak a, tual zâwl killi chu mi fanpui a; a tual zâwl kil tinah tual zâwl dang a lo awm zêl a.

²²A killîa tualzâwl chu hung vek a ni a, tawng 40 a sei, tawng 30 a zau a ni a; a killîte chu a intiât vek a ni.

²³Chûng hmun li hual chhuak vek chuan, lunga remin a intlar chhuak vek a; chung lungrem hnuai chuan sa chhumna thuk a intlar chhuak leh vek a.

²⁴Ka hnênah chuan, “Hêngte hi tempula rawngbâwtuten mipui thilhlân an chhumna hmun, choka a nih hi,” a ti a.

BUNG 47

DAMNA TUI LEH THING

¹Chumi hnû chuan tempul kawngka lamah mi hruai kîr leh a; tempul luhna kawngka hnuai aţang chuan chhak lam hawiin tui a lo luang chhuak a, tempul kawt lam chu chhak lam hawi a ni a; tui chu tempul sîr dîng lam aţangin, maichâm chhim lamah a luang a.

²A hmar lam kawngka aţangin mi hruai chhuak a, pâwnah chuan chhak lam hawi kawngka pâwn zâwk thlengin mi hruai a; chutah chuan, dîng lampangah tui a lo luang chhuak a.

³Min hruaitu chu a kuta hruai kengin khawchhak lam hawiin a kal chhuak a, tawng sângkhata sei a han teh a, tui chu mi dâi kâitîr a; tui chuan ka kerêk a thleng a.

⁴Tawng sângkhat a teh leh a, mi dâi kâitîr leh a; tui chu ka khûp thleng a ni. Tawng sângkhat a han teh leh a, mi dâi kâitîr leh a; tui chu ka kâwng thleng a ni a.

⁵Tawng sângkhat a han teh leh chuan, dâikâi rual loh khawpa luipui a lo ni ta a; tui chu a thûk êm avângin, dâikâi theih loh luipui, a hleuhva hleuh tham a lo ni ta a.

⁶Ka hnênah, “Mîhring fapa, hei hi i hmu mâw?” mi ti a. Tichuan, luipui kamah chuan mi hruai kîr leh a.

⁷Chutia ka kîr leh lai chuan, luikam tuakah chuan thing tam tak a lo awm a.

⁸Ka hnênah: “Hê tui hi khawchhak lamah a luang a, phaiah a luang thla zêl a, tui puiah a luang lût ta a. Tuipui a zu fîn vêleh tui thianghlîmah a zu chantîr dâwn a ni.

⁹Hê lui luanna apiangah hian rannung che thei tinrêngin an dam phah ang. Hêng tui luangte avâng hian sangha a tam êm êm ang a; an dam zêl dâwn avângin, hê lui luanna hmun apiang chu thil engkim tân nunna a ni zêl ang.

¹⁰Sangha mantute chu En Gedi aţanga En Eglaim thlengin an dîng ang a, an lênte an zâr ang. Chûnga an sanghate chu Tuifinriat Zau sanghate ang mai a ni ang a, a tam êm êm dâwn a ni.

¹¹Mahse, a dûm leh chirhdûpte chu tihdam an ni ve lo vang a; chi khur hmunah zuah a ni ang.

¹²Luikam tawn tawnah chuan, ei tûr theirah chi tinrêng a kûr tep tup ang a; a hnahte pawh vuai lovin a rah duh êm êm ang. Hmun thianghlîm aţanga lo luang chhuak tuia châwm a nih avângin a thla kipin a rah ang. A rahte chu châw a ni ang a, a hnahte chu damdawi a ni ang,” a ti a.

AN RAMRÎ TÛRTE

¹³Lalpa PATHIAN chuan heti hian a ti: “Hêngte hi Israel hnam 12-ten roluah tûr ram an thêna an ramrî tûr chu a ni. Josephan chan hnih a chang tûr a ni.

¹⁴Intluk tlâng takin ram chu in luah tûr a ni; in thlahtute hnênah bân phar meuhvin, hê ram hi in roluah atân pêk ka lo tiam tawh si a.

¹⁵“Hei hi a hmar lam ramri tûr a ni ang: Tuipui Zau aţangin Hethlon kawngah Zedad lama kal zêlin,

¹⁶Hamath te, Berothah te, Sibraim (chu chu Damaska ramrî leh Hamath ramri inkâr a ni) te, Hazar Hattikon (chu chu Hauran ramrî) te a ni.

¹⁷Tichuan, ramrî chu Tuipui aţanga Hazar Enan, Damaska ramrî a ni a; hmar lamah chuan Hamath ramrî thleng a ni ang. Hei hi a hmar lam chu a ni a.

¹⁸“Khawchhak lama i chhinchhiah tûr chu, Hauran leh Damaska ramrî inkâr te, Gilead leh Israel ram inkâr te, Jordan lui dung tuipui chhak lam hrûl zelah a ni. Hei hi a chhak lam chin chu a ni.

¹⁹“Chhim lamah chuan Tamar aţanga Kades kianga Meriba tui thlengin, luikawr ruam zawhin Tuipui Zau thlengin a ni. Hei hi a chhim lam ram chin tûr a ni.

²⁰“Thlang lam rî chu Tuipui Zau a ni ang a, a chhim kil aţanga phei zêlin Hamath zâwn a thleng a. Hei hi thlang lam ramrî chu a ni.

²¹“Chutiang chuan hê ram hi Israel hnamte awm dân ang zêlin in then tûr a ni.

²²In rochan atân thum vâwrin in insem tûr a ni a, nangmahniho bâkah in zînga khawsaa, nupui fanau nei tawh ram dang mite nê. Anni chu in lakah chuan Israel fate zînga piang ve rêng ang ni rawh se; Israel hnamte zîngah rochan an nei ve tûr a ni.

²³Chûng ram dang mite chu an chênna hnam apiang chuan rochan an siamsak ve tûr a ni,” Lalpa PATHIAN-in a ti.

BUNG 48

RAM INSEM DAN

¹“Hêng hi hnam hmingte chu an ni: Hmar lam ramrî aţanga Hethlon kawngah, Hamath luhnaah, Hazar Enan-ah, hmar lama Damaska ramrî-ah, Hamath lamah, chutah chuan, chhak lam leh thlang lamah Dan hnamin chan khat an chang ang;

²Dan ramri chhak lam aţanga thlang lam thlengin, Aser hnam chan a ni ang;

³Aser ramri chhak lam aţanga thlang lam thlengin, Naphtali hnam chan a ni ang;

⁴Naphtali ramri chhak lam aţanga thlang lam thlengin, Manase hnam chan a ni ang;

⁵Manase ramri chhak lam aţanga thlang lam thlengin, Ephraim hnam chan a ni ang;

⁶Ephraim ramri chhak lam aţanga thlang lam thlengin, Reuben hnam chan a ni ang;

⁷Reuben ramri chhak lam aţanga thlang lam thlengin, Juda hnam chan a ni ang;

⁸Juda ramri chhak lam aţanga thlang lam chu, i serh hran tûr ram bial, tawng 25,000 a zau, a dung zâwng chu chhak lam leh

thlang lama hnam khat chan nêna intluk, a laia hmun thianghlim nêna a ni ang.

⁹“LALPA tâna ram i serh hran bîk tûr chu a dung tawng 25,000, a vâng tawng 10,000 a ni tûr a ni.

¹⁰Hêng puithiamhote tân hian ram chu serh hran a ni a: a hmar zâwngin a dung tawng 25,000, thlang lam zâwnga a vâng chu tawng 10,000, chhak lam zâwnga a vâng chu tawng 10,000, a chhim zâwnga a dung chu tawng 25,000 a ni ang. LALPA hmun thianghlim chu a laia a awm tûr a ni.

¹¹Puithiam Zadoka thlahho, serhhran tawh, keima thil enkawltu, Israel fate leh Levía chite vah bo lai pawha vâk bo ve lo te tân liau liau a ni tûr a ni.

¹²Hê ram bial serh hran hi anni Levía chite tân chuan an ramrî kianga thil thianghlim ber a ni ang.

¹³“Puithiamho ramrî hrûlah Levía chiten chan an nei ang a, a dung tawng 25,000, a vâng tawng 10,000 a ni ang; tichuan an ram dung sei zâwng chu tawng 25,000, a vâng tawng 10,000 a ni ang.

¹⁴An hralh tûr a ni lo va, an thleng tûr a ni hek lo; a ram tha lai ber chu mi dang hnênah an hlân thei lo vang, LALPA tâna serh hran a ni si a.

¹⁵“Tawng 25,000 bâka ram la âwl, tawng 5000 a zau chu vântlang chan, khawpuia mite chênna in tûr leh vântlâng ram tân a ni ang; khawpui chu a lai takah a awm tûr a ni.

¹⁶Hêng hi a teh vêl dân a ni: a hmar lam tawng 4500, a chhim lam tawng 4500, a chhak lam tawng 4500, a thlang lam tawng 4500 a ni.

¹⁷Khawpui tâna vântlâng ram chu hetiang hi a ni: hmar lam tawng 250, chhim lam tawng 250, chhak lam tawng 250 leh, thlang lam tawng 250 a ni.

¹⁸A dung lam la bâng zawng, serh hran ram hrûla mi chu, chhak lamah tawng 10,000, thlang lamah tawng 10,000 a ni ang. Serhhran ram hrûl zêl a ni ang a; chuta tanga thlai thar chhuahte chu khawpuia hnathawktute ei tûr a ni ang.

¹⁹Israel hnam tina mi khawpuia hnathawktute chuan huan thlai an enkawl tûr a ni.

²⁰Ram serh hran pumpui chu killi nei a ni a, a dung leh vâng, kil tin chu tawng 25,000 vek a ni a. Serh hran ramah chuan khawpui hmun tûr dah hran tûr a ni.

²¹“A bâk ram la awm, serh hran ram leh khawpui chan sîr tuak vê vê chu lal chan a ni ang a, chhak lamah serh hran ram tawng 25,000 leh, thlang lamah tawng 25,000 chu, ram bung dangte hrûl zêlah a awm a; chû chu lal chan a ni ang. Ram serh bîk a ni ang a, tempul hmun thianghlim chu a lai takah a awm tûr a ni.

²²Levia chite chan ram leh khawpui chan ram, lal chan ram laili bâkah chuan, Juda ramrî leh Benjamin ramrî inkâra ram chu lal chanpual tûr a ni.

²³“A bâk hnam la awmte chu, chhak lam a tanga thlang lam chu Benjamin hnam chan a ni ang;

²⁴Benjamin-ho nêna inrîin, chhak leh thlang zâwngin, Simeonan chan khat a chang ang;

²⁵Simeon-ho nêna inrîin, chhak leh thlang zâwngin, Issakar-hovin chan khat an chang ang;

²⁶Issakar-ho nêna inrîin, chhak leh thlang zâwngin, Zebulunan chan khat a chang ang;

²⁷Zebulun-ho nêna inrîin, chhak leh thlang zâwngin, Gad-an chan khat a chang ang;

²⁸Gad-ho nêna inrîin, chhim lamah, ramrî chu Tamar a tanga Kadesh kianga Meriba tui thlengin, chuta tângin luikawr zawhin Tuipui Zau thlengin a ni ang.

²⁹Hei hi Israel hnamte ro chan tûra tûm vâwra ram i sem dân tûr leh, an ram bung hrangte chu a ni,” Lalpa PATHIAN-in a ti.

KHAWPUI KAWNGKÂTE LEH AN HMINGTE

³⁰“Hêng hi khawpui a tanga chhuahnate a ni. Hmar lamah tawng 4500 an teh a,

³¹(khawpui kawngkâte chu Israel hnamte hming puttîr zêl tûr a ni a), hmar lamah kawngka pathum: Reubena tân kawngka pakhat, Juda tân kawngka pakhat, Levía tân kawngka pakhat;

³²chhak lampang tawng 4500-ah chuan kawngka pathum: Josefa tân pakhat, Benjamina tân pakhat, Dana tân pakhat a ni a;

³³chhim lampang tawng 4500-ah chuan kawngka pathum: Simeona tân pakhat, Issakara tân pakhat, Zebuluna tân pakhat a ni a;

³⁴thlang lampang tawng 4500-ah chuan kawngka pathum: Gada tân pakhat, Asera tân pakhat, Naphtalia tân pakhat a ni.

³⁵A hual vêlin tawng 18,000 a ni ang a; chumi nî a tâng chuan chû khawpui hmingah chuan: ‘LALPA AWMNA HMUN’ tih a ni tawh ang.

DANIELA

Ziah tu: Daniela • Ziah kum: B.C. 500 vêl

Daniela Bu thupui chu lalram lo din chhuah dân leh a tlûk chhiat dân te, kumsâng rorêl leh Pathian chatuan lalram chanchinte a ni. Daniela bu hi Thupuan bu ang bawkin inlârna thupuan (apocalypse) a ni. Khawvêlah hian sual thiltihtheihnate hi lo lian viau thîn mahse, a tâwpah chuan Pathian thutak hian hnehna a chang leh thîn a, a bul leh tâwp neitu leh rêltu chu Pathian a ni leh thîn tih hê lehkhabu hian a târlang. Daniela tih awmzia chu Pathian chu ro mi rêlsaktu tihna a ni. A tlangvâl tîrhin Nebukadnezzara khân Babulon salah a hruai tel ve a. Rei lote chhûngin chu rama mi fîngho zînga fîng berah Pathianin a siam a, an hotu lû berah awmin, Medo-Persia Lalramah dinhmun sâng ber pathumte zînga pakhtah kaisantîr a ni. Daniela chanchina chhinchhiah tlâk tak mai chu: amah duhsaktu lal (emperor) kha lal dang daihin rawn paithla mah se, Pathianin a awmpui tlat avângin lal tharte pawhin an rawn duhsak zêl a. A finzia leh rinawmzia hriain, Prime Minister dinhmun an chelh zawmtîr zêl a, B.C. 530 thleng khân Babulon-ah a awm. Hê lehkhabuah hian Jentail lalramte a lo tâwp huna Messia Krista lo kal hmasak tûrte kha a hunbi nêl lam a lo hrilhlâwk a ni (9:24-27). Thuthlung Thar buten Daniela bu ami thu tam tak an la chhuak a. Isua ngei pawhin Daniela ziaa a nih thû a nemnghet (Mt. 24:15). Daniela bu tel lovin Bible hrilhlâwkna dang: Thupuan bu leh hê khawvêl hun hnuhnunga thil thleng hi hrilhfiah kim theih a ni lo. Daniela bu thu tlangpui chu (1) Babulon lal ina Daniela chanchin hmasa, (2) Lal Nebukadnezzara mumang hrilhfiahna, (3) Hebrai tlangvâl pathum meipui ata chhanchhuahna, (4) Nebukadnezzara'n inlârna a hmuh leh tihtlâwma a awm thû, (5) Lal Belshazzara leh lal Daria hnuiaia Daniela thiltihte, (6) Danielan inlârnaa sakawlh pali a hmuh thû, (7) Persia lalram Grik-hovin an lâk thû leh Tempul tihbawrhân thû, (8) Daniela tawngtâina leh Hapta 70 thûte leh (9) Daniela inlârna hmuh hnuhnung chanchinte a ni. Daniel lehkhabu hi Bible-a bu 27-na a ni a, bung 12 a awm a, châng 357 a awm bawk.

BUNG 1

DANIELA LEH A THIAN TEN PATHIAN THU AN ZAWM

¹Juda lal Jehoiakima rorêl kum thumnaah chuan, Babulon lal Nebukadnezzara chu Jerusalemah a lo kal a, a rawn hual a.

²LALPA chuan Juda lal Jehoiakima chu a kutah a pê a, Pathian ina bungbêl thenkhatte nêl; ani chuan Sinar rama a pathian inah a kalpui a, a pathian ina sum dahna inah chûng thilte chu a dah tha ta a.

³Lal chuan Aspenaza, mi tilreh hotu chu, Israel fate zînga mi thenkhat, lal thlahte, milian fate zînga

⁴tlangvâl duhawm, sawiser kai lo, hmeltha, pianpui finna leh remhriatna nei tha, mi vengvâ leh rilru chak, lal ina tlin taka chetla thei tûr mi, Kaldai tawng leh thiam thil tinrêng zirtîr theih tûr mite thlang chhuak tûrin thû a pê a.

⁵Tichuan, lalin chaw tuihnâi tha tha leh a in thîn ang uain te chu ni tina an dawn tûrin lal chuan a pêktîr a; kum thum chhûng an zirtîr ang a, chumi hnûah lal hmâah chuan a rawngbâwl tûrin an va inlan tawh tûr a ni a.

⁶Chutianga Juda thlaha mi an thlan chhuahte zîngah chuan Daniela te, Hanania te, Misaela te leh Azaria te an tel a.

⁷Mi tilreh hotu chuan hming thar a lo saksak a: Daniela chu Beltesazzara; Hanania chu Sadraka; Misaela chu Mesaka, Azaria chu Abed-Nego, tiin a lo vuah hlawm a.

⁸Daniela erawh chuan a thinsungin lal chaw tuihnâi tak takte leh, uain a in thînte hmanga intihbawhlhlawh loh a tum tlat a; chûng thil laka a intihbawhlhlawh loh nân mi tilreh hotu hnênah chuan a dîl a.

⁹Chutih lai chuan Pathianin Daniela chu mi tilrehte hotu ber duhsakna leh khawngaihna a dawntîr a.

¹⁰Mi tilreh hotu chuan Daniela hnênah, “In ei tûr leh in tûr ruatsaktu che u ka lalpa lalber chu ka hlau a ni. Engah nge in rualpui tlangvâl dangte aia hmêl chhe zâwka a rawn hmuh tehlul ang che u ni? Chutiang lo ni se, lal chuan ka lû ngei pawh hi a la mai ang tih a hlauhawm asin,” a ti a.

¹¹Mi tilreh hotuin Daniela te, Hanania te, Misaela te, Azaria te enkawl tûra hotu a dah hnênah chuan Daniela chuan,

¹²“I chhiahhlawhte hi ei tûr thlai leh in tûr tui chiah min pe sela, ni sâwm chhûng chu min enthla phawt tûrin ka ngên a che.

¹³Tichuan, kan hmêl lan dân chu lal chaw tuihnâi eitute nêl khaikhin la; tha i tih ang zêlin i chhiahhlawhte chungah hian i ti dawn nia,” a ti a.

¹⁴Tichuan, an thu chu a pawmsak a, ni sâwm chhûng a enthla ta a.

¹⁵Ni sâwm a ral hnû chuan, lal chaw tuihnâi eitu tlangvâlte aiin an hmêl a mawiin, an taksa pawh a lo mâm tha zâwk a.

¹⁶Tichuan, anniho enkawltupa chuan an chanvoa mi ei tûr tuihnâi leh in tûrte chu a la bo va, an ei tur thlai a pe ta a.

¹⁷Chûng tlangvâl palite chu Pathianin hriatna te, lehkha thiamna tinrêngte leh finna tinrêngte a pê a; Daniela chuan inlârna leh mumang zawng zawng a hre thiam vek a ni.

¹⁸Hunte a lo ral zêl a, lalin a hmâa inlan tûra a hun ruatah chuan, mi tilreh hotu chuan anni chu Nebukadnezzara hmâah chuan a hruai lût ta a.

¹⁹Lal chuan a lo kâwm hlawm a, anniho zîngah chuan Daniela te, Hanania te, Misaela te, Azaria te ang tûmah an awm ve lo va; lal kiangah chuan a rawng bâwlin an awm ta a.

²⁰Finna leh hriatthiamna kawng tinrêngah lalin a zawh fiaha, a belhchian aţangin, a lalram chhûng zawng zawng mitdâwivaih thiamte leh arsi awm dân hmanga dâwithiam zawng zawngte aiin a lêt sâwm in an tha zâwk daih tih a hre ta a.

²¹Tichuan, Daniela chu Lal Kura lal kum khatna thlengin a thawh zawm ta zêl a ni.

BUNG 2

NEBUKADNEZZARA MUMANG

¹Nebukadnezzara rorêl kum hnihnaah chuan, Nebukadnezzara chuan mumang a nei a; chu chuan mutmû pawh tuah thei lo khawpin a rilru a tibuai ta a.

²Lal chuan a mumang hrilhfiakh tûrin mitdâwivaih thiam te, arsi hmanga aikaihthiam te, dâwithiam te leh Kaldai-hote a kohtîr a. Anni chu an lo kal a, lal hmâah chuan an rawn ding a.

³Lal chuan an hnênah, “Mumang ka nei a, eng ang mumang nge a nih hriat tumin ka buai a nih hi,” a ti a.

⁴Kaldaiho chuan Aramik tawngin lal hnênah, “Aw lalber, dam reng ang che! I mumang chu i chhiahhlawhte hi hrilh la, a hrilhfiakhna kan pe dâwn che nia,” an ti a.

⁵Lal chuan Kaldaiho chu a chhâng a, “Thutlûkna ka siam nghet tawh: mumang leh a hrilhfiakhna min entîr dâwn loh chuan sahsawm vek in ni ang a, in inte chu bawhlhlawh bâwmah a chang ang.

⁶Mumang leh a awmzia min entîr erawh chuan, ka hnên aţangin thilpêkte, lâwmmante leh châwimâwina ropui tak in dawng ang. Chuvângin mumang leh a awmzia chu min hrilh rawh u,” a ti a.

⁷Anni chuan a hnênah, “Lalber chuan a chhiahhlawhte hi a mumang chu hrilh sela, tichuan, kan lo hrilhfiakh dâwn nia,” tiin an chhâng leh a.

⁸Lal chuan a chhâng a, “Ka thu ka hlen dâwn tih in hriat avângin tikhawtlai dân in zawng mai mai tih ka hre Chiang ta:

⁹mumang chu min hrilhfiakh theih loh chuan, in tân dân pakhat chia a awm e! Hun a inthlak danglam mai ang, tiin dâwt leh thu tha lo mi hrilh tûrin in inthural a nih hi. Chuvângin, mumang chu min hrilh ula, a awmzia pawh min hrilhfiakh nghal thei tih ka hria ang chu,” a ti a.

¹⁰Kaldaiho chuan lal chu an chhâng a, “Lalber awm dân hrilhfiakh thei hi lei chungah hian tumah an awm lo vang; chuvângin, lal te, hotute, rorêltute rêng rêngin hetiang thil hi dâwivaih thiam te, arsi chhût mite, Kaldai mite an la zâwt ngai si lo va.

¹¹Lalber thil phûl hi a khirh êm a, tísaa awm ve lo, pathiante tân chauh lo chuan tu dang mahin an hrilhfiakh thei lo vang,” an ti a.

¹²Chutia an tih avâng chuan lal chu a thinur ta êm êm a, Babulon mifingho zawng zawng tihbora vekna tûrin thu a pe ta a.

¹³Tichuan, thupêk chu tihchhuah a ni ta a, mifingte chu an that tan dâwn ta a; Daniela leh a thiantie pawh chu thah tûrin an rawn zawng a.

PATHIANIN NEBUKADNEZZARA MUMANG A PUANG

¹⁴Daniela chuan Babulon mi fingte that tûra kal chhuak, lal vêngtu sipai hotu Arioka chu fîng tak leh remhre takin a lo chhâng a;

¹⁵lal vêngtu sipai hotu Arioka hnênah chuan, “Engtizia nge lal thupêk chu chuti taka a hmanhmawh mai le?” a ti a. Arioka chuan Daniela chu thil awm dân a hrilh a.

¹⁶Tichuan, Daniela chu lal hnênah a va lût a, lal chu a hrilhfiakh theih nân hun pe tûrin a dîl a.

¹⁷Daniela chu ama inah a hâwnng a, a thiltih tum chu a thian Hanania te, Misaela te, Azaria te a hrilh a,

¹⁸Babulon mifing dangte zînga Daniela leh a thiantie chu an boral ve loh nân leh, chû thurûk chungchânga vân Pathian zahngaihna an dîl theih nân.

¹⁹Chû thurûk chu Daniela hnênah chuan zân inlârnaah tihlan a ni ta a. Daniela chuan vân Pathian chu a fak a.

²⁰Daniela chuan, “Pathian hming chu kumkhuain fakin awm rawh se, Finna leh thiltihtheihna chu a ta a ni si a.

²¹Hun te, sik leh sâte a tidanglam thîn a; Lalte paih thlain, lalte a tungding bawh thîn a; Mifingte hnênah finna a pê a, Hriatthiamna neitute hnênah hriatna a pe thîn.

²²Thil thûk leh thil inthupte a tilang thîn; Thima thil awmte a hria a, A hnênah chuan êng a awm si a.

²³“Lâwmthu sawiin ka fak a che, Aw, mi thlahtute Pathian; Nangin finna leh thiltihtheihna mi pê a, Kan dîl che kha tunah min hriatîr ta, Lal thil phûl chu kan hnênah i hriatîr ta si a,” a ti a.

DANIELA’N MUMANG A HRILHFIACH

²⁴Tichuan, Daniela chu Babulon mi fingte tiboral tûra lalin a ruat Arioka hnênah chuan a va kal a. A hnênah thian a va hrilh a: “Babulon mi fingte chu tihlum suh; lal hnênah mi hruai la, lal chu a awmzia ka hrilhfiakh ang e,” a ti a.

²⁵Arioka chuan Daniela chu lal hnênah chuan a hruai ngâl thuai a, a hnênah, “Juda saltang zînga mi pakhat, lal hnêna a hrilhfiakhna pe theitu tûr ka hmu ta,” tiin a hrilh a.

²⁶Lal chuan Daniela, Beltesazzara an tih tâk chu a chhâng a, “Mumanga ka thil hmuh leh a awmzia mi hrilhfiakh thei ang maw?” a ti a.

²⁷Daniela chuan lal chu hmaichhanah a chhâng a, “Lalin a hriat duh thurûk chu mi fingte, arsi chhûtmi te, dâwivaih thiam te leh zâwlneite chuan lal hnênah an puang thei lo rêng ang chu.

²⁸Nimahsela, vânah khian thurûkte puang thîntu Pathian a awm a, nakina thil lo la awm tûr chu Lal Nebukadnezzara hnênah a lo hriatîr ta a ni. I mumang te, i khum leh i lu chungah inlârinate chu hêng hi a ni e:

²⁹Nang chu, aw lalber, khuma i mut laiin, tûn hnêa thil lo awm tûrte ngaituahin i rilru a lo vâkvêl a; thurûkte puang thîntu chuan thil lo thleng tûr a lo hmuh lâwktîr che a ni.

³⁰Mahse, kei hi, mihring dangte aia ka fin bîk vânga hê thurûk hi ka hnênah puan a ni lo va, keimahni avâng zâwkin lal hnênah a hrilhfiakhna hriatîr a ni zâwk e, i thînlunga i ngaituahte i lo hriat chhuah theih nân.

³¹“Aw lalber, i lo hawî vêl a; ngai teh, milim ropui tak a lo lang a! Chu milim ropui, tle vur mai chu i hmâah a lo ding luah mai a; a pianhmag chu râpthlâk tham a ni.

³²Chû milim lû chu rangkachak tha chi a ni a, a âwm leh a bânate chu silvar, a pum leh a malpuite chu dâr a ni a,

³³a kête chu thîr, a kephah chu thîr leh bellei inchawhpawlh a ni.

³⁴Chutia i thlîr reng lai chuan, kut tel lova lai chhuah lungpuiin milim kephah thîr leh bellei chu a rawn delh a, a tikeh sawm ta vek a.

³⁵Tichuan, thîr te, bellei te, dâr te, silvar te, rangkachak te chu a rualin a keh darh vek a, nipui laia hruih zâwla buhsî ang mai an lo ni ta a; thlîin a len bo vek avângin an hnûhmâ pawh hmuh tûr rêng a awm ta lo va. Milim delhtu lungpui chu tlâng lianpui a lo ni a, lei pumpui hi a luah khat ta a.

³⁶“Hei hi mumang chu a ni a. A hrilhfiagna chu lal hmâah hian ka han sawi ang e.

³⁷Aw lalber, nang hi lalte lal chu i ni a. Vên Pathianin lalram te, thiltihtheihna te, chakna te, ropuina te a pê che a;

³⁸khawiah pawh mihring fate chênna hmun apiangah, ramhnuia ramsate leh chunglêng savate chu i kutah a pê a, an zâa chung a rorêl tûrin a siam bawh che a; chuvângin, hê rangkachak lû hi nangmah chu i ni a.

³⁹Nangma zawhah hian lalram dang, nang aia ténau zâwk a lo ding chhuak ang; tin, lalram pathumna, dâr, lei chung zawng zawnga rorêl tûr a lo awm leh dawn a ni.

⁴⁰Lalram palina chu thîr anga chak a ni ang; thîr chuan thil rêng rêng a tikeh sawma, a hneh thîn ang mai hian; tikeh sawmtu thîr angin, chu lalram chuan a dang zawng chu a tikeh sawmin, a râwt dip vek ang.

⁴¹I hmuh ang khân, a kephah leh a ke zungtang, a then belvawtu hlum, a then thîr te khân lalram inthen tûr a entîr a ni; chuti chung chuan, amahah thîr chakna a la awm tho vang, thîr leh hlum inpawlh i hmuh ang khân.

⁴²A ke zungtang thenkhat thîr, a then hlum a ni angin, lalram chu a thenah a chak ang a, a thenah chuan a keh awl hle ang.

⁴³Thîr leh hlum inchawhpawlh i hmuh ang khân, mihring chi inpawlh tak an ni ang; mahse, thîr leh hlum a inpawlh tak tak thei lo ang bawkin, an inzawm nghet thei lo vang.

⁴⁴Chûng lalho hun lai chuan, vên Pathianin lalram, tichhiat tawh ngai loh tûr a rawn din ang; chu lalram chu mi dangte kuta dah a ni tawh lo vang a, kumkhuain a ding reng ang; hêng lalram lo awm tawh zawng zawngte hi a tikeh sawmin, a tiboral vek zâwk ang.

⁴⁵Tlâng ata lungpui, kut lova lâk chhuahin thîr te, dâr te, hlum te, silvar te, rangkachak te a tikeh sawm i hmuh ang khân—Pathian ropui chuan tûn hnûa thil lo awm tûr chu lal hnênah hian a puang ta a nih hi. Mumang chu a dik ngei a, a hrilhfiagna pawh a Chiang e,” a ti a.

DANIELA LEH A THIANTE AN KAISÂNG

⁴⁶Tichuan, Lal Nebukadnezzara chu hmâia lei siin a bawkkhup a, Daniela chu chibai a bûk a, thilpêk te leh rimtuite rawn hlân tûrin thû a pê a.

⁴⁷Lal chuan Daniela chu chhângin, “Hetiang thurûk i puan theih dân aţang rêng hian, i Pathian chu pathiante Pathian, lalte Lal, thurûkte puangtu a lo nih takzet hi le,” a ti a.

⁴⁸Lal chuan Daniela chu a kaisântîr a, thilpêk ropui tak tak a pê a; Babulon ram bial pumpui chung a rorêltûah leh, Babulon mi fîng zawng zawng chung a thuneitu berah a dah ta a.

⁴⁹Danielan a dîl angin lal chuan Sadraka te, Mesaka te, Abed-Negoa te chu Babulon ram bial awptûah a dah hlawn a; Daniela erawh chu lalber rorêlnaah chuan a awm ta a.

BUNG 3

RANGKACHAK MILIM

¹Lal Nebukadnezzara chuan rang kachakin milim tawng 60 a sâng, a vâng lam tawng 6 a siam a. Babulon biala Dura phaizâwlah a dintîr a.

²Lal Nebukadnezzara chuan governor te, rorêltute, ram awptute, remruattute, sum vawngtute, dân hremi te, ram bial enkawltute leh sorkar hnathawk milian zawng zawng chu lal Nebukadnezzara milim din tâk hlannaa tel tûrin a chah khâwm vek a.

³Tichuan, governor te, rorêltute, ram awptute, remruattute, sum vawngtute, dân hremi te, ram bial enkawltute leh sorkar hnathawk milian zawng zawng chu, Lal Nebukadnezzaran milim a din tâk hlannaa tel tûrin an lo kal khâwm vek a; Nebukadnezzara milim din hmâah chuan an ding thup a.

⁴Tlângau chu ring takin a lo au va: “Aw, nangni mi tin te, hnam tin te, ţawng tinte u,

⁵tâwtawrâwt te, phênglâwng te, ţingtang te, perhkhuang te, tumrîk chite leh rimâwi chi tinrêng a rawn rik vêleh, Lal Nebukadnezzara milim din hi bawkkhupa chibai bûk theuh tûra thupêk in ni e;

⁶bawkkhupa chibai bûk duh lo apiang chu rawhtuina meipuih paîh luh nghal tûr an ni ang,” a ti a.

⁷Tichuan, mipuite chuan tâwtawrâwt te, phênglâwng te, ţingtang te, perhkhuang te, tumrîk chite leh rimawi chi tinrêng rî an hriat veleh, mi tin te, hnam tin te, ţawng tina mi zawng zawng chu an bawkkhup ta thup a, Lal Nebukadnezzara rangkachak milim chu chibai an bûk dual dual a.

DANIELA THIANTE AN THU AN ÂWÎH LO

⁸Chutih lai tak chuan Kaldaiho chu an lo kal a, Judate chu an rawn hêk a.

⁹Lal Nebukadnezzara hnênah chuan, “Aw lalber, kumkhuain dam reng ang che!

¹⁰Aw lalber, mi tinin tâwtawrâwt te, phênglâwng te, ţingtang te, perhkhuang te, tumrîk chite leh rimawi chi tinrêng rî an hriat vêleh, bawkkhupin rangkachak milim chibai an bûk tûr a ni;

¹¹tûpawh bawkkhupa chibai bûk duh lo apiang chu, rawhtuina meipuih paîh luh nghal tûr an ni ang,” tiin thupêk i siam a.

¹²Juda mi thenkhat Babulon ram bial chung a hotua i dah Sadraka te, Mesaka te, Abed-Negoa te kha an awm a; hêng mite hian, aw lalber, i thû an pawisa duh lo va. I pathiante rawng an bâwl duh lo va, rangkachak milim i din pawh chibai an bûk duh hek lo,” an ti a.

¹³Nebukadnezzara chuan thinrim êm êmin Sadraka te, Mesaka te, Abed-Negoa te churawn hruai nghâl tûrin thû a pê a. Lal hmâah chuan chûng mite chu anrawn hruai a.

¹⁴Nebukadnezzara chuan an hnênah, “Nangni Sadrak, Mesak, Abed-Nego, ka pathiante rawng in bâwl duh lo va, rangkachak milim ka din pawh chibai in bûk duh lo, tih hi a dik em?”

¹⁵Aw le, tunah hian tâwtawrâwt te, phênglâwng te, tîngtang te, perhkhuang te, tumrîk chîte leh rimâwi chi tinrêng rî in hriat vêleh, bawkkhupa rangkachak milim ka siam hi chibai in bûk chuan, a tha e! Mahse chibai in bûk duh lo anih chuan, rawhtuina meipuih paih luh nghâl tûr in ni ang. Ka kut ata hi tû pathian tehluin nge chhan chhuak thei ang che u le?” a ti a.

¹⁶Sadraka te, Mesaka te, AbedNegoa te chuan lal chu an chhâng a, “Aw Nebukadnezzar, hê thilah hi zawng kan chhân che pawh a ngai lo ve.

¹⁷Kan Pathian, a rawng kan bâwl thina chuan rawhtuina meipui ata min chhan chhuak thei asin, aw lalber, i kut ata pawh min chhan chhuak mai ang.

¹⁸Min chhan chhuak lo a nih pawhin, hei hi hria ang che, aw lalber, i pathiante rawng chu kan bâwl dâwn chuang lo va, i rangkachak milim siam pawh chibai kan bûk hauh lo vang,” an ti a.

FAHNA MEIPUI ATA CHHANCHHUAHNA

¹⁹Nebukadnezzara chu a thinrim ta êm êm a, Sadraka te, Mesaka te, Abed-Negoa te lakah chuan a hmêl pawh a danglam zo vek a. Rawhtuina meipui chu a sat dân pangngai lêt sariha tisa tûrin thû a pê a.

²⁰A sipai zînga chak deuh deuh te chu Sadraka te, Mesaka te, Abed-Negoa te phuar tûr leh, rawhtuina meipuih paih lût tûrin thû a pê a.

²¹Tichuan, chûng mite chu an kawr te, an kekawr te, an diar te, an silhfên dangte inbel chungin an phuar a, rawhtuina meipuih chuan an paih lût ta a.

²²Lal thupêk chu a hmanhmawh êm avâng leh, meipui chu a sat êm avângin, Sadraka te, Mesaka te, Abed-Negoa te meipuih paih luttute chu meialh chuan a kâng hlum ta a.

²³Chûng mi pathum, Sadraka te, Mesaka te, Abed-Negoa te chu phuar chungin, rawhtuina meipui laiah chuan an tla lût ta a.

²⁴Lal Nebukadnezzara chuan mak a ti ta hle mai a; a tho thut a, a khâwnbâwlho hnênah chuan, “Meipuih khuan phuar chungin mi pathum kan paih lût a ni lo’ m ni?” a ti a. Anni chuan, “Ni e, aw lalber,” tiin an chhâng a.

²⁵Ani chuan, “En teh u! Mi palî, phuar phelha, mei laia vei vei ka hmuh khû; nâ pawh an ti si lo va, a palîna phei chu Pathian Fapa ang mai zu ni â!” a ti a.

NEBUKADNEZZARAN PATHIAN A FAK

²⁶Nebukadnezzara chuan rawhtuina meipui kawngka chu a va hnaih a, “Sadrak, Mesak, Abed Nego, Pathian Chungnungbera chhiahhlawhte u, lo chhuak ula, hetah lo kal teh u,” a va ti a. Tichuan Sadraka te, Mesaka te, AbedNegoa te chu meipui aţang chuan an lo chhuak a.

²⁷Lal fapate, rorêltute, ram awptute leh lal remruatpuitute chu an lo kal khâwm a. Chûng mite taksa chungah chuan meiin thiltihtheihna rêng rêng a nei lo va; an sam te pawh a kâng kir eih lo va, an thuamhnâwte lahin a danglam phah hek lo; mei rim takngial pawh an nam baw lo tih an hmû a.

²⁸Nebukadnezzara chuan, “Sadraka te, Mesaka te, Abed-Negoa te Pathian chu fakin awm rawh se; ani chuan a Vântirhkoah a rawn tîr a, a chhiahhlawh, amah ţantute chu a chhan chhuak a; chûng mite chuan lal thupêk pawh hnial ngam khawpin an taksa an hlân a; pathian dang rêng rêng rawng bâwl lovin, chibai pawh bûk hek lovin, an Pathian rawng chauh bâwlin chibai an bûk a ni!

²⁹Chuvângin mi tin, hnam tin, ţawng tin zîngah Sadraka te, Mesaka te, Abed-Negoa te Pathian sawi chhia apiang sah sawm an ni ang a, an inte chu bawhlawh bâwmah siam a ni ang tih thupêk ka chhuah e; hetiang taka chhan chhuak thei Pathian dang rêng rêng an awm si lo,” a ti a.

³⁰Tichuan, lal chuan Sadraka te, Mesaka te, Abednegoa te chu Babulon ram bial chungah a kaisântîr ta a.

BUNG 4

NEBUKADNEZZARA MUMANG PAHNIHNA

¹Lal Nebukadnezzara chuan, Lei pumpuia chêng mi tin te, hnam tin te, ţawng tinte hnênah: In chungah thlamuanna tihpunin awm rawh se.

²Pathian Chungnungberin ka hnêna thilmak leh chhinchhiahna min thawh sakte hi puan chhuah tha ka ti a ni.

³A chhinchhiahnate chu a ropuiin, A thilmak tihte chu a va nasa êm! A lalram chu chatuan lalram a ni a, A rorêlna chu chhuan zawng zawng thlengin a ni ang.

⁴Kei, Nebukadnezzara hi ka inah râlmuang tak leh hmuinġl takin ka awm a.

⁵Mumanga ka thil hmuh chuan mi tihlâu va, khuma ka ngaihtuahte leh ka lûa inlârnate chuan mi tibuai a.

⁶Chuvâng chuan Babulon mi fîng zawng zawng chu ka mumang awmzia min hrilhfiah theih nân, ka hmâa rawn hruai tûrin thû ka pê a.

⁷Tichuan, dâwivaih thiam te, arsi chhûttu te, Kaldaihote leh hrilhlâwktute chu an lo lût a, mumang chu ka lo hrilh a; mahse a awmzia min hrilhfiah thei si lo va.

⁸A tâwpah chuan ka hmâah Daniela a lo kal a (a hming chu ka pathian hming, Beltesazzara a ni a; amahah Pathian Thianghlim Thlarau a awm), a hnênah chuan mumang chu ka lo hrilh a:

⁹“Beltesazzar, dâwivaih thiamte hotu, nangmahah Pathian Thianghlim Thlarau a awm tih ka hriat avâng leh, thurûk engmahin a tihbuai ve loh che avângin ka mumanga inlârna ka hmuh leh, a awmzia chu min hrilhfiah sak rawh le.

¹⁰Khuma ka mut laia ka lûa inlârnate chu hêng hi a ni: Ngai teh, ka lo hawi vêl a, Lei laiah hian thing kûng a lo awm a, A sâng êm êm a.

¹¹Thing chu nghet takin a lo ţang zêl a, A zîk chuan vân a han tawng a, Kâwlkil tin aţangin a hmuh theih vek a.

¹²A hnahte chu a duhawm hle a, A rahte chu a kûr tep tup a, Mi tinin an tlan huai huai a. Ramhnuaia ramsâten a hlim an bêl a, A zârah chuan chunglêng savate an chêng a, Thilnung tinrêng châwmthu a ni.

¹³“Khuma ka mut laia ka lua inlârnaa ka thil hmuh chu, vêngtu, mi thianghlîma chu vân aţangin a lo chhuk a.

¹⁴Ring taka âuvin heti hian a ti a: “Thingkûng chu kit ula, a zârte chu hlâwi rawh u. A hnahte chu sawi tîl ula, a rahte chu theh darh rawh u. A hnuai ata ramsâte chu tlan chhuak sela, Savate pawh a zâr aţangin chhuak rawh se.

¹⁵Mahse a bul bâwr leh a zungte chu leiah zuah ula, Thîr hrui leh dâr zaiin tawn ula, Ram hnîm no zîngah chuan. Vân daifîmin far huh sela, Ramsâte nêen hlobet zîngah tla ve rawh se.

¹⁶A mihring rilru chu tihdanglam ni sela, Ramsa rilru pêk ni sela, A chungah hun sarîh tla rawh se.

¹⁷Hê thu hi vêngtute thupêka tihlûk a ni a, Mi thianghlîmte thu chhuaka tih a ni, Chungnungbera chuan mihring lalram chungah ro a rêl a, A duh apiangte hnênah a pe mai a, Mi hnuaihnung berte pawh a châwikâng thîn, tih hi Mi nungten an lo hriat theih nân.’

¹⁸“Hei hi Kei, lal Nebukadnezzaran mumanga ka hmuh chu a ni. Khai le, nang Beltesazzar, a hrilhfiâhna chu han puang teh le, ka lalram chhûnga mi fîng dang zawngin a awmzia min hrilh thei si lo va; nang erawh chuan i tihêi a ni, Pathian Thianghlîm Thlarau chu nangmahah a awm si a,” a ti a.

DANIELAN MUMANG PAHNIHNA A HRILHFIAH

¹⁹Daniela, a hming Beltesazzara an tih bawk chu, engemaw chen a han chî-âi deuh va, a ngaihtuahna lamin a tibuai bawk a. Lal chuan a hnênah, “Beltesazzar, mumang leh a awmzia chuan tibuai che suh se,” a ti a. Beltesazzara chuan a chhâng a, “Ka lalpa, mumang chu nangmah hawtute tân ni zâwk sela, a awmzia pawh chu i hmêlmate tân ni lul rawh se!

²⁰“I thing lo hmuh, lo tşang liana, lo nghet tlut mai, a zîkin vân tawng hial, kâwlkil tin aţanga lang thei vek,

²¹hnah duhawm tak neia, a rahte pawh kûr tep tup, mi tinin an tlan huai huai, ramhnuaia sâten a hlim an belh, a zâr pawh chunglêng savaten chên nâna an hman mêk chu–

²²aw lalber, nangmah hi i ni a, i tşang a, i lo chak hle a; i ropuina chu vân tawng khawpin a tşang a, i lalna chuan kâwlkil a lo thleng a.

²³“Lalin a hmuh vêngtu, mi thianghlîma, vân aţanga lo chhukin, Thingkûng chu kit ula, tiboral rawh u, a bul bâwr leh a zungte erawh chu leiah zuah ula, thîr hrui leh dâr zaiin ram hnîm no zîngah tawn rawh u; vân daifîmin far huh thîn sela, a chungah hun sarîh a ral hma chu hlobet ringin ramsate zîngah khawsa ve rawh se’ tia a sawi kha;

²⁴aw lalber, hei hi a hrilhfiâhna chu a ni a, hei hi Chungnungbera thupêk, ka lalpa, lalber chungah lo thleng tûr chu a ni tlat mai:

²⁵Mihring zîng ata an hnawt chhuak ang che a, i chênna tûr chu ramhnuaia ramsa zîngah a ni ang a, bâwngpa angin hlobet an eifîr ang che. Vân daiin a chiahhuah ang che a, Chungnungbera

chuan mihringte lalna ram chungah thu a nei a, a duhsak apiang hnênah a pe thîn tih i hriat hmâ loh chuan, i chungah hun sarîh a ral ang.

²⁶“Thing bulbâwr leh a zungte zuah tûr thû an lo pêk ang khân, vân lam zâwkin thû a nei tih i hriat chhuah hnûah, i lalram chu i kutah a awm leh ang.

²⁷Chuvângin, aw lalber, ka thurâwn hi i tân pawm tlâk lo ni sela; i sualna chu diknain tichat la, i khawlohnate chu retheite lainatnain thlâkthleng rawh. Tichuan, hmuîngîl taka i awm chhûng hi a sei deuh mahnâ,” a ti a.

NEBUKADNEZZARA A MUALPHO TA

²⁸Chûng zawng zawng chu Nebukadnezzara chungah chuan a lo thleng ta a.

²⁹Thla sâwm leh pahni tawpawh chuan, Babulon lal in chungah a vei kual vêl a.

³⁰Lal chuan, “Hê Babulon ropui hi, ka ropuizia châwimâwi nân, keima thiltihtheihna chak takin lalber chênna atâna ka din a ni lo vem ni?” tiin a sawi a.

³¹Chû thû chu lalin a la sawi lai lâ lalin vân aţanga âw lo chhuak chuan: “Lal Nebukadnezzar, i chungchâng thû sawi a ni ta: lalram chuan a hransan ta a che!

³²Mihring zîng ata an hnawt chhuak ang che a, i chênna tûr chu ramhnuaia ramsate zîngah a ni ang. Bâwngpa angin hnîm i pet tawh ang. Chungnungbera chu mihringte lalna ram chungah rorêltu a ni a, a duh duh hnênah a pe thîn tih i hriat chhuah hmâ chu, i chungah hun sarîh a ral ang,” a ti a.

³³Chumi dârkârah ngei chuan chû thû chu Nebukadnezzara chungah a lo thleng nghâl a; mihringte zîng ata an hnawt chhuak a, bâwngpa angin hnîm a pet ta a; vândaiin a taksa chu a chiah huh thîn a, a samte chu mupui thla chen zetin a tşang sei a, a tinte chu sava tin ang mai a ni ta a.

NEBUKADNEZZARAN PATHIAN A FAK

³⁴Chû hun tawpawh chuan kei, Nebukadnezzara hian, vân lam ka han thlîr chho va, ka hriatna pangngai chu a lo kîr leh a; Chungnungbera chu mal ka sâwm a, chatuana nung renga chu fakîn ka châwimâwi a: A lalna chu chatuan lalna a ni si a, A lalram chuan chhuan awm chhûng zawng zawng a daih a.

³⁵Leilung luahtu zawng zawngte hi engmah lo mai an ni; Vân sipaiho zîngah a duh angin a ti a, Leilung luahtute zîngah pawh. A kut chu tûma chelh rual a ni lo va, A hnênah, “Eng thil nge i tih tâk?” ti thei an awm hek lo.

³⁶Rilru pangngai ka put leh lai chuan, ka lalram tihropui nân, ka ropuina leh ka mâwina pawh ka hnênah a lo kîr leh a. Ka remruatpuite leh ka milianhoten min rawn bêl leh ta bawk a. Ka lalramah chuan ka nghet sawt a, ka ropuina pawhin mi belhchhah leh ta a ni.

³⁷Tûnah chuan kei, Nebukadnezzara hian vân Lal chu fakîn, zah takin ka châwimâwi a ni; a thiltih zawng zawng chu thudik a ni a, a kawngte chu dikna a ni. Chapo taka lêng thînte chu a hnûk hniam thei si a.

BUNG 5

BELSAZARA RUAIṬHEH

¹Lal Belsazara chuan a milianho sâng khat zet te tân ruai ropui tak a ðeh a, a milian sâng khat-ho hmâah chuan uain a in a.

²Uain a in tam deuh hnû chuan, Belsazara chuan rangkachak leh silvar bungbêl, a pa Nebukadnezzaran Jerusalem tempul aṭanga a lak te chu lal leh a miliante, a nupuite leh a hmeiten zu in nâna an hman atâna rawn phawrh chhuak tûrin thû a pê a.

³Tichuan, Jerusalema Pathian tempul aṭanga an lâk chhuah rangkachak bungbêl te chu an rawn la a; lal leh a miliante, a nupuite, a hmeite chuan zu in nân an hman ta a.

⁴Zu chu an in a, rangkachak leh silvar te, dâr leh thîr te, thing leh lung pathiante chu an châwimâwi ta a.

⁵Chutih lai tak chuan, khâwnvâr dahna epa lal in bang zût mâm, a êng zâwn takah chuan mihring kut a lo lang a, thû a rawn ziak a; lal chuan a ziaaktu kut tumbung chu a lo hmû a.

⁶Lal hmêl chu a lo dâng zo ta vek a, a rilru a buai a, a kâwngruh chuktuah te a zawi a, a khûpte a inkhâwngh hlawk hlawk a.

⁷Lal chuan arsi chhuimite, Kaldai mite, aienthiamte kovin a âu vak a. Lal chuan Babulon mifingte hnênah, “He thuziak hi chhiara, a awmzia mi hrilhfiah theitu chu, puan senduk sintîrin, a nghâwngh rangkachak ði awrhîr a ni ang a; lalrama lal ber pathumnaah ka siam baw ang,” a ti a.

⁸Lal mi finge chu an vaiin an lo kal vek a, mahse, tumah thuziak chhiar thei leh a awmzia lal hnêna hrilhfiah thei an awm lo.

⁹Tichuan, Lal Belsazara chu a mangang ta êm êm mai a, a hmêl lan dân a danglam zo vek a, a milianhote lahin tihngaihna rêng an hre si lo.

¹⁰Lal leh a miliante âu thâwm avâng chuan, lalnu chu ruaiṭhehna inah chuan a lo lût a. Lalnu chuan, “Aw lalber, dam reng ang che! I rilru tibuai duh suh aw, i hmêl pawh danglam hau suh se.

¹¹I lalramah hian mi pakhat, amahah Pathian Thianghlim Thlarauvin a chênchilh mi a awm asin. I pa hun lai khân pathiante finna ang maia ênna te, hriatthiamna te, finna te chu amahah chuan a awm tih hriat a ni tawh a; i pa lal Nebukadnezzara, i pa lal ngei khân dâwivaih thiamte, arsi chhût mite, Kaldaite leh aienthiamte hotu berah a lo siam a ni.

¹²Amahah chuan thlarau ða bîk te, hriatzauna te, hriatthiamna te, mumang hrilhfiah theihna te, thukhirh chinfel theihna te, thil mak hrilhfiah theihna te chu, lalin Beltesazara tia a koh ðhin Daniela hnênah chuan a awm a; tûnah hian Daniela chu ko ta la, a hrilhfiahna chu a rawn pe mai ang,” a ti a.

BANGA THUZIAK HRILHFIAHNA

¹³Daniela chu lal hmâah chuan an rawn hruai a. Lal chuan Daniela hnênah, “Nangmah hi em ni Daniela, Juda saltângte zînga mi, ka pa lalin Judai ram aṭanga a rawn hruai chu?

¹⁴Pathian Thlarau nangmahah a awm avângin ênna te, hriatthiamna te leh finna danglam bîk nangmahah a awm tih ka lo hria a ni.

¹⁵Tûnah hian hê thuziak chhiara, a awmzia mi hrilhfiah tûrin mi fîng te, arsi chhûtmite ka hnênah an rawn hruai a; mahse hê thil awmzia hi min hrilhfiah thei si lo.

¹⁶Nang erawh chuan thilmak tak tak i hrilhfiah thei tih ka hria a ni. Tûnah hian hê thuziak hi i chhiar theiha, a awmzia mi hrilhfiah theih chuan, puan senduk sintîr i ni ang a, rangkachak khaidiat i awrh ang a, hê lalramah hian a lal ber pathumna i ni ang,” a ti a.

¹⁷Daniela chuan lal chu a chhâng a, “I thilpêkte chu nangman nei zâwk la, i lâwmante chu mi dang pe zâwk ang che; hê thuziak erawh chu lal tân ka chhiarsak ang a, a awmzia pawh ka hrilfhiahsak ang e.

¹⁸Aw lalber, Pathian Chungnungbera chuan i pa Nebukadnezzara hnênah lalram te, ropuina te, châwimâwina te leh zahawmna te a pê a.

¹⁹Ropui taka siam a nih avângin mi tin te, hnam tinte leh ðawng tinte chu amah hlauvin a hmaah an khûr ðhin a ni. A duh apiang a that a; a duh apiang a zuah a; a duh apiang a tungding a; a duh apiang a paih thla ðhin a ni.

²⁰Nimahsela, a thinlung a lo chapo a, chapona chuan a rilru a tisak a, a lalna ðhutthlêng aṭanga paih thlak a ni a, ama hnên ata ropuina chu an chhuhsak ta a.

²¹Mihring fate zînga ta hnawh chhuah a ni a, ramsa rilru ang puttîr a ni a, ram sabengtungte zîngah a chêng a. Chungnungbera zâwk chu mihringte lalna ram chung thuneitu leh, a duh apiang lalah a dah mai ðhin tih a hriat chhuah hmâ chu, bâwnghpa angin hlobetin an châwm a, vân daiin a taksa a tihuh ðhin a.

²²“Mahse nang, a fapa Belsazara hian hêng zawng zawng hre reng chung hian, i thinlung i titlâwm duh lo va.

²³Vâna Lalpa do zâwnghin i inchâwimâwi a. A ina bungbêl te chu i hmâah an rawn la a, nang leh i milian te, i nupui te leh i hmeiten zu in nân in lo hman vei a. Silvar leh rangkachak, dâr leh thîr, thing leh lunga siam pathian, engmah hmu thei lo, ngaithla thei lo, hriat pawh hre thei hlei lote chu i châwimâwi a; a kuta i nunna thâw kawltu leh i khawsak dân tinrêng neitu chu i châwimâwi duh si lo va.

²⁴Chuvângin, kut tumbung hi a rawn tîr ta a, hetiang hian a rawn ziak ta a nih hi.

²⁵“A thuziak chu hei hi a ni e: MENE, MENE, TEKEL, UPHARSIN.

²⁶Hei hi a thumal tin hrilhfiahna a ni. MENE: Pathian chuan i lalram nambar a chhût zo tawh a, a kin ta e;

²⁷TEKEL: Bûknain an bûk che a, i tling zo ta lo a ni;

²⁸PERES: I lalram chu ðhen darh a ni a, Media leh Persia kutah pêk a ni ta,” a ti a.

²⁹Tichuan, Belsazara thupêk angin, Daniela chu puan senduk an sintîr a, a nghâwngh rangkachak ði an awrhîr a, lalram chhûnga lal ber pathumnaah dah a ni tih an puang ta a.

BELSAZARA A THI

³⁰Chumi zân lâ lâ chuan, Kaldai lal Belsazara chu thah a ni a.

³¹Medai mi Daria, kum 62 vêla upa chuan lalram chu a chang ta a.

BUNG 6

DANIELA AN PHIAH

¹Daria chuan a lalram pumpuiah ram awptu 120 dah chhuah vek tha a ti a;

²Lal chuan chhiatna a tawh loh nân, chûng ram bial awptuten chanchin an thlen khâwm thinna tûrin, an chungah chuan puipa pathum a dah a, an zînga pakhat chu Daniela a ni.

³Amah chênchilhtu thlarau tha chungchuang bik avângin, Daniela chu ram awptute leh puipa dangte lakah chuan a filawr nalh mai a; lal pawhin a lalram pum pui chungah hotu bera dah a rilrûk a.

⁴Tichuan, governorte, puipate leh ram bial awptute chuan ram enkawlina thûah Daniela hêkna tûr remchâng an dap ta a; nimahsela, a rinawm êm avângin a dik lohna emaw, hêkna tûr emaw an hmu thei lo; amahah dik lo leh tihsual hmuh tûr a awm si lo va.

⁵Chûng mite chuan, “A Pathian biak dân lamah chhuanlam kan dap a nih ngawt loh chuan, hê Daniela hêk chhiatna tûr hi kan hmu thei dân lo ve,” an ti a.

⁶Tichuan, chûng puipate leh ram awptute chu lal hmâah chuan an va kalkhâwm a, a hnênah tihian an va ti a: “Lalber Daria, dam reng ang che!”

⁷Governorte, sorkar hotute, ram bial awptute, remruattute leh thurâwn petute chuan inrâwnkhâwmîn, ni sawmthum chhûng chu aw lalber, nangma hnênah chauh lo chuan, mi tupawhin an pathian hnênah emaw, mi dang hnênah emaw dîlna hlân apiang chu, sakeibaknei pûkah paih tûr a ni tih dân nghet siam ni rawh se, tih an remti tlang a.

⁸Tûnah hian, aw lalber, khapna dân tinghet tûrin hming ziaik hnan la, Media leh Persia dân danglam ngai lo ang zêlin, tuma tihdanglam theih loh a ni dân nia,” an ti a.

⁹Tichuan, Lal Daria chuan chû thupêkah chuan a hming a ziaik hnan ta a.

DANIELA SAKEIBAKNEI PÛKAH

¹⁰Danielan thupêk chu ziaik hnan a ni ta tih a lo hriat chuan a inah a hawng a. A pindan chungnunga tukverhte, Jerusalem lam hawia a hawn bulah chuan, a hmâ daih aţanga a lo tih thîn dân pangngaiin, ni khatah waw thum thingthiîn, Pathian hnênah lawmthu sawiîn a ţawngtai thîn a.

¹¹Chûng mite chu an inhâwrkhâwm a, Danielan a Pathian hmâa dîlna thlena a ţawngtai lai chu an va phâwk ta a.

¹²Lal hnênah chuan an va kal a, lal thupêk thû kha an va sawipui a: “Aw lalber, ni sawmthum chhûngin nangma hnênah chauh lo chuan pathian emaw, mihring emaw hnêna dîlna nei apiang chu, sakeibaknei pûkah paih an ni ang, tih thupêk kha i ziaik hnan a ni lo vem ni?” an ti a. Lal chuan a chhâng a, “Chu thil chu a dik alâwm, Media leh Persia dân danglam ngai lo angin,” a ti a.

¹³Anni chuan lal chu an chhâng a, “Hê Daniela, Juda saltângte zînga mi hian a pawisa lo che a, aw lalber, i hming ziaik hnan ngei dân thupêk pawh pawisa lovin, ni tin waw thum a ţawngtai thîn zu nia,” an ti a.

¹⁴Lalin chûng thûte a lo hriat chuan a inthiam lo ta êm êm a, Daniela chhan chhuah dân tûr ngawt a ngaihtuah a; ni tlâk thlengin chhan chhuah dân kawng a dap a.

¹⁵Chûng mite chu lal hnênah chuan an lo kal leh a, lal hnênah chuan, “Aw lalber, Media leh Persia dânin thupêk leh dân thuchhuak, lalberin a tihngheh tawh chu sût leh theih a ni lo tih hria ang che,” an ti a.

¹⁶Tichuan, lal chuan thû a pê a, Daniela chu anrawn hruai a, sakeibaknei pûkah chuan an paih lût ta a. Mahse, lal chuan Daniela hnênah, “I Pathian, bâng lova a rawng i bâwlsaka chuan a chhan chhuak mawlh ang che,” a ti zui hrâm a.

¹⁷Lung anrawn la a, pûk kawngka chu an chhîn a, Daniela chungthûah thil engmah tihdanglam a nih loh nân, lal chuan ama hming nemna leh a miliante hming nemnain a châr tlat a.

DANIELA, SAKEIBAKNEI LAKA CHHAN CHHUAH

¹⁸Lal chu a inah a hâu a, chumi zân chuan châw a nghei a; a hmâah chuan rimâwi thil pawh anrawn la lo va. Mutmû pawh a tuah thei hek lo.

¹⁹Lal chu zîng takah a tho va, sakeibaknei pûkah chuan hmanhmawh takin a va kal a.

²⁰Pûk a va thlen chuan, Daniela chu ţah âw-in a âu va. Lal chuan Daniela hnênah, “Daniel, Pathian nung chhiahhlawh, bâng lova a rawng i bâwlsak, i Pathian chuan sakeibakneite lakah a chhanhim thei che em?” a ti a.

²¹Daniela chuan lal hnênah, “Aw lalber, dam reng ang che!”

²²Ka Pathian chuan a Vântirhkohte arawn tûr a, sakeibaknei kate arawn tichîp tlat a, mîn tina rêng rêng lo; a mithmuhah tihsual engmah ka nei lo tih mîn hmu reng si a; aw lalber, i lakah pawh eng paw mah ka khawih lo asin,” a ti a.

²³Lal chu a lâwm ta êm êm mai a, pûk aţanga Daniela la chhuak tûrin thû a pe a. Daniela chu pûk aţang chuan an la chhuak ta a, a taksâah nâ rêng rêng a awm lo, a Pathian a rin tlat avângin.

DARIA’N PATHIAN A CHÂWIMÂWI

²⁴Lal chuan thupêk a chhuah a, Daniela hêktute chu anrawn hruai a, sakeibaknei pûkah chuan an paih thla a, anmahni leh an fanaute leh an nupuite nê; sakeibakneite chuan an lo bâwr luih luih a, pûk mawng an thlen hmâ hmân an ruhte chenin an lo seh sawm nghal vek mai a ni.

²⁵Lal Daria chuan lehkha a ziaik a: Khawvêla mi tin te, hnam tin te leh ţawng tinte hnênah: In chungah remna tihpun lo ni rawh se.

²⁶Ka lalram awp chhûng zawng zawngah miten Daniela Pathian hi hlâuvîn khûr rawh se, tih thupêk ka chhuah a ni. Ani chu Pathian nung a ni si a, Chatuanin a nghet a ni; A lalram chu tihchhiat rual a ni lo vang a, A rorêlna chu engtikah mah a tâwp lo vang.

²⁷Chhandamtu leh chhanchhuaktu a ni a, Leiah leh vânah hian Chhinchhiahna leh thilmak a ti thîn, Sakeibaknei thiltihtheihna laka Daniela chhanchhuaktu a ni.

²⁸Tichuan, hê Daniela hi Daria rorêl lai leh Persia mi Kura rorêl laiin a hmuingîl hlê a ni.

BUNG 7

INLÂRNAA SAKAWLH PALI

¹Babulon lal Belsazara lal kum khatnaah khân Daniela chuan a mutna kumah mumang neiin, a lûa inlârnate a hmu a. A mumang chu a ziaik chhuak a, a tângpui a sawi a.

²Daniela chuan heti hian a sawi a, “Zân inlârnaa ka hmuh chu, vâna thli pali hi Tuipui Zau chungah a lo tleh a.

³Tuipui ațang chuan sakawlh pali, inang lo vek hi an lo chhuak a.

⁴A hmasa ber chu sakeibaknei ang, mupui thla nei a ni a. A thlâte an thlawnsak thlengin ka lo en reng a; lei ațangin an kaithova, mihring angin an dintîr a, mihring thinsung an lo pê a.

⁵“Sakawlh dang, a pahnihna, savawm ang tak chu a lo lang leh nghal a. A pang leh lamin a ding a, a ka chhûng ha kârah chuan nâkruh pathum a awm a. Heti hian an ti a: ‘Tho la, sâ ei țeuh rawh!’ tiin.

⁶“Chumi hnua ka han en leh chuan thil dang, keitê ang, a hnungzângah sava thla pali nei a lo awm a. Chu sakawlh chuan lu pali a nei a, a hnênah chuan lalna an pê a.

⁷“Chumi hnua zân inlârnaa ka hmuh chu, ngai teh, sakawlh palîna, hlauhawm leh râpthlâk, chak êm êm mai hi a ni a. Thîr hâ hraw pui pui a nei a; thil a ei duak duak a, a seh sawm buaih buaih a, a bângnawi chenin kêin a chîl hrep thîn. A hmâa sakawlh dangte lakah chuan a danglam bîk hle a, ki sâwm a nei baw k a.

⁸“Chûng kí-te chu ka ngaihtuah laiin ki dang, tê deuh hi an zîng ațang chuan a lo chawr chhuak a, chu chuan ki lo awm hmasa pathumte chu a zung chawpin a tithlawn a. Chû kiah chuan mihring mit ang mitte a awm a, uangthuang taka thu sawina kâ a awm baw k.

INLÂRNAAH HMÂKHAWŜÂNGA

⁹“Lalțhutthlêngte chu an rem fel thlengin ka en reng a, Tah chuan Hmâkhawsânga chu a țhû a; A silhfên chu vûr angin a vâ a, A lua sam chu sahmul hlang hlak ang a ni. A lalțhutthlêng chu meialh a ni a, A tawlailîr kê pawh meialh baw k a ni;

¹⁰A hmâ ațang chuan mei lui a lo chhuak a. Mi sâng tam takin a rawng an bawl a; A hmâah chuan a sînga hmun sîng an ding a. Rorêlna a ințan a, Lehkhavute chu an keu a.

¹¹“Kî-a khân uangthuang taka thu a sawi avângin ka enzui reng a; sakawlh chu an thaha, a taksa chu meia an paih luh thlengin ka en reng a.

¹²Sakawlh dangte pawh, an lalna chhuhsak an ni a, an nunna erawh chu hunbi khat leh hun khat âtan an pawh seisak a.

¹³“Zân inlârna chu ka thlîr reng a, Ngai teh, Mi pakhat, Mihring Fapa ang hi, Vâ chhûmte nê chuan a lo kal a! Hmâkhawsânga hnênah chuan a lo kal a, A hmâah chuan an rawn hruai hnai a.

¹⁴A hnênah chuan lalna te, ropuina te, lalram te pêk a ni a, Mi tin, hnam tin, țawng tinin a rawng an bawl theihna tûrin. A lalna chu chatuana lalna, Boral tawh ngai lo tûr a ni a, A lalram chu tihchhiat rual loh tûr a ni.

DANIELA INLÂRNA AWMZIA

¹⁵“Kei, Daniela hi, ka taksa chhûnga ka thlarau hi a lungngai a, ka lûa inlârnate hian mi tibuai a ni.

¹⁶A kianga ding ve zînga pakhat hnênah chuan ka va kal a, thil awmzia ka va zâwt chhuak vek a. Ani chuan chûng thil awmziatê chu mi hrilhfiah ta a:

¹⁷“Hêng sa ropui tak tak palîte hi lal palî, lei ațanga lo chhuak an ni.

¹⁸Mahse, lalram chu Chungnungbera mi thianghlimten an chang ang a, chatuanin lalram chu an nei kumkhua tawh ang.’

¹⁹“Kei chuan sakawlh palîna, a dangte aia danglam bîk, hlauhawm rûrâ tak mai, a hâte pawh thîr, a tinte pawh dâr, ei duak duaka, pawt sawm buaih buaiha, a bângnawi chena a kephaha chîl zui hrep thîn awm dân dik tak chu ka hre chât ta a;

²⁰a lû-ah ki sâwm a nei a, ki dang a lo chhuah veleah a hmâa pathumte kha an thlawn ta mai a; chû kî chuan mitte neiin, uangthuang taka thu sawi theihna kâ a nei a, a lan dânah pawh a țhiantê ai chuan a ropui hmêl bîk hle a.

²¹“Ka en reng a; chu kî vêk chuan mi thianghlimte chu a do va, a hneh ta a,

²²Hmâkhawsânga chu a lo kal a, Chungnungbera chuan mi thianghlimte chu thiam a rawn chantîr a, mi thianghlimte chuan lalram an chan ve hun a thleng ta a.

²³“Heti hian a ti a: ‘Sakawlh palîna chu Leia lalram palîna a ni ang a, Lalram dang zawng aia danglam bîk tûr a ni ang, Lei pum pui a lem zo ang a, A chîl hrep ang a, a pawt sawm baw k ang.

²⁴Kî sâwmte chu lal sâwm an ni a, Hê lalram ațanga lo chhuak tûr hi an ni. Anni dawtah a dang a lo chhuak leh ang; A hmasa ber laka danglam hlê tûr a ni a, Lal pathum a rawn hneh ang.

²⁵Chungnungbera chu a uankhum vêl ang a, Chungnungbera mi thianghlimte pawh a tiduhdah baw k ang. Hunte leh dânte tihdanglam a tum ang a, Hun khat leh hunte leh hun chanve chhûng chu A kutah mi thianghlimte pêk an ni ang.

²⁶Mahse rorêlna a lo awm ang a, Kumkhuaa tihchhiata tihboral tûrin, A thuneihna chu an chhuhsak tawh ang.

²⁷Tichuan lalram te, thuneihna te, Vâ hnuaia lalram zawng zawngte ropuina chu, Chungnungbera mi thianghlimte hnênah pêk a ni ang. A lalram chu chatuan lalram a ni a, Thuneihna tinrêngin a thu âwihin a rawng an bawl ang.’

²⁸“Hei zawng hi a chanchin chu a ni. Kei Daniela hi, ka ngaihtuahnate chuan mi tibuai nasa hle a, ka hmêl a danglam zo vek a; mahse chûng thilte chu ka thinsungah ka vawng reng a.”

BUNG 8

INLÂRNAA BERAM LEH KÊL

¹Lal Belsazara rorêl kum thumnaah khân ka hnênah inlârna a lo lang leh a, kei Daniela hnêna a tîra a lo lan hmasak hnû khân a ni a.

²Inlârna ka hmuhah chuan ka lo hawi vêl a, Elam biala Susan khawpuia lal inah ka lo awm a; inlârnaah chuan Ulai Lui kamah ka lo awm a.

³Ka han hawi chho va, lui kamah chuan berâmpa, ki pahnih nei hi a dîng a, a ki pahnihte chu sâng tak a ni a; a pakhat zâwk chu a dang aiin a sâng zâwk a, a sâng zâwk chu a ʔo hnuhnung zâwk chu a ni.

⁴Chû berâmpa chuan thlang lam te, hmar lam te, chhim lam te phîn kual vêlin ka hmu a, eng sâ mahin an ngam lo va; a kut ata chhan chhuak thei rêng rêng an awm hek lo, a duh dân dânin a ti a, a lo ropui ta hle a.

⁵Ka ngaihtuah mêk laiin, khawthlang lam aʔangin, lei pumpui chungah hian kêlchal hi lei rap lovin a lo thawk thut mai a; chu kêlchal chuan a mit inkârah kî langsâr tak a nei a.

⁶Berâmpa kî pahnih nei, lui kama dîng ka hmuh chu a rawn pan a, theitâwpa chakin a rawn tlan vak a.

⁷Berâmpa chu a rawn hmachhawn a; thinrim êm êmin berâmpa chu a rawn tauh chawrh a, a ki pahnih chu a tauh tliahsak a. Lo bei lêl tûrin berâmpa chuan chakna a nei tawh si lo va, leiah a si thlû a, a chîl nek a; a kut ata berâmpa chhanchhuak thei chu tûmah an awm lo.

⁸Chû kêlchal chu a lo ropui tual tual a; nimahsela, a chak vânglai takin a kî ropui chu a tliak a, chumi hmunah chuan kâwlkil lî lam hawiin kî pali a lo chhuak a

⁹Chûng zînga pakhat aʔang chuan ki te reuhtê a lo chawh chhuak a, chu chu chhim lamah te, khawthlang lamah te, khawchhak lamah te leh Ram Ropui lamah te chuan a ʔang lian ta tual tual a.

¹⁰Vâna mipuite han tâwng pha hialin a ʔang lian a; chûng zînga mite leh arsi ʔenkhate chu leiah a phih thla a, a chîl hrep a.

¹¹Vân mipuite lalpa tluk hialin a indahsâng a; ni tina inthâwina thilhlante chu a tihtâwpsak a, A Hmun Thianghlim pawh chu a tihchhiatsak a.

¹²Bawhchhiatna avângin, ni tina an inthâwinatê dodâl tûrin sipai rual hnênah kî chu pêk a ni a; thutak chu leiah a paih thla bawk a. Chûng thil zawng zawng chu a ti a, a tuang viau bawk si a.

¹³Chumi hnû chuan mi thianghlim pakhat thusawi ka hria a; chû mi chu mi thianghlim dangin a lo bia a, “Inlârnaa ni tin inthâwinatê chu tichhetuin engchen nge a bawhchhiatsak anga, hmun thianghlim leh mipuiho rahbehna chuan engchen nge a aw h dâwn?” a ti a.

¹⁴Ani chuan ka hnênah, “Tlai leh zîng* 2300 chhûng a ni; chumi hnûah hmun thianghlim chu thenfai a ni tawh ang,” a ti a

GABRIELAN INLÂRNA A HRILHFIAH

¹⁵Kei, Daniela hian inlârna chu ka hmuhin, a awmzia hriat tumin ka zawng ta a; chû vêleh chuan mihring ang hmêl pû hi ka hmâah a lo dîng a.

¹⁶Ulai lui kam tuak inkârah chuan mi pakhat âw ka hria a: “Gabriel, hê mi hi inlârna awmzia hrilhfiah rawh,” a lo ti a.

¹⁷Ka dînnâ bulah chuan a lo kal hnai a, a lo kal chuan ka hlâuh êm avângin bawkkhupin ka tlu a; ani chuan ka hnênah, “Mihring fapa, hê inlârna hi hun tâwp chungchâng a ni tih hrethiam ang che,” a ti a.

¹⁸Mi biak lai chuan hmaia lei siin ka muhîl dêr a; mahse min khawih a, ngîl takin min dintîr ta a.

¹⁹Ani chuan, “Khai le, thinurna hun tâwpa thil lo awm tûr chu ka hriattîr ang che; a hun ruat ang takin tâwpna chu a lo thleng dâwn si a.

²⁰Berâmpa, kî pahnih nei i hmuh kha, Media leh Persia lalte an ni.

²¹Kêlpa kha Grik lalram a ni a. A mit pahnih inkâra kî lian tak kha an lal hmasa ber a ni.

²²Kî tliak tâ leh a aia kî pali lo dîng chhuakte kha, khâ hnam aʔang khân lalram palî an lo dîng chhuak ang a, a thuneihna ang tak erawh chu an nei ve lo vang.

²³“An lalna tâwp lamah chuan Bawhchhetuten a vâwrtâwp an thlen hunah, Lal hlauhawm hmêl tak, inphiarrûk vêl hneh tak A lo dîng chhuak dâwn a ni.

²⁴Ama chakna ni si lo, thiltihtheihna chak tak a nei ang; Thil a tichhe rem rum ang a, A tuang zurh zurh dâwn si a; Mi chak leh mi thianghlimte pawh a zuah lo vang.

²⁵“A fin kherek êm avângin, A rorêlna chu vervêknain a tihlawhtling ang; Ama ngaihin a indah sâng hle bawk ang. Mi tam tak chu an hausak laiin a bei thut dâwn a ni. Lalte lal meuh pawh a khing hial ang a; Mahse, mihring kut lova tihtliahin a awm ang.

²⁶“Tlai leh zîng inlârna kha, Sawi tawh ang kha a dik a ni; Chuvângin, inlârna chu châr tlat rawh, Hun rei tak hnûa mi tûr a ni si a,” a ti a.

²⁷Kei, Daniela chu, ka chau dêr a, ni tam tak ka dam lova; chumi hnûah chuan ka tho va, lal hna chu ka thawk leh ta a. Inlârna chu mak ka ti êm êm a, tûma’n an hre thiam si lo.

BUNG 9

DANIELAN A MITE TAN A ʔAWNGʔAISAK

¹Ahasuera fapa Daria, Media thlah, Kaldai ram lala an siam kum khatna—

²a rorêl kum khatnaah chuan kei, Daniela hian, LALPA zâwlnei Jeremian kum sawmsarih chhûng Jerusalem a ram dâwn a ni tia, hrilhlâwkna bu a ziaik aʔangin ka lo hre thiam ta a.

³Tichuan, chaw ngheia, saiip puan sinin vaivut zîngah, ʔawngʔaia dîl chungin, LALPA Pathian lam ka hawi ta a.

⁴LALPA ka Pathian hnênah chuan, mahni sual inpuang chungin ka ʔawngʔai a, “Aw LALPA, nang chu Pathian ropui leh tihbâiawm, nangmah hmangaihtu leh i thupêkte zâwmtu lakah

chuan i thuthlung vawnga, zahngaihna lantîr thîntu,

⁵khawlo takin thilsual kan ti a, i thupêkte leh i rorêl dân thute hawisanin, suaksual takin kan awm a, i lakah kan hel thîn a.

⁶I chhiahhlawh zâwlneiten nangma hminga kan lalte, kan hotute, kan thlahtute leh ram chhûnga mipui zawng zawngte hnêna thu an lo puan thînte pawh kan lo bengkhawn duh hek lo.

⁷Aw LALPA, dikna chu i ta a ni a, keini chan ve erawh chu, tuna kan awm dân ang hian, mualphona mai a ni—Judai rama mite, Jerusalem chêngte leh Israel-ho zawng zawng, i hnawh chhuahna ram hla leh hnaia mi zawng zawngte nê, i laka an rinawm loh êm vâng a ni si a.

⁸“Aw LALPA, i lakah kan lo sual êm avângin kan chanvo hi mualphona mai a ni, kan lalte, kan hotute, min thlahtute pawh an dang chuang si lo.

⁹Ani chu helsan thîn mah ila, LALPA kan Pathian hnênah chuan zahngaihna te, ngaihdamna te a awm si a.

¹⁰Keini chuan LALPA kan Pathian âw chu kan ngaihaven duh lo va, a chhiahhlawh zâwlneite hmanga a dân thu min pêkte lah kan zâwm duh bawh hek lo.

¹¹A ni takzet mai, Israelho zawng zawng hian i dân chu bawhchhiain, i âwkâ zâwm lo tûrin an hawisan che a; i lakah thilsual kan tih tlat avângin, Pathian chhiahhlawh Mosia Dân bua inziakin a tiam sa ânchhia kha kan chungah hian leih buak a nih tâk hi.

¹²Keini leh kan rorêltute chungah chhiatna râpthlak tak a rawn thlen dawn tia a tiam thu kha a nemngnet ta; Jerusalem a sawisak dân chu, chutiang aia nasa rêng rêng chu vân hnuai zawng zawngah hian a la awm ngai lo.

¹³“Mosia Dân inziak angin hêng chhiatnate hi kan chungah a lo thleng ta a; chutichung pawhin, kan khawlohnate sima, a thutak hriatthiam tumin, LALPA kan Pathian hmâah tawngtaina kan la hlân chuang lo.

¹⁴Chuvângin, LALPA chuan kan chungah hian chhiatna thlentîr a tum ta rêng a ni; keinin a thu âwih duh lo mah ila, LALPA kan Pathian chu a thiltih zawng zawngah a dik vêl vek a ni.

¹⁵Tûnah hian aw LALPA kan Pathian, nang chuan kut chak takin i mite chu Aigupta ram aţangin i hruai chhuak a, tûn ang tak hian i hming pawh i chher ta a; mahse keini erawh chu kan sual êm a, suaksual takin kan lo ti ta si a!

¹⁶“Aw LALPA, dik taka engkim i tih ang zêlin, i tlâng thianghlim leh i khawpui, Jerusalem chungah i thinrimna leh i thinurna lakiang tûrin kan ngên a che; keimahni sualna avâng te, min thlahtute bawhchhiatna avângtein, Jerusalem leh i mite hian kan vêla mite sawi chhiat kan hlawh ta si a.

¹⁷Chuvângin, aw kan Pathian, i chhiahhlawh tawngtaina leh dîlna min ngaithla la, LALPA zârah i hmun thianghlim ram chhe dêr tawh chungah chuan i hmêl êntîr ang che.

¹⁸Aw ka Pathian, beng chhîin lo ngaithla teh; i mit meng la, nangma hming pu ngei khawpui chhiatzia hi han en teh; kan thil tha tihte avâng ni lovin, i zahngaihna nasa tak avâng zâwkin i hnênah dîlna kan thlen a ni.

¹⁹Aw LALPA, lo ngaithla la! Aw LALPA! Ngaidam rawh! Aw LALPA, lo ngaithla la, lo ti ngei ang che! I hming avângin i khawpui leh i hming pû i mite hi rei rial suh aw ka Pathian,” tiin.

HAPTA SAWMSARII HRILHLÂWKNA

²⁰Chutia ka tawngtaia, keima sual leh ka mi Israelte sual ka puan mêk laia, ka Pathian tlâng thianghlim tâna ka dîlna LALPA ka Pathian hnêna ka thlen lai chuan,

²¹ni e, ka tawngtai lai mêkin, a tîra inlârnaa ka mi hmuh Gabriela kha, tlai lam tawngtai hun lai vêl hian chak taka thlâwkin ka bul a rawn thleng nghal a.

²²Ani chuan mi bia a, thil mi hrilh a, “Aw Daniel, hriatthiamna pe tûr chein ka lo kal a nih hi.

²³I thil dîl tîr aţang khân thupêk a chhuak tawh reng a, chu chu hrilh tûr chein ka lo kal a ni, mi duhawm tak i ni si a; chuvângin ngun takin lo ngaihtuah la, inlârna chu lo hrethiam tawh ang che:

²⁴“I mite leh i khawpui thianghlim tâna Bawhchhiatna titâwp tawh tûr te, Sualna tikin tûr te, Khawlohna atâna inremna siam tûr te, Chatuan dikna lalût tûr te, Inlârna leh hrilh lâwkna châr nghet tlata, Chungnungbera hriak thih tûrin Hapta sawmsarih ruat a ni e.

²⁵“Jerusalem tun dîn leh sak thatna tûr Thupêk an chhuah aţanga Lal Fapa Messia lo awm thlengin, Hapta 7 leh hapta 62 a awm dawn Tih hria la, chhût thiam ang che; Kawthlêr te, kulh bang te an dîn tha leh ang, Hun khirh tak kârah pawh.

²⁶“Hapta 62 hnûah chuan Messia chu tihhlum a ni ang, ama tân erawh chuan a ni lo; Lal lo kal tîra lamţangte chuan Khawpui leh hmun thianghlim an tichhia ang. A tâwpna chu tuilian nê a ni ang, Indo tâwp thlengin chhiatna chu ruatsa a ni.

²⁷Hapta khat atân mi tam tak thu a thlun nghehpui ang; Mahse hapta chanvêah chuan Inthâwina leh thilhlân a titâwp ang. Tenawmna thlâah tichhetu chu a chuang ang a, Tâwpna lo thleng tîra ruatsa chu, Tichhetu chungah leih buak a ni ang,” a ti a.

BUNG 10

INLÂRNAA MI ROPUI

¹Persia lal Kura lal kum thum naah chuan, Daniela, Beltesazara an tih bawh hnênah thu a lo thleng a. Chû thuchah chu a dik a, a hun ruat erawh chu a rei hle a; a thuchah chu a hre thiam a, inlârna awmzia pawh a hre thiam bawh a.

²Chûng lai chuan kei, Daniela hi kâr thum chhûng zet lû ka sùn a.

³Chaw tuihnai rêng rêng ka ei lo va, sâ leh uain pawh ka kâah a lût lo va, kâr thum chhûng chu hriak pawh ka thih hek lo.

⁴Thla khatna ni 24 ni chuan lui lian tak, Tigris lui kamah ka awm a,

⁵Ka han hawi chho va, ngai teh, mi tuemaw puan zaisîn sin hian Uphaz rangkachak kâwnghrên a hrêng a!

⁶A taksa chu beril ang a ni a, a hmêl chu kâwlpê ang, a mitte chu meichher ang mai, a bân leh a kête chu dâr nawh tlêt ang a ni a; a âw chu mipui thâwm ri mur mur ang hi a ni.

⁷Kei, Daniela chauh hian inlârna chu ka hmu a, ka kianga mite chuan an hmu ve lo; mahse namên lovin an thlabâr a, bihrûk tumin an tlânchhe ta vek a.

⁸Chuvângin, hê inlârna ka hmuh lai hian mahni chauhvin min hnutchhiah a, thahrui rêng rêng pawh nei lovin ka chau hnêp a; ka zawi zo vek a, ka chau ngawih ngawih mai a.

⁹Mahse, a awrî ka hriata, a tawng rî ka han hriat chuan, bawkkhupa hmaia lei siin ka muhîl ta a.

PERSIA LEH GRIK CHUNGCHÂNG HRILHLÂWKNA

¹⁰Thâwklehkhatah kut hian mi rawn khawih thut a, khûr chungin, bawkvâk tûr ang hian ka awm a.

¹¹Ani chuan ka hnênah, “Aw Daniel, mi azawnga duhawm, ka thu hrilh che hi hrethiam la, ngîl takin dîng rawh, i hnêna rawn tîrh ka ni asin,” a ti a. Chû thû mi hrilh lai chuan khûr chungin ka dîng ta a.

¹²Ani chuan ka hnênah, “Daniel, hlau suh, hriatthiam tuma thinlung taka i inpêka, Pathian hmaa i intihtlâwm aţang khân, i thûte kha ngaihlâk a ni a; i thusawi avâng a lo kal ka ni e.

¹³Nimahsela, Persia lalram hotu khân ni 21 chhûng mi dâl tlat a; Persia lalte hnênah chuan keimah chauhva hnutchhiaha ka awm hnû chuan, ngai teh, hotu lian Mikaela chu mi pui tûrin a lo kal ta a ni.

¹⁴Nakîna i mite chung a thil lo la thleng tûrte rawn hrilhfiah tûr chea lo kal ka ni, inlârna kha hun rei tak hnûa mi tûr a la ni chauh si a,” a ti a.

¹⁵Chutiang thû mi hrilh zawh chuan, tawng thei lovin lei lam ka bih ta tlawk tlawk a.

¹⁶Thâwklehkhatah mihring fapa ni âwm tak hian ka hmui a rawn khawih a; tichuan ka kâ ângin, ka bula dîng hnênah chuan, “Ka lalpa, inlârnaa ka thil hmuhte avângin lungngaiin ka khat a, chakna thahrui rêng rêng ka nei ta lo a ni.

¹⁷Ka lalpa chhiahhlawh mai hian engtin nge ka lalpa chu ka biak theih che le? Keimahah hian chakna thâ rêng ka nei ta lo va, ka thaw thei tawk tawk a ni si a,” ka ti a.

¹⁸Tichuan, mihring ang tak chuan mi khawih leh a, chû chuan mi tichak thar leh ta a.

¹⁹Ani chuan, “Aw, mi azawnga duhawm, hlau suh! I hnênah thlamuanna awm rawh se; intichak rawh, a ni, chak takin awm ang che!” a ti a. Chutianga thu a han sawi chuan ka lo chak leh ta a, “Ka lalpain sawi rawh se, nangin mi tichak ta si a,” ka ti a.

²⁰Ani chuan, “I hnêna ka lo kal chhan i hria em? Tûnah hian Persia ram hotu bei tûrin ka kîr leh tûr a ni; ka kal hnûah Grik ram hotu a lo kal vê thung ang.

²¹Nimahsela, Thutak Ziahna Bu a chuang ngei ka hrilh ang che. (Hêng mite lakah hian in hotu Mikaela chauh lo chu min puitu tumah dang an awm lo.

BUNG 11

¹⁴Media mi Daria lal kum khatnaah pawh khân, keimah ngei hi amah tingheta tichak tûrin ka dîng tawh a.)

²Tûnah hian thutak ka hrilh teh ang che: Khai aw, Persia ramah lal pathum dang an lo chhuak ang a, a palîna chu midang zawng aiin a hausa fâl hle ang; a chakna te, a hausakna te hmangin Grik ram do tûrin mi zawng zawng a chawk tho vang.

³Chumi hnûah lal thiltithe i tak, a duh ang anga che a, thuneihna ropui tak nêna rorêl tûr mi a lo chhuak ang.

⁴A lo dîn chhuah hunah, a ram chu a keh chhia ang a, kâwlkil liah then darh a ni ang; mahse a thlahte hnênah a ni lo vang a, a rorêl puite tân pawh a ni hek lo vang; a ram chu mi dangte tân chhuhsakin a awm zâwk ang.

CHHIM LEH HMAR LALTE INDONA

⁵Chhim lam lal pawh a lo chak hle ang a, a miliante zînga pakhat chu amah aiin a chak ang a, lalna a chang hial dâwn a ni. Ram zau tak chungah ro a rêl ang.

⁶Kum engemawti hnûah an inzawmkhâwm ang a, Chhim lam lal fanu chu Hmar lam lal hnênah inremna siam tûrin a kal dâwn si a; mahse amahin thû a nei tawh lo vang a, amah leh a thuneihna pawh a dîng chang hek lo vang; amah hruaitute, a hringtu leh chûng hun laia amah tichaktute nêna mantîrin an awm zâwk ang.

⁷Nimahsela, a zung aţanga lo chawr chhuak chuan a hmun a rawn luah ang a, sipai rual nêna lo thawkin, Hmar lam lal kulh chu an luhchilh ang a, an va bei ang a, an hneh ang.

⁸An pathiante, an miliante chu salah manin, an thil hlu tak tak, silvar leh rangkachak te chu Aigupta ramah an kalpui vek ang; Hmar lam lal ai chuan a daih rei zâwk ang.

⁹Hmar lam lal chu Chhim lam lal hnênah a lo kal ve ang a, mahse ama ramah a kîr leh ngâl ang.

¹⁰A fapate erawh chuan buaina an chawk chhuak ang a, sipai rual ropui tak an khâwm ang; an tam hneh ang a, an nawr tlang bawk ang; chumi hnûah chuan ama kulh lamah a kîr leh ang a, buaina a chawk chhuak ang.

¹¹Chhim lam lal chu a thinrim êm êm ang a, Hmar lam lal bei tûrin a lo thawk chhuak ang; Hmar lam lal chuan sipai rual tam tak lo khâwm vak mah se, a hmêlma kutah an tlu lût vek ang.

¹²Mi tam tak a kâwi hâw duah duah avângin a thinlung a lo chapo ang a; a sîng têlin a that ang a, mahse a chak phah chuang lo vang.

¹³Hmar lam lal chuan a hmaa mi aia nasain sipai rual a khâwm leh chiam ang a, kum engemawti hnûah sipai rual ropui tak leh râlthuam tam zâwk nêna a lo thawk leh dâwn a ni.

¹⁴Chutih hunah chuan Chhim lam lal do tûrin mi tam tak an rawn thawk chhuak ang. Inlârna tihlawhtling tûr tingin i mite zînga mi kawlsente pawh an rawn inlek ve bawk ang a; mahse tlu leh mai tûr an ni.

¹⁵Tichuan, Hmar lam lal rawn thawk thla chuan mual pâwng siamin an hung hnan ang a, kulh nei khawpui chu an la ang; Chhim lam lal sipaite chuan an chelh lo vang. Sipai thlan chhuahte pawhin lo dang tûrin chakna an nei hek lo vang.

¹⁶Amah do tûra lo kal chuan a duh duhin a ti ang a, tûma'n an chelh lo vang. Tihchhiat theihna nêna ram ropuiah chuan a dîng ang.

¹⁷“A ram pum chakna nêna luh a tum ang a, mi tha takte pawh an tel ve ang a, chutiang chuan a ti ang. A tihchhiat theih nân a hnênah hmeichhe fanu a pê ang a; mahse a lamah a țang chuang lo vang a, a pui bawh hek lo vang.

¹⁸Chumi hnûah thliarkâr lam a hawi ang a, tam tak a la ang. Mahse hotu pakhatin a sawichhiatna chu a tihtâwpsak ang a; a tihtawp hnûah amah beih lêt nân a hman thung ang.

¹⁹Chumi hnûah ama rama kulh awmna lam chu a hawi leh ang a; mahse a tlûk phah ang a, hmuh tûr a awm tawh lo vang.

²⁰“Amah thlaktu lo chhuak chuan lalram ropui tak hnênah chhiah a tuk ang a; mahse ni rei lote hnûah, thinurna leh indona avâng pawh ni lovin, tihbora a ni ang.

²¹A aiawhin mi sual tak a lo chhuak ang a, lal an châwimâwi thin ang pawh an pe lo vang; mahse nêlawm hmêl taka insiamin, bumna hmanin lalram chu a chang ang.

²²Tuilian chaknain a hmâa thil awm apiang chu, thuthlung hotupa pawh ni se, hnâwl bo zêl an ni ang.

²³Inremna a siampui zet hnûah vervêk takin a che zui ang a, mi tlênte hmanin a intichak leh dâwn a ni.

²⁴Ram bial hausa lai takah chuan, râlmuang âwm takin a lût ang a; a pate leh a pute tih ngai loh chu a ti ang; râllâk sum te, hausakna leh an rawk sumte chu a sem darh ang; kulh nei khuate bei tûrin a ruahman ang a, mahse hun rei lote chauh a daih ang.

²⁵“A chakna leh a huaisenna chu sâwm khâwmin, sipai rual ropui tak nêl Chhim lam lal chu a rûn ang a. Chhim lam lal chuan a sipai rual ropui leh thiltitheite chu indo tûrin a chawh tho vang a; mahse a lo hneh chuang lo vang, phiarrûkna nêna an rawn beih dâwn avângin.

²⁶Ni e, chaw tuihnai a lo kîlpuite ngei chuan an tiboral ang; a sipai rualte pawh hnâwl bo an ni ang a, mi tam tak chu thah an ni ang.

²⁷Hêng lal pahnihte hian intihchhiat vê vê tum rân chungin dawhkân pakhat kîlin dâwt an inhrilh tawn ang; mahse an tuang hauh lo vang, a tâwpna hun chu ruat lâwk sâ diam a nih avângin.

²⁸Hausakna sum tam tak nêl ama rama a kîr leh laiin, thuthlung thianghlim thiat tumna thinlung a pû ang a; thil a tihchhiat hnûah ama ram lamah a haw tawh ang.

HMAR LAM LALIN PATHIAN A SAWICHHIA

²⁹“Hun ruatah a lo kîr leh ang a, chhim lamah a kal ang a; mahse a kal hmasak leh hnunung zâwk ang kha a ni tawh lo vang.

³⁰Kupra ațangin amah bei tûrin lawng rual an lo kal dâwn si a; a mangang hle ang a, thuthlung thianghlim bawhchhe tûrin thinrim takin a lo kîr leh ang a, thil a tichhe buaih buaih ang. “Tichuan a kîr leh ang a, thuthlung thianghlim bawhchhetute thû chu a ngaihven hle ang.

³¹Sipaite a khâwm chiam ang a, hmun thianghlim chu an tibawrhâng ang a; ni tina inthâwina te chu a tibo ang a, a hmunah chuan tikhawlohnâ thil tenawm an dah ang.

³²Suhsualna nêna thuthlung dotute chu fakdernain a tikhawlo bawh ang; nimahsela, an Pathian hre rengtute erawh chu chak

takin an awm ang a, thil ropui takte an ti ang.

³³Chûng mite zînga a ngaihna hriate chuan mite an zirtîr ang; mahse ni tam tak chhûng chu khandaih te, meialh tea tihhlum an ni ang a, sala manin, rawk an tâwk ang.

³⁴An tlûk hunah chuan puihna an dawng tlêm hle ang; mahse tam tak chuan a der maiin an zawm ang.

³⁵An zînga thenkhat, hriatthiamna neite chu a hun tâwp thlengin thlîtfîma, tihthianghlîma, tihvâr ngaiin an tlu ang; chutiang tih nâna hun ruat chu a la ni cheu si a.

³⁶“Lal chu a duh dân dânin a che vêl ang a: pathian dang zawngte aia sângin a intilian ang; pathiante Pathian chu a sawichhia ang a, thinurna hrîkthlâk zawh a nih hmâ chu a tuang zêl rih dâwn a ni; ruat lâwk tawh chu hlen chhuah tûr a ni si a.

³⁷A thlahtute Pathian te, hmeichhe duh zâwng te, pathian dang te pawh ni se, engah mah a ngai lo vang; chûng zawng zawng ai pawhin amah chu a indah sâng zâwk dâwn a ni.

³⁸Chûngte aiah kulhte pathian a châwimâwi zâwk ang a; a thlahtute la hriat ngai loh pathian chu, rangkachak leh silvar te, lunghlute leh thil duhawm takte nêl a châwimâwi zâwk ang.

³⁹Tichuan, ram dangte pathian, a la pawm tûrte hmanin kulh nghet ber berte chu a bei ang a, a tiropui bawh ang; mi tam tak chungora rorêltuah a siam ang a, hlâwkna ûmin ramte a sem ang.

HMAR LAM LAL HNEHNA

⁴⁰“Hun tâwpah chuan, chhim lam lalin a rawn bei ang; Hmar lam lal chu tawlailîr te, sakawr chung chuang mite leh lawng tam tak nêl, thâwngaleivir angin a rawn thawk ang; ramahte chuan a lût ang a, hneh taka chîmin a paltlang ang.

⁴¹Ram Ropuih pawh a lût ang a, ram tam tak a titlâwm ang; hêng ram: Edom te, Moab te leh Ammon mi challangte erawh chu ani lakah chuan an him ang.

⁴²Ram hrang hrang chungah kut a lek ang a, Aigupta ram pawhin a pumpelh lo vang.

⁴³Rangkachak leh silvar dahthâtna te, Aigupta thilhlu zawng zawng chungah te thû a nei ang; Libia hote leh Ethiopia miten a hnung an zui ang.

⁴⁴Nimahsela, khawchhak lam leh hmar lam ațanga chanchin thar lo thlengin a rawn timangang ang; tichuan, thinur êm êmin, tiboral tûr leh mi tam tak nuai bo vek tûrin a thawk chhuak ang.

⁴⁵A lal in chu tuiptui leh tlâng thianghlim ropui tak inkârah a hûng ang; mahse, a hun tâwp a thleng ang a, tûma'n an pui tawh lo vang.

BUNG 12

HUN TAWP HRILH LAWKNA

¹“Chutih hunah chuan, i mite vêng reng thîntu, hotu ropui tak, Mikaela a lo ding chhuak tawh ang; Buaina hun a lo awm ang a, Hnam a lo pian tîrh ata chumi hun thlengin Chutiang rêng rêng chu a la awm ngai lo vang. Chutih hunah chuan i mite, an hming lehkhawba chuang tawh phawt chu, Chhan chhuah an ni ang.

²Leia vut zînga lo muhîl tawh tam tak an lo tho leh ang a, Thenkhat chu chatuana nunnaah, Thenkhat chu chatuana

mualphona leh hmuhsitawmna hmunah.

³A finge chu vân êng angin an êng ang, Kawng dika hruaitu mi tam tak chu Arsîte angin chatuanin an êng tawh ang.

⁴“Mahse, nang Daniel, hun tâwp lo thlen hmâ zawng chuan thû chu thup la, lehkhabu chu châr tlat rawh; mi tam tak an tlân vêl ruai ang a, hriatnate chu a la pung deuh deuh dâwn si a,” a ti a.

⁵Tichuan kei, Daniela hian ka han en a; mi dang pahnih an lo ding ve a, pakhat chu luikam he lamah, a pakhat zâwk chu luikam lehlamah a ni a.

⁶Mi pakhat hian mi dang, puan zaisîna inthuum, luipui tui chung awm hnênah, “Hêng thilmakte hi engtikah nge a lo thlen kim dâwn?” tiin a zâwt a.

⁷Luipui tui chung awm, puan zaisîna inthuum chuan a kut ding lam leh a kut vei lam vân lamah a phar chho va, “Hun khat leh hun hnih leh hun chanvê chhûng a ni ang; hnam thianghlimte chakna zawng zawng tihchhiatsak vek an nih hunah, hêng thilte hi a thleng kim tawh ang,” tiin chatuana nung renga hmingin chhia a chhâm a.

⁸Chû thû chu hre mah ila, a awmzia ka hre thiam lo va. “Ka lalpa, hêng thil tâwpna hi eng ang nge ni ang?” ka ti a.

⁹Ani chuan, “Daniel, kal mai teh, thûte chu thup tlat a ni a, tâwpna hun thlengin châr tlat a ni.

¹⁰Mi tam tak chu tihthianghlîma, tihvâra, then thianghlim an ni ang a; mi suaksualte erawh chuan suaksual takin an ti zêl ang; mi suaksual tumahin a ngaihna an hre lo vang a, mi finge chauhin an hre thiam ang.

¹¹“An ni tin inthâwina an lak bosaka, tihṭiauna thil tenawm an dintîr aṭangin, ni 1290 a awm ang.

¹²Ni 1335 lo thlen hun thlenga nghak fan fantute chu an nihlawh e.

¹³“Nang erawh chu, a tâwp thlengin kal zêl ang che; i châwl hahdam ang a, nî-te a lo tâwp hunah, i rochan luah tûrin i lo tho leh dâwn nia,” a ti a.

HOSEA

Ziah tu: Hosea • Ziah kum: B.C.715-710

Hosea hming awmzia chu Lalpan a chhandam tihna a ni. Juda lal pali, Uzzia, Jothama, Ahaza leh Hezekia te hun laia zâwlni a ni a; a hun laia zâwlni dang awm vê te chu, Israel ramah Amosa, Judai ramah Isaia leh Mika te an ni. Hosea hrilhlâwkna thupui chu: Israel chu nupui rinawm lo, pasal te uirêsan chîng anga khaikhinna a ni; a taka entîr nân Hosea chu a nupuiah nawhchizuar a neihtîr a; tihtak nangialin Hosea nupuiin a pasal a fawr bosan dân leh Israel hnamin mitem pathian biaa amah siamtu Pathian laka a rinawm lohzia chu a takin Hosea bu hian a lantîr. Pathian chuan a mite an rinawm loh hian a tuar a; mahse sual a ngai thei si lo; sual lam âwn tlat ama mite a hmangaih a bâng thei bawk si lo. Amah hawisantuten a hnên lam hawia, a hnêna an lo kîr leh chuan, Lo-ammi (Ka mi ni lo) a tih tawh pawh Ammi (Ka mite) tiin ngaihdam a inpeih reng a, a nupui mâk chu koh leh a inhuam reng a ni. Hei hi tun laia ringtute leh Pathian inkâra thil awm dân a la ni zêl. Hosea Bu hi Bible-ah a bu 28-na a ni a, bung 14 a awm a, châng 175 a awm bawk. Hun hnununga Israel hnam tundin lehna thutiamin a khâr a ni.

BUNG 1

HOSEA CHHUNGKUA

¹Judai rama Uzia te, Jothama te, Ahaza te leh Hezekia te lal laia, Israel ramah chuan Joasa fapa Jeroboama lal laia Beria fapa Hosea hnêna LALPA thu lo thleng chu.

HOSEA CHHÛNGKUA

²Hosea hmanga LALPAN thu a sawi tan lai khân, LALPA chuan Hosea hnênah: “Va kal ta la, nupuiah nawhchizuar va nei la, Nawhchizuar lakah chuan fa nei ang che, Ram hian nasa taka nawhchi zuara, LALPA an uirêsan tâk hi,” a ti a.

³Tichuan a va kal a, Diblaim-a fanu Gomeri chu a va nei a, ani chuan nau a pai a, fapa a hrinsak a.

⁴LALPA chuan a hnênah: “A hmingah Jezreel-a sa rawh, Rei lo têah Jehua chhûngte chungah Jezreel-a thisen phubâ ka la ang a, Israel chhûngte lalram ka titâwp dâwn si a.

⁵Chumi nîah chuan Israel thalngul chu, Jezreel Ruamah ka titliak ang,” a ti a.

⁶Nau a pai leh a, fanu a hring a. Pathian chuan a hnênah: “A hmingah Lo-Ruhama-i sa rawh, Israel chhûngte chungah zah ka ngai tawh dâwn si lo va, Ka hruai bo daih dâwn a ni.

⁷Juda chhûngte chungah erawh chuan zah ka ngai ang, LALPA an Pathian chuan a chhandam ang. Thalngul te, khandaih te, indona te, Sakawr te, sakawr chungchuang mite hmang chuan a chhandam lo vang,” a ti a.

⁸Lo-Ruhama-in hnutê a nghei chuan nau a pai leh a, fapa a hring a.

⁹Tichuan Pathianin: “A hmingah Lo-Ammia sa ang che, Ka mite in ni ta si lo va, In Pathian pawh ka ni hek lo vang.

ISRAEL TUNDIN LEHNA

¹⁰“Nimahsela, Israel fate tam tûrzia chu Tuifinriata ãiavut ang maiin Chhiar sên loh, teh sên rual loh an ni ang. Heti hi a ni ang a, ‘Ka mite in ni lo’ an tihna aiah khân, ‘Pathian nung fate in ni’ an ti ang.

¹¹Juda fate leh Israel fate chu Hruai khâwm an ni leh ang a, An hotu tûr anmahni’n an la ruat ang; Ram chhûng ațangin an lo chhuak ang a, Jezreel nî chu a va ropui dâwn êm!

BUNG 2

PATHIAN MI RINAWM LOTE

¹In unaupate hnênah, ‘Ka mite u’ ti ula, In farnute hnênah, ‘Lainatawm te u,’ ti ang che u.

PATHIAN MI RINAWMLOTE

²In nu hi khing rawh u, khing rawh u; Ka nupui a ni lo ve, a pasal ka ni hek lo! A nawhchizawrhna chu ama hmuh phâk lohvah dah bo sela, A uirêna chu a hnute kâr ațangin dah bo rawh se;

³Chuti lo zawng, saruakin ka siam ang a, A pian nî angin ka hlîm ruak vek mai tûr asin. Thlalêr angin ka siam ang a, Ramro angin ka siam bawk ang a, Tuihâlîn ka hrêk hlum dah ang e.

⁴“A fate chungah pawh zah ka ngai lo vang, Nawhchizuar fate an ni si a.

⁵An nuin nawhchi a zuar miau va; Anmahni paitu ber a zahpuaiwm si a. ‘Ka ngaihzâwngte chu ka va ûm teh ang, Anni chu ka chaw leh ka tui te, Ka sahmul leh ka puan zaisîn te, Ka hriak leh ka in tûr mi petute an ni si a,’ a ti a.

⁶Chuvângin, ngai teh, I kawng chu hlîngin ka hung ang a, Dai ka theu nnan ang a, Tichuan, kalkawng a hmu thei lo vang.

⁷A ngaihzâwngte chu a ûm ang a, Mahse, a ûmphâk lo vang; A ni, a zawng vêl ang a, a hmu si lo vang. Tihian a ti ang a, ‘Ka pasal hmasa ka pan leh mai teh ang, Tunah chuan ka tân a ãa tawh zâwk si a,’ tiin.

⁸Baala tâna an hman buh te, uain thar te, hriak te, silvar leh rangkachak ka tihpunsakte chu Keima pêk a ni tih rêng an hre lo.

⁹Chuvângin, ka buh chu a seng hunah, Ka uain pawh a thar hunah ka lakîr leh ang a, A saruak khuhna tûra ka pêk Ka sahmul leh ka lâ zaisîn chu ka chhuhsak leh ang.

¹⁰A hur herhna saruak chu a ngaihzâwngte hmuhah ka hlîm lanskang ang a, Ka kut ata tuman an chhan chhuak lo vang.

¹¹A intihhlîmna zawng zawng, A Kût ni te, a Thla Thar te, a Sabbath te leh—A Kût ni dang zawng zawng ka tihtawp sak ang.

¹²Hêng hi ka ngaihzâwngte hlauh mi pêk a ni’ a tih ãhîn, A grêp leh a theipui kûngte chu ka tihchhiatsak ang. Ramngaw-ah ka siam ang a, Ramsâten an ei ral vek ang.

¹³Baala hun laia rimtui a hâlsak aiah Ka hrem dâwn a ni. Bengbeh leh ãhî awrhin a inchei a, A ngaihzâwngte hlîr a pan a, Kei erawh chu mi theihngihl ta,” LALPAN a ti.

A MITE TÂNA PATHIAN ZAHNGAIHNA

¹⁴“Chuvângin, ani chu ka thlêm ang a, Thlalêrah ka hruai chhuak ang a, Thlamuanna thu ka fah ang.

¹⁵Chuta a grêp huan chu ka pê ang a, Akor Ruam chu beiseina kawngkaah ka siamsak ang; Tah chuan a tleirâwl lai angin a zai ang a, Aigupta ram ațanga a lo chhuah lai ang khân.

¹⁶“Chutih huna thil awm dân tûr chu, ‘Ka pasal’* tiin min ko tawh ang a, ‘Ka pu’** min ti tawh lo vang,’ LALPAN a ti.

¹⁷A kê ațangin Baala hmingte ka tihbosak ang a, Chûng hmingte chu an lam tawh ngai lo vang.

¹⁸Chumi hunah chuan an tân thuthlung ka siamsak ang, Ramhnuai ramsa te, chunglêng sava te, Lei chung a bawkvâka kal chite tân. Lei ațangin indona thalngul leh khandaih ka tibo vang a, Thlamuang takin an mu tawh ang.

¹⁹Kumkhua atân nupuiah ka hual ang che; A ni, dikna leh rorêlna te, Hmangaih lainatna leh zahngaihna Ka tân ka hual ang che.

²⁰Rinawmnain ka hual ang che a, LALPA chu i lo hre dâwn nia.

²¹“Chumi nîa thil awm dân tûr chu, LALPA chuan, “Ka chhâng zêl ang, Vânte pawh ka chhang lêt ang a, Lei hi anrawn chhâng lêt bawh ang,” a ti a.

²²Leiin buh te, uain thar te, Hriak tein a lo chhâng lêt ve ang a, Jezreel hnênah chhânna an pê ang.

²³Anni chu ka tân leiah ka phun ang a, Lainatna dawng lote chu ka lainat ang a; Ka mi ni hauh lote pawh ‘Ka mi in ni e!’ ka ti ang a, Anni pawhin, ‘Kan Pathian i ni!’ an la ti ang!

BUNG 3**PATHIAN HNENAH ISRAELTE AN KÎR LEH ANG**

¹LALPA chuan ka hnênah, “Kal leh ta la, hmeichhia, kawppui nei lai, uirenu ngei va ngaizâwng leh rawh, pathian dangte bîa, ringlo mite grêp ro an ngainat chung pawha LALPAN Israel fate a hmangaih tlat ang hian,” a ti a.

²Tichuan, silvar tangka sekel 15 leh, barli chhangphut homer khat leh a chanve-in chû nu chu ka va lei ta a.

³“Ka hnênah ni rei tak awm ang che; nawhchi i zuar tûr a ni lo va, mi dang i kawp tûr a ni hek lo—tichuan kei pawh, i ta ka ni dâwn nia,” tiin ani chu ka hrilh a.

⁴Israel fate pawh hun rei fê chu lal te, hotu te, inthâwina leh lungphun serh te, puithiam kawr te leh aienna milimte nei lovin an awm dâwn si a.

⁵Chûng hnûah chuan, Israel fate chu an kîr leh ang a, LALPA an Pathian leh, an lal Davida chu an zawng leh dâwn a ni. Hun hnunungah chuan LALPA òihin a t̃hatna zâr an zo tawh ang.

BUNG 4**ISRAELTE CHUNGA PATHIAN VUINA**

¹LALPA thu hi ngaithla teh u, Nangni Israel fate u, Ram chhûnga chêngte chungah LALPA a lâwm lo a ni: “Thutak leh zahngaihna rêng a awm lo va, Hê ramah hian Pathian hriatna a awm lo ve.

²Chhechham, dâwt sawi, Tualthah, rûkrûk leh uirêna te, Serh leh sâng pawh a awm ta lo, Thisen chhuah lah a indawt zut a.

³Chuvângin, ram chuan a tuar na hle ang a, A chhûnga chêngte pawhin an chêr phah ang, Ram sâ te, chunglêng savate pawh; A ni, tuifinriata sanghate chenin lâk bo an ni ang.

⁴“Tumah inkhing suh ula, inhaul tawn hek suh u; I mite chu puithiam khingtute ang mai an ni si a.

⁵Chuvângin, chhûnah in la tlû ang a, Zânah pheii chuan zâwlneite pawhin an la tlûkpui ang che u; I nu pawh ka tiboral ang.

⁶Ka mite chu hriatna tlâkchham vânga tihboral an ni. Nang pawh hriatna i hnar avângin, Ka puithiam i nihna ata ka hnâwl vê ang che; I Pathian dân te i theihngihl vei a, Kei pawhin i fate ka theihngihl vê ang.

⁷“An pung telh telh a, Ka lakah an sual tulh tulh a; An ropuina chu mualphonaah ka la chantîr ngei ang.

⁸Ka mite sualnaah an lo in ei thâuva; An suahsualna lamah an rilru a bet tlat a.

⁹Mipuite ang thovin puithiamte pawh an awm ang. An nun dân ang zêlin ka hrem ang, An thiltih ang zêla thungrulh an ni bawh ang.

¹⁰An ei țeuh ang a, an puar chuang lo vang, Nawhchi an zuar ang a, an pun phah lo vang; LALPA thu âwih an bânzan ta si a.

ISRAELTE MILEM BIAKNA

¹¹“Nawhchizawrh, zu, uain thar te hi thinlung salbettu a ni.

¹²Ka miten an milem pathiante an rawn a, An tiangin an inchnân lêtîr vêl a. Nawhchizawrhna thlarauvin a hruai sual a, An Pathian chu an hur bosan ta.

¹³Tlâng chhîpah te an inthâwi a, Tlâng chungah rimtui an hâl a, Sasua, poplar leh thîl thing hnuaiah, A thingbuk hlim a nawm avângin. In fanuten nawhchizawrh an chîng a, In fa-mote lah uirê chîng bawh.

¹⁴“In fanuten nawhchi an zawrhin ka hrem lo vang a, In fa-mote an uirêin ka hrem hek lo vang; Mipate ngei pawhin nawhchizuar an tawm fâlpui a, Maichâm nawhchizuar anên an inthâwi a, Chuvângin, hre thiam lo mipuite chu an tlu chhia ang.

¹⁵“Nang Israel, nawhchizawrh chîng mah la, Juda chuan chîng ve suh se. Gilgal-ah lo chho suh ula, Beth Aven-ah chho hek suh u, LALPA hming chhâlin chhia chham hlek suh u.

¹⁶“Israel chu a luhlul a, Bâwngla luhlul ang mai a ni; Tûnah chuan phûla berâm angin LALPAN a tlattîr ang.

¹⁷“Ephraim chu milem nê an inzawm ta, A awm awmin awm teh se.

¹⁸Helna zû an in a, Nawhchi zawrh an bâng thei lo ve. An rorêltuten mualphona an ngaina si a.

¹⁹Thliin a thlain a thlawhpui daih a, An inthâwinat avângin an la mualpho hle ang.

BUNG 5

ISRAEL LEH JUDATE CHUNGA RORÊLNA A HNAI

¹“Puithiamte u, hei hi hre rawh u! Aw Israela chhûngte u, ngaihven ula, aw lal chhûngkuate u, ngaithla teh u! Rorêlna chu in ta a ni si a, Mizpa tân thang in ni thîn a, Tabor chungalên zâr in ni.

²Helhote ka zilhauh chung pawhin, Tualthahnaah an inrawlh thûk hle si.

³Ephraïma ka hria alâwm, Israela pawh ka lakah thup a ni lo; Aw Ephraïm, tunah nawhchizawrh i chîng a; Israela chu a bawrhbang zo ta.

⁴“An thiltih thînte chuan Pathian lama Hawikîr lehna a kâwk lo, Nawhchizawrhna râuvîn a man ta, LALPA pawh an hre lo ve.

⁵Israela chaponal chu an hmêlin a lantîr a; Chuvângin, Israel leh Ephraïm chu an sualnaah an tlu ang, Juda pawh an zîngah a tlu ve ang.

⁶“An berâm leh bâwng rualte nêl LALPA zawng tûrîn an kal ang a, Mahse ani chu an hmu lo vang; Anni lakah a inlahrang tawh si a.

⁷LALPA lakah tenawm takin an ti a, Hnam dang fate an hring a. Thla Thar chuan an rochante nêl lam a ei zo vang.

⁸“Gibea-ah berâmpa kî hâm ula, Rama-ah tâwtawrâwt hâm rawh u! Beth Aven-ah ring takin âu rawh u, ‘Aw Benjamin, i hnung lam kha en rawh!’ tiin.

⁹Ephraïm chuan zilh a tawh hunah a chhe vek ang; Israel hnamte zîngah thil thleng ngei tûr ka puang ta.

¹⁰“Juda hotute chu ramri sawn bo chîng an ni a, Ka thinurna chu an chungah tui angin ka leih bua ang.

¹¹Ephraïm chu rorêlna hmanga rahbeha tihchhiat a ni, Mihring tih dân zuia a kal luih tlat avângin.

¹²Chuvângin, Ephraïm eichhetu rannungah ka chang ang a, Juda chhûngte tiṭawihtu ka ni bawh ang.

¹³“Ephraïm chuan a natna a inhmua, Juda’n a hlîam tuar a inhmuhin, Ephraïm chu Assuria hnênah a kal a, Lal Jareba hnênah mi a va tîr a; Mahse a tidam thei lo vang che a, I hlîam pawh a tidam thei hek lo vang.

¹⁴Ephraïm tân sakeibaknei ang ka ni ang a, Juda chhûngte lakah sakeibaknei vânglai angin. Keima’n pawt sawmin ka kal bo daih ang; Ka pu bo vang a, tuman an chhan lo vang.

¹⁵An dik lohzi a inhriat hmâ chu Ka awmna hmunah ka kîrsan daih ang. Chumi hnûah ka hmêl an zawng ang a; An tuar laiin min zawng ruai ruai ang.”

BUNG 6

SIM TURA SAWMNA

¹Hawh u, LALPA hnênah i kîr leh ang u; Min lo pawt sawm tawh nâ a, min tidam leh dâwn si a; Min vaw tawh nâ a, min tuam dam leh dâwn alâwm.

²Ni hnih hnuah min tinung leh ang; A hmâah dam taka kan awm theih nân, Ni thum niin min kaitho leh ang.

³I hre thiam ang u khai, LALPA hriatna hi a ûmin i ûm ang u. Zîng khawvâr angin a lo kal ngei ang; Ruah angin kan hnênah a lo thleng ang, Lei tihuhtu ruah hmasa leh ruah hnuhnung ang hian.

SIM DUH LO ISRAEL LEH JUDA

⁴“Aw Ephraïm, engtin nge maw ka tih dâwn che le? Aw Juda, engtin nge ka tih tâk ang che? Min hmangaihna chu zîng chhûm zâm leh, Zîng daifim anga ral leh mai a ni si a.

⁵Chuvângin, anni chu zâwlneite hmangin ka râwt a, Ka kamchhuak thuin ka tihlum a; I rorêlnate chu kâwlpê zuai zuai ang a ni a.

⁶Inthâwina aiin khawngaihna ka duh zâwk si a, Hâlrâl thilhlante aiin Pathian hriatna ka duh zâwk a ni.

⁷“Mihringte angin thuthlung an bawhchhia a; Ka lakah vervêk takin an ti a.

⁸Gilead chu thilsual titute khawpui Thisena tihbawhlhlawh a ni.

⁹Rûkru rualten mi an lo châng thîn angin, Puithiam rualin Sekem kawngah mi an lo that thîn; Thil zahthlak tak an ti a ni.

¹⁰Israel chhûngkuaah thil râpthlak ka hmu a: Ephraïm-ah nawhchizawrhna a awm a; Israel chu a bawrhbang zo ta.

¹¹Aw Juda, i tân rah seng tûr ruatsak i ni, Ka mi saltângte ka hruaikîr hunah.

BUNG 7

¹“Israel tihdam ka tum laiin, Ephraïm sualna a lo lang a, Samari suahsualna pawh chuti bawh. Inbum te an chîng si a; Chhûng lamah rûkru a lût a; Pâwn lamah suahmang rualin min suam a.

²An suahsualna zawng zawng ka hre reng tih An thinlungin an ngaihtuah lo; An thiltihte ngeiin a hual vêl ta a, Ka hmâa awm an ni si a.

³An suahsualnain lal an tilâwm a, An dâwtthuîn an hotute an tilâwm bawh a.

⁴“An vaiin uirê vek an ni. Chhang urtûin thuk a tihsat chungal—A chhang hmeh sa a inur lai mêka A meichhawm a chawlsan rih ang hi a ni.

⁵Kan lal châwimâwi nî-ah chuan Hotuten zû an tulh rui a; Hmusittute rualin bân a lo phar vêl thîn.

⁶An thinlung chu thuk anga sâa insiamin, An lo châng ru thîn a; Chhang siamtu zankhuaa muhîla, Zînga a rawn alh chhuak phut ang hi a ni.

⁷Thuk ang maia sâ an ni a, An rorêltute pawh an that a; An lalte pawh an tlu zo ta. An zîngah mi koh nachâng hria lah an awm hek lo.

⁸“Ephraïm chu hnam dangte nêl an chî a in pawh ta; Ephraïm chu chhang lehlam chauh ur hmin ang a ni.

⁹Ram dang miten a chakna an ei sak a, Ani lahin a hre si lo; A sam pawh a ṭuak ṭeuh tawh a, Chu pawh chu a hre chuang lo.

¹⁰Israel chaponal chu a hmêlin a tilang a, LALPA an Pathian hnênah an kîr duh lo va, Thil tinrêngah amah an zawng duh si lo.

HNAM DANG RIN A SÂWT LO

¹¹“Ephraim chu thuro lungmâwl ang mai, hriatna nei lo a ni– Aigupta lam an auh loh leh Assuria lam an pan thûl.

¹²An kalna apiangah, an chungah ka lèn ka zâr ang a; Chunglêng savate angin ka phih âwk ang; An inkhâwm hovin an chanchin an hriat angin Ka hrem hlawm dâwn a ni.

¹³“Kei min tlânsan ta si a, an chung a va pik êm! An chan tûr chu chhiatna mai a ni, Ka lakah an hel tlat si a le! Kei chuan tlan chhuak tawh mah ila, Anni chuan dâwtthu mai min hrih thîn.

¹⁴An khum laizâwla an chiau vawng vawng pawhin Thinlung takin min au chuang lo. “Buh leh uain thar duha inkhâwm an ni a, Ka lakah chuan an hel tlat a.

¹⁵Ka zirtîr a, ka thum chak sauh sauh va, Mahse, tha lo takin min piar baw si a;

¹⁶An hawi kîr leh ta, Chungnungbera lamah ni lovin; Thalngul rintlak loh ang mai an ni. An hotute chu khandaiha tihtlûk an ni ang, An jawng chaltlai êm avângin. Chû tak chû Aigupta rama hmuhsit an hlawhna tûr a ni.

BUNG 8**ISRAELTE UIRÊNA**

¹“I hmuiah tâwtawrâwt chuktuah rawh! LALPA chhûngte chungah mupui angin a lo thawk dâwn e, Ka thuthlung an bawhchhiat avâng leh Ka dân an zawm duh loh avângin.

²“Ka Pathian, kan hria che alâwm!’ Tiin Israelte chuan min âu vang.

³Israelte chuan thil tha an hnâwl si a; Hmêlmaten an ûm dâwn a ni mai.

⁴“Ka thu lovin lal te an insiam a; Ka hriatpui hauh lohvin lalte an ruat a. An silvar leh rangkachakin Mîlem pathian an insiam chawp a– An chhiat phahna tûr mai a ni si a.

⁵Aw Samari, i bâwngnotê chu hnâwl a ni ta! An laka ka thinrimna a alh hluah hluah a– Dem kai lo hian engtikah tak awm ang che maw?

⁶Israel ram pawh heti tho hi a ni: Themthiam kutchhuak a ni a, Pathian a ni si lo; Samari bâwngno lim chu tihsawm a ni ang.

⁷“Thli an chîng a, Thâwngaleivir an seng ang. Thlai kûngin zîk nei lovin, Ei tûr a chhuah lo vang. Rah pawh chhuah mahse, Ram dang miten an tlan zo vang.

⁸Israel chu chîmrâ a ni ta; Jentailte zîngah an tâl vêt ta mai mai a, Hlutna nei lo bêl ang maiin.

⁹Assuria bêl tûrin an chho va, Ram sabengtung vâk rawlai ang maiin; A ngaihzâwngte lakah Ephraim chu a inphalrai ta.

¹⁰A ni, hnam dangte zîngah inzuar mahse, Ka hruai khâwm leh tho vang; Lal chak takte thuhnuaiah Lungngaiin an la tuar dâwn si a.

¹¹“Ephraim-in sual tâna mâichâm a siam t̃euh hi, An sual phahna lek a lo ni zâwk e.

¹²Ka dân thu ropuite ka ziahsak tawh na a, Thil danglam daihah an ngai si a.

¹³Ka hnêna inthâwi thilhlanah sâte hlânin an ei a, Mahse LALPA chuan a pawm si lo. An khawlohnate hre rengin a hrem ang a, Aigupta lamah an kîr leh ang.

¹⁴“Israel chuan a Siamtu theihngihlin, Tempulte a din vêt a; Judate pawhin kulh nei khuate an tipung a; Mahse, a khawpuiah mei ka thlâk ang a, A lal inte a kâng ral vek ang.”

BUNG 9**ISRAELTE SUAL HREMNA**

¹Aw Israel, hnam dangte hlim dânin hlim ve bual bual suh, I Pathian nawhchi zawrhan lek i ni asin. Hruihzâwl apiangah man neia i inzawrh thîn hi.

²Hruihzâwl leh grêp sâwrkhurin A chawm zo lo vang, Uain thar tûr rêng a awm lo vang.

³LALPA ramah an chêng ve lo vang a, Ephraim chu Aigupta ramah kîr lehlin, Assuria ramah chaw thianghlim lo an ei ang.

⁴LALPA hnênah uain thilpêk an hlân lo vang a, An inthâwinaten a tilâwm hek lo vang. An tân lusûnna chaw-ah a chang ang a, A ei apiang an bawhlhlawh ang. An chaw chu puar leh fânna bâk a ni lo vang a; LALPA in a thleng pha hek lo vang.

⁵Inkhâwmpui urhsûn niin eng nge i tih anga, LALPA kût niah chuan eng nge i tih ve ang le?

⁶Chhiatna avângin an liam zo ta. Aigupta chuan a lo man khâwm ang a, Memphis chuan a lo phûm ang. An silvar thilhlûte chu kângthaiin a bâwm ang a, An puan inte chu hlîngin a bâwm ang.

⁷Hremna nî chu a lo thleng tawh a; Thungrulhna nî pawh a thleng ta. Israel chuan a hria alâwm! Zâwlnei chu mi mâwl a ni a, Thlarau mi pawh mi â-ah an chang zo ta. In khawlohna leh in huatthu a chhiat êm avângin.

⁸Ephraim vêngtu chu ka Pathian hnêna awm a ni; Zâwlnei kalna apiangah thang an kam a– A Pathian inah pawh inhuatna a awm.

⁹An khawlohna thûkzia chu, Gibea mite hun lai ang mai kha a ni. An khawlohna a hre reng ang a; An sualnat pawh a hrem ang.

¹⁰“Israelte ka hmuh khân Thlalêra grêp ang lek an ni a; In thlahtute kha theipui rah huna a hmin hmasate angin ka hmû a. Mahse, Baal Peor hmuna an va kal khân, Kha mualphonaah khan an intulût ta a; An duh zâwng thilah an intitenawm zo ta vek a.

¹¹Ephraima ropuina chu sava angin a la thlâwk bo ang– Nau pai te, rai te, nau hringte an awm tawh lo vang!

¹²An fate chu tipuitling mahse, An vaia an la sîn vek tûr an ni. A ni, ka hawisan huna an chungpik tûrzia chu âw!

¹³Tura angin Ephraima chu hmun nuam taka phun niin ka hmû a, Mahse, Ephraima fate chu tualthattu hnêna hruai tûr lek an ni.”

¹⁴Aw LALPA, pê ang che– Eng nge i pêk ang le? Nau chhiatna chhûl leh Hnute tui nei lo pê ang che!

¹⁵An suahsualnat chu Gilgala mi vek a ni, Tah chuan anni chu ka haw ta a. An thilsual tih avângin Ka in ata ka hnawt chhuak ang a, Ka hmangaih tawh hek lo vang. An hotute lah helhmang vek an

ni si a.

¹⁶Ephraim chu vuak a ni ta, An zungte nên lam a ro zo va; Rah an chhuah lo vang. A ni, fa pawh hring dawn se, An duh lai, an rîla rah chu ka thahsak ang.”

¹⁷Thu an awih loh êm avângin Ka Pathianin a la paih chhuak ang a; Hnam dang zîngah an vâkvai ang.

BUNG 10

ISRAEL SUALNA LEH SALTANNA

¹Israel chu grêp rah duh tak, Ama tân maia rah chhuak a ni. Rah seng tûr a ngah poh leh Maichâm a tipung mai a; A ram hausak dân ang zêlin An lung serhte an chei nasa ting mai a ni.

²An thinlung a phîr a; A mawh an phur ang. An maichâmte a tichim ang a; An milim lungphunte a tichhia ang.

³Anni chuan, “LALPA kan tîh loh vângin, Lal pawh kan nei ta lo ve. Lal pawh nei ila, Eng nge min tihsak chuan ang le?” an la ti ang.

⁴Thu an sawi mai mai a, Dâwt thuthlung siamin chhia an chhâm a. Leilet thlûra hnâm tûr to angin, rorêlna a lo to thîn.

⁵Samari khuua chêngte chu Beth Aven bâwngno avângin an hlâu ang. Mipuiten an sîn ang a, Puithiamte an chiau vawng vawng ang— An ropuinain a kalsan tâk avângin.

⁶An pathian lim chu Assuria-ah kalpui a ni ang, Lal Jareba hnêna thilpêk atân. Ephraim chu a mualpho ang a, Israel-in ama remruat a la zahpui ang.

⁷Samaria chu, tui chung a hnâwl angin An lal chawpin hnâwl bo a ni ang.

⁸Israelho sualna, Aven hmun sâng chu Tihchhiat a la ni ang. An maichâmah chuan hling leh buar a to ang; Tlângte hnênah chuan, “Min khuh rawh!” an la ti ang a, Mualte hnênah, “Min delh rawh!” an la ti ang.

⁹Aw Israel, Gibeah hun ata tawh i la sual reng mai; Tah chuan an la ding reng si a. Gibeah khuua khawlohna fate chung a indona khân An hnên a thleng pha ve si lo.

¹⁰Ka duh hunah ka hrem mai ang. An bawhchhiatna thuah hnih vânga ka phuar hunah chuan Anmahni dotu tûrte an la tang khâwm ang.

¹¹Ephraim chu bâwngla sâwi zal, Buhchîl peih tak a ni; A nghâwngah nghâwngkawl ka bât ang a, Ephraim chu lei ka rihtîr ang. Juda pawhin lei a let ang a; Jakobah lei tlang a chhu dip ang.”

¹²Mahni tân diknain chi tuh ula; Khawngaihna in seng rawh u; In khêkkhal lo chu let rawh u, LALPA zawn hun a ni tawh si a, Dikna rawn vûr tûr che u-a a lo kal hmâ ngei hian.

¹³Suahsualna lei in let a; Khawlohna in seng a. Dâwt rah in ei a, Mahni duh dânin in kal tlat a, Mi chak ngah lamah in inchhuang vêl a.

¹⁴Chuvângin, i mite zîngah buaina a chhuak ang a, I kulh zawng zawng an rawk chereu vek ang, Indo laia Salamanan Beth Arbel a sawisaka— Nu pakhat a fate chung a sâtsawm ang mai khân.

¹⁵Aw Bethel, i chungah pawh an la ti ve ang, I suahsual êm avângin. Israel lal chu khawfingchah rualin Tihboral dêr a ni ang.

BUNG 11

PATHIANIN ISRAELTE A HMANGAIH ZUI ZEL

¹“Israel chu a naupan lai aţang tawhin ka hmangaih a, Aigupta aţangin ka fapa atân ka ko chhuak a.

²Koh an nihin an hla tulh tulh a; Baalte hnênah an inthâwi a, Milim kerchawpte hnênah rimtui an hâl thîn.

³“Ephraim chu kal ka zirtîr a, A bânah ka kai a; Mahse, ka tihdam an ni tih pawh an hre dêr si lo.

⁴Mihring hruihrualin ka hnûk ang, Hmangaihna hruihrualin, Kei hi an nghâwngkawl hlihsaktu ang ka ni a, Anni chu sâin ka châwm thîn a ni.

⁵Aigupta ramah an kîr leh lo vang; Mahse an inlamlêt duh loh avângin Assuria-hote chu an lal an ni ang.

⁶A khawpuiahte chuan khandaih a lêng ang a, An thurâwn avâng ngein A ram te, a mipuite a tiboral ang.

⁷Ka mite hian mi tlân bosan an tum reng a. Chungnungbera chu ko thîn mahse, Châwimâwi tum rêng an awm si lo.

⁸“Ephraim, engtin nge ka bânas theih ang che? Israel, engtin nge mi kutah ka hlan theih ang che? Engtin nge Adma angin ka siam theih ang che? Engtin nge Zeboim angin ka awmtîr theih ang che? Ka thinlung chhûng hi a inlet but but a; Ka lainatna che lah chawthawhin a awm si a.

⁹Ka thinrim sosâng ka hrithla lo vang a; Ephraim chu ka tichhe leh tawh lo vang. Kei chu mihring ni lovin, Pathian ka ni a, In zînga awm Mi Thianghlina chu; Hlauhawmna nên ka lo kal lo vang.

¹⁰“LALPA hniakhnung an zui ang. Ani chu sakeibaknei angin a rûm dawn a ni. A rûm hunah chuan, A fate chu khawthlang lam aţangin an lo khûr haw ang;

¹¹Aigupta aţangin sava angin an lo thlâwk hâu ang a, Assuria ram aţangin thûro angin an lo haw ang. Tichuan, anmahni in lumah ka chêntîr tawh ang,” LALPAN a ti.

PATHIANIN EPHRAIM A DEM

¹²“Ephraim chuan dâwtthu in mi hual vêl a, Israel chhûngte pawhin bumna; Juda chuan Pathian thu a la âwih zêl a, Mi Thianghlina, rinawma lakah pawh.

BUNG 12

¹“Ephraim chuan thli a ring a, Khawchhak thli te a ûm thîn a; Ni tinin dâwtthu leh tlâkranna a tipung thîn. Assuria-ho nên thû an thlung a, Aigupta lamah hriak a tawhlût baw a.

²“LALPA chuan Juda-ho lakah vuina a nei baw, Jakobah chu a awm dân angah hrem a ni ang a, A thiltih ang zêlin a thungrûl ang.

³Chhûl aţang rêngin a û ke-artuiaha a man a, Ama chaknain Pathian a buan a.

⁴A ni, Vântirhkoh a buan a, a hneh a; Tâp chungin, a malsâwmna a ngên chiam a. Bethelah chuan a hmu ta a, Tah

chuan kan hnênah thu a sawi a.

⁵Chû chu LALPA, Sipaihote Pathian hi a ni. Hriat reng tûra a hming chu LALPA tih hi a ni.

⁶Tichuan, i Pathian hnênah kîr la; Zahngai tak leh dik takin rorêl bawk la, I Pathian chu nghâk tlat zêl ang che.

⁷“Kanaan-ho vervêkzia chu! An kutah bûkna dik lo a awm reng a; Mi an nêk rân mai a ni.

⁸Ephraïma chuan, ‘Ka hausa ta a, Ka inlamuk tawh bawk a; Ka thawhrimna zawng zawngah Khawlohna sual engmah an hmu lo vang,’ a ti a.

⁹Nimahsela, Aigupta ram ațang tawh khân, Kei hi LALPA i Pathian chu ka ni asin; Kût hun in hman lai ang khân Puan inah ka la chênțîr leh ang che u.

¹⁰Zâwlneite hmangin thu ka sawi țhîn a, Inlârinate ka tipung bawk țhîn; Zâwlneite rawngbâwlinaah tehkhin thu ka hmang țhîn.”

¹¹Gilead chuan pathian limte nei țeuh mahse, engmahlo mai an ni— Gilgalah bâwngpain inthâwi mahse, An maichâmte chu leilehna thlûra hnâwl chhekhâwm ang lek a la ni ang.

¹²Jakoba chu Suria ramah a tlânchhia a; Israelan nupui man a tuak a, Nupui hlawh tûrin berâm a vêng a.

¹³Zâwlnei hmangin LALPAN Israela chu Aigupta ațangin a hruai chhuak a, Zâwlnei hmang vêka humhim a ni.

¹⁴Ephraïma chuan a tithinur êm êm a; Chuvângin an thisen mawh chu an chungah LALPAN a phurhtîr a, An demna chu an chungah a tlâktîr ve ang.

BUNG 13

ISRAELTE CHUNGA HREMNA NASA

¹Ephraïma’n khûr chunga thu a sawi chuan, Israel ramah a intilian țhîn a; Baala biaa a bawhchhiat chuan, a thih phah ta a.

²Tunah phei chuan an sual deuh deuh va, Milimte an inker chawp a, Thiam takin silvar milim an chhûng a; Kut themthiamte kutchhuak vek a ni si a. “Inthâwina hlântu apiangin bâwngno chu fâwp rawh se!” an ti a.

³Chuvângin, zîng lama țiauchhûm leh Dai tla ral leh thuai țhîn ang hi an ni ang; Buh chîlna hmuna buhsî thli len bo leh Meikhu chhuahnaa meikhu ang lek an ni ang.

⁴“Kei erawh chu Aigupta ram ațang tawha LALPA in Pathian ka ni a; Keimah lo chu Pathian dang in nei tûr a ni lo, Keimah lo chu chhandamtu dang reng an awm lo.

⁵Thlalêrah khân ka hria che asin, Ramro tak hmuna khân.

⁶Ei leh in an hmu a, an intitlai a; An puar fânna in thinlung a tichapova; Tichuan, min theihngihl ta a.

⁷“Chuvângin, an lakah sakeibaknei ang ka ni ang a; Keitê angin kawng lakah ka lo châng ang;

⁸A note laksak savawm ang maiin ka kawlh ang a, An nâkruh ka ham thlêrsak ang, Sakeibaknei angin an sa ka ei ang a, Ramsaten an pawt darh vek ang.

⁹“Aw Israel, tihchhiatin i awm a, Mahse, keiman ka țanpui ang che.

¹⁰I Lal ka ni bawk ang; I khawpui zawng zawng chhan theitu tûr Mi dang an awm dâwn em ni? ‘Lal leh rorêltu min pe rawh,’ titu in rorêltute chu khawiah nge?

¹¹Thinrim chungin lal ka pe che u a, Thinur takin ka la bo leh ta a ni.

¹²“Ephraïma khawlohna chu an chhinchhiah a; A sualna pawh khâwlkhâwm a ni.

¹³Hmeichhe nau vei lungngaihna angin a chîm ang. Fapa fing lo tak a ni a, Nau pianna hmuna awm nachâng a hre dâwn si lo va.

¹⁴“Thlân thiltihtheihna lakah ka tlan chhuak ang a, Thihna ata ka chhan chhuak ang. Aw Thihna, i tûrah ka țang ang a! Aw Thlân, i tân boralna ka ni ang! Ka lakah lainatna mit chu thup a ni si a.”

¹⁵A unaute zînga rinawm a ni chung pawhin, Khawchhak thliin arawn nuai ang; LALPA thli chu thlalêr ațanga lo thawk tûr a ni. A tuihnâte chu a ro ang a, A tuikhurte chu a kangchat vek ang. A thilhlû dahkhâwm țhâ țhâ a rawk fai vek ang.

¹⁶A Pathian laka a hel tlat avângin Samari chuan a mawh a phur ang. Khandaiha tihhlum an ni ang a, An nausênte an sâtsawm ang a, Hmeichhe raipuarte pum an tai thlêr ang.

BUNG 14

HUN HNUHNGA ISRAELTE TUNDIN LEHNA

¹Aw Israel, LALPA i Pathian hnênah kîr leh rawh, Khawlohnaah i lo tlu tawh si a;

²Thu thlen tûr nei chungin LALPA hnênah kîr leh rawh u. A hnênah heti hian ti rawh u, “Khawlohna zawng zawng la bo la; Khawngaihna min lo pawm ang che, Kan hmu bâwngnote hi inthâwi nân kan hlân dâwn si a.

³Assuria chuan min chhandam lo vang a, Sakawr chungah kan chuang hek lo vang, Kan kutchhuakte hnênah, “Kan pathiante in ni” kan ti tawh hek lo vang. I hnênah hian fahrahten lainat an hlawh țhîn a ni.”

⁴“An hnungtawlhna ka tihdamsak ang a, An laka ka thinrimna a kiang tawh si a, Anni chu ka hmangaih ringawt mai dâwn a ni.

⁵Israelte tân daifim ang ka ni ang, Lili pâr angin a țhang duah ang a, Lebanon angin zung a kai darh zêl ang.

⁶A zârte chu a țâwi darh luai ang a; Olive thingkung anga mawiin, Lebanon angin a rimtui ang.

⁷A hlim bêl țhîntute pawh an lo kîr leh ang; Buh kûng angin an nung sâr ang a, Grêp hrui angin an duah hlauh hlauh ang. Lebanon uain ang maia rimtui an ni ang.

⁸“Ephraïma chuan, ‘Milem mai mai hi eng atân nge ka tih tawh ang?’ Eng nge a nih ka hriat tawh khawp mai hi maw. Kei chu fâr kûng hring dup ang ka ni a; I rahte chu keimahah hian hmuh a ni e.

⁹Mi fing chu tu nge ni? Hêng thilte hi hre thiam rawh se. Tu nge remhria? Man thiam rawh se. LALPA kawngte chu a dik si a; Mi dikten an zawh țhîn a, Bawhchhetute erawh chuan an tlûk phah țhîn.

JOELA

Ziah tu: Joela • Ziah kum: B.C. 835-796

Joela hrilh lâwkna thupui chu LALPA Ni chungchâng a ni a, Joela hming awmzia chu LALPA (Jehova) chu Pathian a ni tih a ni. A bu chhûngah hian Israel lal leh hnam dang lal hming a chuan tel loh avângin a ziaak hun lai hriat a tiharsa deuh a; hripui leh khaukhaupten ram chhûng an suasam a, mipuiten an tuarzia te, mahse sima, LALPA lam an hawi chuan Lalpan chutih hun leh, hun hnahnungah malsâwmnain a vûr leh tûr thu te, 'Israel hnam tundin lehna' thû te a sawi uar hle. Bung 3 chauh ni mah se, Joela bu hi Thuthlung Tharin vawi 23 lai a la (quote) chhuak a, a pawimawh bawh a ni ang. Isua leh Johana (Thupuan Bu) ten nî leh thla tihthima an awm tûr thû leh khawvêl hun tâwp dân, LALPA Ni lo thlen huna thil awm dân tûr hi Joela bûa mi tâwma rawn sawi zawm an ni. Mi tin chungah Thlarau Thianghlim leih a nih tûr thu Joela hrilhâwk kha hei ngei hi a ni e tiin Pentikos ni khân Petera'n a puang chhuak tan ta bawh a; tûn thlengin chu Thlarau Thianghlim hnathawh chu khawvêl ram hrang hrangah chhunzawm a la ni ta zêl a ni. Joela bu hi thupui pathumin a then theih: (i) LALPA nîa tuarna lo awm tûr leh tihbo a nih dân tûr (1:1-2:27) te, (ii) Thlarau pêk tiamna thû (2:28-29) te leh (iii) LALPA nîa chhanchhuahna lo awm dân tûr te a ni (2:30-3:21). Joela hi Bible-a lehkhabu 29-na niin, a chhûngah hian bung 3 leh châng 73 a awm.

BUNG 1

RAM CHU TIHCHHIAT A NI

¹Pethuela fapa Joela hnêna LALPA thu lo thleng chu.

RAM CHU TIHCHHIAT A NI

²Nangni upate u, hei hi hria ula, Ram chhûnga chêng zawng zawng te u, in beng chhi rawh u! In dam laiin hetiang hi a thleng ngai em ni? In thlahtute hunah pawh a thleng tawh ngai em ni?

³In fate hnênah hrilh ula, In fate chuan an tu leh fate hrilh sela, Anni chuan an thlah lehchhâwngte hrilh zêl rawh se.

⁴Pangang ei bâng chu, khaukhuap rualin an ei ang a; Khaukhuap rual ei bâng chu thingngêtin an ei ang a, Thingngêti ei bâng chu pangngangin an ei zo vang.

⁵Nangni zungawl veite u, harh ula, tap rawh u; Nangni zu hehho zawng zawngte u, tap chiam rawh u, Uain thar in hmuh phâk tawh dân loh avângin.

⁶Ka ram bei tûrin hnam chak tak, Chhiar sên rual loh an lo chhuak ta si a; An hâ chu sakeibaknei hâ ang a ni a, An ngho chu sakeibaknei ngho lian chi ang a ni a.

⁷Ka grêp huante an chîl chhia a, Ka theipui kûng an tichhe bawh a; Theipui zârte an khel fai vek a, an paih darh a; A zârte lamin an hîk fai lêng a.

⁸Nula thianghlimin a vânglai pasal a sîn angin Saiip puan fêngin tap vak rawh u.

⁹Buhbâl thilhlân leh in tûr thilhlante chu LALPA in ațanga tihbo a ni ta; LALPA rawngbâwltu puithiamho an lungngai a.

¹⁰Lote chu a chul zo ta, ramin a sîn a; Buh hmun a chhe zo va, Uain thar tûr a awm ta lo va, Hriak pawh a awm tawh hek lo.

¹¹Nangni loneitute u, zak ula, Nangni grêp huan enkawltute u, Wheat leh barli seng tûr a riral zawh avângin Rûm vawng vawng rawh u.

¹²Grêp hrui a vuai a, Theipui kûng a ro zo ta; Theibuhfai leh tûm thingte, Apple kungte leh Rama thing tinrêngte pawh a vuai zo ta; Mihring fate lakah hlimna a chuai zo ta.

RAM TÂNA SÛNNA

¹³Puithiamte u, puan vengin sîn rawh u; Maichâma rawngbâwltute u, tap ula; Saiip puan sinin, zankhuua mu tûrin lo kal teh u, Nangni ka Pathian rawngbâwl tute u; Buhbâl leh in tûr thilhlante chu In Pathian In ațangin khap a ni ta.

¹⁴Chaw nghei hun serh hrang ula, Inkhâwmpui urhsîn ko rawh u; Upate leh ram chhûnga mi zawng zawng LALPA in Pathian inah khâwm vek ula, LALPA chu âu vak vak rawh u.

¹⁵Chu nî chu, a va han pawî dân tak êm! LALPA nî chu a hnai tawh si a, Engkimtithian boralna a rawn thlenna tûr ni chu.

¹⁶Kan mit hmuhah ei tûr te, hlimna leh lâwmnate chu Kan Pathian in ata tihbo a ni lo vem ni?

¹⁷Thlai chite chu leiah a riral zo va, Buhzêmtê pawh a chhe rem rum a; Chhêk inte chu a tlabal mai mai a, Buhte lah a ro zo tawh si a.

¹⁸Rante chu an rûm chuah chuah a! Bâwng rualte chu an mangang a, Chaw peh tûr hlobet an nei si lo va; Berâm rual chenin hrem an tuar a.

¹⁹Aw LALPA, ka auh lawm lawm che hi; Hlobet hmunte meiin a kâng fai vek a, Rama thing zawng zawng pawh meiin a kâng fai zo ta.

²⁰Ramsate pawhin an ko che a, Lui tuite a kangchat zo vek a, Hlobet hmunte meiin a kâng fai zo ta si a.

BUNG 2

LALPA NÎ

¹Zion-ah chuan tawtawrâwt hâm ula, Ka tlang thianghlimah chuan inrâlrin nân hâm rawh u! Ram chhûnga awm zawng zawng khûr vek rawh se; LALPA nî chu a lo thleng dân ta e, A hun pawh a hnai ta:

²Thimna nî, dul ruih maiah chuan, Chhûm a zîng a, a thim chhah mup a, Zînga chhûmin tlang a bawh phui mup ang hian. Mipui tam tak leh chak tak, Tûma la hmuh ngai loh an lo thawk ang; Tûn hnua awm leh tawh ngai lo tûr chu, Chhuan tam tak ral hnû thleng pawhin.

³An hma lam chu meiin a kâng fai zêl a, An hnungah meiin a hliau zuai zuai a; An hma lam chu Eden Huan ang ni mah se, Thlalêr ramro anga chhia a hnutchhiah zêl; Eng thil mahin an pumpelh lo vang.

⁴An landan chu sakawr ang a ni a; Sakawr chak chi ang maiin an tlan dur dur a.

⁵An thâwm rîva chu tawlaîr ang a ni a, Tlâng chungachte an zuang vêl a, Meiin buhpâwl a kâng duai duai ang leh, Indo tûra sipai inpeih sa thup ang mai hi an ni.

⁶An hmâa mipuite chu na tuarin an vial ngawl ngawl a; An vaiin an hmêl a lo dâng vek a.

⁷Mi chak tak angin an tlân a, Indo mite angin bangah an lâwn a; Mahni hmazâwnah an pên thup thup a, Tûmah an pêng darh lo.

⁸Tûmah an innêk buai lo va; Mahni hmazâwn theuhah an kal thup thup a. Hriamhreî hmangin an su tlang pawp pawp a, Engmahin an kawng a dâl zo lo.

⁹Khawpui chhûngah an tlân vel ruai a, Kulh chungah te an tlân a; In chhûngah te an lâwn lût a, Rûkru angin tukverhah te an lût a.

¹⁰An hmâah chuan lei a nging dur dur a, Vân pawh a khûr hlawk hlawk a; Nî leh thla a thim khup a, Arsi a êng chuai ruai a.

¹¹LALPA chuan a sipai rualho hmâah âw a chhuah a, A riabûk lah chu a ropui êm êm a; A thupêk hlenchhuaktu chu a chak si a. LALPA nî chu a ropuiin a râpthlak êm êm a; Tûin nge dâwl zo vang le?

SIM TÛRA NGENNA

¹²Chuvangin, LALPA chuan heti hian a ti: “Tâp chungin, lusûn chungin, chawnghei ula, In thinlung zawng zawngin ka lam lo hawi rawh u,” LALPAN a ti.

¹³In puan ni lovin, in thinlung pawthlêr ula; LALPA in Pathian hnênah kîr leh rawh u. Ani chu khawngaihnaa khat, lainatna ngah, thinnel leh zaidam a ni a; Thil tha lo thlentîr tûr laka inlamlêl hreh lo mi a ni.

¹⁴Chuvângin, LALPA in Pathian hnêna Buhbâl leh in tûr thil in hlan avângin, Ani chu inlamlêtin, in lam lo hawiin, Malsawmna a hnutchhiah lo vang che u tih tu nge hria?

¹⁵Zion-ah tâwtawrâwt hâm ula, Chaw nghei hun serh hrang ula, Inkhâwmpui urhsûn ko rawh u;

¹⁶Mipuite ko khâwm ula, Pungkhâwmho chu thian rawh u; Upate pawh ko khâwm ula, Naupangte, hnute hne laite nêl ko khâwm rawh u. Moneituin a pindan chhuahsan sela, Mo pawhin a incheina pindan chhuahsan bawh rawh se.

¹⁷LALPA rawngbâwltu puithiamte chu, Bathlâr leh maichâm inkârâh tãp rawh se; “Aw LALPA, i mite hi zuah la, I rochan hote hi hnam dangte nuihzatbûr leh An thuhnuia an dah phal suh ang che. ‘Khawiah nge an Pathian chu?’ tiin, eng aiah nge hnam dangten an sawi tehlul ang ni?”

RAM TUAI THAR LEHNA

¹⁸LALPA chuan a ram tân thahnem ngaiin, A mite chu a khawngaih êm êm ang.

¹⁹LALPA chuan a mite chu chhângin, “Ngai teh u, buh te, uain thar te, hriak te chu Kham khawpin ka pe ang che u; Hnam dangte sawi chhiat tûrin ka awmtîr tawh lo vang che u.

²⁰“Hmar lam sipai rualte chu ka hnawh kiansak daih ang che u a, Ram ruak leh tiau-ah ka hnawt bo ang, A hma lamin chhak lam tuipui bul, A hnung lamin khawthlang tuipui a ep ang; Râpthlak taka thil an tih avângin An rimchhia chu a uih hluah hluah ang a, A rawn nam chhuak vut vut ang.”

²¹Aw, ram duhawm, hlau suh; LALPA chuan thil mak tak takte a ti si a! Lâwmin, hlim takin awm rawh.

²²Nangni ramsate u, hlau suh u; Hlobet hmunte chu a lo chawr no leh ang a, Thingkungten rah an chhuah leh ang a; Theipui leh grêp hruite pawh an duah tha leh dâwn si a.

²³Nangni Zion fate u, lâwm ula, LALPA in Pathianah chuan hlim rawh u; Rinawm taka ruah hnunng a pêk leh tãk che u hi, In tân ruah a rawn sûtîr leh dâwn asin Ruah hmasa chu, Ruah hnunng pawh thla khatna aţangin a pe ang che u.

²⁴Hruihzâwl chu buhin a khat vek ang a, Tuizênte chu uain thar leh hriakin a liam zawih zawih ang.

²⁵“Tichuan, in hnêna ka rawn tîr ka sipai rual ropui Khaukhup rual te, pangang te, thingngêtte leh Pangangin an ei chhiat kumte kha ka rûl leh ang che u.

²⁶Ei leh in tûr in ngahin, in hnianghnâr hlê ang a, Mak taka hruai thîntu che u LALPA in Pathian hming chu in fak ang; Ka mite chu tihmualphoin an awm tawh ngai lo vang.

²⁷Israelte zînga awm ka ni tih in hria ang; Kei hi LALPA in Pathian ka ni a, Mi dang tumah an awm lo. Ka mite chu tihmualphovin an awm tawh ngai lo vang.

PATHIAN THLARAU LEIH CHHUAH

²⁸“Chumi hnûa thil lo awm tûr chu, Mî* zawng zawng chungah ka Thlarau ka leih ang a; In fanu fapaten ka thû an puang ang, In putarten mumang an mang ang a, In tlangvâltin inlârnate an hmu ang.

²⁹Chûng nî-ahte chuan, ka bâwihpa leh bâwihnite chungah te pawh Ka Thlarau ka leih bawh ang.

³⁰“Lei chungah leh vânah thilmak ka entîr tûrte chu: Thisen te, mei te leh meikhu dîngte a ni ang.

³¹LALPA ni ropui leh tihbaiawm lo thlen hmâin Ni chu thimah a chang ang a, Thla pawh thisenah a chang ang.

³²Tupawh LALPA hming lam apiang Chhandam an ni ang. A thi bângte zînga LALPA hming lamtute tân Zion Tlângah leh Jerusalem-ah chuan chhan chhuahna a awm dâwn si a, Chû chu LALPA lo sawi lâwk tawh kha a ni.

BUNG 3

PATHIANIN HNAM TIN CHUNGAH RO A RÊL

¹“Ngai teh u, chûng nîte leh chûng huna, Juda leh Jerusalema saltângte ka hruai kîr leh hunah chuan,

²Hnam zawng zawng pawh ka khâwm vek ang a, Jehosaphat Ruamah ka hruai thla ang; Chutah chuan, ka mi, ka rochan Israelte chungah an thiltih dân ang zêlin an chungthû ka rêl ang, Hnam tin zînga an hnawh darh vek kha; Ka ram pawh an then darh zo vek a nih kha.

³Ka mite chu thum vâwrin an insem a, Mipa naupangte chu nawhchizuar lei nân te, Hmeichhe naupangte chu an zu in tûr lei nân te an hralh thîn a nih kha.

⁴“Aw Tura, Sidon leh Philistia tuipui kama mi zawng zawngte u, Engti takin nge mi tih in tum le? Ka lakah phuba lâk in tum maw ni? Ka chungah phuba in la a nih teh chuan, In phubâ chu in

lu chung ngeiah rang takin ka la lêt ve nghâl ang.

⁵Ka silvar leh ka rangkachak te in lâksak a, Ka ro thâ thâ in tempulah in thiar lût vei a.

⁶Juda fate leh Jerusalem fate chu An ram ata hla taka in sawn bo theih nân, Grik mite hnênah in hralh bawk thîn a.

⁷“Lo ngai reng ula, in hralhna hmun ata ka rawn hruai chhuak ang a, In thungrulhna chu in lu chung ngeiah ka tlâktîr ve ang.

⁸In fapate leh in fanute chu Juda mite kutah ka hralh ve ngei ang. Anni chuan ram hla taka awm Sebaho hnênah an hralh chhâwng ve ang; LALPA chuan a sawi tawh si a.”

⁹Hnamte zîngah hê thû hi puang rawh u: “Indo tûrin inpeih rawh u! Michakte chu chawk tho ula, Indo mi zawng zawng lo hnai sela, Lo chho rawh se.

¹⁰In leihlehna hriamte chu khandaihah chher ula, In chem kawmte chu feiah chher rawh u; Mi chak lote pawhin, ‘Ka chak a ni,’ ti rawh se.”

¹¹Hnam zawng zawngte u, inkokhâwm ula, lo kal rawh u, A vêl zawng zawngah hian rawn pungkâwm rawh u. Aw LALPA, i mi chakte chu rawn tîr thla vek ang che.

¹²“Hnamte chu lo tho sela, Jehosaphata Ruamah chuan lo kal chho rawh se; Chutah chuan a vêla hnam tin chung a rorêl tûrin ka thû dâwn a ni.

¹³Favah keng rawh u, buhseng a hun tawh hi. Lo kal ula, chhuk thla rawh u le; Sâwrkhur chu a khat ta dêr mai, Tuizêm pawh a liam zawih zawih a An suahsualna a lo va nasa êm.”

¹⁴Mipui tamzia chu, rorêlna ruamah an awm hmur mai! Rorêlna ruamah chuan LALPA nî chu a hnai takzet a ni.

¹⁵Nî leh thla a thim tawh ang a, Arsi êng te pawh a chuai vek ang.

¹⁶LALPA chu Zion aţangin a âu vang a, Jerusalem aţangin a âw a chhuah ang; Vânte leh lei hi a khûr ang a; A mite tân erawh chuan LALPA chu inhumhimna a ni ang, Israel fate tân chakna a ni bawk ang.

¹⁷“Tichuan, kei hi LALPA in Pathian Ka tlâng thianghlim Zion-a chêng ka ni tih in hria ang. Jerusalem chu a lo thianghlim tawh ang a, Ram dang miten an paltlang leh tawh ngai lo vang.”

PATHIANIN A MITE MAL A SÂWM

¹⁸Chûng nîa thil awm dân tûr chu Tlâng liante chu uain tharin a dîr tuah tuah ang a, Mualahthe chuan hnute tui chu a luanin a luang ang, Judai ram luikawr zawng zawngah tui a luang khat vek bawk ang; LALPA in aţangte chuan tuihna a lo luang chhuak ang a, Akasia Ruam a châwm ang.

¹⁹“Aigupta chu a khawro tlawk tlawk ang a, Edom pawh thlalêr ram ro maiyah a chang ang, Juda mite laka an lo duh chhiat êm avâng leh, Anmahni ram ngeiah pawisawi lo thisen an chhuah thîn avângin.

²⁰Judai ram erawh chu kumkhuain a awm reng ang a, Jerusalem chu thang leh thar zêla awm reng tûr a ni.

²¹An thisen mawh ka tlenfai loh chu ka tlêngfai ang; LALPA chu Zion-ah chuan a chêng reng dâwn si a.

AMOSA

Ziah tu: Amosa • Ziah kum: B.C. 760-750

Amosa hming awmzia chu ritphurtu tihna a ni. B.C. zabi 8-na laia Israel hmar lam lalram sualna phurtu a ni a, Judai rama Tekoa khuua berâm vêngtu a ni. A thupui chu, Israel hmar lama miten milem pathian biain, mi retheite an awpbeh nasat avânga an chung Pathian rorêlna lo thleng tûr chungchâng a ni ber. Hmar lamah Jeroboama II, Judai ramah Uzzia te lal lai (B.C. 760-750) vêl kha Israel ramah chuan mite khawsak nawm ve lai, mahse mi hausaten nuam chêna mi rethei leh chanhaite dikna chhuhsaka, mahni chipuite bâwih ang leka an tihretheih lai a ni thung. Khatih huna Pathian zâwlnei Amosa chuan sakhaw hruiatu dik lote chu puithiam an ni emaw, lal an ni emaw pawh ni se, diau hauh lovin, sualna chu a nihna angin a dem thak thak ngam a ni. Mi retheite thlavâng hauhin, Pathianin misualte chu a hrem dâwn a, sala siamtute chu Assuria hmangin salah a la siam ve dâwn. Amosa thuchah laimu chu: Rorêlna dik chu lui angin luang sela, Dikna chu luipui angin luang rawh se, (5:24) tih thu hi a ni. Amosa hi Bible-a lehkhahu 30-na a ni a, bung 9 a awm a, châng 146 a awm bawk.

BUNG 1

HNAME CHUNGA RORÊLNA

¹Juda lal Uzia te, Israel lal Joasa fapa Jeroboama te lal lai, lîrngîn hmâ kum hnihah khân, Tekoa berâm vêngtute zînga mi Amosan Israelte chungchâng inlârna a hmuh chanchin chu.

²“LALPA chu Zion aţangin a âu va, Jerusalem aţangin âw a chhuah a; Berâm tlatna hlobette chu a uai zo va, Karmel tîang chhîp pawh a ro zo ta,” a ti a.

HNAME CHUNGA RORÊLNA

³LALPA chuan heti hian a ti: “Damaska bawhchhiatna pathum pali avângin, A hremna tuar tûr chu ka hlihsak lo vang, Gilead ram chu buhchîl anga thîr zuma an chîl avângin.

⁴Hazaela inah mei ka tîr pheî ang a, Chu chuan Ben Hadada lal inte chu a kâng chhe vek ang.

⁵Damaska kulh kawngkâte ka tichhia ang; Aven Ruama chêngte chu ka tiboral ang a, Beth Eden lal pawh ka tiboral baw ang. Suria mite chu Kirah salah an tâng ang,” LALPAN a ti.

⁶LALPA chuan heti hian a ti: “Gaza bawhchhiatna pathum pali avângin, A hremna tuar tûr chu ka hlihsak lo vang, Edom hnêna pêk tûrin Sala an man zawng zawng an pêk vek avângin.

⁷Gaza kulh chungah mei ka tîr ang a, Chu chuan a lal inte chu a kâng chhe vek ang.

⁸Asdod a mi chêngte chu ka tiboral ang a, Askelon lal pawh ka tiboral baw ang; Ekron chungah kut ka thlâk ang a, Philistia mi thi bângte chu an boral vek ang,” Lalpa PATHIAN-in a ti.

⁹LALPA chuan heti hian a ti: Tura bawhchhiatna pathum pali avângin, A hremna tuar tûr chu ka hlihsak lo vang, Edom hnênah

an sal man-ho an pêk veka, Unau kâra thuthlung pawh an hriat reng loh avângin.

¹⁰Tura kulh chungah mei ka tîr ang a, A lal inte chu a kâng chhe vek ang.”

¹¹LALPA chuan heti hian a ti: “Edom bawhchhiatna pathum pali avângin, A hremna tuar tûr chu ka hlihsak lo vang, Khandaih hmangin a unaupa a ûm vak a, Lainatna rêng a nei hek lo; A thinrimin nasa takin thil a tichhia a, Thinurna a pai reng baw si a.

¹²Teman chungah mei ka tîr ang a, Bozra lal inte chu a kâng chhe vek ang.”

¹³LALPA chuan heti hian a ti: “Ammon mite bawhchhiatna pathum pali avângin, A hremna tuar tûr chu ka hlihsak lo vang, An ram zauh an tumna lamah Gilead-ah hmeichhe naupaite an pir thlêr avângin.

¹⁴Raba kulh chhûngah mei ka chhuah ang a, A lal inte a kâng chhe vek ang; Indo nîa âu ri nuaih nuaih kârah, Thâwngaleivir nîa thlipui tleh hum hum ang hi a ni ang.

¹⁵An lal chu salah an hrui ang a, Amah leh a miliante nêan an man ang,” LALPAN a ti.

BUNG 2

JUDA LEH ISRAELTE CHUNGA RORÊLNA

¹LALPA chuan heti hian a ti: “Moab bawhchhiatna pathum pali avângin, A hremna tuar tûr chu ka hlihsak lo vang, Edom lal ruhte chu chinaia chang khawpa a rawh avângin.

²Moab chungah chuan mei ka tîr ang a, Kerioth lal inte chu a kâng chhe vek ang; Moab chu tâwtawrât leh âu tuar tuar rî leh, Buai nuai nuai kârah a thi ang.

³An zînga rorêltu chu ka that ang a, An milian hote nêan ka that vek ang,” LALPAN a ti.

JUDA CHUNGA RORÊLNA

⁴LALPA chuan heti hian a ti: “Juda bawhchhiatna pathum pali avângin, A hremna tuar tûr chu ka hlihsak lo vang, LALPA dân an hmuhsit avâng leh, A thupêkte an zawm duh loh avângin, An dâwtthu chuan a hrui bo va, Dâwtthu, an thlahtute hrui sualtu chu.

⁵Judate chungah mei ka tîr ang a, Jerusalem lal inte chu a kâng chhe vek ang.”

ISRAEL CHUNGA RORÊLNA

⁶LALPA chuan heti hian a ti: “Israel bawhchhiatna pathum pali avângin, A hremna tuar tûr chu ka hlihsak lo vang, Mi dikte chu tangkaruaa an hralh thîn avâng leh, Pheikhaw bun khata mi retheite an hralh thîn avângin.

⁷Mi retheite lu chungah vaivut takngial pawh an ît a, Pachhiate dikna an thai bosak a. Ka hming thianghlim tibawrhbâng tûrin, Pafa fân nula te an inzen tawm a.

⁸Maichâm awmna tinah puan dahkham phahin an mu thîn a, An pathian inah chuan mi châwi sâ hmangin zu an in thîn.

⁹“Mahse, an hmâa awm Amor-ho, Sidar anga sâng, sasua anga khauk hote kha, Keiman ka tiboral a; Chung lama an rahte leh hnuai lama an zung thlengin ka chhu chat vek a.

¹⁰Aigupta ram ata hruai chhuaktu che u ka ni a, Amor-ho ram in neih theih nân, Kum sawmli chhûng thlalêrah ka hruai che u kha.

¹¹In fapate zînga mi zâwlnei atân ka tung ding a, In tlangvâl thenkhat Nazarit mi atân ka siam baw k a. Aw Israel fate u, chutiang chu a ni lo vem ni?” LALPAN a ti.

¹²“Nangni erawh chuan Nazarit mite chu zû te in pê a, Zâwlneite chu, “Thû puang suh u!” tiin in lo khap vêl a.

¹³“Ngai teh u, tawailîr khata buhphal an phur ang hian, Nangni hian min delh rit a ni.

¹⁴Chuvângin, tlân chak chu michak lakah a boral ang a, Mi chakin a chakna a chhawr thei baw lo vang a, Mi chak pawh an inchhanhim thei hek lo vang;

¹⁵Thalngul hmangtu pawh a ƣang zo bîk lo vang, Ngachak pawhin a pumpelh hek lo vang a, Sakawra chuang mi pawh a inhum thei chuang lo vang.

¹⁶Mi chak leh huaisen ber berte pawh Chumi nîah chuan saruakin an tlânchhia ang,” LALPAN a ti.

BUNG 3

ZÂWLNEI THUCHAH THUNEIHN

¹Aw, Israel fate u, Aigupta ram aƣanga ka hruai chhuah chhûngkuate u, LALPAN a sawisêl dan che u hi lo ngaithla teh u:

²“Khawvêla chhûngkua zawng zawngah nangni chauh hi ka hriat in ni a; Chuvângin, in sualna zozai avâng hian ka hrem dân che u a ni.”

³Inrem zet lovin mi pahni an kal dân thei em ni?

⁴Sa seh tûr nei lovin ngâwah sakeibaknei a rûm ngai em ni? Sakeibaknei vânglaiin sa man nei lovin, a pûkah a rûm dân em ni?

⁵Tawktarh awm lovin, leia thang kamah sava a âwk ngai em ni? Awh nei lovin leia thang kam chu a per thei ngawt em ni?

⁶Khawpuiah tâwtawrâwt an hamin, mi an râlkhêl dân lo vem ni? Khawpuiah chhiatna a thlenin, LALPA tih a ni dân lo vem ni?

⁷Lalpa PATHIAN chuan a chhihhlawh zâwlneite hnênah a thurûk hriattîr hmasa lovin eng thil mah a ti ngai lo.

⁸Sakeibaknei a rûm a! Tu nge hlau lo vang? Lalpa PATHIAN-in thu a sawi a, Tu nge puang lo thei ang?

ISRAELTE SUAL HREMNA

⁹“Asdod lal inahte thu puang ula, Aigupta rama lal inahte chuan puang rawh u: ‘Samaria tlâng chungah pung khâwm ula; An zînga an buai mur mur dân te, A chhûnga an inhnaichhiah zia te chu en rawh u.

¹⁰Tih dân dik pawh an hre lo ve,’ LALPAN a ti, ‘Tharum leh inrawknaa mi thil an lâkte chu an lal inahte an chhêk rei rui mai.”

¹¹Chuvângin, Lalpa PATHIAN chuan heti hian a ti: “Hmêlmaten ram an rawn hual ang a; I chakna thahrui an rawn chhat ang a, I lal inte chu an rawk ang.”

¹²LALPA chuan heti hian a ti: “Berâmpuin sakeibaknei kâ aƣangin A ke pahni leh a beng them emaw tal a chhuhsak hrâm angin, Israel fa, Samari-a chêngte chu khum kil leh a tlâng ang maiin, Pawhchhuahin an la awm ang!

¹³Ngaithla ula, Jakoba chhûngte hrilh rawh u,” Lalpa PATHIAN, sipaihote Pathianin a ti,

¹⁴“An bawhchhiatna avânga Israelte ka hrem nîah chuan, Bethela maichâmahte chuan chhiatna ka thlen ang; Maichâm kîte chu sahchhum veka Leia paih tûr a ni si a.

¹⁵Thlasik in te leh nipui in te chu ka tichhia ang; Saingho inte chu tihchhiat a ni ang a, In ropui tak takte tâwpna nî a ni ang,” LALPAN a ti.

BUNG 4

ISRAELTEN ZILHNA AN PAWM LO

¹Nangni Basan bâwngpui, Samari tlânga chêng, Mi retheite nêkchêpa, Pachhiate rapbeta, Palsalte hnêna, “Zû rawn la ula, i lo in ho teh ang!” titûte u, Hê thû hi lo ngaithla teh u.

²Lalpa PATHIAN chuan a thianghlîmna chhâlin chhia a chham ta: “Lo ngai reng ula, thîr kawmin a hnuh bo che u-a, In thlahte pawh nghakuiin a lak bo nî a lo thleng dân.

³Kulh bang pawpah in chhuak ang a, Mahni hma zâwn theuhah in kal ang a, Harmon-ah paih thlak in ni ang,” LALPAN a ti.

⁴Bethel-ah lo kal ula, bawhchhia ula ti nia, Gilgal-ah bawhchhiatna chu tipung ta che u; Inthâwina te chu hlân tûk tin ula, Ni thum danah sâwma pakhat pe zat zat ula.

⁵Lâwmthu sawi inthâwinaah pawh dâwidim telh ula, Mahni duh zâwng thilhlân te pawh puangin hril ta che u; Chû chu in duh zâwng a nih khâ, aw Israel fate u!” Lalpa PATHIAN-in a tih chu.

ISRAELTEN ZILHNA AN PAWM LO

⁶“In khawpui tinah ha faina ka pe baw che u a. Hmun tinah ei tûr tlâkchhamna nê; Chuti chung pawhin ka hnênah in lo kîr duh si lo,” LALPAN a ti.

⁷“Buh seng hun hmâ thla thum a la awmin, Ruah sîr tûr ka hrênsak che u-a. Khawpui pakhata ka sîrtîr laiin, Khawpui dangah ka hrênsak a. Bial khatah ruah a sîr a, A sîr lohna hmun chu a vuai zo va.

⁸Tichuan, khawpui pahni pathumin khawpui dangah tui in tûr an zawng a, An tlai phah chuang lo va; Chutichung pawhin, ka hnênah in lo kîr duh si lo,” LALPAN a ti.

⁹“Thlai hrî leh ngêtin ka hrem che u-a. In huan te, In grêp hmun te, in theipui kung te, In olive kungte a pun dân veleh, Khaukhaupten an ei zawhsak che u-a; Chuti chung pawhin ka hnênah in lo kîr duh si lo,” LALPAN a ti.

¹⁰“Aigupta rama hripui ang khâ in zîngah ka lêtîr a; In tlangvâlte chu khandaihin ka that a, In sakawrte ka mansak che u-a; In sipai hmun chu uih rimchhiain ka ur vut vut a; Chuti

pawhin ka lam in hawi duh si lo,” LALPAN a ti.

¹¹“Sodom leh Gomorra ka paihlhâk ang khân, In zînga mi thenkhat ka paih thlâ a, Meialh laia thingthu nung pawh chhuah ang in ni a; Chuti pawhin ka hnênah in lo kîr si lo,” LALPAN a ti.

¹²“Aw Israel, chutiang chuan i chungah ka ti ang; Hetiang hi i chungah ka tih dâwn avângin, Aw Israel, i Pathian tâwk tûrin inpei rawh!

¹³Ngai teh u khai, Tlângte din chhuaka, thlî te siama, Mihring te hnênah a ngaihtuahte puansaka, Zîng chu thima chantîra, Lei hmun sâng pal chhuaktu chu A hming chu LALPA, sipaihote Pathian a ni.

BUNG 5

ISRAEL TANA SÛNNA

¹Aw, Israel chhûngte u, nangmahni sùn nâna hê ka thusawi hi hre mawlh teh u:

²Nula thianghlim Israel chu a tlu ta; A tho leh tawh lo vang. Ama ramah hnuchhawin a awm a; Tung dingtu tûr tumah an awm lo.

³LALPA Pathian chuan heti hian a ti: Mi sâng khat thawh chhuahna khuah Mi za chauh an dam ang a, Mi za thawh chhuahna khawpuiah Israel chhûngte tâna la dam chu mi sâwm chauh an ni ang.”

SIM TÛRA NGENNA

⁴LALPA chuan Israel chhûngte hnênah heti hian a ti: “Mi zawng ula, nung rawh u;

⁵Bethel chu zawng suh ula, Gilgal-ah pawh lût suh u, Beerseba-ah pawh va kal hek suh u; Gilgal chu sala tâng mai tûr a ni a, Bethel pawh engmah lo mai a ni dâwn si a.

⁶LALPA chu zawng ula, nung rawh u, Chuti lo zawng, Josefa inah mei angin a alh chhuak ang a, Bethel-ah thelh mit tûr tumah an awm si lova, a kâng fâi vek ang.

⁷Nangni, rorêlna dik thil khâa chantîra, Leilunga dikna luan raltîr mai mai te u!”

⁸Siruk leh Chhohreivûng te a siam a; Thihna hlim chu zîng ênga chantîrin Chhûn chu zân angin thimah a chantîr a; Tuifinriata tuite kova, Lei chungah ruah rawn sûtîr thîntu chu, A hming chu LALPA a ni.

⁹Kulh chungah thinurna a lo thlen theih nân Mi chakte chungah chhiatna a thlen thîn.

¹⁰Kulh kawngkâa zilhtu chu an hua a, Thu dik sawitute chu an ngeih hek lo.

¹¹Chuvângin, mi retheite rapbetin Chhiah angin buh in lâksak a, Lung chherin in sa khep khup mah ula, In luah hauh lo vang le; Grêp huan nuam tak tak in siam a, Chûng aţanga uain te chu in in hlek lo vang.

¹²In bawhchhiatna zozai te leh In sual burû zia ka hai si lo va: Mi dikte tuartîrin thamna in la a; Kulh kawngkâah pachhiate chan ve tûr in lâk pênsak a.

¹³Chutiang hun ţa lo takah chuan Mi fingen ngawih an chuh mai a ni.

¹⁴Thil ţa lo ni lovin, thil ţa zawng ula, Tichuan in nung ang; In sawi ang takin LALPA sipaihote Pathianin a awmpui ang che u.

¹⁵Sual chu hua ula, ţa chu ngaina rawh u; Kulh kawngkâah dikna tung ding rawh u. Tichuan, LALPA, sipaihote Pathian chuan Josefa thlah la dam chhunte chu a khawngaih mahna.

LALPA NÎ

¹⁶Chuvângin LALPA, sipaihote Pathian, LALPA chuan heti hian a ti: “Kawthlêr tinah mi an ţap tlawk tlawk ang a, Kawngpui dung hmun tinah te chuan, ‘E heu! Eheu!’ an ti ang. Loneitute chu sûnpui tûrin an ko ang a, Ţah hla chham thiamte an ruai ang.

¹⁷Grêp huan tinah an ţap ruai ruai ang, Ka rawn hrût tlang dâwn si che u a,” LALPAN a ti.

¹⁸LALPA nî thlahleltute u, in chan a va chau tak êm! LALPA nî chu eng atâna duh nge in nih? Êng ni lovin, thim a ni dâwn asin.

¹⁹Sakeibaknei laka tlânchhiaa, Savawmin a lo tâwk ang mai hi a ni! Anih loh leh, ina va luha, Bang a va vuana, Rûlin a lo chuk ang mai hi a ni!

²⁰LALPA ni chu êng ni lovin, thim a ni lo vem ni? Êng awm hauh lo, thim chhah mup a ni lo vem ni?

²¹“In kût nîte hi ka huain, ka hmusit teh a nia, In inkhâwmpui urhsûn te lah ka lâwm hek lo.

²²Hâlral thilhlân leh buhbâl thilhlante min hlân mah ula, Ka pawm lo vang a, Ran châwm thâuva remna thil in hlan pawh engahmah ka ti hek lo vang.

²³In hla bengchhengte chu ka hnêna ta la bo ula, In tîngtang rimâwite pawh ka ngaithla peih lo ve.

²⁴Rorêlna dik chu lui angin luang sela, Dikna chu luipui angin luang rawh se.

²⁵“Aw Israel chhûngte u, thlalêrah khân kum 40 chhûngin Inthâwina leh thilhlân min hlân em ni?

²⁶Nangmahni siamchawp mai mai In lal Sikkuta in keng zêl a, In milim Kaiuan leh, In arsi pathiante nêk khân.

²⁷Chuvângin, Damaska piah daihah salah ka tântîr ang che u,” LALPA, a hming sipaihote PATHIAN chuan a ti e.

BUNG 6

ZION LEH SAMARI TE ZILHLAWKNA

¹Zion tlânga nuam tâwla awm hote, Samari tlâng chu rinchhana neia, Hnam ropui zînga an milian tak tak, Israel chhûngten an pan huai huaite u, In chung a pik e!

²Kalne khuah kal ula, va en ta che u; Chuta ţangin Hamath khaw ropuiah kal zêl ula; Philistia khawpui Gath-ah chhuk thlâ ula. Chûng lalramte ai chuan in ţa zâwk em ni? An ram nge zâu zâwk nangmahni ram?

³Chhiatna a thleng lawk dâwn lo, titute chung a pik e, Tharum thawhna thlen thuatute an ni si a.

⁴Saingo khuma mu der dera, An thutna nuama zi mar vêla, Berâm rual zînga berâm note leh A huanga mi bâwnng tuaite hmanga intuituaha;

⁵Tingtang nên hla lênglâwnng mai mai saa, Davida ang maia rimâwi hmanraw siam thiam;

⁶Zu pawh nopui ngata dawm thina, Hriak tha ber inchulh thînte chuan, Josefa tuarna pawh an tuarpui ve lo.

⁷Chuvângin, sala tâng hmasâte zîngah ngei salah an kal ve ang, An hlim bûng bûngna chu tihtâwpsak a ni ang.

⁸Lalpa PATHIAN in chhe chhamin, Lalpa, sipaihote PATHIAN-in heti hian a ti: “Jakob-ho chapona chu ka ten a, A lal inte pawh ka hua a; Khawpui leh a chhûnga mi zawng zawng chu, ka mantîr vek ang,” tiin.

⁹In khatah mi sâwm lo la awm ta se, an thi tho vang.

¹⁰A thia laina, ruang hâltu tûrin, in aţanga ruang a lak chhuah dâwnin, in chhûnga awm hnênah, “In hnênah mi dang an la awm em?” a ti ang a. Mi dangin, “Awm tawh lo,” a lo ti ang. Ani chuan, “Ngâwi hmiah rawh! LALPA hming lam ngam rual kan ni si lo va,” a ti ang.

¹¹Ngai teh u, LALPA chuan thu a pe e: In ropui tak chu a thiat darh ang a, In tete chu a chhu sawm bawh ang.

¹²Lungpui chungah sakawrte tlânin, Bâwngpain lei an let dâwn em ni? Nangni chuan rorêlna te chu tûr-ah, Dikna rah chu thil khâ-ah in chantîr tâk hi,

¹³Nangni ‘thil ho mai mai’ chungah lâwma, ‘Kî’ chu kan la a ni lo vem ni, “Keimahniin, kan chakna ngeiin?” titute u.

¹⁴“Lo ngai ta che u, aw, Israela chhûngte u, nangmahni dotu tûr hnam ka tung ding dâwn a ni,” LALPA, sipaihote PATHIAN chuan a ti; “Hamath luhna aţangin Araba Ruam thlengin An sawisa hrep ang che u,” tiin.

BUNG 7

INLÂRNAA KHAUKHUAP

¹Lalpa PATHIAN chuan thil mi entîr a: Ngai teh, thlai hnuhnung chin hun laiin khaukuhap rual tam tak a siam a; chu thlai hnuhnung chu lal chanpual hnim an hleh hnûa mi a ni a.

²Tichuan, chumi rama hnim an ei zawh chuan: “Aw, Lalpa PATHIAN, ngaidam rawh aw, ka ngên a che! Jakoba chu lo ding chhuak lul rawh se, Amah lah a tê hle si a!” ka ti a.

³Tichuan, hemi thûah hian LALPA chu a inlamlêt a. LALPA chuan, “Hê thil hi a thleng leh dâwn lo ve,” a ti ta a.

INLÂRNAA MEI CHU

⁴Lalpa PATHIAN chuan thil mi entîr a: Ngai teh u, Lalpa PATHIAN chuan buaina tichhuak tûrin mei a ko va, chu chuan tui thûk tak leh a ram vêl chu a kângral a.

⁵Kei chuan: “Aw Lalpa PATHIAN, titâwp tûrin ka ngên a che! Jakoba chu lo ding chhuak lul rawh se, Amah lah a tê hle si a!” ka ti a.

⁶Tichuan, hemi thûah hian LALPA chu a inlamlêt a. Lalpa PATHIAN chuan, “Hê thil pawh hi a thleng leh dâwn lo ve,” a ti ta a.

INLÂRNAA SAHAL KHAI

⁷Hê thil hi mi entîr leh a: Ngai teh, LALPA chu sahal khai keng chungin, bang bula ding ka hmu a, a kutin Enremna chu a keng a.

⁸LALPA chuan ka hnênah, “Amosa, eng thil nge i hmuh?” a ti a. Kei chuan, “Sahal Khai” ka ti a. LALPA chuan: “Ngai teh, ka mi Israelte zîngah hian Sahal ka khai dâwn a ni; Ka pêl mai mai tawh lo vang.

⁹Isaka hmun sângte chu tihram a ni ang a, Israel hmun thianghlimte chu tihchhiat a ni ang. Jeroboama chhûngte chu khandaihin ka do dâwn a ni,” a ti a.

AMAZIA HÊKNA

¹⁰Bethel puithiam Amazia chuan Israel lal Jeroboama hnênah, “Amosa chuan Israel chhûngte zîngah a phiar che a. A thu sawi zawng zawng hi ram tân dâwl zawh chi a ni lo vang.

¹¹Amosa chuan tihian a ti: ‘Jeroboama chu khandaiha thah a ni ang, Israelte chu anmahni ram aţangin Sala hruai bo an la ni ngei ang,’ a ti,” tiin thû a thawn a.

¹²Amazia chuan Amosa hnênah: “Nang, hmutheitu! Judai ramah tlânchhe rawh. Chutah chuan chaw va ei la, Chutah chuan thû va puang zâwk ta che.

¹³Bethel-ah chuan thû puang tawh suh, Lal tân hmun thianghlim a ni si a, Lal chênna hmun a nih hi,” a ti a.

¹⁴Amosa chuan Amazia chu a chhâng a: “Zâwlnei ka ni lo va, Zâwlnei fapa pawh ka ni hek lo, Berâm vêngtu mai ka ni a, Theipui rah enkawltu ka ni.

¹⁵LALPAN ka ranrual vêng lai mi hruai a, LALPA chuan ka hnênah, ‘Kal la, ka mi Israelte hnênah thû va puang rawh,’ mi ti a.

¹⁶Chuvângin, tunah LALPA thû chu ngaithla teh: Nang chuan, ‘Israelte do zâwngin thû puang suh la, Isaka chhûngte do zâwngin sawi hek suh,’ mi ti a.

¹⁷“LALPA chuan heti hian a ti: ‘I nupui chu khawpuiah nawhchizuar a ni ang a; I fanu fapate chu khandaiha thah an ni ang; I ram chu tehna hruin an sem darh ang a, Ram tihbawhlhlawhah i thi ang; Israel chu ama ram ata sala hruai bo a ni ngei ang,’” a ti a.

BUNG 8

INLÂRNAA NIPUI THEI

¹Lalpa PATHIAN chuan thil mi entîr a: Chû chu nipui thei bâwm a ni a.

²Ani chuan, “Amosa, eng thil nge i hmuh?” a ti a. Kei chuan, “Nipui thei bâwm,” ka ti a. LALPA chuan heti hian a ti a: “Ka mi Israelte tâwpna chu a lo thleng ta; Ka pêl mai mai tawh dâwn lo.

³Chumi nia tempula an hla tûr chu Tah ruai ruaina a ni ang,” Lalpa PATHIAN-in a ti. “Hmun tinah mitthi ruang a let rem rum ang a, Ngâwi rengin an paih chhuak mawlh mawlh ang.”

⁴Hei hi ngaithla teh u, nangni, tlachhamte eirala, Ram chhûnga retheite tikawnkâw vektute u,

⁵Tihian an ti a: “Buh kan zawrh theih nân Thla Thar chu engtikah nge a ral ang? Wheat kan zawrh theih nân Sabbath ni hi engtikah nge a liam dâwn? Ephah bûk titlêmin Sekel kan tirit ang

a, Bumrain bûkna dawhâ kan siam ang.

⁶Tangkain mi retheite kan lei ang a, Pheikhawk bun khatin pachhiate kan lei ang, Buhfai chhia pawh kan hralh zêl ang,” titute u.

⁷LALPA chuan Jakoba chhuanvâwra chhâlin chhia a chham ta: “An hnathawh pakhat mah ka theihghilh ngai lo vang.

⁸Hei vang hian ram chu a khûrin, A chhûnga awm apiangten an sîn dâwn lo vem ni? Luipui angin a lo lian tual tuala, Aigupta Luipui angin a sosângin a phai leh thîn.

⁹Lalpa PATHIAN chuan, “Chumi nî-ah chuan, Chhûn lai takah nî ka tlâktîr ang a, Nî sat lai takin leilung ka tithim ang;

¹⁰In kûtte chu lusûnnaah ka chantîr ang a, In hlâte chu khawhar hlâah ka chantîr ang; Kâwng zawng zawngah saiip puan ka ventîr ang a, In lû ka tikawh vek ang a, Fapa mal sîn angin ka siam ang che u a, A tâwp chu khâkna nî ang mai a ni ang.

¹¹Lalpa PATHIAN chuan heti hian a ti, “Ngai teh u, nîte chu a lo thleng mêk e,” Ram chhûngah tâm ka tlâktîr dâwn, Chaw tâmna nî lovin, Tuihâlana pawh nî hek lovin, LALPA thu hriat châka tâmna a ni.

¹²LALPA thu hriat châkin Tuipui râl ațanga a râl lehlam thlengin, Hmâr lam leh chhak lam te an dap ruai ruai ang a, Mahse an hmu si lo vang.

¹³Chûng nî-ah te chuan nula thianghlimte, Tlangvâl santhate meuh pawh Tuihâlîn an chau ngawih ngawih ang.

¹⁴Samaria sualna chhâla chhechhama, ‘Aw Dan, i pathian nunna chhâl-in!’ titu leh, ‘Beerseba pathian nunna chhâlîn!’ titu chu, An tlû ang a, an tho leh tawh lo vang,” tiin.

BUNG 9

ISRAELTE TANA CHHIATNA

¹LALPA chu maichâm bula dingin ka hmu a, tihian a ti a: “A nghahchhan nghîng vek khawpin kawngka biangte chu vaw nghek la, An lû zawng zawng keh sawm vek rawh se. Khandaihin ka that phiar dâwn a ni. Tlânchhiate pawhin an pumpelh dâwn lo va, Pûtchhuak hrâmte pawh an him chuang lo vang.

²“Hremhmun pawh zu lai thleng hial mahse, Kutin ka hnûk chhuak leh tho vang; Vân thleng pawhin han lâwn mahse, Chuta ta chu ka hnûk thla tho tho ang;

³Karmel tlâng chhîpah biru mahse, Chutah chuan ka dap chhuak ang a, ka man tho ang; Ka hmuh phâk loh tuifinriat mawngah pawh birû se, Chuta rûlpui hnênah chuan thû ka pe ang a, a lo chuk mai ang;

⁴An hmêlmaten salah hruai daih mahse, Chuta khandaih chu thû ka pe ang a, Chû chuan a tihlum tho vang. An t̄atna tûr ni lovin, anmahni tina tûrin an chungah ka mit a fu reng ang.”

⁵Lalpa, sipaihote PATHIAN chuan, Leilung a khawih hlek a, a tuiiril zawih zawih a, Chuta chêngte chuan lû an sîn ta mai a; A zavaiin Lui angin a lo lian ang a, Aigupta Luipui angin a kâm leh duak mai ang.

⁶Vâna a awmna tûr te a siam a, Leiah pawh a awmna tûr a tinghet a; Tuifinriat tuite ko chhuaka, Lei chungah sûtîr thîntu chu

A hming chu LALPA a ni.

⁷“Ka lakah Ethiopia mite ang tho in ni lo vem ni, Aw, Israel fate u?” LALPAN a ti e. “Israelte hi Aigupta ram ațangin, Philistia mite chu Kaphtor ațangin, Suria mite chu Kir ațangin ka hruai chhuak lo vem ni?

⁸“Ngai teh u, Lalpa PATHIAN mit chu lalram sual tak chungah a fû a, Leilung ațang hian ka tiboral daih dâwn a ni; Jakoba chhûngte erawh chu ka tiboral vek lo vang,” LALPAN a ti.

⁹“Thû chu ka pe dâwn si a, Chhihrîa buh an hrî angin, Hnam tin zînga mi Israela chhûngte chu ka hrî ang a; Buhfang tê ber pawh leiah a tla bo lo vang.

¹⁰“Chhiatna chuan min tlâkbuak ve kher nâng,’ titu, Ka mite zînga misualho zawng zawng chu khandaihin an thi vek ang.

ISRAEL TUNDIN LEHNA

¹¹“Chumi hunah chuan Davida puan in, Tlu chhe tawh chu ka tung ding leh ang a, A chhe laite ka siam t̄ha ang; A chim chhe tawhte pawh, hmâna mi ang khân Ka din thar leh ang.

¹²Edom mi la dam chhunte bâkah, Ka hming pu Jentail zawng zawng an neih theih nân,” Hêng thil zawng zawng titu LALPA chuan a ti a ni.

¹³“Ngai teh u, leilettuin buhsengtu a ûmphâk a, Chi kuitiaktuin grêp rapsâwrtu a ûmphâk a; Hun leh nite chu a lo thleng dâwn e,” LALPAN a ti, Tlângte chu uain thlum t̄ha chiin a dîr tluk tluk ang a, Mual zawng zawng a luan tlang vek ang.

¹⁴Ka mi Israel saltângte chu ka hruai kîr leh ang a; Khaw ram tawhte chu an din t̄ha leh ang a, an chêng bawk ang; Grêp huante an siam ang a, a zû te chu an tlân ang; Huante an siam ang a, a rahte an ei bawk ang.

¹⁵Anmahni ramah chuan ka phun nghet tawh ang a, An hnêna ka pêk ram ațangte chuan pawh chhuahin an awm tawh ngai lo vang,” LALPA in Pathian chuan a ti a ni.

OBADIA

Ziah tu: Obadia • Ziah kum: B.C. 585 vêl

A hming awmzia chu ‘LALPA chibai búktu or LALPA chhiahhlawh’ a ni tih bâk chu Obadia chanchin hi hriat zui a ni lo. A thupui ber chu Edom chhiat tûr chungchâng a ni. Edom ram chu Esauva thlahteho awmna a ni a. Obadia hun laia Edom khawpui chu Sela (a hnua Petra) a ni. Chin hriat lohva kum za tam tak a bo hnûah a khaw hmun hlui chu A.D. 1812 khân an hmu chhuak leh a, Dead Sea chhak lam thlalêr ramro, lungpui lian pui chung a inrem, khawpui danglam tak a ni a, Bible hrilh lâwkna tidika nemnghettu pawimawh tak a ni. Obadia bu hi thupui hrang hrang: (i) Edom chhiatna tûr thupuan (1-9), (ii) Tihchhiat a tawh chhan (10-14) leh, (iii) LALPA Nĭ a Edom chan tûr (15-21) te a ni. Thuthlung Hluia lehkhabu tawi ber a ni a, Thuthlung Thar ziaktuten hemi bú aţang hian thu lak chhuah an nei lo. Obadia hi Bible-a lehkhabu 31-na, bung khat chauh a ni a, châng 21 a awm.

BUNG 1

EDOM HREM A NI DAWN

¹Obadia inlârna. Lalpa PATHIAN in Edom chungchâng heti hian a ti (LALPA hnên aţanga kan thu hriat chu, “Amah nêna indo tûrin i tho vang u,” tiin, hnamte zîngah palai tîr a ni):

²“Ngai rawh, hnamte zînga te tak têah ka siam ang che a; An hmusit hlê ang che.

³I thinslung chapona khân a bum che a, Nang, khâm kâra khawsa mai mai, Ko pang sâng tak luahtu; I rilrûin, “Tu nge leiah mi paih thla thei ang?” i ti vei a.

⁴Mupui angin sâng takah thlâwk chho daih mah la, I bú chu arsi zîngah chhep hial pawh ni la, Chuta ta chu ka phihi thlâ ang che,” LALPAN a ti.

⁵“I hnênah rûkrûte lo kal sela, Zânah suamhmangte lo kal ta sela— An va han sawisa nasa dâwn che êm!— Duhtâwk an ngah thlengin an rawk dâwn lo che em ni? Grêp lotute i hnênah lo kal ta se, Lawh hmaih an nei dâwn lo vem ni?

⁶“Esauva an dap nasat tûrzia chu âw! A ro phûmrûkte lamin an hai chhuak lêng ang chu!

⁷I lama ţang zawng zawngten Ramri thlengin an nawr lui ang che; Ţha âwm taka i bula awmten An bum chein an hneh ang che. I chhang eituten i awh nân thang an kam ang a, Tuman an hre si lo vang.

⁸“Chumi nîah chuan Edom-a mi fîngte tiboralin, Esauva tîang aţangin hriatthiamna ka tihbosak dâwn lo vem ni?” LALPAN a ti.

⁹Aw Teman, Esauva tîanga mi tin suat rêm vek tûra an thawh chhuah hunah chuan, I michak hote chu an va zâm nasa dâwn êm.

EDOMA’N A UNAU A TINAWMNAH

¹⁰“I unau Jakoba chung a i nunrâwnna avângin, Mualphona i la khum ang a, Kumkhuain i boral hlen tawh ang.

¹¹Râl lehlamah i din reng nîa, A sipaite ram dang miten sala an hruai nîa, A kulh kawngkâa ram dang mite an lo luha, Jerusalem chung a ţhum an vâwr lai khân— Nang pawh an zînga tel ve ang chiah i ni.

¹²“I unaute sala an hruai nîa Lo thlîr liam mai mai tûr i ni lo; Juda mipuiten chhiat an tawh nîa Lo lâwm teh sûrh tûr pawh i ni lo; Manganga an awm laia Chaltlai taka lo ţawngkhum tûr pawh i ni hek lo.

¹³Ka miten vanduaia an tawh lai khân An kulh kawngkâah i luhkhung tûr a ni lo. Manganna an tawh nî khân An tuarnate va thlîr kual vêl tûr pawh i ni lo va, An chhiat tawh denchhenin An thil neih lo chuh ve tûr pawh i ni hek lo.

¹⁴Tlân chhuakte lo dangchat tûrin Kawng pêng ţuama lo châng tûr pawh i ni lo va; Mangan laia mi la dam chhunte Lo mantîr tûr pawh i ni hek lo.

¹⁵“Hnam tin chungah LALPA nî chu a hnai tawh si a; I lo tih tâk ang bawkin i chungah tih a ni ve ang a; I thungrulhna chu i chungah a lo lêt vê ang.

¹⁶Ka tîang thianghlîma in in tâk ang khân, Hnam zawng zawngin an in zêl tawh dâwn si a; Nî e, an in ang a, an lem ang a, Awm lo ang mai an ni ang.

ISRAELTE HNEHNA HNUHNUNG

¹⁷“Zion Tlângah chuan chhan chhuahna a awm ang a, Thianghlîmna a awm ang; Jakoba chhûngte chuan an rochan an chang tawh ang.

¹⁸Jakoba chhûngte chu mei an ni ang a, Josefa chhûngte chu meialh an ni ang; Esauva chhûngte erawh chu buhpâwl an ni ang; An hâl ang a, an kângral vek ang, Esauva chhûngte tûmah an dam chhuak lo vang,” LALPAN a lo sawi tawh si a.

¹⁹Esauva tîang chu Chhim lam mite chan a ni ang a, Philistia ram chu Phai rama mite chan a ni ang. Anni chuan Ephraïma leh Samaria ram an nei ang. Benjamina chuan Gilead ram a chang ang.

²⁰Israel fa saltâng chhuak Israel rama awmten Kanaan ram chu Zarephath thleng an luah ang, Jerusalem mi saltâng chhuak Sepharad a awmten Chhim lam khawpuite an chang ang.

²¹Chhan chhuaktu chu Esauva tîangte chung a rorêl tûrin Zion Tlângah a lo kal ang a Lalram chu LALPA ta a ni tawh ang.

JONA

Ziah tu: Jona • Ziah kum: B.C. 785-760

Jona hming awmzia chu Thûro tihna a ni. A thuchah ber chu Pathian zahngaihna a ni a, Pathian chhandamnain Israel hnam bâk a huam zâuzia a entîr nghâl. Israel lal Jeroboama II hun lai (B.C. 793-758) vêla awm a ni (2 Lal. 14:25). Nghapui kawchhûng aţanga nungdama a chhuah leh, Ninevi khawpuia Chanchin Tha hrila, hmasâng khawvêl ringlo mite zînga revival ropui ber thlentû Jona rawngbawlna kha Bible critics tam takin entirna nei thawntu ang leka chantîr an tum ang ni lovin, ataka awm ngei (historical person) a ni tih kan Lal Isuan a nemngnet (Mat. 12:38-42) a; Jona thil tawn aţangin Isuan phûma a awma, a thawhleyna entîr lâwkna angin a sawi a ni (Mt. 12:38-42). Lehkhabu tawi tê si, pawimawh zet mai, mihringte ngaituahna tibuai thei khawp thilmak pai khat tlat a ni. Nghapui chungchâng bâkah, zan khat thila ûm lo zâm duah hluah mai te, hreh tak chung a thusawi chu Pathian thu a nih miau avânga Ninevi mipuiten an lo sim phah duak mai te, Pathianin tihbora a tum pawh a thulh phah ta hial mai te kha sawi nawn a nuam a; Jentailte tâna missionary hmasa, Krista lo entîr lâwktu, hming dai tawh lo tûrte zînga mi a ni. Jona hi Bible-a lehkhabu 32-na niin, bung 4 a awm a, châng 48 a awm bawk.

BUNG 1

JONA THUAWIHLONA

¹LALPA thû chu Amittai fapa Jona hnênah a lo thleng a,

²“Tho la, Ninevi khaw ropui takah chuan va kal la, an chungthû va tângâupui rawh; an suahsualna chuan ka hnên a rawn thlen tâk hi,” tiin.

³Nimahsela, Jona chu a tho va, LALPA hnên ata chu Tarsis lamah tlan bo tûrin a kal ta a. Joppa khuah a chhuk thla a, Tarsis lama kal tûr lawng a hmu a; a chuan man a pê a, LALPA hnên a chu Tarsis-a kal tûrte zîngah lawng-ah chuan a lût ve ta a.

TUFINRIAT CHUNGAH THLIPUI

⁴Mahse, tuifinriatah chuan LALPAN thlipui a tlehtîr a; tichuan, tuifinriatah chuan thli na tak chu a rawn tleh ta a, lawng chu a keh dân ta mai a.

⁵Lawngpute chuan an hlau va; mi tinin anmahni pathian an âu theuh va, lawng tizâng tûrin a chhûnga bungruate chu tuipuih an paih chhuak a. Jona erawh chu lawng chhuat hnuaihnuung berah a chhuk thla a, a mu zâl chu tui takin a lo muhîl daih a.

⁶Lawng hotupa chu a hnênah a lo kal a, “Nang muhîl, engtizia nge ni le? Tho la, i Pathian ko ta che; kan boral lohna tûrin i Pathian chuan min ngaituhsak thei mahna,” a ti a.

⁷Tichuan, an inrâwn khâwm a, “Hawh u, hê chhiatna hi tû vânga kan chung a lo thleng nge ni tih kan hriat theih nân, thum i vâwr ang u,” an ti a. Tichuan, thum an vâwr a, an thumvâwr chu Jona chungah a tla ta a.

⁸Anni chuan a hnênah, “Khawngaihin min hrilh teh! Hê chhiatna hi eng vânga kan chung a lo thleng nge? Eng hnathawk mi nge i nih? Khawî aţangin nge i lo kal? Khawî rama mi nge i nih? Eng hnam nge i nih le?” an ti a.

⁹Ani chuan an hnênah, “Hebrai mi ka ni a; vân Pathian, tuifinriat leh khawmual siamtu LALPA hi ka hlau a ni,” a ti a.

TUIPUIAH JONA AN THLÂK

¹⁰Chuta mite chuan an hlau ta êm êm a, hnênah, “Engati nge hetiang thil te i tih le?” an ti a. A thusawi aţangin LALPA tlan bosan tum a ni tih mite chuan an lo hre ta si a.

¹¹Tihian an ti a, “Hê tuifâwn min tihrehsak tûr hian i chungah engtin nge kan tih dân?” an ti a; tuifinriat lah chu a fâwn nasa tawh tawh mai si a.

¹²An hnênah chuan, “Min châwi kâng ula, tuipuih hian min theh thla mai rawh u; tichuan, in tân tuifâwn hi a reh mai ang. Hê tuifâwn nasa tak hi keimah vâng a ni tih ka hria e,” a ti a.

¹³Nimahsela, lawng mite chuan khawmuala inkhalh chhuah tumin, theitâwpin an kar leh fat fat a; mahse tuipui chu a fâwn nasat zêl si avângin an ti thei ta ngang lo va.

¹⁴Tichuan, LALPA chu an âu va, “Aw LALPA, hê mi nunna avâng hian min tiboral lul suh la, pawisawi lo thisen mawh min phurhtîr lul lo tûrin kan ngên a che; aw LALPA, nanging tha i tih ang zêlin ti ang che,” an ti a.

¹⁵Tichuan, Jona chu an châwikâng a, tuipuih chuan an theh thla a, tuifâwn nasa tak chu a reh ta a.

¹⁶Chû lawnga mite chuan LALPA chu an hlau ta êm êm a, LALPA hnênah chuan inthâwina an hlân a, thû te an tiam a.

JONA TAWNGTAINA LEH CHHAN CHHUAHNA

¹⁷LALPA chuan Jona dawh tûrin sangha lian pui a lo ruat sa diam a. Tichuan, Jona chu sangha pum chhûngah chuan ni thum leh zan thum a awm a.

BUNG 2

¹Sangha pum chhûng aţang chuan Jona chuan LALPA a Pathian hnênah tihian a tawngtai a.

²“Ka mangan êm avângin LALPA chu ka âu va, Ani chuan mi lo chhâng a. “Hremhmun chhûngril aţangin ka âu va, Ka âu i lo hre ta a.

³Thûk takah mi paih thlâ a, Tuifinriat chhûngril daihah chuan, Tui tam takin mi hual vêl a; I tuifâwn inchoawkte chuan mi vûr pil daih a.

⁴Kei chuan, ‘I hmuh phâk lohva paih chhuah ka ni a; Mahse, i tempul thianghlim lam ka hawi leh ang,’ ka ti a.

⁵Tuite chuan mi hual vêl a, ka nun chhûngril a chîm hial a; Tui thûk tak chuan mi tuam vêl a; Hnimte chuan ka lû a tuam vek a.

⁶Tlâng inngahna bul thlengin ka chhuk thla a; Lei chuan a kalhnain kumkhuah atân mi kalh hnan a; Mahse aw LALPA ka Pathian, Nanging khur thûk aţangin ka nunna mi lachhuak leh a.

⁷“Ka nun hi keima chhûngrila a chauh laiin, LALPA chu ka hre reng a; Ka tawngtaina pawh i hnênah, I tempul thianghlimah a lo

chho ta a ni.

⁸“Milem tlâktlai lo ngaisângtute chuan, An chan tûr khawngaihna hi an hnâwl a ni.

⁹Kei erawh chuan i hnênah, Lâwmthu sawi thilhlan ka hlân ang; Ka tiam tawh chu ka hlen bawh ang. Chhandamna chu LALPA ta a ni.” ka ti a.

¹⁰Tichuan, LALPA chuan sangha chu a bia a, khawmualah Jona chu a law chhuak ta a.

BUNG 3

JONAN NINEVI-AH THU A HRIL

¹LALPA thù chu Jona hnênah a lo thleng nawn leh a,

²“Tho la, Ninevi khawpui ropui takah chuan va kal la, thù ka hrilh tâk che kha va hril rawh,” a ti a.

³Tichuan, Jona chu a tho va, LALPA thù angin Ninevi-ah chuan a va kal ta a. Ninevi chu khawpui ropui zet mai, a zâu zâwng pawh ni thum kal a ni.

⁴Jona chu khawpui chhûng, ni khat kal chin chu a han fang tan ta a. “Tûn aţanga ni sawmli-ah Ninevi khawpui hi tihboral a ni dâwn!” tiin a âu va.

NINEVI MIPUITEN THU AN ÂWÎH

⁵Ninevi mipuite chuan Pathian chu an ring ta a, chawnghei tûr thu an puang a, mi tê ber aţanga mi lian ber thlengin saiip puan an sin a.

⁶Chûng thù chuan Ninevi lal beng a lo thleng a; ani pawhin a lalthutthlêng chu a thawhsan a, a lal puan a hlip a, saiip puanin a inkhuh a, vut zîngah a ţu ta a.

⁷Lal leh a miliante chuan thupêk an chhuah a, Ninevi khaw pumah hetiang hian an puangzâr a, Mihring te, ran te, bâwng rual te, berâm rual te rêng rêngin engmah tem pawh tem suh se; an ei tûr a ni lo va, tui pawh an in tûr a ni lo.

⁸Mihring leh sâ rêng rêngin saiip puan sin vek sela, nasa takin Pathian âu rawh se; a ni, mi tinin an thilsual tihte leh an kuta tharum an thawh thin te chu sim vek rawh se.

⁹Kan boral loh nân Pathian chuan a rilru lamlêtin, a thinurna nasa tak aţang chuan a inlamlêl lo vang tih tu nge sawi thei?” tiin.

¹⁰Tichuan, an awm dân sual hawisana an thil tihte chu Pathianin a lo hmu a; an chung a chhiatna thlen a tum thù a lo sawi tawh pawh chu Pathian chuan a ţulh a, a ti ta lo a ni.

BUNG 4

JONA THINRIMNA LEH PATHIAN NGILNEIHNA

¹Jona erawh chu a lâwm lo nasa mai a, a thinur ta êm êm a.

²Tichuan, LALPA hnênah a ţawngtai a, “E khai, LALPA, kan rama ka awm lai khân ka sawi lâwk rêng lo vem ni? Chuvângin Tarsis lamah ka tlân bo ta a nih kha; nang lah chu khawngaihna leh zahngai thei Pathian, thinnel, lainatna ngah si, chhiatna thlen duh lo mi i ni tih ka hai si lo va.

³Chuvângin aw LALPA, tunah hian ka nunna hi la tawh mai rawh, hetia nun reng ai chuan ka tân thih a ţa zâwk e!” a ti a.

⁴LALPA chuan, “I thinrim mai hi i tidik em ni?” a ti a.

⁵Tichuan, Jona chu khawpui aţang chuan a kal chhuak a, khawpui chhak lamah chuan a han ţu a. Tah chuan chhâwlbûk a zâr a, khawpuiah chuan eng thil nge thleng dâwn tih thlîrin, a daihlamah chuan a ţu a.

⁶LALPA Pathian chuan Jona hrehawmna lo chhâwka, a lû zâr hlim tûrin ûm zâm tûr a lo buatsaih diam a. Chû ûm zâm avâng chuan Jona chu a lâwm êm êm a.

⁷Mahse, a tûk khua a lo vâv chuan Pathianin pangngang a tîr a, ûm chu a ei chhum a, a lo vui ta a.

⁸Ni a lo tlâng sâng a, Pathian chuan khawchhak thli lum chak tak a tlehtîr a, ni sâ chuan Jona lû chu a em tlawk tlawk a, a thidang ta hial a. Thih a dîl ta ruai a, “Ka tân hian dam aiin thih a ţa tawh zâwk a nih hi,” a ti a.

⁹Pathian chuan Jona hnênah, “Thlai chungchânga thin i ti-ur ringawt hi a dik em ni?” a ti a. Ani chuan, “Ka thinrim hi ka tidik chiah a ni, thihna hial pawh thleng ang i hmiang!” a ti a.

¹⁰Mahse LALPA chuan, “He ûm zâm, i hahpui loh, i thantîr pawh ni lo, zan khata lo awma, zan khata thi leh mai mah ka lainat e, i ti a.

¹¹Hê Ninevi khaw ropuia mihring zozâi, an dîng leh vei pawh thliar hrang thei lo nuai khat leh singhni h aia tam bâkah—ranrual tam tak awmna hi, ka khawngaih dâwn lo vem ni?” a ti a.

MIKA

Ziah tu: Mika • Ziah kum: B.C. 740-710

Mika hi Moreseth khaw chhuak a ni a, a hming awmzia chu LALPA anpui tihna a ni. Zâwlnei Isaia hun laia mi, an thuziak pawh inzûl tak a ni a, Jeremia pawhin Mika chu lal Hezekia hun lai (B.C. 715-686) a zâwlnei a nih thu a sawi (Jer. 26:18). Kan Lalpa Isuan chhûngkuua indona awm dân a sawi kha Mika 7:6 thu hi a ni (Mt. 10:35-36). Mika hian Pathian mizia a târlan chu, sual ngaithei lo leh haw êm êm, mahse a fa sualte hmangaih tlattu ni baw si a ni. Hmar lama Israel te leh chhim lama Judate chu Pathian lakah an hel a, khawdang an hawisan a. Tichuan, Mika hian vawi tam tak sim tûra hrilh pawha awih duh lote chung a rorêlna leh hremna nasa tak lo thleng tûr thû a puang ta a ni. Mahse an thilsual tihte sima, a lam an hawia, a thu an awih chuan, Pathianin ngaihdam a inpeih reng thu a tel baw. Mika thuchah laimu, Israel zâwlneite thuchah khaihâwmna ni thei hial, LALPAN mihringte hnêna a phût chu: Dik taka tiha, khawngaihna ngainata, tlâwm taka Pathian nêna lên dun (6:8) a ni. Mika hian Isaia ang bawkin Bethlehema Messia-Isua lo pian tûr thû a lo hrilh lâwk a (5:2); nakina Armageddon indona te (4:11-13), kum sang lalram awm dân tûr (4:1-5) te leh Israelte tâna hmalam beiseina thute a hrilh lâwk baw a ni. Mika Bu hi Bible-a lehkhabu 33-na a ni a, bung 7 a awm a, châng 105 a awm baw.

BUNG 1

ISRAELTE CHUNGA RORÊLNA LO THLENG TUR

¹Juda lal Jothama te, Ahaza te, Hezekia te lal laia, Samari khua leh Jerusalem chungchâng a Moreseth mi Mika thil hmuh leh, a hnêna LALPA thu lo thleng chu.

ISRAELTE CHUNGA RORÊLNA LO THLENG TÛR

²Nangni hnam zawng zawngte u, lo ngaihlâ ula! Aw, leilung leh a chhûnga awmte u, ngaihven teh u! Lalpa PATHIAN, LALPA ngei chu a tempul thianghlim aţangin In khawsak dân hretu ni rawh se.

³LALPA chu ama hmun aţangin a lo chhuak dâwn si a; Lei hmun sângte rawn chîl tûrin A lo chhuk thla dâwn a ni.

⁴Mei sâin khawihnûn a titui thîn ang hian, A hnuaia tlângte chu a tui al ang, Awih panga tui luang a thlûr thla sung angin Ruamte chu a khichat riak ruak ang.

⁵Hêng zawng zawng hi Jakoba bawhchhiat vâng leh, Israela chhûngte sual vâng vek zu nia. Jakoba bawhchhiatna chu eng nge? Samari a ni lo vem ni? Khawi hi nge Judai ram hmun sângte chu? Jerusalema mite an ni lo vem ni?

⁶Chuvângin, Samari chu hnawmhnaw chhêkhâwm, Grêp huan hmunah ka chantîr ang; A lungremte chu ruamah ka lum thla ang a, A lungphûmte lamin ka hailang vek ang.

⁷Milim an kerte chu chhut sawm vek a ni ang a, An nawhchizawrh hlawhte pawh meim an hâlral vek ang; An milimte

pawh ka tichhe vek ang, Nawhchizawrh hlawha an khâwl a nih avângin Nawhchizawrh hlauhah an pe lêt leh ang.”

ISRAEL LEH JUDATE TÂNA SÛNNA

⁸Chuvângin, ţap chungin ka rûm ang a, Saruak ngalngatin ka vâkvêl ang; Sihal angin ka û ruah ruah ang a, Ostriik angin ka hrâm tuarh ang.

⁹A hliamte chu tihdam rual loh a ni a. Judai ramah a lo kal ta si a; Ka mite kawngka a rawn thleng ta Jerusalem kawngka chu.

¹⁰Gath khua chu hrilh suh ula, Ţap hlek suh u; Beth-Aphra khuaah chuan, Vaivutah tâl rawh u.

¹¹Saphir-a chêngte u, saruakin zak takin kal zêl rawh u, Zaanana-a chêngte an kal chhuak ve lo. Beth Ezel miten an sùn a; I hnên ata a dinna hmun lâk bo a ni.

¹²Maroth-a chêngte'n thil ţa an beisei laiin, LALPA hnên ata chhiatna a lo thleng ta Jerusalem kulhah chuan.

¹³Aw, Lakis-a chêngte u, Tawlailîr chu sakawr chak chi hnuhtîr rawh u (Ani chu Zion fanu sualna bul a ni a), Israel bawhchhiatna chu nangmahah hmuh a ni si a.

¹⁴Chuvângin, Moreset Gath hnênah thilpêk i pe tûr a ni; Akzib inte chu Israel lalte tân bumna mai a ni ang.

¹⁵Aw, Maresa mite u, in rochungtu tûr ka rawn hruai ang; Israelte ropuina chuan Adullam a thleng ang.

¹⁶Inziat kawlh la, i lû mêt rawh, I rohlû i fanaute avâng chuan; Mulukawh angin i lukawh tizau rawh, I hnên ata salah an hruai bo dâwn si a.

BUNG 2

THILSUAL TITUTE CHUNGPIKNA

¹An khum laizâwla thil sual ngaihtuaha, Thil ţa lo tih tumte chung a pik e. Zîng khua a vârin an puitlin ngei thîn, An thû thû a ni miau va.

²Mi lo-te awtin tharumin an chhuhsak thîn a, In te pawh an neihsak thîn. An in leh lote bâkah, an roluah tûr te chenin an nêkchêp thîn.

³Chuvângin, LALPAN heti hian a ti: Hê chhûngkaw chhiatna tûr hi ka duang chhuak ta, Tuman nghâwng in lasawn thei tawh lo vang a; Chapo takin in lêng thei tawh hek lo vang, Hei hi hun ţa lo a ni si a.

⁴Chumi nîah chuan nangmahni deusawhin tehkhin thu an siam ang a, Ţah hla run thlâk tak an chham ang: ‘Tihboralin kan awm zo ta! Ka mite chanvo a tidanglam a; Mîn tikawnkâw zo ta dêr mai! Mîn dotute hnênah kan lo te a sem darh zo ta,’ “tiin.

⁵Chuvângin, LALPA mite punkhâwmnaa Ţhumvâwra ram an sem hunah sawisaktu in nei lo vang.

ZÂWLNEI DAWTHEI

⁶Thuhriltute hnênah “Thu puang suh u,” an ti a. Chuvângin, in hnênah eng thu mah an puang lo vang; Sawi chhiatna pawh an chhâng lêt hek lo vang.

⁷Nangni Jakoba chhûngkua an tiha te u: “LALPA Thlarau chu khauekhirhin a awm em ni? Hêng thilte hi ama tih a ni em ni? Dik

taka awmte hnênah thil tha a thlen lo vem ni?

⁸“Tun hnaiah ka mite chu hmêlma enin in en a, Indona ațanga lo hâu ang maia mi veivâk, Nangmahni rinchhantute chu an kawrfualte in hlihsak a.

⁹Ka mi, hmeichhiate chu An in nuam tak ațangin in hnawt chhuak a; An fate hnên ațangin ka ropuina chu in la bo hlen ta a.

¹⁰“Tho ula kal chhuak rawh u, Hei hi in chawlhna tûr a ni lo ve; Tihkhawloh tawh a ni a, in chhiat phah mai ang, Tihchhiat dêr tûr a ni si a.

¹¹Thlarau dik lo neirawn kalin ‘Zu leh uain a luang zeih zuh dân,’ tiin dâwtrawn sawi se, Chutiang mi chu hêng mite zâwlnei âwm tâwk lek an ni e.

ISRAEL TUNDIN LEHNA

¹²“Aw Jakob-hote u, in vaiin ka hruai khâwm leh ngei ngei dân che u a, Israel la damchhunte chu ka hruai khâwm leh mawlh ang; An huang chhûnga berâm rual ang maiin ka dah khâwm ang a, Hlobet hmuna ran rual tlâ ang hian; Mipui tam avângin an bengchheng hle ang.

¹³Tâwn tlangtuin an hma a hruai ang; Kawngkaah chuan an lût hum hum ang a, Chutah bawk chuan an chhuak thîn ang; An lal chuan hmâ a hruai ang a, LALPA chu an hotu lû ber a ni ang.”

BUNG 3

RORELTU SUAKSUALTE LEH ZÂWLNEITE

¹Tihian ka sawi a: “Aw, Jakob hotute u, lo ngaithla teh u, Nangni Israel chhûngkaw rorêltute u: Rorêl dân dik in hre tûr a ni lo vem ni?

²Nangni thil tha huua, sual lam ngainate u; Ka mite vun in lip a, An ruha mi ti in hlehsak a;

³Ka mite sâ in ei bawk a, An vun in lip a, An ruhte in titliak a, Bêl chhûnga sâ an chhum tûr ang leh Saso bêl chhûnga sâ ang maiin An chan sawm vek a.”

⁴LALPA chu an han âu ve bawk ang a, Mahse a lo ngaithla tawp lo vang; Chumi hunah chuan an lakah a hmêl a thup ang, An thil tih dânah an sual êm avângin.

⁵Ka mite hruai sualtu zâwlneite chungthûah LALPAN heti hian a ti; Ei tûr petu hnênah chuan ‘A muanawm e’ an ti a, Ei tûr pe duh lote lakah chuan Indo an inpeih nghal mai si a:

⁶“Chuvângin, in chan tûr chu inlârna awm lo zân a ni ang a; Ai en theih loh nân thim in nei bawk ang; Zâwlneite chungah ni a her liam ang a, An tân chuan chhûn pawh thim a ni ang.

⁷Tichuan, hmutheitate chu an zak ang a, Aientute chu an mualpho ang; An vaiin an hmuí an hup ringawt mai dân a ni, Pathian chhânna an dawng dân si lo va.”

⁸Jakoba bawhchhiatna puang chhuak tûr te, Israelte sualna puansak tûrtein, Kei chu LALPA Thlarauvin rorêlta te, chakna te leh Thiltihtheihnain mi tikhat ta.

⁹Nangni, Jakoba chhûngkaw hotute, Israela chhûngte chungah rorêltute, Rorêlta dik huua, Felna dân kailektute u, Hei hi lo ngaithla teh u.

¹⁰Zion chu thisen chhuahin in din a, Jerusalem chu khawlohnain:

¹¹An hotuten thamna beiseiin ro an rêl a, An puithiamten hlawh neiin an zirtîr a, An zâwlneiten sum beiseiin âi an en a. Chuti chung chuan LALPA lam âwn tho siin “LALPA chu kan zîngah a awm lo vem ni? Kan chungah eng pawl mah a thleng lo vang,” an ti maw?

¹²Nangmahni avângin Zion chu lo angin an rît phut vek ang a, Jerusalem chu thil chhe hlâwmah a chang ang a, Tempul awmna tlang chu ramhnuai hmun sâng ang mai a ni ang.

BUNG 4

ZION AțANGA LALPA RORELNA

¹Ni hnunnunga thil awm dân tûr chu LALPA in awmna tlang chu Tlang lian chhîpah dînggeh a ni ang; Tlangtête chungah chawisânin a awm ang a, Miten an pan huai huai dân a ni.

²Hnam tam tak an lo kal ang a, “Hawh u, LALPA tlangah i chho vang u, Jakoba Pathian inah chuan; Ani chuan a kawngte min zirtîr ang a, A kawngah chuan kan kal dân nia,” an ti ang. Zion ațangin dân thû chu a lo chhuak dân si a, Jerusalem ațangin LALPA thû a lo chhuak ang.

³Mi tam tak kârah ro a rêl ang a, Hla taka awm hnamte chu a zilhhau thîn ang; An khandaihte chu leilehna atân an chher ang a, An feite chu chem kawmah an chher ang; Hnam leh hnam kârah tuma’n khandaih an chelek tawh lo vang a, Indo dân an zir tawh hek lo vang.

⁴Mi tin mahni grêp leh theipui kûng hlimah an thû ang a, Tuma’n an tihlau tawh lo vang; Sipaihote LALPA kâ chuan a sawi tawh si a.

⁵Mi zawng zawng chuan an pathian hming theuhvin an zui ang a, Keini erawh chu LALPA kan Pathian hmingin kan zui zêl ang, Chatuan thleng pawhin.

HNEHNA CHANG TÛR ZION

⁶“Chumi nî-ah chuan kebaite ka khâwm ang a, Mi vâkvâite leh ka lo tihnat tawhte pawh ka ko khâwm vek ang,” LALPAN a ti;

⁷Kebaite chu a la dam chhunah ka siam ang a, Vâkvâite chu hnam chak takah ka siam bawk ang; LALPAN Zion Tlang ațangin an chungah ro a rêl ang Tun ațanga kumkhuain.

⁸Aw nang, ranrual vên insâng, Zion fanu chênna tlang; I hnênah a lo thleng dân e, Tûn hmâa lalram in neih tawh ang kha, Jerusalem fanute tâna lalna ram chu.”

⁹Engati nge tuna i țaht tâk vak le? In zîngah lal an awm lo vem ni? In remruattu a boral tawh em ni? Hmeichhe nau vei anga natnain a man tâk che hi.

¹⁰Nau nei tûr angin nâ chu tuar rawh, Aw, Zion fanu, Hmeichhe nau vei na tuar angin. Tûnah chuan khawpui ata chhuakin Ramhnuah i awm ang a, Babulon thlengin i kal tûr a ni. Chutah chuan an man ang che a; I hmêlmate kut ațangin LALPAN a chhanhim ang che.

¹¹Tûnah pawh nangmah do tûrin hnam tam tak an inhâwrkhâwm e, “I tibawrhâng ang u khai, Zion chu kan thlîr zui dân nia,” an ti a.

¹²Mahse LALPA ngaihtuah dân an hre si lo, A remruat dân an hre thiam hek lo; Hruih zâwla buhphal angin anni chu a khâwm dân si a.

¹³“Aw Zion fanu, tho la, chîl nek rawh; Thîrin i kî chu ka siam ang a, I ke tinte pawh dânin ka siam ang; Mi tam tak i râwt sawm ang a; An hlâwkna chu LALPA hnênah ka serh hrang ang, An sum chu lei pumpui LALPA tân serh hrang ang che.”

BUNG 5

MESSIA LO KAL TUR

¹Aw, sipai rualte u, Sipaite inpunkhâwm rawh u; Ani chuan min hual tawh a nih chu; Israel rorêltu chu tiangin a biangah an vua ang.

MESSIA LOKAL TÛR

²Mahse nang, Bethlehem Ephrathah, Juda sâng tam tak zîngah tê hle mah la, I hnên aţangin Israelte Rorêltu tûr Ka tân a lo chhuak dân si a, Ani chu hmakhawsâng ata tawh, Chatuan aţanga lo chhuak a ni.”

³Chuvângin, nau veituin nau a hrin hmâ chu, Anmahni chu a hawisan ang; Chumi hnûah a unau la dam chhunte chu Israel fate hnênah an kîr leh ang.

⁴LALPA chaknain ani chu a dîng ang a, LALPA a Pathian hming ropuina ngeiin A ran rualte chu a châwm ang; Anni chu an awm reng tawh ang a, Ani chu, tun aţanga khawvêl tâwp thleng pawhin a ropui dân si a;

ISRAEL HMÊLMATE CHUNGA RORÊLNA

⁵Hê mi hi kan inremna chu a ni ang. Assuria-ho kan ramah an lo kal a, Kan lal inah te an luh hunah, Vêngtu pasarih leh puipa pariatin kan lo do lêt ang.

⁶Assuria ram chu khandaihin an tichhia ang a, Nimroda ram chu a kawngkâte lamin an tichhe bawh ang; Chutiang chuan kan ramah an lo kal ang a, Kan ram chhûng an rawn luh hunah, Assuria-ho lakah min chhan chhuak ang.

⁷Jakob-ho la dam chhunte chu Hnam tam tak zîngah an awm ang a, LALPA hnên ata dâi lo tlâ leh Hlobet chung a ruah sûr ang maia, Mî tûmah ngaihcân pawh nei lova, Mihring fapate rêng rêng pawh ngêh lo ang hi an ni ang.

⁸Jakob-ho la dam chhunte chu Jentailte zîngah an awm ang a, Ramhnuai sâte zînga sakeibaknei ang leh, Berâm rual zînga sakeibaknei vânglai angin, Hnam tam tak kârah an lêng ang; An pal tlangna laia berâmte seha, Pawt sawm thîin ang hi an ni ang a, Tuma'n an chhan chhuak thei lo vang.

⁹I kut chu i hmêlmate lamah i lek chhuak ang a, I hmêlma zawng zawng chu an boral vek ang.

¹⁰“Chumi nîah chuan in sakawrte ka tihlum vek ang a, In tawilîrte ka tichhe vek ang, LALPAN a ti,

¹¹“In ram chhûnga khawpuite ka tichhia ang a, In kulh zawng zawng ka tichim vek ang.

¹²In hnêna mi dawthiamte ka that vek ang a, Âientu tûr pawh in nei tawh lo vang.

¹³In milim kerchawp te, in lungphun serhte chu Ka chhu chhe vek ang a; In kut chhuak thil mai mai chibai in bûk tawh lo vang;

¹⁴In thing milim siamte chu in hnêna mi ka la vek ang a, In khawpuite chawpin ka tichhia ang.

¹⁵Ka thu ngaithla duh lo hnamte chungah chuan Thinrim leh thinur takin phubâ ka la ang.”

BUNG 6

PATHIANIN ISRAELTE A NGÊN

¹LALPA thu hi lo ngaithla teh u; “Tho ula, tlângte hnênah ngên ula, Mualte chuan in âw lo ngaithla rawh se.

²Aw, nangni tlângte, leilung nghahchhan nghet takte u, LALPA lungâwi loh thu hi lo ngaithla teh u; LALPA chuan a mite lakah thupawi a nei ta si a, Israelte chu a khing dân a ni.

³“Aw ka mite u, in pawî eng nge maw ka sawi le? Engtin nge ka lo tihhah che u? Min chachhuah ta che u.

⁴Aigupta ram aţangin ka hruai chhuak che u a, In saltânna ata ka tlan chhuak bawh che u a; In hnênah Mosia te, Aarona te, Miriami te ka rawn tîr a.

⁵Aw, ka mite u, LALPA chu a dik tih in hriat theih nân Moab lal Balaka thurâwn leh, Beora fapa Balaama'n Sittim aţanga Gilgal thleng rawka A lo chhân lêt dân te kha hre reng ta che u.”

⁶LALPA hmâah chuan eng nê nge ka lo kal ang a, Engtin nge Pathian Chungnungbera chu chibai ka bûk ang le? A hmâah chuan bâwngno kum khat mi kengin Hâlral thilhlân ka hlân dân em ni?

⁷LALPA chu berâmpa sâng tam tak leh Hriaka luang lui sîngkhata tihlungâwi chî a ni em ni? Ka bawhchhiat aiah ka fatîr hi pên, Ka suahsual manah ka rîla rah chu ka hlân dân em ni?

⁸Aw mîhring, thil ţha a entîr tawh che kha; LALPAN eng nge a phût che? Dik taka ti tûr leh, khawngaihna ngainata, Tlâwm taka i Pathian nêna lên dun a ni lo vem ni?

ISRAELTE SUAHSUAL HREMNA

⁹LALPA âw chuan khawpui a âu va Finna nei mi chuan i hming chu a hria ang: “Talhfiak chu ngaihven rawh u! Tû remruat nge ni?

¹⁰Mi suaksual inah chuan Suahsualna robâwmte chu a la awmin, Bûkna dik lo leh tenawm chu a la awm cheu em ni?

¹¹Tehkhâwng dik lo te, bûklung dawtheite hi Thil thianghlimah ka chhiar dân em ni?

¹²An mi hausâte chu pâwngnêknain an khat a, A mi chêngte lah dawheh an ni si a, An ka chhûngah bumna lei an hmuam a.

¹³“Chuvângin, na tuar tûrin ka vua ang che a, I sualnate avângin ka tiram dêr ang che.

¹⁴In ei ang a, mahse in purpui si lo vang; In ril a ţam reng zâwk ang. A then chu chheprelh mah ula, in hum thei chuang lo vang; In khâwl sâ pawh khandaiha ka tihrîral dân avângin.

¹⁵“Thlaite pawh chîng mah ula, a rah in seng lo vang; Olive rah sâwr mah ula, a hriak in thih lo vang; Uain thlum siam mah ula, a zû chu in in chuang lo vang.

¹⁶Omria thupêkte an la vawng reng si a; Ahaba chhungkaw thil lo tih tâk zawng zawngte nen; Hmun khawro maia ka siamna tûr chein An remruat dân in la zui zêl si a; I mî chuta chêngte chu nuihzabur mai an ni ang a, Tichuan, ka mite hmingchhiatna pawh i phur ngei ang.”

BUNG 7

ISRAELTE SUALNA AVANGA LUNGNGAIHNA

¹Ka va'n lungngai tak êm! Nipui thei an seng khâwm laia, Grêp lawh hmailh zawngtu ang mai ka ni; Ka nunin a chhâk êm êm a hmin hmasaa mi ngei, A rah bâwr ei tûr a awm ta si lo.

²Mi rinawm chu lei ata a boral ta, Mihring zîngah mi dik tak tumah an awm lo. Thisen chhuah tûrin an inchâng tawn vek a; Mahni unaute chenin lénin an inchâng hlawn a.

³Kut khinghniha thil sual tih chu ze tak an ni, Hotuten thilpêk an beisei a, Rorêltuten thamna an ngiat a, Milianten an sual tih duh zâwng an âpui a; An inthural tlâng dial a.

⁴An zînga tha ber chu hlîng buk ang lek a ni a; Mi dik ber pawh hlîng zum aiin a hriam zâwk; Nangmah vêngtu leh nangmah hremna ni chu a lo thleng ta e; Tûn hi an chí-âina hun a ni ang.

⁵Thianah innghat suh la; I thian kawm chu ring tlut suh; I ângchhûnga bei ngei lakah pawh I hmuai kawngkhar vêng tha rawh.

⁶Fapain a pa a tihmingchhe thîn a, Fanuin a nu a khing thîn, Movin a pasala nu a do va; Mihring hmêlma chu ama chhûngkua ami an ni thîn.

⁷Kei erawh chuan LALPA lam ka en tlat ang a; Min chhandamtu Pathian chu ka nghâk reng ang; Ka Pathian chuan min lo ngaithla dâwn si a.

ISRAELTE INPUANNA LEH THLAMUANNA

⁸Ka hmêlmapâ, mi lo diriam suh; Tlu mah ila, ka tho leh ang; Thim hnuaiah pawh thu mah ila, LALPA chu ka êng a ni zêl ang.

⁹LALPA thinurna chu ka tuar mai ang, A lakah ka lo sual miau si a, Mahse, ka chung thû mi sawi felsaka, Ka dikna min rêlsak hnûah chuan, Êngah mi hruai chhuak ang a, A dikzia chu ka hmu ang.

¹⁰“Khaw nge LALPA i Pathian chu?” Titu ka hmêlma-nû chuan a la hmu ve ang a, a zak teh ang chu. Ka mit ngei hian a la hmu ang; Kawtthlêra chirhdiak ang maiin An la chîl pêr dâwn a ni.

¹¹In kulh bangte din a nih hunah chuan, In dân siam chuan a fan zau hle ang.

¹²Chumi huna i hnêna lo kal tûrte chu Assuria ram leh kulh nei khawpui aţang te, Kulh aţanga Luipui thlengin, Tuipui aţanga tuiipui leh, Tlâng leh tlâng inkâr aţangtein a ni ang.

¹³Chûng ramte chu an michêngte Thil sual tih rah avângin Tihram vek a ni ang.

PATHIANIN ISRAELTE A NGAIDAM ANG

¹⁴I mi, i berâm rual, Karmel tlâng Ramhnuai khawhar taka chêngte chu I talhfiakin enkawl rawh; Tûn hmâ te ang bawh khân Basan leh Gilead ramah tlattîr ang che.

¹⁵“Aigupta ram aţanga in lo chhuah lai ang khân, Thilmak tak tak ka entîr ang.”

¹⁶Hnam dangten an hmuhin, an chakna chu an zahpui hlê ang; An kê an hup ringawt ang a, An bengte pawhin a ngawn phah bawh ang.

¹⁷Rûl ang maiin vaivut an liak ang a; Leia rûlte ang maiin an kua aţangin an bawkvâk ang. LALPA kan Pathian chu an tîh dêk ang a, Nangmah avângin an hlau bawh ang.

¹⁸Suahsualna ngaidama, Mahni rochan la dam chhunte bawhchhiatna ngaidamtu Nang ang hi Pathian tu nge awm le? A thinrimna chu a pai kumkhua dâwn si lo va, Zahngai thei nih hi a lâwm zâwng a nih avângin.

¹⁹Ani chuan lainat takin mi en leh ang a, Kan sualnate min hnehsak leh ang. Nang chuan kan sualna zawng zawngte hi Tuipui thûk takah i thlak daih dâwn si a.

²⁰Hmasânga kan thlahtute i lo tiam ang khân, Jakoba hnênah thutak pên Abrahama hnênah khawngaihna i pe dâwn si a.

NAHUMA

Ziah tu: Nahuma • Ziah kum: B.C. 663-612

Nahuma hming awmzia chu (Pathian) Thlamuanna tihna a ni. Assuria khawpui Ninevi chhiat tûr thû a tlangaupui a ni ber. B.C. 760 vêla Jona thuhrlil avâng a sim avâng khân a hnû kum za chhûng zet Pathian hremna an pumpelh phah a. Mahse, sim zui zêl aiin, an ze ngai bawka kîr lehin, milem biakna, tharum thawhna leh nunrâwnna nên ram an valh zau leh tan ta a. Chuvângin, Nahuma thuchah chuan simna thû hril tawh lovin, an tlûk chhiat tûr thu a puang tawh mai a ni. A thuhrlil hun kha, Aigupta khawpui Thebes tlâwm (B.C. 663) leh B. C. 612 a Ninevi khawpui tlûkchhiat tak tak inkâr chhûng a ni. Pathian thutiam hlen tûrin Babulon-ho an lo lian ta a; tichuan tuilian ang maiin, chu suahsualna khawpui chu awlsam tain an la ta mai a, a chhe hlen ta a ni. Nahuma hi Bible-a lehkhabu 34-na a ni a, bung 3 a awm a, châng 47 a awm bawk.

BUNG 1

¹Ninevi phurrit chu. Elkos mi Nahuma inlârna bu.

A HMÊLMÂTE CHUNGA PATHIAN THINURNA

²LALPA chu phuba la thîn, Pathian thîkthuchhia a ni a; LALPA chu thinura phubâ latu a ni. LALPA chuan a hmêlmate chungah phubâ a la ang a, A thinrimna chu a hmêlmate tân a chhêkkhâw thîn.

³LALPA chu nasa taka thiltithe, thinnel bawk si a ni a, Mi suaksual chu hrem lohvin a chhuah lo vang. LALPA chuan thâwngaleivirah leh thlipuia kawang a nei a, Chhûm khi a kêphaha vaivut kai a ni.

⁴Tuipui a zilhhau chuan a kangchat mai a, Lui zawang zawang pawh a kang mai a ni. Basan leh Karmel te a ro zo va, Lebanon pangpâr pawh a vui a ta

⁵A hmâah chuan tlângte chu a nhîng dur dur a, Mualte chu a tuirol zawi h zawi h a, A hmâah chuan leilung hi a khûr a, A ni, khawvêl leh a chhûnga chêng zawang zawnge nên.

⁶A thinur hmâah tu nge ding thei ang le? A thinrimna hlauhawm chu tu nge tuar zo vang? A thinrimna chu mei angin a leihbua a, Lungpuite chu a paih sawm rem rum mai a ni.

⁷LALPA chu a thâ a, Mangan laia himna kulhpui a ni; Amah rinchhantute a hai si lo.

⁸A hmêlmate erawh chu tuilian so but but angin An awmna chenin a la tiboral vek ang a, Thimnain a ûmzui bawk ang.

⁹Engah nge LALPA chu in phiar tâk mai le? Buaina siam nawn leh tûr awm lo khawpin A titâwp hlen daih tawh dawn che u asin.

¹⁰Hlîngbawn anga inkai hnawkin, Ngawlvei angin zu rui thîn mah se, Buhpâwl ro angin an kang ral vek ang.

¹¹Nangmah aţanga chhuak mi pakhat, LALPA dodâl zâwna phiar thîntu, Thurâwnu suaksual tak a awm.

¹²LALPA chuan heti hian a ti: “An tam avâng a him dawn emaw an intih laiin, Tihtlâwm an ni ang a, an boral vek ang. Nang erawh chu lo tina tawh che mah ila, Ka tina tawh lo vang che;

¹³A nghâwngkaw! i lo bah chu ka tihtlihsak ang che a, Hruia a phuarna che chu ka tichat vek ang.”

¹⁴LALPA chuan nangma chungchangah thupêk a siam a: “I hming hi chhawm nun reng a ni tawh lo vang. I pathian ina milem ker leh chhûnte chu Ka tiboral vek ang. I suahsual êm avangin i thlân pawh ka lai nghal ang.”

¹⁵En teh, tlângah te chanchin tha rawn thlena, Remna thu rawn puangtute kê chu! Aw Juda, i kûtte chu tha takin serh la, I thutiamte chu hlen rawh. Mi sualpa chuan a paltlang tawh dawn si lo che a; Tihbora a ni ta e.

BUNG 2

NINEVI TIHCHHIAT THU

¹Tichhetu chu i hmâah a lo chhuak ta. Kulh chu vêng tha rawh! Kawngpui chu vil bawk la; In sang mar la, I thiltitheihna chu thuam tha rawh.

²Israelte ropuina ang mai khân LALPAN Jakoba ropuina chu a din thar leh dawn si a; Tiruaktuten an lo tiruak zo vek a, An grêp huante an tiram vek tawh si a.

³A mi chakho phâw chu an tisen a, Mi huaisente phâw chu a senlâr a ni. A inbuatsaihna nî-ah chuan Tawlailîrte chu mei angin a de zawr zawr a, An feite chu an vilik zuai zuai a.

⁴Tawlailîrte chu kawthlêrah an tlân thuak thuak a, Kawng zau laia an innâwk rup rup a; Meichher angin an êng zuai zuai a, Kâwlphe angin an tlân phe zawr zawr a.

⁵A miliante chu a hre reng ang a; An kal te chu an petek nawk nawk ang; Kulh lam chu hmanhmawh takin an pan ang a, Lo invênna tûr an buatsaih ang.

⁶Lui lama kawngkhârte chu an hawng ang a, Lal in chu an tichhe vek ang.

⁷Thupêk chhuah a ni ta: Salah an man ang a, an kai chhuak ang; A bawihnte chuan thûro anga hrâm nghur nghura, An âwmte chûm chûm chungin Hmâ an hruai ang.

⁸Hmasâng Ninevi chu dîl ang a ni a, Nimahsela, an tlânchhiatsan vek ang. “Ding teh u! Ding teh u!” ti mah se; Tûma’n an lehawi tawh lo vang.

⁹Râllâk sum silvar te la rawh u! Rangkachak te pawh la ula! Lâk sên loh khawpin rosum a tam si, Thil hlu tinrêng a awm rei rui mai.

¹⁰A ruak ta dêr mai, a ram chhe zo ta! Thinlung a tuirol a, Khûp a inkhâwng hlawk hlawk a; Kîl tinah natna hlîrin a khat a, An hmêl zawang zawang pawh a dang zo ta.

¹¹Sakeibakneite chênna kha khawiah nge a awm a, An notê an chawm thinna hmun te, Sakeibakneiin a notête leh a puite nêna tûmah hlau lova, An tualchai thinna kha khawiah nge a nih tâk?

¹²Sakeibakneiin a notête tân sa a pawt sawm a, A puite tân sa a seh a, A pûk chhûngah a saseh te chu A chhêkkhâwm rei rui thîn.

¹³“Ngai teh, ka do che a ni, i tawlaifirte chu meikhû-ah ka chantîr ang a, i sakeibaknei vânglaite chu khandaihin a tihlum vek ang; leilung aţang hian saseh tûr nei lovin ka siam ang che a, tûma’n i palaite thu an pawisa tawh lo vang.”

BUNG 3

NINEVI LUNGNGAIHNA

¹Thisen chhuahna khawpui chu a chung a pik e! Dâwt thu leh inrawknain a khat a. Saseh neih loh lai rêng a nei si lo.

²In hlap ri ţhuai ţhuai te, Tawlaifir thâwm ri chur chur te, Sakawr tîn ri khup khup te, Tawlaifir tîn dur durte nê!

³Sakawra chuang miten khandaihin leh fei an lek tle zawr zawr a. An mi thahte chu an let rem rum a, Mitthi ruangte chu a intiang vûm thêr thûr a, Chhiar sên rual a ni lo— Mitthi ruang chungah an inpal tlu nawk nawk a.

⁴Chûng chu, nawhchi zawrh ze tak, hur hiam mai, Dâwithiam zînga an hotunu ber, Nawhchizawrh vânga hnam leh chhûngkuate hralhtu, Dâwi hmanga tikhawlotu vânga lo awm a ni.

⁵“Ngai teh, ka do che a ni,” sipaihote LALPA chuan a ti; “I pawnfên chu i hmai thlengin ka hlîm ang a, I saruakna chu nangmah tihmualpho nân Hnam tîn leh ram tîn ka entîr ang.

⁶Bawhlhlawh tenawm ka theh ang che a, Thil bawhlhlawhah ka siam bawh ang che a, Miten an en huai huai ang che.

⁷Heti hi a ni ang a, a hmu che apiangin An tîn chhiatsan ang che a, ‘Ninevi chu a chhe zo ta e! Tû takin sûn ang maw?’ Hnêmtu tûr tu nge ka hmuhsak dâwn che le?” an ti ang.

⁸Luipui kama awm, tuiin a hual vêl No Amon aiin i dinhmun a ţha bîk em ni? Tui chu inphen nân a hmang a, Luipui pawh chu a kulhbang a ni nghâl asin.

⁹A chakna hnâr chu Ethiopia leh Aigupta a ni a, Chîn tâwk pawh a nei lo hial a; Put leh Lubim te chu nangmah puitute an ni.

¹⁰Mahse hruai bovin a awm tho va, Salah a tâng a; A fa naupangte chu kawthlêr pêngthuam tinah An paih keh sak a; An milianho chu ţhum vâwrin an insem a, An mi ropui zawng zawngte chu khaidiata phuar an ni.

¹¹Nang pawh i rui ve ang a; Thuhrûkin i awm ang; Hmêlma laka himna tûr i zawng ruai mai dâwn a ni.

¹²I kulhpui zawng zawng chu theipui hmin ţuah tak, A kûng han sawi hleka A eitu kâa tla lût ang hi a ni ang.

¹³I mite lah chu hmeichhia mai an ni vei nê! In ram luhnate chu hmêlma tîn a inhawng huai a, I in kalhna thingte chu meiin a kâng ral ang.

¹⁴An hual hun che atân tui chhêkkhâwl la, I kulhte chu tinghet rawh! Hlum nê sawhban la! Leirawhchan siam rawh!

¹⁵Kâng meiin a ei ral dâwn che; Khandaihin a tihlum ang che a, Khaukhuap angin a ei zo vang che. Khaukhuap anga tamin insiam pung ula! Khaukhuap rual anga tamin intipung thûr thûr ta che u!

¹⁶Vâna arsîte aiin i sumdawng mite i tipung nasa zâwk a. Khaukhupten an rawk a, an thlâwk bo ta.

¹⁷I sipai hotute chu khaukhuap rual ang an ni a, I vêngtu hotute chu khawvawh nia pal tânga Khaukhuap fu khâwm ang an ni; Nî

a lo chhuah veleh an thlâwk bo va, An awmna hmun rêng hriat a ni lo.

¹⁸Aw, Assuria lalpa, i berâmpuete an muthlû e; I miliante chu vaivutah an mu a. I mite chu tângahte an darh zo va, Hruai khâwmtu rêng an awm lo ve.

¹⁹I hlîam tîn damna tûr a awm lo, I lo hlîam nasa êm a ni. I chanchin hria zawng zawngin Kut an ben khum ang che, I suahsualna khân chîm loh rêng a nei em ni?

HABAKUKA

Ziah tu: Habakuka • Ziah kum: B.C. 605 vêl.

Habakuka hming awmzia chu ‘pawm’ (lâwm taka pawm) tihna a ni awm e. Theipui leh grêp hruiten rah chhuah lovin, ranrualte huang ata bo vek mahse Lalpaa lâwm zêl mi (3:17) a ni. Chutiang rilru pu mi chuan ama mite a hmangaih êm êm a, an thlarau nun vêngtu angah a indah hial a ni. A tîr lamah Pathian chhuah chhâlin, engah nge Judai ramah heti khawpa suahsualna awm a phal theih? Engtin nge ama mite hremtu atân Pathianin Babulon-ho ang mi nunrawng pui pui a hman? tiin hriatthiam har a ti a. Chûng zawhnate atanga chhânna a hmuh chhuah tâk, Habakuka thuchah pawimawh ni ta chu: ‘Mi dik chuan a rinna chu a nunpui ang’ (2:4) tih hi a ni. Hê thû hi Thuthlung Thar bu ziaktuten an ngainain an lachhuak hlawm (Rom 1:17; Gal. 3:11; Heb. 10:38). Habakuka hi Pathian ring tlat mi leh, tun laia thlarau mi kan tih ang ziarâng hi a thuziak hian a phawk chhuak tlat a ni. A thuchah hi ‘Zawhna, chhânna, a tâwpa hnehna’ tiin kan khaikhâwm thei ang. Habakuka hi Bible-a lehkhabu 35-na a ni a, bung 3 a awm a, châng 56 a awm bawk.

BUNG 1

¹Zâwlnei Habakuka phurrit hmuh chu

ZÂWLNEIIN ZAWHNA A ZÂWT

²Aw LALPA, engchen nge ka auh ang che a, Mi ngaihthlâksak loh vang le? “Inpâwngnêkna!” tia ka âu pawhin, I chhandam chuang si lo.

³Engvângin nge khawlohna thil mi entîra, Thil chhe deuh deuh mi hmuhtîr reng mai le? Inrawkna leh inpâwngnêknaten mi hmachhawn reng a; Buaina te, inkhinnate a lo chhuak a.

⁴Chuvângin, dân pawhin awmzia a nei lo va, Dik taka rorêlna a awm thei hek lo. Mi suaksualten mi dik an hualbet a; Chuvângin, rorêlna pawh a chingchivêt zo ta.

LALPA CHHÂNNA

⁵“Ringlo hnamte hi thlîrin, en vêl ula— Mak ti tawp mai rawh u! Nangni hunah hian, an hrilh che u pawha in awih loh tîr Thil ka ti dân asin.

⁶Ngai teh u, Kaldaiho ka vulh lian ang a, Hnam kawlhse leh ri vut vut mi, Mi dangte thil neihsak tum rêng rêngin Lei vâng lam an la pal tlang duai duai dân a ni.

⁷Mi hlauhawm leh râpthlâk an ni a; An rorêlna leh an zahawmna chu anmahni atanga lo chhuak a ni.

⁸An sakawrte chu keite aiin an tlan chak zâwk a, Tlai lam chinghniate aiin an kawlh a. Hma lam an tâwn pawp pawp a; Sakawra chuang mite lo kalna pawh a hla a; Mu âr la tîr ang maiin an bir vang vang thîn.

⁹“Tharum thawh tîra lo kal vek an ni; An hmêlte chu khawchhak thlî ang mai a ni a. Tîauvut anga tam sal an man khâwm a.

¹⁰Lalte pawh an nuihzat mai mai a, Miliante an hmusit a. Kulhte chu tham lo takin an la zêl a, Lei an chhûng pâwnng thûr a, an la mai thîn.

¹¹Mahse a rilru a thlâk a, a bawhchhe ta a; Chû thiltihtheihna chu an pathian tih-ah ruatin, thilsual an ti ta a.”

ZÂWLNEI ZAWHNA PAHNIHNA

¹²Chatuana mi i ni lo vem ni, Aw LALPA ka Pathian, ka Mi Thianghlim? Kan thi tîr a ni lo. Aw LALPA, anni chu rorêl tîrin i ruat a; Aw Lungpui, anni chu thununtu atâna i ruat an ni.

¹³Sual en reng thei lo khawpin i mitte a thianghlim a, Suahsualna pawh i en reng thei lo va. Mahse, vervêk taka tite hi engati nge i en reng theiha, Mi suaksualten an aia mi dikte an eiral laia i ngawih reng si le?

¹⁴Engah nge mihringte hi tuiptui sanghâte anga, Rorêltu nei lo bawkvâka kal thînte anga i siam le?

¹⁵Nghakuaiin an khai chhuak vek a, An lénin an man a, Lénkhangin an fûn khâwm a. An lâwma an hlim êm êm a.

¹⁶Tichuan, an lènte hnênah an inthâwi a, An lénkhangte tân rîmtui an hâl a; Anmahni avânga chanvo ropui an chana, Ei tîr an hnianghnâr êm avângin.

¹⁷Tichuan, an lènte chu tiruak zêlin, Hnamte chu lainatna nei lovin an that zêl dân em ni?

BUNG 2

¹Ka vên inah ka ding ang a, Kulh chungah awmhmun ka rem ang; Eng thil nge min hrilh dân ka lo thlîr ang a, Min zilh huna chhân dân tîr ka lo ngaihtuah ang.

MI DIK CHU RINNAIN A NUNG

²LALPA chuan heti hian mi rawn chhâng a: “Inlârna chu ziaik la, Tlan paha miten an chhiar theih tîrin Lungphêkah fiah takin ziaik rawh.

³Inlârna chu hun ruat chhûnga lo awm tîr a ni si a; Hun tâwp thil a ni a sawi ni, a daw lo vang. Rei deuh mah se, ngâk fan fan rawh; A lo thleng ngei dân si a, Rei a rial lo vang.

⁴“Mi chapo awmdan hi en ta che, A nun dân rêng pawh a ngîl loh êm hi; Mi dik chu a rinna angin a nung thîn.

MI SUAKSUALTE CHUNGPIKNA

⁵“Zû ruih chng mi chu mi chapo an ni duh hle, Ina awm chet chet thei lo mi an ni. Hremhmun angin châkna an tizâu thîn a, Thihna ang maiin, duh tâwk rêng an ngah zo lo; Hnam zawng zawng kâwi khâwmin, Mi zawng zawng an khâwm dûl dûl a.

⁶“Chûng mite chuan thufing leh tih-elna thû chham khumin, ‘Mahni ta ni lova intihausa chu a chung pik e, Mi neih chhuhsakin engchen nge a inhaivûr dân?’ An tikhkhum dân lo vem ni?

⁷I sum batnate an rawn thawk thut lo vang maw? Nangmah tihrehawmtu tîr i kaitho lek a ni lo maw? Duh tâwkin an rawk ve mai ang che.

⁸Hnam tam tak i lo rawk tawh a, Ram chhûng leh khawpui leh, hmun tina chêngte Thisen i chhuah thîn avângin, A la damchhun zawng zawngten an rawk ve ang che.

⁹“Dik lo taka mahni tâna sum hailût a, Chhiatna thleng thei laka invên nân In sâng pui pui satute chung a pik e!

¹⁰I chhûngkaw tâna mualphona, Mi tam takte tân chhiat phahna, I thlarau tâna sual a ni e.

¹¹Bang ațangin lungremten an âu khum ang che a, Khanchhuk thingtlâwnnten an lo chhâng ang.

¹²“Khawpui din nâna thisen chhuaha, Khawlohnâa khawpui dintu chu a chung a pik e!

¹³Ngai teh u, kâng ral leh mai tûr thila mite an thawhrama, Engmah lova nham tin an intihah thîn hi, Sipaihote LALPA tih a ni lo vem ni?

¹⁴Tuifinriat chu tuiin a khuh vek angin LALPA ropuizia hriatnain Leilung hi a la khat dâwn si a.

¹⁵A thenawm hnêna zu in tûr pea, A saruakna hmuh tuma zu bûr chhawpa, Hrai rûitu chan chu a la chhe dâwn mang e!

¹⁶Ropuina aiah a zahthlak ngawih ngawih a nih kha. Nang pawhin i in ve bawk si a! Serhtan loh i nihzia kha hailan ni teh se. LALPA kut dîng lam no chuan a bei lêt ang che a, I ropuina chu mualphona tâwpkhâwkah a la chantîr ang.

¹⁷Lebanon chung a i nunrâwn zia kha, Ramsa i suasam avângin i tirâlî zo va, Mihring thisen avâng te, Khawpui te, a ram leh a chhûnga chêng zawng zawng I sawisak nasat êm avângin, chûng thil chuan a tuam ve ang che.

¹⁸“Milim kerchawp leh chhûn chawp, Dâwt zirtîrtu mai hi a siamtute tân eng nge hlâwkna? Ƨawng thei hlei lo milem pathiante hi A siamtute pawhin an ring meuh emaw chu?

¹⁹Thingtum hnênah, “Tho rawh le!” tia, Lungtum, Ƨawng thei hlei lo hnênah, “Tho la! A zirtîr ang che!” titu chu a chung a pik e. Ngai teh, rangkachak leh silvarin tuam mah se, anmahniah thâw rêng a awm si lo.

²⁰“Mahse LALPA chu a tempul thianghlimah chuan a awm a. Leilung zawng zawng hi a hmâah ngawi Ƨiap rawh se.”

BUNG 3

ZÂWLNEI ƧAWNGƧAINA

¹Zâwlnei Habakuka ƧawngƧaina, Shigionoth thlûkin.

²Aw LALPA, i thusawi ka lo hria a, ka hlau va; Aw LALPA, hmâna i hnathawhte kharawn tiharh leh rawh! Kan hun chhûng ngei hian han tichhuak leh la; I thinur lai pawhin zahngaihna hre reng ang che.

³Pathian chu Teman ațangin a lo kal a, Mi Thianghlima chu Paran Tlâng ațangin. A ropuinain vân a khuh a, Leilung hi amah faknain a khat.

⁴Amah chu a ên hian a êng phût a; A kutpah ațangin a rawn de zuai zuai a, Chutah chuan a thiltihtheihna chu thuhrûk a ni.

⁵Hripuiin hmâ a hruai a, Khawsikin a hnung a zui a.

⁶A han dîng a, leilung a teh a; A hawi vêl a, hnamte chuan an lo hlâu va. Chatuan tlâng lian te chu a tidarh a, Tlâng hlunte chu an kûn a, A kawngte chu chatuan atân a ni.

⁷Kusan-ho puan ina mite hrehawmzia ka hmu a, Midian ram puanzârte chu a khûr chiam a.

⁸Aw LALPA, luite lakah lungâwi lovin, Luite avânga thinrim nge i nih Tuipui laka i thinrim vâng zâwk? I sakawr, i chhandamna tawlailîra i chuan tâk mai?

⁹I thalngul chu peih diam a ni a; I thalte chu chhia an chham khum a. Lei hi lui hmangin i then darh a.

¹⁰Tlângte chuan an hmû che a, an khûr a; Tuiliante pawhin an chîm pil a. Thûkna chuan a âw a chhuah a, A kut chu sâng takin a vâwr chho va.

¹¹Ni leh thlâte chu an awmna hmunah an dîng reng a; I êng chhuak thal lêng vêlahte leh, I fei tle zawr zawrahte chuan An kal sawn leh ta.

¹²Thinrim takin ram chhûng i fang chhuak a; Thinurin hnamte chu i chîl nek a.

¹³I mite chhan tûrin i kal chhuak a, I hriakthiha chhandam tûrin. Mi suaksual in chu a lungphûm ațanga a chhîp thlengin i tichhe zo ta.

¹⁴An khaw hotupa ber chu Ama thalfangin i chhun tlang a. Min hnawh darh tumin thâwngaleivir angin an lo chhuak a; A rûka mi retheite ei zawh hi an nuam tihzâwng a ni.

¹⁵Nangma sakawrin tuipui chung i pal tlang vêl a, Tui chu a phuan buah buah a.

¹⁶A thâwm ka hriatin, ka taksa chu a khûr a, A âw chuan ka hmu i a tiphu der der a, Ka ruh chhûng chu a muat a; Ka tirilah ka khûr hlawk hlawk a, Mangan nia ka hahchawlh theihna tûr a ni. Mite hnêna a lo chhoh hunah, A sipai rualte nêna a rawn rûn ang.

RINNA HLÂ

¹⁷Theipui kûngin pâr chhuah lovin, Grêp hruin rah chhuah lo mah se; Olive kûngin rah chhuah lovin, Thlawhmain ei tûr thar chhuak lo mah se; Huang a ran rualte bo zovin, Ran inah ran awm lo mah se

¹⁸LALPA-ah chuan ka lâwm zêl ang a, Mi chhandamtu Pathianah chuan ka hlim zêl ang.

¹⁹LALPA Pathian chu ka chakna a ni a; Sakhi kê ang kê mi siamsak ang a, Ka tlâng sângah te mi lêtîr ang. Hla hruaitu tân: Ka Ƨingtang rema sak tûr.

ZEPHANIA

Ziah tu: Zephania • Ziah kum: B.C.635-625

Zephania hming awmzia chu ‘Lalpan a thup’ tihna a ni a, a thuchah chu ‘Lalpa Ni’ chungchâng a ni. Juda lal Hezekia thlaha mi a ni a, zâwlneite zînga lal thisen kâi awmchhun a ni awm e. Lal Josia lal lai (B.C. 640-609) a rawngbâwl a ni a. A hun laia mihring nun inthlahdul lutuk leh thil awmdân aţangin, Babulon lal Nebukadnezzara hmanga Jerusalem tihchhiat a la nih tûr pawh a lo hmu lâwk a, chû hun ţha lo chu LALPA nî lo thlen dân tûr nên a sawi zawm a. Nakina Jentail lalramte pawh tihlûk an la nih tûr thû leh, Messia Lalram lo thlen huna Israelte hnam ropui taka tundin an nih leh tûrte nên a lo hmu lâwk kiau a ni. Josia lal laia Israel rama revival ropui lo thleng kha, zâwlnei Zephania’n sim tûra mipuite a lo zilhâwkna rah a nih a rinawm. Zephania thupui ber chu LALPA Nî chu hun hnahnunga lo la awm tûr, mi sualte tân Pathian phuba lâkna nî, LALPA mite tân chhan chhuahna ni ropui a nih tûr thû a ni. Chuvângin, LALPA thinurna nîa thuhrûk an nih theihna tûr chu, an sualte sima, LALPA lama hawi kîr leh a ni, tiin a tlangâu a ni. Zephania hi Bible-a lehkhahu 36-na a ni a, bung 3 a awm a, châng 53 a awm bawk.

BUNG 1

¹LALPA thû, Zephania hnêna lo thleng chu. Ani chu Hezekia fapa, Amaria fapa, Gedalia fapa, Kusa fapa a ni a; Judai rama Amona fapa Josia lal laia mi a ni.

LALPA NI ROPUI CHU

²“Ram chhûnga thil engkim mai hi Ka tirîral vek dâwn,” LALPAN a ti.

³“Mihringte leh ramsate pawh ka tiboral ang; Chunglêng savate leh Tuipua sanghate chenin ka tiboral ang a, Mi suaksualte tân tûk chhiatna ka thlen ang. Ram puma mite hi ka nuai bo dâwn,” LALPAN a ti.

⁴“Juda-ho chungah kut ka thlâk ang, Jerusalema chêng zawng zawng chungah nên. Hê hmuna Baala hnûhmâ zawng zawng hi ka nuai bo vek ang a, Milem puithiam-ho hming leh, ramhuai puithiamte—

⁵An inchung zâwla nî leh thlâ leh vâna arsite hnêna kûn thîn te; LALPA chibai bûka, a hnêna chhia chhama, Milkoma hnêna chhechham baw si te pawh ka nuai bo vek ang;

⁶LALPA hawisana, zui duh tawh lo te, LALPA zawng lova, râwn duh lotute nên ka nuai bo vek ang.”

⁷Lalpa PATHIAN hmâah chuan ngawi reng rawh u; LALPA nî chu a hnai tawh si a, LALPA chuan inthâwina a buatsaih tawh a; A mikhual tûrte pawh a sâwm tawh si a.

⁸“LALPA nîa inthâwinaah chuan, Miliante, lal fate, Hnam dang silhfên inbel-ho zawng zawngte chu ka hrem ang.

⁹Chumi nî vêka ka hrem tûrte chu Kawngka zuan-kahlêno zawng zawngte, Tharum thawhna leh bumnaa an pûte in

tikhattute an ni ang.

¹⁰“Chumi nîah chuan Sangha Kawngkâ aţangin lungngai âu thâwm a lo awm ang, Khawpui Thar vêngah an chiau wawng wawng ang a, Tlâng aţanga thil keh chhe rî a lo ri ţhuai ţhuai ang.

¹¹Nangni Maktesh-a chêngte u, ţap vak vak rawh u! Sumdâwnng mi zawng zawng an that vek a; Tangkarûaa sumdawngte an thi zo tawh si a;

¹²“Chutih huna thil awm dân tûr chu Jerusalem chu khâwnvâr nên ka dap ang a, Awmhmun a lo inlalian vêl mai maia, An rilrua, ‘LALPA chuan thil ţha vak a ti lo vang, Thil ţha lo pawh a ti hek lo vang,’ Ti mai mai-ho chu ka hrem dâwn a ni.

¹³An rosunte chu rawktute ta mai a la ni ang, An inte pawh a la ram vek ang; In te chu sa thut thut mah se an luah chuang lo vang; Grêp huante siam mah se, a zû an tlan hek lo vang.”

¹⁴LALPA ni ropui chu a hnai ta e; A hnaih êm avângin a lo thleng têt a ni. LALPA nîa thâwm chu a râpthlak dâwn si a; Mi chakte pawh an ţap ruai ruai ang.

¹⁵Chumi nî chu thinurna nî a ni a, Buaina leh manganna nî, Tihchhiatna leh tihramna nî, Thimna leh ngui ruaina nî, Chhûm leh thim chhah mup nî a ni.

¹⁶Kulh hung khawpuite leh Vên insângte bei tûra Tâwtawrâwt hâma râlkhel dâr rîkna nî a ni.

¹⁷“Mipuite chungah manganna ka thlen ang a, Mittel ang maiin an kal dún dún ang, LALPA laka an sual êm avângin; An thisen chu vaivut angin a baw nuai ang a, An ruangte pawh hnâwmhnaw ang mai a ni ang.”

¹⁸LALPA thinurna nî-ah chuan An tangkarua leh an rangkachakin A chhan chhuak thei lo vang; A ram pumpui chu a thikna meipuiin a kâng ral ang, A ram chhûnga mi chêng zawng zawng A thenfai vek tawh dâwn avângin.

BUNG 2

SIM TURA NGENNA

¹Inkokhâwm rawh u, A ni, in kokhâwm teh u, Aw, hnam tlâktlailote u.

²Dân thu tihchhuah a nih hmâ a, Buhsî ang maia nî a liam hmâ hian, LALPA thinurna in chung a lo thlen hmâa, LALPA thinurna nîin a rawn nan hmâ ngei che u hian!

³LALPA chu zawng rawh u, nangni mi inngaitlâwm, Leilunga a rorêlna dik chelhtute u. Dikna leh tlâwmna nun zawng rawh u. Tichuan, LALPA thinurna nî-ah chuan, Thuhrûkin in awm thei mial mahna.

HNAMTE CHUNGA RORELNA

⁴Gaza khua chu hnuchhawn a ni ang a, Ashkelon khua chu a ram vek ang; Ashdod mite chu chhûn laiah an ûm chhuak ang a, Ekron mite chu an suatmang vek ang.

⁵Tuipui kama chêng, Kereth mite u, In chung a pik e! LALPA thû chuan a do si che u a, Aw Kanaan, Philistia rama mi: Luahtu awm tawh lo khawpin “Ka tiboral dâwn a che.”

⁶Tuipui kamte chu ran tlatna hmun a ni ang a, Berâmpute chawhlbûk leh berâm huang te a awm tawh zâwk ang.

⁷Tuipui kamte chu Juda chhûngkaw la dam chhunte tân a ni ang; Chutah chuan an ranruale an tlattîr ang; Ashkelon tualzâwlah te chuan tlâi ni nêmah an muzâl ang. LALPA an Pathianin a tlawh dâwn a, An saltânna aţang pawhin a hruai kîr leh dâwn si a.

⁸“Moab hovin an sawichhiatna te, Ammon-miten an dem dân te, Deuhsawh nân taka an hman ţhinzia te, An ram rûn tuma an vaubehna ţawng chaltlâizia te ka hai si lo.

⁹Chuvângin, ka nunna chhâlin ka sawi e, Sipaihote LALPA, Israelte Pathian chuan a ti: “Moab chu Sodom ang mai a ni ang a, Ammon mite chu Gomorra ang lek an la ni ang— Kângthâi hmun leh chi leilung maiah a chang ang a, Luah lohvin an awm kumkhua ang. Ka mi la thi bângte chuan an rawk ang a, Ka hnam la dam chhunte chuan an luahlân ang.”

¹⁰An chapo aiah hetiang hi an chan tâwk a ni ang, Sipaihote LALPA mi leh sâte dodâla, Hmusit taka an lo inulin khum ţhin avângin.

¹¹LALPA hi an tân chuan hlauhawm tak a ni, Khawvêl pathian zawng zawngte chu engmah lovah a chantîr dâwn si a; Tuipui kama chêng hnam zawng zawngten Anmahni hmun ţheuh aţangin, Amah chu chibai an bûk ang.

¹²“Nangni Ethiopia mite pawh Ka khandaihin a la tihlum ve ang che u.”

¹³Hmar lam do zâwngin a kut a lek ang a, Assuria a sawp chhia ang, Ninevi chu a tiram vek ang a, Thlalêr anga khawro a ni tawh ang.

¹⁴Chutah chuan ramsa tinrêng te, Sa rual te an bawh kkep khup tawh ang. Kânghlâite leh thlalêr chhimbukte chu Ban chhîp bâwkah te an riak ang a; Tukverhah te an hrâm ang a, Kawngka bul te chu a tlabal vek ang a; Sidar inte chu a chhe rem rum dâwn si a.

¹⁵Hei hi khawpui hlim thei tak Thlamuang taka awm ţhîn kha a ni a, A rilrûin, “Kei ka awm a, tu dang mah an awm chuang lo” a ti a. Engtin nge a lo ram chhiat tâka, Ramsate riahhmun maia a chan tâk? A vêla miten kal paha kut thin khumin An chek khum tlawk tlawk ang.

BUNG 3

JERUSALEM SUAHSUALNA

¹Helhmang leh bawhlhlawh kai, Hnehchhiah chîng khawpui chu a chung a pik e!

²A thu a zâwm duh lo va, Zilhna thu a pawm duh hek lo; LALPA a rinchhan duh lo va, A Pathian lam a hnaih duh hek lo.

³An hotute chu sakeibaknei hâhum an ang a; Rorêltute lah chinghne koham A tûk atân engmah an khêk thei lo.

⁴A zâwlneite chu mi butut leh bumhmang an ni: A puithiamte lah hmun thianghlim tibawhlhlawh tâwk lek an ni a, Dân chu an palzût vêl mai mai a ni.

⁵An hnêna awm LALPA chu a dik êm a, Thil dik lo a ti ve lo vang. Tûk tinin a rorêlna dikzia a lantîr ţhîn a; A tithlâwn ve ngai lo, Mi dik lote erawh chuan zah nachâng pawh an hre lo.

⁶Hnamte chu ka nuai bo va, An kulhte ka tihchhiatsak a; An kawthlêrte chu ka tiram vek a, Kaltlang tûr pawh tumah an awm ta lo. An khawpuite a chhe zo ta a; Luahtu tûr rêng an awm ta lo.

⁷Kei chuan, ‘Anni zawnin min ţih ngei ang a, Zilhna pawh an pawm ang chu— Eng vâng pawhin anni chu hrem mah ila, An chênna thlenga tihboral a ni lo vang,’ ka ti a. Mahse zîngah an tho va, an tikhawlo zo leh ta vek a.

A LA DAMCHHUN RINAWMTE

⁸“Chuvângin, râlâlâk la tûra ka thawh chhuah hma chu Min lo nghâk rawh u,” LALPAN a ti; Ka thiltih tum dân chu: Lalramte koh khâwma, hnam tina mite pawh hruai khâwm bawkin, An chungah ka thinurna nasa tak leh Ka lungawi lohzia inhrîkthlak ţhak mai hi a ni; Leilung zawng zawng hi ka thîkna meipui chuan A kâng ral vek dâwn a ni.

⁹“Chutih hunah chuan mipuite hnênah ţawng thianghlim ka pekîr leh ang, An zâa LALPA hming an lam theih nân leh, Thu khat vuua a rawng an bâwl tlan theih nân.

¹⁰Ethiopia lui râl lehlam aţangin Keimah chibai mi bûktute, Hnawh darhho fanute chuan Ka hnênah thilhlân tûr an rawn keng ang.

¹¹Chumi nîah chuan ka chungah in bawhchhiatnate leh In thiltih zawng zawng avângin in zak tawh lo vang; Chutih hunah chuan in zînga mi, In chapona lo hlimpuitute chu ka hnawt bo vek ang a, Ka tlang thianghlimah chuan in chapo thei tawh ngai lo vang.

¹²In zîngah chuan mi zâwldawh leh mi tlâwmte ka dah ang a, LALPA hming chu an rinchhan ber a ni tawh ang.

¹³Israel la damchhunte chuan thil dik lo an ti tawh lo vang, Dâwt pawh an sawi tawh lo vang a, An kâah bumna ţawngkam rêng rêng hriat tûr a awm tawh lo vang; An ranruale chawmin an chawh hahdam ang a, Tuman an tihlau tawh ngai lo vang.”

PATHIAN RINAWMNA HLIMPUI

¹⁴Aw Zion fanu, zai rawh! Aw Israel, au vak vak rawh! In thinlung zawng zawnin, lâwmin hlim rawh u, Aw, Jerusalem fanu!

¹⁵LALPA chuan i hremna a lak bosak tawh che a, I hmêlmâ pawh a hnawt chhuak ta. LALPA, Israel Lalber chu in zîngah a awm a; Chhiatna rêng rêng in tâwk leh tawh ngai lo vang.

¹⁶Chumi hunah chuan Jerusalem hnênah; “Hlau suh,” an ti ang a; Zion hnênah chuan, “I kut pawh zawi suh se,” an ti ang.

¹⁷In zînga awm, LALPA in Pathian, Mi Thiltitheia chuan a chhandam ang; In chungah a hlimin a lâwm êm êm ang a, A hmangaihna in a tingawi hlê hlê ang che u a, Hla sâin i chungah a lâwm êm êm ang.”

¹⁸“Mite sawi chhiatna phurrit phurtu, Nangmahni zînga mi, Kût hmang ve pha lova lungngaite chu ka hruai khâwm ang.

¹⁹Chumi hunah chuan Nangni nghaisatu zawng zawngte chungthû ka rêl ang; Kebaite chu ka chhandam ang a, An hnâwh chhuah tawhte chu ka hruai khâwm leh ang, Mualpho taka an awmtîrna ram tinah chuan Fakna leh hmingthanna ka khumtîr tawh ang.

²⁰Chumi hunah chuan ka hruai kîr leh ang che u a, Ka hruai khâwm leh ang che u; In saltâna ata ka hruaikîr hunah che u chuan, Khawvêl mi zawng zawng zîngah, Hmingthanna leh châwimâwina ka pê ang che u,” LALPAN a ti.

HAGGAIA

Ziah tu: Haggaia • Ziah kum: B.C. 520

Zâwlnei Haggaia thuchah ber chu Tempul sak that hna thawk zo thuai tûra a mite fuih thatho a ni. Babulon saltâng kîr lehte hnêna thupuangtu zâwlnei hmasa ber a ni a. B.C. 536 kuma Zerubabela hova saltâng kîr lehte khân an vêla hnam dangte dodâlna leh anmahni hmasialna avângin tempul lungphûm bâk sak chhonzawm an tum lo va. Chutih laia mite rilru ngui kaiharh tûrin Pathianin zâwlnei Haggaia leh Zakaria te a tîr ta a ni. Mipui a fuihna chu: ‘Tempul a chhiat rem rum laia, bang thuah nei ina chêng tûr in ni bîk em ni?’ (1:4) tih thu hi a ni. Tempul pawh thahnemngaiin an sa chhonzawm leh sauh sauh va, B.C. 516 khân an sa zo ta a ni. Haggaia hming awmzia chu hlimawm tihna a ni. Tempul hmasa tihchhiat hma lawk khân Pathian Thlarauvin a chhuahsan kha a ni a, Haggaia tân chuan tempul din thar leh chu Pathian awmpuina koh kîrlehna ang a ni. Chû bâkah, Haggaia thlarau mit chuan nakina kum sâng rorêl huna Messia tempul ropui zâwk lo la ding tûr te, an hnam tâna hun tha leh muanawm lo la awm hun te a thlîr daih a ni. Haggaia hi Bible-a lehkhawb 37-na a ni a, bung 2 a awm a, châng 38 a awm bawk.

BUNG 1

PATHIAN IN SA TURA THUPÊK

¹Lal Daria lal kum hnihna, thla rukna, ni khatnaah chuan, zâwlnei Haggaia hnênah LALPA thû chu Sealtiel fapa Zerubabela, Judai ram awptu hnênah leh, Jehozadaka fapa puithiam lalber Josua hnênah heti hian a lo thleng a,

²“Sipaihote LALPA chuan heti hian a ti: ‘Hêng mite hian, “A hun a lo la thleng lo, LALPA in sak hun a la thleng lo ve,” an ti mai mai a.

³Chuvângin, LALPA thu chu zâwlnei Haggaia hnênah a lo thleng ta a,

⁴“Tempul a chhiat rem rum laia, bang thuah nei ina chêng tûr in ni bîk em ni?”

⁵Chuvângin, sipaihote LALPA chuan heti hian a ti: “In kawng zawh lai kha chhût chiang rawh u!

⁶“Tam tak in chîng a, tlênte in thar a; In ei a, in puar si lo; In in a, in chhâwlhâl a reh si lo va; Puan in sin a, in lum phah si lo; In inhlawhfa a, mahse in hlawh chu ip pawpa thlak atân mai a ni.”

⁷Chuvângin, sipaihote LALPA chuan heti hian a ti: “In kawng zawh lai te hi chhût chiang rawh u!

⁸Thing lakhâwm tûrin tângah te han kal ula, tempul chu sa rawh u, chu chuan mi tilâwm ang a, chawimâwiin ka awm dâwn asin,” LALPAN a ti.

⁹“Tam tak in beisei a, mahse a hâwng tlêm hlê si a; inah in hâwn a, keiin ka lo chhêm bosak si che u a. Engvâng nge ni?” sipaihote LALPA chuan a ti a ni. “Mahni in lam pana in tlan haw diak laiin, ka in chu a chhiat rem rum vâng a ni.

¹⁰Chuvâng chuan a ni chung lam vânin daifim tla tûr a hrênsak che u a, leiin a rah chhuah tûr a hrênsak che u ni.

¹¹Lei chung leh tâng chungah te, buh leh uain thar leh hriak chungah te, lei aţanga thil lo chhuak tinrêng chungah te, mihring leh ran chungah te, kuta in thawhrimna zawng zawng chungah te khawkhêng ka ko ta a ni,” a ti a.

MIPUITE THU ÂWIHNA

¹²Tichuan, Sealtiel fapa Zerubabela leh, Jehozadaka fapa Josua, puithiam lalber leh, mipui zînga la dam chhun zawng zawngte chuan, LALPA an Pathian thû leh, LALPA an Pathianin a tîr anga zâwlnei Haggaia thû chu an zâwm a; mipuite chuan LALPA chu hmaichhanah an tîh ta a.

¹³LALPA mi tîr Haggaia’n LALPA thuchah chu mipuite hnênah a puang a, “In hnênah ka awm reng a ni, LALPAN a ti,” tiin.

¹⁴Tichuan, LALPAN Sealtiel fapa, Judai ram awptu Zerubabela thlarau leh, puithiam lalber Jehozadaka fapa Josua thlarau leh mipui la damchhun zawng zawngte thlarau chu a chaw tho va; tichuan, sipaihote LALPA an Pathian inah chuan an kal a, hna chu an thawk ta a,

¹⁵chu chu Lal Daria lal kum hnihna, thla rukna, ni 24-na a ni.

BUNG 2

PATHIAN IN ROPUI TUR CHU

¹Thla sarihna, ni 21 niin LALPA thu chu zâwlnei Haggaia hnênah a lo thleng a:

²“Sealtiel fapa Zerubabela, Judai ram awptu leh Jehozadaka fapa Josua, puithiam lalber leh mipui zînga la dam chhunte hnênah heti hian sawi rawh:

³“In zîngah tûn hmâa hê in ropui lai hmu phâ tu nge awm? Tûnah hian eng ang takin nge in hmuh tâk? In mithmuhah khaikhin tham pawh a ni tawh lo a ni lo vem ni?

⁴Zerubabel, chak takin awm rawh,’ LALPAN a ti; nang Josua, puithiam lalber Jehozadaka fapa, chak takin awm la; nangni ram chhûng mipui zawng zawngte u, chak takin awm ula, hna thawk rawh u,’ LALPAN a ti; ‘In hnênah ka awm si a,’ sipaihote LALPAN a ti e.

⁵‘Aigupta ram aţanga in chhuah laia in hnêna thu ka thlun tawh ang khân ka Thlarau chu in zîngah a awm reng a ni; hlau rêng rêng suh u!’

⁶“Sipaihote LALPA chuan heti hian a ti: ‘Lei leh vânte, tuifinriat leh khawmual te hi rei lo têah ka sawinghîng leh dâwn a;

⁷hnam zawng zawng ka sawinghîng ang a, ‘Hnam Tinrêngte Duhzâwng’ chu a lo thleng ang a, he tempul hi ropuinain ka tikhat ang,’ sipaihote LALPA chuan a ti.

⁸‘Tangkarua hi ka ta a ni a, rangkachak pawh ka ta a ni,’ sipaihote LALPA chuan a ti.

⁹‘He tempul hnunung zâwk hi a hmasâ ai khân a ropui zâwk ang,’ sipaihote LALPA chuan a ti. ‘He hmunah hian thlamuanna ka thlen ang,’ sipaihote LALPA chuan a ti a ni.”

MIPUITE BAWLHHLAWHNA

¹⁰Daria lal kum hnihna, thla kuana, ni 24-naah chuan, zâwlnei Haggai hnênah LALPA thu a lo thleng a,

¹¹“Sipaihote LALPA chuan: ‘Puithiamho chu dân thù zâwt rawh,

¹²“Miin a silhfên hmâwrah sa thianghlim fûn sela, a silhfên hmâwr chuan chhang emaw, sa tuihâng emaw, uain emaw, hriak emaw, ei tûr rêng rêng lo tawk ta sela, a thianghlim tho ang em?” a ti, tiin,” a ti a. Puithiamte chuan, “Thianghlim tawh lo vang,” tiin an chhâng a.

¹³Haggai chuan, “Mitthi ruang khawih avânga mi bawlhhlawhin hêng hi khawih ve ta se, a bawlhhlawh ve tho ang em?” a ti a. Puithiamte chuan, “A bawlhhlawh ve ang,” an ti a.

¹⁴Haggai chuan, “He mite leh hê hnam hi ka hmâah chutiang tak chu an ni a, an kut chhuak tinrêng pawh chutiang baw chu a ni; an thil hlante chenin a thianghlim lo a ni,’ LALPAN a ti,” tiin a chhâng a.

MALSAWMNA THUTIAM

¹⁵LALPA tempula lung in rem chhoh hmâ hian hun kal zêl tûr chungchâng chu wawiin aţang hian ngun takin ngaihtuah rawh u–

¹⁶khâng hun lai te khân, miin buh ephah 20 an chhûn khâwmna hmun aţangin 10 chauh an thar a; uain sâwr khur aţanga bath 50 thâl chhuah theih an beisei laiin 20 chauh a tling thîn a nih kha.

¹⁷In thawhrim rah zawnz zawnz kha eichhetu hrik te, ngêt te, rialte hmangin ka hrem che u a; chuti chung pawhin ka lam in lo hawi duh chuang si lo,’ LALPAN a ti.

¹⁸Vawiin ni 24 nî, thla kuana, LALPA tempul lungphûm in phûm ni aţang hian–ngun takin chhût teh u:

¹⁹Buhzêmah buhchî a la awm em? Grêp hrui te, theipui kung te, theibuhfai te leh olive thingten rah an la chhuah rih lo va. Nimahsela, wawiin aţang hian mal ka sâwm ang che u.

ZERUBABELA, CHHINCHHIAHNA ATÂN THLANG

²⁰Chumi thla, ni 24 nî chuan LALPA thu chu Haggai hnênah a lo thleng leh a,

²¹“Judai ram awptu Zerubabel hnênah heti hian ti rawh: ‘Lei leh vân ka tinghîng dân.

²²Lalramte ka paih thla ang a; Jentail lalramte chakna ka chhu chhia ang. Tawlailîrte ka tichhia ang a, A chung a chuangte ka phihi thlâ ang; Sakawr leh a chungchuangte chu an tlû ang, Mî tin mahni unaute khandaiha tihtlûk an ni ang.

²³Sipaihote LALPA chuan heti hian a ti, ‘Chumi nîah chuan, ka chhiahhlawh Zerubabel, Sealtiel fapa, ka chelh tlat ang che,’ LALPAN a ti; ‘tichuan, hming nemna zungbunah ka siam ang che; ka lo thlang tawh si che a,’ sipaihote LALPA chuan a ti.

ZAKARIA

Ziah tu: Zakaria • Ziah kum: B.C. 560-520

Zakaria hming awmzia chu Lalpan a hre reng tih a ni. Babulon saltân hnûa zâwlnei Haggia nêna rawngbâwl rual an ni. Zakaria hrilhlâwkna bûa thil chhinchhiah tlâk tak takte chu: (i) Thuthlung Hluiah Isaia bu tih lohvah chuan Messia chanchin chuan tamna ber; (ii) Zâwlneite ho zingah hun hnununga thil lo thleng tûr chanchin chipchiara sawi chiangu ber; (iii) Israelte chanchinah Zakaria hi puithiamna leh zâwlneihna kaikawp remtu a nih avângin, Puithiam-Zâwlnei ropui Krista nihna târlangu ber pakhat a ni a; (iv) Bible-a khuhhawna bu hnih, Daniela bu leh Thupuan bute ziarâng phawk chhuak ber a ni bawk. Krista lokallehna te, a lalna leh a rorêlna te, a mihrinna leh a pathianna te, a inggaihlâwmna te, hnâwl leh phatsana a awm dân tûr te, tangka sawmthuma hralh a nih dân tûr chena lo hrilh lâwktu a ni. Hun hnununga thil thleng tûr a lo sawi lâwk zingah Harmageddon Indona lo la awm tûr (13 & 14, cp. Thup. 16:16) te, hmêlma sipaiten Jerusalem an hual dân tûr te, Israel mite chhan tûra vân aţanga lo chhuka, Olivet Tlânga LALPAN kê arawn ngah dân tûr te, Olive tlâng lo khichat ruah mai tûr te, hnam tin chung Kristan ro a rêl dân tûr te, Israel ram hmêlmang lo insiam danglam dân tûr te, a hnam anga Israelte lo ţhangharhin hre lova an khenbeh kha, an pipute chena an lo ngahfâk Messia a lo ni reng tih hre chhuak leha, a hnam pumin an pawma, urhsûn êm êma an sîn leh hnunawh dân tûr te leh a thi bângho chhandama an awm vek dân tûrte fiah takin a sawi lâwk a. Khawvêl tâwpa Krista hova kum sâng rorêl tûr thu a sawi bawk. Zakaria hi Bible-a lehkhabu 38-na a ni a, bung 14 a awm a, châng 211 a awm bawk.

BUNG 1

SIM TURA NGENNA

¹Daria lal kum hnihna, thla riatnaah chuan, Iddova fapa, Barakia fapa zâwlnei Zakaria hnênah LALPA thu a lo thleng a,

²“LALPA chu in thlahtute chungah a thinur êm êm a ni.

³Chuvângin an hnênah, ‘Sipaiote LALPA chuan heti hian a ti, ti ang che: “Ka hnênah lo kîr rawh u,” sipaiote LALPA chuan a ti; “Kei pawh in hnênah ka lo kîr ve ang,” sipaiote LALPA-in a ti.

⁴“In thlahtute ang khân awm ve suh u. Anni chu zâwlnei hmasaten, ‘Sipaiote LALPA chuan heti hian a ti: “In awmdan sual leh in thilsual tihte kha tunah hawisan rawh u,”’ an ti thîn a. Nimahsela, an ngaithla duh lova, an zâwm duh hek lo,” LALPAN a ti a ni.

⁵“In thlahtute chu khawiah nge an awm? Zâwlneite pawh an dam kumkhua em ni?

⁶Mahse, ka thute leh ka thuruatho, Ka rawngbâwltu zâwlnei ka lo pête khân In thlahtute chu an hmakhalh vek a ni lo vem ni? Tichuan, an inlamlêl a: Sipaiote LALPAN kan chungah tih a tum angin, Kan awm dân leh kan thiltih ang zêlin Kan chungah a ti ta a

nih hi,” tiin.

INLÂRNAA SAKAWRTE

⁷Daria lal kum hnihna, thla 11-na, Sebat thla, ni 24 nî chuan Iddova fapa, Barakia fapa, zâwlnei Zakaria hnênah LALPA thu a lo thleng a:

⁸Ngai teh, zânah chuan mi pakhat, sakawr sen chungah chuang ka hmu a, ruama thingbuk zingah hian a lo ding a; a hnungah chuan sakawr sen te, a buang te leh a vârtê a awm a.

⁹“Ka lalpa, hêng hi eng nge ni?” ka ti a. Mi betu Vântirrhkoh chuan ka hnênah, “Eng nge an nih keiman ka entîr ang che,” a ti a.

¹⁰Thingbuk zinga ding chuan a chhâng a, “Hêngte hi lei pum pui fang chhuak tûra LALPA tirtê an nih hi,” a ti a.

¹¹Anni chuan LALPA Vântirrhkoh, thingbuk zinga ding chu an chhâng a, “Leilung hi a pumin kan fang chhuak tawh a, ngai teh, lei pum pui chu a châwl hahdam veng veng mai a ni,” an ti a.

LALPAN ZION A THLAMUAN DAWN

¹²LALPA Vântirrhkoh chuan a chhâng a, “Aw, sipaiote LALPA, Jerusalem leh Judai ram khawpuite chungah hian zahngaihna nei lovin engchen nge i awm dawn le, hei, kum 70 lai i thinur ta mai si a?” a ti a.

¹³LALPA chuan mi betu Vântirrhkoh hnênah chuan thlamuanawm tak leh ţha takin a chhâng a.

¹⁴Mi betu Vântirrhkoh chuan ka hnênah, “Sipaiote LALPA chuan heti hian puang chhuak tûrin min ti a ni: “Jerusalem hi ka thik takzet a, Zion tân ţahnem ka ngai êm a ni.

¹⁵Nuamtâwl ngaina-ho hnamte chu ka haw takzet a ni; Ka han thinur hlek kha a ni a, Mahse hênggho hian an lo tuartîr nghek mai si a.”

¹⁶Chuvângin, LALPAN heti hian a ti: “Zahngai takin Jerusalem ka lo kîr e; A chhûngah ka in chu sak a ni ang,” sipaiote LALPA chuan a ti, “Jerusalem chungah tehna hrui zam a ni ang,” tiin.

¹⁷“ ‘Sipaiote LALPA thú chu va puang leh rawh: “Ka khawpuite chu hausa takin an inzârdarh leh dawn a ni; LALPAN Zion chu thlamuang takin a awmtîr leh ang a, Jerusalem chu a thlang leh ang,” tiin.

INLÂRNAA KÎ

¹⁸Chung lam thlîra ka han hawi vêl lai chuan, kî palî ka hmû a.

¹⁹Mi betu Vântirrhkoh hnênah chuan, “Hêng hi eng nge ni?” ka ti a. Anni chuan, “Hêngte hi Juda te, Israel te leh Jerusalem phîn darhtu kî an nih hi,” a ti a.

²⁰LALPA chuan kut themthiam mi palî mi entîr a.

²¹Kei chuan, “Heng mite hi eng ti tûra lo kal nge an nih? ka ti a. Anni chuan, “Hêng mite hi tuma beih lêt ngam loh khawpa Juda mite phîn darhtu an ni a; Juda ram tidarh tûra an laka kîrawn hmangtu hnamte kîrawn tihţhaiha, hnawt chhuak tûrin hêng mite hi an lo kal a ni,” a ti a.

BUNG 2

INLÂRNAA TEHNA HRUI

¹Chung lam thlîrin, ka han hawi vêl a, ngai teh, mi pakhat hian a kutin tehna hrui a lo keng a.

²Kei chuan, “Khawi lamah nge i kal dâwn?” ka ti a. Ani chuan, “Jerusalem hi a dung leh vâng engchen nge tih hre tûrin ka teh dâwn a ni,” a ti a.

³Mi betu Vântirhkoh kha a kal chhuak a; amah tâwk tûrin Vântirhkoh dang a lo chhuak baw a,

⁴a hnênah, “Tlân la, hê tlangvâl hnênah hian: ‘Jerusalem chu mihring leh ran an tam êm avângin, kulh nei lo khua anga luah a ni ang.

⁵A vêlin kei hi mei bang ka ni ang a, a chhûng tiropuitu ka ni baw ang,’ “LALPAN a ti.

ZION LEH HNAME AN LA HLIM DAWN

⁶“Khaih khaih! Hmar lam ram kha tlânsan r’u,” LALPAN a tih chu; vânthli pali angin ka kâipharih tawh si che u a,” LALPAN a ti.

⁷Khai le, Zion! Nang, Babulon fanu lo chênpuitu, tlân chhuak rawh.”

⁸Sipaihote LALPA chuan heti hian a ti si a: “A ropuina chuan nangmahni rawktu hnamte hnênah mi tîr a; nangni khawihthu chuan ka mitnaute a khawih a ni.

⁹Anni chu ka kut ka thin khum ang a, an chhiahhlawhten duh tâwkin an la rawk ve ang. Chutichuan, sipaihote LALPA chuan mi tîr ngei a ni tih in hria ang.

¹⁰“Aw, Zion fanu, hlimin zai rawh! Ngai teh, in zînga chêng tûrin ka lo kal dâwn si a,” LALPAN a ti.

¹¹“Chumi nîah chuan hnam tam takin LALPA an zawm ang a, ka mite an ni ve tawh dâwn a ni. Kei pawh in zîngah ka chêng ang. Tichuan, sipaihote LALPA chuan in hnênah mi tîr tih in hria ang.

¹²LALPA chuan Ram Thianghlîma Judai ram chu a roluah atân a nei ang a, Jerusalem pawh a thlang nawn leh dâwn a ni.

¹³Tîsâ zawng zawng chu LALPA hmâah ngawi thiap rawh se, ani chu a awmna hmun thianghlîm aţangin a rawn tho chhuak tawh si a!”

BUNG 3

INLÂRNAA PUITHIAM LALBER

¹Puithiam lalber Josua, LALPA Vântirhkoh hmaa dîng leh, amah dotu tûr, a dîng lama Setana dîng chu mi entîr a.

²LALPA chuan Setana hnênah, “Setan, LALPAN a hau va che! Jerusalem thlangtu LALPA chuan a hau va che! He mi hi meia ta thingthu pawh chhuah chu a ni lo vem ni?” a ti a.

³Josua chu thawmhnaw bâl tak inbel chung a Vântirhkoh hmaa dîng a ni a.

⁴Ani chuan a hmaa dîngte hnênah, “A silhfên bawhlhlawh kha hlihsak rawh u,” a ti a. Ani hnênah chuan, “En teh, i khawlohnate chu i hnên aţangin ka la bo ta a, silhfên manto takin ka thuan ang che,” a ti a.

⁵Kei chuan, “Diar fai tak khimtîr rawh se,” ka ti a. Tichuan a lûah chuan diâr fai tak an khimtîr a, silhfênin an thuan a. LALPA Vântirhkoh chu a bulah chuan a dîng reng a.

CHAWRNO LO CHHUAK TUR

⁶LALPA Vântirhkoh chuan Josua chu khûn takin thu a chah a,

⁷“Sipaihote LALPA chuan heti hian a ti: ‘Ka kawng te i zawh zêla, Ka thupêkte i zawm tlat chuan, Ka chhûngkaw rorêltûah i ţang ang a, Ka rorêlna hmun chu i kutah a awm baw ang; Heta dînghote zîngah pawh hian Kal vêlna hmun ka pe vê ang che.

⁸Aw Josua, puithiam lal, lo ngaithla teh, Nang leh i hmaa ţhu i ţhiante kha, Chhinchhiahna mak tak an ni si a; Ngai teh, ka Chhiahhlawh CHAWRNO-A chu ka rawn tîr dâwn si a.

⁹Ngai teh, Josua hmaah lung ka ngath a: Lung chungah mit pasarih a awm. Ngai teh u, chutah chuan thuziak ka ker dâwn,’ Sipaihote LALPA chuan a ti, ‘Chu ram sualna chu ni khat thilah ka tibo vek ang.

¹⁰Sipaihote LALPA chuan, ‘Chumi nî-ah chuan, ‘Mi tinin an thenawmte sâwmin, An grêp hrui leh an theipui kung hnuaiah an awmho del del tawh ang,’” a ti.

BUNG 4

INLÂRNAA KHAOWNVÂR DAHNA LEH OLIVE THING

¹Mi betu Vântirhkoh kha a lo kal leh a, muhîl lai inkaiharh ang mai hian mi rawn kaiharh a.

²Ani chuan ka hnênah, “Eng nge i hmuh le?” a ti a. “Ka han en vêl a, rangkachak hlana siam khâwnvâr hûnna, a chhîpa thlêng dar leh, a chung a khâwnvâr pasarih nê, chûng khâwnvâr pasarihte chuan dâwt pasarih an nei ţeuh va.

³Thlêng dar sîr dîng leh veiah chuan olive thing pakhat vê vê a awm a.”

⁴Mi betu Vântirhkoh chu chhângin, “Hêngte hi engtihna nge ni, ka pu?” ka ti a.

⁵Mi betu Vântirhkoh chuan, “Hêng hi engtihna nge i hre lo maw?” a ti a. “Hre lo, ka pu,” ka ti a.

⁶Ani chuan heti hian mi hrilh ta a: “Hei hi Zerubabela hnêna LALPA thu lo thleng chu a nih hi: ‘Chakna ni lovin, thiltihtheihna pawh ni hek lovin, ka Thlarau zâwkin le,’ Sipaihote LALPA chuan a ti.

⁷Aw tlâng ropui, tu nge maw i nih le? Zerubabela hmâah râwt mâm in la ni ang! A sak zawh nân lung an phûm hunah “Khawngaihna, a tân khawngaihna!” tiin an au dur dur ang.”

⁸Hei lo pawh hi LALPA thu ka hnênah a lo thleng a:

⁹Jerubabela kut ngei chuan He tempul lungphûm hi a phûm a; Ama kut bawkin a sa zo leh ang. Tichuan, sipaihote LALPA chuan in hnênah mi tîr tih in la hria ang.

¹⁰Tereuh têa bul ţan hi tu nge hmusit ngai? Hêng thil pasarihte hian Jerubabela sahal khai chu hmuhnawm tiin an hlim êm êm a. LALPA mit an ni a, Khawvel pumpui thlîr kual rengtu an ni,” tiin.

¹¹Kei chuan a hnênah, “Hêng olive thing pahni khâwnvâr hûnna dîng leh veia mi te hi eng nge ni?” tiin ka zâwt a.

¹²Tihian ka zâwt nawn leh a, “Rangkachak dâwt pahni kal tlanga rangkachak hriak rawn luan luhna, hêng olive thingzâr pahnihte hi eng nge ni?” ka ti a.

¹³Ani chuan, “Hêngte hi engtihna nge tih i hre lo maw?” a ti a. “Hre lo, ka pu,” ka ti a.

¹⁴Ani chuan, “Hêng hi lei pum pui LALPA kianga ding thîn, hriakthih mi pahnihte chu an nih hi,” a ti a.

BUNG 5

INLÂRNAA LEHKHABU ZIAL THLÂWK

¹Chung lam ka han hawi chho va, lehkhabu zial thlâwk lai hi ka hmû a.

²Ani chuan ka hnênah, “Eng nge i hmuh?” a ti a. Kei chuan, “Lehkhabu zial thlâwk lai ka hmû. A dung lam tawng 20, a vâng lam tawng sâwm a ni,” ka ti a.

³Ani chuan ka hnênah, “Hei hi lei pumpuia ânhche kal chhuak chu a ni: lehkhabu zial phêk lehlamah ‘Rûkrû apiang hnawh chhuah tûr,’ tih leh, a phêk lehlamah, ‘Dâwta chhechhamtu apiang hnawh chhuah tûr,’ tih a chuang a.”

⁴Ânhhia ka tûr chhuak ang,” sipaihote LALPA chuan a ti; “Rukru inah te, dâwta ka hminga chhechhamtu inah te a lût ang. Chu pâ inah chuan a awm reng ang a, a thingphel leh lungtum chawpin a eiral vek ang,” a ti a.

INLÂRNAA BÂWM CHHUNGA HMEICHHIA

⁵Mi betu Vântirhkoh lo kal chhuak chuan ka hnênah, “Tunah khân hawi chho la, kal chhuak ta kha eng nge tih han en teh,” a ti a.

⁶Kei chuan, “Eng thil nge ni?” ka ti a. Ani chuan, “Kal chhuak ta chu tehna bâwm a ni,” a ti a. Ani vêk chuan, “Hei hi lei pumpuia an lan dân a ni e,” a ti a.

⁷A chhinna suan phêk chu a hawng a, tehna bâwm chhûngha chuan hmeichhe pakhat a lo thû reng a;”

⁸ani chuan, “Hei hi Suaksuali a nih hi!” a ti a. Bâwm chhûngha chuan a nem lût a, suan phêk chuan a chhîn leh ta a.

⁹Ka han hawi chho va, ka han en vêl a, hmeichhe pahni, an thlaa thli awm nê an lo chhuak a; kânghlai thlâ ang thlâ an nei a, lei leh vân inkârah chuan tehna bâwm chu an châwikâng ta a.

¹⁰Tichuan, mi betu Vântirhkoh hnênah, “Khawi lamah nge bâwm chu an kalpui dâwn?” tiin ka zâwt a.

¹¹Ani chuan, “A in an sakna tûr Sinar ramah a ni e; an sak peih hunah bâwm chu a dahna tûr hmunah an dah dâwn a ni,” a ti a.

BUNG 6

INLÂRNAA TAWLAILÎR PALI

¹Ka han hawi chho va, ka han en vêl a, ngai teh, tlâng pahni inkârah hian tawlailîr pali an lo kal a, a tlâng leilung chu dâr hlîr a ni a.

²Tawlailîr pakhatnaa sakawrte chu a sen a ni a, tawlailîr pahnihaa sakawrte chu a dum a ni a,

³tawlailîr pathumnaa sakawrte chu a vâ a ni a, tawlailîr palinaa sakawrte chu a tjal, sakawr chak chi a ni.

⁴Mi betu Vântirhkoh chu ka zâwt a, a hnênah, “Ka pu, hêngte hi eng tihna nge ni?” ka ti a.

⁵Vântirhkoh chuan ka hnênah, “Hêngte hi vân thlarau pali, leilung zawng zawng LALPA hmaa ding thîn, anmahni awmna hmun aţanga rawn kal chhuakte an nih hi.

⁶Sakawr dum awmna saw hmar lama kal chhuak tûr a ni a, a vâte sâwn an zui ang a, a tjalte saw chhim lam rama kal tûr an ni,” a ti a.

⁷Sakawr chak chîte chu thatho takin, lei pum pui fang chhuak tûrin an chhuak ta a. Ani chuan, “Kal ta ula, lei pum pui chu va fang chhuak vek rawh u,” a ti a. Tichuan, lei chung zawng zawngah chuan an va kal chhuak ta a.

⁸Ani chuan mi âu va, ka hnênah, “En teh, hmâr lam rama kalte khân hmâr ramah chuan ka Thlarau tân chawlh hahdamna min pe a ni,” a ti a.

JOSUA HNENA LALLUKHUM KHUMTIR TURA THUPEK

⁹LALPA thû chu heti hian ka hnênah a lo thleng a:

¹⁰“Saltâng, Babulon aţanga lo kal, Heldaia te, Tobija te, Jedaia te hnên aţanga thilpêk chu dawn sak la, chumi ni lâ lâ chuan kal la, Zephania fapa Josia inah chuan lût rawh.

¹¹Silvar leh rangkachakte la chhuak la, chu chuan lallukhum ropui siam la, Jehozadaka fapa Josua, puithiam lal lûah khumtîr rawh.

¹²A hnênah chuan tihian ti la, ‘Sipaihote LALPA chuan heti hian a ti: “Hei le, Mi pakhat CHAWRNO-A an tih chu! Ama hmun aţangin a lo chawr chhuak ang a, LALPA tempul chu a rawn din dâwn a ni;

¹³A ni, LALPA tempul chu a rawn din ngei ang. Ropuina chu a khum ang a, A lalthutthlênga thuin ro a rêl ang; A lalthutthlêng chungah puithiam a ni ang a, An pahniha inkârah inremna a awm ang,” tiin,’ a ti a.

¹⁴“Lallukhum ropui chu Helema te, Tobija te, Jedaia te, Zephania fapa Hena te tân LALPA tempulah hriatrengna tûr a ni ang.

¹⁵Hla taka mite pawh an lo kal ang a, LALPA tempul chu an rawn sa ve ang. Tichuan, sipaihote LALPA chuan in hnênah mi tîr ngei tih in la hria ang. LALPA in Pathian âw chu thahnemngai taka in zawm chuan, hê thil hi a lo la thleng ngei ang,” a ti a.

BUNG 7

CHAWNGHEI AIIN THUAWIH A TĤA ZAWK

¹Lal Daria lal kum 4-na, thla kuana, Kislev thla, ni lî ni chuan, LALPA thû chu Zakaria hnênah a lo thleng a,

²chutih lai chu mipuiten Serezera te, Regem Meleka leh a hote nê, LALPA hmaa tawngtai tûra Pathian ina an tîr lai a ni a,

³sipaihote LALPA ina awm puithiamte leh zâwlneite hnênah chuan, “Kum tam tak ka lo tih tawh thîn angin, thla ngânaah hian ka la tpin, chaw ka la nghei zêl dâwn em ni?” tiin an va zâwt a.

⁴Sipaihote LALPA thû chu ka hnênah a lo thleng a,

⁵“Ram chhũa mi zawng zawngte leh puithiamte hnênah sawi rawh: ‘Khâng kum 70 chhũa thla ngâ-na leh thla sarihnaa chaw ngheia in sùn thìn khân, keima tân, keima tân ngei in lo nghei ngút emaw chu?’

⁶In eia, in in pawhin, nangmahni tâna eia, in mai in ni lo vem ni?

⁷Jerusalem leh a chheh vêl khawpuite an luah khaha, an hmuingîl êm êma, Chhim lam leh Phairuamte pawh an luah khah laia, LALPA thù zâwlnei hmasaten an puan chhuah th̄inte baw kha in zâwm tûr a ni lo vem ni?’ tiin hrilh rawh,” a ti a.

THU AWIH LOH RAH : SALTANNA

⁸LALPA thù chu Zakaria hnênah a lo thleng a,

⁹“Sipaihote LALPAN heti hian a ti: ‘Dik takin rorêl ula, Mi tinin mahni unaute hnênah Khawngaihna leh lainatna lantîr rawh se.

¹⁰Hmeithai te, pa nei lo te, Mi khual leh rethei te nêksâwr suh u. Tûma’n a unaute tâna th̄a lo tûr chu A rilru pawhin ngaihtuah suh se,’ a ti a ni.

¹¹“Nimahsela, an bengkhawn duh lo va, an tukkhum chhah chhawnin, an hriat loh nân an beng an chhuchhêt a.

¹²A ni, sipaihote LALPA chuan a Thlarau ngeia zâwlnei hmasate hnêna a hrilh, a dânte leh a thûte an ngaihtlâk duh loh avângin, an th̄inlung chu lung anga changin an tisak a. Chuvâng chuan sipaihote LALPA thinurna nasa tak a lo thleng ta a ni.

¹³Chuvângin, an hnêna thu a hrilh laia an ngaithla duh lo ang bawkin, kei minrawn auh ve lai khân ka ngaihsak duh ta bîk lo a nih kha,” sipaihote LALPA chuan a ti.

¹⁴“Tichuan, an la hriat ngai loh hnam tin zîngah th̄awngaleivîrin ka ph̄in darh ta hlawm a. Ram pawhin a chhiat phah dêr a, tumahrawn lêt emaw, veivâk emaw pawh an awm tawh hek lo; ram nuam tak chu an tichhe dêr mai sî a.”

BUNG 8

JERUSALEM : KHAWPUI THIANGHLIM NI ZEL TUR

¹Sipaihote LALPA thù chu ka hnênah a lo thleng a,

²Sipaihote LALPA chuan heti hian a ti: “Zion hi th̄ik taktêin ka th̄ik a; Namênlova thinur khawpin ka th̄ik a ni.’

³“LALPA chuan heti hian a ti: ‘Zion-ah chuan ka kîr leh ang a, Jerusalem-ah ka chêng ang. Jerusalem chu Thutak Khawpui an ti ang a, Sipaihote LALPA Tlâng chu, Tlâng Thianghlim an ti baw ang.’

⁴“Sipaihote LALPA chuan heti hian a ti: ‘Jerusalem kawthlêrahte chuan Pitar leh putar tiang hawl, Kum upa tak tak an th̄u fer fur leh dâwn a ni.

⁵Khawpui kawthlêr-ah te chuan, Nula leh tlangvâlte chu infiamin An zi hut hut ang.’

⁶“Sipaihote LALPA chuan heti hian a ti: ‘Tuna thi bângten mak ti hle mahse, Ka tân th̄il mak a ni ve kher dâwn em ni?’ Sipaihote LALPA chuan a ti.

⁷“Sipaihote LALPA chuan heti hian a ti: ‘Ngai teh u, khawchhak ram ațangte leh Khawthlang ram ațangtein ka mite chu ka chhan chhuak ang;

⁸Ka hruai kîr leh ang a, Jerusalem-ah ngei an chêng leh ang. Ka mite an ni ang a, Kei pawh, thutak leh diknain an Pathian ka ni ang.”

⁹Sipaihote LALPA chuan heti hian a ti: “Nangni, sipaihote LALPA awmna in tâna lung an phûm nia Zâwlneite hmanga thupuan, tâna lo ngaithlatute u, ‘Tempul chu sak a nih theih nân, In kutte tichak rawh u.

¹⁰Tûn hmâ khân mîhring leh ran tân inhlawhna a awm lo va; Hmêlmâte avângin mi lût leh chhuak tân a râlmuang si lo va; Mi tin an thenawmte nên ka indotîr vâng a nih kha.

¹¹Tûnah erawh chuan, hêng mi la dam chhunte tân hian, tûn hmâ ang kha ka ni tawh lo vâng,’ sipaihote LALPA chuan a ti.

¹²Thlai chî a th̄a dâwn si a, Grêpte chu a rah bâwr tep tup ang; Leiin a hlâwkna a chhuah ang a, Vânin daifimin a châwm baw k ang. Chûng th̄il zawng zawng chu Hê nham la dam chhunte ta tûr vek a ni ang.

¹³Heti ang hi th̄il awm dân tûr a ni ang: Hnam tinte ânchhe bûra in awm th̄in kha, Aw, Juda-te leh Israel chhûngte u, Ka chhandam ang che u a, malsâwmna in lo ni tawh zâwk ang. Hlau suh ula, In kutte chu lo chak sauh sauh rawh se.’

¹⁴“Sipaihote LALPA chuan heti hian a ti: ‘In thlahtuten mi tihthinur lai khân Hrem che u ka tum tlat th̄in kha, Ka thù pawh ka zûk duh hek lo, Sipaihote LALPA-in a ti.

¹⁵Tûn hunah erawh chuan Jerusalem leh Juda chhûngte tân th̄at chhuah mawlh ka tum ta a ni. Hlau rêng rêng suh u.’

¹⁶Hêngte hi in tih tûr a ni ang: Mi tinin mahni thenawm hnênah thu dik tak sawi rawh se, Dik takin, inrem tak leh fel takin rorêl th̄in rawh u;

¹⁷Tuman mahni thenawmte chhiatna tûr th̄inlung pu suh se; Dâwta chhechham hi chîng hlek suh u. Hêng th̄ilte hi ka huatzâwng a ni,’ Sipaihote LALPA chuan a ti a ni.”

¹⁸Sipaihote LALPA thu chu ka hnênah a lo thleng a,

¹⁹Sipaihote LALPA chuan heti hian a ti: Thla lînaa chawnghei te, Thla ngânaa chawnghei te, Thla sarihnaa chawnghei te, Thla sâwmnaa chawnghei te hi Juda chhûngte tân lâwmna leh hlimna, Ruai hlimawm a ni tawh ang. Chuvângin, remna leh thutak ngaina rawh u.’

²⁰“Sipaihote LALPA chuan heti hian a ti: ‘Khawpui tam taka chêng mipui Tam tak an lo la kal nguah nguah ang;

²¹Khawpui pakhata mite chu khaw dangah an kal ang a, “Hawh u, LALPA hnênah t̄awngt̄ai tûrin kal vat vat ila, Sipaihote LALPA chu i zawng ang u. Kei pawh ka kal ve dâwn,” an la ti ang.

²²Ni e, sipaihote LALPA zawnga, LALPA hnêna t̄awngt̄ai tûrin, Mipui tam tak leh hnam ropuite chu Jerusalem-ah an lo la kal mup mup dâwn a ni.’

²³“Sipaihote LALPA chuan heti hian a ti: Chûng hunachte chuan hnam tin leh t̄awng tin ațanga mi sâwm zêlin Juda mi pakhat kawrbâna vuan chungin, “I hnênah Pathian a awm tih kan hria a, i rualin min kaltîr ve hrâm rawh,” an la ti ang,” “ a ti a.

BUNG 9

HMELEMA LAKA ISRAEL VENHIMNA

¹Hadrak leh Damaska chungah phurrit thleng tûr leh a inngahna tûr chu (Mihringte mit leh Israel hnam zawng zawngte mit chu LALPA chungah a fu si a);

²An ramria awm Hamath te, Tura te leh Sidon te pawh, Hmer tel an ni ve tho vang, fing teh mah se.

³Tura chuan kulhbîng sâng te a din a, Silvar te chu vaivut ang maiin a chhêk khâw a, Rangkachak pawh kawthlêra chirhdiak zât zet a ni.

⁴Mahse LALPAN a paih chhuak dâwn; Tuipuia a thiltihtheihna chu a tihchhiatsak ang a, Meipuiin a kâng ral ang.

⁵Ashkelon chuan a hmuhin a hlau ang a; Gaza pawh nasa takin a lungngai ang; Ekron khaw tân beiseina a tihbosak ang. Gaza lalin a thih phah ang a, Ashkelon chu an luah leh tawh lo vang.

⁶Ashdod chu hnam chawhpawhlin an luah ang a, Philistia mite chapona chu ka tiboral ang.

⁷A kâ ata a thisen ka la bo vang a, A kam chhûnga thil tenawmte ka la bo vang. A la dam chhunte chu kan Pathian tâ vek tûr an ni ang a, Judai ram governor ang a la ni ang, Ekron chuan Jebus-ho chan an la chang ve ang.

⁸Ka in chu a vêlin sipai rual lakah ka vêng ang a, Tûma'n an hrût tlangin, an pal tlang tawh lo vang. Hnehchhiahtu tûmahin an pal tlang tawh ngai lo vang, Ka mitin ka thlîr reng tawh dâwn si a.

LAL LO KAL TUR

⁹Aw Zion fanu, nasa takin hlim rawh! Aw Jerusalem fanu, âu vak vak rawh! Ngai teh, i hnênah i Lal a lo kal e; Ani chu chhandamtu dik tak a ni, Inngaitlâwmin sabengtung chungah a chuang a, Sabengtung tuai chungah chuan.

¹⁰Ephraim lakah tawlaîr leh Jerusalem lakah sakawr ka tiboral ang a; Indona thalngul pawh tihtliah a ni ang. Hnam tin hnênah remna thu a sawi ang a; A lalna chuan tuipui ațanga tuipui thlengin, Luipui ațanga kâwlkil thleng a ni ang.

PATHIANIN A MITE A CHHANDAM ANG

¹¹Nang erawh chu, I thisena thuthlunna avângin, I saltângte chu tui awm lohna khur ata ka chhuah zalên ang.

¹²Nangni, beiseina saltângte u Kulhpuih chuan kîr leh rawh u. A lêt hniha ka pêk tûr che u hi Vawiinah ka puang e.

¹³Ka thalngul Juda chu ka kuaikûl a, Thalchuan Ephraima ka vuah a, Aw Zion, i fate ka chawh tho vanga, Aw Grik-hote u, an rawn do vang che u, Mi chak khandaih angah ka siam ang che.

¹⁴LALPA chu an chungah hmuh theihin a awm ang a, A thal chu kâwlphê angin a phê zawr zawr ang. Lalpa PATHIAN chuan tâwtawrâwt a hâm ang a, Chhim lama thâwngaleivir nêan a thawh chhuak ang.

¹⁵Sipaihote LALPA'N a vêng ang a, Virvawmin an hneh ang a, an that vek ang. Uain rui bengchheng angin an in inpuar ang a; Maichâm kila thisen chawhtawlha a khat angin an khat liam ang.

¹⁶Chumi nîah chuan LALPA an Pathianin, A mite chu a berâmte angin a chhandam ang. Lallukhum chungah lunghlûte ang

hi an ni ang a, ram chungah chhinchhiahna atân a châwisâng ang.

¹⁷A thatnate chu a ropuiin, A mâwinatê chu a va ropui êm! Buhbâlin tlangvâlte a tihlim ang a, Uain tharin nulate hlimna a thlen ang.

BUNG 10

JUDATE LEH ISRAELTE TUNDIN LEHNA

¹Ruah hnuhnung sîr hun lai hian LALPA hnênah ruah dîl rawh u. LALPA chuan kâwlphê leh chhûmte pên, Lova thlai tinrêngte tân Ruah a rawn sûtîr dâwn asin.

²Milem pathiante chuan bumna thû an sawi a; Aienthamte thil hmuh chu dâwtthu, Phuachawp mumang bâk an sawi lo; A der maiin mite an thlamuan vêl a. Berâm ang maiin mipuiin an bawh rûak rûak si a, an buai mai loh nâkah, Berâmpu awm hek lo le.

³Berâmpute hian min tithinrim takzet a, Kêlpute chu ka hrem ngei ang. Sipaihote LALPA chuan a ranrual Juda chhûngte chu a kan ang a, Indonaa a sakawr chhuanvâwrah a siam ang.

⁴A hnêna mi a kila lung te, A hnêna mi khenkilhna te, A hnêna mi indona thalngul te, A hnêna mi rorêltute a huhovin an lo chhuak ang.

⁵Kawthlêra indona chirhdiak hmunah chuan an hmêlmate rapbettu Mi chak tak angin an che ang. An lamah LALPA a țin avângin an bei vak ang a, Sakawra chuang mite chu an timualpho ang.

⁶Juda chhûngkua chu ka tichak ang a, Josefa chhûngkua chu ka chhandam ang. An chungah zah ka ngaih êm avângin ka hruai kîr leh ang. Ka la hnawh chhuah ngai loh angin an awm ang; Kei hi LALPA an Pathian ka ni si a, An thu pawh ka lo ngaihthlâksak tawh ang.

⁷Ephraim-ho chu michak ang an ni ang a, Uain in angin an thinlung a lâwm ang. A ni, an faten an hmu ang a, an hlim bawh ang; An thinlung chu LALPA-ah chuan a lâwm hle ang.

⁸Anni chu faifûkin ka ko khâwm ang, Ka tlan chhuak dâwn si a; An lo pun țin dân ang khân an pung chho leh ang.

⁹Mi tin zîngah ka awm darhtîr ang a, Ram hla tak ațang pawhin min hre reng ang; An fate nêan an khawsa tlang del del ang a, Dam takin an lo haw leh ang.

¹⁰Aigupta ram ațang pawhin ka hruai kîr leh ang a, Assuria ațangin ka hruai khâwm leh ang. Gilead leh Lebanon ramah te ka hruai lût bawh ang, Awmna hmunin a daih loh thlengin.

¹¹Tuipui chu mangang takin a pal tlang ang a, Tuifâwnte pawh a tudai bawh ang a, Luipui thûk zawng zawng a kangchat vek ang. Assuria chapona pawh tihtlâwm a ni ang a, Aigupta pawh a lal tiangin a chhuahsan bawh ang.

¹²“LALPA-ah chuan anni chu ka tichak ang a, Ama hmingin an chhukin an chho țin ang,” LALPAN a ti.

BUNG 11

ISRAEL TIHTIAUNA

¹Aw, Lebanon, i kawngte chu hawng rawh, I sidar thingte meiin a kan fâi theih nân.

²Far thingte u, sidar thing tlu chu ãah ula, Thing lian pui pui a tlûk tâk hi. Aw, Basan sasaw thing, ãap rawh, Ngaw dur pui pui a chereu zo ta si a.

³Berâmpu ãap thâwm a ni reng mai! An ropuinate a chhe zo ta si amâw. Chû le, sakeibaknei hâhum rî chu! Jordan chapopui ãhin pawh a chuai zo ta.

BERAMPUTE HRILHLAWKNA

⁴LALPA ka Pathian chuan heti hian a ti, “Ranrual talh tûr châwm rawh,

⁵a neituten pawl tihna nei lovin an talh ãhin a; a hralhtute lahin, ‘LALPA chu fakín awm rawh se, ka lo hausak phah ta si a,’ an ti mai a; an berâmpu lahin an lainat baw si lo va.

⁶Ram chhûnga chêngte chu ka lainat tawh lo vang,” LALPAN a ti. “Mî tin chu an ãhenawmte kutah leh an lalber kutah ka pe zâwk ang. Ram chu an suasam vak ang a, mahse an kut ata ka chhan chhuak tawp lo vang.”

⁷Tichuan, ranrual talh tûrte chu ka châwm ta a, abík takin a rual zînga a chhiava deuh deuh an ni a. Tiang pahniñ ka la a: pakhat chu Duhawm ka vuah a, a dang chu Phuarkhâwmtu ka vuah a; ranrualte chu ka châwm a.

⁸Thla khat chhûngin berâmpu pathum ka bân a. Ka nun hian a ning tawh a, anni pawhin min haw baw a.

⁹Tihian ka ti a, “Ka châwm tawh malêk ang che u. A thi tûr chu thi sela, a riral tûr chu riral mai rawh se. A la bângte chu ineitawn mai mai teh se,” ka ti a.

¹⁰Mî zawnz zawnz hnêna thuthlung ka lo siam tâk ka phelh theih nân, ka tiang Duhawm ka tih zâwk chu ka la a, hmun hnihah ka bung hmaw a.

¹¹Tichuan, chumi ni chuan phelh a ni ta a. Ran rual zînga a chhiava deuh deuh, min lo thlîr rengtute chuan LALPA thû a ni tih an hre ta a.

¹²An hnênah, “Rem in tih chuan, ka hlawn min pe rawh u; rem in tih loh leh min pe lo mai rawh u,” ka ti a. Tichuan, ka hlawn atân tangkarua tlang 30 an bûk chhuak a.

¹³LALPA chuan ka hnênah, “Bêlvawtu hnênah pe mai rawh,” a ti a; chu chu ka hlawn âwm tâwka an chhiar chu a ni. Tichuan, tangkaraw tlang 30 chu ka la a, bêlvawtu tân LALPA inah chuan ka chhûng lût ta a.

¹⁴Chumi hnûah ka tiang pakhat, Phuarkhâwmtu chu, Juda leh Israela inkâra inunauna ka tihchah theih nân ka tan chhum leh a.

¹⁵LALPA chuan ka hnênah, “Berampu tlâktlailo hmanrua kha va la leh ta che.

¹⁶Hê ramah hian berâmpu ka dah ang a, chu mi chuan ran bote pawh a ngaihsak lo vang a, a notête pawh a zawnz khâwm hek lo vang; ruhtliakte a tuam dam lo vang a, a dam ãha hote pawh a châwm hek lo vang. Mahse a thâu thâu sâte chu a ei hmiah hmiah ang a, an tinkawm chenín a thlawn fai vek zâwk ang.

¹⁷“Berâmpu tlâktlai lo, a ranrual kalsantu chu, A chung a pik e. Khandaihin a bân leh A mit ãing lam a chhun ang a; An bân chu a zeng vek ang a, A mit ãing lamin a del phah ang,” a ti a.

BUNG 12

JUDATE TAN CHHANCHHUAHNA LO THLENG TUR

¹Israelte chungthûa LALPA thu chhuak rip tak chu. Vânte kaipharhtu LALPA, leilung nghahchhan phûma, mihring chhûnga thlarau siamtu chuan tihian a ti:

²“Ngai teh u, Judai ram leh Jerusalem an hualbeh hunah chuan, Jerusalem chu a chhehvêla hnam zawnz zawnz tân ruinhna novah ka siam ang.

³Chumi nîah chuan Jerusalem chu hnam tin tân lungpui khin rit takah ka siam ang; châwi sawn tumtu zawnz zawnz chu an keh sawm vek ang. Chuti chung chuan, hemi bei tûr hian leia hnam zawnz zawnz anrawn pung khâwm mup mup dâwn a ni.

⁴Chumi nîah chuan an sakawrte chu ka tichi-âi vek ang a, a chungachuangte pawh ka ti â vek baw ang; Juda chhûngte chu ka mitin ka thlîr reng ang a, hnamte sakawr mit zawnz zawnz ka tihdelsak vek ang.

⁵Juda puipate chuan an rilrûin, “Jerusalem luahtute tân sipaihote LALPA an Pathian chu an chakna a ni,” an ti ang.

⁶Chumi nîa Juda puipate chu, thingchheh zînga meivâm ang leh, buhphal zînga meichher alh hluah hluah angin ka siam ang; an chheh vêla mipui zawnz zawnz chu, ãing lam leh vei lamah a kâng fai vek ang. Jerusalem khawpui erawh chu a awmna hmun—Jerusalemah ngei chuan an luah leh ang.

⁷“Davida chhûngkaw ropuina leh Jerusalem mite ropuina chuan Judate ropuina a khûm loh nân, LALPAN Judate puan in chu a chhan chhuak hmasa ang.

⁸Chumi hunah chuan LALPAN Jerusalem chu a vêng ang; an zînga chak lo ber pawh chumi hunah chuan Davida ang maia chak an ni ang a, Davida chhûngte pheî chu Pathian angin, LALPA Vântirhkoh an hmâa awm ãhînte ang an ni ang.

⁹Chumi huna Jerusalem bei tûra lo fuan khâwm hnam zawnz zawnz tiboral tûrin ka zawnz chhuak vek ang.

AN MI CHHUNA CHU AN SUN

¹⁰“Davida chhûngkaw chungah leh Jerusalem-a chêngte chungah chuan, khawngaihna leh ãilsakna Thlarau ka leih ang a; tichuan, Kei, an mi chhuna ngei chu minrawn en tawh ang. A ni, mahni fapa neihchhun miin a sùn ang maiin an sùn ang a, mahni fa tîr tâna an tuar ang maiin an tuar nâ ang.

¹¹Chumi nî-ah chuan Jerusalemah a rûnpua lusûnna a lo awm ang, Megiddo phaizâwla Hadad Rimmon hmun a sùnna nasa ang mai khân.

¹²A ram pumin a sùn ang, chhûngkaw tin a hrangin: Davida thlah chhûngkua pawh a hrangin, an nupuite a hrangin; Nathana thlah chhûngkua a hrangin, an nupuite a hrangin;

¹³Levia thlah chhûngkua a hrangin, an nupuite a hrangin; Simeia chhûngkua a hrangin, an nupuite a hrangin;

¹⁴a bâk chhûngkaw dang zawnz zawnz pawh, chhûngkaw tin a hrangin, an nupuite a hrang ãheuh zêlin.

BUNG 13

MILEM BIAKNA TIHBORAL

¹“Chumi niah chuan, sual leh bawlhhlawh tlen fai nân, Davida chhûngte leh Jerusalema chêngte tân tuikhur an hawng ang.

²Sipaihote LALPA chuan heti hian a ti, “Chumi niah chuan, ram chhûng aţangin milem pathian hming rêng rêng ka nuai bo vek ang a, hriat zui an hlawh tawh lo vang. Ram chhûng aţangin zâwlnei leh thlarau bawlhhlawh ka hnawt bo vek ang.

³Mi tupawhin thú a la puan cheu chuan, amah hringtu a nu leh a paten a hnênah, ‘LALPA hminga dâwt i sawi avângin i dam reng tûr a ni lo,’ an ti ang a. Amah hringtu, a nu leh a pate chuan zâwlnei thu a puan avângin an chhun tlang tûr a ni.

⁴Chutih hunah chuan zâwlnei tinin an inlârna hmuh leh an thupuanthe chu an zahpui tawh zâwk ang a; inbum nân sahmul kawrfual an ha tawh hek lo vang.

⁵Heti hian an sawi zâwk ang, ‘Zâwlnei ka ni lo va, lo nei mi ka ni zâwk e; ka tleirâwl tîr ata ran vulh mîn zirtîr a,’ tiin.

⁶Mi tuemaw chuan a hnênah, “A nih leh i bân inkâra hliamte hi engati nge?” a ti ang a. Ani chuan, ‘Hêng hliamte hi chu ka thianta ina ka intihpalhna a nih hi,’ tiin a chhâng ang.

CHHANDAMTU BERAMPU

⁷“Aw khandaih, harh la, ka Berâmpu, Ka thianpa chu bei ta che,” Sipaihote LALPAN a tih chu. “Berâmpu chu vua la, Berâmte chu an darh mai ang; Tichuan, a notête chungah kut ka thlak dâwn nia.

⁸Ram zawng zawngah hetiang thil hi a thleng dâwn,” LALPAN a ti, “A michêng, hmun thuma thena hmun hnih an tlu ang a, an thi ang, Hmun thuma thena hmun khat zuah an ni ang;

⁹Hmun thumnate chu meiin ka fiah ang, Silvar angin ka thlifim ang a, Rangkachak an fiah angin ka fiah ang. Ka hmingin min ko vang a, Keiin ka lo chhâng ang, Ka lo chhâng ngei ngei ang. ‘Hê mite hi ka mite an ni’ ka ti ang a; Mi tinin, ‘LALPA chu kan Pathian a ni,’ an ti ve ang.”

BUNG 14

LALPA NÎ

¹Ngai teh u, LALPA nî chu a lo thleng dâwn e, In râllâkte pawh in zîngah sem a la ni ang.

²Jerusalem do tûrin hnam zawng zawng ka khâwm dâwn si a; Khawpui chu lâk a ni ang a, Inte chu an suasam vak vak ang a, Hmeichhiate chu an pawnsual ang. Khawpuia mi zâtvê salah man an ni ang a, A la bângte chu khawpui aţanga tihbo an ni lo vang.

³LALPA chu a lo thawk chhuak ang a, Indona nia a chêt thîn dân angin Chûng hnamte chu a rawn bei dâwn a ni.

⁴Chumi nî-ah chuan chhak lam aţanga Jerusalem rawn chhawng, Olive Tlâng chungah chuan a kê a nghat ang. Olive Tlâng chu chhak leh thlang zâwngin a phel phawk ang a, Ruam zâwl zau tak a lo awm ang; A tlang zahvê chu hmar lamah a tawlsawn ang a A zahvê dang chhim lamah a insawn bawk ang.

⁵Chû tlâng kâr ruamah chuan in tlânchhia ang a, Chu tlâng kâr ruam chuan Azal hmun a zu thleng dâwn si a. Nî e, in tlan chhe ngei ang, Juda lal Uzzia lal laia lîrngînga an tlânchhia ang mai khân. I hnêna awm mi thianghlîmho zawng zawng nê, LALPA ka Pathian chu a lo kal tawh ang.

⁶Chumi nîa thil âwmdân tûr chu Êng a awm lo vang a; Êng dul ruai ang mai hi a ni ang.

⁷Nî khat a ni ang, LALPA chuan a hria– Chhûn ni lo, zân pawh ni si lo. Mahse tlai lam a lo nih chuan Êng a lo awm tawh ang.

⁸Chumi nîah chuan, Jerusalem aţangin tuinung lui a luang chhuak ang a, A zâtvê chu khawchhak lam tuipuih A zâtvê dang chu khawthlang tuipuih a luang ang; Nipuiah pawh, thlasikah pawh chutiang reng chu a ni ang.

⁹LALPA chu lei chung zawng zawngah Lalber a ni ang. Chumi nîah chuan, “LALPA chu pakhat a ni,” an ti ang a, A hming pawh pakhat a ni ang.

¹⁰Geba aţanga Jerusalem chhim lam Rimmon thlengin a ram zawng zawng chu tihzâwl vek a ni ang. Jerusalem chu châwisânin a to lûr ang a, Benjamin Kawngkâ aţanga Kawngka Hmasaber, a Kil Kawngkâ thlengin, Hananel Insâng aţanga lal uain sâwrkhur thlengin luah khah vek a ni ang.

¹¹A chhûngah mipui an chêng ang a; Chhiatna zâkhua a thleng tawh ngai lo vang, Jerusalem chu him takin miten an luah tawh ang.

¹²Jerusalem dotu hnam zawng zawng chu LALPAN hetiang hripui hian a hrem dâwn a ni: An kêa dîng reng chungin an tîsâ chu a tuihal ang a, An mitkhur chhûnga an mitmûte chu a tuihal ang a, An ka chhûnga an lei pawh a tuihal bawk ang.

¹³Chumi nîah chuan anmahniho chu an chî-aiin an buai nuai nuai ang. Mi tinin mahni bul hnâia awm apiang an inrêk tawn ang a, Mahni bul hnaia mite chu an inbei tawn chiam ang;

¹⁴Judate pawhin Jerusalemaţan an lo khawh ve ang a. An vêla hnam zawng zawngte hausakna chu an kâwi khâwmsak vek ang; Rangkachak te, silvar te, silhfênte chu a awm rei rui ang.

¹⁵Pulh hrîn a nuai zui bawk ang a, An sakawr leh sabengtung chungah te, Sanghâwngsei leh sabengtung tê chi chungah te, An sipai riahhmuna ran zawng zawng chungah te nê. Chutiang chuan hripuiin a nuai ang.

HNAM TININ LALBER CHIBAI AN BÛK

¹⁶Jerusalem dotute zînga tel ve lo, hnam tin zînga mi la awmte chuan Lalber, sipaihote LALPA chibai bûk tûr leh, Bâwkte Kût hmang tûrin kum tinin an lo kal chho thîn ang.

¹⁷Lei chung a tû chhûngkua pawh ni se, Lalber, sipaihote LALPA chibai bûk tûra lo kal ve lote chungah chuan ruah rêng rêng a sûr lo vang.

¹⁸Aigupta chhûngkua chu lo chho lovin lo lût ve duh lo ta se, ruah tui pawh an dawng ve lo vang a; Bâwkte Kût hmang tûra kal chho duh lo hnamte chung a LALPAN hremna hrîpui a thlentîr tûr pawh chu an tuar bawk ang.

¹⁹Hei hi Aigupta ram hremna leh Bâwkte Kût hmang tûra kal chho duh lo hnam zawng zawngte hremna chu a ni ang.

²⁰Chumi hunah chuan, sakawr ʔhî-ah te pawh LALPA TÂNA THIANGHLIM tih an zia̋ ang. LALPA ina bungbêlthe chu, maichâm hmaa bungbêl an dahte ang mai an lo ni ang.

²¹Ni e, Jerusalem leh Judai rama bungbêl tinrêng chu sipaihote LALPA tâna serh hran a ni vek ang. Inthâwi tûra lo kal apiangin an rawn keng ang a, sa chhum nân an hmang thei ang. Chumi hunah chuan sipaihote LALPA inah chuan Kanaan mi rêng rêng an awm tawh lo vang.

MALAKIA

Ziah tu: Malakia • Ziah kum: B.C. 430

Malakia hming awmzia chu Ka tirhko emaw, LALPA thuchah kengtu tihna emaw a ni. Hê Thuthlung Hlui zâwnei hnunung ber hunah hian, Babulon saltâng kîr leh Judate chuan Jerusalem tempul sak that leh hnûah rawngbâwlna pawh an chhonzawm leh tawh a. Mahse mite thlarau nun a khawrovin, rinna kawngah an lo hnungtawlh thûk tawh hle mai a. Puithiamte zîngah meuh pawh hlemhlêna a pung a (1:7-8; 3:8); nupa inthenna a tam a (2:14); hnam dangte nêan an inneih pawlh a (2:10-12); sâwma pakhat pêk an lo ngaihthah ta a. Chutiang kâra mipuite leh puithiamte hnêna Malakia thuchah pawimawh ber chu: (i) Pathian rorêna an chungah a tlâk hmâ ngeia an sualte sima, a der maia Pathian an biak dân laka insiam tha leh tûr te, (ii) Sâwma pakhat pe tûr leh, chumi aţanga Pathian malsâwmna hnâr hâihawng leh tûrin chona a siam a (3:10). Hê thu hi Kristian kohhranten thilpêk kawnga infuih nâna an hman rim tak a lo ni ta. Malakia hian Elija thlarau leh thiltihtheihnaa Baptistu Johana rawngbâwl tûr a lo hrilhlâwk baw. Malakia hi Bible-a lehkhaw 39-na a ni a, bung 4 leh châng 55 a awm. Malakia hun aţanga Thuthlung Thara Baptistu Johana lo awm thleng--kum 400 vêl chhûng khân zâwnei thupuan chu a chaw! ta rih a ni.

BUNG 1

PATHIANIN ISRAELTE A HMANGAIH

¹Israelte chungchanga LALPA thu chhuah rit tak, Malakia ziah chu.

²LALPA chuan, “Ka hmangaih che u a ni,” a ti a. “Nangni erawh chuan, ‘Engtiang takin nge min lo hmangaih a?’ in ti a. Esauva chu Jakoba unau a ni lo vem ni?” LALPA’N a ti. “Jakoba chu ka hmangaih a;

³Esauva erawh chu ka hua a ni, A awmna tlâng leh a rochante chu ka tiram vek a, Thlalêr sihalte tân ka pe ta.”

⁴Edom mite chuan, “Mîn lo sawp chhe tawh nâ a, Kan hmun chhe tawh dîn tha leh tûrin kan kîr leh mai ang,” ti mah sela, Sipaihote LALPA chuan heti hian a ti: “Dîn tha leh mah se, ka thiat leh tho vang; Suahsualna Ram tih an ni ang a, Kumkhuaa LALPA thinrim rengnate, an ti ang.

⁵In mitin in hmu ang a, tihian in ti ang, ‘LALPA chu Israel pâwn lam thlengin a ropui e,’ tiin.

THILHLAN BAWLHHLAWH

⁶Fapa chuan a pa a châwimâwi a, Chhiahhlawhin a pu a châwimâwi thîn. Kei hi Pa ka nih si chuan, Mîn châwimâwina chu khawiah nge? Kei hi in Hotu ka nih chuan, In mi zahna chu khawiah nge?” Sipaihote LALPA chuan a ti a ni. Nangni puithiamho, ka hming hmuittute u. Nangni chuan, ‘Engtin nge i hming kan hmuhsit le?’ in ti maw?

⁷“Ka maichâmah te thil bawlhhlawh in hlan tâk mai hi le. Nangni erawh chuan, ‘Engti kawngin nge kan tihbawlhhlawh?’ in ti a. ‘LALPA dawhkân hi a nêp mang e,’ in tihah te hian.

⁸Inthâwi nâna ran mittel in hlân thîn hi Thil sual a ni lo vem ni? A kebai leh damlo in hlân hi, Thil tha lo tak a ni lo vem ni? In governor hnênah va pe tehrêng ula! In chungah a lâwm ngût emaw chu? Lâwm takin a lo dawng dâwn em ni?” Sipaihote LALPA chuan a ti.

⁹“Mahse, tihian Pathian zahngaihna dîl rawh u, Mîn lo khawngaih mial mahna. Hetiang hi in kut ngeia in tih a ni si a, Lâwm takin a lo pawm dâwn che u em ni?” Sipaihote LALPA chuan a ti a ni.

¹⁰“Thil lothlâwn hlan nân ka maichâma mei dêt lo tûrin “In zîngah hian kawngkhâr khâr tlat thei tûr in awm em? Tichuan, a thlâwn maiin ka maichâm mei chhêm alh a ni dâwn lo nia. In lakah hian ka lâwm dêr si lo va, In thilhlân pawh ka pawm hek lo vang,” Sipaihote LALPA chuan a ti.

¹¹Ni chhuahna aţanga a tlâkna thleng pawhin, Jentailte zîngah ka hming hi a ropui ang a; Hmun tinah ka hmingin rimtui an hâl ang, Thilhlân thianghlim te nê; Jentailte zîngah ka hming chu a ropui dâwn si a,” Sipaihote LALPA chuan a ti a ni.

¹²“Ka maichâm intihbawrhân dân chu ‘LALPA dawhkân chu a bawlhhlawh êm mai, Ei tûr leh thei an hlante chenin a hmuhsitawm e,’ in tih hian a ni.

¹³Tihian in ti baw a, ‘A va ninawm êm!’ tiin hnâr in tum khum a,” Sipaihote LALPA chuan a ti. “Mi thil in rûk te, ran kebai te, a damlo te in rawn la a; Inthâwi nân in rawn la ve si a! In hnên aţangin ka pawm dâwn em ni? LALPAN a ti a ni.

¹⁴“A ranrual zînga a pa tuai tha nei renga, Hlân tûra intiam tawh baw si a, Mahse Lalpa hnêna a hmêlhem zâwk hlâna Bumtu chuan ânychhia dawng rawh se; Lal ropui tak ka nih hi, Ka hming chu hnam tin zîngah tîh tûr a ni asin,” Sipaihote LALPA chuan a ti.

BUNG 2

PUITHIAM HLEMHLÊ-TE

¹“Aw, puithiamte u, hei hi in tân thupêk a ni. In ngaihthlâk duh lohva, Thinlung taka in vawn duh hek lohva, Ka hming in châwimâwi duh loh chuan, “In chungah ânychhia ka rawn tîr ang a, In malsawmna dawn chungah ânychhia ka lawh ang. Thinlung taka in pawisak loh avângin, ânychhia ka lawh dêr tawh,” sipaihote LALPA chuan a ti.

²In ngaihthlâk duh lohva, Thinlung taka in vawn duh hek lohva, Ka hming in châwimâwi duh loh chuan, “In chungah ânychhia ka rawn tîr ang a, In malsawmna dawn chungah ânychhia ka lawh ang. Thinlung taka in pawisak loh avângin, ânychhia ka lawh dêr tawh,” sipaihote LALPA chuan a ti.

³“Ngai teh u, in thlahte chu ka zilhhau vang a, In hmâiah êk ka tât ang, In inthâwina ran êk te nêan chuan; Êk kai luai chungah hruai bo in ni ang.

⁴Levia hnêna ka thuthlung a awm zêl theih nân, He thupêk hi in hnênah ka pê che u tih in hria ang,” Sipaihote LALPA chuan a ti.

⁵“A hnêna ka thuthlung chu, nunna leh muanna thú a ni a, Min tìh theih nân a hnênah ka pê a, Min tìh ngei baw k a, ka hming pawh a zah êm êm a ni.

⁶Thutak dân chu a kê-ah a awm a, A hmuiah diklohna rêng a awm lo. Ngaihgam tak leh dik takin min zui a, Sualna lakah mi tam tak a inlamlêttîr a.

⁷Puithiam lei chuan hriatna vawng sela, A kamchhuak ațangin miten dân an lo ngaichâng tûr a ni; Sipaihote LALPA thuchah kengtu a ni si a.

⁸Nangni erawh chu kawng ata in kalpêng a; Mi tam tak dân in bawhchhiattîr a. Levia thuthlung chu in tikhawlo zo ta,” Sipaihote LALPA chuan a ti a ni.

⁹“Ka dân thu in zawm duh lohva, Dân thua mi thlei bîk in neih avângin, Mi zawng zawng hmuah Kei pawhin hmuhsitawm leh hniam taka ka dah tâk che u hi.”

RINAWM LO TAKA PHATSANNA

¹⁰Kan zâin Pa pakhat nei kan ni lo vem ni? Pathian pakhat siam vek kan ni lo vem ni? Engtizia nge kan inbumtawn tîhna, Thlahtute thuthlung kan bawhchhiat le?

¹¹Juda chuan vervêk taka tih a chîng a, Israel ramah leh Jerusalemah thil tenawm tak a ti a, LALPA’N a duh tak hmun thianghlim chu, Juda chuan a tibawrhbâng ta, Nupuiah ram dang pathian fanu a nei ta si a.

¹²Hrereng chung leh harhfim chung a titu chuan, Sipaihote LALPA hnênah thilpêk hlân eng ang mah se, LALPAN Jakoba puan in ațangin tiboral daih rawh se!

¹³Hei hi in thiltih dang chu a ni lehpek a: Tâp leh rûm chungin, mittui nê, LALPA maichâm in tihuh dep dup tîh hi a ni; Chuvângin, in thilhlân te a ngaihsak duh lova, In kuta thilhlân lah a pawm duh tawh hek lo.

¹⁴Nangni chuan, “Engvânga pawm lo nge a nih?” te in ti a. I tlangvâl laia i nupui laka i rinawm loh êm avâng khân maw le. In inkâr thu hre Chiangtu lah chu LALPA a ni si a; I kawppui, i nupui, thutiam nêna i neih a nih ngei kha.

¹⁵Thlarau lam chí pai chungin, Pumkhatah a siam a ni lo vem ni? Engati nge pumkhata a siam? Chithlah ațanga Pathian ngaihsak mi a zawng a ni. “Chuvângin, in thlarau lam thil chu ngaihvên ula, Tu mân mahni tawntirh nupui chu bumin tîh suh se.

¹⁶“LALPA, Israelte Pathian chuan heti hian a ti si a, Mahni silhfên, nunrâwnnaa khuhna a nih avângin, Inmâk hi ka huatzâwng a ni,” Sipaihote LALPA chuan a ti. “In thlarau lam thil chu ngaihvên ula, Rinhlelhawm deuhvin awm suh u.”

¹⁷In thusawi dânte hian LALPA in tihah tîh asin; Nangni chuan, “Engtin nge kan tihhah le?” in ti a. E le, “Thil sual titu apiang LALPA mithmuah mi tîh an ni a, An chungah a lâwm tîh,” in tih loh leh, “Dikna Pathian chu khawiah nge?” in tih avâng te hian.

BUNG 3

TIRHKOH LO KAL TUR

¹“Ngai teh u, ka tirhkoh ka rawn tîr e, Ani chuan ka hmaah kawng a lo buatsaih ang. In zawn tîh Lalpa chu, A tempulah a lo kal thut ang, Thuthlung tirhkoh, in lawm êm êma pawh a lo kal e. Ngai teh u, Ani chu a lo kal mek a ni,” Sipaihote LALPA chuan a ti.

²“Mahse a lo kal ni chu tu’n nge dâwl zo vâng? A lo lan hunah tu nge lo dîng thei ang? Ani chu rawh thianghlimna mei ang leh, Puansutu sahbawn ang mai a ni si a.

³Silvar thlifimtu leh tithianghlimtu angin a thú ang a; Levia fate a thian thianghlim ang a, Rangkachak leh silvar angin a thianfai ang, LALPA hnêna inthâwina dik an hlan theih nân.

⁴Tichuan, hmasâng hunte, hmanlai kumte angin, Judate leh Jerusalem thilhlân chu LALPA tâna duhawm a ni leh ang.

⁵Rorêl tûrin ka rawn hnaih ang che u a; Thuhretu viak tîh takah ka tâng ang, Dâwithiam te, uirê te, Dâwta chhechham chîng te, Hmeithai te, fahrahte leh hlawhfâ, an hlawh pe tîh duh lote, Mikhual hnawh bo chîngte nê– Mi zah nachâng an hriat loh avângin,” Sipaihote LALPA chuan a ti.

⁶“LALPA ka ni a, ka danglam ve ngai lo; Chuvângin aw, Jakoba thlahte u, tihboral in ni lo ve.

⁷Nimahsela, in thlahtute hun ata tawh Ka thupêkte in pên bosan a, In zâwm duh hek lo. Chuvângin, ka hnênah lo kîr ula, kei pawh in hnênah ka lo kîr ve ang,” Sipaihote LALPA chuan a ti a ni. “Nangni erawh chuan, ‘Engti zâwngin nge kan lo kîr ang?’ in ti a.

PATHIAN TÂ RÛKSÂK SUH

⁸“Mihringin Pathian thil a rawk tîr em ni? Nangni chuan min suam a ni ngawt alâwm! Nimahsela, nangni chuan, ‘Engti zâwngin nge kan rawk che?’ in ti a. Sâwma pakhat leh thilhlânah te hian maw le.

⁹He hnam pumpui hian Kei min rawk tîh avângin Ânchhia lawh in ni ta.

¹⁰Ka inah ei tûr a awm theih nân, Sâwma pakhat zawng zawng chu thawhlâwm bâwmah rawn la vek rawh u; Vân tukverhte hi hawnsak che u-in, Dawn sên loh khawpin malsâwmna Ka vûr dâwn che u nge vûr dâwn lo che u, Mi han fiah ta che u,” Sipaihote LALPA chuan a ti.

¹¹“Eiraltu lakah ka vênasak ang che u-a; Tichuan, leia in thlai rahte chu an tiriral tawh lo vang a, Huana in grêp rahte pawh a zûva zo tawh hek lo vang,” Sipaihote LALPA chuan a ti;

¹²“Hnam zawng zawngin nihlawh an la ti dâwn che u-a, In ram chu a la duhawm nasa dâwn si a,” Sipaihote LALPA chuan a ti.

MIPUI PHUNCHIAR NASA

¹³“Ka laka in tawngkam hi a dêngkhâwng hle mai,” LALPAN a ti, “Nangni chuan, ‘I lakah eng thupawi nge kan sawi â?’ in ti a.

¹⁴Pathian rawngbâwl hi a thlâwn mai a ni e; A thupêkte kan zawm tîhata, Sipaihote LALPA hmâa kan han intilungchhe vêl hian Hlâwkna eng nge a neih le?

¹⁵Chuvângin, mi chapote chu nihlawh kan ti tawh mai a, A suaksual apiang an dîng chang zâwk zêl a; Pathian an fiah pawhin,

an tuar ve si lo va,' in tih t̃hin hi," tiin.

HRIATENGNA LEHKHABU

¹⁶Tichuan, LALPA t̃ihtute chu an inberâwn a, LALPA chuan a lo ngaithla a, a lo hriatsak a; LALPA t̃ihtute, a hming ngaihtuah t̃hîntute tân, Hriatrengna lehkhabu chu a hmâah ziah a ni ta a.

¹⁷"Anni chu Ka lunghlûa ka siam hunah, Ka tâ an ni tawh ang," sipaihote LALPA chuan a ti. Miin a fapa, amah châwmtu a duat t̃hîn angin Anni chu ka zuah dâwn a ni."

¹⁸Tichuan, mi dikte leh mi suaksualte, Pathian rawngbâwl leh bâwl lo chu In thliar hrang thiam tawh ang.

BUNG 4

PATHIAN NI ROPUI

¹"Ngai teh, nî-te chu a lo thleng e, Thuk ang maia kâng hluah hluah chu. Mi chapo zawng zawng leh Thil sual titu zawng zawng chu buhpâwlah an chang vek ang, Chumi ni chuan a kâng ral dâwn si a," Sipaihote LALPA chuan a ti. "Chu chuan zung leh zâr pawh a zuah lo vang.

²Nangni ka hming t̃ihtute erawh chuan Dikna Nî chu, a thlâah damna nê a lo chhuak ang; In kal chhuak vêl ang a, Bâwngnote châwm thâu angin in t̃hang zawt zawt mai ang.

³Chûng thil ka tih hunah chuan, Mi suaksualte chu in rap hrual tawh ang, In kephah hnuaia vutdûr ang lek an ni dâwn si a," Sipaihote LALPA chuan a ti.

⁴"Ka chhiahhlawh, Mosia Dân, Horeb tlânga Israel mi zawng zawng tâna Dân thuruat leh rorêl dân ka pêkte kha hre reng rawh u.

⁵Ngai teh u, LALPA ni ropui leh râpthlak lo thlen hmâin In hnênah zâwlnei Elija ka rawn tîr ang.

⁶Ani chuan pate thinlung chu an fate lamah, An fate thinlung chu an pate lamah a inremtîr ang, Chuti lo zawng, ka lo kal ang a, Leilung hi ânchhia ka tuartîr hlah dah ang e.

MATTHAIA

Ziah tu: Matthaia • Ziah kum: A.D. 50

Chanchin Tha leh Thuthlung Thar bu hmasa ber ziaktu Matthaia, Levian an tih bawh hi a hming awmzia chu 'Lalpa thilpek' tihna a ni. Juda mi, chhiahkhawn hna a thawh laia Isuan amah zui tura a koh: inngaihtuah buai lova zui nghal mai, zirtir 12 zinga mi a ni a. He Chanchin Tha bu hi Hebraite tana hriatthiam theih tur zawngin Isua Krista chu Lal a nihna lam a thlur deuh. Juda rilru pu takin thlahtu chhuina a ngai pawimawh hle a, Krista chu Abrahamama thlaha mi, Israel lal ropui Davida Fapa, a pianna pawh Davida khua Bethlehem niin, Judate nghahfak Messia ngei a nihna fiah takin a sawi a ni. Matthaia hian 'Lalram' (Kingdom) thu a sawi uar hle. Van Lalram, Pathian Lalram Chanchin Tha hriltu a ni a, 'lalram' tih ngawt phei chu vawi 50 chuang a sawi. Chanchin Tha bu dangte aiin Matthaia bu hian Isua chanchina thil thlengte chu Thuthlung Hlui hrilhlawkna thlen famkimna a nihzia a tichiang bik a, vawi 60 chuang a la chhuak hial a ni. Matthaia hian Israelten an Lal Messia, Isua an hnawla an dodal nasatzia hi Chanchin Tha bu dangte ai mahin a sawi chiang bawh. Matthaia bu hi Bible-a bu 40-na a ni. Bung 28 a awm a, châng 1071 a awm. He Chanchin Tha bu ziaktu hi tu dang ni lovin, amah tirkoh Matthaia zia ngei a ni tih hi pawm dan tlangpui ber a ni.

BUNG 1

ISUA KRISTA THLAHTUTE

¹Davida Fapa, Abrahamama Fapa, Isua Krista thlahtute ziahna bu chu:

²Abrahaman Isaka a hring a; Isakan Jakoba a hring a; Jakobian Juda leh a unaute a hring.

³Judan Tamari lakah Peresa leh Zera a hring a; Peresan Hezrona a hring a; Hezronan Rama a hring.

⁴Raman Aminadaba a hring a; Aminadaban Nasona a hring a; Nasonan Salmona a hring.

⁵Salmonan Rahabi lakah Boaza a hring; Boazan Ruthi lakah Obeda a hring a; Obedan Jesaia a hring.

⁶Jesaian lal Davida a hring a. Lal Davidan Uria nupui lakah Solomona a hring.

⁷Solomonan Rehoboama a hring a; Rehoboaman Abija a hring a; Abijan Asa a hring.

⁸Asan Jehosaphata a hring a; Jehosaphatan Jorama a hring a; Joraman Uzia a hring.

⁹Uzian Jothama a hring a; Jothaman Ahaza a hring a; Ahazan Hezekia a hring.

¹⁰Hezekian Manasea a hring a; Manasean Amona a hring a; Amonan Josia a hring.

¹¹Babulon sala an hruai lai vel khan Josian Jekonia leh a unaute a hring.

¹²Babulon sala an hruai hnuin Jekonian Shealtiel a hring a; Shealtielan Zerubabela a hring.

¹³Zerubabelan Abiuda a hring a; Abiudan Eliakima a hring a; Eliakiman Azora a hring.

¹⁴Azoran Zadoka a hring a; Zadokan Akima a hring a; Akiman Eliuda a hring.

¹⁵Eliudan Eleazara a hring a; Eleazaran Matthana a hring a; Matthanan Jakoba a hring.

¹⁶Jakoban Mari pasal Josefa chu a hring a; chu Mari lakah chuan Isua, Krista an tih chu a lo piang ta a ni.

¹⁷Tichuan, Abrahamama atangin Davida thlengin, thlahtu zawng zawng chu chhuan sawm leh chhuan li an ni a; Davida atangin Babulon sala hruai inkarah chhuan sawm leh chhuan li an awm leh a; Babulon sala hruai atanga Krista thlengin, chhuan sawm leh pali an awm leh a ni.

MARIN KRISTA A HRING

¹⁸Isua Krista lo pian dan chu hetiang hi a ni: A nu Mari chu Josefa nen an inhual laiin, an awm dun hmain, Thlarau Thianghlimin nau a paitir tih hriat a lo ni a.

¹⁹Tichuan, a pasal* Josefa, mi fel tak chuan tihmualpho a duh lo va, a rûk têa then mai a tum a.

²⁰Nimahsela, chung thil a ngaihtuah lai mek chuan ngai teh, Lalpa Vantirhkoh chu a mangah arawn inlar a, "Josef, nang Davida fapa, Mari hi nupuia neih hlau suh; a nau pai chu Thlarau Thianghlim paitir a ni asin.

²¹Fapa a hring ang a, a hmingah ISUA i sa tur a ni: ani chuan a mite chu an sualna lakah a la chhandam dawn si a," a ti a.

²²Chung thil zawng zawng lo thlen famkim tur thu chu Lalpan a zawlnei hmangin tihian a lo sawi tawh kha:

²³"Ngai teh, nula thianghlim chu a rai ang a, Fapa a hring ang a, a hmingah Immanuela an sa ang," tiin. Immanuela chu, "Kan hnena Pathian awm," tihna a ni.

²⁴Tichuan, Josefa muhil chu a lo harh a, Lalpa Vantirhkohvin a hnena thu a pek ang chuan a ti a. Mari chu nupuih a nei ta a.

²⁵Nimahsela, a fatir Fapa a hrin hma zawng chuan ani chuan a pawl lo. Tichuan, a hmingah ISUA a sa ta a.

BUNG 2

KHAWCHHAK MIFINGTE

¹Lal Heroda lal laia, Judai ram Bethlehem khuaa Isua a lo pian hnu chuan ngai teh, Khawchhak lam atangin mi finge Jerusalem khuaah an lo kal a,

²"Judate Lal lo piang chu khawiah nge? A arsi pawh khawchhak lamah kan hmu a, amah chibai bûk turin kan lo kal a ni," anrawn ti a.

³Chu thu chu lal Herodan a lo hriat veleh a mangang ta a, Jerusalema mi zawng zawng pawh an buai zo ta a.

⁴Tichuan, puithiam lalte leh dan zirtirtu zawng zawng chu a ko khawm a. Krista chu khawia piang tur nge tih a zawt a.

⁵Anni chuan a hnenah, “Judai rama Bethlehem khuua piang tur a ni tih zawlneiin heti hian a ziah kha:

⁶“Nang, Bethlehem, Judai rama mi, Judai khawpuite zingah i te ber lo ve. I chhung aṭangin Roreltu a lo chhuak dawn si a, Ka mi Israelte vengtu tur chu,” an ti a.

⁷Chumi hnuah chuan Herodan a rûkin mi finge chu a ko va, arsi lo lan hun lai chu dîlchhût takin a zâwt chhuak a.

⁸Tichuan, anni chu Bethlehem khuuah chuan a kaltir a, “Kal ta ula, chu Naute chu fimkhur takin va zawn chhuak rawh u, kei pawhin amah chibai karawn buk ve theih nan, in hmuh velehi mirawn hrilh ve ang che u,” a ti a.

⁹Lal thu chu an hriatin an kal ta a. Ngai teh, khaw chhak lama arsi an hmuh ngei kha an hmaah a kal zel a, Naute awmna chung zâwn a thlen chuan a ding ta a.

¹⁰Chu arsi an han hmuh chuan an hlim nasa ta em em a.

¹¹Tichuan, in chhunga an va luh chuan Naute chu a nu Mari nen an hmu a, bawkkhupin chibai an buk a. An ro bâwmte an hawng a, a hnenah chuan thilpek atan rangkachak te, beraw te, murra te an hlân a.

¹²Heroda hnena kir leh lo tura an mang lama hriattir an nih avangin, anmahni ram lam panin kawng dangah an haw ta a.

AIGUPTA LAMA RÂLTLAN

¹³An hâw hnu chuan ngai teh, Lalpa Vantirrhokh chu Josefa mumangah a inlar a, “Tho la, Naute leh a nu hruai la, Aigupta ramah tlan rawh u, ka hrilh leh hma loh che zawn chutah chuan awm reng ang che u; Herodan Naute tihhlum tumin a zawn dawn a ni,” a ti a.

¹⁴Tichuan, a tho va, a zân a zânin Naute leh a nu chu a hruai a, Aigupta ram an pan ta a.

¹⁵Chutah chuan Heroda thih thlengin an awm ta a; Lalpan zawlnei kâa, “Ka fapa chu Aigupta ram aṭangin ka ko chhuak a,” tia a sawi kha a lo thlen theih nan.

PAWI SAWI LO NAUSÊN TIHHLUM

¹⁶Mifingten an bum tih a lo hriat chuan Heroda chu a thinur ta êm êm a; a hun thu mifinge a zawn chhuah ang khan sipaite a tir chhuak a, Bethlehem khuah leh a chhehvel zawn zawn mipa naupang kum hnih achin hnuai lam chu a tihhlumtir ta vek a.

¹⁷Tichuan, Zawlnei Jeremian a lo sawi lawk kha a lo thleng ta a ni, heti hian a lo ti a:

¹⁸“Rama khuua thawm an hriat chu, Ṭap te, mitthi ngaia chiauwawng vawng te a ni, Rakili chuan a fate a ṭah a, An awm tawh si lova, Hnem pawh a duh lo,” tiin.

NAZARETH KHUAA AN INAH

¹⁹Heroda a lo thih hnu chuan ngai teh, Lalpa Vantirrhokh chu Aigupta rama awm Josefa mumangah a inlâr a,

²⁰“Tho la, Naute leh a nu hruai la, Israel ramah kir leh rawh: Naute tihhlum tumtute kha an thi tawh e,” a ti a.

²¹Tichuan a tho va, Naute leh a nu chu a hruai a, Israel ramah an haw leh ta a.

²²Nimahsela, Arkelaus-a chuan a pa Heroda aiawhin Judai ram a awp tih a hriatin, chuta kal chu a hlau ta a. Mumang lama Pathianin a hriattir ang zelin Galili lamah an kal ta a.

²³Nazaret khuah an tih chu an va thleng a, tah chuan an awm ta a: “Ani chu Nazaret mi an ti ang,” tia zawlneiten an sawi kha a lo thlen theih nan.

BUNG 3

BAPTISTU JOHANA KAWNG BUATSAIH

¹Chûng lai chuan Baptistu Johana chu thuhrlin Judai ram thlalêrah a lo kal a,

²“Sim rawh u, vânlalram chu a hnai tawh si a!” a ti a.

³Hê mi hi zâwlnei Isaian: “Thlalêra mi âu âw chuan, ‘LALPA lamlian sial ula, A kawngte tingîl rawh u,’ a ti,” tia a lo sawi kha a ni a.

⁴Johana chuan sanghâwngsei hmulpuan a inbel a, a kâwng chu savun kâwng hrênin a hrêng a; a châw chu khaukhuap leh ram khawizû a ni.

⁵Chûng lai chuan Jerusalem aṭang te, Judai ram pum aṭang te, Jordan lui dung vêl zawn zawn mite chuan amah chu anrawn pan khâwm a.

⁶an sualte puangin, Jordan luih chuan ama hnênah baptisma an chang hlawm a.

⁷Nimahsela, baptisma chang tûra lo kal Pharisai leh Saddukai tam tak a hmuh chuan an hnênah, “Rûl thlahte u! Thinur lo thleng tûr tlânsan tûrin tuin nge zilh che u?”

⁸Chuvângin, sim hming pu tlâkin rah rawh u,

⁹“Abrahama kan thlahtu a ni alâwm,’ ti ringawt suh u; Pathian chuan hêng lungte hi Abrahama thlahah a chantîr thei tih ka hrilh a che u.

¹⁰Tûnah pawh thing bul tinah hreipui an chhawp tawh reng a ni; chuvângin, eng thing pawh rah ṭhaa rah lo apiang chu kiha, meia tuah tûr a ni.

¹¹Kei chuan sim tûrin tuin ka baptis che u a; nimahsela, ka hnunga lo kal tûr chuan kei aiin thil a tithei zâwk a, a pheikhawk keng tlâk pawh ka ni lo. Ani chuan Thlarau Thianghlim leh meiin a baptis ang che u.

¹²A kuta sisêp kengin, a hruih zâwla buh chu a zâp fai hliau ang a, zêmah chuan buh tak chu a khung ang; buhsî erawh chu mei mit thei lovin a hâl ral dâwn a ni,” a ti a.

JOHANAN ISUA A BAPTIS

¹³Chûng lai chuan Isua chu Galili ram aṭangin Jordan luih baptisma chang tûrin Johana hnênah a lo kal ve a.

¹⁴Johana erawh chuan, “I baptis ka ṭûl zâwk si a, ka hnêna i lo kal tlat mai le?” tiin a lo hnial a.

¹⁵Nimahsela Isuan a hnênah, “Tûnah hian rem ti lul rawh, hetiang a ṭhatna dân zawn zawn hlen chhuah hi kan tih âwm rêng a ni si a,” tiin a chhâng a. Ani chuan a remti ta a.

¹⁶Baptisma a chan zawn vêleh Isua chu tui ata a chhuak ngâl a; ngai teh, a tân vânlalram a lo inhawng a, Pathian Thlarau chu ṭhûro

anga lo chhukin, a chungah fû a hmu a.

¹⁷Chû vêleh vân atangin âw a lo chhuak a, “Hei hi ka Fapa duhtak, ka lawm êm êma chu a ni,” a ti a.

BUNG 4

SETANAN ISUA A THLÊM

¹Chumi hnû chuan Isua chu Diabola thlêma awm tûrin thlalêrah Thlaraubin a hruai lût a.

²Ni sawmlî leh zan sawmlî chaw a nghei hnû chuan a ril a lo tâm ta hlê a.

³Thlêmtu chu a lo kal ta a, a hnênah, “Pathian Fapa i nih tak zet chuan hêng lungte hi chawa chantîr turin thû pe ta che,” a ti a.

⁴Ani erawh chuan, “Mihring hi chaw chauhvîn an nung tûr a ni lova, Pathian kâa chhuak thu tinrêngin an nung zâwk tûr a ni,’ tih ziaak a ni,” tiin a chhâng a.

⁵Diabola chuan khaw thianghlîmah chuan a hruai lût a, Tempul chhîpah chuan a dintîr a,

⁶a hnênah, “Pathian Fapa i nih tak zet chuan zuang thla ta che, ‘Nangmah enkawl tûr chuan A Vantirhkohte a tîr mai ang, I kê lunga a insawh nat loh nân, An kutin an lo dâwm ang che,’ tih ziaak a ni si a,” a ti a.

⁷Isuan a hnênah, “‘LALPA i Pathian fiah suh,’ tih ziaak a nih kha,” a ti a.

⁸Diabola chuan tlâng sâng tak chungah a hruai leh a, khawvêl lalram zawng zawng leh an ropuina zawng zawng chu a entîr a.

⁹A hnênah chuan, “Bawkkhupin chibai mi bûk la, hêng zawng zawng hi ka pe vek ang che,” a ti a.

¹⁰Mahse Isuan a hnênah, “Setan, kal bo daih rawh! ‘LALPA i Pathian chibai bûk la, ama rawng chauh bâwl rawh,’ tih ziaak a ni,” a ti a.

¹¹Diabola chuan a kalsan a. Ngai teh, Vântirhkohte chu an lo kal a, a rawng an rawn bâwlsak ta a.

ISUAN GALILI-AH RAWNG A BÂWL TAN

¹²Johana chu tân inah an tântir tih Isuan a lo hriatin Galili lamah a kal ta daih a.

¹³Nazaret khua chu chhuahsanin, Kapernaum-ah a va awm ta a; chû khua chu dîl kama awm, Zebulun leh Naphtali bial chhûnga mi a ni a,

¹⁴zâwlnei Isaia hrilhlâwk a lo thlen famkimna tûrin:

¹⁵“Zebulun ram leh Naphtali ram, Dîl panna kawng, Jordan râla awm, Jentailte Galili chu;

¹⁶Thim hnuaia thûte chuan êng ropui tak an hmu a, Thihna thim hnuaia thûte chungah pawh, Êng a lo chhuak ta,” tia a sawi ang taka a lo thlen theih nân.

¹⁷Chuta țang chuan Isuan, “Sim rawh u! vân lalram chu a hnai tawh e,” tiin a hril țan ta a.

SANGHA MANTU PALI ZIRTÎR-AH A KO

¹⁸Galili dîl kama a lên vêl lai chuan unau pahnih, Simona, Petera an tih chu a unau Andria nên dîla lên an dêng lai a hmu a; sangha mantu an ni a.

¹⁹Ani chuan an hnênah, “Mi zui rawh u, tichuan, mihring mantû atân ka siam ang che u,” a ti a.

²⁰Tichuan, an lête chu kalsanin an zui ta nghâl a.

²¹Chuta țang chuan a kal zêl a, unau dang pahnih, Zebedeia fapa Jakoba leh a unau Johana te chu, an pa Zebedeia hova lawnga an lête siamțhaa an lo awm chu a va hmu a. Anni chu a ko va.

²²Chawplehchilhin an pa leh lawng chu an kalsan a, an zui ta a.

²³Isua chuan Galili ram zawng zawng a fang kual a, an biak inahte zirtîrin, lalram Chanchin T̃ha a hril a, mite zînga damlohna leh natna tinrênga nâ te a tidam zêl a.

ISUAN MI TAM TAK A TIDAM

²⁴Suria ram pumah a chanchin chu a lo thang chhuak ta a; damlohna leh natna tinrênga nghaisak tuarte zawng zawng an rawn hruai a, thenkhat chu ramhuai man te, thenkhat phûngzâwl te leh zeng te an ni a; a lo tidam zêl a.

²⁵Galili ram ațang te, Dekapoli khua ațang te, Jerusalem ațang te, Judai ram ațang te leh Jordan râl ațang te chuan mipui tam takin amah an zui a.

BUNG 5

TLANG CHUNGA ISUA THUSAWI

¹Mipuite chu a hmuhin tlângah a kal chhova, thuthmun a rem lai chuan a zirtîrte an lo kal khâwm a.

²Tichuan, anmahni zirtîrin thû a sawi a:

³“Thlarauba retheite chu an nihlawh e, Vân lalram chu an ta a ni si a.

⁴Mi lungngaite chu an nihlawh e, Thlamuang takin an la awm dâwn si a.

⁵Inngaitlâwmte chu an nihlawh e, Lei hi an la rochung dâwn si a.

⁶Dikna duh êm avânga rilțâma tuihâlte chu an nihlawh e, An la tlai dâwn si a.

⁷Mi khawngaih thei takte chu an nihlawh e, Khawngaih an la hlawh dâwn si a.

⁸Thinlunga thianghlîmte chu an nihlawh e, Pathian an la hmu dâwn si a.

⁹Remna siamtute chu an nihlawh e, ‘Pathian fa’ tia koh an la ni dâwn si a.

¹⁰Dikna avânga tihduhdah tuarte chu an nihlawh e, Vân lalram chu an ta a ni si a.

¹¹“Keimah avânga miten an sawi chhiat che u a, an tihduhdah che u a, dâwta sual tinrêng tia an puh hunah che u chuan in la nihlawh ang.

¹²Lâwm ula, nasa takin hlim rawh u; vâna in lâwmman chu a ropui si a; in hmâa zâwlnehote pawh kha chutiang bawh chuan an tiduhdah thîn asin.

RINGTUTE CHU CHI LEH ÊNG AN NI

¹³“Lei chi in ni a; nimahsela chi hian alna hloh ta se, engtin nge an tih-al leh tâk ang? Tlâktlaina nei lo, mihringte rah mai mai tûr leka paih chhuah a ni ang.

¹⁴“Khawvêl êng in ni e. Tlâng chungah khaw awm chu thuhrûk theih a ni lo.

¹⁵Miin khâwnvâr an chhit laiin bâwm chhûngah an dah ngai lo, a hûnnaah an hûng zawk thîn; tichuan, in chhûnga mi zawng zawng a ên thîn a ni.

¹⁶Chutiang tak chuan in êng chu mi mit hmuhah êng rawh se; tichuan, in thil tha tihte an hmû ang a, in Pa vâna mi an chawimâwi thei ang.

KRISTAN DAN A TIFAMKIM

¹⁷“Dân thû emaw, zâwlneite thû emaw hnâwl tûra lo kal emaw min ti suh u. Hnâwl tûr ni lovin, tifamkim tûra lo kal ka ni zâwk.

¹⁸Tihtak zetin ka hrilh a che u, lei leh vân a boral hmâ loh chuan dân thûa hawrap chhun han te tak tê emaw, thai han te tak tê emaw pawh, a zâa a thlen kim hmâ loh chuan pakhat mah a boral tawp lo vang.

¹⁹Chutichuan, tûpawh hêng thupêk tê ber zînga mi pakhat pawh bawhchhiaa, chutiang ti ve tûra mite zirtîr apiang chu, vân lalramah chuan mi tê ber an ti ang; amaherawhchu, tûpawh zâwma, zirtîr ve apiang chu vân lalramah chuan mi lian an ti ang.

²⁰In thât nain dân zirtîrtute leh Pharisaite thât na a khûm loh chuan vân lalramah in lût hauh lo vang tih ka hrilh che u hi.

TUALTHAHNA, THINLUNGA INĀN

²¹“Hman laia mite hnênah khân, ‘Tual i thât tûr a ni lo, tûpawhin tual a thah chuan a chungthû rêl a ni ang’ an ti tih thû in hria.

²²Kei chuan ka hrilh a che u, chhan awm lova mahni unau chungah thînur apiang, a chungthû rêl a ni ang a; tûpawh a unau ‘mi tlâktlai lo pa!’ ti phei chu, rorêlna sângah a chungthû rêl tur a ni. Mi tûpawh, ‘Mi â pa!’ ti apiang chu, hremhmun meia kal tlâk a ni tih ka hrilh a che u.

²³Chuvângin, maichâma thilpek i hlan mêk lai pawh khân, i unauvin i chungah lungâwi lohna a nei tih i hriat chhuah chuan,

²⁴maichâm hmâah chuan i thilpêk chu hnutchhiahin va kîr leh la, i unau chu va rem zet la, tichuan i thilpêk chu rawn hlân ang che.

²⁵I khingpui chu kawnga in kal dun lai ngeiin rem thuai rawh, chuti lo zawng, i khingpui chuan rorêltu a mantîr ang che a, rorêltu chuan hotute hnênah a hlân ang che a, tân inah an khung mai ang che.

²⁶Tihtak zetin ka hrilh a che u, a zavaia i rulh tlâk vek hmâ chuan, chuta țang chuan engtin mah i chhuak leh tawh lovang.

THINLUNGA UIRÊ

²⁷I uirê tûr a ni lo,’ tih hi hmâsâng ațanga in hriat hnû a ni e.

²⁸Kei erawh chuan ka hrilh a che u, tûpawh ngaih châka hmeichhe melhtu chu, a thînlungah a uirê tawh reng a ni.

²⁹I mit ding lamin a tihtlûk che chuan kher chhuak la, paih daih rawh; i taksa a puma hremhmuna paih ai chuan, i taksa pêng pakhat boral chu i tân a țha zâwk.

³⁰I kut ding lamin a tihtlûk che chuan tan la, paih daih rawh; i taksa a puma hremhmuna paih ai chuan i taksa pêng pakhat boral chu i tân a țha zâwk daih a ni.

HRIATPUITU THUAH LÎ

³¹“Tûpawh nupui mâ apiangin inmâkna lehkha a hnênah pe rawh se,’ tih a ni bawh a.

³²Kei erawh chuan ka hrilh a che u, mipat hmeichhiatna hman khawloh vâng a nih chauh loh chuan, tûpawhin nupui a mâk chuan, a nupui chu a uirêtir a ni; mâk tawh hnû nei apiang chu uirê a ni.

ISUAN CHHECHHAM A KHAP

³³“Hman laia mite hnênah, ‘Dâwtin chhia chham suh la, Lalpa hnênah i chhechhamte chu hlen zâwk rawh,’ an ti tih in hre tawh bawh a,

³⁴Kei chuan ka hrilh a che u, chhia rêng rêng chham suh u; vân chhâlin chham suh u, chu chu Pathian lalthutthlêng a ni si a;

³⁵lei chhâlin chham hek suh u, chû chu a ke nghahchhan a ni si a; Jerusalem chhâlin chham hek suh u, chû chu Lal ropui tak khawpui a ni si a.

³⁶I lû chhâlin i chham tûr a ni hek lo, samzai khat pawh i tivârîn, i tidum thei si lo va.

³⁷In thu sawiah ‘ni’ chu ‘ni,’ ‘ni lo’ chu ‘ni lo’ ni mai rawh se. Chûng bâk aliam chu misual pa laka chhuak mai a ni e.

MÊL HNIH KAL RAWH

³⁸Mit aiah mit, hâ aiah hâ’ an ti tih in hre tawh e.

³⁹Kei erawh chuan mi sual dodâl lo tûrin ka hrilh a che u. I biang ding lama bêngtu hnênah chuan a lehlam pawh dawh rawh.

⁴⁰Mi tûpawhin thubuai siam sak che an tuma i kawr an lâksak che chuan, i puan pawh lâk teltîr nghâl rawh.

⁴¹Mêl khat kala phût luitu apiang che hnênah chuan mêl hnih kal rawh.

⁴²A dîltu che chu pê la, i laka pûk duhtu chu hnar suh.

I HMÊLMÂTE HMANGAIH RAWH

⁴³“I vêngte hmangaih la, i hmêlma haw rawh,’ an ti tih in hre tawh e.

⁴⁴Kei erawh chuan ka hrilh a che u, in hmêlmâte chu hmangaih ula, ânhche lawhtu che u chu malsâwm ula, nangmahni hawtu che u chungah chuan thât chhuah ula, diriamtu leh tiduhdahtu che u chu țawngțaisak rawh u,

⁴⁵chû chu in Pa vâna mi fate in nih theihna tûr a ni; ani chuan mi sualte leh mi thate chungah chuan a nî a chhuahtîr thîn a, mi dikte leh mi dik lote chungah pawh ruah a surtîr thîn a ni.

⁴⁶Nangmahni hmangaihtute chauh in hmangaih hian eng lâwmman nge in hmuh? Chhiaikhawntute pawhin chutiang tho

chuan an ti ve lo vem ni?

⁴⁷In unaute chauh in biak that hian midangte aia in that bikna eng nge awm? Chhiahkhawntute pawhin chutiang chuan an ti ve tho lo vem ni?

⁴⁸Chuvângin, in Pa vâna mi a tha famkim angin in tha famkim ve tûr a ni.

BUNG 6

PATHIAN LÂWM ZAWNGA THIL THA TIH

¹“In thil tha tihte chu vântlâng hmuha mâwia ti mai mai lo tûrin fimkhur rawh u; chuti lo chuan, in Pa vâna mi hnên ațangin lâwmman in dawng lo vang.

²“Chuvângin, khawngaih thilpêk in hlanin, mi vervêkten mi fak an hlauh theihna tûra biak inah te, kawthlêrah te an puang zâr thîn ang hian ti vê suh u. Tihtak zetin ka hrilh a che u, an lâwmman chu an dawng zo dêr tawh.

³Nang erawh chuan thilpêk i hlanin, i kut dîng lamin a tih chu i kut vei lamin hre suh se,

⁴tichuan, i thilpêk chu a rûkin a awm thei ang; chutichuan, a rûka hmu rengtu che i Pa chuan langsâr takin lâwmman a pe ang che.

TAWNGTAI DÂN

⁵“In tawngtaiin, mi vervêkte angin in ti tûr a ni lo. Anni chuan mite hmuh atân biak inah te, kawthlêr lûn laiah te dîng chung a tawngtai an ngaina thîn si a. Tihtak zetin ka hrilh a che u, an lâwmman tûr an dawng zo tawh.

⁶Nang erawh chu i tawngtaiin, i pindan chhungrilah lût la, i kawngka khâr la, i Pa a rûka awm hnênah chuan tawngtai rawh; tichuan, i Pa a rûka hmu rengtu che chuan langsâr takin lâwmman a pê ang che.

⁷In tawngtai laiin, ringlo mite angin sawi ngai chham nawn mai mai suh u; an chham hnem chuan mite hriat nih an hlauh dâwnah an inngai thîn a ni.

⁸Chuvângin, anmahni angin ti ve suh u. In Pa hian in mamawhte chu in dil hmâ pawhin a hria asin.

⁹Nangni chu heti hian tawngtai rawh u: “Kan Pa, vâna mi, I hming zahawm rawh se.

¹⁰I lalram lo thleng rawh se. I duhzâwng vâna an tih angin Leia miten ti rawh se.

¹¹Wawiinah kan ni tin chaw min pê ang che.

¹²Kan leibâte kan ngaihdam angin, Nang pawhin kan leibatte min ngaidam ang che.

¹³Sual tûra thlêmnaah min hruai lût suh ang che, Misual pa lakah chuan min chhandam zâwk ang che. Lalram te, thiltihtheihna te, ropuina te, Chatuanin i tâ a ni si a. Amen.”

¹⁴Mite thil sual tih in ngaihdam chuan, in Pa vâna mi’n a ngaidam vê ang che u.

¹⁵Nimahsela, mite thil sual tih in ngaihdam si loh chuan, in thil sual tihte chu in Pain a ngaidam bîk lovang.

PATHIAN MITHMUHA CHAWNGHEI

¹⁶“Chaw in nghei laiin, mi vervêkte angin ngui hmêl pu suh u. Anni chuan mi mithmuha chaw nghei hmêl an put theihna tûrin an hmêl an tipawr thîn. Tihtak zetin ka hrilh a che u, an lâwmman chu an dawng zo tawh.

¹⁷Nang erawh chuan, chaw i nghei laiin i lû-ah hriak thih la, i hmai phih rawh,

¹⁸tichuan, a rûka awm i Pa mithmuha chaw lo chuan, mite hmuhah chaw nghei angin i lang lo vang a; tichuan, i Pa a rûka hmutu che chuan langsâr takin a rûl ang che.

VÂNA RO KHÂWLKHÂWM

¹⁹“Leiah thîm leh tuiêkin a ei chhiatnaah, rûkruten an reh pawha an rûknaah hian in tân ro khâwl khâwm suh u;

²⁰vânah, thîm leh tuiêkin a ei chhiat theih lohnaah, rûkruten an reh pawha an rûk hek lohnaah chuan in tân ro khâwl khâwm zawk rawh u;

²¹I ro awmna apiangah i rilru pawh a awm ang.

TAKSA KHÂWNVÂR

²²“Taksa khâwnvâr chu mit hi a ni. I mit a fiah chuan, i taksa chu a pumin a lo êng chhuak mai ang.

²³I mit a that loh erawh chuan, i taksa pumin a thim zo vek ang. Tichuan, nangma chhûnga êng chu thim ni sela, chû thim chu a va nasa dâwn êm!

PATHIAN LEH SUM CHAWHPAWLH THEIH LOH

²⁴Tuma’n hotu pahnih rawng an bâwl kawp thei lo; pakhat huain pakhat an duh ang a; a nih loh leh, pakhat lamah tângin pakhat zâwk an hmusit ang. Pathian leh sum rawng in bâwl kawp thei lo ve.

LUNGKHAM SUH

²⁵Chuvângin, ka hrilh a che u, in nun nân eng nge in ei ang a, eng nge in in ang, tih te, in taksa tân eng silhfên nge in inbel dâwn, tih lungkham suh u. Ei tûr aiin nunna a hlu zâwkin, silhfên aiin taksa a hlu zâwk lo vem ni?

²⁶Chunglêng savâte hi en teh u; buh an tuh lo va, an seng hek lo, buh zêmah an chhêk khâwm bawk hek lo; mahse, in Pa vâna mi chuan a chawm asin. Chûngte ai chuan in hlu zâwk daih lo vem ni?

²⁷Nangni zîngah in ngaihtuah hah avâng ngawtin tuin nge mahni dung lam tawng khata tisâng thei?

²⁸Silhfên chungchâng engah nge in lungkham ni? Phâi zâwla lili-te than duanzia hi ngaihtuah teh u; an thawk hah ve lo, lâ pawh an kâi hek lo;

²⁹nimahsela, ka hrilh a che u, Solomona ropuina zawng zawng pawh kha hêng zînga pakhat tluk pawh hian chei a ni lo asin.

³⁰Tichuan ram hnim, wawiina nung hlih hlih, a tûk lawka thuka paih luh leh mai tûr mah Pathianin chuti taka a chei chuan, aw nangni rin tlêmte u, a thuam nasa zâwk dâwn lo che u em ni?

³¹Chutichuan, ‘Eng nge kan ei ang?’ emaw, ‘Eng nge kan in ang?’ emaw, ‘Eng silhfên nge kan inbel ang?’ tiin lungkham suh u.

³²Hêng thil zawng zawng hi Jentail mite zawn ber a ni. In Pa vâna mi hian chûng zawng zawng chu in mamawh tih a hria asin.

³³Pathian lalram leh a thatna chu zawng hmasa zâwk ula, tichuan, chûng zawng zawng chu pêk belhchhah in ni dâwn nia.

³⁴Chutichuan, a tûk atân engmah engto lâwk suh u, a tûk chuan ama tân rêl ve mai rawh se. Ni khat atân ni khat hrehawm chu a tâwk a ni.

BUNG 7

THIAM LOH CHANTIR SUH

¹Tumah thiam loh chantîr* suh u, nangni pawh thiam loh chantîra in awm loh nân.

²Thiam loh in chantîr ang bawkin nangni pawh thiam loh in chantîr ang che u a; in tehkhâwng ngai bawkin an teh lêt vê ang che u.

³Engtizia nge mahni mita thing tum awm reng ngaimawh si lovin, i unau mita hmawlh te tak te awm chu i ngaimawh tlat le?

⁴Engtin nge i unau hnênah, ‘I mita hmawlh te reuh tê kha mi lâk chhuahtîr rawh,’ i tih theih ang? En teh, nangma mit ngeia mi kha thing tum chu a ni lo vem ni?

⁵Nang mi vervêk! I mita thing tum kha la chhuak hmasa la; tichuan i unau mita hmawlh te tak tê lâk chhuah tûr chu i hmu fiah thei dâwn nia.

⁶“Uite chu thil thianghlim pe suh u; in tuikeplungte pawh vawk hmâah theh hek suh u, an chîl chhia ang a, nangni pawh an rawn tâi thlêr mai ang che u.

DÎL, ZAWNG, KIK

⁷“Dîl ula, an pê ang che u; zawng ula, tichuan in hmu ang; kik ula, an hawn sak ang che u.

⁸A dîl apiangin an dawng thîn a; a zawngtu pawhin a hmu thîn; a kiktû apiang chu an hawnsak ang.

⁹Nangniho zînga mi tûpawh in fapain chhangpêr dîl che u sela, tu nge lungtum pê ang che u?

¹⁰A nih loh leh, sangha dîl che u sela, tu nge rûl pê ang che u?

¹¹Chuvângin, nangni mi sualte mahin in fate thil tha pêk nachâng in hriat chuan, in Pa vâna mi pheî chuan amah diltute chu thil tha a va pe nasa dâwn êm!

¹²“Chutichuan, miten in chungah ti ve se in tih ang takin mi dangte chungah pawh ti ve rawh u, hei hi Dân thû leh Zâwlneite thû a ni si a.

KAWNG ZÎM

¹³“Kawngka zîmah chuan lût rawh u; boralnaa luhna kawngkâ leh kalkawng chu a zau va, chu kawnga kal pawh chu an tam rêng a ni.

¹⁴Nunnaa luhna kawngkâ chu a zîm a, a kawng pawh a bumboh baw a, a hmutute pawh an tiêm rêng a ni.

AN RAH-AH IN HRIA ANG

¹⁵Zâwlnei suakte lakah fimkhur rawh u; chûngte chu berâm vun sinin in hnênah an lo kal thîn, an chhûng lam erawh chu chinghne koham an ni si a.

¹⁶An rah aţangin eng ang mi nge an nih in hre mai ang. Hlîng buk kungah grêp rah an lo ngai em ni? Lenhlingah pawh theipui an lo ngai em ni?

¹⁷Chuvângin, thing tha apiang a rah tha thîn a; thing chhia erawh chuan rah tha lo baw a chhuah thîn.

¹⁸Thing tha a rah chhe thei lo va, thing chhia lah a rah tha thei hek lo.

¹⁹Thing tin rah thaah rah lo apiang an kit a, meiah an paih thîn.

²⁰Chuvângin, an rah aţangin eng mi nge an nih in hre mai ang.

KA HRE NGAI LO VA CHE U

²¹“‘Lalpa, Lalpa’ mi ti nazawng chu vâna lalramah an lût tawp lo vang a; ka Pa vâna mi duhzâwng titute erawh chu an lût ang.

²²Chumi nî-ah chuan mi tam takin, ‘Lalpa, Lalpa, i hmingin thûte kan hrilin, i hmingin ramhuaite kan hnawt chhuakin, i hmingin thilmak tam tak kan ti thîn lo vem ni?’ an la ti ang.

²³Chumi hunah chuan, ‘Nangni thil sual titute u, ka hre ngai lova che u, ka hnêna ta kal bo rawh u!’ tiin anni chu ka la hrilh ang.

LUNGPUI CHUNGA SAK

²⁴“Chutichuan, hêng ka thusawite hriaa zâwm apiang chu, lungpui chungah in satu mifing nên ka tehkhin dâwn a ni:

²⁵ruah a lo sîr a, tuite a lo lian a, thlîte a lo tleh a, chu mi in chu a rawn nam sawk sawk a; mahse a chim lo va; lungpui chungah rem tlat a nih avângin.

²⁶Chuvângin mi tupawh, hêng ka thusawi hre si, zâwm si lote chu mi â tîauvut chungah in satu ang lek an ni:

²⁷ruah a lo sîr a, tuite a lo lian a, thlîte a lo tleh a, chû mi in chu a rawn nam sawk sawk a; a chim ta a. A sawp chu nasa tak a ni,” a ti a.

²⁸Isuan chûng thû chu a sawi zawhin mipuite chuan a thu zirtîr dân chu mak an ti hlê a;

²⁹Dân zirtîrtute ang lova thunei taka anmahni a zirtîr avângin.

BUNG 8

ISUAN PHÂR A TIDAM

¹Tlâng ata chu a lo chhuk a, mipui tam takin amah chu an zui a.

²Ngai teh, a hnênah chuan phâr a lo kal a, “Lalpa, duh la chuan mi tithianghlim thei a ni,” tiin chibai a bûk a.

³Isuan a kutin a lo ban a, a dek a, “Ka duh e, lo thianghlim tawh ang che,” a ti a. A phâr chu a lo thianghlim nghâl ta mai a.

⁴Isuan a hnênah, “Tûmah hrilh lo vang che; mahse kal la, puithiam hnênah va inentîr la, i dam Chiang ngei tih an lo hriat nân Mosian thil hlan tûr a ruat kha va hlân rawh,” tiin a hrilh a.

ISUAN SIPAI ZA HOTU CHHIAHHLAWH A TIDAM

⁵Isua chu Kapernaum khuua a luhin sipai za hotu hian a rawn pan a,

⁶“Lalpa, ka chhiahhlawh a zeng a, khum betin inah na tak tuarin a mu reng mai,” tiin tanpui tûrin a rawn ngên ngawih ngawih a.

⁷Isuan a hnênah, “Ka lo kal ang a, ka rawn tidam ang e,” a ti a.

⁸Sipai za hotu chuan, “Lalpa, ka in chhông i luhna tlâk a ni lo. Thû sawi mai la, ka chhiahhlawh chu a dam mai ang.

⁹Kei pawh hotu thuhnuai a awm ka ni a, ka hnuaiah sipaite an awm bawk a. Pakhat hnênah, ‘Kal rawh,’ ka tih leh a kal a; mi dang hnênah pawh, ‘Lo kal rawh,’ ka tih chuan a lo kal mai a; ka chhiahhlawh hnênah pawh, ‘Hei hi ti rawh,’ ka tih chuan a ti mai thîn,” tiin a chhâng a.

¹⁰Isuan chu thû chu a hriatin mak a ti a, amah zuitute hnênah chuan, “Tih tak zetin ka hrilh a che u, Israelte zingah pawh heti taka rinna nasa hi ka hmu lo.

¹¹Ka hrilh a che u, chhak leh thlang atangin mi tam tak an lo kal ang a, vân lalramah chuan Abraham a te, Isaaka te, Jakoba te nê an la thû ho ang a.

¹²Lalram fate erawh chu pawns thimah hnawh chhuahin an awm thung ang. Chutah chuan tah leh ha thial a awm ang,” a ti a.

¹³Isuan sipai za hotu hnênah chuan, “Kal tawh rawh le, i rin ang takin i chungah lo thleng rawh se,” a ti a. Chutih lai dârkar ngeiah chuan a chhiahhlawh chu a lo dam ta a.

PETERA PIZAWN TIHDAM

¹⁴Isua chu Petera ina a luhin, a nupua nu khawsika mû chu a va hmu a.

¹⁵Tichuan a kut chu a dehsak a, a khawsik chuan a kiansan ta a. A lo thova, an ei tur a siamsak ta a.

TLAI LAMAH MI TAM TAK TIHDAM

¹⁶Tlai lam a lo nih chuan ramhuai man mi tam tak a hnênah an rawn hruai a. Thlarau sualte chu thû pên a hnawt chhuak a, damlo zawng zawng chu a tidam zêl a,

¹⁷“Amah ngeiin kan chak lohnate a lâ a, kan nâte a phur a,” tia zâwlnei Isaian a sawi kha a lo thleng ta a ni.

ZIRTIR NIH MAN

¹⁸Isuan a kiang vêla mipui tam tak a hmuhin, râl lehlama kal sawn tûrin thû a pê a.

¹⁹Dân zirtirtu pakhat hi a lo kal a, a hnênah, “Zirtirtu, i kalna apiangah ka zui ang che,” a ti a.

²⁰Isuan a hnênah, “Sihalten kua an nei a, chunglêng savâte pawhin bû an nei a, Mihring Fapa erawh chuan khawiah mah lu ngahna tûr a nei ve lo,” a ti a.

²¹A zirtirte zinga mi dangin a hnênah, “Lalpa, ka pa vûi tûrin mi kaltir zet ta che,” a ti a.

²²Mahse Isuan a hnênah, “Mi zui rawh; mitthi chuan anmahni mitthi chu vûi mai rawh se,” a ti a.

THLÎ LEH TUIFÂWNIN ISUA THU AN ÂWIH

²³Lawngah chuan a chuang a, a zirtirte chuan an zui a.

²⁴Dil chungah chuan thlipui a lo tleh thut a, tuifawn chuan lawng chu a vûr hlup hlup a. Ani erawh chu a muhîl a.

²⁵A zirtirte chuan an va kai tho va, “Lalpa, min chhan rawh! Kan boral dâwn hi le!” an ti a.

²⁶Ani chuan an hnênah, “Aw, nangni rin tlênte u, engah nge in hlah viau le?” a ti a. A lo tho va, thlî leh dil chu a hau va, a reh nghal ta mai a.

²⁷Mite chuan mak an ti a, “Hê mi hi tu nge maw a niha, thlî leh dil leh zêl pawhin a thu an âwih mai le?” an ti a.

RAMHUI MAN PAHNIH TIHDAM

²⁸Râl leh lam Gadarin* mite ram chu a va thlen chuan, ramhuai man pahni, thlân ațanga lo chhuakin an rawn tâwk a; an kawlh êm avângin chu mi kawngah chuan tûmah an kal tlang ngam lo va.

²⁹Thâwklekhkatak aw ring taka âuvin, “Isu, Pathian Fapa, engtia rawn inrawlh tâ nge i nih? Hun tiam thlen hmâa min nghaisak i tum em ni?” an ti a.

³⁰Chuta an awmna ațanga hla fê-ah chuan vawh rual tam tak an tlâ a.

³¹Ramhuaite chuan, “Min hnawh chhuah chuan vawh rual kawchhûngahte sâwn min luhtir ang che,” tiin an ngên a.

³²Ani chuan an hnênah, “Kal ta che u,” a ti a. Tichuan, an chhuak a, vawh kawchhûngah chuan an lût ta a. Chu vêleh vawh rual zawng zawng chu âwih pangah chuan an tlân chhuk ta vak mai a, dilah an tlân lût a, tuiah an tla hlum ta a.

³³Ran vulhtute chu an tlânchhia a; khuah chuan an va kal a, ramhuai mante chungah thil lo thlen dân leh thil awmzia zawng zawng chu an va sawi darh a.

³⁴Tichuan, a khawnâwtin Isua hmu tûrin an lo chhuak a. Amah an rawn hmuh chuan an ram ațanga kal bo tûrin an ngên chiam a.

BUNG 9**ISUAN ZENG A NGAIDAM A, A TIDAM**

¹Chutichuan, Isua chu lawngah a chuang a, râl lehlamah a kai a, a awmna khuah chu a va thleng ta a.

²Ngai teh, zeng pakhat chu a mutna khum chawpin a hnênah an rawn zawn a. Chûng miten an rinzia Isuan a lo hmuhin zeng hnênah chuan, “Ka fapa, hlim takin awm rawh; i sualte ngaihdam a ni tawh e,” a ti a.

³Chû vêleh dân zirtirtu thenkhat chuan an rilruin, “Hê mî hian Pathian a sawi chhe ta le!” an ti a.

⁴Nimahsela, Isuan an ngaihtuahte chu a lo hria a, “Engah nge in thilunga sual in ngaihtuah ni?”

⁵I sualte ngaihdam a ni tawh,’ tih leh, ‘Tho la, kên kal tawh rawh,’ tihah hian, a eng nge sawi awl zâwk?

⁶Nimahsela, Mihring Fapa hian khawvêlah sual ngaihdam theihna a nei tih in hriatna tûr a nih hi,” a ti a. Zeng hnênah chuan, “Tho la, i mutbu têt la, i inah haw rawh,” a ti a.

⁷Tichuan, a tho va, a inah a haw ta a.

⁸Mipuite chuan chû chu an hmuhin mak an ti êm êm a, mihringte hnêna chutiang thiltihtheihna petu Pathian chu an fak a.

CHHIAHKHAWNTU MATTHAIA

⁹Chuta ƣang chuan Isua chu a kal zêl a, mi pakhat, a hming Matthaia chu a chhiahkhawwna hmuna ƣhû a va hmu a. A hnênah, “Mi zui rawh,” a ti a. Ani chu a tho va, a zui ta a.

¹⁰Chutia ina chây a kil lai chuan, ngai teh, chhiahkhawntute leh mi sual tam tak an lo kal khâwm a, Isua leh a zirtirte bulah chuan an va ƣhu ve a.

¹¹Pharisaiten chû chu an rawn hmuhin, a zirtirte hnênah, “Engati nge in zirtirtu hian chhiahkhawntute leh mi sualte hnêna a ei ve mai?” an ti a.

¹²Isuan a lo hriat chuan an hnênah, “Mi hrisêlte chuan daktawr an ngai lo va, mi bawrsâwmte zâwkin an ngai a ni.

¹³Chuvângin, ‘Inthâwina aiin khawngaihna ka duh zâwk e,’ tih hi, a awmzia va zir rawh u. Mi ƣha-ho lam tûra lo kal ka ni lo va, mi sualten an lo sim theih nana lo kal ka ni asin,” a ti a.

CHAWNGHEI CHUNGCHANGAH ISUA AN CHHUAHCHHÂL

¹⁴Chûng lai chuan Johana zirtirte chu a hnênah an lo kal a, “Keini leh Pharisaiten hian chaw kan nghei ƣhin si a, engati nge i zirtirte lêmin an nghei si loh?” an rawn ti a.

¹⁵Isuan an hnênah, “Moneitu chu a ƣhianten hnêna a chên ve reng laiin an sîn dâwn em ni? Nimahsela, Moneitu chu an hnên aƣanga hruai bo hun a la awm ang a, chutih hunah chuan chây te pawh an la nghei vê ang chu.

¹⁶Tûma’n puan tharin puan hlui ƣet an bel ngai lo; a bel phuina tûr chuan puan hlui chu a kai ƣet ang a, a lo thlêr zau zâwk dâwn asin.

¹⁷Uain thar pawh savun ip hluih an thun ngai lo; thun ta sela, savun ip hlui chu puak kehî, uain chu a bua ang a, a savun ip chawp chuan a chhiat phah zâwk ang. Chuvângin uain thar chu savun ip thara an thun chuan a him vê vê dâwn a ni,” a ti a.

HMEICHHE NAUPANG TIHNUN LEH HMEICHHIA TIHDAM

¹⁸Chûng ƣhû chu an hnêna a sawi laiin ngai teh, rorêltu pakhat a lo kal a, chibai a bûk a, “Tûn maiah khân ka fanu a thi a; nimahsela, lo kal la, a chungah i kut ngat la, a lo nung leh mai ang,” a ti a.

¹⁹Tichuan, Isua chu a tho va, a zui ta a, a zirtirte pawhin an zui ve a.

²⁰Chû vêleh chuan hmeichhe pakhat, kum sâwm leh kum hnih lai thi pûta dam lo hi a hnungah chuan a lo kal a, a puan hmâwr a rawn dek a.

²¹“A puan hmâwr chauh pawh dek ila, tihdamin ka awm mai ang,” a ti rilru a ni.

²²Isua chu a han lehhawi a, chû mi chu a hmuh chuan, “Ka fanu, thlamuang takin awm rawh; i rinna hi i dampui ta e,” a ti a.

Chumi darkâr aƣang chuan chû hmeichhia chu a lo dam ta a.

²³Rorêltu inah chuan Isua a va lût a, phênglâwng tumte leh mi ƣap tuarh tuarh a va hmuh chuan,

²⁴“Kiang rawh u; naupang chu a thi lo ve, a muhîl a nih zâwk hi,” a ti a. Anni chuan an nuihsan mai a.

²⁵Mipuite chu pâwna a chhuahtîr hnû chuan a lût a, a kutah a vuan a, hmeichhe naupang chu a lo tho ta a.

²⁶Chumi chanchin chu chu lai ram zawnzawngah chuan a lo thang chhuak ta a.

MITDEL PAHNIH TIHDAM

²⁷Isuan chumi hmun a chhuahtîr lai chuan mitdel pahnihin an zui ve a, “Davida fapa, min khawngaih rawh,” tiin an âu va.

²⁸Ina a luh chuan, mitdelte chuan a hnên an rawn pan a. Isuan an hnênah, “Hetiang hi ti theiin min ring tak tak em ni?” a ti a. Anni chuan a hnenah, “Ring e, Lalpa,” an ti a.

²⁹Ani chuan an mit a dek a, “In rin angin in chungah thleng rawh se,” a ti a.

³⁰Tichuan, an mit chu a lo vâv ta a. Isuan an hnênah, “Tûma’n hre ve suh se,” tiin kauh takin a hrilh a.

³¹Nimahsela, anni chu an chhuak a, chu lai ram tin kil tinah chuan chu chanchin chu an sawi darh ta zâwk a.

ƣAWNG THEI LO A ƣAWNG

³²An kal chhuah lai chuan ngai teh, ramhuai man, tawng thei lo mi pakhat a hnênah an rawn hruai a.

³³Ramhuai chu a hnawh chhuah vêleh ƣawng thei lo chu a lo ƣawng ta a. Mipuite chuan mak an ti hle a, “Israelte zîngah hetiang hi hmuh tûr a la awm ngai lo!” an ti a.

³⁴Pharisaiten erawh chuan, “Ramhuai lal avângin a ni, ramhuaite a hnawh chhuah ƣhin ni,” an ti a.

ISUA LAINATNA

³⁵Isua chuan thingtlang khaw lian leh khaw tê zawnzawng a fang chhuak a, an biak inah te a zirtîr a, lalram Chanchin ƣha hrilh, damlo leh natna tinrênga nâte a tidam zêl a.

³⁶Mahse, mipuite chu a hmuhin, vêngtu nei lo berâmte anga chau leh baihvâi tak an nih avângin a khawngaih ta êm êm a.

³⁷Tichuan, a zirtirte hnênah chuan, “Buh seng tûr a tam vei nê, thawktu lah an tlem si a.

³⁸Chuvângin, a buh sengtu tûrte tîr chhuak tûrin buh neitu Lalpa chu dîl rawh u,” a ti a.

BUNG 10

ZIRTIR SAWM PAHNIHTE

¹A zirtîr sâwm leh pahnihte chu a ko khâwm a, thlarau bawlhhlawh hnawh chhuah theihna te, natna tinrênga nâ leh damlo an tihdam theih nân thuneihna a hlân a.

²Tirhko sâwm leh pahnihte hming chu hêngte hi an ni: A hmasa ber chu Simona (Petera an tih) leh a unau Andria te; Zebedai fapa Jakoba leh a unau Johana te;

³Philippa leh Bartholomaia te; Thoma leh chhiahkhawntu Matthaia te; Alphaia fapa Jakoba leh Lebbaia, Thaddaia an tih bawh te;

⁴Kanaan mi Simona leh a mantîrtu Juda Iskariota te an ni.

SAWM LEH PAHNIHTE TIRH CHHUAH

⁵Chûng sâwm leh pahnihte chu Isuan a tîr chhuak a, an hnênah thû a pê a: “Jentailte kawngah kal suh ula, Samari mite khua rêng rêngah pawh lût hek suh u.

⁶Amaherawhchu, Israel hnam berâm bote hnênah kal zawk ang che u.

⁷In kalna apiangah, ‘Vân lalram chu a hnai ta,’ tiin hril zêl rawh u.

⁸Damlote tidam ula, phârte tithianglim ula, mitthite kai tho ula, ramhuaite hnawt chhuak ang che u. A thlâwnin in hmu a, a thlâwn vêkin pe ang che u.

⁹In kawnghrênah rangkachak tangkâ te, tangkarua te, dâr tangkâ te pai suh u,

¹⁰zin kawngah iptê emaw, kawr pahniht emaw, pheikhawkte emaw, tiangte emaw keng hek suh u; hnathawktu chu ei hmu tlâk a ni si a.

¹¹“Khaw lianah emaw, khaw têah emaw in luhna apiangah thlenna tûr âwm zawng chhuak ula, in chhuah leh hmâ loh chuan chutah chuan awm reng ang che u.

¹²Mi ina in luh dâwn rêng rêngin chibai bûk thîn rawh u.

¹³Thlenna tlâk chhûngkua an nih chuan, in duhsakna chu an chungah awm reng sela. Dawng tlâk lo an nih chuan, in duhsakna chu in hnênah lo lêt leh mai rawh se.

¹⁴Tûpawh lâwm lo che u a, in thû ngaithla duh lo chu, chumi in emaw, chumi khua emaw in chhuahsan hunah, in kêa vaivut chu thing thla rawh u.

¹⁵Tihtak zetin ka hrilh a che u, rorêlna nîah chuan chu khua ai chuan Sodom leh Gomorra ram tuar tûr chu a ziaawm daih zâwk ang.

TIH DUHDAHNA LO AWM TUR

¹⁶“Ngai teh u, chinghne zînga berâm angin ka tîr che u hi. Chuvângin, rûl anga fîng, thuro anga pawî sawî lovin awm ang che u.

¹⁷Mihring lakah fimkhur hle rawh u; rorêlna sângah an thlen ang che u a; biak inah te an vua ang che u.

¹⁸Keimah vâng hian hotute leh lalte hmâah an la hruai ang che u, anniho leh Jentailten ka thu an hriat theih nân.

¹⁹Chutianga an mantîr hunah che u chuan eng thu nge in sawi ang a, engtin nge in sawi dâwn tih ngaihtuah buai suh u. In sawi tûr chu a hun takah pêk in ni mai ang;

²⁰a sawitu chu nangni in ni dâwn si lo va, in Pa Thlarau nangmahnia awmin a sawi zâwk dâwn a ni.

²¹“Tihhlum tûrin unau leh unau an inmantîr ang a, pa pawhin a fa a mantîr bawh ang; fate pawhin an nu leh pate an do vang a, an tihhlumtîr bawh ang.

²²Keima hming avângin mi zawng zawng huat in hlauh ang. Nimahsela, a tâwp thlenga tuar chhuak peiha ngei chu chhandamin a awm ang.

²³Hê khuaah hian an tihduhdah hunah che u chuan khaw dangah tlânsan ang che u. Tihtak zetin ka hrilh a che u, Mihring Fapa a lo kal hmâin Israel khuate chu in fang chhuak hman lo vang.

²⁴“Zirlai chu a zirtîrtu chungah a awm lo; chhiahhlawh pawh a pu chungah a awm hek lo.

²⁵Zirlai chu a zirtîrtu anga awm a tawh e, chhiahhlawh pawh a pu anga awm a tawh bawh. In neitupa mah ‘Belzebub-a,’ an tih chuan, a chhûngte pheî chu an va ti nasa dâwn êm!

²⁶“Chuvângin, anni chu hlau suh u; lang lo tûra thuhrûk engmah a awm si lo, thup bo hlen tûra zêp rûk theih pawh engmah a awm hek lo.

ISUAN PATHIAN TÎH DAN A ZIRTÎR

²⁷Thim zînga ka hrilh che u hi êngah sawi chhuak ula; beng bula in hriat hi, in chungah chuangin tlângaupui rawh u.

²⁸“Taksa tihluma thlarau tihlum thei lo chu hlau suh u. Amaherawhchu, hremhmuna thlarau leh taksa tiboral theitu chu hlau zâwk rawh u.

²⁹Chawngzawng pahniht dâr tangka tlang khatin an hralh thîn lo vem ni? Chûng zînga pakhat mah chu in Pa remtihna lovin leiah a tla lovang.

³⁰In samzaite lam pawh hi chhiar vek a ni asin.

³¹Chuvângin, hlau suh u; chawngzawng tam tak aîin in hlu zâwk si a.

MITE HMAA KRISTA TÂN TLAT

³²“Chutichuan, mite hmâa mi tantu chu, chû mi chu ka Pa vâna mi hmâah ka tan ve ang.

³³Nimahsela, mite hmâa mi phattu chu, ka Pa vâna mi hmâah ka phat ve ang.

KRISTAN IN THENNA A THLEN

³⁴“Leiah hian remnarawn thlen tûra lo kalah mi ngai suh u. Remnarawn thlen tûr ni lovin, khandaih nêna lo thawk ka ni zâwk.

³⁵Fapa chu a pa dotîr tûrin, fanu a nu dotîr tûrin, mo a pasala nu dotîr tûr tea lo kal ka nih hi.

³⁶Mihring hmêlmâ chu ama chhûngkaw zînga mi ngei a ni ang.

³⁷Mahni nu leh pa pawh ni se, keimah aia hmangaih zâwk chu, ka mi ni tlâk a ni lo. Mahni fanu emaw, mahni fapa emaw keimah aia hmangaih zâwk pawh ka mi ni tlâk a ni lo.

³⁸Tûpawh mahni krâws pua mi zui lo chu, ka mi ni tlâk a ni lo.

³⁹Tûpawh mahni nun thlahlel chuan a chàn ang a; keimah avânga a nun chàn erawh chuan a neih phah zâwk ang.

TUISIK NO KHAT

⁴⁰“Nangni lâwmthu che u chuan kei pawh mi lâwm a ni a, kei mi lâwm chu mi tîrtu lâwm a ni.

⁴¹Zâwlnei chu zâwlnei a nih avânga lâwm chuan, zâwlnei lâwmman a dawng ang. Mi dik chu mi dik a nih avanga lâwm chuan, mi dik lâwmman a dawng bawng ang.

⁴²Tihtak zetin ka hrilh a che u, tûpawh hêng mi têtê zînga pakhat hnênah kei mi zuitu a nih avânga tuisik no khat chauh pawh petu chuan an lâwmman an chên tawp lo vang,” a ti a.

BUNG 11

BAPTISTU JOHANAN ISUA HNENAH PALAI A TÎR

¹Isuan a zirtîr sâwm leh pahnihte thû a pêk zawh chuan anmahni khuuah te zirtîra, thu hril tûrin a kal chhuak ta a.

²Johana erawh chuan tân in ațanga Krista hnathawh dân te a lo hriatin, amah zuitute zînga mi pahni a palaitir a,

³a hnênah, “Lo kal tûra chu i ni nge, mi dang kan la beisei dân?” tiin an va zâwt a.

⁴Isuan an hnênah, “Kal leh ta ulang, in thil hmuh leh hriat hi Johana chu va hrilh rawh u:

⁵Mitdelte mit a lo vâ a, kebaite kên an kal ta; phârte an lo thianghlim a, bengngawngte beng a lo vâ ta; mitthite kaihtawhin an awm a, pachhiaten Chanchin Tha hril an dawng ta.

⁶Chuvângin, keima chung lungnih lohna nei lo chu an nihlawh e,” tiin a lo chhâng a.

⁷Chûng mite kal liam hnû chuan, Isuan mipuite hnênah Johana chanchin chu a sawi a, “Eng en tûrin nge thlâlêrah khân in kal chhuah le? Luang thli chhêm ngîn maw?

⁸A nih loh leh, eng en tûr berin nge in kal chhuah kha? Puan nê sin maw? Ngai rawh u, puan nê sin te chu lal inahte asin an awm ni.

⁹A nih loh leh, eng vâng berin nge in kal chhuah le? Zâwlnei en tûrin maw? A nih ngei kha, ka hrilh a che u, zâwlnei ai pawha ropui zawk a ni asin,

¹⁰“En teh u, ka tirkoh chu i hmâah ka tîr a, Ani chuan i hmâah i kawng a lo sial ang,” tiin hê mi chanchin hi an lo zia asin.

¹¹Tihtak zetin ka hrilh a che u, hmeichhe hrin zîngah Baptistu Johana aia ropui zâwk an la chhuak ngai lo; nimahsela, vâ lalrama mi tê ber pawh ani ai chuan an ropui zâwk.

¹²Baptistu Johana hun lai ațanga tûn thlengin, vâ lalrama chuan tharuma beihna a tâwk thîn a, tharum thawhtuten an pânglâk thîn.

¹³Zâwlnei zawng zawngte leh dân bûte chuan Johana lo awm thleng khân an hril lâwk thîn.

¹⁴In pawm duh a nih chuan, hê mi hi lo kal tûra an sawi Elija chu a ni e.

¹⁵Hriatna tûra beng nei chuan hre rawh se!

¹⁶“Nimahsela, tûnlai thangtharte hi eng nê nge ka tehkhin ang? Naupangho, dâwr hmunah te thû a, an thiante nê in-âu tawn vêl a,

¹⁷Phênglâwng kan tumsak che u a, In lâm si lo va. ‘Kan sînpui che u a, In tuar na lêm si lo va,’ tite ang hi an ni.

¹⁸“Johana chu a lo kal a, a eiin a in lo va, ‘Ramhuai a zâwl a nih hi,’ an ti a.

¹⁹Mihring Fapa a lo kal a, a eiin a in a, ‘En teh u, chaw heh mi, uain heh mi, chhiakhawntute leh mi sualte thian saw!’ an ti si a. Nimahsela, finna chu a dikzia a fateah a lang asin,” a ti a.

SIM DUH LO KHUATE CHUNGPIKNA

²⁰Chumi hnûah chuan, thil mak a tih tamna ber khuate chu an sim duh loh avângin a hau ta a:

²¹“Korazin, i chung a pik e! Bethsaida, i chung a pik e! In zînga thil mak ropui tihte kha Tura leh Sidon khuah tih ni sela chuan, saiip puan sina vut zînga thûin an sim daih tawh ang.

²²Chuvângin ka ti a che u, rorêlna nîah chuan nangni tuar tûr ai chuan, Tura leh Sidon khaw tuar tûr chu a zia awm zâwk ang.

²³Nang, Kapernaum, vâ thlenga chawisân ni mah la, Hremhmuna paih thlak i ni ang; nangmaha thil mak tak tihte kha Sodom khuah tih ni zâwk sela chuan, tûn thleng hian a la awm reng ang chu.

²⁴Nimahsela, ka hrilh a che u, rorêlna nîah chuan, i tuar tûr ai chuan Sodom ram tuar tûr chu a ziaawm daih zâwk ang,” a ti a.

CHAWLHNA DIK ISUAN A PE

²⁵Chutih lai chuan Isuan heti hian a ti a, “Aw ka Pa, lei leh vâ Lalpa, nangin mifing leh mi thiamte lakah hêng thû hi i thup a, nausênte hnêna i puan avângin lâwmthu ka hrilh a che.

²⁶A ni, ka Pa, chutiang tih chu i mithmuhah thil tha a ni si a.

²⁷Ka Pain thil engkim mi kawltîr tawh; Pa chauh lo chuan tûmahin Fapa hi an hre lo; Pa pawh chu Fapa leh, Fapain a hriattîr duha te chauh lo chuan tûma’n an hre hek lo.

²⁸“Nangni thawk rim leh phurrit phur zawng zawngte u, ka hnênah lo kal ula, keima’n ka chawltîr ang che u.

²⁹Ka ngêhângkaw l bat ula, ka hnên ațangin zir rawh u; nunnê leh rilrua inngaitlâwm ka ni asin; tichuan, in thlarau tân nun hahchâwl in nei ang.

³⁰Ka ngêhângkaw l chu a nuam a, ka phur pawh a zâng a ni,” a ti a.

BUNG 12

ISUA CHU SABBATH LAL A NI

¹Chu mi lai chuan Isua chu Sabbath niin buh hmunah a kal tlang a. A zirtîrte rilâtam chuan buh vûite chu an thliak a, an ei ta a.

²Pharisaiten chû chu an hmuhin a hnênah, “En teh, i zirtîrten Sabbath nia tih thiag lo an tih tâk hi,” an ti a.

³Ani erawh chuan an hnênah, “Davidan a rilâtam laia a thiante nêna an thil tih kha in chhiar lo vem ni?

⁴Khatia Pathian ina a luha, amah leh a thianten ei thiag lo, puithiamte chanpual bika an dah hran, chhang thianghlim an ei thû kha?

⁵A nih leh, Sabbath nia Pathian biak ina puithiam awmten Sabbath an bawhchhiat pawhin an ngaihnathiam zêl tih dân thû-ah chuan in chhiar lo vem ni?

⁶Engpawh ni sela, tempul aia ropui zâwk hetah a awm tih ka hrilh a che u.

⁷Inthâwina ni lovin, khawngaihna ka duh e, tih hi, a awmzia lo hre tawh ni ula zawng, thiam chang zâwk thiam loh in chantîr lo tûr.

⁸Mihring Fapa hi Sabbath Lalpa pawh a ni asin,” a ti a.

SABBATH NIA TIHDAM

⁹Chuta țang chuan a kal sawn a, an biak inah a va lut a.

¹⁰Ngai teh, mi pakhat kut zeng a lo awm a. Amah an hêk theih nan, “Sabbath niin tihdam a thiang em?” tiin Isua an zawt a.

¹¹Ani chuan an hnenah, “Nangni zingah tupawhin berâm pakhat nei ula, chu chu Sabbath niin khuarkhurumah tla ta ang sela, tu nge kai chhuak lo vang che u?”

¹²Berâm pakhat ai chuan mihring pakhat chu a va hlu zawk êm! Chuvangin Sabbath ni-ah tihthat a thiang e,” a ti a.

¹³Chu mi hnenah chuan, “I kut phar rawh,” a ti a. Tichuan, a phar chhuak a, a kut lehlam angin a lo dam ta a.

¹⁴Pharisaiho chu an chhuak a, amah an tihlum theih dan tur an phiar ta a.

EN TEH, KA CHHIAHHLAWH HI

¹⁵Isuan chu thu a lo hriat chuan, chu hmun chu a chhuahsan a. Mi tam takin amah an zui a, an zain a lo tidam vek a.

¹⁶Amaherawhchu, a chanchin puang zar lo turin a khap tlat a,

¹⁷Zâwlnei Isaia thusawi kha a lo thlen theihna tur a ni si a:

¹⁸“En teh! Ka Chhiahhlawh, ka thlan, Ka duh tak, ka rilruin a lawm êm êma hi! A chungah Ka Thlarau ka dah ang a, Jentailte hnenah dikna a puang ang.

¹⁹A hnial buai lo vang a, awrawl a chhuah hek lo vang, Kawthlerah te a aw tuma’n an hre bawh hek lo vang.

²⁰Hneh tura rorelna a tirh chhuah hma loh chuan, Luang sâwp a tichhum lo vang a, Meikhu pawh a timit lo vang.

²¹Jentailte chuan a hming chu an ring tawh ang,” tiin.

INDO CHHUNGKUA A DING CHHUAK THEI LO

²²Chung lai chuan ramhuai man mitdel, țawng thei lo ni bawh mi pakhat an rawn hruai a; ani chuan a lo tidam a; chutichuan, țawng thei lo chu a lo țawng thei ta a, a hmu thei ta bawh a.

²³Mipui zawng zawng chuan mak an ti hle a, “He mi hi Davida Fapa chu a ni thei mai lo vang maw?” an ti a.

²⁴Pharisaiten chu chu an hriatin, “He mi hian ramhuai lal Belzebub-a avang lo chuan ramhuaite a hnawt chhuak lo vang,” an ti a.

²⁵Mahse, Isuan an ngaihtuahte chu a lo hria a, an hnenah: “Khawii lalram pawh mahni indo apiang an boral thin; khawii khua pawh, chhung khat pawh, mahni indo apiang chu an ding chhuak lo vang.

²⁶Setanan Setana vek a hnawh chhuah chuan mahni indo a ni ang asin. Engtin nge a lalram chu a din chhuah theih ang?

²⁷Kei hian Belzebub-a avanga ramhuaite hnawt chhuak thin ka lo nih chuan, in fate khan tu vangin nge an lo hnawh chhuah thin le? Chuvangin, hemi chungchang rêltu tur chu anmahni kha an ni asin.

²⁸Kei hian Pathian Thlarau avanga ramhuaite hnawt chhuak thin ka nih erawh chuan, Pathian lalram chu in hnenah a lo thleng tawh tihna a ni ang.

²⁹Mi chak chu phuar hmasak a nih zet loh chuan, engtin nge miin a in chhunga lutin, a sum a laksak theih ang? A phuar hnua erawh chuan a in chu a rawk thei tawh dawn a ni.

³⁰Tupawh ka lama țang lo chu mi do a ni; tupawh mi seng khawmpui lo chuan a tidarh a ni.

NGAIHDAM THEIH LOH SUAL

³¹“Chuvangin ka hrilh a che u, mihring sualna tinreng leh Pathian an sawi chhiatna tinreng chu ngaihdam an ni ang a; nimahsela, Thlarau Thianghlim an sawi chhiatna lehzel chu ngaihdam an ni lo vang.

³²Mi tupawhin Mihring Fapa sawisel sela, ngaihdam a ni ang; amaherawhchu, mi tupawh Thlarau Thianghlim lehzel sawisel chu ngaihdam a ni lo vang, he khawvelah pawh, khawvel lo la awm turah pawh.

THING CHU A RAHAH HRIAT A NI

³³“Thing țha chu a rah pawh a țha,’ in tih loh pawhin, ‘thing chhia chu a rah pawh a chhia,’ ti mai rawh u; thing chu a rahah hriat a ni si a.

³⁴Rûl thlahte u! Nangni misualin engtin nge thu țha in sawi theih ang le? Thinlunga khat liam chu kê-in a sawi thin asin.

³⁵Mi țha erawh chuan a thinlung ro bâwm chhunga mi thil țhate a theh chhuak thin a, misual chuan a thil chhe khâwl bâwm chhunga thil chhiate chu a theh chhuak bawh thin.

³⁶Ka hrilh a che u, miten thu lawi lo mai mai an sawi zawng zawngte chen hian rorelna ni-ah an sawi fiah a la tul ang.

³⁷I thu chuan thiam a chantir ang che a, i thu vêk chuan thiam loh a chantir bawh ang che,” a ti a.

DAN ZIRTIRTUTE LEH PHARISAITEN CHHINCHHIAHNA AN PHÛT

³⁸Chutih lai chuan, dan zirtirtute leh Pharisaite zinga mi chuan a hnenah, “Zirtirtu, chhinchhiahna i hnen ațanga hmuh kan duh e,” an ti a.

³⁹Ani chuan an hnenah, “Tunlai țangthar misual leh uirê chîngte hian chhinchhiahna ngawt an zawng a; mahse zawlnei Jona chhinchhiahna chauh lo kha chu an hnenah eng chhinchhiahna mah pek an ni lo vang.

⁴⁰Jona chu ni thum leh zan thum whale* kawchhunga a awm ang khan, Mihring Fapa pawh ni thum leh zan thum lei chunggrilah a awm bawh dawn a ni.

⁴¹Ninevi khuaa mite kha rorelna niah chuan, tunlai țangtharte rual hian an lo tho ve ang a, thiam loh an rawn chantir ang, anni chu Jona thu hrilh avangin an sim si a; ngai teh u, Jona aia ropui zawk hetah hian a awm asin.

⁴²Chhim lam lalnu pawh kha rorelna ni-ah chuan tunlai mite zingah hian a lo tho ve ang a, thiam loh arawn chantir ve ang; ani chu Solomona thufing ngaithla turin kawlkil atangin a lo kal nal si a; ngai teh u, Solomona aia ropui zawk hetah hian a awm asin.

THLARAU BAWLHHLAWH A KÎR LEH

⁴³“Thlarau bawlhhlawh pakhat chuan mi kawchhung a chhuahsan a, tui awm lohna hmunahte chawlhna zawngin a vak a vak a, a hmu si lo va.

⁴⁴Ka chhuahsan inah khan ka lêt leh mai teh ang,’ a ti a. A va kir leh chuan, ruak huai a, phiah faia chei that diamin a va hmu a.

⁴⁵Tichuan a va kal a, amah aia sual zawk thlarau dang pasarih arawn hruai a, chutah chuan an lut a, an chênchilh ta a; chu mihring mize hnuhnung zawk chu a hmasa ai khan a lo chhe ta zawk a ni. Chutiang thil chu he thangthar mi suaksualte chungah hian a la thleng ang,” a ti a.

A NU LEH UNAUTEN ISUA AN KO

⁴⁶Mipuite hnena thu a la sawi lai mekin a nu leh a unaute chu amah biak tumin pâwnah an ding a.

⁴⁷Mi pakhat chuan a hnenah, “En teh, i nu leh i unaute pâwnah sawn an ding reng a, an be duh che,” tiin a hrilh a.

⁴⁸Ani erawh chuan amah betu hnenah chuan, “Ka nu chu tu nge ni? Ka unaute pawh chu tute nge ni?” tiin a chhang a.

⁴⁹Tichuan, a zirtirte lamah a kut a phar a, “En teh u, ka nu leh ka unaute hi!

⁵⁰Mi tupawh ka Pa vana mi duhzawng ti apiang chu ka unau te, ka farnu te, ka nu te an ni asin,” a ti a.

BUNG 13

BUH CHI THEHTU TEHKHIN THU

¹Chu mi ni chuan Isua chu in atangin a kal chhuak a, dîl kamah a thu a.

²A hnenah chuan mipui tam tak an lo pung khawm a, tichuan lawngah a chuang a, a thu a; mipui zawng zawng chu vaucamah an ding a.

³Tehkhin thu hmangin thu tam tak a hrilh a: “Ngai teh u, buh chi thehtu chu buh chi theh turin a feh a.

⁴Chutia a theh lai chuan, a then kawng dungah a tla a, savaten anrawn tân zo ta mai a.

⁵Thenkhat chu pialtlêp lung hmun, lei panna hmunah a tla a; lei a chhah loh avangin a to ve nghal mai a.

⁶Mahse, ni a lo tlângsân chuan a rawn em vuai a, zung a neih loh avangin a râwp ral ta mai a.

⁷Thenkhat hnimhlîngnei zingah a tla a, hnim chu a lo thang lian a, a dîp ral ta a.

⁸Thenkhat lei tha a tla te chuan rah an chhuah a: thenkhat a leh za te, thenkhat a leh sawmruk te, thenkhat a leh sawmthum te a lo ni a.

⁹Tupawh hriatna tura beng nei chuan hre rawh se,” a ti a.

TEHKHIN THU-IN A TUM CHU

¹⁰Zirtirte chu an lo kal a, a hnenah, “Engati nge an hnenah tehkhin thua i sawi?” an ti a.

¹¹Ani chuan a chhang a, an hnenah, “Van lalram thurûk hi nangni hriat tura pek a ni a, anni erawh chu pek an nih ve loh vang a ni e.

¹²Tupawh a nei apiang an pek belhchhah ang a, a lo ngah lehzuang ang; mahse a nei lo chu, a neihchhun pawh an laksak ang.

¹³Chuvang chuan a ni, an hnenah tehkhin thua ka sawi ni; hmu reng chungin an hmu lo va, hre reng chungin an hre si lo va, a ngaihna reng pawh an hriat loh hi.

¹⁴An awm dan hian Isaia hrilhlawkna thu kha a thlen diktir chiah a ni: “Benga hre siin a awmzia in man lo vang; Hmu reng siin a ngaihna in hre chuang lo vang;

¹⁵He mite thinlung hi a chawlawl ta a, An bengte a ngawng tawh a, An maimitchhing baw si a, ‘Chuti ni lo se, an mitin an hmu ang a, An bengin an hria ang a, An thinlungin an hrethiam baw ang a, Tichuan, an inlamlet leh ang a, Keiin ka lo tidam hlahu mai tur a ni na a le,” a tih kha.

¹⁶In mitte hi a vannei teh e, an hmu si a; in bengte pawh a vannei e, an hre si a.

¹⁷Tihtak zetin ka hrilh a che u, zâwlnei tam tak leh mi tha tam takten in thil hmuhte hi hmuh ve an châk a, an hmu pha si lo; in thil hriatte pawh hi hriat ve an châk a, mahse an hre pha ve si lo.

BUH CHI TEHKHIN THU HRILHFAHNA

¹⁸“Tichuan, buh chi theh tehkhin thu hi lo ngaithla r’u le:

¹⁹Mi tupawhin lalram chanchin a lo hriata, a ngaihna a hriat si loh chuan, misual pa chu a lo kal a, a thinlunga theh sa chu a chhuhsak thin. Chu mi chu kawng dunga theh chu a ni.

²⁰Pialtlêp lung hmuna tla chu, thu chu hria a, lâwm taka pawm nghaltu hi a ni;

²¹nimahsela, amahah chuan zung a kaih loh avangin rei lo te chauh a daih thin. Thu avanga hrehawmna emaw, tihduhdahna emaw a lo thlen vele a tlu nghal mai thin.

²²Hnimhlîngnei zinga tla chuan thu chu a hre ngei a, mahse he khawvel lungkhamna leh hausak duhna rilruin thu chu a dîp tlat a, rah a chhuah thei lo a ni.

²³Lei tha chung a theh erawh chu, thu chu beng a hria a, a ngaihna hrethiam baw hi a ni; chu mi chuan rah a chhuah a, thenkhat a leh za te, thenkhat a leh sawmruk te, thenkhat a leh sawmthum tein a pung thin,” a ti a.

BUH TAK LEH BUH LEM TEHKHIN THU

²⁴Tehkhin thu dang an hnenah a sawi leh a: “Van lalram chu, mi, a lova chi tha thehtu nen chuan tehkhin a ni;

²⁵nimahsela, mite muthilh hlanin a hmêlma a lo kal a, buh zingah chuan buh lem a theh a, a kal bo leh mai a.

²⁶Buh chu a lo to va, a vuih a lo hun chuan buh lemte chu a lo lang ve ta a.

²⁷Loneitu chhiahhlawhte chu an lo kal a, a hnenah, ‘Ka pu, i lovah chi tha i theh a ni lo vem ni? Buh lemte saw engtia lo awm

mai nge ni?’ an ti a.

²⁸Ani chuan an hnenah, ‘Hmêlma pa tih a nih chu’ a ti a. Chhiahhlawhte chuan a hnenah, “A nih leh chung chu va lâwr khawm turin min duh em ni?” an ti a.

²⁹Ani erawh chuan, ‘Duh lo ve, buh lem in lak khawm mai chuan buh tak in pawt tel palh ang asin.

³⁰Buh seng hun thlengin lo ʔo za sela, buh seng hunah chuan buh âttute hnenah, “Buh lemte chu lâwr khawm hmasa ula, hâl turin têt khawm rawh u; buh tak erawh chu ka buhzêmah chhung khawm rawh u, ka la ti ang e,” a ti a.

ANṬAM CHI TEHKHIN THU

³⁴Tehkhin thu dang an hnenah a sawi leh a: “Van lalram chu anṭam chi fang khat miin a laka, a lova a theh ang chu a ni,

³²Chi azawnga têt ber a ni a; nimahsela, a lo ṭhan len hnuah chuan thlai dangte aiiin a lian zawk a, thing kung a lo ni a, chungleng savate pawh lo kalin a zârahte an riak ṭhin,” a ti a.

DÂWIDIM TEHKHIN THU

³³Tehkhin thu dang an hnenah a sawi leh a: “Van lalram chu dawidim, hmeichhiain a lâk a, chhangphut tehkhawng thumah a puma fan chhuak vek tura a phul ang chu a ni,” a ti a.

HRILHLÂWKNA LEH TEHKHIN THU

³⁴Chung zawng zawng chu Isuan tehkhin thuin mipuite hnenah a sawi a, tehkhin thu lovin an hnenah engmah a sawi lo,

³⁵zâwlneiin, “Tehkhin thuin ka kâ ka âng ang a; Leilung pian tirh ata thil inthup chu Ka sawi chhuak ang,” tia a sawi kha a lo thlen theihna turin.

BUHLEM TEHKHIN THU HRILHFIAHNA

³⁶Isuan mipuite chu a ṭintir a, inah chuan a lut a. A zirtirte chu a hnenah an lo kal a, “Lova buh lem tehkhin thu kha min hrilhfiah rawh,” an ti a.

³⁷Ani chuan a chhang a, “Chi ṭha thehtu chu Mihring Fapa hi a ni.

³⁸Lo chu khawvel hi a ni a, chi ṭhate chu lalram fate an ni a; buh lemte chu mi sual fate an ni.

³⁹Chung chi lo theh vetu chu hmêlma pa Diabola a ni a, buh seng chu khawvel tawpna tur a ni a, buh sengtute chu Vantirhkohte an ni.

⁴⁰Chutichuan, buh lemte chu an lâwr khawm a, meia an hâl ang hian khawvel tawpah chuan a la awm ang.

⁴¹Mihring Fapa hian a Vantirhkohte chu a tir chhuak ang a, a lalram aṭangin thil sualtitute, dan bawhchhetu zawng zawng te chu an lâwr khawm vek ang a,

⁴²rawhtuina meipuiah chuan an paih lut ang. Chutah chuan ṭah leh ha ṭhial chu a awm ang.

⁴³Mi ṭhate erawh chu an Pa lalramah chuan ni angin an êng tawh ang. Tupawh hriatna tura beng nei chuan hre rawh se.

RO PHÛM RÛK TEHKHIN THU

⁴⁴Van lalram chu lova ro phum rûk, miin a hmuh a, a thuhrûk ang hi a ni; a lâwm êm avangin a neih zawng zawng chu a va hralh a, chu lo chu a lei ta a.

⁴⁵“Van lalram chu sumdawng mi tuikeplung mawi zawngtu ang chu a ni leh a;

⁴⁶ani chuan tuikeplung man to tak pakhat a hmu a, a neih zawng zawng a va hralh a, a lei ta a.

LÊNKHANG TEHKHIN THU

⁴⁷Van lalram chu lêngkhang, tuipuia zâr, chi tinreng man khawmna ang chu a ni leh a,

⁴⁸lên chu a khah velel vaukamah an hnûk chhuak a; an ṭhutchilh a, a ṭha zawng chu bâwmah an chhar khawm a, a chhia erawh chu an paih ṭhin.

⁴⁹Khawvel tawp hunah pawh chutiang bawk chuan a awm ang. Vantirhkohte an thawk chhuak ang a, mi fel zinga mi sualte chu an thliar hrang tawh ang a,

⁵⁰rawhtuina meipuiah chuan an paih lut tawh ang. Chutah chuan ṭah leh ha ṭhial chu a awm ang,” a ti a.

⁵¹Isuan an hnenah, “Heng thil zawng zawng hi in hre thiam em?” a ti a. Anni chuan a hnenah, “Hre thiam e, Lalpa,” an ti a.

⁵²Ani chuan an hnenah, “Chutichuan, dan zirtirtu, van lalram chanchin zir tawh apiang chu, in neitu, a ro bâwm ata thil tharte leh thil hluite phawrh chhuak ṭhintu ang chu a ni,” a ti a.

NAZARETH-AH ISUA A HNAWNG

⁵³Isuan chung tehkhin thute a sawi zawh chuan chu hmun chu a chhuahsan ta a.

⁵⁴Ama awmna khua chu a va thleng a, an biak inah chuan anni chu a zirtir a, mite chuan mak an ti hle a, “He mi hian he finna leh heng thilmak tihtheihnate hi khawi ata nge a dawn le?

⁵⁵He mi hi mistiri fapa kha a ni lo vem ni? A nu pawh Mari an tih hi a ni lo vem ni? A unaute pawh Jakoba te, Josefa te, Simona te leh Juda an tihte hi an ni lo vem ni?

⁵⁶A farnute pawh kan zinga awm an ni vek lo vem ni? He mi hian heng thilte hi khawia mi teh fakau nge a dawn le? an ti a.

⁵⁷Amah chu an ngaithiam thei ta lo va. Isua erawh chuan an hnenah, “Zâwlnei chu ama khaw lamah leh ama inah chauh lo chuan chawimawi lohvin a awm ngai lo,” a ti a.

⁵⁸Tichuan, an rin loh avangin chutah chuan thil ropui pawh a ti tam thei lo.

BUNG 14

BAPTISTU JOHANA LU TAN

¹Chung lai chuan lal Heroda chuan Isua chanchin chu a lo hre ve a.

²A chhiahhlawhte hnenah, “Chu mi chu Baptistu Johana kha a nih chu; mitthi zing ata a tho leh ta zuk nia; chuvangin chung thiltihtheihnate chuan amahah a thawk ta a nih chu,” a ti a.

³Heroda chuan a unau Philipa nupui Herodi vangin Johana chu a man a, a phuar a, tân inah a lo khung tawh si a.

⁴Johana chuan a hnenah, “Ani i neih hi a thiàng lo ve,” a lo tihsak vang a ni a.

⁵Johana chu tihhlum duh mah se, miten zâwlnei nia an ngaih tlat avangin mipui a vêngthâwng lo thei si lo va.

⁶Nimahsela, Heroda pian champha a lo thlen chuan Herodi fanu chu a laiah a lâw a, chu chuan Heroda chu a tilâwm ta a.

⁷Chuvang chuan a dîl apiang pe turin chhechhamin a tiam a.

⁸A nuin a lo fuih rûk angin ani chuan, “He thlengah hian Baptistu Johana lu mi pe rawh,” a ti a.

⁹Lal chu a lungngai ta hle mai a; nimahsela, a thutiamte leh a chaw kilpuite avang chuan pe turin thu a pe ta a.

¹⁰Tichuan mi a tir a, tân inah chuan Johana lu chu a va tantir a.

¹¹A lu chu thlêngin an rawn chaw a, nula chu an pe a; ani chuan a nu hnenah a kalpui ta a.

¹²A zirtirte chuan a ruang chu an va hlâwm a, an phum a; Isua an va hrilh a.

MIPUI SANGNGA HRAI

¹³Chu thu chu Isuan a lo hriat chuan hmun fianrial pan turin lawngin a inkar chhuak ta daih a. Nimahsela, mipuiten an lo hriatin khua aţangte chuan kea kalin an zui ta a.

¹⁴Tichuan, vaukam a lo kai leh chuan mipui tam tak a rawn hmu a; a khawngaih êm êm a, an nâ te a tih damsak a.

¹⁵Tlai lam a lo nih chuan a zirtirte chu a hnenah an lo kal a, “Hei hi hmun fianrial tak a ni a, khua lah a tlai tawh si a. Khuaah te kala, ei tur an lei theih nan mipuite hi tîn darhtir mai rawh,” an ti a.

¹⁶Nimahsela Isuan an hnenah, “An kal bo a ngai hlei nem. Nangmahni’n ei tur pe ta che u,” a ti a.

¹⁷Anni chuan a hnenah, “Chhangpêr panga leh sangha pahni h chauh kan nei si a,” an ti a.

¹⁸Ani chuan, “Ka hnenah rawn la teh u,” a ti a.

¹⁹Mipuite chu hlobet chung a ţu turin thu a pe a. Chhangpêr panga leh sangha pahni h chu a la a, van lam hawiin mal a sawm a, a phel a, chhangpêrte chu zirtirte hnenah a pe a; zirtirte chuan mipuite hnenah an sem ta a.

²⁰Tichuan, an vaiin an ei a, an puar ta vek a, an ei ningnawi pawh chu bawmrâng sawm leh pahni hah an rût khat a.

²¹A eitute chu hmeichhia leh naupang tiam lovin, patling hlir pawh sangnga lai an ni.

TUI CHUNGAH ISUA A KAL

²²Isuan mipui a tîn darhtir vel chhungin a zirtirhote chu ral lehlama lo va kai hmasa turin lawngah a chuantir nghal a.

²³Mipui tîn darh hnu chuan ţawngtai turin tlangah chuan a han kal hrang a. Tlai lam a lo ni a, amah chauhvin a awm ta a.

²⁴Lawng erawh chu dîl lai takah a awm tawh a; thliin a ni lo zawnga a beng tlat avangin tuifawn chuan a vawrh a vawrh mai a.

²⁵Khawvar dawn laiin Isua chu anmahni lam panin dîl chungah chuan kein a kal a.

²⁶Zirtirten dîl chung a kea a kal an lo hmuh chuan an mangang a, “Thlahrâng a nih saw!” an ti a. Hlauvin an au vak vak a.

²⁷Nimahsela, Isuan anmahni chu a ko thuai a, “Thlamuang takin awm rawh u; keimah ka ni e; hlau suh u,” a ti a.

²⁸Peteran a chhang a, “Lalpa, nang i nih chuan tui chung a i hnena lo kal thu mi pe rawh,” a ti a.

²⁹Ani chuan, “Lo kal ta che,” a ti a. Petera chu lawng ata a chhuk a, Isua hnen lam panin tui chungah chuan kein a kal ta a.

³⁰Nimahsela, thli tleh hum hum chu a hlau va; a pil dawn ta mai a, “Lalpa mi chhan rawh!” tiin a au va.

³¹Isuan a lo ban thuai a, amah chu a chelh a, a hnenah, “Aw nang rin tlêm, engah nge i rinhlehl le?” a ti a.

³²Chutia lawng chhunga an luh chuan thli chu a bâng ta mai a.

³³Lawnga lo awmte chuan, “Pathian Fapa i lo nih tak zet hi,” tiin amah chu chibai an bûk a.

MI TAM TAKIN AN DEK A, AN DAM

³⁴Râl lehlam an va kai a, Gennesaret ram an lo thleng ta a.

³⁵Chu mi hmuna miten amah a ni tih an lo hriat chuan, chumi kiang vel ram zawng zawngah chuan mi an tir a, damlo zawng zawng chu a hnenah an rawn hruai a,

³⁶a puan hmâwr tal deh an dîl a. A dek apiang chu an dam zel a.

BUNG 15

CHHUNG LAM AţANGA BAWLHHLAWHNA

¹Chung lai chuan dan zirtirtute leh Pharisaite chu Jerusalem aţangin Isua hnenah an lo kal a,

²“Engati nge i zirtirten upate thurochhiah an bawhchhiat? Chaw ei dawnin kut an sil ngai si lo va,” an ti a.

³Ani chuan an hnenah, “Nangni pawhin engati nge in thurochhiah avanga Pathian thupek in bawhchhiat?”

⁴Pathianin, ‘I nu leh i pa chawimawi rawh,’ tih leh, ‘Tupawh a nu emaw, a pa emaw ânchhia lawhtu chu tihhlum tur a ni,’ tiin thu a pe a.

⁵Nangni chuan, ‘Tupawhin a nu emaw, a pa emaw hnena, “In tana ka lo ţangkai tawhna zawng zawng hi Pathian hnena hlan a ni tawh, ti apiang chuan,

⁶a nu leh pa chawimawi a ţul tawh lo ve,’ in tih tîn hi. Tichuan, in thurochhiah avangin Pathian thu chu in bawh bo ta a nih hi.

⁷Vervêkte u! Isaia hian in chungchang thu a lo hrilhlawk dik zet mai:

⁸“He mite hian an kâin mi hnaih a, An hmuiin mi chawimawi a, An thinlung erawh chuan mi hlat si a.

⁹An mi biak tîn hi a thlâwn mai a ni, Pathian thu anga an zirtir hi mihring thu chhuak mai a ni,” tiin a chhang a.

¹⁰Mipuite chu a hnenah kal turin a ko va, an hnenah, “Ngaithla ula, hre thiam rawh u:

¹¹Kâa lut chu mihring tibawhlhlawhtu a ni lo va; mahse kâ ațanga lo chhuak ngei chu mihring tibawhlhlawhtu a ni e,” a ti a.

¹²A zirtirte chu an lo kal a, a hnenah, “Pharisaiten he thu an hriata an helhzia kha i hria em?” an ti a.

¹³Ani erawh chuan a chhâng a, “Kung zawng zawng ka Pa vana mi phun loh chu pawh chhuahin a awm ang.

¹⁴Anni chu pawisa suh u. Hruaitu mitdel an ni e. Mitdelin mitdel vêk a hruai chuan khuarkhurumah an tla dun ang,” a ti a.

¹⁵Peteran a hnenah, “He tehkhin thu hi min hrilhfiah ta che,” tiin a zawt a.

¹⁶Isuan, “Tun thlengin nangni pawhin in la hre thiam chuang lo maw?

¹⁷Kâa lut apiang chu pumah a tla thla a, dailênnaa paih chhuahin a awm tih in hre lo vem ni?

¹⁸Kâa chhuakte erawh chu thinlung ațanga lo chhuak a ni a, chung ngei chuan mihring a tibawhlhlawh thin a ni.

¹⁹Thinlung ațang hian ngaihtuahna sualte, tualthahnate, uirênate, inngaihnate, rukrûknate, dâwta hêknate, sawichhiatnate a lo chhuak thin a;

²⁰Chung chu mihring tibawhlhlawhtu a ni; kut sil lova chaw ei erawh chuan mi a tibawhlhlawh lo ve,” a ti a.

JENTAIL NU-IN A RINZIA A ENTIR

²¹Chu hmun ațang chuan Isua chu a kal chhuak a, Tura leh Sidon bialah a kal ta a.

²²Ngai teh, chu rama mi Kanaan hmeichhe pakhat a lo au chhuak a, “Aw Lalpa, Davida Fapa, mi khawngaih rawh! Ka fanu ramhuaiin a tibuai nasa em mai,” a ti a.

²³Ani erawh chuan kam khat mahin a chhang lo. A zirtirte zâwkin, “Kan hnungah a au a au si a, kaltir mai ta che,” tiin an rawn ngên a.

²⁴Mahse ani chuan, “Israel hnam beram bo hnenah lo chuan tirh ka ni lo ve,” a ti a.

²⁵Hmeichhia chuan a ûmzui zel a, “Lalpa, mi tanpui hrâm rawh,” tiin chibai a bûk a.

²⁶Ani erawh chuan, “Fate chhang laksaka uitete hnena pek chu a tha nang,” tiin a chhang a.

²⁷Ani chuan, “Ni e Lalpa, mahse uitete pawhin an pute dawhkan ațanga chaw nâwi tla chu an ei ve thin alawm,” a ti a.

²⁸Chu veleh Isuan a hnenah, “Hmeichhia, i rinna a va nasa êm! I duh ang takin i chungah thleng rawh se,” tiin a chhang a. Tichuan, a fanu chu chumi darkar ațang chuan a lo dam ta a.

ISUAN MIPUI TAM TAK A TIDAM

²⁹Chu hmun chu Isuan a chhuahsan a, Galili dîl kam vel a hrût tlang a, tlangah a chho va, chutah chuan a thu a.

³⁰Mipui tam takin a hnen an rawn pan khawm chiam a, an zingah chuan kebaite, mitdelte, țawng thei lote, piangsualte leh mi dang tam tak an tel a; Isua ke bulah an mut a, ani chuan a lo tidam

zel a.

³¹Chutichuan, țawng thei lote an lo țawng a, piangsualte chu an lo dam a, kebaite kein an kal a, mitdelten an lo hmu thei ta tih an hmuhin mipuite chuan mak an ti em em a, Israelte Pathian chu an fak a.

MI SANGNGA HRAI

³²Isuan a zirtirte chu a ko khawm a, “Mipuiho hi tunah ni thum ka hnenah an awm tawh a, ei tur engmah an neih loh avangin ka lainat êm êm a ni. Rilțâm chung a hawtir chu ka duh si lo, chuti lo zawng, kawng lakah an țâmchhâwl mai dawn si a,” a ti a.

³³A zirtirte chuan a hnenah, “Mipui heti zozai puarna khawp chhangpêr chu hetiang hmun thlalêrah engtin nge kan hmuh ang?” an ti a.

³⁴Isuan an hnenah, “Chhangpêr engzat nge in neih?” a ti a. Anni chuan “Pêr sarir, nghate tlêm nen,” an ti a.

³⁵Tichuan, mipuite chu leia thu turin thu a pe a.

³⁶Chhangpêr pasarih leh sanghate chu a la a, lawmthu a sawi a, a phel a, zirtirte hnenah a pe a, a zirtirte chuan mipuite hnenah an sem ta a.

³⁷An zavai chuan an ei a, an puar ta hlawm a; an ei bâng nawi pawh chu bâwm sarirah an dah khat hial a.

³⁸A eiture chu hmeichhia leh naupang tiam lovin, patling hlir pawh sangli lai an ni.

³⁹Chutia mipuite a țintir hnu chuan lawngah a chuang a, Magdala ram a va thleng a.

BUNG 16

PHARISAITE LEH SADUKAITEN CHHINCHHIAHNA AN PHÔT

¹Pharisaite leh Saddukaite chu an lo kal a, amah fiah nan van ațanga chhinchhiahna entir turin an rawn ngen a.

²Ani chuan a chhâng a, an hnenah, “Tlai lam a lo nihin ‘Khua a tha dawn a ni ang, kâwl a sen êm mai,’ in ti thin a;

³zing lamah chuan ‘Vawiin chu khua a chhe dawn a ni ang, kâwl a sen a, khua a dur êm mai,’ in ti bawh thin maw? Mi vervêkte u! Khaw awm dan in hrethiam si a, mahse hun awm dan chhinchhiahnate chu in hre fiah thei si lo.

⁴Thangthar mi sual leh uirê hmang tak takten chhinchhiahna an zawng a, mahse Jona chhinchhiahna chauh lo chu eng chhinchhiahna mah pek an ni lo vang,” a ti a. Anni chu a kalsan ta daih a.

PHARISAITE LEH SADUKAITE DÂWIDIM

⁵A zirtirte chuan râl lehlam an va thleng a, chhang an lo ken theihnghilh a.

⁶Isuan an hnenah, “Pharisaite leh Saddukaite dawidim lakah inveng ula, fimkhur rawh u,” a ti a.

⁷Anni chuan, “Chhang kan ken loh avanga sawi a ni ngei ang,” tiin an in ngaihtuah hlawm a.

⁸Isuan chu chu a lo hriatin an hnenah, “Aw, nangni rin tlemte u, engati nge chhang in neih loh avang maia in inngaihtuah buai

ni?

⁹Tunah pawh in la hre thiam chuang lo maw? Mi sangnga chhangpêr pangaa hrai leh in bâwmrâng ruh khah zat kha in hre reng lo vem ni?

¹⁰Mi sangli tana chhangpêr pasarih leh a bângnâwi bâwm liana in ruh khah zat te kha?

¹¹Chhang chungchang in hnenah ka sawi lo tih engah nge in hriat loh? – Pharisaite leh Saddukaite dâwidim laka fimkhurna thu a nih zawk kha,” a ti a.

¹²Chutichuan, chhang dâwidim lakah fimkhur turin a ti lo va, Pharisaite leh Saddukaite zirtirna laka fimkhur turin anmahni a zilz zawk tih an lo hre fiah ta a.

PETERAN ISUA CHU KRISTA A NI TIH A PUANG

¹³Isuan Philipa Kaisari bial a lo thlen chuan a zirtirte hnenah “Kei, Mihring Fapa hi miten tu nge a nih mi tih?” tiin a zawt a.

¹⁴Anni chuan, “Thenkhatin ‘Baptistu Johana a ni,’ an ti che a; thenkhatin, ‘Elija a ni,’ an ti a; thenkhat leh chuan, ‘Jeremia emaw, zâwlnei zinga pakhat emaw a ni,’ an ti che,” an ti a.

¹⁵Ani chuan, “A nih leh nangnin Kei hi tu nge ka ni mi tih?” a ti a.

¹⁶Simon Peteran a chhang a, “Krista, Pathian nung Fapa chu i ni,” a ti a.

¹⁷Isuan a hnenah, “Simon Bar-Jona, i nihlawh e; tisa leh thisenin a hriattir che a ni si lo va, ka Pa vana miin a hriattir zawk che a ni.

¹⁸Nang Petera i ni tih ka hrilh baw a che; he lungpui chungah hian ka kohhran ka rem chho vang a, Hremhmun kawngkharte chuan chu chu an ngam lo vang.

¹⁹Van lalram chabite ka pe ang che a, lei chungah engpawh i phuar apiang vanah phuar a ni ang a; lei chungah engpawh i phelh apiang vanah phelh a ni ang,” tiin a chhang a.

²⁰Isua Krista a ni tih tumah hrilh lo turin a zirtirte chu a khap tlat a.

ISUAN A THIH LEH THAWHLEH TUR THU A SAWI LÂWK

²¹Chu mi hnu ațang chuan Isuan Jerusalem khuua a kal tur thu te, upate, puithiam lalte, dan zirtirtute laka thil tam tak a tuar tur te, an tihhluma, ni thum nia kaihthawha a awm leh tur thu chu a zirtirte a hrilh țin ta a.

²²Petera erawh chuan ani chu a hruai hrang a, “Lalpa, chung chu i chungah a thleng tawp lo vang,” tiin a khak țin ta a.

²³Ani erawh chu a hawi a, Petera hnenah, “Setan, ka hnungah kal rawh! Ka tan tlûkna thang i ni e; Pathian thil lam ngaituah lovin, mihring thil ringawt i lungkham zawk a nih hi,” a ti a.

KRAWS PU LA, ZUI RAWH

²⁴Isuan a zirtirte hnenah, “Tupawhin mi zui a duh chuan mahni inphat sela, ama kraws pû-in mi zui rawh se.

²⁵Tupawh mahni sahimna thlahlel apiangin a chên ang a; tupawh keimah avanga a nunna chan chuan a humhim ang.

²⁶Miin khawvel hi a pumin nei sela, a nun hloh si se a tan hlawkna tur eng nge awm? A nih loh leh, miin a nunna aiah eng nge a hlan ve ang?

²⁷Mihring Fapa hi a Vantirhkohte nen a Pa ropuinaa inthuin a lo kal dawn si a; chu mi hunah chuan mi tin an thiltih ang zelin lâwmman a pe theuh vang.

²⁸Tihtak zetin ka ti a che u, heta dingho zingah hian, Mihring Fapa a lalrama lo kal an hmuh hma lohva thihna tem hauh lo tur an awm asin,” a ti a.

BUNG 17

TLANG CHUNGA ISUA HMÊL DANGLAM

¹Ni ruk hnuah chuan Isuan Petera te, Jakoba te, a unau Johana te chu a hruai hrang a, tlang sang tak chungah a chhohpui a;

²an hmaah chuan a hmêl landan a lo danglam a. A hmêl chu ni angin a lo êng a, a silhfente chu a lo êng vâz sût mai a.

³Ngai teh, Mosia leh Elija an lo lang a, amah nen chuan an inbia a.

⁴Petera chuan Isua hnenah, “Lalpa, kan tan heta awm hi a țin a; i duh chuan hetah hian bâwkte pathum i khawh ang u hmiang; i tan pakhat, Mosia tan pakhat, Elija tan pakhat,” a ti a.

⁵A la sawi lai mekin ngai teh, chhûm vâz takin anmahni a rawn hlih ta a; thawklehkhatah chhûm ațanga aw lo chhuak chuan, “Hei hi ka Fapa duh tak, ka lawm êm êma chu a ni; ama thu ngai rawh u!” a ti a.

⁶Zirtirte chuan chu chu an hriatin an bawkkhup a, an hlau em em a.

⁷Nimahsela, Isuan anni chu a rawn khawih harh a, “Tho ula, hlau suh u,” a ti a.

⁸An han dak chhuak a, Isua chauh lo chu tudang mah an hmu ta lo va.

⁹Tlang ațanga an chhuk thlak laiin Isuan an hnenah, “Mihring Fapa hi mitthi zing ata a thawh leh hma loh chuan in thil hmuh kha tumah hrilh suh u,” tiin thu a pe a.

¹⁰A zirtirte chuan, “Engati nge dan zirtirtuten Elija a lo kal hmasa tur a ni an tih le?” tiin an zawt a.

¹¹Isuan a chhang a, “Elija chu a lo kal dawn reng a ni, engkim a siam țin baw ang.

¹²Nimahsela, ka hrilh a che u, Elija chu a lo kal tawh reng alawm, amah a ni tih an hre lo va, a chungah duhtaw an lo ngah ta zawk a. Chutiang bawkin Mihring Fapa pawh hian chung mite lakah chuan a tuar ve dawn asin,” a ti a.

¹³Zirtirte chuan Baptistu Johana chungchang a sawi a ni tih an lo hre thiam ta a.

MIPA NAUPANG TIHDAM

¹⁴Mipui awm khawmna hmun an zuk thlenin mi pakhat chu a hnenah a lo kal a, a hmaah chuan a ținthi a,

¹⁵“Lalpa, ka fapa saw khawngaih rawh, phûngzâwl a ni a, a tuar nasa êm mai; wawi tam tak meiah a tlu țin a, wawi tam tak tuiah te a tlu baw țin.

¹⁶I zirtirte hnenah ka rawn hruai a, an tidam thei si lo va,” a ti a.

¹⁷Isuan “Aw, rinna rêng nei lo leh ðhangthar lepchiahte u, engchen nge in hnenah ka awm ang a, engchen nge ka dawhtheih ang che u? Amah chu ka hnenah rawn hruai rawh u,” a ti a.

¹⁸Isuan ramhuai chu a hau va, a chhung ata a chhuak ta a; chumi darkar aţang chuan naupang chu a lo dam ta a.

¹⁹Chung hnuah chuan zirtirte chu a hrangin Isua hnenah an lo kal a, “Engati nge keinin kan hnawh chhuah theih loh?” an ti a.

²⁰Isuan an hnenah, “In rin loh vang a nih kha; tihtak zetin ka hrilh a che u, anţam chi fang khat tiat ang rinna in neih chuan he tlang hnenah hian, ‘Heta ţang hian sâwtah sawn va insawn rawh,’ in ti ang a, a insawn mai ang; in tan tih theih loh engmah a awm lo vang.

²¹Amaherawhchu, hetiang chi hi chu ţawngtai leh chawnghei aţang chauhva chhuak thei a ni,” a ti a.

ISUAN A THIH LEH A THAWHLEH TUR A SAWI NAWN

²²Galili rama an la awm reng laiin Isuan an hnenah, “Mihring Fapa hi mihringte kutah mantirin a awm ang a,

²³an tihlum ang a, ni thum ni-ah kaihtawhin a awm leh ang,” a ti a. Tichuan an lungngai ta êm êm a.

PETERA TE PUTU-IN CHHIAH AN CHÂWI

²⁴Kapernaum khua an lo thlen chuan tempul chhiahkhawntute chu Petera hnenah an lo kal a, “In zirtirtuin tempul chhiah a pe ve ðhin lo vem ni?” an ti a.

²⁵Ani chuan, “Pe ve ðhin e,” a ti a. In chhunga a va luh chuan Isuan a hnenah, “Simon, engtin nge i ngaih? Leia lalten bungraw chhiah emaw, mimal chhiah emaw hi tu lakah nge an lak ðhin, an fate lakah nge, mi hrang lakah?” tiin a lo sawi khalh a.

²⁶Peteran, “Mi hrang lakah,” a tih veleh Isuan a hnenah, “Chuti chu an fate chu an âwl a nih chu.

²⁷Mahse, dilah va kal la, nghakuai chiah la, sangha lo chhuak hmasa chu man rawh. A kê keu la, tangka tlang khat i hmu mai ang; chu chu la la, kei leh nangma pual atan an hnenah pe rawh, chuti lo zawng, anniho hi kan tilungawi lo palh ang e,” a ti a.

BUNG 18

TU NGE ROPUI BER?

¹Chutih lai tak chuan zirtirte chu Isua hnenah an lo kal a, “Van lalramah tu nge ropui ber ang le? an ti a.

²Isuan naupang tê a ko va, an zingah a dintir a,

³“Tihtak zetin ka ti a che u, inlamlêt a, naupang tê ang in lo nih loh chuan van lalramah in lut hauh lo vang.

⁴Chuvangin, he naupang tê anga inngaitlâwm chu van lalramah chuan an ropui ber ang.

⁵Tupawh ka hming avanga hetiang naupang tê pakhat lawm apiang chu keimah mi lawm a ni.

TLÛKNA LAKA ISUA ZILHLÂWKNA

⁶“Kei mi ringtute zinga mi te ber pawh titlu apiang chu, a nghawngah buhrâwtsawmna lung lianpui awrhrtirin tuifinriat thuk laiah thlak daih sela, a tan a ðha zawk ang.

⁷“Tlûknate avangin khawvel chung a pik e! Tlûknate chu lo awm tur rêng zawng a ni a; nimahsela tlûkna awmtirtu chung a pik e!

⁸I kutin emaw, i kein emaw a tihtlûk che chuan, tan la, paih daih rawh; kut pahnih emaw, ke pahnih emaw neia kumkhaw meia an paih luh che ai chuan, piangsualin emaw, kebain emawa nunnaa luh i tan a ðha zawk e.

⁹I mitin a tihtlûk che chuan kher chhuak la, paih daih rawh. Mit khing hnih neia hremhmun meia an paih luh che ai chuan, mit khing khat neia nunnaa luh i tan a ðha zawk a ni.

BERAM BO TEHKHIN THU

¹⁰“Heng mi têtê zinga pakhat pawh hi hmusit lo turin fimkhur rawh u; vanrama an Vantirhkohten ka Pa vana mi hmel chu an hmu fo ðhin tih ka hrilh che u hi.

¹¹Mihring Fapa hi mi bote chhanchhuak tura lo kal a ni asin.

¹²“Engtin nge in ngaih? Mi tupawhin beram za nei sela, an zinga pakhat vak bo sela, sawmkua leh pakuate chu hnutchhiahin tlangah te kalin a bo chu a zawng dawn lo vem ni?

¹³Tihtak zetin ka hrilh a che u, a hmuh leh hlauh chuan sawmkua leh pakua vak bo lote chungah ai chuan, hemi chungah hian a lawm zawk ang.

¹⁴Chutiang bawkin heng mi têtê zinga pakhat boral pawh hi in Pa vana mi duhzawng a ni lo ve.

UNAU THIL SUAL TI ENKAWL DAN

¹⁵“I unauvin i chungah thil sual ti sela, kal la, amah leh nangmah chauhva hriatah a sualna chu zilh ang che. I thu a ngaihtlak chuan i unau chu i hmin ta a ni ang.

¹⁶A ngaihtlak duh loh che erawh chuan mi dang pahnih khat hruai la, tichuan in thu zawng zawng chu ‘hriatpuitu pahnih pathum kâa tihngheh a ni ang.’

¹⁷Anni pawh a ngaihtlak duh loh chuan kohhranah thlen rawh. Kohhran thu pawh a ngaihtlak duh loh zel chuan, ani chu i tan ringlo mi leh chhiahkhawntu ang lo ni mai rawh se.

¹⁸“Tihtak zetin ka hrilh a che u, lei chungah engpawh in phuar apiang vanah phuar a ni ang a; lei chungah engpawh in phelh apiang vanah phelh a ni ang.

¹⁹Ka hrilh nawn leh a che u, lei chungah hian in zinga mi pahnih an thil dil kawnga an inthural chuan, ka Pa vana mi tihsakin an awm ang.

²⁰Mi pahnih emaw, pathum emaw ka hminga an inkhawmna apiangah chuan an zingah ka awm ðhin asin,” a ti a.

NGAIHDAMNA NEI LO CHHIAHHLAWH TEHKHIN THU

²¹Petera chu a lo kal a, a hnenah, “Lalpa, ka unauvin ka chungah thil sual ti sela, vawi engzat nge ka ngaihdam ang le? Vawi sarilh thleng em ni ang?” a ti a.

²²Isuan a hnenah, “Vawî sarih thlengin ka ti lo va che, vawî sarih hmun sawmsarih thlengin ka ti zawk a che.

²³“Chu mi avang chuan van lalram chu, lal tuemawin a chhiahhlawhte hnena sum chungchang chinfel a tum dan ang hi a ni.

²⁴A chinfel hna ãan nan, mi pakhat talent singkhat ba chu a hnenah anrawn hruai a.

²⁵Mahse pek tur a neih loh avangin, amah chawpin, a nupui nen, a fate nen, a neih zawng zawng hralha rûl turin a pu chuan thu a pe ta a.

²⁶Chutichuan, chu chhiahhlawh chu a pu hmaah chuan a bawkkhup a, ‘Lalpa, ka chungah zahngai rih la, a za vaiin ka pe vek ang che,’ tiin a ngen a.

²⁷Tichuan, chu chhiahhlawha pu chuan a khawngaih ta êm êm a, a chhuahtir a, a bâ chu a ngaidam ta a.

²⁸“Nimahsela, chu chhiahhlawh chu a kal chhuak a, a chhiahhlawhpui zinga pakhat, a duli za bâ chu a va hmu a; a man bet a, ‘I leibâ kha mi pe rawh!’ tiin a hrawkah a rêk a.

²⁹Tichuan, a chhiahhlawhpui chu a bawkkhup a, ‘Ka chungah zahngai rih la, a zain ka rûl vek ang che,’ tiin a ngen chiam a.

³⁰Nimahsela zah a ngai duh lo va; a leibâ a tlak hma loh chu tân inah a khung ta a.

³¹A chhiahhlawhpuiten a thiltih dan an lo hmuh chuan an rilru a na ta êm êm a, a thiltih dan zawng zawng chu an pu hnenah an va hrilh ta a.

³²Chu veleh an pu chuan chu mi chu a ko va, a hnenah, ‘Nang chhiahhlawh suaksual pa! Mi dil chiam avang khan i leibâ zawng zawng ka ngaihdam che kha.

³³Ka khawngaih che ang bawkin nang pawhin i chhiahhlawhpui chu i khawngaih ve tur a ni lo vem ni?” a ti a.

³⁴A pu chu a thinur ta a, a leibâ zawng zawng a tlâk hma loh chuan nghaisatute hnenah a pe ta a.

³⁵Chutichuan, thinlung taka in unaute thil tihsual in ngaihdam loh chuan, ka Pa vana mi pawhin chutiang bawk chuan in chungah a ti ve ang,” a ti a.

BUNG 19

INNEIHNA LEH INMÂKNA

¹Heti hi a ni a, chung thu a sawi zawh chuan Isua chu Galili ram ata a chhuak a, Jordan lui rala Judai ramah a va kal a;

²Mipui tam takin an zui a; tah chuan anni chu a lo tidam a.

³Pharisaite pawh a hnenah an lo kal a, amah fiah nan, “Eng vang pawhin miin a nupui mâk a thianga rêng em?” tiin an zawt a.

⁴Ani chuan an hnenah, “A tir ata an Siamtu khan ‘mipaah leh hmeichhiaah a siam,’ tih leh,

⁵‘He mi avang hian mipain a nu leh a pa kalsanin a nupui nen an inzawm ang a; an pahnih chuan tisa pumkhat an lo ni tawh ang,’ a ti tih in chhiar lo vem ni?

⁶Chutichuan, pahnih an ni tawh lo va, tisa pumkhat an ni tawh zawk a ni. Chuvangin, Pathianin a zawm tawh chu mihringin ðen

suh se,” tiin a chhang a.

⁷Ani chuan a hnenah, “A nih leh, engati nge Mosian inmâkna lehkha hmanga mâk tur thu a pêk si?” an ti a.

⁸Ani chuan an hnenah, “In thinlung sak vang chauhin Mosian nupui mak a phalsak che u a nih kha; mahse, a tirah chuan chutiang a ni lo.

⁹Kei chuan ka ti a che u, “Inngaihna suala tlûkna avang ni lova, nupui mâa mi dang nei apiang chu, a uirê a ni; mâk hnu nei pawh uirê a ni,” a ti a.

¹⁰A zirtirte chuan a hnenah, “Nupa chungchanga mipa dinhmun chutiang a nih si chuan nupui neih loh mai a ða zawk a nih chu,” an ti a.

KAWPPUI NEIH LOH CHUNGCHANGA ISUA ZIRTIRNA

¹¹Ani erawh chuan an hnenah, “Chu thu chu a peka te tan chauh lo chuan, mi nazawng pawm theih chi a ni lo rêng asin:

¹²Mi tilreh, an nu pum chungh a ðanga chutianga piang sa rêng an awm a; mi tilreh, mihring kuta reh chawpte an awm bawk a; mi tilreh, van lalram avanga tilreha insiam chawpte an awm bawk a. Tupawh a pawm thei apiangin pawm mai rawh se,” a ti a.

ISUAN NAUPANGTE MAL A SAWM

¹³Chumi lai chuan an chungah kut nghata a lo ðawngtaisak turin a hnenah naupang têtê anrawn hruai a; nimahsela zirtirte chuan an lo hau va,

¹⁴Nimahsela Isuan, “Naupang têtê ka hnenah han kaltir ula, hnar suh u; van lalram chu hetiang mite ta hi a ni asin,” a ti a.

¹⁵An chungah chuan a kut a lo nghat ta a; chu hmun a ðang chuan a kal sawn ta a.

ISUAN TLANGVAL HAUSA THURÂWN A PE

¹⁶Mi pakhat chu a hnenah a lo kal a, “Zirtirtu ða, chatuana nunna ka neih theih nan eng thil ða nge ka tih ang?” a ti a.

¹⁷Ani chuan a hnenah, “Engati nge ða tia min koh le? ða chu pakhat chauh a awm, chu chu Pathian a ni. Nunnaa luh i duh chuan thupekte zawm ta che,” a ti a.

¹⁸Ani chuan a hnenah, “A eng ber hi maw?” a ti a. Isuan, “‘Tual i that tur a ni lo,’ ‘I uirê tur a ni lo,’ ‘Ruk i ru tur a ni lo,’ ‘Thuhretu derah i ðang tur a ni lo;’

¹⁹‘I nu leh i pa chawimawi rawh,’ tihte leh, ‘Nangmah i inhmangaih angin i vengte i hmangaih tur a ni,’ tihte hi,” a ti a.

²⁰Tlangval chuan a hnenah “Chung thu zawng zawng chu ka naupan lai a ðangin ka zawm ðhin. Eng nge ka la bâk le?” a ti a.

²¹Isuan a hnenah, “ða famkima awm i duh chuan kal la, i neih chu hralh la, pachhiate hnenah pe la, tichuan vanah ro i nei dawn nia; chutichuan, lo kal la, mi zui ang che,” a ti a.

²²Chu thu a han hriat chuan chu tlangval chu lungngai takin a kal bo ta a, sum ngah tak mai a lo ni si a.

PATHIAN NEN ENKIM TIH THEIH

²³Isuan a zirtirte hnenah chuan, “Tihtak zetin ka hrilh a che u, mi hausa tan van lalrama luh chu a harsa rêng asin.

²⁴Ka hrilh nawn leh a che u, mi hausa Pathian lalrama luh aiin sanghawngsei hriaui bengal luh tlang a awl zawk,” a ti a.

²⁵Chu thu chu a zirtirten an hriat chuan mak an ti êm êm a, “Tu nge chhandam ni thei ta ang le?” an ti a.

²⁶Isuan anni chu a en a, an hnenah, “Chu chu mihring tan tih rual a ni lo; mahse Pathian nen chuan engkim tih theih a ni,” a ti a.

²⁷Peteran a chhang a, “Ngai teh, keinin engkim kalsanin kan zui ta che a. Tichuan, eng nge kan chan ve tak ang le?” tiin a zawt a.

²⁸Isuan a hnenah, “Tih tak zetin ka hrilh a che u, Siamtharlehnaah chuan Mihring Fapa hi a ropuina thutthlenga a thut hunah, nangni mi zuitute hi Israel hnam sawm leh hnam hnihte chungah rorêlin, lalthutthleng sawm leh pahniha in la thu ve ang.

²⁹Tupawh keima hming avanga inte emaw, unaute emaw, farnute emaw, pa emaw, nu emaw, fate emaw, ramte emaw kalsan apiang chuan a leh za an hmu ang a, chatuana nunna an rochung baw ang.

³⁰“Nimahsela, mi tam tak hmasa bera awm te chu hnunung ber an la ni ang a; hnunung berte pawh hmasa ber an la ni ang,” a ti a.

BUNG 20

GRÊP HUANA THAWKTUTE TEHKHIN THU

¹“Van lalram chu, in neitupa a grêp huana hnathawktute ruai tura zing taka thawk chhuaka ang chu a ni.

²Ani chuan hnathawktute chu ni khata duli hlawn tura an inrem hnuah a grêp huanah chuan a tir hlawn a.

³Zing lam dar kaw vela a va chhuah leh chuan, daw hmuna mi dang ding mai maite a va hmu a,

⁴an hnenah, ‘Nangni pawh grêp huanah va feh ve ta che u, a âwm taw chu ka pe ang che u,’ a ti a. Tichuan an kal ta a.

⁵Chhun laiah leh tlai dar thum velah a va kal chhuak leh a, a tih ngai bawkin a va ti leh a.

⁶Tlai dar 5 velah chuan a va chhuak leh a, mi dang ding mai maite a hmu a; an hnenah, ‘Engati nge nilêng lênga heta in din mai mai le?’ a ti a.

⁷Anni chuan a hnenah, ‘Tuma’n min ruai si lo alawm,’ an ti a. Ani chuan an hnenah, ‘Nangni pawh grêp huanah va feh ve rawh u, a âwm taw chu in hmu ang’ a ti a.

⁸“Tlaiah chuan grêp huan neitupa chuan a huan enkawltu hnenah, ‘Hlawhfa ho kha ko khawm la, a hnunung bera fanin a hmasa ber thlengin an hlawn pe rawh,’ a ti a.

⁹Tichuan, tlai dar nga vela a rawihte chu an lo kal a, duli an dawng theuh va.

¹⁰A hmasa bera mite an lo kal chuan, dawn tam deuh an inring a; mahse anni pawh chuan duli baw an dawng a.

¹¹An hlawn an lak hnu chuan in neitupa chungah chuan an phunnawi ta a,

¹²“Heng hnunung berte hian darkar khat chauh an thawk a, keini chhun ni sensa hnuai nilenga thawkte nen intluk renga min siam le,’ an ti a.

¹³“Ani erawh chuan an zinga mi pakhat hnenah, ‘Thiana, i chungah tih dik loh ka nei lo ve. Duli hlawn turin kan inrem a ni lo vem ni?

¹⁴I ta kha la la, kal mai rawh. Nangmah ka pek zat hi he hnunung ber hnenah hian ka pe ve duh a ni mai.

¹⁵Ka ta chu ka duh duha ka tih a thianga lo vem ni? That ka chhuah avangin nangin i lo itsik em ni?’ tiin a chhang a.

¹⁶Chuvangin, hnunung ber chu hmasa ber a la ni ang a, hmasa ber pawh hnunung ber a la ni ang. Sawmte chu tam tak an ni a, thlante erawh chu tlêmtê an ni si a,” a ti a.

ISUAN A THIH LEH A THAWHLEH TUR A SAWI TUM THUMNA

¹⁷Isua chuan Jerusalem khuua a han chhoh dawnin zirtir sawm leh pahnihte chu kalkawngah chuan a hruai hrang a, an hnenah,

¹⁸“Lo ngaithla teh u, Jerusalem kan chho dawn a ni a, Mihring Fapa hi puithiam lalte leh dan zirtirtute kuta mantirin a awm dawn a; anni chuan thi turin a chungah ro an rel ang;

¹⁹nuihza siam nan leh vuak atan leh kraws-a khenbeh turin Jentailte hnenah an pe ang. Ni thum niin a lo tho leh ang,” a ti a.

RAWNGBAWL HI ROPUINA A NI

²⁰Chung lai chuan Zebedai fapate nu chu a fapate hruai in a hnenah an lo kal a, thingthia chibai buk chungin thil eng emaw a dil a.

²¹Ani chuan, “Eng nge i duh le?” a lo ti a. A hnenah chuan, “Heng ka fapate pahnihi i lalramah, i ding lamah leh i vei lama thu ve ve turin phalna min pe rawh,” a ti a.

²²Nimahsela Isuan, “In dil chu in hre lo a ni. Ka no in tur chu in in thei em ni, baptisaa ka in-baptis tur aiah in in baptis thei dawn em ni?” tiin a chhang a. Anni chuan a hnenah, “Kan ti thei ang chu,” an ti a.

²³Ani chuan, an hnenah, “Ka no chu in in ngei ang; baptisaa ka in baptisna turah pawh baptis in ni ve ngei ang; mahse ka ding lam leh vei lama thut tur thu chu keia pek tur a ni lo va, ka Pa buatsaih sakate tan a ni zawk ang,” a ti a.

²⁴Zirtir sawmtan chu thu an lo hriat chuan unau pahnihte chungah chuan an lâwm lo hle a.

²⁵Isua erawh chuan anniho chu a ko va, “Jentail roreltute chu anmahni mite lakah an intilal em em thin a, an mi lianten thuneihna an vilik nasatzia in hria e.

²⁶Nangni zingah zawng chutianga tur a ni lo vang; mi tupawh in zinga milian nih duh chu in chhiahhlawnah a tang zawk tur a ni;

²⁷Mi tupawh in zinga hmasa ber nih duh apiang chu in bawihah a awm baw tur a ni.

²⁸Mihring Fapa hi rawngbawlsaka awm turin a lo kal lo va, rawngbaw tur leh, mi tam tak tlan nana a nun pe tura lo kal zawk a ni,” a ti a.

MITDEL PAHNIH MIT A LO VÂR TA

²⁹Jeriko khua ațanga an kal chhuah laiin, mipui tam takin amah chu an zui a.

³⁰Ngai teh, mitdel pahni kawang sira lo ̣thu te chuan Isua a lo kal dawn tih an hriat veleh, “Lalpa, Davida Fapa, min khawngaih rawh!” tiin an au va.

³¹Mipuite chuan an hau va, ngawi turin an ti a; nimahsela, anni chu, “Aw Lalpa Davida Fapa, min khawngaih rawh!” tiin an au uar sauh va.

³²Tichuan, Isua chu a ding a, anmahni chu a ko va, “Eng ti turin nge min duh?” a ti a.

³³Anni chuan a hnenah, “Lalpa, kan mit min tihvarsak kan duh a ni,” an ti a.

³⁴Isua chuan a lo khawngaih êm êm a, an mit a dek a. Chawp leh chilhin an mitin khua a hmu thei ta nghal a, amah chu an zui ta a.

BUNG 21**ROPUI TAKA LAW M LUHNA**

¹Tichuan, Jerusalem khua an thlen dawnin, Oliv Tlanga Bethphage khua an lo thlen chuan Isuan zirtir pahni a tir a,

²an hnenah, “In hma zawn khuaah sawn va kal ta ula, sabengtung thlun, a kianga a pa tuai nen in hmu ang. Phelh ula, ka hnenah han kai rawh u.

³Mi tupawhin in hnenah engpawh an sawi chuan, ‘LALPAN a duh a ni,’ in ti ang a; tichuan a rawn kaltir nghal mai ang,’ a ti a.

⁴Zâwlnei in a lo sawi kha a thlen kim theih nan chung chu a lo awm a ni.

⁵“Zion fanu chu hrilh rawh, ‘En teh, i Lal chu, i hnenah a lo kal dawn a, Inngaitlâwm takin sabengtung chungah a chuang e, Sabengtung pa tuai chungah ngei chuan,’” tih thu hi a ni a.

⁶Tichuan, zirtirte chu an va kal a. Isuan an hnena thu a pek ang tak chuan an ti a,

⁷Sabengtung leh a pa tuai chu an rawn kai a, a chungah chuan an puante an phah a, ani chu a chuang ta a.

⁸Chung mipui tam takte chuan kalkawngah an puante an phah a; mi dangin thing kunga mi chhâwl an sât a, kalkawngah an phah baw k.

⁹A hma lama kalte leh a hnung lama zuitu mipuite chuan, “Davida fapa hnenah Hosanna! LALPA hminga lo kal chu fakin awm rawh se! Chungnung berah khian Hosanna!” tiin an au va.

¹⁰Chutia Jerusalem khua an lo luh chuan a khua-in, “He mi hi tu nge ni?” tiin khawpui chu a pumin a nghing a.

¹¹Mipuite chuan, “He mi hi Zâwlnei Isua, Galili rama Nazaret khuaa mi chu a nih hi,” an ti a.

ISUAN TEMPUL A THIAN

¹²Isua chu Pathian tempulah chuan a va lut a, tempula thil zuartute leh a leitute chu a hnawt chhuak vek a, tangka thlengtuho dawhkante leh ̣thuro zuarho ̣thutphahte pawh chu a nam thluksak a.

¹³“Ka in chu ̣awngtâina in an ti ang,’ tih zia k a ni; nangni erawh chuan suamhmangte bûkah in siam a nih hi,” a ti a.

¹⁴Tichuan, tempulah chuan mitdelte leh kebaite a hnenah an lo kal a; anni chu a lo tidam a.

¹⁵Puithiam lalte leh dan zirtirtute erawh chuan a thilmak tihte leh tempula “Davida Fapa hnenah Hosanna!” tia naupang aute chu an hmuhin an lungawi lo êm êm a,

¹⁶a hnenah, “Hengho thusawi hi i hria maw?” an ti a. Isuan an hnenah, “Hria e. He thu hi in chhiar ngai lo vem ni, ‘Nausente leh hnute hne laite kâa chhuakin Fakna i tifamkim ta,’ tih thu hi?” a ti a.

¹⁷Tichuan, chung mite chu a kalsan a, khawpui chu chhuahsanin, Bethaniah a kal a; chutah chuan a riak ta a.

THEIPUI KUNG RO

¹⁸Zing a lo ni a, khawpui lama a kir leh laiin a ril a lo ̣tâm ta a.

¹⁹Kawng sirah chuan theipui kung a hmu a, a va pan a, a hnah chauh lo chu engmah a hmu lo va, “Engtikah mah rah leh tawh ngai suh ang che,” a ti a. Theipui chu a vuai ta nghal a.

THEIPUI KUNG RO IN A ZIRTIR

²⁰Zirtirtin an rawn hmuh chuan mak an ti a, “Engtizia nge theipui hi a vuai nghal mai le?” an ti a.

²¹Isuan an hnenah, “Tihtak zetin ka hrilh a che u, rinna in neiha, rinhlelhna rêng rêng in neih loh chuan, theipui kunga thil tih ang lek hi in ti lo vang, he tlâng hnênah pawh hian, ‘Lo insawn la, tuipuih lo inpaih daih rawh,’ ti ula, chutiang chuan a lo awm mai ang.

²²Rinna nena ̣awngtâia in dil apiang chu in hmu ang,” tiin a chhang a.

ISUA THUNEIHNA PAWM LO

²³Tempul chhunga a lo luh hnua a zirtir mek laiin puithiam lalte leh vantlang upaten an rawn hmachhawn a, “Tu thuin nge heng thil hi i tih? Tu nge he thuneihna hi pe che?” an ti a.

²⁴Nimahsela, Isuan anni chu a chhang a, “Kei pawhin thu kam khat ka zawt ve ang che u, chu chu min hrilh chuan tu thuin nge heng thil hi ka tih ka hrilh ve ang che u:

²⁵Johana baptisma kha khawia mi thu nge ni? Vana mi thu nge mihring thu?” a ti a. An inngaihtuah buai ta a, “ ‘Vana mi thu,’ kan tih chuan, ‘Engah nge a thu in awih loh?’ min ti si ang a.

²⁶‘Mihring thu,’ kan tih lahin mipui an hlauhawm baw k si; mi zawng zawngin Johana chu zâwlneiah an ruat si a,” an ti a.

²⁷Tichuan, Isua hnenah, “Kan hre lo,” tiin an chhang ta a. Ani pawh chuan an hnenah, “Kei pawhin tu thua ti nge ka nih ka hrilh bik lo vang che u,” a ti ta a.

FAPA PAHNIH TEHKHIN THU

²⁸“A nih leh nangnin engtin nge in ngaih? Mi pakhatin fapa pahni a nei a. Pakhat hnenah chuan a va kal a, ‘Ka fapa, waviin chu grêp huanah va thawk ta che,’ a ti a.

²⁹Ani chuan, ‘Ka duh lo,’ tiin a lo chhang a; mahse chumi hnua chuan a rilru a lamlêt a, a kal leh ta a.

³⁰Pakhat hnenah pawh chuan a va kal a, chutiang bawh chuan a va ti a. Ani chuan, ‘Ka pu, ka kal ang e,’ tiin a chhang a; mahse a kal ta si lo va.

³¹Chu mite pahnihah chuan a tu zawkin nge an pa duh zawng ti le?” a ti a. Anni chuan, “A hmasa zawk chuan le,” an ti a. Isuan an hnenah, “Tihlak zetin ka hrilh a che u, chhiahkhawntute leh nawhchizuarten Pathian lalram an luh khalh che u hi.

³²Johana chu dikna kawng zawhin in hnenah a lo kal a, in ring chuang si lo va; chhiahkhawntute leh nawhchizuarate erawh chuan amah chu an ring asin; nangnin chu chu hmu reng mah ula, ring turin inlamlê in tum chuang si lo.

GRÊP HUAN ENKAWLTU SUAL TEHKHINNA

³³“Tehkhin thu dang ngaithla leh rawh u: Ram neitu mi pakhat a awm a, chu mi chuan grêp huan a siam a, palin a hung a, grêp sâwr khur a lai a, in sang a sa a. Huan enkawltute hnenah thawhhlawh turin a pe a, ram hla takah a zin san ta a.

³⁴A rah seng hun a lo thlen dawn chuan, a rah hmasa a chan theih nan huan enkawltu hnenah a chhiahhlawhte a tir a.

³⁵Mahse huan enkawltute chuan a chhiahhlawhte chu an lo man a, pakhat an vua a, pakhat an tihlum a, pakhat lungin an deng a.

³⁶Tichuan chhiahhlawh dang, a hmasa pawl aia tam zawk a tir leh a; anniho pawh chu an hmaa mite an tih ang bawkin an lo ti leh a.

³⁷A tawp berah chuan, ‘Ka fapa hi chu an zah deuh mahna,’ tiin an hnenah a tir ta a.

³⁸Nimahsela, huan enkawltute chuan a fapa chu an lo hmuh vele, ‘He mi hi ro luahtu tur chu a nih hi. Ti r’u, i that ang u khai, a ro luah tur chu kan neihsak dawn nia,’ an ti a.

³⁹Tichuan an man a, grêp huan ațang chuan an theh chhuak a, an tihlum ta a.

⁴⁰Chutichuan, grêp huan neitupa a lo kal hunah chung huan enkawltute chungah chuan engtin nge a rawn tih ang le?” a ti a.

⁴¹Anni chuan a hnenah, “Chung mi sualte chu hrehawm tuartirin a tiboral ang a, grêp huan chu huan enkawltu dang, a seng hun apianga a rahte a hnêna thlen zêl thei tur hnenah thawhhlawh turin a pe ang,” an ti a.

⁴²Isuan an hnenah, “Pathian lehkhah, ‘In satuten lung an hnâwl hnu kha, A kila lung țangkai ber a lo ni, Chu chu LALPA tih a ni a, Kan mithmuhah a mak a ni,’ tih hi in chhiar ngai lo vem ni?

⁴³Chuvangin ka hrilh a che u, ‘Pathian lalram chu in hnena ta an laksak ang che u a, rah chhuak tur hnam hnenah pek a ni ang.’

⁴⁴He lung chung a tlu apiang chu an keh sawm ang a; a delh lek phei chu a râwt dip vek ang,” a ti a.

⁴⁵Puithiam lalte leh Pharisaite chuan a tehkhin thute chu an hriatin, anmahni a sawi chhan tih an inhria a.

⁴⁶Amah chu man an tum a, mahse mipui an hlau bawh si a, mipuiin zâwlneiah an ngai si a.

BUNG 22

INNEIHNA RUAI TEHKHIN THU

¹Isuan tehkhin thu hmangin an hnenah a sawi leh a,

²“Van lalram chu lal pakhat, a fapa tana inneihna ruai a buatsaisak ang chu a ni a,

³inneihna ruai theh tura a sawmte chu ko turin a chhiahhlawhte a tir chhuak a; mahse an lo kal duh hlawn lo va.

⁴A chhiahhlawh dangte chu a tir leh a, ‘Ka mi sawmhote hnenah, “Hei le, ruai chu ka buatsaih ta e; ka bawngpa leh ran châwm thaute ka talh a, engkim peih a ni ta. Inneih ruai theh turin lo kal tawh r’u le,” va ti rawh u,’ a ti a.

⁵Nimahsela, an lo ngaihsak duh lo va, pakhat chuan a lovah a fehnan a, pakhat chu a sumdawnna lamah a kal daih a.

⁶Mi dangte erawh chuan a chhiahhlawhte chu an man a, diriam takin an tihlum ta hial a.

⁷Lalin chu thu a lo hriat chuan a thinrim ta êm êm a. A sipaite a tir chhuak a, chung tualthattute chu an tiboral a, an khua te pawh an hâlsak a.

⁸Tichuan, a chhiahhlawhte hnenah, ‘Ruai chu peih a ni ta, ka sawmhote kha ei tlak pawh an lo ni hlawn lo ve.

⁹Chuvangin, kawngpuiahte vak vel ula, mi in hmuh apiang chu ruai theh turin va sawm rawh u,’ a ti a.

¹⁰Tichuan, a chhiahhlawhte chu kawngpuiah te chuan an va chhuak a, an hmuh apiang chu misual leh mi thate pawh an rawn hruai khawm vek a. Tichuan, mo lawmna in chu mi sawmte chuan an luah khat ta a.

¹¹“Lal chu a mikhual sâwm khâwmte hmu tura a lo luh chuan, an zingah chuan inneih kawr ha ve lo mi pakhat a rawn hmu a;

¹²Chu pa hnenah chuan, ‘Thiana, eng tizia nge inneih kawr ha lova heta i lo luh le?’ a ti a. Ani chu a ngawi reng a.

¹³Lal chuan a chhiahhlawhte hnenah, ‘A kut leh a ke phuar ula, hruai bo ula, pawn thimah paih chhuak rawh u; chutah chuan țah leh ha thial a awm ang,’ a ti a.

¹⁴“Sawmte chu tam tak an ni a, mahse thlante chu tlênte an ni,” a ti a.

PHARISAITE: KAISARA HNENAH CHHIAH CHAWI A THIANG EM?

¹⁵Pharisaite chuan a thusawi ațang ngeia amah an man theih dan tur dapin an inrâwn khawm a.

¹⁶Tichuan, an zirtirte chu Heroda pawla mite nen a hnenah an tir a, chu mite chuan, “Zirtirtu, mi dik tak i ni a, thutakin Pathian kawng thu i zirtir thîn a; pawisak bik tumah i nei chuang lo tih kan hria e; tumah thlei bik i nei si lo va.

¹⁷Chuvangin, i ngaihdan min hrilh teh khai. Kaisara hnena chhiah chawi hi a thiang em?” an ti a.

¹⁸Mahse, Isuan an suahsualzia chu a lo hria a, “Vervêkte u, eng vanga mi fiah nge in nih?

¹⁹Chhiah tangka chu mi entir ta che u,” a ti a. A hnenah chuan duli* tlang an rawn la a.

²⁰Ani chuan an hnenah, “Hei hi tu lem leh tu hming nge ni?” a ti a.

²¹Anni chuan a hnenah “Kaisara,” an ti a. Ani chuan an hnenah, “Kaisara thilte chu Kaisara hnenah pe ula, Pathian thilte chu Pathian hnenah pe ta che u,” a ti a.

²²Chu thu chu an hriatin mak an ti hle a, an kiansan a, an kal bo ta daih a.

SADUKAITE: THAWHLEHNA HI ENG NGE NI?

²³Chumi ni vek chuan Saddukaiho, thawhlehna a awm lo titute chu a hnenah an lo kal a, an rawn zawt a,

²⁴“Zirtirtu, Mosia chuan, ‘Fa nei lovin mi thi ta sela, a tana chi thlahsak turin a unaupain a rochung tur a ni,’ a ti a.

²⁵Aw le, kan zingah unau mipa pasarih an awm a; a upa berin nupui a nei a, a thihsan a, chi a thlah loh avangin a nupui chu a unaupa rochung turin a hnutchhiah a;

²⁶chutiang bawkin pahnihna leh pathumna pawh chuan an ti a, pasarihna thlengin an ti theuh va.

²⁷A hnunchung berah chuan hmeichhia pawh chu a thi ve ta a.

²⁸Chutichuan, thawhlehna hunah anni pasarihthe zinga tu nupui ber chu nge ni ang? An zain an nei theuh si a,” tiin an zawt a.

²⁹Anni chu chhangin Isuan, “Pathian Lehkha Thu leh Pathian thiltihtheihna in hriat loh avangin in ngai thelh hle a nih chu.

³⁰Thawhlehnaah chuan nupui pasal an innei tawh dawn lo va, vana Pathian Vantirhkohte ang an ni dawn asin.

³¹Mitthi thawhlehna chungchanga Pathianin in hnena a sawi kha in chhiar lo vem ni, heti hian a ti a nih kha,

³²“Kei Abrahamah Pathian, Isaaka Pathian, Jakoba Pathian ka ni,’ tia in hnena a sawi kha in chhiar lo vem ni? Pathian chu mitthi Pathian a ni lo va, mi nung Pathian zawk a ni,” a ti a.

³³Mipuiten chung thu chu an lo hriat chuan, a thu zirtir dan chu mak an ti em em a.

DAN ZIRTIRTUTE: THUPEK HMASA BER ENG NGE?

³⁴Isuan Saddukaiho a hnial dang tih Pharisaite an lo hriatin, an rawn inhawrhawm a.

³⁵Tichuan, an zinga mi pakhat, dan hremi chuan amah fiah nan,

³⁶“Zirtirtu, dan thupekah hian a eng hi nge ropui ber le?” tiin a zawt a.

³⁷Isuan a hnenah, ‘LALPA, i Pathian chu i thinlung zawng zawngin, i thlarau zawng zawngin, i rilru zawng zawngin i hmangaih tur a ni,’ tih hi.

³⁸Hei hi thupek ropui leh hmasa ber a ni.

³⁹A dawttu, a anpui chu hei hi a ni, ‘Nangmah i inhmangaih angin i vengte pawh i hmangaih tur a ni,’ tih hi.

⁴⁰Chung thupek pahnihah chuan Dan leh Zâwlnete thu zawng zawng a inkhaikhawm vek a ni,” a ti a.

ISUA: DAVIDAN A CHITHLAHA MI ENGTIN NGE LALPA A TIIH THEIH?

⁴¹Chutia Pharisaiho an inhmuikhawm lai chuan Isuan anni chu thu a zawt a,

⁴²“Krista chu engtin nge in ngaih? Tu fapa nge ni?” a ti a. Anni chuan a hnenah, “Davida Fapa,” an ti a.

⁴³Ani chuan an hnenah, “A nih leh Davida chuan Thlarauvin engtin nge ‘Lalpa’ tia a koh le?

⁴⁴LALPA chuan, ka Lalpa hnenah, “I hmêlmate i kephah hnuia ka dah hma loh zawng, Ka kut ding lamah thu ang che,” a ti si a?

⁴⁵Davidan ani chu ‘Lalpa’ a tih si chuan, engtin nge a fapa a nih theih?” a ti a.

⁴⁶Tuma’n kam khat mahin an chhang thei lo va, chu mi ni aţang chuan tuma’n thu dang rêng rêng pawh an zawt ngam tawh lo.

BUNG 23

DAN ZIRTIRTUTE LEH PHARISAITE CHUNGPIKNA

¹Tichuan, Isuan mipuite leh a zirtirte hnenah thu a sawi a,

²“Dan zirtirtute leh Pharisaite chu Mosia thutphahah chuan an thu a.

³Chuvangin, tih tur an hrilh apiang che u chu ti ula, zawm zel ang che u; an thiltih ang erawh chuan ti ve suh u; an sawi a, an sawi angin an ti leh chuang si lo.

⁴Phurrit hrehawm takte an siam a, mite kovah an bel thin a; anmahni erawh chuan an kut zung hmâwr pawhin an khawih duh si lo.

⁵An thiltih zawng zawng chu mihring hmuh atan maia ti an ni. An bân bun leh chal hrênna khim te an tihlai a, an puan fêm an tibuk thin a.

⁶Ruaithehnaah thutna tha ber te, biak inah thutna langsar ber te,

⁷dâwr hmuna chibai bûk te, miten ‘Rabbi, Rabbi’ tia an koh te an ngaina si thin a.

⁸“Nangni erawh chu ‘Rabbi’ tihin awm suh u; in Zirtirtu chu pakhat chauh a ni, Krista ngei chu, nangni chu in zain unau in ni si a.

⁹Lei chungah hian tumah ‘Ka pa’ ti suh u; in Pa chu pakhat chauh a ni, vana mi khi.

¹⁰“Zirtirtu’ tihin awm hek suh u, in zirtirtu chu pakhat chauh a ni, Krista ngei chu.

¹¹In zinga ropui ber chu in chhiahhlawhah a awm zawk tur a ni.

¹²Inngaihlu apiang tihtlâwm an ni ang a, inngaitlâwm chu chawimawiin an awm ang.

¹³“Nangni dan zirtirtu leh Pharisai vervekte u, in chung a pik e! Van lalram chu mite tan in khârsak a; nangni lah in lut duh si lo, mi lut turte tana kawng dâltu mai in ni e.

¹⁴Nangni dan zirtirtu leh Pharisai vervêkte u, in chung a pik e! Hmeithaite sum in eisak a, tlang bum nan rei tak tak in tawngtai

thin. Chuvangin, nasa zawkin thiam loh in la chang mawlh ang.

¹⁵“Nangni dan zirtirtu leh Pharisaï vervêkte u, in chung a pik e! Saphun pakhat siam tur pawhin tuipui leh khawmual in hrût peih si a, chutianga in hmin theih tawhte lah chu in leh-hnihin hremhmun fapaah in siam a ni ngawt alawm.

¹⁶“Nangni, hruaitu mitdel, ‘Tempul chhâla chhechham chu engmah a ni lo; mahse Tempula rangkachak chhâla chhechham erawh chuan a hlen tur a ni,’ titute u, in chung a pik e!

¹⁷Nangni mi â leh mitdelte u! A eng nge ropui zawk, rangkachak nge, rangkachak tithianghlmitu Tempul chu?

¹⁸“Mi tupawhin maichâm chhâla chhia a chham chuan, engmah a ni lo; a chung a thilpek awm chhâla chhechhamtu erawh chuan a hlen tur a ni,’ in ti bawk a.

¹⁹“Mi â leh mitdelte u! A eng zawk chu nge ropui zawk, thilpek chu nge, thilpek tithianghlmitu maicham chu?

²⁰Tichuan, maicham chhâla miin chhia a chham chuan, a chung a thilhan awmte nen a chhe chhamnaah a tel sa vek si a.

²¹Tempul chhâla chhechhamtu pawhin a chung luahtu chhâlin chhia a chham a.

²²Van chhâla miin chhia a chham chuan, Pathian lalthutthleng chung a thu chhâlin chhia a chham a.

²³“Nangni dan zirtirtu leh Pharisaï vervêkte u, in chung a pik e! Pudina te, lengmasêr te, pardî te chu sawmah pakhat in pe thin a, dan thu pawimawh zawk–diknate, zahngaihnhate leh rinnate chu in ngaihthah hlah si a. Chungte chu asin in tih tur chu, a dangte hlamchhiah chuang si lovin.

²⁴Nangni hruaitu mitdel, vaihmitte thli faia, sanghawngsei dawlh si te u!

²⁵“Nangni dan zirtirtu leh Pharisaï vervekte u, in chung a pik e! No leh thleng pawn lam in silfai a, a chhung erawh chu hlemhlêtna leh insumlohnain a khat si a.

²⁶Nang Pharisaï mitdel, no leh thleng chhung lam chu silfai hmasa la, tichuan a pawn lam nen a fai tawh dawn nia.

²⁷“Nangni dan zirtirtu leh Pharisaï vervêkte u, in chung a pik e! Thlân hnawih vâr, a pawn lam mawi taka lang, a chhung lam mitthi ruh leh bawhlhlawh tinrênga khat ang chu in ni asin.

²⁸Pawn lama in lan danah chuan mihring mithmuhah in fel hmel hle a, in chhung lam erawh chu vervêkna leh dan bawhchhiatnaa khat a ni si a.

²⁹“Nangni dan zirtirtu leh Pharisaï vervekte u, in chung a pik e! Zâwlneiho thlân inte in sa a, mi fel thlân te in cheimawi vel a,

³⁰“Kan pute hun lai khan lo awm ve ila zawng, zâwlnei te thisen an chhuahnaah chuan kan tel ve hauh lo vang,’ in ti thin.

³¹Chuvangin, zâwlneiho thattute thlah in ni tih nangmahni ngei kha hriatpuitu in ni.

³²In thlahtute sualzia tehna no chu tikhat law law rawh u.

³³Rûlte u, rûl thlahte u! Engtin nge hremhmuna hremna chu in pumpehl theih ang?

³⁴“Chuvangin zâwlnei te, mifing te, dan zirtirtute in hnenah ka rawn tir ang: thenkhat in tihlum ang a, kraws-ah in khengbet ang,

thenkhat in biak inah te in vua ang a, khaw tinah in tiduhdah zui zel ang;

³⁵chutichuan, mi fel tak Abela thisen atangin, tempul leh maicham inkara Barakia fapa Zakaria in thaha thisen thleng khan, lei chung a mi fel thisen an chhuah zawng zawng mawh chu nangmahni chungah a tla ang.

³⁶Tihtak zetin ka hrilh a che u, chung zawng zawng chu tunlai thangtharte chungah hian a lo la thleng ngei ang.

ISUAN JERUSALEM A TAH KHUM

³⁷“Aw Jerusalem, Jerusalem, zâwlneiho thattu, i hnenah an rawn tirhte lunga lo deng hlumtu! Arpuiin a note a thla hnuaia a awp khâwm angin i fate vawi engzat nge awp khâwm ka tum a, i duh si loh!

³⁸En teh u, in in chu chhe ram dêra hnutchhiaha a awm tak hi.

³⁹Ka hrilh a che u, ‘LALPA hminga lo kal chu fakim awm rawh se,’ in tih hma loh chuan mi hmu leh tawh lo vang,” a ti a.

BUNG 24

ISUAN TEMPUL CHHIAT TUR A SAWI LÂWK

¹Isua chu a chhuak a, Tempul a chhuahsan dawn laiin a zirtirte chuan tempul in sak dan entir turin an rawn pan a.

²Isuan an hnenah, “Heng zawng zawng hi in hmu maw? Tihtak zetin ka hrilh a che u, heng lungremte hi tihchim lohva hnutchhiaha pakhat mah a awm lo vang,” a ti a.

KHAWVEL TAWPNA LEH A HUN CHHINCHHIAHNA

³Oliv Tlang chung a thut laiin zirtirte chu anmahniho chauhvîn a hnenah an lo kal a, “Chung thil chu engtikah nge a lo awm ang? I lokallehna leh khawvel hun tâwp tur chhinchhiaha chu eng ang nge ni dawn min hrilh rawh,” an ti a.

⁴Isuan a chhang a, an hnenah: “Tuma’n an tihder loh nan che u fimkhur rawh u.

⁵Mi tam takin, ‘Krista chu ka ni,’ tiin keima hming chhâlin an lo la chhuak ang a, mi tam tak an la bum dawn a ni.

⁶Indo thu leh indo thuthangte in la hria ang. Lo chi-ai suh ang che u; chung thil chu lo thleng tûr rêng a ni; tâwpna erawh chu a la ni rih lo vang.

⁷Hnam hrang hrang an indo vang a, sorkar leh sorkar an indo vang. Hmun hrang hrangah tàmte a tla ang a, hrî te a lêng ang a, lîrte a ngîng ang.

⁸Chung zawng zawng chu lungngaih bulanna chauh a ni.

⁹“Chumi hunah chuan hrehawm tuar turin an mantir ang che u a, an tihlum ang che u; ka hming avangin hnam zawng zawng huat in la ni ang.

¹⁰Chumi hunah chuan mi tam tak an tlu ang; an inhêk tawn ang a, an inhaw tawn ang.

¹¹Zâwlnei suak tam tak an lo chhuak ang a, mi tam tak an hruai sual ang,

¹²Dan bawhchhiatna a la pun nasat dawn avangin mi tam zawk hmangaihna chu a la dai ang.

¹³A tâwp thlenga tuar peih erawh chu chhandamin an awm ang.

¹⁴He lalram Chanchin Tha hi hnam zawng zawng hnenah hriatpuitu atan khawvel pumah hrilhin a awm ang a; chu mi zawhah chuan tâwpna chu a lo thleng ang.

HREHAWMNA HUN RÂPTHAK

¹⁵Chutichuan, tiramtu tenawm, zâwlnei Daniela sawia kha, hmun thianghlina ding in hmuh hunah chuan (a chhiar apiangin a awmzia hre rawh se),

¹⁶Judai rama awmte chu tlangahte tlan bo rawh se.

¹⁷In chung a awm chu a in chhunga englo chuh turin chhuk suh se;

¹⁸Lova awm chu a thawmhnahte chuh turin haw suh se.

¹⁹Chutiang hunah chuan raite leh nau no pawmte chan a va chhe dawn êm!

²⁰In tlanchhiat hun tur chu thlasikah emaw, Sabbath ni emaw a nih loh nan tawngtai rawh u.

²¹Buaina namenlo a chhuak dawn si a; chutianga nasa rêng rêng chu leilung pian tih ata tun thlengin a la awm ngai lo va, awm pawh a awm leh tawh hek lo vang.

²²Chung nite chu tihtawi ni lo se, tumah dam khawchhuak an awm lo vang; thlante avang chauhin chung nite chu tihtawi a ni ang.

²³“Tute pawhin in hnenah, ‘Hei le, Krista chu heta hi a awm e,’ emaw, ‘Sawta saw,’ emaw, an tih chuan, awih suh u.

²⁴Krista derte leh zâwlnei suakte an lo chhuak dawn si a, chung chuan mi bum nan chhinchhiahna leh thilmak nasa tak tak an ti ang a, thei phei se chuan thlante meuh pawh an tihder thei hial ang.

²⁵Ngai teh u, ka hrilh lawk che u hi.

²⁶Chuvangin in hnenah, ‘En r’u, thlalêrah a awm e!’ tia an hrilh che u chuan, kal chhuak suh u; ‘Pindan chhungrilah a awm e!’ an tih pawhin awih suh u.

²⁷Chhak lamah kâwl a lo phê a, thlang lam thlengin a de zuai zuai thin a, Mihring Fapa lo kal lehna pawh chutiang bawh chu a ni ang.

²⁸“Saruang awmna apiangah mulukawhte pawh an awm khâwm ang.

MIHRING FAPA LOKALLEHNA

²⁹“Chung hrehawmna nite a zawh velehi ni chu tihthim a ni ang a, thlain êng a chhuah tawh hek lo vang; arsate chu van ațangin an lo tla ang a, van thiltihtheihnate chu tihngin a ni ang.

³⁰Chutih hunah chuan Mihring Fapa chhinchhiahna chu vanah a lo lang ang a, leia hnam zawng zawngte chuan an sîn ang a, Mihring Fapa hi thiltihtheihna leh ropuina nasa tak nen van chhûm chung a lo kal an hmu ang.

³¹A Vantirhkohte chu tawtawrât ri ropui tak nen a tir chhuak ang a, anni chuan a thlante chu kâwlkil lî ata, van tawp ațanga a tâwp lehlam thlengin an lâwr khâwm ang.

THEIPUI KUNG NENA TEHKHIN

³²“Tunah chuan theipui kung awmdan ațang hian tehkhin thu zir rawh u: A zîk a lo no va, a hnah a lo chawr chuan, nipui a thaw dawn tih in hre thin.

³³Nangni pawhin chung thil zawng zawng chu in hmuh hunah amah chu a lo hnai tawh a, kawngka bulah a awm tawh tih hria ang che u!

³⁴Tihtak zetin ka hrilh a che u, chung zawng zawng chu a thlen kim hma loh chuan tunlai t̃hangthar te hi an ral lo vang.

³⁵Lei leh van a boral ang a, ka thu erawh chu engtikah mah a boral lo vang.

A HUN LEH NI TUMA HRIAT LOH

³⁶“Chumi ni leh darkar erawh chu Pa chauh lo chuan tuma’n, vana Vantirhkohte pawhin an hre lo.

³⁷Nova dam lai ang bawh kha Mihring Fapa lokallehna chu a ni ang.

³⁸Khang tuilêt hma nîte khan, lawng chhunga Nova a luh ni thlengin an eiin an in a, nupui pasal an innei thin,

³⁹tui a lo lêt a, an zaa lak bo an nih vek hma loh kha chuan engmah an hre lo va; Mihring Fapa lokallehna pawh chutiang bawh chu a ni ang.

⁴⁰Chu mi hunah chuan lovah mi pahnih an awm ang a; pakhat chu lâk bo a ni ang a, pakhat chu hnutchhiah a ni ang.

⁴¹Hmeichhe pahnihin buh dennaah buh an lo dêng ang a, pakhat chu lâk bo a ni ang a, pakhat chu hnutchhiah a ni ang.

⁴²“Chutichuan, ngaihven rawh u, eng hunah nge in Lalpa chu a lo kal dawn in hre si lo.

⁴³Mahse, hei hi hre rawh u, rûkru lo kal hun tur chu in neituin hria se a vêng ang a, a in a reh pawhtir lo vang.

⁴⁴Chuvangin, nangni pawh inring rengin awm rawh u, Mihring Fapa lo kal in rin loh lai takin a lo kal dawn si a.

CHHIAHHLAWH RINAWM LEH CHHIAHHLAWH SUAL

⁴⁵“Chhiahhlawh rinawm leh fing, a puin an chhungkaw hotuah leh an chaw sem huna a semtu tura a ruat chu tu ber nge ni ang le?

⁴⁶A pu lo haw laia tha taka lo awm chhiahhlawh a rawn hmuha chu a nihlawh ang.

⁴⁷Tihtak zetin ka hrilh a che u, a neih zawng zawng chung a hotuah a siam ang.

⁴⁸Chhiahhlawh sual ve thung chuan a rilruin, ‘Ka pu a lo haw lawk dawn lo ve,’ tiin,

⁴⁹a chhiahhlawhpuite lo vel ta sela, ngawlveite zingah eiin in sela,

⁵⁰chu chhiahhlawha pu chu a rin loh nî-ah, a hriat loh laiin a lo kal ang a,

⁵¹bung hniah a rawn chhuah ang a, mi vervêkte chan ang a chantir ang; chutah chuan t̃ah leh hațhial chu a awm ang.

BUNG 25

NULA THIANGHLIM FING LEH Â TEHKHIN THU

¹⁴“Van lalram chu nula thianghlim sawm, an khâwnvârte kenga mo neitu hmuak tura chhuakte nen chuan tehkhin a ni ang.

²An zinga mi panga an fing a, panga dang an â a.

³A â-te chuan an khâwnvârte an kenin a tui an keng tel lo va;

⁴a finge erawh chuan an khâwnvârte an keng a, a bûrin a tui an keng tel bawh a.

⁵Mahse, mo neitu chu a lo thlen har avangin an vaiin an muthlu a, an lo muhil a.

⁶Zan laiah chuan, ‘Khai le, mo neitu chu a lo kal ta e, amah hmuak turin lo chhuak r’u!’ tiin au thâwm an hre ta a.

⁷Nula thianghlimte chu an vaiin an tho va, an khawnvârte chu an buatsaih a.

⁸A â-te chuan a finge hnenah, ‘In khâwnvâr tui kha min pe ve rawh u; kan khâwnvârte a mit dawn e,’ an ti a.

⁹Mahse, a finge chuan, ‘Keini leh nangni tan a daih lo vang; a zuartute hnenah va kal ula, va lei ve zawk rawh u,’ tiin an chhang a.

¹⁰Tichuan, a lei tura an kal bo hlân chuan mo neitu chu a lo thleng ta a; a lo inpeihsa te chu ama rualin inneihnaah chuan an lut a; kawng chu an khar ta a.

¹¹Chu mi hnuah chuan nula thianghlim dangte pawh chu an lo thleng a, ‘Lalpa, Lalpa, min hawnsak rawh!’ an ti a.

¹²Ani erawh chuan, ‘Tihlak zetin ka hrilh a che u, ka hre lo va che u,’ tiin a chhang a.

¹³“Chuvangin, ngaihven rawh u, Mihring Fapa lo kal hun leh ni in hre si lo va,” a ti a.

TALENT TEHKHIN THU

¹⁴“Van lalram chu, ram hla taka zin tur mi pakhatin ama chhiahhlawhte ko va, an hnena a sum a kawltir ang chu a ni.

¹⁵Chhiahhlawh pakhat hnenah talent nga a pe a, chhiahhlawh dang hnenah talent hnih, a dang hnenah talent khat a pe a; an tih theih awm tawh theuhvin a pe a; tichuan a zin chhuak ta a.

¹⁶Tichuan, talent nga dawngtu chuan a sum chu a va peipung a, talent nga dang a dek chhuak ta a.

¹⁷Chutiang bawkin talent hnih dawngtu pawh chuan talent hnih dang a deh chhuah belh ve bawh a.

¹⁸Talent khat dawngtu erawh chu a va kal a, lei a lai a, a pu tangka chu a thukru ta daih a.

¹⁹“Hun rei tak hnuah chung chhiahhlawhho pu chu a lo haw a, an sum dinhmun chu a chhûtpui a.

²⁰Tichuan, talent nga dawngtu chu a lo kal a, talent nga dang a rawn keng a, ‘Ka pu, talent nga mi kawltir kha; en teh, talent nga dang ka deh chhuah belh e,’ a ti a.

²¹A pu chuan a hnenah, ‘Bawih tha leh rinawm, i ti tha e; tlênte chungah i rinawm a, tam tak chungah ka awmtir ang che. I pu lâwmnaah lut rawh,’ a ti a.

²²Talent hnih dawngtu pawh chu a lo kal a, ‘Ka pu, talent hnih mi kawltir kha; hei le, talent hnih dang ka deh chhuah belh e,’ a ti a.

²³A pu chuan a hnenah, ‘Bawih tha leh rinawm, i ti tha e; tlênte chungah i rinawm a, tam tak chungah ka awmtir ang che; i pu lâwmnaah lut rawh,’ a ti a.

²⁴“Talent khat dawngtu pawh chu a lo kal a, ‘Ka pu, mi kherkhiap tak i ni tih ka hria a; i tuh loh pawh i ât thin a, a chi i theh darh lohnaah pawh i seng thin a.

²⁵Chuvangin, ka hlauthawngin i talent kha leiah ka thukru ta mai a ni. En ta che, i ta ngai kha i hmuh leh hi,’ a ti a.

²⁶A pu chuan a hnenah, ‘Chhiahhlawh sual leh zawmthaw pa, ka tuh lohnaah pawh ka ât a, a chi ka theh darh lohnaah pawh ka seng thin tih i hria maw?’

²⁷A nih ahnû, ka tangka chu sumdawngte hnenah pung neia lo dah tawh tur i ni a, tuna ka lo haw hian ka ta chu a pung nena hmu leh tur ka ni.

²⁸Chuvangin, talent khat kha laksak ula, talent sawm neitu hnenah pe rawh u.

²⁹A nei apiang an pek belhchhah ang a, tichuan a lo ngah lehzual ang; a nei lo erawh chu a neihchhun pawh chhuhsak a ni ang.

³⁰Kha chhiahhlawh tlaktlai lo kha pawn thimah theh chhuak rawh u. Chutah chuan tha leh ha thial chu a awm ang,’ a ti a.

MIHRING FAPAIN HNAM TIN CHUNGAH RO A RÊL DAWN

³¹“Mihring Fapa hi a ropuinaa inthum a, Vantirhkhoh thianghlimho zawng zawng nena a lo kal hunah chuan a ropuina lalthutthlengah a thu ang.

³²Hnam zawng zawng chu a hmaah chuan koh khawm an ni vek ang a; berâmpuin a berâmte zinga ta kêl a thliar hrang angin anniho chu a thliar hrang tawh ang.

³³Berâmte chu a kut ding lamah a dah ang a, kêlte erawh chu a kut vei lamah a dah ang.

³⁴“Chumi hunah chuan Lalber chuan a kut ding lama mite hnenah, ‘Ka pa voh bikte u, lo kal ula, khawvel siam tantirh ata in tana lalram buatsaih chu luah tawh r’u le:

³⁵ka ril a tamin nangnin ei tur mi pe a; ka tui a hâlin in tur mi pe a; mikhual ka nihin mi thleng a;

³⁶saruaka ka awmin puan mi sintir a; ka dam lohvin mi kan a; tân ina ka awmin mi tlawh si a,” a la ti ang.

³⁷“Mi dikte chuan, ‘Lalpa, engtik laiin nge rilâmin kan hmuh che a, ei tur kan pek che? Tuihâlin kan hmuh che a, in tur kan pek che?’

³⁸Engtik laiin nge mikhuala kan hmuh che a, kan thlen che? Saruaka kan hmuh che a, puan kan sintir che?

³⁹Engtik laiin nge dam lovin emaw, tân inah emaw kan hmuh che a, kan rawn tlawh che?’ tiin an la chhang ang.

⁴⁰Lalber chuan an hnenah, ‘Tihlak zetin ka hrilh a che u, heng ka unau tê berte zinga mi pakhat chungah in tih chu keima chungah ti in ni asin,’ tiin a la chhang ang.

⁴¹“Chumi zawhah a kut vei lama mite hnenah pawh chuan, ‘Ânhche dawngte u, kumkhaw mei, Diabola leh a tirkhohte tana an buatsaihah chuan mi kal bosan rawh u;

⁴²ka ril a tamin nangnin ei tur mi pe lo va; ka tui a hâlin in tur mi pe hek lo;

⁴³mikhual ka nihin mi thleng lo va; saruak ka nihin puan mi sintir lo va; ka dam loh lai te, tân ina ka awm lai tein mi kan si lo,’ a la ti ang.

⁴⁴Chumi hunah chuan anni pawhin, ‘Lalpa, engtik laiin nge rilâmin emaw, tuihâlin emaw, mikhualin emaw, saruakin emaw, dam lovin emaw, tân inah emaw kan hmuh che a, rawng kan bâwsak loh che?’ tiin an la chhâng ang.

⁴⁵Nimahsela ani chuan an hnenah, ‘Tihtak zetin ka hrilh a che u, heng mi tē berte zinga mi pakhat chung a ti lo chu ka chung a ti lo in ni,’ tiin a la chhâng ang.

⁴⁶“Chung mite chu chatuana hremnaah an kal ang a, mi dikte erawh chu chatuana nunnaah an kal ang,” a ti a.

BUNG 26

ISUA TIHLUM TURA PHIARNA

¹Chûng thu zawng zawng a sawi zawh hnu chuan Isuan a zirtirte hnenah,

²“Ni hnih hnuah Kalhlên Kût a lo thleng dawn tih in hria a, Mihring Fapa hi khenbeh turin an mantir dawn a ni,” a ti a.

³Chumi lai chuan Puithiam Lalber Kaiapha an tiha in hual chhung kawt laiah chuan puithiam lal te, dan zirtirtute leh vantlang upate chu an pung khawm a;

⁴Isua chu bumna hmanga mana, tihhlum dan tur an phiar vèl a.

⁵Amaherawhchu, “Kût chhung chuan ni lo se, chuti lo zawng, vantlang zingah buaina a chhuak palh ang e,” an ti a.

BETHANI A HRIAK THIHNA

⁶Isua chu Bethani khuahh phâr Simona ina a awm laiin,

⁷hmeichhe pakhat chu alabasta bûra hriak rimtui to tak kengin a hnenah a lo kal a, chaw a kil lai chu a lu-ah a leih a.

⁸Zirtirtin chu chu an hmuhin an lâwm lo hle a, “Engah nge hetia a tihrial mai mai le?”

⁹He hriak hi man tam taka hralha, mi retheite hnêna pêk tur a nih vei nê,” an ti a.

¹⁰Isua erawh chuan chu chu a hriatin an hnenah, “Hmeichhia hi engah nge in tihbuai ni? Ka chungah hian thil tha tak a ti a nih hi.

¹¹Mi retheite chu in hnêna awm reng an ni alawm, kei erawh chu awm reng tur ka ni ve si lo va.

¹²Ka taksaa he hriak rimtui a leih hi phûm tûra mi lo buatsaih lâwkna a ni asin.

¹³Tihtak zetin ka hrilh a che u, khawvel pumah he Chanchin Tha an hrilna apiangah he hmeichhe thiltih pawh hi amah hriatreng nân an sawi tel zel ang,” a ti a.

JUDAN ISUA A PHATSAN

¹⁴Chumi hnu chuan sawm leh pahnihte zinga mi pakhat, Juda Iskariota an tih chu, puithiam lalte hnenah a va kal a

¹⁵“Amah chu mantir che u ila, eng nge min pek ang?” a va ti a. Tichuan, tangka tlang sawmthum an bûk chhuahsak ta a.

¹⁶Chuta tang chuan mantirna remchang a zawng ta reng a.

ISUAN A ZIRTIRTE NEN KALHÊEN KÛT AN HMANG

¹⁷Chhang dâwidim telh loh kût ni hmasa berah chuan zirtirte chu Isua hnenah an lo kal a, “Kalhlên Kût chaw eina turin khawiah nge buatsaihsak che ila i duh?” an ti a.

¹⁸Ani chuan, “Khawpuiah mi tuemaw hnenah va kal ula, chu mi hnenah chuan, ‘Zirtirtu chuan, “Ka hun a hnai ta a; ka zirtirte nen i inah Kalhlên Kût kan hmang ang e, a ti e,’ va ti ang che u,” a ti a.

¹⁹Tichuan, Isuan tihtur a hrilh angin zirtirte chuan an ti a; Kalhlên Kût chawhlui chu an buatsaih ta a.

²⁰Chutia khua a lo tlai hnu chuan zirtir sawm leh pahnihte nen chuan chawhlui chu an kil a;

²¹Chaw an ei laiin ani chuan, “Tihtak zetin ka hrilh a che u, in zinga mi pakhat hian mi mantir dawn a ni,” a ti a.

²²Tichuan, an lungngai ta êm êm a, a hnenah chuan a mal malin, “Lalpa, keimah em ni?” an ti theuh va.

²³Ani chuan a chhang a, “A kuta thleng mi zenpuitu ngei chuan mi mantir ang.

²⁴Mihring Fapa hi a chanchin an ziah ang zelin a kal dawn a ni; nimahsela, Mihring Fapa mantirtu tur mihringa chung chu a pik e! Chu mihring chu piang lo law law se a tan a tha zawk tur,” a ti a.

²⁵A mantirtu tur Juda chuan a zawt a, “Rabbi, keimah em ni?” a ti a. Ani chuan a hnenah, “I sawi chiah chu a ni e,” a ti a.

ISUAN LALPA ZANRIAH BUL A TAN

²⁶Chaw an ei laiin Isuan chhang a la a, mal a sawm a, a phel a, zirtirte hnenah a pe a, “La ula, ei rawh u; hei hi ka taksa a ni,” a ti a.

²⁷No pawh chu a la a, lawmthu a sawi a, an hnenah a pe a, “In zain in rawh u.

²⁸Hei hi ka thisena thuthlunna thar, mi tam tak sual ngaihdam nana chhuak tur chu a ni.

²⁹Nimahsela, ka hrilh a che u, ka Pa lalramah nangmahni nen a thar ka in hun a lo thlen hma loh chuan, tun achinah grêp rah tui hi ka in leh tawh lo vang,” a ti a.

³⁰Hla an sak zawhin an chhuak a, Olive Tlangah chuan an kal ta a.

PETERAN A PHATSAN TUR ISUAN A SAWI LÂWK

³¹Isuan an hnenah, “Zan inah hian in zain kei hi min phatsan vek ang, heti hian ziah fel diam a ni tawh: ‘Berâmpu chu ka vua ang a, Berâm rual chu an tlân darh ang,’ tiin.

³²Kaihtawha ka awm leh hnuah erawh chuan, Galili ramah in hmaah ka kal ang,” a ti a.

³³Peteran a hnenah, “Mi dang zawngin phatsan vek dawn che mahse, kei chuan ka phatsan ngai lo vang che,” tiin a chhâng a.

³⁴Isuan a hnenah, “Tihlak meuhvin ka hrilh a che, zan inah hian âr a khuan hmain nang hian vawi thum mi phat ang,” a ti a.

³⁵Peteran a hnenah, “I thihnaah chuan thi ve dawn mah ila, ka phatsan hauh lo vang che!” a ti a. Zirtir dang zawngte pawhin chutianga baw chuan an ti theuh va.

HUANA ISUA TAWNGTAINA

³⁶Isua chu anniho nen chuan hmun pakhat Gethsemani an tih chu an lo thleng a, a zirtirte hnenah, “Sawtah sawn tawngtai tura ka va thang hlanin hetah hian lo thu rawh u,” a ti a.

³⁷Petera leh Zebedai fapate pahni chu a hruai a, a lungngaiin a lo mangang ta êm êm a.

³⁸An hnenah, “Ka lungngaihna hi a nasa êm a, thihpuina tham hial a ni. Hetah hian awm ula, mi vênpu rawh u,” a ti a.

³⁹Hma lamah a va kal sawn hlek a, a baw thlawp a, “Aw ka Pa, a theih hrâm chuan he no hian mi pêl lul rawh se; nimahsela, keima thu ni lovin, nangma thu ni zawk rawh se,” tiin a tawngtai a.

⁴⁰Chumi hnu chuan a zirtirte hnenah a lo kal a, anni chu an lo muhil vek a, Petera hnenah, “E khai! Darkar khat pawh mi vênpu thei lo a ni maw?”

⁴¹Thlêmnaa in luh loh nan inring rengin tawngtai rawh u. Thlarau zawngin a peih alawm, tisa hian a zo lo a ni,” a ti a.

⁴²Tichuan, a vawi hnihna atan a va kal hrang leh a, “Aw ka Pa, he no hi ka in lohva mi pel thei lul lo a nih chuan, nangma thu ni rawh se,” a ti a.

⁴³A lo kir leh chuan anniho chu an lo muhil leh dêr tawh a, mut chhuakin a man tlat mai si a.

⁴⁴Tichuan, a kalsan leh a, a dil ngai dilin a vawi thum nan a va tawngtai leh a.

⁴⁵A zirtirte hnena a lo kir leh chuan, an hnenah, “Tun thlengin in la mu hahchawl reng mai maw? Ngai teh u, hun a teptêr tawh a nia. Mihring Fapa hi misualte kutah mantir a ni dawn ta e.

⁴⁶Tho ula, i kal ang u. Hei le, mi mantirtu tur chu a lo hnaih tak hi,” a ti a.

GETHSEMANIA PHATSANNA LEH IN MANTIRNA

⁴⁷Chutia a la sawi lai mek chuan ngai teh, sawm leh pahnihte zinga mi Juda chu, puithiam lalte leh vantlang upate hnen ațanga lo chhuak mipui tam tak nen, khandaihte leh talhtumte kengin an lo thleng ta mai a.

⁴⁸A mantirtu tur chuan chhinchhiahna a lo hrilh lawk diam a, “Ka fawh apiang chu amah a ni ang, man ang che u,” tiin.

⁴⁹Rang takin Isua chu a pan nghal a, “Chibai, Rabbi!” tiin a fawp ta a.

⁵⁰Isuan a hnenah, “Thiana, eng ti turin maw i lo kal a?” a ti a. Tichuan, Isua chu an man a, an hruai ta a.

⁵¹Chu veleh Isua zuitute zinga pakhat chuan a kut lek chhuakin a khandaih a phawi a, puithiam lalber chhiahhlawh chu a sat a, a beng a sah thlaksak a.

⁵²Mahse, Isuan a hnenah, “I khandaih kha a paiah khung rawh, khandaih chelektute zawng zawng chu khandaih bawka tihhlum an ni dawn asin.

⁵³Tunah pawh Vantirhkohe singsarih leh sanghni aia tam han tir nghal turin ka Pa hnenah ngên thei lovin mi ring em ni?”

⁵⁴Ngên ta ila, Pathian Lehkha Thuin he thil lo thleng tur a sawi kha engtin nge a lo thlen theih ang?” a ti a.

⁵⁵Chutih lai chuan Isuan chung mite hnenah chuan, “Khandaih leh talhtum kengin, suamhman man tur ang maiin inrawn thawk a ni maw? Ni tin tempulah zirtirin in zingah ka thu thin a, mi man si lo va.

⁵⁶Mahse, zâwlneite Lehkhabuin a sawi anga a lo thlen theihna turin heng zawng zawng hi a lo awm ta a nih hi,” a ti a. A zirtirte chuan ani chu phatsanin an tlan chhe ta vek a.

ISUAN SANHEDRIN-HO A HMACHHAWN

⁵⁷Isua mantute chuan dan zirtirtute leh vantlang upate lo pun khawmna, puithiam lalber Kaiapha inah chuan an hruai a.

⁵⁸Petera pawhin hla fê ațanga zuiin puithiam lalber tualzâwl arawn thleng ve a. A va lut a, a tawp thlenga thil awm dan hmu turin chhiahhlawhho zingah a va thu ve a.

⁵⁹Puithiam lal te, upate leh rorêltuho zawng zawng chuan Isua an tihhlum theihna turin dâwta hêkna tur an dap kual chiam a;

⁶⁰mahse an hmu si lo va. Hretu der tam tak lo kal mah se an hre thei chuang lo. Nakinah chuan hretu der pahni an lo kal ta a,

⁶¹“He mi hian, ‘Pathian tempul hi ka thiat ang a, ni thum chungin ka sa leh thei,’ a ti e,” an ti a.

⁶²Puithiam Lalber chu a lo ding chhuak a, a hnenah, “Engmahin i chhâng lo maw? Heng mite hêkna che hi eng thil nge ni ngai?” a ti a.

⁶³Isua chu a ngawi reng a. Puithiam lalber chuan a hnenah, “Pathian nung chhâlin thu ka pe a che, Krista, Pathian Fapa chu i nih leh nih loh min hrilh rawh!” a ti a.

⁶⁴Isuan a hnenah, “I sawi ang tak chu ni e. Mahse ka hrilh a che, Mihring Fapa hi Thiltitheia kut ding lama thua, van chhâm chung a lo kal i la hmu ang,” a ti a.

⁶⁵Chu veleh puithiam lalber chuan a silhfente a pawt thlêr a, “Pathian a sawi chhe ta! Engah nge thuhretu dang kan ngaih tawh ang le? En teh u, Pathian a sawi chhiatna thu in hriat tak hi!

⁶⁶Engtin nge in ngaih?” a ti a. Anni chuan, “Thi tlâk a ni,” tiin an chhang a.

⁶⁷Tichuan, a hmaiah chil an chhâk a, an vua a; thenkhat chuan amah ben pahin,

⁶⁸“Nang, Krista chuan min hrilh ta che! Tuin nge bêng che?” an ti a.

PETERAN ISUA A PHAT, LUNGCHHE TAKIN A TAP

⁶⁹Chutih lai chuan Petera chu pâwn hung chhungah chuan a thu a. Chhiahhlawh nula pakhat hi a bulah a lo kal a, “Nang pawh Galili Isua zuitu i nih ve kha,” a ti a.

⁷⁰Nimahsela ani chuan an zavaia hmaah, “I thu sawi chu ka hre hauh lo mai,” tiin a phâ a.

⁷¹In hungna kawngka lama a va chhuah lai chuan, nula dangin a lo hmu a, a bul vêla awmte hnenah chuan, “He mi pawh hi Nazareth Isua bula awm thin kha a nih hi,” a ti a.

⁷²Ani erawh chuan chhechham meuhin, “Chu mihring chu ka hre nek lo ve,” tiin a pha leh a.

⁷³Rei lo te hnuah a kianga ding ve te chuan, Petera hnenah, “Nang pawh an zinga mi i nih ngei hi, i awphâwiah a hriat reng alawm,” an ti a.

⁷⁴Ani erawh chuan ânchhia lawhin chhia a chham a, “Chu Mihring chu ka hre tawp lo ve!” a ti a. Chu veleh chuan ar a khuang ta nghal a.

⁷⁵Petera chuan, “Âr a khuan hmain nanging vawi thum mi phat ang,” tia a hnena Isua sawi kha a hre chhuak a. Pâwnah a chhuak a, lungchhe takin a va tap ta a.

BUNG 27

PONTIA PILATA HNENAH ISUA AN HLAN

¹A tuk khua a lo var a, puithiam lalte leh vantlang upa zawng zawng chu Isua an tihhlum theih dan tûr phiarin an inhâwr khâwm a;

²An phuar a, an kai a, governor Pontia Pilata hnenah an pe ta a.

JUDA A IN ÂWKHLUM

³Chung lai chuan a mantirtu Juda khan Isua thiam loh an chantir ta tih a hriat veleh a inchhîr a, tangka sawmthum kha puithiam lalte leh upate hnenah chuan a rawn la lêt leh a,

⁴“Mi thiam thisen ka phatsan kha thil ka lo tisual a ni,” a va ti a. Anni erawh chuan, “Eng atan nge chutiang chu kan tih ang? Nangma thu alâwm,” an lo tihsan a.

⁵Ani chuan silvar tangka chu tempulah a paih lut a, a kal bo va, a va inawkhlum ta a.

⁶Puithiam lalte chuan silvar tangkate chu an la a, “Hei hi sum bâwma dah a thianga lo ve, thisen man a ni si a,” an ti a.

⁷An inrâwn khâwm a, mikhualte phûmna turin Bêlvawtu hmun chu an lei ta a.

⁸Chuvangin, chu hmun chu tun thlengin ‘Thisen Hmun’ an ti ta a ni.

⁹Tichuan, zâwlnei Jeremia hrilhlawk kha a lo thleng famkim ta, tihian a lo sawi a: “Silvar tangka sawmthum an la a, A man atana an chhiar, Israel thlah, tuten emaw an chhiara man chu,

¹⁰LALPA thupek ang zelin bêlvawtu ram lei nan an pe a,” tiin.

ISUAN PILATA A HMACHHAWN

¹¹Isua chu governor hmaah chuan a ding a. Governor chuan “Judate Lal i ni em?” tiin a zawt a. Isuan a hnenah, “I sawi ang tak chu ni e,” a ti a.

¹²Puithiam lalte leh upaten dâwta an hêk laiin engmahin a chhang lo va.

¹³Pilata chuan a hnenah, “An hêkna zozai che hi i hre lo vem ni?” a ti a.

¹⁴Mahse kam khat maha a chhân loh avangin governor chuan mak a ti hle mai a.

BARABBA AI A AWHNA

¹⁵Governor chuan kût ni hian mi tâng pakhat, mipuiten an dil apiang a chhuahsak thin a.

¹⁶Chung lai chuan mi tâng, Barabba an tih, tlâng hriat khawpa misual chu an nei a.

¹⁷Chutichuan, an inrâwn khâwm zawhin Pilatan an hnenah, “Tu nge chhuahsak che u ila in duh? Barabba nge Isua, Krista an tiha hi?” a ti a.

¹⁸Itsîkna avanga an mantir mai a ni tih a hai si lo va.

¹⁹Chutia rorêlna thutthlenga a thut lai chuan a nupuiin, “Kha mi dik tak kha engtin mah ti suh; wawiinah hian amah avangin ka mang lamah thil tam tak ka tuar phah a ni,” tiin thu a rawn chah a.

²⁰Nimahsela, puithiam lalte leh upate chuan Barabba chu chhuaha, Isua zawk chu tiboral tura ngên turin mipuite chu an lo hmin vek a.

²¹Governor chuan anniho chu a bia a, “Anni pahnihah hian a tu zawk nge chhuahsak che u ila in duh?” a ti leh a. Anni chuan, “Barabba lei!” an ti a.

²²Pilata chuan an hnenah, “Isua, Krista an tih hi engtin nge ka tih tak ang?” a ti a. An vai chuan, “Kraws-ah khengbet rawh!” an ti a.

²³Ani chuan, “Engah maw, eng thil nge a tih sual?” a ti a. Anniho erawh chu, “Krawsah khengbet rawh,” tiin an au tuarh tuarh a.

²⁴Pilata chuan engtin mah a dang zo dawn chuang lo va, a buai nasa ting mai dawn tih a hriatin, tui a la a, mipui hmaah chuan a kut a sil a, “He mi dik thisen lakah hian ka fihlîm e; nangnin in tih tihin ti rawh u,” a ti a.

²⁵Mipuite chuan an vaiin, “A thisen mawh chu keimahni leh kan fate chungah tla rawh se,” tiin an chhang a.

²⁶Tichuan, Barabba chu a chhuah a; Isua erawh chu a vua a, kraws-a khenbeh turin a pe ta a.

SIPAITE ISUA AN NUIHSAWH

²⁷Governor vengtu sipaite chuan Isua chu lal in hung chung Praitoriam-ah an hruai lut a, sipai zawng zawng an lo kal khawm a, amah chu an rawn hual a.

²⁸Tichuan, a puante an hlihsak a, kawrfual senduk an hâktir a.

²⁹Hlîng lukhum an phiar a, a lû-ah an khumtir a, a kut ding lamin luang tiang an kentir a. A hmaah chuan an thingthi a, “Chibai, Judate Lal!” tiin nuihza siam nan an hmang a.

³⁰Chil an chhâk a, luang tiang chuan a lû-ah an vua a.

³¹Nuihza siam nana an hman zawhin a kawrfual an hlihsak a, ama kawr chu an hâktir leh a, kraws-a khenbeh turin an kalpui ta a.

KRAWS CHUNGA LAL CHU

³²Chutia an kal chhuak chuan Kurini khuaa mi, a hming Simona an hmu a. Chu mi chu a kraws pu turin an man a.

³³Golgotha an tih hmun an lo thleng a, chu chu ‘Luruh Hmun’ tihna a ni.

³⁴A in turin thil khâ nena pawlh uain thûr an pe a. Mahse a han tem a, a in duh ta lo va.

³⁵Kraws-ah chuan an khengbet ta a, a silhfente chu thumvâwrin an insem a; chu chu zâwlnei sawi lawk lo thlen famkimna tur a ni: “Ka silhfênte an insem a, Ka kawr tân thum an vâwr a,” tih kha.

³⁶Thuthmun remin amah chu an veng ta a.

³⁷A lu chungah chuan an hêkna thuziak: “HE MI HI ISUA JUDATE LAL A NI” tih an tar a.

³⁸Ama rualin suamhmang pahni an khêngbet ve a, a dîng lamah pakhat, a vei lamah pakhat.

³⁹Chumi bula mi veivâkte chuan diriam takin lu an thin khum a,

⁴⁰Amah tih-el nan, “Nang tempul thiata ni thuma sa lehtu, in chhandam ta che! Pathian Fapa i nih ahnû, kraws ata kha lo chhuk rawh,” an ti a.

⁴¹Chutiang bawkin puithiam lalte, dan zirtirtute leh upate chuan diriam takin,

⁴²“Mi dang mah tidam a, mahni intidam thei si lo. Israel Lal a nih takzet chuan kraws aţangin lo chhuk ang hmiang; tichuan amah chu kan lo awih ang chu.

⁴³Pathian a ring alawm, a duh chuan tunah ngei hian rawn chhandam rawh se; ‘Pathian Fapa ka ni,’ a inti bawk a,” an ti a.

⁴⁴Suamhmang an khenbehte pawhin chutiang bawk chuan an deusawh ve bawk a.

KRAWS-AH ISUA A THI

⁴⁵Chhun dar* 12 aţanga tlai dar 3 thlengin ram zawng zawng chungah khua a thim ta vek a.

⁴⁶Tlai dar thum velah chuan Isua chu aw ring takin, “Eloi, Eloi, lama sabakthani?” tiin a au va. Chu chu “Ka Pathian, ka Pathian, engah nge mi kalsan?” tihna a ni.

⁴⁷Chu laia dîng thenkhatten chu chu an hriatin, “He mi hian Elija a ko a nih hi!” an ti a.

⁴⁸Chu veleh an zinga mi pakhat a tlan a, tui hîpna a la a, uain thûrah a chiah a, tiangah a târ a, in turin a pe a.

⁴⁹Mi dangte chuan, “Awmtir hle hle rawh u; amah chhan chhuak turin Elija a lo kal emaw kan lo thlir ang chu,” an ti a.

⁵⁰Isua chu aw ring takin a au leh a, a thlarau a thlah ta a.

⁵¹Ngai teh, tempul puanzâr chu a chung lam aţangin a hnua lam thlengin a thlêr tlang vek a; lîr a lo nghîng a, lungpuite a lo khi chat a;

⁵²thlante a lo inhawng a; mi thianghlim muhil tawh taksa tam tak kaih thawhin an awm ta a;

⁵³chungte chu a thawhle hnuah chuan thlan ata lo chhuakin khaw thianghlimah chuan an lut a, mi tam tak hnenah an inlâr ta a.

⁵⁴Sipai za hotu leh a kianga Isua venga awm vete chuan lîrngîng leh thil awm dante chu an hmuhin, namên lovin an hlau ta a, “He mi hi Pathian Fapa a ni ngei mai!” an ti a.

⁵⁵Chutah chuan hmeichhe tam tak, a rawngbawlsak chungah Galili ram aţanga Isua rawn zuitute chu an awm a, hla tak aţangin an thlir a;

⁵⁶chung zingah chuan Mari Magdalini te, Jakoba leh Josea te nu Mari te leh, Zebedaiia fapate nu te an ni a.

JOSEFA THLANAH ISUA AN PHÛM

⁵⁷Tlai a lo nih chuan Arimathai khuaa mi hausa, a hming Josefa, Isua zirtir lo ni ve bawk chu a lo kal a.

⁵⁸Chu mi chu Pilata hnenah a va kal a, Isua ruang chu a va dil a. Pilata chuan ruang chu chu pa hnena hlan tur chuan thu a pe a.

⁵⁹Josefa chuan ruang chu a va hlâwm a, puan zai sîn fai takin a tuam a,

⁶⁰ama thlân thar, lunga kerkuakah chuan a zalh a; lung lian tak lîrin, thlân kawngka chu a khâr a, a kalsan ta a.

⁶¹Chutah chuan Mari Magdalini leh Mari dang chu an awm ve a, thlân hmazâwnah chuan an ţhu a.

PILATAN VENG TU A DAH

⁶²A tûk chu, Inbuatsaihna Ni a zawh tûk a ni a, puithiam lalte leh Pharisaite chu Pilata hnenah an pung khawm a,

⁶³“Ka pu, kha bumtu khan a dam laiin, ‘Ni thum hnuah ka tho leh ang,’ a ti tih kan hre reng a.

⁶⁴Chuvangin, thlân chu ni thum ni thlenga veng tlat turin thu pe rawh; chuti lo zawng, a zirtirte hovin zanah an ru chhuak ang a, ‘Mitthi zinga ta a tho leh ta,’ tiin an sawi darh hlauih ang e. Chutiang a nih chuan inbumna hnunngung zawk chu a hmasa ai khan a ţha lo lehzuall dawn asin,” an ti a.

⁶⁵Pilata chuan an hnenah “Vengtu sipai in nei alawm; kal ula, him tawh tura in hriat ang chuan ventir ta che u,” a ti a.

⁶⁶Chutichuan, an va kal a, thlân chu him takin an siam a, lung chu chhinchhiahnain an châr nghet a, vengtu sipaite an ventir ta a.

BUNG 28**A THO LEH TA**

¹Sabbath ni a lo zawh a, chawlhkar ni hmasa ber zîng khua a vâr dâwnin, Mari Magdalini leh Mari dang chu thlân en turin an kal a.

²Ngai teh, lîrpui a lo nghîng a; van aţangin Lalpa Vantirhkoh a lo chhuk a, thlân kawngka aţangin lung chu a rawn lîr sawn a, a chungah a ţhu ta a.

³A hmêl lan dan chu kawlpê ang a ni a, a silhfên chu vîr angin a vâ a;

⁴Vengtute chu hlau êm êmin an khûr a, thi ang dêrin an lo awm ta a.

⁵Vantirhkoh erawh chuan hmeichhiate chu a bia a, “Nangni chuan hlau suh u. An khenbeh Isua kha in zawng tih ka hria e.

⁶Hetah a awm tawh lo; a sawi ang ngeiin a tho leh tawh e. Lo kal ula, Lalpa an zalhna hmun hi rawn en mah teh u.

⁷Kal thuai thuai ula, a zirtirte hnenah, ‘Mitthi zinga ta a tho leh ta, Galili ramah in hmaah a kal e; chutah chuan amah in hmu ang,’ tiin va hrilh rawh u. Ngai teh u, ka hrilh tawh che u hi,” a ti a.

⁸Tichuan, hlauthâwng takin, lawm êm êm bawk siin thlân aṭang chuan an kal sawn thuai a, a zirtirte hrilh turin a tlânin an tlân haw ta a.

HMEICHHIATEN THOLEH LALPA CHIBAI AN BÛK

⁹A zirtirte hrilh tura an haw kawngah chuan, ngai teh, Isuan anni chu a lo tawh a, “Chibai u le!” a ti a. Tichuan, anni chuan a kephahte vuanin chibai an bûk a.

¹⁰Isuan an hnenah, “Hlau suh u. Tikhân kal ta ula, Galili rama kal turin ka unaute va hrilh rawh u; chutah chuan mi hmu ang,” a ti a.

SIPAIHO THAMNA AN PE

¹¹Chutia an kal lai chuan ngai teh, vengtu sipai thenkhat chu khawpuiah an va lut a, puithiam lalte hnenah chuan thil awm dan zawng zawng chu an va hrilh vek a.

¹²Anni chu upate nêan an inhmu khawm a, an inrâwn zawhin, sipaite hnenah chuan tangka tam tak an pe a,

¹³“Zanah kan muthilh hlanin a zirtirte an lo kal a, amah chu an ru bo ta a ni,’ ti ang che u.’

¹⁴He thu hian governor beng a lo thlen hunah, amah chu kan tilungawi ang a, nangni chu kan hum tlat ang che u,” an ti a.

¹⁵Chutichuan, tangka chu an la a, an hrilh ang zel chuan an ti ta a; chu thu chu tun thleng hian Judate zingah an la vawrh darh ta zel a ni.

THUPEK ROPUI

¹⁶Zirtir sawm leh pakhat te erawh chu Galili rama Isuan a ruat sak tlângah chuan an kal a.

¹⁷Amah an va hmuh chuan chibai an bûk a; nimahsela, mi thenkhat chuan an ringhlel a.

¹⁸Isua chu an hnenah a lo kal a, anniho chu a rawn bia a, “Lei leh vana thuneihna zawng zawng ka hnenah pêk a ni ta.

¹⁹Chutichuan kal ula, hnam tina mi zirtirah te siam ula, Pa leh Fapa leh Thlarau Thianghlim hmingin baptis ula,

²⁰thu ka pêk zawng zawng che u zâwm turin zirtir rawh u; ngai teh u, kumkhuain, khawvel tâwp thleng pawhin Keiman ka awmpui zel ang che u,” a ti a. Amen.

MARKA

Ziah tu: Johan Marka • Ziah kum: A.D. 68

He Chanchin Tha Bu ziaktu Marka hi Jerusalema chêng, Mari fapa a ni (Tirh. 12:12). Barnaba leh Paula te zin a zui ve a, mahse Perga khua ațangin a kîrsan a. Chumi hnûah a pami Barnaba hnung zuiin Kupra thliarkarah a feh chhuak ve leh a. A tîr lamah kal hrang mah se, a hnûah chuan Paula tân mi țangkai a ni leh a (Kol. 4:10; 2 Tim. 4:11; Philm. 24). Petera nêan an inkawp hle baw. Marka'n Isua chanchin a ziahah pawh hian Petera'n Isua a hmuh dân a tilang deuh nia sawi a ni. Petera pawhin 'ka fapa' a ti rêng a (1 Pet. 5:13). Marka hian Jentailte hriatthiam tîr zâwngin Krista chu Lalpa chhiahhlawh a nihna lam a târ lang deuh. German Bible critic pakhat G.C. Storr-an Chanchin Tha bu zingah Marka hi a tawi ber avângin ziah hmasak ber a ni ang e, tia a rin dân 1786 kuma a vawrh chhuah kha critic dangten puibâwmin, Matthaia leh Luka te hian Marka bu leh bu dang 'Q' source ami an copy chhawng ve ta mai a ni ang tiin, 'Two Source Theory' ngaihdan chu kum 18th leh 19th c. chhûng khan a lo piang chhuak a; chû chuan Synoptic Gospel/Problem an tih chu hring chhuakin, Bible zirtu tam ber pawm dân leh an gospel zir dân inngahna a lo ni ta a ni. Chik zâwka zir chian erawh chuan finfiahna rintlak awm lo, a inngahna 'Q' bu an tih ngei pawh a taka hmuh tîr awm lo, zirtute 'suangtuahna bu' mai a lo ni a. Marka bu a tawi bikna chhan hi, Isua zirtîrna thute ai maha a thilmak tih lam kha ama style anga tawi fel taka a ziah vâng a ni zâwk thei e. Mit ngeia Isua hmutu leh a hnungzuitu Matthaian Isua zirtîr pawh ni ve lo Marka zia lo copy chhawngtu ang leka ngaihna hian a ti-dapchawp theory deuh baw. Marka khan Matthaia leh Luka ziahte hi copy-in a kaitawi a ni zawk ang, tia mithiam dangte theory pawh finfiah a ni chuang lo. Thu Chiang erawh chu, hêng thâwkkhum bute hi "Thlarau Thianghlimin a hriatîr ang zêlin Pathian mi thianghlimten an 'ziak' a ni tih hi a ni (2 Pet. 1:21). Matthaia bu hi hmasâng Kohhran Paten Chanchin Tha Bu ziaktu hmasa ber nia an hriat avânga Thuthlung Thar bu zînga lo dah hmasa an ni. Marka bu hi Bible-a bu 41-na a ni a, bung 16 leh châng 678 a awm.

BUNG 1

BAPTISTU JOHANA KAWNG BUATSAIH

¹Pathian Fapa, Isua Krista Chanchin Tha bulțanna chu.

²Zâwlneite lehkhâbûah: "Ngai teh, i hmâi hmâah ka tirhkoah ka tîr a, i hmâa i kawng buatsaihtu tîr chu."

³"Thlalêra mi âu âw chuan, 'LALPA lamlian sial ula, A kawngte tingîl rawh u,'" tia ziah ang khân,

⁴Johana chu thlalêrah mite baptis tîr leh sual ngaihdam nân simna baptisma thû hrilin a lo kal a.

⁵Judai rama mi zawng zawng leh, Jerusalem khuah mite chu a hnên lam panin an kal chhuak a, an sualte puangin Jordan luih an zain baptisma a lo chantîr hlawm a.

⁶Johana chu sanghawngsei hmuh puanin a inthum a, a kâwng chu savun kâwnghrênin a hrêng a, khaukhuap leh ram khawizû chaw-ah a ring thîn a ni.

⁷"Ka hnungah keimah aia thiltithe i zâwk a lo kal mêk a ni; kûna a pheikhaw hrui phelhsak tlâk pawh ka ni lo ve.

⁸Kei chuan tuiin ka baptis thîn che u a; mahse ani chuan Thlarau Thianghlimin a baptis ang che u," tiin thû a hril thîn.

JOHANAN ISUA A BAPTIS

⁹Chûng hun lai chuan Isua chu Galili rama Nazaret khua ațangin a lo kal a, Jordan luih chuan Johana hnênah baptisma a chang ta a.

¹⁰Tui ațanga a lo chhuah vêleh vân a lo inhawng a, Thlarau chu thûro anga a chunga lo chhuak a hmu a.

¹¹Tichuan, vân ațangin âw a lo chhuak a, "Nang ka Fapa duh tak i ni a, i chungah ka lâwm êm êm a ni," a rawn ti a.

SETANAN ISUA A THLÊM

¹²Thlarau chuan ani chu thlalêrah a tîr chhuak ngâl a.

¹³Setana thlêm chungin thlalêrah chuan ni sawmli a awm a, ramsa zîngah te a chêng a; Vântirhkohte chuan a rawng an bâwlsak a.

ISUAN GALILI-AH RAWNG A BAWL ȲAN

¹⁴Johana chu lung ina an tântîr hnûin, Isua chu Pathian Lalram Chanchin Tha hrilin Galili ramah a lo kal a,

¹⁵"Hun chu a lo thleng ta e, Pathian lalram pawh a lo hnai ta. Sim ula, Chanchin Tha hi ring rawh u," a ti zêl a.

LÊNDÊNG PALI ZIRTIRA SIAM

¹⁶Galili dîl kama a kal laiin Simona leh a unaupa Andria-ten dîlah lên an lo dêng lai a va hmu a; sangha mantu an ni a.

¹⁷Isuan an hnênah, "Mi zui rawh u, tichuan mihring mantû atân ka siam ang che u," a ti a.

¹⁸Tichuan, an lênte chu kalsanin an zui ngâl a.

¹⁹Chuta țang chuan hla lo tê a kal sawn a, Zebedaia fapa Jakoba leh a unau Johana te a va hmu a, an lên te siam thain lawngah chuan an lo awm a.

²⁰Anni pawh chu a ko vê nghal a; tichuan, an pa Zebedaia chu inhlawhfa an rawih, lawnga awmte nêan chuan an kalsan a, an zui ta a.

ISUAN THLARAU BAWLHHLAWH A HNAWT CHHUAK

²¹Chumi hnûah chuan Kapernaum khuah an va lût a; Sabbath ni chuan biak inah a inkhâwm a, a zirtîr ngâl a.

²²A thu zirtîr chu miten mak an ti hle a, dân zirtîrtute ang lova, thunei taka anmahni a zirtîr thîn avângin.

²³Biak in chhûngah chuan ramhuai bawlhhlawh pâi mi pakhat a lo awm ve reng a. A rawn âu chhuak a,

²⁴"Mîn awmtîr hlê hlê rawh u! Nazaret Isu, nang nêna inzawmna eng nge kan neih? Mîn tiboral tûrin i lo kal em ni? Nang ka hria a che, Pathian Mi Thianghlima chu i ni," a ti a.

²⁵Mahse Isuan a hau va, “Ngâwi la, hê mi hi chhuahsan rawh,” a ti a.

²⁶Tichuan, thlarau bawhlhlawh chuan a tikhûr chiam a, ring taka âu chungin a chhuahsan ta a.

²⁷An vâi chuan mak an ti êm êm a, “Hei hi eng thil nge ni ta ngai le? Eng zirtîrna thar nge ni ta? Thunei takin thû a pê a, thlarau bawhlhlawhte pawhin an zâwm zêl mai a nih hi,” tiin an inzâwt vêl a.

²⁸Galili chhehvêla ram tin kil tinah a chanchin chu a thang chhuak nghâl a.

PETERA PIZAWN TIHDAM

²⁹Biak in ațanga an lo chhuah vêleh Jakoba leh Johana nê, Simona leh Andria te inah chuan an lût a.

³⁰Simona nupuia nu chu khawsikin, khumbetin a lo nâ a; a dam loh thû chu Isua an hrilh thuai a.

³¹Ani chu a lo kal a, a kutah a chelh a, a kai tho va, a khawsik chuan a thlah ta nghâl a. An ei rawng a bâwlsak ta a.

³²Tlai lama ni a tlâk hnu chuan, damlo zawng zawng leh ramhuai mante chu a hnênah an rawn hruai a.

SABBATH NI TLAK HNUA TIHDAMNA

³³A khaw mipui chu kawngkhâr bulah chuan an lo awm khawm ta hmur mai a.

³⁴Tichuan, natna tinrenga nâ mi tam tak a tidam a, ramhuai tam tak a hnawt chhuak bawk a; ramhuaite chu an ățawng ve pawh a phalsak lo, tu nge a nih an hriat avângin.

GALILI RAMA THUHRIL

³⁵A tûkah chuan, zîng khawvâr hmâin a tho va, a kal chhuak a, fianrialah a va kal a; chutah chuan a ățawngțai a.

³⁶Simona leh a ățiante chuan amah chu an lo zawng ruai ruai a.

³⁷Amah an va hmuh chuan a hnênah, “Mi zawng zawngin an zawng che asin,” an ti a.

³⁸Mahse ani chuan an hnênah, “Khaw ățenawm hnaivâiahte pawh thû ka hril theihna tûrin i kal zêl ang u, chû chu ka lo kal chhan a ni si a,” a ti a.

³⁹Galili ram pum chu a fang chhuak vek a, an biak inahte thû hrilin, ramhuaite a hnawt chhuak zêl a.

ISUAN PHÂR A TITHIANGHLIM

⁴⁰A hnênah chuan phâr pakhat a lo kal a, “Duh la chuan mi tithianghlim thei e,” tiin a hmâah ățingțhiin a ngên chiam a.

⁴¹Isuan a lo khawngaih êm êm a, a lo ban a, a dek a, “Ka duh e, lo thianghlim tawh ang che,” a ti a.

⁴²A sawi zawh vêleh a phâr chu a dam ta nghâl a, a lo thianghlim ta a.

⁴³Khauh takin thû a pê a, a kal botîr leh nghâl a,

⁴⁴a hnênah, “Tû hnênah mah sawi darh suh ang che; tikhân kal la, puithiam hnênah va inentîr la, i inthen nân Mosian thil a ruatte kha hlân rawh, i lo dam ta tih an hriat fiahna tûrin,” a ti a.

⁴⁵Nimahsela, ani chu a kal chhuak a, inthup a hnêkin, nasa takin a va puang zâr ta zâwk a; chuvângin, Isua chu khaw chhûnghah zalên takin a lût thei ta lo va, fianrial a chuh a; tichuan, ani chu miten hmun tin ațangin an rawn pan khâwm ta a.

BUNG 2

ISUAN ZENG A NGAIDAM A, A TIDAM

¹Ni engemawti hnûah Kapernaum khu a lo luh lehin, in chhûnghah a awm tih thû a lo thang ta a.

²Tichuan, mipui tam tak an lo pung khâwm nghal a, kawngka bulah pawh awmna leng lo khawpin an khat vek a. An hnênah chuan thû a hril ta a.

³Zeng pakhat chu mi palîin zâwnin, a hnênah an rawn hruai a.

⁴Mipui avângin a bul hnai an lo thleng thei lo va, a awmna zâwn inchung chu an ățiat a. An ățiahna âwngah chuan zeng chu a mutna khum chawpin an thlâk thla a.

⁵Isuan an rinzia a lo hmuhin zeng hnênah chuan, “Ka fapa, i sualte ngaihdam a ni tawh e,” a ti a.

⁶Chuta lo ățu ve dân zirtîrtute chuan an rilrûin an ngaihtuah a,

⁷“Hê mi hian engati nge Pathian sawi chhiatna thû hetiang a sawi chhuah tâk? Pathian chauh lo chuan tûin nge sualte ngaihdam thei le?” an ti a.

⁸Nimahsela, Isuan chutiang thu an ngaihtuah tih a rilrûin a lo hre tlang nghal a, an hnênah, “Chûng thû chu engati nge in rilrûa in ngaihtuah ni?”

⁹Zeng hnênah hian, ‘I sualte ngaihdam a ni tawh,’ tih leh, ‘Tho la, i mutbû têt la, kên kal tawh rawh,’ tih hi a eng nge sawi awlsam zâwk?

¹⁰Lei chungah hian Mihring Fapain soal ngaihdam theihna a nei tih in hriatna tûr a nih hi,” a ti a. Zeng hnênah chuan,

¹¹“Ka hrilh a che, tho la, i mutbû la la, i inah haw rawh,” a ti a.

¹²Ani chu a tho thuai a, a mutbû chu a têt a, an zâa mithmuhah a kal chhuak ta a; tichuan, an zavai chuan mak an ti êm êm a, “Hetiang rêng rêng hi kan la hmu ngai lo!” tiin Pathian an châwimâwi a.

CHHIAHKHAWNTU MATTHAIA

¹³Chuta ățang chuan dîl kamah a kal chhuak a; mipui zawng zawng pawh a hnênah an lo kal a, ani chuan a lo zirtîr a.

¹⁴A kal pahin Levia, Alphaia fapa chu chhiah pêkna office-a lo ățu a va hmu a. A hnênah, “Mi zui rawh,” a ti a. Ani chu a tho va, a zui ta a.

¹⁵Isua chuan Levia inah chawhlui a kîl a, chhiahkhawntute leh misual tam takin Isua leh a zirtîrte chu an kîlpui hlawm a; an tam hle a, amah chu an zui ve ta a.

¹⁶Misualte leh chhiahkhawntute chaw a kîlpui tih an rawn hmuh chuan dân zirtîrtute leh Pharisaite chuan a zirtîrte hnênah, “Engtizia nge chhiahkhawntute leh mi sualte hnênah a ei a, a in le?” an ti a.

¹⁷Isuan chû chu a lo hria a, an hnênah, “Mi hrisêlte chuan daktawr an ngai lo va, mi bawrsâwmte zâwkin an ngai a ni. Mi

fel-ho lam tûrin ka lo kal lo va, mi sualten an lo sim theih nâna lo kal ka ni zâwk,” a ti a.

CHAWNGHEI THU-AH ISUA AN CHHÂL

¹⁸Johana zirtîrte leh Pharisaite chuan châw an nghei a. Anni chu an lo kal a, a hnênah, “Johana zirtîrte leh Pharisaiten châw an nghei thîn si a, engati nge i zirtîrte lêmin an nghei ve loh?” an rawn ti a.

¹⁹Isuan an hnênah, “Moneitu chu a thiante zînga a la awm mêk laiin moneitu thianten châw an nghei thei em ni? An hnêna moneitu a la awm chhûng chuan châw an nghei thei lo vang.

²⁰Nimahsela, moneitu chu an hnên aţanga hruai bo ni a lo la thleng ang a, chu mi hunah erawh chuan an la nghei ve ang chu.

²¹“Tûma’n puan thar khawng takin puan hlui an bel ngai lo; bel ta sela, puan thar chuan a hlui chu a kaiţet ang a, a lo thlêr nasa zâwk ang.

²²Tûma’n uain dahna savun ip hluiah uain thar an thun ngai lo; thun ta se uain thar chuan savun ip hlui chu tâwn puakin uain chu a bua ang a, a dahna ipin a chhiat phah bawk ang. Uain thar chu savun ip tharah an thun tûr a ni,” a ti a.

ISUA HI SABBATH LALPA A NI

²³Vawi khat chu Sabbath niin buh hmunah an kal tlang a; chutia an kal pah chuan a zirtîrte chuan buh vûite chu an thliak a.

²⁴Pharisaite chuan a hnênah, “En teh, engati nge Sabbath nia thil thiang lo an tih tâk mai?” an ti a.

²⁵Ani chuan an hnênah, “Davida leh a thiante rilţâm leh tlachhama an awm laia an thiltih kha in chhiar lo vem ni:

²⁶Khatia puithiam lalber, Abiathara hun laia Pathian ina a luha, puithiamte chauh tih loh, midang tâna ei thiang lo chhang thianghlim chu a ei a, a thiante hnêna a pêk ve thû kha?” a ti a.

²⁷Amah vêkin an hnênah, “Sabbath hi mihring tâna siam a ni a, mihring hi Sabbath tâna siam a ni lo.

²⁸Chuvângin, Mihring Fapa hi Sabbath Lalpa pawh a ni bawk asin,” a ti a.

BUNG 3

SABBATH NI A TIHDAM

¹Biak inah chuan a lût leh a, chutah chuan mi pakhat kut zeng a lo awm a.

²Tichuan, amah an hêk theih nân, Sabbath ni-a a tihdam dâwn leh dâwn loh an lo enthla a.

³Ani chuan kut zeng hnênah, “Lo pên chhuak rawh,” a ti a.

⁴An hnênah chuan, “Sabbath ni hian tihţhat nge thiang tihchhiat, nunna chhan nge thiang tihhlum?” tiin a zâwt a. Anni chu an ngawi reng a.

⁵Thinur tak chungin anmahni lam a hawi kual a, an thinlung a khauh êm avânga rilru na ngawih ngawih chungin chu mi hnênah chuan, “I kut phar rawh,” a ti a. A han phar chhuak a, a kut chu a lehlam ang maiin a lo dam ta a.

⁶Pharisaiho chu an chhuak a, amah tihboral theih dân tûr ngaihtuahin Heroda pâwla mite nên chuan an phiar ţan nghâl a.

MIPUI TAM TAKIN ISUA AN ZUI

⁷Isua chu a zirtîrte nên dîl lamah an va inthiarfihlîm a. Nimahsela, Galili ram aţangte, Judai ram aţangte,

⁸Jerusalem aţang te, Idumai ram leh Jordan râl aţangte, Tura leh Sidon khua aţangte chuan a thil ropui tih chanchin an lo hriatin, a hnênah chuan mipui tam tak an lo pung khâwm a.

⁹Mipui an tam êm avângin an rawn chîm buai loh nân a tân lawnglêng pakhat lo buatsaih tûrin a zirtîrte a hrilh a.

¹⁰Mi tam tak a lo tihdam tawh thîn avângin natna nei apiangin amah deh tumin an bâwr luai luai si a.

¹¹Thlarau bawhlhlawhte pawhin amah chu an hmuh apiangin a hmâah bawkkhupin, “Nang ngei hi Pathian Fapa chu i ni,” tiin an âu chhuak thîn.

¹²Nimahsela, a chanchin puang darh lo tûrin a khap tlat a.

ZIRTIR SAWM PAHNIHTE

¹³Tlângah chuan a chho va, amahin a duh zâwng apiang chu a ko va. A hnênah chuan an han kal a.

¹⁴An zîng aţang chuan sâwm leh pahnih a ruat a, anni chu ama hnêna khawsa reng tûr te, thu hrila a tîrh chhuah theih nâna ruat an ni bawk a.

¹⁵Damlote tidam a, ramhuaite hnawhchhuah theihna tûrin thiltihtheihna a pê a;

¹⁶Chûngte chu Simona, Petera tia a koh te,

¹⁷Zebedeia fapa Jakoba leh Jakoba unau Johana te an ni. Chûng mite chu Bonergia a vuah a, chu chu “Khawpuiri Fate” tihna a ni a;

¹⁸Andria te, Philipa te, Bartholomaia te, Matthaia te, Thoma te, Alphaia fapa Jakoba te, Thaddaia te, Kanaan mi Simona leh,

¹⁹a mantîrtu Juda Iskariota te an ni. Tichuan in chhûngah an lût a.

INDO CHHUNGKUA DING CHHUAK THEI LO

²⁰Mipui an lo pung khâwm leh chiam a, an tân chaw ei ngaihna pawh a awm ta lo hial a.

²¹A chhûngte erawh chuan an lo hriatin, “A â ta anih chu le,” tiin amah chu hruai tumin an va pan a.

²²Jerusalem aţanga dân zirtîrtu lo chhukte chuan, “Belzebub-a a zâwl a nih hi,” an ti a; “Ramhuai lal avângin alâwm ramhuaite a hnawh chhuah thîn ni,” an ti bawk a.

²³Isuan anniho chu a ko va, tehkhin thûin an hnênah: “Setanan engtin nge Setana vêk a hnawh chhuah theih?”

²⁴Lalram pawh mahni a indo chuan, chu lalram chu a ding chhuak thei lo vang.

²⁵Chhûngkua pawh an indo chuan, chu mi chhûngkua chu a ding chhuak thei lo vang.

²⁶Setana pawh mahni a indova, amah leh amah a inkhin chuan, din chhuah ahnêkin a boral phah zâwk ang.

²⁷Tûma’n mi chak ina lûtin a sum chu an laksak thei lo vang, chu mi chak chu an phuar hmasak zet loh chuan. An phuar hnûah chauh chu in chu an rawk thei dâwn a ni.

NGAIHDAM THEIH LOH SUAL

²⁸Tiitak zetin ka hrilh a che u. Mihring fate hi an sualna zawng zawng leh Pathian an sawi chhiatna tinrêngte pawh ngaihdam an ni ang;

²⁹Thlarau Thianghlim lehzêl an sawi chhiat erawh chuan ngaihdamna an chang ngai lo vang a, chatuana thiam chang lo tûr an ni zâwk ang,” a ti a.

³⁰chumi a sawi chhan chu, “Thlarau bawlhhlawh a zâwl,” tia an puh vang a ni.

A NU LEH A UNAUTEN ISUA AN ZAWNG

³¹Chumi hnû chuan a nu leh a unaute chu an lo kal a, pâwnah an ding a, amah ko tûrin mi an tîr a.

³²A vêlah chuan mipui an thu khat vek si a; a hnênah chuan, “En teh, i nu leh i unauten an zawng che a, pâwnah sâwn an awm e,” an ti a.

³³Ani erawh chuan an hnênah, “Ka nu leh ka unaute chu tute nge ni?” tiin a chhâng a.

³⁴A kiang vêla thûte lam chu a hawi kual a, “Ka nu leh ka unaute chu heta mite hi an nih hi!

³⁵Tûpawh Pathian duh zâwnng ti apiang chu ka unaute, ka farnute, ka nute an ni asin,” a ti a.

BUNG 4

BUHCHI THEHTU TEHKHIN THU

¹Dîl kamah chuan a zirtîr leh a. Mi pui tam tak a hnênah an lo pung khâwm a, tichuan dîl chung a lawngah chuan a chuang a, a thû a; mipui zawng zawng chu vaukamah chuan dîl lam hawiin an awm a.

²Tehkhin thû hmangin thu tam tak a zirtîr a; hetiang hian a hrilh a:

³“Beng lo chhi ula, ngaithla rawh u! Buh chi thehtu chu buh chi thehin a feh a;

⁴A theh laiin, a then kawng sîrah a tlâ a, savaten an rawn tlân zo ta mai a.

⁵Thenkhat chu pialtlêp lung hmun, lei panna hmunah a tlâ a; lei a chhah loh avângin a ʔo thuai a;

⁶nimahsela, nî a lo tlângsân deuh chuan a em vui a, zung a neih loh avângin a râwp ral ta mai a.

⁷Thenkhat hnimhlingnei zîngah a tlâ a, hnimhlingnei chu a lo ʔo sang a, a dîp ral a, rah rêng a chhuah ta lo va.

⁸Thenkhat erawh chu lei ʔaah a tlâ a, a ʔo va, a ʔhang lian a, rah a chhuah ta a: a leh sawmthum te, a leh sawmruk te, a leh zâ tein a lo pung ta a,” a ti a.

⁹Amah vekin, “Tupawh hriatna tûra beng nei chuan hre rawh se!” a ti a.

TEHKHIN THU TUM

¹⁰Amah chauhva a awm laiin sâwm leh pahnihte leh a ʔhuihruai dangte chuan tehkhin thûte chu an zâwt fiah a.

¹¹Ani chuan an hnênah, “Pathian lalram thurûk chu nangni tân chuan hriat phal a ni a, pâwn lama mite tân erawh chuan engkim tehkhin thû veka sawi a ni;

¹²Hmu reng si a, a ngaihna an hriat loh nân, Bengin hre mah se a awmzia an hriat loh nân; Chuti ni lo se an hawi kîr leh ang a, An sualte ngaihdam a ni mai tûr,” a ti a.

BUHCHI THEHTU TEHKHIN THU HRILHFIAHNA

¹³Amah vekin an hnênah, “Hê tehkhin thu hi in hre thiam lo maw? Chuti chu engtin nge tehkhin thu dang rêng rêng pawh in hriatthiam theih ang?

¹⁴Buh chi thehtu chuan thû chu a theh a.

¹⁵Kawng sîra theh chu hêngte hi an ni: thû an hriat vêleh Setana a lo kal vat a, an thilunga thu theh chu a lâksak ngâl ʔhîn.

¹⁶Chutiang bawkin, pialtlêp chung a theh chu: thû an hriat veleha lâwm taka pawm ngâl mai te hi an ni;

¹⁷anmahniah zung rêng an nei lo va, an daih rei thei lo a ni. Rei lo te hnûah thû avânga hrehawmna emaw, tihduhdahna emaw a lo awm vêleh an tlu ngâl mai ʔhîn.

¹⁸Hnimhlingnei zînga thehte chu hêng hi an ni: chúng mite chu thu hre tawh te an ni a,

¹⁹nimahsela, khawvêl thil thlâkhlehnate, hausak duhna rilrute, thil dang dang châknate chu a lo luhin thû chu a dîp ral a, rah nei lovin a lo awm ʔhîn.

²⁰Lei ʔaah theh chu hêng hi an ni: thû chu hriaa, pawma, a leh sawmthum te, a leh sawmruk te, a leh zâ tea rah ʔhîn te hi an ni,” a ti a.

BÂWM CHHÛNGA KHÂWNVÂR

²¹Amah bawk chuan an hnênah, “Khâwnvâr hi bâwm chhûngah emaw, khum hnuaiah emaw an dah ngai em ni? A hûnna hmunah an dah tûr a ni zâwk lo vem ni?

²²Puanzâr loh tûra zêp engmah a awm lo va, lang lo tûra thuhrûk engmah a awm hek lo.

²³Tûpawh hriatna tûra beng nei chuan hre rawh se,” a ti a.

²⁴Amah vekin an hnênah, “In thu hriat chu eng nge a nih ngaihven rawh u. In teha ngai bawkin an tehsak ve ang che u; in thu ngaithlatute phe chu, an teh uar sak zâwk mah ang che u.

²⁵Tûpawh a nei hnênah chuan tam zâwk pêk belhchhah a ni ang; tûpawh a nei lo chu, a neihchhun pawh an lâksak ang,” a ti a.

THLAI CHI ʔHAN DAN TEHKHIN THU

²⁶Tihian a sawi a, “Pathian lalram chu hetiang hi a ni: miin leiah hian thlai chi theh sela,

²⁷zânah muhîlin chhûnah tho ʔhîn sela, thlai chi chu engtia lo ʔiaka lo ʔhang lian nge a nih a hre lo ang hi a ni.

²⁸Lei hian amahin rah a chhuah ʔhîn; a tîr berah a hnah, a dawtah a vûi, chumi zawhah a vûiah chuan buh hûm a lo awm ʔhîn.

²⁹Nimahsela, a rah chu a lo hmin chuan, buh seng a lo hun tawh avângin ani chuan favah chu a lek chhuak ngâl ʔhîn a ni,” a

ti a.

ANĀM CHI TEHKHIN THU

³⁰Amah vêkin, “Pathian lalram chu engtin nge kan tehkhin ang? Eng tehkhin thu hmangin nge kan hrilhfiah ang?

³¹Anām chi fang ang hi a ni e, leia theh a nih lai chuan, leiah hian chi tê ber a ni a,

³²a theh hnûah erawh chuan a lo thang lian a, thlai dang zawng aia a lo lian ta zâwk a, zâr lian tak tak a rawn chhuah a, chunglêng savate chuan a buk hlimah bu an chhep thîn a ni,” a ti a.

ISUA TEHKHIN THU HMAN DAN

³³Chutiang tehkhin thu tam tak hmang chuan an hriat theih tûrin an hnênah a sawi thîn.

³⁴Tehkhin thû lovin an hnênah thu a sawi lo. Anmahni chauhva an awm hunah erawh chuan, a zirtîrte hnênah engkim a hrilhfiah thîn.

THĹ LEH TUIFĀWNIN ISUA THU AN AWIH

³⁵Chu mi ni tlai lamah chuan ani chuan an hnênah, “RĹ lehlamah sâwn i kai ang u,” a ti a.

³⁶Mipuite chu kalsanin, ani chu a chuanna lawngin an kalpui ta a. Lawnglêng dangte pawh an kal ve bawh a.

³⁷Thlipui na tak a lo tleh a, tuifâwn chuan lawng chu a rawn vûr hlawp hlawp a, lawng chu tuin a khat dâwn ta mai a.

³⁸Ani lah chu lawng mei lamah a awm a, lukham khamin a lo muhîl a. An kai tho va, a hnênah, “Zirtîrtu, kan boral hi pawî i ti lo vem ni?” an ti a.

³⁹Ani chu a lo harh a, thĹ chu a hau va, dĹ hnênah pawh chuan, “Ngâwî la, awm hlê hlê rawh!” a ti a. Tichuan, thĹ chu a bâng a, a reh ta a.

⁴⁰Anniho hnênah chuan, “Engati nge heti taka in hlauh mai le? Engtizia nge rinna rêng rêng in neih loh?” a ti a.

⁴¹Tichuan, an hlau ta êm êm a, “Hê mi hi tu nge ni le, thĹ leh dĹ lehzel pawhin a thu an âwih mai le?” an inti hlawm a.

BUNG 5

RAMHUI MAN TIHDAM

¹Tichuan, dĹ râla Gadarin mite ram chu an lo kai a.

²Lawng aţanga a chhuah hnû chuan mi pakhat, thlarau bawlhhlawh pâi, thĹan aţanga lo chhuakin a rawn tâwk thut mai a;

³chû pa chu thĹanah a chêng thîn a, tûma’n an phuar bet thei lo va, khaidiat pawhin an phuar thei chuang lo,

⁴kawlte leh khaidiatte pawhin an phuar fo tawh thîn a; nimahsela khaidiatte chu a pawt chat a, kawlte pawh chu a titliak mai a; tumah tudawl thei an awm lo va.

⁵Achhûn azânin thĹanah te leh tlângah te chuan a au vak vak a, lungte pawhin a inzai thîn a.

⁶RĹ khat aţanga Isua a lo hmuh vêleh chu pa chu a rawn tĹan a, chibai a rawn bûk a.

⁷Aw ring taka âuvin, “Isu, Pathian Chungnungbera Fapa, kei leh nangin eng nge inzawmna kan neih? Mi nghaisa lul lo tûrin Pathian hmingin ka ngên chiam a che,” a ti a.

⁸Isuan a hnênah “Nang, thlarau bawlhhlawh pa, mihring chhûng aţang khân lo chhuak rawh!” a lo ti tawh si a.

⁹Ani chuan, “Tu nge i hming?” tiin a zâwt a. Ani chuan, “Ka hming chu Nuaia* a ni, tam tak kan ni si a,” a ti a.

¹⁰Chumi ram aţanga anmahni tîr chhuak lo tûrin Isua hnênah a dĹ bawh a.

¹¹Chulai vêla tlâng pangah chuan chĹaw zawngin vawh rual tam tak an tĹa a.

¹²Ramhuaite chuan, “Vawh rual zîngah sâwn min kaltîr rawh, an kawchhûngah te kan luh theih nân,” tiin amah chu an ngên a.

¹³Isua chuan a phalsak nghâl a. Tichuan, thlarau bawlhhlawhte chu an chhuak a, vawh kawchhûngahte chuan an lût a (sanghnihi lai an ni a); vawh rual chu awih pangah chuan an tĹan thĹa chiam a, dĹlah an tĹan lût a, tuiah an tĹa hlum ta a.

¹⁴Vawh vulhtute chu an tĹânchhia a, khuah leh chu lai ram vêlahte chuan an sawi darh a. Tichuan, eng thĹ nge lo thleng ta tih en tûrin mite chu an lo kal chhuak hlawm a.

¹⁵Isua hnên an lo thleng a, ramhuai ‘nuaia’ pâitu kha thuamhnaw inbel a, rilru pangngai pua lo thû ve reng chu an rawn hmû a. An hlau ta hlê a.

¹⁶Chûng mite hnênah chuan thĹ awm dan hmutute chuan chu ramhuai mana chung a thĹ thlen dân leh vawh chanchin chu an lo hrilh a.

¹⁷Chûng mite chuan ani chu an ram chhuahsan tûrin an ngên a.

¹⁸Chutia lawnga a chuan dâwn lai tak chuan ramhuai man hnûa khân Isua hnêna awm ve zêl a dĹ a.

¹⁹Nimahsela, Isuan a phal lo va, “I in lamah, i thiante hnênah hâw la, Lalpan i tĹn thĹ a tihsak ropuizia che leh a khawngaihzia che hi va puang zâwk rawh,” a ti a.

²⁰Tichuan a kal a, Dekapoli khuahste chuan Isuan a tâna thĹ a tihsak ropuizia chu a tlangaupui ta a; mi zawng zawng chuan mak an ti hle a.

HMEICHHE NAUPANG TIHNUN LEH HMEICHHE THIPÛT TIHDAM

²¹Isua chu lawngin râĹ lehlam a lo kai leh a, a hnênah chuan mipui tam tak an rawn pung khâwm a; ani chu dĹ kamah chuan a la awm reng a.

²²Ngai teh, biak in hotute zînga mi pakhat, a hming Jaira chu a lo kal a; a hmuh vêleh a ke bulah a bawh khup a,

²³“Ka fanu naupang tê a thi lek lek a. Lo kal la, a chungah kut i nghah chuan a lo dam ang a, a nung leh mai ang,” tiin a ngên chiam a.

²⁴Tichuan, a hnênah Isua chu a va kal ta a; mipui tam takin an zui a, an nêk huai huai a.

²⁵Hmeichhe pakhat chu kum sâwm leh kum hnih thi pûtin a dam lo va,

²⁶daktawr tam tak lakah thil tam tak a tuar tawh a. A neih zawng zawng pawh a dekrall zo tawh a, that lam pan a hnêkin a lo zual zâwk mah si a.

²⁷Chû mi chuan Isua chanchin a lo hriatin, hnung lam atangin arawn pan a, a puan chu arawn dek a.

²⁸“A puan chauh pawh dek ila, tihdamin ka awm mai ang,” a ti rilrû a ni.

²⁹Chawp leh chilhin a thi pût chu a reh nghâl a, a nâ chu tihdam a ni tih ama taksaah a inhre ta a.

³⁰Isua chuan amah atangin thiltihtheihna a chhuak tih a lo hria a, mipui zingah chuan a hawi kual a, “Tu nge ka puan dek che u?” a ti a.

³¹A zirtîrte chuan a hnênah, “Mipuiin an nêk huai huai che hi i hmu ve reng si a, engti tiha “Tu nge mi dek?” ti nge i nih le?” an ti a.

³²Ani erawh chu chû thil titu hmuh tum chuan a la hawi kual reng a.

³³Chû hmeichhia chuan a chung a thil a tihsak chu hriain, hlau leh khûr chungin arawn pan a, a hmâah a bawkkhup a, a awmdan chu a hrilh ta vek a.

³⁴Ani chuan a hnênah, “Ka fanu, i rinna hi i dampui a ni e. Thlamuang takin kal la, i natna ata lo dam hlen tawh ang che,” a ti a.

³⁵A la tawng lai mêkin biak in hotu in atang chuan mi thenkhat an lo kal a, “I fanu a thi tawh. Engah nge zirtîrtu hi i la tihbuai cheu dâwn?” an ti a.

³⁶Nimahsela, Isuan an thusawi a lo hriatin biak in hotu hnênah chuan, “Hlau suh la, ring mai rawh,” a ti a.

³⁷Tichuan, Petera te, Jakoba te, Jakoba unau Johana te chauh lo chu tûma’n amah an zui ve a phal lo va.

³⁸Biak in hotu in an va thlen chuan an lo buai mur mur a, ring tak taka âuvin an lo tap tuar tuar hlawn a.

³⁹A va luh chuan an hnênah, “Engati nge in tãh bengchhen vak mai le? Naupang chu a thi lo va, a muhîl a ni zâwk,” a ti a.

⁴⁰Mite chuan an lo nuihsan a. Mahse ani chuan mi dangte chu a chhuatîr vek a, naupang nu leh pa leh a hnêna awmte chauh chu a hruai a, naupang awmnaah chuan an lût a.

⁴¹Naupang kut chu a chelh a, a hnênah, “Talitha, Kumi!” a ti a, chû chu “Mami, tho rawh ka tih che hi,” tihna a ni.

⁴²Hmeichhe naupang chu a lo tho vat a, a kal nghâl ta mai a; amah chu kum sâwm leh kum hnih mi a ni a. Anni chuan mak an ti êm êm a.

⁴³Nimahsela, chû thil thleng chu tûmah hrilh lo turin a khap tlat a, ei tûr pe tûrin a hrilh a.

BUNG 6

NAZARETH-AH ISUA A HNAWNG

¹Chû hmun atang chuan a kal chhuak a, ama khaw lamah chuan a kal ta a, a zirtîrte chuan an zui zêl a.

²Sabbath ni a lo thlen chuan, biak inah a zirtîr tan ta a. A thu zirtîr ngaithlâte chuan, “Hê mi hian hêng thûte hi khawia mi nge a hriat le? Hê mi hnênah hian eng ang finna teh fakau nge pêk a niha, a kutin heti taka thil ropui a tih theih mai le!

³Hê mi hi Mari fapa Jakoba te, Josea te, Juda te, Simona te unaupa mistiri kha a ni lo vem ni?” A farnute pawh hetah kan zînga awm vê te hi an ni lo vem ni?” an ti a. Tichuan, amah chu an hre thiam ta lo va.

⁴Mahse Isuan an hnênah, “Zâwlnei chu ama khaw lamahte, ama laichin zîngahte, ama inahte chauh lo chuan châwimâwi lohvin a awm ngai lo,” a ti a.

⁵Damlo mi tlênte chung a kut nghata a tihdamte chauh lo chu, chutah chuan thil lian tham a ti thei ta lo va.

⁶An rin loh avangin mak a ti êm êm a. Tichuan, zirtîr chung zêlin khuate chu a fang kual a.

SAWM LEH PAHNIHTE TIRH CHHUAH

⁷Sâwm leh pahnihte chu a ko va, pahnih zêlin a tîr chhuak tan ta a; thlarau bawhlhlawhte chung a thuneihna a pe bawh a.

⁸An zinna atân tiang chauh lo chu, chhang pawh, iptê pawh, an kawnghrêna tangkâ pawh—engmah ken loh tûr, a ti tlat a;

⁹pheikhaw erawh chu bun tûr a ti a; kawr erawh chu pahnih hâk thuah loh tûr, a ti bawh a.

¹⁰Amah vêkin an hnênah, “Khawiah pawh thlen in nei ula, in chhuahsan thlengin chutah chuan awm reng ang che u.

¹¹Khawi khua pawhin an lawm loh che u a, in thu an ngaihlak duh loh chuan, chû hmun in chhuahsan hunah an tihdik lohzia hriattîr nân in kephah hnuaia vaivut kai chu thin thlâk khum ang che u. Tihtak zetin ka hrilh a che u, rorêlna nîa chû khuain a tuar tûr aiin Sodom leh Gomorra tuar tûr chu a ziaawm daih zâwk ang!” a ti a.

¹²Tichuan, an kal chhuak a, an sim theih nân mite hnênah thû an hril a.

¹³Ramhuai tam tak an hnawt chhuak a, dam lo tam tak hriak an hnawih a, an tidam bawh a.

BAPTISTU JOHANA LU TAN A NI

¹⁴Isua hming chu a thang chhuak ta a, lal Heroda pawhin a lo hre ve ta a. “Baptistu Johana kha mitthi zînga ta a tho leh ta zu nia, chûng thiltihtheihnate chuan amahah a thawk ta a nih chu,” a ti a.

¹⁵Thenkhatin, “Elija a ni,” an ti a. Mi dangin, “Zâwlnei a nih loh pawhin, zâwlneite zînga pakhat ang a ni tal ang,” an ti bawh a.

¹⁶Heroda erawh chuan a lo hriat tirh atangin, “A lû ka tan Johana ngei kha a ni ang; mitthi zîng atangin a lo tho leh ta a nih chu!” a ti a.

¹⁷Heroda ngei chu Johana mantîrtu leh tân ina khungtu a ni si a, ama unau Philipa nupui Herodi vânga chutianga ti chu a ni a; nupui a nei ta si a.

¹⁸Johana khân Heroda hnênah, “I unau nupui i chhuhsak hi a tiang lo a ni,” tiin a lo khak tawh a.

¹⁹Chuvângin Herodi chuan ani chu a haw hle a, tihhlum a duh hial a, mahse a duh angin a khawih thei si lo va;

²⁰Heroda erawh chuan Johana chu mi dik leh thianghlim a ni tih a hriat avângin a hlau va, a hum tlat a. A thusawi te a ngaihthlâk phei chuan thil tam tak a tih phah a, lâwm takin a ngaithla thîn a ni.

²¹Heroda pian champhaphak nî a lo thlen chuan, a mi ropui te, officer lian te, Galili rama mi liante tâna ruai a theh laiin hun remchang a lo awm ta a.

²²Herodi fanu ngei chu a lo lût a, a lâm a, Heroda leh a ruai kîlpuite chu a tilâwm ta a; tichuan, lal chuan nula hnênah, “I duh apiang mi dîl rawh, ka pe ang che,” a ti a.

²³“Engpawh mi dîl apiang chu, ka lalram zatve hial pawh ni se ka pe ang che,” tiin chhe chhamin a intiam bawh a.

²⁴Ani chu a kal chhuak a, a nu hnênah, “Eng nge ka dîl ang?” a va ti a. Ani chuan, “Baptistu Johana lû le!” a lo ti a.

²⁵Lal hnênah chuan hmanhmawh takin a lo lût leh vat a, “Thlêngin baptistu Johana lû mi pe nghal la ka duh a ni,” a va ti a.

²⁶Lal chuan pawh a ti ta hle mai a; mahse chhia a lo chham tawh avâng leh, a ruai kîlpuite a hmaizah vângin a hnial hreh bawh si a.

²⁷Lal chuan vêngtu sipai pakhat a tîr nghal a, a lûrawn la tûrin thû a pê a. Tichuan, tân inah chuan a va kal a, a lû chu a va tan a,

²⁸thlêngin a lû chu a rawn châwi a, nula hnênah chuan a pê a; chû nula chuan a nu hnênah a pe ta a. ²⁹Chû thû chu a zirtîrte chuan an hriat vêleh a ruang chu an va hlâwm a, thlânah an zalh ta a.

MIPUI SANGNGA HRAI

³⁰Tirhkohte chu Isua hnênah an rawn kal khâwm a, an thiltih dân te, an thil zirtîr zawng zawng chu a hnênah chuan an hrilh a.

³¹Ani chuan an hnênah, “Tî rawh u, châwl hahdam rih tûrin hmun fianrial lam i pan ang u,” a ti a. Mi tam tak an insûl zut zut a, châw takngial pawh an ei hman si lo va.

³²Tichuan, fianrial lam panin lawngin an va kal hrang ta a.

³³An kal chhuak lai chu mipuiin an lo hmu hman a, anmahni ngei an ni tih an hai si lo va; tichuan, khaw tin aţangin kên an lo tlân khâwm a. An kal tumna lam an thlen hmân an lo va thlen khalh a, a awmna hmun chu an rawn pan khâwm a.

³⁴Isua chu lawng aţangin a rawn chhuak a, mipui chuti zozai a han hmuh chuan, vêngtu nei lo berâm ang mai an nih avângin a khawngaih êm êm a. An hnênah thu tam tak a zirtîr ta a.

³⁵Khua chu a lo tlai ta hle a, a zirtîrte chu a bulah an lo kal a, “Hei hi hmun fianrial tak a ni a, khua lah a tlai tawh hlê si a;

³⁶Hêng lai chhehvel khua leh ram vêlah ei tûr ilo leia an kal theih nân tîn darhtîr tawh mai rawh; ei tûr engmah an nei tawh lo a nia,” an ti a.

³⁷Ani erawh chuan an hnênah, “Nangmahni’n ei tûr pe rawh u,” tiin a lo chhâng a. Anni chuan a hnênah, “Duli zahnih man chhang kan va leiin ei tûr kan pe dawn em ni ang?” an ti a.

³⁸Mahse ani chuan an hnênah, “Chhangpêr engzat nge in neih? Han en teh u,” a ti a. An neih zât an hriat veleh, “Pêr ngâ, sangha pahnih nê,” an ti a.

³⁹Ani chuan an vaiin hlobet hring chungah chuan a hlâwm hlâwma thutîr tûrin zirtîrte chu thû a pê a.

⁴⁰Tichuan mi za te, sawmngâ tê tê-in an tûr tlar ta a.

⁴¹Chhangpêr pangâ leh sangha pahnih chu a lâ a, vân lam hawiin mal a sâwm a, chhangpêrte chu a phel a, mipui hnêna sem tûrin a zirtîrte chu a pê a; sangha pahnih pawh chu an zaa hnênah a sem bawh a.

⁴²Tichuan, an vaiin puar takin an ei vek a.

⁴³Chhang leh sangha ningnâwi chu bawmrâng sâwm leh pahnihah an rût khat a.

⁴⁴Chhang eitute chu patling hlîr pawh sangnga lai an ni.

TUI CHUNGHA ISUA A KAL

⁴⁵Mipuite chu a tîn darhtîr mêk laiin, a zirtîrte chu râl lehlama Bethsaida khuua lo va kal hmasa tûrin lawngah a chuantîr a, a kaltîr nghâl a.

⁴⁶An kal liam hnû chuan tawngtai tûrin tlâng lamah a kal ta a.

⁴⁷Tlai a lo nih chuan, lawng chu dîl lai takah a awm tawh a; ani chu khawmualah chuan amahin a awm a.

⁴⁸Chutih lai chuan thliin an lawng chu a ni lo lamah a nem tlat avânga an buaizia chu a va hmu a. Zîng dâr thum vêlah chuan an awmna a rawn thleng a, anmahni kal pelh tum angin dîl chungah chuan kên a kal a.

⁴⁹Chutia dîl chung a kêa a kal an lo hmuh chuan thlahrâng emaw an ti a, an âu vak vak a;

⁵⁰anni chuan amah chu an hmu vek si a, an mangang a. Mahse anniho chu a rawn chhâng vat a, Thlamuang takin awm rawh u; keimah ka ni alâwm; hlau suh u,” a rawn ti a.

⁵¹Lawngah chuan an hnênah a lût chho va, thli chu a bâng nghâl ta mai a. Mak an ti êm êm a, a ngaihna rêng an hre lo va.

⁵²An thinslung a sak tlat avângin chhang chungchâng awmzia te kha an hrethiam thei bawh si lo.

MI TAM TAKIN AN DEK A AN DAM

⁵³Tichuan, râl lehlam an va kai a, Genesaret ram an va thleng a, vaucamah chuan lawng chu an thlung a.

⁵⁴Lawng aţanga an lo chhuah chuan miten tu nge a nih an lo hre nghâl a,

⁵⁵chûng lai ram zawng zawngah chuan an tlân kual vêl a, a awm thu an lo hriatna hmun apiangah damlote chu an khuma mu chungin an rawn zawn hlawn a.

⁵⁶Thingtlang khuuah te, khawpuiah te, ramhnuaiah te, dawr hmunah te pawh, a kalna apiangah damlote chu an lo mut a, a puan hmâwr tal deh atân an dîl hlawn a. Tichuan, amah dek apiang an dam zêl a.

BUNG 7

CHHUNG LAMK AṬANGA BAWLHHLAWHNA

¹Pharisaite leh dân zirtirtute zînga mi tute emaw chu Jerusalem khua aṭangin anrawn kal khâwm a.

²Chûng mite chuan a zirtîr ṭhenkhatten kut bawlhhlawha chaw an ei lai an lo hmuh avângin an sawisêl a, kut sil loh chu an ngaithiam si lo va.

³Pharisaite leh Judahō zawng zawng chuan an upate thurochhiah an vawn tlat avângin, uluk taka kut an sil phawt loh chuan engmah an ei ngai lo a ni.

⁴Bazar aṭanga ina an haw pawhin an insil fai phawt loh chuan an ei ngai lo. Zawm tlat tûra an dawn chhâwn thil dang pawh tam tak a la awm: no te, dârbel te, thlêng te leh thutthlêng sil fai te ang hi.

⁵Tichuan, Pharisaite leh dân zirtirtute chuan, “Engati nge i zirtîrten upate thurochhiah an zawm lohva, kut sil fai lohva chaw an ei ṭhin le?” tiin an zâwt a.

⁶Ani chuan an hnênah, “Isaia hian nangni mi vervêkte ṭhû hi a lo hrihlâwk dik zet mai: ‘Hêng mite hian an kâin mi chawimâwi a, An thilung erawh chuan mi hlat si a.’

⁷A lothlawn maia mi bia an ni, An thu zirtîr pawh mihring thupêk mai a ni e.’

⁸Pathian thupêk hlamchhiahin, mihringte thurochhiah mai mai in zâwm zâwk a—hêng no leh thlêng sil fai te leh, chutiang thil chu in vuan nghet ṭlut si a,” a ti a.

⁹An hnênah, “In thurochhiahte in vawn duh luatah, Pathian thupêk zâwk chu in hnâwl hlauh si a nih hi.

¹⁰Mosia chuan, “I nu leh i pa chawimâwi rawh,’ ‘Tûpawh a nu emaw, a pa emaw sawi chhia apiang chu tihhlum tûr a ni,’ a ti si a.

¹¹Nangni erawh chuan, ‘Miin, a nu emaw, a pa emaw hnênah, “Nangni min chhawrbâwkna tûr hi Korban a ni tawh, a tih chuan,’ (chu chu ‘Pathian hnêna pêk,’ tihna a ni a),

¹²a nu tân emaw, a pa tân emaw engmah a tihsak in phal tawh ṭhin loh hi;

¹³in dân inhlan chhâwn thil avângin Pathian thu hi awmze nei thei lo lêkin in siam ṭhin a. Chutiang thil lah chu in ti hnem hlê si a,” a ti a.

¹⁴Mípuite chu ama hnêna a koh khâwm laiin an hnênah, “Ka ṭhû hi ngaithla ṭheuh ula, a awmzia pawh hriat tum teh u:

¹⁵Pawn lam aṭanga mihring kawchhûnga lûta tibawlhhlawh thei engmah a awm lo; mihring kawchhûng aṭanga lo chhuakte erawh chu mihring tibawlhhlawhtu a ni zâwk e.

¹⁶Tûpawh hriatna tûra beng nei chuan hre rawh se!” a ti a.

¹⁷Tichuan, mipuite chu in chhûnga a luhsan hnûin a zirtîrte chuan tehkhin thu awmzia chu amah an zâwt fiah a.

¹⁸Ani chuan an hnênah, “Nangni pawhin in hre thiam chuang lo maw? Pawn lam aṭanga mihring kawchhûnga lût engmahin mihring a tibawlhhlawh thei lo,

¹⁹a thilung chhûnga lût lovin a pumpuiah a lût a, dailênnaah a chhuah leh ṭhin avângin, ei tûr tinrêng a tithianghlîm ṭhin, tihte hi

in hre thei lo vem ni?” a ti a.

²⁰“Mihring kawchhûng aṭanga lo chhuak hian a ni mihring tibawlhhlawh ṭhin ni,” a ti a.

²¹Chhûng lam mihring thilung aṭang chuan ngaihtuahna sualte a lo chhuak ṭhin; uirêna te, ingaihnâ te, tualthahna te,

²²rukûkna te, awhna te, suahsualna te, bumna te, hurna te, îsikna te, sawi chhiatna te, chapona te, âtna te hi;

²³chûng thil sual zawng zawng chu chhûng lam aṭangin a lo chhuak a, mihring chu a tibawlhhlawh ṭhin,” a ti a.

JENTAIL NU-IN A RINNA A LANTIR

²⁴Chû hmun aṭang chuan a tho va, Tura leh Sidon ramah a kal ta a. In pakhatat chuan a lût a, a awmna chin tûma hriat a duh lo va; mahse inthup theih a ni si lo va.

²⁵Nu pakhat chu a fanu naupang têin thlarau bawlhhlawh a pâi a, chû nu chuan a awm tih a lo hre hlauh va, a lo kal vang vang a, a ke bulah arawn bawkhup a.

²⁶Chû hmeichhia chu Grik mi a ni a, pianna lamah Suro-Phoiniki mi a ni. Ani chuan a fanu kawchhûng aṭanga ramhuai hnawh chhuahsak tûrin a ngên ngawih ngawih a.

²⁷Nimahsela, Isuan a hnênah, “Fateho hi han puar hmasa phawt rawh se; fate chaw ei tûr lâk saka, ui têtê hnêna paih te chu a ṭha nâng,” a ti a.

²⁸Ani chuan a hnênah, “Ni e, Lalpa, mahse dawhkân hnuaia ui têtê pawhin fate chaw nâwi chu an ei ṭhin alâwm,” tiin a chhâng a.

²⁹Ani chuan a hnênah, “Chû ṭhû i sawi ang tak chuan kal rawh le; ramhuai chuan i fanu chu a chhuahsan tawh e,” a ti a.

³⁰In a va thlen chuan, a fanu chu ramhuaiin a lo chhuahsan tawh a, khuma a lo mu hlê hlê chu a va hmu ta a.

ISUAN BENGNGAWNG ṬAWNG THEI LO A TIDAM

³¹Tichuan, Tura leh Sidon ram chu a chhuahsan a, Dekapoli ram kal tlang zêlin Galili dîl chu a lo thleng leh ta a.

³²Chutah chuan mi pakhat bengngawng, ṭawng fiah thei lo hi a hnênah anrawn hrui a, a chunga a kut nghat tûrin an ngên a.

³³Chû mi chu mipui zîng aṭangin a hrui hrang a, a kut zungtangin a beng kuate a khawih a, chil a chhâk a, a lei a dehsak a;

³⁴Vân lam hawiin ṭhâwk a han lâ a, a hnênah, “Ephatha,” a ti a, chû chu “Lo inhawng rawh,” tihna a ni.

³⁵Tichuan, a bengte chu a lo inhawng a, a lei phuarna pawh chu a lo inphelh a, fiah takin a ṭawng thei ta a.

³⁶Anni chu tûmah hrihl lo tûrin a khap tlat a; nimahsela, a khap nasat poh leh an tlangaupui zual sauh zâwk si a.

³⁷Mite chuan mak ti takin, “Ani hi zawngin engkim hi a tiṭha zêl mai a nih hi. Bengngawngte beng a tivâr a, ṭawng thei lote pawh a ṭawngtîr zêl mai si a,” an ti a.

BUNG 8

MIPUI SANGLI HRAI

¹Chûng lai chuan mipui lo pung khâwm chu an tam êm êm a, ei tûr lah engmah an nei si lo va, Isuan a zirtîrte chu a ko va, an hnênah,

²“Mipuite hi ka hnênah ni thum an awm tawh a, ei tûr engmah an neih loh avângin ka lainat êm êm a ni.

³Rilâm chung a in lama ka hawtîr chuan kawng lakah an tàmchhâwl mai dâwn si a; thenkhat phei chu hla tak aţanga lo kal te an ni a,” a ti a.

⁴A zirtîrte chuan an chhâng a, “Tûin nge hetiang ram palailêngah mipui heti zozai tlaina khawp châw pe thei ang le? an ti a.

⁵Ani chuan, “Chhangpêr engzât nge in neih?” tiin a zâwt a. “Pêr sarih,” tiin an chhang a.

⁶Tichuan, mipuite chu leia t̃hu tûrin thû a pê a. Chhangpêr pasarih chu a lâ a, lâwmthû a sawi a, a phel a, mipuite hnêna sem tûrin a zirtîrte chu a pê a; tichuan mipuite chu an sem ta a.

⁷Nghate tlêm an nei bawk a; chûngte pawh chu mal a sâwm a, an hnêna sem tûrin a hrilh a.

⁸Tichuan, puar khawpin an ei a; an ei bâng nâwi chu bâwm lian tak tak pasarihah an rût khat a.

⁹A eitute chu mi sangli vêl an ni. Tichuan, a t̃in darhtîr a,

¹⁰lawngah chuan a zirtîrte nêl an chuang nghal a, Dalmanutha ram an thleng ta a.

PHARISAITEN CHHINCHHIAHNA AN ZAWNG

¹¹Pharisaite chu amah hnial tûrin an lo kal a, amah fiah nân a hnên avângin vân lam chhinchhiahna an rawn phûl a.

¹²Ani chu thlarauvin a rûm vawng vawng a, “Engati nge tûnlai t̃hangtharte hian chhinchhiahna thil ngawt an dap le? Tihlak zetin ka hrilh a che u, tûnlai t̃hangtharte hnênah hian eng chhinchhiahna mah pêk an ni lo vang,” a ti a.

PHARISAITE LEH HERODA DÂWIDIM LAKA FIMKHURNA

¹³Anni chu a kalsan a, lawngah a chuang leh a, râl lehlamah a kal ta daih a.

¹⁴Zirtîrte chuan chhang an lo ken theihnghilh a, lawngah chuan chhang tlang khat mai lo chu engmah an nei si lo va.

¹⁵Tichuan an hnênah, “Pharisaite dâwidim leh Heroda dâwidim lakah hian fimkhur takin invêng rawh u,” a ti a.

¹⁶Anni chuan, “Chhang kan neih loh vânga chû chu sawi a ni ngei ang,” an ti hlawm a.

¹⁷Mahse Isuan a lo hria a, an hnênah, “Engati nge chhang in neih loh mai avânga chutianga in ngaihtuah? Tûnah pawh in la man thiam lo va, a ngaihna pawh in la hre thiam lo cheu maw? In thinlung a la sak fo em ni?

¹⁸Mit nei reng siin in hmu lo maw? Beng nei rengin in hre lo vem ni? Engmah in hre reng thei na nge?

¹⁹Mi sangnga tâna chhang ka phel khân, a bâng nâwi kha bâwmrâng engzat nge in ruh khah?” a ti a. Anni chuan, “Sâwm leh pahnih,” an ti a.

²⁰Anih leh, mi sângli tân chhang tlang sarih ka phel t̃um khân, a bâng nâwi kha bâwmrâng lian engzâtah nge in ruh khah?” a ti leh a. Anni chuan, “Bâwm sarih,” an ti a.

²¹Tichuan, ani chuan an hnênah, “Chuti chu engati nge in la hriat thiam theih loh le?” a ti a.

BETHSAIDA MITDEL TIHDAM

²²Bethsaida khua a lo thleng a; a hnênah mitdel an rawn hruai a, amah chu dek tûrin an ngên a.

²³Ani chuan mitdel kut chu a chelh a, khua aţang chuan a kai chhuak a. A mitah chuan chil a chhâk a, a chungah kut a ngat a, khua a hmuh theih leh theih loh a zâwt a.

²⁴Ani chu a lo dâk chhuak a, “Mihringte chu thing kal ang maiin ka hmu,” a ti a.

²⁵Tichuan, a kutin a mit a khawih leh a, a hawî chhuahtîr a. A lo dam ta viah a, engkim fiah takin a hmu thei ta a.

²⁶Chumi hnû chuan ama in lamah a hawtîr a, a hnênah, “Khawpuiah lût lo la, khaw chhûnga mite pawh tûmah hrilh suh ang che,” a ti a.

PETERAN ISUA CHU KRISTA A NIH THU A PUANG

²⁷Isua leh a zirtîrte chu Philippi Kaisari chheh vêl khuaahte chuan an zin chhuak a; kawnga an kal lai chuan a zirtîrte hnênah, “Miten tu nge ka ni min tih?” tiin a zâwt a.

²⁸Anni chuan, “Baptistu Johana a ni,’ an ti che a; mi dangin ‘Elija a ni,’ an ti che a; thenkhat erawh chuan, ‘Zâwlnei zînga pakhat a ni,’ an ti che,” tiin an hrilh a.

²⁹Ani chuan an hnênah, “A nih leh nangnin Kei hi tu nge ka ni min tih ve?” tiin a zâwt a, Petera chuan a hnênah, “Krista chu i ni,” tiin a chhâng a.

³⁰Ani chuan ama chungchâng chu tûmah hrilh lo tûrin anniho chu a khap tlat a.

ISUAN A THIH LEH THAWHLEH TUR A SAWI LÂWK

³¹Amah vêkin an hnênah, Mihring Fapain thil tam tak a tuar tûr te, upate leh puithiam late leh dân zirtîrtute hnâwla a awm tûr te, an tihlum dân tûr te, ni thum hnûa a thawhleh tûr te chu a zirtîr t̃an ta a.

³²Chûng thû chu ualau takin a sawi a. Petera chuan ani chu a hruai hrang a, a zilh ta a.

³³Mahse, ani chuan a zirtîrte lam a hawî a, Petera chu zilh pahin, “Setan, ka hnungah kal rawh! Pathian thilte ngaihtuah lovin mihring thil ngawt i ngaihtuah zâwk a nih hi,” a ti ta a.

KRAWS PU CHUNGA ZUI

³⁴Mipuiho chu a zirtîrte nêl a ko khâwm a, an hnênah, “Mî tûpawhin mi zui a duh tak tak chuan mahni inphat sela, a krâws pûin mi zui rawh se.

³⁵Tûpawh mahni sahimna ngawt thlahleh chuan a chân ang a; tûpawh keimah avâng leh Chanchin T̃ha avânga ama nun chân

apiangin a humhim ang.

³⁶Miin khawvêl hi a pumin nei sela, a nun chân si sela, a tân hlâwkna tûr eng nge awm?

³⁷Miin a nunna aiah eng nge a pêk ve tâk ang?

³⁸Tûnlai ðangthar uirê hmang leh mi suaksual zîngah hian keimah leh ka thu zahpui apiang, Mihring Fapa hian a Vântirhkhoh thianghlimte nêna a Pa ropuinaa inthuaama a lo kal hunah, chu mi chu arawn zahpui ve thung ang,” a ti a.

BUNG 9

TLANG CHUNGA ISUA HMÊL DANGLAM

¹“Tihktak zetin ka hrilh a che u, heta dînggho zînga mi ðhenkhat hi thiltihtheihna nêna Pathian lalram lo thleng an hmuh hmâ lohva thihna tem hauh lo tûr an awm asin,” a ti a.

²Ni ruk hnûah chuan Isuan Petera te, Jakoba te, Johana te chu a hruai a, a hrangin tlâng sâng takah a kal chhohpui a; an hmâah chuan a hmêl lan dân chu a lo danglam ta a.

³A silhfênte chu a tle sur mai a, vûr ang maia vâ, leia puan sututen an sûk vâ theih piah lama vâ hi a ni.

⁴Elija chu Mosia nêna anrawn inlâr a, Isua nêna an inbia a.

⁵Petera chuan Isua hnênah, “Rabbi, heta awm hi kan tân a ðha e; bâwkte pathum i khawh ang u, i tân pakhat, Mosia tân pakhat, Elija tân pakhat,” a ti a;

⁶an hlauh êm avângin sawi tûr ber pawh a hre lo.

⁷Tichuan, chhûm a lo zîng a, anmahni chu arawn hlih ta a; chhûm aţang chuan âw a lo chhuak a, “Hei hi ka Fapa duh tak a ni. Ama thú chu ngai rawh u,” a ti a.

⁸An han hawi chhuak thuai a; mahse an kianga Isua chauh lo chu tûmah an hmu ta lo va.

⁹Tlâng aţanga an chhuk thlâk laiin ani chuan, Mihring Fapa hi mitthi zînga ta a thawhle hnûah chauh lo chuan an thil hmuhte chu midang hnêna sawi chhuah a khap tlat a.

¹⁰Chû thú chu an vawng reng a, mitthi thawhlehnâ chu eng tihna tak ni ang mâw? tiin anmahni zîngah chuan an inzâwt ðhîn a ni.

¹¹A hnênah chuan, “Engvângin nge dân zirtirtuten, ‘Elija a lo kal hmasa tûr a ni,’ an tih le?” tiin an zâwt a.

¹²Ani chuan, “Elija chu lo kal hmasa tûr rêng a ni a, engkim arawn siam ðha ang. Mihring Fapa chungchângah chuan thil tam tak tuarin mi hmuhsitin a awm tûr a ni tih a chanchin engti ziaa zia nge an nih?”

¹³Nangni erawh chu ka hrilh a che u, Elija chu a lo kal tawh rêng alâwm, a chanchin an ziah ang ngeiin a chungah duh tâwk an lo ngah tawh baw a,” a ti a.

MIPA NAUPANG TIHDAM

¹⁴Chutia zirtîrte hnên a thlen thlâk lai chuan, mipui tam tak an lo awm khâwm a, dân zirtirtute nêna an lo inhnial a.

¹⁵Mi zawng zawngin amah an hmuh vêleh, mak ti êm êmin a hnênah an tlân khâwm a, chibai an bûk a.

¹⁶Ani chuan, “Anniho nêna hian eng thúah nge in lo inhnial?” tiin dân zirtirtute chu a zâwt a.

¹⁷Chutih lai chuan mipui zînga mi pakhatin, “Zirtirtu, ka fapa, thlarau ðawng thei lo pâi i hnênah karawn hruai a.

¹⁸Khawiah pawh a manna apiangah a paih thlu ðhîn a; a chilphuante a tlâ a, a hâte a ðhial a, a khawng vek a; tichuan, i zirtîrte hi hnawt chhuak tûrin ka ti a; mahse an ti thei si lo va ni,” a ti a.

¹⁹Ani chuan a chhâng a, “Aw, ðangthar rinna rêng nei lote u, eng chen nge in hnênah ka awm ang a, eng chen nge ka ngaih theih dân che u? Amah churawn hruai teh u,” a ti a.

²⁰Isua hnênah chuan anrawn hruai a. Isua chu a hmuh vêleh thlarau chuan naupang chu a sawisa vak a; leiah a tlu a, a chilphuan a tla a, a tâl âwrh âwrh a.

²¹Ani chuan a pa hnênah, “Hetiang hian eng chen nge a lo awm tawh?” tiin a zâwt a. Ani chuan, “A naupan lai aţanga awm tawh a ni.

²²Amah tihhlum tumin meiah te nam thluin, tuiah te pawh wawi engemawzât a nam thla fo ðhîn. Chuvângin, nangin eng emawti tala i tih theih chuan min khawngaih la, min pui lul rawh,” tiin a ngên a.

²³Isuan a hnênah, “I ring thei a nih phawt chuan, engkim hi a ringtu tân chuan tihtheih a ni asin,” a ti a.

²⁴Chû vêleh naupang pa chuan, “Lalpa, ka ring e; ka rinhlêlnaah hian mi pui ang che!” tiin ðap chungin a âu chhuak a.

²⁵Chutih lai chuan Isuan mipui lo tlân khâwm mêk a hmuhin, thlarau bawhlhlawh chu a hau va, “Nang, thlarau ðawng thei lo leh bengngawng, thú ka pê a che, a kawchhûng aţang khan lo chhuak la, lût leh tawh suh!” a ti a.

²⁶Chû ramhuai chu a âu vak a, nasa takin a sawisa a, a chhuahsan ta a. Naupang chu thi ang dêrin a awm a, mi tam tak chuan, “A thi ta a nih hi,” an lo ti hman tawh a.

²⁷Mahse Isuan a kut a chelh a, a kai tho va, ani chu a lo tho ta mai a.

²⁸Chumi hnûah Isua chu ina a luhin, a zirtîrte chuan mi dang hriat lohvin, “Engati nge keinin kan hnawh chhuah theih loh le?” tiin an zâwt a.

²⁹Ani chuan, “Hetiang chí hi chu ðawngtai leh chawnghei chauh loh chuan engtin mah a chhuak thei lo,” tiin a hrilh ta a.

ISUAN A THIH LEH A THAWHLEH TUR A SAWI NAWN

³⁰Chû hmun chu chhuahsanin, Galili ram chu an kal tlang a, tûma hriat pawh a duh lo va.

³¹A zirtîrte hnênah chuan, “Mihring Fapa hi mihringte kuta mantîrin a awm tûr a ni a, an tihlum baw a. An tihlum hnû ni thum nîah a tho leh ang,” tiin a zirtîr a.

³²Nimahsela, a thusawi chu a ngaihna an hre lo va, amah an zâwt fiah ngam baw si lo va.

TU NGE ROPUI BER?

³³Kapernaum khua chu an thleng ta a. In chhûnga an awm laiin an hnênah, “Kawngah khân eng thûah nge in inhnial kha?” tiin a zâwt a.

³⁴Anni chu an ngâwi reng a, kawng lakah khân an zîngah tu nge ropui ber ang? tiin an lo inhnial tawh si a.

³⁵Ani chu a thû a, sâwm leh pahnihte chu a ko va, an hnênah, “Mi tûpawhin hmasa ber nih a duh chuan, a hnuhnung berah a awm tûr a ni a, mi zawng zawng chhiahhlawh a ni bawk tûr a ni,” a ti a.

³⁶Naupang tê a kai a, an zîngah chuan a dintîr a. A pawm kâng a, an hnênah,

³⁷“Ka hming avânga hetiang naupang tê pakhat pawh lâwmtu chuan Keimah mi lâwm a ni; Kei mi lâwm apiang chu Keimah mi lâwm an ni lo, mi Tirtu lâwm an ni zâwk,” a ti a.

ISUAN PAWL BIK NEIH A KHAP

³⁸Johanan a hnênah, “Zirtirtu, kan pâwl zînga mi ni lo, mi tuemaw hian i hminga ramhuaite a hnawt chhuak lai kan hmu a; min zui ve si loh avângin kan khap ta mai asin,” a ti a.

³⁹Nimahsela Isuan, “Khap tawh suh u; tûmah ka hminga thilmak ti chung a kei mi sawichhe nghâl thei an awm lo vang.

⁴⁰Tûpawh mi dodâl lo chu kan lama tang an ni.

⁴¹Krista mi in nih avânga tui no khat in tûr petu apiang che u chu, tihtak zetin ka hrilh a che u, chû mi chuan a lâwmmann dawn tûr chu a chân hauh lo vang.

ISUAN SUAL TI LO TURIN A ZILH

⁴²“Keimah mi ringtu hêng mi têtê zînga pakhat pawh titluta chu a nghâwnghah buh râwtsawmna lung awrtîrin tuifinriatah thlâk daih sela, a tân a tha zâwk ang.

⁴³I kutin a tihtlûk che chuan tan chhum mai rawh. Kut khinghniha hremhmun mei mit tawh ngai lova kal ai chuan, kut bûl chung a nunnaa luh chu i tân a tha zâwk a ni.

⁴⁴“An lungte a thih theih tawh lohna leh mei mit tawh ngai lohna hmun chu.”

⁴⁵I kên thil sual a tihtîr che chuan tan daih rawh. Ke khinghniha nêna hremhmun mei mit tawh ngai lohna hmuna paih luha awm ai chuan, ke bûl chung a nunnaa luh chu i tân a tha zâwk a ni.

⁴⁶“An lungte a thih theih tawh lohna leh Mei mit tawh ngai lohna hmun chu.”

⁴⁷I mitin thil sual a tihtîr che chuan kher chhuak daih rawh; mit khing khata Pathian lalrama luh chu i tân a tha zâwk, mit khinghniha hremhmun meia paih luh ai chuan, chû hmun chu a ni,

⁴⁸“An lungte a thih theih lohna leh Mei mit tawh ngai lohna hmun chu.”

CHI DA TAWH TANGKAI LO

⁴⁹“Mi tin meia fiahin an la awm ang a, inthâwina tinrêng pawh chia al a la ni ang.

⁵⁰Chi hi a tha e; mahse chi hi a dâk tawh chuan engtin nge an tih-al leh ang? Chuvângin, nangmahniah chi nei ula, inngeih dial dial rawh u,” a ti a.

BUNG 10**INNEIH LEH INTHEN CHUNGCHANG**

¹Tichuan, a tho va, chuta tang chuan Jordan râla Judai ramah a kal ta a. A hnênah chuan mipui an rawn pungkâwm leh a, tichuan a tih dân pangngaiin a lo zirtîr leh a.

²Pharisaite chu an lo kal a, amah fiah nân, “Miin a nupui mâk a thiang em?” tiin an zâwt a.

³Ani chuan an hnênah, “Mosian engtin nge thû a pêk che u?” tiin a chhâng a.

⁴Anni chuan, “Mosia chuan mipa tân inmâkna lehkha ziaka, mâk a phal ngei alâwm,” an ti a.

⁵Isuan an hnênah, “In thinlung sak êm avângin asin chu thupêk chu a ziah sak che u ni.

⁶Leilung siam tîr a tang rêngin, Pathianin ‘hmeichhiaah leh mipaah a siam a ni.’

⁷Chumi avâng chuan mipain a nu leh a pa a kalsan ang a, a nupui a zawm ang;

⁸tichuan, an pahnih chuan tîsa pum khat an lo ni tawh ang; pahnih an ni tawh lo va, tîsa pum khat an ni tawh zâwk a ni.

⁹Chutichuan, Pathianin a zawm tawh chu mihringin then suh se,” a ti a.

¹⁰In lamah pawh a zirtîrte chuan chu thû bawk chu amah an zâwt leh a.

¹¹Ani chuan an hnênah, “Tûpawh mahni nupui mâa, mi dang nei apiangin a nupui a uirêsan a ni.

¹²Hmeichhia pawhin a pasal a thena, mi dang a neih chuan uirê a ni,” a ti a.

ISUAN NAUPANGTE MAL A SAWM

¹³A kuta a lo deh theih nân a hnênah naupangtête an rawn hruai a; nimahsela, zirtîrte chuan a rawn hruaitute chu an lo hau va.

¹⁴Chû chu Isuan a hmuhin a lungawi lo êm êm a, zirtîrte hnênah chuan, “Naupang têtê ka hnênah han kaltîr ula, hnar suh u; Pathian lalram chu hetiang mite ta hi a ni si a.

¹⁵Tihtak zetin ka hrilh a che u, tûpawh Pathian lalram chu naupang tê anga lâwm lo apiang a chhûngah an lût vê hlek lo vang,” a ti a.

¹⁶Anmahni chu a pawm a, an chungah a kut ngathin mal a sâwm ta a.

TLANGVAL HAUSA HNENA ISUA THURÂWN

¹⁷Kawnga a kal chhuah laiin mi pakhat a lo tîlân a, a hmâah a thingthî a, a hnênah, “Zirtirtu thâ, chatuana nunna ka chan ve theih nân eng nge ka tih ang?” tiin a zâwt a.

¹⁸Isuan a hnênah, “Engati nge thâ mi tih? Mi pakhat chauh lo chu tûmah thâ an awm lo, chû chu Pathian a ni.

¹⁹Thupêkte chu i hria alâwm: ‘Uirê suh,’ ‘Tual that suh,’ ‘Rûk ru suh,’ ‘Dâwtin mi hêk suh,’ ‘Mi bum suh,’ ‘I nu leh i pa châwimâwi rawh,’ tihte hi,” a ti a.

²⁰Ani chuan a hnênah, “Zirtîrtu, chûng thû zawng zawng chu ka tleirawl tîrh ata ka zâwm thîn asin,” a ti a.

²¹Isuan amah chu a en a, a hmangaih a, a hnênah, “Tlâkchham pakhat i la nei e; kal la, i nei apiang hralh la, pachhiate hnênah pe rawh, chutichuan, vânah ro i nei ang; tichuan lo kal la, krâws pû la, mi zui ang che,” a ti a.

²²Nimahsela, chû thû chuan a tingui rawih mai a, sum ngah tak a lo ni si a, lungngai takin a kal bo ta a.

PATHIAN NEN ENKIM TIH THEIH

²³Isua chu a hawi kual a, a zirtîrte hnênah, “Sum ngahte tân Pathian lalrama luh a va harsa dâwn êm!” a ti a.

²⁴A zirtîrte chuan a thu sawi chu mak an ti hlê a. Isuan a chhâng leh a, an hnênah, “Naute u, sum leh paia innghat mite tân chuan Pathian lalrama luh hi a harsa takzet asin!”

²⁵Mi hausa Pathian lalrama luh aiin sanghâwngsei hriau benga luh tlang a awl zâwk,” a ti a.

²⁶Anniho chuan mak an ti êm êm a, a hnênah, “Chutiang a nihin tu nge chhandam ni thei ang le?” an ti a.

²⁷Isuan anni chu a en a, “Mihring tâna tih rual loh hi, Pathian nê chuan tih theih loh a awm lo; engkim hi Pathian nê chuan tih theih vek a ni asin,” a ti a.

²⁸Peteran a hnênah, “En teh, keinin engkim kalsanin kan zui ta che a,” tiin a sawi tan dêk dêk a.

²⁹Isuan a chhâng a, “Tihlak zetin ka hrilh a che u, tûpawh keimah avâng leh Chanchin T̃ha avânga in emaw, unaupate emaw, farnute emaw, nu emaw, pa emaw, nupui emaw, fate emaw, ramte emaw kalsan tawh phawt chuan

³⁰tûn dam chhung lâ lâ hian inte, unaupate, farnute, nute, fate, ramte chu a leh zâin, tihduhdahnnate nêna hmu lo tûr tûmah an awm lo, khawvêl lo la awm tûra chatuana nunna nê.

³¹Nimahsela, hmasa bera awm mi tam tak chu hnunngung ber an ni ang a, hnunngung berte pawh hmasa ber an la ni ang,” a ti a.

ISUAN A THIH LEH THAWHLEH TUR A SAWI VAWI THUMNA

³²Jerusalem khuaa chho tûrin kalkawngah an kal mek a; Isua chu an hmâah a kal a; anni chuan mak an ti hlê a. A hnunga kal pawh chu an hlau deuh va. Ani chuan sâwm leh pahnihte chu a hruai hrang leh a, a chunga thil thleng tûr chu a hrilh a:

³³“Ngai teh u, Jerusalemah kan chhoh dâwn hi; Mihring Fapa hi puithiam lalte leh dân zirtîrtute hnênah mantîrin a awm tawh dâwn a; thi tûrin a chungthû an rêl ang a, Jentailte kutah an pê ang;

³⁴anni chuan nuihza siam nân an hmang ang a, an vua ang a, chil an chhâk ang a, an tihlum ang. Ni thum nî-ah a tho leh ang,” a ti a.

ROPUINA CHU RAWNGBAWL HI A NI

³⁵Zebedaia fapa Jakoba leh Johana te chuan ani chu an rawn hnaih a, a hnênah “Zirtîrtu, i hnêna kan dîl apiang min tihsak ta che,” an ti a.

³⁶Ani chuan, “Eng nge tihsak in duh le?” a ti a.

³⁷Anni chuan, “I ropuinaah chuan i ding lamah pakhat, i vei lamah pakhat min thuttîr ang che,” tiin an chhâng a.

³⁸Mahse Isuan, “In dîl chu in hre lo a ni. Ka no in tûr chu in in theiin, ka baptisma chan tûr pawh in chang thei em ni?” a ti a.

³⁹Anni chuan a hnênah, “Kan chang thei ang,” an ti a. Tichuan Isuan an hnênah, “Ka no in tûr chu in in ang a, ka baptisma chan tûr pawh chu in chang ve ang;

⁴⁰nimahsela, ka ding lamah emaw, ka vei lamah emawa thut tûr thû chu keia pêk tûr a ni lo va, an buatsaih sakate tân a ni zâwk ang,” a ti a.

⁴¹Zirtîr dang sâwmte chuan chû chu an lo hriatin Jakoba leh Johana te chungah chuan an lâwm lo hlê a.

⁴²Nimahsela Isuan anniho chu a ko va, an hnênah, “Jentail rorêltute chu anmahni mite lakah an intilal êm êm thîn a, an mi lianten thuneihna an chelek zia pawh in hria e.

⁴³Nangni zîngah zawng chutiang tûr a ni lo vang; in zînga mi lian nih duh apiang chu in chhiahhlawhah a tang zâwk tûr a ni;

⁴⁴In zînga hmasa ber nih duh apiang chu mi zawng zawng bâwihah a awm zâwk tûr a ni.

⁴⁵Mihring Fapa meuh pawh rawngbâwlsak tûr ni lovin, rawngbâwl tûr leh mi tam tak tlan nâna a nun pe tûra lo kal a ni zâwk si a,” a ti a.

ISUAN BARTIMAIA MIT A TIVÂR

⁴⁶Jeriko khua an lo thleng a. A zirtîrte leh mipui nâwlpuiten Jeriko khua an chhuahsan dâwn laiin mitdel Bartimaia, Timaia fapa chu kawng sirah kutdawhin a lo thû a.

⁴⁷Nazaret Isua a ni tih a hriat vêleh, “Isu, Davida Fapa, mi khawngaih rawh,” tiin a âu ta a.

⁴⁸Mi tam takin ngâwi tûrin an ti a; mahse ani chu, “Davida Fapa, mi khawngaih rawh!” tiin a âu uar sauh va.

⁴⁹Isua chu a ding chawt a, amah chu ko tûrin thû a pê a. Tichuan, mitdel chu an ko va, a hnênah, “A koh che chu, tho rawh. Lâwm hle ta che,” an ti a.

⁵⁰Ani chuan a puan a paih a, a zuang tho va, Isua hnên a pan ta a.

⁵¹Isuan a hnênah, “Eng nge tih sak che i duh le?” a lo ti a. Mitdel chuan a hnênah, “Rabboni, hmuh theih ka duh,” a ti a.

⁵²Isuan a hnênah, “Kal tawh rawh le, i rinna hian a tidam tawh a che,” a ti a. Tichuan a hmu thei ta nghâl a, kawngah chuan Isua chu a zui ve ta a.

BUNG 11

ROPUI TAKA LAW M LUHNA

¹Jerusalem khua an thlen dâwna, Oliv tlanga Bethphage leh Bethani khaw kiang an thlenin a zirtîrte zînga mi pahni a tîr a,

²an hnenah, “In hma zawn khuaah sawn va kal ta ula; chumi khua chu in luh veleh, sabengtung pa tuai thlun, tuma la chuan lohna chu in va hmu mai ang. Phelh ula, rawn kai rawh u.

³Mi tûpawhin, ‘Engah nge khatia in tih?’ an tih che u chuan, ‘Lalpan a duh a ni,’ ti ula, tichuan a rawn kaltîr nghâl mai ang,” a ti a.

⁴Tichuan an kal ta a, kawthlêrah chuan kawngkhâr pawn lama sabengtung pa tuai thlun chu an va hmu a; an phelh ta a.

⁵Mahse chuta lo ding ve te chuan, “Engah nge sabengtung thlun kha in phelh?” an ti a.

⁶Isuan sawi tûra a hrilh angin an hnênah chuan an sawi a. Tichuan an kaltîr ta a.

⁷Sabengtung pa tuai chu Isua hnênah an rawn kai a, a chungah chuan an puante an phah a, a chuang ta a.

⁸Mi tam takin kalkawngah chuan an puan an phah a; mi dangin thingkûnga mi chhâwl sâtin kawngah chuan an phah baw k a.

⁹Tichuan, a hma lama kalte leh a hnung lama rawn zuitute chuan, “Hosanna! ‘LALPA hminga lo kal chu fakin awm rawh se!’

¹⁰Kan Pa Davida lalram, LALPA hminga lo thleng tûr chu châwimâwiin awm rawh se! Chungnung berah khian Hosanna!” tiin an âu va.

¹¹Isua chu Jerusalem tempul chhûngah chuan a lût a. Chutia engkim a en vêl zawh chuan, khua a lo tlai tawh baw k a, a chhuak a, sâwm leh pahnihte nêl Bethani-ah an kal ta a.

THEIPUI KUNG A RO

¹²A tûkah chuan Bethani aţanga a chhuah hnûin a ril a lo ţâm ta a.

¹³Râlkhata theipui kung hnah nei hi a hmu a, a rah engemaw hmuh tûr a awm tâkin, tiin a va pan a. A bul a va thlen chuan a hnah chauh lo chu engmah hmuh tûr a awm lo va; theipui rah seng hun pawh a ni lo rêng a.

¹⁴Isuan chu thing hnênah chuan, “Tûma’n i rah hi ei leh tawh ngai suh se,” a ti a. A zirtîrte pawhin chû chu an rawn hre phâ a.

ISUAN TEMPUL A THIAN

¹⁵Jerusalem an lo thleng ta a. Tempulah chuan a va lût a, tempula thil zuartute leh leitute chu a hnawt chhuak a, tangka thlengtuho dawhkânte leh ţûro zuarho ţhutphahte pawh chu a nam thlûksak baw k a.

¹⁶Tempul paltlang zâwnga bungrua an thiar vêl pawh a khap baw k a.

¹⁷“Ka in chu hnam tin tân ţawngtaina in an ti ang,’ tih zia k a ni lo vem ni? Nangni erawh chuan suamhmangte bûkah in siam zâwk hi,” tiin a zirtîr hlawn a.

¹⁸Puithiam lalte leh dân zirtîrtuten an lo hriat chuan amah tihhlum dân tûr an dap ta a; mahse a zirtîrna chu mipui zawng zawngin an ngaih ropui êm avângin anni pawh chuan amah chu an hlâu ve baw k si a.

¹⁹Tlai lamah chuan khawpui chu a chhuahsan a.

THEIPUI KUNG RO IN A ENTIR

²⁰Zingah chuan an kal pahin theipui kung kha a zung thlenga thîa ro zo vekin an hmû a.

²¹Petera chuan a hre reng a, “Rabbi, en teh! Theipui kung ânhhia i lawh kha a ro zo ta,” tiin a hrilh a.

²²Isuan an hnênah, “Pathian hi ring rawh u.

²³Tihtak zetin ka hrilh a che u, mi tûpawhin hê tlâng hnênah hian, ‘Lo insawn la, tuipuih zu inpaih lut daih rawh,’ tia, thintlunga rinhlêlhna nei lova a sawi ang takin a lo thleng thei tih ringtu tân, a sawi ang tak chuan a hmu ang.

²⁴Chuvângin ka hrilh a che u, ţawngtaia in dîl apiang chu hmu tawhah inngai ula, tichuan in hmu ang.

²⁵Ĳawngtaia in din hun apiangin, tû chungah pawh thupawi nei ula, ngaidam phawt rawh u; tichuan, in Pa vâna mi’n in bawhchhiatte chu a ngaidam thei ang.

²⁶Nimahsela, in ngaihdam si loh chuan in Pa vâna mi pawhin in bawhchhiatte chu a ngaidam bîk lo vang,” a ti a.

ISUA THUNEIHNA AN RINGHLEL

²⁷Jerusalem chu an lo thleng leh ta a. Tempul a fan vêl laiin puithiam lalte, dân zirtîrtute leh upate chu a hnênah an lo kal a.

²⁸A hnênah, “Tû thuneihnain nge hêng thil hi i tih? Heti ang ti tûr hian tu nge thû pe che?” an rawn ti a.

²⁹Mahse Isuan, “Kei pawhin thu pakhat ka zâwt ve ang che u; mi chhâng ula, tichuan hêng thil hi tu thûa tî nge ka nih ka hrilh ang che u:

³⁰Johana baptisma kha vâna mi thû nge mihring thû? Mi chhâng rawh u,” a ti a.

³¹An ngaihtuah tlâng a, “Vâna mi thû,’ kan tih chuan, ‘Engah nge a thû in âwih loh?’ min ti si ang a.

³²‘Mihring thû’ kan tih dawn chuan, mi zawng zawngin Johana chu zâwlnei dik takah an ngai si a, mipui kan hlâu baw k si a,” an ti a.

³³Tichuan, “Kan hre lo ve,” tiin Isua chu an chhâng ta a. Isuan an hnênah, “Kei pawhin hêng thil hi tû thûa tî nge ka nih ka hrilh bîk lo vang che u,” a ti ta a.

BUNG 12

GRÊP HUAN ENKAWLTU SUAL TEHKHIN THU

¹Tehkhin thuin an hnenah a sawi ţan ta a: “Mi pakhat chuan grêp huan a siam a, palin a hung vek a, grêp sâwr khur a lai a, in sâng a sa a. Huan enkawltute hnenah thawhhlawh turin a pe a, ram hla takah a zin ta a.

²A rah seng a lo hun chuan a chan-âi la tûrin huan enkawltute hnênah a chhiahhlawh pakhat a tîr a.

³Mahse ani chu an lo man a, an vaw hrep a, kutruakin an kaltîr ta a.

⁴An hnênah chuan chhiahhlawh dang a tîr leh a; chû pawh chu lungin an lo deng a, a lû-ah an lo hlîam a, zahthlâk taka an sawisak hnûah an kaltîr a.

⁵Mi dang a tîr leh a; chu mi chu an lo tihlum a; mi dang tam tak pawh chutiang bawh chuan thenkhat an sawisâ a, thenkhat an lo tihlum a.

⁶Fapa pakhat, a duh tak chu a la nei a; ‘Ka fapa hi chu an lo zah deuh ang chu maw,’ tiin an hnênah chuan a hnunung berah a tîr ve ta a.

⁷Nimahsela, chûng huan enkawltuho chuan, ‘Hê mi hi roluah tu tîr chu a nih hi. Tî r’u, i that ang u; tichuan a roluah tîr hi kan tâ a ni mai ang,’ an ti a.

⁸Tichuan, ani chu an lo man a, an tihlum a, grêp huan ata chu an theh chhuak ta a.

⁹Huan neitupa chuan engtin nge a rawn tih tâk ang le? Lo enkawltute chu a rawn tiboral ang a, huan chu mi dangte a pê ang.

¹⁰Hê Pathian Lehkha thû hi in chhiar lo vem ni: ‘In satuten lung an hnâwl hnû kha, Chû ngei chu a kila lung tangkai ber a lo ni ta.

¹¹Chû chu LALPA tih a ni a, Kan mithmuhah a mak a ni!’ tih hi, a ti a.

¹²Tichuan, amah chu man an tum a, mah se mipui an hlâu bawh si a, chû tehkhin thû chu anmahni tihchhana sawi a ni tih an hai si lo va. Tichuan, amah chu an kiansan a, an kal bo ta a.

PHARISAITE: KAISARA HNENAH CHHIAH PEK A THIANG EM?

¹³Anni chuan a thu sawi atanga man theih dân tîr dapin Pharisaite leh Heroda pâwla mi tute emaw a hnênah an tîr a.

¹⁴An lo thlen chuan a hnênah, “Zirtîrtu, mi dik tak i ni a, pawisak bik pawh i nei lo tih kan hria; tûmah thlei bik lovin, tih tak zetin Pathian thû chu dik takin i zirtîr thîn a. Kaisara hnêna chhiah châwi hi a thiang nge thiang lo?

¹⁵Kan pê ang nge pe lo vang?” an ti a. An vervêkzia hriain ani chuan an hnênah, “Engvângin nge chutia min fiah le? Duli tlang mi han lâk ula, ka lo en teh ang,” a ti a.

¹⁶Tichuan, an rawn la a. Ani chuan an hnênah, “Hei hi tû lem leh tû hming nge ni?” a ti a. Anni chuan, “Kaisara,” an ti a.

¹⁷Isuan an hnênah, “Kaisara thilte chu Kaisara hnênah pê ula, Pathian thilte chu Pathian hnênah pe ta che u,” a ti a. Amah chu mak an ti ta êm êm a.

SADUKAITE: THAWHLEHNA HI ENG ANG NGE?

¹⁸Saddukaiho, thawhlehna a awm lo tite chu a hnênah an lo kal a; thû an rawn zâwt a,

¹⁹“Zirtîrtu, ‘Mi tûpawhin fa nei lovin a nupui thihsan sela, a unaupa chuan a nupui chu rochungin a unaupa tân châ a thlahsak tîr a ni,’ tiin Mosian min ziahsak a ni.

²⁰Aw le, unau pasarih an awm a; a upa berin nupui a nei a, châ thlah lovin a thi a.

²¹A pahnihna chuan a rochung a, châ thlah lovin a thi ve leh ta a; a pathumna pawhin chutiang bawh chuan a ti a.

²²Tichuan, unau pasarih te chu châ thlah lovin an thi zêl a. A hnunung berah hmeichhia pawh chu a thi ve ta a.

²³Thawhlehnaah chuan a tu bera nupui nge ni ta ang le? An pasarih chuan nupuiah an neih theuh si a?” tiin an zâwt a.

²⁴Isuan an hnênah, “Pathian Lehkha Thû leh Pathian thiltihtheihna in hriat loh êm avângin in ngai sual zâwk a ni lo maw?

²⁵Mitthi zîng ata tholehte chuan nupui pasal an innei dâwn tawh lo va, vâna Vântirhkohte ang an ni tawh dâwn asin.

²⁶Mitthite chungchângah hian, an tho leh ngei a ni tih Mosia lehkhahua hnimbuk kâng thûah Pathianin, ‘Kei, Abrahama Pathian, Isaaka Pathian, Jakoba Pathian ka ni,’ tia a sawi te kha in chhiar lo vem ni?

²⁷Ani chu mitthi Pathian a ni lo va, minung Pathian a ni zâwk. In man fuh lo tawp a nih chu,” tiin anniho chu a chhâng a.

DAN ZIRTIRTUTE: THUPEK HMASA BER CHU ENG NGE?

²⁸Dân zirtîrtute zînga pakhat chu a lo kal a, an inhnialna thûte chu a lo ngaithla vê a, Isuan an zawhnate chu dik takin a chhâng tih pawh a hria a, tichuan a hnênah, “Thupêk zawng zawngah eng hi nge hmasa ber?” tiin a zâwt ve ta a.

²⁹Isuan a chhâng a, “Thupêk hmasa ber chu hei hi a ni: ‘Aw Israelte u, ngaithla teh u, LALPA kan Pathian chu, Lalpa pakhat a ni.

³⁰LALPA i Pathian chu i thinlung zawng zawngin, i thlarau zawng zawngin, i rilru zawng zawngin, i chakna zawng zawngin i hmangaih tîr a ni.’ Hei hi thupêk hmasa ber chu a ni.

³¹A dawttu, a anpui chu hei hi a ni: ‘Nangmah i inhmangaih angin i vêngte pawh i hmangaih tîr a ni,’ tih hi. Hêng aia thupêk ropui zâwk rêng rêng a awm lo,” tiin a chhâng a.

³²Tichuan, dân zirtîrtu chuan a hnênah, “I tiṭṭha hlê mai Zirtîrtu. Thudik tak i sawi e, Pathian chu pakhat chauh a ni a, amah lo chu tûmah dang an awm lo.

³³Amah chu thinlung zawng zawngin, hriatna zawng zawngin, thlarau zawng zawngin, chakna zawng zawngin hmangaiha, mahni inhmangaih anga mahni thenawmte hmangaih hi pumhâl thilpêk leh inthâwina zawng zawng aiin a ṭṭa zawk êm êm a ni, i ti hi i sawi dik zet a ni,” a ti a.

³⁴Chû mi chuan fing deuhin a chhâng tih Isuan a hriatin, a hnênah chuan, “Pathian lalram i hlat loh hi,” a ti a. Chuta chinah chuan tûman engmah an zâwt ngam tawh lo.

ISUA: DAVIDAN A CHITHLAH ENGTIN NGE LALPA TIIN A KOH THEIH?

³⁵Chumi hnûah chuan Isuan tempula a zirtîr laiin an hnênah, “Dân zirtirtuten engtin nge Krista chu Davida Fapa tia an sawi ṭṭin?

³⁶Davida ngeiin Thlarau Thianghlim hriattîra a sawi chu: ‘LALPA chuan, ka Lalpa hnênah, “I hmêlmâte i ke nghahchhana ka siam hmâ loh zawng Ka ding lamah ṭṭu ang che,” a ti si a.

³⁷Chutia Davida pawhin ‘Lalpa,’ tia a koh si chuan, engtin nge a fapa a nih theih ang?” a ti a. A thusawi chu mipui vantlângho chuan lâwm takin an ngaithla ṭṭin a ni.

DAN ZIRTIRTUTE LAKA FIMKHUR

³⁸A zirtîr pahin an hnênah, “Dân zirtirtute lakah fimkhur rawh u, anni chuan kawrfual hâa lên kual a, bazar hmuna chibai inbûk te an ngainâ a,

³⁹biak ina thutna langsâr laia thut te, ruaithehnaa thut hmun tha berte an chuh tlat a,

⁴⁰hmeithai sum an eisak a, tlâng bum nân rei tak tak an tawngtai thîn. Hêng mite thiam loh chan tûr hi a nasa bîk dâwn a ni,” a ti a.

HMEITHAI DÂR TANGKA PAHNIH

⁴¹Isua chu thawhlâwm bâwm hûnna ep-ah a thû a, thawhlâwm bâwma miten tangka an thlâk lai chu a lo thlîr a. Mi hausa pui puite chuan anrawn thlâk ruih ruih a.

⁴²Nakinah chuan hmeithai rethei tê hi a lo kal a, dâr tangka tlang hnih a thlâk vê a, chû chu cheng khat hû a ni.

⁴³Isua chuan a zirtîrte chu a ko va, an hnênah, “Tihlak zetin ka hrilh a che u, thawhlâwm bâwma thlâktu zawng zawng aiin hê hmeithai rethei tê hian a thlâk tam zâwk.

⁴⁴Hêng mite hian an neih chuang liama mi an thlâk a, ani erawh chu a retheih tehlul nê, a neihchhun, a khawsak der derna tûr lamin a thlâk fai vek a ni,” a ti a.

BUNG 13**TEMPUL CHHIAT TUR ISUAN A SAWI LÂWK**

¹Tempul aţanga a chhuah laiin a zirtîrte zînga mi pakhatin a hnênah, “Zirtîrtu, en teh, an lung remte leh an insak ropuizia hi!” a ti a.

²Isuan a hnênah, “Hêng in ropuizia hi in hmu maw? Hêng lung remte hi tihchim lohva zuah tûr pakhat mah a awm lo vang,” a ti a.

HUN HNUHNUNG LEH KHAWVEL TAWP TUR CHHINCHHIAHNA

³Olive Tlâng chung, tempul ep chiaha a thut laiin Petera te, Jakoba te, Johana te, Andria te chuan a hnênah,

⁴“Chûng chu engtika lo awm tûr nge? Chûng thil zawng zawng lo thleng tûr atân eng chhinchhiahna nge lo awm dâwn tih min hrilh rawh,” tiin a rûkin an zâwt a.

⁵Isuan an hnênah, “Tûma’n an tihder loh nân che u fimkhur rawh u.

⁶Keima hming chhâlin mi tam tak an lo kal ang a, ‘Krista chu ka ni e,’ tiin mi tam tak an tihder ang.

⁷Indo thû leh indo thu thangte in hriat hunah mangang suh ang che u; chûng chu a lo thleng tûr rêng a ni; tâwpna erawh chu a la ni rih lo vang.

⁸Hnam hrang hrang an indo vang a, sorkar leh sorkar an indo vang. Hmun hrang hrangah lîrte a nghîng ang a; tîm te a tlâ ang a, buaina a lo chhuak ang. Chûng chu lungngaih inţanna a ni.

⁹“Nangni chu lo inralring rawh u, an man ang che u a, rorêltute hnênah an la thlen ang che u a; biak inahte an vua ang che u. Keimah vângin hotute leh lalte hmâah, ka thu in hriattîr theihna

tûrin in la dîng dâwn a ni.

¹⁰Chanchin Tha hi nham zawng zawng hnênah hril hmasak tûr a ni si a.

¹¹An man che u a, in chungchâng rêl tûra an hlan hunah che u chuan lo lungngai lâwk suh u, eng nge in sawi dâwn tih pawh ngaihtuah lâwk hek suh u. Chutih hun takah chuan sawi tûr pêk in ni mai ang, chû chu sawi ang che u; a sawitu chu nangni in ni dâwn lo va, Thlarau Thianghlim a ni zâwk dâwn si a.

¹²Tihhlum tûrin unau leh unau an inmantîr ang a, pa pawhin a fa; fate pawhin an nu leh an pate an do vang a, an tihhlumtîr bawh ang.

¹³Ka hming avângin mi zawng zawng huat in hlawh ang. Mahse, a tâwp thlenga tuar hrâm hrâm chu, chû mi ngei chu chhandamin a awm ang.

BUAINA HUN RÂPTHLAK

¹⁴“Chuvângin, zâwlnei Daniela sawi ‘tiramtu tenawm’ kha, a din lohna tûra dîng in hmuh hunah, (a chhiar apiangin a awmzia hre rawh se), “chutih hunah chuan Judai rama awmte chu tlangahte tlân bo rawh se;

¹⁵Inchunga awm chu inchhûngah chhuk suh se, inchhûnga thil engmah chuh tûrin lût hek suh se.

¹⁶Lova feh pawh a silhfên chuh tûrin hâw hek suh se.

¹⁷Chûng nî-ahte chuan raipuarte leh nau no pawmte chan a chhe dâwn mang e!

¹⁸In tlânchhiat hun chu thlasik lai a nih loh nân tawngtai rawh u.

¹⁹Chûng nîte chu hrehawmna nî a ni dâwn si a, chutiang taka hrehawmna nasa chu Pathianin leilung a siam tîrh ata tûn thlengin a la awm ngai lo va, engtikah mah a awm leh tawh hek lo vang.

²⁰Lalpan chûng nîte chu titâwi suh sela, mihring rêng rêng damin an chhuak lo vang; nimahsela a mi thlante, a mi ruatte azârah nîte chu a titâwi dâwn a ni.

²¹“Chutih hunah chuan tupawhin in hnênah, ‘En teh u, heta hi Krista chu!’ emaw, ‘En teh u, sawta saw!’ emaw an tih chuan, âwih suh ang che u;

²²Krista derte leh zâwlnei suakte an lo chhuak dâwn si a, chûng chuan inbum nân chhinchhiahna leh thilmakte an entîr ang; theih ni phei se chu, thlante meuh pawh an bum thei hial ang.

²³Nangni erawh chu fimkhur ula; ngaihven rawh u, engkim ka hrilh lâwk che u hi.

MIHRING FAPA LOKALLEHNA

²⁴“Nimahsela, chûng buaina nî leh hun te a zawh chuan nî chu tihthimin a awm ang a, thlân êng a chhuah tawh hek lo vang;

²⁵vâna arsîte an lo tlâ ang a, vâna thiltitheihnite chu tihngîn a ni ang.

²⁶Chutih hunah chuan Mihring Fapa hi thiltitheihna nasâ leh ropui tak nê chhûm zînga lo kal an hmu ang.

²⁷Tichuan, a Vântirhkohte chu a tîr chhuak ang a, a thlante chu kâwlkil lî aţangin, leilung hmun hla ber aţanga vân hmun hla ber

thlengin an lâwr khâwm ang.

THEIPUI KUNG NENA TEHKHIN

²⁸“Tichuan, theipui kung aţangin tehkhin thû hi zir rawh u. A zîk a lo no va, hnah a rawn chhuah chuan nipui a thaw dâwn tih in hre thîn.

²⁹Chutiang bawkin, hêng thil lo thleng in hmuh hunah, amah chu kawngka bul hnaiah a awm tawh tih hria ang che u!

³⁰Tihtak zetin ka hrilh a che u, chûng zawng zawng chu a thlen hmâ loh zawng, tûnlai thangtharte hi an ral lo vang.

³¹Lei leh vân a boral ang a, ka thû erawh chu a boral lo vang.

A NI LEH DARKAR TUMA HRIAT LOH

³²“Chûng thil lo thlen tûr nî leh dârkar erawh chu Pa chauh lo chuan tûma’n an hre lo, vâna Vântirhkohte pawhin, Fapa pawhin a hre lo.

³³Fîmkhur ula, inring rengin ţawngtai rawh u; eng hunah nge a lo thlen dâwn in hre si lo.

³⁴Ram hla taka zin tûr mi pakhat chuan a chhiahhlawhte hnênah thuneiha hlâna, an thawh tûr tâwk pe theuhva, kawngkhâr vêngtu pawh ţa taka lo vêng tûra thû pê a, kal bo ta daih ang chu a ni.

³⁵Chuvângin, inring reng rawh u, in neitupa lo haw hun tûr chu tlai lamah nge, zan laiah nge, âr khuan hunah nge, zîngah nge a nih dâwn in hre si lo—

³⁶chuti lo chu, a lo haw phut ang a, in muthlu lai a rawn phâwk hlauh ang che u.

³⁷In hnêna ka sawi hi, mi zawng zawng hnêna sawi ka ni: Ngaihven rawh u!” a ti a.

BUNG 14

ISUA THAH TUMA PHIARNA

¹Ni hnih hnûah chuan Kalhlên Kût leh Chhang Dâwidim telh loh Kût a awm dâwn a. Puithiam lalte leh dân zirtirtute chuan bumna nêna amah chu mana, tihhlum dân tûr an dap a.

²Amaherawhchu, “Kût lai chuan ni suh se; chuti lo zawng, mipui vantlâng zîngah buaina a chhuak hlauh ang e,” an ti a.

BETHANI KHUAA HRIAK THIHNA

³Bethani khuaa phâr Simona inah, dawhkâna chaw a kîl laiin, hmeichhe pakhat alabasta bûra spiknard hriak rimtui man to tak kengin a lo kal a. A bûr chu a tikeh a, a lû-ah a leih a.

⁴Nimahsela, an zînga thenkhat chu an lâwm lo hle a, “Engtizia nge hê hriak rimtui hi a tihrial mai le?

⁵Hralh se duli zathum aia ţahnem fê man a ni si a, mi retheite pe zâwk ang hmiang,” an ti a. Chû nû chu an sawisêl bawrh bawrh a.

⁶Mahse Isuan, “Ngawihsan hlê hlê rawh u. Engah nge in tihbui? Ka chungah hian thil ţa tak a ti asin.

⁷Mi retheite chu in zînga awm reng an ni alâwm, in duh hun hunah an tân thil ţa in tihsak thei a; kei chu in hnêna awm reng tûr ka ni lo.

⁸A tih theih tâwk a ti a ni. Ka taksa hi phûm turin hriak a lo thih lâwk a nih hi.

⁹Tihtak zetin ka hrilh a che u, khawvêl pumah hê Chanchin Ţha an hrilna apiangah, hê hmeichhe thiltih pawh hi amah hriat reng nân an sawi ve zêl ang,” a ti a.

JUDAN ISUA MANTIR A REMTI

¹⁰Sâwm leh pahnihte zînga mi pakhat Juda Iskariota chu Isua mantîr tumin puithiam lalte hnênah a kal a.

¹¹Chû thû an lo hriat chuan an lâwm hle a, a hnênah pawisa pêk an tiam a. Tichuan, a mantîr dân tûr remchâng a zawng ta a.

ISUAN A ZIRTIRTE KALHLÊN KÛT A HMANPUI

¹²Tichuan, Chhang dâwidim telh loh nî, ni hmasa ber, Kalhlên Kûtna berâm no an talh nîah chuan a zirtîrten a hnênah, “Kalhlên Kût chaw i ei tûrin khawi hmuna buatsaih nge i duh?” an ti a.

¹³A zirtîrte zînga mi pahniht a tîr a, an hnênah, “Khawpuiah va lût ula, chutah chuan bêla tui châwi mipain a lo hmuak ang che u a, amah chu zui ang che u.

¹⁴A luhna in neitupa hnênah, “Zirtîrtu chuan, ‘Ka zirtîrte nê Kalhlên Kût chawhlui kan kîlna tûr mikhual pindan chu khawiah nge a ti?’ ti ang che u.”

¹⁵Tichuan, ani chuan pindan chungnung zau tak, engkim buatsaih sâ chu a kawhmmuh ang che u a; chutah chuan lo siam peih diam ang che u,” a ti a.

¹⁶Tichuan, a zirtîrte chu an kal chhuak a, khawpuiah chuan an va lût a, an hnêna a sawi ang takin an va hmu a; Kalhlên Kût chaw chu an buatsaih ta a.

¹⁷Tlaiah chuan ani chu sâwm leh pahnihte nê an kal ta a.

¹⁸Chutia an ţhut a, chaw an ei mêk laiin Isuan, “Tihtak zetin ka hrilh a che u, ka hnêna ei ve in zînga mi ngei hian mi mantîr ang,” a ti a.

¹⁹Tichuan, an lungngai ta êm êm a, a mal malin a hnênah, “Keimah em ni?” an ti theuh va. Mi danga pawh chuan, “Keimah em ni?” a ti bawk a.

²⁰Ani chuan an hnênah, “Sâwm leh pahnihte zînga mi pakhat, thlênga chhang mi chiahpuitu hi a ni e.

²¹Mihring Fapa hi a chanchin an ziah ang zêl khân a kal dâwn a ni; Mihring Fapa mantîrtu chung erawh chu a va pik êm! Chû mihring chu piang lo se a tân a ţa zâwk tûr,” a ti a.

ISUAN LALPA ZANRIAH A BUATSAIH

²²Chutia chaw an ei lai chuan Isuan chhang a la a, mal a sâwm a; tichuan a phel a, an hnênah a pê a, “La ula, ei rawh u; hei hi ka taksâ a ni,” a ti a.

²³No chu a lâ a, lâwmthu a sawi zawhin an hnênah a pê a; tichuan, an zâin no chuan an in ta theuh va.

²⁴Amah vêk chuan an hnênah, “Hei hi ka thisena thuthlunna thar, mi tam tak tâna chhuak tûr chu a ni.

²⁵Tihtak zetin ka hrilh a che u, Pathian lalrama a thar ka in hun a thlen hmâ loh zawng grêp rah tui hi ka in leh tawh lo vang,” a ti a.

²⁶Hlâ an sak zawhin an chhuak a, Oliv tângah chuan an kal ta a.

ISUAN PETERA PHAT TUR A SAWI LÂWK

²⁷Isuan an hnênah, “Zân inah ngei hian in vaiin min phatsan vek ang, heti hian an lo ziaik tawh si a: ‘Berâmpu chu ka vua ang a, Berâmte chu hnawh darh an ni ang,’ tiin.

²⁸“Amaherawhchu, kaihtawha ka awm hnûah, Galili ramah in hmâah ka kal ang,” a ti a.

²⁹Petera chuan a hnênah, “An vaiin phatsan vek dâwn che mah se, kei chuan ka phatsan ve lo vang che,” a ti a.

³⁰Isuan a hnênah, “Tihnak zetin ka hrilh a che, vawiinah ngei, zânin lâ lâ hian, âr vawi hnih a khuan hmâin nang hian vawi thum mi phat ang,” a ti a.

³¹Ani erawh chu a ƣang ruh hlê a, “I thihnaah chuan thi ve dâwn mah ila, ka phatsan tawp lo vang che,” a ti a. Chutiang bawh chuan an vaiin an ti ƣeuh va.

HUANA ƣAWNGƣAINA

³²Chutichuan, hmun pakhat, Gethsemani an tih chu an thleng a; ani chuan a zirtîrte hnênah, “Ka ƣawngtai hlânin hetah hian lo thu rawh u,” a ti a.

³³Tichuan, Petera te, Jakoba te, Johana te chu a kiangah a hruai a, ani chu thlaphângin a lo mangang ta êm êm a.

³⁴An hnênah, “Ka rilru a lungngai takzet a, thihpuina tham hial a ni. Hetah hian lo awm ula, inralring rawh u,” a ti a.

³⁵Hma lamah tawi tê a va pên hlek a, leiah chuan a bawh thlawp a, a theih hrâm chuan chû hun chuan amah chu kalpêl mai se tiin a ƣawngtai a.

³⁶“Abba, Ka Pa, nang chuan engkim i ti thei alâwm. Hê no hi ka hnên ata la kiang lul rawh; mahse, keima thû ni lovin, nangma thû ni zawk rawh se,” a ti a.

³⁷A lo kîr leh lai chuan anni chu muhîlin a rawn hmû a, Petera hnênah, “Simon, i muhîl a ni maw? Dârkar khat chauh pawh i ƣang thei nang e?

³⁸Thlêmnaa in luh loh nân inring rengin ƣawngtai rawh u. Thlarau chuan a peih reng a, tisa hian a zo lo a ni,” a ti a.

³⁹A va kal hrang leh a, a dîl ngai dîlin a ƣawngtai leh a.

⁴⁰A lo lêt leh chuan anniho chu an lo muhîl leh dêr tawh a, an mut a chhuak ngang mai si a; chhân lêt ngaihna pawh an hre lo.

⁴¹Chutianga a lo lêt vawi thumnaah chuan an hnênah, “In la mu hahchâwl reng dâwn em ni? Tâwk tawh rawh se! A hun chu a lo thleng ta reng mai; hei le, Mihring Fapa hi mi sualte kutah an mantîr dâwn ta e.

⁴²Tho ula, i kal ang u. En teh u, mi mantîrtu tûr pawh a lo hnai ta,” a ti a.

GETHSEMANIA PHATSANNA LEH INMANTIRNA

⁴³A la sawi lai mêkin, sâwm leh pahnihte zînga mi pakhat Juda chu, puithiam lalte leh dân zirtîrtute leh upate hnên aƣanga lo kal, khandaih leh talhtum keng mi tam tak nêan an lo thleng nghal a.

⁴⁴Phatsantua chuan chhinchhiahna a lo pe lâwk a, “Ka fawh apiang chu amah a ni ang; man ula, him takin hruai bo ang che u,” tiin.

⁴⁵A lo thlen vêleh amah chu a va pan nghal a, “Rabbi, Rabbi!” tiin a fâwp a.

⁴⁶Tichuan, ani chu an man a, an hruai ta a.

⁴⁷A bula dingte zînga mi pakhat chuan a khandaih a phâwi a, puithiam lalber chhiahhlawh chu a sât a, a beng a sah thlâksak a.

⁴⁸Isuan anni chu a bia a, an hnênah, “Suamhmang man tum ang maiin khandaih, talhtumte nêan in lo thawk chhuak a ni maw?

⁴⁹Tempulah khân in hnênah ni tin zirtîrin ka awm ƣhîn a, mi man si lo. Nimahsela, Pathian Lehkha Thu thlen dikna tûr a nih hi,” a ti a.

⁵⁰Tichuan, amah chu an phatsan a, an vai chuan an tlân chhiatsan ta vek a.

TLANGVAL SARUAKA TLÂN CHHIA

⁵¹Tlangvâl pakhat puan zaisîn chauh inbel hian amah chu a zui ve a. Chû mi chu tlangvâlhoivin an lo man a,

⁵²nimahsela, a puan zaisîn chu hnutchhiahin, saruakin a tlân bo ta a.

ISUAN SANHEDRIN-HO A HMACHHAWN

⁵³Isua chu puithiam lalber hnênah an hruai ta a; tichuan puithiam lalte, upate, dân zirtîrtute zawng zawng chu an lo pung khâwm a.

⁵⁴Petera chuan râlkhath aƣangin puithiam lalber kawt zâwl thlengin a zui ve zêl a. Chhiahhlawhho zîngah mei lum aiin a ƣhu vê a.

⁵⁵Puithiam lalte leh rorêltu zawng zawng te chuan Isua an tihhlum theih nân amah hêkna tûr an dap a, mahse an hmu thei si lo va.

⁵⁶Mi tam takin dâwtin an hêk a, mahse an hêkna thûte chu a inrem thei hlawn si lo va.

⁵⁷Mi tûteemaw an rawn ding chhuak a, dâwtin an rawn hêk a,

⁵⁸“Hê mi hian, ‘Hê tempul, kuta sak hi ka ƣhiat ang a, ni thum chhûngin a dang, kuta sak ni lo ka din leh ang,’ a tih kan hria,” an ti a.

⁵⁹Chuti chung pawhin an hêkna thû nêan chuan a inrem thei chuang lo.

⁶⁰Puithiam lal chu a laiah a lo ding chhuak a, Isua hnênah, “Engmahin i chhâng lo maw? Hêng miten an hêkna che hi eng nge a awmzia?” tiin a zâwt a.

⁶¹Ani erawh chu a ngâwi tlat a, engmahin a chhâng lo. Puithiam lal chuan a hnênah, “Krista, Faktlâka Fapa chu i ni em?” tiin a zâwt leh a.

⁶²Isuan, “Ni e. Mihring Fapa hi Thiltitheia ding lama ƣhûa, vân chhûm zînga lo kal in la hmu dâwn a ni,” a ti a.

⁶³Chû vêleh puithiam lal chuan a silhfênte a pawt thlêr a, “Hretu dang engah nge kan ngaih tawh ang?

⁶⁴Pathian a sawi chhiatzia in hriat tâk hi! Engtin nge in ngaih le?" a ti a. Tichuan, an vaiin ani chu 'thi tlâk a ni,' tiin thiam loh an chantîr ta a.

⁶⁵Thenkhatin chil an chhâk a, a hmai an tuam a, an vua a, "Tawng ta che!" an ti a. Hotute chuan an bêng sawk sawk a.

PETERAN ISUA A PHAT A, A TAP

⁶⁶Petera chu hnuai lama in hung chhông kawtlaia a awm laiin Puithiam lal chhiahhlawh nulate zînga pakhat a lo kal a;

⁶⁷Petera mei lum ai chu a hmu a, a en reng a; "Nang pawh hi Nazareth Isua bula awm thîn kha i nih hi," a ti a.

⁶⁸Ani erawh chuan, "I thu sawi chu ka hre hauh lo mai, a ngaihna pawh ka hre lo ve," tiin a phâ a. Bathlârah a va chhuak a, âr chu a khuang ta a.

⁶⁹An chhiahhlawh nula chuan a lo hmu leh a, a kiana dingte hnênah, "Hê mi hi an zînga mi a nih hi," a ti a.

⁷⁰Ani chuan a pha leh a. Rei lo te hnûah a kiana dingten Petera chu, "Nang pawh hi an zînga mi i nih ngei hi, i awphâwiah Galili mi i ni tih a hriat reng alâwm," an ti a.

⁷¹Ani erawh chuan, "Chû mihring in sawia chu ka hre hauh lo mai," tiin ânchhia inlawhin chhia a chham ta a.

⁷²Âr chu a lo khuang leh a. Petera chuan a hnêna Isuan, "Âr vawi hnih a khuan hmâin nangen vawi thum mi phat ang," a tih thu kha a hre chhuak a. Chû chu ngaihtuahin a tap ta a.

BUNG 15

ISUAN PILATA A HMACHHAWN

¹A tûk zîngah chuan puithiam lalte chu upate leh dân zirtirtute leh rorêltu zawnzawng nêan inrâwn khawm vat vat a; Isua chu an phuar a, an kalpui ta a, Pilata kutah an hlân a.

²Pilata chuan a lo zâwt a, "Judate lal i ni em?" a ti a. Ani chuan a hnênah, "Ni e, i sawi ang chu a ni e," tiin a chhâng a.

³Puithiam lalte chuan kawng tam takin an hêk a, mahse engmahin a chhâng lo.

⁴Pilata chuan a zâwt leh a, a hnênah, "Engmahin i chhâng lo maw? En teh, an hêkna zozâi che hi!" a ti a.

⁵Isua erawh chuan engtin mahin a chhâng chuang lo va, Pilata pawhin mak a ti hle a.

BARABBA AIAWHIN

⁶Kût lai hian chhuah tûra an ngen apiang mi tâng pakhat an chhuahsak thîn a.

⁷Mi pakhat, Barabba an tih chu, helho dangte zîngah kawl bunin a tâng ve reng a; chûngte chuan an helnaah tual an that a ni.

⁸Tichuan, mipuite chu ring taka âuvin, an tân a tihsak thîn anga ti tûrin an ngên ta a.

⁹Mahse Pilatan an hnênah, "Judate lal hi em ni ka chhuahsak dâwn che u?" tiin a chhâng a.

¹⁰Puithiam lalten îtsikna avângin a kutah an rawn hlân tih a hai si lo va.

¹¹Nimahsela, Barabba zâwk chu chhuahsak dîl tûrin puithiam lalte chuan mipuite chu an fuih pawrh a.

¹²Pilata chuan an hnênah, "A nih leh Judate Lal in tiha hi engtin nge ka tih dâwn?" tiin a zâwt leh a.

¹³Anniho chuan, "Krâwsah khêngbet rawh," tiin an âu tuarh tuarh a.

¹⁴Pilata chuan an hnênah, "Engah mâw? Eng nge a tihsual?" a ti a. Mahse anniho chu, "Krâwsah khêngbet rawh," tiin an âu uar sauh va.

¹⁵Pilata chuan mipui chu tihlungâwi a duh a, Barabba chu a chhuahsak ta a; Isua chu a vuak zawhin krâws-a khenbeh tûrin a pe ta a.

SIPAITE ISUA AN NUIHSAWH

¹⁶Chumi hnûah sipaite chuan in hual chhông kawt zâwl, Praitoriam an tihah chuan ani chu an hruai lût a, sipaiho chu an ko khâwm vek a.

¹⁷Ani chu puan sen duk an sintîr a; hling lukhum an phiar a, a lûah an khumtîr a.

¹⁸"Chibai, Judate lal!" tiin chibai an bûk el vêl a.

¹⁹A lû-ah chuan luang tiangin an vua a, chil an chhâk a, thingthiîn chibai an bûk el a.

²⁰Nuihza siam nâna an hman zawhah puan senduk chu an hlip a, ama kawr an haktîr leh a, krâws-a khenbeh tûrin an hruai chhuak ta a.

LAL CHU KRAWS CHUNGAH

²¹Kurini khuaa mi Simona, Aleksandara leh Rufa pa, chutih laia ram lam aţanga lo kalin chû hmun chu a rawn kal pelh dâwn lai takin, krâws putsak tûrin an lo man bet a.

²²Tichuan hmun pakhat, Golgotha, Luruh Hmun an tih chu an va hruai thleng a.

²³Chutah chuan murra nêna pawlh uain an pê a, mahse a in duh lo va.

²⁴Krâws-a an khenbeh laiin, a silhfente chu a chang tûr hriat nân thum an vâwr a, an insem a.

²⁵Isua an khenbeh chu zîng lam dâr kua* a ni.

²⁶An hêkna thuziak chu a chung lamah an târ a: "JUDATE LAL" tiin.

²⁷Ama rualin suamhmang pahni an khêngbet ve a; a ding lamah pakhat, a vei lamah pakhat.

²⁸Chutichuan, Pathian Lehkha thûin, "Bawhchhetute zîngah an chhiar tel ta," a tih kha a lo thleng famkim ta a ni.

²⁹Chu lai hmuna mi vei apiang chuan an lû thîn khumin, "Hrep tak che hian! Nang tempul thiata ni thum chhôngin ka din leh ang, titu,

³⁰intidam la, krâws ata kha lo chhuk ta che!" tiin an elsên vêl a.

³¹Chutiang bawkin puithiam lal te leh dân zirtirtute chuan nuihsawh chungin, "Mi dang mah a tidam a; mahni pawh intidam thei si lo.

³²Krista, Israel Lal chu kan lo hmuha kan rin theih nân tûnah hian krâws ata lo chhuk ang hmiang,” an ti a. Ama ruala khenbeh vête pawhin ani chu an deusawh bawk a.

KRAWS-AH ISUA A THI

³³Chhûn dâr sâwm pahni aţanga tlai dâr thum thlengin ram pumpui chu a lo thim khup mai a.

³⁴Tlai dâr thumah chuan Isua chu aw ring takin, “Eloi, Eloi, lama sabakthani?” tiin a âu va; chû chu “Ka Pathian, ka Pathian, engah nge mi kalsan?” tihna a ni.

³⁵A kiang vêla ding thenkhat chuan chû chu an lo hriatin, “En teh u, Elija a ko a nih hi!” an ti a.

³⁶Mi pakhat chu a va tlân a, uain thûrah tui hîpnaa chiah khatin tiangah a târ a, in tûrin a pê a. “Khit khian han awm sela, amah la thla tûrin Elija a lo kal emaw i en ang u,” a ti a.

³⁷Isua chu aw ring takin a âu va, a thlarau a thlah ta a.

³⁸Pathian biak in puanzâr chu a chung lam aţangin a hnuai lam thlengin a thlêr tlang vek a.

³⁹Tichuan, a hma zâwna sipai za hotu ding chuan chutianga a âu dân leh a thlarau a thlah dân a hmuh chuan, “Hê mi hi Pathian Fapa ngei chu a lo nih hi!” a ti a.

⁴⁰Hmeichhiate pawhin râlkhat aţangin an rawn thlîr a; an zîngah chuan Mari Magdalini te, Jakoba leh Josea te nu Mari te, Salomi te an tel a,

⁴¹chûng mite chu Galili rama a awm laia amah zuia a rawng bâwlsak thîntute an ni a, hmeichhe dang tam tak, ama ruala Jerusalema kal vête pawh an tel bawk a.

JOSEPHA THLANAH ISUA AN PHÛM

⁴²Tlai a lo ni a, chûmi nî chu Sabbath hmâ nî a ni a, a tûk tâna Inbuatsaihna Nî a ni a.

⁴³Josefa, Arimathai khuua mi, rorêltu zahawm, Pathian lalram beisei mi ni bawk chu a lo kal a, huai takin Pilata hnênah a lût a, Isua ruang chu a dîl ta a.

⁴⁴Pilata chuan chutia a thi ta mai chu mak a ti hlê a; sipai za hotu chu kovin, engtia rei nge a thih tawh tih a zâwt a.

⁴⁵Sipai za hotu hnên aţanga a hriat fiah hnûah, Josepha hnênah ruang chu a hlân ta a.

⁴⁶Tichuan, puan zai sîn a lei a, amah chu a la thla a, puan zai sîn chuan a tuam a. Lung kerkuak thlânah chuan a zalh a, thlân kawngkâah chuan lung lîrin, a khâr ta a.

⁴⁷Mari Magdalini leh Josea nu Mari te chuan an zalhna hmun chu an thlîr reng a.

BUNG 16

A THO LEH TA

¹Sabbath nî a lo zawh chuan, Mari Magdalini te, Jakoba nu Mari te leh Salomi te chuan a ruang hnawih tûra an kal huna ken tûrin thil rimtui an lei a.

²Chawlhkâr ni hmasa ber tûk zîng takah, nî a chhuak fel ta tihin thlân chu an va thleng a.

³“Thlân kawngkhârna lungpui chu tûin nge min lum sawnsak ang âw?” tiin anmahni chu an inzâwt hlawm a.

⁴Nimahsela, an va en nâk chuan lung chu nawr sawn sâin an hmu a, lung chu lian tak a ni a.

⁵Thlân chhûngah an lût a, tlangvâl pakhat puan vâf fual sin, ding lam panga thû an hmu a; an hlau ta êm êm a.

⁶Ani erawh chuan an hnênah, “Hlâu suh u. Nazareth Isua, an khenbeha kha in zawng a ni a. A tho leh ta! Hetah a awm tawh lo. En teh u, an zalhna hi!

⁷Tikhân kal ta ula, a zirtîrte leh Petera hrilh ula, Galili ramah in hmâah a kal dâwn a; in hnêna a sawi tawh ang khân chutah chuan in hmu ang, in ti dâwn nia,” a ti a.

⁸Anni chu mak tiin an khûr a, thlân aţang chuan an tlânchhia a. An hlauh êm avângin tû hnênah mah an sawi lo.

MARI MAGDALINI'N THOLEH LALPA A HMU

⁹Chawlhkâr ni hmasa ber zîng taka a thawhleh khân, a kawchhûng ata ramhuai pasarih a hnawh chhuahsak tâk Mari Magdalini hnênah a inlâr hmasa ber a.

¹⁰Ani chu Isua chênpuî thînte hnênah a va kal a, mitthi ngaia an lo ţap lai chu a va hrilh a.

¹¹Anni erawh chuan a nung leha, a hmuh ngei thû a sawi chu hre mahse an âwih si lo.

ZIRTIR PAHNIHTE HNENAH ISUA A INLÂR

¹²Chumi hnûah chuan an zînga mi pahni hmun dang pana kal laite hmêl hmuhah lan dân danglamin a inlâr leh a.

¹³Anni chuan zirtîr dangte an va hrilh a, mahse an lo âwih chuang lo.

THUPÊK ROPUI

¹⁴Chumi hnûah chuan sâwm leh pakhatte hnênah chaw an kîl laiin a inlâr ta a; a thawhleh hnûa amah hmutute thu rêng rêng âwih duh lohva, an rin loh leh an thinlung sak avâng chuan a zilh ta a.

¹⁵An hnênah, “Khawvêl zawng zawngah kal ula, thil siam tinrêng hnênah Chanchin Tha hi hril rawh u.

¹⁶Mi tûpawhin a rina, baptisma a chan chuan chhandam a ni ang a; amaherawhchu, mi tûpawhin a rin loh chuan thiam loh a chang ang.

¹⁷Hêng chhinchhiahnate hian ringtute chu a zui zêl ang: Keima hmingin ramhuaite an hnawt chhuak ang a; ţawng thartein an ţawng ang;

¹⁸rûlte kutin an la ang a; thihna tûr engpawh lo in sela, an nat phah chuang lo vang; damlote chungah kut an nghat ang a, an dam zêl ang,” a ti a.

KRISTA CHU PA DINGLAMAH A AWM TA

¹⁹Chutia an hnêna Lalpan thû a sawi zawh chuan, vânah hrui chhohvin a awm a, Pathian kut ding lamah a han thû ta a.

²⁰Tichuan, anni chu an kal chhuak a, ram tinah thû an hril ta a; Lalpan anmahni a thawhpui a, a thû tinghet tûrin chhinchhiahnate chuan a zui zêl a. Amen.

LUKA

Ziah tu: Luka • Ziah kum: A.D. 60

Luka, daktawr duhawm tak hi Paula rawngbâwlna thlâwpa, a zinna apianga zui tlattu a ni. Amah hi Jentail Kristian a ni a, Bible pumpui ziahtute zîngah amah chiah hi Juda ni ve lo awmchhun a ni. Chuvângin a Chanchin Tha ziah hi Grik (Jentail) mite hriatthiam tûr zâwngin, Krista mihrinna lam a târ lang tam deuh. Krista chu a nu Mari lam aţanga chhuiin, Mihring Fapa ngei a nihzia tilang tûrin thlahtu bul Adama thlengin a chhui lêt a; mihring anga lo piang ve bawk, nausên a nih aţanga mi pangngai anga puitlin thlenga lo ţhang lian, rilru lamah pawh lo fing ve deuh deuh; mihringte ang bawka Pa hnêna dîla ţawngţai ve ţhîn a nihna lam chu ziahtu dangte aiin a uar zâwk. Chanchin Tha Bua thu sei ber pakhat ziahtu Luka thuziah aţang hian Isuan mihringte a lainatzia te, hnehchhiaha awmte a khawngaihzia te, natna tuartute leh thlarau sual tihduhdah tuarte a lainatzia leh, chûng mi bo, sual bâwiha tângte chhan chhuak tûra vân aţanga lo kal a nihzia te chu tehkhin thû: duli bo, berâm bo, fapa tlanbo leh a dangte hmang hian a tifiyah hlê. Chhandamna chu mi tin ta tûr Chanchin Tha a nihna pawh a uar hlê a ni. Luka hi Biblea lehkhahu 42-na a ni a, bung 24 a awm a, châng 1151 a awm bawk.

BUNG 1

THEOPHILA TANA HLANNA

¹Kan zînga thil lo thlen famkim dân kha mi tam takin a indawt dân ang taka ziah chhuah an tum hlawm a,

²a bul aţanga mit ngeia hmutute leh thûa rawngbâwltuten min hlân chhâwng bawk a;

³chuvângin, Theophil zahawm ber, a bul aţanga ngun taka ka lo chhui chhuah tawhte chu mûmal taka i tâna ziah chhuah vê hi kei pawhin tha ka ti a,

⁴chû chu zirtîrna i lo dawn tawhte aţanga a dikzia i lo hriat chian theihna tûr a ni si a.

JOHANA PIAN TUR THU ZAKARIA HNENA PUAN

⁵Judai rama Heroda lal laiin Abija pawla puithiam pakhat Zakaria an tih chu a awm a. A nupui chu Arona thlah zinga mi a ni a, a hming chu Elizabeti a ni. lal laiin Abija pâwla puithiam pakhat, Zakaria an tih chu a awm a. A nupui chu Arona thlah zînga mi a ni a, a hming chu Elizabeti a ni.

⁶An pahnihin Pathian mithmuhah mi dik tak an ni a, Lalpa thupêk leh a dân zawnzawng chu sawisêl tûr awm lo khawpin an zâwm ţhîn.

⁷Mahse Elizabeti chin avangin fa an nei lo, an pahnihin upa tak an ni tawh a.

⁸Thil awm dân chu: a awmna pâwlte tih dâna Pathian hmâa puithiam hna a thawh laia,

⁹Lalpa tempul chhûnga a luh laiin, puithiamte tih dân ang zêla rimtui hâltu tûr ţhumvâwra an en chu ama chungah a tla a.

¹⁰Rimtui hâl hun lai chuan mipui zawnzawng chu pâwnah an lo ţawngţai a.

¹¹Lalpa Vântirhkoh pakhat chu rimtui hâlna maichâm ding lama dingin a hnênah a inlâr a.

¹²Zakaria'n a hmuh chuan a mangang a, hlauhna a thâuvah a man ta a.

¹³Nimahsela, Vântirhkoh chuan a hnênah, “Zakari, hlau suh, i thil dîl kha a hria asin; i nupui Elizabeti'n fapa a hrinsak ang che a, a hmingah Johana i sa tûr a ni.

¹⁴Nang chu i hlimin i lâwm ang a; a lo pian hun chuan mi tam tak an lâwm bawk ang.

¹⁵Lalpa ngaiha milian a ni ang a, uain leh zû rêng rêng a in tûr a ni lo. A nu pum chhûng aţang rêngin Thlarau Thianghlimin a khat ang.

¹⁶Israela thlahte zînga mi tam tak Lalpa an Pathian lamah a hawi kîrtîr leh ang.

¹⁷Elija thlarau leh a thiltihtheihnain Lalpa hmaah a kal hmasa bawk ang: ‘Pate thinlung an fate lama hawitîr tûr te,’ Thuâwihloten mi dikte finna an lo chhar vê theih nân te, Lalpa tâna inpeih tûra mite lo buatsaih tûr tein,” a ti a.

¹⁸Zakaria chuan Vântirhkoh hnênah, “Chû chu engtin nge ka hriat ang? Kei putar ka ni a, ka nupui pawh a upa tawh hlê si a,” a ti a.

¹⁹Vântirhkoh chuan a chhâng a, a hnênah, “Kei hi Gabriela, Pathian hmâa ding ţhîn ka ni a, nangmah bia a, hê chanchin lâwmawm hrilh tûr chea tîr ka ni.

²⁰Ngai rawh, ka thu sawite a hun taka lo thleng tûr chu i âwih loh avângin, a hun ruata a lo thlen hmâ loh zawnzawng i ngâw reng ang a, ţawng pawh i ţawng thei lo vang,” a ti a.

²¹Mipuite chuan Zakaria chu an lo ngâk reng a, tempul chhûnga a awm rei tâk avâng chuan mak an ti hle a.

²²Nimahsela, a lo chhuah chuan an hnênah thû a sawi thei ta lo va; a ţawng theih tâk loh avâng leh, zaizira anni a rawn biak dân aţang chuan tempulah thlarau inlâr a hmû tih an hre ta a.

²³Chutiang taka a rawngbâwlna hun bi a lo kim chuan, ama in lamah a haw leh ta a.

²⁴Ni eng emawti hnûah chuan a nupui Elizabeti chu a lo rai ta a; thla nga chhung a inthup a,

²⁵“Lalpan min lainat êm a, mi zînga ka hming chhia chhillh bo nân, heti hian min tihsak ta a nih hi,” a ti a.

KRISTA PIAN TUR THU MARI HNENA PUAN

²⁶Thla ruknaah chuan Pathianin Vântirhkoh Gabriela chu Galili rama Nazaret khua an tiha

²⁷nula thianghlim pakhat hnênah a tîr a, chû nula chu Davida thlaha mi, Josefa nupui hual a ni. Nula thianghlim hming chu Mari a ni.

²⁸Vântirhkoh chu a hnêna a lo luh chuan, “Chibai, Vohbik, Lalpa i hnênah a awm; hmeichhia azawnga nihlawh i ni e!” a ti a.

²⁹Nimahsela, chû miin chutiang thû a hrilh chuan a timangang hlê a, eng ang chibai nge ni ta ngai le? tiin a inngaihtuah buai ta a.

³⁰Vântirhkoh chuan a hnênah, “Mari, hlâu suh; Pathian duhsak zâwng i ni asin.

³¹Ngai rawh, i rai ang a, fapa i hring ang a, a hmingah ISUA i sa tûr a ni.

³²Ani chu a la ropui hlê ang a, Chungnungbera Fapa an ti ang; Lalpa Pathianin a thlahtu Davida lalthutthlêng chu a pê ang;

³³Jakoba thlahte chungah chatuanin ro a rêl ang a, a lalram chu engtikah mah a tâwp tawh ngai lo vang,” a ti a.

³⁴Mari chuan Vântirhkoh hnênah, “Chûng chu engtin nge ni ang, mipa laka thianghlim ka la ni si a?” a ti a.

³⁵Vântirhkoh chuan a hnênah, “Thlarau Thianghlim i chungah a lo thleng ang a, Chungnungbera thiltihtheihnain a hliahkhuh ang che; chuvângin, chû mi thianghlim lo piang tûra pawh chu Pathian Fapa an ti ang.

³⁶Tûnah hian i laichîn nu Elizabeti, a ching an tih thîn pawhin a tar hnû hian mipa a pây vê ta; tûn thla hi a thla rukna a ni tawh.

³⁷Pathian tân tih theih loh engmah a awm lo,” a ti a.

³⁸Mari chuan, “Ngai teh, Lalpa bâwihnu ka ni a, I thû ang zêlin ka chungah lo thleng rawh se,” a ti a. Vântirhkoh chuan a kalsan ta a.

MARIN ELIZABETHI A TLAWH

³⁹Chûng lai chuan Mari chu a tho va, hmanhmawh takin thingtlângah a zin chhuak a, Judai rama khaw pakhat a va thleng a;

⁴⁰Zakaria inah a va thleng a, Elizabeti chu chibai a va bûk a.

⁴¹Elizabetin Mari chibai bûk thâwm a hriat vêleh, a pum chhûnga nautê chu a che dawt dawt a; tichuan, Elizabeti chu Thlarau Thianghlimin a lo khat a.

⁴²Aw ring takin a âu va, “Nang chu hmeichhia azawnga nihlawh i ni, i rîla rah pawh a nihlawh e!

⁴³Ka Lalpa nu meuhvin hetia mi rawn tlawh chhuak ta mai hi, engtizia nge?

⁴⁴Ngai teh, i chibai bûkna awrâwl ka beng a luh vêleh, ka pum chhûnga nautê pawh hlim takin a lo che vê dawt dawt asin.

⁴⁵Lalpan a hnêna a lo sawi ang ngeiin a lo la thleng ngei ang tih ringtunu hi a ni nihlawh ni,” a ti a.

MARI HLA

⁴⁶Mari chuan: “Ka nun hian Lalpa a châwimâwi a,

⁴⁷Ka thlarau pawh mi Chhandamtu Pathianah chuan a lâwm êm êm a ni.

⁴⁸A bâwihnu hnam tlâwm tak chu a khawngaih a; Ngai rawh, tûn achinah thangthar zawng zawngin ‘nihlawh’ mi ti dâwn a ni.

⁴⁹Mi chak khân thil ropui tak mi tihsak a, A hming pawh ‘thianghlim’ a ni.

⁵⁰Amah tîhtute chu chhuan zawng zawng thlengin a khawngaih zêl thîn.

⁵¹A bânin a tha chakzia a entîr a, Mi chapote chu an suangtuahnain a tidarh ta a.

⁵²Mi chakte chu an lalthutthlêng aţangin a hnûk thla a, Mi hnuaihnungte a châwi sâng ta a.

⁵³Rilţâmte chu thil ţha takin a titlai a, Hausate chu kutruakin a tîr bo ta a.

⁵⁴A khawngaihza hriat reng nân A chhiahhlawh Israelte a ţanpui ta.

⁵⁵Min thlahtute leh, Abrahamah leh a thlah kal zêlte tâna a lo tiam ang khân,” a ti a.

⁵⁶Mari chu thla thum lai a hnênah chuan a châm a, chumi hnûah chuan an in lamah a hâw leh ta a.

BAPTISTU JOHANA PIAN THU

⁵⁷Elizabeti nau neih chu a lo hun a, fapa a hring ta a.

⁵⁸An ţhenawmte leh an laichînte chuan Lalpan a khawngaihna nasa tak a lantîr tih an lo hria a, an lâwmpui a.

BAPTISTU JOHANA SERHTAN

⁵⁹Heti hi a ni a, a ni riat nîah chuan, nausên serhtan tûrin an kal a; a hmingah chuan a pa hming Zakaria baw sak an tum a.

⁶⁰A nu erawh chuan, “Ni lo ve; Johana tia sak zâwk tûr a ni e,” tiin a lo chhâng a.

⁶¹Nimahsela, anni chuan, “I laichînte zîngah hê hming pû hi tumah an awm hlei nê,” an ti a.

⁶²Tichuan, a pa chu zaizirin eng hming nge sak a duh tih an zâwt a.

⁶³Ani chuan a ziahna tûr lehkhâ phêk a dîl a, “A hming chu Johana a ni e,” tiin a ziaik a. An zâin mak an ti hle a.

⁶⁴Chawp leh chilhin a lei leh a kê chu a lo inphelh a, Pathian fakina a ţawng chhuak nghâl ta mai a.

⁶⁵An vêla awm zawng zawngte chuan an hlâu va; chûng an thu sawi zawng zawng chu Judai ram thingtlâng hmun tinah chuan a darh chhuak vek a.

⁶⁶Chumi chanchin hria apiang chuan an rilrûah an pai reng a, “Chû nausên chu engtin tak la awm ang mâw?” an ti hlawn a; Lalpa kut chuan amah chu a awmpui reng a.

ZAKARIA HRILHLÂWKNA

⁶⁷A pa Zakaria chu Thlarau Thianghlimin a lo khat a, hê thû hi a puang a:

⁶⁸“Lalpa, Israelte Pathian chu fakina awm rawh se, A mite a rawn kan a, a tlan chhuak ta a,

⁶⁹A chhiahhlawh Davida chhûngkaw zîngah chuan Chhandamna kê a rawn tung ding ta a.

⁷⁰Leilung pian tîr aţang rêngin A zâwlnei thianghlimte kâin a lo sawi tawh si a.

⁷¹Kan hmêlmâte lakah leh Min hawtu zawng zawng laka kan himna tûr chu,

⁷²Min thlahtute hnêna khawngaih a tiam sâ lantîr tûr leh, A thuthlung thianghlim hriat reng nân;

⁷³Mìn thlahtu Abrahama hnêna chhia a chham chu:
⁷⁴Hlâu lova a rawng kan bawl theihna tûra Kan hmêlmâte laka chhanchhuahna tûr leh,
⁷⁵Kan dam chhûnga a mithmuha thianghlim leh dik taka kan awm theihna tûr hi a ni.
⁷⁶A ni, Taitê, nang hi Chungnungbera zâwlnei an ti ang che; A kawngte chu sial tûrin Lalpa hmâah i kal dawn si a;
⁷⁷An sualte ngaihdamna azâra A mite hnêna chhandamna thu hriattîr tûrin,
⁷⁸Kan Pathian zahngaihna duhawm tak avâng chuan Chung lam aţangin ni chhuakin min rawn tlawh ta,
⁷⁹Thim zîngah leh thihna hlima thûte ên tûr leh, Thlamuanna kawnga kan kê pêntîr tûrin,” tiin.
⁸⁰Tichuan, nausên chu a lo ţhang lian zêl a, thlarauvah a lo chak telh telh a, Israelte hnêna a rawn inlâr chhuah hmâ loh chuan thlalêrah a awm reng a.

BUNG 2

MARI HRIN KRISTA

¹Chûng hun lai chuan Kaisara Augustan khawvêl zawng zawngah chhiarpui neih tûr thû a pê a.
²Chû chhiarpui chu Kurinia’n Suria ram a awp laia an neih hmasak ber a ni.
³Tichuan, mi zawng zawng chu an hming ziaik tûrin anmahni khua ţheuhvah an kal a.
⁴Josefa pawh Davida chhungkua leh a thlaha mi a nih avângin Galili rama Nazaret khua aţangin, Judai rama Davida khua Bethlehem an tihah chuan
⁵a nupui hual Mari, râipuar ţeuh tawh nên hming ziaik tûrin an kal ve ta a.
⁶Tichuan, chû hmun an va thlen lai chuan a nau hrin a lo hun ta a.
⁷Tichuan, a fa tîr atân mipa a hring a; nausên puanin a tuam a, an tân khualbûkah hmun a awm ve loh avângin ran chaw pêkna thlêngah a muttîr a.

CHUNGNUGBERA ROPUINA

⁸Chu lai ramah bawh chuan berâm vêngtute an awm a, zanaah an beramte vêngin phûlah chuan an riahchilh a.
⁹Ngai teh, Lalpa Vântirhkoh pakhat an hmâah a lo ding a, Lalpa ropuinain an vêl chu a rawn chhun êng a, anni chuan an hlâu êm êm a.
¹⁰Vântirhkoh chuan an hnênah, “Hlau suh ulang, ngai rawh u, mi tin ta tûr Chanchin Tha lâwmawm êm êm ka rawn thlen che u a ni.
¹¹Waviinah hian Davida khuaah in tân Chhandamtu a piang ta, Lalpa Krista chu.
¹²Hei hi in tân chhinchhiahna tûr a ni: nausên puana tuam, ran chaw pêkna thlênga mû in hmu ang,” a ti a.

¹³Thâwklehkhatah Vântirhkoh hnênah chuan vân mipui an lo awm khâwm ta hmu mai a, Pathian an fak a:

¹⁴“Chungnung berah Pathian ropui takin awm rawh se, Lei chungah mihringte hnênah rem thû lêng rawh se!” an ti a.

¹⁵Chutia Vântirhkohten vân lama an kiansan vêleh berâm vêngtute chuan, “Tûnah Bethlehem khuaah kal ila, Lalpa thu min hrilh lo thleng chu i en ang u,” an ti a.

¹⁶Tichuan an kal thuai thuai a, Mari leh Josefa chu ran chaw pêkna thlênga nausên mû nên chuan an va hmû a.

¹⁷Chutia an va hmuh hnû chuan, nausên chungchânga hriattîrna thû an dawn dân te chu an sawi darh a.

¹⁸Berâm vêngtute thu sawi chu a hria apiangin mak an ti hlê a.

¹⁹Mari erawh chuan chûng thil zawng zawng chu a thilunga ngaihtuahin a vawng reng a.

²⁰Berâm vêngtute pawhin an hnêna hrilh an nih ang ngeia engkim an hmuh leh an hriat avângin, Pathian châwimâwi leh fak chung zêlin an kîr leh ta a.

ISUA SERHTAN

²¹A serh tan hun tûr ni riat a lo tling a, a hmingah chuan, chhûla a awm hmâ rênga Vântirhkohvin a sak tawh sa, ISUA an sa ta a.

TEMPULAH ISUA HLAN A NI

²²Mosia dân anga Mari inthen fai hun a zawh ni chuan, Lalpa hnêna hlân tûrin Jerusalemah an kalpui a.

²³(Lalpa dân thûa ziah angin, “Mipa fâ chhûl keu apiang chu LALPA tâna serh thianghlim tih a ni ang” tia ziah ang khân:)

²⁴Lalpa dân thûa a inziah angin thilhlân hlân tûrin, “Thuro tuak khat emaw, parva no pahnih emaw” hlan tûr a ni a.

SIMEONA'N PATHIAN CHHANDAMNA A HMU

²⁵Ngai teh, Jerusalemah chuan mi pakhat, a hming Simeona a awm a, chu mi chu mi dik leh Pathian ngaihsak tak a ni a, Israelte Thlamuantu chu a lo ngâk reng a, a chungah Thlarau Thianghlim a awm a.

²⁶Lalpa Krista chu a hmuh hmâ loh chuan a thi lo vang tih Thlarau Thianghlimin a lo hriattîr tawh rêng a.

²⁷Tichuan, Thlarau hruaiin tempul chhûngah chuan a lût a. Dânin a phût ang ti tûra nausên Isua chu a nu leh a pain an rawn hruai luh laiin,

²⁸ani chuan a lo pawm a, Pathian a fak mawlh mawlh a:

²⁹“Lalpa, tûnah hian i thû ang zêlin I chhiahhlawh hi thlamuang takin I kaltîr dawn ta a;

³⁰I chhandamna chu ka mitin a hmu ta

³¹Mi zawng zawng hmuh atâna i buatsaih ngei chu,

³²Jentailte hnêna puan chhuah tûr êng leh, I mi Israelte ropuina tûr chu,” a ti a.

³³Nausên chungchâng a sawi chu Josefa leh a nu chuan mak an ti hle a.

³⁴Simeona chuan anni chu mal a sâwm a, a nu Mari hnênah, “Ngai rawh, hê naupang hi Israelte zînga mi tam tak tlûkna tûr leh mi tam tak din chhuahna tûra ruat a ni, miten an sawi chhiat tûr chhinchhiahna nêh;

³⁵(ni e, nanga thinlung pawh ngunhnâmin a la chhun tlang ang), mi tam tak thinlung ngaihtuahte chu hâi lan a nih theih nân,” a ti a.

TLANTU A NI TIH ANNI'N A HRIATPUI

³⁶Zâwlnei nu pakhat, Anni, Phanuela fanu, Asera hnama mi a awm a. A tar tawh hlê a, a tawn tîrh pasal nêh kum sarîh an innei a;

³⁷chû hmeichhia chu kum sawmriat leh kum lî zet a hmeithai a, tempul kalsan lovin achhûn azânin châwngheia tawngtaiin Pathian a be tîh.

³⁸Chutih lai tak chuan ani chu a lo kal a, Pathian hnênah lâwmthu a sawi a, Jerusalem khawpuia tlanna beisei apiangte hnênah chû nausên chungchâng chu a puang baw k a.

NAZARETH-AH CHHUNGKUAIN AN KIR

³⁹Chutia Lalpa dân ang zêla thil zawnz zawnz an tih zawn chuan Galili rama anmahni khua Nazaret-ah chuan an haw leh ta a.

⁴⁰Nautê chu a lo tâng lian zêl a, thlarauvah a lo chak telh telh a, finnain a khat ta a; a chungah Pathian khawngaihna chu a awm a.

⁴¹Kum tinin, Kalhlên Kût hun apiangin a nu leh a pa chu Jerusalem an kal tîh a.

⁴²Kum sâwm leh kum hnih a lo tlin chuan kût dân pangngaiin Jerusalem an kal chho leh a.

⁴³Kût nîte a lo tiak a, an hâw laiin mipa naupang Isua chu Jerusalem chuan a châm a. Josepha leh a nu chuan chû chu an hre si lo va;

⁴⁴an kalpuite zîngah a awm emaw an ti a, ni khat an kal hman tawh a, an laichînte leh an hmêlhriatte zîngah an zawnz a.

⁴⁵Chutia an hmuh tâk loh avâng chuan amah zawnz chung zêlin Jerusalem an kîr leh ta a.

⁴⁶Ni thum hnûah chuan tempulah, zirtirtute zînga tîh, an thû lo ngaithlaa, thû a lo zâwt vêl lai chu an va hmu ta a.

⁴⁷A thil hriatzia leh zawnhna a chhân thiamzia hretu zawnz zawnz mak tih a hlawh a.

⁴⁸A nu leh a paten amah an va hmuh chuan mak an ti êm êm a, a nu chuan a hnênah, “Taitê, engati nge hetia min tih? En teh, i pa nêh mangang takin kan zawnz che asin,” a ti a.

⁴⁹Ani chuan an hnênah, “Engah nge mi zawn? Ka Pa hnâ thawk tûr ka ni tih in hre lo vem ni?” a ti a.

⁵⁰Mahse an hnêna a thu sawi dân chu a ngaihna an hre lo va.

⁵¹Anmahni rual chuan a hâw thlâ a, Nazaret khua chu an thlang leh ta a. An thû ang zêlin a awm a; a nu erawh chuan chûng thil zawnz zawnz chu a rilrûin a vawnz tlat a.

⁵²Isua chuan nikhua a lo hre chho zêl a, a taksa pawh a tâng lian telh telh a, Pathian leh miten an duhsak thei hlê a.

BUNG 3

BAPTISTU JOHANA KAWNG BUATSIAH

¹Tiberia Kaisara lal kum sâwm leh pangânaah chuan Pontia Pilata chu Judai ram governor a ni a, Heroda chu Galili bial awptu a ni a, a unau Philipian Iturea leh Trakonitis a awp a, Lusania chu Abilene bial awptu a ni a;

²Ana leh Kaiapha chu puithiam lalber an nih laiin, thlalêrah Zakaria fapa Johana hnênah Pathian thû a lo thlang a.

³Ani chuan Jordan lui kam vêl ram tin a hrût a, sual ngaihdam nân simna baptisma chanchin a hril zêl a;

⁴zâwlnei Isaian a lehkhâbûah heti hian a lo zia k a: “Thlalêra âw chuan, ‘LALPA kawng chu buatsaih ula; A kawngte pawh tingil rawh u.

⁵Kawr tin chhûn khah a ni ang a, Tlâng tin, mual tin râwt hniam a ni ang; Kawng kâwite chu tihngil a ni ang a, Kawng bumbohte a lo rual baw k ang;

⁶Tichuan, mi zawnz zawnz Pathian chhandamna chu an hmu ang,’ a ti,” tiin.

⁷Ani chuan baptisma chang tûra a hnêna mipui lo pung khâwmte hnênah, “Rûl thlahte u! Thinur lo thlang tûr tlânsan tûrin tûin nge zilh che u?

⁸Chuvângin, sim hming pu tlâkin rah rawh u, ‘Abrahama thlah kan ni alâwm,’ ti mai teh suh u. Duh ni se Pathian chuan hêng lungtête hi Abrahama thlahah a chantîr thei tih ka hrilh a che u.

⁹Tûn apangin thingbul tinah hreipui an chhawp ta. Chuvângin, thing tin rah thâa rah lo chu an kit a, meiah an paih zêl a ni,” a ti a

¹⁰Tichuan, mipuite chuan a hnênah, “Engtin nge kan tih ták ang?” tiin an zâwt a.

¹¹An hnênah chuan, “Tûpawh kawr pahnih nei chuan hâk tûr nei lo chu pê sela; tûpawh ei tûr nei chuan chutiang bawkin ti rawh se,” a ti a.

¹²Chhiahkhawntute pawh baptisma chang tûrin an lo kal a, “Zirtirtu, kan tih ve tûr eng nge ni le?” an ti a.

¹³Ani chuan an hnênah, “Chhiah châwi tûr bi tuk sâ aia tam chu khawn suh u,” a ti a.

¹⁴Chutiang bawkin sipaite pawhin a hnênah, “Keini pawhin eng nge kan tih ve tûr?” tiin an zâwt a. Ani chuan an hnênah, “Tûmah vau suh ula, dâwtin tûmah hêk suh u; in hlawhah lungâwi rawh u,” a ti a.

¹⁵Tichuan, Johana chung a mite beisei dân chu a sâng zêl a, Krista chu a ni thei mai lo mâw, tia mi zawnz zawnz an rilrûa an ngaihtuah mêk laiin,

¹⁶Johana chuan a chhâng a, an zâa hnênah, “Kei chuan tuin ka baptis che u a; mahse, kei aia thiltithe i zâwk a lo kal mêk a, a pheikhaw hru i phelh tlâk pawh ka ni lo. Ani chuan Thlarau Thianghlim leh me iin a baptis ang che u.

¹⁷A kutin a sisêp a keng a, a hru i h zâwlah a zâp fai hliau ang; buhtakte chu a zêmah a khung ang a, buhsîte erawh chu mei mit thei lovin a hâl ral ang,” a ti a.

¹⁸Fuihna thu dang tam tak hmangin mite hnênah thû a hril thîn a.

¹⁹Nimahsela, lal Heroda chu a nau nupui Herodi nêna an khawsak dân chungchângah leh a thil tih sual tinrêng avângin Johanan a zilhau va,

²⁰chutiang thil sual a tih zawng zawng chu belhchhahin Johana chu tân inah a khung ta a.

JOHANAN ISUA A BAPTIS

²¹Mi zawng zawngin baptisma an chan lai khân, Isua pawhin baptisma a chang vê a; a tawngtai mêk laiin vân a lo inhawng a.

²²Thlarau Thianghlim chu thûro taksa ang pûin a lo chhuk a, a chungah a fû a, vân aţangin âw a lo chhuak a, “Nang ka Fapa duh tak i ni a; i chungah ka lâwm êm êm a ni,” a ti a.

ISUA KRISTA THLAHTUTE

²³Isua chu rawng a bâwl tan lai khân kum sawmthum mi a ni tawh a, (mi ngaih chuan) Josefa fapa a ni a. Chumi chu Helia fapa a ni a,

²⁴chu mi chu Matthata fapa a ni a, chu mi chu Levia fapa a ni a, chu mi chu Melkia fapa a ni a, chu mi chu Janna fapa a ni a, chu mi chu Josefa fapa a ni a,

²⁵chu mi chu Mattathia fapa a ni a, chu mi chu Amosa fapa a ni a, chu mi chu Nahuma fapa a ni a, chu mi chu Esia fapa a ni a, chu mi chu Naggia fapa a ni a,

²⁶chu mi chu Maatha fapa a ni a, chu mi chu Mattathia fapa a ni a, chu mi chu Semeia fapa a ni a, chu mi chu Josefa fapa a ni a, chu mi chu Juda fapa a ni a.

²⁷chu mi chu Joana fapa a ni a, chu mi chu Rhesa fapa a ni a, chu mi chu Zerubabela fapa a ni a, chu mi chu Shealtiel fapa a ni a, chu mi chu Neria fapa a ni a,

²⁸chu mi chu Melkia fapa a ni a, chu mi chu Addia fapa a ni a, chu mi chu Kosama fapa a ni a, chu mi chu Elmodama fapa a ni a, chu mi chu Era fapa a ni a,

²⁹chu mi chu Josea fapa a ni a, chu mi chu Eliezara fapa a ni a, chu mi chu Jorima fapa a ni a, chu mi chu Matthata fapa a ni a, chu mi chu Levia fapa a ni a,

³⁰chu mi chu Simeona fapa a ni a, chu mi chu Juda fapa a ni a, chu mi chu Josefa fapa a ni a, chu mi chu Jonana fapa a ni a, chu mi chu Eliakima fapa a ni a,

³¹chu mi chu Melea fapa a ni a, chu mi chu Menna fapa a ni a, chu mi chu Mattatha fapa a ni a, chu mi chu Nathana fapa a ni a, chu mi chu Davida fapa a ni a,

³²chu mi chu Jesaia fapa a ni a, chu mi chu Obeda fapa a ni a, chu mi chu Boaza fapa a ni a, chu mi chu Salmona fapa a ni a, chu mi chu Nasona fapa a ni a,

³³chu mi chu Aminadaba fapa a ni a, chu mi chu Rama fapa a ni a, chu mi chu Hezrona fapa a ni a, chu mi chu Perezia fapa a ni a, chu mi chu Juda fapa a ni a,

³⁴chu mi chu Jakoba fapa a ni a, chu mi chu Isaaka fapa a ni a, chu mi chu Abrahamia fapa a ni a, chu mi chu Tera fapa a ni a, chu mi chu Nahora fapa a ni a,

³⁵chu mi chu Seruga fapa a ni a, chu mi chu Reuva fapa a ni a, chu mi chu Pelega fapa a ni a, chu mi chu Ebera fapa a ni a, chu mi chu Sela fapa a ni a,

³⁶chu mi chu Kainana fapa a ni a, chu mi chu Arpaksada fapa a ni a, chu mi chu Sema fapa a ni a, chu mi chu Nova fapa a ni a, chu mi chu Lameka fapa a ni a,

³⁷chu mi chu Methusela fapa a ni a, chu mi chu Enoka fapa a ni a, chu mi chu Jareda fapa a ni a, chu mi chu Mahalalela fapa a ni a, chu mi chu Kainana fapa a ni a,

³⁸chu mi chu Enosa fapa a ni a, chu mi chu Setha fapa a ni a, chu mi chu Adama fapa a ni a, chu mi chu Pathian fapa a ni a.

BUNG 4

SETANAN ISUA A THLÊM

¹Isua chu Thlarau Thianghlimin a lo khat a, Jordan lui aţangin a kîr leh a, Thlarau chuan thlalêr hmunah a hruai lût a,

²chutah chuan Diabolan ni sawmlî a thlêm a. Chutih chhûng zawng chuan engmah a ei lo. Chû hun a lo tâwp chuan a ril a lo tîm ta a.

³Diabola chuan a hnênah, “Pathian Fapa i nih tak tak chuan hê lung hi châwa chang tûrin thû pe ta che,” a ti a.

⁴Isuan a hnênah, “Mîhring hi châw chauhvîn an nung lo vang a, Pathian thu tinrêngin an nung zâwk ang,’ tih ziaak a ni,” tiin a chhâng a.

⁵Diabola chuan tîlâng sâng takah a hruai chho va, mit khap kâr lovah khawvêl lalram zawng zawng a entîr a.

⁶Diabola chuan a hnênah, “Hêng zawng zawng chungah thuneihna leh an ropuina hi ka pê ang che; chûng chu ka hnênah pêk a ni tawh a, ka duhsak apiang hnênah ka pe mai dâwn a ni.

⁷Chibai mi bûk la, tichuan a vaiin i ta a ni vek mai ang,” a ti a.

⁸Isuan a hnênah, “Setan! Ka hnungah awm rawh. ‘Lalpa i Pathian chu chibai bûk la, ama rawng chauh bâwl rawh,’ tih ziaak a nih kha,” tiin a chhâng a.

⁹Chumi zawhah Diabola chuan Jerusalemah a hruai a, tempul chhîp sâng laiah chuan a dîntîr a, “Pathian Fapa i nih tak tak chuan heta tâng hian zuang thla ta che;

¹⁰Nangmah vêng tûr chein A Vântirhkohte chu thû a pe ang,’ tih leh,

¹¹‘I kê lunga a insawh nat loh nân An kutin an lo dâwm ang che,’ tih ziaak a ni si a,” a ti a.

¹²Isuan a hnênah, “‘Lalpa i Pathian chu fiah suh,’ tih a ni e,” a tihsan leh a.

¹³Chutia Diabolan thlêmna tinrênga a thlêm zawh chuan, a remchân hun atân a kalsan ta a.

ISUAN A THUCHAH A PUANG TAN

¹⁴Isua chu Thlarau thiltihtheihnain Galili ramah a kîr leh a, ama chanchin chu chu lai vêl ram tinah chuan a thang chhuak ta a.

¹⁵An biak inah te a zirtîr zêl a, mi zawng zawngin an chawîmâwi a.

¹⁶Tichuan, a seilenna khua Nazaret chu a lo thleng ta a. A tih dân pangngaiin, Sabbath nî chuan biak inah a inkhâwm a, thu chhiar tûrin a dîng chhuak a.

¹⁷Zâwlnei Isaia lehkhabu chu an pê a. Lehkhabu zial chu a phelh a, hê thu chuanna lai hi a keu va:

¹⁸“Riangvaite hnêna Chanchin Tha hril tûra hriak mi thih avângin LALPA Thlarau chu ka chungah a awm a; Thinslung hliam tuam dam tûr te, Saltângte chhuah zalenna thù puang tûr te, Mitdelte mit tihvâr saka, Rabbeha awmte chhuah zalên a,

¹⁹LALPA lungâwi kum puang tûr tein mi tîr a nî,” tih thù hi a nî.

²⁰Lehkhabu chu a zial a, a enkawltu hnênah a pe kîr leh a, a ðhu ta a. Biak in chhûnga mi zawng zawng mit chu a chungah a fû a.

²¹An hnênah, “Hê Pathian Lehkha Thù hi vawiinah hian in hriatah a lo thleng ta a nih hi,” tiin a sawi ðan a.

²²Tichuan, an zâin a thuhretûah an ðang a, a ðawngkam chhuak khawngaihna thûte chu an tân thu mak a tling a. “Hê mi hi Josefa fapa kha a nî lo vem nî?” an ti a.

²³An hnênah, “Nangni chuan hê thufing hi min chham khum duh awm e, ‘Daktawr, intidam ta che! Kapernaum khuua i thiltih kan lo hriat apiang kha, nangma khuuah ngei hian ti ve rawh,’ min la tih ve ngei dâwn hi,” a ti a.

²⁴Tihian a sawi baw k a, “Tihtak zetin ka hrilh a che u, zâwlnei tûmah mahni khuua miten an lâwm ngai lo.

²⁵Thudik erawh chu ka hrilh a che u, Elija hun laia kum thum leh thla ruk vân khârpîn a niha, a ram puma ðâm nasa tak a lo tlâk lai khân Israel ramah hmeithai tam tak an awm asin;

²⁶nimahsela, an zînga tû hnênah mah Elija kha tîr a nî lo va, Sidon biala Zarephath khuua hmeichhia, hmeithai pakhat hnênah chauh tîr a nih zâwk kha.

²⁷Zâwlnei Elisa hun lai pawh khân Israel ramah phâr tam tak an awm nâ a; Suria mi Naamana tih loh chu tû dang mah tihthianglim an nih loh khâ,” a ti a.

²⁸Biak in chhûnga mi zawng zawngin chutiang thù an lo hriat chuan thinrimnain an lo khat a,

²⁹an tho va, khua ata chu an nam chhuak a; an khaw ðhuthmun tlâng pang a khâm kovah chuan nam thlâk tumin an hruai ta a.

³⁰Ani erawh chu mipui kârah a pût chhuak a, a kal bo ta daih a.

THLARAU BAWLHHLAWH ISUAN A HNAWT CHHUAK

³¹Galili rama khaw pakhat Kapernaum-ah chuan a zuk kal a. Sabbath nîah chuan mite a zirtîr ðin a.

³²Thunei taka a sawi ðhin avângin a zirtîr dân chu mite chuan mak an ti thei hlê a.

³³Biak inah chuan ramhuai bawlhhlawh thlarau pâi mi pakhat a lo awm a. Chû mi chu aw ring taka âuvin,

³⁴“Min awmtîr hlê hlê rawh! Nazaret Isu, nang leh keini hian inzawmna eng nge kan neih? Min tiboral tûrin i lo kal em nî? Tu nge i nih ka hria a che, Pathian Mi Thianghlîma chu i nî!” a ti a.

³⁵Mahse Isuan a lo hau va, “Ngawi la, a chhûng ata lo chhuak rawh!” a ti a. Tichuan, ramhuai chuan an awmna bulah chuan a

tithlû a, sawisa zui lovin a chhûng ata chu a lo chhuak ta a.

³⁶An zâ chuan mak an ti hlê a, “Eng thù nge nî ta ngai le?! Thuneihna leh thiltihtheihnain thlarau bawlhhlawhte hnênah thù a pê a, an chhuak ngâl zêl baw k si a,” an ti hlawm a.

³⁷A chanchin chu chu lai vêl ram tinah chuan a thang chhuak ta a.

PETERA PIZAWN TIHDAM

³⁸Biak in chu a chhuahsan a, Simona inah a lût a. Mahse, Simona nupuia nu chu khawsik sângin a dam lova, a tâna thil tihsak tûrin an lo ngên a.

³⁹A kiangah chuan a va dîng a, khawsik chu a hau va, a kiang ta a. Ani chu a tho ta mai a, an ei tûr a siamsak ngâl a.

⁴⁰Tlai ni a tlâk dâwn ruaiin natna chi hrang hranga nâte leh damlo tinrêngte chu an rawn hruai a; an zâa chungah chuan kut a ngat ðeuh va, a tidam zêl a.

⁴¹Ramhuaite pawhin, “Krista, Pathian Fapa chu i nî!” tia âuvin mi tam tak kawchhûng aţangin an lo chhuak a. Krista a nî tih an hai si lo va, mahse an puan chhuah phal lovin a khap tlat a, a hau baw k a.

⁴²A tûk khua a lo vâv chuan a kal chhuak a, hmun fianrial lam a pan a. Mipuite chuan amah chu an zawng a, a hnên an va thleng a, anmahni kalsan lo tûra uibeh an tum a;

⁴³nimahsela ani chuan, “Khaw dangahte pawh Pathian lalram chanchin ka hril tûr a nî, chû hna thaw k tûra tîr chu ka nî si a,” a ti a.

⁴⁴Tichuan, Galili ram chhûnga biak inahte chuan thù a hril zêl a.

BUNG 5

SANGHA MANTU PALI ZIRTIRA KOH

¹Mipuiin Pathian thu ngaihla tûra amah an bâwr huai huai laiin ani chu Gennesaret dîl kamah chuan a dîng a,

²dîl kama lawng pahni lo dîng reng chu a hmu a; sangha mantuten an lên su fai tûra lawng an chhuahsan lai a ni a.

³Simona lawngah chuan a chuang a, vaukam aţanga tawlh chhuak hret tûrin a hrilh a. Tichuan, ðhuthmun a rem a, lawng aţang chuan mipuite chu a zirtîr ta a.

⁴Thù a sawi zawh chuan Simona hnênah, “Li ðhuk lam pan la, sangha man tûrin i lête chu deng rawh le,” a ti a.

⁵Simona chuan a hnênah, “Zirtîrtu, zankhuain hah takin kan deng tawh a, engmah kan man lo; mahse i ðhûin lên chu ka’n deng leh ang e,” a ti a.

⁶Chutia lên an han den chuan sangha tam tak an man a, an lête chu a ðet ta hial a.

⁷Tichuan, lawng danga an pâwlpuite chu anmahni rawn pui tûrin kutin an hûi a. An lo kal a, lawng pahni chu pil lek lekin an chhûng khat vê vê a.

⁸Simon Petera chuan chû chu a hmuhin Isua ke bulah a bawkkhup a, “Aw Lalpa! Misual ka nî, mi kalsan rawh,” a ti a.

⁹Chuti taka tam sanghâ an man chu amah leh a ðhiantie chuan mak an ti hlê a.

¹⁰Simona te pâwl zînga mi vêk Zebedaia fapa Jakoba leh Johana te pawhin mak an ti a. Isuan Simona hnênah, “Hlâu suh. Tûn aţang chuan mihring i man tawh ang,” a ti a.

¹¹Tichuan, an lawngte chu vaukamah an hruai kai a, engkim kalsanin amah chu an zui ta a.

ISUAN PHÂR A TITHIANGHLIM

¹²Khaw pakhata a awm laiin ngai teh, phârin a bawm khah vek mi pakhat hian Isua chu a lo hmu a; hmaia lei siin a bawkkhup a, “Lalpa, duh la chuan mi tithianghlim thei e,” tiin a ngên chiam a.

¹³Ani chuan a lo ban a, a dek a, “Ka duh e, lo thianghlim tawh ang che,” a ti a. Chawp leh chilhin a phâr chu a dam ta duak mai a.

¹⁴Chû mi hnênah chuan tû hnênah mah sawi darh lo tûrin a hrilh a, “Puithiam hnênah va inentîr la, i inthen nâna Mosian tih tûr a ruat te chu va hlân rawh, miten i dam ta tih an lo hriat theih nân,” tiin a hrilh a.

¹⁵Nimahsela, a chanchin chu a darh zau sauh zâwk a; tichuan a thu ngaithla duh leh an nâte tihdam duhin mipui tam tak an rawn pung khawm ðhin a.

¹⁶Chuvângin, fianrial chuhin ramhnuaiah te a va ðawngţai ðhin a ni.

ISUAN ZENG A NG Aidam a, a Tidam

¹⁷Ni khat chu, a zirtîr laiin Pharisaite leh dân zirtîrtute pawh an ðhu ve hlawm a; chûng mite chu Galili leh Judai ram khawtin aţanga lo kalte, Jerusalem aţanga lo kalte an ni a; mite tidam tûrin Lalpa thiltihtheihna chu a awm si a.

¹⁸Tin, ngai teh, zeng pakhat chu a mutna khum chawpin an rawn zâwn a, a hmâa va dah tûrin zâwn luh an tum a.

¹⁹Mipui an tam êm avângin zâwn luhna kawng rêng an hmu lo va; tichuan in chungah an lâwn chho va, in chung chu an ðhiat a, âwngah chuan a khum chawpin Isua hmazâwnah chuan an uai thlâktîr a.

²⁰Ani chuan an rinzia a lo hmuhin a hnênah, “Þhiana, i sualte ngaihdam a ni tawh e,” a ti a.

²¹Mahse, dân zirtîrtute leh Pharisaite chuan, “He Pathian sawichhetu hi tu nge maw a nih le? Pathian chauh lo chuan tûin nge sualte ngaidam thei le?” tiin an ngaihtuah a.

²²Nimahsela, Isuan an ngaihtuahte chu a lo hria a, an hnênah, “In rilrûah eng nge in ngaihtuah?”

²³I sualte ngaihdam a ni tawh, tih nge sawi awl zâwk ang, “Tho la, kêin kal tawh rawh, tih hi?”

²⁴Khawvêlah Mihring Fapa hian sual ngaidam tûrin thuneihna a nei tih in hriatna tûr a nih hi,” a ti a. Zeng hnênah chuan, “Tho la, i mutbu têt la, i inah haw tûrin ka ti a che,” a ti a.

²⁵An mithmuh lai reng chuan a tho nghâl a, a mutbû chu a têt a, Pathian fak chung zêlin a inah a haw ta a.

²⁶An zâin mak an ti a, Pathian an fak a, “Vawiinah hian thil danglam tak kan hmu a nih hi!” an ti a, an hlâu ta êm êm a.

CHHIAHKHAWNTU MATTHAIA

²⁷Chumi zawhah chuan a kal chhuak a, chhiah pêkna hmuna lo ðhû chhiahkhawntu pakhat, a hming Levia a hmu a. A hnênah, “Mi zui rawh,” a ti a.

²⁸Ani chu a tho va, engkim kalsanin a zui ta a.

²⁹Levia chuan ama inah ruai ropui tak a ðhehsak a. Chutah chuan chhiahkhawntu tam tak leh mi dangte nên ruai chu an kîlpui hlawm a.

³⁰Dân zirtîrtute leh Pharisaite erawh chu a zirtîrte chungah an phun nâwi a, “Engati nge chhiahkhawntute leh mi sualte nêna in ei a, in in le?” an ti a.

³¹Isuan an hnênah, “Mi hrisêlte chuan daktawr an ngai lo va, mi bawrhsâwmte zâwkin an ngai a ni.

³²Mi fel-ho lam tûra lo kal ka ni lo va, misualten an lo sim theih nana lo kal zâwk ka ni,” tiin a chhâng a.

CHAWNGHEI THU-AH ISUA AN CHHÂL

³³Anni chuan a hnênah, “Johana zirtîrtin chaw an nghei fo va, an ðawngţai ðhin a, Pharisaite pawhin chutiang bawk chuan an ti ðhin, engti zia nge nangni hian in ei a, in in le?” an ti a.

³⁴Isuan an hnênah, “Mo ðhiantie hnêna moneitu a awm ve chhûngin mo ðhiantie chu chaw in ngheitîr thei em ni?”

³⁵Moneitu chu a ðhiantie hnên aţanga hruai bo hun a la thleng ang a, chûng hunah chuan an la nghei ve ang chu,” a ti a.

³⁶An hnênah tehkhin ðhû a sawi a: “Tûma’n puan hlui bel nân puan thar an hmang ngai lo; bel ta se, a thar chuan a kâi ðet zâwk ang, chuvângin puan thar leh puan hlui chu a inrem thei lo.

³⁷Tûman savun uain ip hluih uain thar an thun ngai lo, thun ang sela, uain thar chuan savun ip hluite chu a tâwn puak ang a, a bua ang a, savun ip pawhin a chhiat phah bawk ang.

³⁸Uain thar chu savun uain ip thara thun zâwk tûr a ni.

³⁹Mi tûmahin uain chang ða tawh in zawhin uain la no tak an duh zui ngai lo; ‘A hlui hlui a ða,’ an tih ðhin hi,” a ti a.

BUNG 6

ISUA CHU SABBATH LALPA A NI

¹Sabbath wawi khat zawha a wawi hnihnaah chuan buh hmunahte an kal tlang a. A zirtîrte chuan buh vuite chu an thliak a, an kutin an nuai fai a, an ei a.

²Pharisai zînga mi ðhenkhat chuan, “Engati nge Sabbath nia tih thiang lo chu in tih?” an ti a.

³Isuan a chhâng a, “Davida a rilţâm laia amah leh a hnungzuite thiltih dân kha in chhiar lo vem ni?”

⁴Khatia Pathian ina a luha, puithiamte chauh ei thian chhang thianghlim chu a lâka, a eia, a hnungzuite a pêk ve ðhû kha?” a ti a.

⁵Amah vêkin an hnênah, “Mihring Fapa hi Sabbath Lalpa a ni bawk asin,” a ti a.

SABBATH NI A TIHDAM

⁶Sabbath ni dangah pawh biak inah a lût a, a zirtîr a. Mi pakhat kut ding lam zeng hi chutah chuan a lo awm ve reng a.

⁷Tichuan, dân zirtirtute leh Pharisaite chuan amah hêkna tûr an hmuh theih nân, Sabbath nî-a a tihdam dâwn leh dâwn loh an lo châng a.

⁸Nimahsela, ani chuan an ngaihtuahte chu hriain kutzeng hnênah chuan, “Tho la, hetah hian lo dîng rawh,” a ti a. Tichuan a tho va, a dîng chhuak ta a.

⁹Isuan an hnênah, “Sabbath nî hian thil tha tih nge thiàng thil sual tih, nunna chhanchhuah nge thiàng tihboral? tih ka zâwt a che u,” a ti a.

¹⁰Mipui awmna lam chu a hawi kual a, chû mî hnênah chuan, “I kut phar rawh,” a ti a. A han phar chhuak a, a kut lehlam ang maiin a lo dam ta a.

¹¹Mahse anni lam chu an thinrim êm êm a, Isua chungah chet dân tûr ngaihtuahin an inrâwn khâwm a.

ZIRTIR SAWM PAHNIHTE

¹²Chûng lai chuan a kal chhuak a, ãawngtai tûrin tlângah a lâwn a, Pathian hnênah zankhuain a ãawngtai a.

¹³A tûkah chuan a zirtirte chu a hnêna lo kal tûrin a ko va; an zîng aţangin sâwm leh pahni a thlang chhuak a, an hmingah pawh *Apostolte tiin a vuah a:

¹⁴chûngte chu Simona, Petera an tih baw leh a unau Andria te, Jakoba leh Johana te; Philipa leh Bartholomaia te;

¹⁵Matthaia leh Thoma te; Alphaia fapa Jakoba te, Simona, Zelota an tih te;

¹⁶Jakoba fapa Juda te, amah phantsantu ni bawk Juda Iskariota te an ni.

ISUAN MI TAM TAK A TIDAM

¹⁷Tichuan, an zân an chhuk thlâ a, a zirtirte leh mipui tam tak nênmun zâwlah an dîng khawm a; chûng mipuite chu Judai rama khaw tin leh Jerusalem aţang te, Tura leh Sidon chhehvêl tuipei kama chêng mi tam tak nênmun, a thû ngaithla tûr leh an nâte tihdam duhin an lo kal khâwm a,

¹⁸an zîngah chuan thlarau bawlhhlawh sawisakte pawh an awm a. An lo dam ta a.

¹⁹Amah aţanga thiltihtheihna chhuak chuan a tihdam zêl avângin mipui zawn zawn chuan amah chu deh an tum theuh va.

TLANG CHUNGA THUSAWI

²⁰A zirtirte awmna lam chu a lo hawi chhuak a: “Nangni retheite u, in nihlawh e, Vân lalram in tâ a ni si a.

²¹“Nangni tûna rilâmta u, in nihlawh e; in la tlai dâwn si a, “Nangni tûna ãapte u, in nihlawh e, in la nui dâwn si a.

²²“Mihring Fapa avânga miten an huat che u a, an ensan che u a, an hauh che u a, hmingchhe taka an chhuah hunah che u chuan in la nihlawh ang.

²³Chu mi nîah chuan hlim taka lâwmin zuang rawh u! Ngai teh u, vânah khian in lâwmmman ropui tak a awm asin, in chungah an tih ang tho hian an thlahtute pawhin zâwlneite chungah an lo tih thîn kha.

ISUAN CHUNGPIKNA A PUANG

²⁴Nangni mi hausate u, in chung a pik e; in lâwmmman in dawng zo dêr tawh si a.

²⁵Nangni tûna tlai puarte u, in chung a pik e; in ril a la tîm dâwn si a. Nangni tûna nuite u, in chung a pik e; lungngaiin in la ãap dâwn si a.

²⁶Mi zawn zawn fak in hlawn hunah in chung a la pik ang, chutiàng bawkin an thlahtuten zâwlnei suakte chungah an tih kha.

I HMÊLMATE HMANGAIH RAWH

²⁷“Ka thu ngaithlatute u: in hmêlmâte chu hmangaih ula, nangmahni hawtute tân thil tha ti tûrin ka hrilh a che u;

²⁸nangmahni sawichhetu che u chu malsâwm ula, diriamtu che u chu ãawngtaisak rawh u.

²⁹Biang lehlama bêngtu che hnênah lehlam pawh dawh rawh. I puan chhuhsaktû che lakah chuan i kawr pawh ui suh.

³⁰A dîltu apiang che hnênah pe rawh; i thil lâksaktu che chu dîl leh tawh suh.

³¹Miten in chungah ti se in duh ang bawkin mi dangte chungah pawh ti ve rawh u.

³²Nangmahni hmangaihtute chauh in hmangaih hian ãat chuan bîkna eng nge in neih? Mi sualte pawhin anmahni hmangaihtute chu an hmangaih ve tho si a.

³³In laka ãate chungah chauh ãat in chhuah hian eng nge in ãat chuan bîkna le? Misualte pawhin chutiàng bawk chuan an ti ve tho si a.

³⁴Hmuh lêt leh theihna tûr hnênah chauh thil in pûktîr hian, eng nge in lêm chuan bîkna? Mi sualte pawhin an hmuh lêt leh theihnate hnênah chuan an pûktîr ve tho asin.

³⁵Amaherawhchu, in hmêlmâte hmangaih ula, thil tha tihsak ula, rulh lêt beisei lovin pûktîr rawh u; tichuan in lâwmmman a ropui ang a, Chungnungbera fate in ni bawk ang. Ani chu mi sualte leh lâwm nachâng hre lote chungah pawh a ngilnei si a.

³⁶Chuvângin, in Pain zah a ngai thei ang bawkin, nangni pawhin zah lo ngai ve rawh u.

THIAM LOH CHANTIR SUH U

³⁷“Tumah thiam loh chantîr ngawt suh u, nangni pawh thiam loh chantîra in awm loh nân. Thiam loh chantîr mai lo ula, tichuan thiam loh an chantîr bîk lo vang che u. Ngaidam ula, tichuan an ngaidam ve ang che u.

³⁸Pe rawh u, tichuan an pe lêt vê ang che u: teh tling zânin, beng muka sâwi muka liam zawih zawihin in malchungah an pê ang che u. In tehna ngai bawkin an tehsak ve dâwn si che u a,” a ti a.

³⁹An hnênah tehkhin thûin: “Mitdelin mittel vêk a hruai thei em ni? An pahnihin khuarkhurumah an tla dîn dâwn lo vem ni?

⁴⁰Zirlai chu a zirtirtu chungah a awm lo; mahse famkim taka zir zo tawh chu an zirtirtu ang a la ni ang.

⁴¹Engati nge i mita thing tum awm chu ngaimawh si lovin, i unau mita hmawlh te reuh te awm chu i ngaimawh le?

⁴²Mahni mita thing tum ngaimawh nachâng hre si lovin, ‘Unaupa, i mita hmawlh tê kha mi lâk chhuahtîr rawh,’ engtin nge i tih theih? Vervêk pa! I mit ata thing tum kha la chhuak hmasa la, tichuan i unau mita hmawlh te tak te lâk chhuah tûr chu fiah takin i hmu dawn nia.

THING CHU A RAH ATANGA HRIAT A NI

⁴³“Thing thâin rah chhia a chhuah lo va, thing chhiain rah thâ a chhuah hek lo.

⁴⁴Thing tin hi a rah atanga hriat a ni si a. Hruihlîngnei kûngah theipui an lo ngai lo va, hîngbuk kungah grêp rah an lo ngai bawh hek lo.

⁴⁵Mi thâ chuan a thinlung ro bâwm thâ atangin thil thâte a theh chhuak thîn a; mi sual chuan a thinlung ro bâwm thâ lo atangin thil thâ lote a theh chhuak thîn. Thinlunga khat liam chu kâin a sawi thîn.

LUNGPUI CHUNGA SAK

⁴⁶“Engati nge nangnin ka thu zâwm si lo va, ‘Lalpa, Lalpa,’ mi tih thîn?

⁴⁷Mi tûpawh ka hnêna lo kal a, ka thû hriaa zâwm apiang chu eng ang mi nge an nih ka hriattîr ang che u:

⁴⁸In satu, thûk taka lei laia, a inngahna lungpui chung a phûmtu ang chu an ni. Tui a lo lian a, tuifâwnin chu mi in chu a hlap thuai thuai a, lungpui chung a nghet taka sak a nih avângin a tinghîng thei lo va.

⁴⁹Amaherawhchu, thû chu hriaa zâwm si lo chu, nghahchhan awm lova lei chung maia in satu ang chu a ni; tuilianin na taka a rawn nuai vêleh a chim nghâl mai a. A sawp chu nasa tak a ni,” a ti a.

BUNG 7

ISUAN SIPAI ZA HOTU CHHIAHHLAWH A TIDAM

¹Mipui hmaa thû a sawi zawhin Kapernaum kuaah a lût a.

²Sipai za hotu pakhat chhiahhlawh, a pu tâna ngainatawm tak chu a dam lo va, thih ngamin a nâ a.

³Isua chanchin a lo hriat vêleh, a chhiahhlawh tidam tûr leh ama ina lo kal tûra va ngên tûrin Juda upate a tîr a.

⁴Isua hnên an va thlen chuan, anni chuan an mi dîlsaka chu tanpui tlâk a nihzia sawiin ani chu an ngên chiam a,

⁵“Kan hnam hi a hmangaih êm a, kan biak in pawh min saksak a ni,” an ti a.

⁶Tichuan, Isua chu an rualin a kal ta a. In a thlen dawn têpin sipai za hotu chuan a hnênah a thiante a tîr a, “Lalpa, rawn kal buai duh suh, ka in chhîng chu i luhna tlâk a ni lo ve.

⁷Chuvângin, i hnêna lo kal tlâk pawh niin ka inhre lo. Thû chauh sawi la, ka chhiahhlawh chu a dam mai ang.

⁸Kei pawh hotu hnuaia awm ka ni a, ka hnuaiah sipaite an awm leh a. Thû ka pê a, ‘Kal rawh,’ ka ti a, a kal a; mi dang hnênah pawh, ‘Lo kal rawh,’ ka ti a, a lo kal mai thîn; ka chhiahhlawh hnênah pawh, ‘Hei hi ti rawh,’ ka tih chuan, a ti mai thîn,” a ti a.

⁹Isuan chûng thû chu a lo hriatin, chû pa chu mak a ti hê a, a hawi kual a, amah zuitu mipui hnênah chuan, “Ka hrilh a che u, Israelte zîngah pawh heti êma rinna nasa hi ka hmu lo!” a ti a.

¹⁰Tichuan, a mi tirhte chu ina an va haw leh chuan, chhiahhlawh dam lo chu dam thâ viahin an va hmu ta a.

NAIN HMEITHAI FAPA THI ISUAN A KAITHO

¹¹A tûkah chuan khaw pakhat, Nain an tihah chuan a kal a; a zirtîrte leh mipui tam takin amah an zui a.

¹²Chû khaw kulh kawngkhâr kiang a lo thlen chuan ngai teh, mitthi an rawn zâwn chhuak a, a nu fapa neihchhun a ni a, ani lah chu hmeithai a ni a. Khuua mi tam takin an rawn zui a.

¹³Lalpa chuan hmeithai chu a hmuh vêleh a khawngaih êm êm a, “Tap suh,” a ti a.

¹⁴A bulah a va kal hnai a, kuang inhawng chu a dek a, a zâwn tute chuan an dînpui a. Ani chuan, “Tlangval, tho rawh ka ti a che,” a ti a.

¹⁵Mitthi chu a lo thû chhuak a, a rawn tawng chhuak ta a. Tichuan, a nu hnênah a hlan a.

¹⁶Chuta mi zawng zawng chuan an hlâu va, Pathian an fak a, “Kan zîngah zâwlnei ropui tak a lo chhuak ta a nih hi,” an ti a; “Pathianin a mite a rawn tlawh ta,” an ti bawh a.

¹⁷Chû thil thleng chanchin chu Judai ram zawng zawngah leh a chhehvêl ram tinah a thang chhuak ta a.

BAPTISTU JOHANAN ISUA HNENAH PALAI A TIR

¹⁸Johana zirtîrte chuan chûng thû zawng zawng chu Johana an va hrilh a.

¹⁹Tichuan, Johana chuan a zirtîr pahnih a ko va, Isua hnênah a tîr a, “Lo kal tûra chu i ni nge, mi dang kan la beisei dawn?” tiin a chah a.

²⁰A mi tirhten a hnên an thlen chuan, “Baptistu Johanan, ‘Lo kal tûra chu i ni nge, midang kan la beisei dawn?’ tiin i hnênah min rawn tîr a ni,” an ti a.

²¹Chutih lai chuan Isuan chak lohna vei te, hripui vei te, thlarau sualin a man mi tam tak a tidam a, mitdel tam takte mit a tivâr a.

²²Isuan an hnênah, “Kal leh ta ulang, in thil hmuh leh hriat te hi Johana va hrilh rawh u: mitdelte mit a lo vâ ta, kebâte kêin an kal ta, phârte an lo thianghlim ta, bengngawngte pawh an beng a lo vâ ta, mitthite kaihthawhin an awm ta, pachhiaten Chanchin Thâ hril an dawng ta.

²³Tûpawh keima chung a lungnih lohna nei lo chu an nihlawh e,” tiin a chhâng a.

²⁴Johana mi tirhte kal sawn hnû chuan Isuan mipuite hnênah Johana chungchâng a sawi zui a, “Eng en tûrin nge thlalêra in kal chhuah kha? Luang thli chhêm nghîn maw?

²⁵A nih loh leh, eng en tûr berin nge in kal chhuah kha? Puan zai sîn sinte maw? Ngai rawh u, puan ropui sin leh mi nuamsate chu lal inah te asin an awm ni.

²⁶A nih loh leh, eng en tûr berin nge in kal chhuah kha? Zâwlnei maw? Ni e, zâwlnei ai pawhin a ropui zâwk tih ka hrilh a

che u.

²⁷En teh, ka tirhkoh i hmâah ka tîr a, Ani chuan i hmâah i kawng a siam ang,’ tia a chanchin an ziaka kha, hê mi hi a ni e.

²⁸Ka hrilh a che u, hmeichhe hrin zîngah Baptistu Johana aia zâwlnei ropui zâwk an awm lo; nimahsela, Pathian lalrama mi tê ber pawh ani ai chuan an ropui zâwk a ni,” a ti a.

²⁹Mi zawng zawngin a thû an lo hriat chuan, chhiahkhawntute pawhin Pathian thû chu a dik a ni tiin an pawm ve ta hial a, Johana baptisma an lo chang tawh baw a.

³⁰Pharisaite leh dân hretute erawh chuan a hnênah baptisma chang ve duh lovin, anmahni tâna Pathian remruatsak chu an lo hnâwl tawh si a.

³¹Lalpa chuan, “Tûnlai thangtharte hi eng nêen nge ka tehkhin anga, eng ang tak nge maw an nih le?”

³²Naupangho, dâwr hmunah te thû a, an thiante nêen inâutawn vêl a, ‘Phênglâwng kan tumsak che u a , In lâm si lo va. ‘Kan sînpui che u a, In tuar na lêm si lo,” ti te ang hi an ni.

³³Baptistu Johana a lo kal a, chaw a ei lo va, uain pawh a in hek lo va, ‘Ramhuai a zâwl a nih hi,’ in ti hlahu va.

³⁴Mihring Fapa a lo kal ta a, a eiin a in a, nangni erawh chuan, ‘En teh u, chaw heh mi, uain heh mi, chhiahkhawntute leh misualte thian saw!’ in ti baw a si a.

³⁵Finna chu a dikzia a fate zawng zawngah a lang asin,” a ti a.

HMEICHHE SUAL NGAIHDAM

³⁶Pharisaite zînga mi pakhat chuan a hnêna chaw ei tûrin a sâwm a. Tichuan, chu Pharisai inah chuan a lût a, chaw a kîl a.

³⁷Ngai teh, chumi khuua hmeichhe sual pakhat chuan Pharisai inah chaw kîlin a thû mêk tih a hriat vêleh, alabasta bûrin hriak rimtui arawn keng a,

³⁸a ke bulah chuan tap chungin a ding a; a mittuiin a kephah a far huh a, a samin a hrû a; a kephah chu a fâwp ngawih ngawih a, hriak rimtui chuan a chulh ta a.

³⁹Amah sâwmtu Pharisai chuan chû chu a hmuhin, “Hê mi hi zâwlnei a nih chuan amah dektu hmeichhia hi tu nge a niha, eng ang hmeichhia nge a nih hriat âwm tak, misual a ni reng si a,” a ti rilrû a.

⁴⁰Isuan a chhang a, “Simon, i hnênah engemaw sawi tûr ka nei,” a ti a. Ani chuan, “Sawi ta che Zirtîrtu,” a ti a.

⁴¹Isuan, “Tangka pûktîrtu pakhat lakah mi pahnih hian lei an bâ a; pakhatin duli zangâ a bâ a, pakhatin duli sawmngâ.

⁴²Rulhna tûr an neih loh vê vê avângin, an pahnih chuan a ngaidam ta a. Tichuan, a tu zâwk chuan nge hmangaih zâwk ang? Mi hrilh rawh,” a ti a.

⁴³Simona chuan, “A ngaidam tam zâwka chuan a nih ka ring,” tiin a chhâng a. Ani chuan a hnênah, “I tidik zet mai,” a ti a.

⁴⁴Tichuan, hmeichhe lam chu a hawi a, Simona hnênah, “He hmeichhia hi i hmu em? I inah ka lo lût a, nangin ke silna tûr tui mi pe lo va, ani erawh chuan a mittuiin ka ke a tihuh a, a samin a hru fai leh a ni.

⁴⁵Nang chuan mi pawh i fâwp lo va, hê hmeichhia erawh hi chuan a lo luh tirh ata ka kephah a la fâwp bâng thei lo a nih hi.

⁴⁶Nangin ka lû-ah hriak mi thih lo; hê hmeichhia hi chuan ka kêah hriak rimtui a chulh a nih hi.

⁴⁷Chuvângin ka hrilh a che, heti taka a hmangaih avâng hian, a sualte chu tam hle mahse ngaidam a ni ta. Ngaidam a tlêm chuan hmangaihna pawh a tlêm deuh asin,” a ti a.

⁴⁸Hmeichhe hnênah chuan, “I sualte ngaidam a ni tawh e,” a ti a.

⁴⁹A chaw kîlpuite chuan, “Sualte pawh ngaidam ta hial mai chu tu nge maw ni lê?” an ti a.

⁵⁰Hmeichhe hnênah chuan, “I rinna hian a chhandam che a nih hi. Thlamuang takin kal tawh rawh,” a ti a.

BUNG 8

HMEICHHE TAM TAKIN ISUA AN TAWIAWM

¹Chumi hnûah chuan Isua chu Pathian lalram Chanchin Thā hrila entir chung zêlin khaw lian leh khaw têt a fang zêl a. Sâwm leh pahnihte chuan a hnung an zui a;

²hmeichhia tuteemaw thlarau sual leh an natna a tihdam saktin an zui baw a; chûng zîngah chuan Mari, Magdalini an tih, a kawchhûng aţanga ramhuai pasarih chhuak ta te,

³Heroda sum enkawltu Chuza nupui Joani te, Susani leh mi dang tam tak te nêen an ni; chûngte chuan mahni intum chawpin a rawng an bâwlsak thîn.

BUH CHI THEHTU TEHKHIN THU

⁴Khaw tin aţangin mipui tam tak an lo pung khâwm a, amah anrawn pan a, ani chuan tehkhin thu hmangin thû a sawi a:

⁵“Buh chi thehtu chu a buh chî thehin a feh a. Buh chi thenkhat chu kawng dungah a tlâ a, miin an rap a, chunglêng savaten an tlân zo ta a.

⁶A then pialtlêp chungah a tlâ a; a tiah vêleh hnâwng a tlâkchham avângin a râwp ral ta mai a.

⁷Thenkhat chu hnimbhîngnei zîngah a tlâ a, hnim a lo thang lian a, an dîp ral ta a.

⁸Thenkhat chu lei thaah a tlâ a, a lo ʔo va, a leh zâin a rah ta a,” a ti a. Chûng thû chu sawiin a âu va, “Tûpawh hriatna tûra beng nei chuan hre rawh se!” a ti a.

TEHKHIN THU TUM

⁹A zirtîrte chuan a hnênah, “Hê tehkhin thû hi eng tihna nge ni?” tiin an zâwt a.

¹⁰Ani chuan, “Nangni tân chuan Pathian lalram thurûk chu hriat phal ni mah se, mi dangte hnênah chuan tehkhin thû chauhvîn sawi a ni; ‘Hmu reng chung pawha an hmuh theih loh nân, bengin hre mahse a ngaihna an hriat chuan loh nân,’ a ti a.

BUH CHI THEHTU TEHKHIN THU HRILHFIAHNA

¹¹“Tehkhin thû kha hei hi a ni: Buh chî chu Pathian thû a ni.

¹²Kawng dunga tlâ chu thu hre tawhte hi an ni; tichuan, chhandamna chang tûra an âwih theih loh nân Diabola chu a lo

kal a, an thinlunga thu awm chu a lâk bosak ang hi a ni.

¹³Pialtêp chung a tlâte chu, thu an lo hriat vêleha lâwm taka pawm nghal mai te hi an ni; nimahsela, zung rêng an kai si lo va, chuvângin rei lo te chauh an âwih a, thlêmna a awm hlekin an thu nghal mai thîn.

¹⁴Hnimhlingnei zînga tlâ chu, thû an lo hriat hnûin an kal chhuak a, dam chhûng khawsak lungkhamna te, hausak duhna te, nawmsak duhnate chuan a dîp a, an rah puitling thîn lo a ni.

¹⁵Lei thaa tlâte erawh chu hêng mite hi an ni: rilru tha leh rinawm takin thû chu an hria a, an vawng reng a, chhel takin rah an chhuah thîn.

KHÂWNVÂR CHHIT NENA TEHKHIN

¹⁶“Tûma’n an khâwnvâr chhit lai bûrin an khuh ngai lo, khum hnuaiah pawh an dah ngai hek lo; a lût apiangin a êng an hmuh theih nân a hûnnaah an hûng zâwk thîn.

¹⁷Puan loh tûra zêp rûk engmah a awm lo va, hriat chhuah loh tûr leh lang chhuak leh lo tûra thuhrûk pawh engmah a awm hek lo.

¹⁸Chutichuan, thû in lo dawn dân hi ngaihtuah teh u. Tûpawh a nei chu an pêk belhchhah ang a; tûpawh a nei lo chu, la nei tûra a inngaih thlengin lâksak a ni ang,” a ti a.

ISUA NU LEH A UNAUTEN AMAH AN PAN

¹⁹A nu leh a unaute chuan amah chu anrawn pan a, mahse mipui vângin a awmna hmun chu an thleng thei lo va.

²⁰Mi tuteemaw chuan, “I nu leh i unauten hmuh che tumin pâwnah sâwn an ding reng e,” tiin an va hrilh a.

²¹Ani erawh chuan an hnênah, “Ka nu leh ka unaute chu Pathian thu hriaa zâwmute hi an ni,” tiin a lo chhâng a.

THLI LEH TUIFÂWNIN ISUA THU AN ÂWIH

²²Ni khat chu a zirtîrte nêl lawngah an chuang a. An hnênah, “Dîl râl lehlamah sâwn i va kai ang u,” a ti a. Tichuan, an kal ta a.

²³Chutia lawnga an chuan lai chuan ani chu a muhîl ta a. Dîlah chuan thlipui a lo thawk thut a, an lawng chu tuiin a khat dân a, an dinhmun a hlauhthâwnawm ta hlê a.

²⁴A hnênah chuan an va kal a, an kai tho va, “Zirtîrtu, zirtîrtu, kan boral dân hi le!” an ti a. Ani chu a lo tho va, thli leh tuifâwn chu a hau va. Tichuan a bâng a, a reh ta mai a.

²⁵Ani chuan an hnênah, “Khaw’nge in rinna chu?” a ti a. Anni chuan an hlâu va, mak an ti êm êm a, “He mi hi tu ngê maw a nih le? Thli leh tui te pawh thû a pe a, an âwih zêl mai le!” an ti hlawm a.

RAMHUI MAN TIHDAM

²⁶Galili ram epa awm Gadarin mite ram chu an va inkar kai a.

²⁷Khawmuala a chhuah laiin khuaa mi tuemaw, hun rei tak ramhuai man tawh hian arawn tâwk a. Chû pa chuan thawmhnâw engmah a inbel lo va, inah pawh chêng lovin thlânahte a khawsa thîn a.

²⁸Isua a hmuh vêleh a âu va, a hmâah a bawkkhup a, aw ring takin, “Isu, Pathian Chungnungbera Fapa, kei leh nang hian eng

nge inlaichinna kan neih? Mi nghaisa lul lo tûrin ka ngên a che!” a ti a.

²⁹Chû pa kawchhûnga thlarau bawllhhlawh chu chhuak tûrin thû a lo pe tawh si a. Ramhuai chuan a man thîn avângin mite chuan an vêng a, khaidiat leh kawl an buntîr a; mahse amah an phuarnate chu a tichat a, ramhuai chuan thlalêrahte a khalh chhuak thîn.

³⁰Isuan a hnênah, “Tu nge i hming?” tiin a zâwt a. Ani chuan, “Nuaia,”* a ti a, a kawchhûngah ramhuai tam tak an lût si a.

³¹Anni chuan leilâwta tîr thlâk thû pe lo tûrin Isua chu an ngên a.

³²Chulai tlâng pangah chuan vawk rual tam tak an tlâ a. Tichuan, vawk rual kawchhûnga luh an dîl a. Ani chuan a phalsak ta a.

³³Chû pa kawchhûnga ramhuaite chu an chhuak a, vawk kawchhûngah chuan an lût a, vawkte chu âwih pangah chuan an tîl thla dur dur a, dîlah chuan an tîl lût a, tuih an tlahlum ta a.

³⁴Vawk vulhtute chuan thil awm dân an hmuh chuan an tlânchhia a, khuah leh ramah te an sawi darh a.

³⁵Thil awm dân en tûrin mite chu an lo chhuak a, Isua hnênah an lo kal a, ramhuai chhuahsan tâka kha thuamhnâw inbela rilru pangngai pûin, Isua ke bula thû anrawn hmu a. An hlâu ta a.

³⁶Mit ngeia hmutute chuan ramhuai manin tihdamna a chan dân te an lo hrilh bawk a.

³⁷Gadarin chhehvêl rama mi zawnzawn chuan hlauh tak têa an hlauh avângin anmahni kalsan tûrin ani chu an ngên chiam a. Tichuan, lawngah a chuang a, a kîr leh ta a.

³⁸Ramhuai chhuahsana chuan a hnêna awm ve zêl a dîl a. Nimahsela Isuan ama in lama hâu tûrin a tîr ta zawk a,

³⁹“I inah hâu la, Pathianin i tân thil a tihsak che hi a ropuizia va puang rawh,” tiin a kaltîr ta a. Tichuan a kal a, khaw chhûng zawnzawn chuan Isuan a tân thil a tihsak ropuizia chu a tlangâupui ta a.

HMEICHHE NAUPANG TIHNUN, HMEICHHE THIPÛT TIHDAM

⁴⁰Chutia Isua lo kîr leh chu mipuiin an lo lâwm a; amah an lo nghâk thuap si a.

⁴¹Ngai teh, mi pakhat, a hming Jaira chu a lo kal a, ani chu biak in hotu a ni a. Isua ke bulah a bawkkhup a, a ina kal tûrin arawn ngên a,

⁴²fanu mal kum sâwm leh kum hnih vêl mi a nei a, a thi lek lek a. Isua chu a kal ta a, kawngah chuan mipuiin an nêk huai huai a.

⁴³Tin, hmeichhe pakhat chu kum sawm leh kum hnih thi pûtin a dam lo va, a neih sum zawnzawn daktawrte lakah a dek ral tawh a; mahse tûman an tidam thei si lo va,

⁴⁴chû hmeichhia chuan a hnung lam aţangin a puan hmâwr arawn dek a. Chawp leh chilhin a thi pût chu a lo reh ta ngâl a.

⁴⁵Isuan, “Mi dek kha tu nge ni?” a ti a. Tûman ka dek ti an awm si loh avângin, Petera leh a thiante chuan, “Zirtîrtu, mipuiin an nêk huai huai che a, ‘Mi dek kha tu nge ni?’ te i tih le,” an ti a.

⁴⁶Nimahsela Isuan, “Tû emaw chuan mi dek a ni, thiltihtheihna keimah ațangin a chhuak tih ka hria alâwm,” a ti a.

⁴⁷Chû hmeichhia chuan inthup reng chi a ni lo tih a hriatin khûr zawih zawih chungin a lo kal a; a hmâah chuan a bawkkhup a, mipui zawng zawng hmuhah chuan a deh chhan leh chawp leh chilha a dam nghâl dân chu a puang chhuak ta a.

⁴⁸Ani chuan, “Ka fanu, hlim takin awm rawh; i rinna hian a tidam che a nih hi. Thlamuang takin kal tawh le,” a ti a.

⁴⁹A la ẵwng lai mêkin biak in hotu in ațangin mi pakhat a lo kal a, “I fanu chu a thi ta, zirtirtu hi tibuai tawh lo mai rawh,” a ti a.

⁵⁰Mahse Isuan chu thû chu a hriatin, “Hlau suh la, ring mai rawh, tiham a ni ang,” tiin a chhâng a.

⁵¹In a va thlen chuan Petera, Johana leh Jakoba te bâkah naupang nu leh pate chauh lo chu mi dang luh ve a phal lo va.

⁵²Chuta mi awm zawng zawng chuan mitthi chu an lo ẵh vak vak a; nimahsela ani chuan, “Tạp suh u, a thi lo ve, a muhîl a ni zâwk e,” a ti a.

⁵³A thi tawh tih an hre si a, an nuihsan mai a.

⁵⁴Anni chu pawnsah a chhuahtîr vek a, a kutah a chelh a. “Bawihê, tho rawh,” tiin a ko va.

⁵⁵Tichuan, a thlarau chu a lo kîr leh a, a tho ta mai a. Ei tûr thil engemaw pe tûrin a hrilh a.

⁵⁶A nu leh a pa chuan mak an ti êm êm a, mahse ani chuan a thiltih chu tûmah hrilh lo tûrin a khap tlat a.

BUNG 9

SAWM PAHNIHTE TIRH CHHUAHNA

¹A zirtîr sâwm leh pahnihte chu a ko khâwm a, ramhuai zawng zawng chung a thiltihtheihna leh thuneihna leh damlo tiham theihna a pê a.

²Pathian lalram chanchin hril tûr leh damlote tidam tûrin a tîr chhuak ta a.

³An hnênah, “Zin kawngah engmah keng suh u, tiang emaw, ipt e emaw, chawfun emaw, pawisa emaw engmah keng suh u; kawr pawh pahnihi nei suh u.

⁴In thlenna inah chuan awm reng ula, chuta ẵng ngei chuan chhuak leh ang che u.

⁵Nangni lo thleng duh lotute khua chu in chhuahtsan dâwnin, an dik lohzia hriattîr nân in kephaha vaivut thing thlâ ang che u,” a ti a.

⁶Tichuan, an kal ta a, khua an fang zêl a, hmun tinah Chanchin T̄ha an hril a, mite an tidam zêl a.

HERODAN ISUA A ZAWNG

⁷Lal Heroda pawhin a thiltih zawng zawng chu a lo hre ve ta a; mi thenkhatin Johana kha mitthi zing ațangin a lo tho leh ta nia an sawi chuan a rilru a tibuai hlê a,

⁸thenkhatin Elija a lo inlâr niin an sawi thung a, mi dangte chuan hmanlai zâwlneite zing a mi a lo tho leh niin an sawi baw k a.

⁹Heroda chuan, “Johana kha a lu ka tansak tawh a, heti fakauva a thû ka hriat leh tâka hi tu nge?” a ti a. Tichuan, amah chu hmuh a tum ta a.

MIPUI SANGNGA HRAI

¹⁰Tirhkoh-hote kha an lo kîr leh a, an thiltih chanchin an rawn sawi a. Tichuan, anniho chu mi tlawh loh hmun fianrial, Bethsaida khaw ram chan chhûngah a hruai hrang daih a.

¹¹Nimahsela, mipuite chuan an lo hria a, amah chu an zui dur dur a; ani chuan a lo lâwm a, Pathian lalram chanchin a hrilh a, tiham ngai apiang a tidam a.

¹²Khua chu a lo tlai dâwn ta a, sâwm leh pahnihte chu a hnênah an lo kal a, “Kan kiang vêl khuahte leh lovahte kalin, thlen in leh ei tûr zawng tûrin mipui hi kal darhtîr ta che; hei, hmun fianrial taka awm kan ni si a,” an ti a.

¹³Ani erawh chuan an hnênah, “Nangmahnin ei tûr pe rawh u,” a ti a. Anni chuan, “Hêng mi zawng zawng daih ei tûr hi kan va leisak anih ngawt loh chuan, chhangpêr pangâ leh sangha pahnihi chauh lo chu engmah kan nei lo,” an ti a.

¹⁴Patling hlîr pawh sângnga vêl lai an ni a. Tichuan, a zirtîrte hnênah, “Mi sawmngâ zêlin a hlâwmin thuttîr rawh u,” a ti a.

¹⁵Chutiang chuan an thuttîr ta vek a.

¹⁶Tichuan, ani chuan chhangpêr pangâ leh sangha pahnihi chu a la a, vân lam hawiin mal a sâwm a, a phel a, mipui hmâa hlui tûrin a zirtîrte hnênah chuan a pê a.

¹⁷Tichuan, an zavaiin puar takin an ei a, an ei ningnâwite chu bâwmrâng sâwm leh pahnihi an rût khat a.

PETERAN ISUA CHU KRISTA TIIN A PUANG

¹⁸Heti hi a ni a, amah chauhva a ẵwngt̄ai laiin a zirtîrte chuan an va fin a, ani chuan an hnênah, “Miten tu nge a ni mi tih?” tiin a lo zâwt a.

¹⁹Anni chuan, “T̄henkhatin baptistu Johana an ti che a; thenkhatin Elija an ti che a; thenkhat dangin hman lai zâwlnei t̄ua emaw a lo tho leh ta a ni ang, an ti che,” tiin an chhâng a.

²⁰Ani chuan an hnênah, “A nih leh, nangnin tu nge ka ni min tih ve?” a ti a. Petera chuan, “Pathian Krista i ni,” tiin a lo chhâng a.

ISUAN A THIH LEH THAWHLEH TUR A SAWI LÂWK

²¹Chû thû chu tûmah hrilh darh lo tûrin a khap tlat a,

²²“Mihring Fapa hi thil tam tak tuar tûr a ni a, upate, puithiam lalte, dân zirtirtuten an hnâwl ang a, an tihlum ang a, ni thum nâh kaihtawhin a awm leh ang,” a ti a.

KRAWS PU CHUNGA ZUI

²³An zâa hnênah hê thû hi a sawi a, “Mi tûpawhin mi zui a duh chuan, mahni inphat sela, ni tin ama krâws pu chung zêlin mi zui rawh se.

²⁴Tûpawh mahni sahimna thlahlel chuan a chân ang a, tûpawh keimah vânga ama nun chân chuan, chû mi ngei chuan a humhim zâwk ang.

²⁵Miin khawvêl hi a pumin nei sela, inti chhiain boral si sela, a tân hlâwkna tûr eng nge awm?

²⁶Tûpawh keimah leh ka thu zahpui apiang, Mihring Fapa hi ama ropuina te, a Pa ropuina te, a Vântirhkoh thianghlim ropuinate nêna a lo kal hunah, chu mi chu arawn zahpui ve ang.

²⁷Dik takin ka hrilh a che u, heta dingho zînga thenkhat hi, Pathian lalram an hmuh hmâa thihna tem lo tûr an awm a ni,” a ti a.

TLÂNG CHUNGA ISUA HMÊL DANGLAM

²⁸Chûng thû a sawi hnû ni riat vêlah chuan Isuan Petera te, Johana te, Jakoba te chu a hruai a, ƣawngƣai tûrin tlângah an lâwn chho va.

²⁹A ƣawngƣai laiin a hmêl awm dân chu a lo danglam a, a silhfênte chu a lo vâa, a tle sur mai a.

³⁰Ngai teh, mi pahnihin amah chu anrawn bia a, chu mite chu Mosia leh Elija an ni a,

³¹ropui takin an inlâr a, Jerusalema thihna a hlen chhuah dân tûr an sawi ho va.

³²Petera leh a ƣiante erawh chu an muhîl daih a; an lo harh chhuah chuan a ropuina leh a kiana mi pahni ding chu an hmu ta a.

³³Chûng miten Isua an kalsan lai chuan Peteran Isua hnênah, “Zirtîrtu, kan tân heta awm hi a ƣa e; bawkte pathum i khawh ang u: i tân pakhat, Mosia tân pakhat, Elija tân pakhat,” a ti a, eng thu nge a sawi pawh a hre lo.

³⁴Chûng thû chu a sawi laiin chhûm a lo zîng a, anni chu a hliah ta a; chhûma an luh leh lai chuan an hlâu hlê a.

³⁵Chhûm aƣang chuan âw a lo chhuak a, “Hei hi ka Fapa duhtak chu a ni. Ama thû ngai rawh u!” a ti a.

³⁶Aw rî a han reh chuan Isua chauh chu an hmu ta a. Mahse an thil hmuh chungchâng chu chûng hun lai chuan tûmah hrilh lovin an ngawihpui tlat a.

MIPA NAUPANG TIHDAM

³⁷A tûkah chu tlâng aƣang chuan an chhuk thlâ a, mipui tam takin amah chu an lo hmuak a.

³⁸Thâwklehkhatah mipui zîng aƣangin mi pakhat a lo âu chhuak a, “Zirtîrtu, ka fapa rawn en tûrin ka ngên a che, ka fapa neihchhun a ni si a.

³⁹Ngai teh, thlarauvin a man a, a âu chhuak thut ƣîn a: a kâa chilphuan tla khawpin a kaih ƣîn a, duk chur khawpa a awm hnûah a kalsan ƣawk ƣîn a ni.

⁴⁰Hnawt chhuak tûrin i zirtîrte ka ngên a; an tichhuak thei si lo va,” a ti a.

⁴¹Isuan a chhâng a, “Aw, ƣangthar rinna nei lo leh tlâktlai lote u, eng chen nge in hnênah ka awm ang a, ka ngaihteih ang che u? I fapa chu hetahrawn hruai rawh,” a ti a.

⁴²Chutia a lo kal chu ramhuai chuan a paih thlu ƣuai a, a khûr chiam a. Isuan thlarau bawhlhlawh chu a hau va, naupang chu a tidam a, a pa hnênah chuan a kaltîr leh ta a.

ISUAN A THIH TUR THU A SAWI LAWK

⁴³Mi zawng zawngin Pathian ropuizia chu mak an ti a. Chutia mi tinin a thiltih zawng zawng mak an tih lai chuan, Isuan a zirtîrte hnênah,

⁴⁴“Hêng thû hi in bengah lût teh se: Mihring Fapa hi mihringte kutah mantîrin a awm dân a ni,” a ti a.

⁴⁵Nimahsela, a thusawi awmzia chu an hre thiam lo, an hriat theih loh nân a inthup tlat a; anni lahin a thusawi awmzia an zâwt ngam si lo va.

TU NGE ROPUI BER?

⁴⁶Chumi hnû chuan zirtîrho chu an zîngah tu nge ropui ber ang tih thûah an lo inhnial a.

⁴⁷Isuan an rilrua an ngaihtuahte a lo hriatin naupang tê a kai a, an hmâah a dintîr a,

⁴⁸an hnênah, “Tûpawh ka hming avânga he naupang tê lâwm apiang chu keimah mi lâwm an ni; tupawh kei mi lâwm chu mi tirtu lâwm an ni. In zînga tê ber hi ropui ber a ni,” a ti a.

ISUAN PAWL BIK NEIH A KHAP

⁴⁹Johana chuan a chhâng a, “Zirtîrtu, tuemaw i hminga ramhuaite hnawt chhuak vê kan hmu a, kan zînga mi a nih loh avângin kan khap ta asin,” a ti a.

⁵⁰Mahse Isuan, “Khap tawh suh u, tupawh mi dodâl lo chu kan lama ƣang an ni,” a ti a.

SAMARI KHUA-TEN CHHANDAMTU AN HNÂWL

⁵¹Tin, ani chuan chung lama hruai chhoh a nih hun a thlen tawh dân avângin Jerusalem lama kal pawh chu a tum nghet ta a,

⁵²a mi tirtte chu a hmâah a tlântîr a. Chutia an kal lai chuan, ama tâna lo buatsaih tûrin Samari mite khaw pakhatah an lût a.

⁵³Nimahsela, Jerusalem lam pan a tum tlat avângin chu khuua mite chuan an lo thleng duh lo va.

⁵⁴A zirtîr Jakoba leh Johana-ten chu chu an hriatin, “Lalpa, Elija ang khân hênggho kan ral vek nân hian vân ata mei kan ko thla mai dân em ni?” an ti a.

⁵⁵Mahse anni lam chu hawiin a zilhau va, “Eng ang thlarau nge in chan tih pawh in inhriat loh hi.

⁵⁶Mihring Fapa hi mite nunna tiboral tûr ni lovin, chhandam tûr zâwka lo kal a ni,” a ti a. Tichuan, khaw dangah an kal ta a.

ZIRTIR NIH MAN

⁵⁷Kalkawnga an kal laiin tûin emaw a hnênah, “Lalpa, i kalna apiangah ka zui ang che,” a ti a.

⁵⁸Isuan a hnênah, “Sihalten kua an nei a, chunglêng savâte pawhin bû an nei a, Mihring Fapa erawh chuan lu nghahna a nei lo,” a ti a.

⁵⁹Mi dang hnênah, “Mi zui rawh,” a ti a. Mahse ani chuan, “Lalpa, ka pa mi vui liamtîr phawt ta che,” a ti a.

⁶⁰Isuan a hnênah, “Mitthi chuan an mitthi chu lo vui mai rawh se; nang chuan Pathian lalram chanchin va hril darh zâwk rawh,” a ti a.

⁶¹Mi dang leh pawhin, “Lalpa, ka zui ang che; amaherawhchu ka ina mite nên tha takin kan va inthlah phawt ang e,” a ti a.

⁶²Isuan a hnênah, “Leilehnaa kut nghat tawh zeta, hnung lam hawi lêt leh chu, Pathian lalram mi ni tlâk an ni lo,” a ti a.

BUNG 10

MI SAWMSARIH TIRH CHHUAH

¹Chumi hnû chuan Lalpan mi dang sawmsarih a ruat a, a kal tumna khua leh hmun tinah, pahni zêla lo va kal hmasa tûrin a tîr a.

²An hnênah, “Buh seng tûr a tam si a, mahse a thawktute an tlêm si; chuvângin, a buh seng tûra mite tîr tûrin buh Neitupa hnênah chuan ngên rawh u.

³“Kal rawh u; ngai teh u, chinghne rual zînga berâm no angin ka tîrh che u hi.

⁴Pawisa ip te, iptê te, pheikhawkte keng suh u: kawngah tûmah chibai bûk hek suh u.

⁵Mi ina in luhna apiangah, “Hê inah hian thlamuanna lo thleng rawh se,” ti hmasa thîn rawh u.

⁶Thlamuanna fa lo awm ta se, in thlamuanna chu an chungah a awm reng ang; an awm loh chuan in chungah a lo lêt leh ang.

⁷Thlenna in ngaiah awm reng ula, an pêk apiang che u chu eiin in vê mai rawh u; hnathawktu chu hlauh hmu tlâk a ni si a. In hrang hrangah thleng lâwr suh u.

⁸Eng khuaah pawh lût ula, an lo thlen duh che u chuan, an hlui apiang che u chu ei mai rawh u.

⁹Damlote chu tidam ula, an hnênah, ‘Pathian lalram chu a lo hnai ta,’ ti zêl ang che u.

¹⁰Khuaa in luhnaten an thlen duh loh che u chuan, an kawthlêrah chhuak ula,

¹¹In khaw vaivut kan kephaha kai chenin in chungah kan thing thlâ e; nimahsela Pathian lalram chu in kiangah a lo thleng tawh tih hre rawh u,’ ti ang che u.

¹²Ka hrilh a che u, chu mi nî-ah chuan chu khuaa mite tuar tûr ai chuan Sodom khaw tuar tûr chu a ziaawm zâwk ang.

SIM DUH LO KHUATE CHUNGPIKNA

¹³“Korazin, i chung a pik e! Bethsaida, i chung a pik e! Nangmahnia thilmak ropui tihte kha Tura leh Sidon khuaa tih ni sela, saiip puan sinin, vut zînga thûin an sim daih tawh ang.

¹⁴Nimahsela, rorêlna nîah chuan nangni tuar tûr ai chuan Tura leh Sidon khaw tuar tûr chu a ziaawm zâwk ang.

¹⁵Nang Kapernaum, vân thlenga châwi sân ni mah la, Hremhmun thlenga paih thlâk i ni ang.

¹⁶In thu ngaithlatu chuan ka thû a ngaithla a ni; nangni hnâwltu chuan kei mi hnâwl a ni; kei mi hnâwltu chu mi Tîrtu hnâwl a ni,” a ti a.

SAWMSARIHTE HLIM TAKA LO HAW

¹⁷Sawmsarihte chu hlim takin an lo hâwng a, “Lalpa, ramhuaite pawh i hming avângin kan thû thûin an awm zêl mai nia!” an ti a.

¹⁸Ani chuan an hnênah, “Têk anga Setana van ațanga lo tlâ kha ka hmu asin.

¹⁹Ngai teh u, rûlte, khawmualkaikuangte leh, hmêlma pa thiltihtheihna zawng zawng rahbehna tûr thuneihna ka pêk che u hi; chuvângin eng thil mahin, engti zâwng mahin an tina hauh lo vang che u.

²⁰Mahse, thlaraute in thû thûa an awm avang maiin lâwm suh u; vana in hming ziah a nih avangin lâwm zâwk rawh u,” a ti a.

THLARAUAH ISUA A HLIM

²¹Chutih lai chuan Isua chu Thlaraudah a hlim êm êm a, “Ka Pa, lei leh van Lalpa, lâwmthu ka hrilh a che. Nangin mi fîng leh mi thiamte lakah heng thil hi i thup a, nausênte hnenah i puang ta si a. Ni e ka Pa, chutiang chu i mithmuha tha a ni si a.

²²Ka Pain engkim mi hlân zo tawh, Pa chauh lo chuan Fapa hi tu nge a nih tûma’n an hre lo; Pa pawh chu tu nge ni tih hi, Fapa leh an hnêna Fapain a puan duhnate chauh lo chuan tûma’n an hre lo,” a ti a.

²³A zirtîrte lam a hawi a, a rûktêin a hrilh a, “Hêng thil in hmuhna mitte hi a vânni teh e;

²⁴ka hrilh a che u, zâwlneite leh lal tam tak pawhin in thil hmuhte hi hmuh vê an châk a, mahse an hmu pha si lo; bengia in hriatte hi hriat vê an châk a, an hre pha si lo va,” a ti a.

SAMARI MI THA TEKHIN THU

²⁵Dân hretu pakhat a lo ding a, amah fiah nân, “Zirtîrtu, chatuana nun nêi tûrin eng nge ka tih tûr?” a ti a.

²⁶Ani chuan a hnênah, “Dân lehkhâbûah eng nge inziak? Engtin nge i lo hriat ve le?” a ti a.

²⁷Ani chuan, “Lalpa i Pathian chu i thinlung zawng zawngin, i thlarau zawng zawngin, i chakna zawng zawngin, i rilru zawng zawngin i hmangaih tûr a ni,’ ‘Nangmah i inhmangaih angin i thenawm khawvêngte pawh i hmangaih tûr a ni,’ tih hi,” tiin a chhâng a.

²⁸Ani chuan a hnênah, “I chhâng dik khawp mai; chutiang tak chuan ti la, i nung ang,” a ti a.

²⁹Ani erawh chuan, thiam inchantîr tumin Isua hnênah, “A nih leh, tu nge ka thenawm khawvêngte chu?” a ti a.

³⁰Isuan a chhâng a, “Mi tuemaw Jerusalem ațangin Jeriko khuaah a zuk kal a, suamhmangho a tâwk ta a; chûngho chuan a silhfên hlihsakin an vaw hrep a, thi lek lekin an kalsan ta a.

³¹Chutih lai chuan puithiam tuemaw hi chû kawngah chuan a zuk kal hlauh va. Mahse, a hmuh vêleh kawng sîr lehlamah a hêl ta mai a.

³²Chutiang bawkin Levia chî mi pakhat pawhin chumi hmun chu a lo thleng a, a hmuh vêleh kawngsîr lehlamah a hêl ve leh ta mai a.

³³Nimahsela, Samari mi tuemaw zin kalin chû pa awmna hmun chu a lo thleng ve a. A han hmuh chuan a khawngaih ta êm êm a.

³⁴A va pan hnai a, a pemahte chuan hriak leh uain a leih a, a tuam a, ama sa chungah a chuantîr a, khualbûkah a kalpui a, a enkawl ta a.

³⁵A tûka a kalsan dâwnin duli pahni a phawrh a, khualbûk vêngtu hnênah chuan a pê a, ‘Lo enkawl la, hei bâka i sênso chu ka lo kîr leh hunah ka rawn rûl leh ang che,’ a ti a.

³⁶“Chûng mi pathum zîngah chuan suamhmangho zu tâwktu pa thenawm khawvêng chu tû ber nge nia i rin?” a ti a.

³⁷Ani chuan, “A khawngaihtu chu,” a ti a. Isuan a hnênah, “Nang pawhin chutiang bawkin va ti ve ang che,” a ti a.

MARI LEH MARTHII TE RAWNGBAWLNA

³⁸An zin veivah pahin khaw pakhtah a lût a; chutah chuan hmeichhe pakhat, a hming Marthii’n a inah a lo thleng a.

³⁹Ani chuan laizâwn pakhat a nei a, a hming chu Mari a ni; ani chu Lalpa ke bulah a thu a, a thu sawi a ngaithla a.

⁴⁰Marthii erawh chu ei rawngbâwlin a vir buai hle a; a hnênah a lo kal a, “Lalpa, ka laizawnnu hian keimah chauhvah ei rawngbâwl tûra mi ring tawp mai hi a dik em ni? Mi pui tûrin rawn tîr teh,” a ti a.

⁴¹Isuan a hnênah, “Marthi, Marthi, vei i ngah êm a, i buai mai mai a nih hi.

⁴²Thil pakhat a pawimawh; Marin chan thâ chu a thlang a, chû chu lâksak tûr a ni lo ve,” tiin a chhâng a.

BUNG 11

ṬAWNGṬAI DAN TUR

¹Hmun pakhtah hian a ṭawngṭai a, a ṭawngṭai zawh chuan a zirtîr mi pakhtatin a hnênah, “Lalpa, ṭawngṭai dân min zirtîr ta che, Johanan a zirtîrte a zirtîr ang khân,” a ti a.

²Ani chuan an hnênah, “In ṭawngṭai chuan heti hian ti ang che u: Kan Pa, vâna mi, I hming zahawm rawh se. I lalram lo thleng rawh se. I duh zâwng vâna mi’n an tih angin Leia mi’n ti rawh se.

³Kan ni tin chaw min pe ang che.

⁴Kan sualte min ngaidam ang che, Keini pawhin kan englo bâte kan ngaidam thîn a ni. Sual tûra thlêmnaah min hruai lût suh ang che, Misual lakah chuan min chhandam zâwk ang che,’ tiin,” a ti a.

ZANLAIA ṬHIAN LO LENG.

⁵An hnênah chuan, “In zînga mi tûin emaw ṭhian nei sela, zan laia a hnênah kalin, ‘Ṭhiana, chhangpêr pathum mi pûktîr rawh;

⁶ka ṭhian zinin mi rawn tlawh a, a hmâa hlui tûr engmah ka nei si lo va,’ va ti sela;

⁷inchhûng aṭang chuan, ‘Mi rawn tibuai suh; tûnah chuan kawng kan kalh tawh a, ka fate nêen kan mu vek tawh a; nangmah pe tûrin ka rawn tho peih tawh lo,’ ti mah se,

⁸ka hrilh a che u, a ṭhian a nih avânga thovin a va pe mai lo nâ a, a dîl ngut ngut avângin a tho ang a, a duh zât zât a va pe tawh mai ang.

DÎL, ZAWNG, KIK

⁹“Ka hrilh a che u, dîl rawh u, tichuan an pê ang che u; zawng rawh u, tichuan in hmu ang; kik rawh u, tichuan an hawnsak ang che u.

¹⁰A dîl apiangin an dawng a, a zawng chuan an hmu bawh a, tupawhin a kik chuan an hawnsak dâwn a ni.

¹¹Nangni paho zînga tû ber emaw hi in fapain chaw dîl che u sela, tu nge lung pe ang che u? A nih leh, sangha dîl che u sela, sangha aia rûl in pe dâwn em ni?

¹²A nih leh, artui dîl che u sela, khawmual kaikuang in pe dâwn em ni?

¹³Chuvângin, nangni mi sualte mahin in fate thil ṭha pêk nachâng in hriat chuan, in Pa vana mi chuan a dîltute chu Thlarau Thianghlim a va pe dâwn êm!” a ti a.

INDO CHHUNGKUA DING THEI LO

¹⁴Ramhuai pakhat hi a hnawt chhuak a, chû ramhuai chu ṭawng thei lo a ni a. Chutia ramhuai a chhuah veleh chuan ṭawng thei lo chu a lo ṭawng ta a; mipuite chuan mak an ti hle a.

¹⁵Mi thenkhat erawh chuan, “Ramhuai lal Belzebub-a avangin a ni ramhuaite a hnawh chhuah thîn ni,” an ti a.

¹⁶Thenkhat dang chuan amah fiah nan vana ta chhinchhiahna an dîl a.

¹⁷Ani erawh chuan an ngaihtuahte a lo hriatin, an hnênah, “Eng lalram pawh ni se, mahni an indo chuan an tlu chhe thîn a; chhûngkaw indo pawh an tla chhe thîn.

¹⁸Setana pawh mahni indo ta se, engtin nge a lalram a din chhuah ang? Nangni lahin Belzebub-a zâra ramhuaite hnawt chhuakah mi ngai si a.

¹⁹Kei hian Belzebub-a zâra ramhuaite hnawt chhuak thîn ka lo nih chuan, in faten tu vangin nge an lo hnawh chhuah thîn le? Chuvângin, in chungchâng chu anni rêl tûr a ni asin.

²⁰Mahse, kei hian Pathian kuta ramhuaite hnawt chhuak thîn ka nih chuan, Pathian lalram chu in hnênah a lo thleng reng tawh tihna a ni ang.

²¹Mi chakin râlthuum famkim nêna ama in a vên chhûng chuan a bungruate chu a him thîn.

²²Nimahsela, amah aia chak zâwk a lo kal a, a rawn hneh erawh chuan, inring tâwk taka a lo inrâlthuumna zawng zawng chu a chhuhsak ang a, râlâl sum chu a sem tawh mai ang.

²³Ka lama ṭang lo chu mi do a ni; mi seng khâwmpui lo chuan a tidarh a ni.

THLARAU BAWLHHLAWH KIR LEH

²⁴“Thlarau bawlhhlawh pakhat, mi kawchhûng aṭanga chhuak chu chawlhna zawngin tui awm lohna hmunahte a vâk a vâk a; chawlhna hmun rêng a hmu lo va, ‘Ka chhuahna in ngaiyah khân ka kîr leh mai teh ang,’ a ti a.

²⁵A va thlen chuan in chu phiah faia chei fel sâ diamin a va hmu a.

²⁶Chû vèleh a va kal a, amah aia soal zâwk ramhuai dang pasarih a rawn hruai a, chutah chuan an lût a, an chênchilh ta a; chû mihringa mize hnuhnung chu a hmasa aiin a khawlo ta zâwk a ni,” a ti a.

THU VAWN RENG

²⁷Chûng thute a sawi mêk laiin, mipui zîng aţangin hmeichhia tuemaw a lo âu chhuak a, a hnênah, “Nangmah pâitu chhûl leh i hnute hnêk chu malsawmin awm rawh se!” a ti a.

²⁸Ani erawh chuan, “Pathian thu hriaa vawng tlat mite hian malsâwmna an dawng hnem zâwk asin!” a ti a.

CHHINCHHIAHNA ZAWNG

²⁹A hnên lam pana mipui an lo pun khâwm laiin tihian a lo ti a, “Tûnlai  angtharte hi an khawlo zo ta. Chhinchhiahna an zawng a; mahse, zâwlnei Jona chhinchhiahna chauh lo chu eng chhinchhiahna mah pêk an ni lo vang.

³⁰Jona chu Ninevi khuua mite tân chhinchhiahna a ni ang khân, Mihring Fapa pawh tûnlai  angtharte tân chhinchhiahna a la ni ang.

³¹Chhim lam lalnu kha rorêlnaah chuan tûnlai  angtharte zîngah hian a lo tho ve ang a, thiamloh a rawn chantîr ang, ani kha Solomona finna thu ngaithla tûrin kâwlkîl aţangin a lo kal vang vang a nih kha; en teh u, Solomona aia ropui zâwk hetah hian a awm asin.

³²Ninevi mite pawh kha rorêlnaah chuan tûnlai  angtharte zîngah an lo tho ve ang a, thiam loh an rawn chantîr ang, Jona thuhrlîl avângin an sim si a; en teh u, Jona aia ropui zâwk hetah hian a awm asin.

TAKSA KHÂWNVÂR

³³“Tûma’n khâwnvâr chhiin hmun bir -ah emaw, b wm hnuaiah emaw an dah ngai lo, in chh nga lo l tten a  ng an hmuh theih t rin, a h nnaah an h ng z wk   in.

³⁴Taksa kh wnv r chu mit hi a ni. I mit a   at chuan i taksa chu a pumin a  n chhuak   in. I mit a chhiat erawh chuan i taksa chu a pumin a thim vek mai ang.

³⁵Chuv ngin, nangmaha  ng awm chu thim a lo ni dah ang e, fimkhur rawh.

³⁶I taksa pum chu  nga khat a niha, thim r ng a awm loh chuan, kh wnv r  ng takin a chhun  n che ang ma in i taksa chu a pum  n d wn a ni,” a ti a.

PHARISAITE LEH DAN HRE MITE CHUNGPIKNA

³⁷A la sawi lai mekin Pharisaî pakhatin chaw eipui a a s wm a. Tichuan a l t a, ch w chu a k l ta a.

³⁸Chaw ei d wna kut a sil lo chu Pharisaî chuan a hmuhin mak a ti h e a.

³⁹Lalpa chuan a hn nah, “Nangni Pharisaiten no leh th  ng p wn lam chu in sil f i   in a, mahse in chh  ng lam erawh chu du  mna leh sualin a khat baw  si.

⁴⁰Mi   e u! P wn lam siamtu chuan chh  ng lam pawh a siam tel lo vem ni?

⁴¹In neih s  a ang kh n mi retheite  anpui ta che u; tichuan, in t n engkim a thiangh im tawh d wn nia.

⁴²“Nangni Pharisaite u, in chung a pik e! Pudina te, pard  te, th  i tin  ng te s wma pakhat in pe   in a, dikna leh Pathian hmangaihna chu in ngaih  ah leh si a. H ng e hi asin in tih t r

chu ni, a dang e tih     h chuang lovin.

⁴³Pharisaite u, in chung a pik e! Biak ina     na langs r ber ber te, d wr hmuna chibai b   te in ngaina   in si a.

⁴⁴Nangni d n zirt   te leh Pharisaite u, in chung a pik e! Miten a hnuaiah th  n a awm tih h e lova an kalna hmun ang chu in ni e,” a ti a.

⁴⁵D n h e mi pakhat chuan ch  ng l  in a hn nah, “Zirt   te, h ng i demna th  te hi min tih  han a nih hi,” a ti a.

⁴⁶Ani chuan, “D n h e mite u, nangni pawh in chung a pik e! Mi dang kovah phurrit tak tak in bel   in a, nangni lah n ch  ng phurrit te chu in zung ang hm  wr pawhin in khaw h duh si lo.

⁴⁷In chung a pik th  wt a ni! Z wlnei o th  n in ka s  e, in ti m w, in th  ht te tih  lum an nih kha.

⁴⁸Chuv ngin, in th  ht te th    h d n chu in h iatpui a, in rem  hpui t  na a ni; annin an that a, nangnin an th  n inte in lo saksak thung a.

⁴⁹Chuv ngin Pathian finna pawhin, ‘An hn nah z wl   te leh tir    te ka t r ang a,   en  at an that ang a,   en  at an tidu  ah ang;

⁵⁰tichuan, leilung pian tir  a anga z wl    zawng zawng th   en mawh chu t  nlai  angtharte lakah hian     t a ni ang,

⁵¹maich  m leh tempul ink  ra Abela th   en a anga Zakaria th   en an chhuah th  nga mawh chu. Ni e, ka hr  h a che u, t  nlai  angtharte lakah hian     t a ni maw h ang.

⁵²“D n h e mite u, in chung a pik e! Finna ch  bi in la bo va. Nangni l  t duh si lovin, mi l  t tur lo d    t mai in nih hi,” a ti a.

⁵³Ch  ng th   an hn  na a sawi lai chuan, d n zirt    te leh Pharisaite chuan amah chu an er   m av ngin an s  wt vak vak a, a deuhsawh z  wng ngaw  in an hn  l a.

⁵⁴amah an h  k theih n n, a thu sawi a anga in     wng aw    r tum n an ch  ng reng a.

BUNG 12**VERV  KNA LAKA FIMKHUR**

¹Chut  h lai chuan, ch    r sen loh khawpa tam mipui an lo pung kh  wm a, an inn    k n    h n    h a; ani chuan a zirt    te hn  nah th   a sawi   an a, “Pharisaite d      m, verv   na lakah chuan fimkhur rawh u.

²Lang chhuak leh lo t  ra thu     k engmah a awm lo; h iat chhuah leh loh t  ra thup h  n theih engmah a awm hek lo.

³Chuv ngin, th  ma in sawi apiang chu khaw   ngah h iat a la ni ang a; pindan chh    ng  la a r   a in sawi te pawh kha in chung a angin an la t          d   n a ni.

ISUAN PATHIAN HLAU TURIN A ZIRT  R

⁴Ka   iante u, ka hr  h a che u, taksa tih  ma, chub  k engmah ti thei lote chu h     suh u,

⁵Amaherawh    , tu nge in h    h t  r ka hr  h ang che u, a tih  lum h  u pawha h        na p   h theih  na neitu chu h     rawh u; ni e, ka hr  h a che u, amah chu h     maw h rawh u!

⁶Chawngzawng pangâ dâr tangka pahnihin an hralh thîn lo vem ni? An zînga pakhat mah hi Pathianin a hmaih ngai si lo.

⁷In samzâi te lam pawh chhiar vek a ni asin. Chuvângin hlau suh u; chawngzawng tam tak aiin in hlu zâwk a ni.

MITE HMAA KRISTA TÂN TLAT

⁸“Ka hrilh a che u, mite hmaa mi tantu chu Pathian Vântirhkohte hmaah Mihring Fapa hian a tan ve ang.

⁹Mite hmaa mi phattu chu, Pathian Vântirhkohte hmaah ka phat ve ang.

¹⁰Mihring Fapa sawisêltu chu ngaihdam a ni ang; Thlarau Thianghlim sawi chhetu erawh chu ngaihdam a ni lo vang.

¹¹“Biak ina rorêltute leh thuneitute hmaa chhuahchhalh tûra an dintîr hunah che u chuan, engtia chhân tûr nge ni a, eng thu nge sawi tûr tih lungkham lâwk suh u.

¹²Chutih hun atân chuan Thlarau Thianghlimin sawi tûr a hrilh mai ang che u,” a ti a.

MI HAUSA Â TEHKHIN THU

¹³Mîpui zînga tuemaw chuan Isua hnênah, “Zirtîrtu, ka unau hnênah ro insem tûrin mi sawisak rawh,” a ti a.

¹⁴Nimahsela, ani chuan a hnênah, “Thiana, nangni chung a rorêltûah leh ro semtûah tu nge mi siam?” a ti a.

¹⁵Tin, an hnênah, “Fîmkhur ula, duhâmna lakah invêng rawh u; mihring nun hi neihnun thila innghat a ni lo ve,” a ti a.

MI HAUSA MÂWL TEHKHIN THU

¹⁶An hnênah tehkhin thû a sawi a: “Mi hausa pakhat chuan buh a thar hlâwk hlê mai a.

¹⁷Tihian a inngaihtuah a, ‘Engtin nge ka tih ang âw, buh leh bâl dahna leng tûr chhêk in ka nei si lo va?’

¹⁸“Hetî hian ka ti teh ang; ka chhêk in hi ka thiat ang a, a aia lianin ka sa ang a; chutah chuan ka buh leh ka sum zawng zawng ka chhêk khâwm ang.

¹⁹Ka thlarau hnênah, “Thlarau, kum tam tak chhûng atân sum tam tak i khâwl hi; châwl la, eiin in la, nuam chên tawh rawh le, ka ti ang,” a ti a.

²⁰Nimahsela, Pathianin a hnênah, ‘Mi â pa! Zaninah hian i nunna an lâksak dâwn a che; i thil dehchhuahte kha tû tâ nge ni ang le?’ a ti a.

²¹Mahni tâna sum khâwl tēuh va, Pathian lama ngah si lo chu, chutiang chu a ni thîn,” a ti a.

LUNGKHAM SUH U

²²A zirtîrte hnênah chuan, “Chuvângin ka hrilh a che u, in nunna thû leh, ei leh in tûr chungchâng lungkham suh u; in taksa thû leh silhfên inbel tûr chungchâng pawh engto hek suh u.

²³Nunna hi ei leh in thil mai a ni lo va, taksa pawh hi silh leh fên thil mai a ni hek lo.

²⁴Choâkte hi ngaihtuah teh u, buh an tuh lo va, an seng hek lo, chhêk in te, buhzēm te pawh an nei lo; mahse Pathianin a châwm si a. Nangni chu savâte ai chuan in hlu zâwk daih lo vem ni?

²⁵Nangni zîngah lungkham avângin tûin nge mahni dung lam tawng khata tisâng thei?”

²⁶Hetiang thil tê mah ti thei lo hian engati nge thil dang in lungkham thîn?

²⁷“Tuktinpâr than dân hi ngaihtuah teh u: hnâ an thawk lo, lâ pawh an kai hek lo; mahse ka hrilh a che u, Solomona meuh pawh a ropuina zawng zawnga a inthuum khân hêng tûktinpâr pakhat tluk pawh hian cheiin a awm lo.

²⁸Chutichuan hlobet, waviina nung hliah hliah, a tûka thuka rawh ral leh mai tûr mah Pathianin chuti taka a chei chuan, âw, nangni rin tēm te u, chûngte ai chuan engti fakauvin nge a thuum belh dâwn che u?

²⁹“Ei tûr te, in tûr te hi dap ruai suh u, lungkham bawh hek suh u.

³⁰Chûng thil zawng zawng chu khawvêla hnam tinte zawn ber a ni a, chûng chu in mamawh tih in Pa-in a hai lo asin.

³¹Pathian lalram chu zawng zâwk ula, chûng thilte chu a pêk belhchhah dâwn che u nia.

³²Pâwl tlênte u, hlau suh u; lalram pêk che u hi in Pa duhzâwng tak a ni asin.

³³“In thil neihte chu hralh ula, mi rehteite pe rawh u; vânah rûkru awm lohnaah, thîmin a ei chhiat hek lohnaah chuan tangka ip hlui thei lo te, sum phai thei lo te insiam rawh u.

³⁴In ro awmna apiangah in rilru pawh a awm ang.

CHHIAHHLAWH RINAWM LEH CHHIAHHLAWH SUAL

³⁵“Inpeih sa diamin, khâwnvâr pawh chhit ên sa nêin inring reng rawh u;

³⁶inneihna ruai theh zo a lo hâw huna an pû-in kawngkhâr a rawn kik vêleha lo hawn nghâl vat tûra ama mite an inring reng thîn angin awm rawh u.

³⁷An pû lo hâwngin amah lo nghâk rengtu chhiahhlawh a rawn hmuhate chu an nihlawh ang. Tihtak zetin ka hrilh a che u, ani chu a inpeih thuai ang a, anni chu chaw kîl tûrin thutna a remsak ang a, an ei tûr a siamsak ang.

³⁸Zan laiah emaw, khawvâr dâwnah emaw pawh lo hâw se, a chhiahhlawh inring renga lo awm a rawn hmuhte chu an nihlawh ang.

³⁹Hei erawh hi chu hria ula, rûkru rawn chêt hun tûr chu in neituin hre lawk se, a vêng ang a, a in a reh pawhtîr lo vang.

⁴⁰Nangni pawh inring reng rawh u, Mihring Fapa hi lo kal tura in rin loh dârkârah a lo kal dâwn si a,” a ti a.

⁴¹Peteran a hnênah, “Lalpa, hê tehkhin thû hi keimahni chauh nge min hrilh, mi zawng zawng?” a ti a.

⁴²Lalpa chuan, “Sum enkawltu rinawm leh fîng, a pû-in a hun taka an chaw ei tûr semsak tûra a chhûngte rêlsaktu atân tu nge a siam ang le?

⁴³A pu lo hâw laia chhiahhlawh chutiang taka tiṭha a rawn hmuha chu a nihlawh ang.

⁴⁴Dik takin ka hrilh a che u, a neih zawng zawng chung a hotûah a siam ngei ang.

⁴⁵Nimahsela, chủ chhiahhlawh chuan a rilrûin, ‘Ka pu hi a lo hâu lawk dâwn lo ve,’ tiin chhiahhlawhho chu a hmei a pân lo vêl sela, ei leh in-in, zu rûi bawkin lo awm ta sela,

⁴⁶chủ chhiahhlawha pû chu a beisei aia hmâin, a inrin loh laiin a lo hâu thut ang a, bung hnihah arawn chhuah ang a, ringlomite chan ang a chantîr ang.

⁴⁷Chhiahhlawh, a pû duh zâwn hre reng chung a ti lo va, lo inring baw si lo chu vaw tam tak an vua ang.

⁴⁸Amaherawhchu, a hriat loh avânga vuakna khawp thil ti chuan vuak a tuar tlêm zâwk ang. Tûpawh tam tak an pêka hnênah chuan tam tak an phûit ang; tûpawh tam tak an kawltîra lakah chuan tam tak an phûit ang.

KRISTAN INTHENNA A THLEN

⁴⁹“Khawvêlah hian mei rawn thlâk tûra lo kal ka ni; tûnah pawh hian kâng tawh se ka va ti êm!

⁵⁰Nimahsela, baptisma chan tûr ka la nei, chu mi hlen chhuah hmâ chu ka thâw a va ipik êm!

⁵¹Leiah hian inremna thlen tûra lo kal emaw mi ti elo? Nî lo ve, ka hrilh a che u, inthen darhna thlen tûra lo kal zâwk ka ni.

⁵²Tûn aţang chuan chhûng khatah mi pangâ an inthen hrang ang: pathumin pahni an do ang a, pahnihin pathum an do vang.

⁵³Inthenna chu pa leh fapa inkârah te, fapa leh a pa, nu leh a fanu, fanu leh a nu, mo leh a pasala nu, a pasala nu leh a mo inkârah te a ni ang,” a ti a.

HUN KAL DAN HRIAT THIAMNA

⁵⁴Mipuite hnênah chuan, “Thlang lama chhûm lo thawk chho in hmuh chuan, ‘Ruah a sûr dâwn,’ in ti nghâl thîn a; a lo ni ngei thîn.

⁵⁵Chhim thlî a lo tleh lahin, ‘Khua a lum dâwn,’ in ti a; a lo dik ngei baw thîn a.

⁵⁶Vervêkte u! Leilung awm dân leh khaw awm dân chinchâng pawh in hre fiah thiam si a, engati nge tûnlai hun awm dân in hriat fiah thiam loh le?”

I KHINGPUI REM RAWH

⁵⁷Ni e, engah nge a dik leh dik lo chu nangmahni pawhin in rêl fel mai loh?

⁵⁸Thuneitu hmâa i khangpui nêin in inlan hunin, kawng lakah insawirem dân dap pui hrâm rawh; chuti lo chuan rorêltu hmâah a hnûk lût ang che a, rorêltu chuan thuneitu sângah a hlân ang che a, tân inah a khung hlaui dah ang che.

⁵⁹Ka hrilh a che, chêng khat pawh i tlâk kim hmâ chuan chuta tâ chu i chhuak leh tawh lo vang,” a ti a.

BUNG 13

SIM NGE BORAL?

¹Chutih lai chuan Pilatan Galili mite thatin an thisen chu an inthâwina thilhlân zîngah a pawlsak thû mi tute emawin Isua an rawn hrilh a.

²Isuan an hnênah, “Chûng Galili mite chuan chutiang thil an tuar avâng chuan Galili rama mi zawnzawng aia sual bîk niin in ring em ni?

³Ni teh suh e, ka hrilh a che u; nangni pawh in sim loh chuan chutiang baw chuan in boral vek ang.

⁴A nih leh, Siloam in sângin mi sâwm leh pariat a delhhlumte pawh kha Jerusalema chêng zawnzawngte aia sual bîk niin in ngai em ni?

⁵Ni teh suh e, ka hrilh a che u, nangni pawh in sim loh chuan chutiang baw chuan in boral vek ang,” a ti a.

THEIPUI RAH LO KUNG TEHKHIN THU

⁶He tehkhin thû pawh hi a sawi a: “Tûin emaw a grêp huanah theipui kûng khat a phun a; a kûngah chuan a rah arawn zawnzawng a, pakhat mah a hmu lo va.

⁷Tichuan, grêp hrui enkawltu hnênah, ‘En teh, kum thum chhûngin he theipui kûngah hian a rah ka va zawnzawng thîn a, pakhat pawh ka hmu ngai lo. Kit mai rawh; engah nge hmun pawh a awn hnawzawng reng le?’ a ti a.

⁸Mahse ani chuan, “Ka pu, kumin tal hi zuah ila, a vêlin ka lai ang a, leiţhain ka rihvûr phawt ang e.

⁹A rah hlaui chuan a ţha dâwn êm asin. A la rah loh fo erawh chuan kit mai ang che,” a ti a.”

CHAK LOHNA THLARAU

¹⁰Biak in pakhatatah chuan Sabbath niin mite a lo zirtîr a.

¹¹Ngai teh, hmeichhe pakhat kum sâwm leh kum riat zet chak lohna thlarauvin a man hi a lo awm reng a, chu mi chu a kûn reng a, mahniin a ding char thei tawh lo va.

¹²Chu mi chu Isuan a lo hmuhin, a hnênah a ko va, a hnênah, “Hmeichhia, i chak lohna chuan a thlah ta a che,” a ti a.

¹³A chungah a kut a ngat a; a lo ding char thei nghâl mai a, Pathian a fak ta a.

¹⁴Nimahsela, Sabbath nîa Isuan mi a tihdam avâng chuan biak in hotu chu a thinur a, mipuite hnênah, “Mihringte tân ni ruk chhûng hnathawhna ni a awm alâwm; chumi chhûng chuan lo kal ula, intidam ta che u, Sabbath nîah ni lo hian,” a ti a.

¹⁵Lalpa chuan, “Vervêkte u! Nangni pawhin Sabbath niin in sebâwnzawng emaw, in sabengtung emaw a thlunna phelhin, tui pe tûra hrui chhuak lo tu nge awm che u?

¹⁶Hê hmeichhia, Abrahama fanu lehngâl, Setanan kum sâwm leh kum riat ngawt a lo phuar hi, Sabbath ni pawha phelhsak loh chi em ni?” tiin a chhâng a.

¹⁷Chûng thû a sawi avâng chuan amah eptu zawnzawng chu an zak ta a; mipuite erawh chu a thil ropui tih zawnzawngte avângin an lâwm êm êm si a.

ANĀM CHI TEHKHIN THU

¹⁸Tin, ani chuan, “Pathian lalram chu eng ang nge ni ang? Eng nêin nge ka tehkhin dâwn?

¹⁹Miin anām chi fang a lâka, a huana a chîn ang chu a ni; a lo thang lian a, thingkûng lian tak a lo ni a, chunglêng savâte chuan a zârahte chuan bû an chhêp ta a,” a ti a.

DÂWIDIM TEHKHIN THU

²⁰“Pathian lalram chu eng nê nge ka tehkhin dâwn?”

²¹“Hmeichhia in dâwidim a lâka, chhangphut tehkhâwn thuma a zavaia a fan chhuah vek tûra a phul darh ang chu a ni e,” a ti a.

KAWNG ZÎM

²²Tichuan, khawpuite leh thingtlang khuate chu a fang kual a, zirtîr chung zêlin Jerusalem lam chu a pan ta a.

²³Mi tûemaw hian a hnênah, “Lalpa, chhandamte chu tlêm tê chauh maw an nih?” a ti a. Ani chuan an hnênah,

²⁴“Kawngka zîmah chuan luh tum hrâm rawh u; ka hrilh a che u, mi tam takin luh an tum ang a, an lût thei si lo vang.

²⁵In neitupa a lo thawha, kawng a khâr khum tawh che u chuan, nangni’n pâwna dingin, ‘Lalpa, Lalpa, kawng min hawnsak rawh,’ tiin va kik mah ula, ‘Khawi lama mi nge in nih ka hre lova che u,’ tiin a lo chhâng ang che u.

²⁶Nangni’n, ‘I hmuhah pawh kan eia kan in thin kha, kan kawthlêrahte pawh i zirtîr thin khâ,’ in la ti ang.

²⁷Nimahsela ani chuan, ‘Ka hrilh a che u, khawi lama mi nge in nih ka hre lo va che u; nangni thil sual titu zawng zawngte u, ka hnên ata kal bo vek rawh u,’ a la ti ang.

²⁸“Abrahama te, Isaaka te, Jakoba te, zâwlnei zawng zawngte Pathian lalrama an lût in hmuha, nangni lah pâwna hnawh chhuah in ni tih in inhriat hunah, chutah chuan ãah leh ha ãial chu a awm ang.

²⁹Chhak leh thlang, chhim leh hmar ațangin mi an lo kal ang a, Pathian lalramah an la ãhû ang.

³⁰Hnuhnung berte pawh hmasa bera la awm tûr an awm a, hmasa berte pawh hnuhnung bera awm tûr an awm bawk,” a ti a.

³¹Chumi nî tak chuan Pharisai tute emaw an lo kal a, a hnênah, ‘Chhuak la, heta ta hi kal bo rawh; Herodan tihhlum che a tum a nia,” an rawn ti a.

³²Ani chuan an hnênah, “Chû sihal hnênah chuan he ãhû hi va sawi rawh u, ‘Ngai rawh, vawiinah nê, naktûkah nê, ramhuaite ka hnawt chhuak ang a, damlote pawh ka tidam ang a, a nithum niin ka ti zo vang.’

³³Engpawh nise, vawiinah nê, naktûkah nê, a tûk lehah nê ka kal zêl tûr a ni; Jerusalem pâwn lamah zâwlnei thih theih a ni lo ve,” a ti a.

ISUAN JERUSALEM A ãAH KHUM

³⁴“Aw Jerusalem, Jerusalem! Zâwlneiho thattu, i hnêna an rawn tirhte lunga lo dênghlumtu! Arpuiin a note a thla hnuaia a awp khâwm angin, I fate vawi engzât nge awp khâwm ka tum khâ?

³⁵En ta che u! In in chu tihram vek hmabâkin a awm ta; tihtak zetin ka hrilh a che u, ‘LALPA hminga lo kal chu a nihlawh e,’ in tih hun a lo thlen hmâ loh zawng mi hmu leh tawh lo vang!” a ti a.

BUNG 14

SABBATH NI A VÛNG TIHDAM

¹Vawi khat chu, Sabbath niin Pharisai hotu pakhat inah chaw ei tûrin a kal a, an lo enthla reng a.

²Ngai teh, a hmâah chuan vûng, dam lo mi tuemaw hi a awm a.

³Isuan dân hre mite leh Pharisai hnênah chuan, “Sabbath niin tihdam a thiang nge thiang lo?” tiin a zâwt a.

⁴Anni erawh chu an ngâwi reng a. Tichuan, ani chuan damlo chu a chelh a, a tidam a, a kaltîr ta a.

⁵An hnênah chuan, “Nangni zîngah in sabengtung emaw, sebâwn emaw tuichhunchhuahah tlâ sela, Sabbath ni pawhin tu nge hnûk chhuak nghâl lo vang che u?” a ti a.

⁶Chûng zawhnate pawh chu chhân ngaihna an hre chuang lo.

INNGAITLÂWM RAWH

⁷Ruai kîl tûra mi sâwmten ãhutna ãhâ ãhâ an chuh thin tih a lo hmuhin, anniho chu tehkhin thu a hrilh a:

⁸“Inneihna ruai kîl tûra an sâwm chein ãhutna ãhâ berah chuan ãhu suh ang che; nang aia mi zahawm zâwk a lo sâwm tel hlauh tâkin;

⁹tichuan, a sâwmtu che chuan, ‘Hê mi ãhut nân hian kian ta che,’ a rawn ti ang che a; zak deuhvin ãhutna hnuaî hnung ber lam i pan thlâk a ngai palh ang e.

¹⁰An sâwm che chuan ãhutthlêng hnuaîhnung berah va ãhu zâwk ang che; tichuan, a sâwmtu che a lo kal hunah, ‘ãhiana, ãhutthlêng ãhâ deuhvah hian lo ãhu chho rawh,’ a ti ang che a, tichuan i chaw kîlpuite mithmuhah chuan châwimâwiin i awm dâwn nia.

¹¹Inngaihlu apiang tihtlâwm an ni ang a, inngaitlâwm chu châwimawî an ni ang,” a ti a.

¹²Amah sâwmtu hnênah pawh chuan, “Chhûnah emaw, zânah emaw ruai i ãheh hunin i ãhiant, i unaute, i laichinte, i thenawm mi hausate chu sâwm suh ang che; chuti lo chuan an sâwm lêt ve leh ang che a, an rûl leh mai ang che.

¹³Ruai i ãheh hun chuan pachhiate, piangsualte, kebâite, mitdelte sâwm zâwk rawh;

¹⁴Chûngte chuan rulh lêtna tûr che an neih loh avângin i nihlawh ang; mi dikte thawhleh hunah rulh lêt i ni dâwn si a,” a ti a.

ZANRIAH ROPUI TEHKHIN THU

¹⁵Dawhkâna a chaw kîlpuite zînga pakhatin chûng ãhûte chu a lo hriatin a hnênah, “Pathian lalrama chaw ei pha ve tûrte chu an va nihlawh dâwn êm!” a ti a.

¹⁶Ani chuan a chhâng a, “Mi tûin emaw zânah ruai ropui tak a ãheh a, mi tam tak a sâwm a;

¹⁷a ei a lo hun chuan a mi sâwmtu hnênah, ‘Lo kal rawh u, tûnah engkim peih a ni ta e,’ ti tûrin a chhiahhlawh a tîr a.

¹⁸Nimahsela, anniho chu inthuralin an pha vek a. A hmasa ber chuan a hnênah, ‘Lo ka lei a, a en tûra kal a ngai si a. Khawngaihin mi han phatsak ang che,’ a ti a.

¹⁹Mi dang chuan, ‘Sebâwng tuak ngâ ka lei a, a ʔat leh ʔat loh ka va en fiah dâwn a. Khawngaihin mi rawn phatsak ang che,’ a ti a.

²⁰Mi dang leh chuan, ‘Nupui ka nei vê ta a, ka kalsan thei lo a ni,’ a ti a.

²¹Tichuan, chhiahhlawh chuan chûng thû chu a pû a va hrilh a. In neitu chu a thinur a, a chhiahhlawh hnênah chuan, ‘Rang takin kal chhuak la, khawpui chhûnga kawthlêr leh kâwmkâr te va hrût la, pachhiate, piangsualte, kebâte, mitdelte hetah rawn hruai lût rawh,’ a ti a.

²²Chhiahhlawh chuan, ‘Ka pu, i thu mi pêk angin ka ti tawh a, mahse hmun ruak a la awm ta cheu mai,’ a ti a.

²³A pu chuan chhiahhlawh hnênah chuan, ‘Lamlianah leh dâiah te va chhuak la, ka in tikhat tûrin mîte chu va hruai khâwm hrâm rawh.

²⁴Ka hrilh a che, khâng mi ka sâwmte zînga pakhat mah khân ka ruai siam an kîl lo vang,’ a ti a.

ENGKIM KALSANA KRISTA ZUI

²⁵Mipui tam takin amah chu an zui dûl dûl a. Anmahni lam a hawi a, an hnênah,

²⁶“Tûpawh ka hnêna lo kal tûr chuan, a pa te, a nu te, a nupui te, a fa te, a unau te, a farnu te, ni e, ama nun ngei pawh a huat loh chuan, ka zirtîr a ni thei lo vang.

²⁷Tûpawh mahni krâws pûa mi zui lo chu ka zirtîr a ni thei lo vang.

²⁸Nangni zîngah tûpawhin in sâng sak tum ula, a sak zawhna khawp sum in neih leh neih loh hre tûrin, ʔhu chungin a man tûr chin tu nge chhût hmasa lo vang che u?

²⁹Lungphûm phûm tawh zeta, a sak zawh theih loh chuan, a hmu apiangin nuihzatin,

³⁰Hê mi hian in a rel ting a, a sa zo thei si lo,’ an ti dâwn lo vem ni?

³¹Anih loh leh, lal tûin nge lal dang do tûra a kal dâwnin, mi sîngnhîh nêna amah do tûra lo kal chu, mi sîngkhat nêna lo beih ngam dâwn leh dâwn loh, ʔhu chungah ngun taka ngaihtuah hmasa lo vang?

³²Chuti a nih loh vek pawhin, lal dang chu hla taka a la awm laiin, inremna kawng dapin palai a tîr ang.

³³Chutiang bawkin, in zînga mi tûpawh a neih zawng zawng kalsan lo chu ka zirtîr a ni thei lo vang.

CHI DÂ, TLAKTLAI LO

³⁴“Chî hi a ʔha e; nimahsela chî hi a dâk tawh chuan, engtin nge an tihal leh ang?

³⁵Lei tân a ʔha tawh lo va, êk dûr tân pawh a ʔha hek lo; mite paih chhuah tûr lek a ni tawh ʔhîn. Tûpawh hriatna tûra beng nei chuan hre rawh se!” a ti a.

BUNG 15

BERAM BO TEHKHIN THU

¹Chhiahkhawntute leh mi sual zawng zawngte chu a thû ngaithla tûrin an rawn pan khâwm a.

²Pharisaite leh dân zirtirtute erawh chuan, “He mi hian mi sualte kâwmîn an zîngah chaw te a ei ʔhîn nia,” tiin an lo sawisêl a.

³Ani chuan an hnênah hê tekhin thû hi a sawi a:

⁴“In zînga mi tuemaw hian berâm zâ nei sela, pakhat chu tibo ta sela, thlalêrah sawmkua leh pakuate chu hnutchhiahin, a bo chu a hmuh leh hmâ loh chu tu nge zawng lo vang?

⁵A hmuh leh chuan lâwm takin a kokîah a pu ʔhîn.

⁶In a thlenin a ʔhianta leh a ʔhenawmte a ko khâwm ang a, an hnênah, ‘Mi lâwmpui r’u, ka berâm bo kha ka hmu leh ta e!’ a ti ang.

⁷Ka hrilh a che u, chutiang bawkin mi fel sawmkua leh pakua sim tûr pawh nei lote ai chuan, mi sual pakhat sim chungah hian vân mipuite lâwmna a nasa zâwk ang.

DULI BO TEHKHIN THU

⁸“Hmeichhia tupawhin duli sâwm neiin pakhat hloh ang sela, khâwnvâr chhîa a in vêlte phiatin, a hmuh leh hmâ loh chu tu nge ngun takin zawng lo vang?

⁹A hmuh leh chuan a ʔhianta leh a ʔhenawmte a ko khâwm ang a, ‘Mi lâwmpui rawh u, ka duli bo kha ka hmu leh ta e!’ a ti ang.

¹⁰Chutiang bawkin ka hrilh a che u, misual pakhat sim chungah Pathian Vântirhkohte hmâah lâwmna a awm ʔhîn,” a ti a.

FAPA TLAN BO TEHKHIN THU

¹¹Tihian a sawi a: “Mi tu emaw hian fapa pahnih a nei a.

¹²A naupang zâwk chuan a pa hnênah, ‘Ka pa, ka ro chan ve tûr chu mi pe rawh,’ a ti a. Tichuan, a sum chu an hnênah a sem ta a.

¹³Ni rei lo te hnûah a fapa naupang zâwk chuan a chanpual zawng zawng chu a khâwm vek a, ram hla takah a zin ta daih a, chutah chuan nuam chênin a sum chu a khawh ral ta hiau hiau va.

¹⁴A neih sum a chen ral zawh chuan chû ramah chuan ʔâmpui a lo tlâ a, ei tûr a lo tlachham ta a.

¹⁵Tichuan, chu rama mi pakhat chu a va bêl a; chu mi chuan wawk chaw pe turin a huanah a tîr a.

¹⁶Vawkin be kâwm an ei lai te chuan intihpuar vê a châk êm êm a, tuma’n engmah an pe si lo.

¹⁷“Nimahsela, a han inhre chhuak ta a, ‘Ka pa chhiahhlawh chaw ei sên loh nei an tam vei nê, kei lah chu hetah rilʔâmin ka thî mai dâwn si a!

¹⁸Ka tho vang a, ka pa hnênah ka kal ang a, a hnênah, “Ka pa, vâna mi chungah leh nangma mithmuhin thil sual ka ti a;

¹⁹i fapaa vuah tlâk pawh ka ni tawh lo va. I hnêna inhlawhfa pakhat angah mi siam ve mai rawh,” ka ti ang,’ a ti a.

²⁰“Tichuan a tho va, a pa hnênah chuan a kal ta a. Ani chu hla taka a la awm laiin a pa chuan a lo hmu a, a khawngaih êm êm a, a tlân a, a va kuah chawt a, a fâwp ngawih ngawih a.

²¹A fapa chuan a hnênah, ‘Ka pa, vâna mi chungah leh nangma mithmuhi thil ka tisual a; i fapaa vuah tlâk pawh ka ni tawh lo ve,’ a ti a.

²²“Nimahsela, a pa chuan a chhiahhlawhte hnênah, ‘Kawrfual tha ber kha han la ula, hâktîr rawh u; a kutah zungbun te, a ke-ah pheikhawh te buntîr rawh u.

²³Sebâwng tuai châwm thau kha han kai ula, talh rawh u, hlim takin ruai i theh ang u;

²⁴hê ka fapa hi a thi a, a lo nung leh ta a; a bo va, kan hmu leh ta a nih hi,’ a ti a. Hlim takin an awm tan leh ta a.

²⁵“Nimahsela a fapa upa zâwk chu lo lamah a awm a. A feh hâw chu in a lo thlen dâwnin rimawi tum rî leh lâw thâwm a hre ta a.

²⁶Tichuan, chhiahhlawh pakhat a ko va, eng thil nge ni ta tih a zâwt a.

²⁷Ani chuan a hnênah, ‘I nau a lo hâwng a, i pain him taka a hmu leh avângin sebâwng tuai châwm thau kha a talh a ni,’ a ti a.

²⁸Ani chu a thinur a, a lût duh ta lo va. Chutichuan, a pa chu a lo chhuak a, arawn thlêm a.

²⁹Nimahsela ani chuan a pa hnênah, ‘Ngai rawh, hei chen hi i rawng ka lo bâwl ve tawh a; i thu âwih loh lai pawh ka nei ngai lo va; ka thiante nêna intihhlim ve nân kêltê takngial pawh mi la pe ngai hek lo.

³⁰Nimahsela hei, i fapa, nawhchizuarthe laka i sum tlak ral vektu hi a lo hâw vêleh, sebâwng tuai châwm thau i lo talhsak lehngah a,’ tiin a chhâng a.

³¹“Ani chuan a hnênah, ‘Ka fapa, ka hnêna awm reng i ni a, ka neih zawng zawng hi i ta a ni asin.

³²He i nau thi tawh hnû hi a lo nung leh a; bo tawh hnû kha kan hmu leh ta a nih hi; chuvângin hlim tak leh lâwm taka awm tûr kan ni zâwk asin,’ a ti a.”

BUNG 16

SUM ENKAWLTU RINAWM LO TEHKHIN THU

¹A zirtîrthe hnênah chuan hê thû pawh hi a sawi a: “Mi hausa tuinemaw sum enkawltu a nei a; chû mi chuan a sum a khawhral mai mai thîn, tiin a hnênah an hêk a.

²Tichuan, ani chu a ko va, ‘I chungchâng thu ka hriat hi engtizia nge ni? I sum enkawl dân han zia chhuak teh, tûn aţang chuan sum enkawltûah i ţang thei tawh lo vang,’ a ti a.

³“Sum enkawltu chuan a rilrûin, ‘Engtin nge ka tih tâk ang âw? Ka pûin sum enkawl hnâ aţangin min bân dâwn si a. Lei lai h ka peih si lo; kut dawh lah ka zak bawh si.

⁴Mahse, sum enkawl hna aţanga min bân huna an ina min awmtîr theih dân tûr ka hre ta,’ a ti a.

⁵“Tichuan, a pu leibatute chu a ko khâwm vek a, a hmasa ber hnênah chuan, ‘Ka pu lakah engzât nge i bat?’ a ti a.

⁶Ani chuan, ‘Hriak tehkhawng zakhat,’ a ti a. Ani chuan, ‘I ba bû han lâ la, ţhu thuai la, sawmngâ zia k ngah rawh,’ a ti a.

⁷Mi dang hnênah, ‘Nang engzât nge i bat?’ a ti a. Ani chuan, ‘Buh tehkhâwng zakhat,’ a ti a. Ani chuan a hnênah, ‘I ba bûah

sawmriat zia k rawh,’ a ti a.

⁸A pu chuan sum enkawltu dik lo rem hriatzia chu fakawm a ti a. Hê ţangthar khawvêl fate hi mahni ţanghma hai kawngah eng fate aiin an fîng thiam zawk hle mai.

⁹“Ka hril a che u, sum lem hi thian siam nân hmang rawh u, sum a ral hunah pawh chatuan inah an lo lâwm lût dâwn che u nia.

¹⁰Tlênte chungah rinawm chu tam tak chungah pawh a rinawm thîn; tlênte chungah rinawm lo erawh chu tam tak chungah pawh a rinawm chuang lo.

¹¹Sum lem chungah mah in rinawm loh chuan tuin nge sum tak chu kawltîr ang che u?

¹²Mi dang thil neihah mah in rinawm loh chuan, in chanpual tûr ngei pawh tu nge pê duh ang che u?

¹³Chhiahhlawh tûmahin hotu pahni rawng an bâwl kawp thei lo; pakhat huain pakhat a duh ang, a nih loh chuan pakhat tanin pakhat a hmusit ang. Pathian leh sum rawng in bâwl kawp thei lo ve,” a ti a.

DÂN, ZÂWLNEITE LEH LALRAM

¹⁴Sum ngaina Pharisaite pawhin chûng thûte chu an lo ngaithla vê a, an nuihzat hlê a.

¹⁵Ani chuan an hnênah, “Mî hmuha intifel mai in ni e; nimahsela, Pathian chuan in rilrû a hre si a. Mihringte ngaihsân zâwng hi Pathian mithmuhah chuan tenawm mai a ni.

¹⁶“Dân leh zâwlneite hun chhûng chu Johana lo awm thleng kha a ni a. Chumi chinah chuan Pathian lalram chanchin an hril ta a, luh tumin miten an bawh huai huai a.

¹⁷Dân thu chhun han te tak tê a boral aiin vân leh khawvêl boral a awl zâwk.

¹⁸Tûpawh nupui mâa nupui dang nei chu uirê a ni; tûpawh mi nupui mâk hnu nei pawh uirê a ni,” a ti a.

MI HAUSA LEH LAZARA

¹⁹“Mi hausa tuemaw a awm a, puan sen duk leh puan zai sîn a sin a, ni tîn nuamsa takin a khawsa thîn a.

²⁰Kutdawh pakhat, a hming Lazara, pânin a bawm khah hi a awm vê a, a in pân kawngkhâr bulah chuan an muttîr thîn a;

²¹mi hausa dawhkân aţanga ningnâwi tlâte chuan lo inhnangfâk vê a duh êm êm a. Ui te lah chuan a pânte chu anrawn liahsak thîn a.

²²Tichuan, kutdawh chu a thi a, Vântirhkohten Abrahama ângchhûngah an hrui ta a. Mi hausâ pawh chu a thi a, an phûm a.

²³Hremhmunah chuan ngaisak tuar rêng rêngin a awm a, a han vanvadâk a, hla taka Abrahama leh a ângchhûnga Lazara awm nêna hmu ta a.

²⁴“Tichuan, a âu va, ‘Ka pa Abraham, mi khawngaih la, Lazara kha han tîr la, ka lei tidâi tûrin a kut zung hmâwr tuih rawn chia rawh se; hê meipua ngaisak ka tuar hi a na êm mai,’ a ti a.

²⁵“Nimahsela, Abrahama chuan, ‘Ka fapa, nangin i dam lai khân thil tha i chang a, chutiang bawkin Lazaran thil tha lo a chan kha hre ta che; mahse tûnah chuan ani chu hetah thlamuang takin

a awm a, nang zawng nghaisak i tuar ta a nih kha.

²⁶Chû chauh a ni lo, heta tanga nangni hnêna kal tumte chu an kal theih lohna tûr leh, tûmah khata tanga keimahni hnêna an lo kai theih lohna tûrin, keini leh nangni inkârah hian lei kak zau tak an siam a ni,' a ti a.

²⁷Ani chuan, 'A nih leh ka pa, ani kha ka pa ina kaltîr tûr talin ka ngên a che;

²⁸pianpui mipa pangâ ka nei a; hê inngghaisakna hmunah hian an lo kal ve dah ang e, thahnemngai takin hrilh teh se,' a ti a.

²⁹Nimahsela Abrahama chuan, 'Mosia leh zâwlneite an nei alâwm; chûng mite thû chu ngaihven ang hmiang,' a ti a.

³⁰Ani chuan, 'Ka pa Abraham, ni lo ve; mitthi zînga mi meuh an hnênah kal zâwk sela an sim dâwn alâwm,' a ti a.

³¹Nimahsela ani chuan, 'Mosia leh zâwlneite thû pawh an pawisak loh chuan, mitthi zînga ta tho lehte thû pawh an âwih duh chuang lo vang,' a ti a," a ti a.

BUNG 17

TLÛKNA LAKA ISUA ZILHNA

¹A zirtîrte hnênah, 'Tlûknate hi awm lo thei a ni lo; nimahsela, tlûkna awmtîrtu chung chu a pik e!

²Hêng mi têtê zînga pakhat pawh tihtlûk ai chuan, a titluta tûr nghâwngah buh râwtsawmna lung awrhîrin tuifinriatah thlâk daih sela, a tân a t̃ha zâwk ang.

³Fîmkhur rawh u. I unauvin i chungah thil sual a tih chuan zilh la; a sim chuan ngaidam rawh.

⁴Ni khatah i chungah wawi sarih thil sual tiin, 'Ka sim e,' tia wawi sarih i lam a lo hawi leh chuan i ngaidam tûr a ni," a ti a.

RINNA LEH THILTIH

⁵Tirhkohte chuan Lalpa hnênah, "Kan rinna min tihpunsak rawh," an ti a.

⁶Lalpa chuan, "An̄tam chi fang khat tiat rinna in neih chuan hê thingtheihmu kûng hnênah hian, 'Lo inphâwi la, tuifinriatah va inphun rawh,' in ti ang a, in thû a âwih mai ang.

⁷In zînga mi tuemaw hian chhiahhlawh neiin a leilehna emaw, a berâm vênna ātang emawa a feh hâw lo thlen vêleh, 'Châwrawn kîl ng̃hâl rawh,' tu nge lo ti ang che u?

⁸'Ka ei in tûr mi siam la, puan veng la, ka ei kham hm̃a chu mi lo vil rawh; chumi hn̄uah i ei ve thei ang,' a ti zâwk dâwn lo vem ni?

⁹I thupêk anga a tih avângin chhiahhlawh chu lâwmthû i hrilh dâwn em ni? I tih ka ring lo ve.

¹⁰Chutiang bawkin, nangni pawhin in hnêna thupêk zawng zawng anga in tih hn̄uin, 'Chhiahhlawh tlâktlai lo kan ni. Kan tihtûr ti vê mai kan ni e,' ti rawh u," a ti a.

PHÂR SÂWM TIHTIANGHLIM

¹¹Jerusalemah a kal dâwn a, Galili leh Samari ram chu a kal tlang a.

¹²Khaw pakhata a luh dâwnin phâr hlîr mi sâwmin an lo tâwk a, hla takah an ding a.

¹³Tichuan aw ring taka âuvin, "Isu, Zirtîrtu, min khawngaih rawh!" an ti a.

¹⁴Anni chu a lo hmuh chuan, "Kal ula, puithiamte hnênah va inentîr rawh u," a ti a. Chutia an kal lai chuan an lo thianghlim ta hlawm a.

¹⁵An zînga pakhat chuan a dam ta tih a inhria a; tichuan a va kîr leh a, ring taka âuvin Pathian a fak a,

¹⁶a ke bulah a bawkkhup a, lâwmthû a sawi a. Amah chu Samari mi a ni a.

¹⁷Isuan a chhâng a, "Mi sâwm a ni lo'm ni lo thianghlim ta che u? Pakuate kha khawiah nge?

¹⁸Hê ram dang mi bâk hi Pathian châwimâwi tûra lo kîr leh tûr an awm na nge?" a ti a.

¹⁹Chu mi hnênah chuan, "Tho la, kal tawh rawh. I rinna hian a tidam che a nih hi," a ti a.

LALRAM LO THLENG TÛR

²⁰Pharisaiten Pathian lalram lo thlen hun thû an zawhna chu chhângin an hnênah, "Pathian lalram chu mita hmuh theih tûr zâwngin a lo thleng hlei nê;

²¹'En teh u, heta hi!' emaw, 'Sawta saw!' emaw an ti hek lo vang. Pathian lalram chu nangmahni chhûnga awm a ni zâwk e," a ti a.

²²Zirtîrte hnênah chuan, "Mihring Fapa dam lai nîte hi ni khat tal hmuh châk hun in la nei ang; mahse in hmu pha tawh si lo vang.

²³In hnênah, 'En teh u, heta hi!' emaw, 'En teh u, sawta saw!' emaw, an ti ang a. Kal chhuak suh ula, zui hek suh u;

²⁴Kâwl a lo phêt a, kâwlkil lehlam ātanga a lehlam thlenga a de chhuak zawr zawr ang hian Mihring Fapa lo kal ni chuan a awm ang.

²⁵Nimahsela, chû hun thlen hm̃a chuan thil tam tak a tuar pawt tûr a ni a, tûnlai t̃hangtharte hn̄awlin a awm ang.

²⁶"Nova dam laia thil awm dân ang khân, Mihring Fapa lo kal leh nîte chuan a awm bawk ang.

²⁷Lawng chhûnga Nova a luha, tui a lo lêt a, an zâa a chîm hlum vek ni kha a thlen hm̃a loh zawng an eiin an in a, nupui pasal an innei thîn a.

²⁸"Chutiang bawkin Lota dam laiin a lo awm bawk: an eiin an in a, an leiin an hralh a, thlai an chîng a, in te an sâ a;

²⁹nimahsela, Sodom khua ata Lota a chhuah ni chuan vân ātangin mei leh kât a sûr a, a tihlum ta vek a.

³⁰Chutiang bawkin Mihring Faparawn inlâr nî chuan a awm ang.

³¹Chumi nîah chuan tûpawh in chungah awm chu in chhûnga a sum awm chuh tûrin chhuk suh se. Chutiang bawkin, tûpawh lova feh chu inah hâw suh se.

³²Lota nupui hre reng rawh u.

³³“Tûpawh mahni sahimna tûr zawng chuan a chhân ang a, tûpawh mahni nun chhân chuan a humhim zâwk ang.”

³⁴“Ka hrilh a che u, chumi zânah chuan khum pakhatah mi pahni an mû ang a, pakhat lâk bo a ni ang a, pakhat hnutchhihah a awm ang.

³⁵Hmeichhe pahni an dêng ang a, pakhat chu lâk bo a ni ang a, pakhat chu hnutchhihah a ni ang.

³⁶Mi pahni lovah an feh ang a: pakhat lâk bo a ni ang a, pakhat chu hnutchhihah a ni ang,” a ti a.

³⁷Anni chuan an chhâng a, “Lalpa, khawi lamah mâw?” an ti a. Ani chuan, “Saruang awmna apiangah, mulukawlhte pawh an pung khâwm ang,” a ti a.

BUNG 18

HMEITHAI THAHNEMNGAI TEHKHIN THU

¹Beidawng lova tawngtai thin tûr an nihzia hê tekhin thu hmang hian a zirtîr a:

²“Khaw pakhatah hian rorêltu, Pathian hlau lo, mihring pawh ngaihsak chuang lo hi a awm a.

³Chu khuah chuan hmeithai pakhat a awm a; ani chuan, ‘Ka khingpui chungah phubâ mi lâksak rawh,’ tiin a pan fo va.

⁴Hun engemaw chen chu a tihsak duh lo va; mahse, nakinah chuan a rilrûin, ‘Pathian hlau lovin mihring ngaihsak lo mah ila,

⁵hê hmeithai hian mi tibuai chhên mai si a, a phubâ chu ka laksak teh mai ang, a lo kal reng mai hi a ninawm zozai e,’ a ti a ni,” a ti a.

⁶Lalpa baw chuan, “Rorêltu fel lo thu sawi hi lo ngaihlâ teh u.

⁷An chungah zaidawh rih mah se, a mi thlan, a chhûn a zâna amah âutute phubâ chu Pathianin a lâksak dawn lo vem ni?

⁸Ka hrilh a che u, an phubâ chu a lâksak thuai ang. Nimahsela, Mihring Fapa chu a lo kal hunah khawvêlah hian rinna hmuh tûr rêng a rawn hre dawn em ni?” a ti a.

PHARISAI LEH CHHIAHKHAWNTU

⁹Mi dik tak nia inngaia, mi dang zawng zawng hmuhsit chingte hnênah hê tekhin thu hi a sawi baw a: ¹⁰“Mi pahni chu tempulah tawngtai tûr an kal a, pakhat chu Pharisaï a ni a, pakhat dang chu chhiahkhawntu a ni.

¹¹Pharisaï chu a ding a, a tawngtainaah ti hian ama chungchâng a chham a: ‘Pathian, mi dang hleprûk chingte, mi dik lote, uirê chingte ang ka nih loh avâng leh, hê chhiahkhawntu ang pawh hi ka nih loh avângin i chungah ka lâwm e.

¹²Kâr khatah vawi hnih chaw ka nghei a; ka neih apiang sâwma pakhat ka pe thin,’ a ti a.

¹³Chhiahkhawntu erawh chu hla takah dingin, vân lam pawh a en ngam lo va, ‘Pathian, kei misual hi mi khawngaih rawh!’ tiin a âwm a inchûm a inchûm ta zâwk a.

¹⁴“Ka hrilh a che u, a hmasa zâwk ai chuan hemi hi thiam changin a inah a haw ta a ni. Inngaihlu apiang tihtlâwmin an awm ang a, inngaitlâwm chu chawimâwiin an awm ang,” a ti a.

ISUAN NAUPANGTE MAL A SAWM

¹⁵A hnênah chuan naupang têtê chu a lo deh turin an rawn hruai a; nimahsela zirtîrten an hmuh chuan an lo hau va.

¹⁶Isua erawh chuan anni chu a ko va, “Naupang têtê ka hnênah han kaltîr ula, hnar suh u; Pathian lalram chu hetiang mite tâ hi a ni si a.

¹⁷Tihtak zetin ka hrilh a che u, tûpawh Pathian lalram chu naupang têtê a lawm anga lâwm lo chu, a chhûngah an lût tawp lo vang,” a ti a.

ISUAN TLANGVAL HAUSA THURAWN A PE

¹⁸Hotu pakhat chuan, “Zirtîrtu thâ, chatuana nunna ka neih theih nân eng nge ka tih ang?” tiin a zâwt a.

¹⁹Isuan a hnênah, “Engati nge thâ mi tih? Mi pakhat chauh lo chu tûmah tha an awm lo, chû chu Pathian a ni.

²⁰Thupêkte chu i hria alâwm: ‘Uirê suh,’ ‘Tual that suh,’ ‘Rûk ru suh,’ ‘Dâwtin mi hêk suh,’ ‘I nu leh i pa chawimâwi rawh,’ tih te hi,” a ti a.

²¹Ani chuan, “Chûng thû zawng zawng chu ka tleirâwl tîr ata ka zâwm thin asin,” a ti a.

²²Isuan chûng chu a hriatin a hnênah, “Tlâkchham pakhat i la nei. I neih zawng zawng hralh la, pachhiate hnênah pe rawh; chutichuan, vânah ro i nei ang; tichuan, lo kal la, mi zui ang che,” a ti a.

²³Chû thû a han hriat chuan a lungngai ta êm êm a, sum ngah tak a lo ni si a.

PATHIAN NEN ENKIM TIH THEIH

²⁴Chutia a lungngaih tâkzia Isuan a hmuh chuan, “Sum ngahte tân Pathian lalrama luh a va harsa dawn êm!

²⁵Mi hausa Pathian lalrama luh aiin hriau beng a sanghâwngsei luh tlang a awl zâwk,” a ti a.

²⁶A thusawi hriate chuan, “Chuti chu, tu nge chhandam ni thei ang le?” an ti a.

²⁷Ani erawh chuan, “Mihring tih rual loh hi Pathian chuan a ti thei asin,” a ti a.

²⁸Petera chuan, “En teh, keinin engkim kalsanin kan zui ta che a,” a ti a.

²⁹Ani chuan an hnênah, “Tihtak zetin ka hrilh a che u, tûpawh Pathian lalram avânga in emaw, nu leh pate emaw, unaute emaw, nupui emaw, fate emaw kalsan chu,

³⁰tûn dam chhûng lâ lâ hian a aia tam zâwk hmu lo tûr tûmah an awm lo, hun lo la awm tûra chatuana nunna nê,” a ti a.

ISUAN A THIH LEH THAWHLEH TUR A SAWI VAWI THUMNA

³¹Mi sâwm leh pahnihte chu a hruai hrang a, an hnênah, “Ngai teh u, Jerusalemah kan chhoh dawn hi, zâwlneiten Mihring Fapa chanchin an ziah zawng zawng kha hlen chhuah a ni ang.

³²Jentailte hnênah an pe ang a, nuihza siam nâna hmangin mualpho takin an siam ang a, chil an chhâk khum ang.

³³An vua ang a, an tihlum bawh ang. A ni thum niah a tho leh ang,” a ti a.

³⁴Mahse, chûng thil chu pakhatmah an hre thiam chuang lo; a thusawi chu an lakah thupin a awm a, eng thil nge a sawi tih pawh an hre thiam hek lo.

MITDELIN MITVÂRNA A CHANG

³⁵Jeriko khua a thlen dâwnin mitdel pakhat chu kawng sîrah kut dawhin a lo thû a;

³⁶mipui tam tak kal thâwm a hria a, engtizia nge tih a zâwt a.

³⁷Anni chuan Nazaret Isuan a kal pêl mêk tih an hrilh a.

³⁸Ani chu, “Isu, Davida Fapa, mi khawngaih rawh,” tiin a âu ta a.

³⁹A kal hmasate chuan ngâwi tûrin an khap a; mahse, ani chuan, “Davida Fapa, mi khawngaih rawh!” tiin a âu uar sauh va.

⁴⁰Isua chu a ding chawt a, a hnêna hruai tûrin thû a pê a. A kiang a lo thlen chuan,

⁴¹“Eng nge tihsak che i duh?” tiin a lo zâwt a. Ani chuan, “Lalpa, hmuh theih ka duh,” a ti a.

⁴²Isuan a hnênah, “Hmu thei tawh ang che, i rinna hian a tidam che a nih hi,” a ti a.

⁴³Thâwklehkhatah a hmu thei ta nghâl a, Pathian fak chung zêlin amah chu a zui vê ta a. Mi zawng zawngin chu thil an hmuh chuan Pathian an fak a.

BUNG 19

ZAKAIA INAH ISUA A THLENG

¹Isua chu Jeriko khuaah chuan a lût a, a chhûn pelh dâwn a.

²Ngai teh, mi pakhat, a hming Zakaia a awm a, chhiahkhawn hotu lian a ni a, mi hausa tak a ni.

³Isua chu mi eng ang nge a nih hmuh a tum a; mahse mipui avângin a hmu pha lo va, amah chu pa tâwi tê a ni si a.

⁴Tichuan, a kalna tûr kawngah chuan a lo va tlân khalh a, amah lo en tumin *theipui kûngah a lâwn a.

⁵Isuan chu lai hmun a lo thlen chuan a hawi chho va, a hnênah, “Zakai, lo chhuk thuai rawh; waviinah hian i inah ka thleng dâwn a ni,” a ti a.

⁶Tichuan, a chhuk thla thuai thuai a, lâwm takin ani chu a thleng ta a.

⁷Chû chu an hmuhin an vai chuan, “Mi sual hnêna thleng tûra a luh tâk saw,” tiin an phunnâwi a.

⁸Zakaia chuan ding chungin Lalpa hnênah, “En teh, Lalpa, ka sum zâtve pachhiate hnênah ka pe asin; dik lo taka mi thil ka lo hlep rû a nih chuan a leh liin ka rûl leh ang,” a ti a.

⁹Zakaia hnênah chuan Isuan, “Vaviinah hê inah hian chhandamna a lo thleng ta, ani pawh Abraham a fapa vê bawh a ni si a;

¹⁰Mihring Fapa hi mi bote zawnga, chhandam tûra lo kal a ni rêng a ni,” a ti a.

RANGKACHAK TANGKA TEHKHIN THU

¹¹Chûng thûte chu an ngaihlâk laiin Jerusalem khua an hnaih tâk avâng leh Pathian lalram lo lang nghal mai dâwna an rin avângin tehkhin thu dang a sawi a.

¹²Tihian a sawi a: “Mi zahawm tak pakhat chu lalram neitu nihna va la a, chumi zawha lo kîr leh tûrin ram hla takah a zin a.

¹³A chhiahhlawhte zînga sâwm a ko va, an hnênah tangka sâwm a pê a, an hnênah, ‘Ka lo kîr leh hmân lo peipung rawh u,’ a ti a.

¹⁴Mahse a khuaten an hua a, ‘Hê mi hi kan lal atân kan duh lo ve,’ ti tûrin palai an tîr a.

¹⁵Tichuan, lalram a va chan hnûa a lo kîr leh chuan, tangka a pêk chhiahhlawhho aţang chuan, mi tinin engzât nge sum an lo peipun tih hre tûrin a hnênah a ko khâwm a.

¹⁶Tichuan, a hmasa ber chu a lo kal a, ‘Ka pu, i tangkâ kha sâwmin a pung e,’ a ti a.

¹⁷Ani chuan a hnênah, ‘Nang bâwih thâ hian i ti tha e; tlênte chung a i rinawm avângin khaw sâwm chung a hotûah awm ang che,’ a ti a.

¹⁸A dawttu chu a lo kal a, ‘Ka pu, i tangkâ kha pangâin a pung e,’ a ti a.

¹⁹A hnênah chuan, ‘Nang pawh khaw panga chungah hotûah awm ang che,’ a ti a.

²⁰“Mi dang a lo kal leh a, ‘Ka pu, en teh hei, i tangkâ kha rawmawlin ka fûn ţha daih asin.

²¹Mi kherkhiap tak i nih avângin ka hlâu che a. I dah khâwl lohnaah pawh i khawn tho va, i tuh lohnaah pawh i âţ thîn si a,’ a ti a.

²²Ani chuan a hnênah, ‘Bâwih suaksual, i ţawngka chhuak ngeiin ka thiam lo va che. Mi kherkhiap tak ka niha, ka dah luh lohnaah pawh ka khawn ţhina, ka tuh lohnaah pawh ka âţ thîn tih hre reng si,

²³engah nge ka tangkâ hi sum dah punna hmuna i lo dah loh? Ka lo kal hunah a pung nêna dawng tûr ka ni asin,’ a ti a.

²⁴A kiana dingte hnênah chuan, ‘A tangkâ kha lâksak ula, tangka sâwm neitu hnênah pe rawh u,’ a ti a.

²⁵(Mahse anni chuan, ‘Ka pu, ani zawngin tangkâ sâwm lai a nei tawh alâwm,’ an lo ti a.)

²⁶Ka hrilh a che u, a nei apiang an pêk belhchhah ang a, a nei lo chu a neihchhun pawh lâksak a ni ang.

²⁷Nimahsela, hêng mi dotute leh an lal atân pawha mi duh lotute hirawn hruai ula, ka hmâah hian tihlum rawh u,’ a ti ta a,” a ti a.

ROPUI TAKA LAWMLUH

²⁸Chûng thû a sawi zawh chuan Jerusalem panin hmâ a hruai chho zêl a.

²⁹Bethphage leh Bethani khaw kiang, Olivet tlâng an tih chu a lo thlen chuan a zirtîrte zînga mi pahnih a tîr a,

³⁰“In hma zâwn khuaah sâwn va kal ta ula; in va luh tirhin sabengtung pa tuai thlun, tûma la chuan ngai lohna in va hmu

ang. Phelh ula, rawn kai rawh u.

³¹Mi tûpawhin, ‘Engah nge in phelh?’ tia an zawh che u chuan, ‘Lalpa’n a duh a ni,’ in ti dâwn nia,” a ti a.

³²Tichuan a mi tirhte chu an kal ta a, an hnêna a sawi ang ngeiin an va hmu a.

³³Mahse, sabengtung pa tuai thlun an phelh lai chuan a neitute chuan an hnênah, “Sabengtung pa tuai kha engah nge in phelh?” an ti a.

³⁴Anni chuan, “Lalpa’n a duh a ni,” an ti a.

³⁵Tichuan, Isua hnênah an rawn kai a. Sabengtung pa tuai chungah chuan an puante an phah a, a chungah Isua an chuantîr a.

³⁶A kalna tûr kawngah chuan an puante an phah zêl a.

³⁷Oliv tâng aţanga chhuk thlâkna an thlen dâwn laiin, a hnungzui mipuite chuan an vaiin a thil mak tih zawng zawng an hmuh avânga lâwmin, aw ring takin Pathian an fak a:

³⁸“LALPA hminga Lal lo kal chu fakin awm rawh se!’ Vânah remthû lêng sela, chungnung berah khian ropui rawh se!” an ti a.

³⁹Mipui zînga Pharisai thenkhat chuan a hnênah, “Zirtîrtu, i zirtîrte hi zilh rawh,” an lo ti a.

⁴⁰Nimahsela ani chuan, “Ka hrilh a che u, hêngte hi an ngawih reng chuan, lungte tal an âu chhuak nghâl mai ang,” tiin a chhâng a.

ISUAN JERUSALEM A ƧAH KHUM

⁴¹A thlen dawn tēpin khawpui chu a han thlîr a, a Ƨah khum a,

⁴²“Aw, nang lul hian tûnah tal hian i himna tûr thû hi lo hre teh hrâm la! Nimahsela, tûnah zawng i hmuh loh tûrin a inthup tawh si a.

⁴³I râlten i vêlin lei kulh an siam ang a, an hual ang che a; chhuak thei lovin i vêlin an hualbet tlat ang che,

⁴⁴nang leh i chhûnga awm i fanaute nêl leiah an paih ang che a; i chhung a lung intiang reng reng an zuah lo vang; an fan lai che i hriat loh avângin chutiang hunte chu i chungah a lo la thleng dâwn si a,” tiin.

ISUAN TEMPUL A THIAN

⁴⁵Tempulah chuan a va lût a, eng ilo zuartute leh chûng thil leitute chu a hnawt chhuak a,

⁴⁶an hnênah, ‘Ka in chu Ƨawngtâina in a ni,’ tih ziaak a ni; nangni erawh chuan ‘suamhmangte bûk’-ah in chantîr ta a nih hi,” a ti a.

⁴⁷Tempulah chuan ni tin a zirtîr thîn a. Puithiam lalte leh dân zirtîrtute leh vântlâng hotute erawh chuan amah tihbora dân an zawng reng thung a;

⁴⁸nimahsela, miten a thu sawi an ngaihthlâk nin theih loh avângin an duh angin engtin mah an ti thei lo.

BUNG 20

ISUA THUNEIHA AN DODÂL

¹Ni khat chu tempulah mite a zirtîr a, Chanchin Ƨha a hrilh laiin, puithiam lalte leh dân zirtîrtute chu upate nêna lo kalin amah chu an rawn hmachhawng a,

²a hnênah, “Min hrilh rawh, tû thûin nge hêng thil hi i tih? Hê thuneihna hi tû pêk che nge?” an rawn ti a.

³Ani erawh chuan an hnênah, “Kei pawhin thil pakhat ka zâwt ve ang che u a, mi hrilh rawh u:

⁴Johana baptisma kha vâna mi thû nge mihring thû?” a ti a.

⁵Anni chu an inngaihtuah a, “Vâna mi thû,’ kan tih chuan, ‘Engah nge a thû in âwih loh?’ min ti si ang a.

⁶‘Mihring thû,’ kan tih chuan mi zawng zawngin lungin min deng mai dâwn si a; Johana chu zâwlnêi a nih an ring si a,” an ti a.

⁷Tichuan anni chuan, “Tû thû nge a nih kan hre lo,’ tiin an chhâng a.

⁸Isuan an hnênah, “Kei pawhin hêng thilte hi tû thûa ti nge ka nih ka hrilh bîk lo vang che u,” a ti ta a.

GRÊP HUAN ENKAWLTU SUAL TEHKHIN THU

⁹Mipuite hnênah chuan hê tekhin thû hi a sawi a: “Tûin emaw grêp huan a siam a, huan enkawltute hnênah thawhhlawh tûrin a pê a, rei tak thang tûrin ram hla takah a zin ta a.

¹⁰A rah seng a lo hun chuan, a chan âi va lam tûrin huan enkawltute hnênah a chhiahhlawh pakhat a tîr a. Nimahsela, huan enkawltute chuan an lo vêl a, kut ruakin an kaltîr leh ta a.

¹¹Chhiahhlawh dang a tîr leh a; chû pawh chu an lo vêl leh a, zahthlâk takin an siam a, kut ruakin an kaltîr leh ta a.

¹²A pathumna a tîr leh a; chu pheih chu hliam khawpin an lo sawisâ a, an paih chhuak ta hial a.

¹³“Grêp huan neitupa chuan, ‘Engtin nge ka tih ang âw? Ka fapa duh tak hi ka tîr mai teh ang. Ani hi zawng an lo zah deuh mahnâ,’ a ti a.

¹⁴Mahse huan enkawltuten an lo hmuh chuan, ‘Hê mi hi ro luahtu tîr chu a nih hi. Hawh u, i that ang u; tichuan a ro khâwm tîr chu kan neihsak dâwn nia,’ an ti a.

¹⁵Tichuan, grêp huan aţang chuan an theh chhuak a, an tihlum ta a. Grêp huan neitupa chuan an chungah engti takin nge a rawn tih ang le?

¹⁶Grêp huan enkawltute tibora tûrin a rawn thawk ang a, huan chu mi dang hnênah a pê ang,” a ti a. Chû thû an hriat chuan a ngaithlatute chuan, “Chû êm chu thleng suh se!” an ti a.

¹⁷Anni lam chu a en a, “Hê thuziak hi eng nge ni le: ‘In satuten lung an hnâwl hnû, A kila lung Ƨangkai ber lo ni tâ hi,’ tih hi eng tihna nge?

¹⁸Tûpawh chû lung chunga tlu apiang chu an keh sawm ang a, a delh lek pheih chu a râwt dip vek ang,” a ti a.

¹⁹Puithiam lalte leh dân zirtîrtute chuan chutih lai lâ lâ man nghâl chu an tum a; mahse mipui lam an vêngthâwng lo thei si lo, chû tekhin thû chu anmahni dem paha sawi a ni tih an hai si lo

va.

PHARISAITE: KAISARA HNENAH CHHIAH CHAWI A THIANG EM?

²⁰Tichuan, governor thuneihna ngeia man a nih theih nân an enthla ta a, a thusawi sual ațanga amah an man theihna tûrin mi dik tak anga insiam enthlatute an intîr a.

²¹Anni chuan a hnênah, “Zirtîrtu, dik takin thû i sawiin i zirtîr a, tûmah thlei bîk lovin tihtak zetin Pathian kawng thû i zirtîr thîn tih kan hria e:

²²Kaisara hnêna chhiah châwi hi kan tân a thiang nge thiang lo?” tiin an zâwt a.

²³Ani erawh chuan an vertherzia chu a lo hria a, “Engah nge hetia mi fiah?

²⁴Duli tlang mi han entîr teh u. Hei, tû lem leh tû hming nge chuang hi?” a ti a. Anni chuan, “Kaisara,” an ti a.

²⁵Ani chuan an hnênah, “A nih a hnû, Kaisara thilte chu Kaisara hnênah pê ula, Pathian thilte chu Pathian hnênah pe ta che u,” a ti a.

²⁶Tichuan, mipui hmâa a thusawi sual man tûr an hmu thei ta lo va; a chhan lêt dân chu mak an ti êm êm a, an ngawi ta reng a.

SADUKAITE: THAWHLEHNA HI ENG TIHNA NGE?

²⁷Mitthi thawhlelehna a awm lo titu Saddukai thenkhat chu thû zâwt tûrin a hnênah an lo kal a,

²⁸“Zirtîrtu, nupui nei lai mi tûpawh fa nei lovin thi ta sela, a unaupain a nupui chu rochungin a unaupa tân chi a thlahsak tûr a ni tih, Mosian min ziahsak a ni.

²⁹Aw le, unau pasarih an awm a. A upa berin nupui a nei a, fa nei lovin a thi a.

³⁰A dawttu chuan nupuiah a nei ta a, mahse fa nei lovin a thihsan ve leh ta mai a.

³¹A pathumna chuan a nei vê leh a; chutiang zêlin pasarihthe chuan an nei theuh va, fa nei lovin an thi zêl a.

³²A tâwpah hmeichhia pawh chu a thi ve ta a.

³³Chutichuan, thawhlelehna hunah chuan a tû ber nupui chu nge ni ta ang? An pasarih chuan nupuiah an neih theuh si a,” tiin an zâwt a.

³⁴Isuan an hnênah, “Khawvêl mihringte hian nupui pasal an innei thîn.

³⁵Nimahsela, chû khawvêl lo la awm tûra tel ve tlâkah leh mitthi zîng ata thawhlelehna chang ve tlâka ruat apiangte chuan nupui pasal an innei tawh dâwn hlei nê;

³⁶Vântirhkohte tlukpui an nih tawh dâwn avângin an thi leh thei tawh lo va; tholeh fate an nih avângin Pathian fate an ni si a.

³⁷Mitthite kaihtawha an awm leh tûr thû chu Mosia pawhin hnim buk kâng chungchângah khân a lo entîr tawh reng asin, khatah khân Lalpa chuan ‘Abrahama Pathian, Isaaka Pathian, Jakoba Pathian,’ a ni tih a insawi a.

³⁸Chuvângin, ani chu mitthi Pathian a ni lo va, minung Pathian a ni zâwk e; mi zawng zawng hi ama tâna nung an ni vek si a,” a ti a.

³⁹Dân zirtîrtu thenkhat chuan, “Zirtîrtu, i sawi ța khawp mai,” an lo ti bawk a.

⁴⁰Chumi hnû chuan thu dang engmah an zâwt ngam tawh lo.

ISUA: DAVIDAN A CHITHLAHA MI ENGTIN NGE LALPA A TIH THEIH?

⁴¹Ani chuan an hnênah, “Engtizia nge Krista chu Davida fapa an tih thîn?

⁴²Fakna Hla Bûah Davida ngeiin: “LALPA chuan ka Lalpa hnênah, ‘Ka dîng lamah țu ang che,

⁴³I hmêlmâte i ke nghahchhana ka siam vek hmâ loh chuan,’ a ti a.

⁴⁴Tichuan, Davidan ani chu, ‘Lalpa’ a ti si a; engtin nge a fapa a nih theih?” tiin a zâwt a.

DAN ZIRTIRTUTE LAKA FIMKHUR TUR

⁴⁵Mi zawng zawng hriat phâk tûrin a zirtîrte hnênah chuan,

⁴⁶“Dân zirtîrtute lakah fimkhur rawh u; anni chuan kawr fual nêna lên kual vêl an thlahlel a; bazar lûn laia chibai inbûk te, biak ina țhutna langsâr ber te, ruaițhehnaa hmun ța ber te an thlahlel thîn a,

⁴⁷hmeithai sum an eisak a, tlâng bum nân rei tak tak an țawngțai thîn. Chûngho chuan thiam loh an chang nasa lehzuall ang,” a ti a.

BUNG 21

HMEITHAI DÂR TANGKA PAHNIH

¹A han hawi chhuak a, thawhlâwm bâwma mi hausaten thawhlâwm an thlâk lai a hmû a.

²hmeithai rethei deuh pakhatin dâr tangka tlang hnih a rawn thlâk lai a hmu bawk a.

³“Tihtak zetin ka hrilh a che u, hênggho zawng zawng ai hian hê hmeithai rethei tê hian a thlâk tam zâwk;

⁴hênggho zawng zawng hian an neih chuang liama mi Pathian tân an pê a; ani erawh chu a retheih tehlu nê, a neihchhun, a khawsak vê der derna tûr nê lam a pe vek a ni,” a ti a.

ISUAN TEMPUL TIHCHHIAT TUR A SAWI LÂWK

⁵Mi thenkhatin tempul cheina lung mâwizia leh thilpêk khâwm ațanga chei mâwi a nih dante an lo sawi laiin ani chuan,

⁶“Hêng lungrem in hmuhte rêng rêng hi tihchim lohva hnutchhiah pakhat mah a awm lo vang, chutiang ní chu a la thleng dâwn si a,” a ti a.

TUN LAI THIL AWMZIA LEH KHAWVEL TAWP HUN CHHINCHHIAHNA

⁷Anni chuan a hnênah, “Zirtîrtu, chûng chu engtika lo awm tûr nge? Chûng thil lo thlen dâwna chhinchhiahna chu engte nge?” tiin an zâwt a.

⁸Ani chuan, “Buma in awm loh nân fimkhur rawh u. Mi tam tak chu keima hming chhâlin, ‘Krista chu ka ni,’ emaw, ‘A hun a thleng dâwn ta,’ tiin emaw an lo kal ang. Chutiang mite chu in zui tûr a ni lo.

⁹Amaherawhchu, indo thù leh buaina thù in hriat hunah pawh chi-âi suh u; chûng thil chu lo thleng hmasa tûr rêng a ni si a, tâwpna erawh chu a thleng ngâh thut lo vang.

¹⁰“Hnam hrang hrang an indo vang a, sorkar hrang hrang an indo baw ang.

¹¹Hmun hrang hrangah lîrpui a ngîng ang a, tàmte a tla ang a, hrichhe pui pui a lêng baw ang; vân aţangin chhinchhiahna râpthlak leh hlauhawm tak tak a lo lang dâwn a ni.

¹²Chûng thil zawng zawng thlen hmâ chuan, an man ang che u a, an tiduhdah ang che u; biak inah leh tân inah te an tântîr ang che u. Keima hming avângin lalte leh hotute hmâah thiam loh chang tûrin an la hnûk lût ang che u.

¹³Nimahsela, chûngte chu ka thù min hriatpuina remchâng a ni hlauh dâwn a ni.

¹⁴Chuvângin, in chhân lêt dân tûr ngaihtuah lâwk lo tûrin in rilru inpeih sa ang che u;

¹⁵in hmêlmâ zawng zawngten chhân lêt ngaihna an hriat loh tûr kâ leh finna ka pe dâwn si che u a.

¹⁶In nu leh pate, in unaute, in laichînte, in thiantie pawhin an mantîr ang che u a; thenkhat chu an tihhlumtîr hial ang che u.

¹⁷Keima hming avângin mi zawng zawng huat in hlawh ang.

¹⁸Amaherawhchu, in samzâi khat pawh a rîral lo vang.

¹⁹Chhel takin in nun chu humhim rawh u.

JERUSALEM TLÛK CHHIATNA

²⁰“Sipai rualin Jerusalem an hual in hmuh hunah tihram dêra a awm hun a hnai ta tih hria ang che u.

²¹Chutih hunah chuan Judai rama awmte chu tlângah te tlan bo rawh se; a chhûnga awmte chuan chhuahsan sela; kulh pâwna awmte chu a chhûngah lût suh se.

²²Chûng nîte chu phuba lâkna ni a ni e, chumi chungchâng a ziaak zawng zawng a lo thlen theihna tûrin.

²³Chûng nî-ah te chuan râite leh nauno pawmte chung chu a va pik dâwn êm! Hê ramah hian hrehawm nasa tak a thleng dâwn a, hê hnam chungah hian thinurna a thleng dâwn si a.

²⁴Khandaih hriama sâm an ni ang a, hnam tin hnênah sala hruaiin an awm ang. Jerusalem chu Jentailte hunbî a kim hmâ loh chuan Jentailho rahbehin a awm dâwn a ni.

MIHRING FAPA LOKALLEHNA

²⁵“Nîah te, thlâah te, arsiâh te chhinchhiahna mak tak tak a lo awm ang; tuifinriat rûm rî leh tuifâwn namên lo chuan leiah pawh awm ngaihna hre lo khawpin hnam tin hrehawmna leh manganna a thlen ang;

²⁶vân thiltihtheihna a ngîng dur dur ang a, lei chung a lo thleng mai tûr thilte hlâuvîn patling meuh pawh hlâuva thlabârin an thidang hial ang.

²⁷Chutih hunah chuan Mihring Fapa hi thiltihtheihna leh ropuina nasa tak nên chhûm zînga lo kal an hmu ang.

²⁸Chûng thil lo thlen tan hunah chuan dâk chhuak ula, chung lam en rawh u, in tlanna tûr chu a hnai ta si a,” a ti a.

THEIPUI KUNG TEHKHIN THU

²⁹Chumi hnû chuan an hnênah tehkhin thù a sawi a: “Theipui kûng leh, thing zawng zawng te hi en rawh u.

³⁰A hnah chawr no in hmuh chuan, nipui a lo thaw dâwn tih in hre thîn.

³¹Chutiang bawkin, nangni pawhin chûng thil lo thleng in hmuh hun chuan Pathian lalram a lo hnai ta tih hria ang che u.

³²Tihtak zetin ka hrilh a che u, thil zawng zawng a thlen kim hmâ loh chuan tûnlai thangtharte hi an ral lo vang.

³³Lei leh vân a boral ang a, ka thù erawh chu eng vâng mahin a boral lo vang.

INRALRIN TULNA

³⁴“Nangmahni lam kha fimkhur rawh u, chuti lo zawng nawmsip bawlin, zu leh sâ leh dam chhûng khawsak thlâkhlehnaten in rilrû a lo luah khat lutuk ang a, chu mi Nî chuan in inrin loh laiin a rawn thâwn thut mai tûr che u asin.

³⁵Lei pum puia mi chêng zawng zawng chungah thang âwk angin a lo thleng thut dâwn si a.

³⁶Chuvângin, chûng thil lo thleng tûr zawng zawng chu pumpelh tlâkah leh, Mihring Fapa hmâa ding tlâka ruat in nih theih nân, eng lai pawhin tawngtai chungin ngaihven rawh u,” a ti a.

³⁷Chhûn lamah chuan tempulah a zirtîr thîn a, zânah chuan a kal chhuak a, Olivet tlang an tihah chuan a riak thîn a.

³⁸A thusawi ngaithla tûrin mipui zawng zawng chu zîng takah tempulah an lo kal khâwm thîn.

BUNG 22

ISUA THAH TUMA PHIARNA

¹Chhang dâwidim telh loh kû, Kalhlên Kût an tih chu a hnai ta a.

²Puithiam lalte, dân zirtirtute chuan amah tihhlum dân tûr an dap a, vantlâng an hlâu baw si a.

³Tin, mi sâwm leh pahnihte zînga mi, Juda Iskariota an tiha kawchhûngah chuan Setana a lût a.

⁴Tichuan ani chu a va kal a, puithiam lalte leh vêngtu sipai hotute hnênah amah an man theih dân tûr a va sawipui a.

⁵Anni chu an lo lâwm hlê a, tangkâ pawh pêk an remti a.

⁶Ani chuan mipui hriat loh hlâna mantîrna remchâng hmuhsak ngei a intiam baw a.

ISUA LEH A ZIRTIRTEN KALHLÊN KÛT CHAW AN BUATSIAH

⁷Chhang dâwidim telh loh nî, Kalhlên Kûtna berâm no an talh thîn nî chu a lo thleng ta a.

⁸Isuan Petera leh Johana chu, “Kalhlên Kût chaw kan kîlho tûr min va buatsaih sak rawh u,” tiin a tîr a.

⁹Anni chuan a hnênah, “Khawiah nge va buatsaih ila i duh?” an ti a.

¹⁰Ani chuan an hnênah, “Ngai teh u, khawpuia in luhin, bêla tui pû mipain a lo tâwk ang che u a; a luhna inah chuan zui lût ang che u.

¹¹Chû in neitupa hnênah chuan, ‘Zirtîrtuin ka zirtîrteho nê Kalhlên Kût chaw kan kîlna tûr mikhual pindan chu khawiah nge? a ti a che,’ ti ang che u.”

¹²Ani chuan pindan chungnung zau tak, peih sa diam a entîr ang che u a; chutah chuan buatsaih rawh u,” a ti a.

¹³Tichuan, an kal ta a, a sawi lâwk ang takin an va hmu a; Kalhlên Kût chaw chu an buatsaih ta a.

ISUAN LALPA ZANRIAH BUL A ȚAN

¹⁴A hun a lo thlen chuan chaw a kîl a, tirhko sâwm leh pahnihten an kîlpui baw a.

¹⁵An hnênah, “Ka thil tuar hmâin hê Kalhlên Kût chawhlui kîlpui che u hi ka duhin ka nghâkhlê tak meuh va,

¹⁶Pathian lalramah a taka hlen chhuah a nih hmâ chuan ka ei leh tawh lo vang, tih ka hrilh a che u,” a ti a.

¹⁷Tichuan, no a lâ a, lâwmthû a sawi zawhin, “Hei hi la ula, insem Țeuh rawh u;

¹⁸ka hrilh che u ang khân tûn a chinah Pathian lalram a lo thlen hmâ loh zawng grêp rah tui hi ka in leh tawh lo vang,” a ti a.

¹⁹Tichuan, chhang a lâ a, lâwmthû a sawi zawhin a phel a, an hnênah a pê a, “Hei hi ka taksa, in aia hlan tûra chu a ni; min hriatreng nân hei hi ti thîn* rawh u,” a ti a.

²⁰Chutiang bawkin zanriah ei khamah no chu a la a, “Hê no hi ka thisena thuthlung thar chu a ni, in aia chhuak tûr chu.

²¹Nimahsela, en teh u, mi phatsantu tûr chuan dawhkân mi kîlpui mêk a ni.

²²Mihring Fapa hi an ruat angin a kal dawn ta; mahse, a mantîrtu tûr mihring chung erawh chu a va pik êm!” a ti a.

²³Chutiang thil ti duh tûr chu tu nge ni ang le, tiin anmahniho chu an in zâwt kual a.

ZIRTIRTEN ROPUI NIH AN INCHUH

²⁴An zîngah tu nge ropui ber ang, tih thûah inhniálna a lo chhuak a.

²⁵Ani chuan an hnênah, “Jentail lalte chu an hnuia mite lakah an inti lal hle thîn a; an chung thuneitute chu ‘duhsaktu’ an ti thîn a.

²⁶Nangni zîngah erawh chuan chutiang tûr a ni lo vang; in zînga ropui ber chuan nau zâwk chan chang sela, a lal zâwk chu rawngbâwltu angin awm zâwk rawh se.

²⁷Tu nge ropui zâwk: chaw kîltu nge ei rawngbâwltu? Chaw kîltu a ni lo vem ni? Kei erawh chu in zîngah ei rawngbâwltu anga ka awm hi.

²⁸“Nangni hi fiahna ka tawh chhûng zawnga min awmpui tlattu in ni si a.

²⁹Ka Pain ka hnêna min hlan tawh ang chiahin in hnênah lalram chu ka hlân tawh che u asin;

³⁰tichuan, ka lalram chhûnga ka dawhkâna in eia in bâr theihna tûr leh, Israel hnam sâwm leh hnam hnihte rorêlsaka, lalhuthlênga in la Țhut vê theih nân,” a ti a.

ISUAN PETERA PHAT TUR A SAWI LAWK

³¹Lalpa chuan, “Simon, Simon! Setanan buh thlei anga a thlei theihna tûr chein nangmah hi a dîl asin.

³²Mahse i rinna a bo loh nân ka ȚawngȚaisak che a; i lo hawi lêt leh hunah i unaute tinghet ang che,” a ti a.

³³Mahse, ani chuan a hnênah, “Lalpa, i kalnaa kal ve tûr hian lung in tân pawh, thih pawh ka huam asin,” a ti a.

³⁴Ani chuan, “Peter, ka hrilh a che, mi hria tih vawi thum i phat hmâ chu wawiinah hian âr a khuang lo vang,” a ti a.

ZIN KAWNGA MAMAWH

³⁵An hnênah, “Tangka ip te, iptê leh pheikhawk tel lova ka tîrh chhuah che u khân tlâkchham in nei em?” a ti a. Anni chuan, “Nei lo,” an ti a.

³⁶Ani chuan an hnênah, “Tûnah erawh chuan, tangka ip nei te, ipte nei te chuan keng rawh se; khandaih nei lo chuan a thuamhnaw hralh sela, lei rawh se.

³⁷Ka hrilh a che u, hê thuziak: ‘Ani chu misual zîngah an chhiar tel ta,’ tih hi keima chung thleng kim tûr a ni. Keima chungchânga hrilhlâwknae chu keimaha tâwp tûr a ni e,” a ti a.

³⁸Anni chuan, “Lalpa, hei, khandaih pahni chu a awm e,” an ti a. Ani chuan an hnênah, “A tâwk e,” a ti a.

HUANA ȚAWNGȚAI

³⁹Tichuan, a kal chhuak a, a tih dân pangngaiin Oliv tlângah chuan a kal a, a zirtîrte pawhin an zui a.

⁴⁰A hmun a va thlen chuan an hnênah, “Thlêmnaa in luh loh nân ȚawngȚai rawh u,” a ti a.

⁴¹Ani chu lunga den phâk chin vêlah chuan a va kal hrang a, a ȚingȚhî a, a ȚawngȚai a,

⁴²“Ka Pa, rem i tih chuan hê no hi ka hnên ata la sawn rawh; nimahsela, keima thû ni lovin nangma thû ni zâwk rawh se,” a ti a.

⁴³Vân aȚangin Vântirhko pakhat amah tichak tûrin a hnênah arawn inlâr a.

⁴⁴A thlaphâng êm êm a, Țahnemngai lehzualin a ȚawngȚai a. A thlan chu thi far lian tak angin leiah a far a.

⁴⁵A ȚawngȚai zo chu a tho va, a zirtîrte hnênah chuan a lo kal a, lungngaia an lo muhîl chu arawn hmu a.

⁴⁶An hnênah, “Engah nge in muthilh? Tho ula, ȚawngȚai rawh u, thlêmnaah in lût mai tûr asin,” a ti a.

GETHSEMANIA PHATSANNA LEH MANTIRNA

⁴⁷A la sawi lai mêkin ngai teh, mipui an lo thleng nghal a; sâwm leh pahni zînga tel Juda an tih chuan hmâ arawn hruai a, fawh tumin Isua chu arawn pan a.

⁴⁸Isua chuan a hnênah, “Juda, Mihring Fapa hi fâwpin mâw i mantîr dawn?” a ti a.

⁴⁹A bul vêla mite chuan thil lo thleng tûr chu an hmuin, “Lalpa, khandaih kan lek tawh mai dâwn em ni?” an ti a.

⁵⁰An zînga mi pakhat chuan puithiam lalber chhiahhlawh chu a sat a, a beng ding lam a sah thlâksak a.

⁵¹Mahse Isuan, “Hei hi min phalsak teh u,” a ti a. A beng chu a dek a, a tidam ta a.

⁵²Isuan puithiam lalte, tempul hotute leh chû hmuna lo kal upate hnênah chuan, “Suamhmang man tûr ang maiin khandaih, talhtumte nê in lo thawk a ni maw?”

⁵³Tempulah ni tin in hnêna ka awm laite khân mi man tumin mi bei si lo va; nimahsela, tûn hi thim thiltihtheihna leh nangni tân chêt hun a ni rêng e,” a ti a.

PETERAN ISUA A PHAT, LUNGCHHE TAKIN A TAP

⁵⁴Tichuan an man ta a, an kalpui a, puithiam lalber inah chuan an hruai lût ta a. Petera chuan râlkhat aţangin a zui ve a.

⁵⁵Inhung chhûng kawt zâwlah chuan mei an chhêm a, an ţu khâwm a, Petera chu an zîngah a va ţu vê a.

⁵⁶Chutia mei bula a ţu lai chu chhiahhlawh nula pakhatin a lo hmu a, a melh reng a, “Hê mi pawh hi a hnêna awm ţhîn kha a nih hi,” a ti a.

⁵⁷Mahse ani chuan, “Hmeichhia, chû mî chu ka hre lo ve,” tiin a phâ a.

⁵⁸Nakin deuhvah chuan mi dangin a rawn hmu leh a, “Nang pawh an zînga mi i nih hi,” a ti a. Petera erawh chuan, “Mihring, ka ni lo ve!” a ti a.

⁵⁹Dârkar khat hnûah chuan mi dangin a nihna hre chianh takin, “Hê pa hi a hnêna awm ve ţhîn kha a ni ngei mai; Galili mi a ni alâwm,” a ti a.

⁶⁰Petera erawh chuan, “Mihring, i thusawi chu ka hre lo ve!” a ti a. A la sawi lai mekin âr a khuang ta nghâl a.

⁶¹Lalpa chu a lo hawî pheî a, Petera chu a rawn en a. Chû vêleh Petera chuan a hnêna Lalpan, “Âr a khuan hmâin nang hian wawî thum mi phat ang,” tia a sawi kha a hre chhuak leh a.

⁶²Tichuan, Petera chu a chhuak a, lungchhe takin a va tap zawih zawih a.

ISUA AN NUIHZAT, AN VUA

⁶³Isua chu a mantute chuan nuihza siam nân an hmang a, an vua a.

⁶⁴A mit an tuam a, a hmaiah an bêng a, “Sawi rawh! Tu nge bêng che?” an ti a.

⁶⁵Pathian sawi chhiatna ţawngkam chhe tinrêngin an âu nawmna ta a.

ISUAN SANHEDRIN-HO A HMACHHAWN

⁶⁶Khua a vâr vêleh vântlâng upate, puithiam lalte leh dân zirtirtute chu an inpun khâwm a, an rorêlnaah chuan an hruai a,

⁶⁷“Krista i nih tak zet chuan min hrilh rawh,” an ti a. Ani chuan an hnênah, “Hrilh che u mah îla, in âwîh lo vang.

⁶⁸Zâwt che u mah îla, min chhâng lo vang a, min chhuahtîr hek lo vang.

⁶⁹Tûn achinah Mihring Fapa hi Pathian thiltihtheihna kut ding lamah a ţu tawh ang,” a ti a.

⁷⁰Tichuan, an vai chuan, “Nang hi Pathian Fapa chu i ni a mâw?” an ti a. Ani chuan an hnênah, “Ni e, in sawi dik e,” a ti a.

⁷¹Anni chuan, “Hriatpuitu dang tu nge kan ngaih tawh ang? Keimahni ngeiin ama kamchhuak kan hriat tâk hi,” an ti a.

BUNG 23

PONTIA PILATA HNENAH ISUA AN HLAN

¹Mipuite chu an tho vek a, Isua chu Pilata hnênah chuan an hruai a.

²An hêk ţan ta a: “Hê mi hian kan hnam a tikhawlo va, Kaisara hnênah chhiah châwi a khap a, Krista, Lal a ni tih ama sawi ngei kan hria e,” tiin an hêk a.

³Pilata chuan a hnênah, “Judate lal i ni em?” tiin a zâwt a. Ani chuan a hnênah, “Ni e, i sawi ang tak chu ka ni e,” tiin a chhâng a.

⁴Pilata chuan puithiam lalte leh mipuite hnênah, “Hê mî hian tihsual a neih ka hmu lo ve,” a ti a.

⁵Mahse, anniho chu an kawlh zual sauh va, “Galili ram aţangin Judai ram khaw tinah leh hê hmun thleng hian a zirtîrna avângin mipuite a chawh tho ţhîn a ni,” an ti a.

ISUAN HERODA A HMACHHAWN

⁶Pilatan Galili chungchâng an sawi chu a hriatin Isua chu Galili rama mi a nih leh nih loh a zâwt a.

⁷Tichuan, Heroda biala mi a ni tih a hriat vêleh, Heroda hnênah a tîr nghâl a, chutih lai tak chu Jerusalema Heroda awm lai a lo ni kher a.

⁸Herodan Isua a lo hmuh chuan a lâwm hlê a; hun rei tak hmuh a lo duh tawh ţhîn a, a chanchin mi sawi tam tak a lo hria a, a hnên aţanga thilmak engemaw tal hmuh pawh a beisei a ni.

⁹Thu tam tak a zâwt a; mahse ani chuan engmahin a chhâng lo.

¹⁰Puithiam lalte leh dân zirtirtute chu an ding ţhup a, nasa takin an hêk a.

¹¹Heroda leh a sipaite chuan Isua chu hmusit takin nuihza siam nân an hmang a, kawrfual ropui tak hâktîrin, Pilata hnênah a thawn kîr leh ta a.

¹²Chumi nî aţang chuan Heroda leh Pilata chu an inngeih leh ta a; chu mî hmâ zawng chuan an intai reng ţhîn a ni.

BARABBA AIAWH TURIN

¹³Pilata chuan puithiam lalte, hotute leh mî zawng zawng a ko khâwm a,

¹⁴an hnênah, “Hê mî hian mite a hruai sual ţhîn tih thúah ka hnênah in rawn hruai kha a ni a. In hmâ ngeiah in hêkna thú nêng ngun taka ka endik hnûin, hê mî hi a sualna engmah ka hmu lo ve;

¹⁵Heroda pawhin a hmu hek lo, chuvângin a hnênah ka tîrh che u kha; hê mî hian thihna tling khawp thil engmah a ti lo ve.

¹⁶Chuvângin, ka hrem hlek ang a, ka chhuah mai dâwn a ni,” a ti a.

¹⁷(Kûtnaah hian an hnenah mi pakhat a chhuah sak ngei tûr a ni a).

¹⁸Thâwk leh khatah an âu rual a, “Hê mi hi tiboral la, Barabba zâwk kha min chhuahsak rawh,” tiin.

¹⁹Ani chu khawpui chhûnga helna tichhuaktûa an puh bâkah, tualthah thûa tân ina khung a ni.

²⁰Pilata chuan Isua chhuah a duh a, an hnênah thu a sawi leh a.

²¹Nimahsela anni chuan, “Kraws-ah khêng bet rawh, kraws-ah khêng bet rawh!” tiin an au tuarh tuarh a.

²²A wawi thum nân an hnênah, “Engah maw? Hê mi hian eng thil sual nge a tih? Thihna khawp thil paw eng mah a khawih lo. Ka hrem ang a, ka chhuah mai dâwn a ni,” a ti leh a.

²³Nimahsela, anni chu ring taka âuvîn, krâws-a khêng bet tûrin an nawr lui tlat a. Chûng mite leh puithiam lalte âu âw chuan a vau dai ta a.

²⁴Tichuan, an phûit angin Pilata chuan thi tûrin thû a titlu ta a.

²⁵Helna leh tualthah thû avânga tân ina tâng zâwk chu an dîl angin a chhuahsak a; Isua erawh chu an duh duha an tih tûrin an kutah a pe ta a.

LAL CHU KRAWS CHUNGAH

²⁶Chutia an kalpui lai chuan Kurini khaw mi Simona, thingtlâng lam aţanga chu lai hmuna lo kal chu an lo man a, Isua hnung lama putpui tûrin krâws chu a chungah an ngat a.

²⁷Ani chu mipui tam takin an zui dûl dûl a, an zîngah chuan amah sîn a, lungchhe taka ţahtu hmeichhiate an awm bawk a.

²⁸Mahse Isua chuan anni lam chu hawiin, “Jerusalem fanute u, kei chu mi ţah suh u, nangmahni leh in fate tân ţap zâwk rawh u.

²⁹A hun chu a lo la thleng ngei dâwn si a, chutih hunah chuan, ‘Hmeichhe chingte, nau pâi ngai lohna pumte, nau hnêk ngai loh hnute chu a nihlawh e!’ an la ti ang.

³⁰Chutih hunah chuan miten tlângte hnênah, ‘Mîn delh rawh,’ an la ti ang a; mualte hnênah, ‘Mîn khuh rawh,’ an la ti ang.

³¹Thing hringah mah hetiana an tih chuan, a rova phe chuan engtin tak ti ang maw?” a ti a.

³²Chutah chuan tihlum tûr misual dang pahni an hruai tel ve bawk a.

³³Kalvari an tih hmun an va thlen chuan krâws-ah an khêngbet ta a, mi sualte pawh chu a dîng lamah pakhat, a vei lamah pakhat an khêngbet a.

³⁴Isuan, “Ka Pa, anni hi ngaidam rawh; an thiltih hi an hre lo a ni,” a ti a. A silhfênte chu thum vâwrin an insem a.

³⁵Mipuite chuan dîng chungin an thlîr a. An zînga hotute chuan diriam takin, “Mi dang mah a chhandam thîn alâwm; Pathian mi thlan Krista a nih tak zet chuan amah pawh in chhandam ang hmiang,” an ti a.

³⁶Sipaiote pawhin amah chu nuihza siam nân an hmang a, zu thûr an pê a,

³⁷“Judate Lal i nih tak zet chuan in chhandam ta che,” an ti a.

³⁸A lu chungah chuan, “HE MI HI JUDATE LAL A NI,” tiin Grik ţawng te, Latin ţawng te leh Hebrai ţawnga ziah te an târ a.

³⁹Mi sual an khai kân pakhat zâwk chuan Isua hnênah, “Krista chu i nih tak zet chuan in tidam la, keini pawh min tidam ta che,” tiin a ânkhum a.

⁴⁰A pakhat zâwk erawh chuan a lo zilh a, “Pathian meuh pawh i hlau na nge, thuhmun renga an hrem che hi?

⁴¹Keini zawng hrem âwm rêng kan ni; kan thiltih man hmû chauh kan nih hi; hê mi hi zawngin engmah a tisual lo,” a ti a.

⁴²Isua hnênah chuan, “Lalpa, i lalrama i lo kal hunah min hre reng ang che,” a ti a.

⁴³Isuan a hnênah, “Tihtak zetin ka hrlh a che, vawiinah hian ka hnênah Paradis-ah i awm ve ang,” a ti a.

ISUA KRAWS-AH A THI

⁴⁴Dârkâr rukna* vêl aţanga dârkâr kuana* thlengin khawvêl pum chu a lo thim ta mup mai a,

⁴⁵Ni chu tihthim a ni a, tempul chhûnga puanzâr chu a laiah a phel phawk a.

⁴⁶Isua chu aw ring takin a âu va, “Ka Pa, i kutah ka thlarau ka kawltîr e,” a ti a: a thlarau a thlah ta a.

⁴⁷Sipai za hotu chuan thil awm dân chu a hmuhin, “Hê mi hi mi takzet a lo ni ngei mai!” tiin Pathian a fak ta a.

⁴⁸Chûng thil thlîr tûra mipui rawn pung khâwmho zawng zawng chuan thil awm dân chu an hmu a; an âwmte chûm chungin an hâw darh ta a.

⁴⁹A hmêlhriat zawng zawng te erawh chu, Galili aţanga rawn zuitu hmeichhiate nê chuan râlkhatah dîngin chûng thilte chu an thlîr a.

ISUA, JOSEPHA THLANA PHÛM

⁵⁰Ngai teh, mi pakhat, a hming Josefa, rorêltute zînga mi, mi ţa leh mi dik tak a awm a .

⁵¹Ani chuan an rorêl dân leh an thutlûkna pawh kha a pawmpui ve lo va. Juda khawpui pakhat Arimathai-a mi a ni a, ani chu Pathian lalram beiseitu a ni vê a.

⁵²Chû mi chu Pilata hnênah a va kal a, Isua ruang chu a va dîl a.

⁵³Tichuan, a la thlâ a, puan zai sînin a tuam a, lung kerkuak thlân, tûmah an la zalh ngai lohnaah chuan a zalh ta a.

⁵⁴Chu mi ni chu Inbuatsaihna ni a ni a, Sabbath ni chu a thleng têt pawh a.

⁵⁵Galili ram aţanga amah zuitu hmeichhiate khân an zui zêl a, thlân awm dân leh a ruang chu engtin nge an zalh tih an thlir vê reng a.

⁵⁶Tichuan, an hâw leh a, englo rimtuite leh hriak rimtuite an buatsaih a. Sabbath ni chuan thupêk angin an châwl a.

BUNG 24

A THO LEH TA

¹Chawlhkâr ni hmasa ber, vârtianah chuan anniho chu mi dang tute emaw nêh, englo rimtui an buatsaih sâte chu kengin thlânah chuan an va kal a.

²Thlân ata lung chu lum sawn sâin an va hmû a;

³An va lût a, Lal Isua ruang chu an hmu ta lo va.

⁴A ngaihna hre lova an mangan êm êm laiin ngai teh, silhfên êng tle tak hâ mipa pahnih an kiangah an lo ding a.

⁵Anni chu an hlauh avânga lei lam biha an kûn tlat laiin, chû mite chuan an hnênah, “Engati nge mitthi zînga minung in zawn?”

⁶Hetah a awm tawh lo, a tho leh tawh e! Galili rama a awm laia in hnêna a thu sawi kha hre reng rawh u,

⁷Mihring Fapa hi mi sualte kutah mantîrin a awm tûr a ni a; krâws-ah an khêngbet ang a, ni thum nîah a tho leh ang, tîa a sawi kha,” an ti a.

⁸A thu sawite chu an lo hre chhuak leh ta a.

⁹Thlân aţang chuan an hâw vang vang a, sâwm leh pakhatte leh mi dang zawnzawng hnênah chûng thilte chu an va hrilh vek a.

¹⁰Chung thu tirkohnte hnena va hrilhtute chu Mari Magdalini te, Joani te, Jakoba nu Mari te leh an hnêna hmeichhe dang awm vête an ni a.

¹¹Nimahsela, an thusawite chu thil ho mai maiah an ngai a, an âwihsak lo va.

¹²Petera erawh chu a tho va, thlân lamah chuan a tlan a; kûna a va bih chuan puan zai sîn te chauh chu a hmû a; tichuan thil awm dân chu mak ti êm êm chungin a hâwsan leh ta a.

EMMAU KAWNG

¹³Ngai teh, khami nî tak khân an zînga mi pahnih chu Emmau khua an tihah chuan an kal dâwn a, chû khua chu Jerusalem aţangin mêl* sarih a ni.

¹⁴Anni chuan chûng thil lo thlen dân zawnzawng chu an sawi dîn zêl a.

¹⁵Chutia an tîti a, an inhniat lai chuan, Isua ngei chuan a rawn pan hnai a, an bulah a kal vê ta a.

¹⁶Nimahsela, a hmêl an hriat theih loh nân an mit chu tihvaihin a awm a.

¹⁷Ani chuan an hnênah, “Kal paha lungngai taka in sawi dun kha eng thû nge ni?” a ti a.

¹⁸A pakhat zâwk, a hming Kleopa chuan a chhâng a, a hnênah, “Jerusalem khuah nangmah chauhvîn em ni i awm -tûnlaia thil thleng chanchin pawh i hriat loh?” a ti a.

¹⁹Ani chuan, “Eng thil maw?” a ti a. Anni chuan, ‘Nazaret Isua, Pathian leh mi zawnzawng mithmuha thû-ah leh thiltiha zâwlnei ropui tak chungchâng hi;

²⁰khatia puithiam lalte leh kan hotuten tihhlum tûra an hrui a, krâws-a an khenbeh tâk chanchin kha.

²¹Keinin Israelte tlantû tûr a nih kan lo beisei tehlu nêh. Chû mai a ni lo, chûng thil lo thlen aţanga waviin hi a ni thum nî a ni

tawh.

²²Chûng lo pawh, kan pâwlte zînga hmeichhe thenkhat, zîng taka thlâna va kalten min rawn tichî-âi hlê lehngah a.

²³A ruang hmu si lovin Vântirhko inlâr an hmuh thû leh, chû mite chuan a nung leh tih an lo hrilh thû an rawn sawi a.

²⁴Kan zînga mi thenkhat chu thlânah an va kal a, hmeichhiate sawi ang khân an va hmû vê a; mahse amah ber chu an hmu bawh si lo va,” tiin an hrilh a.

²⁵Ani chuan an hnênah, “Mî âte u! zâwlneite thusawi zozâi kha in thilung hian a va âwih mawh tak êm!”

²⁶Krista chuan chûng thil chu tuarin a ropuinaah a lût tûr a ni rêng lo vem ni?” a ti a.

²⁷Tichuan, Mosia aţanga ţanin, zâwlnei zawnzawngten Pathian Lehkhabu puma ama chanchin an ziah apiang chu anmahni a hrilhfiah ta vek a.

ZIRTIRTE MIT TIHVÂR

²⁸Tichuan, an kalna tûr khua chu an thleng dâwn ta a; ani chu hla deuhva kal tum angin a awm a.

²⁹Kâin an chelh a, “Kan hnênah awm ta che; khua a tlai tawh a, ni pawh a tlâk dâwn tawh hi,” an ti a. Tichuan an hnêna awm tûrin a lût vê ta a.

³⁰Heti hi a ni a, chaw ei tûrin an kiangah chuan a thû a, chhang a lâ a, mal a sâwm a, a phel a, an hnênah a pê a.

³¹Tichuan, an mit a lo vâ a, tu nge a nih an lo hre ta a; mahse ani chu a ral ta mai a.

³²Anni chuan, “Kalkawnga min biak laia Pathian Lehkha Thû min hrilh fiah lai khân kan thilung a harh huai a ni lo’ m ni kha?” an inti a.

³³Tichuan, chumi lai lâ lâ chuan an tho va, Jerusalem an kîr leh nghâl a, sâwm leh pakhatte leh an thian lo awm khâwm chu an va hmû a,

³⁴“Lalpa chu a tho leh tak zet a ni, Simona hnênah pawh a inlâr ta!” an lo ti a.

³⁵Anni pawh chuan kalkawnga thil thleng leh, chhang a han phel a, a hmêl an lo hriat chhuah dân te chu an hrilh vê a.

A ZIRTIRTE HNENAH ISUA A INLÂR

³⁶Chûng thûte chu an sawi mêk laiin amah Isua ngei chu an zîngah a lo ding a, an hnênah, “In chungah thlamuanna awm rawh se,” a ti a.

³⁷Anni erawh chuan an râp a, an hlâu êm êm a, thlarau hmû-ah an innngai a.

³⁸Ani chuan an hnênah, “Engati nge in mangan? Engah nge in rilrûah rinhlelhna a lo awm?”

³⁹Ka kutte, ka kephahte hi en rawh u, keimah ngei kha ka ni alâwm. Mî en Chiang ula, mi han dek teh u, thlarau chuan ruh leh taksa pawh a nei lo va, kei erawh chuan in hmuh angin ka neih hi,” a ti a.

⁴⁰Chû thû a sawi zawn chuan a kut leh a kephah te chu an hnênah chuan a entîr a.

⁴¹An lâwm luat avânga an la âwih loh cheuva, mak an tih chhûngin an hnênah, “Hetah eng emaw ei tûr in nei em?” a ti a.

⁴²Tichuan, sangha hem hmin hrang khat leh khawithlâr an pê a.

⁴³Chû chu a lâ a, an hmuh laiin a ei ta a.

PATHIAN LEHKHA KEU HAWNNA

⁴⁴An hnênah, “Hêng hi in hnêna ka awm laia ka hrilh thîn che u kha a ni, Mosia Dânahte, Zâwlnei Lehkhabûahte, Fakna Hla Bûahte Keima chanchin ziahna zawng zawng chu a taka thleng famkim vek tûr a ni e,” a ti a.

⁴⁵Pathian Lehkha Thû hre thiam thei tûrin an thînlung chu a hawnsak a.

⁴⁶An hnênah, “Hetî hian ziah a ni: Krista chuan a tuar tûr a ni a, ni thum niin mitthi zînga ta a tho leh baw k tûr a ni;

⁴⁷simna leh sual ngaihdamna thû chu hnam tin hnênah ama hminga hril tûr a ni a, chû chu Jerusalemah tan tûr a ni,” tiin.

⁴⁸Nangni chu hêng thil zawng zawng min hriatpuitu in nih hi.

⁴⁹Ngai teh u, Ka Pa Thutiam chu in chungah ka rawn thlentîr dâwn e; amaherawhchu, chung lam aţanga thiltihtheihnaa thuam in nih hmâ chuan Jerusalem khawpuiah hian châm reng ang che u,” a ti a.

ISUA VÂN LÂWN

⁵⁰Anniho chu Bethani dai kiang thlengin a hruai chhuak a; a bân a phar a, mal a sâwm a.

⁵¹Chutia mal a sâwm lai chuan anni chu a kalsan a, vân lamah hruai chhohvin a awm ta a.

⁵²Anni chuan amah chu chibai an bûk a, lâwm êm êmin Jerusalemah an kîr leh ta a,

⁵³tempulah chuan Pathian hnênah fakna leh malsâwmna hlânin an awm thîn a. Amen.

JOHANA

Ziah tu: Johana • Ziah kum: A.D. 85-90

He Chanchin Tha bu ziaktu hi Zebedaia fapa Johana a ni a, a unaupa Jakoba leh Petera te nên bul hnai taka Isua hnung zuia, a thurûk chena hriatpuitu zînga mi a ni. Johana kha Krâws bul thlenga Isua zuitu leh Isua nu Mari enkawl zuitu a ni. He lehkhahu bâkah hian ama hming pû lehkhathawn pathum leh Thupuan bute hi Johana kutchhuak vek a nih bawk avângin Bible ziaktu pawimawh berte zînga mi (a vaia bu 5 ziaktu) a ni a, a thu zia leh a thuchachte hi a evangelist hlih hlih mai a ni. He Chanchin Tha bu hi kum upa tak a nih hnûah Ephesi khua aţanga a ziah a ni tih hi Kohhran Pate aţanga an lo pawm tlân a ni. He Chanchin Tha bu a ziahna chhan chu: Isua hi Pathian Fapa dik tak, a ring apiangte tâna chatuana nunna an chan theihna kawng awmchhun a nihzia târlan a ni (20:31). Chuvangin Isua chu Pathian Fapa, Pathian rawn tîrh, Pathian thu chauh hriatpuitu a nihzia a uar hlê a. Chuvângin Johana hian ringtu nun kaihhruaina lam ʔawngkam: ‘ring,’ ‘nunna,’ ‘thutak,’ ‘hmangaihna,’ ‘khawvêl,’ ‘Keimah,’ ‘tihtak zetin,’ etc. tih thûte a hmang uar a, evangelist thuchah puangtu a ni. Matthaia, Marka leh Luka ten ‘synoptic gospel’ an ziah dân bâkah, Johana bu hi a ‘thlarau lam chanchin ʔa’ hawia ziah a nihna hian a hlutna a belhchhah baw. Ziaktu pathumin Isua leia a lo kal aţanga bul an ʔan laiin Johana chuan Isua chu chatuana lo awm tawh Logos a nihna aţangin bul a ʔan daih mai. Chanchin Tha Johana hi Bible-a bu 43-na a ni a; bung 21 a awm a, châng 879 a awm baw.

BUNG 1

CHATUAN THU CHU

¹A tîrah Thû a awm, Thû chu Pathian hnêna awm a ni a, Thû chu Pathian a ni.

²A tîr aţang rênga Pathian hnêna awm a ni.

³Thil engkim ama siam a ni a; thilsiam awm tawh zawng zawng hi amah tel lova siam engmah a awm lo.

⁴Amahah chuan nunna a awm a; chû nunna chu mihringte tân êng a ni.

⁵Êng chu thim zîngah a lo êng a; thimin chû chu a hre pha lo.

JOHANA HRIATPUINA: ÊNG TAK

⁶Pathianin a rawn tîrh mi pakhat a awm a, a hming chu Johana a ni.

⁷Chû mî chu hriatpuitu atân a lo kal a, Êng thû chu hriatpui tûr leh, amah kal tlanga mi zawng zawngin an rin theih nân.

⁸Amah chu Êng chu a ni lo, Êng thu hriatpuitu tûra lo kal a ni zâwk.

⁹Mi tin tiêngtu Êng dik taka chu khawvêlah hian a lo kal mêk.

¹⁰Ani chu khawvêla awm sâ rêng a ni; khawvêl hi ama siam a ni a, mahse khawvêlin amah chu a hre lo.

¹¹Ama mite hnênah a lo kal a; ama mite chuan an lo lâwm si lo.

¹²Nimahsela, amah lâwm apiangte leh a hming ringtute tân Pathian fa nihna a pe ta.

¹³Chûng mite chu thisena hrin an ni lo va, tîsa duh zâwna hrin an ni hek lo, mipa duh dân hrin pawh an ni lo va, Pathian hrin an ni zâwk e.

THU - MIHRINGA LO CHANG

¹⁴Thû chu mihring*ah a lo chang a, kan zîngah a lo chêng ta: Pain a hrin, a Fapa mal neihchhun ropuizia ang zêla a ropuina kan hmuh chu: khawngaihna leh thutaka khat a ni.

¹⁵Johanan awrâwl chhuah meuhvin hriatpuina thû a tlângaupui a, “Ka hnunga lo kal tûr khân mi lehkhah tawh a ni, ka hmâa awm sâ rêng a ni si a,’ tia a chanchin ka sawi kha, amah hi a ni e,” tiin.

¹⁶Ama famkimna chu kan chang ʔeuh tawh a: khawngaihna azâra khawngaih lehchhâwnna nên.

¹⁷Dân thû chu Mosia hmanga pêk a ni a, khawngaihna leh thutak chu Isua Krista aţanga lo chhuak a ni.

¹⁸Tûma’n eng lai mahin Pathian an hmu ngai lo. Fapa mal neihchhun, Pa ângchhûnga mi ngei chuan a rawn puang chhuak ta.

THLALÊRA ÂU ÂW

¹⁹Jerusalem aţanga puithiamte leh Levia chîa mite chu, “Tu nge i nih?” tia Johana va zâwt tûra Judaten an tîrh laia Johana thu lo sawi chu hei hi a ni:

²⁰Engmah zêp lovin a inpuang a, “Krista chu ka ni lo ve,” a lo ti a.

²¹Anni chuan a hnênah, “Anih leh, tu nge i nih le? Elija i ni em?” an ti a, an zâwt a. Ani chuan, “Ni lo ve,” a ti a. “Zâwlnei i ni em?” an ti leh a. Ani chuan, “Ni lo ve,” tiin a chhâng a.

²²Anni chuan a hnênah, “A nih leh, tu nge i nih? Min tîrtute kan hrilh theih nân min hrilh rawh. I chanchin hi engtin nge i sawi dân?” an ti a.

²³Ani chuan, “Zâwlnei Isaian, ‘LALPA kawng chu tingîl rawh u,’ tia a sawi thlalêra âu-tu âw ka ni e,” a ti a.

²⁴Chûng an mi tîrha-te chu Pharisaite zînga mi an ni a.

²⁵A hnênah chuan, “Krista emaw, Elija emaw, zâwlnei emaw pawh i nih si loh chuan engati nge i baptis ʔin?” tiin an zâwt leh a.

²⁶Johana chuan a chhâng a, “Keiin tuiin ka baptis ʔin; mahse in zîngah hian mi pakhat in hriat loh a ding tawh reng a ni.

²⁷Amah chu alâwm ka hnunga lo kal tûr, kei aia ropui zâwk chu; a pheikhaw hruil phelh tlâk pawh ka ni lo ve,” a ti a.

²⁸Chûng thil chu Jordan râla Bethani* khua, Johana baptis-na hmuna thil thleng a ni.

PATHIAN BERAM NO

²⁹A tûkah chuan Johanan ama lam pana Isua lo kal a hmu a, “En teh u! Pathian Berâm No, khawvêl sual la botu tûr saw!

³⁰Saw mi saw-‘Ka hnunga lo kal tûr, kei aia tlatlum zâwk, ka awm hmâ daih pawha lo awm tawh,’ tia ka sawi kha a nih saw.

³¹Amah chu ka lo hre lo va; nimahsela Israelte hnêna tihlan a nih theih nân tuia baptis tûra lo kal mai ka ni e,” a ti a.

³²Johana hriatpuina thû chu hei hi a ni: “Thlarau chu thûro angin vân ațanga lo chhuk ka hmu a, ani chungah chuan a fu reng a.

³³Amah chu ka hre si lo va; nimahsela, tuia baptis tûra mi tîrtu chuan ka hnênah, ‘A lu chungah Thlarau lo chhuka, a chungah fû i hmuhna apiang chu, chû mi chu Thlarau Thianghlîma baptistu tûr chu a ni ang,’ tiin mi hrilh a.

³⁴Chû chu ka hmu tawh a, chuvângin hê mî hi Pathian Fapa a ni tih pawh ka hriattîr tawh a ni,” a ti a.

ZIRTIR HMASATE

³⁵A tûk lehah chuan Johana chu a zirtîr pahnihte nêan an dîng ho va.

³⁶Isua veivâk vêl chu thlîrin, “En teh u, Pathian Berâm No saw!” a ti a.

³⁷Zirtîr pahnihte chuan a thusawi chu an hria a, Isua chu an zui ta a.

³⁸Isua chuan amah an zui tih a hmuhin a lo lehawi a, an hnênah, “Eng nge in zawn?” a ti a. Anni chuan, “Rabbi (chû chu Zirtîrtu tihna a ni) khawiah nge i awm?” an ti a.

³⁹Ani chuan an hnênah, “Lo kal ula in hmu ang,” a ti a. Chutichuan an va kal a, amah chu an va hmu a, chû mi nî chuan nilêngin, tlai lam dâr lî vêl thlengin a hnênah chuan an awm reng a.

⁴⁰Johana thu sawi hriaa Isua zuitu pahniha a pakhat zawk chu Andria, Simon Petera unau a ni.

⁴¹Ani chuan a hmasa berin ama unau Simona a va hmu a, a hnênah, “Messia (chû chu Krista tihna a ni) kan hmu ta,” a ti a.

⁴²Tichuan, Isua hnênah arawn hruai a. Isuan ani chu a lo en a, “Jona fapa Simona i ni. Kipha an ti tawh ang che,” a ti a (chû chu ‘Lung,’ tihna a ni).

PHILIPPA LEH NATHANAELA

⁴³Atûkah chuan Isuan Galili rama kal a tum a, Philipa a hmu a, a hnênah, “Mi zui rawh,” a ti a.

⁴⁴Philipa chu Bethsaida khuaa mi a ni, chû chu Andria leh Petera te awmna khua a ni bawk a.

⁴⁵Philipa chuan Nathanaela a hmu a, a hnênah, “A chanchin Mosia dân Lehkhabûah leh zâwlneiten an lo ziah, Nazaret Isua, Josefa fapa chu kan hmu ta,” a ti a.

⁴⁶Nathanaela chuan a hnênah, “Nazareth khua ațangin thil ța a lo chhuak thei em ni?” a ti a. Philipa chuan a hnênah, “Lo kal la, rawn en ta che,” a ti a.

⁴⁷Isuan a hnên lam pana Nathanaela lo kal chu a lo hmu a, a chanchin a lo sawi a, “En teh u, Israel mi dik tak, amaha bumna rêng awm lo saw,” a ti a.

⁴⁸Nathanaela chuan a hnênah, “Engtin nge min lo hriat theih?” a ti a. Isuan a chhâng a, “Philipan a koh hmâ che a theipui kûng

hnuaia i awm lai khân ka hmû che asin,” a ti a.

⁴⁹Nathanaelan a hnênah, “Rabbi, Pathian Fapa chu i ni e! Israel Lal i nih ngei hi!” tiin a chhâng a.

⁵⁰Isuan a chhâng a, a hnênah, “Theipui kûng hnuaiah ka hmû che asin,’ ka tih avângin i ring a ni mâw? Hêng aia thil ropui zâwk hi i la hmu ang,” a ti a.

⁵¹Amah vêk chuan, “Tihtak zetin ka hrilh a che, vân inhawngah, Mihring Fapa chungah Pathian Vântirhkohte chhuk leh chho i la hmu ang,” a ti a.

BUNG 2

TUI UAIN A CHANTIR

¹Ni thum nîah chuan Galili rama Kana khuaah inneihna a awm a, chutah chuan Isua nu pawh a awm vê a.

²Isua leh a zirtîrte pawh chu inneihna ruai ްhêh tûrin an sâwm ve a.

³Uain chuan a daih ta lo va, Isua nu chuan a hnênah, “Uain an tlachham ta e,” tiin a hrilh a.

⁴Isuan a hnênah, “Hmeichhia, nanga mi lo buaipui ka ngai em ni? Ka hun a la thleng rih lo ve,” a ti a.

⁵A nu chuan chhiahhlawhho hnênah, “In hnêna a sawi apiang chu ti zêl ang che u,” a ti a.

⁶Judate inthenfai dânin chutah chuan lung tuibêl paruk, litar sawmriat ațanga zâ vêl leng ްheuh an hûng a.

⁷Isuan an hnênah, “Tuibêlah te hian tui chhûng khat rawh u,” a ti a. Tichuan, an chhûng khat a.

⁸An hnênah, “Tûnah thâl chhuak ula, fatu hotu hnênah kalpui rawh u,” a ti a. An va kalpui ta a.

⁹Fatu hotûin tui uaina lo chang ta chu a tem a, khawi lama mi nge tih a hre si lo va (chhiahhlawh tuichâwite erawh chuan an hria a), fatu hotu chuan moneitu chu a ko va.

¹⁰A hnênah, “Mi tinin uain ța an sem hmasa phawt a, an in tam deuh hnûah a ța lo deuh an sem zui ްhîn a ni ngai a; nang erawh chuan tûn thlenga uain ța i la neih reng mai le,” a ti a.

¹¹Isuan hê chhinchhiahna a tih țaanna Galili rama Kana khuaah hian a ropuina chu a tilang ta a, a zirtîrte chuan amah chu an ring ta a ni.

¹²Chumi hnûah chuan Kapernaum khuaah a zuk kal a, a nu nêan, a unaute nêan, a zirtîrte nêan; chutah chuan ni rei lo tê an châm a.

ISUAN TEMPUL A THIAN

¹³Judate Kalhlên Kût a hnai tawh a, Isua chu Jerusalemah a han kal a.

¹⁴Tempulah chuan sebâwngte, berâmte, ްthûro zuartuho leh tangka thlengtu-hote sumdâwn dân chu a hmu a.

¹⁵Hruihualin vuakna a siam a, berâm leh sebâwngte chu tempul ațang chuan a hnawt chhuak vek a, tangka thlengtute tangkâ chu a leih bua a, an dawhkânte chu a nam thlûksak a.

¹⁶Thûro zuartute hnênah chuan, “Hêngte hi kal bopui rawh u! Ka Pa in hi sumdâwnna inah in siam tûr a ni lo!” a ti a.

¹⁷A zirtîrte chuan hê thuziah hi an hre chhuak a, “I in atâna ka thahnemngaihna mi ei zo ta,” tih hi.

¹⁸Judate chuan a hnênah, “Hetiang thil ti tûra thuneihna i nei a nih chuan, mi hmuhtîr tûr eng ang chhinchhiahna nge i nei?” tiin an chhâng a.

¹⁹Isuan an hnênah, “Hê in hi tichhia ula, ni thum chhûngin ka tung ding leh ang,” tiin a chhâng a.

²⁰Judate chuan, “Hê in hi kum sawmlî leh kum ruk chhûnga sak a ni a, nangin ni thum chhûngin i tung ding ang maw?” an ti a.

²¹Nimahsela, tempul a sawi hi ama taksa a tihna a lo ni zâwk si a.

²²Chuvângin, mitthi zîng ata a thawhleh khân, a zirtîrte chuan an hnêna a sawi kha an hre chhuak a; tichuan Pathian Lehkha Thû leh Isua thusawi chu an ring ta a.

THINLUNG HRETU

²³Jerusalema a awm laia, Kalhlên Kût ruai theh laia chhinchhiahna a tih hmutu mi tam tak chuan a hming chu an lo ring ta a.

²⁴Isua chuan mi zawng zawng a hriat chian êm avângin an lakah chuan a ngampa lo,

²⁵tûma hrilh fiah ngai lova mihring thinlunga awm chu a hriat tlang nghâl vek avângin.

BUNG 3

PIAN NAWN LEHNA

¹Pharisaite zînga mi, a hming chu Nikodema, Judate hotu pakhat hi a awm a.

²Chû mî chu zânah Isua hnênah a lo kal a, a hnênah, “Rabbi, Pathian aţanga chhuak zirtîrtua lo kal i ni tih kan hria; Pathianin a awmpui loh chuan hêng chhinchhiahna i tih ang hi tûma’n an ti thei lo vang,” a ti a.

³Isuan a chhâng a, “Tihtak zetin ka hrilh a che, mi tûpawh an pian-nawn* leh loh chuan Pathian lalram an hmu thei lo vang,” a ti a.

⁴Nikodema chuan a hnênah, “Upat hnûah engtin nge mi a pian leh theih ang? A nu pumah lûtin a piang nawn leh thei em ni?” a ti a.

⁵Isuan a chhâng a, “Tihtak zetin ka hrilh a che, mi tûpawh tui leh Thlarau a an pian loh chuan Pathian lalramah an lût thei lo vang.

⁶Tisaa piang chu tisa mai a ni a; Thlarauva piang erawh chu thlarau a ni.

⁷I piang nawn leh tûr a ni,’ ka tih che hi thil makah ngai suh.

⁸Thlî pawh a duh duhin a tleh thîin, a rî chu i hria a; mahse khawi aţanga lo kal nge tih leh, khawi lam panin nge a tleh zêl dawn tih pawh i sawi thei nêng. Thlarauva piang pawh chutiang bawh chu an ni asin,” a ti a.

⁹Nikodema chuan a chhâng a, a hnênah, “Chûng thil chu engtiangin nge a lo awm theih?” a ti a.

¹⁰Isuan a chhâng a, “Israelte zirtîrtu ni si, chûng chu i hre lo va maw?”

¹¹Tihtak zetin ka hrilh a che, kan thil hriat hi kan sawi a, kan thil hmuh hi kan hriattîr thîin; mahse kan hriatpuina thû chu i âwih si lo.

¹²Khawvêl thil ka hrilh che mah i âwih loh chuan, vân lam thil hrilh che ila engtin nge i âwih ang?

¹³Tûmah vânah an chho ngai lo, vân aţanga lo chhuka chauh lo hi chu: chû chu Mihring Fapa, vâna mi hi a ni.

¹⁴Mosian thlalêrah rûl a khai kâng a, chutiang tak chuan Mihring Fapa hi khai kânin a awm bawh tûr a ni;

¹⁵tûpawh amah ring apiang an boral lohva, chatuana nunna an neih zâwk nân.

¹⁶Pathianin khawvêl a hmangaih êm avângin ama hrin ngei, a Fapa mal neihchhun a pê a; mi tûpawh amah ring apiang chu an boral lo vang a, chatuana nunna an nei zâwk ang.

¹⁷Khawvêl thiam loh chantîr tûrin Pathianin a Fapa khawvêlah a tîr lo, amah avânga khawvêl a chhandam theihna tûrin a tîr zâwk a ni.

¹⁸Amah ring chu tûmah thiam loh chang an awm lo va; amah ring lote chuan thiam loh an chang tawh reng a ni, Pathian hrin ngei, a Fapa mal neih hming an rin loh avângin.

¹⁹Thiam loh channa chu hei hi a ni, khawvêlah êng a lo kal a, mihrinten êng aia thim an duh zâwk hi a ni, an thiltihte a sual êm avângin.

²⁰Thil sual ti thînten êng an hua a, êngah pawh an lo kal lo; chuti lo chuan an thiltihte a lang dawn si a.

²¹Nimahsela, thil dik titu apiang chu êngah an lo kal thîin, an thiltihte Pathian avânga ti an ni tih a lan theih nân,” a ti a.

BAPTISTU JOHANAN KRISTA A CHAWIMAWI

²²Chumi hnûah chuan Isua leh a zirtîrte chu Judai ramah an kal a, chutah chuan an hnênah a awm reng a, a baptis bawh a.

²³Johana pawhin tui tamna hmun a nih avângin Salim khaw kiana Ainon-ah a baptis bawh a. Mi lo kal khâwmte chu a lo baptis hlawm a.

²⁴Chutih lai chuan Johana chu lung inah an la tântîr lo va.

²⁵Johana zirtîrte leh Judate chu intihthianghlamna dân chungchângah an lo inhnial a.

²⁶Johana hnênah an lo kal a, a hnênah, “Rabbi, Jordan râla i hnêna awm, a thû min hriattîra khân mite a baptis thîin a, ngai teh, a hnênah mi zawng zawng an kal huai huai mai!” an ti a.

²⁷Johanan a chhâng a, “Vân aţanga pêk a nih chauh loh chuan mihringin engmah dawn a nei thei lo.

²⁸Krista ka ni lo ve, a hmâa mi tîrh mai ka ni,’ tia ka sawi thîin lai khân nangni ngei hi mi hriatpuitu in nih kha.

²⁹Moneitu chu mo pasal chu a ni a; nimahsela moneitu thian, a thu lo ngaichâng rengtu chuan moneitu âw a hriat chuan a lâwm êm êm thîin. Kei pawh ka lâwmna a famkim ta a nih hi.

³⁰Ani chu lian zêl tûr a ni a, kei erawh chu tê zêl tûr ka ni.

³¹“Chung lam ațanga lo kal chu mi zawng zawng aia chungnung ber a ni; lei ațanga lo chhuak chu lei mi a ni a, lei lam thil a sawi thîn. Vên ațanga lo kal chu engkim chungah lêng a ni.

³²A hmuh leh a hriat apiang a hriatpui thîn a; mahse, tûma’n a hriatpuina thu an âwih si lo.

³³A hriatpuina thu âwihtu chuan Pathian chu mi dik tak a nihzia a nemnghet thîn.

³⁴Pathian tîrh chuan Pathian thû a sawi thîn; ani chuan a zât teh kherin Thlarau chu a pe si lo.

³⁵Pain Fapa a hmangaih a, a kutah engkim a pe tawh.

³⁶Mi tûpawhin Fapa a rin chuan chatuan nunna a nei tawh; tûpawh Fapa ring lo chuan nunna chu a hmu lo vang a, a chungah Pathian thinurna chu a awm reng zâwk ang,” a ti a.

BUNG 4

SAMARI HMEICHHIAIN A MESSIA A TÂWK

¹Chutichuan, Isuan Johana aiin zirtîr a siam tam zâwk a, a baptis tam zâwk tih Pharisaiten an hria tih Lalpa chuan a lo hriat vêleh

²(Amah Isua chuan a baptis lo, a zirtîrten an baptis zâwk thîn),

³Judai ram chu a kalsan a, Galili ramah a kîr leh ta a.

⁴Samari ram kal tlang chu tûl a ti a.

⁵Tichuan, Samari ram khaw pakhat Sukar an tih chu a lo thleng a, chulai chu Jakobian a fapa Josefa hnêna ram a pêk kiang kha a ni a.

⁶Jakoba tuichhunchhuah pawh kha chutah chuan a awm. Isua chu a kal hah avângin tuichhunchhuah sîrah chuan a t̃hu a. Chhûn dar 12* vêl a ni a.

⁷Samari hmeichhe pakhat chu tui châwi tûrin a lo kal a. Isuan a hnênah, “In tûr min pe ta che,” a lo ti a.

⁸A zirtîrte chu ei tûr leiin khuah an kal bo vek si a.

⁹Samari hmeichhia chuan a hnênah, “Engtizia nge nang Juda miin kei Samari hmeichhe hnênah in tûr mi dîl?” a ti a. Judaten Samari mite hi eng atân mah an ti ngai si lo va.

¹⁰Isuan ani chu a chhâng a, “Pathian thilpêk leh, ‘In tûr min pe ta che,’ i hnêna titu hi hria la chu, nanging a hnênah i dîl zâwk tûr a ni a, ani chuan tui nung a pe tawh tûr che a ni,” a ti a.

¹¹Hmeichhia chuan a hnênah, “Ka pu, tuichhunchhuah a thûk si a, a khâi chhuahna pawh i nei baw si lo va. Chû tuinung chu khawia mi nge i hmuh bîk le?

¹²Kan pu Jakoba aiin i ropui zâwk em ni? Ani chuan hê tuichhunchhuah hi min pê a, amah ngei chuan a in a, a fapate leh a rante pawhin,” a ti a.

¹³Isuan a chhâng a, a hnênah, “Tûpawh hê tui in apiang an tuihâl leh ang;

¹⁴amaherawhchu, tûpawh an hnêna ka pêk tûr tui in chu an tuihâl leh tawh ngai lo vang. Keiin an hnêna tui ka pêk tûra te chhûng lam ațang chuan chatuan nunna tui a lo chik chhuak tawh dâwn a ni,” a ti a.

¹⁵Hmeichhia chuan a hnênah, “Ka pu, chû tui chu mi pe rawh, ka tuihâl loh nân leh, hê tui châwi tûra ka lo kal leh tawh loh nân,” a ti a.

¹⁶Isuan a hnênah, “I pasal va ko la, hetah lo kîr leh ang che,” a ti a.

¹⁷Hmeichhia chuan, “Pasal ka nei hlei nê,” tiin a chhâng a. Isuan a hnênah, ‘Pasal ka nei hlei nê,’ ti âwm rêng pawh i ni e;

¹⁸pasal pangâ i nei tawh a, tûna mi i kawp lai pawh hi i pasal a ni lo rêng a ni, i sawi dik khawp mai,” a ti a.

¹⁹Hmeichhia chuan a hnênah, “Ka pu, zâwlnei i ni tih ka hre ta.

²⁰Kan thlahtute chuan hê tlângah hian Pathian chibai an bûk thîn; nangni Judate pawhin Jerusalem hi Pathian chibai bûkna hmun bîkah in ngai si a,” a ti a.

²¹Isuan a hnênah, “Hmeichhia, mi ring mai rawh, hê tlângah kher lo pawh, Jerusalemah kher lo pawh Pa chibai in bûk hun a thleng dâwn ta.

²²Nangnin in hriat loh chibai in bûk thîn; keini zawngin kan biaka chu kan hria asin, chhandamna chu Judate ațanga lo chhuak tûr a ni si a.

²³Chû hun chu a thleng mêk, tûn hi a ni Pathian chibai bûktu dik takten thlarau leh thutaka Pa chibai an bûk hun chu ni; Pain chutiang taka amah chibai bûktu tûr mite chu a zawng mêk a ni.

²⁴Pathian chu Thlarau a ni; amah chibai bûktuten Thlarau leh Thutakin chibai an bûk tûr a ni,” a ti a.

²⁵Hmeichhia chuan a hnênah, “Messia (Krista an tih) chu a lo kal dâwn tih ka hria. Ani chu a lo kal hunah engkim min la hrilh fiah vek ang,” a ti a.

²⁶Isuan a hnênah, “Keimah a betu che hi amah chu ka ni e,” a ti a.

BUHTE AN ÊNG TA

²⁷Chutih lai chuan a zirtîrte chu an lo thleng a, hmeichhia a lo bia chu mak an ti hlê a; mahse tûma’n “Eng nge i zawn?” emaw, “Engati nge ani nê in inbiak?” emaw pawh an ti lo.

²⁸Tichuan, hmeichhia chuan a tuibêl a kalsan a, khuah a va kal a, mite hnênah,

²⁹“Lo kal ula,rawn en teh u, ka thiltih apiang min hrilh zêltu mi pakhat a awm a; hê mi hi Krista a ni thei mai lo maw?” a va ti a.

³⁰Tichuan, mite chu khua ațangin an lo chhuak a, amah chu an rawn pan khâwm a.

³¹Chumi hlân chuan zirtîrte chuan a hnênah, “Zirtîrtu ei rawh,” tiin an lo nawr ngat ngat a.

³²Mahse, ani chuan an hnênah, “In hriat loh chaw ei tûr ka nei e,” a ti a.

³³Zirtîrte chu an inbia a, “Tûin emaw a ei tûr an rawn kensak em ni le?” an inti hlawm a.

³⁴Isuan an hnênah, “Mi tîrtu duhzâwn tih leh, a hnâ thawh zawh hi ka chaw ber a ni.

³⁵Buh sengna tûr thla lî a la awm,’ in ti maw? Ngai rawh u, ka hrilh a che u, dâk chhuak ula, thlawhmmâte hi en ta che u, tûn apangin seng tûrin a hmin dêr tawh hi!

³⁶Buh sengtûin hlawh a hmu thîn a, chatuan nun neihna tûr rah a seng khâwm mēk a ni, a tuhtu leh a sengtu an lâwm dun theih nân.

³⁷Pakhatin a tuh thîn a, mi dangin a rah a seng thîn, tih thû hi a dik a ni.

³⁸In thawhrim loh rah seng tûrin a ni ka tîr che u ni; mi dangin an thawk a, nangni chu an thawhnaah in va tel ve mai a ni,” a ti a.

KHAWVEL CHHANDAMTU

³⁹Samari khuua mi tam tak chuan, “Ka thiltih apiang min hrilh zêl” tia khâ hmeichhiain a hriattîr avâng khân Isua chu an ring ta a.

⁴⁰Samari mite chu Isua hnênah an lo kal a, an hnêna châm rih tûra an ngên tlat avângin chutah chuan ni hnih a châm a.

⁴¹A thusawi aţang chuan mi dang tam takin an ring ve ta a.

⁴²Anni chuan hmeichhe hnênah, “Tûnah zawng, i thusawi avânga ring kan ni ta lo; keimahni ngēiin a thû kan hria a, hê mi hi Krista, khawvêl Chhandamtu a lo ni ngēi tih kan hre ta,” an ti a.

GALILI LAMIN AN LO LÂWM

⁴³Ni hnih hnûah chuta ţang chuan a kal chhuak a, Galili ramah a kal ta a.

⁴⁴Isua ngeiin zâwlnei chu ama khaw lamah châwimâwi a hlawh ngai lo tih a lo hriattîr tawh si a.

⁴⁵Chutia Galili ram a lo thlen chuan Galili mite chuan an lo lâwm a, Jerusalem khuua kût laia a thiltih zawng zawng an lo hmu ve reng a; anni pawh chu kûtnaah chuan an kal ve si a.

MILIAN FAPA TIHDAM

⁴⁶Isua chuan tui uain-a a chantîrna Galili rama Kana khuua kha a lo thleng leh a. Chutah chuan milian pakhat a awm a, a fapa chu Kapernaum khuua a dam lo va.

⁴⁷Isua chu Judai ram ata Galili ramah a lo kal tih a hriat veleah a hnênah a han kal a, a fapa thi lek leka dam lo chu zuk tidam tûrin ngen tak tēin a ngên a.

⁴⁸Isuan a hnênah, “Chhinchhiahnate leh thilmakte in hmuh phawt loh chuan, engti zâwng mahin in ring dâwn lo a nih hi,” a ti a.

⁴⁹Chu milian chuan a hnênah, “Ka pu, ka fa thih hmâ ngeiin lo chhuk lul rawh!” a ti a.

⁵⁰Isuan a hnênah, “Tikhân kal mai rawh, i fapa chu a dam tawh e,” a ti a. Tichuan, chû pa chuan Isua thû chu a âwih a, a kal ta a.

⁵¹Chutia a chhuk thla chu a bawihthen an lo hmuak a, “I fapa chu a dam ta!” an lo ti a.

⁵²Ani chuan eng hun lai taka dam nge tih a zâwt a. Anni chuan a hnênah, “Nimin chhûn dâr khatah khân a khawsikin a thlah ta a ni,” an ti a.

⁵³Chumi hun chu Isuan ama hnêna, “I fapa chu a dam tawh e,” a tih hun lai tak kha a ni tih a hre ta a. Tichuan, amah leh an chhûngkua chuan an ring ta a.

⁵⁴Chû thil chu Isuan Judai ram aţanga Galili rama a lo kal leh hnûa chhinchhiahna a tih vawi hnihna a ni.

BUNG 5

BETHESDA DÎLA DAMLO TIHDAM

¹Chumi hnû chuan Judate kût pakhat a awm a; Isua chu Jerusalem khuua a han kal a.

²Jerusalemah chuan Berâm Kawngkhâr kiangah dîl a awm a, chû chu Hebrai ţawngin Bethesda an ti a, hulhiap pangâ a nei nghe nghe.

³Chûngah chuan damlo te, mitdel te, kebai te, zengte chuan chu tui rawn fâwn hun chu chângin an lo nghâk reng thîn a.

⁴Dîlah chuan Vântirhkoah a lo chhuk thla a, dîl tui chu a zu tiphûl a; tui phûl hnûa dîla chhuk thla hmasa ber chu eng natna vei pawh ni se an dam zêl a.

⁵Chutah chuan mi tuemaw kum sawmthum leh kum riat lai chak loh veia nâ a awm ve a.

⁶Isuan chû hmuna a mû chu a hmu a, a lo na rei tawh hlê tih a hria a, a hnênah, “Tihdam i duh em?” a ti a.

⁷Chû damlo chuan, “Ka pu, tui a phûl laiin dîla mi dahtu ka nei lo va, ka chhuk thlâk chhûngin mi dangin min luh khalh zêl si a,” tiin a chhâng a.

⁸Isuan a hnênah, “Tho la, i mutbu têt la, kên kal tawh rawh,” a ti a.

⁹Chawplehchilhin chû mî chu a dam ta nghâl mai a, a mutbu a têt a, a kal ta a. Chu mi ni chu Sabbath nî a ni a.

¹⁰Chuvângin Judate chuan a dam taa hnênah chuan, “Sabbath nî a ni a, i mutbu ken a thiàng lo ve,” an ti a.

¹¹Ani erawh chuan an hnênah, “Mi tidamtu ngeiin ka hnênah, ‘I mutbu têt la, kên kal tawh rawh,’ mi ti alâwm,” tiin a chhâng a.

¹²Anniho chuan a hnênah, “I mutbu têt la, kên kal tawh rawh,’ i hnêna titu chu tu nge ni?” tiin an zâwt a.

¹³Mahse, tihdamna changtu chuan tû tihdam nge a nih a hre lo va, chutah chuan mipui an tam a, Isua lah chû hmuna aţang chuan a lo kal sawn daih tawh si a.

¹⁴Chumi hnû chuan, chû pâ chu tempulah Isuan a lo hmu leh a, ani chuan a hnênah, “Ngai rawh, tihdam i nih tâk hi. Thil sual ti leh tawh suh, chuti lo chuan i chungah thil tha lo lehzuah a lo thleng mai ang,” a ti a.

¹⁵Tichuan, chû pâ chu a va kal a, Judate hnênah chuan amah tidamtu chu Isua a ni tih a va hrilh a.

PA LEH FAPA CHAWIMAWI RAWH

¹⁶Sabbath nîa chutiàng thil a tih avâng chuan Judate chuan Isua chu an tinawmnah a, tihhlum dân tur an zawng ta a.

¹⁷Nimahsela, Isuan anni chu chhângin, “Ka Pain tûn thlengin hna a la thawk reng a, kei pawhin ka thawk ve zêl a nih hi,” a ti a.

¹⁸Judate chuan tihhlum an tum ngawrh sauh va, a chhan chu, Sabbath a bawhchhia chauh a ni lo va, Pathian tlukpuia indahin Pathian chu ‘Ka Pa’ a tih bawh avângin a ni.

¹⁹Isuan an hnênah, “Tih tak zet in ka hril h a che u, Fapain Pa thiltih a hmuh bāk chu mahni in engmah a ti thei lo; Pain a tih ang zêlin Fapa pawhin a ti mai zâwk a ni.

²⁰Pain Fapa a hmangaih a, a thiltih zawng zawng chu a entir thîn; mak in tih atân hêngte aia hnathawh ropui zâwk hi a la entir zêl ang.

²¹Pain mitthite a kai thova, a tinung thîn angin, Fapa pawhin a duh apiang a tinung thîn.

²²Pain tûte ro mah a rêlsak ngai lo, rorêlna zawng zawng chu Fapa hnênah a hlân ta zâwk a ni,

²³mi zawng zawng in Pa an zah anga Fapa pawh an zah theih nân. Tûpawh Fapa zah lo chu amah tîrtu Pa pawh zah lo a ni.

NUNNA LEH RORELNA, FAPAA INNGHAT

²⁴“Tih tak zet in ka hril h a che u, tûpawh ka thû hriaa mi tîrtu ring chuan, chatuan nun a nei tawh, thiam loh chang a ni tawh lo va; thihna ata a chhuak a, nunnaah a lût tawh zâwk a ni.

²⁵Tih tak zet in ka hril h a che u, mitthiten Pathian Fapa âw an hriat hun a thleng mêk, chû chu tûn hun hi a ni e; chûvângin a hria apiang an nung zêl ang.

²⁶Pain mahnia nunna a nei ang bawkin, Fapa hnênah mahnia nun neihna tûr a pê,

²⁷Mihring Fapa a nih avângin a hnênah rorêl tûrin thuneihna a pe bawk.

²⁸“Hêng hi mak ti suh u; thlâna awm zawng zawngten a âw an hriat hun a lo thleng mêk;

²⁹tichuan, an lo chhuak ang a, thil tha titute chuan nung tûra thawhleha an chang ang a, thil sual titute chuan thiam loh chang tûra thawhleha an chang thung ang.

³⁰Mahni mai in engmah ka ti thei lo. Benga ka hriat ang zêlin ro ka rêl thîn; ka rorêlna chu a dik a ni, mahni duh dân dân awm lova, mi tîrtu ka Pa duh dân awm ka tum tlat thîn avângin.

HRIATPUITU THUAH LI

³¹“Keima chanchin hi keimah vêkin sawi ila, ka thu hriatpuina chu a dik lo tihna a ni ang.

³²Keima chanchin hriattîrtu mi dang a awm a; chû mi chuan ka chanchin a hriatpuina chu a dik tih ka hria.

³³Nangnin Johana hnênah mi in tîr a, ani chuan thutak a lo hriattîr kha.

³⁴Mihring hnên aţanga hriatpuina dawng ka ni lo, mahse chhandama in awm theihna tûrin hêng thû hi sawi ka ni zâwk.

³⁵Johana chu khâwnvâr alh êng tak a ni, a êng hnuaia han intihhlîm rih pawh in la thlahlel a nih kha.

³⁶“Nimahsela, hriatpuina ka neih hi Johana hriatpuina thû ai khân a ropui zâwk: Pain ka hlen chhuah tûra hnâ min pêk ka thawh lai mêk pawh hian kei hi, Pain mi tîr tih mi hriatpui asin.

³⁷Kei mi tîrtu Pa ngei pawhin ka chanchin a hriatpui tawh. Nangni chuan eng lai mahin a âw in hre ngai lo va, a hmêl pawh in hmu ngai hek lo.

³⁸A mi tîr bera pawh in rin miao loh avângin, a thusawi phei chuan in rilrûah hmun chan ngaihna a awm lo.

³⁹Pathian Lehkha in zir thîn mâw, chutah chuan chatuan nunna chang thei dâwna in inrin vâng a ni a; chûngte chu keima chanchin hriatpuitu a ni asin.

⁴⁰Mahse, nunna nei tûrin ka hnênah in lo kal duh si lo.

⁴¹“Mihring châwimâwina hi ka pawm ve lo.

⁴²Nangmahniah Pathian hmangaihna in nei lo tih erawh chu ka hria a ni.

⁴³Ka Pa hminga lo kal ka ni a, nangnin mi lâwm si lo: mahni hmingin mi dang lo kal sela, chumi chu in lâwm khawp ang.

⁴⁴Nangni inchâwimâwi tawn lâwm te u, Pathian tak chauhva chhuak châwimâwina zawng lote chuan engtin nge rin pawh in rin theih rêng ang?

⁴⁵Pa hnêna ka hêk che u ring suh u: nangmahni hêktu zâwk mi pakhat a awm asin, in rin Mosia ngei hi a ni e.

⁴⁶Mosia in rin chuan kei pawh mi ring tawh tûr in ni; ani chuan keima chanchin asin a ziah ni.

⁴⁷A thu ziah in rin si loh chuan engtin nge ka thûte chu in rin theih rêng ang?” a ti a.

BUNG 6

MIPUI SANGNGA HRAI

¹Chûng thil hnûah chuan Isua chu Galili dîl, Tiberi dîl an tih râl lehlamah chuan a kal ta a.

²Damlote chung a chhinchhiahna a tih an lo hmuh tawh avângin ani chu mipui tam takin an zui a.

³Isua chu tângah chuan a kal chho va, chutah chuan a zirtîrte nêan an thû ho va.

⁴Kalhên Kût, Judate kût chu a hnai tawh a.

⁵Isua chu a han dâk chhuak a, amah rawn pantu mipui tam tak chu a hmu a, Philipa hnênah, “Hêngho ei tûr chhang hi khawia mi nge kan lei tâk ang le?” a ti a.

⁶Chû thû chu amah fiah nân a sawi a ni, a tih tûr chu ama’n a hre reng si a.

⁷Philipa chuan a hnênah, “Mi tinin tlêm têa chang theuh tûr pawhin duli zahnih man chhang chuan a daih lo vang,” tiin a chhâng a.

⁸A zirtîrte zînga pakhat Simon Petera unau Andria chuan a hnênah,

⁹“Barli chhangpêr pangâ leh sangha pahnih nei mipa naupang pakhat hetah hian a awm a; mahse mi heti zozai zîngah eng tham nge ni ang?” a ti a.

¹⁰Isua chuan, “Mipuite hi thuttîr rawh u,” a ti a. Chu lai chu hlobet tamna hmun a ni a. Tichuan, mipuite chu an thû ta a, mi sângngâ vel lai an ni a.

¹¹Isuan chhangpêrte chu a la a, lâwmthu a sawi zawhin zirtîrte hnênah chuan a sem a, chutiang bawkin zirtîrte chuan mipui thûte chu an sem ta a; chutiang bawkin sanghâte pawh chu an duh zât zât in an sem a.

¹²An ei puar hnû chuan a zirtîrte hnênah, “Engmah rîral lo tûrin a nîngnâwite chu chhar khâwm rawh u,” a ti a.

¹³Chutichuan, an chhar khâwm a, barli chhangpêr panga eitute ei ningnâwi chu bawmrâng sâwm leh pahni an rût khat a.

¹⁴Isuan chutianga chhinchhiahna a tih chu an hmuhin mipuite chuan, “Hê mi hi zâwlnei, khawvêla lo kal tûra chu a lo nih ngei hi,” an ti a.

DÎL CHUNGAH ISUA A KAL

¹⁵Mipuite chuan Isua chu lala siam tûra man luih tumin an lo kal dâwn tih Isuan a lo hriatin, tlângah amah chauh chuan a kal hrang daih a.

¹⁶Tlai lamah chuan a zirtîrte chu dîlah chuan an chhuk a,

¹⁷lawngah an chuang a, Kapernaum lam panin dîl chu an paltlang dâwn a. Khua chu a thim ta a, Isua chu an hnênah a lo kîr ve si lo va.

¹⁸Thlîpui nasa tak arawn tleh avângin tui chu a fâwn sâng telh telh a.

¹⁹Mêl nga emaw, mêl ruk emaw vêl lawng an kar hnûah Isua chu dîl chungah kea kalin lawng arawn pan lai an lo hmu a; an hlâu ta a.

²⁰Mahse, ani chuan an hnênah, “Keimah ka ni alâwm, hlâu suh u,” a ti a.

²¹Anni chuan lawnga chuang ve tûrin an duh hlê a; mahse chawplehchilhin lawng chuan an pan khawmual chu a thleng nghâl ta mai a.

VAN LAM CHHANG CHU

²²A tûkah chuan dîl râl lehlama mipui dingte chuan zirtîrhote chuanna lawng pakhat chauh lo chu lawng dang a awm lo va, Isua lah a zirtîrte zîngah lawngah chuan a chuang ve lo tih leh, zirtîrte chu anmahni chauhvîn an kal ta tih an lo hria a.

²³Mahse Lalpan lâwmthu a sawi hnûa chhang an eina bulah khân, Tiberi khua aţangin lawng dangte a lo thlen belh a.

²⁴Tichuan, Isua leh a zirtîrte chu an awm ta lo tih an hriatin mipuite pawh chu chûng lawngahte chuan an chuang a, Isua zawngin Kapernaum khua an lo thleng a.

²⁵Dîl râl lehlama amah anrawn hmuh chuan, “Rabbi, engtik lai khân nge he lam i lo thlen?” an ti a.

²⁶Isuan anni chu a chhâng a, “Tihtak zetin ka hrilh a che u, chhinchhiahnate in hmuh avânga mi zawng in ni lo va, chhangpêr in ei puar avâng mai a ni.

²⁷Chaw dangral mai mai ûmin phê phê suh u, chatuan nun daih tûr châw, Mihring Fapain a pêk tûr che u chu zawng zâwk rawh u; Pa Pathianin ani chu a chhinchhiah tawh si a,” a ti a.

²⁸Anni chuan a hnênah, “Pathian hnâ kan thawh theih nân eng thilte nge kan tih dâwn?” an ti a.

²⁹Isuan a chhâng a, “Pathian hnathawh chu hei hi a ni, a mi tîrh hi lo ring mai rawh u,” a ti a.

³⁰Anni chuan a hnênah, “Kan hmuha kan rin theihna tûr chein eng chhinchhiahna nge i tih ang? Eng thil nge i tih dâwn?

³¹Mîn thlahtuten thlalêrah manna an ei a, ‘Vân aţangin an hnênah chhang ei tûr a pê,’ tih zia ang khân,” an ti a.

³²Isuan an hnênah, “Tihtak zetin ka hrilh a che u, vân aţanga chhang kha Mosia pêk che u a ni lo ve; ka Pa erawh chuan vân aţangin chhang tak a pê che u a nih hi.

³³Pathian chhang chu vân aţanga lo chhuk a, khawvêl tâna Nun Petu hi a ni,” a ti a.

³⁴Anni chuan a hnênah, “Lalpa, chû chhang chu min pe zêl ang che,” an ti a.

³⁵Isuan an hnênah, “Keimah hi nunna chhang chu ka ni. Tûpawh ka hnêna lo kal chu a rilţâm leh tawh ngai lo vang a, tûpawh mi ring chu a tuihâl leh tawh hek lo vang.

³⁶Nangnin mi hmuh pawhin min rin phah chuang lo tih ka hrilh che u kha.

³⁷Pain mi pêk zawng zawng chu ka hnênah an lo kal vek ang; tûpawh ka hnêna lo kal chu ka hnawt chhuak tawp lo vang.

³⁸Vân aţangin mahni duh zâwn ti tûra lo chhuk ka ni lo va, mi tîrtu duh zâwn ti tûra lo kal ka ni zâwk e.

³⁹Hei hi ka Pa, mi tîrtu duh zâwn chu a ni: anin mi pêk zawng zawng tûmah hloh lo ila, ni kin nîah chuan kai tho zâwk ila, tih hi.

⁴⁰Mi tîrtu duh zâwn chu hei hi a ni, mi tûpawh Fapa hmûa, ring apiangin chatuana nunna nei sela; ni kin nîah ani chu keiman kai tho ila ka ti a ni,” a ti a.

AMA MITEN AN HNÂWL

⁴¹“Kei hi vân aţanga chhang lo chhuk chu ka ni,” a tih avângin a chungah chuan Judate an phun nâwi a.

⁴²“Hê mi hi Josefa fa, Isua kha a ni lo vem ni, a nu leh pa pawh kan hriat hi? ‘Vân aţanga lo chhuk ka ni,’ engtia ti thei nge a nih?” an ti a.

⁴³Isuan a chhâng a, an hnênah, “Phun nâwi phun nâwi suh u.

⁴⁴Kei mi tîrtu Pa-in a hîpte chauh lo chu tûmah ka hnêna lo kal thei an awm lo; kei chuan chû mi chu ni kin nîah ka kai tho ve ang.

⁴⁵Zâwlneite lehkhâbûah, ‘An zavaiin Pathianin a zirtîr vek ang,’ tih zia ka ni. Mi tin Pa thû hriaa zir apiang chu ka hnênah an lo kal thîn.

⁴⁶Pa hmu tawh an awm tihna a ni lo, Pathian hnên aţanga lo kala chauh lo chu; ani hi Pa hmutu chu a ni.

⁴⁷Tihtak zetin ka hrilh a che u, tûpawh mi ring chuan chatuana nunna a nei tawh.

⁴⁸Keimah hi nunna chhang chu ka ni.

⁴⁹In thlahtuten thlalêrah manna an ei nâ a, an thi leh tho va.

⁵⁰Hei hi vân aţanga chhang lo chhuk chu a ni e, miin a ei ang a, a thi leh tawh lo vang.

⁵¹Keimah hi vân aţanga chhang nung lo chhuk chu ka ni. Tûpawhin hê chhang hi a ei chuan chatuanin a nung reng ang, khawvêl nunna atâna ka pêk tûr chhang chu ka taksâ hi a ni,” a ti a.

⁵²Judate chu an inhnial a, “Hê mi hian engtin nge a taksa chu ei tûrin min pek theih ang le?” an ti a.

⁵³Isuan an hnênah, “Tihtak zetin ka hrilh a che u, Mihring Fapa taksâ in ei a, a thisen in in baw loh chuan, nangmahnin

nunna in nei si lo alâwm.

⁵⁴Tûpawh ka taksâ eia ka thisen in chuan chatuana nunna a nei tawh, tichuan ni kin nîah ani chu ka kai tho vang.

⁵⁵Ka taksâ hi chaw tak a ni a, ka thisen hi in tûr tak chu a ni si a.

⁵⁶Tûpawh ka taksa eia ka thisen in chu, keimahah a awm reng thîn, kei pawh amahah ka awm reng thîn.

⁵⁷Pa Minunga chuan mi tîr a, Pa zâra nung ka ni ang bawkin, tûpawh mi ei chu keima zârah a nung baw ang.

⁵⁸Hei hi vân ațanga chhang lo chhuk chu a ni; in thlahtuten chhang an ei a, an thi leh mai ang kha a ni lo. Hê chhang eitu apiang chu chatuanin a nung reng ang,” a ti a.

⁵⁹Chûng thû chu Kapernaum khuua a zirtîr laia biak in chhûnga a sawi a ni.

ZIRTIR TAM TAK AN KAL BO

⁶⁰Chutia a zirtîrte zînga mi tam takin chu thû an han hriat chuan, “Hei hi thu khîrh tak a ni, tu nge hre thiam thei ang le?” an ti a.

⁶¹Chû thû avâng chuan a zirtîrte chu an phun nâwi tih Isuan amahah hriatna a lo nei a, an hnênah, “Hê thû hi in ei lo hlê mai mâw?”

⁶²Mihring Fapa hi a hmâa a awmna ngaia chho hmu ta ang ula, engtin nge in ngaih ang le?

⁶³Tinungtu chu Thlarau a ni, tîsa chuan tlaktlaina rêng a nei lo. In hnêna thû ka sawite hi thlarau a ni, nunna pawh a ni.

⁶⁴Nimahsela, in zînga mi thenkhat ring lo in awm tlat mai,” a ti a. Isuan amah ring lotute leh amah mantîrtu tûr chu a tîr ațangin a hre sâ reng si a.

⁶⁵Tichuan a sawi zêl a, “Chuvângin a ni in hnênah, ‘Pain phalna a pêk loh chu tûmah ka hnênah an lo kal thei lo,’ ka tih le,” a ti a.

⁶⁶Chuta chin chu a zuitute zînga tam takin an kalsan a, amah an pâwl zui leh tawh lo.

⁶⁷Isuan sâwm leh pahnihte hnênah chuan, “Nangni pawhin kal bo in duh ve em ni?” a ti a.

⁶⁸Simon Peteran a hnênah, “Lalpa, tû hnênah nge kan kal ang? Nangin chatuana nunna thû i nei alâwm.

⁶⁹Krista, Pathian nung Fapa chu i ni tih kan hria a, kan âwih tawh baw k a,” tiin a chhâng a.

⁷⁰Isuan an hnênah, “Nangni sâwm leh pahnihte hi keima thlan in ni lo vem ni? In zînga mi pakhat lah misual pa a ni lehngghâl vei nê,” a ti a.

⁷¹Simona fapa Juda Iskariota, sâwm leh pahnihte zînga mi tihchhana a sawi a ni, ani chu a mantîrtu tûr a ni si a.

BUNG 7

ISUA UNAUTEN AN ÂWIIH LO

¹Chûng thil thlen hnû chuan Isuan Galili bial chu a fang a; Judaten amah tihhlum an tum avângin Judai ram chu a fang duh lo va.

²Judate Bâwkte Kût chu a hnai tawh hlê a.

³Chutichuan, a unauten a hnênah, “Heta țang hian Judai ramah va kal rawh, i zirtîrte pawhin i thiltih an lo hmuh theih nân.

⁴Mahni intihlâr duhte chuan a rûkin thil engmah an ti hlei nê. Hêng thilte hi i ti takzet a nih chuan khawvêl hmâah va in târ lang ta che,” an ti a.

⁵A unaute ngei pawhin amah chu an ring si lo.

⁶Isuan an hnênah, “Ka hun a la thleng rih lo ve; nangni hun erawh chu a thleng reng tawh a ni.

⁷Khawvêlin nangni an haw thei lo a che u, kei erawh chu mi haw thîn, an thil sual tihte ka hriattîr thîn avângin.

⁸Nangni chu kûtnaah chuan han kal rawh u, kei chu hê kûtah hian ka kal dawn rih lo ve, ka hun a la thleng si lo va,” a ti a.

⁹Chûng thû an hnêna a sawi lai chuan ani chu Galili ramah a la awm reng a.

CHUNG LAM MITHIAM

¹⁰A unaute chu kût tûra an chhoh tâk hnû chuan ani pawh chu ualau lo takin, a rûk deuhin a han kal chho vê a.

¹¹Judaten kûtnaah chuan ani chu an lo zawng a, “Khawiah nge a awm?” an ti a.

¹²Ama chungchângah mipui an phun ru sup sup a, thenkhatin, “Mi țha a ni e,” an ti a; thenkhatin, “Ni suh e, mipui a bum mai mai a ni,” an ti a.

¹³Mahse, Judate an hlauh avângin a chungchâng thû chu ualau takin an sawi lang ngam lo.

¹⁴Kût vânglai takin Isua chu tempulah a han kal a, a zirtîr a.

¹⁵Judate chuan, “Hê mi hi zir sâng pawh ni si lovin engtin nge heti taka lehkha a thiam?” an ti a, mak an ti hlê a.

¹⁶Isuan anni chu a chhâng a, “Ka thu zirtîr hi keima tâ a ni lo va, mi tîrtu tâ zâwk a ni.

¹⁷Tûpawh ama duh zâwng ti ve duh chuan ka thu zirtîr hi Pathian tihchhuah nge, keima phuahchawpa sawi mai ka nih a hria ang.

¹⁸Mahni phuahchawp sawi mai mai chuan ama mâwina a zawng a ni; amah tîrtu mâwina chauh a zawn erawh chuan, chû mi chu mi takzet a ni, amahah chuan fel lohna rêng a awm lo.

¹⁹Mosian in hnênah dân a pe lo che u em ni, in zîngah dân zâwm rêng pawh in awm loh le? Engtizîa mi tihhlum tum nge in nih? a ti a.

²⁰Chûng mite chuan an chhâng a, “Ramhuai zâwl i nih lek hi. Tûin nge tihhlum tum che?” an ti a.

²¹Isuan anni chu a chhâng a, “Hna pakhat ka thawh ngawt pawhin mak in ti viau lehngghâl a.

²²Hei vâng hian alâwm Mosian serhtan thû a pêk che u ni, (Mosia tihchhuah ni lovin, thlahtute tihchhuah a ni zâwk), Sabbath nîah pawh serh in tan tho si a.

²³Sabbath nia serhtan hi Mosia dân bawhchhiatna a nih si loh chuan, Sabbath nia mi ka tihdam tâk avângin ka chungah in thînur bîk ang maw?

²⁴A lan dân ngawtin rêl mai mai suh ula, dik takin rêl zâwk rawh u,” a ti a.

HEI HI KRISTA A NI THEI EM?

²⁵Jeruselema mi ðhenkhat chuan, “Hê mi hi maw tihhlum an tuma chu?

²⁶En teh u! Huai takin thu a sawi piap piap a, tûma’n an khak si lo va. Hotute pawh hian Krista dik tak a ni tih an hre ta em ni le?

²⁷Mahse, keini chuan hê mi hi a pianna chin lam kan hria a; Krista lo lan hunah chuan, tûma’n a pianna chin an hre lo vang,” an ti a.

²⁸Tempula a zirtîr laiin Isua chuan ring takin, “Nangnin mi hria e, ka pianna chin pawh in hria e; nimahsela, keima thua lo kal ka ni lo, mi tîrtu hi mi takzet a ni, ani chu in hre si lo.

²⁹Kei erawh chuan amah chu ka hria; a hnên aţanga lo chhuak ka ni a, ani chu kei mi tîrtu a ni,” a ti a.

³⁰Chuvâng chuan amah chu man an tum a, mahse kutthlâk tûra che chhuak tûmah an awm leh si lo va, a hun a la thlen loh vâng a ni a.

³¹Mipui zînga tam takin amah chu an ring a, “Krista lo kal hunah pawh hê miin chhinchhiahna a tih bâk hi a rawn ti dâwn em ni?” an ti a ni.

ISUA LEH SAKHAW HRUAITUTE

³²Ama chung a mipui phun rûkna thûte chu Pharisaite an lo hria a; tichuan Pharisaite leh puithiam lalte chuan amah man tûrin vêngtute an tîr ta a.

³³Isuan an hnênah, “Rei lo tê in hnênah ka la awm rih ang a, chumi hnûah chuan mi tîrtu hnênah ka kal tawh ang.

³⁴Nangnin mi zawng ang a, mi hmu lo vang; ka awmnaah pawh in lo kal thei lo vang,” a ti a.

³⁵Judahote chu an inbia a, “Kan hmuh loh tûrin hê mi hi khawi lama kal nge a tum? Grik mite zînga Pêmdarhho hnêna kalin Grik mite a va zirtîr dâwn em ni ang?

³⁶Nangnin mi zawng ang a, mi hmu lo vang a; ka awmnaah pawh in lo kal thei lo vang,’ a tih hi, eng a tihna nge ni le?” an ti a.

THLARAU THIANGHLIM PEK TIAM

³⁷Kût ni hnuhnung ber, a ni ropui berah chuan Isua chu a dîng a, a âu va, “Tuihâl apiang ka hnênah lo kal sela, rawn in rawh se.

³⁸Tûpawh mi ring chu, Pathian Lehkha sawi angin, a chhûng lam aţangin tui nung luite a lo luang chhuak ang,” a ti a.

³⁹Chû thû chu amah ringtuten Thlarau an neih tûr thû a sawina a ni; Thlarau Thianghlim chu pêk a la ni rih lo, Isua chu châwimâwia a la awm rih loh avângin.

TU NGE A NIH?

⁴⁰Chutichuan, mipui zînga tam takin chûng thû chu an lo hriatin, “Dik takin hê mi hi Zâwlnei a ni ngei mai,” an ti a.

⁴¹Mi dangte chuan, “Hei hi Krista chu a ni,” an ti a. ðhenkhat erawh chuan, “Krista chu Galili ram aţangin a lo chhuak ang maw?

⁴²Krista chu Davida thlah aţangin, Davida khua Bethlehem aţanga lo chhuak tûr a ni tih Pathian Lehkha a sawi lo vem ni?” an ti a.

⁴³Tichuan, amah avângin mipui zîngah inðhenna a lo awm ta a.

⁴⁴ðhenkhat chuan man an duh a, mahse tûma’n a chungah kut an thlâk si lo.

THUNEITUTEN AN HNÂWL

⁴⁵Vêngtu sipaite chu puithiam lalte leh Pharisaite hnênah an lo kîr leh a; anni chuan, “Engah nge in rawn man loh?” an lo ti a.

⁴⁶Vêngtu sipaite chuan, “Hê pa ang rêng hian tûma’n thû an la sawi ngai lo,” tiin an chhâng a.

⁴⁷Pharisaite chuan an hnênah, “Nangni pawh a lo bum ve che u elo?

⁴⁸Hotute leh Pharisaite zîngah hê pa ring hi an awm rêng rêng em ni?

⁴⁹Hêng mipui lungmâwl, dân pawh hre lo-ho hi ânchedawng lek an nih hi,” an ti a.

⁵⁰Nikodema (zâna Isua hnêna lo kal, an zînga tel ve) chuan an hnênah,

⁵¹“Ama kê ngei aţanga eng mi nge a niha, eng thil ti nge ni tih hriat a nih hmâin kan dânin mi thiam loh a chantîr ngai em ni?” a ti a.

⁵²Ani chu an chhâng a, “Nang pawh chu Galili mi i ni ve elo? Zawng la, hawi vêl teh, Galili ram aţangin zâwlnei chhuak tûr tûmah an awm lo ve,” an ti a.

⁵³Tichuan, mi tin mahni in lamah ðheuh an haw ta a.

BUNG 8

UIRE NU-IN ISUA A HMACHHAWN

¹Isua chu Oliv tlângah chuan a va kal a.

²Zîng lam hmâ takah tempulah chuan a lo kîr leh a, a hnênah mi zawng zawng an lo kal khâwm a; ani chu a ðhû a, anmahni a zirtîr a.

³Chutih lai chuan dân zirtîrtute leh Pharisaite hmeichhe pakhat a uirê lai an man an rawn hrui a. A laiah chuan an dintîr a,

⁴Isua hnênah, “Zirtîrtu, hê hmeichhia hi a uirê lai an man a ni, a uirê lai takin.

⁵Mosian Dân Lehkhabûah hetiang mi hi lunga den hlum thû min pê a. Nangin engtin nge i ngaih ve le?” an ti a.

⁶Chû chu amah fiah nân leh, amah hêkna tûr an hmuh theih nâna ti an ni. Isua chu a kûn tlat a, an thu sawi hre lo ang maiin leiah chuan a kut zungţangin thil a ziaak a.

⁷Anni chuan an zâwt sek sek a; tichuan, ani chu a lo dîng chhuak a, an hnênah, “In zînga sual nei lo apiangin, amah chu lungin dêng hmasa rawh se,” a ti ta a.

⁸Ani chu a kûn leh a, a kut zungţangin lei a thai leh a.

⁹A thu sawi hriate chuan inthiam lohna rilru an lo nei ta a, a upa ber aţanga ţanin a tâwp thlengin pakhat khatin an relhru bo

vek a. Isua chauh chu hnutchhiain a awm ta a, a laia hmeichhia la ding reng nèn khân.

¹⁰Isua chu a lo ding chhuak leh a, chû hmeichhia chauh chu a rawn hmu a, a hnênah, “Hmeichhia, nangmah hêktute kha khaw nge an awm zawh tâk? Tûman thiam loh an chantîr na che nge?” a ti a.

¹¹Ani chuan, “Chantîr lo, Lalpa,” a ti a. Isuan, “Kei pawhin thiam loh ka chantîr lo va che; kal la, tûn hnûah tisual leh tawh suh,” a ti a.

¹²Chumi hnû chuan Isuan an hnênah thû a sawi leh a, “Keimah hi khawvêl êng ka ni; tûpawh mi zui chu thimah a lêng tawh lo vang a, nunna êng a nei zâwk ang,” a ti a.

ISUAN AMA CHANCHIN A HRIATTIR

¹³Chutichuan, Pharisaiten a hnênah, “Mahni thu hriattîr mai i ni a; i thu hriattîr hi a dik lo ve,” an ti a.

¹⁴Isuan anni chu a chhâng a, “Mahni thû hriattîr mah ila, ka thu hriattîr hi a dik a ni; khawi aţanga lo kal nge ka niha, khawiah nge ka kal leh dâwn tih pawh ka hria; mahse, nangni chuan ka lo chhuahna leh ka kalna tûr chin in hre lo.

¹⁵Nangni chuan tîsâ takin ro in rêl a; kei chuan tû chungthû mah ka rêl ve lo.

¹⁶Kei hian rorêl ve pawh ni ila, ka rorêlna chu a dik ngei ang; mahnia maltlat mai ka ni lo, mi tîrtu Pa nêna awm kan ni asin.

¹⁷In dân Lehkhabûah pawh mi pahni thû chu a dik e, tih ziaik a nih kha.

¹⁸Kei hi mahni thu hriattîrtu ka ni a, Pa mi tîrtu chuan ka thû a hriattîr ve bawh asin,” a ti a.

¹⁹Anniho chuan, “I Pa chu khawiah nge?” an ti a. Isuan a chhâng a, “Nangnin kei min hre lo va, ka Pa pawh in hre hek lo. Kei mi hria ni ula, ka Pa pawh in hre tûr,” a ti a.

²⁰Isuan an hnênah chûng thû chu tempula thawhlâwm dahna hmunah zirtîr pahin a sawi a; a hun a la thlen loh avângin amah chu tûma’n an man si lo.

ISUAN A KAL BO TUR A SAWI LÂWM

²¹Isuan an hnênah a sawi leh a, “Ka kal bo dâwn a, nangnin mi zawng ang a, in sualnaah chuan in thi ang. Ka kalna tûrah pawh in lo kal thei hek lo vang,” a ti a.

²²Judate chuan, “Intihhlum a tum em ni? ‘Ka kalna tûrah in kal thei lo vang,’ a ti si a?” an ti a.

²³Ani chuan an hnênah, “Nangni hnuai lama chhuak in ni a; kei zawng chung lama chhuak ka ni. Nangni khawvêl mi in ni a; kei chu hê khawvêl mi hi ka ni lo.

²⁴Chuvâng chuan a ni in hnênah, ‘In sualnaah chuan in thi ang’ ka tih kha; ‘Kei hi Amah chu ka ni,’ tia ka sawi pawh in âwih loh chuan in sualnaah chuan in thi mawlh ang,” a ti a.

²⁵Anni chuan a hnênah, “A nih leh tu nge maw i nih le?” an ti a. Isuan an hnênah, “Chû tak chu a ni a bul aţanga in hnêna ka sawi fo thîn chu ni.

²⁶In chungchâng thûah hian sawi tûr leh rêlsak tûr che u tam tak ka nei; engpawh ni se mi tîrtu chu mi dik tak a ni a; a hnêna

thû ka hriat apiang khawvêl hnênah ka hriattîr thîn a ni,” a ti a.

²⁷An hnênah Pa chungchâng thû a sawi tih reng an hre chhuak zo si lo.

²⁸Isuan an hnênah, “Mihring Fapa in khaikân hnûah, Kei hi Amah chu ka ni tih leh, mahni thûin thil engmah ka ti lo va, Pain mi hrihl ang zêlin hêng thû hi ka sawi zâwk a ni tih in la hria ang.

²⁹Mi tîrtu chu ka hnênah a awm. Pa chuan min thlahthlam si lo, ama lâwm zâwng ka tih thîn avângin,” a ti a.

³⁰Chûng thû a sawi aţang chuan mi tam takin amah chu an ring ta a.

THUTAKIN A TIZALEN ANG CHE U

³¹Isuan amah ringtu Judate hnênah chuan, “Ka thûa in awm reng chuan ka zirtîr dik tak in ni ang.

³²Thutak in hria ang a, thutak chuan a chhuah zalên ang che u,” a ti a.

³³Anni chuan a hnênah, “Abrahama thlahte kan ni asin, tûn thlengin tû bâwihah mah kan la awm ngai lo, chuvângin ‘A chhuah zalên ang che u,’ i ti kha eng i tihna nge?” an ti a.

³⁴Isuan a chhâng a, “Tîhtak zetin ka hrihl a che u, tûpawh thil sual ti apiang sual bâwih a ni.

³⁵Bâwih chu kumkhuain inah a awm reng lo; Fapa erawh chu kumkhuain a awm reng thîn.

³⁶Tichuan, Fapain a tihzalen che u chuan zalên dik tak in ni ang.

ABRAHAMA CHI LEH SETANA CHI

³⁷“Abrahama thlahte in ni tih ka hria e; nimahsela mi thah in tum tlat si a, ka thû hian nangmahniâh hmun a chan loh vâng a ni e.

³⁸Ka Pa hnêna thil ka hmuh chu ka sawi thîn; nangni pawhin in pate hnêna in hriat te chu in tih thîn hi,” a ti a.

³⁹Anni chuan a hnênah, “Kan pa chu Abrahama a ni,” tiin an chhâng a. Isuan an hnênah, “Abrahama fate in nih chuan Abrahama hnâ thawk tûr in ni asin.

⁴⁰Pathian hnên aţanga ka dawn thutak ka hrihl che u a, nangni chuan mi thah in tum si a. Abrahama chuan hetiangin a ti ve lo vang.

⁴¹Nangni zawngin in pa tihdânin in ti thîn a nih hi,” a ti a. Anni chuan, “Sâwn kan ni lo va; Pa Pathian pakhat nei kan ni,” an ti a.

⁴²Isuan an hnênah, “Pathian hi in Pa a nih tak tak chuan kei pawh min hmangaih ang chu; Pathian hnêna chhuak leh a hnên aţanga lo kal ka ni si a; mahni thua lo kal ni lovin Ama mi tîrh ka ni zâwk si a.

⁴³Engati nge ka thu sawi awmzia in hriat thiam theih loh? Ka thu hi in man thiam thei ngang lo a nih hi.

⁴⁴Nangni zawng in pa Diabola tâ in ni a, in pa duh zâwng a ni tih in duh ni. Ani chu atîr aţang rênga tualthat a ni, thutakah a awm lo, amahah thu tak rêng a awm loh vâng a ni. Dâwtthû a sawiin ama phuachhawp a sawi thîn; dawthei a ni a, dâwt pâ pawh a ni.

⁴⁵Kei erawh chuan thutak ka sawi avângin nangnin mi ring thei lo a nih hi.

⁴⁶In zingah tu nge ka thiam lohna hria? Thutak ka sawi pawhin engati nge min rin loh le?

⁴⁷Pathian mi chuan Pathian thú a ngaithla thîn; nangni erawh chu Pathian mi in nih loh avângin ka thú pawh in ngaithla thei lo a nih hi,” a ti a.

ABRAHAMA AWM HMAA MI KHA 'KEIMAH'

⁴⁸Judate chuan a hnênah, “Samari mi, ramhuai zâwl tia kan sawi che kha kan tidik ngawt lo maw?” tiin an chhâng a.

⁴⁹Isuan, “Ramhuai zâwl ka ni lo ve; min puh chhe hlê mai maw; mahse kei chuan ka Pa a ni ka châwimâwi ni.

⁵⁰Keima mâwina tûr zawng pawh ka ni lo; mi zawnsaktu leh rêlsaktu Mi Pakhat a awm zâwk a ni.

⁵¹Tihtak zetin ka hrilh a che u, miin ka thú a zawm chuan thihna hmêl a hmu ngai lo vang,” a ti a.

⁵²Judaten a hnênah, “Ramhuai zâwl i ni tih tûnah kan hre ta! Abraham a thi tawh, zâwlneite pawh; nang erawh chuan, ‘Miin ka thú a zawm chuan thihna a tem ngai lo vang,’ i ti si a.

⁵³Kan thlahtu Abraham a, thi tawh ai khân i ropui zâwk em ni? Zâwlneite pawh an thi tawh bawk. A tû ber chu nge nia i inhriat vê le?” an ti a.

⁵⁴Isuan a chhâng a, “Mahni inchâwimâwi ila, ka mâwina chu engmah a ni lo vang. ‘Kan Pathian’ in tih, ka Pa chu mi châwimâwitu a ni asin;

⁵⁵Nangni erawh chuan amah in hre si lo; kei chuan amah chu ka hria; ‘Amah ka hre lo,’ ti ila, nangmahni ang maia dawthei ka ni ang; nimahsela, kei chuan amah chu ka hria a, a thu pawh ka zâwm thîn.

⁵⁶In thlahtu Abraham a kha, ka ni hmu tûr a nih avângin a hlim êm êm thîn a, a hmu ta ngei a, a lâwm rêng bawk a,” a ti a.

⁵⁷Judate chuan a hnênah, “Nang kum sawmngâ êm pawh la tling lo hian Abraham a i hmu a mâw?” an ti a.

⁵⁸Isuan an hnênah, “Tih tak zetin ka hrilh a che u, Abraham a awm hmâ pawh khân KEIMAH-A chu ka ni e,” a ti a.

⁵⁹Chû vêleh amah denna tûr lung an lâ a; nimahsela, Isua chu a biru a, tempul ațangan mipui kârah a pût chhuak daih a.

BUNG 9

PIANTIRH AțANGA MITDEL MIT TIHVÂR

¹Chutia a kal pah chuan Isuan pa pakhat mitdel sâa piang hi a hmu a.

²A zirtîrte chuan a hnênah, “Rabbi, mitdel sâa piang hi tû sual vâng nge, amah hi nge a nu leh a pa?” tiin an zâwt a.

³Isuan, “Hê mi sual vâng hi a ni lo va, a nu leh a pa sual vâng a ni hek lo; amaha Pathian hnathawh lo lanna tûr a ni zâwk e.

⁴Chhûn a nih laiin mi tîrtu hnâ ka thawk tûr a ni; zân a lo thleng dâwn, chutih hunah chuan tûma’n an thawk thei tawh lo vang.

⁵Khawvêla ka awm chhûngin khawvêl êng chu Keimah hi ka ni,” tiin a chhâng a.

⁶Chutia a sawi zawh chuan leiah chil a chhâk a, chû chuan hlum a siam a, hlum chu a mitah a hnawih a.

⁷A hnênah, “Siloam dîlah va sil rawh,” a ti a (Siloam chu “Tirh” tihna a ni). Tichuan a va kal a, a sil a, mitvârin a lo kîr leh ta a.

⁸Tichuan, a thenawm leh tûn hmâ zawnga kutdawha hmu thînten, “Hê mi hi kutdawha thu thîna kha a ni lo vem ni?” an ti a.

⁹Thenkhatin, “Amah ngei kha a nih hi,” an ti a. Mi dangin, “Ama anpui a ni zâwk ang,” an ti a. Ani chuan “Khâmi ngei kha ka ni e,” a ti a.

¹⁰Mite chuan a hnênah, “I mit chu engtin nge a lo vâv tâk?” an ti a.

¹¹Ani chuan a chhâng a, “Mi pakhat Isua an tih khân hlum a siam a, ka mitah a hnawih a, ‘Siloam dîlah va kal la, va sil rawh,’ a ti a. Tichuan, ka va kal a, ka sil a, ka mit a lo vâv ta a ni,” a ti a.

¹²Anni chuan a hnênah, “Amah chu khawiah nge a awm?” an ti a. Ani chuan, “Ka hre lo,” a ti a.

PHARISAITEN TIHDAMA CHU AN HNAWT CHHUAK

¹³Mitdel thîna chu Pharisaite hnênah an va hruai a.

¹⁴Isuan hlum siama a mit a tihvâr ni kha Sabbath ni a lo ni kher si a.

¹⁵Pharisaite pawh chuan a mit lo vâv tâk dân chu an zâwt leh a. Ani chuan, “Ka mitah hlum a bel a, ka sil a, ka hmu thei ta mai a ni,” a ti a.

¹⁶Pharisaite thenkhat chuan, “Hê mihring hian Sabbath ni pawh a serh loh avângin Pathiana chhuak a ni thei lo vang,” an ti a. Mi dangin, “Misualin engtin nge hetiang chhinchhiahna a tih theih ang?” an ti thung a. An zingah chuan inthenna a lo awm ta a.

¹⁷Mitdel hnênah chuan, “I mit a tihvâr chungchângah nang eng angin nge amah chu i ngai?” an ti leh a. Ani chuan, “Zâwlnei a ni,” a ti a.

¹⁸Mahse, Judate chuan mit lo vâv tâa nu leh pate an koh hmâ chuan mitdel a lo ni thîn a, a mit a lo vâv ta tih pawh an âwihsak duh lo va.

¹⁹A nu leh a pa hnênah chuan, “Hê mi hi in fapa, mitdel sâa piang in tih kha a ni em? Engtiang takin nge tûnah a lo hmuh theih tâk?” tiin an zâwt a.

²⁰A nu leh a pa chuan an chhâng a, “Hei hi kan fapa a ni a, mitdel sâa piang a ni tih kan hria;

²¹tûnah hian engtianga lo hmu leh thei tâ nge a nih kan hre lo, a mit tivârtu pawh kan hre hek lo. Patling a ni alâwm, amah zâwt rawh u. Ama’n sawi ang hmiang,” an ti a.

²²Juda hotute an hlauih avângin a nu leh a pa chuan chuti zâwn chuan an sawi a ni; a chhan chu, Juda hotuten Krista a ni tia tântu apiang chu biak in ațanga hnawh chhuah tûr tih an lo rêl vek tawh si a.

²³Chuvâng chuan a ni a nu leh a pain, “Patling a ni alâwm, amah zâwt rawh u,” an tih ni.

²⁴Chutichuan, mitdela chu an ko nawn leh a, a hnênah, “Pathian fak mai rawh! Hê pa hi zawng mi sual a ni tih kan hria e,” an ti a.

²⁵Ani chuan, “Mi sual a ni nge ni lo ka hre lo. Thil pakhat ka hria: tân hma khân ka mit a del thîn a, tunah chuan ka hmu thei ta,” tiin a chhâng a.

²⁶Anni chuan a hnênah, “I chungah engtin nge a tih? I mit engtin nge a tihvâr?” an ti a.

²⁷Ani chuan an hnênah, “Ka hrilh tawh che u kha, in ngaithla duh si lo. Engati nge in hriat duh leh tâk? Nangni pawh a zirtîr nih ve in duh elo?” tiin a chhâng a.

²⁸Anniho erawh chuan amah chu an hau nek a, “Nang hi ama zirtîr i ni a, keini zawng Mosia zirtîrte kan ni asin.

²⁹Pathianin Mosia a bia tih kan hria, hê pâ vê hi khawi lam mi nge a nih kan hre nek lo ve,” an ti a.

³⁰Ani chuan, “Chû tak chu a ni, a makna chu, khawi lam chhuak nge tih in hriat lohva chuan ka mit a tivâr miau si â!

³¹Pathianin misual thû a ngaithla lo tih kan hria; mahse mi tûpawhin Pathian a ngaihsak a, a duh zâwng a tih chuan, ani chuan a lo ngaithla thîn.

³²Khawvêl awm tîrh ata mitdel sâa piang mit an tihvâr leh thu hriat a ni ngai lo.

³³Hê mi hi Pathian aţanga chhuak a nih loh chuan engmah a ti thei lo vang,” tiin a chhâng a.

³⁴Anni chuan a hnênah, “Nang sual hlâwma lo piang hian mi i zirtîr tehlu ang maw?” an ti a. Tichuan, an hnawt chhuak ta a.

³⁵An hnawt chhuak ta tih Isuan a lo hriat chuan, a zawng chhuak a, a hnênah, “Pathian Fapa i ring em?” a ti a.

³⁶Ani chuan, “Amah chu ka rin theih nân, tu nge a nih le, Lalpa?” a ti a.

³⁷Isuan a hnênah, “Amah chu hei, i hmuh reng hi, nangmah betu che hi a ni e,” a ti a.

³⁸Ani chuan, “Lalpa, ka ring e!” a ti a. Chibai a bûk a.

³⁹Isuan, “Hê khawvêlah hian rorêl tûra lo kal ka ni, mitdelte chu an mit a lo vârna tûr leh, mitvârte chu an mit a lo delna tûrin,” a ti a.

⁴⁰A bul vêla Pharisai awmte chuan chû chu an hriatin a hnênah, “Keini pawh mitdel kan ni ve elo?” an ti a.

⁴¹Isuan an hnênah, “Mittel in nih chuan sual in nei lo vang; mahse tûnah ‘Kan hmu thei e,’ in ti si a. Chuvângin in sualna chu a awm reng a ni.

BUNG 10

ISUA BERAMPU TAK TAK

¹“Tihtak zetin ka hrilh a che u, tûpawh berâm huang kawngkâa lût lova hmun danga lâwn lût chu, chû mi chu rûkrû leh suamhmang a ni e.

²Tûpawh kawngkâa lût erawh chu berâm vêngtû a ni.

³Ani chu kawngka vêngtuin a lo hawnsak thîn a; berâmten a âw an hre thîn; ama berâmte chu an hmingin a ko theuh va, a hruai

chhuak thîn.

⁴A berâmte a hruai chhuak a, an hma hruaiin, berâmte chuan amah chu an zui thîn, a âw an hre si a.

⁵Hmêl hriat loh chu an zui tawp lo vang a, an tlân bosan zâwk ang; hmêl hriat loh âw chu hriat pawh an hre dâwn si lo,” a ti a.

⁶Isuan hê entîrna thû hi a hmang a, mahse eng thû nge a sawi tih erawh chu an hre thiam si lo va.

ISUA BERAMPU ȚA

⁷Isuan an hnênah a sawi leh a, “Tihtak zetin ka hrilh a che u, Keimah hi berâm kawngkâ chu ka ni.

⁸Ka hmâa lo kal zawng zawngte kha rûkrûte, suamhmangte an ni vek a; chuvângin berâmte chuan an ngaithla lo rêng a ni.

⁹Keimah hi kawngkâ chu ka ni. Mi tûpawh keimahah a luh chuan chhandamin a awm ang; tichuan a lûtin a chhuak ang a, ei tûr a hmu baw ang.

¹⁰Rûkrû chu ru tûr leh tihlum tûr leh tichhe tûr lo chuan a lo kal lo. Kei zawng nun an neiha, chhenfâkawm taka an neih theih nâna lo kal ka ni.

¹¹Kei hi Berâmpu Ța ka ni. Berâmpu Ța chuan a berâmte tân a nunna a pê.

¹²Inhlawhfâ, berâmpu tak tak pawh ni lo, berâm neitu pawh ni lo chuan chinghne lo kal a hmuhin berâmte a tlânsan thîn; tichuan, chinghnia chuan berâmte a seh a, an tlân darh thîn.

¹³Inhlawhfa mai a ni a, inhlawhfa chuan berâmte chu ngaihsak lovin a tlân bosan thîn.

¹⁴Keimah hi Berâmpu Ța chu ka ni; ka berâmte chu ka hria a, ka berâmte pawhin min hria a ni.

¹⁵Pain mi hriat angin, kei pawhin Pa chu ka hria; berâmte tân ka nun ka hlân ta.

¹⁶Hê berâm huanga mi lo hi, berâm dang ka nei; anni pawh ka la rawn hruai tûr an ni, ka âw pawh an hria ang; chutichuan, Berâmpu pakhat nêh huang khatah an lâwi zâ tawh ang.

¹⁷Chuvângin, ka nunna hi ka lâlê leh tûra ka hlan avângin ka Pa chuan mi hmangaih a ni.

¹⁸Tûma’n mi lâksak lo vang, keima thu ngeia hlân ka ni zâwk. Pe thei ka ni a, la lêt leh thei pawh ka ni. Hê thupêk hi ka Pa hnên aţanga ka dawn a ni si a,” a ti a.

¹⁹Tichuan, chûng thu sawite avâng chuan Judate zîngah inţhenna a lo awm leh a.

²⁰Mi tam tak chuan, “Ramhuai a zâwl a, a â ta a nih hi. Engati nge a thû pawh in ngaihtlâk ni?” an ti a.

²¹Mi dangin, “Hêng thûte hi ramhuai zâwl thusawi a ni awzâwng lo ve. Ramhuaiin mitdel mit a tivâr thei em ni?” an ti a.

BERAMPUIN A BERAMTE A HRIA

²²Jerusalemah chuan Hlantharlehna Kût lai a ni a, chû chu thlasik lai a ni.

²³Isua chu tempul chhûnga Solomona hulhliapah a vei kual a.

²⁴Judate chuan an rawn hual tuau tuau va, a hnênah, “Eng chen nge tuilairapin min awmtîr dâwn? Krista i nih chuan min

hrilh Chiang mai rawh,” an ti a.

²⁵Isuan an hnênah, “Ka hrilh tawh che u kha, in âwih si lo; ka Pa hminga ka hnathawhte hian ka chanchin an hriattîr asin.

²⁶Mahse, in âwih si lo, ka hrilh tawh che u angin ka berâm in nih ve loh vâng a ni.

²⁷Ka berâmte chuan ka âw an hre thîn, kei pawhin an âw ka hria a, min zui thîn a ni.

²⁸An hnênah chatuana nunna ka pê a; an boral leh tawh ngai lo vang a; ka kut aṭangin tûma’n mi chhuhsak lo vang.

²⁹Anniho mi petu ka Pa chu mi zawng zawng aiin a ropui zâwk a; chuvângin tûma’n ka Pa kut aṭang chuan an chhuhsak thei lo vang.

³⁰Kei leh ka Pa chu pakhat* kan ni,” a ti a.

ISUA LUNGA DEN AN TUM LEH

³¹Judate chuan a denna tûrin lung an chhar leh a.

³²Isuan anni chu a bia a, “Paa chhuak hnathawh thâ tam tak ka entîr tawh che u kha. Khâng hnathawhte zîngah khân a eng vâng ber chuan nge lunga mi den in tum?” a ti a.

³³Judate chuan, “Hnathawh ṭha avângin lungin kan deng dâwn lo che; Pathian sawi chhiain nang mihring ve mai ni si, Pathiana i insiam chawp avâng zâwkin kan deng dâwn che,” tiin an chhâng a.

³⁴Isuan an hnênah, “In Dân Bû-ah ‘pathiante in ni, ka ti,’ tih ziaak a ni lo vem ni?”

³⁵Pathian thu thlennate mah pathiante an tih chuan (Pathian Lehkha Thu lah chu hnâwl theih rual a ni si lo va),

³⁶Pain a serhhran leh khawvêla arawn tirha hian ‘Keimah hi Pathian Fapa ka ni,’ ka tih avângin, ‘Pathian i sawi chhia,’ in ti maw?

³⁷Ka Pa hnâ thawk ka nih loh chuan mi ring suh u;

³⁸mahse ka thawk anih si chuan, kei mi ring lo mah ula, hnathawhte tal hi ring rawh u; Pa keimahah a awm tih leh, kei Paah ka awm tih in hriata in rin nân,” tiin a chhâng a.

³⁹Chuvângin, ani chu man an tum leh a, mahse an kut ata chu a relh bo daih a.

JORDAN RÂLA RINGTUTE

⁴⁰Jordan lui râlah, a tîra Johanan baptisma a chantîrna lamah khân a kal ta daih a, chutah chuan a va awm ta reng a.

⁴¹A hnênah chuan mi tam tak an va kal a; “Johanan chhinchhiahna engmah a ti lo nân, hê Mi chungchâng Johanan a lo sawi lâwk zawng zawng kha a dik vek a ni,” an ti a.

⁴²Chutah chuan mi tam takin amah chu an ring ta a.

BUNG 11

LAZARA THIH THU

¹Mari leh a laizâwn Marthi te awmna khua Bethani-ah chuan damlo mi pakhat Lazara a awm a.

²Chû damlo Lazara chu Mari nuṭa a ni a, Mari chu hmana Lalpa kea hriak rimtui chulha, a sama hrûksaktu kha a ni.

³Tichuan, a farnute chuan Isua hnênah, “Hei le Lalpa, i hmangaih kha a dam lo ve,” tia hrilh tûrin mi an tîr a.

⁴Isuan a lo hriat chuan, “Hê natna hi thihna tûr a ni lo, Pathian ropuina tûr a ni zâwk, Pathian Fapa chu hê mi avâng a châwimâwia a awm theihna tûr a ni e,” a ti a.

⁵Isuan Marthi te, a laizâwn te, Lazara te chu a lainat hlê a.

⁶Tichuan, a dam lo tih a hriat hnûah pawh a awmna ngaiah chuan ni hnih a la châm ta cheu va.

⁷Chumi hnûah chuan a zirtîrte hnênah, “Judai ramah i va kal leh ang u,” a ti a.

⁸Zirtîrte chuan, “Rabbi, hmân ni lawkah Judaten lunga den an tum che a; i kal leh tho dâwn em ni?” an ti a.

⁹Isuan a chhâng a, “Ni khatah dârkâr sâwmpahnih chhûng khua a êng lo vem ni? Chhûn ênga mi a lèn chuan, a petek lo va, hê khaw êngah hian a hmuh theih avangin.

¹⁰Zâna mi a lèn erawh chuan a petek thîn, amahah êng a awm loh avângin,” a ti a.

¹¹Chûng thû chu a sawi zawhin an hnênah, “Kan ṭhian Lazara chu a muhîl ta a, a muhîl kai harh tûrin ka kal dâwn a ni,” a ti a.

¹²A zirtîrte chuan, “Lalpa, a muthilh theih zawngin a dam ṭha leh mai ang chu,” an ti a.

¹³Nimahsela, Isuan a thih thû a sawi a ni si a; anniho erawh chuan a mut hahchawlh chungchâng sawiah an lo ngai a.

¹⁴Chuvângin, fiah takin Isuan, “Lazara a thi ta a nih chu.

¹⁵In rin theih nâna chuta ka awm lo hlauh chu nangni avâng pawhin ka lâwm a ni. Engpawh ni se, a hnênah chuan i va kal ang u,” a ti a.

¹⁶Thoma, Phîra an tih chuan a zirtîrpuite hnênah, “A ruala kan thih ve theih nân i va kal teh tak ang u hmiang,” a ti a.

KEIMAH HI THAWHLEHNA LEH NUNNA

¹⁷Chutia Isua a va thlen chuan thlânah ni lî a lo awm hman tawh a.

¹⁸Bethani khua chu Jerusalem kiang lawk, mêl hnih* vêla hla a ni.

¹⁹An nuṭa awm ta lo khawhar lenpuuin Mari leh Marthii te chu hmeichhe tam takin an lo la ṭhutpui a.

²⁰Isua a lo thleng dâwn tih a hriat veleth Marthii chu hmuak tûrin a kal vat a; Mari erawh chu inah a la ṭhu reng a.

²¹Marthii chuan Isua hnênah, “Lalpa, heta awm ni la chu ka nuṭa a thi lo tûr.

²²Tûnah pawh Pathian hnêna i ngen apiang Pathianin a pê ang che tih ka hria,” a ti a.

²³Isuan a hnênah, “I nuṭa chu a tho leh ang,” a ti a.

²⁴Marthi chuan, “Nikin nîa thawhlehaah chuan a tho leh ang tih ka hria e,” a ti a.

²⁵Isuan a hnênah, “Keimah hi thawhlehaah leh nunna chu ka ni. Tûpawh Kei mi ring chu thi mah sela a nung leh ang.

²⁶Tûpawh nung a, Kei mi ring apiang chu a thi leh tawh ngai lo vâng. Hê thû hi i ring em?” a ti a.

²⁷Ani chuan a hnênah, “Ring e Lalpa, khawvêla lo kal tûr Krista, Pathian Fapa chu i ni tih ka ring e,” a ti a.

ISUA LEH THIHNA, HMÊLMA HNUHNUNG

²⁸Chû thû a sawi zawh chuan a kal sawn a, a laizâwn Mari chu a rûkin a va ko va, “Zirtîrtu a lo thleng tawh a, a ko che asin,” a va ti a.

²⁹A hriat vêleh ani chu a tho thuai a, a hnênah chuan a va kal ta a.

³⁰Isua chu khuaah chuan a la lût lo va, Marthiin a va hmuahna hmunah khân a la awm reng a.

³¹An khawhar hnêm tûra inchnhûnga amah lo awmpuitu Judate chuan Mari tho ta vut mai leh, pâwna a kal chhuak an hmuh chuan, “Thlânah ãap tûrin a kal dâwn a nih saw,” tiin an ûmzui a.

³²Mari chuan Isua awmna a va thlena a va hmuh chuan a ke bulah a bawkkhup a, a hnênah, “Lalpa, heta awm ni la chu, ka nuãa a thi lo tûr,” a ti a.

³³Isuan Mari ãap leh a rawn zuitu Judate ãap chu a hmu a, a thlarau chu lungngaiin a rûm a.

³⁴“Ani chu khawiah nge in zalh?” a ti a. Anni chuan, “Lalpa, lo kal la, en teh,” an ti a.

³⁵Isua chu a ãap ta a.

³⁶Judate chuan, “En teh u, a lo va hmangaih êm ve le!” an ti a.

³⁷Mi ãhenkhat chuan, “Hê mê, mitdel mit pawh tivârtu hian hê mi pawh hi a thih lohtîr thei lo vem ni?” an ti a.

THIHNA ATA LAZARA KAIH THAWH

³⁸Isua chu a rûm vawng vawng a, thlân chu a thleng ta a. Pûk a ni a, lungin an chhîn a.

³⁹Isuan, “Lung hi châwi sawn rawh u,” a ti a. A thia farnu Marthi chuan a hnênah, “Lalpa, tûnah zawng a rimchhe tawh ang, ni lî lai liam tawha thi a ni si a,” a ti a.

⁴⁰Isuan a hnênah, “I rin chuan Pathian ropuina i hmu ang, ka ti lo che em ni?” a ti a.

⁴¹Tichuan, mitthi ruang dahna pûk chhinna lung chu an châwi sawn a. Isua chu a vanvadâk a, “Ka Pa, ka thû i ngaihthlâk ãhin avângin i chungah ka lâwm e.

⁴²Ka thû i ngaihthla fo ãhin tih ka hria e; chuvângin, hêng mipui ding hote avângin hei hi ka sawi a ni, nanging mi tîr tih an rin theih nân,” a ti a.

⁴³Chûng thû a sawi zawh chuan, ring takin, “Lazar, lo chhuak rawh!” tiin a âu va.

⁴⁴Mitthi chu a kut leh a kê thlân puana tuam chungin a lo chhuak ta a, a hmai pawh puana tuam a ni a. Isuan an hnênah, “Phelh ula, kaltîr rawh u,” a ti a.

ISUA THAH TUMA PHIARNA

⁴⁵Mari te lo lûnpuitu, Isua thiltih pawh hmu ve Judate zînga tam takin Isua chu an ring ta a.

⁴⁶Mi ãhenkhat erawh chu Pharisaite hnênah an kal a, Isua thiltihte chu an va hrilh a.

⁴⁷Chutichuan, puithiam lalte leh Pharisaite chuan rorêltuho an ko khâwm a, “Engtin nge kan tih tâk ang? Hê mi hian chhinchhiahna tam tak a ti tawh si a.

⁴⁸Hetia kan thlahthlam reng chuan mi zawng zawngin amah an ring mai ang; tichuan Rom mite an lo kal ang a, kan ram leh hnam hi min chhuhsak mai dâwn asin,” an ti a.

⁴⁹An zînga mi pakhat Kaiapha, chu mi kuma puithiam lalber chuan an hnênah, “Engmah in hre lo ve,

⁵⁰kan hnam pum pui boral lohna tûrin mi zawng zawng thih ai mi pakhat thih kan tân a ãha tih pawh in ngaihtuah bawh hek lo,” a ti a.

⁵¹Chû chu ama thûa sawi mai pawh a ni lo; puithiam lalber a nih kum a ni a, chuvângin an hnam pum aia Isua thih tûr thû a lo sawi lâwk a ni zâwk a;

⁵²chû hnam bik tân chauh pawh a ni lo, Pathian fa khawvêla awm darhho zawng zawng chu pâwl khata a hruai khâwm theihna tûr pawh a ni bawh.

⁵³Tichuan, chumi ni aãang chuan amah tihhlum tumin an phiar ãan ta a.

⁵⁴Chuvângin, Isua chu Judate zîngah ualau takin a lêng chhuak ta lo va, chû hmun aãang chuan thlalêr depa awm Ephraim khua an tihah chuan a kal ta daih a; chutah chuan a zirtîrte nêan an va awm reng a.

⁵⁵Judate Kalhlên Kût chu a hnai tawh a, Kalhlên Kût hmâa inthian tûrin thingtlâng khua aãangin mi tam tak Jerusalemah an lo kal khâwm a.

⁵⁶Isua chu an zawng a, tempul vêla ding khâwmho chuan, “Kûtnaah hian a lo kal lo mai âwm mang e, nangni eng nge in rin dân?” an inti hlawm a.

⁵⁷Puithiam lalte leh Pharisaiten amah chu an man theih nân tûpawh a awmna hria apiang chuan anmahni hnênah an hrilh vat tûr a ni tih thupêk an chhuah tawh si a.

BUNG 12

BETHANI KHUAA HRIAK THIHNA

¹Kalhlên Kûtna tûr ni ruk a la awmin Isuan mitthi a kaihthawh Lazara awmna Bethani khua chu a lo thleng a.

²Tah chuan a tân zanriah an buatsaih a, Marthiin eirawng a bawl a, Lazara erawh chu dawhkâna a chawhlui kîlpuitu pakhatah a ãang a.

³Mari chuan spiknard hriak rimtui to chî litar chanve bûr chu a lâ a, Isua kê a chulh a, a samin a hrûksak leh a; tichuan chu hriak rim chuan in chu a tikhat ta rum rum a.

⁴Nimahsela, Simona fapa Juda Iskariota, a zirtîr pakhat, a mantîrtu tûr chuan,

⁵“Hê hriak rimtui hi engati nge duli zathuma hralhin mi retheite hnêna a pêk zâwk loh?” a ti a.

⁶Mi retheite a ngaihsak vânga chû thû chu sawi a ni lo; rûkrû a ni a, tangka ip a kawh a, a chhûnga mi chu a lâk ãhin vâng zâwk a ni.

⁷Mahse Isuan, “A duh ang takin ti rawh se; kei mi phûm nî atân a lo kawl th̄a a nih hi.

⁸Mi retheite chu kumkhuain in hnêna awm reng an ni alâwm; kei erawh chu in hnêna awm reng tûr ka ni si lo va,” a ti a.

LAZARA TIHLUM TURA PHIARNA

⁹Juda mipui tam takin chutah chuan a awm tih an lo hriatin an rawn pan khawm a; Isua chauh an rawn kal chhan lo va, mitthi tawh hnû a kaihtawh Lazara hmuh an duh vâng a ni bawk a.

¹⁰Puithiam lalte erawh chuan Lazara pawh tihhlum tûrin an phiar tel ta zêl a;

¹¹amah avângin Juda mipui tam takin Isua an ring a, anniho chu an hawisan phah zêl si a.

ROPUI TAKA LAWM LUH

¹²A tûkah chuan mipui tam tak, kûtnaa lo kalte chuan Isua chu Jerusalemah a lo kal dâwn tih an hriatin,

¹³tûmkaute an keng a, a hmuak tûrin an va kal chhuak a, “Hosana! ‘Lalpa hminga lo kal, Israelte Lalber chu fakin awm rawh se!’” tiin an âu va.

¹⁴Isuan sabengtung pa tuai a lo hmuh chuan a chungah a chuang a:

¹⁵“Hlau suh, Zion fanu; En teh, i Lal chu, Sabengtung pa tuai chungah chuangin, A lo kal dâwn e,” tih ziaik ang khân.

¹⁶Chûng thil chu a tîrah a zirtîrten an hre thiam mai lo va; mahse chûng thû chu ziah a lo ni tawhin, a tân chûng thil chu an lo ti ngei tih Isua châwimâwi a nih hnû khân an lo hre chhuak leh ta a ni.

¹⁷Thlân ata Lazara a koh chhuaha, thi tawh hnû a kaihtawh laia a hnêna awm vête khân, a thu hriatpuina hnâ an lo thawk ve zêl bawk a.

¹⁸Chû chhinchhiahna chu a ti ngei tih an lo hriat avângin a ni, mipuite pawhin amah chu an va hmuah ni.

¹⁹Pharisaite chuan anmahniho zîngah chuan, “Eng tihna mah in nih loh hi. En ta che u, khawvêlin amah an zui tâk hi,” an inti rêng a ni.

BUH THAR HLÂWK

²⁰Kûtnaah chuan Pathian chibai bûk tûra pung khâwmte zîngah Grik mi tûte emaw an awm ve a.

²¹Chûng mite chu Philippa, Galili rama Bethsaida khuua mi hnênah an lo kal a, a hnênah, “Ka pu, Isua hmuh kan duh e,” tiin an dîl a.

²²Philipa chuan Andria a rawn hrilh a; Andria leh Philipa te chuan Isua an rawn hrilh leh a.

²³Isuan anni chu a lo chhâng a, “Mihring Fapa châwimâwia a awm hun chu a lo thleng ta e.

²⁴Tihtak zetin ka hrilh a che u, buh fang leia a tlâka, a thih phawt loh chuan a malin a awm reng thîn; a thih erawh chuan tam takin a rah thîn.

²⁵Mahni nun thlahleltu chuan a chên ang a; hê khawvêlah hian mahni nun ngei pawh haw ngam chuan chatuana nunna tûr a

vawng reng ang.

²⁶Mi tûpawhin ka rawng a bâwl chuan mi zui rawh se; ka awmnaah ka rawngbâwltu pawh a awm ve tûr a ni. Mi tûpawhin ka rawng a bâwl chuan ka Pain a châwimâwi ve ang.

ISUAN A THIH TUR THU A SAWI LÂWK

²⁷“Tûnah hian ka chhungril nun hi a lungngai a ni, eng nge ka sawi leh tâk ang le? ‘Ka Pa, hê hun lakah hian mi chhandam rawh,’ ka ti mai dâwn em ni? Mahse hei vâng taka tun hun lo thleng hi ka ni si a.

²⁸Ka Pa, i hming châwimâwi rawh,” a ti a. Vên aţangin âw a lo chhuak a, “Ka châwimâwi tawh a, ka châwimâwi leh zêl ang,” a ti a.

²⁹A kiana ding mipuiten an lo hriatin, ‘khawpui rî a ni,’ an ti a. Mahse mi dangte chuan, “Vântirhkohvin a rawn bia a ni,” an ti thung a.

³⁰Isuan a chhâng a, “Chû âw chu ka tâna lo chhuak a ni lo, nangmahni tâna lo chhuak zâwk a ni.

³¹Tûn hun hi hê khawvêl chungchâng ngaihtuah lai a ni a; tûna hê khawvêl rorêltu hi paih chhuah a ni ang.

³²Kei hi lei aţanga khaikâna ka awm chuan, mi zawng zawng keima hnênah ka hîp ang,” a ti a.

³³Chû thû chu eng ang thihnaa thi tûr nge a nih hriattîr nân a sawi a ni.

³⁴Mipuite chuan a hnênah, “Krista chu chatuana awm reng tûr a ni tih Dân Bû-ah kan hria a; engtin nge ‘Mihring Fapa hi khaikânin a awm tûr a ni,’ tia i sawi theih? Chû Mihring Fapa chu tu nge ni?” tiin an chhâng a.

³⁵Isuan an hnênah, “Êng hi rei lo te chhûng in hnênah a la awm rih e. Êng in neih chhûng hian kal vêl rawh u, chuti lo zawng, thimin a nang dah ang che u; thima mi a kal chuan khawi lam nge a pan dâwn tih pawh a hre si lo va.

³⁶Êng in neih chhûng hian êng hi ring rawh u, êng fate in lo nih theih nân,” a ti a. Chûng thû chu Isuan a sawi a; tichuan a kal sawn a, an hmuh lohvah a bibo ta daih a.

KAN THUSAWI TUIN NGE RING?

³⁷An mithmuhah chhinchhiahna thil mak tak takte ti thîn mah se amah an ring si lo,

³⁸zâwlnei Isaian: “Lalpa, kan thu sawi tûin nge ring? LALPA kut chu tû hnênah nge a lan?” tia a sawi a lo thlenna tûr a ni si a.

³⁹Chuvângin, an âwih thei lo rêng a ni; a chhan chu Isaian tihian a sawi leh bawk a:

⁴⁰“An mit a tihdelsak a, An thinslung a tikhauh va; Chuti lo zawng, an mitin an hmu ang a, An thinslungin an hre thiam ang a, An inlamlêl ang a, Ka lo tidam mai dâwn si a,” tiin.

⁴¹Isaian a ropuizia a hmuha a chanchin a sawi avângin chûng thû chu a sawi a ni.

ÊNGAH KAL RAWH

⁴²Chutiang kârah pawh chuan hotute zînga mi tam takin Isua an ring ve ta hial a; mahse, Pharisaite avângin amah an rinna an puang chhuak lo, chuti lo chuan biak in ațanga hnawh chhuah an ni mai dâwn si a;

⁴³Pathian fak hlawh ai chuan mihring laka tlâktlum an thlahlel zâwk si a.

⁴⁴Isua chu a âu va, “Tûpawh mi ring chu kei mi ring a ni lo, mi tîrtu ring a ni.

⁴⁵Tûpawh mi hmû chu mi tîrtu hmû a ni.

⁴⁶Khawvêl ên tûra lo kal ka nih hi; chuvângin, kei mi ring apiang chu thimah a awm reng lo vang.

⁴⁷Mi tûpawhin ka thusawi hriain âwih lo mah sela, keiin thiam loh ka chantîr lo; khawvêl thiam loh chantîr tûra lo kal ka ni lo va, khawvêl chhandam tûra lo kal ka ni zâwk e.

⁴⁸Mi tûpawhin mi hnâwla, ka thu sawite a pawm duh loh chuan, thiam loh chantîrtu tûr a nei: ka thu sawi ngei hian ni kin nîah thiam loh a la chantîr dâwn a ni.

⁴⁹Keima thú maia sawi ka ni lo; Pa mi tîrtu chuan ka sawi tûr leh ka hriattîr tûrun thu mi pe zâwk a ni.

⁵⁰A thu mi pêk chu chatuana nunna a ni tih ka hria. Chuvângin ka thu sawi rêng rêng hi Pa mi tîrtu min hrilh ang zêla sawi ka ni e,” a ti a.

BUNG 13

ISUAN ZIRTIRTE KE A SIL

¹Kalhlên Kût a lo thlen hmâin, Isuan hê khawvêl hi chhuahsana, Pa hnêna a kal hun a thleng tawh tih a hria a, khawvêla la awm ama mi, a lainat êm ênte chu a tâwp thleng pawhin a hmangaih reng si a.

²Zanriah an ei kham a, Diabola chuan Simona fapa Juda Iskariota chu Amah mantîr duhna thnlung a lo puttîr tawh reng a,

³Isua chuan a kutah thil engkim Pain a hlân tawh tih leh, Pathian hnên ațanga lo kal a ni ang bawkin Pathian hnênah vêk a kîr leh dâwn ta tih hriain,

⁴a zanriah ei kham chu a tho va, a kawrfual a hlîp a, inhrûk puan a lâ a, a veng a.

⁵Tichuan chawhtawlhah tui a bun a, zirtîrte kê chu a silsak a, inhrûk puan a ven chuan a hru zêl a.

⁶Simon Petera hnên a lo thleng a. Ani chuan, “Lalpa, nang meuhin ka kê i sil ang maw?” a ti a.

⁷Isuan a chhâng a, “Ka thiltih hi tûnah i hre thiam rih lo vang; mahse nakinah zawng i la hre thiam ngei ang,” a ti a.

⁸Peteran a hnênah, “Ka kê chu i sil tawp lo vang!” a ti a. Isuan a hnênah, “Ka sil loh che chuan ka hnênah chan i nei ve lo vang,” a ti a.

⁹Simon Petera chuan, “Lalpa, chuti a nih chuan ka kê chauh ni lovin, ka kut leh ka lû pawh le!” a ti a.

¹⁰Isuan a hnênah, “Inbual tawh chu an kê bâk sil a ngai lo ve, a fai tâwk alâwm; nangni in fai e: in vai erawh chuan a ni lo,” a ti a.

¹¹A mantîrtu tûr chu a hre lâwk si a; chuvângin, “In zavaï chuan in fai lo,” a ti a ni.

¹²Chutia an kê a sil zawh chuan a thuamhnaw dah that kha a lâ a, a tû leh a, an hnênah, “In chungka ka thiltih dân hi engtihna nge in hria em?

¹³Nangnin Zirtîrtu leh Lalpa min ti tînin; in tidik e, ka ni ngei rêng a.

¹⁴Kei Lalpa leh Zirtîrtu mahin in kê ka sil chuan nangni pawhin kê in insilak tînin tûr a ni.

¹⁵In chungka ka tih anga ti ve tûrin entwawn tûr ka siamsak che u a nih hi.

¹⁶Tihtak zetin ka hrilh a che u, chhiahhlawh chu a pu aiin a ropui lo; tirkoh pawh a tîrtu aiin a ropui hek lo.

¹⁷Hêng thilte hi in hre thiam a nih chuan ti ve ula, in nihlawh ang.

ISUAN A MANTIRTU TUR A SAWI

¹⁸In zavaia chungthû ka sawi lo. Ka mi thlante chu ka hria; mahse Pathian Lehkha Thûin, ‘Ka chhang eipui ngeiin, A ke artui ka chungah a lek ta,’ tia a sawi a lo thlen kimna tûr a ni.

¹⁹A lo thlen hmâ hian ka hrilh che u hi, a lo thlen tak tak hunah Keimah ngei ka ni tih in âwih theihna tûrin.

²⁰Tihtak zetin ka hrilh a che u, tûpawh ka tîr apiang lo lâwm chu Kei mi lâwm a ni; tûpawh Kei mi lâwm chu mi tîrtu lâwm a ni,” a ti a.

²¹Isuan chûng thûte a sawi zawh chuan a lo thlaphâng ta êm êm a, “Tihtak zetin ka hrilh a che u, in zînga mi pakhat hian mi mantîr dâwn tâk hi,” tiin a sawi ta a.

²²Tichuan, tû a tihna ber nge tih pawh hre lovin a zirtîrte chu an inen kual hê hâw hlawn a.

²³A zirtîrte zînga mi pakhat, Isuan a hmangaiha chu Isua âwm nghêngin a tû a.

²⁴Simon Petera chuan ani chu tû a tihna nge tih zâwt tûrin a va zaizir a.

²⁵Ani chu Isua âwm nghêngin a va thle phei leh a, a hnênah, “Lalpa, tû ber nge ni?” a ti a.

²⁶Isuan a lo chhâng a, “Chhang them ka chiaha ka pêka chu a ni ang,” a lo ti a. Chutichuan, chhang them chu a chiah hnûin a lâ a, Simona fapa Juda Iskariota chu a pe ta a.

²⁷Chutia chhang them a pêk hnû chuan a chhûngah Setana a lût ngâl a. Isuan a hnênah, “I tih tûr chu ti thuaï rawh,” a ti a.

²⁸Mahse dawhkân kîltu zîngah chû thû chu eng vânga hrilh nge a nih tûma’n an hre lo.

²⁹Thenkhatin, Juda chu tangka ip kawltu a nih avângin Isuan, “Kût âtana châkkhâi ilo va lei rawh,” a ti emaw, mi retheite hnênah eng ilo pe tûrin a tîr emaw a ni ang, te an lo ti a.

³⁰Tichuan, chhang them chu a la a, a kal chhuak ta ngâl a. Chutih lai chu zân a ni tawh a.

THUPEK THAR

³¹A kal chhuah hnû chuan Isuan, “Tûnah hian Mihring Fapa hi châwimâwi a ni a, amahah chuan Pathian pawh châwimâwi a ni bawh.

³²Amahah Pathian chu châwimâwi a nih chuan amahah ngei Pathianin a châwimâwi ang a, a châwimâwi nghâl bawh ang.

³³Naute u, in hnênah rei lo tê ka la awm rih ang. Nangni pawhin mirawn zawn ang; Judate hnênah, ‘Ka kalna tûrah in lo kal thei lo vang,’ tia ka sawi ang khân, tûnah pawh hian in hnênah ka sawi hi.

³⁴“Thupêk thar ka pêk che u chu, ‘inhmangaih tawn rawh u,’ tih hi a ni; keiin ka hmangaih che u ang hian nangni pawh inhmangaih tawn rawh u.

³⁵In inhmangaih tawn theuh hian ka zirtîrte in ni tih mirawn zawnin an hre dâwn che u a ni,” a ti a.

PETERAN A PHATSAN TUR ISUAN A SAWI LÂWK

³⁶Simon Peteran a hnênah, “Lalpa, khawiah nge i kal dâwn?” a ti a. Isuan a chhâng a, “Tûnah chuan ka kalna tûrah mi zui thei lo vang; nakinah erawh chuan mi zui thei tawh ang,” a ti a.

³⁷Peteran a hnênah, “Lalpa, engah nge tûnah pawh ka zui theih loh vang che? I tân ka nunna hi ka hlân huam asin,” a ti a.

³⁸Isuan, “Keimah vângin i nunna i hlân huam mâw? Tihtak zetin ka hrilh a che, nangin wawî thum mi phat hmâ loh chuan âr a khuang lo vang,” a ti a.

BUNG 14**KAWNG, THUTAK LEH NUNNA**

¹⁴In thinlung mangang suh se; Pathian in ring si a, kei pawh mi ring ve rawh u.

²Ka Pa inah awmna tûr in tam tak a awm a, awm lo se ka hrilh tawh ang che u. In awmna tûr hmun buatsaihin ka kal dâwn e.

³In tân hmun buatsaih tûra ka kal chuan ka lo kîr leh ang a, ka hnênah ka hruai ang che u; ka awmnaah nangni pawh in awm ve theih nân.

⁴Ka kalna tûr chin in hria a, a kawng pawh in hria e,” a ti a.

⁵Thoman a hnênah, “Lalpa, i kalna tûr pawh kan hre si lova, engtin nge a kawng chin kan hriat theih ang?” a ti a.

⁶Isuan a hnênah, “Keimah hi kawng leh thutak leh nunna chu ka ni. Keimahah chauh lo chuan tûmah Pa hnênah an lo kal ngai lo.

PA A INLÂR

⁷Kei mi hria ni ula, ka Pa pawh in hre tawh tûr; tûn aţang chuan amah in hre ta e, amah in hmu tawh bawh,” a ti a.

⁸Philip a hnênah, “Lalpa, Pa chu min hmuhtîr ta che, kan tân a tâwk ang,” a ti a.

⁹Isuan a hnênah, “Philip, hei leh chen hi in hnênah ka awm a, chuti chung pawhin mi hre lo mâw? Tûpawh Kei mi hmû chu Pa hmû a ni. ‘Pa chu keini min hmuhtîr rawh,’ eng tia ti nge i nih?

¹⁰Kei Paah ka awm a, Pa pawh Keimahah a awm tih i âwih lo vem ni? In hnêna thû ka sawi hi keima thûin ka sawi lo; Keimaha awm reng Pa chuan a thawk zâwk thîn a ni.

¹¹Kei Paah ka awm a, Pa pawh Keimahah a awm tih mi ring rawh u; a nih loh leh thiltih avâng tal hian mi ring rawh u.

ṬAWNGṬAI CHHANNA

¹²Tihtak zetin ka hrilh a che u, kei mi ring chuan ka thil tih ang hi a ti ve ang; hêngte aia thil ropui zâwk pawh a la ti ve ang, ka Pa hnêna ka kal tawh dâwn avângin.

¹³Ka hminga in dîl apiang chu ka ti zêl ang, Fapa avânga Pa châwimâwia a awm theih nân.

¹⁴Ka hminga engpawh in dîl chuan ka tihsak zêl ang che u.

ISUAN ṬANPUITU A TIAM

¹⁵“Nangnin min hmangaih chuan ka thupêkte hi zâwm rawh u.

¹⁶Pa ka dîl ang a, ani chuan Thlamuantu dang, chatuana in hnêna awm tûr a pe ang che u,

¹⁷chû chu thutak Thlarau, khawvêlin a neih theih loh chu a ni; amah an hmuh lohva an hriat hek loh avângin. Nangni erawh chuan amah chu in hria e, in hnênah a chêng reng a, nangmahniah chuan a awm zêl dâwn a ni.

¹⁸Fahrahin ka kalsan lo vang che u; in hnênah ka lo kal leh ang.

CHÊNCHILHTU PA LEH FAPA

¹⁹Rei lo te hnûah khawvêlin min hmu tawh lo vang; nangni erawh chuan min hmû ang; keimah ka nun avângin nangni pawh in nung ve ang.

²⁰Chumi nîah chuan Kei ka Paa ka awm te, nangni Keimaha in awm te, Kei nangmahniah ka awm tih te in hria ang.

²¹Ka thupêkte pawma zâwmtu chu mi hmangaihtu a ni. Mi hmangaihtu apiang chu ka Pain a hmangaih ang, Kei pawhin ani chu ka hmangaih ang a, a hnênah ka inlâr ang,” a ti a.

²²Juda (Iskariota lo zâwk) chuan a hnênah, “Lalpa, khawvêl hnêna inlâr si lovin, engtin nge keini hnênah i inlâr dâwn le?” a ti a.

²³Isuan a chhâng a, a hnênah, “Miin min hmangaih chuan ka thû a vawng tlat ang; ka Pain ani chu a hmangaih ang a, a hnênah kan lo kal ang a, amah chu chênna inah kan siam ang.

²⁴Kei min hmangaih lotu chuan ka thû pawh a zâwm lo; hêng thû in hriatte hi Keima ta a ni lo va, Pa mi tîrtu tâ a ni zâwk e.

A THLAMUANNA THILPEK

²⁵In hnêna ka la awm chhûngin hêng thûte hi ka hrilh che u a nih hi.

²⁶Amaherawhchu, Pain ka hminga Thlarau Thianghlim arawn tîrh tûr Thlamuantu chuan engkim a zirtîr ang che u a, in hnêna ka sawi zawn zawn a hriat chhuahtîr leh ang che u.

²⁷“Thlamuanna ka hnutchhiah a che u; Keima thlamuanna ka pê a che u; khawvêlin a pê ang loh taka ka pêk che u hi. In thinlung mangang suh se, hlauh pawh hlau suh se.

²⁸In hnêna ka sawi in hriat tawh ang khân, ‘Ka kal bo dâwn a, in hnênah ka lo kîr leh ang.’ Nangnin min hmangaih ni ula, Pa

hnêna ka kal dâwn avângin in lâwm zâwk tûr a ni; Pa chu Keimah aiin a ropui zâwk si a.

²⁹Tûnah a lo thlen hmâ hian ka hrilh lâwk che u hi, a lo thlen huna in rin theih nân.

³⁰In hnênah thú ka sawi tam hman tawh lo vang, khawvêl lal a lo kal dâwn si a, chû pa chuan Keimahah engmah chan a nei lo;

³¹amaherawhchu, kei hian Pa ka hmangaih tih leh, Pain thú mi pêk ang zêlin thil ka ti thîn tih khawvêlin an hriatna tûr a nih hi. Tho ula, heta ʔang hian i chhuak ang u.

BUNG 15

GRÊP DIK TAK

¹“Keimah hi grêp kûng dik tak ka ni a, ka Pa chu huan enkawltu a ni.

²Ka zawmpui pêng rah lo apiang a paih thîn a; a rah pêng apiang a hlâwi fai thîn, a rah tam lehzuat nân.

³In hnêna ka thu sawi avâng chuan tûnah pawh then fai in ni tawh reng a ni.

⁴Keimahah awm ula, Kei pawh nangmahniâh ka awm reng ang. A pêng chu grêp kûng nê a inzawm reng loh chuan amahin a rah thei lo ang bawkin nangni pawh Keimahah in awm reng loh chuan in rah thei lo vang.

⁵Keimah hi grêp kung chu ka ni, nangni a pêngte chu in ni. Tûpawh Keimahah a awm reng a, Kei pawh amaha ka awm rengna chu, chû mi chu tam takin a rah thîn; Ka tel lovin engmah in ti thei si lo.

⁶Keimaha mi a awm reng loh chuan pêng anga sah thlâkin a awm a, a vuai thîn; tichuan an fawm khâwm a, meiah an paih a, a kâng ral thîn.

⁷Nangni Keimaha in awm reng a, Ka thú nangmahnia a awm reng bawk chuan in duh apiang dîl rawh u, in tân tihin a awm zêl ang.

⁸Tam taka rah in chhuah hian ka Pa chu châwimâwiin a awm thîn; tichuan ka zirtîrte in ni ang.

HMANGAIHNA LEH HLIMNA TIHFAMKIMNA CHU

⁹“Pain mi hmangaih ang bawkin kei pawhin ka hmangaih che u hi; ka hmangaihnaah hian awm reng rawh u.

¹⁰Nangnin ka thupêkte in zawm chuan, ka hmangaihnaah in awm reng ang; Keiin ka Pa thupêkte ka zâwm a, a hmangaihin ka awm reng ang bawk hian.

¹¹Ka lâwmna nangmahnia a awm reng theih nân leh, in lâwmna a famkim theih nân, hêng thú hi in hnênah ka sawi a ni.

¹²Hei hi ka thupêk chu a ni, Keiin ka hmangaih che u ang bawkin nangni pawh inhmangaih rawh u.

¹³Miin a ʔhian tân a nunna a hlan aia hmangaihna nasa zâwk tûman an nei thei lo.

¹⁴Thú ka pêk che u ang zêla in tih chuan ka ʔhianta in ni ang.

¹⁵Chhiahhlawh tiin ka ko tawh lo vang che u; chhiahhlawh chuan a pu thiltih a hre si lo va; chuwângin, ʔhianta ka ti tawh zâwk ang che u; Pa hnêna thil ka hriat zawng zawng in hnênah ka

puang tawh si a.

¹⁶Nangni chuan mi thlang lo, Keima’n ka thlang zâwk che u a; kal chhuak a va rah tûr leh, rah tlo tak chhuah tûrin ka ruat a che u; tichuan ka hminga Pa hnêna in dîl apiang a pe dâwn che u nia.

¹⁷Hêng thúte hi in lo inhmangaih theih nâna ka pêk che u a ni e.

KHAWVEL HUAT

¹⁸“Khawvêlin a huat che u chuan, a huat hmâ che u pawhin Kei chu min lo haw tawh tih in hria e.

¹⁹Khawvêl mi ni ula, khawvêl chuan ama mi chu a hmangaih ang chu. Khawvêl mi in ni si lo va, khawvêl ata ka thlan chhuah in nih tâk avâng hian khawvêlin a hua che u a ni zâwk e.

²⁰“Chhiahhlawh chu a pu aiin a ropui lo,’ tih thú ka hrilh tawh che u kha hre reng rawh u. Kei pawh min tiduhdah a nih chuan nangni pawh an tiduhdah ngei ang che u. Ka thú an zawm chuan nangni thú pawh an zâwm ang.

²¹Nimahsela, hêng thil zawng zawng hi ka hming avângin in chungah an la ti ang, mi tîrtu an hriat loh avângin.

²²Kei hi lo kal lovin an hnênah thu sawi ta lo îla, sual an nei lo tûr; tûnah erawh chuan an sual lakah chhuanlam tûr an nei ta lo ve.

²³Tûpawh kei mi hua chuan ka Pa pawh a hua a ni.

²⁴Mi dang tûma la tih ngai loh thilte chu an zîngah ti lo ni îla sual an nei lo tûr; tûnah zawng annin Kei leh ka Pa min hmu tawh a, huat pawh min haw tawh bawk a.

²⁵An dân lehkhâbûah, ‘Chhan awm lovin mi hua,’ tia ziah kha a lo thlenna tûr a ni e.

THLAMUANTU: THLARAU THIANGHLIM

²⁶“Thlamuantu Thlarau Thianghlím, Keima hminga Pa hnên aʔanga ka rawn tîr tûr erawh chuan thil zawng zawng a zirtîr ang che u a, in hnêna ka thusawi apiang a hriat chhuatîr leh ang che u.

²⁷Nangni chu a tîr aʔanga ka hnêna awm in nih avângin ka thu hriatpuitûah lo ʔang ve ang che u.

BUNG 16

THLARAU THIANGHLIM HNATHAWH

¹“Suala in tlûk luh lohna tûrin hêng thilte hi ka hrilh che u hi.

²Biak in aʔangin an la hnawt chhuak ang che u a; a ni, nangni tihlumtu che u chuan Pathian tâna thil ʔha ti-ah an la inngai ang, chutiang hun chu a lo thleng dâwn.

³Pa leh Kei min hriat loh avângin chûng thil chu an la ti dâwn a ni.

⁴Chûng thilte chu ka hrilh che u hi; tichuan a hun a lo thlen hunah ka hrilh tawh che u kha a ni tih in hriat chhuah theihna tûrin. Hêng thil hi a tîr lam khân ka hrilh lo che u a, a chhan chu in hnêna ka la awm vâng a ni.

⁵“Tûnah erawh chuan mi tîrtu hnênah ka kal dâwn ta; in zînga tûmahin, ‘Khawiah nge i kal dâwn?’ tiin min zâwt si lo.

⁶Hêng thû ka hrilh che u avâng hian, in thîlung chu lungngaihna in a luah khat ta hlauh si a.

⁷Nimahsela, thu dik tak ka hrilh a che u. Ka kal bo hi in thâtna tûr zâwk a ni; ka kal loh chuan Thlamuantu chu in hnênah a lo kal dâwn si lo va; ka kal bo erawh chuan in hnênah karawn tîr ang.

⁸Ani a lo thlen hunah chuan sualna te, dikna te leh rorêl na te avângin khawvêl hi thiam chang lo a nihzia a hriattîr ang:

⁹an sualna chu, Kei mi ring duh lo hi a ni;

¹⁰an dikna chu, nangni hmuh phak lohva ka Pa hnêna ka kal dâwn vâng a ni;

¹¹an rorêl na chu, hê khawvêl lal hian thiam a chang lo hi a ni.

¹²“In hnênah thusawi tûr tam tak ka la nei cheu va, mahse, tûnah chuan in tîl ri h lo vang.

¹³Amaherawhchu, amah thutak Thlarau chu a lo thlen hun chuan thutak zawnzawngah a hrui lût ang che u: ama thû maiin a sawi dâwn si lo; thû a dawn apiang chu a hril zâwk ang; thil lo thleng tûrte nêl lam a hriattîr ang che u.

¹⁴Ani chuan mi châwimâwi ang; ka hnên aţangin thû a lâ ang a, a la hriattîr ang che u.

¹⁵Pa thil neih zawnzawng hi ka ta a ni. Chuvâng chuan keima hnên aţangin thil engkim a lâ ang a, a pe chhâwng leh thîl ang che u, ka tih hi.

LUNGNGAIH LAWMA CHANTIR

¹⁶“Rei lo te hnûah nangnin mi hmu lo vang a; rei lo te hnûah bawk nangnin mi hmu leh ang, Pa hnêna ka kal dâwn avângin,” a ti a.

¹⁷Zirtîrte zînga thenkhat chuan, “Kan hnêna a thusawi hi eng nge a awmzia, ‘Rei lo têah nangnin kei min hmu lo vang a, rei lo têah bawk nangnin kei min hmu leh ang,’ a tih leh, ‘Pa hnêna ka kal dâwn avângin,’ a tih hi?” an ti hlawn a.

¹⁸Anni chuan, “Hei, ‘Rei lo tê,’ a tih hi eng tihna nge ni? A thusawi hi a ngaihna kan hre lo,” an ti a.

¹⁹Amah an zâwt duh tih Isuan a lo hria a, an hnênah, “‘Rei lo têah nangnin min hmu lo vang a, rei lo têah bawk nangnin min hmu leh ang,’ tia ka sawi kha in inzâwt maw?”

²⁰Tihtak zetin ka hrilh a che u, nangnin ţapin in sîn ang a, khawvêl erawh chu a lâwm thung ang; nangni in lungngai ang a, mahse in lungngaih chu lâwmah a la chang ang.

²¹Hmeichhe nau vei chu a lungngai thîl, a hun tak a thlen tawh avângin; nimahsela, nau a hrin vele a thlaphân chu a hre chang leh tawh thîl lo, khawvêl mihring lo piang chuan a tihlâwm êm avângin.

²²Tûnah hian in lungngai viau a; mahse karawn hmu leh ang che u a, in thîlung a lâwm ang, in lâwmna chu tûman an lâksak lo vang che u.

²³“Chu mi nî-ah chuan nangnin engmah mi zâwt tawh lo vang. Tihtak zetin ka hrilh a che u, ka hminga Pa hnêna in dîl apiang a pê ang che u.

²⁴Tûn thlengin ka hmingin engmah in la dîl lo. Dîl rawh u, tichuan in hmu ang, in lâwm a kim theih nân.

ISUA KRISTAN KHAWVEL A HNEH TA

²⁵“Chûng thû chu entîr na neiin in hnênah ka sawi thîl a; nimahsela, pehhêla ka sawi tawh loh hun a thleng thuai dâwn, chu mi hunah chuan fiah takin Pa chanchin ka hrilh tawh ang che u.

²⁶Chumi nîah chuan ka hmingin thîl in dîl tawh ang; kei chuan Pa ka dîlsak ang che u, tiin ka sawi lo rêng a ni;

²⁷nangnin kei mi hmangaiha, Paa chhuak ka ni tih min rin avângin Pain a hmangaih che u asin.

²⁸Kei hi Pa hnên aţanga lo chhuak a, khawvêl lo kal ka ni. Khawvêl chhuahsana Pa hnêna hâwng leh tûr ka ni bawk,” a ti a.

²⁹A zirtîrte chuan a hnênah, “Hei le, tûnah zawnzawng fiah takin thu i sawi a, pehhêl na ţawngkâ rêng i hman tâk loh hi!

³⁰Nangin engkim i hria a, zawh hran che pawh i ngai lo tih tûnah kan hre ta. Hemi avâng pawh hian Pathian hnên aţanga lo chhuak i ni tih kan âwih e,” an ti a.

³¹Isuan a chhâng a, “Tûnah chuan in âwih ta maw?”

³²Mahni nîa in kal darh veka, Keimah chauhva min hnutchhiah hun a thleng dâwn, ni e, a thleng reng tawh a ni. Mahse Keimah maiin ka awm lo, ka hnênah Pa a awm reng si a.

³³Keimaha in thlamuan theihna tûrin hêng thûte hi in hnênah ka sawi a ni. Khawvêl hian harsat manganna in tâwk thîl ang; nimahsela thlamuang takin awm rawh u, Keiin khawvêl ka hneh ta,” a ti a.

BUNG 17

AMA TAN ISUA A ŢAWNGŢAI

¹Chûng thû chu Isuan a sawi a; vân lam a en a, “Ka Pa, a hun a thleng ta. I Fapa châwimâwi rawh, Fapain a châwimâwi ve dâwn che nia.

²Ani hnêna i pêkho zawnzawngte hnêna chatuan nunna a pêk ve theih nan, mi zawnzawng chungah thuneihna i pe tawh si a.

³Chatuana nunna chu: Pathian dik awmchhun Nangmah leh i tîr Isua Krista hriat hi a ni.

⁴Leiah hian ka châwimâwi tawh a che. Nangin thil tihtûr mi pêkte pawh ka ti zo tawh e.

⁵Aw ka Pa, khawvêl awm hmâa i hnêna ropuina ka neih hmang khân, tûnah hian nangma rualin mi châwimâwi rawh.

ZIRTIRTE TAN ISUA A ŢAWNGŢAI

⁶“Hê khawvêl aţanga Kei mi pêkteho hnênah i hming chu ka puang chhuak ta. Nangin mi pêkote hi i tâ an ni a, i thû pawh an zâwm ta.

⁷Nangin thil mi pêk zawnzawngte hi i hnên aţanga chhuak a ni tih tûnah chuan an hre ta.

⁸Nangin thû mi pêkte kha an hnênah ka pe tawh si a; chûng chu an vawng tlat a, i hnêna chhuak ka ni tih Chiang takin an hre tawh a, nangin mi tîr tih pawh an âwih ta.

⁹“An tân a ni ka dîlsak ni. Khawvêl tâna dîlsak ka ni lo, nangin mi pêkteho tân ka dîl zâwk a ni, i tâ an ni si a.

¹⁰Ka tâ zawnzawng hi i tâ vek a ni a, i tâte pawh hi ka tâ an ni, anmahniah châwimâwiin ka awm si a.

¹¹Kei chu khawvêla awm reng tûr ka ni tawh lo, hênghote erawh hi chu khawvêla awm an ni a, Kei chu i hnênah ka lo hâu dâwn ta. Ka Pa thianghlim, Keini pum khat kan ni anga anniho pawh pum khat an nih ve theih nân, nangin mi pekteho hi hum tlat ang che.

¹²Khawvêlah an hnêna ka awm chhûng hian i hmingin ka hum thîn. Kei mi pêkteho hi ka hum tlat a; an zînga mi pakhat mah an boral lo, boral fapa chauh lo kha chu; chû lah chu Pathian Lehkha Thu thlen famkimna tûr a ni si a.

¹³Tûnah hian i hnênah ka lo hâu dâwn ta a, ka lâwmna anmahniah a thlen famkim theih nân hêng thû hi khawvêlah ka hril zo ta.

¹⁴I thû chu an hnênah ka hlân tawh; Kei khawvêl mi ka ni lo ang bawk hian, anni pawh khawvêl mi an nih loh avângin khawvêl huat an hlawh a ni.

¹⁵Anni chu khawvêl aţanga la chhuak tûrin ka ngên lo che a, misual pa laka i hum tlat tûrin ka ti zâwk a ni.

¹⁶Khawvêl mi ka ni lo ang bawk hian, anni pawh khawvêl mi an ni lo.

¹⁷I thutakin anni chu tithianghlim rawh. I thû chu thutak a ni si a.

¹⁸Nangin khawvêlah mi tîr ang khân Kei pawhin anni chu khawvêlah ka tîrh ve hi.

¹⁹Anni pawh thutaka tithianghlim an nih theih nân anmahni tân ka intithianghlim thîn.

RINGTU ZAWNG ZAWNG TAN ISUA A ƧAWNGƧAI

²⁰“Hêng mite tân chauhva ngensak ka ni lo, an thuhril aţanga kei mi la ring tûrte tân pawha ngensak ka ni bawk;

²¹ka Pa, nang keimaha i awm leh, kei nangmaha ka awm ang hian an zâa pumkhat an nih theih nân; anni pawh keimahniah pumkhat an lo niha, nangin kei mi tîr tih khawvêlin an âwih theih nân.

²²Nangin ropuina mi pêk kha Keiin anmahni ka pe ta, Keini pum khat kan ni ang bawka anni pawh pum khat an nihna tûrin.

²³Kei anmahniâh, nang Keimahah, anni pum khata an awma an famkim theihna tûrin; nangin Kei mi tîr tih leh, mi hmangaih angin anni pawh i hmangaih tih, khawvêlin an hriat theih nân.

²⁴Ka Pa, nangin Kei mi pêkhote hi ka awmnaa ka hnêna awm ve atân ka duh e; nangin mi pêk ka ropuina kha an hmuh theih nân; leilung pian hmân nang chuan min hmangaih tawh si a.

²⁵Aw dikna Pa! Khawvêlin a hre lo che a, Kei erawh chuan ka hriat che hi; hênghote pawh hian nangin Kei min tîr tih an hria e.

²⁶An hnênah i hming ka hriattîr ta a, ka hriattîr leh fo vang; nangin Kei mi hmangaihna ang hmangaihna kha anmahniâh a awm theih nân leh, Kei pawh anmahniâ ka awm theih nân,” a ti a.

BUNG 18

GETHSEMANIA PHATSANNA LEH MANTIRNA

¹Isuan chûng thû chu a sawi zawhin a zirtîrte nê an chhuak a, Kidron lui kawr an kân a; chutah chuan huan a awm a, amah leh a zirtîrte nê an chuan an lût a.

²A mantîrtu Juda pawh chuan chu hmun chu a hria a; Isua chu a zirtîrte nê an chutah chuan an lêng fo si a.

³Chutichuan sipai pâwlte, puithiam lalte leh Pharisaite hnêna mi vêngtuhote chu Juda chuan arawn hrui a, khâwnvârte, meichherte, hriamhreite kengin chutah chuan an lo kal a.

⁴Isuan a chunga thil thleng tûr zawng zawng chu a hre vek a, chûng mite lam chu panin an hnênah, “Tu nge in zawn?” a ti a.

⁵Anni chuan a hnênah, “Nazaret Isua,” tiin an chhâng a. Isuan an hnênah, “Keimah hi ka ni e,” a ti a. A mantîrtu Juda pawh chu an zîngah a dîng a.

⁶“Keimah hi ka ni e,” a tih vêleh an hnungtawlh dual a, leiah an tlu hlawn a.

⁷Ani chuan an hnênah, “Tu nge in zawn?” tiin a zâwt leh a. Anni chuan, “Nazaret Isua,” an ti a.

⁸Isuan a chhâng a, “Kei hi amah chu ka ni tih ka hrilh che u hi. Kei mi zawng in nih chuan hêngho hi chu kaltîr rawh u,” a ti a.

⁹Hemi hmâa a lo sawi tawh, “Nangin Kei mi pêkte hi pakhat mah ka hloh lo,” a tih kha a thlen theih nân.

¹⁰Simon Petera chuan a khandaih pai chu a phâwi a, puithiam lalber chhiahhlawh a sât a, a beng dîng lam a sah thlâksak a. Chû chhiahhlawh hming chu Malka a ni.

¹¹Isuan Petera hnênah, “Khandaih kha a paiah khung rawh. Pain mi pêk no hi ka in dâwn lo vem ni?” a ti a.

PUITHIAM LAL HMAAH

¹²Chutichuan, sipai pâwl leh an hotute, Judaho tempul vêngtu sipaite chuan Isua chu an man a, an phuar ta a.

¹³Ana hnênah an hrui hmasa a, ani chu chumi kuma puithiam lalbera Ƨang Kaiapha puzawn a nih vâng a ni.

¹⁴Kaiapha chu mi zawng zawng thih aia mi pakhat thih a Ƨha, tia Judate thurâwn petu kha a ni a.

PETERAN ISUA A PHAT

¹⁵Simon Petera chuan Isua chu a zui a, a zirtîr dang pakhat pawhin a zui ve a. Chû zirtîra chu puithiam lalber hmêlhriat a ni a, puithiam lalber kawt zâwl hung chhunga Isua awmnaah chuan a lût ve a;

¹⁶Petera chu pâwn kawngkhâr bulah a dîng a. Tichuan, zirtîr dang, puithiam lalber hmêlhriata chu a va chhuak a, kawngkhâr vêngtunu chu a bia a, Petera chu a hrui lût a.

¹⁷Kawngkhâr vêngtu nula chuan Petera hnênah, “Nang pawh hê pa zirtîr zînga mi i ni lo mâw?” a ti a. Ani chuan, “Ka ni lo ve,” a ti a.

¹⁸Tichuan, chhiahhlawhte leh vêngtute chu chutah chuan an dîng hlawn a, a vawh vângin meihawlin mei an chhêm a, an in ai lum a; Petera pawh an kiangah chuan a awm a, dîng chûngin mei lum a ai ve a.

PUITHIAM LALBERIN ISUA A CHHÂL

¹⁹Puithiam lalber chuan Isua chu a zirtîrte chanchin leh a thu zirtîr chungchâng a zâwt a.

²⁰Isuan a chhâng a, “Khawvêl hmâah ualau taka thu ka sawi thîn kha; biak in leh tempulah te, Judate pun khâwmna hmunah te ka zirtîr thîn kha, a rûkin engmah ka sawi lo.

²¹Engvânga min zâwt nge i nih? Ka thu sawi ngaithlatute hnên aţangin zâwt ta che. Chûng mite chuan eng nge ka sawi an hria alâwm,” a ti a.

²²Chû thû chu a sawi vêleh vêngtu pakhat a kianga dîng chuan Isua chu a bêng a, “Khati khân puithiam lalber pawh i chhâng ang maw?” a ti a.

²³Isuan a chhâng a, “Thil tha lo sawi ka nih chuan ka sualna mi hriattîr rawh; mahse tha taka thû ka sawi chung pawhin engah nge mi ben?” a ti a.

²⁴Tichuan, Ana chuan phuar chungin puithiam lalber Kaiapha hnênah a tîr ta a.

PETERAN VAWI HNIH DANG A PHAT

²⁵Simon Petera chuan dîng chungin mei lum a ai a. Mite chuan a hnênah, “Nang pawh hi a zirtîr zînga mi i ni lo mâw?” an ti a. Ani chuan, “Ka ni lo ve,” tiin a phâ a.

²⁶Puithiam lalber chhiahhlawh pakhat, Petera beng sah thlâka laichîn chuan, “Huanah khân a bula awm ve ka hmuh che kha i ni lo vem ni?” a ti a.

²⁷Petera chuan a phat leh a; chu veleh chuan âr a khuang ta nghâl a.

PILATA RORÊLNA

²⁸Isua chu Kaiapha in aţang chuan Praitoriam*-ah an hruai lût a, zîng tak a la ni a. Anniho erawh chu Praitoriamah chuan an lût ve lo, lût tâ se an bawhlhlawh ang a, Kalhlên Kût chaw an ei thiang dâwn si lo va.

²⁹Pilata chu an hnênah a va chhuak a, an hnênah, “Hê mi chungah hian eng thubuai nge in rawn thlen?” a va ti a.

³⁰Anni chuan a hnênah, “Hê mi hian thil sual ti lo se i hnênah kan rawn thlen hauh lo vang,” tiin an chhâng a.

³¹Pilata chuan an hnênah, “Nangnin hruai ula, in dân ang chuan a chungthû va rêl rawh u,” a ti a. Judate chuan a hnênah, “Kan dânin mi tûmah tihhlum a thianga lo, a ti si alâwm,” an ti a.

³²Chû chu engtiang taka thi tûr nge a nih Isuan a sawi lâwk thîn ang taka a thlen theihna tûr a ni.

³³Pilata chu lal in hung chhûngah chuan a va kal leh a, Isua chu a ko va, a hnênah, “Judate lal i ni em?” a ti a.

³⁴Isuan a chhâng a, “Hei hi nangma rilru puak chhuaka sawi nge i nih, keima chungchâng hi mi dangin an hrih che?” a ti a.

³⁵Pilatan a chhâng a, “Kei hi Juda ka ni vê em ni? I chipuite leh puithiam lalten ka hnênah an hlân che a nih hi. Eng thil nge i tih?” a ti a.

³⁶Isuan a chhâng a, “Ka lalram chu hê khawvêla mi hi a ni lo. Ka lalram chu hê khawvêla mi ni se, Judate kuta mantîra ka awm loh nân ka thuihruaiten an bei ve ang; nimahsela ka lalram zawng heta mi hi a ni lo,” a ti a.

³⁷Tichuan, Pilatan a hnênah, “Chû, lal i ni ngei a mâw?” a ti a. Isuan a chhâng a, “Ni e, Lal ka ni tih dik takin i sawi e. Chû thutak

hriattîr chu ka lo pian chhan leh, hê khawvêla ka lo kal chhan a ni. Mi tupawh thutaka a awm chuan ka thû a ngaithla thîn,” a ti a.

³⁸Pilata chuan a hnênah, “Thutak chu eng nge ni?” a ti a. Chu thû a sawi zawh chuan, Judate hnênah a va chhuak leh a, an hnênah, “A sualna engmah ka hmu lo.

BARABBA AIAWHNA

³⁹“Nimahsela, Kalhlên Kûtah hian in tih thîn dân angin mi pakhat ka chhuahsak dâwn che u a. Tichuan, Judate lal hi chhuahsak che u ila in duh em?” a ti a.

⁴⁰Chû vêleh an vâi chuan an âu leh a, “Hê mi hi chu ni suh se, Barabba kha ni zâwk rawh se!” an ti a. Barabba chu suamhmang a ni a.

BUNG 19

SIPAITE ISUA AN NUIHSAWH

¹Tichuan, Pilata chuan Isua chu a hruai a, a vuaktîr ta a.

²Sipaite chuan hling lukhum an phiar a, an khumtîr a, puan sen duk an sintîr a.

³“Chibai! Judate Lal!” an ti a. An bêng thuai thuai a.

⁴Pilata chu a va chhuak leh a, an hnênah, “En teh u, engmah a sualna ka hmu lo tih in hriat nân, in hnênah ka rawn hruai chhuak e,” a ti a.

PILATA RORÊLNA

⁵Isua chu hling lukhum khuma, puan sen duk sin chungin an rawn chhuattîr a. Pilatan an hnênah, “Hei le, Mihringa chu!” a ti a.

⁶Tichuan, puithiam lalte leh vêngtu hotuten an lo hmuh chuan, “Krâws-ah khêng bet rawh, krâws-ah khêng bet rawh!” tiin an âu rual a. Pilata chuan an hnênah, “Kalpui ula, krâwsah chuan khêngbet ta che u; kei chuan a sualna ka hmu lo,” a ti a.

⁷Judate chuan, “Dân kan nei a, chu dân ang chuan Pathian Fapaa a insiam avângin a thi tûr a ni,” tiin an chhâng a.

⁸Pilatan chu thû a hriat chuan a hlau ta hlê a,

⁹Praitoriam-ah chuan a va lût leh a, Isua hnênah, “Khawi lama mi nge i nih?” a ti a. Nimahsela, Isuan a chhâng lo.

¹⁰Pilata chuan a hnênah, “Mi chhâng lo vang maw? Krâwsa khêngbet thei che ka ni a, chhuah zalên thei che ka ni bawh tih i hre lo vem ni?” a ti a.

¹¹Isuan, “Chung lam aţanga pêk ni lo la chuan ka chungah hian eng tih theihna mah i nei lo vang. Chuvângin, i hnêna mi petu hi a sual nasa zâwk a ni,” tiin a chhâng a.

¹²Chuta ţang chuan Pilatan chhuattîr dân a dap ta a; mahse, Judaho chu an âu tuar tuar a, “Hê mi hi i chhuattîr chuan Kaisara thian i ni lo vang. Tûpawh lala insiam apiang Kaisara do an ni,” an ti a.

¹³Pilatan chûng thû a hriat chuan Isua chu a hruai chhuak a, a hming Lungrem an tih, Hebrai ţawnga Gabbatha an tih hmuna rorêlna thutthlêngah chuan a thû ta a.

¹⁴Chumi nî chu Kalhlên Kût atâna Inbuatsaih Nî a ni a, zîng dâr ruk vêl a ni. Ani chuan Judate hnênah, “En teh u, in Lal hi!” a

ti a.

¹⁵Nimahsela, an au va, “Tiboral rawh, tiboral rawh, krâws-ah khêng bet rawh!” an ti a. Pilata chuan an hnênah, “In Lal hi krâws-ah ka khêng bet ang maw?” a ti a, Puithiam lalte chuan, “Kaisara lo chu lal dang kan nei lo,” tiin an chhâng a.

¹⁶Tichuan, ani chu krâws-a khen beh tûrin an kutah chuan a hlân ta a. Isua chu an kalpui ta a.

LAL CHU KRAWS CHUNGAH

¹⁷Ani chu ama krâws puin, ‘Lu ruh hmun,’ an tih, Hebrai ƣawnga Golgotha an tih lam panin a kal ta a,

¹⁸chumi hmunah chuan krâws-ah an khêng bet a, mi dang pahnihte pawh a sir tuakah pakhat vê vê-in, a laiah Isua a awm a.

¹⁹Pilata chuan lehkha a ziaik a, krâws lêrah chuan a târ a. Chu thuziak chu: ‘NAZARETH ISUA, JUDATE LAL’ tih a ni.

²⁰Krâws-a Isua an khenbehna hmun chu khawpui kiang mai a nih avângin, thuziak an târ pawh chu Juda mi tam takin an chhiar a; Hebrai ƣawng te, Grik ƣawng te, *Latin ƣawng tea ziah a ni a.

²¹Chutichuan, Juda puithiam lalte chuan Pilata hnênah, “Judate Lal’ tiin ziaik suh; ‘Judate Lal ka ni, a ti,’ tiin ziaik rawh,” an ti a.

²²Pilata erawh chuan, ‘Ka ziah kha ka ziaik zo tawh,’ tiin a chhâng a.

²³Sipaitein krâws-a Isua an khenbeh zawh chuan a silhfênte an lâ a, hmun liâh an phel a, sipaitein phel khat ƣeuhvin an chang a; a kawr an la bawh a. Kawr chu ƣuilohekawr a ni a, a nghâwng aƣangin a puma tah vek a ni;

²⁴chuvângin anni chuan, “I pawt thlêr lo vang u, a neitu tûr zawn nân ƣhâm i vâwr zâwk ang u,” an ti a. Pathian Lehkha Thûin, “Ka silhfênte an insem a, Ka kawr atân ƣhum an vâwr a,” tia a sawi kha a lo thlenna tûrin. Chutiang tak chuan sipaihote chuan an ti a.

EN TEH, I NU KHA

²⁵Isua krâws kiangah chuan a nu leh a nu laizâwn Mari, Klopenupui leh Mari Magdalini te an ding a.

²⁶Isuan a nu leh a zirtîr a hmangaiha kha a kianga ding a hmû a, a nu hnênah, “Hmeichhia, en teh, i fapa a nih kha!” a ti a.

²⁷A zirtîr hnênah chuan, “En teh, i nu a nih kha!” a ti a. Chuta ƣang chuan chu zirtîr chuan ani chu ama inah a hrui hâu ta a.

A KIN TA

²⁸Chumi hnû chuan Isuan thil zawng zawng a thleng kim tawh tih a hria a, Pathian Lehkha Thu thlen famkim nân, “Ka tui a hâl e!” a ti a.

²⁹Chutah chuan bêl pakhat uain thûra khat an hûng a; chutichuan, tui hîpna chu uain thûra chiah khatin, husop tiangah an târ a, a hmuiah an han thlen a.

³⁰Isuan uain thûr chu a lo dawn zawh chuan “A kin ta!” a ti a. A lu a kûn a, a thlarau a thlah ta a.

ISUA NÂKAH AN CHHUN

³¹Chumi ni chu Inbuatsaihna Nî a nih avângin ruangte chu Sabbath nîa krâws-a an awm reng loh nân (chû Sabbath chu ni ropui bîk a ni si a), Judate chuan Pilata hnênah an kête tihltiaha an ruang kalpuiah an ngên a.

³²Sipaite chu an lo kal a, a bul hnai zâwk krâws-a an khenbeh leh a lehlama mi pakhat kête chu an titliak a;

³³Mahse Isua kianga an lo kal chuan a thi tawh tih an hmu a, a kête chu an titliak ve ta lo va.

³⁴Nimahsela, sipai zînga pakhat chuan a nâkah feiin a chhun a, thisen leh tui a lo chhuak ta nghâl a.

³⁵A hmutu ngeiin a hriattîr tawh a, a thu hriattîr hi a dik a; thudik tak a sawi tih pawh a inhria, nangni pawhin in rinna tûrin.

³⁶Pathian Lehkha Thûin, “A ruh pakhat mah tihltiaha a ni lo vang,” tia a sawi lo thlenna tûrin chutiang chuan a lo awm ta a ni.

³⁷Pathian Lehkha Thu dangin, “An chhuna chu an la en ang,” tiin a sawi bawh a.

JOSEPHA THLANAH ISUA AN PHÛM

³⁸Chumi hnûah Josefa, Arimathai khuua mi, Isua zirtîr vê bawh, mahse Juda hotute a hlauh vânga lo inthup ƣhîn chuan Isua ruang chu lâk sawn atân Pilata a va dîl a; Pilata chuan a lo phalsak a. Tichuan, ani chu a va kal a, Isua ruang chu a va hlâwm ta a.

³⁹Nikodema, a tîr lama zâna Isua rawn tlawhtu kha murra leh aloe in pawh sa kg. 34* vêla rit kengin a lo kal vê a.

⁴⁰Tichuan, Isua ruang chu an la thla a, Judate inphûm dân angin englo rimtuite nên chuan puan zai sînin an tuam a.

⁴¹Krâwsa an khenbehna hmunah chuan huan pakhat a awm a; huanah chuan mi tûmah an la zalh ngai lohna thlân thar pakhat a awm.

⁴²Judate Inbuatsaihna Nî a ni a, thlân chu a bul hnai lawka awm a nih avângin chutah chuan Isua chu an zalh ta a.

BUNG 20

THLAN RUAK

¹Chawlhkâr ni hmasa berah chuan zîng takah, khuah pawh a la thim laiin Mari Magdalini chu thlânah chuan a va kal a, lung chu thlân aƣangin lâk sawn sâin a va hmû a.

²Tichuan a tlân a, Simon Petera leh zirtîr dang Isuan a hmangaiha hnên a va thleng a, an hnênah, “Lalpa chu thlân aƣangin an kal bopui ta, khawiah nge an dah kan hre si lo,” a ti a.

³Petera chu zirtîr dang nên chuan an kal chhuak a, thlân awmna lam chu an pan a.

⁴A tlânin an tlân dôn a, zirtîr dang chuan Petera chu a lehpêl a, thlân chu a thleng hmasa a.

⁵Kûnin a chhûng chu a bih a, puan zai sîn lo la awm reng te chu a hmu a; mahse a chhûngah chuan a lût lo.

⁶Simon Petera pawh a hnungah a rawn thleng ve a, thlân chhûngah a lût a; puan zai sîn lo awm reng leh,

⁷a lu tuamna puan chu puan zai sînte zînga awm lovin, inthlep fel sa thlapin a hrangin a lo awm tih a hmu a.

⁸Zirtîr dang, thlân thleng hmasa zâwka pawh chu a lût vê a; a hmuh chuan a ring ve ta a.

⁹Mitthî zing ata a tho leh tûr a ni tih Pathian Lehkha Thû kha an la hre si lo va.

¹⁰Chutichuan, zirtîrte chu anmahni inah an hâw leh ta a.

MARI MAGDALINI'N THOLEH LALPA A HMU

¹¹Mari erawh chu pawns thlân kiangah ding chungin a ƣap a; chutia ƣap chung chuan a kûn a, thlân chhûng chu a va bih a;

¹²Isua ruang zalhna hmunah chuan puan vâw sin Vântirrhokh pahni, pakhat a lu lamah, pakhat a ke lama ƣhu a hmu a.

¹³Anni chuan a hnênah, “Hmeichhia, engah nge i ƣah?” an ti a. Ani chuan an hnênah, “Ka Lalpa an kal bopui a, an dah bona hmun ka hre si lo a ni,” a ti a.

¹⁴Chutia a sawi zawh chuan hnung lam a han leh haw i a, Isua ding a hmu a, mahse Isua a ni tih a hre lo va.

¹⁵Isuan a hnênah, “Hmeichhia, engati nge i ƣah? Tu nge i zawn?” a ti a. Ani chuan huan enkawltu emaw a ti a, “Ka pu, nangman i la bo a nih chuan i dahna hmun mi hrilh rawh, tichuan keiman ka kalpui mai dâwn nia,” a ti a.

¹⁶Isuan a hnênah, “Mari!” a ti a. Ani chuan a awmna lam hawiin, “Rabboni!” a ti a; (chû chu Zirtîrtu tihna a ni a.)

¹⁷Isuan a hnênah, “Mi khawih suh âw, tûn thleng pawhin Pa hnênah ka la chho si lo; ka unaute hnênah va kal la, an hnênah, ‘Ka Pa, in Pa, ka Pathian, in Pathian hnênah ka chho dâwn,’ a ti e, va ti rawh,” a ti a.

¹⁸Mari Magdalini chu a va kal a, zirtîrte hnênah Lalpa a hmuh thû a va hrilh a, a hnêna a thu sawite pawh a hrilh a.

APOSTOLTE HNENAH THUNEIHA A HLAN

¹⁹Chumi nî, Chawlhkâr ni hmasa ber tlai lamah chuan, Juda hotute an hlauh avânga zirtîrtin an awm khâwmna kawngkâte an khâr hnû chuan, an zingah Isua a lo ding a, an hnênah, “In chungah thlamuanna awm rawh se,” a ti a.

²⁰Chû thû chu a sawi zawhin an hnênah chuan a kut leh a nâk te a entîr a. Lalpa hmêl an hmuh chuan zirtîrte chu an lâwm ta êm êm a.

²¹Isuan an hnênah, “In chungah thlamuanna awm rawh se! Pain kei mi tîr ang bawkin kei pawhin ka tîrh che u hi,” a ti leh a.

²²Chûng thute chu a sawi zawhin an chungah a thâw a, an hnênah “Thlarau Thianghlim nei rawh u.

²³Tû sual pawh in ngaihdam apiang chu ngaihdam a ni ang; tû sual pawh in ngaihdam loh apiang chu ngaihdam loh a ni ang,” a ti a.

HMUA RING

²⁴Sâwm leh pahnihte zing mi Thoma, Phîra an tih chu, Isua rawn kal lai khân a lo awm vê lo va.

²⁵Zirtîr dangte pawhin a hnênah, “Lalpa chu kan hmu ta,” an lo ti a. Ani chuan an hnênah, “A kuta thîr khenna hnuhmâte kha ka hmuha, thîr khenna hnuhmâah ngei ka kut zungtang ka zen a, a nâka ka kut ka zen ngei loh chuan ka âwih lo vang,” a ti a.

²⁶Ni riat hnûah chuan zirtîrte chu in chhûngah an awm leh a, Thoma pawh a awm vê a. Isua chu a lo kal a, kawngte chu kalh tlat a ni si a, an zingah a lo ding ta a, an hnênah, “In chungah thlamuanna awm rawh se!” a ti a.

²⁷Thoma hnênah chuan, “Ka kut te hi han en la, i kut zungtangin han khawih teh; i kutin han ban la, ka nâk hi zen rawh le. Ring lovin awm suh la, ring mai rawh,” a ti a.

²⁸Thoma chuan a chhâng a, “Ka Lalpa leh ka Pathian i ni!” a ti a.

²⁹Isuan a hnênah, “Thoma, nang chuan mi hmuh avângin i ring a. Hmu lova ringte chu an nihlawh e,” a ti a.

HE LEHKHABU ZIAH CHHAN

³⁰Isua chuan zirtîrte mithmuhah chhinchhiahna dang tam tak a ti a, chûngte chu hê lehkhahbûah hian ziah lan a ni lo;

³¹amaherawhchu, hêng hi Isua chu, Krista, Pathian Fapa a ni tih in rin theih nân leh, in rina, ama hminga nunna in neihna tûrin ziah a ni e.

BUNG 21

DÎL KAMAH TUKTHUAN

¹Chumi hnû chuan Isua chu a zirtîrte hnênah Tiberia dîl kamah a inlâr leh a; a inlâr dân chu hetiang hi a ni:

²Simon Petera te, Thoma, Phîra an tih te, Galili rama Kana khuaa mi Nathanaela te, Zebedaiâ fapa pahnihte leh a zirtîr dang pahnihte chu an awm khâwm a.

³Simon Petera chuan an hnênah, “Sangha man tûrin ka kal dâwn e,” a ti a. Anni chuan a hnênah, “Keini pawh i hnênah kan kal vê ang,” an ti a. Tichuan, an kal chhuak a, lawngah an chuang a; chu mi zân chuan engmah an man lo.

⁴Khua a lo vâw chuan, Isua chu vaukamah a ding a; mahse zirtîrte chuan Isua a ni tih an hre lo va.

⁵Isuan an hnênah, “Naute u, ei tûr in nei em?” a ti a. Anni chuan a hnênah, “Nei lo,” tiin an chhâng a.

⁶Ani chuan an hnênah, “Lawng ding lamah khân lên dêng ula in man mai ang,” a ti a. Tichuan an han dêng a, an sangha man chu a tam êm avângin an hnûk chhuak zo ta lo va.

⁷Tichuan zirtîr, Isuan a hmangaiha khân Petera hnênah, “Lalpa a nih saw!” a ti a. Simon Petera chuan Lalpa a ni tih a hriat vêleh a kawr chung zâwk a hâ a (a lo inphelh ruak si a), dîlah a zuang thla ta a.

⁸Zirtîr dangte chuan lawng te tak tê chuan lên chu sanghâ chawpin an rawn hnûk chhuak a, (khawmual aţanga hla lo tê, feet zathum vêl emaw lek a ni a).

⁹Khawmuala an chhuah chuan, meihawla mei chhêm sâ leh, a chungah sangha leh chhangpêr awm sâ hi an va hmu a.

¹⁰Isuan an hnênah, “In sangha man ƣenkhat kha han la rawh u,” a ti a.

¹¹Simon Petera chu lawngah chuan a va chuang kai a, sangha lian pui puia khat awmna lên chu khawmualah a hnûk chhuak a, a vaiin za leh sawmnga leh pathum a ni; chuti zozai chu awm mah se lên chu a ƣet chuang lo.

¹²Isuan an hnênah, “Lo kal ula, tukṭhuan rawn ei rawh u,” a ti a. Lalpa a ni tih an hriat avângin zirtîrte zînga tûmahin a hnênah, “Tu nge i nih?” tiin an zâwt ngam lo.

¹³Isua chu a lo kal a, chhang chu a lâ a, an hnênah a sem a, sanghate pawh chutiang bawk chuan a sem a.

¹⁴Chumi ṭum chu Isuan mitthi zîng ata a thawhlehn hñua a zirtîrte hnêna a inlâr vawi thumna a ni.

DINHMUN NGAIAH ISUAN PETERA A DAH LEH

¹⁵Tukṭhuan an ei khamin Isuan Simon Petera hnênah, “Simon, Jona fapa, hêngte ai hian nanging kei mi hmangaih zâwk em?” a ti a. Ani chuan a hnênah, “Aw Lalpa, ka ngainâ che tih i hria e,” a ti a. Ani chuan a hnênah, “Ka berâm note châwm rawh,” a ti a.

¹⁶A vawi hnihnaah chuan a hnênah, “Simon, Jona fapa, nanging kei mi hmangaih em?” a ti leh a. Ani chuan a hnênah, “Aw Lalpa, ka ngainâ che tih i hria e,” a ti leh a. Ani chuan a hnênah, “Ka berâmte châwm rawh,” a ti a.

¹⁷A vawi thumnaah chuan a hnênah, “Simon, Jona fapa, nanging kei mi ngainâ em? a ti ta a. Chutia a vawi thumnaah, “Nanging mi ngainâ em?” a hnêna a tih avâng chuan Petera chu a lungngai ta hlê mai a, a hnênah, “Lalpa, engkim i hria a; ka ngainâ che tih i hria e,” a ti a. Isuan a hnênah, “Ka berâmte châwm rawh.

¹⁸Tihtak zetin ka hrilh a che, i naupan lai khân i kâwngah i inhrêng a, i duhna apiangah i kal ṭhîn a; i upat hnûah erawh chuan i kutte i phar ang a, mi dangin an hrênsak ang che a, i duh lohna lamah an kai ang che,” a ti a.

¹⁹Chûng thû chu engtiang taka thiin nge Pathian a la châwimâwi dâwn tih hriattîr nâna a sawi a ni. Chû thû a sawi zawh chuan a hnênah, “Mi zui rawh le,” a ti a.

ZIRTIR HMANGAIHA LEHKHABU ZIAH

²⁰Petera chu a hawi kual a, Isua zirtîr, a hmangaih, zanriah ei laia a âwm nghênga lo thle pheia, “Lalpa, tû ber hian nge nangmah mantîr dâwn che?” titûa khân a rawn zui a hmu a.

²¹Peteran ani chu a hmuhin Isua hnênah, “Mahse Lalpa, hê mi hian eng nge a tih vê dâwn le?” a ti a.

²²Isuan a hnênah, “Duh ila chuan, ka lo kal leh thleng pawhin a dam ang chu, chû chu i tân sâwtina eng nge awm? Nang chuan mi zui mai rawh,” a ti a.

²³Chû thû avâng chuan chû zirtîr chu a thi dâwn lo tiin unaute zîngah chuan a thang ta a ni. Mahse Isuan a thi dâwn lo tih thû a sawi lo va, “Duh ila chuan ka lo kal leh thleng pawhin a dam ang chu, chû chu i tân sâwtina eng nge awm?” a ti mai zâwk a ni.

²⁴Chû zirtîr chu hêng thu hriattîrtu leh ziaktu hi a ni; a thu hriattîr hi dik tak a ni tih kan hria e.

²⁵Hêng bâkah hian Isua thiltih dang tam tak a la awm, chûng chu pakhat tê têa ziah vek ni dâwn se, lehkhabu ziah tûr zawng zawng chu khawvêlah pawh hian lengin ka ring lo. Amen.

TIRHKOHTE

Ziah tu: Luka • Ziah kum: A.D. 60

Chanchin Tha ziaktu Luka bawkin he lehkhahu pawimawh tak, Pa thiltiam anga Pentikos nia Thlarau Thianghlim lo thlen dan te, chu Thlarau thiltitheihna leh a hnathawh avanga tirhkohten ram tina Chanchin Tha an hril darh aṭanga Thuthlung Thar Kohhran lo pian thu te a ziaak a ni. Isua van lawn thu aṭanga ṭanin Tirhko Paulu Rom khaw lung ina a ṭan thleng, kum 30 vel chhunga kohhran kal dan leh Chanchin Tha darh dan chanchin tlangpui a ni. A bu chhungah hian Thlarau Thianghlim tih hi waw sawmnga chuang sawi lan a ni; chutianga thlarau hnathawh uarna bu a nih avang chuan, mi ṭhenkhat chuan a bu hmingah ‘Thlarau Thianghlim Thiltih’ an ti nghe nghe. Tirhkohte bu hi Chanchin Tha bute leh Lehkhathawnte inkar dawh zawmtu leilawn ang a ni. Thil thleng a sawi zinga pawimawh leh a bu pum luan chhuaktu chu Kristian tiduhdahtu Saula, a hnua Paulu lo ni ta pianthar thu leh, Jentailte hnena Chanchin Tha hril tura Pathian belruat a nih ang ngeia Krista tan thih pawh huama, kawlkil thlenga a hril darh thu hi a ni. Tun thlenga missionary hnathawh dan kalhmang leh kaihhruaina zam chhuaktu a ni a; chu bakah, Thlarau Thianghlim hnathawh leh Kristian thurin humhalhtu pawimawh a ni a, thuhrihna lama inkaihhruaina ṭangkai a ni bawh. Tirhkohte hi Bible-a lehkhahu 44-na a ni a, bung 28 a awm a, chang 1007 a awm bawh.

BUNG 1

THUHMAHRUAI

¹Aw Theophil, hmana ka lehkhah ziahah khan, Isua thiltih leh a zirtir ṭantirh dan zawng zawng chanchin kha ka ziaak a,

²khami kha Thlarau Thianghlim ṭanpuinaa tirhko thlante hnēna thu a pēk zawha, vana lak chhohva a awm ni thleng chanchin a ni a,

³an hnēnah chuan finfiahna dik lo thei lo tam tak hmangin, a tuar hnua a nung leh ngei tih a inentir a, ni sawmli chhung zet an hmuh theih tura inlarin, Pathian lalram thu an hnenah a sawi ṭhin.

THLARAU THIANGHLIM PEK TIAM

⁴An awm khawmnaah te a tel ve ṭhin a, Jerusalem chhuahsan lo tur leh, Pa thutiam chu lo nghak chhuak turin thu a pe a, chu Thutiam chu “in hnēna ka sawi in hriat tawh ṭhin bawh kha a ni e,” a ti a ni.

⁵“Johana khan tuiin a baptis ṭhin a, nimahsela, tun aṭanga ni rei lo teah Thlarau Thianghlima baptisma in chang ang,” a ti a.

⁶Chutia an inhmuh khawm lai chuan anni chuan a hnenah, “Lalpa, tun hunah hian em ni Israelte tan lalram i dinthar leh dawn?” tiin an zawt a.

⁷Ani chuan an hnēnah, “A hun leh a ni Pa in ama thu thua a dah chu nangni lo hriat ve tur a awm lo ve.

⁸Thlarau Thianghlim chu in chunga a lo thlen hunah thiltitheihna in la nei ang; tichuan, Jerusalemah te, Judai leh Samari ram khaw tinah te leh kawlkil thleng pawhin ka thu hriatpuitute in ni ang,” a ti a.

ISUA VANAH A CHHO

⁹Chung thu chu a sawi zawhin, an hmuh lai ngeiin, vanah hruai chhohvin a awm a; chhūmin an hmuh phak lohva a hruai bo ta a.

¹⁰Chutia a chhoh laia, khaw dang hawi lēk lova van lam an en reng lai chuan ngai teh, puan vār sin mi pahni an kiangah an lo ding a,

¹¹chung mite chuan, “Galili mite u, engati nge van lam thlira in din reng? He Isua, in hnēn ata vana hruai chhohva hi, vana a chho in hmu ang tak hian amah ngei hi van aṭangin a lo kal leh dawn asin,” an ti a.

PINDAN CHUNGNUNGA ṬAWNGṬAINA

¹²Olivet tlang an tih aṭang chuan Jerusalemah an kīr leh a, chu tlang chu Jerusalem kiang lawk, Sabbath nia kalna tawh chauh a ni.

¹³Khua an luh chuan, an awmkhawmna pindan chungnungah chuan an chho va: Petera te, Jakoba te, Johana leh Andria te; Philipa leh Thoma te; Bartholomaia leh Matthaia te; Zelot pawla mi Alphaia fapa Jakoba leh Simona te leh Jakoba fapa Juda te an ni.

¹⁴Chungho zawng zawng chu Isua nu Mari te, Isua unau te leh hmeichhe dangte nen rilru hmun khat puin, ṭawngṭaia dīl chungin an awm ho zel a.

MATTHIA THLAN A NI

¹⁵Chutia zirtirho awm khawm zingah chuan Petera chu a lo ding chhuak a, thu a sawi a (an vaiin za leh sawmhnih an ni a),

¹⁶“Unaute u, Thlarau Thianghlimin Davida kâa, Isua mantute rawn hruaitu Juda-a chungchang chu Pathian Lehkhabin a sawi lawk ang taka lo thleng tur a ni reng a ni;

¹⁷ani kha kan zinga chhiar tel a ni a, heng rawngbawlinaah te hian chanvo pawh a nei ve ngei si a.”

¹⁸(He mi hian a suahsual manin hmun pakhat a lei a, a lu sawh zawngin a tla a, a pum a puak keh a, a ril zawng zawng a chhuak vek a.

¹⁹Chu thu chu Jerusalema awmte chuan an hre vek a; chuvangin chu hmun chu, anmahni ṭawngin, ‘Akel Dama’ an ti a, chu chu ‘Thisen Hmun’ tihna a ni.)

²⁰“Sam Bu-ah heng thu hi ziah a ni: ‘A chēna in chu tihramin awm sela, A chhungah tumah chēng suh se,’ ‘A hotu nihna chu mi dangin chang rawh se,’ tih hi.

²¹“Chutichuan, Lal Isua kan zinga lūt ṭhin, chhuak ṭhina a awm chhung zawng leh,

²²Johanan baptisma a chantir lai aṭanga kan hnēn aṭanga van lama Isua hruai chhohva a awm ni thlenga, keini min kawp tlattute zingah mi pakhat a thawhleha min hriatpuitu atan a awm tur a ni,” a ti a.

²³Mi pahnih an ruat a: chung mite chu Barsaba an tih Josefa, Justa an tih baw leh, Matthia te an ni a.

²⁴Tichuan, an ãawngtã a, “Aw Lalpa, nang, mi zawng zawng thinlung hretu, he mite pahnihah hian a tu zawng nge i thlan min hriattir ang che,

²⁵Juda-a chu ama awmna tur hmuna a kal theih nan, suala a tlûksan hnu, heng rawngbawlna leh tirhkoh nihna hmun ruak hi luah khah a ngai si a,” an ti a.

²⁶Thum an vâwr a, an thumvâwr chu Matthia chungah a tla a. Tichuan, ani chu tirhkoh sawm leh pakhatte zingah chhiar tel a lo ni ta a.

BUNG 2

THLARAU THIANGHLIM A LO THLENG

¹Pentikos ni a lo thlen chuan, an zain hmun khatah, lungruat takin an awm khawm vek a.

²Thâwklehkhatah van ațangin rî, thlipui tleh hum hum angin a lo thleng phut a, chu thil chuan an thutna in chu a tikhat ta mup mai a.

³Tichuan, leite chu meialh anga insem darhin a rawn inlar a, mi tin chungah a chuang theuh va.

⁴An zavai chuan Thlarau Thianghlimin an lo khat ta vek a, Thlarauvin a ãawngtir ang zelin ãawng dang dangin an ãawng ta a.

MIPUI CHHÂN LÊTNA

⁵Van hnuai hnam tin zing ațangin Juda sakhaw mi tak takte chu Jerusalema an awm lai a ni a.

⁶Chu thawm rî avang chuan mipui tam tak an lo tlan khawm a, mi tinin an thusawi chu anmahni ãawng theuhva an lo hriat avangin an rilru a chi-ai zo va.

⁷An vai chuan mak tiin, an mangang ruai mai a, “En teh u, hênga thusawitute zawng zawng hi Galili mi an ni lo vem ni?

⁸Engtin nge mahni pianpui ãawng ang maia kan hriat theih vek mai le?

⁹Keini lah Parthian hnam te, Medai hnam te, Elamitai hnam te, Mesopotamia rama chêng te, Judai rama mi te, Kappadokia mi te, Ponto leh Asia rama awm te,

¹⁰Phrugia leh Pamphulia rama awm te, Aigupta rama awm te, Kurini kiang vêla Libia rama awm te, Rom ațanga lo kal Judate leh an saphunte,

¹¹Krit mite leh Arab mite kan ni hlawm si a; mahse, Pathian thilmak tihropui an sawi te hi mahni ãawng theuhva kan hriat vek si le?” an ti a.

¹²Tichuan, an zavai chuan mak tiin a ngaihna rêng an hre lo va, “Hetiang hi eng nge maw a awmzia ni dawn le?” an ti a.

¹³Thenkhatin nuizhat chungin, “Uain thar an rûi a nih hi,” an ti a.

PETERA SERMON

¹⁴Petera chu sâwm leh pakhatte nêan an ding hova, ring taka âuvin an hnênah thû a sawi a, “Nangni Judai rama mite leh Jerusalema chêng zawng zawngte u, hêng hi hria ula, ka thû hi lo ngaithla rawh u.

¹⁵Hêng mite hi in ngaih angin an rûi lo ve, zing dâr kua emaw chauh a la nih hi.

¹⁶Hei hi zâwlnei Joela lo sawi lâwk kha a ni zâwk:

¹⁷Ni hnunnungahte chuan hetiang thil hi a lo la thleng ang, Pathianin a ti, Mi zawng zawng chungah ka Thlarau ka leih ang a; In fapate, in fanuten ka thû an hril ang a, In tlangvâalten inlânate an hmu ang a, In putarten mumangah an mang ang.

¹⁸Chûng niahte chuan ka bâwihpa leh bâwihnute chungah pawh, Ka Thlarau ka leih ang a, ka thu an hril ang.

¹⁹Chung lam vânah thilmak te, Hnuai lam leiah chhinchhiahna te ka entir ang a; Thisen te, mei te, meikhu mup mup te nêan:

²⁰Ni chu thimah a chang ang a, Thla pawh thisenah a chang ang, LALPA ni ropui leh hlauhawm a lo thlen hmâ ngeiin.

²¹Hetiang hian thil a lo awm ang, Tûpawh LALPA hming lam apiang chhandam an ni ang,’ a tih ang khân.

²²“Nangni Israel mite u, hêng thû hi ngaithla rawh u: Nazaret Isua kha, in zingah thil ropui tak takte, thilmak tak takte, chhinchhiahnate hmangin Pathianin a thlâwpzia a hriat chiantir che u kha; chûng thil hretute chu nangmahni ngei in nih kha.

²³Amah ngei kha Pathianin a ruat sâ leh a hriat lâwk ang takin, nangnin dân bawhchhetute kutah in mantir a, krâwsah in khêngbet a, in tihlum ta a;

²⁴khâ mi kha, Pathianin thihna tûr chu a thahsak a, thihnain a chelh din rual loh a nih avângin a kai tho leh ta a ni.

²⁵Ama chungchâng Davidan tihian a sawi: ‘Lalpa chu ka hmâah hian ka hmu lâwk thîn a, Ka ding lamah a awm thîn avângin, ka nghing mai mai lo vang.

²⁶Chuvângin ka thinlung hi a hlim a, ka lei pawh a lâwm a; Ka tisa pawh beiseinain a châwl hahdam ang.

²⁷Ka thlarau Hremhmunah i hnutchhiah lo vang a, I mi thianghlim taksa ãawihral i phal hek lo vang.

²⁸Nunna kawngte mi hriattir tawh si a; I hmâah lâwma khatin min siam ang,’ tiin.

²⁹“Unaute u, chi thlahtu Davida thu hi inthlahrung lo takin in hnênah ka’n sawi ang e. Ani zawng a thi tawh a, an phûm tawh baw a, tûn thlengin a thlân pawh a la awm reng hi.

³⁰Ani chu zâwlnei a ni a, tisa dânin a thalbê ațanga lo chhuak, a lalthutthlêng chung a thu tûr Krista chu a la tung ding dawn tih chhechham meuhin Pathianin a sawi tih pawh a hria a;

³¹chû thil chu a lo hriat lâwk tawh avângin Krista thawh leh tûr thû sawiin, a thlarau chu Hremhmunah hnutchhiahin a awm lo rêng a, a taksa pawh a ãawihral baw hek lo.

³²Hê Isua hi Pathianin a kaitho leh ta a, chû chu kan zavai hian a hriatpuitute kan ni.

³³Chuvângin, Pathian kut ding lamah châwimâwiin a awm a, Thlarau Thianghlim pêk tiam tawh chu Pa hnên ațangin a dawng a, tûna in hmuh leh in hriat ang hian a rawn leih baw ta a nih hi.

³⁴Davida chu vânah a chho lo ve, amah zâwkin tihian a sawi: ‘LALPA chuan ka Lalpa hnênah, “Ka kut ding lamah țin reng ang che,

³⁵I hmêlmâte i ke rahchhana ka siam hmâ loh zawng,” a ti e,’ a ti zâwk a nih kha.

³⁶“Chutichuan, Isua in khenbeha ngei kha, Pathianin Lal leh Krista nih fâwmin a siam ta tih Israel hnam zawng zawng hian hre mawlh rawh se,” a ti a.

³⁷Chûng thû an han hriat chuan, an thinlung chu vih ang maiin a lo nâ a, Petera leh tirhkoh dangte hnênah chuan, “Unaute u, engtin nge kan tih tâk ang le?” an ti a.

³⁸Petera chuan an hnênah, “In sual ngaihdam nân sim ula, Isua Krista hmingin baptisma chang ținuh rawh u; tichuan, Thlarau Thianghlim thilpêk chu in chang dâwn nia.

³⁹Hê thutiam hi nangni tân pawh, in fate tân pawh, hla taka mi zawng zawng tân pawh, Lalpa kan Pathianin a koh apiangte tân a ni e,” a ti a.

KOHRAN A ȚHANG ZEL

⁴⁰Hriatpuina thu dang tam tak pawh a sawi a, “Tûnlai ținthar lepchiah takte nun hi hawisan rawh u,” tiin a fuih a.

⁴¹Tichuan, lâwm taka a thu zâwm apiangin baptisma an chang ta a; chu mi ni chuan mi sângthum lai an zîngah belhchhahin an awm ta a.

⁴²Tichuan, an ținwngtâinaah te, chhang an phel honaah te chuan, tirhkohte zirtîrna thû chu nghet taka vuanin an inpâwlkhâwm țin a.

⁴³Tirhkohte kaltlanga țin mak leh chhinchhiahna mak tak tak tih a nih tâk zêl avângin mi tinin an hlau ta êm êm a.

⁴⁴Ringtu zawng zawng chu an inthlungkhâwm a, engkim an ințâwm tawn vek a,

⁴⁵an țin neih te, an thumhnâwte an hralh a, an châkkhai daih tâwk lek ținuhvin an zâa hnênah chuan an sem țin.

⁴⁶Tichuan, ni tin rilru hmun khat pûin tempulah chuan an inkhawm țin a; in hrang hrangah te chuan chhang an phel a, rilru tuang tak leh lâwm takin chaw te an ei khâwm baw țin a.

⁴⁷Pathian an fak a, mi zawng zawng lâwm zâwngin an awm a. Chhandamna chang tûr apiang chu Lalpan kohhranah ni tin a belh chhahsak zêl baw k a.

BUNG 3

KEBAI TIHDAM

¹Petera leh Johana chu ținwngtâi hun chawhnu dâr thumah chuan tempulah an chho dîn a.

²Mi pakhat, a nu pum chhûng ațanga kebai tûr rênga lo piang chu, Mâwi tia an vuah tempul kawngkhâr bulah chuan, tempula lûtte hnêna kut lo dawh tûrin ni tin an muttîr țin a.

³chû mi chuan tempula Petera leh Johana te lût tûr chu a hmû a, kut a lo dawh a.

⁴Chû mi chu Johana nên chuan an en reng a, Petera chuan, “Mi han en teh,” a ti a.

⁵Ani chu an hnên ațanga thilpêk eng emaw dawn beisein a lo hawi chhuak a.

⁶Petera chuan a hnênah, “Tangkâ leh rangkachak ka nei lo; nimahsela, ka neihchhun ka pê ang che: Nazaret Isua Krista hmingin ding la, kên kal tawh rawh,” a ti a.

⁷A kut ding lamah a chelh a, a kaitho ta a; chawp leh chilhin a kête leh a kheimit ruhte chu a lo chak ngêl a.

⁸Tichuan, a zuang tho va, a ding a, kein a kal ta a; anni rual chuan kên a kal a, a zuang baw k a, Pathian fak chung zêlin tempulah chuan a lût vê ta a.

⁹Chutia kêa kala, Pathian a fak chu mi zawng zawngin an hmu a.

¹⁰Tempul luhna, Kawngkhâr Mâwi bula kut dawha țin țin kha a ni tih an hre si a; a chungah chuan eng țin nge lo thleng ta, tiin mak an ti a, a ngaihna rêng an hre lo va.

SOLOMONA HULHLIAPA THUHRIL

¹¹Kebai tihdama chuan Petera leh Johana te chu a chelh reng lain, Solomona hulhliap an tih hmunah chuan mipui zawng zawng an lo tlan khâwm a, mak an ti êm êm a.

¹²Peteran mipuite chu a lo hmuhin an hnênah, “Nangni Israel mite u, hêng hi engati nge mak in tih viau? Kan tih theih rêng emaw, kan sakhaw mi êm vâng emawa hê mi hi kaltîr ta ang ziazângin engah nge min en ținup mai le?

¹³Abrahama Pathian, Isaaka Pathian leh Jakoba Pathian, min thlahtute Pathian chuan a Fapa Isua a châwimâwi ta a nih hi; ani chu in mantîr a, Pilatan chhuah a tum a, a beih hrâm chung pawhin in hnâwl tlat a nih kha.

¹⁴Mi Thianghlima leh Midika kha in duh lo va, tualthattu kha in hnêna pêk in ngên ta zâwk a,

¹⁵Nunna Lal chu in tihlum a; mahse Pathianin ani chu mitthi zîng ata a kaitho leh a; chû thu hriatpuitute chu kan ni asin.

¹⁶A Hming rêng mai pawh hi, hê Hming rin avâng hian a ni hê mi hi in hmuh leh in hriat anga a tihchak tâk ni. Ni e, amah ațanga rinna lo awm chuan in zâa mithmuhah a tidam ta a nih hi.

¹⁷“Nimahsela, unaute u, hre lova ti in ni tih ka hria e, in hotute pawhin an hriat loh vânga an tih ang khân.

¹⁸Amaherawhchu, Pathianin a zâwlnei zawng zawngte kâa Krista chuan hrehawm a tuar tûr thu a hriat lâwktîr ang khân a thlentîr ta a ni.

¹⁹Chuvângin, in sualte thai bo a nih theih nân sim ula, Pathian hnênah inlamlêl leh rawh u; tichuan Lalpa hnên ațangin harhtharna hun a lo thleng thei dâwn nia;

²⁰ani chuan in hnêna a chanchin an lo hril țin Krista Isua pawh a rawn tîr mai ang;

²¹leilung pian tîr ata Pathianin a zâwlnei thianghlim zawng zawngte kâa a lo sawi tawh angin, 'Engkim Siam Țhat Hun' a thlen

hmâ loh zawng vânin ani chu a kawl rih tûr a ni.

²²Mosia ngeiin kan thlahtute hnênah, ‘LALPA in Pathianin keimah ang hi in unaute zîng ațangin Zâwlnei pakhat a siamsak ang che u. In hnêna a thu sawi zawng zawng chu in ngaihlhâksak vek tûr a ni.

²³Mi tûpawhin chu Zâwlnei thû chu an ngaihlhlâk duh loh chuan, an mite zîng ațanga tihboral dêr an ni ang,’ a tih kha.

²⁴Ni e, Samuela lo awm ațanga zâwlnei lo awm tawh zawng zawng, thurawn puang lawk thîn apiangte khân tûnlaia thil thlengte hi an lo hrilh lâwk thîn a ni.

²⁵Nangni hi Pathianin kan thlahtute hnêna a siam zâwlneite leh thuthlung fate in ni asin; Pathianin Abrahamah hnênah, ‘I thlahah chuan leia chhungkua zawng zawng malsâwm an ni ang,’ tia a tiam kha.

²⁶Pathianin a Fapa Isua chu a tung dîng a, in sualte hawisantîr theuhva malsâwm tûr che u in, nangmahni hnênah a rawn tîr hmasa ber a nih hi,” a ti a.

BUNG 4

PETERA LEH JOHANA AN MAN

¹Mipuite hnêna thû an sawi lai chuan puithiam-hote, tempul hotute, Saddukai-hote chu an hnênah chuan an lo thleng phut a,

²Isua chu mitthi zîng ata a tho leh ta, tia a chanchin an lo hrila, an lo zirtîr chu an helh êm êm a.

³Anniho chu an man a, khua a tlai tawh avângin a tûk thlengin tân inah an khung ta a.

⁴Nimahsela, thu ngaithlaho zînga mi tam takin an âwih ve ta thung a; an tam lam chu patling hlîr pawh sangnga lai an ni.

SANHEDRIN HMAA THUSAWI

⁵A tûkah chuan an hotute, upate, dân zirtîrtute,

⁶puithiam lalber Ana te, Kaiapha te, Johana te, Aleksandara te, puithiam lalber chi leh kuang zawng zawngte chenin Jerusalemah chuan an inkokhâwm vek a.

⁷Anni pahnih chu a laiah an dintîr a, “Eng thiltihtheihnain nge, tû hmingin nge hêng thil hi in tih?” tiin an zâwt a.

⁸Petera chu Thlarau Thianghlimin a lo khat a, an hnênah heti hian a ti a: “Mipui hotute leh Israel puipate u:

⁹vawiiinah hian mi khawngaihlhlâk chungah thil ța tih avânga engtianga lo dam ta nge a nih, tia min chhuahchhâl a nih chuan,

¹⁰in zavaiin hei hi hre rawh u, Israel mi zawng zawng pawhin hre rawh se, Nazareth Isua Krista, krâws-a in khenbeh, Pathianin mitthi zîng ata a kaihthawh leh kha, chû hming avâng chuan he mi hi in hmâah dam takin a dîng thei ta a nih hi.

¹¹Nangni, ‘in satute u, in lung hnâwl hnû, a kila lung ẵangkai ber’ lo ni ta hi amah ngei kha a ni asin.

¹²Mi dang tû hnênah mah chhandamna a awm lo; vâh hnuai mihring hming sak zîngah min chhandam thei hming dang rêng a awm lo,” a ti a.

ISUA HMING SAWI KHAP

¹³Petera leh Johana te huaisenzia an hmuhin, zir sâna pawh nei lo, mi mâwl ve mai an ni tih an hre si a, mak an ti hle a. Isua hnêna awm tawh an ni tih an hre ta a.

¹⁴Tin, an hnêna dîng ve, an mi tihdama hmêl pawh an hmu reng a, sawisêl ngaihna an hre bawh si lo va.

¹⁵Chutichuan, an rorêlna ata an kal hrantîr hnûin anniho chu an inbe râwn a,

¹⁶“Hêng mite hi engtin nge kan tih tâk ang le? Tlâng hriat thamin thilmak an ti tih Jerusalema awm zawng zawngin an hre vek tawh a, keini pawhin kan hnial thei bawh si lo.

¹⁷Mahse, mipuite hnêna an puan darh zêl loh nân, tûn achinah tû hnênah mah hê hminga thu sawi tawh lo tûr talin i vau bet mai ang u,” an ti a.

¹⁸Tichuan, anni chu an ko va, Isua hminga thû sawi tawh lo tûr leh zirtîr tawh hauh lo tûrin khuah takin thû an pe ta a.

¹⁹Nimahsela, Petera leh Johana te chuan an hnênah, “Pathian mithmuhah nangni thu zawm nge dik zâwk Pathian thu zawm, tih hi ngaihtuah rawh u.

²⁰Keini zawngin kan thil hmuh leh hriatte kha sawi lovin kan awm thei lo,” an ti a.

²¹Tichuan, anniho chu nasa taka an vau hnûah an chhuah ta a, mipuite avângin hrem vak ngaihna pawh an hre lo, an thiltih avângin mi zawng zawngin Pathian an châwimâwi si a.

²²Thilmak hmanga an tihdama lah chu kum sawmli aia upa mah a ni bawh si a.

HUAISEN TURA ẵAWNGẵAINA

²³Chutia an chhuak chu, anmahni pâwlte hnênah an va kal a, puithiam lalte leh upaten an hnêna an sawi dân zawng zawng chu an hrilh vek a.

²⁴Chutiang thû an han hriat chuan inthurualin aw ring takin an âu va, Pathian hnênah, “Lalpa, nang vâh te, lei te, tuifinriat te, a chhûnga awm zawng zawngte Siamtu Pathian i ni;

²⁵i chhiahhlawh Davida kâah hêng hi i lo sawi tawh a: Engati nge hnam mâwlhote chu an thinur tâk le? Mipuiten engati nge thil sâwt lo mai mai an suangtuah?

²⁶Khawvêl lalten an ep huai huai a, LALPA leh a Krista dodâlin Hotute pawh an pung khâwm a.’

²⁷“Hê kuaah hian i fa Thianghlim, i hriak thih Isua chu nasa taka dodâl tûrin Heroda leh Pontia Pilata te, Jentailte leh Israel mite an pung khâwm chiam a,

²⁸nangma kut ngeia tih i tum leh i remruat sa tihlawhtling tûrin.

²⁹Tûnah hian Lalpa, mi an vau nasatziate hi ngaithla la, i chhiahhlawhte hi huaisen takin i thû chu min puantîr zêl ang che.

³⁰I fa Thianghlim Isua hminga chhinchhiahna leh thilmakte ti tûrin, i tihdamna kut chu phar chhuak zêl ang che,” an ti a.

³¹An ẵawngẵai zawh chuan an awmkhâwmna in chu a lo ngîng lawih lawih a, an zâin Thlarau Thianghlimin an lo khat a, huaisen takin Pathian thû an hril zêl a.

ENGKIM INṬAWM TLANNA

³²Ringtu mipuite chu thinlung hmun khat pûin, ngaihtuah hmun khatin an awm a; an zînga pakhat mahin an thil neih an hauh bîk lo, thil zawng zawng chu an inṭawm tlâng vek si a.

³³Tirhkohte chu thiltihtheihna ropui tak nên Lalpa Isua thawhleth thû hriatpuitûah an ṭang a. An zâa chungah khawngaihna awm chu a nasa êm êm a.

³⁴An zîngah chuan tlachham bîk pawh an awm lo; ramte leh inte chu a nei apiangin an hralh a, an thil hralhte chu a man an rawn keng khâwm zêl a,

³⁵tirhkohte ke bulah an dah khâwm a; annin an châkkhai daih tawh ṭheuhvin an sem chhuak leh ṭhîn a ni.

³⁶Josea, tirhkohten Barnaba tia an koh chu (chû mi hming awmzia chu, “Thlamuanna Fa,” tihna a ni a), Levia chi, Kupra thliarkara mi a ni a,

³⁷ani pawhin a ram chu hralhin a man a rawn keng a, tirhkohte ke bulah a rawn dah a.

BUNG 5

THLARAU THIANGHLIM BUM TUMNA

¹Mi pakhat, Anania an tih chuan a nupui Saphiri nên ram an hralh ve a.

²A hralhna man chu a thup ṭhen a, a nupui pawhin a hriatpui bawh a; tichuan a ṭhen chu kengin tirhkohte ke bulah chuan a dah ve ta a.

³Mahse Petera chuan, “Anani, Thlarau Thianghlim bum tûr leh, i ram hralhna man zêp ṭhen tûrin engati nge Setanan i thinlung a luah khah le?

⁴I kuta a awm chhûng zawng khân, i tâ a ni reng lo vem ni? I hralh hnû pawh khân i thû thû a ni lo vem ni? Engati nge hetiang ti tûra i rilrûa i ngaihtuah? Mihring ni lovin, Pathian bum i tum a nih zâwk hi,” a ti a.

⁵Anania chuan chû thû chu a hriat vêleh a tlu tawp a, a thi ta a. Tichuan, a hria apiang chuan an hlau ta êm êm a.

⁶Tlangvâlte chu an tho va, puanin an tuam a, an zâwn chhuak a, an phûm ta a.

⁷Dârkar thum vêl hnûah chuan a nupui chu eng thil nge thleng tih pawh hre lovin a lo lût vê a.

⁸Petera chuan a hnênah, “Mi hrilh rawh, ram chu heti zât hian maw in hralh?” a ti a. Ani chuan, “Aw, heti zât chiah hian a ni,” a ti a.

⁹Petera chuan a hnênah, “Engah nge Lalpa Thlarau fiah tûra in inthural ni? En rawh, i pasal phûmtute kê chuan kawngka bul a thleng ta, nang pawh an zâwn chhuak ang che,” a ti a.

¹⁰Thawh leh khatah a ke bulah chuan a tlu tawp a, a thi ta a. Tlangvâlte chu an lo lût a, ani chu thiin an rawn hmu a, an zâwn chhuak a, a pasal kiangah chuan an phûm vê ta a.

¹¹Chûng thu hria apiangte leh kohhran zawng zawngte chuan an hlau ta êm êm a.

KOHHRANA THILTIHTHEIHNA KAL ZEL

¹²Mipui zîngah chuan tirhkohte kut hmangin Pathianin chhinchhiahna leh thilmak tam tak a ti zêl a. Anniho chu an vaiin rilru hmun khat pûin, Solomona Hulhliapah chuan an inkhâwm ṭhîn a.

¹³An zînga tel ve ngam mi dang tûmah awm lo mahse, mipuite chuan anniho chu an ngaisâng êm êm a.

¹⁴A hmei a pain, ringthar tam tak chu Lalpa hnênah an rawn luh belh zêl a,

¹⁵chutichuan, damlote chu kawthlêrahte an zâwn chhuak a, khumahte leh mutbûah te an muttîr a, Petera kal vêl paha a hlímthlân a zâr hliah phâk ve hlauh tâkin, an ti a ni.

¹⁶Jerusalem chhehvêl khua aṭangte pawhin mipui an lo pung khâwm a, damlote, thlarau bawhlhlawh sawisakte an rawn hruai a, an vaiin damna an chang ṭheuh va.

TÂN IN AṬANGA TIRHKOHTE CHHAN CHHUAHNA

¹⁷Puithiam lalber leh a hote zawng zawngte chu an lo thawk a (chûng mite chu Saddukai pâwla mite an ni), îtsîknain an khat a,

¹⁸tirhkohte chu an rawn man a, vantlâng tân inah an khung ta a.

¹⁹Mahse, zânah Lalpa Vântirhkoht pakhatin kawngkhârte chu a rawn hawng a, anni chu a hruai chhuak a,

²⁰“Kal ula, tempulah chuan va ding ula, mite hnênah hê nunna thuchah hi va sawi rawh u,” a ti a.

²¹Chû thû chu an hriatin, tempulah chuan zîng takah an va kal a, an zirtîr ta a. Chutih lai chuan puithiam lalber leh a hote chuan rorêltute an ko khâwm a, chutah chuan Israel thlahte zînga upaho zawng zawng an lo kal khâwm a, tirhkohte chu va hruaitîr tûrin tân inah chuan mi an va tîr a.

TIRHKOHTE CHUNGTHU AN RÊL LEH

²²Vêngtute chu an va kal a; nimahsela tân inah chuan an va hmu ta si lo va; chanchin hrilh tûrin an kîr leh a,

²³“Tân in chu him taka inkhâr tlatin, a vêngtute pawh kawngkhâr bulah dingin kan hmu si a; mahse kan han hawng a, a chhûngah chuan tumah kan hmu hauh lo mai!” tiin an hrilh a.

²⁴Puithiam lal te, tempul hotute, puithiam lalhoten chû thû an lo hriat chuan, engtin tak ni zêl ang maw le? tiin a ngaihna rêng an hre ta lo va.

²⁵Chutih lai chuan mi pakhat a lo kal a, an hnênah, “En teh u, tân ina mi in khungte khân tempulah dingin mi an zirtîr a nia!” tiin a rawn hrilh a.

²⁶Tichuan, tempul hotu chu vêngtute nên chuan an va kal a, mipuiin lungin an lo deng mai ang tih an hlauh avângin ṭha takin an va hruai a.

²⁷Tichuan, an rawn hruai thleng a, rorêltuho hmâah chuan an dintîr a. Puithiam lalber chuan an hnênah,

²⁸“Hê hminga zirtîr tawh loh tûr kan tih tawh che u kha? En ta che u, in zirtîrnain Jerusalem khua in tihkhah vek tawh hi, chû mi thisen mawh chu kan chungah bel in tum lehngâl!” tiin a lo chhâl a.

²⁹Mahse, Petera leh tirhkohte chuan, “Mihring thû ni lovin, Pathian thu zawm hi kan bat a ni.

³⁰Nangnin in tihhluma thinga in khai kân Isua kha, min thlahtute Pathian chuan a kaitho leh ta a.

³¹Israelte hnêna sual simna leh sual ngaihdamna pe tûrin Amah ngei kha Pathianin Lal leh Chhandamtu ni tûrin a kut ding lamah a châwimâwi ta a ni.

³²Chûng thilte chu a dik tih hriatpuitute kan nih hi; chutiang bawkin Pathianin a thu zâwmtute hnêna a pêk Thlarau Thianghlîm chuan a hriatpui baw a ni,” tiin an chhâng a.

GAMALIELA THURÂWN

³³Chutiang thûte an han hriat chuan an thin a khei ta êm êm a, tihhlum zai an rêl ta a.

³⁴Nimahsela, rorêltute zîngah chuan Pharisaï pakhat, a hming Gamaliela, dân zirtîrtu leh mi zawng zawngin an zah êm êm chu a lo ding chhuak a, tirhkohte chu pâwna lo va chhuahtîr rih tûrin thû a pê a.

³⁵Rorêltute hnênah chuan: “Nangni Israel mite u, hêng mite chungah in thil tih tum hi fîmkhur rawh u.

³⁶Tûn hmâ deuh pawh khân, mi lian anga insawi Theoda a lo awm tawh kha. Patling zali rualin amah an lo zui a. Mahse amah an tihhlum hnû chuan a thu zâwmtute chu an darh sarh vek a, engmah an ni zui lo.

³⁷Chû pâ awm hnû, chhiarpui awm lai khân Galili rama mi Juda kha a lo awm leh a; a hnênah mi engemawzat a hîp khâwm leh a. Mahse ani pawh a thi a, a thu zâwmtute chu an darh leh zo tawh a.

³⁸Tûnah hian ka hrilh a che u, hêng mite hi tawh suh ula, awm mai mai rawh se; hê an thiltih leh an tum te hi mihring tihchhuah mai a nih chuan engmah a ni lo vang;

³⁹Pathian aţanga chhuak a nih erawh chuan in paihthla thei lo vang; chuti lo zawng, Pathian do in lo ni hlauh dah ang e,” a ti a.

⁴⁰A thusawi chu an pawm tlâng ta a; tichuan, tirhkohte chu an ko va, an vua a, Isua hminga thu sawi tawh loh tûr, tia thû pe chungin an kaltîr ta a.

⁴¹Anni chu rorêltute hmâ aţang chuan an kal chhuak a, a Hming avânga mualphona tuar tlâka ruat an nih avângin an lâwm hle a.

⁴²Tichuan, ni tinin tempulah leh, in tinah te chuan Isua chu Krista a nihzia zirtîr leh thuhrlil an bâng chuang lo.

BUNG 6

RAWNGBAWLTU PASARIH THLAN

¹Chûng hun laia zirtîrte an pun chhoh zêl lai chuan, an ni tin thil sem danah an hmeithaite an ngaihthah deuh avângin Hebraite chungah Grik Judate chu an phun nâwi ta a.

²Tichuan, sâwm leh pahnihte chuan zirtîrho zawng zawng chu an ko khâwm a, “Pathian thu hril ngaihthaha dawhkân lama rawng kan bâwl mai zawngin a ţha lo vang.

³Chuvângin, unaute u, in zîngah mi hmingthâ hlîr, Thlarau Thianghlîmah leh finnaa khat, mi pasarih thlang chhuak rawh u;

tichuan, chûng mite chu hêng thil rêlfeltu atân kan ruat dâwn nia;

⁴keini erawh chu ţawngţai leh thuhrlil rawngbâwl hnâa inpe zêl tûr kan ni si a,” an ti a.

⁵An thusawi chuan mipui zawng zawng a tilungâwi ta a. Tichuan, mi an thlang chhuak a, chûngte chu: Stephana, rinna leh Thlarau Thianghlîma khat te, Philipa te, Prokora te, Nikanora te, Timona te, Parmena leh Juda saphun Nikola, Antiokei khuua mi te an ni a.

⁶Chûng mite chu tirhkohte hmâah an dintîr a; anni chuan an chungah kut ngatin an ţawngţaisak a.

⁷Tichuan, Pathian thû chu a lo darh zau zêl a; Jerusalem khuah chuan ringthar an pung chak êm êm a; puithiamte zîngah pawh mi tam takin rinna thû chu an pawm ve ta hial a.

PATHIAN SAWI CHHIAAH STEPHANA AN PUH

⁸Stephana, rinna leh thiltihtheihnaa khat chuan mipui hmâah thilmak ropui tak tak leh chhinchhiaahna mak tak tak a ti thîn a.

⁹Nimahsela, Sal Chhuakho Biak in an tih (Kurini mite, Aleksandria mi te, Kilikia mite leh Asia rama mite) zînga mi ţhenkhat chu an rawn thawh a, Stephana chu an rawn hnial a.

¹⁰Nimahsela, a finna leh amah sawipuitu Thlarau chu an hnial hneh ngang si lo va.

¹¹Chumi hnuah anni chuan, “Mosia leh Pathian a sawi chhia tih kan hria,” tia puh lêtin, a rûkin mi tûtûte emaw an tham a.

¹²Vântlâng mipuite, upate, dân zirtîrtute an fuihpawrh a; tichuan, an rawn bei a, an man a, rorêltute hnênah an hrui ta a.

¹³Chû bâkah hretu derte an siam a, chûng mite chuan, “Hê mi hian hê in thianghlîm leh dân hi a sawi chhe reng mai a,

¹⁴hê Nazaret Isua hian hê in hi a ţhiat ang a, Mosia dân min pête kha a tidanglam vek dâwn tih a sawi kan hria,” an ti a.

¹⁵Tichuan, rorêlnaa thûte zawng zawng chuan Stephana chu an en reng a, a hmêl chu Vântirhkhoh hmêl angin an hmu a.

BUNG 7

STEPHANA THUSAWI: ABRAHAMA KOH THU

¹Puithiam lalber chuan, “Hêng thûte hi a dik em?” a ti a.

²Ani chuan, “Unaute leh pate u, lo ngaithla teh u: Kan pa Abrahamah chu Haran khuua a awm hmâa Mesopotamia rama a awm lai khân, Ropuina Pathian chu a hnênah a inlâr a,

³a hnênah, ‘I chènna ram leh i laichînhote zîng ata chhuak la, ram ka la entîr tûr che lamah kal rawh,’ a ti a.

⁴Ani chuan Kaldai ram chu chhuahsanin Haran khuah a va chêng ta a. A pa thih hnûah, chuta ţang chuan hei, tûna in chènna ramah hian Pathianin a pem luhtîr ta a.

⁵Hê hmunah hian luah tûr ram engmah a pe lo va, a ke nghahna tham takngial pawh a pe hek lo. Nimahsela, fa a la neih hmâ pawhin, amah leh a hnûa a thlahte thlenga ro luah tûr erawh chu pêk a tiam thung a.

⁶Pathianin hetiang hian a sawi: a thlahte chu mi ramah kum zali an mikhual ang a, chutih chhûng chuan tihduhdah tuar tûrin mi bâwihah an tâng dâwn a ni.

⁷Pathianin, ‘Bâwiha an luhna tûr hnam chu keiman ka la ngaihtuah ang a, chumi hun a zawh chuan an lo kal chhuak ang a, hê hmunah hian ka rawng an la bâwl ang,’ a ti bawk a.

⁸Pathian chuan a hnênah serhtan thû a thlung a; Abraham a chuan Isaaka a hring a, a ni riat nîah a serh a tansak a; Isaaka chuan Jakoba a hring a, Jakoba chuan chi thlahtu sâwm leh pahnihte kha a hring ta a.

THLAHTUTE AIGUPTAAH

⁹“Chi thlahtute khân Josefa kha an îtsîk a, Aigupta ramah an hralh a. Mahse, Pathianin a awmpui tlat a.

¹⁰A manganna zawng zawng ata a chhan chhuak zêl a, Aigupta lal Pharaoa hmâah duhsakna leh finna a pê a; tichuan, Aigupta ram chungah leh a ina mi zawng zawng chungah hotûah a siam ta a.

¹¹Aigupta leh Kanaan ram zawng zawngah khân tām a tlā a, manganna nasa tak a lo thleng ta a; kan pûte chuan ei tûr an tlachham ta a.

¹²Amaherawhchu, Jakoba Aigupta ramah buh a awm tih a lo hriatin, min thlahtute kha a tîr chhuak hmasa a.

¹³Vawi hnih an kalnaah Josefa chu a unaute hnênah chuan a lo inhriattîr a, Josefa chhûngkua chu Pharaoa hmêlhriat an lo ni vê ta a.

¹⁴Josefa chuan a pa Jakoba leh a unau zawng zawng a kohtîr a; mi sawmsarih leh panga an ni a.

¹⁵Tichuan, Jakoba chu Aigupta ramah a pêm thla a; chutah chuan amah leh min thlahtute chu an thi ta a.

¹⁶Sekem khuaah an rawn zâwn lêt leh a, Abrahaman Sekema fapa Hamora fapate laka tangka suma a lei hmunah khân an zalh ta a.

PATHIANIN MOSIA HMANGIN A CHHAN CHHUAK

¹⁷“Pathianin Abraham a hnêna a thutiam thlen hun a lo hnaih lai khân, Aigupta ramah chuan mite* chu an lo pung nasa hle a,

¹⁸Josefa hre lo lal dang a lo awm thleng khân an pung zêl a.

¹⁹Chû mi chuan kan hnam chungah verther takin hlei a lèn a, kan pute chu a hrêkbet tlat a, an nausênte chu thi tûrin a paih chhuahâtîr thîn a.

²⁰Chutih lai chuan Mosia a lo piang a, Pathian duh zâwnng tak mai a ni a; a pa inah thla thum chhûng an enkawl a.

²¹An dah bo lai khan Pharaoa fanuin a lo chhar a, ama fa angin a châwm lian ta a.

²²Mosia chuan Aigupta mite finna zawng zawng chu a zir chhuak vek a, a thûah leh a thiltihah a ropui êm êm a.

²³“Kum sawmlîa upa a lo nih chuan, a unau Israel fate tlawh chhuah a tum a.

²⁴An zînga mi pakhat dik lo taka an tuartîr lai a hmu a, a chhan a, phuba a lâksak a, Aigupta mi chu a tihlum ta a.

²⁵Ama kutin Pathianin a chhanhim tih a unauten an hrethiam dâwn emaw a ti a, mahse an hrethiam si lo va.

²⁶A tûkah chuan an zînga mi pahnihte insual lai thelh tumin a va pan hnai a, ‘Thiante u, unau in ni alâwm; engati nge intihnat in

tum mai le?’ tiin rem a tum a.

²⁷Mahse, a thenawm chungah kawhmawh bâwlta zâwk chuan Mosia chu a nam kiang a, ‘Kan chungah hotûah leh rorêltûah tûin nge siam che?’

²⁸Nimina Aigupta mi i tihhlum ang khân mi tihhlum i tum a ni mâw?’ a ti a.

²⁹Chû pâ thusawi avâng chuan Mosia chu a tlân bo va. Midian ramah a va awm ta reng a, chutah chuan fapa pahnihte a nei a.

³⁰“Kum sawmlî a vei hnû chuan, Sinai Tlâng thlalêrah, hnim buk pakhat mei alh zîngah chuan Lalpa Vântirhkoah a hnênah a inlâr a.

³¹Mosia’n chû chu a hmuhin mak a ti êm êm a; en Chiang tûra a va hnaih lai chuan Lalpa âwin a rawn ko va,

³²“Kei hi i thlahtute Pathian ka ni e, Abraham a Pathian, Isaaka Pathian, Jakoba Pathian chu,’ a ti a. Mosia chu a khûr a, a en ngam ta lo va.

³³Lalpa chuan a hnênah, “I kephah ata i pheikhawh kha phelhlawh; i dinna kha hmun thianghlum a ni e.

³⁴Aigupta rama ka mite hrehawmzia ka hmu reng asin; an rûm thâwm pawh ka hre reng a, anmahni chhan chhuak tûrin ka lo chhuk ta a ni. Hawh teh, Aigupta ramah ka tîr ang che,” a ti a.

³⁵“Chû Mosia, ‘Hotu leh rorêltûah tûin nge siam che?’ tia an hnar chu, hnimbuka a hnêna inlâr Vântirhkoah khân a pui a, amah ngei chu hotu leh chhan chhuaktu atân Pathianin a tîr ta a ni.

³⁶Aigupta ramah te, Tuipui Senah te, thlalêrah te kum sawmlî chhûnga thil mak leh chhinchhiahnate a hmuhtîr hnûin anni chu a hruai chhuak ta a.

PATHIAN LAKAH ISRAEL A HEL

³⁷“Hei hi Mosian Israela thlahte hnêna a sawi chu a ni, ‘LALPA in Pathian chuan keimah ang hian, in unaute zînga mi Zâwlnei pakhat a siamsak ang che u a. Chû mi thû chu lo ngaichang ang che u,’

³⁸“Amah chu a ni thlalêra pungkâwmho zînga awm, Sinai Tlâng Vântirhkoahvin a biak, kan pute hnêna thu lo sawitu leh, keini hnêna hlan tûr thu nung lo dawngtu chu,

³⁹min thlahtuten a thû an âwih lo va, an hnar a. An thinlungin Aigupta lam an hawi kîr leh a,

⁴⁰Arona hnênah, ‘Kan hmâ hruai tûrin pathiante min siamsak rawh; hê Mosia, Aigupta rama ta min hruai chhuaktu lah hi a chanchin kan hre ta si lo va,’ an ti a.

⁴¹Chûng lai chuan sebâwnng no lem an siam a, milim hmâah an inthâwi a, anmahni kut chhuak chu an hlimpui ta a.

⁴²Tichuan, Pathianin a hawisan a, vâna arsiho chibai an bûk theihna tûrin anmahni a ensan ta a. Zâwlnei lehkhâbûah, ‘Thlalêrah khân kum sawmlî chhûngin, rana inthâwiin kei mi bia em ni? Aw, Israel chhûngte u?’

⁴³Moloka puan-in in kaih a, In pathian Remfana arsi lem biakbûk in din a; Chuvângin Babulon khaw pêl rawkin Ka hruai bo ang che u,’ tih zia ang khân.

PATHIAN BÂWKTE DIK

⁴⁴“Mosia hnêna a lem a hmuhtîr anga siam tîrtuin a ruat ang khân, kan pûte chuan thlâlêrah khân hriattîrna puan in chu an nei a.

⁴⁵Chû biakbûk chu kan pûte chuan an chhawm zêl a, Pathianin kan pûte hmâa Jentailho a hnawh chhuahte ram an luah lai khân Josua hovîn an luhpui a; Davida hun thleng khân chutah chuan a awm ta a.

⁴⁶Chû Davida chuan Pathian duhsakna a dawng a, Jakoba Pathian tân awmna in siamsak a dîl a.

⁴⁷Mahse, Solomona zâwkin in chu a saksak ta thung a ni.

⁴⁸“Nimahsela, Chungnungbera chu kuta sak tempulahte a awm ngai lo; zâwlnei chuan:

⁴⁹Vân hi ka lalthutthlêng a ni a, Lei hi ka ke nghahchhan a ni. In chu eng angin nge mi saksak ang? LALPAN a ti, Ka chawlh hmun pawh chu eng nge?

⁵⁰Keima kutin hêng thil engkim hi ka siam lo vem ni?’ tia a sawi ang khân.

ISRAELTEN THLARAU THIANGHLIM AN DODÂL

⁵¹“Nangni mi luhlul, thinlung leh beng tan lohte u! Thlarau Thianghlim hi in dodâl kumkhua mai mâw; in pûte tih ang zêlin in ti thîn a nih hi.

⁵²In puten zâwlnei tihduhdah loh an nei em ni? Mi Dik tak lo kal tûra thu hrilh lâwtute kha an tihlum a; nangni hi chû Mi Dik mantîrtu leh thattute chu in ni asin,

⁵³Dân thû Vântirhkohte pêk chhâwn sâ dawng zeta zâwm si lote u,” a ti ta a.

STEPHANA MARTARNA

⁵⁴Chûng thû an han hriat chuan an thinlung chu chhun ang mai a lo ni a, Stephana chu hachang an thial khum a.

⁵⁵Ani erawh chu Thlarau Thianghlimin a khat a, vân lam a en tlat a, Pathian ropuina leh Pathian kut dîng lama Isua dîng a hmu a;

⁵⁶“En teh u! Vân inhawng ka hmu a, Pathian kut dîng lama Mihring Fapa dîng pawh ka hmu!” a ti a.

⁵⁷Anniho chu aw ring takin an au va, an beng an hup a, amah chu an beihrawn a;

⁵⁸khaw pâwnah an theh chhuak a, lungin an dêng a. Chû thil hriatpuitute chuan tlangvâl pakhat, a hming Saula ke bulah chuan an puante an dah khâwm a.

⁵⁹Stephana chuan “Lalpa Isu, ka thlarau hruai ang che,” tia Pathian a koh laiin lungin an dêng ruih ruih a.

⁶⁰Ani chu a thingthî a, aw ring takin a âu va, “Lalpa, he sual mawh hi an chungah tlaktir suh ang che,” a ti a. Chu thu a sawi zawh chuan a muhil ta a.

BUNG 8

SAULAN KOHHRAN A TIDUHDH

¹Saula pawh chuan a thih chu a remti a. Chuta tâng chuan Jerusalema kohhranho chungah tihduhdahna namên lova nasâ a lo chhuak ta a; tirhkohte chauh lo chu Judai leh Samari ram khaw tinah an darh ta vek a.

²Pathian tâna mi inpêten Stephana chu an phûm a, nasa takin an t̃ah a.

³Saula erawh chuan kohhranhote chu a sawisa chiam chiam a, in tinah a lût a, a hmei a pain a hnûk chhuak a, tân inah a khung zêl a.

SAMARI RAMAH KRISTA THU HRIL A NI

⁴Tichuan, hnawh darhote chu khaw tinah an kal a, thû an hril darh zêl a.

⁵Philipa chu Samari khuah a zuk kal a, an hnênah Krista thû a tlângaupui a.

⁶Mipuite chuan thilmak a tihte an hmuha an lo hriat avângin, rilru hmun khat pûin Philipa thu sawi chu an lo ngaihven hlê a.

⁷Thlarau bawhlhlawhte pawh ring taka âu chungin an luhna mî kawchhûng chu an chhuahtsan hlawm a; zengte leh kebai tam tak pawh an lo dam ta a.

⁸Chû khuah chuan hlimna ropui tak a lo thleng ta a.

DÂWITHIAMIN A RING VE

⁹Mahse, mi pakhat, a hming chu Simona, dâwithiamna hmanga chû khuah mi ropui tak nia lo inchhâl thîn chuan, Samari khuah mite chu mak ti takin a lo dâwi â thîn a.

¹⁰Tichuan, mi tê ber ațanga mi lian ber thlengin, “Hê mi hi Pathian thiltihtheihna ropui an tih kha a nih hi,” tiin a thû an ngaisâng êm êm thîn a.

¹¹A dâwithiamna hmanga hun rei tak chhûng a lo bual âț thîn avângin a thû chu an ngaihven lo thei lo a ni.

¹²Nimahsela, Philipian Pathian lalram chanchin t̃a thû, Isua Krista hminga a han hril chuan an âwih nghâl ta mai a, a hmei a pain baptisma an chang ta a.

¹³Simona pawh chuan a âwih ve ta hial a; baptisma a chan hnûah pawh Philipa chu a thlâwp zêl a, chhinchhiahna leh thil mak tihte a hmu a, mak a ti thei hlê a.

DÂWITHIAM SUALNA

¹⁴Jerusalema awm tirhkohten Samari khuah miten Pathian thû an âwih tih an lo hriat chuan, an hnênah Petera leh Johana chu an tîr a;

¹⁵anni an zuk thlen chuan, Thlarau Thianghlim an chan theih nân an t̃awngțaisak a.

¹⁶Chumi hmâ chuan an zînga tû chungah mah a la thleng lo. Lalpa Isua hmingin baptisma an chang chauh a la ni a.

¹⁷Tirhkohte chuan an chungah kut an nghat a, Thlarau Thianghlim an lo chang ta a.

¹⁸Chutianga tirhkohten kut an nghah avânga Thlarau Thianghlim pêk an ni tih Simonan a hmuh chuan,

¹⁹“Hetiang thuneihna hi min pe vê rawh u, tû chungah pawh kut ka nghahna apiangin Thlarau Thianghlim an chan vê theih nân,” tiin an hnênah tangkâ pêk a tum a.

²⁰Nimahsela, Petera chuan a hnênah, “Pathian thilpêk tangka suma lei i tum avângin, i tangkâ pawh i boral rualin boral ve rawh se!

²¹Hê thilah hian i tel vê lo va, chanvo pawh i nei hek lo; Pathian mithmuha thinlung dik lo pô i nih hi.

²²Chuvângin, hê i suahsualna hi sim la, Pathian hnenah ãawngtâi rawh; he i ngaihtuahna thinlung sual hi a ngaidam thei hlah mahna.

²³Khâkna tûr-in a luah khat che a, suahsualnain a phuar tlat che tih ka hria e,” a ti a.

²⁴Simona chuan a chhâng a, “In thil sawi hi ka chungah a thlen loh nân nangnin Lalpa hnênah min ãawngtâisak rawh u,” a ti ta ruai mai a.

²⁵Chutichuan, Lalpa thû chu an hriattîra an hril zawhin, Samari ram khaw tam takah Chanchin T̃ha hril chung zêlin Jerusalemah an haw leh ta a.

ETHIOPIA MI HNENAH KRISTA CHANCHIN T̃HA

²⁶Lalpa Vântirhkoh pakhatin Philipa chu a bia a, “Tho la, chhim lamah Jerusalem ațanga Gaza lam pan thlakna kawngah khuan zu kal rawh; chû chu thlalêr hmun a ni,” a ti a.

²⁷Tichuan a tho va, a kal ta a. Ngai teh, Ethiopia mi pakhat, Ethiopia lalnu Kandaki hnuaia mi tilreh lal tak, a ro zawng zawng enkawltu chu Jerusalemah Pathian be tûrin a han kal a,

²⁸a hâw lam chuan a tawlailîra t̃hu chungin Zâwlnei Isaia lehkhahu a chhiar a.

²⁹Thlarau chuan Philipa hnênah, “Va hnaih la, tawlailîr saw va ûmpa rawh,” a ti a.

³⁰Philipa chu a va tlan a, zâwlnei Isaia lehkhahu a lo chhiar rî a va hria a, “I thu chhiar kha a awmzia i hria em?” a ti a.

³¹Ani chuan, “Tûma hrilh fiahsak lohvin engtin nge ka hriat theih ang?” a ti a. A hnêna t̃hu chho tûrin Philipa chu a sâwm a.

³²Pathian Lehkhabu a lo chhiar lai chu hei hi a ni: “Beram anga talh tûrin ani chu an hruai a; Beram no a hmul mêttu hmâa a ngawi reng angin, Ani pawhin a kâ a âng lo.

³³Tihmualphova a awm laiin a thiamthu an hnâwlsak a; A thlahte chanchin tu nge hril ang? Lei ațangin a nunna an lâksak si a,” tih hi a ni.

³⁴Mi tilreh chuan Philipa hnênah, “Zâwlnei hian tû chungchâng nge a sawi, amah nge mi dang chungchâng, tih ka zâwt a che?” a ti a.

³⁵Philipa chuan chu Pathian Lehkha thû chu a bul ațanga tanin, Isua chanchin a hrilh ta a.

³⁶Chutia kalkawnga an kal zêl lai chuan tui awmna an zuk thlang a. Mi tilreh chuan, “En teh, heta hi tui a awm. Baptisma chang tûrin engin nge mi dâl?” a ti a.

³⁷Philipa chuan, “I thinlung zawng zawnga i rin chuan i chang thei ang chu,” a ti a. Ani chuan, “Isua Krista hi Pathian Fapa a ni

tih ka ring e,” tiin a chhâng a.

³⁸Tawlailîr chu a dintîr a. Philipa leh mi tilreh chu tuiah chuan an zu lût dún a, a baptis ta a.

³⁹Tui ațanga an lo chhuah vêleh Lalpa Thlarau chuan Philipa chu a la bo va, mi tilreh pawh chuan ani chu a hmu zui ta lo; mahse hlim takin a kal ta zêl a.

⁴⁰Philipa chu Azota khuaah an lo hmu a. Ani chuan a kal pêl zêl a, Kaisari khaw thlengin khaw tinah Chanchin T̃ha chu a hril zêl a.

BUNG 9

DAMASKA KAWNG: SAULA A PIANGTHAR

¹Saula erawh chuan Lalpa zirtîrho thah tumin a la vau reng a, puithiam lalber hnênah a va kal a,

²mi tûpawh Kawnga mi a hmuh chuan, a hmei a pain, phuar chungah Jerusalema a hnuh khâwm theih nân, Damaska khuaa biak in zawng zawnga mite hnêna pêk tûr lehkhâ te a va dîl a.

³Chutia a zin ta chu Damaska khua a thlen dâwnin, thâwklekhatah a awmna vêl chu vân ațanga êngin a rawn chhun êng phut a.

⁴Leiah a tlu a, a hnênah, “Saula, Saula, engati nge mi tihduhdah?” tiin âw a hria a.

⁵Ani chuan, “Lalpa, tu nge i nih?” a ti a. Lalpa chuan, “Keimah Isua, i tihduhdah hi ka ni. Chhunna thîrah i inkhêng na thlâwn mai a ni e,” a ti a.

⁶Tichuan, mak ti tak mai leh hlauva khûr chungin, “Lalpa, eng ti tûrin nge min duh?” tiin a zâwt a. Lalpa chuan a hnênah, “Tho la, khuaah lût rawh, tichuan i tih tûr an lo hrilh ang che,” a ti a.

⁷A hnêna kal vête chu ngâwi rengin an dîng a, âw zawng an hre nâ a, mahse tûmah an hmu lo.

⁸Saula chu lei ata a lo tho va, a han meng dâwn a, engmah a hmu thei ta lo va. A kutah an kai a, Damaska khuaah an hruai lût ta a.

⁹Ni thum chhûng khaw hmu lovin a awm a, engmah a ei lo va, a in hek lo.

ANNANIAN SAULA A BAPTIS

¹⁰Damaska khuaah chuan zirtîr pakhat, a hming Anania a awm a; chumi hnênah chuan Lalpan mumang angin, “Anani” a ti a. Ani chuan, “Lalpa, heta hi ka awm,” a lo ti a.

¹¹Lalpa chuan a hnênah, “Tho la, kawthlêr Ngîl an tihah chuan kal la, Juda inah, Tarsa khuaa mi pakhat, a hming Saula va zâwt chhuak rawh; ngai teh, a ãawngtâi mêk asin.

¹²Ani chuan inlârna mi pakhat, a hming Anania chu a hnêna lûta, a mit vârna tûra a chungah kut ngat chu a hmu tawh reng a ni,” a ti a.

¹³Anania chuan a chhâng a, “Lalpa, chû mi chuan Jerusalem khuaa i mi thianghlimte paw i khawih nasatzia mi tam tak hnên ațangin ka lo hria a.

¹⁴Hetah pawh i hming lam apiang a phuar theihna tûrin puithiam lalte hnênah thuneihna a hmu tawh reng si a,” a ti a.

¹⁵Mahse, Lalpa chuan a hnênah, “Kal mai rawh, Jentailte, lalte, Israela thlahthe hnêna ka hming pu lûttu atâna ka bêl ruat a ni alâwm.

¹⁶Ka hming avângin engtia nasaa hrehawm tuar tûr nge a nih amah ka la hriatîr dâwn a ni,” a ti a.

¹⁷Tichuan, Anania chu a va kal a, inah chuan a lût a; a chungah a kut a ngat a, “Unaupa Saula, i mit vâna tûr leh, Thlarau Thianghlina i lo khah theih nân, Lalpa Isua, i lo kalna kawnga i hnena inlâra khân mirawn tûr a ni,” a ti a.

¹⁸Thawklehkhatah a mit aţang chuan puhlip ang hi a tla ngâl a, a mit a lo vâ leh ta a; tichuan, a tho va, baptisma a chang ta a.

¹⁹Chaw a ei a, a lo chak leh ta a. Damaska khuua zirtîrho awmte hnênah chuan ni engemaw zât a châm a.

SAULAN KRISTA THU A HRIL

²⁰Biak inah te chuan Krista chu Pathian Fapa a nihzia a tângaupui ta ngâl a.

²¹A thu ngaithlatu zawng zawngte chuan mak an ti hle a, “Hê mi hi Jerusalem khuua hê hming lamtûte tiduhdahtu kha a ni lo vem ni? Chûng mite chu puithiam lalte hnêna phuar chung a hruai theihna tûra heta lo kal a ni lo vem ni?” an ti a.

²²Saula erawh chu a lo chak lehzu a, hê Isua hi Krista a nih tak zetzia fiah takin a sawi thîn a, Damaska khuua Juda awmte pawhin hnial ngaihna rêng an hre lo va.

SAULAN THIHNA A PUMPELH

²³Ni rei tak hnûah Judate chuan Saula tihhlum dân tûr an phiar ta a.

²⁴Mahse, ani chuan an phiarna chu a lo hria a. Amah tihhlum tumin kulh kawngka tinah chuan a chhûn a zânin an châng a.

²⁵Tichuan, zirtîrten ani chu zânah an hruai a, kulh aţang chuan bâwm lian takin an uai thlâktîr ta a.

SAULA JERUSALEMAH

²⁶Saula chuan Jerusalem a va thlen chuan zirtîrhote chu zawm ve a tum a; nimahsela ani chu an lo hlau vek mai a, zirtîr a ni ve ang tih rêng an ring pha lo.

²⁷Barnaba erawh chuan ani chu a hruai a, tirhkohte hnênah chuan arawn kalpui a. An hnênah chuan kalkawngah Lalpa a hmuha a biak dân te, Damaska khuuah Isua hminga huai taka thû a hril dân te pawh chu a hrilh vek a.

²⁸Chutichuan, Saula chu Jerusalemah chuan an hnênah lût thîn, chhuak thînin a awm vê ta a.

²⁹Lalpa hmingin huai takin thû a hril a, Grik Judate nêan inhniak vak a, anni chuan amah chu tihhlum an tum ta a.

³⁰Unauhoten chû chu an lo hriat chuan Kaisari khuuah an hruai chhuk a, Tarsa khuuah an kaltîr ta daih a.

KOHRAN A THANG ZEL

³¹Chutichuan, Judai ram zawng zawngah te, Galili leh Samari ramah te chuan kohhran chu thlamuang takin a lo ngêlghet deuh deuh va. Lalpa tih dêkin an awm a, Thlarau Thianghlina i thlamuan a, an lo pung zêl a.

AINIA TIHDAM

³²Petera chuan ram pum fan pahin Ludda khuua mi thianghlime awmte hnênah a zuk kal baw k a.

³³Chutah chuan mi pakhat, a hming Ainia, a zen avânga kum riat khum beta mu tawh chu a hmu a.

³⁴Petera chuan a hnênah, “Aini, Isua Kristan a tidam a che; tho la, i mutbu têt rawh,” a ti a. Tichuan a tho ta mai a.

³⁵Ludda khuah leh Saron khuua awm zawng zawngten Ainia awm dân an hmuh chuan Lalpa lam an hawi ta hlawn a.

DORKI KAIHTHAWH

³⁶Joppa khuuah chuan zirtîr pakhat, a hming Tabithi a awm a, chu chu Dorki* tihna a ni. Chû hmeichhia chu thil tihthat leh mi retheite thilpêk lama inphal mi a ni.

³⁷Chûng lai chuan a dam lo va, a thi ta a. An bual fai a, pindan chungnungah an zalh a.

³⁸Ludda khuah chu Joppa khaw kiang lawk a ni a, zirtîrhote chuan chutah chuan Petera a awm tih an lo hria a, a theih anga ranga an hnêna kal tûra ngên tûrin mi pahni an tîr a.

³⁹Petera chu a tho va, an hnênah a kal ta a. A va thlen chuan pindan chungnungah chuan an hruai chho va. Chuta hmeithai zawng zawngte chu a kianga dingin, an hnêna Dorki awm laia a kawr thui te, a puan tahte entîr chungin an ţap hlawn a.

⁴⁰Nimahsela Petera chuan anni chu a chhuahtîr vek a, a ţingthî a, a ţawngţai ta a. Ruang lam chu a hawi a, “Tabithi, tho rawh,” a ti a. Tichuan, a mit a lo meng a, Petera chu a hmu a, a ţu chhuak hlawn mai a.

⁴¹A kutin a ban a, a kai tho ta a; mi thianghlime leh hmeithaite chu a ko va, dam ţha viahin an hnênah a pê a.

⁴²Joppa khuua mi zawng zawngin chû thil chu an hre vek a; mi tam takin Lalpa chu an ring ta a.

⁴³Petera chu Joppa khuuah chuan savun siamtu Simona inah chuan ni tam tak a châm a.

BUNG 10

KORNELIAN ZUALKO A TIR

¹Kaisari khuuah chuan mi pakhat, a hming Kornelia a awm a, Italia Sipai Pâwl an tiha sipai za hotu a ni.

²Pathian ngaihsak mi a ni a, a chhûngte zawng zawng nêan Pathian tih dêkin an awm a, mi retheite hnênah thil tam tak a pe thîn a, Pathian hnêna ţawngţai thîn mi a ni.

³Ni khat chu, tlai lam dâr thum vêlah inlârna fiah tak a hmu a; tah chuan Pathian Vântirrhokh pakhat a hnênarawn lûtin, “Korneli!” tiin arawn ko va.

⁴Kornelia chuan a hmuhin a hlau va, “Lalpa, eng nge ni?” a ti a. Ani chuan a hnênah, “I ţawngtaite leh i thilpêkte kha hriat reng tûrin Pathian hmâah a thleng chho ta.

⁵Tûnah Joppa khuuah mi tîr la, mi pakhat Simona, Petera an tiha chu kohtîr rawh.

⁶Ani chu savun siamtu Simona hnênah a thleng a, a in chu tuipui kama awm a ni. Ani chuan tih tûr a lo hrilh dâwn che nia,” a

ti a.

⁷Chutia amah betu Vântirhkoh a kal sawn vêleh Kornelia chuan a chhiahhlawhte zînga mi pahnih leh sipai pakhat, amah vil rengtute zînga mi inpe tak mai chu a ko va.

⁸Tih dân tûr zawnz zawnz a hrilhfiah zawhin Joppa khuaah chuan a tîr ta a.

PETERA INLÂRNA

⁹A tûkah chuan kawnga an kal laia, khua an thlen dâwnin, chhûn dâr 12 vêlah Petera chu tawngtai tûrin in chungah a chho va;

¹⁰A ril a lo tàm ta hlê a, ei tûr a duh ta a; mahse ei tûr an buatsaih vêl lai chuan zêlin a awm ta a.

¹¹Vân inhawng a hmu a, chuta tâng chuan bâwm lian pui hi a kil lia puan hlai taka inhling ang mai hi a rawn uai thla zêl a, lei a lo thleng ta a.

¹²Chû thil chhûngah chuan lei chung a ran ke pali nei tinrêng, ramsâ te, bawkvâka kal chi te, chunglêng sava tinrêngte an awm a.

¹³A hnênah chuan âw-in, “Peter, tho rawh; talh la ei rawh,” a rawn ti a.

¹⁴Mahse, Petera chuan, “Ni lo ve Lalpa! Thil thianghlim lo leh bawhlhlawh engmah ka ei ngai lo ve,” a ti a.

¹⁵Chû âw chuan a vawî hnihnaah, “Pathianin a tihthianghlim tawh chu nangin bawhlhlawh ti suh,” a ti a.

¹⁶Chutiang hlîr chuan vawî thum a lo awm a. Bâwm chu vâna khai chhohvin a awm leh ta a.

KAISARI-A KAL TURA KOHNA

¹⁷Petera chuan inlârna a hmuh chu eng nge a awmzia ni ang le, tia mak tia a ngaihtuah lai mêkin ngai teh, Kornelia mi tirhte khân Simona in chu an lo zâwt chhuak a, kawngkhâr bulah an lo dîng reng tawh a.

¹⁸Simona, Petera an tiha chu, chutah chuan a thlen leh thlen loh an zâwt a.

¹⁹Petera chuan inlârna chungchâng a la ngaihtuah lai mêkin Thlarauvin a hnênah, “Ngai teh, mi pathumin an zawnz che.

²⁰Chuvângin, tho la, chhuk la, engmah ringhlel lovin anmahni chu zui rawh; anni chu ka tîr an ni e,” a ti a.

²¹Tichuan, Kornelia mi tirhte hnênah chuan Petera chu a chhuk a, “Hei le, in mi zawn chu ka ni e; eng nge in rawn kal chhan?” a ti a.

²²Anni chuan, “Kornelia, sipai za hotu mi dik tak, Pathian tîh mi, Juda hnam zawnz zawnz zînga mi hmingtha chuan i thusawî a lo ngaihthlâk theih nân, a ina kal tûra ko tûr chein Vântirhkoh thianghlimin a hrilh a ni,” an ti a.

²³Chûng mite chu a ko lût a, a riahtîr a. A tûkah chuan Petera chu an hnênah chuan a kal ta a, Joppa khuaa mi unau tute emaw pawhin an zui ve a.

PETERAN KORNELIA A HMU

²⁴A tûk lelah chuan Kaisari khua chu an lût ta a. Kornelia chuan a laichînte leh a tîan bul deuh deuh te ko khâwmin anni chu an lo ngêk reng a.

²⁵Petera chu a luh dâwnin Kornelia chuan a lo hmuak a, a ke bulah a bawkkhup a, Pathian angin chibai a lo bûk a.

²⁶Mahse Petera chuan ani chu a kai tho va, “Ding rawh, kei pawh mihring ve mai ka nih hi,” a ti a.

²⁷Chutia inbe chung chuan a lût a, mi tam tak lo awm khawm hmur mai chu a hmu a.

²⁸An hnênah, “Juda mi tân hnam dang pâwl leh an hnêna kal a thian lohzia in hria e. Nimahsela, mi tûmah thiàng lo leh bawhlhlawh ka tîh tûr an ni lo tîh Pathianin Chiang takin min hmuhtîr a ni.

²⁹Chuvângin, min rawn koh vêleh hnial lovin ka lo kal ta a nih hi. Aw le, ka zâwt a che u, eng nge mi rawn koh chhan le?” a ti a.

³⁰Kornelia chuan, “Ni lî a ni ta, tûn ang hun thleng hian kan inah chaw ka nghei a; tlai dâr thum tawngtai hunah kan inah hian ka tawngtai a; ngai teh, puan êng sin mi pakhat hi ka hmâah a lo ding a,

³¹Korneli, i tawngtaina kha hriatsak i ni e, retheite hnêna i thilpêkte pawh Pathianin a hre reng a.

³²Joppa khuaah mî tîr la, Simona, Petera an tiha chu i hnênah ko rawh. Ani chu tuifinriat kama savun siamtu Simona inah a thleng a. Amah a lo kal hunah thû a hrilh ang che,” a ti a.

³³Chuvângin, i hnênah mî ka rawn tîr ngêl vat a ni; i lo kal thei hlauh chu a va lawmawm êm! Chutichuan, Lalpan i hnêna thu a pêk apiang che ngaihthla tûrin, tûnah hian Pathian hmâah kan zâin hetah kan lo awm khâwm a nih hi,” a ti a.

KORNELIA INA THUHRIL

³⁴Petera chuan thû a sawi ta a: “Dik takin, Pathianin mi duhsak bîk a nei lo tîh ka hre thiam ta.

³⁵Chuvângin, hnam tin zînga mi tûpawhin amah an tîha, dik taka an tîh chuan Pathianin a pawm a ni.

³⁶Pathianin Israel fate hnênah thû a rawn thlen a, inremna thû chu Isua Krista hmangin a rawn puang ngei mai, mahse amah chu engkim Lalpa a ni.

³⁷Johanan baptisma thû a tlângaupui hnû khân, Galili ram aţanga ţanin, Judai ram zawnz zawnz thang chhuak ta hê thuchah hi nangni pawhin in hriat ve kha:

³⁸Nazaret Isua chanchin kha, khatia Pathianin thiltihtheihna nêl Thlarau Thianghlima hriak a thih dân te, Pathianin a awmpui tlat avânga thil tha tia a zin vêl dân te, Diabola tihduhdah zawnz zawnz a tihdam dân te kha.

³⁹Judai ramah leh Jerusalema a thiltih zawnz zawnz te, thinga an khai kâna, an tihlum dân te chena hriatpuitute kan ni a.

⁴⁰Pathianin ani chu ni thum niin a kai tho leh a, hmuh theihin a inlâr a,

⁴¹mi zawnz zawnz hnênah ni lovin, hriatpuitu atâna Pathianin a thlan bîkte hnênah a ni; chutah chuan keini mitthi zînga ta a thawhlele hnêna a hnêna eia in ho tîhnte hi kan tel vê bawk a.

⁴²Ani chu mitthite leh minungte chung a Rorêltua Pathian ruat ngei chu a ni tih mite hnêna puanga, hriatpui tûrin Pathianin thû min pê a ni.

⁴³Amah ringtu apiangin a hming avânga sual ngaihdamna an chan tur thû chu zâwlnei zawng zawngten an lo hriatpui tawh thîn a nih kha,” a ti a.

JENTAILTE HNENAH THLARAU THIANGHLIM A THLENG

⁴⁴Peteran chûng thû a sawi lai chuan, a ngaithlatu zawng zawng chungah chuan Thlarau Thianghlim a lo thleng ta a.

⁴⁵Petera hnungrawn zui ve ringtu serhtanhote chuan Thlarau Thianghlim thilpêk chu Jentailte chungah pawh leih buak a nih avângin mak an ti êm êm a.

⁴⁶Ṭawng danga thû sawiin Pathian an châwimâwi tih an hai si lo va. Chutichuan Peteran,

⁴⁷“Hêng mi, keimahni anga Thlarau Thianghlim chang vête hi baptisma an chan loh nân miin tui hman an khap thei em ni?” a ti a.

⁴⁸Tichuan, Lalpa hminga baptisma chan tûr thû a pê a. Chumi zawhah chuan ni rei lo tê tal châm tûrin an ngên a.

BUNG 11

PETERAN PATHIAN KHAWNGAIHNA A HUMHALH

¹Tichuan, tirhkohte leh unau dang, Judai rama awmte chuan Jentailte pawhin Pathian thû an lo pawm vê ta tih an lo hre ta a.

²Peteran Jerusalem a han thlen chhoh chuan serhtan a ṭûl tihote chuan an lo chhuah chhâl a,

³“Serhtan lohte inah i lût a, an hnênah te i ei lehngâl amâw!” an ti a.

⁴Nimahsela, Petera chuan a bul aṭanga indawtin anni chu a hrilh fiah a:

⁵“Joppa khuaah ṭawngṭaiin ka awm a; tah chuan zêlin ka awm a, inlârna ka hmu a, englo bâwm, puan lian tak ang, a kil lîa hlin, vâna ta lo uai thla ka hmu a; ka kiangah arawn innghat a.

⁶Chû thil chu eng nge ni tih ngaihtuahin ka en reng a, lei chung a ran ke pali nei te, ramsâ te, bawkvâka kal chî te leh, chunglêng savâte ka hmu a.

⁷Tin âwin, ‘Peter, tho rawh; talh la ei rawh,’ mi tiin ka hre baw a.

⁸Mahse kei chuan, ‘Ni lo ve Lalpa! Thil thianga lo leh bawhlhlawh engmah ka kâah a lût ngai lo,’ ka ti a.

⁹Nimahsela, vâna aṭanga âw chuan a wawi hnihnaah, ‘Pathianin a tihthianghlim tawh chu nanging thianga lo ti suh,’ tiin mi chhâng a.

¹⁰Chutiang hlîr chuan wawi thum a lo awm a; tichuan engkim chu vânah khai chhoh a ni leh ta a.

¹¹Chutih lai tak chuan ka thlenna in kawtah chuan mi pathum, Kaisari khua aṭanga mi ko tûra an rawn tirhte chu an lo ding reng tawh a.

¹²Thlarau chuan engmah rinhlelhna nei hauh lova anmahni zui ngâl tûrin mi tîr a. Hêng unau parukte pawh hian min zui vê a;

tichuan, chû mî inah chuan kan lût ta a.

¹³Chû mî chuan kan hnênah, an inchhûnga Vântirhkoh ding a hmuh dân te, a hnênah, ‘Joppa khuaah mite tîr la, Simona, Petera an tiha chu va hruiatîr rawh;

¹⁴ani chuan thû a hrilh ang che a, chu mi thusawi aṭang chuan nang leh i chhûngte chu chhandamin in awm ang,’ a tih thûte pawh min hrilh a.

¹⁵Keiin thû ka han sawi ṭan ta a, a tîra kan chung a lo thleng ang mai khân, anni chungah pawh chuan Thlarau Thianghlim chu a lo thleng vê ta a.

¹⁶Lalpa thû, ‘Johanan tuiin mi a baptis thîn a; nangni zawngin Thlarau Thianghlimin baptisma in la chang ang,’ a tih thûte kha ka lo hre chhuak leh ta a.

¹⁷Chutichuan, Lalpa Isua Krista kan rina, Pathianin thilthlâwnpêk min pêk ang tho kha an hnêna a pêk vê tâk a hnû, kei tehlul hi Pathian dodâl tûr ka ni em ni?” a ti a.

¹⁸Chûtiang thû an lo hriat chuan an ngâwi ta a; “Chuti chu, Pathianin Jentailte pawh nung ve tûrin an sim a phal ta zu nia,” tiin Pathian an fak ta a.

ANTIOKEIAH BARNABA LEH SAULA

¹⁹Stephana chungthû avânga tihduhdahna lo hluar chho zêlin a hnawh darhote kha Phoiniki ramah te, Kupra thliarkârah te, Antiokei khuaah te an kal a, Judate hnênah chauh lo chuan tû hnênah mah thû an hril lo.

²⁰Nimahsela, an zînga thenkhat chu Kupra thliarkâr leh Kurini khuaa mite an ni a, chu mite chuan Antiokei khua chu an thlenin Grik mite hnênah pawh thû an sawi a, Lalpa Isua thû chu an puang ve ta a.

²¹Lalpa kut chuan a awmpui a; mi tam takin an ring a, Lalpa lam an hawi ta hlawm a.

²²Chutiang chanchin tharte chuan Jerusalem kohhrante beng a lo thleng a, tichuan Barnaba chu Antiokei thlengin an tîr chhuak ta a.

²³Ani chu a va thleng a, Pathian khawngaihna hmêl a han hmuh chuan a lâwm hlê a, thinslung taka Lalpa vuan reng tûrin an zân a fuih a.

²⁴Ani chu mi ṭha ṭak a ni a, rinna leh Thlarau Thianghlima khat a ni. Tichuan Lalpa hnênah mi tam tak an tel belh ta zêl a.

²⁵Chumi hnû chuan Barnaba chu Saula zawng turin Tarsa khuaah a kal a.

²⁶A va hmuh chuan Antiokei khuaah a rawn hrui a. Tichuan, kumtluanin kohhranhote nêan an inpâwl khâwm thîn a, mi tam tak an zirtîr baw a. Antiokei khuaah hian a ni zirtîrteho chu “Kristian” an tih hmasak ber ni.

JUDAI RAM TANA ṬANPUINA

²⁷Chûng lai chuan zâwlnei tute emaw Jerusalem aṭangin Antiokei khuaah an zuk kal a.

²⁸An zînga mi pakhat, a hming Agaba chu a ding a, khawvêl zawng zawngah ṭâm nasa tak a tla dâwn tih Thlarau hriattirna thû a puang a; chû ṭâm chu Klaudia Kaisara lal laiin a lo thleng ta a.

²⁹Zirtîrteho chuan an theih tâwk theuhvin, Judai rama unau awmte tân chhawmdâwlina thawn an tum a.

³⁰Chû chu an puitlin ta ngei a, upate hnênah chuan Barnaba leh Saula kutah an thawn ta a.

BUNG 12

KOHRAN CHUNGAH HERODA A HRÂNG

¹Chûng hun lai chuan lal Heroda chu kohhrana mi thenkhatte tihduhdah tumin a invilik tan a.

²Tichuan Jakoba, Johana unau chu khandaihin a sâthlum a.

³Chû chuan Judate a tilâwm tih a hriatin Petera pawh chu man a tum lehzel a. Chutih lai chu Chhang Dâwidim Telh Loh Kût hun lai a ni a.

⁴Ani chu a man a, tân inah a khung a, sipai pâwl lî, pali theuh zelîn a vên chhâwktîr a; Kalhlên Kût zawhah mipui hmâa pho chhuah a tum a ni.

TÂN IN ATA PETERA A CHHUAK

⁵Chuvângin, Petera chu tân inah chuan a tântîr ta a; nimahsela, kohhranho chuan ama tân Pathian hnênah bâng lovin an tawngtaisak reng a.

⁶Chutia Herodan hruai chhuah a tum dâwn zânah chuan Petera chu sipai pahni inkârah kawl pahni bunin a muhîl a; a vêngtute pawhin tân in chu vêngin kawngka bulah an vil reng a.

⁷Ngai teh, Lalpa Vântirhkoh pakhat chu a kiangah a lo ding a, tân in chhûng chu a lo êng a; Petera nâkah a khawih harh a, “Tho vat rawh!” a ti a. A kawl bun chu a kut aţangin a tla ta mai a.

⁸Vântirhkoh chuan a hnênah, “Insiam la, i pheikhaw bun rawh,” a ti a. A sawi ang chuan a ti a. Vântirhkoh chuan, “I thuamhnaw inbel la, mi zui rawh,” a ti a.

⁹Tichuan a chhuak a, a zui ta a; Vântirhkoh chêtzia chu atak a ni tih a hre lo va, inlârna hmu emaw a inti zâwk a.

¹⁰Vêngtu sipai tawntirh leh a dawttu an pelh hnû chuan, pâwna chhuahna tîr thîr kawngkhâr chu an va thleng a, chû chu an tân a inhawng chawp a; tichuan an chhuak a, kawthlêr pakhat an zawh thlâ a, Vântirhkoh chuan a kalsan ta nghâl a.

¹¹Petera chuan thil awmzia a hre fiah ta a, “Lalpan a Vântirhkoh a tîr chhuak a, Heroda kut aţang leh Juda mipui zawng zawngte beiseina aţangin mi chhandam tih tunah ka hrefiah ta,” a ti a.

¹²Chutia a harhfîm hnû chuan, Johana Marka an tih bawk nu Mari in lam chu a pan ta a; chutah chuan tawngtaiin mi tam tak an lo awm khâwm a.

¹³An sumhmun kawngkhâr a kik vêleh nula pakhat, a hming Rodi chu chhâng tûrin a va kal a.

¹⁴Petera âw a han hre ta mai chu, a lâwm avângin kawng hawnsak nachâng pawh hre lovin a tlân lût leh daih a, kawngkhâr bulah Petera a ding tih a va hrilh a.

¹⁵Anni chuan a hnênah, “I â ta a nih hi!” an lo tihsan a. Ani erawh chuan, ‘tak tak a ni,’ tiin a ţang tlat a. Mahse anni chuan, “A Vântirhkoh a nih chu,” an la ti lehzel a.

¹⁶Petera chuan a kik reng a; kawngka an han hawn chuan amah ngei chu an hmu ta a, mak an ti êm êm a.

¹⁷Anni chu ngawi tûrin kutin a zâp a, Pathianin tân in chhûng aţanga amah a hruai chhuah dân a hrilh ta a. “Hêng thû hi Jakoba leh unaute va hrilh rawh u,” a ti a. Tichuan a kal chhuak a, hmun dangah a kal sawn ta a.

¹⁸Khua a lo vâv chuan vêngtu sipaihote chu Petera awmna chin hre lovin, namên lovin an buai ta nuaih nuaih a.

¹⁹Heroda chuan a zawng vêl a, a hmu si lo va, a vêngtute chu a chhuahchhâl hrep a, tihlum tûrin thû a pê a. Amah chu Judai ram aţangin Kaisari khuah a chhuk thla a, chutah chuan a zu awm reng a.

HERODA THIH DAN RÂPTHAK

²⁰Heroda chu Tura leh Sidon mipuite chungah a thinrim hlê a; chûng mite chuan lal hnuai thawk milian, Blasta chu thianah an siam a, thu khat vuain a hnênah an lo kal a, lal ram chu an ramin ei leh bar tûr an lakuhna ber a nih avângin inrem turin an rawn ngên a.

²¹An inbiakna tîr nîah chuan Heroda chuan lal puan a sin a, lalthutthlêngah a thû a, an hnênah thû a sawi a.

²²“Mihring âw a ni lo, pathian âw a nih hi!” tiin mipuite chu an âu dual dual a.

²³Mahse ani chuan Pathian hnênah châwimâwina a pêk loh avângin chawp leh chilhin Lalpa Vântirhkoh kut a tuar a. Rulhûtin a ei a, a thi ta a.

²⁴Pathian thu erawh chu a ţang a, a darh zau zel a.

BARNABA LEH SAULA NEMNGHEH

²⁵Barnaba leh Saula te chu rawng an bâwl zawhin, Jerusalem khuah aţang chuan an kîr leh a, Johana, Marka an tiha chu an hnênah an hruai a.

BUNG 13

¹Antiokei khuah kohhran awm te zîngah chuan zâwlneite leh zirtirtute an awm; chung chu Barnaba te, Nigera an tih Simeona te, Kurini khuah mi Lukia te, lal Heroda bula seilian Manaina te, Saula te an ni.

²Chutia chawngheia Lalpa rawng an bâwl lai chuan, Thlarau Thianghlîmin, “Barnaba leh Saula te hi anmahni ka ruat chhan ti tûrin mi tihhransak rawh u,” a ti a.

³Chutichuan, châw an nghei a, an tawngtai zawh chuan an chungah kut an nghat a, an tîr chhuak ta a.

KUPRA THLIARKARA THUHRIL

⁴Tichuan, Thlarau Thianghlîm tîr chhuahin an kal a, Selukai khuah an chhuk a, chuta ţang chuan Kupra thliarkârah lawngin an kal leh a.

⁵Salamis khuah an thlen chuan Judate biak inah Pathian thû an hril a. Johana pawh anmahni pui tûrin an hruai vê a.

⁶Chû thliarkâr chu Paphos khaw thlengin an fang chhuak a, dâwithiam, zawlnei suak Juda mi pakhat an hmu a, a hming chu Bar-Isua a ni.

⁷Chû pa chu lal aiawhtu, mi fîng tak Serjia-Paula hnêna awm a ni a. Chû lal aiawhtu chuan Pathian thu ngaithlâk a duh avângin Barnaba leh Saula chu a ko va.

⁸Nimahsela, ‘Eluma’ dâwithiam (a hming dang chu Bar-Isua) chuan lal aiawhtu chu rinna thú âwih lohtîr a tum a, anni chu a lo dodâl a.

⁹Saula, Paula an tih bawk chu Thlarau Thianghlimin a lo khat a, chû pa chu a en reng a,

¹⁰“Nang mi bumhmang leh vertherna khat pa, nang Diabola fapa, nang dikna tinrêng malmâk pa, Lalpa kawng tuang tha hi tikhawloh i tum zêl ang mâw?

¹¹Hre rawh, tûnah hian i chungah Lalpa kut a tla ta e, i mit a del ang a, khaw êng i hmu rih lo vang,” a ti a. Tichuan, chhûm leh thimin a bawh nghâl a, kuta kaitu tûr zawngin a dap ta ruai ruai a.

¹²Lal aiawhtu chuan chû thil awm dân chu a hmû a, Lalpa zirtîrna thú chu mak a ti êm êm a, a ring ve ta a.

PISIDIA RAMA ANTIOKEI

¹³Paula leh a thiante chu Paphos khua aţang chuan lawngin an kal a, Pamphulia rama Perga khua an thleng a; Johana chuan anni chu kalsanin Jerusalema a hâwsan ta a.

¹⁴Perga khua aţang chuan an kal zêl a, Pisidia rama Antiokei khua an thleng a; Sabbath nîn biak inah an lût a, an thú a.

¹⁵Dân Lehkhabu leh Zâwlneite Lehkhabu chhiar zawh a nih chuan biak in hotuten an hnênah mi an tîr a, “Unaute u, mite tâna fuihna thú eng emaw in neih chuan sawi rawh u,” an ti a.

¹⁶Tichuan, Paula chu a lo ding a, a kutin a zâp a, thú a sawi a: “Israel mi, Pathian ţihtûte u, ngai teh u:

¹⁷Hê Israelte Pathian hian kan thlahtute kha a lo thlang a, Aigupta rama an mikhual chhûng khân a châwi kâng a, a kut phar chhuak meuhin chuta ţang chuan a hruai chhuak leh ta a.

¹⁸Thlalêrah kum sawm lî lai an awm chhûnga an thiltih dânte chu dawhthei takin a en reng thei a.

¹⁹Kanaan rama hnam sarîh a tihtlâwmsak hnû khân, an ram chu an luah atân ţhumvâwrin a semsak a.

²⁰“Chumi hnû kum zali leh kum sawmnga chhûng, zâwlnei Samuela lo awm thleng khân rorêltute a pê ţhin a.

²¹Chumi hnûah lal an dîl a; tichuan Pathianin, Saula, Kisa fapa, Benjamina chîa mi kha, kum sawm lî chhûng an hnênah a pê a.

²²A lalna a tihtâwpsak lai khân, Davida chu lal atân a tung ding a, ani chungchang sawiîn Pathianin, ‘Davida, Jesaia fapa, ka thinlung ang pu mi leh, ka duh zâwng ang zêl ti tûr mi ka chhar ta,’ a ti a ni.

²³“Chû mi thlah aţang chuan, thutiam tawh ang zêlin, Pathianin Israelte tân Chhandamtu Isua a rawn dîn chhuak a,

²⁴a lo kal hmâin Johanan simna baptisma thú Israel mi zawng zawng hnênah a lo hrilh hmasa bawk a.

²⁵Johanan a rawngbâwl hna a zawh dâwn lai khân, ‘Nangnin tûah nge mi ruat? Ani chu ka ni lo ve. Nimahsela ngai teh u, ka kal hnûah mi tuemaw a lo kal dâwn a, kei zawng a kephaha pheikhaw phelhsaktu ni tlâk pawh ka ni lo ve,’ a ti a.

²⁶“Unaute u, Abrahamah thlaha fate u, in zînga Pathian ţih mi zawng zawngte tân, hê chhandamna thú hi in hnênah kan rawn thlen ta a nih hi.

²⁷Jerusalem khuua awmte leh an rorêltuten ani chu an hriat loh avâng leh, Sabbath nî apianga an chhiar ţhin zâwlneite thuchah an hriatthiam loh avângin ani chu thiam loh an chantîr a; tichuan zâwlneite hrilhâwkna tidiktûah an ţang ta hlauh a ni.

²⁸Amahah thihna khawp meuh thil engmah an hmu lo chung pawhin, Pilata hnênah tihlum an ngên a.

²⁹Zâwlneiten an ziah lâwk zawng zawng kha a hlen chhuah zawhin, thing lêr aţangin an la thlâ a, thlânah an zalh ta a.

³⁰Nimahsela, Pathianin mitthi zîng ata a kai tho leh ta a ni.

³¹Galili ram aţanga Jerusalem khuua ama ruala chho vête hnênah ni tam tak a inlâr a; chûng mite chu mipuite hnêna a thuhriatpuitûah an ţang ta a ni.

³²Keini pawhin thlahtute hnêna thú a lo tiam tawh, chanchin lâwmawm tak kan rawn puang a ni e.

³³Pathianin keini, an fate tâna a thutiam chu, Isua kai thovin a hlen chhuak ta. Sam pahniha chuan, ‘Ka Fapa i ni e, Vawiihah hian ka hring a che,’ tih zia ang khân.

³⁴A taksa pawh ţawihna hmuna kîr leh lo tûra Pathianin mitthi zîng ata a kaihtawh tûr thú heti hian a sawi, ‘Davida hnêna khawngaihna ka tiam tlatte kha nangmah ka pê ang che,’ tiin.

³⁵Chuvângin Fakna hla dangah, ‘I Mi Thianghlim ţawihral chu i phal lo vang,’ a ti bawk a.

³⁶Davida zawng, Pathian duh dâna a hun laia mite tân rawng a bâwl zawh khân a muhîl a, a pute hnênah an zalh a, a ţawihral tawh alâwm;

³⁷nimahsela, Pathianin a kaihtawha erawh chu a ţawihral ve lo.

³⁸Chuvângin unaute u, hre rawh u; amah kaltlangin sual ngaihdamna thú in hnênah kan hrilh che u hi;

³⁹Mosia dânah thiamchanna rêng rêng a awm theih loh laiin, amah ringtu erawh chu tûpawh ni se, engkimah thiam chantîr an ni vek asin.

⁴⁰Chuvângin, fimkhur rawh u, chuti lo chuan zâwlneite lehkhâbûin a sawi kha in chungah a lo thleng dah ang e:

⁴¹“Hmusittute u, en rawh u, Mak ti ula boral rawh u! In dam chhûng hian thil kawng khat ka tih hi, Chû thil chu miin an hrilh che u pawhin In âwih tawp lo vang,’ tih hi,” a ti a.

ANTIOKEIAH MALSAWMNA LEH INDONA

⁴²Judaten biak in an chhuahsan lai chuan, Jentailte chuan Sabbath ni lehah chûng thúte chu sawi leh tûrin an ngên a.

⁴³Inkhâwmhote chu an ţin darh vêleh, Judate leh an saphunte zînga Pathian ngaihsak mi tam takin Paula leh Barnaba chu an ţâwiâwm zui zêl a; anni chuan Pathian khawngaihnaah awm reng tûrin an fuih a.

⁴⁴Sabbath nî a lo thlen leh chuan a khaw pum deuh thâw chu Pathian thu ngaithla tûrin an rawn inkhâwm a.

⁴⁵Nimahsela, Judaten mipui hmêl an hmuh chuan, îtsîknain an khat a; Paula thusawi chu hnialkalhin a chhe zâwng ngawtin an sawi a.

⁴⁶Mahse, Paula leh Barnaba te chu an lo huai sauh zâwk a, “Pathian thú hi nangmahni hnênah sawi hmasak tûr chu a ni rêng e; mahse in duh lohva, chatuana nung ve tlâka in inruat loh a hnû, ngai rawh u, Jentailte lam kan hawi ve tawh dâwn.

⁴⁷Chutianga ti tûr chuan Lalpan thú min pê rêng a ni: ‘Jentailte êng ni tûrin ka ruat a che, Kâwlkil thlenga chhandamtua i awm theih nân, tih zia ang khân,” an ti a.

⁴⁸Jentailte chuan chûng thú an lo hriat chuan an lâwm hle a, Lalpa thú chu an châwimâwi a. Chatuana nung tûra ruat lâwk apiang te chuan an ring ta a.

⁴⁹Tichuan, Lalpa thú chu, chu lai ram pumah chuan a darh chhuak ta vek a.

⁵⁰Judaho erawh chuan sakhaw ngaihsak milian hmeichhiate leh khaw chhûnga mi pawimawh deuh deuh an fuihpawrh a, Paula leh Barnaba te tiduhdah tûrin mi an chawh tho va; tichuan, an ram aţangin an hnawt chhuak ta hial a.

⁵¹Nimahsela, anni chuan an kephaha vaivut an thîn thlâk khum a, Ikoniam khuah an kal ta a.

⁵²Zirtîrhote chu Thlarau Thianghlimin an lo khat a, an hlim êm êm a.

BUNG 14

IKONIAM-AH

¹Ikoniam khuah chuan Judate biak inah an lût dîn a, thú an sawi thîn a; chutichuan, Judate leh Grik mipui tam takin an ring ta a.

²Mahse, ring duh lo Judaten Jentailte an fuihpawrh a, an rilrûah huatna chî tuhin unaute chu an huattîr a.

³Tichuan, Lalpaah huai takin thú an sawi zêl a, chutah chuan rei fê an châm a, Lalpa chuan chhinchhihna leh thil makte an kuta tihtîrin a khawngaihzia a hriattîr thîn a.

⁴Nimahsela, khuah mipuite chu an inthên phawk a; a thenin Judate an ţan a, a thenin tirhkohte an ţan a.

⁵Jentailte leh Judate chu an hotute nêna ţangkawpin tirhkohte chu sawisaka, tharum thawha lunga den an tum a,

⁶anni chuan an thiltum an lo hriat chuan, Lukaoni khawpui Lustra leh Derbe leh a chhehvêl ramah te an tlan ta zêl a.

⁷chûngah te chuan Chanchin Tha chu an hril zêl a.

LUSTRA KHUAA MILEM BIAKNA

⁸Lustra khuah chuan ke zeng tuemaw a thú thîn a, a nu pum aţanga zeng sa rênga piang a ni a, kêin a kal ngai lo va.

⁹Chû mi chuan Paula thusawi a ngaithla ve a. Paula chuan ani chu a en reng a, damna tûra rinna a nei tih a hria a,

¹⁰aw ring takin, “I kêin ngîl takin dîng rawh!” tiin a âu va. Ani chu a lo uang tho va, kêin a kal ta a.

¹¹Mipuiten Paula thiltih an han hmuh chuan, Lukaoni ţawngin ring takin, “Mihring angin pathiante chu kan hnênah an lo chhuk

ta a nih hi!” an ti a.

¹²Barnaba chu ‘Zeus’* an ti a, Paula chu thusawitu zâwk a nih avângin ‘Hermes’** an ti a.

¹³Zeus puithiam, daipâwna biak in nei chuan sebâwngpate leh pangpâr thite chu kawngkhâr kiangah a rawn la a, mipuite nêin chuan inthâwi nâna talh an tum a.

¹⁴Tirhkoh Barnaba leh Paula te erawh chuan chû chu an hriat veleh an puan an pawt thlêr a, awrâwl chhuahin mipui zîngah chuan an tlan lût a,

¹⁵“Pute u, engtizia nge hetiang thil tih in tum le? Nangmahni ang bawka mihring ve tho kan nih hi; hêng thil tlâktlai lo te hi hawisan rawh u. Keini chuan lei leh vân leh tuifinriat leh a chhûnga awm zâwng zâwng siamtu Pathian nung hnên lam in lo hawi theih nân thú kan rawn hrilh che u a nih hi.

¹⁶Chû Pathian chuan tûn hmâ zâwng khân hnam tinte chu anmahni awm dân kawng an zâw a phal thîn a.

¹⁷Nimahsela, amah a awm ngei tih hriatpuitu nei lovin a awm ngai lo; thil tha tiin vân aţangin ruah a surtîr a, in thlaiten hlâwk taka rah chhuahin, ei tûr leh lâwmnain in thîlung a tikhah thîn che u kha,” an ti a.

¹⁸An hnêna inthâwina ran talhsak tum mipuite chu chûng thú chuan an khap thei hrâm a.

LUNGA DEN, DERBE A TLÂNCHHIAT

¹⁹Mahse, Antiokei leh Ikoniam khuah mi Juda tute emaw an lo kal a; mipuite chu an lamţanga siamin, an rawn hmin ta duak mai a, Paula chu lungin an dêng a, thi tawh ngeia an hriat avângin khuah aţangin an hnûk chhuak a.

²⁰Ani erawh chu zirtirhoten an dîn hual laiin a lo tho va, khuah chuan a lût leh ta mai a. A tûkah chuan Barnaba nêin Derbe khuah an kal ta a.

RINGTHARTE TICHAK ZELIN

²¹Chû khuah mite hnênah chuan Chanchin Tha an hril a, zirtîr tam tak an siam hnûin, Lustra khuah te, Ikoniam khuah te, Antiokei khuah te an lo kîr leh a.

²²“Hrehawm tam tak tuar chungin Pathian lalrama lût tûr kan ni rêng a ni,” tiin zirtîrhote rilru an tichak a, rinnaah chuan dîng nghet tlat tûrin an fuih zêl a.

²³Kohhran tinah upate an ruatsak a, chaw nghei chung a ţawngţai zawhin, an rin Lalpa hnênah chuan an kawltîr zêl a.

²⁴Pisidia ram an kal tlang hnûah Pamphulia ram an lo thleng a.

²⁵Perga khuah thú an hril zawhin Attalia khuah an chhuk a.

²⁶Chuta ţang chuan lawngin an chhuak a, Antiokei khuah an lo thleng leh ta a; chû chu an hnathawh zâw tâk ti tûra unauten Pathian khawngaihna kawltîra, an tirh chhuahna hmun kha a ni.

²⁷An thlen hnûah kohhranho an ko khâwm a, Pathianin anmahni hmanga thil a tih zâwng zâwng, Jentailte tâna rinna kawng Lalpan a lo hawnsak dân te chu an sawi a.

²⁸Tichuan, zirtirhote hnênah chuan rei tak an châm a.

BUNG 15**SERHTAN THUBUAI**

¹Judai ram aţangin mi tute emaw an lo chhuk a, “Mosia dân anga serh in tan loh chuan chhandam in ni thei lo vang,” tiin unaute chu an zirtîr a.

²Paula leh Barnaba chu chûng mite nê chuan namên lova an inhniâl a, nasa taka an inkhin tâk avângin, an thubuai chingfel tûrin Paula leh Barnaba chu an zînga mi thenkhatte nê, Jerusalemah tirkhohte leh upate hnêna han thlen tûrin an ruat a.

³Kohhran tirhin an kal ta a; Phoiniki ram leh Samari ram an fang chhuak a; Jentailten an lo rin ve tâk dân an sawite chuan unau zawnzawngte a tilâwm êm êm a.

⁴Jerusalem an han thlen chuan kohhrante, tirkhohte leh upate chuan an lo lâwm a; anni chuan Pathianin anmahni hmanga thil a tih zawnzawngte chu an puang chhuak a.

⁵Nimahsela, Pharisaî pâwla mi ring vê tute emaw an lo tho va, “Jentailte chu an serh tantîr tûr a ni a, Mosia dân pawh âwih tûra tiamtîr kher tûr a ni,” an ti tlat a.

JERUSALEM KHAWMPUI

⁶Chû thu ngaihtuah tûr chuan tirkhohte leh upate chu an inkhâwm ta a.

⁷Nasa taka an inhniâl hnûin, Petera a lo ding chhuak a, an hnênah: “Unaute u, Jentailten keima kâa Chanchin Tha an lo hriata, an âwih theihna tûra, hmâna Pathianin min thlan chhuah dân pawh in hai loh kha.

⁸Tichuan, thinlung hretu Pathian chuan anmahni a pawm ve tho a ni tih hriattîr nân, keini min pêk ang bawkin an hnênah Thlarau Thianghlim a pe vê si a.

⁹Keini leh anni thlei bîk lovin rinnain an thinlung a tithianghlim a.

¹⁰Chuvângin, min thlahtute leh keini zawn tawh loh nghâwnkawîl kha, tûnah zirtîrhote kovah barh luih tumin, engati nge Pathian in fiah le?

¹¹An rin dân ang bawkin keini pawhin Lalpa Isua Krista khawngaihna avâng chauhva chhandam tûr niin kan inring ve tho si a,” a ti a.

¹²Barnaba leh Paula ten anmahni hmanga Jentailte zînga Pathianin chhinchhiahna leh thil mak tak tak a tih thû an sawi chu ngaithlain mipui zawnzawng chu an ngawi thuap a.

¹³Chutia an la ngawih lai chuan Jakobani heti hian thu a sawi a: “Unaute u, ka thusawi hi lo ngaithla teh u:

¹⁴Pathianin Jentailte a kan tantîr dân te, ama hming pu tûr an zînga mi a lâk chhuah dân te chenin Simonan arawn sawi kha.

¹⁵Chûng thû leh zâwlneite thuziak hi a inhmeh hle mai, tihian ziah a ni:

¹⁶Chûng zawnzawng chuan ka kîr leh ang a, Davida bâwkte chim kha ka siam tha leh ang a, A chhe lai apiang pawh ka din thar leh ang;

¹⁷Mi dang zawnzawngte pawhin LALPA an zawn nân leh, Ka hming mi tawmpuitu Jentailho zawnzawngte pawhin LALPA an zawn

nân Hêng thil zawnzawng titu LALPA chuan a ti a,

¹⁸Khawvêl siam tirkh ata hêng thu hriattîrtu Lalpa chuan a ti e, tih hi.

¹⁹“Chuvângin, heti hian ka ruat a ni, Jentailte zînga Pathian lam hawite chungah hian kherkhiap lutuk lo ila,

²⁰milem biakna thil bawlhhlawh ei te, inngaih te, sa rehhlum leh sa thisen eite an chûn tawh lohna tûrin an hnênah lehkha thawn zâwk ila ka ti a ni.

²¹Mosia dân pawhin hmânlai ata tawh khaw tinah thu puangtute a nei a, biak in tinah Sabbath ni apianga chhiar a nih thin kha,” a ti a.

JERUSALEM THUCHHUAK

²²Tichuan, tirkhohte, upate leh kohhran pumpui chuan, an pâwl aţanga mi thlan chhuaha, Paula leh Barnaba te ruala Antiokei khuah kâlîr tha an ti a; an thlante hming chu, unaute zînga hotu deuh deuh, Juda, Barsaba an tih baw leh Sila te an ni.

²³Hetianga hian lehkhathawn an zia a: “Tirkhohte, upate leh unauten Antiokei khuah te, Suria ram te leh Kilikia rama Jentail unau awmte hnênah: Chibai ule.

²⁴Kan pâwl zînga mi tute emaw thu sawiin a tibuai che u a, in rilru an timangang tih kan hria a, “Serh in tan tûr a ni a, dân pawh in zawn kher tûr a ni,” an ti a; chutiangan an hnênah thû engmah kan pe si lo va.

²⁵Chuvângin, thu khat vuah kan inkhâwmin, mi thlante in hnênarawn kâlîr ve tha kan ti a, kan duh tak Barnaba leh Paula,

²⁶Lalpa Isua Krista hming avângah thih huam te rual hian.

²⁷Tichuan, Juda leh Sila te kanrawn tîr a nih hi, anni pawhin hêng thû baw hi tawngkâin an hrilh ang che u.

²⁸Thlarau Thianghlim leh keini chuan hêng thu pawimawh bâk hi phurrit zual in chungah ngat lo ila a tha kan ti:

²⁹milem biakna sa ei te, sa thisen ei te, sa rehhlum sa ei te, inngaih te bânsan ula kan ti a; hêng hi in bânsan chuan in tân a tha ang. Dam takin awm rawh u,” tiin.

SURIA RAMA RAWNGBAWLNA

³⁰Tichuan, an tîr chhuak ta a, Antiokei khuah an thleng a; mipui an ko khâwm a, lehkha chu an pê a.

³¹An chhiar zawn chuan, an fuihna thû te chuan a tilâwm êm êm a.

³²Juda leh Sila te chu zâwlnei an ni baw a, thu tam takin unaute chu an thlamuan a, an tinghet a.

³³Chutah chuan hun engemaw chen an châm hnûin, unaute chuan tirkhohte hnênah chibai bûkna nê an hawtîr leh ta a.

³⁴Sila erawh chuan la châm rih chu tha a ti hle a.

³⁵Paula leh Barnaba te pawh Antiokei khuah chuan Lalpa thu zirtîr leh hrilin an awm reng a, mi dang tam takte pawh an awm baw a.

JOHAN MARKA AVANGA INTHENNA

³⁶Ni eng emaw zât hnûah Paula chuan Barnaba hnênah, “Tûnah kal leh ta ila, khaw tina Lalpa thû kan hrilna apianga unau awmte kha tlawh zêl ila, engtin nge an awm tih enin i va kan kual ang hmiang,” a ti a.

³⁷Barnaba chuan Johana, Marka an tih chu an hnênah hruai a tum tlat a.

³⁸Paula erawh chuan Pamphulia rama an awm laia a hawsan daiha, an rawngbâwlina lama a zui ve tâk loh avâng khân hruai ve leh chi niin a hre lo va.

³⁹Tichuan, namên lovin an inhnial a, an inthen phah ta hial a. Barnaba’n Marka chu a hruai a, Kupra thliarkâr lamah lawngin a kal ta a.

⁴⁰Paula erawh chuan Sila a thlang a, unauten Lalpa khawngaihnaa an kawltîr hnûin a kal chhuak leh ta a.

⁴¹Tichuan, kohhran pâwlte chu tinghet zêlin Suria leh Kilikia ram a fang chhuak a.

BUNG 16**TIMOTHEAN PAULA LEH SILA A ZAWM**

¹Derbe khua leh Lustra khua te a tlawh leh a. Ngai teh, chutah chuan zirtîr pakhat, a hming Timothea a lo awm a; amah chu ringtu, Juda hmeichhe pakhat fapa a ni a, a pa erawh chu Grik mi a ni.

²Lustra leh Ikoniam khuaa unaute mithmuhah chuan fakawm tak a ni a.

³Paula chuan ani chu an hnêna kal ve tûrin a duh a; tichuan, chu lai vêla Judate mitmei vêngin a serh a tansak a, a pa chu Grik mi a ni tih an hre vek si a.

⁴An kalna khaw tinah chuan Jerusalema tirhkohte leh upate thuchhuak kha zâwm tûrin an ti zêl a.

⁵Tichuan, kohhrante chu rinnaah chuan an nghet sawt a, a ni têlin an pung zêl a.

MAKEDONIA KOHNA

⁶Phrugia leh Galatia ram an fan chhuah zawh chuan, Thlarau Thianghlimin Asia rama thuhrlil a khap ta a.

⁷Musia ram an va thleng a, Bethunia rama luh an tum a; mahse Thlarau bawh chuan a phal leh ta lo va.

⁸Tichuan, Musia ram chu an kal pêl a, Troas khuaah an chhuk thla a.

⁹Zânah chuan Paulan inlârna a hmu a. Makedonia rama mi pakhat hian ding chungin, “Makedonia ramah lo kai la, min pui rawh,” tiin a lo ngên a.

¹⁰Chû inlârna a hmuh zawh chuan, Makedonia rama kal kan tum ta nghâl a, an hnênah Chanchin Thla hril tûrin Pathianin min ko tih kan hria a.

PHILIPPI-AH LUDI’N BAPTISMA A CHANG

¹¹Troas khua aţang chuan lawngin kan chhuak a, ngîl takin Samothraki kan thleng a, a tûkah Neapoli khua kan thleng leh a.

¹²Chuta ţang chuan Philippi khuaah kan kal a, chû khua chu Makedonia biala khaw pawimawh ber a ni a, Rom aţanga mi pêmho awm khâwmna a ni. Chû khuaah chuan ni engemaw zât kan châm a.

¹³Sabbath niin khaw pâwna lui kam, ţawngţaina hmun atâna an hman ţinah chuan kan kal a; tah chuan kan thû a, hmeichhe lo kal khâwmhote hnênah chuan thû kan sawi a.

¹⁴Hmeichhe pakhat, a hming Ludii chuan kan thû a ngaithla a. Ani chu puan sen duk zuartu, Thuatira khaw mi, Pathian betu a ni. Paula thu sawi pawm thei tûrin Lalpa chuan a thinlung a hawnsak a.

¹⁵Chutia amah leh a chhûngten baptisma an chan zawh chuan, “Lalpa tâna mi rinawm ni tûra min ngai a nih chuan kan inah lo thleng rawh u,” tiin min ngên chiam a. Tichuan, min sâwm thlu ta a.

PAULA LEH SILA TÂN INAH

¹⁶Ķawngţai tûra kan kal laiin bâwih nula pakhat ramhuai zâwl, aienthiam hian min lo tâwk a, a aienthiamna chu a pûte chuan an hlâwkpuil hlê a.

¹⁷Chû nula chuan Paula leh keini min zui a, “Hêng mi chhandamna kawng min hrilhtu te hi, Pathian Chungnungber chhiahhlawhte an nih hi,” tiin a âu a âu mai a.

¹⁸Chutiang chuan ni tam tak a âu va. Paula thinin a tuar ta ngang lo va, chû mî lam hawiin thlarau hnênah chuan, “Isua Krista hmingin a chhûng aţanga lo chhuak tûrin thû ka pê a che,” a ti a. Chumi lai lâ lâ chuan a chhuak ta a.

¹⁹A puten an sum hnâr a chat ta tih an lo hriat chuan Paula leh Sila chu an man a, hotute hmâah dâwr hmunah an hnûk lût a.

²⁰Rorêltute hnênah an hruai a, “Hêng Judate hian namên lovin kan khua an rawn chawh buai a ni;

²¹keini Rom miten kan pawm leh kan zawm ve thiang lo, tihdân eng eng emaw an rawn zirtîr reng mai,” an ti a.

²²Tichuan, mipui chu tirhkohte sawisak tumin an rawn inhâwr khâwm a, rorêltute chuan an kawr hâk laite an phih thlêrsak a, tianga vuak tûr thû an pe ta a.

²³Vawi tam tak an vuak hnûah tân inah an khung a, uluk taka vêng tûrin tâng vêngtu chu thû an pê a.

²⁴Chutiang thupêk khauh tak a dawn avâng chuan ani chuan rip chhûngrilah a khung a, an kêahte chuan kawl a buntîr a.

PHILIPPI TÂNG VENG TU CHHANDAM

²⁵Nimahsela, zan laiah chuan Paula leh Sila chu Pathian hnênah an ţawngţai a, hlâ an sâ a, mi tângten an ngaithlâ a;

²⁶Thâwk leh khatah lîrpui a lo ngîng a, tân in lungphûmte lam chuan a sawi ngîng a; kawngkhâr zawng zawng a inhawng vek a, mi tin kawl bunte chu a lo inphelh ta vek a.

²⁷Tâng vêngtu muhîl chu a lo harh a, tân in kawngkhar inhawng te chu a hmu a, tâng hote chu an tân bo vek emaw a ti a, a khandaih a phâwi a, intihhlum a tum a.

²⁸Paula chu ring takin a âu va, “Intina suh; kan vaiin hetah kan la awm vek alâwm,” a ti a.

²⁹Chû vêleh tâng vêngtu chuan khâwnvâr a chhi a, a lo tân lût a, hlauva khûr chungin Paula leh Sila hmâah chuan a bawkkhup a.

³⁰Anni chu a hruai chhuak a, “Pute u, chhandama awm tûrin eng nge ka tih ang?” a ti a.

³¹Anni chuan a hnênah, “Lalpa Isua Krista ring la, tichuan chhandamin i awm ang, nang leh i chhûngte nêh,” an ti a.

³²Amah leh a inchhûnga mi zawng zawng hnênah chuan Lalpa thû an hrilh a.

³³Chumi zân lâ lâ chuan a hruai a, an vuakna hliamte chu a silfai sak a. Amah leh an chhûngkua chuan baptisma an chang nghâl vek a.

³⁴A inah a hruai lût a, ei tûr a hlui a; an chhûngkua Pathian an lo rin tâk avângin a hlim ta êm êm a.

PAULAN A RÛKA CHHUAH A DUH LO

³⁵Khua a lo vâh chuan, rorêltute chuan, “Kha mite kha chhuah rawh u,” ti tûrin hotute an tîr a.

³⁶Tâng vêngtu chuan chû thû chu Paula a hrilh a, “Rorêltuten chhuak tûrin an ti che u a. Tihian lo chhuak ula, thlamuang takin kal rawh u,” a ti a.

³⁷Paula erawh chuan, “Rom mi kan ni a, thiam loh chang pawh kan ni lo va, vantlâng mithmuhah min vaw hrep a, tân inah min khung a. Tûnah hian arûka mi chhuahtîr an tum leh si amâw? A teuh lo mai! Anmahni ngei lo kal sela, min rawn hruai chhuak ang hmiang,” a ti a.

³⁸Hotute chuan chû thû chu rorêltute an va hrilh a. Rom mi an lo ni reng tih an hriat chuan an hlauthâwng ta a.

³⁹An va kal a, thuphâ an va châwi a, an hruai chhuak a, khua chu chhuahsan tûrin an ngên a.

⁴⁰Tichuan, tân in aţang chuan an chhuak a, Ludii inah an lût a; chutah chuan unauteho chu an va hmu hlawm a, an  awng thlamuan a, tichuan an kal chhuak ta a.

BUNG 17

THESSOLONIKA KHUA-AH KRISTA THU AN HRIL

¹Amphipoli leh Apollonia khua te an kal pêl a, Thessalonika khua an thleng a, chutah chuan Judate biak in a awm a;

²Paula chu a dân pangngaiin biak inah chuan a lût a, Sabbath  um thum lai Pathian Lehkha Thu aţangin a zirpui a,

³Krista chuan hrehawm tuara, mitthi zîng ata tho leh tûr a nihzia te chu entîrna hmangin a hrilh fiah zêl a; “Hê Isua kan hril hi Krista chu a ni,” a ti baw  h n a.

⁴Mi  henkhat chuan an lo  wih ta a; Grik-ho zînga Pathian ngaihsak mi tam tak te leh hmeichhe hruaitu mi engemaw z tin Paula leh Sila te chu an z wm ve ta hial a.

JASONA IN AN SUASAM

⁵Nimahsela,  wih ve duh lo Judate chuan an  ts k a; d wr hmuna misual rualhote s wmin, mipui an kh wm a, khaw chh ng chu an chaw   buai vek a, vantl ng hmaa hruai chhuah tumin Jasona in chu an rawn bei ch m a.

⁶Anni chu an hmu si lo va, Jasona leh unau dang lo awmte chu khaw hotute hn nah an hn k l t a, an  u va, “Khawv l chaw   buaitute kha hetah pawh an lo kal a,

⁷Jasona hian a lo thleng vei a; h ng   zawng zawng hian l l dang Isua a awm, tiin Kaisara thup k an kalh a ni,” an ti a.

⁸Ch ng th te an lo hriat chuan mipuite leh khaw hotute chu an buai ta hl  a.

⁹Jasona leh mi dangte hn n a ang chuan an aia dahkham t r th l an la a, an chhuah ta a.

BERIA KHUAA RAWNGBAWLNA

¹⁰Unaute chuan a z n a z nin Paula leh Sila chu Beria khuah an kalt r ng  l a. Chuta an va thlen chuan Judate biak inah an l t a.

¹¹Ch  khuah mite chu Thessalonika mite ai chuan an lo  a z wk a, an thusawi pawh l wm takin an pawm ng  l mai a, an thusawi dik leh dik loh hriat fiah tumin ni tin Pathian Lehkhabu a angin an zawng  h n a.

¹²Chutichuan, mi tam takin an ring ta a; Grik hmeichhe zahawmte leh mipa  h nem tham takin an ring baw   a.

¹³Nimahsela, Thessalonika khuah Judah   chuan Paulan Beria khuah Pathian th  a hril tih an hriat v leh, an rawn  m zui z l a, mipui an rawn chaw   tho leh ta a.

¹⁴Unaute chuan Paula chu tuifinriat thlenga kal t rin an t r chhuak ng  l a. Sila leh Timothea erawh chu chutah chuan an la ch m reng a.

¹⁵Paula hruaitute chuan Atheni khua an thlenpui a; an haw l t hm in Sila leh Timothea chu a hn na lo kal thuai t rin th  a chah a.

ATHENI MI FINGTE

¹⁶Paulan Atheni-ah anni chu a lo ng ah chh ngin, khua chu m lem biakna hl ra khat nia a hmuh av ngin, a rilr  n a vei ta  m  m a.

¹⁷Chutichuan, biak inah Judate leh Jentailte z nga Pathian ngaihsak mite chu a chh tpui  h n a, puipunna hmuna lo awm apiangte pawh ni tin a sawipui baw    h n a.

¹⁸Epikuria mi leh Stoik mi f ng  henkhatte pawhin ani chu an rawn hnial a.  henkhat chuan, “He mi kamtam hian eng nge sawi a tum?” an ti a. Isua chanchin leh thawhle na th  a hril av ngin  henkhat chuan, “Ram dang pathian mak takte chanchin hriltu a ni awm e,” an ti baw   a.

¹⁹Tichuan, ani chu an hruai a, Areopagi-ah chuan an kalpui a, a hn nah, “H  z rt rna th r i sawi hi min hrilh fiah thei ang em?”

²⁰Kan beng hriatah thu th r mak tak i rawn thlen ta si a. H ng th lte hi eng nge a awmzia hriat kan duh e,” an ti a.

²¹Atheni khuah mi zawng zawng leh an mikhualte chenin, th l dang ngaihsak lo l  kin, thu th r a awm h leka sawi t r emaw, mi sawi ng ith la t r emaw talin an awm chaw    h n a ni.

AREOPAGI A THUSAWI

²²Tichuan, Paula chu Areopagi* laiah chuan a ding a, “Nangni Atheni khuua mite u, kawng engkima in puithûzia hi hai rual a ni lo ve.

²³Ka kal vêl paha chibai in bûk thîn thilte ka en laiin, maichâm pakhat chungah chuan, ‘HRIAT LOH PATHIAN TÂN’ tia ziaak ka hmu a ni. Chutichuan, hre lova chibai in bûk thîna kha, chu mi thû chu ka hrilh che u a nih hi:

²⁴Khawvêl leh a chhûnga thil zawng zawng siamtu Pathian chu lei leh vân lal a nih avângin, kuta sak tempul-ah te a awm lo va.

²⁵Tlâkchham nei anga mihringte kuta rawngbâwlsakin a awm hek lo; amah ngei chu engkim hnêna nunnate, thâwnkate leh thil zawng zawng petu a ni zâwk e.

²⁶Lei chung zawng zawnga awm tûrin thisen hmun khat aţangin hnam tin a siam a, an tân hun bîte a ruat a, an awmna ramrite pawh a kamsak a.

²⁷Lalpa an zawn theih nân leh, hmuh chhuah beiseia an dap an dapa, an hmuh hlauh theih nân; amah chuan tûmah min hlat lo theuh si a.

²⁸Amahah chuan kan nung, kan chê, kan awm a ni si a; nangmahni hla phuah thiamte pawhin, ‘Keini pawh a thlahte kan ni si a,’ an tih thîn ang khân.

²⁹Chuvângin, Pathian thlahte kan nih avângin Pathian chu rangkachak te, tangka te, lung te, mihring themthiamna leh remruatnaa chher chhuah theih ang lekah kan ngai tûr a ni lo ve.

³⁰Dik takin Pathian chuan kan hriat loh laite kha a haider thîn a; tûnah erawh chuan ram tina mi zawng zawng tân sim tûr thû a pe ta.

³¹Diknaa khawvêl ro a rêlna tûr nî a tiam tawh a; a rêltu tûr pawh a ruat fel diam tawh a. Chû chu mi zawng zawngin an lo hriat chian theih nân mitthi zîng ata a kai tho leh ta a ni,” a ti a.

³²Mitthi thawhleha thû an lo hriat chuan, thenkhatin an nuihsan a; thenkhatin, “Hê thû hi i hnên aţangin kan la ngaithla leh ang e,” an ti a.

³³Tichuan, Paula chuan anni chu a kalsan ta a.

³⁴Nimahsela, mi thenkhat chu a lamah an ţang ta tlat a, an ring ve ta a; chûng zîngah chuan Areopagia mi Dionusia leh hmeichhe pakhat a hming Damari leh an hnêna awm ve mi dangte pawh an tel a.

BUNG 18**KORINTH KHUAA RAWNGBAWLNA**

¹Chûng thil hnûah chuan Paula chuan Atheni khuua a chhuahsan a, Korinth khuuah a kal ta a.

²Chutah chuan Juda pakhat, a hming Akuila a hmu a, ani chu Ponto rama piang a ni a, (Klaudian Juda zawng zawng Rom khuua chhuahsan vek tûra thû a pêk avângin) a nupui Priskili nên Itali ram aţanga lo thleng hlim an ni a; chû mite inah chuan a va thleng a.

³An hnathawh ang thawk a nih ve avângin anni chu a hrawn a, an hnênah a thawk ve thîn a; an hnathawh chu puan in siam a ni

a.

⁴Sabbath ni apiangin biak inah Pathian thû a hril thîn a, Judate leh Grikte chu a hmin thîn a.

⁵Sila leh Timothea chu Makedonia ram aţanga an lo thlen hnû chuan Paula chu, Thlaraubin a nawr tlat avângin Judate hnênah Isua chu Krista a ni tih thû a hriattîr thîn.

⁶Mahse an hnial kalha, an sawi chhiat tâk avângin a puan a thîn khum a, an hnênah, “In thisen mawh chu in lu chungah tla rawh se; kei chu ka fihlîm e. Tun aţang chuan Jentailte hnênah ka kal tawh ang,” a ti a.

⁷Chû hmun chu a chhuahsan a, mi pakhat, a hming Justa inah a lût a, chu mi chuan Pathian a be thîn a; a in pawh biak in dawt chiaha awm a ni.

⁸Tichuan, Krispa, biak in hotu chuan a chhûngte zawng zawng nêen Lalpa an ring ta a. Korinth khuua mi tam takin an lo hriatin an ring vê ta a, baptisma an chang ta a.

⁹Zânah chuan Lalpa chu Paula hnênah inlârin thû a lo hrilh a, “Hlau suh la, ngawi lovin thû sawi zêl rawh;

¹⁰Keiman ka awmpui reng che alâwm, tina tûr chein tûma’n i chungah kut an thlâk lo vang; hê khuah hian mi tam tak ka nei si a,” a ti a.

¹¹Tichuan, an hnênah Pathian thu zirtîrin kum khat leh thla ruk a awm ta a.

¹²Galliova chu Akaia rama lal aiawha a awm laiin, Judate chuan inthurualin Paula chu an bei a, rorêlna thutthleng hmâah an thlen a,

¹³“He pa hian dân kalh zâwna Pathian be tûrin mite a thlêmthlu thîn a ni,” an ti a.

¹⁴Paula chuan a chhân ve hmâin, Galliova chuan Judate hnênah, “Judate u, hêng hi dân bawhchhiatna emaw, thiltih sual emaw tal ni sela, mathei lovin ka ngaihtuhsak tûr che u a ni a.

¹⁵Mahse thûte, hmingte, in dân chungchângte mai a nih chuan nangmahni’n rêl zâwk rawh u; chutiang thil rêltu nih pawh chu ka duh nek lo ve,” a ti a.

¹⁶Tichuan, rorêlna thutthlêng aţang chuan anni chu a hnawt chhuak ta hlawm a.

¹⁷Grik mi zawng zawng chuan biak in hotu Sosthena an man a, rorêlna thutthlêng hmâah chuan an vua a. Galliova erawh chuan chung thilte chu a ngaihsak duh lo va.

PAULA ANTIOKEI-AH A KIR

¹⁸Paula chu rei tak a châm reng a. Tichuan, unaute chu kalsanin, Suria ram lamah lawngin a kal ta a, Priskili leh Akuila pawh ama rualin an kal ve bawk a. Thutiam a neih avângin Kenkriai khuuah a lû a mêt a.

¹⁹Ephesi khuua chu a lo thleng a, chutah chuan anni chu a hnutchhiah ta a; mahse ani chu biak inah a lût a, Judate hnênah thû a sawi a.

²⁰Anni chuan rei deuh châm tûrin an sâwm a, mahse a châm hman si lo.

²¹“Jerusalema kût lo thleng tûr han serh hman tûra ka kal ngei a ngai si a; Pathianin rem a tih chuan, in hnênah ka lo kal leh ang,” tiin a thlah a. Tichuan, Ephesi khua a ʔang chuan lawngin a kal ta a.

²²Kaisari a thleng a, Jerusalem-ah a han chho va, kohhran chu chibai a bûk a; chu mi zawhah chuan Antiokei khuaah a chhuk leh a.

²³Chutah chuan rei tak a chawlh hnûin a kal leh a, zirtîrho zawng zawng tinghetin Galatia ram leh Phrugia ram chu a fang chhuak vek a.

APOLLOVA RAWNGBAWLNA

²⁴Juda pakhat, a hming Appolova, Aleksandria khuaa piang, thu sawi thiam tak leh Pathian Lehkha thu hre tak mai chu Ephesi khuaah chuan a zuk kal a.

²⁵Chû mi chu Lalpa kawng chanchin zir tawh, ʔahnemngaihna thinlung nei a nih avângin Lalpa chanchin chu dik taka hrilin a zirtîr ʔhin a; mahse, Johana baptisma thû chu a hriat chhun a la ni mai a.

²⁶Biak inah chuan huai takin thû a sawi ʔan ta a. A thusawi chu Priskili leh Akuila-ten an lo hriatin an hruai hrang a, Pathian thû chu a tluantlingin an hrilh fiahsak ta a.

²⁷Ani chuan Akaia rama kai a tum a, amah an lo lawm theih nân zirtîrhote hnênah lehkha an ziahsak a; a va thlen chuan Pathian khawngaihna azârah ringtute chu nasa takin a va ʔanpui ta a;

²⁸Pathian Lehkha Thu ʔangin Isua chu Krista ngei a ni tih awihawm taka a hrilh fiah ʔhin avangin Judate rilru chu a hneh thei hle ʔhin a ni.

BUNG 19

EPHESI KHUAH PAULA

¹Korinth khuaa Apollova châm chhûng khân Paula chuan tlang sâng lam bialte kal tlang zêlin, Ephesi khua a lo thleng a. Zirtîr ʔhenkhat a hmu a,

²an hnênah, “In rin ʔantirh lai khân Thlarau Thianghlim in chang em?” a ti a. Anni chuan a hnênah, “Chang suh e, Thlarau Thianghlim a awm tih pawh kan hre hlei nê,” an ti a.

³Ani chuan an hnênah, “A nih leh, eng baptisma nge in lo chan?” a ti a. Anni chuan, “Johana baptisma,” an ti a.

⁴Paula chuan, “Johana khân simna baptisma-in a baptis ngei a, mite hnênah chuan a hnunga rawn kal tûra chu an lo ring tûr a ni tiin a hrilh zêl a, chû chu Isua Krista hi a ni,” a ti a.

⁵Chû thû an hriat chuan, Lalpa Isua hmingin baptisma an chang ta a.

⁶Paulan an chung a kut a han nghah chuan, Thlarau Thianghlim chu an chungah chuan a lo thleng a; tichuan, ʔawng dang dangin an ʔawng a, thlarauvin thû an puang ta a.

⁷An vaiin patling sâwm leh pahnih an ni.

⁸Tichuan, Paula chu biak inah a inkhâwm ʔhin a, thla thum chhûng huai takin thû a sawi a, Pathian lalram chanchin chu mite sawipuiin, mi rilrûte a hneh zêl a.

⁹Nimahsela, mi ʔhenkhat luhlul lui tlat leh âwih duh hauh lote an awm a, mipui hmâah chuan Kawng thû chu a chhe zâwng ngawta an sawi avângin ani chuan a kalsan a, zirtîrhote pawh a hruai hrang daih a, Turanna sikulah chuan ni tin Pathian thû a zirpui ʔhin a.

¹⁰Chutiang chuan kum hnih chhûng a chhunzawm zêl a, tichuan, Asia rama mi zawng zawng, Judate leh Grikte chuan Lalpa Isua thû chu an lo hre ta vek a.

THIL MAK TIHIN KRISTA A CHAWIMAWI

¹¹Pathianin Paula chu nasa takin thil mak tak tak a tihîr ʔhin a,

¹²a inhrûkna puan te, a puan sin lai te pawh damlote hnêna an va ken hian an natnaten a kiansan phah ʔhin a, an kawchhûnga thlarau sualte pawh an chhuak ʔhin.

¹³Chûng lai chuan thiam zuara vâk vêl Juda mi tuten emaw, “Paula hril ʔhin Isua hminga chhuak tûrin thû kan pê a che,” tiin ramhuai pâite chungah Lalpa Isua hming an lo hmang vê rawk ʔhin a.

¹⁴Juda puithiam lal pakhat, Skeva chuan chutianga tih chîng fapa pasarih a nei a.

¹⁵Nimahsela, thlarau sual chuan an hnênah, “Isua ka hria, Paula pawh ka hria; nangni hi tute nge maw in nih le?” tiin a chhâng a.

¹⁶Ramhuai pâi chuan a rawn zuan thut a, an vaiin a hneh a, a titlâwm vek a, chû in ʔang chuan saruak leh hlîam tuarin an tlânchhe ta a.

¹⁷Chû thil thleng chu Ephesi khuaa chêng Judate leh Grik mite zîngah pawh a thang chhuak vek a; mi zawng zawngin an hlau va, Lalpa Isua hming chu a lian ta a.

¹⁸Ringthar tam tak chuan an sualte puangin, an thiltih dik lohzia sawiin an lo kal a. ¹⁹Dâwi thila inhman ʔhin mi tam takte pawhin an dâwi lehkhate an rawn la khâwm a, mi zawng zawng mithmuhah an hâl ral vek a. Chûng man chu an han chhût a, tangkaraw tlang singga* hû zet niin an hria.

²⁰Chuti kauva nasa chuan Lalpa thû chu a thang a, hnehna a chang zêl a.

EPHESI BUAINA

²¹Chûng thilte a thlen hnû chuan, Paula chuan Makedonia leh Akaia ram chu fan chhuah phawta, chumi hnûah Jerusalema kal a rilrûk a, “Chuta ka kal zawh chuan Rom khua ka tlawh bawt tûr a ni,” a ti a.

²²Tichuan, amah puitu pahnih, Timothea leh Erasta chu Makedonia ramah a kaltîr a, ani erawh chu Asia ramah a la châm rih a.

²³Chûng hun lai chuan Kawng thû avânga buaina namên lo a lo chhuak a.

²⁴Mi pakhat, a hming Demetria, tangkaraw chhertu, tangkaruaa Diani lem siamtu chuan a siam thiam mi tam tak a ruai a, an hlâwk êm êm ʔhin a.

²⁵Chû mi chuan a hlâwfate bâkah, an hnathawh ang thawktu midangte pawh a ko khâwm vek a; an hnênah, “Pute u, hê hna hi kan hausakna hnâr a ni tih in hria e.

²⁶Hê Ephesi khua chauhvah ni lovin, Asia ram khawvêl zawng zawng deuhthâwah Paula hian, kuta siam pathiante hi pathian tak an ni lo, tiin mi tam tak a hmin tawh a, a hawisantîr mêk tih hi nangni ngei pawhin in hmûin in hria a.

²⁷Chuvângin, hê kan eizawnna hi a hmingchhe palh ang tih a hlauhawm mai a ni lo va, Asia rama mi zawng zawng leh khawvêlin an biak thin, pathiannu ropui Diani tempul mâwina hi hmusitin, an ngainêp zo vang tih a hlauhawm a ni,” a ti a.

²⁸Chutiang thú an han hriat chuan an thinur ta êm êm a, “Ephesi mite Diana-i hi a ropui e!” tiin an âu dual dual a.

²⁹A khaw buaiin an buai ta a, Makedonia mi, Paula zinpu, Gaia leh Aristarka te chu an man a, inthurualin ennawm chhuahna inah an tânpui chiam a.

³⁰Paula chuan mipui kêra luh ve a tum a, mahse zirtîrhoten an phal lo va.

³¹Asia rama hotu thenkhat chu Paula thianta an ni a, ennawm chhuahna ina lût ve lo tûra va ngên tûrin a hnênah mi an tîr a.

³²Pungkhâwmhote chu an buai nuaih nuaih a, thenkhat thu khatin an âu va, thenkhat leh chu thu dangin an âu bawh a; mi tam zawk phei chuan an pun khâwm chhan pawh an hre lo.

³³Mipui zîng aţang chuan Aleksandara chu an kai chhuak a, Judaten mipui hma lamah an nawr phei a. Tichuan, Aleksandara chuan a kutin a zâp a, mipui hmâah a thiam thu sawi a tum a.

³⁴Mahse, Juda mi a ni tih an hriat vêleh, mipui zawng zawng chu dârkâr hnih lai, “Ephesi Mite Diana-i hi a ropui e!” ti hlîrin an âu thup thup a.

³⁵Tichuan, khawpui ziaaktu lian chuan mipuite chu a ngawihîr hnûin tihian a sawi a: “Ephesi mipui te u, Diana Ropuii biak in leh, Zeus-a hnên aţanga a lim lo tlâ kha, Ephesi khuaa mite hi a vêngtu in ni tih tu nge hre lo awm ni?”

³⁶Chuvângin, hêng thú hi hnial rual a nih loh a hnû, in ngâwi reng tûr a ni a, awmze nei lova tih rum rum tûr pawh a ni lo.

³⁷Hêng mi inrawn hruaite hi biak in rawktu an ni lo va, in pathiannu sawi chhetu pawh an ni hek lo.

³⁸Chuvângin, Demetria leh a thian themthiamte pawhin tû lakah pawh thubuai nei sela, rorêlna inte chu a inhawng reng alâwm, lal aiawhtute pawh an awm a. An duh leh inchhâl tawn ang hmiang.

³⁹Thil dang chhui chhuah tûr in nei a nih chuan, dân ang taka rem a ni ang chu.

⁴⁰Vawiina buaina sosâng vak avâng hian a mawh kan phur mai ang tih pawh a hlauhawm e, buaina lo chhuah chhan sawi tûr bulbâl pawh a awm bawh si lo,” a ti a.

⁴¹Chutiang thú a sawi zawh chuan pung khâwmho chu a tîn darhtîr ta a.

BUNG 20

GRIK RAMA ZIN THU

¹Buaina a kian tâk hnu chuan Paula chuan zirtîrte chu a ko khâwm a, chibai a bûk a, Makedonia ram lam panin a chhuak ta a.

²Chulai ram vêl chu a fang chhuak a, zirtîrhote chu thu tam takin a fuih zêl a; tichuan Grik ram a thleng ta a.

³Chutah chuan thla thum a châm a. Suria ram lamah lawnga kal a tum laiin, Judaten amah thah tuma an phiar avângin Makedonia ram lama haw kual a tum leh ta zâwk a.

⁴Beria khuaa mi Sopatera te, Thessalonika khuaa mi Aristarka leh Sekunda te, Derbe khuaa mi Gaia te, Timothea te, Asia rama mi Tukika leh Trophima te chuan Asia ram thlengin an thlah a.

⁵Chûngho chu kan hmâah an lo va kal a, Troas khuaah min lo ngâk reng a.

⁶Keini erawh chu Chhang Dawidim Telh Loh Kût zawhah Philippi khua aţangin lawngin kan chhuak a, a ningânaah Troas khua kan thleng a; chutah chuan ni sarhi kan châm a.

TROAS KHUAA RAWNGBAWLNA

⁷Chawlhkâr ni hmasa berah chuan, zirtîr-hote chu chhang phel tûrin anrawn inkhâwm a. Paulan a tûka kal a tum tawh si a, thú a hril a, zan lai thlengin a sawi a.

⁸An inkhâwmna pindan chungnungah chuan khâwnvâr tam tak a awm a.

⁹Tukverhah chuan tlangvâl pakhat, a hming Eutuka chu a thú a, a mutchhuak chu a lo muthlû a. Paulan thu a sawi rei avânga a muthlû chu in chhâwng thumna aţang chuan a tlâ a, thiin an chhar a.

¹⁰Paula chu a chhuk thla a, ani chu a bawh a, a kuah a, “Thlaphâng suh u, hei a lo la nung reng alâwm,” a ti a.

¹¹Paula chu a chho leh a, chhang a phel a, chaw a ei a, an hnenah thukhawchâng rei tak, khawvâr thlengin a sawipui a; tichuan a kal chhuak ta a.

¹²Tlangvâl pawh chu dam takin anrawn hruai lût a; tichuan thlamuang takin an awm ta a.

TROAS AţANGIN MILETAS

¹³Keini chu Asso khaw pan tûr lawngah kan lo chuang hmasa a, chuta aţang chuan Paula chu chuantîr kan tum a ni; ama remruat sa angin ani chuan kêa rawn pan a tum a.

¹⁴Asso khuaah minrawn fin a, ani chu kan chuantîr a, Mitulini khua kan thleng a.

¹⁵Chuta aţang chuan lawngin kan kal leh a, a tûkah Kio thliarkâr zâwn kan thleng a. A tûk lehah Samo thliarkâr kan thleng a, Troguliam-ah kan châm a. A tûkah Miletas khua kan thleng a.

¹⁶Asia rama tâwi khawmuang lo tûrin Paula chuan Ephesi khua chu kal tlang mai a tum sâ rêng a; a theih chuan Jerusalem-ah Pentikos nî nan hman a tum avângin a hmanhmawh tawh si a.

EPHESI UPATE FUIHNA

¹⁷Miletas khua aţang chuan Ephesi khuaah mi a tîr a, kohhran upate chu a hnênah a kohtîr a.

¹⁸Annihon lo thlen chuan thú a lo hrilh a: “Asia rama ka lo kal tîrh nî aţanga in hnêna ka awm chhûng zawng khân, in zînga ka awm dân te chu in hria alâwm,

¹⁹inngaihtlâwmna zawng zawng nê, Judate min phiar avânga mittui tam tak sênga ka chungah fiahna lo thleng te tuar chungin

Lalpa rawng ka bâwl thìn kha;

²⁰in tâna ƣangkai tûr engmah hrilh che u ka tîm lo va, vantlâng zîngah te, in tinah te ka zirtîr zâwk thìn che u a.

²¹Judate leh Grikte hnênah pawh inlamlêta Pathian lam an hawia, kan Lalpa Isua Kristaa rinna an neih theih nân thu ka hril thìn kha.

²²Tihian hre rawh u, tûnah hian Jerusalema kal ngêi tûrin thlarauvin mi nawr tlat a, chutah chuan ka chungah eng thil nge lo thleng dawn tih pawh ka hre lo,

²³Phuarna leh hrehawmnain mi hmuak tih Thlarau Thianghlimin khaw tina mi hriattîr chu ka hriat vê chhun a ni mai a.

²⁴Mahse, chûtiang thil engmahin min tizâm lo va, ka intlansiakna kawng chu zawha, Lalpa Isua hnên aƣanga rawngbâwna ka dawn–Pathian khawngaihna Chanchin Ƣa hriattîr mawlh hi hlim taka ka hlen chhuah theih dawn phawt chuan, ka nunna pawh hi thlâkhlelh tlâkah ka ruat lo ve.

²⁵“Pathian lalram thû hrila ka lo tlângâupui thìn nangniho hian ka hmêl in hmu tawh dawn lo tih ka hre si a.

²⁶Chuvângin, mi zawng zawng thisenah ka hul a ni tih vaviinah hian ka hriattîr a che u.

²⁷In hnêna Pathian thu tluantling hrilh che u ka tîm loh kha.

²⁸Chuvângin Pathian kohhranho, ama thisena a leite chu châwm tûrin nangmahni leh in berâm zawng zawng chungah chuan fimkhur rawh u, Thlarau Thianghlimin an chungah hotûah a siam che u hi.

²⁹Ka kalsan hnû che u hian in zîngah chinghne kohamte an lo lût ang a, berâmte chu an zuah lo vang tih ka hre si a.

³⁰Nangmahni zîng aƣang ngei hian thu veivir chîng tak takte lo chhuakin, zirtîrhote chu kawng dik lovah an la hruai sual ang.

³¹Chuvângin ngaihven ula; kum thum chhûng zet mittui tla chungah achhûn azâna mi tin ka zilh fan fan thìn che u kha hre reng rawh u.

³²“Tûnah hian unaute u, nangni hi Pathian leh a khawngaihna thûah ka kawltîr a che u; chû chuan a siam lian thei che u a, mi thianghlimte zîngah ro chan a neihtîr baw ang che u.

³³Tûma tangkâte, rangkachakte, silhfênte ka awh ngai loh kha.

³⁴Hêng kutte hian keimah leh ka ƣiante châkkhai a deh chhuah thìn kha nangmahni ngeiin in hria e.

³⁵Chutianga thawkrim chung chuan, mi chaklote in ƣanpui dân tûr pawh kawng tinrêngah ka kawhbmuh thìn che u kha. Lalpa Isuan, ‘Lâk aiin pêkin lukhâwng a nei zâwk,’ tia a sawi kha hre reng rawh u,” a ti a.

³⁶Chûng thûte a sawi zawh chuan a ƣingthî a, an zâin a ƣawngtaipui a.

³⁷An zavai chuan an ƣap râwih râwih a, Paula nghâwngah an uai a, an fâwp ngawih ngawih a,

³⁸an lungngaih chhan ber chu a hmêl an hmuh dawn tawh loh thû a sawi chu a ni. Tichuan, lawng awmna thlengin amah chu an thlah ta a.

BUNG 21

JERUSALEM ZIN KAWNG FIMKHURNA

¹Anniho nêna kan inthên hnu chuan, lawngin kan chhuak ta a, ngîl taka kalin Kos thliarkâr kan thleng a, a tûkah Rodi thliarkâr kan thleng a, chuta ƣang chuan Patara khua kan thleng leh a.

²Phoiniki rama kal tûr lawng pakhat kan hmu a, kan chuang a, kan kal ta zêl a.

³Kupra thliarkâr kan hmu a, vei lamah kan kal pêl a, Suria ram lamah kan kal zêl a, Tura khuaah kan chhuk a; chutah chuan lawngin a phurh bungruate chu thiar chhuah tûr a ni a.

⁴Chuta awm zirtîrhote chu zawng chhuakin ni sarih kan châm a. Anni chuan Thlarau hriattîrin Paula chu Jerusalema kal lo tûrin an hrilh a.

⁵Mahse, chûng nîte chu a lo zawh chuan kan kalna tûr lam panin kan chhuak leh ta a. Unaute chuan an nupui fanaute nêan an zavaiin daipâwn thlengin min thlah a. Tuipui kamah chuan kan ƣingthî a, kan ƣawngtaî a.

⁶Chibai te kan inbûk a, lawngah chuan kan chuang a; anni pawh an haw leh ta a.

⁷Tura aƣanga kan kal chhuak chu Tolemai khua kan thleng a, unaute chibai kan bûk a, an hnênah ni khat kan châm a.

⁸A tûkah chuan keini Paula ƣiante chu kan chhuak a, Kaisari khua kan thleng a, Chanchin Ƣa hriltu Philipa inah kan thleng a, ani chu pasarihte zînga pakhat a ni a, a hnênah kan châm a.

⁹Chu mi chuan fanu nula thianghlim palî a nei a, Thlarau thuchah an puang thîn a.

¹⁰Chutah chuan ni tam tak kan châm a, Judai ram aƣangin zâwlnei pakhat, a hming Agaba chu a lo chhuk a.

¹¹Kan hnênah a lo kal a, Paula kâwnghrên chu a la a, chumi chuan a kut leh a kê te a phuar a, “Hê kâwnghrên neitu hi Jerusalema Judate chuan hetiang hian an phuar ang a, Jentailte kutah an pe baw ang,” Thlarau Thianghlimin a ti e,” a ti a.

¹²Chû thû kan hriat chuan, keini leh chumi khuaa mite chuan Paula chu Jerusalema han chho lo tûrin kan ngên chiam a.

¹³Paula chuan a chhâng a, “Engah nge maw in ƣah in ƣaha, ka lung in tihchhiat le? Lalpa Isua hming avâng chuan Jerusalemah phuar chang ka huam lo va, thih pawh ka huam asin,” a ti a.

¹⁴Chutia ui beh ruâl a nih tâk lovah chuan, “Lalpa thû thû ni rawh se,” tiin kan ngawihsan ta a.

INREMNA SIAM TURIN PAULA AN NGÊN

¹⁵Ni engemawti hnûah chuan kan insiam a, Jerusalemah kan chho ta a.

¹⁶Kaisari khuaa zirtîrho thenkhat pawh kan rualin an kal ve a, anni chuan Kupra thliarkâra mi pakhat, a hming Nasona, zirtîr hmasa zînga mi, kan thlen in pa tûr chu an rawn hruai ve a.

¹⁷Jerusalem kan thlen chuan unauten hlim takin min lo lâwm a.

¹⁸A tûkah chuan Paula hovin Jakoba hnênah kan lût a; chutah chuan kohhran upa zawng zawng pawh an lo awm a.

¹⁹Paulan anmahni chibai a bûk zawhin, a rawngbâwnaa Pathianin Jentailte chung a thiltithe chu kimchang takin a sawi a.

²⁰Unauten chûng thûte an lo hriat chuan Pathian an châwimâwi a. A hnênah chuan, “Unaupa, Judate zînga ringtu an tamzia i hmu a; dân thû la urhsûn tak tak an ni vek bawk si a;

²¹ nang chuan Jentailte zînga Juda awm zawng zawngte hnênah Mosia dân bânzan a, an fâte serh tan lo tûr leh Judate dân anga awm kher loh tûr, tiin i zirtîr thîn tih mi sawi an hria a.

²²Engtin nge ni ta ang le? I lo thleng tih an hriat dân avângin mipuite pawh an lo kal khâwm ngei ang a.

²³Chuvângin, kan hrilh ang che hian ti ang che: Thutiam nei lai mipa pali kan hnênah an awm a.

²⁴Anni chu hruai la, an hnênah inthian fai ve la, an lu mehna tûr tumsak ang che; tichuan, i chungchânga mi sawi an hriatte kha engmah a lo ni lo tih an hria ang a, nangmah ngei pawhin tha takin dân i zâwm tih an hre mai dân nia.

²⁵Jentailte zînga ringtute chungchâng thû-ah chuan: mitem biakna thil ei lo tûr te, sa thisen ei lo tûr te, sa rehhlum ei lo tûr te, ingaihna sual laka inthiarfihlîm tûr tih thûte kan rêl a, kan ziah tawh kha,” an ti a.

TEMPULAH PAULA AN MAN

²⁶A tûkah chuan Paulan mipate chu a hruai a, an hnênah a inthian vê a, an inthenna hun chhûng a kim thu puang tûrin tempulah an lût a, chû hunah chuan an zâa hming kimin thilhan an hlân bawk tûr a ni a.

²⁷Chûng ni sarîh nite chu a tlin dân ruai laia, Asia rama Judaten Paula chu tempul chhûnga a awm lai an rawn hmuh chuan, mipui an chawh tho va, ani chu an man bet a,

²⁸“Israel mite u, min pui rawh u! Hê mi hi ram tina mi zawng zawng hnênah mi te, dân te leh hê hmun chungchang a chhe zâwnga zirtîrtu kha a nih hi; chubâkah, hê hmun thianghlîm tibawhlhlawh tûr hian tempulah Grik mite a luhpui bawk a ni,” tiin an âu va.

²⁹(Chumi hmâ chuan Ephesi mi Trophima chu khaw chhûngah amah nê an hmû a, chû mi chu Paulan tempulah a luhpui emaw an ti a ni).

³⁰Tichuan, a khuain an buai ta nuai nuai a; mipuite chu an lo tlin khâwm a, Paula chu an man a, tempul aţang chuan an hnûk chhuak a; kawngte chu an khâr nghâl a.

³¹Chutia amah tihhlum an tum lai chuan, Jerusalem khaw pum a buai zo ta tih thû chuan sipai hotu lal ber hnên a lo thleng a.

³²Ani chu sipai za hotu leh sipaite hruaiin an awmna lamah an tlin thla a. Mipuiten sipai hotu lal leh sipai rual hmêl an hmuh chuan, Paula an lo vaw lai chu an tâwp a.

³³Sipai hotu lal chuan a rawn hnaih a, Paula chu a man a, khaidiat pahniha hlîng tûrin thû a pê a; tu nge a niha, eng thil nge a tih, tih a zâwt a.

³⁴Mipui zînga thenkhat chu thu khatin an âu va, thenkhat chu thu dangin an âu bawk si a. Chutiang bengchheng ri nuaih nuaih kârah chuan thudik ber pawh a hre thei lo va, kulhbîng chhûnga

hruai lût tûrin thû a pe ta a.

³⁵Paulan kailâwn a thlen lai te chuan mipuiin an beih nasat êm avângin sipaite chuan an zâwn ta ringawt a.

³⁶Mipuite chuan, “Tiboral rawh u!” tia âuvin an ûm zui luai luai si a.

JERUSALEM MIPUI HMAA THUSAWI

³⁷Paula chu kulhbîng chhûnga an hruai luh dân lai chuan sipai hotu lal hnênah, “I hnênah thu kamkhat ka sawi thei ang em?” a ti a. Ani chuan, “Grik ţawng i thiam elo?

³⁸Hman deuhva buaina chawkhhuaktu Aigupta mi, tualthah hmang, mi sangli rual thlalêra hruai chhuaktu kha i ni lo vem ni?” a ti a.

³⁹Paula erawh chuan, “Juda mi, Kilikia rama Tarsa khuaa mi ka ni, khaw namaia awm ka ni hlei nê; mi khawngaih la, mipui hnênah khuan thû mi sawitîr rawh,” a ti a.

⁴⁰A remtih vêleh Paula chu kailâwnah chuan a ding a, mipuite chu a kutin a zâp a. An ngâwi ta thuap a, Hebrai ţawngin heti hian thu a sawi ta a:

BUNG 22

PAULA THIAM THU SAWI

¹“Unaute u, pate u, ka thiam thû hi lo ngaihla teh u,” a ti a.

²Hebrai ţawng a hmang tih an han hriat phei chuan an ngâwi lehzuai a. Tihian a sawi a:

³Juda mi dik tak ka ni e; Kilikia rama Tarsa khuaa piang ka ni a, mahse hê khawpuiah hian Gamaliela ke bula zira sei lian ka ni, min thlahtute dân khermei thei ang bera zirtu ka ni a, waviinah hian nangni zawng zawng ang bawka Pathian tâna thahnemngai mi ka ni vê thîn a.

⁴Chuvângin, hê Kawnga mite chu thi khawpin ka sawisâ a, a hmei a pâin ka phuar a, tân inah te ka khung thîn.

⁵Puithiam lalber leh rorêl khâwla upate zawng zawng pawhin chûng thû chu min hriatpui thei ang. An hnên aţangin Damaska khuaa unaute pêk tûr lehkha ka la a, tichuan chû khuaa awm apiangte chu hrem tûrin, phuar chung a Jerusalema hruai tûra ka kal kha.

⁶“Chutia ka kal ta chu, chhûn lai vêl hian Damaska kiang kan thlenin vân aţangin êng ropui tak hi ka vêlah chuan a lo êng phut a;

⁷Kei chu leiah ka tlû a, “Saula, Saula, engati nge mi tihduhdah?” tiin âw ka hria a.

⁸Kei chuan, ‘Lalpa, tu nge i nih?’ tiin ka chhâng a. Ani chuan ka hnênah, ‘I tihduhdah Nazaret Isua ka ni,’ a ti a.

⁹Ka thiantie chuan chu êng chu an hmuh chuan an hlau va, mi betu âw erawh chu an hre ve lo.

¹⁰Kei chuan, ‘Lalpa, eng nge ka tih tâk ang?’ ka ti a. Lalpa chuan ka hnênah, ‘Tho la, Damaskaah chuan lût rawh, tah chuan i tih tûra ruat zawng zawng chu an lo hrilh ang che,’ a ti a.

¹¹Tichuan, chû êng ropui avâng chuan khua ka hmu thei ta lo va, ka thianten kutin min kai a, Damaska khuah chuan ka lût ta

a.

¹²“Tichuan, mi pakhat, Anania, dân lama mi thahnemngai tak mai leh, chû khuua chêng Juda zawng zawng zînga mi hmingtha chu

¹³ka hnênah a lo kal a, ka kiangah a ding a, ka hnênah, ‘Unaupa Saula, mit vâr lo pu tawh ang che,’ mi ti a. Tichuan, amah chu ka hmu thei ta ngâh mai a.

¹⁴Ani chuan, ‘Mîn thlahtute Pathianin a duhzâwng hre tûr leh, Mî Dika chu hmûa, a tawngkâ ngêi dawng thîn tawh tûrin a thlang a che.

¹⁵Mîta i hmuh leh beng a i hriatte ngei hi mi zawng zawng hnêna hriatpuitûah i la tâng dawn nia.

¹⁶Engah nge i la muangchân cheu le? Tho la, Lalpa hming lam chungin baptisma chang la, i sualte tlêng fai ta che,’ mi ti a.

¹⁷“Hei, Jerusalema ka lo hâw leh hnû hian, tempula ka tawngtai laiin zêlin ka lo awm a;

¹⁸Amah chu ka lo hmu a, ka hnênah, ‘Hmanhmawh la, Jerusalem hi chhuahsan vat rawh, Keima chungchânga i hriattîrna thû an âwih dawn lo tawp mai,’ tiin min lo hrilh a.

¹⁹“Kei chuan, ‘Lalpa, biak in tinah nangmah ringtu apiang ka vuaka, tân inah ka khungtîr thîn kha tûma’n an hai si lo va.

²⁰I tâna martar Stephana thisen an chhuah lai khân, kei pawh a kiangah ka ding vê a, a thih lo remtitu pawh ka ni a, a tihlumtute thumhnaw vêngtûah te ka tâng lehngah si a,’ ka ti a.

²¹“Ani chuan, ‘Kal chhuak la, heta tanga hla takah Jentailte hnênah ka tîr zâwk ang che,’ mi ti ta a,” a ti a.

PAULA, ROM KHUA LEH TUI

²²Chû thû a sawi thleng chuan an ngaithla a, tichuan, aw ring takin, “Mi hetiang nek hi khawvêl ata tiboral rawh u; dam reng tlâk pawh a nih loh hi,” an ti a.

²³Tichuan, an âu va, an puante an pawt thlêr a, vaivut an vânvawrh a;

²⁴sipai hotu lal chuan ani chu kulhbîng chhûnga hruai luha, chuti taka an âu khum chhan chu eng nge tih hre tûrin, vuak chung a dâwp chhuah tûr thû a pê a.

²⁵Chutia savun hruia an phuar lai chuan Paula chuan a kianga ding sipai za hotu hnênah, “Rom mi vuak hi a thiang rêng rêng em ni, thiamloh chang pawh ni lo lehngah?” a ti a.

²⁶Sipai za hotu chuan chû chu a hriat vêleh, sipai hotu lal hnênah chuan a kal a. “I thil tih tûr hi fîmkhur rawh, hê mi hi Rom mi a lo ni reng mai,” tiin a hrilh a.

²⁷Tichuan, sipai hotu lal chu a lo kal a, a hnenah, “Rom mi maw i nih a, mi hrilh rawh?” a ti a. Ani chuan, “Ni e,” a ti a.

²⁸Sipai hotu lal chuan, “Rom mi nihna hi kei chuan tangka tam tak sênga ka neih asin,” tiin a chhâng a. Paula chuan, “Kei chu Rom mi rênga piang ka ni,” a ti a.

²⁹Tichuan, sawisa chung a dâwp chhuah tumtûte chu an kal kiang ngâh a; sipai hotu lal pawhin Rom mi a ni tih a hriat chuan a hlau va, a lo phuar tak mai avâng pawhin a hlauthâwng bawk a.

SANHEDRIN-HO AN INTHEN

³⁰A tûkah chuan, eng vânga Judate chuan hêk ta vak mai nge tih hriat a duh a, a phuarna chu a phelhsak a, puithiam lalte leh rorêltu zawng zawng chu a hmâa lo kal khâwm vek tûrin thû a pê a; Paula pawh chu a hruai chhuak a, an hmâah a dintîr a.

BUNG 23

¹Paula chuan rorêltute chu ngun takin a en reng a, “Unaute u, wawiin thlengin Pathian hmâah ka chhia leh tha hriatnain thiam mi chantîr ang takin ka awm thîn,” a ti a.

²Puithiam lalber Anania chuan Paula kianga dingte hnênah a kâa bensak tûrin thû a pê a.

³Paula chuan a hnênah, “Nang, bang hnawih vârpâ! Pathianin a bêng zâwk ang che. Dân anga ka chungthû ngaituah tûrin i thû a, dân lo angin min bêtîr leh si ang mâw?” a ti a.

⁴A kianga mite chuan, “Pathian puithiam lalber i hau vei a ni mâw?” an lo ti a.

⁵Paula chuan, “Unaute u, puithiam lalber a ni tih ka hre lo a ni; ‘I chipuite hotu chungah thu tha lo sawi suh,’ tih ziak a ni si a,” a ti a.

⁶Paula chuan rorêlnaa mi thenkhat chu Saddukaite, thenkhat Pharisaite an ni tih a hmuhin, rorêltute hmâah chuan a âu va, “Unaute u, Pharisaî ka ni, Pharisaî fapa pawh ka ni; mitthi thawhle beiseina thûah chhuah chhalhin ka awm a nih hi!” a ti a.

⁷Chû thû a sawi zawh chuan Pharisaite leh Saddukaite inkârah inhnialna a lo chhuak a, mipui pung khâwm chu an inthen phawk mai a.

⁸Saddukaihote chuan mitthi thawhleha te, Vântirhkohte, thlaraute pawh awm lo vekin an ngai a. Pharisaîhote erawh chuan an ring vek si a.

⁹Tichuan, an ri ta nuai nuai a. Pharisaite lama tâng dân zirtîrtu thenkhat an ding a, “Hê mi hi engmah a sualna kan hre lo ve; thlarau pawhin, Vântirhkoh pawhin amah hi an bia a lo nih pawhin Pathian do zâwng chuan i che lo vang u,” tiin an hnial a.

¹⁰Chutia an inhnial buai nasat tâk êm avâng chuan, sipai hotu lal chuan Paula chu an pawh sawm a hlau va, sipaite chu a hnêna zuk kala, an zîng ata zu kai chhuaka, kulhbîng chhûnga hruai chho tûrin thû a pê a.

PAULA THAH TUMA PHIARNA

¹¹Nimahsela, chumi zân chuan Lalpa chu a kiangah a ding a, “Paula, thlamuang takin awm rawh; Jerusalema ka thû i hriattîr ang hian Rom khawpuiah pawh i la hriattîr tûr a ni,” a ti a.

¹²A tûk zîngah chuan Judaho zînga mi thenkhat chu an inhâwr khâwm a, Paula an thah hmâ loh chuan engmah eia in lo tûrin chhechhamin thû an intiam a.

¹³Chû phiarrûknaa telte chu mi sawmli chuang an ni.

¹⁴Puithiam lalte leh upate hnênah an lo kal a, “Paula kan tihlum hmâ loh chuan engmah ei lo tûrin chhechhamin kan intiam tlâng vek a ni.

¹⁵Chuvângin, nangni hian rorêltute nên a thu ngaituah tha leh tûr angin, in hnêna hruai thla tûrin sipai hotu lal hnênah han sawi

rawh u; tichuan, in kiang hnai a lo thlen hmâ ngeiin keini chu amah tihlum tûrin kan lo inpeih diam ang e,” an ti a.

¹⁶Nimahsela, Paula farnua fapain an chên rûk thû chu a lo hria a, kulhbîng chhûngah chuan a va lût a, Paula chu a va hrilh a.

¹⁷Paula chuan sipai za hotu pakhat a ko va, “Hê tlangvâl hi hotu lal hnênah va hruai rawh; a hnênah thu pawimawh sawi tûr a nei a ni âwm e,” a ti a.

¹⁸Tichuan, sipai hotu lal hnênah chuan a va hruai a, “Paula, mi tâng khân mi ko va, hê tlangval hi i hnêna rawn hruai tûrin mi tîr a, i hnênah thu pawimawh sawi tûr a nei a ni âwm e,” a ti a.

¹⁹Sipai hotu lal chuan a bânah a chelh a, a kâi hrang a, “Eng nge mi hrilh tûr i neih chu?” tiin a rûk têin a zâwt a. ²⁰Ani chuan, “Paula chungchâng hi fel zâwka ngaihtuah thât leh tum angin naktûkah rorêltute hnêna hruai thla tûrin Judaten dîl che an remti tâng a.

²¹Mahse, an thû lo âwih suh ang che; an zînga mi sawmli chuang zetin an châng ru reng a, chûng mite chuan amah an thah hmâ loh chu engmah eia in lo tûrin chhia an chham a; tûnah hian i thûpêk ngâkin inpeih sâin an awm reng a nia,” a ti a.

²²Tichuan, sipai hotu lal chuan tlangval chu a kaltîr a, “Hê thû hi mi hrilh tawh tih tû hnênah mah sawi suh ang che,” a ti tlat a.

FELIKA HNENAH AN TIR

²³Sipai za hotu pahni a ko va, “Zân dâr kuaah Kaisari khaw thlenga kal tûrin sipai zahnih leh sakawr chung chuang mi sawmsarih bâkah fei keng mi zahnih buatsaih rawh u,” a ti a;

²⁴Governor Felika hnêna him taka a thlen theih nân Paula chuanna tûr sakawr lo buatsaih tûrin a hrilh a.

²⁵Hetiang hian lehkha a ziaak a:

²⁶“Klaudia Lusian Felika, Governor thâ ber chu chibai a bûk e.

²⁷“Hê mi hi Judaten an man a, an thah dâwn laiin an hnênah sipaite hruaiin ka kal a, Rom mi a ni tih ka hria a, ka chhan chhuak ta a.

²⁸Chuti taka an hêk chhan hriat ka duh avângin an rorêltute hmâah ka hruai ta a.

²⁹Anmahni dân thû eng engemaw vêlah an hêk mai a ni tih ka hmu chhuak a; mahse chûng an hêkna thûah chuan thihna tling khawp emaw, phuarna tham emaw, engmah a awm si lo.

³⁰Judaten amah an chang rû tih hriattîrna ka dawn vêlah i hnênah ani hi ka rawn tîr ngâh a ni; a hêktute pawh a chung a thupawi an neih ang ang chu i hmâa sawi tûrin thû ka pe baw k e. Mangtha le,” tiin.

³¹Tichuan, sipaite chuan a thupêk ang chuan Paula chu a zân a zânin an hruai a, Antipatri khua an thlenpui a.

³²A tûkah chuan a hnêna kal zêl tûr sakawr chung chuang mite chu an kîrsan a, kulhbîng lamah an kîr leh ta a.

³³Kaisari khua chu an lo thleng a, governor hnênah lehkha chu an pê a, Paula pawh a hnênah an hlân a.

³⁴Governor-in lehkha a lo chhiar zawh chuan khawi rama mi nge tih a zâwt a, Kilikia rama mi a ni tih a hriat vêleh,

³⁵“Nangmah hêktu che an lo thlen hunah i thû chu ka ngaihtuah ang e,” a ti a. Tichuan, Heroda rorelna ina dah tûrin thû a pê a.

BUNG 24

HELNA TICHHUAKTU-AH AN PUH

¹Ni nga hnûah chuan puithiam lalber Anania chu upate leh thusawi thiam mi pakhat, Tertulla nên an lo thleng thla a. Anni chuan governor hnênah Paula chu an rawn khing ta a.

²Paula an koh luh hnû chuan Tertulla chuan ani chu a hêk tan ta a: “Felik zahawm ber, i zârah thlamuang êm êmin kan awm a, i enkawl na fîng tak avângin hê hnam hian hamthamna a dawng thîn a,

³eng lai pawhin, khawi hmunah pawh lâwm takin kan pawm zêl dâwn che a ni.

⁴Amaherawhchu, i tân ninawm lutuk nih kan duh lo va, i hawihhâwmnain thu kam hnih khat erawh chu min ngaihtlâksak tûrin ka ngên a che.

⁵He pa hi mi hnawksak, khawvêla Juda zawng zawngte zînga inthên darhna thlent, Nazarin pâwla an hotupa ber a ni tih kan hria a.

⁶Tempul tihbawlhhlawh a tum baw k a; chuvângin kan man a, kan dân ang a chungthu rêl kan tum mêk a ni a.

⁷Nimahsela, sipai hotu lal Lusian a lo kal a, kan kuta mi chu tharumin min rawn chhuksak a,

⁸amah hêktute chu i hmâa lo kal tûrin thû min pê a. Nangmah ngeiin hêng kan hêkna thil zawng zawng hi ama hnên aţangin i hre Chiang thei ang,” a ti a.

⁹Juda hote pawhin chûng thû chu a dik a ni tih an lo pawmpui vê baw k a.

FELIKA HMAA PAULA THIAM THU SAWI

¹⁰Chumi zawhah governor-in thu sawi ve tûra a tih vêlah Paula chuan, “Kum tam tak chhûngin hê hnam chung a rorêltûah i lo ţang tawh tih ka hriatin, lâwm takin thiam thû ka sawi dâwn a ni.

¹¹Pathian be tûra Jerusalema ka han kal chhoh hnûah ni sâwm leh ni hnih bâk a la ral hman lo tih i la hre thei ang.

¹²Tempulah pawh, biak inah pawh, khawpui chhûngah pawh ni se, mipuite tâna buaina siam tûra mi ka fuihpawrh lai hi anniho hian min hmu rêng rêng lo vang.

¹³Tûna an mi hêkna thû pawh hi a dik leh dik loh an finfiah thei hek lo vang.

¹⁴Mahse, i hmâah ka’n inpuang teh ang, ‘kalsual’ tia an sawi hê Kawng dân ang hian min thlahtute Pathian ka be thîn. Dân bû leh Zâwlneite Lehkhabûa ziaak zawng zawng ka ring si a.

¹⁵Mi thate leh misualte thawhlehn a awm ang tih Pathian lamah ka beisei a, hênghote pawh hian chu baw k chu an âwih ve tho si a.

¹⁶Chuvângin, chhia leh thâ hriatna thiag vawn zêla, Pathian leh mihringte mithmuha sawisêl kai lova awm zêl hi ka tum thîn.

¹⁷“Kum tam tak hnûah ka chipuite hnênah thilpêk pe tûr leh thil hlan tûr rawn kengin ka lo kal a,

¹⁸chûng thil ka hlan lai chuan Asia rama miten tempulah inthian thianghlimin min hmu a, mipui an tel lo va, buai bengchheng a awm hek lo.

¹⁹Keima laka thupawi nei an nih chuan hetah i hmâah hian min rawn hêk tûr a ni a.

²⁰A nih loh leh, hêng mite ngei hian rorêltute hmâa ka din lai khân, ka tihsual eng nge an hmuh sawi rawh se,

²¹hê thu kam khat avâng hian a nih nghâl loh chuan, an zînga ka din lai khân, ‘Mitthi thawhleha thûah wawiinah hian in hmâah chhuah chhalhin ka awm a nih hi,’ ka tih kha,” a ti a.

FELIKAN A TIKHAWTLAI

²²Tichuan, Felika chuan Kawng thû chu chiang lehzuale a lo hriat hnû chuan, “Sipai hotu lal ber Lusian lo thlen thlâk hunah in thû hi ka la rem ang,” tiin an thû chu a dah ta rih a.

²³Tichuan, Paula chu thlah zalên deuh va, a thianten a rawng an bâwlsak leh an rawn tlawh te khap lo va vêtîr tûrin sipai za hotu hnênah chuan thû a pê a.

²⁴Ni engemaw zât hnûah Felika chu a nupui, Juda hmeichhia Drusilli nêan lo kal a, Paula chu a kohtîr a, Krista rinna thû chu a ngaithlâ a.

²⁵Paula chuan dikna thû te, insûm thû te, rorêlna lo la awm tûr thû te a hrilh laiin Felika chuan hlauhawm a ti êm êm a, “Kal kiang leh phawt mai la, hun remchâng ka neih hunah ka ko leh dâwn che nia,” a ti a.

²⁶Paulan a intlan chhuah nân tangkâ a pêk a beisei deuh baw k a. Chuvâng chuan a ko fo va, a kâwm thîn a ni.

²⁷Nimahsela, kum hnih hnûah Porkia Festan Felika chu a rawn thlâk a; Felika chuan Judate tihlâwm a duh avângin Paula chu phuar sâin a hnutchhiah a.

BUNG 25

PAULAN KAISARA HNENA THLEN A NGÊN

¹Festa chu chumi bial a lo thlen aţanga ni thum hnûah Kaisari atangin Jerusalema a han kal a.

²Tah chuan puithiam lalte leh Juda puipate chuan a hnênah Paula chungchâng chu a chhe zawng hlîrin an lo hrilh a,

³Jerusalema hruai chhohtîr tûrin an lo ngên chiam baw k a; a lo chhohna kalkawnga lo chên rûka thah an tum a ni.

⁴Nimahsela, Festa chuan Paula chu Kaisari khuah vênna hnuaia la awmtîr zêl riha, amah pawhin hâw thlâk thuai a tum thû a hrilh a.

⁵“Chuvângin, in zînga thuneitu deuh deuhin min zui thlâ sela, sualna a neih leh neih loh hriat nân chû pâ chu rawn khing ta che u,” a ti a.

⁶Tichuan, an zîngah ni sawm aia tam a châm hnû chuan Kaisari khuah a chhuk thla leh a. A tûkah chuan, rorêlna thutthlêngah a thû a, Paula chu rawn hruai tûrin thû a pê a.

⁷Ani a lo thlen chuan Jerusalema mi Juda lo chhukte chu a bul vêlah an dîng a, Paula chu hêkna thu rip pui puiin an beihrawn a, a dik ngêi e, tia finfiah theih erawh chu an nei chuang lo.

⁸Paula pawhin a thiam thû sawiin, “Judate dân ka bawhchhe lo va, Tempul ka tibawhlhlawh hek lo, Kaisara lakah pawh thil engmah ka tisual lo ve,” a ti a.

⁹Nimahsela, Festa chuan Judate zînga hmingthat a duh a, Paula hnênah chuan, “Jerusalema han kal a, hêng thûte hi ka hmâa rêl i duh em?” tiin a zâwt a.

¹⁰Paula chuan, “Kaisara rorêlna thutphaha dîng ka nih hi, hetah ngei hian rêlsak tûr ka ni. Judate chungah thil engmah ka tisual lo, nang pawhin i hre chiang hle si a.

¹¹Mi sual ka niha, thihna khawp meuh thil sual ka lo ti a nih chuan thih pawh ka hnial lo ve; nimahsela, hênghoten min hêkna thû hi engmah lo mai a nih erawh chuan, tumahin an kutah mi pe thei lo vang. Kaisara hnêna thlen ka ngên zâwk e,” a ti a.

¹²Festa chuan a rorêlpuite a biak râwn zawhin, “Kaisara hnêna thlen i ngên vei mâw? Kaisara hnênah chuan i kal mawlh ang chu!” tiin a chhâng a.

AGRIPPA HMAAH PAULA

¹³Ni engemaw zât hnûah chuan lal Agrippa leh Berniki chu Festa chibai bûk tûrin Kaisari khuah an lo kal a.

¹⁴Ni tam tak an châm hnûah, Festa chuan Paula thubuai chu lal hnênah chuan a thlen a, “Felika khân mi tâng tuemaw a lo hnutchhiah a,

¹⁵Jerusalem ka han tlawh lai khân puithiam lalte leh Juda upaten a chungchâng thû min lo hrilh a, thiam loh chantîr an lo ngên a.

¹⁶Kei chuan an hnênah, ‘Hêktute hmâa an mi hêkin hmaichhana thiamthu sawina remchâng pêk a nih hmâa thi tura tih mai hi Rom sorkar dân a ni lo ve,’ tiin ka hnial a.

¹⁷Anniho chu hetah an lo kal a, rei rial lovin a tûkah chuan rorêlna thutthlêngah ka thû a, chû mi chu ka kohtîr a.

¹⁸Chutia a hêktuten dîng meuha an hêk chung pawh chuan, ka rin ang rêngin thupawi tîng tham engmah an sawi ta lo va,

¹⁹an sakhaw dân leh Isua, mi pakhat thi tawh, Paulan a nung leh tih a sawi a, chû mai chu a chungah an thubuai neih chu a lo ni a.

²⁰Chûng thûte chu ka ngaihtuah thiam zâwn pawh a ni si lo va, a chungthû rêl tûra Jerusalema han kal a duh leh duh loh ka zâwt a.

²¹Mahse, Paula chuan Augustaa rorêlna a ngên ta zâwk a; tichuan, Kaisara hnêna ka thawn theih hmâ loh chuan vênna hnuaia dah tûrin thû ka pe ta a ni,” a ti a.

²²Agrippa chuan Festa hnênah, “Kei pawh chû mi thusawi chu ngaihtlâk ka duh asin,” a ti a. Ani chuan, “Naktûkah i ngaithla dâwn nia,” a ti a.

²³Atûkah chuan Agrippa leh Berniki chu ropui taka inthumin an lo kal a, thusawina inah an lo lût a, sipai hotu liante, khuah mi langsâr deuh deuhte nê; tichuan Festa thupêkin Paula chu an rawn hruai lût a.

²⁴Festa chuan, “Lal Agrippa leh hê hmuna lo kal zawng zawngte u, hê mi in hmuh hi a ni, Jerusalemah leh hê hmuna Juda rorêltute zawng zawngin nung tlâk lova an ruat, tihlum tûra min gena chu a nih hi.

²⁵Nimahsela, thihna khawp meuh thil engmah a tisual lo tih ka hria a; amah zâwkin Augustaa hnêna thlen a duh avangin tîr ka tum ta a ni.

²⁶Hê thilah hian ka lalpa hnêna ziaka thlen tûr mumal ka hre si lo va. Chuvângin, in hmâah karawn hruai chhuak a nih hi, Lal Agrippa, a bîk takin nang hi ka tihchhan nghe nghe che a, a awm dân zawh fiahna aţangin eng emaw tal ziah tûr ka hmuh theih nân.

²⁷Lalber hnêna mi tâng thawn tûr ve lêm, an hêkna thû, mumal taka hriat teltîr loh chu tih chî-ah ka ngai si lo va,” a ti a.

BUNG 26

PAULA HUN HMASA

¹Agrippa chuan Paula hnênah, “I thiam thû i sawi thei e,” a ti a. Tichuan, Paula chuan a kut a phar a, a thiam thû chu a sawi ta a:

²“Lal Agrippa, vawiinah hian Judaten mi an hêkna zawng zawnga ka thiam thû i hmâa ka sawi theih dâwn avâng hian lâwmawm hlêin ka inhria.

³Judate dân leh thubuai awm dân zawng zawng hre chiangtu i nihna hian mi tilâwm bawka. Chuvângin, dawhthei taka mi ngaihthlâksak tûrin ka ngên a che.

⁴Râwlthar tê ka nih lai aţangin Jerusalema ka chipuite zînga ka awm dân kha atîr aţang rêngin Juda zawng zawngten an hai lo.

⁵Kan sakhaw pâwl khermei ber tih dâna Pharisaï ka ni tihte pawh an hre chiangtu duh a nih chuan atîr aţangin hai tûr a awm hek lo.

⁶Pathianin min thlahtute hnêna a thutiam chungah beiseina ka neih avâng maiin tûnah hian thubuai ka awrh a nih hi.

⁷Chû thutiam chu kan hnam sâwm leh hnam hnihin, thahnemngai takin, achhûn azâna Pathian rawngbâwla hmuh an beisei thîn a ni. Chû thil beiseina thû avâng chuan a ni, Lal Agrippa, Judaten min hêk ni.

⁸“Pathianin mitthi a kai tho tih hi engati nge awihawm lova in ruat le?

⁹“Ni e, kei ngei pawh hian Nazaret Isua hming dodâl zâwna theihtâwp chhuah tûrah ka lo inngai ve thîn a.

¹⁰Jerusalemah pawh chutiang chuan ka ti thîn a; puithiam lalte hnên aţanga thupêk lân, mi thianghlim tam tak tân inah ka khung bawka a; an tihhlum lai te pawhin a remtihpui-tûah ka ţang bawka thîn a ni.

¹¹Biak in tinah ka tiduhdah thîn a, tihluhnain Pathian hming ka sawi chhiattîr bawka thîn a; an chungah ka kawlh êm êm a, ram pâwn lama khawpui thleng thlengin ka tiduhdah thîn a ni.

PAULAN A PIANTHAR THU A SAWI

¹²“Chutiang ti tûrin puithiam lalte thupêk leh hriatpuina lehkhâ kengin Damaskaah ka kal a;

¹³chhûn laiah chuan âw lalpa, kawng dungah chuan vân aţanga êng, ni êng aia êng zâwk chu, keimah leh ka kalpuite hual vêl chuan a lo êng phut a.

¹⁴Kan vaiin leiah kan tlu dual a, chutih lai chuan Hebrai ţawngin, ‘Saula, Saula, nangin engati nge mi tiduhdah le? Chhunna thîrah i inkhêng na thlâwn mai a ni e,’ tia min hrilhtu âw chu ka hria a.

¹⁵‘Lalpa, tu nge i nih?’ ka ti a. “Lalpa chuan, ‘Keimah Isua, i tiduhdah hi ka ni.

¹⁶Nimahsela, tho la, i kêin dîng rawh; hêng i thil hmuh tawhte leh ka la hriattîr zêl tûr che atâna rawngbâwltûah leh thuhriatpuitu atân, i hnênah karawn inlâr a nih hi.

¹⁷Juda mipuite leh Jentailte kut ata ka chhanhim ang che; anmahni hnênah ka tîr che hi,

¹⁸chutichuan, thim ata êng lam anrawn hawia, Setana thuneihna hawisana Pathian lam an lo hawi lêt nân te, sual ngaihdamna an chan theih nân leh, Keimah mi rin avânga rinnaa tihthianghlim tawhte zînga rochan an neih ve theih nân,’ a ti a.

PAULA PIANTHAR HNU NUN

¹⁹“Chuvângin, lal Agrippa, vân lam inlârna thû chu hnial rual ka ni hlei nê,

²⁰Damaska mite hnênah leh Jerusalema mite hnênah ka puang hmasa ber a, Judai ram pum puia mite hnênah te, Jentailte hnênah te chuan an lo sima, Pathian lam an hawia, sim hming pu tlâka hna an thawh theihna tûrin ka hril zâwk thîn a ni.

²¹Chû vâng mai chuan a ni, Judaten tempula min man a, mi tihhlum an tum tâk ni.

²²Tichuan, Pathian hnên ata ţanpuina ka hmuh avângin milian leh mitête hnêna thu hriatpuin, tûn thlengin ka la dîng zêl a, Mosia leh zâwlneiten thil lo thleng tûr an sawi bâk engmah ka sawi lo. Chûngte chu:

²³Kristan hrehawm a tuar tûr thû te, mitthi zîng ata thawh hmahruaitu a nih tûr thû te, Judate leh Jentailte hnêna chû êng thu puan chhuah thûte chu a ni e,” a ti a.

PAULA CHONA AGRIPPAN A HNÂWL

²⁴Chutianga thiam thû a sawi zawh chuan Festa chuan aw ring takin, “Paula, i â ta a ni maw! I zir tamnain a ti â che a nih hi!” a ti a.

²⁵Mahse, Paula chuan, “Festa zahawm ber, ka â lo asin; thutak leh finna thû a ni ka sawi zâwk ni.

²⁶Zalên taka hêng thû ka sawi tâkte hi lal pawh hian a hre tawh a; pakhat mah hriat hmai a nei lo vang tih ka chiangtu a ni, a chhan chu hêng thilte hi hmun kilkhâwra thil thleng a ni si lo va.

²⁷Lal Agrippa, zâwlneite thu i âwih em? I âwih tih ka hria e,” a ti a.

²⁸Agrippa chuan Paula hnênah, “Kristianah mi siam thei mai dâwn alawm le,” a ti a.

²⁹Paula chuan, “Pathianin rem ti se, nangmah chauh ni lovin, vawiina ka thu ngaihlatu zawng zawngte pawh hi keimah ang vek hian awm se ka ti asin, hêng kawlte erawh chu bun ve kher lovin,” a ti a.

³⁰Chûng thûte a sawi zawh chuan lal chu governor nên, Berniki nên, an bula thûte nên chuan an tho va;

³¹chutia a hranga an sawi dun naah chuan, “Hê mi hian thihna leh kawl bunna khawp meuh thil engmah a lo tih loh hi,” an ti a.

³²Agrippa chuan Festa hnênah, “Hemi hian Kaisara hnêna thlen lo dîl kher lo sela chuan chhuak daih zâwk tûr a nih hi,” a ti a.

BUNG 27

ROM KHAW ZIN KAWNG A INTAN

¹Tichuan, Itali lama kal tûr thû an tihtlûk veleh, Paula chu mi tâng thenkhat dangte nên Augusta pâwla sipai za hotu Julia kutah an hlân ta a.

²Adramuttiam lawng, Asia tuifinriat kam hrûta kal thînah chuan kan chuang a. Makedonia rama Thessalonika khaw mi Aristarka pawh kan hnênah a awm ve a.

³A tûkah Sidon khua kan tlawh a. Julia chu Paula chungah a tha hlê a, a thiante tlawha a vah vêl leh inenkawlte pawh a phalsak a.

⁴Chû hmun aţanga tuifinriata kan kal leh chuan, thliin a ni lo lamah min nem avângin Kupra thliarkâr phen thli ûp lamah kan kal ta a.

⁵Tichuan, Kilikia ram leh Pamphulia tuipuih kan kal zêl a, Lukia rama Mura khua kan thleng a.

⁶Chutah chuan sipai za hotu chuan Aleksandria lawng, Itali ram kal tûr a hmu a; chutah chuan min chuantîr a.

⁷Zâwi zâwia ni rei tak kan kal hnûin, harsa takin Nidas khaw zâwn kan thleng thei hrâm a, thli avânga hma lam kan pan zêl theih loh avângin Salmoni hrûla Kret thliarkâr phen thli ûp lamah kan her kual a.

⁸Harsa taka vaukam kan hrût hnûah, Lasai khaw bula Litengsâwl Mâwi an tih hmun chu kan thleng ta a.

PAULA THURÂWN AN PAWM LO

⁹Chutah chuan ni rei fê kan châp a, Chawnghei Hun pawh a pêl daih tawh a, chutiang huna lawnga zin chu a hlauhawm tawh avângin Paula chuan thurâwn a pê a,

¹⁰an hnênah, “Pute u, tûna lawnga kan kal chhuah mai chuan chhiatna leh boralna nasa tak thleng dâwna hriatna ka nei a, lawng leh a bungraw phurh mai ni lovin, nunna pawh kan in hloh hial ang,” a ti a.

¹¹Mahse, sipai za hotu chuan Paula thu sawi ai chuan lawngpu leh lawng neitu thû chu a pawm zâwk a.

¹²Thlasik tuar nân litengsâwl chu a rem loh avângin, mi tam zâwkin chuta ţanga tuipuia kal chhuaha, Phoiniki khua thlen hrâma, chuta thlasik tuar mai chu an rawtpui a; Phoiniki chu Kret thliarkâra lawng chawlh hmun a ni a, hmar thlang leh chhim thlang hawi zâwna awm a ni.

TUIPUI CHUNGA THLIPUI KARAH

¹³Chhim thli chu zâwi têtin a lo tleh heuh heuh va, an duh ang a lo thleng ta emaw tiin, tuipuih an inkhalh chhuak ta mai a, Kret thliarkâr chu vaukamah kan hrût zêl a.

¹⁴Nimahsela, rei rial lovin thlipui chu a lo thawh ta thut mai a, chû thli chu Eurakuilo* an ti a.

¹⁵Lawng chu a rawn nuai ta a, thli hawi zawnka khalh theih a ni ta si lo va, kan thlah dul ta ringawt a.

¹⁶Thliarkar te tak têt, Klauda an tih phen thli ûp lamah min lên lût hlauh va, harsa takin lawnglêng kan hum thei hrâm a;

¹⁷Lawng chhûnga an lâk luh hnûin, hruin lawngah an phuar bet a; Surti ţiau dúp hmuna len luh an hlauh avângin lawng puanzâr an tihnam a; tichuan min lên min lên ta mai a.

¹⁸Tuifâwnin min vawrh nasat êm avângin a tûk aţang chuan lawng chhûnga bungrua chu tuiah an paih thâwl ţan ta a.

¹⁹A ni thum ni chuan lawng thumhnâw chenin kutin kan paih chhuak a.

²⁰Ni rei tak chu ni pawh, arsi pawh a lang lo va, min nuaitu thlipui lah chu a na êm êm mai si a, dama chhuah leh theih beiseina pawh a bo vek tawh a.

²¹Chû chen chaw ei lo va kan awm hnûin Paula chu an zîngah a ding a, “Pute u, ka thû kha ngaithlân, Kret thliarkar aţang khân kal chhuak lo ila zawn, hêng chhiatna leh chânna hi a thleng lo tûr.

²²Mahse, tûnah pawh hian thlamuang taka awm tûrin ka fuih a che u; in zîngah tûmahin nunna in hloh lo vang, a bo tûr chu lawng chauh hi a ni ang.

²³Nizânah keimah mi neitu leh a rawng ka bâwl thîn Pathian Vântirhkohe ka kiangah a lo ding a, ka hnênah,

²⁴Paula, hlau suh, Kaisara hmâah i la ding ngei tur a ni; lawnga i hnêna awm zawn zawnge kha Pathian a pe tawh a che, mi ti a ni.

²⁵Chuvângin pute u, thlamuang takin awm rawh u; min hrilh ang chu a lo thleng ngei dâwn tih hi Pathianah chuan ka ring tlat a ni.

²⁶Tihian thliarkâr khawiah emaw min lên chhuak ngei ang,” a ti a.

²⁷Adria tuifinriatah thliin min vawrh kual aţanga zan sâwm leh palîna zânah chuan zanlai vêlah, lawng mite chuan khawi lai khawmual emaw thleng dâwnin an inhria a.

²⁸Tui thûk zâwn an han teh a, fit 120* a lo ni a; thui lo têt an kal leh hnûah an teh leh a, fit 90 chauha thûk a ni tih an hria a.

²⁹Vaukam lung khawkrawk hmunah min vawrh lût ang tih an hlauh avângin, lawng hnung lamah chuan thirchakai pali an thlâk a; khawvâr hun an ngah ta a.

³⁰Lawng pûte chuan lawng chu tlan bosan an tum a, lawng hma lamah chuan thirchakaite thlâk tûr ni âwm takin lawnglêng zâwk chu tuifinriatah an thlâk thlâ a.

³¹Paula chuan sipai za hotu leh sipaite hnênah, “Hêngho hi lawnga an awm vê reng loh chuan, chhan chhuah theih in ni lo vang,” a ti a.

³²Tichuan, sipaite chuan lawnglêng hlinna hruite chu an zai chat a, an thlâk ta daih a.

³³Khua a vâw têt a, Paula chuan an za vai chuan chaw ei tûrin a tur hlawm a, “Vawin hi engmah ei lova ni sâwm leh ni lî in ngah ni a ni a, engmah in ei bawk si lo va.

³⁴Chuvângin, chaw hi ei vek rawh u, in dam chhuahna tûr a nih hi; in zîngah tû samzai khat mah a boral lo vang,” a ti a.

³⁵Chûng thû a sawi zawh chuan chhang a lâ a, mi zawng zawng hmâah Pathian hnênah lâwmthu a sawi a; chhang chu a phel a, a ei tan ta a.

³⁶An zâ chuan an rilru a lo harh sawt a, chaw te pawh chu an ei ve ta hlawm a.

³⁷Kan vaiin lawnga chuang chu zahnih leh sawmsarih paruk kan ni a.

³⁸Puar khawpa an ei zawh chuan, lawng tizâng tûrin an buh phurh chu tuipuah an paih chhuak leh a.

MALTA-AH LAWNG CHHIATNA

³⁹Khua a lo vâw chuan, eng khawmual nge tih an hre lo va; mahse tiaupho nei litengsâwl pakhat hi an hmu a, chumi chungah lawng tlan chhuah tîr dân kawng an dap ta a.

⁴⁰Thîrchakai thlunnate chu an thlah a, tuipuah chuan an hnutchiah a; lawng kar herna hruite chu an thlah dul a, hma lam puanzâr chu thli chhêm tûrin an khai sâng a, tiaupho lam chu an pan ta a.

⁴¹Nimahsela, vaukama tuifâwn chak tak hlâwm hnih intawhna hmunah tak mai chuan lawng hma lam zum chu a inkhawh lût hlah mai a, che sawn thei lovin a tâng ta a, a mei lam erawh chu tuifawn nasa tak chuan a hlap keh tan a.

⁴²Chutih lai chuan sipai hote chuan mi tângte tihhlum an lo rawt a, chuti lo chuan tui an hleuh kai ang a, an tlan bo mai an hlau a ni.

⁴³Mahse, sipai za hotu chuan Paula chhanhim a duh avângin an thiltum chu a khap a; tui hleuh thiam apiang tuia zuan thlâk a, khawmual lo kai hmasa tûr leh,

⁴⁴mi dangte chu, a then thingphêk chungah te, a then lawng bungraw dang chungah te kai tûrin thû a pê a. Chutiang chuan an vaiin khawmualah chuan him takin an kai ta vek a.

BUNG 28

MALTA THLIARKARA PAULA RAWNGBAWLNA

¹Khawmuala kan kai zawh chuan chû thliarkâr hming chu Malta a ni tih kan lo hre ta a.

²Chuta mi chêngte chuan min lo khawngaih êm êm a; ruah a sîr avâng leh a vawh avângin mei an chhêm a, kan zâin min lo lâwm a.

³Nimahsela, Paulan thing têt khat a fawm a, meiah a tuah a, a sat avângin rûl a lo chhuak a, a kutah a zem ta tlat mai a.

⁴Chuta mi chêngte chuan a kuta rûl inkhai rêng an hmuh chuan, “Hê mî hi tualthat a ni phawt ang, tuipui aţangin tlan chhuak thei mah sela, diknaa rorêltu chuan a dam zêl a âwih tawh lo a nih dâwn hi,” an ti a.

⁵Ani erawh chuan rûl chu meiah a thing thla mai a, nâ pawh a ti si lo va.

⁶Chuta mite erawh chuan a rawn vûn vak emaw, a tlûk tawpa a thih ngâl emaw an ring a. Chutia rei tak an thlîr reng hnû pawha engmah a ti lo tih an hmuhin, an rilru an lamlêt a, pathian a nih hi, an ti leh ta zâwk a.

⁷Chu lai hmun chu, chu thliarkâra lal ber, a hming Publia ram a ni a; ani chuan min lo lâwm a, ni thum lâwm takin min thleng a.

⁸Publia pa chu khawsik leh santên veiin a lo mu reng a. Paula chuan ani chu a va kan a, a ţawngţaisak a, a chungah a kut a ngah a, a tidam ta a.

⁹Chû thil a tih hnû chuan, chu thliarkâra natna nei apiangte chu an lo kal a, damna an chang hlawm a.

¹⁰Chuta mite chuan kawng hrang hrangin min chawimâwi a; kan kalsan dâwn chuan kan châkkhai mamawhte min pê a.

ROM KHUA AN THLENG

¹¹Thla thum hnûah chuan Aleksandria lawng, Unau Phîr chhinchhiahna chuang, chû thliarkâra thlasik chhûnga chawlh lo hmang tawhah chuan kan chuang ta a.

¹²Surakus khua kan tlawh a, chutah chuan ni thum kan châm a.

¹³Chuta ţanga kal kual zêlin Regiam khua kan thleng a. Ni khat hnûah chuan chhim thlî a lo tleh a; a tûk lehah Puteoli khua kan thleng leh a,

¹⁴chutah chuan unaute kan hmu a, an hnênah ni sarih châm tûrin min sâwm a. Mahse, Rom khaw lam chu kan pan zêl a.

¹⁵Chuta ţang chuan kan unauten kan chanchin an hriat vêleh, Appia Dâwr leh Khualbûk Pathum hmun thlengin min hmuak tûrin an lo kal a. Paulan chûng mite chu a hmuh chuan Pathian hnênah lâwmthû a sawi a, a lo huai phah leh sawt a.

¹⁶Rom khua kan luh chuan, sipai za hotu chuan tânghote chu vêngtu hotu hnênah a hlân a; Paula erawh chu sipai vên chungah amah chauhva awm an phalsak a.

ROM KHUAA PAULA RAWNGBAWLNA

¹⁷Ni thum hnûah Paula chuan Juda hruaitute a ko khâwm a. Chuta rawn inkhâwmte hnênah chuan, “Unaute u, mi zawng zawng leh min thlahtute dân chungah engmah ka tisual lo chung pawhin, Jerusalem aţangin Rom sorkar kutah min tântîr a,

¹⁸anni chuan min zawh chian hnûah thihna khawp meuh ka chungah engmah a awm loh avângin mi chhuah an tum a.

¹⁹Mahse Judaten chû chu an hnial tlat avângin Kaisara hnêna thlen lo thei ka ni ta lo a ni; ka hnampuite hêk duh vânga ti erawh chu ka ni lo.

²⁰Chûng thilah chuan nangmahni hmuha biak che u ka duh vângin ka ko che u a ni; Israelte beiseina ka ţawmpui avânga hê khaidiat hi bun ka ni si a,” a ti a.

²¹Anni chuan a hnênah, “I chanchin hi Judai ram aţangin lehkha pawhin kan hre hauh lo va, unau heta lo kalte lahin a ţha lo zâwna an sawi che pawh kan hre hek lo.

²²Mahse, hê pâwl hi ram tinah sawi chhiat a ni si a, i ngaihdân nangma kê ngei aţanga hriat kan duh a ni,” an ti a.

²³Tichuan, a hun tûra an ruat nî-ah chuan a thlen inah mi tam tak an lo kal a; an hnênah chuan Pathian lalram chanchin chu khûn takin a lo hrilh fiah a; Mosia Dân Bu leh Zâwlnei Lehkhabuten Isua chanchin an lo sawi dân aṭanga an rilru hmin tumin zîng aṭanga tlai thlengin finfiahna thu tam takin a zirtîr bawk a.

²⁴Mi ṭhenkhat chuan a thusawite chu an ring a, a ṭhenin an ring lo va.

²⁵Tichuan, anniho chu an inrem tlâng thei ta lo va, Paulan ṭawngkam hnih khat a sawi zawhin an kal chhuak ta a. Chû a thusawi chu hei hi a nî; “Thlarau Thianghlimin Zâwlnei Isaia kê hmanga kan thlahtute hnêna a sawi kha a dik ngawt mai.

²⁶Hê mite hi va hrilh rawh: Beng zawnghin hre mah ula, in hrethiam si lo vang; Hmu reng chungin in hmu fiah lo vang a, a ngaihna in hre lo vang;

²⁷Hê chîte thinlung hi a lo chawlawl ta a, An bengte a lo ngawng tawh a, An mit a lo del ta bawk a, ‘Chuti ni lo se an mitin an hmu ang a, An bengin an hria ang a, An thinlungin an hre bawk ang a, An hawi kê leh ang a, Keiin ka lo tidam hlauh mai tûr,’ an ti a, a tih kha.

²⁸“Chuvângin, Pathian chhandamna thû hi Jentailte hnênah hril a ni ta tih hre rawh u, anni chuan an lo ngaihsak dâwn si a!” a ti a.

²⁹Chûng thû a sawi zawh chuan, Judate chu nasa taka anmahni leh anmahni inhnial chungin an ṭin ta a.

³⁰Paula chu kum hnih pumhlum ama in luah hawhah chuan a chêng a, a hnêna lût apiang a lo lâwm ṭhîn a,

³¹Pathian lalram thû hrilin, Lal Isua Krista thû chu fiah tak leh âwihawm takin a zirtîr ṭhîn a, tûmahin an khap si lo va.

ROM

Ziah tu: Paula • Ziah kum: A.D. 56-58

Rom lehkathawn hi tirhko Paulan Korinthe khua a tlawh waw thum tuma a ziah a ni. Thuthlung Thara Kristiante tâna thuchah puan chhuahna kimchang ber a nih avângin Lehkathawn zînga dah hmasak ber âwm rêng pawh a ni. A thu bul tan nâna 'Pathian Chanchin Tha' (1:1) tih leh 'Krista Chanchin Tha' (1:16) tih aţang hian, inang renga suala tlu tawh lei mihringte tân hian chhandamna thú a fûn sâ ve rêng rêng. Judate Pathian chu Jentailte Pathian pawh lo niin, suala tlu tawh mi zawng zawng tân thiamchantîrna chu rinnaa chan theih a nihzia a târ lang a. Krista thihna chu misualte thihnaah min ruatsak a, chû thihnaa thi tawhte chu a thawhleahnaah min telh vê nghâl a. Chû thawhleahna nun chang tawh Kristiante nunah chuan dikna te, hmangaihna te nê inrem taka nung tûrin a Thlarau chuan keimahniah a thawk thîn. Ringtu nun hlui leh nun thar inthlâkthleng dân hi fiah tak leh mâwi takin Paula hian a sawi chhuak a ni. Rom lehkathawn hian Pathian hnam thlan Israelte tlûkna avânga Jentailte tâna khawngaihnaa chhandamna a lo inhawn thú a sawi a. Pathian thú an âwih loh avânga Israelten hnâwl leh mâk tâwka, tân thlenga mutthlûkna thlarauvin a tuam mêk dinhmun aţangin hê hun hnunungah hian an lo harh thar leh ang a, a hnam puma chhandama, hnam anga tundin an la nih leh tûr thutiam ropui, zâwlneite lo hrilh lâwkte kha chiang takin a sawi baw. (bung 9-11) Rom lehkathawn hi Bible-a lehkhabu 45-na a ni a, bung 16 a awm a, châng 433 a awm.

BUNG 1

CHIBAI BÛKNA

¹Paula, Isua Krista bâwih, tirhko ni tûra koh chu Pathian Chanchin Tha hril tûra tihhran a ni a.

²Pathian Lehkhabu Thianghlimin a zâwlneite hmanga a lo tiam tawh,

³a Fapa kan Lalpa Isua Krista chu tîsa dânah chuan Davida thlah aţanga lo piang a ni a;

⁴thianghlimna Thlarau dânah chuan, thihna ata a thawhleahna chuan thiltihtheihnain Pathian Fapa a nihzia a puang a.

⁵Ama hming avânga rinna chu hnam zawng zawngte âwihtîr tûrin, amahah chuan khawngaihna leh tirhko nihna kan chang ta:

⁶chûng zîngah chuan nangni pawh Isua Krista koh in ni vê si a.

⁷Rom khuaa Pathianin a hmangaih tak tak, mi thianghlim ni tûra kohte zawng zawng hnênah: Pathian, kan Pa leh Lalpa Isua Krista hnên ata khawngaihna leh remna te chu in hnênah awm rawh se.

ROM KHUA TLAWH A CHÂK

⁸A hmasâin, khawvêl pumah in rinna thú a than chhuah tâk avângin in zâa chungka ka lâwmthû hi Isua Krista zârah ka Pathian hnênah ka sawi a ni.

⁹Ka ţawngţainaah te chuan bâng lovin in hming ka lam thîn a, ka thlarau ngei hian a Fapa Chanchin Tha rawng ka bâwl thîn tih hi Pathian pawhin mi hriatpui a ni.

¹⁰Tûnah te hian Pathian remtihna ngeia in hnêna lo kal theih dân a awm lâwm ni tiin ka dîl thîn a ni.

¹¹In lo insawhnghehna tûra, thlarau lam thilpêk pe tûra rawn hmuh che u hi ka châk êm êm a ni.

¹²Chû chu in rinna leh keima rinna ţang hova, kan in chhêm alh tawn theihna tûr a ni si a.

¹³Unaute u, Jentail dangte hnênah pawh a rah chhuah ka hmuh tawh ang bawkin, in zîng aţang pawha ka hmuh theihna tûrin, in hnênah waw tam tak lo kal ka tum tawh tih in hriat loh ka duh lo ve (mahse tân thleng hian dâlin ka la awm si a).

¹⁴Grik mite leh hnam kawlsente lakah bat ka nei; mi fing leh mi mâwlte hnênah pawh.

¹⁵Chuvângin, keima lamah chuan, nangni Rom khuaa awmte hnênah Chanchin Tha hi hril tûrin ka inpeih reng a ni.

MI DIK CHU RINNAIN A NUNG

¹⁶Krista Chanchin Tha chu ka zahpui si lo va, tûpawh a ring apiangte tân chhandamna tûra Pathian thiltihtheihna a ni; a hmasain Juda mite tân a ni phawt a, Grik mite tân pawh a lo ni leh a.

¹⁷Pathian dikzia chu rinna aţanga rinna zêla tihlan a ni, "Mi dik chu rinnain a nung ang," tia ziah ang khân.

DIK LOHNA CHUNGA PATHIAN THINURNA

¹⁸Pathian thinurna chu dik lo taka thutak rapbettute, Pathian pawisak lohna leh khawlohna zawng zawng chungah vân aţanga tihlan a ni tawh si a.

¹⁹Pathian chu hre duh ni se, hriat theih tûrin anmahniâh Pathianin a hriattîr a, a entîr vek tawh a.

²⁰Khawvêl siam tirh ata tawh amaha hmuh theih loh thilt chu fiah taka hmuhin a awm a, a chatuan thiltihtheihna leh a Pathianna ngei pawh thilsiamte hmanga tihlan a ni; chuvângin chhuanlam tûr an nei lo.

²¹Pathian chu hre mah se, Pathian a nihna angin an châwimâwi lo va, lâwm nachâng pawh an hre hek lo; thil lawilo mai mai an ngaihtuah zâwk a, an thinlung â tak chu tihthimin a awm a.

²²Intifing hle siin mi â-ah an lo chang ta.

²³Thi thei lo Pathian ropuina chu thi thei mihringte leh savâ te, ran ke pali nei te leh bawkvâka kal chi rannungte ang lekah an chantîr ta a.

²⁴Chuvângin, an taksa chu zahthlâk taka insiam tawna, an tîsa châkna thinlung ang zêla bawhlhlawh taka inhmang khawlo tûrin Pathianin a thlahzal ta lâw lâw a ni.

²⁵Pathian thutak chu dâwtah an chantîr a, Siamtu be lovin, thilsiamte chu biain an rawng an bâwl ta zâwk si a. Siamtu chu chatuana fak tlâk a nih vei nê. Amen.

²⁶Tenawmna kawng zawh zêl tûrin Pathianin a hawisan ta. An hmeichhiate leh zêl pawhin an pianphung awm dân kalhin, a khawlo zâwngin an inhmang tawn a.

²⁷Chutiang bawkin mipate pawhin hmeichhiate nêna an inhman dân pangngai piah lamah, anmahni leh anmahni an inîit tawn a, mipa leh mipa zahthlâk takin an inngai a, an sual man hmuh tûr dik tak chu anmahniah ngei an hmu zêl a nih hi.

²⁸Pathian lam ngaihtuah hlek pawh an duh loh avângin, mihring tiha mawi lo khawp thil bawhlhlawh leh ngaihtuahna khawlo tak tak an put pawh Pathianin a phalsak ta hial a:

²⁹dik lohna tinrênga inhmang zovin, inngaihna sual te, suahsualna te, duhâmna te, mi tihchhiat duhna tein an lo khat a; îtsikna te, tualthahna te, inngeih lohna te, bumna te, sual lam ngawt âwntu te, sê sêa thulâk ching te an ni a;

³⁰mi rêl hmangte, Pathian hawtute, mi kawlsente, chapote, mi uankhum chingte, thil sual ching chhuak thar thînte, nu leh pa thu âwih lote,

³¹rilru mumal nei lote, mi rintlâk lote, hmangaihna nei lote, ngaihdamna nei lote, lainatna nei lote an ni.

³²Chûng mi, Pathian rorêlna dik zâwk hre reng chung a tisual lui zêl te chu thi tlâk rêng an ni; anmahni zînga ti mai pawh ni lovin, mi dang ti vête an lâwmpui zâwk thîn.

BUNG 2

PATHIAN RORÊLNA DIK

¹Chuvângin aw mihring, mi dang thiam loh chantîr mah la, chhuanlam rêng i nei lo ve; mi dang thiam loh i chantîrna ang bawka mahni thiam loh inchantîr i ni asin; nang, sawisêltu pawhin chutiang thilte chu i ti vê tho si a.

²Nimahsela, Pathianin chutiang thil ti thintute chung a rorêlna chu thu dik tak a ni tih kan hria a ni.

³Aw mihring, chutiang thil ti thînte sawisêltu pawhin i ti vê tho si a; Pathian rorêlna chu pumpelhe theih i inring bîk em ni?

⁴A nih loh leh Pathian thatzia hriatna hian simna kawngah a hruai thei che tih hre lovin, Pathian thatna te, a dawhtheihzia te, a thinnelzia te hi i lo hmusit mai dâwn em ni?

⁵I luhlul leh i thinlung tihsak ang zêlin, thinurna nî leh Pathian rorêlna dik a lo lan hunah thinurna i inkhâwl khâwm nasa ting mai dâwn asin.

⁶Pathian chuan “mi tin an thiltih ang zêlin a rêlsak dâwn si a”:

⁷thil tha ti fan fana, ropuina leh chawimawina leh thih theih lohna zawngtute hnênah chuan chatuan nunna a pê ang;

⁸amaherawhchu, mahni hmâ siala, thutak zâwm duh lo va, diklohna zâwm zâwtute chungah chuan thinurna leh thinrimna te,

⁹hrehawmna leh lungngaihna chu thil sual titu apiangte thlarau chungah chuan a awm ang; Juda mi chungah a awm hmasa ang a, Grik mi chungah pawh a awm leh ang.

¹⁰Thil tha titu apiang hnênah chuan ropuina te, chawimawina te, thlamuanna te pêk a ni ang, Juda mi hnênah pêk hmasak a ni ang a, Grik mi hnênah pêk a ni leh ang.

¹¹Pathianin mi duhsak bîk a nei si lo va.

¹²Dân nei lova thil sual titu chu dân lo bawkin a boral ang a; dân nei chung a thil sual titu chu dân anga rêlsakin a awm ang.

¹³(Dân hretu maite chu Pathian mithmuhi mi dik an ni lo va; dân anga titute erawh chu thiam chantîrin an awm ang.

¹⁴Jentail dân nei loten dânin a phûit ang thova anmahni rilru dân anga an tih chuan, chûng mite chuan dân nei lo mah se, anmahni tân chuan dân a ni chawp vê mai a,

¹⁵an thinlung lamah dân thû chu ziak a ni tih an thiltihin a entîr a, an chhia leh tha hriatna pawhin a hriatpui a, chû chuan a chângin thiam a chantîr a, a chângin thiam loh a chantîr leh mai a).

¹⁶Chanchin Tha ka sawi ang hian Pathianin mihringte thurûk chu Isua Kristaah a la ngaihtuah dâwn a ni.

JENTAILTE ANGA JUDATE THIAM LOHNA

¹⁷Nang chu Juda tia koh i ni ngei a, dân chu i rinchhan a, Pathian chu i chhuang baw a,

¹⁸a duh zâwng i hria a, dân thûa zirtîr i nih avângin thil tha tak chu i pawmpui a,

¹⁹mitdelte tâna hruaitu tling leh, thim hnuaia awmte tâna êntû niin i inngai baw a,

²⁰mi â-te zilhtu, nausênte tâna zirtîrtu, dân anga finna leh thutak awm dân neitu niin i inhria a.

²¹Chuvângin nang, mi dangte zirtîrtu ni si, nangmah i inzir si lo mâw? Nang, rûkru lo tûra hriltu hian i ru thîn mâw?

²²Nang, “Uirê suh,” titu hi i uirê thîn mâw? Nang, milim duh lotu, nangin mîlem biakna tempula thilte chu i rawk thîn mâw?

²³Nang, dân chhuangtu, dân i bawhchhiat avângin Pathian i tihmingche thîn mâw?

²⁴Ziaka a awm ang khân “Pathian hming chu nangmahni avângin Jentailte zingah sawi chhiatin a awm ta a nih hi.”

SERHTAN A SAWT LO

²⁵Dân i zawm chuan serhtan chu a tangkai takzet a ni; dân bawhchhetu i nih erawh chuan i serhtan chu tan loh ang lek a lo ni ang.

²⁶Chuvângin, serhtan loh miin dân thu ruatte a vawn chuan a serhtan loh chu serhtan anga ngai a ni dâwn lo vem ni?

²⁷Pianphunga serhtan lohvin dân chu a zawm kim chuan nang, lehkhâ thû leh serhtan dân leh a ziahna bu nei sia, dân bawhchhe si chu a sawisêl dâwn lo che em ni?

²⁸A lang maia Juda mi chu Juda mi tak a ni lo va; a langa tîsa maia serhtan chu serhtan tak a ni bawh hek lo;

²⁹chhûngrila Juda mi chu Juda mi tak a ni; serhtan dik tak chu thinlunga serhtan a ni, lehkhâ thû maiah ni lovin, Thlarauva serhtan a ni; chû mi chuan mihring fak hlawh lovin Pathian fak a hlawh zâwk thîn.

BUNG 3

PATHIAN RORÊLNA HUMHALH

¹Juda mi nih hian tangkaina eng nge a neih bîk? Serhtan hi eng nge a sâwtina?

²Kawng tinrêngah a sâwt a ni! A sâwt nachhan ber chu Pathian thû hi anmahni hnêna pêk hmasak a nih vâng a ni.

³A nih leh, thenkhatten ring ta lo sela, engtin nge ni ang? An rin lohna chuan Pathian chu rin tlâk lovah a siam dâwn tihna em ni?

⁴Hnâi lo ve! Pathian chu mi dik tak ni sela, mi tinte chu dawthei ni zâwk rawh se; “Nang chuan i thûa thiam i chan a, Rorêlsaka i awm huna i hneh theih nân,” tih zia ang khân.

⁵Mahse, kan diklohna hian Pathian dikna a tihlan si chuan eng nge kan sawi tâk ang le? Pathianin thinurna a thlen hian thil a tidik lo tihna a ni em? (Mihring dân angin ka sawi a ni).

⁶Ni teh suh e! Chuti ni se engtin nge Pathianin khawvêl ro a rêl chuan ang?

⁷Ka dâwt sawiin Pathian dikna leh a ropuizia a belhchhah sauh a nih si chuan engvângin nge kei pawh chu misual min la tih cheu vang?

⁸Engah nge “Thil tha a lo chhuah theih nân thil sual i ti ang u,” kan tih mai loh? Mi thenkhat chuan a chhe zâwna sawiah min puh lehngghâl a, mi thenkhatin sawi tak takah min ngai bawk si a. Thiam loh an chang chu a âwm rêng a ni.

MI SUAL VEK KAN NI

⁹Eng nge ni ta le? Anni aiin kan tha chuang bîk em ni? Tha bîk lo ve. Judate leh Grikte chu sual bâwiha awm vek an nihzia kan sawi tawh kha;

¹⁰Hetiang hian ziah a ni: “Tûmah mi dik an awm lo, pakhat mah an awm lo;

¹¹Tûmah hre thiam pawh an awm lo, Tûmah Pathian zawng mi rêng an awm lo.

¹²An pêng bo zo vek a; An tlâktlai lo zo ta vek a; Tûmah thil tha ti an awm lo, Pakhat chauh pawh an awm lo.”

¹³“An hrawk chu thlân inhawng a ni a; An lei chu inbum nân an hmang a”; “An hmuiah rûl tûr a awm a.”

¹⁴“An kê chu sawi chhiatna leh khâknain a khat a.”

¹⁵“Thisen chhuah tûrin an ngal thâ a chak a;

¹⁶An kawngah chuan boralna leh lungngaihna a awm a;

¹⁷Thlamuanna kawng rêng rêng an hre lo.”

¹⁸“Pathian tihna mit pawh an pu hek lo.”

¹⁹Dânin a sawi apiang chu dân hnuaia awmte tâna sawi a ni tih kan hria a; kê zawng zawng hup a nih theih nân leh, khawvêla mi zawng zawng Pathian hmâa thiam lo vek an nih theih nân.

²⁰Chuvângin, dân thiltih avângin a mithmuhah thiam chang tûmah an awm lo vang; sual a ni tih hriatna hi dân avânga lo awm a ni si a.

RINNA AVANGA PATHIAN DIKNA

²¹Nimahsela, dân tel lova Pathian dikna, Dân leh Zâwlneiten an lo hriatpui vê bawk chu, tunah hian tihlanin a awm ta,

²²Pathian dikna ngei chu, Isua Krista rin avâng chuan a ring apiangte hnênah tihlanin a awm a. Chuvângin, danglam bîkna tûr engmah a awm lo;

²³mi zawng zawngin thil sual an ti vek a, Pathian ropuina chang zo rêng an awm lo,

²⁴Isua Kristaa awm tlanna chuan a khawngaihna avângin a thlâwnin thiam min chantîr a,

²⁵Pathian dawhtheihna chuan tûnhma zawnga thil sual lo tih tawhte haiderin, a dikzia târlan nân rinnain a Fapa thisen chu sual thâwi nân a ruat a;

²⁶Amah chu mi dik tak a nihzia leh, Isua ring apiang thiamchantîrtu ni thei khawpa mi dik a nihzia tûn huna a entîr theihna tûr a ni e.

UANNA HNÂWL A NI

²⁷In lo uan tinnna chu khawiah nge a nih tak? Hnâwl a ni ta. Eng dânin mâw? Thiltih dânin maw? Ni lo ve, rinna dânin a ni.

²⁸Chuvângin, dân thiltih ni lovin, rinnain miin thiam a chang zâwk a ni.

²⁹Pathian chu Judate Pathian chauh em ni? Jentailte Pathian a ni vê lo vem ni? Ni vê tehrêng mai. Jentailte Pathian pawh a ni teh meuh mai.

³⁰Pathian pakhat a awm a, rinna avânga serhtante thiamchantîrtu a ni a, amah vêk chu rinna avânga serhtan lohte thiam chantîrtu a ni bawk.

³¹A nih leh, rinna avângin dân chu engmah lovah kan siam em ni? Teuh lo mai! Dân chu kan tinghet sauh zâwk a ni.

BUNG 4

ABRAHAMA: RINNAA THIAM CHANG

¹Tisa dâna kan pa Abraham a chuan eng thil nge a hmuh kan tih ang?

²Abrahaman thiltih avângin thiam chang ni se uan chhan tûr a nei dâwn asin, Pathian hmâah erawh chuan ni lovin.

³Pathian Lehkhabûin eng nge a sawi? “Abraham a chuan Pathian a ring a, chû chu ama thiamchannaa ruat a ni,” a ti a ni.

DAVIDAN THUTAK A LAWMPUI

⁴Hnathawktu hlawh chu khawngaih thilpêk anga ruat ni lovin, hlawh chhuah a ni.

⁵Amaherawhchu, hnâ pawh thawk lo, Pathian ngaihsak lo, thiam chantîrtu ring zâwktu rinna chu ama thiamchannaa ruatsak a ni.

⁶Thiltih vâng pawh ni lo, Pathianin mi dika a pawmte nihlawhzia chu Davida pawhin tihian a sawi:

⁷“An bawhchhiatna ngaihdam sakte leh, An sual khuhsaka awm te chu An nihlawh e;

⁸LALPAN sual nei lo a tiha chu A nihlawh e.”

ABRAHAMA: SERHTAN HMAA THIAM CHANG

⁹Chû nihlawhna chu serhtante tân chauhva lo awm nge, serhtan lohte tân pawh? Abraham a rinna chu a thiamchannaa ruat a ni kan ti si a?

¹⁰Chû chu eng tia ruat nge? A serhtan hnûah nge, a serhtan hmân? A serhtan hnû ni lovin, a serhtan hmân a ni zâwk.

¹¹Serhtan lova a awm laiin, rinna avânga thiam chang nih chhinchhiahna, serhtan entîrna ni baw chu a dawng tawh a; tichuan, serhtan loh te pawh thiam changa ruat an nih theih nân leh, ringtu zawng zawngte tân pa a lo nih theihna tûr a ni a.

¹²Serhtan mite pa chauh ni lova, serhtan loh mite tân pawha pa a nih theih nân, kan pa Abrahamana serh a tan hmaa rinna kawng a zawh anga a hnung zuitute tân pawh a ni baw.

RINNA AVANGA THUTIAM PEK

¹³Abraham leh a thlahte hnêna khawvêl ro luahna tûr thutiam kha dân avângin a ni lo va, rinna avânga dikna zâwkin a ni.

¹⁴Dân hnuaia mite chu ro luahtu ni ta se, rinna chu engmah lovah a chang dân a, thutiam pawh chu awmze nei lo a ni ang.

¹⁵Dân chuan thinurna a ken tel miao avângin, dân awm lohna hmunah chuan bawhchhiat tûr pawh a awm baw hek lo.

¹⁶Chuvângin, thutiam chuan mi zawng zawng a huap theih nân leh, dân nei mite chauh ni lo, kan zâa rinna pa Abraham rinna ang neitute pawh a huap vek theih nân, rinna avânga khawngaihnaa pêk a ni.

¹⁷Mitthite tinungtu leh thil awm lote lam pawh awm anga kotu an rin Pathian hmâah chuan (“Chi tam takte pâah ka siam a che” tia ziah a lo ni tawh rêng si a;)

¹⁸beisei tûr rêng a awm loh lai pawhin beisei takin a ring tlat a, chû chu hnam tam takte pa a lo nih theihna pawh a ni, “Khati zât khian i thlahte chu an la awm ang,” tia hrilh a nih ang khân.

¹⁹A taksa thi tawh ang mai (kum za mi laia upa) leh Sari pawh nâu pai rual a nih tawh lohzia hai chuang lovin, rinna kawngah a duai duh lo va.

²⁰Pathian thutiam chu ringhlelin a peteksan hek lo, a rinna a lo chak sauh va, Pathian a chawimâwi ta zâwk a,

²¹a thutiam tawh chu a hlen chhuak ngei dân tih a ring nghet tlat a ni.

²²Chuvângin, a rinna chu “ama thiam channaa ruatsak a lo ni ta.”

²³Chû thiam changa ruatsakna chu ama tân maia zia a ni lo,

²⁴keini tân pawh a lo ni ve zêl. Mitthi zînga ta kan Lalpa Isua kâi thotu chu kan rin chuan, thiam changah min ruat ve dân a ni.

²⁵Kan sualte avânga thi tûra hlan a ni a, thiam kan chan lehna tûra kai thawh a ni baw.

BUNG 5

HARSATNA NGAMTU RINNA

¹Chutichuan, rinna avânga thiam chang kan nih tawh avângin, kan Lalpa Isua Kristaah chuan Pathian nên kan inrem ta a;

²amah avâng vêk chuan tûna kan dinna, hê khawngaihnaah hian rinnain kan lût a; Pathian ropuina chu lâwm chungin kan beisei a ni.

³Chû chauh pawh ni lovin, hrehawmnaah pawh kan lâwm baw a ni, hrehawmna chuan tuar a tichhel tih kan hre si a;

⁴tuarchhelna chuan chin hriatna a siam a, chû chin hriatna chuan beiseina a siam a ni.

⁵Keimahnia Thlarau Thianghlim min pêk hmang hian kan thinlungah Pathian hmangaihna a chhûn luh tawh avângin, beiseina chu a titlâwn dân si lo va.

KRISTA KAN AIAWHTU

⁶Chakna rêng pawh nei lova kan la awm lai khân, Krista chu misualte tân a hun takah a rawn thi a.

⁷Mi dik aia thih chu tûma’n an duh âwm lo ve; mi t̃ha aia thih huam erawh chu an awm mahna.

⁸Amaherawhchu, Pathianin a mi hmangaihzia a lantîr dân chu, misual kan la nih laia, Krista kan aia a thi ta hial kha a ni.

⁹Chû chauh pawh ni lovin, a thisena thiam kan chan tawh hnû hian, amah avâng vêkin thinurna laka chhandam kan ni ang.

¹⁰Hmêlmâ kan nih lai mahin a Fapa thihna avânga Pathian nêna inrem tawh kan ni a, tûna kan inrem tawh hnûah phei chuan a nunna avângin chhandamin kan awm lehzual ang.

¹¹Chû bâkah, kan Lalpa Isua Krista zâra inremna kan hmuh tâk avâng hian Pathianah kan lâwm baw a ni.

ADAMA-AH THIHNA, KRISTA-AH NUNNA

¹²Chutichuan, mi pakhat avângin khawvêlah sual a lo lût a, sual avângin thihna a lût a; chutiang bawkin mi zawng zawngin thil sual an tih avângin thihnain mi zawng zawng a fan chhuak ta a.

¹³(Dân awm hmân khawvêlah sual a awm tawh si a; dân a awm loh lai khân sual chu suala ngaih a ni lo.

¹⁴Nimahsela, Adama ațanga Mosia thlengin Adama bawhchhiatna ang khera thil sual ti lote chungah pawh thihna chuan ro a rêl tho. Adama chu lo la kal tûra entîrna a ni si a.

¹⁵Thilthlâwnpêk erawh chu bawhchhiatna nêna inang lo. Khâ mi pakhat thil sual tih avâng maha mi tam tak an thih si chuan, Pathian khawngaihna leh mi pakhat Isua Krista khawngaihna avânga thilpêk chu, mi tam zâwk chungah nasa lehzualin a awm ngei ang.

¹⁶Pathian thilpek chu khâ mi pakhat sualnain a hrin chhuah ang kha a ni lo. Thil sual pakhat tih khân thiam chang lovah mi a siam si a; mahse thilthlâwnpêk erawh chuan bawhchhiatna tam tak chungah thiam min chantîr ta thung a ni.

¹⁷Mi pakhat thil sual tih avâng maha thihnain ro a rêl si chuan, khawngaihna nasa tak leh dikna thilpêk dawngtute chuan Mi pakhat, Isua Krista avângin nunnain ro an va rêl nasa dân êm!).

¹⁸Chuvângin, mi pakhat thil sual tih avânga thiam chang lo tûra rorêlna thu chhuak chu mi zawng zawng chungah a tlâ ang bawkin, mi dik pakhat thil t̃ha tih avânga thilthlâwnpêk chu mi zawng zawng chungah a lo tla ta a; chû chuan nunna hmu tûra thiamchang nihna a rawn thlen ta.

¹⁹Mi pakhat thuâwih lohna avâng khân mi tam tak mi sualah siam an lo ni ta a; chutiang bawkin Mi pakhat thuâwihna avângin mi tam tak mi dika siam an ni ang.

²⁰Chû bâkah, sual a pun lehzual nâna dân hi lo awm a ni a. Mahse, sual a pun nasat poh leh khawngaihna pawh a pung lehzual thîn.

²¹Thihna hmanga سوالin ro a rêl ang hian, khawngaihna chuan diknain kan Lalpa Isua Krista zârah chatuan nunna thlenga ro a rêl theih nân.

BUNG 6

SUALA THI, PATHIANA NUNG

¹Eng nge kan sawi tâk ang le? Khawngaihna tipung leh zual tûrin kan soal zêl mai dâwn em ni?

²Teuh lo mai! Keini soal thihsan tawhte hi engtin nge سوال bawkan la nun theih cheu ang?

³Krista Isuaa baptismas chang tawh keini hi, a thihnaah khân baptis kan ni tawh tih in hre lo vem ni?

⁴Chuvângin, thihna baptismas kaltlangin, ama rualin phûmin kan awm ta a, Pa ropuinain Krista chu mitthi zînga ta a kai tho ang bawkin keini pawh nun tharin kan nung ve tawh tûr a ni.

⁵A thihna anpuia amah nêna inzawm kan nih tawh si chuan, a thawhleha anpui pawhin kan inzawm bawkan ang.

⁶Hei hi hria ila: soal rawng kan bâwl tawh loh nân leh, soal pu taksa chu chin rala a awm theih nân, kan mihring hlui chu ama ruala khenbeh tawh a ni.

⁷Thi tawh chu soal laka ta chhuah zalen a ni tawh si a.

⁸Krista ruala kan thih tawh chuan, ama rual bawkin kan nung leh ang tih kan ring a ni.

⁹Krista chu mitthi zînga ta kaihthawh a ni tawh a, a thi leh tawh lo vang tih kan hria a. Thihna chuan ama chungah thu a nei pha tawh hek lo.

¹⁰Thihna a rawn thihchilh kha soal lam kawnga thih hlenna a ni a; nunna a rawn nunpui erawh chu Pathian tâna nung a ni ta.

¹¹Chutiang bawkin nangni pawh soal thihsan tawhah inruat ula, kan Lalpa Krista Isuaah chuan Pathian lama nungah inruat rawh u.

¹²Chuvângin, in tîsa châk zâwnng zâwm tûrin, in taksa thi theiah chuan سوالna chu rorêltîr suh u.

¹³In taksa pêngte chu dik lohna hriamhrei atân soal ti tûrin pe phal tawh suh u; amaherawhchu, mitthi zînga ta nung leh angin Pathian hnênah inpê ula, in taksa pêngte pawh chu dikna hriamhrei atân Pathian hnênah pe zâwk rawh u.

¹⁴Sualnain in chungah thû a nei tawh dâwn si lo: dân hnuaia kûn in ni tawh lo va, khawngaihna hnuaia awm in nih tawh avângin.

SUAL BÂWIHA TA PATHIAN BÂWIH

¹⁵Engtin nge ni ta ang le? Dân hnuaia kûn tawh lova, khawngaihna hnuaia kan awm tawh avâng hian kan soal zui zêl dâwn em ni? Teuh lo mai!

¹⁶An thuâwih tûra in intukluhna apiang bâwihah in tâl lût nghâl tih in inhre lo vem ni? Thihna thlen thei khawpa soal bâwih a nih theih a, thiam chang tûra thuâwihna bâwiha luhna a awm bawkan tih te hi in hre lo vem ni?

¹⁷Amaherawhchu, soal bâwihah lo tâng tawh mah ula, tuna chhan chhuah in nihna thurin hi in thinlinea in âwih tâk avângin

Pathian chu fakîn awm rawh se.

¹⁸Sual laka chhuah zalen in nih tawh avângin dikna bâwih in lo ni ta e.

¹⁹In tîsain a zawh loh avângin mihring takin ka sawi dâwn. In taksa pêngte chu bawhlhlawhna leh dân bawhchhiatna bâwiha in pêk hian, bawhchhiat lehzuallnaah a hruai thîn che u a; tûnah erawh chuan in taksa pêngte chu thianghlîmna thlen ngei tûrin dikna bâwihah pe tawh rawh u.

²⁰Sual bâwih in nih lai khân, dikna lakah chuan khuah khîrh loh in la ni a.

²¹Tûna zahpuiaawm in tih tâkte zîngah hian eng rahte nge in lo chhuah tawh le? Chûng thil tâwpna chu thihna a ni asin.

²²Sual laka chhuah zalen in lo nih hnûa Pathian chhihhlawh in lo nih tâk avâng hian, thianghlîm taka rah chhuah thei in ni ta a, chumi tâwpna chu chatuana nunna a ni.

²³Sual hlawh chu thihna a ni a, Pathian thilthlâwnpêk erawh chu kan Lalpa Krista Isuaah chuan chatuana nunna a ni.

BUNG 7

DÂN AṬANGA CHHUAH ZALENNA

¹Unaute u (dân hre mite hnênah ka'n sawi teh ang), dân chuan mi an dam chhûng zawngin an chungah thû a nei tih in hre lo vem ni?

²Hmeichhe pasal nei chu a pasal dam chhûng zawng dân chuan a pasalah a phuar tlat a. A pasal a thih erawh chuan a pasal laka phuar behna dân aṭanga chhuah zalen a ni.

³A pasal la dam laia mi dang a neih chuan, “uire-nu” an ti ang; a pasal a thih tawh erawh chuan, chû dân aṭang chuan a zalên ta a; mi dang nei leh pawh ni se uirê a ni lo.

⁴Chutichuan ka unaute u, Krista taksa avângin dân laka thi in ni tawh asin; chuvângin Pathian lama rah kan chhuah theih nân pasal dang nei thei in ni ta e—mitthi zînga ta kaihthawha ngei chu.

⁵Tîsâa kan la awm lai khân, dânin a kaih harh châkna sualte chuan kan taksa pêngah te hian thihna khawpa rah chhuah tûrin a thawk thîn.

⁶Tûnah erawh chuan dân laka chhan chhuah kan ni tawh a, min phuartu pawh kan thihsan tawh bawkan a; chuvângin, lehkha ziaik hlui ang mai kha ni tawh lovin, Thlarau thara rawngbâwl tûr kan ni ta.

SUALIN DÂN A HMAN ṬANGKAIZIA

⁷Eng thû nge kan sawi leh tâk ang le? Dân chu soal em ni? Ni teh suh e! Dân awm lo se soal hi soal a nih ka hre hauh lovang. Dânin “Awt suh,” ti lo se ‘awh’ hi soal a nih pawh ka hre lo tûr le.

⁸Amaherawhchu, khapna thupêk hi soal hian remchângah hmangin keimahah hian châkna soal tinrêng a rawn kai harh thîn a ni. Dân awm lo se soal chu thil thi mai a ni si a.

⁹Dân lo hian ka lo nung tawh thîn a; mahse khapna thupêk a lo awm veleh, soal a lo harh chhuak a, mitthi mai ka ni ta a.

¹⁰Tichuan, nunna tûra thupêk chu, ka tân thihna tûr a lo ni ta si a.

¹¹Sualna chuan thupêk chu remchângah hmangin mi bum a, thupêk hman chuan mi tihlum ta a ni.

¹²Chuvângin, dân chu a thianghlim a, thupêk pawh chu a thianghlim a, a dik a, a thâ a ni.

DÂNIN SUAL LAKAH A CHHANDAM THEI LO

¹³A nih leh, thil tha chu ka tân thihna a lo ni ta em ni? Ni teh suh e! Sual sualzia a lan theih nân, thil tha hmangin keimahah hian thihna a thlen a, tichuan thupêk nêna tâng kawpin sual sual râpthlakzia a tichiang ta êm êm a ni.

¹⁴Dân chu thlarau lam thil a ni tih kan hria a; kei erawh chu tisa mi, sual thuhnuiaia hralh tawh ka ni si a.

¹⁵Ka thiltih dan rêng pawh hi ka inhre thiam ta lo ve. Ka tih duh ang ti si lo hian, ka huat zâwng takte hi ka ti leh mai thîn a.

¹⁶Tichuan, ka tih loh tûr ka tih hian, dân chu a tha tia pawm ka ni dân bawh si a.

¹⁷Chuvângin, a titûa chu keimah ka ni tawh lo va, keimaha awm sual tih a ni zâwk.

¹⁸Keimahah chuan (chû chu ka tisaah tihna a ni) thil tha chêng tûr rêng a awm lo tih ka hria; thil tha tih duhna chu ka nei; mahse engtia tih tûr nge ka hre si lo.

¹⁹Thil tha tih ka duh hi ka ti lo va; ka tih duh loh thil sual bawh ka ti leh mai thîn a.

²⁰Chutia ka duh loh zâwng ka tih si chuan, a titu chu keimah ni tawh lovin, keimaha awm sual tih a ni zâwk.

²¹Tichuan, hê dân hi ka lo man thiam ta: thil tha tih ka duh laiin ka hnênah sual a lo awm thîn, tih hi.

²²Ka chhûng lam mihring erawh chu Pathian dânah hian a lâwm thîn a ni.

²³Nimahsela, ka taksa pêngahte hian dân danglam a awm tih ka hria, chû chuan ka rilru dân a do va, ka taksa pênga mi sual dân bâwihah mi siam thîn a ni.

²⁴Aw, mi khawngaihthlâk chu ka va ni tak êm! Hê thihna taksa lakah hian tûn nge mi chhan chhuak dân le?

²⁵Kan Lalpa Isua Krista zârah Pathian hnênah lâwmthu ka sawi a ni! Tichuan, ka rilrû tak chuan Pathian dân rawng ka bâwl thîn a, ka tisa erawh chuan sual dân rawng ka bâwl thîn a ni.

BUNG 8

SUAL CHHUNGKHUNG LAKA ZALENNA

¹Tûnah chuan tisa duh zâwng awm tawh lova, Krista Isuaa awma, Thlarau duhzâwng kalte tân chuan thiam loh chan tûr rêng a awm tawh lo.

²Krista Isuaa nunna Thlarau dân chuan sualna leh thihna dân ata chu mi chhuah zalên tawh si a.

³Tisâ a chak loh avânga dânin a tih theih loh chu, Pathian chuan a Fapa chu sual pu taksa ang puttîrin, sual thâwi nân a rawn tîr a: tîsâa sualna chu thiam loh a chantîr ta a;

⁴chu tak chu tisa duh dân kal lova, Thlarau duh dân kal zâwk keimahniah hian dânin a phûd dik tak hlen chhuah a nih theihna tûr a ni.

⁵Tisa dân nungte chuan tisa duh zâwng ringawt an ngaihtuah thîn; Thlarau dân nungte erawh chuan Thlarau duh zâwng an ngaihtuah zâwk thîn.

⁶Tisa rilru put reng chu thihna a ni a; Thlarau lam rilru put erawh chu nunna leh thlamuanna a ni.

⁷Tisâna rilru hian Pathian a do tlat a; Pathian dân hnuaiah a intulût si lo va, intulût chû pawh a ni hek lo.

⁸Chuvângin, tîsâa awmte tân Pathian tihlâwm theih a ni lo.

⁹Pathian Thlarau nangmahnia a awm tak tak chuan tîsâa awm in ni lo va, Thlarauva awm in ni zâwk e. Mi tûpawh Krista Thlarau nei lo chu ama mi a ni lo rêng a ni.

¹⁰Krista chu nangmahniah a awm chuan, taksa chu sualna avânga thi sa a ni a; nimahsela, dikna avângin Thlarau chu nunna a ni thung.

¹¹Amaherawhchu, mitthi zînga ta Isua kai tho lehtu Thlarau chu nangmahniah a awm chuan, mitthi zînga ta Krista kai tho lehtu nangmahniah awm Thlarau ngei chuan in taksa thi theite chu a tinung bawh ang.

THLARAU ZARA FA NIHNA

¹²Chutichuan, unaute u, tisa dân zâwm lova, tisa duh zâwng nung tawh lo tûra awm hi kan bat a ni.

¹³Tisâ taka in nun chuan in thi ang; amaherawhchu, taksa thiltihte chu Thlarauva in tihlum chuan in nung ang.

¹⁴Pathian Thlarau hruaia awm apiangte chu Pathian fate an ni si a.

¹⁵Hlâu leh mai tûra bâwih nihna thlarau chang in ni lo va, fa nihna Thlarau in chang ta zâwk a ni; chû thlarau avâng chuan, “Abba, Â-pa,” tiin kan âu thîn a ni.

¹⁶Thlarau ngei chuan keimahni thlarau nê Pathian fate kan ni tih min hriatpui a ni;

¹⁷fate kan lo nih chuan roluhtu– Pathian roluhtu leh Krista luahpuitute kan ni; amah kan tuarpui ve tak meuh a nih chuan, a hnênah châwimâwiin kan awm ve ang.

TUARNA AṬANGA ROPUINA

¹⁸Tûnlai huna tuarnate hi nakina kan chung a ropuina tihlan tûr nê chuan khaikhin thamah ka ngai si lo.

¹⁹Pathian fate tihlan an nih hun tûr chu thilsiamte hian beisei takin an lo ngâk fan fan a ni.

²⁰Thil siam zâwng zâwng chu chhiatna bâwihah dah an ni a, anmahni duh thû ni lovin, a awmtîrtuin beiseina neia a awmtîr vâng a ni zâwk.

²¹Thil siamte ngei pawh chu chhiatna bâwih aṭanga chhan chhuah an la ni ang a, Pathian fate zalenna ropuiah chuan an la lût ve dân a ni.

²²Thil siam zâwng zâwng hian tûn thlengin rûm chung a nau vei nâ an tuar tlâng tih kan hria.

²³Chû chang a ni lo, keini Thlarau rah hmasa changtute pawh hian kan taksa tlanna, faa siama kan awmna tûr chu, chhung ril lama rûm vawng vawng chungin kan ngâk fan fan a nih hi.

²⁴Chû thil beisei chuan a ni chhandama kan awm ni; nimahsela, hmuh tawh reng beisei hi beiseina a ni lo. Tu nge hmuh tawh reng thil la beisei cheu ngai le?

²⁵La hmuh loh thil kan beisei erawh chuan, dawhthei takin kan ngâk fan fan thîn a ni.

²⁶Chutiang tak chuan Thlarau hian kan chak lohnahte min pui thîn. Kan tawngtai dân tûr takin kan tawngtai thîn em tih pawh kan hre hek lo; nimahsela Thlarau zâwk hian sawi chhuah rual loh khawpa nasaa rûm chungin min tawngtaisak thîn a ni.

²⁷Pathian duh zâwna mi thianghlime a tawngtaisak thîn avângin, thilung lam entu chuan Thlarau rilru chu a hre tlang vek a ni.

²⁸Pathian hmangaihtu, ama tum dân ang taka a kohva-te tân chuan, an thâtna tûrin thil engkim hi an lo thawk tlang vek tih kan hria.

²⁹A Fapa chu unau tam takte zînga fatîr a lo nih theih nân, a hriat lâwka-te chu ama Fapa anpui ngeia awm tûrin a ruat lâwk tawh si a.

³⁰Chû mai a ni lo, a ruat lâwka-te chu a ko baw a; a kohva-te chu thiam a chantîr baw a; thiam a chantîra-te chu a chawimâwi baw a ni.

PATHIAN CHATUAN HMANGAIHNA

³¹Hêng thilah hian eng nge kan sawi ve tâk ang? Pathian hi kan lama a tan chuan tûin nge min do thei ang?

³²Ama Fapa ngei pawh zuah lova, kan zavâi aia petu chuan engah nge a dang zawng zawng pawh a thlâwna min pêk loh vang?

³³Pathian mi thlante chu tu nge hêk ang? Pathian chu thiamchantirtu a ni si a.

³⁴Tu nge thiam loh pawh chantîr thei tehreng ang? Thia kha Krista a ni a; a tho leh tawh baw si a; Pathian kut ding lamah han awmin min sawisak leh ta zêl a ni.

³⁵Krista hmangaihna aţanga min then hrang thei tûr eng nge awm? Hrehawmnain emaw, lungngaihna emaw, tihduhdahnain emaw, tîmnain emaw, saruaknain emaw, hlauhawmnain emaw, khandaihin emaw min then dâwn em ni?

³⁶“Nangmah vângin nilêng lênga tihhlumin kan awm thîn a; Berâm talh tûrte ang leka ngai kan ni,” tih ziak ang kân.

³⁷Then teh suh e; chúng zawng zawngah chuan min hmangaihtu avângin hnehtu aiin kan ropui zâwk asin.

³⁸Thihna te, nunna te, Vântirkoh te, lalna te, thiltihtheihna te, thil awm mêk te, thil lo la awm tûr te,

³⁹sânnâ te, thûkna te, thil siam dang rêng rêng pawhin, kan Lalpa Krista Isuaa awm Pathian hmangaihna laka ta chu min then thei lo vang tih ka hre Chiang a ni.

BUNG 9

ISRAELTEN KRISTA AN HNÂWL

¹Kristaah chuan thutak a ni ka sawi ni, dâwt ka sawi lo ve; Thlarau Thianghlimah chuan ka chhia leh tha hriatna pawh hian a dik tih mi hriatpui baw a ni.

²Ka thilungah hian manganna nasa tak leh lungngaihna reh thei lo ka pài reng a.

³Tisa lama ka unau, ka chipuite aiah kei hian Krista laka ânhhe dawn tak asin ka nâp ni.

⁴Israel mi an ni a; fa nihna te, ropuina te, thuthlung te, dân te, Pathian rawngbâwna te, thutiam te chu an tâ a ni a;

⁵thlahtute pawh an tâ baw an ni a, tisa lam a nih lahin Krista chu anmahni aţanga lo chhuak a ni baw a; ani chu engkim chungâ leng, chatuana fak tlâk Pathian a va ni tehlu êm! Amen.

ISRAELTEN PATHIAN THILTUM AN HNÂWL

⁶Nimahsela, Pathian thû chu engmah lo maia chang ta a ni lo. Israel mi zawng zawng hi Israel mi tak pawh an ni vek chuang lo,

⁷Abrahama thlahte an nih mai avâng hian an vaiin a fate an ni baw hek lo; “Isaaka-ah hian i thlahte tih an ni ang,” tih a nih zâwk kha.

⁸Tisa inthlah chhâwnna ringawta lo piang te chu Pathian fa an nih phah chuang lo; mahse chí-a chhiarte chu thutiam fate zâwk an ni asin.

⁹Thutiam chu hei hi a ni: “Tûn ang hunah hian ka lo kal ang a, Sari chuan fapa a hring ang,” tih hi.

¹⁰Chû chauh pawh a ni lo, Rebeki pawhin mi pakhat, kan pu Isaaka laka fa a pài laiin,

¹¹(nautête hrin an la nih hmâa, a chhia a tha an la tih theih hmâ kân, thiltih vâng ni lovin, a kotu vâng a ni zâwk a; Pathianin a thlan chhan tak kha ding nghet tûr zâwk chu a ni si a),

¹²a hnênah, “A upa zawkin a naupang zâwk rawng a bâwl ang,” a ti a.

¹³“Jakoba ka hmangaih a, Esauva erawh chu ka hua,” tih ziak ang kân.

ISRAELTEN AN HNÂWL AVANGA PATHIAN RORÊLNA

¹⁴Eng nge kan sawi tak ang le? Pathianah dik lohna a awm ta em ni? Hnai lo ve!

¹⁵Mosia hnênah, “Ka khawngaih tûr apiang chu ka khawngaih ang a, ka lainat tûr apiang chu ka lainat ang,” tia a sawi kha.

¹⁶Chuvângin a duhtu emaw, amah pantu emaw vâng a ni lo va, a khawngaihtu Pathian vâng a ni zâwk e.

¹⁷Pathian Lehkha Thû chuan Pharaoa hnênah, “Khawvêl zawng zawngah ka hming puan darh a nih theih nân leh, ka thiltihtheihzia nangmahah ka entîr theih nâna tung ding che ka nih hi,” a ti si a.

¹⁸Chuvângin, Pathian chuan a duh apiang a khawngaih thîn a, a duh apiang a tiluhlul thîn.

¹⁹Nang chuan ka hnênah, “Engati nge mi la dem cheu? Tu nge a duhzâwng dodâl thei?” i ti a ni mahna.

²⁰Mahse aw mihring, Pathian han hnial ngam chu tu nge maw i nih le? Thil siam chuan a siamtu hnênah, “Engati nge hetiana mi siam?” a ti dâwn em ni?

²¹Bellei tlang khat aţangin bel tha deuh leh, bêl tha vak lo siam tûrin bêlvawtu chuan bellei chungah thû a nei lo vem ni?

²²Pathianin a thinurzia lantîr nân leh, a thiltihtheihzia entîrna tûrin, tihboral atâna a lo buatsaih thinurna bête chu dawhthei takin a la ngâk hrâm hrâm a;

²³a ropuina nasatzia lantîr nân khawngaihna bête chu ropui taka awm tûrin a lo buatsaih lâwk bawk a ni.

²⁴Keini pawh hi a kohva-te chu kan ni a, Judate chauh ni lovin Jentailte pawh an ni bawk lo vem ni?

²⁵Hosea lehkhâbûah chuan: “Ka mi pawh ni lote chu ‘Ka mite’ ka ti ang; Hmangaih lohvi chu ‘Hmangaihi’ ka ti ang.

²⁶“Heti hi a lo ni ang a, ‘Ka mite in ni lo,’ Ka tihna aiah ngei chuan ‘Pathian nung fate’ an la ti ang” tia ziah a nih kha.

²⁷Isaia pawhin Israel mite chungchâng tihian a lo âupui a: “Israel mite chu tuifinriata tiau zâtin tam mah sela, a thi bâng tlênte chauh chu chhandam an ni ang.

²⁸A hnâ chu a thawk zo vang a, diknain a pawt tâwi ang, LALPA chuan lei chungah hian hnâ chu a thawk zo thuai tawh dân si a.”

²⁹Isaia vekin tihian a lo sawi tawh kha: “Mipuite Lalpa chuan chi thlahtu min zuahsak lo sela chu, Sodom khua ang mai kan ni tawh ang a, Gomorra khua ang chauh a siam kan ni tawh ang,” tiin.

TUN LAI ISRAELTE DINHMUN

³⁰Eng nge kan sawi leh tâk ang le? Thiamchanna pawh ûm vê lo Jentailte chuan thiam an chang ta, rinna avânga thiamchanna ngei chu.

³¹Nimahsela, dân zawm thâta thiamchanna ûmtu Israelte chuan dân hmanga thiamchanna chu an tlin chuang si lova.

³²Eng vâng nge? Rinnain an zawng lo va, dân zawm thâta hlawh chhuah an tum vâng a ni. Tlûkna lungpuiah chuan an tlu ta si a.

³³Heti hian ziah a ni: “Ngai teh, Zionah chuan tlûkna lung leh dodâlna lungpui ka dah a, Tupawh amah ring apiang chu tihmualpho an ni lo vang,” tiin.

BUNG 10

ISRAELTEN CHANCHIN THA AN MAMAWH

¹Unaute u, Israelte tâna ka thinlung duhzâwng leh Pathian hnêna ka tawngtâina chu: chhandama an lo awm theihna tûr hi a ni.

²Pathian tân thahnem an ngaihza pawh ka hriatpui a, mahse hriatna dika ti an ni si lo.

³Pathian thâtna lam hre lova anmahni thât vena zâwna insawhngheh dân an dap avangin, Pathian diknaa intukluh nachâng an hre si lo.

⁴A ring apiangten dikna an chan theih nân, Kristaah chuan dân ram a tla* tawh si a.

⁵Mosia chuan dân zawm avânga thiam channa chungchâng a lo ziaak a, “Chutiang zâwmtu chuan dân chu a nunpui tûr a ni,” tiin.

⁶Rinna avânga thiamchanna chuan heti hian a ti: “Tu nge vânah lâwn ang?” emaw (chû chu chung lama ta Krista hruai thlâk

tûr tihna a ni),

⁷“Tu nge leilâwtah chhuk ang?” emaw (chû chu mitthi zînga ta Krista hruai chhoh leh tûr tihna a ni), tiin in rilru pawhin ti suh se.

⁸A nih leh eng nge a sawi? “Thû chuan a hnaih a che, i kâ leh i thinlungah pawh a awm” (chû chu kan hril mêk rinna thû hi a ni):

⁹“I kâin Isua chu Lalpa a ni tih i tan tlat a, mitthi zînga ta Pathianin a kai tho tih i thinlunga i rin chuan chhandam i ni ang.”

¹⁰Thinlunga ringtuin thiam a chang a; kâa tan tlatna hian chhandamna a thlen bawk thîn.

¹¹Pathian Leikhân, “Tûpawh amah ring apiang chu tihmualpho a ni lo vang,” a ti a ni.

¹²Juda leh Grik mite inkârah inthleihhranna engmah a awm lo, an zâa chung a Lalpa chu Lalpa pakhat a ni a, amah âutu zawng zawngte chungah chuan a tha si a.

¹³“Tûpawh Lalpa hming lam apiang chu chhandam an ni ang.”

ISRAELTEN CHANCHIN THA AN HNÂWL

¹⁴Engtin nge an rin lohva chu an lam theih ang? Tû a nih pawh an hriat lohva chu engtin nge an rin ang? Thuhriltu awm lovin engtin nge an hriat ang?

¹⁵Tirh lohvin engtin nge thû an hril ang? “Remna Chanchin Tha hrila, thil tha leh chanchin lâwmawm thlentute kê chu a va mâwi êm!” tih ziaak a ni si a.

¹⁶Nimahsela, Chanchin Tha chu an zâvai chuan an âwih vek lo. Isaian, “LALPA, kan thu sawi tûin nge ring?” a tih rêng kha.

¹⁷Chutichuan, rinna chu hriatna aţangin a lo awm a, hriatna chu Pathian thû avânga lo awm a ni.

¹⁸A nih leh, an bengin an hre lo vem ni? Hria ê: “An thâwm chu ram tinah a thang a, An thû chu kâwlkil thlengin a thang chhuak ta.”

¹⁹Israel miten an hre lo vem ni? han ti leh ta ila. A hmasa berin Mosian, “Hnama pawha chhiar tham lohte hmangin In thîkthû ka chawktcho vang a; Hnam mâwl takte hmangin ka tithinur ang che u,” a ti a.

²⁰Isaian huai takin heti hian a lo sawi a: “Mi zawng loten min hmu a, Mi lam lote hnênah ka inhriattîr thîn.”

²¹Israelte hnênah hei hi a sawi: “Thuâwih lo leh hnial hrâtte lamah, Nîlêngin bân ka phar thîn,” tiin.

BUNG 11

ISRAELTE CHU MÂK HLEN AN NI LO

¹Pathianin ama mite chu a hnâwl fithla dêr em ni ka’n ti teh ang. Teuh lo mai! Kei pawh hi Israel mi, Abrahama thlah, Benjamin hnam ka nih hi.

²Pathianin a hriat lâwk mite chu a hnâwl fithla lo ve. Elijan Israel mite chungthû Pathian hnêna a thlen dân, Pathian Leikhâ Thûin a sawi hi in hre lo vem ni?

³“LALPA, i zâwlneite an tihlum a, I maichâmte an tichim a; Keimah chauh ka awm tawh a, Kei pawh mi tihlum an tum si a,” tia a sawi kha.

⁴Mahse, chung lamin engtin nge a chhân khâ? “Baala hmâa thingthi ngai lo mi sangsarih keima tân ka la zuah reng asin,” a ti a nih kha.

⁵Chutiang bawkin, tûnlai pawh hian khawngaihnaa mi thlan, a kuangbâng tlemtê chu an la awm ve reng a ni.

⁶Khawngaihna avâng a nih chuan thiltih vâng a ni lo ve; chuti ni lo se, khawngaihna hi khawngaihna a ni thei nâng. Thiltih vâng a nih chuan, khawngaihna a ni thei lo baw; chuti ni lo se, thiltih pawh chu thiltih a ni thei dâwn si lo va.

⁷Engtin nge ni ta ang? Israel mite chuan an zawn chu an hmu lo va, thlante erawh chuan an hmu si a, a bawk zawn chu an chawlawl zo ta a ni.

⁸Heti hian an lo ziaik rêng a: “Pathianin vawiin thlengin an hnênah Mutthlûkna thlarau a pê a, Hmuh theih lohna mitte, hriat theih lohna bengte nê.”

⁹Davida khân heti hian a ti: “An dawhkân chu an tân thang leh fal lo ni se, Tlûkna leh thungrulhna lo ni rawh se;

¹⁰Hmu thei lo tûrin an mitte chu lo thim se la, An hnungzâng chu kûl reng rawh se,” tiin.

ISRAELTE HNÂWL HLEN AN NI LO

¹¹An tlûkna chu an tlâk hlenna tûr a ni em? Hnai lo ve! An tlûkna avânga anmahni thiktîr nân, Jentailte hnênah chuan chhandamna a lo thleng ta zâwk a ni.

¹²An tlûkna mah khawvêl hausakna a niha, an tlâkhniamna mah Jentailte hausakna a nih chuan, an famkimna phei chuan a va tihausa nasa dâwn êm!

¹³Chuvângin, nangni Jentailte hnênah ka sawi e; Jentailte tirhko ka nih avâng hian ka rawngbâwl na hi ka chawimawi a ni,

¹⁴hemi avânga engemawti tala ka chipuite ka thiktîr a, thenkhatten chhandamna an lo chan theih nân.

¹⁵Anmahni paih thlâkna mah khawvêl nêna inrem lehna a nih chuan, anmahni lawm luh lehna tûr chu thihna ata nunna a nih lohvin eng dang nge ni ang?

¹⁶Chhang hlâwm sawh thlâk hmasak chu a thianghlim chuan, a hlâwm pum pawh chutiang baw chu a ni; a zung a thianghlim chuan a zârte pawh a thianghlim baw a ni.

¹⁷Oliv zâr thenkhat chu sât thlain, nang, oliv suak kha oliv kûngah chuan zawm i ni tawh a, a zungin a châwm, a kûng tha zâr pawh i zo vê ta a,

¹⁸a zâr dangte lakah inchhuang thei i ni lo. Inchhuang mah la, a zung châwmtu i ni lo tih hria la, a zungin a châwm zâwk che a ni.

¹⁹Nang chuan, “A kûnga zawm ka nih theih nân a zârte chu sah thlâk an ni alâwm,” i ti a ni mahna.

²⁰A ni khawp mai. An rin loh avânga sah thlâk an ni rêng a, nang erawh chu i rin avânga ding i nih kha. Chapo lo la, hlâu zâwk ang che.

²¹Pathianin zâr tak zâwkte mah a zuah loh chuan nang pawh a zuah bik lo vang che.

²²Chuvângin ngai teh, Pathian thatzia leh a tihbaiawmzia hi ngaihtuah rawh: tlûte tâna a hlauhawmzia hi; i tân erawh chuan

thatna a ni thung, a thatnaa i awm zêl dâwn a nih chuan. Chuti a nih loh chuan paih thlâkin i awm ve mai ang.

²³Anni pawh, an ring duh lo zêl a nih chauh loh chuan zawmin an awm leh ang; Pathianin anmahni a zawm leh thei si a.

²⁴Nang oliv suak sah chhum mah oliv kung tak nêna zawm i nih chuan, chûng oliv tak zâr te chu oliv kungpuiah chuan zawm an va ni lehzual dâwn êm!

²⁵Unaute u, hê thurûk hi in hriat loh ka duh lo ve, chuti lo zawn, mahni ngaiha intifing mai in ni palh ang e; Jentailte famkimna a lo thlen hmâ chuan Israelte hnênah chawlawna engemaw chen a la thleng rih a nih hi.

²⁶Chutichuan, Israel mi zawn zawn chhandam an ni ang tih heti hian ziah a ni: “Zion aţangin Chhanchhuaktu chu a lo kal ang a, Jakoba hnêna ta Pathian ngaihsak lohna a hlih kiansak ang,”

²⁷Chû chu an hnêna ka thuthlun tûr chu a ni, An sualte ka lăk bo hunah chuan.”

²⁸Chanchin Tha lam kawngah chuan nangmahni tân hmêlmâ an ni a; thlan bik an nihna kawngah erawh chuan thlahtute avânga duhawm tak an ni baw si a.

²⁹Pathian thilthlâwnpêk leh a kohna chu sût leh theih a ni tawh lo.

³⁰Pathian ringlomi in nih thîn kha, tûnah erawh chuan an rin loh avângin nangnin khawngaihna in lo chang ta hlauh va;

³¹chutiang bawkin, tûnah hian Pathianin a khawngaih che u azâra khawngaihna an lo chan vê theih nân anniho chuan an âwih ta lo a nih hi.

³²Pathianin a khawngaih vek theih nân mi zawn zawn chu rin lohna huangah a khung ta vek si a.

³³Aw, Pathian finna leh hriatna ngahzia hi a va thûk êm! A rorêlnate chu chhui chhuah rual loh, a kawngte pawh hmuh phak rual loh a va ni êm!

³⁴“LALPA rilrû chu tûin nge hria? Tu nge thurâwn petu ni tawh le?

³⁵A rulh lêt tûr pawhin a hnênah tûin nge thil pe hmasa?

³⁶Amah aţangin, amah avângin, ama tân thil zawn zawn hi an lo awm a ni. A hnênah chuan chatuanin ropuina awm rawh se. Amen.

BUNG 12

PATHIAN HNENA INTHÂWINA NUNG

¹Chuvângin unaute u, Pathian khawngaihnae kaltlang zelin inthâwina nung leh thianghlim, Pathian pawm tlâk atân in taksa chu hlân tûrin ka ngên a che u; chû chu in rawngbâwl dân tûr rêng a ni si a.

²Hê khawvêl tihdân hi zâwm hauh suh u; Pathian duh zâwna thil tha leh pawm tlâk a ni nge ni lo hre fiah tûrin, in rilru chu thlâk danglam lo ni zâwk rawh se.

THLARAU THILPEKA PATHIAN RAWNG BAWL

³Pathian mi pêk khawngaihnaah hian, in zîngah tûmahin mahni nihna bâka indah sâng lovin, Pathianin mi tin hnêna rinna a pêk ang tâwk zêlin, dik taka ngaihtuah theuh tûrin ka ti a che u.

⁴Taksa pum khatah hian pêng tam tak kan nei a, pêng tinte thiltih erawh chu a inang vek lo;

⁵chutiang bawkin keini pawh tam tak ni mah ila, Kristaah chuan taksa pumkhat kan ni a: a mal mala inpêng tawn theuh kan ni.

⁶Khawngaihna min pêk ang zêlin thilpêk pawh kan nei hrang theuh va, chûng chu i hmang baw ang u: hrilhlâwkna lam a nih chuan, rinna kan neih ang tâwk zêlin i hril bâwk ang u;

⁷rawngbâwl na lam a nih chuan thahnemngai takin rawng i bâwl tlat ang u; zirtirtu pawhin zirtîr zêl rawh se;

⁸mi fuihtu pawhin fuih zêl sela; thil petu chuan phal takin pe rawh se; rorêltuin thahnemngai takin ro rêl se la; mi khawngaihtuin lâwm takin khawngaih rawh se.

KRISTIANTE NUN DAN TUR

⁹Hmangaihna chu vervêkna tel lo ni rawh se. Sual hi hua ula; thil tha chu vuan tlat rawh u.

¹⁰Unau kêra inhmangaihna ang hian inhmangaih tawn theuh ula; mahni aiin mi dangte chu tha zâwkah ngai rawh u;

¹¹taihmkâna kawngah chuan inthlahdah lovin, thlarauva thahnemngai chungin Lalpa rawngbâwl ula;

¹²beiseina neia lâwm chungin, harsatna kêrah chhel takin, thahnemngai takin jawngtai fan fan rawh u;

¹³mi thianghlimte tlâkchhamna chu chhawmdâwl ula; mikhualte chungah that chhuah rawh u.

¹⁴A tiduhdahtu che u chu malsâwm ula, ânchhia chu lawh suh u.

¹⁵Lâwmte chu lâwpui ula, tapte chu thapui rawh u.

¹⁶Rilru hmun khat pûin lo awm dial dial rawh u. Indah sâng bik suh ula, mi nun tlâwmte zîngah tel zâwk rawh u. Mahni ngaihah intifing suh u.

¹⁷Tû sual pawh sualin thungrûl ve suh u. Mi zawng zawng mithmuhah thil tha ngaihtuah rawh u.

¹⁸A theih phawt chuan nangmahni lam tal kha mi zawng zawng nêin inrem takin awm rawh u.

¹⁹Duh takte u, nangmahnin phubâ la suh ula, Pathian thinurna hmun kian zâwk rawh u; “Phubâ lâk chu keima chan a ni a, keiman ka thungrûl ang,’ Lalpan a ti,” tih ziaak a ni si a.

²⁰Chuvângin, “I hmêlmâ a rilâm chuan ei tûr pê la; a tuihâl chuan in tûr pe rawh: chutianga i tih chuan a lu chungah meiling i chhêk khâwl a ni ang.”

²¹Sualin hnehbân che suh se, sual chu thatnain hneh zâwk ang che.

BUNG 13**SORKAR HNENA INTUKLUH**

¹Mi tin an chungah thuneitute thu hnuaiah an kûn tûr a ni. Pathian thû lovin tûmah thuneitu an awm lo va; thuneitûa awmte hi Pathian ruat an ni si a.

²Chuvângin, tûpawh thuneitu dodâl chu Pathian thupêk dodâl an ni a; a dodâltute chuan mahni chungah vêk hremna an inthlen mai ang.

³Rorêltute hi thil tha titute tân hlauhawm an ni lo va, misualte tân erawh chuan hlauhawm an ni. Thuneitute hlau lova awm i duh em? Thil tha ti la, an hnên atangin fak i hlauh dân nia.

⁴Ani chu i thatna tûra Pathian rawngbâwltu a ni si a. Thil sual i tih erawh chuan hlau rawh; khandaih chu a thlâwnin a pây mai si lo va; ani chu Pathian rawngbâwltu, thil sual titu chungah thinura phuba latu a ni si a.

⁵Chuvângin, thinur hlauh vâng mai ni lovin, i chhia leh tha hriatna avâng pawhin an thuhnuaia kûn tûr rêng i ni e.

⁶Chuvâng rênga chhia chhâw thîn in nih hi; chutianga hna chu thawk zêl tûra Pathian rawngbâwltute an ni si a.

⁷Chuvângin, in leibatte chu rûl vek rawh u: leiman pêkna tûrah leiman pê ula, chhia chhâwina tûrah chuan chhia chhâw rawh u; hlauh tûra chu hlau ula, zah tûra chu zah rawh u.

I VÊNGTE HMANGAIH RAWH

⁸Inhmangaih tawna mai lo chu tûma engmah ba suh u; mi dangte hmangaihtu chuan dân a zawh famkim tawh si a.

⁹Hêng thupêk, “Uirê suh,” “Tual that suh,” “Ru suh,” “Thuhretu derah tang suh,” “Awt suh,” tih leh thupêk dang la awm rêng rêngte hi, “Nangmah i inhmangaih angin i thenawm khawvêngte i hmangaih tûr a ni,” tih hian a khai khâwm vek si a.

¹⁰Hmangaihnain thenawm khawvêngte paw i khawih ngai lo va; chuvângin hmangaihna hi dân zawh famkimna a ni.

KRISTAA INTHUAM TUR

¹¹Tûnlai thil awmzia in hriat ang hian muhîl thawhharh a hun tawh tak zet a ni; tûnah chuan kan rin tîr lai ai khân kan chhandamna chu a hnâi ta zâwk si a.

¹²Zân hi a rei ta hlê a, khawvâr a hnai ta. Chuvângin, thim thiltihte chu paih ila, êng râlthum chu i inbel ang u.

¹³Chhûna awm angin mâwi takin i awm ang u, zu rûia intihbuai chîng lovin, hur leh inngaih hmanga awm hek lovin, insual buai leh in îtsîk pawhin i awm suh ang u.

¹⁴Lal Isua Krista chuan inthum zâwk ulang, in tîsa châkna puitlin tûr zâwngin eng thil mah ti suh u.

BUNG 14**ZALÊNA DÂN**

¹Rinnaa chak lo mi chu dawh thiam ula, a rinhlelh thilte chu hnial buaisak suh u.

²Mi pakhat chuan thil engpawh a ei theih a inring a, mi chak lo erawh chuan thlai chauh a ei thei a.

³Engkim ei mi chuan a ei lo mi hmusit suh se; ei lo mi pawhin a ei mi chu sawisêl suh se; Pathianin ani chu a pawm tawh si a.

⁴Mi dang chhiahhlawh sawisêltu chu tu nge i nih bîk? A din emaw, a tlûk emaw chu ama hotu lakah a ni zâwk si a. Ni e, ani chu dintîrin a awm ngei ang, Pathianin a dintîr thei si a.

⁵Mi pakhatin ni khat hi ni dang aiin a ngaihlu bîk a, mi dang erawh chuan nî zawng zawng hi inang vekah a ngai thung a. Mi tin mahni rilrûah inhre Chiang rawh se.

⁶Ni bîk serhtu chuan Lalpa tân a serh thîn a; ni serh bîk nei lo pawhin, a serh loh chhan chu Lalpa tân a ni ve tho. Engkim eitu chuan, Pathian hnêna lâwmthu a sawi avângin Lalpa tâna ei a ni; a ei lotu pawh chuan a ei loh avângin Pathian hnênah baw lâwmthu a sawi thîn.

⁷Tûmah mahni tân maia nung kan ni lo va, tûmah mahni tâna thi kan ni hek lo.

⁸Kan nun chuan Lalpa tân kan nung a; kan thih pawhin Lalpa tân kan thi a ni. Chuvângin kan nun pawhin, kan thih pawhin Lalpa tâ kan ni.

⁹Mitthite leh minungte Lalpa a nih theih nân Krista chu a thi a, a tho leh a, tichuan a nung leh ta a ni.

¹⁰Nimahsela, nangin engati nge i unau chu thiam loh i chantîr mai le? Engah nge i unau i hmuhsitzia i tihlan kher? Krista rorêla thutphah hmâah kan vâi hian kan la ding vek dâwn asin.

¹¹Tihian ziah a ni si a: “Ka nunna chhâlin ka sawi e, Khûp tinrêng ka hmâah an thingthi ang a, Lei tinrêng Pathian hnênah a inpuang baw ang, LALPA a ti.”

¹²Chutichuan, kan zâin Pathian hnênah mahni chanchin kan la sawi theuh dâwn a ni.

¹³Chuvângin, thiam loh i inchantîr tawn suh ang u; amaherawhchu tûpawhin mahni unau tâna kawng dâl tûr emaw, an tlûk phahna tûr emaw siam loh hrâm i tum zâwk ang u.

HMANGAIHNA DÂN

¹⁴Amah ngawtah chuan thiàng lo engmah rêng a awm lo tih Lalpa Isuaah chuan ka hre Chiang a ni; nimahsela, thiàng lova ngaitu tân erawh chuan a thiàng lo a ni mai.

¹⁵I ei leh in avânga i unau rilru a nat phah chuan hmangaihna kawng i zawh tawh lo a ni. Kristan a thihsaka chu i ei leh in hmangin tikhawlo suh.

¹⁶Chuvângin, i thil tha tih chu sawi chhiatin awm suh se;

¹⁷Pathian lalram chu ei leh in lam a ni lo va, dikna te, remna te, Thlarau Thianghlina hlimna te a ni zâwk e.

¹⁸Chûng thila Krista rawngbâwltu apiang chu Pathian lâwm zâwng leh mihringte tâna pawm nahawm tak a ni thîn.

¹⁹Chutichuan, inremna tûr leh intihsâwt tawna tûr thilte chu i ûm zêl ang u.

²⁰Ei leh in thil avâng maiin Pathian hnathawh tichhe suh. Thil engkim mai hi a thianghlim ngei e; nimahsela, mi dang tlûkna tûra thil ei chu, a eitu tân sual a ni.

²¹I unau tlûkna tûr leh a zawh loh tûr thil a nih ai chuan sa ei loh te, zu in loh te, thil dang engpawh tih loh mai a tha zâwk e.

²²Rinna i nei maw? I rinna chu Pathian hmâah nei mai rawh. Mahni ngaiha thil tha tih kawnga inthiam lohna nei lo mi chu a nihlawh e.

²³Mahse, ringhlel chung a eitu chuan rinnaa ei a nih loh avângin thiam loh a chang sâ reng a ni; engpawh rinna lova thiltih chu sual a ni.

BUNG 15

RITPHURH INCHHÂWK TAWNIN

¹Keini mi chak zâwkte hian mahni lâwmna mai zawng lovin, chak lo zâwkte tanpui hi kan tih tûr a ni.

²Kan zavâi hian mahni thenawm khawvêngte sâwt tlân nân an thatna tûra tihlâwm i tum theuh ang u.

³Krista pawhin ama lâwm zâwng a zawng si lo: “Nangmah an diriamna che chu keima chungah a tla ta,” tih zia ang khân.

⁴Pathian Lehkha Thû avânga chhelna leh thlamuanna kan beisei theih nân, hman laia zia apiangte kha kan lo inzir vê na tûra ziah a lo ni.

⁵Dawhtheihna leh thlamuanna Pathian chuan Krista Isua thû ang zêlin rilru hmun khat puttîr theuh che u sela,

⁶rilru hmun khat leh kê pawh hmun khatin Pathian leh kan Lalpa Isua Krista Pa chu in chawimâwi thei dâwn nia.

A HUHOVA PATHIAN CHAWIMAWI

⁷Chuvângin, Kristan Pathian ropuina tûra a lâwm che u ang bawkin, nangni pawh inlâwm tawn rawh u.

⁸Thlahtute hnêna a thutiam tingheta, Pathian thutak tân tûrin, Isua Krista chu serhtante rawngbâwltuah arawn tang ta a,

⁹chû chu a khawngaihna avânga Jentailten Pathian an chawimâwi theihna tûr a ni tih zia ang a ni: “Hei vâng hian Jentailte zingah ka fak ang che a, I hming fakîn ka zai ang,” tiin.

¹⁰Heti hian a ti baw a: “Aw Jentailte u, a mite nên chuan hlim rawh u!”

¹¹“LALPA chu fak rawh u, nangni Jentail zawng zawngte u! Mi zawng zawngte u, amah chu fak rawh u!”

¹²Isaian tihian a lo ti a: “Jesaia bulpui chu a awm ang a, Jentailte chung a lal tûrin a lo chhuak ang; Amahah Jentailten beiseina an nghat ang.”

¹³Thlarau Thianghlim thiltihtheihna azâra beiseinaa khat in lo nih theih nân, in rinnaah chuan, beiseina Pathian chuan lâwmna leh remna tinrêngin tikhat che u rawh se.

JERUSALEM AṬANGA ILLURIKAM

¹⁴Tûnah chuan ka unaute u, nangnihi hi thatnaa khat, hriatna tinrêng ngah, inziltawn thei in lo ni reng tih hriain, ngaihngam takin ka awm ta a ni.

¹⁵Nimahsela unaute u, Pathian khawngaihna ka dawn ang zêlin, thil thenkhatrawn hriat nawntîr leh tûr che u in, huai takin karawn zia ang a ni e.

¹⁶Tichuan, Jentailte thilhlân chu pawm tlâk leh, Thlarau Thianghlina tihthianghlim a nih theih nân, kei hi Jentailte hnêna Isua Krista tâna Pathian Chanchin Tha rawngbâwltu ka lo ni ta a

ni.

¹⁷Chuvângin, Pathian lamah chuan Krista Isuaah chhuan tûr ka nei a ni.

¹⁸Jentailte âwihtîr tûrin Kristan keimaha a hlen chhuah chin chauh lo chu thûin emaw, thiltihin emaw ka puang chhuak thei si lo;

¹⁹chhinchhiahna leh thil mak ropui tak tak te leh, Pathian Thlarau thiltihtheihna te nên Jerusalem aţanga Ilurikam thlengin, Krista Chanchin Țha chu ka hril kim tawh a ni.

²⁰Ni e, mi dang lungphûm tawh sâ chung a rem chho mai ka nih loh nân, Chanchin Țha chu Krista hming la lam lohna hmuna hril tumin ka bei hrâm hrâm Țhîn a ni.

²¹Heti hian ziah a ni: “A chanchin la hril ngai lohnaa miten an hmu ang a, La hre ngai loten an hria ang.”

ROM TLAWH TUMNA

²²Hei vâng hian in hnêna kal thei lo tûra dodâlna nasa tak ka tawh phah a ni.

²³Tûnah erawh chuan hêng ram vêlah hian awmhmun ka nei ta lo bawh a, kum tam tak chu in hnêna lo kal châk êm êmin ka awm tawh bawh si a;

²⁴tichuan, Spain rama ka kal hunah in hnênah ka lo kal dâwn nia. Ka zin paha hmuh che u ka beisei tlat si a, nangmahniho nêna duh tâwka kan inpâwlho hnûah, ka kal zêlna tûra min thlah pawh ka beisei bawh a.

²⁵Tûnah erawh chuan mi thianghlimte rawngbâwlsak tûrin Jerusalem khuah ka kal rih dâwn a ni.

²⁶Makedonia leh Akaia rama mite chuan lâwm takin Jerusalem khuah mi thianghlimte zînga retheite tân sum an thawh khâwm tawh si a.

²⁷An inphal hlawm hlê a, an lakah an ba rêng bawh a. Jentailten anmahni hnên aţanga thlarau lam malsâwmna an lo chan avângin, an taksa mamawh lam phuhrûksaka, chhawmdâwl vê thung chu an tih tûr rêng a ni.

²⁸Chuvângin, hê hnâ hi ka han thawh zawha, hê rahchhuak hi an lo dawn fel hnûah, Spain rama kal pahin ka rawn tlawh dâwn che u nia.

²⁹In hnêna ka lo kal hunah, Krista Chanchin Țha malsâwmna famkim nên ka lo kal dâwn tih ka hria.

³⁰Unaute u, Lalpa Isua Krista leh Thlarau hmangaihna, Țahnemngai taka min Țawngţaisak zêl tûrin ka ngên a che u,

³¹Judai rama ringlo mite laka chhanchhuah ka nih theih nân te, Jerusalem mipui tâna ka rawngbâwl na chu mi thianghlimte tâna pawm tlâk a nih theih nân te, ³²Pathian remtihnaa hlim taka in hnêna ka lo kal theih nân leh, nangniho nêna kan intihharh thar leh theihna tûr a ni si a. ³³Tûnah hian remna Pathian chuan in zâin awmpui zêl che u rawh se. Amen.

BUNG 16

FARNU PHOIBI FAKNA

¹Kan farnu Phoibi, Kenkriai khuah a kohhran rawngbâwlto hi ka hmêlhriattîr duh che u a,

²mi thianghlimte chung a an tih dân ang bawka Lalpa hminga in lo lawm a, puilh a ngaihna apianga in lo puilh tlâk a ni e. Amah ngei pawh mi tam tak puitu a ni Țhîn a, keimah ngei pawh min pui Țhîn a ni.

ROM MI THIANGHLIMTE CHIBAINA

³Priskilli leh Akuila, Krista Isuaa ka thawhpuite kha chibai ka bûk e,

⁴ka nunna chhanhim tûra an ngâwng dawhtute bâkah, Jentail kohhrana mi zawng zawng te hnênah lâwmthû ka sawi a ni.

⁵An in lama inkhâwm Țhîn kohhran kha chibai ka bûk a. Ka duh tak Epaineta, Akaia rama Krista ringtu hmasa ber kha chibai ka bûk e.

⁶Mari, kan tâna thawk rim tak kha chibai ka bûk bawh e.

⁷Ka chipui Andronika leh Junia, ka tânpuite kha chibai ka bûk e; anni chu tirkohnte zînga mi hriat hlawh tak an ni a, kei aia Kristaa awm hmasa zawk an ni ngê ngê.

⁸Amplia, Lalpaa ka duh tak kha chibai ka bûk e.

⁹Kristaa kan hnathawhpui Urbana leh ka duh tak Stakua kha chibai ka bûk e.

¹⁰Krista duh zâwng mi, Apellia kha chibai ka bûk a. Aristobula te chhûngkua kha chibai ka bûk e.

¹¹Ka chipui Herodiona kha chibai ka bûk e. Narkissa chhûngte zînga mi, Lalpaa awmte kha chibai ka bûk e.

¹²Truphaini leh Truphosi, Lalpaa thawk rim tak te kha chibai ka bûk a. Duhtak Persi, Lalpaa thawk rim êm êm kha chibai mi bûksak ang che u.

¹³Lalpaa mi thlan Rufa leh a nu, ka nu vê bawh kha chibai ka bûk e.

¹⁴Asunkrita te, Phlegona te, Hermia te, Patroba te, Herma te leh an hnêna unau awmte nên khân chibai ka bûk e.

¹⁵Philologoa leh Juli nên, Nirea leh a farnu nên, Olumpa nên, an hnêna mi thianghlim awm zawng zawngte nên khân chibai ka bûk e.

¹⁶Fawh thianghlimin chibai inbûk rawh u. Krista kohhran zawng zawngte hian chibai an bûk a che u.

MI ȚHENDARH CHÎNG KÂWM SUH U

¹⁷Unaute u, nangmahni zirtîrna kalh zâwnga zirtîrna thû sawia, inţhenna leh tlûkna rawn thlentute chu fîmkhur taka hawisan tûrin ka ngên a che u.

¹⁸Chutiang mite chuan kan Lalpa Krista rawng an bâwl lo va, mahni pumpui tâna bâwl mai an ni; an dangnâl leh Țawngkam thiamin mi mâwlte thinlung an bum Țhîn.

¹⁹In thu âwihzia hi mi zawng zawng zîngah a thang chhuak ta si a. Chuvângin in chungah ka lâwm a ni; amaherawhchu thil Țha lamah chuan in fin thiam a, sual lamah erawh chuan pawl sawi lo in nih ka duh a ni.

²⁰Remna Pathian chuan in kephah hnuaiah Setana chu a rawn chîl sawm thuai ang. Kan Lalpa Isua Krista khawngaihna chu in hnênah awm rawh se. Amen.

PAULA ṬHIANTE CHIBAINA

²¹Ka hnathawhpui Timothea leh ka chipui Lukia te, Jasona te, Sosipatera te hovin chibai an bûk a che u.

²²Kei, Tertia, hê lehkhathawn ziaktu hian Lalpa hmingin chibai ka bûk a che u.

²³Keimah leh kohhran pum pui thlen in pa Gaia chuan chibai a bûk a che u. Khuaa sum enkawltu Erasta leh unaupa Kuarta chuan chibai an bûk a che u.

²⁴Kan Lalpa Isua Krista khawngaihna chu in zâa chungah awm rawh se. Amen.

MALSAWMNA

²⁵Tunah hian ka Chanchin Ṭha leh Isua Krista thu hril ang taka tinghet tûra thiltitheitu hnênah chuan, khawvêl pian tirh ata thurûk inthup chu puan chhuah a nih ang zêlin,

²⁶chû thurûk tûna puan chhuaha awm ta leh, hnam tinte hriat atâna Pathian Lehkha Thûin a lo sawi tâk te, chatuan Pathian thupêk ang zêla rinna chu an lo âwih theih nân:

²⁷Pathian finga chauh hnênah chuan Isua Krista kaltlangin chatuana ropuina chu awm rawh se. Amen.

1 KORINTH

Ziah tu: Paula • Ziah kum: A.D. 56

Hê lehkhathawn hi Ephesi khua ațanga Korinth kohhrante hnêna Paula thawn a ni. Korinth kohhran chhûnga buaina leh harsatna hrang hrang chin fel tuma a ziah a ni a. Chûng harsatnate chu kohhran mite zînga inngeih lohna te, pâwl pâwla inthen darhna te, ringlomite nêna inneih pawl leh inggaihna sual laka ringtuten an inthiar fihlîmsan a` tûlzia te, milem hnêna hlan tawh sa ei thiang leh thiang lo chungchâng te; thlarau thilpêk hrang hrangte hi taksa pum khata chhuak, inrem tlâng tûr a ni tiin, ƣawng hriat loh chungchâng inkaihhruai dân te, Lalpa zanriah hman dân dik leh mitthi thawhleha chungchâng te a ni a. Chûng harsatna kârah Paula chuan ringtute chu an awm dân tûr ƣa hrilhin, apostol thuneihna leh thlarau lama rorêtu a nihnain kauh takin thû a pê a ni. Korinth kohhran buai chin fel tûlna avâng a ringtu mimal leh kohhran nun kaihhruaina a ziah bâkah, hê lehkhathawnah hian Paulan hmangaihna thû-hla mawi elkhen a chham chhuak a, a tawpah ‘...a ropui ber chu hmangaihna hi a ni,’ a ti a ni (bung 13). Bung 15-ah hian Kristian thurin lairil, mitthi thawhleha leh tholeh taksa awm dân chungchâng Bible pumin a sawi chian leh chipchiar lai ber chu hê lehkhathawnah hian a chuang baw a, Krista chu thawh hmahruaitu a ni (15:23). 1 Korinth hi Bible-a lehkhabu 46-na a ni a, bung 16 leh châng 437 a awm.

BUNG 1

CHIBAI BÛKNA

¹Pathian duh zâwng a Isua Krista tirhkoh ni tûra koh Paula leh kan unaupa Sosthena chuan,

²Korinth khuaa Pathian kohhran, Krista Isuaa serhhran, mi thianghlim ni tûra kohte hnênah leh, ram tina kan Lalpa Isua Krista hming lam zâwng zâwng leh anmahni leh keini hnênah:

³Kan Pa Pathian leh Lalpa Isua Krista hnên ata khawngaihna leh remna chu in hnênah awm rawh se.

KORINTH KHUAA THLARAU THILPEKTE

⁴Krista Isua zâra Pathian khawngaihna chu in chung a awm avângin Pathian hnênah lâwmthu ka sawi thîn a,

⁵in thu sawi dân tinrêngah leh hriatna tinrêngah amahah chuan engkimah tihhausakin in awm si a,

⁶Krista thu hriatpuina pawh nangmahniah tihnghehin a awm baw a;

⁷tichuan, kan Lalpa Isua Krista rawn inlârna chu nghâkin, thilpêk lamah pawh in duai lo baw a,

ROM KHUA TLAWH A CHÂK

⁸ani chuan kan Lalpa Isua Krista niah chuan dem kai lova in awm theih nân, a tawp thlengin a tinghet ang che u.

⁹A Fapa Isua Krista, kan Lalpa nêna inpâwlna hmanga nangmahni kotu Pathian chu a rinawm si a.

KOHRAN PAULA INTHEN HI SUAL A NI

¹⁰Unaute u, kan Lalpa Isua Krista hmingin ka ngên a che u, in zîngah hian inthena awm lovin lo inthural tlâng ula, in rilru leh in ngaihtuah dânah te hian lo inzawm tlat ang che u.

¹¹Ka unaute u, in chanchin ka lo hria a, in zîngah inhnialnate a chhuak thîn tih Kloii te chhûngkuain min hrilh a ni.

¹²Hei hi ka sawi a ni, mi tinin, “Kei Paula pâwl ka ni,” “Kei chu Apollova pâwl ka ni,” “Kei chu Kiphaa pâwl ka ni,” “Kei chu Krista pâwl ka ni,” in ti ƣeuh mai si a.

¹³Krista chu then darh a ni em ni? Paula hi in aia khenbeh a ni em ni? A nih loh leh Paula hmingin baptisma in chang em ni?

¹⁴Krispa leh Gaia tih loh chu in zînga mi tûmah ka baptis loh che u avângin Pathian hnênah lâwmthu ka sawi a ni;

¹⁵chuti lo zâwng, miin keima hminga baptis in ni emaw an ti dah ang e.

¹⁶Stephana te chhûngkua pawh ka baptis ngei a. Chûng lo chu mi dang ka baptis pawh ka hre lo.

¹⁷Krista chuan baptis tûrin mi tîr lo va, Chanchin ƣa hril tûrin mi tîr zâwk a ni; thu fîng hmanga hril lovin—chuti lo zâwng, Krista krâws chu engmah lovah an chantîr dah ang e.

KRISTA, PATHIAN FINNA LEH THILTIHTHEIHNA

¹⁸Krâws thuhrl hi boralte tân chuan thil âthlâk mai a ni a, keini chhandamte tân erawh chuan Pathian thiltihtheihna a ni si a.

¹⁹“Mifing finna chu ka tiboral ang a, Mi thiamte thiamna hi engmah lovah ka chantîr ang,” tih ziaak a ni.

²⁰Mi fîng chu khawiah nge? Leikhathiam chu khawiah nge? Khawvêl thila hnialhrât chu khawiah nge? Hê khawvêl finna hi Pathianin âthlâk a ti a ni lo vem ni?

²¹Khawvêl finna hian Pathian a hre lo rêng rêng a, Pathian finnaah erawh chuan thuhrl âthlâk hmanga a ringtute chhandam hi Pathian duh zâwng a ni.

²²Judate chuan chhinchhiahna an phût tlat a, Grik-hovin finna thû ngawt an dap si a;

²³keini erawh chuan khenbeh Krista a ni kan hril ni; chû tak chu Judate tâna dodâltu lian, Grikho tân thil âthlâk mai a lo ni baw si,

²⁴nimahsela, a kohvate tân chuan, Judate pawh ni se, Grikte pawh ni se, Krista chu Pathian thiltihtheihna leh Pathian finna a ni.

²⁵Pathian âtna chu mihring aiin a fîng zâwk a, Pathian chak lohna pawh chu mihring aiin a chak zâwk si a.

LALPAAH CHAUH ROPUINA

²⁶Unaute u, a koh dân che u hi ngaihtuah teh u, mihring ngaiha mifing te, mi thiltitheih te, dinhmun sâng ve deuh te pawh a kohte zînga an tîemzia hi.

²⁷Nimahsela, Pathian chuan mifingte tizak tûrin khawvêl ngaiha thil mâwl deuh deuh a thlang thîn a; khawvêl thila chak zâwkte timualpho tûrin Pathianin mi chak lo tê tê a thlang thîn;

²⁸Khawvêla thil hnuaihnnung leh thil hmuhsitawm te, thil awm lote nêl lam Pathianin a thlang a, thil awmsâte chu engmah lova a siam theihna tûrin;

²⁹chuvângin, Pathian hmâah tûmah inchhuang thei rêng an awm lo.

³⁰Nangni erawh chu ama zârah Krista Isuaah chuan in awm tawh a; ani chu Pathian hnên ata kan tân finna te, dikna te, thianghlamna te leh tlanna te a lo ni ta a ni;

³¹chutichuan, an ziaik ang khân, “Inchhuanna tûr duh apiang chuan LALPA-ah inchhuang rawh se.”

BUNG 2

KHENBEH KRISTA

¹Unaute u, Pathian hriattîrna thû in hnêna puang tûra ka lo kal lai khân thusawi thiam bîkna emaw, finna thûk bik emaw nêna lo kal ka ni lo.

²Isua Krista leh an khenbeh thû bâk in zîngah thil dang hriat ka tum rêng rêng loh kha.

³Chak lo leh hlâu êm êmin, nasa taka khûr chungin in zîngah ka awm a.

⁴Ka tawngkâ leh ka thuhrilah khân mihring finna leh tawngkam thiamna hmanga inhneh tumna a tel ve hek lo, Thlarau leh a thiltihtheihna lan chhuah tirna zâwk a nih kha;

⁵in rinna chu mihring finnaa innghat lovin, Pathian thiltihtheihnaah a innghat zâwk tûr a ni.

THLARAU FINNA

⁶Amaherawhchu, mi puitling tawhte zîngah chuan thu fîng chu kan sawi ngei thîn a, mahse hê khawvêl finna thû hi a ni lo; engmah lo maia chang leh tûr hê khawvêl rorêltute finna thû pawh a ni hek lo.

⁷Pathian finna thurûk a ni kan sawi thîn ni; thu fîng inthup, kan ropuina tûra Pathianin khawvêl awm hmâa a ruat lâwk tawh chu.

⁸Chû chu hê khawvêl rorêltute rêng rêng hian an hre lo; hria sela zawng, ropuina Lalpa chu an khêngbet dâwn si lo va.

⁹“Mita hmuh ngai loh, benga hriat ngai loh, Mihring thîlunga lût ngai lo, Pathianin amah hmangaihtute tâna a buatsaih chu,” tia inziak ang khân.

¹⁰Keini hnênah erawh chuan Pathianin a Thlarauvin min hriattîr ta a nih hi. Ni e, Thlarau chuan thil engkim a chhui chhuak thîn, Pathian thuril chenin.

¹¹Mihring rilru chhûngril chu amaha awm mihring thlarau chauh lo chuan tû in nge hria? Pathian rilrû pawh Pathian Thlarau vêk lo chuan tûma’n an hre lo.

¹²Pathianin a thlâwna min pête chu eng thilte nge ni tih hre thei tûrin khawvêl thlarau ni lo, Pathian hnên ațanga chhuak Thlarau pêt kan chang zâwk a ni.

¹³Chûng thilte chu mihringte inzîr fin dân ang ni lovin, Thlarau Thianghlamin min zirtîr dân zâwkin, thlarau thûte chu thlarauvin kan sawi thîn.

¹⁴Khawvêl mi chuan Pathian Thlarau thilte chu a tuipui ve tak tak lo, thil âthlâk ang lekah an ngai tlat si a; thlarauva hriat fiah a nih avângin khawvêl mi tân hriat fiah ngaihna a awm lo.

¹⁵Mahse thlarau mi chuan thil engkim a hre fiah thîn a, ani erawh chu tûma’n an hre fiah thei lo zâwk a ni.

¹⁶Tuîn nge LALPA rilrû hre tawh a, amah chu zirtîr thei ang? Keini erawh chuan Krista rilrû kan pu asin.

BUNG 3

KOHHAN PÂWL RILRU HI TÎSÂNA A NI

¹Unaute u, thlarau mite angin thû ka la hrilh thei lo che u a, tîsa mi angin, Kristaa la nausênte angin in hnênah ka sawi a ni.

²Châw ni lovin, hnûtêa ka châwm che u kha; tûn thleng hian chaw rum in la ei thei lo cheu va;

³tîsa mi in la nih reng vâng a ni e. In zîngah itsikna te, innghirnghona te leh inthenna te a la awm fo avâng hian, tîsa mi, mihring pangngai ve mai in la ni lo vem ni?

⁴Mi pakhatin, “Paula pâwl ka ni,” a ti a; mi dangin, “Kei chu Apollova pâwl ka ni,” in ti reng mai hi, in la tîsa deuh lo maw?

TUIA CHÂWM, HNATHAWH, ZILHHAUH

⁵Paula chu tu nge ni a, Apollova pawh chu tu nge? In rin tûr rawn hrilhtu che u an ni mai a, chu pawh chu Lalpan a pêt ang chauhva thawk an ni zâwk lo vem ni?

⁶Keiin ka phun a, Apollovan tuiin a châwm a, mahse Pathianin a thantîr thung a ni.

⁷Chutichuan, a thantîrtu Pathian chauh lo chu, a phuntu chu engmah a ni lo va, tuia châwmtu pawh chu engmah a ni chuang lo.

⁸A phuntu leh tuia châwmtu chu pum khat an ni a, an thawhrim ang zêla lâwmman pawh dawng vê vê tûr an ni.

⁹Pathian hnathawhpuitute chu kan ni a, nangni hi Pathian thlawhmâ chu in ni a, Pathian sak in chu in ni bawh a.

¹⁰Pathianin khawngaihna min pêt ang zêlin, in sak thiam tak angin keiin lungphûm ka phûm a, mi dangin a chungah in an sâ a. Chumi chungah in sak dân tûrah erawh chuan mi tin fîmkhur theuh rawh se.

¹¹Lungphûm tawh sâah lo chuan tûma’n lung dang an rem thei si lo, chû lungphûm chu Isua Krista a ni.

¹²Chû lungphûm chungah chuan mi tûpawhin rangkachakin emaw, silvarin emaw, lung man tamin emaw, thingin emaw, hnimin emaw, buhpawlin emaw in sâ ang sela,

¹³mi tin hnathawh chu a lo lang fiah mai dâwn a ni; chumi Nî chuan a târlang ang a, mei chuan a hailang dâwn si a; chû mei ngei chuan mi tin hnathawhte chu eng ang nge a nih a fiah theuh tawh ang.

¹⁴Tû hnathawh pawh ni se, a chungah in sak chu a him reng chuan, chû mi chuan lâwmman a dawng ang.

¹⁵Tû hnathawh pawh a kan ral erawh chuan chû mi chuan a chân ang; amah tak erawh chu chhandam a ni ang, amaherawhchu, meia kal tlang hnû ang mai a ni ang.

¹⁶Pathian tempul in ni tih in inhre lo vem ni? Pathian Thlarau pawh nangmahniah a awm reng tih in hre lo vem ni?

¹⁷Tûpawhin Pathian tempul chu a tihbawlhhlawh chuan, chu mi chu Pathianin a tiboral ve ang. Pathian tempul chu a thianghlim si a, chû tempul chu nangmahni kha in ni e.

KHAWVEL FINNA LAKA INVEN

¹⁸Tûman mahni intihder suh se. In zingah tûpawh hê khawvêl thila fînga a inngaih chuan, a lo fin theih nân lo â phawt rawh se.

¹⁹Hê khawvêl finna hi Pathian ngaihah chuan thil âthhlâk a ni si a. “Ani chuan mifingte chu anmahni fin vervêknain a âwk thîn,” tih ziaak a ni;

²⁰a dang lehah chuan, “LALPA chuan mifingte thil ngaihtuah hi tângkaina rêng nei lo a ni tih a hria,” tih ziaak a ni bawh.

²¹Chuvâng chuan mihrinna lamah tûmah inchhuang suh se. Engkim in ta a ni si a;

²²Paula emaw, Apollova emaw, Kipha emaw, khawvêl emaw, nunna emaw, thihna emaw, thil awm mêk emaw, thil lo la awm tûr emaw, a zavâiin in ta vek a ni.

²³Nangni pawh Krista tâ in ni a; Krista chu Pathian tâ a ni.

BUNG 4

PATHIAN THURÛK ENKAWLTU

¹Keiniho hi Krista chhiahhlawhah leh Pathian thurûk enkawltûah miten min ngai rawh se.

²Enkawltû ni tûr chuan mi rinawm nih a ngai si a.

³Mahse, nangnin min lo sawisêl emaw, rorêlnain min fiah emaw pawh ni se, ka tân chuan thil tê tham tê a ni. Dik takin mahni pawh ka infiah ngai hek lo.

⁴Mahni indemna tûr pawh ka hre bawh lo va; mahse, chû chuan thiam mi chantîr chuang lo; mi fiahtu tak tak chu Lalpa a ni zâwk si a.

⁵Chuvângin, Lalpa lo kal leh hmâ, a hun hmâ hian engmah lo fiah suh u; ani chuan thima thil thuhrûkte, thinlunga thil tum rûkte nêl lam a tilang vek ang. Tichuan, mi tinin mahni phû tâwk Pathian fakna an hlawh theuh dawn a ni.

KRISTA AVANGA MI Â

⁶Tichuan, unaute u, a ziaak pêla in kal lohna tûr leh, keimahni aţanga in zir theih nân, chûng thilte chu in tţatna tûrin kei leh Apollova chungah ka inbel ta a ni; tichuan, in zînga mi pakhat chhuanga, mi dang in hmuhsit loh nân.

⁷Mi dangte aia danglam bîka siamtu che u chu tu nge? I dawn bâk eng nge i neih bîk? Dawng reng siin, engati nge i dawn ni lo anga i uanpui?

⁸In tlai na lailêng e! In hausa tawh bawh si a! Keini tel lovin lah ang maia ro in rêl ta hi ka duh dân tak pawh a ni asin, nangnite nêl hian rêl tîang thei ngê ngê ila!

⁹Pathianin keini tirhkohte hi thi tûr rênga ruat ang maiin, a hnuhnung ber âtân min târ chhuakah ka ngai a ni. Mihringte leh Vântirhkohte hmuhdawm âtân khawvêlah hian min siam a ni ber mai.

¹⁰Krista tân mi â kan ni a, nangni erawh chu Kristaah mifing in ni zâwk e! Keini zawng kan chak lo va, nangni erawh chu in chak khawp alâwm! Nangni chu in ropui bawh a, keini zawng hmuhsitawm mai kan ni!

¹¹Tûn thleng pawh hian kan rilţâmin kan tuihâl a, silhfên kan tlachham a, mi kut thak hnawihna kan ni a, in leh lo pawh kan nei hek lo.

¹²Mahni kuta thawkin kan rim hlê a. Miten min sawichhiatin mal kan sâwm a; min tihduhdahin kan tuar hrâm hrâm a;

¹³miten min puh chhiatin, zâidawh takin kan hrilh fiah thîn. Tûn thleng pawh hian khawvêl hnâwmhnawh, thil zawng zawng êkchhia ang lekah miten min ngai a ni.

PÂ CHAN CHANG PAULA

¹⁴Hêng thûte hi nangmahni tizak tûra ziaak ka ni lo va, mahni fa duh takte anga ka zilhna che u a nih zâwk hi.

¹⁵Kristaah chuan zirtîrtu sîngkhat lai nei mah ula, pa erawh chu in ngah si lo; Krista Isuaah chuan Chanchin Tţa hmangin fa ka hring che u a nih hi.

¹⁶Chuvângin, min entawn tûrin ka ngên a che u.

¹⁷Hei vâng hian Timothea, ka duh tak leh Lalpaa ka fapa rinawm chu in hnênah ka rawn tîr a, ani hian Kristaa ka awm dân te, hmun tina kohhranho ka zirtîr thîn dân te chu a hriattîr ang che u.

¹⁸In hnênah lo kal dawn tawh lo tûra min ngaih avângin mi thenkhat chu in lo inluling nghâl mai a.

¹⁹Mahse, Lalpan rem a tih chuan ka lo kal thuai ang a, mi chapote tawngka ni lovin, eng thiltihtheihna nei nge an nih chu ka rawn hre mai ang.

²⁰Pathian lalram chu thû maia awm a ni lo va, thiltihtheihnaa awm a ni zâwk si a.

²¹Eng nge in duh zâwk? Vuakfung nêl nge ka lo kal ang a, hmangaihna leh nunnêmna thlarau nêl le?

BUNG 5

INNGAIHNA SUALIN KOHHRAN A TIBAWLHHLAWH

¹In zingah inngaihna sual bawlh hlawh tak, Jentailho zingah pawh awm ngai lo chu a hluar hlê tih thû a thang nasa a, mi pakhat phei chuan a pa nupui a lo nei lehngghâl vei nêl!

²Chutiang thil titu chu zahpuiawm in tih avânga in zîng aţanga hnawh chhuah hial âwm a nih vei nêl, in la uanpui zâwk leh ta nghâl a.

³Keimah ngei hi taksâin ka rawn tel lo nâ a, thlarauvah erawh chuan ka tel a ni, chutiang khawp thil sual titu chu a chungthû ka ngaihtuah fel dêr tawh (in zinga awm ve ang maiin).

⁴Kan Lalpa Isua Krista hminga in inpâwl khâwm hunah kan Lalpa Isua Krista thiltihtheihnaah chuan ka thlarau chu awm vên,

⁵chutiang mi chu Lalpa Isua nî-ah chuan a thlarau chhandam a nih theih nân, a tîsa tiboral tûrin Setana pe mai ila ka ti a ni.

⁶In uanpui duh zâwng hi a tha lo hlê mai. Dâwidim tlem tlein chhang hlâwm chu a pumin a fan chhuak thin tih in hre lo vem ni?

⁷Chuvângin, chhang hlâwm thar in lo nih theih nân, dâwidim hlui chu thian fai rawh u, dâwidim telh loh dik tak in nih kha. Kan Kalhlên Kûtna, Krista ngei pawh chu inthawi nân kan aia hlan a ni tawh si a.

⁸Chuvângin, dâwidim hluia kût lovin, rilru chhia leh khawlohna dâwidima kût hek lovin, rinawmna leh dikna chhang dâwidim telh lohvin i kût zâwk ang u.

INNGAIH CHÎNGTE HREM TUR

⁹Inngaih chîngte kâwm lo tûrin lehkha ka thawn tawh che u kha.

¹⁰Amaherawhchu, hê khawvêla inngaih hmangete emaw, duhâmte emaw, hlêp rûte emaw, milem betu hrim hrimte emaw hi kawmserh tûr ka tihna a ni lo; chuti ni se khawvêl laka inlak chhuah daih a ngai dâwn si a.

¹¹Tûna ka rawn ziah chhan erawh chu, unau hming pu ve si, mahse inngaih bânsan chuang si lo, mi duhâm, milem biak leh mi sawi chhiat chîng, zu ngawveih leh hlêprûk chîng te an ni kâwm hauh lo tûr leh, an zîngah chawhlui pawh kîlpui hauh lo tûra ka tih che u ni.

¹²Pâwn lam mite chu keia lo rêlsak tûr em ni dâwn? In lo rêlsak tûrte chu a chhûnga mite zâwk hi an ni lo'm ni?

¹³Dik takin pâwn lam mite chu Pathianin a ngaihtuah mai ang chu! Chutiang mi sual chu in zîng ata hnawt chhuak rawh u.

BUNG 6

UNAU INKHIN BUAI LOH TUR

¹In zîngah tûpawhin mi dang lakah thubuai nei ula, mi thianghlimte hnêna thlen lovin mi dik lote kutah in thlen ngam ang mâw?

²Mi thianghlinten khawvêlah ro an la rêl dâwn tih in hre lo vem ni? Khawvêl chung a rorêltu tûrte hi thil te reuh tê pawh rêl tlâk lovah in inngai dâwn em ni?

³Vântirhkohte ro pawh kan la rêlsak dâwn tih in la hre lo mâw? Chuvângin, tûn dam chhûng thilte pheih chu kan rêl lehzuat tûr a ni lo vem ni?

⁴A nih loh leh, tûn dam chhûng khawsak chungchâng rêl fel tûr in neihin, kohhrana mi tâwmkâilo ber berte em ni in rêltûr thin?

⁵Hei hi zah nachâng in hriatna tûra sawi ka nih hi. Nge, mahni unaute kâra thubuai chîng fel thei mi fîng pakhat pawh in zîngah hian an awm lo tihna em ni zâwk?

⁶Unau pakhatin rorêlna hmâah ama unau a khing ta mai a, chû pawh chu ring lote hmâah lehngah!

⁷Hetianga rorêlna hmâa in inkhing vak vak mai hi in tisual hlê a ni. Engati nge an diklohna chu in dawh mai loh? Engah nge bumtu nih aia an buma nih pawh in thlan mai loh?

⁸Chutih ahnêkin, nangmahni zâwk kha tidik lotu, unaute bumtûah in tang zâwk lehngah!

⁹Mi dik lote chuan Pathian lalram an luah ve dâwn lo tih in hre lo vem ni le? Bumin awm suh u. Inngaih hmangete, milem biak

chîngte, uirê chîngte, neih inang inkawp chîngte, mi hur herh leh mawngkawhurte,

¹⁰rûkrûte, mi duhâmte, zu leh ruihhlo ngaite, mi hauh hmangete leh hlêp rûk chîng tûmahin Pathian lalram an luah lo vang.

¹¹Nangni zînga thenkhat kha chutiang mi chu in ni asin. Mahse, Lalpa Isua hming leh kan Pathian Thlarauva tlen fâi in ni tawh a, tihthianghlim in ni tawh a, thiam chang in ni tawh e.

TAKSA LEH THLARAUVA PATHIAN CHAWIMAWI

¹²Ka tân chuan thil engkim tih a thianga a, mahse thil zawng zawng tih a tangkai chuang lo. Ka tân thil engkim tih thianga vek mahse, eng thuhnuai mah ka intulût lo vang.

¹³Ei tûrte chu pum tân a ni a, pum chu ei tûrte tân a ni; nimahsela Pathianin a tiboral vê ve dâwn. Taksa hi inngaih nân a ni lo va, Lalpa tân a ni zâwk e; Lalpa pawh chu taksa tân a ni si a.

¹⁴Pathianin Lalpa chu a kai tho va, keini pawh hi a thiltihtheihnain min kai tho ve ang.

¹⁵In taksa chu Krista taksa pêng a ni tih in hre lo vem ni? Krista taksa pêngte chu lâksakin nawhchizuar taksa pêngah ka siam dâwn em ni le? Teuh lo mai!

¹⁶A nih leh, nawhchizuar nêna inzawm chu amah nên pum khat nihna a ni tih in hre lo vem ni? “An pahnihin tîsa pum khat an lo ni tawh ang,” a ti si a.

¹⁷Lalpa zawm erawh chu amah nên thlarauva pum khat an ni.

¹⁸Inngaihna sual hi tlânsan rawh u. Mihring thil sual tih apiang hi taksa pâwn lama tih a ni; inngaihna sual titu chuan, ama taksa chung a thil sual ti a ni.

¹⁹In taksâ hi nangmahni chhûnga awm Pathian atanga in dawn, Thlarau Thianghlim tempul a ni tih in hre lo vem ni? Mahni tâ pawh in ni lo tih in inhre lo vem ni?

²⁰Mana lei in ni tawh asin; chuvângin in taksâ leh in thlarau chu Pathian ta a ni a, hei hian Pathian chawimâwi rawh u.

BUNG 7

INNEIHNA DÂN TE

¹In lehkha rawn thawn chungchangan chuan: Mipa tân hmeichhe khawih loh a tha a ni.

²Nimahsela, inngaihna a awm thin avângin mipaten nupui bik nei theuh sela, hmeichhiate pawhin pasal bik nei theuh rawh se.

³Pasal chuan a nupui hnêna a tih tûr chu duat takin ti sela, chutiang bawkin nupui pawhin a pasal lakah ti vê rawh se.

⁴Nupui chuan ama taksa chungah thû a nei lo va, a pasal chu thuneitu zâwk a ni. Chutiang bawkin pasal pawhin ama taksa chungah thû a nei bik lo va; a nupui chu thuneitu zâwk a ni.

⁵Chaw nghei tûr leh tawngtai tûra in inpêk theih nân, rei lo tê atâna rem in tih chhûng chauh lo chu, a tû vê vê mah intidâwng suh u; chumi zawhah chuan in awm dân ngaiin awm leh mai ula, chuti lo chuan insûm zawh loh palh avângin Setanan a thlêm dah ang che u.

⁶Mahse hei hi thu pe zâwna sawi ka ni lo va, a phal zâwna sawi ka ni zâwk e.

⁷Ka duh dân chuan mi zawnz zawnz hi keimah ang hian awm vek se ka duh a ni. Amaherawhchu, mi tinin Pathian hnên ațangin thilpêk engemaw an nei theuh va, pakhatin kawng khatin, mi dangin kawng dangin.

⁸Nimahsela, kawppui nei lote leh hmeithaite hnênah chuan heti hian ka ti a ni: keimah ang tak hian awm sela an tân a ța ang;

⁹mahse an insûm theih loh erawh chuan nupui pasal nei mai rawh se. Tisa châkna pây reng ai chuan nupui pasal neih mai chu a ța zâwk si a.

INNEIH THUTIAM VAWNG TLAT RAWH

¹⁰Nupui pasal neite hnênah chuan keimah ni lovin Lalpa zâwkin thû a pê a: Nupui chuan a pasal then suh se.

¹¹A then a nih vêk chuan pasal nei lovin awm mai sela, a nih loh leh a pasal nên vêk insuihrem leh rawh se. Pasal chuan a nupui a ma tûr a ni lo.

¹²Mi dangte hnênah erawh chuan, Lalpa ni lovin keima'n ka sawi a ni: Unau tûpawhin ringlomi nupuih nei sela, a nupui chuan a pasala hnêna awm zêl a duh chuan ma suh se.

¹³Hmeichhiain pasal ringlomi nei sela, a pasalin a hnêna awm zêl a duh chuan then suh se.

¹⁴A pasal, ringlomi chu a nupui zâra tihthianghlim a ni a; nupui, ringlomi pawh chu a pasal azârah tihthianghlim a ni bawk si a: chuti ni lo se in fate thlengin an thianghlim loh phah ang chu; mahse tûnah zawnz an thianghlim tawh e.

¹⁵Ringlomi zâwkin a then duh a nih chuan then mai rawh se; chutiangah chuan unaupa emaw, farnu emaw chu phuarin an awm tawh lo ve. Pathian erawh chuan inrem tûrin min ko a ni.

¹⁶Chuvângin âw nupui, i pasal i chhandam dâwn leh dâwn loh engtin nge i hriat ang? Nang pawh aw pasal, i nupui i chhandam dâwn leh dâwn loh engtin nge i hriat ang le?

KOH I NIH ANGIN NUNG RAWH

¹⁷Pathianin mi tin hnêna a sem ang theuh leh, Lalpan mi tin a koh ang zêla nunpui tûr a ni. Chutiang chu kohhran zawnz zawnzge tihdân tûra ka ruat chu a ni.

¹⁸Serhtan tawh koh an awm em? Serhtan loh ni leh kher suh se. Serhtan lohva koh an awm em? Serhtantîr kher suh se.

¹⁹Serhtan hi engmah a ni lo va, serhtan loh pawh engmah a ni hek lo; Pathian thupêk zawn hi a pawimawh ber a ni.

²⁰Mi tin koh an nih laia an awm dân pangngai angin awm zêl mai rawh se.

²¹Bâwiha i awm laia koh i ni em? Engto duh suh, chhuah zalenna hun a awm hlauh erawh chuan, chu remchânna chu ûmzui ang che.

²²Bâwiha awm laia Lalpa kohva chu, 'Lalpa bâwih chhuah' a ni a; chutiang bawkin zalêna awm laia kohva chu 'Krista bâwih' a ni thung.

²³Mana lei in ni tawh a; chuvângin, mihringte bâwihah tâl lut suh u.

²⁴Unaute u, mi tin kohva in awm laia in awm dân ang khân Pathian hnênah awm zêl rawh u.

KAWPPUI NEI LO LEH HMEITHAITE TAN

²⁵Nula thianghlimte chungchângah chuan Lalpa thu pêk sâ ka nei lo va; mahse, Lalpan a khawngaihna azâra rintlâka min siam vê avângin, thurâwn erawh chu ka pe vê dâwn a ni.

²⁶Tûnlai hun hi a khirh êm avâng hian, mi tûpawh tûna an awm dân anga an awm mai hi ținai ka hria.

²⁷Nupui nên in lo inphuar zawnz tawh em? Then tum lêm suh. Nupui la nei lo i ni em? Nupui zawnz duh suh.

²⁸Mahse, nupui nei i nih pawhin, thil tisual i ni lo ve; nula thianghlimin pasal nei ta se, a tisual hek lo. Amaherawhchu, chutiang mite chuan tisa hrehawmna an tuar ang; chuvângin kei chuan tuartîr loh che u ka duh zâwk.

²⁹Nimahsela, heti hian ka ti a, unaute u, hun a tlêm tawh a, tûn ațang chuan nupui neite pawh nei lo anga an lo awm theihna tûr te,

³⁰tapte chu tap lo anga an awma, hlim te chu hlim lo anga an awm a, thil leitute chu engmah nei lo anga an awmna tûr te,

³¹khawvêl thila inhmang mite pawhin a ni lo zawnz hmang sual lova an awm ka duh a ni. Hê khawvêl awm dân hi boral mêk a nih hi.

³²Chuvângin, lungkham nei lova in awm ka duhsak che u a ni. Nupui nei lo chuan Lalpa tihlâwmna tûr ngaihtuahin Lalpa lam thil chu a lungkham țin.

³³Nupui nei erawh chuan a nupui tihlâwmna tûr ngaihtuahin khawvêl thil chu a lungkham țin.

³⁴Pasal nei leh nula thianghlim chu an inang lo bawk. Pasal nei lo chuan a taksa leh a thlarauva thianghlim taka a awm theih nân Lalpa lam a ngaihsak țin; pasal nei erawh chuan a pasal tihlâwmna tûr ngaihtuahin khawvêl lam a engto si a.

³⁵Chûngte chu in thatpui nân ka sawi a ni; khuahkhirh che u ka tum lo va, mâwi taka in awm a, zêm buaitu dang awm lova Lalpa rawng in bawl theihna tûrin ka sawi zâwk a ni.

³⁶Amaherawhchu, tûpawhin a fanu nula thianghlim, a nulât hmêlthatna chuai khawpa a lên reitîr avânga tidik tâwk lova a inhriat chuan, țin a tih angin ti rawh se. Thil a tisual lo ve; pasal neihtîr rawh se.

³⁷Mahse, rilru nghet tak neia, țin pawh a tih bawk lohva, ama duhthû ang taka hlen chhuah tuma, a fanu thianghlimna vawn him reng tum tlattu chuan a tița hlê a ni.

³⁸Tichuan, pasal neihtîrtu chuan a tița a, a neihtîr lotu phei chuan a tița lehzual.

³⁹Nupui chu a pasal dam chhûng chuan dân phuar a ni; a pasal a thih tawh erawh chuan a duh apiang nei theiin a zalên tawh e, mahse Lalpaah chauh a ni tûr a ni.

⁴⁰Ka ngaihdân chuan, a awm pangngaiin awm mai se a hlim zâwk ang; hê thilah hian Pathian Thlarau chu nei vê bawkah ka inngai a ni.

BUNG 8

CHHIA LEH ȚA HRIATNA PAWISA RAWH

¹Milem biakna thilhlân chungchângah chuan: Kan zâin hriatna kan nei theuh tih kan hria. Hriatna hian mi a tichapo ȥhîn a, hmangaihna erawh chuan mi a siam ȥa ȥhîn.

²Mi ȥupawhin engkim hre veka a inngaih chuan, a hriat ȥur tak a la hre fuh lo zâwk a ni.

³Mi ȥupawhin Pathian a hmangaih chuan, chu mi chu Ama mi hriat a ni.

⁴Chuvangin, milem biakna thilhlân ei chungchângah, khawvêlah hian milim rêng rêng hi engmah lo mai a nihzia leh, Pathian pakhat chauh lo chu a dang rêng rêng a awm lohzia kan hria.

⁵Vânah emaw, leiah emaw hian ‘pathian’ tia sawi ve mai ȥur an awm a, (chutiang pathian leh lalpa an tih chu tam tak an awm si a).

⁶Keini tân chuan Pathian pakhat Pa chu a awm a, ama hnên aȥangin engkim a chhuak a, keini pawh ama tâna awm kan ni; Lalpa pakhat, Isua Krista chu a awm bawh a, amah avângin engkim a awm a, amah avânga nung kan ni.

⁷Mahse, chutiang hriatna chu mi zawng zawngah a awm kher lo; milim an biak ȥhîn avângin mi ȥhenkhat chuan milem hnêna thilhlante chu an la ei reng a; an chhia leh ȥa hriatna chak lo tak chu tihbawhlhlawh a ni lehngêhl ȥhîn.

⁸Nimahsela, ei ȥur hian Pathian fak min hlawhtîr lo va; kan ei loh hian kan ȥat phah chuang lo bawh a, kan ei hian min tihȥat phah chuang hek lo.

⁹Chuvâng tak chuan fîmkhur rawh u; chuti lo zawng, hetia zalên deuhva in khawsak dân hi mi chak lo zâwkte ȥlûktîrtu a ni thei si a.

¹⁰Nang, hriatna nei mi kha, milem biakna ina i chaw kîl lai ȥûin emaw arawn hmuh hlauh che a, chhia leh ȥa hriatna nei chauh vê tak a lo nih bawh si chuan, milem biakna chaw te chu a ei ngam phah vê mai dân lo vem ni?

¹¹Tichuan, i hriatna avâng chuan i unau mi chak lo tak, Kristan a tihsaka ngei chuan a boral phah dân lo vem ni?

¹²Chutianga unaute chungah ȥhil i tihsual a, an chhia leh ȥa hriatna chak lo tak i hliamsak lehngêhl avâng chuan, Krista chungah ȥhil sual ti i lo ni dân asin.

¹³Chuvângin, ei ȥur hian ka unau a tihtlûk chuan, ka unau ka tihtlûk leh tawh lohna ȥûin sâ rêng rêng ka ei tawh lo vang.

BUNG 9

MAHNI INPHAT DÂN

¹Tirhkoah ka ni lo vem ni? Zalên ka ni lo vem ni? Kan Lalpa Isua Krista pawh ka hmu tawh lo vem ni? Nangniho kha Lalpaa ka thawh rah in ni lo vem ni?

²Mi dangte tân tirhkoah ni lo mah ila, hnial rual lohvin nangni tân zawng ka ni Chiang alâwm; Lalpaa tirhkoah ka nih chhinchhiahna chu nangniho hi in ni asin.

³Mi endiktute laka kan inthiam vê ȥhinna chu hei hi a ni:

⁴Duh duha eia in theihna dân kan nei lo bîk em ni?

⁵Tirhkoah dangte, Lalpa unaute leh Kipha te ang khân mahni nupui, ringtu ni ve bawh te chu zinnaah pawh hrui vêl ȥûin ȥhû kan nei lo bîk em ni?

⁶Barnaba leh keini pahni chauh hian hnathawh chawhlân ȥûin zalênna kan nei lo bîk em ni?

⁷Tu nge mahni inchâwm chawpa indonaa kal ngai le? Tu nge grêp huan siama a rah ei leh si lo vang? A nih loh leh ȥûin nge ran rual enkawla a hnute in si lo chu?

⁸Hêng ȥhûe hi mihring ang leka sawi ka ni em ni? Dân ȥhû pawhin chûng bawh chu a sawi a ni lo’em ni?

⁹Mosia Dân Lehkhabuah chuan, “Sebâwngpain buh a chîl laiin a hmui phuar suh,” tih ziaak a ni si a. Pathianin sebawngpa ȥanghmâ ngawt em ni a ngai?

¹⁰Nge, keini tân vek em ni a sawi zâwk? Ni e, keimahni tân a ni an ziaak ni: lei lettû chuan beiseina neiin a let ȥur a ni a, buh chîltu pawhin chanvo neih ve beisein a chîl ȥur a ni si a.

¹¹Keinin thlarau lam ȥhil in hnênah kan tuh a, in hnên aȥangin ȥisa ȥhil seng ve ta mai ila, ȥhil ropui tak a ni dân em ni?

¹²Mi dangte mahin in laka thuneiha an chan chuan, keini pheih chu chang ȥur kan ni lehzuah lo vem ni? Mahse keini chuan chû thuneiha chu kan hmang vê lo; Krista Chanchin ȥa kan dân loh nân kan tuar mai zâwk dân a ni.

¹³Tempula ȥhil thianglim chungah rawngbâwtute chuan chûng thilte chu an ei thiang a, maichâma rawngbâwtute pawhin maichâma thilhlante chu an ei ve thei tih in hre lo vem ni?

¹⁴Chutiang bawkin Chanchin ȥa hriltute chuan Chanchin ȥa chu ei hmuh nân an hmang ȥur a ni, tiin Lalpan ȥhû a pe asin.

¹⁵Kei erawh chuan chûng chu pakhat mah ka hmang ve lo, keima hamȥatna ȥura ziaak pawh ka ni hek lo; chutianga ka chuan vê theihna chu miin engmah lova min siamsak dânna ai chuan ka tân ȥhih mai a thlanawm zâwk ang.

¹⁶Chanchin ȥa hi hril mah ila, inchhuan phahna ȥur ka nei chuang lo: ka chungah tihmâkmawh a ȥlâ a ni zâwk; Chanchin ȥa ka hril loh chuan ka chung a pik dân si a.

¹⁷Mahni duhtûa ti ka nih chuan lâwmman ka nei a ni; mahni duhtû a nih loh chuan enkawlâna hna mi kawltîr mai a ni ang.

¹⁸Ka lâwmman chu eng nge ni ta? Hlawh phûl lo va, a thlâwna Chanchin ȥa hrila, Krista Chanchin ȥaah ka thuneiha vê-na pawh keima hlâwk nâna ka hmang lo hi ka lâwmman chu a ni.

MI ZAWNG ZAWNG TANA RAWNGBAWL

¹⁹Mi zawng zawng laka zalên thei ni mah ila, mi tam lehzuah ka hneh theih nân mi zawng zawng chhiahhlawhah ka insiam ta.

²⁰Judate ka hneh theihna ȥûin Judate hnênah Juda mi angin ka awm ȥhîn; dân hnuaia mite ka hneh theihna ȥûin, dân hnuaia awmte hnênah dân hnuaia awm angin ka awm ȥhîn;

²¹dân nei lote hneh ȥûin dân nei lote hnênah dân nei lo angin ka awm ȥhîn, (Pathian dân âwih lo ni si lova, Krista dân hnuaia kûn siin).

²²Chak lote ka hneh theih nân chak lote hnênah chak lo angin ka awm thîn. Eng emawti tala mi thenkhatte ka chhandam theih nân, mi zawng zawng hnênah awm dân chi kimin ka awm tawh.

²³Nangmahni chan ang ka chan ve theih nân hêng hi Chanchin Th̄a avânga ti ka ni.

LALLUKHUM CHANG TURA BEIHNA

²⁴Intlânsiakho chu an zâin tlân mahse, an zînga pakhat chauhvîn lăwmman a hmu thîn tih in hre lo vem ni? In chan ve theih nân chutiang chuan tlân vê rawh u.

²⁵Lăwmman hmu h ngei tuma beitu chu engkimah a insûm thîn. Anni chuan lallukhum chhe thei hmu tûrin an bei a, keini erawh chu lallukhum chhe thei lo hmu tûrin kan intihsiaak a nih hi.

²⁶Chutichuan, thlen chin tûr hre Chiang sâin a ni ka tlân ni. Miten boruak mai hneka an bei angin ka bei ve hek lo.

²⁷Kei chuan ka taksa tichhelin, ka thuhnuaiha ka dah ta; chuti lo chuan, mi dangte hnêna ka tlângaupui lai hian keimah zâwk hi tling lo anga hnâwlin ka awm hlauh dah ang e.

BUNG 10

THUTHLUNG HLUI AṬANGA ENTIRNA

¹Hêng bâkah hian unaute u, hei hi in theihngihl loh ka duh: min thlahtute zawng zawng kha chhûm hnuaiah an awm vek a, an zavâin tuipui pawh an kal kai vek a,

²Mosia-ah khân chhûm leh tuipua baptis-in an awm vek a,

³an zâin thlarau lam chaw thuhmun an ei theuh va,

⁴an zâin thlarau lam in tûr thuhmun pawh an in theuh kha. Anmahni uap rengtu, khâ thlarau lam Lungpuia mi kha an in theuh si a; chû Lungpui chu Krista a ni.

⁵Mahse, an zînga mi tam zâwk chungah Pathian a lungni ta lo va; thlâlêrah khân an tluhlum ta a ni.

⁶Chûng thilte chu kan tân entirna an lo ni a, thil sual tih an chhâk ang maia kan chhâk ve loh nân.

⁷An zînga mi thenkhat milem betu an ni ang khân i be ve suh ang u, “Mipui chu ei leh in tûrin an thû a, infiam tûrin an tho leh a,” tih ziaak ang khân.

⁸An zînga mi thenkhat inngaihna sualah an tlû a, ni khatah mi sîngnih leh sangthumin an tlûkhlum phah ang khân keini chu i inngai ve suh ang u.

⁹An zînga mi thenkhatin Krista an fiah a, rûla tihborala an awm phah ang khân keini chuan i fiah hek suh ang u.

¹⁰An zînga mi thenkhat an phun nâwi a, taboraltuin a tihboral phah ang khân i phun nâwi ve lo vang u.

¹¹Chûng thil an chungah lo thleng zawng zawngte chu, entirna atân keini khawvêl tâwp lo thlennaa mite min zilh lăwk nâna an ziah a lo ni.

¹²Chuvângin, ding nghet nia inngai chu fimkhur rawh se; a tlu hlauh dah ang e.

¹³Mihringin thlêmna an tawh thîn tlângpui bâk in chungah a thleng ngai lo. Pathian zawng a rinawm êm a, ani chuan in tuar theih tâwk bâk thlêmna in tawh a phal lo vang; in tuar theihna

tûrin thlêmna rualin tlân chhuahna kawng a siam ngihl zâwk ang.

MILEM BIAKNA TLANSAN RAWH

¹⁴Chuvângin, ka duh takte u, milem biak hi tlânsan rawh u.

¹⁵Mi fingte hnêna sawi angin ka sawi a ni; ka thu sawi hi lo ngaihtuah zui rawh u.

¹⁶Malsâwmna nova mal kan sâwm thîn hi Krista thisen tawmpuina a ni lo vem ni? Chhang kan phel thîn hi Krista taksa tawmpuina a ni lo vem ni?

¹⁷Keini hi thahnem tak ni mah ila, chhang tlang khat, taksa pumkhat kan ni; chhang tlang khata mi chu kan zâin kan chang theuh si a.

¹⁸Israelho hi tisa dânin han en teh u: Inthâwina sa eitute chuan maichâm chu an tawmpui lo vem ni?

¹⁹Ka sawi tum chu eng nge? Milem chu em ni pawimawh ber? Nge, milem hnêna thil hlante chu em ni pawimawh zâwk?

²⁰Jentailte inthâwina chu Pathian hnênah ni lovin, ramhuaiho hnênah an inthâwi thîn, tih hi ka sawi tum chu a ni; chuvângin ramhuaiho nêna inzâwmna rêng rêng in neih loh ka duh a ni.

²¹Lalpa no-a mi leh ramhuai no-a mi in in kawp thei lo vang; Lalpa dawhkâna mi leh ramhuai dawhkâna mi pawh in ei kawp thei hek lo vang.

²²A nih loh leh, Lalpa thikthû kan chawk tho dâwn em ni? Chuti ni se, amah aiin kan chak zâwk tihna em ni?

ENGKIM PATHIAN ROPUI NAN

²³Ka tân chuan engpawh ti ila a thianga vek a, mahse thil tangkai a ni vek lo; ka tân chuan engkim a thianga vek a, mahse min siam tha vek chuang lo.

²⁴Tûman mahni tânghmâ ringawt hai lovin, mi dangte thatna tûr zawng zâwk rawh se.

²⁵Sa dâwra an zawrh apiang chu ngaih tihthat nâna zâwt kher lovin ei ve mai rawh u;

²⁶“leilung leh a chhûnga thil awm zawng zawng hi LALPA ta a ni si a.”

²⁷Ringlomi tûnemaw chaw ei-ah sâwm che u sela, kal duh ta bawk ula, ngaih tihthat nâna zâwt hmasa kher lovin, an hlui apiang che u chu ei mai rawh u.

²⁸Mahse miten, “Hei hi milem hnêna hlan tawh a ni,” tia an hrilh che u chuan, a hrilhtu che u avâng leh, in chhia leh tha hriatna avângin ei suh u; “leilung leh a chhûnga thil awm zawng zawng hi LALPA ta a ni si a.”

²⁹“Chhia leh tha hriatna” tih hian, nangni lam ni lovin, mi dangte tâna ti ka ni zâwk. Engah nge mi dangte chhia leh tha hriatna chuan keima zalenna chungah thû a neih ang le?

³⁰Lăwm taka ka ei a, lăwmthu sawi chungah chaw ka ei avângin maw sawi chhiat ka hlauh ang?

³¹Chuvâng tak chuan in ei pawhin, in in pawhin, in tih apiangah Pathian ropuina tûr hlirin ti rawh u.

³²Judate, Grikte leh Pathian kohhranho tlûk pahna tûrin thil engmah ti suh u.

³³Mi tam takin an ẵngaipua, chhandam an lo nih theih nân kei pawhin mahni hlăwkna tûr ngawt zawng lovin, eng thilah pawh mi zawng zawng lâwm zâwnga awm ka tum hrâm hrâm thîn a ni.

BUNG 11

LU KHUHNA

¹Krista hnungzuitu ka ni ang tak hian ka hnungzuitu lo ni ve rawh u.

²Kawng tinrênga mi hriat reng thîn avâng leh, thurochhiah ka hrilh che u anga in vawn tlat avâng hian ka fak che u a.

³Ka hriattîr duh che u chu, mipate chungah hian hotu lû ber Krista a awm a; hmeichhe lû chu mipa a ni a, Krista lû chu Pathian a ni.

⁴Mipa hian lukhum khum chung a ẵngtâi emaw, Thlarau thuchah a puan emaw chuan a lû chu a tizahawm lo a ni.

⁵Hmeichhia erawh chu lu khuh lova a ẵngtâi emaw, Thlarau thuchah a puan emaw chuan a lû chu a tizahawm lo a ni; ziah kâwn vek nên thuhmun reng a ni si a.

⁶Hmeichhia chu lu khuh lova a awm ai chuan, mêt kâwnng lâw rawh se. Hmeichhe tân lu meh kawlh emaw, ziah kâwn emaw a zahthlâk a nih si chuan, lukhum khum mai rawh se.

⁷Mipa erawh chu Pathian anpui leh Pathian ropuina a nih avângin lû a khuh ve tûr a ni lo; hmeichhia erawh chu mipa ropuina a ni e.

⁸Mipa hi hmeichhia aẵnga chhuak a ni lo va; hmeichhia erawh chu mipa aẵnga chhuak a ni zâwk.

⁹Mipa hi hmeichhe tâna siam a ni lo va; hmeichhia erawh chu mipa tâna siam a ni.

¹⁰Hei vâng hian, Vântirhkohte avângin, hmeichhiaten thuneihna entîr tûrin chhinchhiahna an khum tûr a ni.

¹¹Mahse, Lalpaah chuan mipa hi hmeichhia lova awm hrang thei lo, hmeichhia pawh mipa lova awm hrang thei bîk lo a ni.

¹²Hmeichhia hi mipa laka chhuak a ni ang bawkin, mipa pawh hmeichhe laka piang a ni si a; amaherawhchu, engkim mai hi Pathian aẵnga chhuak vek a ni.

¹³In zîngah khân han ngaihtuah Chiang teh u. Hmeichhiain a lu khuh lova Pathian hnêna a ẵngtâi hi mâwi pawh a mâwi em ni?

¹⁴Mipa sam sei tak te hi a putu tân thil zahthlâk a ni tih in pianpui rilru pawhin a hriattîr lo che u em ni?

¹⁵Hmeichhe sam sei tak nei chu, a tân ropuina a ni thung; a sam chu amah khuhna tûra pêk a ni si a.

¹⁶Mi tûpawhin hnial mahse, hetiang bâk dân kan nei lo, Pathian kohhrante pawhin an nei hek lo.

LALPA ZANRIAH KÎL DÂN

¹⁷Hêng zirtîrna thu ka pêk lai che u hian, fak theih lohna che u ka nei: in inkhâwm hian ẵt phah aia chhiat phah nâna in hman zâwk avângin.

¹⁸A hmasa berin, kohhrana in inkhâwm in zîngah inthenna a awm thîn tih ka lo hria a, dikna chin a awm ngeiin ka ring a ni.

¹⁹In zînga mi tak tak an lo lan chhuah theih nân, nangmahni zîngah inremlohna engemaw a awm tûr a ni rêng a ni.

²⁰Chuvângin, in inkhâwmnaah hian, Lalpa Zanriah kîl thei pawh in ni lo ve.

²¹In han ei lahin, mi dang nghâk lovin mahni niin zanriah in ei hmasa mai a; tichuan, mi pakhat ril a ẵm laiin mi dang a lo rûi a.

²²Eng ti zia nge! Ei leh inna tûr inte chu in nei lo vem ni? Ei tûr nei vê lote chu in tizakin, Pathian kohhran pawh in hmusit a ni mâw? Eng nge ka hrilh leh tâk ang che u? Heti chung hian ka fak tho dâwn che u em ni? Ka fak thei lo va che u.

LALPA ZANRIAH BULTANNA

²³Ka thu hrilh chhâwn che u kha Lalpa hnêna mi ka dawn a ni asin: khatia, Lalpa Isua chuan mantîra a awm zâna chhang a lâk a,

²⁴lâwmthû a sawi zawha a phela, “La ula, ei rawh u; hei hi ka taksa in aia pêk tûra chu a ni, min hriatreng nân hei hi ti thîn rawh u,” a tih kha.

²⁵Chutiang bawka zanriah ei zawha no pawh chu a lâk a, “Hê no hi ka thisena thuthlung thar chu a ni a. In in apiangin, mi hriatreng nân ti thîn rawh u,” a tih kha.

²⁶Chû chhang chu in ei a, no-a mi pawh chu in in apiangin, a lo kal leh hmâ loh zawng Lalpa thihna chu in puang zêl a ni si a.

MAHNI INENFIAH RAWH

²⁷Chuvângin, tûpawh ei tlâk lo chung a chhang ei emaw, Lalpa no-a mi in emaw apiang chuan Lalpa taksa leh thisenah thiam loh a chang ang.

²⁸Chuvângin a eitu tûrin mahni infiah rawh se; tichuan chhang chu eiin, no-a mi chu in rawh se.

²⁹A eitu leh intûin Lalpa taksa a nihzia pawh ngaihtuah chuang lova, tlâk lo chung a ei chuan, ama chung a rorêlna tla tûra ei a ni.

³⁰Hei vâng hian in zîngah mi tam tak in chak lovin in bawrsâwm a, tam takin in thih phah a nih kha.

³¹Mahni inenfiah nachâng hria ila chuan rorêlna hi kan chungah a tla lo tûr.

³²Mahse rorêlna hi kan chungah a lo tla a nih pawhin, Lalpan min thunun tihna a lo ni zâwk a, thiam chang lo khawvêl mite zînga min hmer tel lohna tûr a lo ni.

³³Chuvângin, ka unaute u, ruai kîl tûra in inkhâwm in, innghâk tlâng thîn rawh u.

³⁴Tûpawh rilâm chuan in lamahrawn ei lâwk rawh se; chuti lo zawng, rorêlna tuar tûra inkhâwm in ni mai ang asin. Khai le, hêng bâka thu dangte chu ka lo kal hunah karawn tîfel mai ang.

BUNG 12

THLARAU THILPEK: PÊNG HRANGTE INPUMKHATNA

¹Unaute u, thlarau thilpêk chungchâng hre lova in awm ka duh lo ve.

²Jentail mi in ni tih leh, milim ẵwng thei hlei lote lamah hrui bova awm in ni tih in hriat kha.

³Mi tûpawhin Pathian Thlarauva thù a sawiin, Isua chu ‘ânchhedawng’ an ti ngai lo; Thlarau Thianghlima mi an awm chauh loh chuan tûmahin, ‘Isua chu Lalpa a ni,’ an ti thei hek lo tih ka hriattîr a che u.

⁴Thilpêk hrang hrang a awm a, Thlarau erawh chu a thuhmun a ni.

⁵Rawngbâwlina chi hrang hrang a awm a, mahse Lalpa chu a thuhmun a ni.

⁶Hnathawh dan hrang hrang a awm a, mahse mi zawng zawnga thawktu Pathian chu a thuhmun a ni.

⁷Thlarau hriattîrna chu mi zawng zawng sâwt tlânna tûrin mi tin hnênah pêk a ni:

⁸mi pakhat hnênah Thlarauvin finna thù pêk a ni a; mi dang hnênah chû Thlarau vêk hmang chuan hriatna thù pêk a ni a;

⁹mi dang hnênah chû Thlarauvah vêk chuan rinna pêk a ni a; mi dang hnênah chû Thlarau vêkah chuan tihdam theihna pêk a ni a;

¹⁰mi dang hnênah thilmak tihtheihna pêk a ni a; mi dang hnênah thlarauva thu puansak theihna pêk a ni a; mi dang hnênah thlarau dik leh dik lo hriat theihna pêk a ni a; mi dang hnênah ãawng chi hrang hranga thu sawi theihna pêk a ni a; mi dang hnênah ãawng hriat loh hrilh fiah theihna te pêk a ni si a.

¹¹Mahse, chúng zawng zawng chu, Thlarau pakhat, a ngai vêk chuan a duh ang taka thawkin, mimal tin hnênah a sem thîn.

TAKSA PAKHATA PÊNG HRANGTE INPUMKHATNA

¹²Taksa pum khatah hian pêng tam tak a awm a, taksa bung hrang hrangte chu tam mah se, taksa chu pakhat a ni si a; chutiang chu Krista pawh hi a ni.

¹³Kan zâin taksa pakhat Thlarau pakhat baptis-in kan awm vek a; Judate emaw, Grikte emaw, bâwihte emaw, zalêna awmte emaw pawh ni mah ila, chû Thlarau pakhat chauh chu min intîr ãeuh a ni.

¹⁴Taksa hi pêng khat chauh ni lovin, pêng tam tak a ni zâwk.

¹⁵Kephah hian, “Kut ka nih loh avângin taksâa tel ka ni ve lo,” ti sela, chumi avâng chuan taksâa tel lo a ni chuang lo.

¹⁶Beng hian, “Mit ka nih loh avângin taksâa tel ka ni lo ve,” ti sela, chumi avâng chuan taksâa tel lo a ni chuang hek lo.

¹⁷Taksa pum hi mit ni vek sela, ri hriatna chu khawiah nge a awm ang? A pum hian ri hriatna ni vek sela, rim hriatna chu khawiah nge a awm ang?

¹⁸Pathianin pêng tinrêng hi taksaah hian a duhna apiangah a awmtîr zâwk a ni.

¹⁹Chúng zawng zawng chu pêng khat chauh ni ta se, taksa hi khawiah nge a awm tâk ang?

²⁰Chutichuan, pêng tam tak awm mahse, taksa chu pumkhat a ni.

²¹Mit hian kut hnênah, “Eng atân mah ka mamawh lo che,” a ti thei lo; lû pawhin kephah hnênah, “Engah mah ka mamawh lo va che,” a ti thei hek lo.

²²Ti thei teh suh e, taksa pêng nêp zâwka langte hi an pawimawh êm êm a ni.

²³Tichuan, taksa pêng nêp zâwka kan ngaih ãhinte hi kan ngaih pawimawh tûr an ni; chuvângin, kan taksa pêng mâwi lo zâwkte hian thuam mâwi an mamawh zâwk asin.

²⁴Kan taksa pêng mâwi zawk te erawh chuan chei mâwi hran an ngai lo. Pathianin mâwina nei lo pêng chu a châwimâwi nasa zâwk si a.

²⁵Taksa hi inñhen hrang lova, pêng hrang hrangte hi inenkawl tlâng vek tûra rem khâwm a ni.

²⁶Tichuan, pêng khatin a tuar chuan, pêng dang zawng zawngin an tuarpui thîn a; pêng khat châwimâwi a nih chuan, pêng dang zawng zawngin an lâwmpui bawk thîn.

²⁷Tichuan, nangniho hi Krista taksa chu in ni a, mimal tin hi a pêngte ãeuh in ni e.

²⁸Pathianin a kohhranah hêng mite hi a dah a: pakhatnaah tirkhohte, pahnihaah zâwlneite, pathumnaah zirtirtute; chu mi hnûah thil mak tihtheihna neite an awm a; chu mi zawhah tihdamna thilpêk neite, mi ãanpui theite, rorêl thiamte, ãawng hriat loh chi hrang hrangte a awm a.

²⁹Mi zawng zawng hi tirkkoh an ni vek em? Zâwlnei an ni vek em ni? Zirtirtu an ni vek em ni? An vaiin thil mak tihtheihna an nei vek em ni?

³⁰Mi zawng zawngin tihdamna thilpêk an chang vek em? ãawng hriat lohvin thu an sawi vek em? Thu hrilhfiah theihna an nei vek em?

³¹Thilpêk ãa ber dawn te chu châk hlê rawh u. Khai le, kawng ãa lehzuall chu ka entîr ang che u.

BUNG 13

THILPÊK ROPUI BER

¹Mihring ãawngte leh Vântirkkoh ãawngtein thù sawi mah ila, hmangaihna nei si lo ila, dâr ri mai mai emaw, dârbenthek ri mai mai emaw ka ni ang.

²Thu hrilh lâwk theihna neiin, thurûk zawng zawng leh hriatna zawng zawng nei vek mah ila, tlâng tisawn thei khawp rinna famkim pawh nei mah ila, hmangaihna nei si lo ila, engtihna mah ka ni lo vang.

³Mi retheite châwm nân ka neih zawng zawng pe zo vekin, ka taksa pawh hâl ral tûrin hlân hial mah ila, hmangaihna nei si lo ila, ka tân engmah a sâwt chuang lo vang.

⁴Hmangaihna chuan a dawhthei a, a ngilnei bawk a; hmangaihna chuan mi dang a itsik lo va; hmangaihna chuan mahni a infak lo va, a uang hek lo va;

⁵mâwi lo takin a che lo va, mahni hmâ a sial lo va, a thinur duh lo va, thil ãa lo a ngaihtuah lo va;

⁶dik lohnaah a lâwm lo va, mahse thutakah chuan a lâwm thîn;

⁷engkim a tuar hrâm hrâm a, engkim a ring a, engkim a beisei a, engkim a tuar chhuak thîn.

⁸Hmangaihna hi a dâi tawh ngai lo vang; thù hrilh lâwk theihnae hi awm mah sela, tihbân a la ni ang a; ãawng hriat lohte

hi awm mah sela, tihbân a la ni ang a; hriatna hi awm mah sela, a la boral dâwn a ni.

⁹A kim lovin kan hria a, a kim lovin thû kan puang bawk thîn.

¹⁰A famkim a lo thlen hunah a kim lo chu tihbo a ni tawh ang.

¹¹Ka naupan laiin naupang angin ka ãawng a, naupang angin ka hria a, naupang angin ka ngaihtuah thîn; tuna ka lo puitlin hnû hian naupang tih dân chu ka bân-san ta.

¹²Tûnah hian dârthlalangah kan hmu riai ruai a, nakinah chuan inhmatawnin a ni tawh ang. Tûnah chuan a then a zâr chauh ka hria a, chutih hunah chuan kei mi hriat chian ang bawk hian ka hre Chiang ve tawh ang.

¹³Tûnah chuan rinna te, beiseina te, hmangaihna te hi a pathum hian a awm reng ang; hêng zîngah hian a ropui ber chu hmangaihna hi a ni.

BUNG 14

HRILHLÂWK THEIHNA LEH ãAWNG HRIAT LOH

¹Hmangaihna hi ûm zêl ula, thlarau thilpêkte hi châk hlê bawk ula, thu hrilh lâwk theihna pheî chu châk leh-zual rawh u.

²ãawng hriat lohva thusawitu chuan mihring hnêna sawi lovin, Pathian hnêna sawi a ni zâwk si a, tûma'n a thu sawi chu an hre thiam lo; mahse thlarauvin thurûk a sawi a ni.

³Thlarauva thupuangtu erawh chuan mihringte hnênah siam thatna thû te, fuihna thû te leh thlamuanna thû te a sawi zâwk thîn.

⁴ãawng hriat lohva thusawitu chuan mahni insiamthat nâna ti a ni a, thlarauva thupuangtu erawh chuan kohhran siam that nâna ti a ni.

⁵In vâi hian ãawng hriat lohva thû in sawi ka duhsak che u a, thlarauva thupuangtu in nih ka duhsak leh-zual; thlarauva thu puangtu chu ãawng hriat lohva thusawitu aiin a ropui zâwk si a; kohhran siamtha tûr chuan a hrilh fiah lehngghâl a ngai thîn a ni.

ãAWNG HRIAT LOH HRILHFIAH TUR

⁶Tûnah hian unaute u, ãawng hriat lohva thû sawiin in hnênah lo kal ta ila, inlârna thuchah te, hriatna lam te, thlarau lam thupuan te, zirtîrna thû te in hnêna ka sawi si loh chuan engtin nge in sâwt phah chuan ang?

⁷Nunna nei lo thil, phênglâwng emaw, ãingtang emaw hi mûmal neia a rik loh chuan eng hla nge an tuma an ham tih tu nge hre hrang thei ang?

⁸Tâwtawrâwt hi mûmal nei lova a rik mai mai chuan tu nge râi do tûra inpeih thei ang?

⁹Chutiang bawk chuan nangni pawhin hriat awlsam tûr zâwnga thil in sawi chhuah lohvin, in thusawî engtin nge an lo hriat ang? Boruaka âu mai mai in ni ang asin.

¹⁰Khawvêlah hian ãawng chi hrang tam tak a awm a ni thei e, mahse awmze nei lo pakhat mah a awm si lo.

¹¹A sawi awmzia ka hriat loh chuan, kei hi a sawitu tân ram dang mi ang mai, a sawitu pawh chu ka tân ram dang mi ang mai a ni bawk ang.

¹²Thlarau thilpêkte chung a thahnem in ngaih êm avângin kohhran siam thatna kawng hi dap nasa leh-zual rawh u.

¹³Chuvângin, ãawng hriat loh neitu chuan a hrilh fiah theih nân dîl rawh se.

¹⁴ãawng hriat lohva ka ãawngtai chuan, ka thlarau a ãawngtai a, ka hriatna lam erawh chuan a hlâwk phah chuang lo.

¹⁵Engtin nge ni ta ang le? Thlarauvin ka ãawngtai ang a, hriat theih tûrin ka ãawngtai bawk ang. Thlarauvin ka zâi ang a, hriat theih tûrin ka zâi bawk ang.

¹⁶Chuti lo chuan, thlarauvin mal sâwmsak mah la, i thu sawi awmzia a hriat thiam si loh chuan, engtin nge hre thiam lo chungin i lâwmthu sawiah 'Amen' a lo pêk theih ang?

¹⁷Nang chuan tha takin lâwmthu i sawi ngei mai; mahse mi dangin an lo sâwtpui si lo va.

¹⁸Nangniho zawng zawng aia ãawng hriat lohva thû ka sawi tam zâwk avângin Pathian hnênah lâwmthu ka sawi a ni;

¹⁹kohhran zîngah erawh chuan, ãawng hriat lohva thumal sîng khat sawi ai chuan, midangte ka zirtîr theih nân, ãawng hriatin thumal panga lek pawh ka sawi zâwk ang.

ãAWNG HRIAT LOH: RING LO MITE TANA CHHINCHHIAHNA

²⁰Unaute u, naupang chhe rilru ang lek pu suh u; sual lam kawngah erawh chuan nausên ang ni ula, hriatthiamna nei tûrin rilru puitling pu rawh u.

²¹Dân Lehkhabûah, "ãawng danglam hmangte kê leh hmuiin hê mite hnênah hian thû ka sawi ang; chuti chung pawhin mi la ngaihthla chuang lo vang, Lalpan a ti," tih ziak a ni.

²²Chuvângin, ãawng hriat lohthe hi ringtute tâna chhinchhiahna ni lovin, ringlomite tâna chhinchhiahna zâwk a ni; thlarauva thupuan erawh chu ringlomite tân a ni lo va, ringtute tân zâwk a ni e.

²³Tichuan, kohhran pum pui hmun khata in inkhawmin, in zâvaia ãawng hriat lohva in ãawng chuan, chinchâng la hre lote emaw, ringlote emaw lo lût sela, in â ta emaw an ti dâwn lo vem ni?

²⁴Mahse in vâia thlarau thuchah in puan chuan ringlomi emaw, la hre lo emaw pawh lo lût se, in zâa thiltih avâng chuan a sualna inhriain, a inhmuhchhuah phah thei zâwk dâwn a ni.

²⁵Tichuan, a thinlunga thurûkte chu phawrh chhuahin a awm ang a; bawkkhupin Pathian chibai a bûk ang a, in zîngah Pathian a awm tak zet a nih hi, a ti thei dâwn a ni.

KOHRAN INKHAWM KALHMANG

²⁶Unaute u, engtin nge ni zêl ang le? Inrawn inkhawmin, mi tinin fakna hla emaw, zirtîrna thu emaw, ãawng hriat loh emaw, thu puan chhuah tûr emaw, hrilh fiahna emaw in nei thîn a. Thil zawng zawng hi insiamthat nâna tih ni vek rawh se.

²⁷Tûpawhin ãawng hriat lohva thû a sawi chuan, tum khatah mi pahnih emaw, a tam berah pathum emawin a inchhâwkin ti se la, mi pakhatin hrilh fiah zêl rawh se.

²⁸Hrilhfiahtu an awm loh chuan, kohhran inkhawmnaah chuan amah chu ngawi mai sela, ama hnênah leh Pathian hnênah

sawi rawh se.

²⁹Thlarau thuchah puangtu mi pahnih emaw, pathumin emaw puang sela, mi dangten ngun takin lo ngaithla rawh se.

³⁰Mahse, a bula thû mi dangin hriattîrna thû a dawn chuan, a hmasa zâwk chu lo ngâwi mai rawh se.

³¹Mi zawnz zawnzin an zir a, an lo hlâwkpuina tûrin, in zâin, pakhat zêlin lo inpuan chhâwk thîn rawh u.

³²Zâwlneite thlarau chu zâwlneite thû thûa awm a ni asin.

³³Pathian chu buaina Pathian a ni lo va, remna Pathian a ni zâwk e, mi thianghlim inpâwl khâwmhote awm dân ang hian.

³⁴Kohhran inkhâwmnaah chuan hmeichhiate chu ngâwi rengin awm rawh se; an tân thu sawi vê phal a ni si lo va; dân bûin awm tûra a ziaik angin, tlâwm takin awm mai rawh se.

³⁵Thil an zir vê duh a nih chuan, in lamah an pasalte zâwt mai thîn rawh se; kohhrana hmeichhe thu sawi hi a zahthlâk si a.

³⁶Pathian thû hi nangmahni aţanga chhuak em ni? A nih loh leh nangmahni hnênah chauh em ni a lo thlen?

³⁷Mi tûpawhin zâwlneiah emaw, thlarau mi deuhvah emaw a inngaih chuan, in hnêna ka thu ziaik hi Lalpa thupêk a ni tih a hriatpui ngei tûr a ni.

³⁸Nimahsela, mi tupawhin hriatna a neih loh chuan hre lovin awm ve mai rawh se.

³⁹Chuvângin unaute u, thlarauva thupuangtu nih hi châk hlê ula, ţawng hriat lohva thu sawi te hi khap suh u.

⁴⁰Thil engkim hi mâwi tak leh fel taka tih ni rawh se.

BUNG 15

THOLEH KRISTA INLÂRNA

¹Unaute u, Chanchin Tha ka hrilh che u khân in lâwm a, inngah nâna in hman bawh kha in hnênah ka sawi nawn leh a ni.

²Ka thu hrilh che u kha, âwih satliah mai ni lova, in vawng tlat a nih chuan, chû tak chu chhandam in nihna pawh a ni si a.

³Kei pawhin ka dawn ngei chu ka hriattîr hmasa che u a nih kha: Pathian Lehkha Thû ang zêlin Krista chu kan sual vângin a thi a,

⁴phûmin a awm a, Pathian Lehkha Thû ang zêlin ni thum nâh kaihthawh a ni a,

⁵Kipha hnênah a inlâr a, chumi hnûah sâwm leh pahnihte hnênah a inlâr leh a.

⁶Chumi hnûah chuan, ţum khatah unau zangâ aia tam hnênah a inlâr leh a, chûng zînga mi tam zâwk chu tûn thlengin an la dam a, thenkhatte erawh chu an muhîl tawh hlawn a.

⁷Chumi hnûah Jakoba hnênah a inlâr leh a; chu mi hnûah tirhkoh zawnz zawnzte hnênah a inlâr leh bawh a.

⁸A tâwp berah chuan a hun lova piang ang mai, keima hnênah pawh a inlâr leh hial a.

⁹Kei zawnz tirhkoh zînga tê ber, Pathian kohhran ka tihduhdah avâng a tirhkohva vuah tlâk loh ka ni si a.

¹⁰Mahse, Pathian khawngaihna avângin tûn dinhmun hi ka thleng ta a, min khawngaihna chu a thlawn lo hlê mai; anniho zawnz aiin ka thawk rim a, keima tih erawh chu a ni lo, keimaha awm Pathian khawngaihna a thawk zâwk a ni.

¹¹Tichuan, anni emaw, keimah emaw pawh ni ila a dang chuang lo: thû kan hril a, nangnin in lo âwih mai a nih kha.

THOLEH KRISTA: KAN BEISEINA

¹²Krista chu mitthi zîng ata kaih thawhin a awm tih hril a nih mêt laiin, engtizia nge in zînga mi thenkhatin, “Mitthi thawhleha a awm lo,” in tih mai le?

¹³Mitthi thawhleha a awm loh chuan, Krista pawh kha kaih thawhin a awm lo tihna a ni dawn a.

¹⁴Krista kha kaih thawh a nih loh chuan, kan thuhrl hi engmah lo mai a ni ang a, in rinna pawh engmah lo mai a ni bawh ang.

¹⁵Ni e, Krista a kai tho leh tih Pathian kan hriatpui avâng khân, Pathian tân hriatpuitu dawthei kan lo ni bawh ang— mitthite kaih thawha an awm loh chuan Krista pawh kha a kai tho hek lo vang.

¹⁶Mitthite kaih thawh an nih loh chuan, Krista pawh kha a tho leh lo tihna a ni ang.

¹⁷Krista kha kaih thawh a nih loh chuan, in rinna chu a thlawn mai a lo ni ang a, in sualnaah chuan in la awm reng tihna a ni dawn asin!

¹⁸Chutiang ni se, Kristaa muhîl tawhte kha an bo hlen daih dawn tihna a ni bawh ang.

¹⁹Hê dam chhûng chauhva Krista beisei ni ila, mi azawnga mi khawngaihthlâk ber kan lo ni ang.

HMÊLMA HNUHNUNG: THIHNA

²⁰Mahse, Krista chu mitthi zîng ata kaih thawh ngei a ni, muhîlte thawh hmahruaitu a lo ni ta.

²¹Thihna hi mihring avânga lo awm a ni a, Mihring avâng vêkin mitthi thawhleha a lo awm bawh a.

²²Adama-ah chuan mi zawnz zawnz an thi ang hian, Krista-ah chuan mi zawnz zawnz tihnunin an awm ang.

²³Nimahsela, mi tin mahni hun zêlah a ni ang: Krista chu thawh hmahruaitu a ni a; chumi hnûah, a lo kal leh huna tho leh tûrte chu Krista mite an ni ang.

²⁴Rorêlna te, thuneihna te leh thiltihtheihna zawnz zawnz te chu a titâwp vek ang a; Pathian, Pa hnên ngeiah chu lalram a hlan hunah chuan tâwpna chu a lo thleng tawh ang.

²⁵A hmêlmâ zawnz zawnz a ke hnuaia a dah hmâ loh chuan ani chuan ro a rêl dawn si a.

²⁶Hmêlma hnunung ber, tihboral tûr chu thihna hi a ni.

²⁷“Ani chuan a ke hnuaiah engkim a dah si a.” Nimahsela, “A hnuaiah engkim a dah ta,” a tih hian, a hnuaia engkim dahtu Pathian chu a tel vê lo tih a lang reng a ni.

²⁸A hnuaia engkim a dah hun chuan, Fapa ngei pawh a hnuaia engkim dahtu hnuaiah chuan a awm bawh ang, Pathian chu engkima engkim a nih theihna tûrin.

THAWHLEHNA HI AWM TA LO SE

²⁹Mitthite hi tho leh dâwn lo ta se, mitthi puala baptisma changte chuan eng nge an tih tâk ang? Eng atân nge mitthite puala baptisma an chan thîn le?

³⁰Engvângin nge dârkâr tin dinhmun hlauhawma kan awm?

³¹Unaute u, kan Lalpa Krista Isuaah chuan ka chhuan êm che u avângin ni tin ka thi thîn tih ka sawi e.

³²Ephesi khuua sakawhlte kha mihring tihdân angin lo soal vê ta vak ila, ka tâna hlâwk tûr eng nge awm? Mitthite an tho leh dâwn lo a nih chuan, “Hawh u, i eiin i in ang u khai, naktûkah kan thi mai dâwn alâwm.”

³³Bumin awm suh u: “Thian sualte chuan nungchang tha an tikhawlo thîn.”

³⁴Dikna kawngah harh chhuak ula, thil soal ti suh u; thenkhat chuan Pathian hriatna pawh in neih hauh loh hi. Hei hi zah nachâng in lo hriatna tûra sawi ka ni e.

TAKSA ROPUI

³⁵“Mitthite chu engtianga kaih thawhin nge an awm dâwn? Eng ang taksa pûin nge an lo kal dâwn?” tiin mi thenkhatin in zâwt a ni thei e.

³⁶Mi â pa, i chi tuh hi a thih zet loh chuan tihnunin a awm hlei nê.

³⁷I chi tuh chu, a tak lo la awm tûr ni lovin, buh fang mai emaw, thlai dang chi fang mai emaw i tuh zâwk a ni.

³⁸Pathian chuan a duh dân takin taksâ a pê a, a fang tin tân taksâ a pe theuh baw a.

³⁹Tîsâ zawng zawng hi tîsa thuhmun vek a ni lo, mihring tîsa a awm a, rannung tîsa te, sangha tîsa te, sava tîsa te a awm hran vek a.

⁴⁰Vân taksâ a awm a, lei taksâ a awm baw a; vân taksa ropuina a awm a, lei taksa ropuina pawh a awm baw a.

⁴¹Ni-in ropuina chi khat a nei a, thlân ropuina chi dang a nei baw a, arsitin ropuina an nei vê baw a; arsi leh arsi pawh ropuinaah chuan an inchen hlawn lo va.

⁴²Mitthi thawhlehma pawh chutiang baw chu a ni. Tawih theia tuh a ni a; tawih thei lova kaihthawh a ni;

⁴³Tlâwm taka tuh a ni a, ropui taka kaihthawh a ni. Chak lova tuh a ni a, thiltihtheihna neia kaihthawh a ni.

⁴⁴Mihring taksâa tuh a ni a, thlarau taksâa kaihthawh a ni. Mihring taksa a awm a, thlarau taksa a awm baw a.

⁴⁵Heti hian ziah a ni: “Mihring hmasa ber Adama chu minung a lo ni,” tiin. Adama hnunung ber chu nunna petu Thlarau a lo ni ta thung a.

⁴⁶Mahse, a awm hmasa zâwk chu thlarau ni lovin, mihring lam a awm hmasa zâwk a; chu mi hnûah thlarau lam a awm chauh a ni.

⁴⁷Mihring hmasa ber chu leia mi, vaivuta siam a ni a; mihring pahnihna chu Lalpa, vâna mi a ni.

⁴⁸Vaivuta siam a nih angin, vaivuta siam thil dangte pawh an awm a; vân lam Mi angin, vâna mite pawh an awm baw a.

⁴⁹Vaivuta siam mihring hmêl kan pû angin, vân lam Mi hmêl kan la pu ve baw ang.

KAN HNEHNA HNUHNUNG

⁵⁰Unau te u, hei hi ka'n sawi teh ang, “Tîsa leh thisen hian Pathian lalram chu a luah thei lo vang a; tawih thei hian tawih thei lo chu a luah thei hek lo vang.”

⁵¹Khai le, thurûk ka hrilh ang che u: Kan zâvai hi chuan kan muhîl vek dâwn lo va;

⁵²mahse, thâwk leh khatah, mitkhpakâr lovah, tâwtawrâwt hnunung ber a rîk hunah chuan tihdanglamin kan awm vek ang. Tâwtawrâwt a rîk hunah mitthite chu tawih thei tawh lo tûra kaihthawh an ni ang a, keini pawh tihdanglam kan ni tawh ang.

⁵³He tawih thei hian tawih theih lohna a inbel tûr a ni a, he thi thei pawh hian thihtheihlohna a inbel baw tûr a ni.

⁵⁴Chutichuan, he tawih thei hian tawih theih lohna a inbel a, he thi thei hian thihtheihlohna a inbel hunah, chumi hunah ngei chuan, “Thihna chu hnehna in a lem zo ta,” tih thu ziaik hi a lo thleng ang.

⁵⁵“Aw Thihna, khawiah nge i tûr chu? Aw Thlân, khaw nge i hnehna chu?”

⁵⁶Thihna tûr chu soal a ni a; soal thiltihtheihna chu dân hi a ni.

⁵⁷Nimahsela, kan Lalpa Isua Krista zâra hnehna min petu Pathian hnênah chuan lâwmthu awm rawh se.

⁵⁸Chuvângin, ka unau duh takte u, nghet takin, tihchêt rual lohvin, Lalpa hnâ thahnemngai taka thawkin awm zêl rawh u, in thawhrimna chu Lalpaah chuan a thlâwn dâwn lo tih in hre si a.

BUNG 16**MI THIANGHLIMTE TANA THAWHLÂWM**

¹Mi thianghlimte tâna thawhlâwm chungchângah chuan, Galatia rama kohhranho hnêna thû ka pêk angin nangni pawhin lo ti ve rawh u.

²Chawlhkâr ni hmasa berah mi tinin malsâwmna in dawn ang zêlin dah khâwl theuh ula, ka lo kal huna thawhlâwm khawn chawp a ngaih loh nân.

³Ka lo kal hunah in thilpêkte chu Jerusalema keng chho tûrin, in mi rin zâwnng hnênah chuan lehkhâ kengin ka tîr ang e.

⁴Ka kal vê-na tûr a nih pheih chuan keima rualin an kal dâwn nia.

MIMAL RUAHMANNA

⁵Makedonia ram ka fan chhuah zawhah in hnênah ka lo kal ang (Makedonia ram pal tlang ka tum tho baw a).

⁶In hnênah hian châm rei theih ka inbeisei a, thlasik chhûng pawh a ni mahna, khawi lamah pawh kal chhuak ila, nangni chuan min thlah thei zêl ang chu.

⁷Kal pah maia hmuh che u ka duh tâwk lo va; Lalpan rem a tih chuan in hnênah rei deuh châm ka beisei tlat a ni.

⁸Ephesi khuuaah erawh chuan Pentikos ni thlenga châm ka tum ang.

⁹Rawngbâwlna kawng zau tak leh hlâwk bawk si ka tân a inhawng a, dodâltu tam tak an lo awm zêl bawk a.

¹⁰Timothea a lo kal chuan engmah hlauhthâwn nei lovin lo awmtîr rawh u; keiin ka thawh ang bawkin Lalpa hnâ a thawk vê si a.

¹¹Chuvângin, tûma'n lo hmusit suh se. Ngaihngam taka ka hnêna a lo kal theih nân t̃ha takin in rawn thlah dâwn nia; unaute nêna lo kal tûrin kan lo nghâk reng si a.

¹²Kan unaupa Apollova khâ, unaute ruala in hnêna lo kal tûrin nasa takin ka ngên a, tûn huna lo kal hi a hreh hlê a; mahse hun remchâng a neih hunah a lo kal ngei ang.

FUIHNA HNUHNUNG

¹³Invêng ula, rinnaah chuan dîng nghet tlat rawh u; intihuai ula, chak takin lo awm rawh u.

¹⁴In tih apiang chu hmangaihnaa tih ni vek rawh se.

¹⁵Unaute u, Stephana chhûngkua chu Akaia rama ringtu hmasate an ni a, mi thianghlimte rawngbâwlsak tûra an inpêkzia kha in hria e;

¹⁶chutiang mite hnênah te, keini min thawhpua, t̃hahnem min ngaihpuitu apiang hnênah te chuan intulût t̃hîn tûrin ka ngên a che u.

¹⁷Stephana te, Fortunata te, Akaika te lo kal hi ka lâwm a ni, in awm loh pawh lang lovin mi siam si a.

¹⁸Anni hian in rilrû an tiharh t̃hîn ang khân kei pawh min tiharh vê si a. Chuvângin, hetiang mite hi lâwm rawh u.

INTHLAHNA LEH CHIBAI BÛKNA

¹⁹Asia ram kohhranho hian chibai an bûk a che u. Akuila leh Priskili te leh an ina inkhâwm kohhran hian thinslung takin Lalpaah chibai an bûk mawlh mawlh a che u.

²⁰Unau zawng zawngten chibai an bûk a che u. Fawh thianghlimin chibai lo inbûk tawn rawh u.

²¹Kei Paula hian he chibai bûkna hi keima kut ngeia ka ziah a nih hi.

²²Mi tûpawhin Lalpa Isua Krista a hmangaih loh chuan ânhhedawngin awm rawh se. Aw Lalpa, lo kal ta che!

²³Lalpa Isua Krista khawngaihna chu in hnênah awm rawh se.

²⁴Krista Isuaa ka hmangaihna hi in zâa hnênah awm rawh se. Amen.

2 KORINTH

Ziah tu: Paula • Ziah kum: A.D. 57

Korinth Lehkathawn Pahnihna hi Paulan Philippi khua ațanga Makedonia rama a zin țin thumnaa a ziah a ni. A hmâ kuma a lehkathawn hmasa kha chhunzawmin, hemi a ziah lai hian kohhrana mi ținekhat zingah Paula kaihhruaina duh lo pâwl an lo awm ta a, langsâr takin duh lohna an lantîr hial a ni. Chûngte chu hre rengen Paula chuan kohhran mite zingah ama kaihhruaina la zâwmtute chu ding nghet tlat tûr te, apostol a nihna ringhleltute zirtîrna dik lohzia leh pawm tlâk a nih lohzia a sawi uar a. Isua Krista tirhkoh dik tak a nih avânga a thuneihna chu kohhran ținatna tûra dik taka hmang a nih zâwkzia te, Lalpa ținpuinaa a din kohhran a veizia leh, mimal taka an tâna a tuar nasatzia te chu ringtute fuih nân a hmang a ni. Hê lehkathawn hi Paulan Chanchin Țha avânga tihduhdahna leh hrehawm tuarna chungchâng a puan chhuahna a ni a; chutah chuan tâwp mai lovin Kristiante tân hlimna thurûk chu tuarna ațanga lo awm thei a ni tiin, mangan laia thlamuanna leh tuarna ata hlâwkna a nih zâwkzia te, Krista kan tuarpui vena a nih avângin ringtuten Krista zâra tuarna kal tlanga, hlimna leh lâwmna leh hnehna kan chan thu a puan chhuahna bu a ni a; beidawna chu beiseinaah a chantîr a ni. II Korinth hi Bible-a lehkhabu 47-na a ni a, bung 13 a awm a, châng 257 a awm bawk.

BUNG 1

CHIBAI BÛKNA

¹Pathian duh zâwnga Isua Krista tirhkoh Paula leh kan unaupa Timothea te chuan, Korinth khuaa Pathian kohhran hnênah leh Akaia ram puma mi thianghlim awm zawnzawngte hnênah:

²Pathian kan Pa leh Lalpa Isua Krista hnên ata khawngaihna leh remna in hnênah awm rawh se.

TUARNA KARA THLAMUANNA

³Kan Lalpa Isua Krista Pathian leh Pa, lainatna Pa leh thlamuanna zawnzawng Pathian chu fakim awm sela,

⁴kan hrehawm lai zawnzawng min thlamuan țintu Pathianin min thlamuan ang taka hrehawm tuarte kan thlamuan ve theihna tûr a ni.

⁵Krista tuarnate anga kan tuar tam poh leh, kan thlamuanna pawh Krista zârah a pung tam sauh dâwn a ni.

⁶Hrehawm kan tuar pawhin nangmahni lam tân thlamuanna tûr leh chhandamna tûr zâwk a ni a, kan lo tuar tawh anga chhel taka in tuar chhuah ve nân a ținakai si a. Kan thlamuang ta a nih pawhin nangmahni lo thlamuan vena tûr leh chhandamna tûr bawk a ni e.

⁷Hrehawm tuar vêtute in nih avâng takin thlamuanna pawh in chang vê ngei ang tih kan beiseipui tlat che u a ni.

TUARNA ATA CHHAN CHHUAHNA

⁸Unaute u, Asia rama kan chungah buaina lo thlen thû kha hre lova in awm kan duh lo ve: khatia tuar zawn rual loh khawpa phurritin min delh beh reng lai khân, dam rêng pawh kan in beisei tawh lo va.

⁹Ni e, thiin chauh hmabâkin kan inhria a, mahse keimahnîa innghat lova, mitthite kai thotu Pathian chauh kan rin theihna tûr a lo ni a,

¹⁰thihna râpthlâk lakah min chhan chhuak tawh a, min chhan chhuak zêl a; min la chhan chhuak leh zêl ang tiin amahah rinna kan ngat a ni.

¹¹Mi tam takte ținwngtaisakna azârah thilpêkte kan dawng a, chuwângin kan aiawha mi tam takin lâwmthu an sawi theih nân min ținwngtaipui ve rawh u.

PAULA RINAWMZIA

¹²Kan hlim chhan chu hei hi a ni: khawvêlah hian tlâwm tak leh rinawm takin, mihring finna lam ni lovin, Pathian khawngaihna avâng zawn kan khawsa țin a, nangmahni lakah phei chuan a ni lehzuat, tih hi kan chhia leh țin hriatna pawhin min pawmpui bawk a ni.

¹³In chhiar țin leh in hriat bel tawh sa bâk engmah in hnênah ziah belh ka tum lo. Tûnah chuan a tâwp thleng pawhin in hre thiam tawh ang tih ka ring e,

¹⁴(keini pawh min hriat thiampui nual tawh ang khân), Lalpa Isua Nî-ah chuan nangni hi kan chhuang dâwn che u ang bawkin nangni pawhin min chhuang ve dâwn si a.

KOHHRAN HUMHALHNA

¹⁵Chumi ring nghet tlat chung chuan, a hlâwkna in chan nawn theih nân, in hnêna lo kal hmasak ka tum ta a,

¹⁶nangmahni tlawh pahin Makedonia ramah kal zêl ila, Makedonia ram ațangin in hnênah lo lêt lehin, nangmahni puihna ngeia Judai rama kal zêl ka tum a ni.

¹⁷Chutiang thil ka ruahman lai khân fimkhur lo taka ti ka lo ni em ni? A nih loh leh, ka thil ruahmanah tisa maiin em ni ka lo tiha, “Ni e, ni e,” ka tih chu “Ni lo ve, ni lo ve,” ti leh mai tûr ka ni em ni?

¹⁸Pathian a rinawm ang bawkin in hnêna kan thu sawi pawh ‘Ni’ leh ‘Ni lo’ tia thle tawn mai mai a ni si lo.

¹⁹Pathian Fapa Isua Krista chanchin, kei leh Silvana leh Timothean in hnêna kan puan țin chu “A ni” tih leh “A ni lo” tih a ni kawp vê si lo va, amahah chuan “Ni e” tih chiah a awm zâwk a ni.

²⁰Pathian thutiam zawnzawng chu amahah chuan “Ni e” tih a ni a; keimahni avânga Pathian a ropuina tûrin amahah chuan ‘Amen’ a awm țin a ni.

²¹Nangmahni nên Kristaa min tingheta, hriak min thihtu chu Pathian a ni si a;

²²amah bawk chu min chhinchhiahtu leh inhual lâwkna Thlarau min petu pawh a ni.

²³Chû bâkah nangniho hliam palh che u ka hlauh avânga Korinth khuaa rawn kal lo mai ka ni tih mi hriatpui tûrin Pathian

ka âu a ni.

²⁴In rinna chung a thuneih kan tumna lam a ni lo va, in lâwmna tûra in thawhpui kan ni zâwk e; rinnaah chuan in ding nghet si a.

BUNG 2

¹Chuvângin rilru nuam lo tak pu chung chuan in hnêna lo kal tawh loh mai ka tum ta a ni.

²In rilru ka tihnat si chuan ka tihnata te baw lo chu min tilâwmtu tûr dang an awm thei dâwn em ni?

BAWHCHHETUTE NGAIAM RAWH U

³Chû tak chu hê lehkhâ ka ziah chhan hi a ni e; chuti lo zawng, ka lo kal hunah ka lâwmna tûrte lakah lungngaihna ka hmu hlaui dah ang e; ka lâwm viau chuan in zavâia lâwmna tûr zâwk a nih ka ring tlat si a.

⁴Thinlunga rûm vawng vawnga na tak tuar chungin, he lehkhâ hi mittui sùr zung zung kâra ka ziaa a ni; nangmahni rawn tilungngai ve tûr ni lovin, nangmahni ka hmangaihnia che u in lo hriat vêna tûr zâwk a ni e.

⁵Mi tûpawhin lungngaihna lo thlen mahse, kei chu min tilungngai chuang dâwn lo va, nangniho zawng zawng hi runthlâk lutuk si lova in lungngaih vê nâna ti chauh ka ni.

⁶Hetianga vântlâng hriata hremna a lo tâwk ta hi, chutiang mi tân chuan a tâwk hle a ni;

⁷tûnah chuan in ngaihdama, in thlamuan a tûl leh tawh zâwk a ni; chuti lo zawng, chutiang mi chu lungngaihnain a lem zo hlaui dah ang e.

⁸Chuvângin, amah in hmangaihna kha tithar leh tûrin ka ngên zâwk che u a ni.

⁹Chû chu hê lehkhâ ka rawn ziah chhan pawh hi a ni a, kawng tinrênga thû in âwih leh âwih loh ka fiahna che u a ni e.

¹⁰Eng thilah pawh mi in ngaihdam apiang chu kei pawhin ka ngaidam ve a ni. Kei pawhin tute pawh ka lo ngaihdam tawh si chuan, nangmahni tâna Krista hmâa ngaidam ka ni asin;

¹¹chuti lo zawng, Setanan remchâng a chuah dah ang e; a bumna hmanrua lah kan hai si lo va.

KRISTA HNEHNA

¹²Krista Chanchin Tha hril tûra Troas khua ka thlen lai khân Lalpa chuan kawng min hawnsak a;

¹³mahse ka unaupa Tita ka hmuh loh avângin ka ngaih a tha thei lo va; anni chu ka kalsan a, Makedonia ramah ka kal ta a ni.

¹⁴Krista hnehnaa min hruai thîntu Pathian hnênah lâwmthû awm rawh se; keimahni hmangin amah hriatna rimtui chu hmun tinah a lêng vêl si a.

¹⁵Chhandam tawhte leh mi boralte zîngah chuan Pathian tân Krista rimtui kan ni.

¹⁶Pâwl khat tân chuan thihna kawnga hruaitu tûr thihna rim kan nam vut vut a, pâwl lehlan tân erawh chuan nunna kawnga hruaitu tûr nunna rim kan nam chem chem si a. Chutianga tân chuan tu nge tling zo vang le?

¹⁷Mi tam takte angin Pathian thu hi sumdawn nan kan hmang ve lo; Pathian tirh kan nih angin, rinawm takin Pathian mithmuhah chuan Kristaah thu kan sawi zâwk thîn.

BUNG 3

KRISTA LEHKHA

¹Mahni infak kan tan leh ta em ni? A nih loh leh, in hnêna insawi mâwina tûr lehkhâ te, in mi hriatpuina lehkhâ te chu, mi thenkhat tih dân ang hian kan ngai ve ta em ni?

²Nangni hi kan lehkhâ, kan thinlunga inziak, mi zawng zawng hriat leh chhiar chu in ni a;

³Krista lehkhâ in ni tih a Chiang hlê a ni; chû chu keimahni min ziahtîr a ni a; lehkhâtuia ziah ni lo, Pathian nung Thlarauvin a ziah, lung phêka ziah pawh ni lo, tisa thinlung phêka ziah ngei chu in ni e.

LEHKHA-AH NI LOVIN, THLARAUVAH

⁴Chutiang khawpa rinna chu Pathian lamah chuan Krista zârah kan nei a ni.

⁵Engkim hi keimahni atanga chhuak leh tling tâwk vek a ni kan intihna ni lovin, kan tlin theihna zâwk chu Pathian atangin a ni a,

⁶amah baw hi thuthlung thar rawngbâwltu atâna min tlintirtu a ni; lehkhâ thû maia rawngbâwltu ni lovin, a Thlarau rawngbâwltu atân a ni zâwk; lehkhâ thu mai chuan a tihlum thîn a, Thlarau erawh chuan a tinung thîn.

THUTHLUNG THAR ROPUINA

⁷Thihna tûra rawngbâwlna, lung phêka ziaha ker mah a ropui a, Mosia hmêla ropuina, ral leh thuai tûra lo lang mah Israel faten an en tha ngam lo hial a nih chuan,

⁸Thlarauva rawngbâwlna pheih chu engti taka ropui ni ang maw?

⁹Thiam loh chantîrna tûra rawngbâwlna mah a ropui chuan, midik nih theihna tûra rawngbâwlna pheih chu a ropui lehual dâwn mang e.

¹⁰Ropui taka siama lo awm tawh ni mah se, hemi lakah chuan a ropui thei ta lo, ropuina lama khûm daihtu a awm tawh si a.

¹¹Ral ta riailaia mah a ropui chuan, awm reng tûra pheih chu a ropui zâwk daih a ni.

¹²Chutiang beiseina nei chu kan nih avângin thû chu huai takin, a ruh langin kan sawi zêl tawh a ni.

¹³Israel faten Mosia hmêla êng a reh thlenga an en reng loh nâna puana a hmai a khuh thîn ang kha a ni tawh lo.

¹⁴An rilru chu tihdelin a awm miao si a. Tûn thleng pawhin Thuthung Hlui an chhiar apiangin, chû inkhuhna puan chuan a la khuh ta reng a; Kristaah erawh chuan chû inkhuhna chu hlih kian a ni tawh si a.

¹⁵Amaherawhchu, waviin thleng hian Mosia Lehkhabu an chhiar apiangin an thinlungah chuan khuhna chu a la awm zêl a ni.

¹⁶Mahse, Lalpa lam an hawi apiangin, khuhna chu hlih kianin a awm thîn.

¹⁷Lalpa chu Thlarau a ni a; Lalpa Thlarau awmna apiangah zalêna a awm thîn.

¹⁸Keini erawh chu kan zâa hmai khuh lovin, Lalpa ropuina chu dâthlalanga kan hmû ang hian kan hmû a, ama anpuia awm tûrin, ropuina ațanga ropui zual zêl tûrin Lalpa Thlarauva tihdanglamin kan awm mek a ni.

BUNG 4

KRISTA CHANCHIN ȚHA ÊNG

¹Chutichuan, zahngaihna kan hmuh ang zêla hetiang rawngbâwlina nei kan nih avâng hian kan zâm lo vang.

²Mahse, thil thuhrûk zahthlâk pui puite chu kan hnâwl fithla vek a, verther taka kal lovin, Pathian thû chu tlâng bum nân kan hmang vê lo va; mahse Pathian hmâah chuan mi tin thîlunga thutak inpuang chhuak ațangin mi mit kan tlung em tih kan thlîr zâwk a ni.

³Chuvângin, kan Chanchin Tha hi khuha a awm chuan, boralte hnênah a ni khuha a awm ni;

⁴Pathian anpui Krista Chanchin Țha ropuina êng chuan anmahni a chhun ên theih lohna tûrin, hê khawvêl pathian hian ringlote rilru a tidel ta.

⁵Mahni thû kan hril lo va, Krista Isua chu Lalpa a nih thû te, keini pawh Isua tâna in chhiahhlawh mai kan nih thû te a ni kan hril thîn ni.

⁶Isua Krista hmêlah chuan Pathian ropuizia hriatna êng min pe tûrin, thim ata êng pe chhuak tûra thupetu Pathian chuan kan thîlungte hi a chhun êng ta si a.

PAIH THLAK, TLÂWM SI LO

⁷Nimahsela, thiltitheihna chungnung chu keimahni ațanga chhuak ni lova, Pathian ațanga chhuak a nihzia tilang tûrin chû ro chu hlum bêlah te hian kan vawng a ni.

⁸Kil tin ațanga nêk sâwrin kan awm a, mahse kan keh chhe êm lo va; a ngaihna hre lovin kan awm a, mahse kan bei a dawng si lo;

⁹tihduhdahin kan awm a, mahse kalsan kan ni si lo; vuak thlûkin kan awm a, mahse tihbora êm chu kan ni si lo;

¹⁰Isua nunna hi kan taksâa a lan theih nân kan taksâah hian Lalpa Isua thihna chu kan pu zêl a ni.

¹¹Isua nunna chu kan taksa thi theiah hian tihlan a nih theih nân, keini nungdama awmte hi Isua vânga thi tûra mantîrin kan awm fo thîn.

¹²Tichuan, keimahnîah thihnain a thawk thîn a, nangmahnîah erawh chuan nunnain a thawk zâwk a ni.

¹³Thlarauva rinna thuhmun kan neih avângin kan rin ang takin kan sawi thîn a, “Ka ring baw a, chuvângin ka sawi baw a ni,” tih ziaak ang khân.

¹⁴Lalpa Isua kai thotu chuan keini pawh Isua rualin min kai tho vê dâwn a, nangnite nêh hian min la hruai khâwm dâwn tih kan hre si a.

¹⁵Thil engkim hi nangmahni tân vek a ni a, khawngaihna chu mi tam zâwk hnênah lo pung zêlin, Pathian ropuina tûra lâwmthu sawina tûr pawh nasa takin a pung zêl ang.

HMUH THEIH LOH HMUH

¹⁶Chuvângin kan zâm lo ve. Kan pawns lam mihring hi lo awngrawp tial tial mah se, kan chhûng lam mihring erawh chu ni tina siam tharin a awm zêl zâwk a ni.

¹⁷Tûna mit khap kâr daih lek hrehawm nêp tê kan tuar vê hian, sawiin a siak loh khawpa chatuana ropuina chu min thawhsak mêt a ni si a.

¹⁸Hmuh theih lam ngawt en lovin, hmuh theih loh thilte chu kan en zâwk a ni. Hêng hmuh theih thilte hi rei lo tê atân a ni a, mahse hmuh theih loh thilte chu chatuan atân a ni.

BUNG 5

THAWHLEHNA HRIAT FIAH DAN

¹Hê leia kan puan in hi Țiahin awm mahse, Pathian hnên ata kuta sak loh in ropui, chatuana awm tûr vâna mi chu kan nei tih kan hre si a.

²Vâna kan awmna tûra inthuan hun nghâkhlel takin hê puan in ațang hian kan rûm tak meuh a nih hi.

³Chutiang chuan inthuan ila, saruakin kan awm tawh dâwn si lo.

⁴Keini hê puan ina awmte hi rit phurin kan rûm vawng vawng a, inthuan lohva awm kan duh vâng a ni lo va; hê thi thei taksa hi nunnain a lem zawh huna thuamnaw thara* inbel kan duh tawh vâng zâwk a ni.

⁵Chuta tâna min buatsaihtu chu Pathian a ni, inhual lâwkna Thlarau min petu ngei chu.

⁶Tichuan, taksaa kan awm chhûng hian Lalpa hnênah kan la awm rih lo tih hriain, ngaihngam takin kan awm ta a ni.

⁷Hmu theia kal lovin, rinnain kan kal zâwk si a.

⁸Taksa ațanga kal chhuah hi Lalpa hnêna awmna a ni tih kan hre Chiang a, kan duh tak pawh a ni.

⁹Chuvângin, a hnênah kan awm emaw, awm lo emaw, kan tum ber chu ama lâwmzâwng mi nih hi a ni.

KRISTA RORÊLNA ȚHUTTHLÊNG

¹⁰Mi tinin taksâa an thiltih ang zêla a chhia a Țha an hmuh theihna tûrin, Krista rorêlna Țhutthlêng hmâah chuan pho lanin kan la awm vek tûr a ni.

¹¹Chuvângin, Lalpa Țihbâiawmzia chu hriain mite rilru hneh kan tum thîn; Pathian chuan min hre Chiang êm êm a, in chhia leh Țha hriatna hmang khân in hriat chian ka ring a ni.

PATHIAN NENA INREMNA

¹²In hnênah kan infak mâwi leh tâ a ni lo va; mahse thîlung taka ti lova, a lang lam ngawt uanpuitute laka keimahni avânga chhuan tûr leh chhân lêt dân tûr siamsak che u duh vâng maia rawn sawi zâwk kan ni e.

¹³Kan lo â ta a nih chuan Pathian tân ni se; kan lo fîng ta zâwk a nih leh, nangmahni tân ni rawh se.

¹⁴Krista hmangaihna chuan min tur lui tlat a ni; heti hian kan ngaihtuah: mi zawng zawng thih aiah mi pakhat a thih si chuan, mi zawng zawng chu thi an ni a;

¹⁵mi zawng zawng thih aia a thih chhan chu, nunga awmtan anmahni tâna nung tawh lova, an thih aia thia tholeha tâna an nun tawh zâwkna tûrin a ni.

¹⁶Chuvângin, tâna chinah chuan mi tûmah tisa dânin kan thlîr tawh lo. Krista pawh mihring hriatna lamin lo hre tawh mah ila, tûnah chuan chuti zâwngin kan hre tawh lo ve.

¹⁷Chutichuan, mi tûpawh Kristaa a awm chuan thilsiam thar a lo ni a; thil hluite chu a ral ta a; ngai teh u, thil engkim a lo thar ta.

¹⁸Thil zawng zawng hi Pathian aţanga chhuak vek a ni a; ani chuan Krista zârah amah nêin inremmin min awmtîr a, inremlehna rawngbâwl hna min pê a,

¹⁹khawvêl hi Amah nêna inremtîr leh tûrin Pathian chu Kristaah a awm a, an bawhchhiatnate chu bawhchhiatnaah a chhiarsak lo va, chu inremlehna thû chu min kawltîr ta a ni.

²⁰Tichuan, Krista aia palai kan ni a, keimahni hmangin Pathianin a ngên a che u: Pathian nêin lo inrem leh tûrin Krista aiawhin kan ngên tak meuh a che u.

²¹Amahah chuan Pathian dikna kan lo nih theih nân, sual rêng rêng hre lo chu Pathianin keimahni vângin sualah a siam ta a ni.

BUNG 6

RAWNGBAWLNA CHHINCHHIAHNATE

¹Pathian khawngaihna hi sâwtpui nân in hmang lo palh ang e, amah thawhpuitute hian a ngenin kan ngên a che u.

²“Khawngaihna hunah ka ngaithla che a, Chhandamna nî-ah ka ţanpui che,” a ti si a. Ngai teh u, tûn hi khawngaihna hun chu a ni a; Ngai teh u, tûn hi chhandamna nî chu a ni.

³Kan rawngbâwl hnâ hian dem a kai loh nân mi rilru tihual thei khawp thil engmah kan ti lo ve.

⁴Chuvângin, Pathian rawngbâwlute tih âwm rêngin, engkimah mi mit tlung tûr zâwngin kan awm thîn: chhel taka tuarnaah te, hrehawmnaah te, tlâkchhamnaah te, mangannaah te,

⁵vuak hrepnaah te, lung in tânnaah te, buainaah te, thawhrimnaah te, mutmawhnaah te, chawngheinaah te;

⁶thianghlimnaah te, hriatnaah te, dawhtheihnaah te, ngilneihnaah te, Thlarau Thianghlimah te, hmangaihna tak takah te;

⁷thutak thûah te, Pathian thiltihtheihnaah te; ding lam leh vei lama dikna râltuamah te;

⁸châwimâwinaah leh tihmualphonaah te, insawichhiat leh infakmawinaah te bumtu angin, mi dik tak ni siin;

⁹mi hriat tham loh angin, mahse hmingthang tak siin; thi lek lek angin, ngai teh u kan nung si; thunun tâwk angin, tihhlum si lohvin;

¹⁰lungngai angin, mahse lâwm fo siin; rethei angin, mi tam tak tihausa siin; engmah nei lo angin, engkim nei siin kan awm thîn.

THIANGHLIM RAWH U

¹¹Aw, Korinth mite u! Kan thilung pawh phawrh vekin in hnênah inhawng takin thû kan sawi hi.

¹²In lakah hian kan hmangaihza che u hi kan zêp lo va, nangni lam erawh chu in inhawng vê si lo.

¹³In chung a kan tih ang bawh hian nangni pawh kan lakah inhawng ve rawh u (fate ang taka ka biak che u hi).

¹⁴Ringlomite nêin inrem lo tak chungin inthlunzawm suh u. Dikna leh dân bawhchhiatnain eng nge inremna an neih? A nih loh leh, thim leh êngin eng nge inzawmna an neih?

¹⁵Krista leh Beliala pawhin eng nge inremna an neih? A nih loh leh ringtu leh ringlomi chuan eng nge inţawm an neih?

¹⁶Pathian tempul leh milemte hian eng nge inremna an neih? Nangni hi Pathian nung tempul chu in ni asin. Pathianin tihian a ti: “Anmahniâh ka chêng ang a, An zîngah ka lêng bawh ang. An Pathian ka ni ang a, Anni pawh ka mite an ni ang.”

¹⁷Chuvângin, “An zînga ta lo chhuak ula, Inlahrang rawh u, LALPAN a ti. Thil bawhlhlawh chu khawih suh u, Tichuan ka lo lâwm dân che u nia.”

¹⁸“In tân Pa ka ni ang a, Ka tân fanu fapa in ni bawh ang, ’ LALPA Engkimtitheia chuan a ti.”

BUNG 7

¹Chutiang thutiam chu kan neih avângin duhtak te u, tîsâ leh thlarau bawhlhlawhna zawng zawng lakah i inthian fai ang u khai, Pathian tîh dêk chungin thianghlimna chu i tifamkim ang u.

KORINTH MITE SIMNA

²In thilungah hmun min kian rawh u. Tû pawh mah kan khawih lo va, tûmah kan hruai sual lo va, tûmah kan bum hek lo.

³Chû chu thiam loh chantîr tûr che u a ti kan ni lo ve; thih leh thi tîang a, dam leh dam tîang tûrin kan thilungah hian kan vawng reng che u tih ka sawi tawh kha.

⁴Nangni lamah chuan ka ţawng huai ngam khawp mai, ka chhuang bawh si che u a. Thlamuannain ka khat a. Kan hrehawmna zawng zawngah pawh lâwmîn ka khat liam thîn a ni.

⁵Makedonia rama kan lo kal lai pawh khân kan taksain chawlh hahdam rêng a nei hman lo, kil tin aţangin min tibuai a. Pâwn lamah indona a awm laiin chhûng lamah hlauthâwng rêng rêngin kan awm bawh si.

⁶Nimahsela, kan hnêna Tita a lo kîr tâk avângin mi lungngaite thlamuantu Pathian chuan min tithlamuang ta e.

⁷A lo kal avâng chauh pawh ni lovin, nangmahni avânga a thlamuanna chuan min tilâwm êm êm a: min ngaihza te, min tuarpui dân te, kan tâna thahnem in ngaihza te min hrilh a, chûng chuan min tithlamuang lehzuall bawh a ni.

⁸Ka lehkhathawn khân in rilru a tina tih hre mah ila, ka inchnîr ta lo ve; a tîr kha chuan ka inchnîr ngei a. Mahse khâ lehkhathawn khân rei lo te chhûng chauh a tilingngai che u tih ka hria a.

⁹Tûnah chuan ka lâwm leh ta zâwk a: tihlungngaiha in awm vâng ni lovin, in lungngaihna chuan simna a thlen vâng a ni zâwk. Pathian duh zâwnga tihlungngaiha in awm hian, keini lamah chuan engmah chên in neih phah lo asin.

¹⁰Pathian duh zâwnga lungngaihna chuan chhandamna tûra simna a thlen a, inchnîrawm lo tak a ni. Tîsâ taka lungngaihna

erawh chuan thihna a thlen thîn.

¹¹Pathian duh zâwna lungngaihna in a hrin chhuahte chu lo thlîr ila: taihmakna te, mahni inthen fai duhna te, sual huan te, sual tih hlauhna te, a tha lam tih châk tlatna te, thahnemngaihna te, sual chu hrem ngei ni se tia duhna te a neih tîr che u hi. Chûng thil zawn zawn laka in fihlîmzia tichiangtu chu nangniho hi in ni asin.

¹²Chutichuan, in hnênah zia mah ila, thil dik lo titu tihchhanin ka zia lo va, thil tha lo tih tuartu avângin ka zia hek lo; nimahsela, Pathian mithmuha kan ngaihsakzia che u in lo hriat chian theih nâna zia zâwk ka ni e.

TITA LÂWMNA

¹³Chuvângin, thlamuanga in awmna hian keini pawh min tithlamuang vê ta. In zavâia Tita rilru in lo tihtharsak avânga arawn lâwmna chuan keini pawh min tilâwm lehual a ni.

¹⁴Tita hnênah hian nangmahni ka chhuanzia che u ka lo sawi vak a nih pawhin, ka zak chuang lo vang. Zah ahnêkin, in hnênah hian eng thil pawh dik taka kan sawi thîn angin, Tita hnêna kan chhuanna che u pawh chu a lo dik chiah si a.

¹⁵In zâa a thû in âwihzia te, hlau leh khûr chung a mah in lo dawnawn dân te chu a hre reng a, a ngaina zual sawt che u a ni.

¹⁶Engkima ka rin ngam tûra in awm avângin ka lâwm êm êm a ni.

BUNG 8

THILPEKA CHUNG CHUANNA

¹Unaute u, Pathianin Makedonia ram kohhran te hnêna khawngaihna a pêk dân hriattîr che u ka duh a:

²khatia tuarna hmanga fiahna nasa tak an tawh laia hlimnaa an khah liam dân te, retheihna khur thûka an awm laia an thilphalzia te kha.

³Khâ kha an theih tâwk a ni a; ni e, an theih tâwk bâk aliam pawh a ni a, anmahni duh thû ngeia ti an ni tih ka hriatpui a,

⁴mi thianghlimte rawngbâwna tel vê dîlin, an thilpêkte pawh chu dawng tûrin nasa takin min ngên zâwk a ni.

⁵Kan beisei phâk lohvin, Lalpa hnênah an intulût hmasa a, chumi hnûah Pathian duh zâwn takin kan hnênah an awm inpe leh ta a ni.

⁶Chutichuan, bul a lo tan tawh ang takin hê khawngaihna thilpêk pawh hi nangmahnia hlen chhuak ve nghâl tûrin Tita chu kan awm tîr ta a ni e.

⁷Tichuan, rinnaah te, thu sawiah te, hriatnaah te, thahnemngaihna zawn zawnah te, kawng engkima keini min hmangaihna in ngah ang hian, hê khawngaihna pawh hi lo ngah vê rawh u.

KAN ENTAWN TUR KRISTA

⁸Thu pe zâwnin ka sawi lo va, mi dangte thahnemngaihna atângin in hmangaihna chu a tak leh tak loh a lan fiah nân ka sawi zâwk a ni.

⁹In hriat angin kan Lalpa Isua Krista khawngaihna chu: hausa mahse a retheihna azâra in lo hausak theih nân nangmahni avângin a rethei êm êm a ni.

¹⁰Hê thilah hian rawtna ka siam a: kum khat liam tawha tih atâna in duh, a bul pawh in lo tan tawh thil bawhzui chu, in thatna tûr a ni satliah lo ve;

¹¹tûnah hi chuan in hlen chhuak tawh tûr a ni; pêk duhna in neih tawh ber ahnû, in neih ang tâwk zelin pê mai rawh u.

¹²Pêk duhna rilru a awm phawt chuan, miin a neih loh pui ni lovin, a neih ang tâwk zêla phal taka a pêk chu pawm awm tak a ni si a.

¹³Mi dangte zângkhai nâna phurrit siamsak che u chu ka tum lo ve;

¹⁴amaherawhchu, in neih chuang aliam hian tûna an tlâkchhamna a lo phuhrûka, an neih aliam pawh in tlâkchham phuhrûka a lo la nih ve theihna tûra ti ka ni zâwk; chutiang chu kan inchoawmdâwl tawn theih dân tûr pawh a ni asin.

¹⁵“A chhar tam chuan a nei tam chuang lo va, a chhar tlêm chuan a tlachham hek lo,” tih zia ang khân.

JUDAI RAMA MI THIANGHLIMTE TANA THAWHLAWM

¹⁶In tâna ka thahnemngaih ang bawka Tita thinlunga petu Pathian hnênah chuan lâwmthu awm rawh se.

¹⁷Ani chuan kan ngenna a pawm mai bâkah, mi taima tak a nih avâng leh a thahnemngaih vâng zawnin, ama duh thû ngeia in hnêna lo kal a ni mah zâwk.

¹⁸Ani rual hian unaupa kan awm tîr vê dawn a, amah hi Chanchin Tha avângin kohhran zawn zawnin miten an fak hlê a;

¹⁹chû chauh pawh a ni lo va, Lalpa chawimawi nân leh in inphalzia lantîr nân ani hi, hê thilpêk la khâwma khua kan fan vênnaa tel vê tûrin kohhranhovin an ruat a ni bawh.

²⁰Hê thilpêk thahnem tham tak kan lâk khâwmnaah hian tûma dem kai lohna tûr kan zawn hrâm hrâm a ni.

²¹Lalpa mithmu atân chauh pawh ni lovin, mihring ngaiha mâwi leh mâwi lo pawh kan dawn tel bawh a.

²²Anni rual hian kan unaupa kan awm kaltîr vê dawn a, a thahnemngaihna hi kawng tam takah kan fiah tawh bawh a; tûnah phe chu chuan nangni kan rin tawh êm che u avângin thahnem a ngai lehual a ni.

²³Tita chanchin hi miten an zawn che u chuan, ka kawppui leh nangmahni tâna ka thawhpui a ni e. Kan unaute chanchin hi an hre duh a nih chuan: kohhranho thuchah kengtu, Krista ropuina te an ni e.

²⁴Chuvâng chuan kohhranho hmâah in hmangaihna lo lantîr ula, nangni pawhin kan tâna chhuan tlâk in nihzia lo lantîr vê bawh rawh u.

BUNG 9

THILPEK ENKAWL DAN

¹Mi thianghlimte rawngbâwsak chungchang erawh chu in hnêna ziah kher pawh a ngai lo ve;

²in inphalzia ka hria a, Makedonia mite hnênah, ‘Akaia ram chu kum khat liam ta khân a inpeih dêr tawh,’ tiin ka lo chhuang thîn che u asin; in thahnemngaihna hian mi tam zâwk a chawh harh tawh a ni.

³Mahse, hemi chungchângah hian a lothlâwn maia fak che u ka nih loh nân leh, in lo inpeih theih nân unaute hi ka rawn tîr dâwn ta a ni;

⁴chuti lo zawng, Makedonia rama mi tuteemaw khân min rawn zui vê ta hlauh se, la inpeih lovin rawn hmu ta che u sela (nangni chu hmer tel lul lovin), nangmahni chhuangtu che u keini lam zâwk hian zahna kan hmu dâwn a.

⁵Chuvângin, unaute hi in hnêna lo kal hmasa a, rinna thutiam in lo inhuam tawh sâ anga lo inpeih hman tûra ngen che u tûlin ka hria a; chû chu intihluhna ni lovin, mahni thilphalna ang zawka kal tûr a ni.

HLIM TAKA PETU

⁶Heti hian ka ti a ni: Tlênte tuhtu chuan tlênte bawka a ât ang a; tam tak tuhtu chuan tam tak a ât ang.

⁷Mi tinin ui chung a pe lovin, pêk loh theih loh anga ngaia pe hek lovin, an thilunga an tum dân ang zêlin pe theuh rawh se; Pathian chuan hlim taka petu a ni a hmangaih ni.

⁸Pathianin khawngaihna tinrêng chu in chungah a vûr liam thei si a; tichuan, in mamawh thil engkim in lo ngah ang a, hna tha tinrêng thawh nân in luang liam thei ang;

⁹Heti hian ziah a ni: “A sem darh a; Retheite hnênah a pê a; A thâtna chuan kumkhua a daih dâwn si a.”

¹⁰Thlai chi tuhtu hnêna chi petu, chaw ei tûr petu, thlai chi tuh tûr petu leh in chi tuh sâ tipungtu leh in thâtna rah tihhlâwksaktu che u chuan

¹¹in thilphal êm avânga engkima a tihhausak che u avângin, keini lam pawhin Pathian hnêna lâwmthu sawina tûr kan neih phah a ni.

¹²Hê chhawmdâwlna hnâ hian mi thianghlimte tlâkchhamna chu a phuhrûksak chauh pawh ni lovin, Pathian hnêna lâwmthu sawina a lo luang liam ta hial a ni.

¹³Hê rawngbâwlna hian Krista Chanchin Tha thurin in zawm thâtzia te, anmahni tân leh mi zawng zawng tâna thilpêk lama in thilphal êm avângin Pathian an châwimâwi phah a ni.

¹⁴In hnêna Pathian khawngaihna awm hi a nasat êm avângin, nangmahni ngai êm êm chungin an tawngtaisak che u a ni.

¹⁵A thilpêk sawi hleih theih loh avâng hian Pathian hnênah lâwmthu awm rawh se!

BUNG 10

THLARAUVA INDONA

¹Kei Paula, hmaichhana tlâwm taka lang, râla khata nangmahni laka huai leh viau thîn si hian, Krista zaidamna leh nunnêmnain ka ngên a che u.

²In hnêna ka lo kal hunah tisa taka khawsâa min ngaitute lakah pâu tihkhauh ka hreh loh mai avânga inhrikthlâk kher a ngaih loh nân, nangni kha ka rawn ngên che u a ni.

³Tisain awm mah ila, tisa indo angin kan indo vê si lo.

⁴Keini indona râlthumte chu tisa thil a ni vê lo va, kulhpui nghet tak thiat thei Pathian thiltithethihna a ni zâwk si a.

⁵Suangtuahnaate leh thil sâng tinrêng, Pathian hriatna dodâl tûra indah sâng chawpte chu paih thlâin, ngaihtuahna tinrêng te chu Krista thu âwihna bâwihah kan hnûk lût thîn a;

⁶in thûâwihna a famkim hunah, thu âwihlohna zawng zawng hrem tûrin kan inpeih reng a ni.

PAULA THUNEIHNA DIK TAK CHU

⁷Pâwn lam lan dân maiin em ni thil in thlîr thîn? Mi tûpawhin Krista ta nia a inngai a nih chuan, amah ngeiin hei hi lo ngaihtuah nawn leh rawh se: amah chu Krista tâ a ni ang bawkin keini pawh Krista ta kan ni vê bawka asin.

⁸Lalpan thuneihna min pêk hi, nangmahni tihchhiatna tûr ni lovin, kan insiam thâtna tûr zâwk a nih avângin, inchhuan phah nân hmang uar deuh pawh ni ila ka zahpui hauh lovang;

⁹chuti a nih loh chuan, lehkhathawn hmanga tihthaihi tum che u ka ang dâwn asin.

¹⁰“A lehkhâ thawnte chu a ritin a khauih va, a taksa erawh chu âwm nêmtê, a kamchhuakte lah sit awm si,” an tih thîn kha.

¹¹Chutianga min lo titu chuan hei hi hre rawh se, in hnêna kan lo kal hmâa kan lehkhâ thu ang chiahin kan lo kal hunah pawh kan rawn ti ngei ang.

PAULA THUNEIHNA TAWP CHIN

¹²Mahni insawimâwite zingah chuan kan inchhiar tel ngam lo va, anni nên kan intehkhin ngam hek lo. Anni zawng anmahni leh anmahni an intehin an inkhaikhin thîn a, an â ngawt mai.

¹³Keini erawh chu Pathianin kan thawhna tûr bial min chantîr bâka mi kan chhuang vê lo vang, nangni pawh chu bial chhûng chuan a huam tel si che u a.

¹⁴Bial phâk loh pui bial che u angin (Kan thuneihnain nangmahni huam pha lo ang maiin) kan huam zau lutuk si lo; nangmahni hnênah a ni Krista Chanchin Tha hrila kan lo kal ni.

¹⁵Kan teh tâwk bâkin mi dangte thawhrimna chu kan chhuang lo va; mahse in rinna a thân ang zêlin, nangmahni avângin kan bial hi a la zau zêl ang tih kan beisei a,

¹⁶in ram piah lam thlengin Chanchin Tha kan hril zêl ang a; mahse bial danga mite thawh sâ chu kan uanpui lo vang.

¹⁷Nimahsela, “Inchhuanna tûr duh apiang chuan LALPA-ah inchhuang rawh se.”

¹⁸Mahni infak mâwi chuan lawm a hlauh si lo va, Lalpan a fak chuan lawm a hlauh zâwk a ni.

BUNG 11

AN RINAWMNA CHUNGCHANG

¹Ka ât deuh naah hian min lo dawhtheih ka duh hle mai, mi pawh in dawh na lailêng e.

²Pathian thîknain asin ka thîk che u ni; Krista hnênah chuan nula thianghlim tak anga ka pêk theihna tûr che u in, pasal pakhat ka hualsak si che u a.

³Nimahsela, rûlin finrâwl chhuaha Evi a bum ang khân, thianghlim taka Kristaa in awm dân ẵa te kha an hrui khawlohsak mai ang che u tih ka hlau a ni.

⁴Keinin kan hrilh che u ni lo, Isua dang chanchin hrila in hnêna lo kal apiang in lo ngai thei a, thlarau in chan ngai loh in chang thei mai zêl a, in la pawm ngai loh chanchin ẵa dang in lo pawm duh zêl mai si a.

PAULA LEH TIRHKOH SUAKTE

⁵Hêng tirhko challenge ber berte hi engti zâwng pawhin tluk loh ka inring bik lo asin.

⁶Thu sawi thiam ni lo mah ila, hriatnaah zawng ka duai bik lo vang. Kawng tinrêngah in zînga kan inlantîr vek tawh kha.

⁷Hlawh nei lova in hnêna Pathian Chanchin ẵa ka hril a, chawisâna in awm theihna tûra ka intihtlâwm khân thil ka lo tisual zâwk em ni?

⁸In rawng ka bawl lai khân, kohhran dangte sum tihekin hlawh ka lo dawng zâwk thîn asin.

⁹In hnêna ka awm laia ka tlâkchham lai khân tûmah ka tihautak lo va, Makedonia ram aẵa lo kal unauten ka mamawh minrawn tumsak zêl a. In tâna hautak tûra ka insiam hauh loh kha; chutiang bawh chuan mahni ka intumchawp zêl ang.

¹⁰Krista thutak keimahah a awm bawh a, chuvângin Akaia ramah ngat hi chuan tûma dâl rual lohva inchhuang thei ka ni asin.

¹¹Eng vâng nge? Ka hmangaih loh che u vâng em ni? Pathianin a hria e!

¹²Mi thenkhat chu keimahni anga lan tumin an lo inchhuang hlê a; mahse chhuan tûr daptute lakah chutiang remchânna chu ka sah chah theih nân, tûna ka tih dân ang hian ka ti zêl ang.

¹³Chutiang mite chu tirhko suak, thawktu ni ve si, mahse mi bumhmang, Krista tirhkoha insiam chawpte an ni si a.

¹⁴A mak hran lo ve! Setana ngei pawh êng tirhkohvah a insiamchawp thîn a ni.

¹⁵Chuvângin, ama rawngbâwltute pawh dikna rawngbâwltûah lo insiamchawp ve pawh ni se, thil mak a ni lo ve; an thiltih ang zêla tâwp hun zawng an la nei ngei ang.

HREH TAK CHUNGA UANNA

¹⁶Tûman mi â emaw min lo ti suh se, ka han sawi leh ang e. Amaherawhchu, tlêmtê tala ka uan theih nân mi â ang min lo dawh hrâm mai dân nia.

¹⁷Ka thu sawi hi Lalpa thû angin ka sawi lo va, mi â ang maiin, mahni inrintâwkna chhuangin ka sawi a ni zâwk.

¹⁸Tisâ taka mi tam tak an uan thîn avângin, kei pawh ka han uang vê teh ang.

¹⁹Nangni chu mi fîng in ni a; chuvângin mi âte chu thiam taka in dawh thîn kha!

²⁰Miin bâwihah siam che u sela, ei zo duak che u sela, bum che u sela, mahni inchâwimâwi sela, in hmaiah bêng che u sela, in dawh thei zêl a.

²¹Chutiang pawh ti vê thei lo khawpa kan lo chak lo kha a zahthlâk hial mai! Mahse, miin eng thil pawh a ngam chuan kei pawhin ka ngam tih hi â takin ka sawi a ni.

KRISTA TANA TAWRHNA

²²Hebrai mi an ni mâw? Kei pawh ka ni alâwm. Israel mi an ni mâw? Kei pawh ka ni e. Abrahamah thlah an ni mâw? Kei pawh ka ni vê bawh.

²³Krista rawngbâwltute an ni mâw? Mi â angin sawi ila, ka ni zâwk mah si a: ka thawkrim zâwk a, namên lova vuak ka tuar a, vawi duai lo tân inah ka tâng a, thih hlauhawmna hmun te lah ka pal tlang hnem êm êm a.

²⁴Vuak khata wawi sawmli vuak tling lo zêlin Judate lakah tûm ngâ vuak ka tâwk a.

²⁵Tiangin wawi thum min vua a, wawi khat lungin min dêng a; wawi thum lawng chhiatna ka tâwk a; ni khat leh zan khat tuipui chungah ka tâng tawh a;

²⁶Ka zinnaah wawi tam tak tui laka hlauhawmah te, suamhmang laka hlauhawmah te, ka chipuite laka hlauhawmah te, Jentailte laka hlauhawmah te, khawpuia hlauhawmah te, thlalêra hlauhawmah te, tuipuia hlauhawmah te, unau suakte zînga hlauhawmah te;

²⁷thawhrimna leh chauh chhiatnaah te, wawi tam tak mut theih lohnaah te; rilâtam leh tuihâlnaah te, wawi tam tak chaw ngheinaah te, khawsik leh saruaka awmnaah te nê;

²⁸hêng bâkah hian kohhranho zawng zawng ka ngaihtuahna: ni tina min delh rittu hi a awm reng bawh a.

²⁹Mi chak lote ka tuarpui lo ngai em ni? Mi an tlûkin ka vei lo ngai em ni?

³⁰Chhuang tûr ka nih vêk chuan ka chak lohna thilte a ni ka chhuan dân ni.

³¹Kan Lalpa Isua Krista Pa leh Pathian, kumkhuaa châwimâwia chuan dân ka sawi lohzia a hria e.

³²Damaska khuaah khân lal Areta hnuaia governor khân mi man tumin Damaska mite chu khawpui a vêtîr a;

³³mahse kulh hrûla tukverhah chuan bâwmin min uaithlâktîr a, a kut ata ka pût chhuak ta a ni.

BUNG 12

PARADIS INLÂRNA

¹A sâwt chuang lo nachungin ka'n uang zêl teh ang. Ka sawi tûr chu Lalpa hnên aẵa inlârna leh hriattîrna thû a ni a.

²Kum sâwm pali kal ta khân Kristaa mi pakhat ka hria, (taksân nge a awma taksa lovin tih chu ka sawi thei lo: Pathianin a hria); chûtiang mi chu vân thumna thlenga lâk chhohvin a awm a.

³Chûtiang mi chu ka hria, (taksâa awm nge a nih taksa lovin tih erawh chu ka sawi thei lo: Pathianin a hria;)

⁴Paradis-ah lâk chhohva a awma, thu sawi hleih theih loh, mihring tâna sawi thiang lote pawh a hria tih ka hria.

⁵Chutiang mi chu a ni ka chhuan tûr chu ni; mahse keima chak lohna chauh lo chu mahni ka inchhuang lo vang.

⁶Inchhuang duh pawh ni ila, mi â chu ka nih phah lo vang, thu tak chauh ka sawi dawn si a. Ka insûm zâwk ang, chuti lo chu mi tûpawhin mi hmuh ang leh ka laka thú an hriat ang aiin min lo ngai ropui palh ang e.

TÍSÂA HLÎNG

⁷Thlarauva hriattîrnate chu a tam êm avânga ka indah sân lutuk loh nân, tísaa hlîng chu pêk ka ni, mi nghaisatu tûr Setana tirkoh chu; chuti a nih ngawt loh chuan ka indah sâng lutuk dawn si a.

⁸Chû thil chuan mi kiansan theih nân Lalpa chu vawi thum ka dîl a.

⁹Ani chuan ka hnênah, “Ka khawngaihna hi i tân a tâwk e, ka thiltihtheihna hi chak lohnaah asin tihfamkima a awm ni,” a ti ta a. Chuti chuan, Krista thiltihtheihna chu ka chung a awm reng theih nân, lâwm takin ka chak lohnate hi ka chhuang tawh zâwk a ni.

¹⁰Chuvângin, Krista avângin chaklohnaah te, sawi chhiatnaah te, tlâkchhamnaah te, tihduhdahnaah te, mangannaah te pawh ka lâwm thîn. Ka chak loh lai hian a ni ka chak thîn ni.

TIHKOH CHHINCHHIAHNATE

¹¹Mi â ang maiin ka uang ta vak mai si a; nangnin ti lo thei lovah min siam a nih hi. Nangni hi asin mi châwimâwitu tûr chu ni; engmah ni lo mah ila, tirkoh lian berte pawh eng kawngah mah ka tluk lo bîk si lo va.

¹²Dik tak chuan tirkoh nih chhinchhiahna hrang hrang—thlarauva chhinchhiahna te, thilmak tih te, thiltih ropui tak takte chu dawhthei taka in zînga ka lantîr thîn kha.

¹³Kohhran pâwl dangte aia nêp bîkna in nei rêng em ni? Keima’n ka tihhautak loh êm che u avâng te kha a nih ngawt loh chuan. Hê diklohnaah hi chuan min ngaidam mai teh u!

KOHRAN HMANGAIHNA

¹⁴Tûn hi in hnêna lo kal tûra ka inpeih tum thumna a ni ta. Karawn tihhautak lo vang che u, in thil neihi ni lovin nangmahni zâwk a ni ka duh ni. Faten nu leh pate tân an khâwlsak ngai lo va, nu leh paten an fate tân an khâwlsak zâwk thîn a ni.

¹⁵Kei chu in thlarau tân lâwm takin ka in hmang ral ang a, ka insêng ral vek ang; mahse ka hmangaih nasat poh che u leh min ngainêp ting mai si a.

¹⁶Chutiang chu ni mahse kei chuan ka tihhautak lo va che u; chuti chung pawhin kei mi vervêk hian vervêk takin ka man che u a lo ni maw!

¹⁷In hnêna ka tirkhe zînga mi hmangin hlâwk phah nân ka lo hmang che u em ni zâwk le?

¹⁸Tita churawn tîrin ama rualin kan unaupa pawh karawn kaltîr a. Tita chuan hlâwkna um nân a hmang che u em ni? Thlarau hmun khat pûa lêng dún kan ni zâwk lo vem ni? Kawng thuhmun reng kan zawh tlâng a ni lo vem ni?

¹⁹A nih loh leh, in hnêna thiamthu sawiah min ngai em ni? Kristaah chuan Pathian mithmuhah thú kan sawi zâwk asin. Duh takte u, engkim kan tih zawng zawng hi nangmahni siam thâtna tûr zâwk a ni.

²⁰Ka lo kal hunah duh anga karawn hmuh loh che u-a, nangni pawhin in tum anga min hmuh loh ka hlau a ni. Chuti lo zawng inhauhna te, in itsîkna te, thinrim hrîk thlâkna te, mahnihmasialna te, insawi chhiatna te, sêsêa thu lâk te, chapona te, intihbuaina te a lo awm dah ang e;

²¹chuti lo chuan, ka lo kal leh hunah, in mithmuh lai ngeiin ka Pathianin min timualphovin, an thil tihsual la sim sî loh, bawhlhlawhna te, inngaihna te, an lo hur thinna te chu ka thâkhum vak ang tih pawh ka hlau asin.

BUNG 13

THUNEIHNA NENA LO KAL

¹Tûn hi in hnêna ka lo kal wawi thumna tûr a ni. “Hretu pahnih emaw, pathum emaw kâin thu tinrêng tihngheh a ni ang.”

²In hnêna ka lo kal wawi hnihnaah kân ka hrilh lâwk tawh che u kha. In hnêna ka awm loh lai pawha ka ziahna chhan chu, tûn hmâa thil sual titute leh mi dang zawngte pawh kha, ka lo kal hunah chuan tumah ka dîm lo vang.

³Kristan keimahah thú a sawi ngei em tih fiahna in zawng bawka, ani chu nangni laka chak lo ni lovin, nangmahniah thiltitheih tak a ni zâwk si a.

⁴Ani chu chak lohna avânga khenbeh a ni nâ a, mahse Pathian thiltihtheihna nung a ni. Keini pawh amahah chuan kan chak lo bîk lo, mahse nangmahni lama Pathian thiltihtheihna avângin a hnênah kan nung vê ang.

⁵Rinnaah hian in awm nge awm lo tih nangmahni lam inen fiah ula; nangmahni ngei infiah thîn rawh u. Isua Krista chu nangmahniah a awm tih in hre lo vem ni, nge, chû fiahnaah chuan in tling zo lo zawk?

⁶Keini erawh chu fiahnaah hian paih thlâk kan ni lo tih in la hriat ngei ka beisei tlat a ni.

PAULAN NUNNÊM NIH A THLANG

⁷Keini hi pawm tlâk bîk anga inlantîr kan tum vâng ni lovin, hnâwl tlâk lek pawhin awm dawn mah ila, nangni chuan thil sual engmah ti lova, rinawm taka in awm theihna tûrin Pathian hnênah ka dîl thîn a ni.

⁸Thutak tan tûr chauh lo chuan, thutak do zâwngin engmah kan ti thei si lo va

⁹Kan chak loh lai pawha nangni in chak hian kan lâwm thîn a ni. Tihfamkima in awm hi kan duh dân tak a ni e.

¹⁰Chutichuan, tichhe tûr ni lova, siam tha tûr zâwk che u in Lalpan thuneihna min pê a ni. In hnêna ka awm huna na taka ka zilh loh nân che u in hnêna ka awm loh lai hian hêng thute hi ka ziaak a nih hi.

CHIBAI BÛKNA LEH MALSAWMNA

¹¹A tâwp berah chuan unaute u, dam takin u le. Lo famkim tawh ula. Inrem tlâng takin, thinslung hmun khat pûin, thlamuang takin awm rawh u; hmangaihna leh remna Pathian chuan awmpui zêl che u rawh se.

¹²Fawh thianghlimin chibai inbûk tawn rawh u.

¹³Mi thianghlimin zawng zawngte hian chibai an bûk a che u.

¹⁴Lalpa Isua Krista khawngaihna te, Pathian hmangaihna te,
Thlarau Thianghlim pâwlina te chu in zâa hnênah awm rawh se.
Amen.

GALATIA

Ziah tu: Paula • Ziah kum: A.D. 49

Hei hi Galatia rama kohhran hrang hrangte hnêna Paula lehkathawn a ni a. Galatia hi Asia Minor (tunlai Turkey ram)-a awm a ni. A tira hê rama chêngte chu Phrugia mi an ni a, thingbul lungbul be mi an ni. Juda pêm darhho tam tak an chêng vê a. Paula khân a zin vawi khatnaah Barnaba nên Galatia chhim biala khaw thenkhat, Ikoniam, Lustra leh Derbe te an tlawh a, kohhran pawh an din a. Hê lehkha a ziah lai hian Galatia kohhran chu zirtîrna dik lo, Isua Krista ni lo, chanchin t̃ha dang zirtîrnain a tuam mek a; chû bâkah chhandam ni tûr chuan Juda dâna serhtan leh dân zawm that a t̃ul tia zirtîrna chuan a lo hneh mêk a ni. Chutiang kârah chuan Paulan Krista chhandamna chu dân zawm that lam ni lovin, khawngaihna avânga rinnaa chhandam a ni tih a hrilh fiah. Galatia lehkathawn hi Bible-a lehkhahu 48-na a ni a, bung 6 a awm a, châng 149 a awm bawk.

BUNG 1

CHIBAI BÛKNA

¹Paula, tirhko (mihringte tirh chhuah ni lo, mihring zâra tih pawh ni lo, Isua Krista leh mitthi zînga ta kai thotu, Pa Pathian zârah) leh,

²ka hnêna unau awm zawng zawngte chuan, Galatia rama kohhran hnênah:

³Pa Pathian leh kan Lalpa Isua Krista hnên ațangin khawngaihna leh remna chu in hnênah awm sela,

⁴ani chuan kan Pa leh kan Pathian duh zâwngin t̃unlai khawvêl sual laka min chhan chhuah theih nân kan sualte avângin amah ngei chu a inpe ta;

⁵ama hnênah chuan ropuina chu chatuanin awm rawh se. Amen.

CHANCHIN T̃HA PAKHAT CHAUH

⁶Krista khawngaihna azâra nangmahni kotu che u a nih vei nên, heti thuta chanchin t̃ha danga in han pênzan thei mai hi a mak ngei mai.

⁷Hei hi eng dang vâng mah a ni lo: nangmahni tibuai t̃urin Krista Chanchin T̃ha tihkhawloh duhtu t̃ute emawin an rawn tichî-ai mai zâwk che u a ni.

⁸Keimahnii emaw, vân ațanga Vântirhkohten emaw, Chanchin T̃ha kan hrilh tawh che u ni lo, chanchin t̃ha dang engpawh hrilh che u sela, ânehche dawngin awm rawh se.

⁹Kan sawi tawh t̃hin bawk kha t̃unah hian ka sawi nawn leh dawn, in lo pawm tawh sa ni lo chu, t̃upawhin chanchin t̃ha dang an hrilh che u chuan ânehche dawngin awm rawh se,

¹⁰Mihring tihlâwm nge ka tum Pathian? Mite zînga tlâktlum tum mai em ni ka nih? Mihring tilâwmtu mai ka nih chuan Krista bâwih ka ni lo vang.

TIRHKOH NI TURA KOH

¹¹Unaute u, Chanchin T̃ha ka hrilh che u kha mihring thû mai a ni lo tih ka hrilh a che u.

¹²Mihring hnên ațanga dawng ka ni lo va, tute zirtîrna dawng emaw pawh ka ni hek lo, Isua Krista inlârna ațang ngeia dawng ka ni zâwk asin.

¹³Juda sakhuaa ka awm dân hmasa pawh in hriat tawh kha, khatia Pathian Kohhran tihchhiat tuma ka beih dân leh ka tihduhdah nasatzia te kha.

¹⁴Juda sakhuaah hian ka chîte zînga ka rualpui leh thawhpui tam tak aiin ka kal thûk zâwk daih a, min thlahtute thurochhiah chungah t̃hahnemngaihna lamah a firfiak ber pâwlah ka t̃ang hial a ni.

¹⁵Amaherawhchu, Pathian duhzâwnga ka nu pum chhûng ațanga mi serh hrangtu leh, a khawngaihna avânga mi kotu chuan,

¹⁶Jentailte zînga a chanchin ka hril theih nân a Fapa ngei ka hnênah a inlârta a, khatih lai khân kei chuan t̃isâ leh thisen ka rân nghâl lo va,

¹⁷tirhko lo ni hmasa tawhte panin Jerusalemah ka han kal bawk hek lo; Arabia ramah ka kal ta zâwk a, chumi hnûah Damaska khuaah ka kîr leh ta a ni.

JERUSALEMA MI KA TLAHWTE

¹⁸Kum thum hnûah chuan Petera hmu t̃urin Jerusalemah ka han kal a, a hnênah ni sâwm leh pangâ ka châm a,

¹⁹Tirhko dangte zîngah Lalpa unau Jakoba chauh lo chu t̃umah ka hmu lo.

²⁰(In hnêna ka thu ziahah hian Pathian mithmuhah ka daw lo asin.)

²¹Chumi hnûah Suria leh Kilikia ramahte ka kal zêl a.

²²Khatih lai khân Judai ram kohhrana Krista mite hmêlhriat pawh ka la ni lo bawk a.

²³Miten min hriat dân ber chu, “Hmâna min tiduhdahtuin rinna tihboral a tum t̃hin kha, t̃unah hian a thuhrlitua a t̃ang leh ta zâwk a ni,” tia mi sawi chauh hi a ni.

²⁴Tichuan, keimah vângin Pathian an châwimâwi ta a ni.

BUNG 2

CHANCHIN T̃HA HUMHALH

¹Kum sâwm leh kum lî a vei hnûah Barnaba nên Jerusalemah kan han kal leh a, Tita pawh ka hnênah a kal vê a.

²Hriatîrna ka dawn avânga han kal ka ni a, Jentailte zînga Chanchin T̃ha ka puan t̃hin dân ka han hrilh a; hruaitu lianhote erawh chu a hranga hrilh an ngai a; chuti lo zawng, awmze nei lo hian ka lo t̃lân thlâwn hlah dah ang e.

³Nimahsela, ka mi hruai Tita pawh chu Grik mi ni mah se, serh an tan luihtîr lo.

⁴Chû thil chu unau suak, a rûk t̃ea an lo hruai luhte avânga lo awm a ni (bâwiha min siam theih nân Krista Isuaa zalenna kan neih t̃ak enthla t̃ur hian chûng mite chu a rûkin an lût zâwk a ni).

⁵Nimahsela, Chanchin Țha thutak hi in tâna humhalh tlat kan duh avângin, chûng mite thu zâwm tûr chuan dârkâr khat chauh pawh kan intulût duh lo a nih kha.

⁶Mi pawimawh deuh te pawh an lo awm a ni mahna, keini tân erawh chuan engtihna mah an ni chuang lo; Pathianin tûmah duhsak bîk a nei si lo va, chûvângin an lo indah pawimawh deuh a nih pawhin kan tân chuan engmah a lêm chuang lo.

⁷Chutih ahnêkin, serhtante tâna Chanchin Țha Petera hnênah kawltîra a awm angin, serhtan lohte tâna Chanchin Țha chu ka hnênah kawltîr a ni tih pawh an hai lo va.

⁸(Serhtante tirhkoh ni tûrin Petera tâna hlâwk taka thawhsaktu ngei chuan, Jentailte tirhkoh ni tûrin ka tân pawh sâwt takin mi thawhsak ta si a.)

⁹Jakoba, Kipha leh Johana—ban pawimawh bera ngaihten keima hnêna pêka awm khawngaihna chu an hmuhin, anni serhtante hnêna kala, kei leh Barnaba chu Jentailte hnêna kal tûrin inpâwlina kut dîng lam min pe ta a ni.

¹⁰Retheite hre reng tûrin min duh mai a ni a, chu lah chu ka tih chûk zâwng tak a lo ni si a.

DÂN LAMA LÊT LOH TUR

¹¹Petera chu Antiokei khuah a lo kal laiin demawm taka a awm avângin hmaichhanah ngei ka khak a;

¹²Jakoba hnên ațanga mi Țhenkhat an lo kal hmâ zawng khân ani chuan Jentailte hnênah chûw a ei ȥhîn a; mahse chûng mite lo thlen vêleh serhtan mite a hlauh avângin an hnên ata a inla hrang leh daih a.

¹³Juda dang zawngte pawhin verther taka a tih dân chu an entawn vê zêl baw si a, Barnaba meuh pawh an vervêkna chuan a hruai bo vê ta hial a ni.

¹⁴An thiltih dân chu Chanchin Țha thutak nêna an inrem lohzia ka hmuhin, an zâa hmâah Petera chu ka kamkhat a, “Nang Juda mi i ni a, Juda anga awm lovin Jentail angin i khawsâ a. Chuti ni si, engtizia nge Jentailte chu Judate anga awmtîr kher i tum le?” ka ti ta a ni.

¹⁵Keini zawng Juda mi ni sâ rêng kan ni a, Jentail misual kan ni vê si lo va,

¹⁶dân thiltihte avângin miin thiam a chang thei lo va, Isua Krista rinna avâng chauhvîn thiam a chang zâwk tih kan hria; keini pawhin dân thiltih avâng ni lovin, Krista rinna avâng a thiam kan chan theih nân, Krista Isua chu kan ring a ni; dân thiltihte avângin tûma’n thiam an chang dân si lo.

¹⁷Kristaa thiam channa kan zawn lai khân, misual kan nihzia kan inhmu chhuak a nih si chuan, Krista chu sual rawngbâwlto a ni tihna em ni? Teuh lo mai!

¹⁸Ka thil ȥhiah tawh hnû ka sak ȥhat leh si chuan bawhchhetûah ka insiam ringawt dân asin.

¹⁹Pathian lama ka nun theih nân kei zawng dân avâng vêkin dân lamah ka thi tawh si a.

²⁰Krista ruala khenbehin ka awm ta; mahse ka la nung si a; nunga hi keimah ka ni tawh lo va, Krista chu keimahah a nung tawh zâwk a ni; tûna tîsâa ka nung hi, min hmangaihtu leh ka tâna

a nunna hlântu Pathian Fapa ringa nung ka ni.

²¹Pathian khawngaihna chu ka hnâwl lo va; dân avâng a thiamchanna awm ni se, Krista thihna hi a thlâwn a ni dân asin.

BUNG 3

RINNAA THIAMCHANNA

¹Aw nangni Galatia mi â te u! In mithmuh ngeiah Isua Krista chu khenbeh a nihzia Chiang taka târlan a nih tehlul nêna, thutak zâwm lo turin tu nge dân â che u?

²Hei chauh hi in hnên ațanga hriat ka duh: Thlarau in dawn kha dân zawm ȥhat avâng a hmu nge in nih, rinna thû in lo hriat avâng zâwkin?

³Heti êm hian mâw in lo ât le? Thlarauva bulȥan ve tawh si, tîsâ deuhin in zo dân a ni maw?

⁴Engmah lo mai ni ta se, in tuar tawhna zozait kha a thlâwn dân tihna em ni le?

⁵Chûvângin, in hnêna Thlarau petu che u leh, in zînga thilmak titu chuan dân thiltihte avâng a pe che u nge a nih, rinna thu in lo ngaihtlâk avângin?

⁶Abrahama pawhin ‘Pathian a ring a, chu rinna chu ama thiamchannaa ruat’ a nih kha.

⁷Chutichuan, rinnaa awmte chauh chu Abrahama fate an ni tih hre rawh u.

⁸Pathian Lehkha Thû chuan rinna avângin Pathianin Jentailte thiam a la chantîr dân tih hmu lâwkin, “Nangmahah chuan hnam tin malsâwmin an awm ang,” tiin Abrahama hnênah Chanchin Țha a lo hrilh tawh a.

⁹Chûvângin, rinnaa awmte chuan ringtu Abrahama nêna malsâwmna an dawng a ni.

DÂNIN ÂNCHHIA A THLEN

¹⁰Dân zawm ȥhat leh ȥhat lohva inngat apiang chu ânhche hnuaiah an la awm reng tihna a ni; “Dân lehkhah thu ziaik zawng zawngin ti tûra a sawi ang ti lo apiang chu ânhche dawngin an awm ȥhîn,” tih ziaik a ni si a.

¹¹Mahse, Pathian mithmuhah chuan tûmah dân zawm ȥhat avâng a thiamchang an awm lo tih a lang reng a ni, “Mi dik chu rinnain a nung ang,” tih a nih zâwk kha.

¹²Dân chu rinna a ni lo va; mahse “dân zâwmtu chuan dân chu a nunpui tûr a ni,” tih a ni si a.

¹³Krista chuan kan aiah ânhchia a lo phur a; tichuan dân ânhche laka ta chu min tlan chhuak ta; (“ȥhinga khaikân apiang chu ânhche dawng a ni,” tih ziaik a nih kha),

¹⁴Abrahama hnêna malsâwmna chu Jentailte hnênah Krista Isua zâra a lo awm theih nân leh, Thlarau pêk min tiam pawh chu rinnaa kan lo hmuh theih nân a ni.

THUTIAM DANGLAM LO

¹⁵Unaute u, mihring tih dânin ka sawi a ni: mihring thuthlung mai pawh ni mah se, nemngheh a nih hnû chuan tûma’n an phelh tawh ngai lo va, an belhchhah ngai hek lo.

¹⁶Chuvângin, Abrahama leh a Chithlah hnênah a ni thû chu tiam a awm ni. Mi tam tak hnêna sawi angin, “Chi thlahte hnênah,” a ti lo va, mi pakhat kâwk bîkin, “I Chithlah hnênah chuan,” a ti a ni zâwk a, chû chu Krista a ni.

¹⁷Heti hian ka’n sawi ang e: Pathianin thuthlung, Kristaa a lo tihngheh tawh chu, a hnû kum zali leh sawmthuma dân lo awm leh tâ khân thiatin a nuai bo thei lo.

¹⁸Dân zawm avânga ro luahta a nih chuan thutiam vâng a ni lo tihna a ni a; mahse Pathianin ro luahtu tûr chu thutiam hmangin Abrahama hnênah a pê a ni.

DÂN PÊK CHHAN

¹⁹Dân hi eng vâng a lo awm nge? Bawhchhiatna avângin Chithlah lo lan hmâa thutiam belhchhah nâna pek a ni; Vântirhkohte kal tlangin remna siamtu palai kuta pêk a ni.

²⁰Palai rêng rêng hi mi pakhat tân chauhva palai a ni ngai lo, Pathian erawh chu pakhat a ni a.

²¹A nih loh leh, dân chuan Pathian thutiamte chu a kalh ta em ni? Kalh teh suh e! Nunna pe thei dân chu pêk lo ni tawh sela chuan, thiamchanna ngei pawh hi dân avânga lo awm tûr a ni ang chu.

²²Nimahsela, Isua Krista rinna avânga thiltiam chu a ringtute hnêna pêk a nih theih nân, Pathian Lehkha Thû chuan engkim hi sual thuhnuaiha a kharkhip ta vek a.

²³Mahse, rinna a lo thlen hmâa, rin tûr taka chu tihlan a la nih hmâ si khân, dân hnuaiah kan tâng thup a nih kha.

²⁴Chuvângin, rinna avânga thiam kan chan theih nân dân chu Krista hnên lama min kaihruaitu a ni.

²⁵Rinna a lo thlen hnûah erawh chuan, kaihruaitu thuhnuaiha kan awm tawh lo ve.

FAPA LEH ROLUAHTU

²⁶Krista Isua rinna avângin in vaiin Pathian fate in ni ta si a.

²⁷Nangni zîngah Kristaa baptisma chang apiangte kha Kristaa inthum in ni tawh reng a.

²⁸Chutah chuan Juda leh Grik a awm chuang lo, bâwih leh zalên a awm hrang hek lo; mipa leh hmeichhia a thliar hrang chuang lo va, Krista Isuaah chuan in zân pum khat in ni vek si a.

²⁹Krista tâ in nih chuan Abrahama thlah in ni a, thutiam anga ro luahtu tûr in ni e.

BUNG 4

¹Heti zâwng hian ka’n sawi ang e: ro luahtu tûr chu mi zawng zawng chung a hotu ni mah sela, naupang a la nih chhûng chuan bâwih nêd danglamna rêng a la nei chuang lo,

²a pa hun ruat a thlen hmâ loh chuan amah vêngtu leh enkawltute hnuaiah a la awm ri h a.

³Chutiang bawkin keini pawh naupang kan nih lai khân khawvêl zirtîrna dik lo hnuaiah bâwiha kan awm kha.

⁴Nimahsela, hunbi kim a lo thlen khân, Pathianin a Fapa hmeichhe hrin, dân hnuaia lo piang chu a rawn tîr a,

⁵fa nihna kan chan theih nân leh dân hnuaia awmte a tlan chhuah theih nân.

⁶Fa in lo nih tâk avângin, Pathianin a Fapa Thlarau chu in thinlungah a rawn chêtîr tawh a, chû Thlarau chu “Abba! Ka pa!” tiin a âu chhuak thei ta a ni.

⁷Chuvângin, bâwih i ni tawh lo va, fapa i ni zâwk e: fapa i nih avângin Krista zâra Pathian ro luahtu tûr i ni ta zâwk a ni.

KOHHAN TANA THAHNEMNGAIHNA

⁸Amaherawhchu, tûn hmâa Pathian in hriat loh lai khân, an pianphung aţang rêng pawha pathian ni hlei lote rawng in bawl thîn kha.

⁹Tûna Pathian in lo hriat hnû hian, emaw, Pathian mi hriat in lo nih hnu hian tih zâwk tûr a ni e, engah nge khawvêl thil nêp leh engmah ni hlei lo lama in hawi lêt leha, chutiang bâwiha in awm duh leh tâk mai?

¹⁰Nî te, thlâ te, hun te, kum te in serh leh ta mai a nih hi.

¹¹In tân thâ ka sêng thlawn ang tih pawh ka hlâu hlei lo ve.

¹²Unaute u, keimah anga awm tûr in ka ngên a che u, kei pawh nangmahni anga ka awm hi. Ka pawl engmah in khawih hek lo.

¹³Taksa chak lohna avânga in hnênah Chanchin Tha hril hmasa ka ni tih in hriat kha.

¹⁴Ka taksâa fiahna thil thleng, in tâna ngaimawhawm tak tûr chu in hmusit lo va, in hnar hek lo; Pathian Vântirhkohe angin, Krista Isua ang maiin min lo tîtha a nih kha.

¹⁵Vânnei in intihnte kha khawiah nge a nih tâk le? Theih ni se, in mitte kher chhuaka, mi pêk in inhuamzia te pawh ka hai lo asin.

¹⁶Thu dik ka hrilh che u avâng khân in hmêlmâ ka ni ta em ni?

¹⁷Thahnemngai taka nangmahni rawn thlêm lungâwi tumtute hian in thâtna tûr an duh vâng a ni lo; anmahni lam chauh in hawi theih nâna lâk hran daih che u an tum a ni.

¹⁸Thil tha ti tûr chuan in hmuh phâka ka awm lai chauh ni lovin, englai pawha thahnemngaih hi a tha a ni.

¹⁹Ka naute u, Krista chu nangmahniah siam puitlina a awm hmâ loh chuan nau veia ka vei leh tâk che u hi.

²⁰Tûnlai tak phei chuan in hnênah awm îla, ka aw-kî te ka han tidanglam vêl tûr; a tihngaihna tak pawh ka hre lo va che u.

THUTHLUNG PAHNIH

²¹Dân hnuaia awm chhâk te u, mi hrilh rawh u, dân thû chu in ngaihla lo vem ni?

²²Heti hian a inziak: Abrahaman fapa pahni h a nei a, pakhat chu bâwihnu lakah, pakhat chu zalên nu lakah a ni a.

²³Bâwihnu laka mi chu tîsa dân angin a piang a, zalên nu laka mi erawh chu thutiam vâng a piang a ni.

²⁴Chûng thû chu entîrna a ni. Chûng chu thuthlung pahni h an ni a: pakhat chu Sinai Tlâng a mi, bâwih ni tûr fa hringtu chu Hagari a ni.

²⁵Tichuan, Hagari hi Arabia rama Sinai Tlâng chu a ni a, tûnlaia Jerusalem awm dân nêd hian ang khat an ni, a fate nêd bawihah an awm si a.

²⁶Mahse, chung lam Jerusalem erawh chu a zalên a, chu ngei chu kan zavaia nu a ni.

²⁷Heti hian ziaak a ni: “Aw ching nu, hlim rawh, Nang fa hring ngai lo nu! Âu chhuak phut rawh, Nang, nâu vei ngai lo nu! Pasal pawm lai nei ai chuan Khawhar nu chuan fa a nei tam zâwk asin.”

²⁸Unaute u, keini hi Isaaka ang khân thutiam fate kan ni.

²⁹Nimahsela, tîsa dâna lo piang khân Thlarau dâna lo piang kha a lo tiduhdah ang khân, tûnah ngei pawh hian chutiang bawh chu a ni.

³⁰Nimahsela, Pathian Lehkha Thûin engtin nge a sawi? “Bâwihnu chu a fapa nêen hnawt chhuak rawh; bâwihnu fapa chuan zalên nu fapa chu ro a luahpui dâwn si lo,” a ti a ni.

³¹Chutichuan unaute u, bâwihnu fate kan ni lo va, zalên nu zâwk fate kan ni.

BUNG 5

KRISTIAN ZALÊNNA

¹Chuvângin, Kristan min chhuah zalenna hmunah hian ding nghet ula, bâwih nghâwngkawlah tâng leh tawh suh u.

²Ngai teh u, kei Paulan in hnêna ka sawi hi, serh in tantîr chuan Krista chu enga tân mah in ti lo tihna a ni.

³Serh tantîr leh apiangte hnênah dân pumpui zâwm tûrin leibâ an insiam leh ringawt a ni tih ka sawi nawn leh a ni.

⁴Nangni dâna thiamchan tumte u, Krista lakah mi hrang in ni ta; khawngaihna in tlûksan tâk hi.

⁵Keini erawh chuan rinnaa thiamchan beiseina chu Thlarauvin kan thlîr reng asin.

⁶Krista Isuaah chuan serhtan engmah a sâwt lo va, serhtan loh pawh engmah a sâwt hek lo; nimahsela hmangaihna in a thawh chhuah rinna chu a sâwt êm êm a ni.

HMANGAIHNAIN DÂN A ZAWM FAMKIM

⁷In tân thât thîn vei nen le; thutak in zawmna tûr hi tuin nge lo dâl che u?

⁸Hetianga thlêmtu che u hi nangmahni kotu aţanga chhuak a ni hlei nêen.

⁹Dâwidim tlêm têin chhang hlâwm chu a pumin a fan chhuak thîn.

¹⁰Rilru dang daih in la pu êm lo vang tih Lalpaah chuan ka ring tlat a; nangni tibuitu che u chu tûpawh ni se, a mawh a la phur ngei ang.

¹¹Unaute u, kei hi serhtan a tûl e, tiin la tlângau zêl ila, engah nge min la tiduhdah cheu ang le? Chuti ni se, Krâws thû kan hril pawh hi tûma’n huatthûah an la duh tawh nâng.

¹²Nangmahni tibuitute chu anmahni zâwk intan fithla law law se ka va duh êm!

¹³Unaute u, nangni zawng zalên taka awm tûra koh in nih kha; chû zalênna chu tîsa thil tihna remchângah erawh chuan hmang hauh suh ula, hmangaihna in rawng inbâwlsak tawn hlauh zâwk rawh u.

¹⁴Dân thû zawng zawng chu hê thu kam khat hian a tifamkim vek asin: “Nangmah i inhmangaih angin i thenawm khaw vêngte i hmangaih tûr a ni,” tih hi.

¹⁵Nimahsela, in inseh a, in inei tawn mai chuan, in intichhe tawn mai dâwn si a, fîmkhur rawh u!

THLARAUA AWM

¹⁶Hei hi ka sawi duh a ni: Thlarauvah awm rawh u, tichuan tîsa châkna chu in puitlin dâwn lo nia.

¹⁷Tîsa châkna hian Thlarau a do tlat a, Thlarau hian tîsa thil a do tlat bawh a. Hêng thil indo tawn tlat avâng hian in duh zâwng thil engmah in ti thei lo rêng a ni.

¹⁸Nimahsela, Thlarau hruaia in awm chuan dân hnuaia awm in ni tawh lo ve.

¹⁹Tîsa thiltithe chu hai rual a ni lo, hêngte hi a ni: uirêna te, inngaihna te, bawlhhlawhna te, hurna te,

²⁰milem biakna te, dâwithiamna te, inhuatna te, inhauhna te, thîkna te, thinura rîk phut chîn te, mahnihmasialna te, inlunguallohna te, rin hranna te,

²¹itsîkna te, tualthahna te, zu ruihna te, zu hmuna nuam tâwna te leh chutiang thilte chu a ni. Chutiang thil tih chîngte chuan Pathian lalram hi an chang vê lo vang, tia ka hrilh lâwk thîn che u kha, tûnah pawh hian ka hrilh leh che u hi.

²²Thlarau rah erawh chu hmangaihna te, hlimna te, remna te, dawhtheihna te, ngilneihna te, thâtna te, rinawmna te,

²³zaidamna te, insûmtheihna te a ni. Chutiang kalh zâwngin eng dân mah a awm si lo va.

²⁴Krista Isuaa mite chuan an tîsâa sual tih châkna chu a suangtuahna chawpin an khêngbet tawh asin.

²⁵Thlarauva nung kan nih chuan Thlarauvah zêl i awm tlat ang u.

²⁶Mahni chauh inngaihlu lovin, initsîk tawn hek lovin, incho tawn zawngin engmah i ti suh ang u.

BUNG 6

RITPHURH INCHHÂWK TAWNIN

¹Unaute u, mi thil sual ti lai phâwkin awm ta se, nangni thlarau mite chuan lainatna thlarauvin tung ding leh rawh u; nangni pawh thlêmna in tawh ve hlauh ang e, mahni lo invêng thâ zawk rawh u.

²In phurritte inchhâwk tawn ula, tichuan Krista dân chu in hlen chhuak dâwn zu nia.

³Mahni lam engmah ni si lova, lo inngaih pawimawh viau hi mahni inbum mai an ni.

⁴Mi tinin mahni thiltih inen fiah phawt rawh se; tichuan mi dangah ni lovin, mahni tih tâwkah lâwmna a nei thei zâwk ang.

⁵Mi tinin mahni phur an phur theuh dâwn si a.

THILPHAL LEH THIL THÂ TIH

⁶Thu thâ zirtîrna dawngtu chuan a zirtîrtu chu thil thâ tinrêng pe ve rawh se.

⁷Bumin awm suh u, Pathian chu nuihsawh chi a ni hlei nê; miin a chi tuh ang chiah chu a seng leh ngei dâwn asin.

⁸Mahni tîsa lama tuhtu chuan tîsâa mi bawk chhiatna a seng ang a; Thlarau lama tuhtu erawh chuan Thlarauva mi chatuana nunna a seng dâwn a ni.

⁹Chuvângin, thil tha tih i ning lo vang u; kan inthlahdah loh chuan a hun takah a rah kan seng ngei dâwn si a.

¹⁰Chutichuan, hun remchâng kan neih ang zêlin mi zawnzawng chungah thil tha i ti thîn ang u, rinna chhûngte tân phei chuan i ti lehzuall ang u.

¹¹En teh u, keima kut ngeiin in hnênah lehkha hrâw pui puia ka ziah hi!

KRAWS CHAUH CHHUANG

¹²Mi hmuha lan mâwi duhtuten serhtan tûrin an phût lui thîn che u a. Hei hi eng dang vâng mah a ni lo va, Krista krâws avângatihduhdah an tuar loh nâna ti mai an ni.

¹³Serhtante ngei pawhin dân thû an zâwm chuang si lo va, in taksâah ngei inchhuanna chhan tûr an neih theih nân serh tantîr che u an duh mai a ni.

¹⁴Kei erawh chuan kan Lalpa Isua Krista krâws chauh chu ka chhuang zêl dâwn; chû krâws avâng chuan khawvêl hi ka tân khenbeh tawh a ni a, kei pawh khawvêl laka khenbeh tawh ka ni.

¹⁵Krista Isuaah chuan siam thar lehna a nih chauh loh chuan serhtanin awmzia a nei lo va, serhtan lohvin awmzia a nei hek lo.

MALSAWMNA LEH NGENNA

¹⁶Hê dân anga kal apiangte chungah chuan remna leh khawngaihna awm rawh se, Pathian Israelte chungah pawh.

¹⁷Tûn aţang chuan tûma'n mi tibuai tawh suh se, Lalpa Isua chhinchhiahnate chu ka taksa hian a pu vê tawh si a.

¹⁸Unaute u, kan Lalpa Isua Krista khawngaihna chu in thlarau hnênah awm rawh se. Amen.

EPHESI

Ziah tu: Paula • Ziah kum: A.D. 60

Ephesi lekhkathawn hi Paulan Rom khaw lung ina a tâna ațanga a thawn a ni a. A thuchah hi uluk taka ngaihtuah chuan Ephesi kohhran tân maia zia ni lovin, Laodikei mite hnêna a thawn ni pawhin a rin theih baw (Kol. 4:16); chûng bâkah chuan ringtu zawng zawng huapa zia a ni tih a chiang baw. Hê lekhkathawnah hian thurin pawimawh tak tak a tarlan zîngah, khawngaihna avânga chhandamna a thlawna pek kan nih thu te, ringtuten Lalpaah dinhmun sâng tak kan chan thû te, kohhran dik tak chu Krista taksâ a nihzia te, chutiang dinhmun changtu ni âwm rênga ringtute chu nung tûr leh Lalpa chaknaa kal tûr leh, a râldote dopui tûr kan ni tih lam hi a uar hle a ni. Ephesi lekhkathawna Kohhran a sawi hi tûnlaia kohhran pâwl (denomination) hrang hrang ang hi ni lovin, Kohhran tak tak, Krista taksâ zâwk a ni. Tichuan, chû taksa zâwmtute dinhmun sânzia leh chû dinhmun nêna inmâwia ringtute chu nung tûr an nihna a sawi. Ephesi hi Biblea lekhhabu 49-na a ni a, bung 6 a awm a, chang 155 a awm baw.

BUNG 1

CHIBAI BÛKNA

¹Paula, Pathian duh zâwnga Krista Isua tirhko chuan, Ephesi khuua mi thianghlime leh Krista Isuaa mi rinawmte hnênah chuan: ²Kan Pa Pathian leh Lalpa Isua Krista hnên ațangin khawngaihna leh remna in hnênah awm rawh se.

KRISTA TLANNA

³Pathian leh kan Lalpa Isua Krista Pa chu fakin awm rawh se; ani chuan vân hmunah te khian Kristaah thlarau malsawmna tinrêngin mal min sâwm a; ⁴leilung pian hmâ daiha Kristaa min lo thlan tawh ang khân, hmangaihna neia, thianghlime tak leh sawisêlbova a hnêna kan awm theihna tûr leh, ⁵Isua Krista zârah chuan a duh zâwng ang taka ama fa atâna siam tûrin min lo ruat lâwk tawh baw a. ⁶A khawngaihna ropuizia kan fak ve theih nân, Duhtaka-ah chuan pawm tlâkah min siam ta a ni. ⁷A thisen zârah chuan amahah tlan na kan chang ta, a khawngaihna ngahzia ang zêla sual ngaihdamna chu; ⁸chumi vêk chuan finna leh remhriatna tinrêngin min vûr baw a, ⁹ama tum dân leh țha a tih ang taka a duh zâwng thurûk ril chu kan hnênah a hriattîr tawh a ni. ¹⁰A remruatna hunbî a kim hunah, amahah chuan thil engkim, vâna mite, leia mite chu—Kristaa fâwk khawm vek a nih theihna turin. ¹¹Amahah chuan kan ro luah tûr kan chang tawh a, chû chu ama remruat dân ang takin, engkim titu tum dân anga ruat lâwk a ni a, ¹²keini Kristaa inngat hmasa te hi a ropuizia fak nâna hman tûr kan ni.

¹³Amahah chuan nangni pawh in chhandamna Chanchin Țha thutak chu hriain, in lo ring ve ta a; amah in rin avânga Thlarau Thianghlime pêk tiamnain chhinchhiah in ni tawh a, ¹⁴a ropuizia fakna tûrin, chû Thlarau chu Pathianin ama tâna a lei tawh, tlan chhuah an nih hmâ pawha kan ro luah tûr dahkham lâwkna a ni e.

THLARAU FINNA DÎLA ȚAWNGȚAINA

¹⁵Chuvângin, kei pawhin Lalpa Isua in rinzia te, mi thianghlime zawng zawng in hmangaihzia te ka lo hriatin, ¹⁶ka ȚawngȚainaah te chuan in chungah lâwmthu sawi ka bâng thei lo; ¹⁷kan Lalpa Isua Krista Pathian, ropuina Pa chuan amah hriat chianna kawngah finna leh hriattîrna thlarau pe zêl che u sela, ¹⁸in hriattiamna mitte chu tihvâr lo ni rawh se; tichuan a koh chhan beisei tlâk a nihzia te, mi thianghlime ro luah tûr ropuizia leh chhenfâkawmzia te in lo hre fiah thei dâwn nia. ¹⁹A thiltihtheihna mak takin a thawh dân te, amah ringtu keiniho tâna a thiltihtheihna ropuizia te chu eng ang tak nge a lo niha,

²⁰Kristaah chuan engti takin nge a thawh—mitthi zîng ata kai thova, vân hmuna a kut dîng lama a han Țuttîr dân te, ²¹lalna te, thuneihna te, thiltihtheihna te leh rorêna zawng zawng te chu hê khawvêlah chauh ni lo, khawvêl lo la awm tûra hming sak tinrêng chung daiha mi a ni a. ²²A ke hnuaiah chuan thil engkim a dah a, amah chu engkim chungâ lû ber ni tûrin kohhran hnênah a pê a, ²³chû ngei chu ama taksa a ni, engkim luah khattu famkimna chu.

BUNG 2

KHAWNGAIHNA AVANGA RINNA

¹Nangni pawh, in bawhchhiat leh in sual te avânga thi hnû kha a tinung leh che u-a;

²khâng hun lai khân hê khawvêl dân a in lo khawsak Țhin kha, boruaka thuneitu lal, thu âwih lo fate chhûnga tûna thawk mêktu thlarau thawh dân ang bawh hian;

³chûngho zîngah chuan keini pawh tîsa châknaa lo inhmanga, khawvêl mîna rilru leh duhna tipuitling zâwnga inhmang Țhin kan nih avâng khân, thinurna fâ ni sâ rênga piang kan nih kha, mi dange ang bawh hian.

⁴Nimahsela, Pathian khawngaihna a nasat êm avâng leh, hmangaihna thûk taka min hmangaih avâng chuan

⁵bawhchhiatna hnuaia thi dêr tawh hnû kha, Krista rualin min tinung vê a (khawngaihnaa chhandam in ni ta),

⁶ama rualin min kai tho va, Krista Isuaah chuan vân hmunah te khian a kiangah min Țuttîr ta a,

⁷chû chu hun lo la kal tûr atân pawha min khawngaihna nasatzia Krista Isuaah zêl a lantîr theihna tûr a ni.

⁸Khawngaihna avânga rinnaa chhandam in ni a, chû chu nangmahni lama chhuak a ni lo, Pathian thilpêk a ni zâwk e;

⁹thiltih avâng pawh a ni hek lo; ni se mi tûpawhin in chhuan phah nân an hmang mai dâwn asin.

¹⁰Krista Isuaah chuan thil țha ti tûra siam kan ni a; ama kutchhuak kan nih avângin thil țha tih chu kan awm dân tûra Pathian buatsaih lâwk a ni.

A THISENIN A TIHNAI

¹¹Chuvângin nangni, tîsâa Jentail, tîsa kuta serhtan-hovin ‘serhtan-loh’ an tih Țhin che u kha hre reng rawh u;

¹²khâng hun lai khân Krista tel lovin in awm a, Israel khua leh tui lakah leh thutiamna thuthlung laka mi hrang daih niin, Pathian tel lovin, beiseina rêng pawh nei lovin hê khawvêla in

awm thìn kha.

¹³Tûnah erawh chuan Krista Isuaah chuan, nangni hla taka awm thìn te kha, Krista thisena tihhnai in lo ni ta e.

KRISTA KAN INREMNA

¹⁴Amah chu kan inremna a ni a; ani chuan indaidanna bang chu thiatin, pâwl khatah a siam a;

¹⁵Ama tîsâ ngeiin inhuatna, Dân thupêk zînga mi chu a nuai bo va; mi pahnihte chu amahah chuan pum khata siamin mihring thar a đin a, tichuan, a inremtîr ta a ni.

¹⁶An lo inhmêlmâkna chu tihlumin, krâws chuan mi pahnihte chu a inremtîr a; Pathianah chuan pum khata siam an lo ni ta.

¹⁷A lo kal lai khân nangni hla taka awmte leh hnai deuhva awmte hnênah remna Chanchin Tha a hrilh che u kha.

¹⁸Ama zârah Thlarau pakhatin Pa hnêna luh theihna kan nei vê vê a ni.

KRISTA KAN LUNGPUI

¹⁹Tûnah chuan mikhual leh pân lam mi mai in ni tawh lo va, mi thianghlimte nênn tualkhat leh Pathian chhûngkua in ni ta a;

²⁰tirhkohte leh zâwlneite lungphûm chung sak in ni a, chû inah chuan a kila lung pawimawh ber chu amah Isua Krista hi a ni.

²¹Chû in pum pui chu amahah chuan fel taka rem khâwmin, Lalpaah chuan tempul thianghlimah a lo chang ta a;

²²chutah chuan nangni pawh Thlarau zâra Pathian chênna in ni tûra rem khâwm in ni.

BUNG 3

THURÛK TIHLAN A NI

¹Hei vâng hian kei Paula, nangni Jentailte tâna Krista Isuaa mi tâng hian,

²Pathian khawngaihna hun chhûng hian in tâna pêk ka nih thû kha in lo hre tawh ngei ang a,

³khatia, thurûk chu inlârna aţanga hriattîra ka awm kha (tâwi tēja ka rawh ziah tawh kha:

⁴khâng te kha in chhiar chuan, Krista thurûk ka hria tih in hre thei ang).

⁵Tûn hma lam khân mihring fapate hnênah hriattîr a la ni ngai lo va; tûnah erawh chuan a tirhkohti thianghlimte leh a zâwlnei thianghlimte hnênah Thlarau Thianghlimin a hriattîr ta;

⁶chû thurûk chu hei hi a ni: Chanchin Tha avâng hian Kristaah chuan Jentailte hi roluahpuite, taksa pêngpuite, thutiam chanpuite an ni, tih hi.

⁷A thiltihtheihnain a thawh dân ang zêlin, Pathian khawngaih rawngbâwlneah hian mawhphurtua siam ka ni si a.

THURÛKIN A TUM

⁸Kei, mi thianghlim zawng zawng zînga nêp ber ai pawha nêp zâwk hnênah hian Krista hausakna chhuichhuah zawh rual loh chanchin chu Jentailte hnêna hril darh tûr leh,

⁹Isua Kristaah engkim siamtu Pathianin chatuan aţanga a lo thup kumkhua tawh inpâwlne thurûk chu, mi zawng zawng hnêna puang tûrin hê khawngaihna hi min pê a;

¹⁰vân hmuna lalnate leh thuneihnate hnêna Pathian finna ngahzia kohhran hmanga hriattîr hi a tum tak a ni:

¹¹a chatuan remruat ang zêla kan Lalpa Krista Isuaa a rawn hlen chhuah tâk chu.

¹²Amahah chuan rinna kan ngah tlat avângin amahah vêk chuan tlangnêl taka luh theihna kan nei ta.

¹³Chutichuan, in aia hrehawm ka tuarnate hian in rilru tihnuat suh se, in ropuina a ni zâwk asin.

THURÛK HRIAT FIAHNA

¹⁴Hei vâng tak hian kan Lalpa Isua Krista Pa hnênah chuan thingthiîn ka kûn thìn a,

¹⁵ani chu lei leh vâna chhûngkaw pumpui hming châwi chhan a ni.

¹⁶Ani chuan a ropuina ngah dân ang zêlin a Thlarau chuan in chhûngril lam mihring chu thiltihtheihnain a thuam ang che u-a,

¹⁷rinna avângin Krista chu in thilungah a chêng reng thei dân nia; nangni pawh hmangaihnaa zung kaia ngahchhan nei in ni a,

¹⁸mi thianghlim zawng zawngte nênn chuan a zauzia te, a seizia te, a thûkzia te, a sânzia te chhut chhuak thei tûr leh,

¹⁹Krista hmangaihna hriat sên rual loh hre chhuak thei tûra Pathian famkimnaa tihkhah in lo nih theih nân.

²⁰Tûnah hian keimahni chhûng lama thawktu thiltihtheihna ang zêlin, kan dîl leh kan ngaihtuah zawng zawng aia nasa zâwka titheitu hnênah ngei chuan,

²¹Krista Isua zâra a ropuina chu kohhranah hian kumkhuain, chhuan zawng zawng thlengin lo awm rawh se. Amen.

BUNG 4

INPUMKHATA AWM

¹Chuvângin kei, Lalpaa mi tâng hian a kohna che u phûa awm tûrin ka ngên a che u:

²Inngaihtlâwmna leh zaidamna leh dawhtheihna tinrêng nênn, hmangaihnaa indawhtawna,

³remnaa inphuarkhâwmin, Thlarauva inpumkhatna vawng him tûrin i bei hrâm hrâm ang u.

⁴Beiseina pakhat koh in ni ang khân, taksa pakhat leh Thlarau pakhat a awm a;

⁵Lalpa pakhat, rinna pakhat, baptisma pakhat,

⁶Pathian pakhat leh mi zawng zawng Pa, engkim chung a awm, engkim kal tlang, engkim chhûnga awm si chu a ni.

THLARAU THILPEK

⁷Krista thilthlâwnpêk tehna ang zêlin mi tin hnênah khawngaihna pêk a ni.

⁸Tihian a sawi a: “Chung lama a han chhoh lai khân, Saltânna chu salah a hruai a, Mihringte hnênah thilpêk a hlân.”

⁹(Lei hmun hnuai hnungah a lo chhuk hmasa bawk si a nih chuan, ‘A han chho’ tih chu eng tihna nge ni le?)

¹⁰Lo chhuka chu vân pum pui chung daiha han chhova bawk kha a ni a; chû chu thil zawng zawng a luah khah vek theihna tûr a ni.)

¹¹Amah ngeiin mi thenkhat chu tirhkoh atân te, thenkhat zâwlnei atân te, thenkhat Chanchin Tha hriltu atân te, thenkhat pastor atân leh thenkhat zirtîrtu atân te a pê a,

¹²rawngbâwl hna thawk tûra mi thianghlimte buatsaih nân te, Krista taksa siam puitling tûr te,

¹³Pathian Fapa hriatna kawngah leh rinnaa kan zâa kan inpumkhata, Krista famkimna lenzia tluka mi puitlinga kan inchher chhuah hunah chuan,

¹⁴fing vervêk tak leh zei taka mi bum tur châng rengtute zirtîrna thli tinrêngin a vawrh kual mai mai theih naupang kan ni tawh lo vang a,

¹⁵hmangaihna nên thu dik tak sawiin amahah chuan kawng tinrêngin kan thang lian thei tawh ang; amah Krista ngei chu a Lû ber a ni si a.

¹⁶Amahah chuan taksa chu a pumin, a pêng tinte inchuktuaha rem khâwm vekin, pêng tinten an theih ang tâwka thawk tlâng theuhvin, hmangaihnaa insiam tha tûrin taksa chu a lo thang lian thîn a ni.

MIHRING THAR

¹⁷Tichuan, hei hi Lalpaah ka hriattîr che u a ni: rilru lawilo pu Jentail mite awm dânin awm tawh suh u,

¹⁸anni zawng thinlung chawlawl tawh an nih avângin anmahniah hriatna rêng an nei lo va; an ngaihtuahna pawh a thim zo tawh a, Pathian nunna lakah then hranin an awm tawh a ni.

¹⁹Chûng mite chu pawisak leh zah nachâng hriatna kal pêl tawh an ni a, thil bawlhhlawh tinrêngah chin lêm nei lovin, hur zêl tûrin an inpumpêk ta.

²⁰Nangni erawh chuan chuti zâwngin Krista chu in zir ve loh kha;

²¹a thû te lo hre tawhin, Isuaa thutak a awm ang taka ama zirtîr in nih tak zet chuan,

²²in hman lai awmdân kawnga mihrinna ze hlui, bum châk hliah hliah thîn, tha lo tak mai kha hlíp thlâ ula,

²³in rilru thlarau chu tihtharin awm bawk sela;

²⁴mihring thar, dikna leh thianghlimna tak tak, Pathian duh dân ang taka siam khân inthuan zâwk rawh u.

THLARAU TIVUI SUH

²⁵Chutichuan, dâwt sawi bânsanin, “Mi tinin mahni thenawm hnênah thu dik sawi theuh rawh se,” inpêng tawn vek kan ni si a.

²⁶“Thinrim ula, tisual kher suh u”: in thinur lai chu niin liampui suh se.

²⁷Diabola chu hmun kian hlek suh u.

²⁸Rûk hmang chuan ru tawh suh se. Tlachham hnênah thil pêk tûr a neih theih nân a kutin thil tha thawk sela, rim zâwk rawh se.

²⁹Thu tha lo chu in kân sawi chhuak suh sela; insiamthatna tûra thil tûlte chu sawi zâwk ula; tichuan in thu ngaithlatute tân khawngaihna a lo ni dâwn nia.

³⁰Pathian Thlarau Thianghlime chu tilungngai suh u, tlanna ni atân amahah chhinchhiah tlat in nih tawh kha.

³¹Khâkna te, thinurna te, thinrimna te, inhauhna te, sawi chhiatna zawng zawng te, rilru chhia zawng zawng te chu in hnên ata dah bo vek rawh u.

³²Pathianin Kristaa a ngaidam che u ang hian, inkhawngaihin inlaintat tawn ula, inngaidam tawn theuh rawh u.

BUNG 5

HMANGAIHNAAH AWM RAWH U

¹Chutichuan, a fa duh takte angin Pathian awm dân entawntu lo ni rawh u.

²Kristan min hmangaih a, Pathian hnêna inthâwina leh thilhlân rimtui atân kan aia a inpê ang khân hmangaihnaah chuan awm rawh u,

³Chuvângin, mi thianghlime tiha mâwi tûr rêngin inngaihna sual te, bawlhhlawhna leh duhâmna tinrêngte chu in zîngah sawi pawh sawi rîk ni suh se.

⁴Zahmawh te, tawng mâwi lo te, fiamthu bawlhhlawh sawi te hi in tân a mâwi lo va, lâwmthu sawi zâwk rawh u.

⁵Inngaih chîng te, mi bawlhhlawh te, mi duhâm te (mi duhâm chu milem betu a ni a); chutiang mite chuan Krista leh Pathian lalramah rochan engmah an nei vê lo tih in hria e.

⁶Chûng sual sawinêptute chuan bum che u suh se; chûng thil avâng chuan a ni Pathian thinurna chu âwih lo fate chung a thlen thîn ni.

⁷Chuvângin, chutiang mite zîngah chuan tel vê suh u.

ÊNGAH AWM RAWH U

⁸Hmânah chuan thim in ni a, tûnah erawh chuan Lalpaah êng in lo ni ta. Chuvângin, êng fate angin awm rawh u:

⁹(Thlarau rah chu thatna te, felna te leh thutak zawng zawngah chuan a awm si a;)

¹⁰Lalpa lâwm zâwng chu eng nge ni tih lo zawng chhuak thîn rawh u.

¹¹Thim thiltih rah chhuah nei ngai lo nên inzâwmna nei hlek lo ula, a dik lohzia tilang zâwk rawh u.

¹²A rûka an thil chin thinte chu sawi ringawt pawh zahthlâk a ni.

¹³Amaherawhchu, thil zawng zawng a nihna anga hai lan hi êng hnathawh a ni e, hai lan tawh chu êng a ni si a.

¹⁴Chuvângin heti hian a tih kha: “Nang muhil, meng rawh, Mitthi zînga ta tho la, Kristan a chhun êng ang che.”

FING TAKA AWM

¹⁵Mi âte anga awm lovin, mi fingte awm dân zâwm zâwk tûrin fimkhur rawh u.

¹⁶Hun ٲa lova awm kan nih avângin, hun remchâng apiang lo hman ٲa rawh u.

¹⁷Fing lo taka awm lovin, Lalpa duh zâwn  u eng nge ni tih hriat tum zâwk rawh u.

¹⁸Uaiin rui suh u, tl  kranna mai a ni a; Thlarauva khatin awm zâwk rawh u.

¹⁹Fakna hla te, Pathian hla te, thlarau hla te hian in  wi tawn    n ula, Lalpa chu in thinlungin rim  wi tumsak ula, zaiin fak rawh u.

²⁰Kan Lalpa Isua Krista hmingin, thil engkimah Pa Pathian hn  nah l  wmthu hril fo rawh u.

²¹Pathian     d  k chungin intul  t tawn     h rawh u.

KRISTA LEH KOHHRAN INNEIHNA

²²Nupuite u, Lalpa hn  na in intul  t ang tak hian in pasalte hn  nah intul  t rawh u.

²³Pasal chu nupui l   a ni ang bawkin, Krista pawh chu kohhran l   a ni a, a taksa Chhandamtu a ni.

²⁴Chutichuan, kohhran hi Krista thuhnuaia awm a ni ang bawkin, nupuite pawh kawng engkimah an pasalte hn  nah intul  t rawh se.

²⁵Pasalte u, in nupuite hmangaih rawh u, Kristan kohhran a hmangaih a, an aia a in   ang kh  n,

²⁶ani chu         silfainain a thenfaia a tihthianghlim theih n  n;

²⁷chutichuan, kohhran ropui, bawhlhlawh kai lo leh z  r lo, thianghlim leh hm  lhem lovin ama hn  nah ngei chuan a l  wml  t thei tawh ang.

²⁸Tichuan, pasalten anmahni taksa angin an nupuite an hmangaih t  r a ni. Mahni nupui hmangaihtu chu mahni inhmangaih a ni.

²⁹T  ma'n mahni taksa an haw ngai si lo va, Lalpan a kohhran a ch  wm a, a duat ang hian an ch  wmin an duat z  wk     n a ni.

³⁰Ama taksa ngei, a ruh leh a taks  te chu kan ni si a.

³¹  i v  ng hian mipain a nu leh a pa kalsanin a nupui a zawm ang a, an pahnihin t  sa pumkhat an lo ni tawh ang."

³²  i hi thur  k ril tak a ni; kei erawh chuan Krista leh a kohhran chungch  ng a ni ka sawi ni.

³³Engpawh ni se, mi t  pawhin amah a inhmangaih angin a nupui hmangaih sela, nupui pawhin a pasal zah thiam rawh se.

BUNG 6

NAUPANGTE LEH NU LEH PATE

¹Naupangte u, Lalpaa in nu leh in pate thu z  wm rawh u, ch   chu thil dik a ni si a.

²"I nu leh i pa ch  wim  wi rawh," ch   chu tiam neia thup  k hmasa ber a ni.

³     chu i t  n a    a a, leiah hian i dam rei bawk ang."

⁴Nangni pate u, in fate tithinur suh ula, Lalpa zirt  rnaah leh thununnaah chuan enkawl z  wk rawh u.

CHHIAHHLAWHTE LEH AN PUTE

⁵Chhiahhlawhte u, Krista chung a in ti ang chiahin, t  sa lama in hotute     pawh thinlung leh tihtak zetin, hlau leh kh  r chungin z  wm ve rawh u;

⁶mit rawngb  wltute ang maia awm lovin, mihring til  wmtute ang pawh ni hek lovin, Krista chhiahhlawh dik tak angin, thinlung taka Pathian duh z  wn    n,

⁷mihring t  n ni lovin, mahni in    na ang ngeiin Lalpa rawng b  wl rawh u;

⁸b  wih pawh, zal  n pawh, mi tinin thil    a an tih ang z   n Lalpa hn  n a  ngin l  wmman an hmu leh d  wn tih in hre si a.

⁹Nangni hotute u, in Hotu tak chu v  nah a awm tih leh, ani chuan t  mah duhsak b  k a nei lo tih hriain, invau mai lovin, anniho chungah pawh chutiang chuan ti v   ang che u.

PATHIAN R  LTHUAM FAMKIM

¹⁰A t  wp berah chuan ka unaute u, Lalpaah leh a thiltihtheihna ropui takah chuan lo intichak rawh u.

¹¹Pathian r  lthuam famkimin inthuam ula, tichuan verv  k taka Diabola bumna lakah nghet takin in ding thei d  wn nia.

¹²Kan buante hi t  sa leh thisen mai an ni lo va; lalna te, thunei  na te, h   khawv  l thim chung a ror  ltute leh, v  n hmuna thlarau sual hote z  wk hi an ni a.

¹³Chuv  ngin, h   hun    a lo takah hian in do hneha, in do zawh vek hn   pawha nghet taka in din z  l theih n  n, Pathian r  lthuam famkim chuan inthuam rawh u.

¹⁴Nghet taka dingin, in k  wn   u thutakin hr  ng ula, dikna   wmp   w inbel rawh u.

¹⁵Remna Chanchin    a at  na inbuatsaihna chu in k  -ah bun ula,

¹⁶misual pa thal alh thei zawng zawng timit t  rin rinna p   w chu hman rawh u.

¹⁷Chhandamna th  r-lukhum* chu khum ula, Thlarau ngunhn  m, Pathian Th   chu vawng tlat rawh u.

¹⁸  awng  aina leh d  lna zawng zawng chu Thlarauvin hlan fo ula; fimkhur taka ngaihven reng chungin, mi thianghlim zawng zawng t  n   ahnemngai takin d  lsak     n rawh u.

¹⁹Chanchin    a thur  k chu puang chhuak t  ra p  k ka niha, huai taka ka puan chhuah theih n  n, min   awng  aisak ve rawh u.

²⁰    Chanchin    a palai ni t  ra kawl bun chu ka ni tawh si a; chuv  ngin ka sawi t  rte huai taka ka sawi chhuah theih n  n min d  lsak ang che u.

INTHLAHNA CHIBAI

²¹Nangni pawhin ka chanchin leh ka awm d  n in hriat theih n  n Tukika, Lalpaa unau duhtak leh rawngb  wltu rinawm hian engkim a rawn hrilh ang che u;

²²  i v  ng hian amah hi in hn  nah ka rawn t  r a ni, ka chanchin in lo hriata, ani pawhin in thinlung a rawn thlamuan theih n  n.

²³Pa Pathian leh Lalpa Isua Krista hn  na ta remna leh rinna nei hmangaihna chu unaute hn  nah awm rawh se.

²⁴Rinawm taka kan Lalpa Isua Krista hmangaihtute zawng
zawng hnênah khawngaihna chu awm rawh se. Amen.

PHILIPPI

Ziah tu: Paula • Ziah kum: A.D. 60

Hê lehkhathawn hi Paulan Rom khuua lung in a tân laia a ziah a ni. Philippi khuua hi Paulan a zin vawi hnihnaah khân a tlawh a (Tirh. 16:12), Ludi leh tâng vengtute chhûngkua an piangthar a. Kum rei lo te hnûah kohhran pawh ngêlghet takin a lo ding zui a. Hê lehkhâ a thawn chhan chu Philippi kohhranten Paula tanpui nân pawisa an rawn thawn avânga a lâwmthu sawina a nih bâkah, Krista tâna nunga, inpumkhat leh inrem taka, inggaitlâwm leh inlaintat tawn taka khawsa tlâng târa a duhsak vâng a ni. A ziah dân aţang hian Paula leh Philippi mite inkârah inţhian ţhatna thûk tak a awm tih a lang thei a. Neroa hnuaia lung in tâng ni mah se, Paula hian ringtute nun hi hnehna nun a ni a, nun hlimawm a nih zâwkzia hi a thupui a ni. Hê lehkhathawna mite hriat hlawh leh langsâr ber chu “Nun hi Krista a ni a, thih pawh hlâwkna’ tih thu hi a ni. Philippi lehkhathawnah hian thi khawp hiala Krista inggaihtlâwmna leh hming ropui leh sâng bera châwimâwi a nih thû kan hmu (2:5-11). Philippi lehkhathawn hi Bible-a lehkhâbu 50-na a ni a, bung 4 a awm a, châng 104 a awm bawk.

BUNG 1

CHIBAI BÛKNA

¹Paula leh Timothea, Krista Isua bâwihte chuan, Krista Isuaa mi thianghlim Philippi khuua awm zawng zawng hnênah te, kohhran hotute leh rawngbâwtute hnênah chuan:

²Pathian kan Pa leh Lalpa Isua Krista hnên aţangin khawngaihna leh remna chu in hnênah awm rawh se.

LAWMTHU SAWINA LEH DÎLNA

³Nangmahni ka rawn hriat chhuah apiangin Pathian hnênah lâwmthu ka sawi ţhîn a,

⁴in tâna ka ţawngţai apiangin hlim takin ka hlân ţhîn asin.

⁵Kan inhmuh hmasak ber nî aţangin Chanchin Ṭha hril kawngah tun thlenga min la thawhpui zêl avâng hian,

⁶nangmahnia thil ṭha ti ţantu khân, Isua Krista nî thlengin a hlen chhuak ngei ang tih ka ring tlat a ni.

⁷Ka rilrûah in chêng reng ţhîn a, chû chu in vaia ka ngaihtuah che u pawhin dikin ka hria a; hetia kawl ka bunnaah te, Chanchin Ṭha humhalha a dikzia tinghet târa ka thawhnaah hian nangni pawh, chû khawngaihna min ţawmpuitu in nih kha.

⁸In zavai khân Isua Krista lainatnain ka lainat êm êm che u tih hi Pathian pawhin mi hriatpui asin.

⁹In hmangaihna chu a lo pun deuh deuh va, hriatna lamah leh chhûng lam mitvârna tinrênga in lo ngah lehzual theih nân ka ţawngţai ţhîn;

¹⁰Krista nî a lo thlen thlenga rinawm leh sawisêlbo in nih theih nân, thil ṭha chu ngaihlut nachâng in hre thiam ang a,

¹¹Pathian ropuina leh fakna atân, Isua Krista zâra dikna rah awm chuan in lo khat thei bawh ang.

KRISTA THU HRIL A NI

¹²Unaute u, keima chung a thil lo thlengte kha Chanchin Ṭha hril darhna remchâng a lo ni ta hlahz zâwk tih in hriat ka duh hle;

¹³chuvângin ka kawl bun chhan chu Krista vâng a ni tih lal in vêngtu sipai pâwl zawng zawng zîngah leh mi dang zawng zawng hnênah a lo lang Chiang ta.

¹⁴Lalpaa unau zînga a tam zâwkte pawhin ka kawlbun chhan an lo hre Chiang ta bawh a; tichuan hlahz ahnêkin, Pathian thu hril kawngah an lo huai phah sauh zâwk a ni.

¹⁵Mi ţhenkhat chuan itsîkna leh elrêlra rilru pûin Krista thû hi an lo hril ve ţhîn a, ţhenkhat erawh chuan rilru ṭha tak nêan an hril thung a:

¹⁶A hmasa zâwkte khian an ti tak tak lo va, mahni hmasialna leh inerna avânga Krista thû chu hril mai an ni a, kawlbun chung a ka tuarna mi belhchhahtu an ni.

¹⁷A hnunung zâwkte erawh chuan Chanchin Ṭha humhalh tura ruat ka ni tih hriain, hmangaihna avâng zâwka hril ţhîn an ni.

¹⁸Eng nge a pawina? A derin emaw, a takin emaw, engti zawng pawhin Krista Thû chu hril a ni ta rêng rêng hian mi tilâwm a; ni e, ka lâwm zêl ang.

NUN HI KRISTA A NI

¹⁹Isua Krista Thlarau mi pêk avâng leh in mi ţawngţaisakna avângin chung thil chu chhan chhuahna ka hmuhna tûr a ni hlahz dâwn tih ka hria.

²⁰Hê ka taksâah hian a nung chungin emaw, thihnain emaw Krista chu châwimâwiin a la awm ngei ang, tia ka beisei leh ka nghahfâk hi eng mahin mi tihmualphosak lo vang tih hi huai takin ka dinpui zêl ang.

²¹Ka tân chuan nun hi Krista a ni a, thih pawh hlâwkna a ni.

²²Mahse, ka la dam zêl a nih chuan, rah chhuak tûrin ka la thawk zêl dâwn tihna a ni a; a eng zâwk chu nge ka thlan dâwn tih pawh ka sawi thei lo.

²³Lehlahm lehlahmin min nawr tawn vê vê a, kal chhuaha Krista hnêna awm hi ka chûk a, chû chu a ṭha zâwk daih si a.

²⁴Mahse, nungdama la awm hi nangmahni vângin a la ṭul zâwk bawh si a.

²⁵Tichuan, rinnaah chuan hlim taka in awma, hmâ in sâwn theihna tûrin in zâa hnênah ka la awm reng dâwn tih ka ring nghet tlat a ni:

²⁶in hnêna ka lo kal leh theih dâwn avânga Isua Kristaa in hlimna a lo pun lehzual theih nân.

KRISTA TANA BEIH HRÂM LEH TUAR

²⁷In awm dân chu Krista Chanchin Ṭha nêan inrem phawt rawh se; tichuan nangmahni tlawh tûrin ka lo kal emaw, kal lo emaw pawh nise, thlarau hmun khata in awm reng thû te, rilru hmun khata Chanchin Ṭha avânga ṭahnem in ngaihtlân thû te ka lo hre thei ang a,

²⁸in hmêlmâte laka zâm hauh lova in awm thû te pawh ka lo hre thei bawh ang; chû chu an khawlohzia lailangtu a nih laiin, nangni tân chuan Pathian hnên ațanga chhandamna a ni hlauh dâwn a ni.

²⁹Nangni chu Krista aiawhin, amah ring tûr chauh ni lovin, a tuar aia tuar ve pawh phalsak in ni asin;

³⁰keimaha indona awm in hmuh țin, tûn thlenga la awm reng chu in lo nei vê ta si a.

BUNG 2

INNIAHTLÂWMNA AZARA INPUMKHATNA

¹Chuvângin, Kristaah chuan fuihna te, hmangaih thlamuanna te, Thlarauva inpâwlina te, lainatna te leh khawngaihna te a awm pawt chuan,

²rilru hmun khata inthuralin, hmangaihna hmun khat neiin, duh zâwng thuhmuna awmin, ka lâwmna tifamkim rawh u.

³Mahni hmasial tak leh inngaihhlut avânga engmah ti lovin, rilrûa inngaitlâwm takin, mi tinin mahni aiin mi dang ța zawkah ruat țeuh rawh se.

⁴Mi tinin mahni ținghmâ ringawt thlir lovin, mi dangte hamthatna tûr pawh thlir tel ve rawh u.

KRISTA TLÂWMNA LEH CHAWI SÂNNA

⁵Krista Isua rilru ang tak hi nangni pawhin lo pu ve rawh u.

⁶Ani chu Pathian ni reng mah se, Pathian tluka awm chu a thlahlel chang ta lo va,

⁷a intiruak vek a, bâwih dinhmun a rawn luah a, mihring ang maiin a lo awm vê ta a.

⁸Mihring hmêl ang rawn pûin, amah a intitlâwm a, thih thlenga thu zâwmin a lo awm ta a, krâwsa thihna ngei chu.

⁹Chutichuan, ani chu Pathianin nasa takin a châwi sâng a, hminga zawnga hming chungnungber chu a pê ta a.

¹⁰Isua hmingah chuan vâna mi te, leia mi te, lei hnuaia mi zawng zawng te chu an la ținghthi vek ang a,

¹¹Pa Pathian châwimâwi nân Isua Krista chu Lalpa* a ni, tiin lei tinrêngin a puang tawh ang.

MEICHER CHHITUTE

¹²Chutichuan, ka duhtakte u, ka awm lai chauhva thu âwih ni lovin, tûna ka awm loh hlân phei chuan thu lo âwih lehzualin, chhandam in nihna chu hlau leh khûr chungin thawh chhuahpui rawh u;

¹³ama lâwm zâwng ngeia ti tûr leh, a duh dân ang taka ti tûra nangmahnia thawktu chu Pathian a ni si a.

¹⁴Phun nâwi lo leh hnial buai lovin thil engkim ti țin ula,

¹⁵tichuan, hê ținghthar rilru kâwi leh awm herh tak takte zingah hian Pathian fa, sualna nei lo, pawl sawi lo leh dem kai lova khawvêl tân êng in nih theih nân te,

¹⁶Krista Nî-ah chuan tlân thlâwn mai ka nih lohzia leh, a thlâwna thawk rim ka nih loh bawh avânga ka lo lâwm ve theih nân, nunna thuchah chu vuan tlat ang che u.

¹⁷Ni e, rinnaa in rawngbâwlina leh inthâwina thilhlana in in tûra leih buakin awm dân mah ila, ka lâwm zêl ang a, in zâin ka lâwmpui bawh ang che u.

¹⁸Chû vâng vêk chuan nangni pawh lâwm ula, mi lâwmpui vê rawh u.

TIMOTHEA FAKAWMNA

¹⁹In chanchinte ka lo hriata, ngaihngam taka ka lo awm vê theih nân, Lalpa Isuan rem a tih chuan Timothea hi in hnêna rawn tîr thuai ka tum a ni.

²⁰Tihtak zeta in ținatna tûr duhsakna rilru pû mi dang ka nei si lo.

²¹Mi dang zawng chuan Isua Krista thilte zawng lovin, anmahni tân ngawta zawng an ni vek si a.

²²Ani zawng a mizia in hriat chian tawh kha, fapain a pa tân a thawk angin, Chanchin Ța rawng min bâwlpui a ni.

²³Chuvângin, ka awm dân tûr ka hriat vêleh ani hi rawn tîr ngâl ka tum a.

²⁴Keimah ngei pawh ka lo kal vê thuai theih nân Lalpa chu ka ring tlat a ni.

EPAPHRODITA FAKAWMNA

²⁵Epaphrodita, ka unaupa, ka thawhpui leh ka sipaipui, ka tlâkchhamnaa mi chhawmdâwl tûra in rawn tîr hi in hnêna rawn tîr lêt leh ținlin ka hria a.

²⁶Ani hian in zâin a ngai hle mai che u-a, a dam loh thû in lo hria chu pawl a ti takzet a.

²⁷Thi chhâwnga nâ mah ni se, ani chu Pathianin a khawngaih a, ani chauh pawh ni lovin, kei pawh min khawngaih vê bawh a; chuti ni lo se, ka lungngaihna hi a inthuah nasa hlê dâwn a ni.

²⁸Chuvângin, ani hi in hmuha, in thâw a ven huai theih nân leh, kei pawh ka zângkhai sawt theih nân, rawn tîr hmanhmawh deuh ila ka ti a.

²⁹Tichuan, ani hi hlim takin Lalpaah chuan lo lâwm ula, hetiang mi hi ngaisâng rawh u;

³⁰in mi chhawmdâwlina thilin a tlin bâk puhru tûrin, thih thâ tak meuhvin a thawk a, Krista hnâ a thawhrim êm avângin a thih phah ținleh ngêl ngê a ni.

BUNG 3

ENGKIM KRISTA TAN

¹A tâwp berah chuan ka unaute u, Lalpaah chuan lâwm rawh u. In hnêna thu pangngai rawn ziah nawn leh hi ninawm ka ti lo, in tâna himna tur a ni bawh si a.

²Ui lakah te hian fîmkhur rawh u, thil ța lo titute lakah fîmkhur ula, serhtan uarho lakah pawh fîmkhur rawh u!

³Keini Thlarauva Pathian biate, mihrinna thil chhuang vê lova, Krista Isua chauh chhuangtute hi serhtan kan ni zâwk e.

⁴Tih êmah chuan kei pawh tisa chung rinna ngat thei ka ni asin. Mi tûpawhin mihrinna lamah inchhuanna tûr neia a inngaih pawt chuan a ngah pâl tak ka ni vê ang:

⁵Ni riat nâ serhtan, Israela thlah, Benjamina chí, Hebraite laka Hebraia piang ka ni a; dân lamah lah Pharisaï ka ni a;

⁶Thahnemngaih a nih lahin kohhran tiduhdahtu ka ni a; dân thûa felna lamah pawh sawisêl bo ka ni.

⁷Nimahsela, ka tâna hlâwk tûr thilte chu Krista avângin chànnaah ka ruat ta zâwk a ni.

⁸Ni e, ka ti takzet a ni: ka Lalpa Krista Isua hriat chianna hi a lo hlu êm a, thil dang rêng rêng chu eng atân mah ka ti tawh lo; amah vângin engkim ka chàn vek a, Krista lama ka hlâwk phahna tûr a nih dân phawt chuan chûng thil chu hnâwmhnaw ang lekah ka ngai tawh a ni.

⁹Dân zawm avânga keima that vena lam ni lovin, rinna avânga Pathian thatna, Krista rin avânga thiam chang nihna chu ka lo nei ta zâwk a ni.

¹⁰Chû ngei chu a thihna anpuia thia, a tuarnate tawmpuia, a thawhleha thilthihtheihna nêna ka chan fiah theihna tûr a ni si a;

¹¹Chû baw chu, engemawti zâwng tala thihna ata thawhleha ka chan vê mial theihna tur chu a ni.

TIAM CHIN LAM PAN

¹²Famkim tawh ka inti lo va, chan tûr chang tawhah pawh ka inngai chuang lo; amaherawhchu, Krista Isua mi man chhan hi ka man chhuak thei mahna tiin ka um zêl dân.

¹³Unaute u, man tawhah pawh ka inngai lo; mahse, thil pakhat ka ti thîn— hnung lama thil awmte chu theihngihlin, hma lama thil awmte chu ka ban tawt tawt thîn a,

¹⁴Krista Isuaa Pathianin chung lama min koh chhan lâwmman hmu tûrin, tiam chin lam chu ka pan ngat ngat a ni.

¹⁵Chuvângin, keini puitling deuh te hian hetiang rilru hi i pu zêl ang u; ngaihdân dang nei in nih pawhin, eng kawngah pawh Pathianin a la hriattîr zêl ang che u.

¹⁶Engpawh ni se, kan thlen tawh china kan kal dân ang khân kal zêl ila, rilru hmun khat i pû ang u.

VAN KHUA LEH TUI

¹⁷Unaute u, ka awm dân hi lo zir vê rawh u. Entawn tûr keini min nei a, kan awm dân anga awm vête chu lo entawn ang che u.

¹⁸Mi tam tak an kal a, chûng mite chu Krista krâws hmêlmâ an ni tih an chanchin ka hrilh fo che u kha, tûnah pawh tap chung a ka hrilh che u hi:

¹⁹Chûngho tâwpna chu boralna a ni a, an pathian chu an pum a ni; khawvêl thil ringawtin an rilru a luah khah avângin an ropuina pawh an mualphona mai a ni.

²⁰Keini zawng vân khua leh tui kan ni a, vân aţanga lo kal tûr Chhandamtu Lal Isua Krista chu ngâkhlel takin kan thlîr reng a,

²¹engkim ama thû thûa awmtîr theitua thawh dân ang zêlin, kan taksa bawhlhlawh tak hi tidanglamin, ama taksa ang maia ropuina a siam thar leh dân a ni.

BUNG 4

INPUMKHAT LEH HLIM TAKA TAWNGTAI

¹Chuvângin, ka unau duh tak leh ka ngaih êm êm, ka lâwmna leh ka lallukhumte u, chutiang tak chuan Lalpaah dîng nghet rawh u.

²Lalpaah chuan rilru hmun khat pu tûrin Euodii ka ngên a, Suntuki pawh ka ngên baw a ni.

³Ni e, nang, ka nghâwngkaw bahpui dik tak kha ka sâwm baw a che. Khâng hmeichhia, Chanchin Thaa mi thawhpuitute kha lo tanpui rawh; Klemenâ nê, ka thawhpui dang, Nunna Bûa hming chuangte nê khân.

⁴Lalpaah chuan lâwm zêl rawh u. Ka sawi nawn fo dân, lâwm rawh u!

⁵In dawththeihzia chu mi zawng zawng hriat tham lo ni rawh se. Lalpa chu a hnaï e.

⁶Engah mah mangang suh u; engkimah tawngtaia dîlin, lâwmthu sawi tel zêlin, in thil dîlte chu Pathian hnênah hriattîr zêl ang che u.

⁷Tichuan, Pathian thlamuanna, rilrûin a chhui phâk rual loh chuan in thilung leh in ngaihtuahnate chu Krista Isuaah chuan a vênak ang che u.

HENG HI NGAIHTUAH R'U

⁸A tâwp berah chuan unaute u, a dik apiang te, a zahawm apiang te, a fel apiang te, a thianghlim apiang te, a duhawm apiang te, a thang mâwi apiangte chu a thata, fak tlâk a nih phawt chuan— chûng chu ngaihtuah rawh u.

⁹In thil zir te, in thil pawm te, in thil hriat te, keimaha in thil hmuh te pawh kha, khatiang kha ti thîn ula; tichuan, Thlamuanna Pathian chuan a awmpui ang che u.

PHILIPPI MITE THILPHALNA

¹⁰In mi ngaihsakzia tûn hnaia in rawn tharthawh leh tâk avâng hian Lalpaah chuan ka lâwm tak zet a ni; chutiang chu in tum dân pawh a ni rêng a, remchâng in la hmuh loh vâng mai a ni.

¹¹Ka tlâkchham thu sawi ka ni lo; kei chu eng ang pawhin awm mah ila, lungâwi zêl dân ka zir tawh si a.

¹²Tlâwm taka awm dân ka thiam a, hausa taka awm dân pawh ka thiam baw a. Khaw hmun pawh ni se, tlai puara awm dân te, rilţama awm dân te, hausa tak leh tlachhama awm dân thurûkte chu thil engkimah ka zir chhuak tawh asin.

¹³Mi tichaktu Kristaah chuan engkim ka ti thei a ni.

¹⁴Engpawh ni se, ka manganna min lo tawmpui vê hi in tiţha ngawt mai.

¹⁵Nangni Philippi mite u, Chanchin Thaa thlen tirh laia Makedonia ram aţanga ka kal chhuah lai khân, nangni chauh lo chuan tû kohhran mahin thilpêk leh dân kawngah mi tanpui lo tih in hriat kha.

¹⁶Thessalonika khuuaa ka awm lai pawh khân, ka tlâkchhamna phuhrûk tûrin, waw hnih ngawt tanpuina in rawn thawn a nih kha.

¹⁷Thilpêk beisei ka ni lo va, mahse nangmahni rah chhuah ngei aṭanga lo pung tûr lam chu ka thlîr zâwk a ni.

¹⁸Nimahsela, engkim ka nei a, ka ngah ta. Epaphrodita kuta in thil mi thawnte chu ka lo hmû a, ka phuisui ta khawp mai. Chûng chu thil rimtui lêng chem chem, Pathian duh zâwng leh a pawm tlâk inthâwina a ni si a.

¹⁹Ka Pathian chuan Krista Isuaa hausakna a ngah ang zêlin in mamawh zawng zawng a pê ang che u.

²⁰Tûnah hian Pathian leh kan Pa hnênah chuan chatuanin ropuina chu awm rawh se. Amen.

CHIBAI BÛKNA LEH MALSAWMNA

²¹Krista Isuaa mi thianghlim tinte kha min han chibai ang che. Ka hnêna unau awmte hian chibai an bûk a che u.

²²Mi thianghlim zawng zawngin chibai an bûk a che u, a bîk takin Kaisara ina awm ve chhûngkuate hian chibai an bûk a che u.

²³Kan Lalpa Isua Krista khawngaihna chu in zâa hnênah awm rawh se. Amen.

KOLOSA

Ziah tu: Paula • Ziah kum: A.D. 60

Hê lehkhah hi Ephesi leh Philippi lehkhathawnte ang bawkin Rome khuah lung ina a tân laia Paula thawn a ni (1:1; cf. 1. 23; 4:18). Hmasang ațangin Paula kutchhuak ngei a ni tih hi pawm tlân a ni. Kolosa khuah hi Phrugia ram (tân laia Turkey), Ephesi chhak lam km 160 vêla hlâa awm a ni. Paulan va tlawh chhuak vê chiah lo mahse, Ephesi khuah rawng a bawl hun chhông khân, Paula zirtîr mi pakhat Epaphras-a khân Kolosa khuah kohhran a va din niin a rin theih (1:5-8). Chuvângin Paula pawhin an thlarau lam hamthatna duhsakin lehkhah a thawn niin a rin theih baw. Amaherawhchu, khâ kohhran dîng tîrah khân zîrtîrna hlauhawm Gnostic Zîrtîrna an tih a lo awm avâng ringtute humhalh nân Paula chuan Krista chungnunzia te, Engkimtithi, engkim siamtu Pathian Fapa, khawvel sual tlantu a nihzia sawiin, Kristaa nun thara nun a tûlzia a zirtîr a ni. Krista chatuan ropuina hi Kolosa bu hian a sawifah bîk hle. Kolosa lehkhathawn hi Bible-a lehkhahu 51-na a ni a, bung 4 a awm a, châng 95 a awm baw.

BUNG 1

CHIBAI BÛKNA

¹Paula, Pathian duh zâwnga Isua Krista tirhkoh leh kan unaupa Timothea chuan,

²Kolosa khuah Kristaa mi thianghlimte leh nau rinawmte hnênah: Pathian kan Pa leh Lalpa Isua Krista hnên ațangin khawngaihna leh remna chu in hnênah awm rawh se.

KRISTA AN RINNA

³Pathian leh kan Lal Isua Krista Pa hnênah chuan lâwmthu sawiin, in tân kan tawngtâi tîn asin.

⁴Krista Isua in rinna leh mi thianghlim zawng zawng in hmangaihza kan lo hre vê tawh baw a;

⁵Chû bâkah, in tân vânah beiseina an dahsak che u vâng a ni baw a, chû ngei chu Chanchin Tha thutak in lo hriat tawh kha a ni.

⁶Chû Chanchin Tha chu nangmahni hnêna a lo thlena, Pathian khawngaihna thutak chu in ngaihthlâka, in lo hriata, rah a chhuah ang khân, tûnah hian khawvêl zawng zawngah pawh rah a chhuah ta zêl a ni.

⁷Epaphra, kan chhiahhlawhpui duh tak, in tâna Krista rawngbâwltu rinawm hnên ațang pawha in lo hriat tawh kha,

⁸ani hian Thlarauva in mi hmangaihna thû min hrilh tîn a.

KRISTA CHUNG CHUANNA

⁹Chumi avâng chuan thlarau finna leh thlarauva hriat thiamna tinrêng in lo neiha, ama duh zâwng hriatnaa in lo khah theih nân, nangni kan hriat tîr ni che u ațang khân keini pawhin tawngtâi leh dîlsak che u kan bâng lo.

¹⁰Tichuan, Pathian duh dân phûa in awm zêla, amah tilâwma, hnathawh tha tinrêng in lo rah chhuahpuia, Pathian hriatna lama in than len zêl theih nân te;

¹¹a thiltitheihna ropui takin a thawh ang zêlin, hlim takin, dawhtheihna te, chhelnâ te, chakna tinrêng te nêna tihnghehin in lo awm ang a;

¹²tichuan, êng zînga mi thianghlimte rochan tawmpui vê tlâka min siamtu Pa hnênah chuan lâwmthu kan sawi thei tawh dâwn a ni.

¹³Ani chuan thim thuneihna ațangin min chhan chhuak a, a Fapa hmangaih taka lalramah chuan min hruai lût a;

¹⁴a thisen avângin amahah chuan tlan chhuah kan lo ni ta, kan sualte ngaihdamna chu.

¹⁵Ani chu hmuh theih loh Pathian anpui, thil siam tinrêng zînga piang hmasa ber chu a ni.

¹⁶Thil zawng zawng, vâna awm te, leia awm te, hmuh theih te, hmuh theih loh te, lalthutthlêng te, lalram te, lalna te leh thuneihna te chu ama siam vek a ni. Engkim a siam a, ama tâna a siam a ni.

¹⁷Amah chu engkim awm hmâa lo awm tawh a ni a, amahah chuan engkim a inthlung khâwm vek a.

¹⁸Ani chu taksa lû ber, kohhran lû leh a bulpui ber a ni a; engkima chungnungber a lo nih theih nâna mitthi zîng ațanga tho leh hmasa ber chu a ni.

KRISTAA INREM LEHNA

¹⁹Amaha Pathian famkimna zawng zawng chêtîr hi Pa duh zâwng a ni a,

²⁰amah nêna engkim inremtîr leh hi a duh zâwng a ni a, leia mi pawh, vâna mi pawh, a krâws thisen ngei chuan a inremtîr leh ta.

²¹Nangni, thilsual in tih avâng in rilrûa hmêlmâ lo ni tawh leh, tuithlâra lo awm daih tawh te kha, tûnah chuan amah zâwkin a rem leh tawh che u a,

²²a hmâah chuan thianghlim, hmêlhem lo leh sawisêl bova a lantîr theihna tûr che u in, a thihna kal tlangin a taksâin amah nêna inremtîr tawh che u-a.

²³Rinnaah chuan awm reng ula, nghahchhan neia nghet taka dingin, vâna hnuiaia thilsiam tinrêng hnêna puan darh tawh leh, in lo hriat vê tawh Chanchin Tha beiseina ațang hian pêng bo suh u. Kei, Paula ngei pawh hi chumi rawngbâwltua siam chu ka ni asin.

KRISTA TANA INHLAN RAWNGBAWLNA

²⁴In tâna ka tuar ve-na hian tûnah pawh mi tilâwm a; Kristan tuarna a hlen tawh bâk chu a taksâ, kohhran vâng chauhvin ka taksâin ka tuar chhonzawm zêl a ni.

²⁵Chumi avâng chuan Pathian thu tifamkim tûr leh, Pathianin in tâna rawngbâwl hna thawk tûra min pêk ang zêla rawngbâwltu ka ni a,

²⁶tûn hmâ zawnga mite laka a lo thup kumkhua tîn thurûk chu tûnah hian a mi thianghlimte hnênah a puang ta.

²⁷Chûng mite hnênah chuan Jentailte tâna thurûk ropui leh hausa chu Pathianin hriattîr a duh a. Chû thurûk, beiseina ropui

tak mai chu: ‘nangmahniâh Krista a awm,’ tih hi a ni.

²⁸Kan thuhrl ber pawh amah hi a ni a; chuvângin Krista Isuaah chuan mi zawng zawng tihfamkim an ni tih thú hi, finna tinrêng mite zirtîrin kan zilh bawh thîn.

²⁹Chú hna thawk tûr chuan, ama chakna nasa takin keimaha a thawh dân ang zêlin, rim taka bein ka thawk thîn a ni.

BUNG 2

FINNA NI LO, KRISTA ZAWK

¹Nangniho leh Laodikei khuua mite leh, a taka ka hmêl la hmu lo zawng zawngten nangmahni ka lo hahpuizia che u hi in hriat ve ka duh a ni.

²Chú chuan an thinlungte titha-thovin, hmangaihnaah an insuihkhâwm ang a, Pa leh Kristaa awm Pathian thurûk hriat famkimna thûk leh hausakna zêmpui ngei chu hai pawp ve bawh se ka duh a;

³chú mî-ah chuan finna leh hriatna robâwm zawng zawng chu thuhrûk a ni si a.

⁴Hemi ka sawi chhan chu, ãawngkam thiamna hmanga miten an bum loh nân che u a ni.

⁵Taksâin in hnênah awm lo mah ila, thlarauvin in zîngah ka awm si a; Krista rinnaa in nghehzia leh in awm dân ãhatzia hian min tihlim thîn.

⁶Chuvângin Krista Isua, Lalpa chu in lo pawm ang khân, amahah chuan awm reng ula,

⁷amahah chuan zung kai ula, inphun nghet tlat rawh u; an zirtîr che u ang khân in rinnaah chuan nghet ula, lâwmthu sawi uar rawh u.

⁸Fimkhur rawh u, chuti lo zawng, tûpawhin Krista thú pawh ni lo, mihringte tih dân inlâkchhâwn mai mai leh inbumna thilin, fin hmêl tak leh awihawm âwm takin an bum palh ang che u.

⁹Amahah chuan Pathian famkimna tinrêng chu taksâin a awm si a;

¹⁰Amah chu lalna leh thuneihna zawng zawng lû a ni a, amahah chuan in famkim ta a ni.

DÂN AIAH KRISTA ZAWK

¹¹Krista serhtannaah chuan tîsâa sual pu taksa chu hlip thla vekin, kuta serhtan ni lovin, amah zâwkah chuan serhtan in ni a,

¹²baptismaah chuan a hnêna phûm in ni tawh a, chú mî-ah bawh chuan mitthi zîng ata amah kai thotu Pathian hnathawh rinna avânga a hnêna kaihtawh in nih vê kha.

¹³In bawhchhiatnate leh in tîsâa serhtan lohna avânga thi hnû kha, in bawhchhiatna zawng zawng chu ngaidamin ama rualin a tinung che u-a;

¹⁴batna lehkha, thupêka zia, min hêka min do tlattu chu a thai bo tawh a. Chú chu krâwsah khêngbetin a la bo ta.

¹⁵Tichuan, lalna leh thuneihnate chu hlip thlâin, chûngte chu hnehin vântlâng hmuhah a târ mualpho ta.

¹⁶Chuvângin, ei leh in chungchângah emaw, kût ni thú-ah emaw, thla thar thú-ah emaw, sabbath ni thú-ah emaw, tûma’n

thiam loh chantîr che u suh se;

¹⁷chûng chu thil lo awm tûrte hlimthlâ mai a ni a, a tak chu Krista a ni.

¹⁸Inngaihtlâwmna der te, Vântirhkoh chibai bûktute, hmuh hleih loh hmûa insawia, khawvêl-mîna rilru pû tho si a indah sâng chawp vêlho hian in lâwmman dawn tûr chungah bum che u suh se;

¹⁹chûngcho chuan taksa Lû chu an zawm tawh lo a ni. Lû chuan taksa bung hrang hrang inzawm khâwm chu a châwm a ni a, Pathian len dân ang zelin a lo ãhang lian thîn a ni.

²⁰Chuvângin, hê khawvêl tihdân hi Kristaa in thihsan tawh si chuan, eng tizia nge khawvêl mite ang leka tihdân hnuaia in kûn leh tâk mai?

²¹“Tawh suh, tem suh, dek suh,”

²²tia mihring siam chawp leh intukchawp, ral leh mai tûr laka in intukluh leh tâk mai le?

²³Hêng, inti sakhaw-mite phuahchawp thil, inngaihtlâwmna der te, taksâ ngaihnêpa intihrehawm vêl te hi a puithû hmêl viaw pawh a ni thei e; mahse, tisa châkna hneh tûr chuan a ãangkai hauh si lo va.

BUNG 3

TÎSA CHAKNA NI LOVIN, KRISTA ZAWKIN

¹Krista ruala kaihtawh in nih ve tawh chuan, chung lamah Pathian ding lama thú Krista awmna lama thilte chu zawng tawh zâwk rawh u.

²Lei lam thilahte inngat lovin, chung lama thil awmahte in rilru ngat tlat rawh u.

³In thi tawh a, in nunna chu Pathianah chuan Krista hnênah thuhrûk a ni tawh si a.

⁴Krista kan nunna chu a lo inlâr hunah chuan nangni pawh ama hnênah ropui takin in inlâr vê ang.

⁵Chuvângin, in lei lam taksa pêngte chu tihlum rawh u: inngaihna te, bawhlhlawhnate, hurna te, châkna sual te, duhâmna te (duhâmna chu mitem biakna a ni si a);

⁶chûng thil avâng chuan a ni, Pathian thinurna chu âwih duh lo fate chungah a thlen thîn ni.

⁷Nangni pawh chutiang tia in nun lai khân, chûng thilte chu in awm dân vê bawh a nih thîn kha.

⁸Tûn ahang chuan hêng thil zawng zawng: tihtauhna te, thinurna te, huatna te, sawi chhiatna te, in ãawngkam bawhlhlawhte hi bânzan vek rawh u.

⁹Mihring hlui chu a thiltih chawpin in hlip thla tawh a, chuvângin dâwt inhrilh tawn suh u,

¹⁰mihring thar chuan in inthuan tawh a, chu mihring thar chu hriat famkimna nei tûrin, a siamtu anpuia siam tharin a awm mêk a ni.

¹¹Chutah chuan Grik mi leh Juda mi te, serhtan leh tan loh te, hnam mâwl te, Skuthia mi te, bâwih te, zalên te pawh an awm hrang tawh lo; Krista chu engkim a ni a, engkimah a awm si a.

MIHRING THAR MIZIA

¹²Chutichuan, Pathian mi thlan, mi thianghlim leh duh tak in nih ang ngeiin lainatna thinlung te, ngilneihna te, inngaihtlâwmna te, zaidamna te, dawhtheihna te chuan inthuan rawh u,

¹³tû chungah pawh thu pawl nei ula, indawh tawnin inngaidam tawn ula; Kristan a ngaidam che u ang tak khân inngaidam vê rawh u.

¹⁴Chûng zawng zawng chungah chuan hmangaihna inbel rawh u, chu chu phuar khâwmna famkim a ni si a.

¹⁵Pathian thlamuanna chuan in thinlungah ro rêl rawh se, chutianga awm tûr chuan taksa pum khata koh in ni asin; lâwm nachâng hre bawh rawh u.

¹⁶Krista thû chu finna tinrêngin nangmahniâh khat liam rawh se; fakna hlâ te, Pathian hlâ te, thlarau hlâ tea inzirtîrin inzill tawn ula, khawngaihna thinlung pu chungin Lalpa chu hlâ saksak rawh u.

¹⁷Thu sawiah te, thiltihah te, in tih apiangah Lalpa Isua hmingin ti vek ula, amah kal tlang zêlin, Pathian leh Pa hnênah lâwmthu hril thîn rawh u.

KRISTIAN CHHUNGKUA

¹⁸Nupuite u, Lalpa mite tâna tih âwm rêngin, in pasalte hnênah intulût rawh u.

¹⁹Pasalte u, in nupuite hmangaih ula, an lakah thin tichhe suh u.

²⁰Naupangte u, engkimah in nu leh in pate thû zawm rawh u, chû chu Lalpa lawm zâwng a ni si a.

²¹Pate u, in fate tithinur suh u, an rilru a hnual dah ang e.

²²Bawihthe u, tîsa dâna in hotute thû chu engkimah zâwm rawh u; mit rawngbâwltu ni mai lovin, mihring tilâwmtu pawh ni hek lovin, tihtak zetna thinlung pûa Lalpa tih dêk chungin zâwm rawh u.

²³Engpawh in tih apiang chu, mihring tân maia ti lovin, Lalpa tâna ti ang zêl zâwkin, phûr takin ti thîn rawh u.

²⁴Lalpa hnên aţangin in lâwmman ro luah tûr chu in hmu ngei dâwn tih hre reng ang che u; Lalpa Krista rawngbâwl in ni si a.

²⁵Thil dik lo titu chuan a thiltih man chu a têl ngei ang; inthlei bikna rêng a awm si lo va.

BUNG 4

¹Hotute u, nangni pawhin vânah Hotu in nei tih hriain, in bawihthe chungah dik tak leh tha takin ti ve rawh u.

KRISTIANTE INLAINATNA

²Thahnemngai takin ţawngţai ula, rilru fim takin lâwmthu sawi zêl rawh u;

³ka kawh bun chhan Krista thurûk ka puan chhuah theih nân leh, ka tân kawng a inhawn zêl theih nân, keini pawh min ţawngţaisak ve rawh u;

⁴ka sawi tûr ang taka ka sawi theih nân min dîlsak bawh rawh u.

⁵Pawn lama mite lakah chuan fing takin awm ula, a ţul angin remchanna lei zêl rawh u.

⁶In ţawngka chhuak chu chî-a al, khawngaihna tel ni zêl rawh se; tichuan mi tin hnenah sawi tûr dik tak in hre thei dâwn nia.

CHIBAI HNUHNUNG

⁷Tukika hi kan unau duh tak, rawngbâwltu rinawm, Lalpaa kan bâwihpui a ni a, ani hian ka chanchin zawng zawng a rawn hrilh ang che u.

⁸Chuvângin, ani hi in hnênah ka rawn tîr a ni, kan chanchin in lo hriata in thinlung a lo thlamuan theih nân.

⁹Onesima, unau rinawm leh duh tak, in zînga mi pawh a lo tel ve kha. Anniho hian he lama thil thleng engkim an hriattîr ang che u.

¹⁰Aristarka, ka tânpuipa hian chibai a bûk a che u; Marka, Barnaba tupa pawhin chibai a bûk a che u, (ama chungchânga tih dân tûr chu ka rawn sawi tawh kha: in hnêna a lo kal chuan lo lâwm rawh u),

¹¹Isua, Justa an tiha hian chibai a bûk ve che u a. Hêng mite chauh hi serhtan mite lam aţang chuan Pathian lalram tâna ka thawhpui awmchhun an ni si a; min tithlamuangtu tak tak an ni bawh a.

¹²Epaphra, nangmahni zînga mi, Krista Isua bâwihpa hian a chibai che u a. Pathian duh zâwnga kawng tinrênga in lo puitlina, in lo famkim theih nân ani hian thahnemngai takin a ţawngţaisak thîn che u asin.

¹³Nangmahni tân te, Loadikei mite tân te, Heirapoli-a awm tân tea thahnem a ngaihzia ka hriatpui a ni.

¹⁴Luka, daktawr duhawm tak leh Dema hian chibai an bûk a che u.

¹⁵Loadikei khuua unau awmte kha chibai mi bûksak ula; Numpha leh a ina kohhranho chu chibai mi bûksak bawh ang che u.

INFUIHNA LEH MALSAWMNA HNUHNUNG

¹⁶Hê lehkathawn hi in zînga in chhiar zawhah, Loadikei kohhranah pawh lo chhiattîr ve rawh u; nangni pawhin Loadikei khuua aţanga lehkha thawn kha lo chhiar vê bawh ula.

¹⁷Arkippa hnênah khân, “Rawngbâwl hnâ Lalpa hnena mi i hmuh kha hlen tûrin fimkhur rawh,” ti ang che u.

¹⁸Kei, Paula hian keima kut ngeia ziakin chibai ka bûk che u hi. Ka kawh bunte hi hre reng rawh u. Khawngaihna in hnênah awm rawh se. Amen.

1 THESSALONIKA

Ziah tu: Paula • Ziah kum: A.D. 51

I Thessalonika Lehkathawn hi Paula lehkathawn zînga a hmasa pâwl a ni a, Korinth khua aţanga a ziah a ni. Laina lehkha anga ziah a ni a, rinnaa an din nghehzia leh an thiltih that chung a lâwmpuina thû te, Krista lokallehna chungchang leh a hnaih tawhzia thû te chu duhsak tak leh anmahni thlamuan pahin a hrilh fiahsak a ni. Chuvângin, Lalpa lokalleh huna a lâwm zâwnga awma, mimal nun invawng thianghlim tûrin a fuih. Hê lehkathawn hian Krista lokallehna chungchangah tûn thleng hian ringtute tân beiseina lâwmawm min la pe zêl a ni. Thessalonika mite kha kohhran ding tîr tê an ni a; ringtu thi tawhte dinhmun tûr chungchângah zirtîrna mûmal pêk an ngai a. Chû mamawhna chu chhângin Kristaa muhîlte chu Lalpa hnêna awm tawh, nakinah taksa thawhlehna changa ropui taka lâk chhohva, keini nungdama lo la awma te pawh anmahni ruala Lalpa hnêna vâna 'lâk chhoh' (rapture) tûr kan ni, tia lo inthlamuan tawn tûrin a chah a ni. (4:13-18) I Thessalonika hi Bible-a lehkhabu 52-na a ni a, bung 5 a awm a, châng 89 a awm baw.

BUNG 1

CHIBAI BÛKNA

¹Paula, Silvana leh Timothea chuan Pa Pathian leh Lalpa Isua Kristaa mite, Thessalonika kohhranhote hnênah: Pa Pathian leh Lalpa Isua Krista hnên aţangin khawngaihna leh remna in hnênah awm rawh se.

ENTAWN TUR ȚA

²Kan Țawngtâinaachte chuan in hming lamin, nangmahni avângin Pathian hnênah lâwmthu kan sawi Țhîn.

³Rinna avânga thâ thlah lova hnâ in thawh dân te, hmangaihna avânga in thawhrim zia te, kan Pathian leh Pa hmâa kan Lalpa Isua Krista beisei avânga in dawhtheihzia te kha hre reng rawh u,

⁴ka unau duhtak te u, Pathian mi thlan in ni tih kan hria asin.

⁵Kan Chanchin Ța hi in hnênah thû chauhvîn a thleng lo va, thiltihtheihna nê, Thlarau Thianghlim nê, inrintawkna nghet tak nêna a lo thlen zâwk kha; nangmahni tâna Țahnmem kan ngaih Țhinzia pawh in hai si lo va.

⁶Lalpa leh keimahni hnungzuitu in lo ni ve ta a, hrehawm nasa tak in tuar chung pawhin a thû chu in lo pawm tlat a, Thlarau Thianghlimah in lâwm êm êm baw si a;

⁷chuvângin Makedonia leh Akaia rama ringtu zawng zawngte tân entawn tlâk in ni ta reng mai.

⁸Lalpa thû chu nangmahni aţangin a thang chhuak ta a, Makedonia leh Akaia ramah chang lo pawh hmun tinah a thang chhuak ta. Pathiana in rinna thû chu a darh zau êm avângin keini tân pawh sawi nawn a ngai ta lo hial a ni.

⁹Kan rawn tlawh lai che u a min lo lawmzia te, milem kalsana, Pathian nung leh dik tâna rawngbâwl tûra Pathian lam in hawi

tâkzia te,

¹⁰vân aţanga lo kal tûr a Fapa, mitthi zîng ata a kaih thawh, thînur lo thleng tûr laka min chhanchhuaktu Isua ngei chu kan ngâk si a.

BUNG 2

PAULA AWM DAN

¹Unaute u, kan rawn tlawh che u kha a thlâwn lo tih nangmahni ngeiin in hria alâwm.

²Khami hmâ khân tuarna kan lo pal tlang tawh a, Philippi khuaah diriam taka nghaisakna kan tâwk a nih kha; dodâlna nasa tak kârah pawh Pathian Chanchin Ța puang tûra kan Pathiana kan huaisenzia pawh in hriat ve kha.

³Kan thu hril hi dik lohna emaw, bawhlhlawhna emaw, inbumna emaw aţanga lo chhuak a ni si lo va.

⁴Chanchin Ța hril hnâ kawltîr tlâka Pathianin min ruat ang ngeiin, kan thu sawina rêng rêngah mihringte tilâwm tûr mai ni lovin, kan thîlung fiah Țhîntu Pathian tilâwm zâwngin kan hril zawk Țhîn a ni.

⁵Englai mahin fak derna thû emaw, duhâmna thup tûra thu-khuh emaw kan chng lo tih in hai loh kha—Pathian ngei chu min hriatpuitu a ni si a.

⁶Krista tîrhkoh kan nih avâng hian mite tâna hautak thama phût nei thei kan ni vê tawh a; mahse nangni emaw, mi dangte emaw, mihring tu dang hnên emaw aţang mahin châwimâwina kan zawng ngai lo.

⁷Nau pawm lai nuin a fate a duat angin in zîngah zaidam takin kan awm Țhîn a nih kha.

⁸Heti taka kan ngaih che u avâng hian, Pathian Chanchin Ța zirtîr mai hi kan duh tâwk lo; kan tân in duhawm êm avângin kan nunna hial pawh pêk tak che u kan nâp asin.

⁹Unaute u, kan thawh hahzia leh kan rimzia in hriat Țhîn kha; nangmahni tîhhautak mawlh hlauvin achhûn azâna thawh hah êm êm chungin Pathian Chanchin Ța chu kan hrilh Țhîn che u kha.

¹⁰Nangni ringtute zîngah khân dem kai lovin, dik tak leh inpe zo takin kan awm Țhîn tih min hriatpuitute in nih kha, a dikzia chu Pathian pawhin min hriatpui vê baw si.

¹¹Pain a fate chung a tih anga kan fuih che u a, kan thlamuan baw che u a, chutiang bawka ti ve tûra mawhphurhna kan hlan Țheuh tawh che u kha;

¹²chûng chu ama lalram leh a ropuinaa ko lûttu che u Pathian mi ni tlâka in awm theihna tûr a ni e.

AN LO PIAN THAR DAN

¹³Hei vâng hian bâng lovin Pathian hnênah lâwmthu kan sawi a, Pathian thû kan hnên aţanga in hriata, in pawm lai khân mihring thu ang leka pawm lovin, Pathian thutak a nihna zâwkin in pawm a; a ringtu nangniho tân a lo thawh sâwt hlê a nih hi.

¹⁴Nangni unaute u, Judai rama Pathian kohhranho, Krista Isuaa awmte tîhdân entawntu in lo ni ta a. Judate laka an tuar ang khân nangni pawhin in rama mite lakah ang khat renga in tuar vê tâk hi.

¹⁵Chûng Judate chuan Lalpa Isua leh anmahni zâwlneite pawh an that a, keini pawh min tiduhdah baw k a; Pathian an tilâwm lo va, mi zawng zawng do zawnin an awm lui tlat a,

¹⁶chhandamna an chan theihna tûra Jentailte hnêna thu hril min khap lehngal a, an sualna chuan a vawrtâwp a thleng ta; a tâwpah zawng thinurna chu an tawngbaw ta ngê ngê a ni.

ANMAHNIHO HMUH CHÂKNA

¹⁷Nimahsela unaute u, nangmahni nên thinlung lamah ni lo, taksâin rei lo te chhûng kan inthen rih zawk a, in hmêl hmuh leh hlân kan nghakhlel êm êm a ni.

¹⁸Kei Paula ngei telin, in hnênah vawi engemaw zat lo kal kan tum thîn a, nimahsela Setanan min dâl tlat a.

¹⁹Kan beiseina, kan lâwmna leh kan hlimna lallukhum tûr chu eng dang nge ni chuang ang le? Kan Lalpa Isua Krista lokalleh hunah chuan nangmahni ngei hi in ni dâwn lo'm ni?

²⁰Nangni hi kan ropuina leh kan hlimna in ni asin.

BUNG 3

AN RINNA VEIAWM

¹Chutia kan tuar zawh tâk ngang loh avâng chuan, Atheni khuua châm rih zai kan rêl ta a;

²tichuan Timothea, kan unaupa leh Pathian rawngbâwltu, Krista Chanchin Thaa kan thawhpui hi nangmahni tinghet tûr leh in rinna kawnga thlamuan tûr che u in kanrawn tîr a ni.

³Hêng hrehawm tuarnate hian tûte mah tinghîng suh se. Hetiang tuar tûra ruat kan ni tih nangmahni pawhin in hriat reng kha.

⁴Dik takin, in hnêna kan awm lai khân hrehawm tuar tûr kan ni tih kan hrilh lâwk che u kha; chutiang chuan a thleng ta ngei a, chû pawh chu in hriat kha.

⁵Chuvângin, rinna lamah eng nge in an zêl tih hre lovin kan awm hlê hlê thei ta si lo va, chinchâng hre tûrin ani hi karawn tîr ta a ni; chuti lo zawng, thlêmtu chuan a thlêm thlûk hlauh che u chuan kan thawhrimnate kha a thlâwn mai dâwn asin.

TIMOTHEA FUIHNA

⁶Tûnah chuan Timothea chu in hnên aţangin kan hnênah a lo lêt leh tawh a, hmuh che u kan châk ang bawka min hmuh in lo châk vê zia te, a lâwmawm zâwnga min la hriat vê reng avâng te, in rinna thû leh in hmangaihna chanchin te minrawn hawn a;

⁷chuvâng chuan ka unaute u, in rinna thu lâwmawm tak chuan min hnêm khawp a, kan manganna leh hrehawmnate chu kan hre chang tawh lo hial a ni.

⁸Tûnah zawng, Lalpaa in din ngheh zêlna hian min tidam sawng sawng mai a ni.

⁹Nangmahni vângin heti tak hian Pathianah kan lâwm ta si a, engtiang takin nge Pathian hnênah lâwmthu kan sawi tâk ang le?

¹⁰Tichuan in hmêl kan hmuh theihna tûr leh, rinna lama in tlâkchhamna kan phuhrûksak theihna tûr che u in, achhûn azânin nasa takin kan ţawngţai thîn a ni.

KOHRAN TANA ŢAWNGŢAINA

¹¹Tûnah hian kan Pathian leh Pa leh kan Lalpa Isua Krista chuan in hnênah min hruai ngei rawh se.

¹²Kan hmangaih che u ang taka nasâa nangmahni leh mi zawng zawng in hmangaih theih nân, in hmangaihna chu Lalpan nasa takin tihpunsak che u sela;

¹³kan Lalpa Isua Krista chu a mi thianghlim zawng zawngte nêna a lo kal hunah, kan Pathian leh kan Pa hmâah in thinlungte chu sawisêl bova thianghlimin a tinghet ang che u.

BUNG 4

THIANGHLIM TURA NGÊNA

¹A tâwp berah chuan unaute u, Pathian tilâwm zâwnga in awm dân tûr leh, kan hnên ata in dawn ang kha in lo ngah lehzualna tûrin, Lalpa Isuaah chuan kan ngên che u a, kan fuih baw k a che u.

²Lalpa Isua zârah chuan eng thûte nge kan pêk che u tih in hria e.

³Pathian duh zâwng chu hei hi a ni: tihthianghlina in awm reng hi; chuvângin inngaihna sual lakah chuan inthiarfihlîm rawh u;

⁴tichuan, in zînga mi tinin mahni bêl chu thianghlim leh zahawm taka wawn him dan in hre dawn a ni.

⁵Pathian hre lo Jentailho ang lek hian tîsa châkna kawngah inhmang suh u;

⁶hetiang thilah hian tûma'n a unaupa chungah remchâng lân tîsual suh se; Lalpa chu chutiang thil titu zawng zawng chungah phuba latu a nih avângin, keini pawhin kan zilh lâwkin kan hriattîr tawh che u kha.

⁷Pathianin bawlhhlawh tûrin min ko lo va, thianghlim tûrin min ko zâwk a ni.

⁸Chuvângin, hê zilhna thu pawisa lotu chu mihring pawisa lo mai a ni lo va, a Thlarau Thianghlim min petu Pathian pawisa lo a ni zâwk.

IN UNAUNA NUN MAWI

⁹Unau inhmangaihna chungchâng hi chu ziahsak in ngai lo ve, Pathian ngei chuan inhmangaih tawn tûrin a zirtîr si che u a.

¹⁰Makedonia ram puma unau zawng zawng chungah pawh chutiang tak chuan in ti a nih kha. Nimahsela unaute u, nasa zâwka ti zêl turin kan ngên a che u.

¹¹Kan thupêk che u ang ngei khân ngâwi reng chungin, tih tûr mahni kova tlâ chu ngai pawimawh takin mahni kut ngeiin hnâ thawk rawh u;

¹²tichuan, pâwn lam mite hmuhah mâwi takin in awm thei ang a, engmah tlâkchham in nei dâwn lo nia.

KRISTA LOKALLEH DAWN VANGA THLAMUANNA

¹³Unaute u, beiseina rêng rêng nei lo mi dangte ang maia in lungngaih ve loh nan, muhîlte chanchin in hriat loh ka duh lo ve.

¹⁴Isua a thi a, a tho leh ta tih kan rin si chuan, Isuaa lo muhîl tawhte chu Pathianin ama rualin arawn hruai vê dâwn asin.

¹⁵Lalpa thûin hei hi in hnênah kan sawi a ni. Keini Lalpa lo kal thlenga nung dama lo la awmte hian, muhl tawhte chu kan lehkhah tawp lo vang, tih hi.

¹⁶Lalpa ngei chu âu thâwm nê, Vântirhkoh chungnungber âu leh Pathian tâwtawrâwt rî nê, vân aţangin a lo chhuk dâwn si a. Kristaa thi tawhte chu an tho hmasa ang a.

¹⁷Chumi hnûah chuan keini nungdama lo la awm te hi, boruakah Lalpa tâwk tûrin, anmahni rualin chhûm zîngah khian lâk chhohvin kan awm ang. Chutichuan, kumkhuan Lalpa hnênah kan awm tawh ang.

¹⁸Chuvângin, hêng thûte hian lo inthlamuan tawn thîn rawh u.

BUNG 5

LALPA NÎ

¹Chûng thil lo thlen hun leh ni chungchângah chuan, unaute u, ka ziahsak pawh in ngai lo ve.

²Lalpa Nî chu zanah rûkru angin a lo thleng dâwn tih nangmahni zâwkin in hriat chian kha.

³Miten, “Muanna leh himna!” tia an sawi lai mêkin, hmeichhe raipuarin nau a vei thut angin chawp leh chilha boralna an chungah a lo thleng ang a, tuman an pumpelh hauh lo vang.

⁴Nimahsela unaute u, nangni zawng thimah in awm lo ve; chu mi Nî lo thleng tûr pawh chuan rûkrû angin a nang thut lo vang che u.

⁵In zâin êng fate leh chhûn lam fate in ni vek si a. Zâna mi kan ni lo va, thima mi kan ni hek lo.

⁶Chuvângin, mi dangte angin i muthlu suh ang u khai, harhvâng takin i ngaihven zâwk ang u.

⁷Muhilte chu zânah a ni an muthilh thîn ni, zu rûite pawh chu zânah a ni an ruilh thîn ni.

⁸Nimahsela, keini chhûna mite hi harhfim takin awm ila, rinna leh hmangaihna âwmpâw inbel rengin, chhandam beiseina chu thîr lukhum angin i khum ang u.

⁹Pathianin thinurna tuar tûrin min ruat lo va, kan Lalpa Isua Krista zâra chhandamna chang tûrin min ruat zâwk a ni;

¹⁰kan aia a lo thihna chhan chu, men lai pawhin, mutthilh lai pawhin, amah nêna kan chênho theih nân a ni.

¹¹Chutichuan, inthlamuan tawnin intichak tawn zêl rawh u, in tih mêk thîn ang hian.

FUIHNA THU

¹²Unaute u, in zînga thawkrimte, Lalpaa in chungah awmte leh nangni zilhtu che u chu zah nachâng hre tûrin kan fuih che u hi;

¹³an hnathawh avânga hmangaih taka lo ngaihlu êm êm tûrin kan ngên che u a ni. Nangni chu inngeih takin lo awm rawh u.

¹⁴Unaute u, dân lo taka chête chu zilhhau rawh u; mi zakzumte erawh chu thlamuan ula, chak lote pawh tung ding zêl ula, mi zawng zawng lakah dawhthêi tûrin kan fuih a che u.

¹⁵Sual chu sual vêka thungrûlh tûr a ni lo tih lo hre rawh u; amaherawhchu, nangni tân leh mi zawng zawng tâna thil tha tûr chu a ûmin ûm rawh u.

¹⁶Lâwm fo ula,

¹⁷bâng lovin ţawngţai rawh u,

¹⁸engkimah lâwmthu hril zêl ula; chû chu Krista Isuaah in tâna Pathian duh zâwng a ni si a.

¹⁹Thlarau chu timit suh u.

²⁰Thlarauva thupuanthe hi hmusit suh u.

²¹Engkim fiah thîn ula; thil tha chu vuan tlat rawh u.

²²Sual tinrêng lakah inthiarfihlîm rawh u.

MALSAWMNA LEH ZILH-HAUHNA

²³Remna Pathian ngei chuan in pumin tithianghlim che u sela; in thlarau, in rilru leh in taksa chu kan Lalpa Isua Krista lo kal hunah a pumin, dem kai lova humhîm awm rawh se.

²⁴A kotu che u chu a rinawm êm a, a tihpuitlinsak ngei bawh ang che u.

²⁵Unaute u, min ţawngţaisak rawh u.

²⁶Unau zawng zawngte chu fawh thianghlimin chibai mi bûksak rawh u.

²⁷Hê lehkhah hi unau thianghlim zawng zawngte hnêna chhiar tûrin Lalpa hmingin mawhpurhna ka hlân a che u.

²⁸Kan Lalpa Isua Krista khawngaihna chu in hnênah awm rawh se. Amen.

2 THESSALONIKA

Ziah tu: Paula • Ziah kum: A.D. 51

'Lalpa Nî chu a lo thleng daih tawh alâwm; tûna buaina leh rûmna an tawrh te chu Lalpa Nî a thlen laia chhanchhuahna an chan vê loh vânga tuar an ni tawh zâwk,' tiin a beidawng zâwngin Paula ziaik ni âwm tak lehkhathawn pakhat chuan Thessalonika kohhran mite zîngah ringtu an nih avânga tihduhdah tuarte rilru a lo tichî-ai hle a. Chumi hrilh fiah tûr chuan Paulan hê lehkhah hi a thawn leh a. Lalpa Nî lo thlen hmâin ringtute chu Lalpan ama hnênah min la chho hmasa dâwn alâwm; chu mi ni lo thlen hmâin Danbawhchhepa a lo lang hmasa ang a, chu bâkah tlûksanna a lo awm phawt dâwn asin. Nangni chu thima awm lovin, êngah in awm tawh e,' tia thlamuanna thuchah sawiin ringtute a fuih a ni. II Thessalonika lehkhathawn tawi têah hian hun hnuhnunga thil lo thleng tûr hrilh lâwkna (eschatology) chungchâng a langsâr hle. 2 Thessalonika hi Bible-a lehkhahu 53-na a ni a; bung 3 a awm a, châng 47 a awm bawk.

BUNG 1

CHIBAI BÛKNA

¹Paula, Silvana leh Timothea chuan, Pathian Kan Pa leh Lalpa Isua Krista mi Thessalonika kohhran hnênah:

²Pa Pathian leh Lalpa Isua Krista hnên aţangin khawngaihna leh remna chu in hnênah awm rawh se.

PATHIAN RORÊLNA HNUHNUNG LEH ROPUI

³Unaute u, nangmahni avâng hian Pathian hnênah lâwmthu sawi tûr kan ngah hlê mai; chû chu tih âwm tak pawh a ni a, in rinna chu nasa takin a lo ţangh lian zêl a, in zavaia in inhmangaih tawna te lah chu a zual zêl bawk si a.

⁴Hetianga tihduhdahna leh hrehawm tinrêng in tuarna kâra in chhelna leh in rinna nghet tak avâng hian, Pathian kohhranho zîngah kan chhuang êm êm che u a ni;

⁵Pathian rorêlna dik takah chuan, Pathian lalram mi ni tlâka chhiar tel in ni tih finfiahna Chiang taka lo lang chu in lo tuar vê-na hi a ni asin.

⁶Nangmahni hrehawm tuartirtu che u chungah hrehawmna bawka thungrulh leh hi Pathian ngaihah thil dik a ni si a.

⁷Lalpa Isua chu a Vântirhkhoh chak tak takte nên vân aţanga a rawn inlâr hunah nangni hrehawm tuarte leh keiniho hi chawlhna min pê ang,

⁸Pathian hre lote leh kan Lalpa Isua Krista Chanchin Tha âwih duh lote chungah erawh chuan meialh hmangin phuba a la tawh ang.

⁹Chûng misualte chu Lalpa hmâ aţang leh a thiltihtheihna ropui tak aţang chuan chatuana boralnaa hrem an ni ang a,

¹⁰a mi thianghlim zawng zawngten lâwm taka hmuaka an lo châwimâwi tûrin chumi Nî-ah chuan a lo kal dâwn a ni. Nangni pawh kan thu hriattîr che u kha in pawm avângin in tel vê ang.

¹¹Chuvâng chuan, kan Pathianin a kohte zînga tel ve tlâka a ruat che u a, a thiltihtheihna hmanga thil tha tih in duhte chu in hlen chhuah veka, in rinnain tih tur tha a hriat apiang a tih theihna tûrin kan ţawngţaisak ţhîn che u a;

¹²chutichuan, kan Pathian leh Lalpa Isua Krista khawngaihna ang zêlin, kan Lalpa Isua Krista hming chu nangni amahah, amah pawh chu nangmahniah châwimâwiin a awm thei dawn a ni.

BUNG 2

TLÛKSANNA RÛNPUI

¹Unaute u, kan Lalpa Isua Krista lokallehna leh a hnêna kan intawh khawmna tûr thû-ah heti hian kan ngên a che u,

²kan sawi anga puhin lehkhah te, ţawngka te leh thlarauvin, 'Krista Nî chu a thleng dêr tawh alâwm,' tih thuthangin in rilru timangangin, chî-âi phah nân lo hmang suh u.

³Tûma'n engti zâwng mahin tihder che u suh se. Tlûksanna* chu a lo thlen hmasak zeta, dânbawhchhepa,** boral fapa** chu a lo lan hmâ loh chuan chu mi Nî chu a thleng dâwn si lo va.

⁴Ani chuan Pathiana an vuah leh chibai an bûk apiang chu dovin, mi chungah a inchâwi sâng ang a; Pathian tempul chhûngah Pathian anga ţhûin, Pathian angin a inlantîr dâwn a ni.

⁵In hnêna ka awm lai khân chûng thû chu ka hrilh ţhîn che u tih in hrereng lo vem ni?

⁶Ama hun takah chauh a lo lan theihna tûrin, tûnah hian eng thilin nge la khapbet* tih in hria e.

⁷Dân bawhchhiatna thurûk chuan a thawk ţan dêr tawh si a; tûna la khaptu hi lâk kian a nih hmâ chu khapbehin a la awm rih a ni.

⁸Chumi hnûah dânbawhchhepa chu a rawn inlâr chhuak tawh ang; nimahsela, Lalpa rawn inlârna êng nasa tak chuan a tihlum ang a, a kâa thâw chuan a tiboral ang.

⁹Chû dânbawhchhepa chu Setana chakna ze pûin a lo kal ang a, thiltihtheihna te, chhinchhiahna te, inbumna thilmak tinrêng nên a rawn thawk ang a,

¹⁰boral fate chu, chhandam an nih theih nâna hmangaihna thutak an pawm duh loh avângin, inbum dân verther tak hmanga bumin an awm ang.

¹¹Hei vâng hian dâwt thû chu an awih ngeina tûrin, Pathianin inbumna chak tak an hnênah a thlentîr ang:

¹²thutak âwih duh lova, dik lohnaa lâwm zâwkten thiam loh an chan vek theihna tûrin.

DING NGHET RAWH U

¹³Lalpa duh lai unaute u, Pathianin Thlarauva a tihthianghlim leh thutak rinna avângin a tîr aţanga chhandamna chang tûra a lo thlang che u hi, in puala Pathian hnêna lâwmthu sawi mawlh mawlh tûr kan ni a,

¹⁴kan Lalpa Isua Krista ropuina chang tûrin kan Chanchin Tha hian a ko ta che u a nih hi.

¹⁵Chuvângin unaute u, ding nghet ula, thurochhiah in lo zir te, kan lehkhah thawn leh ţawngkâa kan zirtîr che u kha vuan tlat rawh u.

¹⁶Kan Lalpa Isua Krista leh kan Pa Pathian, min hmangaiha, khawngaihna avânga chatuana thlamuanna leh beiseina tha min petu chuan,

¹⁷In thinlungte chu tithlamuanguin, thu tha leh hnathawh tha tinrêngin tinghet zêl che u rawh se.

BUNG 3

MIN TAWNGTAISAK RAWH U

¹A tâwp berah chuan unaute u, Lalpa thû hi nangmahni zînga a awm anga a lo zalên a, chawimawia a awm zêl theih nân te:

²Mi nikhua lo leh mi suaksualte laka chhan chhuaha kan awm theih nân min tawngtaisak rawh u; mi zawng zawngin rinna an la nei vek rih si lo va.

³Amaherawhchu, Lalpa chu a rinawm êm a, ani chuan tinghetin misual pa lakah chuan a hum tlat dâwn che u nia.

⁴Thû kan pêk che u kha in ti a, in la ti zui zêl ang tih pawh Lalpaah chuan kan ring tâwk che u a ni.

⁵Lalpa chuan in thinlung chu Pathian hmangaiha, dawhthei taka Krista nghâk fan fan thei tûrin hruai che u rawh se.

THATCHHIATNA LAKA ZILH-LÂWKNA

⁶Unaute u, kan thu hriattîrna an dawn anga awm lo va, dân lo ang taka awm unau chu tûpawh ni se, chutiango laka inthiarfihlîm tûr chuan kan Lalpa Isua Krista hmingin thû kan pê che u.

⁷Nangnin min entawn dân tûr in hriat tawh ang khân in zîngah mâwi lo taka kan chêt ngai loh kha.

⁸Tû chaw mah a thlâwnin kan ei ngai lo va, in zînga mi tûmah kan tihhautak lohna tûr che u in achhûn azânin hah tak leh rim takin kan thawk zâwk a ni;

⁹Inchâwmîr tûrin thuneihna kan nei lo a ni lo va, nangni tâna entawn tlâk ni tûrin kan insiam a ni zâwk.

¹⁰In hnêna kan awm lai pawh khân hê thû bawh hi kan pêk che u kha, “Tûpawh hna thawk duh lo chuan ei pawh ei suh se,” tih hi.

¹¹In zînga mi thenkhat dâwngdah taka khawsa thînte chanchin kan lo hria a; chûng mite chuan hna thawh rêng rêng tum lovin mi dang thilah an inrawlh buai chhên thîn a.

¹²Chutiang mite chuan ngâwi rengin thawk mial mial sela, anmahni thawh chhuah ngei ei thîn rawh se, tih hi Lalpa Isua Kristaah chuan thu pe chungin kan fuih a ni.

¹³Nimahsela unaute u, nangni chuan thil tha tih lo ning suh u.

¹⁴Mi tûpawhin hê kan lehkha thû hi a zawm duh loh chuan, chû mi chu chhinchhiah ula, zahna an lo hmuh theih nân kawmserh rawh u.

¹⁵Amaherawhchu, hmêlmâ ang êm chuan en lo ula, unau angin zilh zâwk rawh u.

MALSAWMNA

¹⁶Remna Lalpa ngei chuan kawng tinrêngah thlamuanna pe che u rawh se. Lalpa chu in zâa hnênah awm rawh se.

¹⁷Kei Paulan, keima kut ngeia chibai ka bûkna che u a nih hi; hei hi ka lehkhathawn apianga chhinchhiahna atâna ka ziah a ni e.

¹⁸Kan Lalpa Isua Krista khawngaihna chu in zâa hnênah awm rawh se. Amen.

1 TIMOTHEA

Ziah tu: Paula • Ziah kum: A.D. 64

Hê lehkhah hi Paulan rinna lama a fapa Timothea hnêna Kohhran kalhmang leh a enkawl dân te, hruaitu mawhphurhna te leh fel taka inkaihhraina leh kohhran chawmna tûra a thawn a ni a; chuwângin Timothea hnêna lehkhathawn pahnihte leh Tita lehkhathawn te hi ‘Pastoral Lehkhathawn’ an ti a ni. Kum AD zabi khatna laia ringthar an lo pun chhoh zêl lai khân, kohhran enkawl dân tûrah thuneihna tela inkaihhraina mûmal leh inthununna ken kawh tûlzia a lo Chiang telh telh a; chuwângin kohhran hruaitu leh enkawltute awm dân tûr hetiang hian a ziaak ta a ni. Timothea hi Paula nêna inkawp tlat, apostol naupang tak a ni a. A pa chu Grik mi a ni a, a nu Euniki chu kulmûk taka Juda sakhaw zâwmte a ni (2 Tim. 1:5). A pianna leh seilenna Galatia rama Lustra khua aţangin Paula te zin tûm hnihna kha a lo zui ve a, Korinth-ah te, Ephesi leh Jerusalem-ah te a tâwiâwm zêl a. Pastor senior-in pastor la naupang zâwk Timothea hnêna lehkhah a thawn chhan chu: “Pathian chhûngkaw zînga khawsak dân tûr in hriat theih nân ka ziaak a ni; Pathian chhûngkua chu Pathian nung Kohhran, thutak nghahchhan leh ban nghet a ni si a,” (3:15) tih hi a ni. Timothea lehkhathawn pakhatna hi Bible-a lehkhahu 54-na a ni a, bung 6 a awm a, châng 113 a awm bawk.

BUNG 1

CHIBAI BÛKNA

¹Min Chhandamtu Pathian leh kan beisei Lalpa Isua Krista thupêk anga Isua Krista tirkoh Paula chuan:

²Rinnaa ka fapa dik tak Timothea hnênah: Pathian kan Pa leh, kan Lalpa Isua Krista hnên aţangin khawngaihna te, zahngaihna te, remna te lo awm rawh se.

THURIN DANG A AWM LO

³Makedonia rama ka kal laia ka ngen che ang khân, thurin dang zirtîr thîn mi thenkhatte kha lo khap tûrin Ephesi khuaah khân châm rih tûrin ka ngên nawn leh che a ni.

⁴Thawnthu lamah leh thlahtu hming chhui kual vak vak kha bânsan rawh se; chûng chuan Pathiana rinna lamah sâwtna engmah a thlen lo va, inhnialna chauh a chawkh chhuak thîn a ni.

⁵Thupêkin a tum tak chu, thinlung thianghlîm leh chhia leh tha hriatna thiang leh, rinna dik tak aţanga lo chhuak hmangaihna hi a ni zâwk.

⁶Chûng chu pên bosanin, mi thenkhat chuan thu lawilo mai mai an tuipei ta zâwk a,

⁷pâwr tak taka an thu sawite hian eng nge a kawha, eng nge awmzia a neih tih hre thiam si lovin, dân zirtîrtu ber nih an chuh tlat si a.

⁸Dân chu miin tha taka a zawm phawt chuan a tha tih tûma’n kan hai lo;

⁹hêng hi hria ila: dân hi mi thate tâna siam ni lovin, dân pawisa lo leh dân kalh zâwnge che thîn tân te, Pathian ngaihsak lo leh misual tân te, mi thianghlîm lo leh Pathian zah lo tân te, nu leh pa thattu te, tualthat te,

¹⁰innghai chîng te, mawngkawhur te, mihring rûk bo hmang te, dawthei te, a dera chhechham chîng te leh, thurin dik dodâl zâwnge thil rêng rêng te,

¹¹faktlâk Pathian Chanchin Tha ropui, ka hnêna kawltîr ang dodâltute tâna siam a ni zâwk e.

PATHIAN KHAUNGAIHNA ROPUI

¹²Hê rawngbâwlâna hnâ thawkh theia mi siamtu leh rin tlâka mi ngaitu Krista Isua, kan Lalpa hnênah chuan lâwmthu ka sawi a ni.

¹³Hmanah khân sawi chhetu, tiduhdahtu leh mite nghaisatu ka ni thîn a; amaherawhchu, hriat lohna avâng leh rinna pawh la nei lo chung a ti ka nih avângin zahngaihna ka chang ta hlauh a ni.

¹⁴Krista Isuaa rinna leh hmangaihnaah chuan kan Lalpa khawngaihna chu a khat liam zawih zawih si a.

¹⁵Krista Isua chu misualte chhandam tûrin khawvêlah a lo kal tih thû hi a rinawmin a va pawm tlâk êm! Kei chu an zînga misual ber ka nih hi.

¹⁶Chuwâng chauhvah zahngaihna hmû ka ni bawkh si; tichuan, Isua Kristan keimahah hian a dawhtheihna zawng zawng a lo lantîr hmasa ta a ni; chatuan nunna chang ve tûra la ring tûrte tâna entîrna a nih theih nân.

¹⁷Lalber, chatuana awm, thi thei lo, hmuh theih loh, finna nei awmchhun Pathian chu, chatuana chawmîawi leh ropuiin awm rawh se. Amen.

INDONA THA BEI RAWH

¹⁸Ka fapa Timothe, hmâna i awm dân tûr an hrih lâwk ang taka indona tha i beih theih nân, chû mawhphurhna chu i kovah ka nghat a,

¹⁹rinna leh chhia leh tha hriatna thiang vawng tlat ang che; mi thenkhatten chûng chu an pawisak loh avângin, lawng keh angin an rinna chu a keh chhe thîn.

²⁰Chûng zîngah chuan Humenaia leh Aleksandara an tel a, Pathian sawi chhiat pawizia an zir theih nân anni chu Setana ka pê a ni.

BUNG 2

MI ZAWNG ZAWNG TANA TAWNGTÂI

¹Mi zawng zawng tân thil dîl tawngtâina te, tawngtâina pangngai te, mi dangte tâna tawngtâisakna te leh lâwmthu sawia tawngtâina te hi thil dang zawng aia ka ngai pawimawh hmasak a ni a,

²thlamuang tak leh inrem taka Pathian ngaihsak chung leh zahawm taka kan khawsak theih nân, lalte leh thuneitu zawng zawngte chu tawngtâisak an tûl bawkh a ni.

³Chû chu min chhandamtu Pathian ngaihin a tha a, lawmtlâk a ni si a.

⁴Ani chuan thutak chu mi zawng zawngin an man fiaha, chhandamna an chan a duh a ni.

⁵Pathian pakhat a awm a, Pathian leh mihring inkârah Palai pakhat a awm bawh a, chû chu Mihring, Krista Isua chu a ni a,

⁶ani chu a hun tak zêla hriatpuitu ni tûrin mi zawng zawng tlan nân a inpê a;

⁷kei pawh hi chumi thu puangtu atân leh tirhkohe ni tûra ruat chu ka ni; Kristaah chuan thutak a ni ka sawi ni, ka daw lo ve, rinna leh thutaka Jentailte zirtirtua ruat ka ni si a.

KOHRANA MIPA LEH HMEICHHIA

⁸Mipate hi thinrim lo leh ringhlel lovin, kut thianghlime phar chhuakin, hmun tinah tawngtai se tih hi ka duh dân a ni;

⁹chutiang bawkin hmeichhiate pawhin inchei dân tuangtlan, inchawih tâwk inbel sela, lêrh deuhva sam phiar lovin, rangkachak te, tuikeplung te leh thawmhnaw manto chi te inbel lo se,

¹⁰Pathian ngaihsak mite tiha mawi tâwkin hmeichhiate chu thil tihthatin inchei rawh se.

¹¹Hmeichhiate chuan inpêkna tinrêng nê, ngawi rengin an zir lai zir mai rawh se.

¹²Mipa chungâ thûneihna chuha an zirtîr ve chu ka remti lo, ngawih an chuh mai zâwk tûr a ni.

¹³Evi aiin Adama siam hmasak a nih kha.

¹⁴Adama kha bum a ni ve lo va, Evi kha bum thlûk zâwk chu a ni a, bawhchhiatnaah a tlu ta a.

¹⁵Nimahsela, rinnaah te, hmangaihnaah te, thianghlinaah te awm dân mawi taka a nun chhoh zel chuan, fa hrinnaah chhandamin a awm ang.

BUNG 3

KOHRAN HOTU DINHMUN

¹Tûpawh Kohhran hotua tan duh chuan hnathawh tha a duh a ni tih thu hi a rin tlak a ni.

²Kohhran hotu chu mi dem kai lo, nupui pakhat nei, insûm thei, rilru fim, nungchang tha, mi lawm dân thiam, zirtîr thiam,

³zu in lo mi, kut inthlâk mai ching lo, hlêprû lo, mi nunnêm, mi hnial buai hrât lo, mi duham lo,

⁴zahawm taka mahni fate leh chhûngkaw khawsak rêl fel thiam mi a ni tûr a ni;

⁵(miin ama in chhûng khawsak mah a rêl fel theih loh chuan engtin nge Pathian Kohhran a enkawl theih ang?)

⁶Ring thar mi ni suh se, chuti lo zawng, a chapo mai ang a, Diabola thiam lohna khurah bawh a tla ve dah ang e.

⁷Chûng bâkah chuan pawn lam mite ngaiha mi hmingtha a ni tûr a ni; chuti lo chuan, Diabola thangah âwkin, a hmingcheh hlauh dah ang e.

RAWNGBAWLTU DINHMUN

⁸Chutiang bawkin kohhran hotute pawh mi zahawm an ni tûr a ni a; mi kamtam te, zu heh te, hlêprûk ching te an ni tûr a ni lo;

⁹chhia leh tha hriatna thiang tak nêna rinna thuril pawm tlat mi an ni tûr a ni.

¹⁰An nun dân enfiah hmasak phawt tûr a ni bawh a; hming hliauna nei lo an ni tih finfiah hnûah chauh rawngbâwl hnâ thawh rawh se.

¹¹Chutiang bawkin hmeichhiate pawh mi zahawm, mi rêl leh sawi chhiat ching lo mi, insûm thei leh, engkima rinawm an ni tûr a ni.

¹²Kohhran hotute chu mahni chhûngkaw leh fanau enkawl thiam, nupui pakhat nei ni rawh se.

¹³Kohhrana rawngbâwl hna thawh thate dinhmun chu zahawm taka a ni a, Krista Isua an rinnaah pawh an huai bik a ni.

THURÛK ROPUI CHU

¹⁴Nangmahni rawn tlawh thuai che u beiseiin hêng hi in hnênah ka ziaak a ni.

¹⁵Ka rawn tlai deuh takin tiin Pathian chhûngkaw zinga khawsak dân tûr in hriat theih nâna ziaak ka ni a; Pathian chhûngkaw chu Pathian nung Kohhran, thutak ngahchhan leh a ban nghet a ni si a.

¹⁶Kan rin Pathian thurûk ropuizia hi hnial rual a ni lo: Pathian chu mihring*ah a lo chang a, Thlaraudah thiam chantîr a ni a, Vântirhkohten an hmuhpui a, Jentailte hnênah tlângaupui a ni a, Khawvêlah hian mite rin a hlauh a, Ropuinaah hrui chhoh a ni ta a.

BUNG 4

TLÛKSANNA RÛNPUI

¹Hun hnunngah chuan mi tam takin rinna an la tlûksan ang a, hrui bona thlaraute leh ramhuaiho zirtîrna lam an la tuipei tial tial dân tih Thlaraudin chiang takin a sawi a,

²verther taka dâwt sawiin, an chhia leh tha hriatna ngei chu thir linga deh châr ang maia chawlawl an la ni ang;

³inneih te an khap a, Pathianin ei tûra a siam sâ, thutak hriaa ringte tân lâwmthu sawia ei mai tûr thil thenkhat ei an khap bawh a.

⁴Pathian thilsiam tinrêng hi a tha a, lâwmthu nêna pawm a nih phawt chuan eng thil mah hi lo hnar tûr a ni lo ve;

⁵Pathian thû leh tawngtainaa tihthianghlime a ni tawh si a.

CHHIAHLAWH THA ISUA KRISTA

⁶Chûng thilte chu unaute i zirtîr chuan, Isua Krista rawngbâwlta tha tak, rinna thu leh zirtîrna dik, tân thlenga ngun taka i la zawm reng thû tea chawm i ni ang.

⁷Mahse Pathian pawisa lo leh pitarte thawnthu mai mai chu hnar la, Pathian ngaihsak tûrin insawizawi rawh.

⁸Taksa sâwizawi ngawt chu a tangkai nêp deuh va, Pathian ngaihsakna erawh chu nunna thutiam a nei avângin engkimah a hlâwk vek a ni, tân dam chhûng leh hun lo la awm zêl tûr thleng pawhin.

⁹Hei hi thusawi rinawm leh mi zawng zawng tâna pawm tlak a ni.

¹⁰Pathian nung kan rin avângin kan thawkrim a, mite min hauha pawh kan tuar hrâm hrâm a; ani chu mi zawng zawng Chhandamtu a ni a, amah ringtute chhandamtu a ni deuh ber bawk.

¹¹Chûng thilah te chuan thû pê la, zirtîr rawh.

I RAWNGBAWLNAAH FIMKHUR RAWH

¹²I naupanna tûmahin ngaiñep suh se; thu sawiah te, chêtziaah te, hmangaihnaah te, thlarauvah te, rinnaah te, thianghlimnaah te ringtute tâna entawn tlâk lo ni ang che.

¹³Ka lo kal hmâ loh zawng Pathian thu chhiar te, thuhiril te, zirtirna lam te bei uar zêl rawh.

¹⁴Upaten i chung a kut nghata an lo hrilh lâwksak che anga thlarau thilpêk i dawn kha thlahthlam lo vang che.

¹⁵Chûngte chu ngun takin ngaihvên zui la; i hmasâwnzia lang chhuak thei khawpin chûng thilah chuan inhmang zo rawh.

¹⁶Nangma lamah leh i zirtîr dânah fimkhur rawh. Bei zêl la, tichuan nangmah leh i thu ngaithlatute chu i chhandam thei dawn asin.

BUNG 5

KOHRAN MITE ENKAWL DÂN

¹Putarte chu hâu lovin, pa te angin fuïh la; tlangvâl deuhte chu nau angin en rawh.

²Pitarte chu nu angin en la, nula deuhte chu thianghlimna tinrêng nên farnu angin en ang che.

HMEITHAITE ZAH TUR

³Hmeithai dân dik taka hmeithaite chu zah ang che.

⁴Tû leh fa nei hmeithai chuan a inchhûngah Pathian ngaihsak dân zirtîr sela, an nu leh pate chung a thât chhuah zir phawt rawh se; chû chu a thain Pathian lâwm zâwng a ni si a.

⁵Hmeithai dik tak, mahni chauhva khawsa chuan—Pathianah innghatin, achhûn azâna dil leh tawngtâin hun a hmang thîn a.

⁶Amaherawhchu, mahni nuam tihzâwng ringawta inhmang thîn hmeithai chu a dam lai pawhin thi a ni.

⁷Hmingchhiatna nei lova an awm theih nân chûng thû chu pê ang che.

⁸Tûpawh mahni chhûngkhat lainâte ngaihsak lova, mahni chênpuî chhûngte ngei pawh ngaihsak lo chuan rinna a phatsan a ni, ring lo mi aiin an sual zâwk.

⁹Hmeithai kum sawmruk la tling lo chu, hmeithaia chhiar tûr a ni lo; mahse pasal pakhat chauh lo nei tawh,

¹⁰thil tha tih kawnga hming tha, fate chawm tlei tawh, mikhualte lo thleng tawha, mi thianghlimte kê lo silsak tawh, mi mangangte lo chhawmdâwla, thil tha tinrênga thahnemngai mi a nih bawk chuan, hmeithaia ziah luh theih a ni.

¹¹Hmeithai la nula deuhte erawh chu zia tel suh; an tisa chhâkna nêp zo lovin, Krista aiin pasal neih an thlang leh mai thîn si a,

¹²an rinna hmasa phatsanin, thiam loh an inchantîr thîn a ni.

¹³Chubâkah, an inthlahdah zui a, in hrang hrangah te lêng lâwrin, thatchhiat leh mi sawi chhiat mai an duh taw lo va; tih loh loh tûr tiin, sawi loh tûr tûr an sawi thîn.

¹⁴Chuvângin, hmeithai la nula deuhte chuan pasal nei leh mai sela, fanaute neiin, inchhûng khawsak rêl sela, anmahni eptute tân sawisêlna tûr remchâng engmah siamsak lo se ka duh a ni.

¹⁵Mi thenkhat chu Setana lamah an kalpêng leh dêr tawh zu nia.

¹⁶Ringtu, a hmei a pa tûpawhin hmeithai awmpui a neih chuan chawm mai sela, kohhran chu tibuai kher suh se; tichuan, belh tûr nei lo hmeithai tak takte chu kohhranin a chhawmdâwl thei dawn a ni.

UPATE ZAH RAWH

¹⁷Kohhran upa fel taka rorêl thiamte leh, a bîk taka thuhiril leh zirtirna lama thawk rimte chu a lehnhia chawimâwi tlâka ruat an ni.

¹⁸Pathian Lehkha chuan, “Sebâwngpâin buh a chîl laiin a hmui phuarsak suh,” a ti a. “Hnathawktu chu a hlawh hmu tlâk a ni,” a ti baw a.

¹⁹Kohhran upa an hêknaah mi pahnih pathum hriatpuina chauh lo chu pawm suh.

²⁰Thil sual tih chûngte chu mi zawng zawng hriatah zilhhau rawh, mi dangte pawh an tît phah ve theih nân.

²¹Pathian leh Lalpa Isua Krista leh Vântirhko thlan chhuahte hmâah hêng thûte hi ngaihdân nei sâ lovin, tûmah thlei bîk nei lova keng kawh tûrîn thû ka pê a che.

²²Hmanhmawh takin tû chungah mah kut nghat mai suh; mi dang sualna pawh tawmpui hek suh; invawng thianghlim zâwk ang che.

²³Tui chauh in lo la, i hrisel loh thîn avâng leh, i pum lam avângin uain tlêm tlêm lo hmang thîn ang che.

²⁴Mi thenkhat sualna chu a langsâr a, an tuar nghâl baw thîn a; thenkhat sualna lang chhuak lawk lo a awm baw.

²⁵Chutiang bawkin, mi thenkhat thil tha tih chu a langsâr a, mi thenkhat thil tha tih erawh chu lang nghal rih lo mah se, thup hlen theih a ni lo.

BUNG 6

HOTUTE ZAH TUR

¹Pathian hming leh a zirtirna thû sawi chhiat a nih loh nân, bâwih nghâwngkaw bât apiangte chuan anmahni hotute chu engkimah zah tlâkah ngai rawh se.

²An hotute chu ringtu an lo nih avâng leh, unau zînga mi an nih avângin ngaiñêp phah suh se; anmahni avânga hlâwkna dawngtute chu ringtute leh duhlaita an nih avângin an rawng bâwlsak zâwk rawh se. Chûng thû chu zirtîr la, fuïh rawh.

DIK LOHNA LEH DUHÂMNA

³Miin zirtirna chi dang a zirtîr a, kan Lalpa Krista thu zirtirna tuantling pawh a pawm lohva, Pathian ngaihsakna thû nêna inrem zirtirna pawh a pawm duh loh chuan,

⁴Chutiang mi chu mi chapo, engmah hre tak tak lo, inhnial leh intihbuaî pawisa lo mi a ni a; itsikna te, intihbuaîna te, sawi chhiatna te leh rinhlelhna ða lo bâk hrin chhuah a nei lo.

⁵Þûl lova hnialhrât, rilru chhe pû, thutak pawh lo, hlâwkna thil apiang pathiana neih mi an ni. Chutiang mite lakah chuan inthiarfihlîm rawh u.

⁶Pathian ngaihsak hi lungâwina nêen chuan a hlâwk khawp asin.

⁷Khawvêlah hian thil engmah kan luhpui lo va, engmah kan chhuahpui thei bawh hek lo.

⁸Ei tûr châw leh silhfên kan neih chuan i duh tâwk mai ang u.

⁹Hausak ngaina mite chu thlêmna thangah te an âwk a; châkna sual chuan âthlak takin mite tikhawlovin chhiatna leh boralnaah a hîp bo ðhîn.

¹⁰Tangka sum ngainat hi sual tinrêng ðobul a ni a; mi duhâmtên awtîn, rinna chu an pên bosan a, anmahni chu lungngaihna tam takin an inchnun na ngawih ngawih ðhîn a ni.

INPUANNA ðA

¹¹Aw, nang Pathian mi erawh chuan chûng thilte chu tîlansan la; dikna te, Pathian ngaihsakna te, rinna te, hmangaihna te, dawhtheihna te, nunnêmna te chu ûm zêl rawh.

¹²Rinnaa indona ða chu bei fan fan la, chatuan nunna chu vuan tlat rawh; chumi chang tûra koh i ni a; thu hriatpuitu tam takte mithmuhah pawh i rinna i puan chhuah tawh ðhîn kha.

¹³Engkim hnêna nunna petu Pathian leh Krista Isua, Pontia Pilata hmâa thurin dik ðan tlatu mithmuhah chuan thû ka pê a che;

¹⁴kan Lalpa Isua Krista rawn inlâr leh hmâ loh chuan, hê thupêk hi hmêlhem lo leh sawisêl kai lovin lo humhalh tlat ang che.

¹⁵Faktlâka, Thuneitu lû, lalte Lal leh hotute Hotu chuan Krista chu ama hun tiam takah chuan a rawn lantîr dâwn si a;

¹⁶amah chauh chuan thih theih lohna a nei a, hnaîh theih rual loh khawpa êngah chuan a awm a, tûma'n an hmu ngai lo va, hmuh theih pawh a ni hek lo; ama hnênah chuan chatuana châwimâwina leh thiltihtheihna awm rawh se. Amen.

MI HAUSATE TANA THUPÊK

¹⁷Tûnlai huna mi hausate chu invilik lo tûr leh, rinchnan tlâk loh sum chungâ inngat lova, thil engkim hnianghnâr khawpa tlan tham min petu Pathian nung hnêna inngat zâwk tûrin zilh rawh.

¹⁸Thil ða ti rawh se; thiltih ðatah hausâ sela, miten an zâr an zo ve theih nân thilphal rawh se,

¹⁹chatuana nunna an vawn tlat theih nân, hun lo thleng tûr atân ngahchhan ða khâwl khâwm tûrin fuih rawh.

RINNA CHU HUMHALH RAWH

²⁰Aw Timothe! I kova mawhphurhna inngat chu humhalh tlat la, dik lo taka science thiamna anga an chhâl, hnialna thu inkalh tak tak leh ho mai maia Pathian zah lohna thûte chu hawisan rawh.

²¹Chutiang buaipuitu mi ðhenkhat chuan rinna kawng an pên bosan tâk hi. Khawngaihna i hnênah awm rawh se. Amen.

2 TIMOTHEA

Ziah tu: Paula • Ziah kum: A.D. 67

Hei hi Paula lekhkathawn hnunung ber nia ngaih a ni a, Neroa rorêl hun (A.D. 54-68) tâwp lama Rom khua ațanga Paula ziah a ni. A lehkha hmasâah chuan amah pawh a la zalên deuh va, Timothea nêna inhmuh beisei reng thîn kha a ni a; hê lehkha a ziah lai boruak erawh chu a dang ta daih mai. A thih hun a hnaih tâkzia te pawh a sawi chhuak ta hial a. Lung inah a tâng chauh a ni lo va, a thiante pawhin an kalsan deuh vek tawh a ni. Khawvêl tâwp dâwna hun khirh tak leh thil tha lo tak tak lo thleng tûr a puang lâwk a, chutiang kârah pawh chuan Chanchin Tha avânga rinawm taka awm tûrin a fuih zêl a ni. Timothea Thawn Hnihna thuchah, Bible puma Pathian thuchah laimu nia an sawi thîn chu: “Pathian mithmuha pawm tlâk ni tûrin taihmâk chhuah zêl rawh,” (2:15) tih hi a ni. A lekhkathawn hmasa lamah te kha chuan Chanchin Tha tângaupuitu ni mah se ‘tling lo anga hnâwla awm’ te a hlau a nih kha (1 Kor. 9:27). Mahse a hun tâwp dâwna Rom khawpuia lung ina martar hmabâka a awm lai, hê lehkha hnunung a ziah lai hi chuan: intihsiakna tha a hlen chhuah tawh thû te, a tân dikna (felna) lallukhum dah a nih tawh thu te a sawi thei hial a; Krista zârah hnehna hlado a chham thei tawh a ni. Timothea lekhkathawn pahniha hi Bible-a lekhkhabu 55-na a ni a; bung 4 a awm a, châng 83 a awm bawh.

BUNG 1

CHIBAI BÛKNA

¹Isua Kristaa nunna thutiam anga, Pathian duh zâwna Krista Isua tirkoh Paula chuan,

²Ka fapa duh tak Timothea hnênah: Pa Pathian leh Krista Isua kan Lalpa hnên ațangin khawngaihna te, zahngaihna te, remna te lo awm rawh se.

TIMOTHEA RINNA LEH PIAN LEH MÛRNA

³Min thlahtuten an lo tih thîn angin, chhia leh tha hriatna thiag tak neia a rawng ka bâwl thîn Pathian hnênah lâwmthu ka sawi a, achhûn azâna bâng lova ka țawnğainaah te chuan ka hre reng thîn che a,

⁴i mittui tlâ te kha ka hre reng a, lâwm taka ka awm theih nân hmuh che ka châk hlê a ni.

⁵rinna dik tak nangmaha awm chu ka hre reng a, chu rinna chu atîrin i pi Loisii-ah khân a awm a, i nu Euniki-ah pawh a awm bawh a, nangmahah pawh a awm ngei tih ka hria asin.

⁶Kut ka nghah avânga Pathian thilpêk nangmaha lo awm kha chhêm alh tûrin ka hriattîr leh a che.

⁷Pathianin hlauhna thlarau min pe lo va; thiltihtheihna te, hmangaihna te leh rilru hrisel te min pe zâwk a ni.

CHANCHIN THA ZAHPUI LOH

⁸Chuvângin, kan Lalpa chanchin hriatpuina thu puan chhuah hnâ hi zahpui suh la; kei, ama mi tâng pawh hi mi zahpui lo vang che. Chanchin Tha avânga tuarna hi Pathian thiltihtheihna ang zêlin mi țâwmpui zâwk rawh.

⁹Ani chuan kan thiltih angte ni lovin, ama tum dân leh a khawngaihna avâng zâwkin min chhandam ta a, kohna thianghlimin min ko bawh a; chu khawngaihna chu leilung pian hmân Krista Isuaah chuan min lo pe tawh a;

¹⁰nimahsela, min Chhandamtu Isua Krista inlârna hian tûnah a rawn tilang ta a, thihna chu tiboralin, Chanchin Tha avângin nunna leh boral theih lohna a rawn thlen ta;

¹¹chû Chanchin Tha chu Jentailte hnêna hril tûr leh, tirkoh leh zirtîrtu ni tûra ruat chu ka ni.

¹²Chuvâng chuan a ni hêng thil hi ka tuar ni; nimahsela, ka zak lo ve, ka rina chu tu nge a nih ka hria, a hnêna ka kawltir tawh chu chûmi Nî a lo thlen thleng chuan min vawn himsak thei tih ka hre si a.

RINNA CHU VUAN TLAT RAWH

¹³Krista Isuaa awm rinna leh hmangaihna neiin, zirtîrna him keima hnên ațanga i hriatte kha nghet takin vuan tlat ang che.

¹⁴Thil tha i hnêna kawltîra awm kha, keimahnia awm Thlarau Thianghlim ngei hian vawn tlat tûr a ni.

¹⁵Asia rama awm zawng zawngte khân min hawisan vek tih pawh i hria a, an zingah chuan Phugella leh Hermogena te an tel a.

¹⁶Lalpa chuan Onesiphora te chhûngkaw hnênah zahngaihna a pê a, ani pawhin mi fuih harh fo va, ka khaidiat bun pawh mi zahpui si lo va;

¹⁷Rom khuua a lo kal lai pawh khân thahnemngai takin ka awmna a rawn zawng chhuak a, mi rawn tlawh vang vang a ni.

¹⁸Ephesi khuua ka rawngbâwlina mi puih nasatzia nang pawhin i hre Chiang a; chuvângin chumi Nî-ah chuan Lalpan zahngaihna a dawn phal rawh se.

BUNG 2

KHAWNGAIHNAAH INTICHAK RAWH

¹Chuvângin ka fapa, Krista Isuaa awm khawngaihnaah hian lo intichak zêl rawh.

²Thu hriatpuitu tam tak zingah ka thu zirtîr i ngaihthlâk thinte kha, mi dangte zirtîr chhâwng ve zêl thei tûr mi rinawmte hnênah kawltîr ve rawh.

³Isua Krista sipai tha tak angin harsatna chu chhel takin tuar zêl ang che.

⁴Sipaia țantîrtu lâwm zâwna a awm theih nân, sipaia țang lai tûmah indo laiin tûn dam chhûng khawsaknate hian a intihnawng ngai lo.

⁵Miin intihsiakna a beih rêng rêngin, dân ang taka a beih loh chuan lâwmman a dawng thei lo vang.

⁶Loneitu thawk rim na nâ nâ chuan a thar hmasa chu a chang ngei tûr a ni.

⁷Ka thu sawi hi ngaihtuah la, Lalpa chuan thil engkimah hriatthiamna pê che rawh se.

⁸Ka Chanchin Tha hril Isua Krista chu Davida thlaha mi, mitthi zinga ta tho leha kha a ni tih hre reng ang che;

⁹chû Chanchin Tha avâng chuan thil sualtitu angin, kawl bun khawpin ka tuar thîn a; Pathian thû erawh chu phuarin a awm ve si lo va.

¹⁰Chuvângin, Krista Isuaa chhandamna chu chatuana ropuina nê an hmuh vê theihna tûrin, Thlante avâng chuan engkim ka tuar thîn.

¹¹He thû hi a rinawm a ni: Amah nê kan thih tawh chuan, Amah nê kan nung bawh ang;

¹²Kan tuar hrâm hrâm chuan Amah nê ro kan la rêl ang; Amah kan phatsan chuan Ani pawhin min phatsan ve ang;

¹³Keini rinawm lo mah ila, Ani chu a rinawm reng dâwn; Mahni a inphatsan thei si lo.

THAWKTU PAWM TLAK LEH TLAK LOH

¹⁴Hêng thûte hi hrilh nawn leh rawh: thu ho mai mai leh sâwt hlei lo, a ngaithlatute tâna boralna chauh thlen thei thilah inhnial buai tawh lo tûrin, Lalpa hmâah mawh phurhtîr ang che.

¹⁵Pathian mithmuha pawm tlâk ni tûrin zir Chiang thîn ang che; thutak thû dik taka then fel thiam mi tân chuan zahpui chi a ni si lo va.

¹⁶Amaherawhchu, Pathian zah lohna thu duk dak lo sawi chingte chu hawisan rawh; chutiang mite chuan Pathian an ngaihtah telh telh thîn a ni.

¹⁷An thu zirtîr chuan pânchhia angin a ei chhe zêl ang. Humenaia leh Phileta te pawh chutiango zingah chuan an tel a;

¹⁸chûng mite chuan thudik an pên bosan a, thawhleha chu thil thlang daih tawh anga an zirtîr avângin mi thenkhatte rinna an tihchhiatsak thîn.

¹⁹Nimahsela, Pathian lungphûm nghet chu a la ding reng a, hê chhinchhiaha hi a nei a: “Lalpa chuan ama mite chu a hria,” tih leh, “Krista hming lam apiang chuan sual kalsan rawh se,” tih hi a ni.

²⁰In ropuiah hian rangkachak leh silvara siam bungbêl chauh a awm lo va, thing leh belleia siam thilte pawh a awm thîn; thenkhat hlu deuh a awm laiin thenkhat hlu lêm lo a awm bawh.

²¹Chuvângin, chûng thil hlu lo laka mi a inthiarfihlîm chuan, bungbêl thianghlîm leh ngaihhlutawm, Lalpa hman tlâk, hna tha tinrêng thawk thei tûra peih sa diam a ni ang.

²²Tleirâwl châknate chu tlânsan la, thinlung thianghlîma Lalpa kotu apiangte zingah chuan felna te, rinna te, hmangaihna te, remna te chu ûm vê rawh.

²³Âthlâk thilah leh awmze nei lova inhnialnaah tel duh suh, intihbuaina bâk a hring chhuak lo tih hria ang che.

²⁴Lalpa chhiahhlawh chu a inhnial buai vê tûr a ni lo va; mi zawng zawng chungah zaidam takin, thiam taka zirtîr turin, dawh

hrâm hrâm zâwk rawh se;

²⁵innkaitlâwm takin anmahni dotute chu hrilh fiah bawh rawh se; thudik tak an hriata an sim vê pawh Pathianin a lo phalsak hlahu thei asin.

²⁶Tichuan, Diabolan a duh zâwnng ti tûrin thangah a lo âwk reng tih an inhriat chhuah theih hlahu chuan, an tlân chhuahsan thei dâwn a ni.

BUNG 3

HUN RALMUANG LO LEH MI KHIRH

¹Hei hi hria la, ni hnunngah te chuan hun râlmuang lo tak a lo thlang dâwn.

²Mihringte chu mahni inhmangaihtute, tangka ngainatute, intiveite, chapote, Pathian sawi chhetute, nu leh pa thu awih lote, lâwm nachâng hre lote, thianghlîm lote,

³hmangaihna nei lo mite, ngaidam duh hauh lote, mi sawi chhiat chingte, insûm thei lote, mi nunchhiate, a tha lam haw tlat mite,

⁴phatsantute, mi luhlulte, induh larh mai te, Pathian hmangaih aia mahni lâwmna mai hmangaih zâwtute an ni dâwn si a.

⁵Pathian ngaihsak âwm takin an lang ang a, mahse a thiltihtheihna chu an âwih si lo vang. Chutiang mite chu hawisan rawh!

⁶Mi ina lêng kualin chutiang mite chuan hmeichhe buan chak lo leh sualin a lo delh beh tawh, châkna sual tinrênga lo tlu chhe tawhte chu an bum zung zung mai a,

⁷chutiang mite chu inzir vê fo si, thutak pawh pha chuang si lo an ni.

⁸Jannia leh Jambria-ten Mosia an lo dodâl ang khân, chûng mite chuan thutak an dodâl thîn; rilru khawlo tawh, rinna lama pawm tlâk loh mi an ni a;

⁹chûng mite chu an kal thui hauh lo vang, an âtzia chu mi zawng zawng hmuhah a lang chhuak leh mai dâwn a ni.

PATHIAN MI LEH PATHIAN THU

¹⁰Nang erawh chuan ka zirtîrna te, ka awm dân te, ka thil tum te, ka rinna te, ka dawhtheihna te, ka hmangaihna te leh ka chhelna te chu fimkhur takin i zâwm tlat a;

¹¹Antiokei khuah te, Ikoniâm khuah te, Lustra khuah te khân tihduhdahna leh ngaisak ka tuar dân i hriat kha. Chûng mi zawng zawngte lakah chuan Lalpan mi chhan chhuak ta a ni.

¹²Ni e, Pathian ngaihsaka, Krista Isuaa awm reng tumte chuan tihduhdahnate an tuar zêl dâwn.

¹³Misualte leh lemchangte erawh chuan mite an bum kual mai mai a, anmahni ngei pawh miten an bum ve bawh ang a, an chan a chhe tial tial ang.

¹⁴Nang erawh chu i thil zir leh hriat chian tawhah te khân awm nghet tlat rawh; tû hnêna zir nge i nih i hriat chian êm kha.

¹⁵I naupan têt aţangin Lehkha Thianghlîm chu i hre tawh a, chû chuan Krista Isua rinnain chhandamna hmu khawpin a tifing thei che a ni.

¹⁶Pathian Lehkha Thû zawng zawng hi Pathian thâwk khuma pêk a ni a, zirtîr nân te, inzilh nân te, intihdik nân te, dikna kawnga inzirtîr nân te a ʔangkai a ni.

¹⁷Pathian mi chu thil ʔa tinrêng thawk chhuak tûra famkim taka a inthuan theih nân.

BUNG 4

THU CHU HRIL RAWH

¹Chuvângin, Pathian leh Lalpa Isua Krista, a lalrama minungte leh mitthite rorêlsak tûrarawn inlâr leh tûra hmâah chuan mawhpurhna ka hlân a che:

²Thu chu hril rawh! Hun ʔaah pawh, hun ʔa lovah pawh inpei reng rawh. Dawhtheihna zawng zawng sâwm khâwmin zirtîr zêl la, an rilru hmin tum la, zilhhau la, fuih baw ang che.

³Zirtîrna dik an ngaihsak peih loh hun a la thleng ngei dâwn. An bengte a zat ruai avângin anmahni duh zâwng lam ti-mî zirtîrtu an hûi khâwm tawh zâwk ang.

⁴An bengin thutak a hawisan tawh dâwn avângin, phuachchawp thawnthu mai mai an tleipui zaw dawn a ni.

⁵Nang erawh chuan engkim thlîr fim zêl la, hrehawm chu tuar mai rawh. Chanchin ʔa hril hnaah hian bûr tlat la, i rawngbâwlna kha hlen chhuak ang che.

PAULA THUCHAH HNUHNUNG

⁶Ka kal chhuah hun a hnai ta; inthâwina tui anga leih buak turin ka inpei tawh reng a ni.

⁷Intihsiakna ʔa chu ka ti zo tawh a, intlansiakna kawngah ka tlân chhuak tawh baw a, rinna chu ka vawng reng tawh a ni.

⁸A tâwp berah chuan, dikna lallukhum chu ka tân dahin a awm tawh a, chû ngei chu Lalpa, diknaa rorêltu chuan chu mi Nî-ah chuan mi khumtîr ang; keima tân chauh a ni lo va, a inlârna ngai apiangte tân pawh a ni si a.

HNU CHHAWNSAN TIRHKOH

⁹Ka hnênarawn kal thuai tum hrâm ang che.

¹⁰Dema chuan tûnlai khawvêl hi a thlâkhlelh êm avângin mi hawisan a, Thessalonika khuah a kal ta. Kreskea chu Galatia ramah a kal a, Tita pawh Dalmatia ramah a kal ta baw.

¹¹Luka chauhvin mi awmpui ta. Marka kha sâwm la, han hrui vê ta che; ani kha rawngbâwlna hnâah ka tân a ʔangkai si a.

¹²Tukika chu Ephesi-ah ka tîr baw.

¹³I lo kal hunah Troas khuah Karpah hnêna kawrfual ka hnutchhiah kha, lehkhate nênhânrawn keng la, savun lehkha mawlh kharawn keng ang che.

¹⁴Aleksandara, dâr chhertu khân ka pawh a khawih nasa hlê a. A thiltih ang zêlin Lalpan a la thungrûl ve mawlh ang.

¹⁵Kan thu sawi a dodâl nasat êm avângin a lakah khân nang pawh lo fimkhur ang che.

¹⁶Ka thiamthû ka sawi hmasak ʔum chuan, mi dinpuitu tûr tûmah an awm lo va, min phatsan vek a. An chungah a mawh tla lul suh se.

LALPA CHU A RINAWM

¹⁷Lalpa erawh chuan mi dinpui tlat a, mi tichak sauh sauh va, chuvângin Jentail zawng zawngte hriat theih tûrin Chanchin ʔa ka hril kim thei ta. Chu bâkah, sakeibaknei kâ aʔang khân chhan chhuahin ka lo awm ta baw a.

¹⁸Lalpa chuan sual hnathawh zawng zawng lakah mi chhan chhuak ang a, a vân lalramah chuan him takin min thlen ngei ang. Ama hnênah chuan ropuina chu chatuan chatuanin awm rawh se. Amen!

THLASIK HMAIN LO KAL RAWH

¹⁹Priski leh Akuila leh Onesiphora te chhûngkua kha mirawn chibai ang che.

²⁰Erasta chu Korinth khuah a awm daih a, Trophima lah chu Mileti khuah dam lovin ka kalsan ta mai a.

²¹Thlasik hmâa lo kal ngei tumin theihtawp han chhuah ang che. Eubula te, Pudea te, Lina te, Klaudii leh unau zawng zawngten chibai an bûk a che.

INTHLAHNA

²²Lalpa Isua Krista chu i thlarau hnênah awm sela. Khawngaihna chu i hnênah awm rawh se. Amen.

TITA

Ziah tu: Paula • Ziah kum: A.D. 65

Hê lehkhathawn hi Paulan a rawngbâwnaa amah puitu tangkai Tita hnênah Crete thliarkara kohhrante enkawl dân tûr chungchânga mawhphurhna inhlanna thuchah a nih avângin ‘Pastoral Leikhathawn’ an tih zînga mi a ni. Luka unaupa Tita hming hi Tirkhohte Thiltih bûah lang lo mah se, Paula hian a lehkhathawnah a hming wavi 13 lai a tilang a. Tita hi Jentail mi, Paula rawngbâwna aţanga ringtu lo ni ta, Paula pawhin a aiawh tûra rintlâka a ngaih leh, Crete thliarkâra kohhrante enkawl tûra mawhphurhna a hlan ngam khawpa a mi rin berte zînga mi a ni. He pastoral lehkhathawn-ah hian kohhran upaa tling tûra thil tûl (qualifications) te leh an hnêta a sawi a; thurin hrisêl leh dik a uar a, zirtîrna dik lo a ngaimawh hlê. Tita lehkhathawn hi Bible-a lehkhabu 56-na a ni a; bung 3 a awm a, châng 46 a awm.

BUNG 1

CHIBAI BÛKNA

¹Paula, Pathian bâwih leh Isua Krista tirkoh, Pathian mi thlante rinnaah leh, Pathian ngaihsakna thutak hriatpuinaah te, ²Dâwt sawi thei lo Pathianin chatuana nunna, khawvêl awm hmaa a tiam tawh chu beisein, ³min Chhandamtu Pathian thupêk ang zêlin keima hnênah mi kawltîr a; chû chu a thuhrlina hmangin a hun takah a tilang ta. ⁴Tita, rinna thuhmuna ka fapa dik tak hnênah: Pa Pathian leh Lalpa Isua Krista min Chhandamtu hnên ata khawngaihna te, lainatna te leh remna te chu awm rawh se.

UPAA TLING TURTE

⁵Kret thliarkârah khân tih tûr hmabâk leh, a tûl apiang lo tifel tûrin ka hnutchhiah che a, thû ka pêk che ang khân, khaw tinah upate lo ruat ang che. ⁶Upa tûrte chu hming hliau lo ni se, nupui pakhat nei, fate rinawm tak tak neia, nawmsak bâwna lam leh dân pawisak lohna lama sawisêl kai lo mi ni rawh se. ⁷Kohhran hotu chu Pathian sum enkawltu a nih avângin hming hliauna nei lo, mi luhlul lo, thin ram lo, zu in lo mi, mi kutthlâk chîng lo, hlêprûk chîng lo mi a ni tûr a ni a; ⁸mi lawm dân thiam, thil tha ngaina mi, rilru fim, mi dik, mi thianghlim, mahni inthunun thei mi a ni tûr a ni. ⁹Zirtîrna rinawm a lo dawn tawh chu nghet taka vuan tlat mi a ni tûr a ni; tichuan, zirtirna dik tak hmanga mi fuih dân a thiam ang a, hnial kalhtute dik lohna lailang khawpin a chhâng thla thei dâwn a ni.

UPATE HNA

¹⁰Dân pawisa lo, duh duh sawi mai mai chîng leh bum hmang mi tam tak an awm a, serhtanho zînga mi an ni deuh ber lehngêl a; ¹¹chutiang mite chuan sum hmuhna tûr a nih phawt chuan, sawi loh tûr tûr an sawi a, a chhîngkua kuaa mi an bum khawloh te pawh an awm a, an kê chu hupsak ngei tûr a ni. ¹²Chûnggho zînga pakhat, anmahni zâwlnei ngei pawhin, “Kret thliarkâra mite chu mi dawthei, sakawlh sual, thatchhe si, vir bawk si an ni,” a tih kha. ¹³Hê hriatpuina thû hi a dik a ni. Chuvângin, rinna dik taka an awm theih nân, na takin lo zilhau la, ¹⁴thutak hawisantu, Judaho thawnthûte leh mihring dân siam chawp pawisa zâwkte thû chu engah mah ngai suh se. ¹⁵Mi thianghlim tân chuan engkim a thianghlim a; mi bawlhhlawh leh ring lo mite tân erawh chuan engmah thianghlim a awm lo; an rilru leh an chhia leh tha hriatna chawpin a bawlhhlawh si a. ¹⁶Pathian hria an inti a; mahse an thiltihin a phatsan si. Mi tenawm, thu âwih lo leh thil tha ti tûra tlâktlaina rêng nei lo an ni.

BUNG 2

KOHRAN THA ZIARÂNG

¹Nang erawh chuan zirtîrna dik tak nêna inhmeh thil sawi rawh. ²Putar deuh te chu rilru fim, zahawm, insûm thei mi ni se; rinna leh hmangaihna hrisêl tak nei, dawhthei tak ni tûrin fuih rawh. ³Pitarte pawh chutiang bawk chuan nungchang zahawm takin awm sela, mi sawi chhiat chîng lovin, zu ruih hmang hek lovin, thil tha tam tak zirtîrta ni sela, ⁴hmeichhia la valai deuhte chuan an pasalte leh an fate hmangaih sela, ⁵fîmkhur thiam, thianghlim, inchhîng khawsak ngaihven mi, mi tha, pasalte thu âwih thei mi ni sela; tichuan Pathian thû hi sawi chhiatin a awm dâwn lo nia. ⁶Chutiang bawkin tlangvâlthe chu rilru fim tak pu tûrin fuih rawh. ⁷Thil tha tih kawng engkimah mi dangte tihmuhtûah tang la; zirtîrna lamah pawh rinawm leh zahawm takin, thlêm thlûk rual loh ni bawk la, ⁸min dotuten mi sawi chhiatna tûr engmah an neih loh avanga an zah hial zâwkna tûrin, sawisêl tûr awm lo ţawngkam mawi hmang thîn ang che. ⁹Bâwihte chuan an pute thu âwih sela; engkimah an lâwm zâwnga awm tûr te, an pûte chhang lê ve lo tûr leh, ¹⁰kutkem nei lovin, an rinawmzia tilang zâwk rawh se; tichuan, kawng engkimah min Chhandamtu Pathian thû hi duhawm takin a lang chhuak dâwn a ni.

KHAWNGAIHNAA CHHANDAMNA ZIRTIR

¹¹Chhandamna thlentû Pathian khawngaihna chu mi zawng zawng hnênah a lo lang ta a, ¹²khawvêl châknate, Pathian ngaihsak lohnate hnâwlin, tûnlai khawvêlah hian nun dân thiamin, fel tak leh Pathian ngaihsak takin kan awm tûr a ni tih min zirtîr a; ¹³kan Pathian ropui leh Chhandamtu Isua Krista inlârna tûr atâna beiseina lâwmawm chu kan thlîr reng a, ¹⁴ani chuan kan bawhchhiatna tinrêng laka ta min tlan chhuak a; ama pual bik atâna a tihthianghlim, thil tha tih kawnga thahnemngai tûra a ruat mite tân a inpe zo ta. ¹⁵Thunei takin chûng thû chu hrilh la, fuih la, zilhau rawh. Tûma’n hmsut che suh se.

BUNG 3

KHAWNGAIHNA ROCHUNTUTE KHAWNGAIHNA

¹Rorêltute leh thuneitute hnuaia kûna, an thu awih tûr te, thil tha tinrêng ti tûra inpeih tûr te, ²tû pawî mah sawi lova, mite nêna inrema, zaidam leh mi zawnz zawnz hnêna inngaitlâwm tûrin anni chu hriattîr leh ang che. ³Keini pawh hmânah chuan mi â, thu âwih duh lo, buma awm, tîsa châkna leh nawmsak bâwlna tinrênga sual lama inhmang thîn, mi itsîka, huatthlala taka awm luia, inhawtawn reng thîn kan nih kha. ⁴Mahse, min Chhandamtu Pathian ngilneihzia leh mihringte a hmangaihzia a lo lan lai khân, ⁵dik taka hna kan thawh vâng ni lovin, a khawngaihna avâng zâwkin min chhandam a; piantharnain min sil fai a, Thlarau Thianghlamin min siam thar leh ta a ni. ⁶Chû chu min Chhandamtu Isua Krista zârah chuan nasa takin kan chungah a leih ta a, ⁷a khawngaihnaa thiamchantîr kan nih tawh avângin, chatuana nun beiseina ang zêla ro luahtu kan ni ang. ⁸Hê thû hi a dikin, hêng thilte hi hriat nawnîr leh fo che ka duh a ni: 'Pathian ringtute chuan thil tha ti zêl tûrin ngaihtuah rawh se,' tih thû hi. Hêngte hi mihringte tâna tha leh sâwt a ni si a.

INTHENNA PUMPELH RAWH

⁹Âthlak taka intihbuai te, thlahtu chhuina kawngah te, inhniálnaah te leh dân thu inchuh buainate chu pumpelh rawh; chûng chu thil sâwt lo leh tângkai lo mai a ni e. ¹⁰Rin hran nei mi chu wawî hnih khat i zilhhauh hnû chuan hnâwl tawh mai ang che. ¹¹Chutiang chu mi rilru kâwî leh sual lui zêl mi an ni a, anmahni ngeiin thiam loh an inchantîr thîn.

THUCHAH HNUHNUNG

¹²Artema emaw, Tukika emaw i hnêna ka rawn tîrh hunah Nikopoli khuaah ka hnênah lo kal hrâm rawh; chutah chuan thlasik hun hman ka tum a ni. ¹³Dân hremi Zina leh Appollova te pawh engmah tlachham lova an awm theih nân hmanhmawh takin rawn kaltîr ve ang che. ¹⁴Kan mite chu dâwngdah mai mai lovin, mamawh tlâkchham nei lo tûra hna tângkai thawka inhmang reng tûrin fuih ang che.

INTHLAHNA

¹⁵Ka hnêna awm zawnz zawnzge hian chibai an bûk a che. Rinnaa min hmangaihtute kha chibai min bûksak ang che. In zâa hnênah khawngaihna awm rawh se. Amen.

PHILEMONA

Ziah tu: Paula • Ziah kum: A.D. 60

Hê lehkhá, Paulan Rom khawpui lung ina a tân hmasak laia a ziah hi Kolosa khuáa awm Philemona hnêna thawn a ni a. Onesima, a hming awmzia ‘tangkai’ tih ni si, a pu Philemona lakah tangkai lovin, a pu thil a rûksak hnêah a tlân bo va. A tlân bona lamah Rom khuáah Paula rawngbâwlnaah a lo piangthar ta hlahu va; ringtu a lo nih tâkah chuan hreh deuh mahse, Tukika rualin hê lehkhá nên hian Onesima chu a pu hnênah a tîrkîr leh ta a. A pu chuan lo ngaidama, ringtu a nihna anga lo lâwm lût leha, hmangaihna nêna inrem leh tûrin Paula hian a ngensak a ni. Philemona lehkhathawn hi Bible-a lehkhabu 57-na a ni a, bung khat a ni a, châng 25 a awm.

BUNG 1

CHIBAI BÛKNA

¹Paula, Krista Isua mi tâng leh kan unaupa Timothea chuan: Kan duh tak leh kan thawhpui Philemona hnênah te,

²kan farnu Aphi te, kan sipaipui Arkippa te, i ina kohhran inkhawmhote hnênah chuan:

³Kan Pa Pathian leh Lalpa Isua Krista hnên ata khawngaihna leh remna chu in hnênah awm rawh se.

PHILEMONA HMANGAIHNA LEH RINNA

⁴Ka Pathian hnênah lâwmthu ka sawi a, ka tawngtâinaah te chuan in hming ka lam fo thîn,

⁵Lalpa Isua lamah leh mi thianghlim zawng zawngte lama hmangaihna leh rinna i neih chu lo hriain,

⁶I rinna chu mi dangte hrilh chhâwnga i chanpui ve zêl chuan, Krista Isuaa i thil dawn thatzia hriatna pawh a lo pung sawt dâwn a ni.

⁷Unaupa, nangma zâra mi thianghlimte thinlung a lo harh chhuah tak avângin, i hmangaihna chuan min tihlimin min tithlamuang khawp mai.

ONESIMA TANA NGENSAKNA

⁸Kristaah chuan a âwm tawh ang zêla thu han pêk che hi ngam êm êm mah ila,

⁹hmangaihna avângin kei Paula putar, tûna Krista Isuaa mi tâng ni bawh hian a nengin ka ngên zâwk ang che.

¹⁰Ka fapa Onesima, kawh bun chungka ka hrina tân hian i hnênah ka ngensak e;

¹¹ani chu hmânah khan i tân a tangkai lo va, tûnah erawh chuan kei leh nangma tân a tangkai tawh asin.

¹²I hnênah ka rawn thawn kîr a, lo lâwm lût leh ang che, tih hi thinlung takin ka sawi a ni.

¹³Chanchin T̄ha avânga kawh ka bunnaah hian, nangma aiawha rawng mi bâwlsak theih nân, ka hnêna awmtîr reng ka duh a.

¹⁴Nimahsela, i remtihna lo chuan eng mah ka ti duh lo ve, i thil t̄ha tih tûr chu phût chhuah ni lova, i duh thû ngeia i tih a nih zawk nân.

¹⁵Rei lo tê a kalsan zawk che kha, kumkhuaa amah i neih hlenna tûr a ni zâwk dâwn asin,

¹⁶bâwih ang erawh chuan ni tawh lovin, bâwih aia t̄ha, unau duh tak ang zawkin a ni ang chu. Ka tân pawh mi duhawm a nih chuan, i tân phei chuan tîsâah leh Lalpaah a va duhawm lehzuâl dâwn êm!

THU AWIH TURA PHILEMONA FUIHNA

¹⁷Chuvângin, thawhpua mi ngai a nih chuan keimah mi lâwm angin amah hi lo lâwm ang che.

¹⁸I chungah thil engpawh a lo tihsual emaw, i lei a bâ emaw a nih chuan keima batah ngai ang che.

¹⁹Kei, Paula hian keima kut ngeia ka ziah a nih hi. Keiman ka rulhsak ang; ka lakah nang pawhin bâ i nei ka tihna erawh chu a ni lo ve.

²⁰A ni asin unaupa, Lalpaah chuan nangma hnên atângin lâwmna mi neihtîr la; Kristaah chuan ka thinlung tiharh leh ang che.

²¹Mi lo âwihsak ngei ang a, ka sawi aia nasa zâwk mahin i ti ang tih ka hriat avângin i hnênah ka rawn ziaak a nih hi.

²²Chubâkah, thlenna tûr pindan mi lo buatsaihsak bawh ang che; in tawngtâinate avângin in hnênah pêk ka ni dâwn tih ka inring si a.

INTHLAHNA

²³Epaphra, Krista Isuaa ka tânpuipa hian chibai a bûk a che;

²⁴ka hnathawhpui Marka te, Aristarka te, Dema te, Luka te pawhin chutiang bawkin chibai an bûk a che.

²⁵Kan Lalpa Isua Krista khawngaihna chuan i thlarau awmpui che rawh se. Amen.

HEBRAI

Ziah tu: Hriat chian loh. • Ziah kum: A.D. 68

Hebrai lehkhathawn ziaktu hi hriat chian a ni lo. Mi ðhenkhatin Paula ziah niin an ring a; mahse Paula ziah ngei a ni tih finfiahna a awm hran lo. Paula bâka ziak thei tur âwm mi dang engemaw zât hming an vawrh chhuah zîngah, pawm tlân bîk a awm lo bawk. A ziaktu hian Timothea hi ‘kan unaupa’ tiin a sawi. Hê lehkhah ziah a nih lai hian Jerusalem tempul a la din reng avângin, A.D. 70 a tempul tihchhiat hma deuhva ziah a ni tihah erawh chuan inhnia na a awm lo (10:11). A ziaktu lam hre Chiang thei lo mah ila, a thu kalhman a tang hian Chung lam thuneihna ngeia ziah a ni tih a Chiang a; chuvângin, a tîr a tang rêngin Thlarau hriattirna in thâwk khum lehkhahû-ah telh a ni. Hebrai Kristiante zîngah Isua Krista rinna kawnga ngui leh chau mêka awmte chu nghet taka awm zêl tûr te, thutak hriat tawh hnûa tlûksan a pawî tûrza te, rinna kawngah puitlinna lam pana kal tûra fuih te an ngai a. Thuthlung Hluia dân thupêk zawng zawngte kha, Isua Kristaah engkim hlen chhuah a nih tawh avângin Juda sakhuana chu a tâwp tawh a, Kristaah lo chuan beisei tûr a awm lo, tiin Krista chu thuthlung ðha zâwk, Aarona puithiamna aia ðha zâwka chatuana puithiam a nihzia hê lehkhathawn ziaktu hian fiah takin a tar lang a ni. Thuthlung Hlui sakhuana nêna khaihkinna a nih avângin a thupui ber pawh ‘ðha zâwk’ tih hi a ni. Hebrai lehkhathawn hi Bible-a lehkhahu 58-na a ni a; bung 13 a awm a, châng 303 a awm bawk.

BUNG 1

PATHIAN INPUANNA ROPUI

¹Pathian, hmân laia thlahtute hnêna hun hrang hrang leh kawng hrang hranga Zâwneite hmanga thu lo sawi ðhîntu chuan

²Hêng ni hnûnngah te hian a Fapa hmang ngeiin kan hnênah thu a sawi ta. Ani chu ro zawng zawng luahtu atân a ruat a, amahah vêk chuan khawvêlte hi a siam bawk a;

³Ani chu a ropuina êng chu a ni a, a nihna ze pui, tak neia a rawn inlantîrna a ni; ðhû-a a thiltihtheihna chuan thil engkim a chelh ding a, amah ngeiin kan sualte min tlen faisak hnûah Chungnungbera ding lamah khian a han ðhu ta a.

⁴Vântirhkohte aia ðha zâwk daih a nih avângin anni aia hmingðha chungchuang zâwk a rochung ta.

FAPA, VANTIRHKOHTA AIA CHAWISAN

⁵Vântirhkoh tû ber hnênah nge hêng ðhû hi a lo sawi le? “Nang hi ka Fapa i ni a, Wawinah hian ka hring ta a che,” tih leh: “Kei hi ani tân Pa ka ni ang a, Ani chu ka tân Fapa a ni ang,” tih hi?

⁶A Fatîr khawvêla a rawn tîr lai khân heti hian a ti bawk: “Pathian Vântirhkoh zawng zawngin amah chu chibai bûk rawh se.” tiin.

⁷Vântirhkoh chungchâng heti hian a sawi: “Ani chuan a Vântirhkohte chu Thlarauvah* a chantîr ðhîn a, A rawngbâwtute

chu meiallah a chantîr ðhîn,” tih hi.

⁸Fapa hnênah chuan heti hian a sawi thung: “Aw Pathian, i lalthutthlêng chu, Chatuan atân a ni si a; Dikna lal tiang pawh chu i lalram tiang a ni e;

⁹Dikna chu i ngaina a, Bawhchhiatna erawh i huat kha; Chuvângin Pathian, i Pathian chuan I ðhianta aia nasa zâwkin Hlimna hriak ngei a thih che hi,” tih leh,

¹⁰“Nang, LALPA, a tîrin leilung nghahchhan i phûm tawh a, Vânte khi i kut chhuak a ni.

¹¹An la boral ang a, puan angin an la chul vek ang a, Nang erawh chu i awm reng ang.

¹²Puan angin i zial ang a, Tichuan, a lo danglam tawh ang. Nang zawng i pangngai reng a, I kumte pawh a ral lo vang,” tiin.

¹³Vântirhkoh tû ber hnênah nge hei hi a lo sawi le: “I hmêlmâte i ke nghahchhana Ka siam hmâ loh zawng, Ka ding lamah ðhu ang che,” tih hi?

¹⁴An zavaiin rawngbâwtu thlarau, chhandamna rochung tûrte enkawl tûra tîr chhuah an ni lo vem ni?

BUNG 2

CHHANDAMNA THLAHTLAM SUH

¹Chuvângin, kan thu hriat tâkte kha kan pawisak hlê a ngai a ni, chuti lo zawng kan tawlh bo dah ang e.

²Vântirhkohte hmanga thu sawi pawh a nghet si a, bawhchhiatna leh thu âwih lohna tinrêngten dik taka thungrulhna an hmuh zêl bawk si chuan,

³heti êma chhandamna ropui hi thlahtlam ila, engtin nge kan tlân chhuah theih tehlu ang? Chû chhandamna ðhû chu, a tîra Lalpa âw-kâ ngei hretute chuan min nemnghehsak tawh a ni.

⁴Pathianin chhinchhiahnate leh thilmakte, thilmak tihtheihna hrang hrangte nê, ama duh dân ang zêla Thlarau Thianghlim thilpêkte nê anni chu a hriatpui si a.

FAPA, VANTIRHKOHTA AIA HNUIA SIAM

⁵Khawvêl lo la awm tûr chanchin kan sawi hi chu Vântirhkohte thuhnuaiah chuan a dah lo.

⁶Mahse mi pakhat chuan khawiah emaw hêng ðhû hi sawiin a hriattîr tawh a: “Mihring hi eng nge maw a niha, i ngaihven reng ðhîn le? Mihring fapa pawh hi eng nge maw a niha, i vohbîk viau mai le?

⁷Ani chu Vântirhkohte aia hnui hretin i siam rih a; Ropuina leh châwimâwina i khumtîr a, I kutchhuak chungachte chuan hotûah i siam bawk a;

⁸A ke hnuaiahte engkim i dah si a.” A thuhnuaia engkim a dah tawh avângin, a hnuaia dah loh engmah a nei lo. Tunah chuan engkim a hnuaia awm vek angin kan la hmu rih lo mai a ni.

⁹Amaherawhchu Isua, Vântirhkohte aia hnui hreta siam riha chu, Pathian khawngaihna azârah mi tin thihna a tawhsak theih nân, thihna ngei chu tuarin, ropuina leh châwimâwina khumtîra a awm chu kan hmu ta zâwk a ni.

FAPA TAM TAK ROPUINAA HRUAI LUH

¹⁰Ama tân leh amah vângin thil zawng zawng an lo awm a, fapa tam tak ropuinaa hruai lûta, a tuarna azâra an chhandamna siam saktu tihfamkim chu Pathian tân chuan tih âwm rêng a ni si a.

¹¹Tithianghlitmu leh tithianghlimte chu an zâa mi pakhata chhuak an nih avângin, ani chuan anmahniho chu ‘unaute’ tih a zak si lo va.

¹²“Ka unaute hnênah i hming ka tlângaupui ang a; Pung khâwmho zingah chuan hla sâin ka fak ang che,” tiin.

¹³“Amahah chuan ka rinna ka ngat ang,” a ti a. “Hei le, kei leh Pathian mi pêk naupangte hi,” a ti baw k a.

¹⁴Naupangte hi tîsâ leh thisen changtute an ni ang hian, amah ngei pawhin chûng baw k chu a chang vê ta, thihna thlentu Diabola chu thihna vêka a tihbora theihna tûr leh,

¹⁵dam chhûnga thih hlau rêng rênga awmte, thih hlauhna bawiha tâng zawng zawngte a chhan chhuah theihna tûrin.

¹⁶Ţanpuina a pêka te chu Vântirhkohte ni lovin, Abrahama thlahte an ni zâwk si a.

¹⁷Chutichuan, mite tân an sual thupha châwina siamsak tûrin, Pathian lamah chuan Puithiam Lalber, mi lainat thei leh rinawm a nih theih nân, kawng engkima a unaute anga lo awm chu a tân pawh a tûl ve rêng a ni.

¹⁸Amah ngei chuan thlêmna te tâwka a lo tawrh ve tawh avângin, thlêmna tâwkte chu a Ţanpui thei a ni.

BUNG 3**FAPA CHU A RINAWM**

¹Chuvângin unau thianghlim, vân kohna chang vê te u, kan thurinin a puan chhuah Tirhkohe leh Puithiam Lalber, Krista Isua chu ngaihtuah rawh u;

²Mosia kha Pathian chhûngkaw pum tâna a rinawm ang bawkin, ani pawh amah ruattu lakah chuan a rinawm a ni.

³In satu chu a in sak aia ngaihhlut tlâk a nih angin, Amah chu Mosia aia ngaih ropui tlâka ruat a ni.

⁴In tin hian dintu tuemaw a nei zêl ang hian, thil zawng zawng dintu chu Pathian a ni.

⁵Pathian chhûngkaw pum tâna chhiahhlawh rinawmah Mosia a rawn Ţang kha, a hnu lama la sawi zui zêl tûr atâna hriatpuitu a ni a,

⁶Krista erawh chu ama chhûngkuaah Fapa a ni thung a; keini hi chû chhûngkua chu kan ni e, a tâwp thlenga rinna leh beiseina lâwmawm kan vuan tlat a nih chuan.

RINAWM RAWH

⁷Tichuan, Thlarau Thianghlim sawi angin: “Vawiinah hian a âw in hre dâwn a nih chuan,

⁸Thlalêra fiahna thlen laia An tihthinur ang khân, In thinlung tikhauih suh u;

⁹In thlahtuten mi fiahin mi thlêm a, Kum sawmli chhûnga ka thiltihte chu an hmu reng si a.

¹⁰Chuvângin, anniho chungah chuan ka thinur a, “Thinlung lamah an pêng bo reng a, Ka kawngte pawh an hre hek lo,” ka ti a,

¹¹Tichuan, thinurin chhia ka chham a, “Ka chawlhnaah chuan an lût lo vang,” tiin.

¹²Unaute u, fimkhur rawh u, chuti lo chuan Pathian nung bânsan duhna khawp rin lohna thinlung sual chu in zînga mi tû chungah pawh a awm thei reng a nia.

¹³“Vawiin” an tih chhûng hian ni tinin infuih tawn zâwk rawh u, chuti lo zawng, in zînga mi tûpawh sual bumna hmanga tihlulul in lo ni dah ang e.

¹⁴A tira kan rinna ang kha a tâwp thlenga kan vawn tlat chuan, Krista neitu nihna kan chang ta tihna a ni.

¹⁵“Vawiinah hian a âw in hriat dâwn chuan An helsan lai ang khân In thinlung tikhauih suh u,” tih a ni si a.

THLALÊRA ZIN HOTE HLAWHCHHAMNA

¹⁶Tute nge ni hre reng chungah helte kha? Aigupta ram aŢanga Mosia hruai chhuahho zawng zawng kha an ni lo vem ni?

¹⁷Tute chungah nge kum sawmli chhûng a thinrim kha? Thil sual ti a, thlalêra tlu-hlumhote chungah khân a ni lo vem ni?

¹⁸Tute nge a chawlhnaa lût ve lo tûra chhia a chham khumte kha? A thu âwih lo-hote kha an ni lo vem ni?

¹⁹Tichuan, rin lohna avângin an lût thei ta lo tih kan hria a ni.

BUNG 4**CHAWLHNA THUTIAM**

¹Chuvângin, a chawlhnaa luhna thutiam awm reng chung hian, lût thei lo tûra tling thelh zînga tel vê nih i hlau ang u.

²Chanchin Ţha chu kan hnêna hrilh a nih ang bawkin an hnênah pawh hrilh a ni ngei si a; nimahsela, a ngaithlatuten rinna nêna an zawm loh avângin, an thu ngaihthlâkte chu an sâwtpui si lo.

³Keini ringtute erawh chu, chû chawlhnaah chuan kan lût ta a; leilung pian tîrh lai khân a hnathawhte chu zo tawh mahse, “Thinura chhia ka chham ang khân Ka chawlhnaah chuan an lût lo vang,” tiin a lo sawi baw k a ni.

⁴Ni sarih ni chungchâng chu khawiah emaw heti hian a lo sawi tawh a: “Ni sarih nîah chuan Pathianin a hnathawh zawng zawng a chawlhna ta a,” tiin.

⁵Chû hmunah chuan, “Ka chawlhnaah an lût vê lo vang,” a ti leh baw k a.

⁶Chuvângin, mi thenkhat tân luh theih a la ni reng a; mahse Chanchin Ţha hril dawng hmasatute chu thu âwih lohna avangin an lût vê ta lo a ni.

⁷Davidah khân eng ni emaw ber chu “vawiin” tiin a ruat a, chuta Ţanga hun rei tak hnûah: “Vawiinah” hian a âw in hriat chuan In thinlung tikhauih suh u,” a rawn ti leh ta a nih hi.

⁸Josuan chawlhna lo pe tawh ni se, a hnûah ni dang sawi nawn leh a ngai tawh lo tûr.

⁹Chuvângin, Pathian mite tân chawlhna a la awm ta cheu a nih hi.

¹⁰Túpawh Pathian chawlhnaa lûta, châwl vê tawh chuan Pathian tih ang khân a hnathawhte chu a chawlhsan thîn.

THÛ CHUAN KAN NIHNA A HMU TLANG

¹¹Chû chawlhnaa lût ngei tûr chuan theihtâwp i chhuah ang u, chuti lo zawng, thu âwih lo hote tlûk ang khân kan tlu vê dah ang e.

¹²Pathian Thû hi thu nung, thiltithe, khandaih hriam tawn eng ang ai pawha hriam zâwk, nunna leh thlarau, ruhchuktuah leh thlîng chena phel hrang vek thei, thînlunga ngaihtuah leh tumte pawh hre tlang vektu a ni.

¹³Thilsiam a hmuh phâk loh tûra thup theih engmah a awm lo; kan chanchin kan thlenna tûra mit hmuhah chuan engkim mai hi saruak leh inhawng sâ vek a ni.

KAN PUITHIAM LAL NGILNEI

¹⁴Tichuan, Puithiam Lal ropui, vânahte kal tlang tawh Pathian Fapa Isua kan neih avângin, kan thurin hi nghet takin i pawm tlat ang u.

¹⁵Puithiam Lalber, kan chak lohnate min hriat thiampui thei lo ni lo, keimahni anga kawng tinrenga thlêmna tâwk tawh, mahse sual si lo chu a ni.

¹⁶Chuvângin, mangan laia tanpuitu tûr zahngaihna leh khawngaihna kan chan theih nân, khawngaihna lalthutthlêng chu huai takin i pan ang u.

BUNG 5

PUITHIAM LALBER NIH THEIHNA

¹Puithiam lalber chu mihringte zînga thlan chhuah, mihringte tân Pathian hnêna sual thâwina leh thilpêk hlân tûra ruat a ni.

²Ani chuan mi mâwlte leh kawng bote chungah zah a ngai thei a, amah ngei pawh chak lohnaa hual vêla awm a ni ve baw si a.

³Hei vâng hian mipuite tân chauh ni lovin, ama tân ngei pawh sual tâna inthâwina a hlân ngei tûr a ni a.

⁴Arona anga Pathian koh an nih loh chuan tûma'n chutiang châwimâwina chu mahni an inbel ngai lo.

CHATUAN PUITHIAM

⁵Chutiang bawkin Krista ngei pawh Puithiam Lalber ni tûra mahnia intiropui a ni vê si lo, mahse: "Nang hi ka Fapa i ni a, Vawiinah hian ka hring a che," tia a hnêna sawitu khân a tiropui ta zâwk a ni;

⁶"Nang chu Chatuan Puithiam i ni e, Melkizedeka puithiam dân ang khân," tiin hmun dangah a sawi bawk.

⁷Ani chu mihringa a rawn chan lai khân thihna laka amah chhan chhuak theitu chu nasa taka tapin a âu va, mittui nêna tawngtaiin, dîlna a hlân a, Pathian a tîh êm avângin a dîlna chu ngaihthlâksak a ni a.

⁸Fapa meuh pawh ni mah se, a thil tuarah te chuan thu âwih a zir zêl a,

⁹tichuan, tha famkima lo awmin, ama thu âwih zawng zawngte tân chatuana chhandamna bulpui a lo ni ta.

¹⁰"Melkizedeka puithiam dân" anga Puithiam Lalberah Pathianin a vuah ta a,

¹¹chumi chanchin chu sawi tûr a tam si, mahse in hriatna beng a ngawn êm avângin hrilhfiar in har baw si a.

THLARAUVA SAWNGNÂWINA

¹²Tûn ang hun tawhah te chuan zirtîrtu ni tawh âwm in ni asin le; mahse Pathian thu bulâannaah bawk kîr leh in ngai thîn a, chaw tak in la ei thei lo fo va, hnute tui bawka châwm in la ngai reng mai a nih hi.

¹³Hnute chauh ring na nâ nâ chuan dikna kawng thû hi an dai pha tak tak lo, nausên an la ni miao si a.

¹⁴Chaw tak erawh chu puitling tawhte tân a ni, an lo hman than tawhna aţangin, a tha leh tha lo thliar thiam tûrin an rilru chu sawi zawi a lo ni tawh thîn a ni.

BUNG 6

SAWNGNÂWI RENG A HLAUHAWM

¹Chuvângin Krista thu bulâanna ngawt sawi leh thîn tawh lovin, puitlinna lam kawng i zawhsan ve tawh ang u. Hêng thiltih thi aţanga simna te, Pathian rinna chungchâng te,

²baptisma thurin te, mi chungah kut nghah te, mitthi thawhleha te, chatuana rorêlna chungchâng zirtîrna bul lam ringawt hrût hrût tawh lo hian.

³Pathianin rem a tih chuan chu kan ti ngei tûr pawh a ni a.

⁴Vawi khat rilru tihvârna lo chang tawh, vâ thilpêkte pawh tem vê tawha, Thlarau Thianghlim pawh chang ve tawh,

⁵Pathian thu tha pawh tema, hun lo la awm tûra thiltitheihnate pawh tem tawh zeta,

⁶an tlûksan leh si chuan, sim tûra siam thar leh theih an ni tawh lo, Pathian Fapa chu anmahni ngeiin khêngbet nawna, tîmualphotu an nih avângin.

⁷Ruah sîr lo dawng thîn leilung chuan a chîngtute tân thlai ţangkai tak tak a chhuahsak thîn avângin Pathian malsawmna a dawng thîn.

⁸Mahse, hnim hlingnei leh buarte a chhuah chuan mâkin a awm a, ânhche dawng thâwthânga awmin, a tâwpa hâl ral tûr a ni mai.

AWM DÂN THA ZÂWK

⁹Duh takte u, chutiang zâwng chuan sawi mah ila, nangni tân chuan thil tha lehual, chhandamna thlen thei thil a awm ngei kan ring tlat a ni.

¹⁰Pathian chu in hnathawh leh a hming avânga hmangaihnaa in thawhrimna te, mi thianghlimte rawng in lo bâwl tawhna te leh in la bâwl zêl dan te hi theihnghilh khawpa mi fel lo a ni lo ve.

¹¹In beisei ang hi a taka a thlen theih nân, a tâwp thlengin in taihmak dân pangngai ang khân chhunzawm zêl ula kan ti hlê a ni.

¹²Chutichuan, rinna leh dawhtheihna avânga thutiam rochung tawhte awm dân entawn ula, dâwngdah rêng rêng suh u.

KRISTAA PATHIAN THIL TUM DIK LO THEI LO

¹³Pathianin Abrahama hnêna thû a tiam lai khân, amah aia ropui zâwk chhâla chhia a chham theih loh avângin, amah leh amah inchhâlin,

¹⁴“Mathei lovin mal ka sâwm ngei ngei ang che a, nasa takin ka tipung zêl ang che,” a ti a ni.

¹⁵Chutia chhel taka a tuar chhuah hnû chuan, thil tiam chu a hmu ta ngei a ni.

¹⁶Mihringte hian an aia ropui zâwk chhâlin chhia an chham thîn; an inhnialna tanfung tihngheh nân leh thu tihtlûk nân chutiang chuan chhia an chham thîn.

¹⁷Chutiang bawkin Pathian chuan, ro luah tûr thû a tiamte hnênah a thû a sût dâwn lohzia tichiang lehzuat tûrin, chhechhamin a thutiam chu a nemngheh bawk a,

¹⁸chûngte chu sût leh theih loh thil pahnihin a delhkihl a: Pathian daw thei lo a nihna bâkah, kan hmaa beiseina a dah, chan ngei tuma tlân mêkten thlamuanna nasa lehzuat an neih theih nân a ni.

¹⁹Chû beiseina chu kan nunna atân thîrchakai a ni a, a rinawmin a ngeth a ni. Puanzâr phên aţangin hmun thianghlim ril zâwkah chuan a lût a;

²⁰chutah chuan Melkizedeka puithiamna anga chatuana Puithiam Lalber lo ni ta Isua chu kan aiawhin a lut ta a ni.

BUNG 7**DIKNA LAL CHU**

¹Chu Melkizedeka, Salem lal, Pathian Chungnungbera puithiam, Abrahaman lallo a thah zawha, a lo haw lam lo hmuaka, mal lo sâwmtu,

²Abrahama pawhin engkimah sâwma pakhat a pêk ve bawka kha, a tîrah chuan “dikna lalpa” tih a ni phawt a; chumi hnûah Salem lal tih a ni leh bawk a, a awmzia chu “remna lal” tihna a ni.

³Pa nei lo, nu nei lo, thlahtu chhui tûr pawh nei lo, awm tan ni leh tâwp ni pawh nei lova chu, Pathian Fapa anga siam a ni zâwk a; chatlak lovin puithiam a ni reng a.

⁴Chû mihring ropuizia chu ngaihtuah teh u, thlahtu Abrahama meuh pawhin a râlâl sum aţangin sâwma pakhat a pê a nih kha.

⁵Levia thlahte zînga puithiam hna chang apiangte chuan dân angin mipuite hnên aţangin sâwma pakhat lâk tûr thu an hmu ngei a, chûngte chu an unau, Abrahama thlahte vek an ni tho va;

⁶amaherawhchu, an thlahtute zînga chhui tel pawh ni vê lova khân Abrahama lakah sâwma pakhat a dawng a, thutiam kawltu chu mal a sâwm ta thung a.

⁷Tichuan, hnial rual lohvin a tê zâwk chu a lian zâwka malsâwmin a awm ta a ni.

⁸Hetah hi chuan thi thei mihringte hian sâwma pakhat an dawng thîn a, chutah erawh chuan a nung reng tih hriatpuitu chuan a dawng thung.

⁹Levia, sâwma pakhat dawng thîntu pawh khân, Abrahama kal tlangin sâwma pakhat a pe tawh, tia sawi theih a ni;

¹⁰Melkizedeka a lo hmuah lai khân a pa thalbêa awm a la ni si a.

PUITHIAM THAR MAMAWHNA

¹¹Levia chîte puithiamna aţanga famkimna hmuh theih a nih tho chuan (chumi hnuaiah chuan mipuiten dân thu an lo hmu si a), Arona puithiamna ang ni lo, Melkizedeka puithiamna anga puithiam dang lo awm leh hi engati nge a la tûl cheu le?

¹²Puithiam nihna a lo inthlâk danglam tawh si a, chuvângin dân thû pawh tihdanglam vê a lo ngai ta a ni.

¹³Hêng a chanchin an sawia hi hnam danga mi daih a ni a, chû hnama mi tute mahin maichâmah rawng an la bawl ve ngai lo.

¹⁴Kan Lalpa chu Juda hnam aţanga lo chhuak a ni tih a Chiang a; chu hnam chungchanga puithiamna thilah Mosian engmah sawi a nei lo.

¹⁵Chuvângin, Melkizedeka anga puithiam chi dang lo chhuak leh tûr chu a Chiang reng a,

¹⁶ani chu mihringte tâna thupêk siamsak ang ni lo, nun tâwp nei lo thiltihtheihna ang zâwkin a lo kal ta a ni.

¹⁷“Nang chu, Melkizedeka puithiamna dân anga chatuana puithiam i ni e,” tia hriatîr a ni si a.

¹⁸Thupêk hmasa chu a chak lohva, a hman tlâk tawh loh êm avângin thiah a lo ni ta a,

¹⁹dân thû chuan engtin mah a tifamkim thei lo; amaherawhchu, beisei tûr tha zâwk a lo awm avângin Pathian min hnaihtîr ta hlauh zâwk a ni.

PUITHIAM THAR ROPUIZIA

²⁰Thutiam tel lova puithiam nihtîr pawh a ni bawk lo va

²¹(anniho chu thutiam tel lova puithiamna siam an ni si a; puithiamna ani Siamtu erawh chuan thutiamin hê thû hi a sawi: “LALPAN a tiam tawh a, A sût leh tawh lo vang, ‘Nang chu chatuana puithiam i ni e, Melkizedeka puithiamna ang khân”).

²²Chû aia nasa taka Chiang zâwk chuan Isua chu thuthlung tha zâwk nemngheh a lo ni ta.

²³An puithiam hnâ chhunzawm zêl thei lo tûra thihnain a tihtâwpsak mi tam tak an awm bawk.

²⁴Ani erawh chu chatuanin a awm reng a, puithiamna danglam thei tawh lo a nei a ni.

²⁵Chuvângin, amah kaltlanga Pathian hnên rawn pantute chu a tâwpkhâwk thlengin a chhandam thei a ni; anmahni dîlsak tûrin chatuanin a nung reng si a.

²⁶Chutiang mi thianghlim, pawî sawi lo, bawhlhlawh kai lo, misualte laka awm hrang, vân chung sâng aia sâng zâwka siam chu Puithiam Lalbera nei âwm tak kan ni rêng a;

²⁷puithiam lalhote anga ni tina inthâwia, mahni sual tâna inhlân phawta, mipuite tâna hlân leh chauh thîn te ang ni lovin, amah ngei vawî khat a inhlân khân ani chuan engkim a tlingtla ngêl vek a ni.

²⁸Dân chuan chak lohna nei mihringte chu puithiam lalberah a ruat thîn a; dân awm hnûa thutiam vê thung chuan chatuan atâna tihfamkim tawh Fapa chu puithiam lalberah a ruat ta zâwk a ni.

BUNG 8

PUITHIAM THAR RAWNGBAWLNA

¹Hei hi kan thu sawi laimu chu a ni: “Chutiang Puithiam Lalber, vâna Ropuibera lal̄thut̄hlêng d̄ing lam meuhva han t̄hûa,

²hmun thianghlim leh biakbûk tak tak, mihring sak ni lo, Lalpa sak zâwka Rawngbâwltu kan nei,” tih hi a ni.

³Puithiam Lalber apiang chu thilpêkte leh inthâwinatê hlân tûra ruat an ni a. Chuvângin, hê Puithiam Lalber pawh hian hlan tûr eng emaw tal a neih vê a ngai a.

⁴Leia awm ni sela chuan puithiam pawh a ni kher lo vang, dân anga thilpêk hlântute an awm sâ tawh tho avângin.

⁵Mosian biakbûk a sak dâwna chung lam thupêk a dawn ang khân, anniho chuan vâna lam thil entawna siam leh hlimthla rawng an bâwl thîn a. “Tlânga entawn tûr hmuhtîr i nih ang tak khân engkim siam ang che,” a tih kha.

⁶Tûnah erawh chuan thuthlung t̄ha lehzuâl, thutiam t̄ha lehzuâl chungâ nemnggeh tawh tâna Palai a ni angin rawngbâwl hna t̄ha zâwk a lo chang ta.

THUTHLUNG THAR

⁷Thuthlung hmasa chu sawisêl bo ni ta se, thlun nawn a ngai lo tûr.

⁸An tlin lohna hmu reng chungin tihian a sawi a: “Ngai teh, nî te chu a lo thleng mêk e, LALPAN a ti, Israela chhûngkua leh Juda chhûngkua te Thuthlung thar ka siampui hun tûr chu—

⁹An thlahtute Aigupta ram aṭanga hruai chhuak tûra An kuta ka chelh nia an hnêna ka thlun ang kha a ni lo; Ka thuthlungah chuan an awm reng ta si lo va, Chuvângin anni chu ka ngaihsak ta lo a ni, LALPAN a ti.

¹⁰Chûng ni hnêna Israela chhûngkuate hnêna Thû ka thlun tûr chu hei hi a ni, LALPAN a ti: An rilrûah ka thupêkte ka dah ang a, An thinhlungah ka zia baw ang a, An Pathian ka ni ang a, Anni chu ka mite an ni baw ang.

¹¹Tûma’n ‘LALPA chu hre rawh’ tiin Mahni thenawm leh mahni unaute an zir̄tîr tawh lo vang; A tê ber aṭanga a lian ber thlengin, An zâin mi hre t̄heuh tawh dâwn si a.

¹²An dik lohnahte zah ka ngai ang a, An sualnatê pawh ka hre reng tawh dâwn si lo,” tiin.

¹³“Thuthlung Thar,” tia a sawi avângin a hmasa zâwk chu a hluihlâwn ta a. Tichuan, lo hluia lo upa tawh chu a ral lek lek tawh a ni.

BUNG 9

LEI CHUNGA HMUN THIANGHLIM

¹Thuthlung hmasa pawh khân Pathian rawngbâwl dân leh rawngbâwlina hmun thianghlim, lei chungâ mi a nei tho va.

²Biakbûk an buatsaih a, a tawntir̄h chu khâwnvâr dahna te, dawhkân te, ‘chhang thianghlim’ dahna hmun te a ni a; chû chu ‘hmun thianghlim’ an tih chu a ni.

³Puanzâr pahnihna phênah chuan biakbûk chhûnga Hmun Thianghlim Ber an tih chu a awm a;

⁴chutah chuan rangkachak rimtui hâlâna bâwm leh thuthlunna bâwm, a vêla rangkachaka tuam a awm a, chu thuthlunna bâwm chhûngah chuan Manna dahna rangkachak bêl te, Arona tiang lo chawr te, thuthlunna lung phêkte a awm a;

⁵a bâwm chungah chuan zahngaihna t̄hutphah hliahkhuhin, ropuina Cherubte a awm baw a. Chu mi chanchin chu tunah chuan chipchiarin kan sawi thei lo vang.

FAMKIM LO LEI RAWNGBÂWLNA

⁶Chutiang tak chuan buatsaih a ni a, puithiamhote chu biakbûk tawntir̄h zâwkah chuan rawngbâwl tûrin an lût thîn.

⁷A dawt lehah chuan puithiam lalber chu, amah chauhvîn kum tin vawî khat, thisen keng ngeiîn a lût thîn a, chû chu ama tân leh mipuiten hre lova an lo tihsual thâwi nân a hlân thîn.

⁸Thlarau Thianghlimin a hriattîr chu hei hi a ni: ‘biakbûk hmasâ a la dîn chhûng chuan, Hmun Thianghlim bera luhna kawng chu a la lang rih lo,’ tih hi.

⁹Chû chu tûnlai thil entîrna hi a ni a; hetiang dân anga thilpêk leh inthâwina hian a hlântute chhia leh t̄ha hriatna pawh a siam t̄ha zo lo va,

¹⁰chûng chu siam t̄hatna hun lo thlen hmâa tîsaa zawm tûr thil ei leh in chungchâng te leh insil fai dân chungchâng te mai a ni.

VÂN LAM HMUN THIANGHLIM

¹¹Nimahsela, Krista chu thil t̄ha la awm zêl tûr atân Puithiam Lalbera lo kalin, a biakbûk atân pawh kuta sak loh, hêng thil siam zînga mi pawh ni lo, ropui leh famkim bika siam a ni.

¹²Kêl thisen te, bawng thisen te ni lovin, ama thisen nê ngei chuan Hmun Thianghlim Berah chuan vawî khat lûtîn a tlingtla nghâl vek a, chatuana tlanna chu a tlâk zo ta.

¹³Kêl leh bawng pa thisen leh, bawng la vâpa mi bawllhlawh chungâ theh mahin thianghlim khawpa tîsâ a tîlêngfai a nih ngai chuan,

¹⁴chatuan Thlarau zâra hmêlhem lova Pathian hnêna hlan tawh Krista thisen leh lek pheî chuan Pathian Nung rawngbâwl tûrin, in chhia leh t̄ha hriatna chu thiltih thîte lakah chuan a va tithianghlim nasa dâwn êm!

¹⁵Hei vâng hian ani chu Thuthlung Thar Palai a ni rêng a, thuthlung hmasa hnuaia bawhchhiatnate laka tlan chhuak tûrin a lo thi ta a; chuvângin kohvate chuan chatuan ro luahna thutiam chu an chang thei dâwn a ni.

PALAI THIH A TUL

¹⁶Thurochhiah a awm tawh chuan, a chhiahtu chu a thi tawh ngei tih a awm vê baw tûr a ni.

¹⁷Mi an la dam laiin an thurochhiah chuan awmzia a la nei lo va, a chhiahtu thiîh hnûah chauh thuneihna a nei thîn a ni.

¹⁸Chuvângin, thuthlung hmasa pawh kha thisen tel lovin an hlân ngai lo.

¹⁹Mosia khân dân thû ang zêla thupêk chungchang mi zawng zawng a hril̄h lai khân, bawngno leh kêl thisen chu tui nê, sahm̄ul lasen leh husop nê, lehkhabu leh mi zawng zawng chu a theh a.

²⁰“Hei hi thuthlung thisen Pathianin in zawm tûra a pêk che u a nih hi,” a ti a nih kha.

²¹Chutiang bawkin biakbûk leh rawngbâwlâ hmanrua zawng zawng chu thisen chuan a theh bawk a.

²²Dân thû ang chuan thil zawng zawng deuthhâw hi thisena tihthianghlîm a ni thîn, thisen chhuah lohvin ngaihdamna rêng a awm si lo va.

²³Chutichuan, vân thil anpuite mah chûng inthâwinate chuan tihthianghlîm a tûl si a, vân thil tak takte phei chu inthâwina t̃ha lehzuâla tihthianghlîm a ngai ngei ang.

²⁴Krista chu kuta sak hmun thianghlîm, a tak anpui maia lût a ni si lo va; tûnah hian vânah, Pathian hmâah ngei chuan kan aia dîng tûrin a lût ta zâwk a ni.

²⁵Kum tinin puithiam lalber chu ran thisen kenga Hmun Thianghlîm Bera a lût thîn angin, ani chu a inhlân fo a tûl vê hek lo.

²⁶Chuti ni suh sela, leilung pian tîr ata vawî tam tak a tuar tawh tûr a ni. Nimahsela, hê hun tâwpah hian sual tibo tûrin a lo lang a, amah ngei chu inthâwî nân a rawn inhlân ta a ni.

²⁷Mihringte hi vawî khat thi tûra ruat an ni a, chu mi hnûah rorêlna a awm ang;

²⁸chutiang bawkin Krista pawh mi tam tak sual phur tûrin vawî khat hlanin a lo awm ta. Thlahlel taka amah lo ngâk fan fantute hnênah sual tel lovin, chhandam tûr zâwkin a vawî hnihna atân a lo lang leh ang.

BUNG 10

RANA INTHÂWÎ A TAWK LO

¹Dân hi thil t̃ha la rawn thleng tûrte hlimthlâ, a tak ni lo, a lem mai a ni a; chuvângin dân ang maia inthâwina chu kum tin hlân tlut tlut thîn mah se, a hlântute ngei pawh a tifamkim thei chuang lo.

²Chuti ni lo se, inhlanna pawh a tâwp daih tawh dâwn lo vem ni? A hlântuten tihthianghlîmna chang tawh ni se, sual inhriatna pawh an nei tawh nâng.

³Mahse chûng inthâwinate chu kum tina an sualzia hriat thar lehna a ni zâwk si a.

⁴Chuvângin bâwng pa leh kêl thisen te chu sual tibo thei ziazâng a ni lo.

KRISTA THIHNAIN PATHIAN DÂN A HLEN ZO

⁵Khawvêla a lo kal lai khân heti hian a ti a: “Inthâwina leh thil hlan i duh lo va, Taksa mi buatsaihsak zâwk a.

⁶Hâlral thilhlân leh sual tâna inthâwinaah chuan I lâwm si lo va.

⁷Lehkhâbûah keima chanchin an zia k a, kei chuan, “Aw Pathian, ‘Ngai teh, i duh zâwng ti tûrin ka lo kal e,” ka ti a.

⁸A chungah chuan, “Inthâwina te, thilhlân te, halrâl thilhlân te, sual tâna inthâwina te i duh lo va, chûngah chuan lâwmna i nei hek lo,” a ti a (chûngte chu dân ang maia hlan an ni a),

⁹chumi hnûah chuan, “Aw Pathian, ngai teh, i duh zâwng ti tûrin ka lo kal e,” a ti ta a. A pahniha hi a tun dîn theihna tûrin a hmasa zâwk kha a la bo ta a ni.

¹⁰Tichuan, Pathian duh zâwng Isua Krista taksa chu hlan a nih tawh avângin tihthianghlîmin kan awm hlen ta a ni.

KRISTA THIHNAIN TITHTHIANGHLIMTE A TIFAMKIM

¹¹Puithiam apiang khân sual tibo thei hlei lo inthâwî dân ngai bawkin ni tin an inthâwî tluk tluk thîn a.

¹²Hê Mi erawh hi chu chatuan atân, sual tâna inthâwina vawî khat chia a hlan hnûin, Pathian dîng lamah a han t̃hu ta a;

¹³chuta t̃ang chuan a hmêlmâte chu a ke rahchhana siam an nih hmâ loh zawng a ngâk reng a.

¹⁴Vawî khat a inhlanna khân tihthianghlîm tawhte chu chatuan atân a tifamkim ta.

¹⁵Thlarau Thianghlîm pawhin chû chu min hriatpui bawk a; heti hian a lo sawî tawh si a:

¹⁶“Chûng ni hnûah chuan, “An hnêna ka thu thlun tûr chu hei hi a ni, LALPAN a ti: An thînlungah ka dânte ka dah ang a, An rilru chhûngah chuan ka zia k baw ang,” tiin.

¹⁷Tihian a ti baw k a, “An sualte leh an bawhchhiatnate ka hre reng tawh lo vang,” tiin.

¹⁸Chutia sual ngaihdam a nih tawh si chuan, sual tâna thilhlân pawh a awm zui zêl a ngai tawh lo.

I RINNA VUAN TLAT RAWH

¹⁹Chutichuan unaute u, Isua thisen avâng chuan Hmun Thianghlîm Berah chuan kan lût ngam ta e;

²⁰a taksa kal t̃laga puanzâr inhawng chu kan tâna kawng min ruatsak, kawng thar leh nung chu a ni.

²¹Pathian chhûngkaw chung a Puithiam Lalber kan neih avângin,

²²thînlunga tihtak zeta rinna nghet neiin, kan thînlunga chhia leh t̃ha hriatna khawlo tawh te chu tifiain, kan taksa pawh tui fima sil fai varin amah chu i hnaih ang u.

²³Kan beisei thurin hi ngîng lovin i vuan nghet tlat ang u, Thutiamtu chu a rinawm si a.

²⁴Hmangaihna leh thil t̃ha tiha inchawk tho tûr zâwng zêlin i ngaihtuah ang u.

²⁵Mi t̃henkhat tih dân anga inkhâwmte bânsan mai lovin, infuih tawn zâwk ula; chu Nî chu a lo hnai zêl tih in hriat avângin uar lehzuâlin lo infuih tawn rawh u.

MIDIK CHU RINNAIN A NUNG

²⁶Thutak chanchin kan hriat tawh hnû pawha kan sual luih zêl chuan eng ang sual thâwina mah a awm tawh dâwn si lo va,

²⁷rorêlna hlauhawm lo thleng tûr leh, a hmêlmâte kan ralna tûr thinurna mei chauh kan hmabâk a ni mai.

²⁸Mosia dân pawisa lo chu, hriatpuitu mi pahni pathum emaw thûin, lainatna tel lovin an thi thîn.

²⁹Pathian Fapa rap beta, amah tihthianghlîmna thuthlung thisen pawh thil narân ang leka ngaia, khawngaihna Thlarau zah

derna pawh nei lo chu, chutiang mi tluka hremna râpthlak phû an awm thei dâwn em ni?

³⁰“Phuba chu keima lâk tûr a ni, keima’n ka thungrûl ang,” Lalpan a ti, titu chu tu nge a nih kan hre si a. “LALPA chuan a mite chungthû a rêlsak dâwn,” a ti leh baw a.

³¹Pathian nung kut tuar chu thil râpthlâk tak a ni.

³²Hmana tihvârna in chan hnûa, harsatna kâra indona nasa tak in lo tuar chhuah dân te kha ngaihtuah thîn rawh u.

³³A châng chuan mite lo thlîr atân hmuhsitna leh hrehawmna kârah in awm a; lehlamah erawh chuan chutianga tihduhdaha lo awm vê tawhte tuarna fâwmpuitu in lo ni hlauh si a.

³⁴Ka kaw l bun avângin min lainat a, in thawmhnâwte an rawksak che u pawhin lâwm takin in tuar thei a, vânah chatuan daih ro hlu zâwk in nei tih in hriat vâng a ni.

³⁵Chuvângin, nghet taka in awm theihna chhan in rinna kha thlah hlek suh u, lâwmman ropui tak a keng asin.

³⁶Pathian duh zâwng in tih hnûa, a thutiam chu in hmuh theih nân chhelna in mamawh a ni.

³⁷“Rei lo te hnûah Lo kal tûra chu a lo kal dâwn si a, Rei a rial tawh lo vang.

³⁸Ka mi dik chu rinnain a nung ang; A hnungtawh erawh chuan, A lakah ka lâwm lo tawp ang.”

³⁹Keiniho erawh chu boral tûra hnungtawh pâwla mi kan ni lo va; thlarau chhandamna ringtute kan ni zâwk.

BUNG 11

RINNAIN KAN HRETHIAM

¹Rinna hi thil beiseite a taka awm ngei a ni tih hriatna, thil lang lote hmuh fiahna a ni.

²Chumi avâng chuan upahote khân chanchin duhawm tak tak an lo nei hlawm a.

³Khawvêl hi Pathian thûa siam a ni tih kan lo hriatna chu rinnain a ni a; chutichuan, hmuh theih thilte hi thil lang thei tea siam a ni lo.

HMÂSANGA MITE RINNA

⁴Rinnain Abela chuan Kaina inthâwina aia tha zâwk Pathian hnênah a hlân a, chu chuan mi dik a nihzia a hriatpui a, a thilhlân chu Pathianin a lo pawmsak a; chû rinna thiltih avâng chuan a thih hnûah pawh thû a la sawi ta zêl a nih hi.

⁵Rinnain Enoka kha thi lova lâk bovin a awm a; “Pathianin a lâk bo avângin hmuh tûr a awm ta lo va;” lâk bova a awm hmân Pathian a lo tilâwm tawh a ni tih nemnghehna a lo nei tawh reng a ni.

⁶Rinna lovin amah tihlâwm theih a ni lo; Pathian hnêna lo kal tûr chuan, amah chu a awm tih leh, taima taka amah zawngtute hnêna lâwmman petu a ni tih a ring tûr a ni.

⁷Rinnain Nova chuan thil lo la lang rih lo chungchângah chung lam hriatîrna a dawng a, ani chuan Pathian tih dêkin, an chhûngkua zawng zawng chhandam nân lawng a tû a; chû thiltih chuan khawvêl chu thiam loh a chantîr ta a, rinna ang zêla

thiamchanna rochungtu a lo ni ta.

MI RINAWM ABRAHAMA

⁸Abrahama chuan a rochun tûr ram lama kal chhuak tûra kohna chu rinnain a pawm a. Khawi lamah nge a kal dâwn tih pawh hre lâwk chuang lovin a pê chhuak tawp mai a.

⁹Rinnain ram tiamah chuan mi rama awm ang maiin a va awm ta reng a, thutiam thuhmun a rochunpui tûr Isaaka leh Jakoba te nê puan inah an chêng a;

¹⁰Pathian ngeiin a din leh a sak, lungphûm nei khawpui chu a thlîr thîn a ni.

¹¹Rinnain Sari pawh khân a tiamtu rinawmna chu a ring ngam a; chuvâng chuan tar tak a nih tawh hnûah chi pâi thei tûrin a lo chak thar leh a, fa a hring ta a.

¹²Chutichuan, mipa pakhat, mitthi ang thâwthâng lo ni tawh aţang chuan, vâna arsi ang maia tam leh, tuifinriat kama tîauvut chhiar sên loh ang maia tam an lo piang chhuak ta a ni.

VÂN LAM BEISEINA

¹³Chûnghote chu an zavaiin rinna neiin an thi ta a, thiltiamte chu an chang hman lo; mahse hla tak aţangin an lo hmu lâwk a, an thlamuanpuiin an tleipui êm êm a, leiah hian ram dang mi leh khualzin mai an ni tih an lo inpuang tawh baw a.

¹⁴Chutiang thû an sawi zâwng chuan anmahni ram tûr zawng an ni tih an puang a ni.

¹⁵An lo chhuahna ram khân lunglên zâwk se chuan, kîr lehna remchâng an hmu tawh ngei ang.

¹⁶Nimahsela, an duh zâwk chu ram tha lehzual a ni a, chû chu vâna mi a ni. Chuvângin, Pathian chuan an Pathian nih a zak lo va; an tân khawpui meuh a lo buatsaihsak tawh si a.

THLAHTUTE RINNA

¹⁷Abrahama chuan fiah a nih lai khân, Isaaka chu rinnain a hlân a, thutiam dawngtûa chuan a fapa neihchhun ngei chu a hlân a;

¹⁸“Isaaka-ah hian i thlahte chhui an la ni ang,” tiin Pathianin a lo sawi tawh si a,

¹⁹mitthi pawh Pathian chuan a kai tho thei ang tih a ring a, thi hnu dam leh ang maiin a hmu kîr leh ta rêng a ni.

²⁰Isaaka chuan thil lo la thleng tûr chungchângah Jakoba leh Esauva te chu rinnain mal a sâwm a.

²¹Jakoba chuan a hnukchah dâwnin Josefa fate chu rinnain mal a sâwm vê vê a; a tiang hmâwr rinchanin Pathian a bia a.

²²Josefa khân a thih hun a lo hnaih khân, Israela thlahte kal chhuah tûr thû chu rinnain a sawi lâwk a; ama ruhro an rawn enkawl dân tûr chenin a hrilh diam a.

MOSIA RINNA

²³Mosia lo pian lai khân nausên hmêl tha tak a nih avângin, a nu leh a paten rinnain thla thum chhûng an thukrû a; lal thupêk pawh an hlau lo.

²⁴Mosia chuan a lo puitlin hnû khân, rinnain Pharaoa fanua fapaa vuah a duh lo va;

²⁵rei lo te chhông atân sual nawmna chên vê duh lovin, Pathian mite nêna tihduhdah tuar a thlang ta zâwk a.

²⁶Krista avâng a sawi chhiat hlawh chu Aigupta hausaknate aia sum ropui zâwkah a ngai a; a lâwmman dawn tûr lam a thlîr tlat avângin.

²⁷Lal thinurna pawh hlau lovin Aigupta ram chu rinnain a chhuahsan a; hmuh theih lohva chu a hmuh avângin a tuar fan fan a.

²⁸Kalhlên Kût leh thisen theh kha rinnain bul a ãansak a, fatîr tîboraltûa khân a khawih ve lohna tûrin.

²⁹Tuipui Sen kha khawmual ang maiin rinnain an kal kai a; chutianga tih ve tum Aigupta-ho kha tuiin a chîm pil ta vek a.

RINNAIN HNEHNA AN CHANG

³⁰Jeriko kulh kha rinnaa ni sarih an hêl kual hnûin a chim ta a.

³¹Rahabi nawhchizuar kha rinna avângin awihlo-ho zîngah a boral ve lo, ãa taka enthlatute a lo mikhual avâng khân.

³²Eng nge ka la sawi cheu vang le? Gideon a te, Baraka te, Samson a te, Jephtha te, Davida te, Samuela te leh zâwlneiho chanchin te sawi dâwn ila, hunin mi daih dâwn si lo va;

³³chûng mite chuan rinnain lalramte an lâ a, dikna an thawk chhuak a, thutiamte an chang a, sakeibaknei khâte an tihchihsak a,

³⁴meipui hlauhawm an pal dai a, khandaih hriam lam an pumpel a, chak lohna ata tihchakin an awm a, indonaah mi huaisen an lo ni a, hnam dang sipai rualte chu an ûm tlan duai duai ãin a.

³⁵Hmeichhiaten an mitthi tho leh te an hmu a. Mi dangten nghaisak an tuar a, thawhleha ãa zâwk an chan theih nân chhan chhuah pawh an duh lo hial a.

³⁶Mi ãenkhatin mite nuihsawh leh vuakte an tuar a, ni e, tân inah te tângin kawh te an bun bawh a.

³⁷Lungin an deng a, thingzainaa zai bunin an awm a, thlêmna an tâwk a, khandaiha tihhlum an ni a. Beram vun leh kêl vun sinin an vâkvai a; rethei takin, hrehawm takin, diriam taka nghaisak an tuar a,

³⁸chûngho tân chuan khawvêl hi awmna tlâk a ni lo. Thlalêrah te, tlângah te, pûkah te, khuarkhurumah te an vâk an vâk a.

³⁹Tichuan, chûng mi zawng zawngte chuan rinna avâng a fak tlâk nihna hlawh chhuakin, thiltiamte erawh chu la dawng rih lovin an awm a;

⁴⁰anni leh keini aruala tihfamkima kan awm theih nân, Pathianin thil ãa zâwk min buatsaihsak a ni.

BUNG 12

RINNAA INTLANIAKNA

¹Chuvângin keini pawh hriatpuitu rual ropui takin chhûm pui ang maia min hual vêl avâng hian, awlsam tēja sual lama min hnûk lût thei leh, min tihnawh thei apiang dah kiang ila, kan hmâa intlansiakna kawngah hian chhel takin i tlan zêl ang u.

²Kan rinna siamtu leh tifamkimtu Isua chu i thlîr zel ang u; ani pawh a hmâah hlimna buatsaihsak a nih avângin, mualpho pawisa lovin krâws chu a tuar a, Pathian lalãhutthlêng ding lamah khian a han ãu ta a ni.

PATHIAN THUNUNNA

³Khati taka misualte dodâlna a tuar chhuah dân kha ngaihtuah ãin rawh u, chuti lo zawng, in thlarau chu a nguui a tladah mai dâwn asin.

⁴Thisen chhuak khawpin sual in la do tak tak lo ve.

⁵Fate zilh anga zilhna thûte kha in lo theihngihl ta a nih hi: “Ka fapa, LALPA thununna chu ngainêp suh la, A zilhhauih chein lungnhûr suh;

⁶LALPA chuan a hmangaih te chu a thunun ãin a, Fa a lawm apiang a vaw ãin asin,” tih te hi.

⁷Thununna in lo tuar vê a nih chuan, Pathianin a fapa ang takin a en che u tihna a ni; pa thunun loh fa tu nge awm ngai le?

⁸Fate’n an hlawh ãin thununna in hlawh loh chuan fa tak ni lovin, falak mai in ni ang asin.

⁹Chû mai a la ni lo, min siam ãa tûrin mihring dânin pate kan nei a, anni pawh kan zah si a. Nunna tûra thlarau lam Pa thû phei chu kan zawm lehzuah dâwn lo vem ni?

¹⁰Anni chuan ni rei lo te chhông chauh ãa an tih ang zêlin min thunun ãin a; mahse ani chuan a thianghlimna kan ãawmpui vê theih nân, kan ãatna tûrin min thunun zâwk ãin a ni.

¹¹Thununna rêng rêng hi tuar lai chuan lâwmawmin a lang lo va, a tawrh hlelhawm zawk ãin a; mahse tawrh hnûa a sâwizawi tawhte tân dikna rah thlamuanawm tak chu a chhuahsak ãin.

IN THLARAU TICHAK THAR RAWH U

¹²Chutichuan, kut uai thlâte chu tichar ula, khûp zâwite chu tichak rawh u;

¹³kêa in kalna tûr kawng ngîl siam ula; tichuan, kebai chu tihpelhsawlh lohva, tihdam a nih zâwk nân.

¹⁴Mi zawng zawng nêna inremna leh thianghlimna chu ûm rawh u; thianghlimna lovin tûman Lalpa an hmu lo vang.

¹⁵Pathian khawngaihna chu in chang lo hlauh ang e, fimkhur rawh u; khâkna zung lo chawr chhuak hian a tibuai che u in, mi tam takin an bawlhhlawh phah si a.

¹⁶Inngaih hmang emaw, Esauva anga Pathian zah lo mi emaw an lo awm dah ang e. Ani chuan a fatîr nihna chu chaw wawi khat ei-ah a hralh kha.

¹⁷A hnûah chû malsâwmna chu rochun a duh leh pawhin hnâwlin a awm a; mittui nêl ãahnemngai takin zawng mah se, rilru lamlêtna remchâng a hmu tawh lo tih in hria e.

PÂWL ROPUI

¹⁸Nangni zawng tlâng khawih theih meia kâng hlauh hlauh te, chhûm dum te, thim te leh thlipui te,

¹⁹tâwtawrâwt rî te leh thu sawi thâwm awmna hmun va thleng ve pawh in ni lo va; chûng thâwm hretute chuan thu dang rêng an hnêna sawi tawh lo tûrin an ngên hial a,

²⁰“Ramsa lam pawhin tâng chu khawih sela, lunga den hlum emaw, thala kahhlum tûr emaw a ni,” tih thupêk kha an tuar thei ta si lo va.

²¹An thil hmuh râpthlâkzia chu, Mosia pawhin, “Ka hlau lutuk chu ka khûr ka khûr mai a ni,” a tih hial kha.)

²²Nimahsela, Zion tâng te, Pathian nung khawpui te, vân Jerusalem te, Vântirhkohe chhiar sen loh pung khâwm te,

²³fâtîr vâna hming chuang kohhran hnên te, mi zawng zawng chung a rorêltu Pathian hnên te, mi dik thlarau tihfamkimho hnên te,

²⁴Thuthlung Thar Palai Isua hnên te, thisen theh, Abela thisen aia thu tha zâwk sawitu hnêna thleng in ni tawh zâwk e.

VÂN LAM ÂW NGAITHLA R’U

²⁵Thu sawitu chu in lo hnar palh ang e, fîmkhur rawh u. Leia Thu sawitu an duh loh vânga hremna an pumpelth si loh chuan, vân âtanga Thu sawitu kan hawisan lek phei chuan hremna kan pumpelth lo lehzuat ang.

²⁶Khatih laia a âw khân lei hi a tinghîng a; nimahsela tûnah hian, “Lei chang ni lovin, wavi khat dang leh chu vân pawh ka la sawi nghing leh dâwn,” tiin thu a la tiam ta fo a ni.

²⁷Chutia “Wavi khat dang leh chu,” tih hian, tihngînh ve theih lohthe chauh an awm reng ang a, sawi ngînh tawhte chu, thil siam dangte ang maia tih bo vek a ni tawh dâwn, tihna a ni.

²⁸Chuvângin, tihngînh rual loh lalram kan chan avâng hian khawngaihna i nei ang u, chu mi zârah chuan Pathian zah leh tih dêk chungin, a lâwm zâwngin a rawng kan bâwl thei tawh dâwn nia.

²⁹Kan Pathian hi kâng raltu mei a ni asin.

BUNG 13

THATNA DÂN ZAWM TURTE

¹Unau inhmangaihna hi awm zêl rawh se.

²Mikhualte chung a that chhuah hi lo thlahthlam suh u; chutianga an inthlahdah laiin mi thenkhat chuan hre lovin Vântirhkohte an lo thleng thei reng asin.

³Lung ina tâng vê angin tân ina awmte chu hre reng ula. Tihduhdah tuarte pawh taksâa awm vê tho in nih avângin hre reng rawh u.

⁴Mi zawng zawng zingah inneihna hi châwimâwiin awm sela, khumpui chu tihbawhlhlahw ni suh se; mi hurte leh uirê chingte chungthû chu Pathianin a rêl dâwn si a.

⁵In nun dânah sum ngaina mi ni suh u; in neih tâwkah lungâwi rawh u. Amah ngeiin, “Engtikah mah ka kalsan lo vang che a, ka thlahthlam ngai baw lo vang che,” a ti si a.

⁶Chutichuan, huai takin, “LALPA chu mi tanpuitu a ni a, Ka hlau lo vang. Mîhringin eng nge mi tih theih ang?” kan ti ngam a ni.

SAKHAW THILA INKAIHHRUAINA

⁷In hnêna Pathian thurawn sawitu leh kaihruai thîntu che u chu hre reng ula, an nun dân a thil thate chu entawnin, an rinna chu zâwm vê rawh u.

⁸Isua Krista chu nimirah te, wawinah te, chatuan thleng pawhin a pangngai reng a ni.

⁹Zirtîrna mak leh danglam tak taka hruai bovin awm suh u. Thilung hi khawngaihnaa tihngheh chu a tha si a, ei leh ina tihngheh erawh chu a tha lovang, a buaipuitute ngei pawhin an hlâwkui dâwn si lo va.

¹⁰Keini maichâm neih vê-ah chuan, biakbûka rawngbâwltute tân engmah ei a thianga ve lo.

¹¹Puithiam lalberin ran thisen chu hmun thianghlímah sual tâna inthâwi nân a la lût a, sa ruang erawh chu dai pâwnah an hâlral thîn.

¹²Chutianga bawkin Isua pawhin ama thisen ngeia mite chu a tihthianghlím theih nân, kulh kawngkhâr pâwn lamah chuan a lo tuar ta a ni.

¹³Chuvângin, amah an hmuhsitna chu phurin, keini pawh dai pâwnah chuan a hnênah i kal chhuak ang u.

¹⁴Hetah hian khaw hmun nghet kan nei si lo va, khaw lo la awm tûr chu kan zawng zâwk a ni.

¹⁵Tichuan, ama zârah faknaa inthâwina hi Pathian hnênah i hlan mawlh mawlh ang u, chû chu a hming kan tan tlatna hmuí rah chhuak chu a ni.

¹⁶Thil tihthat leh thilphal hi theihngîhlh suh u; chutianga inthâwina chuan Pathian a tilungâwi si a.

¹⁷In hotute thu âwih ula, intulût rawh u; in chanchin sawi tûra in thlarau vênasaktu che u an ni si a. Chuvângin, hlím takin sawitîr ang che u, lungngai chungin sawi ta se, in hlâwkui thei dâwn lo asin.

TAWNGTAISAK TÛRA NGENNA

¹⁸Mîn tawngtaisak rawh u; kawng engkimah rinawm taka awm kan tum tlat a, chhia leh tha hriatna thianga taka ti kan ni tih kan inhre Chiang si a.

¹⁹In hnêna ka lo kîr leh thui theih nân, chutianga taka ti nghal tûrin ka ngên che u a ni.

MALSAWMNA, FUIHNA HNUHNUNG, INTHLAHNA

²⁰Tunah hian remna Pathian, mitthi zing ata kan Lalpa Isua kai tho lehtu, beramte tâna Berâmpu ropui chuan, a chatuan thuthlunna thisen zârah chuan,

²¹a duh zâwng ti tûrin hna tha tinrêng tihpuitintîr che u sela, Isua Krista zârah a mithmuha a lâwm zâwng chu nangmahniah thawk zo sela; ama hnênah chuan chatuan chatuanin ropuina awm rawh se. Amen.

²²Unaute u, fuihna thû hi lo ngaithei hrâm hrâm tûrin ka ngên a che u: thu tawî tê chauh ka rawn ziah hi.

²³Kan unaupa Timothea kha an chhuah zalên vê ta tih lo hria ula, a lo kal thui dâwn a nih chuan amah nênan kan rawn hmû ang che u.

²⁴In hotu zawnz zawnz leh mi thianghlim zawnz zawnz te chu
chibai mi rawn bûk ula. Itali mite hian chibai an bûk a che u.

²⁵In zâa hnênah khawngaihna awm rawh se. Amen.

JAKOBA

Ziah tu: Jakoba • Ziah kum: A.D. 45-50

A ziaaktu hi Lalpa Isua unaupa Jakoba a ni. Jerusalema Kristian kohhran dng ttrah khn hotu lû leh thunei tak a ni a. Juda Kristiante, Rom lalram chhnga hmun tina darhhote hnêna a thawn a ni. Hê lehkhathawn hi Thuthlung Thar bu hmasa ber zînga mi a ni bawk. A thu ziaakah hian Pathian thu hrilh fiahna thû aiin Kristian nun a taka hman chhuah dân a uar zâwk. Paulan ‘rinnaa thiamchanna’ a uar laiin Jakobian ‘Thiltih tel lo rinna chu a thi a ni,’ tia a sawi hi mi tam tak chuan thu inkalh angah an ngai; mahse a takah chuan a inkalh lo, an tang dân zâwk. Rinna tak tak chu thiltihin a zui lo thei lo va, then hran theih lohva inzawm tlat a ni. Thufingte bu nêna khai khin theih khawpin zirtirna fng leh tlo ttr, a taka hman theih mai chi thahnem tak a awm. Taksa pêng hrang hrang zîngah lei hi thunun theih loh a nihzia a sawi uar hlê bawk. Jakoba hi Bible-a lehkhabu 59-na a ni a; bung 5 a awm a, châng 108 a awm bawk.

BUNG 1

HNAM SAWMPAHNIHTE CHIBAI BÛKNA

¹Jakoba, Pathian leh Lalpa Isua Krista bâwihin Hnam Sâwm leh Hnam Hnih ram danga darhhote chu chibai a bûk e.

TUARNA ATA HLÂWKNA

²Ka unaute u, fiahna hrang hrang in tawh laiin lâwmna hlîrah ngai rawh u;

³In rinna fiah a nih khn dawhtheihna a siamsak che u tih hria ang che u.

⁴Dawhtheihna chuan tih ttr a neih chu famkim takin ti sela; tichuan engmah tlachham lovin in lo famkim ang a, in lo puitling thei ang.

⁵In zîngah tûpawhin finna a tlâchham chuan, hau kher lova phal taka pe thîntu Pathian hnênah dîl sela, tichuan pêk a ni ang.

⁶Amaherawhchu ringhlel lovin, rinnain dîl rawh se; ringhleltu chu thliin tuifinriat a chhêma, tuifawn invawrh ang lek hi a ni si a.

⁷Chutiang mi chuan Pathian hnên aţangin engmah hmuh inring suh se.

⁸Rilru phîr nei mi chu a awm dân zawnzawngah mi nghet lo a ni.

RETHEI LEH HAUSATE DINHMUN

⁹Unau rethei tak chu dâwm kân a nih avângin lâwm rawh se:

¹⁰Mi hausa erawh chu tihhniama a awm pawhin lâwm rawh se; hlobet pâr anga chuai leh mai ttr a ni si a.

¹¹Ni a lo tlâng sâng a, ni sâ chuan hlobet a tivuaia; a pârte chu a lo tîl a, a mâwina a lo chuai thîn. Chutiang bawkin mi hausa pawh ama kawng zawh reng chungin a la thâmral ve dân a ni.

HREHAWMNA KÂRA PATHIAN HMANGAIHNA

¹²Thlêmna tuar hrâm hrâmtu chu a nihlawh e; a tuarna chu hriatsak a nih hunah nunna lallukhum, Lalpan amah hmangaihtute hnêna a tiam chu a dawng dân si a.

¹³Tûma’n thlêmna an tawh laiin, “Pathianin min thlêm alâwm maw le,” ti hauh suh se; sualin Pathian a thlêm thei lo va, Pathian chuan tûmah a thlêm ngai hek lo.

¹⁴Mi tûpawh mahni châk zâwnzawng ti ttr hruai bo leh hîpa an awm hian thlêmna tâwk an lo ni zâwk thîn.

¹⁵Châkna chuan no a pai a, sual a hring thîn a; sual chu tihpuitlin a nihin thihna a thlen thîn a ni.

¹⁶Ka unau duh takte u, bumin awm suh u.

¹⁷Thilpêk tta leh thilpêk famkim tinrêng hi chung lama ênna petu Pa hnên aţanga lo chhuk a ni a; amahah chuan thil inthlak danglam emaw, hlim thla inher danglam rêng rêng emaw a awm ve lo.

¹⁸A thilsiam zînga rah hmasa kan lo nih theih nân ama duhzâwnzawng ngeiin, thutak thû hmangin min hring a ni.

FIAHNA HUNA AWM DÂN TÛR

¹⁹Chuvângin ka unau duhtakte u, mi tinin ngaithlatua tjan tum hmasa phawt sela, tawnzawng ve chuh lovin, thîn pawh tinel hrâm rawh se;

²⁰mihring thinurna hian Pathian dikzia a tichhuak dawn si lo va.

NGAITHLATU AIIN ZÂWMTU

²¹Tichuan, bawhlhlawhna leh suala khat liam zawnzawng chu dah bo vek ula, nangmahnia thuchah awm tawh sa, in thlarau chhandam theitu chu, zâwldawh takin pawm rawh u.

²²Thu ngaithlatute mai ni lovin, thu zâwmtute lo ni zâwk rawh u, chuti lo zawnzawng, mahni inbum lek in lo ni dah ang e.

²³Thu ngaithlatu ni si, zâwm leh si lo chu, dârlhalanga mahni hmêl ngun taka inen thîna ang chu a ni;

²⁴ngun tak chuan a inen vê ngei a, mahse a kal sawn a, mi eng ang nge a nih a intheihngilh nghâl si thîn.

²⁵Amaherawhchu, tûpawh dân famkim, zalênna dân bih Chiang a, chhunzawm zêl a, theihngilh leh mai lova, zâwmtu leh thawktu chu a thil tihah malsâwmin a awm ang.

²⁶In zînga mi tûpawh sakhaw mî nîa inngai, mahse a lei vêng zo si lo chu, mahni thinlung inbum lek a ni a, chû mi sakhaw biak dân chu engmah lo mai a ni.

²⁷Pathian leh kan Pa mithmuha sakhaw biak dân thianghlim leh sual kai lo chu: fahrah leh hmeithaite an hrehawm laia ngaisak leh, khawvêl bawhlhlawh kai lova invawn thianghlim hi a ni e.

BUNG 2

HLEIH NEIHNA LAKA FIMKHUR

¹Ka unaute u, kan Lalpa Isua Krista, Ropuina Lalpa chu hleih nei reng chung a rin chî a ni lo.

²In inkhâwmna inah rangkachak zungbun bun, thuamhnaw changkâng tak inbel chu lo lût sela, chutih laiin mi rethei puan chhe bâl tak inbel chu lo lût bawk sela;

³thuamhnaw ropui tak sin chu ngaihsakin, “Helai thutna thaah hian thu rawh,” in tiha, mi rethei hnênah, “Nang chu sâwtah sâwn lo va ding rawh,” emaw, “Ka dinna chhuatah hian thu rawh,” in ti chuan,

⁴hleih in neihzia leh, rilru sual pu chungsa sawiseltu in ni ve tho a ni lo vem ni?

⁵Ka unau duh takte u, ngai teh u: Pathianin hê khawvêla retheite hi rinna lama hausa tûr leh, amah hmangaihtute hnêna a tiam lalram luah tûra a thlante an ni lo vem ni?

⁶Nangni erawh chuan mi rethei chu in timualpho thîn si a. Mi hausate hi nangmahni hrêk beta, rorêlna hmâa hnûk lût thîntu che u an ni zâwk lo vem ni?

⁷Hming zahawm in put vê te pawh an sawi chhe thîn a ni lo vem ni?

⁸Pathian Lehkhabua dân pawimawh ber, “Nangmah i inhmangaih angin i thenawm khawvêngte i hmangaih tûr a ni,” tih hi in zawm chuan in tiha e;

⁹amaherawhchu, mi thlei bîk in neih chuan, thil sual ti in ni a, dânin bawhchhetu angin thiam loh a chantîr ang che u.

¹⁰Mi tûpawhin dân pumpui hi zâwmin dân pakhat chauh pawh bawhchhe sî se, a za vaia bawhchhia a ni.

¹¹“Uirê suh,” titu chuan, “Tual that suh,” a ti bawk si a. Chutichuan, uirê lo mah la, tual i thah si chuan dân bawhchhetu i ni tho tho.

¹²Chuvângin, zalênna dân rorêlsak tûr angin thû sawi ula, a tih pawh ti bawk rawh u.

¹³Mi chungsa lainatna nei lo chu lainatna tel lova rêlsakin a awm ang. Lainatna hi rorêlna chungsa lêng a ni si a.

THILTIH TEL LO CHU RINNA THI

¹⁴Ka unaute u, miin rinna nei inti mah sela, thiltih a neih si loh chuan eng nge sâwt ang? Chutiang rinna chuan mi a chhandam thei dawn em ni?

¹⁵Unaupa emaw, unaunu emaw chu saruaka awmin, an ni tin ei tûr chaw tlachham sela,

¹⁶in zînga mi tuin emaw an hnênah, “Thlamuang takin kal ula, lum tak leh puar takin awm rawh u,” ti sela, taksa mamawh thil in pêk si loh chuan engtin nge an sâwtpui chuan ang?

¹⁷Chutiang bawkin, thiltih nei lo rinna ringawt chu a thi a ni.

¹⁸Mi tu emaw chuan, “Nangin rinna i nei a, keiin a tiha tih ka nei alâwm. I rinna chu thiltih tel lovin mi entîr la, keiin ka rinna chu ka thiltihin ka entîr ang che,” a ti mai dawn che asin.

¹⁹Pathian pakhat a awm tih i ring a. I tiha e. Ramhuaite pawhin an ring a, an khûr thîn asin!

²⁰Aw mi â pa, thiltih tel lo rinna chu engmah lo mai a ni tih i hre duh tak tak maw?

²¹Kan pa Abrahaman a fapa Isaaka maichâm chungsa a hlan khân, thiltih avângin a ni lo’ m ni thiam a chan ni?

²²Rinna chu thiltih nên an tâng dôn a, tichuan thiltih avângin rinna chu a famkim ta a ni lo’ m ni?

²³“Abrahaman Pathian a ring a, chû rinna chu a thiamchannaah ruat a ni,” tih thû hian Lehkha Thû a tikim a. Tichuan, ani chu Pathian thianah vuahin a awm ta a nih kha.

²⁴Tichuan, rinna avâng chauh ni lovin, thiltih avâng zâwkin miin thiam a chang thîn tih in hre ta.

²⁵Chutiang bawkin nawhchizuar Rahabi pawh khân enthlatute kha a lo lâwm a, kawng danga a hâwtîr khân, thiltih avângin thiam a chang ta a ni lo’ m ni?

²⁶Chutiang bawkin thlarau tel lo taksa chu thi a nih angin, thiltih tel lo rinna pawh thi a ni.

BUNG 3

KHÂWI NGAM THEIH LOH LEI

¹Ka unaute u, in zînga mi tam tak hian zirtîrtu nih chu lo tum suh u, zirtîrtute chuan rorêlna khirh zâwk kan tâwk dâwn tih kan hre si a.

²Kan zâin thil tam tak kan tisual thîn si a. Thu sawia tisual ngai lo mi chu mi puitling a ni a, a taksa pum pawh thunun thei mi a ni.

³Kan thû an âwih theih nâna sakawr kâa thirbarh kan barh chuan, an taksa pum pawh duh duhin kan kâi her thîn.

⁴Lawng te pawh hi en rawh u: a lian hlê a, thli na takin a chhêm lêng thîn nâ a, a khalhtu chuan a kaih herna khâwl tereuh têtin a kaltîr duhna lam apiangah a tiher thîn.

⁵Chutiang bawkin lei pawh hi taksa pêng te tak tê a ni a, nasa takin a uang thîn. Ngai teh u, mei sî lekin thil a tihkan nasat theih zia hi en ta che u!

⁶Lei hi mei a ni a, suahsualna khawvêl a ni. Lei hi kan taksa pum tibawhlhlawh vek thei tûr zâwnga invuah a lo ni a, pianpui zia chu a tikâng thîn; chû pawh chu hremhmun meiin arawn tihkan a ni bawk.

⁷Ramsa leh sava chi tinrêng te, rannung leh tuia chêng sa chi tinrêng te hi khâwi ngam theih vek an ni a, mihringten an khâwi ngam thîn bawk a.

⁸Nimahsela, lei hi tûma’n an khâwi ngam thei lo. Thunun theih loh sual, thihna tûra khat a ni.

⁹Hemi hian kan Pathian leh Pa kan fak a, hemi vêk hian Pathian anpuia siam kan mihring puite ânchhia kan lawh leh mai a.

¹⁰Kâ thuhmun aţang hian fakna leh ânchhe lawhna a chhuak thîn a. Ka unaute u, chutiang tûr chu a ni lo asin.

¹¹Tuikhur hian hna hmun khatah tui tui leh tui khâ a tichhuak thîn em ni?

¹²Ka unaute u, theipui kûngah oliv thei a rah thei em ni? A nih loh leh, grêp hruiah theipui a rah thei em ni? Chutiang bawkin tui hna pakhatin tui al leh al lo a tichhuak thei lo.

CHUNG LAM FINNA LEH RAMHUI FINNA

¹³In zîngah tu nge fînga hre thiam awm? A thiltihte chu inngaitlâwmna fîng tak nêna tih a nihzia nungchang mâwi takin lantîr rawh se.

¹⁴Nimahsela, in thinlungah itsîkna kha tak mai leh mahni hmasialna in neih chuan uang suh ula, dâwtin thudik chu dodâl hek suh u.

¹⁵Chutiang finna chu chung lam aţanga lo chhuk a ni lo va, khawvêl thil, tîsâna leh ramhuai laka mi a ni zâwk e.

¹⁶Itsîkna leh mahni hmasialna awmnaah chuan buaina leh sual tinrêng a awm thîn.

¹⁷Chung lam aţanga lo chhuak finna erawh chu a hmasa berin a thianghlim a, chutah inrem a duh a, a nunnêm a, a tihnuam a, khawngaihna leh rah thâin a khat a; thlei bîk a nei lo va, vervêkna a tel hek lo.

¹⁸Dikna rah chu remna siamtuten inrem takin an tuh thîn.

BUNG 4**CHAPONAIN INDONA A THLEN**

¹In zînga indona leh insualnate hi khawi aţanga lo chhuak nge? Nangmahni chhûnga indo thîn nawmchen duhna aţanga lo chhuak a ni lo vem ni?

²In châk a, in nei si lo va. Tual in that a, in awt a, in nei thei si lo va. In insual a, in indo va. In dîl loh avângin in nei lo va;

³In dîl a, in hmu lo hi, in dîl dik loh vâng a ni e; nawmsak nân maia hman in tum si a.

⁴Nangni uirenu leh uirepate u! Khawvêl thian nihna hi Pathian hmêlmâ nihna a ni tih in hre lo vem ni? Chuvângin khawvêl thian nih duh apiangte chu Pathian hmêlmâa insiam an ni asin.

⁵Pathian Lehkha Thûin, “Thlarau keimahnia chêng hian thîk tham khawpin min duh a ni,” a tih hian, engmah lo sawiah in ngai em ni?

⁶Khawngaihna nasa lehzual a pê a. “Pathianin mi chapote a dodâl a, Inngaitlâwmte erawh chu khawngaihna a pe thîn,” a ti a ni.

TLÂWMNAIN KHAWVEL-MÎNA A HNEH

⁷Chuvângin, Pathian hnênah intulût ula. Diabola chu dodâl rawh u, tichuan a tlan bosan ang che u.

⁸Pathian hnaih ula, ani pawhin a hnaih vê ang che u. Nangni misualte u, in kut te chu silfai rawh u; rilru phîr pûte u, in thinlung kha tithianghlim rawh u.

⁹Rûm vawng vawng ula, lungngaiin ţap rawh u! In nuihna chu lungngaihnaah chang sela, in hlimna chu nguinaah chang rawh se.

¹⁰Lalpa mithmuah inngaitlâwm ula, anin a châwi sâng ang che u.

UNAU SAWISÊL SUH

¹¹Unaute u, insawi chhe tawn suh u. Tûpawhin a unau a sawi chhiata, a unau a sawisêl hian, dân a sawi chhiain dân a sawisêl tihna a ni. Dân i sawisêl chuan, dân zâwmtu ni lovin, a sawisêltu lek i ni zâwk.

¹²Dân petu chu pakhat chauh a awm, chhandam theia tiboral theia chu. Nang mi dangte sawisêltu chu tu nge maw i nih le?

NAKTÛK CHHUANG SUH

¹³Tûnah hian nangni, “Vawiinah emaw, naktûkah emaw, chumi khami khawpuiah chuan kan kal ang a, chutah chuan kum khat kan va thang ang a, kan sumdâwng ang a, hlâwkna kan hmû ang,” titute u,

¹⁴naktûkah chuan eng thil nge lo thleng dâwn in hre si lo. In nunna chu eng nge ni? Chhûm rei lo tê lo zâm a, ral leh ta mai thîn ang lek hi a ni asin.

¹⁵Tihian in sawi zâwk tûr a ni, “Lalpan rem a tih chuan, kan dam ang a, chû-mi khâ-mi chu kan ti ang,” tiin.

¹⁶Nangni chuan in chaponate chu in hlimpui zâwk mah a. Chutianga lo hlimpui rêng rêng chu sual a ni.

¹⁷Chuvângin, tûpawh thil ţa tih tûr hriaa ti si lo chu, a tân sual a ni.

BUNG 5**HNEHCHHIAHTUTE CHAN TUR**

¹Nangni mi hausate u, in chung hrehawm lo thleng mêk avâng hian ţap ula, chiau vak vak rawh u.

²In hausaknate a tlachhia a, in thuamhnâwte pawh thîmin a ei zo ta.

³In rangkachak leh tangkâte a tuiêk zo va; a tuiêk chu in thiam lohzia lo hriatpui vê-tu lek a ni ang a, in tîsa chu mei kan angin a kâng ral bawk ang. Ni hnununga ro khâwl khâwm lek in ni si a.

⁴In lova buh âttu, in hlawhfa chhawrte hlawh, bumna hmanga in hlêprûk sak kha a lo âu chhuak ta; a sengtute mangang âu thâwm pawhin Sipaihote Lalpa beng a lo thleng ta.

⁵Leiah hian nuamsa takin in khawsa a, nawmsip in bâwl a; inthah ni atân in thinlung in lo chiahpum lâwk a nih hi.

⁶Mi dik chu thiam loh in chantîr a, in that a; ani chuan a dodâl ve si lo che u-a.

DAWHTHEIHNA LEH TAWRHCHHELNA

⁷Chuvângin unaute u, Lalpa lo kal hmâ loh zawng dawhthei takin awm rawh u. En teh u, lo neitu chuan ruah tui tla hmasa leh hnunung chu a hmuh hmâ loh chuan chhel takin lei rah hlu tak chu a ngâk thîn asin.

⁸Nangni pawh chhel takin awm ula, in thinlung tinghet rawh u; Lalpa lo kal hun chu a hnai tawh si a.

⁹Unaute u, inphun nâwi khum suh u, thiam loh in chang dah ang e. Ngai teh u, Rorêltu chu kawngka bulah a din reng tawh hi!

¹⁰Ka unaute u, zâwlnei, Lalpa hminga thu sawitute tuar dân leh chhel dân kawng te chu entawn atân lo hmang rawh u.

¹¹Tuar khawchhuakte chu nihlawhah kan chhiar a ni. Joba chhelzia in hria a, Lalpan a tâwpa a tihdân pawh kha in hre bawk a, khâng ațang khân Lalpa chu mi khawngaih thei leh zahngai thei a nihzia a lang fiah êm êm a ni.

¹²Hêng bâkah hian ka unaute u, chhia chham suh u; vân chhâlin emaw, lei chhâlin emaw, thil dang rêng rêng chhâlin emaw chhia chham suh u. “Ni” in tih chu “Ni” ni sela, “Ni lo” in tih chu “Ni lo” ni mai rawh se; chuti lo zawng, thiam loh chang in lo ni mai dawn asin.

MAMAWH PHUHRÛKNA

¹³In zîngah natna tuar in awm em? Țawngțai rawh se. Hlim an awm em? Fakna hlâ sa rawh se.

¹⁴In zîngah damlo an awm em? kohhran upate ko sela, annin Lalpa hminga hriak hnawihin a chungah Țawngțai rawh se.

¹⁵Tichuan, rinnaa Țawngțaina chuan damlo chu a chhandam ang a, Lalpa chuan ani chu a kai tho vang. Thil sual a lo tih tawhte chu ngaihdam a ni ang.

¹⁶Tihdam in nih theih nân, in sualte inpuang tawn ula, inȚawngțaisak tawn rawh u. Tihtak zeta mi dik Țawngțaina hi a sâwtin, nasa takin hnâ a thawk thei a ni.

¹⁷Elia chu keimahni anga mihring vê mai bawk a ni. Ruah sîr lo tûrin Țahnemngai takin a Țawngțai fan fan a; tichuan, chu lai ramah chuan kum thum leh a chanve ruah rêng rêng a sîr ta lo va.

¹⁸A han Țawngțai leh ngat ngat a, vânin ruah a surtîr a, leiin a rahte a chhuahtîr leh ta a.

MISUAL CHU HRUAI KÎR RAWH

¹⁹Ka unaute u, in zînga mi tûpawh thutak ațang chuan pêng bo ta sela, mi tûin emaw hawi kîrtîr leh sela,

²⁰mi sual kawng bo hruai kîr lehtu chuan thihna ata a thlarau a chhandam ang a, sual tam tak a khuh bosak bawk ang tih inhre rawh se.

1 PETERA

Ziah tu: Petera • Ziah kum: A.D. 65

Petera Lehkathawn hi Isuan Petera hnêna a thupêk tihfamkimna a ni. Serhtan mite tâna rawngbâwltu a nih angin, ram tina Hebrai kristian darhhote tâna a thawn a ni a, Kristian zawng zawngte huapa thawn a ni thei baw. Paula ang bawkin khawngaihna thû a uar hlê. A thawnna hmun hi Babulon a ni tih a sawi a (5:13); mi thenkhat chuan Rom khawpui a sawina niin an ngai thung. Peteran hê lehkathawn a ziah chhan tak chu, an chungah harsatna lo thleng mêk chu, tho leh Isua Krista hminga beiseina nei tlat chungah, chhel taka tuar tûra infuihna a ni. Pathian tîh nuna nung tûra infuihnain a luah hneh hlê. 1 Petera hi Bible-a lehkhabu 60-na a ni a; bung 5 a awm a, châng 105 a awm baw.

BUNG 1

THLAN BIK KHUALZINTE CHIBAI BÛKNA

¹Petera, Isua Krista tirkoh chuan Ponto ram te, Galatia ram te, Kappadokia ram te, Asia ram te, Bithunia rama awm darhhote leh,

²Isua Krista thisen theh dawng tûr leh âwih tûra Thlarauvin a tihthianghlimho, Pa Pathian hriat lâwk anga thlan bîkte hnênah chuan: In chungah khawngaihna leh remna chu tihpunin awm rawh se.

VÂN LAM RO LUAHNA

³Kan Lalpa Isua Krista Pathian leh Pa chu fakín awm rawh se. Ani chuan a khawngaihna nasat dân ang zêlin, mitthi zîng ata Isua Krista thawhlelna avângin beiseina nung hmu tûrin min hring leh a,

⁴rochan chhe thei lo, bawlhhlawh kai lo, chuai thei lo chu vânah in tân a lo kawł thatsak che u a.

⁵Rinna avânga chhandamna, hun hnunnunga tihlan tûra peih sa chu chang tûrin, Pathian thiltihtheihnaa vawn tlat chu in ni e.

⁶Chû chu in hlimpui hle a, mahse tûn hun rei lo te chhûng mai atân, thlêmna chi hrang hrang avângin lungngaihna in la tuar rih mai a ni a;

⁷in rinna dikzia, meia fiah tawh chu, rangkachak boral leh mai theite aiin a hlu zâwk si a; chuvângin Isua Krista inlâr hunah chuan fakna leh châwimâwina leh ropuina chu in la hlawh ngei ang.

⁸Amah chu hmu ngai lo pawhin in hmangaih si a. Tûnah hian hmu rih lo mah ula, amah chu in ring a, sawi hleih theih loh khawpa lâwmna leh ropuinain in khat tawh reng a,

⁹in rin chhan ber in thlarau chhandamna chu in hmu tawh si a.

¹⁰Hê chhandamna thû hi zâwlneite khân ngun takin an zawng a, in chungah khawngaihna lo thleng tûr te hi an lo puang lâwk thîn a ni.

¹¹Kristan a tuar tûr te leh chumi hnûa ropuina lo awm tûrte chu eng ang tak nge a niha, engtik huna lo awm tûr nge tia an zawn

thîn laiin, anmahnia Krista Thlarau awm chuan a lo hriattîr lâwk tawh si a.

¹²Anni chu anmahni tân ni lo, nangmahni tâna rawng bâwl an ni tih hriattîr an ni. Vân aţanga rawn tîrh Thlarau Thianghlim zâra in hnêna Chanchin T̄ha hriltute khân chû chu an hrilh che u kha; chûngte chu Vântirkhohte pawhin hmuh vê an chāk thîn asin.

KAN PA PATHIAN HMÂA AWM DÂN

¹³Chuvângin, a tûl apiang ti tûrin in rilru chu inpeih reng sela, mahni inthunun baw ula, a rawn inlâr huna Isua Kristan a rawn kensak tûr che u khawngaihnaah chuan in beiseina chu a pumin lo inngat rawh u.

¹⁴Fa thu âwih thei tak in ni baw a, hre lova in hmânlai chākna te ang khân awm tawh lo ula,

¹⁵a kotu che u a thianghlim ang bawkin nangni pawh in chetzia zawng zawngah lo thianghlim tawh rawh u;

¹⁶“Kei ka thianghlim angin nangni pawh lo thianghlim vê rawh u,” tih ziaak a nih kha.

¹⁷Thlei bîk nei lova mi tin hnathawh ang zêla rêlsaktu Pa chu in ko a nih chuan, heta in la châm chhûng zawng hian amah tîh dēk chungin nung ang che u.

¹⁸In thlahtute aţanga in dawn chhâwn, nun dân mûmal lo aţanga tangkâ te, rangkachak te anga chhe leh mai thei thila tlan chhuah in ni lo va,

¹⁹Berâm No hmêlhem lo leh bawlhhlawh kai lo, Krista thisen hlûa tlan in ni zâwk asin.

²⁰Ani chu leilung pian hmâa ruat lâwk a ni tawh a, mahse nangmahni tân hun hnunnungah te hian a rawn inlâr ta a ni.

²¹In rinna leh beiseina chu Pathian-ah zêl a nih theih nân, ama zârah baw chuan, mitthi zîng ata kaithotu leh ropuina petu Pathian chu in ring ta a nih hi.

CHATUAN DAIH THÛ

²²Unaute chungah hmangaihna tak tak neia, Thlarau zâra thutak zâwma, in thlarau in tihthianghlim tawh avângin, thinslung thianghlimin tihtak zet in hmangaih tawn rawh u,

²³chi chhe thei lakah ni lovin, Pathian thu nung reng leh chatuana awm rengah chuan, chi chhe thei lo laka piangthar in ni zâwk si a.

²⁴“Mi zawng zawng hlobet ang an ni a, An ropuina zawng zawng pawh hlobet pâr ang a ni. Hlobet chu a vui a, A pârte chu a tîl thîn.

²⁵LALPA thû erawh chu chatuanin a awm reng ang,” tih a ni si a. Chû thû chu in hnêna an puan chhuah tāk Chanchin T̄ha hi a ni e.

BUNG 2

¹Chuvângin, mi kher chhiat duhna rilru zawng zawng te, bumna te, vervêkna te, itsikna te leh sawi chhiatna zawng zawng te chu bânsan ula,

²nausên piang hlim te angin, thlarau hnute pawlh dal loh thûdik chu a châkin châk rawh u, chûtah chuan in lo ðangh lian thei dawn asin.

³Chutiang a nih chuan, Lalpa khawngaihna in lo tem tawh tihna a ni ang.

LUNGPIU LEH HNAME THLAN BIKTE

⁴Amah chu lung nung, mihringte hnâwl hnû, mahse Pathianin a thlan bik leh a ngaihhlut êm êm a ni a, a hnênah chuan lo kal rawh u.

⁵Nangni pawh lung nungte angin, Isua Krista zâra Pathian pawm tlâk thlarauva inthâwina hlân tûrin puithiam thianghlim in ni a, thlarau chenna in atâna din chu in ni.

⁶Chuvângin, Pathian Lehkha Thûin, “Ngai teh u, Zionah chuan A kila lung pawimawh ber, thlan, hlu tak chu ka rem a ni; Amah ringtu chu a mualpho lo vang.”

⁷Nangni a âwihtute tân erawh chuan hlu tak a ni a, a âwih lote tân chuan, “In satuten lung an hnâwl hnû kha, Khâ ngei kha a kila lung ðangkai ber a lo ni ta,”

⁸“Tlûkna lung leh dodâlna lungpui chu.” Thu an âwih loh avângin an tlu si a; chutianga ti tûra ruat an ni rêng a.

⁹Nangni erawh chu chi thlan, lal puithiam, hname thianghlim, Pathian mi thlan bikte chu in ni a; chuvângin ama êng mak taka lût tûrin thim ata nangmahni ko chhuaktu hnenah chuan fakna thu in puang thei ta e.

¹⁰Tûn hmâa eng mi mah ni lo kha, tûnah chuan Pathian mi in lo ni ta a; zahngaihna la hmu ngai lo te pawhin tûnah chuan zahngaihna in hmu ta.

KHAWVEL HMÂA NUN DÂN TÛR

¹¹Duhtakte u, mikhual leh khualzin mai in nih avângin, thlarau dotu tisa châknate bânsan tûrin ka ngên a che u;

¹²Jentailte zingah nun dân zahawmin nung rawh u; tichuan miten thil sualtitu anga an sawi chhiat che u pawhin, in thil ða tihte an hmuh avângin Pathianin a rawn kan hunah Pathian an chawimâwi thei dawn nia.

SORKAR HNÊNA INTUKLUH

¹³Lalpa avângin mihring dân siam apiang hnênah chuan intulût rawh u, lal chungnungber hnênah a ni emaw,

¹⁴governor hnênah a ni emaw, misual hremtu tûra mi tirhte hnênah a ni emaw, thil ða titu chawimâwi tûra a mi tirhte emaw pawh ni se, chûngte hnênah chuan in intulût tûr a ni.

¹⁵In thil ða tih avânga ðawng ngaihna hre lova mi â-ho in tidang reng mai hi Pathian duh zâwng a ni asin.

¹⁶zâlên in ni a, nimahsela in zalenna chu sual khuh bo nân hmang lovin, Pathian bâwiha awm nân hmang zâwk rawh u.

¹⁷Mi zâwng zâwng chawimâwi rawh u. Unauhote chu hmangaih rawh u. Pathian tih ula. Lalber chu chawimâwi rawh u.

HOTUTE THU ÂWIIH TÛR

¹⁸Chhiahhlawhte u, in hotute zah ula, an thû thûin awm rawh u; mi ða leh mi nun nêmtê lakah chauh ni lovin, mi tawhkhirh takte lakah pawh intulût rawh u.

¹⁹Miin ama dik loh vâng ni lova, Pathian hming avâng zâwka tuar loh tûr thlenga a tuar fan fan hi, Pathian lâwm zâwng a ni si a.

²⁰Thil in tihsual avânga kut thlâk in tuarin, chhel takin tuar ngawt mah ula, fak in hlawnah chhan tûr eng nge awm? Mahse thil ða in tih avânga tuarna chu, chhel taka in tuar chuan, chû chu Pathian lâwm zâwng a ni.

²¹Chutiang ti tûra koh chu in ni zâwk asin, Krista pawhin a tuarsak che u avângin a hniakhnung in zui theih nân entawn tûr a hnutchhiah che u kha.

²²“Ani chuan engmah a tisual si lo va, a kâah bumna thu rêng a awm hek lo;”

²³miten an sawi chhiat laiin a chhâng lêt vê lo va, a tuar laiin a vau lêt vê hek lo; dik taka ngaihtuah ðhîntua hnênah chuan a intulût mai zawk a ni.

²⁴Thinglêrah khân ama taksa ngeiin kan sualte a phur a, tichuan keini chu sual laka thi tawhin, dikna kawnga kan nun theihna tûr a lo ni a—vuak a tuarnaah tihdam in nih tawh kha.

²⁵Berâm angin in vâk bo va, tûnah erawh chuan Berâmpu hnênah leh in thlarau Vêngtu hnêna in kîr leh tawh hi.

BUNG 3

PASALTE HNENA INTUKLUH

¹Nupuite u, in pasalte thû thûin awm rawh u; in pasalte zînga Pathian thu awih lo an lo awm a nih pawhin, ðawng lo pawhin, nupuiten chêtziaa an hneh theih dân chu,

²anmahni zah tak si a, nun dân thianghlim taka in awm dân an rawn hmuh hian a ni.

³In inchei dânah pawh, pâwn lam incheina—sam chei lêrh te, rangkachak ði awrh te, thawmhnaaw man to tak taka inchei lovin,

⁴thinlung chhûngril lama mihring nun inphûm, rilru zaidam leh nunnêm tak mai chu silhfên mâwi leh chhe thei lo chu a ni a, Pathian mithmuhah a hlu êm êm a ni.

⁵Chutiang chuan hmasânga hmeichhe thianghlim, Pathian ringtute pawh khân an pasalte thu âwihnain a ni an inchei ðhin ni.

⁶Sari pawhin Abrahama thû chu zâwmin, ‘lalpa’ tiin a ko hial a nih kha. Nangni pawhin thil ða in tih tlata, hlauh tûr rêng in neih loh chuan, Sari fate in ni tawh reng a ni.

PASALTE HNÊNA THUCHAH

⁷Chutiang bawkin nangni pasalte u, in nupuite chu hriat thiamna nêndâwm hliau hliau ula, bêl keh awl zâwk an nih hriain chawimâwi thiam ula, khawngaihna nun in ðawmpuite an nih hi; tichuan, in ðawngtainate chu tihbahlah a ni dawn lo nia.

MALSÂWM TÛRA KOHNA

⁸A tâwp berah chuan, in zâin rilru hmun khat pûin awm ula, inlaintat tawn ula, unau hmangaihinhmangaih ula, mi khawngaih thei tak leh inngaitlâwm takin awm rawh u:

⁹sual chu soal vêkin thungrûl suh u; inhauhna pawh inhauhna vekin thungrûl hek suh ula; malsâwm lêt hlauh zâwk rawh u. Chutiang ti tûra koh in ni si a; tichuan malsâwmna in rochung dâwn nia.

¹⁰“Nungdama awm thlahlela, ni tha hmuh duh chuan, Soal lakah a lei vêng tha sela, A hmuipawh bumna thù sawi lo tûrin vêng tha rawh se.

¹¹Sual hawisanin thil tha ti se la; Remna zawngin ûm zêl rawh se.

¹²Lalpa mit chu mi dikte chungah a fû a, A beng pawh an tawngtâina lamah a chhi thîn si a, Nimahsela, LALPA hmêl chuan thil soal titute chu a do thîn,” tih a ni si a.

TUARNA - CHHAN THA LEH THA LO

¹³A tha lam zâwmtu i nih chuan i pawh khawih tûr tu nge awm?

¹⁴Chuti chungah dikna avânga in tuar chuan in nihlawh ang. “An vauna chu hlau suh ula, mangang hek suh u.”

¹⁵In thinsungah Lalpa Pathian chu serh hrang ula, nangmahnia beiseina in neih chhan zâwtu apiang che u chu chhâng thei tûrin lo inpeih sa reng rawh u; amaherawhchu, inngaitlâwm tak leh zah takin ti ang che u.

¹⁶chhia leh tha hriatna thianga tak nei ula, tichuan, thil tisualtu anga puh chhiat tumtu che u chu, Kristaa in awm dân mawi tak avângin zak deuhin an awm zâwk dâwn nia.

¹⁷Thil soal tih vânga tuar ai chuan, Pathian remtih zâwng a nih chuan, thil tha tih vânga tuar hi a tha zâwk si a.

KRISTA TUARNA LEH KEINI TUARNA

¹⁸Krista chu soal avângin vawi khat a thi a, tichuan, mi dik chuan mi dik lo ai a tuar a; chû chu Pathian hnêna min hruai theih dân kawng a lo ni a, a taksa ngei chu tihhlumin a awm a, Thlarauvah erawh chuan tihnunin a awm thung a ni.

¹⁹Ani chuan tân ina thlarau awmtê hnênah thù a zuk hril a;

²⁰chûng mite chu Nova dam laia lawng tuk chhûng zawnga Pathianin dawhthei taka a nghah laia âwih duh lote kha an ni a; kha lawngah khân mi tlem tê, mi pariat chauh kha tui ațanga chhandam an ni.

²¹Chumi lo entir lâwkna—chhandamna chu Isua Krista thawhleha avângin tûnah a lo awm ta, chû chu baptisma hi a ni (tisa bawhlhlawh tihfai mai ni lovin, chhia leh tha hriatna thianga tak nêna Pathian kan chhanlêt vênâ hi a ni).

²²Isua Krista chu vânah chhovin Pathian dîng lamah a han awm a; Vântirhkohho te, thuneihna te, thiltihtheihna te chu ama thuhnuai awm vek an ni.

BUNG 4

¹Chutichuan, Kristan tîsâa a tuar avângin nangni pawh chutiang rilru pû chuan inthuan vê rawh u; tîsâa tuar tawh chuan soal a bânzan tawh si a;

²chutiang mi chu a dam chhûng zawngin tîsa chhâknain a nung tawh dâwn lo va, Pathian duh zâwngin a nung tawh zâwk dâwn a ni.

³Jentailte duh zâwng thil: hurna te, tîsa chhâkna te, zu ruinhna te, zu hmun hlimna te, zu inhona te leh milem biakna tenawma inhman nân tûn hmâ kha tâwk tawh rawh se.

⁴Chutiang nawmsip bâwlâna thila in tel vê duh ta lo hi mak an ti a, an sawi chhe ta mai che u a nih hi.

⁵Chûngho chuan minung leh mitthite rorêlsak tûra inpeih renga hmâah chuan anmahni chanchin an la sawi vê ngei dâwn a ni.

⁶Chû vâng tak chuan a ni, mitthite hnênah pawh Chanchin Tha chu hril a nih tâk ni, tîsâa awm mihringte anga rêlsak an ni ang a, thlarauvah erawh chuan Pathian anga an nun theihna tûr a ni thung ang.

PATHIAN ROPUINA TÛRA RAWNGBÂWL

⁷Thil zawng zawng tâwpna a lo hnai ta; chûvângin in tawngtâi theih nân rilru harhvâng leh urhsûn tak pû ang che u.

⁸Thil dang zawng aiin inhmangaih tawna hi lo uar ber ang che u; ‘hmangaihna hian soal tam tak a hliakhkhuh thei si a.’

⁹A phunchiar lo zâwngin inlâwm tawn thiam rawh u.

¹⁰Mi tinin thilpêk in dawn ang zêlin, Pathian khawngaihna chi hrang hrang enkawltu tha angin, rawng inbâwlsak tawn zêl rawh u.

¹¹Mi tûpawhin Pathian thù a sawi chuan, Pathian thu a nihna ang ngeiin a sawi tûr a ni. Mi tûpawhin rawng a bâwl chuan Pathianin theihna a pêk ang takin bâwl rawh se; chutichuan, Isua Krista avângin Pathian chu thil engkimah chhâwimâwiin a awm thei ang, ropuina leh rorêlna chu chatuanin a ta a ni si a. Amen.

PATHIAN ROPUINA TÛRA TUARNA

¹²Duh takte u, in zîngah fiahna hautak deuh deuh lo thleng ta hi, thil danglam leh mak ta lûa-ah chuan ngai suh u;

¹³Krista tuarna in tawmpui vê-na a nih avângin lâwm zâwk rawh u; chutichuan a ropuina a lo lan hunah nangni pawh in hlimin in la lâwm dâwn asin.

¹⁴Krista hming avânga sawi chhiat in nih chuan in nihlawh e; Thlarau ropui tak, Pathian Thlarau chuan a chênchilh si che u a. Anmahni lamah chuan Pathian chu sawi chhiatin a awm a, nangmahni lamah erawh chuan chhâwimâwiin a awm thung a ni.

¹⁵Mahse, in tuar chhan chu tualthah vâng emaw, rukrûk vâng emaw, thilsual tih vâng emaw, tûl lova midangte thila va inrawlh ve ngawt vâng emaw ni suh se.

¹⁶Tûpawh kristian nih vânga tuar a nih chuan zak suh se, Pathian chhâwimâwi phah nân hman hlauh zâwk rawh se.

¹⁷Rorêlna chu Pathian chhûngkuaah hian tjan a hun tawh si a; keimahni maha a tjan hmasak chuan Pathian Chanchin Tha âwih

duh lote tâwpna chu engtiang tak ni ang maw?

¹⁸Mi dik mah chhandam hrâm a nih chuan, Pathian ngaihsak lo leh mi sualte lek pheih chu eng ang tak ni ang maw?

¹⁹Chutichuan, Pathian rem tihzâwng anga tuarte chuan thil tha tiin an thlaraute chu Siamtu rinawm hnênah kawltîr rawh se.

BUNG 5

BERAMTE CHÂWM RAWH

¹In zînga kohhran upate chu, kei, in upatpui, Krista tuarna hriatpuitu, ropuina lo lang tûr chang vetu tûr hian ka fuih a che u:

²In zînga Pathian berâm rualte chu vêng ula, a enkawltûah awm rawh u; tih loh theih loh ang ni lovin, châk tak zâwkin, hlêpna bawhlhlawh duh vâng ni hek lovin, thatho takin ti ang che u.

³In hote chungah intilal suh u, berâmhote tâna entawn tlâkah insiam zâwk ula.

⁴Berâmpu Lalber chu a lo lan hunah, nangni hian ropuina lallukhum chuai thei lo chu in chang ang.

PATHIANA INTUKLUH, DIABOLA DODÂL

⁵Chutiang bawkin nangni thalaite u, in aia upate hnênah intulût rawh u. Ni e, in zâin intulût tawn theuh ula, inngaihtlâwmnain inthuam rawh u; “Pathianin mi chapote a dodâl a, mi inngaitlâwmte hnênah khawngaihna a pe thîn.

⁶Tichuan, Pathian kut chak tak hnuaiah chuan intitlâwm ula, a hun takah a châwi sâng dâwn che u nia;

⁷Ama chungah chuan in manganna zawng zawng nghat vek rawh u, a lainat êm che u hi.

⁸Harh fîm takin awm ula, inrâlring rawh u; in hmêlmâ Diabola chu sakeibaknei rûm thîn angin a ei theih tûr zawngin a phî ruai thîn.

⁹Amah chu dodâl rawh u; rinnaah chuan nghet tlat ula, khawvêl ram danga in unaute pawhin in tuar ang hi an tuar vê tho tih hria ang che u.

¹⁰Khawngaihna zawng zawng Pathian, a chatuan ropuina chang tûra Krista Isuaa kotu ngei che u chuan, rei lo tê in tuar hnûah tha famkima siamin, tinghetin, tichakin, dîn nghehtîr che u rawh se.

¹¹A hnênah chuan ropuina leh lalnate chu chatuanin awm rawh se. Amen.

INTHLAHNA LEH THLAMUANNA

¹²Silvana, unaupa rinawm taka ka neih kutah hian nangmahni fuihna thû, tûna in dinna hi Pathian khawngaihna dik tak a ni tih hriattîrna lehkha tâwi têin ka rawn thawn a nih hi.

¹³Babulona awm, nangmahni nêna thlan nu hian chibai a bûk a che u; chutiang bawkin ka fapa Marka pawhin chibai a bûk a che u.

¹⁴Hmangaihnaa infâwpin chibai inbûk rawh u. Krista Isuaa awm zawng zawngte hnênah chuan thlamuanna awm rawh se. Amen.

2 PETERA

Ziah tu: Petera • Ziah kum: A.D. 66

Hê lehkhathawn hian a tum ber chu kohhran chhûngah zâwlnei suak leh zirtîrtu suakten kohhranho inngahna thutak sawi derthâwn tuma an zirtîr dân dik lohzia hai lana, chutiang thil laka fimkhur tûra inhriattîr a ni. Chuvângin a ziaktu Petera hian ringtute chu Krista hriatna dik tak neia, dikna kawng zawh zêla, nghet taka Pathian ring tlat tûrin a fuih a ni. Lalpa lokallehna thutiam chu nghet taka vuan tûrin, a lo la lang mai rih lo a nih pawha chhandam nih theihna hun remchânga ngai zâwka, dawhthei taka nghâk tûr te, Lalpa khawngaihna leh hriatnaa lo ðang lian zêl tûr tein ringtute chu a fuih a ni. 2 Timothea kha Paula hun tâwp dâwna ziah a ni angin, 2 Petera hi tirkoh Peteran martar hmabâka a awm tawh reng laia a ziah a ni. 2 Petera hi Bible-a lehkhabu 61-na a ni a; bung 3 a awm a, châng 61 a awm baw.

BUNG 1

MI RINAWMTE CHIBAI BÛKNA

¹Simon Petera, Isua Krista bâwih leh tirkoh chuan, kan Pathian leh Chhandamtu Isua Krista ðatna avânga rinna hlu tak kan chan ang chang vête hnênah:

²Pathian leh kan Lalpa Isua hriatnaah chuan in chungah khawngaihna leh remna tihpun ni rawh se.

³A ropuina leh a ðatna avânga min kotu chuan, amah hriatna azârah a thiltihtheihnain nunna atân leh Pathian ngaihsakna tûrin thil engkim min pê a,

⁴chû chuan namên lova thutiam ropui leh hlu chu min pe baw a, chumi zârah chuan Pathian zia ðawmpui vê thei tûrin, châkna sual avânga he khawvêla khawlohna hi in pumpelth thei dâwn a ni.

RINNAA ðHAN LENNA

⁵Hemi avâng hian taihmak chhuahin in rinnaah chuan ðatna telh ula, ðatnaah chuan hriatna telh baw ula,

⁶hriatnaah chuan insûmna telh ula, insûmnaah chuan chhelna telh ula, chhelnaah chuan Pathian ngaihsakna telh ula,

⁷Pathian ngaihsaknaah chuan unau inhmangaihna telh ula, unau inhmangaihnaah chuan Pathian hmangaihna telh baw ang che u.

⁸Hengte hi in tâ a niha a pun zêl baw chuan kan Lalpa Isua Krista hriatna kawngah hian dâwngdah mai mai emaw, rah chhuah nei lo emawin a awmtîr lo vang che u.

⁹Amaherawhchu, hetiang thil tlakchham hi mitdelna a ni a; engmah a thlir thui thei lo; a hmanlai sual tlenfaisak a ni tih pawh a hre reng thei tawh hek lo.

¹⁰Chuvângin unaute u, a kohna leh a thlanna che u chu tinghet tûrin taihmak chhuah lehzuall rawh u; chutianga in tih chuan in tlu chhe ngai lo vang;

¹¹chutichuan, kan Lalpa leh Chhandamtu Isua Krista chatuan rama luh theihna chu phal taka pêt in ni ang.

PETERA THIH A HNAI

¹²Hei vâng tak hian thutak hriatna kawngah lo nghet tawh mah ula, rawn hriat thartîr leh tûr che u in ka bei zêl ang.

¹³Ni e, hê bâwk têa ka la awm chhûng hian rawn chawh harh leh ðhin che u hi ðhân ka hria a,

¹⁴kan Lalpa Isua Krista min hriattîr ang khân, hê ka bâwk te dah bo hun hi a thleng thuai tawh dâwn tih ka hre si a.

¹⁵Ka thih hnûah pawh chûng thil chu in hriat reng theihna tûrin theihtâwp ka chhuah zêl ang.

HRILH LÂWKNA RINTLÂK

¹⁶Kan Lalpa Isua Krista lokallehna leh a thiltihtheihna kan hriattîr lai che u khân, vervêk taka thawntu phuachawp kan hmang lo va, a ropuizia mit ngeia kan hmuh thû kan sawi zâwk a ni.

¹⁷Ani chuan Pa Pathian hnên ata chawimâwina leh ropuina a hmuh lai khân, Ropuibera hnên aţangin ama hnênah khân âw a lo thleng a: “Hei hi ka Fapa duh tak, ka lawm êm êma chu a ni,” tiin.

¹⁸Tlâng thianghlina a hnêna kan awm lai khân chû âw, vân aţanga lo chhuak chu keimahni ngei pawhin kan hria a ni.

¹⁹Hrilhlâwkna thu dik nemngheh tawh chu kan nei a, êngin hmun thim a chhun êna khua a lo vâr ang hian, in thinlunga vârparh arsi a lo chhuah hmâa hrilhlâwkna thû in lo ngaihsak chuan in tiţha hlê ang;

²⁰hei hi hria ula, Pathian Lehkhawua hrilhlâwkna thû rêng rêng hi mimal ngaihdan puan chhuahna thil a ni lo,

²¹hman laia hrilhlâwkna thû rêng rêng kha mihring duh dâna lo irh chhuak a ni ngai lo va, Thlarau Thianghlimin a hriattîr ang zêlin Pathian mi thianghlinten an sawi zâwk ðhin a ni.

BUNG 2

THURIN HLAUHAWMTE

¹Chuvângin mite zîngah zâwlnei suakte pawh an lo chhuak tawh a, nangmahni zîng aţang ngeiin zirtîrtu suak te pawh an lo la chhuak dâwn; chûng mite chuan a rûktêin zirtîrna hlahhawm tak tak an la rawn zep lût ang a, anmahni tlanchhuaktu Lalpa ngei pawh an phatsan hial ang a, anmahniâh chawp leh chilha boralna an la inthlen ang.

²Chutiang chhiatna kawng chu mi tam takin an zawh vê ang a, anmahni avângin Thudik Kawng hian sawi chhiat a hlawh phah baw ang.

³Duhâm takin, nangmahni aţanga hlâwkna hmuh tumin dâwt thûin an rawn dâwi â ang che u. Nimahsela, chhiatna an tawng buak tûr hian a lo nghâk reng tawh a ni: anmahni tiboraltu tûra chu a muthlu ve si lo va.

ZIRTÎRTU SUAKTE BORALNA

⁴Suala tlû ta Vântirrhkoh hote kha Pathianin a zuah lo va, hremhmunah a paih thlâ a, khuarkhurum thim chhah mup-ah a khung a, tah chuan rorêlsaka an awm hun tûr an lo nghâk a ni.

⁵Hmasâng khawvêl pawh kha a zuah chuang lo; khâ Pathian ngaihsak duh lo khawvêlah khân tui a tilêt a nih kha. Dikna

thuhrltu Nova erawh chu mi dang pasarihte nêen a chhandam ta a;

⁶Sodom leh Gomorra khuate kha a tiboral vek a, meivâpah a chantîr a. A hnu zêla Pathian ngaihsak duh lote chan tûr entîr lâwk nân a hmang a.

⁷Lota, mi dik, mi suaksualte awm dân bawhlhlawh lutuk avânga lungngai êm êm thîna chu a chhan chhuak a,

⁸(chu mi dik chu an zîngah a chêng vê si a, dân lo anga ni tina an thil sual tih a hmuh leh a hriatte chuan amaha thlarau dik tak awm chu a chhun na ngawih ngawih thîn a ni).

⁹chuvângin, Lalpa chuan amah ngaihsaktute chu thlêmna aţanga chhan chhuah dân leh, mi dik lote chu rorêl nî atân hrem chung a khêk dân a hria;

¹⁰tîsa châkna ringawta inhmang a, hurna bawhlhlawha tâl lûta, thuneitu pawisakna nei rêng rêng lote pheî chu hrem chung a khêk dân a hre lehzuâl si a. Pawisak nei lo, luhlul bawk si an ni. Vân lam mi ropuite pawh sawi chhiat an hlau lo;

¹¹chakna leh thiltihtheihna nasa zâwk nei Vântirhkohte meuh pawhin Lalpa hmâah chuan, chûng vân mi ropuite chu an sawi chhe ngam hlei nêem.

ZIRTÎRTU SUAKTE SUAHSUALNA

¹²Mahse chutiang mi râpthlâk, mana tihhlum mai tûra lo piang ramsa ngaihtuahna pawh nei lo ang mai te chuan eng a nih pawh an hriat hleih loh hi an sawi chhe buan buan a, an khawlohnâah ngei chuan an la boral dêr dâwn si a,

¹³an suahsual man an la têt ngei ang. Chhûn êngah pawh zu hmun hlimna thlahlel mi an ni a. In hnêna ruai an thehin, mahni inbuma intihlim chawp mai an ni a, mi tibawhlhlawha tikhawlotute an ni.

¹⁴An mit chu uirênain a khat a, sim thei lovin sual hi an lo tidawklak tawh a, mi rilru nghet lo deuh han thlêmthlûk te chu an zeî êm êm a ni. Duhâmna rilru lo thánhnân tawh, ânchhe dawng fate an ni.

¹⁵A thil tihsual hlawh chena thlahleltu Beora fapa Balaama kawng an zawh a, kawng dik pên bosanin an vâk bo ta.

¹⁶Ani khân a thil tihsualah zilhhâuh a tawh a; sabengtung ţawng thei lo chu mihring angin a lo ţawng chhuak a, chu zâwlnei thiltih âthlak tak chu a khuahkhîrh ta a ni.

¹⁷Chûng mite chu tuikhur hna kangchat tawh leh chhûm, thlipuiin a nuai vêt mai mai ang an ni; chûng mite awmna tûra an ruatsak chu chatuan thim chhah mup a ni.

ZIRTÎRTU SUAKTE BUMNA

¹⁸Chutiang mite chuan pâwr fê fêin thu ho mai mai an sawi thîn a, chutiang thû an sawi aţang chuan hê khawvel nun dân ţa lo bânsan tawhte tîsa châkna a kai chhuak a, hurna kawngah bawh bumîn an awm leh thîn a ni.

¹⁹Mite hnênah zalêna pêk an tiam thîn a, mahse anmahni ngei pawh chu chhiatna bâwiha tâng an ni reng si a; mihring hi min uai thlutu apiang bâwihah kan tâng mai a lo ni.

²⁰Lalpa leh Chhandamtu Isua Krista an hriat avânga khawvêl bawhlhlawhnate an tlân chhuahsan hnûah, chû thang hnawkah

bawh chuan âwkin, an tlûk leh si chuan an awm dân hnuhnung zâwk chu a hmasa aiin a chhe zâwk thîn a ni.

²¹Dikna kawng chanchin an hriat hnû a, an hnêna thupêk thianghlim kawltîra awm tawh chu an hawisan leh ai chuan, dikna kawng thû chu hre lo lâw lâw sê an tân a ţa zâwk tûr.

²²Hê thufing hi an chungah a thleng dik a nih hi: “Ui ama luak lamah a kîr leh a,” tih leh, “Vawkpui inbual fai tawh chirhdiakah bawh inbual tûrin a kîr leh,” tih hi.

BUNG 3

PATHIAN THUTIAM A DUL LO

¹Duh takte u, tûn hi in hnêna lehkhâ ka thawn wavi hnihna a ni a (in rilrûa ngaihtuahna thianghlim chawh tho tûra ka rawn hriat nawn tirna vê vê a ni e).

²Zâwlnei thianghlimte thu sawi tawhte leh, Lalpa leh Chhandamtu tirhkoaho, keimahni hnêna a thupêkte nêen in hriat nawn leh atâna ziaik ka ni.

³Hei hi hre hmasa ula, ni hnuhnungahte chuan nuihsantute an lo chhuak ang a, anmahni châk zâwngr hrithla chungin an lo kal ang.

⁴“A lokallehna thutiam chu khawiah nge? Siam tîrh lai ata tawh chi thlahutute muthilh hun aţang khân, engkim a ngai renga a la awm zêl hi,” an la ti ang.

⁵Hêngte hi an haider lui tlat a: hmân laiin Pathian thû avângin vânte a lo awm a, lei pawh hi tui chhûnga awm, tui aţanga lo chhuak a ni a;

⁶chutih hun laia khawvêl chu tuiin a chîm a, a boral ta, tih thû hi.

⁷Chû thû vêkin a chelh dîn mêk tûna lei leh vân pawh hi, Pathian ngaihsak duh lo mite chung a rorêlna leh boralna nî a lo thlen hun atân, hâlrâl tura khêkin a la awm rih a ni.

⁸Nimahsela, duhtakte u, hê thil pakhat hi theihnghilh suh u, Lalpa ngaih chuan ni khat hi kum sângkhat ang a ni a, kum sângkhat pawh ni khat ang a ni, tih hi.

⁹Mi thenkhatin muang zel tûra an ngai ang hian Lalpa hi a thutiamah chuan a muang lo asin; tûma boral a duh lo va, mi zawngr zawngr sim tûra a duh vâng zâwkin nangmahni tân a dawhthei a ni zâwk e.

LALPA NÎ

¹⁰Lalpa nî chu zânah rûkrû angin a lo thleng dâwn, chumi nîah chuan vânte chu nasa taka riin a boral ang; thil bulte chu meia em ralin a awm tawh ang a, lei leh a chhûnga hna thawh awmte hi a kâng ral vek ang.

¹¹Chutichuan, thil zawngr zawngr a boral vek dâwn avângin, engtiang taka thianghlim leh Pathian ngaihsaka awm tûr nge in nih le?

¹²Pathian ni lo thleng tûr hi ngâkhlel takin thlîr ula, hmanhmawh rawh u. Chu mi nî a lo thlen hunah zawngr, vânte hi a kâng ral vek ang a, thil bulte lamin mei sa nasa tak chuan a em ral vek ang.

¹³Keini erawh chuan a thutiam ang tak khân, vân tharte leh lei thar, a chhûnga dikna awmna chu kan beisei a ni.

DING NGHET RAWH U

¹⁴Chutiang beiseina chu in neih avângin duh takte u, bawlhhlawh kai lo leh sawisêl bova, thlamuang taka in awm lai a rawn hmuh theih nân che u taihmâk chhuah rawh u.

¹⁵Kan Lalpa dawhtheihna chu chhandam nih theihna hun remchângah hmang hlah rawh u; kan unaupa duh tak Paula pawhin a hnêna finna pêk ang zêla in hnêna a ziah ang khân—

¹⁶a lehkathawn dang zawnzawngah pawh chûng thute chu a sawi thîn. Chûng zîngah chuan thu hriat thiam har deuhte a awm a, zirna mûmal nei lo leh mi nghet loten Pathian Lehkha Thu dang an ngai kâwi thîn ang bawkin an ngai kâwi a, anmahni intihboral phah nân an hmang thîn a ni.

¹⁷Chuvângin, duh takte u, nangni chuan hêng thilte hi in lo hriat lâwk tawh hi; in fimkhur loh chuan mi sualte dik lohnaah hruai bova awmin, in din ngheh tawhna hmun aţang khan in tlu sual hlah dah ang e.

¹⁸Kan Lalpa leh Chhandamtu Isua Krista hriatnaah leh khawngaihnaah chuan lo ţhang lian rawh u. Tûnah leh chatuan thleng pawhin ama hnênah chuan ropuina awm rawh se. Amen.

1 JOHANA

Ziah tu: Johana • Ziah kum: A.D. 90-95

Johana lehkathawn hi lehkathawn dangte ang lovin tû ziaik nge ni a, tû hnênah leh tû tâna ziaik nge tih te, chibai bûkna te a awm lo va; mahse hmâsang kohhran hun aţangin Johana ziaik a ni tihah erawh chuan an inlungual. Pâin a fate hnêna a thawn angin hê lehkhaw pawh hian a sawi a; hetah hian ringtu sualna pawh faten an pate laka an sualna angin a târ lang. Chuvângin ‘naute u,’ tih te, ‘duh tak te u’ tih ţawngkamte a tam deuh. Johanan thupui ngaih pawimawh bîk pali a neihthe chu: inpâwlina hlimawm te, sualna hneh a pawimawh dân te, zirtîrna dik lo laka fîmkhur ţîlzia te leh Pathian Fapa rinna avânga chatuan nunna te hi a ni. Johana kutchhuak dang ang bawkin hê lehkhawh hian hmangaihna leh inhmangaih tawinna a uar hlê. Johanan zirtîrtu suak chhinchhiaha pahni a entîr chu: Krista chungchânga thurin dik lo leh Gnostic zirtîrna te hi a ni. Johana lehkathawn pakhatna hi Bible a lehkhaw 62-na a ni a; bung 5 a awm a, châng 105 a awm bawk.

BUNG 1

HRIATA, HMUHA, KHAWIHA CHU

¹A bul aţanga kan bengka kan hriat, kan mita kan hmuh, a en pawh kan en reng ţhin, kan kuta kan khawih ngei—Nunna Thû kha,

²chu Nunna chu tihlan a ni ta a, kan lo hmu a, hriatpuitîah kan ţang bawka. Chu chatuan Nunna, Pa hnêna awm, kan hnêna a rawn inlâr thû kan hrilh che u chu -

³nangni nêna kan inpâwlho theihna tûrin kan thil hmuh leh hriat chu in hnênah kan hriattîr che u a ni; dik takin kan inpâwlhona hi Pa leh a Fapa Isua Krista nêna inpâwlina a ni tawh reng asin.

⁴In hlimna a famkim theih nân hêng thûte hi kan rawn ziaik a nih hi.

AMAH NÊNA INPÂWLHONA

⁵Hei hi a hnên aţanga a thuchah kan ngaihlîk a, kan hrilh chhâwn tûr che u chu a ni: Pathian chu êng a ni a, amahah chuan thim rêng rêng a awm lo.

⁶Thima awm siin, “Amah nêna kan inpâwl,” kan tih chuan dâwt kan sawi a, thutakah pawh kan awm lo tihna a ni.

⁷Nimahsela, ênga kan awm chuan, amah chu ênga mi a ni si a; tichuan, kan inpâwl tlang a, a Fapa Isua Krista thisen chuan kan sual zawng zawng min tlen faisak a ni.

⁸“Sual ka nei lo,” kan tih chuan, mahni leh mahni kan inbum a, thutak chu keimahnîah a awm lo a ni.

⁹Kan sualte kan puan chuan, kan sualte ngaidam tûr leh kan diklohna zawng zawng tîng fai tûrin amah chu a rintlâkin a dik a ni.

¹⁰Thil sual ka ti lo, kan tih chuan, amah chu dawtheiah kan siam a, a thû pawh keimahnîah a awm lo tihna a ni.

BUNG 2

¹Ka naute u, thil sual in tih loh nân hêng thû hi in hnênah ka ziaik a ni. Mi tûpawhin thil sual a tih chuan, Pa hnêna min Sawipuitu, mi dik, Isua Krista chu kan nei e.

²Amah ngei chu kan sual thâwina a ni; keimahnî sual chauh ni lovin, khawvêl pum sual thâwina pawh a ni a.

AMAH HRETU NIH FINFIAHNA

³Amah kan hria tih tichiangtu chu, a thupêkte kan zawm hian a ni.

⁴A thupêkte zâwm si lovin, “Amah ka hria,” titu chu mi dawthei a ni a, amahah pawh thutak a awm lo.

⁵Tûpawhin a thû a zawm chuan, amahah Pathian hmangaihna a famkim tawh a ni. Chu mîah vêk chuan amahah kan awm tih kan inhria.

⁶“Amahah ka awm reng,” titu chu ama awm angin a awm vê tûr a ni.

⁷Duh takte u, in hnênah thupêk thar rêng rêng ka ziaik lo va; thupêk hlui, a tîr aţanga in neih sâ bawka kha ka ziaik zâwk a ni. Chû thupêk hlui chu a bul aţanga in thu hriat tawh hnû kha a ni si a.

⁸Thupêk thar ka ziaik bawka a, chû chu amahah leh nangmahni a dik vê vê si a, thim chu a kian mêk avâng leh êng taka chu a lo ên tawh reng avângin.

⁹Miin “Êngah ka awm,” ti ta se, a unau a huat reng bawka si chuan thimah a la awm tihna a ni.

¹⁰Mahni unau hmangaihtu chu êngah chuan a awm reng tawh zâwk a, tlûkna chhan tûr a awm lo ve.

¹¹Mahni unau hawtu erawh chu thimah a awm a, thim zîngah a khawsa bawka a; thimin a mit a hliah tlat avângin a kalna chin pawh a hre lo.

AN THLARAU DINHMUN

¹²Naute u, in hnêna ka ziah chhan hi, ama hming avânga in sualte ngaihdam a nih tâk vâng a ni e.

¹³Pate u, in hnêna ka ziah chhan chu, a tîr aţanga Awm-renga chu in hriat tawh vâng a ni. Tlangvâlte u, in hnêna ka ziah chhan chu, misualpa chu in hneh tâk vâng a ni asin. Naupangte u, in hnêna ka ziah chhan chu Pa in lo hriat tawh vâng a ni.

¹⁴Pate u, a tîr aţanga in hnêna Awm-renga chu in hriat avângin in hnênah ka ziaik a nih kha. Tlangvalte u, in chak a, Pathian thû nangmahni a awm reng a, misual chu in hneh tawh bawka avângin in hnênah ka ziaik bawka a ni.

KHAWVÊL THLAHLEL SUH

¹⁵Khawvêl hi thlahlel suh ula, khawvêl thilte pawh hi ngaina hek suh u. Mi tûpawhin khawvêl a thlâkhlelh chuan, Pa hmangaihna chu amahah a awm lo a ni.

¹⁶Khawvêla thil awm zawng zawng— tîsa châkna te, mit châkna te, mi tichapo thei thilte hi Paa chhuak a ni lo va, khawvêl thil mai

a ni zâwk si a.

¹⁷Khawvêl hi a châknate chawpin a boral zêl a; Pathian duh zâwng titu erawh chu kumkhuain a awm reng ang.

HUN HNUHNUNGA INBUMNA

¹⁸Naute u, hun hnahnung ber chu a ni ta e, Krista-dotu a lo kal dâwn tih in hriat ang khân, tûnah pawh Krista-dotu tam tak an lo chhuak ta; hei vâng hian hun hnahnung ber a ni tih kan hria a ni.

¹⁹Anniho chuan min chhuahsan ta a, kan mi leh sâ tak pawh an ni lo reng a, ni se kan hnênah an awm ve zêl ang chu; kan mi leh sâ tak an nih lohzia a lan fiah theih nân min chhuahsan ta a nih hi.

²⁰Nangni erawh chu Mi Thianghlima chuan hriak a thih che u a, thil engkim in hriat tâk hi.

²¹Thutak in hre lo ka tih vânga rawn ziaak pawh ka ni lo, in hriat zâwk avâng leh, dâwt thû chu thutak aţanga chhuak a ni lo tih ka ziah duh vâng a ni e.

²²Isua hi Krista a ni tih hnialtu tluka mi dawthei an awm em ni? Pa leh Fapa pawm duh lotu chu Krista-dotu a ni.

²³Mi tûpawhin Fapa a phatsan chuan Pa pawh a lâwm chuang lo; Fapa lo lâwmtu erawh chuan Pa pawh a lâwm thîn a ni.

NANGMAHNĀAH THUTAK AWM RAWH SE

²⁴Tichuan, a tîr aţanga in hriata kha nangmahniâh chêtîr zêl ula. A tîr aţanga in hriata khân a chênchilh reng che u chuan, Fapaah leh Paah in awm reng dâwn a ni.

²⁵Chû thutiam chu a ni amah ngeiin min tiam kha: chatuan nunna chu.

²⁶Nangmahni hruai bo tumtute chungchâng in hnênah ka ziaak a nih hi.

²⁷Ama hnên ata hriakthih in chan khân a awmpui tlat che u a, tû zirtîr mah in ngai chuang lo ve. Chû hriak thihna vêk chuan thil zâwng zâwng a zirtîr vek che u a, a dik a, dâwt a ni bawk si lo va, chuvângin a zirtîr ang ngei che u chuan, amahah chuan awm reng ang che u.

PATHIAN FATE

²⁸Naute u, amahah awm reng rawh u; tichuan a rawn inlâr hunah pawh a hmaah chuan zak lovin, ngaihngam takin kan awm thei dâwn nia.

²⁹Amah chu mi dik a ni tih in hriat chuan, dik taka titu chu ama hrin a ni tih in hria ang.

BUNG 3

¹Ngai teh u, Pa hian min lo va hmangaih tehlul êm! ‘Pathian fa’ tia vuah kan ni vê ta reng mai! Khawvêl erawh chuan min hre si lo, amah a hriat miau loh avângin.

²Duh takte u, Pathian fate chu kan lo ni ta a; engtiang takin nge kan awm dâwn tih erawh chu tihlan a la ni rih lo; amah a rawn inlâr hunah erawh chuan, amah angin kan awm dâwn tih erawh chu kan hria, amah chu a nihna ang takin kan hmu dâwn si a.

³Ama chung a beiseina neitu chuan, amah chu a thianghlim êm avângin a intithianghlim thîn a ni.

SUAL LEH PATHIAN FA

⁴Thil sual ti chu dân bawhchhia a ni ngâl baw; sual chu dân bawhchhiatna a ni si a.

⁵Amah chu kan sualte la bo tûrin a lo lang tawh tih in hria e; amahah chuan sual rêng rêng a awm si lo va.

⁶Tûpawh amaha awm reng chuan thil sual a ti lo. Mîin thil sual a tih chhûng chuan amah chu a hmu lo va, hriat pawh a hre hek lo.

⁷Naute u, tûma bumin awm suh u. Dikna titu chu dik tak a ni, amah chu mi dik a ni si a.

⁸Thil sual titu chu Diabola aţanga chhuak a ni; Diabola chuan atîr aţang rêngin thil sual a ti si a. Pathian Fapa lo lan chhan ber chu Diabola hnathawh tihboral a ni.

⁹Tupawh Pathian hrin chuan thil sual a ti lo, Pathian chí amahah a awm tawh avângin. Pathian hrin a ni tlat a, thil sual ti zêl thei a ni tawh lo.

HMANGAIHNA THUPÊK

¹⁰Pathian fate leh Diabola fate chu he mîah hian a lo lang thîn: Tûpawh dikna kawng zawh lo chu Pathiana chhuak a ni lo, a unau hmangaih lo chu Pathiana chhuak a ni hek lo.

¹¹Kan inhmangaih tawn theuh tûr a ni tih hi, a tîr aţanga thuchah in hriata kha a la ni reng.

¹²Kaina, misual laka mi, mahni unau thattu ang khân in awm tûr a ni lo. Eng vânga that mai nge a nih? A unaupain dik taka a tih laiin, ani chuan thil dik lo a tih vâng a ni.

¹³Unaute u, khawvêlin a huat che u pawhin mak ti suh u.

¹⁴Kan unaute kan hmangaih vângin thihna ata chhuakin, nunnaah kan lût tih kan hria. Ama unau pawh hmangaih lotu chu thihnaah a la awm reng a ni.

¹⁵Tûpawh a unau hua chu tualthat a ni; tualthattu tûmah chatuan nunna pây reng rêng an awm lo tih in hria e.

HMANGAIHNAIN A THAWH CHHUAH

¹⁶Pathian hmangaihna hi eng teh fakau nge tih kan hriatna chu kan tâna a nunna a hlan tâk hial aţang hian a ni a. Keini pawhin unaute tâna nunna hlan vê chu kan bat a ni.

¹⁷Mahse, mi tûpawhin hê khawvêl thil hi nei ngahin, a unau tâkchhamzia a hmuh pawha lainatna thinlung a neih si loh chuan, engtin nge Pathian hmangaihna chu amahah a awm theih ang?

¹⁸Ka naute u, ţawngka maiin emaw, lei chauhvin emaw i inhmangaih suh ang u, thiltih leh thutakin ni zâwk rawh se.

¹⁹Hetah tak hian thutaka mi kan ni tih kan inhria ang a, a hmâah pawh thlamuang takin kan awm thei dâwn a ni.

²⁰Kan rilrûa inthiam lohna awmte hi engkim hretu Pathian, thinlunga kan suangtuahna aia ropui zâwk chuan a hre tlang vek a ni.

²¹Duh takte u, kan rilruin thiam loh min chantîr loh chuan Pathian lamah pawh ngaih a ngam thîn asin.

²²Keini pawhin a thupêkte kan zâwm a, a mithmuha a lâwm zâwng kan tih thîn avângin, a hnêna mi kan dîl apiang chu kan hmu zêl thîn a ni.

²³A thupêk chu hei hi a ni: a Fapa Isua Krista hming chu rina, a thu min pêk anga inhmangaih tawn hi a ni.

THUTAK THLARAU LEH THLARAU DIK LO

²⁴A thupêk zâwmtu chu amahah chuan a awm reng a, ani pawh amahah a awm reng bawk a. Amah kan hnênah a awm reng tih kan hriat theihna chu, ama'n a Thlarau min pêkah hian a ni.

BUNG 4

¹Duh takte u, thlarau nazawng chu ring suh u, thlaraute chu Pathian laka mi an ni nge ni lo fiah rawh u; khawvêlah hian zâwlnei suak tam tak an lo chhuak ta si a.

²Hei hi Pathian Thlarau in hriat theihna tûr chu a ni: Thlarau engpawh Isua Krista chu mihringah a lo chang tih tantu chu Pathian laka mi a ni;

³Isua Krista chu mihringah a lo chang tih tan lo erawh chu, eng thlarau pawh ni se Pathian laka mi a ni lo. Chû chu Krista-dotu thlarau, lo kal tûr in hriata kha a ni a, tûnah pawh khawvêlah a awm tawh reng a ni.

⁴Naute u, Pathian mite in ni a, nangmahnia awma chu khawvêlah awma aia ropui zâwk a nih vângin, hnehna chu in chang reng tawh asin.

⁵Anni chu khawvêl mi an ni. Chuvângin, khawvêl mi angin an tawng a, khawvêl mite pawhin an thû chu an ngaichâng thîn.

⁶Keini hi Pathian ta kan ni a. Pathian hretu chuan kan thû pawh a ngaithla thîn; Pathian mi ni vê lo chuan kan thû pawh a ngaithla duh thîn lo. Hei tak hi dikna thlarau atanga thlarau dik lo kan hriat hran theihna pawh a ni e.

HMANGAIHNA PATHIAN HRIATNA

⁷Duh takte u, i inhmangaih tawn theuh ang u, hmangaihna hi Pathian laka chhuak a ni si a; mi tûpawh hmangaihna nei apiang chu Pathian hrin a ni a, Pathian a hre bawk.

⁸Hmangaihna nei lo chuan Pathian a hre lo, Pathian chu hmangaihna a ni si a.

⁹Hemî-ah hian Pathian hmangaihna chu keimahni lamah tihlan a ni ta, ama zâra kan nun theihna tûrin Pathianin a hrin ngei, a Fapa mal neihchhun khawvêlah a rawn tîr tâk hi.

¹⁰Hemî-ah hian hmangaihna chu a awm, keimahnin Pathian kan hmangaih vê tihna ni lovin, ama'n min hmangaih a, kan sual thâwi nân a Fapa a rawn tîr a ni zâwk.

¹¹Duhtakte u, Pathianin heti êma min hmangaih avâng hian keini pawhin inhmangaih tawn hi kan bat a ni.

HMANGAIHNA MITA PATHIAN HMÊL HMUH

¹²Tûma'n eng lai mahin Pathian an hmu ngai lo. Kan inhmangaih tawn chuan Pathian chu keimahniâh a awm a, a hmangaihna pawh keimahniâh a famkim dâwn a ni.

¹³Ama Thlarau min pêk tawh atang hian amahah kan awm a, amah pawh chu keimahniâh a awm tih kan hre bawk a ni.

¹⁴Khawvêl Chhandamtu ni tûrin Pain Fapa a rawn tîr tih kan hmû a, kan nemnghet bawk.

¹⁵Tûpawh, "Isua hi Pathian Fapa a ni," tia tan tlattu hnênah Pathian a awm reng a, ani pawh Pathianah a awm reng bawk a ni.

¹⁶Pathianin min hmangaih tih kan hria a, kan ring bawk a. Pathian chu hmangaihna a ni a; tûpawh hmangaihnaa awm reng chu Pathianah a awm reng a, Pathian pawh amahah a awm reng a ni.

HMANGAIHNA HLEN CHHUAH

¹⁷Hmangaihnaa min thawhsak dân chu: ngaihngam taka rorêlna nî kan hmachhawn thei tûr hi a ni; chuvângin, hê khawvêlah pawh hian ama awm dân ang takin kan awm vê ta a nih hi.

¹⁸Hmangaihnaah chuan hlahna rêng a awm lo; hmangaihna famkim chuan hlahna a hnawt kiang si a. Hlahna hi hremna a ni nghâl a. Hlau rêng rênga mi a awm chuan hmangaihnaah a la famkim lo tihna a ni.

¹⁹Ama'n min hmangaih hmasak avângin kan hmangaih a ni.

RINNAA THU ÂWIHNA

²⁰Miin, "Pathian ka hmangaih e," tiin a unau haw si se, mi dawthei a ni; a unau a hmuh phâk reng pawh a hmangaih loh chuan, a hmuh ngai loh Pathian chu engtin nge a hmangaih theih ang?

²¹Ama hnên atângin hê thupêk hi kan nei: Pathian hmangaihtu chuan a unau pawh a hmangaih bawk tûr a ni, tih hi.

BUNG 5

¹Isua hi Krista a ni tih ringtu chu Pathian hrin a ni; tûpawh a hringtu hmangaih chuan a hrina pawh a hmangaih thîn.

²Pathian fate kan hmangaih tih kan hriat theihna chu—Pathian kan hmangaiha, a thupêkte kan zawm hian a ni.

³Hei hi Pathian hmangaihna chu a ni, a thupêkte kan zawm hi. A thupêkte chu a khirh si lo va.

⁴Pathian hrin apiang chuan khawvêl a hneh zêl thîn. Hei hi a ni khawvêl hneha ngamna chu, kan rinna hi.

⁵Isua hi Pathian Fapa a ni tih ringtu chauh lo chuan tûin nge khawvêl hneh thîn le?

PATHIAN HRIATPUINA CHU

⁶Hê mi hi a ni, tui leh thisena lo kala chu—Isua Krista hi; tui chauh ni lovin, tui leh thisen nê a ni. Hriatpuitu chu Thlarau a ni, Thlarau chu thutak a nih avângin.

⁷Vânah hriatpuitu pathum an awm: Pa leh Thu leh Thlarau Thianghlim te an ni a; hêng pathumte hi pakhat an ni.

⁸Leiah hian hriatpuitu pathum an awm a, Thlarau, tui leh thisen te an ni; chûng pathum te chu pakhat a inthural a.

⁹Mihring hriatpuina mah kan pawm chuan, Pathian hriatpuina chu a ropui zâwk asin; Pathian hriatpuina chu hei hi a ni, a Fapa chanchin a rawn hriattir hi.

¹⁰Pathian Fapa ringtu chuan mahniâh inhriatna a nei; Pathian ring lotu erawh chuan amah chu dawtheiah a siam a ni, Pathianin a Fapa a pêk thû a hriatpuina pawh a rin loh vângin.

¹¹Chû hriatpuina thû chu hei hi a ni: Pathianin chatuan nunna min pê a, chû mi nunna chu a Fapaah chuan a awm.

¹²Fapa neitu chuan nunna chu a nei a; Pathian Fapa nei lo chuan nunna pawh a nei lo.

¹³Nangni Pathian Fapa hming ringtute hnênah hêng thu ka ziah chhan chu, chatuan nunna in nei tih in lo inhriat theih nân leh, Pathian Fapa hming chu in rin theih nân a ni e.

**MAHNI INRIN TÂWKNA LEH LAINATNA NÊNA
TAWNGTAINA**

¹⁴Hei hi Ama laka kan huai ngam ve na chu a ni: ama duh zâwnga eng pawh kan dîl chuan, min ngaihthlâksak tîh, tih hi.

¹⁵Chutia kan dîl apiang min ngaihthlâksak tih kan hriat si chuan, a hnêna kan thil dîl chu kan hmu tawh tih pawh kan hria a ni.

¹⁶Mi tûpawhin a unauin thihna tling lo thil sual a tih tîh chu hmu sela, a dîlsak ang a, tichuan Pathianin thihna khawp ni lo thil sual titute tân nunna a pê ang. Thihna khawp sual a awm a. Chutiang tâna tawngtâksak erawh chu ka sawi lo ve.

¹⁷Dik lohna zawng zawng hi sual a ni a; thihna khawp ni lo sual a awm bawh.

THU DIK HRIATA, DÂWT THU HNÂWL

¹⁸Tûpawh Pathian hrin chuan thil sual a ti lo tih kan hria e; Pathian hrina chuan amah chu a vawn tlat avângin misual pa pawhin a khawih thei lo rêng a ni.

¹⁹Pathian aţanga chhuak kan ni tih leh, khawvêl pum hi misual pa thuhnuia a awm a ni tih kan hria e.

²⁰Pathian Fapa chu a lo kal a, Pathian Taka a nihzia hre thei tûrin hriatthiamna min pê tih kan hre bawh a; keini hi a Fapa Isua Kristaa kan awmin, Pathian Taka-ah chuan kan awm a ni. Hei hi Pathian dik leh chatuan nunna a ni.

²¹Naute u, milem lakah inthiarfihlîm rawh u. Amen.

2 JOHANA

Ziah tu: Johana • Ziah kum: A.D. 90-95

¹³I laizawnnu, thlan vê bawki faten chibai an bûk a che. Amen.

A ziaaktu hian ‘upa’ a inti a, Johana kha a lo tar hnûa miten zah entîr nâna an kohna a ni thei ang. Johana chuan hê lehkhathawn hi ‘hmeichhe tha leh a fate’ hnêna a thawm a ni. Kristian nun laimu chu thutaka nun hi a ni. Chû ‘Thutak’ chu tîsaa lo chang ta Isua Krista chu a ni. Johanen hmangaihna a hrilh fiah dân chu: ‘Pathian thupêk anga nun’ hi a ni mai. Chû chu ringtute zawm tlat tûr a ni bawk. “Hei hi hmangaihna chu a ni, a thupêk anga awm hi,” a ti a ni (1:6). Hê lehkhathawn hian zirtirna dik lo laka invêng tûrin a fuih bawk. 2 Johana hi Bible a lehkhahu 63-na a ni a; bung khat a awm a, châng 13 a awm.

BUNG 1

HMEICHHE THLANTE TÂN

¹Upa chuan, Hmeichhe thlan leh a fate hnênah: thutaka ka hmangaihnte, kei chang ni lo, thutak hria apiangte tân pawh,

²Thutak chu keimahnâa awm reng leh kumkhuaa kan hnêna awm tûr a nih avângin:

³Pa Pathian leh Pa Fapa, Lalpa Isua Krista hnên ata khawngaihna te, zahngaihna te, remna te chu thutak leh hmangaihna in hnênah awm rawh se.

KRISTA THUPÊKA AWM

⁴Pa hnên aţanga thupêk kan hmuh ang khân, i fate zînga thenkhat thutakah an awm tih ka hmuh avângin ka lâwm hlê a ni.

⁵Nang hmeichhe zahawm, ka ngên a che; i hnênah thupêk thar angin ka ziaak lo va, a tîr aţanga kan neih sâ anga kan inhmangaih tawn theih nâna ziaak zawk ka ni.

⁶Hei hi hmangaihna chu a ni, a thupek anga awm hi. Hei hi a tîr aţanga in hriat tawh a thupêk chu a ni a, zâwm tlat ang che u.

KRISTA DOTUTE LAKA FÎMKHURNA

⁷Bumtu tam tak, Isua Krista chu mihringah a lo chang tih pawm lotute chu khawvêlah hian an lo chhuak ta. Chutiang mite chu bumtu leh Krista dotu an ni.

⁸Kan thawh chhuah sâte kha kan hloh loh va, lâwmman pawh a kima kan hmuh theih nân lo inveng tha rawh u.

⁹Tûpawh Krista zirtirna thûa awm reng lova kalkhûmtu rêng rêng chuan Pathian a nei lo a ni. Krista zirtirna thûa awm reng erawh chuan Pa leh Fapa a nei vê vê a ni.

¹⁰Tûpawh hê zirtirna thû keng lo hian in hnênah lo kal sela, in inah pawh lo thlentîr suh ula, tawngkam tha pawhin be suh u.

¹¹Tawngkam tha lo betu chu a thil sual tihah a tel ve tihna a ni.

INTHLAHNA

¹²In hnêna ka sawi duh thu tam tak chu, lehkhah leh a tuia ziah ka duh lo va; in lâwm a kim theih nân in hnêna lo kala, hmaichhana inkawma sawiho ka beisei zâwk a ni.

3 JOHANA

Ziah tu: Johana • Ziah kum: A.D. 90-95

Hê Johana lehkhâ, a thianpa Gaia hnêna a thawnah hian Kohhrana nihna tha chuhtu leh amah Johana te lo sawi chhia a, rawngbâwltu mikhual dangte pawh lo lâwm duh lotu Diatrepha awm dân dik lohzia sawina a langsâr hlê. Kristian nun dân tha nung Gaia leh Demetria te a fak thung. Hê lehkhâ zia k tawî tê hi an hun laia kohhran nun dân tifihtu tangkai tak a ni. 3 Johana hi Bible a bu 64-na a ni a; bung 1 a awm a, châng 14 a awm.

BUNG 1

GAIA CHIBAI BÛKNA

¹Upa chuan, Duh tak Gaia, thutaka ka hmangaiha hnênah chuan:

²Duh tak, thlarau lama malsâwmna i dawn ang bawkin, hrisêlnaah leh kawng tinrêngah malsâwmna i dawn theih nân ka tawngtai thîn a ni.

³Unaute-ho lo kalin nangmahah thutak a awmzia leh i nunpuizia te min rawn hrilh a, ka lâwm takzet a ni.

⁴Ka fate thutakah an awm tih ka hriat tluka min tilawmtu dang rêng an awm lo.

GAIA INPÊKNA FAKAWM

⁵Duh tak, unaute leh mikhualte chung a i tih apiangah rinawm takin i ti thîn a;

⁶chûng mite chuan hmangaihnaa i thiltih chanchin chu kohhranah an hriatpui tawh asin. Chûng mite chu an zin zêlna tûrah Pathian mite tih dân tûr âwm rênga i rawn puihbawm chuan i ti tha hle ang.

⁷Ama Hming avânga pên chhuak an ni si a, Jentailte hnên aţangin engmah an dawng lo reng a ni.

⁸Chutiang mite chu thutaka kan rawngbâwlpuite an nih theih nân kan lo lâwm ngei tûr a ni.

DIOTREPHA LEH DEMETRIA

⁹Kohhran hnênah khân lehkhâ ka thawh tawh a; nimahsela an zînga mi langsâr nih thlahlel tak mai Diatrepha khân min lâwm lo hlê a nih kha.

¹⁰Chuvângin, ka lo kal chuan, a thiltih dân dik lote kha ka chachhuah vê mawlh ang; tawng chhe pui puiin min lo puh kual thîn a. Chû pawh chu duh tâwk lovin, unauhote pawh a lo dawngsawng duh lo va, anmahni lo ngaihventu tûr mi dangte pawh a khap hial a, kohhran aţangin a hnawt chhuak leh nghâl a.

¹¹Duh tak, thil sual tih chîng vê lo la, a tha chauh lo entawn zâwk ang che. Thil tha titu chu Pathian laka mi a ni a; thil sual titu chuan Pathian a hmu rêng rêng lo a ni.

¹²Demetria erawh chuan mi zawng zawng fak a hlauh thîn a, thutaka fak pawh a hlauh bawh a. Keini pawhin kan fak khawp asin; kan fakna thu dikzia pawh i hriat kha.

INTHLAHNA CHIBAI

¹³I hnênah thu tam tak ziah tûr ka nei a, mahse i hnênah hian lehkhâtui leh pen ringawta ziah erawh chu ka duh tâwk lo.

¹⁴rawn hmuh thuai che hi ka beisei tlat a ni; tichuan hmai chhanah kan la tîti dîn dâwn nia. Thlamuanna i hnênah awm rawh se. Kan thianten chibai an bûk a che. Thianteho kha an hming theuhvin chibai mi han bûk dâwn nia.

JUDA

Ziah tu: Juda • Ziah kum: A.D. 68

Hê lehkhathawn ziaktu Juda hi Lal Isua unaute zînga mi a ni. Thuthlung Thar lehkhahûah hian inzilhauhna thu hriam leh vîn berte zînga mi a ni hial âwm e, kohhran hmasâa rinna tlûksantute zilhauhna thû a nih vâng pawh a ni ang. Chutiang rinhlelha thlipui lo tleh kârah chuan Juda chuan unaute chu rinnaa ding nghet tlat tûr leh thurin humhalh tlat tûrin a fuih a ni. Rinna phatsantute dinhmun a laihlanna leh demna ãawngkam pawh a dêngkhâwng hle. A thuchah ber pawh, "...hê rinna thû, mi thianghlimte hnêna kawltîra awm ta kha, ãhahnemngai taka humhalh a nih theih nâna fuihna thuchah" hi a ni. (1:3) Juda lehkhathawn hi Bible-a lehkhahu 65-na a ni a; bung khat a awm a, châng 25 a awm bawh.

BUNG 1

THLANTE HNENA CHIBAI BÛKNA

¹Juda, Isua Krista bâwih leh Jakoba unaupa chuan, Pa Pathianin a serhrante, a kohte leh Isua Kristaa vênhima awmte hnênah:

²Khawngaihna te, remna te, hmangaihna te in chungah tihpunin awm rawh se.

RINNA AWM NGHEH

³Duh takte u, kan chan tlân chhandamna thû in hnêna ziah ka lo tum urhsûn vei nê; mahse hê rinna thû, mi thianghlimte hnêna kawltîra awm ta kha, ãhahnemngai taka humhalh a nih theih nâna fuihna thuchah rawn ziah ãul ka ti leh ta zâwk a ni.

⁴Hriat loh laiin mi tute emaw a rûkin an lo inzep rû a, chûng mite chu Pathian pawisa lo, Pathian khawngaihna pawh hurna remchâng a hmang zêl mi, kan neihchhun Lalpa Pathian leh kan Lalpa Isua Krista hnâwltute an ni; chûng mite chu hun rei tak aâng tawha thiam loh chang tûra ruat an ni.

RINNA PHATSANTU HLUI LEH THARTE

⁵Hê thû hi in hriat hnû pawh ni mahse, hrilh nawn leh che u ka duh a ni: Aigupta ram aângin Lalpan a mite a chhan chhuak zet a, chu mi hnûah a thu âwih duh lote chu a tiboral leh ta, tih thû hi.

⁶Vântirhkohte pawh tirkoh an nih dân tûra ruatsak ang pawm lova chhuahsan ta te chu, chatuan phuarnaa phuar chungin, Rorêlna Ni ropuiah an chungchâng ngaihtuah tûrin thim hnuaiah tântîr an ni.

⁷Sodom leh Gomorra leh, an kiang vêla khuate pawh dang chuang lovin, hurna tenawma inpumpêkin, a hurherh zâwngin an khawsâ a, chatuan meipui tuartu tûrte awm dân an lo entîr lâwk a ni.

⁸Chutianga suangtuahna khawlo nei mite chuan anmahni tîsâ ngei pawh an tibawhlhawh a, thuneitute an pawisa lo va, vân lam mi ropuite an sawi chhe vak vak a.

⁹Vântirhkohte chungnungber Mikaela meuh pawhin Diabola nêna Mosia ruang an inchuh lai khân, Diabola kha a sawi chhe

ngam hlei nê, "Lalpan hau che rawh se!" a ti zâwk a ni.

¹⁰Hêng mite erawh hi chuan an hriat loh thilte hi an sawi chhe buan buan zêl a; ramsa kawlh ang leka an hriatna mâwl tak chu mahni intihkhawloh phah nân an hmang thîn a ni.

¹¹An chung a va pik êm! Kaina kawng chu an zawh a, sum lama duhâmnaah Balaama kawng dik lovah chuan an tlân bawh a, Kora helnaah chuan an boral ta.

PHATSANTUTE SUALNA LEH BORALNA

¹²Chûngte chu hmangaihna ruai in ãheh châng a tibawhlhawhtu che u an ni, zâmna chhe tê pawh nei lovin, anmahni tânghmâ chauh hâin, in ruaithehnaah an tel vê a. Ruahtui pai lo chhûm, thliin a len vêl mai mai ang an ni; favâng thîng, rah pawh nei lo, thi nawn tawha, a zung chawpa tlu kar tawhte an ni;

¹³Tuipui fâwn vêl, mahni mualphona chauh phuan chhuakte an ni a; arsi vâkvâi, chatuana thim chhah mup khêksak te ang chu an ni.

¹⁴Enoka, Adama aâng a pasarihna khân chûng mite hnênah pawh chuan a lo hrilh lâwk a, "Ngai teh u, Lalpa chu a mi thianghlim sîng khatte nê a lo kal e,

¹⁵mi zawng zawng chung a rorêl tûr leh Pathian thu âwih duh lote zawng zawngin Pathian zah lo taka amah pawisak lohna thil an tihte leh, Pathian pawisa loten chaltlai tak taka an ãawng khum avângin an chung a rorêla, thiam loh chantîr tûrin a lo kal dâwn a ni," tiin.

PHATSANTUTE LO LA AWM TÛR

¹⁶Hêng mite hi mi phunchiar, sawisêl tûr ringawt zawng an ni a, anmahni châkna ang zêla hruiin an awm a; an insawi thei êm êm a, an hlâwkna tûr thlîr rânin tûtûte emaw an tlawng kual vêl thîn.

¹⁷Duh tak te u, nangniho erawh chuan kan Lalpa Isua Krista tirkohnten thû an hrilh lâwk che u kha hrereng ang che u:

¹⁸Hun hnunnungah chuan nuihsantute an lo la awm ang a, Pathian pawisakna pawh nei lovin, anmahni châkna angin an la khawsa mai mai ang, tih an hrilh tawh che u kha.

¹⁹Chûng mite chu tîsa mi, Thlarau chan pawh nei lo, inñhen darhna thlentute an ni.

PATHIANA I NUN VAWNG ãHA RAWH

²⁰Duh takte u, nangni chu Thlarau Thianghlimah chuan ãawngtai ula, in rinna thianghlim ber chungah chuan nangmahniin inrem nghet tlat rawh u.

²¹Pathian hmangaihnaah chuan invawng ãha ula, chatuan nun thlengin kan Lalpa Isua Krista khawngaihna chu ngâkhlel takin thlîr reng rawh u.

²²Mi ãhenkhat chu lainat ula, duhsakna lantîr rawh u;

²³mi ãhenkhat chu hlau chungin chhandam rawh u; an tîsa bawhlhawh kaina silhfên chena ten chungin, meî zîng aâng chuan pawt chhuak thuai rawh u.

PATHIAN ROPUI RAWH SE

²⁴Tichuan, in tlûk loh nâna vêng theitu che u, a ropuina hmâa nasa taka hlim tak leh bawlhhlawh kâi lova hlân theitu che u,

²⁵min chhandamtu Pathian, fîng taka chauh hnênah chuan châwimâwina te, ropuina te, rorêlna leh thuneihna te chu, tûnah leh kumkhuain awm reng rawh se. Amen.

THUPUAN

Ziah tu: Johana • Ziah kum: A.D. 96

Bible bu tawpna berah hian thil ropui leh mak tak tak leh rapthlâk pui pui, he lei chungah lo la thleng turte bakah, Isua Krista lokalleh huna thil awm dan tur te chu Hmangaih Johana hnênah inlânain Isuan a lo hmuh lawktir a. Thupuan (Gr. apokalupsis) awmzia chu ‘thil inthup hâilanna,’ ‘khuh hawwna,’ ‘thuruk puan chhuahna’ etc. tihna te a ni thei. He khuh hawwna buah hian Isua Krista chu, a tisa put laia tlâwm tea lo kal ang mai kha ni ta lovin, a hmêlma pa hneh tur leh he lei chungah rorel turin, ropui râpthlak taka inthuanin a rawn lêt leh dawn: chu chu Krista Lokallehna “Second Coming” tih hi a ni. Khawvêl thil inher chho leh thil thleng zawng zawngah hmun laili ber luahin, a kutah lei leh van hun a inher vel a, a thuhnuaiah engkim a dah vek a, vanin lei pum pui chungah ro pui a rel dan chanchin a ni. Johana hian a thil hmuh leh hriat ang takin a sawi a, a chângin lei chungah te, a chângin vânah te a awmna a inthlak tawn reng. A lem leh a taka entirna (symbol) thil a hmang hmem hle a, Thuthlung Hluia thil thleng a sawi tel fo baw. Krista chu a mite tan leh a Kohhranhote tan—Moneitu leh kohhran Lu, Puithiam Lalberlalte Lal, hotute Hotu a ni. Zirtute zingah Thupuan bu hrilhfiah dan chi hrang pali a awm: (i) IDEALIST or SYMBOLIC ngaihdanin, Thupuan bu hi a taka thil awm pawh ni hran lo, a drama anga soal leh tha indo dan entirna mai, eng hun bik sawina mah ni chuang lo a ni, an ti. (ii) PRETERIST ngaihdanin, Thupuan bu hian AD zabi 1-na laia Rom lalram awm dan a ruh lang râwt lovin, inlârna leh hrilh lâwkna angin a tar lang mai a, thil thleng vek tawh sawina a ni, an ti. (iii) HISTORICIST ngaihdanin, Thupuan bu hian kohhran hun puma thil thleng a huam vek a, a bu ziak hun ațanga tunlai khawvel thil thlengte nen hian hmehbel theih vek angah an ngai. (iv) FUTURIST hmuh dan erawh chuan, Thupuan buin a sawi ber—Hrehawmna hun thim te, Sakawlh lo chhuak tur te, Krista lokallehna te leh, kum sang rorelte hi tuna la thleng lo, nakina lo la thleng tur (future) a ni, an ti. Thupuan bu pawhin ‘thil lo thleng thuai tur thu’ (1:1; 4:1) tia a sawi ang hian, he Futurist hrilhfiahna hian Thupuan bu kalhmang a thlâwp ber tih chu a bu hian a tichiang. Bung thuma then hranna: Bung 1-nain thil thleng tawh a sawi a; bung 2-3 in thil thleng tawh ațanga tuna la thleng mek, kohhran 7-te chanchin; bung 4 ațanga a tawp thleng hian hun leh thil lo la thleng tur te, khawvel tawpa chatuan ram lo awm hun tur thlengin a sawi. He lehkhabin a tum ber chu, Isua Krista rawn inlâr leh dawna lei leh van lo insingsak dan chanchin a ni. Bung 4-19 hi Hrehawmna hun (Tribulation) an ti a. He hun thima thil thleng langsâr deuhte chu, Sakawlh rorêlna rûrâ tak lo awm tur te, chutih huna ringtu ‘mi thianghlime’ tana tihduhdahna rapthlak lo awm tur te, leilunga chhiatna rapthlak indawt chho zut tur te, Harmageddon indona te leh Israel hnam tana tuarna lo thleng tur te, Babulon tlâwm hlen tur thu te a ni. Isua Krista chu van sipai rualte nena a lo chhuk thlaka, misualte tiboral tur leh, amah ringtu mi dikte chhan chhuaka, he khawvelah hian muanna ram ropui din tura Krista lokallehna ‘Second

Coming’ chu he hun vawrtawpna chu a ni. Sakawlh leh zâwlnei suak leh a zuituhote chu a rawn tihlum vek ang. Israelte tan leh Jentail kristiante tan he leiah hian Isua Krista hova Kum Sâng Rorel chu a lo awm ang (20:4-6). Chutih chhungin Setana leh a hote zawng zawng chu phuar chungin leilâwtah kum sang khat chhung paihthlâk an ni ang a; chumi zawha helna hnunung ber a rawn tihchhuah leh hunah, amah Setana ngei chu awihlo fate zawng zawng nen chatuan meidilah paih luh vek an ni ang. Lei hi tihbora a ni tawh ang. Chutih hunah chuan LEI THAR LEH VAN THAR, a chhunga JERUSALEM KHAWPUI THAR awm nen chuan a lo lang tawh ang a, Lalpa ringtute chu hlim tak leh thlamuang takin, chatuanin an chawl tawh ang. Thupuan bu hi Bible a lehkhabu 66-na a ni a; a bu chhungah hian bung 22 a awm a, chang 404 a awm baw.

BUNG 1

THUHMA LEH MALSAWMNA

¹Thil lo la thleng thuai tur thu, Pathianin a chhiahhlawhte hriattir tura a pek, Isua Krista Thupuan chhuah chu. A Vantirhkhoh tîrin chu thu chu a chhiahhlawh Johana hnênah a hriattîr a;

²ani chuan Pathian thu leh Isua Krista hriatpuina thu leh a thil hmuh zawng zawng chanchin chu a rawn hriattîr ta.

³He hrilhâwkna thu chhiar a, ngaithla a, a chhunga thu ziak pawmtute chu an nihlawh e; a hun chu a hnai tawh si a.

KOHRAN PASARIHTE CHIBAI BÛKNA

⁴Johana chuan Asia rama kohhran pasarihte hnênah chuan: Awm mêka leh Awm Tawha leh Lo La Awm Tura hnen ațang te, a lalthutthleng hmaa Thlarau pasarih awmho hnên ațang te,

⁵Isua Krista, thuhriatpuitu rinawm, mitthi zing ata tho leh hmasa bera leh, leia lalte chungah roreltu hnen ata khawngaihna leh remna chu awm rawh se. Min hmangaih a, a thisenin kan sualte min tlen faisak a,

⁶Pathian leh a Pa tâna lalah leh puithiama min siamtu hnênah, ama hnên ngêiah chuan ropuina leh rorelnate chu chatuanin awm rawh se. Amen.

⁷Ngai teh, chhûm zingah a lo kal dawn e; mit tinrêngin an hmu ang a, amah chhuntute ngêi pawhin an hmu ang. Leia hnam zawng zawng chuan amah chu an țah chiam dawn a ni. Chutiang tak chu ni rawh se, Amen.

⁸“Kei hi Alpha leh Omega, a Bul leh a Tawp ka ni a; Awm Mêka leh Awm Tawha leh Lo La Awm Tura, Engkimtithia chu ka ni,” Lalpan a ti.

MIHRING FAPA INLÂRNA

⁹Kei Johana, in unaupa leh, Isua Kristaa hrehawmna te, lalram te, chhelna te țawmpuitu che u hi, Pathian thu avang leh Isua thu hriattîrna avangin Patmos thliarkâr an tihah chuan ka awm a.

¹⁰Lalpa Nî-ah chuan Thlarauvin ka lo awm a, ka hnung lamah chuan tawtawrawt ri ang, aw ring tak hi ka hria a,

¹¹chu âw chuan, “Kei Alpha leh Omega, Hmasabera leh Hnuhnung bera chu ka ni. I thil hmuh chu lehkhahuah ziaak la, Asia rama kohhran pasarih— Ephesi kohhran te, Smurna kohhran te, Pergamos kohhran te, Thuatira kohhran te, Sardis kohhran te, Philadelphia kohhran leh Laodikei kohhran te hnênah chuan thawn rawh,” a tih ka hria a.

¹²Mi betu chu hmuh tumin aw lo chhuahna lam chu ka han lehawi a. Chutia ka’n leh hawi chuan rangkachak khâwnvâr dahna pasarih ka hmu a;

¹³khâwnvâr dahna laiah chuan mi tuemaw Mihring Fapa ang, kephah thlenga kawrfual ha, a awma rangkachak hrênnaa inhrêng chu ka hmu a.

¹⁴A lu leh a sam chu sahmul vâ angin a vâ a, vûr ang maia vâ a ni a; a mitte chu meialh ang mai a ni.

¹⁵A kephahte chu dâr tle mi ang a ni a, rawhtuina meia rawh thianghlim tawh ang mai a ni. A aw chu tui luang ri hum hum ang a ni.

¹⁶A kut ding lamin arsi pasarih a keng a; a kê aţang chuan khandaih hriam tawn a lo chhuak a; a hmêl chu ni eng sat vanglai ang maia êng a ni.

¹⁷A hmêl ka hmuh veleah a ke bulah chuan thi ang dêrin ka tlu a. Ani erawh chuan a kut ding lam chu ka chungah a nghat a, ka hnenah, “Hlau suh; kei hi Hmasa bera leh Hnuhnung bera chu ka ni.

¹⁸Keimah hi Minunga chu ka ni a, ka lo thi a, ngai teh, kumkhua atan ka nung leh ta. Amen. Thihna leh Hremhmun chabite pawh ka nei bawh a.

¹⁹I thil hmuh takte leh tuna thil awm mêkte leh nakina thil lo la awm turte chu ziaak rawh.

²⁰Ka kut ding lama arsi pasarih i hmuhte leh rangkachak khâwnvâr dahna pasarihthe thurûk chu hei hi a ni: Arsi pasarihthe chu kohhran pasarihthe tirhkoh an ni a; khâwnvâr dahna pasarihthe chu kohhran pasarihthe an ni.

BUNG 2

HMANGAIHNA NEI LO KOHHRAN

¹“EPHESI kohhran enkawltu* hnênah chuan heti hian ziaak rawh: ‘A kut ding lama arsi pasarih kenga, rangkachak khâwnvâr dahna pasarih zinga vei veia khân heng thu hi a sawi e:

²“I thiltihte ka hria, i thawhrimzia te, i chhelzia te, mi sual i ngaihtheih lohzia te pawh ka hria a ni. Tirhkoh ni si lova tirhkoh intite chu i finfiah bawh a, mi dawthei mai an ni tih i lo man chhuak tawh si a;

³dawhthei takin i bei hrâm hrâm a, keima hming avangin i thawkrim a, hah pawh i inti phal lo va.

⁴Mahse demna che ka nei a ni: i hmangaihna hmasa ber i bansan ta hi a ni.

⁵Chuvangin, khawi lai aţanga tlû nge i nih hre reng la, inlamlêl bawh la, a hmaa i tih ngai kha ti leh rawh. Chuti lo zawng, i hnênah ka lo kal thut ang a, i khâwnvâr dahna hmun kha ka sawnsak mai ang che.

⁶Mahse thatna tak i neih ve chu, Nikola-ho thiltihte i hua hi a ni; chu chu kei pawhin ka haw ve asin.

⁷“Thlarauvin kohhranhnô hnêna thu a sawi hi beng nei chuan hre rawh se. Hnehnâ changtu hnênah Pathian Paradis laia awm Nunna Thingâ mi ngei chu ka eitir ve ang.”

TIH DUHDAH KOHHRAN

⁸“SMURNA kohhran enkawltu hnenah chuan heti hian ziaak rawh: ‘Hmasa bera leh Hnuhnung bera, thi tawha lo nung leh taa khân heng thu hi a sawi e:

⁹“I thiltih te, i hrehawmzia te, i pachhiatzia te chu ka hria e (mahse i hausa si a); Juda inti, Juda tak ni si loten an sawi chhiat dan che pawh ka hai lo; Setana biak in an lo ni lek si a.

¹⁰Tuar tûr i hmabâkte hi hlau reng reng suh. Diabolan in zinga mi thenkhat fiah turin tân inah a khung dawn che u a; ni sawm chung hrehawm in tuar ang. Thih thlengin rinawm takin lo awm la, tichuan nunna lallukhum chu ka pe ang che.

¹¹“Thlarauvin kohhranhnô hnena thu a sawi hi beng nei chuan hre rawh se. Hnehtu apiang chu thih hnihna chuan a tina ve dawn si lova.”

CHAWHPAWLH KOHHRAN

¹²“PERGAMOS kohhran enkawltu hnenah chuan ziaak rawh, ‘Khandaih hriam tawn hriam tak neia khan heng thu hi a sawi a ni:

¹³“I thiltihte ka hria, i chênna pawh Setana lalthuthleng hûnna hmun a ni tih ka hria. Mahse ka hming i vuan tlat a, Setana chênna hmuna in zinga ka mi rinawm Antipas-a thah a nih lai meuh pawh khan kei mi rinna chu i phatsan lo bawh a.

¹⁴Mahse, demna tur che ka nei a ni: Balaama zirtirna pawm mi thenkhat in lo kawh reng avang hian. Ani Balaama chuan Balaka chu Israela thlahte tân dodâltu lian tak siamsakin, inggaihna suala inhmang tur leh, milem biakna sa ei turin sualna kawng a lo zirtir si a.

¹⁵Nang pawhin Nikola-ho zirtirna pawmtute i lo kawh ve reng a, chu chu ka huat zawng tak a ni bawh a.

¹⁶Sim mai rawh, chuti lo zawng, ka rawn tlawh thut ang che a, chung mite chu ka kâa khandaih hian ka rawn do mai dawn asin.

¹⁷“Thlarauvin kohhrante hnena thu a sawi hi beng nei chuan hre rawh se. Hnehtu apiang chu manna thurûk thenkhat ka pe ang. Lung vâ pawh ka pe ang, chu lungah chuan hming thar a inziak a, chu hming chu a dawngtu chauh lo chuan tuman an hre lo vang.”

SUAL NGAITHEI KOHHRAN

¹⁸“THUATIRA kohhran enkawltu hnenah chuan heti hian ziaak rawh, ‘Pathian Fapa, meialh ang mit neia, dâr tle-mi ang kephah neia chuan heng thu hi a sawi:

¹⁹“I thiltih te, i hmangaihna te, i rawngbawlina te, i rinna te leh i chhelna te ka hria; i hna thawh hnuhnung berte chu a tira mi ai khan a nasa zawh hle si a.

²⁰Mahse, demna tur che ka nei a ni, kha nu Jezebeli, zâwlnei nia inchiâl-i kha i lo ngaithei hle mai a; ani khan i phalna ngeiin inggaihna sual ti tur leh, milem biakna sa ei turin ka

chhiahhlawhte chu zirtirin a lo thlêm thlu thîn a nih kha.

²¹Inngaih a chîn chu sim turin hun ka pe a, mahse a sim duh chuang lo.

²²Chuvângin kha nu kha khumbetin ka nattir dâwn a ni; a uirêute pawh an thiltih chînte an sim duh loh chuan hrehawm râpthlak takah ka paih lût bawh ang.

²³A fate pawh ka tihlum ang; tichuan kohhranho zawng zawngin kei hi rilru leh thilnung entu ka ni tih an hria ang. Nangniho pawh in thiltih ang zêlin ka rûl leh theuh ang che u.

²⁴Nangni bâkah, Thuatira khuua mi dang awmte, he zirtirna thu pawm lova, Setana thil thuk an tihthe pawh hre lova la awmte chungah chuan phurrit dang ka bel lo vang che u, ka ti a ni.

²⁵In neih sa erawh chu ka lo kal hma loh chuan vawng tlat rawh u.

²⁶Hnehtu leh a tawp thlenga ka hna thawh chhunzawm zeltu hnenah chuan hnamte chungah thuneihna ka pe ang,

²⁷Ani chuan thirtiang hmangin ro a rêl ang. Kei pawhin ka Pa hnen ațanga ka dawn ang bawkin, anni chu belvawtu hlum belte anga vuak sawm vek an ni ang;

²⁸ani erawh chu varparh arsi ka pe ang.

²⁹Thlarauvin kohhranho hnêna thu a sawi hi beng nei chuan hre rawh se.”

BUNG 3

KOHRAN THI

¹“SARDIS kohhran enkawltu hnênah chuan heti hian ziak rawh, ‘Pathian Thlarau pasarih leh arsi pasarih neia khân hêng thu hi a sawi: “I thiltihte ka hria, nung tak thanin i hming hi a lo thang na a, i thi reng si a.

²Inveng ța la, i thil neih sa thi lek lek te kha tichak thar leh rawh; i thiltihte rêng rêngah Pathian mit tlung zo tur ka hmu si lo.

³Chuvângin, i thu dawn leh ngaihthlakte kha hrereng la, pawm tlat la, sim rawh. I invêng ța peih lo a nih chuan rûkru angin ka lo kal ang a, eng hunah nge ka rawn phâwk dâwn che i hre si lo.

⁴Sardis khuah khân an puan tibawhlhlahw ve lo hming tlemte i neih kha; anni chu puan vîn sinin, ka kiangah an lêng ve thîn ang; chutiang ti tlâk chu an ni si a.

⁵Hnehtu apiang chu puan vîn sintir an ni ang a, an hming pawh Nunna Bu ațangin ka thai bo tawp lo vang; chutih ahnêkin ka Pa hmaah leh a Vantirkohte hmaah an hming ka țan tlat dâwn a ni.

⁶“Thlarauvin kohhranho hnêna thu a sawi hi beng nei chuan hre rawh se.”

KOHRAN RINAWM

⁷“PHILADELPHIA kohhran enkawltu hnenah chuan heti hian ziak rawh, ‘Mi thianghlîma, mi dik taka, “Davida chabi neia, tuma khâr loh tura hawnga, tuma hawn loh tura khâra khân heng thu hi a sawi a ni”:

⁸“I thiltihte ka hria. En ta che, chakna i nei tlem hle na a, chutichung pawhin ka Thu chu i vuan tlat a, ka hming pawh i phat

lo bawh a. Chuvângin, i hmaah hian kawngka inhawng sa ka chhawpsak che a, tuman an khâr thei lo vang.

⁹Ngai teh, Setana biak ina inkhâwm thîn Juda inti, ni tak tak si lo, dawheh-hote chu i ke bula lo kalin chibai ka rawn bûktir ang che a, ka hmangaihzia che hi ka hriattir dâwn a ni.

¹⁰Chhel taka awm tura ka thupêk i pawm tlat avângin, lei mihringte fiah tura khawvel puma fiahna hun lo thleng tur lakah kei pawhin ka humhim ang che.

¹¹Ngai teh, ka lo kal thuai dâwn e! I chan tawh sa i lallukhum kha tuman an lâksak loh nân che vawng tlat rawh.

¹²Hnehtu apiang chu ka Pathian tempul banah ka siam ang a, chuta țang chuan a chhuak leh tawh lo vang. Amahah chuan ka Pathian hming leh, ka Pathian khawpui Jerusalem Thar, ka Pathian hnena mi, van ațanga lo chhuk hming nen chuan ka ziak ang. Amahah vêk chuan keima hming thar ka ziak kai bawh ang.

¹³“Thlarauvin kohhranho hnêna thu a sawi hi beng nei chuan hre rawh se.”

KOHRAN LUM CHANG CHANG

¹⁴“LAODIKEI kohhran enkawltu hnênah heti hian ziak rawh, ‘Amen-a, Rinawma leh Hriatpuitu Dika, Pathian thilsiam bula khan hêng thu hi a sawi:

¹⁵“I thiltihte chu ka hria, i vawh hek lohva, i sat hek loh hi. I vawh emaw, i sat emaw ka duh a ni.

¹⁶Chuvângin, sa si lo, vawt bawh si lova i lum chang chang avângin ka kê ata ka chhâk chhuak ang che.

¹⁷“Ka hausa a, sum ka ngah a, engmah ka tlachham lo ve,’ i ti vel a; mahse mi rethei, khawngaihthlak, pachhia, mittel, saruak mai i ni tih i inhre si lo va.

¹⁸Chuvângin, i lo hausak theih nân ka hnena mi rangkachak meia rawh thianghlîm lei turin ka râwn a che; i saruak zahpuiawm khuh mawi nan thuamhnaw vîn te, i mitin a hmuh fiah theih nân, i mita hnawih tur mitna damdawi te chu ka hnena mi lei bawh ang che.

¹⁹Ka hmangaih apiang chu ka zilhhau va, ka thunun thîn. Chuvângin, țaahnem ngai la, sim rawh.

²⁰Ngai teh, kawngkhar bula dingin ka kik hi. Tupawh ka aw hriaa, kawng mi hawnsaktu hnenah ka lût ang a, a hnenah zanriah ka ei ang a, ani pawhin ka hnenah a ei bawh ang.

²¹Hnehtu apiang chu ka lalthutthlengah ka kiangah ka țintir ang, kei pawhin ka hneh a, ka Pa hnêna a lalthutthlenga ka țin thu ang hian.

²²“Thlarauvin kohhranho hnêna thu a sawi hi beng nei chuan hre rawh se.”

BUNG 4

VANA LALTHUTTHLENG PINDAN

¹Chûng thil hnuah chuan ka han en a; ngai teh, vânah chuan kawngkhâr inhawng ka hmu a. Tichuan âw ka hriat hmasak, tawtawrawt rî ang mai khân ka hnenah, “Hetah hian lo chho la, tichuan nakina thil lo la thleng turte chu ka entîr ang che,” tiin mi hrilh a.

²Tichuan, Thlarauvin ka lo awm ngêh a; ngai teh, vânah chuan lalthutthleng a lo inhûng a, chu lalthutthlengah chuan Mi pakhat a ðhu baw k a.

³Chuta ðhua lan dân chu jasper leh sardion lung ang a ni a; lalthutthleng vêlah chuan chhimbâl, lunglu hring eng ang hi a zâm a.

⁴A laia lalthutthleng hual vel chuan lalthutthleng dang sawmnhieh leh pali a awm a; chûng lalthutthlengah te chuan upa sawmnhieh leh pali kawrfual vâh hâa ðhu ka hmu a; an lûah rangkachak lallukhum an khum a.

⁵Lalthutthleng aţang chuan kawlpêh te, khawpui ri te, awrâwl ri te a lo chhuak a. Lalthutthleng hmaah chuan meichher pasarih an chhi tlar ðhût a, chûng chu Pathian Thlarau pasarihte chu an ni.

⁶Lalthutthleng hmaah chuan tuifinriat ang maia lang dathlalang a awm a. Lalthutthleng laiah leh lalthutthleng velah chuan thil nung pali, mit hlira khat chu a hma lam leh a hnung lamah an awm a.

⁷Thil nung pakhatna chu sakeibaknei ang a ni a, thil nung pahnhia chu sebawng no ang a ni a, thil nung pathumna chuan mihring hmêl ang a pu a, thil nung palina chu mupui thlâwk lai ang a ni.

⁸Thil nung palite chuan thla paruk ðheuh an nei a, mit hlîrin an chhûng lam leh pâwn lam chu a tuam khat a. Chhun leh zan châwl lovin heti hian an au va: “A thianghlime, a thianghlime, a thianghlime, Lalpa Pathian, Engkimtheia, Awm tawha leh Awm Mêka leh Lo La Awm Tura chu!” tiin.

⁹Thil nungten lalthutthlenga ðhu a, chatuana nung renga chu ropuina leh chawimawina leh lawmthu an han hril chuan,

¹⁰upa sawmnhieh palite chu lalthutthlenga ðhua hmaah chuan an bawkkhup a, chatuana nung renga chu chibai an bûk a, lalthutthleng hmaah chuan an lallukhumte chu dahin:

¹¹“Aw Lalpa, ropuina te, chawimawina te, Thiltihtheihna te chu hmu tlak i ni e; Nangin engkim i siam a, I duh anga awm turin i siam si a,” an ti a.

BUNG 5

¹Lalthutthlenga ðhua kut ding lamah chuan lehkhabu zial, chhung lam leh pâwn lama ziah, chhinchhiahna pasariha châr tlat chu ka hmu a.

²Vantirhkoh chak tak chuan aw ring takin, “Tu nge lehkhabu hi phelha, a chhinchhiahnate nena hawng tlak tu nge awm?” tia a au lai ka hmu baw k a.

³Tichuan vânah te, leiah te, lei hnuaiah te pawh lehkhabu zial chu hawng thei tumah an awm lo va, a ena en thei pawh an awm hek lo.

⁴Chutia lehkhabu zial chu keu hawnga, a ena en tlâk pawh tumah an awm loh avâng chuan ka ðap ta vak vak a.

⁵Mahse, upa zinga pakhat chuan ka hnenah, “ðap tawh suh. Ngai teh, Sakeibaknei, Juda hnama mi, Davida Bulpui khân lehkhazial chu keu hawng tur leh a chhinchhiahna pasarih chu phelh turin hnehna a chang ta,” a ti a.

⁶Ka han en a; ngai teh, lalthutthleng leh thil nung palite leh upate awmna lai takah chuan Berâm No, talh tawh hnu ang, ki pasarih leh mit pasarih nei ding hi ka hmu a, chûng mit pasarihte chu Pathian Thlarau pasarih, lei pum puia tih chhuahte chu an ni.

⁷Ani chu a lo kal a, lalthutthlenga ðhua kut ding lama lehkhabu zial chu a la ta a.

FAK TLAK BERAM-NO

⁸Lehkhabu chu a lâk veleh, thil nung pali leh upa sawmnhieh palite chu Berâm No hmaah chuan an bawkkhup a, ðingtang leh rimtui rangkachak berhbû pakhat an keng ðheuh va; chûng rimtui chu mi thianghlime ðawngtaina a ni.

⁹Tichuan he hla thar hi an sa a: “Nang, lehkhabu chu laa, A chhinchhiahnate phelh tlâk i ni; Talhin i awm tawh a, Chi tin, ðawng tin, mi tin leh hnam tina mite chu, Pathian tân i thisenin min tlan tawh si a.

¹⁰Kan Pathian tân lalah leh puithiamah te min siam a; Tichuan, lei chungah hian ro kan la rêl ang,” an ti a.

¹¹Ka han en vel a, lalthutthleng leh thil nungte leh upate awmna velah chuan Vantirhkoh tam tak aw ka hria a; an tamzia chu a sânga sâng hmun sâng tam tak leh a sînga sîng hmun sîng tam tak an ni.

¹²chûngte chuan aw ring takin: “Berâm No talh tawha chu Thiltihtheihna te, hausakna te, finna te, chakna te, chawimawina te, ropuina te leh malsawmna te chu dawng tlâk a ni e!” an ti a.

¹³Chutah chuan thil siam zawng zawng, vana awm te, leia awm te, lei hnuaia awm te, tuifinriata awm zawng zawngte chuan, “Lalthutthlenga ðhua leh Berâm No hnenah chuan Malsawmna te, chawimawina te, ropuina te leh Thiltihtheihna te chu chatuanin awm rawh se!” tia an sawi ka hre baw k a.

¹⁴Thil nung palite chuan, “Amen!” an lo ti a. Upa sawmnhieh leh palite pawh chuan bawkkhupin chatuana nung renga chu chibai an bûk a.

BUNG 6

CHHINCHHIAHNA 1-NA: HNEHTU CHU

¹Berâm No chuan chhinchhiahna pasarih zinga pakhat a phelh lai ka hmu a; thil nung palite zinga pakhat chuan khawpui ri ang maiin, “Lo kal la, en rawh,” a tih ka hria a.

²Chutia ka han en chuan ngai teh, sakawr vâh hi ka hmu a. A chung a chuang chuan thal ngul a keng a, a hnenah chuan lallukhum chu pêk a ni a; tichuan hnehtu ni chungin, hneh zêl turin a chhuak ta a.

CHHINCHHIAHNA 2-NA: LEI CHUNGA BUAINA

³Chhinchhiahna pahnhia a han phelh chuan, thilnung pahnhia chuan, “Lo kal la en rawh,” a tih ka hria a.

⁴Sakawr dang, mei anga sen hi a lo chhuak a. A chung a chuang hnenah chuan mipui leh mipui insuattîr theihna leh lei aţanga inremna lâk bosak theihna an pe a; a hnenah chuan khandaih lian tak hi an pe baw k a.

CHHINCHHIAHNA 3-NA : LEI CHUNGA TÂMNA

⁵Chhinchhiahna pathumna a han phelh chuan, thil nung pathumna chuan, “Lo kal la, en rawh,” tiin ka hria a. Chutia ka han en chuan ngai teh, sakawr dum ka hmu a; a chung a chuang chuan a kutin bûkna a keng a

⁶Thil nung palite zing aţang chuan âw-in, “Duli-in wheat chhangphut kg. khat, duliin barli chhangphut kg. thum; hriak leh uain erawh chu khawih buai suh,” a tih ka hria a.

CHHINCHHIAHNA 4-NA: LEI PUM HUAPA THIHNA

⁷Chhinchhiahna palina a han phelh veleh chuan, thil nung palina âw chuan, “Lo kal la, en rawh,” a tih ka hria a.

⁸Tichuan ka han en a, ngai teh, sakawr dang ka hmu a. A chung a chuang hming chu Thihnaa a ni a, Hremhmuna’n a rawn zui a. Chung mite hnenah chuan lei hmun lia thena hmun khat chungah khandaih te, tâm te, hrî te leh lei chung a sa kawlh tak takte hmanga tihlum tura thuneihna pêk an ni a.

CHHINCHHIAHNA 5-NA: MARTARTE AU ÂW

⁹Chhinchhiahna pangana a han phelh a, Pathian thu leh a thu hriatpuina an wawn tlat avânga tihlum tâwkte thlarau, maichâm hnuiaa awm te chu ka hmu a;

¹⁰Anni chuan aw ring taka auvin, “Aw Lalpa, nang mi thianghlim leh dik hian, kan thisen chhuahna phuba la lovin leia chêngte chungah hian engchen nge rorêl lova i awm dâwn?” an ti a.

¹¹Tichuan, anni chu kawrfual vâr an pe theuh va; an bawihpuite leh an unau, anmahni ang bawka thah tûrte chu an thah kim hma loh chuan la ngêk rih turin an hrilh a.

CHHINCHHIAHNA 6-NA: LEI LEH VAN BUAINA

¹²Chhinchhiahna parukna a phelh lai chu ka en reng a; ngai teh, nasa takin lîr a lo ngêng a, ni chu saiip lazai dum angin a lo dum a, thla chu thisen angin a lo awm ta a.

¹³Vana arsîte chu leiah an tla a, theipui kung thlipuiin a nuai tîl ang mai hi a ni a.

¹⁴Van chu lehkhabu angin a inzial bo daih a, tlang leh thliarkâr zawng zawng chu an awmna ata a insawn bo vek a.

¹⁵Tichuan, leia lal te, milian te, sipai hotu te, mi hausa te, mi chak te, bawihle leh mi zalên zawng zawngte chu pûkah te, tlanga lungpui kârahte chuan an birû a,

¹⁶tlang leh lungpui hnenah te chuan, “Min delh ula, lalthutthlênga thua leh Berâm No thinur hmêl lakah min thukru teh u!

¹⁷A thinurna ni ropui chu a lo thleng ta a nih hi, tu nge ding thei awm ang i le?” an ti a.

BUNG 7**ISRAEL CHHINCHHIAHNA**

¹Chu mi hnuah chuan lei killia Vantirhkoh pali ding ka hmu a, khawmualah leh tuifinriata a tleh loh nân leh, thingkung reng reng pawh a chhêm loh nan leia thli pali chu an chelh tlat a.

²Vantirhkoh dang, Pathian nung chhinchhiahna keng, khawchhak lama lo chhuak ka hmu a. Ani chuan khawmual leh tuifinriat tihchhiat theihna an pek Vantirhkoh palite hnenah chuan ring takin,

³“Kan Pathian chhihhlawhte chu an chala kan chhinchhiah hma loh chuan khawmual te, tuifinriat te leh thingte chu tichhe rih suh u,” tiin a au va.

⁴Chutia an chhinchhiah zât chu ka lo hria a, Israela thlah hnam tina mi nuai khat sing li sang li an chhinchhiah a:

⁵Juda hnama mi sing khat leh sang hnih an chhinchhiah a, Reuben hnama mi sing khat leh sang hnih an chhinchhiah a; Gada hnama mi sing khat leh sang hnih an chhinchhiah a;

⁶Aser hnama mi sing khat leh sang hnih an chhinchhiah a; Naphtali hnama mi sing khat leh sang hnih an chhinchhiah a; Manase hnama mi sing khat leh sang hnih an chhinchhiah a;

⁷Simeon hnama mi sing khat leh sang hnih an chhinchhiah a; Levia hnama mi sing khat leh sang hnih an chhinchhiah a; Isakar hnama mi sing khat leh sang hnih an chhinchhiah a;

⁸Zebulun hnama mi sing khat leh sang hnih an chhinchhiah a; Josepha hnama mi sing khat leh sang hnih an chhinchhiah a; Benjamin hnama mi sing khat leh sang hnih an chhinchhiah a ni.

HREHAWM RÂPTHĹAK HUNA MIPUITE

⁹Chumi hnuah chuan ka han en a; ngai teh, mipui tam tak tuma chhiar sên loh, hnam tina mi te, chi tina mi te, mi tina mi te leh tawng tina mi te chu kawrfual vâr inthuaama tûmkau kengin, lalthutthlêng hma leh Berâm No hmaa ding thup chu ka hmu a;

¹⁰aw ring takin an au va, “Chhandamna chu lalthutthlênga thua kan Pathian leh Berâm No ta a ni!” tiin.

¹¹Vantirhkoh zawng zawng chuan lalthutthlêng leh upate leh thil nung palite awmna chu an din hual a, lalthutthlêng hmaah chuan an bawkkhup a, Pathian chu chibai an buk a,

¹²“Amen! Malsâwmna te, ropuina te, finna te, Lawmthu te, chawimâwina te, thiltihtheihna te leh chakna te chu, Chatuanin kan Pathian hnenah awm rawh se. Amen,” an ti a

¹³Upa zinga pakhat chuan, “Heng kawrfual vâr inthuahte hi tute nge ni a, khawi aţanga lo kal nge an nih?” tiin mi zâwt a.

¹⁴Kei chuan a hnenah, “Ka pu, nangman i hre zâwk alawm,” ka ti a. Ani chuan ka hnenah, “Heng mite hi hmun hrehawm rapthlak tak aţanga lo chhuakte an nih hi; an kawrfualte chu sufaiin, Berâm No thisena tihvâr an ni tawh a ni.

¹⁵Chuvângin, Pathian lalthutthlêng hmaah an awm a, a tempulah chuan achhûn azânin a rawng an bawl thîn. Lalthutthlênga thua ngei chu an zingah a chêng reng tawh dâwn a ni.

¹⁶An rilâm leh tawh lo vang a, an tuihâl leh tawh hek lo vang; ni sâ an tuar tawh lo vang a, thil sâ reng rengin a tihrehawm tawh hek lo vang.

¹⁷Berâm No, lalthutthlêng laia awm chu an vêngtu a ni ang a, nunna tuikhurahte chuan a hruai ang. Pathianin an mit ata mittui zawng zawng a hrûk hulsak tawh ang,” a ti a.

BUNG 8

CHHINCHHIAHNA 7-NA: TAWTAWRAWT 7 HAM HMAA THIL AWMTE

¹Chhinchhiahna pasarihna a han phelh chuan, darkar chanve vel lai vân chu a reh thuap a.

²Pathian hmaa Vantirhkoh pasarih dingte chu ka hmu a; an hnenah chuan tawtawrawt pasarih pêk an ni a.

³Vantirhkoh dang chu rangkachak rimtui hâlna bûr kengin a lo kal a, maichâm kiangah chuan a ding ta a. Rimtui hâl tûr an pe teuh va, chungte chu mi thianghlim zawng zawngte tawngtâina nen lalthutthleng hmaa rangkachak maichâm chung a hlan tur a ni a.

⁴Rimtui hâl khû leh mi thianghlimte tawngtâina chu, Vantirhkoh kut aţang chuan Pathian hmaah a chho ta a.

⁵Vantirhkoh chuan rimtui hâlna bûr chu a la a, maichâma meiin a tikhat a, leiah a paih thla ta a. Chu veleh chuan thawm ri nuai nuai te, khawpui ri te, kawlpê te leh lîrnging te a lo awm nghal a.

⁶Tichuan, Vantirhkoh pasarihte chuan an tawtawrawt pasarih kente chu hâm turin an inring ta a.

TAWTAWRÂWT 1-NA: RAMNGAW A TICHHIA

⁷Vantirhkoh pakhatna chuan a han hâm a: tichuan, rial leh mei, thisen nêna inpawlh chu leiah a sûr ta chiam a. Tichuan, thingkung hmun thuma t̃hena hmun khat a kâng ral a, hlobet hringte pawh a kâng ral ta vek a.

TAWTAWRÂWT 2-NA: TUIFINRIAT A TICHHIA

⁸Vantirhkoh pahnihna chuan a han hâm a: tâng lian pui, meia kâng hluah hluah ang hi tuiфинriatah chuan an paih thla a; tuiфинriat chu hmun thuma t̃hena hmun khat thisenah a lo chang ta a.

⁹Tuiфинriata nungcha awm zawng zawng hmun thuma t̃hena hmun khat an thi ta a; lawngte pawh hmun thuma t̃hena hmun khat tihchhiat a ni ta baw k a.

TAWTAWRÂWT 3-NA: TUIHNÂTE A TICHHIA

¹⁰Vantirhkoh pathumnain a han ham chuan, arsi lian pui, meichher anga alh zuai zuai hi van aţangin a lo tla a, lui hmun thuma t̃hena hmun khat leh tuikhur chungah te a tla a.

¹¹Chu arsi hming chu ‘Sai’* a ni. Tichuan, tui hmun thuma t̃hena hmun khat a kha ta vek a, tui chu a khâk êm avângin mi tam takin an thih phah a ni.

TAWTAWRÂWT 4-NA: VÂN A TICHHIA

¹²Vantirhkoh palina chuan a han hâm a: ni chu hmun thuma t̃hena hmun khat, thla hmun thuma t̃hena hmun khat, arsite pawh hmun thuma t̃hena hmun khat chu a lo thim ta vek a. Chhûn lam hmun thuma t̃hena hmun khat a êng ta lo va, zân lam pawh chutiang baw k chuan a awm a.

¹³Tichuan ka han en a, Vantirhkoh vân laizawla thlawkin aw ring taka, “Leia la khawsa hote chung a pik e, a pik e, a pik e, Vantirhkoh pathumin tawtawrawt an la hâm dâwn cheu si a!” a tih ka hria a.

BUNG 9

TAWTAWRÂWT 5-NA: LEILÂWT KHAU PUANG TUR

¹Vantirhkoh pangana chuan a han hâm a: vân aţang leia tla tawh arsi ka hmu a. A hnenah chuan khuarkhurum mawng nei lo, Leilâwt chabi pêk a ni a.

²Ani chuan khuarkhurum mawng nei lo chu a han hawng a; leilâwt aţang chuan meikhu nasa tak a lo chhuak a. Chu leilâwt meikhu avâng chuan ni leh boruak chu a lo thim ta vek a.

³Chu meikhu zing aţang chuan leiah hian khau an lo chhuak teuh va. Chûngho hnenah chuan he leia khawmualkaikuangten an neih ang thiltihtheihna an pe a.

⁴Leia hnim hring te, thil hring te, thingkung te pawh tichhe lo tura thu pêk an ni a; mahse an chala Pathian chhinchhiahna nei lote sawisak erawh chu phalsak an ni.

⁵Tihhlum erawh chu an phalsak lo va, thla nga chhung nghaisa turin an hrilh thung a. An nghaisak dan chu khawmualkaikuangin mi a seha a tihrehawm ang hi a ni.

⁶Chutih hunah chuan miten thihna an zawng ang a, an hmu lo vang; tih an chak hlih hlih ang a, mahse thihna chuan a tlan bosan zawk ang.

⁷Chûng khau pianzia chu indo nâna sakawr an thuam ang deuh hi a ni. An lû-ah chuan rangkachak ang deuh lukhum an khum a; an hmai chu mihring hmai ang tak hi a ni.

⁸Hmeichhe sam ang sam an nei a, an hâ te chu sakeibaknei hâ ang mai a ni.

⁹An âwmpêh atân thir âwmpêh ang an nei a; an thla zâp tâwm chu sakawr leh tawlailir tam tak indo tura tlan ri dur dur ang a ni.

¹⁰An mei chu khawmualkaikuang mei ang a ni a, an mei chuan mi an zûk thei a. Thla nga chhûng mihringte tihnat theihna pêk an ni a.

¹¹Leilâwt chuan tirkoh neiin, an chungah lal angin a awm a, a hming chu Hebrai tawngin Abaddona* a ni a, Grik tawnga a hming chu Apoliona* a ni.

¹²Chungpikna hmasa ber chu a zo ta a. Ngai teh, chumi hnu chuan chungpikna pahni a la awm cheu mai.

TAWTAWRÂWT 6-NA: EUPHRATES AţANGIN VANTIRHKOHE

¹³Vantirhkoh parukna chuan a han hâm a: tichuan Pathian hmaa rangkachak maichâm ki pali aţangte chuan âw ka hria a,

¹⁴tawtawrawt keng Vantirhkoh parukna hnenah chu âw chuan, “Euphrates lui puia Vantirhkoh pali phuarte khu phelh rawh,” a ti a.

¹⁵Tichuan, chumi darkar, chumi ni leh thla leh kum atâna an lo buatsaih tawh, Vantirhkoh palite chu mihring hmun thuma t̃hena hmun khat tihlum turin an chhuahtir ta a.

¹⁶Sakawr chung a chuang sipai rualho tamzia chu maktaduai zahni lai an ni tih an sawi ka hria.

¹⁷Inlârnaah chuan sakawrte chu hetiang hian ka hmu a: a chung a chuangte chuan mei anga sen âwmpêh leh a dumpawl

tak deuh leh kê ang eng tûk mai an nei a; sakawr lû-te chu sakeibaknei lu ang a ni a, an kê aţang chuan mei te, meikhu te leh kâtte a lo chhuak a.

¹⁸Chûng hri pathum, an kê aţanga lo chhuak mei te, meikhu leh kê te chuan mihring hmun thuma ţhena hmun khat zet an tihlum ta a.

¹⁹Sakawr thiltihtheihna chu an kê-ah leh an meiah chuan a awm a; an meite chu rûl ang a ni a, lu an nei a; chu chuan mi an tina ţhin a.

²⁰Chung hri chhiain a tihlum bâng mihringte chuan anmahni kutchhuak thilsiam biak an sim chuang lo; ramhuaite, rangkachak milim te, tangka te, dêr te, lung te leh thinga siam milem, engmah hmu thei lo, hre thei lo leh kal thei lo biak chu an sim duh chuang lo.

²¹Tualthah te, dêwi te, inngaihna bawlhhlawh te leh an rukrûk chin ţhin te pawh an sim chuang hek lo.

BUNG 10

VANTIRHKOH CHAK LEH LEHKHABU TÊ CHU

¹Vantirhkoh chak tak, chhûma inthum, van aţanga lo chhuk ka hmu a. A lû-ah chuan chhimbâl a zâm a, a hmai chu nî ang a ni a, a kê te chu mei ban ding ang a ni.

²A kutah chuan lehkhabu te tak te inkeu sa a keng a. A ke ding lamin tuifinriat a rap a, a vei lamin khawmual a rap a,

³ring takin, sakeibaknei angin a hâhum vak a. A hrâm laiin khawpui ri pasarihte chuan âw an lo chhuah ve baw a.

⁴Chutia khawpui ri pasarihten âw an chhuah lai chuan ka lo ziak dâwn a; chutih laia van aţanga âw lo chhuak ka hriat chuan, “Khawpui ri pasarihte thu sawi chu châr tlat la, ziak suh,” a rawn ti a.

⁵Vantirhkoh, tuifinriat leh khawmual rap ve vea ding ka hmuh chuan a kut chu van lamah a phar chho va,

⁶chatuana nung renga, vân leh a chhûnga thil awm te, lei leh a chhûnga thil awm te, tuifinriat leh a chhûnga thil awm te nena siamtu chu chhâlin, “Tihkhawtlai a ni tawh lovang,” tiin chhia a chham a.

⁷Nimahsela, Vantirhkoh pasarihna thâwm rîk hun a thlen dâwn tîpin, a chhiahhlawh zâwlneite hnena a lo puan lawk tawh angin, Pathian thurûk chu a lo thleng famkim tawh ang.

JOHANAN LEHKHABU TÊ A EI

⁸Van aţanga âw ka hriat khân mi be leh a, “Tuifinriat leh khawmual rapa ding Vantirhkoh kuta lehkhabu inkeu saw va la rawh,” mi ti a.

⁹Vantirhkoh hnenah chuan ka va kal a, a hnenah, “Lehkhabu tî kha mi pe rawh le,” ka va ti a. Ani chuan ka hnenah, “La la, ei zo vek rawh; hei hian i pum a tikha vek ang a, i kâah erawh chuan khawizû angin a thlum ang,” a ti a.

¹⁰Tichuan, Vantirhkoh kuta lehkhabu tî chu ka la a, ka ei ta a; ka kâah chuan khawizû angin a thlum a. Mahse ka ei zawh chuan ka pum chu a kha zo ta a.

¹¹Ani chuan ka hnenah, “Mi tam tak te, hnam tam tak te, ţawng tam tak te, lal tam tak te chungchang thu i hrilh lawksak tur a ni,” a ti a.

BUNG 11

HRIATPUITU MI PAHNIHTE

¹Luang tlâwn, tiang ang hi min pe a. Vantirhkoh chu a lo ding a, “Tho la, Pathian tempul chu, maichâm nen, a chhûnga chibai bûktute nen teh rawh.

²Tempul hûngna pawn zâwk tualzawl erawh chu teh tel suh, Jentailte hnena pek a ni tawh e. Anni chuan khaw thianghlim chu thla sawmli pahnih an rap bet dawn a ni.

³Ka thu hriatpuitu pahnihte hnenah chuan thiltihtheihna ka pe ang a, tichuan, saiip puan sinin ni sangkhat zahnih sawmruk chung hrilhlâwkna thu an puang ang,” a ti a.

⁴Chûng chu lei pumpui Pathian hmaa ding oliv kung pahnih leh khâwnvâr dahna pahnihte chu an ni.

⁵Mi tupawhin anni chu tihnat duh ang sela, an kê aţangin mei a lo chhuak ang a, an hmelmâte chu a kâng ral mai ang. Tichuan, anmahni tihnat tumtute chu chutiang taka tihlum tûr an ni a.

⁶Chûng mite chuan hrilhlawkna thu an hril chung zawnga ruah sur lo turin van khâr phui vek theihna an nei a; tui thisena chantir theihna an nei baw a, an duh chuan hri chhia hmanga khawvel hrem theihna an nei baw.

HRIATPUTUTE THAH AN NI

⁷An hriatpuina thu an hril zawh hunah chuan, khuarkhurum mawng nei lo aţanga sakawh lo chhuak chho chuan anmahni a rawn do ang a, a hneh ang a, a tihlum baw ang.

⁸An ruang chu khaw ropui kawthlêrah chuan a awm reng ang a; chu chu thlarau lama Sodom leh Aigupta an tih chu a ni a, kan Lalpa an khenbehna hmun kha a ni baw a.

⁹Tichuan, mi tin, chi tin, ţawng tin leh hnam tinte chuan ni thum leh a chanve chhûng an ruangte chu an en huai huai ang a, an ruangte chu thlana phûm an phal lo vang.

¹⁰Leia cheng mihringte tihrehawmtu zâwlnei pahnihte chu tihlum an nih tâk avângin lei mihringte chu an lawm êm êm ang a, intihlimna te siamin, lâwmna thilpêkte an inpe tawn vêl dâwn a ni.

HRIATPUTUTE LO THO LEH

¹¹Ni thum leh a chanve hnuah chuan Pathian hnen ata nunna thâw chu an chhungah a lo lût a, an lo ding chhuak leh ta mai a; a entute chuan namên lovin an hlau ta a.

¹²Van aţanga aw ring tak lo chhuak chuan, “Hetah hian lo chho rawh u,” a rawn ti a. Chhûm zîngah chuan vanah an chho va; an hmêlmate pawhin an hmu reng a.

¹³Chutih lai tak chuan lîr nasa takin a lo nhîng a, khawpui chu hmun sâwma ţhena hmun khat a chim vek a. Lîrngîngah chuan mi sangsarih an thi a; a la damte chuan hlau êm êmin van Pathian hnenah chawimawina an hlân ta hial a.

¹⁴Tichuan, chungpikna pahnihna chu a zo ta a. Ngai teh, chungpikna pathumna pawh a lo thleng thuai dawn e.

TAWTAWRÂWT 7-NA: LALRAM PUAN CHHUAH A NI

¹⁵Vantirhkoh pasarihna chuan a han hâm a: vânah chuan aw ring takin, “He khawvel lalram hi kan Lalpa leh a Krista lalna ram a lo ni ta; ani chuan chatuanin ro a rêl dawn si a!” tiin an au ta dur dur a.

¹⁶Pathian hmaa an lalthutthlenga thu upa sawmhnih leh palite chu an bawkkhup a, Pathian chibai an bûk a,

¹⁷“Aw Lalpa, Engkimtithei Pathian, Awm-mêka leh Awm-tawha leh Lo La Awm Zel Tura chu i ni, i thil tihtheihna ropui tak chuan ro i rêl avângin lâwmthu kan hrilh a che.

¹⁸Hnamte chu an thinur takzet a, i thinurna pawh a lo thlen ve tâk hi. Mitthite tana ro i relsak hun chu i chhiahhlawh zâwlneite leh mi thianghlimte tan lawmman i pek hun a ni si a, i hming thiitu milian leh mi tete chenin. Lei tikhawlotute chu i tihchhiat ve hun a thleng ta si a,” an ti a.

¹⁹Tichuan, vana Pathian tempul chu a lo inhawng a, a tempul chhungah chuan a thuthlunna bâwm chu a lo lang ta a. Kâwl a phe zuai zuai a, a ri rum rum a, khawpui a ri dur dur a, lir a lo nging a, rial lian pui puite a tla chiam a.

BUNG 12**HMEICHHIA, NAUTÊ LEH DRAGON**

¹Vânah chuan chhinchhiahna ropui tak a lo lang a: hmeichhia chu niin a inthuan a, a ke hnuaiah thla a awm a, a lu-ah arsi sâwm leh pahni chuang lallukhum a khum a.

²Chu nu chuan nau a pai a; a vei a, a nau hring tur na tuar chu a têt tuar tuar a.

³Vânah chuan chhinchhiahna dang a lo lang leh a: ngai teh, Dragon sen lian pui, lu sarih leh ki sâwm nei hian lallukhum pasarih hi a lo khum a.

⁴A mei chuan vâna arsi hmun thuma thena hmun khat chu a hrâwm khâwm a, leiah a paih thla ta a. Hmeichhiain nau a hrin dawn mêk laiin, a hrin veleha lo ei zawh nghâl tumin hmeichhe nau vei hmaah chuan Dragon chu a ding rûn a.

⁵Fapa a hring a, ani chu hnam zawn zawn chung a thir tianga roreltu tur chu a ni. A fa chu Pathian hnenah leh a lalthutthlengah chuan lak chhohvin a awm ta a.

⁶Hmeichhia erawh chu thlalêrah Pathianin a buatsaihsak hmunah chuan a tlânchhe ta a; chutah chuan ni sangkhat zahni sawmruk chhung an châwm ang.

VAN AṬANGA SETANA PAIHTHLAK

⁷Vanah chuan indona a lo awm a; Mikaela leh a Vantirhkohte chuan Dragon chu an do va; Dragon leh a tirhkoh-hote pawh chuan an lo bei let ve a;

⁸Nimahsela, an hneh ta lo va, vanah chuan awmna tûr hmun reng an nei tawh bawh hek lo.

⁹Tichuan, Dragon lian pui, hmasang rûlpui, Diabola leh Setana an tih, khawvel pumpui bumtu chu an paih thla ta a; leiah an paih a, a tirhkohho zawn zawnge pawh an paih thla tel vek a.

¹⁰Vânah chuan ring taka au âw ka hria a: “Tûnah zet chuan kan Pathian chhandamna te, a chakna te leh a lalram chu a Krista

thiltihtheihnate nen a lo thleng ta e; kan unaute hêktu, kan Pathian hmaa achhûn azâna hêk thiintu chu paih thlâk a ni ta.

¹¹Berâm No thisen leh an thu hriatpuina thu avangin ani chu an hneh ta; an nunna pawh chûn huam khawpin an ngainêp tawh si a.

¹²Chuvâng chuan âw, vante leh a chhunga awm te u, hlim rawh u! Leilung leh tuifinriata chengte chung a pik e! Diabola chuan hun tîem tê chauh a nei tawh tih a inhriat avânga thinur êm êmin in hnenah a lo chhuk ta a nih hi,” a ti a.

HMEICHHIA TIHDUHDAH A NI

¹³Dragon chuan leia paihthlâk a ni tih a inhriat veleh Fapa bringtu hmeichhia chu a tiduhdah ta a.

¹⁴Mahse, hmeichhia chu thlalêra ama hmuna a thlawh luh theih nân mupui lian tak thla khing hnih an pe a; rûlpuiin a ban phâk lohna hmunah chuan hun khat leh hunte leh hun chanve* chung zawn hmeichhia chu an châwm dâwn a ni.

¹⁵Tichuan, rûlpui chuan hmeichhia chu tui liana len botir tumin a kê aṭang chuan luipui tui ang maiin a puh chhuak vak a.

¹⁶Nimahsela, leiin hmeichhia chu a lo ṭanpui a; lei chuan a kê a âng vak a, Dragonin a kê aṭanga a puh chhuah tui lian chu a lem zo ta vek a.

¹⁷Dragon chu hmeichhe chungah chuan a thinur ta em em a, a thlah la awmho zawn zawn, Pathian thupek zâwma, Isua Krista hriattirna thu ṭan tlattu apiang do turin a thawk chhuak ta a.

BUNG 13**TUIFINRIAT AṬANGIN SAKAWLH**

¹Tuifinriat tiauphovah chuan ka lo ding a. Sakawlh, lu sarih leh ki sâwm nei tuifinriat aṭanga lo chhuak ka hmu a, a kê-ahthe chuan lallukhum sâwm a awm a, a lû-ahthe chuan Pathian sawi chhiatna hming a chuang kuau va.

²Sakawlh ka hmuh chu keitê ang a ni a; a kete chu savawm kê ang a ni a, a kê chu sakeibaknei kê ang a ni. Dragon chuan amah chu thiltihtheihna te, a lalthutthleng te leh a thuneihna ropui tak chu a pe a.

³A lu pakhat chu thihpui tham hiala hliamin ka hmu a; mahse chu hliampui chu a dam ta mai a. Tichuan, khawvêl mi zawn zawnin sakawlh chu mak ti êm êmin an zui dûl dûl a.

⁴Sakawlh hnena thuneihna petu dragon chu pathian angin chibai an bûk dual dual a; “He sakawlh ang hi tu nge awm? Tu nge amah hi do thei ang?” tiin sakawlh pawh chu pathian angin chibai an bûk bawh a.

⁵A hnenah chuan Pathian sawi chhiatna leh thil ropui tak tak sawi theihna kê pek a ni a, thla sawmli pahni chhûng hetiana chhunzawm zêl tura hun pek a ni a.

⁶Tichuan, Pathian hming te, a biakbuk te, vana awm van mipuite leh Pathian meuh pawh a sawi chhe vak vak a.

⁷Mi thianghlimte a do leh a hneh pawh phalsak a ni lehngâl a. Chubâkah chi tinreng te, ṭawn tinreng te leh hnam tinreng te chung a thuneihna a hnenah pek a ni bawh a.

⁸Leilung siam tirha talh tawh Berâm No Nunna Bua hming ziah ve loh leia cheng zawng zawng chuan amah chu pathian biakin an be dâwn a ni.

⁹Tupawh hriatna tura beng nei chuan hre rawh se.

¹⁰Tupawh sala mantu chu salah a tâng ve ang; tupawh khandaiha tihlumtu chu khandaih veka tihhlum a ni ang. Hetah hian mi thianghlimte tân chhelna leh rinna nghet neih a pawimawhzia a lang a ni.

LEI AṬANGA LO CHHUAK SAKAWLH

¹¹Sakawlh dang lei aṭanga lo chhuak ka hmu a; berâm ki ang ki pahni a nei a, Dragon angin a ṭawng a.

¹²Sakawlh hmasa zâwka thuneihna zawng zawng chu amahin a hmang a; tichuan lei leh a chhûnga cheng zawng zawngte chu thihpui thama hliam dam leh ta Sakawlh hmasa zâwka chu chibai a bûktir baw a.

¹³Chhinchhiahna thil mak ropui tak tak tiin, mipui hmuhah van aṭangin mei a ko thla thei hial a.

¹⁴Sakawlh hmasa zâwk mithmuha thilmak tihtheihna a neih chu lei mihringte bum nan a hmang a; leia chêng mihringte chu khandaiha hliam tuar dam leh ta sakawlh lim a dintir hlawm a.

¹⁵Sakawlh lim hnenah chuan nunna pek theihna a nei a, sakawlh lim baw chu a ṭawngtir thei baw a; sakawlh lim chibai bûk duh lo zawng zawng chu a tihhlumtir baw dâwn a ni.

¹⁶Tichuan mi zawng zawng, a lian a tein, a hausa a retheiin, zalen te, bawih te chu an kut ding lamah emaw, an chalah emaw chhinchhiahna a neihtir vek a;

¹⁷tichuan, sakawlh hming emaw, a chhinchhiahna emaw, a hming nambar emaw neite chauh lo chuan tuman engmah an leia an hralh theih lohna turin.

¹⁸Hetah hian finna a awm a. Chhût thiam chuan Sakawlh nambar chu chhût rawh se; mihring nambar a ni a: chu pa nambar chu 666 a ni e.

BUNG 14

BERAMNO LEH MI 144 000 TE

¹Tin, ka han en vel a, ngai teh, Zion Tlanga Berâm No ding leh, a kiana mi nuai khat singli sangli, an chala a Pa hming inziak ka hmu a.

²Van aṭang chuan thâwm rî, tui tam tak ri hum hum ang leh khawpui ri dur dur thâwm ang hi ka hria a. Ṭingṭang tumtuten ṭingṭang an tum ri ka hre baw a.

³Lalthutthleng hmaah leh thilnung pali leh upate hmaah chuan hla thar ni awm tak hi an sa a; lei aṭanga tlan chhuah tawh mi nuai khat singli sangli te chauh lo chuan tuman chu hla chu an zir ve thei lo.

⁴Chûngho chu hmeichhe laka intibawhlhlawh lo, invawng thianghlim an ni. Chûng mite chu Berâm No kalna apianga zuitute an ni. Chûngho chu Pathian leh Beram No tan rah hmasa ber ni turin mihring zing aṭanga tlan chhuah an ni a.

⁵An kê aṭangin dâwt thu rêng a chhuak ngai lo, Pathian lalthutthleng hmaah meuh pawh sawiselbo an ni si a.

VANTIRHKOH PATHUMTE THUPUAN

⁶Vantirhkoh dang ka hmu a, chu mi chu leia cheng hnâm tinreng te, chi tinreng te, ṭawng tinreng te, mi tinreng te hnena chatuan Chanchin Ṭha tlangaupui turin vanlaizâwlah chuan a thlawk kual a,

⁷ani chu ring takin a au va, “Pathian chu hlau ula, chawimawi rawh u, a rorel hun a lo thleng ta si a; van te, lei te, tuifinriat leh tuihnâte siamtu chu chibai bûk rawh u,” tiin.

⁸Vantirhkoh dangin a rawn zui a, ani chuan, “Babulon khaw ropui, a hur luat avânga hnam zawng zawng thinurna uain intirtu chu, a tlawm ta, a tlawm ta,” tiin a au va.

⁹Vantirhkoh pathumna chuan a rawn zui ve leh a, aw ring takin, “Mi tupawhin Sakawlh leh a lim chibai bûka, an chalah emaw, an kutah emaw chhinchhiahna an neih chuan,

¹⁰chu mi ngei chuan Pathian thinurna zu fir, Pathian thinurna noa mi chu a in zo ṭhak ang. Berâm No mithmuhah leh Vantirhkoh thianghlimte mithmuhah mei leh kâta nghaisakin a awm baw ang.

¹¹Chutiang mite nghaisakna meikhu chu chatuanin a khu chho reng tawh ang a; sakawlh leh a lim chibai bûktute, a hming chhinchhiahna putu apiang chuan achhûn azânin chawlh reng an nei lo vang,” tiin a au va.

¹²Hetah tak hian Pathian thupek awiha, Isua ringa vuan tlattu mi thianghlimte chhelna a awm a ni.

¹³Tichuan, van aṭangin awin, “Hetî hian zia rawh: “Tûn aṭang chuan mitthi, Lalpaa thite chu an nihlawh ang,” tiin mi hrilh a. Thlarau chuan, “Ni e, an thawhrimna aṭangin an châwl hahdam tawh ang a, an thawhrahte chuan a zui ve tawh dawn a ni,” a ti a.

LEI BUHSENG

¹⁴Ka han en a, chhûm vâr ka hmu a; chhûm chungah chuan Mihring Fapa ang tak mi pakhat hi a ṭhu a, rangkachak lallukhum a khum a, favah hriam tak a keng baw a.

¹⁵Tempul aṭangin Vantirhkoh dang a lo chhuak a, chhûm chungah ṭhu hnênah chuan aw ring takin, “I favah kha phawrh la, buh chu ât rawh; i tan ah a hun tawh si a; lei buh chu a hmin tawh khu,” a ti a.

¹⁶Tichuan, chhûm chungah ṭhu chuan a favah chu leiah a han vilik a, lei buh chu an seng ta a.

THINURNA GRÊP SÂWR A NI

¹⁷Tempul chhûng aṭang chuan Vantirhkoh dang a lo chhuak leh a, ani pawh chuan favah hriam tak a keng baw a.

¹⁸Vantirhkoh dang, mei chungah thuneitu chu maichâm aṭangin a lo chhuak baw a; favah hriam tak kengtu hnenah chuan aw ring takin, “I favah hriam tak kha phawrh la, leia grêp hrui rah bâwrte khu zuk ât chhum rawh; grêp rahte khu a hmin ṭuah tawh êm khu,” tiin a au va.

¹⁹Tichuan, Vantirhkoh chuan a favah chu leiah chuan a vilik a, leia grêp rah chu an seng khâwm a, Pathian thinurna grêp sâwrna khurpuiah chuan a vawm lût chiam a.

²⁰Khawpui pâwna grêp sâwrna khurah chuan an rap sâwr a, grêp sawrna khur aṭanga thisen lo luang chhuak chu, sakawr

lakam* chim phâka thukin, km. zathum vela thui a luang ta a.

BUNG 15

BERHBU RORÊLNA THUHMA

¹Vânah chuan chhinchhiahna dang, ropui tak leh mak tak ka hmu a; Vantirhkoh pasarihte chuan hremna hnunung ber pasarih an keng a, chungah te chuan Pathian thinurna chu a kim tawh ang.

²Darthlalang tuipui ang mai, mei nena inpawlh ka hmu a; sakawlh te, a lim te, a chhinchhiahna te, a hming nambar te chungah hnehna changtute chuan darthlalang tuipui chungah dingin Pathian tingtang an lo keng hlawm a.

³Pathian chhiahhlawh Mosia hla leh Berâm No hla an sa a: “Lalpa Pathian, Engkimtithei, I hnathawhte chu a ropuiin a mak a; Aw, mi thianghlimte Lalber! I kawngte chu a felin a dik a ni.

⁴Aw Lalpa, tu nge tih lo vang che a, tu nge i hming chawimawi lo vang? Nangmah chauh i thianghlime si a. I rorelna chu tihlan a nih tawh avangin, Hnam tinreng i hnêna lo kalin chibai an rawn bûk ang che,” tiin.

⁵Chûng hnua chuan ka han en a, van tempul chhunga hriatpuina pindan chhungril chu a lo inhawng a.

⁶Tempul atang chuan Vantirhkoh pasarih, hremna hri chi sarik kengte chu puan êng tak sinin, an âwmah rangkachak âwmhrêna inhrêng chungin an lo chhuak a.

⁷Thilnung pali zinga pakhat chuan Vantirhkoh pasarihte hnenah chatuana nung reng Pathian thinurnaa khat rangkachak berhbu pasarih a pe a.

⁸Tempul chhung chu Pathian ropuina leh a thiltitheihna khûin a khat a, Vantirhkoh pasarihten hremna pasarih an hlen chhuah hma loh chu tempulah chuan tumah an lût thei lo.

BUNG 16

¹Tempul atanga aw ring tak lo chhuak ka hriat chuan Vantirhkoh pasarihte hnenah, “Kal ula, Pathian thinurna berhbute chu lei chungah chuan leih baw rawh u,” a ti a.

BERHBU 1-NA: PÂN CHHE TENAWM

²A hmasa ber chu a kal a, a berhbu chu lei chungah chuan a leih bua a; tichuan, sakawlh chhinchhiahna neite leh a lim chibai bûktute chuan pân chhe tenawm an vei ta hlawm a.

BERHBU 2-NA: TUIFINRIAT THISENAH A CHANG

³Vantirhkoh pahnihna chuan a berhbu chu tuifinriatah a leih bua a; chu veleh mitthi tawh thisen angin thisenah a chang ta a; tichuan, tuifinriata awm thil nung tinrêng chu an thi ta vek a.

BERHBU 3-NA: TUI THISENAH A CHANG

⁴Vantirhkoh pathumna chuan a berhbu chu luahte leh tuikhurahte a leih bua a; tichuan, thisenah a chang ta a.

⁵Tui Vantirhkoh chuan heti hian a sawi ka hria: “Aw Lalpa, midik chu i ni, hetiang hian ro i rel ta si a, nang chu Awm-Meka leh Awm-Tawha leh Awmzel Tura chu i ni si a.

⁶Mi thianghlimte leh zâwlneite thisen chhuah thintute in turin thisen vêk i pek ve tak hi; an chan tur reng a ni e,” a ti a.

⁷Maichâm atang chuan mi dangin, “A dik a ni, aw Engkimtithei Lalpa Pathian, i rorelnate chu a dikin a fel a ni,” a tih ka hria.

BERHBU 4-NA: MEISÂIN MIHRINGTE A EM ÛT

⁸Vantirhkoh palina chuan a berhbu chu nî-ah a leih bua a; tichuan, nî chu mei sâa mihringte em ùt turin thiltitheihna pek a ni a.

⁹Tichuan, mihringte chu mei sa tak mai chuan a em ùt ta hlawm a, chûng hremna chungah thuneitu Pathian hming chu an sawi chhe vak vak a, amah an chawimawi lo va, an sim duh chuang lo.

BERHBU 5-NA THIM LEH NÂ

¹⁰Vantirhkoh pangana chuan a berhbu chu sakawlh lalthutthlengah a leih bua a; tichuan, a lalram chu a lo thim ta vek a; an na tuar chuan an leite chu an seh a.

¹¹An na tawrhte leh an pânte avâng chuan vân Pathian chu an sawi chhia a; an thiltih chu an sim duh chuang lo.

BERHBU 6-NA: EUPHRATES LUI KANGCHAT

¹²Vantirhkoh parukna chuan a berhbu chu Euphrates luipui chungah a leih bua a; a lui tui chu a kangchat ta vek a, chu chu khawchhak lam atanga lal lo kal tûrte tâna kawng lo buatsaihna tûr a ni a.

¹³Dragon kê atang leh sakawlh kê atang leh zâwlnei suak kê atang chuan thlarau bawhlhlawh pathum, chungû ni awm tak lo chhuak ka hmu a.

¹⁴Chungte chu ramhuai thlarau, thil mak ti thinte an ni a; anniho chu Pathian Engkimtitheia ni ropuia indonaa hruai khâwm turin, leia lalte hnenah leh khawvel pumah an kal chhuak ta a.

¹⁵“Ngai teh u, rûkru angin ka lo kal dâwn. Inralringa inpeih sa diamte chu an nihlawh e; chuti lo zawng, saruaka a awm lai miten an hmu ang a, a zahthlâk ang e.”

¹⁶Tichuan, hmun pakhat, Hebrai tawnga Armageddon an tihah chuan an hruai khâwm ta a.

BERHBU 7-NA: LEI PUMPUI TIHNGHÎN A NI

¹⁷Vantirhkoh pasarihna chuan a berhbu chu boruakah a leih bua a; chu veleh vân tempul chhûnga lalthutthleng atang chuan, “A kin ta!” tiin ring takin âw a lo chhuak a.

¹⁸Tichuan, ri nasa tak a lo awm a, khawpui a ri dur dur a, kâwl a phe zuai zuai a; lîrpui a lo nhîng a, leia mihring awm tirh atangin chutianga lirngghîng nasa rêng rêng chu a la awm ngai lo.

¹⁹Tichuan, khawpui ropui pawh chu hmun thumah a lo inthen darh a, hnam tin khawpuite pawh a tlu sawp vek a. Babulon khaw ropui pawh Pathian thinrim nasatna uaiin no chu dawng ngei turin Pathian hmaah hriatreng a ni.

²⁰Thliarkar zawng zawng chu an tlan bo vek a, tlangte pawh hmuh tur a awm tawh lo.

²¹Vân atangin rial lian pui pui, tlang khat pawh kg. sawmli vela rit theuh chu mihringte chungah a tla chiam a. Mihringte chuan

riala hremna avângin Pathian an sawi chhe vak vak a; chu hremna chu a nasa êm êm si a.

BUNG 17

HMEICHHE SEN LÂR LEH SAKAWLH SEN LÂR

¹Vantirhkoh pasarih berhbu pasarih keng zinga pakhat chuan mi bia a, “Hawh teh, tui tam tak chung a ðu nawhchizuar râpðlak tak an hrem dan ka lo entir ang che;

²leia lalte chuan ani chu an hurpui ðin a, lei mihringte pawh a hurna uaiin chuan a hrai rui ðin,” a ti a.

³Tichuan, Thlarau chuan thlalêrah mi kalpui a. Hmeichhe pakhat, sakawlh sen lâr chung a chuang ka hmu a; chu sakawlh taksa chu a pumin Pathian sawi chhiatna hming hlîrin a khat a, lu sarih leh ki sawm a nei a.

⁴Chu hmeichhia chuan puan sen duk leh sen lâr a sin a, rangkachak te, lung man tam te, tuikeplung tein a inchei a; ama hur bawhlhlawhna leh tenawmnaa khat rangkachak no chu a kutin a chawi a.

⁵A chalah chuan he hming hi a inziak kuau va: “THURÛK, BABULON ROPUI-I, NAWHCHIZUARTE NU, KHAUVÊL TENAWMNA NU” tih hi a ni a.

⁶Chu hmeichhia, mi thianghlimte thisen leh Isuaa martarte thisena rui nu phût mai chu ka hmu a. Ka han hmuh chuan mak ka ti êm êm a.

HMEICHHIA LEH SAKAWLH AWMZIA

⁷Vantirhkoh chuan ka hnenah, “Engtizia nge mak i tih viau le? He nu thurûk leh, a chuanna sakawlh, lu sarih leh ki sâwm nei thurûk hi ka hrlh ang che.

⁸Sakawlh i hmuh kha, awm tawh zeta awm leh ta lo a ni a; khuarkhurum mawng nei lo aţangin a lo chhuak chho va, boralna hmuna kal leh tûr a ni. Leia cheng mihringte zingah, leilung siam tirh aţanga Nunna Bua hming zia lohte chuan chu sakawlh, awm tawha awm leh ta lo, lo la awm leh tura chu an hmuh hunah chuan mak an la ti hle ang.

⁹“Hetah hian rilrua fin ðulzia a lang: Lu sarihte chu hmeichhe ðutna tlang pasarihte chu an ni.

¹⁰Lal pasarih an ni bawk a. Pangate chu an liam tawh a, pakhat chu a la awm a, pakhat erawh chu a la awm rih lo va. A lo kal hunah pawh hun rei lo te chauh awm tur a ni ang.

¹¹Sakawlh awm tawh zeta, awm leh ta lova ngei pawh kha a pariatna a ni a, pasarihte zinga mi a ni bawk a, a la boral ve ang.

¹²“Ki sawm i hmuhte kha lal sawm, mahse lalna la chang rih lote an ni a; darkar khat chhûng erawh chu sakawlh nen lal anga thuneihna an la inţawm ang.

¹³Chungho chuan inthuralin, an thiltihtheihna leh thuneihna te chu sakawlh an pe ang.

¹⁴Chungho chuan Berâm No chu an dorawn ang a, mahse Berâm No chuan a hneh ang; a hnena awm a kohva te, a thlana te leh a tâna mi rinawmte pawhin an hneh bawk ang; ani chu hotute Hotu leh lalberte Lalber a ni si a,” a ti a.

¹⁵Amah vek chuan ka hnênah, “Nawhchizuar ðutnaa tui i hmuhte kha, mi te, mipui te, hnam te leh ðawng te an ni.

¹⁶Sakawlh leh ki sawm i hmuhte ngei chuan nawhchizuar chu an hua ang a, engmah nei lo leh saruakin an siam ang; a sa pawh an ei ang a, meiin an hâl ral dâwn a ni.

¹⁷Pathianin a thil tum tihlawhtling tur leh a thu chu hlen chhuah a nih theih nan lalhote rilruah inthuralna a siamsak ang a, sakawlh hnenah pawh an lalram te chu an pe phal hial dâwn a ni.

¹⁸Hmeichhia i hmuh kha khawpui ropui, leia lalte chung a roreltu chu a ni,” a ti a.

BUNG 18

BABULON ROPUI TLÛKCHHIATNA

¹Chûng hnuah chuan van aţanga lo chhuk Vantirhkoh dang, thuneihna ropui tak nei hi ka hmu a; a ropuina chuan lei chu a chhun êng vek a.

²Awrâwl chak tak leh ring takin a au va, “Babulon khaw ropui chu a tlâwm ta, a tlâwm ta; ramhuaite tawm khâwmna, thlarau bawhlhlawh tinrêngte kharkhipna hmun, sava bawhlhlawh leh huatðlala tinrêngte kulhbing mai a lo ni ta!

³A hur vânga thinurna uaiin chu hnam zawng zawngin an intulh rui zo tawh si a; khawvêl lalte chuan ani chu hurna khurah an luhpui a, khawvêla sumdâwnge chuan hleihluak taka a nawmsak chenna chu an hausak phah ðin,” tiin.

⁴Van aţang chuan aw dang ka hre leh a: “Ka mite u, kha nu kha chhuahsan rawh u; chuti lo zawng, a suahsualnaah khan in tel ve ang a, a hremna tuar turte chu in tuar ve palh ang e.

⁵A suahsualnate chuan vân a tawng ta, a sualzia chu Pathianin a hai rêng rêng lo a ni.

⁶In chung a tihdan ang chiahin ani chungah pawh ti ula, a thiltih apiang chu a lêt ðakin thungrûl rawh u; in tur nova a chawhpawlh sa pawh chu a leh hnihin chawhpawlh sak rawh u.

⁷A intihropuina leh a intih nawmsak dan ang zel khân nghaisain tilungngai ve rawh u; a rilruin, ‘Lalnuah ka ðu a, hmeithai pawh ka ni lo va, lungngaihna tur ka nei lo ve,’ a ti vei a.

⁸Chuvângin, ni khat chhûng maiin thihna te, lusunna te leh tàmna te hmangin hremna a tuar ang. Meipua hâl ral ðak tur a ni a, chuti khawpa nasa chuan Lalpa Pathianin chu hmeichhe chungah chuan ro a rel ta a ni.

KHAUVÊLIN BABULON TLÛ A SÛN

⁹Inngaihna khura a lo tlûkpuite leh a nawmsak bawlpui ðin leia lalte chuan amah kâng raltu meikhu an hmuh hunah chuan ðap chungin an la sùn ang a,

¹⁰nghaisak a tuar ang tawrh ve hlauvin hla takah an ding ang a, ‘A va pawî êm, Babulon khawpui ropui leh khaw namênlo chu le! Darkar khat chungin i chungah rorelna a lo tla ta mai si a,’ an la ti ang.

¹¹“Leia sumdâwngho pawhin amah chu an ðah ang a, an la sùn ang; tuman an thil zawrhate an leisak tawh si lo va.

¹²An sumte chu rangkachak leh tangkarua te, lung man tam leh tuikeplung te, puan zai sin leh puan sen duk te, maimaw puan leh puan sen lâw te, thing rimtui tinreng te, saingho thil tinreng te, thing tha ber chi leh dar leh thir leh sailungvara siam bungbêl tinreng te nen;

¹³thakthing te, rimtui hâl chi te, hriak rimtui leh beraw te, uaiin leh oliv hriak te, chhangphut leh buh te, sebâwng leh berâm te, sakawr leh tawlailir te, sal anga an zawrh mihringte nen a ni.

¹⁴I thei rah chak zawng tak mai te kha a bo vek tawh, thil tuihnai leh mawi zawng zawng te pawh a bo vek a, i hmuh phâkah a awm tawh lo.

¹⁵Chung thila sumdâwngte leh amah avânga lo hausate chu ãapa lungngai chungin, nghaisakna a tawrh ang tawrh ve hlauvin hla takah an ding ang a,

¹⁶A pawî em mai, khatiang khawpui ropui, puan zai sin leh puan sen duk leh sen lâw sina, rangkachak leh lung man tam leh tuikeplunga thuam mawi a nih vei nê!

¹⁷Chutiang hausakna ropui chu darkar khat chhûng lekin engmah lovah a chang ta, an la ti ang. Lawng hotu te, lawnga zin ãhin zawng zawngte, lawng khalhtute, lawnga sumdâwngte chu hla taka dingin,

¹⁸a kâng khû thlir chungin, ‘Hei ang khaw ropui hi a awm leh thei dâwn em ni?’ tiin an au va.

¹⁹“An lû-ah vaivut an phul a, ãap leh lungngai chungin, ‘A va râpthlak em, chu khaw ropui tak chu. Tuifinriata lawng neitu zawng zawngten a hausakna zâr an zo ãhin a! Mahse darkar khat chhûng lekin a ram dêr si taka maw!’ an ti ang.

²⁰“Aw, van te, nangni tirhkohte leh zâwlnei thianghlim te u, hlim rawh u, a chungah Pathianin in phuba a laksak tak che u hi!” tiin.

BABULON TLÛK HLENNÄ

²¹Vantirhkohe chak tak hian buh râwt sawmna lung lian pui ang hi lung a chawi a, tuiptuah a paîh thla vak a, “Babulon khaw ropui chu hetiangna nasa hian paîh thlâk a ni ang a, hmuh tûr a awm leh tawh ngai lo vang.

²²Ûingtang te, phênglâwng te, tawtawrâwt te chu i chhungah an tum ri tawh ngai lo vang. I chhungah hian kut themthiam hnathawh rêng rêng hmuh tur a awm tawh hek lo vang a, buh her thâwm hriat tur a awm tawh hek lo vang.

²³Khâwnvâr pawh i chhûngah chhit ên a ni tawh lo vang a; mo leh moneitu thâwm rêng rêng i chhungah hriat a ni tawh ngai lo vang. I sumdâwngtute chu leia miliante an ni si a; i dâwi avângin hnam zawng zawng pawh buma an awm kha.

²⁴A chhungah zâwlneite, mi thianghlimte leh, lei chungah an thah zawng zawngte thisen chu hmuh tur a awm si a,” a ti a.

BUNG 19

BABULON CHHIATNAAH VÂN MITE AN LÂWM

¹Chung thil hnuah chuan, vânah mipui tam takin aw ring takin, “Halleluia! chhandamna te, ropuina te, thiltihtheihna te chu Lalpa kan Pathian ta a ni!

²A rorelnate chu a dikin a ãha si a; ani chuan nawhchizuar râpthlak tak, a hurna avânga lei tikhawlotu chungthû chu a rêl a, a chhiahhlawhte thisen chhuahtu chungah chuan phuba a lâk tâk hi,” an ti a.

³“Halleluia! A kâng khû chu chatuanin a chho dâwn si a!” an ti leh a.

⁴Upa sawmhnih pali leh thil nung palite chu an bawkkhup a, “Amen! Halleluia!” tiin, lalthutthlenga ãhu Pathian chu chibai an bûk a.

⁵Tichuan, lalthutthleng aãangin âw a lo chhuak a, “Nangni a chhiahhlawh zawng zawng, amah ãhtu milian leh mitete u, kan Pathian chu fak rawh u!” a ti a.

⁶Mipui tam tak âw ang leh, tui tam tak ri hum hum leh, khawpui nasa taka ri dur dur angin, “Halleluia! Lalpa Pathian Engkimtithia chuan ro a rêl tâk hi!

⁷Hlim takin i lawm ang u, amah chu chawimawi ila, Berâm No nupui neih hun chu a lo thleng ta a, a nupui pawh a inpeih tawh e,” an ti a.

⁸Puan zai sîn fai leh vâr tle ser ser an sintir a, puan zai sîn chu mi thianghlimte dikna a ni si a.

⁹Ani chuan ka hnenah, “Tihian ziaak rawh: ‘Berâm No nupui neihna ruaitheha sâwmte chu an nihlawh e!’ tiin mi hrilh a.” “Hêng thu hi Pathian thu chhuak dik tak a ni,” tiin ka hnenah a sawi bawk a.

¹⁰Pathian chibai bûka bûk turin a kê bulah ka bawkkhup a. Mahse ani chuan ka hnênah, “Hetî chuan ti suh! Kei chu i bawihpui, Isua thu hriatpuina pawmtu i unaute zinga mi ka ni alawm; Pathian chibai bûk zâwk rawh! Hrilhlâwkna thlarau chu Isua hriatpuina thu hi a ni si a,” a ti a.

KRISTA : SAKAWR VÂR CHUNGAH

¹¹Van inhawng chu ka han hmu a, ngai teh, sakawr vâr leh a chungah chuang chu Rinawma leh Dika an ti a, ani chuan diknain ro a rel a, râk a do ãhin.

¹²A mitte chu meialh ang a ni a, a lû-ah chuan lallukhum tam tak a khum a. A hming ziaak, amah chauh lo chuan tumahin an hriat loh chu a pu a.

¹³A kawrfual hâkah chuan thisen a kai hnuang mai a; a hming chu “Pathian Thua” an ti a.

¹⁴Van sipai rualhote chuan puan zai sîn vâr leh fai tak sinin, sakawr vâr chungahte chuangin an zui dûl dûl a.

¹⁵A kâ aãangin khandaih hriam tak a chhuak a, chu chu hnam tin a sah thlûkna tur a ni a; chung mite chungah chuan ãhir tiangin ro a rêl ang. Pathian Engkimtithia chuan ãhirrimna nasa tak nen a grêp sâwrna khurah chuan a rap sâwr dâwn a ni.

¹⁶A kawrfualah leh a malpuiah chuan “LALBERTE LALBER LEH HOTUTE HOTU,” tih hming ziaak a chuang a.

SAKAWLH LEH A SIPAITE HNEH AN NI

¹⁷Vantirhkohe pakhat nî-a ding ka hmu a; ani chuan vanlaizâwla sava thlâwk zawng zawng hnênah chuan aw ring takin, “Pathian ruai ropui tak ãheh turinrawn pung khâwm ula,

¹⁸lal sa te, sipai hotu sa te, michak sa te, sakawr leh a chung a chuang sa te, mi zawng zawng—bawih te, mi zalen te, milian leh mitete pawh, an zavaia sa chu in ei thei e,” a ti a.

¹⁹Sakawr vâr chung a chuang leh a sipai hote lo do lêt turin sakawh chu leia lalhote leh an sipai rualte nena an inhâw khâwm mup pawh ka hmu baw a.

²⁰Sakawh chu an man ta a; ama rualin zâwlnei suak, a mithmuha chhinchhiahna lo ti thintu leh, a thil mak tihtheihna hmanga sakawh chhinchhiahna nei leh a lim chibai bûktute bum thintu pawh chu an man tel a; an pahni chuan a nung chungin meidîlah, mei leh kâta kângah chuan an paih lût ta a.

²¹Midangho zawng chu sakawr chung a chuang kâ aţanga lo chhuak khandaih chuan tihhlum vek an ni a. Tichuan, sava zawng zawng chuan chûngho sate chu puar takin an ei ta a.

BUNG 20

SETANA KUM 1000 PHUAR A NI

¹Vantirh koh pakhat vân aţanga lo chhuk ka hmu a, khaidiat hrawl zet mai a keng a, khuarkhurum mawng nei lo kawngkhar chabi a keng baw a.

²Ani chuan dragon, hmasang rûlpui, Diabola leh Setana chu a man a, kum sang khat tâng turin a phuar a,

³khuarkhurum mawng nei lovah chuan a paih lût a, a khâr khum a, a châr hnan tlat a; tichuan, kum sang khat a ral hma loh chuan hnamte a bum thei tawh lo vang. Chumi hnuah chuan hun rei lo te an chhuahtir leh rih dawn a ni.

MI THIANGHLIMTEN KRISTA HOVIN KUM SANG RO AN RÊL

⁴Lalthutthlengte ka hmu a, chutah chuan mi an ţu a, an hnenah chuan roelna an hlân a. Isua leh Pathian thu hriatpuitua an ţan tlat avânga an lu an tansak thlaraute pawh ka hmu a; chung mite chuan sakawh leh a lim chu chibai an bûk duh lo va, an chalah emaw, an kutah emaw chhinchhiahna an pu duh baw hek lo. Tichuan, chûng mite chu an lo nung leh a, Krista hovin kum sang khat chhung ro an rêl ta a.

⁵Mitthi dang zawngte erawh chu kum sang khat a ral hma loh chuan tihnun an la ni ve lo. Hei hi thawhleha hmasa chu a ni.

⁶Thawhleha hmasaa telte chu an nihlawhin an thianghlim a ni. Thih hnihna pawhin an chungah eng thu mah a nei pha dawn si lo va, Pathian leh Krista puithiamte an ni ang a, amah nèn kum sang khat chhung ro an rêl zâwk dawn a ni.

SETANA HELNA NUA CHIMIH

⁷Kum sang khat a lo ral hnuah chuan Setana chu a tâna hmun aţangin an chhuahtir leh rih dawn a;

⁸chutichuan, lei kil lia hnamte chu bum turin a kal chhuak leh ngâl ang; Gog leh Magog te chu râl do turin a hruai khâwm chiam ang a, chungho tam tûrza chu tuifinriata ţiauvut ang mai an ni ang.

⁹Tichuan, leilung dâp dul khawpa tamin an kal chho va, mi thianghlimte riah hmun leh khawpui duhawm tak chu an hual a. Mahse van aţangin Pathian hnena mi meipui a lo sûr a, arawn

kâng hlum ta vek a.

¹⁰Anmahni bumtu Diabola chu, Sakawh leh Zâwlnei der awmna, kâta kâng meidîlah chuan an paih lût a. Tichuan, achhûn azâna ngaisak tuar rêng rêngin an awm kumkhua tawh ang.

LALTHUTTHLENG VÂR HMAA RORÊLNA RÂPTHAK

¹¹Tin, lalthutthleng vâr lian pui, a chung a ţu nen ka hmu a, a hma aţang chuan lei leh vân an tlan bo tawh a. An tân awmna tur hmun rêng a awm tawh lo.

¹²Mitthite chu, milian pawh, mite pawh, Pathian hmaa ding ţupin ka hmu a; lehkhate an keu va. Lehkhate dang pawh an keu baw a, chu chu Nunna Bu a ni. Mitthite chu an thiltihte anga lehkhate lo inziak ang zêlin an chungthu rêlsak an ni ta a.

¹³Tuifinriat chuan a chhunga mitthi awmte chu a chhuahtir a, Thihna leh Hremhmun chuan mitthi an kawlte chu an chhuahtir vek a. Tichuan, mi tin an thilti ang zêla rêlsakin an awm ta a.

¹⁴Thihna leh Hremhmun chu meidîlah an paih lut a. Hei hi thih hnihna chu a ni.

¹⁵Chû Nunna Bua hming chuang ve lo apiang chu meidîlah chuan an paih lût zêl a.

BUNG 21

ENGKIM SIAM THAR A NI

¹Hei le, vân thar leh lei thar chu ka hmu ta e; vân hmasa leh lei hmasa te chu an boral daih tawh a. Tuifinriat pawh a awm tawh lo.

²Kei, Johana hian khawpui thianghlim, Jerusalem Thar, a pasal hmuh atâna mawi taka mo a inchei ang mai hian, Pathian hnêna mi vana ta lo chhuk chu ka hmu a.

³Van aţanga aw ring tak chuan heti hian a ti a; “Ngai teh, Pathian chenna in chu mihringte hnenah a lo awm ta, ani chu an hnenah a awm ang a, anni chu a mite an ni ang. Pathian ngei chu an hnenah a awm ang a, an Pathian a ni baw ang.

⁴An mit ata mittui zawng zawng Pathianin a hru hul tawh ang. Thihna a awm tawh lo vang a, lungngaihna te, ţahna te a awm tawh hek lo vang. Natna rêng rêng a awm tawh lo vang, thil hmasate chu a ral tawh si a,” tiin.

⁵Lalthutthlenga ţu chuan, “Ngai teh, thil engkim ka siam thar e,” a ti a. Ka hnênah chuan, “Ziak rawh, hêng thu hi a rinawmin a dik si a,” a ti a.

⁶Ka hnenah chuan heti hian a ti a, “Hlen chhuahtir a ni ta! Kei hi Alpha leh Omega, a Bul leh a Tawp ka ni. Tuihâl apiang hnênah chuan Nunna Tuikhura mi chu a thlâwnin ka pe ang.

⁷Hnehtu apiang chuan thil zawng zawng a rochung ang, a Pathian ka ni ang a, ani chu ka fapa a ni ang.

⁸Amaherawhchu, mi dâwihzep te, ring lo te, tenawm te, tualthat te, mi hur te, dâwithiam te, milem bia te, dawthei zawng zawngte chan tûr chu mei leh kâta kâng dîl a ni a; chu chu thih hnihna a ni,” a ti a.

JERUSALEM THAR

⁹Vantirhkoh pasarih zinga pakhat, berhbu pasariha hremna hnunung ber kengtu kha ka hnenah a lo kal a, “Hawh teh, Berâm No nupui, a mo chu ka entir ang che,” tiin mi bia a.

¹⁰Ani chuan tlang lian pui sâng takah Thlarauvin mi thlawhpui a, khaw ropui, Jerusalem thianghlim, vana Pathian hnen ata lo chhuk chu mi entir a,

¹¹Pathian ropuinain a ên a. A ên dân chu lung man tam ber ang, jasper lung ang mai hi a ni a, krystal anga fim a ni bawk.

¹²Kulh ropui leh sâng tak a nei a, kawngkhâr sawm leh pahnihi a nei a, kawngkhâr bulahte chuan Vantirhkoh sâwm leh pahnihi an awm a. Chung kawngkhârah te chuan hming ziaa a awm bawk a, chungte chu Israela thlah hnam sâwm leh hnam hnihte hming a ni.

¹³Chhak lamah kawngkhâr pathum, hmâr lamah kawngkhâr pathum, chhim lamah kawngkhâr pathum, thlang lamah kawngkhâr pathum a awm a.

¹⁴Khawpui kulh bang chuan lungphum sâwm leh pahnihi a nei a, chungah chuan Berâm No tirhkoh sâwm leh pahnihte hming a chuang a.

¹⁵Mi betu chuan khua leh a kawngkhârte leh a kulhbang teh nan rangkachak luang tiang a keng a.

¹⁶Khua chu killi nei a ni a, a dung lam leh a vâng lam a inchen a. Luang tiang chuan khawpui chu a han teh a, a dung leh vâng leh sân lam chu a inchen vek a, km. sanghnihi leh zali theuh a ni.

¹⁷Kulh bang chu a teh leh a, mihring teh dan pangngaiin (chu chu Vantirhkoh teh dan pangngai chu a ni a) metar sawmruka chhah a ni.

¹⁸A kulh sak nân jasper lung hman a ni a; khawpui chu rangkachak thianghlim a ni a, darthlalang fim tak ang mai hi a ni.

¹⁹Chu khaw kulh lungphmte chu lung man tam chi tinrênga chei mawî a ni a: lungphûm hmasa ber chu jasper lung a ni a; a pahnihi chu sapphir lung a ni a; a pathumna chu kalkidoni lung a ni a; a palina chu emeral lung a ni a;

²⁰a pangana chu sardonik lung a ni a; a parukna chu sardias lung a ni a; a pasarihi chu krusoli lung a ni a; a pariatna chu beril lung a ni a; a pakuana chu topaz lung a ni a; a sawmna chu krusopra lung a ni a; a sawm leh pakhatna chu jasin lung a ni a; a sawm leh pahnihi chu amethis lung a ni.

²¹Kawngkhar sâwm leh pahnihte chu tuikeplung sâwm leh pahnihi, tlang hlawn khat theuhva siam a ni. Chu khawpui kawtlai chu rangkachak thianghlim a ni a, darthlalang ang maia lang tlang thei a ni.

JERUSALEM THAR ROPUINA

²²Khawpui chhûngah chuan tempul rêng rêng ka hmu lo va; Lalpa Pathian Engkimtithia leh Berâm No chu an tempul a ni si a.

²³Khawpui chuan ên turin ni a ngai lo va, thla êng pawh a ngai hek lo; Pathian ropuinain a chhun êng zâwk a ni. An khâwnvâr chu Berâm No a ni.

²⁴Hnam tina ta a chhandamte chu a êngah chuan an lêng ang a; leia lalte chuan an ropuina leh zahawmna an rawn luhpui ang.

²⁵A kawngkate chu chhûnah an khâr tawh ngai lo vang (chutah chuan zan pawh a awm tawh dân si lo va).

²⁶Chutah chuan hnamte ropuina leh mawina chu an la lut ang.

²⁷Chutah chuan thil bawhlhlawh rêng rêng a lût lo vang a, thil tenawm tite leh dawhehte pawh an lut hek lo vang a; Berâm No Nunna Bua hming chuangte chauh an lut ang.

BUNG 22

NUNNA LUI

¹Nunna lui tui fim tak, krystal anga fim, Pathian leh Berâm No lalthutthleng ațanga lo luang chhuak chu mi entir a.

²Kawthlêr lai takah leh, lui kam tuakah chuan Nunna Thing, chi hrang sawm leh pahnihi rah, thla tina rah a awm a. Chu thing hnah chu hnamte tan damna tur a ni.

³Ânhhia rêng rêng a awm tawh lo vang a, Pathian leh Berâm No lalthutthleng chu a awm tawh zâwk ang a, a chhihhlawhten a rawng an bawl ang.

⁴Anni chuan a hmêl an hmu ang a, a hming chu an chalah a chuang bawh ang.

⁵Zân a awm leh tawh lo vang a; khâwnvâr êng leh ni êng an ngai tawh lo vang, Lalpa Pathian chuan anni chu êng a pe dân si a. Tichuan, chatuanin ro an rêl tawh ang.

A HUN CHU A HNAI TA

⁶Ani chuan ka hnenah, “Hêng thu hi a rinawmin a dik a ni,” a ti a. Zâwlnei thianghlimte Lalpa Pathian chuan thil lo thleng thuai turte chu a chhihhlawhte entir turin a Vantirhkohte a tir a.

⁷“Ngai teh, ka lo kal thuai dawn e! He lehkhabya hrilhlâwkna thu pawm apiang chu an nihlawh e,” a ti a.

⁸Kei, Johana hian hêng thil zawng zawng hi ka hmuin ka hria a ni. Chutia ka hriata ka hmuh chuan, hêng thil mi entirtu Vantirhkoh chu Pathian anga chibai bûk turin a ke bulah ka bawkkhup a.

⁹Ani chuan ka hnênah, “Hetî hian ti suh khai. Kei chu nang leh i unau zâwlneite leh, he lehkhabya thuchah pawmtute bawihpui mai ka ni alawm. Pathian chibai bûk zawk rawh,” a ti a.

¹⁰Ani chuan ka hnenah, “He lehkhabya hrilhlawkna thute hi thup suh; a hun chu a lo thleng mai dân e.

¹¹Midik lo chu dik lo reng mai rawh se; mi bawhlhlawh pawh bawhlhlawh reng mai rawh se; mi dik chu dik reng sela; mi thianghlim chu thianghlim reng rawh se.”

KOHHRANTE HNENA ISUA THU HRIATTIR

¹²“Ngai teh, ka lo kal thuai dân e; mi tin an thiltih ang zêla pêk atan ka lawmman chu ka kawh reng a ni.

¹³Kei hi Alpha leh Omega, a Hmasa ber leh a Hnunnung ber, a Bul leh a Tawp ka ni.”

¹⁴Nunna Thing zârzo theihna nei tûr leh, khawpui kawngkaa lut thei tura a thupek zawmtute* chu an nihlawh e.

¹⁵Pâwnah chuan ui te, dawithiam te, mihur te, tualthat te, milem bia te, dâwt ngaina leh dawhehte an awm ang.

¹⁶“Kei, Isua hian kohhranho tan heng thute hi in hnêna hriattir turin ka Vantirrhkoh chu ka rawn tir a ni. Davida Bulpui leh a Thlah, Arsi êng tak, Varparh Arsi chu ka ni,” a ti a.

¹⁷Thlarau leh mo chuan, “Lo kal rawh!” an ti a. A hria apiangin “Lo kal rawh!” ti ve rawh se. Tuihâl apiang lo kal rawh se. A duh apiangin nunna tui hi a thlâwnin in rawh se.

INZILHLÂWKNA

¹⁸He lehkhabu hrilhlawkna thu hria apiang ka hriattir e. Mi tupawhin heng thu hi a belhchhah chuan, he lehkhabya hremna ziate hi Pathianin a chungah a belhchhah ve ang;

¹⁹mi tupawhin he hrilhlâwkna lehkhabya mi thu a lâk bo chuan, he lehkhabya ziate Nunna Bu leh Khaw Thianghlina a chan turte chu Pathianin a lak bosak ve ang.

KA LO KAL THUAI DAWN E

²⁰Hêng thu hriattirtu hian, “Matheilovin ka lo kal thuai dawn e,” a ti. Amen. Lo kal ta che, Lalpa Isu!

²¹Kan Lalpa Isua Krista khawngaihna chu in zaa hnenah awm rawh se. Amen.